

BIBLE

Bayibuli Entukuvu

Endagaano Enkadde n' Endagaano Empya

Luganda (Ganda-2014) Language

Luganda [Ganda-2014] - All Bible

Old Testament		New Testament	
Olubereberye	3	Nakkumu	1.631
Okuva	102	Kaabakuuku	1.635
Ebyabaleevi	191	Zeffaniya	1.640
Okubala	261	Kaggayi	1.645
Ekyamateeka Olwokubiri	357	Zekkaliya	1.648
Yoswa	434	Malaki	1.665
Balam	482		
Luusi	529	Matayo	1.670
1 Samwiri	536	Makko	1.740
2 Samwiri	598	Lukka	1.785
1 Bassekabaka	650	Yokaana	1.862
2 Bassekabaka	712	Ebikolwa by'Abatume	1.916
1 Ebyomumirembe	771	Abaruumi	1.988
2 Ebyomumirembe	832	1 Abakkolinso	2.017
Ezera	899	2 Abakkolinso	2.046
Nekkemiya	920	Abaggalatiya	2.064
Eseza	950	Abaefeso	2.074
Yobu	965	Abafiripi	2.084
Zabbuli	1.023	Abakkolosaayi	2.091
Engero	1.166	1 Basessalonika	2.098
Omubuulizi	1.118	2 Basessalonika	2.105
Oluyimba	1.234	1 Timoseewo	2.109
Isaaya	1.243	2 Timoseewo	2.117
Yeremiya	1.342	Tito	2.123
Okukungubaga	1.447	Firemooni	2.127
Ezeekyeri	1.457	Abaebbulaniya	2.129
Danyeri	1.554	Yakobo	2.150
Koseya	1.583	1 Peetero	2.158
Yoweeri	1.598	2 Peetero	2.166
Amosi	1.604	1 Yokaana	2.171
Obadiya	1.616	2 Yokaana	2.179
Yona	1.618	3 Yokaana	2.180
Mikka	1.622	Yuda	2.182
		Okubikkulirwa	2.185

Luganda [Ganda-2014] - All Bible

Olubereberye

Olubereberye 1

Entandikwa

- ¹ Ku lubereberye Katonda yatonda eggulu n'ensi.
- ² Ensi yali njereere nga yeetabuddetabudde, ekizikiza nga kibisse kungulu ku buziba, n'Omwoyo wa Katonda ng'atambulira ku mazzi.
- ³ Awo Katonda n'agamba nti, "Wabeeewo obutangaavu," ne waba obutangaavu.
- ⁴ Katonda n'alaba obutangaavu nga bulungi; n'ayawula obutangaavu n'ekizikiza.
- ⁵ Katonda obutangaavu n'abuyita emisana, n'ekizikiza n'akiyita ekiro. Ne wabaawo akawungeezi ate ne buba enkyia. Olwo lwe lunaku olw'olubereberye.
- ⁶ Era Katonda n'agamba nti, "Wabeeewo ebbanga lyawule olufu n'amazzi."
- ⁷ Bw'atyio Katonda n'akola ebbanga okwawula wansi n'amazzi agali waggulu. Ne kiba bwe kityo.
- ⁸ Katonda ebbanga n'aliyita eggulu. Ne buba akawungeezi, ate ne buba enkyia, olwo lwe lunaku olwokubiri.
- ⁹ Awo Katonda n'ayogera nti, "Amazzi agali wansi w'eggulu gakuṇjaanire mu kifo kimu, wabeeewo olukalu." Ne kiba bwe kityo.
- ¹⁰ Katonda olukalu n'aluyita ensi, amazzi agakuṇjaanye go n'agayita ennyanja. Katonda n'alaba nga ky'akoze kirungi.
- ¹¹ Awo Katonda n'agamba nti, "Ensi ereete ebimera: emitii egizaala ensigo mu ngeri yaagyo, emitii egypt'ebibala ebibaamu ensigo mu ngeri yaagyo, gibeere ku nsi." Ne kiba bwe kityo.
- ¹² Ensi n'ereeta ebimera: ebimera egypt'ensigo ebya buli ngeri, n'emitii egypt'ebibala ebya buli ngeri n'ebijja ku nsi. Katonda n'alaba nga ky'akoze kirungi.
- ¹³ Ne buba akawungeezi ate ne buba enkyia. Olwo lwe lunaku olwokusatu.
- ¹⁴ Awo Katonda n'agamba nti, "Wabeeewo ebyaka mu bbanga ly'eggulu, okwawula emisana n'ekiro; bibeerenga obubonero okwawulanga ebiro, n'ennaku, n'emyaka.
- ¹⁵ Bibeere ebyaka ku ggulu, bireetere ensi obutangaavu." Ne kiba bwe kityo.

¹⁶Katonda n'akola ebyaka ebinene bibiri, ekyaka ekisinga obunene kifugenga emisana, n'ekitono kifugenga ekiro, n'akola n'emmunyeenye.

¹⁷Awo Katonda n'abiteeka mu bbanga ly'eggulu byakenga ku nsi,

¹⁸enjuba efugenga emisana, omwezi gufugenga ekiro, era byawulenga obutangaavu n'ekizikiza. Katonda n'alaba ng'ekyo kirungi.

¹⁹Ne buba akawungeezi, ate ne buba enkya. Olwo lwe lunaku olwokuna.

²⁰Katonda n'ayogera nti, "Amazzi galeete ebibinja by'ebiramu, n'ebinyonyi bibuukenga waggulu mu bbanga."

²¹Bw'atyo Katonda n'akola ebitonde eby'omu nnyanja ebinene ennyo, na buli kiramu ekya buli ngeri eky'omu nnyanja, na buli kinyonyi ekibuuka. Katonda n'alaba nga ky'akoze kirungi.

²²Bw'atyo Katonda n'abiwa omukisa n'agamba nti, "Muzaale mwale, mujjuze amazzi g'enyanja, n'ebinyonyi byale ku nsi."

²³Ne buba akawungeezi, ate ne buba enkya; olwo lwe lunaku olwokutaano.

²⁴Katonda n'ayogera nti, "Ensi ereete ebiramu ebya buli ngeri: ente, n'ebiyewalula, n'ensolo ez'omu nsiko eza buli ngeri." Bwe kityo bwe kyali.

²⁵Katonda n'atonda ensolo ez'oku nsi eza buli ngeri, n'ente eza buli ngeri, na buli ekyewalula ku ttaka ekya buli ngeri. Katonda n'alaba nga ky'akoze kirungi.

²⁶Awo Katonda n'agamba nti, "Tukole omuntu mu kifaananyi kyaffe mu ngeri yaffe. Bafugenga ebyennyanya eby'omu nnyanja, n'ebinyonyi eby'omu bbanga, n'ensolo zonna, n'ensi yonna, era bafugenga na buli ekyewalulira ku nsi kyonna."

²⁷Bw'atyo Katonda n'atonda omuntu mu kifaananyi kye, mu kifaananyi kya Katonda mwe yamutondera; n'abatonda omusajja n'omukazi.

²⁸Katonda n'abawa omukisa, n'abagamba nti, "Mwale mujjuze ensi, mugifugenga. Mufugenga ebyennyanya ebiri mu nnyanja, n'ebinyonyi eby'omu bbanga na buli kiramu ekitambula ku nsi."

²⁹Awo Katonda n'agamba nti, "Laba mbawadde buli kimera eky'ensigo ekiri ku nsi na buli muti ogw'ensigo mu kibala kyagwo. Munaabiryanga.

³⁰Mbawadde na buli nsolo ey'oku nsi, na buli kinyonyi eky'omu bbanga na buli ekyewalula, na buli ekissa omukka mbiwa buli kimera, okuba emmere yaabyo." Bwe kityo bwe kyali.

³¹Awo Katonda n'alaba byonna by'akoze nga birungi nnyo. Ne buba akawungeezi, ate ne buba enkya, olwo lwe lunaku olwomukaaga.

Olubereberye 2

¹Bwe bityo eggulu n'ensi awamu ne byonna ebigrimu ne biggwa okukolwa.

²Ku lunaku olw'omusantu Katonda yali amaze ebyo byonna bye yali akola; n'awummulira ku lunaku olwo ng'ava ku mirimu gye gyonna gye yakola.

³Bw'atyo Katonda olunaku olw'omusantu n'aluwa omukisa n'alutukuza; kubanga ku olwo Katonda kwe yawummulira emirimu gye yakola mu kutonda.

Adamu ne Kaawa

⁴Ebyo bye bifia ku ggulu n'ensi nga bwe byatondebwa, MUKAMA Katonda we yamalira okutonda eggulu n'ensi.

⁵Tewaaliwo muddo gwonna ku nsi wadde ekimera kyonna, kubanga MUKAMA Katonda yali tannatonnyesa nkuba ku nsi era nga tewali muntu ow'okulima ettaka.

⁶Naye ensulo n'eva mu ttaka n'efukirira ensi yonna.

⁷MUKAMA Katonda n'akola omuntu okuva mu nfuufu ey'oku nsi n'amufuuwa mu nnyindo omukka ogw'obulamu. Omuntu n'aba omulamu.

⁸MUKAMA Katonda yali asimbye ennimiro Adeni ku luuyi olw'ebuvanjuba, omuntu gwe yabumba n'amuteeka omwo.

⁹MUKAMA Katonda n'ameza mu ttaka buli muti ogusanyusa amaaso era omulungi okulya. N'ateeka omuti ogw'obulamu, n'omuti ogw'okumanya ekirungi n'ekibi wakati mu nnimiro.

¹⁰Omugga ne gusibuka mu nnimiro Adeni ne gukulukuta okulufukirira, ne gwanjaalira omwo ne guvaamu emigga ena.

¹¹Erinnya ly'ogusooka Pisoni, gwe gwo ogukulukuta okwetooloola ensi ya Kavira, awali zaabu;

¹²ne zaabu y'ensi eyo nnungi; mulimu bideriamu n'amayinja onuku.

¹³Omugga ogwokubiri ye Gikoni, gwe gukulukuta okwetooloola ensi ya Kuusi.

¹⁴N'erinnya ly'ogwokusatu ye Tigiriisi ogukulukutira ku buvanjuba bwa Bwasuli. Ogwokuna ye Fulaati.

¹⁵MUKAMA Katonda n'ateeka omuntu mu nnimiro Adeni agirimenga era agikuumenga.

¹⁶MUKAMA Katonda n'alagira omuntu nti, "Emiti gyonna egy'omu nnimiro olyangako,

¹⁷naye omuti ogw'okumanya ekirungi n'ekibi ogwo togulyangako, kubanga lw'oligulyako tolirema kufa."

¹⁸ MUKAMA Katonda n'ayogera nti, "Si kirungi omuntu okuba yekka, nnaamukolera omubeezi amusaanira."

¹⁹ Naye olwo MUKAMA Katonda yali amaze okukola ensolo zonna ez'omu nsiko n'ebinyonyi eby'omu bbanga. N'abireeta eri omuntu abituume amannya. Buli kiramu omuntu nga bwe yakiyita, lye lyabeera erinnya lyakyo.

²⁰ Bw'atyo omuntu n'atuma buli nsolo ey'awaka, n'ebinyonyi eby'omu bbanga n'ensolo ez'omu nsiko amannya. Adamu yali tannaba kufunirwa mubeezi.

²¹ MUKAMA Katonda n'aleetera omusajja otulo tungi nnyo ne yeebaka; bwe yali nga yeebase n'amuggyamu olubirizi lumu, n'azzaawo ennyama.

²² MUKAMA Katonda n'atonda omukazi okuva mu lubiriizi lwe yaggya mu musajja n'amumuleetera.

²³ Omusajja n'agamba nti, "Lino lye ggumba ery'omu magumba gange, ye nnyama ey'omu nnyama yange, anaayitbwanga mukazi; kubanga aggyibbwaa mu musajja."

²⁴ Noolwekyo omusajja ky'anaavanga aleka kitaawe ne nnyina ne yeegatta ne mukazi we, ne bafuuka omubiri gumu.

²⁵ Omusajja n'omukazi baali tebambadde, naye nga tewali akwatirwa munne nsongyi.

Olubereberye 3

Okujeema kw'Omuntu

¹ Kale nno omusota gwali mukalabakalaba okukira ensolo zonna ez'omu nsiko, MUKAMA Katonda ze yatonda. Ne gugamba omukazi nti, "Kazzi Katonda yagamba nti, 'Temulyanga ku muti gwonna ogw'omu nnimiro!'"

² Omukazi n'addamu omusota nti, "Tulya ku buli muti ogw'omu nnimiro,

³ kyokka Katonda yatulagira nti, 'Temulyanga ku kibala ky'omuti oguli wakati mu nnimiro, wadde okugukwatako, muleme okufa.'

⁴ Naye omusota ne gugamba omukazi nti, "Temugenda kufa.

⁵ Kubanga Katonda amanyi nga lwe muligulyako amaaso gammwe lwe galizibuka, era mulifaanana nga ye, okumanyanga ekirungi n'ekibi."

⁶ Awo omukazi bwe yalaba ng'omuti mulungi nga gusanyusa okutunulako era gwegombewa okuleeta amagezi, n'anoga ekibala kyagwo n'alya; n'awaako ne bba naye n'alya.

⁷ Awo amaaso gaabwe bombi ne gazibuka, ne bategeera nga baali bwereere; ne baluka amalgala g'emiti ne beekolera ebyokwambala.

⁸ Awo ne bawulira eddoboozi lya MUKAMA Katonda ng'atambula mu nnimiro, mu budde obuweweewu. Omusajja n'omukazi ne beekweka mu miti MUKAMA Katonda aleme okubalaba.

⁹ Naye MUKAMA Katonda n'ayita omusajja nti, "Oli ludda wa?"

¹⁰ N'addamu nti, "Mpulidde eddoboozi lyo mu nnimiro, ne ntya, kubanga mbadde bwereere; ne nneekweka."

¹¹ N'amubuuza nti, "Ani akubuulidde nti oli bwereere? Olidde ku muti gwe nakulagira obutagulyangako?"

¹² Omusajja n'addamu nti, "Omukazi gwe wampa okubeeranga nange y'ampadde ekibala ne ndya."

¹³ MUKAMA Katonda kwe kubuuza omukazi nti, "Kiki kino ky'okoze?" Omukazi n'addamu nti, "Omusota gwe gunsenesenze ne ndya."

¹⁴ MUKAMA Katonda n'agamba omusota nti, Kubanga okoze kino okolimiddwa okukira ensolo zonna ez'awaka n'ez'omu nsiko, oneekululiranga ku lubuto lwo era onoolyanga nfuufu ennaku zonna ez'obulamu bwo.

¹⁵ Nteeka obulabe wakati wo n'omukazi, ne wakati w'ezzadde lyo n'ezzadde ly'omukazi; ezzadde lye linaakubetentanga omutwe, naawe onoolibojjanga ekisinziiro.

¹⁶ N'agamba omukazi nti, "Nnaayongeranga nnyo ku bulumi bwo ng'oli lubuto, onoozaaliranga mu bulumi; musajja wo anaakukoleranga bye weetaaga kyokka anaakufuganga."

¹⁷ N'agamba Adamu nti, "Kubanga owulidde eddoboozi lya mukazi wo, n'olya ku muti gwe nakulagira obutagulyangako, "ensi ekolimiddwa ku lulwo; mu ntuyzo zo mw'onoofuniranga ekyokulya ennaku zonna ez'obulamu bwo.

¹⁸ Ensi eneekumerezanga amaggwa n'amatovu, onoolyanga ebibala eby'omu nnimiro.

¹⁹ Mu ntuyzo zo mw'onoggyanga ekyokulya, okutuusa lw'olidda mu ttaka mwe wava, kubanga oli nfuufu ne mu nfuufu mw'olidda."

²⁰ Omusajja n'atuma omukazi erinnya Kaawa, oyo ye nnyina w'abalamu bonna.

²¹ MUKAMA Katonda n'akolera Adamu ne mukazi we ebyambalo eby'amaliba n'abambaza.

²² Awo MUKAMA Katonda n'agamba nti, "Laba omuntu afuuse ng'omu ku ffe okumanyanga ekirungi n'ekibi; kale kaakano talwa kugolola mukono gwe n'anoga ku muti ogw'obulamu n'alya, n'awangaala emirembe gyonna."

²³Bw'atyo MUKAMA Katonda n'agoba omuntu mu nnimiro Adeni agende alimenga ettaka mwe yaggyibwa.

²⁴Bwe yamala okugobamu omuntu, n'ateekamu Bakerubi n'ekitala ekimyansa eky'obwogi ku buli ludda okukuma ekkubo erigenda ku muti ogw'obulamu.

Olubereberye 4

Kayini ne Aberi

¹Adamu n'amanya Kaawa, mukazi we, n'aba olubuto n'azaala Kayini n'agamba nti, "MUKAMA annyambye nzadde omuntu."

²Oluvannyuma n'azaala muganda we Aberi. Aberi n'aba mulunzi, ye Kayini n'abeera mulimi.

³Awo ennaku bwe zaayitawo Kayini n'alyoka aleeta ebibala by'ebimera ebyava mu ttaka okubiwaayo eri MUKAMA.

⁴Aberi naye n'aleeta ku baana b'endiga ze ababereberye n'amasavu gaazo. MUKAMA n'asiima Aberi n'ekiweebwayo kye.

⁵Naye teyasiima Kayini wadde ekiweebwayo kye. Awo Kayini n'asunguwala nnyo, n'endabika y'amaaso ge n'ewaanyisibwa.

⁶MUKAMA n'abuuza Kayini nti, "Osunguwalidde ki? Era n'endabika y'amaaso go lwaki ewaanyisiddwa?

⁷Bw'onookolanga obulungi tokkirizibwenga? Naye bw'otokole bulungi ekibi, kiri kumpi naawe, nga kikulindiridde, naye oteekwa okukiwangula."

Kayini atta Aberi

⁸Kayini n'agamba Aberi muganda we nti, "Tulageko mu nnimiro." Bwe baali nga bali mu nnimiro Kayini n'agolokokera ku muganda we Aberi, n'amutta.

⁹Awo MUKAMA n'abuuza Kayini nti, "Muganda wo Aberi ali ludda wa?" N'amuddamu nti, "Ssimanyi; nze mukumi wa muganda wange?"

¹⁰MUKAMA n'amugamba nti, "Okoze ki? Eddoboozi ly'omusaayi gwa muganda wo oguyiyiddwa ku ttaka linkaabirira.

¹¹Ne kaakano okolimiddwa, era ettaka lyasamye okumira omusaayi gwa muganda wo gwe wasse.

¹²Bw'onoolimanga ettaka terikuwenga bibala byalyo; onoobanga momboze ku nsi."

¹³Kayini n'agamba MUKAMA nti, "Ekibonerezo kyange kinzitooweredde sikisobola.

¹⁴Laba, ongobye okuva ku nsi ne mu maaso go; era nnaabanga momboze ne buli anandaba ananzita.”

¹⁵Awo MUKAMA n'amugamba nti, “Nedda si bwe kiri. Buli alitta Kayini ndimuwalana emirundi musanvu.”

¹⁶Kayini n'alyoka ava mu maaso ga MUKAMA, n'abeera mu nsi ya Enodi ku luuyi olw'ebuvanjuba olwa Adeni.

Abaana ba Kayini

¹⁷Kayini n'amanya mukazi we, n'aba olubuto n'azaala Enoka. Kayini n'azimba ekibuga n'akituuma erinnya lyerimu erya mutabani we Enoka.

¹⁸Enoka n'azaalirwa Iradi ne Iradi n'azaala Mekujeeri, ne Mekujeeri n'azaala Mesuseera, ne Mesuseera n'azaala Lameka.

¹⁹Lameka n'awasa abakazi babiri: omu yali Ada n'omulala nga ye Zira.

²⁰Ada n'azaala Yabali. Ono ye yala kitaawe w'abo ababeera mu weema nga balunda.

²¹Muganda we Yubali, ye yazaala abo abakuba ennanga n'okufuuwa omulere.

²²Zira n'azaala Tubalukayini omuweesi w'eb'yekikomo n'eb'yekyuma. Ne mwannyina wa Tubalukayini nga ye Naama.

²³Lameka n'agamba bakazi be nti, “Ada ne Zira, muwulire eddoboozi lyange; mwe bakazi ba Lameka, muwulirize kye njamba; nzise omusajja olw'okunfumita, nga muvubuka, olw'okunkuba.

²⁴Obanga Kayini yawalanirwa emirundi musanvu, mazima Lameka wa kuwalanirwa emirundi nsanvu mu musanvu.”

Okuzaalibwa kwa Seezi

²⁵Awo Adamu n'amanya mukazi we, n'azaala omwana wabulenzi n'amutuumma Seezi, kubanga yayogera nti, “Katonda ampadde omwana omulala mu kifo kya Aberi, Kayini gwe yatta.”

²⁶Seezi n'azaala omwana owoobulenzi n'amutuumma Enosi. Mu kiseera ekyoabantu ne batandika okukoowoola erinnya lya MUKAMA.

Olubereberye 5

Okuva ku Adamu okutuuka ku Nuuwa

¹Luno lwe lulyo lwa Adamu. Katonda bwe yatonda omuntu, yamukola mu kifaananyi kya Katonda.

²Yabatonda omusajja n'omukazi, n'abawa omukisa n'abatuumma, “abantu.”

³ Adamu bwe yaweza emyaka kikumi mu asatu, n'azaala omwana owoobulenzi amufaanana, mu kifaananyi kye, n'amutuumma Seezi.

⁴ Seezi bwe yamala okuzaalibwa, Adamu n'amala emyaka lunaana, n'azaaliramu abaana aboobulenzi n'aboobuwala.

⁵ Emyaka gyonna Adamu gye yamala gyali lwenda mu asatu, n'afa.

⁶ Seezi bwe yaweza emyaka kikumi mu etaano n'azaala Enosi.

⁷ Seezi bwe yamala okuzaala Enosi n'awangaala emyaka emirala lunaana mu musanvu n'azaaliramu abaana aboobulenzi n'aboobuwala.

⁸ Bwe gityo emyaka gyonna egya Seezi ne giba lwenda mu kkumi n'ebiri n'alyoka afa.

⁹ Enosi bwe yaweza emyaka kyenda n'azaala Kenani.

¹⁰ Enosi bwe yamala okuzaala Kenani n'awangaala emyaka emirala lunaana mu kkumi n'etaano, omwo n'azaaliramu abaana aboobulenzi n'aboobuwala.

¹¹ Bwe gityo emyaka gyonna Enosi gye yamala ne giba lwenda mu etaano; n'alyoka afa.

¹² Kenani bwe yaweza emyaka nsanvu n'azaala Makalaleri.

¹³ Kenani n'awangaala emyaka emirala lunaana mu ana, n'azaaliramu abaana aboobulenzi n'aboobuwala.

¹⁴ Emyaka gyonna Kenani gye yamala ne giba lwenda mu kkumi.

¹⁵ Makalaleri bwe yaweza emyaka nkaaga mu etaano n'azaala Yaredi.

¹⁶ Bwe yamala okuzaala Yaredi n'awangaala emyaka emirala lunaana mu asatu n'azaaliramu abaana abalala aboobulenzi n'aboobuwala.

¹⁷ Ennaku zonna eza Makalaleri ne ziba emyaka lunaana mu kyenda mu etaano, n'afa.

¹⁸ Yaredi bwe yaweza emyaka kikumi mu nkaaga mu ebiri n'azaala Enoka.

¹⁹ Yaredi bwe yamala okuzaala Enoka n'awangaala emyaka emirala lunaana, omwo n'azaaliramu abaana abalala aboobulenzi n'aboobuwala.

²⁰ Bwe gityo emyaka gyonna Yaredi gye yamala ne giba lwenda mu nkaaga mu ebiri, n'afa.

²¹ Enoka bwe yaweza emyaka nkaaga mu etaano n'azaala Mesuseera.

²² Enoka n'atambulira wamu ne Katonda, okumala emyaka ebikumi bisatu nga Mesuseera amaze okuzaalibwa, n'azaala abaana abalala aboobulenzi n'aboobuwala.

²³Bwe gityo emyaka gyonna egya Enoka ne giba ebikumi bisatu mu nkaaga mu etaano.

²⁴Enoka yatambula ne Katonda, n'ataddamu kulabika, kubanga Katonda yamutwala.

Mesuseera ne Nuuwa

²⁵Mesuseera bwe yali nga yaakamala emyaka kikumi mu kinaana mu musanvu n'azaala Lameka.

²⁶Bwe yamala okuzaala Lameka n'awangaala emyaka emirala lusanvu mu kinaana mu ebiri, n'azaala abaana abalala aboobulenzi n'aboobuwala.

²⁷Bwe gityo emyaka gyonna Mesuseera gye yamala ne giba lwenda mu nkaaga mu mwenda; n'afa.

²⁸Lameka bwe yali nga wa myaka kikumi mu kinaana mu ebiri n'azaala omwana owoobulenzi

²⁹n'amutuumma Nuuwa, ng'agamba nti, "Okuva mu ttaka MUKAMA lye yakolimira, ono yalituweezaweeza mu mulimu gwaffe, ne mu kutegana kw'emikono gyaffe."

³⁰Lameka n'awangaala emyaka emirala bitaano mu kyenda mu etaano ng'amaze okuzaala Nuuwa, mu gyo n'azaaliramu abaana abalala aboobulenzi n'aboobuwala.

³¹Bwe gityo emyaka gyonna Lameka gye yawangaala ne giba lusanvu mu nsanvu mu musanvu.

³²Nuuwa bwe yaweza emyaka ebikumi bitaano n'azaala Seemu, ne Kaamu ne Yafeesi.

Olubereberye 6

Amataba

¹Abantu bwe beeyongera obungi ku nsi ne bazaalirwa abaana aboobuwala.

²Abaana ba Katonda ne balaba ng'abawala abo balungi ne bawasa buli gwe beerondera.

³Awo MUKAMA n'agamba nti, "Omwoyo wange taawakanenga na muntu emirembe gyonna, kubanga muntu buntu; n'ennaku ze ziriba emyaka kikumi mu abiri."

⁴Mu nnaku ezo, abaana ba Katonda bwe beegatta n'abawala b'abantu abo, ne babazaalamu abaana; be Banefuli abaali abatutumufu ennyo era abalwanyi abeekitalo mu biseera ebyo era ne mu biro ebyaddirira.

Katonda asalira abantu omusango

⁵ MUKAMA n'alaba ng'ekibi ky'omuntu kiyinze nnyo ku nsi; nga buli ndowooza y'omutima gw'omuntu mbi njereere ebbanga lyonna.

⁶MUKAMA n'anakuwala nnyo kubanga yatonda omuntu ku nsi, n'alumwa nnyo mu mutima gwe.

⁷Awo MUKAMA n'agamba nti, "Ndiggya ku nsi omuntu gwe natonda, ndisaanyaawo omuntu, n'ensolo n'ebinyonyi, kubanga nejusizza olw'okubitonda."

⁸Kyokka ye Nuuwa n'alaba ekisa mu maaso ga MUKAMA.

Ekiragiro ky'okuzimba Eryato

⁹ Bino bye bifia ku Nuuwa n'ab'omu nju ye: Nuuwa yali muntu mutuukirivu, nga taliiko kya kunenyezebwa mu bantu b'ekiseera kye, n'atambula ne Katonda.

¹⁰Nuuwa yalina batabani be basatu: Seemu ne Kaamu ne Yafeesi.

¹¹ Ensi yali nnyonoonefu mu maaso ga Katonda era ng'ejjudde eddalu.

¹²Katonda n'alaba ensi, era laba, ng'eyonoonese mu kweyisa kwayo kubanga buli muntu yenna yali kyetwala nga tewakyali mutuukirivu.

¹³Katonda kwe kugamba Nuuwa nti, "Mmaliridde okuzikiriza buli muntu, kubanga ensi ejjudde eddalu; laba, nzija kubazikiriza mbamalewo ku nsi.

¹⁴Naye ggwe Nuuwa weekolere eryato mu muti gofeeri, okolemu ebisenge, olibikke n'envumbo munda ne kungulu.

¹⁵Bw'oti bw'oba olikola: obuwantu bwalyo mita kikumi mu ana, n'obugazi mita amakumi abiri mu ssatu, n'obugulumivu mita kkumi na ssatu n'ekitundu.

¹⁶Bw'oliba olizimba, waggulu oteekangayo akasolya nga kabika kimu kyakubiri ekya mita. Omulyango gwalyo oguteekanga mu mbiriizi zaalyo. Okolanga eryato lya kalinassatu, ery'emyaliiro: ogwa wansi n'ogwokubiri, n'ogwokusatu.

¹⁷Ndireeta amataba ku nsi, okuzikiriza buli kiramu, ekissa omukka, ekiri wansi w'eggulu; buli ekiri ku nsi kya kufa.

¹⁸Naye ndikola endagaano naawe. Oliyingira mu lyato, ggwe, ne mukazi wo, ne batabani bo, ne baka batabani bo wamu naawe.

¹⁹Oliyingira mu lyato na buli kiramu ekirina omubiri; oliyingiza bibiri bibiri ekisajja n'ekikazi bibeere biramu naawe.

²⁰Ku binyonyi ebya buli ngeri, ne ku nsolo eza buli ngeri, na buli ekyewalula ekya buli ngeri, bibiri bibiri ebya buli ngeri birijja gy'oli, bibeere biramu.

²¹Era twala buli ngeri ya mmere eriibwa, ogitereke; eriba mmere yo n'ebirambyo."

²² Nuuwa n'akola byonna nga Katonda bwe yamulagira.

Olubereberye 7

¹ Awo MUKAMA n'agamba Nuuwa nti, "Yingira mu lyato, ggwe n'abantu bo bona, kubanga nkulabye ng'oli mutuukirivu mu mulembe guno.

² Twala ku buli nsolo ennongoofu musanvu musanvu ensajja n'enkazi,

³ era ne ku binyonyi eby'omu bbanga musanvu musanvu ekisajja n'ekikazi, okukuumma olulyo lwabyo ku nsi.

⁴ Bwe waliyatwo ennaku musanvu nditonnyesa enkuba ku nsi emisana n'ekiro okumalira ddala ennaku amakumi ana, era ndizikiriza buli kintu ekiramu kye natonda ku nsi."

⁵ Bw'atyo Nuuwa n'akola buli kintu nga MUKAMA bwe yakimulagira.

⁶ Nuuwa yali aweza emyaka lukaaga amataba bwe gajja ku nsi.

⁷ Nuuwa n'ayingira mu lyato n'abaana be ne mukazi we n'abakazi b'abaana be bawone amataba.

⁸ Era ensolo ennongoofu, n'ensolo ezitali nnongoofu n'ebibuuka mu bbanga na buli ekyewalula,

⁹ ne biyingira bibiri bibiri ekisajja n'ekikazi eri Nuuwa mu lyato, nga Katonda bwe yamulagira.

¹⁰ Awo olwatuuka oluvannyuma lw'ennaku ziri omusanvu, amataba ne gatandika ku nsi.

¹¹ Mu mwaka ogw'olukaaga ogw'obulamu bwa Nuuwa, mu mwezi ogwokubiri, ku lunaku olw'ekkumi n'omusanvu olw'omwezi, ku lunaku olwo ensulo zonna ez'omu nnyanja ennene, ne ziggulwa lumu n'ebituli byonna eby'eggulu.

¹² Enkuba n'etonnya ku nsi okumala ennaku amakumi ana, emisana n'ekiro.

¹³ Ku lunaku olwo lwennyini Nuuwa ne mukazi ne batabani be, Seemu, ne Kaamu ne Yafeesi, ne bakazi baabwe bonsatule, ne bayingira mu lyato.

¹⁴ Buli nsolo mu ngeri yaayo na buli nte, na buli ekyewalula, era na buli kinyonyi mu ngeri yaakyo na buli nkula ya kinyonyi, nabyo ne biyingira mu lyato.

¹⁵ Ne biyingira mu lyato lya Nuuwa bibiri bibiri byonna ebyalimu omukka ogw'obulamu.

¹⁶ Byonna ne biyingira mu lyato, ekisajja n'ekikazi; byayingira nga Katonda bwe yalagira Nuuwa, MUKAMA n'aggalawo eryato.

¹⁷ Amataba ne gabuna ensi okumala ennaku amakumi ana. Amazzi ne geeyongeranga, n'eryato nalyo ne lyeyongeranga okutumbiira ku nsi.

¹⁸ Amazzi ne gatumbiira ne geeyongera okwala ku nsi, n'eryato ne liseeyeeya kungulu ku mazzi.

¹⁹ Amazzi ne gatumbiira nnyo nnyini ku nsi, n'ensozi zonna empanvu wansi w'eggulu lyonna amazzi ne gazibikka.

²⁰ Amazzi ne gatumbiira ne gabikka ensozi ne zibulira wansi mu mazzi mita nga musanvu.

²¹ Buli kiramu ekyali ku nsi ne kifa: ebinyonyi n'ensolo ez'awaka n'ez'omu nsiko, n'ebitonde byonna ebyali ku nsi n'abantu bona.

²² Buli kintu kyonna ekyali ku lukalu ekissa omukka ne kifa.

²³ Buli kiramu kyonna ekyali ku nsi ne kimalibwawo: abantu, n'ensolo, na buli kitonde ekitambula ku nsi, n'ebinyonyi eby'omu bbanga ne bimalibwawo ku nsi. Nuuwa yekka n'abo be yali nabo mu lyato be baasigalawo.

²⁴ Amataba gaamala ku nsi ennaku kikumi mu ataano.

Olubereberye 8

Okukendeera kw'Amataba

¹ Katonda n'ajjukira Nuuwa n'ensolo zonna ez'awaka n'ez'omu nsiko ezaali naye mu lyato, n'asindika empewo ku nsi, amazzi ne gakendeera;

² ensulo eza wansi w'ensi n'ebituli eby'eggulu ne biggalibwa, n'enkuba eva mu ggulu n'eziyizibwa,

³ n'amazzi ne geeyongera okukendeera ku nsi. Ku nkomerero y'ennaku kikumi mu ataano amazzi gaali gakalidde;

⁴ ne mu mwezi ogw'omusanvu, ku lunaku lwagwo olw'ekkumi n'omusanvu, eryato ne litereera ku nsozi eza Alalaati.

⁵ Bwe gatyo amazzi ne geeyongera okukalira okutuusa mu mwezi ogw'ekkumi, ku lunaku olusooka olw'omwezi ogwo entikko z'ensozi ne zirabika.

⁶ Oluvannyuma lw'ennaku amakumi ana Nuuwa n'aggula eddirisa lye yakola ku lyato

⁷ n'atuma namujjoona n'agenda nga bw'akomawo okutuusa amazzi lwe gaakalira.

⁸ Oluvannyuma n'atuma ejjuba ne liva w'ali okulaba ng'amazzi gakalidde ku nsi;

⁹naye ejjuba ne litalaba we lissa kigere kyalyo, ne likomawo gy'ali mu lyato, kubanga amazzi gaali gakyali ku nsi yonna. N'agolola omukono gwe n'alikwata n'aliyingiza mu lyato.

¹⁰N'alinda ennaku endala musanvu n'atuma ate ejjuba okuva mu lyato;

¹¹ne likomawo akawungeezi, era laba, nga lirina mu kamwa kaalyo akakoola akabisi ke liggye ku muti omuzeyituuni. Awo Nuuwa n'ategeera nti amazzi gakendedde ku nsi.

¹²Ate n'alinda ennaku endala musanvu, n'asindika ejjuba, naye ku mulundi guno teryadda.

¹³Ku lunaku olw'olubereberye, olw'omwezi ogw'olubereberye nga Nuuwa aweza emyaka lukaaga mu gumu, amazzi gaali gakalidde ku nsi. Awo Nuuwa n'aggyako ekibikka ku lyato n'alaba ng'ensi ekalidde.

¹⁴Ku lunaku olw'amakumi abiri mu omusanvu olw'omwezi ogwokubiri ensi yali ekalidde.

¹⁵Awo Katonda n'agamba Nuuwa nti,

¹⁶"Vva mu lyato, ggwe, ne mukazi wo, ne batabani bo ne bakazi baabwe.

¹⁷Fulumya buli kiramu ekiri naawe: ebinyonyi, n'ensolo, na buli kiramu ekitambula ku ttaka, biryoke bizaale byale ku nsi, byeyongerenga obungi."

¹⁸Awo Nuuwa n'afuluma ne batabani be, ne mukazi we wamu ne bakazi ba batabani be.

¹⁹N'ensolo n'ebitonde byonna ebitambula ku ttaka, n'ebinyonyi byonna, byonna ne biva mu lyato bibiri bibiri mu bibinja.

²⁰Awo Nuuwa n'azimbira MUKAMA ekyoto, n'addiru ku zimu ku nsolo ennongoofu ne ku binyonyi ebirongoofu n'awaayo ekiweebwayo ekyokebwa ku kyoto.

²¹MUKAMA n'awulira akawoowo akalungi akamusanyusa, n'ayogera mu mutima gwe nti, "Sikyaddayo kukolimira nsi olw'omuntu, newaakubadde ng'endowooza y'omutima gwe mbi okuva mu buto bwe. Sikyaddayo na kuzikiriza bitonde byonna ebiramu, nga bwe nkoze.

²²"Ensi ng'ekyaliwo, okusiga n'amakungula, obunnyogovu n'ebbugumu, ebiseera eby'omusana n'eb'yobutiti, emisana n'ekiro, tebiggwengawo."

Olubereberye 9

Endagaano ya Katonda ne Nuuwa

¹Awo Katonda n'awa Nuuwa ne batabani be omukisa n'agamba nti, "Muzaale mwale mweyongerenga nnyo mujjuze ensi.

²Ensolo zonna ez'omu nsiko, n'ebinyonyi eby'omu bbanga, na buli ekitambula ku nsi, buli ekiri mu nnyanja, byonna binaakutyanga, mbikuwadde mu mikono gyo.

³Buli kintu ekiramu, ekitambula onookiryanga. Nga bwe nakuwa ebimera, kaakano nkuwa buli kintu.

⁴"Naye toolyenga nnyama ng'ekyalimu omusaayi gwayo.

⁵Era ndivunaana ayiwa omusaayi gwammwe ne nvunaana n'omuntu olw'omusaayi gw'ensolo ne muvunaana n'olw'omusaayi gwa muntu munne.

⁶"Buli anaayiwanga omusaayi gw'omuntu, n'ogugwe gunaayiibwanga, kubanga mu kifaananyi kya Katonda, Katonda mwe yakolera omuntu.

⁷Naye ggwe onoozaalanga ne weeyongera obungi. Oneeyongeranga ku nsi."

Endagaano ne Nuuwa

⁸Awo Katonda n'agamba Nuuwa ne batabani bwe baali

⁹nti, "Laba nkola endagaano yange nammwe ne bonne abaliva mu mmwe oluvannyuma lwammwe,

¹⁰era na buli kitonde ekiramu ekiri naawe: ebinyonyi, n'ensolo ez'awaka n'ez'omu nsiko zonna, ne byonna bye muvudde nabyo mu lyato, ne buli kitonde kyonna ku nsi.

¹¹Nkola endagaano yange eno nammwe: tewaabengawo mataba gazikiriza bulamu bwonna, tewakyaddayo kubaawo mataba gasaanyaawo nsi."

¹²Katonda n'agamba nti, "Kano ke kabonero ke nteeka wakati wange nammwe, na buli kitonde ekiramu ekiri nammwe, era n'ab'emirembe egiriddawo.

¹³Nteeka musoke wange mu kire, nga ke kabonero ak'endagaano wakati wange n'ensi.

¹⁴"Kale olunaatuukanga, bwe nnaaleetaanga ekire ku nsi, musoke anaalabikiranga ku bire,

¹⁵ne nzijkira endagaano yange nammwe na buli kiramu; era amazzi tegakyaddayo kuzikiriza biramu.

¹⁶Musoke bw'anaabanga ku bire, nnaamutunuuliranga ne nzijkira endagaano eteriggwaawo eriwo wakati wa Katonda na buli kitonde ekiramu ekiri ku nsi."

¹⁷Katonda n'agamba Nuuwa nti, "Kano ke kabonero ak'endagaano gye ntaddewo wakati wange ne buli kiramu ekiri ku nsi."

Batabani ba Nuuwa

¹⁸Batabani ba Nuuwa abaava mu lyato ye Seemu, ne Kaamu ne Yafeesi. Kaamu ye yali kitaawe wa Kanani.

¹⁹Bonna abasatu be baali batabani ba Nuuwa; era okuva mu bano ensi yonna yajjula abantu.

Kanani Akolimirwa, Seemu ye Aweebwa Omukisa

²⁰Nuuwa n'atandika okulima n'asimba emizabbibu;

²¹n'anywa omwenge n'atamiira, ne yeebaka mu weema ng'ali bwereere.

²²Kaamu kitaawe wa Kanani n'alaba obwereere bwa kitaawe, n'abuulirako baganda be ababiri abaali ebweru.

²³Awo ne bateeka olugoye ku bibegabega byabwe ne batambula ekyennyumannyuma, ne babikka ku bwereere bwa kitaabwe.

²⁴Omwenge bwe gwamwamukako, Nuuwa n'azuukuka n'ategeera mutabani we omuto ky'amukoze.

²⁵N'akolimira ezzadde lya Kaamu n'agamba nti, "Kanani akolimirwe, abeere muddu wa baddu eri baganda be."

²⁶Era n'agamba nti, "MUKAMA Katonda wange, awe Seemu omukisa, Kanani abeere muddu we."

²⁷Katonda yaza Yafeesi, abeere mu weema za Seemu, Kanani abeere muddu we.

²⁸Oluvannyuma lw'amataba Nuuwa yawangaala emyaka emirala ebikumi bisatu mu ataano.

²⁹Emyaka gyonna Nuuwa, gye yamala ku nsi ne giba lwenda mu amakumi ataano, n'afa.

Olubereberye 10

Bazzukulu ba Nuuwa

¹Bano be bazzukulu ba Nuuwa, Seemu ne Kaamu, ne Yafeesi be baazaala oluvannyuma lw'amataba.

Bazzukulu ba Kuusi

²Batabani ba Yafeesi: Gomeri, ne Magogi, ne Madayi, ne Yivani, ne Tubali ne Meseki ne Tirasi.

³Batabani ba Gomeri be bano: Asukenaazi, ne Lifasi, ne Togaluma.

⁴Batabani ba Yivani baali: Erisa, ne Talusiisi, ne Kittimu ne Dodanimu.

⁵(Mu bano mwe mwava abo abaabuna olubalama lw'enyanja. Bano be batabani ba Yafeesi mu bitundu byabwe, buli bamu mu nnimi zaabwe ng'ennyumba zaabwe n'amawanga gaabwe bwe biri.)

Bazzukulu ba Kaamu

⁶Batabani ba Kaamu be bano: Kuusi, ne Misiri, ne Puuti, ne Kanani.

⁷Batabani ba Kuusi be bano: Seeba, ne Kavira, ne Sabuta, ne Laama ne Sebuteka. Batabani ba Laama baali: Seeba ne Dedani.

⁸Kuusi ye yazaala Nimuloodi; ye yasooka okuba omuntu ow'amaanyi ennyo ku nsi.

⁹Yali muyizzi kkungwa, mu maaso ga MUKAMA, kyeckyava kigambibwa nti, "Afaanana Nimuloodi omuyizzi kkungwa mu maaso ga MUKAMA."

¹⁰Obwakabaka bwe bwatandikira Baberi, ne Eneki ne Akudi ne Kalune, nga byonna bya mu nsi Sinali.

¹¹Bwe yava mu nsi eyo n'agenda mu Bwasuli, n'azimba Nineeve, ne Lekobosiyira, ne Kala ne

¹²Leseni, wakati wa Nineeve ne Kala; Leseni kye kyali ekibuga ekikulu.

¹³Mizulayimu oba Misiri ye kitaawe wa Ludimu, ne Anamimu, ne Lekabimu, ne Nafutukimu,

¹⁴ne Pasulusimu, ne Kasulukimu (omwava Abafirisuuti) ne Kafutorimu.

¹⁵Kanani ye yazaala Sidoni, omwana we omubereberye, ne Keesi,

¹⁶n'Abayebusi, n'Abamoli, n'Abagirugaasi,

¹⁷n'Abakiivi, n'Abaluki, n'Abasiini,

¹⁸n'Abaluvada, n'Abazemali, n'Abakamasi n'ebika eby'omu Kanani ne babuna wonna.

¹⁹Ekitundu kya Kanani kyava ku Sidoni, okwolekera Gerali n'okutuukira ddala e Gaza okwolekera Sodomu, ne Ggomola, ne Adima, ne Zeboyimu okutuukira ddala e Lasa.

²⁰Abo be bazzukulu ba Kaamu, mu nda zaabwe ne nnimi zaabwe, mu bitundu byabwe ne mu mawanga gaabwe.

Bazzukulu ba Seemu

²¹Seemu kitaawe w'abo bona abaava mu Eberi, mukulu wa Yafeesi naye yazaalirwa abaana.

²²Abaana ba Seemu be bano: Eramu, ne Asuli, ne Alupakusaadi, ne Ludi ne Alamu.

²³Batabani ba Alamu: Uzi, ne Kuuli, ne Ggeseri ne Masi.

²⁴Alupakusaadi ye kitaawe wa Seera. Seera ye kitaawe wa Eberi.

²⁵Omú ku batabani ba Eberi yali Peregi, kubanga we yazaalirwa ensi yali yeesazeemu, muganda we ye yali Yokutaani.

²⁶Yokutaani ye yali kitaawe wa Alumodaadi, ne Serefu, ne Kazalumaveesi, ne Yera,

²⁷ne Kadolaamu, ne Uzali, ne Dikula,

²⁸ne Obali, ne Abimayeeri, ne Seeba,

²⁹ne Ofiri, ne Kavira ne Yobabu; bano bona baali batabani ba Yokutaani.

³⁰Ekitundu mwe baali kyava ku Mesa okwolekera Serali, okutuukira ddala ku kitundu eky'ensozi ku luuyi olw'ebuvanjuba.

³¹Abo be bazzukulu ba Seemu, mu nnyumba zaabwe, ne mu nnimi zaabwe, ne mu bitundu byabwe ne mu mawanga gaabwe.

³²Abo ze nnyumba za batabani ba Nuuwa ng'okuzaalibwa kwabwe bwe kwali, n'amawanga gaabwe; era okuva mu bano amawanga gonna mwe gaayalira ne gabuna ensi yonna oluvannyuma lw'amataba.

Olubereberye 11

Omunaala gwa Babiri

¹Ensi yonna yalina olulimi lumu, nga bakozesa ebigambo bye bimu.

²Abantu bwe baava oluuyi olw'ebuvanjuba ne batuuka mu lusenyi nsi ya Sinaali ne babeera omwo.

³Ne bateesa nti, "Mujje tukole amatoffaali, tugookye bulungi." Ne baba n'amatoffaali mu kifo ky'amayinja, ne kolaasi mu kifo ky'ettosi.

⁴Awo ne bagamba nti, "Mujje twezimbire ekibuga, tutuuse omunaala gwakyo ku ggulu; twekolere erinnya, tuleme okusaasaanyizibwa okubuna ensi yonna."

⁵Naye MUKAMA nakka okulaba ekibuga n'omunaala, abaana b'abantu kye baali bazimba.

⁶MUKAMA n'ayogera nti, "Laba, bali omuntu omu, era bogera olulimi lumu! Era eno ntandikwa butandikwa ey'ebyo bye banaakola; era tewali kye banaateesa kukola ekinaabalemerera.

⁷Mujje, tukke wansi tutabuletabule olulimi lwabwe, baleme kutegeeragana."

⁸Bw'atyo MUKAMA n'abasaasaanya ne babuna ensi yonna, n'ekibuga kyabwe ne batakimaliriza.

⁹Ekibuga ekyo erinnya lyakyo kye lyava liyitibwa Babiri, kubanga eyo MUKAMA gye yatabuliratabulira olulimi lw'ensi yonna. Eyo MUKAMA gye yabasaasaanyiza okubuna ensi yonna.

Abaana n'abazzukulu ba Seemu

¹⁰Bino bye bif a ku b'olulyo lwa Seemu: Seemu bwe yali ng'aweza emyaka kikumi, n'azaala Alupakusaadi nga wakayita emyaka ebiri okuva ku mataba.

¹¹Seemu n'amala emyaka ebikumi bitaano nga Alupakusaadi amaze okusaalibwa. N'azaaliramu abaana aboobulenzi n'aboobuwala.

¹²Alupakusaadi bwe yaweza emyaka asatu mu etaano n'azaala Seera,

¹³Alupakusaadi bwe yamala okuzaala Seera n'awangaala emyaka emirala ebikumi bina mu esatu, omwo n'azaaliramu abaana aboobulenzi n'aboobuwala.

¹⁴Seera bwe yaweza emyaka amakumi asatu n'azaala Eberi,

¹⁵ate Seera n'aweza emyaka emirala ebikumi bina mu asatu ng'amaze okuzaala Eberi, era omwo n'azaaliramu abaana abalala aboobulenzi n'aboobuwala.

¹⁶Eberi bwe yaweza emyaka amakumi asatu mu ena n'azaala Pereggi.

¹⁷Eberi bwe yamala okuzaala Pereggi n'awangaala emyaka ebikumi bina mu amakumi asatu, omwo n'azaaliramu abaana abalala aboobulenzi n'aboobuwala.

¹⁸Pereggi bwe yaweza emyaka amakumi asatu n'azaala Leewo,

¹⁹bwe yamala okuzaala Leewo n'awangaala emyaka emirala ebikumi bibiri mu mwenda, n'azaaliramu abaana aboobulenzi n'aboobuwala.

²⁰Leewo bwe yaweza emyaka amakumi asatu mu ebiri n'azaala Serugi.

²¹N'awangaala emyaka emirala ebikumi bibiri mu musanvu. Omwo n'azaaliramu abaana aboobulenzi n'aboobuwala.

²²Serugi bwe yaweza emyaka amakumi asatu n'azaala Nakoli,

²³bwe yamala okuzaala Nakoli n'awangaala emyaka emirala ebikumi bibiri. Omwo n'azaaliramu abaana aboobulenzi n'aboobuwala.

²⁴Nakoli bwe yaweza emyaka amakumi abiri mu mwenda n'azaala Teera.

²⁵Bwe yamala okuzaala Teera n'awangaala emyaka emirala kikumi mu kkumi na mwenda, era omwo n'azaaliramu abaana aboobulenzi n'aboobuwala.

²⁶Teera bwe yaweza emyaka nsanvu, n'azaala Ibulaamu, ne Nakoli ne Kalani.

Obuzaale bwa Ibulaamu

²⁷Bino bye bif a ku b'olulyo lwa Teera: Teera ye kitaawe wa Ibulaamu, ne Nakoli ne Kalani; Kalani ye yali kitaawe wa Lutti.

²⁸Kalani yafa nga kitaawe Teera tannafa. Yafiira mu Uli ey'Abakaludaaya mwe yazaalirwa.

²⁹Ibulaamu ne Nakoli ne bawasa; erinnya lya mukazi wa Ibulaamu lyali Salaayi, ate mukazi wa Nakoli nga ye Mirika, muwala wa Kalani, kitaawe wa Mirika ne Isika.

³⁰Salaayi yali mugumba, teyalina mwana.

³¹Teera n'atwala Ibulaamu mutabani we Lutti muzzukulu we mutabani wa Kalani, ne Salaayi muka mutabani we Ibulaamu, ne bagenda bona okuva mu Uli eky'Abakaludaaya okugenda mu nsi ya Kalani; bwe baatuuka mu Kalani, ne babeera omwo.

³²Emyaka gyा Teera gyali ebikumi bibiri mu etaano; Teera n'afiira mu Kalani.

Olubereberye 12

Okuyitibwa kwa Ibulaamu

¹Awo MUKAMA n'agamba Ibulaamu nti, "Vva mu nsi yannyo ne mu bantu bo ne mu nnyumba ya kitaawo ogende mu nsi gye ndikulaga.

²"Nange ndikufuula eggwanga eddene, era ndikuwa omukisa, n'erinnya lyo ne ndifuula kkulu, olyoke obeere mukisa.

³Ndiwa omukisa abo abakusabira omukisa, era buli alikukolimira nange namukolimiranga; era mu ggwe amawanga gonna ag'omu nsi mwe galiweerwa omukisa."

⁴Bw'atyo Ibulaamu n'agenda nga MUKAMA bwe yamugamba, ne Lutti n'agenda wamu naye. Ibulaamu we yaviira mu Kalani yali aweza emyaka nsanvu mu etaano.

⁵Ibulaamu n'atwala Salaayi mukazi we, ne Lutti mutabani wa muganda we ne byonna bye baalina bye baali bafunye, n'abantu baabwe be baafunira mu Kalani, ne basitula okugenda mu Kanani. Ne batuuka mu nsi ya Kanani.

⁶Ibulaamu n'ayita mu nsi n'atuuka mu kifo ekiyitibwa Sekemu awali emivule gyा Mole. Mu biro ebyo Abakanani be baali mu nsi omwo.

⁷Awo MUKAMA n'alabikira Ibulaamu n'agamba nti, "Ensi eno ndigiwa abo abaliva mu ggwe." Awo Ibulaamu n'azimbira eyo MUKAMA ekyoto eyamulabikira.

⁸Bw'atyo n'alaga ku lusozi ku luuyi olw'ebuvanjuba obwa Beseri, n'asimba eweema ye nga Beseri ali ku luuyi olw'ebugwanjuba, ne Ayi ngali ku luuyi olw'ebuvanjuba, n'azimbira eyo MUKAMA ekyoto, n'akoowoola erinnya lya MUKAMA.

⁹Ibulaamu ne yeeyongera okutambula ng'ayolekera Negevu.

Ibulaamu Agenda e Misiri

¹⁰Ne wagwa enjala mu nsi. Bw'atyo Ibulaamu n'aserengeta e Misiri asengukireko eyo, kubanga enjala nnyingi eyali mu nsi.

¹¹Bwe yali anaatera okuyingira mu Misiri, n'agamba Salaayi mukazi we nti, "Mmanyi ng'oli mukazi mulungi era mubalagavu,

¹²era Abamisiri bwe balikulabako baligamba nti, 'Ono ye mukazi we,' kale balinzita, naye ggwe ne bakuleka.

¹³Ogambanga nti, Oli mwannyinaze ndyoke mbeere bulungi ku lulwo, n'obulamu bwange buleme kubaako kabi, buwone ku lulwo."

¹⁴Ibulaamu bwe yayingira mu Misiri, Abamisiri ne balaba Salaayi nga mukazi mulungi nnyo.

¹⁵N'abakungu ba Falaawo bwe baamulaba ne bamutendera Falaawo ne bamutwala mu lubiri lwa Falaawo.

¹⁶Ku lwa Salaayi, Falaawo n'ayisa bulungi Ibulaamu. Ibulaamu n'aweebwa endiga, n'ente, n'endogoyi, n'abaweeereza abasajja, n'abaweeereza abakazi, n'endogoyi enkazi, n'enjamira.

¹⁷Naye MUKAMA n'aleetera Falaawo n'enyyumba ye endwadde enkambwe olwa Salaayi mukazi wa Ibulaamu.

¹⁸Awo Falaawo n'ayita Ibulaamu n'amugamba nti, "Kiki kino ky'onkoze? Lwaki tewantegeeza nti mukazi wo?

¹⁹Lwaki wagamba nti mwannyoko, ne mmuwala okuba mukazi wange? Kale kaakano mukazi wo wuuno mmuwale mugende."

²⁰Falaawo n'alagira basajja be ebikwata ku Ibulaamu, ne bamusindiikiriza n'ava mu nsi ne mukazi we ne byonna bye yalina.

Olubereberye 13

¹Bw'atyo Ibulaamu n'ayambuka okuva mu Misiri ye ne mukazi we, ne byonna bye yalina, ne Lutti ne bayingira mu Negevu.

Ibulaamu ne Lutti Baawukana

²Mu kiseera ekkyo Ibulaamu yalina ente nnyingi, ne ffeeza ne zaabu nnyingi nnyo.

³N'atambula okuva e Negevu n'atuuka e Beseri, mu kifo eweema ye we yali olubereberye, wakati wa Beseri ne Ayi,

⁴mu kifo we yasooka okuzimbira MUKAMA ekkyoto, Ibulaamu n'akoowoolera eyo erinnya lya MUKAMA.

⁵Ne Lutti eyagenda ne Ibulaamu naye yalina ebisibo by'endiga n'amagana g'ente n'ab'enju ye nga bangi,

⁶ekitundu mwe baali nga tekibamala bombi. Obugagga bwabwe bwali bungi nnyo,

⁷ate nga n'abasumba baabwe bayombagana. Mu kiseera ekyo Abakanani n'Abaperezi nabo baabanga mu nsi omwo.

⁸Awo Ibulaamu n'agamba Lutti nti, "Tewasaana kubaawo kuyombagana wakati wange naawe, wadde wakati w'abalunzi bo n'abange, kubanga tuli baaluganda.

⁹Ensi yonna teri mu maaso go? Leka twawukane. Bwonoolonda oluuyi olwa kkono, nze n'alaga ku luuyi olwa ddyo, bw'onoolaga ku luuyi olwa ddyo nze n'alaga ku luuyi olwa kkono."

¹⁰Lutti n'ayimusa amaaso ge, n'alaba ekiwonvu kya Yoludaani nga kirungi, nga kirimu amazzi buli wantu nga kifaanana ng'ennimiro ya MUKAMA; nga kiri ng'ensi ya Misiri ku luuyi olwa Zowaali. Kino kyaliwo nga MUKAMA tannazikkiriza Sodomu ne Ggomola.

¹¹Bw'atyo Lutti ne yeeronderawo olusenyi lwa Yoludaani n'agenda ku luuyi olw'ebuvanjuba; bwe batyo ne baawukana.

¹²Ibulaamu n'abeera mu nsi ya Kanani, ye Lutti n'abeera mu bibuga eby'omu lusenyi n'atwala eweema ye n'agisimba okumpi ne Sodomu.

¹³Abasajja aba Sodomu baali babi era nga boonoonyi nnyo eri MUKAMA.

¹⁴ MUKAMA n'agamba Ibulaamu ng'amaze okwawukana ne Lutti nti, "Yimusa amaaso go ng'osinziira mu kifo mw'oli, otunule ku bukiakkono, ne ku bukiakkadyo, n'ebuvanjuba n'ebugwanjuba;

¹⁵kubanga ensi gy'olaba ndigikuwa ggwe n'ezzadde lyo emirembe gyonna.

¹⁶Ndyaza ezzadde lyo ng'enfuufu ey'oku nsi; omuntu bw'alisobola okubala enfuufu ey'oku nsi, n'ezzadde lyo aliribala.

¹⁷Situka, tambula obuwantu n'obukiika obw'ensi kubanga ngikuwadde."

¹⁸Awo Ibulaamu n'asimbula eweema ye n'agenda n'abeera okumpi n'emivule gya Mamule, ekiri e Kebbulooni, n'azimbira eyo MUKAMA ekyoto.

Olubereberye 14

Olutalo ne Bakabaka

¹ Mu biro bya Amulafeeri kabaka wa Sinaali, ne Aliyooki kabaka wa Erasali, ne Kedolawomeeri kabaka wa Eramu ne Tidali kabaka wa Goyiyimu,

²bakabaka bano ne balumba ne balwana ne Bbeera kabaka wa Sodomu, ne Bbiruusa kabaka wa Ggomola, ne Sinaabu kabaka wa Aduma, ne Semebeeri kabaka wa Zeboiyimu ne kabaka wa Bera, ye Zowaali.

³Bano bona abooluvannyuma ne beegatta wamu mu kiwonvu kya Sidimu (y'Ennyanja ey'Omunnyo).

⁴Baamala emyaka kkumi n'ebiri nga baweereza Kedolawomeeri kabaka we Eramu, naye mu mwaka ogw'ekkumi n'esatu ne bamujeemera.

⁵Mu mwaka ogw'ekkumi n'ena Kedolawomeeri ne bakabaka abaali naye ne balumba Abaleefa mu Asuterosikalumayimu ne babawangula, n'Abazuuzi mu Kaamu, n'Abemi mu Savekiriyasayimu,

⁶n'Abakooli mu nsi ey'ensozi eya Seyiri n'okutuukira ddala Erupalaani okumpi n'eddungu.

⁷Ate ne bakyuka ne bajja e Nuumisupaati, ye Kadesi ne bawangula ensi yonna ey'Abamaleki n'Abamoli abaabeeranga mu Kazazonutamali.

⁸Awo kabaka wa Sodomu ne kabaka wa Ggomola, ne kabaka wa Aduma, ne kabaka wa Zeboiyiyimu ne kabaka wa Bera, ye Zowaali ne beegatta mu lutalo mu kiwonvu ky'e Sidimu

⁹okulwanyisa Kedolawomeeri kabaka wa Eramu, ne Tidali kabaka wa Goyiyimu ne Amulafeeri kabaka wa Sinaali awamu ne Aliyooki kabaka wa Erasali, bakabaka bana nga balwanyisa bakabaka bataano.

¹⁰Ekiwonvu ky'e Sidimu kyali kijjudde ebinnya ebirimu kolaasi; bakabaka b'e Sodomu ne Ggomola bwe baddukanga ng'abamu babigwamu, n'abalala ne baddukira ku nsozi.

¹¹Awo bakabaka abana ne batwala ebintu byonna ebyali mu Sodomu ne Ggomola, n'emmere yaabwe yonna gye baalina ne bagenda.

¹²Era ne batwala ne Lutti, mutabani wa muganda wa Ibulaamu eyali mu Sodomu, n'ebintu bye ne bagenda nabyo kubanga naye yali abeera mu Sodomu.

Ibulaamu Awonya Lutti

¹³Awo Omwamoli omu eyali abadduseeko n'ajja n'ategeeza Ibulaamu Omwebbulaniya, eyali abeera okumpi n'emivule gya Mamule, muganda wa Esukoli ne Aneri abaalina endagaano ne Ibulaamu.

¹⁴Ibulaamu bwe yawulira nti muganda we atwalibbwaa nga munyage, n'akulembera basajja be abatendeke, abazaalirwa mu nnyumba ye, ebikumi bisatu mu kkumi na munaana, ne bawondera abaatwala Lutti okutuuka e Ddaani.

¹⁵Mu kiro n'ayawulamu eggye lye, n'abalumba, ye n'abaddu be ne bagobereraabantu bali okutuuka e Kkoba, ku luuyi olw'obukiikkono obwa Damasiko.

¹⁶Awo n'akomyawo ebintu byonna, era n'akomyawo ne muganda we Lutti n'ebintu bye n'abakazi n'abantu bona.

Merukizeddeeki Asabira Ibulaamu Omukisa

¹⁷ Ibulaamu bwe yakomawo ng'amaze okuwangula Kedolawomeeri ne bakabaka abaali naye, kabaka wa Sodomu n'afuluma okumusisinkana mu kiwonvu ky'e Save (kye kiwonvu kya kabaka).

¹⁸ Ne Merukizeddeeki kabaka wa Ssaalemi eyali kabona wa Katonda Ali Waggulu Ennyo n'aleeta omugaati n'envinnyo.

¹⁹ N'asabira Ibulaamu omukisa ng'agamba nti, "Katonda Ali Waggulu Ennyo Omutonzi w'eggulu n'ensi awe Ibulaamu omukisa.

²⁰ Era Katonda Ali Waggulu Ennyo agulumizibwe agabudde abalabe bo mu mikono gyo." Awo Ibulaamu n'amuwa ekitundu eky'ekkumi ekya buli kimu.

²¹ Ne kabaka wa Sodomu n'agamba Ibulaamu nti, "Mpa abantu, gwe otwale ebintu."

²² Naye Ibulaamu n'addamu kabaka wa Sodomu nti, "Ndayira MUKAMA Katonda Ali Waggulu Ennyo, Omutonzi w'eggulu n'ensi,

²³ sijja kutwala wadde akawuzi oba akakoba akasiba engatto, oba ekintu kyonna ekikyo, oleme okugamba nti, 'Ngaggawazza Ibulaamu.'

²⁴ Sijja kubaako kye ntwala; okuggyako ebyo abavubuka bye balidde, n'omugabo gw'abasajja abaagenda nange; leka Aneri ne Esukoli ne Mamule bo batwale omugabo gwabwe."

Olubereberye 15

Endagaano ya MUKAMA ne Ibulaamu

¹ Ebyo nga biwedde, ekigambo kya MUKAMA ne kijjira Ibulaamu mu kwolesebwa nti, "Totya Ibulaamu, Nze ngabo yo era empeera yo ennene ennyo."

² Naye Ibulaamu n'addamu nti, "Kiki ky'olimpa Ayi MUKAMA Katonda, kubanga sirina mwana, n'omusika w'ennyumba yange ye Eryeza ow'omu Ddamasiko?"

³ Ibulaamu ne yeeyongera n'agamba nti, "Laba tompadde mwana; omuddu eyazaalibwa mu nnyumba yange ye musika wange."

⁴ Laba ekigambo kya MUKAMA ne kimujjira nti, "Omusajja oyo tagenda kuba musika wo; mutabani wo, y'aliba omusika wo."

⁵ N'amufulunya ebweru n'amugamba nti, "Tunuulira eggulu, obale emunyeenye, obanga osobola okuzibala." Awo n'amugamba nti, "N'ezzadde lyo bwe liriba bwe lityo."

⁶ Ibulaamu n'akkiriza MUKAMA, n'akimubalira okuba obutuukirivu.

⁷ N'amugamba nti, "Nze MUKAMA eyakuggya mu Uli ensi ey'Abakaludaaya, nkuwe ensi eno ebeere yiyo."

⁸Ibulaamu n'addamu nti, "Ayi MUKAMA nnaamanya ntya nti eriba yange?"

⁹MUKAMA n'amuddamu nti, "Ndeetera ennyana eyaakamala emyaka esatu, embuzi ey'emyaka esatu, endiga ensajja ey'emyaka esatu, kaamukuukulu n'ejjiba."

¹⁰Ibulaamu n'abireeta byonna n'abisalamu wakati n'ateeka buli kitundu kungulu ku kinnaakyo, naye ebinyonyi byo teyabisalamu bitundu nga biri.

¹¹Ensegia bwe zajja okubirya, Ibulaamu n'azigoba.

¹²Enjuba yali egwa, Ibulaamu ne yeebaka otulo tungi; era laba, ekizikiza ekingi eky'amaanyi ne kimubuutikira.

¹³Awo MUKAMA n'agamba Ibulaamu nti, "Manyira ddala nti ezzadde lye baliba batambuze mu nsi eteri yaabwe, era baliba baddu eyo, balibonyaabonyezebwa eyo okumala emyaka ebikumi bina.

¹⁴Naye ndibonereza eggwanga lye balikolera n'olvannyuma balivaayo n'obugagga bungi.

¹⁵Naye ggwe oligenda mirembe eri bajjajaabo; oliziikibwa ng'owangaalidde ddala nnyo.

¹⁶Era balikomawo wano mu mulembe ogwokuna; kubanga obutali butuukirivu bw'Omwamoli tebunnayitirira."

¹⁷Enjuba bwe yagwa ng'ekizikiza kikutte, laba, ensuwa eyaka omuliro era enyooka omukka n'ekimulisa ne biyita wakati w'ebitundu bino.

¹⁸Ku lunaku olwo MUKAMA n'akola endagaano ne Ibulaamu ng'agamba nti, "Ezadde lye ndiwa ensi eno, okuva ku mugga ogw'e Misiri okutuuka ku mugga omunene, omugga Fulaati:

¹⁹Omukeeni, n'Omukeniizi, n'Omukadumoni,

²⁰n'Omukiiti, n'Omuperizi, n'Abaleefa,

²¹n'Omwamoli, n'Omukanani, n'Omugirugaasi n'Omuyebusi, mbagabula mu mukono gwo."

Olubereberye 16

Ibulaamu ne Agali

¹Salaayi mukyala wa Ibulaamu yali teyamuzaalira mwana;

²Salaayi n'agamba Ibulaamu nti, "Laba MUKAMA tampadde mwana; weebake n'omuweereza wange, oboolyawo nnyinza okufuna abaana mu ye." Awo Ibulaamu n'awulira eddoboozi lya Salaayi.

³Bw'atyo Ibulaamu bwe yali yaakamala emyaka kkumi mu nsi ya Kanani, Salaayi mukazi we n'addirira Agali Omumisiri, omuweereza we n'amuwa Ibulaamu abeere mukazi we.

⁴Ibulaamu ne yeegatta ne Agali, Agali n'aba olubuto. Agali bwe yalaba ng'ali lubuto, n'anyooma Salaayi, mugole we.

⁵Salaayi n'agamba Ibulaamu nti, "Ekibi ekinkoleddwako kibeere ku ggwe. Nakuwa omuweereza wange mu kifuba kyo naye bw'alabye ng'ali lubuto n'annyooma. MUKAMA atulamule nze naawe!"

⁶Naye Ibulaamu n'agamba Salaayi nti, "Laba, omuweereza wo ali mu buyinza bwo; mukole nga bw'oyagala." Awo Salaayi natandika okubonyaabonya Agali; Agali n'adduka okuva w'ali.

Agali ne Isimayiri

⁷Malayika wa MUKAMA n'amusanga ku nsulo y'amazzi mu ddungu, ensulo y'amazzi eri ku kkubo eriraga e Ssuuli.

⁸N'agamba nti, "Agali, omuweereza wa Salaayi, ovudde wa era ogenda wa?" N'amuddamu nti, "Nziruka mugole wange Salaayi."

⁹Malayika wa MUKAMA n'amugamba nti, "Ddayo eri mugole wo omugondere."

¹⁰Era Malayika wa MUKAMA n'amugamba nti, "Ezadde lyo ndiryaza waleme kuberawo asobola kulibala."

¹¹Ate malayika wa MUKAMA n'amugamba nti, "Laba, olina omwana mu nda yo, aliba wabulenzi, olimutuumma Isimayiri, kubanga MUKAMA ategedde okubonaabona kwo.

¹²Aliba ng'entulege, anaalwananga na buli muntu era na buli muntu anaalwananga naye, era anaabanga mu bulabe ne baganda be."

¹³Awo n'akoowoola erinnya lya MUKAMA eyayogera naye, n'agamba nti, "Oli Katonda alaba", kubanga yagamba nti, "Ndabidde ddala Katonda ne nsigala nga ndi mulamu nga maze okumulaba."

¹⁴Oluzzi kye lwava luyitibwa Beerirakayiro, luli wakati wa Kadesi ne Beredi.

¹⁵Awo Agali n'azaalira Ibulaamu omwana owoobulenzi, Ibulaamu n'atuumma mutabani wa Agali gwe yamuzaalira, erinnya Isimayiri.

¹⁶Ibulaamu yali wa myaka kinaana mu mukaaga Agali bwe yamuzaalira Isimayiri.

Olubereberye 17

Endagaano y'Okukomola

¹ Ibulaamu bwe yaweza emyaka kyenda mu mwenda, MUKAMA n'amulabikira, n'amugamba nti, "Ndi Katonda Ayinzabyonna, tambulira mu maaso gange obe nga toliiko kya kunenyezebwwa.

²Ndikola endagaano yange naawe era ndikwaliza ddala nnyo."

³Awo Ibulaamu n'avuunama; Katonda n'amugamba nti,

⁴"Laba, ndikola naawe endagaano, era onoobeeranga kitaawe w'amawanga mangi.

⁵Erinnya lyo tokyayitibwa Ibulaamu, wabula onooyitibwanga Ibulayimu, kubanga nkufudde kitaawe w'amawanga mangi.

⁶Ndikwaza nnyo nnyini; era ndikufuula amawanga, ne bakabaka baliva mu ggwe.

⁷Era ndituukiriza endagaano yange naawe, n'ezzadde lyo mbeere Katonda wo era Katonda w'ezzadde lyo eririddawo. Endagaano eno teriggwaawo emirembe n'emirembe.

⁸Era ndikuwa ggwe n'ezzadde lyo eririddawo ensi mw'obadde omusenze, ensi yonna eya Kanani, okuba eyiyo emirembe gyonna; era ndiba Katonda waabwe."

⁹Awo Katonda n'agamba Ibulayimu nti, "Ggwe ky'olina okukola kwe kukwata endagaano yange, ggwe n'ezzadde lyo eririddawo emirembe gyabwe gyonna.

¹⁰Eno y'endagaano yange naawe n'ezzadde lyo eririddawo, gy'onookuumanga: Buli musajja mu mmwe anaakomolebwanga.

¹¹Munaakomolebwanga ekikuta eky'omubiri gwammwe, ekyo kibeere akabonero ak'endagaano yange naawe.

¹²Buli mwana owoobulenzi anaawezanga ennaku omunaana ez'obukulu mu mmwe mu mirembe gyammwe gyonna anaakomolebwanga,

¹³oyo azaaliddwa mu nnyumba yo oba gw'oguze n'ensimbi zo okuva ku munnaggwanga anaakomolebwanga. Endagaano yange eteriggwaawo eneebanga mu mubiri gwo.

¹⁴Omwana owoobulenzi yenna atali mukomole, atakomolebbwa kikuta kya mubiri gwe, taabalibwenga mu bantu be, aba amenye endagaano yange."

Ekisuubizo eri Salaayi

¹⁵Katonda n'agamba Ibulayimu nti, "Era Salaayi mukazi wo, tokyamuyita Salaayi, erinnya lye linaabanga Saala.

¹⁶Ndimuwa omukisa, era ndikuwa omwana owoobulenzi mu ye. Ndimuwa omukisa, alibeera jjaja w'amawanga, bakabaka baamawanga baliva mu ye."

¹⁷ Awo Ibulayimu n'avuunama n'aseka, n'agamba munda ye nti, "Omwana alizaalirwa oyo eyaakamala emyaka ekikumi? Saala ow'emyaka ekyenda alizaala omwana?"

¹⁸ Ibulayimu n'agamba Katonda nti, "Isimayiri abeerenga mulamu mu maaso go!"

¹⁹ Katonda n'amugamba nti, "Nedda, naye Saala mukazi wo alikuzaalira omwana owoobulenzi, olimutuumma erinnya Isaaka. Ndinyweza endagaano yange naye okuba endagaano etaliggwaawo ku zadde lye eririddawo.

²⁰ Ku Isimayiri nkuwulidde: Laba, ndimuwa omukisa, alyeyongera, ndimwaliza ddala nnyo, aliba jjajja w'abalingira kkumi na babiri, era ndimufuula eggwanga ery'amaanyi.

²¹ Kyokka ndinyweza endagaano yange ne Isaaka, Saala gw'alikuzaalira mu kiseera nga kino omwaka ogujja."

²² Katonda bwe yamala okwogera naye, Ibulayimu n'ava we yali.

²³ Awo Ibulayimu n'atwala Isimayiri mutabani we n'abaddu bona abaazaalirwa mu nnyumba ye n'abo abaagulibwa n'ensimbi ze, buli musajja yenna mu nnyumba ya Ibulayimu n'akomolwa buli omu ekikuta ky'omubiri gwe ku lunaku olwo lwennyini, nga Katonda bwe yamugamba.

²⁴ Ibulayimu yali aweza emyaka kyenda mu mwenda bwe yakomolebwa ekikuta ky'omubiri gwe.

²⁵ Ne Isimayiri mutabani we yali wa myaka kkumi n'esatu bwe yakomolebwa ekikuta ky'omubiri gwe.

²⁶ Ku lunaku olwo lwennyini Ibulayimu ne mutabani we Isimayiri lwe baakomolebwa.

²⁷ N'abasajja bona mu nnyumba y'abo abazaalirwamu n'abo abaagulibwa n'ensimbi ze okuva eri munaggwanga, baakomolebwa wamu naye.

Olubereberye 18

Ibulayimu n'Abagenyi Abasatu

¹ Awo MUKAMA n'alabikira Ibulayimu mu mivule gya Mamule, mu ttuntu ng'atudde mu mulyango gwa weema ye.

² Bwe yasitula amaaso ge n'alaba, era laba, abasajja basatu nga bayimiridde mu maaso ge. Bwe yabalaba, n'adduka okuva mu mulyango gwa weema ye, okubasisinkana n'agwa wansi,

³ n'agamba nti, "Mukama wange obanga ndabye ekisa mu maaso go, toyita ku muddu wo.

⁴ Leka tuleete otuzzi munaabe ku bigere, muwummuleko wano wansi w'omuti,

⁵nga bwe ndeeta omugaati mulyeko muddemu amaanyi, mulyoke mugende, anti muzze eri muddu wammwe.” Ne bamugamba nti, “Kola nga bw’ogambye.”

⁶Ibulayimu n’ayanguwa okugenda eri Saala, n’amugamba nti, “Teekateeka mangi kilo kkumi na mukaaga ez’obutta okande ofumbire mangi abagenyi emmere.”

⁷Ibulayimu n’agenda bunnambiro mu kisibo n’aggyamu ennyana, ento era ennungi n’agiwa omu ku bavubuka eyayanguwa okugifumba.

⁸Awo n’addira omuzigo n’amata n’ennyana eyafumbibwa n’abiteeka mu maaso gaabwe; n’ayimirira we baali, wansi w’omuti nga balya.

⁹Ne bamubuuza nti, “Saala mukyala wo ali ludda wa?” N’addamu nti, “Ali mu weema.”

¹⁰ MUKAMA n’amugamba nti, “Ddala ndikomawo gy’oli mu kiseera nga kino, era Saala mukazi wo alizaala omwana owoobulenzi.” Ne Saala yali awuliriza ng’ali mu mulyango gwa weema emabega we.

¹¹Mu kiseera kino Ibulayimu ne Saala baali bakaddiye nnyo nga Saala takyali na mu nsonga z’abakazi.

¹²Awo Saala n’asekera muli ng’agamba nti, “Nga nkaddiye, nga ne baze akaddiye, ndisanyusibwa?”

¹³MUKAMA n’abuuza Ibulayimu nti, “Lwaki Saala asese ng’agamba nti, ‘Ndiyinza okuzaala omwana nga nkaddiye?’

¹⁴Waliwo ekirema MUKAMA? Omwaka ogujja, mu kiseera kyennyini, ndikomawo gy’oli, ne Saala alizaala omwana owoobulenzi.”

¹⁵Naye Saala ne yeegaana ng’agamba nti, “Si sese,” kubanga yali atidde. N’amuddamu nti, “Nedda osese.”

Ibulayimu Yeegayiririra Sodomu

¹⁶Awo abasaja bwe bavaayo ne bagenda, ne boolekera oluuyi lwa Sodomu; Ibulayimu n’abawerekerako.

¹⁷MUKAMA n’agamba mu mutima gwe nti, “Ibulayimu namukweka kye ɲjenda okukola?

¹⁸Ibulayimu agenda kufuuka eggwanga eddene, ery’amaanyi, era mu ye, amawanga gonna mwe galdeerwa omukisa.

¹⁹Mmulonze alagire abaana be n’abantu be abaliddawo okukwatanga ekkubo lya MUKAMA nga bakola eby’obutuukirivu era nga ba mazima, MUKAMA alyoke atuukirize ekyo kye yasuubiza Ibulayimu.”

²⁰Awo MUKAMA n'agamba nti, "Olw'okunkaabirira okusukkiridde olw'ebibi bya Sodomu ne Ggomola ebingi ennyo,

²¹nzija kukka ndabe obanga ddala bakozi ba bibi ng'okunkaabirira olw'ebibi byabwe okutuuse gye ndi bwe kuli, era obanga si bwe kiri nnaamanya."

²²Awo abasajja ne bakyuka okuva awo, ne batambula okwolekera Sodomu; naye Ibulayimu n'asigala ng'akyayimiridde mu maaso ga MUKAMA.

²³Awo Ibulayimu n'amusemberera n'agamba nti, "Ddala olizikiriza abatuukirivu awamu n'ababi?

²⁴Singa mu kibuga mulimu abatuukirivu amakumi ataano onookizikiriza n'otokisonyiwa olw'abatuukirivu amakumi ataano abakirimu?

²⁵Kireme okuba gy'oli okukola ekintu bwe kityo, okutta abatuukirivu awamu n'ababi, abatuukirivu ne benkana n'ababi! Kireme kuba bwe kityo! Omulamuzi ow'ensi yonna teyandisaanye akole kituufu?"

²⁶MUKAMA n'agamba nti, "Bwe nnaasanga mu Sodomu abatuukirivu amakumi ataano mu kibuga omwo nzija kusonyiwa ekibuga kyonna ku lwabwe."

²⁷Ibulayimu n'addamu nti, "Laba nnyinziza okwogera ne Mukama, nze ani, nze enfuufu n'evvu!

²⁸Singa abatuukirivu babulako bataano okuwera amakumi ataano, onoozikiriza ekibuga kubanga kubulako bataano?" N'amuddamu nti, "Sijja kukizikiriza, bwe nnaasangamu abatuukirivu amakumi ana mu abataano abampulira."

²⁹Ate Ibulayimu n'amugamba nti, "Singa musangibwamu amakumi ana." MUKAMA n'amuddamu nti, "Ku lw'amakumi ana sijja kukizikiriza."

³⁰Ate n'agamba nti, "Kale nno Mukama aleme okunsunguwalira, nange nnaayogera. Singa musangibwamu amakumi asatu." N'addamu nti, "Sijja kukizikiriza singa musangibwamu amakumi asatu."

³¹N'agamba nti, "Laba njumye ne njogera ne MUKAMA. Singa musangibwamu amakumi abiri." N'agamba nti, "Ku lw'amakumi abiri sijja kukizikiriza."

³²Ate n'agamba nti, "Kale MUKAMA aleme okukwatibwa obusungu, nnaayongera okwogera, naye luno lwokka. Singa kkumi lye linaasangibwamu." N'addamu nti, "Ku lw'abo ekkumi sijja kukizikiriza."

³³MUKAMA bwe yamala okwogera ne Ibulayimu n'agenda, ne Ibulayimu n'addayo ewuwe.

Olubereberye 19

Sodomu ne Ggomola

¹ Bamalayika ababiri ne batuuka mu Sodomu akawungeezi; Lutti yali atudde mu mulyango gwa Sodomu. Lutti bwe yabalaba n'agolokoka okubasisinkana, n'avuunama,

²n'agamba nti, "Bakama bange mukyame mu nnyumba y'omuddu wammwe munaabe ku bigere, mbegayiridde n'okusula musule. Munaazuukuka mangu ku makya ne mukwata ekkubo lyammwe." Ne bagamba nti, "Nedda tunaasula mu luguudo."

³ Naye n'abawaliriza nnyo; awo ne bakyama ne bajja gy'ali ne bayingira mu nnyumba ye, n'abategekera ekijjulo n'emigaati egitali mizimbulukuse ne balya.

⁴Naye nga tebannaba kugenda kwebaka, abasajja ab'omu kibuga, abasajja ba Sodomu, abakulu n'abato, abantu bona ne beetooloola ennyumba;

⁵ne bayita Lutti nga bagamba nti, "Abasajja abazze gy'oli ekiro kino bali ludda wa? Batufulumize twebake nabo."

⁶ Lutti n'afuluma gye bali, n'aggalawo oluggi,

⁷n'abagamba nti, "Baganda bange mbasaba temukola kibi kifaanana bwe kityo.

⁸Laba, nnina bawala bange embeerera babiri, ka mbabafulumize, mubakole kye mwagala; naye temubaako kye mukola basajja bano, bagenyi bange era nze mbalabirira."

⁹Naye ne bamugamba nti, "TUVIIRE! Omusajja omugwira ono, ate kati y'atulagira eky'okukola! Nedda, tujja kukukolako n'okusinga abagenyi bo." Awo ne banyigiriza nnyo Lutti, era kaabula kata bamenye n'oluggi.

¹⁰Naye abasajja ababiri abaali mu nnyumba ne bagolola emikono gyabwe ne bakwata Lutti ne bamuyingiza mu nnyumba ne baggalawo oluggi.

¹¹Ne baziba amaaso g'abasajja abaali ebweru ku luggi lw'ennyumba, abato n'abakulu, ne bakoowa nga bawammanta oluggi.

¹²Awo abasajja bali ababiri ne babuuza Lutti nti, "Olina abantu bo abalala wano, batabani bo, oba bakoddomi bo, oba bawala bo, oba omuntu omulala yenna mu kibuga? Bafulumye mu kifo kino;

¹³kubanga tuli kumpi okukizikiriza. Kubanga okukaaba olw'abantu baamu eri MUKAMA kuyitiridde, era MUKAMA atutumye okukizikiriza."

¹⁴ Awo Lutti n'afuluma n'ategeeza bakoddomi be abaali ab'okuwasa bawala be ng'agamba nti, "Musituke, muve mu kifo kino, kubanga MUKAMA ali kumpi ukukizikiriza." Naye yafaanana ng'abalaata eri bakoddomi be. Lutti n'ab'ennyumba ye ne badduka.

¹⁵ Naye obudde bwe bwali bunaatera okukya, bamalayika ne balagira Lutti nga bagamba nti, “Golokoka, otwale mukazi wo ne bawala bo ababiri abali wano muleme okuzikirira ng’ekibuga kibonerezebwa.”

¹⁶ Naye bwe yali akyekunya, abasajja ne bamukwata omukono, n’emikono gya mukazi we, n’emikono gy’abawala be bombi, MUKAMA ng’abakwatirwa ekisa, ne babafulumya ne babateeka ebweru w’ekibuga.

¹⁷ Bwe baabafulumya ne babagamba nti, “Mudduke muwonye obulamu bwammwe, temutunula mabega wadde okuyimirira mu kiwonvu; muddukire ku nsozi, muleme okuzikirizibwa.”

¹⁸ Awo Lutti n’abagamba nti, “Nedda bakama bange;

¹⁹ Laba, omuddu wammwe alabye ekisa mu maaso gammwe, era mundaze ekisa kingi nga muwonya obulamu bwange; naye siyinza kuddukira ku nsozi akabi tekalwa kunzingiza ne nfa.

²⁰ Laba, ekibuga kiri ekitono ekiri okumpi, kirungi okuddukira omwo. Leka nzirukire eyo. Era n’obulamu bwange bujja kuwona!”

²¹ N’amuddamu nti, “Laba, era nnyongedde okukukwatirwa ekisa, sijja kumalawo kibuga ky’oyogeddeko.

²² Yanguwa tolwa, ddukira eyo; kubanga siriiko kye nnaakola nga tonnattuuka eyo.” Erinnya ly’ekibuga kyeryava liba Zowaali.

²³ Lutti we yatuukira mu Zowaali enjuba yali evuddeyo, Sodomu ne Ggomola ne bizikirizibwa.

²⁴ Awo MUKAMA n’atonnyesa ku Sodomu ne Ggomola omuliro n’obuganga okuva mu ggulu;

²⁵ n’azikiriza ebibuga ebyo, n’ekiwonvu kyonna n’abantu bona abaali mu bibuga, ne buli kintu ekyalimu.

²⁶ Naye mukazi wa Lutti bwe yatunula emabega, n’afuuka empagi ey’omunnyo.

²⁷ Awo ku makya ennyo Ibulayimu n’agenda mu kifo mwe yayimiririra mu maaso ga MUKAMA;

²⁸ n’atunula wansi okwolekera Sodomu ne Ggomola n’okwolekera ekitundu kyonna eky’olusenyi, n’alaba, era laba, ekitundu kyonna nga kijjudde omukka.

²⁹ Bwe kityo bwe kyalit Katonda bwe yazikiriza ebibuga eby’omu kiwonvu. Katonda n’ajjukira Ibulayimu n’afulumya Lutti ebweru n’amuggya wakati mu kuzikirizibwa, bwe yazikiriza ebibuga Lutti mwe yabeeranga.

Ekibi kya Bawala ba Lutti

³⁰ Awo Lutti n'ava mu Zowaali, n'abeera mu nsozi wamu ne bawala be, kubanga yatya okubeera mu Zowaali. Ye ne bawala be ne babeera mu mpuku.

³¹ Olunaku lumu omuwala omukulu n'agamba muto we nti, "Kitaffe akaddiye era tewali na musajja ku nsi ajja kutwagala ng'empisa y'ensi bw'eri.

³² Jjangu tunywese kitaffe omwenge, tulyoke twebake naye, tusobole okufuna ezzadde nga liva mu kitaffe."

³³ Ne batamiiza kitaabwe ekiryo, omukulu n'agenda ne yeebaka ne kitaawe, Lutti n'atamanya bwe yeebaka yadde bwe yagolokoka.

³⁴ Ku lunaku olwaddirira, omuwala omukulu n'agamba omuto nti, "Laba, ekiryo neebase ne kitange; Leka tumunywese omwenge ekiryo kino, oyingire gy'ali weebake naye, tulyoke tusobole okukuma ezzadde mu kitaffe."

³⁵ Awo ne batamiiza kitaabwe ekiryo, omuwala omuto n'asituka ne yeebaka naye, Lutti n'atamanya bwe yeebase ne bw'agolokose.

³⁶ Bwe batyo bawala ba Lutti bombi buli omu n'aba olubuto nga lwa kitaabwe.

³⁷ Omuwala omukulu n'azaala omwana wabulenzi n'amutuumma Mowaabu, ye jjajja w'Abamowaabu abaliwo kaakano.

³⁸ Omuto naye n'azaala omwana mulenzi n'amutuumma Benami, ye yavaamu Abamoni abaliwo ne kaakano.

Olubereberye 20

Abimerek Atwala Mukazi wa Ibulayimu

¹ Ibulayimu bwe yava eyo n'atambula okwolekera Negevu, n'abeera wakati wa Kadesi ne Ssuuli; n'agenda mu Gerali.

² Ibulayimu n'ayogera ku Saala mukazi we nti, "Mwannyinaze." Abimerek kabaka we Gerali n'atumya n'atwala Saala.

³ Naye Katonda n'ajja eri Abimerek mu kirooto ekiryo n'amugamba nti, "Laba oli mufu, olw'omukazi gw'otutte kubanga muka musajja."

⁴ Naye Abimerek yali tanneebaka naye, n'alyoka agamba nti, "Onotta abantu abataliiko musango.

⁵ Si yeyanjamba nti, 'Mwannyinaze?' Era ne Saala n'aanjamba nti, 'Mwannyina.' Kino nkikoze mu mutima omutuukirivu n'emikono gyange tegiriiko musango."

⁶ Awo Katonda n'ayogera naye mu kirooto nti, "Ddala mmanyi nti okoze kino mu mutima omutuukirivu, era nze nakukuma oleme okwonoona gye ndi; ne nkuziyiza okumukwatako.

⁷Kale kaakano zzaayo mukazi w'omusajja, kubanga nnabbi, era anaakusabira, nawe on'oba mulamu. Naye bw'otomuzzeeyo, manya ng'oja kufa, ggwe ne by'olina byonna."

Okwegayirira kw'Abimereki eri Ibulayimu

⁸Awo Abimereki n'agolokoka mu makya ennyo n'ayita abakungu be bona n'abategeesa ebintu bino byonna; abasajja ne batya nnyo.

⁹Awo Abimereki n'ayita Ibulayimu n'amugamba nti, "Otukoze ki? Era nsobi ki gye nkukoze, n'ondeetera nze n'obwakabaka bwange ekibi ekinene ekyenkana awo? By'onkoze tebisaana kukolebwa muntu."

¹⁰Era Abimereki n'agamba Ibulayimu nti, "Wali olowooza ki okukola ekintu kino?"

¹¹Ibulayimu n'addamu nti, "Nakikola kubanga nalowooza nti mu kifo kino temuliumu kutya Katonda n'akamu, era balinzita olwa mukazi wange.

¹²Naze ebyo nga biri awo ddala mwannyinaze, muwala wa kitange, naye si muwala wa mmange; era yafuuka mukazi wange.

¹³Katonda bwe yandeeta okuva mu nnyumba ya kitange, ne mugamba nti, 'Eky'ekisa ky'oyinza okunkolera kye kino, buli kifo kye tutuukamu njogeraako nti ndi mwannyoko.'"

¹⁴Awo Abimereki n'atwala endiga n'ente, abaweeereza abasajja n'abaweeereza abakazi, n'abiwa Ibulayimu, n'amuddiza Saala mukyala we.

¹⁵Era Abimereki n'amugamba nti, "Laba ensi yange eri mu maaso go, beera w'oyagala."

¹⁶N'agamba ne Saala nti, "Laba mpadde mwannyoko ebitundu bya ffeeza lukumi, okukumalako ensonyi mu maaso gaabo bona abali naawe."

¹⁷Awo Ibulayimu n'asabira Abimereki eri Katonda, ne Katonda n'awonya Abimereki era n'awonya ne mukazi we; n'abaweeereza be abakazi ne balyoka bazaala abaana.

¹⁸Kubanga MUKAMA yali aggalidde embuto z'ab'omu nnyumba y'Abimereki olwa Saala mukazi wa Ibulayimu.

Olubereberye 21

Okuzaalibwa kwa Isaaka

¹Awo MUKAMA n'akwatirwa Saala ekisa nga bwe yagamba Ibulayimu n'akola Saala nga bwe yasuubiza.

²Saala n'aba olubuto, n'azaalira Ibulayimu omwana owoobulenzi mu bukadde bwe, mu kiseera MUKAMA kye yamugamba.

³Ibulayimu n'atuumma omwana owoobulenzi, eyamuzaalirwa Saala, erinnya Isaaka.

⁴Ibulayimu n'akomola mutabani we Isaaka ow'ennaku omunaana ez'obukulu nga Katonda bwe yamulagira.

⁵Ibulayimu yali aweza emyaka kikumi mutabani we Isaaka bwe yazaalibwa.

⁶Saala n'agamba nti, "Katonda andeetedde okusekererwa, buli anaawulira anansekerera."

⁷Era n'agamba nti, "Ani yandirowoozezza nti Saala alifuna omwana? Naye, laba mmuzaalidde omwana wabulenzi."

Agali ne Isimayiri Bagobwa

⁸Isaaka n'akula, n'aggyibwa ku mabeere, Ibulayimu n'afumba embaga ennene ku lunaku Isaaka lwe yaggyibwa ku mabeere.

⁹Naye Saala yalaba nga mutabani wa Agali Omumisiri, gwe yazaalira Ibulayimu ng'azanya ne mutabani we Isaaka.

¹⁰N'alyoka agamba Ibulayimu nti, "Goba omuweereza ono ne mutabani we, kubanga omwana w'omuweereza ono taliskira wamu na mwana wange Isaaka."

¹¹Naye ekyo Ibulayimu n'atakisiima.

¹²Katonda n'agamba Ibulayimu nti, "Tonakuwala olw'omulenzi n'olw'omuweereza wo omukazi, buli Saala ky'akugamba kikole; kubanga mu Isaaka mwe ndituukiririza ebyo byonna bye nakusuubiza.

¹³Era n'omwana w'omuweereza wo omukazi ndimufuula eggwanga, kubanga ava mu ggwe."

¹⁴Ibulayimu n'agolokoka ku makya ennyo, n'addira omugaati n'ensawo ey'amazzi n'abiwa Agali n'omwana gwe yazaala ng'abiteeka ku kibegabega kye, n'amusiibula. Agali n'agenda ng'atambulatambula mu ddungu lya Beeruseba.

Agali ne Isimayiri mu Ddungu

¹⁵Awo amazzi ag'omu ddiba bwe gaggwaamu, Agali n'ateeka omwana we wansi w'ogumu ku miti.

¹⁶Agali ne yeeyongerayo ebbanga ng'awalasibwa akasaale, nga mita kikumi, n'atuula okumwolekera, kubanga yayogera nti, "Nneme okulaba omwana ng'afa." Naye bwe yali ng'atudde, omwana n'ayimusa eddoboozi n'akaaba.

¹⁷Katonda n'awulira eddoboozi ly'omulenzi ng'akaaba, malayika wa Katonda n'ayita Agali ng'asinziira mu ggulu n'amugamba nti, "Kiki ekikuteganya? Totya, kubanga Katonda awulidde eddoboozi ly'omulenzi w'ali.

¹⁸Golokoka, situla omwana omunyweze mu mikono gyo, kubanga ndimufuula eggwanga eddene."

¹⁹ Awo Katonda n'azibula amaaso g'Agali, n'alaba oluzzi, n'agenda n'ajjuza ensawo ey'eddiba amazzi, n'anywesa omulenzi.

²⁰ Awo Katonda n'aba n'omulenzi n'akula n'abeera mu ddungu n'aba mwatiikirivu mu kulasa.

²¹ Yabeeranga mu ddungu lya Palani: nnyina n'amufunira omukazi okuva mu nsi y'e Misiri.

Ibulayimu Alagaana n'Abimereki

²² Mu kiseera ekyo Abimereki ng'ali ne Fikoli omukulu w'eggye lye n'agamba Ibulayimu nti, "Katonda ali naawe mu buli ky'okola:

²³ kale kaakano ndayirira mu maaso ga Katonda nga tolinkuuusakuusa, wadde okukuusakuusa omwana wange oba omwana w'omwana wange. Naye nga nze bwe nkukoze obulungi nga naawe bw'olinkola nze n'ensi mw'ozze."

²⁴ Ne Ibulayimu n'amuddamu nti, "Nkulayiridde."

²⁵ Awo Ibulayimu ne yeemulugunya eri Abimereki olw'oluzzi lwe abaddu be lwe baamunyagako.

²⁶ Abimereki n'amugamba nti, "Simanyi n'omu eyakola ekintu ekyo, ggwe tewambulira era sikiwulirangako okutuusa ggwe lw'okintegeezeeza olwa leero."

²⁷ Awo Ibulayimu n'addira endiga n'ente n'abiwa Abimereki, ne balagaana endagaano bombi.

²⁸ Awo Ibulayimu n'ayawulako endiga enduusi musanvu okuva mu kisibo kye.

²⁹ Abimereki n'abuuza Ibulayimu nti, "Endiga ezo omusanvu enduusi z'oyawuddeko amakulu gaazo ki?"

³⁰ N'amuddamu nti, "Endiga ezo enduusi omusanvu onoozitwala okuva gye ndi kalyoke kabe obukakafu nti nze nasima oluzzi olwo."

³¹ Ekifo ekyo kyekyava kiyitibwa Beeruseba, kubanga eyo bombi gye baalagaanira.

³² Bwe baamala okukola endagaano e Beeruseba, Abimereki ne Fikoli omukulu w'eggye lye ne basitula ne baddayo mu nsi y'Abafirisuuti.

³³ Ibulayimu n'asimba omuti omumyulimu mu Beeruseba n'akaabiririra eyo erinnya lya MUKAMA, Katonda Ataggwaawo.

³⁴ Ibulayimu ne yeeyongera okutambulatambula mu nsi y'Abafirisuuti okumala ennaku nnyingi.

Olubereberye 22

Katonda Agezesza Ibulayimu

- ¹ Awo oluvannyuma lw'ebyo, Katonda n'agezesza Ibulayimu, n'amuyita nti, "Ibulayimu!" N'addamu nti, "Nze nzuuno."
- ² Katonda n'amugamba nti, "Twala mutabani wo, mutabani wo omu yekka, Isaaka, gw'oyagala, ogende mu nsi Moliya ku lumu ku nsozi lwe ndikulaga omuweereyo eyo okuba ekiweebwayo ekyokebwa."
- ³ Ibulayimu n'agolokoka ku makya n'ateeka amatandiiko ku ndogoyi ye, n'atwala babiri ku baweereza be abasajja ne Isaaka mutabani we, n'ayasa enku ez'ekiweebwayo ekyokebwa, n'asituka n'agenda mu kifo Katonda kye yamugamba.
- ⁴ Ku lunaku olwokusatu Ibulayimu n'ayimusa amaaso ge n'alengera ekifo.
- ⁵ Awo Ibulayimu n'agamba balenzi be nti, "Musigale wano n'endogoyi, nze n'omulenzi tugende eri tusinze, tulyoke tukomewo."
- ⁶ Ibulayimu n'addira enku ez'ekiweebwayo ekyokebwa n'azitikka Isaaka mutabani we, ye n'akwata omuliro n'akambe, ne bagenda bombi.
- ⁷ Isaaka n'agamba Ibulayimu nti, "Taata." Ibulayimu n'amuddamu nti, "Nzuuno mwana wange." Isaaka n'amubuuza nti, "Laba, omuliro n'enku biibino, naye omwana gw'endiga ogw'ekiweebwayo ekyokebwa guluwa?"
- ⁸ Ibulayimu n'amuddamu nti, "Mwana wange, Katonda aneefunira omwana gw'endiga ogw'ekiweebwayo ekyokebwa." Kale ne bagenda bombi.

Ibulayimu Awaayo Isaaka

- ⁹ Bwe baatuuka mu kifo Katonda kye yamugamba, Ibulayimu n'azimba ekyoto, n'atindikira enku, n'asiba omwana we Isaaka, n'amuteeka ku kyoto ku nku.
- ¹⁰ Awo Ibulayimu n'akwata ekiso, n'agolola omukono gwe atte omwana we.
- ¹¹ Naye malayika wa MUKAMA n'amukoowoola ng'asinziira mu ggulu, n'agamba nti, "Ibulayimu! Ibulayimu!" Ibulayimu n'addamu nti, "Nze nzuuno." N'amugamba nti,
- ¹² "Togolola mukono gwo ku mulenzi so tomukola kintu na kimu, kubanga kaakano ntegedde nti otya Katonda, ndabye nti omwana wo tomunnyimye, omwana wo omu yekka bw'ati."
- ¹³ Awo Ibulayimu n'ayimusa amaaso, n'alaba, era laba, emabega we endiga ennume ng'eri mu kisaka ng'amayembe gaayo mwe galaalidde. Ibulayimu n'agenda n'addira endiga eyo n'agiwaayo okuba ekiweebwayo ekyokebwa, mu kifo ky'omwana we.
- ¹⁴ Ibulayimu kyeyava atuumma ekifo ekyo erinnya Yakuwayire, era ne kaakano bwe kiyitibwa nti ku lusozi lwa MUKAMA anaagabiriranga.

¹⁵Awo malayika wa MUKAMA n'ayita Ibulayimu omulundi ogwokubiri ng'asinziira mu ggulu,

¹⁶n'amugamba nti, "Nze MUKAMA neerayiridde, nga bw'okoze kino, n'otonnyima mwana wo omu yekka bw'ati,

¹⁷ddala ndikuwa omukisa, era ndyaza ezzadde lyo, ne liba ng'emmunyeenye ez'eggulu era ng'omusenyu oguli ku lubalama lw'enyanja. Era ezzadde lyo balitwala eby'abalabe baabwe,

¹⁸era mu zzadde lyo amawanga gonna mwe galiweerwa omukisa, kubanga ogondedde eddoboozi lyange."

¹⁹Ibulayimu n'alyoka addayo eri abavubuka be, ne basitula ne balaga e Beeruseba.

²⁰Awo mu biro ebyo ne babuulira Ibulayimu nti, "Laba Mirika azaalidde Nakoli muganda wo abaana: Uzi ye mubereberye,

²¹ne muto we ye Buzi, ne Kemweri kitaawe wa Alamu,

²²ne Kesedi, ne Kazo, ne Pirudaasi, ne Yidulaafu ne Besweri."

²³Era Besweri yazaala Lebbeeka. Abaana abo omunaana Mirika be yazaalira Nakoli muganda wa Ibulayimu.

²⁴Ate ne mukazi we omulala Lewuma n'azaalira Nakoli, abaana aboobulenzi era be bano: Teba, ne Gakamu, ne Takasi, ne Maaka.

Olubereberye 23

Okufa n'Okuziikibwa kwa Saala

¹Saala yawangaala emyaka kikumi mu abiri mu musanvu.

²N'afiira e Kiriyasuwalaba, ye Kebbulooni, mu nsi ya Kanani. Saala bwe yafa Ibulayimu n'ayingira okumukungubagira n'amukaabira.

³Oluvannyuma Ibulayimu n'ava awali omulambo gwe n'agenda eri Abakiiti n'abagamba nti,

⁴"Ndi mugenyi era omutambuze mu mmwe, munfunire ekifo aw'okuziika, ndyoke nziikewo omuntu wange anve ku maaso."

⁵Abakiiti ne baddamu Ibulayimu nti,

⁶"Tuwulirize mukama waffe. Laba, oli muntu mukulu wakati mu ffe. Ziika mukazi wo mu emu ku ntaana zaffe gy'oneeroboza. Tewali n'omu mu ffe anaakuumma ntaana ye, oba okukuziyiza okuziika omuntu wo."

⁷Ibulayimu n'agolokoka n'avuunama eri Abakiiti, bannannyini nsi.

⁸N'abagamba nti, "Obanga munzikirizza mu mwoyo mulungi okuziika omuntu wange, mumpulirize. Kale munneegayiririre Efulooni mutabani wa Zokali,

⁹anguze empuku ey'e Makupeera, gy'alina, eri ku nkomerero y'ennimiro ye. Agingulize mu maaso gammwe, mmusasule omuwendo gwayo gwonna, efuuke ekifo kyange eky'okuziikangamu mu mmwe."

¹⁰Mu kiseera ekyo Efulooni yali atudde awo wakati mu Bakiiti. Efulooni, Omukiiti n'addamu Ibulayimu nga Abakiiti bonaaba aliwo mu mulyango gw'ekibuga nga bawulira nti,

¹¹"Nedda mukama wange. Mpuliriza. Nkuwadde ennimiro n'empuku erimu, ng'abantu bange balaba, ziika omuntu wo."

¹²Awo Ibulayimu n'avuunama mu maaso gaabwe bona.

¹³N'agamba Efulooni, bona nga bawulira nti, "Obanga okkirizza, nkusaba nsasule omuwendo gw'ennimiro gwonna ndyoke nziikewo mukazi wange."

¹⁴Efulooni n'addamu Ibulayimu nti,

¹⁵"Mpuliriza mukama wange, ennimiro esaana ebitundu by'effeeza ebikumi bina. Kale ekyo ki eri ab'omukwano? Twala ennimiro oziikemu abafu bo."

¹⁶Ne bakkiriziganya, Ibulayimu kwe kusasula Efulooni ensimbi ze bakkirizaganya nga Abakiiti bonaaba balaba.

¹⁷Olwo ennimiro ya Efulooni mu Makupeera, eyali ku luuyi olw'ebuvanjuba olwa Mamule, ennimiro awamu n'empuku eyalimu, n'emiti gyonna egiali mu nnimiro ekitundu kyonna ne bifuuka bya

¹⁸Ibulayimu nga Abakiiti bonaaba fuluma mu mulyango gw'ekibuga balaba.

¹⁹Oluvannyuma Ibulayimu n'aziika Saala mukazi we mu mpuku mu nnimiro ya Makupeera ku luuyi olw'ebuvanjuba bwa Mamule, ye Kebbulooni, mu nsi ya Kanani.

²⁰Abakiiti ne bakwasa Ibulayimu ennimiro awamu n'empuku yaamu mu butongole okubeera obutaka bwe okuziikangamu abantu be.

Olubereberye 24

Okunoonyeza Isaaka Omukazi

¹Ibulayimu yawangaala n'akaddiwa nnyo; era MUKAMA yamuwa emikisa mingi mu byonna.

²Awo Ibulayimu n'agamba omuddu asinga obukulu mu nnyumba ye, eyali afuga byonna Ibulayimu bye yalina nti, "Teeka omukono gwo wansi w'ekisambi kyange

³ndyoke nkulayize mu maaso ga MUKAMA Katonda w'eggulu era Katonda w'ensi, nga toliwasiza mutabani wange mukazi kuva mu bawala ba nsi ya Bakanani, mwe mbeera,

⁴wabula ng'oligenda mu nsi yange mu bantu bange n'owasiza mutabani wange Isaaka omukazi."

⁵Omuddu kwe ku mubuuza nti, "Omukazi bw'ataliyagala kujja nange mu nsi eno, ndizzaayo mutabani wo mu nsi mwe wava?"

⁶Ibulayimu n'addamu nti, "Togezanga n'ozzaayo mutabani wange.

⁷MUKAMA, Katonda w'eggulu, eyanzigya mu nnyumba ya kitange, mu nsi mwe nazaalibwa eyayogera nange era n'andayirira nti, 'Ezadde lyo ndiriwa ensi eno,' alituma malayika we n'akukulembera owasirize mutabani wange omukazi era omuggyeyo.

⁸Naye omukazi bw'aligaana okujja naawe, olwo ekirayiro kino kiriba tekikyakusiba. Kyokka togezanga n'ozzaayo omwana wange."

⁹Awo omuddu kwe kuteeka omukono gwe wansi w'ekisambi kya mukama we Ibulayimu.

¹⁰Awo omuddu n'atwala ku ḥejjamira za mukama we n'agenda ng'atutte buli ngeri ya kirabo okuva ku bya mukama we. N'ayimuka n'agenda e Mesopotamiya mu kibuga kya Nakoli.

¹¹Obudde bwe bwawungeera n'atuuka ebweru w'ekibuga n'afukamiza awo ḥejjamira okumpi n'oluzzi obudde nga buwungedde abakazi we bagendera okukima amazzi.

¹²N'asaba nti, "Ayi MUKAMA Katonda wa mukama wange Ibulayimu mpa obuwanguzi leero nkwegayiridde, olage mukama wange Ibulayimu okwagala kwo okutaggwaawo.

¹³Laba nnyimiridde okumpi n'oluzzi, ne bawala b'abantu ab'omu kibuga bajja okusena amazzi.

¹⁴Kale omuwala gwe nnaagamba nti, 'Nkwegayiridde mpa ku mazzi ag'omu nsuwa yo nnyweko,' n'amala agamba nti, 'Kale nnywa, era n'ēj̄jamira zo nnaazinywesa,' oyo y'aba abeera gw'olonze okuba mukazi w'omuddu wo Isaaka. Ku kino kwe nnaategeerera nti olaze mukama wange ekisa kyo ekitaggwaawo."

Lebbeeka ku Luzzi

¹⁵Laba, bwe yali nga tannamaliriza kusaba, Lebbeeka muwala wa Besweri mutabani wa Mirika muka Nakoli, muganda wa Ibulayimu, n'ajja ng'atadde ensuwa ye ey'amazzi ku kibegabega kye.

¹⁶Omuwala oyo yali mulungi okulabako nga muwala mbeerera, n'akka mu luzzi n'ajjuza ensuwa ye n'avaayo.

¹⁷Awo omuddu n'ayanguwa n'amusisinkana, n'amugamba nti, "Nkusaba ompe ku tuzzi ku nsuwa yo."

¹⁸N'amuddamu nti, "Nywako mukama wange." Amangwago n'assa ensuwa mu mikono gye, n'agikwata mu mukono gwe n'amuwa amazzi.

¹⁹Bwe yamala okumuwa amazzi, n'amugamba nti, "N'enjamira zo nazo nnaazisenera amazzi okutuusa lwe zinaamala okunywa."

²⁰Bw'atyo n'ayanguwa n'ayiwa ensuwa ye ey'amazzi n'agimalira mu kyesero, n'adduka n'asena amalala agaali gamala enjamira ze zonna,

²¹omusajja ng'asirise ng'amwekaliriza amaaso okumanya obanga MUKAMA awadde olugendo lwe omukisa oba nedda.

²²Enjamira bwe zaamala okunywa, omusajja n'addira empeta ya zaabu ey'oku matu erimu gulaamu ttaano n'obutundu musanvu n'ebikomo ebya zaabu bibiri eby'oku mikono bya gulamu kikumi mu kkumi na ttaano n'abiwa omuwala abyenaanike.

²³N'amubuuza nti, "Oli muwala w'ani? Mu nnyumba ya kitaawo mulimu ekisenge mwe tuyinza okusuzibwa?"

²⁴N'amuddamu nti, "Ndi muwala wa Besweri, mutabani wa Mirika gwe yazaalira Nakoli."

²⁵N'ayongerako nti, "Tulina omuddo omukalu n'emmere endala ebimala, era n'ekisenge eky'okusulamu tukirina."

²⁶Awo omusajja n'akutamya omutwe gwe n'asinza MUKAMA.

²⁷N'agamba nti, "Yeebazibwe MUKAMA Katonda wa mukama wange Ibulayimu atalese kisa kye ekitaggwaawo n'obwesigwa bwe eri mukama wange. Era nze ku lwange MUKAMA ankuleembedde mu kkubo n'antuusa mu nnyumba ya booluganda lwa mukama wange."

²⁸Awo omuwala n'adduka n'ategeeza ab'ennyumba ya nnyina ebintu ebyo byonna.

²⁹Lebbeeka yalina mwannyina, Labbaani, eyayanguwa okulaga ku luzzi eri omusajja,

³⁰Labbaani bwe yalaba empeta n'ebikomo ku mikono gya mwannyina, era bwe yawulira ebigambo bya mwannyina ng'omusajja bw'amugambye, n'agenda eri omusajja. Laba omusajja yali ng'ayimiridde awali enjamira ku luzzi.

³¹Labbaani n'amugamba nti, "Jjangu gwe aweereddwa MUKAMA omukisa. Lwaki obeera eno? Ntegesse ennyumba era n'ekifo ky'enjamira."

³²Awo, omusajja n'alaga ku nnyumba, n'asumulula ejamira, ne baziwa essubi n'eb yokulya ne bamuleetera n'amazzi ye n'abasajja be yali nabo banaabe ebigure.

³³Oluvannyuma ne bamuleetera emmere alye. Kyokka ye n'agamba nti, "Sijja kulya nga sinnayogera kindeese." Labbaani n'amugamba nti, "Yogera."

Omuddu Annyonnyola Ekyamutwala

³⁴Awo n'agamba nti, "Ndi muddu wa Ibulayimu.

³⁵MUKAMA yawa mukama wange emikisa mingi, era afuuse mukulu, amuwadde ebisibo by'endiga n'amagana g'ente, ne ffeeza ne zaabu, abaweereza abasajja n'abaweereza abakazi era n'enjamira awamu n'endogoyi.

³⁶Era Saala muka mukama wange bwe yali ng'akaddiye yamuzaalira omwana owoobulenzi, era mukama wange awadde oyo byonna by'alina.

³⁷MUKAMA wange yandayiza n'anjamira nti, 'Towasizanga mutabani wange mukazi ava mu Bakanani ba nnyini nsi mwe mbeera.

³⁸Wabula oligenda mu nnyumba ya kitange, mu bantu bange, n'owasiza mutabani wange omukazi okuva omwo.'

³⁹"Ne mbuuza mukama wange nti, 'Omukazi bw'atalikkiriza kujja nange?'

⁴⁰"Ye n'anziramu nti, 'MUKAMA oyo gwe ntambulira mu maaso ge alikutumira malayika we mu lugendo lwo era alikuwa omukisa, n'owasiza mutabani wange omukazi okuva mu bantu bange, era mu nnyumba ya kitange.'

⁴¹Naye ekirayiro kyange tekirkubaako bw'olituuka mu bantu bange ne batamukuwa, nga ggwe toliiko musango.'

⁴²"Leero bwe ntusee ku luzzi, ne njamba nti, 'Ayi MUKAMA, Katonda wa mukama wange Ibulayimu, obanga onoowa omukisa olugendo luno lwe ndiko,

⁴³laba, nnyimiridde awali oluzzi, kale omuwala anajja okusena amazzi, ne mugamba nti, "Nkusaba ku tuzzi mu nsuwa yo nyweko,"

⁴⁴n'anziramu nti, "Nnywa, era n'enjamira zo nazo nzija kuzisenera," oyo y'aba abeera omukazi MUKAMA gw'alondedde mutabani wa mukama wange.'

⁴⁵"Laba, bwe nabadde nga nkyayogera mu mutima gwange, Lebbeeka n'avaayo n'ensuwa ye ng'eri ku kibegabega kye, n'aserengeta ku luzzi n'asena amazzi. Ne mugamba nti, 'Nkusaba ompe nyweko.'

⁴⁶"Nassa mangu ensuwa ye okuva ku kibegabega kye, n'agamba nti, 'Nnywa, era nnaanywesa n'enjamira zo.'

47 “Kwe ku mubuuza nti, ‘Oli muwala w’ani?’ N’anziramu nti, ‘Ndi muwala wa Besweri, mutabani wa Nakoli, Mirika gwe yamuzaalira.’ Ne nteeka empeta ku nnyindo ye n’ebikomo ku mikono gye.

48 Awo ne nkutamya omutwe gwange ne nsinza MUKAMA ne muwa ekitiibwa, Katonda wa mukama wange Ibulayimu eyankulembera nannuŋŋamya mu lugendo lwange okuwasiriza mutabani wa mukama wange omukazi okuva mu bantu ba mukama wange.

49 Kale kaakano obanga mu mazima munaakolera mukama wange ebyekisa, mumbuulire, era obanga si bwe kityo mumbuulire; ndyoke mmanye eky’okukola.”

Lebbeeka Agenda n’Omuddu

50 Awo Labbaani ne Besweri ne baddamu nti, “Kino kivudde wa MUKAMA, tetuyinza kukuddamu kino oba kiri.

51 Laba, Lebbeeka wuuyo, mutwale, agende abeere muka mutabani wa mukama wo, nga MUKAMA bw’alagidde.”

52 Omuddu wa Ibulayimu bwe yawulira ebigambo byabwe n’avuunama wansi mu maaso ga MUKAMA.

53 N’aggyayo eby’obugagga ebya ffeeza ne zaabu, n’ebiyambalo n’abiwa Lebbeeka, era n’awa mwannyina ne nnyina ebirabo eby’omuwendo omungi.

54 Awo ye n’abasajja be yali nabo ne balyoka balya era ne banywa; ne basulayo ekiro ekyo. Bwe baagolokoka enkyia n’agamba nti, “Ka nzireyo eri mukama wange.”

55 Mwannyina ne nnyina ne bamuddamu nti, “Leka omuwala abeereko naffe akaseera, wakiri ennaku kkumi, olwo mulyoke mugende.”

56 Ye n’abaddamu nti, “Temundwisa, kubanga MUKAMA awadde olugendo lwange omukisa.”

57 Ne bagamba nti, “Ka tuyite omuwala tumubuuze.”

58 Ne bayita Lebbeeka, ne bamubuuza nti, “Onoogenda n’omusajja ono?” N’addamu nti, “Nnaagenda.”

59 Awo ne basiibula Lebbeeka mwannyinaabwe, n’omuwereza we omuwala, n’omuwereza wa Ibulayimu omusajja awamu n’abasajja be.

60 Ne basabira Lebbeeka omukisa ne bamugamba nti, “Mwannyinaffe beera nnyina w’enkumi n’enkumi, abaana n’abazzukulu bo balyenga ebibuga by’abalabe baabwe.”

⁶¹Awo Lebbeeka n'abaweereza be ne basituka ne beebagala eñjamira ne bagenda n'omuweereza wa Ibulayimu omusajja, bw'atyo omuddu n'awala Lebbeeka ne bagenda.

Isaaka ne Lebbeeka Bafumbiriganwa

⁶²Olwo Isaaka yali ng'avudde e Beerirakayiroyi ng'ali mu Negevu.

⁶³Awo bwe yali ng'atambula nga bw'afumiitiriza mu nnimiro akawungheezi, n'ayimusa amaaso ge n'alengera eñjamira nga zija.

⁶⁴Ne Lebbeeka n'ayimusa amaaso ge. Bwe yalengera Isaaka n'ava ku ñjamira,

⁶⁵n'abuuza omuddu nti, "Ani oyo gwe nnengera mu nnimiro ajja okutusisinkana?" Omuddu n'addamu nti, "Ye mukama wange." Lebbeeka kwe kutoola omunagiro gwe ne yeebikkirira.

⁶⁶Awo omuddu n'ategeeza Isaaka byonna nga bwe byagenda.

⁶⁷Awo Isaaka n'awala Lebbeeka n'amuyingiza mu weema eyali eya Saala nnyina, n'afuuka mukazi we n'amwagala. Isaaka n'alyoka afuna essanyu kasookedde afiirwa nnyina.

Olubereberye 25

¹Ibulayimu n'awasa omukazi omulala erinnya lye Ketula.

²Yamuzaalira Zimulaani, ne Yokusaani, ne Medani, ne Midiyaani, ne Isubaki ne Suwa.

³Yokusaani n'azaala Seeba ne Dedani. Dedani n'azaala Asulimu, ne Letusimu ne Leumimu.

⁴Batabani ba Midiyaani baali Efa, ne Eferi, ne Kanoki, ne Abida ne Eruda. Abo bona be baana n'abazzukulu ba Ketula.

⁵Ibulayimu yawa Isaaka byonna bye yalina.

⁶Naye bo abaana b'abaweereza be n'abawa birabo, n'abasiibula bwe yali ng'akyali mulamu bagende ebuvanjuba mu nsi ey'ebuvanjuba; baviire mutabani we Isaaka.

Okufa kwa Ibulayimu

⁷Ibulayimu yawangaala emyaka kikumi mu nsanvu mu etaano.

⁸Ibulayimu yafa ng'akaddiyidde ddala, nga musajja awangaalidde ddala obulungi.

⁹Batabani be Isaaka ne Isimayiri ne bamuziika mu mpuku ey'e Makupeera, mu nnimiro ya Efulooni, mutabani wa Zokali Omukiiti, ebuvanjuba bwa Mamule;

¹⁰ennimiro Ibulayimu gye yagula ku Bakiiti. Omwo Ibulayimu mwe yaziikibwa awali Saala mukazi we.

¹¹Ibulayimu bwe yafa, Katonda n'awa mutabani we Isaaka omukisa, Isaaka n'abeera e Beerirakayiroyi.

Abaana ba Isimayiri

¹²Bino bye bifia ku b'olulyo lwa Isimayiri mutabani wa Ibulayimu eyazaalibwa Agali Omumisiri, omuweereza wa Saala omuwala.

¹³Gano ge mannya gaabwe nga bwe baddinjanwako: Nebayoosi, omubereberye wa Isimayiri, ne Kedali, ne Adubeeri, ne Mibusamu,

¹⁴ne Misuma, ne Duma, ne Massa,

¹⁵ne Kadadi, ne Teema, ne Yetuli, ne Nafisi ne Kedema.

¹⁶Abo be batabani ba Isimayiri, era ago ge mannya gaabwe, mu byalo ne mu bibuga byabwe mwe baabeeranga, abafuzi kkumi na babiri buli omu n'eggwanga lye.

¹⁷Isimayiri yafa ng'awezenza emyaka kikumi mu asatu mu musanvu n'atwalibwa mu babe.

¹⁸Abantu be baatuula okuvira ddala mu Kavira ne batuuka ku Ssuuli okuliraana Misiri ku luuyi olwa Bwasuli. Ennaku zaabwe zonna baawalananga baganda baabwe.

Okuzaalibwa kwa Yakobo ne Esawu

¹⁹Bino bye bifia ku b'olulyo lwa Isaaka, mutabani wa Ibulayimu. Ibulayimu yazaala Isaaka.

²⁰Isaaka yalina emyaka amakumi ana, we yawasiza muwala wa Besweri Omusuuli ow'e Padanalaamu, eyayitbwanga Lebbeeka mwannyina wa Labbaani.

²¹Isaaka n'asaba MUKAMA ku lwa mukazi we Lebbeeka kubanga yali mugumba, MUKAMA n'awulira okusaba kwe, Lebbeeka naaba olubuto.

²²Abaana bombi ne bagulumbira mu lubuto lwe, Lebbeeka n'agamba nti, "Obanga kiri bwe kityo, lwaki mba omulamu?" Awo n'agenda ne yeebuuza ku MUKAMA.

²³ MUKAMA n'amuddamu nti, "Mu lubuto lwo mulimu amawanga abiri, abantu ababiri b'olizaala balibeera ba njawulo, omu alibeera w'amaanyi okusinga munne, era omukulu yaaliweereza omuto."

²⁴Ennaku ez'okuzaala bwe zaatuuka, laba, n'azaala abalongo nga babulenzi.

²⁵Eyasooka bwe yavaayo nga mumyufu, omubiri gwe gwonna nga gufaanana ng'ekyambalo eky'ebyoya. Kyebaava bamutuumma Esawu.

²⁶Oluvannyuma ne muganda we n'azaalibwa, omukono gwe nga gukutte ekisinziro kya Esawu; kyebaava bamuyita Yakobo. Isaaka yalina emyaka nkaaga Lebbeeka we yazaalira abaana abo.

Esawu Atunda eby'Obukulu Bwe

²⁷Abalenzi ne bakula, Esawu n'aba muyizzi lukulwe, omuntu ow'oku ttale. Naye ye Yakobo yali musajja musirise ng'asigala waka.

²⁸Isaaka n'ayagala Esawu kubanga yalyanga ku muyiggo gwe, naye Lebbeeka ye n'ayagala Yakobo.

²⁹Lumu Yakobo yali afumba enva, Esawu n'ajja ng'ava ku ttale; enjala ng'emuluma nnyo.

³⁰Esawu n'agamba Yakobo nti, "Mpa mpute ku nva ezo, kubanga enjala ejula kunzita." Kyeyava ayitibwa Edomu.

³¹Yakobo n'amuddamu nti, "Sooka onguze obukulu bwo."

³²Esawu n'agamba nti, "Laba Ndikumpi n'okufa, obukulu bungasa ki?"

³³Yakobo n'addamu nti, "Sooka ondayirire." Awo Esawu n'amulayirira, olwo n'aguza Yakobo obukulu bwe.

³⁴Yakobo n'alyoka awa Esawu emmere n'enva, n'alya n'anywa, n'agolokoka n'agenda. Bw'atyo Esawu n'anyooma obukulu bwe.

Olubereberye 26

Isaaka Abeera mu Gerali

¹Ne wabaawo enjala mu nsi, eteri eri eyabaawo mu biseera bya Ibulayimu. Isaaka n'agenda mu Gerali, ewa Abimerek kabaka w'Abafirisuuti.

²Ne MUKAMA n'amulabikira, n'amugamba nti, "Toserengeta Misiri, beera mu nsi gye ndikulaga.

³Beera mu nsi gye ndikulaga, nnaabeeranga naawe, n'akuwanga omukisa kubanga gwe n'abaana bo ndibawa ensi zino zonna, era ndituukiriza ekirayiro kye nalayirira kitaawo Ibulayimu.

⁴Ndyaza abaana b'enda yo ne baba ng'emmunyeeny ezz'eggulu, era ndibawa n'ensi zino zonna. Era mu bo amawanga gonna ag'oku nsi mwe galiweerwa omukisa;

⁵kubanga Ibulayimu yagondera eddoboozi lyange, n'akwata bye namukuutira, n'ebiragiro byange, n'ebigambo byange awamu n'amateeka gange."

⁶Bw'atyo Isaaka n'abeera mu Gerali,

⁷abasaja ab'omu nsi omwo bwe baamubuuza ku mukazi we n'abaddamu nti, "Mwannyinaze." Kubanga yatya okwogera nti, "Mukazi wange," ng'alowooza nti,

"Abasajja ab'omu nsi omwo tebalwa kunzita lwa Lebbeeka," kubanga yali mulungi nnyo.

⁸Bwe yamalayo ekiseera ekiwanvu, Abimereki, kabaka w'Abafirisuuti n'atunula mu ddirisa, n'alaba Isaaka ng'azannya ne Lebbeeka mukazi we.

⁹Abimereki kwe kuyita Isaaka n'amugamba nti, "Ddala, mukazi wo, lwaki wagamba nti, 'Mwannyinaze'?" Isaaka n'amuddamu nti, "Kubanga nalowooza nti, 'Nnyinza okufiirwa obulamu bwange ku lulwe.'"

¹⁰Abimereki n'amugamba nti, "Kale kiki kino ky'otukoze? Omu ku basajja yandiyinzizza okusobya ku mukazi wo, wandituleeseko omusango."

¹¹Awo Abimereki n'alyoka alagira abantu bona ng'agamba nti, "Buli alikwata ku musajja ono oba ku mukyala we waakuttibwa."

¹²Isaaka n'asigala mu nsi omwo, n'afuna amakungula emirundi kikumi ag'ebyo bye yasiga, kubanga MUKAMA yamuwa omukisa.

¹³N'afuuka mugagga, obugagga bwe ne bwe yongera n'agaggawala nnyo.

¹⁴Yalina ebisibo by'endiga bingi nnyo n'amagana g'ente, era n'abaweereza nfaafa; Abafirisuuti ne bamukwatirwa obuggya.

¹⁵Kyebaava bajjuza enzizi zonna abaddu ba kitaawe ze baasima mu biro bya kitaawe Ibulayimu, ne baziziba.

¹⁶Ne Abimereki n'agamba Isaaka nti, "Ggenda, tuveemu kubanga otuyitiridde amaanyi."

Abasumba ba Isaaka n'aba Abafirisuuti

¹⁷Awo Isaaka n'avaayo n'azimba mu kiwonvu eky'e Gerali, n'abeera omwo.

¹⁸Isaaka n'azibukula enzizi ezaali zisimiddwa mu biseera bya Ibulayimu kitaawe, kubanga Abafirisuuti baziziba Ibulayimu bwe yamala okufa. Era ye Isaaka n'aziyita amannya gali kitaawe ge yali azituumye.

¹⁹Naye abaddu ba Isaaka bwe basima mu kiwonvu ne bazuula oluzzi olw'ensulo,

²⁰abasumba b'omu Gerali ne bayomba n'abasumba ba Isaaka nga bagamba nti, "Amazzi gaffe." Oluzzi olwo kyeyava alutuma Eseki, kubanga baawakana naye.

²¹Kyebaava basima oluzzi olulala, era nalwo ne baluyombera, lwo kwe kuluyita Situna.

²²Awo n'avaayo n'asima oluzzi olulala, olwo lwo ne bataluyombera, kyeyava alutuma Lekobosi, ng'agamba nti, "Kubanga kaakano MUKAMA atuwadde ebbanga, era tujja kukulaakulanira muno."

²³Bwe yava eyo n'agenda e Beeruseba.

²⁴Ekiro ekyo MUKAMA n'alabikira Isaaka, n'amugamba nti, "Nze Katonda wa Ibulayimu kitaawo, totya. Kubanga ndiwamu naawe, ndikuwa omukisa era ndyaza abaana bo ku lwa Ibulayimu omuddu wange."

²⁵Awo n'azimbawo ekyoto n'akoowoola erinnya lya MUKAMA, n'asimba eyo eweema ye. Era n'eyo abaddu be ne basimayo oluzzi.

²⁶Mu kiseera kye kimu Abimerekki n'ava mu Gerali ng'ali ne Akuzasa gwe yeebuuzangako amagezi ne Fikoli omukulu w'eggye lye, n'agenda eri Isaaka.

²⁷Isaaka n'ababuuza nti, "Lwaki muzze gye ndi ng'ate mwankijjanya ne mungobaganya?"

²⁸Ne bamuddamu nti, "Tulabidde ddala nga MUKAMA ali naawe, kyetuva tugamba nti, 'Wabee wo ekirayiro wakati wo naffe. Era tukole endagaano naawe,

²⁹nga tolitukola kabi, nga ffe bwe tutaakakukola era nga tetuliiko kye tukukoze, wabula ebirungi era nga twakusiibula mirembe.' Kaakano gwe oli muntu MUKAMA gw'awadde omukisa."

³⁰Awo Isaaka n'abakolera ekijjulo ne balya ne banywa.

³¹Ku makya ennyo ne bagolokoka ne balayiriragana, Isaaka n'abawerekerako ne bava gy'ali mirembe.

³²Ku lunaku olwo lwennyini, abaddu ba Isaaka ne bajja ne bamutegeeza eby'oluzzi lwe baasima, ne bamugamba nti, "Tuzudde amazzi."

³³N'alutuumma Siba; erinnya ly'ekibuga kyeriva liba Beeruseba na buli kati.

³⁴Esawu bwe yaweza emyaka amakumi ana eg'yobukulu, n'awasa Yudisi muwala wa Beeri Omukiiti, ne Besimansi muwala wa Eroni naye Omukiiti.

³⁵Ne bakaluubiriza nnyo Isaaka ne Lebbeeka obulamu.

Olubereberye 27

¹Awo Isaaka bwe yali ng'akaddiye nnyo n'amaaso ge nga gayimbadde, nga takyayinza kulaba, n'ayita Esawu mutabani we omukulu, n'amugamba nti, "Mutabani," n'amuddamu nti, "Nze nzuuno."

²Isaaka n'amugamba nti, "Laba, nkaddiye, simanyi lwe ndifa.

³Kale kaakano kwata by'oyizza, omutego gwo n'obusaale bwo, ogende mu nsiko onjiggire yo omuyiggo.

⁴Ontekereteekere ekyokulya ekiwooma ennyo kye njagala, okindeetere nkirye, ndyoke nkusabire omukisa nga sinnafa."

Lebbeeka Asala Olukwe ne Yakobo

- ⁵Ne Lebbeeka yali awo ng'awuliriza, Isaaka ng'agamba mutabani we omukulu Esawu. Awo Esawu bwe yagenda mu nsiko okuyiggo omuyiggo aguleete,
- ⁶Lebbeeka n'agamba mutabani we Yakobo owookubiri nti, "Mpulidde kitaawo ng'agamba muganda wo Esawu nti,
- ⁷'Ndeetera omuyiggo onteekereteekere ekyokulya ekiwooma obulungi, nkirye, ndyoke nkusabire omukisa eri MUKAMA nga sinnafa.'
- ⁸Kale nno kaakano mwana wange wulira kye nkugamba.
- ⁹Genda eri ekisibo ondeeteremu embuzi bbiri ennungi, nfumbire kitaawo ekyokulya ekiwooma, nga bw'ayagala,
- ¹⁰okitwalire kitaawo akirye, alyoke akusabire omukisa nga tannafa."
- ¹¹Naye Yakobo n'agamba Lebbeeka nnyina nti, "Muganda wange Esawu musajja wa byoya, so nga nze ndi muweweetu.
- ¹²Singa kitange anampeewetako, siifuuke mulimba gy'ali, ne nfunu ekikolimo mu kifo ky'okufuna omukisa?"
- ¹³Nnyina n'amuddamu nti, "Ekikolimo kyo kibe ku nze mwana wange; wulira ekigambo kyange ogende ozindeetere."
- ¹⁴Awo Yakobo n'agenda, n'azikwata n'azireeteera nnyina, n'ateekerateekera Isaaka ekyokulya ekiwooma nga bwe yayagala.
- ¹⁵Lebbeeka n'addira ebyambalo ebisinga obulungi ebya Esawu, mutabani we omukulu, ebyali mu nnyumba; n'abyambaza Yakobo mutabani we omuto,
- ¹⁶era n'addira n'amaliba g'embuzi n'agamwambaza ku mikono ne ku bitundu ebyobulago ebiweweera.
- ¹⁷N'alyoka addira ekyokulya ekiwooma n'omugaati bye yafumba, n'abikwasa Yakobo mutabani we.

Omukisa gwa Yakobo Omubbe

- ¹⁸Awo Yakobo n'agenda eri kitaawe, n'amugamba nti, "Kitange nzuuno." Ye n'amuddamu nti, "Gwwe ani mwana wange?"
- ¹⁹Yakobo n'agamba kitaawe nti, "Nze Esawu omwana wo omubereberye, nkoze nga bw'onjambye. Kale kaakano tuula olye ku muyiggo gwange olyoke onsabire omukisa."
- ²⁰Naye Isaaka n'abuuza mutabani we nti, "Ogufunye otya amangu bw'otyo?" N'amuddamu nti, "MUKAMA Katonda wo ampadde omukisa."
- ²¹Awo Isaaka n'agamba mutabani we nti, "Sembera wendi mutabani, nkukwateko, ntegeerere ddala nga ggwe mutabani wange Esawu."

²²Yakobo kwe kusembera awali Isaaka kitaawe. Bwe yamuwlira n'agamba nti, "Eddoboozi lya Yakobo naye emikono gya Esawu."

²³N'atamutegeera kubanga emikono gye gyaliko obwoya ng'egya Esawu muganda we, kwe kumuwa omukisa.

²⁴Isaaka n'amubuuza nti, "Ddala gwe mwana wange Esawu?" N'amuddamu nti, "Ye nze."

²⁵N'alyoka amugamba nti, "Kale gundeetera, ndye ku muyiggo gwa mutabani wange, nkusabire omukisa." N'alyoka agumuleetera, n'alya era n'amuleetera n'envinnyo n'anywa.

²⁶Awo kitaawe Isaaka n'amugamba nti, "Sembera onnywegere mwana wange."

²⁷N'amusemberera n'amunywegera, kitaawe n'awulira akaloosa ke ngoye ze n'amuwa omukisa ng'agamba nti, "Wulira akaloosa k'omwana wange, kali ng'akaloosa k'ennimiro MUKAMA gy'awadde omukisa.

²⁸Katonda akuwe omusulo ogw'omu ggulu, n'obugimu bw'ensi, eraakuwe emmere ey'empeke nnyingi n'envinnyo.

²⁹Abantu bakuweerezenga, n'amawanga gakuvuunamirenga. Fuganga baganda bo, ne batabani ba nnyoko bakuvuunamirenga. Akolimirwe oyo anaakukolimiranga era aweebwenga omukisa oyo anaakusabiranga omukisa."

Esawu Agwa mu Lukwe

³⁰Amangu ddala nga Isaaka yakamala okuwa Yakobo omukisa, era nga Yakobo tannava wali Isaaka kitaabwe, Esawu n'atuuka ng'ava okuyingga.

³¹Era naye n'ateekateeka emmere ey'akawoowo n'agireetera kitaawe. N'agamba kitaawe nti, "Kitange golokoka olye ku muyiggo gw'omwana wo olyoke onsabire omukisa."

³²Kitaawe Isaaka n'amubuuza nti, "Gwe ani?" Kwe kumuddamu nti, "Nze omwana wo omubereberyeye Esawu."

³³Olwo Isaaka n'akankana nnyo n'abuuza nti, "Ani oyo ayizze omuyiggo n'agundeetera ne ngulya ne ngumalawo nga tonnajja ne mmusabira omukisa? Era ddala ajja kuweebwa omukisa."

³⁴Awo Esawu bwe yawulira ebigambo bya kitaawe ebyo, n'atulika n'akaaba nnyo nnyini, n'agamba kitaawe nti, "Nange mpa omukisa, ayi kitange."

³⁵Naye n'amuddamu nti, "Muganda wo azze n'animba era akututteko omukisa gwo."

³⁶Esawu n'ayogera nti, "Teyatumibwa linnya lye Yakobo? Laba, anyingiridde emirundi gino gyombi; yanziggyako eby'obukulu bwange, ate kaakano

antutteko n'omukisa gwange." Kwe kubuuza kitaawe nti, "Tondekeddeewo mukisa n'akatono?"

³⁷ Isaaka n'addamu Esawu nti, "Laba, mmufudde mukama wo, era mmuwadde baganda be bona babe baweereza be, era mmusabidde abe n'emmere ey'empeke wamu n'envinnyo nga bingi ddala. Kale nnaakukolera ki mwana wange?"

³⁸ Esawu n'abuuza kitaawe nti, "Tolinaawo mukisa na gumu kitange? Nange mpa omukisa, ayi kitange." Bw'atyo Esawu n'ayimusa eddobozi lye n'akaaba.

³⁹ Awo Isaaka kitaawe n'amuddamu nti, "Laba, onooberanga mu nsi enkalu, era toofunenga musulo guva waggulu mu ggulu.

⁴⁰ Ekitala kyo kye kinaakukuumanga, era onooweerezanga muganda wo. Naye bw'olimwesimattulako, oliba weefunidde eddembe."

Enteekateeka ya Lebbeeka

⁴¹ Awo Esawu n'akyawa muganda we Yakobo ng'amulanga omukisa kitaabwe gwe yamuwa. Esawu n'alyoka ayogera nti, "Ennaku ez'okukungubagira kitange zinaatera okutuuka. Bwe zirituuka, muganda wange Yakobo nga mutta."

⁴² Kyokka Lebbeeka n'atuusibwako ebigambo bya Esawu mutabani we omukulu; kwe kutumya Yakobo mutabani we omuto, n'amugamba nti, "Laba, Esawu muganda wo ateekekateeka okukutta.

⁴³ Kale nno kaakano mwana wange, okole nga bwe nkugamba: Golokoka oddukire ewa, mwannyinaze Labbaani ali mu Kalani,

⁴⁴ obeereko eyo, okutuusa obusungu bwa muganda wo nga bukkakkanye.

⁴⁵ Obusungu bwe buliba bumuweddeko, nga yeerabidde ky'omukoze, ne ndyoka ntuma ne bakunona. Kale lwaki mbafirwa mwembi ku lunaku olumu?"

⁴⁶ Lebbeeka n'alyoka ategéeza Isaaka nti, "Obulamu bwange bwetamiddwa olw'abakazi bano Abakiiti. Singa Yakobo awasa omu ku bakazi Abakiiti, nga bano, omu ku bakazi aba muno, obulamu bwange buliba tebukyangasa."

Olubereberye 28

Isaaka Asindika Yakobo eri Labbaani

¹ Awo Isaaka n'ayita Yakobo n'amuwa omukisa, n'amukuutira nti, "Towasanga, wadde omu ku bakazi Abakanani.

² Golokoka ogende e Padanalaamu mu nnyumba ya Besweri kitaawe wa nnyoko, ofune omukazi omu ku bawala ba Labbaani mwannyina nnyoko.

³ Katonda Ayinzabyonna akuwe omukisa, akwaze, weeyongere, era obeerenga n'abantu ab'enjawulo bangi.

⁴Akuwe emikisa gya Ibulayimu, era agiwe n'ezzadde lyo, olyoke ofune ensi mw'otambulira, Katonda gye yawa Ibulayimu."

⁵Bw'atyo Isaaka n'asiibula Yakobo, Yakobo n'agenda e Padanalaamu ewa Labbaani, mutabani wa Besweri Omusuuli mwannyina Lebbeeka, nnyina wa Esawu ne Yakobo.

⁶Esawu n'ategeera nga Isaaka awadde Yakobo omukisa, era ng'amusindise e Padanalaamu afuneyo omukazi, era nga bwe yamuwa omukisa yamukuutira nti, "Towasanga ku bakazi Abakanani,"

⁷era nga Yakobo agondedde kitaawe ne nnyina n'agenda e Padanalaamu.

⁸Awo n'ategeera nti abakazi Abakanani tebasanyusa kitaawe Isaaka.

⁹Esawu n'agenda eri Isimayiri n'awasa omukazi erinnya lye Makalasi, muwala wa Isimayiri, mutabani wa Ibulayimu, mwannyina wa Nebayoosi, n'amwongera ku bakazi be yalina.

Ekirooto kya Yakobo ng'ali e Beseri

¹⁰Awo Yakobo n'ava e Beeruseba n'ayolekera Kalani. N'atuuka mu kifo ekimu, n'asula awo ekiro ekyo, kubanga obudde bwali buzibye.

¹¹N'addira erimu ku mayinja agaali mu kifo ekyo, n'alyezizika ne yeebaka.

¹²N'aloota ng'alaba eddaala eggwanvu nga liva ku nsi okutuuka mu ggulu, era nga bamalayika ba Katonda balikkirako era nga balinnyirako,

¹³era nga MUKAMA atudde waggulu waalyo. MUKAMA n'agamba Yakobo nti, "Nze MUKAMA Katonda wa Ibulayimu jjajjaawo, era Katonda wa Isaaka; ensi kw'ogalamidde ndigikuwa ggwe n'ezzadde lyo.

¹⁴Era ezzadde lyo liriba ng'enfuufu y'oku nsi, era olibuna obugwanjuba n'obuvanjuba era n'obukiikkono n'obukiikkaddyo. Mu ggwe ne mu zadde lyo amawanga gonna ag'oku nsi mwe galiweerwa omukisa.

¹⁵Laba ndi wamu naawe, era nnaakukuumanga buli gy'onoogendanga yonna, era ndikukomyawo mu nsi eno, kubanga sirikuleka okutuusa nga mmaze okukola ekyo kye nkugambye."

¹⁶Awo Yakobo n'ava mu tulo n'agamba nti, "Mazima ddala MUKAMA ali mu kifo kino, nze mbadde ssimanyi."

¹⁷N'atyia nnyo, n'agamba nti, "Ekifo kino nga kyantiisa! Ekifo kino ye nnyumba ya Katonda, era guno gwe mulyango gw'eggulu."

¹⁸Awo Yakobo n'agolokoka ku makya, n'addira ejinja lye yali yeezizise n'alisimba okuba empagi n'ayiwa amafuta ku mutwe gwalyo.

¹⁹Ekifo ekyo n'akituma Beseri, songa ekibuga ekyo kyayitbwanga Luzi.

²⁰ Awo Yakobo ne yeerayirira ng'agamba nti, "Katonda bw'alibeera nange, n'ankuumma mu lugendo luno lwe ndiko, n'ampa emmere okulya era n'ebyokwambala ne nkomawo mirembe mu nnyumba ya kitange,

²¹ olwo MUKAMA n'aba Katonda wange.

²² Era ejinja lino lye nsimbye okuba empagi liriba nnyumba ya Katonda, era n'ebyo byonna by'ompa ndikuwaako ekimu eky'ekkumi."

Olubereberye 29

Olugendo Iwa Yakobo

¹ Awo Yakobo ne yeeyongerayo mu lugendo lwe, n'atuuka mu nsi y'abantu b'ebuvanjuba.

² Bwe yatunula n'alaba oluzzi mu nnimiro, ng'ebisibo bisatu eby'endiga zigalamidde awo ku lwo, kubanga awo we zaanywesezebwanga. Ejinja eryasaanikiranga ku mumwa gw'oluzzi olwo lyali ddene,

³ era ebisibo bwe byakuñjaananga, abasumba ne balyoka baliyiringisa okuliggya ku mumwa gw'oluzzi ne banywesa endiga; bwe zaamalanga ne balizzaako.

⁴ Awo Yakobo n'abuuza abasumba nti, "Abooluganda muva wa?" Ne bamuddamu nti, "Tuva Kalani."

⁵ Kwe kubabuuza nti, "Labbaani mutabani wa Nakoli mumumanyi?" Ne bamuddamu nti, "Tumumanyi."

⁶ N'abuuza nti, "Ali bulungi?" Ne baddamu nti, "Ali bulungi, era laba Laakeeri muwala we wuuli ajja n'endiga!"

⁷ N'abagamba nti, "Mulabe, obudde bukyali bwa ttuntu, ekiseera tekinnatuuka okukuñjaanya ensolo awamu, muzinywese mulyoke mugende muzirunde."

⁸ Bo kwe kumuddamu nti, "Ekyo tetusobola kukikola ng'ebisibo byonna tebinnakuñjaanyizibwa, nga n'ejinja terinaggyibwa ku mumwa gw'oluzzi, olwo ne tunywesa endiga."

Yakobo Asisinkana Laakeeri

⁹ Yakobo bwe yali akyayogera nabo, Laakeeri n'atuuka n'endiga za kitaawe. Kubanga ye yali azirunda.

¹⁰ Yakobo bwe yalaba Laakeeri, muwala wa Labbaani, mwannyina nnyina, n'endiga za Labbaani, n'agenda n'ayiringisa ejinja okuva ku mumwa gw'oluzzi n'anywesa endiga za Labbaani.

¹¹ Yakobo n'alyoka agwa Laakeeri mu kifuba, n'ayimusa eddoboozi n'akaaba.

¹² Yakobo n'alyoka ategéeza Laakeeri nti, waluganda ne kitaawe, era ye mutabani wa Lebbeeka. Laakeeri kwe kudduka n'ategéeza kitaawe.

¹³Awo Labbaani bwe yawulira ebya Yakobo, mutabani wa mwannyina, n'adduka okumusisinkana, n'amugwa mu kifuba n'amulamusa bulungi, n'amutwala mu nnyumba ye. Yakobo n'ategeeza Labbaani byonna ebyaliwo.

¹⁴Labbaani n'agamba nti, "Mazima oli ggumba lyange, era nnyama ya mubiri gwange! N'abeera naye omwezi mulamba."

¹⁵Awo Labbaani n'agamba Yakobo nti, "Olw'okubanga oli waluganda ky'onoova ompeerereza obwerefere? Ntegeeza empeera yo bw'eneebanga."

¹⁶Labbaani yalina bawala be babiri; erinnya ly'omukulu nga ye Leeya ne ly'omuto nga ye Laakeeri.

¹⁷Leeya yali manafu, kyokka ye Laakeeri nga mulungi era nga w'amaanyi.

¹⁸Yakobo yayagala Laakeeri, era n'agamba Labbaani nti, "Nzija kukuweereza emyaka musanvu olwa muwala wo omuto Laakeeri."

¹⁹Labbaani kwe kumuddamu nti, "Kituufu okumuwa ggwe ne ssimuwa musajja mulala yenna. Beera nange."

²⁰Bw'atyo Yakobo n'akolerera Laakeeri emyaka musanvu, naye ne giba ng'ennaku obunaku gy'ali kubanga yamwagala nnyo.

²¹Awo Yakobo n'agamba Labbaani nti, "Kale mpa mukazi wange, mmuwale, kubanga ekiseera kye twalagaana nkimazeeko."

²²Labbaani kwe kukuŋjaanya abantu b'ekifo ekyo, n'akola embaga.

²³Naye mu kiro Labbaani n'atwala muwala we Leeya n'amuwa Yakobo okumutwala okuba mukazi we.

²⁴Labbaani yali awadde Leeya Zirupa amuweerezenga.

²⁵Bwe bwakya, Yakobo n'alaba nga bamuwadde Leeya. Kwe kugamba Labbaani nti, "Onkoze ki kino? Saakuweereza lwa Laakeeri? Kale lwaki onimbye?"

²⁶Labbaani n'amuddamu nti, "Mu nsi yaffe tekiri mu buwangwa bwaffe, omuto okusooka omukulu okufumbirwa.

²⁷Sooka omale n'ono wiiki eno emu, n'oli tugenda kumukuwa; kyokka olimukolerera okumala emyaka emirala musanvu."

²⁸Ekyo Yakobo n'akikkiriza, n'amalako wiiki emu eyo, Labbaani n'alyoka amuwa Laakeeri muwala we okuba mukazi we.

²⁹Labbaani n'awa Laakeeri Biira amuweerezenga.

³⁰Yakobo n'atwala Laakeeri n'aba mukazi we; n'ayagala Laakeeri okusinga Leeya, n'aweereza Labbaani emyaka egyo emirala omusanvu.

Abaana ba Yakobo

³¹ MUKAMA bwe yalaba nga Leeya akyayibbwa n'aggula olubuto lwe. Laakeeri ye yali mugumba.

³²Leeya n'aba olubuto, n'azaala omwana wabulenzi. N'amutuumma erinnya Lewubeeni, ng'agamba nti, "Kubanga MUKAMA alabye okubonyaabonyezebwa kwange: ddala baze ananjagala."

³³ N'aba olubuto olulala, n'azaala omwana mulenzi, n'agamba nti, "Kubanga MUKAMA alabye nga ndi mukyawe, kyavudde ampa omwana owoobulenzi omulala; n'amutuumma erinnya Simyoni."

³⁴Ate n'aba olubuto n'azaala omwana mulenzi, n'agamba nti, "Kale kaakano baze ajja kuba bumu nange, kubanga mmuzaalidde abaana abalenzi basatu." Omwana kyeyava atuumwa Leevi.

³⁵ Era Leeya n'aba olubuto n'azaala omwana wabulenzi, n'agamba nti, "Ku luno nzija kutendereza MUKAMA," kyeyava amutuumma Yuda; n'alekayo okuzaala.

Olubereberye 30

Batabani ba Biira ne Zirupa

¹ Laakeeri bwe yalaba nga tazaalidde Yakobo baana, n'akwatirwa muganda we obuggyga; n'agamba Yakobo nti, "Mpa abaana oba si ekyo nzija kufa!"

² Obusungu bwa Yakobo ne bubuubuukira Laakeeri, n'amugamba nti, "Nze Katonda akummye okuzaala?"

³ Laakeeri kwe kumwanukula nti, "Omuweereza wange Biira wuuno, weetabe naye azaalire ku maviivi gange, ndyoke nfune abaana nga mpita mu ye."

⁴N'alyoka amuwa omuweereza we Biira okuba mukazi we, Yakobo ne yeetaba naye.

⁵Biira n'aba olubuto n'azaalira Yakobo omwana owoobulenzi.

⁶ Awo Laakeeri n'agamba nti, "Katonda ankoze bulungi, n'awulira eddoboozi lyange, n'ampa omwana owoobulenzi." Kyeyava amutuumma Ddaani.

⁷Biira omuweereza omukazi owa Laakeeri n'aba olubuto ate, n'azaalira Yakobo omwana owoobulenzi owookubiri.

⁸Laakeeri n'alyoka agamba nti, "Nnwanye ne muganda wange okulwana okw'amaanyi era mpangudde;" omwana kyeyava amutuumma Nafutaali.

⁹ Awo Leeya bwe yalaba akomye okuzaala, n'addira omuweereza we Zirupa n'amuwa Yakobo abe mukazi we.

¹⁰Zirupa omuweereza wa Leeya n'alyoka azaalira Yakobo omwana owoobulenzi;

¹¹Leeya n'agamba nti, "Guno mukisa gwennyini!" Kwe kumutuumma Gaadi.

¹²Ate Zirupa omuweereza wa Leeya n'azaalira Yakobo omwana owoobulenzi owookubiri.

¹³Leeya n'agamba nti, "Neesiimye! Kubanga abakazi banampita wa mukisa;" kyeyava amutuumma Aseri.

¹⁴Lumu mu biseera eby'amakungula g'enjaano Lewubeeni n'agenda mu nnimiro, n'anoga amadudayimu, n'agaleetera nnyina Leeya. Laakeeri n'agamba Leeya nti, "Nkusaba ompe ku madudayimu g'omwana wo."

¹⁵Kyokka ye n'amuddamu nti, "Okiyita kitono ggwe okunnyagako baze? Ate otwale n'amadudayimu g'omwana wange?" Laakeeri n'amugamba nti, "Kale anaaba naawe ekiro kino olw'amadudayimu g'omwana wo."

¹⁶Yakobo bwe yakomawo okuva mu nnimiro akawungeezi, Leeya n'afuluma okumusisinkana, n'amugamba nti, "Weetabe nange, kubanga nkuguze n'amadudayimu g'omwana wange." Kwe kwetaba naye.

¹⁷Katonda n'awulira Leeya, n'aba olubuto, n'azaalira Yakobo omwana owoobulenzi owookutaano.

¹⁸Leeya n'agamba nti, "Katonda ansasudde empeera yange, kubanga nawa baze, omuweereza wange," omwana kyeyava amutuumma Isakaali.

¹⁹Leeya n'aba olubuto ate, n'azaalira Yakobo Omwana owoobulenzi ow'omukaaga.

²⁰Leeya kwe kugamba nti, "Katonda ampadde ekirabo, kaakano baze anaabanga nange, kubanga muzaalidde abaana aboobulenzi mukaaga." Ow'omukaaga kyeyava amutuumma Zebbulooni.

²¹Oluvannyuma n'azaala omwana owoobuwala, n'amutuumma Dina.

²²Ate Katonda n'ajjukira Laakeeri, n'amuwlira n'aggula olubuto lwe.

²³N'aba olubuto n'azaalira Yakobo omwana owoobulenzi, Laakeeri n'agamba nti, "Katonda anziggyeeko okunyoomebwa;"

²⁴n'amutuumma Yusufu, ng'agamba nti, "MUKAMA annyongere omwana omulenzi."

Yakobo Ateesa ne Labbaani

²⁵Laakeeri bwe yazaala Yusufu, Yakobo n'agamba Labbaani nti, "Nsiibula, njende ewaffe mu nsi yaffe.

²⁶Mpa bakazi bange n'abaana bange, be nkuweererezza, ondeke njende: kubanga omanyi okuweereza kwe nkuweerezza."

²⁷ Labbaani kwe kumuddamu nti, “Nga bwe nfunye omukisa mu ggwe, nkusaba oleme kuva wano, kubanga ndabye nga MUKAMA yampa omukisa ku bubwo.

²⁸ Ntegeeza empeera yo nange ngikuwe.”

²⁹ Yakobo n'amuddamu nti, “Ggwe kennyini omanyi nti nkuweerezza era n'ensolo zo nga nzaazizza.

³⁰ Kubanga walina ntono nga sinnajja, naye zeeyongedde nnyo; era MUKAMA n'akuwa omukisa buli gye n'addanga. Naye kaakano nze ndikolera ddi ennyumba yange?”

³¹ Labbaani kwe ku mubuuza nti, “Nkuwe ki?” Yakobo n'amuddamu nti, “Tojja kubaako ky'ompa, okuggyako okunkolera kino, ndyoke nneeyongere okulunda ekisibo kyo:

³² nzikiriza mpite mu kisibo kyo leero, nziggyemu buli ndiga enkuluzza eza bugondo n'ezabitanga, n'endiga ento enzirugavu, n'embuzi eza bugondogondo n'ezabitanga mu mbuzi, era ezo ze zinaabeera empeera yange.

³³ Kale oluvannyuma lwa byonna obutuukirivu bwange bulimpolereza bw'olijja okukebera bw'onsasudde. Bw'olisanga embuzi yonna etali ya bugondogondo n'eya bitanga, oba endiga yonna enkazi enzirugavu eyo eribalibwa nti nnagikubbako.”

³⁴ Labbaani n'amuddamu nti, “Ekyo kirungi. Kale kibeere bwe kityo nga bw'ogambye.”

³⁵ Naye ekiro ekyo Labbaani n'aggya mu kisibo embuzi ennume eza biwuuga n'ezabitanga, n'embuzi enkazi zonna eza bugondogondo n'ezabitanga, buli eyalina ebbala eryeru, na buli ndiga nzirugavu n'aziwa abaana be bazirunde;

³⁶ nga beesudde ebbanga eritambulirwa ennaku ssatu okuva ku ye okutuuka ku Yakobo. Yakobo ye n'alunda ezo ezaasigalawo ku kisibo kya Labbaani.

³⁷ Awo Yakobo n'addira obuti bw'omulibine omubisi, n'obw'omusakedi, n'obw'omwalamoni n'abususumbulako ebikuta mu bukuubo.

³⁸ N'asimba obuti bw'asasambudde mu maaso g'ebisibo ku by'esero ensolo we zanyweranga.

³⁹ Bwe zajjanga okunywa ne ziwalkiranga mu maaso g'obuti obwo, ne zizaalanga eza biwuuga, n'ezabitanga n'ezabitanga.

⁴⁰ Yakobo n'ayawula ento ne zibeera zokka. Naye endala n'azitunuza okwolekera eza biwuuga n'enzirugavu eza Labbaani. Bw'atyo ne yekolera ebisibo eby'enjawulo, n'atagatta zize na za Labbaani.

⁴¹Buli nsolo enkazi ez'amaanyi bwe zaabanga zigenda okuwaka nga Yakobo ateka ku by'esero obuti bwe buli okwolekera ensolo ezigenda okuwaka, ziwakire okumpi nabwo.

⁴²Naye ku nsolo ennafu teyabutekangawo. Olwo ensolo ennafu ne zibanga za Labbaani, zo ez'amaanyi ne zibanga za Yakobo.

⁴³Mu ngeri eyo Yakobo n'agenda ng'agaggawalira ddala nnyo, n'afuna ebisibo bingi ddala, wamu n'abawereza abakazi n'abasajja; era n'afuna n'enjamira n'embalaasi.

Olubereberye 31

Yakobo Ateekateeka Okudda Ewaabwe

¹Awo Yakobo n'awulira nga batabani ba Labbaani bagamba nti, "Yakobo atutte ebyo byonna ebyali ebya kitaffe, era mu byali ebya kitaffe mw'aggye obugagga buno bwonna."

²Era Yakobo n'alaba nga Labbaani takyamufaako nga bwe yali olubereberye.

³Awo MUKAMA n'agamba Yakobo nti, "Ddayo mu nsi ya bajjajaabo, mu bantu bo, era nnaabeeranga naawe."

⁴Awo Yakobo kwe kutumya Laakeeri ne Leeya ku ttale gye baalundiranga ekisibo.

⁵Bwe baatuuka n'abagamba nti, "Ndaba nga kitammwe takyanfaako nga bwe yakolanga olubereberye, naye Katonda wa kitange abadde nange.

⁶Mumanyi bwe naweerea kitammwe n'amaanyi gange gonna.

⁷Kyokka ye kitammwe yandyazaamanya n'akyusa empeera yange n'agikendeeza emirundi kkumi; wabula Katonda n'atamukkiriza kundeetako kabi.

⁸Kale bwe yagambanga nti, 'Eza bugondogondo ze zinaabanga ezizo ekisibo kyonna ne kizaala eza bugondogondo, era bwe yayogeranga nti eza biwuuga ze zinaabanga ezizo ekisibo kyonna ne kizaala eza biwuuga.'

⁹Bw'atyo Katonda aggye ku kitammwe ensolo ze n'azimpa.

¹⁰"Mu kiseera ensolo mwe ziwakira, naloota nga nnyimusa amaaso gange nga ndaba embuzi ennume nga zirinyira enkazi eza biwuuga n'eza bugondogondo n'eza kiweewoweewo.

¹¹Ne mu kirooto ekkyo malayika wa Katonda n'ampita nti, 'Yakobo.' Ne nziramu nti, 'Nze nzuuno.'

¹²N'anjamba nti, 'Yimusa amaaso go olabe, embuzi zonna ezirinnyira ekisibo bwe ziri eza biwuuga, eza bugondogondo n'eza kiweewoweewo; kubanga ndabye ebyo byonna Labbaani by'akukoze.

¹³Nze Katonda w'e Beseri gye wafukira amafuta ku jjinja lye wasimba, gye weeyamira obwewayamo. Kale kaakano golokoka ove mu nsi muno, oddeyo mu nsi gye wazaalirwa.'

¹⁴Awo Laakeeri ne Leeya ne bamuddamu nti, "Ekyo kituufu kubanga tetulina mugabo, mu busika bwa kitaffe.

¹⁵Era atutwala ng'abatali ba mu nnyumba ye. Kubanga yatutunda, era ebyatuvaamu bya badde akozesa.

¹⁶Eby'obugagga byonna Katonda bya muggyeko, bifuisse byaffe n'abaana baffe. Kale kaakano buli Katonda ky'akugambye okukola kikole."

Yakobo Adduka Okuva ku Labbaani

¹⁷Awo Yakobo n'agolokoka, n'ateeka batabani be ne bakazi be ku ηηjamira;

¹⁸n'agoba ente ze zonna, n'ebisolo bye ebirala byonna bye yafuna: obugagga bwe bwonna bwe yafunira mu Padanalaamu, agende mu nsi ya Kanani eri kitaawe Isaaka.

¹⁹Labbaani yali agenze kussala byoya ku ndiga ze, Laakeeri n'abba bakatonda b'omu nnyumba ya Labbaani.

²⁰Yakobo n'adduka ku Labbaani Omusuuli, era teyamutegeeza nti amuvaako agende.

²¹Yadduka ne byonna bye yalina, n'agolokoka n'asomoka omugga Fulaati, n'ayolekera Giriyaadi ensi ey'ensozi.

²²Ku lunaku olwokusatu Labbaani bwe yategeeezwa nti Yakobo yamuddukako,

²³Labbaani n'atwala basajja be, n'awondera Yakobo okumala ennaku musanvu, mu Giriyaadi ensi ey'ensozi.

²⁴Naye Katonda n'ajjira Labbaani, Omusuuli, mu kirooto, ekiro, n'amugamba nti, "Weegendereze, toyogera na Yakobo kigambo kyonna, ekirungi oba ekibi."

²⁵Awo Labbaani n'atuuka ku Yakobo, eyali akubye eweema ye mu nsi ey'ensozi, Labbaani ne basajja be nabo ne basiisira mu nsi ey'ensozi eya Giriyaadi.

²⁶Labbaani n'agamba Yakobo nti, "Okoze ki, okuntwalako bawala bange mu kyama ne babanga abanyage?

²⁷Kiki ekyakuddusa mu kyama nga tombuuliddeko, ndyoke, nkusibule mu kinyumu: n'ennyimba, n'ebitaasa, n'ennanga.

²⁸Kale lwaki tewajjanya na kugwa mu kifuba bazzukulu bange ne bawala bange okubasiibula? Ekyo kye wakola si kya buntubulamu.

²⁹Mbadde nsobola okukukola akabi, wabula Katonda wa kitaawo yayogedde nange ekiro kino, n'aŋŋamba nti, ‘Weegendereze oleme okwogera ne Yakobo ekigambo kyonna, ekirungi oba ekibi.’

³⁰Ne kaakano ogenda kubanga wayagala nnyo okuddayo mu nnyumba ya kitaawo; naye wabbira ki bakatonda bange?”

³¹Yakobo n'addamu Labbaani nti, “Natya, kubanga n'alowooza nti oyinza okunnyagako bawala bo.

³²Naye gw'onoosanga ne bakatonda bo taabe mulamu; waakufa. Mu maaso ga bantu baffe bano, ndaga ekikyo kye nnina okitwale.” Yakobo teyamanya nti Laakeeri abbye bakatonda ba Labbaani.

³³Labbaani n'ayingira mu weema ya Yakobo ne mu weema ya Leeya, ne mu weema ey'abaweereza bombi; naye n'atalaba bakatonda be. N'ava mu weema ya Leeya, n'ayingira mu ya Laakeeri.

³⁴Laakeeri yali atutte bakatonda ba Labbaani, n'abateeka ku matandiiko g'enŋjamira, n'abatuulako. Labbaani n'ayaza weema yonna naye n'atabalabamu.

³⁵Laakeeri n'agamba kitaawe nti, “Mukama wange aleme okusunguwala kubanga sisobola kuyimirira w'oli kubanga ndi mu mpisa y'abakazi.” Labbaani n'anoonya naye n'atalaba bakatonda be.

³⁶Awo Yakobo n'alyoka ajjula obusungu ne yeejuumulira Labbaani, n'amugamba nti, “Nzizizza musango ki? Kibi ki kye nnina, olyoke ongoberere n'obukaali butyo?

³⁷Bw'oyazizza mu bintu byange, kikyo ki ky'osanzemu? Kiteeke wano wakati mu maaso g'abantu bange n'ababo, balyoke basalewo omusobya ku fembi.

³⁸“Emyaka gino gyonna amakumi abiri gye mbadde naawe, endiga zo ne mbuzi zo tezisowolanga, era siryanga ndiga mu kisibo kyo.

³⁹Eyo eyataagulwanga ensolo enkambwe ey'omu nsiko saagikuleeteranga, nze nafiirwanga, waginsabanga, wadde eyo eyabbibwanga ekiro oba emisana nayo yabalirwanga ku nze.

⁴⁰Ekyo ne kindeetera essana okunzigwerangako, n'okubeeranga mu mpewo ekiro, n'otulo ne tumbula.

⁴¹Emyaka gino amakumi abiri mbadde mu nnyumba yo; n'akuweereza emyaka kkumi n'ena olwa bawala bo bombi, ate ne nkuweereza emyaka mukaaga mu kisibo kyo, kyokka okyusizza empeera yange emirundi kkumi.

⁴²Singa Katonda wa kitange, era Katonda wa Ibulayimu, Katonda Entiisa ya Isaaka teyali ku lwange, mazima ddala wandinsiibudde ngalo nsa! Katonda yalabye okubonaabona n'okutegana kwange, kyeyavudde akunenya ekiro."

Endagaano wakati wa Yakobo ne Labbaani

⁴³Awo Labbaani n'addamu Yakobo nti, "Bano bawala bange, n'abaana baabwe bazzukulu bange, n'ebisibo, bisibo byange era ne byonna byolaba byange. Naye bawala bange n'abaana baabwe be bazadde, nnyinza kubakolera ki leero?

⁴⁴Kale jjangu tukole endagaano gwe nange, ebeere omujulirwa wakati wo nange."

⁴⁵Awo Yakobo n'addiria ejinja n'alisimba ng'empagi.

⁴⁶N'agamba abantu be nti, "Mukunjjaanye amayinja." Ne bagakunjjaanya ne bagatumma entuumo, ne baliira awo awali entuumo.

⁴⁷Labbaani entuumu n'agiyita Yegalusakadusa, ye Yakobo n'agiyita Galeedi.

⁴⁸Labbaani n'agamba nti, "Entuumo eno ye mujulirwa wakati wo nange leero." Kyeyava agiyita Galeedi,

⁴⁹n'empagi n'agiyita Mizupa, kubanga yayogera nti, "MUKAMA atunulenga wakati wo nange, nga twawukanye omu okuva ku munne.

⁵⁰Bw'oliyisa obubi bawala bange, oba bw'olibawasizaako abakazi abalala, newaakubadde nga tewali muntu n'omu wakati waffe, ojjukire nti Katonda ye mujulirwa wakati wo nange."

⁵¹Awo Labbaani n'agamba Yakobo nti, "Laba entuumu eno n'empagi bye ntadde wakati wo nange.

⁵²Entuumu eno ye mujulirwa era n'empagi nayo mujulirwa nga nze sirisukka ntuumu eno na mpagi eno okukukola akabi.

⁵³Katonda wa Ibulayimu, era Katonda wa Nakoli, Katonda wa kitaabwe atulamule." Yakobo naye n'alayirira bw'atyo Katonda, Entiisa ya kitaawe Isaaka.

⁵⁴Yakobo n'awaayo ssaddaaka ku lusozi; n'ayita abantu be okulya; ne balya, ne basula ku lusozi ekiro ekyo.

⁵⁵Ku makya ennyo Labbaani n'agolokoka n'asiibula bazzukulu be ne bawala be ng'abagwa mu kifuba; n'abawa omukisa, n'addayo ewuwe.

Olubereberye 32

Yakobo Yeeteekateeka Okusisinkana Esawu

¹Awo Yakobo n'akwata ekkubo lye, bamalayika ba Katonda ne bamusisinkana.

²Yakobo bwe yabalaba n'agamba nti, "Lino ggye lya Katonda." Ekifo ekyo n'alyoka akituumma Makanayimu.

³Awo Yakobo n'atuma ababaka eri Esawu muganda we, mu kitundu kya Seyiri mu nsi ya Edomu.

⁴N'abagamba nti, "Mugambe mukama wange Esawu nti, 'Omuddu wo Yakobo abadde ne Labbaani okutuusa kaakano,

⁵alina ente, n'endogoyi, n'endiga era n'embuzi, abaweereza abakazi era n'abasajja. Kaakano aweerezza mukama we Esawu obubaka buno afune okusaasirwa mu maaso ge."

⁶Ababaka bwe baakomawo eri Yakobo ne bamugamba nti, "Twatuuka ewa muganda wo Esawu era ajja okukusisinkana ng'alina abasajja ebikumi bina."

⁷Olwo Yakobo n'atandika okutiira ddala, n'asoberwa. N'ayawulamuabantu be yali nabo, n'ayawulamu n'endiga, ebisibo bye yalina ne mu ηηjamira, ebibinja bibiri,

⁸ng'alowooza nti, "Esawu bw'anaatuuka ku kibinja ekisooka n'akizikiriza, kale ekibinja ekisigaddewo kinadduka."

⁹Awo Yakobo n'agamba nti, "Ayi Katonda wa jjajjange Ibulayimu, era Katonda wa kitange Isaaka, Ayi MUKAMA eyajjamba nti, 'Ddayo mu nsi yammwe, mu bantu bo, nange nnaakugaggawazanga,'

¹⁰sisaanira wadde akatundu akatono ak'okwagala kwo okutaggwaawo, wadde obwesigwa bwonna bw'olaze omuddu wo. Kubanga nasomoka omugga guno Yoludaani nga nnina muggobuggo; naye kaakano nfuuse ebibinja bibiri.

¹¹Nkusaba omponye mu mukono gwa muganda wange, Esawu, kubanga mmutyta, talwa kujja n'atutta ffenna awamu n'abakazi n'abaana.

¹²Naye waŋjamba nti, 'Nnaakugaggawazanga, era abalikuvaamu baliba ng'omusenyu gw'ennyanja, ogutabalika obungi bwabwe.'"

Ekirabo kya Yakobo eri Esawu

¹³N'alyoka asula eyo ekiro ekyo, n'aggya ekirabo kya muganda we Esawu ku ebyo bye yalina:

¹⁴embuzi enkazi ebikumi bibiri, embuzi ennume amakumi abiri, endiga enkazi ebikumi bibiri, endiga ennume amakumi abiri,

¹⁵eŋŋamira enkazi amakumi asatu n'obwana bwazo, ente enkazi amakumi ana n'ennume kkumi, n'endogoyi enkazi amakumi abiri, n'endogoyi ennume kkumi.

¹⁶N'azikwasa abaddu be, buli kisibo ng'akyawudde, n'agamba abaddu be nti, "Kale munkulemberemu, mulekeewo ebbanga wakati wa buli kisibo."

¹⁷N'ala gira eyakulembera nti, "Esawu, muganda wange bw'anaakusisinkana n'akubuuza nti, 'Oli muntu w'ani? Ogenda wa? Na bino by'olina by'ani?"

¹⁸N'olyoka omuddamu nti, 'Bya muddu wo Yakobo, birabo by'aweerezza mukama wange Esawu, era tali wala naffe.' "

¹⁹Bw'atyo era n'ala gira n'owokubiri n'wookusatu ne bona abagobereranga ebisibo nti, "Nammwe mwogere ebigambo bye bimu bwe musisinkana Esawu,

²⁰era mugambe nti, 'Omuddu wo Yakobo tali wala naffe.' Kubanga Yakobo yallowooza nti, "Nnaamuwooyawooya n'ekirabo ekinkulembedde, n'oluvannyuma nnaalaba amaaso ge, osanga tankole kabi."

²¹Ekirabo kyekyava kimukulemberamu, ye n'asula mu kifo we yali ekiro ekyo.

Yakobo Amegganira e Penieri

²²Mu kiro ekkyo Yakobo n'agolokoka n'awala bakazi be bombi, n'abawereza be abakazi ababiri, n'abaana be ekkumi n'omu n'asomokera e Yaboki.

²³N'abatwala ne byonna bye yalina n'abasomosa omugga.

²⁴Ye Yakobo n'asigala yekka, omusajja n'ameggana naye okutuusa obudde okukya.

²⁵Omusajja bwe yalaba nga taasobole Yakobo, n'akoma ku kinywa ky'ekisambi kye. Yakobo n'atandika okuwenyera nga bw'ameggana n'amusajja.

²⁶Omusajja n'alyoka agamba Yakobo nti, "Ndeka njende kubanga obudde bugenda kukya." Naye Yakobo n'ayogera nti, "Sija kukuta nga tompadde mukisa."

²⁷Omusajja n'amubuuza nti, "Erinnya lyo gw'ani?" N'amuddamu nti, "Yakobo."

²⁸Awo n'amugamba nti, "Tokyaddayo kuyitibwa Yakobo. Wabula onooyitibwanga Isirayiri, kubanga omegganye ne Katonda, awamu n'abantu n'owangula."

²⁹Awo ne Yakobo n'amugamba nti, "Mbuulira erinnya lyo." Naye ye n'amuddamu nti, "Lwaki ombuuza erinnya lyange?" Awo n'amuwa omukisa.

³⁰Yakobo ekifo ekkyo kyeyava akiyita Penieri, ng'agamba nti, "Kubanga ndabaganye ne Katonda, kyokka obulamu bwange ne busigalawo."

³¹Enjuba n'evaayo ne mwakako nga bw'asala Penieri, ng'awenyera olw'obuvune mu kisambi kye.

³²Abayisirayiri kyebava batalya kinywa ky'ekisambi na buli kati, kubanga ekkyo omusajja wa Katonda kye yakomako.

Olubereberye 33

Yakobo ne Esawu Basisinkana

- ¹ Awo Yakobo n'ayimusa amaaso ge n'alaba Esawu ng'ajja ng'ali n'abasajja ebikumi bina. Yakobo n'alyoka ayawulamu abaana abaali ne Leeya ne Laakeeri awamu n'abweereza be abakazi ababiri.
- ² Abeweereza n'abaana baabwe ne bakulembera, Leeya n'abaana be ne baddako, Laakeeri ne Yusufu ne basembayo.
- ³ Ye Yakobo ng'abakulembedde, nga bw'avuunama ku ttaka emirundi musanvu, okutuusa lwe yatuuka okumpi ne muganda we.
- ⁴ Naye Esawu n'adduka okumusisinkana, n'amulamusa ng'amugwa mu kifuba n'amunywegera; bombi ne bakaaba.
- ⁵ Esawu bwe yayimusa amaaso ge n'alaba abakazi n'abaana, n'abuuza Yakobo nti, "Bano baani abali naawe?" Yakobo n'amuddamu nti, "Be baana Katonda baawadde omuddu wo mu kisa kye."
- ⁶ Awo abeweereza be abakazi n'abaana baabwe ne basembera, ne bavuunama, mu ngeri y'emu.
- ⁷ Leeya n'abaana be nabo ne basembera ne bavuunama. Oluvannyuma Yusufu ne Laakeeri ne basembera nabo ne bavuunama.
- ⁸ Esawu n'abuuza Yakobo nti, "Otegeezaaki olwa bino byonna bye nsanze?" Yakobo n'addamu nti, "Lwa kufuna kusaasirwa kwa mukama wange."
- ⁹ Naye ye Esawu n'amugamba nti, "Bye nnina bimmala, muganda wange, by'olina beera nabyo."
- ¹⁰ Yakobo n'amuddamu nti, "Nedda nkwegayiridde, obanga nfunye okusaasirwa mu maaso go, kale kkiriza ekirabo kyange ekivudde mu ngalo zange. Kubanga ddala okulaba ku maaso go kiri ng'okulaba amaaso ga Katonda, olw'ekisa ekyo ky'onnyaniririzzaamu."
- ¹¹ Nkwegayiridde kkiriza ekirabo kyange ekikuleeteddwa, kubanga Katonda andaze ekisa kye, era siri mu bwetaavu." Bw'atyo Esawu n'akikkiriza.
- ¹² Awo Esawu n'agamba nti, "Kale tutambule, nze nzija okukukulemberamu."
- ¹³ Naye Yakobo n'amuddamu nti, "Mukama wange amanyi nti abaana banafu, era n'ebisibo biyonsa, era singa bitambuzibwa awatali busaasizi bijja kufa."
- ¹⁴ Mukama wange k'aleke omuddu we, nze nzija kujja mpola, okusinziira ku ntambula y'ebisolo ebikulembedde, era ne ku ntambula y'abaana, okutuusa lwe ndituuka mu Seyiri."

Yakobo agenda e Sekemu

¹⁵ Awo Esawu n'agamba Yakobo nti, "Kale ka ndeke abamu ku basajja abali nange." Naye Yakobo n'amuddamu nti, "Tekyetaagisa. Kale nsaba ekisa mu maaso ga mukama wange."

¹⁶ Bw'atyo Esawu n'addayo ku lunaku olwo mu Seyiri.

¹⁷ Naye Yakobo n'alaga mu Sukkosi, ne yeezimbira ennyumba, n'azimbira n'ensolo ebisiisira; ekifo ekyo kyekiva kiyitibwa Sukkosi.

¹⁸ Era Yakobo n'atuuka mirembe mu kibuga Sekemu, mu nsi ya Kanani, ng'ava e Padanalaamu, n'asiisira okwolekera ekibuga.

¹⁹ Abaana ba Kamoli kitaawe wa Sekemu ne bamuguza ekitundu mwe yasiisira, n'abasasula ebitundu bya ffeeza kikumi.

²⁰ N'azimbira eyo ekyoto n'akiyita Ekyoto kya Katonda wa Isirayiri.

Olubereberye 34

Sekemu Asobya ku Dina

¹ Awo Dina muwala wa Leeya gwe yazaalira Yakobo, n'agenda okukyalira abakazi ab'omu nsi eyo.

² Sekemu mutabani wa Kamoli Omukiiti omufuzi w'ensi eyo n'amulaba n'amukwata n'amusobyako.

³ Omwoyo gwa Sekemu ne gutwalibwa Dina muwala wa Yakobo, n'amwagala n'ayogera naye ebigambo ebiweweetu.

⁴ Sekemu n'alyoka agamba kitaawe Kamoli nti, "Mpasiza omuwala ono abeere mukazi wange."

⁵ Yakobo bwe yawulira nga Sekemu asobezza ku muwala we Dina, n'aba mukkakkamu okutuusa batabani be abaali balabirira ebisibo ku ttale lwe badda.

⁶ Kamoli kitaawe wa Sekemu n'agenda eri Yakobo okwogera naye.

⁷ Batabani ba Yakobo ne bakomawo eka nga bamaze okukitegeera. Ne banakuwala era ne basunguwalira nnyo Sekemu olw'okukola eky'ekivve era ekitasaana mu Isirayiri.

⁸ Kyokka ye Kamoli n'ayogera nabo ng'agamba nti, "Omwovo gwa mutabani wange gwegomba nnyo muwala wo, nkwegayirira mumuwe amuwase.

⁹ Kkiriza tufumbiriganwenga, otuwe bawala bo, nammwe muwasenga bawala baffe.

¹⁰ Munaabeeranga mu ffe, era mukolenga buli kye mwagala mu nsi yaffe. Mubeeremu era musuubuliremu, mugaggawale nnyo."

¹¹Sekemu naye n'ayogera ne Yakobo ne bannyina ba Dina, nti, "Nsaba ndabe ekisa mu maaso gammwe, era kyonna kye munansalira nzija kukibawa.

¹²Munsabe ebyobuko ebirabo n'ebigenderako, byonna nzija kubibawa nga bwe binaaba binsabiddwa; kye muba munkolera kwe kumpa omuwala abeere mukazi wange."

¹³Batabani ba Yakobo ne baddamu Sekemu ne kitaawe Kamoli nga babakwenyakwenya kuba Sekemu yali asobezza ku mwannyinaabwe Dina.

¹⁴Ne babagamba nti, "Ekyo tetusobola kukikola okuwa mwannyinaffe omuntu atali mukomole, kubanga kya muzizo gye tuli.

¹⁵Kye muteekwa okukola, tulyoke tukkirize, kwe kufuuka nga ffe nga buli musajja mu mmwe akomolebbwa.

¹⁶Tulyoke tubawe bawala baffe, era naffe tuwase bawala bammwe, tubeere mu mmwe tufuuke eggwanga limu.

¹⁷Naye bwe mutakkiriza kukomolebwa, kale tunaatwala muwala waffe ne tugenda."

Okwesasuza Olwa Dina

¹⁸Ebigambo byabwe ne bisanyusa Kamoli ne mutabani we Sekemu.

¹⁹Era omuvubuka teyalwa kukomolebwa, kubanga yayagala nnyo muwala wa Yakobo. Omuvubuka oyo ye yali asinga okussibwamu ekitiibwa mu baana ba Kamoli bona.

²⁰Awo Kamoli ne mutabani we Sekemu ne batuuka ku wankaaki w'ekibuga kyabwe ne boogera n'abantu b'ekibuga kyabwe nga bagamba nti,

²¹Abasajja abo mikwano gyaffe. Ka babeere mu nsi yaffe bakoleremu, kubanga, mulabe, ensi nnene ebamala. Ffe ka tuwase bawala baabwe era naffe tubawe bawala baffe.

²²Wabula buli musajja mu ffe ateekwa okukomolebwa, nga bo bwe bakola; tufuuke eggwanga limu, lwe banakkiriza okubeera mu ffe.

²³Olwo ente zaabwe, ebintu byabwe n'ensolo zaabwe zonna tebiibe byaffe? Kye tuba tukola kwe kukkiriziganya nabo, balyoke babeere mu ffe.

²⁴Abasajja bona abaali ku mulyango ebweru w'ekibuga ne bakkiriziganya ne Kamoli ne mutabani we Sekemu; buli musajja eyafuluma ebweru w'omulyango gw'ekibuga n'akomolebwa.

²⁵Bwe waayitawo ennaku ssatu, nga bakyali mu bulumi, batabani ba Yakobo: Simyoni ne Leevi bannyina Dina ne baddira ebitala byabwe ne balumba ekibuga, abaamu nga tebategedde, ne batta buli musajja.

²⁶Battiramu Kamoli ne mutabani we Sekemu ne baggya Dina mu nnyumba ya Sekemu ne beetambulira.

²⁷Awo batabani ba Yakobo ne bagwa ku munyago ne banyaga ekibuga olwa mwannyinaabwe.

²⁸Ne batwala ebisibo by'endiga, amagana g'ente, n'endogoyi, na buli ekyali mu kibuga ne ku ttale.

²⁹N'obugagga bwonna, n'abaana bona awamu n'abakazi, na buli ekyali mu mayumba, byonna ne babiwamba ne babinyaga.

³⁰Awo Yakobo n'agamba Simyoni ne Leevi nti, "Mundeetedde akacwano, nfuuse wa kukyayibwa abantu bona ab'omu nsi, Abakanani n'Abaperezi. Ffe tuli batono, kale bwe banekunjaanya ne bannumba nzija kumalibwawo, nze n'ennyumba yange yonna."

³¹Bo ne bamuddamu nti, "Lwaki yayisa mwannyinaffe ng'omwenzi?"

Olubereberye 35

Katonda Azza Obuggyaa Endagaano ne Yakobo

¹Katonda n'agamba Yakobo nti, "Golokoka oyambuke e Beseri, obeere eyo, ozimbire Katonda ekyoto, eyakulabikira bwe wadduka muganda wo Esawu."

²Awo Yakobo n'agamba ab'omu nnyumba ye ne bona abaali naye nti, "Muggyeewo bakatonda abalala abali nammwe, mwetukuze mukyuse ebyambalo byammwe,

³tulyoke twambuke tugende e Beseri ndyoke nzimbire Katonda ekyoto, Katonda eyanziramu mu nnaku ez'okunakuwala kwange, era abadde nange buli gye njenze.

⁴Awo ne bawa Yakobo bakatonda abalala bona be baalina, n'empeta ezaali ku matu gaabwe; Yakobo n'abiziika wansi w'omuvule ogwali okumpi ne Sekemu."

⁵Bwe baali batambula, entiisa ya Katonda n'egwa ku bibuga ebyali bibeetoolodde, ne batagoberera baana ba Yakobo.

⁶Yakobo n'ajja e Luzi, ye Beseri, ekiri mu nsi ya Kanani, ye n'abantu bona abaali naye.

⁷N'azimba eyo ekyoto, n'akituumma Erubeeseeri. Kubanga eyo Katonda gye yamweragira bwe yadduka muganda we.

⁸Debola omujjanjabi wa Lebbeeka n'afa n'aziikibwa wansi w'omuvule, wansi wa Beseri kyekyava kiyitibwa Alooninakusi.

⁹Yakobo bwe yava mu Padanalaamu Katonda n'amulabikira, n'amuwa omukisa.

¹⁰Katonda n'amugamba nti, "Erinnya lyo ggwe Yakobo; tokyaddayo kuyitibwa Yakobo, erinnya lyo linaabanga Isirayiri." Bwe kityo erinnya lye ne liba Isirayiri.

¹¹Katonda n'amugamba nti, "Ndi Katonda Ayinzabyonna: zaala oyale, eggwanga n'enkuanya y'amawanga biriva mu ggwe, ne bakabaka balisibuka mu ggwe.

¹²Ensi gye nawa Ibulayimu ne Isaaka, ndigikuwa ggwe, era ndigiwa n'ezzadde lyo eririddawo."

¹³Awo Katonda n'alinnya okuva waali mu kifo we yayogerera naye.

¹⁴Yakobo n'asimba empagi mu kifo Katonda mwe yayogerera naye, empagi ey'ejinja; n'agiyiwako ekiweebwayo ekyokunywa, n'ayiwako n'amafuta.

¹⁵Yakobo ekifo Katonda we yayogerera naye n'akiyita Beseri.

¹⁶Bwe baava e Beseri, era nga bakyali walako okuva Efulasi, Laakeeri n'alumwa, n'alumwa ddala nnyo.

¹⁷Bwe yali ng'alumwa bw'atyo omuzaalisa n'amugamba nti, "Totya kubanga kaakano onoofuna omwana omulala owoobulenzi."

¹⁸Omwoyo bwe gwali gumuggwaamu ng'afa, n'amutuum Benoni, naye kitaawe n'amuyita Benyamini.

¹⁹Awo Laakeeri n'afa n'aziikibwa ku kkubo erigenda Efulasi (ye Besirekemu).

²⁰Yakobo n'asimba empagi ku malaalo ge, y'empagi y'amalaalo ga Laakeeri, ekyaliwo n'okutuusa kaakano.

²¹Isirayiri ne yeeyongera okutambula, n'akuba eweema ye, emabega w'omunaala gwa Ederi.

²²Isirayiri bwe yali ng'ali mu nsi omwo Lewubeeni n'agenda ne yeebaka ne Biira omuweereza wa kitaawe, Isirayiri n'akiwulira. Batabani ba Yakobo baali kkumi n'ababiri.

²³Batabani ba Leeya baali: Lewubeeni mutabani wa Yakobo omubereberye, ne Simyon, ne Leevi, ne Yuda, ne Isakaali ne Zebbulooni.

²⁴Batabani ba Laakeeri ye: Yusufu ne Benyamini.

²⁵Batabani ba Biira, omuweereza wa Laakeeri be ba: Ddaani ne Nafutaali.

²⁶Batabani ba Zirupa omuweereza wa Leeya be ba: Gaadi ne Aseri. Bano be batabani ba Yakobo abaamuzaalirwa mu Padanalaamu.

Okufa kwa Isaaka

²⁷Awo Yakobo n'ajja eri kitaawe Isaaka e Mamule, oba Kiriyasaluba, ye Kebbulooni, Ibulayimu ne Isaaka mwe baatuulanga.

²⁸Isaaka yawangaala emyaka kikumi mu kinaana.

²⁹Isaaka n'afa ng'akaddiye nnyo n'agenda abantu be gye bagenda, ng'amaze ennaku nnyingi, batabani be Esawu ne Yakobo ne bamuziika.

Olubereberye 36

Ezadde Iya Esawu

- ¹ Bino bye bifia ku b'olulyo lwa Esawu, ye Edomu.
- ² Esawu yawasa abakazi ng'abaggya mu Bakanani: Yawasa Ada muwala wa Eroni Omukiiti, ne Okolibama muwala wa Ana mutabani wa Zibyoni Omukiivi,
- ³ ne Basimansi muwala wa Isimayiri muganda wa Nebayoosi.
- ⁴ Ada n'azaalira Esawu Erifaazi, ne Basimansi n'azaala Leweri;
- ⁵ ne Okolibama n'azaala Yewusi, ne Yalamu ne Koola; abo be batabani ba Esawu abaamuzaalirwa mu nsi ya Kanani.
- ⁶ Awo Esawu n'atwala bakazi be, ne batabani be, ne bawala be n'abantu be bona, n'ente ze, awamu n'ebintu bye byonna bye yafuna mu nsi ya Kanani; n'agenda mu nsi ey'ewala ku ya muganda we Yakobo.
- ⁷ Kubanga obugagga bwabwe bwali bungi nnyo nga tebukyabasobozesa kubeera wamu n'ensi mwe baali ng'ebafundiridde olw'obungi bw'ebisolo byabwe.
- ⁸ Olwo ye Esawu, era ye Edomu, n'abeera mu nsi ey'ensozi za Seyiri.
- ⁹ Bino bye bifia ku b'olulyo lwa Esawu, kitaawe w'Abaedomu abaamuzaalirwa ng'ali mu nsi y'ensozi za Seyiri.
- ¹⁰ Batabani be baali: Erifaazi eyamuzaalirwa Ada, ne Leweri eyamuzaalirwa Basimansi.
- ¹¹ Batabani ba Erifaazi baali Temani, ne Omni, ne Zefo, ne Gatamu ne Kenazi.
- ¹² Timuna yali mukazi wa Erifaazi, mutabani wa Esawu era yamuzaalira Ameleki. Abo be batabani ba Ada mukazi wa Esawu.
- ¹³ Bano be batabani ba Leweri: Nakasi, ne Zeera, ne Saama ne Mizza. Abo be bazzukulu ba Esawu ne mukazi we Basemasi.
- ¹⁴ N'abaana ba Okolibama muwala wa Ana, muzzukulu wa Zibyoni, baali Yewusi, ne Yalamu ne Koola, be yazaalira bba Esawu.
- ¹⁵ Bano be bakulu b'enda ya Esawu: Enda ya Erifaazi omubereberye wa Esawu: Temani, ne Omni, ne Zefo, ne Kenazi,
- ¹⁶ ne Koola, ne Gatamu ne Amaleki abaali mu nsi ya Edomu be batabani ba Ada.
- ¹⁷ Enda ya Leweri mutabani wa Esawu: Nakasi, ne Zeera, ne Samma ne Mizza nabo baali mu nsi ya Edomu, era baava mu Basimansi, mukazi wa Esawu.

¹⁸Abaazaalibwa Okolibama mukazi wa Esawu, muwala wa Ana: Yewusi, ne Yalamu ne Koola.

¹⁹Abo bona be baava mu Esawu, ye Edomu, era be bakulu b'enda zaabwe.

²⁰Batabani ba Seyiri Omukooli abaabeeranga mu Edomu be ba Lotani, ne Sobali, ne Zibyoni, ne Ana,

²¹ne Disoni, ne Ezeri ne Disani. Abo be baava mu Bakooli, be baana ba Seyiri abaali mu nsi ya Edomu.

²²Batabani ba Lotani baali Kooli, ne Kemamu, era Lotani yalina mwannyina nga ye Timuna.

²³Batabani ba Sobali be ba Aluvani, ne Manakasi, ne Eberi, ne Sefo ne Onamu.

²⁴Aba Zibyoni, be ba Aya ne Ana; ono ye Ana eyavumbula ensulo z'amazzi agookya, ezaali mu ddungu; bwe yali ng'alunda endogoyi za kitaawe Zibyoni.

²⁵Abaana ba Ana be ba Disoni ne Okolibama omuwala.

²⁶Bo batabani ba Disoni be ba Kemudaani, ne Esubani, ne Isulani ne Kerani.

²⁷Aba Ezeri be ba Birani, ne Zaavani ne Akani.

²⁸Ate aba Disani be ba Uzi ne Alani.

²⁹Bano be bakulu b'enda za Bakooli: Lotani, ne Sobali, ne Zibyoni, ne Ana,

³⁰ne Disoni, ne Ezeri ne Disani. Bano be bakulu b'enda za Bakooli ng'ebika byabwe bwe byali, mu nsi ya Seyiri.

Bakabaka ba Edomu

³¹Bakabaka abafuga ensi ya Edomu, nga tewannaba na kabaka afuga Isirayiri be bano:

³²Bera mutabani wa Byori yafuga Edomu ng'asinziira mu kibuga kye Dinukaba.

³³Bera bwe yafa Yobabu mutabani wa Zeera ow'e Bozula n'afuga mu kifo kye.

³⁴Yobabu bwe yafa Kusamu Omutemani n'afuga mu kifo kye.

³⁵Ne Kusamu bwe yafa, Kadadi mutabani wa Bedadi, eyawangula Midyaani, mu nsi ya Mowaabu n'afuga mu kifo kye; ng'afugira mu kibuga ky'e Avisi.

³⁶Ate Kadadi bwe yafa, Samula ow'e Masuleka n'afuga mu kifo kye.

³⁷Samula bwe yafa Sawuli ow'e Lekobosi, ku mugga Fulaati n'afuga mu kifo kye.

³⁸Sawuli bwe yafa, Baalukanani mutabani wa Akubooli n'afuga mu kifo kye.

³⁹Ate Balukanani mutabani wa Akubooli bwe yafa, Kadali n'afuga mu kifo kye, ng'ali mu kibuga kye Pawu; mukazi we yayitbwanga Meketaberu muwala wa Mezakabu ne Matirida.

⁴⁰Bano be bakulu b'enda zaabo abaava mu Esawu, nga bwe baali mu bifo byabwe: Timuna, ne Aluva, ne Yesesi,

⁴¹ne Okolibama, ne Era, ne Pinoni,

⁴²ne Kenazi, ne Temani, ne Mibuza,

⁴³ne Magidiyeri, ne Iramu. Abo be bakulu b'enda ya Edomu, ye Esawu kitaawe wa Edomu, okusinziira mu bifo mwe baali mu nsi y'obutaka bwabwe.

Olubereberye 37

Ekirooto Kya Yusufu n'Obukyayi bwa Baganda be

¹Yakobo yabeeranga mu Kanani, ensi bajjajaabe mwe baatambuliratambuliranga.

²Era bino bye bifia ku lulyo lwa Yakobo: Yusufu bwe yali nga wa myaka kkumi na musanvu ng'ali ne baganda be batabani ba Biira ne Zirifa, nga balunda ekisibo ky'endiga, Yusufu n'ategeezanga Yakobo kitaabwe ebintu ebibi bye baakolanga.

³Bw'atyo Isirayiri n'ayagala nnyo Yusufu okusinga abaana be abalala, kubanga nga ye mwana ow'omu bukadde bwe; n'amutungira ekyambalo eky'amabala amangi.

⁴Naye baganda ba Yusufu bwe baalaba nga kitaabwe amwagala okusinga bo ne bakyawa Yusufu, ne batayinza na kwogera naye na kisa.

⁵Lumu Yusufu n'aloota ekirooto, n'agenda n'akitegeeza baganda be, ne beeyongera nnyo okumukyawa.

⁶Yabagamba nti, "Muwulire ekirooto kino kye naloose.

⁷Twali tusiba ebinywa by'enjaano nga tuli mu nnimiro, ekinywa kyange ne kiyimuka ne kiyimirira; laba ebinywa byammwe ne bikyebungulula ne bikivuunamira."

⁸Baganda be ne bamugamba nti, "Olowooza olitufuga? Olowooleza ddala nti tulibeera baddu bo?" Olwo ne beeyongera nnyo okumukyayira ddala olw'ekirooto kye n'ebigambo bye.

⁹Ate n'aloota ekirooto ekirala n'akitegeeza baganda be, n'agamba nti, "Ndoose ekirooto ekirala: ne ndaba enjuba n'omwezi n'emmunyeenye ekkumi n'emu nga binvuunamira."

¹⁰ Naye bwe yakitegeeza kitaawe ng'ali wamu ne baganda be, kitaawe n'amunenya ng'agamba nti, "Kirooto ki kino ky'olose? Ddala nze ne nnyoko awamu ne baganda bo tulijja ne tuvuunama mu maaso go?"

¹¹ Baganda be ne bamukwatirwa obuggyga, kyokka ye kitaabwe n'akuumma ekigambo ekyo mu mutima gwe.

Yusufu Atundibwa Baganda be

¹² Awo baganda ba Yusufu ne bagenda okumpi ne Sekemu okulunda ekisibo kya kitaabwe.

¹³ Isirayiri n'alyoka agamba Yusufu nti, "Nga baganda bo bwe balundira e Sekemu, jjangu nkutume gye bali." Yusufu n'amuddamu nti, "Nzuuno ntuma."

¹⁴ N'alyoka amugamba nti, "Genda kaakano olabe obanga baganda bo n'ekisibo bali bulungi, okomewo ontegeeze." Awo n'amutuma okuva mu kiwonvu kya Kebbulooni, n'atuuka e Sekemu.

¹⁵ Awo omusajja n'amulaba ng'atangatangira ku ttale, n'amubuuza nti, "Onoonya ki?"

¹⁶ N'amuddamu nti, "Noonya baganda bange, nkwegayiridde mbuulira gye balundira ekisibo."

¹⁷ Omusajja n'amuddamu nti, "Beeyongerayo, kubanga nabawulira nga bagamba nti, 'Ka tugende e Dosani.'" Awo Yusufu n'agoberera baganda be n'abasanga e Dosani.

¹⁸ Baganda be ne bamulengera ng'akyali wala, era bwe yali nga tannabasemberera ne bateesa bamutte.

¹⁹ Ne bagambagana nti, "Sekalootera wuuyo ajja.

²⁰ Kale mujje tumutte, tumusuule mu kimu ku binnya; tuligamba nti, 'Ensolo enkambwe ye yamulya; tulabe ebirooto bye bwe birituukirira.'

²¹ Naye Lewubeeni bwe yakiwulira n'agezaako okumuwonya mu mikono gyabwe n'agamba nti, "Tetumutta.

²² Tuleme kuyiwa musaayi; ka tumusuule mu bunnya buno wano mu nsiko. Temumuteekako mukono gwammwe." Yayogera bw'atyo alyoke amuwonye mu mikono gyabwe, amuddize kitaawe.

²³ Awo Yusufu bwe yatuuka ku baganda be ne bamwambulamu ekyambalo kye eky'amabala amangi kye yali ayambadde:

²⁴ ne bamutwala ne bamusuula mu bunnya obwali obukalu nga tebuliimu mazzi.

²⁵ Awo bwe baatuula okulya, ne bayimusa amaaso ne balengera ekibiina ky'Abayisimayiri nga bava e Gireyaadi, ng'eñjamira zaabwe zeettise ebyakaloosa, n'envumbo ne mooli nga bali mu lugendo babitwala e Misiri.

²⁶ Yuda kwe kugamba baganda be nti, "Kitugasa ki okutta muganda waffe n'okuyiwa omusaayi gwe?

²⁷ Tumuguze Abayisimayiri. Omukono gwaffe guleme okumubaako, kubanga muganda waffe, omubiri gwaffe gwennyini." Baganda be ne bakkiriziganya naye.

²⁸ Abasuubuzi, Abayisimayiri bwe baabatuukako ne baggya Yusufu mu bunnya, ne bamuguza Abayisimayiri. Baamubaguza ebitundu bya ffeeza amakumi abiri; ne bamutwala e Misiri.

²⁹ Lewubeeni bwe yadda n'alaga ku bunnya n'alaba nga Yusufu taliimu, n'ayuza engoye ze,

³⁰ n'addayo eri baganda be n'abagamba nti, "Omwana taliyo. Kale naamunoonyeza wa?"

³¹ Awo ne baddira ekyambalo kya Yusufu, ne batta embuzi, ne bakinnyika mu musaayi.

³² Ne baddira ekyambalo ekyo eky'amabala amangi ne bakiwalira kitaabwe ne bamugamba nti, "Twalaba ekyambalo kino, kikebere olabe obanga kye kya mutabani wo."

³³ N'akyetegereza n'agamba nti, "Kye kyambalo kya mutabani wange! Ensolo enkambwe yamulya. Ddala Yusufu yataagulwataagulwa."

³⁴ Awo Yakobo n'ayuza ebyambalo bye, n'akungubagira Yusufu okumala ebbanga ddene.

³⁵ Batabani be bona ne bawala be ne bagenda gy'ali okumusanyusa, kyokka ye n'atakkiriza kusanyusibwa. N'agamba nti, "Nedda, ndikka emagombe nga nkyakungubagira omwana wange Yusufu." Bw'atyø Yakobo n'akungubagira nnyo Yusufu.

³⁶ Mu kiseera kyekimu Abamidiyaani bwe baatuuka e Misiri, Yusufu ne bamuguza Potifali, omu ku bakungu ba Falaawo; omukungu oyo ye yali omukulu wa bambowa.

Olubereberye 38

¹ Awo olwatuuka Yuda n'ava ku baganda be n'aserengeta, n'ayingira ew'Omudulamu, erinnya lye, Kira.

² Yuda n'alabayu muwala wa Suwa, Omukanani, n'amuwasa, ne yeetaba naye,

³ n'aba olubuto n'azaala omwana owoobulenzi n'amutuumma erinnya Eri.

⁴Mukyala wa Yuda n'aba olubuto olulala n'azaala omwana omulenzi n'amutuumma Onani.

⁵Ate n'azaala omwana omulala n'amutuumma Seera. Yamuzaalira mu Kezibu.

⁶Era Yuda n'awasiza mutabani we omukulu, Eri, omukazi erinnya lye Tamali.

⁷Naye Eri mutabani wa Yuda omukulu n'aba mwonoonyi mu maaso ga MUKAMA; MUKAMA n'amutta.

⁸Awo Yuda n'agamba Onani nti, "Genda eri muka muganda wo, ofunire muganda wo ezzadde."

⁹Naye Onani n'amanya nti ezzadde teririba lirye; bw'atyo bwe yeetaba naye, amannyi n'agafuka wansi aleme okufunira muganda we ezzadde.

¹⁰Ekyo kye yakola kyali kibi mu maaso ga MUKAMA. N'ono MUKAMA kyeyava amutta.

¹¹Awo Yuda olw'okutya nti Seera ayinza okufa nga baganda be, n'agamba Tamali nti, "Ogira obeera nnamwandum, ng'oli mu nnyumba ya kitaawo okutuusa Seera lw'alikula." Tamali kwe kugenda n'abeera mu nnyumba ya kitaawe.

Yuda ne Tamali

¹²Bwe waayitawo ebbanga mukazi wa Yuda, muwala wa Suwa n'afa. Yuda bwe yayita mu kukungubaga, n'agenda ne Kira Omudulamu e Timuna eri basajja be abasazi b'ebyoya by'endiga ze.

¹³Tamali bwe kyamubuulirwa nti, "Sezaala wo agenda e Timuna okusala ebyoya by'endiga ze,"

¹⁴n'asuula eri ebyambalo by'obwannamwandum ne yeeteekako ekiremba ne yeebikkirira, n'atuula ku mulyango gwa Enayimu, ekiri ku kkubo ng'ogenda e Timuna. Kubanga yamanya nti, Seera akuze, kyokka nga tamuweereddwa ku muwasa.

¹⁵Yuda bwe yamulaba, n'amulowooza okuba omu ku bamalaaya, kubanga yali abisse amaaso ge.

¹⁶N'agenda gy'ali ku mabbali g'ekkubo, n'amugamba nti, "Jjangu, neetabe naawe," kubanga teyamanya nti ye yali muka mutabani we. Tamali kwe ku mubuuza nti, "Onompa ki bwe neetaba naawe?"

¹⁷Yuda n'amuddamu nti, "Nnaakuweereza embuzi ento." N'amubuuza nti, "Onompa omusingo nga tonnagimpeereza?"

¹⁸Yuda n'amuddamu nti, "Nkuwe musingo ki?" N'amugamba nti, "Akabonero ko, akajegere ko awamu n'omuggo gwo oguli mu mukono gwo." Awo n'abimuwa, ne yeetaba naye, n'amufunyisa olubuto.

¹⁹Tamali n'agolokoka n'agenda, n'aggyako ekiremba n'ayambala ebyambalo by'obwannamwandu bwe.

²⁰Yuda bwe yatuma mukwano gwe Omudulamu, okutwala omwana gw'embuzi, addizibwe omusingo teyalaba ku mukazi.

²¹Bwe yabuuliriza ab'omu kifo omwo, omukazi malaaya eyali Enayimu ku mabbali g'ekkubo, ne bamuddamu nti, "Wano tewabeeranga mukazi malaaya."

²²N'alyoka addayo eri Yuda n'amugamba nti takubikako kimunye; era n'abantu ab'ekitundu ekyo bamutegeezesa nti, "Awo tewabangawo mukazi malaaya."

²³Yuda kwe kumugamba nti, "Omukazi oli, ebintu k'abisigaze tuleme okusekererwa, naweereza embuzi eno, naye n'atalabikako."

Perezi ne Zeera Bazaalibwa

²⁴Emyezi ng'esatu bwe gyayitawo ne bagamba Yuda nti, "Muka mwana wo Tamali yafuuka mwenzi. Ate ebyo nga biri awo obwenzi obwo yabufunamu n'olubuto." Yuda kwe kwejuumuula nga bw'agamba nti, "Mumuleete ayokebwe."

²⁵Tamali bwe yali atwalibwa n'atumira sezala we Yuda n'amugamba nti, "Omusajja nannyini bintu bino ye kazaalabulwa. Nkusaba weetegereze ebintu bino: akabonero, akajegere n'omuggo, by'ani?"

²⁶Awo Yuda n'abitegeera n'agamba nti, "Omuwala mutuukirivu okunsinga, kubanga saamuwa mutabani wange Seera." Yuda n'atamuddira.

²⁷Ekiseera eky'okuwona bwe kyatuuka n'alabika nga wakuzaala balongo.

²⁸Era bwe yali mu ssanya omulongo omu n'afulumya omukono gwe, omuzaalisa n'agukwata n'agusibako akawuzi akaakakobe nga bw'agamba nti, "Ono y'asoose okujja."

²⁹Naye omulongo bwe yazzaayo omukono gwe munda, muganda we n'afuluma; omuzaalisa n'agamba nti, "Lwaki owaguzza?" Erinnya ly'omwana kyeryava liba Pereesi.

³⁰Oluvannyuma muganda we n'afuluma n'akawuzi akaakakobe nga kali ku mukono gwe, n'ayitibwa Zeera.

Olubereberye 39

Yusufu ne Muka Potifali

¹Awo Yusufu bwe yatwalibwa e Misiri, Potifali omukungu wa Falaawo, omukulu w'abambowa Omumisiri n'amugula okuva ku Bayisimayiri abaamutwala e Misiri.

² MUKAMA n'aba ne Yusufu n'aba n'omukisa ng'ali mu nnyumba ya mukama we Omumisiri.

³ Ne mukama we n'alaba nga MUKAMA amuwadde omukisa mu buli ky'akola.

⁴ Awo Yusufu n'aganja nnyo mu maaso ga mukama we, n'amulabiriranga, n'amufuula omukulu we nnyumba ye ne byonna bye yalina.

⁵ Okuva olwo MUKAMA n'awa omukisa ennyumba y'Omumisiri olwa Yusufu. Omukisa gwa MUKAMA ne guba ku byonna bye yalina, mu nnyumba ne mu nnimiro.

⁶ Awo Omumisiri n'ateeka byonna mu mikono gya Yusufu. Yusufu n'avunaanyizibwanga byonna okuggyako emmere mukama we gye yalyanga. Kyokka Yusufu yali mulungi nnyo, mubalagavu.

⁷ Awo olwatuuka oluvannyuma lw'ebbangwa eriwerako, mukyala wa mukama we namutunuulira n'okwegomba era n'amugamba nti, "Weebake nange."

⁸ Naye Yusufu n'agaana, n'agamba mukazi wa mukama we nti, "Laba, mukama wange yankwasa byonna ebiri mu nnyumba, n'abiteeka byonna mu mikono gyange,

⁹ era tewali n'omu ansinga mu nnyumba ye, tewali na kimu ky'atankwasa okuggyako ggwe, kubanga ggwe oli mukazi we. Kale nnyinza ntya okuyingira mu kwonoona okwenkanidde awo n'okusobya eri Katonda?"

¹⁰ Newaakubadde muka mukama we yamutayirira, Yusufu ye teyamuwlira na mulundi na gumu.

¹¹ Naye lwali lumu Yusufu bwe yayingira mu nju okukola emirimu gye nga tewali n'omu mu nnyumba,

¹² muka mukama we n'akwata ekyambalo kya Yusufu nga bw'agamba nti, "Weegatte nange." Yusufu n'amwesimatulako, ekyambalo kye ne kisigala mu ngalo z'omukazi wa mukama we. Ye n'adduka n'ava mu nnyumba.

¹³ Naye omukazi bwe yalaba ng'asigazza ekyambalo kya Yusufu,

¹⁴ n'ayita abasajja ab'omu nnyumba ye n'abagamba nti, "Mulabe, yatuleetera Omwebbulaniya okutuduulira, yazze gye ndi okwebaka nange,

¹⁵ bw'awulidde nga ndeekaana n'adduka n'ava mu nnyumba."

¹⁶ Awo kwe kutereka ekyambalo okutuusa mukama wa Yusufu lwe yadda eka.

¹⁷ Omukyala n'abuulira bba byonna ng'agamba nti, "Omuddu Omwebbulaniya gwe watuleetera, yayingidde gye ndi okunjooga.

¹⁸ Naye nabadde nakaleekaana, n'aleka ekyambalo kye gye ndi, n'adduka n'ava mu nnyumba."

Yusufu Ateekebwa mu Kkomera

¹⁹ Awo mukama wa Yusufu bwe yawulira ebigambo omukazi bye yamutegeeza ng'agamba nti, “Bw'ati ne bw'ati omuddu wo bwe yampisizza,” obusungu bwa bba ne bubuubuuka.

²⁰ Mukama wa Yusufu n'akwata Yusufu n'amuteeka mu kkomera omwasibirwanga abazzizza emisango eri kabaka.

²¹ Naye MUKAMA n'abeera ne Yusufu, n'amulaga okwagala kwe okutalojjeka. N'aganja nnyo mu maaso g'omukuumi w'ekkomera.

²² Omukuumi w'ekkomera n'ateeka abasibe bona mu mikono gyा Yusufu, era buli ekyakolebwanga nga Yusufu y'akirinako obuvunaanyizibwa.

²³ Omukuumi w'ekkomera nga tafaayo ku buli ekyalinga mu mikono gyा Yusufu, kubanga MUKAMA yali naye, era MUKAMA n'amuwa omukisa mu buli kye yakolanga.

Olubereberye 40

Yusufu Annyonnyola Ebirooto

¹ Oluvannyuma lw'ebyo omusenero wa kabaka w'e Misiri wamu n'omukulu wa bafumbi be ne banyiiza mukama waabwe kabaka w'e Misiri.

² Falaawo n'asunguwalira nnyo abakungu be abo: omusenero n'omukulu w'abafumbi,

³ n'abawaayo mu mikono gy'omukulu w'ekkomera, Yusufu mwe yali.

⁴ Omukulu w'ekkomera n'abawa Yusufu okubakuma, n'abalabirira, ne babeera mu kkomera.

⁵ Naye ekiro kimu omusenero n'omukulu wa bafumbi aba kabaka w'e Misiri abaali mu kkomera ne baloota, buli omu ekirooto kye, era nga buli kimu kirina amakulu gaakyo.

⁶ Yusufu bwe yajja gye bali ku makya, n'abalaba nga beeraliikirivu.

⁷ N'alyoka abuuza abakungu ba Falaawo abaali naye mu kkomera, mu nnyumba ya mukama waabwe nti, “Lwaki leero mulabika nga mveraliikiridde?”

⁸ Ne bamuddamu nti, “Twaloose ebirooto, naye tewali wa kubivvuunula.” Awo Yusufu n'abagamba nti, “Katonda y'abivvuunula. Kale mbasaba mubimbuulire.”

⁹ Awo omusenero n'ategeeza Yusufu ekirooto kye n'agamba nti, “Nalabye omuti omutiini mu kirooto.

¹⁰ Ku mutiini nga kuliko amatabi asatu, gwabadde gwakatojjera ne gumulisa, ebirimba ne bibaako zabbibu ennyengevu.

¹¹Nga nkute ekikopo kya Falaawo mu ngalo zange, ne nzirira zabbibu ne nzikamulira mu kikopo kya Falaawo, ne nkimukwasa.”

¹²Yusufu n’alyoka amugamba nti, “Gano ge makulu gaakyo: amatabi asatu, ze nnaku esatu;

¹³mu nnaku ssatu Falaawo alikuggya mu kkomera n’akuzza mu kifo kyo, era olimukwasa ekikopo nga bwe wakolanga edda ng’oli musenero we.

¹⁴Kyokka onzijukiranga ng’otuuse mu maaso ga Falaawo, onzijukiranga n’onjogerako gy’ali nkwegayiridde, alyoke anzigye mu kkomera.

¹⁵Kubanga ddala naggyibwa buggyibwa mu nsi y’Abaebulaniya; ate na wano sirina kye nakola kinsaanyiza kuteekebwa mu kkomera.”

Ekirooto ky’Omukulu wa Bafumbi

¹⁶Omukulu w’abafumbi ba Falaawo bwe yalaba ng’amakulu g’ekirooto ky’oli gaali malungi, n’agamba Yusufu nti, “Nange naloose ekirooto: nga neetisse ku mutwe ebibbo by’emigaati bisatu.

¹⁷Mu kibbo ekyokusatu mwabaddemu buli ngeri ya mmere enjokye eya Falaawo. Kyokka ng’ennyonyi zigiriira ku mutwe gwange.”

¹⁸Awo Yusufu n’amuddamu nti, “Gano ge makulu gaakyo: ebibbo ebisatu z’ennaku ssatu;

¹⁹bwe wanaayitawo ennaku ssatu Falaawo ajja kukutemako omutwe, akuwanike ku muti, omulambo gwo gulibwe ebinyonyi.”

²⁰Ku lunaku olwokusatu, lwali lunaku lwa mazaalibwa ga Falaawo, n’akolera abaweeereza be bona embaga, n’atumya omusenero n’omukulu w’abafumbi.

²¹Omusenero n’amizza ku mulimu gwe, n’atandika okuweereza Falaawo,

²²kyokka ye omukulu w’abafumbi n’amuwanika ku muti, nga Yusufu bwe yavvuunula ebirooto byabwe.

²³Naye omusenero n’atajjukira Yusufu n’amwerabira n’atamussaako mwoyo.

Olubereberye 41

Ekirooto kya Falaawo

¹Oluvannyuma lw’emyaka ebiri emirambirira, Falaawo n’aloota ng’ayimiridde ku mugga Kiyira;

²laba mu mugga ne muvaamu ente ennungi ensava musanvu, ne ziriira mu bisaalu.

³Era laba ente endala embi enkovvu musanvu nazo ne ziva mu mugga, ne ziylimirira wamu na ziri ku lubalama lw’omugga.

- ⁴Ente enkovvu, embi ne zirya ente ennungi ensava. Awo Falaawo n'azuukuka.
- ⁵Ate n'addamu okwebaka n'aloota ekirooto ekirala, laba ebirimba eby'emmere ey'empeke musanvu ebigimu nga biri ku kiti kimu.
- ⁶Era laba oluvannyuma ebirimba ebirala musanvu nga bikaze olw'empewo ez'ebbugumu ez'ebuvanjuba nabyo ne biddirira.
- ⁷Awo ebirimba biri ebikaze ne bimira ebirimba biri omusanvu ebigimu ebirungi. Falaawo n'azuukuka, laba nga kibadde kirooto.
- ⁸Awo ku makya Falaawo ne yeeraliikirira; n'atumya ne baleeta abalogo bona ab'e Misiri, n'abagezigezi baamu bona; Falaawo n'abategeeza ekirooto kye, kyokka ne watabaawo n'omu eyasobola okukivvuunulira Falaawo.
- ⁹Awo omusenero wa Falaawo n'agamba Falaawo nti, "Ntegedde nasobyaa nnyo.
- ¹⁰Falaawo bwe yasunguwalira abaddu be, nze n'omukulu w'abafumbi n'atuteeka mu kkomera,
- ¹¹ekiro kimu omukulu wa bafumbi nange twaloota ebirooto, nga buli kimu kirina amakulu ga njawulo ku kinnaakyo.
- ¹²Mu ffe mwalimu omuvubuka Omwebbulaniya nga muddu wa mukulu w'abambowa; bwe twamutegeeza nannyonnyola buli omu ekirooto kye nga bwe kyali.
- ¹³Nga bwe yatunnyonnyola era bwe kityo bwe kyali; nze nazzibwa ku mulimu gwange, ye omufumbiro, n'awanikibwa ku muti."
- Falaawo ategheeza Yusufu ekirooto kye**
- ¹⁴Awo Falaawo n'atumya baleete Yusufu, ne bamuleeta mangu okumuggya mu kkomera. Bwe yamala okumwebwa omutwe n'okukyusa engoye ze, n'ajja mu maaso ga Falaawo.
- ¹⁵Falaawo n'agamba Yusufu nti, "Naloose ekirooto, naye tewali n'omu ayinza kukivvuunula."
- ¹⁶Yusufu n'addamu Falaawo nti, "Si nze nzija okukikola, wabula Katonda y'anaabuulira Falaawo amakulu gaakyo."
- ¹⁷Awo Falaawo n'agamba Yusufu nti, "Laba, bwe nabadde nga nneebase ne ndoota nga nnyimiridde ku lubalama lw'omugga Kiyira;
- ¹⁸ente ennungi ensava musanvu ne ziva mu mugga ne ziriira mu bisaalu;
- ¹⁹ate ente endala ennafu embi ennyo enkovvu ze sirabangako mu nsi y'e Misiri nazo ne zijja.
- ²⁰Awo ente embi enkovvu ne zirya ente ziri omusanvu ensava ezaasoose,

²¹naye bwe zamaze okuzirya nga toyinza na kutegeera nti ziziridde, kubanga nga nkovvu nga bwe zaabadde olubereberye. Awo ne ndyoka nzuukuka.

²²“Ate era mu kirooto kyange nalabye ebirimba ebigimu ebirungi musanvu nga biri ku kiti kimu,

²³n’ebirimba ebirala musanvu ebikaze olw’empewo ez’ebbugumu ez’ebuvanjuba, nabyo ne bivaayo.

²⁴Ebirimba ebikaze ne bimira biri ebigimu. Ebyo nabitegeezezza abagezigezi ne wabulawo n’omu abivvuunula.”

²⁵Awo Yusufu n’agamba Falaawo nti, “Ekirooto kya Falaawo kiri kimu: Katonda alaze Falaawo ky’agenda okukola.

²⁶Ente omusanvu ennungi gy’emyaka musanvu n’ebirimba omusanvu ebigimu gy’emyaka musanvu; ekirooto kiri kimu.

²⁷Ente omusanvu embi enkovvu ezajja oluvannyuma, gy’emyaka musanvu, n’ebirimba omusanvu ebikaze olw’empewo ez’ebbugumu ez’ebuvanjuba gy’emyaka omusanvu egy’enjala.

²⁸“Nga bwe ɲjambye Falaawo, Katonda alaze Falaawo ekyo ky’agenda okukola.

²⁹Wajja kubaawo emyaka musanvu egy’ekyengera mu nsi yonna ey’e Misiri,

³⁰naye oluvannyuma lwagyo waliddawo emyaka musanvu egy’enjala eryerabiza ekyengera mu nsi yonna ey’e Misiri; enjala eribuna ensi.

³¹Ekyengera tekirimanyika n’akatono olw’enjala empitirivu era embi ennyo, eribuna Misiri yenna.

³²Ekirooto kya Falaawo kyekivudde kiddiŋjanwa, kitegeeza nti ekintu Katonda akikakasa era ajja kukituukiriza mangu.

³³Kale kaakano Falaawo alonde omusajja omukalabakalaba era ow’amagezi amuwe obuvunaanyizibwa ku nsi yonna ey’e Misiri.

³⁴Era asseewo abalabirira balabirire ensi bakunjaanye ekimu ekyokutaano eky’emmere ey’empeke yonna mu nsi ey’e Misiri okumalirako ddala emyaka omusanvu egy’ekyengera.

³⁵Bakunjaanye emmere eyo mu myaka egijja egy’ekyengera, bazimbe ebyagi ebinene mu buli kibuga bagikuŋjaanyize omwo olw’ekiragiro kya Falaawo, bagikuume.

³⁶Emmere eyo eriterekebwa olw’enjala eriba mu nsi okumalako emyaka omusanvu egy’enjala erigwa mu Misiri yonna; ensi ereme okuzikirizibwa enjala.”

Falaawo Afuula Yusufu Omufuzi

³⁷ Ebigambo bya Yusufu ne biwulikika bulungi mu matu ga Falaawo n'ag'abaweereza be bonna.

³⁸ Falaawo n'agamba abaweereza be nti, "Tuyinza okufuna omuntu ng'ono Yusufu omuli Omwoyo wa Katonda?"

³⁹ Awo Falaawo n'agamba Yusufu nti, "Katonda nga bw'akulaze bino byonna, tewali mulala mukalabakalaba, omugezi okukwenkana ggwe."

⁴⁰ Gw'onoofuganga olubiri Iwange, era abantu bange banaakolanga kyonna ky'onoobalagiranga; wabula nze kabaka n'abanga waggulu wo."

⁴¹ Awo Falaawo n'agamba Yusufu nti, "Laba, nkutadde wo okufuga ensi yonna ey'e Misiri."

⁴² Olwo Falaawo n'alyoka aggya empeta ku ngalo ye n'aginaanika Yusufu, n'amwambaza ekyambalo ekya linena omulungi, n'omukuufu ogwa zaabu mu bulago bwe.

⁴³ Namuwa n'okutambuliranga mu ggaali lye eriddirira mu kitibwa ng'erya Falaawo mwe yatambuliranga. Bonna ne bavuunama mu maaso ga Yusufu nga bwe bagamba nti, "Muvuuname." Bw'atyo Falaawo n'amuteekawo okufuga ensi yonna ey'e Misiri.

⁴⁴ Falaawo n'agamba Yusufu nti, "Nze Falaawo, naye awatali kigambo kyo tewali muntu aliyimusa mukono gwe newaakubadde ekigere kye mu Misiri."

⁴⁵ Falaawo n'atuma Yusufu erinnya Zafenasipaneyi; n'amuwa Asenaasi muwala wa Potiferi kabona wa Oni okuba mukazi we. Bw'atyo Yusufu n'atambula okubuna Misiri yonna.

Ekirooto kituukirira

⁴⁶ Yusufu yali aweza emyaka amakumi asatu bwe yatandika okuweereza Falaawo, ye kabaka w'e Misiri. Awo Yusufu n'ava mu maaso ga Falaawo n'agenda n'abuna Misiri yenna.

⁴⁷ Mu myaka omusanvu egy'ekyengera emmere yabala n'ekamala.

⁴⁸ Yusufu n'akuinjaanya emmere mu Misiri mu myaka omusanvu egy'ekyengera n'agiterekera mu byagi ebinene mu bibuga. Mu buli kibuga n'akuinjaanyizamu emmere eyavanga mu nnimiro ezikyetoolodde.

⁴⁹ Yusufu n'atereka emmere mpitirivu, n'ebanga omusenyu ogw'oku nnyanja, okutuusa lwe yalekeraawo okugipima, nga tekisoboka kugipima.

⁵⁰ Omwaka ogw'enjala nga tegunnatuuka Yusufu yafuna abaana aboobulenzi babiri, Asenaasi, muwala wa Potiferi kabona wa Oni be yamuzaalira.

⁵¹ Omwana eyasooka yamutuumma Manase, kubanga Yusufu yagamba nti, "Katonda anneerabizza obuzibu bwange bwonna, n'ennyumba ya kitange."

⁵²Owookubiri n'amutuumma Efulayimu, kubanga yagamba nti, "Katonda anjazizza mu nsi mwe nabonaabonera."

⁵³Awo emyaka omusanvu egy'ekyengera ekyali mu nsi y'e Misiri ne giggwaako.

⁵⁴Emyaka omusanvu egy'enjala ne gitandika nga Yusufu bwe yayogera. Enjala n'egwa n'ebuna mu nsi zonna, kyokka yo mu Misiri nga emmere mweri.

⁵⁵Enjala bwe yagwa mu Misiri, abantu ne bakaabira Falaawo olw'emmere. Falaawo n'agamba Abamisiri nti, "Mugende eri Yusufu; ky'anaabagamba, kye muba mukola."

⁵⁶Kale enjala bwe yabuna Misiri, Yusufu n'asumulula ebyagi by'emmere byonna; n'aguza Abamisiri emmere.

⁵⁷Ensi zonna nazo ne zija e Misiri eri Yusufu okugula emmere; kubanga enjala yayitirira mu nsi zonna.

Olubereberye 42

Baganda ba Yusufu Bajja e Misiri

¹Yakobo bwe yategeera nga mu Misiri eriyo emmere, n'agamba batabani be nti, "Lwaki mutunula butunuzi?"

²Mpulidde nti mu Misiri eriyo emmere, muserengete mutugulireyo emmere, tube balamu, tuleme okufa."

³Awo baganda ba Yusufu ekkumi ne baserengeta e Misiri okugula emmere.

⁴Kyokka Yakobo n'atasindika Benyamini, muto wa Yusufu wamu ne baganda be kubanga yatya nti akabi kayinza okumuutukako.

⁵Bwe batyo batabani ba Isirayiri ne bajja mu Misiri wamu n'abalala abajja okugula emmere, kubanga ensi ya Kanani yali ejjudde enjala.

Yusufu Asanga Baganda be

⁶Mu kiseera ekyo Yusufu ye yali afuga Misiri; nga y'aguza abantu emmere. Awo baganda be ne bajja ne bamuvuunamira.

⁷Yusufu n'abalaba n'abategeera, wabula n'abayisa nga b'atamanyi n'ayogera nabo n'obukambwe. N'ababuuza nti, "Muva wa?" Ne bamuddamu nti, "Tuva mu nsi ya Kanani, tuzze kugula mmere."

⁸Bw'atylo Yusufu n'ategeera baganda be kyokka bo ne batamutegeera.

⁹Awo Yusufu n'ajjukira ebirooto bye ku bo. N'abagamba nti, "Muli bakessi; muzze kuketta nsi yaffe mulabe bw'eri ennafu."

¹⁰Ne bamuddamu nti, "Nedda mukama waffe; abaddu bo tuzze kugula mmere.

¹¹Ffenna tuli batabani ba musajja omu, tuli basajja ba mazima. Abaddu bo tetuli bakessi.”

¹²Ye n’abaddamu nti, “Nedda muzze kulaba obunafu bw’ensi yaffe bwe buli.”

¹³Ne bamuddamu nti, “Abaddu bo tuli kkumi na babiri, tuli baana ba muntu omu mu nsi ya Kanani, laba muto waffe n’olwa leero ali ne kitaffe, n’omulala yafa.”

¹⁴Naye Yusufu n’alumiriza nti, “Kiri nga bwe mbagambye, muli bakessi.

¹⁵Nzija kubategeerera ku kino, ndayidde obulamu bwa Falaawo temujja kuva wano, okuggyako nga muto wammwe aleeteddwa wano.

¹⁶Mutume omu ku mmwe, aleete muganda wammwe, mwe mubeere mu kkomera, ebigambo byammwe byetegerezebwe obanga ddala bye mwogedde bya mazima. Oba si ekkyo ndayidde obulamu bwa Falaawo, muli bakessi.”

¹⁷Awo n’abateeka bona mu kkomera okumala ennaku ssatu.

¹⁸Ku lunaku olwokusatu Yusufu n’abagamba nti, “Mukole bwe muti okuwonya obulamu bwammwe, kubanga ntya Katonda;

¹⁹obanga ddala muli basajja b’amazima, omu ku baganda bammwe asigale ng’asibiddwa mu kkomera, abalala mugende mutwalire abantu bammwe emmere,

²⁰mundeteere muto wammwe, olwo ebigambo byammwe bikakasibwe muleme okufa.” Awo ne bakola bwe batyo.

²¹Awo ne bagambagana nti, “Ddala tuliko omusango gwa muganda waffe, kubanga twalaba nga mweraliikirivu, bwe yatwegayirira ne tutamuwliriza; akabi kano kyekavudde katutuukako.”

²²Lewubeeni kwe kubaddamu nti, “Nnabagamba muleme kukola kabi ku mulenzi, nga mmwe temumpuliriza; kale omusaayi gwe kyeguva gutuwalanwako.”

²³Ne batamanya nti Yusufu ategedde bye boogedde, kubanga bayogeranga naye nga bayita mu mutaputa.

²⁴Awo Yusufu n’atunula ebbali n’akaaba, ate n’akyuka gye bali n’ayogera nabo. Awo n’atwala Simyoni n’amusiba nga balaba.

²⁵N’alagira bajjuze ensawo zaabwe ejŋaano, era bazze ensimbi za buli omu mu nsawo ye, baweebwe n’entanda; ne bibakolerwa.

²⁶Awo ne batikka endogoyi zaabwe ejŋaano ne bagenda.

²⁷Naye omu ku bo bwe yasumulula ensawo ye okuliisa endogoyi ye nga bali mu kifo mwe baasula, n’alaba ensimbi ze ku mumwa gw’ensawo;

²⁸n'agamba baganda be nti, "Ensimbi zange baazinzirizza, ziizino mu kamwa k'ensawo yange!" Ekyo ne kibeeralikiriza, buli omu n'atandika okutya, nga bwe bagamba nti, "Kiki kino Katonda ky'atukoze!"

Batabani ba Yakobo Bamutegeeza

²⁹Bwe baakomawo mu nsi ya Kanani eri Yakobo kitaabwe ne bamutegeeza byonna ebyababaako, nga bagamba nti,

³⁰"Omusajja omufuzi w'ensi y'e Misiri yayogera naffe n'obukambwe era n'atuyisa nga abaali bagenze okuketta ensi ye.

³¹Naye ne tumugamba nti, Tuli basajja b'amazima, tetuli bakessi,

³²tuli abooluganda kumi na babiri, baana ba muntu omu, munnaffe yafa, ne muto waffe olwa leero ali ne kitaffe mu nsi ya Kanani.

³³"Awo omusajja oyo omufuzi w'ensi n'atugamba nti, 'Ku kino kwennaategeerera nga muli beesigwa: muleke wano omu ku baganda bammwe, mutwale ejjaano olw'enjala eri mu maka gammwe.

³⁴Mundeetere muto wammwe, kwe nnaategeerera nga temuli bakessi, muli basajja b'amazima, olwo ne ndyoka mbawa muganda wammwe, mulyoke mugule emmere mu nsi eno."

³⁵Bwe baatuuka eka, buli eyafukumulanga ensawo ye, laba ng'omuvumbo gw'ensimbi ze mweziri. Awo bo ne kitaabwe bwe baalaba emivumbo gy'ensimbi ne batya.

³⁶Yakobo kitaabwe n'abagamba nti, "Munzigyeko abaana bange: Yusufu taliiwo, ne Simyoni taliiwo ne kaakano mwagala muntwaleko Benyamini!"

³⁷Awo Lewubeeni n'agamba kitaawe nti, "Ottanga batabani bange bombi, bwe sirikomyawo Benyamini gy'oli; mumpe, nange ndimukomyawo gy'oli."

³⁸Naye Yakobo n'agamba nti, "Mutabani wange tajja kuserengeta nammwe, kubanga muganda we yafa, era ye y'asigalawo yekka. Akabi bwe kalimutuuukako mu lugendo lwe mugendako, muliserengesa envi zange emagombe nga nkyali munakuwawu."

Olubereberye 43

Olugendo Iw'e Misiri Olwokubiri

¹Awo enjala bwe yayinga obungi mu nsi,

²era nga ne mmere gye baggya e Misiri yonna eriiriddwa, kitaabwe n'abagamba nti mugende mutugulire emmere.

³Naye Yuda n'amuddamu nti, "Omusajja yatkuutirira ddala ng'agamba nti, 'Temulinyanga ekigere mu maaso gange nga temuzze na muganda wammwe.'

⁴Bw'onokkiriza tuserengete ne muganda waffe okugula emmere, olwo tunaagenda.

⁵Naye bw'otomukkirize kugenda naffe, tetujja kuserengeta, kubanga omusajja yatugamba nti, ‘Temugenda kulaba maaso gange nga muganda wammwe tali nammwe.’”

⁶Isirayiri kwe kubaddamu nti, “Mwankola ki kino eky’obubalagaze ne mugamba omusajja nti mulina muganda wammwe omulala.”

⁷Ne bagamba nti, “Omusajja yatubuuza nnyo ebitufaako awamu n’ebifa ku lulyo lwaffe, ng’abuuza nti, ‘Kitammwe gyali mulamu? Mulina muganda wammwe omulala?’ Kye twamutegeeza nga kiddamu buzzi ebibuuzo bye yatubuuzanga. Tetwamanya ng’anaatugamba okuserengesa muganda waffe.”

⁸Era Yuda n’agamba Isirayiri kitaawe nti, “Mpa omulenzi tulyoke tugende tube balamu, tuleme okufa enjala, ffe naawe n’abaana baffe.

⁹Nze newaddeyo okumukuma, olimubuuza nze. Bwe sirikumuddiza, ne mussa mu maaso go mbeereko omusango ennaku zonna.

¹⁰Kubanga singa tetwalwa twandibadde tukomyewo omulundi ogwokubiri.”

¹¹Awo Isirayiri kitaabwe n’abagamba nti, “Bwe kinaaba bwe kityo, kale mukole bwe muti: mutwale ebimu ku bibala bya muno mu nsawo zammwe, mutwalire omusajja ekirabo: envumbo ntono, n’omubisi, n’omugavu, n’obubaane ne mooli n’ebinyeebwa ne Alumoni.

¹²Mutwale n’ensimbi za mirundi ebiri nga mutwala na ziri ezaali ku mimwa gye nsawo zammwe, osanga omuntu yakola nsobi.

¹³Mutwale ne muganda wammwe, musituke muddeyo eri omusajja.

¹⁴Katonda Ayinzabyonna abawe omukisa mu maaso g’omusajja, alyoke aleke muganda wammwe oli awamu ne Benyamini bakomewo. Obanga obulumi bw’okufa kw’abaana bange bulintuukako, kale.”

Baganda ba Yusufu Baddayo e Misiri

¹⁵Awo ne batwala ebirabo n’ensimbi za mirundi ebiri, ne Benyamini ne baserengeta naye e Misiri ne bayimirira mu maaso ga Yusufu.

¹⁶Awo Yusufu bwe yalaba nga bali ne Benyamini n’agamba omuweereza we nti, “Bayingize mu nnyumba, otte ensolo ofumbe ekijjulo, kubanga abasajja abo baakulya nange ekyemisana.”

¹⁷Omusajja n’akola nga Yusufu bwe yamulagira, n’ayingiza abasajja mu nnyumba ya Yusufu.

¹⁸Abasajja ne batya olw’okutwalibwa mu nnyumba ya Yusufu, ne bagamba nti kino kizze lwa nsimbi ezatuddizibwa ne ziteekebwa mu nsawo zaffe omulundi

guli, kyetuvudde tuleetebwa wano, anoonye ensonga ku ffe atuvunaane, atufuule abaddu awambe n'endogoyi zaffe.

¹⁹Awo ne bambuka n'omuweereza mu nnyumba ya Yusufu,

²⁰ne bagamba nti Ayi mukama waffe, twajja omulundi ogwasooka okugula emmere,

²¹bwe twatuuka mu kifo we twasula, ne tusumulula ensawo zaffe, nga mu buli kamwa k'ensawo ya buli omu mulimu ensimbi ze ezaali ez'okugula emmere, kyetuvudde tuzizza,

²²era tuleese n'endala olw'okugula emmere. Tetumanyi yateeka nsimbi mu nsawo zaffe.

²³Ye n'abaddamu nti, "Mubeere bagumu temutya. Katonda wammwe era Katonda wa kitammwe ye yabateekera obugagga mu nsawo zammwe; ensimbi zammwe nazifuna." Awo kwe kubaleetera Simyoni.

²⁴Omusalija bwe yamala okuyingiza abasajja abo mu nnyumba ya Yusufu, nga bamaze n'okunaaba ebigere, ng'amaze n'okuliisa endogoyi zaabwe,

²⁵ne bateekateeka ekirabo kya Yusufu bakimuwe mu ttuntu, kubanga baamanya nga bajja kuliira eyo.

Yusufu Alya ne Baganda be

²⁶Yusufu bwe yakomawo eka ne bamuleetera ekirabo kye baalina ne bamuvuunamira.

²⁷N'ababuuza bwe bali, n'ababuuza nti, "Kitammwe akyali mulamu bulungi?"

²⁸Ne bamuddamu nti, "Ssebo, kitaffe akyali mulamu era ali bulungi." Ne bavuunama mu bukkakkamu.

²⁹Yusufu bwe yayimusa amaaso, n'alaba Benyamini muganda we, mutabani wa nnyina. N'ababuuza nti, "Ono ye muto wammwe gwe mwantegeezako? Katonda akuwe omukisa mwana wange."

³⁰Awo Yusufu n'ayanguwa okuva mu maaso gaabwe, kubanga omutima gwe gwalumwa olwa muganda we, n'anoonya ekifo w'anaakabira. N'alinnya mu kisenge kye n'akaabira eyo.

³¹N'anaaba amaziga n'afuluma, n'aguma n'alagira emmere egabwe.

³²Ye ne bamuwa eyiye yekka, ne baganda be bokka, n'Abamisiri abalya naye nabo ne bagabulwa bokka, kubanga Abamisiri tebalyanga n'Abaebulaniya, kubanga kyali kivve eri Abamisiri.

³³Awo baganda ba Yusufu ne batuula mu maaso ge nga baddirinjana okuva ku mukulu mu buzaale bwabwe okutuuka ku muto; ne batunulaganako nga beewuunya.

³⁴Yusufu n'abakoleza ebitole okuva ku mmeeza ye, naye ekitole kya Benyamini ne kisinga ekya baganda be emirundi etaano. Bwe batyo ne balya ne basanyukira wamu ne Yusufu.

Olubereberye 44

Ekikopo kya Ffeeza Kibula

¹Awo Yusufu n'alagira omuweereza mu nnyumba ye nti, "Jjuza ensawo z'abasajja emmere nga bwe basobola okugyetikka, era oteeke ensimbi za buli omu mu nsawo ye.

²Era oteeke ekikopo kyange, ekya ffeeza, mu kamwa k'ensawo ya muto waabwe, wamu n'ensimbi ze ez'okugula emmere." N'akola nga Yusufu bwe yamugamba.

³Emmambya eba evaayo abasajja ne basiibulwa n'endogoyi zaabwe.

⁴Bwe baali baakava mu kibuga Yusufu n'agamba omuweereza we nti, "Golokoka obagoberere bw'obatuukako obabuuze nti, 'Lwaki musasudde ekibi olw'ebirungi? Lwaki mubbye ekikopo kyange ekya ffeeza?

⁵Mu kino mukama wange si mwanywera, era si kyalaguza? Mu ekyo mukoze bubi.'"

⁶Bwe yabatuukako n'abategeeza ebigambo ebyo.

⁷Ne bamugamba nti, "Mukama waffe lwaki ayogedde ebigambo ebyo? Olowooza tuli bantu ba ngeri ki abayinza okukola ekintu ng'ekyo?

⁸Laba, ensimbi ze twasanga ku mimwa gy'ensawo zaffe twazikuddiza okuva mu nsi ya Kanani, kale twandisobodde tutya okubba ffeeza oba zaabu okuva mu nnyumba ya mukama wo?

⁹Oyo gw'onookisanga nakyo mu ffe abaddu bo, afe, era naffe tuliba baddu ba mukama wange."

¹⁰N'abaddamu nti, "Kale kibeere nga bwe mwogedde, oyo anaasangibwa nakyo abeere muddu wange, naye abalala mu mmwe tewaabe abaako ky'avunaanwa."

¹¹Amangwago buli omu nassa ensawo ye wansi n'agisumulula.

¹²N'alyoka abaaza ng'asookera ku asinga obukulu okutuuka ku asembayo obuto; ekikopo ne kisangibwa mu nsawo ya Benyamini.

¹³Awo ne bayuza engoye zaabwe, buli omu n'atikka endogoyi ye, ne baddayo mu kibuga.

Baganda ba Yusufu Bamuvuunamira

¹⁴ Yusufu yali akyali mu nju, Yuda ne baganda be bwe baatuuka gy'ali, ne bagwa mu maaso ge ne bamuvuunamira.

¹⁵ Yusufu n'abagamba nti, "Kiki kino kye mukoze? Temumanyi nti omuntu ali nga nze asobola okuvumbula kye mukoze?"

¹⁶ Yuda n'addamu nti, "Tunaddamu ki mukama wange? Tunaayogera ki? Oba tuneggyako tutya omusango? Katonda avumbudde obwonoonyi bw'abaddu bo, laba tuli baddu ba mukama wange, ffenna, ffe n'oyo asangiddwa n'ekikopo."

¹⁷ Yusufu n'addamu nti, "Ekyo sijja kukikola, wabula oyo asangiddwa n'ekikopo, y'anaaba omuddu wange, naye mmwe mwambuke mirembe, mutuuke eri kitammwe."

Yuda Yeegayirira olwa Benyamini

¹⁸ Awo Yuda n'alaga eri Yusufu n'agamba nti, "Ayi mukama wange nkusaba omuddu wo abeeko kyayogera gy'oli, n'obusungu bwo buleme kubuubiuka eri omuddu wo; kubanga oli nga Falaawo yennyini.

¹⁹ Mukama wange yabuuza abaweereza be nti, 'Mulina kitammwe oba muganda wammwe?'

²⁰ Ne tuddamu mukama wange nti, 'Tulina kitaffe, musajja mukulu, ne muganda waffe atusinga obuto, omwana gwe yazaala mu bukadde bwe, ne muganda wa muto waffe, yafa; muto waffe yekka y'aliwo, eyasigalawo yekka ku baana ba nnyina; era kitaawe amwagala nnyo.'

²¹ "N'olyoka ogamba abaddu bo nti, 'Mumundeetere, mmulabeko.'

²² Twategeeza mukama wange nti, 'Omulenzi tayinza kuva ku kitaawe, kubanga bw'amuvaako, kitaawe alifa bufi!'

²³ N'oddamu abaddu bo nti, 'Muto wammwe bw'ataliserengeta nammwe, temugenda kulaba maaso gange.'

²⁴ Bwe twaddayo eri omuddu wo kitaffe, twamutegeeza ebigambo ebyo, mukama wange.

²⁵ Kale kitaffe bwe yagamba nti, 'Muddeeyo mutugulire ku mmere,'

²⁶ ne tumuddamu nti, 'Tetusobola kuserengeta. Muto waffe bw'atagenda naffe tetujja kugenda kubanga tetusobola kulaba maaso ga musajja oli nga muto waffe tali naffe.'

²⁷ "Awo omuddu wo, kitaffe n'atugamba nti, 'Mumanyi, mukazi wange yanzaalira abaana abalenzi babiri;

²⁸ omu yambulako, ne njogera nti mazima yataagulwataagulwa; era siddangayo kumulaba.

²⁹Bwe muntwalako n'ono, akabi ne kamutuukako, muliserengesa envi zange emagombe nga nkungubaga.'

³⁰"Kale kaakano, bwe nzirayo eri omuddu wo kitange ng'omulenzi tali naffe, obulamu bwe nga bwe bunyweredde ku bw'omulenzi,

³¹bw'anaalaba ng'omulenzi tali naffe, ajja kufa, n'abaddu bo baliserengesa envi z'omuddu wo kitaffe emagombe ng'akyakungubagira omwana we.

³²Kubanga omuweereza wo yeeyimirira omulenzi eri kitange; nga ɳjamba nti, 'Bwe sirimuzza gy'oli ndiba n'obuvunaanyizibwa n'okunenyezebwa ennaku zona ez'obulamu bwange.'

³³"Kale kaakano nkwegayirira, omuddu wo nsigale ng'omuddu wa mukama wange, mu kifo ky'omulenzi; omulenzi omuleke addeyo ne baganda be.

³⁴Kale n'addayo ntua eri kitange ng'omulenzi tali nange? Ntua okulaba akabi akayinza okutuuka ku kitange."

Olubereberye 45

Yusufu Yeeraga Baganda be

¹Awo Yusufu n'atasobola kwefuga n'alemererwa okwongera okwekuuma mu maaso gaabo bona abaaliwo; kwe kulagira nti, "Muggyewo abantu bona mu maaso gange." Bwe kityo ne wataba muntu mulala yenna Yusufu bwe yali yeeraga eri baganda be.

²Awo n'akaaba mu ddoboozi ery'omwanguka, n'Abamisiri ne bamuwulira era n'ennyumba yonna eya Falaawo nabo ne bamuwulira.

³Yusufu n'agamba baganda be nti, "Nze Yusufu, kitange akyali mulamu?" Naye baganda be ne batayinza kumuddamu, kubanga okweraliikirira kwabayinga mu maaso ge.

⁴Awo Yusufu n'agamba baganda be nti, "Mbasaba munseemberere." Ne basembera gy'ali. N'abagamba nti, "Nze muganda wammwe Yusufu gwe mwatunda e Misiri.

⁵Naye kaakano temuggwaamu mwoyo, oba temwekubagiza olw'okuntunda wano, kubanga Katonda yantuma mbasookeyo nsobole okuwonya obulamu.

⁶Kubanga enjala ebadde mu nsi okumala emyaka gino ebiri; era wakyaliyo emirala etaano egitalibaamu kulima wadde okukungula.

⁷Era Katonda yantuma mbasookeyo mbakuumire abalisigalawo ku nsi; ndyoke mbawonyezeewo abantu abangi ennyo mu ngeri ey'ekitalo.

⁸ “Noolwekyo si mmwe mwansindika wano, wabula Katonda; era anfudde kitaawe wa Falaawo, era mukama w’ennyumba ye era omufuzi w’ensi yonna ey’e Misiri.

⁹ Kale mwanguwe, mwambuke eri kitange mumugambe nti, ‘Bw’ati mutabani wo Yusufu bw’agamba nti, Katonda anfudde mufuzi wa Misiri yenna; serengeta gye ndi, tolwa;

¹⁰ ojja kubeera mu Goseni, olibeera kumpi nange. Ggwe n’abaana bo, n’abaana b’abaana bo, ebisibo byammwe, amagana gammwe ne byonna bye mulina;

¹¹ eyo gye nnaabagabiririranga; si kulwa nga mmwe n’ennyumba zammwe ne byonna bye mulina biggwaawo.’

¹² “Era kaakano mwerabiddeko n’amaaso gammwe era ne muganda wange Benyamini akyerabiddeko nti nze njogera nammwe.

¹³ Muteekwa okutegeeza kitange ekitiibwa kye nnina mu Misiri, ne byonna bye mulabye. Temulwa, muserengese kitange wano.”

¹⁴ Awo Yusufu n’agwa Benyamini mu kifuba n’akaaba ne Benyamini n’akaabira ku kibegabega kye.

¹⁵ N’agwa baganda be mu kifuba, n’akaabira buli omu ku bo; n’olvannyuma baganda be ne boogera naye.

Ab’olulyo Iwa Yusufu Bayitibwa e Misiri

¹⁶ Ebigambo eby’okujja kwa baganda ba Yusufu bwe byawulirwa mu nnyumba ya Falaawo ne bisanyusa nnyo Falaawo n’abaweereza be.

¹⁷ Falaawo n’agamba Yusufu nti, “Gamba baganda bo nti, ‘Mukole bwe muti: mutikke ensolo zammwe muddeyo mu nsi ya Kanani,

¹⁸ munone kitammwe n’abantu bammwe n’ebammwe mujje gye ndi, ndibawa ekifo ekisinga obulungi mu nsi y’e Misiri, nammwe mulirya obulungi obw’ensi.’

¹⁹ “Era balagire batwale amagaali okuva mu nsi y’e Misiri olw’abaana baabwe abato ne bakyala bammwe, mujje ne kitammwe.

²⁰ Wabula ebintu byammwe tebibateganya nnyo, kubanga ebisinga obulungi mu Misiri yenna bijja kuba byammwe.”

²¹ Abaana ba Isirayiri ne bakola bwe batyo; Yusufu n’abawa amagaali, nga Falaawo bwe yalagira n’abawa n’entanda ey’omu kkubo.

²² Buli omu ku bo n’amuwa ebyambalo eby’okukyusa, naye ye Benyamini n’amuwa ebitundu bya ffeeza ebikumi bisatu n’ebiyambalo eby’okuwanyisa emigogo etaano.

²³Kitaawe n'amuweereza endogoyi kkumi ezeetisse ebintu ebirungi eby'e Misiri n'endogoyi enkazi kkumi ezeetisse emmere, emigaati n'entanda ya kitaawe bw'aliba ajja.

²⁴Awo n'asiibula baganda be. Bwe baali bagenda n'abagamba nti, "Temuyombera mu kkubo."

²⁵Bwe batyo ne bambuka okuva mu Misiri ne batuuka mu nsi ya Kanani eri kitaabwe Yakobo.

²⁶Bwe baatuuka ne bamutegeeza nti Yusufu akyali mulamu, era y'afuga ensi y'e Misiri yonna. Bwe yawulira ebyo n'awunga n'atasobola kubakkiriza.

²⁷Naye bwe baamutegeeza ebigambo bya Yusufu byonna bye yabagamba, era bwe yalaba amagaali Yusufu ge yaweereza okumutwala n'addamu omwoyo;

²⁸n'agamba nti, "Mmatidde, omwana wange Yusufu akyali mulamu. Nzija kugenda mulabe nga sinnafa."

Olubereberyе 46

Yakobo Agenda e Misiri

¹Awo Isirayiri n'addiria byonna bye yalina, n'atandika olugendo; bwe yatuuka e Beriseba n'awaayo ssaddaaka eri Katonda wa kitaawe Isaaka.

²Katonda n'ayogera ne Isirayiri mu kwolesebwa ekiro, n'amuyita nti, "Yakobo, Yakobo?" N'amuddamu nti, "Nze nzuuno."

³Katonda n'amugamba nti, "Nze Katonda, Katonda wa kitaawo; totya kuserengeta Misiri, kubanga ndi kufuulirayo eyo eggwanga eddene.

⁴Nzija kuserengeta naawe e Misiri, era ndi kuggyayo; era olifiira mu mikono gya Yusufu."

⁵Awo Yakobo n'ava e Beriseba, batabani be ne bamutwalira wamu n'abaana baabwe abato, ne bakazi baabwe ne babassa mu magaali Falaawo ge yaweereza okumutwala.

⁶Era ne batwala ebisibo n'ebintu byabwe bye baafunira mu nsi ya Kanani ne batuuka e Misiri, Yakobo wamu n'ezzadde lye.

⁷Batabani be ne bazzukulu be, bawala be n'abaana ba bawala be; ezzadde lye lyonna n'alireeta mu Misiri wamu naye.

Abaana n'Abazzukulu ba Yakobo

⁸Gano ge mannya g'abazzukulu ba Isirayiri abaagenda e Misiri ne Yakobo: Lewubeeni mutabani wa Yakobo omubereberyе,

⁹ne batabani ba Lewubeeni: Kanoki, ne Palu, ne Kezulooni ne Kalumi.

¹⁰ Ne batabani ba Simyoni: Yamweri, ne Yamini, ne Okadi, ne Yakini, ne Zokali ne Sawuli omwana w'omukazi Omukanani.

¹¹ Ne batabani ba Leevi: Gerusoni, ne Kokasi ne Merali.

¹² N'aba Yuda: Eri, ne Onani, ne Seera, ne Pereezi ne Zeera; naye bo Eri ne Onani baafiira mu nsi ya Kanani. Batabani ba Pereezi baali: Kezulooni ne Kamuli.

¹³ Bo aba Isakaali baali: Tola, ne Puva, ne Yobu ne Simuloni.

¹⁴ Batabani ba Zebbulooni baali Seredi, ne Eroni ne Yaleeri.

¹⁵ Abo be batabani ba Leeya be yazaalira Yakobo nga bali mu Padanalaamu, omuwala ye yali Dina. Abaana bona aboobulenzi n'aboobuwala baali amakumi asatu mu basatu.

¹⁶ Batabani ba Gaadi baali Zifiyooni, ne Kagi, ne Suni, ne Ezuboni, ne Eri, ne Alodi ne Aleri.

¹⁷ Bo batabani ba Aseri be bano: Imuna, ne Isuva, ne Isuvi, ne Beriya awamu ne Seera mwannyinaabwe. Bo Batabani ba Beriya baali Keba ne Malukiyeeri.

¹⁸ Bano be batabani ba Zirupa, Labbaani gwe yawa Leeya muwala we, be yazaalira Yakobo; abantu kkumi na mukaaga.

¹⁹ Batabani ba Laakeeri, mukazi wa Yakobo be bano Yusufu ne Benyamini.

²⁰ Aba Yusufu ng'ali e Misiri baali Manase ne Efulayimu, Asenaasi muwala wa Potiferi kabona wa Oni be yamuzaalira.

²¹ Ne batabani ba Benyamini be ba: Bera, ne Beker, ne Asuberi, ne Gera, ne Naamani, ne Eki, ne Losi, ne Mupimu, ne Kupimu ne Aludi.

²² Abantu abasibuka mu Laakeeri mukazi wa Yakobo baali kkumi na bana.

²³ Mutabani wa Ddaani ye Kusimu.

²⁴ Bo aba Nafutaali be ba: Yazeeri, ne Guni, ne Yezeri, ne Siremu.

²⁵ Bano be baava mu Biira mukazi wa Yakobo, Labbaani gwe yawa Laakeeri muwala we; bona be bantu musanvu.

²⁶ Abantu bona aba Yakobo abajja mu Misiri, ab'enda ye nga totaddeeko baka baana be, baali abantu nkaaga mu mukaaga.

²⁷ Batabani ba Yusufu abaamuzaalirwa ng'ali mu Misiri baali babiri. Abantu bona ab'ennyumba ya Yakobo abajja e Misiri baali nsanvu.

Okutuula e Misiri

²⁸ Yakobo n'atuma Yuda eri Yusufu ajje amusisinkane mu Goseni, ne batuuka e Goseni.

²⁹Awo Yusufu n'ateekateeka eggalii lye n'agenda okusisinkana Isirayiri kitaawe e Goseni, n'amweraga, n'amugwa mu kifuba n'akaabira mu kifuba kye okumala akabanga.

³⁰Isirayiri n'agamba Yusufu nti, "Kale kaakano ka nfe, kubanga ndabye amaaso go ne ntegeera nti okyali mulamu."

³¹Yusufu n'agamba baganda be n'ab'ennyumba ya kitaawe nti, "Nzija kugenda eri Falaawo mugambe nti, 'Baganda bange n'ennyumba ya kitange abaali mu nsi ya Kanani bazze gye ndi.

³²Kyokka balunzi; balunda ente era baleese amagana gaabwe n'ebisibo byabwe ne byonna bye balina.'

³³Kale Falaawo bw'abayita n'ababuuza nti, 'Mukola mulimu ki?'

³⁴Mumuddemu nti, 'Abaweeereza bo kasookedde tuzaalibwa tuli balunzi, ffe ne bajjajjaffe.' Mulyoke mubeere mu nsi ya Goseni, kubanga abalunzi baamuzizo eri Abamisiri."

Olubereberye 47

¹Awo Yusufu n'agenda eri Falaawo n'amugamba nti, "Kitange ne baganda bange n'amagana gaabwe n'ebisibo byabwe ne byonna bye balina bazze nga bava mu Kanani; kaakano bali Goseni."

²Yalondako bataano ku baganda be, n'agenda nabo ewa Falaawo.

³Falaawo n'ababuuza nti, "Omulimu gwammwe mulimu ki?" Ne bamuddamu nti, "Abaweeereza bo tuli balunzi nga bajjajjaffe.

⁴Tuzze muno kunoonyeza bisibo byaffe muddo, kubanga abaddu bo tuva mu njala mpitirivu eri mu Kanani; ne kaakano abaddu bo tukusaba tubeere e Goseni."

⁵Awo Falaawo n'agamba Yusufu nti, "Kitaawo ne baganda bo bazze gy'oli.

⁶Ensi y'e Misiri gw'ogirinako obuyinza, teeka kitaawo ne baganda bo awasinga obulungi; bateeke e Goseni. Era obanga omanyi asobola mu bo muwe akuumene zange."

⁷Awo Yusufu n'ayingiza Yakobo, kitaawe n'amwanjula eri Falaawo. Yakobo n'asabira Falaawo omukisa.

⁸Falaawo n'abuuza Yakobo nti, "Olina emyaka emeka?"

⁹Yakobo n'addamu nti, "Emyaka egy'olugendo lwange mu nsi giri kikumi mu amakumi asatu; emyaka gyange gibadde mitono era mizibu; siwangadde nga bajjajjange."

¹⁰Olwo Yakobo n'asabira Falaawo omukisa n'ava mu maaso ga Falaawo.

¹¹Awo Yusufu n'asenza kitaawe ne baganda be e Misiri, n'abawa ekitundu ekyali kisinga obulungi eky'e Goseni, mu Disitulikiti ey'e Lamusesi nga Falaawo bwe yalagira.

¹²Yusufu n'awa kitaawe ne baganda be n'ab'ennyumba ya kitaawe emmere ng'omuwendo gw'abaana baabwe bwe gwali.

Yusufu mu Njala

¹³Awo emmere n'eggwa mu kitundu ekyo kyonna kubanga enjala yayitirira obungi, ne kireetera ensi y'e Misiri ne Kanani okukosebwa ennyo.

¹⁴Yusufu n'akunjanya ensimbi zonna ezaali mu Misiri ne mu Kanani ng'abaguza emmere; n'azireeta mu lubiri lwa Falaawo.

¹⁵Awo ensimbi bwe zaggwa ku bantu b'e Misiri ne Kanani ne bajja eri Yusufu ne bamugamba nti, "Tuwe emmere. Ensimbi zituweddeko. Lwaki tufa?"

¹⁶Yusufu n'abagamba nti, "Kale obanga ensimbi zibaweddeko mundeetere ensolo zammwe mbaguze emmere."

¹⁷Awo ne bamuleetera amagana g'ensolo zaabwe, omwali embalaasi, n'endiga, n'ente, n'endogoyi, okubiwaanyisaamu emmere; emmere eyo n'ebayisa mu mwaka ogwo.

¹⁸Omwaka ogwo bwe gwaggwaako, ne bajja eri Yusufu mu mwaka ogwaddirira ne bamugamba nti, "Tetuukukise mukama waffe, ensimbi zituweddeko n'ensolo zaffe zifuuse zizo tewali kye tusigazza, wabula emibiri gyaffe gino n'ebyalo byaffe.

¹⁹Tufiira ki nga w'oli? Tugule ffe n'ebyalo byaffe otuwe emmere tuleme okufa, naffe tuliba baddu ba Falaawo, ensi yaffe ereme okuzikirira."

²⁰Bw'atyo Yusufu n'agulira Falaawo ensi yonna ey'e Misiri. Abamisiri kinoomu, bona ne batunda ebyalo byabwe kubanga enjala yali mpitirivu, ensi yonna n'efuuka ya Falaawo.

²¹Bwe batyo n'abantu baamu okuva ku njuyi zonna ne bafuuka baddu ba Falaawo.

²²Ekitundu kya bakabona kye kyokka ky'ataagula, kubanga bo baasasulwanga Falaawo. Kye yabasasulanga kwe beeguliranga ebyokulya; bo kyebaava batatunda ttaka lyabwe.

²³Awo Yusufu n'agamba abantu nti, "Mulabe, olwa leero mbaguze mmwe n'ebyalo byammwe; mbagulidde Falaawo. Kale kaakano ensigo zino zammwe munaazisiga.

²⁴Bwe mulikungula, muliwa Falaawo ekitundu kimu kyakutaano, ebitundu bina bya kutaano biriba byammwe, okuba ensigo mu nnimiro zammwe, n'emmere ku lwammwe n'ab'ennyumba zammwe n'abaana bammwe."

²⁵Ne bamuddamu nti, "Otuwonyezza okufa; mukama waffe bw'anaasiima tuliba baddu ba Falaawo."

²⁶Awo Yusufu n'ateeka etteeka erikwata ku ttaka mu nsi y'e Misiri; weeliri n'okutuusa kaakano, nti ekitundu kimu kyakutaano kiba musolo gwa Falaawo; ettaka ly'abakabona lyokka lye litaafuuka lya Falaawo.

Ekisuubizo kya Yusufu eri Yakobo

²⁷Bw'atyo Isirayiri n'abantu be ne babeera mu nsi y'e Misiri, mu Goseni, ne bagaggawalira mu kitundu ekyo. Baazaala ne baala nnyo.

²⁸Yakobo n'amala mu Misiri emyaka kkumi na musanvu. Bw'atyo Yakobo n'awangaala emyaka kikumi mu ana mu musanvu.

²⁹Ekiseera eky'okufa kwa Isirayiri bwe kyalisembedde, n'ayita mutabani we Yusufu n'amugamba nti, "Obanga nfunye ekisa mu maaso go teeka omukono gwo wansi w'ekisambi kyange, ondayirire ng'onompulira n'otonkuusakuusa: tonziikanga mu Misiri,

³⁰onteeekanga wamu ne bajjajjange. Olintwala n'onziika ku butaka." Yusufu n'amuddamu nti, "Ndikola nga bw'ogambye."

³¹N'amugamba nti, "Ndayirira." N'amulayirira. Awo Isirayiri n'akoteka omutwe gwe ng'atudde emitwetwe w'ekitanda kye.

Olubereberye 48

Yakobo Asabira Batabani ba Yusufu Omukisa

¹Oluvannyuma Yusufu n'ategeeezebwा nti, "Laba, kitaawo mulwadde." Bw'atyo n'atwala batabani be Manase ne Efulayimu;

²Yakobo n'ategeeezebwा nti, "Mutabani wo azze okukulaba." Awo Yakobo ne yeekakaba ku kitanda kye n'atuula.

³N'agamba Yusufu nti, "Katonda Ayinzabyonna yandabikira e Luzi mu nsi ya Kanani n'ampa omukisa.

⁴N'aŋjamba nti, 'Laba, ndikwaza n'osukkirira ne nkufuula abantu abangi, era ensi eno ndigwa ezzadde lyo okuba obutaka bwabwe ennaku zonna.'

⁵"Kale kaakano batabani bo bombi abaakuzaalirwa mu Misiri nga sinnajja, bange; Efulayimu ne Manase baliba bange nga Lewubeeni ne Simyoni bwe bali.

⁶N'abo abaakuzaalirwa oluvannyuma lwabwe baliba babo, banaayitibwa amannya ga baganda baabwe mu mugabo gwabwe.

⁷Kubanga bwe najja ng'ava e Paddani, ne ndaba ennaku Laakeeri n'anfiirako mu kkubo mu nsi ya Kanani, nga nkyagenda Efulasi; ne mmuziika eyo mu kkubo erigenda Efulasi, ye Besirekemu."

⁸Isirayiri bwe yalaba batabani ba Yusufu n'abuuza nti, "Bano be baani?"

⁹Yusufu n'addamu kitaawe nti, "Be batabani bange, Katonda b'ampeeredde wano." N'amugamba nti, "Nkusaba obansembereze mbasabire omukisa."

¹⁰Mu kiseera kino amaaso ga Isirayiri gaali gayimbadde olw'obukadde, nga takyasobola kulaba. Awo Yusufu n'abamusembereza, Yakobo n'abagwa mu kifuba n'abanywegera.

¹¹Isirayiri n'agamba Yusufu nti, "Saasuubira kulaba maaso go; era laba Katonda ansobozesezza okulaba n'abaana bo."

¹²Awo Yusufu n'abaggya ku maviivi ge n'avuunama wansi.

¹³Yusufu n'abatwala bombi, Efulayimu ng'ali mu mukono gwe ogwa ddyo, okwolekera ogwa Isirayiri ogwa kkono, ne Manase ng'ali mu mukono gwe ogwa kkono okwolekera ogwa Isirayiri ogwa ddyo, n'abamusembereza.

¹⁴Isirayiri n'agolola omukono gwe ogwa ddyo n'aguteeka ku mutwe gwa Efulayimu eyali omuto, n'omukono gwe ogwa kkono n'aguteeka ku mutwe gwa Manase, n'ayisiñjanya emikono gye, kubanga Manase ye yasooka okuzaalibwa.

¹⁵N'awa Yusufu omukisa, n'agamba nti, "Katonda wa jjajjange Ibulayimu ne kitange Isaaka gwe baatambulira mu maaso ge, Katonda oyo ankuleembedde obulamu bwange bwonna okutuusa leero,

¹⁶Malayika oyo eyannunula okuva mu bizibu byonna, owe omukisa abalenzi bano. Erinnya lyange lyeyongerenga okutuumibwa mu bo era n'erya Ibulayimu n'erya Isaaka. Era bafuuke ekibiina ekinene mu maaso g'ensi."

¹⁷Yusufu bwe yalaba nga kitaawe atadde omukono gwe ogwa ddyo ku Efulayimu n'atakyagala, n'akwata omukono gwa kitaawe okuguggya ku mutwe gwa Efulayimu aguzze ku mutwe gwa Manase.

¹⁸N'agamba kitaawe nti, "Kireme kuba kityo, kitange, kubanga ono ye mubereberye, teeka omukono ogwa ddyo ku mutwe gwe."

¹⁹Naye kitaawe n'agaana n'agamba nti, "Mmanyi, mwana wange, mmanyi nti alifuuka eggwanga era aliba mukulu; kyokka muto we aliba mukulu okumusinga era alivaamu amawanga mangi."

²⁰Awo n'abasabira omukisa ku lunaku olwo ng'agamba nti, "Abaana ba Isirayiri basabiragane omukisa nga bagamba nti, 'Katonda akuyise nga Efulayimu ne Manase.'" Bw'atyo n'ateeka Efulayimu mu maaso ga Manase.

²¹Ate Isirayiri n'agamba Yusufu nti, "Laba, nnaatera okufa, kyokka Katonda alibeera naawe era alikuzzaayo mu nsi ya bajjajaabo.

²²Wabula ggwe nkuwadde kinene okusinga baganda bo, nkuwadde ekitundu kimu ekikkirira olusozi, kye naggya ku Bamoli n'ekitala kyange n'omutego gwange."

Olubereberye 49

Yakobo Asabira Batabani be Omukisa

¹Awo Yakobo n'ayita batabani be n'abagamba nti, Mukuŋjaane, ndyoke mbategeeze ebiribabaako mu nnaku ezijja.

²Mukuŋjaane muwulire, mwe abaana ba Yakobo, muwulirize Isirayiri kitammwe.

³Lewubeeni ggwe mubereberye wange, amaanyi gange, ebibala ebibereberye eby'amaanyi gange, ekitiibwa n'obuyinza ebiyitirivu.

⁴Naye tafugika, oli ng'amayengo g'enyanja, naye tokyali wa kitibwa, kubanga walinnya ekitanda kya kitaawo, mu nnyumba yange, n'okyonoona.

⁵Simyon ne Leevi baaluganda, ebitala byabwe byakulwanyisa bya maanyi.

⁶Ayi omwoyo gwange teweetaba mu kuteesa kwabwe. Ayi omwoyo gwange teweegatta nabo. Kubanga mu busungu bwabwe batta abantu, olw'okwekulumbaza kwabwe baatema ente olunywa.

⁷Obusungu bwabwe bukolimirwe, kubanga bungi; n'obukambwe bwabwe, kubanga bwa ttima. Ndibaawula mu Yakobo, ndibasaasaanya mu Isirayiri.

⁸Yuda gwe baganda bo banaakutenderezanga. Omukono gwo gunaatulugunyanga abalabe bo. Abaana ba kitaawo banaakuvuunamiranga.

⁹Yuda, mwana w'empologoma. Oyambuse mwana wange, ng'ovudde ku muyiggo. Yakutama, yabwama ng'empologoma. Ddala ng'empologoma enkazi, ani anaakwenjanga?

¹⁰Era omuggo gw'omufuzi teguuvenga wakati wa bigere bya Yuda, okutuusa Siiro lw'alijja; era oyo amawanga gonna gwe ganaawuliranga.

¹¹Alisiba endogoyi ku muzabbibu, n'omwana gw'endogoyi ku muzabbibu ogusinga obulungi, ayoza ebyambalo bye mu nvinnyo, n'engoye ze mu musaayi gwe zabbibu.

¹²Amaaso ge galimyuka wayini, n'amannyo ge galitukula okusinga amata.

¹³Zebbulooni alibeera ku mabbali ga nnyanja; anaabanga mwalo gw'amaato, ensalo ze ziriba ku Sidoni.

- ¹⁴ Isakaali ndogoyi ya maanyi, ng'akutama wakati mu bisibo by'endiga;
- ¹⁵ yalaba ng'ekifo ky'okuwummuliramu kirungi; nga n'ensi esanyusa; n'alyoka akkakkanya ekibegabega kye okusitula, n'afuuka omuddu ow'okukozesebwanga emirimu egy'obuwaze.
- ¹⁶ Ddaani anaalamulanga mu bwenkanya abantu be ng'ekika ekimu ku bika bya Isirayiri.
- ¹⁷ Ddaani anaaba musota mu kkubo, essalambwa ku kkubo, eriruma ebisinziiro by'embalaasi, omwebagazi waayo alyoke agwe emabega waayo.
- ¹⁸ Nnindirira obulokozi bwo, Ayi MUKAMA.
- ¹⁹ Gaadi alirumbibwa ogubiina gw'abanyazi, naye ye, alibafubutukira emabega.
- ²⁰ Aseri emmere ye eneebanga ngimu, era anaagemuliranga kabaka ebyokulya.
- ²¹ Nafutaali mpeewo ya ddembe, avaamu ebigambo ebirungi.
- ²² Yusufu lye ttabi eribala ennyo, ettabi eribala ennyo eriri ku mugga; abaana be babuna bbugwe.
- ²³ Abalasa obusaale baamulumba bubi nnyo, baamulasa ne bamulumya nnyo;
- ²⁴ naye omutego gwe ne gunywera, n'emikono gye ne gitasagaasagana. Olw'omukono gwa Ayinzabyonna owa Yakobo, olw'Omusumba, Olwazi lwa Isirayiri,
- ²⁵ olwa Katonda wa kitaawo, akuyamba, olwa Ayinzabyonna akuwa omukisa, omukisa oguva waggulu mu ggulu, omukisa ogwa wansi mu buziba, omukisa ogw'omu lubuto ne mu mabeere.
- ²⁶ Omukisa gwa kitaawo gusinga omukisa gwa bajajjange, gusinga egyo egyaweebwa bajajja ab'edda. Gino gyonna gibeere ku mutwe gwa Yusufu, gibeere ne ku bukowekowe bw'oyo eyayawukanyizibwa ne baganda be.
- ²⁷ Benyamini musege ogunyaga, mu makya alya omuyiggo, mu kawungeezi n'agaba omunyago.
- ²⁸ Ebyo byonna by'ebika ekkumi n'ebiriri ebya Isirayiri, era ebyo kitaabwe bye yayogera nabo ng'abasabira omukisa. Buli omu ng'amusabira omukisa ogumusaanira.

Okufa kwa Yakobo

- ²⁹ Oluvannyuma n'abakuutira n'abagamba nti, "Nditwalibwa eri abantu bange gye baatwalibwa. Munziikanga wamu ne bajajjange, mu mpuku eri mu nnimiro ya Efulooni Omukiiti,

³⁰mu mpuku eri mu nnimiro ya Makupeera, okumpi ne Mamule, mu nsi ya Kanani, Ibulayimu gye yagulira mu nnimiro, okuva ku Efulooni Omukiiti. Yagigula okuba obutaka bw'okuziikangamu.

³¹Awo we waaziikibwa Ibulayimu ne Saala mukazi we, era ne Isaaka ne Lebbeeka mukazi we, we baaziikwa, era awo we naziika Leeya.

³²Ennimo n'empuku erimu byagulibwa okuva ku baana ba Kesi.”

³³Yakobo bwe yamala okukuutira batabani be, n'azaayo ebigere bye mu kitanda, n'assa omukka ogw'enkomerero n'afa n'akuŋyaanyizibwa eri abantu be.

Olubereberye 50

¹Awo Yusufu n'agwa mu maaso ga kitaawe n'akaaba, n'amunywegera.

²Yusufu n'alagira abaweeresa be abasawo, okukalirira omulambo gwa kitaawe. Bwe batyo abasawo ne bakalirira omulambo gwa Isirayiri;

³baali beetaaga ennaku amakumi ana okukoleramu ekayo. Ezo ze nnaku ezakaliririrwangamu emirambo. Abamisiri ne bakungubagira Yakobo okumala ennaku nsanvu.

⁴Awo ennaku ez'okukungubagiramu Yakobo bwe zaggwaako, Yusufu n'ayogera n'ennyumba ya Falaawo, n'agamba nti, “Obanga ndabye ekisa mu maaso gammwe munjogerereyo ewa Falaawo. Mumugambe nti,

⁵Kitange yandayiza ng'agamba nti, “Nnaatera okufa; mu ntaana yange gye nesimira mu nsi ya Kanani, omwo mw'onziikanga.” Kale kaakano mbasaba mundeke ḥejende nziike kitange; oluvannyuma nkomewo.”

⁶Falaawo n'addamu nti, “Genda oziike kitaawo nga bwe yakulayiza.”

⁷Awo Yusufu n'ayambuka wamu n'abaweeresa ba Falaawo bona, n'abakulu b'ennyumba ye, n'abakulu ba Misiri bona,

⁸n'ab'ennyumba ya Yusufu, ne baganda be, n'ab'ennyumba ya kitaawe. Abaana bokka be baasigala mu Goseni n'ebisibo byabwe n'amagana gaabwe.

⁹N'agenda n'amagaali n'abeebagala embalaasi era ekibiina kyali kinene nnyo.

¹⁰Bwe baatuuka ku gguuliro lya Atadi ng'osomose Yoludaani, ne bakungubaga okukungubaga okutagambika okujjudde ennaku; Yusufu n'akungubagira kitaawe okumala ennaku musanvu.

¹¹Abantu ab'omu nsi, Abakanani, bwe baalaba okukungubaga mu gguuliro lya Atadi ne bagamba nti, “Okukungubaga kuno kwa ntiisa eri Abamisiri.” Ekifo ekayo kyekyava kiyitibwa Aberumizirayimu, ekiri emitala wa Yoludaani.

¹²Bwe batyo batabani ba Yakobo ne bakola nga bwe yabalagira.

¹³Baamwetikka ne bamutuusa mu Kanani, ne bamuziika mu mpuku eyali mu nnimiro ya Makupeera, okumpi ne Mamule, Ibulayimu gye yagula okuva ku Efulooni Omukiiti, aziikengamu abantu be.

¹⁴Yusufu bwe yamala okuziika kitaawe n'addayo e Misiri wamu ne baganda be ne bona abayambuka naye okuziika kitaawe.

¹⁵Baganda ba Yusufu bwe baalaba nga kitaabwe afudde, ne bagamba nti, "Osanga Yusufu ajja kutukyawa yeesasuze olw'ebibi byonna bye twamukola."

¹⁶Kyebaava bamutumira nga bagamba nti, "Kitaawo bwe yali tannafa yatulagira nti

¹⁷tugambanga Yusufu nti, 'Nkusaba osonyiwe baganda bo bye bakusobya n'ekibi kyabwe, kubanga baasobya nnyo gy'oli.' Kale nno kaakano tukusaba osonyiwe okusobya kw'abweereza ba Katonda wa kitaawo." Yusufu bwe baakimugamba n'akaaba.

¹⁸Baganda be ne bagenda gy'ali ne beeyala mu maaso ge ne bagamba nti, "Laba, tuli baddu bo."

¹⁹Naye Yusufu n'abagamba nti, "Temutya, nze ndi mu kifo kya Katonda?

²⁰Mwagenderera okunnumya, naye Katonda n'akifuula ekirungi, n'akikozesa abantu baleme okufa.

²¹Noolwekyo temutya, nzija kubaliisa mmwe n'abaana bammwe." Bw'atyo n'abagumya n'abazaamu amaanyi.

Okufa kwa Yusufu

²²Awo Yusufu n'abeera mu Misiri, ye n'ennyumba ya kitaawe. N'awangaala emyaka kikumi mu kkumi.

²³N'alaba abaana ba Efulayimu, abazzukulu ab'omugigi ogwokusatu. Era n'alaba n'aba Makiri mutabani wa Manase abaazaalirwa ku maviivi ga Yusufu.

²⁴Yusufu n'agamba baganda be nti, "Nnaatera okufa, naye Katonda alibakyalira n'abalinnyisa okubaggya mu nsi eno; n'abatwala mu nsi gye yalayirira Ibulayimu, ne Isaaka ne Yakobo."

²⁵Awo Yusufu n'alayiza abaana ba Isirayiri ng'agamba nti, "Katonda alibakyalira, nammwe mulinyisanga amagumba gange okugaggya wano."

²⁶Bw'atyo Yusufu n'afa, ng'alina emyaka kikumi mu kkumi; ne bakalirira omulambo gwe n'atekebwa mu ssanduuko mu Misiri.

Okuva

Okuva 1

Abayisirayiri Babonyaabonyezebwa

- ¹ Gano ge mannya ga batabani ba Isirayiri, era ye Yakobo, abajja naye mu Misiri; buli omu n'ab'omu nnyumba ye:
- ² Lewubeeni, ne Simyoni, ne Leevi ne Yuda,
- ³ ne Isakaali, ne Zebbulooni, ne Benyamini,
- ⁴ ne Ddaani, ne Nafutaali, ne Gaadi, ne Aseri.
- ⁵ Abaana bona awamu Yakobo yennyini be yazaala baali bawera nsanvu; Yusufu ye, yali yabeera dda mu Misiri.
- ⁶ Awo Yusufu n'afa; ne baganda be ne bona ab'omulembe ogwo ne bafa.
- ⁷ Naye Abayisirayiri ne bazaala nnyo, ne baala, ne bayitirira obungi, era ne baba ba maanyi nnyo; ne bajjula ekitundu ekyo mwe baali.
- ⁸ Awo ne waddawo kabaka omuggya mu Misiri ataamanya Yusufu.
- ⁹ N'agamba abantu be nti, "Abayisirayiri batuyitiriddeko obungi era ba maanyi.
- ¹⁰ Ka tubasalire amagezi baleme kweyongera bungi. Kubanga singa wagwawo olutalo ne beegatta n'abalabe baffe, ne batulwanyisa, balituddukako ne bava mu nsi eno."
- ¹¹ Bwe batyo ne babateekako bannampala bababonyeebonye n'emirimu egy'obuwaze; ne bazimbira Falaawo ebibuga eby'amaterekero, Pisomu ne Lamusesi.
- ¹² Naye gye baakoma okutuntuzibwa, ate gye baakoma okweyongera obungi, ne basaasaana wonna. Abamisiri ne bakyawa abaana ba Isirayiri ate nga bwe babatya.
- ¹³ Ne bongera okutuntuza abaana ba Isirayiri n'obukambwe.
- ¹⁴ Obulamu bw'Abayisirayiri ne bubakaayirira nga bakozesebwa ng'abaddu; nga batabula ebbumba okukola amatoffaali; n'emirimu egya buli ngeri egikolebwa mu nnimiro. Mu mirimu egyo gyonna baabakozesanga n'amaanyi era n'obukambwe.

Falaawo Awa Abazaalisa Ekiragiro

- ¹⁵ Awo kabaka w'e Misiri n'ayogera n'abazaalisa b'Abaebbulaniya, amannya gaabwe Sifira ne Puwa, n'abagamba nti,

¹⁶“Bwe mubanga muzaalisa abakazi Abaebbulaniya, ne mulaba ng’omwana wabulenzi, mumuttanga bussi, naye bw’abanga owoobuwala, mumulekanga n’alama.”

¹⁷Naye abazaalisa baali batya Katonda, nga bamussaamu ekitiibwa, ebyo kabaka w’e Misiri bye yabalagira ne batabikolerako, n’abaana abalenzi nabo ne babaleka ne balama.

¹⁸Kabaka w’e Misiri n’ayita abazaalisa, n’ababuuza nti, “Kiki ekibakozesezza bwe mutyo, okuleka abaana abalenzi ne balama?”

¹⁹Abazaalisa, ne baddamu Falaawo nti, “Abakazi Abaebbulaniya tebali ng’abakazi Abamisiri; bo balamu bulungi era ba maanyi; abazaalisa we bagendera okubatuukako nga bamaze okuzaala.”

²⁰Katonda, n’ayisanga bulungi abazaalisa n’abawa emikisa. Abaana ba Isirayiri ne beeyongera nnyo obungi era ne baba ba maanyi nnyo.

²¹Olwokubanga abazaalisa bassangamu Katonda ekitiibwa, nga bamutya, n’abawa ezzadde.

²²Falaawo n’alyoka alagira abantu be bona nti, “Buli mwana wabulenzi Abaebbulaniya gwe banaazaalanga mumusuulanga mu mugga Kiyira, naye owoobuwala mumulekanga.”

Okuva 2

Okuzaalibwa kwa Musa

¹Awo olwatuuka omusajja ow’omu kika kya Leevi, n’agenda n’awasa omukazi, nga naye Muleevi.

²Omukazi oyo n’aba olubuto n’azaala omwana mulenzi; naye bwe yalaba nga mwana alabika obulungi ennyo, n’amukwekera emyezi esatu.

³Naye bwe yatuusa ekiseera nga takyasobola kumukweka, n’amufunira ekibaya eky’ebitoogo, n’akisiigako ebitosi ne koolaasi; omwana n’amuteeka omwo, n’akissa mu bitoogo ku lubalama lw’omugga Kiyira.

⁴Mwannyina w’omwana n’ayimiriranga nga yeesuddeko akabanga, alabe ebinaamutuukangako.

⁵Awo muwala wa Falaawo n’aserengeta ku mugga Kiyira okunaaba; abawereza be abawala ne batambulira ku lubalama lw’omugga; muwala wa Falaawo n’alaba ekibaya mu bitoogo, n’atuma omu ku bawala okukikima, n’akireeta.

⁶Bwe yakisaanukulako, n’alabamu omwana. Omwana yali akaaba, n’amusaasira nnyo, n’agamba nti, “Ono y’omu ku baana abawere aba Baebbulaniya.”

⁷Awo mwannyina w'omwana n'asembera, n'agamba muwala wa Falaawo nti, "Nnjende nkuyitire omulezi w'abaana Omwebbulaniya ajje akumulerere?"

⁸Muwala wa Falaawo n'amuddamu nti, "Kale, genda." Omuwala mwannyina w'omwana oyo bwe yagenda, yaleeta nnyina wa mwana!

⁹Muwala wa Falaawo n'agamba nnyina w'omwana nti, "Twala omwana ono omunderere, nnaakusasulanga." Omukazi oyo n'atwala omwana n'amulera.

¹⁰Omwana bwe yakula, n'amutwalira muwala wa Falaawo, n'afuuuka omwana wa muwala wa Falaawo. N'amutuumma erinnya Musa, n'agamba nti, "Kubanga namuggya mu mazzi."

Musa Addukira e Midiyaani

¹¹Awo olwatuuka, Musa ng'amaze okukula, n'agendako mu bantu be Abaebbulaniya, n'alaba emirimu emikakanyavu gye baali bakozesebw. N'alaba Omumisiri ng'akuba Omwebbulaniya, omuntu ow'omu baganda be.

¹²Awo Musa n'amagamaga, bwe yalaba nga teri muntu mulala amulaba, n'akwata Omumisiri n'amutta, n'amukweka mu musenyu.

¹³Bwe yaddayo enkeera, n'alaba abasajja babiri Abaebbulaniya nga balwana. N'abuuza oyo eyali asobezza nti, "Lwaki okuba Mwebbulaniya munno?"

¹⁴Omusalija n'amuddamu nti, "Ani eyakulonda okuba omufuzi waffe era omulamuzi waffe? Oyagala kunzita nga bwe watta Omumisiri?" Musa n'aty, n'ayogera mu mutima gwe nti, "Ekintu kye nakola kirabika kyategeerebw."

¹⁵Awo Falaawo bwe yakiwulira, n'agezaako okutta Musa. Naye Musa n'aviira Falaawo, n'addukira mu nsi ya Midiyaani; n'atuula awali oluzzi.

¹⁶Waaliwo kabona mu Midiyaani eyalina abaana be abawala musanvu, ne bajja okusena amazzi bajjuze ebyesero banywese endiga za kitaabwe.

¹⁷Kyokka ne wabaawo abasumba ne bajja ne babagobawo; naye Musa n'asituka n'abalwanirira, n'anywesa endiga zaabwe.

¹⁸Abawala bwe baddayo eka eri kitaabwe Leweri, n'ababuuza nti, "Nga mukomyewo mangu leero?"

¹⁹Ne bamuddamu nti, "Omusalija Omumisiri atulwaniridde ng'abasumba batujoogereza; y'atusenedde n'amazzi n'anywesa ekisibo kyaffe."

²⁰N'abuuza bawala be nti, "Ali ludda wa? Ye lwaki mumuleseeyo? Mumuyite ajje alye ku mmere."

²¹Musa n'akkiriza. N'abeerera ddala mu maka ga Leweri. Leweri n'awa Musa muwala we Zipola okuba mukyala we.

²²Zipola n'amuzaalira omwana owoobulenzi. Musa n'amutuumma erinnya Gerusomu, ng'agamba nti, "Kubanga ndi mugwira mu nsi etali yange."

²³Awo nga wayiseewo ebbanga ggwanvu, kabaka w'e Misiri n'afa. Abaana ba Isirayiri ne basindanga era ne bakaabanga olw'obuddu bwe baalimu, n'okukaaba kwabwe ne kutuuka eri Katonda.

²⁴Katonda n'awulira okusinda kwabwe. Katonda n'ajjukira endagaano ye gye yalagaana ne Ibulayimu, ne Isaaka ne Yakobo.

²⁵Katonda n'atunuulira abaana ba Isirayiri, n'ategeera okubonaabona kwabwe.

Okuva 3

Okuyitibwa kwa Musa

¹Awo olwatuuka, Musa bwe yali ng'alunda ekisibo ky'endiga za mukoddomi we Yesero, kabona w'e Midyaani, n'atwala ekisibo ku ludda olw'ebugwanjuba olw'eddungu; n'atuuka ku lusozi lwa Katonda oluyitibwa Kolebu.

²Malayika wa MUKAMA n'amulabikira ng'asinziira mu muliro ogwaka, mu makkati g'ekisaka. Musa n'atunuulira ekisaka, n'alaba nga kyaka naye nga tekisiriira.

³Musa n'ayogera mu mwoyo gwe nti, "Leka nneetoolooleko neetegereze ekintu kino ekitali kya bulijo, eky'ekitalo, ekireetedde ekisaka obutasiriira."

⁴MUKAMA bwe yalaba nga Musa agenze okwetegereza, Katonda n'amuyita ng'asinziira mu kisaka wakati nti, "Musa, Musa!" Musa n'ayitaba nti, "Nze nzuuno."

⁵Katonda n'amugamba nti, "Teweeyongera kusembera. Ggyamu engatto zo, kubanga ekifo w'oyimiridde kitukuvu."

⁶Ne yeeyongera n'amugamba nti, "Nze Katonda wa kitaawo, era nze Katonda wa Ibulayimu, nze Katonda wa Isaaka, era nze Katonda wa Yakobo." Musa bwe yawulira ebyo n'akweka amaso ge, kubanga yatya okutunuulira Katonda.

⁷Awo MUKAMA Katonda n'ayogera nti, "Ndabidde ddala okubonaabona kw'abantu bange abali mu Misiri. Mpulidde ebiwoobe byabwe olw'abo ababatuntuza ng'abaddu; era ntegedde okubonaabona kwabwe.

⁸Kyenvudde nzika, mbawonye effugabbi ery'Abamisiri, era mbaggye mu nsi eyo, mbaleete mu nsi ennungi era engazi, y'ensi ekulukuta amata n'omubisi gw'enjuki; kaakano mwe muli Abakanani, n'Abakiiti, n'Abamoli, n'Abaperezi, n'Abakiivi n'Abayebusi.

⁹Kale mpulidde okukaaba kw'abaana ba Isirayiri, era ndabye ng'Abamisiri bwe bababonyaabonya.

¹⁰Noolwekyo, jjangu nkutume ewa Falaawo, oggyeyo abantu bange abaana ba Isirayiri mu Misiri.”

¹¹Naye Musa n’agamba Katonda nti, “Nange nze ani agenda ewa Falaawo nziggyeyo abaana ba Isirayiri mu Misiri?”

¹²Katonda n’amuddamu nti, “Ddala, nnaabeeranga naawe. Era kino kye kikakasa nti nze nkutumye: Bw’olimala okuggyga abantu abo mu Misiri, mulisiniza Katonda ku lusozi luno.”

¹³Awo Musa n’abuuza Katonda nti, “Bwe ndituuka mu baana ba Isirayiri ne mbategeeza nti, ‘Katonda wa bajjajammwe antumye gye muli;’ nabo ne bambuuza nti, ‘Erinnya lye ye ani?’ Ndibaddamu ntya?”

¹⁴Katonda n’agamba Musa nti, “NDI NGA BWE NDI,” n’ayongera nti, “Bw’otyo bw’onootegheeza abaana ba Isirayiri nti, ‘NDI y’antumye gye muli.’”

¹⁵Katonda n’ayongera n’agamba Musa nti, “Tegeeza abaana ba Isirayiri nti, ‘MUKAMA, Katonda wa bajjajammwe: Katonda wa Ibulayimu, era Katonda wa Isaaka, era nga ye Katonda wa Yakobo, y’antumye gye muli.’ “Eryo lye linnya lyange ery’olubeerera, era lye linnya lye nnajjuukirirwangako mu buli mulembe ogunaddiriranga gunnaagwo.

¹⁶“Genda okunjaanye abakadde ba Isirayiri, obategeeze nti, ‘MUKAMA, Katonda wa bajjajammwe, Katonda wa Ibulayimu, era owa Isaaka, era owa Yakobo, yandabikira, n’anjamba nti, Ntunuulidde abantu bange, ne ndaba ebibakolebwa mu Misiri.

¹⁷Kyenvudde nsuubiza okubaggya mu kubonaabona kwe balimu mu Misiri, mbaleete mu nsi y’Abakanani, n’Abakiiti, n’Abamoli, n’Abaperezi, n’Abakiivi, n’Abayebusi; y’ensi ekulukuta amata n’omubisi gw’enjuki.’

¹⁸“Abakadde ba Isirayiri bagenda kuwuliriza by’ogamba. Kale, ggwe n’abakadde ba Isirayiri muligenda eri kabaka wa Misiri ne mumugamba nti, ‘MUKAMA, Katonda w’Abaebbulaniya yeeraga gye tuli. Tukkirize tugende mu ddungu, olugendo lwa nnaku ssatu, tuweeyo ssaddaaka eri MUKAMA Katonda waffe.’

¹⁹Naye mmanyi nga kabaka w’e Misiri talibakkiriza kugenda, wabula ng’awalirizibbwa n’amaanyi mangi.

²⁰Kyendiva nkозesa amaanyi gange, ne mbonereza Misiri n’ebyamagero bye ndikolera mu nsi omwo; n’oluvannyuma alibakkiriza ne mugenda.

²¹“Era Abamisiri ndibaagazisa abantu abo; bwe mutyo bwe muliba musitula, temulivaayo ngalo nsa.

²²Buli mukazi Omuyisirayiri alisaba omukazi Omumisiri muliraanwa we, n’oyo bwe basula mu nju emu, ebitemagana ebya ffeeza n’ebya zaabu, n’engoye

ez'okwambala. Ebyo byonna mulibyambaza batabani bammwe ne bawala bammwe; Abamisiri ne muleka nga mubakalizza."

Okuva 4

MUKAMA Awa Musa Obuyinza Okukola Ebyamagero

¹ Musa n'addamu nti, "Tebagenda kunzikiriza, wadde okuwuliriza ebyo bye mbagamba: kubanga bagenda kwogera nti, MUKAMA takulabikiranga."

² Awo MUKAMA n'amubuuza nti, "Ekyo kiki ekiri mu ngalo zo?" N'addamu nti, "Muggo."

³ MUKAMA Katonda n'amugamba nti, "Gusuule wansi." Musa n'agusuula wansi; ne gufuuka omusota, n'agudduka!

⁴ MUKAMA n'agamba Musa nti, "Golola omukono gwo ogukwate akawuuwo ogusitule." N'agolola omukono gwe n'agukwata, ne gufuuka omuggo mu mukono gwe.

⁵ MUKAMA n'amugamba nti, "Bw'olikola bw'otyo bagenda kukukkiriza, era balitegeera nga MUKAMA Katonda wa bajajjaabwe, Katonda wa Ibulayimu, era Katonda wa Isaaka, era Katonda wa Yakobo, yakulabikira."

⁶ MUKAMA n'amugamba nate nti, "Yingiza omukono gwo munda mu kyambalo kyo." N'ayingiza omukono gwe munda mu kyambalo kye: bwe yaguggyaayo, laba, nga gujjudde ebigenge nga gutukula ng'omuzira.

⁷ Ate n'amugamba nti, "Zzaayo omukono gwo munda mu kyambalo kyo." Musa n'azzaayo omukono gwe mu kyambalo kye. Bwe yaguggyaayo, laba nga gufuuse mulamu ng'omubiri gwe ogwa bulijo.

⁸ MUKAMA n'agamba Musa nti, "Bwe batalikkiririza ku kabonero akasoose, balikkiririza ku kabonero akookubiri.

⁹ Bwe bagaananga okukukkiriza nga bamaze okulaba obubonero obwo bwombi, osenanga amazzi mu mugga n'ogayiwa ku lukalu; amazzi ago g'olisena mu mugga, galifuuka omusaayi ng'ogayiye ku lukalu."

¹⁰ Awo Musa n'agamba MUKAMA nti, "Ayi Mukama wange, siri mwogezi mulungi okuva edda n'edda, wadde ne mu kiseera kino ggwe kaayogerera nange, omuddu wo; njogera nnembeggerera ate nga bwe nnaanaagira."

¹¹ MUKAMA n'amuddamu nti, "Ani yakola akamwa k'omuntu? Ani yatonda bakasiru, ne bakiggala, n'abatunula, ne bamuzibe? Si nze, MUKAMA?

¹² Kaakano, genda! Nnaakuyambanga ng'oyogera, era nnaakuyigirizanga by'onooyoyeranga."

¹³Naye Musa n'agamba nti, "MUKAMA wange, nkwegayiride tuma omuntu omulala."

¹⁴MUKAMA n'asunguwalira nnyo Musa, n'amugamba nti, "Muganda wo Alooni Omuleevi, taliwo? Mmanyi nga mwogezi mulungi; era, laba, ajja gy'oli, era bw'anaakulabako ajja kusanyuka mu mutima gwe.

¹⁵Ggwe ojja kwogeranga naye, nze nnaakutegeezanga ky'onoomugambanga, nange n'abayambanga mwembi, ne mbayigiriza eky'okukola.

¹⁶Y'anaakwogereranga eri abantu, ng'abategeeza bye wandiyogedde; ggwe n'oba nga Katonda gy'ali, ng'omutegeezanga by'anaayogeranga.

¹⁷Era oligenda n'omuggo guno, ng'ogukutte mu mukono gwo; gw'onookozesanga ebyamagero."

¹⁸Awo Musa n'addayo eri Yesero, kitaawe wa mukazi we n'amugamba nti, "Nkusaba onzikirize ɳjende ndabe obanga baganda bange e Misiri bakyali balamu." Yesero n'addamu Musa nti, "Genda mirembe."

Musa Addayoko e Misiri

¹⁹Awo MUKAMA n'ayogera ne Musa e Midyaani nti, "Genda, oddeyo e Misiri kubanga abantu bona baiali baagala okukutta, baafa."

²⁰Musa n'addiria mukyala we n'abaana be, n'abassa ku ndogoyi, n'asitula okuddayo mu nsi y'e Misiri, ng'akutte omuggo gwa Katonda mu ngalo ze.

²¹MUKAMA n'agamba Musa nti, "Bw'oddangayo e Misiri, okoleranga ebyamagero ebyo byonna bye nkulaze, awali Falaawo. Nze ndikakanyaza omutima gwe, abantu bange aleme okubakkiriza okugenda.

²²Falaawo omugambanga bw'oti nti, MUKAMA agambye nti, 'Isirayiri mutabani wange, ye mwana wange omubereberye;

²³era nkulagira oleke omwana wange agende ampeereze; naye singa ogaana okumuleka okugenda, laba, nditta mutabani wo omubereberye.'"

²⁴Awo bwe baali bagenda nga batuuse ku nnyumba y'abagenyi, MUKAMA n'amulabikira, n'ayagala okumutta.

²⁵Naye Zipola n'addiria ejinja eryogi, n'akomola omwana we, ekikuta n'akisuula ku bigere bya Musa, n'amugamba nti, "Oli baze wa musaayi!"

²⁶Awo MUKAMA n'amuleka. Mu kaseera ako Zipola we yayogerera ku kukomola nti, "Baze wange ng'osaabye omusaayi!"

²⁷Awo MUKAMA n'agamba Alooni nti, "Genda mu ddungu, osisinkane Musa. N'agenda, n'amusanga ku lusozi lwa Katonda, ne bagwanjana mu bifuba."

²⁸Musa n'abuulira Aloonii ebigambo byonna MUKAMA bye yali amutumye okwogera, n'obubonero bwonna obw'ebyamagero bwe yamulagira okukola.

²⁹ Musa ne Aloonii ne bagenda, ne bakuññaanya abakulu abakulembeze b'abaana ba Isirayiri;

³⁰Aloonii n'abategeeza byonna MUKAMA bye yagamba Musa; era n'abakolera n'obubonero,

³¹ne bakkiriza. Era bwe baawulira nga MUKAMA yakyalira abaana ba Isirayiri, n'alaba okubonaabona kwabwe, ne bakoteka emitwe gyabwe ne basinza.

Okuva 5

Falaawo Aziyiza Abayisirayiri Okuva mu Misiri

¹ Oluvannyuma lw'ebyo, Musa ne Aloonii ne bajja eri Falaawo, ne bamugamba nti, "Tutumiddwa MUKAMA Katonda wa Isirayiri ng'akugamba nti, 'Leka abantu bange bagende, bankolere embaga mu ddungu.' "

² Naye Falaawo n'abaddamu nti, "MUKAMA ye ani, mmugondere, nzikirize Abayisirayiri, sijja kubakkiriza kugenda."

³ Ne bamugamba nti, "Katonda w'Abaebbulaniya yatulabikira. Tukusaba otuleke tugende olugendo lwa nnaku ssatu mu ddungu, tuweeyo ssaddaaka eri MUKAMA Katonda waffe; aleme kututta ne kawumpuli, oba n'ekitala."

⁴ Naye kabaka w'e Misiri n'abagamba nti, "Mmwe Musa ne Aloonii, lwaki mwagala okuggya abantu ku mirimu gyabwe? Muddeeyo mangu ku mirimu gyammwe."

⁵Falaawo n'ayongera n'agamba nti, "Kale, mulabe abantu nga bwe beeyongedde obungi mu ggwanga ate mmwe mubaziyiza kukola."

⁶Ku lunaku olwo lwennyini Falaawo n'alagira abagabi b'emirimu ne bannampala b'abantu nti,

⁷"Mulekeraawo okuwanga abantu essubi ery'okukoza mu kubumba amatoffaali; mubaleke bagende beenoonyezenga essubi lyabwe.

⁸Naye mubalagire babumbenga obungi bw'amatoffaali bwe bumu nga ge babadde babumba; temukendeezanga ku muwendo ogwabasalirwa. Bagayaavu; era kyebava bankaabirira nti, 'Tuleke tugende tuweeyo ssaddaaka eri Katonda waffe.'

⁹Abasajja mubongerekoo ku mirimu gye mubasalira, bakole nnyo, balyoke baleme na kufa ku ebyo bye babalimbalmiba."

Abakozesa Bongera ku Mirimu gy'Abayisirayiri

¹⁰Awo abakozesa ne bannampala ne bagenda ne bategeeza abantu nti, “Falaawo agambye bw’ati nti, ‘Sijja kwongera kubawanga ssubi.

¹¹Mugende mwenonyeze essubi yonna gye musobola okuliraba; kyokka emirimu gyammwe tegijja kukendeezebwako n’akatono.”

¹²Bwe batyo abantu ne basaasaanira Misiri yonna okukuŋñaanya obukonge bw’essubi ly’eŋñaano bakozese obwo mu kifo ky’essubi.

¹³Abakozesa ne babakuluusanyanga nga babalagira nti, “Emirimu gyammwe egibasalirwa buli lunaku, mugituukirize nga bwe mwakolanga ng’essubi likyabaweebwa.”

¹⁴Bannampala Abayisirayiri, abaalondebwaa abakozesa ba Falaawo, ne bakubibwanga nga bwe babuuzbwa nti, “Lwaki omuwendo gw’amatoffaali ogwa jjo n’ogwa leero ogwabasalirwa temugutuukirizza nga bwe mwakolanga edda?”

¹⁵Awo bannampala Abayisirayiri ne bajja ne bajulira ewa Falaawo, ne bamugamba nti, “Ffe abaddu bo, lwaki otuyisizza bw’oti?

¹⁶Abaddu bo tetuweebwa ssubi, kyokka tulagirwa nti, ‘Mubumbe amatoffaali! Abaddu bo tukubibwa, so ng’omusango guli mu bantu bo.’

¹⁷Falaawo n’abaddamu nti, “Muli bagayaavu bugayaavu kyokka. Kyemuva mundeeberera nti, ‘Tuleke tugende tuweeyo ssaddaaka eri MUKAMA.’

¹⁸Kale, mugende mukole! Temujja kuweebwa ssubi, naye muteekwa okubumba omuwendo gw’amatoffaali omujjuvu nga bwe gwabasalirwa.”

¹⁹Bannampala Abayisirayiri ne bategeera ng’akacwano kabatuukiridde, bwe baagambibwa nti, “Omuwendo gw’amatoffaali ogwabasalirwa okubumbanga buli lunaku tegujja kukendeezebwako.”

²⁰Bwe baava ewa Falaawo, baasanga Musa ne Alooni nga babalindiridde.

²¹Bannampala ne babagamba nti, “MUKAMA abatunuulire era asalewo; kubanga mutufudde ekyenyinyalwa ewa Falaawo n’abaweereza be, era mubakwasizza ekitala okututta.”

Katonda Asuubiza Okununula Abayisirayiri

²²Awo Musa n’akomawo awali MUKAMA, n’ayogera nti, “Ayi MUKAMA, abantu bano lwaki obaleetedde emitawaana? Eyo y’ensonga kyewava ontuma?

²³Kubanga kasookedde ɲjenda ne njogera ne Falaawo mu linnya lyo, abantu bo abataddeko ebizibu bingi; era abantu bo tobawonyezza n’akatono.”

Okuva 6

¹ Awo MUKAMA n'addamu Musa nti, "Kaakano ojja kulaba kye nnaakola Falaawo. Kubanga alibaleka ne bagenda olw'amaanyi, era olw'amaanyi alibagoba mu nsi ye."

²Katonda n'agamba Musa nti, "Nze MUKAMA.

³Nalabikira Ibulayimu, ne Isaaka ne Yakobo nga Katonda Ayinzabyonna; kyokka saabategeeza linnya lyange nti Nze MUKAMA.

⁴Era nabasuubiza mu ndagaano yange okubawa ensi ya Kanani, gye baabeerangamu ng'abagwira abatambuze.

⁵Kaakano mpulidde okusinda kw'abaana ba Isirayiri abatuntuzibwa Abamisiri mu buddu, ne nzijkira endagaano yange.

⁶"Noolwekyo tegeeza abaana ba Isirayiri nti, 'Nze MUKAMA. Ndibatikkulako emigugu gy'Abamisiri, era ndibawonya obuddu, ne mbanunula n'omukono gwange ogw'amaanyi nga nsalira Abamisiri omusango.

⁷Ndibafuula abantu bange, era nnaabeeranga Katonda wammwe, era mulitegeera nga nze MUKAMA Katonda wammwe abawonyezza ebizibu by'Abamisiri.

⁸Ndibaleeta mu nsi gye nalayira okuwa Ibulayimu ne Isaaka ne Yakobo; ndigibawa n'efuuka yammwe. Nze MUKAMA.'"

⁹Musa n'ategeeza abaana ba Isirayiri ebigambo ebyo. Naye tebaamuwliriza, kubanga emitima gyali gibennyise, nga n'okutuntuzibwa kubayitiridde.

¹⁰Awo MUKAMA n'agamba Musa nti,

¹¹"Genda otegeeze Falaawo kabaka w'e Misiri aleke abaana ba Isirayiri bave mu nsi ye."

¹²Naye Musa n'addamu MUKAMA nti, "Laba, abaana ba Isirayiri bagaanyi okumpuliriza, kale Falaawo anampuliriza atya nze atayogera bulungi?"

¹³Naye MUKAMA n'ayogera ne Musa ne Alooni, n'abalagira bategeeze abaana ba Isirayiri ne Falaawo nti, MUKAMA abalagidde okuggya abaana ba Isirayiri mu nsi y'e Misiri.

Obuzaale bwa Musa ne Alooni

¹⁴Gano ge mannya aga bajjajaabwe ab'omu bika byabwe: Batabani ba Lewubeeni, mutabani wa Isirayiri omubereberye, be bano: Kanoki ne Palu, Kezulooni ne Kalumi.

¹⁵Batabani ba Simyoni: Yamweri ne Yamini, ne Okadi, Yakini ne Zokali, Sawuli (omwana w'omukyala Omukanani). Abo be b'omu mu bika bya Simyoni.

¹⁶ Gano ge mannya ga batabani ba Leevi ng'emirembe bwe giri: Gerusoni ne Kokasi ne Merali. Leevi yawangaala emyaka kikumi mu asatu mu musanvu.

¹⁷ Batabani ba Gerusoni be bano mu bika byabwe: Libuni ne Simeeyi.

¹⁸ Bano be batabani ba Kokasi: Amulaani ne Izukali, Kebbulooni ne Wuziyeeri. Kokasi yawangaala emyaka kikumi mu asatu mu esatu.

¹⁹ Bano be batabani ba Merali: Makuli ne Musi. Abo be b'omu bika bya Leevi ng'emirembe gyabwe bwe gyali.

²⁰ Amulaamu n'awasa senga we Yokebedi; n'amuzaalira: Aloonni ne Musa. Amulaamu n'awangaala emyaka kikumi mu asatu mu musanvu.

²¹ Bano be baana ba Izukali: Koola ne Nefega ne Zikiri.

²² Abaana ba Wuziyeeri be bano: Misayeri ne Erizafani ne Sisiri.

²³ Aloonni n'awasa Eriseba, muwala wa Aminadaabu era nga ye mwannyina wa Nakayisoni. Yamuzaalira abaana bano: Nadabu ne Abiku, Eriyazaali ne Isamaali.

²⁴ Bano be baana ba Koola: Asira ne Erukaana, ne Abiyasaafu. Abo be b'omu kika kya Abakoola.

²⁵ Eriyazaali, mutabani wa Aloonni, yawasa omu ku bawala ba Putiyeeri, n'amuzaalira Finekaasi. Ago ge mannya g'abakulu b'ebika by'Abaleevi, n'ennyumba zaabwe mu bika ebyo.

²⁶ Abo ye Aloonni ne Musa MUKAMA be yalagira nti, "Muggyeeyo abaana ba Isirayiri bona mu nsi y'e Misiri."

²⁷ Be bo abaayogera ne Falaawo, kabaka w'e Misiri, ku by'okuggyayo abaana ba Isirayiri mu Misiri. Ye Musa oyo, ne Aloonni oyo.

²⁸ Ku lunaku olwo MUKAMA kwe yayogerera ne Musa mu nsi y'e Misiri,

²⁹ MUKAMA yagamba Musa nti, "Nze MUKAMA. Tegeeza Falaawo, kabaka w'e Misiri, buli kimu kyonna kye nkugamba."

³⁰ Naye Musa n'addamu MUKAMA nti, "Nze atamanyi kwogera bulungi, Falaawo anampuliriza atya?"

Okuva 7

¹ Awo MUKAMA n'agamba Musa nti, "Laba, nkufudde nga Katonda awali Falaawo, ne muganda wo Aloonni y'ajja okubeera nnabbi wo.

² Ojjanga kwogera bye nkulagira, ne muganda wo Aloonni ayogere ne Falaawo asobole okuleka abaana ba Isirayiri bave mu nsi ye.

³Naye ndikakanyaza omutima gwa Falaawo; ne bwe ndikolera ebyamagero ebingi ennyo mu nsi y'e Misiri,

⁴tagenda kubawuliriza. Ndirumba Misiri n'amaanyi, ne ngisalira omusango, ne ndyoka nzigayao abantu bange Abayisirayiri bona.

⁵Era Abamisiri balitegeera nti Nze MUKAMA, bwe ndirumba Misiri n'amaanyi ne nzigayao Abayisirayiri.”

Omuggo gwa Aloonni Gufuuka Omusota

⁶Awo Musa ne Aloonni ne bakola nga MUKAMA bwe yabalagira.

⁷We baayogerera ne Falaawo, Musa yali aweza emyaka kinaana egy'obukulu, ne Aloonni ng'aweza emyaka kinaana mu esatu.

⁸MUKAMA n'agamba Musa ne Aloonni nti,

⁹“Falaawo bw'anaabagamba nti, ‘Mukoleeyo ekyamagero,’ nga ggwe ogamba Aloonni nti, ‘Ddira omuggo gwo ogusuule wansi awali Falaawo,’ era gunaafuuka omusota.”

¹⁰Awo Musa ne Aloonni ne bagenda ewa Falaawo, ne bakola nga MUKAMA bwe yabalagira. Aloonni n'asuula omuggo gwe wansi awali Falaawo n'abaweereza be, ne gufuuka omusota.

¹¹Falaawo naye n'atumya basajja be abagezigezi, n'abalogo; abakujjukuju abo Abamisiri ne bakola ekintu kye kimu mu magezi gaabwe ag'ekyama.

¹²Kubanga nabo baasuula wansi emiggo gyabwe, ne gifuuka emisota; naye omuggo gwa Aloonni ne gumira emiggo gyabwe.

¹³Naye era omutima gwa Falaawo ne gukakanyala, nga MUKAMA bwe yali agambye.

Amazzi Gafuuka Omusaayi

¹⁴Awo MUKAMA n'agamba Musa nti, “Omutima gwa Falaawo gukakanyadde, era agaanye okuleka abantu okugenda.

¹⁵Mu makya genda eri Falaawo ng'afuluma okulaga ku mazzi, omulindirire ku lubalama lw'omugga Kiyira. Era twala n'omuggo ogwafuuka omusota.

¹⁶Olyoke omugambe nti, ‘MUKAMA Katonda wa Abaebbulaniya yantuma gy'oli ng'agamba nti, Leka abantu bange bajje mu ddungu bansinze; naye, laba, n'okutuusa leero okyagaanyi okujjondera.’

¹⁷Bw'ati bw'ayogera MUKAMA nti, ‘Ku kino kw'olitegeerera nga nze MUKAMA: laba ndikuba ku mazzi agali mu mugga, n'omuggo oguli mu mukono gwange, era galifuuka musaayi,

¹⁸n'ebyenyanja ebiri mu mugga birifa, n'omugga guliwunya; era n'Abamisiri nga tebakyayagala kunywa ku mazzi gaagwo.’”

¹⁹ MUKAMA n'agamba Musa nti, "Tegeeza Aloonni nti, 'Twala omuggo gwo ogwolekeze amazzi gonna mu Misiri: ku migga gyabwe, n'emikutu gyabwe, n'obuyanja bwabwe, n'ebidiba byabwe, byonna bifuuke musaayi. Era wagenda kuberawo omusaayi mu nsi yonna ey'e Misiri: mu ntiba ez'emiti ne mu matogero ag'amayinja.'"

²⁰ Awo Musa ne Aloonni ne bakola nga MUKAMA bwe yabalagira. Aloonni n'addiria omuggo gwe n'akuba ku mazzi ag'omu mugga, nga Falaawo n'abawereza be balaba; amazzi gonna ag'omu mugga ne gafuuka omusaayi.

²¹ Era n'ebenyanya byonna mu mugga Kiyira ne bifia. Omugga ne guwunya, Abamisiri nga tebakyasobola kunywa mazzi ga mu mugga Kiyira; omusaayi ne gubuna wonna mu nsi y'e Misiri.

²² Abalogo ab'omu Misiri nabo ne bakola bwe batyo mu magezi gaabwe ag'ekyama. Omutima gwa Falaawo ne gweyongera okukakanyala, ebya Musa ne Aloonni n'atabiwuliriza era nga MUKAMA bwe yali agambye;

²³ n'akyuka ne yeddirayo mu lubiri lwe, nga byonna ebibaddewo tabissizzaako mwoyo.

²⁴ Abamisiri bona ne basimaasima okumpi n'omugga nga banoonya amazzi ag'okunywa, kubanga amazzi g'omu mugga nga tegakyanyweka.

²⁵ Awo ne wayitawo ennaku musanvu okuva ku lunaku MUKAMA lwe yakubirako omugga.

Okuva 8

Ebikere Bibuna mu Bamisiri

¹ Awo MUKAMA n'agamba Musa nti, "Ggenda ewa Falaawo omugambe nti, 'MUKAMA agambye bw'ati nti, "Leka abantu bange bagende, balyoke bansinze.

² Naye bw'onoogaana n'otabakkiriza kugenda, laba, nnaasindika ebikere ne bijjula ensi yo yonna.

³ Omugga gulivaamu ebikere enkumu ennyo ebirituuka ne mu lubiri lwo. Biriyingira mu kisenge kyo mw'osula, ne ku kitanda kyo. Biriyingira mu nnyumba z'abawereza bo ne mu z'abantu bo. Biriyingira ne mu byoto omufumbirwa.

⁴ Ebikere birikuwalampa ne bikutambulirako ne ku bakungu bo bona ne ku bantu bo."'"

⁵ MUKAMA n'agamba Musa nti, "Tegeeza Aloonni nti, 'Golola omukono gwo oyolekeze omuggo gwo eri emigga, n'eri emikutu gy'amazzi, n'eri ebidiba, osobozese ebikere okubuna ensi yonna ey'e Misiri.'"

⁶Bw'atyo Aloonni n'agolola omukono gwe ku mazzi gonna ag'omu Misiri; ebikere ne bivaayo ne bijjula ensi yonna ey'e Misiri.

⁷Abalogo nabo ne bakola bwe batyo mu magezi gaabwe ag'ekyama, nabo ne baleeta ebikere mu nsi ey'e Misiri.

⁸Awo Falaawo n'atumya Musa ne Aloonni n'abagamba nti, "Mwegayirire MUKAMA anziggyeeko ebikere bino era ne ku bantu bange, ndyoke nange ndeke abantu bammwe bagende baweeyo ssaddaaka eri MUKAMA."

⁹Musa n'addamu Falaawo nti, "Weerondere ekiseera nga bw'osiima, w'oyagalira neegayirire MUKAMA ku lulwo ne ku lw'abaweereza bo, ne ku lw'abantu bo, ebikere ebikuliko n'ebiri mu nnyumba zo bizikirizibwe, bisigale mu mugga Kiyira mwokka."

¹⁰Falaawo n'agamba nti, "Enkyा." Musa n'agamba nti, "Kijja kubeera nga bw'ogambye, olyoke otegeere nga bwe watali n'omu afaanana nga MUKAMA Katonda waffe.

¹¹Ebikere bijja kukuvira, bive ne mu mayumba go, biviire n'abaweereza bo n'abantu bo; bijja kusigala mu mugga mwokka."

¹²Awo Musa ne Aloonni ne bava ewa Falaawo. Musa ne yeegayirira MUKAMA olw'ebikere MUKAMA bye yali aleetedde Falaawo.

¹³MUKAMA n'akolera Musa kye yamusaba. Ebikere ne bifira mu mayumba, ne mu mpya mu byalo, ne mu nnimiro.

¹⁴Ne bikuññaanyizibwa entuumo n'entuumo; ensi n'ejjula ekivundu.

¹⁵Naye Falaawo bwe yalaba nga waliwo wassiza ku mukka, n'akakanyaza omutima gwe, ebya Musa ne Aloonni n'alekera awo okubiwliriza, era nga MUKAMA bwe yali agambye.

Ensekere Zibuna mu Bamisiri

¹⁶Awo MUKAMA n'ayogera ne Musa nti, "Gamba Aloonni bw'oti nti, 'Golola omuggo gwo, okube ku nfuufu eri ku ttaka, eryoke efuuke ensekere mu nsi yonna ey'e Misiri.'"

¹⁷Ne bakola nga MUKAMA bw'abagambye; Aloonni n'agolola omukono gwe ogwali gukute omuggo, n'akuba ku nfuufu ku ttaka, ne muvaamu ensekere ne zitambulira ku bantu ne ku nsolo; enfuufu yonna mu nsi y'e Misiri n'efuuka nsekere.

¹⁸Abalogo nabo ne bagezaako mu magezi gaabwe ag'ekyama okufuusa ensekere, naye ne balemwa. Ensekere ne ziteevuunya ku bantu ne ku nsolo.

¹⁹ Abalogo ne bagamba Falaawo nti, “Engalo ya Katonda bino y’ebikoze.” Naye omutima gwa Falaawo ne gukakanyala, n’atabawuliriza, nga MUKAMA bwe yali agambye.

Ensowera Zibuna mu Bamisiri

²⁰ Awo MUKAMA n’agamba Musa nti, “Keera mu makya nnyo, ogende osisinkane Falaawo ng’aserengeta ku mazzi omugambe nti, ‘MUKAMA agambye bw’ati nti, Leka abantu bange bagende, bansinze.

²¹ Naye abantu bange bw’otoobakkirize kugenda, laba, ndireeta ebikuukuulu by’ensowera, ku ggwe ne ku baweereza bo, ne ku bantu bo, ne mu nnyumba zammwe. Ensowera zirijjula mu mayumba ga Bamisiri ne ku ttaka kwe gaazimbibwa.

²² ‘Naye ku lunaku olwo, ekitundu Goseni abantu bange gye babeera ndikiyisa mu ngeri ya njawulo; kubanga yo teribaayo bikuukuulu bya nsowera n’akatono, olyoke otegeere nga nze, MUKAMA, ndi wano wakati mu nsi.

²³ Nzija kussaawo enjawulo wakati w’abantu bange n’abantu bo. Ekyamagero kino kijja kubaawo enkeera.’”

²⁴ MUKAMA n’akola bw’atyo. Ebikuukuulu by’ensowera ne byeyiwa mu lubiri lwa Falaawo, mu nnyumba ye, ne mu mayumba g’abaweeresa be, ne mu nsi yonna ey’e Misiri: ensi n’eyonooneka olw’ebikuukuulu by’ensowera.

²⁵ Awo Falaawo n’atumira Musa ne Aloon, n’abagamba nti, “Kale, muweereeyo wano mu nsi eno ssaddaaka eri Katonda wammwe.”

²⁶ Naye Musa n’addamu nti, “Ekyo bwe tukikola, tekijja kuba kituufu. Kubanga ssaddaaka ze tuwaayo eri MUKAMA Katonda waffe, Abamisiri tebajja kuzaagala. Kale singa tuddira ssaddaaka Abamisiri ze bakyawa ennyo bwe batyo, ne tuziwaayo nga balaba, tebajja kutukuba amayinja?”

²⁷ Kitugwanira tutambule olugendo lwa nnaku ssatu mu ddungu, tuweeyo ssaddaaka eri MUKAMA Katonda waffe nga bw’anaatulagira.”

²⁸ Falaawo n’agamba nti, “Nzija kubaleka mugende muweeyo ssaddaaka eri MUKAMA Katonda wammwe mu ddungu, kyokka temugenda ewala ennyo. Kale munsabire.”

²⁹ Musa n’addamu nti, “Bwe nnaaba nakava wano w’oli nzija kusaba MUKAMA, enkyo ensowera ziviire Falaawo n’abakungu be awamu n’abantu be. Naye kirungi Falaawo aleme nate kulimbalimba, n’atakkiriza bantu kugenda kuwaayo ssaddaaka eri MUKAMA.”

³⁰ Musa n’avaayo ewa Falaawo, n’asaba MUKAMA.

³¹MUKAMA n'akola nga Musa bwe yamusaba, n'aggyawo ebikuukuulu by'ensowera ewa Falaawo ne mu baweereza be, ne mu bantu be; ne watasigala nsowera n'emu.

³²Kyokka ne ku mulundi guno, Falaawo yakakanyaza omutima gwe, abantu n'atabakkiriza kugenda.

Okuva 9

Nsotoka mu Magana ag'Abamisiri

¹Awo MUKAMA n'agamba Musa nti, "Genda ewa Falaawo omugambe nti, MUKAMA Katonda wa Abaebbulaniya agambye nti, 'Leka abantu bange bagende, bansinze.

²Singa ogaana okubakkiriza okugenda, n'oyongera okubakuumira wano,

³MUKAMA ajja kusindika nsotoka omukambwe ennyo mu magana go agali mu malundiro, ne mu mbalaasi ne mu ndogoyi, ne mu ɳjamira, ne mu zisseddume z'ente ne mu ndiga.

⁴Naye MUKAMA ajja kwawulamu amagana aga Isirayiri n'aga Misiri, waleme kubaawo nsolo n'emu efa mu magana ag'abaana ba Isirayiri."

⁵MUKAMA n'alonda ekiseera, n'agamba nti, "Enkya MUKAMA w'anaakolera ekintu kino mu nsi eno."

⁶Era enkeera MUKAMA n'akola ekikolwa ekyo: amagana aga Misiri gonna ne gafa, naye ne wataba nsolo n'emu ku magana ag'abaana ba Isirayiri eyafa.

⁷Falaawo n'atuma abantu okwetegereza, ne basanga nga tewali wadde ensolo n'emu ey'abaana ba Isirayiri eyali efudde. Naye era omutima gwa Falaawo ne gusigala nga gukyakakanyadde, Abayisirayiri n'atabakkiriza kugenda.

Amayute n'Amabwa mu Bamisiri

⁸Awo MUKAMA n'agamba Musa ne Alooni nti, "Muyoole mu kyokero embatu z'omunyale, Musa agumanse waggulu mu bbanga nga ne Falaawo alaba.

⁹Gujja kufuuka nfuufu mu nsi yonna ey'e Misiri, guleete amayute ku bantu ne ku nsolo aganaatulikamu amabwa mu nsi yonna ey'e Misiri."

¹⁰Bwe batyo ne bayoola omunyale mu kyokero, ne bagenda bayimirira mu maaso ga Falaawo. Musa n'amansa evvu waggulu mu bbanga, ne lifuuka amayute, ne gatulikamu amabwa ku bantu ne ku nsolo.

¹¹Abalogo ne batasobola kuyimirira mu maaso ga Musa olw'amayute; kubanga amayute gaakwata abalogo n'Abamisiri bona.

¹²Naye MUKAMA n'akakanyaza omutima gwa Falaawo, n'atawuliriza Musa ne Alooni, era nga MUKAMA bwe yagamba Musa.

Amayinja g'Omuzira Gagwa mu Bamisiri

- ¹³Awo MUKAMA n'agamba Musa nti, "Ozuukuka mu makya nnyo, n'ogenda oyolekera Falaawo, n'omugamba nti, MUKAMA Katonda wa Abaebbulaniya agamba bw'ati nti, 'Leka abantu bange bagende, bampeereze.
- ¹⁴Kubanga ku mulundi guno nzija kukusindikira kawumpuli ku ggwe kennyini, ne ku baweereza bo, ne ku bakungu bo, olyoke otegeere nga tewali ali nga nze mu nsi yonna.
- ¹⁵Kubanga nandiyinzizza okugolola omukono gwange ne nkusindikira olumbe, ggwe n'abantu bo, ne lubamalawo ku nsi.
- ¹⁶Naye olw'ensonga eno kyennava nkuleka n'obeera mulamu, ndyoke njolesamaanyi gange, era n'erinnya lyange liryoke litegeezebwe mu nsi yonna.
- ¹⁷Kyokka okyekulumbaliza ku bantu bange n'otobakkiriza kugenda,
- ¹⁸noolwekyo, enkyo obudde nga bwe buti, nzija kusindika kibuyaga ow'omuzira ogw'amayinja ogutagwangako mu Misiri kasookedde ensi eyo ebaawo.
- ¹⁹Kale, lagira bayingize amagana go ag'ente, n'ebisolo byonna ebiri mu ddundiro, kubanga omuzira gujja kukuba buli muntu ali ebweru era ajja kufa; ne buli nsolo yonna eneebeera ebweru mu ddundiro gujja kugikuba efe.'
- ²⁰Abakungu ba Falaawo abaali batya ekigambo kya MUKAMA, ne banguwa ne bayingiza abaddu baabwe n'amagana gaabwe.
- ²¹Naye abo abatassaayo mwoyo ku kigambo kya MUKAMA ne baleka abaddu baabwe n'amagana gaabwe ebweru.
- ²²Awo MUKAMA n'agamba Musa nti, "Golola omukono gwo eri eggulu, omuzira gugwe ku nsi yonna ey'e Misiri: gukube abantu, n'ensolo, ne buli kimera kyonna ekiri mu nnimiro mu Misiri."
- ²³Musa n'ayolekeza omuggo gwe eri eggulu; MUKAMA n'asindika okubwatuka n'omuzira; laddu ne yakira ku ttaka. Bw'atyo MUKAMA n'atonnyesa omuzira ku nsi y'e Misiri.
- ²⁴Omuzira ne gugwa, n'okumyansa ne kwetabika n'omuzira awatali kusalako, ne guba mungi nnyo, nga tegugwangako bwe gutyo kasookedde ensi ya Misiri efuuka ggwanga.
- ²⁵Omuzira gwakuba buli kintu kyonna ekyali ebweru mu nnimiro mu nsi yonna ey'e Misiri: abantu n'ensolo; era omuzira ne gukuba buli kimera kyonna mu nnimiro, ne gusensebula emit gyonna ku ttale.
- ²⁶Ekitundu kyokka ekitaatuukwamu muzira, kye kya Goseni, abaana ba Isirayiri gye baabeeranga.

²⁷Awo Falaawo n'atumya Musa ne Alooni, n'abagamba nti, "Leero luno nnyonoonye; MUKAMA ye mutuufu, naye nze n'abantu bange ffe bakyamu.

²⁸Weegayirire MUKAMA; kubanga omuzira n'okubwatuka bitwetamizza. Nzija kubaleka mugende; siraba kyemuva mweyongera kubeera wano."

²⁹Musa n'addamu nti, "Olunaafuluma mu kibuga, nnaagolola emikono gyange waggulu eri MUKAMA ne mmusaba. Okubwatuka kunaasirika, n'omuzira gunaalekera awo okugwa; olyoke otegeere ng'ensi eno MUKAMA ye nannyini yo.

³⁰Kyokka mmanyi nga ggwe n'abakungu bo temunnatya MUKAMA Katonda."

³¹(Obugoogwa ne sayiri byakubwa ne bizikirizibwa, kubanga sayiri yali ayengera nga n'obugoogwa bumulisizza.

³²Naye ejjaano n'omukyere, byo tebyayonoonebwa kubanga byali tebinnayengera.)

³³Musa n'ava mu kibuga ewa Falaawo, n'awanika emikono gye eri MUKAMA ng'amusaba; okubwatuka n'omuzira ne bisirika, era n'enkuba n'ekya.

³⁴Naye Falaawo bwe yalaba enkuba, n'omuzira, n'okubwatuka nga birekeddaawo, ate ne yeeyongera okusobia; ye n'abakungu be ne bakakanyaza emitima gyabwe.

³⁵Omutima gwa Falaawo bwe gutyo ne gukakanyala; n'ataleka baana ba Isirayiri kugenda, era nga MUKAMA bwe yayogerera mu Musa.

Okuva 10

Enzige Zirya Ebirime by'Abamisiri

¹Awo MUKAMA n'agamba Musa nti, "Genda eri Falaawo, kubanga nnyongedde okukakanyaza omutima gwe, n'omutima gw'abaweeresa be, ndyoke mbalage ebyamagero byange bino:

²era naawe onyumize abaana bo, n'abaana b'abaana bo, ebintu bye nkoledde mu Misiri, n'ebiyamagero bye mbalaze; nammwe mulyoke mutegeere nga nze MUKAMA."

³Awo Musa ne Alooni ne bagenda ewa Falaawo, ne bamugamba nti, "MUKAMA Katonda wa Abaebbulaniya n'agamba bw'ati nti, 'Olituusa ddi ng'okyagaanye okwetoowaza mu maaso gange? Leka abantu bange bagende, bansinze.

⁴Singa ogana okubakkiriza okugenda, enkyia nzija kuleeta enzige mu nsi yo.

⁵Zijja kubikka ensi yonna, wabulewo n'omuntu w'ayisa eriiso okulaba ettaka. Zijja kulya ebyo omuzira bye gwalekawo, zirye ne buli muti ogukula mu nnimiro.

⁶Zinajjuza amayumba go, n'amayumba g'abakungu bo bona, n'amayumba g'Abamisiri bona; ekyo bakadde bo, ne bakadde ba bakadde bo nga tebakirabangako kasookedde babeera mu nsi eno n'okutuusa leero.'" Musa n'akyuka n'aviira Falaawo.

⁷ Abakungu ba Falaawo ne bamugamba nti, "Omusajja ono alituusa ddi ng'atufuukidde omutego? Leka abantu bagende basinze MUKAMA Katonda waabwe. Ggwe tolaba Misiri nga bw'eweddewo?"

⁸Musa ne Aloonni ne bazzibwa awali Falaawo. N'abagamba nti, "Kale, mugende musinze MUKAMA Katonda wammwe. Naye abagenda be baani?"

⁹Musa n'addamu nti, "Abakulu n'abato, batabani baffe ne bawala baffe bona tujja kugenda nabo; era tugenda n'amagana gaffe n'ebisibo byaffe, kubanga waliwo embaga gye tujja okukolera MUKAMA."

¹⁰Falaawo n'abagamba nti, "MUKAMA abeere nammwe, obanga mulowooza nga nzija kubaleka mugende, mmwe n'abaana bammwe! Nze ndaba nga mulina olukwe lwe muteekateeka.

¹¹Nedda! Abasajja bokka ka bagende basinze MUKAMA; kubanga ekyo kye mwagala." Ne bagobebwa awali Falaawo.

¹² Awo MUKAMA Katonda n'agamba Musa nti, "Golola omukono gwo ku nsi ya Misiri oyite enzige, zijje ku nsi ya Misiri, ziry'e buli kantu konna akamera mu nnimiro, n'ebyo byonna omuzira bye gwataliza."

¹³ Musa n'agolola omuggo gwe ku nsi ya Misiri; MUKAMA Katonda n'aleeta embuyaga ezaava ebuvanjuba, ne zikunta olunaku olwo lwonna n'ekiro kyonna. Obudde bwe bwakya embuyaga ne zireeta enzige.

¹⁴Enzige nnyingi nnyo ne zigwa ku nsi yonna ey'e Misiri, ne zigisaanikira, okuva ku nsalo yaayo ey'oluuyi olumu okutuuka ku y'oluuyi olulala. Zaali nzige za kabi kanene, nga tewalabikanga ziri ng'ezo, era tezigenda kulabika.

¹⁵Zaabuutikira ensi yonna, ne wabaawo ekizikiza ku nsi; ne ziry'e buli kimera kyonna mu nsi, n'ebibala byonna eby'emit omuzira bye gwali gutalizza; era tewaasigalawo kintu kyonna kya kiragala ku miti n'ebimera mu nnimiro, mu nsi yonna ey'e Misiri.

¹⁶ Awo Falaawo n'atumya Musa ne Aloonni bunnambiro, n'abagamba nti, "Nnyonoonye eri MUKAMA Katonda wammwe ne gye muli.

¹⁷Mbeegayiridde munsonyiwe olw'okwonoona kwange, omulundi guno gwokka; era musabe MUKAMA Katonda wammwe anziggyeeko olumbe luno lwokka olututta."

¹⁸Musa n'ava ewa Falaawo ne yeegayirira MUKAMA.

¹⁹Awo MUKAMA n'aleeta embuyaga ez'amaanyi ennyo nga ziva ebuvanjuba, ne zisitula enzige ne zizisuula mu Nnyanja Emyufu. Tewaasigala nzige n'emu wonna wonna mu nsi y'e Misiri.

²⁰Naye MUKAMA n'akakanyaza omutima gwa Falaawo, abaana ba Isirayiri n'atabakkiriza kugenda.

Ekizikiza Kikwata mu Bamisiri

²¹Awo MUKAMA n'agamba Musa nti, "Golola omukono gwo waggulu eri eggulu, wabeewo ekizikiza ku nsi ey'e Misiri; ekizikiza ekiyinza n'okuwulikika."

²²Musa n'agolola omukono gwe eri eggulu; ne wabaawo ekizikiza ekikwafu mu nsi yonna ey'e Misiri okumala ennaku ssatu.

²³Abantu bona nga tewali asobola kulaba munne; era tewaali yaseguka kuva mu kifo kye w'abeera okumala ennaku ssatu. Naye bo abaana ba Isirayiri ewaabwe ng'obudde bulaba.

²⁴Awo Falaawo n'atumya Musa, n'amugamba nti, "Mugende musinze MUKAMA. Abaana bammwe nabo mugende nabo, wabula ente zammwe, n'embuzi n'endiga ze ziba zisigala."

²⁵Naye Musa n'addamu nti, "Osaana otuleke tutwale ebisolo eby'okuwaayo ssaddaaka n'ebiweebwayo ebyokebwa eri MUKAMA Katonda waffe.

²⁶Ente zaffe tusaana okugenda nazo; tewali nsolo n'emu eneesigala. Kubanga kitusaanira okuzitwala nga tugenda okusinza MUKAMA Katonda waffe; kubanga tujja kumala kutuuka eri, ne tulyoka tumanya kye tunaakozesa mu kusinza MUKAMA."

²⁷Naye MUKAMA n'akakanyaza omutima gwa Falaawo, n'atabaleka kugenda.

²⁸Falaawo n'agamba Musa nti, "Nva mu maaso! Era weekuum, sikulabanga ng'okomyewo w'endi; bwe ndiddayo okukulaba tolirema kufa."

²⁹Musa n'addamu nti, "Nga bw'ogambye, nange siriddayo kukulaba."

Okuva 11

Okuttibwa kw'Abaana Abamisiri Ababereberye

¹Awo MUKAMA n'agamba Musa nti, "Ekyaliyo ekibonoobono kimu kye nzija okuleetera Falaawo n'ensi y'e Misiri. Oluvannyuma lwakyo ajja kubaleka mugende; ate bw'anaabakkiriza okugenda, ajja kubeegoberako ddala bwegobi abasindiikirize.

²Kale, tegeeza abantu, buli musajja asabanga muliraanwa we, ne buli mukazi asabanga muliraanwa we, ebintu eby'omuwendo ebya ffeeza n'ebya zaabu."

³MUKAMA n'aleetera Abamisiri okukwanagana n'abaana ba Isirayiri; ne Musa n'aweebwa nnyo ekitiibwa mu nsi y'e Misiri. Abakungu ba Falaawo n'abantu bona ne bamugulumiza nnyo.

⁴Awo Musa n'agamba Falaawo nti, "MUKAMA agambye bw'ati nti, 'Nga wakati mu ttumbi, nzija kuyita mu Misiri yonna.

⁵Ebibereberye mu nsi y'e Misiri bijja kufa, okutandikira ku mubereberye wa Falaawo agenda okumusikira, okutuukira ddala ku mubereberye w'omuwala omuzaana asa ku lubengo; era n'ebibereberye byonna eby'ebisolo.

⁶Wajja kubaawo okukungubaga okunene mu nsi yonna eya Misiri, okutabangawo era nga tewagenda kubaawo kukwenkana.

⁷Naye mu baana ba Isirayiri n'embwa teribaayo gw'eboggolera wadde ebisolo byabwe; mulyoke mutegeere nga MUKAMA Abamisiri n'Abayisirayiri tabayisa bumu.'

⁸Era bano abakungu bo bona balijja gye ndi nga babundabunda, ne banvuunamira nga bannegayirira nti, 'Genda, ggwe n'abantu bo bona abakugoberera.' Oluvannyuma lw'ebyo nange ndigenda." N'ava awali Falaawo n'obusungu bungi nnyo.

⁹MUKAMA yali agambye Musa nti, "Falaawo tagenda kuwuliriza by'omugamba, bwe ntyo ndyoke nkolere ebyamagero byange bingi mu Misiri."

¹⁰Musa ne Aloonii baakolera ebyamagero ebyo byonna awali Falaawo; naye MUKAMA yakakanyaza omutima gwa Falaawo, n'atakkiriza baana ba Isirayiri kuva mu nsi ye.

Okuva 12

Okuyitako

¹Awo MUKAMA n'ayogera ne Musa ne Aloonii nga bali mu nsi y'e Misiri, n'abagamba nti,

²"Okuva leero omwezi guno gwe gunaabanga omubereberye mu myezi gyonna mu mwaka gwammwe.

³Mutegeeze abantu bona aba Isirayiri nti ku lunaku olw'ekkumi olw'omwezi guno kigwanidde buli mukulu wa nnyumba, addire omwana gw'endiga ogw'okuliibwa mu maka ge, buli maka omwana gw'endiga gumu.

⁴Singa amaka gabaamu abantu batono nnyo abatamalaawo mwana gwa ndiga, amaka ago geegatte n'ag'omuliraano balye omwana gw'endiga ogwo. Muligeraageranya obungi bw'abantu abamalawo omwana gw'endiga nga musinziira ku ndya ya buli omu mu maka omwo.

⁵Omwana gw'endiga gusaana gube gwa seddume nga gwa mwaka gumu obukulu, era nga teguliiko kamogo. Guyinza okuba omwana gw'endiga oba ogw'embuzi.

⁶Ensolo ezo muzirabiriranga okutuusa ku lunaku olw'ekkumi n'enya olw'omwezi guno; ekibiina kyonna eky'abantu ba Isirayiri ne kiryoka kizitta akawungeezi.

⁷Baddiranga omusaayi ne bagumansira ku njuyi zombi ne waggulu, ku mwango gw'oluggi lwa buli nnyumba mwe baliriira omwana gw'endiga.

⁸Mu kiro ekyo ennyama balyanga njokye ku muliro, era baliirangako n'emigaati egitali mizimbulukuse n'enva ezikaawa.

⁹Tewabanga ku nnyama eyo gye mulya nga mbisi obanga efumbwa mu mazzi; wabula mugyokyanga ku muliro: omutwe, amagulu n'eby'omunda byonna.

¹⁰Temugiterekangako kutuusa nkeera; bw'ebalemanga eggulolimu, mugyokyanga bwokya ne mugizikiriza.

¹¹Mugiryanga bwe muti: Mwesibanga ekimyu, nga mwambadde n'engatto zammwe, nga mukutte n'omuggo. Mugiryanga mangu. Kubanga eyo y'Embaga ey'Okuyitako kwa MUKAMA.

¹²"Kubanga mu kiro ekyo ndiyita mu nsi ya Misiri, nditta buli kibereberyeye kyonna mu nsi y'e Misiri, abantu era n'ebisolo; era bakatonda bona ab'omu Misiri ndibasalira omusango. Nze MUKAMA.

¹³Omusaayi ke kaliba akabonero akalaga ennyumba mwe muli; era bwe ndiraba omusaayi, nga mbayitako; so n'okuzikirira kwe ndireeta ku Bamisiri mmwe tekulibakwatako.

Okukwata Wiiki y'Okuyitako

¹⁴"Olunaku luno lunaababeeranga lwa kijjukizo, era munaalukuumanga ne mulukwata nga lwa mbaga ya MUKAMA mu mirembe gyammwe gyonna egiriddiriñjana. Lino lifuuse tteeka ery'emirembe gyonna.

¹⁵Munaalyanga emigaati egitali mizimbulukuse okumala ennaku musanvu; era ku lunaku olusooka, mu nnaku ezo omusanvu, ekizimbulukusa mukiggiranga ddala mu nnyumba zammwe, kubanga alivumbulwa ng'alidde omugaati ogulimu ekizimbulukusa, okuva ku lunaku olusooka okutuusa ku lunaku olw'omusanvu, aligobebwa mu Isirayiri.

¹⁶Ku lunaku olusooka wanaabangawo olukuññaana olutukuvu, ne ku lunaku olw'omusanvu munaabanga n'olukuññaana olutukuvu; ennaku ezo temuzikolerangako mulimu gwa ngeri yonna, okuggyako okufumba emmere abantu bona gye banaalya, kye kyokka kye mujjanga okukola.

¹⁷ “Mukwatanga Embaga ey’Emigati Egitali mizimbulukuse, kubanga ku lunaku luno lwennyini kwe naggyira ebika bya Isirayiri mu nsi y’e Misiri. Noolwekyo olunaku luno munaalukwatanga n’ab’omu mirembe gyonna egiriddawo. Ekyo kiragiro eky’emirembe n’emirembe.

¹⁸ Mu mwezi ogusooka, munaalyanga omugaati ogutaliimu kizimbulukusa, okuva mu kawungeezi ak’olunaku olw’ekkumi n’enya olw’omwezi, okutuusa ku lunaku olw’amakumi abiri mu olumu olw’omwezi ogwo.

¹⁹ Okumala ennaku musanvu mu nnyumba zammwe temulabikangamu ekizimbulukusa; era alivumbulwa ng’alidde ekintu kyonna omuli ekizimbulukusa, agenda kugobwa mu Isirayiri, ne bwaliba omuzaaliranwa oba omugwira.

²⁰ Temulyanga kintu kyonna omuli ekizimbulukusa; mu nnyumba zammwe mwe musula yonna, mulyanga emigaati egitali mizimbulukuse.”

Omwana gw’Endiga ogw’Okuyitako Guttibwa

²¹ Awo Musa n’ayita abakulembeze ba Isirayiri bona, n’abagamba nti, “Mwerondere abaana b’endiga ng’amaka gammwe bwe gali, mutte omwana gw’endiga ogw’Okuyitako.

²² Musibe bulungi akaddo k’akakubansiri, mukannyike mu musaayi gwe mutadde mu bensani, mulyoke mumansire ku mwango gw’oluggi waggulu, ne ku njuyi zombi ez’omwango. Tewabaawo n’omu afuluma ennyumba ye okutuusa ng’obudde bukedde.

²³ Kubanga MUKAMA ajja kuyita awo ng’agenda okutta Abamisiri; kale bw’anaalaba omusaayi ku mwango gw’oluggi waggulu ne ku mwango mu mbiriizi z’oluggi, oluggi olwo MUKAMA ajja kuluyitako, era tajja kukkiriza oyo azikiriza kuyingira mu nnyumba zammwe n’okubatta.

²⁴ “Kibagwanira okugondera ebiragiro bino ng’etteeka, mmwe ne batabani bammwe emirembe gyonna.

²⁵ Era bwe muliyingira mu nsi MUKAMA gy’alibawa nga bwe yasuubiza, temwerabiranga mukolo guno.

²⁶ Abaana bammwe bwe balibabuuza nti, ‘Omukolo guno gutegeesa ki?’

²⁷ Mulibaddamu nti, ‘Kino kye kiweebwayo eri MUKAMA eky’Okuyitako, kubanga yayita ku nnyumba z’Abayisirayiri mu Misiri, n’awonya amaka gaffe, bwe yatta Abamisiri.’” Awo abantu ne bavuunama ne basinza.

²⁸ Abaana ba Isirayiri ne bagenda ne bakola nga MUKAMA bwe yalagira Musa ne Alooni, bwe batyo bwe baakola.

Ebibereberye Bittibwa

²⁹ Awo ekiro mu ttumbi MUKAMA n'atta ebibereberye byonna mu nsi y'e Misiri, okuvira ddala ku mubereberye wa Falaawo eyali ow'okumusikira, okutuuka ku mubereberye w'omusibe ali mu kkomera; era n'ente embereberye zonna.

³⁰ Falaawo n'azuukuka mu kiro wakati, ye n'abaweereza be bona, n'Abamisiri bona; Misiri yonna n'ejjula okukungubaga, kubanga tewaaliwo nnyumba n'emu omutaafa muntu.

³¹ Mu kiro ekyo Falaawo n'atumya Musa ne Alooni n'abagamba nti, "Musituke! Mutuviire, nze n'abantu bange, mmwe n'abaana ba Isirayiri. Mugende musinze MUKAMA nga bwe mwansaba.

³² Mutwale amagana gammwe n'ebisibo byammwe nga bwe mwansaba, mugende; nange munsabirangayo omukisa!"

³³ Awo Abamisiri ne basindiikiriza abaana ba Isirayiri banguwe okubaviira mu nsi yaabwe; kubanga baagamba nti, "Ffenna tufa tuggwaawo!"

³⁴ Abaana ba Isirayiri ne baddira obuwunga bwabwe obw'emigaati obugotte, obutaliimu kizimbulukusa, ne babussa mu bbakuli omufumbirwa emigaati, ne babuzinga mu ngoye zaabwe, ne babutwalira ku bibegabega byabwe.

³⁵ Baakola nga Musa bwe yabalagira, ne basaba Abamisiri eby'omuwendo ebya ffeeza n'ebya zaabu, awamu n'ebiyambalo.

³⁶ MUKAMA yali aleetedde abaana ba Isirayiri okuganja mu Bamisiri, bwe batyo ne baweebwa buli kye baasabanga. Ne baleka nga bakalizza Abamisiri.

Abayisirayiri Basitula Okuva mu Misiri

³⁷ Awo abaana ba Isirayiri ne batambula okuva e Lameseesi ne batuuka e Sukkosi. Baali abantu ng'emitwalo nkaaga, ng'abakazi n'abaana tebaliddwa.

³⁸ Waaliwo n'abantu abalala bangi abaagenda nabo. Baatwala amagana g'ente mangi, n'ebisibo, bingi nnyo.

³⁹ Ne beefumbira emigaati mu buwunga obugotte bwe baggya mu Misiri, naye tegyalimu kizimbulukusa, kubanga baasindiikirizibwa busindiikirizibwa okuva mu Misiri, ne bataba na budde bwa kwefumbira mmere.

⁴⁰ Emyaka abaana ba Isirayiri gye baamala mu Misiri gyawera ebikumi bina mu amakumi asatu.

⁴¹ Ku lunaku olwasembayo olwaweza emyaka ebikumi ebina mu asatu, eggyle lya MUKAMA eryo lyonna kwe lyasitulira ne liva mu nsi y'e Misiri.

⁴² MUKAMA yali bulindaala ekiro ky'olunaku olwo, n'aggya abaana ba Isirayiri mu nsi y'e Misiri; noolwekyo abaana ba Isirayiri banajjukiranga MUKAMA ekiro ky'olunaku olwo emirembe gyabwe gyonna.

Ebiragiro by'Embaga ey'Okuyitako

⁴³ Awo MUKAMA n'agamba Musa ne Alooni nti, "Bino by'ebiragiro by'Okuyitako: "Omunaggwanga takkirizibwa kugiryako.

⁴⁴ Omuddu aguliddwa n'ensimbi akkirizibwa okugiryako singa amala okukomolebwa;

⁴⁵ naye omugenyi omugwira, n'omupakasi akola awaka, tebakkirizibwa kugiryako.

⁴⁶ "Buli ndiga eneerirwanga mu nnyumba emu; ennyama eyo tekuubengako efulumizibwa bweru wa nju eyo. Temumenyanga ku magumba gaayo n'erimu.

⁴⁷ Abantu bona aba Isirayiri banaakolanga omukolo guno.

⁴⁸ "Omunaggwanga abeera mu mmwe bw'abanga ayagala okukolera MUKAMA Katonda omukolo gw'Okuyitako, asaana asooke okukomolaabantu be aboobulenzi bona abali mu maka ge, alyoke asembere gye muliyegatte mu mukolo ogwo; kubanga olwo anaabanga ng'omuzaaliranwa mu nsi omwo. Naye atali mukomole taagiryengako.

⁴⁹ Etteeka lye limu lye linaakwatibwanga omuzaaliranwa n'Omunnaggwanga abeera mu mmwe."

⁵⁰ Bwe batyo abaana ba Isirayiri bona ne bakola nga MUKAMA Katonda bwe yalagira Musa ne Alooni; bwe batyo bona bwe baakola.

⁵¹ Awo ku lunaku olwo lwennyini MUKAMA Katonda n'aggya abaana ba Isirayiri mu nsi ey'e Misiri nga bagendera mu bibinja byabwe.

Okuva 13

Okutukuza Ebibereberyé

¹ Awo MUKAMA n'agamba Musa nti,

² "Ebibereberyé byonna binjawulireko. Abaana abaggulanda mu Isirayiri yonna banaabanga bange; n'ebisolo ebiggulanda nabyo binaabanga byange."

Embaga ey'Emigaati Egitali Mizimbukuse

³ Awo Musa n'agamba abantu nti, "Mujukiranga olunaku luno, olunaku lwe mwaviirako mu Misiri, ensi gye mwafugibwanga ng'abaddu, kubanga MUKAMA yabaggyayo n'omukono gwe ogw'amaanyi. Temulirangako mugaati gulimu kizimbukusa.

⁴ Ku lunaku lwa leero olw'omwezi guno Abibu, lwe musitudde okuva mu Misiri.

⁵ MUKAMA bw'alimala okubatuusa mu nsi y'Abakanani, n'Abakiiti, n'Abamoli; n'ey'Abakiivi, n'Abayebusi, ensi gye yalayirira bajjajammwe okugibawa, ensi ekulukuta amata n'omubisi gw'enjuki, mukwatanga omukolo guno mu mwezi guno.

⁶Mumalanga ennaku musanvu nga mulya emigaati egitaliimu kizimbulukusa, ne ku lunaku olw'omusanvu kwe munaakoleranga embaga ya MUKAMA.

⁷Munaalyanga emigaati egitali mizimbulukuse okumala ennaku musanvu; tewabangawo alabika n'omugaati omuzimbulukuse, wadde ekizimbulukusa okusangibwa nammwe mu nsi yammwe.

⁸Ku lunaku olwo mulitegeeza abaana bammwe nti, ‘Tukola tuti nga tujukira ebyo MUKAMA bye yatukolera nga tuva mu Misiri.’

⁹Omukolo guno gunaababeereranga ng'akabonero ku mikono gyammwe, oba mu byenyi wakati w'amaaso gammwe, okubajjukizanga etteeka lya MUKAMA eritaavenga ku mimwa gyammwe. Kubanga MUKAMA yabaggya mu Misiri n'omukono gwe ogw'amaanyi.

¹⁰Noolwekyo onookolanga ekiragiro kino bye kigamba, mu kiseera kyakyo buli mwaka, buli mwaka.

Ebibereberye

¹¹“MUKAMA ng'amaze okubatuusa mu nsi y'Abakanani, nga bwe yabalayirira mmwe ne bajajja bammwe, era agenda kugibawa,

¹²MUKAMA mumwawulirangako ebiggulanda byonna. Zisseddume zonna embereberye ez'amagana gammwe zinaabanga za MUKAMA.

¹³Buli kalogoyi akabereberye mukawaanyisangamu omwana gw'endiga ne mukanunulayo, naye bwe mutaakanunulenga mukamenyanga ensingo ne kafa. Ne buli mutabani wammwe omubereberye mumununulanga.

¹⁴“Awo olulituuka batabani bammwe, bwe bababuuzanga nti, ‘Kino kye mukola kitegeeza ki?’ Mubaddangamu nti, ‘Kubanga MUKAMA yatuggya mu Misiri, ensi ey'obuddu, n'omukono gwe ogw'amaanyi.

¹⁵Naye Falaawo bwe yali ng'akakanyadde ng'atugaanye okuvaayo, MUKAMA n'atta ebibereberye byonna mu nsi y'e Misiri; ababereberye b'abantu n'ebibereberye by'ebisolo. Noolwekyo kyetuva tuwaayo ssaddaaka eri MUKAMA ey'ebiggulanda byonna ebisajja; naye batabani baffe abaggulanda tubanunulayo.’

¹⁶Omukolo ogwo gunaababeereranga ng'akabonero akokebbwa ku mikono gyammwe, oba mu byenyi wakati w'amaaso gammwe; kubanga MUKAMA yabaggya mu Misiri n'omukono gwe ogw'amaanyi.”

Empagi ey'Ekire n'Empagi ey'Omuliro

¹⁷Awo abantu, bwe baasitula nga Falaawo amaze okubaleka, Katonda teyabayisa mu kkubo eriyita mu nsi y'Abafirisuuti, newaakubadde lye lyali ery'okumpi. Kubanga Katonda yagamba nti, “Singa bagwa mu lutalo, bayinza okwejusa ne bawetamu ne baddayo e Misiri.”

¹⁸Bw'atyo Katonda n'abeekooloobia ng'abayisa mu kkubo ery'omu ddungu eriggukira ku Nnyanja Emyufu. Abaana ba Isirayiri baava mu nsi y'e Misiri nga bakutte ebyokulwanyisa byabwe nga beetgekedde okulwana.

¹⁹Awo Musa n'avaayo n'amagumba ga Yusufu, kubanga Yusufu yali alayizza abaana ba Isirayiri. Yabagamba nti, "Ddala, ddala MUKAMA agenda kubadduukirira. Kale, amagumba gange mugendanga nago nga muva wano."

²⁰Bwe baava e Sukkosi ne bakuba eweema zaabwe mu Yesamu eddungu we litandikira.

²¹Emisana MUKAMA yabakulemberanga ng'ali mu mpagi ey'ekire okubalaga ekkubo, n'ekiro ng'ali mu mpagi ey'omuliro okubamulisiza, balyoke batambulenga emisana n'ekiro.

²²Empagi ey'ekire ey'emisana, n'empagi ey'omuliro ey'ekiro tezaggibwawo mu maaso g'abantu obudde bwonna.

Okuva 14

¹Awo MUKAMA n'alagira Musa nti,

²"Tegeeza abaana ba Isirayiri bawetemu nga boolekera Pikakirosi, bakube eweema zaabwe okumpi ne Pikakirosi, wakati wa Migudooli n'ennyanja. Musiisire ku lubalama lw'ennyanja nga mwolekedde Baali Zefoni.

³Falaawo abaana ba Isirayiri ajja kuboogerako nti, 'Babulubuutira mu nsi yaffe, n'eddungu libazingizza.'

⁴Nzija kukakanyaaza omutima gwa Falaawo, alyoke abawondere. Naye ndyefunira ekitiibwa okuva ku bye ndikola Falaawo n'eggye lye lyonna; n'Abamisiri balitegeera nga nze MUKAMA." Abaana ba Isirayiri ne bakola bwe batyo.

Falaawo Awondera Isirayiri

⁵Kabaka w'e Misiri bwe yategeera ng'Abayisirayiri baddukidde ddala, Falaawo n'abakungu be ne bejusa, ne bagamba nti, "Kiki kino kye tukoze, okuleka Abayisirayiri ababadde batukolera ne bagenda?"

⁶Bw'atyo n'ateekateeka eggiali lye erisikibwa embalaasi, n'eggye ly'anaagenda nalyo.

⁷Yatwala amagaali lukaaga agasingira ddala obulungi, n'agattako n'amagaali amalala gonna agaali mu Misiri, n'abalwanyi abaduumizi nga be bagavuga.

⁸MUKAMA n'akakanyaaza omutima gwa Falaawo Kabaka w'e Misiri, n'agoberera abaana ba Isirayiri. Abaana ba Isirayiri ne bakwata olugendo lwabwe nga tebaliiko gwe batya.

⁹Abamisiri ne babawondera: embalaasi zonna, n'amagaali gonna aga Falaawo agasikibwa embalaasi, n'abeebagadde embalaasi, n'eggye lye, ne babasanga nga basiisidde ku lubalama lw'enyanja okumpi ne Pikakirosi, nga boolekedde Baali Zefoni.

¹⁰Falaawo bwe yasembera, abaana ba Isirayiri ne balengera Abamisiri nga babagoberera, ne batya nnyo. Abaana ba Isirayiri ne balaajaanira MUKAMA.

¹¹Ne bagamba Musa nti, "Mu Misiri entaana tezaaliyo, kyewava otuleeta tufire wano mu ddungu? Lwaki watuggya mu Misiri n'oja otuyisa bw'oti?

¹²Bwe twali mu Misiri tettwakugamba nti, 'Tuveeko, tuleke tukolere Abamisiri?' Kubanga okukolera Abamisiri kyandibadde waddeko okusinga okufiira mu ddungu."

¹³Musa n'addamu abantu nti, "Temutya, munywere, mujja kulaba obulokozi MUKAMA bw'anaabaleetera olwa leero. Kubanga Abamisiri abo be mulaba kaakano, temuliddayo nate kubalaba emirembe gyonna.

¹⁴MUKAMA ajja kubalwanirira. Mmwe musirike busirisi."

¹⁵MUKAMA n'agamba Musa nti, "Lwaki okaabirira nze? Lagira abaana ba Isirayiri bakwate olugendo lwabwe.

¹⁶Wanika omuggo gwo, ogolole n'omukono gwo ku nnyanja, amazzi ogaawulemu, abaana ba Isirayiri bayite wakati mu nnyanja kyokka nga batambulira ku ttaka kkalu.

¹⁷Nange nzija kukakanyaza emitima gy'Abamisiri, bayingirire enyanja nga babagoberera. Ndyoke nefunire ekitiibwa okusinziira ku bye nnaakola Falaawo, n'amaggye ge, n'amagaali ge, n'abeebagadde embalaasi.

¹⁸Abamisiri nabo banaategeera nga nze MUKAMA, nga nefunidde ekitiibwa: okusinziira ku bye nnaakola Falaawo n'amagaali ge, n'abasajja be abeebagadde embalaasi."

¹⁹Awo malayika wa Katonda eyali akulembira abaana ba Isirayiri n'akyuka n'abadda emabega; n'empagi ey'ekire ne yejjulula okuva mu maaso gaabwe, n'eyimirira emabega waabwe:

²⁰Bw'etyo n'ebeera wakati w'abaana ba Isirayiri n'eggye ly'Abamisiri. Ekiro, ekire ne kireeta ekizikiza ku ludda lw'Abamisiri, naye ne kireeta omuliro okumulisa oludda lw'Abayisirayiri; ekiro kyonna ne wataba ggye lisemberera linnaalyo.

Okuyita mu Nnyanja Emyufu

²¹Awo Musa n'agolola omukono gwe ku nnyanja; MUKAMA n'asindika ku nnyanja embuyaga ez'amaanyi ezaava ebuvanjuba, ne zigobawo amazzi ekiro kyonna, ne lufuuka lukalu, ng'amazzi gayawuddwamu.

²²Abaana ba Isirayiri ne bayita wakati mu nnyanja nga batambulira ku ttaka ekkalu, ng'amazzi gakoze ekisenge ku ludda lwabwe olwa ddyo n'olwa kkono.

²³Abamisiri ne babawondera ne bayingira wakati mu nnyanja n'amagaali ga Falaawo gonna, n'embalaasi ze, n'abasajja be abeebagadde embalaasi.

²⁴Awo mu makya ennyo nga tebunnalaba, MUKAMA n'atunuulira egghe ly'Abamisiri ng'ali mu mpagi ey'ekire n'omuliro, n'atandika okulibonyaabonya.

²⁵Amagaali gaabwe yagamaamulako zinnamuziga, ne gabakaluubirira okuvuga. Abamisiri n'okugamba ne bagamba nti, "Leka Abayisirayiri tubadduke! Kubanga MUKAMA alwanyisa Misiri ng'abalwanirira."

²⁶Awo MUKAMA n'agamba Musa nti, "Golola omukono gwo ku nnyanja, amazzi gakomewo gaggweere ku Bamisiri, ne ku magaali gaabwe, ne ku basajja baabwe abeebagadde embalaasi."

²⁷Bw'atylo Musa n'agololera ennyanja omukono gwe, obudde bwe bwakya n'ekomawo n'amaanyi, Abamisiri ne bagidduka nga balaba ejja; MUKAMA, Abamisiri n'abasaanyaawo wakati mu nnyanja.

²⁸Amazzi ne gakomawo ne gasaanikira amagaali n'abeebagadde embalaasi, n'egghe lya Falaawo lyonna eryali ligoberedde Abayisirayiri mu nnyanja. Tewaali n'omu ku bo eyawona.

²⁹Naye abaana ba Isirayiri bo nga batambulira ku ttaka kkalu wakati mu nnyanja, amazzi nga gakoze ekisenge ku ludda lwabwe olwa ddyo ne ku lwa kkono.

³⁰Bwe kityo ku lunaku olwo Abayisirayiri MUKAMA n'abawonya Abamisiri. Abayisirayiri ne balaba Abamisiri ku lubalama lw'enyanja nga bafudde.

³¹Abayisirayiri ne balaba obuyinza obunene ennyo MUKAMA bwe yalaga ng'akola ku Bamisiri: abantu ne batya MUKAMA, ne bakkiriza MUKAMA n'omuweereza we Musa.

Okuva 15

Oluylimba Iwa Musa

¹Awo Musa n'abaana ba Isirayiri ne bayimbira MUKAMA oluyimba luno nga bagamba nti, "Nnaayimbiranga MUKAMA, kubanga awangudde n'ekitiibwa kingi. Asudde mu nnyanja embalaasi n'omwebagazi waayo.

²MUKAMA ge maanyi gange era lwe luyimba lwange, era afuuse obulokozi bwange. Ye Katonda wange, nange nnaamutenderezanga, ye Katonda wa kitange, nange nnaamugulumizanga.

³MUKAMA mulwanyi; MUKAMA, ly'erinnya lye.

- ⁴ Amagaali ga Falaawo n'eggye lye abisudde mu nnyanja; n'abaduumizi b'amaggye ge abalondemu basaanyeewo mu Nnyanja Emyufu.
- ⁵ Obuziba bubasaanikidde; basse oktuuka ku ntobo ng'ejinja.
- ⁶ "Omukono gwo ogwa ddyo, Ayi MUKAMA, gwalina amaanyi n'ekitiibwa; omukono gwo ogwa ddyo, Ayi MUKAMA, gwasesebbulu omulabe.
- ⁷ Mu bukulu obw'ekitiibwa kyo, wamegga abalabe bo, wabalaga obusungu bwo, ne bubasiriiza ng'ebisasiro.
- ⁸ Omukka bwe gwava mu nnyindo zo, amazzi ne geetuma; amazzi g'ebuziba ne geekwata ng'ekisenge wakati mu nnyanja.
- ⁹ "Omulabe n'ayogera nti, 'Ka mbagobe, mbakwate. Nnaagabana omunyago; mbeemalireko eggoga. Nnaasowolayo ekitala kyange, ndyoke mbazikirize.'
- ¹⁰ Naye wakunsa embuyaga zo, ennyanja n'ebasaanikira. Bakka ng'ekyuma, ne basaanawo mu mazzi amangi ag'amaanyi.
- ¹¹ Ani akufaanana, Ayi MUKAMA, mu bakatonda bona? Ani akufaanana, ggwe, Omutukuvu Oweekitiibwa, atiibwa era atenderezebwa, akola ebyamagero?
- ¹² "Wagolola omukono gwo ogwa ddyo, ensi n'ebamira.
- ¹³ Mu kwagala kwo okutaggwaawo, abantu be wanunula olibakulembra. Mu maanyi go, olibatuusa mu kifo kyo ekitukuvu.
- ¹⁴ Amawanga galikiwulira ne gakankana, ababeera mu Bufirisuuti balijjula ennaku.
- ¹⁵ Abakungu b'omu Edomu balitangaalirira nga batidde; abakulembeze ab'amaanyi aba Mowaabu balikankana; abatuuze b'omu Kanani baliggwaamu endasi.
- ¹⁶ Okwesisiwala n'entiisa biribajjira. Olw'omukono gwo ogw'amaanyi tebalinyega, balisirika ng'ejinja oktuusa abantu bo lwe baliytawo, Ayi MUKAMA, oktuusa abantu bo, be wanunula, lwe baliytawo.
- ¹⁷ Olibayingiza n'obassa ku lusozi lwo lwe weerondera, kye kifo, Ayi MUKAMA kye weekolera mw'onoobeeranga, ekifo kyo Ekitukuvu, kye weekolera, Ayi MUKAMA, n'emikono gyo.
- ¹⁸ MUKAMA anaafuganga emirembe n'emirembe."

Oluylimba Iwa Miryamu

- ¹⁹ Embalaasi za Falaawo, n'amagaali ge, ne basajja be abeebagadde embalaasi bwe baayingira mu nnyanja, MUKAMA n'akomyawo amazzi ag'enyanja ne gabasaanikira; naye nga bo abaana ba Isirayiri batambulira ku ttaka kkalu wakati mu nnyanja.

²⁰Awo Miryamu, nnabbi omukazi era mwannyina wa Alooni, n'akwata ekitaasa; n'abakazi abalala ne bamugoberera nga balina ebitaasa era nga bwe bazina.

²¹Miryamu n'abayimbira bw'ati nti, "Muyimbire MUKAMA, kubanga awangudde n'ekitiibwa kingi. Asudde mu nnyanja embalaasi n'agyebagadde."

Amazzi g'e Mala n'aga Erimu

²²Awo Musa n'akulembera Isirayiri, n'abaggya ku Nnyanja Emyufu, ne bayingirira eddungu ly'e Ssuuli. Ne batambulira ennaku ssatu mu ddungu nga tebalabye ku mazzi.

²³Bwe baatuuka e Mala, ne batasobola kunywa ku mazzi gaawo, kubanga gaali gakaawa: era eyo y'ensonga eyatumisa ekifo ekyo Mala.

²⁴Abantu ne beemulugunyiza Musa, ne bamubuuza nti, "Tunywe ki?"

²⁵Musa ne yeegayirira MUKAMA; MUKAMA n'amulaga ekitundu ky'omuti. Bwe yakisuula mu mazzi, amazzi ne gaba malungi okunywa. Mu kifo kino MUKAMA we yabaweera ekiragiro kino n'etteeka, era n'abagezesza

²⁶ng'agamba nti, "Singa muwuliriza eddoboozi lya MUKAMA Katonda wammwe n'obwegendereza, ne mukola ebyo by'alaba nga bituufu, ne mussaayo omwoyo ku biragiro bye, era ne mugondera amateeka ge, sigenda kubaleetako ndwadde n'emu, ng'ezo ze naleetera Abamisiri, kubanga nze MUKAMA, nze mbawonya endwadde zammwe."

²⁷Awo ne batuuka mu Erimu, awaali ensulo ekkumi n'ebbiri, n'enkindu ensanvu; ne bakuba awo eweema zaabwe okumpi n'amazzi.

Okuva 16

Maanu n'Obukwale

¹Awo abaana ba Isirayiri, nga kibiina kinene, ne basitula okuva mu Erimu; ne batuuka mu ddungu lya Sini, eriri wakati wa Erimu ne Sinaayi, nga baakamala emyezi ebiri n'ennaku kkumi na ttaano kasookedde bava mu nsi y'e Misiri.

²Nga bali mu ddungu eryo, ekibiina kyonna eky'abaana ba Isirayiri ne kyemulugunyiza Musa ne Alooni.

³Abaana ba Isirayiri ne babagamba nti, "Singa twasigala mu nsi y'e Misiri, MUKAMA n'atuttira eyo n'omukono gwe! Kubanga eyo twalyanga sefuliya z'ennyama, n'emmere nnyingi nga bwe twayagalanga, ne tukkuta; naye kaakano mutuleese mu ddungu lino, ekibiina kino kyonna kife enjala."

⁴Awo MUKAMA n'agamba Musa nti, "Nzija kubatonnyeseza emmere ng'eva mu ggulu. Abantu banaakuŋyaanyanga buli lunaku ekitundu eky'olunaku olwo; ndyoke mbagezesze ndabe obanga banaakwatanga amateeka gange, oba tebaagakwatenga.

⁵Ku lunaku olw'omukaaga bwe banaabanga bakuññaanya emmere ey'olunaku olwo, bakuññaanya eyenkanaankana n'ey'ennaku bbiri."

⁶Awo Musa ne Alooni ne bagamba abaana ba Isirayiri bona nti, "Obudde nga buwungeera, we munaategeerera nga MUKAMA ye yabaggya mu nsi y'e Misiri:

⁷ate enkya lwe munaalaba ekitiibwa kya MUKAMA, kubanga awulidde nga mumwemulugunyiza. Kubanga naffe ffe b'ani mmwe okutwemulugunyiza?"

⁸Musa n'ayongera okubagamba nti, "Mujja kwongera okutegeera MUKAMA, olweggulo nga buwungeera bw'anaabawa ennyama ne mulya, ate enkya n'abawa emmere ebamala: kubanga MUKAMA awulidde nga mumwemulugunyiza. Naffe ffe b'ani? Temwemulugunyiza ffe, wabula MUKAMA."

⁹Awo Musa n'agamba Alooni nti, "Tegeeza ekibiina kyonna eky'abaana ba Isirayiri nti, 'Musembere awali MUKAMA, kubanga awulidde okwemulungunya kwammwe!'"

¹⁰Awo olwatuuka, Alooni bwe yali ng'akyategeeza ekibiina kyonna eky'abaana ba Isirayiri, ne batunula mu ddungu; era, laba, ekitiibwa kya MUKAMA ne kirabikira mu kire.

¹¹MUKAMA n'ayogera ne Musa, ng'agamba nti,

¹²"Mpulidde okwemulugunyka kw'abaana ba Isirayiri. Bagambe nti, 'Obudde nga buwungeera munaalya ennyama, n'enkya munakkusibwa emmere. Bwe mutyo munaategeera nga nze MUKAMA Katonda wammwe.'"

¹³Obudde nga buwungeera enkwale ne zija ne zijjula olusiisira; ne mu makya ne wabaawo omusulo ku ttaka mu lusiisira.

¹⁴Omusulo nga gwamuse ng'obudde bukaze, laba, ku ttaka ne kulabikako obuntu obutono obwekulungirivu obufaanana ng'omusulo ogukutte olw'obunnyogovu obungi.

¹⁵Abaana ba Isirayiri bwe baabulaba ne beebuzaganya nti, "Kiki kino?" Kubanga baali tebakimanyi. Musa n'abategeeza nti, "Eno ye mmere MUKAMA gy'abawadde okulya.

¹⁶MUKAMA alagidde bw'ati nti, 'Buli muntu akuññaanye gy'anaamalawo. Buli muntu ali mu weema zammwe mumukuññaanyize kilo bbiri.'"

¹⁷Abaana ba Isirayiri ne bakola nga bwe baalagirwa; abamu ne bakuññaanya nnyingi, n'abalala ntono.

¹⁸Bwe baagipimiranga mu kabakuli aka oma, ze lita ebbiri, oyo eyali akuññaanyizza ennyingi teyasukkirizanga, n'oyo ow'entono nga teyeesera. Buli muntu yakuññaanya ng'okwetaaga kwe bwe kwabanga.

¹⁹ Musa n'abagamba nti, "Tewabaawo omuntu n'omu agifissaako okutuusa enkeera."

²⁰ Kyokka abamu Musa tebaamufaako; ne beeterekerako okutuusa enkeera; n'ezaala envunyu, era n'ewunya. Musa n'abasunguwalira.

²¹ Buli nkya ne bakuññaanyanga buli omu gye yayinzanga okulya nga anaagimalawo; naye akasana bwe kaayakanga nga kakazizza, n'esaanuuka.

Emmere y'oku Ssabiiti

²² Awo ku lunaku olw'omukaaga ne bakuññaanya emmere ya mirundi ebiri, ze kilo nnya buli muntu; abakulembeze bona mu kibiina ne bajja ne bategeeza Musa.

²³ N'abagamba nti, "MUKAMA yalagidde bw'ati nti, 'Enkya lunaaba lunaku lwa kuwummula, ye Ssabiiti ya MUKAMA Entukuvu. Leero mwokye emmere yammwe gye mwetaaga okwokya, era mufumbe gye mwagala okufumba; eneeba esigaddewo mugyeterekere okutuusa enkyा."

²⁴ Bwe batyo ne bagyeterekera okutuusa enkeera, nga Musa bwe yabalagira; n'etewunya wadde okuzaala envunyu.

²⁵ Musa n'abagamba nti, "Eyo mugirye leero, kubanga leero ye Ssabiiti ya MUKAMA, ku ttaka temujja kusangako mmere.

²⁶ Mu nnaku omukaaga mujjanga kugikuññaanya, naye ku lunaku olw'omusanvu, olwa Ssabiiti, emmere teebeerengawo."

²⁷ Naye era abamu ku bantu baafuluma ku lunaku olw'omusanvu bagikuññaanye, naye tebasangayo kantu.

²⁸ Awo MUKAMA n'agamba Musa nti, "Mulituusa ddi nga mukyajeemera ebiragiro byange?

²⁹ Mutegeere nga MUKAMA abawadde Ssabiiti; ku lunaku olw'omukaaga kyava abawa emmere ya nnaku bbiri. Buli muntu abeerenga mu maka ge nga tafulumye n'akatono ku lunaku olw'omusanvu."

³⁰ Abantu bwe batyo ne bawummula ku lunaku olw'omusanvu.

³¹ Ab'omu nnyumba ya Isirayiri, emmere eyo ne bagiyitanga maanu. Yali efaanana ng'akasigo ka koliyanda, nga njeru; ng'ewoomerera ng'obusukuuti obufumbiddwa n'omubisi gw'enjuki.

³² Musa n'agamba nti, "MUKAMA alagidde bw'ati nti, 'Muddire akabakuli aka kilo bbiri mukajjuze maanu mugiterekere ab'emirembe egigenda okujja; balyoke balabe ku mmere gye nabaliisanga mu ddungu, bwe nabaggya mu nsi y'e Misiri.'"

³³ Musa n'agamba Aloonni nti, "Ddira akabakuli osseemu maanu ejjuza oma, ze lita bbiri, obungi, ogisse awali MUKAMA, eterekerwe ab'emirembe egigenda okujja."

³⁴ Bw'atyo Aloonni n'ateeka maanu awali Endagaano, ekuumirwe awo, nga MUKAMA bwe yalagira Musa.

³⁵ Abaana ba Isirayiri ne balya maanu okumala emyaka amakumi ana, okutuusa lwe baatuuka mu nsi omuli abantu. Baalya maanu okutuusa lwe baatuuka ku nsalo ya Kanani.

³⁶ Oma emu yenkana kimu kya kkumi ekya efa.

Okuva 17

Amazzi Agaava mu Lwazi

¹ Awo ekibiina kyonna eky'abaana ba Isirayiri ne kisitula okuva mu ddungu lya Sini, ne batambula ng'ekiragiro kya MUKAMA bwe kyali. Ne bakuba eweema zaabwe mu Lefidimu, naye nga tewaliwo mazzi bantu ge banaanywa.

² Abantu ne bayombesa Musa nga bagamba nti, "Tuwe amazzi tunywe." Musa n'abaddamu nti, "Lwaki munnyombesa? Lwaki mugezesha MUKAMA?"

³ Naye abantu ennyonta y'amazzi n'ebaluma, ne beemulugunyiza Musa. Ne bagamba nti, "Lwaki watuggya mu Misiri, ennyonta okututtira wano, ffe n'abaana baffe n'ebisibo byaffe?"

⁴ Musa n'akaabira MUKAMA nti, "Abantu bano mbakole ntya? Baabano baagala kunkuba mayinja."

⁵ MUKAMA n'addamu Musa nti, "Abantu abo bakulembere, otwale ne ku bakulembeze ba Isirayiri; n'omuggo gwo gwe wakubisa ku mugga genda nagwo ng'ogukutte mu mukono gwo, mutambule.

⁶ Nange nzija kukwesooka mu maaso nyimirire ku lwazi e Kolebu, onookuba olwazi ne muvaamu amazzi abantu banywe." Musa n'akola bw'atyo nga n'abakulembeze ba Isirayiri balaba.

⁷ Ekifo ekyo n'akitooma erinnya Masa ne Meriba, olw'okuyomba kw'abaana ba Isirayiri, n'olw'okugezesha MUKAMA nga bagamba nti, "MUKAMA waali mu ffe oba taliiwo?"

Olutalo Abayisirayiri Iwe Baasooka Okulwana

⁸ Awo Abamaleki ne bajja balwane ne Isirayiri mu Lefidimu.

⁹ Musa n'agamba Yoswa nti, "Tuyunguliremu abasajja bagende balwanyise Abamaleki. Enkyia nzija kuyimirira ku ntikko y'olusozi nga nkutte omuggo gwa Katonda mu mukono gwange."

¹⁰Yoswa n'akola nga Musa bwe yamulagira, n'alwana n'Abamaleki. Musa ne Aloonie Kuli ne bambuka ku ntikko y'olusozi.

¹¹Musa bwe yawanikanga emikono gye, Abayisirayiri nga bagoba, naye bwe yagissanga, nga Abamaleki bagoba.

¹²Emikono gya Musa ne gitandika okumufuuyirira. Aloonie Kuli ne bamuleetera ejjinja, n'atuula okwo; ne bawanirira emikono gye, omu ng'ali ku ludda olumu, ne munne ku ludda olulala, emikono gye olwo ne ginywerera waggulu okutuusa enjuba lwe yagwa.

¹³Yoswa n'awangula Abamaleki ng'akozesa obwogi bw'ekitala.

¹⁴Awo MUKAMA n'agamba Musa nti, "Kino kiwandiike mu kitabo kiryoche kijukirwenga ennaku zonna, era Yoswa asaana akimanye, kubanga Abamaleki njenda kubasangulirawo ddala ku nsi."

¹⁵Musa n'azimbawo ekyoto n'akituumma erinnya MUKAMA ye Bendera Yange.

¹⁶N'agamba nti, "Kubanga MUKAMA alayidde okulwanyisa Abamaleki emirembe gyonna."

Okuva 18

Yesero Akyalira Musa

¹Yesero, kabona w'e Midiyaani, era kitaawe wa mukyala wa Musa, n'awulira byonna Katonda bye yakolera Musa n'abantu be, Abayisirayiri; era nga MUKAMA yaggya Isirayiri mu Misiri.

²Ye yalabiriranga Zipola, mukyala wa Musa; kubanga Musa yali amuzzizza ewaabwe ng'amumulekedde,

³ne batabani be babiri. Mutabani we omu yamutuumma Gerusomu, kubanga Musa yagamba nti, "Mbadde mugwira mu nsi etali yange;"

⁴n'erinnya ly'omulala lyali Eryeza, kubanga yagamba nti, "Katonda wa kitange ye yali omubeezi wange, era n'amponya ekitala kya Falaawo."

⁵Yesero, mukoddomi wa Musa, n'ajja ne batabani ba Musa ne mukyala we eri Musa mu ddungu, we yali asiisidde okuliraana olusozi lwa Katonda.

⁶Yesero yali amutumidde nti, "Nze Yesero mukoddomi wo, nzija okukulabako. Ndi ne mukyala wo ne batabani be bombi."

⁷Awo Musa n'afuluma n'agenda okwaniriza mukoddomi we; n'akutamako ng'amulamus, n'amugwa mu kifuba. Ne balamusaganya, n'oluvannyuma ne bayingira mu weema.

⁸Musa n'anyumiza mukoddomi we ebyo byonna MUKAMA bye yakola Falaawo n'Abamisiri ng'abalanga Isirayiri; n'ebizibu ebyabatuukako mu lugendo lwabe, ne MUKAMA nga bwe yabibawonya.

⁹Yesero n'asanyuka nnyo okuwulira ebirungi ebyo byonna MUKAMA bye yakolera Isirayiri, ng'abanunula ku Bamisiri.

¹⁰Yesero n'agamba nti, "MUKAMA atenderezebwe eyabanunula mu mikono gy'Abamisiri ne mu mukono gwa Falaawo, n'aggya abantu be mu mikono gy'Abamisiri.

¹¹Kaakano ntegedde nga MUKAMA mukulu wa kituibwa okukira bakatonda bona, kubanga yanunula abantu be mu mikono gyabo abaali babeeragirako."

¹²Awo Yesero, mukoddomi wa Musa, n'awaayo eri Katonda ekiweebwayo ekyokye ne ssaddaaka endala; Aloonni n'abakulembeze ba Isirayiri bona ne balya ne mukoddomi wa Musa emmere mu maaso ga Katonda.

Okulonda Abalamuzi

¹³Awo bwe bwakya enkya, Musa n'atuula ku ntebe ye okulamula abantu. Abantu ne bamwetooloola okuva enkya okutuusa akawungeezi.

¹⁴Mukoddomi we bwe yalaba Musa bye yali akolera abantu, n'amugamba nti, "Kiki kino ky'okola? Lwaki olamula bw'omu, abantu bano bona ne bayimirira okukwetooloola okuva ku nkya okutuusa akawungeezi?"

¹⁵Musa n'addamu mukoddomi we nti, "Kubanga abantu bajja gye ndi bategeere Katonda by'ayagala.

¹⁶Buli lwe babeera n'obutakkiriziganya, bajja gye ndi, ne mbasalirawo, era ne mbategeeza amateeka ga Katonda n'ebiragiro bye."

¹⁷Mukoddomi wa Musa n'amugamba nti, "Ky'okola si kirungi.

¹⁸Ggwe, n'abantu bano bona abajja gy'oli, mujja kukoowa nnyo. Kubanga omulimu guno munene nnyo; tosobola kugukola bw'omu.

¹⁹Nkusaba ompulirize nkusalire ku magezi, ne Katonda ng'ali naawe. Osaana obeere omubaka w'abantu ewa Katonda, era omutuuusengako ensonga zaabwe.

²⁰Bayigirize amateeka n'ebiragiro, era obalage nga bwe basaana okweyisanga, awamu n'emirimu gye basaanidde okukola.

²¹Londayo abasajja abalina ebisaanyizo, ng'obaggya mu bantu bona, abasajja abatya Katonda, ab'amazima era abatalya nguzi; obawe obukulembeze, ng'abamu bavunaanyizibwa abantu enkumi, n'abalala abantu ebikumi, n'abamu ebibiina eby'ataano n'abalala eby'ekkumi kkumi.

²²Bawe obuyinza okulamulanga abantu ebbanga lyonna, naye ng'emisango emizibu bagikuleetera, emisango emyangu bo bagisalenga. Ekyo

kinaawewulanga ku buzito bw'omugugu gwo, kubanga banaabanga bagukukwatirako.

²³Singa okola bw'otyo, nga ne Katonda bw'akulagidde, ojja kusobola okugumira emirimu egyo, era n'abantu bano bona balyoke baddeyo ewaabwe nga basanyuse."

²⁴Musa bw'atyo n'awuliriza amagezi gonna mukoddomi we ge yamuwa, n'akolera ku ebyo byonna bye yamubuulirira.

²⁵Musa n'alonda mu Isirayiri yonna abasajja abasobola, n'abafuula abakulembeze b'abantu; nga bavunaanyizibwa enkumi, n'abalala ebikumi, n'abamu amakumi ataano ataano, n'abalala kkumi kkumi.

²⁶Ne balamula abantu ebbanga lyonna. Emisango emizibu nga bagireetera Musa, naye emyangu nga bagisala.

²⁷Awo Musa n'asiibula mukoddomi we, mukoddomi we n'akwata ekkubo ne yeddirayo mu nsi y'ewaabwe.

Okuva 19

Eddungu lya Sinaayi

¹Mu mwezi ogwokusatu abaana ba Isirayiri nga bavudde mu Misiri, ne batuuka mu Ddungu lya Sinaayi.

²Kubanga baali basitudde okuva mu Lefidimu ne bayingira Eddungu lya Sinaayi. Abayisirayiri ne basimba eweema zaabwe mu ddungu omwo mu maaso g'olusozi Sinaayi.

³Awo Musa n'ayambuka eri Katonda; MUKAMA n'amuyita ng'asinziira ku lusozi ng'agamba nti, "Bino by'onoogamba ennyumba ya Yakobo, by'onootegeeza abaana ba Isirayiri nti, bw'ati bw'ayogera MUKAMA nti,

⁴'Mwalaba bye nakola Abamisiri, mmwe ne mbasitulira ku biwaawaatiro by'empungu n'embeereetera gye ndi.

⁵Kale, singa mugondera eddoboozi lyange awatali kwerekera mu, ne mukuuma endagaano yange, mulibeera eggwanga lyange ery'enjawulo egganzi mu mawanga gonna, kubanga ensi yonna yange.

⁶Munaabeeranga obwakabaka bwange obwa bakabona, era eggwanga ettukuvu.' Ebyo bye bigambo by'ojja okutegeeza abaana ba Isirayiri."

⁷Awo Musa n'akomawo, n'ayita abakulembeze b'abantu n'abategeeza ebigambo ebyo byonna MUKAMA bye yamulagira.

⁸Abantu bona ne baddiramu wamu nti, "Ebyo byonna MUKAMA by'agambye, tujja kubikola." Musa n'ategeeza MUKAMA ng'abantu bwe baayogera.

⁹MUKAMA n'agamba Musa nti, "Nzija kujja gy'oli mu kire ekikutte, abantu bawulire nga njogera naawe, bakukkirizenga era bakwesigenga ennaku zonna." Musa n'ategeeza MUKAMA abantu bye baayogera.

Okutukuza Abantu

¹⁰ MUKAMA n'agamba Musa nti, "Genda eri abantu, obatukuze leero n'enkyा. Bagambe booze engoye zaabwe,

¹¹ku lunaku olwokusatu babeere beetegefu, kubanga ku lunaku olwo MUKAMA alikka ku lusozi Sinaayi ng'Abayisirayiri bona balaba.

¹²Abayisirayiri bakugire n'olukomera okwetooloola olusozi, obagambe nti, 'Mwekuume muleme okwambuka ku lusozi oba okulukwatako we lutandikira. Anaalukwatako ajja kuttibwa.

¹³Tajja kukwatibwako, wabula ajja kukubirwa ddala amayinja oba kufumitibwa. Omuntu tajja kulama, n'ebisolo tewaabewo kirama.' Akagombe bwe kanaamala okuvugira akabanga, olwo abantu ne balyoka bajja awali olusozi."

¹⁴Awo Musa n'ava ku lusozi n'aserengeta eri abantu, n'abatukuza ne bayoza engoye zaabwe.

¹⁵N'abagamba nti, "Mwetegekere olunaku olwokusatu, ne bakyala bammwe temubasemberera."

Musa Asisinkana Katonda ku Lusozi Sinaayi

¹⁶Awo ku lunaku olwokusatu ku nkya ne waba okubwatuka n'okumyansa, n'ekire ekikutte ku lusozi, n'eddoboozi ly'akagombe ery'omwanguka ennyo; abantu bona abaali mu lusiisira n'okukankana ne bakankana.

¹⁷Musa n'aggya abantu mu lusiisira n'abaleeta basisinkane Katonda; ne bayimirira wansi w'olusozi.

¹⁸Olusozi Sinaayi ne lubikkibwa omukka; kubanga MUKAMA yalukkako mu muliro. Omukka ne gunyooka nga gwambuka ng'oguva mu kyoto, n'olusozi lwonna ne lukankana nnyo.

¹⁹Eddoboozi ly'akagombe bwe lyeyongera okuvuga n'omwanguka ogw'amaanyi, Musa n'ayogera, ne Katonda n'amwanukula n'eddoboozi ery'okubwatuka.

²⁰Awo MUKAMA n'akka ku ntikko y'Olusozi Sinaayi. MUKAMA n'ayita Musa agende ku ntikko y'olusozi; Musa n'alinnya.

²¹MUKAMA n'agamba Musa nti, "Serengeta eri abantu obalabule baleme kuwaguza okujja okutunula ku MUKAMA, abantu bangi baleme kuzikirira.

²²Ne bakabona, abasemberera MUKAMA, nabo basaana beetukuze, kubanga MUKAMA ayinza okubasaanyaawo."

²³ Musa n'addamu MUKAMA nti, "Abantu tebasobola kwambuka ku Lusozi Sinaayi, kubanga ggwe wennyini watulagira nti, 'Muteekeewo akakomera okwetooloola olusozi, lusigale lwokka nga lutukuvu.' "

²⁴ MUKAMA n'alagira Musa nti, "Serengeta oleete Alooni; naye bakabona n'abantu tobaganya kuwaguza kujja kwambuka eri MUKAMA, kubanga ayinza okubasaanyaawo."

²⁵ Bw'atyo Musa n'aserengeta mu bantu n'abategeeza.

Okuva 20

Amateeka Ekkumi

¹ Awo MUKAMA n'ayogera ebigambo bino, n'agamba nti:

² "Nze MUKAMA Katonda wo, eyakuggya mu Misiri, mu nsi gye mwafuulibwa abaddu.

³ Tobeeranga na bakatonda balala wabula Nze nzekka.

⁴ Teweekoleranga kintu kyonna ekyole ekifaanana n'ekintu kyonna ekiri waggulu mu ggulu, oba wansi ku nsi, oba ekiri mu mazzi agali wansi w'ensi.

⁵ Tobivuunamiranga so tobisinzanga. Kubanga, nze MUKAMA Katonda wo ndi Katonda wa buggy;a; mbonereza abaana olw'ebibi bya bakitaabwe n'ebya bajajjaabwe okutuusa ku mulembe ogwokusatu n'ogwokuna ogw'abo abankyaw.a.

⁶ Naye abo enkumi n'enkumi abanjagala era abakwata amateeka gange, mbalaga okwagala kwange okutaggwaawo.

⁷ Tokozesanga linnya lya MUKAMA Katonda wo ng'olayira ebitaliimu nsa; kubanga MUKAMA talirema kumusalira musango ne gumusinga omuntu oyo alayirira obwerefere erinnya lye.

⁸ Olunaku lwa Ssabbiiti lujukirenga era olutukuzenga.

⁹ Kolanga emirimu gyo, ofaabiiine mu nnaku omukaaga,

¹⁰ naye olunaku olw'omusanvu ye Ssabbiiti ya MUKAMA Katonda wo. Ku lunaku olwo tokolerangako mulimu gwonna; ggwe, wadde mutabani wo, wadde muwala wo, wadde omuweereza wo omusajja, oba omuweereza wo omukazi, wadde ensolo zo, wadde omugenyi ali omumwo.

¹¹ Kubanga mu nnaku omukaaga MUKAMA Katonda mwe yakolera eggulu n'ensi, n'enyanja, ne byonna ebibirimu, n'awummulira ku lunaku olw'omusanvu. MUKAMA kyeyava awa omukisa olunaku olwa Ssabbiiti n'alutukuza.

¹² Kitaa wo ne nnyoko obassangamu ekitiibwa, olyoke owangaale mu nsi MUKAMA Katonda wo gy'akuwa.

¹³ Tottanga.

¹⁴ Toyendanga.

¹⁵ Tobbanga.

¹⁶ Towaayirizanga muntu munno.

¹⁷ Teweegombanga nnyumba ya muliraanwa wo. Teweegombanga mukazi wa muliraanwa wo, newaakubadde omuweereza we omusajja, newaakubadde omuweereza we omukazi, wadde ente ye, oba endogoyi ye, oba ekintu kyonna ekya muntu munno.”

¹⁸ Awo abantu bwe baalaba okumyansa kw'eraddu, ne bawulira n'okubwatuka kw'eggulu awamu n'eddoboozi ly'akagombe, ne balaba n'olusozi nga lunyooka ne bakankana nga batidde nnyo. Ne bayimirira walako,

¹⁹ ne bagamba Musa nti, “Ggwe yogera naffe, tujja kubiwliriza. Naye Katonda aleme kwogera naffe tuleme okufa.”

²⁰ Musa n'agamba abantu nti, “Temutya, kubanga Katonda azze kubagezesza, mumutyenga bulijjo, mulyoke muleme okwonoona.”

Ebiragiro ku Byoto

²¹ Abantu ne basigala nga bayimiridde walako, naye Musa n'asembera mu kizikiza ekikwafu Katonda mwe yali.

²² MUKAMA n'agamba Musa nti, “Bw'oti bw'oba otegeeza abaana ba Isirayiri nti, ‘Mmwe bennyini mwerabiddeko nga njogera nammwe nga nsinziira mu ggulu.

²³ Temwekoleranga bakatonda balala wendi; temwekoleranga bakatonda ba ffeeza oba bakatonda ba zaabu.

²⁴ “Munkolere ekyoto eky'ettaka, muweereyo okwo ssaddaaka zammwe ezookebwa, n'essaddaaka olw'emirembe, ey'endiga zo n'ente zo. Mu buli kifo mwe nnaaleeteranga erinnya lyange okuweebwa ekitiibwa, nnajjanga ne mbaweera omwo omukisa.

²⁵ Bwe munzimbiranga ekyoto eky'amayinja, temukizimbisanga mayinja mayooyoote, kubanga ekyuma bwe kirigakoonako kirigafuula agatasaanira kyoto kyange.

²⁶ Ekyoto kyange temukizimbangako madaala, muleme okukiweebuula nga mulinnya amadaala.”

Okuva 21

Amateeka ku Baddu

¹ Amateeka gano gabategeeze nti:

² “Bw’ogulanga omuddu Omwebbulaniya, akuweererezanga emyaka mukaaga. Mu mwaka ogw’omusantu omuddizanga eddembe lye n’agenda, era talisasuliranga.

³ Bw’aba nga yajja yekka, era agendanga yekka; naye bw’aba nga yajja ne mukazi we, era agendanga naye.

⁴ MUKAMA we bw’abanga amuwadde omukazi, n’amuzaalira abaana aboobulenzi n’aboobuwala; omukazi n’abaana babanga ba mukama wa muddu oyo; omusajja yekka ye yaddizibwanga eddembe lye.

⁵ Naye omuddu bw’agambanga nti, ‘Nze mukama wange mmwagala, ne mukazi wange n’abaana bange bona mbagala, era seetaaga ddembe,’

⁶ mukama we amutwalanga eri abalamuzi, amuleetanga ku luggi oba ku mwango gw’oluggi, n’amuwummula okutu n’olukato. Olwo anaamuweerezanga okutuusa okufa.

⁷ “Omusalija bw’anaatundanga omwana we owoobuwala ng’omuddu, omuwala oyo taddizibwenga ddembe ng’omuddu omusalija.

⁸ Bw’ataasanyusenga mukama we eyamugula, anaayinzanga okununulibwa. Kyokka mukama we taabenga na buyinza kumutunda mu bannamawanga, kubanga mukama we yanaabanga amukuusizakuusiza okumala okumuwasa ate n’amwegobako.

⁹ Singa amugabira mutabani we, olwo anaabanga ng’omu ku bawala be.

¹⁰ Singa amuwasizaako omukazi omulala, mukama we taamuggyengako mmere ye oba engoye ze, wadde ebimukwatako byonna eby’obufumbo.

¹¹ Ebintu ebyo ebisatu singa abimumma, omuwala omuddu anaayinzanga okuleka mukama we n’amuvaako awatali kusasulirwa.

Amateeka ku Butemu

¹² “Anaakubanga omuntu n’amutta, naye atekwa buteekwa okuttibwa.

¹³ Kyokka singa akikola nga tagenderedde, naye Katonda n’akikkiriza okubaawo, anaddukanga ne yiekweka mu kifo kye ndibateekerateekera.

¹⁴ Naye singa omuntu anaasalanga olukwe n’alumba munne n’amutta mu bugenderevu, bw’anaabanga ku kyoto kyange, mumusikangako ne mumutwala ne mumutta.

¹⁵ “Akubanga kitaawe oba nnyina, atekwa buteekwa okuttibwa.

¹⁶ “Oyo awambanga omuntu n’amutunda oba n’akwatibwa naye nga tannamutunda attibwanga buttibwa.

17 “Anaakolimiranga kitaawe oba nnyina atekwa kuttibwa.

Amateeka ku Kuyomba n'Okulwana

18 “Abantu singa bayomba ne balwana, omu n'akuba munne ejinja oba ekikonde, n'atafa wabula n'abeera ku kitanda;

19 singa ava ku kitanda, n'atandika n'okutambulako ebweru n'omuggo gwe, oli eyamukuba taavunaanibwenga; wabula anaasasuliranga ebiseera by'oyo gwe yakuba, era n'amujjanjaba okutuusa ng'awonedde ddala.

20 “Omuntu bw'anaakubanga omuddu we omusajja oba omuddu we omukazi n'omuggo, omuddu oyo emiggo ne gimutta, omusajja oyo anaabonerezebwanga;

21 naye omuddu oyo bw'anaalamanga okumala olunaku oba ennaku ebbiri, mukama we taabonerezebwenga, kubanga ye nannyini ye.

22 “Singa abantu babadde balwana, ne bakubiramu omukazi ali olubuto, olubuto ne luvaamu, kyokka n'atabaako mutawaana mulala gwonna, oyo amukubye anaatanzibwanga omutango bba w'omukazi gw'anaasalanga, era nga n'abalamuzi bagukkirizza.

23 Naye singa omukazi oyo abaako omutawaana ogw'amaanyi, ekibonerezo kineenkanaakananga n'ekyo ky'amukoze. Bw'anattanga anattibwanga,

24 bw'anaaggyangamu eriiso lya munne, n'eriryе banaaligyangamu, oba omuntu bw'anaaggyangamu erinnyo lya munne, n'eriryе banaalikuulangamu, bw'anaamutemangako omukono, n'ogugwe banaagutemangako, bw'anaamutemangako ekigere, n'ekikye banaakitemangako,

25 bw'anaamwokyanga, naye anaayokebwanga, bw'anaamussangako ekiwundu, naye anaassibwangako ekiwundu, bw'anaamunuubulanga, naye anaanuubulwanga.

26 “Omuntu bw'akubanga omuddu we omusajja oba omuddu we omukazi, n'amuggyamu eriiso, anaamuddizanga eddembe lye n'amuleka n'agenda, nga kwe kumuliyira olw'eriiso eryo.

27 Singa akuba omuddu we omusajja oba omuddu we omukazi, n'amukuulamu erinnyo, anaamuddizanga eddembe lye, nga kwe kumuliyira olw'erinnyo eryo.

Amateeka ku Nsolo Ezirundibwa

28 “Singa ente ya seddume etomera omusajja oba omukazi n'emutta, seddume eyo eteekwa okukubwanga amayinja n'efa, n'ennyama yaayo teriibwanga. Kyokka nannyini yo taabengako musango.

29 Naye seddume eyo singa emanyiddwa nga bulijjo ntomezi, era nga ne nannyini yo yalabulwako dda, kyokka n'atagisibira mu lugo lwayo, n'etta omusajja oba omukazi, eneekubwanga amayinja n'efa, ne nannyini yo anattibwanga.

³⁰Naye singa asalirwa engassi, aneenunulanga n'awona okufa ng'asasuddeyo kyonna ekinaabanga kimusaliddwa.

³¹Seddume bw'eneetomeranga mutabani w'omuntu oba muwala we, etteeka lye limu eryo lye linaakozesebwanga.

³²Seddume bw'etomeranga omuddu omusajja oba omuddu omukazi, nannyini yo atekwa okusasula mukama w'omuddu oyo, ebitundu bya ffeeza amakumi asatu, ne seddume ekubwenga amayinja efe.

³³"Omuntu bw'anaabikkulanga ekinya n'akireka nga kyasamye, oba bw'anaasimanga ekinya n'atakisaanikirako, seddume n'ekigwamu oba endogoyi,

³⁴nannyini kinnya anaasasuliranga okufirwa okwo; anaasasulanga nannyini nsolo efudde, era n'okugitwala anaagitwalanga.

³⁵"Seddume y'omuntu bw'eneerumyanga seddume y'omulala, n'emala egitta; banaatundanga seddume ennamu, ensimbi ne bazigabana; ne seddume enfu nayo banaagigabananga.

³⁶Oba singa seddume eyo ng'emanyiddwa nga ntomezitomezi, naye nannyini yo nga tagiggalira mu lugo lwayo, atekwa asasule seddume olwa seddume, yo enfu eneebanga yiye.

Okuva 22

Amateeka ku Bintu by'Abantu

¹"Omuntu bw'anabbanga ente ya munne, oba endiga, n'agitta oba n'agitunda; anazzangawo ente ttaano olw'emu gy'abbye, n'endiga nnya olw'endiga emu.

²"Omubbi bw'anaakwatibwanga ng'amanya ennyumba, n'akubibwa emiggo n'afa; amukubye taabengako musango olw'okuyiwa omusaayi gw'omubbi oyo;

³naye singa ebyo bigwawo ng'enjuba emaze okuvaayo, anaabangako omusango olw'okuyiwa omusaayi ogwo. Omubbi anaateekwanga okuliwa; naye bw'abanga talina kantu, anaatundibwanga alyoke asasulire bye yabba.

⁴"Omubbi singa akwatibwa lubona nga n'ensolo gy'abbye agirina nnamu, oba nte, oba ndogoyi oba ndiga, anazzangawo bbiri bbiri.

⁵"Omuntu bw'anaabanga alunda ebisolo bye mu ddundiro lye oba mu nnimiro ye ey'emizabbibu, ensolo ze n'azireka ne zigenda ziriira mu nnimiro y'omuntu omulala; anaasasulanga ku bibala ebisinga obulungi n'ezabbibu ebiva omumwe.

⁶"Omuliro bwe gunaalandanga ne guyita mu bisaka ne gukwata ennimiro y'omuntu, ne gwokya ebinywa by'enjaano, oba ejjaano ekyakula, oba ne guzikiriza ennimiro ye yonna; eyakumye omuliro ogwo anaasasuliranga byonna ebyonoonese.

⁷ “Omuntu bw’anaateresanga munne ensimbi oba ebintu bye ebirala, ne bamala babibbira mu nnyumba ye; omubbi bw’anaakwatibwanga anaaliwanga emirundi ebiri.

⁸ Naye omubbi bw’ataakwatibwenga, nannyini nnyumba ateekwa agende eri abalamuzi, basalewo obanga ebintu bya munne ye yabitutte.

⁹ Mu buli misango gyonna eg'y'okubeera n'ebintu mu ngeri emenya amateeka, ng'okubeera n'ente, oba endogoyi, oba endiga, oba ekyambalo, oba ekintu ekirala kyonna ekinaabanga kibuze, omuntu n'amala akyogerako nti, ‘Kino kyange,’ omuntu akirina n'oyo akiyita ekikye banaatwalanga ensonga zaabwe eri abalamuzi. Oyo abalamuzi gwe banaasaliranga nti gumusinze, anaddizangawo munne emirundi ebiri.

¹⁰ “Omuntu bw’anaateresanga munne endogoyi, oba ente, oba endiga, oba ensolo endala yonna; n'emala efa, oba n'erumizibwa, oba n'etwalibwa nga tekitegeerekese agitutte,

¹¹ ensonga zaabwe zinaagonjoolwanga nga eyatereka alayidde mu maaso ga MUKAMA nti ensolo eyo si ye yagibba. Nannyini nsolo ateekwanga okukkiriza ekirayiro ekyo, era taasasulwenga kintu kyonna.

¹² Naye bw’eneemubbibwangako, anaagiriwanga.

¹³ Bw’eneebanga erumbiddwa ensolo enkambwe n'etaagulwataagulwa, anaaleetanga ebitundutundu byayo ebisigaddewo ng'obujulizi; taaliwenga nsolo etaaguddwataaguddwa.

¹⁴ “Omuntu bw’aneeyazikanga ensolo ku muliraanwa we, n'erumizibwa, oba n'emuفاako nga nnyini yo taliiwo, anaateekwanga okugisasulira.

¹⁵ Naye nannyini yo bw’anaabangawo, taaliyirwenga. Ensolo ng'ebadde epangisibbwa bupangisibwa, omuwendo ogugipangisizza gunaamalanga mu kugisasulira.

Amateeka ku Mbeera y'Abantu

¹⁶ “Omusajja bw’anaasendasendanga omuwala omuto akyali embeerera, ne yeebaka naye, atwalengayo ebintu ebyobuko, amuwase.

¹⁷ Naye singa kitaawe w'omuwala agaanira ddala okumumuwa, era asasulangayo omuwendo gw'ensimbi ogwenkanankana n'eby'obuko ebiweebwayo ku mbeerera.

¹⁸ “Omukazi omulogo omuttanga bussi.

¹⁹ “Omuntu akola eby'ensonyi n'ensolo ateekwanga kuttibwa.

²⁰ “Omuntu atwalanga ssaddaaka eri katonda omulala, atali nze MUKAMA, azikirizibwenga.

²¹ “Bannamawanga temubayisanga bubi, so temubanyigirizanga, kubanga nammwe mwali bannaggwanga mu nsi y'e Misiri.

²² “Nnamwandu ne mulekwa temubajooganga.

²³ Bwe munaabajooganga ne bankaabira, nnaabawulirizanga.

²⁴ Obusungu bwange ne bubuubuuka, mmwe ne mbatta n'ekitala. Bakyala bammwe ne bafuuka bannamwandu n'abaana bammwe bamulekwa.

²⁵ “Bw'owolanga ensimbi omu ku bantu bange abali mu mmwe, ng'ali mu kwetaaga, teweeyisanga ng'abawozi b'ensimbi abalala; tomusasuzanga magoba.

²⁶ Bw'otwalanga ekyambalo ky'omuntu ng'akakalu, kimuddize ng'enjuba egenda okugwa;

²⁷ kubanga ekyambalo kye ekkyo kye ky'okwebikka kye kyokka ky'alina. Kale bw'otokimuddiza olwo asule mu ki? Bw'anankaabiriranga nzijanga kumuwliriza, kubanga ndi wa kisa.

²⁸ “Tovumanga Katonda, wadde okwogera obubi ku bafuzi bammwe.

²⁹ “Tolwangawo kuwaayo ku bibala ebibereberye nga byengedde. “Mutabani wo omubereberye onoomumpanga.

³⁰ Ente zo n'endiga zo nazo onookolanga bw'otyo. Onoozirekeranga bannyina baazo okumala ennaku musanvu; onoozimpanga ku lunaku olw'omunaana.

³¹ “Mujjanga kuba bantu bange batukuvu. Noolwekyo temuulyenga nnyama ya nsolo etaaguddwataaguddwa ebisolo eby'omu nsiko. Munaagirekeranga mbwa.

Okuva 23

Amateeka ku Kusaasira ne ku Bwenkanya

¹ “Tosaasaanyanga njambo. Teweegattanga na muntu mubi, ng'owa obujulirwa obw'obulimba bulyoke bumuyambe.

² “Tokolagananga na kibiina ky'omanyi nga bye kiriko bikyamu. Bw'obanga owa obujulirwa mu musango, tokkirizanga kusikibwa kibiina ne kikuweesa obujulizi obw'obulimba nga weekubira ku ludda lwe kiriko;

³ era towanga bujulirwa bukyamu oyambe omuntu yenna olwokubanga mwavu.

⁴ “Bw'osanganga ente y'omulabe wo, oba endogoyi ye, ng'ebuzze ogimuddizangayo eka.

⁵ Bw'olabanga endogoyi y'omuntu atakwagala, ng'omugugu gugisudde wansi, togirekanga, naye omuyambangako okugiyimusa.

⁶ “Tolemanga kusalirawo muntu nsonga ze mu bwenkanya, olwokubanga mwavu.

⁷Teweeyingizanga mu nsonga za bulimba, era tottanga muntu atalina kibi oba atazzizza musango, kubanga aliko omusango sigenda kumwejeeereza.

⁸“Tolyanga nguzi, kubanga enguzi eziba omuntu amaaso n’ekyamya n’abatuukirivu.

⁹“Temuwalagganyanga munnaggwanga, kubanga mmwe bennyini mumanyi nga bwe kiri okuba bannaggwanga, kubanga mwali bannaggwanga mu nsi y’e Misiri.

¹⁰“Mu myaka omukaaga osigirangamu emmere yo mu nnimiro zo era n’ogikungula;

¹¹naye mu mwaka ogw’omusanvu ettaka olirekanga ne liwummula, abaavu mu mmwe basobolenga okulya ku mmere okuva mu bimererezi; eneefikkangawo ebisolo by’omu nsiko binaagiryanga. Era bw’otyo bw’onookolanga n’ennimiro zo ez’emizabbibu n’ez’emizeeyituuni.

¹²“Mu nnaku omukaaga mw’okoleranga emirimu gyo, naye ku lunaku olw’omusanvu tokolanga, ente yo n’endogoyi yo ziryoke zisobole okuwummulako; ne mutabani w’omuweereza wo, ne munnaggwanga ali mu maka go bawummuleko baddemu endasi.

¹³“Weegenderezanga n’okolanga byonna bye nkulagidde. Bakatonda abalala toboogerangako, era amannya gaabwe tegayitanga mu kamwa ko.

Amateeka ku Mbaga Enkulu Essatu eza Buli Mwaka

¹⁴“Ononkoleranga embaga emirundi esatu buli mwaka.

¹⁵“Onookolanga Embaga ey’Emigaati Egitali Mizimbulukuse. Onoolyanga omugaati ogutaliimu kizimbulukusa okumala ennaku musanvu, nga bwe nakulagira. Kino okikolanga mu kiseera ekyategekebwa, mu mwezi gwa Abibu, kubanga mu mwezi ogwo mwe waviira mu nsi y’e Misiri. “Tewabangawo ajja gye ndi engalo ensa.

¹⁶“Onookolanga Embaga ey’Amakungula ey’ebibala ebibereberye eby’ebirime bye wasiga mu nnimiro yo. “Onookolanga Embaga ey’Amayingiza buli nkomerero ya mwaka, bw’onookunjaanyaanga ebibala by’omu nnimiro, n’obiyingiza.

¹⁷“Abasajja bona banajjanga awali MUKAMA Katonda emirundi egyo esatu buli mwaka.

¹⁸“Temuwangayo kintu kyonna gye ndi ekirimu ekizimbulukusa nga mundeetedde ssaddaaka erimu omusaayi; n’amasavu aga ssaddaaka yange tegasulangawo kutuusa nkeera.

¹⁹ “Ebibala ebisinga obulungi mu ebyo ebisoose okuva mu ttaka lyo obitwalanga mu nnyumba ya MUKAMA Katonda wo. Tofumbanga akaana k’embuzi mu mata ga nnyina waako.

Ekisuubizo ky’Okukuumibwa Katonda

²⁰ “Laba, ntuma malayika akukulembere, akutuuse bulungi mu kifo kye nteeseteese.

²¹ Omuwulirizanga, era ogonderanga by’agamba. Tomujeemeranga; bw’olijeema tagenda kukusonyiwa, kubanga aliba akola mu Linnya lyange.

²² Naye bw’onoowulirizanga eddoboozi lye, n’okola nga bwe ɳjamba, kale nnaakyawanga abakukyawa, n’abalabe bo banaabanga balabe bange.

²³ Malayika wange alikwesooka mu maaso akukulemberenga akutuuse mu nsi y’Abamoli, ne mu y’Abakiiti, ne mu y’Abaperezi, ne mu y’Abakanani, ne mu y’Abakiivi, ne mu y’Abayebusi, nange ndibazikiririza ddala.

²⁴ Tovuunamiranga bakatonda baabwe, so tobaweerezanga, era tokwatanga mpisa zaabwe, wabula obabetetaranga ddala, n’omenyaamenya n’empagi zaabwe.

²⁵ Oweerezanga MUKAMA Katonda wo yekka, emmere yo n’amazzi go ndyoke mbiwe omukisa. Ndiggyawo endwadde mu mmwe;

²⁶ tewaabengawo mugumba wadde avaamu olubuto. Ennaku z’obulamu bwo zonna nnaazituukirizanga.

²⁷ “Nnaasindikanga ekikangabwa mu mawanga agaagala okukwolekera, ne ntabulatabula abo bonna abanaakwegezangamu, era abalabe bo nnaabafuumuulanga emisinde.

²⁸ Ndisindika ennumba ne zikukulembera, ne zigoba Abakiivi, n’Abakanani, n’Abakiiti ne bakuviira mu kkubo lyo.

²⁹ Naye mu nsi omwo siribagobamu mu mwaka gumu, ebikande bireme kusukkirira, n’ensolo ez’omu nsiko ne zaala ne zibayitirira obungi.

³⁰ Nzijanga kubagobamu mpolo mpolo, okutuusa nga mwaze ne mulyoka mulya ensi eyo.

³¹ “Ndisala ensalo zammwe okuva ku Nnyanja Emyufu okutuuka ku Nnyanja y’Abafirisuuti, n’okuva ku ddungu okutuuka ku Mugga Fulaati. Abantu b’omu nsi omwo ndibabawa, ne mubagobamu.

³² Temukolanga nabo ndagaano, wadde ne bakatonda baabwe.

³³ Temubakkirizanga kubeera mu nsi yammwe, tebalwa kubanyoomesa biragiro byange; kubanga singa muweereza bakatonda baabwe muliba mugudde mu mutego.”

Okuva 24

Isirayiri Akkiriza Endagaano

- ¹ Awo MUKAMA n'alagira Musa nti, "Mwambuke eno gye ndi, ggwe ne Alooni, ne Nadabu, ne Abiku, n'abakulembeze ba Isirayiri nsanvu. Musinze nga mwesuddeko akabanga,
- ² Musa yekka y'anaansemberera; abalala tebasembera. Era abantu tebasaana kujja naye."
- ³ Musa n'ajja n'ategeeza abantu ebiambo byonna MUKAMA bye yamugamba awamu n'amateeka ge gonna. Abantu bona ne baddiramu wamu ne bagamba nti, "Ebigambo ebyo byonna MUKAMA by'agambye tunaabikola."
- ⁴ Bw'atyo Musa n'awandiika ebiambo byonna MUKAMA bye yayogera. Awo Musa n'akeera mu makya n'azimba ekyoto awo wansi w'olusozi; n'asimbako n'empagi kkumi na bbiri ng'ebika bya Isirayiri ekkumi n'ebibiri bwe byali.
- ⁵ N'atuma abasajja abavubuka Abayisirayiri, ne bawaayo ebiweebwayo ebyokebwa eri MUKAMA, ne ssaddaaka ey'emirembe ey'ente.
- ⁶ Musa n'addira ekitundu ky'omusaayi n'akissa mu mabeseni, n'ekitundu ekirala n'akimansira ku kyoto.
- ⁷ N'asitula Ekitabo ky'Endagaano, n'akisomera abantu nga bona bawulira. Ne bagamba nti, "Ebyo byonna MUKAMA by'agambye tujja kubikola; era tunaamugonderanga."
- ⁸ Awo Musa n'addira omusaayi n'agumansira ku bantu, n'agamba nti, "Guno gwe musaayi gw'endagaano MUKAMA Katonda gye yabalagira okukwata."
- ⁹ Awo Musa ne Alooni, ne Nadabu, ne Abiku, n'abakulembeze ba Isirayiri ensanvu, ne bambuka;
- ¹⁰ ne balaba Katonda wa Isirayiri. Wansi w'ebigere bye nga waliwo ng'omwaliiro ogw'amayinja ga safiro, agalabika obulungi ng'eggulu eritaliiko bire.
- ¹¹ Naye Katonda teyakola kabi konna ku bakulembeze ba Isirayiri abo; Katonda baamulaba, ne balya era ne banywa.
- ¹² MUKAMA n'agamba Musa nti, "Yambuka eno gye ndi ku lusozi, obeere wano olinde; nzija kukuwa ebipande eby'amayinja okuli amateeka g'empandiise ogayigirize abantu."
- ¹³ Awo Musa n'asituka n'omuweereza we Yoswa; Musa n'ayambuka ku lusozi lwa Katonda.

¹⁴N'agamba abakulembeze b'abantu nti, "Mugira mutulindako wano nga naffe bwe tukomawo. Mbalekedde Alooni ne Kuuli; buli anaaba n'ensonga yonna agende gye bali, bajja kugimumalira."

¹⁵Awo Musa n'alinnyalinnya olusozi, ekire ne kirubikka.

¹⁶Ekitiibwa kya MUKAMA ne kibeera ku Lusozi Sinaayi. Ekire ne kibikka olusozi okumala ennaku mukaaga; ku lunaku olw'omusantu MUKAMA n'ayita Musa ng'asinziira wakati mu kire.

¹⁷Abaana ba Isirayiri bwe baatunuulira ekitiibwa kya MUKAMA, ne kibalabikira ng'omuliro ogw'amaanyi ennyo ku ntikko y'olusozi.

¹⁸Musa n'ayingira mu kire ng'agenda alinnyalinnya olusozi. Ku lusozi yamalako ennaku amakumi ana.

Okuva 25

Ebiweebwayo mu Weema Entukuvu

¹MUKAMA n'ayogera ne Musa nti,

²"Gamba abaana ba Isirayiri bandeetere ekiweebwayo. Buli muntu aleete ekiweebwayo ng'okuteesa kw'omutima gwe bwe kuli, okimunzijireko.

³"Bino bye biweebwayo bye banaakukwasa: "zaabu, ne ffeeza, n'ekikomo;

⁴n'olugoye olwa bbululu, n'olwa kakobe, n'olumyufu, n'olugoye olwa linena erangiddwa mu wuzi ennungi; n'obwoya bw'embuzi,

⁵n'amaliba g'endiga ennume amakunye amannyike mu langi emyufu, n'ekika ky'eddiba ekirala ekiwangaazi; n'embaawo z'omuti gwa akasiya;

⁶n'amafuta g'ettaala; n'ebiyakaloosa eby'okukoza mu mafuta ag'okwawula, ne mu bubaane obw'okunyookeza;

⁷n'amayinja aga onuku n'amayinja amalala ag'omuwendo, ag'okutona ku kkanzu ey'obwakabona eyitibwa efodi, era ne ku kyomukifuba.

⁸"Bankolere ekifo ekitukuvu ndyoke mbeerenga wakati mu bo.

⁹Mukole Eweema ya MUKAMA eyo entukuvu n'ebigibeeramu byonna nga bwe nnaabalagirira.

Essanduuko

¹⁰"Bakole essanduuko mu muti gwa akasiya, obuwantu mita emu ne sentimita kkumi na ssatu, obugazi sentimita nkaaga mu musantu n'obugulumivu sentimita nkaaga mu musantu.

¹¹Ogiteekeko zaabu omuka ennyo munda ne kungulu, era ogyetoolooze omuge ogwa zaabu.

¹²Ogiweeseze empeta nnya eza zaabu ozisibe ku magulu gaayo ana, ng'empeta ebbiri ziri ku ludda olumu, n'endala ebbiri ku ludda lwayo olulala.

¹³Obajje emisituliro mu muti ogwa akasiya, ogibikkeko zaabu.

¹⁴Ogisonseke mu mpeta eziri ku ssanduuko, okusituzanga essanduuko.

¹⁵Emisituliro egoy ginaalekebwanga mu mpeta ze ssanduuko, si zaakuggyangamu.

¹⁶Mu ssanduuko omwo mw'onossa Amateeka ge nnaakuwa.

¹⁷"Okolereko ekisaanikira, ye ntebe ey'okusaasira, nga kya zaabu omuka ennyo; obuwavu bwakyo sentimita nkaaga mu musanvu, n'obugazi sentimita nkaaga mu musanvu.

¹⁸Era okolereko ebifaananyi bya bakerubi babiri mu zaabu empeese, ku njuyi ebbiri ez'ekisaanikira.

¹⁹Oteeke ekifaananyi kya kerubi omu ku ludda lumu olw'ekisaanikira, n'ekifaananyi kya kerubi omulala ku ludda olwokubiri, nga ebifaananyi bya bakerubi byombi byekutte wamu n'ekisaanikira.

²⁰Ebiwaawaatiro bya bakerubi bibe bibikkule nga bisonze waggulu, era nga bisiikiriza ekisaanikira. Bakerubi batunulagane nga boolekedde ekisaanikira.

²¹Ekisaanikira onookissa kungulu ku Ssanduuko; ekiwandiiko eky'Endagaano ey'Amateeka kye nnaakuwa, okisse munda mu Ssanduuko.

²²Awo waggulu w'ekisaanikira, mu bakerubi bombi abali ku Ssanduuko ey'Endagaano, we nzija okukusisinkana ndyoke nkuwe ebiragiro byange byonna bye nkoledde abaana ba Isirayiri.

Emmeeza

²³"Okole emmeeza mu muti gwa akasiya, obuwavu bwayo sentimita kyenda, obugazi sentimita amakumi ana mu ttaano, n'obugulumivu sentimita nkaaga mu musanvu.

²⁴Ogibikkeko zaabu omuka ennyo; era ogyetoolooze ne zaabu omuge gwonna.

²⁵Era ogyetoolooze olukugiro oluweza sentimita musanvu ne desimoolo ttaano obugazi, n'omuge ogwa zaabu okwetooloola olukugiro olwo.

²⁶Ogikolere empeta nnya eza zaabu, ozisibe mu nsonda ennya awali amagulu ana.

²⁷Empeta zijja kubeera waggulu okumpi n'omuge, emisituliro gy'emmeeza mwe ginaayisibwa.

²⁸Okole emisituliro mu muti gwa akasiya, ogibikkeko zaabu, egoy emmeeza kw'eneesitulirwanga.

²⁹Era ogikolere essowaani eza zaabu, n'ebijiiko ebya zaabu, n'ensuwa eza zaabu, n'ebibya ebya zaabu eby'okufukanga ebiweebwayo.

³⁰Era ku m meeza eno onossaako Emigaati egy'Okulaga, egy'okubeeranga mu maaso gange bulijjo.

Ekikondo ky'Ettaala

³¹"Okole ekikondo ky'ettaala nga kya zaabu omuka. Ekikondo kyonna na bino ebikiriko: entobo yaakyo n'enduli, ebikopo ebifaanana ng'ebimuli, amatabi n'emitunsi n'ebimuli byako, byonna byakuweesebwa mu kyuma kya zaabu kimu bulambalamba.

³²Kunaabako amatabi mukaaga omuntuula emisubbaawa: amatabi asatu nga gali ku ludda lumu, n'amalala asatu nga gali ku ludda olulala.

³³Ku matabi gonna omukaaga agava ku kikondo ky'ettaala, kubeeko ku buli ttabi, ebikopo bisatu ebikole ng'ebimuli by'alumondi; mu buli kikopo nga mulimu omutunsi n'ekimuli.

³⁴Ku kikondo ky'ettaala kyennnyini kubeeko ebikopo bina ebifaanana ebimuli by'alumondi nga mulimu emitunsi n'ebimuli.

³⁵Omutunsi gumu gujja kuba wansi w'amatabi abiri agava ku kikondo, n'omutunsi ogwokubiri gubeere wansi w'amatabi abiri amalala, n'omutunsi ogwokusatu gubeere wansi w'amatabi abiri amalala; amatabi gonna omukaaga ne gaggwaayo.

³⁶Emitunsi n'amatabi biweesebwe mu kyuma kya zaabu omwerefere, nga kiri bulambalamba n'ekikondo ky'ettaala.

³⁷"Era ekikondo kikolere ettaala musanvu; ettaala zino nga zaakira mu maaso gaakyo.

³⁸Makansi ezikomola entambi, n'essowaani ez'okussaako ebisirinza, byonna bikolebwe mu zaabu mwerefere.

³⁹Ojja kwetaaga zaabu omwerefere aweza obuzito bwa kilo asatu mu nnya, okukola ekikondo ky'ettaala ne byonna ebigenderako.

⁴⁰Weegendereze, byonna obikole ng'ogoberera ekifaananyi kye nkulaze wano ku lusozi."

Okuva 26

Eweema ya MUKAMA

¹"Onookola Weema n'emitanda gy'entimbe kkumi, nga girukiddwa mu wuzi eza linena omulebevu alangiddwa n'ewuzi eza bbululu, ne kakobe, ne myufu. Omutunzi ow'amagezi ennyo akoleremu bakerubi.

²Emitanda gy'entimbe gyonna gjija kwenkanankana: obuwantu mita kkumi na bbiri n'ekitundu, n'obugazi mita emu ne desimoolo munaana.

³Emitanda gy'entimbe etaano onoogigatta wamu, ng'ogisengese gumu ku gunnaagwo, era ne ginnaagyo ettaano ogikole bw'otyo.

⁴Otunge enjango eza bbululu ku mukugiro gw'omutanda gw'entimbe ogukomererayo mu kitundu ekimu eky'entimbe ettaano, era okole bw'otyo ne ku njango ekomererayo mu kitundu ekyokubiri.

⁵Otunge enjango amakumi ataano ku mutanda gw'entimbe ogumu, n'enjango endala amakumi ataano ku mukugiro gw'omutanda gw'entimbe mu kitundu ekikomererayo, enjango ezo nga zoolekaganye.

⁶Okole ebikwaso amakumi ataano eby zaabu, okwase wamu emitanda gy'entimbe gyombi n'ebikwaso ebyo, olwo Eweema ya MUKAMA ebeere wamu nga nnamba.

Eby'okussa mu Weema

⁷"Okole entimbe kkumi na lumu nga zilukiddwa mu bwoya bw'embuzi, ozibikke ku Weema.

⁸Entimbe zonna ekkumi n'olumu zija kwenkanankana obunene: ng'obuwantu mita kkumi na ssatu n'ekitundu, n'obugazi mita emu ne desimoolo munaana.

⁹Ogatte entimbe ttaano wamu, n'entimbe omukaaga ozigatte wamu. Olutimbe olw'omukaaga oluwestemu mu maaso g'Eweema.

¹⁰Ojja kutunga enjango amakumi ataano ku mukugiro gw'omutanda gw'entimbe ogukomererayo mu kitundu ky'entimbe ekimu, ne ku mukugiro gw'olutimbe olukomererayo mu kitundu ekyokubiri.

¹¹Okole ebikwaso eby'ekikomo amakumi ataano, obiyise mu njango, bikwate ekibikka ku Weema, ebeere wamu nga nnamba.

¹²Ekitundu ky'entimbe ekisigaddewo ku masuuka g'ebibikka ku Weema kijja kuleebeetera emabega wa Weema.

¹³Entimbe z'ekibikka ku Weema mu mbiriizi zombi ziyise Eweema ya MUKAMA kitundu kya mita emu mu buwanvu. Ebitundu bino byombi bijja kuleebeetera mu mbiriizi zombi eza Weema nga bigibisse.

¹⁴Ekibikka ku Weema okikolereko ekibikkako eky'amaliba g'endiga nga gasiigiddwa erangi emyufu, okwo obikkeko amaliba g'ente ey'omu nnyanja.

¹⁵"Obajje embaawo mu muti gwa akasiya oziyimirize zikole omudaala gw'Eweema kweneetuula.

¹⁶Buli lubaawo lube obuwantu mita nnya n'ekitundu, ate obugazi sentimita nkaaga mu musanvu.

¹⁷Buli lubaawo oluteekoko obubaawo obuyiseemu bubiri, nga butunulaganye n'embawo zonna. Embawo zonna ez'omudaala gw'Eweema ya MUKAMA ozikole bw'otyo.

¹⁸Okole embaawo amakumi abiri ozisse ku ludda olw'obukiikkaddyo obw'Eweema,

¹⁹era okole entobo eza ffeeza amakumi ana, zibeere wansi w'obubaawo obuyiseemu obubiri ku buli lubaawo.

²⁰Ku ludda olwa bukiikkono olw'Eweema ya MUKAMA okolereyo embaawo amakumi abiri,

²¹n'entobo eza ffeeza amakumi ana, bbiri wansi wa buli lubaawo.

²²Okole embaawo mukaaga oziteeke ku ludda olw'emabega, lwe lw'ebugwanjuba bwa Weema;

²³era okole embaawo bbiri ez'okussa ku nsonda ku ludda olwo.

²⁴Ku nsonda zino ebbiri embaawo zombi ozisibe wamu nabansasaana okuviiira ddala wansi okutuuka waggulu, ozinyweze n'empeta.

²⁵Kwe kugamba nti wajja kubeerawo embaawo zonna awamu munaana, n'entobo eza ffeeza kkumi na mukaaga, nga ku buli lubaawo wansi waalwo eriyo bbiri.

²⁶"Osale buliti mu muti gwa akasiya: buliti ttaano ez'okukozesa ku mbaawo eziri ku lusebenju lwa Weema olumu,

²⁷ne buliti ttaano ku mbaawo eziri ku lusebenju lwa Weema olulala, ne buliti ttaano okukozesa ku mbaawo eziri ku ludda olw'emabega wa Weema olw'ebugwanjuba.

²⁸Omulabba guyite wakati w'embawo nga guva ku ludda olumu okutuuka ku ludda olulala.

²⁹Embaawo ozibikkeko zaabu, era okole empeta eza zaabu ozisibise buliti; ne buliti nazo ozibikkeko zaabu.

³⁰Eweema ya MUKAMA onoogizimba ng'ogoberera ekifaananyi ekyakulagibwa ng'oli ku lusozi.

Eggigi

³¹"Okole eggigi mu wuzi eza bbululu, ne kakobe, ne myufu, ne linena omulebevu alangiddwa; era omukozi omukugu atungiremu bakerubi.

³²Oliwanike n'amalobo aga zaabu ku mpagi nnya ezibajjiddwa mu muti gwa akasiya nga zibikkiddwako zaabu, era nga ziymiriziddwa mu ntobo eza ffeeza.

³³Eggigi olinyweze n'ebikwaso; olyoke otereeze Essanduuko ey'Endagaano munda waalyo. Eggigi liryoke lyawule Ekifo Ekitukuvu n'Ekifo Ekitukuvu Ennyo.

³⁴Onosse ekisaanikira, ye ntebe ey'okusaasira ku Ssanduuko ey'Endagaano munda mu Kifo Ekitukuvu Ennyo.

³⁵Oddire emmeeza ogisse ku ludda olwa ddyo mu kisenge ebweru w'eggigi mu Weema, n'ettaala ogisse ku ludda olwa kkono ng'eyolekedde emmeeza.

³⁶"Okole olutimbe lw'omu mulyango gw'Eweema ya MUKAMA mu wuzi eza bbululu, ne kakobe, ne myufu, ne linena omulebevu alangiddwa omulungi; nga byonna bitungiddwa bulungi.

³⁷Olutimbe olukolere empagi ttaano ng'ozibazze mu muti gwa akasiya, ozibikkeko zaabu, n'amalobo gaalwo gabe zaabu; ogiweeseze entobo ttaano ez'ekikomo."

Okuva 27

Ekyoto

¹"Zimba ekyoto mu miti gya akasiya, obugulumivu mita emu ne desimoolo ssatu, n'obuwantu mita bbiri ne desimoolo ssatu, ate obugazi mita bbiri ne desimoolo ssatu.

²Era ku nsonda zaakyo ennya kolerako amayembe; ng'ekyoto n'amayembe bibajjiddwa bumu mu muti gumu; ekyoto kyonna olyoke okibikkeko ekikomo.

³Kola ebbakuli omunaayoolerwanga evvu lyakyo, n'ebisena evvu, n'ebbensani, n'ewuma z'ennyama, ne fulampeni; ebyo byonna nga bikolebwa mu kikomo.

⁴Ekyoto kikolere ekitindiro eky'obutimba eky'ebiyuma eby'ekikomo; ku nsonda ennya ez'ekitindiro olyoke okolerekko empeta nnya ez'ekikomo.

⁵Leebeeseza ekitindiro ekyo mu kyoto, nga waggulu kinyweredde ku muziziko ne kireebeeta okukoma wakati ng'ekyoto bwe kikka.

⁶Kola emisituliro gy'ekyoto mu muti gwa akasiya, ogibikkeko ekikomo.

⁷Emisituliro egoye ogiyingize mu mpeta ennya, gibeere ku njuyi zombi ez'ekyoto nga kibadde kisitulwa okubaako gye kitwalibwa.

⁸Ekyoto kikole n'embaawo, nga wakati kya muwulukwa. Okikole nga bwe kyakulagibwa ku lusozi.

Oluggyga

⁹"Eweema ya MUKAMA gikolere oluggyga. Ku ludda olwa ddyo oluggyga lubeere mita amakumi ana mu mukaaga obuwantu, era nga lulina amagigi aga linena omulebevu alangiddwa,

¹⁰n'entobo amakumi abiri n'ebikolo ebikondo mwe bituula eby'ekikomo amakumi abiri; nga ku bikondo kuliko amalobo aga ffeeza n'emikiikiro egya ffeeza.

¹¹Ne ku ludda olwakkono oluggya lubeere mita ana mu mukaaga obuwanvu, era ebeeyo amagigi n'ebikondo amakumi abiri, n'entobo zaabyo eby'ekikomo amakumi abiri, nga ku bikondo kuliko amalobo aga ffeeza n'emikiikiro egya ffeeza.

¹²"Ku ludda olw'obugwanjuba oluggya lubeere mita amakumi abiri mu ssatu obugazi, era lubeere n'amagigi n'ebikondo kkumi awamu n'entobo zaabyo kkumi.

¹³Ku ludda olw'ebuvanjuba, enjuba gy'efulumira, nayo oluggya lubeere mita amakumi abiri mu ssatu obugazi.

¹⁴Ku ludda olumu olw'omulyango kubeereko amagigi mita mukaaga ne desimoolo mwenda obuwanvu, n'ebikondo bisatu n'entobo zaabyo ssatu,

¹⁵ne ku ludda olulala nakwo kubeereko amagigi mita mukaaga ne desimoolo mwenda obuwanvu, n'ebikondo bisatu n'entobo zaabyo ssatu.

¹⁶"Mu mulyango oguyingira mu luggya wanikamu eggigi mita mwenda obuwanvu, nga lya wuzi za bbululu, ne kakobe, ne myufu, ne linena endebevu ennange, nga bikolebwa omutunzi omukugu, era ng'eggigi lirina ebikondo bina n'entobo zaabyo nnya.

¹⁷Ebikondo byonna mu luggya bibeere n'emikiikiro gya ffeeza, n'amalobo ga ffeeza, n'entobo za kikomo.

¹⁸Oluggya lubeere mita amakumi ana mu mukaaga obuwanvu, n'obugazi mita amakumi abiri mu ssatu, n'amagigi aga linena endebevu ennange, mita bbiri ne desimoolo ssatu obugulumivu, n'entobo ez'ekikomo.

¹⁹Ebintu ebirala byonna ebinaakozesebwa ku mirimu gya Weema egya buli ngeri, ng'otaddeko n'obukondo obukomerera Weema n'obw'omu luggya, byonna bibeera bya kikomo.

Amafuta g'Ettaala

²⁰"Lagira abaana ba Isirayiri bakuleetere amafuta ag'emizeeyituuni amalungi ennyo ag'okukoza mu ttaala, eryoke eyakenga obudde bwonna nga tezikira.

²¹Mu kisenge kya Weema ya MUKAMA ey'Okukunjjaanirangamu, ebweru w'eggigi eribisse Endagaano, awo Alooni ne batabani be we banaabeeranga nga balabirira ettaala eyakirenga awali MUKAMA okuva olweggulo okutuusa mu makya. Lino libeere tteeka abaana ba Isirayiri lye banaakwatanga emirembe gyonna."

Okuva 28

Ebyambalo by'Obwakabona

¹ “Muganda wo Aloonni muyiteyo mu baana ba Isirayiri, awamu ne batabani be: Nadabu, ne Abiku, ne Eriyazaali, ne Isamaali, bajje bampeereze nga be bakabona.

² Muganda wo Aloonni mutungire ebyambalo ebitukuvu, nga bya kitiibwa era nga birabika bulungi.

³ Yogera n'abo bonna abasobola, be nawa ekirabo eky'amagezi mu mirimu egyo, bakolere Aloonni ebyambalo mw'anaayawulirwa okubeera kabona wange.

⁴ Bino bye byambalo bye banaakola: eky'omu kifuba, ekkanzu ey'obwakabona okutali mikono ennyimpi eyitibwa ekkanzu ey'obwakabona eyitibwa efodi; ng'ekoma mu ntumbwe; omunagiro; ekkooti erimu obusaze obw'obusimba n'obw'obukiika; ekitambaala; n'olukoba. Bakolere Aloonni ne batabani be ebyambalo ebitukuvu balyoke bampeereze nga be bakabona.

⁵ Abakozi baweebwe ewuzi eza zaabu, ne bbululu, ne kakobe, ne myufu, ne linena omulebevu omulange.

Ekkanzu eyitibwa Efodi

⁶ “Abakozi abakugu bakole ekkanzu ey'obwakabona ennyimpi etaliiko mikono n'ewuzi eza zaabu, ne bbululu, ne myufu, ne linena omulebevu omulange.

⁷ Ebeere n'ebi'okubibegabega bibiri nga bitungiddwa w'ekoma, eryoke egattibwe bulungi.

⁸ Omusipi gwayo mu kiwato gukolebwe n'amagezi mangi nga aganaakola ekkanzu ey'obwakabona, era n'ebinaakola bifaanagane, ng'ewuzi za zaabu, ne bbululu, ne kakobe, ne myufu, ne linena omulebevu alangiddwa.

⁹ “Oddire amayinja ga onuku abiri, ogalambeko amannya ga batabani ba Isirayiri,

¹⁰ amannya mukaaga ku jjinja erimu, n'amannya g'abasigaddewo omukaaga ku jjinja eryokubiri, ng'okuzaalibwa kwabwe bwe kugenda kuddiriragana.

¹¹ Olambe amannya ga batabani ba Isirayiri ku mayinja ago abiri ng'omusazi w'amayinja bw'ayola akabonero ku jjinja; ogateeke mu fuleemu ogeetoolooze n'emikugiro egya zaabu.

¹² Amayinja ago ojja gakwasiza ku by'okubibegabega eby'ekkanzu ey'obwakabona eyitibwa efodi, ng'amayinja ag'ekijjukizo ky'abaana ba Isirayiri. Aloonni asitulenga amannya gaabwe awali MUKAMA ng'ekijjukizo.

¹³ Okole fuleemu eza zaabu,

¹⁴ n'enjegere bbiri eza zaabu omuka, ozirange ng'emiguwa; olyoke osibire enjegere ez'oku fuleemu.

Ekyomukifuba

15“Kola ekyomukifuba eky'okutereezanga ensonga, nga mulimu gwa kikugu ng'ogw'ekkanzu ey'obwakabona eyitibwa efodi, n'ewuzi eza zaabu, ne bbululu, ne kakobe, ne myufu, ne linena omulebevu omulange.

16Kija kwenkanankana, buli ludda sentimita amakumi abiri mu bbiri, okiwetemu wakati.

17Otungireko ennyiriri nnya ez'amayinja ag'omuwendo omungi. Mu lunyiriri olusooka osseemu amayinja saasiyo, ne topazi, ne kaabankulo;

18ne mu lunyiriri olwokubiri osseemu emalada, ne safiro ne dayamandi;

19ne mu lunyiriri olwokusatu osseemu jasinta; ne ageti, ne ametisita,

20ne mu lunyiriri olwokuna osseemu berulo, ne onuku, ne yasipero, ogateeke mu fuleemu ya zaabu.

21Wabeerewo amayinja kkumi n'abiri, n'amannya gaago ng'amannya g'abatabani ba Isirayiri. Gasalibwe bulungi ng'obubonero obuwoolebwa, nga ku buli limu kulambiddwako erinnya lyako okumalirayo ddala amannya g'ebika ekkumi n'ebibiri.

22“Ekyomukifuba kikolere enjegere ennange ng'emiguwa gyaa zaabu omuka.

23Era ekyomukifuba kikolere empeta za zaabu bbiri, oteeke empeta ezo zombi ku mikugiro ebiri egypt'ekyomu kifuba.

24Oyise enjegere ebbiri eza zaabu mu mpeta ebbiri eziri ku mikugiro gy'eky'omu kifuba.

25Oddire enjuuyi ebbiri ezisigaddewo ez'enjegere ozikwasize ku fuleemu ebbiri, ozinywereze mu maaso g'ebi'oku bibegabega byombi eby'ekkanzu ey'obwakabona eyitibwa efodi.

26Era okole empeta bbiri eza zaabu, ozitunge ku mikugiro gy'eky'omu kifuba ku luuyi olw'omunda oluliraanye ekkanzu ey'obwakabona eyitibwa efodi.

27Era okole empeta bbiri eza zaabu oziteeke mu maaso, mu bitundu ebya wansi eby'ebi'okubibegabega byombi eby'ekkanzu ey'obwakabona eyitibwa efodi, wagguluko okumpi n'oluzizi lw'omusipi olw'ekkanzu ey'obwakabona eyitibwa efodi.

28Empeta ez'oku kyomukifuba zisibwe wamu n'empeta z'ekkanzu ey'obwakabona eyitibwa efodi n'akaguwa aka bbululu, kagattibwe n'olukoba, olw'omu kifuba luleme kutaggulukuka ku kkanzu ey'obwakabona eyitibwa efodi.

²⁹ “Buli kiseera Alooni lw’anaayingiranga mu Kifo Ekitukuvu, anaabanga ayambadde amannya ga batabani ba Isirayiri ku kyomukifuba eky’okumala ensonga, nga kiri ku mutima gwe, kibeerenga ekijukizo awali MUKAMA.

³⁰ Mu ky’omu kifuba eky’okumala ensonga, onooteekamu Ulimu ne Sumimu, era binaabeeranga ku mutima gwa Alooni buli lw’anaayingiranga awali MUKAMA. Bw’atyo Alooni anaasitulanga ekkubo omuyitwa okumala ensonga z’abaana ba Isirayiri okumpi n’omutima gwe buli lw’anaagendanga awali MUKAMA.

Ebyambalo eby’Obwakabona ebirala

³¹ “Onookola ekyambalo ekiri ng’ekkanzu ey’obwakabona eyitibwa efodi, nga kyonna kya bbululu.

³² Waggulu mu makkati gaakyo munaabaamu ekituli omw’okuyisa omutwe; okwetooloola ekituli ekyo kunaabaako omuge omuyonde obulungi ng’omuleera ku kituli ky’omutwe eky’ekkanzu ey’obwakabona, kireme okuyulika.

³³ Okwetooloola ebirenge wansi onootungayo amajjolobera mu wuzi eza bbululu, ne kakobe, ne myufu; nga mu makkati ga buli langi eziriraanye otobekamu obude obwa zaabu.

³⁴ Ng’otunga amajjolobera n’ozzaako akade, ate n’oddiriza amajjolobera n’ozzaako akade; bw’otyo okwetooloola ebirenge by’ekyambalo ekyo.

³⁵ Gunaabanga mulimu gwa Alooni okwambala ekyambalo ekyo ng’agenda okuweereza. Obude obwo bunaawulirwanga ng’ayingira mu Kifo Ekitukuvu awali MUKAMA, ne bw’anaabanga afuluma, aleme okufa.

³⁶ “Onookola akapande aka zaabu omuka ennyo, okayoleko, nga bwe bayola akabonero, nti, Mutukuvu wa Mukama.

³⁷ Akapande okasibeko akaguwa aka bbululu, okanywereze ku kitambaala ky’oku mutwe ku ludda olw’omu maaso olw’ekitambaala.

³⁸ Akapande ako kanaabeeranga mu kyenyi kya Aloon, era Aloon y’anaabangako obuvunaanyizibwa nga wabaddewo ebitatuuse mu biweebwayo ebitukuvu abaana ba Isirayiri bye banaaleetanga nga bamaze okubyawula ng’ebirabo byabwe ebitukuvu; kanaabeeranga ku kyenyi kye bulijo, MUKAMA alyoke akkirize ebirabo ebyo.

³⁹ “Luka ekkooti erimu obusaze obw’obusimba n’obw’obukiika mu wuzi eza linena omulebevu, era okole n’ekitambaala eky’oku mutwe mu linena omulebevu, era okole olukoba ng’olutunzeemu amajjolobera.

⁴⁰ Batabani ba Aloon bakolere amakooti, n’emisipi, n’enkuufiira; nga byonna bya kitiibwaa era nga birabika bulungi nnyo.

⁴¹Alooni muganda wo mwambaze ebyambalo ebyo, ne batabani be nabo bw'otyo; olyoke obafukeko amafuta ag'omuzeeyituuni, obaawule, obatukuze, bampeerezenga nga be bakabona.

⁴²"Bakolere empale ez'omunda eza linena, nga ziva mu kiwato okukoma mu bisambi, zibikke omubiri gwabwe.

⁴³Alooni ne batabani be banaazambalanga nga bajja mu Weema ya MUKAMA ey'Okukuŋjaanirangamu oba bwe banaasembereranga Ekyoto okuweereza mu Kifo Ekitukuvu, baleme okwreeretako omusango ne bafa. "Alooni ne batabani be ne bazzukulu be abalimuddirira banaakuumanga etteeka lino nga lya nkalakkalira."

Okuva 29

Okwawula Bakabona

¹"Bino by'onookola okwawula Alooni ne batabani be okubafuula bakabona balyoke bampeereze. Ojja kulaba ente ya seddume emu ento, n'endiga ennume ento bbiri, zonna nga teziriiko kamogo.

²Era onookola mu buwunga bw'enjaano ennungi emigaati egitaliimu kizimbulukusa, ne zikkeeke enkole n'amafuta ag'omuzeeyituuni ezitali nzimbulukuse, n'obusukuuti obw'oluwehere obutaliimu kizimbulukusa naye nga busiigiddwako amafuta ag'omuzeeyituuni.

³Obiteeke mu kibbo kimu obireete awamu n'ente n'endiga ebbiri.

⁴Leeta Alooni ne batabani be ku mulyango gw'Eweema ya MUKAMA ey'Okukuŋjaanirangamu, obanaaze n'amazzi.

⁵Ddira ebyambalo, oyambaze Alooni ekkooti, n'ekyambalo ekiri ng'ekkanzu ey'obwakabona eyitibwa efodi, n'ekkanzu ey'obwakabona eyitibwa efodi, n'ekyomukifuba, omusibeko omusipi gw'ekkanzu ey'obwakabona eyitibwa efodi ogwalukibwa n'amagezi amangi;

⁶omusibe n'ekitambaala ku mutwe olyoke otereeze bulungi engule entukuvu ku kitambaala eky'oku mutwe.

⁷Ddira amafuta ag'okwawula ogafuke ku mutwe gwe, omwawule.

⁸Leeta batabani be obambaze amakooti,

⁹obasibeko emisipi, obambaze n'enkuufiira; olwo nga bafuuka bakabona emirembe gyonna ng'ekiragiro bwe kigamba. Bw'otyo bw'onooyawula Alooni ne batabani be.

Ekiweebwayo olw'Ebibi

¹⁰“Onoleeta ente eyo ento mu maaso g’Eweema ya MUKAMA ey’Okukujjaanirangamu. Aloonie batabani be banaagikwatako ku mutwe,

¹¹n’olyoka ogittira awo awali MUKAMA ku mulyango gw’Eweema ya MUKAMA ey’Okukujjaanirangamu.

¹²Onoddira omusaayi ogw’ente eyo omuronotono, n’ogusiiga n’olugalo lwo ku mayembe ag’oku kyoto; omusaayi ogunaasigalawo oguyiwe wansi w’ekyoto.

¹³Onoddira amasavu gonna ag’oku byenda n’ogabikka ku kibumba n’ensigo zombi n’amasavu gaazo, obyokere ku kyoto.

¹⁴Naye ennyama y’ente eyo n’eddiiba lyayo, n’obusa bwayo, byokere ebweru w’olusiisira. Ekyo ky’ekiweebwayo olw’ekibi.

Ekiweebwayo Ekyoke

¹⁵“Kwata endiga zombi, Aloonie batabani be banaakwatanga ku mutwe gw’endiga emu;

¹⁶otte endiga eyo, n’oddira omusaayi gwayo n’ogumansa buli wantu ku kyoto.

¹⁷Onosalaasala endiga eyo mu bifi, onaaze eby’omunda byayo n’amagulu gaayo; obisse wamu n’ebifi n’omutwe,

¹⁸endiga yonna ogyokere ku kyoto. Ekyo ky’ekiweebwayo eri MUKAMA ekyoke, eky’akawoowo akasanyusa, nga kiweebwayo ku muliro eri MUKAMA.

Ekiweebwayo ku Kwawulibwa

¹⁹“Onoddira endiga endala, Aloonie batabani be ne bassa emikono ku mutwe gwayo;

²⁰onoogitta, n’oddira ku musaayi gwayo n’ogusiiga ku kasongezo k’okutu kwa Aloonie okwa ddyo, ne ku busongezo bw’amatu ga batabani be aga ddyo, ne ku binkumu by’emikono gyabwe egya ddyo, ne ku bigere byabwe ebisajja ebya ddyo; omusaayi ogunaasigalawo ogumansire ku kyoto okukyetooloola.

²¹Onoddira ku musaayi oguli ku kyoto, oddire ne ku mafuta ag’okwawula, obimansire ku Aloonie ne ku byambalo bye, era ne ku batabani be ne ku byambalo byabwe. Bw’atyo Aloonie batabani be bajja kutukuzibwa awamu n’ebiyambalo byabwe.

²²“Onoggya ku ndiga eyo amasavu, n’omukira omusava, n’amasavu agabikka eby’omu lubuto ne ku kibumba, n’ensigo zombi awamu n’amasavu agaziriko, n’ekisambi ekya ddyo; kubanga eyo y’endiga ey’okukozesa mu kwawula bakabona.

²³Era olabe mu kibbo ekirimu ebitali bizimbulukuse ebiri awali MUKAMA oggyemu omugaati gumu, ne keke emu okuli amafuta ag'omuzeeyituuni, n'akasukuuti ak'oluwehere;

²⁴ebyo byonna obikwase Aloonie ne batabani be, babiwuubire awali MUKAMA ng'ekiweebwayo ekiwuubibwa.

²⁵Onoobibaggyako, n'obyokera ku kyoto ng'obyongera ku kiweebwayo ekyokebwa, mulyoke muveemu akawoowo akalungi akasanyusa MUKAMA; kye kiweebwayo eri MUKAMA ekyokye mu muliro.

²⁶Era onoddira ekifuba ky'endiga y'okwawulibwa kwa Aloonie, okiwuube ng'ekiweebwayo eri MUKAMA ekiwuubibwa; ogwo gwe gunaaba omugabo gwo.

²⁷Onootukuza ekifuba eky'ekiweebwayo ekiwuubibwa, n'ekisambi eky'ekiweebwayo ekiwuubibwa, n'ekisambi eky'omugabo gwa bakabona era nga nakyo kiwuubibwa ekiva ku ndiga y'okwawulibwa, nga bwe guli omugabo gwa Aloonie ne batabani be.

²⁸Gunaabanga mugabo gwa Aloonie ne batabani be, nga guva mu baana ba Isirayiri emirembe gyonna; kubanga gwe mugabo gwa bakabona ogunaavanga ku kiweebwayo ky'abaana ba Isirayiri eky'emirembe, nga kye kiweebwayo kyabwe eri MUKAMA.

²⁹"Ebyambalo bya Aloonie ebitukuvu, batabani be, be banaabisikiranga, era mwe banaafukirwangako amafuta, era mwe banaayawulirwanga.

³⁰Omwana anaabanga azze mu bigere bya Aloonie nga kabona, anaabyambaliranga ennaku musanvu, bw'anajjanga mu Weema ya MUKAMA ey'Okukunyaaanirangamu okuweereza mu Kifo Ekitukuvu.

Emmere ku Kwawulibwa

³¹"Oija kuddira endiga y'okwawulibwa, ofumbe ennyama yaayo mu kifo ekitukuvu;

³²Aloonie ne batabani be balye ku nnyama y'endiga eyo, ne ku mugaati oguli mu kibbo, nga bali ku mulyango gwa Weema ya MUKAMA ey'Okukunyaaanirangamu.

³³Banaalya ku ebyo ebikozesebbwa ku mukolo ogw'okusonyiyibwa kwabwe lwe batukuzibwa era lwe bayawulirwako. Naye atali kabona tabiryangako, kubanga bitukuvu.

³⁴Era singa ku nnyama y'okwawula ne ku migatti wasigalawo ebiremye okutuusa enkeera, byonna byokebwanga bwokebwaga; tewabanga abirya, kubanga bitukuvu.

³⁵"Bwe kutyo okwawulibwa kwa Aloonie ne batabani be bw'onookukola nga bwe nkulagidde. Omukolo gwonna gujja kumala ennaku musanvu;

³⁶era buli lunaku oija kuwaayo seddume y'ente emu ng'ekiweebwayo olw'ekibi, olw'okusonyiyibwa. Waayo ekiweebwayo olw'okulongoosa ekyoto, okifukeko amafuta, okitukuze.

³⁷Oija kumala ennaku musanvu ng'owaayo ekiweebwayo olw'okulongoosa ekyoto, okitukuze; era ekyoto kijja kubeera kitukuvu nnyo, buli ekinaakikomangako nga nakyo kifuuka kitukuvu.

Ekyoto eky'Ebiweebwayo Ebyokebwa

³⁸"Bino by'onoowangayo ku kyoto buli lunaku: onoowangayo endiga ento bbiri ez'omwaka ogumu.

³⁹Endiga emu onoogiwangayo mu makya, ne ginnaayo n'ogiwaayo akawungeezi.

⁴⁰Endiga esooka onoogiwaaayo ne lita bbiri ez'obuwunga obulungi, nga butabuddwamu lita ng'emu ey'amafuta ge zeyituuni, n'oteekerako ne lita emu ey'envinnyo nga ky'ekiweebwayo ekyokunywa.

⁴¹Endiga eyookubiri onoogiwaaayo akawungeezi awamu n'obuwunga n'ebyokunywa nga bw'onooba okoze mu makya, ne biryoka bivaamu akawoowo akalungi akasanyusa ak'ekiweebwayo ekyokebwa eri MUKAMA.

⁴²"Mu mirembe gyonna egigenda okuja, ekiweebwayo kino ekyokebwa kinaaweebwangayo eri MUKAMA obutayosa, mu mulyango gw'Eweema ya MUKAMA ey'Okukuŋjaanirangamu. Awo we nnaakusanga ne njogera naawe.

⁴³Era awo we nnaasisinkana abaana ba Isirayiri, ekifo ekyo ne kitukuzibwa nga kijjudde ekitiibwa kyange.

⁴⁴"Bwe ntyo nnaatukuza Eweema ya MUKAMA ey'Okukuŋjaanirangamu n'ekyoto, era Alooni ne batabani be nabo nnaabatukuza, bampeereze nga bakabona.

⁴⁵Bwe ntyo ndyoke mbeere mu baana ba Isirayiri era mbeere Katonda waabwe.

⁴⁶Awo banaamanya nga nze MUKAMA Katonda waabwe, eyabaggya mu nsi y'e Misiri ndyoke mbeerenga mu bo. Nze MUKAMA Katonda waabwe."

Okuva 30

Ekyoto ky'Obubaane

¹"Onookola ekyoto mu miti gya akasiya, okwoterezangako obubaane.

²Kya kwenkanankana, sentimita amakumi ana mu ttaano buli ludda mu buwanvu ne mu bugazi; era kinaabeera n'obugulumivu bwa sentimita kyenda. Kubeeko amayembe amakole mu muti ogw'ekyoto nga si mayungeko buyunzi.

³Ekyoto okiteekeko zaabu kyonna, waggulu ne mu mbiriizi, ne ku mayembe. Era kikolereko omuge ogwa zaabu okukyetooloola.

⁴Wansi w'omuge, mu mbiriizi z'ekyoto zombi, kolerawo empeta bbiri eza zaabu, okuyisaamu emisituliro gyakyo nga waliwo gye kitwalibwa.

⁵Emisituliro ogikole mu muti gwa akasiya, era ogiteekeko zaabu.

⁶Ekyoto kitereeze mu maaso g'eggigi awali essanduuko ey'endagaano, awali ekisaanikira, ye ntebe ey'okusaasira, ekiri ku Ndagaano; awo we nnaakusisinkana.

⁷ "Alooni anaayotezanga obubaane buli nkya, bw'anajjanga okulongoosa ettaala.

⁸Era Alooni bw'anajjanga okukoleeza ettaala akawungeezi, anyookezenga obubaane mu maaso ga MUKAMA mu mirembe gyammwe gyonna.

⁹Ku kyoto kino tojja kwoterezaako bubaane bulala, wadde ekiweebwayo ekyokebwa, newaakubadde eky'enjaano era tojja kufukako ekiweebwayo eky'ekyokunywa.

¹⁰Alooni anaakolanga omukolo ogw'okulangiririra ku mayembe gaakyo omulundi gumu mu buli mwaka. Okulongoosa kuno okwa buli mwaka kunaakolebwanga n'omusaayi ogw'ekiweebwayo olw'ekibi mu mirembe gyammwe gyonna egigenda okujja. Ekyoto kya MUKAMA kino kitukuvu nnyo."

Ebiweebwayo mu Weema ya MUKAMA

¹¹Awo MUKAMA n'agamba Musa nti,

¹²"Bw'onoobalanga abaana ba Isirayiri, buli gw'onoobalanga anaasasulanga omuwendo eri MUKAMA olw'okununula obulamu bwe mu kiseera mw'abaliddwa, kawumpuli aleme okubagwamu.

¹³Buli abalibwa ne yeegatta ku bamaze okubalibwa, anaawaangayo gulaamu mukaaga eri MUKAMA, ng'okubala okw'Awatukuvu okutongole bwe kuli. Sekeri emu yenkanankana ne gera amakumi abiri. Gulaamu omukaaga zinaaweebwangayo ng'ekiweebwayo eri MUKAMA.

¹⁴Bonna abeegatta ku bamaze okubalibwa, okuva ku b'emyaka amakumi abiri egy'obukulu, n'okweyongerayo, anaawaayo ekiweebwayo ekyo eri MUKAMA.

¹⁵Abagagga tebaawengayo kusussa kitundu kya sekeri, n'omwavu taawengayo kitatuuka kitundu kya sekeri bwe munaawangayo ekiweebwayo eri MUKAMA olw'okwetangirira obulamu bwammwe.

¹⁶Ensimbi abaana ba Isirayiri ze banaakuwa onoozikozesanga ku mirimu gy'Eweema ya MUKAMA ey'Okukuŋjaanirangamu. Kinaabanga ekijjukizo mu maaso ga MUKAMA, olw'okwetangirira obulamu bwammwe."

Ebbensani Omunaabirwa

¹⁷Awo MUKAMA n'agamba Musa nti,

¹⁸“Onookola ebbensani enaabirwamu nga ya kikomo ne ky’etuulako nga kya kikomo. Giteeke wakati w’ekyoto n’Eweema ya MUKAMA ey’Okukuñjaanirangamu; osseemu amazzi.

¹⁹Alooni ne batabani be ge banaakozesanga okunaaba engalo zaabwe n’ebigere byabwe.

²⁰Bwe banaabanga bagenda okuyingira mu Weema ya MUKAMA ey’Okukuñjaanirangamu, banaanaabanga amazzi, baleme okufa. Era ne bwe banajjanga ku kyoto okuweereza nga bawaayo eri MUKAMA ekiweebwayo ekyokye n’omuliro,

²¹banaanaabanga engalo zaabwe n’ebigere byabwe, baleme okufa. Kino kinaabanga kiragiro eky’olubeerera eri Alooni n’ezzadde lye emirembe gyonna.”

Amafuta ag’Okusiiga

²²Awo MUKAMA n’agamba Musa nti,

²³“Ddira ebyakawoowo bino eby’omuwendo: Kiro mukaaga ez’omugavu omuyenge omuka, ne kiro ssatu eza kinamoni, ne kiro ssatu eza kalamu omuwoomerevu;

²⁴ne kiro mukaaga eza kasiya, ne lita nnya ez’amatuta g’omuzeeyituuni; ng’ebipimo by’obuzito bw’omu Watukuvu bwe biri.

²⁵Bino byonna obikolemu amatuta amatukuvu ag’okusiiga, nga bigattikibbwaa bulungi ng’ebikoleddwa omutabuzi w’ebi’akawoowo, ne galyoka gabeera amatuta amatukuvu ag’okufukibwangako.

²⁶Olyoke osiige n’amatuta ago Eweema ya MUKAMA ey’Okukuñjaanirangamu, n’Essanduuko ey’Endagaano,

²⁷n’emmeeza n’ebibeerako byonna, n’ekikondo ky’ettaala n’ebiyakyo byonna, n’ekyoto eky’obubaane,

²⁸n’ekyoto eky’ekiweebwayo ekyokebwa n’ebikozesebwako, n’ebbensani ne kw’etuula.

²⁹Obyawule bifuke bitukuvu nnyo, era buli ekinaabikomangako nga nakyo kifuuka kitukuvu.

³⁰“Alooni ne batabani be onoobafukako amatuta, obaawule, balyoke bampeerezenga nga bakabona.

³¹Era abaana ba Isirayiri obagambe nti, ‘Gano ge ganaabanga amatuta gange amatukuvu ag’okufukibwangako, mu mirembe gyammwe gyonna.

³²Tegajjanga kufukibwa ku bantu ba bulijo; era tewabangawo amatuta amalala agatabulwa mu ngeri eno. Gano matukuvu, era mujukirenga nti matukuvu.

³³Omuntu yenna anaakolanga amafuta ga kalifuuwa okufaanana ne gano, oba anaafukanga gano ku muntu yenna atali kabona, anaawaŋŋangusibwanga, n'ava mu bantu b'ewaabwe.'"

Ebyakaloosa

³⁴Awo MUKAMA n'agamba Musa nti, "Ddira ebyakaloosa bino eby'omuwendo ennyo: sitakite, n'onuka, ne galabano, n'obubaane obuka, nga byenkanankana obuzito,

³⁵Okolemu ebyakaloosa eby'omuwendo, bibe ng'ebikoleddwa omukugu w'ebiyakaloosa. Obiteekemu omunyyo bibeere birongoofu era nga bitukuvu.

³⁶Onoggyako ekitundu n'okisa ne kifuuka lufufugge, n'okiteeka okwolekera Essanduuko ey'Endagaano mu Weema ya MUKAMA ey'Okukuŋjaanirangamu, awo we nnaakusisinkananga. Ekyo kinaabeeranga kitukuvu nnyo, gy'oli.

³⁷Temwekoleranga ebyakaloosa ebyammwe ku bwammwe mu ntabula eno; bino binaabanga bitukuvu era nga bya MUKAMA.

³⁸Omuntu yenna alikola ebibifaanana yeesanyuse olw'akaloosa kaabyo, anaawaŋŋangusibwanga, n'ava mu bantu b'ewaabwe."

Okuva 31

Okulondebwa kw'Abakozi

¹Awo MUKAMA n'agamba Musa nti,

²"Laba, nnonze Bezaaleeri mutabani wa Uli, muzzukulu wa Kuuli, ow'omu kika kya Yuda;

³era mmujjuzza Omwoyo wa Katonda, n'okumanya, n'obusobozi n'amagezi mu kukola ebitali bimu ebyemikono

⁴okutetenkanya ebintu ebinaakolebwa mu zaabu ne ffeeza n'ekikomo, nga bwe binaafaanana,

⁵okwola amayinja n'okugategeka, n'okwola emit, era n'okukola byonna ebyemikono ebya buli ngeri.

⁶Ate mmulondeddeko Okoliyaabu mutabani wa Akisamaki, ow'omu kika kya Ddaani, okumuyamba. "Era abakugu abakola ebintu byonna ebya buli ngeri, mbawadde amagezi okukola bino byonna bye nkulagidde:

⁷"Eweema ya MUKAMA ey'Okukuŋjaanirangamu, n'Essanduuko ey'Endagaano n'ekibikkako eky'entebe ey'okusaasira, awamu n'ebikozesewa byonna mu Weema ya MUKAMA,

⁸em meeza n'ebigenderako, ekikondo eky zaabu omuka eky'ettaala n'ebigenderako, n'ekyoto eky'obubaane,

⁹n'ekyoto eky'ebiweebwayo ebyokebwa n'ebigenderako, n'ebbensani ne kw'etuula;

¹⁰n'ebiyambalo ebyalukibwa obulungi, ebyambalo ebitukuvu ebya Aloon, kabona, n'ebiyambalo bya batabani be bye baweererezaamu mu bwakabona;

¹¹n'amatuta ag'okufukibwa, n'ebiyakaloosa akalungi ak'omu Kifo Ekitukuvu. "Byonna babikole nga bwe nakulagira."

Ssabiiti

¹²Awo MUKAMA n'agamba Musa nti,

¹³"Tegeeza abaana ba Isirayiri nti, Munaateekwanga okukuuma Ssabiiti zange, kubanga ako ke kabonero akanaabeeranga wakati wammwe nange mu mirembe gyammwe gyonna, mulyoke mumanye nga Nze MUKAMA, Nze mbatukuza.

¹⁴"Munaakuumanga Ssabiiti, kubanga lunaku lutukuvu. Buli anaaluweebuulanga waakufa; ne buli anaakolanga omulimu gwonna ku lunaku olwo waakuggibwa mu bantu be, attibwe.

¹⁵Emirimu ginaakolwanga mu nnaku mukaaga, naye olunaku olw'omusanvu ye Ssabiiti ey'okuwummula, lunaku lwa MUKAMA lutukuvu. Buli anaakolanga omulimu ku lunaku lwa Ssabiiti wa kuttibwa.

¹⁶Noolwekyo abaana ba Isirayiri banaakumanga olunaku lwa Ssabiiti, nga balujjukira mu mirembe gyabwe gyonna, ng'endagaano etaggwaawo.

¹⁷Kanaabeeranga kabonero wakati wange n'abaana ba Isirayiri emirembe gyonna, akalaga nti MUKAMA yakola eggulu n'ensi mu nnaku mukaaga, ne ku lunaku olw'omusanvu n'alekeraawo okukola, n'awummula."

¹⁸Awo MUKAMA bwe yamaliriza okwogera ne Musa ku lusozi Sinaayi, n'awa Musa ebipande bibiri eby'amayinja, eby'Endagaano Katonda gye yawandiika n'engalo ye, ye kennyni.

Okuva 32

Ennyana eya Zaabu

¹Abantu bwe baalaba nga Musa aluddeyo nnyo ku lusozi, ne bakuŋjaanira awali Aloon, ne bamugamba nti, "Jjangu, otukolere bakatonda abanaatukulembra; kubanga Musa ono eyatuggya mu nsi y'e Misiri, tetumanyi kimutuuseeko."

²Aloon n'abaddamu nti, "Mwambule empeta eza zaabu, bakyala bammwe, ne batabani bammwe, ne bawala bammwe ze bambadde ku matu gaabwe, muzindeetere."

³Awo abantu bonna ne beenaanulako empeta zaabwe eza zaabu ez'oku matu, ne bazireetera Aloon.

⁴Alooni n'azisaanuusa; zaabu eyavaamu n'agibumbamu ennyana, ng'agirongoosa n'ekyuma. Ne balyoka boogera nti, "Bano be bakatonda bo ggwe Isirayiri abaakuggyaa mu nsi y'e Misiri!"

⁵Alooni bwe yalaba ebyo, n'azimba ekyoto mu maaso g'enyyana, n'alyoka alangirira nti, "Enkyaa tujja kukolera MUKAMA embaga."

⁶Awo enkeera, abantu ne bazuukuka mu makya, ne bawaayo ebiweebwayo ebyokebwa, ne baleeta n'ebiweebwayo olw'emirembe; ne batuula ne balya era ne banywa, ne basituka ne bakola effujjo.

⁷MUKAMA n'agamba Musa nti, "Serengeta, kubanga abantu bo be waggya mu nsi ey'e Misiri boonoonye;

⁸bavudde mangu mu kkubo lye nablagira; beekoledde ennyana ensaanuuse ne bagisinza, ne bagireetera ebiweebwayo, ne boogera nti, 'Bano be bakatonda bo, ggwe Isirayiri, abaakuggyaa mu nsi y'e Misiri!'"

⁹MUKAMA n'agamba Musa nti, "Abantu bano mbalabye, era ndabye nga bakakanyavu.

¹⁰Kale, kaakano ndeka obusungu bwange bubabuubuukireko, mbazikirize; kyokka ggwe ndikufuula eggwanga ekkulu."

Musa Yeegayirira Katonda

¹¹Naye Musa ne yeegayirira MUKAMA Katonda we, n'agamba nti, "Lwaki obusungu bwo bubuubuukira abantu bo be waggya mu nsi y'e Misiri n'obuyinza, awamu n'omukono gwo ogw'amaanyi?

¹²Lwaki okwogeza Abamisiri nti, 'Yabatwala ng'agenderedde kubakola kabi, abattire mu nsozi, abazikirize, bave ku nsi?' Nyigulukuka, obusungu obubuubuuka bukuveeko, oleme kuleeta bulabe ku bantu bo.

¹³Jjukira abawereza bo Ibulayimu, ne Isaaka, ne Isirayiri, be walayirira ggwe kennyni, n'obagamba nti, 'Ndyaza bazzukulu bammwe ng'emmunyeenye ez'oku ggulu, era n'ensi eno gye mbasuubizza ndigiwa bazzukulu bammwe, era eribeera omugabo gwammwe ennaku zonna.'"

¹⁴MUKAMA akabi ke yali ategese okukola abantu be n'atakaleeta.

Musa Azikiriza Ennyana

¹⁵Awo Musa n'aserengeta okuva ku lusozi ng'akutte mu mikono gye ebipande ebibiri eby'Endagaano, nga biwandiikiddwako ku njuyi zombi.

¹⁶Ebipande byakolebwa Katonda, n'ebiwandiike ebyaliko byali bya Katonda, nga ye yabisala ku bipande ebyo.

¹⁷Yoswa bwe yawulira oluyoogaano lw'abantu nga baleekaana, n'agamba Musa nti, "Mu lusiisira eriyo okuyoogaana ng'okw'olatalo."

¹⁸Naye n'amuddamu nti, "Siwulira maloboozi galeekaana olw'obuwanguzi, oba amaloboozi g'okwaziirana olw'okuwangulwa, naye maloboozi ga kuyimba ge mpulira."

¹⁹Naye Musa bwe yasemberera olusiisira, n'alengera ennyana, n'alaba n'amazina; obusungu bwe ne bubuubuuka, n'asuula eri ebipande ebyali mu mikono gye, ne bimenyekera awo wansi w'olusozi.

²⁰N'addira ennyana gye baali bakoze n'aggyokya mu muliro n'agisekulasekula, n'agimerungulira ddala ng'olufuufu; olufuufu n'alumansa ku mazzi n'agawa abaana ba Isirayiri ne baganywa.

²¹Awo Musa n'agamba Aloonni nti, "Abantu bano baakukoze ki, n'obaleetera okwonoona ennyo bwe batyo?"

²²Aloonni n'amuddamu nti, "Tonnyiigira nnyo, mukama wange, naawe abantu bano obamanyi, ng'emitima gyabwe bwe gyamanyiira okwonoona.

²³Banjambye nti, 'Tukolere bakatonda abanaatukulembra kubanga Musa ono eyatuggya mu nsi y'e Misiri, tetumanyi kimutuuseeko.'

²⁴Nange kwe kubagamba nti, 'Buli alina ebya zaabu abyeyambuleko,' ne babimpa ne mbiteeka mu muliro, ne bivaamu ennyana eno."

Abantu Abattibwa Abaleevi

²⁵Awo Musa bwe yalaba ng'abantu basasamadde, nga Aloonni yali abaleese ne basasamala, era ng'abalabe baabwe babasekerera,

²⁶n'ayimirira mu mulyango gw'olusiisira, n'agamba nti, "Ani ali ku ludda lwa MUKAMA? Ajje wano we ndi." Awo batabani ba Leevi bona ne bakuñjaanira w'ali.

²⁷N'abagamba nti, "Bw'ati MUKAMA Katonda wa Isirayiri bw'ayogera nti, 'Buli musajja yeesibe ekitala kye mu kiwato kye, muyiteeyite mu nsiisira okuva ku ludda olumu okutuuka ku ludda olulala, nga buli musajja atta muganda we ne mukwano gwe, ne muliraanwa we.'"

²⁸Abaleevi ne bakola nga Musa bwe yabalagira; era ku lunaku olwo abantu ng'enkumi ssatu ne battibwa.

²⁹Awo Musa n'agamba nti, "Mwawuddwa leero eri MUKAMA, bwe musse buli omu mutabani we, era ne muganda we; MUKAMA abawadde omukisa ku lunaku lwa leero."

³⁰Enkeera Musa n'agamba abantu nti, "Mwonoonye nnyo. Naye nze ka ɲjende eri MUKAMA ndabe obanga nnaatangiririra ekibi kyammwe."

³¹Bw'atylo Musa n'addayo eri MUKAMA, n'agamba nti, "Kitalo! Abantu bano nga boonoonye nnyo; bwe beekoledde bakatonda aba zaabu!"

³²Bw'oba osiima basonyiwe ekibi kyabwe; naye bwe kitaba kityo, nkwegayirira onsangule mu kitabo kyo ky'owandiise."

³³Naye MUKAMA n'agamba Musa nti, "Oyo yekka ankozeeko ekibi gwe ndisangula mu kitabo kyange.

³⁴Kaakano genda otwale abantu mu kifo ekyo kye nakutegeeza; era, laba, malayika wange aija kukukulembera. Naye ekiseera nga kituuse okubabonereza ndibabonerereza ddala olw'ekibi kyabwe."

³⁵Awo MUKAMA n'aleetera abantu kawumpuli, kubanga beekolera ennyana, Aloonii gye yababumbira.

Okuva 33

Okuzza Obuggyga Endagaano

¹Awo MUKAMA n'agamba Musa nti, "Vva mu kifo kino ogende, ggwe n'abantu be waggya mu nsi y'e Misiri, olage mu nsi gye nalayirira Ibulayimu ne Isaaka, ne Yakobo, nga njogera nti, 'Ndigiwa bazzukulu bammwe.'

²Ndiweereza malayika abakulemberenga; era ndigobamu Abakanani, n'Abamoli, n'Abakiiti, n'Abaperezi, n'Abakiivi n'Abayebusi.

³Yambuka mu nsi ekulukutiramu amata n'omubisi gw'enjuki. Naye sijja kugenda nammwe; sirwa kubazikiririza mu kkubo, kubanga muli bantu ab'ensingo enkakanyavu."

⁴Abantu bwe baawulira amawulire ago ag'ennaku, ne bakungubaga ne watabaawo ayambala eby'omu matu wadde eby'oku mikono ebyokwewoomya.

⁵Kubanga MUKAMA yali alagidde Musa nti, "Gamba abaana ba Isirayiri nti, 'Mulina omutima omukakanyavu, era singa ntambula nammwe okumala akaseera wadde katono katya, nzija kubazikiriza. Kale kaakano mweyambulemu ebyokwewoomya byammwe, ndyoke ndabe kye nnaakola.'"

⁶Bwe batyo abaana ba Isirayiri ne beeyambulamu eby'obugagga byabwe nga bali ku lusozi Kolebu.

⁷Kale, Musa yaddiranga eweema n'agisimba ebweru w'olusiisira, ewala ddala n'olusiisira; n'agiyita Eweema ya MUKAMA ey'Okukuŋŋaanirangamu. Ne buli eyeetaaganga MUKAMA, ng'agenda awali Eweema ya MUKAMA ey'Okukuŋŋaanirangamu, eyali ebweru w'olusiisira.

⁸Era buli Musa lwe yafulumanga n'alaga eri Eweema, abantu bona nga bayimirira mu miryango gy'eweema zaabwe ne batunuulira Musa okutuusa lwe yayingiranga mu Weema.

⁹Musa bwe yayingiranga mu Weema, empagi ey'ekire n'ekka n'eyimirira mu mulyango gw'Eweema; MUKAMA n'alyoka ayogera ne Musa.

¹⁰Abantu bwe baalabanga ng'empagi ey'ekire eyimiridde mu mulyango gw'Eweema, bona ne basituka ne basinza, buli omu mu mulyango gw'eweema ye.

¹¹Bw'atyo MUKAMA bwe yayogeranga ne Musa nga batunulaganye, ng'omuntu bw'ayogera ne mukwano gwe. Musa bwe yaddangayo mu lusiisira, omuweereza we, omuvubuka Yoswa mutabani wa Nuuni, ye n'asigalayo mu Weema.

Musa Atunuulira Ekitiibwa kya MUKAMA

¹²Musa n'agamba MUKAMA nti, "Obadde ontegeeza nti, 'Kulembera abantu bano,' naye omuntu gw'onontuma naye tomuntegeezessa. Ogambye nti, 'Nkumanyi awamu n'erinnya lyo, era onsanyusizza.'

¹³Obanga nkusanyusizza, njigiriza amakubo go ndyoke nkumanyi era nneeyongeranga okukusanyusa. Jjukira nti eggwanga lino be bantu bo."

¹⁴ MUKAMA n'addamu nti, "Nnaagendanga naawe, era nnaakuwummuzanga."

¹⁵Musa n'amugamba nti, "Obanga toogende naffe, totuggyga wano.

¹⁶Kale abantu balitegeerera ku ki nga Nkusanyusizza, nze n'abantu bo? Si lwa kubanga onooba ogenze naffe, ne tuba ba njawulo, nze n'abantu bo, nga twawukana ku bantu bona ab'oku nsi?"

¹⁷Awo MUKAMA n'agamba Musa nti, "Nzija kukola ekyo kyennyini ky'osabye; onsanyusizza, era nkumanyi awamu n'erinnya lyo."

¹⁸Musa n'agamba nti, "Nkwegayiridde, ndaga ekitiibwa kyo."

¹⁹ MUKAMA n'agamba nti, "Nzija kuggyayo obulungi bwange bwonna nga mbuyisa mu maaso go. Era nzija kukutegeeza erinnya lyange, MUKAMA. Buli gwe nnaayagalanga okukwatirwa ekisa, nnaamukwatirwanga ekisa, ne buli gwe nnaayagalanga okusaasira nnaamusaasiranga."

²⁰Era n'agamba nti, "Naye toyinza kulaba maaso gange, kubanga tewali muntu antunulako n'aba mulamu."

²¹MUKAMA n'agamba nti, "Waliwo wano okumpi nange ekifo ku lwazi kw'onooyimirira.

²²Ekitiibwa kyange bwe kinaaba kiyitawo, nnaakuteeka mu mpataanya mu lwazi, ne nkubikkako omukono gwange okutuusa lwe nnaamala okuyitawo.

²³Oluvannyuma omukono gwange nnaaguggyawo, n'olaba amabega gange; naye tojja kulaba ku maaso gange."

Okuva 34

Ebipande eby'Amayinja Ebyokubiri

¹ Awo MUKAMA n'agamba Musa nti, "Teekateeka ebipande bibiri eby'amayinja nga biri ebyasooka, nange nnaabiwandiikako ebigambo ebyali ku bipande ebyasooka bye wamenya.

² Weetegeke mu makya, ojje mu makya ago olinnye waggulu ku lusozi Sinaayi, olyoke onneeyanjulire eyo ku ntikko y'olusozi.

³ Tewasaana kubaawo muntu ajja naawe, era ku lusozi wonna wonna tewasaana kulabikawo muntu n'omu; era n'amagana n'ebisibo by'endiga tebisaana kuliira mu maaso ga lusozi."

⁴ Bw'atyo Musa n'atema mu mayinja ebipande bibiri nga bifaanana nga biri ebyasooka; n'akeera mu makya n'alinnya ku lusozi Sinaayi, nga MUKAMA bwe yamulagira, ng'asitudde n'ebipande eby'amayinja byombi mu mikono gye.

⁵ Awo MUKAMA n'akkira mu kire, n'ayimirira awo ne Musa, n'alangirira erinnya lye, MUKAMA.

⁶ MUKAMA n'ayita mu maaso ga Musa n'agamba nti, "Nze MUKAMA, MUKAMA Katonda alina ekisa n'okusaasira okungi, atasunguwala mangu, ajjudde obwesigwa n'okwagala okutaggwaawo.

⁷ Akuumma okwagala eri enkumi n'enkumi asonyiwa ebisobyo byabwe, n'obujeemu bwabwe, n'ebibi byabwe. Talema kubonereza oyo asingiddwa omusango. Abonereza abaana n'abazzukulu olw'ebisobyo bya bakadde baabwe n'ebya bajajajaabwe, okutuukira ddala ku mulembe ogwokusatu n'ogwokuna."

⁸ Amangwago Musa n'avuunama wansi, n'asinza.

⁹ N'agamba nti, "Obanga kaakano nkusanyusizza, Ayi MUKAMA, jjangu, MUKAMA, ogende naffe. Newaakubadde ng'abantu bano balina ensingo nkakanyavu, naye tusonyiwe ebyonoono byaffe n'ebibi byaffe, otukkirize tubeere abantu bo ab'obusika bwo."

¹⁰ Awo MUKAMA n'addamu nti, "Laba, nkola naawe endagaano. Nzija kukolera mu bantu bo ebyamagero ebitakolwangako mu nsi yonna, wadde mu ggwanga lyonna. Abantu bona b'oli nabo banaalaba eby'ekitalo MUKAMA by'anaakolera mu ggwe.

Okulabula ku Kusinza Ebifaananyi

¹¹ "Gondera bye nkulagira leero. Nange, gye mulaga, nzija kugobayo Abamoli, n'Abakanani, n'Abakiiti, n'Abaperezi, n'Abakiivi, n'Abayebusi.

¹² Kirungi weekuumbe oleme kukola ndagaano n'abatuuze ab'omu nsi gy'olagamu, kubanga bayinza okubafuukira omutego.

¹³ Olimenyaamenya ebyoto byabwe, obetente empagi zaabwe, n'otemaatema ebifaananyi byabwe ebibajje bye basinza.

¹⁴Tosinzanga katonda mulala yenna, kubanga Nze MUKAMA, ayitibwa Waabuggyga, ndi Katonda wa buggyga.

¹⁵“Temukolanga ndagaano ey'okukolagana n'abatuuze b'omu nsi omwo. Kubanga bwe baliba bagoberera bakatonda baabwe, nga bawaayo ssaddaaka, gamba omu ku bo n'abayita, mulirya ku biweebwayo byabwe ebyo.

¹⁶Era bwe muliwasiza batabani bammwe abamu ku bawala baabwe, abawala abo ne bagoberera bakatonda baabwe, balireetera batabani bammwe nabo okukola bwe batyo.

¹⁷“Temwekoleranga bakatonda mu byuma ebisaanuuse.

Amateeka ku Mbaga Ennonde

¹⁸“Embaga ey'Emigaati Eigitali Mizimbulukuse ogikwatanga. Munaamalanga ennaku musanvu nga mulya emigaati egitali mizimbulukuse, mu kiseera ekyategekebwa mu mwezi gwa Abibu nga bwe nablagira; kubanga mu mwezi gwa Abibu mwe mwaviira mu Misiri.

¹⁹“Ebiggulanda byonna byange, n'ennume zonna mu magana go embereberye, oba nte oba ndiga.

²⁰Endogoyi embereberye onoozinunulanga n'endiga, naye nga toginunudde ogimenyanga ensingo n'ogitta. Abaana bo abaggulanda bona obanunulanga. Era tewabanga ajja gye ndi engalo ensa.

²¹“Onookolanga okumala ennaku mukaaga, naye ku lunaku olw'omusantu n'owummula; ne mu biseera eby'okukabala n'eb yokukungula onoowummulanga.

²²“Onookwatanga Embaga eya Wiiki, n'Embaga ey'Amakungula g'Ebibala Ebibereberye eby'Enjaano, n'Embaga ey'Okuyingiza Amakungula ku nkomerero y'omwaka.

²³Abasajja bona mu mmwe banaalabikanga awali MUKAMA Katonda, Katonda wa Isirayiri, emirundi esatu mu buli mwaka.

²⁴Amawanga njenda kugagobawo wonna we muli, era ndigaziya n'ensalo zammwe. So tewalibaawo ayagala kutwala nsi yammwe nga mwambuse okulabika awali MUKAMA Katonda wammwe emirundi ego esatu mu mwaka.

²⁵“Temuwangayo kintu kyonna gye ndi ekirimu ekizimbulukusa nga mundeetedde ssaddaaka erimu omusaayi; era ennyama ya ssaddaaka ey'Embaga y'Okuyitako tesigalangawo kutuusa nkeera.

²⁶“Ebibala ebisinga obulungi mu ebyo ebisoose okuva mu ttaka lyo obitwalanga mu nnyumba ya MUKAMA Katonda wo. “Omwana gw'embuzi togufumbiranga mu mata ga nnyina waagwo.”

²⁷ Awo MUKAMA n'agamba Musa nti, "Wandiika ebigambo ebyo; kubanga nkoze endagaano naawe era ne Isirayiri ng'ebigambo ebyo bwe bigamba."

²⁸ Musa n'abeera eyo ne MUKAMA, n'amalayo emisana amakumi ana n'ebiro amakumi ana, nga talya mmere wadde okunywa amazzi. N'awandiika ku bipande ebigambo eby'Endagaano, ge Mateeka Ekkumi.

Amaaso ga Musa Agamasama

²⁹ Musa bwe yaserengeta okuva ku lusozi Sinaayi ng'akutte mu ngalo ze ebipande byombi eby'Endagaano, teyakimanya ng'obwenyi bwe bwali bumasamasa kubanga yali ayogedde ne MUKAMA.

³⁰ Era Alooni n'abaana ba Isirayiri bona bwe baatunula ku Musa, ne balaba ng'obwenyi bwe bumasamasa; ne batya okumusemberera.

³¹ Naye Musa n'abayita; bw'atyo Alooni n'abakulembeze b'abantu ne bajja gy'ali, Musa n'ayogera nabo.

³² Oluvannyuma abaana ba Isirayiri bona ne basembera, n'abategeeza amateeka gonna MUKAMA ge yamulagira ku lusozi Sinaayi.

³³ Awo Musa bwe yamala okwogera nabo, n'abikka obwenyi bwe olugoye.

³⁴ Naye Musa bwe yabanga agenda awali MUKAMA okwogera naye, ng'olugoye olubikka obwenyi bwe alwebikkula okutuusa lwe yavangayo. Bwe yakomangawo okutegeeza abaana ba Isirayiri MUKAMA by'amulagidde,

³⁵ baalabanga obwenyi bwe nga bumasamasa. Bw'atyo Musa ne yezzaako olugoye olubikka obwenyi bwe, okutuusa lwe yaddangayo eri MUKAMA okwogera naye.

Okuva 35

Ebiragiro bya Ssabiiti

¹ Awo Musa n'akuinjaanya ekibiina kyonna eky'abaana ba Isirayiri, n'abagamba nti, "Bino bye bintu MUKAMA by'abalagidde okukola.

² Munaakolanga emirimu mu nnaku omukaaga; naye olunaku olw'omusantu lunaabanga Lwassabbiiti, lutukuvu, munaaluwummulanga awali MUKAMA. Buli anaakoleranga omulimu ku lunaku olwo anattibwanga.

³ Temukumanga muliro mu nnyumba zammwe ku lunaku Lwassabbiiti."

Ekiragiro ky'Eweema ya MUKAMA

⁴ Musa n'agamba ekibiina kyonna eky'abaana ba Isirayiri nti, "Kino MUKAMA ky'alagidde.

⁵Mutoole ku bye mulina muweeyo eri MUKAMA. Buli omu aweeyo, nga bw'ayagala mu mutima gwe ebiweebwayo eri MUKAMA: "zaabu, ne ffeeza, n'ekikomo;

⁶n'olugoye olwa bbululu, n'olwa kakobe, n'olumyufu, n'olugoye olwa linena erangiddwa mu wuzi ennungi; n'obwoya bw'embuzi,

⁷n'amaliba g'endiga ennume amakunye amannyike mu langi emyufu, n'ekika ky'eddiba ekirala ekiwangaazi; n'embaawo z'omuti gwa akasiya,

⁸n'amatuta g'ettaala, n'ebiyakaloosa eby'okukozesa mu mafuta ag'okwawula, ne mu bubaane obw'okunyookeza,

⁹n'amayinja aga onuku n'amayinja amalala ag'omuwendo, ag'okutona ku kkanzu ey'obwakabona eyitibwa efodi era ne ku kyomukifuba.

¹⁰"Abo bona mu mmwe abakugu mu kukola, muveeyo mujje mukole ebyo byonna MUKAMA by'atulagidde:

¹¹"Eweema ya MUKAMA Omukunjaanirwa n'olugoye lwayo n'ekibikkako, n'ebisiba, n'embaawo, n'emikiikiro, n'empagi zaayo, n'ebituurwamu;

¹²essanduuko ey'Endagaano n'emisituliro gyayo, n'ekisaanikira, ye ntebe ey'okusaasira, n'eggigi erigisiikiriza;

¹³em meeza n'emisituliro gyayo ne byonna ebigureerako, n'emigaati gya MUKAMA egy'okulaga;

¹⁴ekikondo ky'ettaala n'ebigenderako, ettaala n'amatuta gaazo;

¹⁵ekyoto eky'okwoterezaamu obubaane n'emisituliro gyakyo; amatuta ag'okwawula, n'obubaane obw'akawoowo; olutimbe olw'omu mulyango oguyingira mu Weema ya MUKAMA;

¹⁶ekyoto eky'ebiweebwayo ebyokebwa n'ekitindiro kyakyo eky'ekikomo; emisituliro gyakyo ne byonna ebikozeserwako; ebbensani ey'ekikomo ne ky'etuulako;

¹⁷entimbe ez'oku bisenge eby'omu luggya n'empagi zaazo ne mwe zituula; n'olutimbe olw'omu mulyango ogulaga mu luggya;

¹⁸enkondo z'eweema n'ez'omu luggya n'emiguwa gyazo;

¹⁹ebiyambalo ebiruke ebyambalwa mu kuweereza mu Kifo Ekitukuvu, bye byambalo ebitukuvu ebya Alooni kabona, n'ebiyambalo bya batabani be bye bakozesa mu bwakabona nga baweereza."

Abantu Baleeta Ebirabo Byabwe

²⁰Awo abantu bona ab'ekibiina ky'abaana ba Isirayiri ne bava awali Musa ne bagenda.

²¹Buli eyayagala, era ng'omwoyo gwe bwe gwamukubiriza, n'awaayo eri MUKAMA eby'okukoza Eweema ya MUKAMA ey'Okukuŋŋaanirangamu n'ebikozesebwamu byonna, n'ebi'okukoza ebyambalo ebitukuvu.

²²Abasajja n'abakazi bona abaayagala mu mitima gyabwe ne bajja; ne baleeta ebikwaso eby'omuwendo, empeta ez'omu matu, n'empeta ez'oku ngalo, n'ebikomo, n'ebirala ebya zaabu ebitali bimu; buli muntu n'awaayo ekirabo ekya zaabu eri MUKAMA.

²³Era buli muntu eyalina olugoye olwa bbululu, oba olwa kakobe, oba olumyufu, oba olwa linena ennungi, oba olw'obwoya bw'embuzi; oba amaliba amakunye ag'endiga ensajja oba ag'embuzi, byonna ne babireeta.

²⁴Buli omu eyalina eky'okuwaayo ekya ffeeza oba eky'ekikomo, yakireeta n'akiwaayo eri MUKAMA; era na buli musajja eyalina olubaawo olwa akasiya nga luyinza okugasa mu mulimu ogwali gukolebwa, yaluleeta n'aluwaayo.

²⁵Abakazi bona abaali bamanyi ennyo okulanga ewuzi, ne balanga n'engalo zaabwe ewuzi eza bbululu, n'ezza kakobe, n'emyufu n'ezza linena omuyonde obulungi, ne bazireeta ne baziwaayo.

²⁶Era n'abakazi bona abaali abakugu era nga beeyagalidde, ne balanga ewuzi mu bwoya bw'embuzi.

²⁷Awo abakulembeze ne baleeta amayinja aga onuku, n'amayinja amalala ag'omuwendo, gasalibwe galyoke gatonebwe ku kkanzu ey'obwakabona eyitibwa efodi ne ku ky'omu kifuba.

²⁸Era ne baleeta n'ebjakaloosa, n'amafuta g'ettaala, n'amafuta ag'okwawula n'okukoza ku bubaane.

²⁹Abaana ba Isirayiri bona, abasajja n'abakazi, abaalina omutima ogwagala okuleeta ekintu kyonna olw'omulimu MUKAMA gwe yali alagidde Musa okukolebwa, ne bakireeta ng'ekiweebwayo kyabwe kye baawaayo eri MUKAMA nga beesiimidde.

Bezaaleeri ne Okoliyaabu n'abakozi

³⁰Awo Musa n'agamba abaana ba Isirayiri nti, "Muwulire. MUKAMA alonze Bezaaleeri mutabani wa Uli, muzzukulu wa Kuuli, ow'omu kika kya Yuda.

³¹MUKAMA amujuzza Omwoyo we, n'obusobozi, n'amagezi, n'okuteteenkanya, n'okutegeera, awamu n'obukozi obwa buli ngeri;

³²ayiye amajjolobera ag'okukolebwa mu zaabu ne ffeeza ne mu kikomo;

³³era n'ag'okusalwa mu mayinja ag'okutona, era n'ag'okwolebwa mu miti, n'okukola buli ngeri yonna ey'amagezi.

³⁴Era ye ne Okoliyaabu mutabani wa Akisamaki ow'omu kika kya Ddaani, MUKAMA abawadde obusobozi okuyigiriza abalala.

³⁵Abajuzza amagezi ag'obukugu mu mitima gyabwe okukola eby'emikono ebya buli ngeri ng'ebikolebwa abayiiya amajjolobera, oba abasala amayinja, oba abatunzi b'emidalizo n'ebimuli mu wuzi eza bbululu, n'eza kakobe n'emyufu mu bitambaala ebya linena omulungi, oba abalus, oba abakugu abakola ebintu byonna ebya buli ngeri n'abatetenkanya amajjolobera."

Okuva 36

¹"Bezaaleeri ne Okoliyaabu ne buli musajja mukugu yenna, MUKAMA gw'awadde obusobozi n'amagezi okumanya okukola omulimu gwonna ku kuzimba eweema ya MUKAMA, bajja kukola nga MUKAMA bw'alagidde."

²Awo Musa n'ayita Bezaaleeri ne Okoliyaabu, ne buli mukugu yenna MUKAMA gwe yali awadde amagezi n'obusobozi, era nga yeeyagalidde yekka okukola.

³Musa n'abakwasa ebirabo byonna abaana ba Isirayiri bye baali batonedde MUKAMA nga bwe baali beeyagalidde eby'okukozaesa eweema ya MUKAMA. Abantu ne bongera okuleeta ku byabwe ebya kyeyagalire buli nkya.

⁴Awo abakozi bali abakugu abaali bakola eweema ya MUKAMA ne bava ku mirimu gyabwe,

⁵ne bajja eri Musa ne bamugamba nti, "Ebirabo abantu bye baleese bisukkiridde obungi ku ebyo ebyetaagibwa okumala omulimu MUKAMA gwe yalagira okukolebwa."

⁶Awo Musa n'awa ekiragiro ne kibunyisibwa mu lusiisira lwonna nti, "Tewabaawo musajja oba mukazi ayongera okuleeta ekiweebwayo olw'omulimu gw'Eweema ya MUKAMA." Bwe batyo abantu ne bagaanibwa okwongera okuwaayo;

⁷kubanga ebyo abakozi bye baalina byali bimala omulimu ogwo era n'okufikkawo.

Eweema ya MUKAMA Ekolebwa

⁸Awo bannakinku bona mu basajja abakozi ne bakola eweema ya MUKAMA n'emitanda kkumi egya linena omunyoole omulungi ennyo, nga mulimu n'eba bbululu, ne kakobe, ne myufu, ne bakerubi nga batungiddwamu n'amagezi mangi.

⁹Emitanda gyonna gyali gyenkanankana; ng'omutanda ogumu guweza obuwanzu mita kkumi na bbiri n'ekitundu, ate obugazi mita emu ne desimoolo munaana.

¹⁰Baagatta emitanda etaano nga bagisengese, gumu ku gunnaagwo, n'emitanda emirala etaano nagyo ne bagigatta bwe batyo.

¹¹Ne batunga ejjango eza bbululu ku mukugiro gw'omutanda gw'entimbe ogukomererayo mu kitundu ekimu eky'entimbe etaano, era ne batunga n'ejjango endala mu ngeri y'emu ku ludda olulala.

¹²Baatunga ejjango amakumi ataano ku mutanda ogumu, era ne batunga ejjango endala amakumi ataano ku mukugiro gw'omutanda ku ludda olulala, ejjango nga zoolekaganye.

¹³Ne bakola ebikwaso ebya zaabu amakumi ataano, ne bakwasa wamu enjuuyi zombi ez'emitanda n'ebikwaso; eweema ya MUKAMA n'ebeera wamu nga nnamba.

¹⁴Ne bakola entimbe kkumi na lumu nga zirukiddwa mu bwoya bw'embuzi ne bazibikka ku Weema.

¹⁵Entimbe zonna ekkumi n'olumu zaali zenkanankana: ng'obuwantu mita kkumi na ssatu n'ekitundu, obugazi zaali mita emu n'obutundu munaana.

¹⁶Ne bagatta entimbe ttaano wamu ku bwazo, n'entimbe omukaaga nazo ne bazigatta ku bwazo.

¹⁷Ne batunga ejjango amakumi ataano ku mukugiro gw'entimbe ekomererayo ku bwazo, n'ejjango amakumi ataano endala ku mukugiro gw'entimbe omulala ku bwazo.

¹⁸Ne bakola ebikwaso eby'ekikomo amakumi ataano, ne babiyisa mu njango okunyweza enjuuyi zombi ez'entimbe ezo ng'ekintu ekimu.

¹⁹Ne bakola ekibikka ku Weema mu maliba g'endiga ennume nga gannyikiddwa mu langi emyufu; okwo ne babikkako amaliba g'ente ey'omu nnyanja.

²⁰Awo ne babajja embaawo mu muti gwa akasiya ne baziymiriza ne zikola entobo ya Weema.

²¹Buli lubaawo lwali mita nnya n'ekitundu obuwantu, ate ng'obugazi zaali sentimita nkaaga mu musanvu.

²²Buli lubaawo baaluteekako obubaawo obuyiseemu bubiri, obw'okukozesa mu kugatta, nga bulekawo amabanga agenkanankana. Embaawo zonna ez'entobo ya Weema ya MUKAMA bwe baazikola bwe batyo.

²³Baakola embaawo amakumi abiri ne bazissa ku ludda olw'obukiikaddyo obw'Eweema,

²⁴era ne bakola obubya obutono obwa ffeeza amakumi ana, ne babussa wansi w'obubaawo obuyiseemu obubiri ku buli lubaawo.

²⁵Ate ku ludda olw'obukiikkono olw'Eweema ya MUKAMA ne bakolerayo embaawo amakumi abiri,

²⁶n'entobo eza ffeeza amakumi ana, bbiri nga ziri wansi wa buli lubaawo.

²⁷Ne bakola embaawo mukaaga, ne baziteeka ku ludda olw'emabega wa Weema, lwe lw'ebugwanjuba;

²⁸era ne bakola embaawo endala bbiri ne bazissa ku nsonda ez'oku ludda olwo olw'ebugwanjuba.

²⁹Ku nsonda zino ebbiri, embaawo zombi baazisiba wamu nabansasaana okuvira ddala wansi okutuuka waggulu, ne bazinyweza n'empeta.

³⁰Noolwekyo waaliwo embaawo munaana, n'entobo eza ffeeza kkumi na mukaaga, nga buli lubaawo wansi waalwo eriyo bbiri bbiri.

³¹Ne bakola emikiikiro mu muti gwa akasiya. Emikiikiro etaano ne bagikozesa ku mbaawo eziri ku lusebenju lwa Weema olumu,

³²n'emikiikiro etaano ku mbaawo eziri ku lusebenju lwa Weema olulala, n'emikiikiro etaano ne bagikozesa ku mbaawo eziri ku ludda olw'emabega wa Weema olw'ebugwanjuba.

³³Ne bassaayo omulabba nga guyita wakati w'embawo nga guva ku ludda olumu okutuuka ku ludda olulala.

³⁴Embaawo ne bazibikkako zaabu, era ne bakola empeta eza zaabu ne bazisibisa emikiikiro; n'emikiikiro nagyo ne bagibikkako zaabu.

Eggigi Likolebwa

³⁵Baakola eggigi mu wuzi eza bbululu, ne kakobe, ne myufu ne linena omulebevu omulungi alangiddwa; era omukozi omukugu n'atungiramu bakerubi.

³⁶Ne baliwanika n'amalobo aga zaabu ku mpagi nnya ezaabajjibwa mu muti gwa akasiya, nga zibikkiddwako zaabu, era nga zisimbiddwa mu ntobo eza ffeeza.

³⁷Ne bakola olutimbe olw'omu mulyango gwa Weema mu wuzi eza bbululu, ne kakobe, ne myufu ne linena omulebevu alangiddwa obulungi.

³⁸Ne balukolera empagi ttaano nga bazibazze mu muti gwa akasiya, ne baziteekako n'amalobo gaazo. Ne babikka zaabu kungulu ku mpagi ne ku bisiba byazo. Entobo zaazo ettaano ne bazikola mu kikomo.

Okuva 37

Essanduuko ey'Endagaano Ekolebwa

¹ Awo Bezaaleeri n'akola Essanduuko mu muti gwa akasiya; ng'obuwantu bwayo mita emu ne desimoolo emu, n'obugazi sentimita nkaaga mu musanvu, n'obugulumivu nabwo sentimita nkaaga mu musanvu.

² N'agibikkako zaabu omuka ennyo kungulu ne munda, era n'agyetoolooza omuge ogwa zaabu.

³ N'agiweeseza empeta nnya eza zaabu, n'azisiba ku magulu gaayo ana, ng'empeta ebbiri ziri ku ludda lwayo olumu n'endala ebbiri ku ludda lwayo olulala.

⁴ N'abajja emisituliro mu muti ogwa akasiya, n'agibikkako zaabu,

⁵ n'agisonseka mu mpeta ziri okusituzanga essanduuko.

⁶ N'akolerako ekisaanikira, ye ntebe ey'okusaasira nga kya zaabu omuka ennyo; obuwantu bwakyo bwali mita emu ne desimoolo emu, n'obugazi sentimita nkaaga mu musanvu.

⁷ N'akolerako ne bakerubi babiri mu zaabu omuweese ku njuyi ebbiri ez'ekisaanikira, ye ntebe ey'okusaasira.

⁸ Kerubi omu yamuteeka ku ludda lumu olw'ekisaanikira, ye ntebe ey'okusaasira, ne kerubi omulala ku ludda olwokubiri, nga bakerubi bombi beekutte wamu n'ekisaanikirako, ye ntebe ey'okusaasira.

⁹ Ebiwaawaatiro bya bakerubi yabikola nga bibikkule nga bisonze waggulu, era nga bisiikirizza ekisaanikira, ye ntebe ey'okusaasira. Bakerubi ne batunulagana nga boolekedde ekisaanikira, ye ntebe ey'okusaasira.

Emmeeza Ekolebwa

¹⁰ N'akola n'emmeeza mu muti gwa akasiya, obuwantu bwayo sentimita kyenda, n'obugazi sentimita amakumi ana mu ttaano, n'obugulumivu sentimita nkaaga mu musanvu.

¹¹ N'agibikkako zaabu omuka ennyo, era n'agyetoolooza omuge ogwa zaabu.

¹² N'agikolerako olukugiro oluweza sentimita musanvu ne desimoolo ttaano obugazi, n'omuge ogwa zaabu okwebungulula olukugiro olwo.

¹³ N'aweesa empeta nnya eza zaabu, n'azisiba mu nsonda ennyo awali amagulu gaayo ana.

¹⁴ Empeta ezo yazissa kumpi n'olukugiro ziyyisbwemu emisituliro gy'emmeeza.

¹⁵ N'akola emisituliro gy'emmeeza mu muti gwa akasiya, n'agibikkako zaabu.

¹⁶ N'akola mu zaabu omuka, ebikozesewa eby'okubeeranga ku mmeeza: essowaani zaako, n'ebijiiko byako, n'ebibya eby'okufukanga ebiweebwayo eby'okunywa.

Ekikondo ky'Ettaala

¹⁷ Yakola ekikondo ky'ettaala nga kya zaabu omuka. Yakiweesazaako entobo yaakyo n'enduli, n'ebikopo ebifaanana ng'ebimuli, amatabi n'emitunsi n'ebimuli byako; byonna yabiweesa mu kyuma kya zaabu kimu bulambalamba.

¹⁸ Kwaliko amatabi mukaaga agafaanana ng'omutuula emisubbaawa; amatabi asatu nga gali ku ludda lumu n'amalala asatu nga gali ku ludda olulala.

¹⁹ Ku ttabi erimu kwaliko ebikopo bisatu nga bikoleddwa ng'ebimuli by'alumondi n'emitunsi n'ebimuli, ate bisatu ne bibeera ku ttabi eddala, n'ebirala bisatu ne bibeera ku buli limu ku matabi amalala okutuusa amatabi omukaaga gonna agava ku kikondo ky'ettaala lwe gaabuna.

²⁰ Ku kikondo ky'ettaala kwennyini kwaliko ebikopo bina ebyakolebwa ng'ebimuli by'alumondi n'emitunsi gyabyo n'ebimuli byako.

²¹ Omutunsi ogumu gwali wansi w'amatabi abiri agava ku kikondo ky'ettaala, n'omuntunsi ogwokubiri ne gubeera wansi w'amatabi abiri agaddirira, n'omutunsi ogwokusatu ne gubeera wansi w'amatabi abiri agaddako, amatabi gonna omukaaga ne gabuna.

²² Emitunsi n'amatabi gaako yabikola bumu n'ekikondo ky'ettaala mu zaabu omuweese omuka nga biri wamu.

²³ Ekikondo ky'ettaala n'akikolera ettaala musanvu, ne makansi ezikomola entambi, n'essowaani ez'okussaako ebisirinza, nga byonna abikoze mu zaabu omuka.

²⁴ Ekikondo ky'ettaala ne byonna ebigenderako yabikola mu zaabu omuka eyaweza obuzito bwa kilo amakumi asatu mu nnya.

Ekyoto eky'Okwoterezangako Obubaane

²⁵ Yakola ekyoto, mu miti gy'akasiya, okwoterezangako obubaane, nga kyenkanankana sentimita amakumi ana mu ttaano buli ludda mu buwanvu ne mu bugazi; n'obugulumivu bwa sentimita kyenda; n'amayembe gaakyo nga gali mu muti gumu nakyo.

²⁶ Ekyoto yakisiigako zaabu omuka kyonna, waggulu ne mu mbiriizi ne ku mayembe, n'akolerako omuge ogwa zaabu okukyebungulula.

²⁷ Wansi w'omuge mu mbiriizi z'ekyoto zombi, yakolerako empeta bbiri eza zaabu, okuyisangamu emisituliro gyakyo nga wabaddewo gye kitwalibwa.

²⁸ Emisituliro yagikola mu muti gwa akasiya, n'agisiigako zaabu.

²⁹ N'atabula amafuta amatukuvu ag'okwawula, n'ateekateeka obubaane obulongosebbwa ennyo, ng'abutabudde bulungi ng'omukugu mu byakaloosa bwe yandikoze.

Okuva 38

Ekyoto eky'ekiweebwayo Ekyokebwa

¹Yazimba ekyoto eky'ekiweebwayo ekyokebwa mu miti gy'akasiya, mita emu ne desimoolo ssatu obugulumivu, ne mita bbiri ne desimoolo ssatu obuwanvu, ate obugazi mita bbiri ne desimoolo ssatu.

²Ku nsonda zaakyo ennya yakolerako amayembe; ng'ekyoto n'amayembe yabibajja bumu mu nduli y'omuti emu. Ekyoto kyonna n'alyoka akibikkako ekikomo.

³Ate n'akola eby'okukozesa ku kyoto: ensaka, n'ebisena evvu, n'ebbensani, n'ewuuma z'ennyama, ne fulampeni. Ebyo byonna yabikola mu kikomo.

⁴Ekyoto yakikolera ekitindiro eky'obutimba obw'ekikomo, n'akireebeeseza ku mukiikiro gw'ekyoto, n'akissa mu kyoto okutuuka mu makkati gaakyo.

⁵N'akola empeta nnya ku nsonda ennya ez'ekitindiro ky'ekikomo nga ze z'okuwanirira emisituliro.

⁶Emisituliro gino yagibajja mu muti gwa akasiya, n'agibikkako ekikomo.

⁷N'asonseka emisituliro egyo ng'agiyisa mu mpeta mu mbiriizi z'ekyoto, gikozesebwenga ng'ekyoto kisitulwa. Yakikola n'embaawo nga wakati kya muwulukwa.

⁸N'akola ebbensi ennya ey'ekikomo n'akameeza kaayo, bye yaweesa okuva mu ndabirwamu ez'ekikomo ezaagabwa abakazi abaaweerezanga ku mulyango gw'Eweema ya MUKAMA ey'Okukuŋñaanirangamu.

Oluggyga Iw'Eweema ya MUKAMA

⁹Ekyaddirira, yakola oluggyga. Ku luuyi olw'obukiikkaddyo, oluggyga lwali obuwanvu mita amakumi ana mu mukaaga, nga lulina amagigi aga linena omulungi omulebevu alangiddwa,

¹⁰n'ebikondo amakumi abiri, n'entobo mwe bituula ez'ekikomo amakumi abiri, nga kuliko amalobo aga ffeeza n'emikiikiro egya ffeeza.

¹¹Ne ku luuyi olw'obukiikkono oluggyga lwali obuwanvu mita ana mu mukaaga, n'ebikondo amakumi abiri, n'ebikolo byabyo mwe bituula eby'ekikomo amakumi abiri, nga ku bikondo kuliko amalobo aga ffeeza n'emikiikiro gyalo gya ffeeza.

¹²Ku luuyi olw'ebugwanjuba oluggyga lwali lwa mita amakumi abiri mu bbiri, ne desimoolo ttaano nga luliko entimbe, n'ebikondo kkumi, n'entobo kkumi; n'amalobo n'emikiikiro nga bya ffeeza.

¹³Ne ku luuyi olw'ebuvanjuba oluggyga lwali obugazi mita amakumi abiri mu bbiri n'obutundu butaano.

¹⁴Ku ludda olumu olw'omulyango kwaliko amagigi obuwantu mita mukaaga n'obutundu munaana, n'ebikondo bisatu n'entobo zaabyo ssatu.

¹⁵Ne ku ludda olulala olw'omulyango nakwo kwaliko entimbe obuwantu mita mukaaga n'obutundu munaana, era n'ebikondo bisatu n'entobo zaabyo ssatu.

¹⁶Entimbe zonna okwebungulula oluggya zaali za linena omulungi omulebevu alangiddwa.

¹⁷Entobo z'ebikondo zaali za kikomo, naye amalobo n'emikiikiro gyako nga bya ffeeza, ne ku mitwe gyabyo nga kubikkiddwako ffeeza; bwe bityo ebikondo byonna eby'omu luggya byaliko emikiikirogya ffeeza.

¹⁸Olutimbe olw'omu mulyango gw'oluggya lwakolebwa mu linena omulungi omulebevu alangiddwa obulungi, nga lutungiddwamu amajjolobera mu wazi eza bbululu, ne kakobe ne myufu. Lwali luweza obuwantu mita mwenda n'obugulumivu mita bbiri n'obutundu busatu, ng'entimbe ez'oluggya bwe zaali.

¹⁹Lwalina empagi nnya, n'entobo zaazo nnya nga za kikomo, n'amalobo gaazo n'emikiikiro nga bya ffeeza, ne kungulu kwonna ne kubikkibwako ffeeza.

²⁰Enkondo zonna ez'Eweema ya MUKAMA n'okwebungulula oluggya zaali za kikomo.

Ebyakozesebwaku Weema ya MUKAMA

²¹Bino bye bintu byonna ebyakozesebwaku Weema, Eweema ya MUKAMA ey'Obujulizi, nga Musa bwe yalagira okubibala bikozesebwewe Abaleevi nga balabirirwa Isamaali mutabani wa Alooni kabona.

²²Bezaaleeri, mutabani wa Uli muzzukulu wa Kuuli, ow'omu kika kya Yuda, n'akola ebyo byonna MUKAMA bye yalagira Musa;

²³baakolera wamu ne Okoliyaabu, mutabani wa Akisamaki ow'omu kika kya Ddaani, eyali omukugu ennyo mu kwola ne mu kutetenkanya, n'okutunga amajjolobera mu linena ennungi endebevu ennange n'ewuzi eza bbululu ne kakobe ne myufu.

²⁴Zaabu yenna eyali aweereddwayo eri MUKAMA, eyakozesebwamu kuzimba ekifo ekitukuvu, yali nga ttani emu, ng'okupima kw'Awatukuvu okutongole bwe kuli.

²⁵Ne ffeeza eyaweebwayo abaabalibwa nga bava mu kibiina mu kubala abantu, yali wa kilo enkumi ssatu mu ebikumi bina, ng'okupima kw'Awatukuvu okutongole bwe kuli.

²⁶Noolwekyo, buli muntu yawangayo gulaamu ttaano ne desimoolo ttaano ng'okupima kw'Awatukuvu okutongole bwe kuli ng'aweebwayo abo abaabalibwa nga bava ku myaka egy'obukulu amakumi abiri n'okweyongerayo,

bonna baawera abasajja obusiriivu mukaaga mu enkumi ssatu mu bitaano mu ataano.

²⁷Ffeeza ow'obuzito bwa kilo enkumi ssatu mu ebikumi bina ye yasaanuusibwa okukolamu entobo ekikumi ez'Awatukuvu n'eggigi: noolwekyo, nga buli kilo amakumi asatu mu nnya zikola entobo emu.

²⁸Kilo amakumi asatu ezaasigalawo zaakolwamu amalobo ag'oku bikondo n'emikiikiro gyabyo, n'okubikka ku mitwe gy'ebikondo.

²⁹Ekikomo ekyaweebwayo eri MUKAMA kyali kilo enkumi bbiri mu ebikumi bina.

³⁰Omwo Bezaaleeri mwe yakola ekituurwamu eky'omulyango gw'Eweema ya MUKAMA ey'Okukunjjaanirangamu, n'ekyoto eky'ekikomo, n'ekitindiro eky'obutimba eky'ekikomo, n'ebikozesebwa ebirala byonna eby'ekyoto,

³¹n'ekituurwamu okwebungulula oluggyga, n'ekituurwamu eky'omulyango omunene ogw'oluggyga, n'enkondo zonna ez'Eweema ya MUKAMA, n'enkondo zonna okwebungulula oluggyga.

Okuva 39

Ebyambalo by'Obwakabona

¹Awo ne bakola, mu wuzi eza bbululu; ne kakobe ne myufu, ebyambalo ebirukiddwa obulungi eby'okuweererezangamu mu Kifo Ekitukuvu. Ne bakolera ne Alooni ebyambalo ebitukuvu, nga MUKAMA bwe yalagira Musa.

Ekkanzu ey'obwakabona Ennyimpi Eyitibwa Efodi

²Awo ne bakola ekkanzu ey'obwakabona eyitibwa efodi mu wuzi eza zaabu, ne bbululu, ne kakobe ne myufu, ne linena omulebevu omulange.

³Ne baweesa zaabu ey'oluwegere, ne bagisala obulere ne babukozesa awamu n'ewuzi eza bbululu, ne kakobe, ne myufu ne linena omulebevu omulangi omulange, nga bikoleddwa mu majjolobera agakoleddwa n'obukugu.

⁴Ekkanzu ey'obwakabona eyitibwa efodi ne bagikolera eby'okubibegabega bibiri nga bitungiddwa w'ekoma, n'egattibwa bulungi.

⁵Ne bakola omusipi gwayo n'amagezi mangi ng'agaakola ekkanzu ey'obwakabona, n'ebikozesebwa nga bye bimu. Ewuzi nga za zaabu, ne bbululu, ne kakobe, ne myufu, ne linena omulebevu alangiddwa; nga MUKAMA bwe yalagira Musa.

⁶Ne baddira amayinja ga onuku ne bagakwasiza mu mapeesa aga zaabu, ng'amayinja gawandiikiddwako, ng'empeta bw'ewandiikwako, amannya g'abaana ba Isirayiri.

⁷Ne bagakwasiza ku byokubibegabega eby'ekkanzu ey'obwakabona eyitibwa efodi, okubeeranga amayinja g'ekijukizo ky'abaana ba Isirayiri; nga MUKAMA bwe yalagira Musa.

Ekyomukifuba

⁸Ne bakola ekyomukifuba, nga mulimu gwa kikugu ng'ogw'ekkanzu ey'obwakabona eyitibwa efodi, mu wuzi za zaabu, ne bbululu, ne kakobe ne myufu ne linena omulebevu omulange.

⁹Kyali kyenkanankana, buli ludda sentimita amakumi abiri mu bbiri ne desimoolo ttaano nga kimaze okuwetebwamu wakati.

¹⁰Ne batungirako ennyiriri nnya ez'amayinja ag'omuwendo omungi. Mu lunyiriri olusooka bassaamu amayinja: sadiyo, ne topazi, ne kaabankulo;

¹¹ne mu lunyiriri olwokubiri bassaamu amayinja: nnawandagala, ne safiro ne alimaasi;

¹²ne mu lunyiriri olwokusatu bassaamu amayinja: jasinta, ne ageti, ne amesusito;

¹³ne mu lunyiriri olwokuna bassaamu amayinja: berulo, ne onuku, ne yasipero; ne gategekebwa mu fuleemu eya zaabu.

¹⁴Waaliwo amayinja ag'omuwendo kkumi n'abiri, nga ku buli limu kusaliddwako erimu ku manya g'abaana ba Isirayiri. Gaasalibwa bulungi ng'obubonero obuwoolebwa nga ku buli limu kuliko erinnya lyako okumalirayo ddala amanya g'ebika ekkumi n'ebibiri.

¹⁵Ku kyomukifuba baakolerako enjegere ennange ng'emiguwa, nga za zaabu omuka;

¹⁶ne bakola fuleemu bbiri eza zaabu n'empeta bbiri eza zaabu; ne bassa empeta ezo zombi ku mikugiro ebiri egy'ekyomu kifuba.

¹⁷Ne bayisa enjegere ebbiri mu mpeta ebbiri ezaali ku mikugiro gy'eky'omu kifuba.

¹⁸Ne baddira enjuuyi ebbiri ezaasigalawo ez'enjegere ne bazikwasiza ku fuleemu ebbiri, ne bazinywereza mu maaso g'eb'y'okubibegabega byombi eby'ekkanzu ey'obwakabona eya efodi.

¹⁹Era baakola empeta bbiri eza zaabu ne bazitunga ku mikugiro ebiri egy'ekyomu kifuba ku luuyi olw'omunda olwali luliraanye ekkanzu ey'obwakabona eya efodi.

²⁰Ne bakolayo empeta endala bbiri eza zaabu ne baziteeka mu maaso mu bitundu byombi ebya wansi eby'eb'y'okubibegabega eby'ekkanzu

ey'obwakabona eya efodi, wagguluko okumpi n'oluzizi lw'omusipi lw'ekkanzu ey'obwakabona eya efodi.

²¹Baasiba empeta ez'oku kyomukifuba wamu n'empeta z'ekkanzu ey'obwakabona eya efodi n'akaguwa aka bbululu, ne bakagatta n'omusipi ekyomukifuba kireme kutaggulukuka ku kkanzu ey'obwakabona eya efodi. Byakolebwa nga MUKAMA bwe yalagira Musa.

Ebyambalo eby'Obwakabona ebirala

²²Baakola ekyambalo eky'omunda mu kkanzu ey'obwakabona eya efodi, nga kiruke era nga kya bbululu kyonna.

²³Ne bassa ekituli wakati mu kyambalo omw'okuyisa omutwe. Ku kituli ekyo ne beetooloozaako omuge omuyonde ng'omuleera kireme okuyulika.

²⁴Okwetooloola ebirenge by'ekyambalo ekyo wansi ne batungayo amajjolobera mu wuzi eza bbululu, ne kakobe, ne myufu, ne linena omulebevu omulange obulungi.

²⁵Era ne bakola n'obude obwa zaabu omuka, ne bagenda nga babutobeka mu majjolobera;

²⁶baatunga amajjolobera ne baddirizaako akade, ate ne batunga amajjolobera ne baddirizaako akade, okwetooloola ebirenge by'ekyambalo ekyo eky'okuweererezangamu; nga MUKAMA bwe yalagira Musa.

²⁷Era ne bakolera Aloonni n'abaana be amakooti agaalukibwa mu wuzi eza linena omulebevu omulungi.

²⁸Ne bakola n'ekitambaala eky'oku mutwe mu linena omulebevu omulungi, era n'enkuufiira ne bazikola mu linena omulebevu omulungi; ne bakola n'empale mu linena omulebevu omulungi omulange,

²⁹n'omusipi mu linena omulebevu omulungi omulange ow'ewuzi eza bbululu, ne kakobe ne myufu nga zitungiddwa ng'omudalizo n'amagezi mangi; nga MUKAMA bwe yalagira Musa.

³⁰Era ne bakola akapande ak'engule entukuvu mu zaabu omuka, ne bayolako ebigambo, nga bw'owandiika ku kabonero, nti: Mutukuvu wa MUKAMA.

³¹Ne bakasibako akakoba akatunge obulungi aka bbululu, kakanywerezenga waggulu ku kitambaala ky'oku mutwe; nga MUKAMA bwe yalagira Musa.

Okumaliriza omulimu gw'Eweema ya MUKAMA

³²Bwe gutyo omulimu gwonna ogw'okukola Eweema ya MUKAMA, eweema ey'Okukunjaanirangamu ne guggwa; ng'abaana ba Isirayiri bakoze ebyo byonna nga MUKAMA bwe yalagira Musa.

³³Awo Weema ya MUKAMA ne bagireetera Musa; Eweema ya MUKAMA yonna ne byonna ebyali bigirimu: ebisiba byayo, n'embaawo, n'emikiikiro, n'empagi zaayo, n'ebituurwamu;

³⁴ekibikkako eky'amaliba g'endiga amakunye amannyike mu langi emyufu, n'amaliba g'embuzi amakunye, n'eggigi ery'okutimba;

³⁵essanduuko ey'Endagaano n'emisituliro gyayo n'ekisaanikira, ye ntebe ey'okusaasira;

³⁶emmeeza ne byonna ebigibeerako, n'emigaati gya MUKAMA eg'yolubeerera;

³⁷ekikondo ky'ettaala ekya zaabu omuka, n'ettaala zaako n'ebigenderako ebikozesewa, n'amatuta gaazo;

³⁸ekyoto ekya zaabu, amatuta ag'okwawula n'obubaane obw'akawoowo, n'olutimbe olw'omulyango oguyingira mu Weema ya MUKAMA;

³⁹ekyoto eky'ekikomo n'ekitindiro kyakyo eky'ekikomo, emisituliro gyakyo ne byonna ebikozesewako; ebbensi ne ky'etuulamu;

⁴⁰entimbe ez'oku bisenge, eby'omu luggya n'empagi zaazo ne mwe zituula, n'olutimbe olw'omu mulyango oglaga mu luggya, emiguwa gyalwo n'enkondo zaalwo; ne byonna ebikozesewa olw'emirimu gy'omu Weema ya MUKAMA, eweema ey'Okukuñjaanirangamu;

⁴¹ebiyambalo ebiruke obulungi ebyambalwa mu kuweereza mu Kifo Ekitukuvu, ebyambalo ebitukuvu ebya Aloon kabona, n'ebiyambalo bya batabani be bye bakozesa mu bwakabona nga baweeereza.

⁴²Nga MUKAMA bwe yalagira Musa mu byonna, bwe batyo abaana ba Isirayiri omulimu gwonna bwe baagukola.

⁴³Awo Musa n'akebera omulimu gwonna, era n'alaba nga bagumalirizza. Nga MUKAMA bwe yalagira, nabo bwe batyo bwe baagukola. Awo Musa n'abasabira omukisa.

Okuva 40

Okusimba Eweema ya MUKAMA

¹Awo MUKAMA n'agamba Musa nti,

²"Ku lunaku olw'olubereberye olw'omwezi ogw'olubereberye kw'olisimbira Eweema ya MUKAMA, eweema ey'Okukuñjaanirangamu.

³Essanduuko ey'Endagaano oligiyingiza mu Weema; Essanduuko n'olyoka ogisiikiriza n'eggigi.

⁴Oliyingiza emmeeza, n'otegeka bulungi byonna ebigikolerwako. Oliyingiza ekikondo ky'ettaala era n'otegekako ettaala zaakwo n'ozikoleeza.

⁵Era oliteeka ekyoto ekya zaabu eky'okwoterezangako obubaane mu maaso g'Essanduuko ey'Endagaano, n'ossaawo olutimbe mu mulyango gw'Eweema ya MUKAMA.

⁶"Ekyoto eky'ekiweebwayo ekyokebwa olikissa mu maaso g'omulyango ogwa Weema ya MUKAMA, weema ey'Okukuñjaanirangamu,

⁷olyoke oteeke ebbensani wakati wa Weema ya MUKAMA ey'Okukuñjaanirangamu n'ekyoto, mu bbensani otekemu amazzi.

⁸Olikola oluggyga okwebungulula Weema ya MUKAMA, n'ossaawo olutimbe mu mulyango oguyingira mu luggyga.

⁹"Oliddira amafuta ag'okwawula n'ogamansa ku Weema ya MUKAMA ne byonna ebigrimu, olyoke oyawule Eweema ya MUKAMA n'ebigrimu byonna, ebeere ntukuvu.

¹⁰Olimansira amafuta ku kyoto eky'ebiweebwayo ebyokebwa n'ebikozesebwako byonna, n'oyawula ekyoto, bwe kityo ekyoto kiribeera kitukuvu nnyo.

¹¹Era n'ebbensani oligimansirako amafuta, ne kw'etuula, n'ogyawula, n'ogitukuza.

¹²"Olireta Aloon ne batabani be ku mulyango gw'Eweema ya MUKAMA ey'Okukuñjaanirangamu, n'obanaaza n'amazzi,

¹³n'oyambaza Aloon ebyambalo ebitukuvu n'omusiigako amafuta n'omwawula, alyoke ampeereze nga kabona.

¹⁴Olireta ne batabani be n'obambaza ekkanzu ey'obwakabona,

¹⁵n'obasiigako amafuta, nga bwe wasiize ku kitaabwe, balyoke bampeereze nga bakabona: era okusiigibwako amafuta okwo kulibafuula bakabona ebbanga lyonna mu mirembe gyabwe."

¹⁶Musa bw'atyo n'akola ebyo byonna nga MUKAMA bwe yamulagira.

¹⁷Awo ku lunaku olusooka mu mwezi ogw'olubereberye, mu mwaka ogwokubiri, Eweema ya MUKAMA n'esimbibwa.

¹⁸Musa n'asimba Eweema ya MUKAMA; n'ateekateeka ebya wansi mw'etuula, n'ategeka olukangaga lwayo, n'asimba empagi zaayo;

¹⁹n'assaako ekibikka ku Weema ya MUKAMA, nga MUKAMA bwe yamulagira.

²⁰N'addira Endagaano, ey'ebipande eby'amayinja okwasalibwa Amateeka Ekkumi, n'agiteeka munda mu Ssanduuko ey'Endagaano, n'assa emisituliro ku Ssanduuko ey'Endagaano, n'assaako kungulu ekisaanikira, ye ntebe ey'okusaasira;

²¹n'ayingiza Essanduuko ey'Endagaano munda mu Weema ya MUKAMA, n'atimbawo eggigi, n'asiikiriza Essanduuko ey'Endagaano, nga MUKAMA bwe yalagira Musa.

²²N'ayingiza emmeeza mu Weema ya MUKAMA ey'Okukuñjaanirangamu, n'agiteeka ku ludda olw'Obukiikkono olwa Weema ya MUKAMA, wabweru w'eggigi,

²³n'assaako emigaati ng'agitegese bulungi awali MUKAMA, nga MUKAMA bwe yalagira Musa.

²⁴N'assa ekikondo ky'ettaala mu Weema ya MUKAMA ey'Okukuñjaanirangamu ku ludda olw'Obukiikkaddyo obw'Eweema ya MUKAMA, okwolekera emmeeza,

²⁵n'ategeka ettaala awali MUKAMA, nga MUKAMA bwe yalagira Musa.

²⁶N'ayingiza ekyoto ekya zaabu mu Weema ya MUKAMA ey'Okukuñjaanirangamu mu maaso g'eggigi,

²⁷n'ayokerako obubaane obwa kawoowo, nga MUKAMA bwe yalagira Musa.

²⁸N'ateeka olutimbe olw'omu mulyango gw'Eweema ya MUKAMA mu kifo kyalwo.

²⁹N'ateeka ekyoto eky'ebiweebwayo ebyokebwa ku mulyango gw'Eweema ya MUKAMA, weema ey'Okukuñjaanirangamu, n'aweerayo okwo ekiweebwayo ekyokebwa eky'obuwunga, nga MUKAMA bwe yalagira Musa.

³⁰N'atereeza ebbensi wakati wa Weema ya MUKAMA ey'Okukuñjaanirangamu n'ekyoto, n'assaamu amazzi ag'okunaaba;

³¹Musa ne Alooni ne batabani ba Alooni mwe baanaabiranga engalo zaabwe n'ebigere byabwe.

³²Buli lwe baayingiranga mu Weema ya MUKAMA ey'Okukuñjaanirangamu, ne buli lwe baasembereranga ekyoto nga banaaba, nga MUKAMA bwe yalagira Musa.

³³N'akola oluggyga okwebungulula Weema ya MUKAMA n'ekyoto, n'assaawo olutimbe mu mulyango oguyingira mu luggy. Bw'atyo Musa omulimu n'agumaliriza.

Ekitiibwa kya MUKAMA

³⁴Awo ekire ne kibuutikira Eweema ya MUKAMA ey'Okukuñjaanirangamu, yonna n'ejjula ekitiibwa kya MUKAMA.

³⁵Musa n'atasobola kuyingira mu Weema ya MUKAMA ey'Okukuñjaanirangamu, kubanga ekire kyagibuutikira, n'ekitiibwa kya MUKAMA ne kijijula.

³⁶Mu lugendo lwabwe lwonna, ekire bwe kyaggyibwanga ku Weema ya MUKAMA, olwo abaana ba Isirayiri nga basitula nga batambula;

³⁷naye ekire bwe kitaggyibwangako ku Weema ya MUKAMA, olwo nga tebasitula kutambula okutuusa ku lunaku lwe kyaggyibwangako.

³⁸Ekire kya MUKAMA kyabeeranga ku Weema ya MUKAMA emisana, ate ekiro nga mu kire ekyo mubaamu muliro, ng'abaana ba Isirayiri bona ebyo babiraba mu lugendo lwabwe lwonna.

Ebyabaleevi

Ebyabaleevi 1

Etteeka ery' Ekiweebwayo Ekyokebwa

¹ Awo MUKAMA n'ayita Musa, n'ayogera naye ng'asinziira mu Weema ya MUKAMA ey'Okukunyjaanirangamu. N'amulagira nti,

² "Yogera n'abaana ba Isirayiri obagambe nti, 'Omuntu yenna mu mmwe bw'aneetesanga okuleeta ekiweebwayo eri MUKAMA, anaaleetanga ekiweebwayo kya nte ng'agiggya mu kiraalo kye, oba endiga oba embuzi ng'agiggya mu kisibo kye.'

³ "Ekiweebwayo bwe kinaabanga ekiweebwayo ekyokebwa nga kiva mu kiraalo ky'ente, anaawangayo seddume etaliiko kamogo. Anaagyereeteranga n'agiweerayo ku mulyango gwa Weema ya MUKAMA ey'Okukunyjaanirangamu, kiryoche kikkirizibwe eri MUKAMA.

⁴ Omuntu aleese ekiweebwayo ekyo ekyokebwa anaakwatanga omutwe gwakyo, era kinakkirizibwanga ku lulwe kiryoche kimutangiririre olw'ebibi bye.

⁵ Seddume eyo anaagittiranga mu maaso ga MUKAMA; era batabani ba Aloon, bakabona, banaddiranga omusaayi gwayo ne baguwaayo eri MUKAMA nga bagumansira ku kyoto okwebungulula enjuuyi zonna ez'ekyoto ekiri awo okumpi n'omulyango gwa Weema ya MUKAMA ey'Okukunyjaanirangamu.

⁶ Awo ekiweebwayo ekyo ekyokebwa anaakibaagangako eddiba, n'akitematemamu ebifi.

⁷ Batabani ba Aloon, kabona, banaakumanga omuliro mu kyoto, ne batindikira bulungi enku ku muliro ogwo.

⁸ Awo batabani ba Aloon, bakabona, banaategekanga bulungi ebifi ebyo, nga n'omutwe n'amasavu babitaddeko; banaabissanga ku nku ezikoledde omuliro ku kyoto.

⁹ Eyaleese ekiweebwayo ekyo anaanaazanga n'amazzi eby'omu lubuto n'amagulu; ebyo byonna kabona anaabyokyanga ku kyoto ng'ekiweebwayo ekyokebwa, ekyokedda mu muliro ne kivaamu evvumbe eddungi erisanyusa MUKAMA.

¹⁰ "Ekinaaleetebwanga okuba ekiweebwayo ekyokebwa bwe kinaavanga mu kisibo, oba ndiga oba mbuzi, omuntu oyo anaawangayo ennume etaliiko kamogo.

¹¹ Anaagittiranga ku luuyi olwakkono olw'ekyoto mu maaso ga MUKAMA, era batabani ba Aloon, bakabona, banaamansiranga omusaayi gwayo ku njuyi zonna ez'ekyoto okukyebungulula.

¹²Anaagitemaatemangamu ebifi; era kabona anaategekanga bulungi ebifi ebyo, nga n'omutwe n'amasavu abitaddeko, n'abissa ku nku ezikoledde omuliro ku kyoto.

¹³Eyaleese ekiweebwayo ekyo anaanaazanga n'amazzi eby'omu lubuto n'amagulu; ebyo byonna kabona anaabiwangayo, n'abyokya ku kyoto, nga kye kiweebwayo ekyokebwa ekyokeddwa mu muliro, ne kivaamu evvumbe eddungi erisanyusa MUKAMA.

¹⁴"Ekiweebwayo ekyokebwa eri MUKAMA bwe kinaabanga eky'ennyonyi, omuntu anaaleetanga ekiweebwayo eky'amayiba oba eky'enjiibwa ento.

¹⁵Kabona anaaleetanga ennyonyi eyo ku kyoto n'aginyoola omutwe n'agukutulako, n'agwokya ku kyoto; omusaayi gwayo anaagukenenuliranga mu mbiriizi z'ekyoto.

¹⁶Anaagiggyangamu ekisakiro kyayo n'ebikirimu, n'akisuula ku ludda olw'ebuvanjuba olw'ekyoto mu kifo awayiyibwa evvu.

¹⁷Anaagikwatanga ebiwaawaatiro n'agiyuza; kyokka taagiryebulirengamu ddala. Anaagyokeranga ku nku ezikoledde omuliro mu kyoto; nga kye kiweebwayo ekyokebwa ekyokeddwa mu muliro ne kivaamu evvumbe eddungi erisanyusa MUKAMA.

Ebyabaleevi 2

Etteeka ery'Ekiweebwayo eky'Empeke

¹"Omuntu yenna bw'anaaleetanga eri MUKAMA ekiweebwayo eky'emmere ey'empeke; empeke anaamalanga kuzisa, n'aleeta obuwunga obulungi. Anaabufukangako amafuta ag'omuzeeyituuni, n'ateekako n'obubaane,

²n'alyoka abuleetera batabani ba Aloon, bakabona. Kabona anaayoolanga olubatu lw'obuwunga obulimu amafuta ag'omuzeeyituuni n'obubaane, n'abwokya mu kyoto ng'ekijjukizo, nga kye kiweebwayo ekyokeddwa mu muliro ne kivaamu evvumbe eddungi erisanyusa MUKAMA.

³Obuwunga obunaasigalangawo ku kiweebwayo, bunaatwalibwanga Aloon ne batabani be, nga kye kitundu ekitukuvu ennyo eky'ekiweebwayo eri MUKAMA ekyokeddwa mu muliro.

⁴"Bw'onooleetanga emigaati egifumbiddwa mu oveni nga kye kiweebwayo, ginaabanga emigaati egikoleddwa mu buwunga obulungi nga mutabuddwamu n'amafuta ag'omuzeeyituuni nga tegiriimu kizimbulukusa, oba bunaabanga obusukuuti obw'oluwegere obutaliimu kizimbulukusa nga busiigiddwako amafuta ag'omuzeeyituuni.

⁵Ekiweebwayo kyo bwe kinaabanga eky'emmere ey'empeke nga kitegekeddwa ku lukalango, kinaakolebwanga mu buwunga obulungi obutaliimu kizimbulukusa nga butabuddwamu amafuta ag'omuzeeyituuni.

⁶Onookimenaamenyanga mu butundutundu, n'okifukako amafuta ag'omuzeeyituuni. Ekyo kye kiweebwayo eky'emmere ey'empeke.

⁷Ekiweebwayo kyo bwe kinaabanga eky'emmere ey'empeke nga kyakufumbirwa mu fulampeni, kinaateekewatheekebwanga mu buwunga obulungi n'amafuta ag'omuzeeyituuni.

⁸Onooleeteranga MUKAMA ekiweebwayo ekyo eky'emmere ey'empeke ekitabuddwa mu bintu ebyo; bwe kinaakwasibwanga kabona, ye anaakireetanga ku kyoto.

⁹Awo kabona anaggyanga ku kiweebwayo eky'emmere ey'empeke, ekitundu eky'ekijjukizo kyakyo, n'akyokya ku kyoto, nga kye kiweebwayo ekyokeddwa mu muliro ne kivaamu evvumbe eddungi erisanyusa MUKAMA.

¹⁰Era ekinaafikkanga ku kiweebwayo eky'emmere ey'empeke, Aloon ne batabani be, be banaakitwalanga; nga kye kitundu ekitukuvu ennyo ekibalirwa ku biweebwayo eri MUKAMA ekyokeddwa mu muliro.

Ekizimbulukusa n'Omunyyo

¹¹"Temuleeteranga MUKAMA ekiweebwayo eky'emmere ey'empeke nga kiteekeddwamu n'ekizimbulukusa; kubanga temuuyokyenga kizimbulukusa wadde omubisi gw'enjuki ng'ekiweebwayo eri MUKAMA ekyokeddwa mu muliro.

¹²Munaabireetanga eri MUKAMA ng'ebiweebwayo eby'ebibala ebibereberye, naye tebiwieerwengayo ku kyoto okubeera evvumbe eddungi erisanyusa MUKAMA.

¹³Ebiweebwayo byo byonna eby'emmere ey'empeke onoobirungangamu omunyyo: tokkirizanga munyyo ogw'endagaano ne Katonda wo okubula mu biweebwayo byo eby'emmere ey'empeke; mu biweebwayo byo byonna ossangamu omunyyo.

¹⁴"Bw'onooleetanga eri MUKAMA ebiweebwayo eby'ebibala ebibereberye eby'emmere ey'empeke, binaabanga ebirimba ebibisi ebibereberye eby'emmere ey'empeke nga bibetenteddwera era nga byokeddwako mu muliro.

¹⁵Onoobifukangako amafuta ag'omuzeeyituuni, n'obiteekangako n'obubaane; ekyo nga kye kiweebwayo eky'emmere ey'empeke.

¹⁶Awo kabona anaggyanga ku kiweebwayo eky'emmere ey'empeke, ekimaze okubetentebwa nga mulimu amafuta ag'omuzeeyituuni n'obubaane, ekitundu eky'ekijjukizo kyakyo, n'akyokya; ekyo nga kye kiweebwayo eri MUKAMA ekyokeddwa mu muliro.

Ebyabaleevi 3

Etteeka ery' Ekiweebwayo olw' Emirembe

1 “Omuntu bw'anaaleetanga ekiweebwayo olw' emirembe eri MUKAMA, ekiweebwayo ekyo nga kya nte nnume oba nkazi gy'aggye mu kiraalo kye, ente eyo tebeerengako kamogo.

2 Omuntu aleese ekiweebwayo ekyo anaakwatanga omutwe gwakyo n'akittira ku mulyango gwa Weema ya MUKAMA ey' Okukunjaanirangamu; batabani ba Aloon, bakabona, ne balyoka bamansira omusaayi ku kyoto okukyebungulula.

3 Omu ku bakabona anaggyanga ebintu bino mu kiweebwayo olw' emirembe ekireeteddwa nga kyokeddwa mu muliro, nga kye kiweebwayo eri MUKAMA; anaawangayo amasavu agabikka ku byenda, n'amasavu gonna agali okumpi n'ebienda,

4 n'ensigo zombi awamu n'amasavu agaziriko okuliraana ekiwato, n'ekibikka ku kibumba nga biggyibwako wamu n'ensigo.

5 Kale batabani ba Aloon banaabyokeranga kungulu ku kiweebwayo ekyokebwa ekiri ku nku eziri ku muliro ne kivaamu evvumbe eddungi erisanyusa MUKAMA.

6 “Omuntu anaggyanga mu kisibo kye ekisolo ekisajja oba ekikazi nga tekiriiko kamogo, n'akiwaayo eri MUKAMA.

7 Bw'anaaleetanga endiga ento nga kye kiweebwayo kye eri MUKAMA,

8 anaagikwatanga omutwe gwayo, n'agittira mu maaso ga Weema ya MUKAMA ey' Okukunjaanirangamu. Kale batabani ba Aloon banaamansiranga omusaayi gwayo ku kyoto n'okukyebunguluza.

9 Mu kiweebwayo olw' emirembe ky'anaaleetanga okuwaayo ng'ekiweebwayo eri MUKAMA nga kyokebwa mu muliro, anaggyangamu bino n'abiwaayo eri MUKAMA: anaawangayo amasavu n'omukira gwonna n'amasavu gaagwo, nga gusaliddwako okumpi n'omugongo, n'amasavu agabikka ku byenda, n'amasavu gonna agali okumpi n'ebienda,

10 n'ensigo zombi awamu n'amasavu agaziriko okuliraana ekiwato, n'ekibikka ku kibumba, nga biggyibwako wamu n'ensigo.

11 Awo kabona anaabyokeranga ku kyoto okubeera ekyokulya ekiweebwayo eri MUKAMA nga kyokeddwa mu muliro.

12 “Ekiweebwayo kye bwe kinaabanga embuzi, anaagiwangayo ng'ekiweebwayo eri MUKAMA;

13 anaagikwatanga omutwe gwayo, n'agittira mu maaso ga Weema ya MUKAMA ey' Okukunjaanirangamu. Kale batabani ba Aloon banaamansiranga omusaayi gwayo ku kyoto n'okukyebunguluza.

¹⁴Awo anaawangayo ekiweebwayo eri MUKAMA ekyokeddwa mu muliro ng'akiggya okwo: amasavu agabikka ebyenda, n'amasavu gonna agaliraanye ebyenda,

¹⁵n'ensigo zombi n'amasavu agaziriko okuliraana ekiwato, n'ekibikka ku kibumba nga biggyibwako wamu n'ensigo.

¹⁶Awo kabona anaabyokeranga ku kyoto okubeera ekyokulya ekiweebwayo nga kyokebwa mu muliro okuvaamu evvumbe eddungi erisanyusa MUKAMA. Amasavu gonna ganaabanga ga MUKAMA.

¹⁷“Ekintu kino kinaabeeranga etteeka ery'ebiro byonna okuyita mu mirembe eginaagendanga giddiriragana mu bifo byonna gye munaabeeranga. Temulyanga masavu wadde omusaayi.”

Ebyabaleevi 4

Etteeka ery'Ekiweebwayo nga Kabona y'Ayonoonye

¹Awo MUKAMA n'ayogera ne Musa n'amugamba nti,

²“Tegeeza abaana ba Isirayiri nti: ‘Bino bye biragiro eri buli muntu anaasobyanga ku mateeka ga MUKAMA nga tagenderedde, n'akola ekintu kyonna MUKAMA kye yalagira obutakikolanga.

³“Singa Kabona eyafukibwako amafuta ag'omuzeeyituuni ayonoona, bw'atyo abantu n'abaleetako omusango olw'ekibi ky'anaabanga akoze, anaaleeteranga MUKAMA ente ennume entoototo etaliiko kamogo, nga kye kiweebwayo eri MUKAMA olw'ekibi.

⁴Sseddume eyo anaagireetanga ku mulyango gwa Weema ya MUKAMA ey'Okukuŋjaanirangamu, mu maaso ga MUKAMA; anaagikwatanga omutwe gwayo n'agittira awo mu maaso ga MUKAMA.

⁵Awo kabona eyafukibwako amafuta ag'omuzeeyituuni anaatoolangako ku musaayi gwa sseddume eyo n'agleeta mu Weema ya MUKAMA ey'Okukuŋjaanirangamu.

⁶Anannyikanga olugalo lwe mu musaayi ogwo n'agumansirako emirundi musanvu awo eggigi ery'awatukuvu we litunudde mu maaso ga MUKAMA.

⁷Awo kabona anaddiranga ku musaayi, n'agusiga ku mayembe ag'oku kyoto okwoterezebwा obubaane obw'akawoowo, ekiri mu Weema ya MUKAMA ey'Okukuŋjaanirangamu mu maaso ga MUKAMA. Omusaayi gwa sseddume ogunaasigalangawo gwonna, anaaguyiwanga ku ntobo y'ekyoto eky'ebiweebwayo ebyokebwa ekiri ku mulyango gwa Weema ya MUKAMA ey'Okukuŋjaanirangamu.

⁸Amasavu gonna aganaabanga mu sseddume ey'ekiweebwayo olw'ekibi, anaagaggyangako: amasavu agabikka ebyenda, n'amasavu gonna agaliraanye ebyenda,

⁹n'ensigo zombi n'amasavu agazirimu okuliraana ekiwato, n'ekibikka ku kibumba ng'abiggyirako wamu n'ensigo,

¹⁰(nga bwe biggyibwa ku nte ey'ekiweebwayo olw'emirembe), bw'atyo kabona anaabyokeranga ku kyoto eky'ebiweebwayo ebyokebwa.

¹¹Naye eddiba ly a sseddume eyo n'enyyama yaayo yonna, n'omutwe gwayo, n'amagulu gaayo, n'eb'y'omu nda byayo nga n'ebienda kwebiri, awamu n'obusa bwayo,

¹²ye sseddume yonna, anaagitwalanga wabweru w'olusiisira mu kifo ekiyonjo awayiyibwa evvu ly'ekyoto, anaatindiranga enku n'akuma omuliro n'agyokeranga okwo.

Etteeka ery'Ekiweebwayo ng'Abantu Bonna Boonoonye

¹³"Ekibiina kyonna eky'Abayisirayiri bwe kinaayoononanga nga tekigenderedde, ne kikola ekimu ku ebyo MUKAMA bye yalagira mu mateeka ge obutabikolanga, ekibiina ne bwe kinaabanga tekitegedde nti kisobezza, banaabanga bazzizza omusango.

¹⁴Ekibi ekikoleddwa bwe kinaategeerekekanga, ekibiina kinaaleetanga sseddume y'ente entoototo mu maaso ga Weema ya MUKAMA ey'Okukuñjaanirangamu, nga ky'ekiweebwayo olw'ekibi.

¹⁵Abakulembeze b'ekibiina banassanga emikono gyabwe ku mutwe gwa sseddume eyo mu maaso ga MUKAMA, sseddume eyo n'ettirwa mu maaso ga MUKAMA.

¹⁶Awo kabona eyafukibwako amafuta ag'omuzeeyituuni anaatwalangako ku musaayi gwa sseddume eyo n'aguleeta mu Weema ya MUKAMA ey'Okukuñjaanirangamu.

¹⁷Anannyikanga olugalo lwe mu musaayi ogwo n'agumansira emirundi musanvu awo eggigi ly'awatukuvu we litunudde mu maaso ga MUKAMA.

¹⁸Anaddiranga ku musaayi n'agusiga ku mayembe ag'oku kyoto ekiri mu Weema ya MUKAMA ey'Okukuñjaanirangamu mu maaso ga MUKAMA. Omusaayi ogunaasigalangawo gwonna anaagufukanga ku ntobo y'ekyoto eky'ebiweebwayo ebyokebwa ekiri ku mulyango gwa Weema ya MUKAMA ey'Okukuñjaanirangamu.

¹⁹Anaggyangamu amasavu gaayo gonna n'agookera ku kyoto,

²⁰n'akola ku sseddume eno nga bwe yakola ku sseddume ey'ekiweebwayo olw'ekibi. Bw'atyo kabona anaatangiririranga abantu bona mu kibiina, era ne basonyiyibwa.

²¹Anaafulumyanga sseddume eno ebweru w'olusiisira n'agyokya nga bwe yayokya sseddume eri eyasooka. Kino kye kiweebwayo olw'ekibi ku lw'ekibiina ky'abantu bona.

Etteeka ery'Ekiweebwayo ng'Omufuzi Ayonoonye

²²“Omufuzi bw'anaayoononanga nga tagenderedde n'akola ekimu ku ebyo MUKAMA bye yalagira mu mateeka ge obutabikolanga, anaabanga azzizza omusango.

²³Ekibi ekyo ky'akoze bwe kinaamalanga okumutegeeezbwa, anaaleetanga ekiweebwayo kye eky'embuzi ensaja etaliiko kamogo.

²⁴Anagikwatanga ku mutwe gwayo, n'agittira awo mu maaso ga MUKAMA we battira ebiweebwayo ebyokebwa. Ekyo nga kye kiweebwayo olw'ekibi.

²⁵Awo kabona anaddiranga ku musaayi ogw'ekiweebwayo olw'ekibi, n'olugalo lwe, n'agusiiga ku mayembe ag'oku kyoto eky'ebiweebwayo ebyokebwa. Omusaayi ogunaabanga gusigaddewo gwonna anaaguyiwanga ku ntobo ey'ekyoto eky'ebiweebwayo ebyokebwa.

²⁶Amasavu gaayo gonna anaagookeranga ku kyoto okwo, okufaanana ng'amasavu olw'ekiweebwayo olw'emirembe bwe ganaayokebwanga. Bw'atyo kabona anaatangiririranga omufuzi oyo olw'ekibi kye, n'asonyiyibwa.

Etteeka ery'Ekiweebwayo olw'Abantu Abaabulijjo

²⁷“Omuntu yenna owabulijjo bw'anaayoononanga nga tagenderedde, n'akola ekimu ku ebyo MUKAMA bye yalagira mu mateeka ge obutabikolanga, anaabanga azzizza omusango.

²⁸Ekibi ekyo ky'akoze bwe kinaamalanga okumutegeeezbwa, anaaleetanga ekiweebwayo kye eky'embuzi enkazi etaliiko kamogo, olw'ekibi ekyo ky'akoze.

²⁹Anaakwatanga ku mutwe gw'ekiweebwayo ekyo olw'ekibi, n'akittira awo awattirwa ebiweebwayo ebyokebwa.

³⁰Awo kabona anaddiranga ku musaayi gwakyo n'olugalo lwe n'agusiiga ku mayembe ag'oku kyoto eky'ebiweebwayo ebyokebwa. Omusaayi ogunaabanga gusigaddewo, gwonna anaaguyiwanga ku ntobo ey'ekyoto eky'ebiweebwayo ebyokebwa.

³¹Amasavu gaakyo anaagaggyangamu nga ag'omu biweebwayo olw'emirembe bwe gaggyibwamu; kabona anaagookeranga ku kyoto ne gavaamu evvumbe eddungi erisanyusa MUKAMA. Bw'atyo kabona anaatangiririranga omuntu oyo olw'ekibi kye, era omuntu oyo anaasonyiyibwanga.

³² “Bw’anaabanga aleese endiga ento ng’ekiweebwayo kye olw’ekibi, anaaleetanga nkazi etaliiko kamogo.

³³ Anaagikwatanga ku mutwe, n’agittira awo awattirwa ebiweebwayo ebyokebwa, nga kye kiweebwayo olw’ekibi.

³⁴ Awo kabona anaddiranga ku musaayi ogw’ekiweebwayo olw’ekibi, n’olugalo lwe, n’agusiiga ku mayembe ag’oku kyoto eky’ebiweebwayo ebyokebwa. Omusaayi ogunaabanga gusigaddewo, gwonna anaaguyiwanga ku ntobo ey’ekyoto eky’ebiweebwayo ebyokebwa.

³⁵ Amasavu gaayo anaagaggyangamu nga ag’omu biweebwayo olw’emirembe bwe gaggyibwamu, era kabona anaagookeranga ku kyoto ku biweebwayo eri MUKAMA ebyokeddwa mu muliro. Bw’atyo kabona anaatangiririranga omuntu oyo olw’ekibi kye, era omuntu oyo anaasoniyibwanga.

Ebyabaleevi 5

Ebikolwa Ebyetaagisa Ebiweebwayo olw’Ekibi

¹ “Omuntu bw’ategyengayo ku kintu ky’amanyi, n’awa obujulirwa ku kintu kye yalaba oba kye yawulira nga kikyamu, anaabanga azzizza omusango.

² “Omuntu yenna bw’anaakwatanga ku kintu ekitali kirongoofu, gamba omulambo gw’ensolo ey’omu nsiko etali nnongoofu, oba ku mulambo gw’ente etali nnongoofu, oba ku mirambo gy’ebiramu ebyekulula ebitali birongoofu, ne bw’anaabanga takitegedde, anaabanga afuuse atali mulongoofu, era anaabanga azzizza omusango.

³ Oba bw’anaakwatanga ku kintu kyonna ekitali kirongoofu ekivudde mu muntu nga si kirongoofu mu buli ngeri yonna, ne kimufuula atali mulongoofu, ne bw’anaabanga takigenderedde, bw’anaategeranga ky’akoze nga kibi, anaabanga azzizza omusango.

⁴ Omuntu bw’anaayanguyirizanga okulayira okukola ekintu kyonna, oba kirungi oba kibi, ng’amaze galayira nga tafuddeeyo, ne bw’anaabanga takigenderedde, bw’anaategeranga ky’akoze bwe kiri, anaabanga azzizza omusango mu buli ngeri yonna gy’anaabanga alayiddemu.

⁵ Omuntu bw’anazzanga omusango mu kyonna kyonna ku ebyo ebizze byogerwako, anaateekwanga okwatula ekibi ekyo ky’anaabanga akoze,

⁶ era n’aleeta ekiweebwayo kye olw’omusango eri MUKAMA olw’ekibi ekyo. Anaaleetanga endiga ento enkazi oba embuzi enkazi ng’abigga mu kisibo kye, nga kye kiweebwayo olw’ekibi; era kabona anaatangiririranga omuntu oyo olw’ekibi kye.

Ebiweebwayo olw’Ebibi eby’Abaavu

⁷ “Omuntu bw’anaabanga omwavu, nga tasobola kuleeta ndiga nto olw’obwavu bwe, anaaleetanga bukaamukuukulu bubiri oba enjiibwa ento bbiri eri MUKAMA, olw’ekibi omuntu oyo ky’akoze, nga ky’ekiweebwayo olw’ekibi, ekimu nga kye ky’ekiweebwayo olw’ekibi ekirala nga kye ky’ekiweebwayo ekyokebwa.

⁸ Anaabireeteranga kabona, n’asooka okuwaayo ekiweebwayo olw’ekibi. Kabona anaanyoolanga ensingo y’ekiweebwayo, naye nga tagikutuddeeko;

⁹ anaddiranga ku musaayi ogw’ekiweebwayo olw’ekibi n’agumansira ku mabbali g’ekyoto. Omusaayi gwonna ogunaabanga gusigaddewo anaaguttululiranga ku ntobo y’ekyoto. Kino kye kiweebwayo olw’ekibi.

¹⁰ Kabona anaawangayo ekiweebwayo ekyokubiri nga kye kiweebwayo ekyokebwa ng’agoberera ebiragiro nga bwe bigamba. Bw’atyo kabona anaatangiririranga omuntu oyo olw’ekibi kye ky’anaabanga akoze, era omuntu oyo anaasoniyibwanga.

¹¹ “Omuntu oyo omwavu bw’anaabanga tasobola kuleeta bukaamukuukulu bubiri oba enjiibwa ento bbiri, anaaleetanga ekiweebwayo olw’ekibi kye, kimu kya kkumi ekya efa eky’obuwunga obulungi okuba ekiweebwayo kye olw’okwonoona. Taabuteekengamu mafuta wadde obubaane, kubanga kiweebwayo olw’ekibi.

¹² Anaakireeteranga kabona, era kabona anaatoolangako olubatu, nga kye kitundu eky’ekijjukizo kyakyo, n’akyokera ku kyoto, ku biweebwayo eri MUKAMA ebyokeddwa mu muliro. Kino nga kye kiweebwayo olw’ekibi.

¹³ Bw’atyo kabona anaatangiririranga omuntu oyo olw’ekibi ky’anaabanga akoze mu bintu ebyo byonna, era anaasoniyibwanga. Ebyo byonna ebinaasigalangawo ku kiweebwayo kino binaabanga bya kabona, nga bwe kiri mu biragiro by’ekiweebwayo eky’emmere y’empeke.”

Etteeka ery’Ekiweebwayo olw’Omusango

¹⁴ MUKAMA n’agamba Musa nti,

¹⁵ “Omuntu bw’anazzanga omusango ng’asobezza mu bimu ku ebyo ebitukuvu bya MUKAMA nga tagenderedde, anaaleetanga eri MUKAMA ekiweebwayo kye olw’omusango, endiga ennume etaliiko kamogo ng’agiggya mu kisibo kye; eneebalirirwanga omuwendo ogugiggyamu mu ffeeza, ng’ebipimo by’awatukuvu bwe biri, ye sekeri. Ekyo nga kye kiweebwayo olw’omusango.

¹⁶ Era anaaliwanga olw’ekyo kye yazzaako omusango mu bitukuvu bya MUKAMA, era anaayongerangako ekitundu kimu ekyokutaano eky’omuwendo gw’ekyo ky’anabanga asobezza; engassi eyo anaagiwanga kabona. Kabona anaatangiririranga omuntu oyo n’endiga ennume ey’ekiweebwayo olw’omusango, bw’atyo anaasoniyibwanga.

¹⁷ “Omuntu yenna bw’anaayoononanga n’akola ku ebyo MUKAMA bye yalagira mu mateeka ge obutabikolanga, ne bw’anaabanga takitegedde, anazzanga omusango.

¹⁸ Anaaleeteranga kabona endiga ennume eteriiko kamogo ng’agiggya mu kisibo kye, ng’ebalirirwamu omuwendo ogugya mu kiweebwayo olw’omusango. Kabona anaamutangiriranga olw’ekisobyo ky’anaabanga akoze nga tagenderedde, era anaasoniyibwanga.

¹⁹ Ekyo nga kye kiweebwayo olw’omusango, kubanga anaabanga ayonoonye mu maaso ga MUKAMA.”

Ebyabaleevi 6

¹ Awo MUKAMA n’agamba Musa nti,

² “Omuntu bw’anaayoononanga n’amenya obwesigwa eri MUKAMA olw’okulimbalimba munne ku kye yamuteresa, oba kye yamukwasa, oba omuntu oyo kye yabba; oba bw’anabbiranga munne,

³ oba bw’anaazuulanga ebyali bibuze naye n’alimba; oba bw’anaalayiranga eby’obulimba, oba bw’anaayoononanga mu bintu ng’ebyo byonna abantu mwe batera okwonoona,

⁴ bw’anaayoononanga bw’atyo anaabangako omusango; kinaamusaaniranga okuzzaayo ebyo bye yabba oba bye yanyaga, oba bye yateresebw oba ebyo ebyali bibuze naye n’abizuula,

⁵ oba ekintu kyonna kye yalayirirako eby’obulimba. Anaaliwanga mu bujjuvu era anaagattangako ekitundu kimu kyakutaano eky’ebyo by’aliwa; bw’atyo anaabiddizanga nnyinibyo ku lunaku omuntu oyo lw’anaaleeterangako ekiweebwayo olw’omusango.

⁶ Era anaaleeteranga kabona ekiweebwayo eri MUKAMA olw’omusango, nga kya ndiga ennume eteriiko kamogo ng’agiggya mu kisibo kye, ng’ogibaliriddemu omuwendo ogugya mu kiweebwayo olw’omusango.

⁷ Awo kabona anaatangiriranga omuntu oyo mu maaso ga MUKAMA, era anaasoniyibwanga mu bintu ebyo byonna by’anaabanga akoze n’azza omusango.”

Ebiweebwayo Ebyokebwa

⁸ MUKAMA n’agamba Musa nti,

⁹ “Lagira Alooni ne batabani be nti: Lino lye tteeka ery’ebiweebwayo ebyokebwa. Ekiweebwayo ekyokebwa kinaabeeranga ku kyoto ekiro kyonna okutuusa enkeera, era omuliro gw’omu kyoto gunaabanga gwaka ebbanga lyonna.

¹⁰Awo kabona anaayambalanga ebyambalo bye ebya bafuta, ng'asooseemu eby'omunda ebya bafuta ku mubiri gwe, n'addiru evvu eriri mu kyoto ery'ekiweebwayo ekyokebwa ku kyoto, n'alissa wabbali w'ekyoto.

¹¹Aneeyambulangamu ebyambalo ebyo, n'ayambala ebyambalo ebirala, n'asitula evvu n'alitwala ebweru w'olusiisira mu kifo ekirongoofu eky'emikolo ng'egyo.

¹²Omuliro gunaasigalanga nga gwaka ebbanga lyonna, teguuzikirenga. Buli nkya kabona anaayongerangako enku ku kyoto; era anaatereezangako ekiweebwayo ekyokebwa ng'akitegese bulungi; era anaayokerangako amasavu ag'ebiweebwayo olw'emirembe.

¹³Omuliro gunaasigalanga gwaka ku kyoto ebbanga lyonna; teguuzikirenga.

Ebiweebwayo eby'Emmere ey'Empeke

¹⁴"Era lino ly'etteeka ery'ebiweebwayo eby'emmere ey'empeke. Batabani ba Aloonni banaaleetanga ekiweebwayo ekyo awali MUKAMA mu maaso g'ekyoto.

¹⁵Kabona anaayoolanga olubatu lw'obuwunga obulungi obw'ekiweebwayo eky'emmere y'empeke n'amafuta gaako ag'omuzeeyituuni n'obubaane bwonna, ebiri ku kiweebwayo ekyo, n'akyokya ku kyoto nga kye kitundu eky'ekijjukizo kyakyo, ne kivaamu evvumbe eddungi erisanyusa MUKAMA.

¹⁶Batabani ba Aloonni banaalyanga ekisigaddewo, naye nga tebaliiramu kizimbulukusa mu kifo ekyo ekitukuvu; banaakiriiranga mu luggyia lw'Eweema ya MUKAMA ey'Okukunjaanirangamu.

¹⁷Tekiyokerwengamu kizimbulukusa. Nkibawadde nga kye kinaabanga omugabo gwabwe ogw'oku biweebwayo byange ebyokebwa, kye kintu ekitukuvu ennyo okufaanana ng'ekiweebwayo olw'ekibi n'ekiweebwayo olw'omusango.

¹⁸Buli mwana mulenzi ava mu Aloonni anaayinzanga okukiryako, ng'etteeka ery'emirembe gyonna bwe ligamba erifa ku biweebwayo eri MUKAMA ebyokeddwa mu muliro. Buli anaabikwatangako anaafuukanga mutukuvu."

¹⁹MUKAMA n'agamba Musa nti,

²⁰"Kino kye'ekiweebwayo Aloonni ne batabani be kye banaawangayo eri MUKAMA ku lunaku lwe banaafukibwangako amafuta ag'omuzeeyituuni: ekitundu eky'ekkumi ekya liita bbiri, nga kilo emu ey'obuwunga obulungi, nga kye kiweebwayo eky'emmere ey'empeke nga kisalirwa wakati ekitundu ekimu, enkyo, n'ekitundu ekirala, akawungeezi.

²¹Bunaafumbibwanga n'amatuta ag'omuzeeyituuni ku fulampeni, ne butabulwa bulungi, ne buweebwayo eri MUKAMA nga kye kiweebwayo eky'emmere ey'empeke, ekivaamu evvumbe eddungi erisanyusa MUKAMA.

²²Kabona ow'omu baana ba Aloonni anaabanga afukiddwako amatuta ag'omuzeeyituuni okumusikira, y'anaakiwangayo eri MUKAMA ng'amateeka bwe galagira emirembe gyonna; ekiweebwayo kyonna kinaayokebwanga.

²³Buli kiweebwayo kyonna eky'emmere ey'empeke kabona ky'anaawangayo kinaayokebwanga bulambalamba; tekiiriibwenga."

Ebiweebwayo olw'Ekibi

²⁴MUKAMA n'agamba Musa nti,

²⁵"Tegeeza Aloonni ne batabani be nti bino bye biragiro eby'ekiweebwayo olw'ekibi. Ekiweebwayo olw'ekibi kinattirwanga mu maaso ga MUKAMA awo wennyini ebiweebwayo ebyokebwa we kittirwa; kiweebwayo kitukuvu nnyo.

²⁶Kabona anaakiwangayo olw'ekibi y'anaakiryanga. Kinaalirwanga mu kifo ekitukuvu mu luggya lwa Weema ya MUKAMA ey'Okukuŋjaanirangamu.

²⁷Buli ekinaakoonanga ku nnyama y'ekiweebwayo ekyo, kinaafuukanga kitukuvu; era ogumu ku musaayi gwakyo bwe gunaamansukiranga ekyambalo, kinaayozerwanga mu kifo ekitukuvu.

²⁸Ensaka ey'ebbumba mwe kinaafumbirwanga eneeyasibwanga; naye bwe kinaafumbirwanga mu nsaka ey'ekyuma, eneekuitibwanga n'emunyunguzibwamu n'amazzi.

²⁹Buli kabona omusajja anaayinzanga okukiryako; kiweebwayo kitukuvu nnyo.

³⁰Naye ekiweebwayo olw'ekibi, omusaayi gwakyo nga guleeteddwako mu Weema ya MUKAMA ey'Okukuŋjaanirangamu olw'okwetangirira mu kifo ekyo ekitukuvu, tekiiriibwenga, kyonna kinaayokebwanga.

Ebyabaleevi 7

Ebiweebwayo olw'Omusango

¹"Bino bye biragiro eby'ekiweebwayo olw'omusango; kinaabanga kitukuvu nnyo.

²Ekiweebwayo olw'omusango kinattirwanga awo wennyini ekiweebwayo ekyokebwa we kittirwa, era omusaayi gwakyo gunaamansirwanga ku njuyi zonna ez'ekyoto okukyebungulula.

³Amasavu gaakyo gonna ganaawebwangayo: omukira ogwa ssava, amasavu agabikka ku byenda,

⁴ensigo zombi awamu n'amasavu agaziriko okuliraana ekiwato, n'ekibikka ku kibumba nga biggyibwako wamu n'ensigo.

⁵Kabona anaabyokeranga ku kyoto nga kye kiweebwayo eri MUKAMA ekyokeddwa mu muliro. Ekyo kye kiweebwayo olw'omusango.

⁶Buli kabona omusajja anaayinzanga okukiryako; kyokka kinaalirwanga mu kifo ekitukuvu. Kiweebwayo kitukuvu nnyo.

⁷Ebiragiro ebikwata ku kiweebwayo olw'omusango bye bimu n'ebikwata ku kiweebwayo olw'ekibi. Kabona anaakozesanga ebiweebwayo ebyo olw'okutangiririra, y'anaabitwalanga.

⁸Kabona anaaweerangayo omuntu yenna ekiweebwayo kye ekyokebwa, y'aneesigalizanga eddiba ly'ekiweebwayo ekyo.

⁹Era buli kiweebwayo eky'emmere ey'empeke ekinaafumbibwanga mu oveni n'ekyo kyonna ekinaateekerwateekerwanga ku fulampeni oba ku lukalango, kabona oyo akiwaddeyo y'anaakitwalanga.

¹⁰Era na buli kiweebwayo eky'empeke ekya buli ngeri, nga kitabuddwa mu mafuta ag'omuzeeyituuni oba nga kikalu kyereere, batabani ba Alooni be banaakitwalanga nga bakigabana kyenkanyi buli omu.

Ebiweebwayo olw'Emirembe

¹¹“‘Bino by'ebiragiro eby'ekiweebwayo olw'emirembe omuntu ky'anaawangayo eri MUKAMA.

¹²“‘Bw'anaakiwangayo olw'okwebaza, ekiweebwayo ekyo anaakigattirangako zikkeeke ezitabuliddamu amafuta ag'omuzeeyituuni kyokka nga temuli kizimbulukusa, n'obusukuuti obw'oluwegere nga busiigiddwako amafuta ag'omuzeeyituuni, ne zikkeeke ez'obuwunga obulungi ennyo nga zigoyeddwa bulungi mu mafuta.

¹³Awamu n'ebiweebwayo bye olw'emirembe n'olw'okwebaza, anaaleeterangako emigaati emifumbe n'ekizimbulukusa.

¹⁴Ku buli kimu ku biweebwayo ebyo anaggyangako omugaati gumu n'aguwaayo ng'ekiweebwayo eri MUKAMA; kabona anaamansiranga omusaayi ogw'ekiweebwayo olw'emirembe y'anaatwalanga ekiweebwayo ekyo.

¹⁵Ennyama y'ebiweebwayo by'omuntu oyo by'aleese olw'emirembe olw'okwebaza eneeriibwanga ku lunaku olwo lwennyini olw'ebiweebwayo bye ebyo; tekubangako gy'asuzaawo.

¹⁶“‘Naye omuntu bw'anaawangayo ekiweebwayo olw'okutuukiriza obweyamo, oba olw'okweyagalira, kinaaliibwanga ku lunaku olwo lwennyini lw'akiwaddeyo; ekinaasigalangawo ku kiweebwayo ekyo kinaaliibwanga enkeera.

¹⁷Ennyama ey'ekiweebwayo eneefikkangawo n'etuusa ku lunaku olwokusatu eneeyokebwanga mu muliro.

¹⁸Ennyama y'ekiweebwayo ky'omuntu oyo olw'emirembe bw'eneeriibwanga ku lunaku olwokusatu, ekiweebwayo ekyo MUKAMA taakikkirizenga, n'oyo akiwaddeyo tekiimubalirwengako kubanga tekiiibenga kirongoofu, ne buli anaakiryangako anaabanga azzizza omusango.

¹⁹“Ennyama eneekoonanga ku kintu kyonna ekitali kirongoofu teeriibwenga, wabula eneeyokebwanga mu muliro; naye ku nnyama endala omuntu yenna omulongoofu anaayinzanga okulyako.

²⁰Naye omuntu atali mulongoofu bw'anaalyanga ku nnyama ey'ekiweebwayo eri MUKAMA olw'emirembe, anaaboolebwanga nga takyabalirwa mu bantu ba MUKAMA.

²¹Era omuntu yenna bw'anaakwatanga ku kintu ekitali kirongoofu, obanga kivudde mu muntu oba mu nsolo, oba ekintu kyonna ekikyayibwa ekitali kirongoofu, ate n'alya ku nnyama y'ekiweebwayo eri MUKAMA olw'emirembe, omuntu oyo anaaboolebwanga, nga takyabalirwa mu bantu ba MUKAMA.”

Okulya Amasavu n'Omusaayi kugaanibwa

²²MUKAMA n'agamba Musa nti,

²³“Tegeeza abaana ba Isirayiri nti, ‘Temulyanga ku masavu ga nte, oba ag'endiga, oba ag'embuzi.

²⁴Amasavu g'ensolo efudde obufi yokka, n'amasavu g'eyo etaaguddwataaguddwa ensolo endala munaagakozesanga ku bintu ebirala byonna eby'omugaso, naye tekabatandanga ne mugalyako.

²⁵Kubanga buli muntu anaalyanga ku masavu ag'ensolo eneevangako ekiweebwayo eri MUKAMA ekyokeddwa mu muliro, anaaboolebwanga, nga takyabalirwa mu bantu ba MUKAMA.

²⁶Era buli kifo kyonna gye munaabeeranga, temuulyenga ku musaayi n'akatono, ne bwe gunaabanga ogw'ebinyonyi oba ogw'ensolo.

²⁷Omuntu yenna anaalyanga ku musaayi, omuntu oyo anaaboolebwanga, nga takyabalirwa mu bantu ba MUKAMA.”

Omugabo gwa Bakabona

²⁸MUKAMA n'agamba Musa nti,

²⁹“Tegeeza abaana ba Isirayiri nti, Omuntu anaaleetanga ekiweebwayo kye olw'emirembe eri MUKAMA, anaawangayo eri MUKAMA Katonda ekitundu kyakyo.

³⁰Anaakisitulanga n'engalo ze n'akireeta eri MUKAMA Katonda nga kye kiweebwayo kye ekyokeddwa mu muliro. Amasavu n'ekifuba nabyo

anaabireetanga, n'awuubawuuba ekifuba mu maaso ga MUKAMA, ng'ekyo kye kiweebwayo ekiwuubibwa.

³¹Amasavu kabona anaagokyanga ku kyoto, naye ekifuba kinaabanga kya Aloonie batabani be.

³²Ekisambi ekya ddyo kinaawebwanga kabona nga gwe mugabo gwe oguvudde ku kiweebwayo ky'omuntu oyo olw'emirembe.

³³Mutabani wa Aloonie anaabanga awaddeyo omusaayi n'amasavu eby'ekiweebwayo olw'emirembe, y'anaafunanga ekisambi ekya ddyo nga gwe mugabo gwe.

³⁴Ku kiweebwayo olw'emirembe eky'abaana ba Isirayiri, nzigyeko ekifuba ekiwuubibwawuubibwa n'ekisambi, ne mbiwa kabona Aloonie ne batabani be, nga gwe gunaabanga omugabo gwabwe ogunaavanga mu baana ba Isirayiri emirembe gyonna."

³⁵Guno gwe mugabo nga guva ku biweebwayo eri MUKAMA Katonda ebyokeddwa mu muliro, ogwagerekerwa Aloonie ne batabani be ku lunaku lwe baaleetebwa eri MUKAMA okumuweereza nga bakabona be.

³⁶Ku lunaku lwe baafukibwako amafuta ag'omuzeeyituuni, MUKAMA Katonda yalagira nti abaana ba Isirayiri babibawenga okubeeranga omugabo gwabwe, ogw'enkalakkalira emirembe gyonna.

³⁷Eryo lye tteeka n'ebiragiro ebifuga ebiweebwayo ebyokebwa, ebiweebwayo eby'emmere ey'empeke, n'ebiweebwayo olw'ekibi, n'ebiweebwayo olw'omusango, n'ebiweebwayo olw'okwawulibwa, n'ebiweebwayo olw'emirembe,

³⁸MUKAMA Katonda bye yawa Musa ku lusozi Sinaayi ku lunaku lwe yalagirirako abaana ba Isirayiri okuleeta ebiweebwayo byabwe eri MUKAMA Katonda, mu ddungu lyu Sinaayi.

Ebyabaleevi 8

Okwawulibwa kwa Aloonie ne Batabani be

¹Awo MUKAMA Katonda n'agamba Musa nti,

²"Leeta Aloonie ne batabani be, n'ebiyambalo, n'amafuta ag'omuzeeyituuni ag'okwawula, ne seddume y'ente ey'ekiweebwayo olw'ekibi, n'endiga ennume bbiri, n'ekibbo ky'emigaati egitali mizimbulukuse;

³okuujjaanyize abantu bonna ku mulyango gwa Weema ya MUKAMA ey'Okukuujjaanirangamu."

⁴Musa n'akola nga MUKAMA Katonda bwe yamulagira; abantu ne bakuññaanira mu kibiina kinene ku mulyango gwa Weema ya MUKAMA ey'Okukuññaanirangamu.

⁵Awo Musa n'agamba ekibiina nti, "Kino MUKAMA Katonda ky'atulagidde okukola."

⁶Bw'atyo Musa n'aleeta Aloonni ne batabani be n'abanaaza n'amazzi.

⁷N'ayambaza Aloonni ekkooti, n'amusiba olwesibyo, n'amwambaza omunagiro, n'amwambaza n'ekyambalo ekya efodi, n'amusibya olwesibyo lwa efodi olwalukibwa n'amagezi amangi, n'amunyweza.

⁸N'amuteekako ekyomukifuba, era mu kyomukifuba n'ateekamu Ulimu ne Sumimu.

⁹N'amusiba ekitambaala ku mutwe, ne mu maaso ku kitambaala n'assaako ekipande ekya zaabu, nga ye ngule entukuvu, nga MUKAMA Katonda bwe yalagira Musa.

¹⁰Awo Musa n'addira amafuta ag'omuzeeyituuni ag'okwawula, n'agakozesa okwawula Weema ya MUKAMA, ne byonna ebibeeramu nabyo n'abyawula.

¹¹N'amansira agamu ku mafuta ku kyoto emirundi musanvu, n'ayawula ekyoto ne byonna ebikozesebwako, n'ebbensani ne mw'etuula, okubitukuza.

¹²N'afuka agamu ku mafuta ag'okwawula ku mutwe gwa Aloonni, n'amwawula, okumutukuza.

¹³Awo Musa n'aleeta batabani ba Aloonni n'abambaza amakooti, n'abasiba eneesibyo, n'abambaza enkuufiira, nga MUKAMA Katonda bwe yalagira Musa.

Ebiweebwayo olw'ekibi n'Ebiweebwayo Ebyokebwa olwa Bakabona

¹⁴Awo n'aleeta seddume ey'ekiweebwayo olw'ekibi; Aloonni ne batabani be ne bakwata ku mutwe gwayo.

¹⁵Musa n'agitta, n'addira omusaayi gwayo n'agusiiga n'olugalo lwe ku mayembe ag'oku kyoto okukyebungulula, n'atukuza ekyoto. Omusaayi ogwasigalawo n'aguyiwa wansi w'ekyoto, n'akitukuza, okukitangiririra.

¹⁶Musa n'addira amasavu gonna agaali ku byenda, n'agaali gabisse ku kibumba, n'ensigo zombi n'amasavu gaazo, byonna n'abyokera ku kyoto.

¹⁷Naye seddume, n'eddiba lyayo, n'enyyama yaayo, n'obusa bwayo, n'abyokera mu muliro ebweru w'olusiisira, nga MUKAMA Katonda bwe yalagira Musa.

¹⁸Awo n'aleeta endiga ennume ey'ekiweebwayo ekyokebwa; Aloonni ne batabani be ne bakwata ku mutwe gwayo.

¹⁹Musa n'agitta, n'amansira omusaayi gwayo buli wantu ku kyoto.

²⁰Awo endiga ng'ewedde okusalwasalwa mu bifi, Musa n'ayokya ebifi ebyo n'omutwe gwayo n'amasavu.

²¹Ebyenda n'amagulu nga biwedde okunaazibwa n'amazzi, Musa n'alyoka ayokya endiga yonna ku kyoto. Ekyo nga kye kiweebwayo ekyokye eky'akawoowo akasanyusa, nga kiweerwayo ku muliro eri MUKAMA, nga MUKAMA Katonda bwe yalagira Musa.

Ekiweebwayo olw'Okwawulibwa kwa Bakabona

²²Awo Musa n'aleeta endiga ennume eyookubiri, nga y'endiga ey'ekiweebwayo olw'okwawulibwa; Aloonni ne batabani be ne bagikwata ku mutwe gwayo.

²³Musa n'alyoka agitta, n'addira ku musaayi gwayo n'agusiiga ku kasongezo k'okutu kwa Aloonni okwa ddyo, ne ku kinkumu eky'engalo ye ey'omukono ogwa ddyo, ne ku kigere ekisajja eky'okugulu okwa ddyo.

²⁴Batabani ba Aloonni nabo ne baleetebwa, Musa n'asiiga omusaayi ku busongezo bw'amatu gaabwe aga ddyo, ne ku binkumu eby'engalo zaabwe ez'emikono gyabwe egya ddyo, ne ku bigere ebisajja eby'amagulu gaabwe aga ddyo. Musa n'addira omusaayi n'agumansira buli wantu ku kyoto okukyebungulula.

²⁵N'addira amasavu n'omukira ogwo omusava, n'amasavu gonna agaali ku byenda, n'agaali gabisse ku kibumba, n'ensigo zombi n'amasavu gaazo, n'ekisambi ekya ddyo;

²⁶n'alaba mu kibbo omubeera emigaati egitali mizimbulukuse egibeera mu maaso ga MUKAMA Katonda, n'aggyamu akagaati kamu akatali kazimbulukuse, n'akagaati akaakolebwa n'amatuta ag'omuzeeyituuni, n'akasukuuti ak'oluwehere kamu, n'abiteeka ku masavu ne ku kisambi ekya ddyo;

²⁷ebyo byonna n'abikwasa Aloonni ne batabani be mu ngalo zaabwe, ne babiwuubawuuba mu maaso ga MUKAMA Katonda, nga kye kiweebwayo ekiwuubibwa.

²⁸Awo Musa ebyo byonna n'abibaggyako, n'abyokera ku kyoto awamu n'ekiweebwayo ekyokebwa, nga kye kiweebwayo eri MUKAMA Katonda eky'okwawulibwa, ekyokebwa mu muliro ne muvaamu akawoowo akalungi akasanyusa.

²⁹Era Musa n'addira ekifuba n'akiwuubawuuba, nga kye kiweebwayo eri MUKAMA ekiwuubibwa. Guno nga gwe mugabo gwa Musa ku ndiga ennume ey'okwawulibwa, nga MUKAMA Katonda bwe yalagira Musa.

Ennaku ez'Okwawulibwa

³⁰Awo Musa n'addira ku mafuta ag'okwawula ne ku musaayi ogwali ku kyoto, n'amansira ku Aloonni ne ku byambalo bye, ne ku batabani be awamu ne ku byambalo byabwe. Bw'atyo n'atukuza Aloonni n'ebyambalo bye awamu ne batabani be n'ebyambalo byabwe.

³¹Musa n'agamba Aloonni ne batabani be nti, "Ennyama mugifumbire awo ku mulyango gw'Eweema ya MUKAMA ey'Okukuŋŋaanirangamu, era awo we muba mugiriira awamu n'emigaati egiri mu kibbo omuli ebiweebwayo olw'okwawulibwa, nga bwe nablagira nga ŋŋambaa nti, 'Aloonni ne batabani be baligirya.'

³²Ebisseeewo ku nnyama ne ku migatti mujja kubyokya mu muliro.

³³Era temfulumanga okuva ku mulyango gwa Weema ya MUKAMA ey'Okukuŋŋaanirangamu okumala ennaku musanvu, okutuusa ng'ennaku zammwe ez'okwawulibwa zituukiridde, kubanga okubaawula kugenda kumala ennaku musanvu.

³⁴MUKAMA Katonda alagidde nti nga bwe kikoleddwa leero bwe kinaakolebwanga bwe kityo okubatangiririra.

³⁵Mujja kubeera ku mulyango gwa Weema ya MUKAMA ey'Okukuŋŋaanirangamu emisana n'ekiro okumala ennaku musanvu, nga mukola ebyo MUKAMA by'abalagidde, si kulwa nga mufa; bwe ntyo bwe ndagiddwa."

³⁶Bwe batyo Aloonni ne batabani be ne bakola ebyo byonna MUKAMA Katonda bye yalagira ng'abiyisa mu Musa.

Ebyabaleevi 9

Ekiweebwayo olwa Bakabona

¹Ku lunaku olw'omunaana Musa n'ayita Aloonni ne batabani be n'abakulembeze ba Isirayiri.

²N'agamba Aloonni nti, "Ddira ennyana eya sseddume eweewbwayo olw'ekibi, n'endiga ennume olw'ekiweebwayo ekyokebwa, nga zombi teziriiko kamogo, oziweeyo ng'ekiweebwayo eri MUKAMA Katonda.

³Ogambe abaana ba Isirayiri nti, 'Muddire embuzi ennume eweewbwayo olw'ekibi, n'ennyana n'omwana gw'endiga, nga zino zombi zaakamala omwaka gumu obukulu era nga teziriiko kamogo, nga za kiweebwayo ekyokebwa;

⁴era n'ente eya sseddume n'endiga ennume eby'ebiweebwayo olw'emirembe, n'ekiweebwayo eky'emmere ey'empeke nga mulimu amafuta ag'omuzeeyituuni, byonna mubiweeyo nga kye kiweebwayo eri MUKAMA Katonda; kubanga ku lunaku lwa leero MUKAMA Katonda ajja kubalabikira."

⁵Bwe batyo ne baleeta byonna Musa bye yablagira okuleeta mu maaso ga Weema ya MUKAMA ey'Okukuŋŋaanirangamu. Abantu bona, kye kibiina ekinene, ne basembera ne bayimirira awali MUKAMA Katonda.

⁶Musa n'alyoka abagamba nti, "Kino kye kyo MUKAMA Katonda kye yabagambye okukola, era ekitiibwa kya MUKAMA kijja kubalabikira."

⁷Awo Musa n'agamba Aloonni nti, "Sembera ku kyoto oweeyo ekiweebwayo kyo olw'ebyonoono byo, n'ekiweebwayo kyo ekyokebwa, olyoke weetangiririre awamu n'abantu era oleete ekiweebwayo eky'abantu; obatangiririre; nga MUKAMA Katonda bwe yalagidde."

⁸Awo Aloonni n'asembera ku kyoto, n'atta ennyana ey'ekiweebwayo kye olw'ebyonoono bye.

⁹Batabani ba Aloonni ne bamuleetera omusaayi, n'annyika olunwe lwe mu musaayi n'agusiiga ku mayembe ag'oku kyoto, n'afuka omusaayi ku ntobo y'ekyoto.

¹⁰N'addiria amasavu n'ensigo n'ebibikka ku kibumba eby'omu kiweebwayo olw'ekibi, n'abyokera ku kyoto, nga MUKAMA Katonda bwe yalagira Musa.

¹¹Ennyama n'eddiba n'abyokera mu muliro ebweru w'olusiisira.

¹²Aloonni n'atta ekiweebwayo ekyokebwa; batabani be ne bamuleetera omusaayi, n'agumansira ku kyoto okukyebungulula.

¹³Ne bamuleetera ebifi eby'ekiweebwayo ekyokebwa nga n'omutwe kweguli; byonna n'abyokera ku kyoto.

¹⁴N'ayoza ebyenda n'amagulu, n'abyokera wamu n'ekiweebwayo ekyokebwa ku kyoto.

Ekiweebwayo olw'Abantu

¹⁵Awo Aloonni n'aleeta ekiweebwayo olw'abantu. Yaddira embuzi ey'ekiweebwayo olw'ebibi by'abantu n'agitta, n'agiwaayo ng'ekiweebwayo kye olw'ekibi, kye yasooka olw'ebibi bye.

¹⁶N'aleeta ekiweebwayo ekyokebwa n'akiwaayo ng'etteeka bwe liragira.

¹⁷N'aleeta ekiweebwayo eky'emmere ey'empeke, n'ayoolamu olubatu, n'akyokya ku kyoto okuliraana n'ekiweebwayo ekyokebwa eky'omu makya.

¹⁸Ente ya sseddume n'endiga ennume nazo n'azitta, nga bye biweebwayo olw'emirembe eby'abantu; batabani ba Aloonni ne bamuleetera omusaayi, n'agumansira ku kyoto okukyebungulula enjuuyi zonna.

¹⁹Naye amasavu ag'ente eya sseddume n'ago ag'endiga ennume, n'amasavu ag'oku mukira, n'ago agabikka ku byenda, n'ensigo, n'agabikka ku kibumba,

²⁰ne bateeka amasavu gaabyo ku bifuba by'ensolo ezo, n'ayokya amasavu ago ku kyoto;

²¹naye ebifuba n'ekisambi ekya ddyo, Aloonni n'abiwuubawuuba mu maaso ga MUKAMA Katonda nga kye kiweebwayo ekiwuubibwa eri MUKAMA Katonda, nga Musa bwe yalagira.

²² Awo Alooni n'awanikiraabantu emikono gye, n'abasabira omukisa. Bw'atyo Alooni ng'amaze okuwaayo ekiweebwayo olw'ekibi, n'ekiweebwayo ekyokebwa, n'ekiweebwayo olw'emirembe, n'avaayo ku kyoto.

²³ Musa ne Alooni ne bayingira mu Weema ya MUKAMA ey'Okukuŋjaanirangamu. Bwe baafuluma ne basabiraabantu omukisa, era ekitiibwa kya MUKAMA Katonda ne kirabikiraabantubonna.

²⁴ Omuliro ne guja nga guva eri MUKAMA Katonda ne gumalirawo ddala ekiweebwayo ekyokebwa n'amasavu ebyali ku kyoto. Awoabantubonna bwe baakiraba ne baleekaana ne bagalamira wansi ng'amaaso gaabwe gali ku ttaka.

Ebyabaleevi 10

Okufa kwa Nadabu ne Abiku

¹ Awo olwatuuka, batabani ba Alooni, Nadabu ne Abiku ne beetwalira buli omu ekyoterezo kye, ne bateekamu omuliro, ne bassaako obubaane, ne bawaayo eri MUKAMA Katonda omuliro ogutali mutukuvu, ne basobya ekiragiro kye.

² Omuliro ne guva eri MUKAMA ne gubookya, ne bafiira awo mu maaso ga MUKAMA Katonda.

³ Awo Musa n'agamba Alooni nti, Kino MUKAMA Katonda kye yayogerako bwe yagamba nti, “Nzija kweyolekanga nga bwe ndi omutukuvu eri abo abansemberera, era nassibwangamu ekitiibwaabantubonna.” Alooni n'asirika busiris.

⁴ Awo Musa n'ayita Misayeri ne Erizafani, abaana ba Wuziyeeri kitaawe omuto owa Alooni, n'abagamba nti, “Mujje wano musitule emirambo gya baganda bammwe mugiggye wano awatukuvu mugitwale ebweru w'olusiisira.”

⁵ Bwe batyo ne bajja ne basitula baganda baabwe abo nga bwe baali bayambadde ne babatwala ebweru w'olusiisira nga Musa bwe yabagamba.

⁶ Awo Musa n'agamba Alooni, ne Eriyazaali ne Isamaali, batabani ba Alooni, nti, “Mmwe temusumulula nviiri zammwe okuzita ne zireebeeta era temuyuza byambalo byammwe nga mukungubaga, kubanga muyinza okufa, n'obusungu bwa MUKAMA Katonda buyinza okubuubukiraabantubonna. Naye baganda bammwe, ye nnyumba yonna eya Isirayiri, babakaabire abo MUKAMA Katonda b'azikirizza n'omuliro.

⁷ Era temuva ku mulyango gwa Weema ya MUKAMA ey'Okukuŋjaanirangamu, temulwa kufa; kubanga muliko amafuta ag'omuzeeyituuni ga MUKAMA Katonda ag'okwawula.” Ne bakola nga Musa bwe yabalagira.

Bakabona bye Basaana Okwegendereza

⁸ Awo MUKAMA Katonda n'agamba Alooni nti,

⁹“Ggwe ne batabani bo bwe muyingiranga mu Weema ya MUKAMA ey'Okukuŋjaanirangamu temunywanga envinnyo oba ekyokunywa ekirala kyonna ekitamiiza; bwe mulikikola temulirema kufa. Eryo linaabanga tteeka ery'enkalakkalira ne mu mirembe gyonna egigenda okujja.

¹⁰Mwawulengamu ebitukuvu n'ebiyabulijjo, ebirongoofu n'ebitali birongoofu;

¹¹era kibasaanidde okuyigirizanga abaana ba Isirayiri amateeka gonna MUKAMA Katonda g'abawadde ng'agayisa mu Musa.”

Etteeka ery'Okulya Emmere Entukuvu

¹²Awo Musa n'agamba Aloonni ne Eriyazaali ne Isamaali, batabani ba Aloonni abaali basigaddewo, nti, “Mutwale ekiweebwayo eky'emmere ey'empeke ekyasigaddewo ku biweebwayo ebyokebwa eri MUKAMA Katonda nga si kizimbulukuse, mukiriire okumpi n'ekyoto kubanga kitukuvu nnyo.

¹³Mukiriire mu kifo ekitukuvu, kubanga gwe mugabo gwo, era gwe mugabo gw'abatabani bo, nga guva ku kiweebwayo eri MUKAMA Katonda ekyokebwa; bwe nt yo bwe ndagiddwa.

¹⁴Naye ekifuba ekiwuubibwa n'ekisambi ekiweebwayo munaabiriira mu kifo kyonna kye munaalaba ekiongoofu; mubirye, ggwe ne batabani bo ne bawala bo b'oli nabo; kubanga bibaweeddwa ng'omugabo gwammwe, ggwe n'abaana bo, nga biva ku biweebwayo olw'emirembe ebiweereddwayo abaana ba Isirayiri.

¹⁵Ekisambi ekiweereddwayo n'ekifuba ekiwuubibwa, binaaleetebwa awamu n'amasavu ag'oku biweebwayo ebyokebwa, ne biwuubibwawuubibwa nga kye kiweebwayo ekiwuubibwa awali MUKAMA, era kinaabeeranga mugabo gwo awamu ne batabani bo emirembe gyonna; nga MUKAMA Katonda bw'alagidde.”

¹⁶Awo Musa n'abuuliriza ebyali bifudde ku mbuzi ey'ekiweebwayo olw'ekibi, n'avumbula nga baagyokezza dda, n'anyiigira batabani ba Aloonni abaali basigaddewo, Eriyazaali ne Isamaali, n'ababuuza nti,

¹⁷“Lwaki ekiweebwayo ekyo olw'ekibi temwakiriiridde, wali awatukuvu? Kitukuvu nnyo. Kyabaweereddwa kiryo ke kiggyiseeko abantu bona ebibi byabwe, nga mmwe mubatangiririra awali MUKAMA Katonda.

¹⁸Ng'omusaayi gwayo bwe gutaatwaliddwa munda mu Kifo Ekitukuvu, embuzi eyo ddala mwandigiriiridde awo awatukuvu nga bwe nablagira.”

¹⁹Awo Aloonni n'addamu Musa nti, “Laba, olwa leero bawaddeyo eri MUKAMA Katonda ekiweebwayo olw'ebibi byabwe n'ekiweebwayo kyabwe ekyokebwa; naye era ebintu nga bino ne bingwako. MUKAMA Katonda yandisanyuse singa leero ndidde ekiweebwayo olw'ekibi?”

²⁰Awo Musa bwe yawulira ebigambo ebyo n'amatira.

Ebyabaleevi 11

Etteeka ku Bisolo Ebirongoofu

¹Awo MUKAMA Katonda n'agamba Musa ne Alooni nti,

²"Mutegeeze abaana ba Isirayiri nti bino bye biramu bye munaayinzanga okulya mu bisolo byonna eby'oku nsi.

³Munaayinzanga okulya ensolo yonna erina ekigere ekyaseemu nga kyeyawulidde ddala, era ng'ezza obwenkulumu.

⁴Kyokka ezo ezizza obwenkulumu bwokka, oba ezirina ebigere ebyaseemu byokka, temuziryanga. Ggamba enjamira, newaakubadde ng'ezza obwenkulumu naye ebigere byayo si byaseemu; noolwekyo si nnongoofu.

⁵N'omusu nagwo guzza obwenkulumu, naye ebigere byagwo si byaseemu; noolwekyo si mulongoofu.

⁶Ate n'akamyu ak'omu nsiko, newaakubadde nako kazza obwenkulumu naye ebigere byako si byaseemu, noolwekyo si kalongoofu, era temukalyanga.

⁷Ate mulabe embizzi, newaakubadde ng'ekigere kyayo kyaseemu, ate nga kyeyawulidde ddala, naye tezza bwenkulumu; noolwekyo si nnongoofu gye muli.

⁸Ebisolo ng'ebyo temulyanga nnyama yaabyo, wadde okukwatako ku mirambo gyabyo; kubanga si birongoofu gye muli.

⁹"Ku biramu ebiri mu mazzi ag'omu nnyanja n'ag'omu migga mulyangako ebyo ebirina amatu awamu n'amagagamba ku mubiri gwabyo.

¹⁰Ebiramu byonna ebyekulumulira mu nnyanja ne mu migga naye nga tebiriiko matu oba magagamba binaabanga bya muzizo gye muli.

¹¹Nga bwe binaabanga eby'omuzizo gye muli, temuulyenga ku nnyama yaabyo, era n'emirambo gyabyo ginaabanga gya muzizo.

¹²Buli kiramu kyonna ekibeera mu mazzi naye nga tekiriiko matu wadde amagagamba kinaabanga kya muzizo gye muli.

¹³"Mu nnyonyi, zino ze z'omuzizo era temuuziryenga: empungu, ensega, makwanzi,

¹⁴kamunye, eddiirawamu erya buli ngeri,

¹⁵ne namujjoona owa buli ngeri;

¹⁶maaya, olubugabuga, olusobe, enkambo eza buli ngeri,

¹⁷ekiwuugulu, enkobyokkobyo, ekkufufu,

¹⁸ekiuugulu eky'amatu, ne kimbala, ensega,

¹⁹kasida, mpabaana owa buli ngeri, ekkookootezi, n'ekinyira.

²⁰"Ebiwuka byonna ebirina ebiwaawaatiro nga bitambuza amagulu ana binaabanga bya muzizo gye muli.

²¹Naye mu biwuka ebyo ebirina ebiwaawaatiro era nga bitambuza amagulu ana munaalyangamu ebyo ebirina ennyingo ku magulu gaabyo ebigenda nga bibuuka amacco ku ttaka.

²²Mu ebyo bino bye munaalyanga: enzige eza buli ngeri, n'enseenene eza buli ngeri, n'obunyeenyenkule obwa buli ngeri, n'amayanzi aga buli ngeri.

²³Naye ebiwuka ebirala byonna eby'ebiwaawaatiro nga birina amagulu ana binaabanga bya muzizo gye muli.

Etteeka ku Bisolo Ebitali Birongoofu

²⁴"Bino nabyo binaabafuulanga abatali balongoofu; buli anaakwatanga ku mulambo gw'ensolo nga zino anaafuukanga atali mulongoofu okutuusa akawungeezi.

²⁵Era buli anaasitulanga ekitundu kyonna eky'omulambo gwazo anaateekwanga okwoza engoye ze, kyokka era anaabanga afuuse atali mulongoofu okutuusa akawungeezi.

²⁶"Buli nsolo yonna erina ekigere ekyaseemu naye nga tekyeyawulidde ddala, oba nga tezza bwenkulumu, eneebanga ya muzizo gye muli. Buli anaakwatanga ku mulambo gwazo anaabanga afuuse atali mulongoofu.

²⁷Mu nsolo zonna ezitambulira ku magulu ana, ezo ezitambulira ku bibatu byazo teziibenga nnongoofu gye muli, buli muntu anaakwatanga ku mulambo gwazo anaabanga afuuse atali mulongoofu okutuusa akawungeezi.

²⁸Era n'oyo anaasitulanga omulambo gwazo anaayozanga engoye ze; naye era anaabanga afuuse atali mulongoofu okutuusa akawungeezi. Teziibenga nnongoofu gye muli.

²⁹"Mu nsolo ezigenda zisoobera ku ttaka; zino teziibenga nnongoofu gye muli: eggunj, emmese, amakonkome amanene aga buli ngeri;

³⁰anaka, enswaswa, omunya, ekkonkome, ne nnawolovu.

³¹Mu ezo zonna ezisoobera ku ttaka ezo teziibenga nnongoofu gye muli. Era buli anaazikwatangako nga zimaze okufa anaabanga afuuse atali mulongoofu okutuusa akawungeezi.

³²Era emu ku zo bw'eneefanga n'egwa ku kintu eky'engeri yonna ekikozesewa, ekintu ekyo kinaafuukanga ekitali kirongoofu, obanga ekintu ekyo kyakolebwa mu muti, oba mu lugoye, oba mu ddiba oba mu kkutiya. Kiteekebwenga mu

mazzi. Tekiibenga kirongoofu okutuusa akawungeezi; kyokka oluvannyuma kinaalongookanga.

³³Era emu ku zo bw'eneegwanga mu nsaka ey'ebbumba, byonna ebiri mu nsaka omwo binaafuukanga ebitali birongoofu, era ensaka eyo muteekwa buteekwa okugyasanga.

³⁴Emmere eneebangaa egenda okuliibwa naye n'ebaako amazzi agavudde mu nsaka omwo, teebenga nnongoofu, n'amazzi agandinywereddwaa okuva mu nsaka omwo tegaabenga malongoofu.

³⁵Era buli kintu kyonna omulambo gw'ensolo zino kwe gunaabanga gugudde ku masiga okufumbirwa oba mu ntamu, binaayasibwayasibwanga, kubanga si birongoofu; era tebiibenga birongoofu gye muli.

³⁶Naye bwe gunaagwanga mu luzzi oba mu ppiipa y'amazzi, ebyo byo binaasigalanga birongoofu; naye oyo yenna anaakwatanga ku mulambo ogwo taabenga mulongoofu.

³⁷Singa omulambo gugwa ku nsigo ez'engeri yonna ezigenda okusimbibwa, zinaasigalanga nnongoofu.

³⁸Naye singa ensigo ziyyibbwako amazzi, omulambo ne guzigwako, teziibenga nnongoofu gye muli.

³⁹Singa ensolo yonna ku ezo ze mukkirizibwa okulyaefa, oyo yenna anaakwatanga ku mulambo gwayo anaabanga atali mulongoofu okutuusa akawungeezi.

⁴⁰Oyo anaalyanga ku nnyama y'omulambo kinaamusaaniranga okwoza engoye ze, era taabenga mulongoofu okutuusa akawungeezi. Oyo yenna anaasitulanga omulambo, kinaamusaaniranga okwoza engoye ze, naye taabenga mulongoofu okutuusa akawungeezi.

⁴¹"Buli kitonde kyonna ekitambulira ku ttaka kinaabanga kya muzizo, temuukiryenga.

⁴²Temuulyenga kitonde kyonna ekyekululira ku ttaka, obanga kyewalulira ku lubuto lwakyo, oba nga kitambuza amagulu, oba nga kikozesa ebigere bingi; kinaabanga kya muzizo.

⁴³Temuganyanga kwonoonebwa bitonde ebyo n'ekimu. Temubikozesanga temulwa kweyonoona, era temubikkirizanga kubafuula abatali balongoofu.

⁴⁴Kubanga Nze MUKAMA Katonda wammwe, kale mwetukuzanga ne mubeera batukuvu, kubanga Nze ndi mutukuvu. Temwesemberezanga ebitonde ebyo ebitambulira ku ttaka ne bibafuula abatali balongoofu.

⁴⁵Kubanga Nze MUKAMA eyabaggya mu nsi ey'e Misiri, okubeera Katonda wammwe; noolwekyo kibasaanira okubeeranga abatukuvu, kubanga Nze ndi mutukuvu.

⁴⁶"Ago ge mateeka agakwata ku nsolo, ne ku nnyonyi, ne ku buli kiramu kyonna eky'omu mazzi, ne ku buli kitonde kyonna ekyewalulira ku ttaka.

⁴⁷Kibasaaniranga mwawulemu, mu bitonde ebiramu ebirongoofu ebisaana okuliibwanga, ne mu bitonde ebiramu ebitali birongoofu ebitasaana kuliibwanga."

Ebyabaleevi 12

Okutukuzibwa Oluvannyuma Iw'Okuzaala

¹ MUKAMA n'agamba Musa nti,

²"Abaana ba Isirayiri bagambe nti, 'Omukazi bw'anaabanga olubuto, n'azaala omwana nga wabulenzi, omukazi oyo taabenga mulongoofu okumala ennaku musanvu, okufaanana nga bw'atabeera mulongoofu ng'ali mu kiseera ky'okulwala kw'abakazi okwa buli mwezi.

³Ku lunaku olw'omunaana omwana oyo omulenzi anaakomolebwanga.

⁴Ate omukazi analindanga ne wayitawo ennaku amakumi asatu mu ssatu alyoke atukuzibwe olw'omusaayi ogwamuvaamu ng'azaala. Taakwatenga ku kintu ekitukuvu wadde okuyingiranga mu watukuvu okutuusa ng'ennaku z'okutukuzibwa kwe ziweddeko.

⁵Naye bw'anaabanga azadde omwana wabuwala, omukazi taabenga mulongoofu okumala wiiki bbiri, nga bw'abeera ng'ali mu kiseera kye eky'okulwala kw'abakazi okwa buli mwezi. Ate analindanga ennaku nkaaga mu mukaaga alyoke alongoosebwe olw'omusaayi ogwamuvaamu ng'azaala.

⁶"Ennaku z'omukazi oyo ez'okutukuzibwa bwe zinaggwangako, bw'anaabanga azadde omwana mulenzi oba muwala, anaaleetanga eri kabona ku mulyango gw'Eweema ya MUKAMA ey'Okukunjaanirangamu, omwana gw'endiga oguwezezza omwaka gumu obukulu okuguwaayo ng'ekiweebwayo ekyokebwa, ng'enjiibwa ento oba ejjiba ng'ekiweebwayo olw'ekibi.

⁷Kabona anaabiwangayo eri MUKAMA okutangirira omukazi oyo; bw'atyo anaabeeranga mulongoofu olw'omusaayi ogwamuvaamu ng'amaze okuzaala. "Ago ge mateeka agakwata ku mukazi anaazaalanga omwana owoobulenzi oba owoobuwala.

⁸Bw'anaabanga tasobola kuwaayo mwana gwa ndiga, anaaleetanga bibiri bibiri ku bino: enjiibwa ento bbiri oba amayiba abiri, ekimu nga ky'ekiweebwayo ekyokebwa n'ekirala nga ky'ekiweebwayo olw'ekibi. Mu ngeri eno kabona anaamutangiririranga, bw'atyo n'afuuka mulongoofu."

Ebyabaleevi 13

Amateeka ku Ndwannde Ez'oku Lususu Ezikwata

¹Awo MUKAMA n'agamba Musa ne Alooni nti,

²"Omuntu yenna bw'anaabanga n'akazimbye ku lususu lw'omubiri gwe, oba awabutuse, oba awali akatulututtu, ne wafaanana ng'awali endwadde ey'ebigenge, aleetebwenga eri Alooni kabona, oba eri omu ku batabani be bakabona.

³Kabona anaakeberanga ekifo ekyo awazimbye ku lususu, bw'anaasanganga ng'obwoya obuli awo awazimbye bufuuse bweru, ate nga awalwadde wennyise okusinga olususu lw'omubiri gw'omuntu oyo, ng'olwo ebyo bigenge. Kabona bw'anaamalanga okumukebera anaalangiriranga nti omuntu oyo si mulongoofu.

⁴Naye awazimbye bwe wanaabanga walungudde, naye nga tewennyise okusinga olususu lw'omubiri gwe, ate nga n'obwoya mu wazimbye awo tebufuuse bweru, kabona anaasibiranga omuntu oyo omulwadde mu kalantiini okumala ennaku musanvu.

⁵Ku lunaku olw'omusanvu kabona anaakeberanga omuntu oyo; bw'anaasanganga ng'awazimbye teweeyongedde, era nga n'obulwadde obwo tebusaasaanye ku lususu, anaayongeranga okumusibira mu kalantiini ennaku endala musanvu.

⁶Ku lunaku olw'omusanvu kabona anaddangamu okumukebera, kale bw'anaasanganga ng'obuzimbu tebukyalabika nnyo, era obulwadde obwo nga tebusaasaanye ku lususu, anaamulangiriranga nti mulongoofu; kubanga kubadde kubutuka bubutusi. Omuntu oyo anaayozanga engoye ze, era anaabanga mulongoofu.

⁷Naye okubutuka okwo bwe kunaasaasaananga ku lususu oluvannyuma lw'okwelianjula eri kabona amulangirire nti mulongoofu, anaateekwanga okuddayo eri kabona yeeyanjule buto.

⁸Kabona anaamukeberanga, bw'anaasanganga ng'okubutuka kusaasaanye ku lususu ku mubiri, kabona anaamulangiriranga nti si mulongoofu; ng'ebyo bigenge.

Amateeka g'Ebigenge ne kwe Bitegeererwa

⁹"Omuntu yenna bw'anaakwatibwanga ebigenge, anaaleetebwanga eri kabona.

¹⁰Kabona anaamukeberanga, bw'anaasangangawo obuzimbu obweru ku lususu nga bwerusizza n'obwoya, era awazimbye nga waliwo n'ennyama y'omubiri erungudde,

¹¹ebyo binaabanga bigenge eby'olutentezi ku lususu lw'omubiri gw'omuntu oyo, era kabona anaamulangiriranga nti si mulongoofu. Taasibibwenga mu kalantiini, kubanga amaze okutegeererwawo nga bw'atali mulongoofu.

¹²"Naye singa ebigenge bisaasaana ku lususu ne bituuka wonna wonna okuva ku mutwe gw'omuntu oyo okutuuka ku bigere nga kabona bw'asobola okulaba,

¹³kale kabona anaakeberanga omuntu oyo; bwe kinaazuulbwanga ng'ebigenge bibunye omubiri gw'omuntu oyo gwonna, anaamulangiriranga nga bw'ali omulongoofu; kubanga omubiri gwe gwonna gufuuse mweru, oyo mulongoofu.

¹⁴Naye ku lususu lw'omuntu oyo bwe kunaalabikangako ennyama erungudde taabenga mulongoofu.

¹⁵Kabona anaakeberanga ennyama eyo erungudde, n'amulangirira nga bw'atali mulongoofu. Ennyama erungudde si nnongoofu, kubanga bigenge.

¹⁶Naye singa ennyama erungudde ekyuka n'efuuka enjeru, omuntu oyo anajjanga eri Kabona.

¹⁷Kabona anaamukeberanga, bw'anaazuulanga ng'olususu olulwadde lufuuse lweru, anaalangiriranga omulwadde oyo okuba omulongoofu; bw'atyo anaabanga mulongoofu.

¹⁸"Omuntu bw'anaabanga alwadde ejjute ku lususu lwe, naye ne liwona,

¹⁹kyokka mu kifo awaali ejjute ne wajjavo obuzimbu obweru oba akatulututtu akatwakaavu, wasaana walagibwe kabona.

²⁰Kabona anaakeberangawo, bw'anaasanganga nga wennyise okusinga olususu, nga n'obwoya bwawo bufuuse bweru; kale kabona analangiriranga omuntu oyo nga bw'atali mulongoofu. Obwo bulwadde bwa bigenge ebifulumidde awo awaali ejjute.

²¹Naye kabona bw'anaakeberangawo, n'asanga ng'obwoya obuliwo si bweru, ate nga tewennyise okusinga olususu era nga tewakyalabika nnyo, kale kabona anaasibanga omuntu oyo mu kalantiini okumala ennaku musanvu.

²²Naye obulwadde obwo bwe bunaasaasaananga ku lususu, kale kabona analangiriranga omuntu oyo nti si mulongoofu, ebyo nga bigenge.

²³Naye obuzimbu bwe bunaasigalanga mu kifo kimu ne butasaasaana, eyo eneebanga nkova ya jjute, era kabona anaalangiriranga omuntu oyo nti mulongoofu.

²⁴"Singa wabaawo ku lususu lw'omuntu awayidde omuliro, awo awali ennyama eyidde ne wazimba, ne wafuuka watwakaavu oba weeru,

²⁵kabona anaakeberangawo, obwoya bwawo bwe bunaabanga bufuuse bweru, ate nga walabika ng'awennyise okusinga olususu, ebyo nga bigenge bye

bifulumye ku lususu oluyidde. Kabona anaalangiriranga omuntu oyo nti si mulongoofu; ebyo binaabanga bigenge.

²⁶Naye kabona bw'anaakeberanga awo awayidde, n'asanga ng'obwoya obuliwo si bweru, era nga tewennyise kusinga lususu, naye nga tewakyalabika nnyo, kabona anaasibiranga omuntu oyo mu kalantiini okumala ennaku musanvu.

²⁷Ku lunaku olw'omusanvu kabona anaamukeberanga, kale bw'anaasanganga ng'obulwadde busaasaana ku lususu, kabona anaamulangiriranga nti si mulongoofu; ebyo nga bigenge.

²⁸Naye obulwadde bwe bunaasigalanga mu kifo ekimu ne butasaasaana ku lususu, era ng'awazimbu tewakyalabika nnyo, buno bunaabanga buzimbu obuleeteddwa omuliro ogwayokyawo; kale kabona anaamulangiriranga nti mulongoofu; kubanga eyo y'enkovu ku lususu awaayokebwa omuliro.

²⁹"Omusajja oba omukazi bw'anaalwalanga ebbwa ku mutwe oba ku kalevu,

³⁰kabona anaakeberanga ebbwa eryo, bwe linaabanga lyennyise okusinga olususu, nga n'obwoya obulirimu bwa kyenvu ate nga bwa matalaga; kale kabona anaamulangiriranga nti si mulongoofu; eryo nga lye bbwa erisiwa, nga bye bigenge eby'oku mutwe oba eby'oku kalevu.

³¹Kabona bw'anaakeberanga ebbwa erisiwa, n'asanga nga teryennyise kuyisa lususu, ate nga mu lyo nga temuliimu bwoya buddugavu, kale kabona anaasibiranga omuntu oyo alina ebbwa erisiwa mu kalantiini amalemu ennaku musanvu.

³²Ku lunaku olw'omusanvu kabona anaakeberanga ebbwa eryo, bw'anaasanganga ng'okusiwa tekusaasaanye, ate nga mu bbwa temuliimu bwoya bwa kyenvu, era ng'awasiwa tewennyise kusinga lususu,

³³omuntu oyo asaananga amwebwe okuggyako awo awalwadde wokka; ate kabona anaamusibiranga mu kalantiini ennaku endala musanvu.

³⁴Ku lunaku olw'omusanvu kabona anaakeberanga awo awasiwa, okusiwa bwe kunaabanga tekusaasaanye ku lususu, ate nga tewennyise kusinga lususu, kale, kabona anaalangiriranga omuntu oyo nga bw'ali omulongoofu; era omuntu oyo anaayozanga engoye ze n'abeera mulongoofu.

³⁵Naye okusiwa bwe kunaasaasaananga ku lususu ng'amaze okulongooka,

³⁶kabona anaayongeranga okumukebera, bw'anaasanganga ng'okusiwa kusaasaanye ku lususu, kabona taanoonyenga bwoya bwa kyenvu mu bbwa eryo; omuntu oyo si mulongoofu.

³⁷Naye mu kulaba kwa kabona, okusiwa bwe kunaabanga tekweyongedde, nga n'obwoya obwa kyenvu bukuze mu bbwa, olwo ng'okusiwa kuwonye, era

omuntu oyo nga mulongoofu era kabona naye anaamulangiriranga nti mulongoofu.

38“Omusajja oba omukazi bw’anaabanga n’obutulututtu obweru ku mubiri gwe,

39kabona anaamukeberanga, bw’anaasanganga ng’obutulututtu bweruyeru, okwo kuba kubutukabutuka okuyiise ku lususu lw’omuntu oyo, ye aba mulongoofu.

40“Omusajja bw’anaakuunyuukangako enviiri ze ku mutwe gwe zonna, anaabeeranga kyemwa, naye nga mulongoofu.

41Era omusajja bw’anaakuunyuukangako enviiri ze ez’omu maaso nga ku kyenyi, oyo anaabanga wa kiwalaata eky’omu bwenyi, kyokka nga mulongoofu.

42Naye mu mutwe omutali nviiri oba mu kiwalaata eky’omu bwenyi bwe munaabangamu akafo akalwadde ebbwa nga kalungudde keeruyeru nga kalimu obumyufumyufu, ebyo nga bigenge bye bifulumye mu mutwe ogutaliimu nviiri oba mu kiwalaata eky’omu bwenyi.

43Kale kabona anaakeberanga omuntu oyo, bw’anaasanganga ng’akafo ako awalwadde ebbwa era awazimbye mu mutwe oguweddemu enviiri oba mu kiwalaata ekiri mu bwenyi, nga kalungudde era nga weeruyeru nga kalimu obumyufumyufu, nga walabika ng’ebigenge bwe biba nga biri ku lususu olw’omubiri,

44omuntu oyo anaabanga mugenge, nga si mulongoofu. Kabona anaamulangiriranga nga bw’atali mulongoofu, olw’obulwadde obwo mu mutwe gwe.

45“Omuntu analwalanga ebigenge anaayambalanga engoye njulifu, n’enviiri z’oku mutwe gwe anaazirekanga ne zikula ne ziduumuuka, anaabikkanga ku mumwa gwe ogw’engulu n’atambula nga bw’aleekaana nti, ‘Siri mulongoofu! Siri mulongoofu!’

46Ebbanga lyonna omuntu ly’anaamalanga ng’alina obulwadde obwo anaabeeranga si mulongoofu. Anaasulanga yekka mu nnyumba ye ebweru w’olusiisira.

Ebigenge mu Byambalo

47“Obulwadde bw’ebigenge bwe bunaalabikanga mu byambalo by’omusajja oba eby’omukazi, ebyambalo ebyo nga bikoleddwa mu byoya by’endiga oba mu bafuta oba maliba,

48oba mu nfunyiro ne mu ntabiro z’ebiyambalo by’ebiyoya by’endiga, oba mu bafuta oba mu maliba, oba mu kyambalo ekya buli ngeri yonna ekitungiddwa mu maliba;

⁴⁹era obulwadde obwo bwe bunaalabikanga nga bwa langi ya kiragalalagala oba myufumyufu, nga buli mu kyambalo oba mu nfunyiro oba mu ntabiro zaakyo, oba mu kyambalo kyonna ekitungiddwa mu maliba; obwo nga bulwadde bwa bigenge, era bunaalagbwanga kabona.

⁵⁰Kabona anaakeberanga obulwadde obwo, anaasibiranga ekintu ekyo omuli obulwadde mu kalantiini okumala ennaku musanvu.

⁵¹Ku lunaku olw'omusanvu kabona anaakeberanga obulwadde obwo. Bw'anaasanganga ng'obulwadde obwo bauaasanye mu kyambalo, mu nfunyiro oba mu butungiro oba mu maliba, oba mu kyonna ekitungiddwa mu maliba, ng'amanya ng'obulwadde obwo bwa bigenge ebitta n'omuntu; ekyo ekyambalo nga si kirongoofu.

⁵²Kabona anaayokyanga ebyambalo ebyo, obanga obulwadde buli mu nfunyiro oba mu ntabiro ez'ebiyambalo ebya bafuta oba eby'ebyoya by'endiga, oba ebirala byonna ebitungiddwa mu maliba, kubanga obwo bwe bulwadde bw'ebigenge ebittira ddala. Ebyambalo ebyo binaayokebwanga mu muliro.

⁵³"Kabona bw'anaabanga akebedde ekyambalo ekirimu obulwadde, n'asanga nga tebusaasaanye mu kyambalo, ne mu nfunyiro zaakyo, oba ne mu ntabiro, oba ne mu kyonna ekitungiddwa mu maliba,

⁵⁴kale kabona anaalagiranga ne bayoza ekyambalo ekyo omuli obulwadde, n'ayongera okukisibira mu kalantiini ennaku endala musanvu.

⁵⁵Awo kabona anaakeberanga ekyambalo ekyo ekyoze, bw'anaasanganga ng'erangi y'akafo awali obulwadde tekyuse, newaakubadde ng'obulwadde tebusaasaanye, ekyambalo ekyo nga si kirongoofu. Mukyokyanga mu muliro, awali ebigenge ne bwe wanaabanga mu kyambalo mu maaso oba mu mabega gaakyo.

⁵⁶Naye kabona bw'anaakeberanga n'asanga nga bwe bamaze okwoza ekyambalo, akafo aka awali obulwadde tekakyalabika nnyo, akafo aka anaakayuzangamu mu kyambalo ekyo, oba mu ddiba oba mu kiruke kyonna ekyambalwa.

⁵⁷Naye obulwadde obwo bwe bunaalabikanga nate mu kyambalo, oba mu kyambalo eky'eddiba oba ekiruke, nga busaasaanye, kale munaayokyanga mu muliro ekyambalo ekyo omuli obulwadde.

⁵⁸Naye mu kyambalo kyonna, oba ekyambalo eky'eddiba oba ekiruke, obulwadde bwe buggwangamu nga kimaze okwozebwawa, kale kinaayozebwanga omulundi ogwokubiri, ne kiba kirongoofu."

⁵⁹Eryo lye tteeka ery'obulwadde bw'ebigenge mu byambalo by'ebyoya by'endiga, oba linena, oba ebiruke obulusi, oba ebitunge mu maliba mu ngeri

ezitali zimu, erinaasinziirwangako okulangirira obanga ekyambalo kirongoofu
oba si kirongoofu.

Ebyabaleevi 14

Abagenge Okufuulibwa Abalongoofu

¹Awo MUKAMA Katonda n'agamba Musa nti,

²“Lino lye tteeka erinaagobererwanga ku lunaku omugenge lw'anaafuulibwanga
omulongoofu mu ngeri entongole ng'aleeteddwa eri kabona.

³Kabona anaafulumanga n'agenda ebweru w'olusiisira n'akebera omuntu oyo.
Awo bw'anaasanganga ng'obulwadde bw'ebigenge bumuwonyeeko,

⁴kabona anaalagiranga okuleetera omuntu oyo agenda okufuulibwa
omulongoofu, ebinyonyi bibiri ebiramu ebirongoofu, n'omuti omwerezzi,
n'oluwuzzi olumyufu, n'ezobu.

⁵Kabona anaalagiranga okuttira emu ku nnyonyi ziri ebbiri waggulu w'amazzi
amalungi agali mu luggyo.

⁶Anaddiranga ennyonyi ennamu, awamu n'omuti omwerezzi, n'oluwuzzi
olumyufu, n'ezobu, byonna ebyo n'abinnyika mu musaayi gw'ennyonyi
enettirwanga waggulu w'amazzi amalungi.

⁷Anaamansiranga omusaayi emirundi musanvu ku oyo omulwadde w'ebigenge
agenda okufuulibwa omulongoofu; era anaamulangiriranga nti mulongoofu.
Ekinyonyi kiri ekiramu, kabona anaakirekanga n'ekibuuka n'ekigenda.

⁸Omuntu oyo anaabanga agenda okufuulibwa omulongoofu anaayozanga
engoye ze, n'amwako enviiri ze, n'anaaba mu mazzi, n'abeera mulongoofu. Ebyo
nga biwedde anaayingiranga mu lusiisira, naye ajjanga kumala ennaku musanvu
ng'asula bweru wa weema ye.

⁹Ku lunaku olw'omusantu omuntu oyo anaayongeranga okumwa ku mutwe
gwe enviiri ze zonna, anaamwangako n'ebirevu bye, n'ebisige bye, n'obwoya
obulala bwonna obumwebwa. Ate anaayozanga engoye ze, n'anaaba omubiri
gwe gwonna mu mazzi, bw'atyo n'afuuka mulongoofu.

¹⁰“Ku lunaku olw'omunaana anaaleetanga abaana b'endiga abalume babiri
abataliiko kamogo, n'omwana gw'endiga omuluusi nga gwa mwaka gumu
ogw'obukulu, n'aleeterako n'obuwunga obulungi obw'emmere ey'empeke
obuweza kilo ssatu obw'ekiweebwayo, ng'abutabudde mu mafuta, n'aleeterako
n'ebbakuli y'amafuta ag'omuzeeyituuni eweza desimoolo ssatu eza lita.

¹¹Awo kabona ow'okulangiriranga omuntu oyo okuba omulongoofu,
anaamuleetanga, awamu n'ebiweebwayo bye, awali MUKAMA Katonda mu
mulyango gw'Eweema ya MUKAMA ey'Okukuŋjaanirangamu.

¹²Awo kabona anaddiranga omu ku baana b'endiga omulume n'aguwaayo awamu n'epakuli y'amafuta ag'omuzeeyituuni, ng'ekiweebwayo olw'omusango, anaabiwuubanga ng'ekiweebwayo eri MUKAMA Katonda ekiwuubibwawuubibwa.

¹³Omwana gw'endiga ogwo anaaguttiranga mu kifo ekitukuvu, ekiweebwayo olw'ekibi n'ekiweebwayo ekyokebwa we bittirwa. Okufaanana ng'ekiweebwayo olw'ekibi, ekiweebwayo olw'omusango nakyo kinaabanga kya kabona; nga kitukuvu nnyo.

¹⁴Awo kabona anaatoolanga ku musaayi ogw'ekiweebwayo olw'omusango n'agusiiga ku lukugiro lw'okutu okwa ddyo okw'oyo anaabeeranga azze okufuulibwa omulongoofu, ne ku kinkumu eky'engalo ey'omukono gwe ogwa ddyo, ne ku kigere ekisajja eky'oku kugulu kwe okwa ddyo.

¹⁵Kabona anaddiranga ku mafuta ag'omuzeeyituuni ag'omu pakuli n'agafukako mu kibatu ky'omukono gwe ogwa kkono,

¹⁶anannyikanga olunwe lwe olwa ddyo mu mafuta ag'omuzeeyituuni agali mu kibatu ky'omukono gwe ogwa kkono, n'amansira n'olunwe lwe ku mafuta ag'omuzeeyituuni emirundi musanvu awali MUKAMA Katonda.

¹⁷Kabona anaddiranga agamu ku mafuta ag'omuzeeyituuni aganaabanga gasigadde mu kibatu kye n'agasiiga ku lukugiro lw'okutu kw'oyo anaabeeranga azze okufuulibwa omulongoofu, ne ku kinkumu ky'engalo ey'omukono gwe ogwa ddyo, ne ku kigere ekisajja eky'oku kugulu kwe okwa ddyo, ng'agasiiga kungulu ku musaayi ogw'ekiweebwayo olw'omusango.

¹⁸Kabona anaddiranga amafuta ag'omuzeeyituuni aganaabanga gasigadde mu kibatu kye n'agasiiga mu mutwe gw'oyo ajja okufuulibwa omulongoofu, n'amutangiririra awali MUKAMA.

¹⁹Kabona anaawangayo ekiweebwayo olw'ekibi, atangiririre oyo atali mulongoofu ajja okufuulibwa omulongoofu. Oluvannyuma kabona anattanga ekiweebwayo ekyokebwa,

²⁰n'akiwaayo ku kyoto awamu n'ekiweebwayo eky'emmere ey'empeke. Bw'atyo kabona anaatangiririranga omuntu oyo, n'afuuka mulongoofu.

²¹"Naye omuntu oyo bw'anaabanga omwavu ng'ebyo byonna tabisobola, anaaleetanga omwana gw'endiga omulume gumu okuba ekiweebwayo olw'omusango, ne kiwuubibwa okumutangiririranga, okwo n'agattirako ne kimu kya kkumi ekyaefa eky'obuwunga obulungi ennyo obutabikiddwa mu mafuta, nga kye kiweebwayo eky'emmere y'empeke, n'agattako n'epakuli y'amafuta ag'omuzeeyituuni;

²²n'amayiba abiri oba enjiibwa ento bbiri, ng'okufuna kwe bwe kunaamusobozesanga; emu eneebanga ya kiweebwayo olw'ekibi, endala nga ya kiweebwayo ekyokebwa.

²³Ebyo byonna eby'okumufuula omulongoofu anaabireetanga eri kabona ku lunaku olw'omunaana, ku mulyango gw'Eweema ya MUKAMA ey'Okukujjaanirangamu, awali MUKAMA.

²⁴Kabona anaddiranga omwana gw'endiga ogw'ekiweebwayo olw'omusango, n'epakuli y'amafuta ag'omuzeeyituuni, n'abiwuuba nga kye kiweebwayo ekiwuubibwawuubibwa awali MUKAMA.

²⁵Kabona anattanga omwana gw'endiga ogw'ekiweebwayo olw'omusango; n'addira ogumu ku musaayi ogw'ekiweebwayo olw'omusango, n'agusiiga ku lukugiro lw'okutu okwa ddyo okw'oyo anaabanga azze okufuulibwa omulongoofu, era ne ku kinkumu eky'engalo ey'omukono gwe ogwa ddyo, ne ku kigere ekisajja eky'oku kugulu kwe okwa ddyo.

²⁶Kabona anaafukanga agamu ku mafuta mu kibatu ky'omukono gwe ogwa kkono,

²⁷n'amansira n'olunwe lwe olwa ddyo agamu ku mafuta ago agali mu kibatu ky'omukono gwe ogwa kkono, emirundi musanvu awali MUKAMA.

²⁸Era kabona anaasiiganga agamu ku mafuta ag'omuzeeyituuni agali mu kibatu ky'omukono gwe ku lukugiro lw'okutu okwa ddyo okw'oyo anaabanga azze okufuulibwa omulongoofu, ne ku kinkumu eky'engalo ey'omukono gwe ogwa ddyo, ne ku kigere ekisajja eky'oku kugulu kwe okwa ddyo, ng'agasiiga kungulu ku musaayi ogw'ekiweebwayo olw'omusango.

²⁹Kabona anaddiranga amafuta ag'omuzeeyituuni aganaabanga gasigadde mu kibatu kye, n'agasiiga ku mutwe gw'oyo anaabanga azze okufuulibwa omulongoofu, okumutangiririra eri MUKAMA.

³⁰Era anaawangayo, ng'obusobozi bwe gye bunaakomanga, amayiba oba enjiibwa ento,

³¹ekinyonyi ekimu ng'ekiweebwayo olw'ekibi n'ekyokubiri ng'ekiweebwayo ekyokebwa, ng'agattirako n'ekiweebwayo eky'emmere ey'empeke. Kabona anaamutangiririra oyo anaabanga azze okufuulibwa omulongoofu eri MUKAMA.

³²Ago ge mateeka aganaagobererwanga omuntu omugenge anaabanga tasobola biweebwayo ebya bulijjo, alyoke afuuke omulongoofu."

Ebigenge mu Mayumba

³³MUKAMA n'agamba Musa ne Alooni nti,

³⁴“Bwe muliyingira mu nsi ya Kanani gye mbawadde okugirya, ne musanga nga ntadde ebigenge mu emu ku nnyumba ez’omu nsi eyo,

³⁵kale, oyo anaabanga nannyini nnyumba eyo anajjanga n’ategeeza kabona nti, ‘Mu nnyumba yange mufaanana ng’omuli obulwadde.’

³⁶Kabona anaalagiranga ne bafulumya ebintu byonna ebiri mu nnyumba ne babimalamu, nga tannaba kuyingiramu kukebera obulwadde obwo nga bwe buli, si kulwa nga byonna ebiri mu nnyumba biyitibwa ebitali birongoofu. Ekyo nga kiwedde kabona anaayingiranga mu nnyumba n’agikebera.

³⁷Anaanoonyanya obulwadde we buli; bw’anaabusanganga ku bisenge by’ennyumba eyo, nga kuliko amabala aga kiragalalagala oba amamyukirivu, era nga galabika gayingidde munda mu mubiri gw’ekisenge,

³⁸olwo kabona anaafulumanga mu nnyumba eyo, n’agiggala okumala ennaku musanvu.

³⁹Ku lunaku olw’omusantu kabona anaakomangawo n’akebera ennyumba eyo. Bw’anaasanganga ng’obulwadde busaasaanidde ku bisenge by’ennyumba eyo,

⁴⁰kale, anaalagiranga ne basokoola mu bisenge amayinja gonna agaliko obulwadde ne bagasuula ebweru w’ekibuga mu kifo ekitali kirongoofu.

⁴¹Era anaalagiranga ebisenge byonna eby’omu nnyumba eyo ne bikalakatibwa, ebintu byonna ebikalakatibbwako ne bisuulibwa ebweru w’ekibuga mu kifo ekitali kirongoofu.

⁴²Era banaddiranga amayinja amalala ne bagazimba mu bifo by’agali agaggyibwamu, ne batabula bulungi omusenyu, ennyumba yonna n’ekubibwa omusenyu.

⁴³“Singa obulwadde buddamu okuzuuka, oluvannyuma lw’ennyumba okugiggyamu amayinja gali, n’okugikalakata era n’okugikubako omusenyu omuggya,

⁴⁴kale, kabona anaagendangayo ne yeetegereza; bw’anaasanganga ng’obulwadde busaasaanye mu nnyumba, ng’ebyo bigenge bye biri mu nnyumba, era nga si nnongoofu.

⁴⁵Anaalagiranga ennyumba eyo n’emenyebwawo, amayinja gaayo n’embaawo zaayo n’omusenyu ogwagikubwako, byonna binaasitulwanga ne bisuulibwa ebweru w’ekibuga mu kifo ekitali kirongoofu.

⁴⁶Ennyumba eyo bw’eneebanga tennamenyebwawo, omuntu yenna anaayingiranga mu nnyumba eyo mu kiseera ky’eneemalanga nga nzigale anaabanga si mulongoofu okutuusa akawungeezi.

⁴⁷N'omuntu yenna anaasulanga mu nnyumba eyo oba anaaliirangamu, anaayozanga engoye ze.

⁴⁸"Naye kabona bw'anajjanga n'akebera mu nnyumba eyo ng'emaze okukubibwako omusenyu, n'asanga ng'obulwadde tebwasaasaana; kale, kabona anaalangiriranga ng'ennyumba eyo bw'eri ennongoofu, kubanga olwo ng'obulwadde bugenze.

⁴⁹Okufuula ennyumba ennongoofu kabona anaddiranga ebinyonyi bibiri n'akabaawo k'omuti omwerezi, n'ekiwero ekimyufu n'ezobu.

⁵⁰Anattiranga ekimu ku binyonyi mu mazzi amalungi mu kibya eky'ebbumba.

⁵¹Awo anaddiranga akabaawo k'omuti omwerezi n'ezobu, n'ekiwero ekimyufu, n'ekinyonyi ekikyali ekiram, n'abinnyika mu musaayi gw'ekinyonyi ekyattiddwa ne mu mazzi amalungi, n'alyoka amansira ennyumba yonna emirundi musanvu.

⁵²Ennyumba anaagifullanga ennongoofu n'omusaayi gw'akanyonyi, n'amazzi amalungi, n'akanyonyi akalamu, n'akabaawo k'omuti omwerezi, n'ezobu n'ekiwero ekimyufu.

⁵³Awo n'afulumya ekinyonyi ekiram, ebweru w'ekibuga n'akiteera eyo ne kibuuka ne kigenda. Mu ngeri eyo anaatangiririranga ennyumba eyo era eneebanga nnongoofu."

⁵⁴Ago ge mateeka aganaagobererwanga ku bulwadde bw'ebigenge, omubiri ogusiiwa,

⁵⁵ebigenge mu ngoye oba mu nnyumba,

⁵⁶oba okubutukabutuka, oba obutulututtu,

⁵⁷okusinziirako okutegeera obanga ekintu kirongoofu oba si kirongoofu. Ago ge mateeka ku bigenge.

Ebyabaleevi 15

Amateeka ku Butali Bulongoofu mu Basajja

¹Awo MUKAMA n'agamba Musa ne Alooni nti,

²"Mugambe abaana ba Isirayiri nti omusajja yenna bw'anaavangamu ebitonnya mu bitundu bye ebyekyama, ebimuvaamu ebyo binaabanga ebitali birongoofu.

³Era lino ly'etteeka ery'obutali bulongoofu bwe obuleeteddwa ebyo ebimuvaamu: obanga bitonnya obutasalako, obanga birekedaawo, bunaabanga obutali bulongoofu mu musajja oyo.

⁴"Buli kitanda omusajja oyo alina ebimuvaamu ky'anaasulangako kinaabanga si kirongoofu, ne buli kintu ky'anaatuulangako kyonna kinaabanga si kirongoofu.

⁵Omuntu yenna anaakwatanga ku kitanda ky'omusajja oyo naye anaafuukanga atali mulongoofu okutuusiza ddala akawungeezi, era anaateekwanga okwoza engoye ze n'okunaaba mu mazzi.

⁶Omuntu yenna anaatuulanga ku kintu kyonna omusajja oyo alina ebimuvaamu kw'anaabanga amaze okutuula, anaafuukanga atali mulongoofu okutuusa akawungeezi, era anaateekwanga okwoza engoye ze n'okunaaba mu mazzi.

⁷Era omuntu yenna anaakwatanga ku musajja oyo alina ebimuvaamu, anaafuukanga atali mulongoofu okutuusa akawungeezi, era anaateekwanga okwoza engoye ze n'okunaaba mu mazzi.

⁸Omusajja oyo alina ebimuvaamu bw'anaawandanga amalusu ku muntu omulongoofu, omuntu oyo anaafuukanga atali mulongoofu okutuusa akawungeezi, era anaateekwanga okwoza engoye ze n'okunaaba mu mazzi.

⁹Era n'amatandiiko gonna omusajja oyo alina ebimuvaamu kw'aneebagaliranga ganaabanga agatali malongoofu,

¹⁰era n'omuntu anaakwatanga ku kintu ekirala kyonna ekinaabanga wansi w'omusajja oyo anaafuukanga atali mulongoofu okutuusa akawungeezi, era anaateekwanga okwoza engoye ze n'okunaaba mu mazzi.

¹¹Omuntu yenna, omusajja oyo alina ebimuvaamu gw'anaakwatangako nga tasoose kunaaba mu ngalo mu mazzi anaafuukanga atali mulongoofu okutuusa akawungeezi, era anaateekwanga okwoza engoye ze n'okunaaba mu mazzi.

¹²Ekibumbe kyonna ekikozesebwा mu maka bwe kinaakwatibwangako omusajja oyo alina ebimuvaamu kinaayasibwanga, na buli ekikozesebwा mu maka eky'omuti kinaanaazibwanga mu mazzi.

¹³"Omusajja anaabanga alina ebimuvaamu bw'anaafuulibwanga omulongoofu, aneebaliranga ennaku musanvu ez'okufuulibwa omulongoofu; anaateekwanga okwoza engoye ze n'okunaaba omubiri gwe mu mazzi amayonjo agakulukuta, bw'atyō anaafuukanga mulongoofu.

¹⁴Ku lunaku olw'omunaana kinaamusaaniranga okuddira amayiba abiri oba enjiibwa ento bbiri n'ajja awali MUKAMA mu mulyango gw'Eweema ya MUKAMA ey'Okukuñjaanirangamu n'abikwasa kabona.

¹⁵Kabona anaabiwangayo, ekimu nga kye kiweebwayo olw'ekibi n'ekirala nga kye kiweebwayo ekyokebwा. Mu ngeri eyo kabona anaatangiririranga omusajja oyo olw'ebimuvaamu eri MUKAMA.

¹⁶"Omusajja bw'anaavangamu amazzi g'obusajja anaateekwanga okunaaba omubiri gwe n'amazzi, era anaasigalanga nga si mulongoofu okutuusa akawungeezi.

¹⁷Buli lugoye olwambalwa oba eddiba nga kuliko amazzi g'obusajja, binaateekwanga okwozebwu mu mazzi, era binaabanga eitali birongoofu okutuusa akawungeezi.

¹⁸Omusajja bw'aneebakanga n'omukazi, ne wabaawo amazzi g'obusajja agafulumizibbwu, bombi banaanaabanga mu mazzi agatukula, era banaabeeranga abatali balongoofu okutuusa akawungeezi.

Amateeka ku Butali Bulongoofu mu Bakazi

¹⁹"Omukazi bw'anaavangamu omusaayi ng'empisa ye eya bulijjo eya buli mwezi bw'eba, anaabeeranga atali mulongoofu okumala ennaku musanvu, ne buli anaamukwatangako anaabeeranga atali mulongoofu okutuusa akawungeezi.

²⁰Mu bbanga eryo ng'omukazi oyo si mulongoofu buli kintu kyonna ky'anaagalamirangako kinaabanga eitali kirongoofu, ne buli kintu kyonna ky'anaatuulangako kinaabanga eitali kirongoofu.

²¹Era buli anaakwatanga ku kitanda kye kinaamusaaniranga okwoza engoye ze, n'okunaaba mu mazzi, era anaabeeranga atali mulongoofu okutuusa akawungeezi.

²²Buli anaakwatanga ku kintu kyonna omukazi oyo ky'atuulako, anaateekwanga okwoza engoye ze n'okunaaba omubiri gwe mu mazzi, era anaabeeranga atali mulongoofu okutuusa akawungeezi.

²³Bwe kinaabanga ekitanda oba ekintu ekirala kyonna omukazi oyo ky'anaabanga atuddeko, omuntu bw'anaakikwatangako anaabeeranga atali mulongoofu okutuusa akawungeezi.

²⁴Omusajja bw'aneebakanga n'omukazi oyo, omusaayi gw'omukazi ogumuvaamu ogwa buli mwezi ne gumutonnyako, anaabeeranga atali mulongoofu okumala ennaku musanvu; n'ekitanda kw'anaagalamiranga nakyo kinaabanga eitali kirongoofu.

²⁵"Omukazi bw'anaavangamu omusaayi okumala ennaku nnyingi mu biseera eitali ebyo ebya buli mwezi nga bwe kiba bulijjo, oba bw'anaavangamu omusaayi okumala ennaku ezisukka ku za bulijjo eza buli mwezi, anaabeeranga atali mulongoofu mu bbanga ly'anaamalanga ng'avaamu omusaayi, nga mu biseera bye ebya buli mwezi.

²⁶Buli kitanda ky'anaagalamirangako ng'omusaayi gukyamuvaamu kinaabeeranga eitali kirongoofu, ng'ekitanda kye bwe kiba mu biseera bye ebya buli mwezi eby'okuvaamu omusaayi, era ne buli kintu ky'anaatuulangako kinaabanga eitali kirongoofu nga bwe kiba mu biseera bye ebya buli mwezi.

²⁷Buli muntu anaakwatanga ku bintu ebyo anaabeeranga atali mulongoofu; kinaamusaaniranga okwoza engoye ze, n'okunaaba omubiri gwe mu mazzi, era anaabeeranga atali mulongoofu okutuusa akawungeezi.

²⁸Naye omukazi oyo avaamu omusaayi bw'anaafuulibwanga omulongoofu, aneebaliranga ennaku musanvu, N'oluvannyuma lwazo anaabeeranga mulongoofu.

²⁹Ku lunaku olw'omunaana kinaamusaaniranga okuddira amayiba abiri, oba enjiibwa ento bbiri n'ajja awali MUKAMA ku mulyango gw'Eweema ya MUKAMA ey'Okukunjaaanirangamu n'abikwasa kabona.

³⁰Kabona anaawangayo ekimu nga kye kiweebwayo olw'ekibi, n'ekirala nga kye kiweebwayo ekyokebwa. Mu ngeri eyo kabona anaatangiriranga omukazi oyo eri MUKAMA olw'ekitali kirongoofu ekimuvaamu.

³¹"Bwe mutyo bwe munaakugiranga abaana ba Isirayiri balemenga okusemberera ebintu ebibafuula abatali balongoofu, balemenga okufa olw'obutali bulongoofu bwabwe okuboonoonyesa Eweema ya MUKAMA ey'Okukunjaaanirangamu eri wakati mu bo.

³²"Ago ge mateeka ku musajja alina ebimuvaamu mu bitundu bye eby'ekyama, n'oyo avaamu amazzi g'obusajja;

³³ne ku mukazi anaavangamu omusaayi ng'empisa y'abakazi eya bulijjo eya buli mwezi bw'eba. Amateeka ago ganaakwatanga ku musajja oba ku mukazi alina ebimuvaamu, ne ku musajja aneebakanga n'omukazi atali mulongoofu."

Ebyabaleevi 16

Omukolo ogw'Okutangiririra

¹Awo MUKAMA n'ayogera ne Musa, abaana ba Aloonni ababiri bwe baali bamaze okufa olwokubanga baasemberera MUKAMA.

²MUKAMA n'agamba Musa nti, "Tegeeza muganda wo Aloonni alemenga okujja buli w'anaayagaliranga, mu kifo Awatukuvu ekiri munda w'eggigi, okutunuulira entebe ey'okusaasira eri ku Ssanduuko ey'Endagaano; bw'alikikola talirema kufa; kubanga nzijanga kulabikira mu kire nga kiri waggulu w'entebe ey'okusaasira.

³Naye Aloonni bw'anaabanga ajja mu kifo Awatukuvu anaaleetanga ennyana ennume olw'ekiweebwayo olw'ekibi, n'endiga ennume olw'ekiweebwayo ekyokebwa.

⁴Anaayambalanga ekkooti entukuvu eya bafuta, ne munda ku mubiri gwe anaasookangako empale eya bafuta, nga yeesibye olukoba olwa bafuta, ne ku mutwe ng'asibyeko ekitambaala ekya bafuta. Ebyambalo ebyo bitukuvu, noolwekyo kimusaaniranga okusooka okunaaba omubiri gwe mu mazzi nga tannabyambala.

⁵Era anaggyanga mu baana ba Isirayiri embuzi ennume bbiri nga za kiweebwayo olw'ekibi, n'endiga emu nga ya kiweebwayo ekyokebwa.

⁶ “Alooni anaawangayo ennyana ennume nga ya kiweebwayo kye olw’ekibi alyoke yeetangiririre awamu n’ab’omu maka ge.

⁷ Era anaddiranga embuzi ebbiri n’azireeta eri MUKAMA mu mulyango gw’Eweema ya MUKAMA ey’Okukuñjaanirangamu.

⁸ Embuzi ebbiri Alooni anaazikubirangako obululu; akalulu akamu nga ka kugwa ku mbuzi ya MUKAMA, n’akalala nga ka kugwa ku mbuzi enessibwangako omusango.

⁹ Alooni anaddiranga embuzi akalulu ka MUKAMA kwe kanaagwanga, n’agiwaayo okubeera ekiweebwayo olw’okwonoona.

¹⁰ Naye embuzi eneegwangako akalulu ak’okugissibyako omusango, eneeweewangayo eri MUKAMA nga nnamu, n’eteebwa n’eddukira mu ddungu mu kifo Azazeri ng’esibiddwako omusango olw’okutangirira.

Ekiweebwayo olw’Ekibi ekyá Kabona n’Abantu

¹¹ “Alooni anaawangayo ennyana eyo ennume nga ya kiweebwayo kye olw’ekibi, alyoke yeetangiririre awamu n’ab’omu maka ge; ennyana eyo ennume anaagittanga nga kye kiweebwayo kye olw’ekibi.

¹² Anaddiranga ekyoterezo ky’obubaane nga kijjudde amanda g’omuliro nga gavudde ku kyoto eri MUKAMA, n’embatu bbiri ez’obubaane obw’akaloosa obumerunguddwa obulungi, n’abireeta munda w’eggigi.

¹³ Anassanga obubaane ku muliro eri MUKAMA, n’omukka ogunaavanga mu bubaane gunaabikkanga entebe ey’okusaasira eri kungulu w’Essanduuko ey’Endagaano, alyoke aleme okufa.

¹⁴ Anaddiranga ku musaayi ogw’ennyana eyo ennume n’agumansira n’olunwe lwe ku ludda olw’ebuvanjuba olw’entebe ey’okusaasira; era omusaayi ogumu anaagumansiranga n’olunwe lwe emirundi musanvu mu maaso g’entebe ey’okusaasira.

¹⁵ “Era anattanga embuzi ey’ekiweebwayo ky’abantu olw’ekibi, n’atwala omusaayi gwayo munda w’eggigi n’agukola nga bwe yakola omusaayi gw’ennyana ennume; anaagumansiranga ku ntebe ey’okusaasira ne mu maaso gaayo.

¹⁶ Mu ngeri eyo anaatangiririranga Ekifo eky’Awatukuvu Enyo olw’obutali bulongoofu n’obujeemu eby’abaana ba Isirayiri, n’olw’ebyonoono byabwe ebirala byonna nga bwe byali. Era anaakolanga bw’atyo ne ku Weema ya MUKAMA ey’Okukuñjaanirangamu eri mu bo wakati mu butali bulongoofu bwabwe.

¹⁷ Mu Weema ya MUKAMA ey’Okukuñjaanirangamu temuubengamu muntu n’omu Alooni bw’anaayingirangamu okutangiririra Ekifo eky’Awatukuvu

Ennyo, okutuusa lw'anaafulumanga ng'amaze okwetangiririra awamu n'ab'omu maka ge, n'ekibiina kyonna ekya Isirayiri.

¹⁸Era anaafulumanga n'ajja ku kyoto ekiri awali MUKAMA n'akitangiririra. Anaddiranga ku musaayi gw'ennyana eya seddume ne ku musaayi gw'embuzi n'agusiiga ku mayembe gonna ag'ekyoto.

¹⁹Ku musaayi ogwo anaamansirangako ku kyoto n'olunwe lwe emirundi musanvu okukifuula ekirongoofu n'okukitukuza okukiggya mu butali bulongoofu obw'abaana ba Isirayiri.

Embuzi Esibibwako Omusango

²⁰"Awo Aloonni bw'anaamalanga okutangiririra Ekifo eky'Awatukuvu Ennyo, n'Eweema ya MUKAMA ey'Okukuŋjaanirangamu, n'ekyoto, anaaleetanga embuzi ennamu.

²¹Anaateekanga emikono gye gyombi ku mutwe gw'embuzi eyo ennamu n'agikwatako, n'agyenenyerezaako ebyonoono by'abaana ba Isirayiri, n'obujeemu bwabwe, n'ebibi byabwe byonna, ng'abitadde ku mutwe gw'embuzi eyo. Embuzi anaagisindikanga mu ddungu ng'etwalibwa omusajja analondebwanga okukola omulimu ogwo.

²²Embuzi eyo eneetikkanga ebyonoono by'abaana ba Isirayiri byonna n'ebitwala mu kifo eteri bantu, eyo omusajja oyo gy'anaagiteeranga n'eraga mu ddungu.

²³"Aloonni anaayingiranga mu Weema ya MUKAMA ey'Okukuŋjaanirangamu, ne yeeyambulamu ebyambalo ebya bafuta bye yayambadde nga tannayingira mu Kifo eky'Awatukuvu Ennyo, era naabirekanga awo.

²⁴Anaanaabiranga omubiri gwe mu mazzi nga gali mu kifo ekitukuvu, n'alyoka ayambala ebyambalo bye ebya bulijo. Anaafulumanga n'awaayo ekiweebwayo kye ekyokebwa ku lulwe, n'ekiweebwayo ekyokebwa olw'abantu bona, alyoke yeetangiririre era n'abantu abatangiririre.

²⁵Era n'amasavu ag'ekiweebwayo olw'ekibi anaagookeranga ku kyoto.

²⁶"Omusajja anaatanga embuzi esibiddwako omusango, eraze mu Azazeri mu ddungu, kinaamugwaniranga okwoza engoye ze n'okunaaba omubiri gwe n'amazzi; oluvannyuma anaakomangawo mu lusiisira.

²⁷Ennyana ennume n'embuzi ennume ez'okuwaayo olw'ebiweebwayo olw'ekibi, era omwava omusaayi ogwaleetebwa mu Kifo eky'Awatukuvu Ennyo olw'okutangiririra, ziteekwa okufulimidzibwa ebweru w'olusiisira, amaliba gaazo n'ennyama yaazo eriibwa n'eyo eteriibwa, zonna binaayokebwanga.

²⁸Oyo anaazokyanga anaateekwanga okwoza engoye ze, n'okunaaba omubiri gwe mu mazzi; oluvannyuma anaakomangawo mu lusiisira.

Olunaku olw'Okutangiririra

²⁹ “Etteeka lino munaalikwatanga emirembe gyonna: Ku lunaku olw'ekkumi mu mwezi ogw'omusantu muneesanga eby'amasanyu byonna n'emirimu gyammwe gyonna, temuukolerengako mulimu gwonna mmwe bannannyini nsi era n'abagwira ababeera mu mmwe,

³⁰ kubanga ku lunaku olwo mulitangirirwa ne mufuulibwa abalongoofu. Bwe mutyo munaabeeranga muvudde mu byonoono byammwe ne mufuulibwa balongoofu mu maaso ga MUKAMA Katonda.

³¹ Lunaabanga ssabbiiti nga lwa kuwummula; era kibasaanira okwefiisanga bye mwandiyagadde; etteeka eryo linaabanga lya mirembe gyonna.

³² Kabona eyafukibwako amafuta ag'omuzeeyituuni era ng'ayawulibwa n'asikira kitaawe, y'anaatangiriranga. Anaayambalanga ebyambalo ebya linena ebitukuvu,

³³ n'atangiririra Ekifo Awatukuvu Ennyo, n'atangiririra n'Eweema ya MUKAMA ey'Okukuŋjaanirangamu, n'atangiririra n'ekyoto, ne bakabona awamu n'abantu bona mu kibiina kyonna.

³⁴ “Etteeka eryo linaababeeranga lya mirembe gyonna, ng'okutangiririra okwo kukolebwa omulundi gumu buli mwaka olw'ebyonoono byonna eby'abaana ba Isirayiri.” Awo byonna ne bikolebwa nga MUKAMA Katonda bwe yalagira Musa.

Ebyabaleevi 17

Etteeka ku Biweebwayo Ebitali bya Bulijjo

¹ Awo MUKAMA n'agamba Musa nti,

² “Tegeeza Aloonie ne batabani be n'abaana ba Isirayiri bona, obagambe nti, Kino MUKAMA ky'alagidde:

³ Omuntu yenna Omuyisirayiri anaawangayo ekiweebwayo eky'ente, oba endiga ento, oba embuzi, munda mu lusiisira oba ebweru w'olusiisira,

⁴ nga tagireese ku mulyango gw'Eweema ya MUKAMA ey'Okukuŋjaanirangamu, okugawaayo ng'ekirabo ekiweebwayo eri MUKAMA Katonda mu kisasi ky'Eweema ya MUKAMA; omuntu oyo anaabanga azzizza omusango ogw'okuyiwa omusaayi; olwokubanga ayiye omusaayi, anaagobwanga n'agaanibwa okukolagananga ne banne.

⁵ Ekyo kiri bwe kityo abaana ba Isirayiri balyoke balekeraawo okuweerangayo ebiweebwayo byabwe ebweru mu nnimiro, naye babireetenga awali MUKAMA Katonda. Kibagwanira okubireetanga eri MUKAMA babikwasenga kabona ku mulyango gw'Eweema ya MUKAMA ey'Okukuŋjaanirangamu, ne biryoka bittibwa nga bye biweebwayo eri MUKAMA olw'emirembe.

⁶Kabona anaamansiranga omusaayi ku kyoto kya MUKAMA ku mulyango gw'Eweema ya MUKAMA ey'Okukuñjaanirangamu, amasavu n'agookya ne muvaamu akaloosa akalungi akasanyusa MUKAMA Katonda.

⁷Tebasaana kwongera kuwangayo biweebwayo byabwe eri bakatonda be beekoledde mu kifaananyi ky'embuzi, be bakola nabyo eby'obwamalaaya. Eryo linaabanga tteeka lyabwe lya lubeerera n'okuyita mu mirembe egigenda okuddawo.

⁸"Era bagambe nti, Buli muntu yenna Omuyisirayiri, oba omunnaggwanga yenna abeera mu bo, aliwaayo ekiweebwayo ekyokebwa, oba ekiweebwayo eky'engeri yonna,

⁹nga takireese ku mulyango gw'Eweema ya MUKAMA ey'Okukuñjaanirangamu, okukiwaayo eri MUKAMA Katonda, omuntu oyo anaagobwanga n'agaanibwa okukolagananga ne banne.

¹⁰"Omuntu yenna Omuyisirayiri oba ow'omu bannamawanga ababeera mu Isirayiri bw'anaalyanga omusaayi ogw'engeri yonna, nnaamunyiigiranga oyo anaalyanga omusaayi, era nnaamugobanga ne mugaana okukolagananga ne banne.

¹¹Kubanga obulamu bw'ekitonde buli mu musaayi, ate nkibawadde okubatangiririra ku kyoto; omusaayi gwe gutangiririra obulamu bw'omuntu.

¹²Noolwekyo Abayisirayiri mbagamba nti tewabanga n'omu mu mmwe anaalyanga omusaayi, era ne munaggwanga abeera mu mmwe naye taalyenga musaayi.

¹³"Omuyisirayiri yenna, oba omunnaggwanga abeera mu mmwe, bw'anaayigganga ensolo oba ennyonyi nga ya kulya, anaagikenenulangamu omusaayi n'agubikkako ettaka,

¹⁴kubanga obulamu bwa buli kitonde gwe musaayi gwakyo. Abayisirayiri kyenvudde mbagamba nti temulyanga musaayi gwa kitonde eky'engeri yonna, kubanga obulamu bwa buli kitonde gwe musaayi gwakyo, omuntu yenna anaagulyanga anaagobwanga n'agaanibwa okukolagana ne banne.

¹⁵"Omuntu yenna omuzaaliranwa oba omunnaggwanga anaalyanga ekintu kyonna ekinaabanga kisangiddwa nga kifu, oba nga kitaaguddwataaguddwa ensolo enkambwe, anaayozanga ebyambalo bye, n'anaaba mu mazzi, era anaabeeranga atali mulongoofu okutuusa akawungeezi; oluvannyuma anaabeeranga mulongoofu.

¹⁶Naye bw'ataayozenga byambalo bye, n'okunaaba n'atanaaba, ye anaabanga yeeretedde obutali bulongoofu bwe okumusigalako."

Ebyabaleevi 18

Okusula n'Omukazi mu Ngeri Emenya Amateeka

- ¹Awo MUKAMA Katonda n'agamba Musa nti,
- ²“Tegeeza abaana ba Isirayiri nti, ‘Nze MUKAMA Katonda wammwe.
- ³Temusaana kweyisanga mu bikolwa byammwe ng'ab'omu Misiri, gye mwabeeranga, bwe beeyisa, era temusaana kweyisanga ng'ab'omu Kanani, gye mbatwala, bwe beeyisa. Temutambuliranga mu mateeka gaabwe.
- ⁴Munaagonderanga ebiragiro byange, munaakwatanga amateeka gange, era mwe munaatambuliranga. Nze MUKAMA Katonda wammwe.
- ⁵Mugonderenga ebiragiro byange awamu n'amateeka gange, kubanga buli muntu anaabikwatanga mu byo mwanaatambulizanga obulamu bwe. Nze MUKAMA Katonda.
- ⁶“Tewabanga omuntu yenna mu mmwe ajja eri munne gw'alinko oluganda ne yeebaka naye. Nze MUKAMA.
- ⁷“Toleeteranga kitaawo buswavu ng'okola ebyensonyi ne nnyoko. Oyo ye maama wo eyakuzaala, teweekanganya naye ne mukola ebyensonyi, n'omuleetako obuswavu.
- ⁸“Teweekanganya na muka kitaawo ne mukola ebyensonyi, ekyo kireetera kitaawo obuswavu ne kimumalamu ekitiibwa.
- ⁹“Teweekanganya na mwannyoko, azaalibwa kitaawo, oba azaalibwa nnyoko, ne bwe muba nga mwakulira mu maka gamu oba nga temwakulira wamu, tomukolangako bya nsonyi okumuleetera obuswavu.
- ¹⁰“Teweekanganya na muwala azaalibwa mutabani wo, oba muwala w'omwana wo omuwala, n'okola naye ebyensonyi; ekyo ne kikuleetako obuswavu.
- ¹¹“Teweekanganya na mwana wa muka kitaawo ow'obuwala eyazaalibwa kitaawo n'omukolako ebyensonyi; oyo mwannyoko. Tomuleeteranga bya buswavu.
- ¹²“Teweekanganya na mwannyina wa kitaawo n'okola naye ebyensonyi; oyo ne kitaawo ba musaayi gwe gumu.
- ¹³“Teweekanganya na muwala bwe bazaalibwa ne nnyoko n'okola naye ebyensonyi; kubanga oyo ne nnyoko ba musaayi gwe gumu.
- ¹⁴“Toweebuulanga muganda wa kitaawo, ng'olaga eri mukazi we weebake naye mukole ebyensonyi; oyo maama wo omuto.
- ¹⁵“Teweekanganya na muka mutabani wo ne mukola ebyensonyi; kubanga oyo ye mukyala wa mutabani wo; tomuleeteranga bya buswavu.

¹⁶ “Teweekakanga na muka muganda wo ne mukola ebyensonyi, kubanga ekyo kinaaleeteranga muganda wo obuswavu.

¹⁷ “Teweekakanga na mukazi ate ne muwala we n’okola nabo ebyensonyi. Era teweekakanga na mwana muwala owa mutabani wa mukazi oyo oba na mwana muwala owa muwala we; kubanga abo ba musaayi gwe gumu n’ogw’omukazi oyo. Ekyo kibi kinene.

¹⁸ “Toleetanga mukazi nga muganda wa mukyala wo ne badda mu kuvuganya, era ne weebaka naye ne mukola ebyensonyi nga mukyala wo akyali mulamu.

¹⁹ “Toseembereranga mukazi ng’oyagala weebake naye omukoleko ebyensonyi ng’ali mu kiseera kye ekya buli mwezi eky’okuvaamu omusaayi mw’abeerera atali mulongoofu.

²⁰ “Teweekakanga na mukyala wa munnansi yammwe okumukolako ebyensonyi, n’akuleetera obutali bulongoofu.

²¹ “Mu baana bo towangayo n’omu ng’ekiweebwayo ekyokeddwa mu muliro eri Moleki, kubanga erinnya lya Katonda wo tosaanira kuliweebuulanga. Nze MUKAMA.

²² “Teweekakanga na musajja nga bwe wandyebase n’omukazi, ekyo kibi ekikyayibwa ennyo.

²³ “Tokolanga bya nsonyi ku nsolo kubanga ekyo kinaakufuulanga atali mulongoofu. Omukazi teyeewangayo eri ensolo emukoleko ebyensonyi, okwo kwe kuwabira ddala.

²⁴ “Temwereetangako obutali bulongoofu nga mugoberera amayisa ago amabi; kubanga n’amawanga ge njenda okugoba mu nsi mwe mujja okuyingira bwe geefuala bwe gatyo agatali malongoofu;

²⁵ n’ensi n’efuuka etali nnongoofu, ne ngibonereza olw’ebyonoono byayo, n’abantu baamu abagibeeramu n’ebasesema.

²⁶ Naye mmwe mukuumenga ebiragiro byange n’amateeka gange. Abazaaliranwa ne bannamawanga abali mu mmwe tewabanga n’omu anaakolanga ku bintu ebyo n’akatono ebikyayibwa ennyo bwe bityo.

²⁷ Kubanga ebintu ebyo byonna byakolebwanga abantu abaabasooka mmwe okubeera mu nsi omwo, ensi n’efuuka etali nnongoofu.

²⁸ Ensi eyo bwe muligifuula etali nnongoofu, egenda kubasesema nga bwe yasesema amawanga agaabasooka okugibeeramu.

²⁹ “Abantu bonna abanaakolanga ebintu ebyo ebibi ebikyayibwa ennyo, abantu ng’abo banaagobwanga ne bagaanibwa okukolagana ne bannaabwe.

³⁰Mukwatenga amateeka gange, nga mwewalanga okukola ebyonoono ebyo ebikyayibwa eby'amayisa amabi, abo abaabasooka ge beeyisanga si kulwa nga gabafuula abatali balongoofu. Nze MUKAMA Katonda wammwe.'"

Ebyabaleevi 19

Obutukuvu n'Enneeyisa y'Omuntu

¹Awo MUKAMA Katonda n'agamba Musa

²ategeeze ekibiina kyonna eky'abaana ba Isirayiri abagambe nti, "Mubeerenga batukuvu, kubanga nze MUKAMA Katonda wammwe ndi mutukuvu.

³"Buli omu mu mmwe assengamu nnyina ne kitaawe ekitiibwa; era mukuumenga Ssabbiiti zange. Nze MUKAMA Katonda wammwe.

⁴"Temulaganga mu bitali Katonda, era temwekoleranga bakatonda abawese mu kyuma ekisaanuuse. Nze MUKAMA Katonda wammwe.

⁵"Bwe munaawangayo eri MUKAMA ekiweebwayo olw'emirembe, mukiwengayo mu butuufu kiryoke kikkirizibwe.

⁶Kinalibwanga ku lunaku olwo lwe kinaaweebwangayo oba enkeera; ekinaabanga kisigaddewo okutuusa ku lunaku olwokusatu kinaazikiribwanga mu muliro.

⁷Singa kiriibwa ku lunaku olwokusatu tekiibenga kirongoofu, era tekikkirizibwenga,

⁸ne buli anaakiryangako anaabanga azzizza omusango; kubanga anaabeeranga aweebuppe ekintu kya MUKAMA ekitukuvu; omuntu oyo anaagobwanga n'agaanibwa okukolagananga ne banne.

⁹"Bw'okungulanga ekyengera eky'omu ttaka lyo, tokunguliranga ddala ebibala byonna eby'omu nnimiro yo okutuuka ku nkomerero zaayo, oba okukunjaanya obubala obutonotono obunaabanga bugudde wansi ng'okungula.

¹⁰Ennimo yo ey'emizabbibu togimalirangamu ddala bibala byonna, n'ebyo ebibanga bigudde wansi tobikuinjaanya. Obirekeranga abaavu ne bannamawanga. Nze MUKAMA Katonda wammwe.

¹¹"Tobbanga. "Tokumpanyanga. "Temulimbagananga.

¹²"Tokozesanga linnya lyange ng'olayira ebtaliimu nsa, n'ovumisa erinnya lya Katonda wo. Nze MUKAMA.

¹³"Muliraanwa wo tomujoganga so tomunyagangako bibye. "Tosulanga na mpeera ya mupakasi wo n'omala nayo ekiro kyonna okutuusa enkyia nga tonnagimusasula.

¹⁴ “Omuggavu w’amatu tomukolimiranga, so n’omuzibe w’amaaso tomuteganga nkonge w’anaayita, naye otyanga Katonda wo. Nze MUKAMA.

¹⁵ “Tosalirizanga ng’olamula; tobanga na kyekubiira ku ludda lw’omwavu wadde okwekubiira ku ludda lw’ow’ekitiibwa, banno obasalirangawo mu bwenkanya.

¹⁶ “Togendanga ng’osaasaanya ejnjambo mu banno. “Tokolanga kintu kyonna ku munno ekiyinza okumuleetera okufiirwa obulamu bwe. Nze MUKAMA.

Etteeka ku Kwagala

¹⁷ “Muganda wo tomukyawanga mu mutima gwo. Naye munno ng’asobezza, omunenyanga, si kulwa nga naawe ogwa mu kibi nga ye.

¹⁸ “Towalananga ggwanga oba okusiba ekiruyi ku mwoyo eri munno yenna ow’omu nsi yo, naye yagalanga muliraanwa wo nga bwe weeyagala wekka. Nze MUKAMA.

¹⁹ “Okwatanga amateeka gange. “Tokkirizanga nsolo za ngeri ndala kuzaazisa mu nsolo zo. “Mu nnimiro yo tosimbangamu nsigo za ngeri bbiri. “Toyambalanga kyambalo eky’olugoye olw’ebiwero eby’engeri ebbiri.

²⁰ “Omusajja bw’aneebakanga n’omuddu omukazi n’amusobyako, naye ng’omukazi oyo tannaweebwa ddembe lye, kyokka ng’aliko omusajja amwogereza, wanaabangawo okuwozesebwa n’ebibonerez, naye tebattbwenga, kubanga omukazi anaabanga tannaweebwa ddembe lye.

²¹ Naye omusajja anaaleetanga endiga ennume ku mulyango gwa Weema ya MUKAMA ey’Okukujjaanirangamu, nga ky’ekiweebwayo kye eri MUKAMA eky’omusango.

²² Kabona anaakozesanga endiga ennume ey’ekiweebwayo olw’omusango okutangiririra omusajja oyo eri MUKAMA; era ekibi kye ky’anaabanga akoze kinaamusonyiyibwanga.

²³ “Bwe muyingiranga mu nsi ne musimba emit iega buli ngeri egy’ebibala ebyokulya, mukitegeere nti ebibala byagyo biriba ng’ebiwereddwa. Biriwerebwa okumala emyaka esatu; tebijjanga kuliibwanga.

²⁴ Mu mwaka ogwokuna ebibala byako byonna binaabanga bitukuvu, nga kye kiweebwayo eri MUKAMA eky’okumutenderez.

²⁵ Naye mu mwaka ogwokutaano munaayinzanga okulya ku bibala byako. Mu ngeri eno ebibala byako bigenda kweyongeranga nnyo. Nze MUKAMA Katonda wammwe.

²⁶ “Tolyanga nnyama yonna nga teweddeemu musaayi; “so tokolanga bya ddogo wadde eby’okulagula.

²⁷“Enviiri ez'oku mabbali g'omutwe gwo tozisalangako; n'ekirevu kyo tokikomolanga.

²⁸“Toweesalanga misale ku mubiri gwo olw'okujukira abaafa oba okwesalako enjola. Nze MUKAMA.

²⁹“Tofuulanga mwana wo omuwala ekivume ng'omufudde omwenzi, kubanga kirireetera abantu mu nsi yo okufuuka abenzi, n'ensi n'ejjula okwonoona.

³⁰“Mukuumanga Ssabbiiti zange era mussangamu ekitiibwa ekifo kyange ekitukuvu. Nze MUKAMA.

³¹“Temwebuuzanga ku basamize oba okukyukiranga abalogo, kubanga bagenda kubaleetera okwonooneka. Nze MUKAMA Katonda wammwe.

³²“Ositukiranga ow'envi, n'omukadde omussangamu ekitiibwa, era ne Katonda wo omutyanga. Nze MUKAMA.

³³“Omugwira bw'abeeranga omutuuze mu nsi yammwe, temumuyisanga bubi.

³⁴Omugwira atuula mu mmwe mumuyisenga ng'omuzaaliranwa ow'omu nsi yammwe. Mumwagalenga nga bwe mweyagala, kubanga nammwe mwali bagwira mu nsi y'e Misiri. Nze MUKAMA Katonda wammwe.

³⁵“Temubangamu kyekubiira nga mupima obuwanvu, oba obuzito, oba obungi bw'ebintu.

³⁶Mubanga ne minzaani entuufu, n'amayinja agapima obuzito amatuufu, n'ekipima ebikalu (efa) ekituufu, n'ekipima ebiyiikayiika ng'amazzi (ini) ekituufu. Nze MUKAMA Katonda wammwe, eyabaggya mu nsi y'e Misiri.

³⁷“Munaakwatanga amateeka gange gonna, n'ebiragiro byange byonna, okubitambulirangako. Nze MUKAMA.”

Ebyabaleevi 20

Ebibonerezo olw'Ekibi

¹Awo MUKAMA n'agamba Musa nti,

²“Tegeeza abaana ba Isirayiri bw'oti nti, Omuyisirayiri yenna, oba omunnaggwanga atuula mu Isirayiri, bw'anaawangayo omwana we ng'ekiweebwayo eri Moleki, kitaawe w'omwana oyo ajjanga kuttibwa. Abantu ab'omu kitundu ekyo mw'abeera banaamukubanga amayinja.

³Nange kennyni, omuntu oyo nnaamunyiigiranga, era nnaamugobanga ne mmugaana okukolagananga ne banne, kubanga awaddeyo omu ku baana be ng'ekiweebwayo eri Moleki, n'ayonoona Awatukuvu wange era n'avumisa erinnya lyange ettukuvu.

⁴Era abantu ab'omu kitundu ekyo mw'abeera, bwe banaamuzibiranga ku liiso, omuntu oyo awaddeyo omwana we eri Moleki, ne batamutta,

⁵omuntu oyo nnaamunyiigiranga, ne ku b'omu nnyumba ye, ne mbagoba ne mbagaana okukolagananga ne bannaabwe, ye ne banne abakolaganye naye mu kukuba obwamalaaya ne Moleki.

⁶“Omuntu bw'anaakolagananga n'abasamize, n'abalogo, n'akuba nabo obwamalaaya, nnaamunyiigiranga, era nnaamugobanga ne mugaana okukolagana ne banne.

⁷“Noolwekyo mwetukuze mubeerenga batukuvu, kubanga Nze MUKAMA Katonda wammwe.

⁸Mukwatenga amateeka gange, mugagobererenga. Nze MUKAMA abatukuza.

⁹“Omuntu yenna anaakolimiranga kitaawe oba nnyina wa kuttibwanga. Noolwekyo akolimidde kitaawe oba nnyina, omusaayi gwe gunaabanga ku mutwe gwe.

¹⁰“Omusajja bwanaayendanga ku muka omusajja, bombi, omusajja ayenze n'omukazi gw'ayenzeeko banattibwanga.

¹¹“Omusajja bw'aneebakanga ne muka kitaawe, anaabanga aweebudde kitaawe. Bombi omusajja n'omukazi banattibwanga; omusaayi gwabwe gunaabanga ku mitwe gyabwe.

¹²“Omusajja bw'aneebakanga ne muka mutabani we, bombi banattibwanga. Kubanga bombi banaabanga bakoze ebyambyone; omusaayi gwabwe gunaabanga ku mitwe gyabwe.

¹³“Omusajja bw'aneebakanga ne musajja munne nga bwe yandyebase n'omukazi, bombi banaabanga bakoze eky'ekivve; era banattibwanga, n'omusaayi gwabwe gunaabanga ku mitwe gyabwe.

¹⁴“Omusajja bw'anaawasanga omukazi ate n'atwalirako ne nnyina, ekyo kya kivve. Ye n'abakazi bombi banaayokebwanga mu muliro, bwe mutyo ekyonoono ekyo ne mukyegobako.

¹⁵“Omusajja bw'anaakolanga eby'ensonyi ku nsolo, anattibwanga, era n'ensolo munaagittanga.

¹⁶“Omukazi bw'anaasembereranga ensolo alyoke akole nayo eby'ensonyi, mumuttanga n'ensolo ne mugitta. Omukazi anattibwanga n'ensolo nettibwa; omusaayi gw'omukazi gunaabanga ku mutwe gwe, n'ogw'ensolo gunaabanga ku mutwe gwayo.

¹⁷“Omusajja bw'anaawasanga mwannyina, oba nga mwanamuwala wa kitaawe, oba nga mwanamuwala wa nnyina, ne beebaka bombi, kinaabanga kya buwemu. Bombi banaagobwanga mu bannaabwe ne babagaana

okukolagananga nabo. Kubanga omusajja oyo anaabanga aweebudde mwannyina, era y'aneetikkanga obuvunaanyizibwa bwonna olw'ekibi ekayo.

18 “‘Omusajja bw’aneebakanga n’omukazi mu biseera by’omukazi, ebya buli mwezi ng’empisa y’abakazi bw’eba, anaabanga abikudde ensulo y’omusaayi gw’omukazi oyo, era n’omukazi anaabanga yeebikudde. Bombi banaagobwanga mu bannaabwe ne babagaana okukolagananga nabo.

19 “Teweekakanga na mukazi muganda wa nnyoko oba ne mwannyina wa kitaawo n’okola naye eby’ensonyi, kubanga ekayo kiweebuula owooluganda ow’okumpi. Mwembi munaavunaanyizibwanga olw’ekyonoono kyammwe ekayo.

20 “‘Omusajja bw’aneebakanga ne muka kitaawe omuto oba ne muka kojjaawe, anaabanga aweebudde bakadde be abo. Omusajja oyo n’omukazi oyo be baneetikkanga obuvunaanyizibwa obw’ekibi ekayo, era balifa nga tebalina baana.

21 “‘Omusajja bw’anaawasanga muka muganda we, kinaabanga ekikolwa ekitali kirongoofu, kubanga aweebudde muganda we. Tebalizaala baana.

Ekiragiro eky’Okubeeranga Abatukuvu

22 “Kale nno, mukwatenga amateeka gange gonna n’ebiragiro byange byonna, era mubikolerengako, ensi mwe mbatwala okutuulanga eryoke ereme kubasesema.

23 Era temugobereranga mpisa ez’amawanga ge ɲjenda ngoba mu nsi eyo; kubanga baakola ebintu ebyo byonna, noolwekyo mbakyawa nnyo.

24 Naye nabategeeza nti, “Mulisikira ensi yaabwe, era ndigibawa ne mugirya, ye nsi omukulukuta amata n’omubisi gw’enjuki.” Nze MUKAMA Katonda wammwe eyabaawula ku mawanga amalala.

25 “Noolwekyo mujjanga kwawulamu ensolo ennongoofu n’etali nnongoofu, n’ennyonyi ennongoofu n’etali nnongoofu. Temufuukanga abatali balongoofu olw’ensolo oba ennyonyi, oba ebiramu byonna ebitambula ku ttaka, bye mmaze okwawulako ne mbibategeeza nti si birongoofu.

26 Kibasaanira okubeeranga abatukuvu gye ndi, kubanga Nze, MUKAMA, ndi mutukuvu, era mbaawudde ku mawanga amalala mubeerenga ggwanga lyange.

27 “‘Omusajja oba omukazi mu mmwe anaabeeranga omusamize oba omulogo, wa kuttibwanga. Mubakubanga amayinja; era omusaayi gwabwe gunaabanga ku mitwe gyabwe.’”

Ebyabaleevi 21

Obutukuvu bw’Obwakabona

¹ Awo MUKAMA n'agamba Musa nti, "Yogera ne bakabona, batabani ba Alooni, obagambe nti tewabanga omuntu eyeeretako obutali bulongoofu olw'okukwata ku mufu mu bantu be,

²wabula ng'amulinako oluganda olw'okumpi. Gamba nga nnyina, oba kitaawe, oba mutabani we, oba muwala we, oba muganda we,

³oba mwannyina embeerera atamanyi musajja, gw'alinko obuvunaanyizibwa kubanga tabeerangako na bba, kubanga ayinza okwereetako obutali bulongoofu.

⁴Kabona nga bw'ali omukulembeze, tekimusaanira kwereetako obutali bulongoofu wakati mu bantu be.

⁵Bakabona tebamwangako nviiri ku mitwe gyabwe, wadde okumwako ebirevu byabwe, oba okusala emisale ku mibiri gyabwe.

⁶Kibasaanira okubeeranga abatukuvu eri Katonda waabwe balemenga okuleetera erinnya lya Katonda waabwe obutali bulongoofu. Kubanga be batuusa ebiweebwayo ebyokebwa mu muliro eri MUKAMA, ye mmere ya Katonda waabwe, noolwekyo kibasaanira okubeeranga abatukuvu.

⁷Tebawasanga mukazi malaaya oba atali mulongoofu, oba oyo agobeddwa ewa bba; kubanga bakabona batukuvu eri Katonda waabwe.

⁸Mubayisenga ng'abatukuvu, kubanga be bawaayo emmere eya Katonda wammwe. Mubayisenga ng'abatukuvu; kubanga Nze MUKAMA atukuza mmwe, ndi mutukuvu.

⁹Era omwana omuwala owa kabona bw'anaakubanga obwamalaaya, bw'atyne yeereetako obutali bulongoofu, anaabeeranga aleetedde kitaawe obutali bulongoofu; anaayokebwanga mu muliro.

¹⁰"Kabona Asinga Obukulu, nga ye mukulembeze mu baganda be, era nga ye yafukibwako amafuta ag'omuzeeyituuni ku mutwe gwe, era nga yayawulibwa ayambalenga ebyambalo by'Obwakabona, tasaanira kusumululanga nviiri ze ku mutwe gwe n'azita, wadde okuyuzanga ebyambalo bye.

¹¹Tayingiranga mu kifo omuli omulambo, aleme kwereetako obutali bulongoofu. Omulambo ne bwe gunaabanga ogwa kitaawe oba ogwa nnyina.

¹²Era n'ekifo kya MUKAMA ekitukuvu taakivengamu oba okukireetako obutali bulongoofu, kubanga yayawulibwa bwe yafukibwako amafuta ag'omuzeeyituuni ga Katonda we. Nze MUKAMA Katonda.

¹³Anaawasanga omukazi mbeerera atamanyanga musajja.

¹⁴Tawasanga nnamwandum, oba omukazi bba gwe yagoba, oba omukazi eyeereeseko obutali bulongoofu olw'okukuba obwamalaaya; naye anaawasanga omukazi embeerera ng'amuggya mu bantu be;

¹⁵aleme okuleetera ezzadde lye obutali bulongoofu wakati mu bantu be. Kubanga Nze MUKAMA Katonda amutukuza.”

Bakabona Abaliko Akamogo

¹⁶Awo MUKAMA n'agamba Musa nti,

¹⁷“Tegeeza Aloonii nti mu zadde lye, okuyita mu mirembe gyonna, bwe munaabangamu omuntu aliko akamogo ku mubiri gwe taasemberenga kuwaayo emmere ya Katonda we.

¹⁸Kubanga tewaabengawo muntu yenna aliko akamogo ku mubiri gwe anaasemberanga. Gamba: omuzibe w'amaaso, oba omulema, oba eyakyama ennyindo, oba eyakulako ekintu ekyasukkirira obuwantu;

¹⁹oba omuntu alina ekigere ekyagongobala, oba omukono ogwalemala,

²⁰oba ow'ebbangoo, oba nakalanga, oba atalaba bulungi, oba ng'omubiri gwe gumusiiwa yeetakulatakula, oba ng'alina amabwa agakulukuta, oba nga yayabika enjagi.

²¹Tewaabengawo wa mu zadde lya Aloonii kabona ng'aliko akamogo anakkirizibwanga okusembira okuleeta ebiweebwayo eri MUKAMA Katonda, ebyokebwa mu muliro. Kubanga aliko akamogo; tekiimusaanirenga kusembira n'okuwaayo ekiweebwayo eri Katonda we.

²²Anaayinzanga okulya ku mmere entukuvu ennyo eya Katonda we;

²³naye olwokubanga aliko akamogo ku mubiri gwe, taasaanirenga kusembira ggigi, oba okulaga okumpi n'ekyoto, n'aleetera ebifo byange ebitukuvu obutali bulongoofu. Kubanga Nze MUKAMA Katonda abitukuza.”

²⁴Bw'atyo Musa n'ategeeza Aloonii ne batabani be, awamu n'abaana bonaaba Isirayiri ebigambo ebyo byonna.

Ebyabaleevi 22

Bakabona n'Obutukuvu bw'Ebiweebwayo

¹ MUKAMA Katonda n'agamba Musa nti,

²“Tegeeza Aloonii ne batabani be bassengamu ekitiibwa ebiweebwayo abaana ba Isirayiri bye bandeetera, ebyawuliddwa, bwe batyo balemenga okuvumisa erinnya lyange. Nze MUKAMA Katonda.

³Era bagambe nti, Omuntu yenna ow'omu zadde lyabwe mu mirembe gyonna eginajjanga giddiriragana bw'ataabenga mulongoofu, naye n'asemberera ebiweebwayo ebyawuliddwa ebitukuvu, abaana ba Isirayiri bye banaabanga

baleese eri MUKAMA Katonda, omuntu oyo anaagoberwanga ddala n'ava mu maaso gange. Nze MUKAMA Katonda.

⁴Omuntu yenna ow'omu zadde lya Alooni alina obulwadde obukwata oba alwadde ekikulukuto taalyenga ku biweebwayo ebitukuvu okutuusa ng'afuuse mulongoofu. Omuntu yenna taabenga mulongoofu bw'anaakwatanga ku kintu kyonna ekitali kirongoofu ekivudde ku kukolagana n'omusajja eyavuddemu amazzi g'obusajja, oba olw'okukomako ku mulambo,

⁵oba okukwata ku kyekulula ekiyinza okumufuula atali mulongoofu, oba okukoma ku muntu ayinza okumusiiga obutali bulongoofu, oba engeri yonna ey'obutali bulongoofu bw'efa yenkana.

⁶Omuntu ng'oyo taabenga mulongoofu okutuusa akawungeezi. Taalyenga ku biweebwayo ebitukuvu wabula ng'amaze okunaaba yenna mu mazzi.

⁷Enjuba bw'eneebanga egudde anaabeeranga mulongoofu; n'olvannyuma anaalyanga ku biweebwayo ebitukuvu ebyo, kubanga ye mmere ye.

⁸Taalyenga ku kintu kyonna ekinaabanga kifudde obufi, oba ekinaabanga kitaaguddwataaguddwa ebisolo, kubanga kinaamufuulanga atali mulongoofu. Nze MUKAMA.

⁹Bwe batyo bakabona kibagwanira okukuumanga ebiragiro byange, balemenga okwereetako omusango ne bafa olw'okubigayaaliriranga. Nze MUKAMA Katonda abatukuza.

¹⁰"Omuntu yenna atali wa mu lulyo lwa kabona, ne bw'anaabanga omugenyi we, oba omupakasi we, taalyenga ku biweebwayo ebyo ebitukuvu.

¹¹Naye kabona bw'aneeguliranga omuddu n'ensimbi, oba omuddu bw'anaazaalirwanga mu nnyumba ya kabona, omuddu oyo anaalyanga ku mmere eyo.

¹²Omwana owoobuwala owa kabona bw'anaafumbirwanga omusajja atali kabona, talyenga ku biweebwayo ebyo ebitukuvu.

¹³Naye singa muwala wa kabona afuuka nnamwandu, oba singa ayawukanira ddala ne bba, kyokka nga talina mwana, n'akomawo okubeeranga mu nnyumba ya kitaawe nga bwe yakolanga ng'akyali muvubuka, anaalyanga ku mmere ya kitaawe. Omuntu yenna atakwatibwako mizizo egyo taalyenga ku mmere eyo.

¹⁴Era omuntu bw'anaalyanga ku kiweebwayo ekitukuvu nga tagenderedde, anaaleetanga ekitundu kimu kyakutaano eky'ekiweebwayo ekyo, n'akigatta ku kiweebwayo ekyo, kyonna n'akikwasa kabona.

¹⁵Bakabona tebavumisanga bintu bitukuvu abaana ba Isirayiri bye banaawangayo eri MUKAMA,

¹⁶nga babakkiriza okulyanga ku biweebwayo byabwe ebitukuvu, bwe batyo ne babateekesaako omusango ogunaabaweesanga ekibonerezo. Nze MUKAMA Katonda abatukuza.”

Ebiweebwayo Ebitakkirizibwa

¹⁷Awo MUKAMA n'agamba Musa nti,

¹⁸“Tegeeza Alooni ne batabani be n'abaana ba Isirayiri bona, obagambe nti, Omuntu yenna ow'omu nnyumba ya Isirayiri omu ku mmwe, oba omunnaggwangaabeera mu Isirayiri, bw'anaaleeteranga MUKAMA Katonda ekirabo eky'ekiweebwayo ekyokebwa okutuukiriza obweyamo bwe, oba ekiweebwayo olw'okweyagalira,

¹⁹kinaateekwanga okubeera sseddume ey'ente oba ey'endiga, oba ey'embuzi etaliiko kamogo, ekirabo ekyo kiryokenga kikkirizibwe.

²⁰Temuwangayo kintu kyonna ekiriko akamogo kubanga tekikkirizibwenga.

²¹Omuntu yenna bw'anaaleetanga ekiweebwayo eri MUKAMA Katonda olw'emirembe, oba okutuukiriza obweyamo, oba ekiweebwayo olw'okweyagalira, ng'akiggya mu kiraalo oba mu kisibo, okukkirizibwa kinaabeeranga ekituukiridde nga tekiriiko kamogo.

²²Temuwangayo eri MUKAMA Katonda ensolo enzibe y'amaaso, oba eriko obuvune, oba ennema oba egongobadde, oba ezimbyezimbye ku mubiri, oba eriko amabwa agakulukuta. Ezo temuziwangayo ku kyoto eri MUKAMA Katonda ng'ekiweebwayo ekyokebwa.

²³Naye ente oba endiga ng'eriko ekitundu kyayo ekisukkiridde obuwanvu oba ekisukkiridde obumpi eneeyinzanga okuleetebwa ng'ekiweebwayo eky'okweyagalira, naye tekkirizibwenga ng'ekiweebwayo olw'okutuukiriza obweyamo.

²⁴MUKAMA Katonda temumuleeteranga ekiweebwayo eky'ensolo erina enjagi ezaanuubulwa, oba ezaabetentebwa, oba ezaayuzibwa, oba ezaasalibwa. Ekyo temukikolanga mu ggwanga lyammwe,

²⁵wadde okukkirizanga ng'ensolo ezo bannamawanga bazibatonedde ne muziwaayo ng'ekiweebwayo eri Katonda wammwe. Kubanga nnyonoonefu mu mubiri era ziriko obukyamu.”

²⁶Awo MUKAMA Katonda n'agamba Musa nti,

²⁷“Ente, oba endiga, oba embuzi bw'eneezaalibwanga eneesigalanga ne nnyina waayo okumala ennaku musanvu. Okuva ku lunaku olw'omunaana n'okweyongerayo ennekirizibwanga bw'eneeweewbwangayo eri MUKAMA Katonda ng'ekiweebwayo ekyokebwa mu muliro.

²⁸Ente oba endiga temugittanga na mwana gwayo ku lunaku lwe lumu.

²⁹Bwe muwangayo eri MUKAMA Katonda ekiweebwayo olw'okwebaza, mukiwengayo mu ngeri ennungi eneekisobzesanga okukkirizibwa.

³⁰Kinaalibwanga ku lunaku olwo lwennyini, temukifissangawo n'akatono okutuusa enkeera. Nze MUKAMA Katonda.

³¹"Bwe mutyo mukwatenga amateeka gange era mugagonderenga. Nze MUKAMA Katonda.

³²Temuvumisanga linnya lyange. Abaana ba Isirayiri kibagwanira okunzisangamu ekitibwa nga Nze mutukuvu. Nze MUKAMA Katonda abatukuza mmwe,

³³era Nze nabaggya mu nsi y'e Misiri mbeerenga Katonda wammwe. Nze MUKAMA Katonda."

Ebyabaleevi 23

¹Awo MUKAMA Katonda n'agamba Musa nti,

²"Yogera n'abaana ba Isirayiri obagambe nti, Zino ze mbaga zange ze nnonze, nga ze mbaga za MUKAMA Katonda ezirondeddwa ze munaakubirangako enkuŋjaana entukuvu.

Ssabiiti

³"Mu nnaku omukaaga munaakolerangamu emirimu gyammwe, naye olunaku olw'omusanvu ye Ssabiiti ey'okuwummula; lunaabeeranga olunaku olw'okukuŋjaana okutukuvu. Temulukolerangako mulimu n'akatono yonna gye munaabeeranga, kubanga ye Ssabiiti ya MUKAMA Katonda.

Okuyitako n'Emigaati Egitali Mizimbulukuse

⁴"Zino ze mbaga MUKAMA Katonda ze yeerondera okunaakubirwanga enkuŋjaana entukuvu ze munaalangiriranga mu ntuko zaazo:

⁵Embaga ya MUKAMA Katonda ey'Okuyitako eneetandikanga ng'obudde buwungeera ku lunaku olw'ekkumi n'enya olw'omwezi ogw'olubereberye.

⁶Ku lunaku olw'ekkumi n'ettaano olw'omwezi ogwo, Embaga ya MUKAMA Katonda ey'Emigaati Egitali Mizimbulukuse kw'eneetandikiranga; munaamalanga ennaku musanvu nga mulya emigaati egifumbiddwa nga temuli kizimbulukusa.

⁷Ku lunaku olusooka olw'embaga eyo ey'Okuyitako munaakubanga olukunjanaa olutukuvu, era temuukolerengako mirimu gyammwe egya bulijjo.

⁸Munaamalanga ennaku musanvu nga buli lunaku muleeta ekiweebwayo ekyokebwa n'omuliro eri MUKAMA. Ku lunaku olw'omusanvu munaakubanga olukunjanaa olutukuvu, era temuukolerengako mirimu gyammwe egya bulijjo."

Embaga ey'Ebibala Ebibereberye

⁹Awo MUKAMA Katonda n'agamba Musa nti,

¹⁰“Tegeeza abaana ba Isirayiri nti, Bwe mutuukanga mu nsi gye nzija okubawa ne mukungula ebibala byamu, muleetanga eri kabona ekinywa eky'ebibala byammwe eby'olubereberye;

¹¹naye anaawuubawuubanga ekinywa ekyo awali MUKAMA Katonda kiryoke kikkirizibwe ku lwammwe. Kabona anaakiwuubawuubanga ku lunaku oluddirira Ssabiiti.

¹²Ku lunaku olwo lwe munaawuubirawuubirangako ekinywa, munaawangayo ekiweebwayo ekyokebwa eri MUKAMA Katonda eky'omwana gw'endiga omulume, ogwakamala omwaka gumu ogw'obukulu era nga teguliiko kamogo.

¹³N'ekiweebwayo eky'emmere ey'empeke ekigenderako kinaabanga kigero kya desimoolo bbiri eza efa, eky'obuwunga obulungi nga mutabuddwamu n'amafuta ag'omuzeeyituuni, nga kye kiweebwayo ekyokebwa n'omuliro eri MUKAMA Katonda, ne muvaamu evvumbe eddungi erisanyusa MUKAMA Katonda; n'ekiweebwayo ekyokunywa ekigenderako kinaabanga ekitundu kimu kya kuna ekya lita emu ey'envinnyo.

¹⁴Era temuulyenga ku mugaati n'akatono oba ku mmere ey'empeke ensiike oba eyaakakungulwa, okutuusa ku lunaku olwo lwennyini lwe munaaleeterangako ekiweebwayo kino eri Katonda wammwe. Lino linaabanga tteeka ery'enkalakkalira ery'emirembe gyonna egigenda okujja, mu bifo byonna gye munaabeeranga.

Embaga eya Pentekoote

¹⁵“Okuva ku lunaku oluddirira Ssabiiti, nga lwe lunaku kwe mwaleetera ekiweebwayo eky'ekinywa ekiwuubibwawuubibwa mubalanga ewiiki enzijuvu musanvu.

¹⁶Munaabalanga ennaku amakumi ataano okutuuka ku Ssabiiti ey'omusanvu, ne mulyoka muwaayo eri MUKAMA ekiweebwayo eky'emmere ey'empeke empya eyaakakungulwa.

¹⁷Nga muva mu buli kitundu gye mubeera, munaaleetanga emigaati, ebiri ebiri nga gikoleddwa mu kigero ekya desimoolo bbiri eza efa ez'obuwunga obulungi, nga bufumbiddwa n'ekizimbukusa; nga kye kiweebwayo eri MUKAMA Katonda ekiwuubibwawuubibwa eky'ebibala ebibereberye.

¹⁸Era awamu n'emigaati ego munaaleeterangako abaana b'endiga musanvu ab'omwaka gumu abataliiko kamogo; munaaleetanga n'ente eya seddume ento emu, n'endiga ennume ento bbiri. Binaabeeranga ekiweebwayo ekyokebwa eri MUKAMA, awamu n'ekiweebwayo eky'emmere ey'empeke n'ekiweebwayo eky'ebokunywa; nga kye kiweebwayo ekyokebwa n'omuliro, ne muvaamu evvumbe erisanyusa MUKAMA.

¹⁹Era munaawangayo embuzi emu ennume nga kye kiweebwayo olw'ekibi, era n'endiga ento ennume ez'omwaka ogumu bbiri nga kye kiweebwayo olw'emirembe.

²⁰Kabona anaawubawubanga ebiweebwayo ebyo awamu n'emigaati egikoleddwa mu bibala ebibereberye n'endiga zombi ento, nga kye kiweebwayo eri MUKAMA Katonda ekiwuubibwawuubibwa. Kinaabanga kiweebwayo eri MUKAMA Katonda ekitukuvu, era kabona y'anaakitwalanga.

²¹Ku lunaku olwo onoolangiriranga olukuŋjaana olutukuvu; era temujanga kukolerako mirimu gyammwe egya bulijjo. Eryo linaabeeranga etteeka ery'emirembe gyonna mu mmwe buli yonna gye munaabeeranga.

²²"Bwe munaakungulanga emmere mu ttaka lyammwe temugimalirangamu ddala okutuuka ku mbibiro z'ennimiro yammwe, wadde okukuŋjaanyanya eneebangang ekunkumuse wansi nga mumaze okukungula. Eyo mugirekeranga abaavu ne bannamawanga. Nze MUKAMA Katonda wammwe."

Embaga ey'Amakondeere

²³Awo MUKAMA n'agamba Musa nti,

²⁴"Tegeeza abaana ba Isirayiri nti olunaku olw'olubereberye mu mwezi ogw'omusanvu lunaabanga lwa kuwummula, munaakwatirangako olukuŋjaana olutukuvu olunaalangirirwanga n'okufuuwa amakondeere ag'omwanguka.

²⁵Temukolerangako mirimu gyonna egya bulijjo, naye munaawangayo ekiweebwayo ekyokebwa n'omuliro eri MUKAMA Katonda."

Olunaku olw'Okutangirirwa

²⁶Awo MUKAMA Katonda n'agamba Musa nti,

²⁷"Olunaku olw'ekkumi olw'omwezi guno ogw'omusanvu lwe lunaabanga Olunaku olw'Okutangirirwa. Munaakubanga olukuŋjaana olutukuvu, muneefiirizanga ne mwerumya, era munaawangayo ekiweebwayo ekyokebwa n'omuliro eri MUKAMA Katonda.

²⁸Olunaku olwo temulukolerangako mulimu na gumu, kubanga lwe Lunaku olw'Okutangirirwa, lwe munaatangirirwanga awali MUKAMA Katonda.

²⁹Omuntu yenna anaagaananga okwefiiriza ku lunaku olwo kinaamugwaniranga okuwaŋjangusibwa n'aggyibwa mu banne.

³⁰Era buli muntu anaakolanga omulimu ku lunaku olwo ndimuggya mu banne ne mmuzikiriza.

³¹Temulukolerangako mulimu n'akatono. Eryo linaabeeranga etteeka ery'enkalakkalira, ery'emirembe gyonna egigenda okujja mu bifo byonna gye munaabeeranga.

³²Lunaabeeranga lwa Ssabbiiti na kuwummulirako gye muli, era muneefiirizanga. Munaakuumanga Ssabbiiti yammwe okuva ku lunaku olw'omwenda olw'omwezi akawungeezi okutuusa ku kawungeezi akaddirira."

Embaga ey'Ensiisira

³³Awo MUKAMA Katonda n'agamba Musa nti,

³⁴"Tegeeza abaana ba Isirayiri nti ku lunaku olw'ekkumi n'ettaano Embaga ya MUKAMA ey'Ensiisira kw'eneetandikiranga, era eneemalanga ennaku musanvu.

³⁵Ku lunaku olw'olubereberye munaakubirangako olukunjaana olutukuvu; temulukolerengako mirimu egya bulijo.

³⁶Munaaleetanga ebiweebwayo eri MUKAMA ebyokye mu muliro okumalira ddala ennaku musanvu, ne ku lunaku olw'omunaana munaakubanga olukunjaana olutukuvu ne muwaayo eri MUKAMA Katonda ekiweebwayo ekyokye n'omuliro. Olwo lwe lukuunjaana olukulu oluggalawo, temulukolerangako mirimu egya bulijo.

³⁷"Ezo ze mbaga MUKAMA ze yalagira, ze munaalangiriranga nti mbaga ntukuvu okunaaleeterwanga ebiweebwayo eri MUKAMA Katonda ebyokeddwa mu muliro, ebiweebwayo ebyokye, ebiweebwayo eby'empeke, ssaddaaka n'ebiweebwayo ebinywebwa ebineetaagibwanga buli lunaku.

³⁸Ebiweebwayo bino byeyongera ku biri eby'oku Ssabbiiti za MUKAMA Katonda, era ne byeyongera ku birabo byammwe ne ku ebyo byonna bye munaabanga mweyamye, ne ku biweebwayo ebirala byonna bye munaabanga muleetedde MUKAMA Katonda nga mweyagalidde.

³⁹"Kale nno okutandikira ku lunaku olw'ekkumi n'ettaano olw'omwezi ogw'omusanvu, nga mumaze okukungula n'okuyingiza ebibala ebivudde mu ttaka lyammwe, munaakoleranga MUKAMA Katonda ekijaguzo okumala ennaku musanvu; olunaku olw'olubereberye lunaabanga lwa kuwummula era n'olunaku olw'omunaana nalwo nga lwa kuwummula.

⁴⁰Ku lunaku olw'olubereberye munaanoganga ku miti ebibala ebisingira ddala obulungi ne muddira n'amatabi g'enkindu, n'amatabi ag'emiti agaziyidde n'ebikoola ebigimu, n'emiti egypt'oku migga, ne mulyoka musanyukira awali MUKAMA Katonda wammwe okumala ennaku musanvu.

⁴¹Mukolanga bwe mutyo ng'ekyo kye kijaguzo eri MUKAMA Katonda, okumala ennaku musanvu buli mwaka. Lino ly'etteeka ery'enkalakkira erinaakwatibwanga n'ab'omu mirembe egigenda okujja; mujaguzenga mu mwezi ogw'omusanvu.

⁴²Munaasulanga mu busiisira okumala ennaku musanvu. Abo bona abazaaliranwa ab'omu Isirayiri banaasulanga mu busiisira,

⁴³bwe batyo ab'omu zzadde lyammwe balyoke bamanye nga bwe nasuzanga abaana ba Isirayiri mu busiisira bwe nnali nga mbaggya mu nsi y'e Misiri. Nze MUKAMA Katonda wammwe."

⁴⁴Bw'atyo Musa n'alangirira mu baana ba Isirayiri embaga za MUKAMA ennonde.

Ebyabaleevi 24

Amafuta ag'Omuzeeyituuni n'Emigaati egy'Okulaga

¹Awo MUKAMA Katonda n'agamba Musa nti,

²"Lagira abaana ba Isirayiri bakuleetere amafuta ag'omuzeeyituuni aga zeyituuni amalungi amaka ag'okukozesa mu ttaala ziryoke zaakenga buli kiseera awatali kusalako.

³Wabweru w'Eggigi ery'Endagaano mu Weema ya MUKAMA ey'Okukuŋjaanirangamu, Aloonni w'anaalabiririranga ettabaaza ezo nga zaakira awali MUKAMA Katonda okuva akawungeezi okutuusa mu makya awatali kusalako. Eryo linaabanga tteeka ery'enkalakkalira ne mu mirembe eigenda okujja.

⁴Aloonni anaalabiriranga ettaala ez'oku kikondo ekya zaabu omuka awali MUKAMA Katonda nga zaaka awatali kusalako.

⁵"Ojja kuddiranga obuwunga bw'eŋjaano obulungi ofumbe emigaati kkumi n'ebiri ng'okozesa desimoolo bbiri eza efa.

⁶Onoogitegekanga mu nnyiriri bbiri nga mu buli lunyiriri mulimu emigaati mukaaga. Onoogiteekanga ku mmeeza eya zaabu omuka awali MUKAMA.

⁷Era ku buli lunyiriri onooteekangako obubaane obuka nga bugendera wamu n'emigaati nga kye kijjukizo eky'ekiweebwayo eri MUKAMA Katonda nga kyokeddwa mu muliro.

⁸Emigaati ego ginaategekebwanga awali MUKAMA buli Ssabiiti awatali kwosa, ng'ekyo kikolebwa ku lw'abaana ba Isirayiri nga ye ndagaano ey'emirembe n'emirembe.

⁹Emigaati ego ginaabanga gya Aloonni ne batabani be, era banaagiriiranga mu kifo ekitukuvu, kubanga giva ku kiweebwayo ekitukuvu ennyo eri MUKAMA Katonda nga kyokeddwa mu muliro nga kye kiragiro eky'enkalakkalira."

Avvoola wa Kuttibwanga

¹⁰Awo mutabani w'omukazi Omuyisirayiri naye nga kitaawe Mumisiri n'afuluma n'abeera mu baana ba Isirayiri, naye ne wasitukawo olutalo wakati w'omusajja oyo n'Omuyisirayiri, nga bali mu lusiisira.

¹¹Mutabani w'omukazi Omuyisirayiri n'avvoola Erinnya lya MUKAMA, era n'akolima. Ne bamuleeta eri Musa. Nnyina ye yali Seromisi, muwala wa Dibuli ow'omu kika kya Ddaani.

¹²Ne bamuggalira mu kkomera okutuusa MUKAMA Katonda lw'anaabategeeza ekinaakolebwa.

¹³Awo MUKAMA Katonda n'agamba Musa nti,

¹⁴"Eyavvodde mumufulumye ebweru w'olusiisira. Abo bona abaamuwlidde ng'avvoola bateeke emikono gyabwe ku mutwe gwe; oluvannyuma ekibiina kyonna kiryoke kimukube amayinja.

¹⁵Tegeeza abaana ba Isirayiri nti omuntu yenna anaakolimiranga Katonda we anaabanga n'obuvunaanyizibwa olw'ekibi ekyo.

¹⁶Oyo yenna anavvoolanga erinnya lya MUKAMA Katonda anattibwanga. Ekibiina kyonna kinaamukubanga amayinja. Ne bw'anaabanga omugwira oba Omuyisirayiri, bw'anavvoolanga erinnya lya MUKAMA Katonda anattibwanga.

¹⁷"Anattanga omuntu naye anattibwanga.

¹⁸Omuntu yenna anattanga ensolo ya munne anaagimuliyiranga, ensolo ku nsolo.

¹⁹Omuntu bw'anaaleetanga akamogo ku munne n'amulumya, ekyo ky'akoze ku munne naye kye kinaamukolwangako:

²⁰obuvune olw'obuvune, eriiso olw'eriiso, erinnyo olw'erinnyo; nga bw'anaabanga alumizza munne, naye bw'atyo bw'anaalumizibwanga.

²¹Omuntu anattanga ensolo ya munne anaagimuliyiranga, n'oyo anattanga omuntu naye waakuttibwanga.

²²Etteeka lye limu lye linaafuganga omugwira era n'Omuyisirayiri. Nze MUKAMA Katonda wammwe."

²³Bw'atyo Musa n'ategeeza abaana ba Isirayiri, ne bafulumya eyavvoola ebweru w'olusiisira ne bamukuba amayinja n'afa. Abaana ba Isirayiri baakola nga MUKAMA bwe yalagira Musa.

Ebyabaleevi 25

Omwaka gwa Ssabbiiti

¹ MUKAMA Katonda yagamba Musa ku lusozi Sinaayi nti,

²"Tegeeza abaana ba Isirayiri nti bwe mutuukanga mu nsi gye mbawa, ensi yennyini eneekuumiranga MUKAMA Katonda ssabbiiti.

³Okumala emyaka mukaaga ennimiro zammwe munaazisigangamu emmere, era mu myaka egyo omukaaga munaasaliranga emizabbibu gyammwe n'ebibala ne mubikungula.

⁴Naye mu mwaka ogw'omusantu ettaka ly'ensi eyo linaabanga ne ssabbiiti ey'okuwummula eri MUKAMA Katonda. Temusiganga mmere mu nnimiro zammwe wadde okusalira emizabbibu gyammwe.

⁵Ebimera ebyekuzizza byokka, ebimererezi, temubikungulanga wadde okunoga ebibala ku mizabbibu gyammwe egitaasalirwa. Omwaka ogwo ettaka ly'ensi linaaguwummulanga.

⁶Ebyo byonna ebyokulya ebinaavanga mu ttaka mu mwaka ogwa ssabbiiti yaalyo binaabanga mmere yammwe, mmwe bennyini, n'eri abaddu bammwe abasaja, n'abakazi, era n'abweereza bammwe ab'empeera, n'abagenyi abanaabanga basula mu maka gammwe;

⁷era n'ente zammwe n'ensolo ez'omu nsiko ezinaabanga ku ttaka lyammwe. Buli ekyokulya ekinaakuliranga ku ttaka eryo kinaabanga mmere.

Omwaka ogw'Okujaguza Jjubiri

⁸"Munaabaliriranga essabbiiti musantu ez'omu myaka, kwe kugamba nti musantu emirundi emyaka musantu. Bwe kityo ekiseera kyonna ekya ssabbiiti ezo ne kiba emyaka amakumi ana mu mwenda.

⁹Ekkondeere ery'okujaguza munaalifuyiranga wonna wonna ku lunaku olw'ekkumi mu mwezi ogw'omusantu ku Lunaku olw'Okutangirirwa, ekkondeere munaalifuyiranga mu nsi yammwe yonna.

¹⁰Munaatukuzanga omwaka ogw'amakumi ataano, era munaalangiriranga ebiseera eby'eddembe eri abatuuze bona mu ggwanga lyammwe. Omwaka ogwo gunaabanga gwa kujaguza gwa Jjubiri gye muli; buli omu anaddangayo mu kifo kye eky'obwannannyini, era buli omu anaddangayo mu kika kye.

¹¹Omwaka ogw'amakumi ataano gunaabanga gwa kujaguza gwa Jjubiri gye muli; mu mwaka ogwo temuusigenga era temuukungulenga bikuze ku bimererezi newaakubadde okukunjaanya ebibala eby'oku mizabbibu egitali misalire.

¹²Kubanga ekiseera ekyo kya kujaguza kya Jjubiri era kinaabanga kitukuvu gye muli; mulyenga ebyo byokka bye munaggyanga mu nnimiro.

¹³"Mu mwaka ogwo ogw'okujaguza ogwa Jjubiri buli omu anaddangayo mu kifo kye eky'obwannannyini.

¹⁴Era bwe munaatunzanga bannammwe ekintu kyonna oba bwe munaagulanga ku bannammwe ekintu kyonna, temuseeragananga.

¹⁵Munnansi munno onoomugulangako ng'osinziira ku myaka egyakayitawo okuva ku kujaguza ku Jjubiri. Era naye anaakutunzanga ng'asinziira ku myaka egibulayo okutuuka ku makungula g'ebibala.

¹⁶Emyaka bwe ginaabanga emingi, omuwendo ogulamulwa munaagwongezanga, naye emyaka bwe ginaabanga emitono munaagukendeezanga, kubanga obungi bw'ebikungulwa, bw'ogula ku mutunzi.

¹⁷Temuseeragananga; mutyanga Katonda wammwe, kubanga Nze MUKAMA Katonda wammwe.

¹⁸"Mugonderenga ebiragiro byange, era mukwatenga amateeka gange, bwe mutyo munaatuulanga n'emirembe mu nsi yammwe.

¹⁹Ensi eneebaleeteranga ebibala byayo, ne mulya ne mukkuta ne mutuulamu n'emirembe.

²⁰Muyinza okubuuza nti, 'Bwe tutaafigenga era ne tutakungulanga, kale mu mwaka ogw'omusanvu tunaalyanga ki?'

²¹Mu mwaka ogw'omukaaga ndibayiwako omukisa gwange ogulireetera ensi yammwe ebibala ebirimala emyaka esatu.

²²Bwe munaabanga musiga mu mwaka ogw'omunaana, munaabanga mulya ku bibala ebikadde bye mwatereka, okutuusa nga mukungudde ebibala eby'omwaka ogw'omwenda.

²³Ettaka teriitundibwenga kagenderere, kubanga ensi yange; mwe muli bayise era abasuze obusuze.

²⁴Buli kitundu kya nsi kye munaalyanga, bwe mutundanga ettaka mwerekengawo omwagaanya ogw'okulinunulayo gye mulitunze.

Okununula Ebintu

²⁵"Munnansi munnamwwe bw'anaayavuwalanga, n'atunda ebimu ku bintu bye, muganda we ow'okumpi mu luganda anajjanga n'anunula ebyo munnansi munne by'atunze.

²⁶Omuntu bw'anaabanga talina anaabimununulira, naye ye ku bubwe ng'agaggawadde, era ng'afunye obusobozi obw'okubinunula,

²⁷anaabaliriranga omuwendo gw'ensimbi oguli mu myaka kasookedde abitunda, n'abala n'omuwendo ogugya mu myaka egisigaddeyo okutuuka ku Jjubiri, n'agusasula omuntu gwe yaguza ebintu ebyo, olwo eyatunda aneddirangayo mu bintu bye.

²⁸Naye singa alemwa okufuna obusobozi okumusasula, kale ebyo bye yatunda binaasigalanga mu mukono gw'eyabigula nga ye nannyini byo okutuusa mu

Mwaka gwa Jjubiri. Binamuddizibwanga mu Jjubiri, era anaayinzanga okweddirayo mu bintu bye.

²⁹“Omuntu bw'anaatundanga ennyumba esulwamu eri mu kibuga ekyetooloddwa bbugwe, anaayinzanga okuginunula mu mwaka nga tegunaggwaako. Mu bbanga eryo ery'omwaka omulamba mw'anaabeereranga n'obuyinza obw'okuginunula.

³⁰Ennyumba eyo eri mu kibuga ekyetooloddwa bbugwe bw'eteenunulibwenga mu bbanga ery'omwaka ogumu, kale eneebeereranga ddala y'oyo eyagigula n'ezzadde lye. Eyagitunda teemuddizibwenga mu Jjubiri.

³¹Naye amayumba ag'omu bubuga obutono obw'omu byalo obuteetooloddwako bisenge, ganaabalirwanga mu ttuluba lye limu n'ery'ennimiro eziri mu byalo. Ganaanunulibwanga era ne gaddira bannyinigo mu Jjubiri.

³²“Bulijjo Abaleevi banaabanga ba ddembe okununula amayumba gaabwe agali mu bibuga byabwe eby'Abaleevi bye balinako obwannannyini.

³³Era Omuleevi bw'anaabanga takozesezza ddembe lye ery'okununula, kale ennyumba eyatundirwa mu kibuga Abaleevi kye balinako obwannannyini, eneemuddiranga mu Jjubiri; kubanga mu bantu ba Isirayiri ennyumba eziri mu bibuga by'Abaleevi za Baleevi.

³⁴Naye ennimiro eziri ku ttaka lya wamu ery'ebibuga byabwe teziitundibwenga; kubanga ezo zaabwe za bwannannyini obw'olubeerera.

Etteeka ery'Okuwola Ensimbi

³⁵“Munnansi munnamwe bw'anaayavuwalanga ng'ali wamu nammwe, nga takyasobola kwefunira buyambi, mubeerenga naye nga mumulabirira nga bwe mwandirabiridde omunnaggwanga oba omusuze obusuze ali mu mmwe.

³⁶Mutyenga Katonda wammwe. Munnamwe temumuggyangako magoba ku kintu kyonna kye munaabanga mumuwoze, bw'atyo munnamwe oyo alyoke abeerenga mu mmwe.

³⁷Bw'omuwolanga ensimbi azzengawo omuwendo gwennyini gw'omuwoze so tasukkirizangamu. Era bw'omuguzanga emmere tossangamu magoba.

³⁸Nze MUKAMA Katonda wammwe eyabaggya mu nsi ey'e Misiri okubawa ensi ya Kanani n'okubeera Katonda wammwe.

Okununula Abaddu

³⁹“Era munnansi munnamwe bw'anaayavuwalanga ng'ali nammwe, ne yeetunda gye muli, temumukozesanga nga muddu.

⁴⁰Munaamukozesanga ng'omupakasi ow'empeera oba ng'omusuze obusuze, ng'ali nammwe. Anaabaweerezanga okutuusa mu Mwaka gwa Jjubiri.

⁴¹Kale nno, olwo anaalekebwanga n'addayo ewaabwe, ye n'abaana be, mu kika kye ku butaka bwa bakadde be.

⁴²Kubanga baweereza bange be naggya mu nsi y'e Misiri; tebaatundibwenga ng'abaddu.

⁴³Temubafugisanga bukambwe, naye mutyenga Katonda wammwe.

⁴⁴Abaddu bammwe abasajja n'abaddu bammwe abakazi munaabaggyanga mu mawanga agabeetoolodde, mu mawanga ago mwe muneeguliranga abaddu abasajja n'abaddu abakazi.

⁴⁵Era munaayinzanga okwegulira ku bannamawanga abali nammwe abasuze obusuze, ne ku baana baabwe abanaazaalirwanga mu nsi yammwe; abo banaabanga nvuma zammwe.

⁴⁶Munaayinzanga okulaamira batabani bammwe abalibagoberera envuma ezo ng'obusika bwabwe obw'emirembe gyonna. Naye Bayisirayiri bannammwe temubafugisanga bukambwe.

⁴⁷"Omunnaggwanga oba omusuze obusuze ali nammwe bw'anaagaggawalanga, naye munnansi munnammwe bwe babeera n'ayavuwala, ne yeetunda eri munaggwanga oba eri omusuze obusuze ali nammwe, oba eri omu ku b'omu luggyia lwa munaggwanga,

⁴⁸anaayinzanga okununulibwa, ng'amaze okwetunda. Omu ku baganda be anayinzanga okumununula:

⁴⁹Taata we oba mutabani wa taata we, oba owooluganda omulala ow'okumpi mu buzaale ow'omu kika kye anaayinzanga okumununula. Oba ye bw'anaagaggawalanga anaayinzanga okwenunula.

⁵⁰Ye n'oli eyamugula bajjanga kubalirira ebbanga okuva mu mwaka gwe yeetundiramu okutuuka ku Mwaka gwa Jjubiri. Omuwendo ogw'okununulibwa guneesigamizibwanga ku muwendo gw'emyaka egibaliriddwa; ebbanga lye yamala n'eyamugula linaageraageranyizibwanga n'ebbanga ery'omupakasi asasulwa empeera.

⁵¹Mu kubalirira kwabwe bwe kinaazuukanga ng'ekyasigaddeyo emyaka mingi okutuuka ku Jjubiri, ku muwendo gwe yeetunda anaasasulangako omuwendo munene olw'okwenunula.

⁵²Naye bw'eneebanga esigaddeyo emyaka mitono, egyo gy'anaabalirirangamu ensimbi zaamu n'asasula ezo nga bwe kyetaagisa olw'okwenunula.

⁵³Oyo eyagula munne anaamuyisanga ng'omupakasi amukolera mu kupatana okwa buli mwaka. Temulekanga oyo eyagula munne okumutuntuzanga nga nammwe mulaba.

⁵⁴“Bw’anaabanga tanunulibba mu zimu ku ngeri ezo, ye n’abaana be banaanunulibwanga mu Mwaka gwa Jjubiri.

⁵⁵Kubanga abaana ba Isirayiri bantu bange, abaweereza bange be naggya mu nsi ey’e Misiri. Nze MUKAMA Katonda wammwe.

Ebyabaleevi 26

Emikisa Egiva mu Buwulize

¹“Temwekoleranga bifaananyi oba okwesimbira ebifaananyi ebyole, oba amayinja ge muyise amatukuvu, era temuteekanga mayinja mawoole mu nsi yammwe okugavuunamiranga. Nze MUKAMA Katonda wammwe.

²Mukwatenga Ssabbiiti zange, era n’ebifo byange ebitukuvu mubissengamu ekitiibwa. Nze MUKAMA Katonda.

³“Bwe munaakwatanga amateeka gange, ne mugondera ebiragiro byange n’obwegendereza,

⁴nnaabatonnyesezanga enkuba mu ntuuko zaayo, n’ettaka linaavangamu ebibala byalyo, n’emiti egy’omu nnimiro ginaabalanga ebibala byagyo.

⁵Munaawuulanga okutuussa ku makungula g’emizabbibu, n’okukungula emizabbibu kunaabatuusanga mu biseera eby’okusiga; era munaalyanga emmere yonna nga bwe mwetaaga, ne mubeera mu nsi yammwe nga mulina emirembe.

⁶“Ndibawa emirembe mu nsi ne mwebaka bulungi, so tewaabengawo anaabatiisatiisanga. Ebisolo ebikambwe ndibimalamu mu nsi yammwe, era temuubeerengamu ntalo.

⁷Munaawonderanga abalabe bammwe ne mubatta n’ekitala ne mubawangula.

⁸Abataano mu mmwe banaagobanga ekikumi, era ekikumi mu mmwe banaagobanga omutwalo ogumu, era munaawangulanga abalabe bammwe n’ekitala.

⁹“Nnaabassangako omwoyo ne mbawa okuzaala ne mweyongera obungi, era endagaano yange nammwe nnaagitukirizanga.

¹⁰Munaabanga mukyalya ku makungula ag’omwaka oguyise ne mugafulumya olw’amakungula amaggya.

¹¹Ekifo kyange eky’okubeeramu nnaakiteekanga mu mmwe, era omutima gwange teguubatamwenga.

¹²Nnaatambuliranga mu mmwe, era nnaabanga Katonda wammwe, nammwe munaabanga bantu bange.

¹³Nze MUKAMA Katonda wammwe eyabaggya mu nsi ey'e Misiri, mulyoke mukome okuba abaddu b'Abamisiri; namenya ebikoligo byammwe ne mbasobozesa okutambula nga mwesimbye.

Ebibonerezo ebiva mu Bujeemu

¹⁴"Naye bwe mutampulirenga, ne mutagondera biragiro ebyo byonna,

¹⁵era bwe munaanyoomoolanga ebiragiro byange ne mukyawa amateeka gange, ne mulemwa okutuukiriza ebiragiro byange ebyo byonna, bwe mutyo ne mutakuumanga ndagaano yange,

¹⁶kale, kino kye ndibakola: Ndibaleetera entiisa eza mangu ez'embagirawo, n'obulwadde obw'olukonvuba obubalumya akasiiso n'omusujja, ebiribaziba amaaso ne bibakamulamu obulamu. Era muliteganira bwereere okusimba ebibala byammwe, kubanga abalabe bammwe be balibiryia.

¹⁷Ndibefuukira, abalabe bammwe n'okubawangula ne babawangula; abo ababakyawa banaabafuganga, ne mudduka n'okudduka so nga tewali abagoba.

¹⁸Oluvannyuma lw'ebyo byonna okubatuukako, era bwe mutanjonderenga, kale ndyongera okubabonereza okusingawo emirundi musanvu, olw'ebibi byammwe.

¹⁹Amalala gammwe n'emputtu ndibibaggyamu, eggulu ne likakanyaala ng'ekyuma, n'ettaka ne likaluba ng'ekikomo.

²⁰Amaanyi gammwe ganaabafanga busa, kubanga ettaka lyammwe teriivengamu mmere yaalyo, wadde emit egypt omu nsi yammwe okubala ebibala byagyo.

²¹"Era bwe muneeyongeranga okutambulira mu makubo ge sikkiriza, ne mugaana okumpulira, ndyongera okubaleetako endwadde nnyingi nga za mirundi musanvu ng'ebibi byammwe bwe byenkana.

²²Era ndibasindikira ensolo ez'omu nsiko, ezinaalyanga abaana bammwe, ne zizikiriza ente zammwe n'omuwendo gwammwe ne gukendeera, nga n'enguudo zammwe tewakyali azitambuliramu.

²³"Era okukangavvula okwo bwe kutaabakyusenga kudda gye ndi, naye ne mweyongera okujeema,

²⁴kale, nange ndibalaga obukambwe, era nze kennyini ndibeebonerereza emirundi musanvu olw'ebyonoono byammwe.

²⁵Era nnaabaleeteranga entalo okwesasuza olw'okumenya endagaano. Bwe muneekuŋjaanyizanga mu bibuga byammwe, nnaabaleeteranga endwadde enkambwe, era n'abalabe bammwe banaabawangulanga.

²⁶Bwe ndikendeeza ku bungi bw'emmere yammwe, olwo abakazi ekkumi banaabafumbiranga emmere yammwe mu ntamu emu, era buli omu banaamupimirangako akatole katono. Munaalyanga, naye temukkutenga.

²⁷"N'ebyo byonna bwe binaalemanga okukyusa emitima gyammwe okumpulira, naye ne mweyongera okunjeemeranga;

²⁸nange nnaabasunguwaliranga, nze kennyini ne mbeebonerereza emirundi musanvu olw'ebibi byammwe.

²⁹Mulirya batabani bammwe ne bawala bammwe.

³⁰Ndizikiriza ebyoto bya bakatonda bammwe, ne ntemaatema bakatonda abalala, ne ntuma emirambo gyammwe ku mirambo nya bakatonda abalala; era ndibakyawa.

³¹Ebibuga byammwe binaasigaliranga awo tayo, n'ebifo byammwe ebitukuvu nga tebiriiko abifaako, era n'akaloosa akava mu biweebwayo byammwe tekansanyusenga.

³²Ensi yammwe ndigifuula ddungu n'abalabe bammwe abanaagibeerangamu ne bagyewuunya.

³³Ndibasaasaanyiza mu mawanga ne mbagobereza ekitala kyange. Ensi yammwe erifuuka amalungu n'ebibuga byammwe nga bimenyeddwa.

³⁴Awo ettaka ne liryoka lifuna emyaka egya ssabbiiti zaalyo mu bbanga eryo lye lirimala nga tewali alifaako, nga mmwe muli mu nsi z'abalabe bammwe; ettaka ne liwummulako ne lyeyagalira mu ssabbiiti zaalyo ezo.

³⁵Ebbanga eryo lyonna ettaka lye lirimala nga tewali kikolerwako, liriba n'okuwummula kwe litaafuna mu ssabbiiti ezaayita bwe mwali nga mmwe mulibeerako.

³⁶"Mu mmwe, abaliba basigaddewo nga bakyali balamu, nditeeka okutya mu mitima gyabwe nga bali eyo mu nsi z'abalabe baabwe, nga n'eddoboозi ly'akakoola k'omuti akafuumuulibwa n'empewo kabatiisa. Banaddukanga ng'abaliko abalabe ab'ekitala ababagoba, banaagwanga newaakubadde nga tewaabeerengawo babawondera.

³⁷Banaagwanjanangako ng'abadduka okwewonya omulabe ow'ekitala newaakubadde nga tewaabengawo babawondera. Bwe mutyo temuuusobolenga kwolekera balabe bammwe.

³⁸Mulisaanawo mu mawanga; ensi z'abalabe bammwe ziribamira.

³⁹N'abo ku mmwe abanaabanga basigaddewo banaakoozimbiranga mu nsi z'abalabe bammwe olw'ebibi byabwe, era balikoozimba n'olw'ebibi bya bakitaabwe.

Okuzza obuggyga Endagaano

40 “Naye bwe baneenenyanga ebibi byabwe n’ebyonoono bya bakitaabwe n’obunnanfuusi bwabwe gye ndi n’obujeemu bwabwe,

41 ebyandeetera okubalaga obukambwe ne mbasindika ne mu nsi z’abalabe baabwe, era amalala g’emitima gyabwe egitali mikomole bwe galikkakkana ne bakkiriza okukola ebibonerezo olw’ebyonoono byabwe,

42 kale ndijjukira endagaano yange ne Yakobo, ne nzijkira endagaano yange ne Isaaka n’endagaano yange ne Ibulayimu, era ndijjukira n’ensi yaabwe.

43 Naye ensi banaabanga bagivuddemu n’efuna ssabbiiti zaayo kubanga abaagibeerangamu tebakyagirimu. Banaabonerezewanga olw’ebibi byabwe kubanga baanyoomoolanga amateeka gange ne batagondera biragiro byange.

44 Newaakubadde ng’ebyo biriba bwe bityo, bwe banaabanga mu nsi z’abalabe baabwe, siibeggyengako wadde okubakyawanga n’okumenyawo ne mmenyerawo ddala endagaano yange gye nalagaana nabo; kubanga Nze MUKAMA Katonda waabwe.

45 Naye ku lwabwe, najjukiranga endagaano gye nalagaana ne bajjajaabwe, be naggya mu nsi ey’e Misiri nga n’amawanga gonna galaba ndyoke mbeere Katonda waabwe. Nze MUKAMA.”

46 Ago ge mateeka n’ebiragiro n’amateeka amakulu MUKAMA ge yakolera abaana ba Isirayiri, nga bwe yalagira Musa, ku lusozi Sinaayi.

Ebyabaleevi 27

Obweyamo eri MUKAMA

1 Awo MUKAMA n’agamba Musa nti,

2 “Yogera eri abaana ba Isirayiri obagambe nti: Omuntu bw’anaakolanga obweyamo obw’enjawulo obw’okuwaayo abantu eri MUKAMA naye ng’asasulayo miwendo egibagyamu, onoobasaliranga bw’oti:

3 omusajja aweza emyaka egy’obukulu egiri wakati w’amakumi abiri n’engaana anaaleetanga sekeri za ffeeza amakumi ataano, nga sekeri z’omu watukuvu bwe ziba,

4 naye bw’anaabanga omukazi onoomusaliranga sekeri amakumi asatu.

5 Omuntu aweza emyaka egy’obukulu egiri wakati w’ettaano n’amakumi abiri, bw’anaabanga omusajja onoomusaliranga sekeri amakumi abiri naye omukazi sekeri kkumi.

6 Bw’anaabanga omwana ng’ali wakati w’omwezi gumu n’emyaka etaano, onoomusaliranga sekeri ttaano eza ffeeza nga mulenzi, naye omuwala sekeri za ffeeza ssatu.

⁷Omuntu bw'anaabanga ow'emyaka egy'obukulu nkaaga n'okusingawo, omusajja onoomusaliranga sekeri kkumi na ttaano n'omukazi sekeri kkumi.

⁸Omuntu eyakola obweyamo bw'anaabanga omwavu ennyo atasobola kuleeta miwendo egoy gye wamusalira, anaayanjulwanga eri kabona; kale kabona anaamusaliranga omuwendo ogumugyamu ng'ageraageranya obusobozi bw'oyo eyeyama nga bwe bunaabanga.

Obweyamo Obukwata ku Bisolo

⁹"Obweyamo bw'omuntu bwe bunaabeeranga obw'ekisolo ekikkirizibwa ng'ekiweebwayo eri MUKAMA Katonda, ekisolo ng'ekyo ekiweebwayo eri MUKAMA Katonda kinaabanga kitukuvu.

¹⁰Tasaaniranga kukikyusaamu oba kukiwaanyisaamu ekibi mu kirungi wadde ekirungi mu kibi; bw'anaabanga awaanyisizza ekisolo ekimu mu kirala, byombi kino na kiri ky'awanyisizzaamu binaafuukanga bitukuvu.

¹¹Ensolo omuntu gy'anaabanga yeeyamye bw'eneebanga etali nnongoofu, etakkirizibwa ng'ekiweebwayo eri MUKAMA Katonda, ensolo eyo esaanira okuleetebwanga eri kabona,

¹²ye alyokenga asalewo nga bw'eri, oba nnungi oba mbi. Omuwendo kabona gw'anaabaliriranga ku nsolo eyo, gwe gunaawebwangayo.

¹³Nannyini nsolo bw'anaabanga ayagala okuginunulayo, anaasaniranga okugattako ekitundu ekimu ekyokutaano ku muwendo gwayo.

Obweyamo Obukwata ku Nnyumba ne ku Ttaka

¹⁴"Omusajja bw'anaawangayo ennyumba ye okubeera entukuvu eri MUKAMA Katonda kabona anaagirabiranga omuwendo ogugigyamu, oba nnungi oba mbi. Omuwendo ogwo kabona gw'anaasalanga gwe gunaakolanga.

¹⁵Oyo anaawangayo ennyumba ye eri MUKAMA bw'anaabanga ayagala okuginunula, anaayongerangako ekitundu kimu kyakutaano ku muwendo gwayo, olwo ng'ennyumba emuddira.

¹⁶"Omusajja bw'anaawangayo ekitundu ky'ettaka lye, lye yasikira, eri MUKAMA Katonda, omuwendo ogligiyamu gunaabalarirwanga nga gwasigamizibwa ku bungi bw'ensigo ezeetaagibwa okusiga ku ttaka eryo ne ziggweerako; ensigo za sayiri ezipimibwamu oma zinaabalirirwangamu sekeri za ffeeza amakumi ataano.

¹⁷Singa ennimiro ye, agiwaayo mu biseera by'Omwaka gwa Jjubiri, omuwendo ogubaliriddwa gunaasigalanga nga bwe guli.

¹⁸Naye bw'anaawangayo ennimiro ye nga Jjubiri eweddeko, kabona anagibalirirangamu omuwendo ng'agwesigamya ku myaka eginaabanga

gibulayo Omwaka gwa Jjubiri eddirira gulyoke gutandike, n'omuwendo ogwali gugaliriddwa gunaakendeezebwangako.

¹⁹Era oyo anaabanga awaddeyo ennimiro ye bw'anaayagalanga okuginunula, kale anaagattangako ekitundu kimu kyakutaano ku muwendo gwayo, olwo ennimiro n'emuddira.

²⁰Naye bw'anaabanga tayagala kununula nnimiro eyo, oba bw'anaabanga agiguzizza omuntu omulala, kale ng'olwo tekyanunulibwa n'akamu.

²¹Naye mu Mwaka gwa Jjubiri ennimiro eyo bw'eneeteebwanga, eneebunga ntukuvu eri MUKAMA, ng'ennimiro eyawongebwa ewa MUKAMA; eneebunga ya kabona.

²²“Omusajja bw'anaawangayo eri MUKAMA Katonda ennimiro gye yagula, etali ku ttaka lye ery'obwannannyini,

²³kabona anaabaliriranga omuwendo ogugigyamu okutuuka ku mwaka gwa Jjubiri, omusajja anaasasulanga omuwendo ogwo ku lunaku olwo ng'ekintu ekitukuvu eri MUKAMA Katonda.

²⁴Mu mwaka gwa Jjubiri, ennimiro eneddizibwanga oyo gwe yagigulako, nga y'oyo eyali nannyini ttaka.

²⁵Buli muwendo ogubalirirwa guneesigamizibwanga ku sekeri z'Awatukuvu, nga gera amakumi abiri zivaamu sekeri emu.

Ebantu Ebiwonge

²⁶“Tewabanga awaayo omwana gw'ensolo omubereberye eri MUKAMA, kubanga abaana b'ensolo ababereberye bona ba MUKAMA, oba nte oba ndiga zonna za MUKAMA Katonda.

²⁷Bw'anaabanga awaddeyo emu ku nsolo ezitali nnongoofu, anagisasuliranga omuwendo gwayo ogwagibalirirwamu, ng'agattako ekitundu kimu kyakutaano eky'omuwendo gwayo. Bw'ataaginunulengayo eneetundwanga omuwendo ogwagibalirirwamu.

²⁸“Naye omuntu yenna bw'anaamalanga okuwongera MUKAMA Katonda ku bintu bye by'anaabanga nabyo, gamba oba muntu oba kisolo oba ennimiro ye gye yasikira, tewaabengawo ku bintu ebyo bitundibwa oba okununulibwa; buli kintu ekiwongere ddala mu ngeri eyo kinaabanga kitukuvu nnyo eri MUKAMA Katonda.

²⁹Omuntu eyawongebwa nga wa kuttibwa, taanunulibwenga kinaamusaaniranga kuttibwa.

Okununula Ebitundu Eby'ekkumi

³⁰ “Buli kitundu eky’ekkumi ekiva mu nsi, gamba ku mmere ey’empeke eva mu ttaka, oba ku bibala ebiva ku miti, kya MUKAMA Katonda, era kitukuvu eri MUKAMA Katonda.

³¹ Omuntu anaayagalanga okununula ku bitundu bye eby’ekkumi, anaagatangako ekitundu kimu kyakutaano ku muwendo gwakyo.

³² Ebitundu eby’ekkumi byonna ebyamagana g’ente n’ebisibo by’endiga, kwe kugamba nti buli nsolo omusumba gy’anaabalanga nga ya kkumi, eneebunga ntukuvu eri MUKAMA Katonda.

³³ Tasaaniranga kulondamu nnungi ng’alekawo embi, oba okuwaanyisa. Bw’anaawaanyisanga ng’olwo ensolo zombi, eri n’eno ewanyisizibwa zinaafuukanga ntukuvu teziinunulibwenga.”

³⁴ Ago ge mateeka MUKAMA Katonda ge yawa Musa ku lusozi Sinaayi agategeeze abaana ba Isirayiri.

Okubala

Okubala 1

Okubala Abantu

¹ Awo MUKAMA Katonda n'ayogera ne Musa mu Weema ya MUKAMA ey'Okukunjaanirangamu, mu Ddungu lya Sinaayi ku lunaku olw'olubereberye olw'omu mwezi ogwokubiri ogw'omwaka ogwokubiri kasookedde abaana ba Isirayiri bava mu nsi y'e Misiri. N'amugamba nti:

² "Bala ekibiina kyonna eky'abaana ba Isirayiri ng'obategeka mu bika byabwe, ne mu mpya zaabwe, ng'owandiika erinnya lya buli musajja kinnoomu ku lukalala.

³ Ggwe ne Aloonij mujja kutegeka abasajja bona ab'omu Isirayiri abawezessa emyaka amakumi abiri egy'obukulu n'okusingawo, abatuuse okuyingira mu magye, mubabalire mu bibinja byabwe.

⁴ Munaayambibwako omusajja omu omu okuva mu buli kika, nga ye mukulu w'oluggya lwa bajjajaabe.

⁵ "Gano ge mannya g'abasajja abajja okubayambako: "Aliva mu kika kya Lewubeeni ye Erizuuli mutabani wa Sedewuli;

⁶ mu kya Simyoni ye Serumijeeri mutabani wa Zulisadaayi;

⁷ mu kya Yuda ye Nakusoni mutabani wa Amminadaabu;

⁸ mu kya Isakaali ye Nesaneri mutabani wa Zuwaali;

⁹ mu kya Zebbulooni ye Eriyaabu mutabani wa Keroni.

¹⁰ Okuva mu baana ba Yusufu: mu kya Efulayimu ye Erisaama mutabani wa Ammikudi; mu kya Manase ye Gamalyeri mutabani wa Pedazuuli.

¹¹ Aliva mu kika kya Benyamini ye Abidaani mutabani wa Gidyoni;

¹² mu kya Ddaani ye Akiyezeeri mutabani wa Amisadaayi;

¹³ mu kya Aseri ye Pagiyeeri mutabani wa Okulaani;

¹⁴ mu kya Gaadi ye Eriyasaafu mutabani wa Deweri;

¹⁵ mu kya Nafutaali ye Akira mutabani wa Enani."

¹⁶ Abo be basajja abaalondebwa okuva mu kibiina, nga be bakulembeze ab'ebika bya bajjajaabwe. Abo nga be bakulu b'ebika bya Isirayiri.

Ebika n'obunene bwabyo

¹⁷ Awo Musa ne Aloonij ne batwala abasajja abo abaatuddwa amannya gaabwe,

¹⁸ ne bakunjaanya ekibiina ky'abantu bona ku lunaku olw'olubereberye olw'omu mwezi ogwokubiri. Awo abantu bona ne beewandiisa mu bujjajja bwabwe ne mu bika byabwe awamu ne mu mpya zaabwe. Abasajja abo abaali

bawezessa emyaka amakumi abiri egy'obukulu n'okusingawo, amannya gaabwe ne gawandiikibwa kinnoomu ku lukalala,

¹⁹nga MUKAMA bwe yalagira Musa. Bw'atyo Musa n'ababalira mu Ddungu lya Sinaayi:

²⁰ Ab'omu bazzukulu ba Lewubeeni, mutabani wa Isirayiri omubereberye: Abasajja bona ab'emyaka egy'obukulu amakumi abiri n'okusingawo, nga batuuse n'okuyingira mu magye, baawandiikibwa amannya gaabwe kinnoomu, ng'ebiwandiiko by'ebika byabwe n'ebi'empya zaabwe bwe byali.

²¹ Abaablibwa okuva mu kika kya Lewubeeni baali emitwalo ena mu kakaaga mu bitaano (46,500).

²² Ab'omu bazzukulu ba Simyoni: Abasajja bona ab'emyaka egy'obukulu amakumi abiri n'okusingawo nga batuuse n'okuyingira mu magye, baawandiikibwa amannya gaabwe kinnoomu, ng'ebiwandiiko by'ebika byabwe n'ebi'empya zaabwe bwe byali.

²³ Abaablibwa okuva mu kika kya Simyoni baali emitwalo etaano mu kenda mu ebikumi bisatu (59,300).

²⁴ Ab'omu bazzukulu ba Gaadi: Abasajja bona ab'emyaka egy'obukulu amakumi abiri n'okusingawo, nga batuuse n'okuyingira mu magye, baawandiikibwa amannya gaabwe kinnoomu, ng'ebiwandiiko by'ebika byabwe, n'ebi'empya zaabwe bwe byali.

²⁵ Abaablibwa okuva mu kika kya Gaadi baali emitwalo ena mu enkumi ttaano mu lukaaga mu amakumi ataano (45,650).

²⁶ Ab'omu bazzukulu ba Yuda: Abasajja bona ab'emyaka egy'obukulu amakumi abiri n'okusingawo, nga batuuse n'okuyingira mu magye, baawandiikibwa amannya gaabwe kinnoomu, ng'ebiwandiiko by'ebika byabwe n'ebi'empya zaabwe bwe byali.

²⁷ Abaablibwa okuva mu kika kya Yuda baali emitwalo musanvu mu enkumi nnya mu lukaaga (74,600).

²⁸ Ab'omu bazzukulu ba Isakaali: Abasajja bona ab'emyaka egy'obukulu amakumi abiri n'okusingawo, nga batuuse n'okuyingira mu magye, baawandiikibwa amannya gaabwe, kinnoomu, ng'ebiwandiiko by'ebika byabwe n'ebi'empya zaabwe bwe byali.

²⁹ Abaablibwa okuva mu kika kya Isakaali baali emitwalo etaano mu enkumi nnya mu ebikumi bina (54,400).

³⁰ Ab'omu bazzukulu ba Zebbulooni: Abasajja bona ab'emyaka egy'obukulu amakumi abiri n'okusingawo, nga batuuse n'okuyingira mu magye,

baawandiikibwa amannya gaabwe kinoomu, ng'ebiwandiiko by'ebika byabwe n'ebi'empya zaabwe bwe byali.

³¹Abaabalibwa okuva mu kika kya Zebbulooni baali emitwalo etaano mu kasanvu mu ebikumi bina (57,400).

³²Okuva mu batabani ba Yusufu: Ab'omu bazzukulu ba Efulayimu Abasajja bona ab'emyaka egy'obukulu amakumi abiri n'okusingawo, nga batuuse n'okuyingira mu magye, baawandiikibwa amannya gaabwe kinnoomu, ng'ebiwandiiko by'ebika byabwe n'ebi'empya zaabwe bwe byali.

³³Abaabalibwa okuva mu kika kya Efulayimu baali emitwalo ena mu ebikumi bitaano (40,500).

³⁴Ab'omu bazzukulu ba Manase: Abasajja bona ab'emyaka egy'obukulu amakumi abiri n'okusingawo, nga batuuse n'okuyingira mu magye, baawandiikibwa amannya gaabwe kinnoomu, ng'ebiwandiiko by'ebika byabwe n'ebi'empya zaabwe bwe byali.

³⁵Abaabalibwa okuva mu kika kya Manase baali emitwalo esatu mu enkumi bbiri mu ebikumi bibiri (32,200).

³⁶Ab'omu bazzukulu ba Benyamini: Abasajja bona ab'emyaka egy'obukulu amakumi abiri n'okusingawo, nga batuuse n'okuyingira mu magye, baawandiikibwa amannya gaabwe kinnoomu, ng'ebiwandiiko by'ebika byabwe n'ebi'empya zaabwe bwe byali.

³⁷Abaabalibwa okuva mu kika kya Benyamini baali emitwalo esatu mu enkumi ttaano mu ebikumi bina (35,400).

³⁸Ab'omu bazzukulu ba Ddaani: Abasajja bona ab'emyaka egy'obukulu amakumi abiri n'okusingawo nga batuuse n'okuyingira mu magye, baawandiikibwa amannya gaabwe kinnoomu, ng'ebiwandiiko by'ebika byabwe n'ebi'empya zaabwe bwe byali.

³⁹Abaabalibwa okuva mu kika kya Ddaani baali emitwalo mukaaga mu enkumi bbiri mu lusanvu (62,700).

⁴⁰Ab'omu bazzukulu ba Aseri: Abasajja bona ab'emyaka egy'obukulu amakumi abiri n'okusingawo, nga batuuse n'okuyingira mu magye, baawandiikibwa amannya gaabwe kinnoomu, ng'ebiwandiiko by'ebika byabwe n'ebi'empya zaabwe bwe byali.

⁴¹Abaabalibwa okuva mu kika kya Aseri baali emitwalo ena mu lukumi mu ebikumi bitaano (41,500).

⁴²Ab'omu bazzukulu ba Nafutaali: Abasajja bona ab'emyaka egy'obukulu amakumi abiri n'okusingawo, nga batuuse n'okuyingira mu magye,

baawandiikibwa amannya gaabwe kinnoomu, ng'ebiwandiiko by'ebika byabwe n'ebi'empya zaabwe bwe byali.

⁴³Abaabalibwa okuva mu kika kya Nafutaali baali emitwalo etaano mu enkumi ssatu mu ebikumi bina (53,400).

⁴⁴Abo be basajja Musa ne Aloonni be baabala, nga bayambibwako abakulembeze ab'omu Isirayiri ekkumi n'ababiri, nga buli omu akiikiridde ekika kye.

⁴⁵Abasajja bona abaana ba Isirayiri abaali bawezessa emyaka egy'obukulu amakumi abiri n'okusingawo, nga batuuse n'okuyingira mu magye ga Isirayiri bwe batyo ne babalirwa mu bika byabwe.

⁴⁶Obungi bwabwe bona abaabalibwa okugatta awamu baali bawera emitwalo nkaaga mu enkumi ssatu mu ebikumi bitaano mu amakumi ataano (603,550).

Abaleevi bo Tebaabalibwa

⁴⁷Abazzukulu ab'omu mpya ez'omu bika ebirala bwe baali babalibwa, bo ab'omu kika kya Leevi tebaabalibwa.

⁴⁸Kubanga MUKAMA Katonda yali agambye Musa nti,

⁴⁹"Ab'omu kika kya Leevi tababalanga wadde okubagatta awamu n'emiwendo gy'abaana ba Isirayiri abalala."

⁵⁰Era n'amugamba nti, "Naye Abaleevi obawanga omulimu ogw'okulabirira Eweema ey'Obujulirwa n'ebintu byamu byonna awamu ne byonna ebiligenderako. Banaasitulanga Eweema n'ebyamu byonna, banaagirabiriranga era banaasiisiranga okugyetooloola.

⁵¹Eweema bw'eneebanga etwalibwa mu kifo ekirala, Abaleevi be banaagisimbulanga, era bwe kineetaagisanga okugissa mu kifo awalala, Abaleevi be banaagisimbangawo. Omuntu omulala yenna bw'anaagisembereranga anaafanga.

⁵²Abaana ba Isirayiri banaasiisiranga mu bibinja, nga buli musajja ali mu lusiisira lwe n'ebendera ye ku bubwe.

⁵³Naye Abaleevi bo banaasimbanga eweema zaabwe okwebungulula Eweema ey'Obujulirwa, abaana ba Isirayiri baleme kutuukibwako busungu bwa MUKAMA. Abaleevi be banaabanga n'obuvunaanyizibwa obw'okulabirira Eweema ey'Obujulirwa."

⁵⁴Abaana ba Isirayiri ne bakola ebyo byonna nga MUKAMA Katonda bwe yalagira Musa.

Okubala 2

Abakulembeze n'Ensiisira z'Ebika Byabwe

¹Awo MUKAMA Katonda n'agamba Musa ne Alooni nti,

²"Abaana ba Isirayiri banaasiisiranga okwebungulula Eweema ya MUKAMA ey'Okukuŋjaanirangamu, nga bagyesuddeko akabanga naye nga bagyolekedde. Buli musajja anaawanikanga ebendera ye n'ebendera z'empya za bajajjaabwe."

³ Ebibinja by'olusiisira lwa Yuda binaasiisiranga ku ludda olw'enjuba gy'eva ne basimba awo ebendera yaabwe. Omukulembeze w'abantu ba Yuda ye Nakusoni mutabani wa Amminadaabu.

⁴Mu kibinja kye nga mulimu abaabalibwa emitwalo musanvu mu enkumi nnya mu lukaaga (74,600).

⁵ Ab'ekika kya Isakaali be banaasiisiranga okuliraana Yuda. Omukulembeze w'abantu ba Isakaali ye Nesaneri mutabani wa Zuwaali.

⁶Abaabalibwa mu kibinja kye baali emitwalo etaano mu enkumi nnya mu ebikumi bina (54,400).

⁷ Ekika kya Zebbulooni kye kinaddangako. Omukulembeze w'abantu ba Zebbulooni ye Eriyaabu mutabani wa Keroni.

⁸Abaabalibwa mu kibinja kye baali emitwalo etaano mu kasanvu mu ebikumi bina (57,400).

⁹ Abasajja bona abaali mu lusiisira lwa Yuda abaabalibwa ng'ebibinja by'amaggye gaabwe bwe byali baali emitwalo kkumi na munaana mu kakaaga mu ebikumi bina (186,400). Be banaakulemberanga.

¹⁰ Ku ludda olw'obukiikaddyo ebibinja eby'amaggye g'omu kika kya Lewubeeni gye banaasiisiranga, nga basimbye eyo n'ebendera yaabwe. Omukulembeze w'abantu ba Lewubeeni ye Erizuuli mutabani wa Sedewuli.

¹¹Abaabalibwa mu kibinja kye baali emitwalo ena mu kakaaga mu ebikumi bitaano (46,500).

¹² Ab'ekika kya Simyoni be banaabaddiriranga. Omukulembeze w'abantu ba Simyoni ye Serumiyeri mutabani wa Zulisadaayi.

¹³Abaabalibwa mu kibinja kye baali emitwalo etaano mu kenda mu ebikumi bisatu (59,300).

¹⁴ Ab'ekika kya Gaadi be banaddangako. Omukulembeze w'abantu ba Gaadi ye Eriyasaafu mutabani wa Deweri.

¹⁵Abaabalibwa mu kibinja kye baali emitwalo ena mu enkumi ttaano mu lukaaga mu amakumi ataano (45,650).

¹⁶ Abasajja bona okugatta awamu abaali mu lusiisira lwa Lewubeeni abaabalibwa, ng'ebibinja by'amaggye gaabwe bwe byali, baali emitwalo kkumi

n'ettaano mu lukumi mu ebikumi bina mu amakumi ataano (151,450). Be banaabanga abookubiri okusitula ng'olugendo lutuuse.

¹⁷ Eweema ya MUKAMA ey'Okukuŋjaanirangamu eneesitulwanga ng'olugendo lutuuse nga yeebunguluddwa olusiisira lw'Abaleevi, ng'eri mu makkati g'ensiisira endala zonna. Banaasitulanga okutambula nga baddiriragana ng'enteekateeka y'ensiisira zaabwe bw'eri, buli musajja ng'agenda n'ebendera ye.

¹⁸ Ku ludda olw'ebugwanjuba y'eneebeeranga olusiisira lw'ebibinja bya Efulayimu nga bakutte n'ebendera zaabwe. Omukulembeze w'abantu ba Efulayimu ye Erisamaa mutabani wa Ammikudi.

¹⁹ Ab'omu kibinja kye abaabalibwa baali emitwalo ena mu ebikumi bitaano (40,500).

²⁰ Ekika kya Manase kye kinaddangako. Omukulembeze w'abantu ba Manase ye Gamalyeri mutabani wa Pedazuuli.

²¹ Ab'omu kibinja kye abaabalibwa baali emitwalo esatu mu enkumi bbiri mu ebikumi bibiri (32,200).

²² Ekika kya Benyamini ne kiddako. Omukulembeze w'abantu ba Benyamini ye Abidaani mutabani wa Gidyon.

²³ Ab'omu kibinja kye abaabalibwa baali emitwalo esatu mu enkumi ttaano mu ebikumi bina (35,400).

²⁴ Okugatta awamu abasajja bona abaali mu lusiisira lwa Efulayimu abaabalibwa ng'ebibinja byabwe bwe byali baali emitwalo kkumi mu kanaana mu kikumi (108,100). Bano be banaabanga abookusatu okusitula ng'olugendo lutuuse.

²⁵ Ku ludda olw'obukiikkono y'eneebeeranga olusiisira lw'ebibinja bya Ddaani n'ebendera yaabwe. Omukulembeze w'abantu ba Ddaani ye Akiyezeeri mutabani wa Amisadaayi.

²⁶ Ab'omu kibinja kye abaabalibwa baali emitwalo mukaaga mu enkumi bbiri mu lusanvu (62,700).

²⁷ Ab'ekika kya Aseri be banaasiisiranga okubaddirira. Omukulembeze w'abantu ba Aseri ye Pagiyerei mutabani wa Okulaani.

²⁸ Ab'omu kibinja kye abaabalibwa baali emitwalo ena mu lukumi mu ebikumi bitaano (41,500).

²⁹ Ab'ekika kya Nafutaali be banaddangako. Omukulembeze w'abantu ba Nafutaali ye Akira mutabani wa Enani.

³⁰Ab'omu kibinja kye abaabalibwa baali emitwalo etaano mu enkumi ssatu mu ebikumi bina (53,400).

³¹Okugatta awamu abasajja bona abaali mu lusiisira lwa Ddaani baali emitwalo kkumi n'ettaano mu kasanvu mu lukaaga (157,600). Abo be banaasembangayo okusitula ng'olugendo lutuuse, ng'ebendera zaabwe bwe ziri.

³²Abo be baana ba Isirayiri abaabalibwa ng'empya zaabwe bwe zaali. Okugatta abaali mu nsiisira bona ng'ebibinja byabwe bwe byali, baawera emitwalo nkaaga mu enkumi ssatu mu ebikumi bitaano mu amakumi ataano (603,550).

³³Naye abaana ba Isirayiri bwe baali babalibwa, Abaleevi bo tebaabalibwa, kubanga bw'atyo MUKAMA bwe yalagira Musa.

³⁴Abaana ba Isirayiri bwe batyo ne bakola ebyo byonna MUKAMA Katonda bye yalagira Musa. Bwe batyo bwe baasiisiranga ensiisira zaabwe ng'ebendera zaabwe bwe zaali, era bwe batyo bwe baasitulanga okutambula buli bantu mu bika byabwe ne mu mpya za bajjajjaabwe.

Okubala 3

Batabani ba Alooni

¹Luno lwe lulyo lwa Alooni n'olwa Musa mu biseera MUKAMA mwe yayogerera ne Musa ku Lusozi Sinaayi.

²Gano ge mannya ga batabani ba Alooni: Nadabu, omubereberye, ne Abiku, ne Eriyazaali, ne Isamaali.

³Ago ge mannya ga batabani ba Alooni, abaafukibwako amafuta ag'omuzeeyituuni okuba bakabona, era abaayawulibwa okuweereza mu mulimu gw'obwakabona.

⁴Naye nno Nadabu ne Abiku baatondokera mu maaso ga MUKAMA ne bafa, kubanga baayokya ekiweebwayo eri MUKAMA Katonda n'omuliro ogutakkirizibwa nga bali mu ddungu ly'e Sinaayi. Tebaalina baana; bwe batyo, Eriyazaali ne Isamaali ne basigala nga be bokka abaaweerezanga nga bakabona ebbanga lyonna kitaabwe Alooni lye yamala nga mulamu.

Omuwendo gw'Abaleevi n'Emirimu gyabwe

⁵Awo MUKAMA Katonda n'agamba Musa nti,

⁶"Leeta ab'omu kika kya Leevi obakwase Alooni kabona bamuweerezenga.

⁷Banaamukoleranga emirimu era ne baweereza n'ekibiina kyonna awali Eweema ya MUKAMA ey'Okukuŋjaanirangamu, nga bakola emirimu awali Eweema ya MUKAMA.

⁸Banaalabiriranga ebintu byonna eby'omu Weema ya MUKAMA ey'Okukuñjaanirangamu, ne bakola emirimu gy'omu Weema ya MUKAMA nga batuukiriza ebyo byonna ebivunaanyizibwa abaana ba Isirayiri.

⁹Abaleevi onoobawanga eri Aloonni ne batabani be; baweereddwa ddala Aloonni nga baggyibwa mu baana ba Isirayiri.

¹⁰Onoolonda Aloonni ne batabani be okubeera bakabona; naye bwe wanaabangawo omuntu omulala yenna n'asembera awatukuvu, anaafanga."

¹¹MUKAMA Katonda n'ayongera okugamba Musa nti,

¹²"Laba, neetwalidde Abaleevi nga mbaggya mu baana ba Isirayiri mu kifo ky'abaana ababereberye abazaalibwa abakazi mu baana ba Isirayiri. Abaleevi banaabanga bange,

¹³kubanga byonna ebizaalibwa ebibereberye byange. Bwe natta ebibereberye byonna mu nsi y'e Misiri neeyawulira ebibereberye byonna mu Isirayiri okubeeranga ebyange,abantu n'ebisolo. Nze MUKAMA Katonda."

¹⁴Awo MUKAMA Katonda n'agamba Musa mu ddungu ly'e Sinaayi nti,

¹⁵"Bala Abaleevi bonna mu mpya zaabwe ne mu bika byabwe. Bala buli mwana mulenzi ow'omwezi ogumu n'okusingawo."

¹⁶Bw'atyo Musa n'ababala nga MUKAMA Katonda bwe yamulagira, ng'ekigambo kya MUKAMA bwe kyalí.

¹⁷Gano ge mannya ga batabani ba Leevi: Gerusoni, ne Kokasi, ne Merali.

¹⁸Gano ge mannya g'abatabani ba Gerusoni ng'empya zaabwe bwe zaali: Libuni ne Simeeyi.

¹⁹Bano be batabani ba Kokasi ng'empya zaabwe bwe zaali: Amulaamu, ne Izukali ne Kebbulooni, ne Wuzyeeri.

²⁰Bano be batabani ba Merali ng'empya zaabwe bwe zaali: Makuli ne Musi. Ebyo bye bika by'Abaleevi ng'empya za bakitaabwe bwe zaali.

²¹Mu Gerusoni mwe mwava oluggyga lwa Abalibuni n'oluggyga lwa Abasimeeyi; ezo nga z'empya za Abagerusoni.

²²Abaana aboobulenzi okuva ku w'omwezi ogumu ogw'obukulu n'okusingawo abaabalibwa baali kasantu mu ebikumi bitaano (7,500).

²³Ab'omu Gerusoni nga baakusiisiranga ku ludda olw'ebugwanjuba emmanju wa Weema ya MUKAMA.

²⁴Omukulembeze w'empya za Abagerusoni yali Eriyasaafu mutabani wa Laeri.

²⁵ Abagerusoni be banaabanga n'obuvunaanyizibwa obw'okulabirira Eweema ya MUKAMA ey'Okukuññaanirangamu, nga balabirira ebibikkako n'eggigi ery'omu mulyango oguyingira mu Weema,

²⁶ n'entimbe ez'omu luggya, n'entimbe ez'omu mizigo egiggulira ku luggya okwebungulula Weema n'ekyoto. Era banaalabiriranga n'emiguwa awamu n'ebintu byonna ebinaakozesebwanga ku mirimu egyo.

²⁷ Mu Kokasi mwe mwava oluggya lwa Abamulaamu, n'oluggya lwa Abayizukaali, n'oluggya lwa Abakebbulooni, n'oluggya lwa Abawuziyeeri; ezo z'empya za Abakokasi.

²⁸ Abaana aboobulenzi okuva ku w'omwezi ogumu ogw'obukulu n'okusingawo abaabalibwa baali kanaana mu lukaaga (8,600). Abakokasi be baweebwa obuvunaanyizibwa okulabiriranga awatukuvu.

²⁹ Ab'omu Kokasi nga baakusiisiranga ku ludda olw'obukiikaddyo obwa Weema ya MUKAMA.

³⁰ Omukulembeze w'empya za Abakokasi yali Erizafani mutabani wa Wuziyeeri.

³¹ Abakokasi be baabanga n'obuvunaanyizibwa okulabirira Essanduuko ey'Endagaano, n'emmeeza, n'ekikondo ky'ettaala, n'ebyoto, n'ebintu eby'omu watukuvu ebikozesebwaga mu kuweereza, n'eggigi; n'emirimu gyonna egyekuusa ku buweereza obwo.

³² Eriyazaali mutabani wa Aloonni kabona ye yalondebwa okuba omukulu w'abakulembeze ba Abaleevi, era n'okulabirira abo abaaweerezanga mu watukuvu.

³³ Mu Merali mwe mwava oluggya lwa Abamakuli n'oluggya lwa Abamusi; ezo nga ze mpya za Abamerali.

³⁴ Abaana aboobulenzi okuva ku w'omwezi ogumu n'okusingawo abaabalibwa baali kakaaga mu ebikumi bibiri (6,200).

³⁵ Omukulembeze w'empya za Abamerali yali Zuliyeeri mutabani wa Abikayiri; Abamerali nga baakusiisiranga ku bukiikaddyo obwa Weema ya MUKAMA.

³⁶ Be baavunaanyizibwanga emikiikiro, n'empagi, n'ebikondo, n'ebikwata ku Weema ya MUKAMA byonna n'ebyekuusa ku mirimu gyayo.

³⁷ Okwo baagattangako empagi zonna ezeebunguludde oluggya n'entobo zaazo, n'enkondo za Weema n'emiguwa.

³⁸ Musa ne Aloonni ne batabani baabwe baasiisiranga ku ludda olw'ebuvanjuba olwa Weema ya MUKAMA, okwolekera enjuba gy'eva mu maaso ga Weema ya MUKAMA ey'Okukuññaanirangamu. Baavunaanyizibwanga okulabirira

awatukuvu ku lw'abaana ba Isirayiri. Omuntu omulala yenna eyasembereranga awatukuvu, ng'ateekwa kufa.

³⁹ Omuwendo gwonna ogw'Abaleevi abaabalibwa ng'empya zaabwe bwe zaali, nga mwe muli abaana aboobulenzi okuva ku w'omwezi ogumu n'okusingawo, nga MUKAMA Katonda bwe yalagira Musa ne Aloonni, baali emitwalo ebiri mu enkumi bbiri (22,000).

Okubala Abasajja Ababereberye

⁴⁰ MUKAMA Katonda n'agamba Musa nti, "Bala abaana ba Isirayiri bona aboobulenzi ababereberye okuva ku mwana ow'omwezi ogumu n'okusingawo okole olukalala lw'amannya gaabwe gonna.

⁴¹ Era ojja kunfunira Abaleevi mu kifo ky'ababereberye ab'abaana ba Isirayiri, era onfunire n'ente ez'Abaleevi mu kifo ky'ente ez'abaana ba Isirayiri embereberye. Nze MUKAMA Katonda."

⁴² Awo Musa n'abala abaana ba Isirayiri ababereberye nga MUKAMA Katonda bwe yamulagira.

⁴³ Okugatta awamu abaana aboobulenzi ababereberye bona okuva ku w'omwezi ogumu n'okusingawo abaabalibwa, nga n'amannya gaabwe gawandiikiddwa ku lukalala, baali emitwalo ebiri mu enkumi bbiri mu ebikumi bibiri mu nsanvu mu basatu.

⁴⁴ Awo MUKAMA Katonda n'agamba Musa nti,

⁴⁵ "Nfunira Abaleevi badde mu kifo ky'abaana ba Isirayiri ababereberye, n'ente z'Abaleevi zidde mu kifo ky'ente z'abaana ba Isirayiri, era Abaleevi banaabanga bange. Nze MUKAMA Katonda.

⁴⁶ Okununula ababereberye ab'abaana ba Isirayiri ebikumi ebibiri mu ensanvu mu abasatu abasukkirira ku muwendo gw'Abaleevi abasajja,

⁴⁷ onoddiranga gulaamu amakumi ataano mu ttaano ku buli omu, ng'ogeraageranyiza ku gulaamu kkumi n'emu ey'awatukuvu nga bw'eri, ye sekeri ey'obuzito ze gulaamu kkumi n'emu n'ekitundu.

⁴⁸ Ensimbi ez'okununula abaana ba Isirayiri abasukkiriram oziwanga Aloonni ne batabani be."

⁴⁹ Bw'atyo Musa n'asolooza ensimbi ez'okwenunula ku abo abaasukkirira ku muwendo gw'abo abaanunulibwa Abaleevi.

⁵⁰ Yasolooza ku babereberye ab'abaana ba Isirayiri effeeza ey'obuzito obwa kilo kkumi na ttaano n'ekitundu, ng'engeraageranya ya sekeri y'awatukuvu bw'eri.

⁵¹ Musa n'addiria ensimbi ez'okwenunula n'aziwa Aloonni ne batabani be, ng'ekigambo kya MUKAMA bwe kyali, nga MUKAMA Katonda bwe yalagira Musa.

Okubala 4

Batabani ba Kokasi

- ¹ MUKAMA Katonda n'agamba Musa ne Alooni nti,
- ² "Mubale batabani ba Kokasi abava mu kika ky'Abaleevi, ng'empya zaabwe n'ennyumba z'abakadde baabwe bwe ziri.
- ³ Mubabale nga muva ku basajja ab'emyaka amakumi asatu egy'obukulu okutuuka ku b'emyaka amakumi ataano, abayinza okuyingira mu buweereza obw'okukola emirimu mu Weema ya MUKAMA ey'Okukuŋñaanirangamu.
- ⁴ "Gino gye mirimu eginaakolwanga batabani ba Kokasi: nga gya kulabirira ebintu ebitukuvu ennyo.
- ⁵ Olusiisira bwe lunaabanga lusitula, Alooni ne batabani be banaayingiranga mu Weema ya MUKAMA, ne batimbulula eggigi ery'olutimbe ne balibikka ku Ssanduuko ey'Endagaano.
- ⁶ Okwo banaabikkangako amaliba ga lukwata, kuno ne babikkako olugoye olwa bbululu omuka, ne balyoka basonsekamu emisituliro gyayo.
- ⁷ "Ku mmeeza ey'Emigaati egy'Okulaga banaayaliirangako ekitambala ekya bbululu, ne bassaako amasowaane, n'ebijiiko ebinene, n'amabakuli, n'ejaagi omunaabeeranga ebiweebwayo ebyokunywa; n'emigaati egy'okulaga nagyo ginaabeeranga okwo.
- ⁸ Banaayaliirangako ekitambaala ekimyufu ennyo, ne bakibikkako amaliba ga lukwata; ne basonsekamu emisituliro gyayo.
- ⁹ "Banaddiranga ekitambaala ekya bbululu ne bakibikka ku kikondo ky'ettaala kwe zinaayakiranga, n'ettabaaza zaako, n'ebikomola entambi n'ensuniya ez'ebisirinza, n'ejaagi ez'amatuta ag'omuzeeyituuni aganaakozesebwanga mu ttaala ezo.
- ¹⁰ Ekikondo n'ebigenderako byonna binaasibibwanga mu maliba ga lukwata ne biteekewa ku musituliro.
- ¹¹ "Banaayaliiranga olugoye olwa bbululu ku kyoto ekya zaabu, okwo ne babikkako amaliba ga lukwata, ne basonsekamu emisituliro gyakyo.
- ¹² "Banaddiranga ebintu byonna ebinaakozesebwanga ku mirimu gy'obuweereza mu watukuvu ne babiteeka mu lugoye olwa bbululu ne babibikkako amaliba ga lukwata, ne babiteeka ku misituliro gyabyo.
- ¹³ Ekyoto banaakiggyangamu evvu ne bakibikkako olugoye olwa ffulungu;
- ¹⁴ ne balyoka bakissaako ebintu byonna ebikozesebwa mu mirimu gy'oku kyoto, nga mwe muli ensiniya ez'omuliro, n'ewuuma, n'ebijiiko n'ebibya. Okwo

banaabikkangako amaliba ga lukwata, ne balyoka basonsekamu emisituliro gyakyo.

15 “Alooni ne batabani be bwe banaamalanga okusibako awatukuvu ne byonna ebibeeramu, nga n'ekiseera ky'olusiisira okusitula mu lugendo kituuse; awo batabani ba Kokasi banajjanga ne babisitula, naye ekintu kyonna ekitukuvu tebakikwatangako, baleme okufa. Ebyo bye bintu eby'omu Weema ya MUKAMA ey'Okukuñjaanirangamu batabani ba Kokasi bye baneetikkanga.

16 “Eriyazaali, mutabani wa Alooni kabona, y'anaabeeranga n'obuvunaanyizibwa obw'amafuta g'ettaala ag'omuzeeyituuni, n'obubaane obwakaloosa, n'ekiweebwayo eky'okulaga eky'emmere ey'empeke, n'amafuta ag'omuzeeyituuni ag'okwawula. Era y'anaalabiriranga Eweema ya MUKAMA ne byonna ebigirimu, n'awatukuvu ne byonna ebikozesezebwamu.”

17 MUKAMA Katonda n'agamba Musa ne Alooni nti,

18 “Mwegendereze ab'omu mpya z'ennyumba z'Abakokasi baleme okukutulwa ku kika ky'Abaleevi.

19 Ekyo munaakibakoleranga, bwe batyo bwe banaasembereranga ebintu ebitukuvu ennyo balemenga okufa, naye basigalenga nga balamu. Alooni ne batabani be banaayingiranga mu watukuvu ne bagabira buli Mukokasi omulimu gwe n'ebyo by'aneetikkanga.

20 Naye Abakokasi tebaayingirenga munda kutunula ku bintu ebitukuvu, wadde n'eddakiika emu, balemenga okufa.”

Batabani ba Gerusoni

21 MUKAMA Katonda n'agamba Musa nti,

22 “Bala ne batabani ba Gerusoni ng'empya zaabwe n'ennyumba z'abakadde baabwe bwe ziri.

23 Babale ng'otandikira ku basajja ab'emyaka amakumi asatu egy'obukulu okutuuka ku b'emyaka amakumi ataano, abayinza okuyingira mu buweereza obw'okukola emirimu egya Weema ya MUKAMA ey'Okukuñjaanirangamu.

24 “Gino gye mirimu eginaakolebwanga ab'omu mpya z'Abagerusoni mu kuweereza era ne mu kwetikka emigu:

25 Baneetikkanga entimbe ez'omu Weema ya MUKAMA, y'Eweema ya MUKAMA ey'Okukuñjaanirangamu n'ebigibikkako, n'amaliba aga lukwata agabikkibwa kungulu kwayo, n'entimbe ez'omu mulyango gwa Weema ya MUKAMA ey'Okukuñjaanirangamu,

26 n'entimbe ez'omu luggya olwebungulula Weema ya MUKAMA n'ekyoto, n'olutimbe lw'omulyango gw'oluggya, n'emiguwa, ne byonna

ebinaakozesebwanga mu kuweereza okwo. Abagerusoni banaakolanga byonna ebineetaagibwanga okukola ku bintu ebyo.

²⁷Mu kuweereza kwonna okw'Abagerusoni, oba mu kwetikka oba mu kukola emirimu egy'engeri endala, Aloonni ne batabani be, be banaabalagiranga. Abagerusoni ojjanga kubakwasa obuvunaanyizibwa bwonna ku ebyo bye baneetikkanga.

²⁸Obwo bwe buweereza bwa batabani ba Gerusoni nga bukwata ku Weema ya MUKAMA ey'Okukuŋjaanirangamu. Bye banaakolanga binaalabirirwanga Isamaali mutabani wa Aloonni kabona.

Batabani ba Merali

²⁹"Batabani ba Merali nabo babale ng'empya zaabwe n'ennyumba z'abakadde baabwe bwe ziri.

³⁰Babale ng'otandikira ku basajja ab'emyaka amakumi asatu egy'obukulu okutuuka ku b'emyaka amakumi ataano, abayinza okuyingira mu buweereza obw'okukola emirimu egya Weema ya MUKAMA ey'Okukuŋjaanirangamu.

³¹Gino gye ginaabanga emirimu gyabwe egikwata ku Weema ya MUKAMA ey'Okukuŋjaanirangamu: Okusitula omudaala gwa Weema ya MUKAMA, n'embaawo zaayo, n'empagi n'ebibya mwe zituula,

³²awamu n'empagi ezeebungulula oluggya n'ebibya byazo mwe zituula, n'enkondo z'eweema, n'emiguwa, ne byonna ebyetaagibwa okukozesebwka ku mirimu egyo. Buli musajja onoomutegeezanga amannya g'ebintu byennyini by'ajjanga okwetikka.

³³Egyo gye ginaabanga emirimu gy'omu mpya z'abaana ba Merali nga bali mu buweereza bwabwe obwa Weema ya MUKAMA ey'Okukuŋjaanirangamu, nga bakulemberwa Isamaali mutabani wa Aloonni kabona."

Ebyava mu Kubala Abantu

³⁴Awo Musa ne Aloonni n'abakulembeze b'abantu ne babala batabani b'Abakokasi ng'empya zaabwe n'ennyumba z'abakadde baabwe bwe zaali.

³⁵Ne bababala nga batandikira ku basajja ab'emyaka amakumi asatu egy'obukulu okutuuka ku myaka amakumi ataano, abajja okuweereza mu Weema ya MUKAMA ey'Okukuŋjaanirangamu,

³⁶nga bababala ng'empya zaabwe bwe zaali; baawera enkumi bbiri mu lusanvu mu amakumi ataano (2,750).

³⁷Ogwo gwe gwali omuwendo gwonna ogw'abo abaali mu mpya z'Abakokasi abaaweerezanga mu Weema ya MUKAMA ey'Okukuŋjaanirangamu. Musa ne Aloonni baababala nga MUKAMA bwe yalagira Musa.

³⁸ Batabani ba Gerusoni nabo baabalibwa ng'empya zaabwe bwe zaali n'ennyumba z'abakadde baabwe bwe zaali.

³⁹ Abasajja bona okuva ku b'emyaka amakumi asatu egy'obukulu okutuuka ku b'emyaka amakumi ataano abaaweerezanga mu mirimu egy'omu Weema ya MUKAMA ey'Okukuŋjaanirangamu,

⁴⁰ baabalibwa ng'empya zaabwe n'ennyumba z'abakadde baabwe bwe zaali, ne bawera enkumi bbiri mu lukaaga mu amakumi asatu (2,630).

⁴¹ Ogwo gwe gwali omuwendo gwonna ogwa batabani ba Gerusoni abaali mu mpya za Abagerusoni abaaweerezanga mu Weema ya MUKAMA ey'Okukuŋjaanirangamu. Musa ne Alooni baababala nga MUKAMA Katonda bwe yalagira Musa.

⁴² Batabani ba Merali baabalibwa ng'empya zaabwe n'ennyumba z'abakadde baabwe bwe zaali.

⁴³ Abasajja bona okuva ku b'emyaka amakumi asatu egy'obukulu okutuuka ku b'emyaka amakumi ataano abajja okuweereza mu mirimu gy'omu Weema ya MUKAMA ey'Okukuŋjaanirangamu,

⁴⁴ abaabalibwa ng'empya zaabwe bwe zaali baali bawera enkumi ssatu mu ebikumi bibiri (3,200).

⁴⁵ Ogwo gwe gwali omuwendo gwonna ogwabalibwa ogw'omu mpya za batabani ba Merali. Musa ne Alooni baababala nga MUKAMA Katonda bwe yalagira Musa.

⁴⁶ Bwe batyo Musa ne Alooni n'abakulembeze ba Isirayiri ne babala Abaleevi bona mu mpya zaabwe ne mu nnyumba z'abakadde baabwe.

⁴⁷ Abasajja bona okuva ku b'emyaka amakumi asatu egy'obukulu okutuuka ku b'emyaka amakumi ataano abajja okuweereza mu mirimu egy'omu Weema ya MUKAMA ey'Okukuŋjaanirangamu,

⁴⁸ abaabalibwa baawera kanaana mu ebikumi bitaano mu kinaana (8,580).

⁴⁹ Buli musajja yaweebwa omulimu ogw'okukola n'ategeezebwa ky'aneetikka, nga MUKAMA Katonda bwe yalagira Musa. Bwe batyo bona ne babalibwa nga MUKAMA Katonda bwe yalagira Musa.

Okubala 5

Ekiragiro ku Bulongoofu bw'Olusiisira

¹ MUKAMA Katonda n'agamba Musa nti,

² "Lagira abaana ba Isirayiri buli mugenge bamufulumye ebweru w'olusiisira, na buli alina ekikulukuto ky'omusaayi, n'oyo anaabanga akutte ku mufu.

³Abasajja n'abakazi bona babafulumyenga ebweru w'olusiisira baleme okulufuula olutali lulongoofu, kubanga omwo mwe mbeera."

⁴Awo abaana ba Isirayiri ne bakolanga bwe batyo ne babafulumyanga ebweru w'olusiisira. Ne bakola nga MUKAMA Katonda bwe yalagira Musa.

Etteeka ly'Okuliwa

⁵MUKAMA Katonda n'agamba Musa nti,

⁶"Tegeeza abaana ba Isirayiri nti, 'Omuntu yenna omusajja oba omukazi bw'anaasobyanga eri munne mu ngeri yonna, bw'atyo anaabanga asobezza eri MUKAMA Katonda, omuntu oyo anaabangako omusango,

⁷era asaana ayatule ekibi ekyo ky'anaabanga akoze. Anaaliwanga mu bujuvu olw'ekibi ekyo ky'anaabanga akoze, n'agattako n'ekitundu ekimu ekyokutaano eky'ebyo by'anaabanga aliye, byonna anaabiwanga oyo gw'anaabanga azizzaako omusango.

⁸Naye singa omuntu oyo azzibbwako omusango taabengawo na waaluganda lwa kumpi, eby'okuliwa ebyo binaabanga bya MUKAMA Katonda era n'endiga ennume ey'okutangiririra oyo eyazza omusango, binaaweebwanga kabona.

⁹Era ebirabo byonna ebitukuvu abaana ba Isirayiri bye banaaleetanga eri kabona binaabanga bya kabona oyo.

¹⁰Ekirabo kya buli muntu ekitukuvu kinaabanga kikye, naye ekyo ky'anaaleeteranga kabona kinaabanga kya kabona."

Etteeka ku Bbuba

¹¹MUKAMA Katonda n'agamba Musa nti,

¹²"Tegeeza abaana ba Isirayiri nti, Muka omusajja yenna bw'anaakyamanga n'akola ebitali bya bwesigwa eri bba

¹³ne yeebaka n'omusajja omulala nga bba tategedde, omusajja oyo n'amusobyako, ekikolwa ekyo ne kitamanyibwa, kubanga tewali mujulizi akirabye era nga tebabakutte nga bakikola;

¹⁴singa omusajja akwatibwa ebbuba n'ateebereza nti osanga mukazi we baamusobezzaako, oba ebbuba ne limukwata newaakubadde nga mukazi we tebaamusobezzaako,

¹⁵kale anaaleetanga mukazi we eri kabona. Anaaleetanga n'ekyokuwaayo ku lwa mukazi we ekitundu kimu ek'yekkumi ekya efa eky'obuwunga bw'emmere eyitibwa sayiri. Obuwunga obwo taabufukengako mafuta ag'omuzeeyituuni wadde okubussaamu ebyakawoowo, kubanga bwe bwungu obuweereddwayo ku nsonga y'ebbuba, nga kye kiweebwayo eky'okujjukiza nti waliwo omusango ogwazzibwa.

¹⁶“Kabona anaasembezanga omukazi oyo n’amuleeta n’amuyimiriza mu maaso ga MUKAMA Katonda.

¹⁷Anaddiranga amazzi amatukuvu nga gali mu kijaagi eky’ebbumba n’ateeka mu mazzi ago enfuufu gy’anaggyanga wansi mu Weema.

¹⁸Kabona bw’anaamalanga okuyimiriza omukazi oyo mu maaso ga MUKAMA Katonda, anaamusumululanga enviiri ze n’azita ne zikka, n’amukwasa ekiweebwayo eky’okujukiza eky’emmere y’empeke ekiweereddwayo olw’obuggyga, ye kabona ng’akutte amazzi agakaawa agaleeta ekikolimo.

¹⁹Kabona anaalayizanga omukazi oyo n’amugamba bw’ati nti, ‘Obanga tewali musajja yenna eyeebase naawe mu kyama n’ofuuka atali mulongoofu songa oli mu bufumbo ewa balo, amazzi agakaawa gano agaleeta ekikolimo tegaakukole kabi.’

²⁰Naye bw’onoowabanga ne weebaka n’omusajja atali balo, bw’otyo ne weeyonoonyesa,

²¹wano kabona anaalayizanga omukazi ekirayiro eky’ekikolimo n’amugamba nti, ‘MUKAMA Katonda aleetere abantu bo okukukolimira n’okukuboola bw’anaakoozimbyanga ekisambi kyo n’olubuto lwo n’aluleetera entumbi ne luzimba.

²²Amazzi gano agaleeta ekikolimo gayingirenga mu mubiri gwo gazimbye olubuto lwo era n’ekisambi kyo kikoozimbe.’ “Omukazi anaddangamu nti, ‘Amiina, Amiina.’

²³“Kabona anaawandiikanga ebikolimo ebyo ku muzingo n’abyozaako mu mazzi agakaawa.

²⁴Anaanywesanga omukazi amazzi agakaawa agaleeta ekikolimo, era amazzi ago ganaayingiranga mu mukazi oyo ne gamuleetera obulumi n’okubonaabona mu mubiri.

²⁵Awo kabona anaggyangako omukazi oyo ekiweebwayo eky’empeke olw’obuggyga, anaawuubanga ekiweebwayo ekyo eky’empeke mu maaso ga MUKAMA Katonda, n’akireeta ku kyoto.

²⁶Kabona anaddiranga olubatu lw’obuwunga obw’ekiweebwayo ng’ekiweebwayo olw’okujukira n’akyokya ku kyoto; ebyo nga biwedde anaanywesanga omukazi amazzi gali.

²⁷Bw’anaamalanga okumunywesa amazzi ago, kale bw’anaabanga yeeyonoonyesezza nga tabadde mwesigwa eri bba, amazzi ago agaleeta ekikolimo ganaayingiranga mu mubiri gw’omukazi oyo ne gamuleetera obulumi

obubalagala; olubuto lwe lunaazimbulukukanga n'ekisambi kye ne kikoozimba, era anaafuukanga omukolimire mu bantu b'ewaabwe.

28 Naye omukazi oyo bw'anaabanga teyeyonoonyesa nga mulongoofu, kale taabeerengako musango, era anaabanga wa ddembe okuzaala abaana.'

29 "Eryo lye tteeka ery'obuggy, omukazi bw'anaakyamanga ne yeeyonoona songa mufumbo aliko bba,

30 oba omusajja bw'anaayingirangamu omwoyo ogw'ebbuba, n'akwatirwa mukazi we obuggy; kale anaaleetanga mukazi we oyo eri MUKAMA Katonda, kabona n'alyoka assa etteeka eryo mu nkola ku mukazi oyo.

31 Balo taabengako kyonoono ku nsonga ezo wabula mukazi we y'anaabangako omusango olw'okwonoona kwe.'"

Okubala 6

Etteeka ery'Obweyamo obw'Omunnazaalayiti

1 Awo MUKAMA Katonda n'agamba Musa nti,

2 "Tegeeza abaana ba Isirayiri nti, Omusajja oba omukazi bw'anaabanga ayagala okukola obweyamo obw'enjawulo obutali bwa bulijo ne yeetukuza ne yeeyawula eri MUKAMA ng'Omunnazaalayiti,

3 anaateekwanga obutanywa nvinnyo n'ekyokunywa ekirala kyonna ekitamiiza, era taanywenga nvinnyo wadde ekitamiiza ekirala kyonna ekikaatuuse. Era taalyenga ku bibala bya mizabbibu wadde ensigo zaabyo.

4 Ebbanga lyonna ly'anaamalanga nga Munnazaalayiti taalyenga ku kintu kyonna ekiva mu mizabbibu newaakubadde ensigo wadde ebikuta.

5 "Ebbanga lyonna ly'anaamalanga ng'ali mu bwewyamo bwe obwo, kkirita teyitenga ku mutwe gwe. Anaabanga mutukuvu eri MUKAMA Katonda okutuusa ekiseera kye eky'okweyawula nga kiweddeko; era enviiri ez'oku mutwe gwe anaazirekanga ne zikula ne ziwanvuwa.

6 Ebbanga lyonna ly'anaamalanga mu bwewyamo bwe obwo eri MUKAMA Katonda, taasembererenga muntu afudde.

7 Newaakubadde kitaawe, oba nnyina, oba muganda we oba mwannyina nga kwe kuli afudde, taabasembererenga alemenga okufuuka atali mulongoofu, kubanga akabonero ak'obweyamo obw'okweyawula eri MUKAMA kanaabanga kali ku mutwe gwe.

8 Okumala ebbanga lyonna ery'obweyamo bwe obw'okweyawula, anaabanga mutukuvu eri MUKAMA Katonda.

⁹ “Omuntu bw’anaafanga ekikutuko ng’aliraanye omuwonge oyo, bw’atyo n’afuula enviiri ze okuba ezitali nnongoofu, kale, anaamwanga omutwe gwe ku lunaku olw’okwerongoosa, lwe lunaku olw’omusanvu.

¹⁰ Ku lunaku olw’omunaana anaaleetanga amayiba abiri oba enjiibwa ento bbiri eri kabona ku mulyango gwa Weema ya MUKAMA ey’Okukuŋjaanirangamu.

¹¹ Kabona anaawangayo ekimu ku ebyo ng’ekiweebwayo olw’ekibi, n’ekyokubiri ng’ekiweebwayo ekyokebwa olw’okumutangiririra kubanga yali ayonoonye bwe yaliraana omuntu afudde. Ku lunaku olwo lwe lumu, kw’anaatukulizangako omutwe gwe.

¹² Aneewangayo eri MUKAMA Katonda okumala ebbanga lyonna ery’obweyamo bwe obw’okweyawula, era anaaleetanga omwana gw’endiga omulume n’aguwaayo ng’ekiweebwayo olw’okusingibwa omusango. Ennaku ezaasooka teziibalbwenga kubanga yafuuka atali mulongoofu mu bbanga ery’obweyamo bwe obw’okweyawula.

¹³ “Lino ly’etteeka erinaakwatanga ku Munnazaalayiti ebbanga lye ery’obweyamo obw’okweyawula bwe linaggwangako. Anaaleetebwanga ku mulyango gwa Weema ya MUKAMA ey’Okukuŋjaanirangamu.

¹⁴ Anaawangayo ebirabo bye eby’ebiweebwayo eri MUKAMA Katonda, bye bino: omwana gw’endiga omulume ogw’omwaka ogumu ogw’obukulu ogutaliiko kamogo nga gwe gw’ekiweebwayo ekyokebwa; n’omwana gw’endiga omuluusi ogutaliiko kamogo nga gwe gw’ekiweebwayo olw’ekibi; n’endiga ennume etaliiko kamogo nga ye y’ekiweebwayo olw’emirembe;

¹⁵ n’ekibbo ky’emigaati egitali mizimbulukuse; ne kkeeke ezikoleddwa mu buwunga obulungi obutabuddwamu n’amatuta ag’omuzeeyituuni agafumba; n’obusukuuti obw’oluwewere obutali buzimbulukuse obusiigiddwako amatuta ag’omuzeeyituuni, n’ebiweebwayo eby’emmere y’empeke n’ebiweebwayo eby’eb yokunyuwa.

¹⁶ “Kabona anaabireetanga awali MUKAMA Katonda, n’awaayo ekiweebwayo kye olw’ekibi n’ekiweebwayo kye ekyokebwa.

¹⁷ Anaawangayo endiga ennume nga ssaddaaka ey’ekiweebwayo olw’emirembe eri MUKAMA Katonda awamu n’ekibbo ky’emigaati egitali mizimbulukuse; era kabona anaawangayo ekiweebwayo eky’emmere y’empeke n’ekiweebwayo eky’eb yokunyuwa.

¹⁸ “Omunnazaalayiti anaamweranga omutwe gwe ogw’obuwonge bwe ku mulyango gwa Weema ya MUKAMA ey’Okukuŋjaanirangamu; anaddiranga enviiri ezivudde ku mutwe ogw’obuwonge bwe n’azissa ku muliro oguli wansi wa ssaddaaka ey’ekiweebwayo olw’emirembe.

¹⁹“Omunnazaalayiti bw’anaamalanga okumwa omutwe gwe ogw’obuwonge bwe, kabona anaddiranga omukono gw’endiga omufumbe, n’aggya ne kkeeke etali nzimbulukuse emu mu kibbo, n’akasukuuti ak’oluwegere akatali kazimbulukuse kamu, n’abimukwasa mu ngalo ze.

²⁰Kabona anaabiwuubanga nga kye kiweebwayo ekiwuubibwa mu maaso ga MUKAMA Katonda. Binaabanga bitukuvu era nga bya kabona awamu n’ekifuba ekiwuubibwa n’ekisambi ekinaaweebwangayo. Ebyo bwe binaggwanga, Omunnazaalayiti anaayinzanga okunywa envinnyo.

²¹“Eryo lye tteeka ery’Omunnazaalayiti aneeyamanga okwewaayo eri MUKAMA Katonda ng’obweyamo bwe obw’okweyawula bwe bunaabanga, ng’agasseeko n’ebirala nga bw’anaasabolanga. Anaateekwanga okutuukiriza obweyamo bwe bwanaabanga akoze, ng’etteeka ly’Omunnazaalayiti bwe liragira.”

Omukisa gwa Kabona

²² MUKAMA Katonda n’agamba Musa nti,

²³“Tegeeza Aloonni ne batabani be nti, Bwe muti bwe munaasabiranga abaana ba Isirayiri omukisa: munaabagambanga nti:

²⁴ “MUKAMA Katonda akuwe omukisa, akukuume;

²⁵ MUKAMA Katonda akwakize amaaso ge akukwatirwe ekisa;

²⁶ MUKAMA Katonda akwolekeze amaaso ge akuwe emirembe.’

²⁷“Bwe batyo banaateekanga erinnya lyange ku baana ba Isirayiri, nange naabawanga omukisa.”

Okubala 7

Okutukuza Ekyoto

¹Awo olwatuuka ku lunaku olwo, Musa bwe yamala okusimba Weema ya MUKAMA, n’agifukako amafuta ag’omuzeeyituuni n’agitukuza ne byonna ebikozesebwa mu yo, era n’afuka amafuta ag’omuzeeyituuni ku kyoto n’akitukuza n’ebintu byakyo byonna.

²Abakulembeze ba Isirayiri, abakulu b’empya za bakitaabwe era nga be bakulembeze b’ebika abaalina obuvunaanyizibwa eri abaabalibwa, ne baleeta ebiweebwayo byabwe.

³Baaleta ebirabo byabwe eby’ebiweebwayo eri MUKAMA Katonda, amagaali agabikkiddwako mukaaga n’ente kkumi na bbiri, nga buli mukulembeze aleeta ente emu, na buli bakulembeze babiri nga baleeta eggaali emu. Ebyo byonna ne babiweerayo mu maaso ga Weema ya MUKAMA.

⁴ MUKAMA Katonda n’agamba Musa nti,

⁵“Bye baleese bibaggyeeko, binaakozesebwanga ku mirimu gy’omu Weema ya MUKAMA ey’Okukuñjaanirangamu. Bikwase Abaleevi, nga buli mulimu gwa buli omu bwe gwetaagisa.”

⁶Bw’atyo Musa n’addiraa amagaali n’ente n’abiwa Abaleevi.

⁷Amagaali abiri n’ente nnya yaziwa batabani ba Gerusoni, ng’emirimu gyabwe bwe gyali,

⁸n’addiraa amagaali ana n’ente munaana n’abiwa batabani ba Merali, ng’emirimu gyabwe bwe gyali; bona nga bakulemberwa Isamaali mutabani wa Aloonii, kabona.

⁹Naye abaana ba Kokasi, Musa teyabawaako, kubanga ebintu ebitukuvu bye baalinako obuvunaanyizibwa baabitwaliranga ku bibegabega byabwe.

¹⁰Bwe batyo abakulembeze ne bawaayo ebiweebwayo mu maaso g’ekyoto olw’okukitukuza, ku lunaku lwe kyafukibwako amafuta ag’omuzeeyituuni.

¹¹MUKAMA n’agamba Musa nti, “Buli lunaku omukulembeze omu anaaleetanga ekiweebwayo kye olw’okutukuza ekyoto.”

Ebiweebwayo bya Nakusoni ne Nesaneri

¹²Eyaleeta ekiweebwayo kye ku lunaku olusooka yali Nakusoni mutabani wa Amminadaabu ow’omu kika kya Yuda.

¹³Ekiweebwayo kye yali sowaani emu eya ffeeza, ng’obuzito epima kilo emu n’ekitundu, n’ekibya ekya ffeeza eky’okumansira ng’obuzito bwakyo bwali obutundu bwa kilo, munaana, byombi, essowaani n’ekibya, nga bipimibwa ng’ebipimo by’awatukuvu bwe biri; byombi nga bijjuziddwa obuwunga obulungi obutabuddwamu amafuta ag’omuzeeyituuni obw’ekiweebwayo eky’emmere y’empeke;

¹⁴n’ekijiiko ekinene ekya zaabu kimu ng’obuzito kipima gulaamu kikumi mu kkumi, nga kijjudde ebyakaloosa;

¹⁵ente ya sseddume emu envubuka, endiga ennume emu, n’omwana gw’endiga omulume gumu oguwezezza omwaka gumu ogw’obukulu, olw’ekiweebwayo ekyokebwa;

¹⁶embuzi ennume emu nga ya kiweebwayo olw’ekibi;

¹⁷era olwa ssaddaaka ey’ebiweebwayo olw’emirembe: ente bbiri, endiga ennume ttaano, embuzi ennume ttaano, n’abaana b’endiga abalume bataano abawezezza omwaka gumu gumu ogw’obukulu. Ekyo kye kyali ekiweebwayo eri MUKAMA ekya Nakusoni mutabani wa Amminadaabu.

¹⁸Ku lunaku olwokubiri Nesaneri mutabani wa Zuwaali, omukulembeze wa Isakaali, n’aleeta ekiweebwayo kye.

¹⁹Ekirabo kye yaleeta yali sowaani eya ffeeza ng'epima obuzito bwa kilo emu n'ekitundu, n'ekibya ekya ffeeza omubeera eby'okumansira ng'obuzito bwakyo bwali obutundu bwa kilo, munaana, nga buli kimu kipimibwa ng'ebipimo by'awatukuvu bwe biri; byombi nga bijjuziddwa obuwunga obulungi obutabuddwamu amafuta ag'omuzeeyituuni obw'ekiweebwayo eky'emmere y'empeke;

²⁰n'ekijiiko ekinene ekya zaabu kimu ng'obuzito kipima gulaamu kikumi mu kkumi, nga kijjudde ebyakaloosa;

²¹ente ya sseddume emu envubuka, endiga ennume emu, n'omwana gw'endiga omulume gumu oguwezezza omwaka gumu ogw'obukulu, olw'ekiweebwayo ekyokebwa;

²²embuzi ennume emu nga ya kiweebwayo olw'ekibi;

²³era olwa ssaddaaka ey'ebiweebwayo olw'emirembe: ente bbiri, endiga ennume ttaano, embuzi ennume ttaano, n'abaana b'endiga abalume bataano abawezezza omwaka gumu gumu ogw'obukulu. Ekyo kye kyali ekiweebwayo eri MUKAMA ekya Nesaneri mutabani wa Zuwaali.

Ebiweebwayo bya Eriyaabu ne Erizuuli

²⁴Ku lunaku olwokusatu Eriyaabu mutabani wa Keroni, omukulembeze w'abantu ba Zebbulooni, yaleeta ekiweebwayo kye.

²⁵Ekiweebwayo kye yali sowaani emu eya ffeeza ng'obuzito epima kilo emu n'ekitundu, n'ekibya ekya ffeeza omubeera eby'okumansira ng'obuzito bwakyo bwali obutundu bwa kilo, munaana, nga buli kimu kipimibwa ng'ebipimo by'awatukuvu bwe biri; byombi nga bijjuziddwa obuwunga obulungi obutabulemu amafuta ag'omuzeeyituuni obw'ekiweebwayo eky'emmere y'empeke;

²⁶n'ekijiiko ekinene ekya zaabu kimu ng'obuzito kipima gulaamu kikumi mu kkumi, nga kijjudde ebyakaloosa;

²⁷ente eya sseddume emu nga nvubuka, endiga ennume emu, n'omwana gw'endiga omulume gumu nga guwezezza omwaka gumu ogw'obukulu, olw'ekiweebwayo ekyokebwa;

²⁸embuzi ennume emu nga ya kiweebwayo olw'ekibi;

²⁹era olwa ssaddaaka ey'ebiweebwayo olw'emirembe: ente bbiri, endiga ennume ttaano, embuzi ennume ttaano, n'abaana b'endiga abalume bataano abawezezza omwaka gumu gumu ogw'obukulu. Ekyo kye kyali ekiweebwayo eri MUKAMA ekya Eriyaabu mutabani wa Keroni.

³⁰Ku lunaku olwokuna Erizuuli mutabani wa Sedewuli, omukulembeze w'abantu ba Lewubeeni, n'aleeta ekiweebwayo kye.

³¹Ekiweebwayo kye yali sowaani emu eya ffeeza ng'obuzito epima kilo emu n'ekitundu, n'ekibya ekya ffeeza omubeera eby'okumansira ng'obuzito bwakyo obutundu bwa kilo, munaana, nga buli kimu kipimibwa ng'ebipimo by'awatukuvu bwe biri, byombi nga bijjuziddwa obuwunga obulungi obutabulemu amafuta obw'ekiweebwayo eky'emmere y'empeke;

³²n'ekijiiko ekinene ekya zaabu kimu, ng'obuzito kipima gulaamu kikumi mu kkumi, nga kijjudde ebyakaloosa;

³³ente eya sseddume emu envubuka, endiga ennume emu, n'omwana gw'endiga omulume gumu nga guweezza omwaka gumu ogw'obukulu, olw'ekiweebwayo ekyokebwa;

³⁴embuzi ennume emu nga ya kiweebwayo olw'ekibi;

³⁵era olwa ssaddaaka ey'ebiweebwayo olw'emirembe: ente bbiri, endiga ennume ttaano, embuzi ennume ttaano, n'abaana b'endiga abalume bataano abawezenza omwaka gumu gumu ogw'obukulu. Ekyo kye kyali ekiweebwayo eri MUKAMA ekya Erizuuli mutabani wa Sedewuli.

Ebiweebwayo bya Serumiyeeri ne Eriyasaafu

³⁶Ku lunaku olwokutaano Serumiyeeri mutabani wa Zulisadaayi, omukulembeze w'abantu ba Simyoni, yaleeta ekiweebwayo kye.

³⁷Ekiweebwayo kye yali sowaani emu eya ffeeza ng'obuzito epima kilo emu n'ekitundu, n'ekibya ekya ffeeza omubeera eby'okumansira ng'obuzito bwakyo bwali obutundu bwa kilo, munaana, nga buli kimu kipimibwa ng'ebipimo by'awatukuvu bwe biri, byombi nga bijjuziddwa obuwunga obulungi obutabulemu amafuta ag'omuzeeyituuni obw'ekiweebwayo eky'emmere y'empeke;

³⁸n'ekijiiko ekinene ekya zaabu kimu, ng'obuzito kipima gulaamu kikumi mu kkumi, nga kijjudde ebyakaloosa;

³⁹ente eya sseddume emu envubuka, endiga ennume emu, n'omwana gw'endiga omulume gumu nga guweezza omwaka gumu ogw'obukulu, olw'ekiweebwayo ekyokebwa;

⁴⁰embuzi ennume emu nga ya kiweebwayo olw'ekibi;

⁴¹era olwa ssaddaaka ey'ebiweebwayo olw'emirembe: ente bbiri, endiga ennume ttaano, embuzi ennume ttaano, n'abaana b'endiga abalume bataano abawezenza omwaka gumu gumu ogw'obukulu. Ekyo kye kyali ekiweebwayo eri MUKAMA ekya Serumiyeeri mutabani wa Zulisadaayi.

⁴²Ku lunaku olw'omukaaga Eriyasaafu mutabani wa Deweri, omukulembeze w'abantu ba Gaadi, n'aleeta ekiweebwayo kye.

⁴³Ekiweebwayo kye yali sowaani emu eya ffeeza ng'obuzito epima kilo emu n'ekitundu, n'ekibya ekya ffeeza omubeera eby'okumansira ng'obuzito bwakyo bwali obutundu bwa kilo, munaana, nga buli kimu kipimibwa ng'ebipimo by'awatukuvu bwe biri, byombi nga bijjuziddwa obuwunga obulungi obutabulemu amafuta ag'omuzeeyituuni obw'ekiweebwayo eky'emmere y'empeke;

⁴⁴n'ekijiiko ekinene ekya zaabu kimu ng'obuzito kipima gulaamu kikumi mu kkumi, nga kijjudde ebyakaloosa;

⁴⁵ente eya sseddume emu envubuka, endiga ennume emu, n'omwana gw'endiga omulume gumu nga guweezza omwaka gumu ogw'obukulu, olw'ekiweebwayo ekyokebwa;

⁴⁶embuzi ennume emu nga ya kiweebwayo olw'ekibi;

⁴⁷era olwa ssaddaaka ey'ebiweebwayo olw'emirembe: ente bbiri, endiga ennume ttaano, embuzi ennume ttaano, n'abaana b'endiga abalume bataano abawezenza omwaka gumu gumu ogw'obukulu. Ekyo kye kyali ekiweebwayo eri MUKAMA ekya Eriyasaafu mutabani wa Deweri.

Ebiweebwayo bya Erisaama ne Gamalyeri

⁴⁸Ku lunaku olw'omusantu Erisaama mutabani wa Ammikudi, omukulembeze w'abantu ba Efulayimu, n'aleeta ekiweebwayo kye.

⁴⁹Ekiweebwayo kye yali sowaani emu eya ffeeza ng'obuzito epima kilo emu n'ekitundu, n'ekibya kya ffeeza omubeera eby'okumansira ng'obuzito bwakyo bwali obutundu bwa kilo, munaana, nga buli kimu kipimibwa ng'ebipimo by'awatukuvu bwe biri, byombi nga bijjuziddwa obuwunga obulungi obutabulemu amafuta ag'omuzeeyituuni obw'ekiweebwayo eky'emmere y'empeke;

⁵⁰n'ekijiiko ekinene ekya zaabu kimu, ng'obuzito kipima gulaamu kikumi mu kkumi, nga kijjudde ebyakaloosa;

⁵¹ente eya sseddume emu envubuka, endiga ennume emu, n'omwana gw'endiga omulume gumu nga guweezza omwaka gumu ogw'obukulu, olw'ekiweebwayo ekyokebwa;

⁵²embuzi ennume emu nga ya kiweebwayo olw'ekibi;

⁵³era olwa ssaddaaka ey'ebiweebwayo olw'emirembe: ente bbiri, endiga ennume ttaano, embuzi ennume ttaano, n'abaana b'endiga abalume bataano abawezenza omwaka gumu gumu ogw'obukulu. Ekyo kye kyali ekiweebwayo eri MUKAMA ekya Erisaama mutabani wa Ammikudi.

⁵⁴Ku lunaku olw'omunaana Gamalyeri mutabani wa Pedazuuli, omukulembeze w'abantu ba Manase, n'aleeta ekiweebwayo kye.

⁵⁵Ekiweebwayo kye yali esowaani emu eya ffeeza ng'obuzito epima kilo emu n'ekitundu, n'ekibya ekya ffeeza omubeera eby'okumansira ng'obuzito bwakyo bwali obutundu bwa kilo, munaana, nga buli kimu kipimibwa ng'ebipimo by'awatukuvu bwe biri, byombi nga bijjuziddwa obuwunga obulungi obutabulemu amafuta ag'omuzeeyituuni obw'ekiweebwayo eky'emmere y'empeke;

⁵⁶n'ekijiiko ekinene ekya zaabu kimu, ng'obuzito kipima gulaamu kikumi mu kkumi, nga kijjudde ebyakaloosa;

⁵⁷ente eya sseddume emu envubuka, endiga ennume emu, n'omwana gw'endiga omulume gumu nga guweezza omwaka gumu ogw'obukulu, olw'ekiweebwayo ekyokebwa;

⁵⁸embuzi ennume emu nga ya kiweebwayo olw'ekibi;

⁵⁹era olwa ssaddaaka ey'ebiweebwayo olw'emirembe: ente bbiri, endiga ennume ttaano, n'abaana b'endiga abalume bataano abawezenza omwaka gumu gumu ogw'obukulu. Ekyo kye kyali ekiweebwayo eri MUKAMA ekya Gamalyeri mutabani wa Pedazuuli.

Ebiweebwayo bya Abidaani ne Akiyezeeri

⁶⁰Ku lunaku olw'omwenda Abidani mutabani wa Gidyoni, omukulembeze w'abantu ba Benyamini, n'aleeta ekiweebwayo kye.

⁶¹Ekiweebwayo kye yali sowaani emu eya ffeeza ng'obuzito epima kilo emu n'ekitundu, n'ekibya ekya ffeeza omubeera eby'okumansira ng'obuzito bwakyo bwali obutundu bwa kilo, munaana, nga buli kimu kipimibwa ng'ebipimo by'awatukuvu bwe biri; byombi nga bijjuziddwa obuwunga obulungi obutabulemu amafuta ag'omuzeeyituuni obw'ekiweebwayo eky'emmere y'empeke;

⁶²n'ekijiiko ekinene ekya zaabu kimu ng'obuzito kipima gulaamu kikumi mu kkumi, nga kijjudde ebyakaloosa;

⁶³ente eya sseddume emu nga nvubuka, endiga ennume emu, n'omwana gw'endiga omulume gumu nga guweezza omwaka gumu ogw'obukulu, olw'ekiweebwayo ekyokebwa;

⁶⁴embuzi ennume emu nga ya kiweebwayo olw'ekibi;

⁶⁵era olwa ssaddaaka ey'ebiweebwayo olw'emirembe: ente bbiri, endiga ennume ttaano, embuzi ennume ttaano, n'abaana b'endiga abalume bataano abawezenza omwaka gumu gumu ogw'obukulu. Ekyo kye kyali ekiweebwayo eri MUKAMA ekya Abidaani mutabani wa Gidyoni.

⁶⁶Ku lunaku olw'ekkumi Akiyezeeri mutabani wa Amisadaayi, omukulembeze w'abantu ba Ddaani, n'aleeta ekiweebwayo kye.

⁶⁷Ekiweebwayo kye yali essowaani emu eya ffeeza ng'obuzito epima kilo emu n'ekitundu, n'ekibya ekya ffeeza omubeera eby'okumansira ng'obuzito bwakyo bwali obutundu bwa kilo, munaana, nga buli kimu kipimibwa ng'ebipimo by'awatukuvu bwe biri; byombi nga bijjuziddwa obuwunga obulungi obutabulemu amafuta ag'omuzeeyituuni obw'ekiweebwayo eky'emmere y'empeke;

⁶⁸n'ekijiiko ekinene ekya zaabu kimu ng'obuzito kipima gulaamu kikumi mu kkumi, nga kijjudde ebyakaloosa;

⁶⁹ente eya sseddume emu nga nvubuka, endiga ennume emu, n'omwana gw'endiga omulume gumu nga guwezezza omwaka gumu ogw'obukulu, olw'ekiweebwayo ekyokebwa;

⁷⁰embuzi ennume emu nga ya kiweebwayo olw'ekibi;

⁷¹era olwa ssaddaaka ey'ebiweebwayo olw'emirembe: ente bbiri, endiga ennume ttaano, embuzi ennume ttaano, n'abaana b'endiga abalume bataano abawezenza omwaka gumu gumu ogw'obukulu. Ekyo kye kyali ekiweebwayo eri MUKAMA ekya Akiyezeeri mutabani wa Amisadaayi.

Ebiweebwayo bya Pagiyeri ne Akira

⁷²Ku lunaku olw'ekkumi n'olumu Pagiyeri mutabani wa Okulaani, omukulembeze w'abantu ba Aseri, n'aleeta ekiweebwayo kye.

⁷³Ekiweebwayo kye yali essowaani emu eya ffeeza ng'obuzito epima kilo emu n'ekitundu, n'ekibya ekya ffeeza omubeera eby'okumansira ng'obuzito bwakyo bwali obutundu bwa kilo, munaana, nga buli kimu kipimibwa ng'ebipimo by'awatukuvu bwe biri; byombi nga bijjuziddwa obuwunga obulungi obutabulemu amafuta ag'omuzeeyituuni obw'ekiweebwayo eky'emmere y'empeke;

⁷⁴n'ekijiiko ekinene ekya zaabu kimu ng'obuzito kipima gulaamu kikumi mu kkumi, nga kijjudde ebyakaloosa;

⁷⁵ente eya sseddume emu nga nvubuka, endiga ennume emu, n'omwana gw'endiga omulume gumu nga guwezezza omwaka gumu ogw'obukulu, olw'ekiweebwayo ekyokebwa;

⁷⁶embuzi ennume emu nga ya kiweebwayo olw'ekibi;

⁷⁷era olwa ssaddaaka ey'ebiweebwayo olw'emirembe: ente bbiri, endiga ennume ttaano, embuzi ennume ttaano, n'abaana b'endiga abalume bataano abawezenza omwaka gumu gumu ogw'obukulu. Ekyo kye kyali ekiweebwayo eri MUKAMA ekya Pagiyeri mutabani wa Ekulaani.

⁷⁸Ku lunaku olw'ekkumi n'ebbiri Akira mutabani wa Enani, omukulembeze w'abantu ba Nafutaali, yaleeta ekiweebwayo kye.

⁷⁹Ekiweebwayo kye yali essowaani emu eya ffeeza ng'obuzito epima kilo emu n'ekitundu, n'ekibya ekya ffeeza omubeera eby'okumansira ng'obuzito bwakyo bwali obutundu bwa kilo, munaana, nga buli kimu kipimibwa ng'ebipimo by'awatukuvu bwe biri; byombi nga bijjuziddwa obuwunga obulungi obutabulemu amafuta ag'omuzeeyituuni obw'ekiweebwayo eky'emmere y'empeke;

⁸⁰n'ekijiiko ekinene ekya zaabu kimu ng'obuzito kipima gulaamu kikumi mu kkumi nga kijjudde ebyakaloosa;

⁸¹ente eya sseddume emu nga nvubuka, endiga ennume emu, n'omwana gw'endiga omulume gumu nga guwezezza omwaka gumu ogw'obukulu, olw'ekiweebwayo ekyokebwa;

⁸²embuzi ennume emu nga ya kiweebwayo olw'ekibi;

⁸³era olwa ssaddaaka ey'ebiweebwayo olw'emirembe: ente bbiri, endiga ennume ttaano, embuzi ennume ttaano, n'abaana b'endiga abalume bataano abawezezza omwaka gumu gumu ogw'obukulu. Ekyo kye kyali ekiweebwayo eri MUKAMA ekya Akira mutabani wa Enani.

⁸⁴Bino bye biweebwayo abakulembeze ba Isirayiri bye baaleeta olw'okutukuza ekyoto ku lunaku lwe kyafukibwako amafuta ag'omuzeeyituuni: essowaani eza ffeeza kkumi na bbiri, ebibya omubeera eby'okumansira kkumi na bibiri, n'ebijiiko ebinene ebya zaabu kkumi na bibiri.

⁸⁵Buli sowaani eya ffeeza ng'epima obuzito bwa kilo emu n'ekitundu, na buli kibya omubeera eby'okumansira nga kipima obuzito bwa butundu bwa kilo, munaana. Okugatta awamu obuzito bw'essowaani ezo zonna n'obw'ebibya ebyo byonna bwali bupima kilo amakumi abiri mu munaana ng'ebipimo by'awatukuvu bwe byali.

⁸⁶Ebijiiko ebya zaabu ebinene ekkumi n'ebibiri ebyali bijjudde ebyakaloosa buli kimu, byali bipima obuzito kilo kikumi mu kkumi na musanvu, ng'ebipimo by'awatukuvu bwe biri. Okugatta awamu ebijiiko byonna byapima obuzito bwa kilo emu ne desimoolo nnya.

⁸⁷Omuwendo gwonna ogw'ebisolo ebyaweebwayo olw'ekiweebwayo ekyokebwa gwali bwe guti: ente ento ennume kkumi na bbiri, endiga ennume kkumi na bbiri, abaana b'endiga abato abalume ab'omwaka ogw'obukulu gumu baali kkumi na babiri, awamu n'ekiweebwayo eky'emmere y'empeke n'ebigenderako. Embuzi ennume kkumi na bbiri ze zaakozesebwa olw'ekiweebwayo olw'ekibi.

⁸⁸Omuwendo gwonna ogw'ebisolo ebyaweebwayo olwa ssaddaaka y'ekiweebwayo olw'emirembe gwali bwe guti: ente ennume amakumi abiri mu nnya, endiga ennume nkaaga, embuzi ennume nkaaga n'abaana b'endiga abato abalume ab'omwaka ogw'obukulu ogumu ogumu nabo nkaaga. Ebyo bye byali

ebiweebwayo olw'okutukuza ekyoto nga kimaze okufukibwako amafuta ag'omuzeeyituuni.

⁸⁹ Awo Musa bwe yayingira mu Weema ya MUKAMA ey'Okukuŋjaanirangamu okwogera ne MUKAMA, n'awulira eddoboozi nga lyogera gy'ali nga liva wakati wa bakerubbi ababiri abali waggulu w'entebe ey'okusaasira eri ku Ssanduuko ey'Endagaano. Ne lyogera naye.

Okubala 8

Ekikondo ky'Ettaala

¹Awo MUKAMA Katonda n'agamba Musa nti,

²“Yogera ne Alooni omugambe nti, ‘Bw'oba oteekateeka ettaala omusanvu, zisaana zaake nga zimulisa ebbanga eryo eriri mu maaso g'ekikondo ky'ettaala.’”

³Alooni n'akola bw'atyo; n'akoleeza ettaala ne zaaka nga zimulisa ebbanga eryali mu maaso g'ekikondo ky'ettaala, nga MUKAMA Katonda bwe yalagira Musa.

⁴Ekikondo ky'ettaala kyakolebwa mu ngeri eno: kyaweesebwa mu zaabu okuva ku ntobo yaakyo okutuuka ku bimuli byakyo. Ekikondo ky'ettaala kyakolebwa ng'ekifaananyi ekyokulabirako MUKAMA Katonda kye yalaga Musa bwe kyali.

Obulongoofu bw'Abaleevi

⁵ MUKAMA Katonda n'agamba Musa nti,

⁶“Ggyamu Abaleevi mu baana ba Isirayiri, obafuule balongoofu.

⁷Okubafuula abalongoofu ojja kukola bw'oti: bamansireko amazzi ag'obulongoofu, obalagire bamwe omubiri gwabwe gwonna, era booze n'engoye zaabwe, bwe batyo bafuuke abalongoofu.

⁸Balagire baweeyo ente ya sseddume ento n'ekiweebwayo ekigenderako eky'obuwunga obulungi obutabuddwamu amafuta ag'omuzeeyituuni; n'olvannyuma naawe oddire ente ya sseddume ento ogiweeyo olw'ekiweebwayo olw'ekibi.

⁹Abaleevi obaleete mu maaso ga Weema ya MUKAMA ey'Okukuŋjaanirangamu, era okuŋjaanyize awo ekibiina ky'abaana ba Isirayiri bona.

¹⁰Onoooleeta Abaleevi mu maaso ga MUKAMA, era abaana ba Isirayiri bajja kussa emikono gyabwe ku Baleevi abo.

¹¹Alooni ajja kuwaayo Abaleevi eri MUKAMA Katonda ng'ekiweebwayo ekiwuubibwa ekivudde mu baana ba Isirayiri, bwe batyo babe nga beetegese okukola omulimu gwa MUKAMA.

¹² “Abaleevi banassa emikono gyabwe ku mitwe gy’ente zisseddume zombi; emu onoogiwaayo ng’ekiweebwayo olw’ekibi, n’endala ng’ekiweebwayo ekyokebwa eri MUKAMA Katonda, okutangiririra Abaleevi.

¹³ Ojja kuyimiriza Abaleevi mu maaso ga Aloonni ne batabani be, olyoke obaweeyo eri MUKAMA Katonda ng’ekiweebwayo ekiwuubibwa.

Abaleevi Bayawulwa ku Bantu

¹⁴ “Bw’otyo bw’onooyawula Abaleevi okuva mu baana ba Isirayiri, era Abaleevi banaabanga bange.

¹⁵ “Ebyo nga biwedde Abaleevi banaayingiranga mu Weema ya MUKAMA ey’Okukuŋjaanirangamu ne baweereza, ng’omaze okubafuula abalongoofu era ng’obawaddeyo ng’ekiweebwayo ekiwuubibwa.

¹⁶ Kubanga bampeereddwa ddala nga bava mu baana ba Isirayiri. Mbeetwalidde nga be bange ddala mu kifo ky’ababereberye, eky’abaana aboobulenzi ababereberye abazaalibwa buli mukazi Omuyisirayiri.

¹⁷ Buli ekizaalibwa kyonna mu Isirayiri ekisaja nga kibereberye, oba muntu oba nsolo, kyange. Bwe nazikiriza ebibereberye byonna eby’omu nsi y’e Misiri, ebya Isirayiri nabeyeyawulirako ne biba byange.

¹⁸ Kaakano ntutte Abaleevi mu kifo ky’ababereberye mu baana ba Isirayiri.

¹⁹ Nzige Abaleevi mu baana ba Isirayiri ne mbagabira Aloonni ne batabani be ng’ekirabo, bakolererenga abaana ba Isirayiri nga baweereza mu Weema ya MUKAMA ey’Okukuŋjaanirangamu nga batangiririra abaana ba Isirayiri balemenga kulumbibwa kawumpuli nga babadde basemberedde awatukuvu.”

²⁰ Bwe batyo Musa ne Aloonni n’ekibiina kyonna eky’abaana ba Isirayiri ne bakola ku Baleevi ebyo byonna nga MUKAMA bwe yalagira Musa.

²¹ Abaleevi ne bayoza engoye zaabwe, ne Aloonni n’abawaayo ng’ekiweebwayo ekiwuubibwa eri MUKAMA Katonda, n’abatangiririra okubafuula abalongoofu.

²² Ebyo bwe byaggwa Abaleevi ne bajja okukola omulimu gwabwe nga baweereza mu Weema ya MUKAMA ey’Okukuŋjaanirangamu, nga balabirirwa Aloonni ne batabani be. Baakola byonna ku Baleevi nga MUKAMA Katonda bwe yalagira Musa.

²³ Awo MUKAMA Katonda n’agamba Musa nti,

²⁴ “Bino bye bikwata ku Baleevi: Abasajja ab’emyaka amakumi abiri mu etaano egy’obukulu n’okusingawo, banajjanga ne batandika emirimu gyabwe mu Weema ya MUKAMA ey’Okukuŋjaanirangamu;

²⁵naye bwe banaawezanga emyaka egy'obukulu amakumi ataano banaawummuliranga ddala ne bava ku mirimu emitongole egya bulijjo ne bateeyongera kuweereza.

²⁶Naye banaayinzanga okudduukirirako ku booluganda abanaabanga bakola emirimu egyo mu Weema ya MUKAMA ey'Okukuñjaanirangamu, naye bo ku lwabwe tebaakolenga mirimu egyo mu butongole. Bw'otyo bw'onootegekanga emirimu gy'Abaleevi."

Okubala 9

Ekiragiro ku Mbaga ey'Okuyitako

¹Awo MUKAMA n'ayogera ne Musa mu Ddungu lya Sinaayi mu mwezi ogw'olubereberye ogw'omwaka ogwokubiri kasookedde bava mu nsi y'e Misiri. N'amugamba nti,

²"Lagira abaana ba Isirayiri bakwatenga Embaga ey'Okuyitako mu ntuuko zaayo nga bwe kyalagirwa.

³Mugikwatanga mu ntuuko zaayo ezaalagirwa ku lunaku olw'ekkumi n'enya olw'omwezi guno nga buwungeera, ng'amateeka n'ebiragiro byako bwe bigamba."

⁴Bw'atyo Musa n'agamba abaana ba Isirayiri okukwata Embaga ey'Okuyitako;

⁵era ne bakola bwe batyo mu Ddungu lya Sinaayi ku lunaku olw'ekkumi n'enya olw'omwezi ogw'olubereberye nga buwungeera. Abaana ba Isirayiri baakola ebyo byonna nga MUKAMA bwe yalagira Musa.

⁶Naye waaliwo abantu abamu abataasobola kukwata Mbaga ey'Okuyitako ku lunaku olwo, kubanga tebaali balongoofu olwokubanga baali bakutte ku mufu. Bwe batyo ne bajja eri Musa ne Aloonni ku lunaku olwo lwennyini,

⁷ne bagamba Musa nti, "Tetuli balongoofu kubanga twakutte ku mufu; Iwaki tugaanibwa okuleetera MUKAMA ekiweebwayo kye, awamu n'abaana ba Isirayiri, mu ntuuko zaakyo ezaalagirwa?"

⁸Musa n'abaddamu nti, "Mulinde mmale okumanya MUKAMA Katonda ky'anandagira ku nsonga yammwe."

⁹Awo MUKAMA Katonda n'agamba Musa nti,

¹⁰"Yogera eri abaana ba Isirayiri obagambe nti, 'Omu ku mmwe, oba omu ku bazzukulu bammwe ab'omu mirembe egiriddawo, singa afuuka atali mulongoofu olw'okukwata ku mufu, oba nga taliiwo yagenda olugendo olw'ewala, anaakwatanga Embaga ey'Okuyitako eya MUKAMA Katonda.

¹¹Banaakwatanga embaga eyo ku lunaku olw'ekkumi n'enya mu mwezi ogwokubiri akawungeezi. Omwana gw'endiga banaagulyanga n'omugaati ogutali muzimbulukuse n'enva ez'ebikoola ebikaawa.

¹²Tebagulekangawo okutuusa enkeera, wadde okumenya ku magumba gaagwo. Bwe banaakwatanga Embaga ey'Okuyitako kinaabasaaniranga okukola ng'amateeka g'embaga eyo bwe galagira.

¹³Naye omuntu omulongoofu ate nga teyagenda lugendo, kyokka n'atakwata Mbaga ey'Okuyitako, anaawanjangusibwanga n'ava mu banne, kubanga teyaleeta kiweebwayo kya MUKAMA Katonda mu ntuuko zaakyo. Ekibi ky'omuntu oyo kinaabeeranga ku mutwe gwe.

¹⁴“Omunnaggwanga anaabeeranga mu mmwe bw'anaabanga ayagala okukwata Embaga ey'Okuyitako kwa MUKAMA Katonda anaagikwatanga ng'agoberera amateeka n'ebiragiro byayo. Munaabanga n'ebiragiro byebimu ebinaagobererwanga bannaggwanga era ne bannansi.”

Ekire Waggulu w'Eweema

¹⁵Ku lunaku Weema ya MUKAMA ey'Endagaano lwe yasimbibwa, ekire ne kigibikka. Okuva akawungeezi okutuusa ku makya ekire ekyali waggulu wa Weema ne kifaanana ng'omuliro.

¹⁶Bwe kityo bwe kyabeeranga; ekire kyagibikkanga emisana naye ekiro ne kifaanana ng'omuliro.

¹⁷Era ekire buli lwe kyaggyibwanga ku Weema, olwo abaana ba Isirayiri ne basitula mu lugendo lwabwe; era awo ekire ekyo we kyayimiriranga, nga n'abaana ba Isirayiri we basiisira.

¹⁸MUKAMA bwe yalagiranga abaana ba Isirayiri okusitula mu lugendo lwabwe, nga basitula; MUKAMA bwe yabalagiranga okukuba olusiisira nga bakola bwe batyo. Ebbanga lyonna ekire lye kyamalanga waggulu wa Weema nga nabo lye bamala mu lusiisira lwabwe.

¹⁹Ekire ne bwe kyamalanga ennaku ennyingi waggulu wa Weema, abaana ba Isirayiri baagonderanga ekiragiro kya MUKAMA Katonda ne batasitula kutambula.

²⁰Oluusi ekire kyamalanga ennaku ntono waggulu wa Weema; naye ng'ekiragiro kya MUKAMA Katonda bwe kyali, nga basigala mu lusiisira lwabwe; kyokka oluvannyuma nga basitula okutambula ng'ekiragiro kya MUKAMA Katonda bwe kyabanga.

²¹Oluusi ekire kyabeerangawo okuva akawungeezi okutuusa mu makya; naye ekire bwe kyaggyibwangawo mu makya, ng'olwo basitula okutambula; oba bwe kyasigalangawo olunaku n'ekiro kyonna oluvannyuma ne kiggyibwawo, ng'olwo basitula okutambula.

²²Ekire ne bwe kyabeeranga waggulu wa Weema okumala ennaku ebbiri oba omwezi, abaana ba Isirayiri nga babeera awo mu lusiisira lwabwe nga tebasitula kutambula; naye bwe kyaggyibwangawo ng'olwo basitula okutambula.

²³MUKAMA bwe yabalagiranga okusigala, nga basigala mu lusiisira lwabwe nga bawummudde, ate MUKAMA bwe yabalagiranga okutambula, nga basitula okutambula. Baagonderanga ekiragiro kya MUKAMA nga bwe yalagira Musa.

Okubala 10

Amakondeere Aga Ffeeza

¹ MUKAMA n'agamba Musa nti,

²“Weesa mu ffeeza amakondeere abiri ogakozesenga okuyitanga abantu bona okukunjaana, era n'okubalagira okuggyawo ensiisira zaabwe.

³Amakondeere gombi bwe ganaafuuyibwanga, ekibiina ky'abantu bona banaakuunjaaniranga w'oli ku mulyango gwa Weema ya MUKAMA ey'Okukunjaanirangamu.

⁴Naye bwe banaafuwangako erimu, olwo abakulembeze, be bakulu b'ebika bya Isirayiri, be banaakuunjaaniranga w'oli.

⁵Amakondeere ag'omwanguka bwe ganaafuuyibwanga, ebika ebinaabanga bisiisidde ku luuyi olw'ebuvanjuba binaasitulanga okutambula.

⁶Ate bwe banaafuwanga ag'omwanguka omulundi ogwokubiri, ensiisira ezinaabanga mu bukiikaddyo, zinaasitulanga okutambula. Amakondeere ag'omwanguka ke kanaabanga akabonero akanaabategeezanga nti basitule batambule.

⁷Naye bwe kineetaagisanga okukuba olukuunjaana, onoofuwanga amakondeere naye tegaabenga ga mwanguka.

⁸“Abaana ba Alooni, bakabona, be banaafuwanga amakondeere. Lino linaabanga tteeka ery'enkalakkira mu mmwe ne mu mirembe egigenda okujja.

⁹Bwe munaagendanga okutabaala omulabe abajoogerereza mu nsi yammwe, mufuuwanga amakondeere ag'omwanguka. Bwe mutyo munajukirwanga MUKAMA Katonda, era anaabawonyanga abalabe bammwe.

¹⁰Mu biseera eby'essanyu, ne ku mbaga zammwe entongole ne ku mbaga z'omwezi ogwakaboneka, munaafuwanga amakondeere nga bwe muwaayo ebiweebwayo byammwe ebyokebwa n'ebiweebwayo byammwe olw'emirembe, era binaabanga bijjukizo byammwe awali MUKAMA Katonda wammwe. Nze MUKAMA Katonda wammwe.”

Okuva mu Sinaayi

¹¹ Awo olwatuuka ku lunaku olw'amakumi abiri mu mwezi ogwokubiri mu mwaka ogwokubiri, ekire ne kisitulibwa okuva waggulu wa Weema ya MUKAMA ey'Okukuñjaanirangamu.

¹² Abaana ba Isirayiri ne basitula ne batambula okuva mu Ddungu lya Sinaayi, oluvannyuma ekire ne kiyimirira mu Ddungu lya Palani.

¹³ Ogwo gwe gwali omulundi omubereberye okusitula okutambula nga bagendera ku kiragiro kya MUKAMA Katonda kye yayisa mu Musa.

¹⁴ Olusiisira lw'abaana ba Yuda Iwe Iwasooka okusitula okutambula, nga bakulemberwa ebendera yaabwe; Nakusoni mutabani wa Amminadaabu nga ye muduumizi waabwe.

¹⁵ Nesaneri mutabani wa Zuwaali ye yaduumira ekibinja ky'ekika kya Isakaali,

¹⁶ ne Eriyaabu mutabani wa Keroni n'aduumira ekibinja ky'ekika kya Zebbulooni.

¹⁷ Eweema ya MUKAMA n'esimbulwa, batabani ba Gerusoni ne batabani ba Merali abaagyetikkanga ne basitula ne batambula.

¹⁸ Ebibinja by'omu lusiisira lwa Lewubeeni bye byaddako okusitula okutambula awamu n'ebendera yaabyo, nga biduumirwa Erizuuli mutabani wa Sedewuli.

¹⁹ Serumkiyeeri mutabani wa Zulisadaayi ye yaduumira ekibinja ky'ekika kya Simyoni,

²⁰ ne Eriyasaafu mutabani wa Deweri n'aduumira ekibinja ky'ekika kya Gaadi.

²¹ Abakokasi ne basitula okutambula nga beetisse ebintu ebitukuvu. Eweema ya MUKAMA ng'emala kusimbibwa, nabo ne balyoka batuuka.

²² Ebibinja by'omu lusiisira lwa Efulayimu bye byaddirira okusitula okutambula awamu n'ebendera yaabyo; Erisaama mutabani wa Ammikudi nga ye muduumizi waabyo.

²³ Gamalyeri mutabani wa Pidazuuli ye yaduumira ekibinja ky'ekika kya Manase;

²⁴ ne Abidaani mutabani wa Gidyoni n'aduumira ekibinja ky'ekika kya Benyamini.

²⁵ Ku nkomerero ya byonna, ebibinja by'omu lusiisira lwa Ddaani, nga bye bikuma emabega, ne bisitula okutambula n'ebendera yaabyo nga bikoobedde ensiisira zonna; Akiyezeeri mutabani wa Amisadaayi nga ye muduumizi waabyo.

²⁶ Pagiyeeri mutabani wa Okulaani ye yaduumira ekibinja ky'ekika kya Aseri;

²⁷ ne Akira mutabani wa Enani n'aduumira ekibinja ky'ekika kya Nafutaali.

²⁸Eyo ye yali entegeka ey'abaana ba Isirayiri ng'ebibinja byabwe bwe byali nga basitula okutambula.

²⁹Awo Musa n'agamba mukoddomi we Kobabu mutabani wa Leweri Omumidiyaani nti, "Tusitula okutambula okugenda mu kifo MUKAMA kye yatugamba nti, 'Ndikibawa.' Kale nno, jjangu tugende ffenna tulikuyisa bulungi, kubanga MUKAMA yasuubiza Isirayiri ebintu ebirungi."

³⁰Naye n'addamu nti, "Nedda, sijja kugenda nammwe, nzirayo mu nsi ye waffe era mu bantu bange."

³¹Naye Musa n'amugamba nti, "Nkwegayiridde totuleka. Ggwe omanyi obulungi eddungu gye tusaanye okukuba olusiisira lwaffe, ggwe ojja okubeera amaaso gaffe.

³²Singa ojja ne tugenda ffenna, tunaagabaniranga wamu buli kirungi kyonna MUKAMA ky'anaatuwanga."

Essanduuko ey'Endagaano, n'Ekire Ekikulemberamu

³³Awo ne basitula okuva ku lusozi lwa MUKAMA Katonda ne batambulira ennaku ssatu. Essanduuko ya MUKAMA ey'Endagaano n'ebakulemberanga okumala ennaku ezo essatu ng'ebanoonyeza ekifo eky'okuwummuliramu.

³⁴Buli lwe baasitulanga okutambula nga bava mu lusiisira, ekire kya MUKAMA Katonda kyabeeranga waggulu waabwe buli budde bwa misana.

³⁵Buli abeetissi b'Essanduuko ya MUKAMA Katonda lwe baasitulanga okutambula, Musa n'agamba nti, "Golokoka, Ayi MUKAMA! Abalabe bo basaasaane; amaggye agakulwanyisa gakudduke."

³⁶Buli Ssanduuko ya MUKAMA Katonda lwe yawummuzibwanga, Musa n'agamba nti, "Komawo, Ayi MUKAMA, eri enkumi n'enkumi eza Isirayiri."

Okubala 11

Abantu Beemulugunya

¹Awo abantu ne beemulugunya olw'ebizibu byabwe nga ne MUKAMA awulira; bwe yabawulira obusungu bwe ne bubuubiuka. Omuliro ne guva eri MUKAMA ne gwakira mu bo, ne gwokya ebitundu ebimu ebyali bikomererayo eby'olusiisira lwabwe.

²Abantu ne bakaabirira Musa; Musa n'asaba MUKAMA, omuliro ne guzikira.

³Ekifo ekyo ne kituumibwa erinnya Tabera, kubanga omuliro ogwava eri MUKAMA gwabaakiramu.

Emmaanu

⁴ Abagwira abaali beetabudde mu baana ba Isirayiri ne baluluunkanira ebyokulya; n'abaana ba Isirayiri nabo ne bongera okukaaba nga bwe bagamba nti, "Singa nno tufuna ku nnyama ne tulyako!

⁵ Tukyajjukira ebyennyanja bye twalyanga mu Misiri nga tewali na kye tubisasulidde, ne wuju n'ensujju, n'enderema n'obutungulu ne katungulukyumu n'eb yokuliira.

⁶ Naye kaakano n'okwoya emmere kutuweddemu, buli we tukuba eriiso tulaba mmaanu eno!"

⁷ Emmaanu yafaanananga ng'ensigo za koliyanda, nga n'ekifaananyi kyayo kiri ng'ekya bideriamu.

⁸ Abantu baagendanga ne bagikuŋjaanya ne bagiseera ku lubengo oba ne bagisekulira mu binu, ne bagifumba mu ntamu oba ne bakolamu bukeeke. Nga mu kamwa ebanga ekoleddwa n'amafuta ga zeyituuni.

⁹ Omusulo bwe gwagwanga mu lusiisira ekiro n'emmaanu nayo n'egwa nagwo.

Musa Asaba Ennyama

¹⁰ Musa n'awulira abantu aba buli luggyga nga bakaaba, buli omu ng'akaabira mu muzigo gw'eweema ye; obusungu bwa MUKAMA Katonda ne bubuubuuka nnyo, ne Musa n'asoberwa n'anyikaala.

¹¹ Musa n'agamba MUKAMA Katonda nti, "Lwaki oleetedde omuddu wo obuzibu buno? Nkoze ki ekitakusanyusizza ne kikuleetera okwetikka omugugu gw'abantu bano bona?

¹² Nze nali olubuto omwali abantu bano bona? Nze nabazaala? Lwaki oñjamba okubasitula mu mikono gyange ng'omulezi w'abaana bw'asitula omwana omuwere mbatwale mu nsi gye wabasuubiza ng'ogirayirira bajajaabwe?

¹³ Ennyama abantu bano bona gye banaalya nnaagiggya wa? Kubanga baneetayirira nga bankaabirira nti, 'Tuwe ennyama tulye!'

¹⁴ Sisobola kusitula bantu bano bona bw'omu kubanga obuzito bwabwe buyinza okummenya nga ndi nzekka.

¹⁵ Obanga bw'otyo bw'oija okumpissa, ate nga bulijo ondaga ekisa kyo, kale nno nzitiraawo kaakano oleme kundeka ne neereetera okwezikiriza."

MUKAMA Ayanukula Musa

¹⁶ MUKAMA n'agamba Musa nti, "Nfunira abasajja nsanvu mu bakulu ba Isirayiri b'omanyi nga be bakulu b'abantu era nga be bakulembeze baabwe obaleete ku Weema ya MUKAMA ey'Okukuŋjaanirangamu, bayimirire awo naawe.

¹⁷Nzija kukka awo njogere naawe; era nzija kutoola ku mwoyo oguli mu ggwe ngubateekemu, balyokenga bakusitulireko omugugu gw'abantu oleme kugwetikkanga wekka.

¹⁸“Abantu bagambe nti, ‘Mwetukuze nga mwetegekera olunaku lw'enkyia, lwe mujja okulya ennyama. Kubanga MUKAMA Katonda yabawulira nga mumukaabirira bwe muti nti, “Singa tufunye ku nnyama ne tulyako! Bwe twali mu Misiri twali bulungi!” Noolwekyo MUKAMA ajja kubawa ennyama mugirye.

¹⁹Temugenda kugirya mu lunaku lumu, oba mu nnaku bbiri, oba mu nnaku ttaano, oba mu nnaku kkumi, oba nnaku abiri;

²⁰naye kumala mwezi mulambirira, okutuusa lw'erifulumira mu nnyindo zammwe n'ebanyiwa, kubanga mwesamudde MUKAMA Katonda abeera mu mmwe, ne mumukaabirira nga mugamba nti, “Mu Misiri twaviirayo ki?””

²¹Musa n'agamba nti, “Abantu bano mwe ndi bawera omuwendo gwa mitwalo nkaaga abatambuza ebigere, naawe ogamba nti, ‘Nzija kubawa ennyama gye banaalya okumala omwezi mulamba!’

²²Ebisolo ebiri mu biraalo ne mu bisibo bwe binattibwa binaabamala? Nantiki ebyennyanja byonna eby'omu nnyanja bwe binaavubibwa ne bibaweebwa, binaabamala?”

²³MUKAMA n'agamba Musa nti, “Omukono gwa MUKAMA Katonda guyimpawadde? Kaakano ojja kulaba obanga ekigambo kyange kye nkugambye kinaatuukirira oba tekiituukirire.”

²⁴Awo Musa n'afuluma n'ategeeza abantu ebigambo bya MUKAMA Katonda; n'akuŋŋanya abasajja nsanvu mu bakulembeze b'abantu n'abayimiriza okumpi ne Weema ya MUKAMA.

²⁵Awo MUKAMA Katonda n'akkira mu kire n'ayogera ne Musa, n'addira ku mwoyo ogwali mu Musa n'agussa mu bakulembeze ensanvu. Omwoyo bwe baagufuna ne batandika okutegeeza obunnabbi, kyokka tebaddayo nate kukikola.

²⁶Waaliwo abasajja babiri nga bayitibwa Eridadi ne Medadi, baali babaliddwa ku bakulembeze ensanvu, naye bo ne basigala mu lusiisira, ne batagenda ku Weema ya MUKAMA; nabo baafuna omwoyo, era ne bategeeza obunnabbi mu lusiisira.

²⁷Omuvubuka n'adduka n'agenda ategeeza Musa nti, “Eridadi ne Medadi bategeeza obunnabbi mu lusiisira.”

²⁸Awo Yoswa mutabani wa Nuuni, omuweereza wa Musa gwe yali yeerondedde ng'akyali muvubuka n'agamba nti, “Mukama wange Musa, baziyize.”

²⁹ Naye Musa n'amugamba nti, "Okwatiddwa obuggyga ku lwange? Kyandibadde kirungi singa abantu ba MUKAMA bona bannabbi, ne MUKAMA Katonda n'abawa omwoyo gwe!"

³⁰ Musa n'abakulembeze ba Isirayiri ne baddayo mu lusiisira.

MUKAMA Aweereza Ennyama ey'Obugubi

³¹ Awo empewo n'eva eri MUKAMA Katonda n'ereeeta obugubi nga buva mu nnyanja ne bugwa okwebungulula olusiisira nga bukoze entuumo nga ya mita emu okuva ku ttaka, nga bujuza ebbanga lya lugendo lwa lunaku lumu ku ludda olumu olw'olusiisira n'olugendo lwa lunaku lumu ku ludda olulala.

³² Ku lunaku olwo ne ku lunaku olwaddirira abantu ne bakuŋjaanya obugubi emisana n'ekiro. Tewali yakuŋjaanya buzito bwakka wansi wa kilo lukumi; ne babwanika buli wantu mu lusiisira.

³³ Naye ennyama yali ekyali mu mannyo gaabwe nga tebannaba kugirya, obusungu bwa MUKAMA Katonda ne bubuubuukira abantu n'abaleetera kawumpuli ow'amaanyi ennyo.

³⁴ Noolwekyo ekifo ekyo kyekyava kituumibwa Kiberosu Katava, kubanga awo we baaziika abantu abaalina omulugube.

³⁵ Abantu bwe baava e Kiberosu Katava ne batambula okutuuka e Kazerosi ne babeera awo.

Okubala 12

Miryamu ne Alooni Bawakanya Musa

¹ Awo Miryamu ne Alooni ne boogera nga bawakanya Musa olw'omukazi Omukuusi gwe yali awasizza, kubanga yali awasizza Mukuusi.

² Ne bagamba nti, "Naye ddala MUKAMA bwe yayogeranga yayitanga mu Musa yekka? Mu ffe namwo teyayogereramu?" MUKAMA Katonda n'abiwlira.

³ Naye nno, Musa yali musajja muwombeefu nnyo, nga muteefu okusinga abantu bona abaali ku nsi.

⁴ Amangwago MUKAMA n'ayogera ne Musa, ne Alooni ne Miryamu n'abagamba nti, "Mujje, mwensatule, mu Weema ya MUKAMA ey'Okukuŋjaanirangamu." Bonsatule ne bagenda.

⁵ MUKAMA Katonda n'akkira mu mpagi ey'ekire, n'ayimirira ku mulyango gwa Weema n'ayita Alooni ne Miryamu. Bombi bwe baasembera

⁶ n'abagamba nti, "Muwulirize ebigambo byange: "Mu mmwe bwe mubaamu nnabbi wa MUKAMA Katonda, nneeraga gy'ali mu kulabikirwa, oba njogera naye mu birooto.

⁷ Naye ekyo si bwe kiri ku muddu wange Musa; mu nju yange yonna, muntu mwesigwa.

⁸ Bwe mba njogera naye tutunulagana maaso na maaso, njogera butereevu so si mu ngero; alaba ekifaananyi kya MUKAMA Katonda. Kale, lwaki temwatidde okuwakanya omuddu wange Musa?”

Miryamu Agengewala

⁹ Obusungu bwa MUKAMA Katonda ne bubabuubuukira, n’abaviira.

¹⁰ Ekire bwe kyasituka okuva ku Weema, era laba, Miryamu n’agengewala, n’atukula ng’omuzira. Alooni n’amukyukira n’alaba ng’agengewadde;

¹¹ n’agamba Musa nti, “Nkwegayirira, mukama wange, oleme kututeekako kibi kino kye tukoze mu busirusiru bwaffe.

¹² Tomuleka omubiri gwe okufaanana ng’ogw’omwana omuwere azaalibwa ng’ali ng’afudde, ng’omubiri gwe guweddemu ensa.”

¹³ Musa n’akaabirira MUKAMA ng’agamba nti, “Ayi Katonda, nkwegayirira omuwonye.”

¹⁴ MUKAMA Katonda n’addamu Musa nti, “Singa kitaawe amuwandidde amalusu mu maaso, teyandibadde muswavu okumala ennaku musanvu? Kale mumusibire ebweru w’olusiisira okumala ennaku musanvu; bwe zinaggwaako ayinza okukomezebwawo.”

¹⁵ Bw’atyo Miryamu n’asibirwa ebweru w’olusiisira okumala ennaku musanvu; abantu ne batasitula kutambula okutuusa Miryamu lwe yakomezebwawo.

¹⁶ Ebyo bwe byaggwa abantu ne basitula okuva e Kazerosi ne batambula okutuusa lwe baasiisira mu ddungu lya Palani.

Okubala 13

Abakesi Kkumi na Babiri Baweerezebwa mu Kanani

¹ Awo MUKAMA Katonda n’agamba Musa nti,

² “Tuma abasajja bagende bakette beetegereze ensi ya Kanani gye ḥejenda okuwa abaana ba Isirayiri. Mu buli kika kya bajajja ojja kulondamu omusajja omu ku bakulembeze baakyo.”

³ Bw’atyo Musa n’abatuma okuva mu ddungu lya Palani, ng’ekiragiro kya MUKAMA Katonda bwe kyali. Bonna baali bakulembeze b’abaana ba Isirayiri.

⁴ Amannya gaabwe ge gano: Eyava mu kika kya Lewubeeni yali Sammuwa mutabani wa Zakula.

⁵ Eyava mu kika kya Simyoni yali Safati mutabani wa Kooli.

- ⁶ Eyava mu kika kya Yuda yali Kalebu mutabani wa Yefune.
- ⁷ Eyava mu kika kya Isakaali yali Igali mutabani wa Yusufu.
- ⁸ Eyava mu kika kya Efulayimu yali Koseya mutabani wa Nuuni.
- ⁹ Eyava mu kika kya Benyamini yali Paluti mutabani wa Lafu.
- ¹⁰ Eyava mu kika kya Zebbulooni yali Gadyeri mutabani wa Sodi.
- ¹¹ Eyava mu kika kya Manase, ky'ekika kya Yusufu, yali Gaadi mutabani wa Susi.
- ¹² Eyava mu kika kya Ddaani yali Ammiyeri mutabani wa Gemali.
- ¹³ Eyava mu kika kya Aseri yali Sesula mutabani wa Mikaeri.
- ¹⁴ Eyava mu kika kya Nafutaali yali Nakabi mutabani wa Vofesi.
- ¹⁵ Eyava mu kika kya Gaadi yali Geweri mutabani wa Maki.
- ¹⁶ Ago ge mannya ag'abasajja Musa be yatuma okugenda okuketta n'okwetegereza ensi eyo. Musa yali atuumye Koseya mutabani wa Nuuni erinnya Yoswa.
- ¹⁷ Musa n'abatuma okuketta n'okwetegereza ensi ya Kanani, n'abagamba nti, "Mwambuke nga muyita mu Negebu muggukire mu nsi ey'ensozi.
- ¹⁸ Mwetegerezenga ensi nga bw'efaanana, n'abantu baamu nga bwe bali, obanga ba maanyi oba banafu, obanga bangi oba batono.
- ¹⁹ Mulyetegereza obanga ensi mwe babeera nnungi oba mbi. Era muliraba ebibuga byabwe obanga tebiriiko bisenge bya bbugwe oba byetooloddwa bigo.
- ²⁰ Mulikebera okulaba obanga ensi yaabwe ngimu oba nkalu, era obanga erimu emit mingi oba temuli. Mwenywezanga ne muleetayo ku bibala eby'omu nsi eyo." Ekyo kye kyali ekiseera ezabbibu nga zaakatandika okwengera.
- ²¹ Awo ne bambuka ne beetegereza ensi okuva mu ddungu lya Zini okutuuka e Lekobu okumpi n'awayingirirwa mu Kamasi.
- ²² Ne bambuka mu Negebu ne batuuka e Kebbulooni, era wano Akimaani ne Sesayi ne Talumaayi abazzukulu ba Anaki nga we babeera. Kebbulooni bwe kyamala okuzimbibwa waayitawo emyaka musanvu ne Zowani eky'omu Misiri nakyo ne kiryoka kizimbibwa.
- ²³ Ne batuuka mu kiwonvu ekiyitibwa Esukoli ne batemamu ettabi limu eryaliko ekirimba kimu ekya zabbibu, abantu babiri ne bakireetera ku musituliro. Era ne baleeta ne ku makomamawanga ne ku ttiini.
- ²⁴ Ekifo ekyo ne kiyitibwa Ekiwonvu kya Esukoli, olw'ekirimba ekyo abaana ba Isirayiri kye baatemamu.

Abakessi Bakomawo

²⁵Awo nga wayiseewo ennaku amakumi ana ne bakomawo nga bamaze okuketta ensi.

²⁶Ne bajja eri Musa ne Aloonie Kadesi mu ddungu lya Palani. Ne babakomezaawo obubaka n'eri ekibiina kyonna, era ne babanjulira ebibala bye baggya mu nsi eyo.

²⁷Ne bategeeza Musa nti, "Twatuuka mu nsi gye watutumamu: ekulukuta amata n'omubisi gw'enjuki, ejjudde ebirungi ebyereere, era bino bye bibala byamu.

²⁸Naye nno abantu ababeera mu nsi omwo ba maanyi, n'ebibuga byabwe binene nnyo era byetooloddwako ebigo. Ate n'ekirala twalabaayo n'abazzukulu ba Anaki.

²⁹Abamaleki babeera mu Negebu mu bukiikaddyo; Abakiiti n'Abayebusi, n'Abamoli babeera mu nsi ey'ensozi; n'Abakanani ne babeera okumpi n'ennyanja ne ku lubalama lw'omugga Yoludaani."

³⁰Awo Kalebu n'asirisa abantu awali Musa n'agamba nti, "Twambukirewo kaakano tutwale ensi eyo, kubanga ndaba nga tusobola okugiwangula."

³¹Kyokka abaagenda ne Kalebu okuketta ne baddamu nti, "Abantu bali tetubasobola, batusinga amaanyi."

³²Bwe batyo ne babunya mu baana ba Isirayiri alipoota etaali nnungi ng'efa ku nsi gye baali bagenze okuketta; nga bagamba nti, "Ensi gye twayitaayitamu nga tugiketta tesobola na kuliisa bantu baayo abagituulamu; ate n'abantu bona be twalabamu baali ba kiwago.

³³Twalabayo n'Abanefisi, abazzukulu ba Anaki abava mu Banefiri. Bwe twetunulako nga tuli ng'obwacaaka, era nabo nga bwe batulaba bwe batyo."

Okubala 14

Abantu Bajeema

¹Ekiro ekkyo abantu bona mu kibiina ne bayimusa amaloboozi gaabwe ne bakaaba n'eddoboozi ery'omwanguka.

²Abaana ba Isirayiri bona ne beemulugunyiza Musa ne Aloonie; abantu bona awamu mu kibiina ne babagamba nti, "Singa twafiira mu nsi y'e Misiri! Oba singa twafiira mu ddungu muno!"

³Lwaki MUKAMA atutwala mu nsi eyo, tutuuke eyo tulyoke tuttibwe n'ekitala? Abakazi baffe n'abaana baffe bagenda kunyagibwa. Okuddayo mu Misiri si kye kinaasingako?"

⁴Ne boogeraganya nti, "Ka twerondere omukulembeze tuddeyo mu Misiri."

⁵ Awo Musa ne Alooni ne bavuunama wansi mu maaso g'ekibiina kyonna eky'abaana ba Isirayiri abaali bakunjaanidde awo.

⁶ Yoswa mutabani wa Nuuni ne Kalebu mutabani wa Yefune, abaali mu abo abaagenda okuketta ensi, ne bayuzaayuza engoye zaabwe,

⁷ ne bagamba ekibiina kyonna eky'abaana ba Isirayiri nti, "Ensi gye twayitaayitamu okugiketta, nsi nnungi nnyo.

⁸ MUKAMA Katonda bw'aliba atusanyukidde, alitukulembera n'atutuusa mu nsi eyo, ensi ekulukuta amata n'omubisi gw'enjuki, era agenda kugituwa.

⁹ Kyokka temujeemera MUKAMA Katonda, era n'abantu b'omu nsi omwo temubatya, kubanga kuliba kumenya mu jjenje kkalu; tebakyalina abakuuma, ate nga MUKAMA Katonda ali wamu naffe. Temubatya."

¹⁰ Naye abantu bona mu kibiina ne bateesa okubakuba mayinja. Awo ekitiibwa kya MUKAMA Katonda ne kirabikira eri abaana ba Isirayiri bona mu Weema ya MUKAMA ey'Okukunjaaanirangamu.

¹¹ MUKAMA n'agamba Musa nti, "Abantu bano balinnyooma kutuusa ddi? Balikomya ddi obutanzikiririzaamu, newaakubadde nga nakola ebyamagero mu buponero bwe nakolera mu bo?

¹² Nzija kubaboola mbazikirize ne kawumpuli, mbasaanyeewo; naye nzija kukuggyamu ggwe eggwanga eriribasinga abo obukulu n'amaanyi."

¹³ Naye Musa n'agamba MUKAMA Katonda nti, "Ebyo Abamisiri bagenda kubiwlira! Kubanga abantu bano wabaggya mu nsi y'Abamisiri n'obuyinza obw'amaanyi amangi.

¹⁴ Bajja kubuulirako ku bantu ab'omu nsi muno. Baamala dda okukiwlira nga ggwe, Ayi MUKAMA, obeera wakati mu bantu bano, era nga, Ayi MUKAMA Katonda, mulabagana nabo amaaso n'amaaso, era ng'ekire kyo kibeera nabo buli kiseera, era ng'obakulemberera mu mpagi ey'ekire emisana ne mu mpagi ey'omuliro ekiro.

¹⁵ Singa abantu bano obatta bona omulundi gumu, amawanga agawulidde obututumufu bwo gagenda kugamba nti,

¹⁶ 'Kubanga MUKAMA Katonda yali tasobola kuyingiza bantu bano mu nsi gye yabasubiza ng'agibalayirira; kyeyava abattira mu ddungu.'

¹⁷ "Ne kaakano nkwegayirira oyoleke obuyinza bwo, Ayi MUKAMA nga bwe buli obusukkirivu nga bwe wasuubiza nti,

¹⁸ 'MUKAMA Katonda alwawo okusunguwala, era ajjudde okwagala okutaggwaawo, era asonyiwa ekibi n'obujeemu. Naye era asingiddwa omusango

tamuleka nga tabonerezebbwa; abonereza abaana olw'ebibi bya bakadde baabwe okutuuka ku mulembe ogwokusatu n'ogwokuna.'

¹⁹Ng'okwagala kwe okungi okutaggwaawo bwe kuli, nsaba osonyiwe abantu bano ekibi ky'abwe, nga bw'ozze obasonyiwa kasookedde bava mu Misiri n'okutuusa leero."

Ekibonerezo kya Isirayiri

²⁰Awo MUKAMA Katonda n'addamu nti, "Mbasonyiye nga bw'onsabye.

²¹Naye nno mu mazima ddala nga bwe ndi omulamu, era ng'ekitiibwa kya MUKAMA Katonda bwe kijjuza ensi yonna,

²²tewalibaawo n'omu ku bantu abaalaba ekitiibwa kyange n'obubonero obw'ebiyamagero bwe nakolera e Misiri ne mu ddungu, naye ne batagondera ddoboozi lyange wabula ne bangezesza nga bankema emirundi kkumi,

²³tewalibaawo n'omu ku bo aliraba ku nsi eyo gye nalayirira bajjajaabwe ne mbasuubiza okugibawa. Tewalibaawo n'omu ku bo abannyoomye aligirabako.

²⁴Naye olwokubanga omuweereza wange Kalebu alina omwoyo ogw'enjawulo era ng'angoberera n'omutima gwe gwonna, ndimuleeta mu nsi gye yatumibwamu, n'ezzadde lye lirigirya.

²⁵Kale nno olwokubanga Abamaleki n'Abakanani babeera mu biwonvu; enkyia muddeeko emabega, musitule mutambule nga mwolekera eddungu nga mukutte ekkubo eriraga ku Nnyanja Emyufu."

²⁶MUKAMA Katonda n'agamba Musa ne Alooni nti,

²⁷"Ekibiina kino ekibi kirituusa ddi nga kinneemulugunyiza? Mpulidde okutolotooma kw'abaana ba Isirayiri nga banneemulugunyiza.

²⁸Bategeeze nti, 'MUKAMA agambye nti, Nga bwe ndi omulamu, bw'ayogera MUKAMA Katonda, ebyo bye mpulidde nga mwogera, nange bye ndibakola.

²⁹Mulifiira mu ddungu muno n'emirambo gyammwe mwe girisigala; mwenna abawezessa emyaka amakumi abiri n'okusingawo egy'obukulu nga bwe mwamala okubalibwa, abanneemulugunyiza.

³⁰Tewaliba n'omu ku bo aliyingira mu nsi gye neelayirira nti ge galibeera amaka gammwe, okuggyako Kalebu mutabani wa Yefune ne Yoswa mutabani wa Nuuni.

³¹Naye abaana bammwe abato, be mwogeddeko nti balifuulibwa omunyago, ndibayingiza mu nsi eyo gye mugaanye ne beeyagalira omwo.

³²Naye mmwe, emirambo gyammwe girisigala mu ddungu muno mwe girigwa.

³³Mmwe olw'obutabeera beesigwa, abaana bammwe balimala emyaka amakumi ana mu ddungu nga bwe balunda ebisibo byabwe okutuusa omulambo gw'oyo alisembayo okufa lwe guliziikibwa mu ddungu muno.

³⁴Nga bwe mwamala ennaku amakumi ana nga muketta ensi eri, bwe mutyo bwe mujja okumala emyaka amakumi ana mu ddungu, nga buli lumu ku nnaku ezo muvaamu mwaka gumu gumu; muboneebone olw'ebibi byammwe, mulyoke mutegeere obuzibu obw'okunneesimbamu.

³⁵Nze, MUKAMA Katonda, nkyogedde; ddala ddala ekyo ndikikola ku kibiina kyonna eky'abantu bano aboonoonyi abeegasse awamu okunjolekera. Tebagenda kuva mu ddungu lino, bona mwe balifiira.' "

³⁶Abasajja abo Musa be yatuma okuketta ensi ne bakomawo ne beemulugunyiza ekibiina ky'abantu bona nga babaleetedde obubaka obutaali bulungi ku nsi eri, era ne babubunyisa mu bantu,

³⁷abasajja abo abaaleeta obubaka obutaali bulungi ne babubunyisa mu bantu kawumpuli n'abattira awo mu maaso ga MUKAMA Katonda.

³⁸Mu basajja bona abaatumibwa okuketta ensi, Yoswa mutabani wa Nuuni ne Kalebu mutabani wa Yefune be bokka abaasigalawo nga balamu.

Abayisirayiri Bawangulwa mu Lutalo e Koluma

³⁹Musa n'ategeeza abaana ba Isirayiri bona ebigambo ebyo, ne bakungubaga nnyo.

⁴⁰Enkeera mu makya ne bambuka mu nsi ey'ensozi. Ne boogera nti, "Twayonoona, naye nga bwe tuli wano tujja kwambuka tuyingire mu nsi MUKAMA Katonda gye yatusuubiza."

⁴¹Naye Musa n'abagamba nti, "Lwaki munyooma ekiragiro kya MUKAMA Katonda? Ebyo bye mutegeka tebiyinza kutuukiririra.

⁴²Tewambuka kubanga MUKAMA Katonda tali nammwe. Abalabe bammwe bajja kubawangula.

⁴³Kubanga Abamaleki n'Abakanani bajja kuboolekera. Olwokubanga mwekyusizza ne muva ku MUKAMA Katonda, tajja kubeera nammwe, ekitala kijja kubatta."

⁴⁴Naye era bo ne beesigula ne bambuka mu nsi ey'ensozi, newaakubadde nga Musa teyagenda nabo era nga n'essanduuko ey'endagaano yasigala mu lusiisira.

⁴⁵Awo Abamaleki n'Abakanani abaabeeranga mu nsi eyo ey'ensozi ne bakkirira ne babalumba ne babakubira ddala okubatuusa e Koluma.

Okubala 15

Amateeka ku Biweebwayo

1 MUKAMA Katonda n'agamba Musa

2ayogere n'abaana ba Isirayiri abagambe nti, "Bwe mutuukanga mu nsi gye mbawadde, mwe munaabeeranga, nga ge maka gammwe,

3ne muleetera MUKAMA Katonda ebiweebwayo ebyokye nga mubiggya mu biraalo byammwe oba mu bisibo byammwe, ekiweebwayo ku muliro oba ssaddaaka enjokye, okutuukiriza obwewayamo bwammwe oba ebiweebwayo olw'okwewayagalira oba ku mbaga zammwe entongole, ne muvaamu akawoowo akasanyusa MUKAMA;

4kale nno oyo anaaleetanga ekiweebwayo eri MUKAMA Katonda anaawangayo ekiweebwayo eky'emmere y'empeke eweza nga kilo emu n'ekitundu ez'obuwunga obulungi, nga mutabuddwamu n'amafuta ag'omuzeeyituuni agaweza nga obutundu mwenda obwa Ini ey'amafuta ag'omuzeeyituuni.

5Ku buli mwana gwa ndiga ogw'ekiweebwayo ekyokebwa oba ogwa ssaddaaka, munaateekerateekerangako obutundu mwenda obwa Ini ey'envinnyo nga kye kiweebwayo ekyokunywa.

6"Bwe munaabanga muwaayo endiga ennume munaateekateekanga ekiweebwayo eky'emmere y'empeke eweza nga kilo ssatu n'obutundu bubiri n'ekitundu obwa Ini ez'obuwunga obulungi nga mutabuddwamu n'amafuta ag'omuzeeyituuni ag'obutundu mwenda n'obutundu bubiri obwa Ini,

7era n'obutundu mwenda n'obutundu bubiri obwa Ini obw'envinnyo nga kye kiweebwayo ekyokunywa, eky'akawoowo akasanyusa MUKAMA Katonda.

8"Bwe munaabanga muteekateeka ente ennume ento ey'ekiweebwayo ekyokebwa oba ssaddaaka, okutuukiriza obwewayamo, oba ekiweebwayo olw'emirembe eri MUKAMA Katonda,

9ku nte eyo ennume munaaleeterangako ekiweebwayo eky'emmere ey'empeke eweza gulaamu mukaaga n'ekitundu ez'obuwunga obulungi nga mutabuddwamu amafuta ag'omuzeeyituuni agaweza kilo emu n'ekitundu.

10Era munaaleetanga envinnyo eweza lita bbiri nga kye kiweebwayo ekyokunywa. Kinaabanga ekiweebwayo ekyokebwa mu muliro ne kivaamu akawoowo akasanyusa MUKAMA Katonda.

11Buli nte ennume oba endiga ennume, na buli mwana gwa ndiga oba embuzi ento, zonna zinaateekebwateekebwanga mu ngeri eyo.

12Munaakolanga bwe mutyo ku buli gye munaateekateekanga nga bwe zinenkananga obungi.

13"Buli nzaalwa yenna kimusaanira okugobereranga enkola eyo buli lw'anaaleetanga ekiweebwayo ekyokebwa ku muliro, ne kivaamu akawoowo akasanyusa MUKAMA Katonda.

¹⁴Mu mirembe gyammwe gyonna egirijja, omugwira oba omugenyi yenna anaabeeranga mu mmwe bw'anaaleetanga ekiweebwayo ekyokebwa ku muliro ekivaamu akawoowo akasanyusa MUKAMA Katonda, anaakoleranga ddala nga bwe mukola.

¹⁵Ekibiina kyammwe kyonna kinaabeeranga n'amateeka geegamu, mmwe ge munaakwatanga era n'abagwira abali mu mmwe ge banaakwatanga; eryo linaabanga etteeka ery'enkalakkalira mu mirembe gyammwe gyonna egirijja. Mmwe nga bwe muli n'omugwira bw'atyo bw'anaabanga mu maaso ga MUKAMA Katonda.

¹⁶Amateeka n'ebiragiro bye munaakwatanga n'omugwira anaabeeranga mu mmwe by'anaakwatanga."

¹⁷ MUKAMA Katonda n'agamba Musa nti,

¹⁸"Tegeeza abaana ba Isirayiri nti, 'Bwe muyingiranga mu nsi mwe mbatwala,

¹⁹ne mulya ku mmere y'omu nsi omwo, munaaleetangako ekitundu nga kye kiweebwayo eri MUKAMA.

²⁰Munaggyanga ekitole ku mmere gye munaasookanga okusa mu gguuliro ne mukireeta nga kye kiweebwayo ekivudde mu gguuliro.

²¹Ku mmere eyo gye munaasookerangako okusa munaaleetangako ekiweebwayo ekyo eri MUKAMA Katonda okuyita mu mirembe gyammwe gyonna.'

Ebiweebwayo olw'Ebibi Ebikolebwa mu Butagenderera

²²"Naye nno bwe munaalemwanga okukwata amateeka ago gonna MUKAMA Katonda g'awadde Musa, nga mukikoze mu butagenderera,

²³amateeka ago gonna MUKAMA Katonda ge yalagira Musa okugabatuusaako okuva ku lunaku MUKAMA lwe yagamuweerako n'okweyongerayo okuyita mu mirembe gyammwe gyonna egigenda okuja,

²⁴ne mugasobya mu butagenderera n'ekibiina kyonna mu butamanya, kale nno ekibiina kyonna kinaaleetanga ekiweebwayo eky'ente ya sseddume ento emu nga kye kiweebwayo ekyokebwa, omuva akawoowo akalungi eri MUKAMA Katonda, nga kuliko n'ekiweebwayo ky'emmere y'empeke n'ekyokunywa ng'etteeka bwe liragira, n'ekiweebwayo eky'embuzi ennume emu olw'ekibi.

²⁵Kabona anaatangiririranga ekibiina ky'abaana ba Isirayiri bona, era bwe batyo banaasoniyibwanga; kubanga baasobya mu butagenderera, ate banaabanga baleese ekiweebwayo eri MUKAMA Katonda ekyokebwa ku muliro, era n'ekiweebwayo eri MUKAMA Katonda olw'ekibi olw'ekisobyo kyabwe ekitaali kigenderere.

²⁶Ekibiina ky'abaana ba Isirayiri bona, bwe batyo banaasonyiyibwanga, n'abagwira abanaabeeranga mu bo nabo banaasonyiyibwanga, kubanga abantu bona banaabanga basoberezza wamu nga tebagenderedde.

²⁷"Naye omuntu bw'anaasobyanga ng'ali bw'omu mu butagenderera, anaaleetanga embuzi enduusi ey'omwaka gumu ogw'obukulu nga kye kiweebwayo olw'ekibi.

²⁸Kabona anaatangiririranga, eri MUKAMA, omuntu oyo asobezza mu butagenderera; bw'anaamalanga okutangiririrwa, anaasonyiyibwanga.

²⁹Munaabeeranga n'etteeka lye limu erinaakozesebwanga ku muntu yenna anaasobyanga nga tagenderedde, bw'anaabanga enzaalwa oba ne bw'anaabanga omugwira bulijjo abeera mu mmwe.

³⁰"Naye buli muntu anaakolanga ekibi mu bugenderevu, bw'anaabanga enzaalwa ne bw'anaabeeranga omugwira abeera mu mmwe, omuntu oyo anaabanga avvodde MUKAMA Katonda, noolwekyo anaagobwanga mu bantu be, ne bamwesalirako ddala.

³¹Olwokubanga anaabanga anyoomye ekigambo kya MUKAMA Katonda, n'amenya etteeka lye, omuntu oyo anaagoberwanga ddala okuva mu bantu be, ne bamwesalirako ddala, era ekibi kye ekijo kinaasigalanga ku mutwe gwe."

Amenya Etteeka Iya Ssabbiiti Anattibwanga

³²Abaana ba Isirayiri bwe baali nga bakyali mu ddungu, ne basisinkana omusajja omu ku b'omu kibiina ky'Abayisirayiri eyali atyaba enku ku lunaku lwa Ssabbiiti.

³³Abo abaamusanga ng'atyaba enku ne bamuleeta eri Musa ne Alooni n'ekibiina kyonna,

³⁴ne bamuggalira mu kkomera, kubanga baali tebamanyi bulungi kya kumukolera.

³⁵Awo MUKAMA Katonda n'agamba Musa nti, "Omusajja oyo ateekwa kuttibwa. Ekibiina kyonna kimukubire amayinja ebweru w'olusiisira."

³⁶Ekibiina kyonna ne kimufulumya wabweru w'olusiisira ne kimukuba amayinja n'afa, nga MUKAMA Katonda bwe yalagira Musa.

Amatanvuuwa ag'Okujuukirirangako

³⁷Awo MUKAMA Katonda n'agamba Musa nti,

³⁸"Yogera eri abaana ba Isirayiri obalagire beekolere amatanvuuwa bagatungenga ku nkugiro z'ebiyambalo byabwe mu mirembe gyabwe gyonna, era ku buli ttanvuuwa batungengako akaguwa aka bbululu.

³⁹Amatanvuuwa ago munaagatunulangako, ekijo ne kibajjukiza amateeka ga MUKAMA Katonda gonna ge musaanira okugonderanga, mulyoke

mugagobererenga mulemenga okweyonoonyesa nga mukola ebyo ebitaliimu nsa byokka nga bye bisanyusa amaaso gammwe n'emitima gyammwe.

⁴⁰Bwe mutyo munajjukiranga amateeka gange ne mubeera batukuvu eri Katonda wammwe.

⁴¹Nze MUKAMA Katonda wammwe, eyabaggya mu nsi y'e Misiri, okubeeranga Katonda wammwe; Nze MUKAMA Katonda wammwe.”

Okubala 16

Okwewaggula kwa Koola ne Dasani ne Abiraamu

¹Lwali lumu, Koola mutabani wa Izukali, mutabani wa Kokasi, mutabani wa Leevi, ne bano abava mu Lewubeeni, Dasani ne Abiraamu batabani ba Eriyaabu, awamu ne Oni mutabani wa Peresi, bona ne beewaggula

²ne basituka ne boolekera Musa. Baali ne bannaabwe abasajja Abayisirayiri ebikumi bibiri mu ataano, abaali abamanyifu ennyo mu baana ba Isirayiri era nga bakiise mu Lukiko Olukulu.

³Ne bajира wamu nga beekobaanye okwolekera Musa ne Aloonie babagamba nti, “Mwekulumbaza nnyo! Ekibiina kyonna, buli omu mu kyo mutukuvu, ne MUKAMA Katonda ali nabo. Kale, lwaki mwekulumbaliza ku kibiina ky'abantu ba MUKAMA?”

⁴Musa bwe yakiwulira n'avuunama wansi.

⁵N'alyoka agamba Koola ne bona abaali naye nti, “Enkyia MUKAMA Katonda anaalondamu ababe, n'oyo omutukuvu, era anaasembeza omuntu oyo gy'ali. Oyo gw'analonda gw'anaasembeza gy'ali.

⁶Gwe Koola n'abagoberezi bo bona mukole bwe muti: Muddire ebyoterezo,

⁷enkyia mubiteekemu omuliro n'obubaane awali MUKAMA, oyo MUKAMA Katonda gw'analondamu, nga ye mutukuvu. Mmwe batabani ba Leevi mwekulumbazizza nnyo!”

⁸Musa n'agamba Koola nti, “Muwulirize, mmwe batabani ba Leevi!

⁹Mukiraba nga kitono nnyo tekibamala, Katonda wa Isirayiri okubaawulako n'abaggya ku kibiina ekinene eky'abaana ba Isirayiri n'abasembeza w'abeera okukolanga omulimu gwa MUKAMA mu Weema ya MUKAMA ey'Okukuñjaanirangamu, n'okuyimiriranga mu maaso g'ekibiina n'okubaweereza?

¹⁰Mmwe ne Baleevi bannammwe MUKAMA Katonda yabasembeza gy'ali, kaakano mwagala n'obwakabona nabwo mubulye?

¹¹Noolwekyo mmwe n'abagoberezi bammwe, mwesimbye ku MUKAMA Katonda, era gwe mwolekedde. Kale Aloon ni naye ye ani, mmwe okumwemulugunyiza?"

¹²Awo Musa n'atumya Dasani ne Abiraamu batabani ba Eriyaabu bayitibwe bajje. Naye ne bagamba nti, "Tetujja kujja!"

¹³Eky'okutuggya mu nsi ekulukuta amata n'omubisi gw'enjuki okututtira mu ddungu, kyalil kitono nga tekimala? Ne kaakano oyagala okutwefuulirako omulangira otufuge?

¹⁴Ng'ebyo bikyali awo, totuleese mu nsi ekulukuta amata n'omubisi gw'enjuki, wadde okutusikiza amasamba n'ennimiro z'emizabbibu. Abasajja bano oyagala obasibe kantuntunu ku maaso obalimberimbe? Nedda, tetujja kujja."

Musa Asabira Abantu

¹⁵Awo Musa n'asunguwala nnyo n'agamba MUKAMA Katonda nti, "Ekiweebwayo kyabwe tokikkiriza. Tewaliwo gwe nnali ntutteko wadde akalogoyi akamu, so tewali n'omu ku bo gwe nnali mpisizza obubi."

¹⁶Musa n'agamba Koola nti, "Ggwe n'abo bona abakugoberera, enkyia mujje awali MUKAMA Katonda, ggwe nabo ne Aloon.

¹⁷Buli musajja aije n'ekyoterezo kye akiteekemu obubaane, ebyoterezo bijja kuwera ebikumi bibiri mu ataano, mubireete awali MUKAMA. Ggwe ne Aloon nammwe mujja kuleeta ebyoterezo byammwe."

¹⁸Awo buli musajja n'addira ekyoterezo kye n'akissaamu obubaane n'omuliro, bona ne bayimirira ne Musa ne Aloon ku mulyango gwa Weema ya MUKAMA ey'Okukuŋjaanirangamu.

¹⁹Koola bwe yamala okukuŋjaanya abagoberezi be abavuganya, ku mulyango gwa Weema ya MUKAMA ey'Okukuŋjaanirangamu, ekitiibwa kya MUKAMA Katonda ne kyeraga eri ekibiina kyonna ekyali kikuŋjaanye.

²⁰MUKAMA Katonda n'agamba Musa ne Aloon nti,

²¹"Mweyawuleko muve mu kibiina kino ndyoke nkizikirize embagirawo."

²²Naye Musa ne Aloon ne bavuunama amaaso gaabwe wansi ne bagamba nti, "Ayi Katonda, Katonda ow'emyoyo egy'abantu bona, omuntu omu bw'ayonoona, osungualira ekibiina kyonna?"

²³MUKAMA Katonda n'agamba Musa nti,

²⁴"Muve okumpi n'eweema eza Koola ne Dasani ne Abiraamu."

Ekibonerezo ky'Abajeemu

²⁵Awo Musa n'asituka n'agenda eri Dasani ne Abiraamu, n'abakulembeze ba Isirayiri ne bagenda naye nga bamugoberera.

²⁶N'agamba ekibiina kyonna nti, "Musembereeyo muve okumpi n'eweema z'abasajja bano abakozi b'ebibi! Temukwata ku kintu kyabwe n'ekimu, sikulwa nga mwenna muzikirizibwa olw'ebibi byabwe."

²⁷Bwe batyo ne basemberayo ne bava okumpi n'eweema za Koola, ne Dasani, ne Abiraamu. Dasani ne Abiraamu baali nga bafulumye mu weema zaabwe nga bayimiridde mu miryango gyazo, nga bali ne bakazi baabwe, ne batabani baabwe, n'obwana bwabwe obuto.

²⁸Awo Musa n'agamba nti, "Ku kino kwe munaategeerera nga MUKAMA Katonda y'antumye okukola ebintu bino byonna so tekubadde kutetenkanya kwange.

²⁹Singa abasajja bano bafa olumbe olwa bulijjo, oba kugwibwako ebyo ebya bulijjo ebigwa ku bantu bonna, kinaaba kitegeeza nti MUKAMA si y'antumye.

³⁰Naye singa MUKAMA Katonda aleetawo ekintu ekiggya ddala ekitali kya bulijjo, ensi n'eyasamya akamwa kaayo n'ebamira nga balamu n'ebintu byabwe byonna, ne bagwa wansi mu gunnya oguwanvu, kale nno munaategeera ng'abasajja abo banyoomodde MUKAMA Katonda."

³¹Awo bwe yali nga yakamala okwogera ebigambo ebyo, ettaka bali kwe baali bayimiridde ne lyabikamu wabiri,

³²ensi n'eyasamya akamwa kaayo n'ebamira n'ebintu byabwe byonna eby'omu maka gaabwe, ne basajja ba Koola bonna n'ebintu byabwe byonna.

³³Baagwayo wansi mu gunnya nga balamu, n'ebintu byabwe byonna bye baalina; ensi n'ebabuutikira, ne basaanirawo ddala okuva mu bannaabwe.

³⁴Abayisirayiri bonna abaaliwo bwe baabawulira nga bakaaba ne badduka nga bwe bagamba nti, "Si kulwa nga naffe ensi etumira!"

³⁵Olwo omuliro ne gujja nga guva eri MUKAMA ne gwokera ddala abasajja ebikumi ebibiri mu ataano abaali bawaayo ekiweebwayo eky'obubaane.

³⁶Awo MUKAMA Katonda n'agamba Musa nti,

³⁷"Gamba Eriyazaali mutabani wa Aloonni kabona aggye ebyoterezo mu muliro, kubanga bitukuvu, amanda ag'omuliro agasaasaanyize wala.

³⁸Ebyoterezo ebyo bya basajja abaayonoona era n'okufa ne bafa; noolwekyo biweesebwemu amasowaane gakozesebwenga ng'ebibikka ku kyoto kubanga baabiwaayo eri MUKAMA Katonda; noolwekyo bitukuvu. Kale binaabanga karbonero ka kijukizo eri abaana ba Isirayiri."

³⁹Bw'atyo Eriyazaali kabona n'addirra ebyoterezo eby'ekikomo, ebyali biweereddwayo bali abaayokebwa, ne biweesebwamu ebibikka ku kyoto,

⁴⁰kiyambe abaana ba Isirayiri okujukiranga nti omuntu atali kabona, atava mu lulyo Iwa Aloonni, taasemberenga kumpi na kyoto okunyookeza obubaane

eri MUKAMA, si kulwa ng'afuuka nga Koola n'ekibiina kye. Eriyazaali bw'atyo bwe yabikola byonna ng'ekiragiro kya MUKAMA Katonda bwe kyali kye yayisa mu Musa.

Kawumpuli mu Bantu

⁴¹Naye enkeera ekibiina kyonna eby'abaana ba Isirayiri ne beemulugunyiza Musa ne Aloonni, nga bagamba nti, "Musse abantu ba MUKAMA Katonda."

⁴²Kyokka ekibiina ky'abantu bwe baakuñjaana okusoomooza Musa ne Aloonni ne bakyuka okwolekera Eweema ya MUKAMA ey'Okukuñjaanirangamu, amangwago ekire ne kigibikka n'ekitiibwa kya MUKAMA Katonda ne kyeyoleka.

⁴³Musa ne Aloonni ne balaga ku mulyango gwa Weema ya MUKAMA ey'Okukuñjaanirangamu,

⁴⁴MUKAMA n'agamba Musa nti,

⁴⁵"Muve mu bantu bano ndyoke mbazikirize embagirawo." Ne bavuunama wansi.

⁴⁶Awo Musa n'agamba Aloonni nti, "Ddira ekyoterezo kyo okisseemu obubaane, n'omuliro ng'oguggya mu kyoto kya MUKAMA, oyanguwe ogende mu kibiina obatangiririre. Kubanga obusungu bubuubuuse okuva eri MUKAMA Katonda era kawumpuli atandise."

⁴⁷Aloonni n'akola nga Musa bwe yamulagira, n'adduka n'agenda wakati mu kibiina. Yasanga kawumpuli yatandise dda mu bantu, naye Aloonni n'awaayo eri MUKAMA Katonda obubaane okubatangiririra;

⁴⁸n'ayimirira wakati w'abafu n'abalamu, kawumpuli n'aziyizibwa.

⁴⁹Bwe kityo abantu abaafa kawumpuli baawera omutwalo gumu mu enkumi nnya mu lusanvu, nga bali abaafa olw'emitawaana gyा Koola tobataddeko.

⁵⁰Aloonni n'akomawo eri Musa mu mulyango gwa Weema ya MUKAMA ey'Okukuñjaanirangamu, nga kawumpuli amaze okuziyizibwa.

Okubala 17

Okutojjerwa kw'Omuggo gwa Aloonni

¹Awo MUKAMA n'agamba Musa nti,

²"Tegeeza abaana ba Isirayiri baleete emiggo kkumi n'ebiri nga gireetebwa abakulembeze baabwe mu buli kika, omuggo gumu buli kika. Owandiike erinnya lya buli musajja ku muggo gwe gw'aleese.

³Wandiika erinnya lya Aloonni ku muggo oguvudde mu kika kya Leevi. Kubanga buli mukulembeze w'ekika ky'obujajja ajja kubeera n'omuggo ggumu.

⁴Olyoke ogiteeke mu Weema ya MUKAMA ey'Okukunjaanirangamu mu maaso g'Essanduuko ey'Endagaano, we mbasisinkana.

⁵Kale nno omuggo gw'oyo gwe nnaalonda gujja kutojjera; bwe ntyo nzija kusirisa okukwemulugunyiza kuno okutatadde okw'abaana ba Isirayiri."

⁶Musa n'ategeeza abaana ba Isirayiri; abakulembeze baabwe ne bamuleetera emiggo, buli mukulembeze omuggo gumu gumu, ng'ebika by'obujjajaabwe bwe byali, okugatta gyonna gy'emiggo kkumi n'ebiri, nga n'omuggo gwa Aloonni mwe gulii.

⁷Musa n'ateeka emiggo egyo mu maaso ga MUKAMA Katonda mu Weema ya MUKAMA awali Essanduuko ey'Endagaano.

⁸Awo bwe bwakya enkyia Musa n'ayingira mu Weema ya MUKAMA awali Essanduuko ey'Endagaano, era laba, ng'omuggo gwa Aloonni ow'omu kika kya Leevi nga gutojedde nga guliko n'obutabi obuto, nga gutaddeko n'ebibala ebyengedde.

⁹Musa n'afulumya emiggo gyonna ng'agiggya mu maaso ga MUKAMA Katonda, n'agireeta awali abaana ba Isirayiri; ne bagitunuulira, buli omu n'aggyawo omuggo gwe.

¹⁰ MUKAMA Katonda n'agamba Musa nti, "Omuggo gwa Aloonni guzzeeyo awali Essanduuko ey'Endagaano gukuumirwenga awo ng'akabonero ak'okulabulanga abajeemu. Ekyo kinaasirisa okunneemulugunyiza, balyoke bawone okufa."

¹¹Musa n'akola nga MUKAMA bwe yamulagira.

¹²Awo abaana ba Isirayiri ne bagamba Musa nti, "Laba, ffenna tujja kufa! Tujja kuggwaawo, tujja kuzikirira.

¹³Buli muntu anaasembereranga Eweema ya MUKAMA ajjanga kufa. Ffenna tuli ba kuzikirira?"

Okubala 18

Emirimu gyia Bakabona n'egy'Abaleevi

¹ Awo MUKAMA Katonda n'agamba Aloonni nti, "Ggwe, ne batabani bo, n'ab'omu kika kyo bona, mmwe munaavunaanyizibwanga olw'emisango eginazzibwanga ku watukuvu; era ggwe ne batabani bo mwekka mmwe muneetikkanga obuvunaanyizibwa ku misango eginazzibwanga ku bwakabona.

²Onooleetanga Abaleevi banno ab'omu kika kyo eky'obujjajja ne babeegattako, ggwe ne batabani bo, okubayambanga bwe munaabanga muweereza mu Weema ya MUKAMA omuli Essanduuko ey'Endagaano.

³Banaaweererezanga wansi wo nga bakola emirimu gyonna egy'omu Weema ya MUKAMA; naye beekuumenga balemenga okusemberera ekyoto wadde eby'omu watukuvu byonna; bwe balikikola, bo naawe mugenda kufa.

⁴Bagenda kukwegattako, balabirirenga Weema ya MUKAMA ey'Okukuñjaanirangamu, nga bakola emirimu gyonna egy'omu Weema, era tewaabenga mugwira n'omu anaasemberanga we muli.

⁵"Mmwe munaabanga n'obuvunaanyizibwa obw'emirimu gyonna egy'awatukuvu n'egy'Ekyoto, olwo obusungu buleme kuddamu kubuubuukiranga ku baana ba Isirayiri.

⁶Kale weeteegereze: nziridde ab'omu lulyo lwo olw'Abaleevi nga mbalonze mu baana ba Isirayiri, ne mbakukwasa ng'ekirabo ekiweereddwayo eri MUKAMA Katonda okukolanga emirimu egy'omu Weema ya MUKAMA ey'Okukuñjaanirangamu.

⁷Naye ggwe ne batabani bo mwekka mmwe munaakolanga emirimu gyonna egy'obwakabona bwammwe egikwata ku kyoto n'egy'omunda w'eggigi. Obuweereza obw'Obwakabona mbubawadde ng'ekirabo. Omuntu yenna omulala anaasemberanga okumpi n'awatukuvu, anaafanga."

Omugabo gwa Bakabona n'ogw'Abaleevi

⁸Awo MUKAMA Katonda n'agamba Aloonni nti, "Laba, Nze kennyni nkukwasizza ebiweebwayo byonna ebireetebwa gye ndi; ebiweebwayo byonna ebitukuvu abaana ba Isirayiri bye banandeeteranga mbikuwadde ggwe ne batabani bo nga gwe mugabo gwammwe ogw'olubeerera.

⁹Ku biweebwayo byonna ebitukuvu ennyo ebitayokeddwa mu muliro kunaabangako ebibyo. Omugabo gwo ne batabani bo gunaavanga ku birabo ebitukuvu ennyo abaana ba Isirayiri bye banandeeteranga: ebiweebwayo eby'emmere y'empeke oba ebiweebwayo olw'ekibi, oba ebiweebwayo olw'omusango.

¹⁰Omugabo ogwo onooguliranga mu kifo ekitukuvu ennyo, era buli musajja anaagulyangako. Osaana okitegeere ng'ebyo bitukuvu nnyo.

¹¹"Bino nabyo binaabanga bibyo: ku birabo bye banandeeteranga, n'ebiweebwayo ebiwuubibwawuubibwa eby'abaana ba Isirayiri. Ebyo mbikuwadde ne batabani bo ne bawala bo okuba omugabo gwo ogw'olubeerera. Buli muntu yenna ow'omu maka go omulongoofu anaalyangako.

¹²"Nkuwadde ku mafuta ag'omuzeeyituuni agasinga obulungi ne ku wayini omusu, ne ku mmere y'empeke embereberyeyo bye baleetera MUKAMA eby'amakungula gaabwe.

¹³Ebibala ebinaasookanga okwengera mu nnimiro zaabwe, bye banaaleeteranga MUKAMA Katonda, binaabanga bibyo. Buli muntu yenna ow'omu maka go omulongoofu anaalyangako.

¹⁴"Buli kintu kyonna mu Isirayiri ekiweereddwayo ddala ne kiwongebwa eri MUKAMA kinaabanga kikyo.

¹⁵Buli ekinaggulangawo enda y'omuntu oba ey'ekisolo, nga kyakuwaayo eri MUKAMA Katonda, kinaabanga kikyo. Naye omwana omubereberye ow'omuntu onoomununulanga, era n'embereberye ez'ensolo ezitali nnongoofu nazo onoozinunulanga.

¹⁶Ebyo eby'okununula onoobinunulanga bimaze okuweza omwezi gumu ogw'obukulu. Onoobinunuliranga ku muwendo ogwagerekebwa ogwa gulaamu amakumi ataano mu ttaano, ng'ebipimo by'awatukuvu bwe biri.

¹⁷"Naye embereberye ey'ente, oba embereberye ey'endiga oba ey'embuzi, ezo toozinunulenga, kubanga zo ntukuvu. Onoomansiranga omusaayi gwazo ku kyoto, n'oyokya amasavu gaazo mu muliro ng'ekiweebwayo ekyokebwa ekivaamu akawoowo akasanyusa MUKAMA Katonda.

¹⁸Ennyama yaazo eneebanga yiyo ng'ekiweebwayo ky'ekifuba ekiwuubibwawuubibwa n'ekisambi ekya ddyo bwe kiri ekikyo.

¹⁹Ebiweebwayo byonna ebitukuvu abaana ba Isirayiri bye banaaleeteranga MUKAMA, mbikuwadde, ggwe ne batabani bo, ne bawala bo, okubeeranga omugabo gwo ogw'olubeerera. Eneebeeranga endagaano ey'omunnyo eya MUKAMA wakati we naawe n'ezzadde lyo emirembe gyonna."

²⁰Awo MUKAMA Katonda n'agamba Alooni nti, "Toobenga na byabusika mu nsi yaabwe, so toobenga na mugabo gwonna mu bo; Nze mugabo gwo era Nze busika bwo mu baana ba Isirayiri.

Ekitundu eky'ekkumi Okukiwa Abaleevi

²¹"Ebitundu eby'ekkumi byonna abaana ba Isirayiri bye banaaleetanga, mbiwadde Abaleevi okubeeranga omugabo gwabwe nga ye mpeera yaabwe olw'omulimu gwe bakola nga baweereza mu Weema ya MUKAMA ey'Okukuñjaanirangamu.

²²Era okuva leero abaana ba Isirayiri tebaasembererenga Weema ya MUKAMA ey'Okukuñjaanirangamu, si kulwa nga bakolerayo ebibi, ne bafa.

²³Abaleevi be banaakolanga emirimu egy'omu Weema ey'Okukuñjaanirangamu, era be baneetikkanga obuvunaanyizibwa bwe banaakolerangayo ebibi. Lino linaabanga tteeka ery'enkalakkalira ne mu mirembe gyammwe gyonna egigenda okujja. Tebaafunenga byabusika mu baana ba Isirayiri.

²⁴Kubanga ebitundu eby'ekkumi abaana ba Isirayiri bye banaaleetanga ng'ekiweebwayo eri MUKAMA, mbiwadde Abaleevi okubeera omugabo gwabwe. Noolwekyo tebabenga na byabusika mu baana ba Isirayiri.”

Ekitundu eky'Ekkumi Abaleevi kye baawangayo

²⁵ MUKAMA Katonda n'agamba Musa nti,

²⁶“Yogera n'Abaleevi obagambe nti, ‘Bwe munaafunanga ebitundu eby'ekkumi, bye mbawadde ng'omugabo gwammwe, nga mubiggya ku baana ba Isirayiri, munaggyangako ekitundu eky'ekkumi ne mukireeta nga kye kiweebwayo kyammwe eri MUKAMA Katonda.

²⁷Ekiweebwayo kyammwe kinaabalibwanga ng'emmere y'empeke ey'omu gguuliro oba ng'omubisi ogw'omu ssogolero.

²⁸Mu ngeri eyo nammwe munaaleetanga ekiweebwayo eri MUKAMA Katonda nga mukiggya ku bitundu eby'ekkumi bye munaafunanga ku baana ba Isirayiri. Ku bitundu ebyo eby'ekkumi kwe munaggyanya ekiweebwayo kya MUKAMA ne mukikwasa Alooni kabona.

²⁹Mu birabo ebyo byonna bye banaabawanga munaggyangako ekisingira ddala obulungi era ekitukuvu ennyo ne mukireeta nga kye kiweebwayo eri MUKAMA Katonda.’

³⁰“Abaleevi bagambe nti, ‘Bwe munaawangayo ebitundu ebisinga obulungi, binaababalirwangako ng'ebivudde mu gguuliro n'ebivudde mu ssogolero.

³¹Mmwe n'ab'omu maka gammwe munaayinzanga okubiriira wonna we munaayagalanga, kubanga eneebeeranga mpeera yammwe olw'omulimu gwe munaakolanga mu Weema ya MUKAMA ey'Okukuññaanirangamu.

³²Bwe munaawangayo ebisingira ddala obulungi, tewaabengawo musango gwonna gwe munaabanga muzzizza; bwe mutyo ebiweebwayo ebitukuvu eby'abaana ba Isirayiri munaabanga temubivumisizza, muleme okufa.’”

Okubala 19

Okutukuza Atali Mulongoofu

¹ MUKAMA Katonda n'agamba Musa ne Alooni nti,

²“Kino kye kiragiro eky'etteeka MUKAMA ky'alagidde: Gamba abaana ba Isirayiri bakuleetere ente enduusi eya lukunu eteriiko kamogo wadde ekikyamu kyonna, era nga tesibibwangamu kikoligo.

³Ogiwanga Eriyazaali kabona; eneetwalibwanga ebweru w'olusiisira n'ettirwa mu maaso ge.

⁴Eriyazaali anaddiranga ku musaayi gwayo n'olunwe lwe n'agumansira okwolekera obwenyi bwa Weema ya MUKAMA ey'Okukunjaanirangamu emirundi musanvu.

⁵Ente eyo eneeyokerwanga mu maaso ge; ne bookya eddiba lyayo, n'ennyama yaayo, n'omusaayi gwayo n'obusa bwayo.

⁶Kabona anaddiranga omuti omwerezzi, n'ezobu n'olugoye olumyufu n'abisuula wakati mu nte eyokebwa.

⁷Ebyo nga biwedde kabona anaayozanga ebyambalo bye n'anaaba omubiri gwe n'amazzi. Anaddangayo mu lusiisira, naye anaabanga atali mulongoofu okutuusa akawungeezi.

⁸N'omusajja anaayokyanga ente eyo, kinaamusaaniranga okwoza engoye ze n'okunaaba omubiri gwe n'amazzi, era naye anaabanga atali mulongoofu okutuusa akawungeezi.

⁹"Omusajja omulongoofu anaayoolanga evvu ly'ente, analiteekanga mu kifo ekirongoofu ebweru w'olusiisira. Linaalabirirwanga abaana ba Isirayiri ne balikozesanga mu mazzi ag'okwerongoosa; kwe kulongoosebwa okw'okuggibwako ekibi.

¹⁰Omuntu oyo anaayoolanga evvu ly'ente, kinaamusaaniranga okwoza engoye ze, era naye taabenga mulongoofu okutuusa akawungeezi. Eryo linaabanga etteeka ery'emirembe n'emirembe eri abaana ba Isirayiri n'eri bannamawanga abanaatuulanga mu bo.

¹¹"Buli anaakwatanga ku mulambo ogw'omuntu yenna, anaabanga atali mulongoofu okumala ennaku musanvu.

¹²Kinaamusaaniranga okwerongoosa n'amazzi ku lunaku olwokusatu ne ku lunaku olw'omusanvu, olwo n'alyoka abeera omulongoofu. Naye bw'ateerongoosenga ku lunaku olwokusatu ne ku lunaku olw'omusanvu, taabenga mulongoofu.

¹³Buli anaakwatanga ku mulambo gw'omuntu n'ateelongoosa, anaabanga ayonoonye ennyumba ya MUKAMA Katonda. Omuntu oyo anaagobwanga mu Isirayiri. Kubanga teyamansirwako mazzi agalongoosa, anaabeeranga atali mulongoofu; obutali bulongoofu bwe bunaamusigalangako.

¹⁴"Lino lye tteeka erikwata ku muntu anaafiranga mu weema: Buli anaayingiranga mu weema omwo n'oyo anaabanga agirimu banaabanga abatali balongoofu okumala ennaku musanvu.

¹⁵Buli kintu ekiterekwamu ekyasaamiridde ekitaliiko kisaanikira tekiibenga kirongoofu.

¹⁶ “Omuntu yenna ng’abaddde ali ebweru mu kyererezi, n’akwata ku muntu attiddwa n’ekitala oba olumbe gwe lusse, oba omuntu yenna anaakwatanga ku ggumba ly’omuntu oba ku malaalo, anaabeeranga atali mulongoofu okumala ennaku musanvu.

¹⁷ “Nga mukola ku muntu atali mulongoofu, munaatoolanga ku vvu ery’oku kiweebwayo olw’ekibi ne muliteeka mu bbakuli ne muliyiwako amazzi amalungi.

¹⁸ Omusajja omulongoofu anaddiranga ezobu n’aginnyika mu mazzi, n’agamansira ku weema ne ku bintu byamu byonna ne ku bantu bona abanaabanga balimu. Era anaamansiranga ne ku muntu anaabanga akutte ku ggumba ery’omuntu, ne ku malaalo, ne ku muntu attiddwa, ne ku oyo afudde olumbe.

¹⁹ Omusajja omulongoofu anaamansiranga ku oyo atali mulongoofu ku lunaku olwokusatu ne ku lw’omusanvu, ne ku lunaku olw’omusanvu anaabanga amulongoosezza. Omuntu oyo alongoosebwa anaayozanga engoye ze mu mazzi, n’okunaaba n’anaaba yenna; era akawungeezi ako anaabeeranga mulongoofu.

Ekibonerezo eky’Obuteerongoosa

²⁰ “Naye omuntu atali mulongoofu bw’ateerongoosenga anaagobwanga mu banne bona, n’asalibwa ku kibiina kyabwe, kubanga anaabeeranga ayonoonye awatukuvu wa MUKAMA Katonda. Amazzi agalongoosa nga tegamumansiddwako, taabeerenga mulongoofu.

²¹ Eryo linaabanga tteeka lyabwe lya mirembe gyonna. Oyo anaamansiranga amazzi ag’obulongoofu, naye anaayozanga engoye ze, n’oyo anaakwatanga ku mazzi ag’okulongoosa anaabeeranga atali mulongoofu okutuusa akawungeezi.

²² Buli kintu atali mulongoofu ky’akwatako, kinaabanga ekitali kirongoofu; na buli anaakikwatangako anaabanga atali mulongoofu okutuusa akawungeezi.”

Okubala 20

Amazzi Okuva mu Lwazi

¹ Mu mwezi ogw’olubereberye, ekibiina kyonna eky’abaana ba Isirayiri, ne batuuka mu ddungu lya Zini, ne batuula mu Kadesi. Miryamu n’afiira eyo, era gye yaziikibwa.

² Awo ekibiina kyonna ne kitaba na mazzi. Abantu bona ne beekujnjanyiza ku Musa ne Alooni.

³ Ne bayombesa Musa nga bagamba nti, “Singa nno naffe twafa, baganda baffe bwe baafiira mu maaso ga MUKAMA Katonda!

⁴ Lwaki waleeta ekibiina kya MUKAMA Katonda kino mu ddungu tulyoke tufiire wano n’ebisibo byaffe?

⁵Lwaki watuggya mu nsi y'e Misiri okutuleeta mu kifo kino ekibi bwe kit? Tekiriimu mmere ya mpeke wadde ttiini, so si kifo kya mizabbibu, so si kya mikomamawanga. Tewali na mazzi ge tuyinza kunywako!"

⁶Awo Musa ne Alooni ne bava mu maaso g'ekibiina ky'abantu ne balaga ku mulyango gwa Weema ya MUKAMA ey'Okukuñjaanirangamu, ne bavuunama wansi. Ekitiibwa kya MUKAMA Katonda ne kibalabikira.

⁷MUKAMA Katonda n'agamba Musa nti,

⁸"Twala omuggo, ggwe ne muganda wo Alooni mukujñaanye ekibiina kyonna. Lagira olwazi nga n'ekibiina kyonna kiraba, lujja kufukumula amazzi. Bw'otyo obaggire amazzi mu lwazi, basobole okunywako, era banywese n'ebisibo byabwe."

⁹Musa n'aggya omuggo awali MUKAMA n'agutwala nga MUKAMA Katonda bwe yamulagira.

¹⁰Musa ne Alooni ne bakujñanyiza ekibiina ky'abantu bona awali olwazi, Musa n'agamba abantu nti, "Mumpulirize, mmwe abajeemu; kitugwanidde ffe okubaggyira amazzi mu lwazi luno?"

¹¹Awo Musa n'ayimusa omukono gwe n'akuba olwazi n'omuggo gwe emirundi ebiri. Amazzi mangi ne gafukumuka okuva mu lwazi, abantu bona mu kibiina ne banywa, n'ebisibo byabwe nabyo ne binywa.

¹²Naye MUKAMA Katonda n'agamba Musa ne Alooni nti, "Olwokubanga temunneesize, ne mutampa kitibwa, ne mutualaga kibiina kino eky'abaana ba Isirayiri nga bwe ndi omutukuvu, noolwekyo temugenda kutuusa kibiina ky'abantu bano mu nsi gye mbasuubizza okubawa."

¹³Ago ge mazzi ag'e Meriba, abaana ba Isirayiri gye baayombera ne MUKAMA, era ne MUKAMA Katonda gye yeeragira mu bo nga mutukuvu.

Edomu Obutawa Isirayiri Lukusa Kuyitawo

¹⁴Musa yatumira Kabaka wa Edomu ababaka ng'asinziira e Kadesi ng'amugamba nti, "Muganda wo Isirayiri agamba bw'ati nti: Ebizibu byonna ebyatutuukako obimanyi.

¹⁵Omanyi nga bajjajjaffe bwe baaserengeta mu Misiri, ne tumalayo emyaka mingi. Abamisiri ne bayisa bubi bakadde baffe, era naffe;

¹⁶naye bwe twakaabirira MUKAMA Katonda, yawulira okukaaba kwaffe, n'atutumira malayika n'atuggya mu nsi y'e Misiri. Kaakano tuli wano mu Kadesi, ekibuga ekiri ku nsalo n'ensi yo.

¹⁷"Nkwegayirira otukkirize tuyite mu nsi yo. Tetuliyita mu birime wadde mu nnimiro z'emizabbibu, era tetugenda kunywa na ku mazzi agali mu nzizi. Tugenda kutambulira mu Luguudo lwa Kabaka Olunene, era tetugenda

kuluvaamu kukyamako ku ludda olwa kkono oba olwa ddyo okutuusa nga tumaze okuva mu nsi yo.”

¹⁸Naye Edomu n'addamu nti, “Tojja kuyita wano, bw'onookikola tujja kwesowolayo tukulumbe n'ekitala.”

¹⁹Abaana ba Isirayiri ne baddamu nti, “Tujja kwambukira mu luguudo olunene mwokka, era ebisibo byaffe naffe bwe tunaanywa ku mazzi gammwe tujja kugasasulira. Twagala kuyitawo buyisi nga tutambuza bigere, tetwetaagayo kirala.”

²⁰Naye Edomu n'addamu nti, “Temuyitawo.” Edomu ne yeesowolayo n'eggye ddene nnyo era nga lya maanyi.

²¹Bw'atyo Edomu n'agaana Isirayiri okuyitira mu matwale ge, Isirayiri n'amuviiira.

Okufa kwa Aloonni

²²Awo ekibiina kyonna eky'abaana ba Isirayiri ne basitula okuva e Kadesi, ne batuuka ku lusozi Koola.

²³MUKAMA Katonda n'agamba Musa ne Aloonni, nga bali ku lusozi Koola okuliraana n'ensalo y'ensi ya Edomu, nti,

²⁴“Aloonni ajja kugenda abantu be bona gye baalaga, kubanga tagenda kuyingira mu nsi gye nzija okuwa abaana ba Isirayiri. Kubanga mwembi mwajeemera ekiragiro kyange ku mazzi ag'e Meriba.

²⁵Leeta Aloonni ne mutabani we Eriyazaali, obaleete ku lusozi Koola;

²⁶Aloonni omwambulemu ebyambalo bye, obyambaze Eriyazaali mutabani we, kubanga Aloonni ajja kufa agende abantu be bona gye baalaga.”

²⁷Musa n'akola nga MUKAMA bwe yamulagira; ne balinnya olusozi Koola ng'abantu bona mu kibiina balaba.

²⁸Musa n'ayambulamu Aloonni ebyambalo, n'abyambaza Eriyazaali mutabani wa Aloonni. Aloonni n'afira awo ku ntikko y'olusozi. Musa ne Eriyazaali ne baserengeta ne bakka wansi w'olusozi.

²⁹Abantu bona mu kibiina bwe bategeera nga Aloonni afudde, ab'omu nnyumba ya Isirayiri bona ne bakungubagira Aloonni okumala ennaku amakumi asatu.

Okubala 21

Yaladi Kizikirizibwa

¹Kabaka Omukanani ow'e Yaladi eyatuulanga mu bukiikaddyo, n'awulira nga Isirayiri ajjira mu kkubo lya Asalimu, n'alumba Isirayiri n'amulwanyisa n'awambamu abamu ku bo.

²Awo Isirayiri ne yeeyama eri MUKAMA Katonda obweyamo buno nti, "Bw'onoogabula abantu bano mu mukono gwaffe, ne tubawangula, ebibuga byabwe tulibizikiririza ddala."

³MUKAMA Katonda n'awulira okwegayirira kw'Abayisirayiri, Abakanani n'abawaayo eri Abayisirayiri, ne bazikiriza ebibuga byabwe; ekifo ekyo ne kituumibwa erinnya Koluma.

Omusota Ogw'Ekikomo

⁴Ne basitula okuva ku lusozi Koola, ne bakwata ekkubo eriraga ku Nnyanja Emyufu, balyoke beetooloole ensi ya Edomu. Abantu nga bali ku lugendo olwo ne batandika okuggwaamu obugumiikiriza.

⁵Ne beemulugunyiza Musa ne Katonda nga boogera nti, "Lwaki mwatuggyga mu Misiri okufiira wano mu malungu? Kubanga temuli mmere; so temuli mazzi; n'obumere buno bwe tufuna tubwetamiddwa."

⁶Awo MUKAMA n'asindikira abantu emisota emikambwe egy'obusagwa, ne gibojja abantu, era abaana ba Isirayiri bangi ne bafa.

⁷Abantu ne bajja awali Musa, ne bamugamba nti, "Twayonoona bwe twakwemulugunyiza ne twemulugunyiza ne MUKAMA Katonda, ne tuboogerako bubi. Tusaba weegayirire MUKAMA atuggyeko emisota gino." Musa n'asabira abantu.

⁸MUKAMA Katonda n'agamba Musa nti, "Kolayo omusota ogufaanana nga giri emikambwe egy'obusagwa oguwanike ku mulongooti; buli anaabojjebwanga omusota, n'agutunulako, anaawonanga."

⁹Awo Musa n'aweesa omusota ogw'ekikomo, n'aguwanika ku mulongooti. Kale buli eyabojjebwanga omusota n'atunula ku musota ogw'ekikomo, ng'awona, ng'aba mulamu.

Olugendo Olwabatuusa mu Mowaabu

¹⁰Awo abaana ba Isirayiri ne basitula ne batambula okutuuka mu Yebosi, ne basiisira omwo.

¹¹Ne basitula okuva mu Yebosi ne batambula, ne basiisira mu Lye-Abalimu, mu ddungu eryolekedde Mowaabu, ku luuyi olw'ebuvanjuba.

¹²Bwe baava awo, ne batambula okulaga mu kiwonvu kya Zeredi, ne basiisira omwo.

¹³Ne bava awo, ne batambula ne basiisira emitala w'omugga Alunoni, oguli mu ddungu erituuka ne ku nsalo ya Abamoli. Omugga Alunoni ye nsalo ya Mowaabu, eyawula Mowaabu n'Abamoli.

¹⁴Kyekyaya kiwandiikibwa mu Kitabo ky'Entalo za MUKAMA Katonda, nti, "Vakebu ne Sufa, n'ebiwonvu bya Alunoni,

¹⁵n'obuserengeto bw'ebiwonvu ebituuka ku kibuga kya Ali, ne byesigama ku nsalo ya Mowaabu."

¹⁶Bwe baava eyo ne batambula okutuuka e Beeri, olwo lwe luzzi MUKAMA we yagambira Musa nti, "Abantu bona bakuŋjaanye, mbawe amazzi."

¹⁷Isirayiri n'alyoka ayimba oluyimba luno, nti, "Weetale, ggwe Oluzzi! Muluyimbirire!

¹⁸Muyimbe ku luzzi abalangira lwe baasima, abakungu n'abantu lwe baayikuula, abakungu, emiggo gyabwe."

¹⁹Ne bava mu ddungu ne batambula okutuuka e Matana. Bwe baava e Matana ne balaga e Nakalieri, ne bava e Nakalieri ne balaga e Bamosi.

²⁰Bwe baava e Bamosi ne balaga mu kiwonvu ekiri mu matwale ga Mowaabu wansi w'olusozi Pisuga, kw'osinziira okulengera eddungu.

Sikoni Awangulwa

²¹Awo Isirayiri n'atuma ababaka eri Sikoni kabaka w'Abamoli ng'amugamba nti,

²²"Tukkirize tuyite mu nsi yo. Tetuliyita mu birime wadde mu nnimiro z'emizabbibu, era tetugenda kunywa na ku mazzi agali mu nzizi. Tugenda kutambilira mu Luguudo lwa Kabaka olunene mwokka okutuusa lwe tuliva mu nsi yo."

²³Naye Sikoni n'atakkiriza Isirayiri kuyita mu nsi ye. N'akuŋjaanya eggye lye lyonna, n'agenda atabaale Isirayiri mu ddungu. Bwe yatuuka e Yakazi n'alwana ne Isirayiri.

²⁴Isirayiri n'amufumita n'obwogi bw'ekitala, n'atwala ensi ye okuva ku mugga Alunoni okutuuka ku mugga Yaboki, n'atuukira ddala ku Bamoni, n'akoma awo, kubanga Abamoni baali ba maanyi nnyo ku nsalo yaabwe.

²⁵Isirayiri n'awamba ebibuga byonna eby'Abamoli n'abeera omwo, ne Kesuboni n'akiwambiramu n'obubuga bwonna obwali bukyetoolodde.

²⁶Kesuboni kye kyali ekibuga ekikulu ekya Sikoni Kabaka w'Abamoli kye yali awambye ng'amaze okulwana n'eyali kabaka wa Mowaabu n'amuggyako ensi ye yonna okutuuka ku Alunoni.

²⁷Abayiiya ennyimba kyebaava bayimba nti, "Mujje e Kesuboni kizimbibwe; ekibuga kya Sikoni kizzibwewo.

²⁸"Omuliro gwafuluma mu Kesuboni,ennimi z'omuliro ne ziva mu kibuga kya Sikoni. Gwayokya Ali ekya Mowaabu, n'abatuula mu nsozi za Alunoni.

²⁹Zikusanze, gwe Mowaabu! Muzikirizibbwa, mmwe abantu ba Kemosi! Batabani be abawaddeyo eri kabaka Sikoni ow'Abamoli ne bafuuka ng'abanoonyi b'obubudamu ne bawala be, ng'abawambe.

³⁰ “Naye tubawangudde Kesuboni azikiridde okutuukira ddala ku Diboni. Tubafufuggazza okutuuka ku Nofa, kwe kutuukira ddala ku Medeba.”

Ogi Awangulwa

³¹ Bw’atyo Isirayiri n’atuula mu nsi y’Abamoli.

³² Musa bwe yamala okutuma abakessi e Yazeri, abaana ba Isirayiri ne bawamba ebibuga ebyali bikyebunguludde, ne bagobamu Abamoli abaabibeerangamu.

³³ Ne bakyuka ne bambukira mu kkubo eriraga e Basani. Ogi kabaka w’e Basani n’eggye lye lyonna ne yeesowolayo okubatabaala mu lutalo olwali mu Ederei.

³⁴ MUKAMA n’agamba Musa nti, “Tomutya; kubanga mugabudde mu mukono gwo, n’eggye lye lyonna awamu n’ensi ye; omukole nga bwe wakola Sikoni kabaka w’Abamoli eyafugiranga mu Kesuboni.”

³⁵ Bwe batyo ne bamutta, ne batabani be, n’eggye lye lyonna, ne batawonyaawo muntu n’omu. Ensi ye ne bagirya.

Okubala 22

Katonda Agaana Balamu Okugenda eri Balaki

¹ Awo abaana ba Isirayiri ne basitula, ne batambula ne basiisira mu lusenyi lwa Mowaabu ku mugga Yoludaani okwolekera Yeriko.

² Balaki mutabani wa Zipoli n’alaba byonna Isirayiri bye yaliakoze Abamoli.

³ Mowaabu n’atya nnyo kubanga abantu abo baali bangi nnyo. Mowaabu okutya abaana ba Isirayiri ne kumusukkirira.

⁴ Awo Mowaabu n’agamba abakulembeze ba Midyaani nti, “Ogubiina gw’abantu bano bajja kulya byonna bye tuli nabyo ebitwetoolodde ng’ente bw’erya n’esaanyaawo omuddo ogw’oku ttale.” Balaki mutabani wa Zipoli, eyali kabaka wa Mowaabu mu biseera ebyo,

⁵ n’atuma ababaka eri Balamu mutabani wa Byoli, eyali mu Pesoli, ekiriraanye Omugga, mu nsi y’ewaabwe, okumuyita ng’amugamba nti, “Abantu bali wano, baavudde mu Misiri, basaanikidde ensi yonna we batudde; basiisidde wano okunninaana.

⁶ Kale nno, nkusaba ojje onkolimirire abantu bano, kubanga bampitiridde amaanyi. Oboolyawo lwe ndisobola okubawangula ne mbagoba mu nsi yange. Kubanga mmayi nga gw’okolimira akolimirwa, ne gw’osabira omukisa aweebwa omukisa.”

⁷ Awo ababaka abaatumibwa, abaali abakulembeze ba Mowaabu n’abakulembeze ba Midyaani, ne basitula nga batutte n’ensimbi ez’okumusasula. Bwe baatuuka eri Balamu ne bamutegeeza obubaka Balaki bwe yabatuma.

⁸ Balamu n'abagamba nti, "Musule wano leero, nange nnaabatuusaako ekigambo MUKAMA ky'anaaba aŋjambye." Bwe batyo abakungu abaava mu Mowaabu ne basula ewa Balamu.

⁹ Katonda n'ajja eri Balamu n'amubuuza nti, "Bantu ki bano abali naawe?"

¹⁰ Balamu n'addamu Katonda nti, "Balaki mutabani wa Zipoli, Kabaka wa Mowaabu ye yampeereza obubaka buno ng'agamba nti,

¹¹ 'Abantu abavudde mu Misiri basaanikidde ensi we batudde. Kale nno jjangu obankolimirire. Oboolyawo ekyo kiyinza okunsobozesa okubalwanyisa ne mbagoba mu nsi yange.'

¹² Naye Katonda n'agamba Balamu nti, "Togenda na bantu abo. Abantu bali tekikugwanidde kubakolimira, kubanga baaweebwa omukisa."

¹³ Enkeera mu makya Balamu n'azuukuka, n'agamba abakungu abaatumibwa Balaki nti, "Muddeeyo mu nsi yammwe, kubanga MUKAMA Katonda aŋjaanye okugenda nammwe."

¹⁴ Abakungu aba Mowaabu ne bakomawo eri Balaki ne bamugamba nti, "Balamu yagaanye okujja naffe."

Katonda Akkiriza Balamu Okugenda

¹⁵ Balaki ne yeeyongera okutuma abakungu abalala, nga baabitibwa binene era nga bangi okusingako ku bali abaasooka.

¹⁶ Ne bajja eri Balamu ne bamugamba nti, "Bw'ati bw'ayogera Balaki mutabani wa Zipoli nti, 'Nkwegayiride, tokkiriza kintu kyonna kukuziyiza kujja gye ndi;

¹⁷ kubanga nzija kutumbula nnyo ekitiibwa kyo, era ŋjenda kukukolera kyonna ky'ononsaba. Jjangu onkoliimiririre abantu bano.'

¹⁸ Naye Balamu n'addamu abo Balaki be yatuma nti, "Balaki ne bw'alimpa enju ye ng'ejjudde ffeeza ne zaabu sigenda kukola kinene oba kitono nga kisukka ku kiragiyo kya MUKAMA Katonda wange.

¹⁹ Kale nno musule wano olwa leero, nga bannammwe bwe baakola, nange mpulire MUKAMA Katonda ky'anaayongera okuŋjamba."

²⁰ Mu kiro ekyo Katonda n'ajja eri Balamu n'amugamba nti, "Obanga abantu abo bakuddukidde, genda nabo, naye okole ekyo kyokka kye nnaakulagira okukola."

Endogoyi ya Balamu Eyogera

²¹ Balamu n'agolokoka mu makya, n'ateeka amatandiiko ku ndogoyi ye, n'agenda n'abakungu ba Mowaabu.

²² Naye Katonda n'asunguwala nnyo kubanga Balamu yagenda, malayika wa MUKAMA Katonda n'ayimirira mu kkubo okumuziyiza. Balamu yali yeebagadde endogoyi ye, abaweereza be babiri nabo baali naye.

²³Endogoyi n'eraba malayika wa MUKAMA Katonda ng'ayimiridde mu kkubo, n'ekitala ekisowoddwa nga kiri mu mukono gwe; endogoyi n'ekyama n'eva mu kkubo n'eraga mu nnimiro. Balamu n'agikuba agizze mu kkubo.

²⁴Malayika wa MUKAMA Katonda n'ayimirira mu kakubo akafunda akayita wakati w'ennimiro z'emizabbibu nga ziriko ekisenge ku buli luuyi.

²⁵Endogoyi bwe yalaba malayika wa MUKAMA Katonda ne yeenyigiriza ku kisenge, n'ebetenterako ekigere kya Balamu. N'ayongera okugikuba.

²⁶Malayika wa MUKAMA Katonda ne yeeyongerayo mu maaso, n'ayimirira mu kakubo akafunda ennyo, awataali kabanga ka kwekyusizaamu kulaga ku mukono ogwa ddyo wadde ku gwa kkono.

²⁷Endogoyi bwe yalaba malayika wa MUKAMA Katonda n'egalamira wansi, nga Balamu ye agituddeko; obusungu bwa Balamu ne bubuubuuka, n'akuba endogoyi n'omuggo gwe.

²⁸Awo MUKAMA Katonda n'ayasamyia akamwa k'endogoyi, n'egamba Balamu nti, "Nkukoze ki okunkuba emirundi gino gyonsatule?"

²⁹Balamu n'agamba endogoyi nti, "Kubanga onfudde atategeera! Singa mbadde n'ekitala mu mukono gwange nandikuttiddewo kaakano."

³⁰Endogoyi n'egamba Balamu nti, "Siri ndogoyi yo gye weebagadde ebbanga lyonna n'okutuusa ku lunaku lwa leero? Ebadde mpisa yange okukukola bwe nti?" Balamu n'addamu nti, "Nedda."

Malayika Alabula Balamu

³¹Awo MUKAMA Katonda n'alyoka azibula amaaso ga Balamu, n'alaba malayika wa MUKAMA ng'ayimiridde wakati mu kkubo n'ekitala ekisowoddwa nga kiri mu mukono gwe. N'awunzika omutwe gwe, ne yeevuunika wansi n'avuunama.

³²Malayika wa MUKAMA Katonda n'amugamba nti, "Lwaki endogoyi ogikubye emirundi egyo gyonsatule? Laba, nzize okukuziyiza kubanga ekkubo ly'okutte terinsanyusa.

³³Endogoyi yandabye n'enneebalama emirundi egyo esatu. Singa teyanneebalamye, nandibadde ggwe nkusse, naye yo nga ngirese."

³⁴Balamu n'agamba malayika wa MUKAMA Katonda nti, "Nnyonoonye. Saategedde nti ggwe oyimiridde mu kkubo okunziyiza. Kale nno nga kye nkoze bwe kitakusanyusizza, ka nzireyo eka."

³⁵Malayika wa MUKAMA Katonda n'agamba Balamu nti, "Genda n'abasajja abo, naye ebiligambo bye nnaakulagira bye byokka by'oba oyogera." Bw'atyio Balamu n'agenda n'abakungu ba Balaki.

Balamu Akyalira Balaki

³⁶ Balaki bwe yawulira nga Balamu ajja, n'afuluma okugenda okumusisinkana mu kibuga kya Mowaabu ekiri ku nsalo ya Alumoni, ku nkomerero yamatwale ge.

³⁷ Balaki n'agamba Balamu nti, "Saakutumira nga nkuyita ojje ku bwange? Lwaki tewajja gye ndi? Olowooza siyinza kukuwa bitiibwa bingi?"

³⁸ Balamu n'addamu nti, "Nzuuno kaakano nzize gy'oli! Naye olowooza nnina obuyinza okwogera kyonna kye njagala? Nteekwa okwogera ebyo byokka Katonda by'anassa mu kamwa kange."

³⁹ Bw'atyo Balamu n'agenda ne Balaki ne bajja e Kiriasikuzosi.

⁴⁰ Balaki n'awaayo ekiweebwayo eky'ente n'endiga, n'aweerezaako ne ku Balamu n'abakungu abaali naye.

⁴¹ Enkeera Balaki n'atwala Balamu n'amulinnyisa ku bifo bya Bamosi Baali, n'asiniira awo okulengera ku kitundu eky'abantu ba Isirayiri abaali okumpi.

Okubala 23

Okulagula kwa Balamu Okusooka

¹ Balamu n'agamba Balaki nti, "Nkolera wano ebyoto musanvu, era onfunire ne sseddume z'ente musanvu, n'endiga ennume musanvu."

² Balaki n'akola nga Balamu bwe yamugamba; bombi Balaki ne Balamu ne bawaayo ente emu n'endiga ennume emu ku buli kyoto.

³ Balamu n'agamba Balaki nti, "Beera wano awali ekiweebwayo kyo nze njire nga nzirako wabbali. Oboolyawo nga MUKAMA anajja n'ansisinkana. Buli kyonna ky'anambikkulira nnaakikutegeeza." N'alaga waggulu ku lusozi awatali bimera.

⁴ Katonda n'asisinkana Balamu; Balamu n'amugamba nti, "Nteeseteese ebyoto musanvu, era ku buli kyoto mpeereddeko ente ya sseddume emu n'endiga ennume emu."

⁵ MUKAMA Katonda n'assa ebiambo mu kamwa ka Balamu n'amugamba nti, "Ddayo eri Balaki omutuuseeko obubaka buno."

⁶ N'addayo gye yali, n'amusanga ng'ayimiridde awali ekiweebwayo kye, n'abakungu bona abo Mowaabu.

⁷ Balamu n'alagula nti, "Balaki ye yanzigya mu Alamu, kabaka wa Mowaabu yanzigya mu nsozi z'ebuvanjuba. N'aŋŋamba nti, 'Jjangu onkolidmiririre Yakobo; jjangu obole Isirayiri.'

⁸ Nnyinza okukolimira abo MUKAMA Katonda batakolididle? Nnyinza okuboola abo MUKAMA Katonda baatabodde?

⁹ Mbalaba okuva ku ntikko ez'enjazi mbalengera nga nsinziira ku nsozi. Ndaba abantu abeeyawuddeko abateerowooza kuba ng'erimu ku mawanga.

¹⁰ Ani ayinza okubala enfuufu ya Yakobo, oba okubala ekitundu ekyokuna ekya Isirayiri? Leka nfe okufa okw'omutuukirivu, n'enkomerero yange ebeere ng'eyaabwe!"

¹¹ Balaki n'agamba Balamu nti, "Onkoze ki kino? Nakuyita kujja kukolimira balabe bange, naye obw'edda bwonna obadde obasabira mukisa!"

¹² N'addamu nti, "Tekijjwanidde kwogera ekyo MUKAMA Katonda ky'atadde mu kamwa kange?"

Okulagula kwa Balamu Okwokubiri

¹³ Balaki n'amugamba nti, "Jjangu tugende mu kifo ekirala w'onoolabira abaana ba Isirayiri; ojja kulabako kitundu butundu so si bona. Kale nno sinziira awo obankolimiririre."

¹⁴ N'amutwala mu nnimiro ya Zofimu, ku ntikko ya Pisuga, n'azimbira eyo ebyoto musanvu n'awaayo sseddume w'ente emu n'endiga ennume emu ku buli kyoto.

¹⁵ Balamu n'agamba Balaki nti, "Beera wano awali ebiweebwayo byo, nze ijnjende musisinkane wali."

¹⁶ MUKAMA Katonda n'asisinkana Balamu, n'ateeka obubaka mu kamwa ke, ng'agamba nti, "Ddayo eri Balaki omuwe obubaka obwo."

¹⁷ N'addayo gy'ali n'amusanga ng'ayimiridde awali ekiweebwayo, ng'ali n'abakungu ba Mowaabu. Balaki n'amubuuza nti, "MUKAMA Katonda agambye ki?"

¹⁸ Bw'atyo n'alagula nti, "Golokoka, Balaki, owulirize; mpulira, mutabani wa Zipoli.

¹⁹ Katonda si muntu, nti ayinza okulimba, oba nti mwana wa bantu nti akyusakyusa ebigambo bye. Ayogera n'atakola? Asuubiza n'atatuukiriza?

²⁰ Mpeereddwa ekiragiro okusaba omukisa; agabye omukisa, era siyinza kukikyusa.

²¹ "Tewali kibi kirabiddwa mu Yakobo, tewali kubonaabona kulabise mu Isirayiri. MUKAMA Katonda waabwe ali nabo; eddoboozi lya kabaka ery'omwanguka liri wakati mu bo.

²² Katonda ye yabaggya mu Misiri, balina amaanyi ng'aga sseddume ey'omu nsiko.

²³ Tewali bulogo ku Yakobo, tewali bulaguzi ku Isirayiri. Kiryogerwako ku Yakobo ne ku Isirayiri nti, 'Mulabe Katonda ky'akoze!'

²⁴ Abantu basituka ng'empologoma enkazi, beeziukusa ng'empologoma ensajja etaweera okutuusa ng'eridde omuyiggo gwayo n'enya omusaayi gw'ebyo by'esse."

²⁵ Balaki n'agamba Balamu nti, "Tobakolimira wadde okubasabira omukisa n'akamu!"

²⁶ Balamu n'addamu nti, "Saakutegeezessa nti kinsaanidde okukola ekyo kyonna MUKAMA Katonda ky'anaagamba?"

Okulagula kwa Balamu Okwokusatu

²⁷ Balaki n'agamba Balamu nti, "Jjangu, nkutwale mu kifo ekirala, oboolyawo Katonda anakkiriza obankoliimiriri ng'osinziira awo."

²⁸ Balaki n'atwala Balamu ku ntikko y'olusozi Peoli, olwolekedde eddungu.

²⁹ Balamu n'agamba Balaki nti, "Nzimbira wano ebyoto musanvu, era onfunireyo wano ente za sseddume musanvu n'endiga ennume musanvu."

³⁰ Balaki n'akola nga Balamu bwe yamusaba, n'awaayo sseddume y'ente emu n'endiga ennume emu ku buli kyoto.

Okubala 24

¹ Awo Balamu bwe yalaba nga MUKAMA Katonda asiimye okuwa Isirayiri omukisa, n'ataddayo kunoonya bya bulaguzi, nga bwe yakola ku mirundi emirala, naye n'ayolekeza amaaso ge eddungu.

² Balamu n'alengera ewala, n'alaba Isirayiri gye yasiisira ng'ebika bwe byali, n'ajjirwa Omwoyo wa Katonda,

³ n'alagula nti, "Okulagula kwa Balamu mutabani wa Byoli, okulagula kw'omuntu azibuddwa amaaso,

⁴ okulagula kw'oyo awulira ekigambo kya Katonda alaba okwolesebwa kw'Ayinzabyonna, eyeeyaze wansi, n'amaaso ge nga gatunula:

⁵ "Eweema zo nga nnungi, Ayi Yakobo, ebifo byo mw'obeera, Ayi Isirayiri!

⁶ "Byeyaliiridde ng'ebiwonvu, ng'ennimiro ku mabbali g'omugga, ng'emigavu egisimbiddwa MUKAMA ng'emivule egiri okumpi n'amazzi.

⁷ Amazzi ganaakulukutanga mu bulobo bwabwe; ne gabooga ensigo zaabwe zirifunanga amazzi mangi. "Kabaka waabwe aliba wa kitibwa okukira Agagi obwakabaka bwabwe bunaagulumizibwanga.

⁸ "Katonda ye yabaggya mu Misiri balina amaanyi nga aga sseddume ey'omu nsiko. Basaanyaawo amawanga g'abalabe ne bamenyaamenya amagumba gaabwe mu butundutundu, ne babalasa n'obusaale bwabwe.

⁹ Ng'empologoma ensajja, beekulula ne bagalamira wansi, ng'empologoma enkazi; ani ayanjanga okubagolokosa? “Akusabiranga omukisa aweebwenga omukisa n'oyo akukolimira akolimirwenga!”

¹⁰ Awo obusungu bwa Balaki ne bubuubuukira ku Balamu. N'akuba mu ngalo omulundi gumu, n'amugamba nti, “Nakuyita okolimire abalabe bange, naye obasabidde mukisa emirundi gino gyonsatule.

¹¹ Kale nno situka oddeyo ewammwe! Nagamba nti nnandikuwadde ebitiibwa bingi, naye MUKAMA akuziyizza okuweebwa ebitiibwa ebyo.”

¹² Balamu n'agamba Balaki nti, “Ababaka bo be wantumira, saabagamba nti,

¹³ ‘Balaki ne bw'alimpa ennyumba ye ng'ejjudde zaabu ne ffeeza, sigenda kusukka kiragiro kya MUKAMA ne nkola ekyange ku bwange oba nga kirungi oba nga kibi, wabula nga ndyogera ebyo byokka MUKAMA by'alindagira okwogera?’

¹⁴ Kaakano nno nzirayo ewaffe mu bantu bange, naye wuliriza nga nkulabulaabantu bano kye balikola abantu bo mu nnaku ezijja.”

Okulagula kwa Balamu Okwokuna

¹⁵ N'ala gula bw'ati nti, “Okulagula kwa Balamu mutabani wa Byoli, okulagula kw'omuntu azibuddwa amaaso,

¹⁶ okulagula kw'oyo awulira ekigambo kya Katonda, aggya okutegeera eri oyo Ali Waggulu Ennyo alaba okulabikirwa kw'Ayinzabyonna eyeyaze wansi, n'amaaso ge nga gatunula.

¹⁷ “Mmulaba, naye si kaakano; mmutunuulira, naye tali kumpi. Emmunyeenye eriva ewa Yakobo; omufuzi alisituka ng'ava mu Isirayiri. Alibetenta Mowaabu, obuwanga bw'abatabani ba Seezi.

¹⁸ Edomu aliwangulwa; Seyiri, omulabe we, aliwangulwa, naye Isirayiri alyeyongera amaanyi.

¹⁹ Omufuzi alisituka ng'ava mu Yakobo n'azikiriza ab'omu kibuga abaliba bawonyeewo.”

Okulagula kwa Balamu Okusembayo

²⁰ Balamu n'alaba Amaleki, n'ala gula nti, “Amaleki ye yakulemberanga mu mawanga, naye ku nkomerero agenda kuzikirira.”

²¹ N'alaba Abakeeni, n'ala gula nti: “Ekifo kyo w'o beera wagumu, ekisu kyo kiri mu lwazi

²² naye era mmwe Abakeeni mugenda kuzikirizibwa Asuli bw'alibatwala mu busibe.”

²³ Ate n'ala gula nti, “Woowe! Ani aba omulamu nga Katonda asazeewo eky'okukola?

²⁴ Ebyombo birijja nga biva ku mbalama za Kittimu; birifufuggaza Asuli ne Eberi, naye nabyo birizikirira.”

²⁵ Awo Balamu n'asituka n'addayo ewaabwe, ne Balaki n'akwata agage.

Okubala 25

Isirayiri Asinza Bakatonda Abalala mu Sitimu

¹ Isirayiri bwe yali mu Sitimu, abasajja ne batandika okwenda n'abakazi ba Mowaabu,

² abaabayitanga ku kuwaayo ebiweebwayo eri bakatonda baabwe. Abaana ba Isirayiri ne balya era ne bavuunamira bakatonda abo.

³ Bw'atyo Isirayiri n'ayingirira eby'okusinzanga Baali ow'e Peoli. Obusungu bwa MUKAMA ne bubabuubuukirako.

⁴ MUKAMA n'agamba Musa nti, “Kwata abakulembeze b'abantu bano obatte, obaanike mu maaso ga MUKAMA abantu bona we babalabira, obusungu bwa MUKAMA bulyoke bukkakkane buve ku Isirayiri.”

⁵ Musa n'agamba abalamuzi ba Isirayiri nti, “Buli omu ku mmwe atte abo abali mu mmwe abeegasse mu kusinza Baali ow'e Peoli.”

⁶ Kale, laba, omusajja omu ku baana ba Isirayiri n'aleeta mu maka ge omukazi Omumidiyaani awo mu maaso ga Musa, nga n'ekibiina kyonna ekya Isirayiri bali awo bakaabira mu mulyango gwa Weema ya MUKAMA ey'Okukuñjaanirangamu.

⁷ Naye Finekaasi mutabani wa Eriyazaali, mutabani wa Alooni kabona, bwe yakiraba, n'asituka mu kibiina n'akwata effumu mu mukono gwe

⁸ n'agoberera Omuyisirayiri n'amutuusa mu weema. Bombi n'abafumita effumu ne liyita mu Muyisirayiri ne liggukira ne mu mubiri gw'omukazi, ne libayitamu bombi. Awo kawumpuli eyali alumbye abaana ba Isirayiri n'akoma.

⁹ N'abo abaafa kawumpuli baawera emitwalo ebiri mu enkumi nnya.

¹⁰ MUKAMA n'agamba Musa nti,

¹¹ “Finekaasi mutabani wa Eriyazaali, mutabani wa Alooni kabona, ankyusicizza obusungu bwange ne mbuggya ku baana ba Isirayiri; kubanga obusungu bwe bwabuubuuka nnyo ng'obwange olw'obutafaayo ku kitibwa kyange, kyenvudde sibazikiriza kubamalawo.

¹² Noolwekyo mutegeeze nti, ‘Laba nkola naye endagaano ey'emirembe.

¹³ Ye, ne bazzukulu be bona banaabanga mu ndagaano ey'obwakabona obw'emirembe gyonna, kubanga yasunguwalira abaana ba Isirayiri olw'okutyoboola ekitiibwa kya Katonda we, n'abatangiririra.’”

¹⁴Omusalija Omuyisirayiri eyattirwa awamu n'omukazi Omumidiyaani yali Zimuli mutabani wa Salu eyali omukulembeze mu kika kya Simyoni.

¹⁵N'erinnya ly'omukazi Omumidiyaani eyattibwa nga ye Kozebi muwala wa Zuuli, eyali omukulembeze mu kimu ku bika bya Midiyaani.

¹⁶MUKAMA n'agamba Musa nti,

¹⁷"Abamidiyaani obayigganyanga n'obatta,

¹⁸kubanga baayagala okubazikiriza n'enewe zaabwe bwe baabakyamya e Peoli, n'olwa Kozebi muwala w'omukulembeze w'e Midiyaani, omukazi oyo eyattibwa ku lunaku okwajjira kawumpuli olw'ebyo ebyali e Peoli."

Okubala 26

Okubala Abantu Okwokubiri

¹Awo oluvannyuma lwa kawumpuli, MUKAMA Katonda n'agamba Musa ne Eriyazaali, mutabani wa Aloonni, kabona, nti,

²"Bala omuwendo gw'abantu bona abali mu kibiina ky'abaana ba Isirayiri, ng'obabala mu bika byabwe ne mu mayumba ga bakadde baabwe. Bala abasajja bona abawezenza emyaka amakumi abiri n'okusingawo abakyasobola okutabaala mu ggye lya Isirayiri."

³Bwe batyo, nga bali mu nsenyi za Mowaabu, ku ludda lw'omugga Yoludaani okwolekera Yeriko, Musa ne Eriyazaali kabona, ne boogera ne bagamba abantu nti,

⁴"Mubale abasajja bona abawezenza emyaka amakumi abiri n'okusingawo, nga MUKAMA Katonda bwe yalagira Musa." Bano be baana ba Isirayiri abaava mu nsi y'e Misiri:

⁵Ab'omu kika kya Lewubeeni, mutabani wa Isirayiri omubereberye, be bano: abaava mu Kanoki, lwe lunyiriri lw'Abakanoki; abaava mu Palu, lwe lunyiriri lw'Apaluu;

⁶abaava mu Kezulooni, lwe lunyiriri lw'Abakezulooni; abaava mu Kalumi, lwe lunyiriri lw'Abakalumi.

⁷Ezo ze nnyiriri z'ekika kya Lewubeeni. Abo abaabalibwa baawera emitwalo ena mu enkumi ssatu mu lusanvu mu amakumi asatu (43,730).

⁸Mutabani wa Palu yali Eriyaabu,

⁹ne batabani ba Eriyaabu baali, Nemweri ne Dasani ne Abiraamu. Dasani ne Abiraamu be bo abaali abakulembeze mu kibiina abaajeemera Musa ne Aloonni era baali mu kabondo k'abagoberezi ba Koola abaajeemera MUKAMA Katonda.

¹⁰Ensi yayasamya akamwa kaayo n'ebamira, ne bafira wamu ne Koola; n'abagoberezi ba Koola ebikumi bibiri mu ataano nabo baazikirizibwa mu muliro ogwabasaanyaawo. Ne babeera kabonero ka kulabirako akanaalabulanga abantu.

¹¹Kyokka olunyiriri lwa Koola terwazikiririra ddala lwonna.

¹²Ab'omu kika kya Simyoni ng'ennyiriri zaabwe bwe zaali be bano: abaava mu Nemweri, lwe lunyiriri lw'Abanemweri; abaava mu Yamini, lwe lunyiriri lw'Abayamini; abaava mu Yakini, lwe lunyiriri lw'Abayakini;

¹³abaava mu Zeera, lwe lunyiriri lw'Abazeera; abaava mu Sawuli, lwe lunyiriri lw'Abasawuli.

¹⁴Ezo ze nnyiriri z'ekika kya Simyoni. Abaablibwa baawera abasajja emitwalo ebiri mu enkumi bbiri mu ebikumi bibiri (22,200).

¹⁵Ab'omu kika kya Gaadi ng'ennyiriri zaabwe bwe zaali, be bano: abaava mu Zefoni, lwe lunyiriri lw'Abazefoni; abaava mu Kagi, lwe lunyiriri lw'Abakagi; abaava mu Suni, lwe lunyiriri lw'Abasuni;

¹⁶abaava mu Ozeni, lwe lunyiriri lw'Abaozeni; abaava mu Eri, lwe lunyiriri lw'Abaeri;

¹⁷abaava mu Alodi, lwe lunyiriri lw'Abaalodi; abaava mu Aleri, lwe lunyiriri lw'Abaaleri.

¹⁸Ezo ze nnyiriri z'ekika kya Gaadi. Abaablibwa baawera abasajja emitwalo ena mu ebikumi bitaano (40,500).

¹⁹Eri ne Onani baali batabani ba Yuda, naye ne bafira mu nsi ya Kanani.

²⁰Ab'omu kika kya Yuda ng'ennyiriri zaabwe bwe zaali, be bano: abaava mu Seera, lwe lunyiriri lw'Abaseera; abaava mu Pereezi, lwe lunyiriri lw'Abapereezi; abaava mu Zeera, lwe lunyiriri lw'Abazeera.

²¹Bazzukulu ba Pereezi be bano: abaava mu Kezulooni, lwe lunyiriri lw'Abakezulooni abaava mu Kamuli, lwe lunyiriri lw'Abakamuli.

²²Ezo ze nnyiriri z'ekika kya Yuda. Abaablibwa baawera abasajja emitwalo musanvu mu kakaaga mu ebikumi bitaano (76,500).

²³Ab'omu kika kya Isakaali ng'ennyiriri zaabwe bwe zaali, be bano: abaava mu Tola, lwe lunyiriri lw'Abatola; abaava mu Puva, lwe lunyiriri lw'Abapuva;

²⁴abaava mu Yasubu, lwe lunyiriri lw'Abayasubu; abaava mu Simuloni, lwe lunyiriri lw'Abasimuloni

²⁵Ezo ze nnyiriri z'ekika kya Isakaali. Abaablibwa baawera abasajja emitwalo mukaaga mu enkumi nnya mu ebikumi bisatu (64,300).

²⁶Ab'omu kika kya Zebbulooni ng'ennyiriri zaabwe bwe zaali be bano: abaava mu Seredi, lwe lunyiriri lw'Abaseredi; abaava mu Eroni, lwe lunyiriri lw'Abaeroni; abaava mu Yaleeri, lwe lunyiriri lw'Abayaleeri.

²⁷Ezo ze nnyiriri z'ekika kya Zebbulooni. Abaablibwa baawera abasajja emitwalo mukaaga mu ebikumi bitaano (60,500).

²⁸Ab'omu kika kya Yusufu nga bayita mu bika bya batabani be Manase ne Efulayimu.

²⁹Ab'omu kika kya Manase ng'ennyiriri zaabwe bwe zaali be bano: abaava mu Makiri, lwe lunyiriri lw'Abamakiri, Makiri ye yali kitaawe wa Gireyaadi. Abaava mu Gireyaadi, lwe lunyiriri lw'Abagireyaadi.

³⁰Ab'omu kika kya Gireyaadi ng'ennyiriri zaabwe bwe zaali be bano: abaava mu Yezeeri, lwe lunyiriri lw'Abayezeeri, abaava mu Kerek, lwe lunyiriri lw'Abakerek;

³¹abaava mu Asuliyeri, lwe lunyiriri lw'Abasuliyeri, abaava mu Sekemu, lwe lunyiriri lw'Abasekemu:

³²abaava mu Semida, lwe lunyiriri lw'Abasemida; abaava mu Keferi, lwe lunyiriri lw'Abakeferi.

³³Zerofekadi teyazaala baana balenzi, yalina bawala bokka, amannya gaabwe ge gano: Maala, ne Noowa ne Kogula ne Mirika ne Tiruza.

³⁴Ezo ze nnyiriri z'ekika kya Manase; abaablibwa baawera abasajja emitwalo etaano mu enkumi bbiri mu lusanvu (52,700).

³⁵Ab'omu kika kya Efulayimu ng'ennyiriri zaabwe bwe zaali, be bano: abaava mu Susera, lwe lunyiriri lw'Abasusera; abaava mu Beker, lwe lunyiriri lw'Ababeker; abaava mu Takani, lwe lunyiriri lw'Abatakani.

³⁶Bano be bazzukulu ba Susera: abaava mu Erani, lwe lunyiriri lw'Abaerani.

³⁷Ezo ze nnyiriri z'ekika kya Efulayimu; n'abaabilibwa baawera abasajja emitwalo esatu mu enkumi bbiri mu ebikumi bitaano (32,500). Abo bona baava mu Yusufu ng'ebika byabwe bwe byali n'ennyiriri zaabwe bwe zaali.

³⁸Ab'omu kika kya Benyamini ng'ennyiriri zaabwe bwe zaali, be bano: abaava mu Bera, lwe lunyiriri lw'Ababera; abaava mu Asuberi, lwe lunyiriri lw'Abasuberi abaava mu Akiram, lwe lunyiriri lw'Abakiram

³⁹abaava mu Sufamu, lwe lunyiriri lw'Abasufamu; abaava mu Kufamu, lwe lunyiriri lw'Abakufamu.

⁴⁰Abazzukulu ba Bera nga bava mu Aluda ne Naamani ng'ennyiriri zaabwe bwe zaali be bano: abaava mu Aluda, lwe lunyiriri lw'Abaluda; abaava mu Naamani, lwe lunyiriri lw'Abanaamani.

41 Ezo ze nnyiriri z'ekika kya Benyamini; n'abaabalibwa baawera abasajja emitwalo ena mu enkumi ttaano mu lukaaga (45,600).

42 Ab'omu kika kya Ddaani ng'enneyiriri zaabwe bwe zaali be bano: abaava mu Sukamu, lwe lunyiriri lw'Abasukamu. Abo be baava mu Ddaani.

43 Zonna zaali nnyiriri za Basukamu. Abaabalibwa baawera abasajja emitwalo mukaaga mu enkumi nnya mu ebikumi bina (64,400).

44 Ab'omu kika kya Aseri ng'enneyiriri zaabwe bwe zaali be bano: abaava mu Imuna, lwe lunyiriri lw'Abayimuna; abaava mu Isuvi, lwe lunyiriri lw'Abayisuvi; abaava mu Beriya, lwe lunyiriri lw'Ababeriya.

45 Ate okuva mu bazzukulu ba Beriya, ze zino: abaava mu Keberi, lwe lunyiriri lw'Abakeberi; abaava mu Malukiyeeri, lwe lunyiriri lw'Abamalukiyeeri.

46 Aseri yalina omwana omuwala erinnya lye nga ye Seera.

47 Ezo ze nnyiriri z'ekika kya Aseri; n'abaabalibwa baawera abasajja emitwalo etaano mu enkumi ssatu mu ebikumi bina (53,400).

48 Ab'omu kika kya Nafutaali ng'enneyiriri zaabwe bwe zaali be bano: abaava mu Yazeeri, lwe lunyiriri lw'Abayazeeri, abaava mu Guni, lwe lunyiriri lw'Abaguni

49 abaava mu Yezeri, lwe lunyiriri lw'Abayezeeri; abaava mu Siremu, lwe lunyiriri lw'Abasiremu.

50 Ezo ze nnyiriri z'ekika kya Nafutaali. Abaabalibwa baawera abasajja emitwalo ena mu enkumi ttaano mu ebikumi bina (45,400).

51 Okugatta awamu omuwendo gwonna ogw'abaana ba Isirayiri abasajja abaabalibwa baawera emitwalo nkaaga mu lukumi mu lusanvu mu amakumi asatu (601,730).

Okugabanya Ensi

52 Awo MUKAMA Katonda n'agamba Musa nti,

53 “Ensi ejja kubagabanyizibwamu okubeera obutaka bwabwe ng'obungi bw'amannya gaabwe bwe buli.

54 Ekibiina ekinene kinaafuna wanene, n'ekibiina ekitono kinaafuna watono. Buli kibiina kinaafuna obunene nga obungi bw'amannya agali ku lukalala bwe genkana obungi.

55 Weegendereze okukakasa ng'ensi egabanyizibbwa mu bwenkanya. Ekika, ekitundu kye kinaafuna kineesigama ku bungi bw'amannya ga bajjajja b'ekika ekyo.

56 Ebitundu ebinene binaagabanyizibwa ku kalulu, era n'ebitundu ebitono nabyo bwe bityo.”

Okubala Abaleevi

⁵⁷ Bano be Baleevi abaabalibwa ng'enyiriri zaabwe bwe zaali: abaava mu Gerusoni, lwe lunyiriri lw'Abagerusoni; abaava mu Kokasi, lwe lunyiriri lw'Abakokasi; abaava mu Merali, lwe lunyiriri lw'Abamerali.

⁵⁸ Ne zino nazo nnyiriri za Baleevi: olunyiriri lw'Ababalibuni, olunyiriri lw'Abakebbulooni, olunyiriri lw'Abamakuli, olunyiriri lw'Abamusi, n'olunyiriri lw'Abakoola. Kokasi yazaala Amulaamu.

⁵⁹ Erinnya lyu muka Amulaamu ye yali Yokebedi muwala wa Leevi, Leevi gwe yazaalira mu Misiri. N'azaalira Amulaamu bano: Aloon, ne Musa ne mwannyinaabwe Miryamu.

⁶⁰ Aloon ye yali kitaawe wa bano: Nadabu, ne Abiku, ne Eriyazaali ne Isamaali.

⁶¹ Kyokka Nadabu ne Abiku ne bafa bwe baakuma omuliro ogutali mutukuvu mu maaso ga MUKAMA.

⁶² Abasajja bona okuva ku mwezi ogumu ogw'obukulu n'okusingawo, abaabalibwa, baali emitwalo ebiri mu enkumi ssatu (23,000). Tebaabalirwa wamu na baana ba Isirayiri nga babalibwa, kubanga Abaleevi bo tebaaweebwa mugabo gwa butaka ng'abaana ba Isirayiri bagabana.

⁶³ Abo be baabalibwa Musa ne Eriyazaali kabona lwe baabala abaana ba Isirayiri mu nsenyi za Mowaabu ku mugga Yoludaani okwolekera Yeriko.

⁶⁴ Naye mu bano abaabalibwa temwalimu musajja n'omu ku abo abaali babaliddwa Musa ne Aloon kabona bwe baabala abaana ba Isirayiri mu Ddungu lyu Sinaayi.

⁶⁵ Kubanga MUKAMA Katonda yali agambye abaana ba Isirayiri abo nti awatali kubuusabuusa bona bagenda kufiira mu ddungu. Era tewali n'omu eyasigalawo nga mulamu okuggyako Kalebu mutabani wa Yefune, ne Yoswa mutabani wa Nuuni.

Okubala 27

Abawala ba Zerofekadi

¹ Abawala ba Zerofekadi mutabani wa Keferi, mutabani wa Gireyaadi, mutabani wa Makiri, mutabani wa Manase, baali ba mu kika kya Manase mutabani wa Yusufu. Amannya g'abawala abo nga ge gano: Maala, ne Noowa, ne Kogula, ne Mirika ne Tiruza.

² Lwali lumu, ne bajja okumpi n'omulyango gwa Weema ya MUKAMA ey'Okukuinjaanirangamu, ne bayimirira mu maaso ga Musa ne Eriyazaali kabona, ne mu maaso g'abakulembeze n'ag'ekibiina kyonna, ne bagamba nti,

³“Kitaffe yafiira mu ddungu. Teyali omu ku bajeemu abagoberezi ba Koola abaajeemera MUKAMA; naye ye yafa bufi lwa bibi bye, naye teyalekawo baana babulenzi.

⁴Lwaki erinnya lya kitaffe mu kika linaabulamu olw'obutazaala mwana wabulenzi? Mutuwe omugabo mu baganda ba kitaffe.”

⁵ Musa n'aleeta ensonga zaabwe awali MUKAMA Katonda.

⁶MUKAMA n'agamba Musa nti,

⁷“Abawala ba Zerofekadi kye bagamba kituufu; bafunire omugabo ogw'obutaka awamu ne baganda ba kitaabwe, era n'omugabo gwa kitaabwe gubaweebwe.

⁸“Era gamba abaana ba Isirayiri nti, ‘Omusajja bw'anaafanga nga taleseewo mwana wabulenzi, kale omugabo gwe ogw'obusika bwe gunaaweebwanga omwana we omuwala.

⁹Bw'ataabenga na mwana wabuwala, omugabo gwe onooguwanga baganda be.

¹⁰Bw'anaabanga talina baganda be, omugabo gwe onooguwanga baganda ba kitaawe.

¹¹Kitaawe bw'aba nga teyalina baganda be, omugabo gwe onooguwanga owooluganda asinga okuba ow'okumpi mu kika kye, oyo y'anaagutwalanga. Eryo linaabanga tteeka erinaakwatibwanga abaana ba Isirayiri, nga MUKAMA Katonda bwe yalagira Musa.’”

Yoswa Alondebwa Okusikira Musa

¹²Awo MUKAMA Katonda n'agamba Musa nti, “Yambuka waggulu ku lusozi luno Abalimu olengere ensi gye mpadde abaana ba Isirayiri.

¹³Bw'onoomala okugiraba, naawe ojja kugendaabantu bo bona gye baalaga, nga bwe kyali ne ku muganda wo Aloonni,

¹⁴kubanga mwembi mwajeemera ekigambo kyange, abantu bwe baajagalala mu ddungu lya Zini ne mutampeesakitiibwa ng'omutukuvu mu maaso gaabwe.” Ago ge gaali amazzi ag'e Meriba mu Kadesi mu ddungu ly'e Zini.

¹⁵Awo Musa n'agamba MUKAMA Katonda nti,

¹⁶“MUKAMA Katonda w'emyoyo gy'abantu bona, alonde omusajja okulabirira ekibiina kino,

¹⁷afulumenga era ayingirenga mu maaso gaabwe, omuntu anaabafulomyanga era anaabayingizanga, abantu ba MUKAMA baleme okuba ng'endiga ezitaliiko musumba.”

¹⁸ MUKAMA Katonda n'agamba Musa nti, “Twala Yoswa mutabani wa Nuuni, omusajja alimu omwoyo, omusseeko omukono gwo.

¹⁹Muyimirize mu maaso ga Eriyazaali kabona ne mu maaso g'ekibiina kyonna, omukuutirire mu maaso gaabwe.

²⁰Mukwase ekitundu ky'obuyinza bwo, ekibiina kyonna eky'abaana ba Isirayiri batandike okumugondera.

²¹Anajjanga n'ayimirira mu maaso ga Eriyazaali kabona anaamutegeezanga ebinaabanga bisaliddwawo ng'akozesa Ulimu mu maaso ga MUKAMA Katonda. Abaana ba Isirayiri bona, bw'anaalagiranga banaafulumanga, era bw'anaalagiranga banaayingiranga."

²²Awo Musa n'akola nga MUKAMA Katonda bwe yamulagira. Yatwala Yoswa n'amuyimiriza mu maaso ga Eriyazaali kabona, ne mu maaso g'ekibiina kyonna.

²³Bw'atyo n'amussaako emikono gye, n'amukuutira, nga MUKAMA Katonda bwe yalagira Musa.

Okubala 28

Ekiweebwayo Ekyा buli Lunaku

¹MUKAMA Katonda n'agamba Musa nti,

²"Lagira abaana ba Isirayiri ng'obagamba nti, 'Mutegekenga ekiweebwayo kyange mu biseera bye nnyini, ye mmere ey'ebiweebwayo byange ebyokye, nga bivaamu akawoowo akalungi akasanyusa.'

³Bagambe nti, 'Ekiweebwayo ekyokye ky'ojjanga okuwaayo eri MUKAMA, kinaabanga bwe kit: endiga ennume bbiri ezitaliiko kamogo nga buli emu ya mwaka gumu ogw'obukulu: zaakuweebwangayo nga njokye buli lunaku.

⁴Endiga emu munaagiwangayo mu makya, n'endiga eyookubiri munaagiwangayo akawungeezi;

⁵nga muteekeddeko ne kilo emu n'ekitundu ez'obuwunga obulungi nga butabuddwamu lita ng'emu ey'amatuta ge zeyituuni.

⁶Ekyo ky'ekiweebwayo ekyokebwa ekya buli kiseera nga bwe kyalagirwa ku lusozi Sinaayi, nga ke kawoowo akasanyusa ak'ekiweebwayo ekyokye eri MUKAMA.

⁷Ekiweebwayo ekyokunyuwa ekigenderako kinaabanga kya lita ng'emu ku buli ndiga. Ekiweebwayo ekyokunyuwa eri MUKAMA Katonda munaakifukiranga mu watukuvu.

⁸Endiga eyookubiri mugiteekateekanga kawungeezi, mu ngeri y'emu n'eyo ey'omu makya. Ekyo kinaabanga ekiweebwayo ekyokebwa, omuva akawoowo akalungi akasanyusa MUKAMA Katonda.'

Ebiweebwayo eby'oku Ssabbiiti

⁹ “Ku lunaku lwa Ssabbiiti munaaleetanga ekiweebwayo eky'endiga ennume ez'omwaka ogumu ogw'obukulu, ezitaliiko kamogo, wamu n'ekiweebwayo ekyokunywa ekigenderako, n'ekiweebwayo eky'obuwunga obulungi ekiweza nga kilo ssatu n'obutundu bubiri n'ekitundu nga butabuddwamu amafuta ag'omuzeeyituuni.

¹⁰ Kino kye kinaabanga ekiweebwayo ekyokebwa ekya buli Ssabbiiti, nga kyongerwa ku kiweebwayo ekyokebwa ekya buli kiseera awamu n'ekiweebwayo ekyokunywa ekigenderako.

Ekiweebwayo ng'Omwezi Gwakaboneka

¹¹ “Ku buli lunaku olw'olubereberye olwa buli mwezi onooleetanga eri MUKAMA ekiweebwayo ekyokebwa eky'ente ennume ento bbiri, n'endiga ento ennume emu, n'abaana b'endiga abalume musanvu abawezenza omwaka ogumu ogw'obukulu; byonna nga tebiriiko kamogo.

¹² Ku buli nte nnume ento munaaleeterangako kilo ttaano ez'obuwunga obulungi obutabuddwamu amafuta ag'omuzeeyituuni; ku ndiga ento ennume munaaleeterangako ekiweebwayo eky'emmere y'empeke epima kilo ssatu n'obutundutundu bubiri n'ekitundu ez'obuwunga obulungi obutabuddwamu amafuta ag'omuzeeyituuni;

¹³ ku buli mwana gw'endiga ennume munaaleeterangako ekiweebwayo eky'emmere y'empeke eky'obuwunga obulungi obupima kilo emu n'ekitundu obutabuddwamu amafuta ag'omuzeeyituuni. Ebyo byonna bye by'ekiweebwayo ekyokebwa, ekivaamu akawoowo akalungi ak'ekiweebwayo ekiri ku muliro, ekiweereddwayo eri MUKAMA Katonda.

¹⁴ Ku buli nte ennume ento kunaaleeterwangako ekiweebwayo ekyokunywa ekya lita emu n'obutundu munaana eza wayini; ku ndiga ennume ento ekya wayini apima lita emu n'obutundu bubiri, ne ku buli mwana gw'endiga ennume ekyokunywa ekya lita emu n'obutundu bubiri eza wayini. Ekyo kye kinaabanga ekiweebwayo ekyokebwa ekya buli mwezi nga gwakaboneka mu mwaka.

¹⁵ Ng'oggyeko ekiweebwayo ekyokebwa ekya bulijjo awamu n'ekiweebwayo ekyokunywa ekigenderako, munaaleetanga embuzi ennume nga kye kiweebwayo olw'ekibi eri MUKAMA Katonda.

Embaga ey'Okuyitako

¹⁶ “Olunaku olw'ekkumi n'enya mu mwezi ogw'olubereberye kwe kunaabanga Embaga ey'Okuyitako kwa MUKAMA Katonda.

¹⁷ Ku lunaku olw'ekkumi n'ettaano olw'omwezi ogwo kwe kunaabeeranga embaga; munaalyanga emigaati egitali mizimbulukuse okumala ennaku musanvu.

¹⁸Ku lunaku olw'olubereberye munaabeeranga n'okukunjaana okutukuvu; era temulukolerangako mirimu gyonna egy'okukakaalukana.

¹⁹Munaawangayo ekiweebwayo ekyokebwa eri MUKAMA Katonda, ekiweebwayo ekyokebwa eky'ente eza sseddume ento bbiri, n'endiga ento ennume emu, n'abaana b'endiga abalume abawezenza omwaka gumu ogw'obukulu; nga byonna tebiriiko kamogo.

²⁰Ku buli nte ento ennume munaaleeterangako ekiweebwayo eky'emmere y'empeke ng'eweza kilo ssatu ez'obuwunga obulungi obutabuddwamu amafuta ag'omuzeeyituuni; ku ndiga ennume ento munaaleeterangako kilo bbiri;

²¹ne ku buli emu ku baana b'endiga ennume omusanvu, kilo emu.

²²Munaaleeterangako embuzi ennume emu ey'ekiweebwayo olw'ekibi olw'okwetangiririza.

²³Ebyo byonna munaabiteekateekanga nga mwongereza ku kiweebwayo ekyokebwa ekya bulijo ekya buli makya.

²⁴Munaategekanga mu ngeri eyo, buli lunaku, emmere ey'ekiweebwayo ekyokebwa, okumala ennaku musanvu, nga ke kawoowo akasanyusa MUKAMA Katonda; ekyo kinaateekebwateekebwanga okwongereza ku kiweebwayo ekyokebwa ekya bulijo awamu n'ekiweebwayo ekyokunywa ekigenderako.

²⁵Ku lunaku olw'omusanvu munaakubangawo olukuinjaana olutukuvu, era temuukolerengako mirimu gyonna egya bulijo egy'okukakaalukana.

Embaga ey'Ebibala Ebibereberye

²⁶"Ku lunaku olw'ebibala ebibereberye, kwe munaaleeteranga ekiweebwayo eky'emmere y'empeke ey'obuwunga, eri MUKAMA Katonda, ku Mbaga ya Wiiki, munaakubanga olukuinjaana olutukuvu; era temuukolerengako mirimu gyonna egya bulijo egy'okukakaalukana.

²⁷Munaawangayo ekiweebwayo ekyokebwa eky'ente ento eza sseddume bbiri, n'endiga ento ennume emu, n'abaana b'endiga abalume abawezenza omwaka ogumu ogw'obukulu musanvu, nga ke kawoowo akasanyusa MUKAMA Katonda.

²⁸Ku buli nte ya sseddume kunaaleeterwangako ekiweebwayo eky'emmere y'empeke ey'obuwunga obulungi obutabuddwamu amafuta ag'omuzeeyituuni obupima kilo ttaano; ne ku ndiga ennume ento, obupima kilo ssatu n'obutundu bubiri n'ekitundu;

²⁹ne ku buli emu ku baana b'endiga ennume omusanvu, obupima kilo emu n'ekitundu.

³⁰Munaagattangako n'embuzi ennume emu ento olw'okwetangiririza.

³¹Ebyo byonna munaabiwangayo awamu n'ekiweebwayo kyabyo ekyokunywa; okwo kwe munaagattanga ekiweebwayo ekyokebwa ekya bulijo n'ekiweebwayo kyako eky'emmere ey'empeke. Mwegenderezenga okulaba ng'ensolo ezo zonna teziriiko kamogo."

Okubala 29

Ebiweebwayo eby'Embaga ey'Amakondeere

¹"Ku lunaku olw'olubereberye olw'omwezi ogw'omusantu munaakubanga olukunjanaa olutukuvu, era temuukolerengako mulimu gwonna ogwa bulijo ogw'okukakaalukana. Olwo lwe lunaabanga olunaku lwammwe kwe munaafuyiranga amakondeere.

²Munaawangayo ekiweebwayo ekyokebwa eky'akawoowo akasanyusa MUKAMA Katonda. Munaateekateekanga ente ento eza sseddume bbiri, n'endiga ento ennume emu, n'abaana b'endiga abalume abawezessa omwaka ogumu ogw'obukulu musantu; ebyo byonna nga tebiriiko kamogo.

³Ku buli nte ya sseddume kunaaleeterwangako ekiweebwayo eky'emmere ey'empeke ey'obuwunga obulungi obutabuddwamu amafuta ag'omuzeeyituuni obupima lita mukaaga n'ekitundu; ne ku ndiga ennume ento obupima kilo ssatu n'obutundu bubiri n'ekitundu,

⁴ne ku buli emu ku baana b'endiga omusantu, obupima kilo emu n'ekitundu.

⁵Mugattangako n'embuzi emu ennume, nga kye kiweebwayo olw'ekibi, okwetangiririza.

⁶Okwo kwe munaagattanga ebiweebwayo ebyokebwa ebya buli mwezi, n'ebiweebwayo byabyo eby'emmere y'empeke n'ebiweebwayo ebyokunywa, nga bwe kyalagirwa. Binaabanga ebiweebwayo ebyokebwa nga biweereddwayo eri MUKAMA Katonda ne muvaamu akawoowo akalungi akasanyusa.

Olunaku olw'Ebiweebwayo olw'Okwetangiririra

⁷"Ku lunaku olw'ekkumi olw'omwezi ogwo ogw'omusantu munaakubanga olukunjanaa olutukuvu. Muneerekerezanga ne mutalukolerako mulimu gwonna.

⁸Naye munaawangayo ekiweebwayo ekyokebwa eky'ente ento eya sseddume emu, n'endiga ento ennume emu, n'abaana b'endiga abalume ab'omwaka ogumu ogw'obukulu musantu, byonna nga tebiriiko kamogo ng'ebyo kye kiweebwayo ekyokebwa omuva akawoowo akasanyusa MUKAMA Katonda.

⁹Ku nte ya sseddume kunaaleeterwangako ekiweebwayo eky'emmere ey'empeke ey'obuwunga obulungi obutabuddwamu amafuta ag'omuzeeyituuni nga bupima kilo ttaano, ne ku ndiga ennume ento obupima kilo ssatu n'obutundu bubiri n'ekitundu,

¹⁰ne ku buli emu ku baana b'endiga abalume omusantu obupima kilo emu n'ekitundu.

¹¹Mugattangako embuzi ennume emu ey'ekiweebwayo olw'ekibi, nga kyongerwa ku kiweebwayo olw'ekibi olw'okwetangiririza, n'ekiweebwayo ekyokebwa ekya bulijjo nga kuliko n'ekiweebwayo kyako eky'emmere y'empeke, n'ebiweebwayo ebyokunywa ebigerak.

Ebiweebwayo olw'Embaga ey'Ensiisira

¹²"Ku lunaku olw'ekkumi n'ettaano olw'omwezi ogw'omusantu munaakubanga olukunjanaa olutukuvu era temulukolerangako mirimu egya bulijjo. Munaakolanga embaga eri MUKAMA Katonda okumala ennaku musantu.

¹³Munaawangayo ekiweebwayo ekyokebwa, ekyokebbwa ku muliro ne muvaamu akawoowo akalungi akasanyusa MUKAMA Katonda, nga kya nte eza sseddume ento kkumi na ssatu, endiga ennume ento bbiri, abaana b'endiga abalume abaweza omwaka gumu ogw'obukulu kkumi na bana; nga byonna tebiriiko kamogo.

¹⁴Era munaaleeterangako ekiweebwayo eky'emmere y'empeke eky'obuwunga obulungi obutabuddwamu amafuta ag'omuzeeyituuni, nga bupima kilo ttaano ku buli emu ku nte ekkumi n'essatu, nga bupima kilo ssatu n'obutundu bubiri n'ekitundu ku buli emu ku ndiga ento ebbiri ennume;

¹⁵ne ku baana b'endiga abalume ekkumi na bana, nga bupima kilo emu n'ekitundu ku buli emu.

¹⁶Era munaawangayo n'embuzi emu ennume olw'ekiweebwayo olw'ekibi, ng'okwo mugasseeko n'ebiweebwayo ebyokebwa ebya bulijjo n'ebiweebwayo eby'emmere y'empeke n'ekiweebwayo ekyokunywa ekigenderak.

¹⁷"Ku lunaku olwokubiri munaateekateekanga ente eza sseddume ento kkumi na bbiri, n'endiga ennume ento bbiri n'abaana b'endiga abalume kkumi na bana abaweza omwaka gumu ogw'obukulu, nga byonna tebiriiko kamogo.

¹⁸Ku nte eza sseddume, n'endiga ento ennume, n'abaana b'endiga abalume, munaateekateekanga ebiweebwayo byabyo eby'emmere y'empeke n'ebiweebwayo byako eby'ebrokunywa, ng'emiwendo egyalagirwa bwe giri.

¹⁹Munaagattangako embuzi ennume emu ey'ekiweebwayo olw'ekibi, nga mwongereza ku kiweebwayo ekyokebwa ekya bulijjo n'emmere yaako ey'empeke, n'ebiweebwayo byako ebyokunywa.

²⁰"Ku lunaku olwokusatu munaateekateekanga ente eza sseddume kkumi n'emu, endiga ento ennume bbiri, n'abaana b'endiga abalume kkumi na bana ab'omwaka ogumu ogw'obukulu; nga byonna tebiriiko kamogo.

²¹Ku nte ne ku ndiga ento ennume, ne ku baana b'endiga, byonna munaabiteekerateekerangako ebiweebwayo eby'emmere yaako ey'empeke

n'ebiweebwayo ebyokunywa byako ebigerak, ng'emiwendo egylagirwa bwe giri.

²²Era munaawangayo embuzi emu ennume nga kye kiweebwayo olw'ekibi nga mwongereza ku kiweebwayo ekyokebwa ekya bulijjo, n'ekiweebwayo kyako eky'emmere ey'empeke n'ekiweebwayo kyako ekyokunywa.

²³"Ku lunaku olwokuna munaategekanga ente eza sseddume kkumi, n'endiga ento ennume bbiri, n'abaana b'endiga abalume kkumi na bana abawezizza omwaka gumu ogw'obukulu; ebyo byonna nga tebiriiko kamogo.

²⁴Ku nte ne ku ndiga ento ennume, n'abaana b'endiga, munaabiteekerateekerangako ebiweebwayo byako eby'emmere y'empeke n'ebiweebwayo ebyokunywa byako ng'emiwendo egylagirwa bwe giri.

²⁵Era munaawangayo embuzi emu ennume, nga kye kiweebwayo olw'ekibi, nga mwongerereza ku kiweebwayo ekyokebwa ekya bulijjo n'ekiweebwayo kyako eky'emmere y'empeke n'ekiweebwayo kyako ekyokunywa.

²⁶"Ku lunaku olwokutaano munaateekateekanga ente eza sseddume mwenda, endiga ento ennume bbiri, n'abaana b'endiga abalume kkumi na bana abawezizza omwaka ogumu nga byonna tebiriiko kamogo.

²⁷Ku nte ne ku ndiga ento ennume, ne ku baana b'endiga, byonna munaabiteekerateekerangako ebiweebwayo byako eby'emmere y'empeke n'ebiweebwayo ebyokunywa byako ng'emiwendo egylagirwa bwe giri.

²⁸Era munaawangayo embuzi emu ennume, nga kye kiweebwayo olw'ekibi nga mwongereza ku kiweebwayo kyako eky'emmere y'empeke n'ekiweebwayo ekyokunywa.

²⁹"Ku lunaku olw'omukaaga munaateekateekanga ente eza sseddume munaana, endiga ento ennume bbiri, n'abaana b'endiga abalume kkumi na bana ab'omwaka ogumu ogw'obukulu, ebyo byonna nga tebiriiko kamogo.

³⁰Ku nte ne ku ndiga ento ennume, n'abaana b'endiga munaabiteekerateekerangako ebiweebwayo byako eby'emmere y'empeke n'ebiweebwayo ebyokunywa byako ng'emiwendo egylagirwa bwe giri.

³¹Era munaawangayo embuzi emu ennume, nga kye kiweebwayo olw'ekibi, nga mwongerereza ku kiweebwayo ekyokebwa ekya bulijjo n'ebiweebwayo byako eby'emmere y'empeke, n'ekiweebwayo kyako ekyokunywa.

³²"Ku lunaku olw'omusantu munaateekateekanga ente za sseddume musantu, endiga ento ennume bbiri, n'abaana b'endiga abalume kkumi na bana ab'omwaka ogumu ogw'obukulu, ebyo byonna nga tebiriiko kamogo.

³³Ku nte ne ku ndiga ento ennume, ne ku baana b'endiga, byonna munaabiteekerateekerangako ebiweebwayo byako eby'emmere y'empeke n'ebiweebwayo byako ebyokunywa, ng'emiwendo egylagirwa bwe giri.

³⁴Era munaawangayo embuzi emu ennume, nga kye kiweebwayo olw'ekibi, nga mwongerereza ku kiweebwayo ekyokebwa ekya bulijo, n'ekiweebwayo kyako eky'emmere y'empeke n'ekiweebwayo ekyokunywa.

³⁵"Ku lunaku olw'omunaana munaakubanga olukujjaana, era temuukolenga mirimu nya bulijo egy'okukakaalukana.

³⁶Munaawangayo ekiweebwayo ekyokye omuva akaloosa akalungi akasanyusa MUKAMA Katonda, nga kye kiweebwayo ekyokye eky'ente eya sseddume emu, n'endiga ennume ento emu, n'abaana b'endiga abalume musanvu ab'omwaka ogumu ogw'obukulu, ebyo byonna nga tebiriko kamogo.

³⁷Ku nte ne ku ndiga ento ennume ne ku baana b'endiga, byonna munaabiteekerateekerangako ebiweebwayo byako eby'emmere y'empeke n'ebiweebwayo byako ebyokunywa ng'emiwendo egylagirwa bwe giri.

³⁸Era munaawangayo embuzi emu ennume nga kye kiweebwayo olw'ekibi, nga mwongerereza ku kiweebwayo ekyokebwa ekya bulijo, n'ekiweebwayo kyako eky'emmere y'empeke n'ekiweebwayo ekyokunywa.

³⁹"Ebiweebwayo ebyo munaabiwangayo eri MUKAMA Katonda ku mbaga entongole ezaategekebwa era ezaalagirwa; nga mubyongera ku biweebwayo bye mweyama, n'eba kyeyagalire, n'ebiweebwayo ebyokebwa, n'ebiweebwayo eby'emmere y'empeke, n'ebiweebwayo ebyokunywa n'ebiweebwayo olw'emirembe."

⁴⁰Awo Musa n'ategeeza abaana ba Isirayiri buli kimu kyonna nga MUKAMA Katonda bwe yamulagira Musa.

Okubala 30

Amateeka ku Bweyamo

¹Musa n'agamba abakulembeze b'ebika by'abaana ba Isirayiri nti, "Kino MUKAMA Katonda ky'alagidde:

²Omusajja bw'aneeyamanga eri MUKAMA Katonda, oba bw'anaalayiranga okutuukiriza ekisuubizo kye, ekigambo kye ekyo taakimenyengawo, naye anaakolanga nga bw'anaabangaasuubizza.

³"Omukazi omuvubuka anaabeeranga akyasula mu maka ga kitaawe, bw'aneeyamanga eri MUKAMA Katonda, oba bw'anaalayiranga okutuukiriza ekisuubizo kye, kale, obweyamo bwe bwonna n'ebyo by'anaabangaasuubizza binaasigalanga nga bwe biri.

⁴Naye kitaawe bw'anaakiteegerangako, n'amuziyiza, kale, tewaabengawo n'ekimu ku ebyo by'anaabangaasuubizza ebinaasigalanga nga bwe biri.

⁵Naye kitaawe bw'anaamugaananga ku lunaku lw'anaakiwulira, tewaabengawo ku bwneyamo bwe newaakubadde bye yalayira bye yasuubiza ebinaatuukirizibwanga, MUKAMA Katonda anaabimusonyiwanga, kubanga kitaawe abimuziyizza.

⁶"Bw'anaafumbirwanga ng'amaze okwewayama ng'awaddeyo n'ebisuubizo nga tamaze kwerowooza,

⁷bba n'abiwulirako, naye n'atabaako ky'ayogera; kale, obwewayamo bw'omukazi oyo n'ebisuubizo bye, bye yalagira okubituukiriza, binaasigalanga nga bwe biri.

⁸Naye singa bba bw'amala okubiwulirako n'amuziyiza, olwo obwewayamo bw'omukazi oyo n'ebyo byonna bye yasuubiza nga teyeerowozezza, biba bifudde, era MUKAMA Katonda anaasonyiwanga omukazi oyo.

⁹"Obwewayamo n'ebisuubizo bwe binaakolebwanga nnamwandu oba omukazi eyayawukanira ddala ne bba mu bufumbo, binaasigalanga nga bwe biri.

¹⁰"Omukazi ali mu bufumbo ng'abeera wamu ne bba mu maka gaabwe, bw'aneeyamanga oba n'asuubiriza ku kirayiro ng'alibaako by'atuukiriza,

¹¹bba n'abiwulirako, naye n'atabaako ky'agamba mukazi we, n'atamuziyiza; kale, obwewayamo bw'omukazi oyo bwonna bunaasigalangawo, ne buli kimu kyonna kye yasuubiza ne yeerayirira, binaasigalangawo.

¹²Naye bba bw'anaabanga abiwliddeko, kyokka n'abidibya n'abisazaamu, olwo tewaabengawo bwneyamo oba ebisuubizo ebyava mu kamwa k'omukazi, ebinaasigalangawo, era MUKAMA Katonda anaabimusonyiwanga.

¹³Bba anaayinzanga okukakasa oba okudibya obwewayamo bwonna mukazi we bw'anaabanga akoze n'ebisuubizo byonna by'anaabanga yeerayiride ebirimu n'okwerumya n'okwefiiriza.

¹⁴Naye bba bw'ataabengako ne kyabyogerako nga ky'ajje abiwlire, olwo omukazi anaabanga akakasizza obwewayamo bwe bwonna n'ebisuubizo bye yeerayirira. Bba anaabikakasanga bw'ataabengako ky'ategeeza mukazi we bw'anaabanga yaakamala okubiwulirako.

¹⁵Naye bwe wanaayitangawo ennaku ng'amaze okubiwulirako, oluvannyuma n'alyoka abidibya, y'anaavunaanyizibwanga ku bitatuukiride mu bwneyamo bw'omukazi oyo."

¹⁶Ago ge mateeka MUKAMA Katonda ge yalagira Musa aganaakwatanga ku musaja ne mukazi we, era ne kitaawe w'omuwala ne muwala we anaabanga akyali omuvubuka ng'akyasula mu nju ya kitaawe.

Okubala 31

Okutta Abamidiyaani

¹ MUKAMA Katonda n'agamba Musa nti,

² "Woolera eggwanga ly'abaana ba Isirayiri ku Bamidiyaani, oluvannyuma olyoke ogende abantu bo bona gye balaga."

³ Awo Musa n'agamba abantu nti, "Muyungule okuva mu mmwe abasajja abalwanyi mubawe ebyokulwanyisa, beetegerekere olutalo, batabaale Midiyaani bawoolere eggwanga lya MUKAMA Katonda ku Midiyaani.

⁴ Mu buli kika kya Isirayiri mujja kuggyamu abasajja lukumi abanaagenda okutabaala."

⁵ Awo ne baleeta okuva ku nkumi za Isirayiri abasajja lukumi okuva mu buli kika be balwanyi omutwalo gumu mu enkumi bbiri abeetegekera olutabaalo.

⁶ Musa n'abasindika mu lutalo, abalwanyi lukumi nga bava mu buli kika; ne Finekaasi mutabani wa Eriyazaali kabona, n'ebintu by'omu watukuvu n'amakondeere ag'okulwana ng'ali nago.

⁷ Ne batabaala Midiyaani nga MUKAMA Katonda bwe yalagira Musa, ne batta buli musajja.

⁸ Mu battibwa mwe mwagendera ne bakabaka ba Midiyaani bano abataano: Evi, ne Lekemu, ne Zuuli, ne Kuula, ne Leeba. Balamu mutabani wa Byoli naye baamuttiramu n'ekitala.

⁹ Abaana ba Isirayiri ne bawamba abakazi ba Midiyaani n'abaana baabwe, ne banyaga ente n'ebisibo byabwe n'ebintu ebirala bingi.

¹⁰ Baayokya ebibuga by'Abamidiyaani mwe baabeeranga, awamu n'ensiisira zaabwe zonna.

¹¹ Baatwala omunyago gwonna, nga mulimu n'abantu n'ensolo;

¹² ne babireeta awali Musa ne Eriyazaali kabona n'ekibiina kyonna eky'abaana ba Isirayiri mu lusiisira lwabwe olwali mu nsenyi za Mowaabu eziri ku mugga Yoludaani okutunuulira emitala wa Yeriko.

¹³ Musa ne Eriyazaali kabona n'abakulembeze mu kibiina bona ne bagenda okusisinkana abatabaazi ebweru w'olusiisira.

¹⁴ Musa n'anyiigira abakulembeze b'eggye, abaduumizi b'ebikumi n'abaduumizi b'enkumi abaakomawo nga bava mu lutabaalo.

¹⁵ Musa n'ababuuza nti, "Abakazi bona temubasse?"

¹⁶Mumanyi nga be baaleetera abaana ba Isirayiri okujeemera MUKAMA Katonda e Peoli bwe baakolera ku magezi Balamu ge yabawanga, kawumpuli amale alumbe ekibiina kya MUKAMA.

¹⁷Kale nno mutte buli mulenzi mu baana abato, era mutte na buli mukazi eyali yeegasseeko n'omusajja.

¹⁸Naye abawala abato abatamanyanga musajja, mubeeterekere.

¹⁹“Musiisire ebweru w'olusiisira okumala ennaku musanvu. Buli omu mu mmwe eyatta omuntu yenna, n'oyo eyakwatako ku gwe basse, mwetukuze awamu n'abanyage bammwe ku lunaku olwokusatu ne ku lunaku olw'omusanvu.

²⁰Mutukuze buli kyambalo ne buli kintu ekyakolebwa mu maliba, oba mu bwoya bw'embuzi oba mu muti.”

²¹Awo Eriyazaali kabona n'agamba abasajja abaatabaala nti, “Lino lye tteeka MUKAMA Katonda ly'alagidde Musa:

²²Zaabu, ne ffeeza, n'ekikomo, n'ekyuma, n'ebbaati, n'essasi

²³n'ekirala kyonna ekigumira omuliro mukiyise mu muliro kiryoche kibeere ekirongoofu. Naye era kisaana okulongoosebwa n'amazzi agalongoosa. Ebyo byonna ebitaasobole kuyita mu muliro biyisibwe mu mazzi ago.

²⁴Ku lunaku olw'omusanvu mwozanga engoye zammwe, mulyoke mubeere abalongoofu. Ebyo nga biwedde mulyoke muyingire mu lusiisira.”

Okugabana Omunyago

²⁵MUKAMA Katonda n'agamba Musa nti,

²⁶“Ggwe ne Eriyazaali kabona, n'abakulembeze b'empya ez'omu kibiina mubale obungi bw'omunyago ogwaleetebwa omuli abantu n'ebisolo.

²⁷Omunyago gugabanyeemu mu bitundu bibiri: eky'abatabaazi abaalwana olutalo n'ekyabaasigala mu kibiina.

²⁸Munaggya ku basajja abaatabaala ekitundu kimu ku buli bikumi bitaano, nga gwe musolo gwa MUKAMA Katonda, oba bantu, oba nte, oba ndogoyi, oba ndiga oba mbuzi.

²⁹Omusolo ogwo mujja kuguggya ku kitundu ekya wakati ekinaagabanibwa abatabaazi mukiwe Eriyazaali kabona nga kye kitundu kya MUKAMA Katonda.

³⁰Ku munyago gw'abaana ba Isirayiri abasigadde wo munaggyako ekitundu kimu ku bitundu ataano, oba bantu, oba nte, oba ndogoyi, oba ndiga oba mbuzi oba ensolo endala zonna. Ebyo mujja kubiwa Abaleevi, abalabirira Weema ya MUKAMA.”

³¹Bwe batyo Musa ne Eriyazaali bwe baakola, nga MUKAMA Katonda bwe yalagira Musa.

³²Omunyago ogwasigalawo abatabaazi gwe beetwalira gwali bwe guti: Endiga, emitwalo nkaaga mu musanvu mu enkumi ttaano (675,000).

³³Ente, emitwalo musanvu mu enkumi bbiri (72,000).

³⁴Endogoyi, emitwalo mukaaga mu lukumi (61,000),

³⁵n'abakazi abatamanyangako basajja emitwalo esatu mu enkumi bbiri (32,000).

³⁶Ekitundu eky'omu makkati eky'omunyago eky'abo abaatabala kyali bwe kit: Endiga, obusiriivu busatu mu emitwalo esatu mu kasanvu mu bitaano (337,500);

³⁷ku ezo kwaliko ez'omusolo gwa MUKAMA Katonda lukaaga mu nsavu mu ttaano (675).

³⁸Ente, emitwalo esatu mu kakaaga (36,000), ng'ez'omusolo gwa MUKAMA Katonda nsanvu mu bbiri (72).

³⁹Endogoyi, emitwalo esatu mu bitaano (30,500), ng'ez'omusolo gwa MUKAMA Katonda zaali nkaaga mu emu (61).

⁴⁰Abantu omutwalo gumu mu kakaaga (16,000); ng'ab'omusolo gwa MUKAMA Katonda baali amakumi asatu mu babiri (32).

⁴¹Omusolo gwa MUKAMA, Musa n'aguwa Eriyazaali kabona, nga MUKAMA Katonda bwe yalagira Musa.

⁴²Ekitundu eky'omu makkati eky'omunyago ogwaweebwa abaana ba Isirayiri nga Musa amaze okuggyako ogw'abatabaazi abaalwana mu lutalo,

⁴³ekitundu ekyo kyali bwe kit: Endiga, emitwalo asatu mu esatu mu bitaano (337,500);

⁴⁴Ente, emitwalo esatu mu kakaaga (36,000);

⁴⁵Endogoyi, emitwalo esatu mu bitaano (30,500);

⁴⁶n'abantu omutwalo gumu mu kakaaga (16,000).

⁴⁷Ekitundu eky'omugabo eky'abaana ba Isirayiri, Musa n'aggyako ekitundu kimu ku buli bitundu ataano byombi eby'abantu n'ebi'ebisolo, n'abiwa Abaleevi abaalabiriranga Weema ya MUKAMA, nga MUKAMA bwe yalagira Musa.

Ebiweebwayo by'Abakulembeze b'Eggye

⁴⁸Awo abakulembeze b'ebibinja mu ggye abaaduumiranga ebikumi n'abaaduumiranga enkumi, ne bajja eri Musa,

⁴⁹ne bamugamba nti, "Abawereza bo tubaze abatabaazi bona be tutwala, nga tewaliwo n'omu abulawo.

⁵⁰Noolwekyo tuleetedde MUKAMA Katonda ekiweebwayo nga kya bintu ebya zaabu buli omu ku ffe bye yanyaga; mwe muli ebikomo eby'oku mikono, emikuufu egy'oku magulu, empeta z'oku ngalo n'empeta ez'omu matu n'obutiiti obw'omu bulago, twetangiririre mu maaso ga MUKAMA Katonda."

⁵¹Musa ne Eriyazaali kabona, ne bakkiriza ebyaleetebwa omwali zaabu n'ebyomuwendo ebirala byonna.

⁵²Zaabu yenna abaduumizi b'enkumi, n'abaduumizi b'ebikumi gwe baleeta eri Musa ne Eriyazaali kabona, okuwaayo eri MUKAMA Katonda, yali apima obuzito bwa kilo kikumi mu kyenda.

⁵³Buli mutabaazi yali yeenyagiddeyo ebintu ebibye ku bubwe.

⁵⁴Awo Musa ne Eriyazaali kabona ne baddira zaabu eyaleetebwa abaduumizi b'enkumi n'abaduumizi b'ebikumi, ne bamuleeta mu Weema ya MUKAMA ey'Okukuñjaanirangamu, okubeeranga ekijukizo eri abaana ba Isirayiri mu maaso ga MUKAMA Katonda.

Okubala 32

Ekika kya Lewubeeni n'ekya Gaadi Bituula mu Gireyaadi

¹Batabani ba Lewubeeni ne batabani ba Gaadi baalina amagana g'ente n'ebisibo by'endiga; ebisolo byabwe nga bingi nnyo. Baatunuulira ensi ya Yazeri n'ensi ya Gireyaadi, ne balaba ng'ekitundu ekyo kituufu okulundiramu ebisolo byabwe.

²Ne bajja awali Musa ne Eriyazaali kabona, n'eri abakulembeze b'ekibiina ne babagamba nti,

³"Ebitundu bino: Atalisi, ne Diboni, ne Yazeri, ne Nimula, ne Kesuboni, ne Ereyale, ne Sebamu, ne Nebo ne Beoni,

⁴bye bitundu by'ensi MUKAMA Katonda gye yawangulira mu maaso g'abaana ba Isirayiri, nsi nnungi okulundiramu; ate ng'abawereza bammwe tulina ebisolo byaffe bingi."

⁵Ne bagamba nti, "Bwe kuba nga kwe kusiima kwammwe, mukkirize ebitundu by'ensi bino bituweebwe, ffe abawereza bammwe, bibeere obutaka bwaffe. Temutusomosa Yoludaani."

⁶Musa n'agamba batabani ba Gaadi ne batabani ba Lewubeeni nti, "Mwagala baganda bammwe bagende batabaale, nga mmwe mwetuulidde wano?

⁷Lwaki abaana ba Isirayiri mwagala okubamalamu amaanyi mu mitima gyabwe mubalemese okuyingira mu nsi MUKAMA Katonda gy'abawadde?

⁸Ne bakadde bammwe bwe baakola bwe nabatuma okuva e Kadesubanea okuketta ensi.

⁹Kubanga bwe baayambuka mu Kiwonvu ekya Esukoli, ensi ne bagiraba, ne bayeengebula emitima gy'abaana ba Isirayiri baleme okugenda okuyingira mu nsi MUKAMA Katonda gye yali abawadde.

¹⁰Obusungu bwa MUKAMA ne bubuubiuka ku lunaku olwo, n'alayira nti,

¹¹'Olw'okubanga tebanjondedde n'omutima gwabwe gwonna, tewalibaawo n'omu ku basajja ab'emyaka okuva ku myaka makumi abiri okweyongerayo egy'obukulu, abaasimbuka okuva mu Misiri, aliraba ku nsi gye nalayira okuwa Ibulayimu ne Isaaka ne Yakobo;

¹²tewalibaawo n'omu okuggyako Kalebu mutabani wa Yefune Omukenizi, ne Yoswa mutabani wa Nuuni, kubanga abo baagondera MUKAMA Katonda n'omutima gwabwe gwonna.'

¹³Obusungu bwa MUKAMA Katonda ne bubuubiukira Isirayiri, n'abatambuliza mu ddungu okumala emyaka amakumi ana, okutuusa omulembe gw'abo abaasobia mu maaso ga MUKAMA lwe gwaggweerera.

¹⁴"Kale nno mmwe muli bazzukulu baabwe, batabani b'abakozi b'ebibi, nga mwongera okunakuwaza MUKAMA Katonda anyiigire Isirayiri!

¹⁵Kubanga singa mumukuba amabega ne mutakola by'ayagala ne mutamugoberera, abantu be ajja kwongera okubeesammulako, nate abaleke mu ddungu omulundi ogwokubiri, era bwe balizikirira mwe mulibaako obuvunaanyizibwa obwo."

Ebika Ebirala Bigabana ku Bugwanjuba bwa Yoludaani

¹⁶Ne bamuseemberera ne bamuddamu nti, "Twagala tuzimbe wano ebiraalo eby'ebisibo by'ebisolo byaffe, tuzimbe n'ebigo eby'abaana baffe abato.

¹⁷Naye ffe tubagalire ebyokulwanyisa, tukulembere abaana ba Isirayiri tubatuuse mu bifo byabwe. Olwo abaana baffe abato balisigala mu bibuga bye tuzimbyeko ebigo ebinywevu, kubanga mu nsi muno mulimu abantu baamu.

¹⁸Tetugenda kudda mu maka gaffe okutuusa ng'abaana ba Isirayiri buli omu amaze okuweebwa obutaka bwe.

¹⁹Ffe tetugenda kugabana nabo ku butaka obwo obuli emitala wa Yoludaani n'okweyongerayo; kubanga obutaka bwaffe tuliba tubufunye ku ludda luno olwa Buvanjuba bwa Yoludaani."

²⁰Awo Musa n'abagamba nti, "Bwe munaakola bwe mutyo, ne mukwata ebyokulwanyisa mu maaso ga MUKAMA Katonda nga mwetegekedde olatalo,

²¹ne musomoka Yoludaani n'ebiyokulwanyisa byammwe mu maaso ga MUKAMA Katonda, okutuusa ng'agobye abalabe be mu maaso ge,

²²n'ensi ng'ewanguddwa mu maaso ga MUKAMA Katonda, olwo muliyinza okukomawo nga temuliiko kya kuvunaanyizibwa eri MUKAMA n'eri Isirayiri. Ekitundu ky'ensi kino ne kibeera omugabo gwammwe mu maaso ga MUKAMA.

²³"Naye bwe mutualikola bwe mutyo, muliba musobezza nnyo awali MUKAMA Katonda, era mutegeerere ddala ng'ekibi kyammwe ekyo kiribayigga ne kibakwasa.

²⁴Kale muzimbire abaana bammwe abato ebibuga eby'ebigo ebinywevu, n'ebisolo byammwe mubizimbire ebiraalo, era mukole n'ebyo bye musuubizza."

²⁵Abaana ba Gaadi n'abaana ba Lewubeeni ne bagamba Musa nti, "Ffe abaweeresa bo tujja kukola nga ggwe mukama waffe bw'otulagidde.

²⁶Abaana baffe abato ne bakazi baffe, n'ebisibo byaffe eby'endiga n'ebiraalo byaffe eby'ente byonna bijja kusigala wano mu bibuga bya Gireyaadi.

²⁷Naye abaweeresa bo, buli musajja eyeewaddeyo okutabaala ajja kusomoka alwanire mu maaso ga MUKAMA Katonda, nga ggwe mukama waffe bw'ogambye."

Ekitundu ky'Ekika kya Manase kisigala mu Gireyaadi

²⁸Awo Musa n'abawaako ebiragiro eri Eriyazaali kabona, n'eri Yoswa mutabani wa Nuuni, n'eri abakulembeze b'empya ez'omu bika by'abaana ba Isirayiri.

²⁹Musa n'agamba nti, "Batabani ba Gaadi ne batabani ba Lewubeeni, buli musajja eyeetegese okutabaala mu maaso ga MUKAMA Katonda, bwe balisomoka nammwe Yoludaani, n'ensi eri mu maaso gammwe n'ewangulwa, kale mubawanga ensi ya Gireyaadi okubeera omugabo gw'obutaka bwabwe.

³⁰Naye bwe basomokanga nammwe nga tebalina byakulwanyisa, kale baligabanira wamu nammwe eby'obutaka bwabwe mu nsi ya Kanani."

³¹Batabani ba Gaadi ne batabani ba Lewubeeni ne baddamu nti, "Ffe abaweeresa bo tujja kukola nga MUKAMA bw'atugambye.

³²Tujja kusomokera mu maaso ga MUKAMA Katonda tuyingire mu nsi ya Kanani nga twesibye ebyokulwanyisa, naye omugabo gwaffe ogw'obutaka bwaffe gujja kusigala ku ludda luno olwa Yoludaani."

³³Awo Musa n'abagabira, abaana ba Gaadi n'abaana ba Lewubeeni, n'ekitundu ky'ekika kya Manase mutabani wa Yusufu, obwakabaka bwa Sikoni kabaka w'Abamoli, n'obwakabaka bwa Ogi kabaka w'e Basani, n'abawa ensi n'ebibuga byamu, n'amawale gaayo n'ebibuga byamu ebigyetoolodde.

³⁴Batabani ba Gaadi ne bazimba ebibuga bino: Diboni, ne Atalosi, ne Aloweri,

³⁵ne Aterosi Sofani, ne Yazeri, ne Yogubeka;

³⁶ne Besu Nimira, ne Besu Kalaani, nga bye bibuga ebiriko ebigo ebinywevu, ne bakola n'ebisibo by'ebisolo byabwe.

³⁷Batabani ba Lewubeeni ne bazimba ebibuga bino: Kesuboni, ne Ereyale, ne Kiriyasayimu,

³⁸ne Nebo, ne Baalu Myoni (amannya gaabyo gaakyusibwa), ne Sibima. Ebibuga bye baddaabiriza baabituumma amannya malala.

³⁹Abaana ba Makiri, mutabani wa Manase, ne bagenda e Gireyaadi, ensi eyo ne bagiwamba, ne bagobamu Abamoli abaagibeerangamu.

⁴⁰Bw'atyo Musa n'awa Gireyaadi, Makiri mutabani wa Manase, n'atuula omwo.

⁴¹Yayiri mutabani wa Manase n'agenda ne yeetwalira obubuga obutonotono, n'abutuumma Kavosu Yayiri.

⁴²Ne Noba naye n'awamba Kenasi n'obwalo obukyetoolodde, n'akituuma Noba erinnya lye.

Okubala 33

Olugendo Iw'Abaana ba Isirayiri okuva e Misiri okutuuka e Kanani

¹Bino bye bitundu by'olugendo Iw'abaana ba Isirayiri olwabaggya mu nsi y'e Misiri mu bibinja byabwe, nga bakulemberwa Musa ne Alooni.

²Musa yawandiika buli kitundu ky'olugendo we kyatandikiranga, nga MUKAMA Katonda bwe yamulagira. Bino bye bitundu ebyo:

³Abaana ba Isirayiri baasitula okuva e Lamesesi ku lunaku olw'ekkumi n'ettaano olw'omwezi ogw'olubereberye, nga lwe lunaku oluddirira Embaga ey'Okuyitako. Baasitula n'obuvumu awatali kutya, nga beeyagala, ng'Abamisiri bona babalaba bulungi;

⁴ng'Abamisiri bwe baziika abaana baabwe ababereberye MUKAMA be yali abasseemu; kubanga MUKAMA Katonda yali asalidde bakatonda b'Abamisiri omusango okubasinga.

⁵Abaana ba Isirayiri ne basitula okuva e Lamesesi ne basiisira e Sukkosi.

⁶Ne bava e Sukkosi ne basiisira e Yesamu, eddungu we litandikira.

⁷Bwe baava mu Yesamu ne baddako emabega ne batuuka e Pikakirosi ekiri ku buvanjuba bwa Baali Zefoni, ne basiisira okuliraana Migudooli.

⁸Ne basitula okuva mu Pikakirosi ne bayita wakati mu Nnyanja Emufu ne bagguka mu ddungu lya Yesamu; ne balitambuliram mu ennaku ssatu ne basiisira e Mala.

- ⁹ Ne bava e Mala ne batuuka mu Erimu, awaali ensulo z'amazzi ekkumi n'ebbiru n'emiti emikindu nsanvu, ne basiisira awo.
- ¹⁰ Bwe baava mu Erimu ne basiisira okumpi n'Ennyanja Emyufu.
- ¹¹ Ne bava ku Nnyanja Emyufu ne basiisira mu Ddungu Sini.
- ¹² Bwe bava mu Ddungu Sini ne basiisira e Dofuka.
- ¹³ Ne bava e Dofuka ne basiisira e Yalusi.
- ¹⁴ Bwe bava e Yalusi ne basiisira e Lefidimu, awataali mazzi abantu okunywako.
- ¹⁵ Ne bava e Lefidimu ne basiisira mu Ddungu lya Sinaayi.
- ¹⁶ Ne bava mu Ddungu lya Sinaayi ne basiisira e Kiberosu Katava.
- ¹⁷ Bwe bava e Kiberosu Katava ne basiisira e Kazerosi.
- ¹⁸ Bwe bava e Kazerosi ne basiisira e Lisuma.
- ¹⁹ Ne bava e Lisuma ne basiisira e Limoni Perezi.
- ²⁰ Bwe bava e Limoni Perezi ne basiisira e Libuna.
- ²¹ Ne bava e Libuna ne basiisira e Lisa.
- ²² Ne bava e Lisa ne basiisira e Kekerasa.
- ²³ Bwe bava e Kekerasa ne basiisira ku Lusozi Seferi.
- ²⁴ Bwe bava ku Lusozi Seferi ne basiisira e Kalada.
- ²⁵ Ne bava e Kalada ne basiisira e Makerosi.
- ²⁶ Ne bava e Makerosi ne basiisira e Takasi.
- ²⁷ Bwe bava e Takasi ne basiisira e Tera.
- ²⁸ Bwe bava e Tera ne basiisira e Misuka.
- ²⁹ Ne bava e Misuka ne basiisira e Kasumona.
- ³⁰ Ne bava e Kasumona ne basiisira e Moserosi.
- ³¹ Bwe bava e Moserosi ne basiisira e Beneyakani.
- ³² Ne bava e Beneyakani ne basiisira e Kolu Kagidugada.
- ³³ Ne bava e Kolu Kagidugada ne basiisira e Yotubasa.
- ³⁴ Ne bava e Yotubasa ne basiisira e Yabulona.
- ³⁵ Ne bava e Yabulona ne basisira mu Ezyoni Geba.
- ³⁶ Ne bava mu Ezyoni Geba ne basiisira e Kadesi mu Ddungu lya Zini.

³⁷ Bwe baava e Kadesi ne basiisira ku Lusozi Koola, okuliraana n'ensi ya Edomu.

³⁸ Awo Alooni kabona n'alinnya ku Lusozi Koola, nga MUKAMA Katonda bwe yamulagira, n'afiira eyo, ku lunaku olw'olubereberyeyo olw'omwezi ogwokutaano, ng'abaana ba Isirayiri baakamaze emyaka amakumi ana kasookedde bava mu nsi y'e Misiri.

³⁹ Alooni yali yakamaze emyaka eg'yobukulu kikumi mu abiri mu esatu bwe yafiira ku Lusozi Koola.

⁴⁰ Kabaka Omukanani ow'e Yaladi eyatuulanga mu bukiikaddyo obwa Kanani, n'awulira ng'abaana ba Isirayiri bajja.

⁴¹ Abaana ba Isirayiri ne basitula okuva ku Lusozi Koola, ne basiisira e Zalumona.

⁴² Bwe baava e Zalumona ne basiisira e Punoni.

⁴³ Ne bava e Punoni ne basiisira e Yebosi.

⁴⁴ Ne bava e Yebosi ne basiisira mu Lye Abalimu, okuliraana ne Mowaabu.

⁴⁵ Ne bava mu Iyimu ne basiisira e Diboni Gadi.

⁴⁶ Ne bava e Diboni Gadi ne basiisira e Yalumonu Dibulasaimu.

⁴⁷ Ne bava e Yalumonu Dibulasaimu ne basiisira mu nsozi za Abalimu, okuliraana Nebo.

⁴⁸ Bwe baava mu nsozi za Abalimu ne basiisira mu nsenyi za Mowaabu okuliraana n'omugga Yoludaani olwolekera Yeriko.

⁴⁹ Ne basiisira mu nsenyi za Mowaabu nga bagendera ku mugga Yoludaani okuva e Besu Yesimosi okutuuka e Yaberi Sitimu.

⁵⁰ Awo MUKAMA Katonda n'ayogera ne Musa mu nsenyi za Mowaabu ku mugga Yoludaani okwolekera Yeriko n'amugamba nti,

⁵¹ "Yogera n'abaana ba Isirayiri obagambe nti, Bwe musomokanga omugga Yoludaani ne muyingira mu nsi ya Kanani;

⁵² mugobangamu abatuuze baamu bona abagirimu kaakano. Muzikirizanga ebifaananyi byabwe byonna ebibajje n'ebiweese byonna; era musaanyangawo ebifo byabwe ebigulumivu mwe basinziza.

⁵³ Ensi eyo muligyetwalira, ne mugituulamu, kubanga ensi eyo ngibawadde okubeera eyammwe ey'obwanannyini.

⁵⁴ Ensi mugigabananga nga mukuba akalulu ng'ebika byammwe bwe biri. Ekika ekinene kifunanga ekitundu eky'obutaka bwakyo kinene, n'ekika ekitono kinaafunanga ekitundu kitono. Buli kye banaafunanga ng'akalulu bwe

kanaagambanga ng'ekyo kye kyabwe. Ensi mugigabananga ng'ebitundu by'ebika byammwe eby'ennono eby'obujajja bwe biri.

55 “Naye abatuuze ab’omu nsi omwo bwe mutualibagobamu bona, kale, abo abalisigalamu bagenda kubafukira enkato mu mmunye zammwe era babeere maggwa mu mbiriizi zammwe. Balibateganya mu nsi omwo mwe munaabeeranga.

56 Olwo bye ntegeka okukola bali, ndibikola mmwe.”

Okubala 34

Ensalo za Kanani

1 MUKAMA Katonda n’agamba Musa nti,

2 “Lagira abaana ba Isirayiri ng’obagamba nti, ‘Bwe tuyingiranga mu Kanani, gye mbawa okuba ensi yammwe ey’obutaka bwammwe obw’enkalakkalira, zino ze ziribeera ensalo zaayo:

3 “Ku bukiikaddyo, ensalo yammwe erizingiramu Eddungu lya Zini n’ekibira ku mabbali ga Edomu. Ku luuyi lw’ebuvanjuba, ensalo yammwe ey’oku bukiikaddyo eritandikira ku Nnyanja ey’Omunnyo w’ekoma ku luuyi olw’ebuvanjuba,

4 n’eyambukira ku Kkubo lya Akulabbimu, n’eraga ku Zini n’ekoma ku bukiikaddyo obwa Kadesubanea. Eriraga e Kazala Dali n’etuuka e Yazimoni,

5 awo w’eriwetera n’egenda ku mugga Wadi ogw’e Misiri n’ekoma ku Nnyanja Ennene.

6 Ku ludda olw’ebugwanjuba, olubalama lw’Ennyanja Ennene lwe lulibeera ensalo yammwe. Eyo y’eriba ensalo yammwe ey’ebugwanjuba.

7 Ku ludda olw’obukiikkono, ensalo yammwe egenda kuva ku Nnyanja Ennene erage ku Lusozi Koola;

8 eve e Koola erage w’oyingirira Kamasi. Ensalo olwo eriraga e Zedada,

9 ne yeeyongerayo okutuuka e Zifuloni, n’ekoma mu Kazalenooni. Eyo y’eriba ensalo yammwe ey’oku bukiikkono.

10 Ensalo yammwe ey’ebuvanjuba erigoberera olunyiriri oluva e Kazalenooni okutuuka e Sefamu.

11 Ensalo n’eserengeta okuva e Sefamu okutuuka e Libula ku ludda olw’ebuvanjuba bwa Yaini, n’ebalama amabbali g’ensozi ku ludda olw’ebuvanjuba bw’Ennyanja y’e Kinneresi, y’ey’e Ggaliraaya.

¹²Olwo ensalo n'egendera ku mugga Yoludaani n'ekoma ku Nnyanja ey'Omunnyo. "Eyo y'eribeera ensi yammwe, n'ezo nga ze nsalo zaayo ku buli luuyi."

¹³Awo Musa n'alagira abaana ba Isirayiri nti, "Ensi eyo muligibawa okubeera obutaka bwabwe obw'enkalakkalira nga mukuba akalulu. MUKAMA alagidde ensi eyo egabanibwe ebika omwenda n'ekitundu,

¹⁴kubanga ab'empya z'ekika kya Gaadi n'ekya Lewubeeni, n'ab'empya z'ekitundu ky'ekika kya Manase, baamala okugabana obutaka bwabwe.

¹⁵Ebika ebyo ebibiri n'ekitundu byamala okugabana obutaka bwabyo ku ludda olw'ebuvanjuba olw'Omugga Yoludaani ogwa Yeriko okutunuulira enjuba gy'eva."

Abasajja Abaalondebwa Okugabanyaamu Ensi

¹⁶MUKAMA Katonda n'agamba Musa nti,

¹⁷"Gano ge mannya g'abasajja abalibagabanyizaamu ensi eyo okubeera obutaka bwammwe: Eriyazaali kabona ne Yoswa mutabani wa Nuuni.

¹⁸Era ojja kulonda mu buli kika omukulembeze omu okuyamba mu kugabana ensi.

¹⁹"Gano ge mannya gaabwe: "Kalebu mutabani wa Yefune ng'ava mu kika kya Yuda.

²⁰Semweri mutabani wa Ammikudi ng'ava mu kika kya Simyoni.

²¹Eridaadi mutabani wa Kisuloni ng'ava mu kika kya Benyamini.

²²Buki mutabani wa Yoguli ng'ava mu kika kya Ddaani.

²³Kanieri mutabani wa Efodi ng'ava mu kika kya Manase mutabani wa Yusufu.

²⁴Kemueri mutabani wa Sifutani ng'ava mu kika kya Efulayimu mutabani wa Yusufu.

²⁵Erizafani mutabani wa Palunaki nga ye mukulembeze okuva mu kika kya Zebbulooni.

²⁶Palutiyeri mutabani wa Azani nga ye mukulembeze okuva mu kika kya Isakaali,

²⁷ne Akikuda mutabani wa Seromi nga ye mukulembeze okuva mu kika kya Aseri,

²⁸ne Pedakeri mutabani wa Ammikudi nga ye mukulembeze okuva mu kika kya Nafutaali."

²⁹Abo be basajja MUKAMA be yalagira okugabanyaamu ensi ya Kanani okubeera obutaka bw'abaana ba Isirayiri.

Okubala 35

Ebibuga by'Abaleevi

¹Awo abaana ba Isirayiri bwe baali nga basiisidde mu nsenyi za Mowaabu ku mugga Yoludaani, okwolekera Yeriko, MUKAMA Katonda n'agamba Musa nti,

²“Lagira abaana ba Isirayiri nti bawanga Abaleevi ebibuga eby'okubeeramu, nga babiggya mu butaka bwabwe bwe baligabana obw'enkalakkalira. Era babaweerangako n'amalundiro okwetooloola ebibuga ebyo.

³Kale, olwo balibeera n'ebibuga ebyokusulangamu, n'amalundiro ag'ente zaabwe n'endiga zaabwe, awamu n'ensolo zaabwe endala ezirundibwa.

⁴“Amalundiro aganaaweebwanga Abaleevi ab'omu bibuga ebyo ganaapimwanga obugazi okuva ku bbugwe w'ekibuga mita ebikumi bina mu ataano.

⁵Amalundiro ago ganaapimanga obuwantu bwa mita lwenda ku ludda olw'ebuvanjuba, ne mita lwenda ku ludda olw'ebugwanjuba, ne mita lwenda ku luuyi olw'obukiikkono, ne mita lwenda ku luuyi olw'obukiikkaddyo, ng'ekibuga kiri wakati. Ago ge ganaabanga amalundiro gaabo ab'omu kibuga.

Ebibuga eby'Okuddukirangamu

⁶“Ku bibuga bye muligabira Abaleevi kugenda kubeerako ebibuga mukaaga eby'okuddukirangamu, omuntu asse omuntu nga tagenderedde. Okwo mulyoke mwongerekko ebibuga amakumi ana mu bibiri.

⁷Okutwalira awamu muliteekwa okugabira Abaleevi ebibuga amakumi ana mu munaana, mubagattireko n'amalundiro.

⁸Omuwendo gw'ebibuga bye muligabira Abaleevi gulyesigamizibwa ku bunene n'obutono obwa buli busika obw'abaana ba Isirayiri. Ab'obusika obunene muliwaayo ebibuga bingi, n'ab'obusika obutono muliwaayo ebibuga bitono.”

⁹Awo MUKAMA Katonda n'agamba Musa nti,

¹⁰“Yogera eri abaana ba Isirayiri ng'obagamba nti, ‘Bwe musomokanga omugga Yoludaani ne muyingira mu nsi y'e Kanani,

¹¹mweronderangamu ebibuga ebinaabanga ebibuga byammwe eby'okuddukirangamu; ng'omwo omuntu asse omuntu nga tagenderedde mw'anaddukiranga.

¹²Bye binaabanga ebifo eby'obuddukiro okwewala omuwoolezi w'eggwanga, omuntu ateeberezebwa okuba omutemu alemenga okuttibwa nga tasoose kuwozesebwa mu maaso g'ekibiina.

¹³Ebibuga ebyo omukaaga bye mugenda okuwaayo bye binaabanga ebibuga byammwe eby'obuddukiro.

¹⁴Mugenda kuwaayo ebibuga bisatu ku ludda luno olw'ebuvanjuba olwa Yoludaani, n'ebibuga bisatu mu Kanani, okubeeranga ebibuga eby'obuddukiro.

¹⁵Abaana ba Isirayiri n'abagenyi bammwe, n'abagwira abanaabeeranga mu mmwe, mwenna munaddukiranga mu bibuga ebyo omukaaga. Kwe kugamba nti omuntu yenna anattanga omuntu nga tagenderedde anaddukiranga omwo.'

¹⁶"Omuntu bw'anaakubanga omuntu n'ekyuma n'amutta, oyo nga mutemu; era omutemu anattirwanga ddala.

¹⁷Era omuntu bw'anaabanga akutte ejinja mu ngalo ze, n'akuba munne n'ejinja eryo, omutemu anattirwanga ddala.

¹⁸Oba omuntu bw'anaabanga akutte ekyokulwanyisa eky'omuti mu ngalo ze, ekiyinza okutta omuntu, n'akikubisa munne, munne n'afa, oyo nga mutemu; era omutemu anattirwanga ddala.

¹⁹Omwooolezi w'eggwanga yennyini y'anattanga omutemu; bw'anaamusicinkananga anaamuttanga.

²⁰Omuntu bw'anaabangako ekiruyi ku munne n'amufumita ng'akigenderedde, olw'obukyayi, oba n'amwekwekerera n'amukasuukirira ekintu ne kimukuba ne kimutta,

²¹oba olw'obulabe bw'amulinako n'amukuba ekikonde, munne n'afa, omuntu oyo amukubye ekikonde anaafanga; kubanga mutemu. Omwooolezi w'eggwanga y'anattanga omutemu oyo ng'amusicinkanye.

²²"Singa omuntu afumita munne mangwago, gw'atalinaako bulabe, oba n'akasuka ekintu nga tagenderedde ne kimukuba,

²³oba n'ayiringisa ejinja, eriyinza okutta omuntu, ne limugwako nga tamulabye, n'afa; olwokubanga teyali mulabe we, era nga yali tagenderedde kumulumya;

²⁴kale, olukiiko lw'ekibiina lunaasalangawo wakati we n'omwooolezi w'eggwanga, nga lugoberera amateeka gano nga bwe gali.

²⁵Omussi oyo olukiiko lw'ekibiina lunaamuwonyanga omwooolezi w'eggwanga, ne lumuleka n'abeeranga mu kibuga kye eky'obuddukiro okutuusa Kabona Omukulu eyafukibwako amafuta ag'omuzeeyituuni amatukuvu ng'amaze okufa.

²⁶"Naye omussi oyo bwe kanaamutandanga n'afulumako mu kibuga kye eky'obuddukiro mwe yaddukira,

²⁷omwooolezi w'eggwanga n'amala amusanga ebweru w'ekibuga ekyo, n'amutta, omwooolezi w'eggwanga taabengako musango gwa butemu.

²⁸Kubanga omussi oyo kinaamusaaniranga okubeera mu kibuga kye eky'obuddukiro okutuusa nga Kabona Omukulu amaze okufa. Kabona Omukulu anaamalanga kufa, omussi oyo n'addayo ewuwe mu bintu bye eby'obutaka.

Amateeka ku Bujulizi n'Okununula

²⁹“Gano ganaabeeranga mateeka gammwe ge munaakwatanga mu mirembe gyammwe gyonna ne buli we munaabeeranga.

³⁰Omuntu bw'anattanga munne, ne wabaawo obujulizi, omutemu oyo naye anaafanga. Naye tewaabengawo attibwa ku bujulizi obw'omuntu omu yekka.

³¹“Temukkirizanga mutango olw'okununula omussi asingiddwa omusango ogw'obutemu n'asalirwa okuttibwa; anaateekwanga okuttibwa.

³²“Temukkirizanga mutango ogw'okununula omussi abeera mu kibuga eky'obuddukiro, alyoke aveeyo addeyo ewuwe nga Kabona Omukulu tannaba kufa.

³³“Temwonoonanga nsi gye mubeeramu. Okuyiwa omusaayi kyonoona ensi; okutangiririra ensi omuiise omusaayi si kyangu, okuggyako ng'etangiririrwa n'omusaayi gw'oyo eyayiwa omusaayi mu nsi omwo.

³⁴Temwonoonanga nsi mwe mubeera nange mwe mbeera, kubanga Nze, MUKAMA Katonda, mbeera wakati mu baana ba Isirayiri.”

Okubala 36

Okufumbirwa kw'Abasika Abakazi

¹Awo abakulembeze b'ennyumba z'empya ez'omu lunyiriri lwa Gireyaadi, mutabani wa Makiri, mutabani wa Manase, nga bava mu kika kya Yusufu, ne bajja ne boogera ne Musa n'abakulembeze n'abazadde b'abaana ba Isirayiri.

²Ne bagamba nti, “MUKAMA Katonda yalagira mukama waffe, abaana ba Isirayiri obagabanyizeemu ettaka ery'obusika bwabwe ng'okuba akalulu, era n'akulagira ebyobusika ebya muganda waffe ZeroFekadi abigabire abaana be abawala.

³Kale, nno, bwe balifumbirwa abalenzi abazaalibwa mu bika ebirala eby'abaana ba Isirayiri, ebyobusika byabwe bigenda kuggyibwa ku by'obusika obwa bajjajjaffe bigattibwe ku by'obusika obw'ebika abawala abo gye banaabanga bafumbiddwa. Kale olwo ebyobusika bye twagabana birituggyibwako.

⁴Awo Omwaka gwa Jjubiri ogw'abaana ba Isirayiri bwe gunaatuukanga, ebyobusika byabwe bigenda kugattibwanga ku bw'ebika abawala abo gye banaabanga bafumbiddwa, n'ebi'obutaka bwabwe nga bitoolebwa ku butaka obwa bajjajjaffe obw'ensikirano.”

⁵Awo Musa n'addamu abantu ng'ekiragiro kya MUKAMA bwe kyali n'alagira abaana ba Isirayiri nti, "Abava mu batabani ab'omu kika kya Yusufu kye bagamba kituufu.

⁶Kino kye kiragiro kya MUKAMA Katonda ku nsonga z'abawala ba Zerofekadi: Mubaleke bafumbirwenga omusajja gwe baneesimiranga, naye omusajja oyo gwe banaafumbirwanga anaavanga mu kika kya kitaabwe.

⁷Mu by'obusika bw'abaana ba Isirayiri, tewaabengawo butaka obw'obusika obunaggibwanga mu kika ekimu ne butwalibwa mu kika ekirala, kubanga buli omu mu baana ba Isirayiri anaakuumanga butiribiri obutaka obw'omu kika kye bw'anaabanga asikidde okuva ku bajajajaabe.

⁸Era buli mwana owoobuwala anaasikiranga obutaka mu kika kyonna eky'abaana ba Isirayiri, anaateekwanga okufumbirwa omusajja ow'omu kika kya kitaawe w'omuwala oyo; bwe kityo buli mwana wa Isirayiri anaabeeranga n'obutaka obw'obusika bwa bakitaawe.

⁹Noolwekyo tewaabengawo butaka obw'obusika obuggyibwa mu kika ekimu ne butwalibwa mu kika ekirala; kubanga buli kika eky'abaana ba Isirayiri kinaakuumanga butiribiri obutaka bw'obusika obw'ekika ekyo."

¹⁰Bwe batyo bawala ba Zerofekadi ne bakola nga MUKAMA bwe yalagira Musa.

¹¹Bawala ba Zerofekadi bano: Maala, ne Tiruza, ne Kogula, ne Mirika, ne Noowa, baafumbirwa batabani ba baganda ba bakitaabwe.

¹²Baafumbirwa mu mpya za batabani ba Manase mutabani wa Yusufu, ebyobusika byabwe ne bisigala mu kika kya kitaabwe.

¹³Ago ge mateeka n'ebiragiro MUKAMA Katonda bye yalagira Musa n'abituusa eri abaana ba Isirayiri nga bali mu nsenyi za Mowaabu ku mugga Yoludaani okwolekera Yeriko.

Ekyamateeka Olwokubiri

Ekyamateeka Olwokubiri 1

Musa Ayogera nga Katonda bw'Anaakulembera Abayisirayiri

¹Bino bye bigambo Musa bye yategeeza Abayisirayiri bonna nga bali ku ludda olw'ebuvanjuba w'omugga Yoludaani mu ddungu, mu Alaba okwolekera Sufu, wakati wa Palani ne Toferi, ne Labani, ne Kazerosi ne Dizakabu.

²Waliwo olugendo lwa nnaku kkumi na lumu okuva e Kolebu okutuuka e Kadesubanea, ng'okutte ekkubo eriyitira ku Lusozi Seyiri.

³Awo ku lunaku olw'olubereberye olw'omwezi ogw'ekkumi n'ogumu, mu mwaka ogw'amakumi ana, Musa n'ategeeza abaana ba Isirayiri ebyo byonna MUKAMA bye yamulagira okubabuulira.

⁴Mu kiseera ekyo Musa yali amaze okuwangula Sikoni kabaka w'Abamoli eyabeeranga mu Kesuboni, ne Ogi kabaka w'e Basani eyabeeranga mu Asutaloosi ne mu Ederei.

⁵Ku ludda lw'eyo olw'ebuvanjuba olw'omugga Yoludaani, mu nsi ya Mowaabu, Musa n'atandika okulangirira amateeka gano ng'ayogera nti:

⁶"MUKAMA Katonda waffe yatugamba nga tuli ku Kolebu nti, 'Ebbanga lye mumaze ku lusozi luno limala;

⁷kale musitule mukyuke, mutambule nga mwolekera ensi ey'ensozi ey'Abamoli, ne mu baliraanwa baabwe yonna mu Alaba, mu nsozi, ne mu bisenyi, ne mu Negebu, ne ku lubalama lw'enyanja, ne mu nsi ya Bakanani n'ey'Abalebanooni, okutuukira ddala ku mugga omunene, Omugga Fulaati.

⁸Mulabe, ensi eyo ngibawadde. Muyingire mwetwalire ensi eyo MUKAMA Katonda gye yeerayirira okugiwa bajjajammwe: Ibulayimu, ne Isaaka, ne Yakobo; okugibawa bo n'ezzadde lyabwe eririddawo.'

Okulonda Abakulembeze

⁹"Mu biro ebyo nabagamba nti, 'Sisobola kubalabirira nzekka bw'omu.

¹⁰MUKAMA Katonda wammwe abongedde nnyo obungi, ne muwera nnyo; era, laba, kaakano muli ng'emmunyeenye ez'oku ggulu mu bungi bwammwe.

¹¹Nsaba MUKAMA Katonda wa bajjajammwe abongerekko obungi emirundi lukumi okusinga nga bwe muli leero, era abawenga omukisa nga bwe yabasubiza.

¹²Kale, nze obw'omu nzekka nnaasobola ntya okwetikka omugugu gwammwe ogwo oguzitowa bwe gutyo, n'okubamalirawo ennyombo zammwe?

¹³Kale nno, mwerondemu, mu buli kika kyammwe, ab'amagezi, abategeevu era abalina obumanyirivu nga bassibwamu ekitiibwa, nange nnaabakuza ne mbafuula abakulembeze bammwe.'

¹⁴Nammwe mwanziramu nti, 'Ekintu ky'otuteserezza ffe okukola kirungi tukisiima.'

¹⁵"Bwe nt yo ne nzirira abakulu b'ebika byammwe, nga basajja ba magezi, abalina obumanyirivu, era abassibwamu ekitiibwa, ne mbalonda okubeeranga abakulembeze bammwe; okubanga abafuzi b'enkumi, n'abalala ab'ebikumi, n'abalala ab'amakumi ataano, n'abalala ab'ekkumi, mu bika byammwe byonna.

¹⁶Mu biro ebyo ne nkuutira abaabalamulanga nti, 'Muwulirizenga ensonga ezinaabaleeterwanga abooluganda, era musalengawo mu bwenkanya wakati w'wooluganda ne munne, era ne wakati we ne munnaggwanga gw'abeera naye.

¹⁷Musalenga emisango awatali kyekubiira; abagagga n'abaavu nga mubawuliriza kyenkanyi. Endabika y'omuntu tebatissanga, kubanga Katonda y'asala emisango gyonna. Bwe wabangawo omusango gwonna omukakanyavu muguleetanga gye ndi, nze nnaaguwuliranga.'

¹⁸Mu biro ebyo ne mbakuutira ebintu byonna bye musaanira okukolanga."

Alipoota y'Abakessi

¹⁹Awo ne tusitula okuva e Kolebu, ne tuyita mu ddungu eddene ery'entisa mwenna lye mwalaba, ne tukwata ekkubo eryatutwala mu nsi ey'ensozi ey'Abamoli, nga MUKAMA Katonda waffe bwe yatulagira; ne tulyoka tutuuka e Kadesubanea.

²⁰Ne mbagamba nti, "Mutuuse mu nsi ey'ensozi ey'Abamoli, MUKAMA Katonda waffe gy'atuwadde.

²¹Laba, MUKAMA Katonda wo akuwadde ensi. Kale, yambuka ogyetwalire nga MUKAMA Katonda wa bajjajaabo bwe yakugamba. Totya, so toggwaamu maanyi."

²²Awo mwenna ne mujja gye ndi, ne munjamba nti, "Kirungi tutume abantu basooke okutuukako eyo gye tulaga, bakebere ensi bagyetegereze nga bw'eri; balyoke bakomewo batutegeeze ekkubo lye tusaanira okukwata, n'ebibuga bye tunaggukako."

²³Ekirowoozo ekkyo kyandabikira nga kirungi, ne nkisiima; ne nnonda mu mmwe abasajja kkumi na babiri; nga mu buli kika muvaamu omusajja omu omu.

²⁴Baasitula ne bambuka mu nsi eyo ey'ensozi, ne batuuka mu kiwonvu Esukoli, ne bakiketta.

²⁵Ne banoga ku bibala eby'omu nsi omwo ne babituleetera; ne batutegeeza bwe bati nti, "Ensi MUKAMA Katonda waffe gy'atuwadde nnungi nnyo.

Okwemulugunya kwa Isirayiri

²⁶“Naye ate ne mutayambuka, ne mujeemera ekiragiro kya MUKAMA Katonda wammwe.

²⁷Ne mwemulugunyiriza mu weema zammwe nga mugamba nti, ‘Olwokubanga MUKAMA tatwagala, yatukyawa, kyeyava atuggya mu nsi y'e Misiri alyoke atuweeyo mu mukono gw'Abamoli batuzikirize.

²⁸Wa eyo gye tunaayambuka? Ebigambo bya baganda baffe abaagenda okuketta biyongobezza emitima gyaffe, bwe bagambye nti, Abantu abali eri banene, era bawanvu okutusinga ffe; ebibuga byayo binene nnyo, n'ebigo byabyo biwanvu bituukira ddala waggulu mu bire. Ate ne batabani ba Anaki nabo twabalabayo.”

²⁹Naye ne mbaddamu nti, “Temutekemuka mitima, so temubatya.

³⁰MUKAMA Katonda wammwe bulijjo abakulembera, ye yennyini agenda kubalwaniriranga, nga bwe yabalwanirira mu Misiri nga mulabira ddala n'amaaso gammwe.

³¹Era ne mu ddungu walabira ddala nga MUKAMA Katonda wo bwe yakusitula, nga kitaawe w'omwana bw'asitula mutabani we, n'akuyisa mu lugendo lwonna n'okukutuusa n'akutuusa mu kifo kino.”

³²Newaakubadde ng'ebyo byonna byali bwe bityo, MUKAMA Katonda wammwe temwamwesiga,

³³songa ye, yabakulemberanga mu lugendo lwammwe lwonna, n'empagi ey'omuliro ekiro, n'ekire mu budde obw'emisana, n'okubalaganga ekifo we munaasiisiranga.

³⁴ MUKAMA bwe yawulira ebigambo byammwe n'asunguwala nnyo, n'alayira nti,

³⁵“Tewalibaawo n'omu ku bantu bano, ab'omulembe guno omubi, aliraba ku nsi eyo ennungi gye nalayirira okuwa bajjajjammwe,

³⁶okuggyako Kalebu mutabani wa Yefune. Ye agenda kugiraba, era ndimugabira, awamu n'ezzadde lye, ensi gye yalinnyako ekigere kye; kubanga yagondera MUKAMA n'omutima gwe gwonna.”

³⁷ Nange MUKAMA yansunguwalira ku lwammwe, n'anjamba nti, “Naawe toliyingira mu nsi omwo.

³⁸Wabula omuweereza wo Yoswa mutabani wa Nuuni ye aligiyingiramu. Mumuwagire, kubanga ye alikulembera abaana ba Isirayiri ne basikira ensi eyo.

³⁹Abaana bammwe abato be mwatiisanga nti bagenda kuwambibwa batwalibwe mu busibe, abaana bammwe abo, abaali batannayawulamu kirungi na kibi, be baliyingira mu nsi eyo. Ndibawa, ne bagyetwalira ne bagyefunira.

⁴⁰Naye mmwe, musitule mukyuke, mukwate olugendo olw'omu ddungu nga mwolekera Ennyanja Emyufu."

Isirayiri Awangulwa mu Lutalo

⁴¹Ne mulyoka munziramu nti, "Twonoonye eri MUKAMA. Tujja kwambuka tulwane nga MUKAMA Katonda waffe bwe yatulagira." Awo buli musajja ne yeesiba ebyokulwanyisa bye eby'olatalo, nga mulowooza nti kyangu okwambuka mu nsi ey'ensozi.

⁴² MUKAMA n'aŋjamba nti, "Bategeeze nti, 'Temwambuka kulwana, kubanga sijja kubeera nammwe. Abalabe bammwe bajja kubawangula.'"

⁴³Bwe ntyo ne mbagamba, naye ne mutawuliriza, ne mujeemera ekiragiro kya MUKAMA, ne mujjula amalala ne mwambuka mu nsi ey'ensozi.

⁴⁴Awo Abamoli abaabeeranga mu nsi eyo ey'ensozi, ne bavaayo ne babalumba, ne babagoba ng'enjuki bwe zikola, ne babakubira mu Seyiri n'okubatuusiza ddala e Koluma.

⁴⁵Ne mukomawo, ne mukaabira mu maaso ga MUKAMA, naye MUKAMA n'atabawuliriza era ne bye mwamukaabirira n'atabibawa.

⁴⁶Bwe mutyo ne musigala e Kadesi, okumala ebbanga eryo lyonna lye mwabeera eyo.

Ekyamateeka Olwokubiri 2

Emyaka gye Baamala mu Ddungu

¹Awo ne tukyuka ne tuddayo mu ddungu nga twolekera Ennyanja Emyufu, nga MUKAMA bwe yandagira. Ne tumala ennaku nnyingi nnyo nga tutambulira mu nsi ey'ensozi ey'e Seyiri.

²MUKAMA n'aŋjamba nti,

³"Mu nsi eno ey'ensozi mutambuliddemu ekiseera kiwanvu, era kimala; kale kaakano mukyuke mulage mu bukiikkono.

⁴Abantu bawe ebiragiro bino nti, 'Muli kumpi okutuuka mu nsi ya baganda bammwe, abazzukulu ba Esawu ababeera mu Seyiri, bajja kubatya, kyokka mubeegendereza nnyo.

⁵Temubasosonkerezaako lutalo, kubanga mmwe sijja kubawa ku ttaka lyabwe, wadde akatundu akatono awagya ekigere ky'omuntu. Kubanga ensi ey'ensozi eya Seyiri nagiwa dda Esawu okuba obutaka bwe obwenkalakkalira.

⁶Mubagulangako emmere gye munaalyanga nga mugisasulira n'ensimbi, n'amazzi ag'okunywa nago nga mugasasulira ensimbi."

⁷ MUKAMA Katonda wo akuwadde omukisa mu mirimu gyonna gy'okola n'emikono gyo. Amanyi nti otambulira mu ddungu lino eddene ennyo bwe lityo.

Era MUKAMA Katonda wammwe abadde akulabirira emyaka gino gyonna amakumi ana, ng'abeera naawe, era nga buli kye weetaaga akikuwa.

⁸ Bwe tutyo ne tweyongerayo mu lugendo lwaffe nga tuyita ku baganda baffe abazzukulu ba Esawu ababeera mu Seyiri. Ne tuleka ekkubo ly'Alaba eririnnyalinnya okuva Erasi ne Eziyonigeba, ne tukwata ekkubo eriyita mu ddungu lya Mowaabu.

⁹ Awo MUKAMA Katonda n'aŋjamba nti, "Abamowaabu temubasunguwaza wadde okubasosonkerezaako olutalo, kubanga sigenda mmwe kubawa ku ttaka lyabwe mu Ali, ettaka eryo namala dda okuliwa bazzukulu ba Lutti okubeera obutaka bwabwe."

¹⁰ Abemi be baabeeranga mu kitundu ekyo, nga basajja banene, nga ba maanyi, nga bangi nnyo, era nga bawanvu okwenkana nga Abanaki.

¹¹ Baayitbwanga Baleefa okufaanana nga Abanaki bwe baayitbwanga, naye Abamowaabu nga bo babayita Bemi.

¹² Mu biseera eby'edda Abakooli nabo baabeeranga mu Seyiri, okutuusa bazzukulu ba Esawu bwe baabasigukulula ne babagobamu ne babazikiriza, ensi eyo ne bagyetwalira, bo ne bagibeeramu; okufaananako ng'Abayisirayiri bwe balikola mu nsi MUKAMA Katonda gye yabawa ey'obusika bw'obutaka bwabwe obw'enkalakkalira.

¹³ MUKAMA n'agamba nti, "Musituke musomoke akagga Zeredi." Ne tusomoka.

¹⁴ Olwo nga kasookedde tuva mu Kadesubanea okutuusa lwe twasomoka akagga Zeredi gyali giweze emyaka amakumi asatu mu munaana. Ekiseera ekyo we kyaggweerako ng'abasajja abalwanyi bona mu lusiisira lw'abaana ba Isirayiri, ab'omu mulembe ogwo, nga bafudde baweddewo, nga MUKAMA Katonda bwe yabalayirira.

¹⁵ Kubanga MUKAMA Katonda yamalirira okubazikiriza n'omukono gwe okutuusa ng'abamaliddemu ddala mu lusiisira lwabwe.

¹⁶ Awo olwatuuka abasajja abalwanyi bona bwe baamala okufa, nga bazikiridde baweddewo mu bantu,

¹⁷ MUKAMA Katonda n'aŋjamba nti,

¹⁸ "Olwa leero munaasala ensalo ya Mowaabu mu Ali.

¹⁹ Naye bwe musemberera Abamoni temubasunguwaza so temubasosonkerezaako lutalo, kubanga mmwe sigenda kubawa ku ttaka ly'Abamoni n'akatono okuba obutaka bwammwe, kubanga ettaka eryo namala dda okuliwa bazzukulu ba Lutti okubeera obutaka bwabwe obw'enkalakkalira."

²⁰Ekitundu ekyo era kyali kiyitibwa nsi ya Baleefa, kubanga Abaleefa be baabeerangamu naye Abamoni nga babayita Bazamuzumu.

²¹Baali basajja ba maanyi era nga bangi nnyo, nga bawanvu ng'Abanaki. Naye MUKAMA Katonda n'abawaayo eri Abamoni ne babazikiriza, ne batwala ensi yaabwe ne bagituulamu.

²²Ne kifaananako nga MUKAMA bwe yazikiriza Abakooli abaalinga mu Seyiri, ensi yaabwe n'agiwa bazzukulu ba Esawu okuba obutaka bwabwe obw'enkalakkalira n'okutuusa leero.

²³Abavi abaabeeranga mu byalo ebyesuddeko okutuuka e Gaza, Abakafutoli abaava e Kafutoli bajja ne babazikiriza ne batwala ensi yaabwe bo ne bagibeeramu.

²⁴"Musituke mutambule muyite mu kiwonvu ekya Alunoni. Otegeere kino nga Sikoni Omwamoli Kabaka w'e Kesuboni mmugabudde mu mukono gwo n'ensi ye yonna. Kale tandika okumutabaala, n'ensi ye ogyetwalire efuukire ddala yiyo ya butaka bwo.

²⁵Okutandika n'olunaku lwa leero amawanga gonna ag'oku nsi nzija kugateekamu entiisa bakankane nga bawulidde ettutumu lyo babeere mu kutiitiira n'okunyolwa ku lulwo."

Okuwangula Sikoni Kabaka w'e Kesuboni

²⁶Nga tuli mu ddungu ly'e Kedemosi natumira Sikoni Kabaka w'e Kesuboni n'obubaka obw'okuteesa emirembe nga mmugamba nti,

²⁷"Tukkirize tuyite mu nsi yo. Tujja kutambilira mu luguudo mwokka nga tetuwunjuseeko kulaga ku ludda olwa ddyo oba olwa kkono.

²⁸Onootuguzanga emmere gye tunaalyanga nga tugisasulira ensimbi, n'amazzi ge tunaanywangako, nago nga tugasasulira ensimbi. Naye tuleke tuyite mu nsi yo nga tutambula n'ebigere,

²⁹nga bazzukulu ba Esawu abaabeeranga mu Seyiri, n'Abamowaabu abaabeeranga mu Ali bwe baatuleka, okutuusa lwe tulimala okusomoka Yoludaani ne tutuuka mu nsi MUKAMA Katonda waffe gy'ategese okutuwa."

³⁰Naye Sikoni Kabaka wa Kesuboni n'atatukkiriza kuyitawo. Kubanga MUKAMA Katonda wammwe yali akakanyazizza omwoyo gwe era ng'awaganyazizza omutima gwe, alyoke amugabule mu mukono gwammwe nga bwe kiri leero.

³¹Awo MUKAMA Katonda n'aŋŋamba nti, "Laba, ntandise okugabula Sikoni n'ensi ye mu mukono gwo. Kale tandika okuwangula ensi ye yonna, olyoke ogyefunire okubeera obusika bwo era obutaka bwo obw'enkalakkalira."

³²Kabaka Sikoni n'eggye lye lyonna ne batulumba mu lutabaalo olw'e Yakazi.

³³MUKAMA Katonda waffe n'agabula Sikoni n'eggye lye lyonna, ne batabani be, mu mukono gwaffe ne tubawangula.

³⁴Mu kaseera ako twawamba ebibuga bye byonna ne tubizikiriza n'abantu bona, abasajja, n'abakazi, n'abaana abato, tetwalekerawo ddala.

³⁵Naye ente ne tuzeetwalira awamu n'omunyago gwe twaggya mu bibuga bye twawamba.

³⁶Okuva ku Aloweri ekiri ku lukugiro lw'Ekiwonvu Alumoni, n'okuva ku kibuga ekiri mu kiwonvu ekyo, n'okutuukira ddala mu Gireyaadi, tewaaliwo kibuga na kimu ekyatusukkirira amaanyi. MUKAMA Katonda waffe byonna yabitugabula mu mukono gwaffe.

³⁷Naye ebifo, MUKAMA Katonda waffe bye yatulagira obutabisemberera, y'ensi y'abazzukulu ba Amoni, ne ku mbalama zonna ez'omugga Yaboki, n'ebibuga eby'omu nsi ey'ensozi; ebyo byo yatugaana okubikwatirako ddala.

Ekyamateeka Olwokubiri 3

Okuwangula Ogi Kabaka w'e Basani

¹Awo ne tukyuka ne twambukira mu kkubo eriraga e Basani. Ogi, Kabaka w'e Basani, n'afuluma n'eggye lye lyonna n'ajja okututabaala mu lutalo olwalwanirwa mu Ederei.

²Naye MUKAMA n'aŋjamba nti, "Tomutya, kubanga oyo mmugabudde mu mukono gwo ye n'eggye lye lyonna n'ensi ye. Kale, mukole nga bwe wakola Sikoni Kabaka w'Abamoli abaabeeranga mu Kesuboni."

³Bw'atyo MUKAMA Katonda waffe n'agabula ne Ogi Kabaka w'e Basani mu mukono gwaffe awamu n'eggye lye lyonna. Ne tubatta bona obutalekaawo muntu n'omu.

⁴Era mu kiseera ekyo ne tuwamba ebibuga bye byonna ne tubitwala. Ebibuga enkaaga byonna tekwaliko kibuga na kimu kye tutaabatwalako, ne tutwala amatwale gonna aga Alugobu ag'obwakabaka bwa Ogi mu Basani.

⁵Ebibuga ebyo byonna byali bizimbiddwa mu bigo eby'ebisenge ebiwanvu, n'emizigo egyptayimbwa, ng'okwo kw'ogatta n'obubuga obw'omu byalo obutaaliko bisenge.

⁶Twabizikiririza ddala byonna nga bwe twakola ebya Sikoni kabaka w'e Kesuboni, nga tuzikiriza buli kibuga n'abasajja bona abaakirimu n'abakazi n'abaana abato bona.

⁷Naye ente ne tuzeetwalira awamu n'omunyago gwe twaggya mu bibuga bye twawamba.

⁸Bwe tutyo mu kiseera ekyo ne tutwala ebitundu by'ensi byonna ebyali ebya bakabaka bombi ab'Abamoli ebyali ku luuyi lw'ebuvanjuba olw'omugga Yoludaani; okuva ku Kiwonvu Alunoni okutuuka ku Lusozi Kerumooni.

⁹Abasidoni nga Kerumooni baluyita Siriyooni, ate bo Abamoli nga baluyita Seniri.

¹⁰Twatwala ebibuga byonna ebyali mu kitundu ekya waggulu ekitereevu ne Gireyaadi yonna ne Basani yonna okutuuka ku Saleka ne Ederei, ng'ebyo byali bibuga eby'omu bwakabaka bwa Ogi mu Basani.

¹¹Ogi kabaka wa Basani ye yali asigaddewo ku Balefa. Ekitanda kye kyakolebwa mu kyuma, nga kiriko mita nnya obuwanyu, n'obugazi bwa mita emu n'obutundu munaana. Kikyaliyo mu Raba eky'Abamoni.

Okugabana Ensi

¹²Bwe twamala okwetwalira ebitundu by'ensi ebyo bye twawangula mu kaseera ako, ne ngabira Abalewubeeni n'Abagaadi ekitundu ekyo ekiri ku bukiakkono okuva ku Aloweri n'okugendera ku mukugiro gw'Ekiwonvu kya Alunoni, n'ekitundu ekyamakkati eky'ensi y'ensozi eya Gireyaadi, awamu n'ebibuga byamu.

¹³Ekitundu kya Gireyaadi ekyasigalawo, n'obwakabaka bwa Ogi obwa Basani omugendera ne Alugabu, ne mbigabira ekitundu ky'ekika kya Manase. Ekitundu kya Alugabu kyonna mu Basani, wonna nga wayitibwa nsi ya Balefa.

¹⁴Yayiri, ava mu Manase, yafuna ekitundu kyonna ekya Alugabu, era ye Basani, nga kyerambulula okutuukira ddala ku nsalo ey'Abagesuli n'Abamaakasi; n'akibbulamu erinnya lye, n'okutuusa leero ensi Basani eyitibwa Kavosu Yayiri.

¹⁵Gireyaadi nagigabira Makiri.

¹⁶Abalewubeeni n'Abagaadi ne mbagabira ekitundu ky'ensi ekiva ku Gireyaadi okuserengeta mu Kiwonvu kya Alunoni, nga mu makkati gaakyo ye nsalo, n'okutuukira ddala ku mugga Yaboki ogw'ensalo n'Abamoni.

¹⁷Omugga Yoludaani nga ye nsalo ey'ebugwanjuba mu Alaba, okuviira ddala ku Kinneresi okutuuka ku Nnyanja ya Alaba, ye Nnyanja ey'Omunnyo, wansi w'olugulungujo lw'olusozi Pisuga ku luuyi olw'ebuvanjuba.

¹⁸Mu kiseera ekyo, mmwe ab'ekika kya Lewubeeni, n'ekya Gaadi, n'ekitundu ky'ekika kya Manase, nablagira nga mbagamba nti, "MUKAMA Katonda wammwe abawadde ekitundu ky'ensi kino okubeera obutaka bwammwe. Naye basajja bammwe bona ab'amaanyi abazira nga beesibye ebyokulwanyisa, be balisooka baganda bammwe abaana ba Isirayiri okusomoka Yoludaani.

¹⁹Kyokka, bakazi bammwe, n'abaana bammwe balisigala mu bibuga bye nabawa awamu n'ente zammwe ze mulina, ze mmanyi nga bwe ziri ennyingi,

²⁰okutuusa nga baganda bammwe bamaze okwetwalira ensi eri emitala w'omugga Yoludaani, MUKAMA Katonda wammwe gy'abawa; MUKAMA alyoke awe baganda bammwe ekiwummulo nga nammwe bwe yakibawa. Oluvannyuma mulikomawo mu butaka bwammwe bwe nabagabira."

²¹Mu kiseera ekkyo ne ndagira Yoswa, ne mmugamba nti, "Ebyo byonna MUKAMA Katonda wammwe byakoze bakabaka abo ababiri obyerabiddeko n'amaaso go gennyini. Bw'atyo MUKAMA bw'alikola obwakabaka bwonna obuli eyo gye mugenda.

²²Temubatyanga; kubanga MUKAMA Katonda wammwe yennyini y'anaabalwaniriranga."

Musa Agaanibwa Okutuuka mu nsi Ensuumize

²³Mu kiseera ekkyo ne neegayirira MUKAMA nga njogera nti,

²⁴"Ayi MUKAMA Katonda, otandise okundaga nze omuddu wo, omukono gwo ogw'amaanyi n'obukulu bwo obw'ekitiibwa. Kubanga katonda ki ali mu ggulu oba ali ku nsi asobola okukola ebyekyewuunyo bino byonna by'okola, n'emirimu egy'amaanyi bwe gityo gy'okola?

²⁵Nkusaba, nsomoke omugga Yoludaani, ηnjende ndabe ku nsi ennungi bw'etyo eri emitala waagwo, ensi eyo ey'ensozi ezirabika obulungi, awamu ne Lebanooni."

²⁶Naye MUKAMA n'ansunguwalira nnyo ku lwammwe, bye namusaba n'atabiwuliriza. MUKAMA Katonda n'anjamba nti, "Ebyo by'oyogedde bikumale; toddayo kwogera gye ndi nate ku nsonga eyo.

²⁷Yambuka waggulu ku ntikko y'olusozi Pisuga, ositule amaaso go otunule ebugwanjuba, ne ku bukiikkono, n'ebuvanjuba ne ku bukiikkaddyo. Weerabireko ku nsi eyo n'amaaso go gennyini, kubanga togenda kusomoka mugga guno Yoludaani.

²⁸Naye obuyinza bukwase Yoswa, omukuutire era omugumye afune amaanyi, kubanga y'agenda okukulembera abantu bano nga basomoka, era ye alibasobozesa okulya ensi eyo gy'oja okulaba, okubeera obutaka bwabwe."

²⁹Bwe tutyo ne tubeera awo mu kiwonvu okumpi ne Besu Peoli.

Ekyamateeka Olwokubiri 4

Musa Alagira Abantu Okuba Abawulize

¹Kale nno kaakano, muwulire, Ayi Isirayiri, mutege amatu eri amateeka n'ebiragiro bye ηnjenda okubayigiriza. Mubigonderenga era mubigobererenga, muliba balamu, mulyoke musingire mu nsi MUKAMA Katonda wa bajjajammwe gy'abawa mugyetwalire ebeere obutaka bwammwe obw'enkalakkalira.

²Temwongerangako ku mateeka ge mbalagira, so temugatoolangako, naye mukwatenga ebiragiro bya MUKAMA Katonda wammwe, bye mbategeeza.

³Mwerabirako n'amaaso gammwe gennyini ebyo byonna MUKAMA bye yakola e Baali Peoli. Abo bona mu mmwe abaagoberera, era ne basinza Baali e Peoli, MUKAMA Katonda wo yabazikiriza;

⁴naye mmwe abaanywerera ku MUKAMA Katonda wammwe, mukyali balamu leero.

⁵Kale, mulabe nno, mbayigirizza amateeka n'ebiragiro nga MUKAMA Katonda wange bwe yandagira, mulyoke mubigobererenga nga mutuuse mu nsi gye mugenda okuyingiramu, n'okugyefunira ng'obutaka bwammwe obw'enkalakkalira.

⁶Mugagobererenga n'obwegendereza, kubanga ekyo kiriraga ensi endala obugezi bwammwe n'obutegeevu bwammwe. Ensi ezo bwe ziriwulira ku mateeka gano gonna zirigamba nti, "Ddala abantu b'eggwanga lino ekkulu bategeevu era ba magezi."

⁷Kubanga ggwanga ki eddala ekkulu erimanyiddwa eririna bakatonda b'abantu baalyo okumpi n'abantu abo, nga ffe bwe tulina MUKAMA Katonda waffe, abeera okumpi naffe buli lwe tumukoowoola?

⁸Era ggwanga ki eddala ekkulu erimanyiddwa eririna amateeka n'ebiragiro eby'obwenkanya nga bino bye nteeka mu maaso gammwe leero?

⁹"Ekikulu, weekuumme nnyo nga weerabirira mu ngeri gye weeyisaamu, olempeng kwerabira ebyo byonna amaaso go bye gazze galaba oleme okubiganya okuva mu mutima gwo ennaku zonna ez'obulamu bwo. Biyigirizenga abaana bo, nabo babiyigirizenga abaana baabwe.

¹⁰Kirungi mujukire nga bwe mwayimirira awali MUKAMA Katonda wammwe, ku lusozi Kolebu, bwe yaŋŋamba nti, 'Kuŋŋanya abantu bona obandeetere wano we ndi, bawulire ebigambo byange, balyoke bayige okumpulira nga bantya; banzisengamu ekitiibwa ennaku zonna ze balimala ku nsi, era ebigambo ebyo babiyigirizenga abaana baabwe.

¹¹Mwasembera ne muyimirira wansi w'olusozi, ne mulaba nga lwaka omuliro ogwatuukira ddala waggulu ku ggulu, nga gwetooloddwa ebire n'ekizikiza ekikutte.'

¹²Bw'atyo MUKAMA Katonda n'ayogera nammwe ng'asinziira wakati mu muliro. Mwawulira envuga y'ebigambo bye, naye ekikula kye temwakiraba; mwakoma ku ddoboozi lyokka.

¹³Yabategeeza endagaano ye eyali mu Mateeka Ekkumi, ge yawandiika ku bipande by'amayinja ebibiri, n'abalagira okugagobereranga.

¹⁴Era mu kaseera ako MUKAMA Katonda n'andagira mbayigirize amateeka n'ebiragiro bye musaana okugonderanga, nga muli mu nsi gye mugenda okwefunira ng'obutaka bwammwe obw'enkalakkalira, nga mumaze okusomoka Yoludaani.

Okusinza Bakatonda abalala Kuwrebwa

¹⁵“Ku lunaku olwo MUKAMA Katonda bwe yayogera gye muli ng'asinziira wakati mu muliro ku lusozi Kolebu, temwalaba kikula kye kya ngeri yonna. Noolwekyo mwekuumenga nnyo,

¹⁶mulemenga okweyonoona nga mwekolera bakatonda abalala, aba buli ngeri, abali mu bifaananyi ebiri ng'omusajja oba ng'omukazi,

¹⁷oba ebifaanana ng'ensolo ez'oku nsi, oba ng'ennyonyi ezibuuka mu bbanga,

¹⁸oba ebifaanana ng'ebiramu byonna ebitambulira wansi oba ebyekulula ku ttaka; oba ebifaanana ng'ebiyennyanja ebiri mu mazzi agali wansi w'ettaka.

¹⁹Era weekuumenga nnyo bw'onooyimusanga amaaso go okutunula waggulu ku ggulu, n'olaba enjuba, n'omwezi n'emmunyeeny, n'ebitiibwa byabyo, n'osendebwasendebwa n'obiweereza, era n'obivuunamira n'obisinza; songa ebyo byonna bye bintu MUKAMA Katonda wo bye yawa amawanga gonna agali wansi w'eggulu.

²⁰Naye mmwe, MUKAMA yabaggya mu Misiri, mu mbiga esaanuusa ebyuma, mubeerenga bantu be ab'obusika bwe, nga bwe muli leero.

²¹“Ate n'ekirala, MUKAMA yansunguwalira ku lwammwe, ne yeerayirira nti nze sigenda kusomoka mugga ogwo Yoludaani nnyingire mu nsi eyo ennungi MUKAMA Katonda wammwe gy'abawa okubeera obusika bwammwe.

²²Naye nze kinsaanira okufiira wano mu nsi eno kaakano mwe tuli, sigenda kusomoka mugga Yoludaani; naye mmwe muligusomoka ne mwefunira ensi eyo ennungi okubeera obutaka bwammwe obw'enkalakkalira.

²³Mwegenderezanga nnyo ne muteerabira ndagaano ya MUKAMA Katonda wammwe gye yakola nammwe. Temwekoleranga bitali Katonda mu kufaanaanyiriza okw'ekintu kyonna MUKAMA Katonda wo kye yakugaana okukola.

²⁴Kubanga MUKAMA Katonda wo muliro ogwokya ne gusaanyaawo, ye Katonda ow'obuggyga.

Ekibonerezo olw'Okusinza Bakatonda Abalala

²⁵“Bw'olimala okuzaala abaana ng'ofunye n'abazzukulu, era nga mu nsi omwo mumazeemu emyaka mingi nga mukaddiye; ne mugenda mweyonoonanga nga mwekolera bakatonda abalala ab'engeri zonna, ne mukolanga ebibi mu maaso ga MUKAMA Katonda wo ne mumusunguwazanga,

²⁶nkoowoola eggulu n'ensi okubeera abajulirwa bange ku lunaku lwa leero nga mbakuitira mmwe nti, Bwe muneeyoonoona bwe mutyo, muliggweerawo ddala mu nsi eyo gye mugenda okwefunira okuba obutaka bwammwe, nga mumaze okusomoka Yoludaani. Muligibeeramu akabanga katono ne muzikirizibwa mwenna.

²⁷MUKAMA anaabasaasaanya mu mawanga amalala, era erisigalayo batono mu mmwe abalibeera mu nsi ezo MUKAMA Katonda gy'anaabanga abasindiikirizza.

²⁸Nga muli eyo munaasinzanga bakatonda abakolebwa n'emikono gy'abantu, mu miti ne mu mayinja, abatayinza kulaba, oba okuwulira oba okulya, wadde okuwunyiriza.

²⁹Naye ng'oli eyo, bw'onoonoonyanga MUKAMA Katonda wo, onoomulabanga, singa onoomunoonyanga n'omutima gwo gwonna awamu n'omwoyo gwo gwonna.

³⁰Ebantu ebyo byonna bwe binaakutuukangako n'olaba ennaku nnyingi, olwo onookomangawo eri MUKAMA Katonda wo mu biseera eby'oluvannyuma, n'omugonderanga.

³¹Kubanga MUKAMA Katonda wo ajjudde okusaasira, taakusuulirirenga wadde okukuzikiriza, oba okwerabira endagaano ye gye yakola ne bajjajaabo gye yabalayiririra.

Isirayiri, Eggwanga Eddonde

³²"Kale, weebuuze leero ku byafaayo eby'ebiro eby'edda, nga naawe tonnabeerawo, okuva ku lunaku Katonda lwe yatonderako omuntu n'amuteeka ku nsi; weebuuze okuva ku luuyi olumu olw'eggulu okutuuka ku luuyi olulala. Waali wabaddewo ekintu ekikulu nga kino, oba waali wabaddewo akiwulirako?

³³Abantu abamawanga amalala baali bawuliddeko ku ddoboozi lya Katonda ng'ayogerera mu muliro, ne basigala nga bakyali balamu, nga mmwe bwe mwaliwulira ne muba balamu?

³⁴Nantiki, waali wabaddewo katonda eyali agezezzaako okwetwalira eggwanga erimu ng'aliggya wakati mu ggwanga eddala, ng'ataddewo ebigezo, n'okukola ebyamagero, n'obubonero, n'ebiyewuunyo, n'entalo, ng'alaga omukono gwe ogw'amaanyi, n'omukono gwe omuwanvu; oba n'ebikolwa ebinene ebitiisa, okufaanana ng'ebantu MUKAMA Katonda wammwe bye yabakolera nga muli mu Misiri, nga mwenna mutunula?

³⁵"Walagibwa ebantu ebyo byonna olyoke otegeere nga MUKAMA ye Katonda; era nga awatali ye tewali mulala.

36Yakuleka n'owulira eddoboozi lye nga liva mu ggulu alyoke akuyigirize. Yakulaga omuliro gwe omungi ennyo ku nsi, n'owulira ebigambo bye nga biva mu muliro ogwo.

37Olw'okubanga yayagala nnyo bajjajaabo naawe muzzukulu waabwe eyabaddirira, yakuggya mu nsi y'e Misiri ng'akozesa obuyinza bwe obungi.

38Yakuwangulira amawanga amakulu era agakusinga ggwe amaanyi, alyoke akuyingize mu nsi yaabwe, era agikuwe ggwe okubeeranga obusika bwo nga bwe kiri leero.

39"Noolwekyo osaana okitegeerere ddala okuva ku lunaku lwa leero, era okinywerezze ddala mu mutima gwo nti MUKAMA ye Katonda yekka ali waggulu mu ggulu ne wansi ku nsi; so tewali mulala.

40Kale, mugonderenga amateeka ge n'ebiragiro bye, bye nkulagira leero; olwo nno eby'obulamu bwo n'embeera yo biryoke bikugenderenga bulungi, ggwe n'ezzadde lyo eririddawo; bw'otyo olyoke owangaalenga ng'oli mu nsi MUKAMA Katonda wo gy'akuwa okubeeranga obutaka bwo obw'enkalakkalira."

Ebibuga eby'Obuddukiro

41Awo Musa n'ayawula ebibuga bisatu ku luuyi olw'ebuvanjuba olw'omugga Yoludaani,

42nga mu bibuga ebyo, omuntu yenna anaabanga asse muntu munne nga tagenderedde, mw'anaddukiranga, kubanga munne anaabanga amusse mu butanwa nga tamuliiko kiruyi kubanga tabangako mulabe we; anaddukiranga mu kimu ku bibuga ebyo yeewonye naye okuttibwa.

43Bino bye byali ebibuga ebyo: Bezeri, nga kiri mu ddungu mu nsi engulumivu kyokka nga waggulu mbyabyatavu, nga kye ky'Abalewubeeni; ne Lamusi mu Gireyaadi, nga kye ky'Abagaadi; ne Golani mu Basani, nga ky'ekitundu ky'Abamanase abaagabana oluuyi olwo.

Musa Ayanjula Amateeka

44Gano ge mateeka Musa ge yateeka mu maaso g'abaana ba Isirayiri,

45era ono ye kalonda w'obujulirwa, n'amateeka, n'ebiragiro, Musa bye yategeeza abaana ba Isirayiri nga bavudde mu Misiri,

46nga bali mu kiwonvu ekiriraanye Besu Peoli ku buvanjuba bw'omugga Yoludaani, mu nsi eya Sikoni kabaka w'Abamoli, eyafugiranga mu Kesuboni, Musa n'abaana ba Isirayiri gwe baali bamaze okuwangula nga bavudde mu nsi ey'e Misiri.

47Ensi eyo baali bagititte awamu n'ensi ya Ogi kabaka wa Basani, abo nga be bakabaka ababiri abaabanga ku luuyi olw'ebuvanjuba olw'omugga Yoludaani.

⁴⁸Ensi eyo yali eva ku Aluweri ekiri ku njegoyego y'Ekiwonvu Alunoni n'okutuuka ku lusozi olunene Siriyoni era olwo ye Kerumooni,

⁴⁹n'ezingiramu ne Alaba ekiri ku luuyi olw'ebuvanjuba obwa Yoludaani, okutuukira ddala ku Nnyanja ya Alaba, ye Nnyanja ey'Omunyyo, wansi w'olugulungujjo lw'olusozi Pisuga.

Ekyamateeka Olwokubiri 5

Amateeka Ekkumi

¹Awo Musa n'akuŋjaanya Isirayiri yenna, n'abagamba nti, Wulira, Ayi Isirayiri, amateeka n'ebiragiro bye nkutegeeza ng'owulira ku lunaku lwa leero. Mubiyige era mubigobererenga n'obwegendereza.

²MUKAMA Katonda waffe yakola naffe endagaano nga tuli e Kolebu.

³Endagaano eyo MUKAMA Katonda teyagikola ne bazadde baffe, naye yagikola naffe abali wano era abalamu ku lunaku lwa leero.

⁴MUKAMA Katonda yayogera nammwe nga mwolekaganye naye, ye ng'asinziira mu muliro ku lusozi olunene.

⁵Mu kaseera ako nze nnali nnyimiridde wakati wa MUKAMA nammwe okubatuusaako ekigambo kya MUKAMA Katonda, kubanga mmwe mwali mutidde omuliro, noolwekyo ne mutualinnya ku lusozi olunene. N'abagamba nti:

⁶“Nze MUKAMA Katonda wo, eyakuggya mu Misiri, mu nsi gye mwafulibwa abaddu.

⁷“Tobeeranga na bakatonda balala wabula Nze nzekka.

⁸Teweekoleranga kintu kyonna ekyole ekifaanana n'ekintu kyonna ekiri waggulu mu ggulu, oba wansi ku nsi, oba ekiri mu mazzi agali wansi w'ensi.

⁹Ebyo tobivuunamiranga so tobisinzanga. Kubanga Nze MUKAMA Katonda wo ndi Katonda wa buggya; mbonereza abaana olw'ebibi bya bakitaabwe n'ebya bajjajjaabwe okutuusa ku mulembe ogwokusatu n'ogwokuna ogw'abo abankyawawa.

¹⁰Naye abo enkumi n'enkumi abanjagala era abakwata amateeka gange, mbalaga okwagala kwange okutaggwaawo.

¹¹Tokozesanga linnya lya MUKAMA Katonda wo ng'olayira ebitaliimu nsa: kubanga MUKAMA talirema kumusalira musango ne gumusinga omuntu oyo alayirira obwerefere erinnya lye.

¹²Olunaku lwa Ssabiiti lujukirenga era olutukuzenga, nga MUKAMA Katonda wo bwe yakulagira.

¹³Kolanga emirimu gyo, ofaabiine mu nnaku omukaaga,

¹⁴naye olunaku olw'omusantu ye Ssabbiiti ya MUKAMA Katonda wo. Ku lunaku olwo tokolerangako mulimu gwonna; ggwe, wadde mutabani wo, wadde muwala wo, wadde omuweereza wo omusajja, oba omuweereza wo omukazi, oba ente yo eya sseddume, oba endogoyi yo, oba ku nte zo endala zonna, oba omugenyi ali omumwo, abaweereza bo abasajja, n'abaweereza bo abakazi, nabo balyoke bawummuleko nga ggwe.

¹⁵Ojjukiranga nga wali muweereza mu nsi ey'e Misiri, MUKAMA Katonda wo n'akuggyayo n'omukono gwe omuwantu era ogw'amaanyi. MUKAMA Katonda wo kyeyava akulagira okuumenga olunaku olwa Ssabbiiti.

¹⁶Kitaawo ne nnyoko obassangamu ekitiibwa, nga MUKAMA Katonda wo bwe yakulagira, olyoke owangaale, era obeerenga n'emirembe, mu nsi MUKAMA Katonda wo gy'akuwa.

¹⁷Tottanga.

¹⁸Toyendanga.

¹⁹Tobbanga.

²⁰Towaayirizanga muntu munno.

²¹Teweegombanga mukyala wa muntu munno. So teweegombanga nnyumba ya muntu munno, newaakubadde enimiro ye, newaakubadde omuweereza we omusajja, newaakubadde omuweereza we omukazi, wadde ente ye, oba endogoyi ye, oba ekintu kyonna ekya muntu munno."

Katonda ne Musa ku Lusozi Sinaayi

²²Ago ge mateeka MUKAMA ge yalangirira eri ekibiina kyammwe kyonna, nga muli wansi w'olusozi Sinaayi, ng'ayogera n'eddoboozi ery'omwanguka eryava mu muliro, n'ekire, n'ekizikiza ekikutte ennyo; teyayongerako birala. Bw'atyo n'agawandiika ku bipande bibiri eby'amayinja, n'abinkwasa.

²³Bwe mwawulira eddoboozi nga liva mu kizikiza, ate ng'olusozi lwaka omuliro, ne musembira gye ndi, n'abakulembeze bona ab'ebika byammwe, n'abakulu bammwe bona.

²⁴Ne mugamba nti, "Laba, MUKAMA Katonda waffe atulaze ekitiibwa kye n'obukulu bwe, era n'eddoboozi lye ne tuliwulira nga lifuluma wakati mu muliro.

²⁵Kale, kaakano tufiira ki? Kubanga omuliro guno omungi bwe guti gujja kutusaanyaawo, tufe tuggweewo, singa twongera okuwulira eddoboozi lya MUKAMA Katonda waffe.

²⁶Kubanga, ani mu bantu omuntu eyali awulidde ku ddoboozi lya Katonda omulamu ng'ayogerera wakati mu muliro, nga ffe bwe tuliwulidde, n'asigala ng'akyali mulamu?

²⁷Ggwe, musemberere, owulirize bulungi byonna MUKAMA Katonda waffe by'anaayogera. Olyoke otubuulire ebyo byonna MUKAMA Katonda waffe by'anaakugamba. Tujja kubiwliriza era tubigondere."

²⁸ MUKAMA yawulira ebiambo byammwe, bwe mwayogera nange, MUKAMA Katonda n'anjamba nti, "Ebigambo abantu abo bye bakugambye mbiwulidde. Byonna bye boogedde bibadde birungi.

²⁹Singa nno bulijo emitima gyabwe gibeera bwe gityo; ne bantya, era ne bagonderanga amateeka gange gonna, ne balyoka balaba ebirungi awamu n'abaana baabwe emirembe gyonna!

³⁰Genda obagambe baddeyo mu weema zaabwe.

³¹Naye ggwe sigala wano nange, ndyoke nkutegeeze amateeka gonna n'ebiragiro, by'ojja okubayigiriza babikolerengako nga bali mu nsi gye mbawa okubeera obutaka bwabwe obw'enkalakkalira.

³²"Noolwekyo mwegenderezenga nnyo, mukolenga nga MUKAMA Katonda wammwe bw'abalagidde; mulemenga okukyama okulaga ku mukono ogwa ddyo oba ogwa kkono.

³³Mutambulirenga mu kkubo MUKAMA Katonda wammwe ly'abalagidde, mulyoke mubenga balamu, mugaggawale, era muwangaalenga nga muli mu nsi ejja okubeera obutaka bwammwe obw'enkalakkalira."

Ekyamateeka Olwokubiri 6

Yagalanga MUKAMA Katonda wo

¹"Kale nno, bino bye biragiro, n'amateeka, MUKAMA Katonda wammwe bye yandagira okubayigiriza, mubikwatenga era mubigonderenga, nga mumaze okusomoka omugga Yoludaani nga muyingidde mu nsi ejja okubeera obutaka bwammwe obw'enkalakkalira.

²Bw'otyo ggwe n'abaana bo, n'abaana b'abaana bo oluvannyuma lwabwe, olyoke otyenga MUKAMA Katonda wo ennaku zonna ez'obulamu bwo, ng'ogondera amateeka ge n'ebiragiro bye, bye nkuwa leero; olyoke owangaalenga.

³Noolwekyo, wulira, Ayi Isirayiri, ogonderenga ebiragiro ebyo n'obwegendereza, ebintu byonna bikugenderenga bulungi, mulyoke muzaale mwalenga nnyo, mu nsi ekulukuta n'amata n'omubisi gw'enjuki, nga MUKAMA Katonda wa bajajjaabo bwe yakusuubiza.

Etteeka ly'Okwagala

⁴"Wulira, Ayi Isirayiri: MUKAMA Katonda waffe ali omu.

⁵Oyagalanga MUKAMA Katonda wo n'omutima gwo gwonna, n'omwoyo gwo gwonna, n'amaanyi go gonna.

⁶Amateeka gano ge nkuwa leero ogakwatanga ku mutima gwo.

⁷Ogayigirizanga abaana bo n'obwegendereza. Ogoogerengako bw'onoobanga otudde mu maka go, ne bw'onoobanga otambula mu kkubo, bw'onoobanga ogalamiddeko, ne bw'onoobanga ogolokose.

⁸Onoogasibanga ku mikono gyo, nga bwe bubonero obw'okukujukizanga, era ogatekanga ne ku kyenyi kyo.

⁹Onoogawandiikanga ku myango gy'ennyumba yo, era ne ku nzigi zo.

¹⁰"MUKAMA Katonda wammwe bw'alimala okukutuusa mu nsi gye yalayirira bajjajaabo: Ibulayimu, ne Isaaka, ne Yakobo okugibawa, nga mulimu ebibuga ebinene ebikulaakulana, by'otaazimba,

¹¹n'amayumba agajjudde buli kintu kyonna ekirungi, ky'otaateekamu, n'enzizi z'otaasima, n'ennimiro z'emizabbibu n'emizeeyituuni z'otaasimba; kale, bw'onomomalanga okulya n'okkuta,

¹²weekuumenga olembengi okwerabira MUKAMA eyakuggya mu nsi ey'e Misiri eyali ey'obuddu.

¹³"Otyanga MUKAMA Katonda wo. Ye gw'obanga oweereza yekka, era mu linnya lye lyokka mw'obanga olayiriranga.

¹⁴Temuweerezanga bakatonda balala, bakatonda b'amawanga aganaabanga gabeetoolodde;

¹⁵kubanga MUKAMA Katonda wo, ali wakati mu mmwe, Katonda wa buggy; obusungu bwe bugenda kukubuubuukirangako, akuzikirize, akumalewo ku nsi.

¹⁶Temugezesanga MUKAMA Katonda wammwe, nga bwe mwakola nga muli e Masa.

¹⁷Munyiikirenga okukuumanga n'okugonderanga amateeka n'ebiragiro MUKAMA Katonda wammwe by'akuwadde.

¹⁸Okolanga ebyo MUKAMA by'akkiriza ebituufu era ebirungi; olwo olyoke obe bulungi ng'oyingidde mu nsi eyo ennungi MUKAMA gye yalayirira bajjajaabo okugibawa,

¹⁹ng'agobyemu abalabe bo bona, nga MUKAMA Katonda bwe yasuubiza.

Okunnyonnyolanga Abaana Amateeka

²⁰"Mu biseera ebirijja, omwana wo bw'akubuuuzanga nti, Ebyo byonna ebinnyonnyola buli kalonda, n'amateeka, n'ebiragiro MUKAMA Katonda waffe bye yabalagira, bitegeeza ki?

²¹Omuddangamu nti, "Twali baddu ba Falaawo mu nsi ey'e Misiri, naye MUKAMA Katonda n'atuggya mu Misiri n'omukono gwe ogw'amaanyi.

²²MUKAMA Katonda n'alaga obubonero obw'ekitalo, n'akola ebyamagero ebinene era ebitatendeka ku Misiri ne ku Falaawo n'ab'omu maka ge bona, nga naffe tulaba.

²³N'atuggayyo n'atuyingiza muno alyoke atuwe ensi eno gye yalayirira bajjajjaffe okugibawa.

²⁴MUKAMA n'atulagira okukwatanga amateeka gano gonna n'okugagonderanga, n'okutyanga MUKAMA Katonda waffe ennaku zonna, alyoke atukuumenga nga tuli mu mbeera ennungi, era nga tuli balamu, nga bwe tuli leero.

²⁵Era singa tuneegenderezanga ne tukwata amateeka gano gonna ne tugagonderanga, mu maaso ga MUKAMA Katonda waffe, nga bwe yatulagira, tunaabanga tutuukirizza ebyo by'ayagala.'"

Ekyamateeka Olwokubiri 7

Isirayiri n'Amawanga Amalala

¹ MUKAMA Katonda wo bw'akutuusanga mu nsi mw'ojja okuyingira, ogyetwalire okuba obutaka bwo, nga n'amawanga mangi amaze okugagobamu, n'amawanga gano omusanvu agakusinga obunene n'amaanyi: Abakiiti, n'Abagirugaasi, n'Abamoli, n'Abakanani, n'Abaperezi, n'Abakiivi, n'Abayebusi,

²MUKAMA Katonda wo ng'amaze okugagabula mu mukono gwo, ng'obawangudde, kikugwanira obazikiririze ddala. Tokolanga nabo ndagaano, so tobakwatirwanga kisa.

³Tofumbiriganwanga nabo. Towangayo muwala wo kufumbirwanga mutabani we, oba mutabani we okuwasanga muwala wo.

⁴Kubanga bagenda kukyamya mutabani wo alekerengaawo okugoberera MUKAMA, baweerezenga bakatonda abalala; era obusungu bwa MUKAMA bunaababuubuukirangako n'akuzikiriza mangu.

⁵Naye bwe muti bwe munaakolanga: Munaamenyanga ebyoto bya bakatonda baabwe, ne mwasaayasa amayinja gaabwe ge bawonga, ne mubetentabetenta empagi zaabwe eza Asera, ne mwokya bakatonda baabwe mu muliro.

⁶Kubanga oli ggwanga ttukuvu eri MUKAMA. MUKAMA Katonda wo yakulonda okuva mu mawanga gonna agali ku nsi okubeeranga eggwanga lye, lye yeefunira ly'asuuta ennyo.

⁷ MUKAMA okugenda okubalonda n'okubaagala ennyo bw'atyo; si lwa kubanga mwe mwali musinga amawanga amalala gonna obungi; nedda, mwe mwali musinga obutono mu mawanga gonna.

⁸Naye lwa kubanga MUKAMA Katonda yabaagala, n'akuuma endagaano gye yakola ne bajajjammwe, n'abanunula n'omukono gwe ogw'amaanyi ng'abaggya mu nsi ey'obuddu, n'abawonya obuyinza bwa Falaawo, ye kabaka w'e Misiri.

⁹Noolwekyo osaananga okukitegeeranga nga MUKAMA Katonda wo ye Katonda; Katonda omwesigwa akuumma endagaano ye ey'okwagala okutaggwaawo eri abamwagala era abagondera ebiragiro bye okutuuka ku mirembe olukumi.

¹⁰Naye abo abamukyawa alibeesasuza n'okuzikirizibwa; tagenda kulwawo kwesasuza oyo amukyawa.

¹¹Noolwekyo weegenderezenga nnyo ogonderenga amateeka n'ebiragiro bye nkugamba olunaku lwa leero.

¹²Bwe munaakwatanga amateeka ago, ne mugagonderanga n'obwegendereza, ne MUKAMA Katonda wo agenda kukuumanga endagaano ye, gye yakola ne bajajjaabo ey'okwagala kwe okutaggwaawo.

¹³Agenda kukwagalanga, akuwenga omukisa; era alikwaza ne weeyongera obungi. Aliwa omukisa ezzadde lyo n'ebibala eby'oku ttaka lyo, n'emmere yo ey'empeke, ne wayini wo, n'amafuta go, n'ennyana ez'ente zo, n'abaana ab'endiga zo, ng'oli mu nsi MUKAMA gye yalayirira bajajjaabo, okugikuwa.

¹⁴Onoofunanga omukisa okusinga amawanga amalala gonna; tewaabengawo musajja oba mukazi mugumba mu mmwe, wadde ente zammwe ezitaazaalenga.

¹⁵MUKAMA takkirizenga ndwadde yonna kukukwata. So taakuleeterenga ndwadde ezo ez'akabi, ze wamanyanga, ez'e Misiri, naye anaazireeteranga abo bona abakukyawa.

¹⁶Onoozikirizanga abo bona MUKAMA Katonda b'anaakuwanguzanga, tobaturuulizanga liiso lya kisa, tobabbranga ku liiso. So toweerezanga bakatonda baabwe, kubanga ogwo gugendanga kukufuukira mutego.

Katonda Aliwangula Amawanga

¹⁷Oyinza okwebuuza mu mutima gwo nti, "Amawanga ag'amaanyi gatyo okutusinga, tulisobola tutya okugagoba mu nsi zaago?"

¹⁸Naye amawanga ago togatyanga; ojjukiranga MUKAMA Katonda wo kye yakola Falaawo ne Misiri yonna.

¹⁹Weerabirako n'amaaso go gennyini ebibonoobono, n'obubonero obw'ebiyamagero, n'ebi'ekyewuunyo, MUKAMA bye yakozesa okukuggya mu nsi y'e Misiri n'omukono gwe omuwantu ogw'amaanyi. MUKAMA Katonda wo bw'atyo bw'anaakolanga amawanga ago gonna g'otya.

²⁰Ate MUKAMA Katonda wo anaaweerezanga ennumba mu balabe bo ne zibaluma, okutuusa n'abo abanaabanga basigaddewo mu lutalo, nga beekwese, lwe ziribazikiririza ddala.

²¹Tobatyanga, kubanga MUKAMA Katonda wo abeera wakati mu mmwe, mukulu era wa ntiisa.

²²MUKAMA Katonda wo amawanga ago anaagendanga agaggyawo linnalimu, mpola mpola. Toligazikiriza gonna mulundi gumu, si kulwa ng'ensolo ez'omu nsiko zaala ne zikuyitirira obungi.

²³Naye MUKAMA Katonda wo anaagagabulanga mu mukono gwo n'ageeraliikirizanga ng'agatabuddetabudde, okutuusa lwe ganaazikirizibwanga.

²⁴Anaagabulanga bakabaka baago mu mukono gwo n'osangulira ddala amannya gaabwe okuva wansi w'eggulu. Tewaabengawo muntu n'omu anaayimiriranga mu maaso go okukwanjanga, ojanga kubazikiriza.

²⁵Ebifaananyi ebyole ebya bakatonda baabwe munaabyokyanga mu muliro. Teweegombanga zaabu na ffeeza anaabibeerangako. So tomwetwaliranga alemenga kukufuukira mutego; kubanga ekikolwa ekyo kya muzizo eri MUKAMA Katonda wo.

²⁶Toyingizanga mu nnyumba yo kintu kyonna ekyomuzizo, olemenga kuba mukolimire ng'ekintu ekyo bwe kiri. Onookikyayiranga ddala era onookitamirwanga ddala, kubanga kyakolimirwa.

Ekyamateeka Olwokubiri 8

Ekisa kya MUKAMA mu Ddungu

¹Mugonderanga amateeka gonna ge nkulagira leero, mulyoke mubeerenga balamu era mwale, muyingire ensi MUKAMA Katonda gye yalayirira bajajajammwe okugibawa mmwe ng'obutaka bwammwe.

²Onojukiranga emyaka gino gyonna amakumi ana MUKAMA Katonda gy'azze ng'akukulembira okukuyisa mu ddungu alyoke akugezese, akukakkanye obeere muwombeefu omwetoowaze, era yekkaanye mu mutima gwo alabe obanga onookwatanga amateeka ge.

³Era yakukkakkanya n'akulumya enjala, n'akuliisa emmaanu, gye wali tolabangako wadde bakadde bo okugiwulirako, alyoke akuyigirize nti omuntu taba mulamu na mmere yokka, wabula na buli kigambo ekiva mu kamwa ka MUKAMA Katonda.

⁴Mu myaka gino gyonna amakumi ana, engatto zo tezaakukaddiwako n'ebigere byo tebyazimba.

⁵Noolwekyo osaana okitegeere mu mutima gwo nti, Ng'omusajja bw'akangavvula mutabani we, ne MUKAMA Katonda wo bw'akukangavvula.

⁶"Onookwatanga amateeka ga MUKAMA Katonda wo ng'otambuliranga mu makubo ge, era ng'omutya, ng'omussaamu ekitiibwa.

⁷Kubanga MUKAMA Katonda wo akutwala mu nsi ennungi ennyo: ensi erimu emigga, n'ebidiba, n'ensulo ez'amazzi agakulukutira ku nsozi ne mu biwonvu.

⁸Ensi omukula ejjaano ne sayiri, n'emitiini n'emikomamawanga, ensi ey'emizabbibu n'omubisi gw'enjuki;

⁹ensi, emmere gy'eteebeerenga ya bbula, nga buli ky'oneetaaganga onookifunanga; ensi, ng'ebiyuma ge mayinja gaayo, era gy'onoosimanga ekikomo mu nsozi zaayo.

¹⁰Awo bw'onoolyanga n'okkuta, weebazenga MUKAMA Katonda wo olw'okukuwa ensi ennungi bw'etyo.

Okulabulwa Obutaba b'Amalala

¹¹"Weegenderezenga nnyo olemenga kwerabiranga MUKAMA Katonda wo, ng'ogaananga okukwatanga amateeka ge, n'ebiragiro bye, bye nkulagira leero.

¹²Si kulwa ng'onoolyanga n'okkuta, ne weezimbiranga amayumba amalungi, n'otereera;

¹³amagana go n'ebisibo byo nga bigezze, ne zaabu yo ne ffeeza yo nga byaze, nga ne buli kintu ky'onoobanga nakyo nga kyeyongedde okwala,

¹⁴kale olwo omutima gwo ne gujjangamu amalala, ne weerabiranga MUKAMA Katonda wo eyakuggyga mu nsi ey'e Misiri mu nnyumba ey'obuddu.

¹⁵Eyakukulemberanga n'akuyisanga mu ddungu eddene era ezzibu ennyo eritiisa, ekkalu omutali tuzzi, nga libunye emisota emikambwe egy'obusagwa, n'enjaba. Eyakuggyira amazzi mu lwazi.

¹⁶Yakuliisanga emmaanu mu ddungu, emmere bajjajaabo gye baali batalabangako. Yali ng'akwetoowazisa era nga bw'akugezes, ku nkomerero biryoke bikugendere bulungi.

¹⁷Weekuumenga, olemenga okulowoozanga mu mutima gwo nti, 'Obugagga buno bwonna mbufunye olw'obuyinza bwange n'amaanyi g'emikono gyange.'

¹⁸Naye ojjukiranga MUKAMA Katonda wo, kubanga y'akuwa obuyinza okufuna obugagga, alyoke atuukirize endagaano ye gye yalayirira bajjajaabo, nga bwe kiri leero.

¹⁹"Bwe kanaakutandanga ne weerabiranga MUKAMA Katonda wo, n'ogobereranga bakatonda abalala, n'obasinzanga n'obavuunamiranga, mbateggeeza mmwe leero nti ddala ddala mugenda kuzikirira.

²⁰Nga bwe mulaba amawanga MUKAMA g'azikiriza mu maaso gammwe, nammwe bwe mulizikirira bwe mutyo, bwe mutualigonderanga ddoboozi lya MUKAMA Katonda wammwe."

Ekyamateeka Olwokubiri 9

¹ Wulira, Ayi Isirayiri. Oseemberedde olunaku lw'ojja okusomokerako omugga Yoludaani, oyingire mu nsi omuli amawanga agakusinga obunene, ogyetwalire ogyefunire. Olisangamu ebibuga ebinene ebyebulunguddwa ebigo ebyawanvuwa okutuuka ku ggulu.

² Abantu baayo be batabani ba Anaki, ba maanyi era bawanvu. Obamanyi bulungi, era wawulirako dda nga boogerwako nti, "Ani ayinza okwolekera Abanaki?"

³ Naye kitegeere leero nga MUKAMA Katonda wo y'akukulembera buli gy'oba olaga yonna, era ng'ali ng'omuliro ogusaanyaawo buli kintu. Ab'amaanyi abo agenda kubasiguukulula abazikirize nga naawe olaba. Noolwekyo ogenda kubagobamu obamalirewo ddala mu kaseera katono, nga MUKAMA bw'akusuubizza.

⁴ MUKAMA Katonda wo bw'alimala okugobamu amawanga ago gonna nga naawe olaba, teweewaananga nga weeyogerako nti, "MUKAMA ansobozesezza okuyingira mu nsi muno n'okugifuna olw'obutuukirivu bwange;" songa lwa butali butuukirivu bwa mawanga ago, MUKAMA kyanaava agagobamu mu maaso go.

⁵ Ojja kuyingira mu nsi yaabwe ogitwale, si lwa kubanga oli mutuukirivu, oba omwesigwa; wabula lwa kibi ky'amawanga ago MUKAMA Katonda wo kyanaava agagoba mu maaso go, atuukirize n'ekisuubizo kye yalayirira bajjajaabo: Ibulayimu ne Isaaka ne Yakobo.

⁶ Osaana okitegeere ng'ensi eno ennungi MUKAMA Katonda gy'akuwa okugyefunira tagikuwa lwa kubanga oli mutuukirivu; kubanga oli muntu alina ensingo enkakanyavu.

Ennyana eya Zaabu

⁷ Ojjukiranga, era tosaana kwerabiranga, nga bwe wasunguwaza MUKAMA Katonda wo ng'oli mu ddungu. Okuviiira ddala ku lunaku lwe wava mu nsi ey'e Misiri mubadde mujeemera MUKAMA n'okutuusa lwe mutuuse mu kifo kino.

⁸ Ku lusozi Kolebu mwanyiiza MUKAMA Katonda, obusungu bwe ne bubuubuuka nnyo n'okwagala n'ayagala okubazikiriza.

⁹ Bwe nalinnya ku lusozi okuweebwa ebipande eby'amayinja, nga bye byaliko endagaano MUKAMA Katonda gye yali alagaanye nammwe, ne mmala ku lusozi ennaku amakumi ana emisana n'ekiro, saalya ku mmere wadde okunywa ku mazzi.

¹⁰ MUKAMA Katonda n'ampa ebipande bibiri eby'amayinja nga biwandiikiddwako n'engalo ya Katonda. Ku byo kwali kuwandiikiddwako

amateeka MUKAMA ge yali abalangiridde ng'ali ku lusozi wakati mu muliro ku lunaku olwo nga mwenna mukuŋjaanye.

¹¹Ku nkomerero y'ennaku amakumi ana n'ebiro amakumi ana MUKAMA Katonda n'ampa ebipande ebibiri eby'amayinja nga bye bipande eby'endagaano.

¹²Awo MUKAMA Katonda n'aŋjamba nti, "Situka ove mangu wano oserengete, kubanga abantu bo be waggya mu Misiri boonoonye. Beekyusizza mangu ne bava mu kkubo lye nablagira okutambulirangamu, ne beekolera ekibumbe ekisaanuuse ekitali Katonda."

¹³Era MUKAMA Katonda ne yeeyongera n'aŋjamba nti, "Neetegerezza abantu bano, ne ndaba nga bantu abalina ensingo enkakanyavu, nga ggwanga lya mputtu.

¹⁴Leka mbazikirize, erinnya ly'eggwanga lyabwe ndisangulewo wansi w'eggulu. Ndikuggyamu eggwanga eddene era ery'amaanyi okusinga eggwanga lyabwe."

¹⁵Bwe nt yo ne nkyuka ne nva ku lusozi ne nserengeta, ne ndeka ng'olusozi lwaka omuliro. Ebipande byombi eby'amateeka eby'endagaano nabirina mu mikono gyange gyombi.

¹⁶Bwe natunula ne ndaba nga mwonoonye mu maaso ga MUKAMA Katonda wammwe; mwali mwekoledde ekitali Katonda nga mukibumbye okufaanana ng'ennyana; mwali mukyuse mangu okuva mu kkubo MUKAMA lye yali abalagidde.

¹⁷Bwe nt yo ne nzirira ebipande byombi bye nnali nkutte mu ngalo zange ne mbikasuka wansi ne byatikirayatikira mu maaso gammwe nga nammwe mulaba.

¹⁸Ate ne nziramu okweyala wansi awali MUKAMA Katonda nga bwe nakola olubereberye ku Lusozi Sinaayi, MUKAMA bwe yali amaliridde okubazikiririza ddala yeefunire eggwanga eddala; ne sirya ku mmere wadde okunywa ku tuzzi okumala ennaku amakumi ana emisana n'ekiro, olw'ekibi kye mwali mukoze, bwe mwakola ebitasaana mu maaso ga MUKAMA Katonda ne mumusunguwaza.

¹⁹Ne nt ya nnyo olw'obusungu bwa MUKAMA Katonda n'ekiruyi kye, kubanga yali abasunguwalidde nnyo ng'ayinza n'okubazikiriza. Naye era MUKAMA n'ampuliriza ne ku mulundi ogwo.

²⁰Era MUKAMA yali asunguwalidde nnyo Aloonii nga n'okumuzikiriza ayinza okumuzikiriza. Naye mu kiseera ekyo ne Aloonii ne mmusabira nnyo.

²¹Ne nzirira ennyana eyabaleetera okusobya, ne ngyokya mu muliro. Ne ngisekulasekula ne ngisa, n'efuuka olufufugge. Olufufugge olwo ne nduyiwa mu kagga akaali kakulukutira ku lusozi olunene.

²² MUKAMA, mwayongera okumusunguwaza bwe mwali e Tabera, n'e Masa, n'e Kiberosu Kataava.

²³ Era MUKAMA bwe yabasindika okuva e Kadesubanea, yabagamba nti, "Mwambuke mwetwalire ensi gye mbawadde." Naye ne mujeemera ekiragiro kya MUKAMA Katonda wammwe. Temwamwesiga wadde okumugondera.

²⁴ Kasookedde mbamanya, ebbanga eryo lyonna mubadde mujeemera MUKAMA Katonda.

Musa Yeegayirira MUKAMA ku Iwa Isirayiri

²⁵ Bwe ntyo ne nambaala ku ttaka nga neevuunise mu maaso ga MUKAMA, okumala ennaku amakumi ana emisana n'ekiro; kubanga MUKAMA Katonda yali agambye nti ajja kubazikiriza.

²⁶ Ne nsaba MUKAMA nti, Ayi MUKAMA Katonda, bano be bantu bo, era obusika bwo bwennyini, be wanunula n'obaggya mu nsi ey'e Misiri n'omukono gwo ogw'amaanyi.

²⁷ Nkusaba ojjukire abaddu bo, era abawereza bo, Ibulayimu, ne Isaaka, ne Yakobo osonyiwe obukakanyavu bw'eggwanga lino, n'obunafu bwalyo n'ebibi byalyo.

²⁸ Ab'omu nsi mwe watuggyga baleme okugamba nti, "Olwokubanga MUKAMA yali tasobola kubatuusa mu nsi gye yabsuubiza, era olwokubanga yali abakyaye nnyo, kyeyava abaggyayo mu Misiri alyoke abattire mu ddungu."

²⁹ Kubanga lino lye ggwanga lyo, be bantu bo ab'obusika bwo, be waggya mu Misiri n'obuyinza bwo obungi, n'omukono gwo ogw'amaanyi.

Ekyamateeka Olwokubiri 10

Ebipande eby'Amayinja Ebyokubiri Okwawandiikwa Amateeka

¹ Mu kiseera ekyo MUKAMA Katonda n'aŋjamba nti, "Tema mu jjinja ebipande bibiri eby'amayinja ebifaanana nga biri ebyasooka, era obajje n'Essanduuko ey'omuti, olyoke oyambuke gye ndi ku lusozi.

² Nzija kuwandiika ku bipande ebyo ebigambo ebyali ku bipande ebyasooka, bye wayasa; olyoke obiteeke mu Ssanduuko."

³ Bwe ntyo ne mbajja Essanduuko mu muti ogw'akasiya, ne ntema ne mu jjinja ebipande bibiri eby'amayinja nga bifaanana nga biri ebyasooka, ne ndyoka nyambuka ku lusozi nga nkutte ebipande byombi mu ngalo zange.

⁴ MUKAMA Katonda n'awandiika ku bipande ebyo ebigambo bye yali awandiise ku bipande biri ebyasooka, ge Mateeka Ekkumi ge yali abalangiridde ku lusozi ng'ali wakati mu muliro, ku lunaku lwe mwakunjaanirako. MUKAMA Katonda n'abinkwasa.

⁵Bwe ntyo ne nkyusa obuwufu ne nzikirira okuva ku lusozi, ebipande ne mbiteeka mu Ssanduuko gye nabaja, nga MUKAMA Katonda bwe yandagira, ne kaakano mwe biri.

⁶Abaana ba Isirayiri ne batambula okuva e Beeru Beneyaakani ne batuuka e Mosera. Awo Alooni we yafiira era we yaziikibwa. Mutabani we Eriyazaali n'amusikira n'atandika okukola emirimu gya Alooni egy'Obwakabona.

⁷Bwe baava awo ne batambula okutuuka e Gudugoda; bwe baava e Gudugoda ne batuuka e Yotubasa, nga mu nsi eyo mulimu emigga egiali gikulukuta amazzi.

⁸Mu kiseera ekkyo MUKAMA n'ayawula ekika kya Leevi okusitulanga Essanduuko ey'Endagaano ya MUKAMA, n'okuyimiriranga mu maaso ga MUKAMA Katonda, n'okwatulanga emikisa gye mu linnya lye, nga bwe bakyakola n'okutuusa leero.

⁹Noolwekyo Abaleevi tebaafuna mugabo wadde ekitundu ekky'obusika mu nsi ensuubize nga baganda baabwe ab'ebika ebirala bwe baafuna; kubanga MUKAMA bwe busika bwabwe, nga MUKAMA Katonda wo bwe yabagamba.

¹⁰Nabeerayo ku lusozi ne mmalayo ennaku amakumi ana, emisana n'ekiro, ng'omulundi gulü ogwasooka. Ne ku mulundi guno MUKAMA yampuliriza. MUKAMA Katonda yali tayagala kukuzikiriza.

¹¹MUKAMA n'añjamba nti, "Genda okulembere abantu, bakwate olugendo lwabwe, bayingire mu nsi gye nalayirira bajjajaabwe okugibawa, bagyefunire."

Ebikulu Katonda bye Yeetaaga

¹²Kale nno, ggwe Isirayiri, kiki MUKAMA Katonda wo ky'akwetaagako wabula okutuya MUKAMA Katonda wo, okutambuliranga mu makubo ge gonna, n'okumwagalanga, n'okuweerezanga MUKAMA Katonda wo n'omutima gwo gwonna n'emmeeme yo yonna,

¹³n'okugonderanga amateeka ga MUKAMA n'ebiragiro bye, nga bwe nkukuutira leero olw'obulungi bwo?

¹⁴Laba, MUKAMA Katonda wo ye nannyini ggulu, era n'eggulu erisinga okuba waggulu ennyo nalyo lirye, n'ensi ne byonna ebigirimu.

¹⁵Kyokka era MUKAMA yakwana bajjajaabo n'abaagala nnyo, ne yeerondera mmwe, bazzukulu baabwe, okubeera ku ntikko y'amawanga gonna nga bwe kiri leero.

¹⁶Noolwekyo mukomole emitima gyammwe, era mukomye okubeera n'amawagali.

¹⁷Kubanga MUKAMA Katonda wammwe ye Katonda wa bakatonda, era ye MUKAMA w'abakama, ye Katonda omukulu, nannyini buyinza era Katonda atiibwa, atalina kyekubiira, era atalya nguzi.

¹⁸Bamulekwa abataliiko bakitaabwe, ne bannamwandum, abamalira ensonga zaabwe mu bwenkanya; era ayagala ne bannamawanga abatambuze, ng'abawa emmere n'ebyokwambala.

¹⁹Kale nno, mwagalenga bannamawanga kubanga nammwe mwaliko bannamawanga mu nsi ey'e Misiri.

²⁰Otyanga MUKAMA Katonda wo era muweerezenga. Munywererengako, era mu linnya lye mw'onoolayiriranga.

²¹Oyo, lye ttendo lyo era ye Katonda wo, eyakukolera ebyamagero ebyo byonna ebikulu ggwe kennyni bye weerabirako n'amaaso go.

²²Bajjajjaabo bwe baaserengeta e Misiri, bona awamu baali baweraabantu nsanvu; kaakano MUKAMA Katonda wo abafudde bangi nnyo ng'emmunyeenyenye ez'oku ggulu.

Ekyamateeka Olwokubiri 11

Ekiragiro ky'Okwagalanga MUKAMA Katonda

¹Yagalanga MUKAMA Katonda wo, ogonderenga ebigambo bye by'akukuutira, n'ebiragiro bye, n'amateeka ge ennakuzonna.

²Mutegeere nga ku lunaku lwa leero soogera na baana bammwe abataamanya era abataalaba ku kukangavvula kwa MUKAMA Katonda wammwe, n'ekitiibwa kye n'omukono gwe ogw'amaanyi, era ogw'obukuumi;

³era abataalaba ku byamagero bye yakola n'ebintu byonna bye yakolera wakati mu Misiri, ku Falaawo, ye kabaka w'e Misiri n'eri ensi ye yonna;

⁴ne bye yakola eggyle lya Misiri n'embalaasi zaalyo n'amagaali gaalyo; era nga amaggye ago bwe yagazikiririza mu mazzi ag'omu Nnyanja Emyufu bwe gaali nga gabagoberera, n'agamalirawo ddala n'okutuusa leero.

⁵Abaana bammwe si be baalaba ebyo byonna MUKAMA bye yabakolera okuva nga muli mu ddungu n'okutuuka wano mu kifo kino,

⁶era ne kye yakola Dasani ne Abiraamu batabani ba Eriyaabu, mutabani wa Lewubeeni, ettaka bwe lyayasamyakamwa kaalyo, wakati mu baana ba Isirayiri bona, ne libamira n'ab'omu maka gaabwe bona, n'eweema ez'ensiisira zaabwe zonna, ne buli kiramu kyabwe kyonna kye baalinako obwannannyini.

⁷Naye mmwe bennyini mwe mwabiraba n'amaaso gammwe, ebintu ebyo ebikulu MUKAMA by'azze akola.

Ekiragiro ky'Okukwatanga Amateeka

⁸ Noolwekyo mukwatenga amateeka gonna ge mbalagira leero, mulyoke mubeere n'amaanyi okuyingira mu nsi gye mujja okwefunira, nga mumaze okusomoka omugga Yoludaani,

⁹ bwe mutyo mulyoke muwangaalenga nga muli mu nsi MUKAMA gye yalayirira bajjajammwe okugibawa awamu ne bazzukulu baabwe, ng'eyo ye nsi omukulukutira amata n'omubisi gw'enjuki.

¹⁰ Kubanga ensi gy'ogenda okuyingira, ogyefunire, tefaanaana ng'ensi y'e Misiri, gye mwava, gye wasimbanga ensigo zo n'ozifukiriranga n'ebomba gye wasambyanga ekigere, ng'afukirira ennimo y'enva.

¹¹ Naye ensi gye mugenda okwefunira nga musomose omugga Yoludaani, ye nsi ey'ensozi n'ebiwonvu, enywa amazzi g'enkuba agava mu ggulu.

¹² Ye nsi MUKAMA Katonda wo gy'alabirira. Amaaso ga MUKAMA Katonda wo gabeera ku nsi eyo bulijjo, okuva ku ntandikwa y'omwaka okutuuka ku nkomerero yaagwo.

¹³ Bwe munaagonderanga amateeka gano ge mbalagira leero: okwagalanga MUKAMA Katonda wammwe, n'okumuweerezanga n'omutima gwammwe gwonna, n'emmeeme yammwe yonna,

¹⁴ kale, anaatonnyesanga enkuba mu nsi yammwe mu biseera byayo: enkuba eya ddumbi n'eya ttoggo, olyoke okungulenga emmere yo ey'empeke, weefunire ne wayini omusu n'amafuta.

¹⁵ Era anaakuzanga omuddo mu malundiro go ente zo gwe zinaalyanga; naawe onoolyanga emmere n'okkuta.

¹⁶ Mwegenderezenga nnyo, mulemenga okukyama ne mubula, ne muweerezanga bakatonda abalala era ne mubavuunamiranga.

¹⁷ Kale obusungu bwa MUKAMA ne bubabuubukirangako, n'aggalangawo eggulu, enkuba ne tetonnyanga, n'ettaka ne litabalangako bibala, ne muzikiriranga ne muggwaawo mangu ku nsi ennungi MUKAMA gy'abawa.

Abaana Abato Okuyigirizibwanga Amateeka

¹⁸ Kale muterekenga ebigambo byange bino mu mutima gwammwe ne mu mmeeme yammwe; munaabisibanga ku mikono gyammwe ng'akabonero ak'okubibajjkizanga, era mubitekanga ne ku byenyi byammwe.

¹⁹ Mubiyigirizenga abaana bammwe, ng'obinyumyako bw'onoobanga otudde mu nnyumba yo, ne bw'onoobanga otambula mu nguudo; ne bw'onoogalamirangako, era ne bw'onoositukanga.

²⁰ Era onoobiwandiikanga ku myango ne ku nzigi,

²¹mmwe n'abaana bammwe mulyoke muwangaalenga nnyo, mumale ennaku nnyingi nga ebbanga eggulu lye lirimala nga liri waggulu w'ensi, nga muli mnsi MUKAMA gye yasuubiza bajajjammwe okugibawa.

²²Bwe muneegenderezanga, ne mugonderanga ebiragiro bino byonna bye mbawa okubikolanga: kwe kwagalanga MUKAMA Katonda wammwe, n'okutambiliranga mu makubo ge gonna, n'okumunywererangako;

²³kale, MUKAMA anaagobangamu amawanga ago gonna aganaabanga mu maaso gammwe, ne mwefunira ensi z'amawanga ago agabasinga mmwe obunene era n'amaanyi.

²⁴Buli we munaalinnyanga ekigere kyammwe, ekifo ekyo kinaabeeranga kyammwe; okuva ku ddungu okutuuka ku Lebanooni, n'okuva ku Mugga Fulaati okutuuka ku nnyanja ey'ebugwanjuba.

²⁵Tewaabengawo muntu n'omu anaasobolanga okubaziyiza. MUKAMA Katonda wammwe aliteeka entiisa n'ekikangabwa mu bannansi bona, buli we munaagendanga, nga bwe yabasubiza.

Omukisa n'Ekikolimo

²⁶Mulabe, ku lunaku lwa leero nteeka mu maaso gammwe omukisa n'ekikolimo.

²⁷Omukisa, bwe munaagonderanga amateeka ga MUKAMA Katonda wammwe ge mbalagira leero;

²⁸ekikolimo, bwe mutaagonderenga mateeka ga MUKAMA Katonda wammwe, ne mukyamanga okuva mu kkubo lye mbalagira leero, ne mugobereranga bakatonda abalala be mwali mutamanyi.

²⁹MUKAMA Katonda wo bw'alikutuusa mu nsi gy'ogenda okuyingiramu ogyetwalire ng'obutaka bwo obw'enkalakkalira, omukisa oguteekanga ku lusozi Gerizimu, n'ekikolimo ku lusozi Ebali.

³⁰Ensozi ezo ziri mitala wa Yoludaani ku ludda olw'ebugwanjuba obw'oluguudo ng'oyolekedde enjuba gy'egwa, okumpi n'emiti eminene egy'e Mole, mu nsi y'Abakanani ababeera mu Alaba ku miriraano gya Girugaali.

³¹Muli kumpi okusomoka omugga Yoludaani mwefunire ensi MUKAMA Katonda wammwe gy'abawa. Bwe mulimala okugyetwalira, nga mwe mubeera,

³²mwegenderezenga nnyo mugonderenga amateeka gonna, n'ebiragiro bye nteeka mu maaso gammwe leero.

Ekyamateeka Olwokubiri 12

Ekyoto Kimu Kyokka eky'Ebiweebwayo

¹ Gano ge mateeka n'ebiragiro bye musaana okukwatanga n'obwegendereza, nga muli mu nsi MUKAMA Katonda wa bajajjaabo gy'akuwadde okubeera obutaka bwo ebbanga lyonna lye mulimala ku nsi.

² Muzikiririzanga ddala ebifo byonna ebiri ku gasozi ne ku nsozi, ne wansi w'agati aganene,

³ bannaggwanga be mugenda okutwalako ensi yaabwe gye basinziza; n'amayinja gaabwe mugaasaayasanga, n'empagi zaabwe eza Asera mulizimenzaamenya ne muzookya mu muliro; n'ebibajje ebya bakatonda baabwe mubitemaatemanga n'amannya gaabwe mu bifo ebyo ne mugasanguliramu ddala.

⁴ MUKAMA Katonda wammwe, ye temumusinzanga mu ngeri eyo nga bali bwe bakola.

⁵ Mmwe munoonyanga mu bika byammwe byonna, ekifo MUKAMA Katonda wammwe ky'alibalondera we munaateekanga Erinnya lye ne mumuzimbira awo ennyumba ye ey'okubeerangamu. Mu kifo ekyo gye munaagendanga okumusinza;

⁶ awo we munaaleetanga ebiweebwayo byammwe ebyokebwa ne biweebwayo ebirala, n'ebitundu byammwe eby'ekkumi, n'ebirabo eby'enjawulo, n'obweyamo bwammwe, n'ebiweebwayo ebya kyeyagalire, n'ebibereberyeye eby'omu bisibo byammwe n'eb'y'omu biraalo byammwe.

⁷ Mmwe n'ab'omu nnyumba zammwe munaaliiranga mu maaso ga MUKAMA Katonda wammwe, munaasanyukanga ne mwenyumirizanga mu buli kintu kyonna kye munaabanga mukoze n'emikono gyammwe, kubanga MUKAMA Katonda wo anaabanga akuwadde omukisa.

⁸ Temukolanga nga bwe tukola wano leero, nga buli omu akola nga bw'alaba ekisaanidde,

⁹ kubanga temunnatuuka mu kiwummulo ne mu busika MUKAMA Katonda wammwe bw'abawa.

¹⁰ Naye bwe mulimala okusomoka omugga Yoludaani, ne mubeera mu nsi MUKAMA Katonda wammwe gy'abawa nga bwe busika bwammwe, ng'abawadde n'okuwummula, nga temukyataataaganyizibwa balabe bammwe abanaabanga babeetoolodde n'okutuula ne mutuulanga mu mirembe;

¹¹ kale nno, mu kifo ekyo MUKAMA Katonda wammwe kyanaabanga yeerondedde okutuuuzanga omwo Erinnya lye, omwo mwe munaaleetanga buli kintu kyonna kye mbalagira: ebiweebwayo byammwe ebyokebwa, n'ebiweebwayo ebirala, n'ebitundu byammwe eby'ekkumi, n'ebirabo eby'enjawulo, n'ebirabo ebisinga obulungi mu bintu byammwe bye munaabanga mweyamye okuwaayo eri MUKAMA.

¹²Munaasanyukiranga awo mu maaso ga MUKAMA Katonda wammwe, mmwe, ne batabani bammwe, ne bawala bammwe, n'abaweereza bammwe abasajja, n'abaweereza bammwe abakazi, n'Abaleevi ab'omu bibuga byammwe, kubanga bo ku bwabwe tebalifuna mugabo oba obusika okufaanana nga mmwe.

¹³Weekuumanga n'otaweerayo biweebwayo by'omu buli kifo kyonna ky'onooolabanga.

¹⁴Obiweerengayo mu kifo ekyo ekimu kyokka MUKAMA ky'anaakulonderanga okuva mu kimu ku bika byo; era omwo mw'onookoleranga ebyo byonna bye nkulagira.

Ebiragiro ku Biweebwayo ebitali bya bulijo

¹⁵Naye onettiranga ku bisolo ebinaabanga mu bibuga byo, oba mpeewo oba njaza, n'olya ennyama nnyingi nga bw'onooyagalanga, ng'omukisa bwe guli MUKAMA Katonda wo gw'anaakuwanga. Abalongoofu mu by'emikolo n'abatali balongoofu, bona banaalyanya.

¹⁶Wabula omusaayi temugulyanga; munaaguyiwanga wansi ku ttaka ng'amazzi.

¹⁷Mu bibuga byo toliirangamu kitundu ekimu eky'ekkumi eky'emmere yo ey'empeke, oba ekya wayini wo, oba eky'amatfuta go; oba ebibereberye eby'omu bisibo byo n'eb'y'omu biraalo byo, oba n'obweyamo bwo oba n'ebiweebwayo ebya kyeyagalire; wadde n'ebirabo ebitali bya bulijo.

¹⁸Onoobiriiranga mu maaso ga MUKAMA Katonda wo, mu kifo ekyo MUKAMA Katonda wo ky'anaabanga akulondedde; ggwe, ne mutabani wo, ne muwala wo, n'omuweereza wo omusajja n'omuweereza wo omukazi, n'Omuleevi anaabanga mu bibuga byo, era onoosanyukiranga mu maaso ga MUKAMA Katonda wo mu buli kintu kyonna ky'onoobanga okoze n'emikongo.

¹⁹Weekuumanga nnyo obutalagajjaliranga Muleevi ebbanga lyonna ly'olimala ng'oli mulamu ku nsi.

²⁰ MUKAMA Katonda wo bw'aligaziya amatwale go, nga bwe yakusuubiza, n'oyoyanga okulya ku nnyama ng'ogamba nti, "Nandiyagadde okulya ku nnyama." Kale, onoolyanga ennyama ennyingi nga bw'onooyagalanga.

²¹Ekifo, MUKAMA Katonda wo ky'anaabanga akulondedde okuteekamu Erinnya lye, bwe kinaabanga kiri wala n'ewuwo kale onoooyinzanga okutta ku zimu ku nsolo ez'omu bisibo byo ne mu biraalo byo MUKAMA by'anaabanga akuwadde, nga bwe nkulagidde; era mu bibuga byo onoooyinzanga okulya ennyama ennyingi nga bw'onooyagalanga.

²²Onoogiryanga nga bw'onoolyanga empeewo n'enjaza. Abalongoofu n'abatali balongoofu bona banaalyanya.

²³Naye weekuumenga obutalyanga musaayi; kubanga omusaayi bwe bulamu, ate nga tekikugwaniranga kulyanga bulamu ng'olya ennyama.

²⁴Togulyanga; oguyiwanga wansi ku ttaka ng'amazzi.

²⁵Togulyanga, olyoke obeerenga mu ddembe, ggwe, n'abaana bo, ng'okoze ebituufu mu maaso ga MUKAMA.

²⁶Naye ebintu byo ebitukuvu ne byonna by'oneeyamanga okuwaayo, onoobiddiranga n'obitwalanga mu kifo MUKAMA ky'anaabanga akulondedde.

²⁷Onooleetanga ebiweebwayo byo ebyokebwa, ennyama n'omusaayi, ku Kyoto kya MUKAMA Katonda wo. Omusaayi gw'ebiweebwayo byo ebirala gunaafukibwanga ku Kyoto kya MUKAMA Katonda wo, naye ennyama onooyzanga okugirya.

²⁸Weegenderezenga okugoberera ebiragiro bino byonna bye nkuwa, olyoke obeenga bulungi, ggwe, n'abaana bo, oluvannyuma lwo, emirembe gyonna, kubanga onoobanga okoze ekituufu mu maaso ga MUKAMA Katonda wo.

Okulabula ku Kusinza bakatonda abalala

²⁹Amawanga ago g'ogenda okulumba ogatwaleko ensi yaabwe, MUKAMA agenda kugazikiriza nga naawe olaba. Naye bw'obanga omaze okubagoba mu nsi yaabwe, n'okugibeeramu n'ogibeeramu,

³⁰era ng'amawanga ago gamaze okuzikirizibwa nga naawe olaba, weekuumanga n'otabuuliriza ku bya bakatonda baabwe ng'ogamba nti, "Ab'omu mawanga ago baasinzanga batya bakatonda baabwe, nange njagala nkole bwe ntyo?"

³¹MUKAMA Katonda wo tomusinzanga mu ngeri efaanana ng'eya bali, kubanga mu kusinza bakatonda baabwe bakoleramu ebikoloero bingi MUKAMA by'atayagala, by'akyawa. Bayokya ne batabani baabwe ne bawala baabwe mu muliro nga ssaddaaka eri bakatonda baabwe.

³²Kibagwanidde okunyikiranga okukolanga buli kintu kye mbalagira, tokyongerangako wadde okukikendeezangako.

Ekyamateeka Olwokubiri 13

¹Mu mmwe bwe mulabikangamu nnabbi oba omuntu n'akutegeeza eby'omu maaso nga yeeyambisa ebirooto, n'alangirira ebyamagero oba ebyewuunyisa ebija okubeerawo,

²era ebyamagero ebyo, oba ebyewuunyisa ebyo by'anaabanga alangiridde ne bituukirira, n'alyoka akugamba nti, "Ka tugoberere bakatonda abalala era tubaweerezenga" (bakatonda ggwe b'otomanyangako),

³towulirizanga bigambo bya nnabbi oyo, oba omuloosi w'ebirooto oyo. Kubanga MUKAMA Katonda wammwe anaabanga abagezesza bugezesza ategere

obanga munaabanga mumwagala n'omutima gwammwe gwonna n'emmeeme yammwe yonna.

⁴MUKAMA Katonda wammwe gwe munaagobereranga, era ye yekka gwe munaatyanga, era amateeka ge, ge munaakwatanga, era n'eddoboozi lye, lye munaawulirizanga era lye munaagonderanga, era ku ye kwe munaanywereranga.

⁵Kale nno nnabbi oyo, oba omuloosi w'ebirooto oyo anattibwanga, kubanga anaabanga abasasamaza mujeemere MUKAMA Katonda wammwe, eyabaggya mu nsi ey'e Misiri, n'abanunula mu nnyumba ey'obuddu, nnabbi oyo ng'akusasamaza, ove mu kkubo ettuufu MUKAMA Katonda wo lye yakulagira okutambulirangamu. Bw'otyo ekibi ekiri mu mmwe, bw'onookimalangamu.

⁶Omuntu yenna, ne bw'abanga muganda wo oba mutabani wo, oba muwala wo, oba mukazi wo omuganzi ennyo, oba mukwano gwo gw'oyagala ennyo ow'okulusegere, n'akusendasendanga mu kyama ng'agamba nti, "Jjangu tugende tusinze bakatonda abalala," bakatonda ggwe b'otomanyangako, ne bakadde bo be batamanyangako,

⁷bakatonda ab'abantu ababeetoolodde, ab'oku muliraano, oba abeewala, okuva ensi gy'etandikira ne gy'ekoma,

⁸tomuwulirizanga, so by'anaakugambanga tobikolanga. Tomusaasiranga era tomuzibiikirizanga wadde okumusonyiwanga.

⁹Omuttiranga ddala. Gw'omusokangako ng'attibwa n'abantu bona ne bassa okwo.

¹⁰Onoomukubanga amayinja n'omutta, kubanga anaabanga agezezzaako okukukyusa akuggye ku MUKAMA Katonda wo eyakuggya mu nsi ey'e Misiri mu nnyumba ey'obuddu.

¹¹Kale Isirayiri yonna banaakiwuliranga banaatyanga, era tewaabeerengawo mu mmwe n'omu anaddangayo okukola ekibi ng'ekyo.

¹²Bw'owuliranga mu kimu ku bibuga MUKAMA Katonda wo by'akuwa okubeerangamu,

¹³nga mulimu abantu abali mu mmwe abosituse ne basikiriza abantu b'omu kibuga kyabwe ekyo nga babagamba nti, "Ka tugende tusinze bakatonda abalala," bakatonda be mutamanyangako,

¹⁴kale nno kikusaanira obuulirizenga nnyo ku kintu ekyo, okyekebejjenga, okyekkaanyizenga ddala. Bwe kinaakakasibwanga nga kya mazima, nga wakati mu mmwe waliwo abakoze ekintu ekibi bwe kityo,

¹⁵kale, abantu bona abanaabeeranga mu kibuga onoobattanga n'ekitala, awamu n'ebisolo byabwe bye balunda byonna.

¹⁶Omunyago gwonna onoogukuṇṇaanyizanga wakati mu kibangirizi eky'omu kibuga, era onoooyokyanga ekibuga kyonna n'omunyago gwako n'omuliro, ng'ekiweebwayo ekiri awamu ekyokebwa eri MUKAMA Katonda wo. Ekibuga ekyo kinaasigalanga awo nga kifunvu eky'olubeerera, tekiddibwengamu kuzimbibwa.

¹⁷Tewaabbeerengawo kintu na kimu ku ebyo ebinaabanga bimaze okukolimirwa ky'onoosangibwanga nakyo, bwe butyo obusungu bwa MUKAMA obunaabanga obungi ennyo bunakkakkananga; anaakukwatirwanga ekisa, n'akulaganga okwagala kwe, n'akwongeranga okwala, nga bwe yalayirira bajjajaabo,

¹⁸kubanga onoogonderanga eddoboozi lya MUKAMA Katonda wo n'okwatanga amateeka ge gonna ge nkuwa leero, n'okolanga ebisaanidde mu maaso ga MUKAMA Katonda wo.

Ekyamateeka Olwokubiri 14

Okuwnera Empisa ez'Ekikaafiiri

¹Muli baana ba MUKAMA Katonda wammwe. Temwesalangako misale oba enjola ku mibiri gyammwe, wadde okwemwangako enviiri ez'omu bwenyi nga mufiiriddwa,

²kubanga oli ggwanga ttukuvu eri MUKAMA Katonda wo. Mu mawanga gonna ag'oku nsi, MUKAMA ggwe gwe yalondamu okuba eggwanga lye eddonde lye yeefunira.

Ebyokulya Ebirongoofu n'Ebitali Birongoofu

³Temulyanga nnyama ya kisolo kyonna ekitali kirongoofu eky'omuzizo.

⁴Bino bye bisolo bye munaalyanga: ente, endiga, embuzi,

⁵enjaza, empeewo, ennangaazi, embulabuzi, entamu, entenjo n'endiga ez'omu nsiko.

⁶Era munaayinzanga okulya ensolo ezirina ebinuulo ebyawulamu wabiri nga zizza n'obwenkulumu.

⁷Naye nno ku ezo ezirina ebinuulo ebyawulamu oba nga zizza obwenkulumu, zino temuziryanga: eñjamira, akamyu, n'omusu. Kubanga newaakubadde nga zizza obwenkulumu, ekinuulo kyazo sikywulemu, si nnongoofu za muzizo gye muli.

⁸Embitti nazo si nnongoofu, kubanga newaakubadde zirina ekinuulo ekyawulemu, naye tezizza bwenkulumu, noolwekyo zinaabanga za muzizo gye muli. Ennyama yaazo temugiryanga so temukwatanga wadde okukoma ku mirambo gyazo.

⁹Mu biramu ebibeera mu mazzi, munaalyanga ebyo ebirina amaggwa ku mugongo n'amagalagamba.

¹⁰Naye ebyo byonna ebitalina maggwa na magalagamba temubiryanga, kubanga si birongoofu gye muli.

¹¹Ennyonyi ennongoofu munaaziryanga.

¹²Naye zino temuuziryenga: empungu, ennunda, makwanzi,

¹³wonzi, eddiirawamu, kamunye n'ez'ekika kye,

¹⁴namujjoona owa buli ngeri;

¹⁵ne maaya, n'olubugabuga, olusove, enkambo n'ekika kyazo,

¹⁶ekiuugulu, n'ekkukufu, ekiuuugulu eky'amatu;

¹⁷n'ekimbala, n'ensega, n'enkobyokkobyo;

¹⁸ne kasiida, ne ssekanyolya, n'ekika kye, n'ekkookootezi, n'ekinyira.

¹⁹Ebiwuka byonna ebirina ebiwaawaatiro nga bigendera mu kibinja si birongoofu gye muli, temuubiryenga.

²⁰Ekiramu kyonna ekirongoofu ekirina ebiwaawaatiro munaayinzanga okukirya.

²¹Ekintu kyonna kye munaasanganga nga kimaze okufa, temukiryanga. Onoooyinzanga okukiwanga munnaggwanga anaabeeranga mu bibuga byo ye n'akirya, oba onoooyinzanga okukitunzanga munnaggwanga. Kubanga oli ggwanga ettukuvu eri MUKAMA Katonda wo. Tofumbiranga kabuzi kato mu mata ga nnyina waako.

Ebiragiro ku Kitundu Ekimu eky'Ekkumi

²²Buli lw'onookungulanga ebibala byo nga biva mu nnimiro yo buli mwaka, weegenderezanga n'ossangako wabbali ekitundu kyabyo eky'ekkumi.

²³Onoolyanga ekitundu eky'ekkumi eky'emmere y'empeke, n'ekya wayini omusu, n'eky'amafuta, n'eky'ebiberebery eby'ebisibo byo n'eb'y'amagana go. Onookiriiranga mu maaso ga MUKAMA Katonda wo mu kifo ky'anaabanga yeerondedde eky'okubeerangamu Erinya lye, olyokenga oyige okutyanga MUKAMA Katonda wo bulijo.

²⁴Naye MUKAMA ng'akuwadde omukisa, kyokka ng'ekifo ekyo kye yeerondera okubeerangamu Erinya lye kiri wala n'ewuwo, noolwekyo nga toosobolenga kwetikka ekitundu eky'ekkumi okukituusangayo,

²⁵kale nno, onookiwaanyisangamu omuwendo gw'ensimbi. Onoogendanga n'ensimbi ezo ng'ozinywezezza mu mukono gwo mu kifo MUKAMA Katonda wo kye yeerondera.

²⁶Ensimbi ezo onoozeegulirangamu ekintu kyonna ky'onooyagalanga: gamba ente, oba endiga, oba envinnyo, oba ekyokunywa ekitamiiza, oba ekintu kyonna ky'onooyagalanga. Ggwe awamu n'ab'omu maka go bona munaaliiranga awo mu maaso ga MUKAMA Katonda wo nga musanyuka.

²⁷Naye nno, Omuleevi anaabeeranga naawe mu bibuga byo tomulagajjaliranga, kubanga ye talina mugabo wadde ebyobusika ebibye ku bubwe nga ggwe.

²⁸Buli myaka esatu, ku buli nkomerero ya mwaka ogwokusatu, onooleetanga ebitundu eby'ekkumi byonna ebyo eby'ebibala byo byonna eby'omwaka ogwo, n'obiterekanga mu mawanika mu bibuga byo.

²⁹Kale nno, Omuleevi kubanga taabenga na mugabo wadde ebyobusika nga ggwe, ne bamulekwa abatalina bakitaabwe ne nnamwandu; abo bona abanaabanga babeera mu bibuga byo, bajjenga balye okutuusa lwe banakkutanga; bw'atyo MUKAMA Katonda wo alyoke akuwenga omukisa mu buli kimu kyonna ky'onookolanga n'emikono gyo.

Ekyamateeka Olwokubiri 15

Omwaka ogw'Okusonyiyirwangamu Amabanja

¹Ku buli nkomerero y'omwaka ogw'omusanvu, amabanja gonna onoogasonyiwanga.

²Okusonyiwa okwo kunaabeeranga bwe kuti: buli muntu eyawola munne ebbanja, anaasazangamu ebbanja eryo lye yamuwola. Temubanjanga Bayisirayiri bannammwe, kubanga ebiro MUKAMA by'anaabanga ataddewo eby'okusonyiwagan amabanja binaabanga bimaze okulangirirwa.

³Onooyinzanga okubanja munnaggwanga akusasule, naye ebbanja muganda wo ly'akulinako onoolimusonyiwanga.

⁴Naye tewaabeerengawo mwavu mu mmwe kubanga ng'otuuse mu nsi MUKAMA Katonda wo gy'akuwa okugyefunira ng'obutaka bwo obw'enkalakkalira n'akuyiwangako emikisa gye emingi,

⁵kasita onoogonderanga ddala MUKAMA Katonda wo, n'ogoberera n'obwegendereza ebiragiro bino byonna bye nkuwa leero.

⁶Kubanga MUKAMA Katonda wo agenda kukuyiwako emikisa gye nga bwe yakusuubiza. Amawanga mangi onoogawolanga naye ggwe tojjanga kugeewolako. Onoofuganga amawanga mangi, naye go tegaakuifugenga.

⁷Bw'onoobanga oli mu bibuga by'omu nsi MUKAMA Katonda wo gy'akuwa, mu mmwe bwe munaabangamu munno omwavu ali mu kwetaaga tokakanyazanga mutima gwo wadde okukodowaliranga muganda wo oyo omwavu.

⁸Omwanjululizanga engalo zo, n'omuwolanga n'okwagala kyonna ky'anaabanga yeetaaga okumuwewulako obuzibu bwe.

⁹Weekuumenga nnyo olemenga kubeeranga na ndowooza eno embi mu mutima gwo nti, "Omwaka ogw'omusantu ogw'okusonyiwa amabanja guseembedde," muganda wo n'omukwatirwa ettima n'otobaako ky'omuwa. Muganda wo ayinza okujulira eri MUKAMA n'osangibwanga ng'ogudde mu kibi.

¹⁰Muwenga n'okwagala n'obutajuliriranga, kubanga olw'omwoyo ng'ogwo, MUKAMA Katonda wo ajanga kukuwanga omukisa mu mirimu gyo gyonna, ne mu buli kintu ky'onootuusangako engalo zo.

¹¹Olkubanga mu nsi temuubulengamu baavu abali mu kwetaaga, kyenva nkulagira nti muganda wo omwavu era ali mu kwetaaga omwanjululizanga engalo zo bulijo mu nsi yo.

Okuwa Eddembe Abaddu Abagule

¹²Omusalija Omwebbulaniya oba omukazi Omwebbulaniya gw'onoobanga oguze okukuweerezanga, bw'anaamalangako emyaka omukaaga, mu mwaka ogw'omusantu onoomuddizanga eddembe lye.

¹³Era bw'onoomutanga tomusiibulanga ngalo nsa.

¹⁴Omuwangako, nga teweeralira, ku magana go, ne ku mmere yo ey'empeke, ne ku wayini wo. Omuwanga nga MUKAMA Katonda wo bw'anaabanga akuwadde omukisa.

¹⁵Ojjukiranga nga wali muddu mu nsi y'e Misiri, MUKAMA Katonda wo n'akununulayo. Noolwekyo kyenva nkuwa ekiragiro kino leero.

¹⁶Naye omuddu bw'anaakugambanga nti, "Sijja kuva wano," kubanga akwagala nnyo ggwe n'abali mu maka go, era nga bw'abeera naawe aba bulungi;

¹⁷kale nno, onoomulazanga awali oluggi, n'oddira olukato n'olufumitanga mu kutu kwe okw'ebweru ne luyingira ne mu luggi; olwo anaabanga afuuse muweereza wo ennaku zonna ez'obulamu bwe bwonna. N'omuweereza wo omukazi naye onoomuyisanga bw'otyo.

¹⁸Tolowoozanga nti omukwatiddwa ekisa kubanga akuweerezza okumala emyaka mukaaga, nga buli mulimu gw'akola gwandikoleddwanga abaweereza ab'empeera babiri balamba. Era mu byonna by'onookolanga, MUKAMA Katonda wo anaakuwanga omukisa.

Ebibereberye eby'Ebisolo Ebirundibwa

¹⁹Buli bibereberye ebisajja ebinaazaalibwanga mu ggana lyo ne mu kisibo kyo, onoabitukuzanga era binaabanga bya MUKAMA Katonda wo. Ente zo ennume embereberye tozikozesanga mirimu, n'endiga zo embereberye tozisalangako byoya.

²⁰Ebibereberye ebyo onoobiryanga buli mwaka, buli mwaka, ggwe n'ab'omu nju yo bona, nga mubiriiranga mu maaso ga MUKAMA Katonda wo, mu kifo MUKAMA ky'anaabanga yeerondedde.

²¹Ekisolo bwe kinaabeerangako akamogo, gamba nga kirema, oba nga kizibe kya maaso, oba nga kiriko ekikyamu kyonna ekinene, tokireetanga ng'ekiweebwayo eri MUKAMA Katonda wo.

²²Onookiriiranga mu bibuga byo. Omulongoofu n'atali mulongoofu mwenna munaabiryanga nga bwe munaalyanga empeewo oba enjaza.

²³Naye omusaayi togulyanga, oguyiwanga wansi ku ttaka ng'ayiwa amazzi.

Ekyamateeka Olwokubiri 16

Embaga ey'Okuyitako

¹Ojjukiranga omwezi ogwa Abibu ng'ogukwatiramu Okuyitako kwa MUKAMA Katonda wo, kubanga ekiro mu mwezi gwa Abibu, MUKAMA Katonda wo mwe yakuggyira mu nsi y'e Misiri.

²Onooleetanga ekiweebwayo eri MUKAMA eky'Okuyitako, ng'okiggya mu ggana lye, ne mu kisibo kyo mu kifo MUKAMA ky'anaabanga yerondedde nga kye ky'okubeerangamu Erinnya lye.

³Tokiryanga na mugaati omuzimbulukuse. Onoomalanga ennaku musanvu ng'emigaati gy'olya si mizimbulukuse, gye migatti egy'okulaba ennaku, kubanga mu Misiri wavaayo mu bwangu, bw'otyo olyokenga ojjukirenga, mu nnaku zonna ez'obulamu bwo, olunaku lwe wasitulirako ng'ova mu nsi y'e Misiri.

⁴Tewaabeerengawo asangibwa na kizimbulukusa mu nsi yo yonna okumalanga ennaku musanvu. Ennyama gy'onooteekateekanga, ey'ekiweebwayo, akawungeezi ku lunaku olw'olubereberye teesigalengawo kutuusa nkeera.

⁵Tokkirizibwenga kuweerangayo mu bibuga byo MUKAMA Katonda wo by'akuwa, ekiweebwayo eky'Okuyitako,

⁶wabula onookiweerangayo mu kifo MUKAMA ky'anaabanga yeerondedde eky'okubeerangamu Erinnya lye. Eyo gy'onooweerangayo Okuyitako akawungeezi ng'enjuba egwa, ng'ojjukiranga olunaku lwe wasitulirako ng'ova mu nsi y'e Misiri.

⁷Onofumbanga okuyitako okwo n'okuliira mu kifo MUKAMA Katonda wo kye yeerondera. Enkeera onoddangayo mu weema yo.

⁸Onoolyanga emigaati egitali mizimbulukuse okumala ennaku mukaaga, kyokka ku lunaku olw'omusanvu kunaabanga kukuŋjaana mu maaso ga MUKAMA Katonda wo okumusinza; tolukolerangako mulimu gwonna.

Embaga ey'Amakungula

⁹ Onoobalanga wiiki musanvu okuva ku kiseera lw'onoookungulanga emmere ey'empeke okuva mu nnimiro yo omulundi ogusooka.

¹⁰ Kale nno onookwatanga Embaga ya Wiiki ezo ng'oleetera MUKAMA Katonda wo ekiweebwayo ekya kyeyagalire ekinaavanga mu ngalo zo, ng'emikisa bwe ginaabeeranga MUKAMA Katonda wo gy'anaabanga akuwadde.

¹¹ Onoosanyukiranga mu maaso ga MUKAMA Katonda wo mu kifo ky'anaabanga yeerondedde okubeerangamu Erinnya lye. Onoosanyukanga ne batabani bo, ne bawala bo, n'abaweereza bo abasajja, n'abaweereza bo abakazi, n'Omuleevi anaabeeranga mu bibuga byo, ne munnaggwanga ne mulekwa, ne nnamwandu abanaabeeranga mu mmwe.

¹² Ojjukiranga nga bwe wali omuddu mu nsi ey'e Misiri, osaana ogonderenga ebiragiro ebyo n'obwegendereza.

Embaga ey'Ensiisira

¹³ Onookwatanga Embaga ey'Ensiisira okumala ennaku musanvu ng'omaze okuyingiza ebyamakungula byo okubiggya mu gguuliro, ne wayini ng'omuggye mu ssogolero lyo.

¹⁴ Onoojaguzanga ng'oli ku Mbaga eyo, ggwe, ne mutabani wo, ne muwala wo, n'omuweereza wo omusajja, n'omuweereza wo omukazi, n'Omuleevi, n'omunnaggwanga, ne mulekwa, ne nnamwandu, abanaabeeranga mu bibuga byo.

¹⁵ Onoomalanga ennaku musanvu ng'oja guza ku Mbaga eyo mu maaso ga MUKAMA Katonda wo mu kifo MUKAMA ky'aneeronderanga. Kubanga MUKAMA Katonda wo anaakuwanga omukisa mu bibala byonna eby'amakungula go, ne mu mirimu gyo gyonna gy'onootuusangako engalo zo, essanyu lyo bwe lityo linaabanga lijuvu.

¹⁶ Abasajja bona mu mmwe banaakuñjaananga emirundi esatu buli mwaka, mu maaso ga MUKAMA Katonda wo, mu kifo ky'aneeronderanga, ku Mbaga y'Emigaati Egitali Mizimbulukuse, ne ku Mbaga eya Wiiki Omusanvu, ne ku Mbaga ey'Ensiisira. Tewaabengawo n'omu anajjanga engalo enjereere awali MUKAMA.

¹⁷ Buli omu anaaleetanga ekirabo kye ng'obusobozi bwe bwe bunaabanga, nga bwesigamizibwa ku mikisa MUKAMA Katonda wo gy'anaabanga akuwadde.

Abalamuzi

¹⁸ Onoolondanga abalamuzi n'abakulembeze mu bantu, mu bika byo byonna, mu bibuga byo byonna, MUKAMA Katonda wo by'akuwa, baweerezenga abantu nga babasalirawo ensonga zaabwe nga tebasaliriza.

¹⁹Obeeranga n'obwenkanya, era tobanga na kye kubiira ng'osala emisango. Tolyanga nguzi, kubanga enguzi eziba amaaso g'omugezi era ebuzaabuza ebiligambo by'abatuukirivu.

²⁰Ogobereranga bwenkanya bwokka olyoke olye ensi MUKAMA Katonda wo gy'akuwa.

Obutasinzanga Bakatonda Balala

²¹Tosimbanga miti gya kusinza okumpi n'ekyoto ky'onoozimbiranga MUKAMA Katonda wo;

²²wadde okuyimirizangawo empagi ey'amayinja ey'okusinzanga; kubanga ebyo byonna MUKAMA Katonda wo tabyagala abikyayira ddala.

Ekyamateeka Olwokubiri 17

¹Toleetanga kiweebwayo eri MUKAMA Katonda wo eky'ente oba eky'endiga ng'eriko akamogo oba ekikyamu kyonna, kubanga ebiri ng'ebyo Katonda wo abikyayira ddala.

²Omuntu yenna omusajja oba omukazi abeera mu mmwe, mu kimu ku bibuga MUKAMA Katonda wo by'akuwa, bw'anaakwatibwanga ng'akoze ebibi mu maaso ga MUKAMA Katonda wo, ng'amenye endagaano ya MUKAMA,

³era ng'ajeemedde ekiragiro kyange n'asinza bakatonda abalala, ng'enjuba, oba omwezi, oba emmunyeenyenye ez'oku ggulu, bye siragiranga okubisinzanga,

⁴ekikolwa ekyo ne kikutgeeezbwangako; kale onookinoonyerezangako n'obwegendereza. Bwe kinaakakasibwanga nga kya mazima, ng'ekibi ekyo kikoleddwa mu Isirayiri,

⁵onoofulomyanga omusajja oyo, oba omukazi oyo, akoze ekibi ekyo, wabweru wa wankaaki w'ekibuga n'omukuba amayinja, n'afa.

⁶Omuntu anattibwanga nga wamaze kulabikawo obujulizi bw'abantu babiri oba basatu, naye omuntu tattibwenga ku bujulizi bw'omuntu omu yekka.

⁷Abajulizi be banaasookanga okukasuuririra omuntu oyo amayinja, n'abalala ne bagoberera. Kinaakusaaniranga okwemalangako ebibi ebinaabeeranga wakati mu mmwe.

Embuga Ezinaasalirwangamu Emisango

⁸Bwe wanaabangawo emisango egireeteddwa mu mbuga yo nga mizibu gikukaluubiridde okusala, oba nga gya kuyiwa musaayi, oba gya kuwozaanjanya, oba kukubagana, oba ensonga endala zonna ezinaabangamu enkaayana mu bibuga byo, ensonga ezo zonna onoozitwalanga mu kifo MUKAMA Katonda wo ky'anaabanga yeerondedde.

⁹Bw'onootuukanga eyo oneebuuzanga ku bakabona, be Baleevi, ne ku mulamuzi anaabanga akola omulimu ogwo mu kiseera ekyo. Banaakutegeezanga ensala yaabwe.

¹⁰Onookoleranga ku nsala yaabwe eyo gye banaakuwanga mu kifo ekyo MUKAMA ky'anaabanga yeerondedde. Weegenderezanga nnyo n'okola ebyo bye banaabanga bakulagidde.

¹¹Kinaakugwaniranga okukola ng'amateeka ge banaabanga bakunyyonnyodde bwe gagamba, n'ensala yaabwe nga bw'eneebanga gye banaakutegeezanga. Bye banaakutegeezanga tobivangako kulaga ku mukono ogwa ddyo oba ku gwa kkono.

¹²Omuntu yenna anaanyoomanga omulamuzi oba kabona eyateekebwawo okuwereza MUKAMA Katonda wo, omuntu oyo wa kufa. Bw'otyo bw'onomalangamu ekibi mu Isirayiri.

¹³Abantu bona banaabiwuliranga ne batya, ne bataddayo nate kukola bya kyejo.

Eby'Obwakabaka

¹⁴Bw'olimala okuyingira mu nsi MUKAMA Katonda wo gy'akuwa, n'ogirya, n'obeera omwo, oliyinza okugamba nti, "Leka neeteekerewo kabaka ananfuganga okufaanana ng'amawanga amalala gonna aganneebunguludde;"

¹⁵Weegenderezanga n'ossaawo kabaka oyo MUKAMA Katonda wo gw'anaakulonderanga. Kikugwanira okumuggyanga mu bantu bo bennyini. Tokkirizibwenga kwessizangawo kabaka omunnaggwanga anaabanga tavudde mu baganda bo bennyini, okukufuganga.

¹⁶Kabaka oyo tateekwa kwefuniranga mbalaasi nnyingi, wadde okutumanga abantu mu Misiri bamufunirengayo embalaasi endala okwongeranga ku z'alina obungi; kubanga MUKAMA yagamba nti, "Temuddangayo kukwata kkubo eryo,"

¹⁷Tawasanga bakazi bangi kubanga bagenda kumukyamyanga. So tekimugwanira kwetuumangako zaabu n'effeeza ennyingi ennyo.

¹⁸Bw'anaamalanga okutebenkera ku ntebe ey'obwakabaka bwe, anaakoppololeranga amateeka gano mu kitabo ng'agaggyanga ku ga bakabona, Abaleevi.

¹⁹Ekitabo ekyo anaabeeranga nakyo bulijjo, era anaakisomanga ennaku zonna ez'obulamu bwe, alyokenga ayige okutyanga MUKAMA Katonda we, ng'agobereranga n'obwegendereza ebigambo byonna ebiri mu mateeka gano, ne mu biragiyo,

²⁰nga teyekulumbaza kusukkirira ku bannansi banne, era nga takyama kuva ku mateeka gano okulaga ku mukono ogwa ddyo oba ku gwa kkono.

Bw'anaakolanga bw'atyo, ye, n'ezzadde lye banaafuganga mu bwakabaka bwe, mu Isirayiri, okumala ennaku nnyingi.

Ekyamateeka Olwokubiri 18

Abaleevi Bakabona

¹ Bakabona, Abaleevi n'ekika kyonna ekya Leevi, tebaafunenga mugabo oba bya busika mu Isirayiri. Banaaweebwanga ku biweebwayo ebyokebwa ebinaaleetebwanga eri MUKAMA Katonda; ogwo gwe gunaabanga omugabo ogw'obusika bwabwe.

² Tebaabeerenga na mugabo gwa busika nga bannaabwe abalala bona mu Isirayiri, kubanga MUKAMA Katonda yabasuubiza nga y'anaabanga obusika bwabwe.

³ Bino bakabona bye banaagabananga ku biweebwayo eby'ente za sseddume n'endiga abantu bye banaabanga baleese: bakabona banaafunangako omukono n'emba zombi, n'eb'y'omu lubuto.

⁴ Era onoobawanga ebibala byo ebibereberye eby'emmere ey'empeke, n'ebya wayini wo, n'amafuta go, n'ebyo ya ebisooka eby'endiga zo.

⁵ Kubanga MUKAMA Katonda wo yeeroboza Leevi n'ezzadde lye mu bika byo byonna okuweerezanga mu linnya lya MUKAMA emirembe n'emirembe.

⁶ Omuleevi bw'anaavanga mu kimu ku bibuga byo ebiri mu Isirayiri gy'abadde atuula, n'ajja nga bw'anaabanga yeeteserezza, n'ajja mu kifo MUKAMA Katonda ky'aneeronderanga,

⁷ anaayinzanga okuweereza mu linnya lya MUKAMA Katonda we okufaanana nga Abaleevi banne abalala aba buli kiseera abanaabanga baweereza mu linnya lya MUKAMA Katonda mu kifo ekayo.

⁸ Anaagabananga kyenkanyi ne banne abaabulijo, ne bw'anaabanga ng'alina ensimbi ezize ku bubwe z'anaabanga aggye mu by'omu maka ge by'atunze.

Okuwera Empisa ez'Obulogo n'Obusamize

⁹ Bw'onooyingira mu nsi MUKAMA Katonda wo gy'akuwa, weekuume obutayiga kukopperera mpisa embi ez'abantu ab'omu mawanga g'olisanga mu nsi omwo.

¹⁰ Tewabeerangawo omuntu n'omu alirabika ng'ayisa mutabani we, oba muwala we mu muliro, ng'ekiweebwayo, oba ng'akola ng'omulaguzi, oba omulogo, oba omusawo w'ekinnansi, oba avvuunula eby'omu biseera ebijja,

¹¹ obaasuula abantu eddalu, oba emmandwa, oba omusamize, oba omulubaale, oba ayogera n'emizimu, oba eyeebuuza ku baafa.

¹² Omuntu yenna anaakolanga ebintu ng'ebyo, anaabanga kivume era ekyomuzizo eri MUKAMA. Era olwokubanga ab'omu mawanga ago bakola

ebyomuzizo ebyo, MUKAMA Katonda wo kyanaava abagoba mu nsi omwo ng'ogiyingira.

¹³Kikugwanira obenga muwulize nnyo, atuukiridde mu maaso ga MUKAMA Katonda wo.

¹⁴Newaakubadde ng'abantu ab'omu mawanga ago b'ogenda okulyako ensi yaabwe, bagondera nnyo abalaguzi n'abasamize, naye ebyo MUKAMA Katonda wo, ggwe, takukkiriza kubikola.

Okusuubizibwa Nnabbi Omuggya

¹⁵ MUKAMA Katonda wo agenda kukuyimusiza Nnabbi ali nga nze, ng'amuggya mu bantu bo. Nnabbi oyo mumuwulirizanga era mumugonderanga.

¹⁶Kubanga ekkyo kye wasaba MUKAMA Katonda wo ku lunaku olw'okukuŋñaana ku lusozi Kolebu ng'ogamba nti, "Sisaanidde kuddayo nate kuwulira ddoboozi lya MUKAMA Katonda wange wadde okuddayo okulaba omuliro guno omungi, nneme okufa."

¹⁷MUKAMA Katonda kwe kunnyanukula nti, "Kye bagambye kirungi era kituufu.

¹⁸Nzija kubayimusiza Nnabbi ali nga ggwe okuva wakati mu bo; Nze nnaasanga ebigambo byange mu kammwe ke, ye n'abategeezanga bye nnaamulagiranga.

¹⁹Omuntu yenna ataagonderenga bigambo Nnabbi by'anaayogeranga mu linnya lyange, Nze kennyini, Nze nnaamwekolerangako.

²⁰Naye nnabbi anaayogeranga mu linnya lya bakatonda abalala, oba aneetulinkirizanga nti ayogera mu linnya lyange, songa si Nze mmulagidde okubyogera, nnabbi oyo wa kufa."

²¹Oyinza okwebuuza nti, "Tunaamanyanga tutya ng'ebigambo ebyo MUKAMA Katonda si y'anaabanga abyogedde?"

²²Ebigambo nnabbi by'anaayogeranga mu linnya lya MUKAMA bwe bitaatuukirirenga oba bwe bitaabenga bya mazima, ng'ebigambo ebyo MUKAMA Katonda si y'abyogedde. Nnabbi oyo by'anaabanga ayogedde anaabanga abiyiiyizza buyiiya. Ebyo tebibatiisanga.

Ekyamateeka Olwokubiri 19

Amateeka ku Bibuga eby'Okuddukirangamu

¹ MUKAMA Katonda wo bw'alimala okuzikiriza amawanga kaakano agali mu nsi gy'akuwa, n'ogyefunira, ne weetwalira ebibuga byabwe, n'amaka gaabwe n'obeera omwo,

²weeyawulirangako ebibuga bisatu nga biri wakati mu nsi MUKAMA Katonda wo gy'akuwa okugirya.

³Okolanga enguudo eziraga mu bibuga ebyo; ensi MUKAMA Katonda wo gy'akuwa okubeera obusika bwo obw'enkalakkalira, ogyawulangamu ebitundu bisatu, kale buli anattanga omuntu anaddukiranga mu kimu ku bibuga eby'omu bitundu ebyo.

⁴Etteeka lino likwata ku muntu anattanga munne nga tagenderedde kubanga anaabanga tamulinaako kiruyi kyonna, oyo eyasse anaddukiranga mu kimu ku bibuga ebyo awonye obulamu bwe.

⁵Ekyokulabirako kiokino: Singa omuntu agenda ne munne okutema omuti mu kibira n'embazzi, naye ng'abadde agiwuuba ateme omuti, embazzi n'ewanguka mu kitu kyayo, n'etema munne n'afa, eyasse anaayinzanga okuddukira mu kimu ku bibuga ebyo, n'atattibwa.

⁶Ebibuga ebyo tebisaanira kuba wala nnyo, kubanga oli ayagala okuwalanira omufu eggwanga bw'anaafubanga okugoba eyasse embiro okutuusa ng'amukutte, aleme kusobola kumukwata, naye n'amutta, songa eyasse oli yali tagenderedde kutta munne, kubanga ku bombi tekwaliko mulabe wa munne.

⁷Kyenva nkulagira okwewayawulirangako ebibuga bisatu.

⁸MUKAMA Katonda wo bw'anaakugaziyirizanga amatwale go, nga bwe yalayirira bajjajaabo, n'akuwa ettaka lyonna lye yasuubiza bajjajaabo,

⁹kasita onookwatanga amateeka gonna ge nkulagira leero, kwe kwagalanga MUKAMA Katonda wo, n'okutambuliranga mu makubo ge, kale ku bibuga bino ebisatu onooyongerangako ebirala bisatu.

¹⁰Ekyo onookikolanga okuziyiza omusaayi gw'omuntu ataliiko musango okuyiikira obwerefere mu nsi yo MUKAMA Katonda wo gy'akuwa okubeera obusika bwo obw'enkalakkalira, omusaayi oguyiise gulemenga kubeera ku ggwe.

¹¹Naye omuntu bw'anaabanga n'ekiruyi ku munne, n'amwekwekerera n'amutta, n'alyoka addukira mu kimu ku bibuga ebyo,

¹²abakulembeze abakulu ab'omu kibuga ky'omutemu, banaamutumyangayo ne bamuggyayo, ne bamukwasa anaabanga agenda okuwoolera eggwanga ery'omusaayi gw'omufu, omutemu n'alyoka attibwa.

¹³Tomusaasiranga. Kikugwanira okumalirawo ddala mu Isirayiri okuyiwa omusaayi ogutaliiko musango, olyoke obeerenga bulungi n'emirembe.

Ensalo z'Obwannannyini

¹⁴Tosimbulanga bituuti ebiri mu mpenda eziraga ensalo ya buli muntu ne muliraanwa we, ebyasimbibwawo ab'omu mirembe egyasooka, ebiraga ettaka ly'onoogabana mu nsi MUKAMA Katonda wo gy'akuwa okugirya.

Etteeka ku Bajulizi

¹⁵ Omujulizi omu taamalenga, okusinzisa omuntu omusango gw'anaabanga azzizza, oba olw'ekikolwa ekibi ky'anaabanga akoze nga kyekuusa ku musango gw'anaabanga azzizza. Wanaamalanga kubeerawo obujulizi bw'abantu babiri oba basatu, olwo nno ekivunaanwa omuntu oyo ne kiryoka kinywezebw.

¹⁶ Omujulizi ow'obulimba bw'aneesowolangayo n'avunaana omuntu nti musoby,

¹⁷ abantu bombi abawozanjanya banajjanga mu maaso ga MUKAMA Katonda awali bakabona n'abalamuzi abanaabanga ku mulimu mu kiseera ekyo.

¹⁸ Abalamuzi kinaabagwaniranga okubuulirizanga ennyo n'obwegendereza. Omujulizi oyo bw'anaakakasibwanga nga mulimba, ng'obujulizi bw'awadde ku munne bugingirire,

¹⁹ munaamukolangako nga naye bw'abadde ayagala munne akolweko. Bw'atyo n'omalirawo ddala ebikolwa ebibi ebiri wakati mu mmwe.

²⁰ Abalala bwe banaakiwuliranga banaatyanga, ng'olwo mu mmwe temukyali baddayo kuzzanga musango gufaanana ng'ogwo.

²¹ Tobasaasiranga; obulamu busasulwenga na bulamu, eriiso olw'eriiso, erinnyo olw'erinnyo, omukono olw'omukono n'ekigere olw'ekigere.

Ekyamateeka Olwokubiri 20

Amateeka g'Olutalo

¹ Bw'onoobanga ogenze okutabaala abalabe bo, n'olaba embalaasi n'amagaali n'eggye eddene okukira eriryo, tobatyanga; kubanga MUKAMA Katonda wo, eyakuggya mu nsi y'e Misiri, anaabanga naawe.

² Bwe munaabanga muli kumpi okutandika okulwana, kabona anajjanga n'ayogera eri egghe ly'abaserikale,

³ n'abagamba nti, "Wulira, Ayi Isirayiri! Olwa leero mugenda okutandika okulwana n'abalabe bammwe. Temuggwaamu mutima, so temutiitiira wadde okubatya.

⁴ Kubanga MUKAMA Katonda wammwe y'anaagendanga nammwe okubalwanirira ng'alwanyisanga abalabe bammwe, n'okubawanga mmwe obuwanguzi."

⁵ Abaami banaayogeranga eri egghe nga bagamba nti, "Waliwo mu mmwe alina ennyumba empya gye yeezimbira naye nga tennatukuzibwa? Kimusanidde addeyo mu nnyumba ye, si kulwa ng'afiira mu lutalo, omulala n'agitukuza.

⁶ Waliwo mu mmwe eyalima ennimiro y'emizabbibu naye nga tannatandika kulya ku bibala byamu? Kimusaanidde addeyo mu maka ge, si kulwa ng'afiira mu lutalo, omuntu omulala n'alya ebibala byamu.

⁷Waliwo mu mmwe eyali ayogereza omukazi, naye nga tannamuwasa? Kimugwanidde addeyo mu maka ge, si kulwa ng'afiira mu lutalo, omuntu omulala n'awasa omukazi oyo."

⁸Abaami banaayongeranga okwogera eri eggye nga bagamba nti, "Waliwo mu mmwe omutiitiizi, oba aweddemu amaanyi mu mutima? Kimusaanidde addeyo mu maka ge, si kulwa ng'aleetera banne omutima omutiitiizi."

⁹Abaami bwe banaamalanga okwogera eri eggye, banaalondanga abakulu mu balwanyi abanaakulemberanga eggye eryo.

¹⁰Bw'onooseembereranga ekibuga ng'ogenda okukirwanyisa, osookanga kulangirira mirembe eri abantu baamu.

¹¹Bwe banakkirizanga emirembe, ne bakuggulirawo emiryango gy'ekibuga kyabwe, kale abantu baamu bona banaafuukanga baweereza bo, okukukoleranga byonna nga bw'onooyagalanga.

¹²Naye ekibuga ekyo bwe kinaagaananga okukkiriza emirembe, ne kisalawo okukulwanyisa, onookyebungululanga n'okizingiza.

¹³MUKAMA Katonda wo bw'anaakigabulanga mu mukono gwo, onottanga n'ekitala buli musajja yenna.

¹⁴Kyokka abakazi n'abaana abato, n'ebisibo by'ensolo, n'ebintu byonna ebinaabanga mu kibuga omwo, onoobyetwaliranga ng'omunyago gwo. Era onookozesanga nga bw'onooyagalanga omunyago gwonna ogunaavanga mu balabe bo MUKAMA Katonda wo gw'anaabanga akuwadde.

¹⁵Bw'otyo bw'onookolanga ebibuga byonna ebinaakubeeranga ewala ennyo, ebitaabenga bibuga bya mawanga gano.

¹⁶Naye mu bibuga bino MUKAMA Katonda wo by'akuwa okuba obusika bwo obw'enkalakkalira, tewaabeerengawo kintu n'ekimu ky'onoolekangamu nga kissa omukka, byonna onoobizikiririzanga ddala.

¹⁷Abakiiti, n'Abamoli, n'Abakanani, n'Abaperezi, n'Abakiivi, n'Abayebusi, onoobamalirangawo ddala, nga MUKAMA Katonda wo bw'akulagidde,

¹⁸balemenga kubayigiriza bikolobero bye bakola nga basinza bakatonda baabwe, bwe mutyo nammwe ne mwonoonanga eri MUKAMA Katonda wammwe.

¹⁹Bw'onoozingizanga ekibuga, ng'olwana nakyo, okumala ebbanga eddene olyoke okiwangule, toddiranga mbazzi n'ozikiriza emit gyakyo gyonna, kubanga ojjanga kwetaaga okulyanga ku bibala byagyo. Togitemanga. Emiti egy'omu nnimiro nagyo bantu olyoke ogizingize?

²⁰Naye emit gy'omanyi nga si gya bibala, egyo onoogitemanga olyoke ogikozesenga okuzimba ekisenge kw'onoosinziiranga okulwananga n'ekibuga ky'onoobanga ozingizza, okutuusa lwe kinaagwanga.

Ekyamateeka Olwokubiri 21

Etteeka ku Butemu ng'Eyatemu Tamanyiddwa

¹Bw'olimala okuyingira mu nsi MUKAMA Katonda gy'akuwa okugirya, omuntu n'asangibwa mu nsiko ng'attiddwa, kyokka ng'eyamusse tamanyiddwa,

²bakadde bo, abakulembeze, n'abalamuzi bo banaafulumanga ne bagenda bapima obuwantu bw'ebbunga okuva ku mulambo okutuuka ku bibuga ebinaabanga bigwebulunguludde.

³Kale nno abakadde abakulembeze b'ekibuga ekinaabanga kisinga okuliraana n'omulambo ogwo, banaaddiranga ente enduusi etakozesebwangako mulimu gwonna, etassibwangamu kikoligo,

⁴ne bagiserengesa mu kiwonvu ekirimu akaggakakulukuta; ekitalimwangamu wadde okusimbwamu emmere. Mu kiwonvu omwo mwe banaanyoleranga ensingo y'ente eyo ne bagimanya.

⁵Kale nno batabani ba Leevi, bakabona, banaavangayo ne basembera, kubanga MUKAMA Katonda wo yabalonda okumuweerezanga, n'okusabiranga emikisa mu linnya lyu MUKAMA n'okutereezanga empaka zonna n'obulumbaganyi.

⁶Awo abakadde abakulembeze bonna ab'omu kibuga ekinaasinganga okuliraana omulambo ogwo, banaanaabiranga engalo zaabwe ku nte eri enduusi eyamenyebbwaa ensingo mu kiwonvu,

⁷ne boogera nti, "Emikono gyaffe si gye gyayiwa omusaayi guno, ne bwe gwali guyiyibwa amaaso gaffe tegaagulaba, tetwaliwo nga guyiyibwa.

⁸Osonyiwe abantu bo, Isirayiri, be wanunula Ayi MUKAMA Katonda, oleme kuleka wakati mu bantu bo, Isirayiri, omusango ogw'okuyiwa omusaayi, gwe batazzanga." Bwe batyo banaasoniyibwanga omusango gw'omusaayi ogwo.

⁹Bw'otyo bw'onoggyangawo omusango wakati wammwe ogw'okuyiwa omusaayi ogutaliiko nsong, kubanga onoobanga okoze ekituufu mu maaso ga MUKAMA Katonda.

Okwasa Omukazi Omunyage

¹⁰Bw'ogendanga okutabaala balabe bo, MUKAMA n'abagabula mu mikono gyo n'onyagayo abantu,

¹¹mu abo abanyagiddwa bw'onooolabangamu omukazi alabika obulungi n'omwagala, n'oyagala okumuwas,

¹²omutwalanga mu maka go, n'omulagira okumwa omutwe gwe, n'okusalako enjala ze,

¹³n'engoye ze mwe yawambirwa azeeyambulangamu. Bw'anaamalanga mu nju yo omwezi mulamba ng'akungubagira kitaawe ne nnyina, onoogendanga gy'ali n'obeera bba, naye anaabeeranga mukazi wo.

¹⁴Kyokka bw'anaabanga takusanyusizza, omuwanga eddembe n'agenda so tomutundanga nsimbi. Tomuyisanga nga muddu, kubanga ggwe wamumalamu ekitiibwa kye.

Eddembe ery'Obwebange ery'Omwana Omubereberye

¹⁵Omusajja bw'anaabanga n'abakazi babiri, omu nga muganzi naye omulala nga mukyawe, bombi ne bamuzaalira abaana aboobulenzi, naye ng'omwana omubereberye ye w'omukyawe;

¹⁶bw'anaabanga agabira batabani be abo ebintu bye mu ddaame lye, takkirizibwenga kuyisa mwana wa muganzi ng'omubereberye, singa omwana w'omukyawe ye mubereberye.

¹⁷Anaasaaniranga okukkiriza nti omwana w'omukyawe ye mubereberye, era anaamuwanga emiteeko ebiri egy'ebintu bye byonna by'alina, kubanga oyo ge maanyi ga kitaawe amabereberye. Ye nannyini ddembe ery'obwebange ery'omwana omubereberye.

Abaana Abakakanyavu Abatawulira

¹⁸Omuntu bw'anaabanga ne mutabani we omukakanyavu omujeemu atagondera biragiro bya kitaawe wadde ebya nnyina, atabafaako bwe bamubonerezaamu olw'obutawulira,

¹⁹kitaawe ne nnyina banaamukwatanga ne bamuleeta eri abakulu abakulembeze ab'omu kibuga kye waabwe nga bali wabweru w'omulyango gw'ekibuga ekyo.

²⁰Banaategeezanga abakulu abakulembeze b'omu kibuga kye waabwe nti, "Mutabani waffe ono mukakanyavu era mujeemu. Tatuwlira. Wa mulugube nnyo era mutamiivu."

²¹Kale nno abasajja b'omu kibuga ekkyo banaamukubanga amayinja ne bamutta. Bw'otyo bw'onoomalangawo ekibi wakati wo. Isirayiri yenna anaakiwuliranga, n'aty.

Amateeka Agatali Gamu

²²Omuntu bw'anaasingibwanga ogw'okufa n'attibwa, n'awanikibwa ku muti,

²³omulambo gwe teguulekebwenga ku muti ne gusulako ekiro kyonna; onoomuziikanga ku lunaku olwo lwennyini, kubanga omuntu awanikibwa ku muti, Katonda aba amukolimidde. Togwagwawazanga nsi MUKAMA Katonda wo gy'akuwa okugirya okubeera obusika bwo obw'enkalakkalira.

Ekyamateeka Olwokubiri 22

Okuyambagana

¹ Bw'olabanga ente ya munno, oba endiga ye, ng'ebula okuva ewaabayo, togirekanga bulesi ne weesuulirayo ogwa nnaggamba naye ogikwatanga n'ogizzaayo ewa nnyiniyo.

² Nannyini yo bw'abanga tasula kumpi naawe, obanga nannyini yo tomumanyi, ogireetanga mu maka go n'obeeranga nayo okutuusa nannyini yo lw'alijja ng'aginoonya; olwo nno n'olyoka ogimuddiza.

³ Okolanga bw'otyo ng'osanze endogoyi ya munno, obanga olonze ekyambalo kya munno, oba ekintu kyonna ekirala munno ky'anaabanga abuliddwa kyokka ggwe n'okironda. Tolemanga kuyamba munno ng'ali mu buzibu, ate nga wandsobodde okumuyamba. Obusobozi bw'onoobanga nabwo okuyamba munno tobumukwekanga.

⁴ Bw'onoolabanga endogoyi ya munno, oba ente ye, ng'egudde ku kkubo, togiyitangako buyisi, wabula omuyambanga okugiyimusa.

Omusajja Okwefaanaanyiriza Omukazi, oba Omukazi Okwefaanaanyiriza Omusaja

⁵ Omukazi taayambalenga ngoye za kisajja, so n'omusajja taayambalenga ngoye za kikazi; kubanga abakola ebyo MUKAMA Katonda wammwe abakyayira ddala.

⁶ Temutwalanga Nnyonyi Nzadde. Bwe munaalabanga ekisu ky'ennyonyi ku muti, oba ku mabbali g'ekkubo, nga kirimu amagi oba obwana obuto, nga ne nnyina waabwo abumaamidde, oba atudde ku magi, bwe munaatwalanga obwana obuto, nnyina waabwo temumutwalirangako.

⁷ Obwana obuto munaayinzanga okubutwala, kyokka nnyina waabwo mumulekanga n'agenda, mulyoke mufunenga emirembe mu mutima awamu n'obuwangaazi.

Akasenge ak'Okukugira Akasolya

⁸ Bwe muneezimbiranga enju empya ey'akasolya akatereevu akatali keesulifu, mukolangako akasenge waggulu okwebungulula akasolya ako, kalyoke kaziyizenga omuntu okuva eyo waggulu n'agwa wansi, n'aleeteranga ennyumba eyo omusango olw'omusaayi ogunaabanga guyiise.

Obutatabulatabulanga Bintu bya Njawulo

⁹ Wakati w'ennyiriri z'emizabbibu temusimbangamu mmere ya ngeri ndala, bwe munaakikolanga, ebibala by'emizabbibu n'ebi'emmere gye munaabanga musimbyemu, byombi munaabifiirwanga.

¹⁰ Ente n'endogoyi temuzigattanga wamu ne muzisibanga ku kikoligo kye kimu eky'ekyuma kye munaabanga mulimisa.

¹¹ Temwambalanga ngoye ezinaabanga zirukiddwa n'ewuzi z'ebyoya by'endiga nga zigattiddwa wamu n'ewuzi eza linena.

¹² Mutunganga emijunga ku buli nsonda ennya ez'eminagiro gyammwe gye munaayambalanga.

Amateeka ag'Enkolagana y'Abasajja n'Abakazi

¹³ Omusajja bw'aneewasizanga omukazi, kyokka oluvannyuma lw'okusula naye, n'amukyawa,

¹⁴ n'amuwaayiriza ng'amukonjera ng'agamba nti, "Nawasa omukazi ono, naye bwe nasula naye saamusanga nga mbeerera,"

¹⁵ Kitaawe w'omuwala oyo ne nnyina banaaleeteranga abakulembeze abakulu ab'ekibuga ekkyo, nga bali ku wankaaki waakyo, obujulizi obunaalaganga ng'omuwala waabwe yali mbeerera.

¹⁶ Kitaawe w'omuwala anaategeezanga abakulembeze abakulu nti, "Nagabira omusajja ono omwana wange omuwala amuwase, naye omusajja amukyaye.

¹⁷ Kaakano wuuno amuwaayiriza ng'amukonjera ng'amwogerako nti, Muwala wo namusanga nga si mbeerera." Naye obujulizi buubuno obulaga ng'omwana wange ono omuwala yali mbeerera. Abazadde b'omuwala banaayanjululizanga essuuka y'obuliri mu maaso g'abakulembeze abakulu ab'ekibuga ekkyo.

¹⁸ Abakulembeze abakulu b'ekibuga ekkyo banaatwalanga bba w'omuwala, banaasookanga okumukubamu.

¹⁹ Ate ne bamusalira omutango gwa sekeli za ffeeza kikumi; banaaziwanga kitaawe w'omuwala; kubanga omusajja oyo anaabanga aleese erinnya ebbi ku muwala wa Isirayiri embeerera. Omuwala oyo anaabeeranga mu maka g'omusajja oyo ebbanga lyonna, era omusajja takkirizibwenga kugoba mukazi we oyo ebiro byonna omusajja oyo by'alimala nga mulamu.

²⁰ Naye singa omusajja nga by'anaabanga ayogedde bya mazima, nga n'obujulizi obukakasa ng'omuwala yali mbeerera bunaabanga bubuze,

²¹ kale nno omuwala oyo anaaleetebwanga ku muzigo gw'ennyumba ya kitaawe, era abasajja ab'omu kibuga ky'omuwala oyo banaamukubiranga awo amayinja n'afa. Kubanga anaabanga akoze ekikolwa kya bugwenyufu nnyo eky'okumanya abasajja ng'akyali mu luggya lwa kitaawe. Ekibi musaananga mukimalemu mu Isirayiri.

²² Omusajja bw'anaakwatibwanga nga yeebase n'omukyala w'omusajja omulala, kale, omusajja akwatiddwa n'omukyala gw'anaabanga yeebase naye, bombi baakuttibwanga. Ekibi musaana mukimalengamu mu Isirayiri.

²³ Bwe wanaabangawo omuwala embeerera ayogerezebwa afumbirwe, omusajja n'amusanga mu kibuga ne yeebaka naye,

²⁴munaabaleetanga bombi ku wankaaki w'ekibuga ekyo ne mubakuba amayinja ne bafa; omuwala, bwe kibanga nga yali munda mu kibuga naye n'atakuba nduulu kufuna buyambi; omusajja, kubanga yayonoona omuwala ajja okufumbirwa omusajja we. Bwe mutyo bwe munaamalangamu ekibi mu mmwe.

²⁵Naye omusajja bw'anaasanganga omuwala ayogerezebwa ku ttale n'amukwata ne yeebaka naye olw'empaka, kale nno omusajja anaabanga yeebase n'omuwala oyo y'anattibwanga.

²⁶Omuwala oyo temumukolangako kintu kyonna, kubanga anaabanga talina kibi kyonna ky'akoze ekinaamusaanyizanga okufa. Ensonga ezo zifaanana ng'ez'omuntu anaabanga alumbaganye muliraanwa we n'amutemula.

²⁷Olwokubanga omuwala ono anaabanga ayogerezebwa okufumbirwa yasangibwa omusajja ku ttale etali bantu, anaayinzanga okuba nga yekubira enduulu naye ne watabaawo amudduukirira okumuyamba.

²⁸Omusajja bw'anasisinkananga omuwala embeerera naye nga taliiko amwogereza, n'amukwata ne yeebaka naye, ne bakwatibwa nga bali mu kikolwa ekyo,

²⁹omusajja anaabanga yeebase n'omuwala oyo anaasasulanga kitaawe w'omuwala sekeri eza ffeeza amakumi ataano. Omusajja anaawasanga omuwala oyo okuba mukazi we, kubanga anaabanga amaze okumusobyako. Era taamugobenga okumala ebbanga lyonna omusajja oyo nga mulamu.

³⁰Omusajja taawasenga mukyala wa kitaawe aleme kuweebuulanga kitibwa kya buliri bwa kitaawe.

Ekyamateeka Olwokubiri 23

Abatakkirizibwenga mu Kuññaaniro lya MUKAMA

¹"Omuntu yenna ng'ebitundu by'omubiri gwe eby'ekyama byabetentebwa oba nga byasalibwako, taayingirenga mu kuññaaniro lya MUKAMA Katonda.

²"Abantu bona abanaazaalibwanga mu bufumbo obutaabenga butukuvu tebaayingirenga mu kuññaaniro lya MUKAMA Katonda. Bazzukulu baabwe okutuusa ku mulembe ogw'ekkumi, nabo tebayingiranga mu kuññaaniro lya MUKAMA Katonda.

³"Abamoni n'Abamowaabu ne bazzukulu baabwe okutuusa ku mulembe ogw'ekkumi tebayingiranga mu kuññaaniro lya MUKAMA Katonda.

⁴Kubanga bwe mwali muva mu nsi y'e Misiri, tebaja kubaaniriza n'okubaleetera ku mmere ne ku mazzi; ate ne bapangisa Balamu mutabani wa Byoli nga bamuggyga e Pesoli eky'omu Mesopotamiya, okubakolimira.

⁵Kyokka MUKAMA Katonda wo n'alemesa Balamu; ekikolimo n'akikufuuliramu omukisa, kubanga MUKAMA Katonda wo akwagala nnyo.

⁶Tokolanga nabo endagaano ey'omukwano n'okubayamba mu mbeera yaabwe ebbanga lyonna ly'olimala ng'oli mulamu.

⁷"Omwedomu tomukyawanga kubanga omulinako oluganda. Tokyawanga Mumisiri n'omu kubanga wali mugenyi mu nsi yaabwe.

⁸Abaana baabwe ab'omulembe ogwokusatu banaakkirizibwanga okuyingira mu kuunjjaaniro ly'a MUKAMA Katonda.

Obutali Bulongoofu mu Lusiisira

⁹"Bw'onoogendanga okutabaala abalabe bo weewalenga obutali bulongoofu mu lusiisira lwammwe.

¹⁰Bwe wanaabangawo omusajja mu mmwe eyeeroteredde ekiro, bw'atyo n'aba atali mulongoofu, anaafulumanga mu lusiisira n'abeera ebweru.

¹¹Naye obudde bwe bunaawungeeranga anaanaabanga n'amazzi; enjuba bw'eneemalanga okugwa anaayinzanga okukomawo mu lusiisira.

¹²"Onootgekanga ekifo ebweru w'olusiisira ky'onooolagangamu okweteewuluza.

¹³Onoogendangayo n'eb'y'okukozesa. Onootwalanga ekifumu, bw'onoomalanga okweteewuluza onoosimanga ekinya n'oziikamu ebyo ebivudde mu nda yo.

¹⁴Kubanga MUKAMA Katonda wo anaatambulanga naawe, mu lusiisira lwo ng'akulabirira n'okukuyamba okuwangula abalabe bammwe. Noolwekyo olusiisira lwo kirusaanira lubeerenga lutukuvu, MUKAMA alemenga kusangamu kintu kyonna ekitali kirongoofu mu ggwe ne kimuleeteranga okukuvaako.

Amateeka Agatali Gamu

¹⁵"Omuddu omugule bw'anaabombanga n'ava ku mukama we mu nsi endala, n'ajja ne yeekweka gy'oli, tomuzzangayo wa mukama we.

¹⁶Omulekanga n'abeera naawe wakati mu mmwe, mu kimu ku bibuga byo ky'aneerobozanga. Tomujoooganga.

¹⁷"Mu bawala ba Isirayiri temukkirizibwenga kubeerangamu bamalaaya ab'omu masabo, n'abasajja abalya ebisiyaga nabo tebakkirizibwenga mu Isirayiri.

¹⁸Toleetanga nsimbi, bamalaaya ze banaabanga bafunye mu bwamalaaya, mu nnyumba ya MUKAMA Katonda wo okusasulira obweyamo, wadde ensimbi z'abasajja abalya ebisiyaga; kubanga MUKAMA Katonda wo akyayira ddala ebikolwa ebyo byombi.

¹⁹ “Omuyisirayiri bw’anaawolanga Muyisirayiri munne ensimbi, oba emmere, oba ebintu ebirala byonna, bw’anaabanga asasulwa tasabirangako magoba gaabyo.

²⁰ Bw’onoowolanga bannaggwanga onoobasabirangako amagoba gaako; MUKAMA Katonda wo alyoke akuwenga omukisa ku buli ky’onookwatangako engalo ng’otuuse mu nsi gy’oli okumpi okuyingira n’okugyefunira.

²¹ “Bw’oneeyamanga obweyamo eri MUKAMA tolwangawo kubutuukiriza, kubanga ddala ddala MUKAMA Katonda wo agenda kukikulagira olyoke weewonye omusango olw’ekibi ekyo.

²² Naye bw’oteeyamanga bweyamo toobeerengako musango.

²³ Ebyo byonna akamwa ko bye kanaayogeranga kikugwanira okubikolanga, mu ngeri y’emu nga bw’onoobanga weeyamye obweyamo eri MUKAMA Katonda wo n’akamwa ko.

²⁴ “Bw’onooyingiranga mu nnimiro ya munno ey’emizabbibu, onoooyinzanga okwenogeranga ku birimba by’emizabbibu n’olya nga bw’oneetaaganga n’okkuta, naye tossangako mu kibbo okwetwalirako eka.

²⁵ Bw’onooyingiranga mu nnimiro ya munno ey’emmere ey’empeke, onoooyinzanga okwekungulirangako n’engalo zo, naye toddiranga kambe n’osala emmere y’empeke eyo eneebanga tennaba kusalibwa.”

Ekyamateeka Olwokubiri 24

Amateeka g’Ebyobufumbo

¹ Omusajja bw’anaawasanga omukazi, naye oluvannyuma n’amukyawa, kubanga amuvumbuddeko ebitamusanyusa, bw’atyo n’amuwandiikira ebbaluwa ey’okumugoba, n’agimukwasa, n’amugoba mu nnyumba ye,

² omukazi oyo anaayinzanga okwefunira omusajja omulala n’amufumbirwa.

³ Omusajja ono owookubiri naye bw’anaamukyawanga n’amuwandiikira ebbaluwa ey’okumugoba, n’agimukwasa, n’amugoba mu nnyumba ye, oba omusajja oyo owookubiri bw’anaafanga;

⁴ bba eyasooka, eyali amugobye takkirizibwenga kuddamu kumuwasa kuba mukazi we, kubanga omukazi oyo anaabanga amaze okwebaka n’omusajja omulala. Ekyo kinaabanga kya kivve mu maaso ga MUKAMA. Totwalanga kibi mu nsi MUKAMA Katonda wo gy’akuwa okubeera obutaka bwo obw’enkalakkalira.

Amateeka Agatali Gamu

⁵ Omusajja bw’anaabanga yaakawasa taalondebwenga kugenda kutabaala oba okuweebwa omulimu omulala omunene ng’ogwo. Anaasigalanga mu maka ge

okumala ebbanga ly a mwaka mulamba ng'asanyusa mukazi we gw'anaabanga awasizza.

⁶Omuntu bw'awolanga munne n'amusaba omusingo, oba akakalu, tamuggyangako lubengo oba enso ng'omusingo oba akakalu, kubanga mu musingo ng'ogwo, aba atwaliddemu obulamu bwa munne.

⁷ Omuntu bw'anaakwatibwanga ng'awamba, obanga atunda Omuyisirayiri munne mu buddu, kale omuwambi anattibwanga. Bw'otyo bw'onoomalangamu ekibi wakati mu mmwe.

⁸ Bwe wanaagwangawo obulwadde obw'olususu ng'obw'ebigenge, weegenderezanga nnyo, n'ogonderanga ebyo Abaleevi, bakabona, bye banaabalagiranga okukola, nga bwe mbalagidde.

⁹ Ojjukiranga MUKAMA Katonda wo kye yakola Miryamu nga muli mu lugendo lwammwe nga muva mu Misiri.

¹⁰Bw'owolanga munno ekintu eky'engeri yonna, toyingiranga mu nnyumba ya munno oyo okunonamu omusingo.

¹¹Ggwe awoze onaabeeranga wabweru n'olindirira oyo gw'onoobanga owoze, okukuleetera omusingo ogwo.

¹²Gw'owoze bw'anaabanga omwavu, ekyambalo ky'anaabanga akuwadde ng'omusingo, tosulanga nakyo.

¹³Enjuba bw'eneebanga yaakagwa, onookiddizanga munno oyo alyoke akyebikke ekiro nga yeebase. Bw'atyo anaakwebazanga era kinaabanga kikolwa kya butuukirivu mu maaso ga MUKAMA Katonda wo.

¹⁴ Toyiikirizanga mwavu n'omupakasi ali mu kwetaaga, n'olwawo okumusasula empeera ye; ne bw'anaabanga Omuyisirayiri munno oba ow'okubannamawanga abanaabeeranga mu nsi yo nga basula mu kimu ku bibuga byo.

¹⁵Onoomusasulanga empeera ye eya buli lunaku ng'enjuba tennaba kugwa, kubanga mwavu n'omutima gwe gubeera ku mpeera eyo. Kubanga bw'onoomulagajjaliranga, anaayinzanga okukaabirira MUKAMA Katonda n'akuloopayo, bw'otyo onoogwanga mu musango ogw'ekibi.

¹⁶ Bakitaabwe b'abaana tebattibwenga nga babalanganga abaana baabwe, n'abaana tebattibwenga nga babalanganga bakitaabwe; buli omu anattibwanga ng'alangibwanga ekibi kye ye yennyini.

¹⁷ Bannamawanga b'onoobeeranga nabo, n'abaana bamulekwa, obasaliranga emisango gyabwe n'obwenkanya, era totwalanga kyambalo kya nnamwandu ng'omusingo.

¹⁸Ojjukiranga nga bwe wali omuddu mu Misiri, naye MUKAMA Katonda wo n'akununulayo. Kyenva nkulagira okukolanga bw'otyo.

¹⁹Bw'onookungulanga ebibala mu nnimiro yo ne weerabirayo ekinywa mu nnimiro, toddangayo kukikima. Onookirekeranga omunnaggwanga oba omwana omufuuzi oba nnamwandu; bw'atyo MUKAMA alyoke akuwenga omukisa mu byonna by'onookolanga.

²⁰Bw'onookubanga emizeeyituuni okuva ku miti gyo, toddangayo ku matabi mulundi gwakubiri okumalirako ddala ebibala ebinaabanga bisigaddeko. Ebyo binaabanga bya bannamawanga, n'abaana bamulekwa ne bannamwandu.

²¹Bw'onookungulanga emizabbibu okuva mu nnimiro yo, toddangamu mulundi gwakubiri. Ebibala ebinaabanga bisigaddeko onobirekeranga bannamawanga, ne bamulekwa ne bannamwandu.

²²Ojjukiranga nga bwe wali omuddu mu nsi ey'e Misiri; kyenva nkulagira okukolanga bw'otyo.

Ekyamateeka Olwokubiri 25

¹Abantu babiri bwe banaabanga n'enkaayana, ensonga zaabwe ne bazitwala mu mbuga z'amateeka, abalamuzi ne babasalirawo, banaalangiriranga asinze n'oyo gwe gusinze.

²Singa oyo gwe gunaasiñjanga anaabanga asaanira okukubwangamu obuga, omulamuzi anaamugalamizanga wansi n'akubirwa mu maaso ge omuwendo gw'obuga obuggyga mu musango gw'anaabanga azzizza,

³naye nga tebusukka buga amakumi ana. Bwe bunaasukkanga omuwendo ogwo munnammwe anaabanga aswazibba nnyo mu maaso gammwe.

⁴Ente temugisibanga mimwa bwe munaabanga mugikozesa okuwuula emmere ey'empeke.

Obuvunaanyizibwa eri Owooluganda Afudde

⁵Abooluganda bwe banaabanga babeera wamu, omu n'afa nga talina mwana wabulenzi, nnamwandu we tafumbirwanga musajja atali wa mu luggyga lwa bba. Muganda wa bba anaatwalanga nnamwandu oyo n'amuwasa, n'atuukiriza obuvunaanyizibwa bwa muganda we omugenzi eri nnamwandu oyo.

⁶Omwana owoobulenzi gw'anaasookanga okuzaala y'anaasikiranga erinnya lya muganda we omugenzi, bwe lityo erinnya ly'omugenzi ne litasangulwawo mu Isirayiri.

⁷Naye omusajja bw'anaabanga tayagala kuwasa nnamwandu wa muganda we, nnamwandu oyo anaagendanga eri abakulembeze abakulu ab'omu kibuga kye, ku wankaaki, n'abagamba nti, "Muganda wa baze agaanye okuwangaaza erinnya

lya muganda we mu Isirayiri. Kubanga agaanye okutuukiriza gye ndi obuvunaanyizibwa bw'alina ku muganda we."

⁸Abakulembeze abakulu b'omu kibuga banaayitanga omusajja oyo ne boogera naye. Bw'anaakakanyalanga n'agamba nti, "Saagala kumuwasa,"

⁹kale, nnamwandu wa muganda we anaatambulanga n'alaga awali omusajja oyo mu maaso g'abakulembeze abakulu b'omu kibuga, anaamwambulangamu engatto mu kigere kye ekimu, era anaamuwendiranga amalusu mu maaso n'ayogera nti, "Bwe kityo bwe kinaakolebwanga ku musajja atazimba lunyiriri lwa luggya lwa muganda we."

¹⁰Oluggya lw'omusajja oyo lunaamanyibwanga mu Isirayiri ng'Oluggya lw'Omwambule Engatto.

Ebiragiro Ebirala

¹¹Bwe wanaabangawo abasajja babiri abalwana, mukazi w'omu bw'anajjanga okutaasa bba ku mulabe we n'amukwata ebitundu bye eby'ekyama,

¹²omutemangako omukono gwe. Tomusaasiranga.

¹³Tossanga mu nsawo zo mayinja gapima ga ngeri bbiri ez'enjawulo, ng'erimu lizitowa, kyokka nga linnaalyo liwewuka.

¹⁴Tobeeranga na bipima bya ngeri bbiri eby'enjawulo, ng'ekimu kinene, kyokka nga kinnaakyo kitono.

¹⁵Kikugwanira obeerenga n'amayinja agapima obuzito obutuufu, era n'ebipima ebirala eby'amazima era ebituufu, olyoke owangaalenga ng'oli mu nsi MUKAMA Katonda wo gy'akuwa.

¹⁶Kubanga MUKAMA Katonda wo akyayira ddala abo bona abakola ebyo ebitali bya bwesigwa.

¹⁷Teweerabiranga Abamaleki bye baakukola bwe wali mu lugendo lwo ng'ova mu Misiri.

¹⁸Bwe wali okooye nnyo nga n'amaanyi gakuweddemu, baakusanga mu lugendo lwo olwo, ne balumba abo bona abaali basemyeyo emabega wo ne babatta; Katonda nga tebamutya.

¹⁹Bw'olimala okutuuka mu nsi MUKAMA Katonda wo gy'akuwa okubeera obusika bwo obw'enkalakkira, ng'akumazeeko n'abalabe bo bona ku njuyi zonna, ng'owummudde, ozikiririzanga ddala Abamaleki n'obamalirawo ddala bona wansi w'eggulu, ne watabaawo baliddayo kubajjukira nti baali babaddewo. Ekyo tokyerabiranga.

Ekyamateeka Olwokubiri 26

Ebibala eby'Amakungula ag'Olubereberye

¹Awo olulituuka bw'omalanga okuyingira mu nsi, MUKAMA Katonda wo gy'akuwa okubeera obusika bwo obw'enkalakkalira, ng'omaze okugyefunira era ng'otebenkedde bulungi,

²oddiranga ebimu ku bibala ebibereberye by'oliggya mu makungula agalisooka okuva mu ttaka ery'oku nsi MUKAMA Katonda wo gy'akuwa, n'obiteeka mu kibbo. Kale nno obireetanga mu kifo MUKAMA Katonda wo kye yeerondera okubeerangamu Erinnya lye.

³Ogambanga kabona alibeera mu kisanja mu kiseera ekkyo nti, "Njatula leero eri MUKAMA Katonda wo nti ntuuse mu nsi MUKAMA gye yalayirira bajjajjaffe okugituwa."

⁴Kabona aliggya ekibbo mu mikono gyo n'akitereeza mu maaso g'ekyoto kya MUKAMA Katonda wo.

⁵Kale nno oliyatula mu maaso ga MUKAMA Katonda wo nti, "Jjajjaffe yali mutambuze Omusuuli, n'aserengeta mu Misiri n'abantu be yali nabo abatono, ne babeera eyo, ne bafuukamu eggwanga ekkulu ery'amaanyi era nga lirimu abantu bangi nnyo.

⁶Naye Abamisiri ne batuyisa bubi, ne batubonyaabonya, nga batukozesa emirimu emikakanyavu.

⁷Bwe tutyo ne tukaabirira MUKAMA, Katonda wa bajjajjaffe; Katonda n'awulira eddoboozi lyaffe, n'alaba okubonaabona kwaffe, n'okutegana kwaffe, n'okunyigirizibwa kwaffe kwonna.

⁸Bw'atyo MUKAMA n'atuggya mu Misiri n'omukono gwe ogw'amaanyi gwe yagolola, n'obuyinza bwe obw'entiisa, n'obubonero, n'ebyamagero eby'ekitalo.

⁹Yatuleeta mu kifo kino n'atuwa ensi eno, ensi omukulukutira amata n'omubisi gw'enjuki.

¹⁰Bwe ntyo ndeese gy'oli ebibalala ebibereberye ebiva mu ttaka ery'omu nsi gy'ompadde, Ayi MUKAMA." Olibiteeka mu maaso ga MUKAMA Katonda wo n'ovuunama mu maaso ge.

¹¹Kale nno, ggwe awamu n'Abaleevi, ne bannamawanga abanaabeeranga mu mmwe, onoojaguzanga ng'osanyukira ebirungi byonna, MUKAMA Katonda wo by'anaabanga akuwadde ggwe n'amaka go gonna.

¹²Mu mwaka ogwokusatu bw'onomalanga okuggyako ku makungula go ekitundu eky'ekkumi n'okissa wabbali, kubanga ogwo gwe mwaka ogw'ekitundu eky'ekkumi, onoddiranga ekitundu ekkyo n'okiwa Abaleevi, ne bannamawanga, ne bamulekwa, ne bannamwandu, ne baliiranga mu bibuga byo ne bakkuta.

¹³Awo onooyoyeranga mu maaso ga MUKAMA Katonda wo nti, "Ekitundu ekimu eky'ekkumi ekyatukuzibwa nkiggyayo mu maka gange ne nkigabira Abaleevi, ne bannamawanga, ne bamulekwa, ne bannamwandu, nga byonna bye wandagira bwe biri. Sikyamyeko kuva ku biragiro byo newaakubadde okwerabira n'ekimu ku byo.

¹⁴Ekitundu ekyo sikiriddeeko nga ndi mu biseera eby'okukungubaga, wadde okukikwatako nga siri mulongoofu, era sikitoddeeko ne mpaayo eri abafu. Njondedde MUKAMA Katonda wange, ne nkola nga bwe yandagira.

¹⁵Otutunuulire ng'osinziira mu kifo kyo ekitukuvu gy'obeera mu ggulu, otuyiweko omukisa gwo ffe abantu bo Abayisirayiri n'ensi gy'otuwadde nga bwe walayirira bajajjaffe, nga y'ensi omukulukuta amata n'omubisi gw'enjuki."

Mugonderenga Amateeka ga MUKAMA

¹⁶ MUKAMA Katonda wo akulagira leero okugonderanga amateeka ago gonna n'ebiragiro ebyo; noolwekyo obigonderanga byonna n'omutima gwo gwonna n'emmeeme yo yonna.

¹⁷Ku lunaku lwa leero oyatudde nga MUKAMA bw'ali Katonda wo, era nga naawe bw'onoottambuliranga mu makubo ge, era ng'onookuumanga ebiragiro bye n'amateeka ge gonna, era ng'onomugonderanga.

¹⁸Ku lunaku lwa leero MUKAMA alangiridde nga bw'oli owuwe, eggwanga lye ku bubwe ery'omuwendo omungi nga bwe yasuubiza, era nga ojjanga kukwatanga ebiragiro bye byonna.

¹⁹Alangiridde nga bw'anaakujjuzanga ettendo n'okwatiikirira n'ekitiibwa okusukkirira amawanga gonna ge yatonda, era ng'olibeera eggwanga ettukuvu eri MUKAMA Katonda wo, nga bwe yasuubiza.

Ekyamateeka Olwokubiri 27

Ekyoto ku Lusozi Ebali

¹Awo Musa ng'ali n'abakulu abakulembeze ba Isirayiri n'alagira abantu nti, "Ebiragiro byonna bye mbategeeza leero mubikumenga.

²Bwe mumalanga okusomoka omugga Yoludaani n'oyingira mu nsi MUKAMA Katonda wo gy'akuwa, oddiranga amayinja amanene n'ogategeeka n'ogakubako omuyiko ogw'ennoni ng'etabuddwamu omusenyu.

³Ogawandiikangako ebigambo bino byonna eby'amateeka, ng'omaze okusomoka, ng'oyingidde mu nsi MUKAMA Katonda wo gy'akuwa, y'ensi omukulukutira amata n'omubisi gw'enjuki, nga MUKAMA Katonda wa bajajjaabo bwe yakusuubiza.

⁴Bw'otyo, bw'olimala okusomoka omugga Yoludaani, otegekanga amayinja ago ku Lusozi Ebali nga bwe mbalagira kaakano, era ogakubangako omuyiko ogw'ennoni ng'etabuddwamu omusenyu.

⁵Era MUKAMA Katonda wo olimuzimbira eyo ekyoto n'amayinja amalamba agatali matemeko na kyuma.

⁶Olizimbira eyo MUKAMA Katonda wo ekyoto n'amayinja amalamba n'oweerako ebiweebwayo ebyokebwa eri MUKAMA Katonda wo.

⁷Oliwaayo ebiweebwayo olw'emirembe, n'obiriira eyo ng'osanyukira mu maaso ga MUKAMA Katonda wo.

⁸Era ku mayinja ago g'olib a tegeze oliwandiikako n'obwegendereza ebigambo byonna eby'amateeka gano."

⁹Awo Musa ng'ali n'Abaleevi, bakabona, n'agamba Abayisirayiri bona nti, "Sirika owulire ggwe Isirayiri! Ku lunaku lwa leero lwennyini ofuuse eggwanga lya MUKAMA Katonda wo.

¹⁰Noolwekyo ogonderanga MUKAMA Katonda wo n'okwatanga amateeka ge n'ebiragiro bye, bye nkulagira leero."

Ebikolimo Ekkumi n'Ebibiri

¹¹Ku lunaku lwe lumu Musa yakuutira abantu bw'ati nti,

¹²Bwe mulimala okusomoka omugga Yoludaani, ab'omu bika bino baliyimirira ku Lusozi Gerizimu ne basabira abantu omukisa: Simyoni, ne Leevi, ne Yuda, ne Isakaali, ne Yusufu, ne Benyamini.

¹³Ate ab'omu bika bino baliyimirira ku Lusozi Ebali ne balangirira ebikolimo: Lewubeeni, ne Gaadi, ne Aseri, ne Zebbulooni, ne Ddaani, ne Nafutaali.

¹⁴Awo Abaleevi balirangirira n'eddoboozi ddene eri abantu bona Abayisirayiri nti:

¹⁵"Akolimirwe omuntu yenna akola ekifaananyi ekitali Katonda oba abumba ekintu ng'ekyo kyonna MUKAMA ky'akyayira ddala nga kikolebwa omukozi nnakinku, omuntu oyo n'abaako ne wakiyimiriza mu kyama." Abantu bona ne baddamu nti, "Amiina."

¹⁶"Akolimirwe omuntu yenna atassaamu kitibwa kitaawe oba nnyina." Abantu bona ne baddamu nti, "Amiina."

¹⁷"Akolimirwe omuntu yenna akyusa ekituuti ekiraga ensalo ya muliraanwa we." Abantu bona ne baddamu nti, "Amiina."

¹⁸"Akolimirwe omuntu yenna aggya omuzibe w'amaaso mu kkubo ettuufu n'amubuza." Abantu bona ne baddamu nti, "Amiina."

¹⁹ “Akolimirwe omuntu yenna atalaga bwenkanya eri bannamawanga, oba bamulekwa oba bannamwandum.” Abantu bona ne baddamu nti, “Amiina.”

²⁰ “Akolimirwe omuntu yenna eyeebaka ne muka kitaawe, kubanga ekitanda kya kitaawe akimalamu ekitiibwa.” Abantu bona ne baddamu nti, “Amiina.”

²¹ “Akolimirwe omuntu yenna akola ebyobukaba n’ensolo.” Abantu bona ne baddamu nti, “Amiina.”

²² “Akolimirwe omuntu yenna eyeebaka ne mwannyina omuwala wa kitaawe, oba muwala wa nnyina.” Abantu bona ne baddamu nti, “Amiina.”

²³ “Akolimirwe omuntu yenna eyeebaka ne nnyina wa mukazi we.” Abantu bona ne baddamu nti, “Amiina.”

²⁴ “Akolimirwe omuntu yenna atemula munne.” Abantu bona ne baddamu nti, “Amiina.”

²⁵ “Akolimirwe omuntu yenna akkiriza okugulirirwa atte munne ataliiko musango.” Abantu bona ne baddamu nti, “Amiina.”

²⁶ “Akolimirwe omuntu yenna atagondera bigambo ebiri mu mateeka gano.” Abantu bona ne baddamu nti, “Amiina.”

Ekyamateeka Olwokubiri 28

Emikisa Eri Abawulize

¹ Bw’onoogonderanga MUKAMA Katonda wo n’okwatanga amateeka ge gonna ge nkuwa leero, MUKAMA Katonda wo alikugulumiza n’akuteeka waggulu w’amawanga gonna ag’oku nsi.

² Emikisa gino gyonna onoogifunanga n’obeeranga nagyo, bw’onoowuliranga eddoboozi lya MUKAMA Katonda wo n’omugonderanga:

³ Onooweebwanga omukisa bw’onoobeeranga mu kibuga ne bw’onoobeeranga mu kyaloo.

⁴ Abaana ab’omu nda yo banaaweebwanga omukisa, n’ebisimbe eby’omu ttaka lya, n’ebisibo byo ebinaazaalibwanga, Ennyana z’ente ez’amagana go, n’obwana bw’endiga ez’ebisibo byo.

⁵ Ekabbo kyo mw’onookuŋyaanyizanga, n’olutiba lwo mw’onoogoyeranga nabyo binaabanga n’omukisa.

⁶ Onoobanga n’omukisa ng’oyingira era onoobanga n’omukisa ng’ofuluma.

⁷ MUKAMA anaakuwanga okuwangula abalabe bo abanaakulumbanga. Banajjiranga mu kkubo limu okukulumba, naye ne basaasaanira mu makubo musanvu mu maaso go nga bawanguddwa.

⁸ MUKAMA anaawanga amawanika go omukisa, ne buli ky'onoookwatangako engalo zo okukikola anaakiwanga omukisa. MUKAMA Katonda wo anaakuwanga omukisa ng'oli mu nsi gy'akuwa.

⁹ MUKAMA agenda kukufuula eggwanga lye ettukuvu nga bwe yakusuubiza n'ekirayiro, bw'onoookwatanga amateeka ga MUKAMA Katonda wo n'otambuliranga mu makubo ge.

¹⁰ Kale nno abantu ab'omu mawanga gonna ag'ensi balitegeera nga bw'oyitibwa erinnya lya MUKAMA era banaakutyanga.

¹¹ MUKAMA anaakugaggawazanga nnyo mu byonna: mu zadde ery'enda yo, ne mu baana ab'ebisibo byo by'oonolundanga, ne mu bibala eby'omu ttaka lyo, ng'oli mu nsi MUKAMA gye yalayirira bajjajaabo okugikuwa.

¹² MUKAMA alikuggulirawo eggwanika lye ery'obugagga bwe ery'eggulu, n'atonnyesanga enkuba mu ttaka lyo, mu biseera byayo, ne buli kintu kyonna ky'onoookolanga anaakiwanga omukisa. Onoowolanga amawanga mangi, kyokka ggwe toogeewolengako n'akatono.

¹³ MUKAMA anaakufuulanga mutwe so si mukira. Bw'onoogonderanga ebiragiro bya MUKAMA Katonda wo bye nkutegeeza leero, n'obigobereranga n'obwegendereza, onoobanga ku ntikko waggulu, so tookooberenga.

¹⁴ Tokyamanga kulaga ku ludda olwa ddyo oba olwa kkono, ng'oleka ebiragiro bino bye nkutegeeza leero, n'ogobereranga bakatonda abalala n'obaweerezanga.

Ebikolimo olw'Obutawulira

¹⁵ Awo olunaatuukanga bw'otoogonderenga ddoboozi lya MUKAMA Katonda wo, n'otokwatanga mateeka ge na biragiro bye, bye nkulagira leero, kale ebikolimo bino byonna binaakutuukangako ne bibeera naawe:

¹⁶ Onookolimirwanga mu kibuga n'okolimirwanga ne mu kyalo.

¹⁷ Ekabbo kyo mw'onookunjaanyirizanga n'olutiba lwo mw'onoogoyeranga binaakolimirwanga.

¹⁸ Abaana b'enda yo banaakolimirwanga, n'ekibala ky'ettaka lyo, n'ennyana z'amagana go, n'obwana bw'ebisibo byo byonna binaakolimirwanga.

¹⁹ Onookolimirwanga ng'oyingira era onookolimirwanga ng'ofuluma.

²⁰ MUKAMA anaakusindikiranga ebikolimo, n'okutabukatabuka, n'okunenyezebwा mu buli kintu kyonna ky'onoogezangako okukola, okutuusa lw'olizikirizibwa n'osaanawo mangu nnyo olw'ebikolwa byo ebibi, olwokubanga onoobanga omusenguse.

²¹MUKAMA alikulwaza olumbe olutawona olw'olukonvuba, okutuusa lwe lulikumalawo mu nsi gy'ogenda okuyingiramu ogirye.

²²MUKAMA alikulwaza akafuba, n'omusujja n'okubugujja. Era alikusindikira ebbugumu eryokya ennyo, n'ekyeya, n'ekitala, n'okugengewala; era binaakugobereranga okutuusa lw'olizikirira.

²³Eggulu waggulu w'omutwe gwo liribeera ng'ekikomo, n'ettaka wansi wo liriba ng'ekyuma.

²⁴MUKAMA alifuula enkuba y'omu nsi yo olufufugge, n'enfuufu yokka y'eneekuyiikiranga okuva waggulu mu bire, okutuusa lw'olizikirizibwa.

²⁵ MUKAMA anaakulekeranga abalabe bo ne bakuwangulanga. Onoobalumbiranga mu kkubo limu, kyokka n'obadduka ng'obunye emiwabo mu makubo musanvu. Olifuuka kyakikangabwa mu maaso g'amawanga gonna ag'oku nsi.

²⁶Omulambo gwo gulifuuka mmere ya nnyonyi zonna ez'omu bbanga, n'eri ensolo ez'oku nsi, era tewaabbeerengawo n'omu anaazigugobangako.

²⁷MUKAMA anaakulwazanga amayute g'e Misiri, n'ebizimba, n'amabwa, n'obuwere, by'otoowonyezebwenga.

²⁸MUKAMA anaakusuulanga eddalu, anaakuzibanga amaaso, n'okukutabulatabulanga mu ndowooza yo.

²⁹Mu ttuntu onoowammantanga ng'omuzibe w'amaaso abeera mu kizikiza obudde bwe bwonna. Buli ky'onookolanga onoolemwanga okukituukiriza; onoovumibwanga era onoobbibwanga buli kakedde, naye nga tewaabengawo akudduukirira.

³⁰Onooyogerezanga omukazi, n'osembereranga n'okumuwasa, naye omusajja omulala anaakumutwalangako n'asulanga naye. Oneezimbiranga ennyumba naye toogisulengamu. Oneesimbiranga enimiro z'emizabbibu, naye toolyenga ku bibala byamu.

³¹Sseddume zo zinattirwanga mu maaso go, naye toolyenga ku nnyama zaazo. Endogoyi zo zinabbirwanga mu maaso go, so tebaazikuddizenga. Endiga zo zinaaweebwanga abalabe bo, ne watabaawo adduukirira okuzikuddiza.

³²Batabani bo ne bawala bo banaagabibwanga mu baamawanga amalala ng'olaba; onoobanoonyanga buli lunaku okutuusa n'amaaso lwe ganaakumyukanga, naye nga tolina maanyi kubaako na kya kukola.

³³Ab'eggwanga ly'otomanyi banaalyanga ebibala by'ettaka lyo by'onoobanga weerimidde, toobengako na kya kukola wabula okutulugunyizibwanga buli kiseera.

³⁴Amaaso go bye ganaalabanga binaakusuulanga eddalu.

³⁵MUKAMA anaakulwazanga amayute ku maviivi ne ku magulu, agataayinzenga kuwonyezebwa, era ne gasasaananga okuva mu bigere okutuuka ku kawumpo k'omutwe.

³⁶ MUKAMA alikuleka, ggwe ne kabaka wo gw'onoobanga weerondedde n'otwalibwa mu ggwanga eddala ly'otowulirangako, ne bajjajaabo lye bataamanya, n'owererezanga eyo bakatonda abalala ab'emiti n'amayinja.

³⁷Olifuuka ekintu ekyesisiwaza, ekinaanyoomebwanga era ekinaasekererwanga mu mawanga gonna MUKAMA gy'anaabanga akulazizza.

³⁸Onoosiganga ensigo nnyingi mu nnimiro yo, kyokka onookungulangamu katono, kubanga enzige zinaalyanga ebibala byo byonna.

³⁹Onoosimbanga essamba z'emizabbibu n'ogisaliranga bulungi, naye toonywenga ku nvinnyo wadde okukuŋjaanya ebibala bya zabbibu, kubanga ensiriŋjanyi zinaabiryanga.

⁴⁰Onoobeeranga n'emiti eg'yemizeeyituuni mu nsi yo yonna, naye togenda kukozesanga ku mafuta gaagyo, kubanga emizeeyituuni gyo ginaakunkumukanga ne gigwa wansi.

⁴¹Olizaala abaana aboobulenzi n'aboobuwala, naye toosigalenga nabo, kubanga banaatwalibwanga mu busibe.

⁴²Enzige zineefuganga emitি gyo gyonna n'ebibala eby'omu ttaka lyo.

⁴³Bannamawanga b'onoobeeranga nabo bagenda kukulaakulananga balinnye waggulu okukusinganga, nga ggwe weeyongeranga kukka bussi wansi.

⁴⁴Banaakuwolanga, naye ggwe toobawolenga. Be banaabanga omutwe naye ggwe onoobanga mukira.

⁴⁵Ebikolimo ebyo byonna binaakujiranga ne bikulondoolanga ne bikutuukako okutuusa lwe binaakuzikirizanga olw'obutagonderanga MUKAMA Katonda wo, n'otokwatanga mateeka ge na biragiro bye, bye yakulagiranga.

⁴⁶Binaabeeranga mu ggwe ng'akabonero era ekyewuunyisa gy'oli n'eri bazzukulu bo emirembe gyonna.

⁴⁷Kubanga bwe wabeeranga obulungi n'ebintu ebingi, tewaweerezanga MUKAMA Katonda wo n'omutima ogujjudde essanyu.

⁴⁸Noolwekyo ng'oli mu njala ne mu nnyonta, ng'oli bwereere, ng'oli mwavu lunkupe, ojjanga kuweerezanga balabe bo, MUKAMA b'anaakusindikiranga okulwana naawe! Anaakwambazanga mu bulago bwo ekikoligo eky'ekyuma okutuusa lw'alikuzikiririza ddala.

49 MUKAMA alikuleetera eggwanga eririva ewala ennyo, ku nkomerero y'ensi, ne likulumba, nga likukkako ng'empungu bw'eva waggulu n'ekka n'amaanyi ku nsi; liriba eggwanga ng'olulimi lwalyo tolutegeera.

50 Liribeera eggwanga erijjudde obukambwe mu maaso, eritassaamu kitiibwa bantu bakulu wadde okusaasira abato.

51 Balirya abaana b'ebisolo by'omu malundiro go, n'ebibala eby'omu ttaka lyo okutuusa lw'olizikirizibwa. Tebalikulekerawo ku mmere ya mpeke, wadde ku nvinnyo oba ku mafuta, wadde ku nnyana ez'ebiraalo byo, oba ku baana b'endiga ab'ebisibo byo, okutuusa lw'olizikirira.

52 Banaazingizanga ebibuga byo byonna mu nsi yo yonna okutuusa ebisenge ebiwanvu eby'ebigo bye weesiga lwe birigwa wansi. Banaazingizanga ebibuga byonna mu nsi yonna MUKAMA Katonda wo gy'akuwa.

53 Olw'okubonaabona abalabe bo kwe banaakutuusangako nga bakuzingizza, onoolyanga ebibala by'olubuto lwo, ennyama ya batabani bo ne bawala bo MUKAMA Katonda wo b'anaabanga akuwadde.

54 Omusajja asingira ddala obuntubulamu era omuwombeefu mu mmwe, taasaasirenga na muganda we yennyini, oba mukyala we omwagalwa, oba abaana be abanaabanga bakyasigaddewo;

55 taawengako n'omu ku nnyama y'abaana be b'anaabanga alya. Kubanga nga takyalina ky'asigazza kyonna mu kubonaabona okungi omulabe wo kw'anaabanga akutuusizzaako ng'akuzingirizza mu bibuga byo byonna.

56 Omukazi asinga obuntubulamu n'eggonjebwa mu mmwe, nga mwenaanyi nnyo, atanjanga na kulinnyisa kigere kye ku ttaka nga kyereere, taamanyisenga bba omwagalwa, wadde mutabani we, oba muwala we,

57 ku mwana gw'anaabanga y'akazaala ow'omu lubuto lwe, n'abaana b'anaazaalanga. Kubanga anaabanga ategese okubalyanga mu nkukutu olw'okubulwako ekyokulya ekirala mu biseera eby'okuzingizibwa era eby'ennaku enzibu ennyo, omulabe wo by'anaabanga akutuusizzaako mu bibuga byo.

58 Bw'otoogonderenga na bwegendereza ebigambo byonna ebiri mu mateeka gano, ebiwandiikiddwa mu kitabo kino, n'ototya era n'otossaamu kitiibwa erinnya lino ery'ettendo era ery'entiisa, eriyitibwa: MUKAMA Katonda wo,

59 kale nno, MUKAMA anaakuweerezanga endwadde enkambwe ennyo, eri ggwe n'eri ezzadde lyo; endwadde ez'olutentezi era enkambwe ennyo ez'olukonvuba.

60 Anaakuleeteranga endwadde zonna ez'e Misiri, ezaakutiisa ennyo, ne zikwezingangako.

⁶¹Era MUKAMA anaakuleeteranga endwadde eza buli ngeri, n'ebibonoobono ebitawandiikiddwa mu Kitabo eky'Amateeka gano, okutuusa lw'olizikirizibwa.

⁶²Era mulisigala ng'omuwendo gwammwe gusse nnyo wansi, songa mwali ng'emmunyeenye ez'oku ggulu olw'obungi bwammwe; lwa kubanga tewagonderanga ddoboozi lya MUKAMA Katonda wo.

⁶³Nga bwe kyasanyusanga ennyo MUKAMA okubagaggawazanga n'okubaazanga mweyongerenga obungi, bwe kityo kinaamusanyusanga okubaavuwazanga n'okubazikirizanga. Olisimbulwa n'oggibwa mu nsi gy'ogenda okuyingira okugirya.

⁶⁴MUKAMA anaakusaasaanya mu mawanga gonna, okutandikira ku ludda olumu olw'ensi gy'etandikira, okutuuka ku ludda olulala gy'ekoma. Eyo gy'onoosinzizanga bakatonda abalala abakolebwa mu miti ne mu mayinja, ggwe ne bajajjaabo be mutamanyangako.

⁶⁵Mu mawanga ago togenda kuweereraweererangayo wadde ebigure byo okufunirangayo ekiwummulo. Eyo, MUKAMA anaakuweerangayo omutima ogujugumira, n'amaaso agaagala okuziba olw'okujulirira, n'emmeeme eweddemu essuubi.

⁶⁶Onoobanga mu kubuusabuusa buli kaseera, ng'ojjudde okutya emisana n'ekiro, ng'obulamu bwo tobwekakasa.

⁶⁷Mu makya onoogambanga nti, "Singa nno bubadde kiro!" Ate ekiro ng'ogamba nti, "Singa nno bubadde makya!" olw'okutya okunajjalanga mu mutima gwo, n'ebyo amaaso go bye ganaalabanga.

⁶⁸MUKAMA anaakuzzangayo mu Misiri mu kyombo, ku lugendo lwe nakugaana okuddayo okutambula. Ng'oli eyo oneewangayo weetunde ng'omuddu omusajja oba ng'omuddu omukazi, naye toofunengayo muntu n'omu akugula.

Ekyamateeka Olwokubiri 29

Okutta Obuggyaa Endagaano

¹Bino bye bigambo by'endagaano MUKAMA Katonda gye yalagira Musa okukola n'abaana ba Isirayiri nga bali mu nsi ya Mowaabu, ng'egattibwa ku ndagaano gye yali akoze nabo ku Kolebu.

²Awo Musa n'ayita Abayisirayiri bona n'abagamba nti, Mwalaba n'amaaso gammwe ebyo byonna MUKAMA Katonda bye yakolera mu nsi y'e Misiri ku Falaawo ne ku bakungu be, ne ku nsi ye yonna.

³Walaba n'amaaso go ebigezo ebinene, n'obubonero obw'ebiyamagero, n'ebiyewuunyisa ebikulu.

⁴Naye n'okutuusa ku lunaku lwa leero MUKAMA tabawanga mutima ogutegeera, oba amaaso agalaba, oba amatu agawulira.

⁵Bwe nabakulembera okumala emyaka amakumi ana mu ddungu engoye zammwe tezaakaddiwako, n'engatto y'omu kigere kyo teyakaddiwa.

⁶Temwalya ku mugaati wadde okunywa ku nvinnyo, oba ku kyokunywa ekirala kyonna ekitamiiza. Ekyo nakikola mulyoke mumanye nga nze MUKAMA Katonda wammwe.

⁷ Bwe mwatuuka mu kifo kino, Sikoni kabaka w'e Kesuboni, ne Ogi kabaka w'e Basani, ne basituka okutulwanyisa, naye ne tubawangula.

⁸Twatwala ensi yaabwe, ne tugigabira Abalewubeeni, n'Abagaadi, n'ekitundu ky'ekika eky'Abamanase, okuba obutaka bwabwe obw'ensikirano.

⁹ Noolwekyo mukwatenga ebiligambo by'endagaano eno n'obwegendereza, mulyoke muwangulenga mu buli kimu kye munaakolanga.

¹⁰Mukunjyaanye wano leero mwenna mu maaso ga MUKAMA Katonda wammwe, nga muli n'abakulembeze b'ebika byammwe, n'abakulu bammwe abakulembeze, n'abafuzi bammwe, n'abasajja bona aba Isirayiri,

¹¹n'abaana bammwe abato, ne bakazi bammwe, ne munnaggwanga asula awamu naawe mu lusiisira lwo, okukutyabira enku, n'okukukimira amazzi.

¹²Oli wano okukola endagaano ne MUKAMA Katonda wo, ng'ekirayiro gy'ali, MUKAMA Katonda wo gy'akola naawe leero;

¹³alyoke akukakase ng'akunyweza leero okubeeranga eggwanga lye, naye nga ye Katonda wo, nga bwe yakusuubiza, era nga bwe yalayirira bakadde bo: Ibulayimu ne Isaaka.

¹⁴Endagaano eno gye nkola, ng'eriko n'ekirayiro kyayo,

¹⁵sigikola nammwe abayimiridde wano naffe leero mwekka, wabula ngikola wamu n'oyo atali wano naffe leero.

¹⁶Mujukira bulungi nga bwe twali mu nsi y'e Misiri, ne bwe twajjanga tuyita wakati mu mawanga okutuukira ddala wano.

¹⁷Mwalabanga ebintu eby'ekikaafiiri, nga mwe mwalinga ebifaananyi ebibajje mu miti n'ebiwoole mu mayinja ne mu ffeeza ne mu zaabu.

¹⁸Mukakasize ddala leero nga mu maka gammwe oba mu bika byammwe temulinaamu musajja oba mukazi n'omu akyamizza omutima gwe okuva ku MUKAMA Katonda waffe agende asinze bakatonda bali abalala abamawanga ago. Mukakasize ddala nga mu mmwe temuliimu kikolo okuyinza okukula obutwa obw'engeri eyo obukaawa ng'omususa.

¹⁹Omuntu ow'engeri ng'eyo ng'awulidde ebigambo eby'ekikolimo kino n'amala yeeyibaala, ne yeetukuza ku bubwe yekka, n'alowooza munda ye nti, "Nzija kubeera bulungi newaakubadde nga mmaliridde okukwata ekkubo eryange ery'obujeemu," ekkyo kinaletanga akacwano ku ttaka erinnyogovu obulungi ne ku kkalu.

²⁰MUKAMA taamusonyiwenga, kubanga obusungu bwa MUKAMA n'ekiruyi kye binaabuubuukiranga ku muntu oyo. Ebikolimo byonna ebiwandiikiddwa mu Kitabo kino binaamukkangako, era MUKAMA alisangula erinnya lye n'aliggya wansi w'eggulu.

²¹MUKAMA anaamwawulanga n'amuggya mu bika byonna ebya Isirayiri n'amubonereza nnyo, nga bwe kiri mu bikolimo byonna eby'endagaano ebiwandiikiddwa mu Kitabo ky'Amateeka kino.

²²Abaana bammwe abaliddawo ne bannamawanga abaliva mu nsi ezeewala baliraba ekibonerezo ekiriba kigudde ku nsi n'obulwadde MUKAMA bw'aliba aleese ku ttaka ly'ensi.

²³Ettaka liriba lyonoonese nga lya munyo n'amayinja agookya, nga tekuyinza kusimbibwako kintu wadde okubaako n'ekimerako, nga n'omuddo tegusobola kumerako. Ensi erifaanana ng'okuzikirizibwa kwa Sodomu, ne Ggomola, ne Aduma, ne Zeboyimu, MUKAMA bye yazikiriza mu busungu bwe obungi.

²⁴Amawanga galyebuuza nga geewunya nti, "Lwaki MUKAMA akoze ekintu kino, n'akikola n'obusungu obungi butyo?"

²⁵Na kino kye kiriba eky'okuddamu nti, "Kubanga abantu bano basudde eri endagaano ya MUKAMA Katonda wa bajjajaabwe, endagaano gye yakola nabo bwe yabaggya mu nsi y'e Misiri.

²⁶Baagenda ne basinza bakatonda abalala, ne babaweereza, bakatonda be baali batamanyi, era Katonda waabwe be yali tabawadde.

²⁷Bwe butyo obusungu bwa MUKAMA ne bubuubuukira ku nsi eyo, n'agireetako ebikolimo byonna ebiwandiikiddwa mu Kitabo kino.

²⁸MUKAMA n'abasiguukulula mu nsi yaabwe ng'aliko ekiruyi, era ng'ajjudde obusungu bungi, n'abakasuka mu nsi endala, nga bwe kiri leero."

²⁹Ebintu eby'ekyama bya MUKAMA Katonda waffe, naye ebyo ebyabikkulibwa bye byaffe n'abaana baffe emirembe gyonna, tulyoke tugonderenga ebigambo byonna ebiri mu mateeka gano.

Ekyamateeka Olwokubiri 30

Obwesigwa bwa MUKAMA Katonda Obutajjulukuka

- ¹ Emikisa n'ebikolimo ebyo byonna bye nkutegeeezezza, bwe binaakutuukangako n'ojjukiranga ng'oli eyo mu nsi ezo zonna MUKAMA Katonda wo gy'anaabanga akusaasaanyizza,
- ²n'okyuka n'odda eri MUKAMA Katonda wo, n'omugonderanga, n'abaana bo bona, n'omutima gwo gwonna, n'emmeeme yo yonna, nga bwe nkulagira leero,
- ³kale MUKAMA Katonda wo anaakusaasiranga n'akuzza mu mbeera yo ennungi eneekwewayazanga, ng'akuwumbyewumbye okukuggyga eyo gy'anaabanga akusaasaanyirizza.
- ⁴Newaakubadde onoobanga owanjangusiriddwa mu nsi esinga okubeera ey'ewala ennyo wansi w'eggulu, MUKAMA Katonda wo anaakukunjaanyangayo, n'akuggyayo n'akukomyawo.
- ⁵MUKAMA Katonda wo anaakukomyangawo mu nsi bajjajaabo gye baafuna, naawe onoogifunanga. Alikugaggawaza era n'akwaza nnyo okukira bajjajaabo.
- ⁶MUKAMA Katonda wo alikomola omutima gwo, n'omutima gwa bazzukulu bo, bw'otyo oyagalanga MUKAMA Katonda wo n'omutima gwo gwonna, n'emmeeme yo yonna, olyoke obeerenga omulamu.
- ⁷MUKAMA Katonda wo aliteeka ebikolimo ebyo byonna ku balabe bo ne ku abo abanaakuyigganya.
- ⁸Bw'otyo n'oddamu okugonderanga MUKAMA Katonda ng'okwata amateeka ge, ge nkulagira leero.
- ⁹Bw'atyo MUKAMA Katonda wo alikugaggawaza mu buli kintu kyonna ky'onookolanga, mu bibala eby'omubiri gwo, ne mu bibala eby'ebisolo byo, ne mu bibala eby'ettaka lyo. MUKAMA alisanyuka nnyo okukugaggawazanga n'obeeranga bulungi, nga bwe kyamusanyusanga okugaggawazanga bajjajaabo,
- ¹⁰ng'ogondeddenga MUKAMA Katonda wo, n'okwatanga amateeka ge n'ebiragiro bye ebiwandiikkidwa mu Kitabo eky'Amateeka kino, n'odda eri MUKAMA Katonda wo n'omukyukiranga n'omutima gwo gwonna, n'emmeeme yo yonna.

Okweronderawo ku Bulamu n'Okufa

- ¹¹ Etteeka lye nkulagira leero terisaana kukukaluubirira, kubanga terikuli wala nnyo.
- ¹²Teriri mu ggulu, n'okugamba ne kikugambisa nti, "Ani anaatulinnyirayo mu ggulu n'atulireeterayo tulyoke tuliwulire tuligonderenga?"
- ¹³So teriri mitala wa nnyanja, olyoke ogambe nti, "Ani anaatusomokera ennyanja, alituleetere tuwulire bye ligamba, tuligondere?"

¹⁴Nedda, ekigambo kiri kumpi ddala ne w'oli, kiri mu kamwa ko ne mu mutima gwo, olyoke okigondere.

¹⁵Kale laba, olwa leero ntadde mu maaso go obulamu n'okufa.

¹⁶Kubanga nkulagira leero okwagalanga MUKAMA Katonda wo, okutambuliranga mu makubo ge, awamu n'okukwatanga amateeka ge n'okugobereranga ebiragiro bye byonna. Bw'onoookolanga bw'otyo ojjanga kuba mulamu era oyale, ne MUKAMA Katonda wo anaakuwanga omukisa ng'oli mu nsi gy'oyingira okugifuna.

¹⁷Naye omutima gwo bwe gunaakyamanga n'otowulira, era bw'onoosendebwasendebwanga okusinzanga bakatonda abalala n'okubaweerezanga,

¹⁸mbalangirira leero nti, Mugenda kuzikirizibwa; era temuliwangaala mu nsi gy'ogenda okusomokera omugga Yoludaani okugyingira okugifuna.

¹⁹Ku lunaku lwa leero nkoowoola eggulu n'ensi nga be bajulirwa bange, ku mmwe, abategedde nga ntadde mu maaso gammwe, obulamu n'okufa; n'emikisa n'ebikolimo. Kale nno londawo obulamu, olyoke obeerenga mulamu, ggwe n'ezzadde lyo:

²⁰ng'oyagalanga MUKAMA Katonda wo, ng'owuliranga eddoboozi lye, era nga weekwatira ddala ku ye. Kubanga MUKAMA bwe bulamu bwo n'okuwangaala; alyoke akuwenga emyaka mingi mu nsi MUKAMA gye yalayirira okugiwa bajajjaabo: Ibulayimu, ne Isaaka, ne Yakobo.

Ekyamateeka Olwokubiri 31

Musa Alaamiriza Yoswa

¹Awo Musa n'agenda n'abuulira Isirayiri yonna ebigambo bino, n'agamba nti,

²“Olwa leero mpezezza emyaka kikumi mu abiri egy'obukulu; sikyalina maanyi kusobola kufuluma na kuyingira nga bwe njagala. Sikyasobola kubakulembera. MUKAMA Katonda antegeezenza nti, ‘Togenda kusomoka mugga guno Yoludaani.’

³MUKAMA Katonda wo yennyini y'ajja okukukulembera mu kusomoka. Ajja kuzikiriza amawanga ago agali emitala, nga naawe olaba, olyoke obatwaleko ensi yaabwe. Yoswa yennyini naye yajja okukukulembera mu kusomoka, nga MUKAMA bwe yagambye.

⁴Era nga MUKAMA Katonda bwe yakola Sikoni ne Ogi, bakabaka b'Abamoli n'ensi yaabwe, n'abazikiriza, ne bano bw'alibakola.

⁵MUKAMA Katonda agenda kubagabula gye muli, era kiribagwanira okubakolako nga mugobererera ddala ebiragiro byange bye mbawadde nga bwe biri.

⁶Beera n'amaanyi era ogume omwoyo. Tobatya wadde okubatekemukira, kubanga MUKAMA Katonda wo anaagendanga naawe buli w'onoddanga, taakulekenga so taakwabulirenga."

⁷Awo Musa n'atumya Yoswa n'amugambira mu maaso ga Isirayiri yenna nti, "Beera wa maanyi era ogume omwoyo; kubanga gw'oija okugenda n'abantu bano mu nsi MUKAMA Katonda gye yalayirira bajjajaabwe okugibawa; era gw'ogenda okugibasalirasaliramu ogibakwase okuba obusika bwabwe obw'enkalakkalira.

⁸MUKAMA Katonda yennyini y'ajjanga okukukulemberanga. Anaabanga naawe bulijjo, taakulekenga so taakwabulirenga. Totya so totekemuka."

Amateeka Ganaasomwanga Buli Mwaka ogw'Omusanvu

⁹Awo Musa n'awandiika amateeka ago, n'agakwasa batabani ba Leevi, bakabona, abaasitulanga Essanduuko ey'Endagaano eya MUKAMA Katonda, era n'awaako n'abakadde bona abakulembeze b'abaana ba Isirayiri.

¹⁰Musa n'abalagira bw'ati nti, "Ku buli nkomerero ya myaka musanvu, mu mwaka omutegeke ogusonyiyirwamu amabanja, era nga y'Embaga ey'Ensiisira,

¹¹Isirayiri yenna nga bazze okulabika mu maaso ga MUKAMA Katonda wo mu kifo ky'aneeronderanga, onoosomeranga Isirayiri yenna amateeka gano gonna nga bawulira.

¹²Okunyanyaanya abantu: abasajja, n'abakazi, n'abaana, ne bannamawanga abanaaberanga mu bibuga byo, balyoke bawulirizenga era bayigenga okutyua MUKAMA Katonda wammwe, era bagobererenga n'obwegendereza ebigambo byonna ebiri mu mateeka gano.

¹³Bwe batyo abaana baabwe abataamanyaanya mateeka gano, balyoke bagawulire bayigenga okutyanga MUKAMA Katonda wammwe, obulamu bwammwe bwonna bwe mulimala nga muli mu nsi gye mugenda okusomokera omugga Yoludaani okugirya."

Ebiragiro bya MUKAMA Ebyasembayo eri Musa

¹⁴Awo MUKAMA n'agamba Musa nti, "Obudde bwo obw'okufa buseembedde. Yita Yoswa, mujje mu Weema ya MUKAMA ey'Okukuñjaanirangamu."

¹⁵Awo MUKAMA Katonda n'alabikira mu Weema ng'ali mu mpagi ey'ekire; empagi ey'ekire n'eyimirira waggulu w'omulyango gw'Eweema.

¹⁶MUKAMA Katonda n'agamba Musa nti, "Mu bbanga ttono oija kugalamira ne bajjajaabo. Olwo abantu bano nga batandika okusinzanga bakatonda abalala abalibeera mu bo, nga be bakatonda ab'omu nsi eyo mwe bajja okuyingira. Bagenda kunvaako bamenye endagaano gye nakola nabo.

¹⁷Ku lunaku olwo obusungu bwange bulibabuubuukirako, nange ndibakisa amaaso gange, ne babeera bangu okuzikirizibwa, era ebizibu bingi

n'emitawaana biribajjira. Ku lunaku olwo balyebuuza nti, 'Emitawaana gino tegitutuseeko lwa kubanga Katonda waffe tali wakati mu ffe?'

¹⁸Ku lunaku olwo ndikwekera ddala amaaso gange olw'ebibi byonna bye banaabanga bakoze nga bakyukidde bakatonda abalala.

¹⁹"Kale nno kaakano wandiika oluyimba luno oluyigirize abaana ba Isirayiri, olubayimbisenga, lulyoke lubeerenga omujulizi wange ku baana ba Isirayiri.

²⁰Kubanga bwe ndimala okubaleeta mu nsi omukulukuta amata n'omubisi gw'enjuki, gye nasuubiza bajjajaabwe nga ngibalayirira, ne balya ne bakkuta ne bagejja, balikyukira bakatonda abalala ne babasinza nga babaweereza, ne bannyooma ne bamenya endagaano yange.

²¹Obubenje obw'akabi bwe bunaabajjiranga, oluyimba luno lunaabasoomozanga ng'omujulizi nga lubalumiriza, kubanga bazzukulu baabwe banaabanga bakyululina mu kamwa kaabwe nga tebannalwerabira. Kubanga mmanyi bye balowooza okukola nga n'okubatuusa sinnaba kubatuusa mu nsi gye nabasuubiza nga ngibalayirira."

²²Bw'atyo, ku lunaku olwo, Musa n'awandiika oluyimba luno n'aluyigiriza abaana ba Isirayiri.

²³Awo MUKAMA n'awa Yoswa mutabani wa Nuuni ekiragiro kino ng'agamba nti, "Beera wa maanyi era guma omwoyo, kubanga ggw'oliyingiza abaana ba Isirayiri mu nsi gye nabasuubiza nga ngibalayirira; era nange nnaabeeranga naawe."

²⁴Musa bwe yamala okuwandiika mu Kitabo ebigambo eby'amateeka gano, okubiggya ku ntandikwa okubituusa ku nkomerero,

²⁵Musa n'lagira Abaleevi abaasitulanga Essanduuko ey'Endagaano eya MUKAMA, ng'agamba nti,

²⁶"Mutwale Ekitabo ky'Amateeka kino mukiteke awali Essanduuko ey'Endagaano eya MUKAMA Katonda wammwe, kibeerenga awo ng'omujulirwa gy'oli.

²⁷Kubanga nkumanyi nga bw'oli omujeemu era alina ensingo enkakanyavu. Obanga mubadde mujeemera MUKAMA Katonda nga nkyaliwo nammwe, kale nga mmaze okufa okujeema kwammwe tekuusingewo nnyo!

²⁸Munkunjaanyize wano abakadde b'ebika byammwe abakulembeze bammwe bona, njogere ebigambo bino mu matu gaabwe nga bawulira; era mpita eggulu n'ensi bibeere abajulirwa okubalumiriza.

²⁹Kubanga mmanyi nga bwe nnaamala okufa mujja kwefaaafaaganyiza ddala nga mukyama okuleka ekkubo lye mbalagidde okukwatanga. Mu biseera ebijja emitawaana gjijanga kubajjira, nga mukoze ebibi mu maaso ga MUKAMA Katonda

mulyoke mumusunguwaze olw'ebyo emikono gyammwe bye ginaabanga gikoze."

Oluyimba MUKAMA Iwe yalagira Musa

30Awo Musa n'ayogera, ebigambo by'oluyimba luno okuluggya ku ntandikwa yaalwo n'okulutuusa ku nkomerero ng'ekibiina kya Isirayiri yenna kiwulira.

Ekyamateeka Olwokubiri 32

1 Tega okutu ggwe eggulu, nange nnaayogera, wulira ebigambo by'omu kamwa kange.

2 Okuyigiriza kwange ka kutonnye ng'enkuba, n'ebigambo byange bigwe ng'omusulo, bigwe ng'obufuuyirize ku muddo, ng'oluwandagirize ku bisimbe ebito.

3 Kubanga ndirangirira erinnya lya MUKAMA; mutendereze ekitiibwa kya Katonda waffe!

4 Lwe lwazi, emirimu gye mituukirivu, n'ebikolwa bye byonna bya bwenkanya. Ye Katonda omwesigwa, ataliiko bukuusa, omwenkanya era omutereevu mu byonna.

5 Beeyisizza ng'abagwenyufu gy'ali, baswavu era tebakyali baana be, wabula omulembe omukyamu era ogw'amawaggali.

6 Bwe mutyo bwe musasula MUKAMA Katonda, mmwe abantu abasirusiru era abatalina magezi? Si ye kitaawo eyakutonda, n'akussaawo n'akunyweza?

7 Jjukira ebiseera eby'edda, fumiitiriza ku myaka egyayita edda. Buuza kitaawo ajja kukubuulira ne bakadde bo abakulembeze bajja kukutegeeza.

8 Ali Waggulu Ennyo bwe yagabanyiza amawanga ensi zaago abantu bona bwe yabayawulayawulamu, yategeka ensalo z'amawanga ng'omuwendo gw'abaana ba Isirayiri bwe gwali.

9 Omugabo gwa MUKAMA Katonda be bantu be, Yakobo bwe busika bwe bwe yagabana.

10 Yamuyisanga mu ddungu, mu nsi enkalu eya kikuñjunta. Yamuzibiranga, n'amulabiriranga, n'amukuumanga ng'emmunye ey'eriiso lye.

11 Ng'empungu bw'enyegenya ku kisu kyayo, n'epaapaalira waggulu w'obwana bwayo, era nga bw'eyanjuluza ebiwaawaatiro byayo, n'ebusitula, n'ebutumbiiza ku biwaawaatiro byayo,

12 MUKAMA Katonda yekka ye yamukulemberanga; so tewabangawo katonda mulala.

¹³ Yamuteeka ku ntikko z'ensozi ez'ensi eyo, n'amuliisanga ku bibala by'omu nnimiro. Yamukulizanga ku mubisi gw'enjuki ogw'omu njatika z'enjazi n'amafuta agaavanga mu mayinja amagumu

¹⁴ ne bbongo eyavanga mu biraalo, n'amata okuva mu bisibo, n'amasavu ag'endiga ento n'ennume, n'embuzi ennume n'enduusi ez'e Basani, awamu n'ejjaano esinga obulungi, wanywanga wayini ow'ejjovu eyavanga mu mizabbibu.

¹⁵ Yesuluuni yakkuta n'agejja n'asambagala; ng'ojjudde emmere nga weezitoowerera n'oggwaamu amaanyi. Yava ku Katonda eyamukola, n'alekulira Olwazi olw'Obulokozi bwe.

¹⁶ Baamukwasa obuggyga olwa bakatonda abalala ne bamusunguwaza ne bakatonda abalala.

¹⁷ Baawaayo ssaddaaka eri baddayimooni, so si eri Katonda, eri bakatonda be batamanyangako, bakatonda abaggya abaali baakatuuka bakatonda abo bajajjammwe be bataatyanga.

¹⁸ Weerabira Olwazi eyakuzaala, weerabira Katonda eyakuzaala.

¹⁹ MUKAMA Katonda bwe yakiraba n'abeegobako kubanga yasunguwazibwa batabani be ne bawala be.

²⁰ N'agamba nti, Nzija kubakweka amaaso gange ndabe ebinaabatuukako; kubanga omulembe gwabwe mwonoonefu, abaana abatalinaamu bwesigwa.

²¹ Bankwasa obuggyga ne bakatonda abalala, ne banyiiza n'ebifaananyi byabwe omutali nsa. Ndibakwasa obuggyga olw'abo abatali ggwanga, ndibakwasa obusungu olw'eggwanga eritategeera.

²² Kubanga obusungu bwange bukumye omuliro, ne gwaka okutuukira ddala wansi mu magombe, gusenkenya ensi n'ebibala byayo, ne gwokya amasozi okutandikira ku bikolo byago.

²³ Nzija kubatumangako emitawaana ne mbayiwangako obusaale bwange.

²⁴ Nnaabasindikiranga ejala namuzisa, n'obulwadde obwokya, ne kawumpuli omuzikiriza; ndibawereza ebisolo eby'amannyo amasongovu n'ebewalula mu nfuufu eby'obusagwa.

²⁵ Ekitala kinaabamalangako abaana baabwe ne mu maka gaabwe eneebangaa ntiisa njereere. Abavubuka abalenzi n'abawala balizikirira abaana abawere n'abasajja ab'envi bona batyo.

²⁶ Nalowoozaako ku ky'okubasaasaanya wabulewo akyabajjukiranga ku nsi.

²⁷ Naye ne saagala abalabe baabwe kubasosonkereza, kubanga abaabalumbagana bandiremeddwa okukitegeera, ne beewaana nti, "Ffe tuwangudde, MUKAMA ebyo byonna si ye yabikoze."

²⁸ Lye ggwanga omutali magezi, mu bo temulii mu kutegeera.

²⁹ Singa baali bagezi ekyo bandikitegedde, ne balowooza ku biribatuukako ku nkomerero.

³⁰ Omusajja omu yandisobodde atya okugoba abantu olukumi, oba ababiri okudumya omutwalo ne badduka, wabula nga Lwazi waabwe y'abatunzeeyo, MUKAMA Katonda ng'abawaddeyo?

³¹ Kya mazima lwazi waabwe tali nga Lwazi waffe, abalabe baffe bakiriziganya naffe.

³² Wayini waabwe ava mu terekero lya wayini wa Sodomu, n'ennimiro z'emizabbibu za Ggomola; ezzabbibu zaabwe zabbibu za butwa, ebirimba byazo bikaawa;

³³ wayini waazo bwe butwa bw'emisota obusagwa obukambwe obw'amasalambwa.

³⁴ Ekyo saakyeterekera, nga kuliko n'envumbo mu mawanika gange?

³⁵ Okuwoolera eggwanga kwange, nze ndisasula. Luliba lumu ebigere byabwe ne biseerera, obudde bwabwe obw'okuzikirira buseembedde, n'okubonerezebwka kwabwe kubafubutukirako.

³⁶ MUKAMA Katonda alisalira abantu omusango mu bwenkanya, alisaasira abaweeresa be, bw'aliraba ng'amaanyi gonna gabaweddemu, omuddu n'ow'eddeme nga tewasigadde n'omu.

³⁷ N'alyoka abuuza nti, Kale nno bakatonda baabwe bali ludda wa, olwazi mwe beekweka.

³⁸ Baani abaalyanga amasavu ku ssaddaaka zaabwe, ne banywa envinnyo ey'ekiweebwayo ekyokunywa? Basituke bajje babayambe, kale babawe obubudamo babakuum!

³⁹ Mulabe kaakano, nga nze kennyini, nze Ye! Tewali katonda mulala wabula Nze; nzita era ne nzuukiza, nfumita era ne mponya; era tewali atangira mukono gwange nga gukola.

⁴⁰ Ngolola omukono gwange eri eggulu ne nangirira nti, ddala ddala nga bwe ndi omulamu emirembe gyonna

⁴¹ bwe mpagala ekitala kyange ekimasamasa, n'omukono gwange ne gukikwata nga nsala emisango, nnaawalananga abalabe bange, ne neesasuzanga eri abanaankyawanga.

⁴² Obusaale bwange ndibutamiiza omusaayi, n'ekitala kyange kirirya ennyama, n'omusaayi gw'abattiddwa n'abawambiddwa, n'ogw'emitwe egy'abakulembeze b'abalabe.

⁴³ Mujaguze mmwe amawanga awamu n'abantu be, kubanga aliwalanira omusaayi gw'abaweereza be, aliwalana abalabe be, era alitangirira olw'ensi ye n'abantu be.

⁴⁴ Awo Musa n'ajja awamu ne Yoswa mutabani wa Nuuni, n'addamu ebigambo byonna eby'oluyimba olwo ng'abantu bona bawulira.

⁴⁵ Musa bwe yamala okuddamu ebigambo ebyo byonna eri abaana ba Isirayiri,

⁴⁶ n'abagamba nti, "Mukwate ku mutima gwammwe ebigambo byonna bye mbateggeezza leero n'obuwombeefu obungi, mulyoke mulagire abaana bammwe bagonderenga n'obwegendereza ebigambo byonna eby'amateeka gano.

⁴⁷ Ebigambo ebyo si bya kusaagasaaga, wabula bye bigambo ebikwatira ddala ku bulamu bwammwe bwennyini. Okusinziira ku bigambo bino, mugenda kuwangaala nga muli mu nsi gye mugenda okusomokera omugga Yoludaani okugifuna."

Okufa kwa Musa Kulangibwa

⁴⁸ Ku lunaku olwo lwennyini MUKAMA Katonda n'agamba Musa bw'ati nti,

⁴⁹ "Yambuka olinnyerинне ku Lusozi Nebo oluli mu nsozi za Abalimu mu nsi ya Mowaabu, osusse amaaso Yeriko olengere ensi ya Kanani gy'empa abaana ba Isirayiri okuba obutaka bwabwe obw'enkalakkira.

⁵⁰ Ku lusozi olwo lw'ojja okulinnya kw'olifiira okujjaanyizibwe eri abantu bo, nga muganda wo Alooni bwe yafiira ku lusozi Koola, n'akujjaanyizibwa eri abantu be.

⁵¹ Kubanga mwembi mwanziggyamu obwesige mu maaso g'abaana ba Isirayiri ku mazzi g'e Meriba-Kadesi mu ddungu ly'e Zini, olw'okulemwa okussa ekitiibwa ekituukiridde mu butukuvu bwange mu maaso g'abaana ba Isirayiri.

⁵² Noolwekyo ensi ojja kugirengera bulengezi, so toligiyingiramu, ensi gye mpa abaana ba Isirayiri."

Ekyamateeka Olwokubiri 33

Musa Asabira Ebika bya Isirayiri Omukisa Omulundi gwe Ogewasembayo

¹ Guno gwe mukisa, Musa musajja wa Katonda gwe yasabira abaana ba Isirayiri nga tannafa.

²Yagamba nti, "MUKAMA Katonda yajja gye tuli ng'ava ku Sinaayi n'atutuukako ng'ava ku Seyiri; yamasamasa ng'ava ku Lusozi Palani. Yajja n'obufukunya bw'abatukuvu okuva ku bukiika obwaddyo obw'ensozi ze.

³ Mazima gw'oyagala abantu, abatukuvu bona bali mu mikono gyo. Bavuunama wansi ku bigere byo ne bawulira ebiragiro by'obawa.

⁴ Ge mateeka Musa ge yatuwa ng'ekyokufuna eky'ekibiina kya Yakobo.

⁵ Waasitukawo kabaka mu Yesuluuni abakulembeze b'abantu bwe baakuinjaana nga bye bika bya Isirayiri ebyegasse.

⁶"Lewubeeni abenga mulamu; alemenga kuggwaawo n'omuwendo gw'abasajja be gulemenga kukendeera."

⁷ Kino kye yayogera ku Yuda: "Wulira, Ayi MUKAMA Katonda okukaaba kwa Yuda; omuleete eri abantu be. Yeerwaneko n'emikono gye. Omuyambenga ng'alwanyisa abalabe be!"

⁸ Bino bye yayogera ku Leevi: "Sumimu wo ne Ulimu wo biwe omusajja oyo gw'oyagala ennyo. Wamukebera e Masa n'omugezesu ku mazzi ag'e Meriba.

⁹ Yayogera ku kitaawe ne nnyina nti, 'Abo sibafaako.' Baganda be teyabategeeranga wadde okusembeza abaana be; baalabiriranga ekigambo kyo ne bakuumanga endagaano yo.

¹⁰ Banaayigirizanga Yakobo ebiragiro byo ne Isirayiri amateeka go. Banaanyookezanga obubaane mu maaso go, n'ebiweebwayo ebyokebwa ku kyoto kyo.

¹¹ Ayi MUKAMA Katonda owe omukisa byonna by'akola, era okkirize emirimu gy'emikono gye. Okubirenga ddala abo abamugolokokerako okubenga abalabe be balemenga kwongera kumulumbanga."

¹² Bye yayogera ku Benyamini: "Omwagalwa wa MUKAMA Katonda abeerenga wanywevu, Katonda Ali Waggulu ng'amwebulungudde bulijjo, omwagalwa anaagalamiranga wakati ku bibegabega bye."

¹³ Yayogera bw'ati ku Yusufu: "Ettaka lye MUKAMA Katonda aliwe omukisa, n'omusulo omulungi ennyo ogunaavanga waggulu mu ggulu n'amazzi mu nzizi empanvu mu ttaka wansi,

¹⁴n'ebibala ebigimu ennyo ebinaavanga mu musana, n'amakungula aganaasinganga mu myezi gyonna;

¹⁵ n'ebibala ebinaakiranga obulungi ku nsozi ez'edda, n'okwala kw'ebirime ku nsozi ez'emirembe gyonna;

¹⁶ n'ebirabo ebisinga byonna mu nsi n'okujula kwayo, n'obuganzi obunaavanga eri oyo ow'omu kisaka ekyaka. Ebyo byonna ka bijjenga ku mutwe gwa Yusufu, mu kyenyi ky'omulangira mu baganda be.

¹⁷ Mu kitibwa anaabanga ente ennume embereberye amayembe ge, ng'amayembe ga sseddume endalu; anaagatomezanga amawanga n'agayuzaayuza, n'agagoberanga ku nkomerero y'ensi. Obwo bwe bunaabanga obukumi bwa Efulayimu nga ze nkumi za Manase."

¹⁸ Yayogera bw'ati ku Zebbulooni: "Jaguzanga, ggwe Zebbulooni, bw'onoofulumanga; ne Isakaali ng'ali mu weema zo.

¹⁹ Banaakoowoolanga amawanga okwambuka ku nsozi ne baweerangayo eyo ssaddaaka ez'obutuukirivu, banaalyanga eby'obugagga ebya mayanja, nga beeyambisa n'ebiyobugagga ebikweke mu musenyu."

²⁰ Yayogera bw'ati ku Gaadi: "Alina omukisa oyo agaziya ensalo z'omugabo gwa Gaadi, Gaadi omwo mw'abeera ng'empologoma ng'ayuza omukono n'omutwe.

²¹ Yeerondera omugabo gw'ettaka erisinga obulungi, omugabo gw'omukulembeze gwe gwamukuumirwa. Abakulembeze b'abantu bwe baakuinjaana ye yabalira emisango gya MUKAMA, n'okukwasa Isirayiri amateeka ga MUKAMA Katonda."

²² Yayogera bw'ati ku Ddaani: "Ddaani mwana gwa mpologoma, ogubuuka nga guva mu Basani."

²³ Yayogera bw'ati ku Nafutaali: "Ggwe Nafutaali ajjudde obuganzi bwa MUKAMA Katonda era ng'ojjudde emikisa gye, onoosikira obukiikkaddyo okutuuka ku nnyanja."

²⁴ Yayogera bw'ati ku Aseri: "Asinga okuweebwa omukisa mu batabani ye Aseri, ku baganda be gwe babanga basinga okwagala era emizabbibu gigimuke nnyo mu ttaka lye.

²⁵ Enzigi z'ebibuga byo zinaasibwanga n'eminyolo egy'ekyuma n'ekikomo n'amaanyi go ganenkananga n'obuwangaazi bwo.

²⁶ "Tewali afaanana nga Katonda wa Yesuluuni eyeebagala waggulu ku ggulu ng'ajja okukuyamba ne ku bire mu kitibwa kye.

²⁷ Katonda ataggwaawo bwe buddukiro bwo, era akuwanirira n'emikono gye emirembe gyonna. Anaagobanga abalabe bo nga naawe olaba, n'agamba nti, 'Bazikirize!'

²⁸ Bw'atyo Isirayiri anaabeeranga mu mirembe yekka, ezzadde lya Yakobo linaabeeranga wanywevu, mu nsi erimu emmere y'empeke ne wayini, eggulu mwe linaatonnyezanga omusulo.

²⁹ Nga weesiimye, Ayi Isirayiri! Ani akufaanana, ggwe eggwanga MUKAMA Katonda lye yalokola? Ye ngabo yo era omubeezi wo, era kye kitala kyo ekisinga byonna. Abalabe bo banaakuvuunamiranga, era onoobalinnyiriranga.”

Ekyamateeka Olwokubiri 34

Okufa kwa Musa mu nsi ya Mowaabu

¹ Awo Musa n'ayambuka okuva mu nsenyi za Mowaabu, n'alinnyalinnya Olusozi Nebo, n'atuukira ddala ku ntikko eyitibwa Pisuga, eyolekedde Yeriko. MUKAMA Katonda n'asinziira awo n'amulengeza ensi yonna ensuubize: okuva ku Giriyaadi okutuuka ku Ddaani,

² ne Nafutaali yonna, n'ensi ya Efulayimu ne Manase, n'ensi yonna eya Yuda okutuuka ku Nnyanja ey'Ebugwanjuba,

³ ne Negebu n'olusenyi olw'ekiwonvu omuli Ekibuga ky'Enkindu ekiyitibwa Yeriko okutuukira ddala ku Zawaali.

⁴ MUKAMA Katonda n'agamba Musa nti, “Eyo y'ensi gye nalayirira Ibulayimu, ne Isaaka, ne Yakobo, nga ngibasuubiza nti, ‘Ndigiwa ezzadde lyo.’ Ngikulaze n'ogiraba n'amaaso go, naye tojja kusomoka kugituukamu.”

⁵ Awo Musa, omuweereza wa MUKAMA, n'afiira awo mu nsi ya Mowaabu, ng'ekigambo kya MUKAMA Katonda bwe kyali.

⁶ MUKAMA n'aziika Musa mu nsi ya Mowaabu, mu kiwonvu ekyolekedde Besupyoli, naye tewali n'omu amanyi malaalo ge we gali ne ku lunaku lwa leero.

⁷ Musa we yafiira yali nga yakamaze emyaka kikumi mu abiri egyptobukulu; kyokka ng'amaaso ge galaba bulungi, era n'amaanyi ge nga tegakendeddeeko.

⁸ Abaana ba Isirayiri ne bakaabira Musa mu nsenyi za Mowaabu okumala ennaku amakumi asatu, okutuusa ennaku ezo ez'okukaaba n'okukungubagira Musa bwe zaggwaako.

⁹ Yoswa, mutabani wa Nuuni, yali ajjudde omwoyo ogw'amagezi, kubanga Musa yali yamuteekako emikono gye. Abaana ba Isirayiri ne bamuwulira, ne bakola nga MUKAMA Katonda bwe yali alagidde Musa.

¹⁰ Okuva olwo tewayimukangawo nnabbi mulala mu Isirayiri afaanana nga Musa, MUKAMA Katonda gwe yamanyagana naye amaaso n'amaaso.

¹¹ Tewaaliwo yamwenkana olw'obubonero n'ebiyamagero MUKAMA Katonda bye yamutuma okukola mu nsi y'e Misiri ku Falaawo ne ku baweereza be bona, ne ku nsi ye yonna,

¹² era n'olw'ekitiibwa kye eky'amaanyi amangi, n'obuyinza obw'entiisa bwe yayoleka mu Isirayiri yenna.

Yoswa

Yoswa 1

¹Awo Musa omuweereza wa MUKAMA bwe yamala okufa, MUKAMA n'agamba Yoswa mutabani wa Nuuni, eyali omubeezi wa Musa nti,

²“Musa omuweereza wange afudde, kale kaakano weeteeketeke osomoke omugga guno Yoludaani ggwe awamu n'abantu bano bona mulyoke muyingire mu nsi eno gye mbawa mmwe abaana ba Isirayiri.

³Nga bwe nasuubiza Musa, buli we munaalinnnya ekgere, mbawaddewo.

⁴Mbawadde ekitundu ekyo kyonna okuvira ddala ku ddungu ne ku Lebanooni, okutuuka ku mugga omunene, Fulaati, n'ensi ey'Abakiiti n'okutuukira ddala ku Nnyanja Ennene ebugwanjuba.

⁵Tewali n'omu alisobola kubaziyiza ennaku zonna ez'obulamu bwo; nga bwe nabeeranga ne Musa era bwe nt yo bwe nnaabeeranga naawe, sirikuleka wadde okukwabuulira.

⁶“Ddamu amaanyi, guma omwoyo; kubanga ggwe oligabira abantu bano ensi gye nasuubiza edda bajjajaabwe.

⁷Ddamu amaanyi era beera muzira, byonna by'okola obyesigamye ku mateeka omuweereza wange Musa ge yakulagira; togaviirangako ddala, oleme okukyama ku mukono ogwa ddyo oba ogwa kkono olyoke obenga omuwangizi buli gy'onoogendanga.

⁸Ekitabo kino eky'amateeka tekikuvanga mu kamwa, okifumiitirizangako emisana n'ekiro olyoke otekenga mu nkola ebyo bye kikulagira era bw'otyo bw'oneefunira obuwangizi n'okukulaakulana.

⁹Si nze nkulagidde? Noolwekyo ddamu amaanyi, guma omwoyo, totya era toterebuka kubanga MUKAMA Katonda wo anaabanga naawe buli gy'onoogendanga.”

¹⁰Bw'atyo ne Yoswa n'alagira abakulembeze b'Abayisirayiri nti,

¹¹“Muyite mu lusiisira lwonna nga mutgeeeza abantu bona nti, ‘Mwesibire entanda kubanga mu nnaku ssatu mulisomoka omugga guno Yoludaani mulyoke mugabane ensi MUKAMA Katonda wammwe gy'abawa.’”

¹²Yoswa n'agamba ab'ekika kya Lewubeeni, n'ab'ekika kya Gaadi n'ekitundu ky'ekika kya Manase nti,

¹³“Mujukire omuweereza wa MUKAMA Musa kye yabalagira ng’agamba nti, ‘MUKAMA Katonda wammwe abawa ekifo eky’okuwummuliramu era alibawa ensi eno.’

¹⁴Bakazi bammwe, n’abaana bammwe abato balisigala wano awamu n’amagana gammwe mu kitundu kino Musa kye yabawa edda ebuvanjuba w’omugga Yoludaani. Naye abasajja bammwe enkwatangabo nga bambalidde ebyokulwanyisa, bateekwa okubakuleberamu n’okubalwanirira,

¹⁵okutuusa baganda bammwe abo nabo MUKAMA lw’alibawa ensi eyo n’abatebenkeza. N’oluvannyuma mulikomawo mu kitundu kino Musa omuweereza wa MUKAMA kye yabawa emitala wa Yoludaani okwolekera ebuvanjuba.”

¹⁶Awo ne baanukula Yoswa nti, “Byonna by’otukalaatidde tunaabikola era tunaagenda yonna gy’onootusindika.

¹⁷Nga bwe twagonderanga Musa mu byonna naawe bwe tunaakugonderanga tutyo; MUKAMA Katonda wo abeerenga naawe nga bwe yabeeranga ne Musa.

¹⁸Buli anaajeemeranga ebigambo byo n’atabiwuliriza anattibwanga. Ddamu amaanyi, guma omwoyo.”

Yoswa 2

Abakessi Baweerezebwa e Yeriko

¹Awo Yoswa mutabani wa Nuuni n’atuma abasajja babiri okuva e Sittimu bagende mu kyama bakette, n’abagamba nti, “Mugende mwekaanye ensi eyo na ddala ekibuga Yeriko.” Bwe batyo ne bagenda. Bwe baatuukayo ne bayingira mu nnyumba y’omukazi malaaya ayitibwa Lakabu ne basula omwo.

²Naye kabaka wa Yeriko n’akitegeera nti waliwo abasajja Abayisirayiri abazze ekiro okuketta ensi ye.

³Bw’atyo kabaka oyo n’atumya ewa Lakabu nti, “Mu nju yo mulimu abasajja abazze okuketta ensi yange, bampeereze mangu.”

⁴Lakabu abasajja bano yali yamaze dda okubakweka, naye n’alyoka agamba nti, “Kituufu abasajja abo baabaddoko wano naye saatedgedde gye baabadde bava.

⁵Oluggi lw’ekibuga bwe lwabaddle lunaatera okuggalwawo akawungeezi, ne bafuluma, saatedgedde gye baalaze; naye mubawondere osanga munaabagwikiriza.”

⁶So nno yali yabakwese dda ku nju waggulu era nga ababisseeko bulungi ebikolokomba by’obugoogwa.

⁷Basajja ba kabaka ne bafuluma ekibuga ne wankaaki waakyo naggalwawo. Ne banoonya abakessi okutuukira ddala ku mugga Yoludaani.

⁸Abakessi bwe baali tebanneebaka, Lakabu n'ayambuka gye baali ku nju waggulu

⁹n'abagamba nti, "Nkimanyi nga MUKAMA abawadde ensi eno era nga ffenna tubatidde nnyo, tuweddemu n'omwoyo.

¹⁰Twawulira MUKAMA bwe yakaliza ennyanja emyufu nga muva e Misiri era twawulira bwe mwazikiriza Sikoni ne Ogi bakabaka b'Abamoli emitala w'omugga Yoludaani.

¹¹Amangwago nga twakakiwulira emitima gyatutyemuka, era teri n'omu ku ffe yasigalamu ndasi, kubanga MUKAMA Katonda wammwe ye Katonda w'omu ggulu ne mu nsi."

¹²N'abagamba nti, "Nga nange bwe mbakoledde ebyekisa, mbasaba nammwe munkolere bwe mutyo nga mulayira mu linnya lya MUKAMA era mumpe n'obukakafu

¹³nga mulitutaliza; nze, ne kitange, ne mmange, ne baganda bange, ne bannyinaze awamu n'abo bona be babeera nabo."

¹⁴Abasajja abo ne baddamu nti, "Bw'otolituloopa, naffe tulibawonya MUKAMA ng'atuwadde ensi eno; era MUKAMA atuzikirize bwe tutalikola bwe tutyo."

¹⁵Olw'okubanga ennyumba ya Lakabu yazimbwa ku bbugwe w'ekibuga, bw'atyo n'abasizza ku muguwa ng'abayisa mu ddirisa.

¹⁶Yabagamba nti, "Mugende mwekwekere ennaku ssatu eyo mu nsozi okutuusa ng'ababawenja bamaze okudda, oluvannyuma muyinza okwetambulira amakubo gammwe."

¹⁷Ne bamugamba nti, "Tujja kukuuma butiribiri ekirayiro kyaffe

¹⁸era bwe tulitabaala ensi yammwe, osibanga omuguwa guno omumyufu mu ddirisa mwe watuyisa era okuŋŋaanyizanga mu nnyumba yo, kitaawo, ne nnyoko, bannyoko n'ab'omu nnyumba ya kitaawo bona.

¹⁹Gwe kalitanda n'afuluma mu nju yo n'atambulatambula mu nguudo, ekirimutuukako kyonna y'alimanya. Kyokka alituukibwako akabi konna mu nju yo, ogwo guliba musango gwaffe.

²⁰Naye k'olituloopa, olwo oliba omenye endagaano yaffe naawe."

²¹Lakabu y'abaddamu n'abagamba nti, "Byonna bibeere nga bwe tukkaanyizza." Bwe yamala okubasiibula n'asiba akawero akamyufu mu ddirisa.

Abakessi Beddirayo Ewaabwe

²²Abakessi bwe baamala okwekwekera ennaku ssatu mu nsozi nga n'ababanoonya bababuliddwa,

²³ne beddirayo eri Yoswa mutabani wa Nuuni ne bamuyitiramu mu byonna nga bwe byagenda.

²⁴Ne bamugamba nti, “Ddala ensi eyo MUKAMA agituwadde, abantu baamu bona tubakubye encukwe.”

Yoswa 3

Abayisirayiri Beeteekerateekera Okusomoka Omugga Yoludaani

¹ Mu makya ennyo Yoswa n'Abayisirayiri bona ne bagolokoka okuva e Sittimu, bwe baatuuka ku mugga Yoludaani ne basooka balindirira awo nga tebannagusomoka.

²Bwe waayitawo ennaku ssatu abakulembeze baabwe ne babayitaayitamu

³nga bwe babalagira nti, “Bwe munaalaba Essanduuko ey'Endagaano ya MUKAMA Katonda wammwe, bakabona Abaleevi nga bagisitudde ne mulyoka muva mu kifo kino ne mugigoberera,

⁴kubanga lino ekkubo temuliyitangamu. Naye wakati wammwe nayo, mulekawo ebbanga nga lya fuuti ssatu muleme okugisemberera.”

⁵Awo Yoswa n'agamba Abayisirayiri nti, “Mwetukuze kubanga enkyia MUKAMA anaakola ebyamagero mu mmwe.”

⁶Ate Yoswa n'agamba bakabona nti, “Musitule Essanduuko era mukulemberemu abantu babagoberere.” Bakabona nabo ne bakola nga Yoswa bwe yabalagira.

MUKAMA Asuubiza Yoswa

⁷ MUKAMA n'agamba Yoswa nti, “Olwa leero njenda okukugulumiza mu maaso g'Abayisirayiri bona balyoke bamanye nti nga bwe nnali ne Musa, era bwe ntyo bwe ndi naawe.

⁸Bw'otyo onoolagira bakabona abasitula Essanduuko ey'Endagaano nti bwe mutuuka ku mugga Yoludaani, muyimirire buyimirizi.”

⁹Yoswa n'ayita Abayisirayiri nti, “Musembere wano muwulire ebigambo bya MUKAMA Katonda wammwe.

¹⁰Olwa leero mugenda okutegeera nti Katonda omulamu ali mu mmwe, kubanga anaagobera ddala Abakanani, n'Abakiiti, n'Abakiivi, n'Abaperezi, n'Abagirugaasi, n'Abamoli, n'Abayebusi mmwe nga mulaba.

¹¹Laba, Essanduuko ey'Endagaano ya MUKAMA w'ensi zonna y'eneebakulemberamu nga musomoka omugga guno Yoludaani.

¹²Kale nno mulonde abasajja kkumi na babiri okuva mu bika bya Isirayiri nga buli kika mulondamu omu omu:

¹³Bakabona abasitudde Essanduuko ya MUKAMA w'ensi zonna, olunaalinya ebigure byabwe mu mugga Yoludaani, amazzi agabadde gakulukuta gonna ganaayimirira ne geetuma."

MUKAMA Ayisa Abayisirayiri mu Mugga Yoludaani

¹⁴Awo Abayisirayiri ne basimbula weema zaabwe okusomoka Yoludaani nga bakuleembeddwamu bakabona abasitudde Essanduuko ya MUKAMA.

¹⁵Omugga Yoludaani gwanjaala mu kiseera eky'amakungula kyonna. Mu kiseera ekyo bakabona abasitudde Essanduuko we baalinnyira ebigure byabwe ku Yoludaani.

¹⁶Amangwago amazzi agaali gakulukuta ne gayimirira ne geetuma eri ewala okuliraana ekibuga Adamu ku ludda lwa Zaresaani. N'ago agaali gaserengeta okweiywa mu Araba Ennyanja ey'Omunno ne gasalikako, abantu ne basomokera Yoludaani ku ttaka ekkalu, mu maaso ga Yeriko.

¹⁷Bakabona abasitudde Essanduuko ya MUKAMA ne bayimirira wakati mu Yoludaani awatakyali mazzi okutuusa Abayisirayiri bona lwe baasomoka.

Yoswa 4

Amayinja Ekkumi n'Abiri ag'Ekijjukizo

¹Awo Abayisirayiri bona bwe baamala okusomoka omugga Yoludaani, MUKAMA n'agamba Yoswa nti,

²"Yungula abasajja kkumi na babiri mu buli kika ng'olondamu omu omu."

³Obakuutire nti, "Mulonde amayinja kkumi n'abiri nga mugaggya wakati mu mugga Yoludaani awo wennyini bakabona we balinnye ebigure byabwe, mugende nago okutuukira ddala we munaasula ekiro kino."

⁴Yoswa n'ayita abasajja kkumi na babiri be yalonda mu bika byonna ebya Isirayiri, n'abagamba nti,

⁵"Mukulembere mu maaso g'Essanduuko ya MUKAMA Katonda wammwe era buli omu ku mmwe alonde ejinja limu ng'aliggya mu mugga guno Yoludaani alyetikke ku kibegabega kye.

⁶Kano kalyoke kababeerere akabonero gye muli era mu mirembe ejija, abaana bammwe bwe balibabuza amayinja gano kye gategeeza,

⁷mulibagamba nti essanduuko y'Endagaano ya MUKAMA bwe yali ng'esomosebwa omugga Yoludaani, amazzi gaagwo ne geetuma ng'ogusenge okutuusa Essanduuko bwe yamala okuyisibwawo. Kale amayinja gano, Abayisirayiri galibabeerera ekijjukizo emirembe gyonna."

⁸Abasajja Abayisirayiri ne bakola nga Yoswa bwe yabakuutira, ne balonda amayinja kkumi n'abiri nga bagaggya mu mugga Yoludaani ng'omuwendo

gw'ebika by'Abayisirayiri bwe gwali. Ne bagasitula okugatuusiza ddala we baali bagenda okusula nga MUKAMA bwe yagamba Yoswa.

⁹Yoswa n'asimba amayinja kkumi n'abiri mu kifo bakabona abaasitula Essanduuko ey'Endagaano we baalinnya era we gali ne kaakano.

¹⁰Bakabona abaasitula Essanduuko ne bayimirira wakati mu Yoludaani okutuusa nga Abayisirayiri bamaze okutuukiriza byonna MUKAMA bye yabalagira ng'ayita mu Musa ne Yoswa. Abantu bona ne basomoka bunnambiro.

¹¹Abantu bona nga bamaze okusomoka, bakabona ne basomosa Essanduuko ya MUKAMA abantu bona nga babayeegese amaaso.

¹²Awo abasajja ab'ekika kya Lewubeeni, n'ekya Gaadi, n'ekitundu ky'ekika kya Manase ne basomoka ne bayita ku Bayisirayiri bona nga babagalidde ebyokulwanyisa nga Musa bwe yabagamba,

¹³bonna abaali bambalidde ebyokulwanyisa baali emitwalo ng'ena mu maaso ga MUKAMA Katonda, olwo ne boolekera eyali olutalo mu lusenyi lw'e Yeriko.

¹⁴Ku lunaku olwo MUKAMA n'agulumiza nnyo Yoswa mu maaso g'Abayisirayiri bona, ne bamussaamu ekitiibwa ennaku zonna ez'obulamu bwe nga bwe baakolanga Musa.

¹⁵Awo MUKAMA n'agamba Yoswa nti,

¹⁶"Lagira bakabona abasitula Essanduuko ey'Obujulirwa baveeyo mu mugga."

¹⁷Bw'atyo Yoswa n'alagira bakabona nti, "Muveeyo mu mugga Yoludaani."

¹⁸Bakabona abasitula Essanduuko ey'Endagaano ya MUKAMA olwalinnya ebigure byabwe ku lukalu, amazzi gonna aga Yoludaani ne gakomawo mu kkubo lyago n'okwanjaala ne ganjaala nga bulijo.

¹⁹Bwe batyo Abayisirayiri ne basitula okuva ku Yoludaani ku lunaku olw'ekkumi mu mwezi ogw'olubereberye ne batuuka e Girugaali ne basiisira awo kumpi n'ensalo ey'ebuvanjuba eya Yeriko.

²⁰Amayinja ekkumi n'abiri agaggibwa mu Yoludaani, Yoswa n'agasimba mu Girugaali.

²¹N'agamba Abayisirayiri nti, "Abaana bammwe bwe balibabuuza amakulu g'amayinja gano,

²²mulibaddamu nti, 'Abayisirayiri bwe baali banaatera okusomoka omugga Yoludaani,

²³MUKAMA n'akaliza omugga ogwo okutuusa nga bamaze okugusomoka ne kifaananako nga MUKAMA Katonda bwe yakola Ennyanja Emyufu.'

²⁴Ebyo byabaawo abantu b'omu nsi yonna bategeere ng'omukono gwa MUKAMA gwa maanyi era nammwe mulyoke mutye MUKAMA Katonda wammwe emirembe gyonna."

Yoswa 5

¹Awo bakabaka ba ab'Amoli abaali emitala ebugwanjuba bw'omugga Yoludaani, ne bakabaka b'Abakanani abaliraanye ennyanja bwe baawulira nga MUKAMA yakaliza amazzi g'omugga Yoludaani Abayisirayiri basobole okusomoka, ne batekemuka omwoyo olw'Abayisirayiri.

Yoswa akomola Abayisirayiri

²Mu kiseera ekyo MUKAMA n'agamba Yoswa nti, "Weekolere obwambe obw'amayinja amoogi, okomole abasajja bona Abayisirayiri abatakomalwanga."

³Bw'atyo Yoswa n'akola obwambe mu mayinja amoogi n'akomolera abasajja Abayisirayiri ku lusozi oluyitibwa Gibeyakalaloosi.

⁴Ensonga Yoswa kyeyava abakomola y'eno: abasajja Abayisirayiri abaava e Misiri nga mwe muli n'abalwanyi bona, baafiira mu ddungu.

⁵Abaava e Misiri bona baali bamaze okukomolebwa, kyokka abaana baabwe abaazaalirwa mu ddungu tebaali bakomole.

⁶Abayisirayiri baamala emyaka amakumi ana nga batambula mu ddungu okutuusa bona, nga mwe muli n'abalwanyi, lwe baafa ne baggwaawo, kubanga baagaana okugondera eddoboozi lya MUKAMA era kyeyava abalayirira nti talibaganya kutuuka mu nsi eyo gye yasuubiza bajjajjaabwe, ensi ekulukuta amata n'omubisi gw'enjuki.

⁷Kale mu bifo byabwe MUKAMA yazzaawo baana baabwe era abo Yoswa be yakomola kubanga tebaakomolerwa mu kkubo.

⁸Bonna nga bamaze okukomolwa tebaava mu weema zaabwe mu lusiisira, okutuusa nga bamaze okuwona.

⁹MUKAMA n'agamba Yoswa nti, "Okuva olwa leero mbaggyeeko ekivume ky'e Misiri." Ekifo ekyo kyekyava kiyitibwa Girugaali n'okutuusa kaakano.

Abayisirayiri bakwata Okuyitako e Girugaali

¹⁰Awo Abayisirayiri bwe baali bakyasiisidde e Girugaali embaga ey'Okuyitako n'etuuka era ne bagirya akawungeezi ku lunaku olw'ekkumi n'enya olw'omwezi, mu lusenyi lw'e Yeriko.

¹¹Enkeera ne balya emmere ey'omu nsi y'e Kanani: emigaati egitali mizimbulukuse n'empeke ensiike.

¹²Okuva ku lunaku olwo lwe baalya ku mmere y'omu Kanani tebaddamu kufuna Maanu; olwo ne batandika kulyanga mmere ya mu nsi eyo.

Yoswa Asisinkana Omukulu w'Eggye Iya MUKAMA

¹³Awo Yoswa bwe yali anaatera okutuuka e Yeriko bwe yayimusa amaaso n'alaba omusajja akutte ekitala ekisowole ng'amwolekedde. Yoswa kyeyava amusemberera n'amubuuza nti, "Oli ku ludda lwaffe oba ku lwa balabe baffe?" Ye n'amuddamu nti,

¹⁴"Siriiko ludda. Nze mukulu w'eggye lya MUKAMA era ntuisse." Yoswa n'agwa wansi, n'avuunama n'amusinza era n'amubuuza nti, "MUKAMA wange, oñjamba ki omuddu wo?"

¹⁵Naye omukulu w'eggye lya MUKAMA n'amuddamu nti, "Yambulamu engatto zo kubanga ekifo kino mw'oli kitukuvu." Ne Yoswa naye n'akola nga bwe yalagirwa.

Yoswa 6

Ekibuga Yeriko kizingizibwa

¹Ekibuga Yeriko kyaligaddwawo ng'enzi g'zonna zisibiddwa be gulugulu olw'okutya Abayisirayiri era nga tewali afuluma wadde ayingira.

²MUKAMA n'agamba Yoswa nti, "Laba, Yeriko ne kabaka waakyo n'abasajja baamu bakirimaanyi mbawaddeyo mu mukono gwammwe.

³Basajja bammwe abalwanyi bona bajja ku kyetooloolanga omulundi gumu buli lunaku okumala ennaku mukaaga.

⁴Bakabona musanvu bajja kwambaliranga amakondeere agaakolebwa mu mayembe g'endiga ennume, nga bakuleembedde Essanduuko. Ku lunaku olw'omusanvu balyetooloola ekibuga emirundi musanvu nga bwe bafuuwa amakondeere gaabwe.

⁵Olunaawulira amakondeere nga gavuga, Abayisirayiri bona baleekaanire waggulu era amangwago ekisenge kya bbugwe ekyetoolodde kineegonnombola wansi; amangwago Abayisirayiri bona beefubitike ekibuga."

⁶Bw'atyo Yoswa mutabani wa Nuuni n'ayita bakabona n'abagamba nti, "Musitule Essanduuko ey'Endagaano ne bakabona musanvu bakulembere Essanduuko ya MUKAMA nga bambalidde amakondeere musanvu agaakolebwa mu mayembe g'endiga ennume."

⁷N'alamira Abayisirayiri nti, "Mweyongere mu maaso, mwetooloole ekibuga abalina ebyokulwanyisa nga bakuleembeddemu Essanduuko ya MUKAMA."

⁸Nga Yoswa bwe yabakalaatira, bwe batyo bakabona omusanvu ne bakulemberamu nga bwe bafuuwa amakondeere gaabwe omusanvu

ezaakolebwa mu mayembe g'endiga eza sseddume, eno nga Essanduuko ey'Endagaano ya MUKAMA bw'ebavaako emabega.

⁹Abasajja abambilidde ebyokulwanyisa ne bakulemberamu bakabona ab'amakondeere, olwo eggye ery'emabega ne ligoberera Essanduuko ng'eno amakondeere bwe ganyaanyaagira.

¹⁰Awo Yoswa n'alagira Abayisirayiri nti, "Temuleekaana wadde okwogerera waggulu, mutambule kasirise okutuusa ku lunaku olwo lwe ndibalagira."

¹¹Bw'etyo Essanduuko ya MUKAMA ne yeetooloozebwa ekibuga omulundi gumu olunaku olwo, ne beddirayo mu lusiisira lwabwe ne beebaka.

¹²Yoswa n'akeera nnyo mu makya, ne bakabona ne basitula Essanduuko ya MUKAMA,

¹³ne bakabona omusanvu abafuuyi b'amakondeere ne batambula, abalwanyi nga babakulembedde, eggye ery'emabega lyo nga ligoberera Essanduuko ya MUKAMA, eno amakondeere nga bwe gafuuyibwa.

¹⁴Ku lunaku olwokubiri ne beetooloola ekibuga omulundi gumu, ne baddayo mu lusiisira. Ne bakola bwe batyo okumala ennaku mukaaga.

Okugwa kwa Yeriko

¹⁵Ku lunaku olw'omusanvu baakeera mu matulutulu ne beetooloola ekibuga nga bulijjo, kyokka olwo lwe lwali olunaku lwokka lwe baakyetooloola emirundi omusanvu.

¹⁶Ku mulundi ogw'omusanvu nga bakabona bamaze okufuuwa amakondeere, Yoswa n'alagira abantu nti, "Muleekaane kubanga MUKAMA abawadde ekibuga.

¹⁷Era ekibuga n'ebintu byamu byonna bya kuweebwayo eri MUKAMA bizikirizibwe okuggyako Lakabu yekka malaaya, oyo n'abantu be baanaabeera nabo mu nju ye. Kubanga yakweka abakessi baffe be twasindikayo.

¹⁸Naye mmwe mwekuume ebyo ebiweereddwayo eri MUKAMA okuzikirizibwa muleme kubitwala kubanga kiyinza okuleetera Abayisirayiri bona ekikolimo n'okuzikirira.

¹⁹Kyokka ffeeza ne zaabu n'ebintu byonna eby'ekikomo n'eb'yekyuma bitukuvu eri MUKAMA era byakutereka mu ggwanika lya MUKAMA."

²⁰Awo Abayisirayiri ne baleekaana nnyo, amakondeere bwe gaavuga. Amangu ennyo ng'amakondeere gakavuga Abayisirayiri ne bogera n'eddoboozi ery'omwanguka, era ekisenge kya bbugwe ekyebunguludde ekibuga Yeriko ne kyegonnombola wansi. Awo ne bayingira ne bakiwamba.

²¹Ne bazikiriza byonna ebyakirimu, abasajja n'abakazi, n'abaana abato, n'ente, n'endiga, n'endogoyi ne byonna ne babizikiriza n'ekitala.

Lakabu Atalizibwa

²² Awo Yoswa n'agamba abasajja ababiri abaatumibwa okuketta ensi eri nti, "Mugende muleete malaaya oli n'abantu be bona baali nabo nga bwe mwamusuubiza."

²³ Bwe batyo abavubuka abo abakessi ne bagenda ne bakola nga bwe baalagirwa, ne baleeta Lakabu malaaya, ne kitaawe, ne nnyina, ne bannyina n'abantu be bona be yali nabo, ne babateeka ebweru w'olusiisira lw'Abayisirayiri.

²⁴ Awo ne balyoka bookya ekibuga ne bazikiriza byonna ebyakirimu okuggyako ffeeza, zaabu n'ebintu eby'ekikomo n'eb'yekyuma bye baggyamu ne babitereka mu ggwanika ly'omu nnyumba ya MUKAMA.

²⁵ Yoswa n'alekawo Lakabu malaaya n'ab'enneyumba ye era Lakabu n'abeera mu Isirayiri n'okutuusa kaakano kubanga yakweka abakessi Yoswa be yatuma okuketta ekibuga Yeriko.

²⁶ Yoswa n'alayira nti, "Akolimirwe mu maaso ga MUKAMA omuntu yenna alyanjanga nate okuzimba ekibuga kino Yeriko. Bw'alyanjanga okuzimba omusingi gwakyo alifiirwa omwana we omubereberye. Ate era bw'alyanjanga okuwangamu enzigi z'emiryango gyakyo, alifiirwa omwana we asembayo owoobulenzi."

²⁷ Bw'atyo MUKAMA n'abeera ne Yoswa, era ettutumu lya Yoswa ne libuna ensi eyo yonna.

Yoswa 7

Abayisirayiri balinnyibwa ku nfeete mu kibuga Ayi

¹ Abayisirayiri ne basobya bwe baatwala ku bintu ebyali ebiwonge; Akani mutabani wa Kaluni muzzukulu wa Zabudi era muzzukulu wa Zeera ow'omu kika kya Yuda, ne yeetwalira ebimu ku bintu ebyo: bw'atyo MUKAMA n'asunguwalira nnyo eggwanga lya Isirayiri.

² Yoswa n'asindika abasajja okuva e Yeriko bagende mu kitundu kye Ayi okuliraana Besaveni ebuvanjuba wa Beseri, n'abakuutira nti, "Mugende mukette ensi eyo." Nabo ne bagenda ne baketta Ayi.

³ Ne bakomawo ne bategeeza Yoswa nti, "Tosindika bantu bangi kulumba Ayi wabula weerezaayo abantu nga enkumi bbiri oba ssatu be baba balumba. Toweerezaayo bantu bona kubanga ab'omu Ayi si bangi."

⁴ Abayisirayiri ng'enkumi ssatu ne boolekera Ayi, kyokka abasajja be Ayi ne babafubutula emisinde

⁵ Okubaggya ku wankaaki w'ekibuga okubatuusiza ddala emitala wa Sebalimu era Abayisirayiri ng'amakumi asatu mu mukaaga ne battibwa. Entiisa ne buutikira Abayisirayiri; emitima ne gibayenjebuka.

⁶ Yoswa n'abakulembeze b'Abayisirayiri ne bayuza ebyambalo byabwe ne beesiiga enfuufu mu mitwe gyabwe era ne beeyala ku ttaka mu maaso g'Essanduuko ya MUKAMA okuzibya obudde.

⁷ Yoswa n'agamba nti, "MUKAMA Katonda nga kitalo kino! Wasomosezaaki Abayisirayiri omugga Yoludaani ate n'obaleka bazikirizibwe Abamoli? Bwe twali tukyali emitala wa Yoludaani tetwaliko kabi n'akatono!"

⁸ Ayi MUKAMA, Isirayiri adduse abalabe baabwe, nze nnaayogera ki kaakano!

⁹ Abakanani n'abali mu kitundu ekyo kyonna bwe banaakiwulira bajja kutwebungulula batusaanyeewo. Olwo erinnya lyo ekkulu bwe lityo liriba terikyavuga."

¹⁰ MUKAMA n'agamba Yoswa nti, "Golokoka. Kiki ekikuvuunamizza ku ttaka?

¹¹ Isirayiri eyonoonye kubanga bavudde ku ndagaano gye nabakuutira, ne batwala ku bintu ebiwonge, ne babitabika mu byabwe ate ne balimba.

¹² Ka mbabuulire, okuggyako nga muzikiriza omubi ali mu mmwe, Abayisirayiri tebayinza kwolekera balabe baabwe, babadduka buddusi, kubanga nsazeewo bazikirizibwe.

¹³ "Golokoka otukuze abantu era obategeeze beetukuze nga beetegekera olw'enkyo bw'atyo bw'ayogera MUKAMA, Katonda wa Isirayiri. Waliwo ebikwekedwa mu mmwe; okuggyako nga mubikwekula temuyinza kuwangula balabe bammwe.

¹⁴ "Enkyo mujjire mu bika byammwe, buli kika MUKAMA ky'analondamu kinaasembera luggyta ku luggyta, n'oluggyta MUKAMA lw'analondamu lunajja nju ku nju, era enju MUKAMA gy'analondamu enejja muntu ku muntu.

¹⁵ Naye oyo anaasangibwa n'ebintu ebiwonge anaayokebwa mu muliro ye n'ebyo byonna by'alina, kubanga amenye endagaano ya MUKAMA n'avumaganya Isirayiri."

Akani Akubwa Amayinja

¹⁶ Yoswa yakeera nnyo n'akuinjaanya ebika byonna, yasookera ku kika kya Yuda era n'asembeza enju ya Yuda:

¹⁷ n'alondamu abo abazaalibwa Zeera, ate mu nju ya Zeera n'alondamu Zabudi n'ennyumba ye:

¹⁸ ate mu bo n'alondamu Akani omwana wa Kalumi, muzzukulu wa Zabudi, muzzukulu wa Zeera ow'omu kika kya Yuda.

¹⁹ Yoswa n'agamba Akani nti, "Mwana wange njagala oweese MUKAMA Katonda wa Isirayiri ekitiibwa era omugulumizise, ombuulire ky'okoze, tonkisa."

²⁰Akani n'addamu nti, "Mazima nayonoona eri MUKAMA Katonda wa Isirayiri era kino kye nakola.

²¹Bwe nalaba nga mu munyago mulimu ekyambalo ekirungi ekyava e Sinaali n'ensimbi, n'effeeza ne zaabu ne mbyegomba, bwe ntyo ne mbitwala ne mbisimira mu ttaka mu weema yange."

²²Yoswa n'atuma ababaka mu weema ya Akani era ne babisangayo ng'abisimidde mu ttaka.

²³Ne babifulumya ne babireeta eri Yoswa n'Abayisirayiri bona, ne babissa mu maaso ga MUKAMA.

²⁴Yoswa n'Abayisirayiri bona ne bakwata Akani muzzukulu wa Zeera ne bye yanyaga: effeeza, ne zaabu, n'ekyambalo. Ne bamutwala ne batabani be, ne bawala be, n'ente ze n'endogoyi ze, n'endiga ze, n'eweema ye ne byonna bye yalina ne babiserengesa mu kiwonvu Akoli.

²⁵Yoswa n'abuuza Akani nti, "Lwaki watuleetera ensasagge eno? Nga bwe wakola bw'otyo olwa leero naawe onookiraba MUKAMA ky'anaakukola." Abayisirayiri bona ne bayikira Akani, n'abaana be n'ebintu bye ne babakuba amayinja ne babatta era ne babakumako omuliro.

²⁶Ne balyoka babatumako amayinja, n'okutuusa kaakano entuumu y'amayinja eyo gagadde ekyaliwo. MUKAMA n'alekera awo okukambuwalira Abayisirayiri, ekiwonvu mwe babattira kyekyava kiyitibwa Akoli n'okutuusa kaakano.

Yoswa 8

Enteekateeka y'okufufuggaza ekibuga Ayi

¹ MUKAMA n'agamba Yoswa nti, "Totya era tokenjentererwa, ddira abasajja bona abalwanyi mulumbe ekibuga Ayi kubanga mbawadde obuwanguzi ku kyo. Kabaka, n'abantu be, ne byonna ebiri mu kibuga Ayi mbibawadde.

²Ayi ne kabaka waakyo mu bayise nga bwe mwakola Yeriko, omunyago gwonna okuva mu Ayi ngubawadde. Mwekukume muteegere emabega w'ekibuga."

³Yoswa n'asituka n'eggye lyonna okulumba Ayi, n'alondamu abasajja abalwanyi abazira nnamige emitwalo esatu n'abasindika kiro okulumba Ayi.

⁴N'abakuutira nti, "Mugende mwekukume kumpi n'ekibuga era muteegere abantu baamu emabega waakyo. Temugenda wala nakyo mwenna mube beetegefu.

⁵Nze n'abalwanyi abalala tujja kwolekera ekibuga, bwe banaatufubutula ng'olulala, tujja kuddukira ddala

⁶tubatwalirize ewala okuva ku kibuga, tubalowoozese nti, tubadduse. Ffe tujja kuddukira ddala tubabuleko.

⁷Olwo mulyoke mufubutuke gye mwekwese, muwambe ekibuga kubanga MUKAMA ajja kukibawa mukiwangule.

⁸Kasita mukiyingira nga mukikumako omuliro. Mukole nga MUKAMA bw'alagidde. Ebyo bye mbakuutidde."

⁹Yoswa n'abasindika ne bagenda beekweka wakati wa Beseri ne Ayi ebugwanjuba w'ekibuga Ayi. Ekiro ekyo Yoswa yakimala n'Abayisirayiri abalala.

Ekibuga Ayi kiwambibwa

¹⁰Yoswa yakeera nnyo mu makya ne yeekebejja abalwanyi be, oluvannyuma ye n'abakulembeze b'Abayisirayiri ne boolekera Ayi.

¹¹Abasajja bona abalwanyi ne basemberera ekibuga era ne bakuinjaanira mu maaso g'ekibuga Ayi mu bukiikkono bwakyo, ng'ekiwonvu kye kibaawula.

¹²Yoswa n'addiria abalwanyi ng'enkumi ttaano ne bateegera wakati wa Beseri ne Ayi ebuvanjuba w'ekibuga.

¹³Ekibinja ky'abalwanyi ekisinga obunene ne kikuinjaanira mu bukiikkono w'ekibuga ate ekibinja ekizibizi ne kikuinjaanira ebugwanjuba w'ekibuga. Naye ye Yoswa ekiro ekyo yasula mu kiwonvu.

¹⁴Mu makya kabaka wa Ayi n'abantu be olwalengera Abayisirayiri ne bafubutuka okugenda okubalwanyisa awo okwolekera Alaba, naye tebaamanya nti waaliwo Abayisirayiri abalala abaali babeekwekeredde emabega w'ekibuga.

¹⁵Yoswa n'ekibinja ky'Abayisirayiri be yali nabo ne beefuula ng'abawanguddwa ne badduka nga boolekedde eddungu.

¹⁶Abantu bona abaali mu kibuga ne bakooowolwa okugoba Abayisirayiri, ne babagobera ddala era ne babawereekereza wala nnyo n'ekibuga.

¹⁷Tewali musajja n'omu yasigala mu Ayi oba Beseri, ekibuga kyonna baaleka kiggule nga bagenze okugoba Abayisirayiri.

¹⁸MUKAMA n'agamba Yoswa nti, "Galula omuwunda gwo ng'ogwolekeza Ayi, kubanga ojja kukiwangula." Bw'atyo Yoswa n'agalula omuwunda gwe eri Ayi.

¹⁹Amangwago ng'agaludde omuwunda abaali beekwese ne bafubutukayo ne besogga ekibuga era amangwago ne bakikoleeza omuliro.

²⁰Abasajja b'omu Ayi bagenda okukebuka ng'ekibuga kyabwe kinyooka omukka nga tebakyasobola kudda mabega wadde okugenda mu maaso.

²¹Yoswa n'abasajja be bwe baalaba nga bannaabwe beesozze ekibuga era ne bakyokya, kwe kukyukira abaali babagoba ne babatta ebitagambika.

²²Abayisirayiri abaayokya ekibuga nabo ne bavaayo ne bafuumbikiriza abasajja b'omu Ayi ne babatta obutalekaawo n'omu.

²³Naye ye kabaka w'e Ayi baamuwamba ne bamuleetera Yoswa.

Okutirimbula kwa bannakibuga b'omu Ayi

²⁴Abayisirayiri bwe baamala okutta abantu b'omu Ayi abaali babagoberedde mu ddungu, ne balyoka bakomawo mu kibuga kya Ayi ne batta abantu bona abaakirimu.

²⁵Abasajja n'abakazi abattibwa ku olwo bona baali omutwalo gumu mu enkumi bbiri.

²⁶Yoswa bwe yagalula omuwunda gwe okugwolekeza ekibuga Ayi teyagussa wansi okutuusa ng'abaamu bona bamaze okuzikirizibwa.

²⁷Ente n'ebintu ebirala bye baasanga mu kibuga, Abayisirayiri ne babitwala okuba omunyago gwabwe nga MUKAMA bwe yakuutira Yoswa.

²⁸Yoswa n'ayokya Ayi era ne kifuuka kifunvu ne leero.

²⁹Ate n'atta kabaka wa Ayi n'amuwanika ku muti okutuusa akawungeezi lwe baawanulayo omulambo gwe ne bagusuula awo ku wankaaki w'ekibuga ne bagutuumako entuumu y'amayinja era ekyaliyo ne kaakano.

Ekyoto kizimbwa ku lusozi Ebali

³⁰Oluvannyuma Yoswa n'azimbira MUKAMA Katonda wa Isirayiri, ekyoto ku lusozi Ebali.

³¹Nga Musa omuweereza wa MUKAMA bwe yakuutira Abayisirayiri era nga bwe kyawandiikibwa mu kitabo ky'amateeka ga Musa, "Ekyoto eky'amayinja agataabajjibwa muntu ng'akozesa ekyuma." Bwe kyaggwa ne batandika okukiweerako MUKAMA ebiweebwayo ebyokebwa n'ebiweebwayo olw'emirembe.

³²Era n'awandiikira eyo ku mayinja mu maaso g'Abayisirayiri bona, amateeka Musa ge yasooka okuwandiikira abaana ba Isirayiri.

³³Abayisirayiri bona n'abakulembeze baabwe, abalamuzi, n'abakungu ne bannaggwanga bona ab'omu Isirayiri ne bayimirira eruuyi n'eruuyi w'Essanduuko okwolekera bakabona Abaleevi abaasitulanga Essanduuko y'Endagaano ya MUKAMA. Ne beegabanyaamu, ekitundu ekimu ne bayimirira mu maaso g'olusozi Gerizimu, ate abalala ne bayimirira mu maaso g'olusozi Ebali, nga Musa omuddu wa MUKAMA bwe yabalagira mu kusooka nti, "Kibagwanidde okusabira Abayisirayiri omukisa."

³⁴Oluvannyuma Yoswa n'abasomera ebigambo byonna eby'omu mateeka, emikisa n'ebikolimo nga byonna bwe byawandiikibwa mu Kitabo ky'Amateeka.

³⁵Tewali kigambo na kimu Musa kye yalagira, Yoswa ky'ataasomera Bayisirayiri bona, abaali bakuinjaanye abasajja n'abakazi n'abaana abato ssaako ne bannaggwanga be baabeeranga nabo.

Yoswa 9

Ab'e Gibyoni Basala Olukwe

¹ Bakabaka baamawanga gonna agaali emitala w'omugga Yoludaani ku nsozi ne mu bikko ne ku lubalama lw'ennyanja ennene okwolekera Lebanooni; omwo nga mwe muli Abakiiti, n'Abamoli, n'Abakanani, n'Abaperezi, n'Abakiivi, n'Abayebusi bona bwe baawulira ebibaddewo

² ne beekobaana okulwana ne Yoswa n'Abayisirayiri.

³ Naye abatuuze b'omu Gibyoni bwe baawulira Yoswa ky'akoze Yeriko ne Ayi

⁴ ne basala amagezi ne bateekateeka emmere n'eb yokunywa ne babissa mu bisawosawo ebikadde ebitungiriretungirire ne babiteeka ku ndogoyi zaabwe, ne bambala ebigoye ebiyulifuyulifu

⁵ n'engatto entungirire, emmere yaabwe yonna yali nkalu ate nga yakukula.

⁶ Ne bagenda eri Yoswa mu lusiisira e Girugaali ne bamugamba wamu n'Abayisirayiri nti, "Ffe tuva mu nsi yeewala, twagala tukole nammwe endagaano."

⁷ Naye Abayisirayiri ne bagamba Abakiivi nti, "Mmwe abatabeera mu ffe tukola tutya nammwe endagaano?"

⁸ Ne baddamu nti, "Ffe tuli baddu bo." Yoswa n'abagamba nti, "Mmwe baani era muva wa?"

⁹ Ne baddamu nti, "Tuzze lwa MUKAMA Katonda wammwe; twawulira byonna bye yakola e Misiri,

¹⁰ era n'ebyo bye yakola bakabaka ababiri Abamoli abaabeeranga emitala wa Yoludaani, Sikoni kabaka w'e Kesuboni ne Ogi kabaka we Basani abaabeeranga mu Asitaloosi.

¹¹ Abakulembeze n'abantu b'ewaffe bona beebaatugamba nti, 'Mwesibire entanda mugende musisinkane Abayisirayiri mubagambe nti, "Ffe tuli baddu bammwe kale tukole nammwe endagaano."

¹² Kale laba emmere yaffe eno we twaviira eka ng'ekyayokya naye olw'olugendo oluwanvu kaakano yiino yonna nkalu era ekukudde n'okukula.

¹³ Ensawo z'omwenge zino ez'amaliba zaali mpya era nga zijjudde omwenge, naye kaakano laba n'okwabika zaabise; ebyambalo n'engatto zaffe byonna byabise olw'olugendo oluwanvu lwe tutambudde."

¹⁴ Abayisirayiri, awatali kumala kubuuza eri MUKAMA, ne bakkiriza okulya ku mmere y'abatambuze bano.

¹⁵Yoswa n'abakulembeze b'Abayisirayiri ne bakola nabo endagaano y'emirembe era ne beerayirira obutabakolako kabi konna.

Ab'e Gibyoni Babonerezewa

¹⁶Nga wayiseewo ennaku ssatu ng'endagaano ewedde okukola, Abayisirayiri ne bakivumbula ng'abantu abo baliraanwa baabwe.

¹⁷Abayisirayiri ne bagenda okunoonyereza, ku lunaku olwokusatu ne batuuka mu bibuga by'abantu bano: Gibyoni, ne Kefira, ne Beroosi ne Kiriyasuyalimu.

¹⁸Naye Abayisirayiri tebatta bantu bano kubanga abakulembeze baabwe baali baamala dda okwerayirira mu linnya lya MUKAMA Katonda wa Isirayiri obutabatta. Abayisirayiri bona ne beemulugunyiza abakulembeze baabwe.

¹⁹Naye bo abakulembeze ne bakakata nti, "Twamala dda okwerayirira mu maaso ga MUKAMA Katonda wa Isirayiri, tetuyinza kubatta.

²⁰Tetuteekwa kubatta kubanga twalayira obutakikola, singa tukikola obusungu bwa MUKAMA bujja kutubuubuukirako."

²¹Abakulembeze b'Abayisirayiri ne bagamba nti, "Temubatta." Bwe batyo ne bafuuka baakwasanga nku era n'okukimanga amazzi g'Abayisirayiri ng'abakulembeze bwe babalagira.

²²Yoswa n'ayita abantu abo n'ababuuza nti, "Naye lwaki mwatulimba nti muli b'ewala, so nga ate muli baliraanwa baffe?

²³Kale nno kaakano mukolimiddwa, munaabeeranga baddu, baakwasanga nku era n'okukimanga amazzi mu nnyumba ya Katonda wange."

²⁴Yoswa ne bamuddamu nti, "Abaddu bo kino twakikola lwa kubanga twawulira nti, MUKAMA Katonda wo yalagira omuddu we Musa okubawa ensi eno era n'okuzikiriza bona abagibeeramu, bwe tutyo ne tutya nnyo ne twagala okuwonya obulamu bwaffe kye kyatukozeseza ekintu kino.

²⁵Naye tuutuno kaakano tuli mu mukono gwo gw'omanyi eky'okutukolera."

²⁶Bw'atylo Yoswa n'awonya abantu bano mu mukono gw'Abayisirayiri, ne batabatta.

²⁷Naye okuva olwo n'abafuula baakwasanga nku n'okukimiranga Abayisirayiri amazzi, era n'okuweerezanga ku kyoto kya MUKAMA mu kifo MUKAMA ky'anaalondanga okukiteekamu. Era bwe batyo bwe bakola ne leero.

Yoswa 10

Abamoli Bawangulwa

¹Adonizedeki kabaka wa Yerusaalemi bwe yawulira nga Yoswa awambye Ayi era ng'akizikiririzza ddala nga bwe yakola Yeriko ne kabaka waayo, era bwe

yawulira nti abantu b'omu Gibyoni bakoze endagaano y'emirembe n'Abayisirayiri era nga kaakano babeera nabo,

²Adonizedeki n'atya nnyo kubanga Gibyoni kyali kibuga gagadde ng'ebibuga bya bakabaka bwe byali, nga kisingira ddala Ayi ate nga n'abasajja baamu bakirmaanyi.

³Bw'atyo Adonizedeki kabaka wa Yerusaalemi n'atumira bakabaka bano: Kokamu ow'e Kebbulooni, ne Piramu ow'e Yalamusi, ne Yafiya ow'e Lakisi ne Debiri ow'e Eguloni n'abagamba nti,

⁴“Mujje munziruukirire tuzikirize ekibuga Gibyoni kubanga abantu baamu bakoze endagaano y'emirembe ne Yoswa n'Abayisirayiri.”

⁵Bwe batyo bakabaka abataano Abamoli, n'ow'e Yerusaalemi, n'ow'e Kebbulooni, n'ow'e Yalamusi, n'ow'e Lakisi n'owe Eguloni ne beekobaana ne bayungula amaggye gaabwe ne bagakulumulula ne balumba Gibyoni.

⁶Abasajja b'omu Gibyoni ne batumira Yoswa mu lusiisira e Girugaali ne bamugamba nti, “Totulekulira basajja bo, yanguwako otudduukirire kubanga bakabaka bona Abamoli ababeera eyo mu gasozi beekobaanye okututabaala.”

⁷Bw'atyo Yoswa n'ava e Girugaali n'abasajja be abalwanyi ba nnamige.

⁸MUKAMA n'agamba Yoswa nti, “Tobatya kubanga bona mbagabudde mu mukono gwo, teri n'omu ku bo anaalam.”

⁹Yoswa n'abasajja be ne bakeesa obudde nga batambula okuva e Girugaali ne balyoka bagwa ku b'Amoli ekiyiifuyiifu.

¹⁰MUKAMA n'abaleetera okutya mu maaso g'Abayisirayiri ne babatta olutta lunene nnyo e Gibyoni ne babafubutula okubambusa e Besukolooni, ne bagenda nga babatta okuyitira ddala e Azeka okutuuka e Makkeda.

¹¹Bwe baali badduka Abayisirayiri nga bavuunuka Besukolooni, MUKAMA n'abasulako amayinja amanene ag'omuzira okutuukira ddala mu Azeka; abaafa omuzira ne baba bangi okusinga n'abattibwa Abayisirayiri.

Enjuba Esikattira

¹²Yoswa n'agamba MUKAMA ku lunaku olwo Abayisirayiri lwe battirako Abamoli, nga n'Abayisirayiri bona bawulira nti, “Gewe enjuba, yimirira butengerera waggulu wa Gibyoni, naawe omwezi kola bw'otyo waggulu w'ekiwonvu Ayalooni.”

¹³Enjuba n'omwezi ne bikola nga bwe babiragidde okutuusa Abayisirayiri lwe baamala okuseseggula abalabe baabwe. Bino byonna byawandiikibwa mu kitabo kya Yasali. Enjuba n'eyimirira butengerera ku ggulu n'eteva mu kifo okumala olunaku lulamba.

¹⁴Tewali lunaku lwali lubadde nga luno, MUKAMA okuwulira omuntu obwenkaniddaawo; MUKAMA yalwanirira nnyo Isirayiri.

¹⁵Oluvannyuma lw'ebyo Yoswa n'Abayisirayiri ne bakomawo ne basiisira e Girugaali.

¹⁶Bakabaka bali abataano ne badduka ne beekukuma mu mpuku e Makkeda.

¹⁷Ne bagamba Yoswa nti, "Bakabaka abataano bazuuliddwa, beekwese mu mpuku."

¹⁸Yoswa n'alagira nti, "Muyiringise agayinja aganene mugateeke ku mumwa gw'empuku era mufuneyeo n'abasajja bagikuume;

¹⁹naye mmwe abalwanyi temubeerawo wabula mugobe abalabe bammwe, temubaganya kuyingira mu bibuga byabwe, kubanga ebyo MUKAMA Katonda wammwe abibawadde."

²⁰Awo Yoswa n'Abayisirayiri bwe baamala okutta abalabe baabwe olutta ssinziggu olubamalirawo ddala, abo abaali basigaddewo baddukira mu bibuga ebiriko ebigo,

²¹olwo abantu bona ne bakomawo mirembe eri Yoswa mu lusiisira e Girugaali. Teri muntu yaddayo kwogerera Bayisirayiri mafuukuule.

²²Oluvannyuma Yoswa n'abagamba nti, "Mugguleewo omumwa gw'empuku mundeetera bakabaka abo abataano."

²³Ne bakola nga bwalagidde ne bamuleetera kabaka w'e Yerusaalemi, n'ow'e Kebbulooni, n'ow'e Yalamusi, n'ow'e Lakisi n'ow'e E guloni.

²⁴Bwe baabamuleetera, Yoswa n'akoowoola Abayisirayiri bona, n'alagira abaduumizi b'eggye abaali naye nti, "Musembere wano kumpi, mulinnye ku nsingo za bakabaka bano." Nabo ne basembera kumpi ne bakola nga bw'abalagidde.

²⁵Yoswa n'abagamba nti, "Temutya wadde okuterebuka, mube n'amaanyi era n'obuvumu kubanga eno y'engeri MUKAMA gy'anaakola abalabe bammwe be mulwana nabo."

²⁶Yoswa bwe yamala okwogera ebyo n'addir bakabaka bali n'abatta, emirambo gyabwe n'agiwanika buli gumu ku muti okutuusiza ddala akawungeezi.

²⁷Enjuba bwe yamala okugwa Yoswa n'alagira emirambo ne giwanulwa ku miti ne gisuulibwa mu mpuku bakabaka bano mwe basooka okwekukuma, ne bayiringisa agayinja aganene ne bagasaanikira ku mumwa gw'empuku n'okutuusa kaakano amayinja ago gakyaliko.

Abamoli Bazikiririzibwa Ddala

²⁸ Ku lunaku olwo Yoswa n'alumba Makkeda n'akizikiriza ne kabaka waayo n'amuttisa obwogi bw'ekitala, abaayo bona n'abazikiriza, kye yakola kabaka w'e Yeriko era kye yakola n'ow'e Makkeda.

²⁹ Yoswa n'Abayisirayiri bona ne bava e Makkeda, ne bagenda e Libuna ne bakizinda,

³⁰ era nakyo MUKAMA n'akibawanguza, n'atta abaakirimu bona n'obwogi bw'ekitala, tewali n'omu gwe yalekawo. Kye yakola kabaka we Yeriko era kye yakola n'ow'e Libuna.

³¹ Yoswa n'Abayisirayiri ne bava e Libuna ne bazinda Lakisi, ne bakyetooloola ne bakikuba.

³² Ku lunaku olwokubiri MUKAMA n'akibawanguza, ne bazikiriza n'ekitala buli muntu yenna eyakirimu era nga bwe baakola e Libuna.

³³ Kolamu kabaka w'e Gezeri n'agezaako okudduukirira Lakisi oyo naye Yoswa n'amutta era n'atalekaawo yadde n'omu ku bantu be.

³⁴ Yoswa n'Abayisirayiri bona bwe baava e Lakisi ne bagenda e Eguloni, ne bakyetooloola kyonna ne bakikuba.

³⁵ Ku lunaku olwo lwennyini ne bazikiriza n'obwogi bw'ekitala buli eyakirimu nga bwe baakola Lakisi.

³⁶ Yoswa n'Abayisirayiri bona ne bava mu Eguloni ne bazinda Kebbulooni,

³⁷ ne bakikuba; ne bazikiriza n'ekitala abantu baayo bona era ne kabaka waabwe n'obubuga bwamu bwonna nga bwe baakola mu Eguloni.

³⁸ Yoswa n'Abayisirayiri bona ate ne bawetamu ne baddayo e Debiri ne bakikuba.

³⁹ Ne bakiwamba ne bazikiriza n'ekitala kabaka waakyo n'abantu baakyo bona n'obubuga bwakyo bwonna, era nga bwe baakola e Kebbulooni ne Libuna bwe baakola ne Debiri.

⁴⁰ Bw'atyo Yoswa n'awangula ensi eyo yonna ey'agasozi, n'ebiwonvu, n'ensenyi ne bakabaka baayo bona, tewali kiramu na kimu kye yaleka nga MUKAMA Katonda wa Isirayiri bwe yamulagira.

⁴¹ Yoswa n'awangulira ddala okuva e Kadesubanea okutuuka e Gaaza mu nsi yonna ey'e Goseni okutuukira ddala e Gibyoni.

⁴² N'awamba bakabaka bano bona n'ensi zaabwe mu lulumba lumu lwokka kubanga MUKAMA Katonda wa Isirayiri yalwanirira Isirayiri.

⁴³ Awo Yoswa n'Abayisirayiri bona ne bakomawo mu lusiisira e Girugaali.

Yoswa 11

¹ Awo Yabini kabaka w'e Kazoli bwe yakimanya, n'atumya Yobabu kabaka w'e Madoni n'eri kabaka w'e Simuloni n'eri kabaka w'e Akusafu,

² ne bakabaka abaali mu bukiikkono mu nsi ey'ensozi, ne mu Alaba mu bukiikkaddyo e Kinnerosi, ne mu nsenyi, ne mu nsozi ez'e Doli ku luuyi olw'ebugwanjuba.

³ N'atumya Abakanani ebuvanjuba n'ebugwanjuba, n'Abamoli, n'Abakiiti n'Abaperezi, n'Abayebusi mu nsi ey'ensozi, n'Abakiivi wansi wa Kerumooni mu nsi ey'e Mizupa.

⁴ Ne bajja, n'amaggye gaabwe gonna, nga bangi nnyo nga bali ng'omusenya gw'enyanja, era ne bajja n'embalaasi nnyingi nnyo n'amagaali mangi nnyo.

⁵ Awo bakabaka bano bona ne beegatta ne bakuba olusiisira olwa awamu ku nzizi ez'e Meromu, balwanyise Isirayiri.

Olutalo Iwe Meromu

⁶ Awo MUKAMA n'agamba Yoswa nti, "Tobatya kubanga obudde nga bwe buti enkyo nzija kubawaayo bona eri Isirayiri, bafumitibwe, battibwe, embalaasi muziteme enteega n'amagaali gookebwe."

⁷ Awo Yoswa n'abalwanyi be bona ne balumba abalabe ku nzizi ez'e Meromu.

⁸ MUKAMA n'abawaayo mu mukono gwa Isirayiri ne babawangula ne babagobera ddala, okubatuusa mu Sidoni ekinene ne ku Misrefosumayimu, ne ku kiwonvu kye Mizupa ebuvanjuba, ne babazikiririza ddala obutalekaawo n'omu.

⁹ Yoswa n'abakolako nga MUKAMA bwe yamulagira, embalaasi zaabwe nazitema enteega, n'amagaali gaabwe n'agookya omuliro.

¹⁰ Mu kiseera ekkyo Yoswa n'addako emabega n'awamba Kazoli, kabaka waakyo n'amutta n'ekitala kubanga emabegako Kazoli kye kyali ekitebe ky'obwakabaka obwo bwonna.

¹¹ Era ne batta buli muntu yenna eyakirimu ne watasigalawo n'omu ne Kazoli n'akyokya omuliro.

¹² Yoswa n'awamba ebibuga ebyo byonna ne bakabaka baabyo, n'abatta n'ebitala n'abazikiririza ddala nga Musa omuweereza wa MUKAMA bwe yalagira.

¹³ Okuggyako Kazoli, ebibuga ebirala byonna ebyali bizimbiddwa ku bifunvu, Yoswa teyabyokya.

¹⁴ Abaana ba Isirayiri ne beetwalira omunyago gwonna ogw'ebibuga bino n'ente, era ne batta buli muntu yenna ne babazikiriza awatali kusigala n'omu assa omukka.

¹⁵Nga MUKAMA bwe yalagira omuddu we Musa, bw'atyo Musa bwe yalagira Yoswa era ne Yoswa bwe yakola; talina kye yaleka takoze ku byonna MUKAMA bye yalagira Musa.

¹⁶Bw'atyo Yoswa n'awangula ensi yonna, n'ensi ey'ensozi n'ey'obugwanjuba yonna, n'ekitundu kya Goseni kyonna, ensi ey'ensenyi ne Alaba, n'ensi yaayo yonna ey'ensenyi.

¹⁷Okuva ku lusozi Kalaki, okulinnya okutuuka e Seyiri, n'okutuuka ku Baalugadi mu kiwonvu kya Lebanooni ekiri wansi w'olusozi Kerumooni ne bakabaka baayo bona n'abawamba, n'abafumita, n'abatta.

¹⁸Yoswa n'alumba n'alwana ne bakabaka abo bona okumala ebbanga.

¹⁹Tewali kibuga kyakola ndagaano ya mirembe n'abaana ba Isirayiri okuggyako Abakiivi abaali mu Gibyoni; byonna baabilwanyisa ne babiwangula,

²⁰kubanga Katonda yennyini ye yakakanyaza emitima gyabwe balwane ne Isirayiri, alyoke abazikiririze ddala, abamalirewo ddala awatali kubakwatirwa kisa, nga MUKAMA bwe yalagira Musa.

²¹Mu kiseera ekyo Yoswa n'agenda n'azikiriza n'amalawo Abanaki mu nsi ey'ensozi, mu Kebbulooni, ne mu Debiri, ne mu Anabu, ne mu nsi yonna ey'ensozi eya Yuda, ne mu nsi yonna ey'ensozi eya Isirayiri. Yoswa n'abazikiririza ddala, bona n'ebibuga byabwe.

²²Tewali Banaki baasigalawo mu nsi y'abaana ba Isirayiri, okuggyako mu Gaza, ne mu Gaasi, ne mu Asudodi, mwe mwasigalako abamu.

²³Yoswa bw'atyo bwe yatwala ensi yonna nga MUKAMA bwe yalagira Musa, n'agiwa abaana ba Isirayiri okuba omugabo nga bwe yayawulibwa mu bika byabwe. Olwo ensi n'ewummula entalo.

Yoswa 12

Bakabaka Abaawangulwa

¹Bano be bakabaka b'ensi Abayisirayiri be baawangula era bannyini nsi Abayisirayiri gye baatwala eri ebuvanjuba bwa Yoludaani, okuva ku kiwonvu ekya Alunoni okutuuka ku lusozi Kerumooni, ne Alaba yonna ku luuyi olw'ebuvanjuba.

²Sikoni kabaka w'Abamoli eyafuga mu Kesuboni, okuva ku Aloweri, ekiri ku mabbali g'ekiwonvu ekya Alunoni, n'ekibuga ekiri wakati mu kiwonvu, n'ekitundu ekya Gireyaadi, okutuuka ku mugga Yaboki, y'ensalo y'abaana ba Amoni; kino ng'ogasseecko n'ekitundu Gireyaadi,

³ ne Alaba okutuuka ku nnyanja Kinnerosi, ku luuyi olw'ebuvanjuba, ne ku Nnyanja ya Araba y'Ennyanja ey'Omunnyo ku luuyi olw'ebuvanjuba mu kkubo ery'e Besu Yesimosi, ne ku luuyi olw'obukiikaddyo wansi w'olusozi Pisuga,

⁴ ne ku nsalo ya Ogi kabaka w'e Basani, omu ku baasembayo ku ba Balefa eyafuganga mu Asutaloosi ne mu Ederei.

⁵ Era ye yali afuga olusozi Kerumooni ne Saleka ne Basani yenna okutuuka ku nsalo ey'Abagesuli, n'Abamaakasi, n'ekitundu kya Gireyaali, ensalo ya Sikoni kabaka we Kesuboni.

⁶ Musa omuweereza wa MUKAMA n'abaana ba Isirayiri babawangula, era ensi yaabwe Musa omuweereza wa MUKAMA n'agiwa Abalewubeeni, n'Abagaadi n'ekitundu ky'ekika kya Manase.

⁷ Bano be bakabaka b'ensi, Yoswa n'abaana ba Isirayiri be baawangula ku luuyi lw'ebugwanjuba olwa Yoludaani okuva ku Baalugadi mu kiwonvu kya Lebanooni okutuuka ku lusozi Kalaki okwambuka okutuuka e Seyiri. Yoswa yagiwa ebika bya Isirayiri bigigabane nga bwe byali byayawulwamu.

⁸Mu nsi ey'ensozi, ne mu nsi ey'ensenyi ne mu Alaba ne ku bitundu ebya wansi ku nsozi, ne mu ddungu ne mu nsi ey'obugwanjuba mu Negevu, ensi ez'Abakiiti, n'Abamoli, n'Abakanani, n'Abaperezi, n'Omukiivi, n'Omuyebusi.

⁹ Kabaka w'e Yeriko	omu,
ne kabaka w'e Ayi ekiriraanye Beseri	omu,
¹⁰ ne kabaka w'e Yerusaalemi	omu,
ne kabaka w'e Kebbulooni	omu,
¹¹ ne kabaka w'e Yalamusi	omu,
ne kabaka w'e Lakisi	omu,
¹² n'ow'e Egulooni	omu,
n'ow'e Gezeri	omu,
¹³ ne kabaka w'e Debiri	omu,
n'ow'e Gederi	omu,

¹⁴ n'ow'e Koluma	omu,
n'ow'e Yaladi	omu,
¹⁵ n'ow'e Libuna	omu,
n'ow'e Adulamu	omu,
¹⁶ n'ow'e Makkeda	omu,
n'ow'e Beseri	omu,
¹⁷ ne kabaka ow'e Tappua	omu,
n'owe Keferi	omu,
¹⁸ n'ow'e Afeki omu n'ow'e Lasaloni	omu,
¹⁹ n'ow'e Madoni	omu,
n'ow'e Kazoli	omu,
²⁰ ne kabaka w'e Simuloni Meroni	omu,
ne kabaka w'e Akusafu	omu,
²¹ n'ow'e Taanaki	omu,
n'ow'e Megiddo	omu,
²² n'ow'e Kedesi	omu,
ne kabaka w'e Yokuneamu ku Kalumeeri	omu,
²³ ne kabaka w'e Doli ku lusozi Doli	omu,
ne kabaka w'e Goyiyimu mu Girugaali	omu,
²⁴ n'ow'e Tiruza	omu.

Bonna awamu bakabaka amakumi asatu mu omu.

Yoswa 13

Amawanga Agaali Tegannawangulwa

¹ Awo Yoswa bwe yali ng'akaddiye ng'amaze emyaka mingi. MUKAMA n'amugamba nti, "Okaddiye omaze emyaka mingi naye, wakyaliwo ensi nnyingi nnyo ez'okuwangula.

² "Zino z'ensi ezikyaliwo: "ensi yonna ey'Abafirisuuti n'Abaseguli

³ okuva ku mugga Sikoli oguli ebuvanjuba wa Misiri, n'okwambukira ddala ku nsalo y'e Ekuloni emanyiddwa nga ey'Abakanani, eriyo abafuzi bataano ab'Abafirisuuti, ow'e Gaza, n'ow'e Asudodi, n'ow'e Asukulooni, n'ow'e Gaasi n'ow'e Ekuloni awamu n'Abavi.

⁴ Okuva mu bukiikaddyo ensi yonna ey'Abakanani, ne Meyala ekya Basidoni, okutuuka ku Afiki, ku nsalo ey'Abamoli,

⁵ n'ensi y'Abagebali, ne Lebanooni yonna, ne ku luuyi olw'ebuvanjuba, n'okuva ku Baalugadi wansi w'olusozi Kerumooni okutuuka w'oyingirira e Kamasi.

⁶ "N'abantu bona ab'omu nsozi za Lebanooni okutuuka ku Misurefsumayima, be Basidoni bona; nze kennyini ndibagoba mbaggye mu maaso g'abaana ba Isirayiri. Kakasa nti ensi eno ogigabira abaana ba Isirayiri nga bwe nakulagira.

⁷ Noolwekyo ojja kugigabanya ng'omugabo eri ebika omwenda era n'ekitundu ky'ekika kya Manase."

Ensi Ebuvanjuba bwa Yoludaani

⁸ Ekitundu ekirala ekya Manase, n'Abalewubeeni n'Abagaadi ne baweebwa omugabo gwabwe, Musa bwe yabawa emitala wa Yoludaani ku luuyi olw'ebuvanjuba nga Musa omuweereza wa MUKAMA bwe yabagabira.

⁹ Okuva ku Aloweri ekiri ku mabbali g'ekiwonvu ekya Alunoni, n'ekibuga ekiri wakati mu kiwonvu, n'olusenyi lwonna olwa Medeba okutuuka ku Diboni;

¹⁰ n'ebibuga byonna ebya Sikoni kabaka w'Abamoli, eyafuga mu Kesuboni, okutuuka ku nsalo y'abaana ba Amoni.

¹¹ Era kyatwaliramu Gireyaadi, n'ekitundu ky'Abagesuli, n'Abamaakasi, n'olusozi lwonna Kerumooni ne Basani yonna okutuukira ddala ku Saleka.

¹² Obwakabaka bwonna obwa Ogi mu Basani, eyali afuga mu Asutaloosi ne mu Ederei, ye yali asigaddewo yekka ku Balefa, bwawangulwa Musa n'atwala ensi yaabwe.

¹³ Naye abaana ba Isirayiri tebaawangula Bagesuli wadde Abamaakasi, bwe kityo Abagesuli n'Abamaakasi ne babeera wakati mu bo ne leero.

¹⁴ Ekika kya Leevi kyokka Musa ky'ataawa mugabo, ebiweebwayo ebyokebwa n'omuliro eri MUKAMA Katonda wa Isirayiri, gwe mugabo gwe nga bwe yamugamba.

Ensi ya Lewubeeni

¹⁵ Musa yagabira ekika ky'abaana ba Lewubeeni ng'enju zaabwe bwe zaali:

¹⁶ Ensalo yaabwe ng'eva ku Aloweri, ekiri ku mabbali g'ekiwonvu eky'Alunoni, n'ekibuga ekiri wakati mu kiwonvu, n'olusenyi lwonna oluliraanye Medeba,

¹⁷ ne Kesuboni, n'ebibuga byakyo byonna ebiri mu lusenyi, ne Diboni ne Bamosi Baali, ne Besubaalumyoni;

¹⁸ ne Yakazi, ne Kedemosi, ne Mefaasi;

¹⁹ ne Kiriyasayimu, ne Sibuma, ne Zeresusakali ku lusozi olw'Ekiwonvu,

²⁰ ne Besupyoli ne Pisuga awayambukirwa ku lusozi, ne Besu Yesimosi,

²¹ n'ebibuga byonna eby'omu lusenyi, n'obwakabaka bwonna obwa Sikoni kabaka w'Abamoli, eyafugira mu Kesuboni, Musa gwe yawangula awamu n'abaami abaali bafuga ab'e Midiyaani, eri ne Lekemu, ne Zuuli, ne Kuli ne Leba, n'abalangira ba Sikoni abaabeeranga mu nsi.

²² Era ne mu abo be batta n'ekitala, abaana ba Isirayiri battiramu n'omulaguzi Balamu omwana wa Byoli.

²³ Era n'ensalo y'abaana ba Lewubeeni yali omugga Yoludaani. Ebibuga n'ebyalо byamu Musa yabiwa abaana ba Lewubeeni okuba omugabo gwabwe.

Ensi y'Abagaadi

²⁴ Musa yagabira ekika kya Gaadi omugabo ng'enju zaabwe bwe zaali:

²⁵ Ettaka lyabwe lyali Yazeri, n'ebibuga byonna ebya Gireyaadi, n'ekitundu ky'ensi y'abaana ba Amoni, okutuuka ku Aloweri okumpi ne Labba,

²⁶ n'okuva e Kesuboni okutuuka ku Lamasumizupe, ne Betonimu, era n'okuva ku Makanayimu okutuuka mu nsi y'e Debiri,

²⁷ ne mu kiwonvu, Besukalamu, ne Besu Nimira, ne Sukkosi, ne Zafoni, n'ekitundu ekyasigalawo ekyobwakabaka bwa Sikoni kabaka ow'e Kesuboni, Yoludaani n'ensalo yaagwo, okutuuka ku lubalama lw'ennyanja ey'e Kinneresi emitala wa Yoludaani ku luuyi olw'ebuvanjuba.

²⁸ Eyo y'ensi eyafuuka omugabo gw'abaana ba Gaadi ng'enju zaabwe bwe zaali, ebibuga n'ebyalо byamu.

Ensi y'Abamanase

²⁹ Musa n'awa ekitundu ky'ekika kya Manase omugabo gwabwe, abaana ba Manase ne bagabirwa omugabo ng'enju zaabwe bwe zaali.

30 N'ensalo yaabwe ng'eya Makanayimu, n'eyita mu Basani n'obwakabaka bwonna obwa Ogi kabaka w'e Basani, n'ebibuga ebya Yayiri, ebiri mu Basani ebibuga nkaaga;

31 n'ekitundu ekimu ekya Gireyaadi ne Asutaloosi, ne Ederei, ebibuga eby'obwakabaka bwa Ogi mu Basani byali b'abaana ba Makiri omwana wa Manase, ekitundu eky'abaana ba Makiri ng'enju zaabwe bwe zaali.

32 Ogwo gwe mugabo Musa gwe yagaba mu nsenyi eza Mowaabu, emitala wa Yoludaani ebuvanjuba bwa Yeriko.

33 Naye ekika kya Leevi Musa teyakiwa mugabo. MUKAMA Katonda wa Isirayiri, ye mugabo gwabwe gwe yabawa, nga MUKAMA bwe yabagamba.

Yoswa 14

Okugabanya ensi ebuvanjuba bwa Yoludaani

1 Bino by'ebitundu Abayisirayiri bye baafuna ng'omugabo mu nsi y'e Kanani, Eriyazaali kabona, ne Yoswa, omwana wa Nuuni, n'emitwe gy'ennyumba eza bakitaabwe ez'ebika by'abaana ba Isirayiri bye baabagabira.

2 Emigabo baagifunanga nga bakuba kalulu nga MUKAMA bwe yalagira Musa olw'ebika omwenda n'ekitundu,

3 kubanga Musa yali agabidde ebika ebibiri n'ekitundu omugabo gwabwe emitala wa Yoludaani, naye Abaleevi bo teyabagabira;

4 kubanga abaana ba Yusufu baali bafuuse ebika bibiri, Manase ne Efulayimu, bo Abaleevi ne bataweebwa mugabo gwonna mu nsi, wabula ebibuga byokka eby'okubeeramu, n'ensiko ey'okulundiramu ebisibo byabwe n'ebintu byabwe.

5 Abantu ba Isirayiri ne bagabana ensi nga MUKAMA bwe yalagira Musa.

Kalebu Afuna Kebbulooni

6 Abantu ba Yuda ne balyoka bajja eri Yoswa e Girugaali, ne Kalebu omwana wa Yefune Omukenizi n'amugamba nti, "Omanyi MUKAMA kye yayogera ne Musa omusajja wa Katonda e Kadesubanea ekikwata ku ggwe nange.

7 Nalina emyaka amakumi ana, Musa omuweereza wa MUKAMA bwe yantuma okuva e Kadesubanea okuketta ensi, era namuleteera ekigambo nga bwe kyali mu mutima gwange.

8 Naye baganda bange be nnali nabo ne baleteera emitima gy'abantu okuggwaamu amaanyi olw'okutya, wabula nze nagoberera MUKAMA Katonda wange n'omutima gwange gwonna.

9 Era Musa yandayirira nti, 'Ensi ebigere byo kwe biririnnya, mugabo gwo n'abaana bo emirembe gyonna, kubanga ogoberedde MUKAMA Katonda wange n'omutima gwo gwonna.'

¹⁰ “Era kaakano MUKAMA ampangaazizza nga bwe yayogera emyaka gino amakumi ana okuva lwe yakigamba Musa, nga Isirayiri etambula mu ddungu. Era laba kaakano ndi wa myaka kinaana!

¹¹ Nkyalina amaanyi leero nga ge nalina Musa bwe yantuma, amaanyi ge nnina leero galinga ge nalina mu kulwana, mu kufuluma ne mu kuyingira.

¹² Kale noolwekyo mpa olusozi luno, MUKAMA lwe yayogera ku lunaku luli, kubanga wawulira ku olwo ng’Abanaki kwe baali n’ebibuga ebinene ebiriko enkomera. MUKAMA nga ye mubeezi wange, nnaabagoba nga MUKAMA bwe yayogera.”

¹³ Yoswa n’amusabira omukisa n’awa Kalebu omwana wa Yefune Omukenezi Kebbulooni okuba omugabo gwe.

¹⁴ Olusozi Kebbulooni ne lufuuka lwa Kalebu mutabani wa Yefune ne leero, kubanga yagoberera ddala MUKAMA Katonda wa Isirayiri.

¹⁵ Kebbulooni edda kyayitbwanga Kiriasualuba era Aluba ye yali omukulu asingayo mu Banaki. Olwo ensi n’eryoka ewummula n’etebaamu ntalo.

Yoswa 15

Ensalo za Yuda

¹ Omugabo gw’abaana ba Yuda ng’enju zaabwe bwe zaali bwe baakuba akalulu, baaweebwa ekitundu okutuuka ku nsalo ya Edomu, ku lukoola lwa Zini, ku nkomerero y’oluuyi olw’obukiikaddyo.

² N’ensalo yaabwe ey’oluuyi olwo okuva ku Nnyanja ey’Omunno w’eva, ku kikono ekitunudde mu bukiikaddyo;

³ n’esala wansi w’ekkubo eririnnya ku Akkulabimu n’eyita okutuuka ku Zini n’erinnya okuyita wansi wa Kadesubanea, n’eyita kumpi ne Kezulooni, n’erinnya ku Addali, n’ekyamira ku Kaluka;

⁴ n’eyita ku Azumoni n’ekoma ku mugga ogw’e Misiri, n’eryoka esibira ku nnyanja. Eno ye yali ensalo yaabwe ey’obukiikaddyo.

⁵ N’ensalo yaabwe ey’obuvanjuba yali nnyanja ey’obukiikakkono. Kyali kikono kya Yoludaani we guyiyira ku Nnyanja ey’Omunno. N’ensalo ey’obukiikakkono kyali kikono kya nnyanja Yoludaani we guyiyiramu.

⁶ N’eyambuka n’eyita ku Besukogula n’eyita ku luuyi lw’ebuvanjuba bwa Besualaba n’eyambuka okutuuka ku jjinja lya Bokani omwana wa Lewubeeni.

⁷ Era n’erinnya ku Debiri okuva mu kiwonvu Akoli, n’egenda ku luuyi olw’obukiikakkono, n’edda e Girugaali emitala w’ekkubo eryambuka ku Adummimu, ekiri emitala w’omugga mu bukiikaddyo, n’etuuka ku nsalo ku mazzi ag’e Ensemesi, n’esala n’ekoma ku Energeri. Awo n’eryoka eyita ku

kiwonvu kya Kinomu ku luuyi lw'ebugwanjuba ekyali ku nkomerero ey'ekiwonvu kya Lefayimu ku luuyi olw'obukiikkono.

⁸Awo n'eryoka eva ku kiwonvu ky'omwana wa Kinomu n'etuuka ku njegoyego za Yebusi ku luuyi olw'obukiikkaddyo ye Yerusaalemi, ne yeeyongera ku ntikko y'olusozi oluli w'okkira mu kiwonvu kya Kinomu ku luuyi olw'ebugwanjuba, ku nkomerero y'ekiwonvu kya Lefayimu mu bukiikkono;

⁹ne yeeyongera okuva ku ntikko y'olusozi n'etuuka ku luzzi olw'amazzi ga Nefutoa, ne yeeyongerayo n'etuuka ku bibuga eby'oku lusozi Efuloni, n'etuuka ku Baala, ye Kiriyasuyalimu,

¹⁰n'ewetamu okuva e Baala ku luuyi olw'ebugwanjuba n'etuuka ku lusozi Sayiri n'eyita n'etuuka ku mabbali g'olusozi Yealimu ku luuyi olw'omu bukiikkono, ye Kyesaloni, n'ekka ku Besusemesi, n'eyita ku Timuna,

¹¹n'egenda ku mabbali ag'e Ekuloni mu bukiikkono, n'ekka ku Sikkeroni n'etuuka ku lusozi Baala, n'ekoma ku Yabuneeri, ne ku nnyanja.

¹²Ensalo ey'ebugwanjuba yali Ennyanja Ennene n'olubalama lwayo. Eyo ye yali ensalo y'abaana ba Yuda ku njuyi zonna ng'enju zaabwe bwe zaali.

Omugabo gwa Kalebu

¹³Yoswa n'awa Kalebu omwana wa Yefune omugabo mu baana ba Yuda Kiriasualuba, ye Kebbulooni, ng'ekiragiro kya MUKAMA bwe kyali. Aluba ye yali kitaawe wa Anaki.

¹⁴Kalebu n'agobamu abaana abasatu aba Anaki: Sesayi ne Akimaani, ne Talumaayi, abaana ba Anaki.

¹⁵N'ava eyo n'alumba abaali mu Debiri, edda eyayitbwanga Kiriasuseferi.

¹⁶Kalebu n'agamba nti, "Anaakuba Kiriasuseferi n'akiwamba ndimuwa muwala wange Akusa amuwase."

¹⁷Osunieri omwana wa Kenazi, muganda wa Kalebu, n'akikuba, Kalebu n'amuwa Akusa muwala we amuwase.

¹⁸Awo bwe yajja gy'ali, n'amugamba asabe kitaawe ennimiro. Bwe yava ku ndogoyi ye, Kalebu n'amubuuza nti, "Kiki kyoyagala nkukolere?"

¹⁹N'addamu nti, "Nsaba onnyambe nga bwe wampa ettaka mu Negebu, ompe n'ensulo z'amazzi." Kalebu n'amuwa ensulo ez'engulu n'ez'emmanga.

Omugabo gwa Yuda

²⁰Guno gwe mugabo gw'ekika ky'abaana ba Yuda ng'enju zaabwe bwe zaali.

²¹Ebibuga ebyali bisemberayo ddala mu bukiikkaddyo mu Negebu eri ensalo ya Edomu byali, Kabuzeeri, n'e Ederei n'e Yaguli,

²²n'e Kina n'e Dimona, n'e Adada,

- ²³n'e Kedesi, n'e Kazoli, n'e Isunani,
- ²⁴n'e Zifu, n'e Teremu n'e Beyaloosi,
- ²⁵n'e Kazolukadatta, n'e Keriosukezulooni, ye Kazoli,
- ²⁶n'e Amamu n'e Sema, n'e Molada,
- ²⁷n'e Kazalugadda n'e Kesuboni, n'e Besupereti
- ²⁸n'e Kazalusuwali, n'e Beeruseba n'e Biziosia
- ²⁹n'e Baala n'e Yimu, n'e Ezemu,
- ³⁰n'e Erutoladi n'e Kyesiri n'e Koluma,
- ³¹n'e Zikulagi, n'e Madumanna, n'e Samusanna,
- ³²n'e Lebaosi, n'e Sirukimu, n'e Ayini, n'e Limmoni. Ebibuga byonna awamu amakumi abiri mu mwenda, n'ebyallo byabyo.
- ³³Era ne mu nsi ey'ensenyi Esutaoli, n'e Zola, n'e Asuna,
- ³⁴n'e Zanowa n'e Engannimu, n'e Tappua, n'e Enamu,
- ³⁵n'e Yalamusi n'e Adulamu, n'e Soko, n'e Azeka
- ³⁶n'e Saalayimu, n'e Adisaimu, n'e Gedera, n'e Gederosaimu, ebibuga kkumi na bina n'ebyallo byabyo.
- ³⁷Zenani, n'e Kadasa, n'e Migudalugadi,
- ³⁸n'e Dirani, n'e Mizupe, n'e Yokuseeri,
- ³⁹n'e Lakisi, n'e Bozukasi, n'e Eguloni,
- ⁴⁰n'e Kabboni, n'e Lamamu, n'e Kitulisi,
- ⁴¹n'e Gederosi, Besudagoni, n'e Naama, n'e Makkeda, ebibuga kkumi na mukaaga n'ebyallo byabyo.
- ⁴²Libuna n'e Eseri, n'e Asani,
- ⁴³n'e Ifuta n'e Asuna, n'e Nezibu,
- ⁴⁴n'e Keira, n'e Akuzibu, n'e Malesa, ebibuga mwenda n'ebyallo byabyo.
- ⁴⁵Ekuloni n'ebibuga byamu n'ebyallo byakyo,
- ⁴⁶okuva ku Ekuloni okutuuka ku nnyanja, ebibuga byonna ebiriraanye Asudodi n'ebyallo byabyo;
- ⁴⁷Asudodi, ebibuga byakyo n'ebyallo byakyo; Gaza, ebibuga byakyo n'ebyallo byakyo okutuuka ku mugga ogw'e Misiri, n'ennyanja ennene, n'ensalo yaayo.

48 Ne mu nsi ey'ensozi, Samiri, n'e Yattiri, n'e Soko,
49 ne Danna, ne Kiriasusanna, ye Debiri,
50 ne Anabu, n'e Esutemoa, n'e Animu,
51 n'e Goseni, n'e Koloni, n'e Giro, ebibuga kkumi na kimu n'ebyalo byabyo.
52 Alabu, n'e Duma, n'e Esani,
53 n'e Yanimu, n'e Besutappua, n'e Afeka,
54 n'e Kumuta n'e Kiriasualuba, ye Kebbulooni, n'e Zioli ebibuga mwenda
n'ebyalo byabyo.
55 Mawoni, n'e Kalumeeri, n'e Zifu, n'e Yuta,
56 n'e Yezuleeri, n'e Yokudeamu, n'e Zanoa,
57 Kaini, n'e Gibea, n'e Timuna, ebibuga kkumi n'ebyalo byabyo.
58 Kalukuli, Besuzuli, n'e Gedoli;
59 n'e Maalasi, n'e Besuanosi, n'e Erutekoni, ebibuga mukaaga n'ebyalo byabyo.
60 Kiriasubaali, ye Kiriyasuyalimu, n'e Laaba ebibuga bibiri n'ebyalo byabyo.
61 Mu ddungu: Besualaba, n'e Middini, n'e Sekaka,
62 n'e Nibusani, n'ekibuga eky'omunnyo, n'e Engedi, ebibuga mukaaga n'ebyalo
byabyo.
63 Abayebusi, be baali mu Yerusaalemi abaana ba Yuda ne batayinza
kubagobamu; Abayebusi ne babeera wamu n'abaana ba Yuda mu Yerusaalemi
n'okutuusa kaakano.

Yoswa 16

Omugabo gwa Yusufu, Efulayimu ne Manase

1 N'omugabo gw'ettaka ly'abaana ba Yusufu ne guva ku Yoludaani awali Yeriko
ku ludda olw'ebuvanjuba olw'amazzi g'e Yeriko, okutuuka mu ddungu,
n'erinnya okuva e Yeriko n'eyita mu nsi ey'ensozi n'etuuka e Beseri
2 N'eyita e Beseri okutuuka e Eruzi n'okuyita ku nsalo ey'Abaluki mu Atalosi
3 n'okukka ku luuyi olw'ebugwanjuba ku nsalo ey'Abayafuleti ku nsalo ey'e
Besukolooni eky'emmanga ku Gezeri n'ekoma ku nnyanja.
4 Bwe batyo abaana ba Yusufu: Manase ne Efulayimu ne batwala omugabo
gwabwe.

Omugabo gw'abaana ba Efulayimu

⁵ Ettaka ly'abaana ba Efulayimu ng'enju zaabwe bwe zaali eno gye lyayitanga; ku luuyi olw'ebuvanjuba ku Atalosuaddali n'okutuuka ku Besukolooni ey'Ekyengulu,

⁶ ne yeeyongera ku nnyanja ne ku Mikumesasi mu bukiakkono ne yeetooloola ku luuyi olw'ebuvanjuba ku Taanasi Siiro, n'olwebuvanjuba olw'e Yanoa,

⁷ n'ekka ku Atalosi ne ku Naala n'ekwata ku Yeriko n'etuuka ku Yoludaani.

⁸ N'eva ku Tappua n'eyita ku luuyi olw'ebugwanjuba n'etuuka ku mugga Kana n'ekoma ku nnyanja. Bino bye bitundu ekika ky'abaana ba Efulayimu bye baagabana ng'enju zaabwe bwe zaali.

⁹ Ku bino kwaliko ebibuga n'ebyalo byakwo byonna ebyaterekerwa abaana ba Efulayimu abaali mu kitundu kya Manase ebibuga byonna n'ebyalo byabwe.

¹⁰ Wabula tebaagoba Bakanani abaali mu Gezeri, baasigala wakati mu Efulayimu n'okutuusa leero nga balimu ng'abaddu nga bakola.

Yoswa 17

Omugabo gwa Manase

¹ Omugabo ne guweebwa ekika kya Manase kubanga ye yali omubereberye owa Yusufu. Makiri omubereberye wa Manase era kitaawe wa Gireyaadi yaweebwa Gireyaadi ne Basani, era yali mulwanyi muzira.

² Era emigabo ne giweeba abaana ba Manase abalala nga bwe baali bazaalibwa mu buli maka. Omugabo gw'abaana ba Abiyezeeri, n'ogw'abaana ba Kerekì n'abaana ba Asuliyeri n'ogw'abaana ba Sekemu, n'ogw'abaana ba Keferi, n'ogw'abaana ba Semida be baana bona aboobulenzi aba Manase omwana wa Yusufu ng'amaka mwe baazaalibwa bwe gaali.

³ Naye Zerokekadi mutabani wa Keferi mutabani wa Gireyaadi mutabani wa Manase teyazaala baana balenzi wabula bawala bokka era baali bayitibwa Maala ne Noowa, ne Kogula, ne Mirika ne Tiruza.

⁴ Bano baagenda eri Eriyazaali kabona ne Yoswa omwana wa Nuuni n'abakulu ne babagamba nti, "MUKAMA yalagira Musa okutuwa omugabo nga baganda baffe." Yoswa kyeyava abawa ettaka nga MUKAMA bwe yalagira. Yabawa omugabo mu baganda bakitaabwe.

⁵ Bw'atyo Manase n'afuna ebitundu kkumi ng'oggyeko ensi ya Gireyaadi ne Basani ebiri emitala wa Yoludaani,

⁶ kubanga abaana ba Manase abawala baafuna omugabo ng'abaana be abalenzi. Ensi ya Gireyaadi yaweebwa abaana ba Manase abaali basigaddewo ne bagitwala.

⁷ N'ensalo ya Manase yava ku Aseri n'etuuka ku Mikumesasi ebuvanjuba bwa Sekemu, n'eyita ku bukiikaddyo n'ekka n'etwaliramu abantu abaali mu Entappua.

⁸ Ensi ya Tappua Manase n'agitwala wabula Tappua ekibuga ekyali ku nsalo ya Manase abaana ba Efulayimu be baakigabana.

⁹ Ensalo n'ekka n'etuuka ku kagga Kana ku luuyi mu bukiikakkono obw'omugga. Bino bye bibuga bya Efulayimu ebiri mu bibuga bya Manase, naye ensalo ya Manase yali mu bukiikakkono obwa kagga n'ekoma ku nnyanja.

¹⁰ Efulayimu n'atwala oluuyi olw'omu bukiikaddyo ne Manase n'atwala oluuyi olw'omu bukiikakkono n'ensalo ye n'ekoma ku nnyanja mu bukiikakkono n'etuuka ku Aseri ate ebuvanjuba n'etuuka ku Isakaali.

¹¹ Mu nsi ya Isakaali n'eya Aseri, Manase n'atwala Besuseani n'ebibuga byakyo ne Ibuleamu n'ebibuga byakyo n'abaali mu Endoli n'ebibuga byakyo n'abaali mu Doli n'abaali mu Taanaki n'ebibuga byakyo, n'abaali mu Megiddo n'ebibuga byakyo z'ensozi essatu.

¹² Naye abaana ba Manase tebasobola kugobamu Bakanani kubanga baali bamaliridde okusigala mu nsi eyo.

¹³ Naye abaana ba Isirayiri bwe beeyongera amaanyi ne bafuula Abakanani abaddu baabwe ab'okubakozesanga emirimu, ne batabeegoberako ddala.

Okwemulugunya kw'Abaana ba Yusufu

¹⁴ Abaana ba Yusufu ne boogera ne Yoswa nti, "Lwaki ffe otuwadde omugabo gumu n'ekitundu kimu ate nga tuli kika kinene? MUKAMA atuwadde nnyo omukisa."

¹⁵ Yoswa n'abagamba nti, "Obanga muli kika kinene mugende mu nsi y'Abaperezi n'ey'Abalefa mwesaayire ekibira, ensi ey'ensozi eya Efulayimu nga bwe tebamala."

¹⁶ Abaana ba Yusufu ne bagamba nti, "Ensi ey'ensozi tetumala; ate nga Abakanani bona abali mu nsi ey'ekiwonvu n'abali mu Besuseani n'ebibuga byakyo era n'abali mu kiwonvu eky'e Yezuleeri balina amagaali ag'ebiyuma."

¹⁷ Yoswa n'ayogera eri ennyumba ya Yusufu, n'eya Efulayimu n'eya Manase nti, "Muli kika kinene era mulina amaanyi mangi temuliba na mugabo gumu gwokka,

¹⁸ naye ensi ey'ensozi eribeera yammwe, newaakubadde nga ya kibira mulikisaawa okutuuka gye kikoma, kubanga muligobamu Abakanani newaakubadde nga balina amagaali ag'ebiyuma era nga baamaanyi."

Yoswa 18

Okugabana Ettaka eryali Lisigaddewo

- ¹ Ekibiina kyonna eky'abaana ba Isirayiri ne bakuŋjaanira mu Siiro ne basimba eyo Eweema ey'Okukuŋjaanirangamu. Ensi yali mu mikono gyabwe,
- ² wabula waali wakyaliwo ebika musanvu ebya Isirayiri ebyali tebinnafunu mugabo gwabyo.
- ³ Yoswa n'agamba abaana ba Isirayiri nti, "Mulituusa ddi okulinda nga temunnafunu mugabo MUKAMA Katonda wa bajjajjammwe gwe yabawa?
- ⁴ Mulonde abantu basatu mu buli kika mbatume bayite mu nsi bagyetegereze, ng'emigabo gyabwe bwe giri era bawandiike ng'emigabo gyabwe bwe giri bakomewo bantegeeeze.
- ⁵ Baligigabanyaamu ebitundu musanvu Yuda esigale mu bitundu byayo mu bukiikaddyo n'ennyumba ya Yusufu mu bitundu byayo mu bukiikkono.
- ⁶ Nga mumaze okugabanya ensi mu bitundu musanvu mundeetera bye muwandiise mbakubire obululu mu maaso ga MUKAMA Katonda waffe.
- ⁷ Abaleevi tebalina mugabo mu mmwe kubanga obwakabona bwa MUKAMA gwe mugabo gwabwe, ne Gaadi, ne Lewubeeni n'ekitundu eky'ekika kya Manase bo baamala okuweebwa omugabo gwabwe emitala wa Yoludaani ku luuyi olw'ebuvanjuba, Musa omuweereza wa MUKAMA gwe yabawa."
- ⁸ Abantu ne bagenda okulaba ensi bw'efaanana, Yoswa n'alagira be baali batumye nti, "Mugende mutambuletambule mu nsi mugyetegereze bw'efaanana, mukomewo mbakubire obululu wano mu maaso ga MUKAMA e Siiro."
- ⁹ Awo ne bagenda ne bayita mu nsi, ne bawandiika ebitundu musanvu ebifa ku bibuga mu kitabo, ne bakomawo ewa Yoswa mu lusiisira e Siiro.
- ¹⁰ Awo Yoswa n'abakubira obululu mu Siiro mu maaso ga MUKAMA n'agabanyiza abaana ba Isirayiri ensi ng'ebitundu byabwe bwe byali.

Omugabo gwa Benyamini

- ¹¹ Awo akalulu k'ekika kya Benyamini, okusinziira ku nnyumba mwe bazaalibwa, ne katuuka era omugabo gwe baafuna ne guba mu makkati g'abaana ba Yuda n'abaana ba Yusufu.
- ¹² Ku luuyi olw'obukiikkono ensalo yaabwe ne tandikira ku Yoludaani ne yeeyongera ku njegoyego z'obukiikkono bwa Yeriko n'eyambuka mu nsi ey'ensozi ebugwanjuba n'ekomekkereza mu ddungu ly'e Besaveni.
- ¹³ Ensalo n'esala okuva mu bukiikaddyo n'etuuka e Luzi ye Beseri ne yeeyongera mu bukiikaddyo e Atalosuaddali kumpi n'olusozi oluli wammanga mu bukiikaddyo obwa Besukolooni.

¹⁴ Ensalo ne yeeyongerayo okuva ku lusozi olutunuulidde Besukolooni n'eraga ku bukiikaddyo n'edda ebuvanjuba n'etuuka e Kiriasubaali, ye Kiriyasuyalimu, kye kibuga ky'abaana ba Yuda. Olwo lwe luuyi olw'ebugwanjuba.

¹⁵ Oluuyi olw'obukiikaddyo Iwatandikira ku njegoyego za Kiriyasuyalimu gye kikoma n'edda ebuvanjuba, ensalo ne yeeyongerayo ku nsulo ez'amazzi aga Nefutoa.

¹⁶ Ate era ensalo n'ekkirira olusozi we lukoma, olutunudde mu kiwonvu kya mutabani wa Kinomu ekiri mu bukiikkono lw'ekiwonvu kya Lefa, n'ekkirira mu kiwonvu kya Kinomu ekiri mu bukiikaddyo bw'ekibuga Yebusi, n'ekka ku Enerogeri.

¹⁷ N'eryoka yeebungulula ng'eva mu bukiikkono n'etuuka ku Ensomesi ne yeeyongerayo e Gerirosi ekitunuulidde ekkubo eryambuka okugenda Adummiru n'eyita n'etuuka ku jjinja lya Bokani mutabani wa Lewubeeni,

¹⁸ ne yeeyongerayo mu bukiikkono ku luuyi lwa Besi Alaba okutuuka ku Alaba,

¹⁹ ne yeeyongerayo mu bukiikkono obwa Besukogula bw'etyo ensalo n'ekoma ku bukiikkono bw'Ennyanja ey'Omunnyo mu bukiikaddyo bw'omugga Yoludaani. Eyo y'ensalo ey'oku bukiikaddyo.

²⁰ Yoludaani ye yali ensalo ku luuyi olw'ebuvanjuba. Guno gwe gwali omugabo gw'ekika kya Benyamini ng'enju bwe zaali, ng'ensalo bwe zaali era ng'enju zaabwe bwe zaali.

²¹ Kale nno ebibuga by'ekika ky'abaana ba Benyamini ng'enju zaabwe bwe zaali byali: Yeriko ne Besukogula ne Emekkezizi,

²² ne Besualaba ne Zemalayimu ne Beseri,

²³ ne Avvimu ne Pala ne Ofula,

²⁴ ne Kefalamoni ne Ofuni ne Geba ebibuga kkumi na bibiri n'ebyalo byabyo.

²⁵ Gibyoni ne Laama ne Beerosi,

²⁶ ne Mizupe ne Kefira ne Moza,

²⁷ ne Lekemu ne Irupeeri ne Talala,

²⁸ ne Zeera, Erefu n'Omuyebusi, ye Yerusaalemi, ne Gibeasi ne Kiriasi ebibuga kkumi na bina n'ebyalo byabyo. Ogwo gwe gwali omugabo ogw'abaana ba Benyamini ng'enju zaabwe bwe zaali.

Yoswa 19

Omugabo gwa Simyoni

¹ N'akalulu akookubiri kaagwa ku Simyoni, kye kika ky'abaana ba Simyoni ng'ennyumba zaabwe bwe zaali n'omugabo gwabwe bwe gwali mu makkati g'omugabo gw'ekika kya Yuda.

²Kyali kitwaliramu Beeruseba, oba Seba, ne Molada,

³ne Kazalusuwali ne Bala, ne Ezemu,

⁴ne Erutoladi ne Besuli, ne Koluma,

⁵ne Zikulagi ne Besumalukabosi, ne Kazalususa

⁶ne Besulebaosi ne Salukeni ebibuga kkumi na bisatu n'ebyalo byabyo.

⁷ Ayini ne Limmoni ne Eseri, ne Asani ebibuga bina n'ebyalo byabyo,

⁸n'ebyalo byonna ebyetoolodde ebibuga ebyo okutuuka ku Baalasubeeri, ye Laama ekiri mu bukiikaddyo. Ebyo bye bitundu abaana ba Simyoni bye baagabana ng'ennyumba zaabwe bwe zaali.

⁹Ettaka abaana ba Simyoni lye baagabana lyali wamu n'ery'abaana ba Yuda. Kubanga omugabo gw'abaana ba Yuda gwabasukkirira obunene; abaana ba Simyoni kyebaava bagabana wakati mu bitundu by'omugabo gwabwe.

Ensi ya Zebbulooni

¹⁰ Akakulu akookusatu ne kagwa ku kika kya Zebbulooni, ng'ennyumba zaabwe bwe zaali. Era n'omugabo gwabwe ne gutuukira ddala ku Salidi.

¹¹Ensalo yaabwe n'eraga ku luuyi olw'ebugwanjuba n'etuuka e Malala, n'etuuka n'e Dabbesesi; ng'egendera ku kagga akali ku buvanjuba bwa Yokuneamu.

¹²Okuva ebuvanjuba wa Salidi ne yeeyongerayo enjuba gy'eva ng'egendera ku nsalo y'e Kisulosutaboli, ne Daberasi, ne yeebalama Yafiya.

¹³Okuva eyo n'edda ebuvanjuba e Gasukeferi, okudda e Esukazini; ne yeeyongerayo e Limmoni, n'edda ku luuyi oluliko Nea.

¹⁴Ne yeebungulula mu bukiikkono n'etuuka ku Kannasoni n'ekoma mu Kiwonvu kya Ifutakeri;

¹⁵ne Kattasi, ne Nakalali, ne Simuloni, ne Idala, ne Besirekemu, ebibuga kkumi na bibiri, n'ebyalo byabyo.

¹⁶Ogwo gwe mugabo gw'abaana ba Zebbulooni ng'ennyumba zaabwe bwe zaali, ebibuga ebyo n'ebyalo byabyo.

Omugabo gwa Isakaali

¹⁷ Akalulu akookuna ne kagwa ku Isakaali, lye zadde lya Isakaali ng'ennyumba zaabwe bwe zaali:

¹⁸Omugabo gwabwe gwalimu Yezuleeri ne Kesulosi ne Sunemu,

¹⁹ne Kafalaimu ne Sioni ne Anakalasi,

²⁰ne Labbisi ne Kisioni ne Ebezi,

²¹ne Lemesi ne Engannimu ne Enkadda ne Besupazzezi.

²²Ensalo n'ekwata ku Taboli ne Sakazuma ne Besusemesi n'ekoma ku mugga Yoludaani. Ebibuga byonna awamu byali kkumi na mukaaga n'ebyalo byabyo.

²³Ogwo gwe mugabo gw'ekika ky'abaana ba Isakaali ng'ennyumba zaabwe bwe zaali, ebibuga n'ebyalo byabyo.

Omugabo gwa Aseri

²⁴N'akalulu akookutaano ne kagwa ku kika ky'abaana ba Aseri ng'ennyumba zaabwe bwe zaali.

²⁵Ekitundu kyabwe kyalimu Kerukasi ne Kali ne Beteni ne Akusafu,

²⁶ne Alammerekı ne Amadi ne Misali ne kituuka ku Kalumeeri ku luuyi olw'ebuvanjuba ne ku Sikolulibunasi,

²⁷ne kidda ebuvanjuba ne kyeyongerayo ku Besudagoni ne kituuka ku Zebbulooni ne ku kiwonvu Ifutakeri ku luuyi olw'omu bukiikkono okutuuka ku Besuemeki ne Neyeri ne kikoma ku Kabuli mu bukiikkono.

²⁸Ne kyeyongerayo ku Ebuloni ne Lekobu ne Kammoni ne Kana okutuuka ku Sidoni Ekinene.

²⁹Ensalo n'edda ku Laama n'ekibuga ekiriko ekigo ekya Tuulo ne kyeyongerayo e Kosa n'eryoka ekoma ku nnyanja mu nsi eriraanye Akuzibu,

³⁰ne Uma ne Afiki ne Lekobu byonna awamu ebibuga amakumi abiri n'ebyalo byabyo.

³¹Ogwo gwe gwali omugabo gw'ekika ky'abaana ba Aseri ng'ennyumba zaabwe bwe zaali, ebibuga n'ebyalo byabyo.

Ensi ya Nafutaali

³²Akalulu akoomukaaga ne kagwa ku Nafutaali, be baana ba Nafutaali ng'ennyumba zaabwe bwe zaali.

³³N'ensalo yaabwe n'eva ku mwera oguli mu Zaanannimu e Kerefu ne Adaminekebu ne Yabuneeri okutuuka ku Lakkumu n'eryoka ekoma ku mugga Yoludaani.

³⁴N'ewetera ku luuyi olw'ebugwanjuba n'etuuka ku Azunnosutaboli ne yeeyongerayo ku Kukkoki, ne yeeyongerayo e Zebbulooni mu bukiikkaddyo, n'ekwata ku Aseri mu bugwanjuba, ne ku Yuda ekiri ku Yoludaani ebuvanjuba.

³⁵N'ebibuga ebiriko ebigo byali Ziddimu, ne Zeri, ne Kammasi, ne Lakkasi, ne Kinneresi,

³⁶ne Adama ne Laama ne Kazoli,

³⁷ne Kasedi ne Ederei, ne Enkazoli,

³⁸ne Ironi ne Migudaleri, ne Kolemu ne Besuanasi ne Besusemesi, ebibuga kkumi na mwenda n'ebyalo byabyo.

³⁹Ogwo gwe gwali omugabo gw'ekika ky'abaana ba Nafutaali ng'ennyumba zaabwe bwe zaali, ebibuga n'ebyalo byabyo.

Omugabo gwa Ddaani

⁴⁰Akalulu akoomusanvu kaagwa ku kika ky'abaana ba Ddaani ng'ennyumba zaabwe bwe zaali.

⁴¹N'ekitundu ky'omugabo gwabwe ne kitwaliramu Zola ne Esutaoli ne Irusemesi

⁴²ne Saalabbini ne Ayalooni ne Isula

⁴³ne Eroni ne Timuna ne Ekuloni

⁴⁴ne Eruteke ne Gibbesoni ne Baalasi

⁴⁵ne Yekudi ne Beneberaki ne Gasulimmoni

⁴⁶ne Meyalakoni ne Lakoni n'ensalo etunuulidde Yafo.

⁴⁷Naye abaana ba Ddaani baalina obuzibu okutwala omugabo gwabwe ne bagenda ne balumba Lesemu ne bakiwangula ne batta abantu baamu n'ekitala ne babeera omwo, ne bakituuma Ddaani ly'erinnya lya jjajaabwe.

⁴⁸Ogwo gwe mugabo gw'abaana ba Ddaani ng'ennyumba zaabwe bwe zaali.

Omugabo gwa Yoswa

⁴⁹Nga bamaze okugabana ensi mu bitundu eby'enjawulo abaana ba Isirayiri ne bawa Yoswa mutabani wa Nuuni omugabo mu bo

⁵⁰ng'ekiragiro kya MUKAMA bwe kyal, ne bamuwa ekibuga kye yasaba, Timunasusera mu nsi ey'ensozi eya Efulayimu. Omwo mwe yazimba ekibuga mwe yabeera.

⁵¹Bino bye bitundu Eriyazaali kabona ne Yoswa omwana wa Nuuni n'abakulu b'ebika bya Isirayiri bye bagabana okuyita mu kalulu e Siiro nga beebuuza ku MUKAMA mu mulyango gwa Weema ey'Okukuŋjaanirangamu. Bwe batyo bwe baamaliriza okugabanyaamu ensi.

Yoswa 20

Ebibuga ekyokwekwekamu

¹MUKAMA Katonda n'alyoka agamba Yoswa nti,

²"Gamba abaana ba Isirayiri bateekewo ebibuga ebyokwekwekamu nga bwe nablagira okuyita mu Musa,

³era nti omuntu yenna atta omulala nga tagenderedde era nga takitegese addukirenga omwo, eyo gy'anaawoneranga omuwoolezi w'eggwanga ayagala okwesasuza.

⁴ "Annadukiranga mu kimu ku bibuga ebyo n'ayimirira ku mulyango gw'ekibuga annyonnyole ensonga ye eri abakadde b'ekibuga ekyo. Awo ne balyoka bamukkiriza okuyingira mu kibuga ne bamuwa ekifo eky'okubeeramu.

⁵ N'oyo ayagala okwesasuza singa anaamugobereranga, tebateekwa kuwaayo oyo asse tagenderedde kubanga muliraanwa we yamutta tagenderedde, lwa kuba nti yamulinako ekiruyi n'obukyayi.

⁶ "Mu kibuga omwo mwanaabeeranga, abantu baamu banaawuliranga ensonga ye, era anaabeeranga omwo okutuusa kabona omukulu aliko mu kiseera ekyo, lw'alifa. Olwo nno aliddayo ewaabwe mu kibuga gye yadduka."

⁷ Awo ne baawulako ebibuga bino: Kedesi mu Ggaliraaya mu nsi ey'ensozi eya Nafutaali, ne Sekemu mu nsi ey'ensozi eya Efulayimu, ne Kiriasualuba, ye Kebbulooni mu nsi ey'ensozi eya Yuda.

⁸ N'emitala wa Yoludaani ku Yeriko ku luuyi olw'ebuvanjuba ne bateekayo Bezeri mu lukoola mu lusenyi mu kika kya Lewubeeni, ne Lamosi mu Gireyaadi mu kika kya Gaadi, ne Golani mu Basani mu kika kya Manase.

⁹ Ebyo bye bibuga ebyateekebwawo abaana ba Isirayiri bona era ne bannaggwanga abaali mu bo nti omuntu yenna eyattanga omuntu nga tagenderedde addukire eyo aleme kuttibwa omuwoolezi w'eggwanga okutuusa lw'aliyimirira mu maaso g'ekibiina.

Yoswa 21

Ebibuga by'Abaleevi

¹ Awo abakulira ennyumba mu kika ky'Abaleevi ne bajja eri Eriyazaali kabona n'eri Yoswa mutabani wa Nuuni n'eri abakulu b'ennyumba z'abaana ba Isirayiri

² e Siiro mu Kanani ne babagamba nti, "MUKAMA Katonda yalagira okuyita mu Musa nti tuweebwe ebibuga eby'okubeeramu era n'amalundiro g'ebisibo byaffe."

³ Kale, nga MUKAMA bwe yalagira, Abayisirayiri ne bawa Abaleevi ebibuga bino n'amalundiro nga gwe mugabo gwabwe.

⁴ Akalulu ne kagwa ku nda ez'Abakokasi. Bwe batyo Abaleevi abaali bava mu Aloonikabona ne bafuna ebibuga kkumi na bisatu okuva mu bika bya Yuda, ne Simyoni ne Benyamini.

⁵ Abakokasi abaali basigaddeo ne bafuna ebibuga kkumi okuva mu nnyumba, z'ebika bya Efulayimu, ne Ddaani n'ekitundu ky'ekika kya Manase.

⁶ N'abaana ba Gerusoni ne baweebwa ebibuga kkumi na bisatu okuva mu nnyumba zino: eya Isakaali, n'eya Aseri, n'eya Nafutaali, n'ekitundu ky'ekika kya Manase mu Basani.

⁷ Abaana ba Merali ne baweebwa ng'ennyumba zaabwe bwe zaali, ebibuga kkumi na bibiri nga biva mu bika bino: Lewubeeni, ne Gaadi, ne Zebbulooni.

⁸ Abaana ba Isirayiri ne bawa Abaleevi ebibuga bino, n'amalundiro gaabwe nga MUKAMA bwe yali alagidde okuyita mu Musa.

⁹ Mu bika bya Yuda ne Simyoni mwavaamu ebibuga bino:

¹⁰ bye byaweebwa abaana ba Aloon mu nnyumba z'Abakokasi mu kika ky'Abaleevi kubanga akalulu be kasooka okugwako.

¹¹ Ne babawa Kiriasualuba (Aluba ye yali kitaawe wa Anaki) era ekimanyiddwa nga Kebbulooni mu nsi ey'ensozi eya Yuda n'ebyalo byakyo ebikyetoolodde.

¹² Naye ennimiro zaakyo n'ebibuga byakyo ne babiwa Kalebu omwana wa Yefune abitwale ng'omugabo gwe.

¹³ Abantu abaava mu Aloon eyali kabona ne baweebwa Kebbulooni, ebibuga ebyokwekwekamu abo ababa basse bantu bannaabwe, n'amalundiro gaabyo ne Libuna n'amalundiro gaakyo,

¹⁴ ne Yattiri n'amalundiro gaakyo ne Esutemoa n'amalundiro gaakyo,

¹⁵ ne Kaloni n'amalundiro gaakyo ne Debiri n'amalundiro gaakyo,

¹⁶ ne Ayini n'amalundiro gaakyo ne Yuta n'amalundiro gaakyo ebibuga mwenda mu bika ebibiri.

¹⁷ Ne mu kika kya Benyamini ne baweebwa Gibyon, ne Geba

¹⁸ ne Anasosi n'amalundiro gaakyo, ne Alumoni n'amalundiro gaakyo ne Alumoni n'amalundiro gaakyo bye bibuga bina.

¹⁹ Ebibuga byonna eby'abaana ba Aloon bakabona byali ebibuga kkumi na bisatu n'amalundiro gaabyo.

²⁰ Eri Abakokasi abalala abaali bava mu nnyumba z'Abakokasi ez'Abaleevi ebibuga ebyabaweebwa byava mu kika kya Efulayimu.

²¹ N'aweebwa Sekemu n'amalundiro gaakyo mu nsi ey'ensozi eya Efulayimu ekibuga eky'okwekwekamu oyo asse, ne Gezeri n'amalundiro gaakyo,

²² ne Kizuzaimu n'amalundiro gaakyo ne Besukolooni n'amalundiro gaakyo,

²³ ne mu kika kya Ddaani, Eruteke n'amalundiro gaakyo, Gibbesoni n'amalundiro gaakyo,

²⁴Ayalooni n'amalundiro gaakyo, ne Gasulimmoni n'amalundiro gaakyo, bye bibuga bina.

²⁵Ne mu kitundu eky'ekika kya Manase, Taanaki, n'amalundiro gaakyo, ne Gasulimmoni n'amalundiro gaakyo, bye bibuga bibiri.

²⁶Ebibuga byonna eby'ennyumba z'abaana ba Kokasi abalala byali kkumi n'amalundiro gaabyo.

²⁷N'eri abaana ba Gerusoni ekimu ku kika ky'Abaleevi, ekitundu eky'ekika kya Manase, Golani mu Basani n'amalundiro gaakyo, ekibuga eky'okwekwekangamu oyo asse nga tagenderedde, ne Beesutera n'amalundiro gaakyo, ebibuga bibiri.

²⁸Ne mu kika kya Isakaali, Kisioni n'amalundiro gaakyo, Daberasi n'amalundiro gaakyo,

²⁹Yalamusi n'amalundiro gaakyo, ne Engannimu n'amalundiro gaakyo, bye bibuga bina,

³⁰ne mu kika kya Aseri, Misali n'amalundiro gaakyo, Abudoni n'amalundiro gaakyo,

³¹Kerukasi n'amalundiro gaakyo, ne Lekobu n'amalundiro gaakyo, bye bibuga bina.

³²Ne mu kika kya Nafutaali, Kadesi mu Ggaliraaya n'amalundiro gaakyo, ebibuga ebyokwekwekamu, ne Kammasudoli n'amalundiro gaakyo, ne Kalutani n'amalundiro gaakyo, bye bibuga bisatu.

³³Ebibuga byonna eby'Abagerusoni ng'ennyumba zaabwe bwe zaali, byali ebibuga kkumi na bisatu n'amalundiro gaabyo.

³⁴Abaleevi abaali basigaddewo abaana ba Merali ne baweebwa okuva mu kika kya Zebbulooni, Yokuneamu n'amalundiro gaakyo, ne Kaluta n'amalundiro gaakyo,

³⁵Dimuna n'amalundiro gaakyo, Nakalali n'amalundiro gaakyo, bye bibuga bina.

³⁶Ne mu kika kya Lewubeeni, Bezeri n'amalundiro gaakyo, ne Yakazi n'amalundiro gaakyo,

³⁷Kedemosi n'amalundiro gaakyo, ne Mefaasi n'amalundiro gaakyo bye bibuga bina.

³⁸Ne mu kika kya Gaadi, Lamosi mu Gireyaali n'amalundiro gaakyo, ekibuga ekyokwekwekamu oyo asse, ne Makanayimu n'amalundiro gaakyo.

³⁹Kesuboni n'amalundiro gaakyo, Yazeri n'amalundiro gaakyo awamu bye bibuga bina.

⁴⁰Ebyo byonna byali by'abaana ba Merali be Baleevi, abaali basigalidde ng'ennyumba zaabwe bwe zaali, bye bibuga kkumi na bibiri byonna awamu.

⁴¹Ebibuga byonna ebyali ku ttaka ery'abaana ba Isirayiri byali amakumi ana mu munaana awamu n'ebyalo byabyo ebibiriraanye.

⁴²Buli kimu ku bibuga bino kyalina ebyalo ebikyetoolodde; byonna ebibuga bwe byali.

⁴³Bw'atyo MUKAMA n'awa Isirayiri ettaka lyonna nga bwe yalayirira bajjajjaabwe, era bwe baamala okulifuna ne babeera omwo.

⁴⁴MUKAMA n'abawa emirembe ne bawummula ku buli luuyi nga bwe yalayirira bajjajjaabwe, tewali mulabe waabwe n'omu gwe bataawangula kubanga MUKAMA yali agabudde abalabe baabwe mu mukono gwabwe.

⁴⁵Buli kintu kyonna ekirungi MUKAMA kye yasuubiza ennyumba ya Isirayiri yakituukiriza. Byonna byatuukirira.

Yoswa 22

¹Awo Yoswa n'ayita Abalewubeeni n'Abagaadi n'ekitundu eky'ekika kya Manase,

²n'abagamba nti, "Mwekuumye ne mukola byonna Musa omuweereza wa MUKAMA Katonda bye yabalagira.

³Ebbanga lyonna n'okutuusa leero temulekeredde baganda bammwe, mubadde beegendereza okukuma ekiragiro kya MUKAMA Katonda wammwe.

⁴Era kaakano MUKAMA Katonda wammwe awadde baganda bammwe emirembe nga bwe yabasuibiza. Noolwekyo muddeeyo mu maka gammwe mu nsi Musa omuweereza wa MUKAMA gye yabawa ku luuyi luli olulala olwa Yoludaani.

⁵Wabula mwegendereze okukumanga ebiragiro era n'amateeka Musa omuweereza wa MUKAMA bye yabalagira: okwagalanga MUKAMA Katonda wammwe, okutambuliranga mu makubo ge gonna, okukumanga ebiragiro bye, n'okumunywererangako era n'okumuweerezanga n'omutima gwammwe gwonna era n'emmeeme yammwe yonna."

⁶Yoswa n'alyoka abasabira omukisa n'abasiibula ne baddayo mu maka gaabwe.

Ekyoto ku Yoludaani

⁷Ekitundu ekimu eky'ekika kya Manase, Musa yali akigabidde ettaka mu Basani, n'ekitundu ekirala eky'ekika kya Manase ne baganda baabwe, Yoswa n'akiwa ettaka ku luuyi olw'ebugwanjuba bwa Yoludaani. Yoswa n'abawa omukisa n'abasiibula baddeyo ewaabwe.

⁸N'abagamba nti, "Ente nnyingi, ne ffeeza, ne zaabu, n'ekikomo, n'ekyuma, era n'engoye nnyingi bye munyaze ku balabe bammwe; mubigabaane ne baganda bammwe."

⁹Awo Abalewubeeni n'abaana ba Gaadi n'ekitundu eky'ekika kya Manase nga bava mu baana ba Isirayiri mu Siiro ekiri mu nsi ya Kanani ne baddayo mu nsi yaabwe, mu Gireyaadi, gye baali bagabanye bo bennyini ng'ekiragiro kya MUKAMA Katonda bwe kyali okuyita mu Musa.

¹⁰Era bwe baatuuka mu kitundu ekiriraanye Yoludaani mu nsi ya Kanani, abaana ba Lewubeeni n'abaana ba Gaadi n'ekitundu eky'ekika kya Manase, ne bazimba awo ekyoto, ekinene ddala.

¹¹Wabula abantu ba Isirayiri bwe baawulira nti bazimbye ekyoto ku Yoludaani ku luuyi lwa Isirayiri,

¹²ekibiina kyonna ekya Isirayiri ne bakunjaana e Siiro beetegerekere olutalo babalumbe.

¹³Awo abaana ba Isirayiri ne batuma Finekaasi omwana wa Eriyazaali kabona eri Abalewubeeni, n'Abagaadi, n'ekitundu ky'ekika kya Manase mu nsi ya Gireyaadi.

¹⁴Ne batumirako abakungu kkumi, omu omu omukulu w'ennyumba mu buli kika kya Isirayiri.

¹⁵Bwe bajja eri Abalewubeeni, n'Abagaadi, n'ekibiina kyonna ekya Manase mu nsi ya Gireyaadi ne babagamba nti,

¹⁶"Ekibiina kyonna ekya MUKAMA bwe kitu bwe kigamba, 'Muyinza mutya okukyama bwe muti okuva ku MUKAMA Katonda wa Isirayiri? Muyinza mutya okuva ku MUKAMA ne mwezimbira ekyoto ne mumujeemera awo?

¹⁷Ekibi kya Peoli tekyatumala, ate nga n'okwerongoosa tubadde tetunnaba kwerongoosa kwemalako kibi ekyo, wadde kawumpuli yagwa ku kibiina kya MUKAMA Katonda,

¹⁸ate mmwe ne mulekeraawo okugoberera MUKAMA Katonda? Bwe munaa jeemera MUKAMA leero, enkyo ajja kunyiigira eggwanga lyonna erya Isirayiri.

¹⁹Obanga ensi gye mututte sinnongoofu, mujje eno eri ensi ya MUKAMA, weema ya MUKAMA gy'eri, tugabane eno gye tuli; kye mutasaana kukola kwe kujeemera MUKAMA, oba okutufuula ffe abajeemu nga mwezimbira ekyoto ekitali kya MUKAMA Katonda waffe.

²⁰Akani mutabani wa Zeera teyajeema bwe yatoola ku bintu MUKAMA bye yali yeerobozza, ekiruyi kya MUKAMA ne kijjira ekibiina kyonna ekya Isirayiri? Si ye yekka eyazikirira olw'ekibi kye.'"

²¹Abalewubeeni, n'Abagaadi, n'ekitundu ky'ekika kya Manase ne balyoka baddamu abakulu b'ebika bya Isirayiri nti,

²²"MUKAMA Katonda ow'Amaanyi, MUKAMA ow'Amaanyi! Ye amanyi, era Isirayiri akimanye! Bwe kiba nga kyabaddle mu kwediima oba kujeemera MUKAMA, temutusonyiwa leero.

²³Bwe tuba nga ekyatuzimbya ekyoto kwe kuva ku MUKAMA, tukiweereko ekiweebwayo ekyokebwa oba ekiweebwayo ekyobutta oba ssaddaaka ez'ebiweebwayo olw'emirembe, MUKAMA Katonda yennyini atuvunaane.

²⁴Nedda, twakikola mu kutya nti mu mirembe egijja abaana baffe balitubuuza nti, 'MUKAMA Katonda wa Isirayiri mumumanyiiko ki?

²⁵Kubanga MUKAMA yakola Yoludaani okubeera ensalo wakati wammwe naffe mmwe Abalewubeeni, n'Abagaadi, temulina mugabo eri MUKAMA Katonda.' Noolwekyo abaana bammwe bayinza okugaana abaana baffe okusinza MUKAMA Katonda.

²⁶"Kyetwava tugamba nti, 'Leka tuzimbe kaakano ekyoto ekitali kya kukozesa ku biweebwayo ebyokebwa, wadde ssaddaaka,'

²⁷naye kibeere akabonero ak'obujulizi wakati waffe nammwe, era ne wakati we mirembe egirituddirira nti tugenda mu maaso ga MUKAMA Katonda ne tumusinza n'ebiweebwayo byaffe ebyokebwa ne ssaddaaka era n'ebiweebwayo olw'emirembe si kulwa nga abaana bammwe bagamba abaana baffe mu biseera ebija nti, 'Temulina mugabo gwonna eri MUKAMA Katonda.'

²⁸Kyetwava tugamba nti, 'Bwe balitugamba batyo oba okugamba abaana baffe abaliddawo, tulibaddamu nti, "Mulabe ekifaananyi kye kyoto kya MUKAMA Katonda, bakitaffe kye baakola, si lwa biweebwayo ebyokebwa wadde ssaddaaka, naye okubeera omujulirwa wakati waffe nammwe."

²⁹Kikafuuwe ffe okujeemera MUKAMA era n'okumuvaako leero ne tutamugoberera nga tuzimba ekyoto eky'ebiweebwayo ebyokebwa, oba ebiweebwayo eby'empeke, oba ssaddaaka, ekitali kyoto kya MUKAMA Katonda waffe ekiri mu maaso ga Ssanduuko y'Endagaano ye!"

Ekyoto Kikkirizibwa

³⁰Finekaasi kabona, n'abakulu b'ebibiina by'ebika bya Isirayiri abaali naye bwe baawulira ebigambo Abalewubeeni, n'Abagaadi n'aba Manase bye bayogera, ne bibasanya nnyo.

³¹Finekaasi mutabani wa Eriyazaali kabona n'agamba Abalewubeeni n'Abagaadi n'abaana ba Manase nti, "Leero tutegedde nti MUKAMA ali wakati mu ffe, kubanga temukoze kivve kino eri MUKAMA Katonda, kaakanoabantu ba Isirayiri mubawonyezza omukono gwa MUKAMA Katonda."

³²Awo Finekaasi mutabani wa Eriyazaali kabona, n'abakulu b'ebika ne bava eri Abalewubeeni, n'Abagaadi mu nsi ye Kanani, ne baddayo eri abantu ba Isirayiri ne bababuulira ebibaddeyo.

³³Bye baayogera ne bisanyusa abantu ba Isirayiri ne bagulumiza Katonda ne bataddayo kwogera ku bya latalo kubalumba, bazikirize ensi Abalewubeeni, n'Abagaadi gye baali basenze.

³⁴Abalewubeeni n'Abagaadi ne batuumma ekyoto erinnya Mujulizi, ne bagamba nti, "Kubanga mujulizi eri ffe nti MUKAMA ye Katonda."

Yoswa 23

Yoswa Asiibula

¹Bwe waayitawo ekiseera, MUKAMA Katonda ng'awadde Isirayiri emirembe mu njuyi zonna awaali abalabe, Yoswa ng'akaddiye ng'awangadde emyaka mungi,

²n'ayita Abayisirayiri bona, abakadde baabwe n'abakulembeze baabwe, abalamuzi n'abakungu n'abagamba nti, "Kaakano nkaddiye era mmaze emyaka mungi;

³mmwe bennyini mulabye byonna MUKAMA Katonda wammwe byakoze amawanga gano gonna ku lwammwe, kubanga MUKAMA Katonda wammwe yabalwaniridde.

⁴Mulabe, ngabidde ebika byammwe amawanga ago agabadde gakyasigadde, amawanga gonna ge namala okuwangula, okuva ku Yoludaani okutuuka ku nnyanja ennene ebugwanjuba.

⁵MUKAMA Katonda aija kubagoba babaviire abasindiikirize okuva mu maaso gammwe mutwale ensi yaabwe nga MUKAMA Katonda wammwe bwe yabasuubiza.

⁶"Noolwekyo mwegendereze nnyo okukwata n'okukola byonna ebiwandiikkwa mu kitabo kya Musa eky'amateeka, obutakyama kukivaako kudda ku ddyo wadde ku kkono.

⁷Temwetabanga n'amawanga gano agasigadde mu mmwe, wadde okwogera ku manya ga bakatonda baabwe, okulayira mu manya gaabwe okubaweereza wadde okubavuunamira.

⁸Naye munywerere ku MUKAMA Katonda wammwe nga bwe mukoze okutuusa leero.

⁹"Kubanga MUKAMA Katonda wammwe agobye amawanga amanene ag'amaanyi era n'okutuusa kaakano teri n'omu asobodde kubaziyiza.

¹⁰Omuntu omu ku mmwe agoba abantu lukumi, kubanga MUKAMA Katonda wammwe yaabalwanirira nga bwe yabasuubiza.

¹¹Noolwekyo mwekuume, mwagale MUKAMA Katonda wammwe,

¹²kubanga bwe munaamuvaangako ne mwegattanga n'abamawanga abaasigalawo abali mu mmwe, oba ne mufumbiriganwa ne mukolagananga nabo,

¹³mukitegeererewo nti MUKAMA Katonda wammwe tagenda kweyongera kubagobamu mawanga gano, naye ganaafuukanga emitego era enkonge gye muli, embooko ezinaabakubanga mu mbiriizi, n'amaggwa aganaabafumitanga mu maaso gammwe okutuusa lwe mulizikirira mu nsi eno ennungi MUKAMA Katonda wammwe gy'abawadde.

¹⁴“Era kaakano nnaatera okukwata olugendo lw'abantu bona ab'oku nsi era mumanyi n'emิตima gyammwe n'emmeeme yammwe mmwe mwenna nti, Tewali kintu kyonna kitatuukiridde MUKAMA Katonda wammwe kye yasuubiza ekibakwatako. Byonna bibakoleddwa, tewali na kimu kiremye.

¹⁵Naye ng'ebintu byonna ebirungi MUKAMA Katonda wammwe bye yabasubiza nga bwe bibaweeddwa, bw'atyo MUKAMA bw'anaabatuussangako, ebibi byonna okutuusa ng'abazikirizza okuva mu nsi eno ennungi MUKAMA Katonda wammwe gy'abawadde.

¹⁶Bwe munaamenyanga endagaano ya MUKAMA Katonda wammwe gye yabalagira, ne mugenda ne muweerezanga bakatonda abalala ne mubavuunamiranga, obusungu bwa MUKAMA bunaabooolekeranga, ne muzikirira mangu okuva mu nsi ennungi gy'abawadde.”

Yoswa 24

Obubaka bwa Yoswa Obusembayo

¹Awo Yoswa n'akuinjaanya ebika byonna ebya Isirayiri e Sekemu, n'ayita abakadde ba Isirayiri n'abakulembeze, abalamuzi era n'abakungu ba Isirayiri ne bajja babeere mu maaso ga MUKAMA.

²Yoswa n'agamba abantu bona nti, “Bw'ati bw'ayogera MUKAMA Katonda wa Isirayiri nti, ‘Edda ennyo bajjajammwe nga mulimu ne Teera kitaawe wa Ibulayimu baabeeranga emitala w'omugga Fulaati, gye basinzizanga bakatonda abalala.

³Ne ndyoka nziggya jjajjammwe Ibulayimu emitala w'omugga, ne mmukulembira okumuyisa mu nsi ye Kanani, ne mmuwa Isaaka, ne mwongerako ezzadde.

⁴Isaaka ne mmuwa Yakobo ne Esawu. Esawu ne mmuwa ensi ey'ensozi eya Seyiri. Naye Yakobo n'abaana be ne mbatwala e Misiri.

⁵“‘Natuma Musa ne Aloon, ne mbonyaabonya Abamisiri n'ebibonoobono bye nabakola, oluvannyuma abaana ba Yakobo ne mbaggyayo.

⁶Bwe naggya bajjajammwe e Misiri mwatuuka ku Nnyanja Emyufu. Abamisiri abaali mu magaali, n'abeebagadde embalaasi ne bawondera bajjajammwe okutuuka ku Nnyanja Emyufu.

⁷Naye bajjajammwe bwe baakaabirira MUKAMA Katonda abayambe, nateeka ekizikiza wakati wammwe n'Abamisiri; Abamisiri n'abayiwako ennyanja n'ebabuutikira. Amaaso gammwe ne galaba kye nakola Abamisiri; ne mutambulira mu ddungu okumala ebbanga ddene.

⁸“Nabaleeta mu nsi ey'Abamoli, abaali emitala wa Yoludaani, ne babalwanyisa, ne mbagabula mu mukono gwammwe. Ne nzikiriza Abamoli okubamalawo mu maaso gammwe ensi yaabwe ne ngigabira mmwe.

⁹Balaki mutabani wa Zipoli, kabaka wa Mowaabu, bwe yasituka okulwanyisa Isirayiri, n'atumya Balamu mutabani wa Byoli abakolimire;

¹⁰naye Balamu saamuwliriza, n'abawa buwi mukisa emirundi n'emirundi. Bwe nt yo ne mbanunula mu mukono gwe.

¹¹“Ne musomoka omugga Yoludaani ne mutuuka e Yeriko. Abantu b'omu Yeriko awamu n'Abamoli, n'Abaperezi, n'Abakanani, n'Abakiiti, n'Abagirusi, n'Abakiivi, n'Abayebusi ne babalwanyisa naye ne mbagabula mu mukono gwammwe.

¹²Ne ntuma ennumba ezabakulembera ezagoba abalabe bammwe mu maaso gammwe, nga mwe muli bakabaka ababiri Abamoli; si mmwe mwakikola n'ekitala kyammwe wadde obusaale.

¹³Ne mbawa ensi gye mutaakolerera, ebibuga bye mutaazimba mwe mutudde kaakano, mulya ebibala by'emizabbibu n'emizeeyituuni bye mutaasimba.’

¹⁴“Noolwekyo kaakano mutye MUKAMA Katonda era mu muweereze mu bwesimbu era mu mazima, muggyeewo bakatonda babajjajammwe be baawererezanga emitala w'omugga ne mu Misiri, muweereze MUKAMA Katonda.

¹⁵Naye bwe muba temwagala kuweereza MUKAMA, mulondeewo leero gwe munaaweerezanga; oba bakatonda babajjajammwe abaali emitala w'omugga be baaweerezanga, oba bakatonda ab'Abamoli, bannannyini nsi mwe muli. Naye nze n'ennyumba yange, ffe tunaaweerezanga MUKAMA Katonda.”

¹⁶Abantu ne balyoka baddamu ne bagamba nti, “Kikafuuwe ffe okuleka MUKAMA okuweerezanga bakatonda abalala.

¹⁷MUKAMA Katonda waffe ye yatuggya ffe ne bajjajaffe mu Misiri mu nsi ey'obuddu, n'akola ebyewuunyo eby'ekitalo nga tulaba, n'atukuma mu kkubo lyonna ne mu mawanga gonna ge twayitamu.

¹⁸MUKAMA Katonda n'agoba amawanga gonna mu maaso gaffe nga mwe muli Abamoli, abaali mu nsi. Naffe kyetunaava tuweerezanga MUKAMA Katonda, kubanga ye Katonda waffe."

¹⁹Yoswa n'agamba abantu nti, "Kizibu okuweereza MUKAMA, kubanga Katonda mutukuvu, Katonda wa buggy, taasonyiwenga bujeemu bwammwe newaakubadde ebibi byammwe.

²⁰Obanga munaalekanga MUKAMA, ne muweerezanga bakatonda abalala, alibakyukira n'abazikiriza n'abamalawo ate nga bulijo abadde abayisa bulungi."

²¹Abantu ne bagamba Yoswa nti, "Nedda, tunaweerezanga MUKAMA."

²²Yoswa n'agamba abantu nti, "Muli bajulirwa bammwe mwekka nga mulonzeewo kuweerezanga MUKAMA Katonda." Ne boogera nti, "Tuli bajulirwa."

²³N'abagamba nti, "Kale muggyeeewo bakatonda abalala abali wakati mu mmwe, era emitima gyammwe mugizze eri MUKAMA Katonda wa Isirayiri."

²⁴Abantu ne bagamba Yoswa nti, "Tujja kuweerezanga MUKAMA Katonda waffe era tujja kumugonderanga."

²⁵Awo Yoswa n'akola endagaano n'abantu ku lunaku olwo, n'abakolera amateeka n'ebiragiro.

²⁶Era n'awandiika ebintu bino mu kitabo ky'amateeka ekya Katonda, n'atwala ejinja eddene ennyo n'aliteeka wansi w'omwera ogwali mu kifo kya MUKAMA Katonda ekitukuvu.

²⁷Yoswa n'agamba abantu nti, "Mulabe ejinja lino lijja kubeeranga omujulizi gye tuli, liwulidde ebigambo byonna MUKAMA Katonda bya tugambye. Era lijja kubeeranga omujulizi gye muli bwe mutaabeerenga beesigwa eri Katonda wammwe."

²⁸Yoswa n'asindika abantu bagende, buli omu mu mugabo gwe.

²⁹Oluvannyuma lw'ebyo Yoswa mutabani wa Nuuni, omuweereza wa MUKAMA, n'afa ng'awezezza emyaka kikumi mu kkumi.

³⁰Ne bamuziika mu ttaka ly'obusika bwe lye yaweebwa e Timunasusera, ekiri mu nsi ey'ensozi eya Efulayimu ku luuyi olw'obukiikkono olw'olusozi Gaasi.

³¹Abayisirayiri ne baweereza MUKAMA ennaku zonna ez'abakadde abaasigalawo nga Yoswa amaze okufa era abaamanya emirimu gyonna MUKAMA Katonda gye yakolera Isirayiri.

³²N'amagumba ga Yusufu, abaana ba Isirayiri ge baggya e Misiri ne bagaziika e Sekemu, mu kifo ky'ettaka Yakobo kye yagula ebitundu bya ffeeza kikumi ku batabani ba Kamoli, kitaawe wa Sekemu ne liba omugabo gw'abaana ba Yusufu.

³³ Eriyazaali mutabani wa Aloonni naye n'afa, n'aziikibwa ku lusozi Gibea olwaweebwa Finekaasi mutabani we, mu nsi ey'ensozi eya Efulayimu.

Balam

Balam 1

- ¹ Oluvannyuma lw'okufa kwa Yoswa, Abayisirayiri ne babuuza MUKAMA Katonda nti, "Ani mu ffe alisooka okwaŋjanga Abakanani okubalwanyisa?"
- ² MUKAMA Katonda n'abaddamu nti Yuda yalisooka, era laba mbawadde obuwanguzi ku Bakanani.
- ³ Abasajja ba Yuda ne bagamba baganda baabwe abasajja ba Simyoni nti, "Tugende ffenna mu kitundu kyaffe ekyatuweebwa tulwanyise Abakanani, era naffe tuligenda nammwe mu kitundu ekyabaweebwa." Awo ne bagenda bona.
- ⁴ Yuda n'alumba Abakanani n'Abaperezi e Bezeki era MUKAMA n'amuwa obuwanguzi n'abattamu abasajja omutwalo mulamba.
- ⁵ Ne bagwikiriza Adonibezeiki mu Bezeki; ne bamulwanyisa era ne batta abasajja be.
- ⁶ Naye Adonibezeiki ne yeemulula, ne bamuwondera, ne bamukwata era ne bamusalako engalo ze ensajja n'ebigere ebisajja.
- ⁷ Adonibezeiki ne yejusa n'agamba nti, "Nga bakabaka ensanvu abaasalibwako engalo zaabwe ensajja n'ebigere ebisajja, bwe baalondalondanga obukunkumuka wansi w'emmeeza yange, nange bwe ɲjenda okuba. Kye nakola bannange Katonda nange akintusizzaako." Ne bamutwala e Yerusaalemi n'afiira eyo.
- ⁸ Abasajja ba Yuda ne balumba ekibuga Yerusaalemi ne bakiwamba ne battaabantu baamu n'ekitala, oluvannyuma ne bakyokya.
- ⁹ Awo abasajja ba Yuda ne balumba Abakanani abaabeeranga mu nsozi ne mu biwonvu ne mu bukiika obwa ddyo.
- ¹⁰ Ate Yuda n'alumba Abakanani abaabeeranga e Kebbulooni (edda ekyayitbwanga Kiriasualuba), mu lutalo olwali eyo mwe battira Sesayi, Akimaani ne Talumaayi.
- ¹¹ Ate n'avaayo n'alumba abaabeeranga e Debiri edda ekyayitbwanga Kiriasuseferi.
- ¹² Awo Kalebu n'agamba nti, "Oyo alirumba Kiriasuseferi n'akiwamba ndimuwa muwala wange Akusa okumuwasa."
- ¹³ Osunieri, omwana wa Kenazi muto wa Kalebu n'akiwamba bw'atyo n'aweebwa Akusa okumuwasa.

¹⁴Awo Osunieri bwe yamala okuwasa Akusa n'amufukuutirira asabe kitaawe ennimiro; Akusa n'addayo eri kitaawe, bwe yali ava ku ndogoyi, Kalebe n'amubuuza nti, "Oyagala ki?"

¹⁵N'amuddamu nti, "Wampa ensi nkalu ey'obukiikaddyo naye kaakano nnyongera ekitundu ekirimu n'enzizi ez'amazzi." Kalebu n'amuwa ekitundu ekirimu enzizi ekyengulu n'ekyemmanga.

¹⁶Abazzukulu b'Omukeeni, mukoddomi wa Musa ne bava mu kibuga eky'enkindu ne bagendera wamu n'abasajja ba Yuda ne batuuka mu ddungu lya Yuda eryali mu bukiikaddyo obwa Aladi ne babeera wamu n'abantu baayo.

¹⁷Awo Yuda n'agenda ne muganda we Simyoni ne balumba Abakanani abaabeeranga e Zefasi, ne babazikiririza ddala era ne bakituumma erinnya Koluma.

¹⁸Era Yuda n'awamba Gaza, Asukulooni ne Ekuloni n'ebitundu ebyetoolodde ebibuga bino.

¹⁹MUKAMA yali wamu ne Yuda n'awangula abantu abaabeeranga mu nsozi okuggyako yalemwa okuwangula abantu abaabeeranga mu kiwonvu kubanga baalina amagaali ag'ekyuma.

²⁰Kebbulooni n'ekiweebwa Kalebu, nga Musa bwe yalagira, n'akifuumulamu batabani ba Anaki abasatu.

²¹Naye abasajja ba Benyamini tebaagoba Bayebusi abaabeeranga mu Yerusaalemi noolwekyo Abayebusi babeera wamu n'abasajja ba Benyamini mu Yerusaalemi n'okutuusa kaakano.

²²N'abasajja ba Yusufu ne balumba Beseri era MUKAMA yali wamu nabo.

²³Abasajja ba Yusufu ne batuma abakessi okuketta ekibuga ky'e Beseri edda ekyayitbwanga Luzi.

²⁴Abakessi bwe baalaba omusajja ng'ava mu kibuga ne bamugamba nti, "Tukwegayiridde tulage omulyango oguyingira mu kibuga naffe tunaakuyisa bulungi."

²⁵Awo bwe yabalaga awayingirirwa, ne bazikiriza n'ekitala abantu b'omu kibuga ekyo; ne batakola kabi konna ku musajja oyo n'ab'omu nnyumba ye bonna.

²⁶Omusajja oyo n'asengukira mu nsi y'Abakiiti, n'azimbayo n'ekibuga n'akituumma Luzi, n'okutuusa kaakano bwe kiyitibwa.

²⁷Ye Manase teyagoba bantu abaabeeranga mu Besuseani, ne mu Taanaki ne mu Poliyadde abaabeeranga mu Ibuleamu, ne mu Megiddo, n'ebyalo ebiriraanye ebibuga ebyo. Naye Abakanani ne bagaanira ddala okuva mu nsi eyo.

²⁸Awo Abayisirayiri bwe beeyongera amaanyi ne bawaliriza Abakanani okubakoleranga emirimu mu kifo ky'okugobwa mu nsi eyo.

²⁹Era ne Efulayimu teyagoba Bakanani naye yabakkiriza okubeera awamu naye mu Gezeri.

³⁰Era ne Zebbulooni teyagoba abantu abaabeeranga mu Kitulooni yadde abaabeeranga mu Nakaloli, naye Abakanani bano n'abakkiriza okubeeranga awamu naye nga bwe bamusasula omusolo.

³¹Aseri teyagoba bantu abaabeeranga mu Akko yadde ab'omu Sidoni n'ab'omu Alaba n'ab'omu Akuzibu n'ab'omu Keruba n'ab'omu Afiki yadde ab'omu Lekobu,

³²naye Abakanani ne bakkirizibwa okubeera awamu n'abantu ba Aseri.

³³Nafutaali teyagoba bantu abaabeeranga mu Besusemesi ne mu Besuanasi naye n'abakkirizanga okubeeranga awamu n'abantu be nga bwe bamusasula omusolo.

³⁴Bo abasajja ba Ddaani tebaasobola kuwamba nsi y'Abamoli ey'omu kiwonvu era Abamoli ne babafuumuula ne baabazaayo mu nsozi.

³⁵Newaakubadde Abamoli baalwanirira nnyo okubeera ku lusozi Keresi, mu Ayalooni ne Saalubimu naye ab'omu kika kya Yusufu ne babafufuggaza era ne babawaliriza okubawanga omusolo.

³⁶Ensalo y'Abamoli yayitanga awo ng'oyambuka Akulabbimu n'okweyongerayo.

Balam 2

¹Awo Malayika wa MUKAMA n'ava e Bokimu n'ajja e Girugaali, n'agamba nti, "Nabaggya mu nsi y'e Misiri ne mbaleeta mu nsi gye nalayira okuwa bajajjammwe; ne ɳjamba nti, 'Endagaano yange gye nalagaana nammwe sirigimenya emirembe gyonna;

²nammwe temukolanga ndagaano n'abantu ab'omu nsi eyo: museseggulanga ebyoto byabwe.' Naye mmwe temugondedde kiragiro kyange: Kiki ekibakozesezza bwe mutyo?

³Kaakano kyenva ɳjamba nti, 'Siibafubutule mu maaso gammwe, naye banaaba balabe bammwe ne bakatonda baabwe banaaba nkonge gye muli.'"

⁴Malayika wa MUKAMA bwe yamala okugamba Abayisirayiri bona ebigambo bino ne balyoka batema emiranga.

⁵Ekifo ekyo ne bakituma erinnya Bokimu; ne baweera eyo Ssaddaaka eri MUKAMA.

⁶Awo Yoswa bwe yamala okulagira Abayisirayiri baabuke, buli omu ku bo n'agenda okugabana ekitundu kye yasuubizibwa.

⁷Abayisirayiri ne baweerezanga MUKAMA mu kiseera kyonna ekya Yoswa era ne mu kiseera kyonna eky'abakulembeze abaawangaala okusinga Yoswa era abaalaba ebikolwa eby'amaanyi MUKAMA bye yakolera Abayisirayiri.

⁸Awo omuweereza wa MUKAMA Yoswa mutabani wa Nuuni n'afa. We yafiira ng'aweza emyaka kikumi mu kkumi.

⁹Ne bamuziika e Timunasukeresi mu kitundu kye yagabana mu nsi ya Efulayimu ey'ensozi mu bukiika obwa kkono obw'olusozi Gaasi.

¹⁰Awo ab'omulembe gwa Yoswa bona bwe baafa ne baggwaawo ne waddawo omulembe gw'abataamanya MUKAMA yadde ebikolwa eby'amaanyi bye yakolera Abayisirayiri.

¹¹Abayisirayiri ne bakola ebibi mu maaso ga MUKAMA era ne basinza Babayaali.

¹²Ne banyiiza MUKAMA kubanga baagoberera era ne basinza bakatonda abalala abamawanga agaali gabeetoolodde ne beerabira MUKAMA Katonda wa bajjajaabwe eyabaggya mu nsi ye Misiri.

¹³Ne bava ku MUKAMA ne basinza ba Baali ne Asutoleesi.

¹⁴MUKAMA n'asunguwalira nnyo Abayisirayiri: Kyeyava abawaayo mu mikono gy'abanyazi ne babanyanga era ne batasobola na kwerwanako okuva mu mikono gy'abalabe baabwe ababeetoolodde kubanga MUKAMA yali amaze okubawaayo.

¹⁵Buli gye baatabaalanga ne bawangulwa kubanga MUKAMA yabavaako olw'ekibi kyabwe nga bwe yabalayirira; ne bawotookerera nnyo.

¹⁶MUKAMA n'abawa abakulembeze abaabalwaniriranga ne babawonya abanyazi.

¹⁷Naye tebaawuliriza bakulembeze baabwe ne bagoberera era ne basinza bakatonda abalala. Tebaakola nga bajjajaabwe abaagobereranga n'okuwuliranga ebiragiro bya MUKAMA.

¹⁸Buli MUKAMA lwe yabawanga omukulembeze yamuyambanga era n'anunulanga Abayisirayiri okuva mu mikono gy'abalabe baabwe ekiseera eky'omukulembeze oyo. Olw'okusindanga n'okweraliikirizibwa abalabe baabwe abaabajooganga, MUKAMA kyeyava abakwatirwa ekisa.

¹⁹Naye omukulembeze olwafanga ne baddamu okweyisanga obubi okukira ne bajjajaabwe, ne bagobereranga ne baweerezanga era n'okuvuunamiranga bakatonda abalala ne banywerera ku mpisa zaabwe embi olw'emputtu yaabwe.

²⁰MUKAMA n'asunguwalira nnyo Abayisirayiri n'agamba nti, "Olw'okuba ngaabantu bano bamenye endagaano gye nalagaana ne bajjajaabwe, so tebagondedde ddoboozi lyange,

²¹siifubutule mu maaso gaabwe wadde eggwanga n'erimu ku ago Yoswa ge yafa bawangudde.

²²Wabula nzija kukozesa amawanga gano okugezesu Abayisirayiri okulaba obanga banaafaayo okunywerera mu kkubo lya MUKAMA nga bajjajaabwe bwe baakola, oba nedda."

²³Bw'atyo MUKAMA n'aleka amawanga gali mu nsi eyo, n'atagawaayo mu mikono gya Yoswa yadde okugafubutula mu nsi eyo nga Yoswa yaakafa.

Balam 3

¹ Waliwo amawanga MUKAMA gaatazikiriza asobole okuyigiririzaako Abayisirayiri bona abataamanya ntalo zonna ez'omu Kanani;

²Kino kiyaambe Abayisirayiri ab'omulembe omuggya abatalwanangako okukuguka mu by'entalo.

³Ge gano: Abakungu abataano ab'Abafirisuuti, Abakanani bona, Abasidoni, n'Abakiivi abaabeeranga ku lusozi Lebanononi, okuva ku lusozi Baalukerumoni okutuuka awayingirirwa mu Kamasi.

⁴Era gaalekebwawo okugezesu Abayisirayiri obanga baligondera amateeka ga MUKAMA ge yalagira bajjajaabwe ng'ayita mu Musa.

⁵Abayisirayiri ne babeeranga wamu n'Abakanani, Abakiiti, Abamoli, Abakiivi n'aba Yebusi.

⁶Ne bawasanga abawala ab'omu mawanga ago era ne bafumbizanga bawala baabwe eri abalenzi b'omu mawanga ago ne basinzanga ne bakatonda baabwe.

Okufuga kwa Osunieri

⁷Abayisirayiri ne bakola ebibi mu maaso ga MUKAMA, ne beerabira MUKAMA Katonda waabwe ne basinzanga Babaali ne Baasera.

⁸Noolwekyo MUKAMA n'asunguwalira nnyo Abayisirayiri, kyeyava abawaayo okuwangulwa n'okufugibwa kabaka Kusanurisasaimu ow'e Mesopotamiya okumala emyaka munaana.

⁹Naye Abayisirayiri bwe baalaajanira MUKAMA, kyeyava abawa omulwanyi omuzira okubanunula erinnya lye Osunieri azaalibwa Kenezi muto wa Kalebu.

¹⁰Osunieri n'ajjula Omwoyo wa MUKAMA n'akulembera Abayisirayiri, n'alumba Kusanurisaseyimu kabaka w'e Mesopotamiya era n'amuwangula kubanga MUKAMA yamuwaayo mu mikono gya Osunieri.

¹¹Awo ne wayitawo emyaka ana ng'Abayisirayiri bali mu mirembe okutuusa ddala Osunieri mutabani wa Kenazi lwe yafa.

Okufuga kwa Ekudi

¹²Ate era Abayisirayiri ne bakola ebibi mu maaso ga MUKAMA; kyeyava awa Eguloni kabaka wa Mowaabu amaanyi okubawangula olw'ebibi byabwe.

¹³Ne yegatta n'Abamoni n'Abamaleki ne balumba Abayisirayiri era ne babawambako ekibuga kyabwe eky'enkindu.

¹⁴Abayisirayiri ne bafugibwa Egulooni kabaka wa Mowaabu emyaka kkumi na munaana.

¹⁵Naye Abayisirayiri bwe baalaajanira MUKAMA, kyeyava abawa omulwanyi omuzira okubanunula ayitibwa Ekudi ow'enkonokono mutabani wa Gera ow'omu kika kya Benyamini; era oyo Abayisirayiri gwe baatuma okutwala ekirabo kyabwe eri Egulooni kabaka wa Mowaabu.

¹⁶Ekudi ne yeewesessa ekitala ekirina obwogi erudda n'erudda nga kiweza sentimita ana mu ttaano obuwavnu. N'akyesiba ku kisambi kye ekya ddyo munda mu ngoye ze.

¹⁷N'atwalira Egulooni kabaka wa Mowaabu ekirabo. Egulooni yali musajja munene nnyo.

¹⁸Awo bwe yamala okuwaayo ekirabo, n'agobawo abajja bakyetisse.

¹⁹Ekudi n'akoma awaali amayinja amoole kumpi ne Girugaali n'addayo eri Egulooni n'amugamba nti, "Nnina obubaka obw'ekyama gy'oli." Kabaka n'agobawo bona be yali nabo era ne bamuvira.

²⁰Awo kabaka bwe yali ng'atudde bw'omu mu nnyumba ye, mu kisenge ekya waggulu ekiweweetu, Ekudi n'amusemberera era n'amugamba nti, "Nnina obubaka obuva eri Katonda gy'oli." Kabaka n'asituka mu ntebe ye.

²¹Ekudi n'asowolayo ekitala kye n'omukono ogwa kkono ng'akiggya ku kisambi kye ekya ddyo n'akisogga kabaka mu lubuto;

²²ekitala kyonna n'ekiti kyakyo ne kimubuliramu, amasavu ne gakibuutikira era n'atayinza na kukisowolamu. Ebyenda bya kabaka ne biyiika.

²³Ekudi n'asibawo oluggi oluyingira mu kisenge ekya waggulu, n'afulumira mu mulyango ogw'emanju.

²⁴Bwe yali nga yakafuluma abaweeereza ba kabaka ne bajja. Bwe baalaba nga enzigi nsibe ne balowooza nti, "Kabaka atekwa okuba ng'agenze manju."

²⁵Bwe baakoowa okulindirira ne baddira ekisumuluzo ne basumululawo, baagenda okulaba ng'omulambo gwa mukama waabwe gugudde bugazi mu kisenge.

²⁶Mu kiseera kye baamala nga balindirira kabaka okuggulawo Ekudi mwe yaddukira n'ayita ku mayinja amoole n'atuuka e Seyiri.

²⁷Bwe yatuuka mu kitundu eky'ensozi ekya Efulayimu n'akiyitamu nga bw'afuuwa ekkondeere, Abayisirayiri ne bamwegattako ye nga abakuleembeddemu.

²⁸N'abagamba nti, "Mungoberere kubanga MUKAMA abawadde obuwanguzi ku balabe bammwe Abamowaabu." Ne bamugoberera ne bawamba ekifo awasomokerwa ekyali kyolekedde aba Mowaabu ku mugga Yoludaani; Abayisirayiri ne bataganya muntu yenna kusomoka.

²⁹Ne batta ku basajja abalwanyi abazira aba Mowaabu mutwalo mulamba; teri n'omu ku bo yasimattuka.

³⁰Bwe batyo Abayisirayiri ne bajeemulula Abamowaabu ku lunaku olwo. Okuva ku olwo ensi n'ebaamu emirembe okumala emyaka kinaana.

Samugali

³¹Omukulembeze eyaddirira Ekudi mu bigere ye Samugali mutabani wa Anasi era naye yanunula Abayisirayiri. Ye wuuyo eyatta abasajja Abafirisuuti lukaaga nga yeeyambisa omuwunda gwe bagobesa ente nga zirima.

Balam 4

Okufuga kwa Debola

¹Ekudi bwe yamala okufa Abayisirayiri ne bakola nate ebibi eri MUKAMA.

²MUKAMA n'abawaayo mu mikono gya Yabini Kabaka wa Kanani, eyabeeranga e Kazoli; omuduumizi w'eggye lye nga ye Sisera eyabeeranga e Kalosesi eky'abamawanga.

³Yabini yalina amagaali ag'ekyuma lwenda, era n'ajoogera Abayisirayiri emyaka amakumi abiri, kyebaava balaajaanira MUKAMA abayambe.

⁴Awo Nnabbi Debola mukazi wa Leppidosi ye yali akulembira Abayisirayiri mu kiseera ekyo.

⁵Era bulijjo yatuulanga wansi w'olukindu olwayitbwanga olwa Debola wakati w'e Lama ne Beseri mu kitundu kya Efulayimu eky'ensozi: Abayisirayiri ne bajjanga gyali okubalamula.

⁶N'atumya Baraki mutabani wa Abinoamu ave mu Kedesi ekitundu kya Nafutaali, n'amugamba nti, "MUKAMA Katonda w'Abayisirayiri akulagidde nti, 'Ggenda okujjaanyize abasajja bo ku lusozi Taboli, obalondemu omutwalo gumu okuva mu kika ekya Nafutaali n'ekya Zebbulooni.

⁷Ndisindika gy'oli ku mugga Kisoni, Sisera omuduumizi w'eggye lya Yabini, n'amagaali ge n'abalwanyi be era ndibawaayo mu mikono gyo.'

⁸Baraki n'amuddamu nti, "Kale nnaagenda bw'onokkiriza ηnjende naawe, naye bw'otokkirize nange siigende."

⁹ Debola n'amugamba nti, "Wewaawo nnaagenda naawe, naye ekitiibwa n'obuwanguzi tebiibe bibyo, kubanga MUKAMA aliwaayo Sisera awangulwe mu mikono gy'omukazi." Baraki n'addayo ne Debola e Kedesi.

¹⁰ Baraki n'ayita ab'ekika kya Zebbulooni n'ekya Nafutaali bakuŋjaanire e Kedesi, abasajja omutwalo gumu ne bamugoberera awamu ne Debola.

Baraki awangula Sisera

¹¹ Keberi Omukeeni yazimba eweema ye okumpi n'omuti omwera e Zaanannimu ekiri okumpi ne Kedesi oluvannyuma lw'okwawukana ne Bakeeni banne, bazzukulu ba Kobabu mukoddomi wa Musa.

¹² Awo Sisera bwe yamanya nga Baraki mutabani wa Abinoamu atuuse ku Lusozi Taboli,

¹³ n'akuŋjaanya amagaali ge gonna lwenda ag'ekyuma, n'abalwanyi be bona okuva ku Kalosesi eky'abamawanga okutuuka ku mugga Kisoni.

¹⁴ Debola n'agamba Baraki nti, "MUKAMA si y'akukuleembedde! Noolwekyo situkiramu kubanga olwa leero MUKAMA awaddeyo Sisera mu mikono gyo." Awo Baraki n'ava ku lusozi Taboli n'abalwanyi be omutwalo gumu.

¹⁵ MUKAMA n'afufuggaza n'ekitala Sisera n'amagaali gonna n'eggye lye lyonna nga Baraki alaba; Sisera n'abuuka mu ggaali lye, n'adduka.

¹⁶ Baraki n'afubutula eggye lya Sisera n'amagaali gaalyo okutuuka e Keloseesi eky'amawanga; era n'abatta n'ekitala obutalekaawo yadde n'omu.

Okuttibwa Kwa Sisera

¹⁷ Naye Sisera n'addukira eri eweema ya Yayeeri mukazi w'Omukeeni Keberi: Kubanga waaliwo enkolagana wakati wa kabaka w'e Kazoli, Yabini n'ab'omu maka g'Omukeeni Keberi.

¹⁸ Yayeeri n'afuluma okusisinkana Sisera; n'amugamba nti, "Mukama wange yingira mu weema yange, totya." Sisera n'ayingira mu weema. Yayeeri n'amubikkako omunagiro.

¹⁹ Namwegayirira nti, "Mpa ku tuzzi nnyweko kubanga ennyonta enzita." N'asumulula eddiba omufukibwa amata n'amunywesa oluvannyuma n'amubikkako.

²⁰ Sisera n'agamba Yayeeri nti, "Yimirira mu mulyango gwa weema eno, omuntu yenna bw'ajja n'akubuuza obanga muno mulimu omusajja yenna, omuddamu nti, 'Temuli.' "

²¹ Awo Sisera bwe yali nga ali mu tulo tungi, Yayeeri mukazi wa Keberi n'addir enkondo ya weema n'ennyondo n'amusooberera n'amukomerera enkondo mu kyenyi, n'eyitamu n'ekwata n'ettaka n'afa.

²²Awo Baraki bwe yali nga anoonya Sisera, Yayeeri n'afuluma okumusisinkana, n'amugamba nti, "Jjangu nkulage omusajja gw'onoonya. Baraki n'ayingira mu weema n'alaba omulambo ggwa Sisera nga gukubiddwamu enkondo mu kyenyi."

²³Ku lunaku olwo Katonda n'awa Abayisirayiri obuwanguzi ku Yabini kabaka wa Kanani.

²⁴Abayisirayiri ne beeyongera okufufuggaza Yabini kabaka wa Kanani okutuusa lwe bamuzikiririzza ddala.

Balam 5

Oluyimba Iwa Debola

¹Ku olwo Debola ne Baraki mutabani wa Abinoamu ne bayimba bwe bat:

²"Mutendereze MUKAMA kubanga mu Isirayiri abakulembeze baatuukiriza omulimu gwabwe n'abantu ne beewaayo nga baagala.

³"Muwulirize mmwe bakabaka, musseeyo omwoyo mmwe abalangira; nze kennyini, nze nnaayimbira MUKAMA; nze nnaayimbira Katonda w'Abayisirayiri.

⁴"MUKAMA, bwe wava e Seyiri, bwe wava mu kitundu kya Edomu okutabaala, ensi n'ekankana, enkuba n'eyiika okuva mu ggulu. Weewaawo, ebire ne bifukumuka amazzi.

⁵Ensozi ne zikankana awali MUKAMA, Oyo owa Sinaayi, ne lukankana mu maaso MUKAMA Katonda w'Abayisirayiri.

⁶"Ku mulembe gwa Samugali, mutabani wa Anasi, ne ku mulembe gwa Yayeeri abatambuze tebaayitanga, mu nguudo nnene, baatambuliranga mu mpenda.

⁷Abakulembeze mu Isirayiri baggwaawo okutuusa nze Debola lwe nayimuka, nga nnyina wa bona mu Isirayiri.

⁸Bwe beefunira abakulembeze abalala, entalo ne ziryoka zibalukawo mu Isirayiri. Ku basajja Abayisirayiri emitwalo ena kwaliko n'omu eyalina effumu oba engabo?

⁹Omutima gwange guli eri abakulembeze b'Abayisirayiri, n'eri abantu abeewaayo nga baagala. Mutendereze MUKAMA.

¹⁰"Mukyogereko mmwe, abeebagala ku ndogoyi enjeru, mmwe abatuula ku biwempe ebirungi ennyo, nammwe abatambulira mu kkubo.

¹¹Wulira oluyimba lw'abantu ku luzzi, nga batendereza obuwanguzi era n'ebikolwa bya MUKAMA eby'obutuukirivu, ebikolwa bye eby'obutuukirivu nga akulembera Abayisirayiri. "Awo abantu ba MUKAMA ne baserengeta, ne bagenda ku miryango gy'ebibuga byabwe.

¹² Zuukuka, zuukuka Debola zuukuka, zuukuka, okulembere oluyimba; golokoka, Baraki okulembere abawambe bo nga basibiddwa, ggwe mutabani wa Abinoamu.

¹³ “Awo abakungu abaasigalawo ne baserengeta, abantu ba MUKAMA, ne baserengeta okulwanyisa ow’amaanyi.

¹⁴ Awo abaava mu kitundu kya Efulayimu ne baserengeta mu kiwonvu, nga bakugoberera ggwe, Benyamini, n’ab’ekika kyo. Mu Makiri ne wavaayo abakulembeze, ne baserengeta, ne mu kitundu kya Zebbulooni ne wavaayo abaduumizi.

¹⁵ Abalangira ba Isakaali baali wamu ne Debola; era Isakaali yali wamu ne Baraki. Ne bafubutuka okumugoberera mu kiwonvu. Olw’enjawukana ezaali mu kika kya Lewubeeni, waaliwo okusooka okufumiitiriza ennyo mu mitima gyabwe.

¹⁶ Kiki ekyakusigaza mu bisibo byo eby’endiga, okuwuliriza endere zebafuuyira endiga? Olw’enjawukana ezaali mu kika kya Lewubeeni, waaliwo okusooka okufumiitiriza ennyo mu mitima gyabwe.

¹⁷ Ab’ekika kya Gireyaadi baasigala mitala wa Yoludaani. N’ab’ekika kya Ddaani ekyabasigaza mu byombo kiki? Ab’ekika kya Aseri; baasigala ku lubalama lw’ennyanya, ne babeera awali emyalo gyabwe.

¹⁸ Ab’ekika kya Zebbulooni baawaayo obulamu bwabwe, era n’ab’ekika kya Nafutaali mu ddwaniro.

¹⁹ “Ku mugga gw’e Megiddo mu Taanaki, bakabaka bajja ne balwana, bakabaka b’e Kanani baalwana. Naye tebaanyaga bintu.

²⁰ Emunyeeny zaalwana nga zisinziira mu ggulu, zaalwanyisa Sisera nga bwe zetoloola mu bbanga.

²¹ Omugga Kisoni gwabasanyizaawo ddala, omugga ogwo ogw’edda omugga Kisoni. Ggwe emmeeme yange, kkumba n’amaanyi.

²² Awo embalaasi ne zija nga zirigita era nga bwe zisambirira ettaka, ensolo zaabwe ezo ez’amaanyi.

²³ Malayika wa MUKAMA n’agamba nti, ‘Mukolimire Merozi. Mukolimire nnyo ababeera e Merozi; kubanga tebeetaba mu lutalo lwa MUKAMA. Tebaalwetabaamu nga MUKAMA Katonda alwanyisa ab’amaanyi.’

²⁴ “Nga wa mukisa Yayeeri okusinga abakazi bona! Nga wa mukisa Yayeeri mukazi w’Omukeeni Keberi, okusinga abakazi bona ababeera mu weema!

²⁵ Bwe yasaba amazzi, yamuwa mata, era n’amuleetera n’omuzigo mu bbawulo ey’ekikungu.

26 Yakwata enkondo ya weema mu mukono gwe ogwa kkono, n'ennyondo mu gwa ddyo, n'akomerera Sisera enkondo mu kyenyi n'eyita namu.

27 Amaanyi gaamuggwa n'agwa; yagwa ku bigere bya Yayeeri n'alambaala we yagwa we yafiira.

28 "Nnyina wa Sisera yalingiriza mu ddirisa; yayisa amaaso mu ddirisa, n'aleekaanira waggulu nti 'Kiki ekirwisizza eggaali lye okujja? Okuguluba kw'eggaali lye nga sikuwulira?'

29 Abazaana be abagezi baba tebanamuddamu ne yeddamu yekka.

30 'Tebazudde omunyago era tebali mu kugugabana, omuwala omu oba babiri buli musajja? Sisera tufunye omunyago ogw'engoye enduke ez'amabala? Eminagiro ebiri emiruke, egy'amabala tegiibe gyange?'

31 "Ayi MUKAMA Katonda abalabe bo bazikirirenga bwe batyo nga Sisera. Naye abo bona abakwagala bamasemasenga ng'enjuba ey'akavaayo mu maanyi gaayo." Awo ne wayitawo emyaka ana nga Abayisirayiri bali mu mirembe.

Balam 6

Abamidiyaani balumba Abayisirayiri

1 Abayisirayiri ne bakola ebibi mu maaso ga MUKAMA Katonda. N'abawaayo mu mikono gy'Abamidiyaani okumala emyaka musanvu.

2 Abayisirayiri ne batulugunyizibwa nnyo Abamidiyaani. Kyebaava beesimira empuku ne beetoolooza ebibuga byabwe agasenge.

3 Buli Abayisirayiri lwe baasiganga ensigo, Abamidiyaani, Abamaleki n'abantu ab'ebuvanjuba ne babalumbanga.

4 Ne basiisira mu nsi eyo, ne bazikiriza ebirime byonna okutuusiza ddala e Gaaza. Ne bawemmenta endiga, ente, endogoyi era tebaalekera Bayisirayiri kantu konna.

5 Kubanga baayikanga ng'enzige mu bungi nga tebabalika. Nga bajja n'eweema, ente, n'enjamira zaabwe. Bwe batyo ne bazikiriza ensi.

6 Abayisirayiri baajeezebwa nnyo Abamidiyaani, Abayisirayiri kyebaava balaajaanira MUKAMA Katonda.

MUKAMA atuma Nnabbi

7 Awo Abayisirayiri bwe baalaajanira MUKAMA olw'Abamidiyaani, MUKAMA,

8 n'atumira Abayisirayiri Nnabbi, n'abagamba nti, "MUKAMA Katonda w'Abayisirayiri agamba bw'ati: nabakulembra okuva mu Misiri, ne mbaggya mu nnyumba ey'obuddu,

⁹ne mbanunula okuva mu mikono gy'Abamisiri, ne mu mikono gy'abo bona abababonnyabonnyanga ne mbafuumuula ku lwammwe era ne mbawa mmwe ensi yaabwe;

¹⁰ne mbagamba nti, 'Nze MUKAMA Katonda wammwe, temussanga kitibwa mu bakatonda b'Abamoli, bannannyini nsi gye mubeeramu.' Naye mmwe temugondedde ddoboozi lyange."

MUKAMA Ayita Gidyoni

¹¹Malayika wa MUKAMA Katonda n'ajja mu Ofula, n'atuula wansi w'omuti omwera ogwali ogwa Yowaasi ow'omu ssiga lya Abiezeri: ne mutabani we Gidyoni yali akubira eñjaano mu ssogolero alyoke agikweke Abamidiyaani.

¹²Malayika wa MUKAMA Katonda n'amulabikira, n'amugamba nti, "Ggwe omusajja omulwanyi namige. MUKAMA ali wamu naawe."

¹³Gidyoni n'abuuza nti, "Ayi Mukama wange, obanga MUKAMA ali wamu naffe, kale lwaki bino byonna bitutuuseeko? Eby'amagero eby'ekitalo bajjajjaffe bye baatubuulirako nti, 'MUKAMA yatuggya mu Misiri, byo biruwa?' Naye Kaakano MUKAMA Katonda atwabulidde era atuwaddeyo mu mikono gy'Abamidiyaani."

¹⁴MUKAMA Katonda n'amukyukira n'agamba nti, "Ggenda n'amaanyigo g'olina, onunule Abayisirayiri mu mikono gy'Abamidiyaani: si nze nkutumye?"

¹⁵N'amuddamu nti, "Ayi MUKAMA wange, nnyinza ntya okununula Abayisirayiri? Kubanga essiga mwe nva lye lisinga okunyoomebwa mu kika kya Manase ate nze nsembayo obuto mu maka ga kitaffe."

¹⁶MUKAMA n'amugamba nti, "Ndibeera wamu naawe, era olifufuggaza Abamidiyaani ng'olinga akuba omuntu omu."

¹⁷Gidyoni n'amuddamu nti, "Obanga nsiimiddwa mu maaso go mpa obukakafu nga ddala ggwe wuuyo ayogera nange.

¹⁸Nkwegayiridde, tova wano, ka ñjende nkuleetere ekirabo kyange nkiteeke mu maaso go." MUKAMA n'agamba nti, "Kale kambeere wano okutuusa lw'onookomawo."

Ekiweebwayo Kya Gidyoni Kisiimibwa

¹⁹Gidyoni n'ayingira mu nju ye, n'atta omwana gw'embuzi n'ateekateeka n'emigaati egitazimbulukuswa ng'akozesa kilo abiri ez'obuwunga bw'eñjaano. Ennyama n'agiteeka mu kibbo; ne guleevi waayo ne bamussa mu kibya, n'abimuleetera wansi w'omwera n'abimuwa.

²⁰Naye malayika wa Katonda n'amulagira nti, "Ddira ennyama n'emigaati egitazimbulukuswa obiteeke ku jjinja lino obifukeko guleevi." Gidyoni n'akola bw'atyo.

²¹Awo malayika wa MUKAMA Katonda n'akoma ku nnyama ne ku migaaati egitazimbulukuswa nga yeeyambisa omuggo gwe yalina. Omuliro ne guva mu jjinja ne gububuuka ne gwokya ennyama n'emigaati egitazimbulukuswa byonna ne bisaanawo. Amangwago malayika wa MUKAMA n'abulawo.

²²Gidyoni n'ategeera ng'oyo abadde malayika wa MUKAMA; Gidyoni n'agamba nti, "Zinsanze, Ayi MUKAMA Katonda, kubanga tulabaganye ne malayika wa MUKAMA maaso ku maaso."

²³Naye MUKAMA Katonda n'amugamba nti, "Emirembe gibe ku ggwe tootya tojja kufa."

²⁴Gidyoni n'azimbira MUKAMA Katonda ekyoto mu kifo ekkyo; n'akituuma erinnya Yakuwasalumu (MUKAMA gy'emirembe); n'okutuusa kaakano kikyaliyo mu Ofula eky'ab'omu ssiga ly a Abiezeri.

Gidyoni azikiriza ekyoto kya Baali

²⁵Ekiro ekkyo MUKAMA Katonda n'agamba Gidyoni nti, "Mmennya ekyoto kwe basinziza Baali, ofuneyo ente eya sseddume ensava eddirira esinga obulungi okuva mu kiraalo kya kitaawo; otemeeteme ekifaananyi ekibajje ekya Asera ekiriraanye ekyoto kya Baali:

²⁶mu kifo ekkyo kungulu ozimbireko MUKAMA Katonda wo ekyoto mu nzimba entuufu eyalagirwa, oddire ente eyo eya sseddume gy'oggye mu kiraalo kya kitaawo ogiweeyo ng'ekiweebwayo ekyokebwa ng'ogyokya n'ebibajjo by'ekifaanannyi kya Asera."

²⁷Awo Gidyoni n'atwala kkumi ku baddu be, n'akola nga MUKAMA Katonda bwe yamulagira, naye kino yakikola kiro olw'okutya ab'omu nju ya kitaawe n'abantu abalala ab'omu kibuga.

²⁸Abantu b'omu kibuga baagenda okugolokoka ku nkya mu makya, nga ekyoto kwe baasinzipa Baali kimenyeddwamenyeddwa, n'ekifaananyi kya Asera ekyakiri okumpi nga nakyo kitemeddwatemeddwa, n'ente eya ssava ng'eweereddwayo ku kyoto ekiggya.

²⁹Ne beebruza nti, "Ani akoze kino?" Awo bwe babuuliriza, ne bategeezebwa nti, "Gidyoni mutabani wa Yowaasi y'akikoze".

³⁰Abantu b'omu kibuga ne bagamba Yowaasi nti, "Ffulumya mutabani wo tumutte, kubanga amenyeemenye ekyoto kwetusinziza Baali; ate era n'atemaatema n'ekifaananyi kya Asera ekibadde kikiriraanye."

³¹Yowaasi n'addamu ekibinja ky'abantu abaali bamulumbye nti, "Mwagala kulwanirira Baali? Mwagala kuwagira bigendererwa bye? Omuntu yenna ayagala okumulwanirira wa kuttibwa nga obudde tebunakya; obanga ddala Baali ye Katonda, yerwanirire yekka, kubanga ekyoto kye kyamenyeddwamenyeddwa."

³²Okuva ku olwo Gidyoni ne bamukazaako erya Yerubbaali ekitegeeza nti, “Baali amulwanyise.” Kubanga yamenyaamenya ekyoto kya Baali.

³³Awo Abamidiyaani, Abamaleki n’abantu b’ebuvanjuba ne beegatta bona ne basomoka omugga Yoludaani ne basiisira mu kiwonvu ky’e Yezuleeri.

³⁴Omwoyo wa MUKAMA Katonda n’akka ku Gidyoni; n’afuuwa ekkondeere ng’ayita ab’essiga lyá Abiyezeeri bamugoberere.

³⁵N’atuma ababaka eri ab’ekika kya Manase nabo bamugoberere. N’atuma n’ababaka abalala eri ab’ekika kya Aseri, n’ekya Zebbulooni n’ekya Nafutaali bamusisinkane.

Gidyoni asaba Katonda Obukakafu

³⁶Awo Gidyoni n’agamba Katonda nti, “Obanga olinunula Abayisirayiri ng’oyita mu nze nga bwe wasuubiza,

³⁷ka nteeke ebyoya by’endiga mu kifo awakubirwa ejjaano; bwe binaatoba omusulo naye ng’ettaka eribyetoolodde lyo kkalu, ne ndyoka nkakasa ddala ng’olinunula Abayisirayiri ng’oyita mu nze nga bwe wasuubiza.”

³⁸Ddala bwe kityo bwe kyalí; kubanga Gidyoni bwe yagolokoka enkeera mu makya ebyoya by’endiga n’abikamulamu omusulo ne muvaamu ekibya kiramba eky’amazzi.

³⁹Gidyoni n’agamba Katonda nti, “Nkwegayiridde tonsunguwalira, kankusabe obukakafu omulundi omulala gumu gwokka. Ku luno njagala ebyoya by’endiga bye biba bibeera ebikalú, ettaka eribyetoolodde litobe omusulo.”

⁴⁰Ekiro ekyo Katonda n’akola nga Gidyoni bwe yamusaba, ebyoya by’endiga ne biba bikalu, lyo ettaka eribyetoolodde ne litoba omusulo.

Balam 7

Gidyoni ayungula abalwanyi ebikumi bisatu

¹Awo Gidyoni gwe baakazaako erya Yerubbaali, ne be yali nabo bona, ne bakeera mu makya, ne basiisira ku luzzi Kalodi; Olusiisira lwa Bamidiyaani lwalí mu bukiika obwa kkono mu kiwonvu, kumpi n’olusozi Mole.

²MUKAMA Katonda n’agamba Gidyoni nti, “Abalwanyi bo basusse obungi; nze sibaganye kuwangula Abamidiyaani, Abayisirayiri baleme okwenyumiriza nti amaanyi gaabwe ge gabawanguzza.

³Noolwekyo kaakano genda olangirire eri abalwanyi bo nti, ‘Buli mutiitiizi yenna n’oyo akankana, ave ku lusozi luno Gireyaadi addeyo ewuwe.’” Abalwanyi emitwalo ebiri mu enkumi bbiri ne baddayo ewaabwe, ne wasigalawo omutwalo gumu.

⁴ MUKAMA Katonda n'agamba Gidyoni nti, "Era abalwanyi bo bakyasusse obungi, baserengese ku mugga, eyo gye naabayunguliramu abasaanidde okugenda naawe n'abatasaanidde."

⁵Awo Gidyoni n'aserengesa abalwanyi ku mugga, MUKAMA Katonda n'amugamba nti, "Buli mulwanyi anaasena amazzi n'engalo ze era n'aganywa ng'embwa mwawule okuva mu abo abanaafukamira ku mugga ne bakubamu emimwa ne banya.

⁶Abo bona abaasena amazzi n'engalo zaabwe ne baganywa ng'embwa baali ebikumi bisatu, naye abalala bona baafukamira ku mugga ne bakubamu emimwa okunywa."

⁷ MUKAMA Katonda n'agamba Gidyoni nti, "Nzija kubanunula era mbawe n'obuwanguzi ku ba Midyaani nga nkosesa abalwanyi ebikumi ebisatu abaanywedde amazzi ng'embwa, naye abo bona abasigaddewo bagambe beddireyo ewaabwe."

⁸Awo Gidyoni n'asigaza abalwanyi be ebikumi ebisatu, bali abalala n'abakuŋŋanyaako emmere n'amakondeere gaabwe, n'abalagira ne beddirayo ewaabwe. Olusiisira lw'Abamidiyaani lwamuli kyemmanga mu kiwonvu.

⁹Ekiro ekyo MUKAMA Katonda n'amulagira nti, "Situkiramu olumbe eggyle ly'Abamidiyaani mu lusiisira kubanga mbawaddeyo mu mikono gyo.

¹⁰Naye obanga otya okubalumba genda ne Pula omuweerezaawo:

¹¹era bw'onoowulira bye boogera onoofuna obuvumu okubalumba. Gidyoni n'omuweereza we Pula ne basemberera olusiisira lw'Abamidiyaani."

¹²Abamidiyaani, Abamaleki n'Abamawanga amalala ag'ebuvanjuba abaali mu kiwonvu, mu bungi baali ng'enzige; era n'eŋŋamira zaabwe mu bungi, nga ziri ng'empeke z'omusenyu oguli ku lubalama lw'enyanja.

¹³Gidyoni aba atuuka bw'ati ku lusiisira n'awulira omukuumi ng'ategeeza munne ekirooto nti, "Naloota nga omugaati gwa sayiri guyiringise, gutomedde eweema ne yevuunika."

¹⁴Munne n'amuddamu nti, "Ekyo si kirala wabula kitala ky'omusajja Omuyisirayiri Gidyoni mutabani wa Yowaasi. Era oyo Katonda amuwadde obuwanguzi ku ba Midyaani n'eggye lyaffe lyonna."

¹⁵Gidyoni bwe yamala okuwulira ekirooto ekyo n'amakulu gaakyo, n'avuunama n'asinza MUKAMA Katonda; era n'addayo mu lusiisira lw'Abayisirayiri n'abalagira nti, "Musitukiremu; kubanga MUKAMA abawadde obuwanguzi ku ggye ly'Abamidiyaani."

¹⁶Awo Abasaja bali ebikumi ebisatu n'abawulamu ebibinja bisatu, buli omu ku bo n'amukwasa ekkondeere n'ensuwa ng'erimu ekitawuliro.

¹⁷N'abagamba nti, "Munnekalirize, bwe tunaaba tunaatera okutuuka ku lusiisira buli kye nnaakola nammwe nga mukikola.

¹⁸Nze n'abo benaabeera nabo, bwe tunaafuuwa amakondeere gaffe, nammwe ne mufuuwa agammwe, ne muleekaanira waggulu nti, 'Ku lwa MUKAMA Katonda ne ku lwa Gidyon.' "

Aba Midyaani balinnyibwa ku nfeete

¹⁹Eyo mu ttumbi nga Abamidiyaani baakajja bakyuse ekibinja ky'abakuumi, Gidyon n'abalwanyi ekikumi be yali nabo, ne basemberera olusiisira, ne bafuuwa amakondeere, ne baasa n'ensuwa ze baali bakutte.

²⁰Ebibinja ebirala nabo ne bafuuwa amakondeere, ne baasa ensuwa zaabwe, ne bakwata ebitawuliro mu mikono gyabwe egya kkono, n'amakondeere mu mikono gyabwe egya ddyo, ne bafuuwa nga bwe baleekaanira waggulu nti, "Ekitala kya MUKAMA Katonda era n'ekya Gidyon."

²¹Buli mulwanyi n'ayimirira mu kifo kye okwetooloola olusiisira: eggye lyonna ery'Abamidiyaani ne bafubutuka nga bwe baleekaanira waggulu.

²²Awo amakondeere ebikumi ebrisatu bwe gaafuuyibwa, MUKAMA Katonda n'atabulatabula Abamidiyaani ne battijjana bokka na bokka n'ebitala byabwe era n'eggye lyabwe lyonna ne lifubutulwa okutuukira ddala e Besusitta okwolekera e Zerera, era n'okutuukira ddala Aberumekola okumpi ne Tabbasi.

²³Abalwanyi ba Isirayiri bona okuva mu kika ekya Nafutaali n'ekya Aseri n'ekya Manase, ne bakoowooolebwa okuwondera Abamidiyaani.

²⁴Gidyon n'asindika ababaka okubuna ekitundu kyonna ekya Efulayimu eky'ensozi: babalagire nti, "Muserengete era muwondere Abamidiyaani, mubasooke okwekwata omugga Yoludaani era n'enzizi okutuukira ddala e Besubata." Awo abalwanyi bona ab'omu kika kya Efulayimu ne bakoowoolwa, ne bawamba omugga Yoludaani n'enzizi zonna okutuukira ddala e Besubata.

²⁵Ne bawamba Olebu ne Zeebu bombi abalangira ba Midyaani; Olebu ne bamuttira ku lwazi olumanyiddwa nga "Olwazi lwa Olebu" ne Zeebu ne bamuttira ku ssogolero erimanyiddwa nga "essogolero lya Zeebu", ne bongera okuwondera Abamidiyaani. Omutwe gwa Olebu n'ogwa Zeebu, Gidyon ne bagimusanza emitala wa Yoludaani.

Balam 8

¹Awo abasajja ba Efulayimu ne babuuza Gidyon nti, "Lwaki watuyisa bw'otyo, n'ototuyita bwe wagenda okulwana ne Midyaani?" Ne bamunenya nnyo.

²Naye n'abaddamu nti, "Kiki kye nkoze okugeraageranya nammwe kye mukoze? Amakungula ga Efulayimu tegasinga ezabbibu Abiyezeeri z'akungudde?

³Katonda yagabula Olebu ne Zeebu abakulembeze ba Midyaani mu mukono gwammwe. Kiki kye nandiyinzizza okukola okugeraageranya nammwe?" Awo bwe yabagamba ebigambo ebyo ne bakkakkana.

⁴Awo Gidyoni n'abasajja be ebikumi bisatu, nga bakooye, naye nga bakyabawondera, ne batuuka ku Yoludaani ne basomoka.

⁵N'agamba abasajja ab'omu Sukkosi nti, "Muwe ku basajja bange, ekyokulya, bakooye. Mpondera Zeba ne Zalumunna bakabaka ba Midyaani."

⁶Naye abakungu ab'omu Sukkosi ne bamuddamu nti, "Eggye lyo limaze okuwamba Zeba ne Zalumunna tulyoke tubawe emmere?"

⁷Awo Gidyoni n'abaddamu nti, "Kale olw'ekyo kye muñjambye, MUKAMA Katonda bw'aligabula Zeba ne Zalumunna mu mukono gwange, ndiyuza emibiri gyammwe n'amaggwa ag'omu ddungu n'emyeramannyo."

⁸Bwe yava eyo, n'ayambuka n'alaga e Penieri, n'abasaba ekintu kye kimu. Naye abantu b'e Penieri ne bamuddamu ng'abasajja ab'omu Sukkosi bwe bamuddamu.

⁹Kyeyava agamba abantu b'e Penieri nti, "Bwe ndikomawo emirembe, ndimenyaamenya omunaala guno."

¹⁰Zeba ne Zalumunna baali mu Kalukoli n'eggye lyabwe ery'abasajja ng'omutwalo gumu n'ekitundu, nga be bantu abaasigalawo ku ggye lyonna ery'abantu ab'obuvanjuba. Abasajja ng'emitwalo kkumi n'ebiri abaasowolanga ebitala be baali bafudde.

¹¹Awo Gidyoni n'ayambukira mu kkubo ly'abo ababeera mu weema ku luuyi olw'ebuvanjuba olw'e Noba n'e Yogubeka n'alumba egghe nga teritegedde.

¹²Zeba ne Zalumunna ne badduka, naye n'abawondera, era n'awamba bakabaka bombi aba Midyaani, n'awangulira ddala egghe lyabwe lyonna.

¹³Awo Gidyoni mutabani wa Yowaasi n'akomawo okuva mu lutalo ng'ayitira mu Lukuubo lwa Keresi.

¹⁴N'asangiriza omuvubuka ow'oku bantu ab'omu Sukkosi, n'abaako by'amubuuza. Omuvubuka n'amuwandiikira amannya g'abakungu ab'omu Sukkosi, abakadde nsanvu mu musanvu.

¹⁵Gidyoni n'alyoka ajja eri abasajja ab'omu Sukkosi n'abagamba nti, "Zeba ne Zalumunna baabo be mwasinzirako okundulira nga muñjamba nti, temuyinza kuwa basajja bange abaali bakooye mmere, nga sirina Zeba ne Zalumunna mu mukono gwange."

¹⁶N'akwata abakadde b'ekibuga n'addirra amaggwa ag'omu ddungu n'emyeramannyo n'abonereza abasajja ab'omu Sukkosi.

¹⁷N'agenda n'e Penieri n'amenzaamenya omunaala gwa Penieri, n'atta n'abasajja b'omu kibuga.

¹⁸N'alyoka abuuza Zeba ne Zalumunna nti, "Abasajja be mwattira e Taboli baali bafaanana batya?" Ne bamuddamu nti, "ggwe nga bw'oli nabo bwe baali. Buli omu yali afaanana ablangira."

¹⁹N'abaddamu nti, "Abo baali baganda bange, abaana ba mmange. MUKAMA Katonda nga bw'ali omulamu, singa mwabalekawo, sandi basse mmwe."

²⁰Awo n'agamba Yeseri mutabani we omubereberye nti, "Golokoka obatte." Naye omuvubuka oyo n'atasowolayo kitala kye okubatta. Yatya kubanga yali akyali mulenzi bulenzi.

²¹Zeba ne Zalumunna ne boogera nti, "Ggwe jjangu otutte, kubanga ng'omusajja bw'ali, n'amaanyi ge bwe genkana. Gidyoni n'agolokoka n'atta Zeba ne Zalumunna, n'atwala n'ebiali bitimbiddwa mu bulago bw'enjamira zaabwe."

²²Awo abantu ba Isirayiri ne bagamba Gidyoni nti, "Tufugire ddala ggwe ne mutabani wo, kubanga otulokodde okuva mu mukono gwa Midyaani."

²³Naye Gidyoni n'abaddamu nti, "Nze sijja kubafuga, so ne mutabani wange tajja kubafuga, wabula MUKAMA y'anaabafuganga."

²⁴Gidyoni n'abagamba nti, "Mbasaba ekintu kimu; buli omu ku mmwe ampe empeta ze yanyaga ku Bayisimayiri."

²⁵Ne bamuddamu nti, "Okuzikuwa tujja kuzikuwa." Ne bayalirira olugoye wansi, buli omu n'ateekako empeta ze yanyaga.

²⁶Obuzito bw'empeta eza zaabu ne buba sekeri lukumi mu lusanvu (nga kilo kkumi na mwenda n'ekitundu), obutabalirako bya kwewoomya, ebirengejja, n'ebiyambalo ebya ffulungu, ebyayambalwanga bakabaka ba Midyaani, n'emikuufu egiateekewanga mu bulago bw'enjamira zaabwe.

²⁷Awo Gidyoni n'addirra zaabu n'amusaanuusa n'amukolamu ekifaananyi eky'ekkanzu (efodi), n'akiteeka mu kibuga kye Ofula. Abayisirayiri bona ne bakivuunamiranga ne bakiszinzanga, era ne kifuukira Gidyoni n'enju ye yonna omutego.

²⁸Awo Midyaani n'ewangulwa abaana ba Isirayiri, era n'etaddayo kubalumba. Ensi n'eba n'emirembe okumala emyaka amakumi ana, Gidyoni gye yabalamula.

²⁹Yerubbaali ye Gidyoni mutabani wa Yowaasi, n'addayo ewaabwe.

³⁰Gidyoni yazaala abaana aboobulenzi nsanvu mu bakazi abangi be yalina.

31N'omuzaana we ow'omu Sekemu yamuzaalira omwana wabulenzi, era n'amutuuma Abimereki.

32Awo Gidyon mutabani wa Yowaasi n'afa, ng'akaddiye bulungi, n'aziikibwa mu ntaana ya kitaawe Yowaasi mu Ofula eky'Ababiezeri.

33Gidyoni nga y'akafa, abaana ba Isirayiri ne bakyuka okusinza babaali ne bafuula Baaluberisi katonda waabwe.

34Abaana ba Isirayiri ne batajjukira MUKAMA Katonda waabwe eyabalokola okuva mu mukono gw'abalabe baabwe bona ku njuyi zonna.

35Ne batalaga kusiima eri ab'enju ya Yerubbaali, ye Gidyon, olw'ebirungi byonna bye yakolera Isirayiri.

Balam 9

1Abimereki mutabani wa Yerubbaali n'agenda e Sekemu eri baganda ba nnyina n'eri ab'ekika bona, ab'ennyumba ya kitaawe, n'ennyumba ya nnyina n'abagamba nti,

2"Mubuuze kaakano ng'abatuuze b'e Sekemu bona bawulira nti, 'Kiki ekisingako obulungi? Batabani ba Yerubbaali bona ensanvu okubafuganga oba omuntu omu y'aba abafuganga?' Mujukire nti ndi wa musaayi gwammwe."

3Awo baganda ba nnyina ne bategeeza abatuuze b'e Sekemu ebintu ebyo byonna. Ab'e Sekemu ne basalawo okugoberera Abimereki nga bwe bagamba nti, "Muganda waffe."

4Ne bamuwa ebitundu bya ffeeza ebya sekeri nsanvu okuva mu ssabo lya Baaluberisi. Abimereki n'apangisa abayaaye n'abantu abataalina bya buvunaanyizibwa ne bamugoberera.

5N'alaga mu nnyumba ya kitaawe mu Ofula n'addira baganda be, batabani ba Yerubbaali nsanvu n'abattira ku jjinja. Naye omu ku baana abo omuto ayitibwa Yosamu mutabani wa Yerubbaali, n'adduka ne yiekweka.

6Awo abatuuze bona ab'e Sekemu n'e Besimiilo ne bakunjaana ne batikkira Abimereki ng'ayimiridde okuliraana omuti omunene, ne bamufuula kabaka mu Sekemu.

7Awo Yosamu bwe baamugamba ebigambo ebyo, n'alinnya ku ntikko y'olusozi Gerizimu n'ayogera mu ddoboozi ery'omwanguka ng'agamba nti, "Mumpulirize abatuuze b'e Sekemu, Katonda alyoke abawulirize.

8Emiti gy'agenda okulonda kabaka, ne gigamba omuzeyituuni nti, 'Ba kabaka waffe.'

⁹Naye omuzeeyituuni ne gubaddamu nti, ‘Ndekeyo okuvaamu amafuta ag’omuzeeyituuni agampeesa balubaale n’abantu ekitiibwa, ηnjende okuyuuguumya emiti?’

¹⁰Awo ne giraga eri omutiini ne gigugamba nti, ‘Ggwe jjangu obeere kabaka waffe.’

¹¹Naye nagwo ne guddamu nti, ‘Ndekeyo okuvaamu obuwoomi n’ekibala ekirungi, ηnjende okuyuuguumya emiti?’

¹²Awo ne giraga eri omuzabbibu ne gigugamba nti, ‘Ggwe jjangu obeere kabaka waffe.’

¹³Naye omuzabbibu ne gubaddamu nti, ‘Ndekeyo okuvaamu wayini asanyusa balubaale n’abantu, ηnjende okuyuuguumya emiti?’

¹⁴Awo emit gyonna ne gigamba omweramanno nti, ‘Jjangu obeere kabaka waffe.’

¹⁵Awo omweramanno ne gugamba emit nti, ‘Bwe muba nga ddala munnonda okuba kabaka wammwe, mujje mwewogome mu kisiikirize kyange. Naye bwe kitaba kityo, omuliro guve mu mweramanno gusaanyeewo emivule gy’omu Lebanooni.’

¹⁶“Kale nno obanga mwakola kya kitibwa era mu mutima omulungi ne mufuula Abimereki kabaka, era bwe muba nga mwalaga obwenkanya eri Yerubbaali n’ennyumba ye, ne mumukola nga bwe kyamusaanira,

¹⁷kubanga kitange yabalwanirira, n’awaayo obulamu bwe, n’abawonya mu mukono gwa Midyaani,

¹⁸naye mmwe ne mujeemera ennyumba ya kitange ne muttira batabani be nsanvu ku jjinja limu, ne mufuula Abimereki omwana w’omuddu omukazi, kabaka w’abatuuze ab’omu Sekemu, kubanga ye muganda wammwe,

¹⁹era bwe muba nga mwakola kya kitibwa era nga mwakikola mu mutima omulungi ne muyisa Yerubbaali n’ennyumba ye bwe mutyo, kale Abimereki asanyuke, era nammwe abasanyuse.

²⁰Naye bwe kitaba bwe kityo, omuliro guve mu Abimereki, gusaanyeewo abatuuze b’omu Sekemu n’ab’e Besimiiro, ate era omuliro guve mu batuuze ab’omu Sekemu ne mu Besimiiro gusaanyeewo Abimereki.”

²¹Oluvannyuma lw’ebyo, Yosamu n’adduka n’alaga e Beeri, n’abeera eyo olw’okutya muganda we Abimereki.

²²Awo Abimereki n’afuga Isirayiri okumala emyaka esatu.

²³Katonda n’akyawaganya Abimereki n’abatuuze b’omu Sekemu, ne balya mu Abimereki olukwe,

²⁴Katonda ng'awoolera eggwanga olw'ekikolwa eky'okutta batabani ba Yerubbaali ensanvu, n'omusaayi gwabwe ng'aguteeka ku Abimereki muganda waabwe eyabatta ng'ayambibwako abatuuze b'omu Sekemu.

²⁵Abatuuze b'omu Sekemu ne bassaawo abasajja ku nsozi babbenga era banyagululenga buli eyayitanga mu kkubo. Abimereki n'ategeeezebwa.

²⁶Awo Gaali mutabani wa Ebedi n'ajja ne baganda be mu Sekemu, abatuuze b'omu Sekemu, ne batanula okumwesiga.

²⁷Ne balaga mu nnimiro ne bakungula ezzabbibu zaabwe, ne basogola omubisi, n'oluvannyuma ne bakola embaga mu ssabo lya katonda waabwe, ne balya ne banya ne bakolimira Abimereki.

²⁸Awo Gaali mutabani wa Ebedi n'ayogera nti, "Abimereki ye ani? Ab'omu Sekemu be baani okumuweereza? Si ye mutabani wa Yerubbaali, era Zebbuli si ye mumyuka we? Muweereze abantu ba Kamoli, kitaawe wa Sekemu. Lwaki tuweereza Abimereki?"

²⁹Ani ayinza okumpa obuyinza okukulembera abantu bano, olwo ndyoke nziggyewo Abimereki? Era nzija kumusoomooza nga mugamba nti, 'Kuŋjaanya eggye lyo, otulumbe.'

³⁰Awo Zebbuli omukulu w'ekibuga bwe yawulira ebigambo bya Gaali mutabani wa Ebedi, n'asunguwala nnyo.

³¹N'aweereza ababaka eri Abimereki mu kyama okumugamba nti, "Laba Gaali mutabani wa Ebedi, ne baganda be bazze mu Sekemu. Basekeeterera ekibuga okukulwanyisa.

³²Kaakano, ggwe jjangu mu kiro n'abasajja bo muteegere mu nnimiro.

³³Mu makya enjuba ng'evaayo, onoogolokoka n'olumba ekibuga. Onoomulumba ye n'abantu abali naye abajja okukulumba, ggwe olyoke obakole ekyo omukono gwo kye guteekeddwa okukola."

³⁴Awo Abimereki n'abasajja be ne bagolokoka mu kiro ne bagenda ne beekweka mu bibanja bina okumpi n'e Sekemu.

³⁵Gaali mutabani wa Ebedi n'afuluma n'ayimirira mu mulyango gwa wankaaki w'ekibuga, ne Abimereki n'abasajja be nabo ne bavaayo gye baali beekwese.

³⁶Awo Gaali bwe yabalaba, n'agamba Zebbuli nti, "Laba abantu nga bava ku nsozi waggulu!" Zebbuli n'amuddamu nti, "Ebisiikirize eby'ensozi by'olaba ng'abantu."

³⁷Naye Gaali n'ayogera nate nti, "Laba, abantu bajja nga bayitira mu muwaatwa gw'ensi, n'ekibinja ekimu kifuluma mu kkubo ery'omwera ogw'abafumu."

³⁸ Awo Zebbuli n'alyoka amugamba nti, "Biki bye wali oyogera bwe wagamba nti, 'Abimereki ye ani ffe okumuweereza?' Abo si be bantu be wanyooma? Kaakano genda obalwanyise."

³⁹ Awo Gaali n'akulembera abatuuze b'omu Sekemu okulwanyisa Abimereki.

⁴⁰ Abimereki n'amugoba, ne Gaali n'amudduka, era bangi ne batuusibwako ebiwundu, era ne bagwa ku mulyango gwa wankaaki.

⁴¹ Abimereki n'abeera mu Aluma. Zebbuli n'agoba Gaali ne baganda be mu Sekemu baleme kubeerangamu.

⁴² Ku lunaku olwaddirira, Abimereki n'ategeezebwa ng'abantu bwe bagenda okulima.

⁴³ Awo n'addira abasajja be n'abaawulamu ebibinja bisatu, n'ateegera abantu mu nnimiro. Bwe yalaba ng'abantu bafuluma ekibuga balage mu nnimiro, n'abalumba.

⁴⁴ Abimereki n'ekibinja kye yali nakyo ne banguwa okuwamba omulyango gwa wankaaki w'ekibuga, ate ebibinja ebibiri byo ne byanguwa okulaga mu nnimiro ne batta abaaliyo.

⁴⁵ Abimereki n'azibya olunaku olwo ng'alwanyisa ab'omu kibuga, n'akiwamba, n'abaalimu n'abatta, n'ekibuga n'akizikiriza, n'akiywamu n'omunnyo.

⁴⁶ Olwawulira ebyo, abatuuze abaali mu kigo kya Sekemu, ne baddukira mu ssabo lya Eruberisi.

⁴⁷ Awo bwe baategeeza Abimereki nti abatuuze b'omu Sekemu baali bakuŋŋaanidde mu kigo kya Sekemu,

⁴⁸ ye n'abasajja be ne balinnya ku lusozi Zalumoni, n'akwata embazi n'atema ettabi n'alyetikka ku kibegabega. N'alagira n'abasajja be yali nabo ng'abagamba nti, "Mwanguwe, mukole nga bwe nkoze."

⁴⁹ Buli omu ku bo n'atema ettabi n'alyetikka, ne bagoberera Abimereki. Ne bagatumma ku kigo, ne bakikumako omuliro. Abantu bona abaali mu kigo kya Sekemu, be basajja n'abakazi nga lukumi ne bafiiramu.

⁵⁰ Awo Abimereki n'agenda e Sebezi, n'asiisira okwetooloola ekibuga ekyo era n'akiwamba.

⁵¹ Mu kibuga ekyo mwalimu ekigo eky'amaanyi, era abantu bona abasajja n'abakazi ab'omu kibuga ne baddukira omwo ne beggaliramu. Ne balinnya ku kasolya k'ekigo.

⁵² Abimereki n'alumba ekigo, naye bwe yali ng'akisemberedde, akume omuliro ku mulyango gwakyo,

⁵³ne wabaawo omukazi omu eyakasuka olubengo ku mutwe gwa Abimereki, n'amwasa omutwe.

⁵⁴ Amangwago Abimereki n'agamba eyasitulanga ebyokulwanyisa bye nti, "Sowola ekitala kyo onzite, si kulwa nga kinjogerwako nti nattibwa mukazi." Omuddu we n'amufumita ekitala n'afa.

⁵⁵ Awo abantu ba Isirayiri bwe baalaba nga Abimereki afudde, buli omu n'addayo ewuwe.

⁵⁶ Katonda bw'atyo n'awalana eggwanga olw'obutali butuukirivu bwa Abimereki, olwa Abimereki okutta abaana ba kitaawe, abooluganda nsanvu.

⁵⁷ Katonda n'abonereza n'abantu b'omu Sekemu olw'obutali butuukirivu bwabwe bwonna, n'atuukiriza n'ekikolimo Yosamu mutabani wa Yerubbaali kye yabakolimira.

Balam 10

Okufuga kwa Toola

¹ Awo oluvannyuma lwa Abimereki, ne wabaawo Toola mutabani wa Puwa, era muzzukulu wa Dodo, omusajja wa Isakaali eyajja okulokola Isirayiri, eyabeeranga mu Samiri mu nsi ya Efulayimu ey'ensozi.

² N'akulembera Isirayiri okumala emyaka amakumi abiri mu esatu, n'aziikibwa mu Samiri.

Okufuga kwa Yayiri

³ Oluvannyuma lw'oyo ne wabaawo Yayiri Omugireyaadi, eyakulembera Isirayiri okumala emyaka amakumi abiri mu ebiri.

⁴ Yalina abaana aboobulenzi amakumi asatu abeebagalanga endogoyi amakumi asatu, era baafuganga ebibuga amakumi asatu, mu nsi ya Gireyaadi ebiyitibwa Kavosu Yayiri n'okutuusa leero.

⁵ Yayiri n'afa n'aziikibwa mu Kamoni.

Okufuga kwa Yefusa

⁶ Abayisirayiri ne beeyongera okukola ebibi mu maaso ga MUKAMA, nga baweereza Babaali ne Asutoleesi ne bakatonda ab'e Busuuli, ne bakatonda ab'e Sidoni, ne bakatonda ab'e Mowaabu, ne bakatonda ab'abaana ba Amoni, ne bakatonda b'Abafirisuuti, ne bava ku MUKAMA ne batamuweereza.

⁷ MUKAMA Katonda n'anyigira Isirayiri, n'abagabula mu mukono gw'Abafirisuuti ne mu mukono gw'abaana ba Amoni,

⁸ abaanyigiriza abaana ba Isirayiri, era ne babajooga okumala emyaka kkumi na munaana. Baanyigiriza abaana ba Isirayiri bona abaali emitala wa Yoludaani ku luuyi olw'ebuvanjuba mu nsi y'Abamoli eri mu Gireyaadi.

⁹Abaana ba Amoni nabo ne basomoka Yoludaani okulwanyisa Yuda ne Benyamini, n'ennyumba ya Efulayimu. Isirayiri ne yeeraliikirira nnyo.

¹⁰Awo abaana ba Isirayiri ne bakaabira MUKAMA nga bagamba nti, "Ddala ddala twasobya, ne tuva ku MUKAMA Katonda waffe, ne tuweereza Babaali."

¹¹ MUKAMA Katonda n'addamu abaana ba Isirayiri nti, "Abamisiri n'Abamoli, n'abaana ba Amoni, n'Abafirisuuti,

¹²n'Abasidoni, n'Abamaleki, n'Abamawoni, bwe baabanyigiriza ne munkowoola, sabalokola okuva mu mukono gwabwe?

¹³Naye mwanvaako ne muweereza bakatonda abalala, noolwekyo sigenda kubalokola nate.

¹⁴Mugende mukaabire bakatonda abo be mwasalawo okuweereza, babalokole mu nnaku yammwe."

¹⁵Naye abaana ba Isirayiri ne bagamba MUKAMA Katonda nti, "Twayonoona. Tukole kyonna ky'onooolaba nga kye kitusaanira. Kyokka tulokole kaakano.

¹⁶Ne baggya wakati mu bo bakatonda abalala, ne baweereza MUKAMA Katonda. MUKAMA n'alumwa olw'ennaku ya Isirayiri."

¹⁷Awo abaana ba Amoni ne basiisira mu Gireyaadi, n'abaana ba Isirayiri nabo ne basiisira mu Mizupa.

¹⁸Abakulembeze b'abantu mu Gireyaadi ne bagambagana nti, "Omusajja anaasooka okulumba abaana ba Amoni, ye anaabeera omukulembeze w'abatuuze b'omu Gireyaadi."

Balam 11

¹Yefusa Omugireyaadi yali mulwanyi w'amaanyi; kitaawe yamuzaala mu malaaya.

²Mukazi wa Gireyaadi yali amuzaalidde abaana aboobulenzi, era abaana b'omukazi oyo bwe baakula, ne bagobaganya Yefusa nga bagamba nti, "Tolisikira wamu naffe ku bintu bya kitaffe, kubanga kitaffe yakuzaala mu mukazi mulala."

³Awo Yefusa n'adduka baganda be, n'agenda n'abeera mu nsi ye Tobu. Abasajja abataaliko kigendererwa ne bakuŋjaana gy'ali ne bamugoberera.

⁴Oluvannyuma lw'ebbanga abaana ba Amoni ne bakola olutalo ku Isirayiri.

⁵Awo abaana ba Amoni bwe baali nga balwana ne Isirayiri, abakadde ab'e Gireyaadi ne bagenda okukima Yefusa mu nsi ya Tobu.

⁶Ne bagamba Yefusa nti, "Jjangu otukulembere tulwanyise abaana ba Amoni."

⁷ Yefusa n'agamba abakadde b'e Gireyaadi nti, "Temwankyawa ne mungoba mu nnyumba ya kitange? Lwaki kaakano mujja gye ndi nga mulina ekizibu?"

⁸ Abakadde b'e Gireyaadi ne bagamba Yefusa nti, "Tuzze gy'oli kaakano, ojje ogende naffe, olwanyise abaana ba Amoni, n'oluvannyuma onoobeera mukulembeze w'abo bona ababeera mu Gireyaadi."

⁹ Yefusa n'abaddamu nti, "Singa munzizaayo ne nnwana n'abaana ba Amoni, MUKAMA n'abampangusiza, n'abeera omukulembeze wammwe?"

¹⁰ Abakadde b'e Gireyaadi ne baddamu Yefusa nti, "MUKAMA ye mujulirwa waffe, bwe tutatuukirize kigambo ekyo."

¹¹ Awo Yefusa n'agenda n'abakadde b'e Gireyaadi, abantu ne bamufuula omukulembeze waabwe era omuduumizi, n'addamu ebigambo byonna bye yayogera mu maaso ga MUKAMA mu Mizupa.

¹² Yefusa n'atuma ababaka eri kabaka w'abaana ba Amoni, ng'amugamba nti, "Onnanga ki ggwe, okujja gye ndi, olwanyise eggwanga lyange?"

¹³ Kabaka w'abaana ba Amoni n'addamu ababaka ba Yefusa nti, "Kubanga Isirayiri bwe baali bava e Misiri baatwala ensi yange okuva ku Alunoni ne ku Yaboki n'okutuukira ddala ku Yoludaani. Kaakano gituddize lwa mirembe."

¹⁴ Awo Yefusa n'addamu n'aweereza ababaka eri kabaka w'abaana ba Amoni

¹⁵ ng'agamba nti, "Yefusa bw'ati bw'ayogera nti, 'Isirayiri teyatwala nsi ya Mowaabu newaakubadde ensi y'abaana ba Amoni.

¹⁶ Naye Isirayiri bwe baava mu Misiri ne baba nga bayita mu ddungu nga balaga ku Nnyanja Emyufu n'e Kadesi,

¹⁷ Isirayiri yatuma ababaka eri kabaka wa Edomu nga bamusaba bayitemu buyisi mu nsi ye. Naye ye teyabawuliriza. Isirayiri n'atuma n'ababaka eri kabaka wa Mowaabu, naye n'atabakkiriza kuyitamu. Isirayiri kyeyava asigala e Kadesi.

¹⁸ "Awo Isirayiri n'alyoka ayita mu ddungu ne yeetooloola ensi ya Edomu n'ensi ya Mowaabu, n'ayita ku luuyi olw'ebuvanjuba obw'ensi ya Mowaabu, ne basiisira emitala wa Alunoni ku nsalo ya Mowaabu.

¹⁹ "Awo Isirayiri n'atuma ababaka eri Sikoni kabaka w'Abamoli era kabaka w'e Kesuboni, ng'amusaba ng'agamba nti, Tukkirize tuyitemu tulage mu nsi yaffe.

²⁰ Naye Sikoni n'ateesiga Isirayiri kuyita mu nsalo ye, era Sikoni n'akuŋŋaanya abantu be bona, ne basiisira mu Yakazi, n'alwanyisa Isirayiri.'

²¹ "MUKAMA Katonda wa Isirayiri n'agabula Sikoni n'abantu be bona mu mukono gwa Isirayiri, n'abawangula, era Isirayiri n'atwala ensi yonna ey'Abamoli.

²²Ne bawamba ensalo yonna ey'Abamoli okuva ku Alunoni okutuuka ku Yaboki, n'okuva ku ddungu okutuuka ku Yoludaani.

²³“Kaakano obanga MUKAMA Katonda wa Isirayiri yagoba Abamoli mu maaso g'abantu be Isirayiri, ggwe ani okulwanyisa Isirayiri?

²⁴Lwaki totwala ensi lubaale wo Kemosi gye yakuwa, naffe ne tutwala eyo MUKAMA Katonda waffe gye yatuwa?

²⁵Ddala ddala osinga Balaki mutabani wa Zipoli kabaka wa Mowaabu? Yali akaayanyizza Isirayiri wadde okubalwanyisa?

²⁶Isirayiri emaze emyaka ebikumi bisatu mu Kesuboni n'ebyalo byayo, ne mu Aloweri n'ebyalo byayo, ne mu bibuga byonna ebiri ku lubalama lwa Alunoni. Kiki ekyabalobera okubyeddiza mu kiseera ekyo?

²⁷Kaakano sirina kye nkusobezza naye ggwe onnumbye okulwana nange. Kale MUKAMA, Omulamuzi, leero alamule wakati w'abaana ba Isirayiri n'abaana ba Amoni.”

²⁸Naye kabaka w'abaana ba Amoni n'atassaayo mwoyo ku bubaka Yefusa bwe yamutumira.

²⁹Awo Omwoyo wa MUKAMA Katonda n'ajja ku Yefusa; Yefusa n'asomoka Gireyaadi ne Manase, n'ayita ne mu Mizupa eky'e Gireyaadi, era mu Mizupa eky'e Gireyaadi gye yava okulumba abaana ba Amoni.

³⁰Yefusa ne yeeyama eri MUKAMA Katonda ng'agamba nti, “Bw'onogabula abaana ba Amoni mu mukono gwange,

³¹ekintu kyonna ekirifuluma mu nzigi z'ennyumba yange nga nkomyewo mu buwanguzi, ne kinyaniriza nga nva mu baana ba Amoni, ndikiwaayo ng'ekiweebwayo ekyokebwa eri MUKAMA.”

³²Awo Yefusa n'alumba abaana ba Amoni n'abalwanyisa, era MUKAMA Katonda n'abagabula mu mukono gwe.

³³N'abakuba okuva ku Aloweri okutuuka e Minnisi, bye bibuga amakumi abiri, n'okutuukira ddala ku Aberukeramimu; n'abakubira ddala era abaana ba Isirayiri ne bawangulira ddala abaana ba Amoni.

³⁴Awo Yefusa bwe yakomawo e Mizupa mu maka ge, laba muwala we n'ajja okumukulisaayo ng'akuba ebitaasa era ng'amuzinira. Ye mwana yekka gwe yalina.

³⁵Yefusa bwe yamulaba, n'ayuza engoye ze, n'ayogera mu ddoboozi ery'omwanguka nti, “Zinsaze muwala wange. Onnakuwazizza nnyo, era ondeetedde ennaku, kubanga neeyama eri MUKAMA Katonda, so siyinza kukimenyawo.”

³⁶ Awo muwala we n'amugamba nti, "Kitange weeyama eri MUKAMA. Kola ekyo kye weeyama eri MUKAMA Katonda, kubanga awooledde eggwanga ku balabe bo, abaana ba Amoni."

³⁷ N'agamba kitaawe nti, "Nkusaba ekintu kimu kyokka, onzikirize ḥnjende ne mikwano gyange mu nsozi okumala emyezi ebiri, ne kaabireko kubanga ndi mbeerera."

³⁸ N'amugamba nti, "Genda." N'agenda n'amala emyezi ebiri mu nsozi ng'ali ne bawala banne nga yekaabirako olw'okuba yali mbeerera.

³⁹ Oluvannyuma lw'emyezi ebiri, omuwala n'akomawo eri kitaawe, era kitaawe n'amuwaayo, nga bwe yeeyama. Yali muwala mbeerera. Era okwo kwe kwava empisa mu Isirayiri

⁴⁰ okuva mu biro ebyo, nti abawala mu Isirayiri bajjukira muwala wa Yefusa Omugireyaadi okumala ennaku nnya buli mwaka.

Balam 12

¹ Abasajja ba Efulayimu ne bayitibwa okusomoka okulaga mu Zafoni. Ne bagamba Yefusa nti, "Lwaki wagenda okulwanyisa abaana ba Amoni, n'otatuyita kugenda naawe? Tugenda kukwokera mu nnyumba yo."

² Yefusa n'abaddamu nti, "Nze n'abantu bange twatawaana nnyo okulwanyisa abaana ba Amoni, era nabakoowoola mujje mutubeere, naye temwajja kutubeera kuva mu mukono gwabwe.

³ Bwe nalaba nga temuzze kutubeera, ne nteeka obulamu bwange mu ngalo zange, ne nsomoka okulwana n'abaana ba Amoni, era MUKAMA Katonda n'abagabula mu mukono gwange. Kaakano kiki ekibaleeta gye ndi okulwana nange leero?"

⁴ Awo Yefusa n'akuṇṇaanya abantu b'e Gireyaadi bona, ne balwanyisa Efulayimu. Abasajja ab'e Gireyaadi baabalwanyisa kubanga Efulayimu baayogera nti, "Mmwe muli bakyewaggula ba Efulayimu ab'e Gireyaadi, wakati mu Efulayimu ne mu Manase."

⁵ Ab'e Gireyaadi ne bawamba ebifo bya Yoludaani okusomokerwa okutuuka mu Efulayimu, era bwe waabangawo ku bakomawo aba Efulayimu eyayagalanga okusomoka, abasajja ab'e Gireyaadi nga bamubuuza nti, "Oli Mwefulayimu?"

⁶ Bwe yeegananga, nga bamugamba ayogere nti, "Shibbolesi." Bwe yayogeranga nti, "Sibbolesi," kubanga teyayinzanga kukyogera bulungi, ng'akwatibwa era ng'attibwa awo awasomokerwa ku Yoludaani. Mu biro ebyo, mu Efulayimu ne mu faamu abantu emitwalo ena mu enkumi bbiri.

⁷Awo Yefusa n'alamula Isirayiri okumala emyaka mukaaga. Yefusa Omugireyaadi n'afa, n'aziikibwa mu kimu ku kibuga bya Gireyaadi.

Okufuga kwa Ibuzaani ne Eroni ne Abudoni

⁸Oluvannyuma lwa Yefusa, Ibuzaani ow'e Besirekemu n'alamula Isirayiri.

⁹Yalina abaana aboobulenzi amakumi asatu, n'abaana aboobuwala amakumi asatu. Bawala be n'abafumbizaabantu abataali ba kika kye, ne batabani be n'abawasiza abawala abataali ba kika kye. N'akulembera Isirayiri okumala emyaka musanvu.

¹⁰Ibuzaani n'afa, n'aziikibwa mu Besirekemu.

¹¹Oluvannyuma lwa Ibuzaani, Eroni Omuzebbulooni, n'alamula Isirayiri okumala emyaka kkumi.

¹²Eroni Omuzebbulooni n'afa, n'aziikibwa mu Ayalooni mu nsi ya Zebbulooni.

¹³Awo oluvannyuma lwa Eroni, Abudoni mutabani wa Kereri Omupirasoni n'alamula Isirayiri.

¹⁴Yalina abaana aboobulenzi amakumi ana, n'abazzukulu amakumi asatu abeebagalanga endogoyi nsanvu. Yalamula Isirayiri okumala emyaka munaana.

¹⁵Abudoni mutabani wa Kireri Omupirasoni n'afa, n'aziikibwa mu Pirasoni mu nsi ya Efulayimu, mu nsi ey'Abamaleki ey'ensozi.

Balam 13

Okuzaalibwa kwa Samusooni

¹Awo abaana ba Isirayiri ne beeyongera okukola ebibi mu maaso ga MUKAMA. MUKAMA Katonda kyeyava abagabula mu mukono gw'Abafirisuuti okumala emyaka amakumi ana.

²Ne wabaawo omusajja ow'e Zola, ow'omu kika ky'Abadaani, erinnya lye Manowa, eyalina mukazi we nga mugumba.

³Malayika wa MUKAMA Katonda n'alabikira omukazi n'amugamba nti, "Laba, kaakano, oli mugumba era atazaalanga ku mwana, naye oliba olubuto n'ozaala omwana wabulensi.

⁴Laba nga tonywa envinnyo, newaakubadde ekitamiiza kyonna, wadde okulya ekintu kyonna ekitali kirongoofu.

⁵Kubanga, laba, olika olubuto n'ozaala omwana wabulensi, era tamwebwangako nviiri, kubanga omulenzi aliba Muwonge wa Katonda ng'akyali mu lubuto lwa nnyina, era yalitanula okulokola Isirayiri okuva mu mukono gw'Abafirisuuti."

⁶ Awo omukazi n'agenda n'ategeeza bba, ng'agamba nti, "Omusajja wa Katonda yandabikidde mu kifaananyi kya malayika wa Katonda, era natidde nnyo. Simubuuizza gy'avudde, ate era naye tambulidde linnya lye.

⁷ Wabula yaŋjambye nti, 'Laba oliba olubuto era olizaala omwana wabulenzi. Tonywanga envinnyo newaakubadde ekitamiiza kyonna, wadde okulya ekintu kyonna ekitali kirongoofu. Kubanga omulenzi aliba Muwonge eri Katonda ng'akyali mu lubuto lwa nnyina, era bw'atyo bw'aliba ennaku ez'obulamu bwe zonna.'

⁸ Awo Manowa ne yeegayirira MUKAMA Katonda ng'agamba nti, "Ayi MUKAMA, omusajja wa Katonda gwe watutumidde, akomewo. Ajje atuyigirize kye tuteekwa okukolera omulenzi anaatuzaalirwa."

⁹ Katonda n'awulira eddoboozi lya Manowa, malayika wa Katonda n'akomawo eri omukazi, n'amusanga mu nnimiro, naye nga Manowa bba tali naye.

¹⁰ Awo omukazi n'ayanguwa n'adduka n'ategeeza bba ng'agamba nti, "Laba omusajja eyandabikira olulala azze."

¹¹ Manowa n'agolokoka n'agoberera mukazi we. Bwe yatuuka awali omusajja n'amugamba nti, "Gwe musajja eyayogera eri mukazi wange?" Malayika n'amuddamu nti, "Ye nze."

¹² Manowa n'amubuuza nti, "Ebigambo byo bwe birituukirira, biragiro ki bye tuligoberera nga tukuza omulenzi?"

¹³ Malayika wa MUKAMA Katonda n'addamu Manowa nti, "Ebyo byonna bye nagamba mukazi wo ateekwa okubikola.

¹⁴ Mukazi wo tateekwa kulya kibala ekiva mu zabbibu, newaakubadde okunywa envinnyo, newaakubadde okunywa ekitamiiza, wadde okulya ekintu kyonna ekitali kirongoofu. Ateekwa okukola buli kintu kye namulagira."

¹⁵ Awo Manowa n'agamba malayika wa MUKAMA Katonda nti, "Sigala wano naffe, tukuteekereteekere akabuzi akato."

¹⁶ Malayika wa MUKAMA Katonda n'agamba Manowa nti, "Ne bwe nnaasigala nammwe, sija kulya ku mmere yammwe. Wabula bwe munaateekateeka ekiweebwayo ekyokebwa, mukiweeyo eri MUKAMA." Mu kiseera ekyo Manowa teyamanya nga gwe yali ayogera naye yali malayika wa MUKAMA.

¹⁷ Awo Manowa n'abuuza malayika wa MUKAMA Katonda nti, "Erinnya lyo ggwe ani, ekigambo ky'oyogedde bwe kirituukirira tulyoke tukuseemu ekitiibwa?"

¹⁸ Malayika wa MUKAMA Katonda n'amuddamu nti, "Obuuliza ki erinnya lyange? Lisukka okutegeera."

¹⁹Awo Manowa n'addiria akabuzi akato, n'ekiweebwayo eky'empeke, n'abiwaayo nga ssaddaaka ku lwazi eri MUKAMA Katonda. Ne wabaawo eky'ekyewuunyo nga Manowa ne mukazi we balaba.

²⁰Omuliro bwe gwava mu Kyoto okugenda eri eggulu, malayika wa MUKAMA Katonda n'akkira mu muliro gw'ekyoto. Manowa ne mukazi we bwe baamulaba, ne bagwa wansi ne bavuunama ng'obwenyi bwabwe butuukira ddala ku ttaka.

²¹Malayika wa MUKAMA bw'ataddayo kweraga gye bali, Manowa ne mukazi we ne bategeera ng'abadde malayika wa MUKAMA Katonda.

²²Manowa n'agamba mukazi we nti, "Tugenda kufa kubanga tulabye Katonda."

²³Naye mukazi we n'amugamba nti, "Singa MUKAMA Katonda yabaddde wa kututta, teyandisiimye kiweebwayo ekyokebwa n'ekiweebwayo eky'empeke okuva gye tuli, newaakubadde okutulaga ebintu bino byonna, wadde okututegeeza kino."

²⁴Awo omukazi n'azaala omwana wabulenzi, n'amutuum Samusooni. Omwana n'akula, MUKAMA Katonda n'amuwa omukisa.

²⁵Omwoyo wa MUKAMA Katonda n'atandika okukolera mu Samusooni ng'ali mu Makanedani ekiri wakati w'e Zola ne Esutaoli.

Balam 14

Samusooni Awasa

¹Awo Samusooni n'aserengeta e Timuna n'alaba omukazi mu bawala ab'Abafirisuuti.

²N'addayo eka, n'ategeeza kitaawe ne nnyina ng'agamba nti, "Nalabye omukazi ku bawala ab'Abafirisuuti mu Timuna. Kale mumumpasize kaakano."

³Awo kitaawe ne nnyina ne bamugamba nti, "Tewali mukazi n'omu mu baganda bo newaakubadde mu Bantu bange gw'oyinza kuwasa, olyoke ogende ofune omukazi okuva mu Bafirisuuti abatali bakomole?" Naye Samusooni n'addamu kitaawe nti, "Mpasiza oyo kubanga ye gwe nsiimye."

⁴Kitaawe ne nnyina tebaamanya ekyo nga kyava eri MUKAMA Katonda, kubanga MUKAMA yali anoonya ensonga ku Bafirisuuti. Mu biro ebyo Abafirisuuti be baafuganga Isirayiri.

⁵Awo Samusooni ne kitaawe ne nnyina ne bagenda e Timuna. Bwe baali basemberedde ennimiro z'emizabbibu egy'omu Timuna, empologoma ento n'ewuluguma nga bw'emulumba.

⁶Awo Omwoyo wa MUKAMA Katonda n'amukkako, n'ayuzaayuza empologoma n'emikono gye ng'ayuzaayuza akabuzi akato, naye n'atabaako ky'ategeeza kitaawe newaakubadde nnyina.

⁷Samusooni n'aserengeta n'agenda n'anyumya n'omukazi era n'amusiima.

⁸Ebbanga bwe lyayitawo, n'addayo okumuwasa, naye aba ali ku lugendo, n'akyama okulaba omulambo gw'empologoma, era laba, nga mu mulambo gw'empologoma mulimu enjuki n'omubisi gw'enjuki.

⁹N'atoola ku mubisi n'engalo ze, n'atambula n'agenda. Bwe yasinjaana kitaawe ne nnyina nabo n'abawaako ne balya, wabula n'atabagamba nti omubisi ogwo gwe balya aguggye mu mulambo gw'empologoma.

¹⁰Awo n'aserengeta ne kitaawe eri omukazi, era Samusooni n'akolerayo embaga ng'empisa y'abawasa bwe yali.

¹¹Abafirisuuti bwe bajja okulaba Samusooni, ne bamuwa bannaabwe amakumi asatu okumuwerekerako.

¹²Awo Samusooni n'abagamba nti, "Kaakano ka mbakokkolere ekikokko. Bwe mulikivvuunula ennaku omusanvu ez'embaga nga tezinnaggwaako, ndibawa ebyambalo ebya linena amakumi asatu, n'emiteeko gy'engoye amakumi asatu.

¹³Naye bwe kinaabalema okuddamu, muteekwa okumpa ebyambalo ebya linena amakumi asatu, n'emiteeko gy'engoye amakumi asatu." Ne bamugamba nti, "Kokkola ekikokko kyo tukiwlire."

¹⁴N'abagamba nti, "Mu muli mwavaamu ekyokulya Mu w'amaanyi mwavaamu ekiwoomerera." Ennaku ssatu ne ziyitawo nga bakyalemeddwa okuvvuunula ekikokko.

¹⁵Awo ku lunaku olwokuna ne bagamba mukazi wa Samusooni nti, "Sendasenda balo atuvvuunulire ekikokko. Bwe kitaabe bwe kityo tujja kukwokya omuliro ggwe n'ennyumba ya kitaawo. Mwatuyita kutunyaga, si bwe kiri?"

¹⁶Mukazi wa Samusooni n'agenda gy'ali ng'akaaba amaziga, ng'agamba nti, "Ddala ddala onkyawa so tonjagala. Wakokkolera abasaja b'omu bantu bange ekikokko, naye n'otakivvuunula." N'amuddamu nti, "Laba sinnakivvuunulira kitange newaakubadde mmange, noolwekyo lwaki nkikuvvuunulira?"

¹⁷N'amukaabirira okumala ebbanga eryo lyonna ery'embaga, olwo n'alyoka akimuvvuunulira, kubanga yamwetayirira nnyo. N'olvannyuma omukazi n'annyonyola abasaja b'omu bantu be ekikokko.

¹⁸Awo ku lunaku olw'omusanvu enjuba nga tennagwa abasaja ab'omu kibuga ne bagamba Samusooni nti, "Kiki ekisinga omubisi gw'enjuki okuwoomerera? Kiki ekisinga empologoma amaanyi?" N'abaddamu nti, "Singa temwalimya nnyana yange, temwandivuunudde kikokko kyange."

¹⁹ Awo Omwoyo wa MUKAMA Katonda n'amukkako, n'aserengeta e Asukulooni n'atta abasajja amakumi asatu, n'abambulamu ebyambalo byabwe, engoye zaabwe n'aziwa abavvuunula ekikokko. N'anyiiga nnyo, n'ayambuka n'addayo ewa kitaawe.

²⁰ Mukazi wa Samusooni ne bamuwa mukwano gwe, eyabeeranga ne Samusooni.

Balam 15

¹ Awo ebbanga bwe lyayitawo, ng'ebiro eby'okukungula enjaano bituuse, Samusooni n'agenda okukyalira mukazi we ng'amutwalidde akabuzi akato. N'ayogera nti, "Nnaagenda eri mukazi wange mu kisenge." Naye kitaawe w'omukazi n'atamukkiriza kugenda yo.

² Kitaawe w'omukazi n'agamba Samusooni nti, "Nze nalowooza nti wamukyayira ddala, kyennava mugabira mukwano gwo. Muganda we omuto amusinga okulabika obulungi. Kaakano gw'oba otwala mu kifo ky'oli."

³ Samusooni n'abagamba nti, "Ku mulundi guno sirina musango, Abafirisuuti bwe nnaabakola akabi."

⁴ Awo Samusooni n'agenda n'akwata ebibe ebikumi bisatu, n'asiba bibiri bibiri emikira, n'akwataganya emikira, n'addirra ebitawuliro n'ateeka ekitawuliro wakati w'emikira kinneebiryre.

⁵ N'akoleeza ebitawuliro, n'ata ebibe okugenda mu nnimiro z'Abafirisuuti. N'ayokya ebinywa n'enjaano eyali tennakungulwa, n'ennimiro z'emizeeyituuni n'ennimiro z'emizabbibu.

⁶ Awo Abafirisuuti bwe baabuuza akoze bwe kityo, ne boogera nti, "Ye Samusooni mukoddomi w'Omumutima, kubanga Omumutima yaddira mukazi wa Samusooni, n'amuwa mukwano gwa Samusooni." Abafirisuuti ne bagenda ne bookya omukazi ne kitaawe omuliro.

⁷ Samusooni n'abagamba nti, "Olw'okuba nga mweyisizza bwe mutyo, sirirekayo okuggyako nga mbawalanyeeko eggwanga."

⁸ N'abalumba n'atta bangi nnyo ku bo, n'agenda n'abeera mu mpuku ey'omu lwazi lw'e Etamu.

⁹ Abafirisuuti ne bayambuka ne basiisira mu Yuda, ne basaasaana okumpi ne Leki.

¹⁰ Abantu ba Yuda ne bababuuza nti, "Lwaki mutulumbye?" Abafirisuuti ne babaddamu nti, "Tuzze okuwamba Samusooni tumutwale nga musibe, tumwesasuze nga bwe yatukola."

¹¹ Awo abasajja enkumi ssatu okuva mu Yuda ne bagenda ku mpuku y'olwazi lw'e Etamu ne bagamba Samusooni nti, "Tewamanya ng'Abafirisuuti be

batufuga? Kaakano kiki kino ky'otukoze?" N'abaddamu nti, "Nneesasuzza kye bankola."

¹²Ne bamuddamu nti, "Tuzze okukusiba tukuweeyo mu mukono gw'Abafirisuuti." Samusooni n'abagamba nti, "Mundayirire nga temunzitte mmwe mwennyini."

¹³Ne bamuddamu nti, "Tukkiriziganyizza. Tujja kukusiba busibi, tukuweeyo mu mukono gwabwe, naye tetujja kukutta." Ne bamusiba emiguwa ebiri emiggya ne bamuggyayo mu mpuku.

¹⁴Bwe yali asemberera Leki Abafirisuuti ne bajja gy'ali nga baleekaana. Awo Omwoyo wa MUKAMA Katonda n'amukkako, emiguwa egiali gimusibye emikono ne giba ng'obugoogwa obwokeddwa omuliro, ne gisumulukuka okuva ku mikono gye.

¹⁵N'alaba oluba lw'endogoyi olutannavunda, n'alukwata, n'akuba abasajja lukumi.

¹⁶Samusooni n'alyoka ayogera nti, "Nkozesezza oluba lw'endogoyi okukola entuumu bbiri; nkozesezza oluba lw'endogoyi okutta abasajja lukumi."

¹⁷Bwe yamala okwogera ekyo, n'akanyuga oluba n'alusuula, ekifo ekyo n'akituma Lamasuleki.

¹⁸N'alumwa nnyo ennyonta, n'akabira MUKAMA Katonda ng'agamba nti, "Omuddu wo omuwadde obuwanguzi olw'amaanyi; ne kaakano nfe, ngwe mu mukono gw'abatali bakomole?"

¹⁹Katonda n'akola ekinnya mu Leki, ne muvaamu amazzi, kwe yanya n'addamu amaanyi, n'aba mulamu. Ekifo ekyo kyeyava akituma Enkakkole, era kikyaliyo mu Leki n'okutuusa leero.

²⁰Samusooni n'akulembera Isirayiri mu biro by'Abafirisuuti, okumala emyaka amakumi abiri.

Balam 16

Samusooni ne Derira

¹Samusooni n'alaga e Gaza n'alabay o mukazi malaaya, n'ayingira gy'ali.

²Awo abantu ab'e Gaza ne bategeezebwa nga Samusooni bw'ali mu kifo ekyo. Ne bamuzingiza ne bamuteegera ku wankaaki w'ekibuga ekiro kyonna. Ne basiriikirira ekiro kyonna nga bagamba nti, "Obudde bwe bunaaba nga bunaatera okukya tunaamutta."

³Naye Samusooni ne yeebaka okutuusa ettumbi, n'agolokoka mu ttumbi, n'akwata enzigi ebbiri eza wankaaki w'ekibuga, n'emifuubeeto gyombi,

n'abisimbula okuva mu bifo byabyo, n'agyawo n'ekisiba, n'abiteeka ku bibegaabega bye n'abitwala ku ntikko y'olusozi olutunuulidde Kebbulooni.

⁴ Awo oluvannyuma lw'ebyo n'aganza omukazi mu kiwonvu ky'e Soleki, erinnya lye Derira.

⁵ Abakulembeze b'Abafirisuuti ne bagenda gy'ali ne bamugamba nti, "Musendesende olabe amaanyi ge amangi mwe gasibuka, tulyoke tusinziire okwo okumusobola, tumusibe tumujeeze. Naffe tulikuwa buli omu ku ffe, ebitundu bya ffeeza lukumi mu kikumi."

⁶ Awo Derira n'agamba Samusooni nti, "Kaakano mbuulira amaanyi go amangi mwe gasibuka, era n'ekiyinza okukusiba okukujeeza."

⁷ Samusooni n'amugamba nti, "Bwe bansiba enkolokolo embisi musanvu, ezitakaze, olwo nnaanafuwa ne mbeera ng'omuntu omulala yenna."

⁸ Abakulembeze b'Abafirisuuti ne baleetera omukazi enkolokolo musanvu embisi ezitakaze, n'azimusibya.

⁹ Waaliwo abasajja abaali beekwese mu kisenge omwo omukazi mwe yali. Awo omukazi n'akoowoola Samusooni ng'agamba nti, "Samusooni Abafirisuuti bakuguddeko." N'akutula enkolokolo, ng'omuntu bwe yandikutudde omuguwa oguyise mu muliro. Bwe kityo ensibuko y'amaanyi ge n'etazuulibwa.

¹⁰ Awo Derira n'agamba Samusooni nti, "Laba, onduulidde, era onnimbye. Kaakano mbuulira ekiyinza okukusiba."

¹¹ N'amugamba nti, "Bwe bansibya emiguwa emiggya egitakozesebwangako, nnaanafuwa, ne mbeera ng'omuntu omulala yenna."

¹² Awo Derira n'addira emiguwa emiggya, n'amusiba, nga mu kisenge mulimu abasajja abeekwese. N'alyoka amukoowoola ng'agamba nti, "Samusooni, Abafirisuuti bakuguddeko." N'agyekutulako ku mikono ng'ewuzi.

¹³ Awo Derira n'agamba Samusooni nti, "Okutuusa kaakano onduulidde era onnimbye. Mbuulira ekiyinza okukusiba." N'amugamba nti, "Bw'onooluka emivumbo musanvu egiri ku mutwe gwange, n'engoye, n'obinyweza nzija kunafuwa, mbeere ng'omuntu omulala yenna." N'aluka emivumbo omusanvu egy'ali ku mutwe gwe, n'engoye,

¹⁴ n'abinyweza n'olubambo. N'amukoowoola ng'agamba nti, "Samusooni Abafirisuuti bakuguddeko." N'agolokoka okuva mu tulo, ne yeetakkuluza ku lubambo lw'omuti ogulukirwako n'engoye ezirukiddwa.

¹⁵ Awo Derira n'amugamba nti, "Oyinza otya okugamba nti onjagala, ate ng'omutima gwo teguli nange? Gino emirundi esatu onduulidde, n'otontegeezza amaanyi go amangi mwe gasibuka."

¹⁶Bw'atyo omukazi n'amusendasendanga n'ebigambo bye ennaku zonna ng'amubuuza okutuusa lwe yamwetamwa.

¹⁷Awo Samusooni n'amubuuira ebyali ku mutima gwe byonna. N'amugamba nti, "Simwebwangako nviiri, kubanga ndi muwonge eri Katonda okuva mu lubuto lwa mmange. Bwe mwebwako enviiri, olwo amaanyi gange gananvaako, ne nnafuwa, ne mbeera ng'omuntu omulala yenna."

¹⁸Awo Derira bwe yalaba ng'amutegeezessa byonna ebyali ku mutima gwe, n'atumira abakulembeze b'Abafirisuuti ng'agamba nti, "Mukomeewo omulundi guno gwokka, kubanga yantegeezessa ebiri mu mutima gwe byonna." Awo Abafirisuuti ne bakomawo nga baleese ezaabu.

¹⁹N'amwebasa ku maviivi ge, n'ayita omusajja n'amumwa emivumbo omusanvu egiali ku mutwe gwe, n'atandika okujeeza, amaanyi ge ne gamuvaako.

²⁰N'amukoowoola ng'agamba nti, "Samusooni, Abafirisuuti bakuguddeko." N'agolokoka okuva mu tulo ng'agamba nti, "Nzija kwetakkuluza ɳjende nga bulijjo." Naye teyamanya nga MUKAMA Katonda amulese.

²¹Awo Abafirisuuti ne bakwata Samusooni, ne bamuggyamu amaaso, ne bamuserengesa e Gaza nga musibe mu njegere ez'ekikomo, ne bamuteeka mu kkomera mu nnyumba omuseerebwa obuwunga.

²²Kyokka bwe yamala okumwebwa, enviiri ze ne zitandika okumera.

²³Awo abakulembeze b'Abafirisuuti ne bakuɳjaana okuwaayo ssaddaaka eri lubaale waabwe Dagoni, nga bwe basanyuka. Ne boogera nti, "Lubaale waffe agabudde Samusooni omulabe waffe mu mukono gwaffe."

²⁴Abantu bwe baalaba Samusooni, ne batendereza lubaale waabwe nga bwe boogera nti, "Lubaale waffe agabudde omulabe waffe mu mukono gwaffe, oyo eyazikiriza ensi yaffe, n'atta bangi ku ffe."

²⁵Awo bwe baasanyuka ennyo, ne bawowoggana nga bwe bagamba nti, "Mutuyitire Samusooni atusanyuseemu." Ne baleeta Samusooni abasanyuseemu, nga bamuggyu mu kkomera. Ne bamuyimiriza wakati w'empagi.

²⁶Awo Samusooni n'agamba omuweereza eyali amukutte ku mukono nti, "Leka nkivate ku mpagi eziwaniridde essabo, nsobole okuzeesigama."

²⁷Mu ssabo mwalimu ekibiina kinene eky'abasajja n'abakazi nga mulimu n'abakulembeze bona ab'Abafirisuuti. Ne waggulu ku kasolya kwaliko abantu ng'enkumi ssatu abaali batunuulira Samusooni ng'abasanyusaamu.

²⁸Awo Samusooni n'asaba eri MUKAMA ng'agamba nti, "MUKAMA Katonda onzijukire kaakano, ompe amaanyi. Omulundi guno gwokka, ayi Katonda mpalane eggwanga ku Bafirisuuti olw'amaaso gange abiri."

²⁹Samusooni n'akwata empagi zombi ezaali wakati mu ssabo we yali ayimiridde, n'azeesigamako, omukono gwe ogwa ddyo nga guli ku mpagi emu, n'omukono ogwa kkono nga guli ku ndala.

³⁰Samusooni n'ayogera nti, "Leka nfiire wamu n'Abafirisuuti." N'asindika n'amaanyi ge gonna, essabo ne ligwa ku bakulembeze, n'abantu bona abaalimu naye, era n'atta bangi mu kufa kwe okusinga ne be yatta nga mulamu.

³¹Awo baganda be n'ennyumba yonna eya kitaawe ne bagenda ne baggyayo omulambo gwe, ne bagutwala ewaabwe, ne bamuziika mu ntaana ya kitaawe Manowa eyali wakati w'e Zola ne Esutaoli. Yali akuleembedde Isirayiri okumala emyaka amakumi abiri.

Balam 17

Mikka n'Ebifaananyi bye Ebyole

¹Waaliwo omusajja eyabeeranga mu nsi ey'ensozi Efulayimu, erinnya lye Mikka.

²N'agamba nnyina nti, "Ebitundu bya ffeeza olukumi mu ekikumi ebyakubulako, n'okukolima n'okolima, nga mpulira, laba, effeeza eyo nze njirina. Nze nagitwala." Awo nnyina n'amugamba nti, "Mwana wange, MUKAMA Katonda akuwe omukisa."

³Awo bwe yakomyawo ebitundu bya ffeeza ebyo olukumi mu ekikumi, eri nnyina, nnyina n'amugamba nti, "Mpaayo effeeza eno eri MUKAMA Katonda, okuva mu mukono gwange ku lw'omwana wange, ekolebwemu ekifaananyi ekyole n'ekifaananyi ekisaanuuse, era ndimuzza gy'oli."

⁴Awo bwe yazza effeeza, nnyina n'addira ebitundu ebikumi bibiri ebya ffeeza, n'abiwa omuweesi wa ffeeza, n'abikolamu ekifaananyi ekyole n'ekifaananyi ekisaanuuse. Ne bitekebwa mu nnyumba ya Mikka.

⁵Omusajja oyo Mikka yalina essabo. N'akola efodi, n'ebifaananyi ebyole n'ayawula omu ku batabani be okuba kabona we.

⁶Mu biro ebyo tewaaliwo kabaka mu Isirayiri, era buli muntu yakolanga nga bw'alaba.

⁷Ne wabaawo omuvubuka ow'omu kika kya Yuda nga Muleevi, eyabeeranga mu Besirekemuyuda.

⁸N'ava mu kibuga kya Besirekemuyuda n'atandika okunoonya gy'anaabera, n'atuuka mu nsi ey'ensozi eya Efulayimu mu nnyumba ya Mikka. Wabula yali akyali ku lugendo ng'akyanoonya aw'okubeera.

⁹Mikka n'amubuuza nti, "Ova wa?" Omuleevi n'amuddamu nti, "Nva mu Besirekemuyuda, era nnoonya we nnyinza okubeera."

¹⁰ Mikka n'amugamba nti, "Beera nange, obeere kitange era kabona, nange ndikuwa ebitundu bya ffeeza kkumi ng'empeera, era ne nkuwa n'engoye n'emmere." Omuleevi n'abeera naye.

¹¹ Awo Omuleevi n'akkiriza okubeera n'omusajja oyo, era omuvubuka n'aba gy'ali ng'omu ku batabani be.

¹² Awo Mikka n'ayawula Omuleevi, era omuvubuka oyo n'abeera kabona we n'abeera mu nnyumba ya Mikka.

¹³ Mikka n'ayogera nti, "Kaakano mmanyi nga MUKAMA Katonda anankoleranga ebirungi, kubanga nnina Omuleevi nga kabona wange."

Balam 18

Abadaani Bawamba ekibuga Layisi

¹ Mu biro ebyo Isirayiri teyalina kabaka. Era mu biro ebyo ekika ky'Abadaani baali banoonya ekifo aw'okubeera kubanga mu bika bya Isirayiri baali tebafunanga kifo kya kubeeramu ng'omugabo gwabwe.

² Kyebaava batuma abaana ba Ddaani bataano, abasajja abalwanyi, okuva mu kika kyabwe kyonna, okuva mu Zola ne mu Esutaoli, bagende bakette ensi. Ne babagamba nti, "Mugende mukebere ensi." Ne batuuka mu nsi ey'ensozi eya Efulayimu mu nnyumba ya Mikka ne basula eyo.

³ Bwe baali eyo okumpi n'ennyumba ya Mikka ne beetegereza eddoboozi ly'omuvubuka Omuleevi, ne bakyama ne bamabuuza nti, "Ani eyakuleeta wano? Era okola ki wano? Era lwaki oli wano?"

⁴ N'abategeeza Mikka bye yamukolera, n'abagamba nti, "Yampangisa era ndi kabona we."

⁵ Ne bamugamba nti, "Tukwegayiridde, kaakano weebuuze ku MUKAMA, obanga olugendo lwe tugenda luliba n'omukisa."

⁶ Awo kabona n'abaddamu nti, "Mugende mirembe, kubanga MUKAMA Katonda asiimye mugende ku lugendo lwammwe."

⁷ Awo abasajja abataano ne bava awo, ne batuuka e Layisi, ne balaba ng'abantu baayo bali mirembe ng'Abasidoni bwe baali. Baali bakkakkamu, nga balina buli kye beetaaga mu nsi, era nga beesudde akabanga n'Abasidoni, nga tewali muntu n'omu gwe bakolagana naye.

⁸ Awo abakessi bwe baddayo eri baganda baabwe e Zola n'e Esutaoli, baganda baabwe ne bababuuza nti, "Bigenze bitya?"

⁹ Ne baddamu nti, "Mugolokoke, tubalumbe. Tulabye ensi, era laba, nga nnungi nnyo. Temuyinza butagenda. Temulwa, tugende tulye ensi.

¹⁰Bwe mulituuka eyo muliraba abantu abakkakkamu ababeera mu nsi engazi, Katonda gy'atadde mu mukono gwammwe, era nsi erimu buli kintu omuntu kye yeetaaga."

¹¹Awo ekika ky'Abadaani ne basitula okuva e Zola n'e Esutaoli, abasajja lukaaga nga balina ebyokulwanyisa.

¹²Ne bagenda ne basiisira okumpi ne Kiriyasuyalimu mu Yuda. Ekifo ekyo ne bakituuma Makanedani era kye kiyitibwa n'okutuusa leero.

¹³Ne bava awo ne balaga mu nsi ey'ensozi eya Efulayimu ne batuuka ku nnyumba ya Mikka.

¹⁴Abasajja abataano abaagenda okuketta ensi ya Layisi ne bagamba baganda baabwe nti, "Mumanyi nga mu nnyumba zino mulimu Efodi n'ebifaananyi ebyole n'ekifaananyi ekisaanuuse? Kale nno mukole kye mugwanira okukola."

¹⁵Ne bakyama ne bagenda mu nnyumba y'omuvubuka Omuleevi eyali ewa Mikka ne bamulamus.

¹⁶Abasajja olukaaga nga balina ebyokulwanyisa byabwe ne bayimirira ku mulyango.

¹⁷Awo abasajja abataano abaagenda okuketta ne bayingira ne baggyamu ekifaananyi ekyole, ne Efodi, ne balubaale abaali mu nnyumba n'ekifaananyi ekisaanuuse, nga kabona n'abasajja olukaaga nga balina ebyokulwanyisa byabwe bayimiridde ku mulyango.

¹⁸Abasajja bwe bayingira mu nnyumba ya Mikka okuggyamu ekifaananyi ekyole, ne Efodi, ne balubaale abaali mu nnyumba n'ekifaananyi ekisaanuuse, kabona n'ababuuza nti, "Mukola ki?"

¹⁹Ne bamuddamu nti, "Sirika tonyega. Jjangu naffe obeere kitaffe era kabona waffe. Kiki ekisinga, ggwe okuba kabona w'ennyumba y'omuntu omu, oba okuba kabona w'ekika kya Isirayiri?"

²⁰Kabona n'asanyuka, n'atwala Efodi ne balubaale abaali mu nnyumba n'ekifaananyi ekyole n'agenda nabo.

²¹Ne babaako we bakyama ne balekayo abaana baabwe abato n'ebisolo byabwe n'ebintu byabwe. Ne bagenda mu maaso.

²²Bwe batambulako akabanga okuva ku nnyumba ya Mikka, abasajja abaabeeranga mu nnyumba eziriraanye ennyumba ya Mikka ne bakuñjaana ne bawondera abaana ba Ddaani.

²³Bwe baali babakoooola, abaana ba Ddaani ne bakyuka ne batunuulira Mikka ne bamubuuza nti, "Mutukoowoolera ki?"

²⁴N'abaddamu nti, "Mututte balubaale bange be neekolera, ne kabona. Kiki kye nsigazza? Muyinza mutya okumbuuza kye mbadde?"

²⁵Abaana ba Ddaani ne bamuddamu nti, "Sitwagala kuwulira ddoboozi lyo, si kulwa ng'abasajja abakambwe abali mu ffe bakulumba n'ofiirwa obulamu bwo n'obw'abo ab'omu nnyumba yo."

²⁶Awo abaana ba Ddaani ne beetambulira. Awo Mikka bwe yalaba nga bamuyinze amaanyi, n'akyuka n'addayo ewuwe.

²⁷Ne batwala ebintu Mikka bye yali akoze, ne kabona gwe yalina, ne batuuka e Layisi omwali abantu abakkakkamu abatamanyiridde, ne bakilumba ne batta abantu baamu n'ekitala, n'ekibuga ne bakikumako omuliro.

²⁸Tewaaliwo eyajja okubataasa kubanga ne Sidoni kyali wala n'ekibuga ekkyo, ate nga tebalina nkolagana na muntu yenna. Ekibuga kyali mu kiwonvu ekiriraanye Besulekobu. Abaddaani ne bazimba buto ekibuga ne babeera omwo.

²⁹Ekibuga ne bakikyusa erinnya okuva ku Layisi lye kyayitbwanga olubereberye ne bakituma Ddaani, ng'erinnya lya Ddaani jjajaabwe eyazaalibwa Isirayiri bwe lyali.

³⁰Awo abaana ba Ddaani ne beeterawo ekifaananyi ekkyole, ne balonda Yonasaani mutabani wa Gerusomu, muzzukulu wa Musa, ne batabani be okuba bakabona eri ekika ky'Abadaani okutuusa ensi lwe yawambibwa.

³¹Ne bassaawo ebifaananyi ebyole Mikka bye yali yeekoledde, ebbanga lyonna ennyumba ya Katonda we yabeerera mu Siiro.

Balam 19

Omuleevi ne mukazi we

¹Awo mu biro ebyo tewaali kabaka mu Isirayiri. Ne wabaawo Omuleevi eyabeeranga mu kyalo mu nsi ey'ensozi eya Efulayimu eyawasa omukazi mu Besirekemu mu Yuda.

²Naye mukazi we oyo n'ataba mwesigwa n'anoba ku bba, n'addayo mu nnyumba ya kitaawe e Besirekemu mu Yuda n'amalayo emyezi ena.

³Bba n'agolokoka n'agenda n'omuwereera we n'endogoyi bbiri okwogera ne mukazi we amukomyewo. Omukazi n'amutwala mu nnyumba ya kitaawe era kitaawe w'omuwala bwe yamulaba n'asanyuka era n'amwaniriza.

⁴Awo mukoddomi we, kitaawe w'omuwala n'amuwaliriza asigaleyo ennaku ssatu. Ne balya ne banya ne basula eyo.

⁵Awo ku lunaku olwokuna ne bagolokoka mu makya, Omuleevi ne yeeteekateeka okugenda. Kyokka kitaawe w'omuwala n'agamba mukoddomi we nti, "Mwesanyuse mumale okulya ku mmere, mulyoke mugende."

⁶Ne batuula ne balya era ne banywa bona wamu. Kitaawe w'omuwala n'agamba omusajja nti, "Kaakano kkiriza osule, omutima gwo gusanyukeko."

⁷Omusajja bwe yagolokoka okugenda, mukoddomi we n'amuwaliriza okusigala era n'asula ekyro ekyo.

⁸Ku lunaku olwokutaano, bwe yagolokoka mu makya okugenda, kitaawe w'omuwala n'amugamba nti, "Weesanyuse kaakano. Ojjira weesanyusa okutuusa obudde lwe bunaawungeera." Ne balya bona wamu.

⁹Omusajja bwe yagolokoka okugenda ne mukazi we n'omugole we, mukoddomi we kitaawe w'omuwala n'amugamba nti, "Laba, kaakano obudde buzibye. Sula obudde buyise. Sigala wano weesanyuse, onoogolokoka enkyo n'oddayo ewuwo."

¹⁰Naye omusajja n'atakkiriza. N'asitula n'agenda ne mukazi we, n'endogoyi ze zombi nga zeetisse, ku luuyi olw'e Yebusi, ye Yerusaalemi.

¹¹Bwe baali bali kumpi ne Yebusi, n'obudde nga buyise, omuweereza n'agamba mukama we nti, "Jjangu tukyame tuyingire mu kibuga kino eky'Abayebusi tusule omwo."

¹²MUKAMA we n'amuddamu nti, "Tetuukyame kuyingira mu kibuga ky'abatali baana ba Isirayiri, eky'abannaggwanga. Tujja kweyongerayo tulage e Gibe."

¹³N'agamba omuweereza we nti, "Tusemberere ekimu ku bifo ebyo, tusule e Gibe oba mu Laama."

¹⁴Ne beeyongerayo. Enjuba n'egwa nga basemberera Gibe ekya Benyamini.

¹⁵Ne bakyama eyo mu Gibe, gye baba basula. Ne balaga mu kifo ekigazi eky'ekibuga ne batuula eyo, kyokka ne wataba muntu n'omu eyajja okubatwala ewuwe.

¹⁶Era laba, ne wajja omusajja omukadde eyali ava ku mirimu gye egy'omu nnimiro akawungeezi, ng'asibuka mu nsi ey'ensozi eya Efulayimu, ng'abeera mu Gibe. Abantu b'e Gibe baayitbwanga Babenyamini.

¹⁷N'ayimusa amaaso ge n'alaba omusajja omutambuze, ng'ali mu kifo ekigazi eky'ekibuga. Omusajja n'amubuuza nti, "Ova wa era olaga wa?"

¹⁸N'amuddamu nti, "Nva mu Besirekemu mu Yuda, ndaga mu byalo eby'ensi ey'ensozi eya Efulayimu gye mbeera. Nva mu Besirekemu mu Yuda, nzirayo mu nnyumba ya MUKAMA, naye tewali anyannirizza mu nnyumba ye."

¹⁹Wabula nnina essubi n'emmere ey'endogoyi zange, ate naffe abaweeereza bo tulina emmere ne wayini ebitumala nze, n'omuweereza wo omukazi, n'omuvubuka.

²⁰Omusajja omukadde n'abagamba nti, "Mbanirizza ewange mwenna. Temwetaaga kusula mu kifo ekigazi eky'ekibuga."

²¹Awo n'abatwala mu nnyumba ye, n'aliisa endogoyi ze, ne banaaba ku bigere, ne balya, ne banywa.

²²Awo bwe baali nga beesanyaamu, laba, abasajja ab'omu kibuga ekyo, abaana ab'obutali butuukirivu ne bazingiza ennyumba nga bwe bakoon oluggi. Ne bagamba nannyini nnyumba, omusajja omukadde nga bwe bawowoggana nti, "Fulumya omusajja oyo ayingidde mu nnyumba yo, tumusiyage."

²³Nannyini nnyumba n'afuluma, n'abagamba nti, "Nedda mikwano gyange, temubeera bagwenyufu. Olw'okuba ng'omusajja ono azze mu nnyumba yange, temukola kintu kya buswavu bwe kityo.

²⁴Mulaba muwala wange wuuno, mbeerera, ate n'omukazi w'omusajja naye nzija kubamuwa. Baabo mubakole kye mwagalala. Naye omusajja ono temumukola kintu kya buswavu bwe kityo."

²⁵Naye abasajja ne bagaana okumuwliriza. Omusajja kyeyava addira mukazi we, n'amufulunya, ne bamukwata ne bamusobyako ekiro kyonna, ne bamuta agende ng'emmambya esala.

²⁶Omukazi n'addayo n'atuuka obudde nga bukya, n'agwa ku luggi lw'ennyumba, mukama we gye yaliasuze, n'abeera awo okutuusa obudde bwe bwakya.

²⁷MUKAMA we bwe yagolokoka mu makya, n'aggulawo enzigi z'ennyumba ye n'afuluma agende ku lugendo lwe, laba, mukazi we ng'agudde mu maaso g'ennyumba, ng'emikono gye gikunukkiriza omulyango.

²⁸N'agamba mukazi we nti, "Golokoka tugende." Kyokka ne wataba kanyego. Omusajja n'amuteeka ku ndogoyi, n'agenda ewuwe.

²⁹Bwe yatuuka ewuwe, n'addira akambe, n'akwata mukazi we, n'amusalaasalamu ebifi kkumi na bibiri, n'abiweereza mu buli kitundu ekya Isirayiri.

³⁰Awo buli muntu eyabirabangako n'agamba nti, "Ekikolwa ekiri nga kino tekikolebwanga so tekirabibwanga okuva ku lunaku abaana ba Isirayiri lwe baayambukirako okuva mu nsi y'e Misiri n'okutuusa leero. Mukirooozeeko, mukifumiitirizeeko era tulabe eky'okukola."

Balam 20

Abayisirayiri Balwana n'Ababenjamini

¹Awo abaana ba Isirayiri bona okuva ku Ddaani okutuuka ku Beeruseba wamu n'ensi ya Gireyaadi ne bakuinjaana mu maaso ga MUKAMA e Mizupa, nga bali omuntu omu.

²Abakulembeze b'abantu bona mu bika byonna ebya Isirayiri ne batuula mu bifo byabwe mu kujjaaniro ly'abantu ba Katonda, nga bawera abaserikale abaalina ebitala, emitwalo amakumi ana.

³Awo abaana ba Benyamini ne bawulira nti Abantu ba Isirayiri bambuse e Mizupa. Abaana ba Isirayiri ne boogera nti, "Ekintu kino eky'ekivve bwe kiti, kyabaawo kitya?"

⁴Omuleevi bba w'omukazi eyattibwa n'addamu nti, "Natuuka e Gibea ekya Benyamini, ne mukazi wange, tusule eyo.

⁵Abasajja ab'e Gibea ne bangolokokerako mu kiro, ne bazingiza ennyumba gye twalimu, ne baagala okunzita. Kyokka ne bakwata mukazi wange ne bamusobyako n'afa.

⁶Kyennava ntwala mukazi wange ne musalaasala, ne mpeereza ebitundu bye mu buli kifo eky'omugabo gwa Isirayiri, kubanga baakola ekikolwa eky'obugwenyufu era eky'ekivve.

⁷Kaakano mmwe abaana ba Isirayiri mwenna, musaleewo eky'okukola."

⁸Awo abantu bona ne bagolokoka nga bali omuntu omu, ne boogera nti, "Tewali muntu mu ffe aliddayo ewuwe. Tewali aliddayo mu nnyumba ye.

⁹Naye kaakano ekintu kye tulikola Gibea okumulwanyisa, kwe kumukubira akalulu.

¹⁰Abantu kkumi ku bantu kikumi okuva mu bika byonna ebya Isirayiri, n'abalala kikumi ku bantu olukumi, n'abalala lukumi ku bantu omutwalo ogumu bagende bafunire eggye ebyetaago. Eggye bwe lirituuka e Gibea eky'e Benyamini balyoke bababonereze ng'ekikolwa kyabwe eby'obugwenyufu bwe kiri, kye baakola mu Isirayiri."

¹¹Awo abantu bona aba Isirayiri ne bakuinjaana ne baba omuntu omu, ne balumba ekibuga.

¹²Ebika bya Isirayiri ne bituma ababaka mu kika kyonna ekya Benyamini, nga babuuza nti, "Kikolwa ki eky'ekivve ekyakolebwa wakati mu mmwe?

¹³Kale kaakano muweeyo abasajja abaana b'ebikolwa ebitali bya butuukirivu abali mu Gibea tubatte, tuggyewo ekibi mu Isirayiri." Naye abaana ba Benyamini ne bagaana okuwuliriza eddoboозi ly'abaana ba Isirayiri.

¹⁴Awo abaana ba Benyamini ne bakuinjaanira mu Gibea nga bava mu bibuga byonna, bagende balwanyise abaana ba Isirayiri.

¹⁵Ku lunaku olwo, abaana ba Benyamini ne bavaayo okuva mu bibuga abasajja abalina ebitala emitwalo ebiri mu kakaaga.

¹⁶Mu bantu abo bona mwalimu abasajja abalondemu lusanvu abakozesa kkono. Buli omu ku bo yayinzanga okuteeka ejinja mu nvumuulo ekube oluviiri, n'atasubwa.

¹⁷Abasajja ba Isirayiri, nga totaddeeko abava mu Benyamini, ne bakuŋjaana abasajja abalwanyi abasitula ebitala, emitwalo amakumi ana.

¹⁸Abaana ba Isirayiri ne bagolokoka ne bayambuka e Beseri ne beebruza ku Katonda nga bagamba nti, "Ani ku ffe alisooka okugenda okulwanyisa abaana ba Benyamini?" MUKAMA n'abaddamu nti, "Yuda yalisooka."

¹⁹Abaana ba Isirayiri ne bagolokoka mu makya ne basiisira okumpi ne Gibe.

²⁰Abasajja ba Isirayiri ne bagenda okulwanyisa Benyamini, n'abasajja ba Benyamini ne basimba ennyiriri okulwanyisa abasajja ba Isirayiri e Gibe.

²¹Abaana ba Benyamini ne bava mu Gibe ne batta abasajja ba Isirayiri emitwalo ebiri mu enkumi bbiri mu lutalo ku lunaku olwo.

²²Nayeabantu bazzaamu abasajja ba Isirayiri amaanyi, ne baddayo ne basimba ennyiriri mu kifo mwe baali ku lunaku olwasooka.

²³Awo abaana ba Isirayiri ne bambuka ne bakaabira MUKAMA okutuusa akawungeezi. Ne beebruza ku MUKAMA nti, "Tuddeyo tulwanyise baganda baffe abaana ba Benyamini?" MUKAMA n'abaddamu nti, "Mugende mubalwanyise."

²⁴Ku lunaku olwokubiri Abayisirayiri ne basembera okulwanyisa Ababenayamini.

²⁵Ababenayamini ne bavaayo ne balumba okuva e Gibe, ne batta abaana ba Isirayiri abalala omutwalo gumu mu kanaana mu lutalo ku lunaku olwo olwokubiri; Abayisirayiri abo bona baalina ebitala.

²⁶Awo abaana ba Isirayiri bona n'abantu bona, ne bambuka okulaga e Beseri, ne bakaabira MUKAMA Katonda ne batuula eyo mu maaso ge ne basiiba olunaku olwo okutuusa akawungeezi, lwe baawaayo ebiweebwayo ebyokebwa n'ebiweebwayo olw'emirembe mu maaso ga MUKAMA.

²⁷Abaana ba Isirayiri ne beebruza ku MUKAMA Katonda, kubanga essanduuko ey'endagaano ya Katonda yaliyo mu biro ebyo,

²⁸nga Finekaasi mutabani wa Eriyazaali, muzzukulu wa Alooni yaweereza mu maaso ga MUKAMA Katonda. Ne bamwebuuzaako nga bagamba nti, "Tuddeyo tulumbe baganda baffe abaana ba Benyamini oba tetuddayo?" MUKAMA n'abaddamu nti, "Mugende kubanga enkya nzija kubagabula mu mukono gwammwe."

²⁹Awo Abayisirayiri ne bateegera ku njuyi zonna eza Gibe.

³⁰Ku lunaku olwokusatu abaana ba Isirayiri ne bambuka okulwanyisa abaana ba Benyamini ne basimba ennyiriri nga boolekedde Gibeal ng'olulala.

³¹Abaana ba Benyamini ne bavaayo okubalwanyisa ne basikirizibwa okuva mu kibuga, ne batandika okukuba n'okutta ng'olulala, nga bava ku luguudo olumu okudda e Beseri, ne ku lulala oludda e Gibeal mu nnimiro. Ne batta abasajja Abayisirayiri ng'amakumi asatu.

³²Abaana ba Benyamini bwe baagambanga nti, "Tubawangula nga luli bwe kyali ku mulundi ogwasooka," Abayisirayiri bo ne beeteesa nti, "Tuddeyoko emabega, tubasikirize okubaggya mu kibuga badde mu nguudo."

³³Abasajja bona aba Isirayiri ne bava mu nnyiriri zaabwe mu bifo byabwe, ne badda e Baalutamali. Abayisirayiri abaateega ne bafubutuka okuva mu bifo byabwe mu ttale erya Gibeal.

³⁴Awo abasajja omutwalo gumu abaalondebwa okuva mu Isirayiri yonna, ne balumba Gibeal ne waba okulwana okw'amaanyi, Ababenyamini ne batamanya nti akabi kabajjidde.

³⁵Awo MUKAMA Katonda n'awangula Benyamini mu maaso ga Isirayiri, era ku lunaku olwo abaana ba Isirayiri ne batta Ababenyamini bona abaalina ebitala, abasajja emitwalo ebiri mu enkumi ttaano mu kikumi.

³⁶Abaana ba Benyamini ne balaba nga bakubiddwa. Abasajja ba Isirayiri ne bakolera Ababenyamini ekkubo, nga bo Abayisirayiri beesize abateezi be baali batadde okumpi ne Gibeal.

³⁷Abaali bateeze ne badduka ne beesogga mu Gibeal, ne basaasaana ne batta abaakirimu bona.

³⁸Abasajja ba Isirayiri baali balagaanye n'abaateega nti abateezi bwe banaanyoosa omukka omungi mu kibuga,

³⁹abasajja ba Isirayiri abali mu ddwaniro banaakyuka. Mu kiseera ekyo Ababenyamini baali batanudde okukuba n'okutta abasajja ba Isirayiri ng'amakumi asatu, nga luli olwasooka. Ne bagamba nti, "Ddala ddala tubawangudde nga mu lutalo luli olwasooka."

⁴⁰Naye omukka bwe gwatandika okunyooka, ekibuga kyonna nga kigya, Ababenyamini ne bakyuka okutunula emabega, laba, ng'ekibuga kyonna kikutte omuliro.

⁴¹Abasajja ba Isirayiri ne babakyukira. Abasajja ba Benyamini ne batya bwe baalaba ng'akabi kabajjidde.

⁴²Kyebaava badduka abasajja ba Isirayiri nga baddukira mu ddungu, kyokka olutalo ne lubayinza. Buli eyadduka okuva mu bibuga n'afiira wamu nabo.

⁴³Abayisirayiri ne bazingiza Ababenyamini, ne babagoba okutuukira ddala ku buvanjuba bw'e Gibea we butandikira.

⁴⁴Abasajja abalwanyi abazira Ababenyamini abaafa baali omutwalo gumu mu kanaana.

⁴⁵Ababenyamini bwe baddukira mu ddungu nga boolekedde olwazi lwa Limoni, Abayisirayiri ne batta enkumi ttaano ku bo. Abayisirayiri ne bongera okubagobera ddala okutuuka e Gidomu, era n'eyo ne battirayo abasajja enkumi bbiri.

⁴⁶Bwe batyo Ababenyamini bona abaafa ku lunaku olwo, baali emitwalo ebiri mu enkumi ttaano, bona abo nga basajja bazira.

⁴⁷Naye abasajja lukaaga be baddukira mu ddungu okwolekera olwazi lwa Limoni, ne babeera eyo okumala emyezi ena.

⁴⁸Abasajja ba Isirayiri ne bakyuka ne baddayo eri abaana ba Benyamini ne batta buli kintu ekyali mu kibuga, ne batta ensolo, ne batta buli muntu gwe baasanga mu bibuga byonna bye baalaba, ne babikumako omuliro.

Balam 21

Ababenyamini bafuna Abakazi

¹Abasajja ba Isirayiri baali beerayiridde e Mizupa nti, "Tewabanga n'omu ku ffe awaayo muwala we okufumbirwa Benyamini."

²Awo abantu ne bagenda e Beseri ne batuula eyo okutuusa akawungeezi nga bakaabira Katonda, nga bayimusa eddoboozi lyabwe, nga bakuba ebiwooobe,

³nga bakaaba nti, "Ayi MUKAMA Katonda wa Isirayiri, lwaki kino kituuse ku Isirayiri leero, ekika ekimu okubula ku Isirayiri?"

⁴Awo ku lunaku olwaddirira, abantu ne bagolokoka ne bazimba ekyoto mu kifo ekyo, ne bawaayo ebiweebwayo ebyokebwya n'ebiweebwayo olw'emirembe.

⁵Abaana ba Isirayiri ne beebuuza nti, "Ani ku bika byonna ebya Isirayiri atazze kukuungaana mu maaso ga MUKAMA Katonda?" Kubanga baali beerayiridde, ng'omuntu yenna alemwa okukuungaana mu maaso ga MUKAMA e Mizupa, ateekwa kuttibwa.

⁶Abaana ba Isirayiri ne basaalirwa olwa Benyamini muganda waabwe nga bagamba nti, "Leero ekika ekimu ekya Isirayiri kisaliddwako.

⁷Tunaabakolera ki okubafunira abakazi, obanga ffe ffennyini twerayiridde eri MUKAMA obutabawa bawala baffe okubafumbirwa?"

⁸Ne beebuuza nti, "Kika ki ku bika bya Isirayiri ekitaayambuka Mizupa mu maaso ga MUKAMA Katonda?" Ne bazuula nga mu Yabesugireyaadi tewaavaayo muntu eyajja mu lukuunjaana.

⁹Bwe baalaba abantu, laba nga tewaliwo mutuuze w'e Yabesugireyaadi.

¹⁰Awo ekibiina ne kitumayo abasajja abalwanyi omutwalo gumu mu enkumi bbiri, ne babalagira nti, "Mugende muzikirize n'ekitala abo bona ababeera mu Yabesugireyaadi, obutalekaawo bakazi wadde abaana.

¹¹Kino kye muba mukola. Mutte buli musajja na buli mukazi atali mbeerera."

¹²Mu bantu abaabeeranga mu Yabesugireyaadi ne basangamu abawala ebikumi bina abaali embeerera, ne babatwala mu nkambi e Siiro mu nsi ya Kanani.

¹³Awo ekibiina kyonna ekyali kikuunjaanye ne kiweereza abaana ba Benyamini abaali ku lwazi lwa Limoni obubaka obw'emirembe.

¹⁴Awo Ababenayamini ne bakomawo mu kiseera ekyo, era ne baweebwa abawala abaawonawo ku bawala ab'e Yabesugireyaadi, naye ne batabamala bona.

¹⁵Abantu ne basaalirwa olwa Benyamini kubanga MUKAMA Katonda yali abaawudde ku bika bya Isirayiri ebirala.

¹⁶Awo abakadde b'olukunjaana ne bagamba nti, "Abakazi b'Ababenayamini baazikirizibwa, kaakano abasajja abasigaddewo, tunabalabira wa abakazi?

¹⁷Ababenayamini abaasigalawo bateekwa okufuna abasika, ekika kireme okusanglibwawo mu Isirayiri.

¹⁸Ate tetuyinza kubawa ku bawala baffe kubawasa, kubanga ffe abaana ba Isirayiri tweyama nga tugamba nti, 'Akolimirwe aliwa Omubenyamini muwala we okumuwasa.'

¹⁹Kyokka waliwo embaga ya MUKAMA Katonda eya buli mwaka e Siiro, ekiri mu bukiikkono bwa Beseri, n'obuvanjuba bw'oluguudo oluva e Beseri okudda e Sekemu, n'obukiikkaddyo bwa Lebona."

²⁰Awo ne bagamba abaana ba Benyamini nti, "Mugende mwekweke mu nnimiro z'emizabbibu,

²¹muteege. Laba abawala b'e Siiro bwe banaafuluma okwegatta ku mazina, mudduke okuva mu nnimiro z'emizabbibu, mwefunire buli muntu omukazi ku bawala b'e Siiro, muddeyo mu nsi ya Benyamini.

²²Awo bakitaabwe oba bannyinaabwe bwe balyemulugunya gye tuli, tulibagamba nti, 'Mubatuwe lwa kisa, kubanga tetwabafunira bakazi mu lutalo, era olwokubanga temwababawa, temulina musango.'"

²³Awo Ababenyamini ne bakola bwe batyo. Ne beewambira abawala ku abo abaali bazina, ne beddirayo mu busika bwabwe, ne baddamu okuzimba ebibuga byabwe ne babeera omwo.

²⁴Mu kiseera ekyo n'abaana ba Isirayiri buli muntu mu kika kye ne yeddirayo mu busika bwe.

²⁵Mu biro ebyo tewaali kabaka mu Isirayiri; buli muntu yakolanga nga bw'ayagala.

Luusi

Luusi 1

Nawomi ne Luusi

¹ Awo olwatuuka mu nnaku ezo abalamuzi ze baafugiramu, enjala n'egwa mu nsi. Awo omusajja ow'e Besirekemu mu Yuda ne mukazi we, ne batabani be bombi, ne basengukira mu nsi ya Mowaabu.

² Erinnya ly'omusajja yali Erimereki, erya mukazi we Nawomi, n'amannya ga batabani be bombi, Maloni ne Kiriyoni. Baali Bayefulaasi ab'e Besirekemu mu Yuda, bwe baatuuka mu nsi ya Mowaabu, ne babeera omwo.

³ Naye Erimereki bba wa Nawomi n'afa; nnamwandumu Nawomi n'asigalawo ne batabani be bombi.

⁴ Batabani be baawasa ku bakazi Abamowaabu, omu Olupa, n'omulala Luusi, ne babeera eyo okumala emyaka nga kkumi.

⁵ Oluvannyuma Maloni ne Kiriyoni ne bafa, Nawomi n'asigala nga talina baana wadde bba.

⁶ Bwe yawulira ng'ali mu nsi ya Mowaabu nti MUKAMA Katonda yajjira abantu be n'abawa emmere, n'agolokoka ne baka baana be okuddayo mu Isirayiri.

⁷ Ye ne baka baana be, ne bava mu kifo mwe baali, ne bakwata ekkubo okuddayo mu nsi ya Yuda.

⁸ Awo Nawomi n'agamba baka baana be nti, "Mugende muddeeyo buli muntu mu nnyumba ya nnyina, era MUKAMA Katonda abakolere ebyekisa, nga nammwe bwe mwakolera abaafa era ne bye mwakolera nze.

⁹ MUKAMA Katonda abawe omukisa era buli omu ku mmwe, amuwe omusajja omulala." N'alyoka abanywegera, nabo ne bayimusa amaloboozi gaabwe, ne bakaaba amaziga,

¹⁰ nga bagamba nti, "Nedda, tuligenda naawe ng'oddoyo eri abantu bo."

¹¹ Naye Nawomi n'abagamba nti, "Muddeeyo ewammwe bawala bange. Kiki ekibaagaza okugenda nange? Sikyasobola kuzaala baana balala bafuuke babba mmwe.

¹² Mweddireyo ewammwe, bawala bange, kubanga nze nkaddiye nnyo sikyafumbirwa. Ne bwe nnandifumbiddwa ne nzaala abaana aboobulensi;

¹³ mwandibalindiridde okutuusa lwe bandikuze nga temunna fumbirwa? Nedda, bawala bange. Nnumwa nnyo okusinga mmwe, kubanga omukono gwa MUKAMA Katonda tegubadde nange."

¹⁴ Bwe baawulira ekyo, ne baddamu okukaaba. Awo Olupa n'anywegera nnyazaala we, n'amusiibula. Naye Luusi namunywererako ddala.

¹⁵ Awo Nawomi bwe yalaba ekyo, namugamba nti, "Laba, munno azzeeyo eri abantu be ne balubaale be, naawe kwata ekkubo omugoberere."

¹⁶ Naye Luusi n'amwegayirira ng'agamba nti, "Tompaliriza kukuvaako, wadde obutakugoberera, kubanga gy'onoogendanga, nange gye nnaagendanga, gy'onooberanga, nange gye nnaaberanga, era abantu bo be banaabanga abantu bange, era ne Katonda wo y'anaaberanga Katonda wange.

¹⁷ Gy'olifiira nange gye ndifiira era eyo gye balinziika. MUKAMA Katonda ankangavvule nnyo bwe ndyawukana naawe wabula mpozi okufa."

¹⁸ Awo Nawomi bwe yalaba nga Luusi amaliridde okugenda naye, n'atayongerako kigambo kirala.

¹⁹ Oluvannyuma bombi ne batambula okutuuka e Besirekemu. Bwe batuuka e Besirekemu, ekibuga kyonna ne kisasamala ku lwabwe, era abakazi ne beebuuza nti, "Dala ono ye Nawomi?"

²⁰ Bwe yawulira ekyo, n'abaddamu nti, "Temumpita Nawomi, naye mumpite Mala, kubanga MUKAMA Ayinzabyonna yalumya obulamu bwange n'okukaawa bunkayiridde.

²¹ Nagenda nnina ebintu bingi, naye MUKAMA Katonda ankomezzaawo nga sirina kantu, kale lwaki mumpita Nawomi? Katonda Ayinzabyonna yandeetera okubonaabona."

²² Bw'atyo Nawomi n'akomawo e Besirekemu, okuva mu Mowaabu ne muka mwana we Luusi Omumowaabu, mu kiseera eky'okukungula sayiri nga kyakatandika.

Luusi 2

Luusi Asisinkana Bowaazi

¹ Nawomi yalina mulamu we, ng'ava mu kika kya bba, Erimereki, nga mugagga, erinnya lye nga ye Bowaazi.

² Awo Luusi Omumowaabu n'agamba Nawomi nti, "Ka ɲjende mu nnimiro okulonda ebirimba bya sayiri, ngoberere oyo anankwatirwa ekisa." Nawomi n'amuddamu nti, "Genda, muwala wange."

³ Amangwago, n'agenda, n'atandika okulonda mu nnimiro abakunguzi we bayise. Awo ne yesanga ng'atuuse mu nnimiro ya Bowaazi, ow'omu kika kya Erimereki.

⁴ Mu kiseera kye kimu Bowaazi n'atuuka okuva e Besirekemu, n'agamba abakunguzi be nti, "MUKAMA Katonda abeere nammwe." Nabo ne bamuddamu nti, "Naawe MUKAMA Katonda akuwe omukisa."

⁵ Awo Bowaazi n'abuuza nampala wa bakunguzi be nti, "Omuwala ono w'ani?"

⁶ N'amuddamu nti, "Ono ye muwala Omumowaabu eyajja ne Nawomi okuva e Mowaabu.

⁷ Atwegayiridde alondelonde abakunguzi we bayise mu binywa, era asiibye akola okuva obw'enkyo okutuusa essaawa eno, okuggyako akabanga akatono ke yawumuddemu."

⁸ Awo Bowaazi n'agamba Luusi nti, "Wuliriza, muwala ggwe. Togendanga n'olondanga mu nnimiro endala yonna, tovanga mu eno, naye obeeranga wamu nabaweereza bange abawala.

⁹ Gendereranga ennimiro basajja bange mwe bamaze okukungula, era ogobererenga abawala. Abasajja mbalagidde obutakutawanya. Era ennyonta bw'ekulumanga, onywenga ku mazzi abasajja ge basenye."

¹⁰ Awo Luusi bwe yawulira ebyo, n'avuunama ku ttaka, ng'agamba nti, "Ng'ondaze ekisa mu maaso go, n'onfaako nze, munaggwanga."

¹¹ Naye Bowaazi n'addamu nti, "By'okoledde nnyazaala wo kasookedde balo afa, ne bwe waleka kitaawo ne nnyoko era n'abantu bo n'oija mu nsi ey'abantu botomanyi, babintegezezza byonna.

¹² MUKAMA Katonda wa Isirayiri gwe weeyuna wansi w'ebiwaawaatiro bye, akusasule olw'ebyo by'okoze, eraakuwe empeera ennene ddala."

¹³ Awo Luusi n'addamu nti, "Nneeyongere okulaba ekisa mu maaso go mukama wange, kubanga oyogedde ebigambo ebyekisa eri omuweereza wo era emmeeme yange ogizizza mu nteeko wadde nga sigwanira kuba omu ku baweereza bo."

¹⁴ Ekiseera ekyokulya bwe kyatuuka, Bowaazi n'agamba Luusi nti, "Jjangu okoze omugaati gwo mu wayini akatuuse." Awo Luusi bwe yatuula wansi, Bowaazi n'amuwa sayiri ensiike, n'alya, n'akkuta, n'emulemera nawo.

¹⁵ Oluvannyuma ng'okulya kuwedde, n'agolokoka agende alonde, era Bowaazi n'alagira abaddu be nti, "Ne bw'anaalonda mu binywa temumugaana.

¹⁶ Wakiri, mumuleke yerondere mu miganda so temumuwuuna."

¹⁷ Awo Luusi n'alonda mu nnimiro okutuuka akawungeezi, oluvannyuma n'awuula ne sayiri gye yali akujjaanyizza, n'aweza nga kilo kkumi na ssatu.

¹⁸ Yonna n'agyetikka, n'agitwala mu kibuga, ne nnyazaala we n'agiraba. Era yamuleetera ne ku mmere gye yali afissizzaawo.

¹⁹ Nnyazaala we yasanyuka nnyo, era n'amubuuza nti, "Wakoze mu nnimiro y'ani leero? Aweebwe omukisa oyo akukwatiddwa ekisa!" Awo Luusi n'abuulira nnyazaala we nannyini nnimiro mwe yakoze, n'erinnya ly'omwami nga ye Bowaazi.

²⁰ Nawomi namugamba nti, "MUKAMA Katonda atalekanga kulaga kisa eri abalamu n'abafu, amuwe omukisa. Anti omusajja oyo muganda waffe ddala, era y'omu ku banunuzi baffe ddala."

²¹ Luusi Omumowaabu n'ayongerako nti, "N'okuñjamba yañjambye nti nkolere wamu n'abakozi be okutuusa lwe balimala eby'okukungula bye."

²² Awo Nawomi n'agamba Luusi muka mwana we nti, "Kijja kuba kirungi nnyo muwala wange, okubeeranga kumpi nabaweereza be abakazi, kubanga singa onoogenda mu nnimiro y'omulala akabi kayinza okukutuukako."

²³ Awo Luusi n'abeeranga kumpi n'abaweereza ba Bowaazi ng'alonda okutuusa amakungula ga sayiri n'eñjaano bwe gaggwa, n'abeeranga wamu ne nnyazaala we.

Luusi 3

Luusi mu Gguuliro Iya Bowaazi

¹ Awo Nawomi nnyazaala wa Luusi n'amugamba nti, "Lwaki sikunoonyeza maka ag'okubeeramu, bakulabiririre eyo?

² Ewa Bowaazi gy'obadde n'abaweereza be abawala, ye muganda waffe. Kale, ekiro kya leero ajja kuba ng'awewa sayiri mu gguuliro.

³ Kale naaba osaabe obuwooowo, era oyambale engoye zo ezisinga obulungi. Oluvannyuma oserengete mu gguuliro; naye tomuganya kumanya nti wooli, okutuusa ng'amaze okulya n'okunywa.

⁴ Oluvannyuma ng'agalamiddeko wansi, weetegereze ekifo w'agalamidde, ogende obikkule ku bigere bye emirannamiro, naawe ogalamire awo; anaakubuulira eky'okukola."

⁵ Awo Luusi n'amugamba nti, "Nzija kukola nga bw'ondagidde."

⁶ N'aserengeta mu gguuliro, n'akola byonna nga nnyazaala we bwe yamulagira.

⁷ Awo Bowaazi bwe yamala okulya n'okunywa, era nga musanyufu, n'agenda n'agalamira ku mabbali g'entuumo ye ññaano. Luusi naye n'asooba mpola mpola, n'abikkula ku bigere bye, n'agalamira awo kumpi naye.

⁸ Ekiro mu ttumbi, Bowaazi ne yekanga, bwe yeekyusa n'alaba omukazi agalamidde kumpi n'ebigere bye.

⁹ N'amubuuza nti, "Ggwe ani?" Luusi n'addamu nti, "Nze Luusi omuweereza wo. Mbikkaako ku lugoye lwo kubanga oli mununuzi wa kika."

¹⁰ Bowaazi n'amuddamu nti, "MUKAMA Katonda akuwe omukisa muwala ggwe, olw'ekisa ekinene kyondaze okusinga eky'olubereberye, kubanga togenze wa bavubuka, abagagga oba abaavu.

¹¹ Kaakano, muwala ggwe, totya. Nzija kukukolera buli kintu kyonna ky'onoosaba. Abantu bange bona ab'omu kibuga, bamanyi ng'oli mukazi mwegendereza.

¹² Kya mazima ddala ndi mununuzi wo, naye waliwo ansingako.

¹³ Beera wano okutuusa obudde lwe bunaakya. Kale bw'anaayagala okukutwala, kinaaba kirungi; naye bw'anaaba nga tasiimye, MUKAMA Katonda nga bw'ali omulamu, nnaakutwala."

¹⁴ N'agalamira kumpi n'ebigere bye okutuusa enkeera, naye n'agolokoka nga tebunnalaba addeyo eka. Naye Bowaazi n'amukuutira nti, "Kireme okumanyibwa nti omukazi yazzeeko mu gguuliro."

¹⁵ Era n'amugamba aleete omunagiro gw'ayambadde; n'agukwata, n'amugerera ebigero mukaaga ebya sayiri, n'abimutikka, oluvannyuma Luusi n'addayo mu kibuga.

¹⁶ Bwe yatuuka eri nnyazaala we, Nawomi n'amubuuza nti, "Byagenze bitya muwala wange?" N'amubuulira ebintu byonna Bowaazi bye yamukoledde,

¹⁷ era n'ayongerako nti, "Yampadde ebigero bino omukaaga ebya sayiri, n'aŋŋamba nti, 'Toddayo wa nnyazaala wo ngalo nsa.' "

¹⁸ Nawomi n'amugamba nti, "Gumiikiriza, muwala wange, olabe ebigambo gye binakkira, kubanga leero omusajja oyo tajja kuwummula okutuusa ensonga eyo lw'anagimala."

Luusi 4

Bowaazi ne Luusi Bafumbiriganwa

¹ Awo Bowaazi n'ayambuka ku wankaaki w'ekibuga n'atuula awo. Mu kiseera kye kimu, muganda we oli gwe yayogerako ngali ne Luusi, yali ayitawo. Bowaazi n'amuyita namugamba nti, "Jjangu otuuleko wano munnange." Naye n'akkiriza, n'agenda n'atuula we yali.

² Bowaazi n'ayita n'abasajja kkumi ku bakadde b'ekibuga ne bajja ne batuula awo.

³ N'alyoka agamba muganda we nti, "Nawomi, eyakomyewo okuva mu Mowaabu, atunda ekibanja ekyali ekya muganda waffe omugenzi Erimereki.

⁴Ndowoozezza nti nkutegeeeze ku nsonga eyo, ekibanja ekyo okigulire mu maaso g'abakadde baffe. Bw'oba ng'oyagala okukinunula kinunule. Naye bw'oba nga toyagala, ntegeeza nkimanye. Tewali mulala alina buyinza kukinunula wabula ggwe, ate nga nze nkuddirira mu lunyiriri lwaffe." Omusajja n'addamu nti, "Nzija kukinunula."

⁵Awo Bowaazi n'amugamba nti, "Olunaku lw'oligula ekibanja ekyo ku Nawomi, ne Luusi Omumowaabu, nnamwandu naye olimutwala, erinnya lye yafa n'olikuuma n'ebintu bye n'obirabirira."

⁶Amangwago, omusajja n'addamu nti, "Nze sisobola kukinunula kubanga nnyinza okwonoona obusika bwange. Noolwekyo gwe kinunule."

⁷(Edda mu Isirayiri, empisa ey'okununula n'okuwaanyisa, yali nga bw'eti: omuntu omu yaggyangamu engatto ye, n'agiwa munne. Eno ye yali ng'enkola entuufu mu Isirayiri).

⁸Awo omusajja n'agamba nti, "Kyegulire." Amangwago Bowaazi n'aggyamu engatto ye.

⁹Bowaazi n'alangirira eri abakadde n'abantu bona nti, "Olwa leero, nguze ku Nawomi ebintu byonna ebya Erimereki, n'ebya Kiriyoni n'ebya Maloni, era mmwe muli bajulirwa.

¹⁰Era ne Luusi Omumowaabu, nnamwandu wa Maloni, naye mututte okuba mukazi wange, okusobola okukuuma erinnya ly'omugenzi Erimereki n'ebintu bye, erinnya lye lireme okufiira awo ate n'okugibwa ne ligibwa mu bitabo bye byafaayo eby'ekibuga. Mmwe bajulirwa!"

¹¹Awo abakadde n'abantu bona abaali ku wankaaki ne boogera nti, "Tuli bajulirwa. MUKAMA Katonda amufaananye nga Laakeeri ne Leeya, abaazimbira awamu ennyumba ya Isirayiri. Naawe Bowaazi oyale mu Efulasi, era oyatiikirire mu Besirekemu,

¹²era n'ezzadde MUKAMA Katonda ly'anaakuwa mu mukazi oyo, libeere ng'ennyumba ya Pereezi, Tamali gwe yazaalira Yuda."

¹³Awo Bowaazi n'awasa Luusi okuba mukazi we, n'ayingira gy'ali, n'aba olubuto, MUKAMA Katonda n'amusobozesa okuzaala omwana owoobulenzi.

¹⁴Abakyala ne bagamba Nawomi nti, "MUKAMA Katonda yeebazibwe, oyo atakulese nga tolina mununuzi olunaku lwa leero. Era erinnya ly'omwana lyatiikirire mu Isirayiri yonna!

¹⁵Kubanga muka mwana wo akwagala, alizza obuggyga obulamu bwo n'akuwanirira mu bukadde bwo; era akusingira abaana omusanvu, be yandizadde."

¹⁶Awo Nawomi n'atwala omwana, n'amuwambaatira mu kifuba kye, n'amulabirira.

¹⁷Abakyala ab'oku muliraano ne bagamba nti, "Ewa Nawomi ezaaliddwayo omwana." Ne bamutuuma erinnya Obedi, oyo ye kitaawe wa Yese, era jjajja wa Dawudi.

¹⁸Luno lwe lunyiriri lwa Pereezi: Pereezi yali kitaawe wa Kezulooni,

¹⁹Kezulooni yali kitaawe wa Laamu, Laamu n'aba kitaawe wa Amminadaabu.

²⁰Amminadaabu yali kitaawe wa Nakusoni, Nakusoni nga ye kitaawe wa Salumooni;

²¹Salumooni yali kitaawe wa Bowaazi, Bowaazi n'aba kitaawe wa Obedi;

²²Obedi yali kitaawe wa Yese, Yese n'aba kitaawe wa Dawudi.

1 Samwiri

1 Samwiri 1

Okuzaalibwa kwa Samwiri

¹ Waaliwo omusajja Omwefulayimu eyabeeranga e Lamasayimuzofimu, mu nsi ey'ensozi eya Efulayimu, ng'ayitibwa Erukaana, nga mutabani wa Yerokamu, muzzukulu wa Eriku, muzzukulu wa Toku, muzzukulu wa Zufu.

² Yalina abakyala babiri, omu nga ye Kaana; n'omulala nga ye Penina. Penina yalina abaana, naye Kaana nga mugumba.

³ Buli mwaka omusajja oyo yayambukanga okuva mu kibuga ky'ewaabwe okugenda okusinza n'okuwaayo ssaddaaka eri MUKAMA ow'Eggye e Siiro. Eyo Kofuni ne Finekaasi batabani ba Eri gye baawererezanga nga bakabona ba MUKAMA Katonda.

⁴ Awo olunaku olw'okuwaayo ssaddaaka bwe lwtuuuka, Erukaana, n'awa Penina ne batabani be, ne bawala be emigabo eg'yennyama.

⁵ Naye Kaana n'amuwa emigabo ebiri kubanga yamwagala nnyo, newaakubadde nga MUKAMA Katonda yali tamuwadde mwana.

⁶ Era kubanga MUKAMA Katonda yali tamuwadde mwana, muggyta we n'amucoccanga.

⁷ Ebyo byabangawo buli mwaka, era bwe baayambukanga okugenda mu yeekaalu ya MUKAMA, muggyta we n'amujoogerezanga okutuusa lwe yakaabanga, n'okulya n'atalya.

⁸ Bba Erukaana n'amubuuza nti, "Kaana, okaabiranga ki? Lwaki tolya? Kiki ekikweraliikiriza? Nze sikusingira abaana ekkumi?"

⁹ Lwali lumu bwe baali bamaze okulya n'okunywa e Siiro, Eri yali atudde ku ntebe okumpi n'omulyango gwa yeekaalu, Kaana n'asituka n'agenda mu maaso ga MUKAMA Katonda.

¹⁰ Mu kulumwa olw'ennaku ennyingi ennyo, n'akaaba nnyo amaziga ng'asaba MUKAMA Katonda.

¹¹ Ne yeeyama ng'agamba nti, "Ayi MUKAMA Ayinzabyonna, bw'olitunuulira ennaku ey'omuweereza wo, n'onzijukira, n'ompa omwana owoobulenzi, ndimuwaayo eri MUKAMA Katonda ennaku zonna ez'obulamu bwe nga muwonge, era enviiri ze tezimwebwengako."

¹² Awo Kaana bwe yeeyongera okusaba ennyo eri MUKAMA Katonda, Eri ne yeekaliriza akamwa ke.

¹³ Kaana yali asaba mu kasirise, ng'emimwa gye ginyeenya, naye nga eddoboozi lye teriwulikika. Eri n'alowooza nti atamidde.

¹⁴Eri kyeyava amugamba nti, “Olikomya ddi okujjanga wano ng’otamidde? Ggyawo ettamiiro lyo.”

¹⁵Naye Kaana n’amuddamu nti, “Si bwe kiri mukama wange; nze ndi mukazi ajjudde ennaku. Sinnanywa ku wayini newaakubadde ekitamiiza ekirala; mbadde nkaabira MUKAMA Katonda mu mmeeme yange.

¹⁶Omuweereza wo tomulowooza okuba omukazi ow’ekyejjo, kubanga mbadde nsindira MUKAMA ennaku n’obuyinike bwange.”

¹⁷Awo Eri n’amuddamu nti, “Genda mirembe. Katonda wa Isirayiri akuwe ekyo ky’omusabye.”

¹⁸N’ayogera nti, “Omuweereza wo alabe ekisa mu maaso go.” Oluvannyuma ne yeetambulira, n’alya ku mmere, n’atandika okutunula n’essanyu.

¹⁹Awo Erukaana n’ab’ewuwe ne bagolokoka enkeera mu makya ne basinza MUKAMA, n’oluvannyuma ne baddayo ewaabwe e Laama. Ne yeetaba ne mukazi we Kaana, MUKAMA Katonda n’amujjukira.

²⁰Kaana n’aba olubuto n’azaala omwana wabulenzi. N’amutuumma erinnya Samwiri, amakulu gaalyo, “Kubanga namusaba MUKAMA Katonda.”

Kaana Awonga Samwiri

²¹Awo Erukaana n’ayambuka n’ab’ennyumba ye okugenda okuwaayo ssaddaaka eri MUKAMA Katonda n’okutuukiriza obweyamo bwe.

²²Naye Kaana teyagenda nabo. N’agamba bba nti, “Omwana bw’aliva ku mabeere, ndimutwala ne mulagayo eri MUKAMA Katonda, era alibeera eyo ennaku ze zonna.”

²³Erukaana n’amuddamu nti, “Kola nga bw’osiima. Linda okutuusa lw’olimala okumuggyia ku mabeere; MUKAMA Katonda atuukirize ekigambo kye.” Awo omukyala n’asigala eka, n’alabirira omwana okutuusa lwe yava ku mabeere.

²⁴Bwe yava ku mabeere, n’amutwala mu yeekaalu ya MUKAMA Katonda e Siiro ng’akyali muto; ne batwala ente ssatu ennume, n’endebe ey’obutta, n’eccupa y’envinnyo.

²⁵Bwe baamala okusala emu ku nte, ne batwala omwana eri Eri.

²⁶Kaana n’ayogera nti, “Nga bw’oli omulamu mukama wange, nze mukyala oli eyayimirira okumpi naawe, ne nsaba MUKAMA Katonda.

²⁷Namusaba omwana ono, era MUKAMA Katonda ampadde kye namusaba.

²⁸Kaakano mmuwaayo eri MUKAMA, era obulamu bwe bwonna aweereddwayo eri MUKAMA Katonda.” Omwana n’asinzizanga MUKAMA Katonda eyo.

1 Samwiri 2

Okusaba kwa Kaana

- ¹ Awo Kaana n'asaba mu bigambo bino nti, "Omutima gwange gusanyukira MUKAMA; amaanyi gange geenyumiririza mu MUKAMA Katonda. Akamwa kange kasekerera abalabe bange, kubanga essanyu lyange liri mu bulokozi bwo."
- ² Tewali mutukuvu nga MUKAMA Katonda tewali mulala wabula ggwe; tewali Lwazi oluli nga Katonda waffe.
- ³ Toyogera nate nga weewaanawaana wadde okuleka akamwa ko okwogera eby'amalala, kubanga MUKAMA Katonda y'amanyi byonna, era y'apima ebikolwa.
- ⁴ Emitego egy'ab'amaanyi gimenyebba naye abanafu baweededwa amaanyi.
- ⁵ Abo abakkutanga, be bapakasa okufuna emmere naye abo abeetaaga, tebakyalumwa njala. Eyali omugumba azadde abaana musanvu, n'oyo alina abaana abangi, asobeddwa.
- ⁶ MUKAMA Katonda y'aleeta okufa, era y'awa obulamu; atwala emagombe ate n'azuukiza.
- ⁷ MUKAMA Katonda y'ayavuwaza era y'agaggawaza; atoowaza ate n'agulumiza.
- ⁸ Ayimusa abaavu okuva mu nfuufu; asitula abali mu bwetaavu okuva mu ntuumu y'evvu; n'abatuuza n'abalangira, era ne basikira entebe ey'ekitiibwa. Kubanga emisingi gy'ensi gya MUKAMA Katonda, era okwo kw'atuuzizza ensi.
- ⁹ Anaakuumanga ebigere by'abatukuvu be, naye ababi balisirisibwa mu kizikiza; kubanga omuntu tawangula lw'amaanyi.
- ¹⁰ Abalabe ba MUKAMA Katonda balisaasaanyizibwa; alibabwatukira ng'asinziira mu ggulu. MUKAMA alisalira ensonda ez'ensi omusango; aliwa kabaka we amaanyi, era n'agulumiza amaanyi g'oyo gwe yafukako amafuta.
- ¹¹ Awo Erukaana n'addayo ewuwe e Lama, naye omwana n'asigala ng'aweereza MUKAMA Katonda, ng'alabirirwa Eri.

Batabani ba Eri

- ¹² Batabani ba Eri baali basajja ba mpisa mbi, nga tebatya MUKAMA Katonda.
- ¹³ Omuntu yenna bwe yawangayo ssaddaaka, omuweereza wa kabona yajjanga, ng'akutte ewuuma ey'amannya asatu ng'enyyama ekyatokosebwa,
- ¹⁴ n'asonseka ewuuma mu nsaka oba mu bbinika, oba mu ntamu, oba mu sefuliya, era ebyo byonna ewuuma bye yakwasanga, kabona bye yeetwaliranga. Bwe batyo bwe baakolanga Abayisirayiri bona abajjanga okusinziza e Siiro.
- ¹⁵ Ate amasavu bwe gaabanga tegannayokebwa, omuweereza wa kabona yajjanga n'agamba omuntu awaayo ssaddaaka nti, "Kabona muwe ku nnyama ayokye, kubanga tajja kukkiriza kutwala nnyama nfumbe ayagala mbisi yokka."

¹⁶Omusajja bwe yamuddangamu nti, "Leka bamale okwokyako amasavu, olyoke otwale yonna gy'oyagala," omuweereza yaddangamu nti, "Nedda, oteekwa okugimpa kaakano, bwe kitaba bwe kityo, nziya kugitwala lw'amaanyi."

¹⁷Ekibi ky'abavubuka abo ne kiba kinene nnyo mu maaso ga MUKAMA, kubanga baanyoomanga ekiweebwayo kya MUKAMA Katonda.

¹⁸Samwiri n'aweerezanga mu maaso ga MUKAMA Katonda nga mulenzi muto, eyayambalanga ekkanzu ey'obwakabona eya bafuta.

¹⁹Nnyina n'amukolelanga ekyambalo n'akimutwaliranga, bwe yabanga ayambuse ne bba okuwaayo ssaddaaka eya buli mwaka.

²⁰Eri n'awa Erukaana ne mukyala we omukisa, ng'ayogera nti, "MUKAMA Katonda abawe abaana okudda mu kifo ky'oyo mukazi wo ono gwe yasaba, n'amuwaayo ng'ekirabo eri MUKAMA." N'oluvannyuma baddayo eka.

²¹MUKAMA n'aba wa kisa eri Kaana, n'azaala abaana aboobulenzi basatu, n'aboobuwala babiri. Omuvubuka Samwiri n'akulira mu maaso ga MUKAMA.

²²Awo Eri eyali akaddiye ennyo, n'awulira ebyo byonna batabani be bye baakolanga Abayisirayiri bona, ne bwe beetabanga n'abakyala abaweerezanga ku mulyango gw'Eweema ey'Okukunjaanirangamu.

²³N'abagamba nti, "Kiki ekibakoza ebifaanana bwe bityo? Bye mpulira okuva eriabantu bano bona nga si birungi.

²⁴Nedda, baana bange; ebigambo bye mpulira ebisaasaana mu bantu ba MUKAMA si birungi n'akatono.

²⁵Omuntu bw'ayonoona eri muntu munne, Katonda ayinza okubatabaganya, naye omuntu bw'ayonoona eri MUKAMA, ani anaamwegayiririra?" Naye ne batawuliriza bigambo bya kitaabwe, kubanga MUKAMA yali asazeewo okubazikiriza.

²⁶Awo omuvubuka Samwiri ne yeeyongera okukula, n'aba muganzi eri MUKAMA n'eri abantu.

Ebyalangibwa ku Nnyumba ya Eri

²⁷Awo ne wabaawo omusajja wa Katonda eyajja eri Eri, n'amugamba nti, "Bw'ati bw'ayogera MUKAMA nti, 'Sseeraga bulungi eri ennyumba ya jjajjaawo mu Misiri bwe baali bafugibwa Falaawo?

²⁸Nalonda jjajjaawo okuva mu bika byonna ebya Isirayiri okuba kabona wange, okwambukanga ku kyoto kyange, okwoterezangako obubaane, n'okwambalanga ekkanzu ey'obwakabona eya bafuta mu maaso gange. Era ne mpa ennyumba ya jjajjaawo ebiweebwayo byonna ebyokebwaa Abayisirayiri.

²⁹Lwaki munyooma ssaddaaka yange n'ekiweebwayo kyange bye nalagira, okuweebwangayo mu yeekaalu yange? Lwaki ossaamu batabani bo ekitiibwa

okunsinga, nga mweddiza ebitundu ebisinga obusava ku buli kiweebwayo abantu bange, Isirayiri, kye bawaayo?’

³⁰ “MUKAMA Katonda wa Isirayiri kyava ayogera nti, ‘Nasuubiza nti ennyumba yo n’ennyumba ya jjajjaawo be banaaweerezanga mu maaso gange ennaku zonna;’ naye kaakano MUKAMA agamba nti, ‘Kikafuuwe! Abanzisaamu ekitiibwa bennassangamu ekitiibwa, naye abo abonnyooma banaaswazibwanga.

³¹ Laba ekiseera kijja lwe ndikumalamu amaanyi era n’ennyumba ya jjajjaawo nayo ne ngimalamu amaanyi, waleme okubaawo n’omu aliwangaala okutuuka mu bukadde,

³² olyoke olabire ennaku mu nnyumba yange. Newaakubadde Isirayiri erifuna omukisa, tewalibaawo n’omu ku b’omu nnyumba yo aliwangaala n’akaddiwa.

³³ Omuntu yekka ku bantu bo gwe siizikirize, gwe ndikkiriza okumpeereza ku kyoto kyange, alisigalawo kukulabya nnaku, na kukunakuwaza mu mutima, na kukukaabya maziga; era bazzukulu bo bona banaafanga nga kyebajje bavubuke.’

³⁴ “Ekirituuka ku batabani bo, Kofuni ne Finekaasi, ke kaliba akabonero gy’oli era bombi balifa ku lunaku lumu.

³⁵ Ndyeyimusiza kabona omwesigwa, aligoberera ebiri mu mutima gwange ne mu mmeeme yange. Ndinywereza ddala ennyumba ye, era aliweerezanga ennaku zonna mu maaso g’oyo gwe ndifukako amafuta.

³⁶ Era buli aliba asigaddewo ku b’omu nnyumba yo alija n’amuvuunamira ng’amusaba ekitundu kya ffeeza n’omugaati ng’ayogera nti, “Nkwegayiridde nnonda okuba omu ku bakabona, nsobole okufuna ekyokulya.””

1 Samwiri 3

MUKAMA Ayita Samwiri

¹ Awo omuvubuka Samwiri n’aweerezanga mu maaso ga MUKAMA ng’alabirirwa Eri. Mu biro ebyo ekigambo kya MUKAMA kyali kya bbula, era nga n’okwolesebwa kwa bbalirirwe.

² Mu kiseera ekyo, Eri eyali akaddiye, n’amaaso ge nga gayimbadde, yali awumuddeko mu kisenge kye.

³ Etabaaza ya Katonda yali tennazikira nga ne Samwiri yeebase mu yeekaalu ya MUKAMA ng’aliraanye essanduuko ya Katonda we yali.

⁴ Awo MUKAMA n’akoowoola Samwiri nti, “Samwiri, Samwiri!” N’addamu nti, “Nze nzuuno.”

⁵ N’adduka n’agenda ewa Eri n’amugamba nti, “Nze nzuuno, ompise.” Naye Eri n’amuddamu nti, “Sikuyise, ddayo weebake.”

⁶ MUKAMA n'addamu n'amuyita, "Samwiri!" Samwiri n'asituka n'agenda eri Eri, n'amugamba nti, "Nze nzuuno, ompise." Naye Eri n'amuddamu nti, "Sikuyise, mutabani, ddayo weebake."

⁷ Samwiri yali tannategeera nga MUKAMA y'amuyita, nga n'ekigambo kya MUKAMA tekimubikkulirwanga.

⁸ MUKAMA n'addamu n'akoowoola Samwiri omulundi ogwokusatu, Samwiri n'asituka n'agenda eri Eri n'amugamba nti, "Nzuuno, ompise." Awo Eri n'ategeera nti MUKAMA y'ayita omuvubuka.

⁹ Eri kyeyava agamba Samwiri nti, "Genda weebake, bw'anaddamu okukuyita, oddamu nti, Yogera, MUKAMA, kubanga omuweereza wo awulira." Awo Samwiri n'agenda n'agalamira mu kifo kye.

¹⁰ MUKAMA n'ajja nate, n'amukoowoola ng'olubereberye nti, "Samwiri! Samwiri!" Samwiri n'addamu nti, "Yogera, Ayi MUKAMA kubanga omuweereza wo awulira."

¹¹ Awo MUKAMA n'agamba Samwiri nti, "Laba, ndikumpi okukola ekigambo mu Isirayiri ekirireetera amatu ga buli muntu alikiwulira okuwaawaala.

¹² Ku lunaku olwo ndituukiriza ebyo byonna bye nnali njogedde ku nnyumba ya Eri.

¹³ Namulabula nti ndibonereza ennyumba ye ennaku zonna, olw'obutali butuukirivu bwa batabani be abavvoola Katonda, n'akimanya naye n'atabaziyiza.

¹⁴ Kyenva ndayirira ennyumba ya Eri nga njamba nti, 'Omusango ogluli ku nnyumba ya Eri tegulisoniyibwa na ssaddaaka newaakubadde ekiweebwayo ennaku zonna.'

¹⁵ Samwiri n'addayo n'agalamira okutuusa obudde lwe bwakya, n'aggulawo enzigi ez'ennyumba ya MUKAMA. N'atya okutegeeza Eri okwolesebwa kwe yafuna,

¹⁶ naye Eri n'amuyita n'amugamba nti, "Samwiri, mwana wange." N'addamu nti, "Nze nzuuno."

¹⁷ Eri n'amubuuza nti, "Kiki kye yakugambye? Tokinkisa. Katonda akuleeteko ekibonerezo eky'amaanyi bw'onoobaako ekigambo kyonna ky'onkisizza ku ebyo bye yakugambye."

¹⁸ Awo Samwiri n'amutegeeza buli kimu, n'atabaako kigambo na kimu kye yamukisa. Eri n'ayogera nti, "Ye MUKAMA, akole nga bw'asiima."

¹⁹ MUKAMA n'abeera wamu ne Samwiri, n'akula. Buli kigambo kye yayogera ku nnyumba ya Eri ne kituukirira.

²⁰Isirayiri yenna okuva mu Ddaani okutuuka e Beeruseba ne bategeera nga Samwiri ateekeddwawo okuba nnabbi wa MUKAMA.

²¹MUKAMA ne yeeyongeranga okweyolekera Samwiri mu Siiro.

1 Samwiri 4

Abafirisuuti Bawamba Essanduuko ya Katonda

¹Awo ekigambo kya Samwiri ne kibuna Isirayiri yenna. Mu biro ebyo Abayisirayiri ne balumba Abafirisuuti, Abayisirayiri ne basiisira okumpi ne Ebenezeri, ate nga Abafirisuuti bo basiisidde mu Afeki.

²Abafirisuuti ne basimba ennyiriri okulumba Abayisirayiri ne bayungula eggye lyabwe okulumba; olutalo bwe lwanyiinyiitira, Abayisirayiri ne bawangulibwa, era enkumi nnya ku bo ne battibwa.

³Abalwanyi bwe baddayo mu nkambi, abakadde ba Isirayiri ne beebuuzagananya nti, “Lwaki MUKAMA alese Abafirisuuti okutuwangula leero? Tuleete essanduuko ya MUKAMA ey'endagaano okuva e Siiro, tugende nayo etuwonye amaanyi g'abalabe baffe.”

⁴Awo abantu ne batuma abasajja e Siiro, ne baggyayo essanduuko ey'endagaano ya MUKAMA Ayinzabyonna, atudde ku ntebe ye ey'obwakabaka wakati mu bakerubi. Batabani ba Eri bombi, Kofuni ne Finekaasi nabo ne bagenda n'essanduuko ya Katonda ey'endagaano.

⁵Essanduuko ya MUKAMA ey'endagaano bwe yatuuka mu nkambi ey'Abayisirayiri, bona ne baleekaanira waggulu mu ddoboozi ery'omwanguka, n'ettaka ne liyuuguuma.

⁶Awo Abafirisuuti bwe baawulira oluyoogaano ne beebuuza nti, “Oluyoogaano olwo lwonna mu nkambi ey'Abaebbulaniya lutegeeza ki?” Bwe baategeera nti essanduuko ya MUKAMA ereeeteddwa mu nkambi,

⁷Abafirisuuti ne batya. Ne boogera nti, “Lubaale azze mu nkambi. Tufudde! Tewabangawo kigambo ekifaanana bwe kityo.

⁸Zitusanze! Ani ayinza okutuwonya balubaale bano ab'amaanyi? Bano be balubaale abaabonyaabonya Abamisiri n'endwadde n'ebibonoobono ebya buli ngeri mu ddungu.

⁹Abafirisuuti, mugume omwoyo, mube basajja. Bwe kitaabe bwe kityo munaaba baddu b'Abaebbulaniya nga bo bwe babadde abaweereza bammwe. Mube basajja mulwane.”

¹⁰Abafirisuuti ne beerwanako ne bawangula Abayisirayiri. Buli Muyisirayiri n'addukira mu nsiisira ye. Ne waba okuttibwa kunene nnyo, Abayisirayiri ne bafiirwa abaserikale abaatambuzanga ebigure emitwalo esatu.

¹¹Essanduuko ya Katonda n'ewambibwa, era ne batabani ba Eri bombi, Kofuni ne Finekaasi ne battibwa.

Okufa Kwa Eri

¹²Olunaku lwe lumu ne wabaawo omusaja Omubenyamini eyava mu lutalo n'adduka okutuuka e Siiro, ng'ayuzizza engoye ze n'omutwe gwe nga gujjudde enfuufu.

¹³Bwe yatuuka, Eri yali atudde mu ntebe ye ku mabbali g'ekkubo ng'atunula, nga yeeraliikiridde olw'essanduuko ya Katonda. Omusajja bwe yatuuka mu kibuga n'asaasaanya amawulire ku ebyo ebibaddewo, ekibuga kyonna ne kikuba ebiwoobe.

¹⁴Eri bwe yawulira oluyoogaano n'abuuza nti, "Oluyoogaano luno luva ku ki?" Omusajja n'ayanguwa n'atuuka awaali Eri n'amutegeeza.

¹⁵Eri yali aweza emyaka eg'yobukulu kyenda mu munaana, amaaso ge nga gayimbadde, era nga n'okulaba takyalaba.

¹⁶Omusajja oyo n'ategeeza Eri nti, "Naakava mu lutalo, era nziruseeyo leero." Eri n'amubuuza nti, "Bigenze bitya mwana wange?"

¹⁷Omusajja eyaleeta amawulire n'amuddamu nti, "Isirayiri edduse Abafirisuuti, era eggye lyaffe lifiiriddwa abalwanyi bangi. Ate ne batabani bo bombi Kofuni ne Finekaasi battiddwa, era n'essanduuko ya Katonda ewambiddwa."

¹⁸Olwayogera ku ssanduuko ya Katonda, Eri n'asirituka okuva ku ntebe ye n'agwa okumpi n'omulyango. Ensingo ye n'emenyeka n'afiirawo kubanga yali musajja mukadde nnyo ate nga n'obuzito muzito. Yali akulembedde Isirayiri okumala emyaka amakumi ana.

¹⁹Mu kiseera ekyo muka mwana we, Finekaasi, yali lubuto era ng'anaatera okuzaala. Bwe yawulira amawulire nti Essanduuko ya Katonda ewambiddwa era nti ne ssezaala we ne bba bafudde, n'alumwa era n'azaalirawo, kubanga obulomi bwamuyitirirako.

²⁰Omukazi oyo bwe yali ng'anaatera okufa, abamuzaalisa ne bamugamba nga boogera nti, "Totya, kubanga ozadde mulenzi." Naye n'atabaanukula wadde okubassaako omwoyo.

²¹N'atuumma omwana erinnya Ikabodi, amakulu gaalyo nti, "Ekitiibwa kivudde ku Isirayiri," kubanga essanduuko ya Katonda yali ewambiddwa ate nga ssezaala we ne bba bafudde.

²²N'ayogera nti, "Ekitiibwa kivudde ku Isirayiri kubanga essanduuko ya Katonda ewambiddwa."

1 Samwiri 5

Abafirisuuti n'Essanduuko ya MUKAMA mu Asudodi ne Ekuloni

- ¹ Awo Abafirisuuti bwe bawamba essanduuko ya Katonda, ne bagiggya Ebenezeri ne bagitwala mu Asudodi;
- ² ne bagisitula ne bagiteeka mu ssabo lya Dagoni, okuliraana Dagoni.
- ³ Awo abantu ba Asudodi bwe baagolokoka enkeera, baasanga Dagoni agudde mu maaso g'essanduuko ya MUKAMA. Ne basitula Dagoni ne bamuzzaawo.
- ⁴ Era ne bwe baagolokoka enkeera ku lunaku olwaddirira, baasanga Dagoni agudde mu maaso g'essanduuko ya MUKAMA, ng'omutwe gwe n'emikono gye bikutuseeko nga bigudde mu mulyango, ng'ekiwuduwudu kye, kye kisigaddewo.
- ⁵ Bakabona ba Dagoni n'abo bona abayingira mu ssabo lya Dagoni kyebava balema okulinnya ku mulyango gw'essabo lye, ne leero.
- ⁶ Omukono gwa MUKAMA ne gubonereza abantu b'e Asudodi n'emiriraano, n'abaleetako entiisa era ne bakwatibwa ebizimba.
- ⁷ Awo abantu b'e Asudodi bwe baalaba ebyabatuukako ne boogera nti, "Essanduuko ya Katonda wa Isirayiri teteekwa kusigala wano naffe, kubanga omukono gwe gutuliko era guli ne ku lubaale waffe Dagoni."
- ⁸ Ne bakuŋjaanya abakungu bona ab'Abafirisuuti ne bababuuza nti, "Tunaakola tutya essanduuko ya Katonda wa Isirayiri?" Ne baddamu nti, "Essanduuko ya Katonda wa Isirayiri etwalibwe e Gaasi." Awo ne batwala eyo essanduuko ya Katonda wa Isirayiri.
- ⁹ Naye bwe baagitusa eyo, omukono gwa MUKAMA ne gulwana n'ekibuga ekyo, ne waba okutya kungi nnyo nnyini mu batuuze b'ekibuga ekyo. Abakulu n'abato n'abaleetako ebizimba ku bitundu byabwe eby'ekyama.
- ¹⁰ Kyebaava baweereza essanduuko ya Katonda mu Ekuloni. Nayé essanduuko ya Katonda bwe yali ng'eneetera okutuuka mu Ekuloni, Abaekuloni ne bakaaba nga boogera nti, "Batuleetedde essanduuko ya Katonda wa Isirayiri, okututta n'abantu baffe."
- ¹¹ Awo ne bakuŋjaanya abakungu bona ab'Abafirisuuti, ne babagamba nti, "Muzzeeyo essanduuko ya Katonda wa Isirayiri mu kifo kyayo, ereme kututta ffe n'abantu baffe." Omukono gwa Katonda gwali gubazitooweredde nnyo era nga bajjudde entiisa ey'okufa.
- ¹² Abo abataafa baalwala ebizimba, okukaaba mu kibuga ne kutuuka mu ggulu.

1 Samwiri 6

Essanduuko Ezzibwayo mu Isirayiri

- ¹ Awo essanduuko ya MUKAMA bwe yali yakamala emyezi musanvu mu nsi y'Abafirisuuti,

²Abafirisuuti ne batumya bakabona n'abafumu, ne bababuuza nti, "Tukolere ki essanduuko ya MUKAMA? Mututegeeeze bwe tuba tugizzaayo mu kifo kyayo."

³ Ne baddamu nti, "Bwe muba muzzaayo essanduuko ya Katonda wa Isirayiri, temugiweereza awatali kirabo, naye mufuba okumuweereza ekiweebwayo olw'omusango. Olwo nno lwe munaawona, era munaabikulirwa MUKAMA kyeyavudde abalonereza."

⁴ Abafirisuuti ne babuuza nti, "Kiki kye tunamuweereza okuba ekiweebwayo olw'omusango?" Ne babaddamu nti, "Ebibumbe eby'ebizimba ebya zaabu bitaano n'ebibumbe eby'emmese eza zaabu bitaano, ng'omuwendo gwa bakulembeze b'Abafirisuuti bwe gul. "Mwabonerezebwa mu ngeri y'emu ng'abakulembeze bammwe n'ensi yammwe.

⁵ Noolwekyo mukole ebibumbe eby'ebizimba n'eby'emmese ebireetedde ensi okusaanawo, muwe Katonda wa Isirayiri ekitiibwa; oboolyawo anaabasonyiwa, ne balubaale bammwe n'ensi yammwe.

⁶Lwaki mukakanyaza emitima gyammwe ng'Abamisiri ne Falaawo bwe baakola? Bwe yabamala amaanyi, tebakkiriza Bayisirayiri kugenda era ne bagenda?

⁷ "Kale nno, muteeketeke ekigaali ekipya, n'ente bbiri ezaakazaala, ezitateekewangako kikoligo, muzisibe ku kigaali, naye ennyana zaazo muziziggyeeko.

⁸Muddire essanduuko ya MUKAMA mugiteeke ku kigaali, ate muddire n'ekisanduuko mwe munaateeka ebintu ebya zaabu olw'ekiweebwayo olw'ekibi, mukiteeke ku mabbali g'essanduuko ya MUKAMA. Mugisindike, egende yokka.

⁹Naye mugitunuulire; bw'eneekwata ekkubo erigenda ewaabayo mu nsi yaayo, e Besusemesi, olwo nga MUKAMA ye yatuleeseko ekibonoobono kino ekinene. Naye bwe kitaabe bwe kityo, olwo tunaategeera ng'omukono gwe si gwe gutubaddeko, kyatutuukako butuusi."

¹⁰Ne bakola bwe batyo. Ne baddirra ente bbiri ezaakazaala, ne baziggyako ennyana zaazo ne bazisiba ku kigaali.

¹¹Ne bateeka essanduuko ya MUKAMA ku kigaali n'ekisanduuko ekyalimu emmese eza zaabu n'ebibumbe eby'ebizimba okugiriraana.

¹²Ente ne zigenda butereevu mu kkubo erigenda e Besusemesi, nga zigenda zikaaba, ne zitakyama ku mukono ogwa ddyo newaakubadde ogwa kkono. Abakulembeze b'Abafirisuuti ne bazigoberera okutuukira ddala ku nsalo ey'e Besusemesi.

¹³Ebiro ebyo byali bya makungula era Ababesusemesi baali bakungula enjjaano yaabwe mu kiwonvu. Bwe balengera essanduuko ne basanyuka okugiraba.

¹⁴Ekigaali ne kituukira mu nnimiro ya Yoswa ow'e Besusemesi ne kiyimirira omwo okumpi n'awali ejinja eddene. Abantu ne bayasa embaawo ez'ekigaali, ente ne baziwaayo ng'ekiweebwayo ekyokebwa eri MUKAMA.

¹⁵Abaleevi ne batwala essanduuko ya MUKAMA, n'ekisanduuko ekyalimu ebibumbe eby zaabu, ne babiteeka ku jjinja eddene. Awo ku lunaku olwo abantu b'e Besusemesi ne bawaayo ebiweebwayo ebyokebwa ne ssaddaaka eri MUKAMA.

¹⁶Abakulembeze abataano ab'Abafirisuuti olwalaba ebyo, ne baddayo mu Ekuloni ku lunaku olwo.

¹⁷Ebibumbe eby'ebizimba eby zaabu Abafirisuuti bye baaweereza ng'ekiweebwayo olw'omusango eri MUKAMA byali: ekimu kya Asudodi, n'ekirala kya Gaza, n'ekirala kya Asukulooni, n'ekirala kya Gaasi, n'ekirala kya Ekuloni;

¹⁸era n'ebibumbe eby'emmese eza zaabu bwe byali, ng'ebibuga byonna eby'Abafirisuuti ebyali eby'Abakungu abataano, ate nga bibuga ebiriko enkomera n'ebyalo byabyo. Ejinja eddene kwe baateeka essanduuko ya MUKAMA mu nnimiro ya Yoswa ow'e Besusemesi, ne libeera kijjukizo n'okutuusa leero.

¹⁹Naye nsanvu ku basajja ab'e Besusemesi ne bafa kubanga balingiza mu ssanduuko ya MUKAMA. Abantu ne banakuwala nnyo olw'ekibonerez okinene MUKAMA kye yabawa,

²⁰era abantu b'e Besusemesi ne beebuuza nti, "Ani ayinza okuyimirira mu maaso ga MUKAMA, Katonda ono omutukuvu? Essanduuko ya MUKAMA tugiweereze ani?"

²¹Ne batuma ababaka eri abatuuze b'e Kiriyasuyalimu n'obubaka nti, "Abafirisuuti bakomezzaawo essanduuko ya MUKAMA. Muserengete, mujje mugiddukire mugitwale ewammwe."

1 Samwiri 7

¹Awo abantu b'e Kiriyasuyalimu ne bajja ne baddukira essanduuko ya MUKAMA, ne bagitwala mu nnyumba ya Abinadaabu ku lusozi. Ne bayawula Eriyazaali mutabani we okuvunaanyizibwa essanduuko ya MUKAMA.

Abafirisuuti Bawangulwa e Mizupa

²Essanduuko n'emala mu Kiriyasuyalimu ebbanga ddene, eryawerera ddala emyaka amakumi abiri, era abantu b'enyyumba ya Isirayiri bona baali banakuwawu era nga banoonya MUKAMA.

³Awo Samwiri n'agamba ennyumba ya Isirayiri yonna nti, "Obanga mudda eri MUKAMA n'omutima gumu, muggyeewo bakatonda abagwira ne Baasutoleesi, mmweweeyo eri MUKAMA gwe muba muweerezanga yekka, era anaabalokola okuva mu mukono gw'Abafirisuuti."

⁴Awo Abayisirayiri ne bava ku Babaali ne Baasutoleesi, ne baweerezanga MUKAMA yekka.

⁵ Samwiri n'ayogera nti, "Mukuñjaanye Isirayiri yenna e Mizupa, mbegayiririre eri MUKAMA."

⁶Bwe baali bakuñjaanidde e Mizupa, ne basena amazzi, ne bagayirira mu maaso ga MUKAMA, ne basiiba era ne baatula ebibi byabwe nga bogera nti, "Twonoonye eri MUKAMA." Olwo Samwiri nga ye mukulembeze era omulamuzi wa Isirayiri e Mizupa.

⁷ Awo Abafirisuuti bwe baawulira nga Abayisirayiri bakuñjaanidde e Mizupa, abafuzi b'Abafirisuuti ne babalumba. Abayisirayiri bwe baakiwulira ne batya Abafirisuuti.

⁸Ne bagamba Samwiri nti, "Tolekeraawo kutukaabiririra eri MUKAMA Katonda waffe, atulokole okuva mu mukono gw'Abafirisuuti."

⁹Awo Samwiri n'addira omwana gw'endiga oguyonka n'aguwaayo ng'ekiweebwayo ekyokebwa eri MUKAMA, n'akaabirira MUKAMA ku lwa Isirayiri, MUKAMA n'amuddamu.

¹⁰ Ku lunaku olwo Samwiri bwe yali ng'awaayo ekiweebwayo ekyokebwa eri MUKAMA, Abafirisuuti ne basembera okulwanyisa Isirayiri, naye MUKAMA n'abwatuka okubwatuka okw'amaanyi, Abafirisuuti ne batya nnyo, era ne badduka Abayisirayiri.

¹¹Abasajja Abayisirayiri ne bava e Mizupa ne bagoba Abafirisuuti, ne bagenda nga babatta okutuukira ddala ku Besukali.

¹² Awo Samwiri n'addira ejinja n'aliteeka wakati wa Mizupa ne Seni, ekifo ekyo n'akituma Ebenezeri, ng'agamba nti, "MUKAMA atuyambye okutuusa kaakano."

¹³Abafirisuuti ne bawangulwa, ne bataddayo nate kulumba Isirayiri. Era ennaku zonna eza Samwiri, omukono gwa MUKAMA ne gunyigiriza Abafirisuuti.

¹⁴Abayisirayiri ne beddiza ebibuga byonna Abafirisuuti bye baali babawambyeko okuva mu Ekulooni okutuuka e Gaasi, ate era Isirayiri n'anunula ebitundu ebyali biriraanyeewo okuva mu buyinza bw'Abafirisuuti. Ne waba okutabagana wakati wa Isirayiri n'Abamoli.

¹⁵ Samwiri n'alamula era n'afuga Isirayiri ennaku zonna ez'obulamu bwe.

¹⁶Buli mwaka n'agendanga e Beseri, n'e Girugaali n'e Mizupa mu mpalo ng'alamula Isirayiri mu bifo ebyo byonna.

¹⁷N'oluvannyuma yakomangawo e Laama, amaka ge gye gaabeeranga, nayo n'alamulirayo Isirayiri. N'azimbirayo MUKAMA ekyoto.

1 Samwiri 8

Abayisirayiri Basaba Kabaka

¹Samwiri bwe yakaddiwa, n'alonda batabani be okuba abalamuzi ba Isirayiri.

²Erinnya lya mutabani we omukulu ye yali Yoweeri, n'owokubiri nga ye Abiya, ne balamulanga mu Beeruseba.

³Naye batabani be ne batagoberera mpisa ze, ne bakyama ne banoonya amagoba, ne balya enguzi, era nga tebalamula mu bwenkanya.

⁴Awo abakadde bona aba Isirayiri ne bakuŋjaana ne bajja eri Samwiri e Laama,

⁵ne bamugamba nti, "Laba, okaddiye ne batabani bo tebagoberera mpisa zo, kaakano tulondere kabaka anaatukulemberanga, tubeere ng'amawanga amalala gonna."

⁶Naye bwe baayogera nti, "Tuwe kabaka anaatukulemberanga," ne kitasanyusa Samwiri. Samwiri n'asaba eri MUKAMA.

⁷Awo MUKAMA n'agamba Samwiri nti, "Wuliriza ebigambo byonna abantu bye bakugamba. Tebajeemedde ggwe, naye bajeemedde nze nneme kuba kabaka waabwe.

⁸Okusinziira ku bikolwa byabwe okuva ku lunaku lwe nabaggya mu Misiri okutuusa ku lunaku lwa leero, bwe banjeemera, ne baweereza bakatonda abalala, nawe bwe batyo bwe bakuyisa.

⁹Kaakano bawulirize, naye obalabulire ddala, era obategeeze ebintu byonna kabaka anaabafuga by'alibakola."

¹⁰Awo Samwiri n'ategeeza abantu abaali bamusaba kabaka, ebigambo byonna MUKAMA bye yamugamba.

¹¹N'abagamba nti, "Bino bye bintu kabaka alibafuga by'alibakola: alitwala batabani bammwe n'abafuula abagoba ab'amagaali ge n'abeebagazi ab'embalaasi ze, n'abamu okuddukiranga mu maaso ag'amagaali ge.

¹²Abamu ku bo alibafuula abaduumizi b'enkumi, n'abalala n'abafuula abaduumizi b'ataano, n'abalala okumulimiranga ennimiro ze n'okuzikungulanga, n'abalala okuweesanga ebyokulwanyisa n'ebintu eby'amagaali ge.

¹³Alitwala bawala bammwe, okumuteekerateekera ebyakaloosa, n'okumufumbiranga, n'okumukoleranga emigaati.

¹⁴Alitwala ennimiro zammwe ennungi, n'ennimiro zammwe ez'emizabbibu n'ez'emizeeyituuni, n'aziwa abaweereza be.

¹⁵Alitwala ekimu eky'ekkumi eky'emmere yammwe ey'empeke, n'eky'ennimiro zammwe ez'emizabbibu, n'akigabira abakungu be n'abaweereza be.

¹⁶Alitwala abaweereza bammwe abasajja n'abaweereza bammwe abakazi, n'abavubuka bammwe abasinga obulungi n'endogoyi, n'abyeddiza.

¹⁷Alitwala ekimu eky'ekkumi ku bisibo byammwe, mmwe n'abafuula abaweereza be.

¹⁸Luliba lumu, mulyekkokkola kabaka wammwe gwe mwerondera, naye MUKAMA talibafaako ku lunaku olwo."

¹⁹Naye abantu ne bagaana okuwuliriza Samwiri, ne bogera nti, "Nedda! Twagala kabaka okutufuga,

²⁰naffe tubeere ng'amawanga amalala gonna, nga tulina kabaka atufuga ayinza okutukulembra n'atulwanira entalo zaffe."

²¹Awo Samwiri bwe yawulira ebigambo byonna eby'abantu, n'abiddiramu MUKAMA.

²²MUKAMA n'addamu Samwiri nti, "Bawulirize obalondere kabaka." Awo Samwiri n'agamba abantu ba Isirayiri nti, "Buli omu ku mmwe addeyo ewuwe."

1 Samwiri 9

Samwiri Afuka ku Sawulo Amafuta

¹Waaliwo omusajja Omubenyamini eyali omututumufu erinnya lye Kiisi, mutabani wa Abiyeeri, mutabani wa Zeroli, mutabani wa Bekolaasi, mutabani wa Afiya, Omubenyamini.

²Yalina mutabani we erinnya lye Sawulo, nga mulenzi alabika bulungi, era nga tewali amwenkana obulungi mu bantu ba Isirayiri, nga muwanvu okusinga abantu bona.

³Endogoyi za Kiisi, kitaawe wa Sawulo zaali zibuze. Kiisi n'agamba mutabani we Sawulo nti, "Twala omu ku baweereza, mugende munooonye endogoyi."

⁴Ne bayitira mu nsi ey'ensozi eya Efulayimu ne mu nsi ya Salisa, naye ne bataziraba. Ne bayita ne mu nsi ya Saalimu naye ne bataziraba. Ne bayita ne mu nsi ye Benyamini, naye ne zibabula.

⁵ Awo bwe baatuuka mu nsi ya Zufu, Sawulo n'agamba omuweereza eyali naye nti, "Jjangu tuddeyo, sikuba nga kitange ava ku b'endogoyi, n'atandika okweraliikirira ffe."

⁶ Naye omuweereza n'amuddamu nti, "Laba, mu kibuga muno mulimu omusajja wa Katonda, era assibwamu nnyo ekitiibwa, na buli ky'ayogera kituukirira. Tugendeyo, oboolyawo anaayinza okututegeeza ekkubo lye tuba tukwata."

⁷ Sawulo n'agamba omuweereza we nti, "Naye bwe tugendayo, omusajja tunaamutwalira ki? Emmere eweddemu mu nsawo zaffe, ate tewali na kirabo kya kutwalira musajja wa Katonda. Tulinawo ki?"

⁸ Omuweereza n'addamu Sawulo nti, "Laba, wano nninawo gulaamu ssatu eza ffeeza, era ze nzija okuwa omusajja wa Katonda atutegheeze ekkubo lye tuba tukwata."

⁹ (Edda mu Isirayiri, omuntu bwe yagendanga okwebuuza ku Katonda, yayogeranga nti, "Jjangu tugende ew'omulabi;" kubanga ayitibwa nnabbi mu nnaku zino, edda ye yayitbwanga omulabi).

¹⁰ Sawulo n'amuddamu nti, "Oteesessa bulungi, jjangu tugende." Ne basitula okugenda mu kibuga omusajja wa Katonda gye yali.

¹¹ Awo bwe baali nga balinnyalinya akasozi okugenda mu kibuga ne basisinkana abawala abaali bagenda okusena amazzi, ne bababuuza nti, "Omulabi gy'ali?"

¹² Ne babaddamu nti, "Gy'ali. Ali mu maaso awo. Mwanguweeko, yaakatuuka kati mu kibuga, kubanga leero abantu balina ssaddaaka ey'okuweerayo mu kifo ekigulumivu.

¹³ Bwe munaaba nga mwakayingira mu kibuga, mujja kumusisinkana nga tannayambuka kuliira mu kifo ekigulumivu. Abantu tebaja kulya nga tannatuuka, kubanga alina okusabira ssaddaaka omukisa n'olvannyuma abayitiddwa balyoke balye. Kaakano mwanguwe mugende, mujja kumusisinkana."

¹⁴ Awo ne bayambuka okugenda mu kibuga. Bwe baali bakiyingira ne balaba Samwiri ng'ajja gye bali, ng'ayolekedde ekifo ekigulumivu.

¹⁵ Kyokka bwe waali wakyabulayo olunaku lumu Sawulo ajje, MUKAMA yali abikkulidde Samwiri ekigambo ng'agamba nti,

¹⁶ "Enkya ku ssaawa nga zino nzija kukusindikira omusajja okuva mu nsi ya Benyamini. Mufukeeko amafuta okuba omukulembeze w'abantu bange, Isirayiri; oyo y'alirokola abantu bange okuva mu mukono gw'Abafirisuuti. Ntunuulidde abantu bange; okukaaba kwabwe kutuuse gye ndi."

¹⁷ Awo Samwiri olwalengera Sawulo, MUKAMA n'amugamba nti, "Omusajja gwe nakutegeezzaako wuuyo. Oyo y'ajja okufuga abantu bange."

¹⁸ Sawulo n'asemberera Samwiri mu mulyango, n'amubuuza nti, "Ssebo oyinza okundagirira ennyumba y'omulabi w'eri?"

¹⁹ Samwiri n'amuddamu nti, "Nze mulabi, nkulemberaamu nga twambuka mu kifo ekigulumivu, kubanga leero onooliira wamu nange, enkya ku makya nzija kukuleka ogende era nzija kukubuulira ebyo byonna ebiri ku mutima gwo.

²⁰ Naye ebifa ku ndogoyi zo ezimaze ennaku essatu nga zibuze, tobyeraliikirira, kubanga zaazuuliddwa. Okwegomba kwa Isirayiri yonna kunaaba kw'ani, bwe kutaabe ku ggwe n'ennyumba ya kitaawo yonna?"

²¹ Sawulo n'addamu nti, "Nze ndi Mubenyamini, era nva mu kika ekisingirayo ddala obutono, ate nga n'ennyumba yaffe y'esingira ddala okuba eya wansi mu nnyumba zonna ez'ekika kya Benyamini. Lwaki oyogera nange ebigambo ebifaanana ng'ebyo?"

²² Awo Samwiri n'atwala Sawulo n'omuweereza we mu kisenge ekinene, n'abatuua mu bifo eby'oku mwanjo mu maaso g'abo bonaabaayitibwa abaali bawera ng'amakumi asatu.

²³ Samwiri n'agamba omufumbi nti, "Leeta ekifi ky'ennyama, kye nakuteresezza, kye nakugambye oteeke wabbali."

²⁴ Awo omufumbi n'addirira ekisambi, n'ebiyakiriko n'akiteeka mu maaso ga Sawulo. Samwiri n'ayogera nti, "Laba kino kye kyakuterekeddwa. Kirye kubanga kyakuterekeddwa okutuusa ekiseera kino olw'omukolo guno, okuva ku kiseera kiri, bwe nagamba nti, 'Nnina abagenyi abayite.' " Awo Sawulo n'aliira wamu ne Samwiri ku lunaku olwo.

²⁵ Bwe baava mu kifo ekigulumivu ne baserengeta mu kibuga, Samwiri n'atwala Sawulo waggulu ku nnyumba ye ne banyumyamu.

²⁶ Awo enkeera Samwiri n'agolokoka mu makya n'akoowoola Sawulo nti, "Golokoka nkusibule odde ku lugendo lwo." Sawulo ne yeteekateeka, ye ne Samwiri ne baserengeta okugenda mu kibuga.

²⁷ Bwe baali baserengeta nga banaatera okutuuka ekibuga we kikoma, Samwiri n'agamba Sawulo nti, "Gamba omuweereza wo ayitewo, atukulemberemu, gwe osigaleko wano, nkutegeezze obubaka obuva eri Katonda."

1 Samwiri 10

¹ Awo Samwiri n'addirira eccupa ey'amatuta n'agifuka ku mutwe gwa Sawulo, n'amunywegera ng'agamba nti, "MUKAMA akufuseeko amafuta okufuga abantu be, Isirayiri.

²Bw'onoova wano leero, onosisinkana abasajja babiri okumpi n'amalaalo ga Laakeeri, e Zereza ku nsalo ya Benyamini, banaakugamba nti, 'Endogoyi ze wagenda okunoonya zaalabise. Kitaawo kaakano takyalowooza ku ndogoyi, naye, yeeraliikirira ggwe, nga yeebuuza nti, "Ebya mutabani wange mbikole ntya?"'

³"Bw'onoova awo, ne weeyongerayo okutuuka ku mwera gwa Taboli, onosisinkana abasajja basatu abanaaba bagenda okusisinkana Katonda e Beseri, omu nga yeetisse obubuzi busatu, omulala nga yeetisse emigaati esatu, n'omulala ng'asitudde eccupa y'envinnyo.

⁴Banaakulamusa ne bakuwa emigaati ebiri, era gikkirize.

⁵"Bw'onoova eyo ogenda ku Lusozi lwa Katonda oluliko ekigo eky'Abafirisuuti. Bw'onooba onootera okutuuka ku kibuga, onosisinkana ekibiina kya bannabbi nga baserengeta okuva mu kifo ekigulumivu nga bakuleembeddwamu abakuba entongooli, n'ebitaasa, n'endere, n'ennanga, era nga bawa obunnabbi.

⁶Omwoyo wa MUKAMA anakukkako mu maanyi, n'owa obunnabbi wamu nabo, era onookyusibwa n'ofuuka omuntu omuggya.

⁷Obubonero obwo bwe bunaatuukirira, kola kyonna ky'onoolaba nga kituufu, kubanga Katonda ali wamu naawe.

⁸"Serengeta onsookeyo e Girugaali. Nnaakugo berera ne nzija gy'oli okuwaayo ssaddaaka ez'ebiweebwayo ebyokebwa n'ebiweebwayo olw'emirembe, naye otekwa okunnindako okumala ennaku musanvu okutuusa lwe ndijja gy'oli ne nkutegeeza eky'okukola."

Sawulo Afuulibwa Kabaka

⁹Awo Sawulo bwe yava eri Samwiri, Katonda n'amuwa omutima omuggya, n'obubonero obwo bwonna ne butuukirira ku lunaku olwo.

¹⁰Bwe baatuuka ku lusozi ekibiina kya bannabbi ne kimusisinkana, Omwoyo wa Katonda n'amukkako mu maanyi era n'atandika okuwa obunnabbi wamu nabo.

¹¹Abaali baamumanya okuva edda n'edda bwe baamulaba ng'awa obunnabbi wamu ne bannabbi, ne bagambagana nti, "Kiki kino ekituuse ku mutabani wa Kiisi? Sawulo naye ali omu ku bannabbi?"

¹²Om uku batuuze b'ekitundu ekyo n'abuuza nti, "Ye kitaabwe y'ani?" Kyerwava lufuuka olugero nti, "Ne Sawulo ali omu ku bannabbi?"

¹³Awo Sawulo bwe yamala okuwa obunnabbi, n'ayambuka mu kifo ekigulumivu.

¹⁴Awo kojja wa Sawulo n'ababuuza ye n'omuweereza nti, "Mubadde wa?" N'addamu nti, "Tubadde tunoonya endogoyi, naye bwe tutaaazirabye, ne tugenda eri Samwiri."

¹⁵Kojja wa Sawulo n'amugamba nti, "Mbuulira Samwiri kye yakugambye."

¹⁶Sawulo n'addamu nti, "Yatutegeeza nti endogoyi zaali zirabise." Naye n'atamubuulira Samwiri bye yamugamba ku by'obwakabaka.

¹⁷Samwiri n'ayita abantu ba Isirayiri bakunjaanire eri MUKAMA e Mizupa.

¹⁸N'abagamba nti, "Bw'ati bw'ayogera MUKAMA, Katonda wa Isirayiri nti, 'Naggya Isirayiri mu Misiri, ne mbalokola okuva mu mukono gw'Abamisiri, ne mu mukono gw'obwakabaka bwonna obwabajooganga.

¹⁹Naye kaakano mujeemedde Katonda wammwe eyabalokola okuva mu buyinike bwammwe n'ennaku yammwe, ne mwogera nti, Nedda, tuteerewo kabaka atufuge.' Kale mwelianjule mu maaso ga MUKAMA mu bika byammwe ne nnyiriri zammwe nga bwe biri."

²⁰Awo Samwiri bwe yasembeza ebika byonna ebya Isirayiri okumpi ne we yali, ekika kya Benyamini ne kirondebwa na kalulu.

²¹N'asembeza ekika kya Benyamini, lunyiriri ku lunyiriri, era olunyiriri lwa Materi ne lulondebwa. N'olvannyuma Sawulo mutabani wa Kiisi n'alondebwa, naye bwe baamunoonya, nga talabika.

²²Ne beeyongera okwebuuza ku MUKAMA nti, "Omusajja w'ali wano, atuuse?" Awo MUKAMA n'abaddamu nti, "Ye, yeekwese mu bitereke."

²³Ne badduka ne bagenda ne bamuleeta. Bwe yayimirira mu bantu, n'aba ng'asinga abantu bona obuwanyu.

²⁴Samwiri n'agamba abantu bona nti, "Mulaba omusajja MUKAMA gw'alonze? Tewali amwenkana mu bantu bona." Abantu ne baddamu n'eddoboozi eddene nti, "Wangaala Kabaka."

²⁵Samwiri n'annyonnyola abantu ebiragiro n'obulombolombo eby'obwakabaka, n'abiwandiika mu kitabo n'akiteeka mu maaso ga MUKAMA. Awo Samwiri n'asiibula abantu bona, buli omu n'addayo ewuwe.

²⁶Sawulo naye n'addayo ewaabwe mu Gibe, ng'awerekerwako abasajja abazira Katonda be yali akomyeko ku mitima.

²⁷Naye abamu ku basajja ab'effujjo ne boogera nti, "Omusajja ono ayinza atya okutulokola?" Ne bamunyooma, era ne batamuwa na birabo. Naye Sawulo n'akisirikira n'atabanyega.

1 Samwiri 11

Sawulo Anunula Ekibuga Yabesi

¹ Awo olwatuuka Nakkasi Omwamoni n'ayambuka n'azingiza Yabesugireyaadi. Abasajja bona ab'e Yabesi ne bamugamba nti, "Kola naffe endagaano, tunaakuweerezanga."

² Naye Nakkasi Omwamoni n'abaddamu nti, "Sijja kukola nammwe ndagaano okuggyako nga munzikirizza okuggyga mu buli muntu, eriiso lye erya ddyo, olwo nswaze Isirayiri yenna."

³ Abakulu ba Yabesi ne bamugamba nti, "Tuwueyo ebbanga lya nnaku musanvu, tusindike ababaka mu nsi yonna eya Isirayiri. Bwe wataabeewo n'omu anajja okutubeera, kale tuneewaayo gy'oli."

⁴ Ababaka bwe baatuuka e Gibea ewa Sawulo, ne bategeeza abantu ebigrando ebyo; bwe baabiwulira bona ne bakuba ebiwoobe.

⁵ Mu kiseera ekkyo Sawulo yali ava mu nnimiro ng'agoberera ente ze ezirima, n'abuuza nti, "Abantu babadde ki? Kiki ekibakaabya?" Ne bamutegeeza obubaka abasajja ab'e Yabesi bwe baali baleese.

⁶ Awo Sawulo bwe yawulira ebigrando ebyo, Omwoyo wa Katonda n'amukkako mu maanyi, obusungu bwe ne bubuubuuka nnyo.

⁷ N'addirra ente bbiri, n'azitemaatema, n'aziwa ababaka ne bazitwala okubuna ensi yonna eya Isirayiri ng'agamba nti, "Buli ataagoberere Sawulo ne Samwiri, ente ze ezirima bwe zityo bwe zinaakolebwa." Entiisa ya MUKAMA n'egwa ku bantu, ne bakuinjaana wamu n'omutima gumu.

⁸ Sawulo n'ababalira e Bezeki, abasajja abaava mu Isirayiri nga bawera emitwalo amakumi asatu, n'abaava mu Yuda ne bawera emitwalo esatu.

⁹ Ne bagamba ababaka abaali bazze nti, "Mutegeeze abasajja ab'e Yabesugireyaadi nti, 'Obudde we bunaatuukira mu ssaawa ez'omu ttuntu, munaaba mulokolebbwa.'" Ababaka bwe bazzaayo obubaka obwo e Yabesi, abatuuze baayo ne bassa ekikkowe.

¹⁰ Abatuuze ab'e Yabesi ne bagamba Abamoni nti, "Enkyta tujja kwewaayo gye muli, mutukole kye mwagala."

¹¹ Enkeera Sawulo yakeera mu matulutulu n'ayawulamu abasajja be ebibinja bisatu; ne balumba olusiisira lw'Abamoni ne babatta okutuusa mu ssaawa ez'omu ttuntu. Abaaluwona ne basaasaana, ne wataba n'omu asigala na munne.

Sawulo Akakasibwa Okuba Kabaka

¹² Awo abantu ne bagamba Samwiri nti, "Ani eyali abuuza nti, 'Sawulo alitufuga?' Mubatuwe tubatte."

¹³ Naye Sawulo n'addamu nti, "Nedda, tewali muntu anattibwa leero, kubanga olwa leero MUKAMA alokodde Isirayiri."

¹⁴Awo Samwiri n'agamba abantu nti, "Mujje, tugende e Girugaali tukakase obwakabaka."

¹⁵Awo abantu bona ne bagenda e Girugaali mu maaso ga MUKAMA ne bakakasa Sawulo okuba kabaka. Era mu kifo ekkyo ne baweerayo ssaddaaka ez'ebiweebwayo olw'emirembe mu maaso ga MUKAMA, Sawulo n'Abayisirayiri bona ne basanyuka ne bajaguza nnyo ne bakola n'entujjo ey'amaanyi.

1 Samwiri 12

Ebigambo bya Samwiri ng'Asiibula

¹ Samwiri n'ayogera eri Isirayiri yenna, ng'agamba nti, "Mpulirizza buli kintu kye munjambye, ne mbateerawo kabaka okubafuga.

²Kaakano mulina kabaka ng'omukulembeze wammwe. Naye nze nkaddiye, mmeze n'envi, era n'abaana bange bali wano nammwe. Mbadde mukulembeze wammwe okuva mu buvubuka bwange n'okutuusa leero.

³Nzuuno mu maaso gammwe. Munnumirize ensonga yonna mu maaso ga MUKAMA ne mu maaso g'oyo gwe yafukako amafuta. Ani gwe nnali ntwalidde ente ye? Oba ani gwe nnali ntwalidde endogoyi ye? Oba ani gwe nnali ndyazaamaanyizza? Oba ani gwe nnali njooze? Oba ani gwe nnali nsabye enguzi? Bwe wabaawo anvunaana mu nsongha yonna nzija kumuliyira."

⁴Ne baddamu nti, "Totunyagangako newaakubadde okutujooga, wadde okulya enguzi okuva mu mukono gw'omuntu yenna."

⁵ Awo Samwiri n'abaddamu nti, "MUKAMA ye mujulirwa gye muli, era n'oyo gwe yafukako amafuta mujulirwa leero, nga sirina nsobi yonna mu maaso gammwe." Ne baddamu nti, "Mujulirwa."

⁶ Samwiri n'agamba abantu nti, "MUKAMA ye yalonda Musa ne Alooni era n'aggya bajjajammwe mu Misiri.

⁷Kale nno, musseeyo omwoyo mutege amatu mu maaso ga MUKAMA, eri okubalamula era n'okubajjukiza ebikolwa eby'obutuukirivu MUKAMA bye yabakolera mmwe ne bajjajammwe.

⁸ "Yakobo bwe yabeera mu Misiri, bajjajammwe ne bakaabirira MUKAMA; MUKAMA yatuma Musa ne Alooni, abaabaggya mu Misiri, n'abateeka mu kifo kino.

⁹ "Naye ne beerabira MUKAMA Katonda waabwe, kyeyava abatunda mu mukono gwa Sisera omuduumizi w'eggye lya Kazoli, ne mu mukono gw'Abafirisuuti, ne mu mukono gwa kabaka wa Mowaabu, abaabalwanyisanga.

¹⁰Abayisirayiri ne bakaabirira MUKAMA, nga boogera nti, ‘Twasobya, twava ku MUKAMA ne tuweereza Babaali ne Baasutoleesi. Naye kaakano tulokole okuva mu mukono gw’abalabe baffe, tunaakuweerezanga.’

¹¹MUKAMA n’alyoka atuma Yerubbaali, ne Bedani, ne Yefusa ne Samwiri ne babalokola mu mukono gw’abalabe bammwe enjuuyi zonna, ne mutuula mirembe.

¹²Naye bwe mwalaba Nakkasi kabaka w’Abamoni ng’abalumba, newaakubadde nga MUKAMA Katonda wammwe ye yali kabaka wammwe ne munjamba nti, ‘Nedda, ffe twagala kabaka okutufuga.’

¹³Kaakano kabaka gwe mulonze era gwe mwasaba wuuno, era laba MUKAMA ataddewo kabaka okubafuga.

¹⁴Bwe munaatyanga MUKAMA ne mumuweerezanga, ne mugonderanga eddoboozi lye, ne mutajeemera biragiro bye, mmwe ne kabaka abafuga ne mugobereranga MUKAMA Katonda wammwe, kinaabanga kirungi.

¹⁵Naye bwe mutaagonderenga MUKAMA, ne mujeemera ebiragiro bye, omukono gwe gunaalwananga nammwe, nga bwe kyali ku bajajjammwe.

¹⁶“Kale nno mulindirire mulabe ekintu ekikulu MUKAMA kyagenda okukola mu maaso gammwe.

¹⁷Bino kaakano si biseera bya kukungula ḥjaano. Naye nzija kusaba MUKAMA, aweereze okubwatuka n’enkuba, mulyoke mutegeere nga kye mwakola okusaba kabaka kyali kibi mu maaso ga MUKAMA.”

¹⁸Awo Samwiri n’asaba MUKAMA, MUKAMA n’aweereza okubwatuka n’enkuba, abantu bona ne batya nnyo MUKAMA ne Samwiri.

¹⁹Awo abantu bona ne bagamba Samwiri nti, “Tusabire eri MUKAMA Katonda wo, ffe abawereza bo, tuleme kufa, kubanga twongedde ku bibi byaffe ebirala byonna, bwe twasabye kabaka.”

²⁰Samwiri n’addamu abantu nti, “Temutya, okukola mwakola ebibi ebyo byonna, naye temuvanga ku MUKAMA, kaakano mumuweerezenga n’omutima gwammwe gwonna.

²¹Temukyukanga okugoberera ebintu ebitaliimu, ebitayinza kubagasa wadde okubawonya, kubanga tebirii mu nsa.

²²MUKAMA tagenda kwabulira bantu be, olw’erinnya lye ekkulu, kubanga MUKAMA yasiima okubafuula ababe.

²³Nze ku lwange, kikafuuwe, okwonoona eri MUKAMA ne ssibasabira; nnaabalaganga ekkubo ettuufu era eggolokofu.

²⁴Kyokka mutyenga MUKAMA era mumuweerezenga n'obwesigwa n'omutima gwammwe gwonna, nga mujjukira ebintu ebikulu bye yabakolera.

²⁵Naye bwe muneeyongeranga okukola ebibi, mmwe ne kabaka wammwe mulizikirizibwa."

1 Samwiri 13

Samwiri Anenya Sawulo

¹Sawulo yalina emyaka amakumi asatu we yaliira obwakabaka, n'afuga Isirayiri okumala emyaka amakumi ana.

²Sawulo yalonda abasajja enkumi ssatu okuva mu Isirayiri, enkumi ebbiri ku bo ne babeera naye e Mikumasi ku lusozi olw'e Beseri, n'abalala lukumi ne babeera ne Yonasaani e Gibeal ekya Benyamini. Abasajja abalala bona n'abasindika baddeyo ewaabwe.

³Yonasaani n'alumba olusiisira lw'Abafirisuuti eyali e Geba, Abafirisuuti ne bakiwulira. Awo Sawulo n'lagira, bafuuwe ekkondeere mu nsi yonna, ng'agamba nti, "Abaebbulaniya bawulire!"

⁴Awo Isirayiri yenna bwe baawulira nga Sawulo awambye olusiisira lw'Abafirisuuti, ate nga Isirayiri yali efuuse ekyenyinalwa eri Abafirisuuti, abantu ne balagirwa okwegatta ku Sawulo e Girugaali.

⁵Abafirisuuti ne beekuŋŋanya okulwana n'Abayisirayiri. Abafirisuuti baalina amagaali emitwalo esatu, n'abeebagala embalaasi kakaaga, n'abaserikale abeebigere ng'omuwendo gwabwe gwenkana ng'omusenyu ogw'oku nnyanja obungi. Ne bayambuka ne basiisira e Mikumasi, ku luuyi olw'ebuvanjuba olw'e Besaveni.

⁶Abasajja Abayisirayiri bwe baalaba ng'embeera yaabwe mbi nnyo, n'eggye lyabwe nga linnyigirizibwa omulabe, ne beekweka mu mpuku, ne mu bisaka ne mu njazi, ne mu binnya.

⁷Ne wabaawo n'abamu ku Baebbulaniya abaasomoka Yoludaani ne bagenda mu nsi ya Gaadi ne Gireyaadi. Sawulo ye n'asigala e Girugaali, n'abaserikale bona be yali nabo, naye nga bajjudde okutya.

⁸N'alinda okumala ennaku musanvu, ebbanga Samwiri lye yali amulaze, naye Samwiri n'atajjirawo e Girugaali, n'abasajja ba Sawulo ne batandika okumuvaako.

⁹Sawulo kyeyava ayogera nti, "Mundeetere wano ekiweebwayo ekyokebwa n'ekiweebwayo olw'emirembe." N'awaayo ekiweebwayo ekyokebwa.

¹⁰Naye bwe yali yakamala okuwaayo ekiweebwayo ekyokebwa, Samwiri n'atuuka. Sawulo n'agenda okumwaniriza.

¹¹ Samwiri n'amubuuza nti, "Kiki kino ky'okoze?" Sawulo n'addamu nti, "Bwe nnalabye ng'abasajja batandise okusaasaana, ate nga tozze mu kiseera kye walaga, ate nga n'Abafirisuuti bakuŋŋaanira e Mikumasi,

¹² ne ndowooza nti, 'Kaakano Abafirisuuti bagenda kukkirira okunnumba e Girugaali, nga sinnaba kwegayirira kufuna mukisa gwa MUKAMA, kyenvudde mpalirizibwa okuwaayo ekiweebwayo ekyokebwa.'

¹³ Samwiri n'agamba Sawulo nti, "Okoze kya busirusiru, obutakuma kiragiro kya MUKAMA Katonda wo kye yakulagira. Singa wakikuumye, MUKAMA yandinywezezza obwakabaka bwo okufuga Isirayiri emirembe gyonna.

¹⁴ Naye kaakano obwakabaka bwo tebuliba bwa lubeerera. MUKAMA anoonyezzaayo omusajja alina omutima ogumunoonya era amulonze okuba omukulembeze w'abantu be, kubanga tokuumye kiragiro kya MUKAMA."

¹⁵ Awo Samwiri n'ava e Girugaali n'ayambuka e Gibeा mu Benyamini, Sawulo n'abala abasajja abaali naye, nga baawera nga lukaaga.

Ebbula ly'Ebyokulwanyisa mu Isirayiri

¹⁶ Sawulo ne mutabani we Yonasaani, n'abasajja abaali nabo baali basiidde e Gebeа ekya Benyamini, ate ng'Abafirisuuti bo basiidde Mikumasi.

¹⁷ Abalabe ne bava mu nkambi y'Abafirisuuti mu bibinja bisatu, ekimu ne kyolekera Yofula, mu nsi ya Suwaali,

¹⁸ n'ekibinja ekirala ne kyolekera Besukolooni, n'ekyokusatu ne kyolekera ensalo etunuulidde ekiwonvu Zeboyimu okwolekera eddungu.

¹⁹ Mu nsi yonna eya Isirayiri temwali muweesi n'omu, kubanga Abafirisuuti baali baasalawo nti, "Si kulwa ng'Abaebbulaniya beeweeseza ebitala oba amafumu!"

²⁰ Noolwekyo Abayisirayiri bona baaserengetanga eri Abafirisuuti, okuwagala enkumbi zaabwe, n'ebiwabyo byabwe, n'embazzi zaabwe, ne najjolo zaabwe.

²¹ Baalinanga omuwendo gwe baasasulanga olw'okuwagala enkumbi ey'amannya abiri n'ebiwabyo, nga gwa njawulo ku ogwo gwe baawangayo olw'okuwagala embazzi n'emiwunda.

²² Era ku lunaku olw'olutalo tewaali muserikale n'omu ku baali ne Sawulo ne Yonasaani, eyalina ekitala wadde effumu, okuggyako Sawulo ne mutabani we Yonasaani.

²³ Waaliwo ekibinja eky'Abafirisuuti ekyali kigenze mu kifo ekyayitbwanga Mikumasi.

1 Samwiri 14

Yonasaani Alumba Abafirisuuti

¹Lumu Yonasaani mutabani wa Sawulo n'agamba omuvubuka eyasitulanga ebyokulwanyisa bye nti, "Jjangu tugende ku ludda luli mu nkambi ey'Abafirisuuti." Kyokka n'atabuulira kitaawe.

²Sawulo yali asiisidde ku njegoyego za Gibea wansi w'omukomamawanga mu Migulooni. Yalina abaserikale nga lukaaga;

³ku bo kwe kwali Akiya eyali ayambadde ekkanzu ey'obwakabona nga ye mutabani wa Akitubu, muganda wa Ikabodi, mutabani wa Finekaasi, mutabani wa Eri, kabona wa MUKAMA mu Siiro. Tewali yamanya nti Yonasaani agenze.

⁴Ku buli ludda lw'ekkubo Yonasaani mwe yali ayagala okuyita okutuuka ku nkambi y'Abafirisuuti waaliyo enkonko empanvu, olumu nga luyitibwa Bozezi, n'olulala nga luyitibwa Sene.

⁵Olukonko olumu lwali ku luuyi olw'obukiikkono okwolekera Mikumasi, n'olulala nga luli ku luuyi olw'obukiikkaddyo okwolekera Geba.

⁶Yonasaani n'agamba omuvubuka eyasitulanga ebyokulwanyisa bye nti, Jjangu tugende mu nkambi y'abasajja abo abatali bakomole, oboolyawo MUKAMA anaatukolera ekyamagero. Kubanga tewali kiyinza kuziyiza MUKAMA kulokola, ng'akozesa abangi oba abatono.

⁷Omuvubuka n'amuddamu nti, "Kola nga bw'osiima. Genda mu maaso, nzisa kimu naawe, omutima gwange n'omwoyo gwange biri wamu naawe."

⁸Yonasaani n'alyoka ayogera nti, "Kale, tusomoke tugende eri abasajja, tubeerage.

⁹Bwe banaatugamba nti, 'Mutulindirire okutuusa lwe tunajja,' kale tunaasigala we tuli, ne tutagenda gye bali.

¹⁰Naye bwe banaatugamba nti, 'Mujje gye tuli,' tunaayambuka, kubanga ako ke kanaaba akabonero gye tuli nti MUKAMA abagabudde mu mukono gwaffe."

¹¹Awo bombi ne beeraga eri olusiisira lw'Abafirisuuti. Abafirisuuti ne boogera nti, "Mulabe, Abaebbulaniya batandise okuva mu binnya mwe baali beekwese."

¹²Abasajja ab'omu nkambi ne bakoowoola Yonasaani n'omuvubuka eyasitulanga ebyokulwanyisa bye nga boogera nti, "Mwambuke gye tuli, tubalage enkola." Awo Yonasaani n'agamba omuvubuka eyasitulanga ebyokulwanyisa bye nti, "Ngoberera twambuke kubanga MUKAMA abawaddeyo mu mukono gwa Isirayiri."

¹³Yonasaani n'alinnyalinnya, ng'ayavula nga n'omuvubuka eyasitulanga ebyokulwanyisa bye bw'amuvaako emabega. Yonasaani n'atta Abafirisuuti,

n'omuvubuka eyasitulanga ebyokulwanyisa bye ng'amuvaako emabega naye n'atta abo abaali bawonyeewo.

¹⁴Mu lulumba olwo olwasooka, Yonasaani n'omuvubuka eyasitulanga ebyokulwanyisa bye, batta abasajja amakumi abiri mu kibangirizi ekyenkana ekitundu kya eka.

Isirayiri Atta Abafirisuuti bangi

¹⁵Awo ne waba okutya kungi nnyo mu ggye lyonna ery'Abafirisuuti abo abaali mu nkambi n'abaali ku ttale; era n'ab'omu bibinja ebirala n'ebibondo ebirumba n'ettaka ne likankana. Okukankana okwo kwava eri Katonda.

¹⁶Abakuumi ba Sawulo abaali e Gibeal mu Benyamini ne balaba ng'ekibinja kisaasaana okuddukira mu njuyi zonna.

¹⁷Awo Sawulo n'alagira abasajja abaali naye nti, "Mubale abasajja bona, mulabe ataliiwo." Bwe baabala, ne bazuula nga Yonasaani n'eyasitulanga ebyokulyanyisa bye tebaliiwo.

¹⁸Sawulo n'agamba Akiya nti, "Leeta essanduuko ya Katonda," kubanga mu biro ebyo yali mu mikono gy'Abayisirayiri.

¹⁹Awo Sawulo bwe yali ng'akyayogera ne kabona, akeegugungo ne keeyongera mu nkambi y'Abafirisuuti, n'agamba kabona nti, "Zaayo omukono gwo, ogira olindako."

²⁰Awo Sawulo n'abasajja be ne beekunjaanya ne bagenda mu lutalo, ne basanga ng'Abafirisuuti balwanagana bokka ne bokka, nga bafumitagana ebitala.

²¹Abaebbulaniya abaabeeranga n'Abafirisuuti, abaali bagenze nabo mu nkambi, ne beegatta ku Bayisirayiri abaali ne Sawulo ne Yonasaani.

²²Awo Abayisirayiri bona abaali beekwese mu nsi ey'ensozi eya Efulayimu bwe baawulira ng'Abafirisuuti badduse, amangwago nabo ne beenyigira mu lutalo ne bannaabwe.

²³MUKAMA n'alokola Isirayiri ku lunaku olwo, olutalo ne lutuukira ddala e Besaveni.

Yonasaani Alya Omubisi gw'Enjuki

²⁴Ku lunaku olwo abasajja Abayisirayiri baali bajjudde ennaku nnyingi nnyo kubanga Sawulo yali abalayizza ng'agamba nti, "Akolimirwe oyo yenna anaalya akantu konna ng'obudde tebunnawungeera, nga sinnaba kwesasuza ku balabe bange." Awo ne wataba n'omu ku baserkale akomba ku kantu.

²⁵Awo abantu bona bwe baatuuka mu kibira ne balaba omubisi gw'enjuki ku ttaka.

²⁶Bwe beeyongerayo munda mu kibira ne basanga nga gutonnya, naye ne wataba n'omu agukombako kubanga baali batya ekirayiro kye baakola.

²⁷Naye Yonasaani yali tawulidde nga kitaawe alayiza abantu, kyeyava addira omuggo gwe yalina n'annyika omusa gwagwo mu bisenge by'enjuki, n'agukombako, amaaso ge ne ganyirira n'addamu amaanyi.

²⁸Awo omu ku baserikale n'amugamba nti, "Kitaawo yatukuutidde n'atulayiza nti, 'Omuntu yenna anaalya ku mmere leero akolimirwe.' Era ekyo kye kireetedde abaserikale okuggwaamu amaanyi."

²⁹Yonasaani n'ayogera nti, "Kitange aleetedde ensi yaffe emitawaana. Laba amaaso gange bwe ganyirira n'amaanyi gange bwe gakomyewo bwe nkomyeko ku mubisi guno ogw'enjuki.

³⁰Tekyandisinze nnyo leero singa abasajja baalidde ku munyago gw'abalabe baabwe? Era tebandisse Abafirisuuti abasinga awo obungi?"

³¹Abayisirayiri we baamalira okutta Abafirisuuti okuva e Mikumasi okutuuka e Ayalooni nga bakooye nnyo.

³²Ne badda ku munyago, ne baddiru endiga n'ente n'ennyana ne bazisalira wansi ku ttaka ne balya ennyama n'omusaayi gwayo.

³³Awo omuntu omu n'ategeeza Sawulo nti, "Abantu basobya ku MUKAMA kubanga balya ennyama erimu omusaayi." N'ayogera nti, "Musobezza nnyo. Munjiringisirize wano ejinja eddene kaakano."

³⁴Sawulo n'agamba nti, "Muyiteeyite mu bantu mubategeeze nti, 'Buli omu ku mmwe aleete ente ye n'endiga ye muzittire wano era mu zirye. Temuddangayo okusobya ku MUKAMA nga mulya ennyama erimu omusaayi.'" Awo buli omu ku bo n'aleeta ente ye ekiro ekyo n'agisalira awo.

³⁵Sawulo n'azimbira MUKAMA ekyoto, era ekyo kye kyoto kye yasooka okuzimbira MUKAMA.

³⁶Awo Sawulo n'ayogera nti, "Tuserengete tugoberere Abafirisuuti ekiru kino tubanyage okutuusa emmambya lw'eneesala, era tuleme okulekawo wadde omu ku bo nga mulamu." Ne bamuddamu nti, "Kola nga bw'osiima." Naye kabona n'ayogera nti, "Twebuuze ku Katonda wano."

³⁷Awo Sawulo ne yeebuuza ku Katonda ng'agamba nti, "Njende nnumbe Abafirisuuti? Onoobagabula mu mukono gwa Isirayiri?" Naye Katonda n'atamuddamu ku olwo.

³⁸Sawulo kyeyava ayogera nti, "Mujje wano mmwe mwenna abakulembeze b'abantu, tunoonyereze tulabe ekibi ekikoleddwa leero.

³⁹Nga MUKAMA alokola Isirayiri bw'ali omulamu, ne bwe kinaaba ku mutabani wange Yonasaani, atekwa kufa." Naye ne wataba n'omu amwanukula.

⁴⁰Awo Sawulo n'agamba Abayisirayiri bona nti, "Muyimirire ku ludda olwo, nze ne mutabani wange Yonasaani tunaayimirira ku ludda luno." Abantu ne bamuddamu nti, "Kola nga bw'onoosiima."

⁴¹Sawulo n'asaba MUKAMA Katonda wa Isirayiri nti, "Kiki ekikugaanye okuddamu omuweereza wo leero? Omusango bwe guba nga guli ku nze oba ku mutabani wange Yonasaani ddamu ne Wumimu, naye bwe guba nga guli ku bantu bo Isirayiri, onaddamu ne Sumimu." Awo akalulu ne kakubibwa era ne kagwa ku Sawulo ne Yonasaani mutabani we.

⁴²Awo Sawulo n'ayogera nti, "Mutukubire akalulu nze ne mutabani wange Yonasaani." Yonasaani n'alondebwa.

⁴³Sawulo n'abuuza Yonasaani nti, "Mbulira ky'okoze." Yonasaani n'amutegeeza nti, "Nakomyeko katono ku mubisi gw'enjuki nga nkozesha omusa gw'omuggo gwange. Kaakano ekyo kinsanyiza okufa?"

⁴⁴Sawulo n'amuddamu nti, "Katonda ankole bw'atyo n'okukirawo bw'otoofe, Yonasaani!"

⁴⁵Naye abantu ne bagamba Sawulo nti, "Lwaki, Yonasaani akoze eby'amagero ebyo byonna mu Isirayiri afa? Ddala Yonasaani attibwe? Oyo aleetedde Isirayiri obununuzi obw'ekitalo? Nedda tekisoboka! Nga MUKAMA bw'ali omulamu, tewali luviiiri na lumu lunaava ku mutwe gwe ne lugwa wansi, kubanga ebyo by'akoze leero Katonda y'amuyambye okubikola." Abantu ne banunula Yonasaani bwe batyo, n'atattibwa.

⁴⁶Ne Sawulo n'alekeraawo okugoberera Abafirisuuti, nabo ne beddirayo mu nsi yaabwe.

⁴⁷Awo Sawulo bwe yalya obwakabaka bwa Isirayiri n'alwana n'abalabe be ku njuyi zonna: Mowaabu, n'Abamoni, ab'e Edomu, ne bakabaka ba Zoba, n'Abafirisuuti, na buli we yaddanga n'abawangula.

⁴⁸N'alwana n'obuzira bungi n'awangula Abamaleki, n'anunula Isirayiri okuva mu mukono gw'abo abaabanyaganga.

Enju ya Sawulo

⁴⁹Batabani ba Sawulo baali Yonasaani, ne Isuvi, ne Malukisuwa. Amannya ga bawala be ababiri gaali Merabu nga ye mukulu, ate omuto nga ye Mikali.

⁵⁰Omukyala we ye yali Akinoamu muwala wa Akimaazi. Omuduumizi w'eggye lye omukulu ye yali Abuneeri mutabani wa Neeri, taata wa Sawulo omuto.

⁵¹Kiisi kitaawe wa Sawulo ne Neeri kitaawe wa Abuneeri baali batabani ba Abiyeeri.

⁵²Mu biro byonna ebya Sawulo, waaliwo okulwanagana okw'amaanyi n'Abafirisuuti, era buli Sawulo bwe yalabanga omusajja ow'amaanyi oba omuzira n'amuyingiza mu magye.

1 Samwiri 15

¹Awo Samwiri n'agamba Sawulo nti, "MUKAMA nze gwe yatuma okukufukako amafuta okuba kabaka w'abantu be Isirayiri, noolwekyo wuliriza obubaka obuva eri MUKAMA Katonda.

²Bw'ati bw'ayogera MUKAMA Ayinzabyonna nti, 'Ndibonereza Abamaleki olw'ekyo kye baakola Isirayiri bwe baabateeega nga bayambuka okuva mu Misiri.

³Kaakano genda olumbe Abamaleki obazikiririze ddala, n'ebintu byabwe byonna. Tobasaasira, otta abasajja n'abakazi, abaana n'abato ddala, ente, n'endiga, n'enjamira n'endogoyi.'

⁴Awo Sawulo n'akuinjaanya abasajja, n'ababalira e Terayimu, nga bawera abaserikale ab'ebigere emitwalo amakumi abiri, n'abalala omutwalo gumu okuva mu Yuda.

⁵Sawulo n'asemberera ekibuga kya Amaleki n'abateegera mu kiwonvu.

⁶N'agamba Abakeeni nti, "Muve mu Bamaleki mugende nneme okubazikiririza awamu nabo, kubanga mwakolera Abayisirayiri bona ebyekisa bwe bayambuka okuva mu Misiri." Abakeeni ne basenguka okuva mu Bamaleki.

⁷Awo Sawulo n'alumba Abamaleki okuviira ddala e Kavira okutuuka e Ssuuli, ekiri ebuvanjuba w'e Misiri.

⁸N'awamba Agagi kabaka w'Abamaleki nga mulamu, naye abantu abalala bona n'abazikiririza ddala n'ekitala.

⁹Era Sawulo n'eggye ne baleka Agagi nga mulamu, era endiga n'ente, n'ennyana n'abaana b'endiga n'ebiyassava, n'ebyo byonna bye baalaba nga bya muwendo, ne batabizikiririza ddala. Naye ebirala byonna ebitaali bya muwendo nga binyoomebwa oba nga binafu, ne babizikiririza ddala.

¹⁰Awo ekigambo kya MUKAMA ne kijjira Samwiri nti,

¹¹"Nejjusizza okufuala Sawulo kabaka, kubanga avudde kukungoberera, n'atakolera ku biragiro byange." Samwiri n'anyolwa nnyo, n'akabira MUKAMA ekiro kyonna.

¹²Enkeera ku makya Samwiri n'agolokoka n'agenda okusisinkana Sawulo, naye ne bamutegeeza nti, "Sawulo yazze e Kalumeeri gye yeezimbidde ekijjukizo, kyokka kaakano avuddeyo n'aserengeta e Girugaali."

¹³Awo Samwiri bwe yamutuukako, Sawulo n'ayogera nti, "MUKAMA akuwe omukisa. Ngoberedde ebiragiro bya MUKAMA."

¹⁴Naye Samwiri n'amuddamu nti, "Ate okubejjagala okw'endiga n'okunjoña kw'ente bye mpulira biva wa?"

¹⁵Sawulo n'amuddamu nti, "Abaserikale baaziggye ku Bamaleki. Baaleseewo ente n'endiga ezisinga obulungi okuba ebiweebwayo eri MUKAMA Katonda wo, naye ebirala byonna twabizikiririzza ddala."

¹⁶Awo Samwiri n'agamba Sawulo nti, "Sirika! Ka nkutegeze MUKAMA kye yanjambye ekiro." Sawulo n'amuddamu nti, "Ntegeza."

¹⁷Samwiri n'amugamba nti, "Newaakubadde nga wali weeraba ng'oli mutono, tewafuuka mukulu wa bika bya Isirayiri? MUKAMA yakufukako amafuta okuba kabaka wa Isirayiri.

¹⁸Naakutuma omulimu, ng'agamba nti, 'Genda ozikiririze ddala abalina ebibi abo Abamaleki, obalwanyise okutuusa lw'olibamalirawo ddala.'

¹⁹Lwaki tewagondedde ddoboozi lya MUKAMA? Lwaki mwalulunkanidde omunyago ne mukola ekibi mu maaso ga MUKAMA?"

²⁰Sawulo n'addamu Samwiri nti, "Nagondedde eddoboozi lya MUKAMA, era nagenze ku mulimu MUKAMA gwe yantumye. Nazikiririzza ddala Abamaleki era ne ndeeta Agagi kabaka waabwe.

²¹Abaserikale baatute endiga n'ente, ebisinga obulungi ku ebyo ebyali biteekeddwa okuzikirizibwa, babiweeyo eri MUKAMA Katonda wo e Girugaali."

²²Naye Samwiri n'amugamba nti, "MUKAMA asanyukira nnyo ebiweebwayo ebyokebwa ne ssaddaaka, okusinga okugondera eddoboozi lya MUKAMA? Okugonda kusinga ssaddaaka, era n'okuwuliriza kusinga amasavu g'endiga ennume.

²³Kubanga obujeemu buli ng'ekibi eky'okusamira, era n'obukakanyavu buli ng'ekibi eky'okusinza bakatonda abalala. Kubanga ojeemedde ekigambo kya MUKAMA, naye akugaanye okuba kabaka."

²⁴Awo Sawulo n'agamba Samwiri nti, "Nyonoonye. Najeemedde ekiragiro kya MUKAMA era n'ebigambo byo, kubanga natidde abantu ne ɳjendera ku bigambo byabwe.

²⁵Kaakano nkusaba, osonyiwe ekibi kyange, okomewo nange nsobole okusinza MUKAMA."

²⁶Naye Samwiri n'amuddamu nti, "Sijja kuddayo naawe kubanga ovudde ku kigambo kya MUKAMA, ne MUKAMA akugaanye okuba kabaka wa Isirayiri."

²⁷Awo Samwiri bwe yakyuka okugenda, Sawulo n'akwata ekirenge ky'ekyambalo kye, ne kiyulika.

²⁸Samwiri n'amugamba nti, "MUKAMA akuyuzizzaako obwakabaka bwa Isirayiri leero, n'abuwa omu ku baliraanwa bo akusinga.

²⁹Oyo ayitibwa Ekitiibwa kya Isirayiri talimba ate takyusakyusa kirowoozo kye, kubanga si muntu nti anaakyusa ekirowoozo kye."

³⁰Sawulo n'addamu nti, "Nyonoonye, naye nzisaamu ekitiibwa mu maaso g'abakadde b'abantu bange, ne mu maaso ga Isirayiri, oddeyo nange, nsinze MUKAMA Katonda wo."

³¹Awo Samwiri n'addayo ne Sawulo, Sawulo n'asinza MUKAMA.

³²Samwiri n'alagira nti, "Mundeetere Agagi kabaka w'Abamaleki." Agagi n'ajja gy'ali ng'akankana naye ng'agamba mu mutima gwe nti, "Mazima ddala obubalagaze bw'okufa buyise."

³³Naye Samwiri n'ayogera nti, "Ng'ekitala kyo bwe kyaleetera abakazi abangi obutaba na baana, ne nnyoko talibeera na mwana." Awo Samwiri n'atemaatema Agagi n'amuttira mu maaso ga MUKAMA e Girugaali.

³⁴Samwiri n'alyoka agenda e Laama, naye Sawulo ye n'agenda ewuwe mu Gibealikya Sawulo.

³⁵Samwiri yanakuwala nnyo olwa Sawulo, era teyaddayo kulabagana ne Sawulo okutuusa Samwiri lwe yafa. MUKAMA n'anyolwa olw'okufuula Sawulo kabaka wa Isirayiri.

1 Samwiri 16

Samwiri Afuka Amafuta ku Dawudi

¹Awo MUKAMA n'agamba Samwiri nti, "Olituusa ddi okunakuwala olwa Sawulo, ate nga nze sikuamubala kuba kabaka wa Isirayiri? Jjuza ejjembe lyo amafuta nkutume eri Yese Omubesirekemu kubanga nnonze omu ku batabani be okuba kabaka."

²Naye Samwiri n'ayogera nti, "Nnaagenda ntya? Sawulo bw'anakiwulira ajja kunzita." MUKAMA n'amugamba nti, "Weetwalire ennyana oyogere nti, 'Nzize kuwaayo ssaddaaka eri MUKAMA.'

³Yita Yese aije okuwaayo ssaddaaka, nzi ja kukulaga eky'okukola. Ojja kufuka amafuta ku oyo gwe nnaaba nnonze."

⁴Samwiri n'akola ekyo MUKAMA kye yamulagira. Bwe yatuuka e Besirekemu abakulu b'ekibuga ne bakankana olw'okutya bwe baamusisinkana era ne bamubuuza nti, "Ojja mirembe?"

⁵N'abaddamu nti, "Weewaawo, mirembe. Nzize okuwaayo ssaddaaka eri MUKAMA. Mwetukuze tugende ffenna tuweeyo ssaddaaka." N'atukuza Yese ne batabani be, n'abayita okujja okuwaayo ssaddaaka.

⁶Bwe baatuuka n'atunuulira Eriyaabu, n'alowooza nti, "Mazima MUKAMA ono gw'afuseeko amafuta, era y'ayimiridde kaakano mu maaso ga MUKAMA."

⁷Naye MUKAMA n'agamba Samwiri nti, "Totunuulira nfaanana ye wadde obuwانو bwe, kubanga si gwe nnonze. MUKAMA tatunuulira ebyo abantu bye batunuulira. Abantu batunuulira bya kungulu naye MUKAMA atunuulira bya mu mutima."

⁸Awo Yese n'ayita Abinadaabu, n'amuyisa mu maaso ga Samwiri. Nayе Samwiri n'ayogera nti, "Oyo naye MUKAMA si gw'alonze."

⁹Yese n'ayita Samma n'amusimbawo, naye Samwiri n'ayogera nti, "Era n'oyo MUKAMA si gw'alonze."

¹⁰Yese n'ayisa batabani be omusanvu mu maaso ga Samwiri, naye Samwiri n'amugamba nti, "Ku bo tekuli n'omu MUKAMA gw'alonze."

¹¹N'abuuza Yese nti, "Bano be batabani bo bokka?" Yese n'addamu nti, "Ekyasigaddeyo asingira ddala obuto, alunda ndiga." Samwiri n'agamba Yese nti, "Mutumye; tetuja kuweera okutuusa lw'anajja."

¹²N'amutumya, n'aleetebwa. Yali mumyufu, n'amaaso ge nga malungi, era ng'alabika bulungi nnyo. Awo MUKAMA n'ayogera nti, "Golokoka omufukeko amafuta; ye wuuyo."

¹³Awo Samwiri n'addirа ejjembe ly'amatfuta, n'agamufukako mu maaso ga baganda be. Okuva ku lunaku olwo Omwoyo wa MUKAMA n'akka ku Dawudi mu maanyi mangi. Oluvannyuma Samwiri n'addayo e Laama.

Dawudi Aweereza Sawulo

¹⁴Awo Omwoyo wa MUKAMA Katonda yali avudde ku Sawulo, omwoyo omubi ogwava eri MUKAMA ne gumuccanga.

¹⁵Awo abaweereza ba Sawulo ne bamuleetera ekiteeso nti, "Laba, omwoyo omubi okuva eri Katonda gukucocca.

¹⁶Mukama waffe alagire abaweereza be kaakano okumunoonyeza omuntu asobola okukuba entongooli. Omwoyo omubi okuva eri Katonda bwe gunaabanga gukusseeko, bw'anagikubanga n'oddamu endasi, onoowuliranga bulungi n'okkakkana."

¹⁷Awo Sawulo n'alagira abaweereza be nti, "Munfunireyo omuntu asobola okukuba entongooli obulungi, mumundeetere."

¹⁸Omу ku baweereza n'addamu nti, "Waliwo mutabani wa Yese Omubesirekemu gwe nalaba asobola okukuba entongooli obulungi. Musajja muzira era

mulwanyi, ate nga mwogezi mulungi, era alabika bulungi. Ate MUKAMA Katonda ali wamu naye.”

¹⁹Awo Sawulo n'atuma ababaka eri Yese, ng'agamba nti, “Mpeereza mutabani wo Dawudi, alabirira endiga.”

²⁰Yese n'addiria endogoyi n'agitikka emigaati, n'eccupa y'envinnyo n'omwana gw'embuzi, n'abiweereza wamu ne mutabani we Dawudi eri Sawulo.

²¹Dawudi n'atuuka eri Sawulo, n'afuuka omu ku baweereza be. Sawulo n'amwagala nnyo, era n'amufuula omu ku abo abaasitulanga ebyokulwanyisa bye.

²²Awo Sawulo n'atumira Yese ng'agamba nti, “Kkiriza Dawudi asigale ng'omu ku baweereza bange, kubanga nsiimye by'ankolera.”

²³Awo buli omwoyo omubi okuva eri Katonda lwe gw'ajjanga ku Sawulo, Dawudi n'amukubiranga entongooli, Sawulo n'akkakkana, era n'awulira bulungiko, n'omwoyo omubi ne gumuvaako.

1 Samwiri 17

Dawudi ne Goliyaasi

¹Awo Abafirisuuti ne bakuŋjaanyiza egghe lyabwe e Soko ekya Yuda okulwana. Ne basiisira mu Efusudammimu ekiri wakati wa Soko ne Azeka.

²Sawulo n'Abayisirayiri nabo ne bakuŋjaana, bo ne basiisira mu kiwonvu Era, ne basimba ennyiriri okulwana n'Abafirisuuti.

³Abafirisuuti ne bayimirira ku luuyi olumu olw'olusozi, n'Abayisirayiri ne bayimirira ku luuyi olulala olw'olusozi, nga wakati waabwe waliwo ekiwonvu.

⁴Mu lusiisira lw'Abafirisuuti ne muva essajja eddene nga lizira erinnya lyalyo Goliyaasi, ery'e Gaasi, ng'obuwantu bwalyo lyali mita ssatu n'okusingawo.

⁵Lyalina enkuufiira ey'ekikomo ku mutwe gwalyo, nga lyambadde n'ekizibaawo eky'ekikomo, n'obuzito bwakyo bwali kilo ataano mu musanvu.

⁶Lyali lyambadde eby'ebikomo ku magulu gaalyo, nga lirina effumu ery'ekikomo ku kibegabega kyalyo.

⁷N'olunyago lw'effumu lyalyo lwali ng'omuti ogulukirwako engoye, n'omutwe gw'effumu ogw'ekyuma ng'obuzito bwagwo kilo musanvu. Eyasitulanga engabo ye yamukulemberangamu.

⁸Awo Goliyaasi n'ayimirira n'aboggolera egghe lya Isirayiri nti, “Lwaki mwetegeka okulwana? Siri Mufirisuuti, ate mmwe temuli baddu ba Sawulo? Mulonde omusajja mu mmwe aserengete gye ndi.

⁹Bw'anannwanyisa n'anzita, kale tunaafuuka baddu bammwe, naye bwe nnaamuwangula ne mutta, munaafuuka baddu baffe era munaatuweerezanga."

¹⁰Era Omufirisuuti n'ayongera okwogera nti, "Leero, nsomooza eggye lya Isirayiri! Mumpeeyo omusajja tulwane."

¹¹Sawulo ne Isirayiri yenna bwe baawulira ebigambo eby'Omufirisuuti, ne bakenjentererwa ne batya nnyo.

¹²Dawudi yali mutabani wa Yese Omwefulasi ow'e Besirekemu mu Yuda.

¹³Yese yalina abaana munaana aboobulenzi, era mu biro ebyo ebya Sawulo yali akaddiye nnyo. Batabani ba Yese abakulu abasatu baali bagenze ne Sawulo mu lutalo. Omukulu ye yali Eriyaabu, owookubiri nga ye Abinadaabu, n'woookusatu nga ye Samma.

¹⁴Dawudi ye yali omuto. Abasatu ne bagenda ne Sawulo,

¹⁵naye Dawudi n'addijjananga ng'ava mu kulunda endiga za kitaawe e Besirekemu, ng'agenda ewa Sawulo.

¹⁶Omufirisuuti n'amala ennaku amakumi ana ng'asoomooza Abayisirayiri enkya n'akawungeezi.

¹⁷Yese n'agamba mutabani we Dawudi nti, "Kwata ekkilo zino amakumi abiri ez'enjaano ensiike n'emigaati gino ekkumi, oyanguwe okubitwalira baganda bo mu lusiisira lwabwe.

¹⁸Ate ne bino ebitole ekkumi eby'amata (kiizi) bitwalire omuduumizi w'ekibinja kyabwe. Olabe baganda bo nga bwe bali okomyewo obubaka obunaatugumya.

¹⁹Bali ne Sawulo n'abasajja ba Isirayiri bona mu kiwonvu Era, balwana n'Abafirisuuti."

²⁰Enkeera Dawudi n'agolokoka mu makya nnyo, endiga n'azirekera omusumba, n'ateekateeka ebintu bye yali atwala, n'agenda nga Yese bwe yamulagira. We yatuukira mu lusiisira, ng'eggye ligenda mu ddwaniro nga lirangirira olutalo.

²¹Isirayiri n'Abafirisuuti baali basimbye ennyiriri, buli ggye nga lyolekedde linnaalyo.

²²Dawudi n'alekera omukuumi w'ebikozesebwa ebintu bye, n'adduka n'agenda eri eggye, n'alamusa ku baganda be.

²³Awo bwe yali ng'aky'anyumya nabo, Goliyaasi, Omufirisuuti omuzira ow'e Gaasi, ne yeesowolayo okuva mu ggye ly'Abafirisuuti n'asoomooza Abayisirayiri mu bigambo bye bimu bye yayogeranga. Dawudi n'amuwlira.

²⁴Awo Abayisirayiri bwe baalaba omusajja ne batya ne bamudduka mu kutya okw'ekitalo.

²⁵Ne bagamba nti, "Mulaba omusajja oyo avuddeyo? Mazima, azze okusoomooza Isirayiri. Omuntu alimutta, kabaka alimugaggawaza era alimuwa muwala we okumuwasa, era n'ennyumba ya kitaawe eneebanga ya ddembe mu Isirayiri."

²⁶Awo Dawudi n'abuuza abasajja abaali bamuyimiridde okumpi nti, "Kiki ekirikolerwa omuntu alitta Omufirisuuti oyo, n'aggya obuswavu buno ku Isirayiri? Omufirisuuti oyo atali mukomole yeeyita ani okusoomooza egghe lya Katonda omulamu?"

²⁷Ne bamuddiramu ebigambo bye bimu nti, "Bw'atyo bw'anaakolebwa omuntu anaamutta."

²⁸Awo Eriyaabu, muganda wa Dawudi mukulu waabwe bwe yamuwlira ng'ayogera n'abasajja, obusungu ne bumukwata, n'amubuuza nti, "Kiki ekyakuleese wano? Ani gwe waledde endiga ezo entono ku ttale? Mmanyi amalala go n'ekyejo ky'olina mu mutima, waserengese kulaba bulabi lutalo."

²⁹Dawudi n'ayogera nti, "Kaakano nkoze ki? Siyinza kubaako kye mbuuza? Mbuzzizza bubuuza."

³⁰N'akyuka n'abuuza omuntu omulala ekibuuzo kye kimu, mu ngeri y'emu abasajja ne bamutegeeza ebigambo bye bimu nga bali abaasoose.

³¹Ebigambo Dawudi bye yayogera byawulirwa ne bituusibwa eri Sawulo; Sawulo n'amutumya.

³²Awo Dawudi n'agamba Sawulo nti, "Waleme kubaawo muntu n'omu aggwaamu mwoyo olw'Omufirisuuti oyo. Omuweereza wo anaagenda n'amulwanyisa."

³³Sawulo n'amuddamu nti, "Toyinza kugenda kulwana na Mufirisuuti oyo; kubanga oli mulenzi bulenzi, songa ye abadde mulwanyi okuva mu buvubuka bwe."

³⁴Naye Dawudi n'addamu Sawulo nti, "Omuweereza wo amaze ebbanga ng'alunda endiga za kitaawe, era bwe waabangawo empologoma oba eddubu eyajjanga n'etwala omwana gw'endiga okuva mu kisibo,

³⁵nagigobereranga, ne ngikuba, ne mponya omwana gw'endiga nga nguggya mu kamwa k'ensolo eyo. Bwe yankukiranga n'eyagala okunzita, nga ngikwata oluba ne ngikuba ne ngitta.

³⁶Omuweereza wo yattako ku mpologoma n'eddubu. Omufirisuuti ono atali mukomole anaaba ng'emu ku zo, kubanga asoomozezza egghe lya Katonda omulamu."

³⁷Dawudi n'ayogera nti, "MUKAMA eyamponya enjala z'empologoma n'enjala z'eddubu, alimponya ne mu mukono gw'Omufirisuuti oyo." Awo Sawulo n'agamba Dawudi nti, "Genda, era MUKAMA abeere naawe."

³⁸Sawulo n'ayambaza Dawudi ebyambalo bye eby'olutalo; n'amuwa ekizibaawo eky'ekikomo, n'amuteeka n'enkuufira ey'ekikomo ku mutwe.

³⁹Dawudi ne yeesiba ekitala kya Sawulo ku kyambalo, n'agezaako okutambula, naye n'alemererwa, kubanga yali tabimanyidde. Awo n'agamba Sawulo nti, "Siibole kugenda na bino kubanga sibimanyidde." N'abyeyambulamu.

⁴⁰N'akwata omuggo mu mukono gwe, n'alonda n'amayinja amaweweenvu ataano mu kagga, n'agateeka mu nsawo ye ey'omusumba. N'addira n'envuumuulo ye mu mukono gwe n'asemberera Omufirisuuti.

⁴¹Awo Omufirisuuti n'omusajja eyasitulanga ebyokulwanyisa bye nga yamukuleembeddemu, ne basemberera Dawudi.

⁴²Omufirisuuti n'atunuulira Dawudi n'amunyooma kubanga yali mulenzi bulenzi, ng'alabika bulungi ate n'amaaso ge nga malungi.

⁴³N'agamba Dawudi nti, "Ndi mbwa olyoke ojje gye ndi n'emiggo?" Omufirisuuti n'akolimira Dawudi nga bwakoowoola balubaale be.

⁴⁴Omufirisuuti n'agamba Dawudi nti, "Sembera wano, omubiri gwo nnaagugabira ennyonyi ez'omu bbanga n'ensolo ez'omu nsiko."

⁴⁵Naye Dawudi n'agamba Omufirisuuti nti, "Ojja gye ndi n'ekitala n'effumu, naye nze nzija gy'oli mu linnya lya MUKAMA ow'eggye, Katonda w'eggye lya Isirayiri gw'osoomooza.

⁴⁶Olwa leero MUKAMA anaakuwaayo mu mukono gwange, ne nkukuba era ne nkusalako omutwe. Olwa leero nnaagabira emirambo egy'eggye ery'Abafirisuuti eri ebinyonyi eby'omu bbanga n'eri ensolo enkambwe ez'ensi, ensi yonna eryoke etegeere nga waliwo Katonda mu Isirayiri.

⁴⁷Abo bona abakuŋŋaanye wano banaategeera nga MUKAMA talokola na kitala wadde effumu, kubanga olutalo, lwa MUKAMA era mwenna agenda kubawaayo mu mukono gwaffe."

⁴⁸Awo Omufirisuuti bwe yali ng'asembera okulumba Dawudi, Dawudi n'adduka mbiro okumusisinkana.

⁴⁹Dawudi n'aggya ejinja mu nsawo ye n'alivuumuula ne likwasa Omufirisuuti mu kyenyi; n'agwa nga yeevunise, n'ejinja nga liyingidde mu kyenyi kye.

⁵⁰Bw'atyo Dawudi n'awangula Omufirisuuti n'envuumuulo n'ejinja, n'amukuba n'amutta nga Dawudi talina kitala ky'akutte.

⁵¹Dawudi bwe yamala okutta Omufirisuuti, n'adduka n'amuyimirirako, n'asowola ekitala ky'Omufirisuuti okuva mu kiraato kyakyo, n'amutemako omutwe nakyo. Awo Abafirisuuti bwe baalaba omuzira waabwe ng'afudde ne badduka.

⁵²Abasajja ba Isirayiri ne Yuda ne bagolokoka n'okuleekaana okungi ne bagoberera Abafirisuuti okutuuka e Gaasi ne ku miryango gya Ekuloni; abaafa n'abaatusibwako ebiwundu ne baba bangi mu kkubo okuva e Saalayimu okutuuka e Gaasi n'e Ekuloni.

⁵³Awo Abayisirayiri bwe baakomawo okuva mu kugoberera Abafirisuuti, ne banyaga olusiisira lw'Abafirisuuti.

⁵⁴Dawudi n'asitula omutwe gw'Omufirisuuti n'agleeta e Yerusaalemi, naye ebyokulwanyisa by'Omufirisuuti n'abiteeka mu weema ye.

⁵⁵Sawulo bwe yalengera Dawudi ng'agenda okulwana n'Omufirisuuti, n'abuuza Abuneeri omuduumizi w'eggye nti, "Abuneeri, oyo omuvubuka mutabani w'ani?" Abuneeri n'amuddamu nti, "Nga bw'oli omulamu, ayi kabaka, simanyi."

⁵⁶Kabaka n'ayogera nti, "Genda onoonyereze bazadde b'omuvubuka oyo."

⁵⁷Amangu ddala nga Dawudi akomyewo ng'asse Omufirisuuti, Abuneeri n'amutwala mu maaso ga Sawulo, nga Dawudi asitudde omutwe gw'Omufirisuuti mu mukono gwe.

⁵⁸Sawulo n'amubuuza nti, "Muvubuka, oli mwana w'ani?" Dawudi n'amuddamu nti, "Ndi mutabani wa muddu wo Yeso Omubesirekemu."

1 Samwiri 18

Omukwano gwa Yonasaani ne Dawudi

¹Awo Dawudi bwe yamala okwogera ne Sawulo, Yonasaani n'aba bumu ne Dawudi, era n'amwagala nnyo nga bwe yali yeeyagala.

²Okuva ku lunaku olwo Sawulo n'atwala Dawudi okubeera naye, n'atamuganya kuddayo mu nnyumba ya kitaawe.

³Awo Yonasaani n'atta omukago ne Dawudi kubanga yamwagala nnyo nga bwe yali yeeyagala yekka.

⁴Yonasaani ne yeeyambulamu ekyambalo kye yali ayambadde n'ekanzu ye, ne yeesumulula n'ekitala kye, n'omutego gwe n'olukoba lwe, n'abiwa Dawudi.

⁵Buli kintu Sawulo kye yatumanga Dawudi, Dawudi n'akituukirizanga bulungi nnyo, era Sawulo kyeyava amuwa ekifo ekyawaggulu mu magye. Ekyo ne kisanyusa abantu bona, n'abakungu ba Sawulo.

Sawulo Akwatirwa Dawudi Obuggyga

⁶Awo abasajja bwe baali nga bakomawo eka, Dawudi ng'amaze okutta Omufirisuuti, abakazi ne bava mu bibuga byonna ebya Isirayiri nga bayimba era nga bazina, okusisinkana kabaka Sawulo, nga bayimba ennyimba ez'essanyu, nga balina ebitaasa n'entongooli.

⁷Baazinanga ate nga bwe bayimba nti, “Sawulo asse enkumi ze Dawudi n'atta emitwalo gye.”

⁸Sawulo olwawulira ebigambo ebyo n'asunguwala nnyo, era ne kimukola bubi nnyo. N'ayogera nti, “Dawudi bamuwaanye n'emitwalo, nze ne bampaana n'enkumi; kiki ky'ataafune bw'ataalye bwakabaka?”

⁹Awo okuva mu kiseera ekyo Sawulo n'akwatirwa Dawudi obuggyga.

¹⁰Olunaku olwaddirira omwoyo omubi okuva eri Katonda ne gujja ku Sawulo n'amaanyi mangi, n'ayogera eby'obunnabbi mu lubiri lwe, Dawudi nga bw'akuba entongooli nga bwe yakolanga buli lunaku. Sawulo yalina effumu mu ngalo ze,

¹¹n'alikasuka, ng'ayogera mu mutima gwe nti, “Kanfumite Dawudi mmukwasize ku kisenge.” Naye Dawudi n'alyewoma emirundi ebiri.

¹²Awo Sawulo n'atya Dawudi, kubanga MUKAMA yali wamu naye, kyokka ng'avudde ku Sawulo.

¹³Sawulo kyeyava aziyiza Dawudi okujja mu maaso ge n'amufuula omuduumizi ow'abasajja olukumi, era olw'omulimu ogwo ne yeeyongera okwatiikirira mu bantu.

¹⁴Dawudi n'afuna omukisa mu buli kye yakolanga, kubanga MUKAMA yali wamu naye.

¹⁵Awo Sawulo bwe yalaba Dawudi ng'afuna emikisa, n'amutya.

¹⁶Naye Isirayiri yenna ne Yuda ne baagala Dawudi, kubanga yakulemberanga bulungi.

¹⁷Awo Sawulo n'agamba Dawudi nti, “Nzija kukuwa muwala wange omukulu Merabu, abe mukyala wo, mpeereza n'obuvumu era lwana entalo za MUKAMA.” Sawulo n'ateesa mu mutima gwe nti, “Kikafuuwe nze okugolola omukono gwange okumukolako akabi. Ekyo Abafirisuuti be balikikola.”

¹⁸Naye Dawudi n'agamba Sawulo nti, “Nze ani, n'ennyumba ye waffe be baani, era n'ekika kya kitange kye kiki mu Isirayiri, nze okuba mukoddomi wa kabaka?”

¹⁹Naye ekiseera bwe kyatuuka omuwala wa Sawulo Merabu okuweebwa Dawudi, ne bamuwa Aduliyeri Omumekolasí okumuwasa.

²⁰Awo muwala wa Sawulo omulala Mikali yali ayagala Dawudi, era Sawulo bwe yakiwulira, n'akisanyukira.

²¹Sawulo n'alowooza mu mutima gwe nti, “Nzija kumumuwa afuuke omutego, omukono gw'Abafirisuuti gulyoke gumuzikirize.” Sawulo kyeyava agamba Dawudi nti, “Kaakano ofunye omukisa ogwokubiri okuba mukoddomi wange.”

²²Awo Sawulo n'ala gira abaweereza be nti, "Mwogere ne Dawudi kyama mumugambe nti, 'Laba, kabaka akusanyukira, ate n'abaweereza be bona bakwagala, noolwekyo beera mukoddomi wa kabaka.'"

²³Ebigambo ebyo ne babitegeeza Dawudi. Naye Dawudi n'ayogera nti, "Mulowooza nga kintu kitono okubeera mukoddomi wa kabaka? Nze ndi musaja mwavu atamanyiddwa nnyo."

²⁴Abaweereza ba Sawulo ne bamutuusaako ebigrando bya Dawudi.

²⁵Sawulo n'addamu nti, "Mugambe Dawudi nti, 'Tewali kirala kabaka ky'ayagala okuggyako ebikuta by'Abafirisuuti kikumi okwesasuza ku balabe be, n'oluvannyuma onoowasa muwala we.'" Sawulo yali ayagala Dawudi attibwe Abafirisuuti.

²⁶Awo abaweereza be ne bagenda ne bategeeza Dawudi ebigrando ebyo, Dawudi n'asanyuka nnyo okuba mukoddomi wa kabaka. Awo ekiseera ekiragaane nga tekinnaba na kuyitawo,

²⁷Dawudi n'abasajja be ne bagenda ne batta Abafirisuuti ebikumi bibiri. N'aleeta ebikuta byabwe, n'awaayo omuwendo ogutuukiridde eri kabaka, alyoke abeere mukoddomi wa kabaka. Awo Sawulo n'alyoka amuwa muwala we Mikali amuwase.

²⁸Naye Sawulo bwe yategeera nga MUKAMA ali wamu ne Dawudi, ate nga ne muwala we Mikali ayagala Dawudi,

²⁹Sawulo ne yeeyongera okumutya, era n'aba mulabe wa Dawudi okuva mu kiseera ekyo.

³⁰Abaduumizi b'Abafirisuuti ne beeyongera okubatabaalanga, era buli lwe baabalumbanga, Dawudi n'awangulanga okusinga n'Abaserikale ba Sawulo abalala bona. Erinnya lya Dawudi ne lyatiikirira nnyo.

1 Samwiri 19

Sawulo Agezaako Okutta Dawudi

¹Awo Sawulo n'agamba mutabani we Yonasaani, n'abaweereza be bona, batte Dawudi. Naye Yonasaani yayagalanga nnyo Dawudi,

²bw'atyo n'amulabula ng'agamba nti, "Kitange Sawulo anoonya bw'anaayinza okukutta. Weekume enkya ku makya, weekweke mu kifo ekikusifu obeere eyo.

³Nnaagenda ne nnyimirira ne kitange mu nnimiro, w'onoobeera, ne njogera naye ku bikukwatako, n'oluvannyuma nzija kujja nkutegeeze bye nnaazuula."

⁴Awo Yonasaani n'ayogera bulungi ku Dawudi eri Sawulo kitaawe ng'agamba nti, "Kabaka aleme okukola akabi ku muddu we Dawudi, kubanga talina kyakukoze, era akuweereza bulungi nnyo mu mirimu egy'omugaso.

⁵Yeewaayo n'atta Omufirisuuti; MUKAMA n'aleetera Isirayiri yenna, obuwanguzi obw'ekitalo, n'okiraba n'osanyuka. Lwaki oyigganya omuntu nga Dawudi ataliiko musango, n'oyagala okumutta awatali nsonga?"

⁶Sawulo n'awuliriza Yonasaani, era n'amulayirira ng'agamba nti, "MUKAMA nga bw'ali omulamu, Dawudi tajja kuttibwa."

⁷Awo Yonasaani n'ayita Dawudi, n'amutegeeza byonna. N'amuleeta eri Sawulo, Dawudi n'addamu n'aweereza Sawulo ng'olubereberye.

⁸Ne wagwawo olutalo nate, Dawudi n'agenda okulwana n'Abafirisuuti, n'abakuba n'atta bangi ku bo, abaasigalawo ne badduka.

⁹Awo omwoyo omubi okuva eri MUKAMA ne gujja ku Sawulo bwe yali ng'atudde mu nnyumba ye, ng'akutte effumu mu mukono, Dawudi bwe yali ng'akuba entongooli.

¹⁰Sawulo n'agezaako okumufumitira ku kisenge n'effumu, naye Dawudi n'alyewoma, ne likwasa ekisenge. Ekiro ekyo Dawudi n'adduka n'awona.

¹¹Sawulo n'atuma ababaka bagende bakuume ennyumba ya Dawudi, bamutte enkeera. Naye Mikali mukyala wa Dawudi n'amulabula n'amugamba nti, "Bw'otodduke kiro kino, bwe bunaakya bajja kukutta."

¹²Awo Mikali n'assiza Dawudi mu ddirisa, n'adduka n'agenda ne yeekweka.

¹³Mikali n'addirira ekifaananyi ekyole n'akiteeka ku kitanda, n'akibikkako olugoye, n'assa n'ebyoya eby'embuzi ku mutwe gwakyo.

¹⁴Awo Sawulo bwe yatumayo ababaka okuwamba Dawudi, Mikali n'abagamba nti, "Mulwadde."

¹⁵Sawulo n'abatuma baddeyo bamulabe era n'abalagira nti, "Mumundeetere mu kitanda kye, mmutte."

¹⁶Naye abasajja bwe bagenda yo, ne balaba ekifaananyi ekyole mu kitanda, nga ne ku mutwe kuliko ebyoya by'embuzi.

¹⁷Sawulo n'abuuza Mikali nti, "Lwaki wannimbye bw'otyo, n'oleka omulabe wange okudduka, n'okuwona n'awona?" Mikali n'amuddamu nti, "Yanjambye nti, 'Bw'otondeke kugenda nzija kukutta.'"

¹⁸Awo Dawudi n'addukira eri Samwiri e Laama, n'amutegeeza byonna Sawulo bye yamukola. Ye ne Samwiri ne bagenda e Nayosi ne babeera eyo.

¹⁹Sawulo n'ategeezebwa nti, "Dawudi ali Nayosi mu Laama;"

²⁰n'atuma ababaka okumuwamba. Naye bwe baalaba ekibiina kya bannabbi nga boogera eby'obunnabbi, nga Samwiri ye mukulembeze waabwe, Omwoyo wa Katonda n'akka ku basajja ba Sawulo, nabo ne baba nga bali.

²¹Awo Sawulo bwe yategeeezebwa ekibaddewo, n'atuma ababaka abalala nabo ne baba nga bali. Sawulo n'atuma ekibinja ekyokusatu, era nabo ne baba nga bali.

²²Ekyavaamu, ye yennyini kwe kugenda e Laama, n'atuuka awali oluzzi olunene oluli e Seku, n'abuuza nti, "Samwiri ne Dawudi bali ludda wa?" Ne bamuddamu nti, "Bali Nayosi mu Laama."

²³Awo Sawulo n'agenda e Nayosi mu Laama, naye Omwoyo wa MUKAMA n'amukkako, n'atambula ng'ayogera eby'obunnabbi okuntuuka e Nayosi.

²⁴Ne yeambula ebyambalo bye, n'atandika okwogera nga bannabbi mu maaso ga Samwiri. N'abeera bw'atyo olunaku lwonna n'okuzibya obudde. Abantu kyebaava boogera nti, "Ne Sawulo ali mu bannabbi?"

1 Samwiri 20

Dawudi ne Yonasaani

¹Awo Dawudi n'adduka okuva e Nayosi mu Laama n'agenda eri Yonasaani, n'amubuuza nti, "Nkoze ki? Nazza musango ki? Kibi ki kye nakola ekiyagazisa kitaawo okunzita?"

²Yonasaani n'addamu nti, "Kikafuuwe! Togenda kuttibwa. Laba kitange talina ky'akola, kakibe kinene oba kitono, nga tantegeezessa. Kiki ekyandimuleetedde okukinkisa ekyo? Tekiriiwo."

³Naye Dawudi n'amulayirira ng'ayogera nti, "Kitaawo akimanyi bulungi nti onjagala, era alowooza mu mutima gwe nti, 'Yonasaani tateekwa kumanya nsonga eyo, kubanga ajja kunakuwala.' MUKAMA nga bw'ali omulamu, era naawe ng'oli mujulirwa, ndi wakati mu kufa."

⁴Awo Yonasaani n'agamba Dawudi nti, "Buli ky'oyagala nkukolere, nnaakikukolera."

⁵Dawudi n'agamba Yonasaani nti, "Enkyia mbaga ey'okujuukirirako omwezi nga gubonese era nsubirwa okuliira awamu ne kabaka, naye nzikiriza ɲjende ne kweke mu nnimiro okuntuusa ku lunaku olwokusatu akawungeezi nga wayiseewo ennaku bbiri.

⁶Kitaawo bw'anambuuza, mugambe nti, 'Dawudi yansabye, agende e Besirekemu, mu kibuga kye waabwe, kubanga waliwo ssaddaaka eya buli mwaka eneeweewbwayo ku lw'ennyumba ye yonna.'

⁷Bw'anaakuddamu nti, 'Kirungi,' olwo nno omuweereza wo anaaba mirembe. Nayosi bw'anaanyiiga, kale onootogeera nti amaliridde okunkola akabi.

⁸Noolwekyo beera wa kisa eri omuweereza wo, kubanga wakola endagaano n'omuweereza wo mu maaso ga MUKAMA. Naye oba nnina omusango, gw'oba onzita. Lwaki ompaayo eri kitaawo?"

⁹Yonasaani n'ayogera nti, "Tekiribaawo! Singa nnali ntegedde nga kitange amaliridde okukukola akabi, sandikubuulidde?"

¹⁰Awo Dawudi n'amubuuza nti, "Ani anantegeeza, kitaawo ng'akuzzeemu n'obusungu?"

¹¹Yonasaani n'amugamba nti, "Jjangu tulage mu nnimiro." Awo bombi ne balaga mu nnimiro.

¹²Awo Yonasaani n'agamba Dawudi nti, "MUKAMA, Katonda wa Isirayiri, abeere mujulirwa waffe; nzija kugezaako okumatiza kitange enkya oba okwosa enkya ku ssaawa nga zino. Bw'anaaba nga takuliiko nsonga, kiki ekinandobera okukumanyisa?

¹³Naye kitange bw'anaaba ng'amaliridde okukukola akabi, kale MUKAMA ankole bw'atyo, n'okusingawo, bwe siikutegeeze ne nkusindika ogende weekweke. MUKAMA abeere naawe, nga bw'abadde ne kitange.

¹⁴Bwe nnaaba omulamu, ondage ekisa kya MUKAMA ekitakoma, ennaku zonna ez'obulamu bwange, nneme okuttibwa,

¹⁵tokendeezanga ku kisa so tolekangayo kulaga bwesigwa eri ennyumba yange, MUKAMA ne bw'alizikiriza buli mulabe wa Dawudi ku nsi."

¹⁶Awo Yonasaani n'akola endagaano n'ennyumba ya Dawudi ng'agamba nti, "MUKAMA abonereze abalabe ba Dawudi."

¹⁷Yonasaani n'alayiza Dawudi nate okukakasa ekirayiro kye, olw'okwagala kwe yamwagala kubanga yamwagala nga bwe yali yeeyagala.

¹⁸Yonasaani n'agamba Dawudi nti, "Enkya mbaga ey'okujuukirirako omwezi nga gubonese, naye tunaakusaalirwa, kijja kutegeerekeka nti tolliwo, kubanga ekifo kyo kinaaba kyereere.

¹⁹Okwosa enkya, obudde nga bunaatera okuziba, genda mu kifo mwe weekweka luli, ebizibu bino bwe byatandika, obeere awali ejinja Ezeri.

²⁰Nnaalasa obusaale busatu ku mabbali gaalyo, ng'ateeba ssabbaawa.

²¹N'olvannyuma nzija kutuma omulenzi nga mugamba nti, 'Genda onoonye obusaale.' Bwe naamugamba nti, 'Laba, obusaale buli ku luuyi gy'oli, buleete,' kale onojja, kubanga MUKAMA nga bw'ali omulamu, onoolama, era tewaabewo kabi.

²²Naye bwe nnaagamba omulenzi nti, 'Laba, obusaale buli mu maaso,' kale onoogenda, kubanga olwo MUKAMA ng'akugambye ogende.

²³Era ne ku bigambo bye twayogerako, MUKAMA abeere naffe ennaku zonna."

²⁴Awo Dawudi ne yeekweka mu nnimiro. Embaga ey'okujuukirirako omwezi nga gubonese bwe yatuuka, kabaka n'atuula okulya.

²⁵N'atuula mu kifo kye ekya bulijo okumpi n'ekisenge okwolekera Yonasaani. Abuneeri n'atuula okuliraana Sawulo, naye ekifo kya Dawudi kyali kyereere.

²⁶Sawulo n'atabaako kyayogera ku lunaku olwo, kubanga yallowooza nti, "Waliwo ekituuse ku Dawudi ne kimufuula atali mulongoofu; ddala si mulongoofu."

²⁷Olunaku olwaddirira, omwezi nga gumaze okuboneka, ekifo kya Dawudi ne kisigala nga kyereere. Awo Sawulo n'abuuza mutabani we Yonasaani nti, "Kiki ekyalobedde mutabani wa Yese okujja ku kijjulo, olunaku lwa jjo newaakubadde leero?"

²⁸Yonasaani n'addamu nti, "Dawudi yanneyegayiridde mukkirize agende e Besirekemu,

²⁹ng'ayogera nti, 'Nzikiriza njende kubanga ennyumba yaffe balina ssaddaaka ey'okuwaayo mu kibuga, ne muganda wange yandagidde mbeere yo. Kale nno obanga ndabye ekisa mu maaso go, nzikiriza njende ndabe baganda bange.' Kyeyavudde tabeerawo ku mmeeza ya kabaka."

³⁰Awo Sawulo n'annyiigira nnyo Yonasaani, n'amugamba nti, "Ggwe omwana w'omukazi omukyamu era omujeemu! Olowooza sikitanyi nga weekobaana ne mutabani wa Yese okweleetako okuswala, n'okukwasa maama wo eyakuzaala ensonyi?

³¹Mutabani wa Yese ng'akyali mulamu ku nsi, tolinywezebwaa ggwe newaakubadde obwakabaka bwo. Kaakano mutumye omundeetere, kubanga ateekwa okufa."

³²Awo Yonasaani n'addamu kitaawe Sawulo nti, "Kiki ekimugwanyiza okuttibwa? Akoze ki?"

³³Naye Sawulo n'amukasuukirira effumu amutte. Awo Yonasaani we yategeerera nga kitaawe amaliridde okutta Dawudi.

³⁴Yonasaani n'asituka ku mmeeza mu busungu obungi, era n'atalya mmere ku lunaku olwokubiri olw'omwezi, kubanga yanakuwalira ekikolwa kya kitaawe eky'obuswavu eri Dawudi.

³⁵Ku makya Yonasaani n'alaga mu nnimiro okusisinkana Dawudi, nga bwe baali balagaanye. Yalina akalenzi ke yagenda nako,

³⁶n'akagamba nti, "Dduka onoonye obusaale bwe nnaalasa." Akalenzi bwe kaali nga kadduka, Yonasaani n'alasa akasaale mu maaso gaako ne kamusookayo.

³⁷Awo akalenzi bwe kaatuuka mu kifo akasaale we kaali kagudde, Yonasaani n'akakoowoola ng'agamba nti, "Akasaale tekali mu maasoko?"

³⁸N'akangula ku ddoboozi, n'amugamba nti, "Yanguwa, genda mangu, tolwawo." Akalenzi ne kakima akasaale, ne kakomawo eri mukama waako.

³⁹Naye akalenzi ne katabaako kye kategeera. Yonasaani ne Dawudi bokka be baamanya enteekateeka eyo.

⁴⁰Awo Yonasaani n'akwasa akalenzi ebyokulwanyisa bye, n'akagamba nti, "Genda, obizzeeyo mu kibuga."

⁴¹Akalenzi bwe kaamala okugenda, Dawudi n'avaayo mu kifo eky'obukiikaddyo, n'agwa wansi mu maaso ga Yonasaani n'amuvuunamira emirundi esatu. Ne bagwanjana mu bifuba ne bakaaba, naye Dawudi ye yasinga okukaaba.

⁴²Awo Yonasaani n'agamba Dawudi nti, "Genda mirembe, kubanga fembi twelayirira omukwano mu linnya lya MUKAMA nga twogera nti, 'MUKAMA ye mujulirwa wakati wo nange, ne wakati w'ezzadde lyo n'ezzadde lyange emirembe gyonna.'" Dawudi n'agenda, ne Yonasaani n'addayo mu kibuga.

1 Samwiri 21

Dawudi ng'ali e Nobu

¹Dawudi n'agenda e Nobu eri Akimereki kabona. Akimereki n'ajja ng'akankana okusisinkana Dawudi, n'amubuuza nti, "Lwaki oli wekka? Tewali muntu mulala ali wamu naawe?"

²Dawudi n'addamu Akimereki kabona nti, "Kabaka alina ensonga gye yantumye, n'aŋjamba nti, 'Tewaba n'omu amanya ku nsonga eno, era n'ebiragiro bye nkuwadde.' Abasajja bange mbagambye we banansisinkana.

³Kale nno kiki ky'olina wo? Mpaayo emigaati etaano, oba kyonna ky'olinawo."

⁴Kabona n'addamu Dawudi nti, "Sirinaawo migatti gya bulijjo okuggyako emigaati egyatukuzibwa, wabula nga abasajja bo beetukuza era nga beekuumye obuteetaba na bakazi."

⁵Dawudi n'amugamba nti, "Abakazi tebabeera naffe, era bulijjo bwe kitera okuba bwe tugenda ku mulimu. Emibiri gy'abasajja giba mitukuvu ne bwe baba ku ŋnjendo eza bulijjo. Kale obanga tутera okwekuuma, olowooza leero emibiri gyabwe tegisinga nnyo kuba mitukuvu?"

⁶Awo kabona n'amuwa emigaati egyatukuzibwa kubanga tewaaliwo migatti mirala wabula emigaati eg'Okulaga egaggibwanga mu maaso ga MUKAMA, buli lunaku nga giwoze, egibuguma ne gissibwawo mu kifo kya gyo.

⁷ Ku lunaku olwo omu ku bawereera ba Sawulo eyayitbwanga Dowegi Omwedomu, era nga ye mukulu w'abasumba ba Sawulo, yali asigadde mu maaso ga MUKAMA okutukuzibwa.

⁸Dawudi n'abuuza Akimereki nti, "Tolinaawo ffumu newaakubadde ekitala awo? Ssaayise na kitala kyange newaakubadde ekyokulwanyisa n'ekimu, kubanga omulimu kabaka gwe yantumye gwabaddde gwa kukolerawo."

⁹Kabona n'amuddamu nti, "Ekitala kya Goliyaasi Omufirisuuti gwe wattira mu kiwonvu Era, weekiri wano; kisabikiddwa mu lugoye emabega w'ekkanzu ey'obwakabona eyitibwa efodi. Bw'oba ng'okyetaaga, kitwale. Tewaliwo kitala kirala wabula ekyo." Dawudi n'ayogera nti, "Tewali kikyenka; kimpe."

Dawudi Addukira e Gaasi

¹⁰ Ku lunaku olwo Dawudi n'adduka Sawulo n'agenda eri Akisi kabaka w'e Gaasi.

¹¹Naye abawereera ba Akisi ne bamugamba nti, "Oyo si ye Dawudi kabaka w'ensi? Si gwe bayimbako nga bazina, nga boogera nti, " 'Sawulo asse enkumi ze ne Dawudi emitwalo gye?" "

¹²Dawudi n'akuumma ebigambo ebyo mu mutima gwe, era n'atya nnyo Akisi kabaka w'e Gaasi.

¹³Kyeyava yeefuala omulalu mu maaso gaabwe, n'aba ng'agudde eddalu, n'awandiika ebitategeerekeka ku wankaaki, nga bw'akulukusa amalusu ku birevu bye.

¹⁴Akisi n'agamba abawereera be nti, "Mulabe! Omusajja mulalu! Lwaki mumundeetedde?

¹⁵Mbuliddwa abalalu, n'okuleeta ne mundeetera omusajja ono okukola ebifaanana bwe biti mu maaso gange? Omusajja ono asaana okuggya mu nnyumba yange?"

1 Samwiri 22

Dawudi ng'ali Adulamu n'e Mizupe

¹Dawudi n'ava e Gaasi, n'addukira mu mpuku Adulamu. Baganda be n'ennyumba ya kitaawe bwe baakiwulira nti ali eyo, ne baserengeta okumusisinkana.

²N'abo bonna abaali abanaku, n'abaalina abababanja, n'abaali beetamiddwa, nga si bamativu, ne bakuñjaanira gy'ali, n'afuuka omukulembeze waabwe; abantu ng'ebikumi bina abaali naye.

³Dawudi n'avaayo n'agenda e Mizupe mu Mowaabu, n'agamba kabaka wa Mowaabu nti, "Nkusaba okkirize kitange ne mmange babeere naawe okutuusa bwe ndimanya Katonda ky'ayagala okunkolera."

⁴N'abaleka ne kabaka wa Mowaabu, ne babeera naye ebbanga lyonna Dawudi lye yabeera mu kifo ekayo.

⁵ Naye nnabbi Gaadi n'alabula Dawudi nti, "Tobeera mu kifo ekayo, vaamu ogende mu nsi ya Yuda." Awo Dawudi n'avaayo n'agenda mu kibira Keresi.

Sawulo Atta Bakabona b'e Nobu

⁶ Sawulo n'awulira nti Dawudi n'abasajja be bazuuliddwa. Sawulo yali atudde wansi w'omumyulimu ku kasazi e Gibeal ng'akutte effumu, nga n'abaserikale be bayimiridde okumwetooloola.

⁷ Awo Sawulo n'abagamba nti, "Mumpulirize mmwe Ababenyamini. Mutabani wa Yeso alibawa ennimiro n'ennimiro ez'emizabbibu? Mulowooza alibafuula abaduumizi b'enkumi n'abaduumizi b'ekikumi?

⁸Kyemuvudde mundyamu olukwe mwenna? Tewali n'omu ku mmwe eyantegeesa mutabani wange ng'akola endagaano ne mutabani wa Yeso. Tewali n'omu ku mmwe afaayo okuntegeesa nga mutabani wange awagira omuweereza wange okunteega, nga bw'akoze leero."

⁹ Naye Dowegi Omwedomu eyali ayimiridde awamu n'abaserikale ba Sawulo n'ayogera nti, "Nalaba mutabani wa Yeso ng'agenda eri Akimereki mutabani wa Akitubu e Nobu.

¹⁰Akimereki yamubuuliza eri MUKAMA, era n'amuwa n'ebikozesebwa n'ekitala kya Goliyaasi Omufirisuuti."

¹¹Awo kabaka n'atunya kabona Akimereki mutabani wa Akitubu n'ennyumba ya kitaawe yonna, bakabona abaali e Nobu, bona ne bajja eri kabaka.

¹²Sawulo n'ayogera nti, "Wuliriza kaakano, mutabani wa Akitubu." N'addamu nti, "Mpuliriza mukama wange."

¹³ Sawulo n'amubuuza nti, "Lwaki weekobaana ne mutabani wa Yeso, n'omuwa emigaati n'ekitala, n'omubuuliza n'eri Katonda, alyoke, anteege angolokokerekko, nga bw'akoze leero?"

¹⁴ Awo Akimereki n'addamu kabaka nti, "Ani ku baddu bo bona eyenkana Dawudi, mukoddomi wa kabaka, omuduumizi wo ow'oku ntikko aduumira ekibinja ekikukuma, era assibwamu ennyo ekitiibwa mu nnyumba yo?

¹⁵Olowooza nti ku lunaku olwo gwe gwali omulundi ogusooka okumubuuliza eri Katonda? Nedda! Kabaka aleme okuvunaana omuweereza wo newaakubadde omuntu yenna ow'omu nnyumba ya kitange, kubanga omuweereza wo talina n'ekimu ky'amanyi ku nsonge eyo."

¹⁶Naye kabaka n'ayogera nti, "Mazima tooleme kufa, ggwe Akimereki, n'ennyumba ya kitaawo yonna."

¹⁷ Awo kabaka n'alagira abaserikale abaali bamuyimiridde okumpi, nti, "Mutte bakabona ba MUKAMA, kubanga nabo bassa kimu ne Dawudi. Baategeera ng'adduka, naye ne batantegheeza." Naye ne wataba n'omu ku baserikale ba kabaka eyayanjanga okugolola omukono gwe okutta bakabona ba MUKAMA.

¹⁸ Awo kabaka n'alyoka alagira Dowegi nti, "Ggwe bakkeeko obatte." Awo Dowegi Omwedomu n'abakkako n'abatta, era olunaku olwo n'atta abasajja kinaana mu bataano abaayambalanga ekkanzu ey'obwakabona eza bafuta.

¹⁹ N'atta n'ekitala abatuuze bona ab'e Nobu, abasajja, n'abakazi, n'abaana abatoototo, n'abaana abawere, era n'ente, n'endogoyi, n'endiga ebyali mu kibuga kya bakabona.

²⁰ Naye Abiyasaali omu ku batabani ba Akimerek, muzzukulu wa Akitubu n'awona n'addukira eri Dawudi.

²¹ Abiyasaali n'ategeeza Dawudi nga Sawulo bwe yali asse bakabona ba MUKAMA.

²² Awo Dawudi n'agamba Abiyasaali nti, "Namanya ku lunaku olwo, Dowegi Omwedomu bwe yaliyo, nga ddala alibuulira Sawulo. Omusango gwange kubanga nze naleetera ennyumba ya kitaawo yonna okuttibwa.

²³ Sigala nange, totya, kubanga omusajja anoonya obulamu bwo anoonya n'obwange. Oija kuba bulungi ng'oli wamu nange."

1 Samwiri 23

Dawudi Awonya Keyira

¹ Awo Dawudi bwe yategeezebwa nti, "Laba, Abafirisuuti balwana ne Keyira, era banyagulula amawuuliro,"

² ne yeebuuza ku MUKAMA nti, "Njende nnumbe Abafirisuuti abo?" MUKAMA n'amuddamu nti, "Genda olumbe Abafirisuuti owonye Keyira."

³ Naye abasajja ba Dawudi ne bamugamba nti, "Wano mu Yuda tuli mu ntiisa. Naye ate bwe tuligenda e Keyira okulwanyisa Abafirisuuti, kiriba kitya?"

⁴ Dawudi n'addayo nate okwebuuza ku MUKAMA. MUKAMA n'amuddamu nti, "Golokoka oserengete e Keyira, kubanga njenda kuwaayo Abafirisuuti mu mukono gwo."

⁵ Awo Dawudi n'abasajja be ne balaga e Keyira, ne balwana n'Abafirisuuti, ne batwala ente zaabwe, era ne batta bangi ku bo. Dawudi n'awonya abatuuze b'e Keyira.

⁶ Mu biro ebyo Abiyasaali mutabani wa Akimerek bwe yaddukira eri Dawudi e Keyira, yagenda ne kkanzu ey'obwakabona eyitibwa efodi.

Sawulo Ayingga Dawudi

⁷Sawulo n'ategeeezebwa nti Dawudi agenze e Keyira, n'ayogera nti, "Katonda awaddeyo Dawudi mu mukono gwange, kubanga Dawudi yesibiddeyo, bw'ayingidde mu kibuga ekiriko wankaaki ow'emitayimbwa."

⁸Awo Sawulo n'akunjaanya amaggye ge gonna okweteekerateekera olutalo, n'aserengeta e Keyira okuzingiza Dawudi ne basajja be.

⁹Dawudi n'ategeera nga Sawulo ateekateeka okumukola akabi, n'agamba Abiyasaali kabona nti, "Leeta ekkanzu ey'obwakabona eyitibwa efodi wano."

¹⁰Awo Dawudi n'ayogera nti, "Ayi MUKAMA Katonda wa Isirayiri, omuweereza wo awuliridde ddala Sawulo bw'ateekateeka okujja okusaanyaawo ekibuga Keyira ku lwange.

¹¹Abatuuze b'e Keyira balimpaayo gy'ali? Era Sawulo anaaserengeta n'ajja, ng'omuweereza wo bw'awulidde? Ayi MUKAMA, Katonda wa Isirayiri, nkwegayiridde, tegeesa omuweereza wo." MUKAMA n'amugamba nti, "Aliserengeta."

¹²Dawudi n'addamu n'abuuza nti, "Abasajja b'e Keyira balimpaayo nze n'abasajja bange eri Sawulo?" MUKAMA n'amuddamu nti, "Balibawaayo gy'ali."

¹³Awo Dawudi n'abasajja be, abawera nga lukaaga ne bava e Keyira, ne batambulatambulanga wano ne wali nga tebalina kifo kyankalakkalira. Sawulo bwe yategeeezebwa nga Dawudi adduse okuva mu Keyira, n'atagendayo.

¹⁴Dawudi n'abeera mu bifo eby'eddungu, mu nsi ey'ensozi mu ddungu ery'e Zifu. Sawulo n'anoonyanga Dawudi buli lunaku, naye Katonda n'atamuwaayo mu mukono gwe.

¹⁵Dawudi ng'ali mu ddungu ery'e Zifu mu kibira ky'e Kolesi, n'ategeera nga Sawulo amunoonya okumutta.

¹⁶Awo Yonasaani mutabani wa Sawulo n'agenda eri Dawudi mu kibira, Kolesi, okumugumya mu MUKAMA.

¹⁷N'amugamba nti, "Totya, kubanga kitange Sawulo talikukola kabi n'akamu. Gwe oliba kabaka wa Isirayiri, nze ne mbeera omumyuka wo, era n'ekyo kitange akimanyi."

¹⁸Awo bombi ne bakola endagaano mu maaso ga MUKAMA, n'olvannyuma Yonasaani n'addayo ewuwe, Dawudi n'asigala mu kibira.

¹⁹Awo ab'e Zifu ne bambuka eri Sawulo e Gibeal ne bamutegeeza nti, "Okimanyi nga Dawudi yeekwese mu ffe mu kibira ky'e Kolesi, ku lusozi Kakira oluli ku luuyi olw'obukiikaddyo obwa Yesimoni?

²⁰Kaakano, ayi kabaka, serengeta mu bbanga lyonna ly'onoosiima, tujja kumuwaayo gy'oli."

- ²¹ Sawulo n'abaddamu nti, "MUKAMA abawe omukisa, olw'okunkwatirwa ekisa.
- ²² Mugende mwetyongere okwetegereza, mumanye, mulabe n'ebifo gy'atera okutambulira, n'abamulabayo, kubanga bantegeeza nti mujagujagu nnyo.
- ²³ Noolwekyo munooonye mu bifo mwe yeekweka munkomezeewo amawulire amakakafu. Bw'anaabeera mu kitundu ekyo eky'ensi nnaagenda nammwe munooonye mu bika byonna ebya Yuda."
- ²⁴ Awo ne bagolokoka ne bakulemberamu Sawulo ne bagenda e Zifu. Mu biro ebyo Dawudi n'abasajja be baali mu ddungu ery'e Mawoni mu Alaba ku luuyi olw'obukiikaddyo obwa Yesimoni.
- ²⁵ Awo Sawulo n'abasajja be ne bagenda okumunoonya. Dawudi n'akiwulira, kyeyava aserengeta awali olwazi mu ddungu ery'e Mawoni n'abeera eyo. Sawulo bwe yakiwulira n'agenda mu ddungu ery'e Mawoni okumunoonya.
- ²⁶ Sawulo n'ayambukira ku luuyi olumu olw'olusozi, Dawudi ne basajja be ne bambukira ku luuyi olulala, nga banguwa okudduka Sawulo. Naye Sawulo ne basajja be bwe baali nga banaatera okuzingiza Dawudi n'abasajja be,
- ²⁷ ne wajja omubaka eri Sawulo ng'agamba nti, "Yanguwako! Abafirisuuti balumbye ensi."
- ²⁸ Awo Sawulo n'alekayo okunoonya Dawudi, n'agenda okulwanyisa Abafirisuuti. Ekifo ekyo kyekyava kituumibwa Serakammalekosi.
- ²⁹ Awo Dawudi n'avaayo n'agenda n'abeera mu bifo ebya Engedi.

1 Samwiri 24

Dawudi Asaasira Sawulo n'atamutta

- ¹ Awo Sawulo bwe yakomawo ng'ava okugoba Abafirisuuti, ne bamutegeeza nti, "Dawudi ali mu ddungu erya Engedi."
- ² Sawulo n'alonda abasajja enkumi ssatu okuva mu Isirayiri yenna, n'agenda nabo okunoonya Dawudi n'abasajja be, ku luuyi olw'enjazi embulabuzi gye Zaabeeranga.
- ³ Sawulo n'atuuka okumpi n'awaali ebisibo by'endiga ebyali ku mabbali g'ekkubo, n'alaba empuku, n'ayingira omwo okuwummulako. Dawudi n'abasajja be baali mu mpuku omwo mu bifo ebikomererayo.
- ⁴ Awo abasajja ba Dawudi ne bamugamba nti, "Luno lwe lunaku MUKAMA lwe yayogerako bwe yagamba nti, 'Ndiwaayo omulabe wo mu mukono gwo, omukole nga bw'osiima.'" Dawudi n'asooba mpola n'asala ku kirenge ky'ekyambalo kya Sawulo.

⁵ Naye oluvannyuma Dawudi n'awulira okulumirizibwa mu mutima olw'okusala ku kirenge ky'ekyambalo kya Sawulo.

⁶ N'agamba abasajja be nti, "Kikafuuwe, nze okukola mukama wange ekintu ekifaanana bwe kityo, MUKAMA gwe yafukako amafuta, wadde okumugololerako omukono, kubanga MUKAMA yamufukako amafuta."

⁷ N'ebigambo ebyo Dawudi n'aziyiza abasajja be n'atabakkiriza kulumba Sawulo. Awo Sawulo n'ava mu mpuku, n'agenda.

⁸ Oluvannyuma, Dawudi naye n'afuluma empuku, n'akoowoola Sawulo ng'ayogera nti, "Mukama wange kabaka!" Awo Sawulo n'akyuka n'atunula emabega, Dawudi n'avuunama n'akka wansi ne yeeyala ku ttaka.

⁹ Dawudi n'agamba Sawulo nti, "Lwaki owuliriza ejnjambo z'abantu aboogera nti, 'Dawudi amaliridde okukukola akabi?'

¹⁰ Leero okirabye n'amaaso go, MUKAMA bw'akumpadde mu mukono gwange ng'oli mu mpuku. Wabaddewo ababadde banneegayirira nkutte, naye ne sibawuliriza. Nagambye nti, 'Sijja kugolola mukono gwange ku mukama wange, kubanga MUKAMA yamufukako amafuta.'

¹¹ Kitange laba, akatundu ke naggye ku kirenge ky'ekyambalo kyo. Nasaze busazi ku kyambalo kyo naye ne sikutta. Kaakano kitegeere era okimanye nga sikusobyanga newaakubadde okukujeemera. Sinnakusobya newaakubadde ng'onjigganya okunzita.

¹² MUKAMA alamule wakati wange naawe. MUKAMA akusasule ng'ebikolwa ebibi byonna by'onkoze bwe biri, naye nze siriyimusa mukono gwange ku ggwe.

¹³ Ng'olugero olw'ab'edda bwe baalugera nti, 'Mu babi mwe muva akabi,' kyendiva sikuyimusiza mukono gwange.

¹⁴ Kabaka wa Isirayiri ajjiridde ani? Ani gw'oyigganya? Mbwa nfu oba nkukunyi?

¹⁵ MUKAMA atulamule, asalewo wakati wo nange. MUKAMA atunuulire ensonga yange andokole mu mukono gwo."

¹⁶ Awo Dawudi bwe yamala okwogera ebigambo ebyo, Sawulo n'abuuza nti, "Eryo ddoboozi lyo, Dawudi mutabani wange?" Sawulo n'akuba ebiwoobe.

¹⁷ N'agamba Dawudi nti, "Gwe oli mutuukirivu okunsinga, kubanga onsasudde bulungi, newaakubadde nga nze nkuyisizza bubi.

¹⁸ Leero ontegeezenza bw'onkoze obulungi, bw'otanzise ate nga MUKAMA yampaddeyo mu mukono gwo.

¹⁹ Omuntu bw'asiinjaana omulabe we, ayinza okumuganya okugenda nga tamutuusizzaako bisago? Kale MUKAMA akusasule bulungi olw'ekikolwa ky'onkoze leero.

²⁰Kaakano ntegeeredde ddala ng'onoobeera kabaka, era n'obwakabaka bwa Isirayiri bulinywezebwa mu mukono gwo.

²¹Kale nno ndayirira eri MUKAMA, nga tolizikiriza bazzukulu bange newaakubadde okusaanyaawo erinnya lyange mu nnyumba ya kitange."

²²Awo Dawudi n'alayirira Sawulo. Sawulo n'addayo ewuwe, naye Dawudi ne basajja be ne baddayo mu kifo gye baali beekwese.

1 Samwiri 25

Dawudi, Nabali ne Abbigayiri

¹Awo Samwiri n'afa, Isirayiri yenna ne bakunjaana okumukungubagira. Ne bamuziika ewuwe e Laama. Awo Dawudi n'avaayo n'aserengeta mu ddungu Palani.

²Mu biro ebyo waaliwo omusajja omugagga ennyo mu Mawoni eyalina eby'obugagga e Kalumeeri. Yalina endiga enkumi ssatu n'embuzi lukumi. Byali biseera bya kusala byoya eby'endiga ze, e Kalumeeri.

³Erinnya ly'omusajja ye yali Nabali, ne mukyala we nga ye Abbigayiri. Yali mukyala mutegeevu era nga mulungi, nga bw'omutunuulira alabika bulungi, naye bba Omukalebu, nga wa kkabyo kyokka nga mukalabakalaba mu mirimu gye.

⁴Nabali yali ng'asala ebyoya by'endiga ze, Dawudi n'akiwulira.

⁵Dawudi n'atuma abavubuka kkumi, n'abagamba nti, "Mwambuke e Kalumeeri eri Nabali mumulamuse mu linnya lyange.

⁶Mumugambe nti, Emirembe gibeere ku ggwe n'eniyumba yo, ne ku bintu byo byonna.

⁷"Mpulira nti ekiseera eky'okusala ebyoya by'endiga kituuse. Abasumba bo bwe baabeeranga awamu naffe, tetwabayisanga bubi, era n'ebbanga lyonna lye baamala e Kalumeeri tewali na kimu ku bintu byabwe ekyabula.

⁸Buuza abaweereza bo, be bajulirwa. Noolwekyo abavubuka bange balabe ekisa mu maaso go kubanga bazze mu kiseera eky'okukwatiramu embaga. Nkusaba obawe kyonna ky'olinawo, oweerezeeko ne mutabani wo Dawudi."

⁹Awo abasajja ba Dawudi bwe baatuuka, ne bawa Nabali obubaka obwo mu linnya lya Dawudi, ne balindirira.

¹⁰Nabali n'addamu abaweereza ba Dawudi nti, "Dawudi oyo ye ani? Mutabani wa Yeso oyo ye ani? Ennaku zino abaweereza bangi badduka ku bakama baabwe.

¹¹Nnyinza ntya okuddira emigaati gyange, n'amazzi, n'ennyama bye ntekeddetekkedde abasajja bange abasala ebyoya ne mbiwa be sirina kye mbamanyiiko?"

¹²Awo abasajja ba Dawudi ne bakyuka ne baddayo ne bamutegeeza buli kigambo nga bwe bategeezebbwaa.

¹³Dawudi n'agamba abasajja be nti, "Mwesibe buli muntu ekitala kye!" Buli omu ku bo ne yeesiba ekitala kye, ne Dawudi ne yeesiba ekikye, abasajja nga bikumi bina ne bayambuka ne Dawudi, ebikumi bibiri ne basigala nga bakuumma eby'okukozesa.

¹⁴Omúku baddu ba Nabali n'agamba Abbigayiri mukyala wa Nabali nti, "Dawudi yatuma ababaka ng'ali mu ddungu okulamusa mukama waffe naye n'abavuma;

¹⁵ate nga abasajja abo baali ba kisa nnyo gye tuli, era tebalina kabi ke baatukola newakubadde okubuza ekintu n'ekimu ku bintu byaffe bwe twali mu ddungu nabo.

¹⁶Baaberanga ng'ekisenge okutwetooloola emisana n'ekiro, ekiseera kyonna kye twamala nabo nga tulunda endiga.

¹⁷Kaakano kifumiitirizeeko, olabe ky'oyinza okukola, kubanga akabi kajjidde mukama waffe n'ennyumba ye yonna. Musajja atabuulirirwa."

¹⁸Awo amangwago Abbigayiri n'ayanguwa n'addiria emigaati ebikumi bibiri, n'ebita bibiri ebya wayini, n'ennyama ey'endiga ttaano ennongoose obulungi, n'ebigero bitaano eby'ejjaano ensiike, n'ebitole kikumi eby'ezabbibu enkalu, n'ebitole ebikumi bibiri eby'ettiini, n'abiteeka ku ndogoyi.

¹⁹N'agamba abaweereza be nti, "Munkulemberemu, nange nzija." Naye n'atabuulirako bba Nabali.

²⁰Awo bwe yali yeebagadde endogoyi ye, n'ayita kumpi n'olusozi nga lumukweka. N'asisinkana Dawudi n'abasajja be nabo nga baserengeta okumwolekera.

²¹Dawudi yali yakamala okwogera nti, "Nakuumira bwereere ebintu byonna eby'omusajja ono bwe byali mu ddungu ne wataba na kimu ekyabula; bw'atyo bw'ansasudde, obubi olw'obulungi.

²²Kale Katonda akole bw'atyo abalabe ba Dawudi n'okukirawo, enkeera bwe wanaabaawo omusajja we n'omu anaasigala nga mulamu."

²³Awo Abbigayiri bwe yalengera Dawudi, n'ayanguwa okuva ku ndogoyi ye, n'avuunama mu maaso ga Dawudi.

²⁴N'agwa ku bigere bye n'ayogera nti, "Mukama wange omusango gubeere ku nze nzekka. Nkwegayiridde leka omuweereza wo ayogere naawe; wuliriza omuweereza wo ky'anaayogera.

²⁵Mukama wange aleme okussa omwoyo ku musajja omusirusiru oyo Nabali, kubanga n'erinnya lye litegeeza musirusiru, atambulira mu busirusiru bwe. Naye nze omuweereza wo, ssaalabye bavubuka mukama wange be watumye.

²⁶"Kale nno mukama wange, nga MUKAMA bw'ali omulamu, akubedde obutayiwa musaayi newaakubadde obutawalana ggwanga n'omukono gwo, era naawe bw'oli omulamu, abalabe bo, n'abo abakuyigganya bona mukama wange babeere nga Nabali.

²⁷Era n'ekirabo kino omuweereza wo ky'aleetedde mukama wange kiweebwe abavubuka abatambula ne mukama wange.

²⁸Nkwegayiridde osonyiwe ekyonoono kw'omuweereza wo, era MUKAMA talirema kuzimbira mukama wange obwakabaka obw'enkalakkalira, kubanga mukama wange alwana entalo za MUKAMA. Waleme okulabika ekikolwa ekikyamu kyonna mu ggwe ennaku zonna ez'obulamu bwo.

²⁹Ne bwe walibaawo omuntu yenna alikulumba okukuyigganya okutwala obulamu bwo, obulamu bwa mukama wange bukuumibwenga MUKAMA Katonda wo mu lulyo olw'abalamu. Naye obulamu bw'abalabe bo alibuvuumuula ng'ejjinja bwe liva mu nvuumuulo.

³⁰Awo MUKAMA bw'alikolera mukama wange ebirungi byonna bye yamusuubiza, era n'amufuula okuba omukulembeze wa Isirayiri,

³¹mukama wange talibeera na kulumirizibwa mu mutima olw'okuyiwa omusaayi awatali nsong, wadde okwewalanira eggwanga. Era MUKAMA bw'alikukolera ebirungi mukama wange, ojjukiranga omuweereza wo."

³²Awo Dawudi n'agamba Abbigayiri nti, "MUKAMA Katonda wa Isirayiri atenderezebwe, akutumye okujja okunsisinkana leero.

³³Akuwe omukisa oyo akubedde okusalawo obulungi, era akubedde okundabula obutayiwa musaayi leero n'obuteewalanira ggwanga.

³⁴Kubanga mazima ddala nga MUKAMA Katonda wa Isirayiri bw'ali omulamu, ambedde obutakukolako kabi, singa toyanguye kujja kunsisinkana, tewandibadde musajja n'omu owa Nabali eyandiwonyeewo, obudde we bwandikeeredde enky."

³⁵Awo Dawudi n'akkiriza okutwala Abbigayiri bye yaleeta, n'ayogera nti, "Genda ewuwo mirembe. Mpulidde ebigambo byo, era nzikkirizza okwegayirira kwo."

³⁶Awo Abbigayiri bwe yaddayo eri Nabali, n'amusanga ng'ali mu nnyumba, era ng'akoze embaga, ng'eya kabaka. Yali asanyuukiridde nnyo, era ng'atamidde, kyeyava tamunyega ku olwo, okutuusa enkeera.

³⁷Awo bwe bwakya, Nabali omwenge nga gumuweddeko, mukyala we n'amutegeeza ebigambo ebyo byonna, naye omutima gwe ne gukakanyala, ne guba ng'ejjinja.

³⁸Oluvannyuma lw'ennaku nga kkumi, Nabali n'afa ekikutuko.

³⁹Awo Dawudi bwe yawulira Nabali ng'afudde, n'ayogera nti, "MUKAMA yeebazibwe anwaniridde, Nabali olw'obubi bwe yankola. MUKAMA ambedde, era akuumye omuweereza we obutakola kikyamu, n'ateeka ebikolwa bya Nabali ebibi ku mutwe ggwe." Awo Dawudi n'atumira Abbigayiri, n'amusaba afuuke mukazi we ng'amusaba okumuwasa.

⁴⁰Abaweereza ba Dawudi ne bagenda e Kalumeeri ne bagamba Abbigayiri nti, "Dawudi atutumye tukutwale omufumbirwe."

⁴¹N'avuunama amaaso ge n'ayogera nti, "Laba omuweereza wo mwetefuteefu okunaazanga ebigere by'abaweereza ba mukama wange."

⁴²Awo Abbigayiri n'ayanguwa okwebagala endogoyi, ng'awerekeddwako abaweereza bataano, n'agenda n'ababaka ba Dawudi, n'amufumbirwa.

⁴³Dawudi yali awasizza ne Akinoamu ow'e Yezuleeri, era bombi ne baba bakyala be.

⁴⁴Kyokka Sawulo yali agabidde muwala we Mikali, eyali mukyala wa Dawudi, Paluti mutabani wa Layisi ow'e Galimu.

1 Samwiri 26

Dawudi Agaana Omulundi Ogwokubiri Okutta Sawulo

¹Awo ab'e Zifu ne bagenda eri Sawulo e Gibe ne bamugamba nti, "Olowooza nga Dawudi teyekwese ku lusozi Kakira, ku luuyi olw'ebuvanjuba olwolekera eddungu Yesimoni?"

²Awo Sawulo n'abasajja abolondemu enkumi ssatu aba Isirayiri, ne bagolokoka ne baserengeta mu ddungu ery'e Zifu, okunoonya Dawudi.

³Sawulo n'asiisira ku mabbali g'ekkubo ku lusozi Kakira okwolekera eddungu, naye Dawudi n'asigala mu ddungu. Awo bwe yalaba Sawulo ng'amugoberedde mu ddungu,

⁴n'atuma abakessi okukakasiza ddala obanga Sawulo yali atuuse.

⁵ Dawudi n'agolokoka n'agenda mu kifo Sawulo we yali asiisidde. N'alaba Sawulo ne Abuneeri mutabani wa Neeri omuduumizi w'eggye, we baali beebase. Sawulo yali yeebase wakati mu lusiisira, ng'eggye limwetoolodde.

⁶ Awo Dawudi n'abuuza Akimereki Omukiiti ne Abisaayi muganda wa Yowaabu, mutabani wa Zeruyiya nti, "Ani anaaserengeta nange, tugende mu lusiisira lwa Sawulo?" Abisaayi n'addamu nti, "Nze n'aserengeta naawe."

⁷ Awo Dawudi ne Abisaayi ne bagenda mu lusiisira ekiro, ne basanga Sawulo nga yeebase wakati mu lusiisira, effumu lye nga lisimbiddwa mu ttaka emitwetwe we. Abuneeri n'abaserikale baali beebase okumwetooloola.

⁸ Abisaayi n'agamba Dawudi nti, "Leero, Katonda awaddeyo omulabe wo mu mukono gwo. Kale nno mpa olukusa mmufumitire wansi awo n'effumu. Siimufumite gwakubiri."

⁹ Naye Dawudi n'addamu Abisaayi nti, "Tomuzikiriza, kubanga ani ayinza okugolola omukono gwe okutta oyo MUKAMA gwe yafukako amafuta, n'ataba na musango?

¹⁰ MUKAMA nga bw'ali omulamu, MUKAMA yennyini yali mukuba. Luliba lumu, olunaku lwe lulituuka n'afa, oba algenda mu lutalo n'azikiririra eyo.

¹¹ Kikafuuwe nze okugolola omukono gwange okutta oyo MUKAMA gwe yafukako amafuta. Naye ddira effumu n'eccupa ey'amazzi ebiri emitwetwe we obisitule tugende."

¹² Awo Dawudi n'aggyawo effumu n'eccupa ey'amazzi ebyali emitwetwe wa Sawulo ne bagenda. Tewali yabalaba newaakubadde okukitegeera, wadde okusisimuka, kubanga bona MUKAMA yali abeebasiza otulo tungi nnyo.

¹³ N'olvannyuma Dawudi n'asomoka n'agenda emitala, n'ayimirira walako ku ntikko ey'olusozi, nga wakati waabwe waliwo ekibangirizi kinene.

¹⁴ N'akoowoola egghe ne Abuneeri mutabani wa Neeri ng'ayogera nti, "Tonziremu gwe Abuneeri?" Abuneeri n'addamu nti, "Ggwe ani alangiriza kabaka?"

¹⁵ Awo Dawudi n'agamba Abuneeri nti, "Oli musajja muzira, si bwe kiri? Ani akwenkana mu Isirayiri? Kiki ekyakulobedde okukuma obulungi mukama wo kabaka? Kubanga waabaddewo omuntu eyazze okuzikiriza mukama wo kabaka.

¹⁶ Ekyo kye wakoze si kirungi. Nga MUKAMA bw'ali omulamu, ggwe n'abasajja bo musaana kufa, olw'obulagajjavu bwammwe, kubanga temwakuumye mukama wammwe, MUKAMA gwe yafukako amafuta. Mutunule mwetegereze; effumu lya kabaka n'eccupa ey'amazzi ebyabadde emitwetwe wa kabaka biri ludda wa?"

¹⁷ Sawulo n'ategeera nga ddoboozi lya Dawudi, n'abuuza nti, "Ye ggwe mutabani wange Dawudi?" Dawudi n'addamu nti, "Ye nze mukama wange kabaka."

¹⁸Dawudi n'amubuuza nti, "Lwaki oyigganya omuweereza wo? Nakola ki, era musango ki gwe nazza?"

¹⁹Kaakano nno, mukama wange kabaka wuliriza ebigambo by'omuweereza wo. Obanga MUKAMA ye yakusindise okunjigganya, akkirize ekiweebwayo. Naye bwe baba nga baana ba bantu, bakolimirwe mu maaso ga MUKAMA, kubanga leero bangobye nneme okugabana mu busika bwa MUKAMA nga bagamba nti, 'Genda oweereze bakatonda abalala.'

²⁰Kale nno omusaayi gwange guleme okuyiyibwa wansi ewala MUKAMA gy'atabeera. Kabaka wa Isirayiri avuddeyo okunoonya enkukunyi, ng'omuntu bwe yandiyizze enkwale mu nsozi."

²¹Awo Sawulo n'ayogera nti, "Nnyonoonye. Komawo mutabani wange Dawudi. Sigenda kuddamu kugezaako kukukolako kabi n'akamu, kubanga leero ondaze, obulamu bwange bwe buli obw'omuwendo mu maaso go. Laba neeyisizza ng'omusirusiru, era nnyonoonye ekiyitiridde."

²²Dawudi n'addamu nti, "Effumu lya kabaka liirino. Tuma omu ku bavubuka bo ajje aliddukire.

²³MUKAMA asasula buli muntu ng'obutuukirivu bwe n'obwesigwa bwe, bwe biri. MUKAMA yakuwaddeyo mu mukono gwange leero, naye ne sigolola mukono gwange ku oyo MUKAMA gwe yafukako amafuta.

²⁴Nga bwe mbaliridde obulamu bwo okuba obw'omuwendo leero, kale obulamu bwange bubeere bwa muwendo mu maaso ga MUKAMA, era andokole mu bizibu byonna."

²⁵Awo Sawulo n'addamu nti, "Oweebwe omukisa mutabani wange Dawudi. Olikola ebintu ebikulu bingi era oliraba omukisa mu byo." Awo Dawudi n'agenda amakubo ge, ne Sawulo ne yeddirayo ewuwe.

1 Samwiri 27

Dawudi Asenga mu Bafirisuuti

¹Dawudi n'afumiitiriza mu mutima gwe ng'agamba nti, "Luliba lumu Sawulo n'anzita. Ekisinga obulungi kwe kuddukira mu nsi y'Abafirisuuti. Awo nno Sawulo anaalekeraawo okunnoonyeza mu Isirayiri, era bwe ntyo bwe nzija okumuwona."

²Awo Dawudi n'abasajja lukaaga ne basitula ne bagenda eri kabaka Akisi mutabani wa Mawoki ow'e Gaasi.

³Dawudi n'abasajja be ne basenga mu Gaasi ewa Akisi, buli musajja ne nnyumba ye yonna, ne Dawudi n'abakyala be bombi, Akinoamu Omuyezuleeri ne Abbigayiri Omukalumeeri, nnamwandu wa Nabali.

⁴Awo Sawulo bwe yategeeezebwa nga Dawudi yaddukira e Gaasi n'alekeraawo okumunoonya.

⁵Awo Dawudi n'agamba Akisi nti, "Obanga ndabye ekisa mu maaso go, wabeewo ekifo ekiba kimpebwa mu kimu ku bibuga ebitonotono, ntuule eyo. Lwaki omuweereza wo abeera naawe mu kibuga ekikulu eky'obwakabaka?"

⁶Awo ku lunaku olwo, Akisi n'amuwa Zikulagi, era kyekyava kibeera ekibuga kya bakabaka ba Yuda, n'okutuusa leero.

⁷Dawudi n'abeera mu nsi ey'Abafirisuuti okumala omwaka gumu n'emyezi ena.

⁸Mu bbanga eryo, Dawudi n'abasajja be ne bambuka ne balumba Abagesuli, n'Abagiruzi, n'Abamaleki. Okuva edda n'edda abo be bantu abaabeeranga mu nsi eyo okuva e Suuli okutuuka e Misiri.

⁹Dawudi buli lwe yalumbanga ekitundu, teyalekangawo musajja newaakubadde omukazi, naye yatwalanga endiga, n'ente, endogoyi n'eñjamira, n'engoye; n'olvannyuma n'addayo eri Akisi.

¹⁰Awo Akisi yamubuuzanga nti, "Leero walumbye wa?" Dawudi yaddangamu nti, "Ebukiikaddyo obwa Yuda," oba nti, "Ebukiikaddyo obw'Abayerameeri," oba nti, "Ebukiikaddyo obw'Abakeeni."

¹¹Teyalekangawo musajja newaakubadde omukazi nga mulamu okubaleeta e Gaasi, kubanga yallowooza nti, "Bakyayinza okutuloopa, nga boogera nti, 'Dawudi akola kino na kino.'" Era eyo ye yali ng'empisa ye, ebbanga lyonna lye yabeera mu nsi ey'Abafirisuuti.

¹²Akisi ne yeesiga Dawudi, n'ayogera mu mutima gwe nti, "Alabika yeetamiddwa abantu be Abayisirayiri, kale kyanaava afuuka omuweereza wange emirembe gyonna."

1 Samwiri 28

Sawulo n'Omulabi w'e Endoli

¹Mu biro ebyo Abafirisuuti ne bakuñjaanya amaggye gaabwe okulwana ne Isirayiri. Akisi n'agamba Dawudi nti, "Kimanye nga ggwe ne basajja bo munaneegattako, tugende mu lutalo."

²Dawudi n'ayogera nti, "Olwo nno ojja kwerabirako omuweereza wo kyayinza okukola." Akisi n'addamu nti, "Weewaawo, nzija kukufuula omukuumi wange ow'oku lusegere ennaku zonna ez'obulamu bwange."

³Mu biro ebyo Samwiri yali amaze okufa, nga ne Isirayiri yenna bamukungubagidde, era nga yaggwa n'okuziikibwa mu kibuga ky'e Laama. Era Sawulo yali agobye abafumu n'abalogo okuva mu nsi.

⁴Awo Abafirisuuti ne bakuŋŋaana, ne basiisira e Sunemu, ate Sawulo ye n'akuŋŋaanya Abayisirayiri bona ne basiisira e Girubowa.

⁵Awo Sawulo bwe yalaba eggye ery'Abafirisuuti, n'atyā, emmeeme n'emutyemuka.

⁶Ne yeebuuza ku MUKAMA, naye MUKAMA n'atamwanukula mu birooto, newaakubadde mu kwolesebwa kwa Katonda eri bakabona oba okuyita mu bannabbi.

⁷Awo Sawulo n'agamba abawereza be nti, "Munnoonyezeeyo omukazi omufumu, njende mmwebuuzeeko." Ne bamugamba nti, "Waliwo ali Endoli."

⁸Awo Sawulo n'ayambala engoye ezitali za bwakabaka ne yeebuzaabuza n'alaga ew'omukazi, ye n'abasajja abalala babiri. N'ayogera nti, "Ndagula, ombuulize omwoyo era onyimusize gwe nnaayogera erinnya."

⁹Naye omukazi n'amugamba nti, "Omanyi bulungi Sawulo kye yakola, bwe yazikiriza era n'agoba abafumu n'abalogu mu nsi. Kale lwaki oteeka obulamu bwange mu katego n'oyagala okunzisa?"

¹⁰Sawulo n'amulayirira eri MUKAMA ng'agamba nti, "Amazima ddala, nga MUKAMA bw'ali omulamu, tolibonerezebwa olwa kino."

¹¹Awo omukazi n'amubuuza nti, "Ani gwe mba nkuyimusiza?" N'addamu nti, "Nyimusiza Samwiri."

¹²Omukazi bwe yalaba Samwiri, n'ayogerera waggulu, n'agamba Sawulo nti, "Lwaki onimbye? Gwe Sawulo!"

¹³Awo kabaka n'amugamba nti, "Totya. Kiki ky'olaba?" Omukazi n'addamu nti, "Ndaba omwoyo nga guyimuka okuva mu ttaka."

¹⁴Sawulo n'amubuuza nti, "Gufaanana ani?" N'addamu nti, "Omusajja omukadde nga yeebisseeko omunagiro y'avaayo." Awo Sawulo n'ategeera nga ye Samwiri, n'avuunama amaaso ge, ne yeeyala ku ttaka.

¹⁵Awo Samwiri n'agamba Sawulo nti, "Lwaki ontawanyizza n'onnyimusa?" Sawulo n'addamu nti, "Nnina ennaku nnyingi nnyo, kubanga Abafirisuuti bannwanyisa, ate Katonda anvuddeko. Takyanziramu ng'ayita mu bannabbi newaakubadde mu birooto. Kyenvudde nkukoowoola ombuulire eky'okukola."

¹⁶Samwiri n'amubuuza nti, "Ombuuliza ki, MUKAMA ng'amaze okukuvaako n'okufuuka omulabe wo?

¹⁷MUKAMA atuukirizza kye yayogera ng'ayita mu nze. MUKAMA akuggyeecko obwakabaka bwo, n'abuwa omu ku baliraanwa bo, Dawudi.

¹⁸Kubanga tewagondera MUKAMA newaakubadde okutuukiriza bye yakulagira okukola Amaleki ng'amusunguwalidde, MUKAMA kyavudde akukola kino leero.

¹⁹MUKAMA alikuwaayo gwe n'Abayisirayiri eri Abafirisuuti, era enkyaa ggwe ne batabani bo munaaba nange eno gye ndi. Era MUKAMA anaawaayo eggye lya Isirayiri mu mukono gw'Abafirisuuti."

²⁰Awo Sawulo n'agwira ddala wansi ekigwo kya bugazi, ng'ajjudde okutya olw'ebigambo Samwiri bye yayogera. N'ataba na maanyi kubanga yali talina ky'alidde olunaku olwo lwonna n'ekiro ekyakeesa olunaku olwo.

²¹Awo omukazi n'asembera okumpi ne Sawulo, n'alaba ng'atidde, n'amugamba nti, "Laba, omuweereza wo akugondedde, ne mpaayo obulamu bwange, ne nkola kye wansabye.

²²Kaakano nkwegayiridee owulirize omuweereza wo, okkirize nkuwe ku mmere olyeko ofune amaanyi okukwata olugendo lwo."

²³N'agaana n'ayogera nti, "Sijja kulya." Naye abasajja be ne bayamba omukazi mu kukubiriza Sawulo okulya, n'abawuliriza. N'ayimuka mu ttaka n'atuula ku kitanda.

²⁴Omukazi yalinawo ennyana ensava, n'agiteekateeka mu bwangu. N'ateekateeka n'enjaano, n'akanda obuwunga, n'afumba emigaati egitali mizimbulukuse.

²⁵N'alyoka abiteeka mu maaso ga Sawulo ne basajja be, ne balya. N'olvannyuma ekiryo ekyo ne bagolokoka ne beetambulira.

1 Samwiri 29

Abaferisuuti Bagaana Dawudi Okubeegattako mu Lutalo

¹Awo Abafirisuuti ne bakunjyaanyiza eggye lyabwe lyonna e Afeki, n'Abayisirayiri ne basiisira ku luzzi oluli mu Yezuleeri.

²Abakulembeze b'Abafirisuuti bwe baali nga bakumba n'ebibinja byabwe eby'ebikumi n'ebi'enkumi, Dawudi n'abasajja be ne babagoberera nga babavaako emabega wamu ne Akisi.

³Abaduumizi b'Abafirisuuti ne babuuza nti, "Ate bano Abaebbulaniya bakola ki wano?" Akisi n'abaddamu nti, "Oyo ye Dawudi, omukungu wa Sawulo kabaka wa Isirayiri. Abadde nange okusukka mu mwaka, era okuva ku lunaku lwe yayabulira Sawulo n'okutuusa leero, sirabanga nsonga ku ye."

⁴Naye abaduumizi b'Abafirisuuti ne bamunyigira ne bamugamba nti, "Sindika omusajja oyo addeyo mu kifo kye wamuwa. Tasaanye kugenda naffe mu lutalo, si kulwa nga atwefuukira wakati mu lutalo. Olowooza waliwo ekkubo eddala erisinga lino okumusobozesa okufuna okuganja eri mukama we bw'amutwalira emitwe gy'abasajja baffe?

⁵Oyo si ye Dawudi gwe baayimbangako, nga bazina, nga boogera nti, “‘Sawulo asse enkumi ze, ne Dawudi asse emitwalo gye?’”

⁶Awo Akisi n’ayita Dawudi n’amugamba nti, “Amazima ddala nga MUKAMA bw’ali omulamu, obadde mwesimbu era eyeesigibwa, era nandyagadde oweerereze wamu nange mu magye. Okuva ku lunaku lwe wajja gye ndi n’okutuusa leero sirabanga bukyamu mu ggwe, naye abakulu tebakusiimye.

⁷Noolwekyo ddayo kaakano, ogende mirembe oleme okwemulugunyizisa abafuzi b’Abafirisuuti.”

⁸Awo Dawudi n’amubuuza nti, “Naye nkoze ki? Nsonga ki gy’olabje etali nnungi mu muweereza wo okuva ku lunaku lwe natandika okukuweereza n’okutuusa leero? Kiki ekindobera okugenda okulwanyisa abalabe ba mukama wange kabaka?”

⁹Akisi n’amuddamu nti, “Mmanyi nga tolina nsonga n’emu mu maaso gange nga malayika wa Katonda, naye abaduumizi b’Abafirisuuti bagambye nti, ‘Tosaana kugenda naffe mu lutalo.’

¹⁰Kaakano obudde bwe bunaakya onoogolokoka ggwe wamu n’abasajja ba mukama wo, be wazze nabo, mugende ku makya obudde nga bwakalaba.”

¹¹Awo Dawudi ne basajja be ne bagolokoka ku makya nnyo ne baddayo mu nsi ey’Abafirisuuti, Abafirisuuti bo ne bambuka e Yezuleeri.

1 Samwiri 30

Dawudi Azikiriza Abamaleki

¹Awo Dawudi ne basajja be bwe baatuuka e Zikulagi, nga wayiseewo ennaku ssatu, baasanga Abamaleki baalumbye obukiikaddyo mu ddungu; ne Zikulagi, baali bakikumyeko omuliro.

²Baali batutte abakazi nga basibe, ne bona abaalimu, abato era n’abakulu. Tewaali n’omu ku bo gwe batta, wabula okubawamba ne babatwala.

³Dawudi ne basajja be bwe baatuuka mu kibuga, baasanga kyokebbwa, era abakazi baabwe n’abaana baabwe aboobulenzi n’aboobuwala nga nabo bawambiddwa.

⁴Awo Dawudi ne bona abaali awamu naye ne bakaaba nnyo okutuusa lwe baggweeramu ddala agakaaba.

⁵Abakyala ba Dawudi bombi, Akinoamu Omuyezuleeri ne Abbigayiri nnamwandu wa Nabali Omukalumeeri, nabo baali babatutte.

⁶Mu kiseera ekyo Dawudi n’anakuwala nnyo kubanga basajja be baali boogera ku kumukuba amayinja, buli omu nga munyiikaavu mu mutima olwa batabani

baabwe ne bawala baabwe abaali batwalibbwa. Naye Dawudi n'afuna amaanyi okuva eri MUKAMA Katonda we.

⁷ Dawudi n'agamba Abiyasaali kabona, mutabani wa Akimereki nti, "Ndeetera ekkanzu ey'obwakabona eyitibwa efodi." Awo Abiyasaali n'agimuleetera.

⁸ Dawudi ne yeebuuza ku MUKAMA nti, "Ngoberere ekinja ekyo, nnaabawkwata?" N'amuddamu nti, "Bagoberere, kubanga oija kusobola okununula abawambe bona."

⁹ Awo Dawudi n'abasajja lukaaga ne batuuka ku kagga Besoli, abamu ku bo ne basigala awo,

¹⁰ kubanga ebikumi bibiri ku bo baali bakooye nnyo n'okuyinza nga tebayinza kusomoka kagga. Naye Dawudi n'abalala ebikumi bina ne banyikira okugoberera omulabe, ebikumi ebibiri ne basigala ku kagga nga bakooye.

¹¹ Ne basanga Omumisiri mu nnimiro ne bamuleeta eri Dawudi. Ne bamuwa amazzi okunywa, n'emmere n'alya,

¹² ne bamuwa ekitole eky'ettiini n'ebirimba bibiri eby'ezabbibu enkalu. N'alya n'addamu amaanyi, kubanga yali amaze ennaku ssatu, emisana n'ekiro nga talidde ku mmere wadde okunywa ku mazzi.

¹³ Awo Dawudi n'amubuuza nti, "Oli w'ani era ova wa?" N'addamu nti, "Ndi Mumisiri, omuweereza w'Omwamaleki. Mmaze ennaku ssatu nga ndi mulwadde muyi era mukama wange kyeyavudde ansuula wano.

¹⁴ Twalumba obukiikaddyo obw'Abakeresi, n'ensi ya Yuda n'obukiikaddyo obwa Kalebu, ne twokya ne Zikulagi."

¹⁵ Dawudi n'amubuuza nti, "Oyinza okuntwala eri ekinja ekyo ekyalumbye?" N'amuddamu nti, "Ssooka ondayirire Katonda, nga tolinzita so tolimpayo eri mukama wange, ndyoke nkuserengese gye bali."

¹⁶ N'abakulembera n'abatwalayo, era laba, nga basaasaanye mu kifo kyonna ku ttale, nga balya, nga banywa, nga bazina olw'omunyago omunene gwe baggya mu nsi ey'Abafirisuuti, ne mu nsi ya Yuda.

¹⁷ Dawudi n'atandika okubatta okuva akawungeezi okutuusa enkeera, ne watawonawo n'omu, okuggyako abavubuka ebikumi bina abeebagala ejnjamira ne badduka.

¹⁸ Dawudi n'akomyawo byonna Abamaleki bye baali banyaze, ng'omwo mwe muli ne bakyala be ababiri abaali bawambiddwa.

¹⁹ Ne watabaawo na kimu ekyabula, oba kitono oba kinene, newaakubadde abaana aboobulenzi oba aboobuwala, n'omunyago na buli kintu kyonna ku ebyo bye baatwala. Dawudi yakomyawo buli kimu.

²⁰N'atwala ebisibo byonna n'amagana gonna, abasajja be ne babikulembeza ebisolo ebirala byonna, nga bwe boogera nti, "Guno gwe munyago gwa Dawudi."

²¹Awo Dawudi n'addayo eri bali ebikumi ebibiri abaali bakooye ennyo, nga tebayinza kumugoberera, abaasigala ku kagga Besoli. Ne bavaayo okusisinkana Dawudi n'abantu abaali naye, n'abalamusa.

²²Naye abamu ku basajja abaagenda ne Dawudi abaali ababi n'abalala nga bafujjo, ne boogera nti, "Tetujja kugabana nabo munyago gwe twasuuzizza omulabe, kubanga tebaagenze naffe. Wabula, buli musaja addizibwe mukazi we n'abaana be agende."

²³Naye Dawudi n'addamu nti, "Nedda baganda bange, temusaana kukola bwe mutyo, MUKAMA by'atuwadde. Atukuumye era n'awaayo mu mukono gwaffe ekibinja ekyatulumbye.

²⁴Ani anaabawuliriza ku nsonga eyo? Omuntu eyagenze mu lutalo ky'anaagabana, kinaaba kyekimu n'eky'oli eyasigadde ng'akuma ebantu ebikozesebwa. Bonna banaagabana kyenkanyi."

²⁵Ekyo Dawudi n'akifuula etteeka n'empisa mu Isirayiri ne leero.

²⁶Awo Dawudi bwe yatuuka mu Zikulagi, n'aweereza abakadde ba Yuda ebimu ku bintu eby'omunyago, abaali mikwano gye, ng'agamba nti, "Ekyo kirabo okuva ku munyago gw'abalabe ba MUKAMA."

²⁷Yakiweereza ab'e Beseri, abaali mu bukiikaddyo mu Lamosi n'ab'e Yattiri,

²⁸ab'e Aloweri, n'e Sifumosi, n'e Esutemoa;

²⁹n'e Lakali, n'abaali mu bibuga eby'Abayerameeri, ne mu bibuga eby'Abakeeni;

³⁰n'e Kolumna, n'e Kolasani n'e Asaki;

³¹n'e Kebbulooni, ne bona abaali mu bifo byonna Dawudi ne basajja be gye baatambuliranga.

1 Samwiri 31

Okufa kwa Sawulo

¹Mu kiseera kyekimu Abafirisuuti baali balwana ne Isirayiri. Abasajja ba Isirayiri ne badduka Abafirisuuti, bangi ku bo ne battibwa ku Lusozi Girubowa.

²Abafirisuuti ne banyikira okugoberera Sawulo ne batabani be, era ne batta Yonasaani, ne Abinadaabu ne Malukisuwa.

³Olutalo Sawulo ne lumuba bubi, abalasi ab'obusaale ne bamuzingiza era ne bamuleetako ekiwundi kinene.

⁴Awo Sawulo n'agamba eyasitulanga ebyokulwanyisa bye nti, "Sowola ekitala kyo onfumite, abatali bakomole abo baleme okunkwata ne bambonyaabonya

n'okunswaza ne banswaza." Naye eyasitulanga ebyokulwanyisa bye n'atya era n'agaana okukikola. Sawulo kyeyava asowola ekitala kye ne yetta.

⁵Awo eyasitulanga ebyokulwanyisa bye bwe yalaba nga Sawulo afudde, n'asowola ekitala kye naye ne yetta.

⁶Sawulo bw'atyo, ne batabani be abasatu, n'eyasitulanga ebyokulwanyisa bye ne basajja be bona ne bafa ku lunaku olwo lwe lumu.

⁷Awo Abayisirayiri abaali emitala w'ekiwonvu n'abo abaali emitala wa Yoludaani bwe baalaba ng'eggye lya Isirayiri lidduse nga ne Sawulo ne batabani be abasatu bafudde, ne balekulira ebibuga byabwe ne badduka. Abafirisuuti ne bajja ne babibeeramu.

⁸Enkeera, Abafirisuuti bwe baagenda okwambula emirambo, baasanga Sawulo ne batabani be abasatu bafiiridde ku lusozi Girubowa.

⁹Ne batemako omutwe gwe ne bamwambulamu ebyokulwanyisa bye, ne batuma ababaka mu nsi yonna ey'Abafirisuuti okulangirira mu ssabo lyabwe, n'eri abantu baabwe.

¹⁰Ne bateeka ebyokulwanyisa bye mu ssabo lya Baasutoleesi, n'ekiwudduwuddu kye ne bakiwanika ku bbugwe ow'e Besusani.

¹¹Naye abatuuze b'e Yabesugireyaadi bwe baawulira Abafirisuuti kye baali bakoze Sawulo,

¹²abasajja abazira bona ne bagolokoka, ne batambula ekiro kyonna ne bagenda e Besusani. Ne bawanulayo omulambo gwa Sawulo, n'egya batabani be ku bbugwe ow'e Besusani, ne bagitwala e Yabesi ne bagyokera eyo.

¹³N'olvannyuma ne baddira amagumba gaabwe ne bagaziika wansi w'omumyulimu e Yabesi, ne basiibira ennaku musanvu.

2 Samwiri

2 Samwiri 1

Dawudi ateggeezebwa Okufa kwa Sawulo

¹ Oluvannyuma lw'okufa kwa Sawulo, Dawudi n'agenda n'abeera e Zikulagi n'amalayo ennakku bbiri, ng'amaze okusaanyaawo Abamaleki.

² Awo olwatuuka ku lunaku olwokusatu, ne wajja omusajja ng'ava mu lusiisira lwa Sawulo, ng'ayuzizza ebyambalo bye, nga ne mu mutwe gwe mulimu enfuuufu. Bwe yatuuka awali Dawudi, n'avuunama ng'amuwa ekitiibwa.

³ Dawudi n'amubuuza nti, "Ova wa?" N'amuddamu nti, "Ndi kaawonawo okuva mu lusiisira lwa Isirayiri."

⁴ Dawudi n'ayogera nti, "Ntegeeza ebyabaddewo." N'ayogera nti, "abantu badduse mu lutalo, era bangi ku bo bafudde. Sawulo ne Yonasaani mutabani we nabo bafudde."

⁵ Awo Dawudi n'agamba omuvubuka eyamutegeeza amawulire ago nti, "Otegedde otya nga Sawulo ne mutabani we Yonasaani nabo bafudde?"

⁶ Omuvubuka n'amugamba nti, "Bwe nnali awo ku lusozi Girubowa, ne ndaba Sawulo nga yeesigamye ku ffumu lye era n'amagaali n'abeebagala embalaasi eby'omulabe nga bamucocca.

⁷ Awo bwe yakyusa amaaso ge n'andaba, n'ankowoola, ne muddamu nti, 'Nkukolere ki?'

⁸ "N'ambuuza nti, 'Ggwe ani?' "Ne muddamu nti, 'Ndi Mwamaleki.'

⁹ "N'alyoka aŋŋamba nti, 'Nnyimirirako onzite! Ndi mu masajjanzira ag'okufa newaakubadde nga ndabika ng'akyalimu obulamu.'

¹⁰ "Kyennava tuyimirirako ne mutta, kubanga n'ategeera nga takyalamye. Ne ntawala engule eyali ku mutwe gwe n'ekikomo ekyali ku mukono gwe, era biibino mbireetedde mukama wange."

¹¹ Awo Dawudi n'abasajja bona be yali nabo, ne bayuza ebyambalo byabwe.

¹² Ne bakaaba, ne bakungubaga ne basiiba okutuussa akawungeezi ku lwa Sawulo ne Yonasaani mutabani we; ne ku lw'eggye lya MUKAMA, ne ku lw'ennyumba ya Isirayiri; kubanga bona baali bafudde n'ekitala.

¹³ Awo Dawudi n'agamba omuvubuka eyamutegeeza amawulire ago nti, "Ova wa?" N'addamu nti, "Ndi mwana wa munnaggwanga, Omwameleki."

¹⁴ Dawudi n'amugamba nti, "Lwaki tewatya kuzikiriza omuntu MUKAMA gwe yafukako amafuta?"

¹⁵Awo Dawudi n'ayita omu ku basajja be, n'amugamba nti, "Mutte." N'amufumita n'amutta.

¹⁶Dawudi n'amugamba nti, "Omusaayi gwo gubeere ku mutwe gwo, kubanga akamwa ko ye mujulirwa ng'oyogera nti, 'Nnatta oyo MUKAMA gwe yafukako amafuta.' "

Dawudi Akungubagira Sawulo ne Yonasaani

¹⁷ Dawudi n'akungubagira Sawulo ne Yonasaani mutabani we,

¹⁸n'alaigira abantu ba Isirayiri bayigirizibwe oluyimba olw'omutego olw'okukungubaga olwawandiikibwa mu kitabo kya Yasali. Olugamba nti,

¹⁹ "Ekitiibwa kyo, ayi Isirayiri, kifiiridde ku nsozi zo! Ab'amaanyi nga bagudde!

²⁰ "Temukyogeranga mu Gaasi, temukyatuliranga mu nguudo za Asukulooni, abawala b'Abafirisuuti baleme okusanyuka, abawala b'abatali bakomole baleme okujaguza.

²¹ "Mmwe ensozi za Girubowa, muleme okugwibwako omusulo newaakubadde enkuba, newaakubadde ennimiro okumeramu ensigo. Kubanga eyo engabo ey'ab'amaanyi gye yanyoomerwa n'engabo ya Sawulo, gye yafuukira ng'etafukibwangako mafuta.

²² Omutego gwa Yonasaani tegwaddanga mabega n'ekitala kya Sawulo tekyaddanga nga kikalu, olw'okubuna omusaayi gw'abattibwanga, n'amasavu g'ab'amaanyi.

²³ "Sawulo ne Yonasaani, mu bulamu bwabwe baali baagalwa nnyo era baali baakisa, ne mu kufa tebaayawukana. Baali bangu okusinga empungu, era baali b'amaanyi n'okusinga empologoma.

²⁴ "Mmwe abawala ba Isirayiri, mukaabire Sawulo, eyabambaza engage ezinekaaneka ez'okwesiima, eyabambaza ebyambalo ebyatonebwa ne zaabu.

²⁵ "Ab'amaanyi nga bagudde wakati mu lutalo! Yonasaani attiddwa ku nsozi zammwe.

²⁶ Nnumwa nnyo ku lwa muganda wange Yonasaani, kubanga wali mukwano gwange ddala. Okwagala kwe wanjagala kwali kwa kitalo, nga kwa kitalo n'okusinga okw'abakyala.

²⁷ "Ab'amaanyi nga bagudde, n'ebyokulwanyisa nga bizikiridde!"

2 Samwiri 2

Dawudi Afukibwako Amafuta Okuba Kabaka wa Yuda

¹ Oluvannyuma lw'ebyo Dawudi ne yeebuuza ku MUKAMA nti, "Nyambuke mu kimu ku bibuga bya Yuda?" MUKAMA n'amuddamu nti, "Yambuka." N'abuuza nate nti, "Njende mu kiruswa?" MUKAMA n'amuddamu nti, "E Kebbulooni."

² Awo Dawudi n'agenda eyo ne bakyala be bombi, Akinoamu Omuyezuleeri ne Abbigayiri nnamwandum wa Nabali ow'e Kalumeeri.

³ Dawudi n'atwala n'abasajja abaali naye, buli muntu n'amaka ge, ne basenga mu Kebbulooni ne mu byalo byakyo.

⁴ Awo abantu ba Yuda ne bajja mu Kebbulooni, ne bafukirako eyo Dawudi amafuta okuba kabaka w'ennyumba ya Yuda. Dawudi n'ategeezebwa nti abantu ab'e Yabesugireyaadi be baaziika Sawulo,

⁵ n'abatumira ababaka okubagamba nti, "MUKAMA abawe omukisa olw'ekisa n'ekitiibwa bye mwalaga Sawulo mukama wammwe ne mumuziika.

⁶ MUKAMA abalage ekisa n'okwagala, nange ndibalaga ky'ekimu olw'ekyo kye mukoze.

⁷ Noolwekyo kyemunaava mubeera ab'amaanyi era abavumu, kubanga oluvannyuma olw'okufa kwa Sawulo mukama wammwe, ennyumba ya Yuda enfuseeko amafuta okubeera kabaka waabwe."

Olutalo Olwabaawo Wakati w'Ennyumba ya Dawudi n'Ennyumba ya Sawulo

⁸ Mu biro ebyo, Abuneeri mutabani wa Neeri, omuduumizi w'eggye lya Sawulo, n'atwala Isubosesi mutabani wa Sawulo e Makanayimu.

⁹ N'amufuula kabaka w'e Gireyaadi, ow'Abasuuli, ow'e Yezuleeri, owa Efulayimu, owa Benyamini era owa Isirayiri yenna.

¹⁰ Isubosesi, mutabani wa Sawulo yali wa myaka amakumi ana we yatandika okufuga Isirayiri, era n'afugira emyaka ebiri. Naye ennyumba ya Yuda ne bagoberera Dawudi.

¹¹ Ebbanga Dawudi lye yabeerera kabaka mu Kebbulooni ng'afuga ennyumba ya Yuda lyali emyaka musanvu n'emyezi mukaaga.

¹² Abuneeri mutabani wa Neeri n'abasajja ba Isubosesi mutabani wa Sawulo, ne bava e Makanayimu ne bagenda e Gibyon.

¹³ Yowaabu mutabani wa Zeruyiya n'abasajja ba Dawudi ne bagenda okubasisinkana ku kidiba eky'e Gibyon. Ekibinja ekimu ne kituula ku luuyi olumu olw'ekidiba, n'ekirala ne kituula ku luuyi olulala.

¹⁴ Awo Abuneeri n'agamba Yowaabu nti, "Abamu ku basajja bagolokoke beegezeemu mu maaso gaffe." Yowaabu n'amuddamu nti, "Kale bagolokoke."

¹⁵Ne bagolokoka, kkumi na babiri ne babalibwa okuva ku ludda lwa Benyamini ne Isubosesi mutabani wa Sawulo, n'ababala kkumi na babiri okuva ku ludda lwa Dawudi.

¹⁶Buli omu n'akwatagana ne gwe yali atunuuliganye naye, ne banyolegana emitwe, ne bafumitigana amafumu, ne bagwira wamu. Era ekifo ekyo mu Gibyoni ne kituumibwa Kerukasu-Kazzulimu.

¹⁷Olutalo ne lweyongererera ddala, Abuneeri n'abasajja be ne bawangulwa abasajja ba Dawudi.

¹⁸Batabani ba Zeruyiya abasatu Yowaabu, Abisaayi, ne Asakeri baaliyo, era Asakeri yali muwenyusi wa misinde ng'empeewo ey'omu ttale.

¹⁹Asakeri n'agoba Abuneeri emisinde, obutatunula ku mukono ogwa ddyo wadde ogwa kkono.

²⁰Awo Abuneeri bwe yatinula emabega we, n'abuuza nti, "Ye ggwe Asakeri?" N'addamu nti, "Ye nze."

²¹Abuneeri n'amugamba nti, "Tunula ku mukono gwo ogwa ddyo oba ku mukono gwo ogwa kkono ogye ku omu ku bavubuka akuli okumpi ekyokulwanyisa kye." Naye Asakeri n'atalekaayo kumugoba.

²²Abuneeri n'addamu okumulabula ng'agamba nti, "Bw'oleka okungoba! Lwaki ondeetera okukutta? Muganda wo Yowaabu nnaamudda wa?"

²³Naye Asakeri ne yeeyongera bwewayongezi okumugoba; Abuneeri kwe kumufumita mu lubuto n'omuwunda gw'effumu, effumu ne liggukira mu mugongo, n'agwa wansi era n'afirawo.

²⁴Naye Yowaabu ne Abisaayi ne bagoba Abuneeri. Enjuba bwe yali eneetera okugwa, ne batuuka ku lusozi Amma, oluliraanye Giya mu kkubo ery'eddungu ery'e Gibyoni.

²⁵Awo abasajja b'e Benyamini ne beekola ekibinja kimu, ne badda ku luuyi lwa Abuneeri, ne bayimirira ku lusozi olumu.

²⁶Abuneeri n'akoowoola Yowaabu n'ayogera nti, "Ekitala kirirya ennaku zonna? Tolaba nti enkomemerero ya byonna buliba bukyayi bwereere? Kale kiki ekikulobera okulagira abantu bo balekeraawo okucocca baganda baabwe?"

²⁷Yowaabu n'addamu nti, "Katonda nga bw'ali omulamu, ne bwe watandikyogedde, obudde bwe bwandikeeredde ng'abasajja balekeddaawo okugoba baganda baabwe."

²⁸Awo Yowaabu n'afuuwa ekkondeere, abasajja bona ne bayimirira, ne balekeraawo okugoba Isirayiri, era n'okubalwanyisa.

²⁹ Ekiro ekyo kyonna Abuneeri n'abasajja be ne batambula ne bayita mu Alaba, ne basomoka Yoludaani, ne batambula mu kiseera eky'oku makya kyonna ne batuuka e Makanayimu.

³⁰ Awo Yowaabu n'addayo ng'alese okugoba Abuneeri, n'akuṇṇaanya abasajja be. Bwe baababala, ne basanga ng'abasajja kkumi na mwenda be baali bafudde, okwo nga tobaldideeko Asakeri.

³¹ Naye abasajja ba Dawudi baali basse Ababenyamini ebikumi bisatu mu nkaaga ku abo abaali ne Abuneeri.

³² Ne batwala omulambo gwa Asakeri ne bamuziika ku biggya bya kitaawe e Besirekemu. N'olvannyuma Yowaabu n'abasajja be ne batambula ekiro kyonna, ne batuuka e Kebbulooni enkeera.

2 Samwiri 3

¹ Awo ne wabangawo entalo wakati w'ennyumba ya Sawulo n'ennyumba ya Dawudi okumala ebbanga ddene. Dawudi n'akulaakulana, n'aba w'amaanyi, naye ennyumba ya Sawulo ne yeeyongeranga okunafuwa.

² Dawudi n'azaalirwa abaana aboobulenzi e Kebbulooni. Omuggulanda yali Amunoni eyazaalibwa Akinoamu Omuyezuleeri,

³ owookubiri yali Kireyaabu eyazaalibwa Abbigayiri nnamwandum wa Nabali Omukalumeeri, n'woookusatu yali Abusaalomu eyazaalibwa Maaka muwala wa Talumaayi kabaka w'e Gesuli;

⁴ n'woookuna yali Adoniya eyazaalibwa Kaggisi, n'owokutaano yali Sefatiya eyazaalibwa Abitali;

⁵ n'ow'omukaaga yali Isuleyamu, eyazaalibwa Egula mukyala wa Dawudi. Abo be baazaalirwa Dawudi mu Kebbulooni.

Abuneeri Asala Eddiiro

⁶ Entalo n'enkaayana nga zikyagenda mu maaso wakati w'ennyumba ya Sawulo n'ennyumba ya Dawudi, Abuneeri n'anyweza ekifo kye mu nnyumba ya Sawulo.

⁷ Sawulo yalina omuzaana erinnya lye Lizupa muwala wa Aya. Isubosesi n'abuuza Abuneeri nti, "Lwaki weetaba n'omuzaana wa kitange?"

⁸ Awo Abuneeri n'asunguwala nnyo olw'ekigambo Isubosesi kye yamugamba, n'amuddamu nti, "Nze mutwe gw'embwa ya Yuda? Mbadde wa kisa eri ennyumba ya kitaawo Sawulo, n'eri baganda be, ne mikwano gye, ne sibawaayo mu mukono gwa Dawudi. Kaakano onteekako omusango olw'omukazi oyo.

⁹ Katonda akole Abuneeri bw'atyo n'okukirawo, bwe siituukirize ekyo MUKAMA kye yalayirira Dawudi,

¹⁰okuggya obwakabaka ku nnyumba ya Sawulo, n'okunyweza entebe ey'obwakabaka eya Dawudi okufuga Isirayiri ne Yuda okuva ku Ddaani okutuuka e Beeruseba."

¹¹Isubosesi n'atajjaanga kwanukula Abuneeri kigambo kirala, olw'okumutya.

¹²Awo Abuneeri n'atumira Dawudi ababaka okumugamba nti, "Ensi y'ani? Kola endagaano nange, laba nnaafuula Isirayiri yonna okuba eyiyo."

¹³Dawudi n'ayogera nti, "Kirungi. Nzija okukola endagaano naawe. Naye ekintu kimu kye nkusaba. Tojja mu maaso gange okuggyako ng'oja ne Mikali muwala wa Sawulo, ng'oja okundaba."

¹⁴Awo Dawudi n'atumira Isubosesi mutabani wa Sawulo ababaka ng'agamba nti, "Mpa mukyala wange Mikali gwe nayogereza n'ebikuta ekikumi eby'Abafirisuuti."

¹⁵Amangwago Isubosesi n'alagira, bamuggye ku bba Palutiyeri mutabani wa Layisi.

¹⁶Naye bba we n'abagoberera, nga bw'akaaba okutuukira ddala, e Bakulimu. Abuneeri n'amugamba nti, "Ddayo eka. N'addayo."

¹⁷Abuneeri n'ateesa n'abakadde ba Isirayiri, n'abagamba nti, "Mumaze ebbanga nga mwagala okufuula Dawudi kabaka wammwe."

¹⁸Kaakano mukituukirize, kubanga MUKAMA yasuubiza Dawudi nti, 'Ndirokola abantu bange Isirayiri okuva mu mukono gw'Abafirisuuti ne mu mukono gw'abalabe baabwe bona, nga nkozesha omuddu wange Dawudi.'"

¹⁹Abuneeri n'agenda n'eri Ababenyamini n'ayogera nabo, n'olvannyuma n'agenda n'ategeeza Dawudi e Kebbulooni, ebyo byonna Isirayiri n'ennyumba ya Benyamini bye baasalawo okukola.

²⁰Awo Abuneeri n'agenda n'abasajja amakumi abiri ewa Dawudi e Kebbulooni, Dawudi n'abategekera embaga nnene.

²¹Abuneeri n'agamba Dawudi nti, "Ka njenderewo mukama wange Kabaka, nkunjjaanye Isirayiri yenna, bakole endagaano naawe, obafuge ng'omutima gwo bwe gunaasiima." Awo Dawudi n'asindika Abuneeri agende, n'agenda mirembe.

Yowaabu Atta Abuneeri

²²Awo abasajja ba Dawudi ne bakomawo ne Yowaabu, nga baleese omunyago munene ddala. Naye we baakomerawo nga Abuneeri takyali ne Dawudi e Kebbulooni, kubanga yali amusiibudde agende mirembe.

²³Yowaabu n'eggye lyonna bwe baatuuka, Yowaabu n'ategeezebwa nga Abuneeri mutabani wa Neeri bwe yazze eri kabaka, naye kabaka n'amusiibula, n'agenda mirembe.

²⁴Awo Yowaabu n'agenda eri kabaka n'amugamba nti, "Wakoze ki ekyo, okuleka Abuneeri n'agenda?

²⁵Okimanyi nga Abuneeri mutabani wa Neeri, yazze okukubuzaabuza, n'okuketta ennyingira yo n'enfuluma yo, ne byonna by'okola?"

²⁶Yowaabu n'ava mu maaso ga Dawudi, n'atuma ababaka okugoberera Abuneeri, era ne bamukomyawo okuva ku luzzi lwa Siira, naye Dawudi n'atakimanya.

²⁷Awo Abuneeri bwe yakomawo e Kebbulooni, Yowaabu n'amutwala ku bbali w'omulyango, ne yeefuula ng'ayogera naye mu kyama, n'amufumita mu lubuto n'afa. Ekyo Yowaabu y'akikola okumusasula olw'omusaayi gwa Asakeri muganda we.

²⁸Oluvannyuma Dawudi bwe yakiwulira, n'ayogera nti, "Nze n'obwakabaka bwange tetulivunaanibwa ennaku zonna mu maaso ga MUKAMA olw'omusaayi gwa Abuneeri mutabani wa Neeri.

²⁹Omusaayi gwe gubeerenga ku mutwe gwa Yowaabu ne ku nnyumba ya kitaawe, era mu nnyumba ya Yowaabu mulemenga okubulamu omuziku newaakubadde omugenge, newaakubadde omulema newaakubadde alifa n'ekitala, newaakubadde alibulwa emmere."

³⁰Yowaabu ne Abisaayi muganda we ne batta Abuneeri kubanga yatta muganda waabwe Asakeri mu lutalo e Gibyoni.

³¹Awo Dawudi n'agamba Yowaabu n'abantu bonaaba abaali naye nti, "Mwambale ebibukutu, mukungubagire mu maaso ga Abuneeri." Kabaka Dawudi yennyini n'atambulira emabega w'essanduuko omwali omulambo.

³²Abuneeri n'aziikibwa e Kebbulooni, kabaka n'akaaba n'eddoboozi ddene awamu n'abantu bonaaba ku ntaana ya Abuneeri.

³³Kabaka n'akungubagira Abuneeri, ng'agamba nti, "Abuneeri teyandifudde ng'omusirusiru bw'afa.

³⁴Emikono gyo tegyasibibwa, so n'ebigere byo tebyateekebwa mu masamba. Ng'omuntu bw'agwa mu maaso g'abo abatali batuukirivu, bwe wagwa bw'otyo." Abantu bonaaba ne bamukungubagira.

³⁵Oluvannyuma bonaaba ne bagezaako okuwaliriza Dawudi alye ku mmere ng'obudde bukyalaba, naye n'alayira ng'agamba nti, "Katonda ankole bw'atyo n'okukirawo, bwe nnaakomba ku mmere oba ku kintu kyonna, okutuusa enjuba ng'emaze okugwa."

³⁶Awo abantu bonaaba ne bakitegeera era ne kibasanyusa. Byonna kabaka bye yakolanga ne bisiimbwanga abantu.

³⁷Era ku lunaku olwo abantu bona ne Isirayiri yenna ne bategeera nga kabaka teyasiima kuttibwa kwa Abuneeri mutabani wa Neeri.

³⁸Awo kabaka n'agamba abantu be nti, "Temumanyi nga leero mu Isirayiri mufuddemu omukungu era omusajja omuzira?

³⁹Era leero, newaakubadde nga nze kabaka eyafukibwako amafuta, ndimunafu olw'abaana ba Zeruyiya abampitiriddeko obukakanyavu. MUKAMA asasule bw'atyo omukozi w'ebibi olw'ebikolwa bye!"

2 Samwiri 4

Isubosesi Attibwa

¹Awo Isubosesi mutabani wa Sawulo bwe yawulira Abuneeri ng'afiiridde e Kebbulooni, n'aggwaamu essuubi, ne Isirayiri yenna ne beeraliikirira.

²Mutabani wa Sawulo oyo yalina abasajja be babiri, bombi nga baduumizi ba bibinja, omu nga ye Baana, n'owokubiri nga ye Lekabu. Baali batabani ba Limmoni Omubeerosi ng'ava mu kika kya Benyamini, kubanga Beerosi kyabalibwanga okuba ekimu ki bitundu bya Benyamini,

³engeri abantu ab'e Beerosi bwe baddukira e Gittayimu, ne babeera eyo na guno gujwa.

⁴Yonasaani mutabani wa Sawulo yalina omwana owoobulenzi eyalemala ebigere. Yalina emyaka etaano egy'obukulu, amawulire agakwata ku kufa kwa Sawulo ne Yonasaani bwe gaasaasaanyizibwa okuva mu Yezuleeri. Naye eyamulabiriranga bwe yamusitula, ng'adduka okumuwonya, omwana n'agwa n'alemala. N'erinnya lye ye yali Mefibosesi.

⁵Awo Lekabu ne Baana batabani ba Limmoni Omubeerosi, ne balaga Isubosesi gye yabeeranga, ne batuuka mu ssaawa ez'etuntu, ne bamusanga ng'awummuddeko.

⁶Ne bagenda mu kisenge eky'omunda ne baba ng'abajja okukima enjaano, ne bamufumita mu lubuto, ne badduka.

⁷Bwe bayingira mu nnyumba, baamusanga agalamidde ku kitanda mu kisenge kye, ne bamufumita ne bamutta, ne bamusalako n'omutwe. Ne batwala omutwe gwe, ne batambula ekiro kyonna mu kkubo erya Alaba.

⁸Omutwe gwa Isubosesi ne bagutwalira Dawudi e Kebbulooni, ne bamugamba nti, "Omutwe gwa Isubosesi mutabani wa Sawulo omulabe wo, eyayagala okukutta, guuguno. Leero MUKAMA awalanye eggwanga lya mukama waffe kabaka ku Sawulo n'ezzadde lye."

⁹ Naye Dawudi n'addamu Lekabu ne muganda we Baana, batabani ba Limmoni Omubeerosi nti, "MUKAMA nga bw'ali omulamu, alokodde obulamu bwange mu kibi kyonna,

¹⁰ omuntu bwe yaŋŋamba nti, 'Sawulo afudde,' n'alowooza nti yali andetedde amawulire amalungi, namukwata ne muttira e Zikulagi, era eyo ye yali empeera ye olw'amawulire ge yaleeta.

¹¹ Mulowooza nga tekirisingawo eri abasajja ababi abattidde omusajja ataliiko musango mu nnyumba ye, ku kitanda kye, ne nvunaana omusaayi gwe ku mmwe era ne mbazikiriza okuva ku nsi?"

¹² Awo Dawudi n'alagira abavubuka be, okutta abasajja abo. Ne babasalako engalo n'ebigere ne bawanika ebiwuduwdudu okumpi n'ekidiba e Kebbulooni. Naye ne baddira omutwe gwa Isubosesi, ne baguziika mu ntaana ya Abuneeri e Kebbulooni.

2 Samwiri 5

Dawudi Afuuka Kabaka wa Isirayiri

¹ Ebika byonna ebya Isirayiri ne bigenda eri Dawudi e Kebbulooni, ne boogera nti, "Laba, tuli mubiri gwo era musaayi gwo.

² Mu biro eby'edda, Sawulo nga ye kabaka waffe, gwe wakulemberanga Isirayiri mu ntalo. Era MUKAMA yakwogerako nti, 'Olirunda abantu bange Isirayiri, era oliba mukulembeze waabwe.'

³ Awo abakadde bona aba Isirayiri bwe bajja eri kabaka e Kebbulooni, n'akola nabo endagaano e Kebbulooni mu maaso ga MUKAMA Katonda, era ne bafuka amafuta ku Dawudi okuba kabaka wa Isirayiri.

⁴ Dawudi we yatanulira okuba kabaka yalina emyaka amakumi asatu; n'afugira emyaka amakumi ana.

⁵ Mu Kebbulooni n'afugirayo Yuda emyaka musanvu n'ekitundu, ate mu Yerusaalemi n'afugiramu Isirayiri yenna ne Yuda emyaka asatu mu esatu.

Dawudi Awamba Yerusaalemi

⁶ Kabaka n'abasajja be ne boolekera Yerusaalemi okulwana n'Abayebusi abaabeeranga eyo. Abayebusi ne bagamba Dawudi nti, "Toliyingira muno, kubanga abazibe b'amaaso n'abalema balikulwanyisa ne bakulemesa;" nga balowooza nti Dawudi tayinza kukiyingira.

⁷ Naye Dawudi n'awamba ekigo kya Sayuuni, ky'ekibuga kya Dawudi.

⁸ Ku lunaku olwo Dawudi n'alagira nti, "Abanaagenda okutta Abayebusi, bayitire ku lusalosalo batte abazibe b'amaaso n'abalema, emmeeme ya Dawudi

b'ekyawa." Kyekyava kigambibwa nti, "Abazibe b'amaaso n'abalema tebaliyingira mu lubiri."

⁹Dawudi n'abeera mu kigo, n'akituumma Ekibuga kya Dawudi. N'azimba ekibuga okukyetooloola, n'akiteekako ne bbugwe.

¹⁰Dawudi ne yeeyongeranga okuba ow'amaanyi kubanga MUKAMA Katonda ow'Eggye yali wamu naye.

¹¹Awo kabaka Kiramu ow'e Ttuulo n'atuma ababaka ne batwala emivule, ne bagenda, n'abazimbi b'amayinja, n'ababazzi eri Dawudi okumuzimbira olubiri.

¹²Dawudi n'ategeera nga MUKAMA yali amunywezezza okuba kabaka wa Isirayiri, era ng'agulumizizza obwakabaka bwe olw'abantu ba MUKAMA Isirayiri.

¹³Dawudi bwe yava e Kebbulooni n'awasa abakyala abalala mu Yerusaalemi, abaana aboobulenzi n'aboobuwala ne bamuzaalirwa.

¹⁴Amannya g'abo abaamuzaalirwa mu Yerusaalemi gaali Sammuwa, ne Sobabu, ne Nasani, ne Sulemaani,

¹⁵ne Ibukali, ne Eriswa, ne Nefegi, ne Yafiya,

¹⁶ne Erisaama, ne Eriyada ne Erifereti.

Dawudi Awangula Abafirisuuti

¹⁷Awo Abafirisuuti bwe baawulira nga Dawudi afukiddwako amafuta okuba kabaka wa Isirayiri, bona ne bambuka okumunoonya, naye Dawudi n'akiwulira n'aserengeta mu kigo kye.

¹⁸Abafirisuuti baali bazze nga basaasaanye mu kiwonvu Lefayimu.

¹⁹Dawudi ne yeebuuza ku MUKAMA nti, "Njende nnumbe Abafirisuuti? Onoobagabula mu mukono gwange?" MUKAMA n'amuddamu nti, "Genda, kubanga nnaabagabula mu mukono gwo."

²⁰Awo Dawudi n'agenda e Baaluperazimu, era n'abawangula. N'ayogera nti, "MUKAMA abonerezza abalabe bange mu maaso gange, ng'embuyaga ez'amazzi bwe zita ne zikulukuta n'amaanyi." Era ekifo ekyo kyekyava kituumibwa Baaluperazimu.

²¹Abafirisuuti ne baleka eyo balubaale baabwe be beekolera, Dawudi n'abasajja be ne babatwala.

²²Abafirisuuti ne badda, ne basaasaana mu kiwonvu kya Lefayimu.

²³Awo Dawudi bwe yeebuuza ku MUKAMA, n'amuddamu nti, "Tobatabaalirawo, naye beetooloole, obalumbe ng'obafuluma mu maaso g'emitungunda.

²⁴Awo olunaatuuka bw'onoowulira abakumba ku masanso g'emitungunda, oyanguwe okulumba, kubanga ekyo kinaategeeza nti MUKAMA akukulembedde okuzikiriza eggye ly'Abafirisuuti."

²⁵Awo Dawudi n'akola nga MUKAMA bwe yamulagira, n'azikiriza Abafirisuuti okuva e Geba okutuuka e Gezeri.

2 Samwiri 6

Essanduuko Ereetebwa e Yerusaalemi

¹Dawudi n'akuinjaanya nate abasajja abaawera emitwalo esatu be yalonda mu Isirayiri.

²N'agolokoka n'agenda n'abantu bona abaali naye, okuva e Baale, Yuda, okuggyayo essanduuko ya Katonda eyitibwa Erinnya lya MUKAMA ow'Eggye atuula ku ntebe ye ey'obwakabaka wakati wa bakerubi.

³Ne bateeka essanduuko ya Katonda ku ggaali empya ne bagiggya mu nnyumba ya Abinadaabu eyali ku lusozi, Uzza ne Akiyo batabani be ne bagikulembera

⁴ng'essanduuko ya Katonda kweri, Akiyo ng'agikulembeddemu.

⁵Dawudi n'ennyumba yonna eya Isirayiri ne bajaguliza mu maaso ga MUKAMA n'amaanyi gaabwe gonna, nga bayimba ennyimba nga bakuba ennanga, n'entongooli, n'ebitaasa, n'ensaasi, n'ebirala.

⁶Awo bwe baatuuka mu gguuliro lya Nakoni, ente bwe zeesittala, Uzza n'agolola omukono gwe n'akwata ku ssanduuko ya Katonda.

⁷Obusungu bwa MUKAMA ne bubuubuukira ku Uzza olw'ekikolwa ekyo, Katonda n'amuttira awo okumpi n'essanduuko ya Katonda.

⁸Awo Dawudi n'anyiiga kubanga obusungu bwa MUKAMA bwagwa ku Uzza, n'atuma ekifo ekyo Peruzizza, ne leero.

⁹Olunaku olwo Dawudi n'atyia MUKAMA, n'ayogera nti, "Essanduuko ya MUKAMA eyinza etya okuleetebwa gye ndi?"

¹⁰Dawudi n'atayagala kutwala ssanduuko ya MUKAMA mu kibuga kya Dawudi, era n'asalawo okugitwala mu nnyumba ya Obededomu Omugitti.

¹¹Essanduuko ya MUKAMA n'ebeera mu nnyumba ya Obededomu Omugitti emyezi esatu, era MUKAMA n'amuwa omukisa ye n'ennyumba ye yonna.

¹²Awo Dawudi n'ategeeezebwa nti, "Ennyumba ya Obededomu n'ebintu bye byonna biweereddwa omukisa olw'essanduuko ya Katonda." Dawudi n'agenda n'aggayayo essanduuko ya Katonda mu nnyumba ya Obededomu n'agireeta mu kibuga kya Dawudi ng'ajaguza.

¹³Abaasitula essanduuko ya MUKAMA bwe baatambula ebigure mukaaga n'awaayo ente ennume n'ennyana ensava nga ssaddaaka.

¹⁴Dawudi ng'ayambadde olugoye olwa linena, n'azinira mu maaso ga MUKAMA n'amaanyi ge gonna.

¹⁵Dawudi n'ennyumba ya Isirayiri yonna ne baleeta essanduuko ya MUKAMA nga boogerera waggulu, era nga bafuuwa n'amakondeere.

¹⁶Awo essanduuko ya MUKAMA bwe yali ng'ereetebwa mu kibuga kya Dawudi, Mikali muwala wa Sawulo, ng'ali mu ddirisa, n'alengera kabaka Dawudi ng'abuuka, ng'azinira mu maaso ga MUKAMA, n'amunyooma.

¹⁷Ne baleeta essanduuko ya MUKAMA ne bagiteeka mu kifo kyayo mu weema Dawudi gye yali agisimbide, Dawudi n'awaayo ebiweebwayo ebyokebwa, n'ebiweebwayo olw'emirembe, mu maaso ga MUKAMA.

¹⁸Awo Dawudi bwe yamala okuwaayo ebiweebwayo ebyokebwa n'ebiweebwayo olw'emirembe, n'asabira abantu omukisa mu linnya lyia MUKAMA ow'eggye,

¹⁹buli muntu n'amugabula omugaati, n'ekiyungula ky'ennyama, n'ekitole eky'ezabbibu enkalu, abasajja n'abakyala. N'olvannyuma abantu bona ne baddayo ewaabwe.

²⁰Dawudi n'addayo ewuwe okusabira ab'omu nnyumba ye omukisa, Mikali muwala wa Sawulo n'agenda okumusisinkana n'ayogera nti, "Kabaka wa Isirayiri ayinza atya okweswaza bw'atyo, ne yejambulira mu maaso g'abawala abaweereza n'abaddu ng'omuntu atalina nsonyi?"

²¹Awo Dawudi n'agamba Mikali nti, "Nakikoledde mu maaso ga MUKAMA eyannonda okusinga kitaawo, n'ennyumba ye yonna okuba omukulembeze w'abantu ba MUKAMA, Isirayiri, era nzija kujagulizanga mu maaso ga MUKAMA.

²²Nzija kweyongererera ddala okweswaza, era sijja kuswala mu maaso gange, naye mu maaso g'abawala abaweereza b'oyogeddeko, nnaasibwangamu ekitiibwa."

²³Awo muwala wa Sawulo Mikali, n'abeera mugumba okutuusa olunaku lwe yafa.

2 Samwiri 7

Ekisuubizo kya Katonda eri Dawudi

¹Awo olwatuuka kabaka n'atereera mu lubiri lwe, MUKAMA n'amuwa okuwummula eri abalabe be bona abaamwetooloola.

²N'agamba Nasani nnabbi nti, "Laba ntudde mu lubiri olwazimbibwa n'emivule, naye essanduuko ya Katonda eri mu weema."

³Nasani n'addamu kabaka nti, "Genda okole ng'omutima gwo bwe gukugamba, kubanga MUKAMA ali wamu naawe."

⁴Ekiro ekijo ekigambo kya MUKAMA ne kijjira Nasani nti,

⁵"Genda otegeeze omuddu wange Dawudi nti, 'Bw'ati bw'ayogera MUKAMA nti, Gewe olinzimbira ennyumba ey'okubeeramu?

⁶Sibeeranga mu nnyumba okuva ku lunaku lwe naggya Abayisirayiri mu Misiri, ne leero. Ntambudde okuva mu kifo ekimu okudda mu kirala nga mbeera mu weema.

⁷Mu bifo byonna bye ntambudde n'Abayisirayiri bona, nnina ekigambo n'ekimu kye nagamba abafuzi baabwe be nalagira okukulembera abantu bange, Isirayiri nti, "Kiki ekibalobedde okunzimbira ennyumba ey'emivule?"'

⁸"Kaakano tegeeza omuddu wange Dawudi nti, 'Bw'ati bw'ayogera MUKAMA, ow'Eggye nti, "Nakuggya mu ddundiro gye walundiranga endiga ne nkufuula omukulembeze w'abantu bange Isirayiri.

⁹Mbadde naawe buli gy'ogenze, era nzikiririzza abalabe bo bona mu maaso go. Ndifuula erinnya lyo okuba ekkulu, ne liba ng'erimu ku g'abasajja ab'ekitiibwa ennyo mu nsi.

¹⁰Ndifunira abantu bange Isirayiri ekifo ekyabwe ku bwabwe, balemenga okutawanyizibwanga. Abantu ababi tebalibacocca nate, nga bwe baakolanga olubereberye,

¹¹okuva lwe nalonda abalamuzi okufuga abantu bange Isirayiri. Era ndikuwa ebiseera eby'emirembe abalabe bo baleme okukuyigganya. " "MUKAMA akugamba nti MUKAMA Katonda yennyini, alinyweza ennyumba yo.

¹²Ennaku zo bwe ziriggwaako, n'owummula ne bajajjaabo, ndikuza ezzadde lyo eririva munda yo likusikire, era ndinyweza obwakabaka bwe.

¹³Oyo yalizimbira Erinnya lyange ennyumba, era ndinyweza entebe ye ey'obwakabaka bwe ennaku zonna.

¹⁴Nnaabeeranga kitaawe, naye aliba mwana wange. Bw'anasobyanga nnaamukangavvulanga n'omuggo ogw'abantu n'enga ez'abantu.

¹⁵Naye okwagala kwange tekumuuvengako, nga bwe kwava ku Sawulo, gwe naggya mu maaso go.

¹⁶Ennyumba yo n'obwakabaka bwo birifuuka bya nkalakkalira ennaku zonna mu maaso gange, era entebe yo ey'obwakabaka erinywezebwba ennaku zonna." "

¹⁷Nasani n'ategeeza Dawudi ebigambo byonna eby'okubikkulirwa kwe.

Okusaba kwa Dawudi

¹⁸Awo kabaka Dawudi n'ayingira n'atuula mu maaso ga MUKAMA, n'ayogera nti, "Nze ani, Ayi MUKAMA Katonda, n'ennyumba yange kye ki, ggwe okuntuusa wano?

¹⁹Gy'obeera ekyo tekimala, Ayi MUKAMA Katonda, oyogedde ku bigenda okubaawo mu biro eby'omu maaso ku nnyumba ey'omuddu wo. Bw'otyo bw'okolagana n'omuntu, Ayi MUKAMA Katonda?

²⁰"Kiki ekirala Dawudi kyayinza okukugamba, kubanga ggwe, Ayi MUKAMA Katonda omanyi omuddu wo.

²¹Olw'ekigambo kyo n'olw'okusima kwo, okoze ebintu bino ebikulu, n'obimanyisa omuddu wo.

²²"Ng'oli mukulu, Ayi MUKAMA Katonda! Tewali akwenkana, era tewali Katonda wabula ggwe, nga bwe twewuliridde n'amatu gaffe.

²³Era ggwanga ki mu nsi erifaanana ng'abantu bo Isirayiri, eggwanga Katonda lye yeenunulira, ne yeekolera erinnya, n'abakolera ebintu ebikulu eby'amagero bwe yagoba amawanga ne balubaale baabwe mu maaso g'abantu bo be weenunulira okuva mu Misiri?

²⁴Onywezezza abantu bo, Isirayiri ng'ababo ddala emirembe gyonna era ggwe Ayi MUKAMA wafuuka Katonda waabwe.

²⁵"Kaakano, Ayi MUKAMA Katonda, otuukirize ekyo kye wasuubiza omuddu wo n'ennyumba ye okole nga bwe wasuubiza,

²⁶erinnya lyo ligulumizibwenga emirembe gyonna, n'abantu boogerenga nti, 'MUKAMA ow'Eggye ye Katonda wa Isirayiri,' era n'ennyumba ey'omuddu wo Dawudi erinywezebwaa mu maaso go.

²⁷"Ayi MUKAMA ow'Eggye, Katonda wa Isirayiri, ekyo okibikkulidde omuddu wo ng'ogamba nti, 'Ndikuzimbira ennyumba,' omuddu wo kyavudde ayanjanga okuwaayo okusaba okwo gy'oli.

²⁸Ayi MUKAMA Katonda, oli Katonda, n'ebigambo byo bya mazima, era omuddu wo omusuubizza ebintu ebirungi.

²⁹Kale nno okkirize okuwa ennyumba ey'omuddu wo omukisa enywerere mu maaso go ennaku zonna, kubanga ggwe Ayi MUKAMA Katonda oyogedde, era ennyumba ey'omuddu wo eneebangaa n'omukisa ennaku zonna."

2 Samwiri 8

Obuwanguzi bwa Dawudi

¹Oluvannyuma lw'ebyo, Dawudi n'awangula Abafirisuuti, n'abafuula abaddu be, n'awamba n'ekibuga kyabwe ekikulu.

² Dawudi n'awangula n'Abamowaabu, n'alagira buli omu ku bo yebake wansi, n'abapimako n'olukoba olupima. Buli eyali ekipimo bibiri yattibwanga, naye oyo eyali ow'ebipimo ebisatu nga y'alama. Abamowaabu ne bafuuka baddu ba Dawudi ne bamuwanga obusuulu.

³ Ate era Dawudi n'awangula Kadadezeri mutabani wa Lekobu, kabaka w'e Zoba, bwe yali nga yeddiza amatwale ge ku Mugga Fulaati.

⁴ Dawudi n'awamba amagaali ga Kadadezeri lukumi, n'abeebagala embalaasi kasanvu, n'abaserikale ab'ebigere emitwalo ebiri. N'atema kumpi embalaasi zonna, n'azilemaza n'alekawo kikumi ku zo.

⁵ Awo Abasuuli ab'e Ddamasiko ne bajja okubeera Kadadezeri kabaka w'e Zoba, naye Dawudi n'atta emitwalo ebiri mu enkumi bbiri ku bo.

⁶ Dawudi n'assa ebibinja eby'abaserikale mu Busuuli e Ddamasiko, Abasuuli ne bafuuka baddu be, era ne bamuwanga obusuulu. MUKAMA n'awa Dawudi obuwanguzi buli gye yagendanga.

⁷ Dawudi n'anyaga engabo eza zaabu ezasitulibwanga abaserikale ba Kadadezeri n'azireeta e Yerusaalemi.

⁸ Kabaka Dawudi n'anyaga n'ebikomo bingi ddala okuva mu Beta ne mu Beresayi, ebibuga ebyali ebya Kadadezeri.

⁹ Awo Toyi kabaka w'e Kamasi bwe yawulira nga Dawudi awangudde eggye lyonna erya Kadadezeri,

¹⁰n'atuma mutabani we Yolaamu eri kabaka Dawudi okumulamusako, n'okumuyozaayoza okuwangula olutalo wakati we ne Kadadezeri. Kadadezeri yalwananga ne Toyi. Yolaamu n'amutwalira ebintu bya ffeeza ne zaabu n'ebikomo.

¹¹ Kabaka Dawudi n'abiwonga eri MUKAMA, nga bwe yakola effeeza ne zaabu bye yaggya mu mawanga amalala ge yawangula.

¹² Amawanga gaali: Busuuli, ne Mowaabu, n'Abamoni, n'Abafirisuuti ne Amaleki; n'awonga n'omunyago gwa Kadadezeri, mutabani wa Lekobu, kabaka w'e Zoba.

¹³ Erinnya lya Dawudi ne litutumuka, bwe yakomawo okuva okutta Abasuuli omutwalo gumu mu kanaana mu kiwonvu eky'Omunnyo.

¹⁴ N'ateeka ebibinja bya baserikale mu Busuuli yonna, Abasuuli bona ne bafuuka baddu ba Dawudi. MUKAMA n'awa Dawudi obuwanguzi buli gye yagendanga.

Amannya g'Abakungu ba Dawudi

¹⁵Dawudi n'afuga Isirayiri yenna, ng'afuga abantu be bona mu bwenkanya ne mu mazima.

¹⁶Yowaabu mutabani wa Zeruyiya ye yali omuduumizi w'eggye, Yekosafaati mutabani wa Akirudi nga ye mujjukiza,

¹⁷Zadooki mutabani wa Akitubu ne Akimereki mutabani wa Abiyasaali nga be bakabona, Seroya nga ye muwandiisi,

¹⁸Benaaya mutabani wa Yekoyaada nga ye mukulu w'Abakeresi n'Abaperesi abaakuumanga ba kabaka, batabani ba Dawudi nga be bawi ba magezi ab'obwakabaka.

2 Samwiri 9

Dawudi ne Mefibosesi

¹Dawudi n'abuuza nti, "Wakyaliwo omuntu mu nnyumba ya Sawulo eyasigalawo gwe nnyinza okulaga ekisa ku lwa Yonasaani?"

²Awo waaliwo omuddu mu nnyumba ya Sawulo erinnya lye Ziba. Ne bamutumya, n'ajja mu maaso ga Dawudi. Kabaka n'amubuuza nti, "Ggwe Ziba?" N'addamu nti, "Nze wuuyo omuddu wo."

³Kabaka n'amubuuza nti, "Tewaliwo muntu mu nnyumba ya Sawulo eyasigalawo gwe nnyinza okukolera ebirungi olw'ekisa kya Katonda?" Ziba n'addamu kabaka nti, "Wakyaliwo mutabani wa Yonasaani, eyalemala ebigere."

⁴Kabaka n'amubuuza nti, "Ali ludda wa?" Ziba n'amuddamu nti, "Ali mu nnyumba ya Makiri mutabani wa Ammiyeri mu Lodebali."

⁵Awo Dawudi n'amutumya, ne bamuleeta okuva mu nnyumba ya Makiri mutabani wa Ammiyeri mu Lodebali.

⁶Mefibosesi mutabani wa Yonasaani, muzzukulu wa Sawulo n'ajja eri Dawudi n'avuunama mu maaso ge. Dawudi n'amubuuza nti, "Ggwe Mefibosesi?" N'addamu nti, "Nze wuuyo omuddu wo."

⁷Dawudi n'amugamba nti, "Totya kubanga siireme kukukolera bya kisa ku lwa Yonasaani kitaawo. Nzija kukuddiza ettaka lyonna eryali erya jjajaawo Sawulo, era onooliranga ku mmeeza yange."

⁸Mefibosesi ne yeeyanza n'ayogera nti, "Omuddu wo kye ki, okufaayo ku mbwa enfu nga nze?"

⁹Awo kabaka n'ayita Ziba, omuddu wa Sawulo, n'amugamba nti, "Mpadde muzzukulu wa mukama wo ebintu byonna ebyali ebya Sawulo n'ennyumba ye.

¹⁰Ggwe ne batabani bo n'abaddu bo munaamulimiranga ettaka ne muleeta ebibala ebirivaamu, muzzukulu wa mukama wo abenga n'ekyokulya. Mefibosesi muzzukulu wa mukama wo, ye anaaliiranga ku mmeeza yange nange, ennaku

zange zonna." Ziba yalina abaana aboobulenzi kkumi na bataano n'abaddu amakumi abiri.

¹¹ Awo Ziba n'agamba kabaka nti, "Nga bw'olagidde mukama wange kabaka, bwe kijja okukolebwa omuddu wo." Mefibosesi n'aliiranga ku mmeeza ya Dawudi ng'omu ku balangira.

¹² Mefibosesi yalina mutabani we omuto, eyayitbwanga Mikka, ne bona abaaali ab'ennyumba ya Ziba baali baddu ba Mefibosesi.

¹³ Mefibosesi n'abeera mu Yerusaalemi kubanga yaliiranga ku mmeeza ya kabaka. Yali yalemala ebigere.

2 Samwiri 10

Dawudi Awangula Abaana ba Amoni

¹ Mu kiseera ekkyo kabaka w'abaana ba Amoni n'afa, mutabani we Kamuni n'amusikira.

² Dawudi n'alowooza nga kyandibadde kirungi, okumukolera ebyekisa nga kitaawe bwe yali akoze. Awo Dawudi n'amutumira ekibinja okugenda okumukubagiza olw'okufa kwa kitaawe. Abasajja ba Dawudi bwe baatuuka mu nsi ey'Abamoni,

³ abakungu ba Amoni ne bagamba Kamuni mukama waabwe nti, "Olowooza nga Dawudi okukuweereza ababaka okukubagiza, aba assamu kitaawo kitibwa? Olowooza nga Dawudi tabasindise okujja okulawuna n'okuketta ekibuga n'okukiwamba?"

⁴ Awo Kamuni n'akwata abasajja ba Dawudi n'abamwako ekitundu ky'ebirevu byabwe n'abasalira ebyambalo byabwe wakati okukoma ku manyuma gaabwe, n'abagoba baddeyo ewaabwe.

⁵ Dawudi bwe yategeezebwa ebyo, n'atumira abasajja be ababaka, kubanga baali mu buswatu bungi, n'abagamba nti, "Musigale e Yeriko ebirevu byammwe bimale okukula mulyoke mukomewo."

⁶ Awo Abamoni bwe bategeera nga Dawudi bamufuukidde ekyenyinyalwa, ne bapangisa abaserikale ab'ebigere Abasuuli emitwalo ebiri okuva e Besukekobu n'e Zoba, n'abalala abasajja lukumi okuva ewa kabaka w'e Maaka, n'abalala omutwalo gumu mu enkumi bbiri okuva e Tobi.

⁷ Dawudi olwawulira ebyo, n'asindika Yowaabu n'eggye lyonna ery'abasajja abalwanyi abazira.

⁸ Abamoni ne bavaayo ne basimba enyiriri awayingirirwa mu wankaaki w'ekibuga kyabwe, Abasuuli ab'e Zoba n'ab'e Lekobu, n'abasajja ab'e Tobi n'e Maaka bo ne babeera mu ttale.

⁹Awo Yowaabu bwe yalaba ng'olutalo lumutaayizza mu maaso n'emabega, n'alondamu abasajja abazira mu Isirayiri, n'abasindika batabaale Abasuuli.

¹⁰Abaasigalawo n'abakwasa Abisaayi muganda we okubaduumira, n'abasindika batabaale Abamoni.

¹¹Yowaabu n'agamba muganda we nti, "Bwe munaalaba Abasuuli nga batuyitiridde amaanyi, munajja ne mutubeera. Abamoni bwe banaabayinga amaanyi, tunajja ne tubabeera."

¹²Tuddemu amaanyi tulwane masajja olw'abantu baffe, n'olw'ebibuga bya Katonda waffe. MUKAMA akole nga bw'asiima."

¹³Awo Yowaabu n'abasajja abaali naye ne bambuka okutabaala Abasuuli, Abasuuli ne babadduka.

¹⁴Abamoni bwe baalaba nga Abasuuli badduse, nabo ne badduka Abisaayi, ne bayingira mu kibuga. Yowaabu n'alekeraawo okulwana n'Abamoni, n'addayo e Yerusaalemi.

¹⁵Awo Abasuuli bwe baalaba nga bawanguddwa Isirayiri, ne beekunjaanya.

¹⁶Kadadezeri n'atumya Abasuuli okuva emitala w'Omugga Fulaati, ne bagenda e Keramu nga bakuleembeddwamu Sobaki omuduumizi w'eggye lya Kadadezeri.

¹⁷Awo Dawudi bwe yakiwulira, n'akuinjaanya Isirayiri yenna n'asomoka Yoludaani n'agenda e Keramu. Abasuuli ne basimba ennyiriri okwolekera Dawudi balwane naye.

¹⁸Naye ne badduka mu maaso ga Isirayiri, Dawudi n'atta abasajja lusanvu ku bavuzi b'amagaali g'embalaasi, era n'emitwalo ena ku beebagala embalaasi, n'afumita ne Sobaki omuduumizi w'eggye lyabwe n'afiirawo.

¹⁹Awo bakabaka bona abaali abaddu ba Kadadezeri bwe baalaba nga bawanguddwa Isirayiri, ne beewerayo ddala eri Abayisirayiri, era ne babawanga n'obusuulu. Awo Abasuuli ne batya okuddamu okuyamba Abamoni.

2 Samwiri 11

Dawudi ne Basuseba

¹Awo mu biro ebyo, ekiseera bakabaka mwe bagendera okutabaala, Dawudi n'asindika Yowaabu n'abasajja be n'eggye lyonna erya Isirayiri. Ne bazikiriza abaana ba Amoni ne bazingiza n'ekibuga kya Labba. Naye Dawudi n'asigala mu Yerusaalemi.

²Olonaku olumu, mu ssaawa ez'olweggulo, Dawudi n'agolokoka, n'atambulatambula ku kasolya ak'olubiri lwe. N'asinziira waggulu eyo n'alengera omukazi ng'anaaba, era omukyala yali mulungi omubalagavu.

³Dawudi n'atuma omuntu okugenda okumunoonyerezaako. Ne bakomawo ne bamutegeeza nti, "Oyo ye Basuseba muwala wa Eriyaamu mukyala wa Uliya Omukiiti."

⁴Awo Dawudi n'amutumya, n'ajja gy'ali, ne yeebaka naye. Yali mu kiseera eky'okwelongoosa obutali bulongoofu bwe. Oluvannyuma n'addayo ewuwe.

⁵Omukyala n'aba olubuto, n'atumira Dawudi nti, "Ndi lubuto."

⁶Awo Dawudi n'atumira Yowaabu nti, "Mpeereza Uliya Omukiiti." Yowaabu n'aweereza Uliya eri Dawudi.

⁷Uliya bwe yagenda gy'ali, Dawudi n'abuuza Yowaabu n'abaserikale bwe baali, n'olutalo bwe lwali.

⁸Awo Dawudi n'agamba Uliya nti, "Serengeta mu nnyumba yo, onaabe ku bigere." Uliya n'afuluma olubiri, kabaka n'amuweereza ekirabo.

⁹Naye Uliya n'ataserengeta wuwe, n'asula ku mulyango gw'olubiri n'abaddu ba mukama we, Dawudi.

¹⁰Dawudi bwe yategeezebwa nti, "Uliya teyazeeyo waka we," n'abuuza Uliya nti, "Waakava olugendo, kiki ekikulobedde okuddayo eka ewuwo?"

¹¹Uliya n'addamu Dawudi nti, "Essanduuko ne Isirayiri ne Yuda baasigadde mu weema, ne mukama wange Yowaabu n'abaddu ba mukama wange basiidde ku ttale. Kale nnyinza ntya okugenda mu nnyumba yange okulya n'okunywa, n'okwebaka ne mukyala wange? Mazima nga bw'oli omulamu, sijja kukola kigambo bwe kityo."

¹²Awo Dawudi n'agamba Uliya nti, "Sigalawo olunaku olulala olabe obanga enkyia siikusindike kuddayo." Bwatyo Uliya n'asigalawo olunaku olwo n'olw'enkyia.

¹³Dawudi n'ayita Uliya alye naye ekyekiro, n'amutamiiza akawungeezi ak'olunaku olwo, Uliya n'agenda n'agalamira ku mukeeka gwe n'abaddu ba mukama we, n'ataddayo wuwe.

¹⁴Enkeera Dawudi n'awandiikira Yowaabu ebbaluwa n'agiwa Uliya agitwale.

¹⁵Yawandiika mu bbaluwa nti, "Uliya muiteke mu maaso ddala olutalo we luli olw'amaanyi, mumwabulire, afumitibwe afe."

¹⁶Awo Yowaabu bwe yali ng'ataayizza ekibuga, n'addiria Uliya n'amuteeka mu kifo kye yamanya nga waaliyo abalabe ab'amaanyi.

¹⁷Abasajja ab'ekibuga bwe baafuluma okulwana ne Yowaabu, abamu ku basajja ba Dawudi ne battibwa, ne Uliya Omukiiti yali omu ku abo abattibwa.

¹⁸Awo Yowaabu n'aweereza Dawudi amawulire gonna agafudde mu lutalo,

¹⁹n'ala gwe yatuma nti, "Bw'onomala okutegeeza kabaka amawulire gonna agafudde mu lutalo,

²⁰n'alabika nga munyiivu, n'abuuza nti, 'Lwaki mwasemberedde nnyo ekibuga nga mulwana? Temwamanya nga bajja kulasa nga basinziira ku Bbugwe?

²¹Ani eyatta Abimerek mutabani wa Yerubbesesi? Teyali mukazi e Sebezi eyamukanyugako ejinja eddene, kwe baseera emmere ey'empeke, ng'asinziira ku bbugwe, n'afirawo? Lwaki mwasembedde okumpi ennyo ne bbugwe?' Awo onoomutegeeza nti, 'Omuddu wo Uliya Omukiiti naye afudde.'"

²²Awo omubaka n'agenda n'ategeeza Dawudi byonna Yowaabu bye yamutuma okwogera.

²³Omubaka n'agamba Dawudi nti, "Abasajja batusinzizza amaanyi ne batulumba ku ttale, naye ne tubagoba okutuusa ku wankaaki ow'ekibuga.

²⁴Naye abalasi basinzidde ku bbugwe ne balasa abaddu, era abamu ku baddu ba kabaka baafudde, n'omuddu wo Uliya Omukiiti naye mwe yafiiridde."

²⁵Dawudi n'agamba omubaka nti, "Ggamba Yowaabu nti, 'Ekigambo ekyo kireme okukubuza emirembe, kubanga ekitala olumu kittu omu n'olulala ne kittu omulala. Munyikirire okulumba ekibuga mukiwambe.' Era Yowaabu mugambe agume omwoyo."

²⁶Awo mukyala wa Uliya bwe yawulira nti bba afudde, n'amukungubagira.

²⁷Okukungubaga bwe kwaggwa, Dawudi n'amutumya, n'amuleeta mu nnyumba ye, n'afuuka mukyala we, n'amuzaalira omwana owoobulenzi. Naye ekigambo ekyo Dawudi kye yakola ne kitasanyusa MUKAMA.

2 Samwiri 12

Nasani Anenya Dawudi

¹Awo MUKAMA n'atuma Nasani eri Dawudi amugambe nti, "Waaliwo abasajja babiri mu kibuga ekimu, omu nga mugagga, omulala nga mwavu.

²Omugagga yalina ebisibo by'endiga bingi n'ente nnyingi;

³naye omwavu nga taliiko bw'ali wabula yalina omwana gw'endiga gumu nga muluusi gwe yagula. N'alabirira omwana gw'endiga ogwo, ne gukula n'abaana be, ne gugabananga ku mmere ye, ne gunyweranga wamu naye, era n'aguleranga. Gwali ng'omwana we owoobuwala gy'ali.

⁴"Lwali lumu ne wajja omutambuze eri nnaggagga, naye nnaggagga oyo n'atayagala kuddira emu ku ndiga ze oba nte ze okuteekerateekera omutambuze oyo ekyokulya. Kyeyava addira omwana gw'endiga guli ogw'omwavu n'aguteekerateekera omugenyi we."

⁵ Awo Dawudi n'asunguwalira nnyo omusajja nnaggagga, n'ayogera nti, "MUKAMA nga bw'ali omulamu, omusajjaakoze ekintu bwe kityo ateekwa

⁶ okusasula emirundi ena olw'ekikolwa ekyo, kubanga talina kusaasira, era asaanira attibwe."

⁷ Nasani n'agamba Dawudi nti, "Omusajja oyo ye ggwe. Bw'ati bw'ayogera MUKAMA, Katonda wa Isirayiri nti, 'Nakufukako amafuta okuba kabaka wa Isirayiri, ne nkulokola mu mukono gwa Sawulo,

⁸ ne nkuwa ennyumba ya mukama wo, ne nkukwasa ne bakyala ba mukama wo, ne nkuwa ennyumba ya Isirayiri ne Yuda; ebyo singa byali tebimala nandikwongedde bingi n'okusingawo.

⁹ Kiki ekikunyoomezza ekigambo kya MUKAMA, n'okukola n'okola ekibi bwe kityo mu maaso ge? Watta Uliya Omukiiti n'ekitala, n'otwala mukyala we n'omufuula owuwo.'

¹⁰ Wamutta n'ekitala eky'Abaana ba Amoni. Noolwekyo ekitala tekiriva mu nnyumba yo, kubanga onnyoomye n'otwala mukyala wa Uliya Omukiiti n'omufuula owuwo.

¹¹ "Bw'ati bw'ayogera MUKAMA nti, 'Laba, ndireeta ekikolimo mu nnyumba yo, ne nzirira bakyala bo ng'olaba ne mbawa muliraanwa wo, ne yeebaka nabo emisana.

¹² Wakikola mu kyama, naye nze ndikikola mu maaso ga Isirayiri yenna, emisana.'

¹³ Awo Dawudi n'agamba Nasani nti, "Nnyonoonye MUKAMA." Nasani n'addamu nti, "Kale, MUKAMA aggyeewo ekyonoono kyo era toofe.

¹⁴ Naye olw'ekikolwa ekyo, oleetedde abalabe ba MUKAMA okumunyooma, omwana anaakuzaalirwa kyanaava afa."

¹⁵ Nasani bwe yaddayo eka, MUKAMA n'alwaza nnyo omwana muka wa Uliya gwe yazaala.

¹⁶ Dawudi ne yeegayirira Katonda ku lw'omwana, n'asiiba, n'agenda mu nnyumba ye n'amala ekiro kyonna nga yeebase wansi.

¹⁷ Abakadde ab'ennyumba ye ne bagendanga gy'ali, okumuwaliriza asituke, alye ne ku mmere, naye n'agaana.

¹⁸ Ku lunaku olw'omusanvu omwana n'afa. Naye abaddu ba Dawudi ne batya okumutegeeza nti omwana afudde, nga bagamba, nti, "Omwana bwe yali omulamu twagezaako okwogera naye, n'atatuwuliriza, olwo binaabeera bitya bwe tunaamubuulira nti omwana afudde? Ayinza okutabukira ddala."

¹⁹Naye Dawudi n'alaba abaddu be nga boogera obwama, n'ategeera nti omwana afudde. N'ababuuza nti, "Omwana afudde?" Ne baddamu nti, "Afudde."

²⁰Awo Dawudi n'ava wansi, n'anaabako, ne yeerongoosa, n'akyusa ebyambalo bye, n'alaga mu nnyumba ya MUKAMA n'asinza. Oluvannyuma n'addayo mu nnyumba ye, n'asaba emmere, n'alya.

²¹Abaddu be ne bamubuuza nti, "Kiki ekyo ky'okola? Omwana bwe yali omulamu, wasiiba n'okaaba, naye kati afudde, ogolokose, olya!"

²²N'addamu nti, "Omwana we yabeerera omulamu, n'asiiba ne nkaaba, nga ndowooza nti, 'Ani amanyi, MUKAMA ayinza okunsaasira, omwana n'aba mulamu?'

²³Naye kaakano afudde, kiki ekinsiibya? Nkyayinza okumukomyawo? Nze ndigenda gy'ali, naye ye talikomawo gye ndi."

²⁴Awo Dawudi n'akubagiza mukyala we Basuseba, ne yeetaba naye, n'aba olubuto, n'azaala omwana wabulenzi, ne bamutuumma Sulemaani, MUKAMA n'amwagala,

²⁵era olw'okwagala okwo, MUKAMA kyeyava atuma Nasani nnabbi n'amutuumma Yedidiya, amakulu nti ayagalibwa MUKAMA.

²⁶Mu biro ebyo Yowaabu n'alwana n'abaana ba Amoni, n'awamba Labba ekibuga kyabwe ekikulu.

²⁷Yowaabu n'atumira Dawudi nti, "Nnumbye Labba, era n'amazzi gaabwe ngasazeeko.

²⁸Kaakano kuŋŋanya egghe lyonna, otabaale ekibuga ekikulu, okiwambe, nga sinnaba kukitwala, ne kituumibwa erinnya lyange."

²⁹Awo Dawudi n'akuŋŋanya egghe lyonna n'ayolekera Labba, n'akirumba era n'akiwamba.

³⁰N'addir engule eyali eya kabaka waabwe, obuzito bwayo kilo asatu mu nnya eza zaabu, nga mu yo baateekamu amayinja ag'omuwendo, n'agyetikkira ku mutwe gwe. N'atwala n'omunyago mungi ddala okuva mu kibuga.

³¹N'aggya abantu abaali mu kibuga, n'abatwala okuba abapaksi; ne bakozesanga emisomeeno, n'ensuuluulu, n'embazzi, n'abalala ne babumbanga amatoffaali. Mu ngeri y'emu n'akozesanga abantu ab'ebibuga byonna eby'abaana ba Amoni. Oluvannyuma Dawudi n'egghe lye lyonna, ne baddayo e Yerusaalemi.

2 Samwiri 13

Amunoni ne Tamali

¹ Abusaalomu, mutabani wa Dawudi yalina mwannyina omulungi, omubalagavu erinnya lye Tamali, naye Amunoni omu ku batabani ba Dawudi omulala n'ayagala okwebaka naye.

² Amunoni n'atawaana nnyo mu nsonga eyo n'okulwala n'alwala, kubanga Tamali yali mbeerera, Amunoni n'akisanga nga kizibu okumufuna.

³ Naye Amunoni yalina mukwano gwe ennyo, eyayitibwanga Yonadabu mutabani wa Simeeya mukulu wa Dawudi, eyali omusaja omukujukuju.

⁴ N'abuuza Amunoni nti, "Kiki ekikutawanyanga buli nkya, ggwe omwana wa kabaka? Lwaki tombulira?" Amunoni n'amugamba nti, "Njagala Tamali, mwannyina Abusaalomu muganda wange."

⁵ Yonadabu n'amugamba nti, "Genda mu kitanda weefuule okuba omulwadde. Kitaawo bw'anajja okukulaba mugambe nti, 'Gamba mwannyinaze Tamali aije ampe ku kyokulya. Mukkirie anteekereteekere ekyokulya nga mmulabako n'amaaso, n'oluvannyuma andiise.'

⁶ Awo Amunoni n'agenda n'agalamira ku kitanda kye ne yeefuula okuba omulwadde; kabaka bwe yagenda okumulaba n'okumusaasira, Amunoni n'amugamba nti, "Nkwegayiridde, kkiriza Tamali aije anfumbire emigaati nga mulaba ku maaso, n'oluvannyuma andiise."

⁷ Awo Dawudi n'atumya Tamali n'amugamba nti, "Genda ewa muganda wo Amunoni mu nnyumba ye, omuteekereteekere ekyokulya."

⁸ Tamali n'agenda ewa Amunoni n'amusanga ng'agalamidde ku kitanda kye. Tamali n'addira obuwunga n'abukanda, n'akola emigaati Amunoni ng'alaba, n'agifumba.

⁹ Tamali n'addira olukalango, n'aluggyako bye yafumbirako, Amunoni ng'alaba naye n'agaana okulya. Awo Amunoni n'alagira abaddu be nti, "Buli muntu afulume." Buli muntu n'afuluma, n'asigalamu ne Tamali.

¹⁰ Amunoni n'agamba Tamali nti, "Ndeetera emmere eno mu kisenge kyange, ondiise." Awo Tamali n'addira emigaati gy'afumbye, n'agitwalira Amunoni mwannyina mu kisenge kye.

¹¹ Naye bwe yagimusembereza okulya n'amukwata, n'amugamba nti, "Jjangu weebake nange, mwannyinaze."

¹² N'amuddamu nti, "Nedda, mwannyinaze, tonkwata n'amaanyi. Ekyo tekikolwa mu Isirayiri. Tokola kya kivve bwe kityo.

¹³ Nsaasira, nnadda wa obuswavu? Ate ggwe, onoobeera ng'omu ku basajja abasirusiru mu Isirayiri. Nkwegayiridde yogera ne kabaka, tajja kukuziyiza nkufumbirwe."

¹⁴Naye n'agaana okumuwuliriza, n'amukwata olw'empaka, kubanga yali amusinza amaanyi, ne yeebaka naye.

¹⁵Oluvannyuma Amunoni n'amukyawa nnyo nnyini, okusinga ne bwe yamwagala, n'amulagira nti, "Golokoka ofulume."

¹⁶Tamali n'amuddamu nti, "Nedda! Okungoba kibi okusinga ekikolwa ky'onkoze." Naye n'agaana okumuwuliriza.

¹⁷N'ayita omuddu ey'amuweerezanga n'amugamba nti, "Omukazi oyo muggye mu maaso gange, omuggalire ebweru."

¹⁸Awo omuddu we n'afulumya Tamali ebweru, n'aggalawo oluggi. Yali ayambadde ekyambalo ekiwanvu nga ky'amabala mangi, kubanga eyo ye yabeeranga ennyambala ey'abambejja embeerera.

¹⁹Tamali n'ateeka evvu mu mutwe gwe, n'ayuza ekyambalo kye, n'ateeka omukono ku mutwe gwe n'agenda ng'akaaba.

²⁰Abusaalomu mwannyina n'amubuuza nti, "Obadde ne mwannyoko Amunoni? Sirikawo mwannyinaze, oyo mwannyoko. Ekyo kireme okukunakuwaza." Awo Tamali n'abeeranga ne mwannyina Abusaalomu, nga mukazi munaku.

²¹Kabaka Dawudi bwe yakiwulira, n'asunguwala nnyo.

²²Naye Abusaalomu n'atabaako kigambo ky'ayogera ne Amunoni, ekirungi oba ekibi, kyokka n'akyawa Amunoni kubanga yayonoonyesa Tamali mwannyina.

Abusaalomu Atta Amunoni

²³Bwe waayitawo emyaka ebiri nga kiseera kya kusala ebyoya by'endiga, ng'abasazi ba Abusaalomu bali e Baalukazoli, ekiriraanye Efulayimu, Abusaalomu n'ayita abaana ba kabaka bonna.

²⁴Abusaalomu n'agenda eri kabaka n'amugamba nti, "Omuddu wo alina abasazi ab'ebyoya by'endiga baaleese. Nkusaba kabaka n'abakungu be, mujje munjagulizeeko."

²⁵Kabaka n'amuddamu nti, "Nedda, mwana wange. Ffenna bwe tunajja, tujja kuzitoowerera." Abusaalomu n'amwegayirira nga bw'amuwaliriza, naye n'agaana okugenda, wabula n'amusabira omukisa.

²⁶Awo Abusaalomu n'amugamba nti, "Ggwe bw'oba nga tojje, nkwegayiridde okkirize Amunoni agende naffe." Kabaka n'amubuuza nti, "Lwaki Amunoni agenda nammwe?"

²⁷Naye Abusaalomu n'amwegayirira nnyo okutuusa bwe yakkiriza Amunoni n'abaana ba kabaka bona okugenda naye.

²⁸Awo Abusaalomu n'alagira abaddu be nti, "Muwulire! Mugenderere okulaba Amunoni ng'atudde, n'omutima gwe nga musanyuukirivu; bwe n'abagamba nti,

'mutte Amunoni,' mumutte. Temutya, si nze mpadde ekiragiro? Mube n'amaanyi era mube bazira."

²⁹Awo abasajja ba Abusaalomu ne batta Amunoni nga Abusaalomu bwe yabalagira. Abaana ba kabaka bona ne basituka ne beebagala buli muntu ennyumbu ye ne badduka.

³⁰Bwe baali bakyali mu kkubo, amawulire ne gatuuka eri Dawudi nti, "Abusaalomu asse abaana ba kabaka bona, era tewasigadde n'omu."

³¹Kabaka n'agolokoka n'ayuza ebyambalo bye, ne yeebaka mu ttaka n'abaddu be bona abaaliwo ne bayuza ebyambalo byabwe.

³²Naye Yonadabu mutabani wa Simeeya, mukulu wa Dawudi, n'ayogera nti, "Mukama wange kabaka aleme okulowooza nga basse abalangira bona, Amunoni yekka y'afudde. Era ekyo kye kyali ekigendererwa kya Abusaalomu okuva ku lunaku Amunoni lwe yakwata Tamali mwannyina.

³³Noolwekyo mukama wange kabaka aleme okweraliikirira olw'amawulire g'afunye agagamba nti abaana ba kabaka bona bafudde. Amunoni yekka ye afudde."

³⁴Kyokka Abusaalomu n'adduka. Omuvubuka omukuumi n'ayimusa amaaso ge, n'alengera abantu bangi mu kkubo ery'ebugwanjuba nga bakkirira ku mabbali g'olusozi.

³⁵Awo Yonadabu n'agamba kabaka nti, "Laba abaana ba kabaka bajja; kituukiridde omuddu wo kye yayogedde."

³⁶Bwe yali yakamala okwogera, abaana ba kabaka ne bayingira nga bakuba ebiwoobe. Kabaka n'abaddu be nabo ne bakaaba nnyo nnyini.

³⁷Abusaalomu ye n'addukira eri Talumaayi mutabani wa Ammikuli, kabaka w'e Gesuli, Dawudi n'amukaabiranga buli lunaku.

³⁸Abusaalomu n'amala e Gesuli emyaka esatu.

³⁹Naye omutima gwa Dawudi ne gwegomba okulaba ku Abusaalomu, kubanga yali akubagizibba olw'okufa kwa Amunoni.

2 Samwiri 14

Abusaalomu Akomawo e Yerusaalemi

¹Awo Yowaabu mutabani wa Zeruyiya n'ategeera nga omutima gwa kabaka gulumirwa Abusaalomu.

²Yowaabu n'atunya omukazi omugezigezi okuva e Tekowa, n'amugamba nti, "Weefuule akungubaga, oyambale engoye ez'okukungubaga, teweesiiga mafuta, obeere ng'omukyala amaze ennaku ennyingi ng'akungubagira omufu.

³Genda eri kabaka, omugambe ebigambo bino.” Yowaabu n’amuwa ebigambo eby’okwogera.

⁴Awo omukazi ow’e Tekowa n’agenda eri kabaka, n’avuunama amaaso ge ku ttaka, ne yeeyanza, n’ayogera nti, “Mbeera, ayi kabaka.”

⁵Kabaka n’amubuuza nti, “Nkubeere mu ki?” N’addamu nti, “Ndi nnamwandu baze yafa.

⁶Nalina batabani bange babiri. Bombi baalwanira ku ttale ne wataba n’omu abataasa, omu n’atta munne.

⁷Kaakano ekika kyonna kiyimukidde omuweereza wo, nga boogera nti, ‘Tuwe omusajja oyo asse muganda we, tumutte olw’obulamu bwa muganda we gwe yatta, tutte n’omusika.’ Mu ngeri eyo banaaba bazikizza etabaaza yokka gye nsigazza, obutalekaawo linnya lya baze wange newaakubadde obusika bwe ku nsi yonna.”

⁸Awo kabaka n’agamba omukazi nti, “Ddayo eka, nzija kukola ku nsonga yo.”

⁹Naye omukazi ow’e Tekowa n’agamba kabaka nti, “Mukama wange kabaka, omusango ka gubeere ku nze, n’ennyumba ya kitange; kabaka n’obwakabaka bwe buleme kubeerako musango.”

¹⁰Kabaka n’addamu nti, “Bwe wanaabeerawo omuntu yenna abaako kya kugamba, mundeetere, taddeyo nate kukutawanya.”

¹¹Omukazi n’ayogera nti, “Nkwegayiride, kabaka, ondayirire eri MUKAMA Katonda wo, awalana eggwanga olw’omusaayi era aziyiza obubi okweyongera ku bubi, mutabani wange aleme okuzikirizibwa.” N’amuddamu nti, “MUKAMA nga bw’ali omulamu, tewaliba luviiри olwa mutabani wo olulimuva ku mutwe.”

¹²Awo omukazi n’agamba kabaka nti, “Nkwegayiride, ka mbeeko ekigambo kye njamba mukama wange kabaka.” N’amuddamu nti, “Yogera.”

¹³Omukazi n’ayogera nti, “Kiki ekikukoza ekigambo bwe kityo abantu ba Katonda? Kabaka aba teyeesalira yekka omusango kubanga takomezaawo omwana we eyagobebwa?

¹⁴Ffenna tuli baakufa, ng’amazzi bwe gayiibwa ku ttaka, ne gatayinzika kuyooleka nate. Nayé Katonda taggyawo bulamu, anoonya engeri gy’anaayinza okukomyawo omuntu abuze.

¹⁵“Kale nno ekkyo kye kyandeese eri kabaka, kubanga abantu bantiisizza, ne baleetera omuweereza wo okulowooza nti, ‘Bwe nnaayogera ne kabaka, mpozzi aliddamu omuweereza we ky’amusaba.

¹⁶Oboolyawo kabaka anaawulira ensonga yange, n'alokola omuzaana we mu mukono gw'omusajja agezaako okunzikiriza nze n'omwana wange okutuggyako obusika Katonda bwe yatuwa.'

¹⁷"Era omuweereza wo yayogedde mu mutima gwe nti, 'Ekigambo kya mukama wange kabaka kye kirimpummuza, kubanga mukama wange kabaka ali nga malayika wa Katonda mu kwawulamu ebirungi n'ebibi. MUKAMA Katonda wo abeere naawe.'"

¹⁸Awo kabaka n'agamba omukazi nti, "Tobaako n'ekimu ky'onkisa ku bye nnaakubuuza." Omukazi n'addamu nti, "Mukama wange kabaka ambuuze."

¹⁹Kabaka n'amubuuza nti, "Omukono gwa Yowaabu guli wamu naawe mu bigambo ebyo byonna?" Omukazi n'amuddamu nti, "Nga bw'oli omulamu mukama wange kabaka, tewali ayinza okukububaabuza ng'adda ku mukono ogwa ddyo oba ogwa kkono okukuggya ku ky'oyogera mukama wange kabaka. Weewaawo, omuddu wo Yowaabu yeyandagidde, n'ampa n'ebigambo ebyo byonna.

²⁰Omuddu wo Yowaabu, ekyo y'akikoze okukyusa embeera eriwo kaakano. Naye mukama wange mugezigezi nga malayika wa Katonda amanyi byonna ebifa ku nsi."

²¹Awo kabaka n'agamba Yowaabu nti, "Kale, nzija kukikola. Genda okime omuvubuka Abusaalomu."

²²Awo Yowaabu n'agwa bugazi ku ttaka ne yeeyanza, n'asabira kabaka omukisa, n'ayogera nti, "Leero, omuddu wo ategedde ng'alabye ekisa mu maaso go, mukama wange kabaka, kubanga kabaka azeemu okwegayirira okw'omuddu we."

²³Yowaabu n'agenda e Gesuli n'akima Abusaalomu n'amukomyawo e Yerusaalemi.

²⁴Naye kabaka n'awa ekiragiro nti, "Ateekwa kugenda mu nnyumba eyiye ku bubwe, tateekwa kulaba maaso gange." Awo Abusaalomu n'abeera mu nnyumba eyiye ku bubwe, n'atalaba maaso ga kabaka.

²⁵Mu Isirayiri yonna temwali n'omu eyatenderezebwा nga Abusaalomu olw'endabika ye ennungi, kubanga okuvira ddala ku mutwe okutuuka ku bigere teyaliiko kamogo.

²⁶Buli lwe yasalanga enviiri ze, lwe zali ng'ennydingi ku mutwe gwe, obuzito bw'azo bw'ali nga kilo bbiri ne desimoolo ssatu ng'ebipimo bya kabaka bwe byali.

²⁷Abusaalomu n'azaalirwa abaana basatu aboobulenzi n'owoobuwala omu. Omuwala ye yali Tamali nga mukyala mulungi nnyo ku maaso.

²⁸Abusaalomu n'abeera mu Yerusaalemi okumala emyaka ebiri nga talaba maaso ga kabaka.

²⁹Awo Abusaalomu n'atumya Yowaabu amutume eri kabaka, naye Yowaabu n'atagendayo. N'amutumya omulundi ogwokubiri, naye era n'agaana okugenda yo.

³⁰Abusaalomu n'agamba abaddu be nti, "Ennimiro ya Yowaabu eriraanye eyange, era alinamu sayiri. Mugende mugikumeko omuliro." Awo abaddu ba Abusaalomu ne bagikumako omuliro ne bagyokya.

³¹Yowaabu n'agolokoka n'agenda eri Abusaalomu mu nnyumba ye n'amubuuza nti, "Lwaki abaddu bo bookezza ennimiro yange?"

³²Abusaalomu n'agamba Yowaabu nti, "Laba, nakutumya, nga njamba ojje wano nkutume eri kabaka okumubuuza nti, 'Lwaki nava e Gesuli? Kyandisinde singa nasigala eyo.' Kaakano njagala kugenda mu maaso ga kabaka, obanga nnina omusango, anzite."

³³Awo Yowaabu n'agenda eri kabaka, n'amutegeeza ebigambo ebyo. Kabaka n'atumya Abusaalomu, n'ajja, n'avuunama amaaso ge wansi mu maaso ga kabaka. Kabaka n'amunywegera.

2 Samwiri 15

Obujeemu bwa Abusaalomu

¹Bwe waayitawo ebbanga, Abusaalomu ne yeefunira amagaali, n'embalaasi, n'abasajja amakumi ataano okumukulemberangamu.

²Yagolokokanga mu makya n'ayimirira ku mabbali g'ekkubo okwolekera wankaaki w'ekibuga. Omuntu yenna bwe yabanga n'ensonga gye yaleeteranga kabaka okulamula, Abusaalomu yamuyitanga n'amubuuza nti, "Oviira mu kibuga ki?" Bwe yaddangamu nti, "Omuddu wo aviira mu kimu ku bika bya Isirayiri,"

³Abusaalomu n'alyoka amugamba nti, "Laba, ensonga ntuufu era etegeerekeka, naye tewali muntu anaagikulamulira."

⁴Ate era Abusaalomu yayongerangako ne kino nti, "Singa nnondebwa okuba omukulembeze mu nsi, olwo buli muntu alina ensonga anajjanga gye ndi, ne mukolera ku nsonga ye."

⁵Ate era omuntu yenna eyajjanga n'amuvuunamira ng'amuwa ekitiibwa, yagololanga omukono gwe, n'amukwatako n'amunywegera ng'amulamus.

⁶Bw'atylo Abusaalomu bwe yeeyisanga eri Abayisirayiri bona abajjanga eri kabaka nga baagala okubalamulira ensonga zaabwe. Ekyavaamu n'abba emitima gy'abantu ba Isirayiri.

⁷Oluvannyuma lw'emyaka ena, Abusaalomu n'agamba kabaka nti, "Nkwegayiridde, nzikiriza njende e Kebbulooni, ntukirize obweyamo bwange bwe nakola eri MUKAMA.

⁸Omeweereza wo bwe yabeeranga e Gesuli mu Busuuli, nakola obweyamo nga njamba nti, 'MUKAMA bw'alinzizaayo e Yerusaalemi, ndisinza MUKAMA.'"

⁹Kabaka n'amuddamu nti, "Ggenda mirembe." N'asitula n'alaga e Kebbulooni.

¹⁰Abusaalomu n'atuma ababaka kyama mu bika byonna ebya Isirayiri, babagambe nti, "Amangwago nga muwulidde okuvuga kw'amakondeere, mwogere nti, 'Abusaalomu ye kabaka e Kebbulooni.'"

¹¹Abasajja ebikumi bibiri be baawerekera Abusaalomu oluvannyuma olw'okuyitibwa ng'abagenyi, songa tebaalina kye baamanya ku nsonga eyo.

¹²Mu kiseera ekyo, Abusaalomu bwe yali ng'awaayo ssaddaaka, n'atumya Akisoferi Omugiro, omuwi w'amagezi owa Dawudi, okuva mu kibuga ky'e Giro. Obujeemu ne bwongerwamu amaanyi n'abagoberezi ba Abusaalomu ne beeyongeranga obungi.

¹³Omubaka n'ajja n'ategeeza Dawudi nti, "Emitima gy'abantu ba Isirayiri gigoberedde Abusaalomu."

¹⁴Awo Dawudi n'agamba abakungu be bona abiali naye e Yerusaalemi nti, "Mugolokoke tuduke kubanga bwe tutakole bwe tutyo tewaabewo n'omu ku ffe anaawona Abusaalomu. Tuteekwa okuvaawo amangu nga bwe kisoboka, aleme okutusaangiriza wano okusaanyaawo ekibuga n'ekitala."

¹⁵Abakungu ba kabaka ne bamuddamu nti, "Abaddu bo beetegefu okukola kyonna, mukama waffe kabaka ky'anaaba asazeewo."

¹⁶Awo Kabaka n'asitula n'ennyumba ye yonna ne bamugoberera, naye n'alekawo abakyala be kkumi okulabirira olubiri.

¹⁷Kabaka n'abantu bona abaagenda naye, bwe baatambulako akabanga, ne batuuka mu kifo ekimu ewalako n'olubiri ne bayimirira awo.

¹⁸Abasajja be bona ne bamukulemberamu, n'Abakeresi bona n'Abaperesi bona, n'Abagitti olukaaga bona abiali bamugoberedde okuva e Gaasi ne bakumba nga bamukulemmbeddemu.

¹⁹Awo kabaka n'agamba Ittayi Omugitti nti, "Lwaki otugoberera? Ddayo obeere ne kabaka Abusaalomu. Oli munnaggwanga eyagobebwa ewaabwe.

²⁰Wajja jjuuzi. Lwaki leero nkutambuza eno n'eri, nga ssinamanya gye ndaga? Ddayo n'abantu bo. Ekisa n'emirembe bibeerenga naawe."

²¹Naye Ittayi n'addamu kabaka nti, "MUKAMA nga bw'ali omulamu, era mukama wange kabaka nga bw'ali omulamu, buli mukama wange kabaka

gy'anaagendanga, oba bulamu oba kufa, omuddu wo anaabeeranga wamu naawe."

²²Dawudi n'agamba Ittayi nti, "Kale yitawo ogende mu maaso." Awo Ittayi Omugitti n'abasajja be bona n'abantu baabwe abaali naye ne bayitawo.

²³Ab'omu byalo bona ne bakaaba nnyo bwe baalaba abantu nga bayitawo. Kabaka naye n'asomoka akagga Kidulooni, abantu bona ne bayitawo ne boolekera eddungu.

²⁴Zadooki awamu n'Abaleevi bona abaali awamu naye, abaasitulanga essanduuko ey'endagaano ya MUKAMA, baagenda ne kabaka. Essanduuko ya Katonda ne bagissa wansi, Abiyasaali naye n'ayambuka okuwaayo ssaddaaka okutuusa abantu bona bwe baggwa mu kibuga.

²⁵Awo kabaka n'agamba Zadooki nti, "Zzaayo essanduuko ya Katonda mu kibuga. Bwe ndiraba ekisa mu maaso ga MUKAMA, alinkomyawo, ne ngirabako n'ekifo MUKAMA ky'abeeramu.

²⁶Naye bw'alisalawo nti, 'Ssiri musanyufu naawe,' ndimweteefuteefu ankole nga bw'asiima."

²⁷Ate era kabaka n'agamba Zadooki nti, "Toli mulabi? Ddayo mu kibuga mirembe, ne mutabani wo Akimaazi ne mutabani wa Abiyasaali, Yonasaani. Gwe ne Abiyasaali muddeeyo ne batabani bammwe.

²⁸Ndirindirira ekigambo ekiriva gye muli, we tulisomokera okulaga mu ddungu."

²⁹Awo Zadooki ne Abiyasaali ne bazzaayo essanduuko ya Katonda e Yerusaalemi ne basigala eyo.

³⁰Naye Dawudi n'alinnyalinnya n'alaga ku lusozi olw'Emizeeyituuni ng'akaaba, n'omutwe ng'agubisse era ng'ali mu bigere. Abantu bona abaali awamu naye nabo baali beebisse emitwe era nga bakaaba.

³¹Dawudi n'ategeezebwa nti, "Akisoferi ali omu ku abo abeekobaana ne Abusaalomu." Dawudi n'asaba nti, "Ayi MUKAMA Katonda nkwegayiridde, fuula amagezi ga Akisoferi obusirusiru."

³²Awo Dawudi bwe yatuuka ku ntikko y'olusozi, abantu gye baasinzipanga Katonda, Kusaayi Omwaluki yaliyo okumusisinkana, ekkooti ye ng'eyulise n'omutwe gwe nga gujjudde enfuufu.

³³Dawudi n'amugamba nti, "Bw'onoogenda nange ojja kunfuukira ekizibu.

³⁴Naye bw'onoddayo mu kibuga, n'ogamba Abusaalomu nti, 'Ndibeera omuddu wo, ayi kabaka; nga bwe naweerezanga kitaawo mu biro eby'edda, bwe ntyo

bwe nnaakuweerezanga,’ onooba ombedde mu nsonga ey’okulemesa Akisoferi, afuuse omuwi w’amegezi owa Abusaalomu.

³⁵Zadooki ne Abiyasaali tebaliyi? Kale bategeeze ekigambo kyonna ky’onoowulira mu lubiri.

³⁶Batabani baabwe ababiri, Akimaazi mutabani wa Zadooki ne Yonasaani mutabani wa Abiyasaali nabo bali eyo, era abo boonoontumiranga bwe wanaabangawo ensonga yonna.”

³⁷Awo Kusaayi mukwano gwa Dawudi n’atuuka e Yerusaalemi, nga Abusaalomu ayingira ekibuga.

2 Samwiri 16

Dawudi ne Ziba

¹Awo Dawudi bwe yali ng’atambuddeko ebbanga ttono n’okuva awaali olusiisira, Ziba omuddu wa Mefibosesi n’ajja okumusisinkana. Yalina endogoyi bbiri eziriko amatandiiko, nga zeetisse emigaati ebikumi bibiri, n’ebirimba eby’ezabbibu enkalu kikumi, n’ebirimba eby’ebibala eby’ekyeya kikumi, n’ekita kya wayini.

²Kabaka n’abuuza Ziba nti, “Bino oleese bya ki?” Ziba n’addamu nti, “Endogoyi za ba mu nnyumba ya kabaka okwebagalanga, n’emigaati n’ebibala bya bavubuka okulya, ne wayini, w’abo abaliyongobera mu ddungu.”

³Kabaka n’amubuuza nti, “Ate muzzukulu wa mukama wo ali ludda wa?” Ziba n’amuddamu nti, “Yasigadde mu Yerusaalemi, kubanga yallowoozezza nti, ‘Leero ennyumba ya Isirayiri eneenziriza obwakabaka bwa jjajjange.’”

⁴Awo kabaka n’agamba Ziba nti, “Byonna ebibadde ebya Mefibosesi, kaakano bibyo.” Ziba n’ayogera nti, “Neeyanzizza, era ɲjanje mu maaso go, mukama wange kabaka.”

Simeeyi Akolimira Dawudi

⁵Awo kabaka Dawudi bwe yali ng’anaatera okutuuka e Bakulimu ne wajja omusajja ow’omu kika ky’ennyumba ya Sawulo erinnya lye Simeeyi mutabani wa Gera; n’akolima nga bw’asembera okumpi ne we baali.

⁶N’akasuukirira Dawudi n’abakungu ba kabaka amayinja, naye abaserikale bona n’abakuumi ba Dawudi nga bamwetoolodde ku luuyi lwe olwa ddyo ne ku luuyi lwe olwa kkono.

⁷Simeeyi n’akolima, nga bw’ayogera nti, “Fuluma, vva wano, ggwe omusajja eyasaaba omusaayi, era ataliiko bw’ali!

⁸MUKAMA akusasudde olw’omusaayi gwonna gwe wayiwa mu nnyumba ya Sawulo, gwe waddiru mu bigere. MUKAMA obwakabaka abugabidde mutabani

wo Abusaalomu. Laba ekikutuusizza kw'ekyo, kubanga engalo zo zижjudde omusaayi!"

⁹ Awo Abisaayi mutabani wa Zeruyiya n'agamba kabaka nti, "Lwaki embwa eyo enfu ekolimira mukama wange kabaka? Leka ญjende mmutemeko omutwe."

¹⁰ Naye kabaka n'ayogera nti, "Luganda ki lwe nnina nammwe, mmwe batabani ba Zeruyiya? Bw'aba ng'ankolimira kubanga MUKAMA ye yamugambye nti, 'Kolimira Dawudi,' ani ayinza okubuuza nti, 'Kiki ekikukoza bw'otyo?'"

¹¹ Awo Dawudi n'agamba Abisaayi n'abakungu be bona nti, "Obanga mutabani wange, ow'omusaayi gwange agezaako okunzita, naye ate Omubenyamini oyo. Mumuleke, akolime, kubanga MUKAMA amulagidde.

¹² Oboolyawo MUKAMA anaalaba okunakuwala kwange n'ansasula obulungi olw'okukolima okwo."

¹³ Awo Dawudi n'abasajja be ne bagenda ku lugendo lwabwe, naye Simeeyi n'ayitira ku lusozi okumwolekera nga bw'akolima, nga bw'amukasuukirira amayinja n'enfuufu.

¹⁴ Kabaka n'abantu bona abaali naye ne batuuka gye baali bagenda nga bakooye. N'aweereraweerera eyo.

Amagezi Kusaayi ne Akisoferi ge baawa

¹⁵ Mu kiseera kye kimu, Abusaalomu n'abantu bona aba Isirayiri ne bajja e Yerusaalemi, ne Akisoferi n'ajja naye.

¹⁶ Awo Kusaayi Omwaluki, mukwano gwa Dawudi, n'ajja eri Abusaalomu n'ayogera nti, "Kabaka awangaale! Kabaka awangaale!"

¹⁷ Abusaalomu n'abuuza Kusaayi nti, "Bw'otyo bw'olaga okwagala eri mukwano gwo Kabaka Dawudi? Kiki ekyakulobedde okugenda ne mukwano gwo?"

¹⁸ Kusaayi n'addamu Abusaalomu nti, "Nedda. Oyo MUKAMA gw'anaalonda, n'abantu bano, n'abasajja bona aba Isirayiri, n'abanga wuwe era n'abeeranga naye.

¹⁹ Era nate n'aweereza ani okuggyako mutabani we? Nga bwe naweerezanga kitaawo, bwe ntyo bwe nnaakuweerezanga."

²⁰ Abusaalomu n'agamba Akisoferi nti, "Tuwe ku magezi. Tunaakola tutya?"

²¹ Akisoferi n'addamu nti, "Weebake n'abakyala ba kitaawo be yalekawo okulabirira olubiri. Isirayiri yenna bwe banaawulira ng'ofuuse ekyenyinyalwa eri kitaawo, banaddamu amaanyi."

²² Awo ne basimbira Abusaalomu eweema waggulu ku nnyumba ne yeebaka n'abakyala ba kitaawe, nga Isirayiri yenna balaba.

²³ Mu biro ebyo okuteesa kwa Akisoferi, kwatwalibwanga okuba nga kuva eri Katonda, era Dawudi ne Abusaalomu bwe batyo bwe baatwalanga okuteesa kwe.

2 Samwiri 17

¹Awo Akisoferi n'agamba Abusaalomu nti, “Leka nnonde abasajja omutwalo gumu mu enkumi bbiri, ɳjende mpondere Dawudi ekiro kino.

²Ndimulumba mu bukoowu bwe ne mu bunafu bwe ne mutiisatiisa, era n'abantu bona abali naye balidduka. Ndikuba kabaka yekka ne mutta,

³naye abantu abalala bona ndibakomyawo gy'oli. Okufa kw'omusajja omu yekka gw'onoonya, kulikomyawo abantu bona nga tebaliiko mutawaana.”

⁴Ekigambo ekyo Abusaalomu n'abakadde bona aba Isirayiri ne bakisiima.

⁵ Naye Abusaalomu n'ayogera nti, “Mumpitire ne Kusaayi Omwaluki, tuwulire ky'anaayogera ku nsonga eyo.”

⁶Kusaayi bwe yajja eri Abusaalomu, Abusaalomu n'amugamba nti, Akisoferi, amagezi g'atuwadde ge gano. Tukole nga Akisoferi bw'agambye? Oba nga si weewaawo, ggwe ogamba otya?

⁷Kusaayi n'addamu Abusaalomu nti, “Ago amagezi Akisoferi g'abawadde si malungi ku mulundi guno.

⁸Omanyi kitaawo n'abasajja be nga basajja balwanyi era nga bakambwe ng'eddubu erinyagiddwako abaana baalyo. Ate n'ekirala, kitaawo mulwanyi mumanyirivu; tayinza kusula na baserikale.

⁹Ne mu kiseera kino, ayinza okuba nga yeekwese mu mpuku oba mu kifo ekirala. Bw'anaasooka okulumba abantu bo, buli anaakiwulira anaagamba nti, ‘Bangi ku bagoberezi ba Abusaalomu battiddwa.’

¹⁰Olwo n'omuntu omuzira mu bazira, alina omutima oguli ng'omutima gw'empologoma, anaayongoberera ddala, kubanga Isirayiri yenna bamanyi kitaawo nga musajja mulwanyi, era n'abali naye basajja bazira.

¹¹“Naye nze amagezi ge nkuwa ge gano: kuɳjaanya gy'oli Isirayiri yenna okuva ku Ddaani okutuuka e Beeruseba, mu bungi bwabwe, ng'omusenyu ogw'oku nnyanja bwe guli obungi, ggwe mwene obakulembere mu lutalo.

¹²Tulimulumba yonna gy'alisangibwa, ne tumugwako ng'omusulo bwe gugwa ku ttaka. Ye newaakubadde abasajja abali naye, tewaliba n'omu aliba omulamu.

¹³Bw'aliddukira mu kibuga, Isirayiri yenna, balireeta emiguwa, ne tukiwalulira mu mugga obutalekawo jjinja n'erimu.”

¹⁴ Awo Abusaalomu n'abasajja bona aba Isirayiri ne bakkiriziganya nti, "Ekiteeso Kusaayi Omwaluki ky'aleese kirungi okusinga ekya Akisoferi." MUKAMA yasiima okulemesa ekiteeso ekirungi ekya Akisoferi alyoke azikirize Abusaalomu.

¹⁵ Naye Kusaayi n'ategeeza Zadooki ne Abiyasaali bakabona nti, "Akisoferi awadde Abusaalomu n'abakadde ba Isirayiri amagezi bwe gati ne bwe gati, naye nze mbawabudde okukola bwe batne bwe batne.

¹⁶ Kaakano muweereze mangu obubaka mutegheeze Dawudi nti, 'Ekiro kya leero tosula ku misomoko egy'omu ddungu; ssomoka, kabaka n'abantu bona abali naye baleme okumalibwawo.'

¹⁷ Yonasaani ne Akimaazi baabeeranga ku Energeri. Baali balinda omuwala okujja okubategeeza byonna, n'oluvannyuma bagende babuulire kabaka Dawudi; baali beewala okulabibwa nga bayingira mu kibuga.

¹⁸ Naye waaliwo omuvubuka eyabalaba, n'agenda n'abuulira Abusaalomu. Amangwago bombi ne baddukira mu nnyumba ey'omwami omu mu Bakulimu. Yalina oluzzi mu luggyga lwe; ne bakka omwo.

¹⁹ Omukyala we n'addirira ekisaanikira n'asaanikira ku kamwa k'oluzzi, n'ayiwako enjaano n'agisaasaanyizaako. Ne wataba n'omu eyakitegeera.

²⁰ Awo abasajja ba Abusaalomu bwe batuuka ew'omukyala ku nnyumba, ne bamubuuza nti, "Akimaazi ne Yonasaani bali ludda wa?" N'abaddamu nti, "Basomose akagga ak'amazzi." Abasajja ne babanoonyako naye ne batalaba muntu yenna, ne baddayo e Yerusaalemi.

²¹ Abasajja bwe baagenda, abaali beekwese ne bava mu luzzi ne bagenda ne bategeeza kabaka Dawudi. Ne bamugamba nti, "Golokoka osomoke mangu omugga, kubanga Akisoferi ateeseteese bw'ati ne bw'ati."

²² Awo Dawudi n'abantu bona abaali naye ne bagolokoka ne basomoka Yoludaani; we bwakeerera nga tewali n'omu atasomose Yoludaani.

²³ Akisoferi bwe yalaba nga amagezi ge tegagobereddwa, ne yeebagala endogoyi ye, n'agenda ewuwe mu kyallo kye waabwe. N'ateekateeka ennyumba ye, n'oluvannyuma ne yeetuga. N'aziikibwa mu ntaana ya kitaawe.

²⁴ Dawudi n'agenda e Makanayimu, ne Abusaalomu n'abasajja bona aba Isirayiri ne basomoka Yoludaani.

²⁵ Abusaalomu n'alonda Amasa okuba omuduumizi w'eggye mu kifo kya Yowaabu. Amasa yali mutabani wa Isira Omuyisimayiri eyawasa Abbigayiri muwala wa Nakasi muganda wa Zeruyiya nnyina Yowaabu.

²⁶ Abayisirayiri ne Abusaalomu ne basiisira mu nsi ya Gireyaadi.

²⁷ Dawudi bwe yatuuka e Makanayimu, Sobi mutabani wa Nakasi ow'e Labba eky'Abamoni, ne Makiri mutabani wa Ammiyeri ow'e Lodebali, ne Baluzirayi Omugireyaadi ow'e Logerimu,

²⁸ ne bamuleetera ebyokwebikka, n'ebibya, n'entamu, n'enjaano, ne sayiri, n'obutta, n'enjaano ensiike, n'ebijanjaalo, n'empindi, ne mpokya omusiike,

²⁹ n'omubisi gw'enjuki, n'omuzigo, n'endiga, ne bbongo, ne babiwa Dawudi n'abantu be okulya. Ne boogera nti, "Abantu enjala ebaluma, era bakooye, n'ennyonta ebalumidde mu ddungu."

2 Samwiri 18

Okufa kwa Abusaalomu

¹Awo Dawudi n'akuŋjaanya abasajja be yalina, n'abalondamu abaduumizi b'enkumi n'abaduumizi b'ebikumi.

²Dawudi n'abalagira bagende, ekimu kya kusatu nga kiduumirwa Yowaabu, ekimu kya kusatu ekirala nga kiduumirwa muganda wa Yowaabu, Abisaayi batabani wa Zeruyiya, n'ekimu kya kusatu ekirala nga kiduumirwa Ittayi Omugitti. Kabaka n'agamba abasajja nti, "Nange n'agenda nammwe."

³ Naye abasajja ne boogera nti, "Toteekwa kugenda naffe, kubanga ffe bwe tunadduka tebaatufeeko. Ekitundu ku ffe ne bwe tunaafa tebaafeeyo. Ggwe olimu abantu omutwalo gumu ku ffe ffenna. Ekisinga obulungi weeteeketeke okutudduukirira ng'osinziira mu kibuga."

⁴Kabaka n'addamu nti, "Kye musiimye kye nnaakola." Awo kabaka n'ayimirira ku mabbali ga wankaaki, ng'eggye lyonna likumba okufuluma mu bibinja eby'ekikumi n'eb'yolukumi.

⁵Kabaka n'alagira Yowaabu, ne Abisaayi ne Ittayi ng'ayogera nti, "Omuvubuka Abusaalomu mumukwate n'ekisa ku lwange." Abantu bonna ne bawulira kabaka ng'awa abaduumizi bonna ebiragiro ebikwata ku Abusaalomu.

⁶Awo eggye ne lifuluma ku ttale okulwana ne Isirayiri, olutalo ne luba mu kibira kya Efulayimu.

⁷Abasajja ba Isirayiri ne bakubibwa abasajja ba Dawudi, era bangi ne battibwa ku lunaku olwo. Baawera ng'emitwalo ebiri.

⁸Olutalo ne lubuna ensi yonna, abantu bangi ne bafiira mu kibira okusinga n'abattibwa n'ekitala.

⁹ Awo Abusaalomu n'asisinkana n'abasajja ba Dawudi. Yali yeebagadde ennyumbu ye. Ennyumbu n'eyita wansi w'amatabi amangi ag'omwera omunene, omutwe gwa Abusaalomu ne gulaaliramu, n'asigala ng'alengejja mu bbanga, ennyumbu gye yali yeebagadde n'egenda mu maaso.

¹⁰Omú ku basajja bwe yakiraba n'ategeeza Yowaabu nti, "Laba nnalengedde Abusaalomu ng'awanikiddwa ku mwera."

¹¹Yowaabu n'agamba omusajja eyaja okumubuulira nti, "Kiki, wamulabye? Kiki ekyakulobedde okumuttirawo? N'andikusasudde gulaamu kikumi mu kkumi na ttaano eza ffeeza ne nkuwa n'olukoba olw'obuzira."

¹²Naye omusajja n'amuddamu nti, "Ne bwe wandinsasudde kilo kkumi n'emu eza ffeeza, sandigololedde mukono gwange ku mwana wa kabaka. Ffenna twawulidde kabaka ng'abalagira ggwe, Abisaayi ne Ittayi nti, 'Waleme okubaawo omuntu yenna anaakola Abusaalomu akabi ku lwange.'

¹³Kale singa mmusse ne ngwa mu mitawaana, tewandimpolerezza, kubanga omanyi nga tewali kigambo ekikwekebwa kabaka."

¹⁴Yowaabu n'ayogera nti, "Sirina bbanga lya kukwonoonerako." N'addira obusaale busatu n'abulasa mu kifuba kya Abusaalomu ng'akyali mulamu mu mwera.

¹⁵N'abavubuka kkumi abaasitulanga ebyokulwanyisa bya Yowaabu ne beetooloola Abusaalomu ne bamukuba ne bamutta.

¹⁶Awo Yowaabu n'afuuwa ekkondeere, eggye ne lireka okugoberera Isirayiri kubanga Yowaabu yabayimiriza.

¹⁷Ne batwala Abusaalomu, ne bamusuula mu lunnya oluwanvu mu kibira, ne bamutuumako amayinja. Isirayiri yenna ne badduka nga buli muntu adda ewuwe.

¹⁸Mu bulamu bwe, Abusaalomu yaddira empagi n'agiteeka mu kiwonvu kya kabaka ng'ekijjukizo kye; n'ayogera nti, "Sirina mwana wabulenzi kwe balijjuukirira erinnya lyange." Empagi n'agituumma erinnya lye, era eyitibwa kijjukizo kya Abusaalomu ne leero.

Dawudi Akungubagira Abusaalomu

¹⁹Akimaazi mutabani wa Zadooki n'ayogera nti, "Ka nziruke, ntwalire kabaka amawulire nga MUKAMA bw'amulokodde mu mukono gw'omulabe we."

²⁰Naye Yowaabu n'amugamba nti, "Si ggwe onootwala amawulire leero. Oligatwala olunaku olulala olutali lwa leero, kubanga mutabani wa kabaka afudde."

²¹Awo Yowaabu n'agamba omusajja Omukusi nti, "Genda otegeeze kabaka by'olabye." Omukusi n'avuunama mu maaso ga Yowaabu n'adduka.

²²Akimaazi mutabani wa Zadooki n'agamba Yowaabu nate nti, "Nkwegayiridde, nzikiriza mmale gagoberera Omukusi." Yowaabu n'amuddamu nti, "Mutabani wange, kiki ekinaaba kikutwala ate nga tolina mawulire g'onootwala aganakuweesa ekirabo?"

²³N'ayogera nti, "Ka mmale gagenda." Awo Yowaabu n'amugamba nti, "Dduka." Akimaazi n'addukira mu kkubo ery'olusenyi lwa Yoludaani n'ayisa Omukusi.

²⁴Awo Dawudi yali atudde wakati w'emiryango ebiri ogw'omunda n'ogw'ebweru, omukuumi n'alinnya waggulu ku wankaaki ku bbugwe. Bwe yayimusa amaaso ge n'alengera omusajja ng'ajja adduka yekka.

²⁵Omukuumi n'ayogerera waggulu n'ategeeza kabaka. Awo kabaka n'amugamba nti, "Bw'aba ng'ali yekka ateekwa okuba ng'aleeta mawulire malungi." Omusajja n'asembera.

²⁶Omukuumi n'alengera omusajja omulala ng'ajja adduka, n'akoowoola omuggazi nti, "Laba omusajja omulala ajja adduka yekka." Kabaka n'ayogera nti, "Naye ateekwa okuba ng'aleeta mawulire malungi."

²⁷Awo omukuumi n'ayogera nti, "Kindabikira nga enziruka ey'oli akuleembedde eri ng'eya Akimaazi mutabani wa Zadooki." Kabaka n'ayogera nti, "Oyo musajja mulungi era ajja n'amawulire malungi."

²⁸Awo Akimaazi n'ayogerera mu ddoboozi ery'omwanguka ng'agamba kabaka nti, "Byonna birungi." N'avuunama mu maaso ga kabaka, ne yeeyala wansi n'ayogera nti, "Yeebazibwe MUKAMA Katonda wo, azikirizza abasajja abayimusizza omukono ku mukama wange kabaka."

²⁹Awo kabaka n'abuuza nti, "Omuvubuka Abusaalomu ali bulungi?" Akimaazi n'addamu nti, "Yowaabu bwe yabadde ng'anaatera okutuma omuddu wa kabaka, nange omuddu wo, nalabye oluyoogaano olunene, naye saatgedde kyabadde wo."

³⁰Kabaka n'amugamba nti, "Ggwe dda wabbali." N'adda wabbali n'ayimirira awo.

³¹Awo Omukusi n'atuuka, n'ayogera nti, "Wulira amawulire amalungi mukama wange kabaka. MUKAMA akulokodde leero mu mukono gw'abo bona abakuyimukiramu."

³²Kabaka n'abuuza Omukusi nti, "Omuvubuka Abusaalomu mulamu?" Omukusi n'addamu nti, "Ekituuse ku muvubuka oyo, kituuke ku balabe ba mukama wange kabaka, n'abo bona abamuyimukiramu okumukola akabi."

³³Kabaka n'afuna ensisi, n'ayambuka mu kisenge ekyali waggulu wa wankaaki, n'akaaba. N'agenda nga bw'ayogera nti, "Mutabani wange Abusaalomu, mutabani wange, mutabani wange Abusaalomu. Singa nze nfudde mu kifo kyo, Abusaalomu, mutabani wange!"

2 Samwiri 19

¹Yowaabu n'ategeezebwa nti, "Kabaka akaaba era akungubagira Abusaalomu."

²Ku lunaku olwo obuwanguzi ne bufuuka okukungubaga eri abantu bona, kubanga baawulira nti, "Kabaka anakuwadde olwa mutabani we."

³Abantu ne bebbirira ne bayingira mu kibuga, ng'abantu abakwatiddwa ensonyi bwe bafaanana nga badduse mu lutalo.

⁴Kabaka n'abikka amaaso ge n'akaaba n'eddoboozi ddene nti, "Mutabani wange Abusaalomu! Woowe Abusaalomu mutabani wange!"

⁵Awo Yowaabu n'alaga mu nnyumba kabaka gye yali n'amugamba nti, "Leero oswazizza abaweereza bo, abawonyezza obulamu bwo, n'obulamu bwa batabani bo ne bawala bo, n'obulamu bwa bakyala bo n'abazaana bo.

⁶Oyagala abakukyawa ate n'okyawa abakwagala. Leero okikakasizza ng'abaduumizi n'abaweereza si kintu gy'oli. Era kindabikira nga singa Abusaalomu abadde mulamu, ffe ffenna nga tufudde leero, wandisanyuse.

⁷Kale nno golokoka ogende ogumye emyoyo gy'abaweereza bo, kubanga nkulayirira eri MUKAMA, nga bwe wataabeewo musajja n'omu anaasigala naawe ekiro kya leero. Ekyo kye kirisingako obubi okusinga obubi bwonna bwe wali olabye okuva mu buto bwo."

⁸Awo kabaka n'agolokoka, n'addirira entebe ye n'agiteeka mu mulyango ogwa wankaaki, bona ne bajja gy'ali.

Dawudi Addayo e Yerusaalemi

Mu kiseera ekyo Abayisirayiri baali baddukidde buli muntu ewuwe.

⁹Abantu bona mu bika byonna ebya Isirayiri baali bakaayana nga boogera nti, "Kabaka yatuwonya mu mukono gw'abalabe baffe, n'atuwonya ne mu mukono gw'Abafirisuuti, kaakano adduse Abusaalomu n'ava mu nsi.

¹⁰Naye Abusaalomu gwe twalonda okutufuga afiiridde mu lutalo. Kaakano kiki ekitulobera okukomyawo kabaka?"

¹¹Awo kabaka Dawudi n'atumira Zadooki ne Abiyasaali bakabona nti, "Mubuuze abakadde ba Yuda nti, 'Lwaki mmwe musembayo okukomyawo kabaka mu lubiri lwe, ebigambo nga byatuuse dda ku kabaka okuva mu Isirayiri yenna?

¹²Mmwe muli baganda bange, mubiri gwange era musaayi gwange, naye lwaki mmwe musembayo okukomyawo kabaka?"

¹³Ate mugambe ne Amasa nti, 'Toli mubiri gwange era musaayi gwange? Katonda ankole bw'atyo n'okukirawo, bw'otobeere muduumizi wa ggye lyange mu kifo kya Yowaabu okuva ne kaakano.'"

¹⁴N'awamba emitima gy'abantu bona aba Yuda ne baba omuntu omu, ne baweereza obubaka eri kabaka nti, "Mukomeewo, ggwe n'abaweereza bo bona."

¹⁵Awo kabaka n'addayo n'atuuka ku Yoludaani. Abantu ba Yuda ne bajja e Girugaali okusisinkana kabaka, n'okumusomosa Yoludaani.

¹⁶Simeeyi mutabani wa Gera Omubenyamini ow'e Bakulimu n'aserengeta mangu n'abasajja ba Yuda okusisinkana kabaka Dawudi.

¹⁷Yagenda n'Ababenayamini lukumi, ne Ziba omuddu w'ennyumba ya Sawulo ne batabani be kkumi na bataano n'abweereza be amakumi abiri. Ne banguwa okulaga ku Yoludaani kabaka gye yali.

¹⁸Ne basomosa ennyumba ya Dawudi, era ne bakola ng'okusiima kwe bwe kwali. Awo Simeeyi mutabani wa Gera n'asomoka Yoludaani, n'agwa bugazi mu maaso ga kabaka,

¹⁹n'amwegayirira ng'agamba nti, "Mukama wange ansonyiwe, aleme okujjukira ebisobyo bye nakola ku lunaku luli, mukama wange kabaka lwe yava mu Yerusaalemi. Kabaka aleme okukijjukira.

²⁰Kubanga nze omuweereza wo mmayi nga nayonoona, naye leero mu nnyumba eya Yusufu nze nsoose okujja okusisinkana mukama wange kabaka."

²¹Awo Abisaayi mutabani wa Zeruyiya n'ayogera nti, "Lwaki Simeeyi tattibwa olw'okukolimira omulonde wa MUKAMA?"

²²Naye Dawudi n'amuddamu nti, "Kiki ekitugatta nze nammwe batabani ba Zeruyiya, mulyoke mufuuke abalabe bange olwa leero? Lwaki omuntu yenna attibwa mu Isirayiri olwa leero, ate nga mmayi nga nze kabaka wa Isirayiri leero?"

²³Awo kabaka n'agamba Simeeyi nti, "Tojja kufa." Era kabaka n'amulayirira.

²⁴Mefibosesi muzzukulu wa Sawulo naye n'aserengeta okusisinkana kabaka; yali tanaabanga bigere bye newaakubadde okumwa ekirevu kye newaakubadde okwoza engoye ze, okuva ku lunaku kabaka lwe yagenderako okutuusa ku lunaku lwe yakomawo emirembe.

²⁵Awo bwe yatuuka okuva e Yerusaalemi n'asisinkana kabaka, kabaka n'amubuuza nti, "Kiki ekyakulobera okugenda nange Mefibosesi?"

²⁶N'addamu nti, "Mukama wange, kabaka, okimanyi nga omuweereza wo mulema. Nagamba omuddu wange nti, 'Ntekerateekera endogoyi, njebagale, ηnjende ne kabaka,' naye n'ambuzaabuza, n'abulawo.

²⁷Yajja eri mukama wange kabaka n'ayogera ku muddu wo ebya kalebule. Naye mukama wange kabaka ali nga malayika wa Katonda, noolwekyo kola nga bw'osiima.

²⁸Ab'ennyumba ya jjajjange bona baali basaanira kufa bufi mu maaso ga mukama wange kabaka, naye nange n'omala gansaasira n'onzikiriza okuba ku abo abatuula ku m meeza yo. Kale kiki kye sifunye okuva eri kabaka?"

²⁹Awo kabaka n'amugamba nti, "Lwaki weeyongera okweyogerako? Ndagidde kaakano, ggwe ne Ziba mugabane ettaka eryo."

³⁰Mefibosesi n'agamba kabaka nti, "Atwale lyonna, kubanga mukama wange kabaka akomyewo mirembe mu bwakabaka bwe."

³¹Baluzirayi Omugireyaadi naye n'aserengeta okuva e Logerimu n'agenda okusomosa kabaka, Yoludaani.

³²Baluzirayi yali musajja mukadde nnyo, ng'awezessa emyaka kinaana, era yali agabiridde kabaka ebyokulya we yabeerera e Makanayimu kubanga yali musajja mugagga nnyo.

³³Awo kabaka n'agamba Baluzirayi nti, "Somoka nange, tugende ffenna e Yerusaalemi, n'akulabiriranga."

³⁴Naye Baluzirayi n'addamu kabaka nti, "Nnina ennaku meka okuba omulamu, ndyoke ηjende ne kabaka e Yerusaalemi?

³⁵Mpezezza emyaka kinaana, olowooza nkyayinza okwawula ekirungi n'ekibi? Olowooza nga omuddu wo akyayinza okutegeera ky'alya ne ky'anywa? Nkyayinza okuwuliriza amaloboozi g'abasajja abayimba n'abakyala abayimbi? Lwaki nzitoowerera mukama wange kabaka?

³⁶Omuweereza wo anasomosa busomosa kabaka, Yoludaani, naye nga siraba kiki enkimpeesa empeera eyenkana awo.

³⁷Nkwegayiridde, kkiriza omuddu wo addeyo, nfire mu kibuga kyange okumpi n'ebiggya bya kitange ne mmange. Naye omuddu wo Kimamu wuuyo. Leka asomoke ne mukama wange kabaka, onoomukolera byonna nga bw'onoosiima."

³⁸Kabaka n'ayogera nti, "Kale Kimamu anaasomoka nange, era ndimukolera nga bw'olisiiima; ne kyonna ky'onooyagala n'akikukolera."

³⁹Awo abantu bona ne basomoka Yoludaani, kabaka n'asomoka nabo. Kabaka n'anywegera Baluzirayi n'amusabira omukisa, n'addayo ewuwe.

⁴⁰Kabaka n'agenda e Girugaali ne Kimamu n'agenda naye; abantu bona aba Yuda, n'ekimu kyakubiri ku bantu ba Isirayiri ne bawerekera kabaka.

⁴¹Oluvannyuma lwe bbanga ttono, abasajja bona aba Isirayiri ne bagenda eri kabaka, ne bagamba kabaka nti, "Lwaki baganda baffe, abasajja aba Yuda, babba kabaka, ne bamutwala ye n'ennyumba ye, ne bamusomosa Yoludaani n'abasajja be?"

⁴²Abasajja bona aba Yuda ne baddamu abasajja ba Isirayiri nti, “Ekyo twakikola kubanga tuli ba musaayi gumu naye. Kiki ekibatabudde mu nsonga eyo? Tulina bye tulidde ku bya kabaka? Oba mulowooza nga tulina ebirabo bye tugabanye?”

⁴³ Awo abasajja ba Isirayiri ne baddamu abasajja ba Yuda nti, “Okusooka byonna, obwakabaka tubulinamu emigabo kkumi. N’ekyokubiri, Dawudi wa ku luganda lwaffe n’okusinga mmwe. Kale lwaki mwatunyooma? Si ffe twasooka okwogera ku ky’okukomyawo kabaka waffe?” Naye ebigambo eby’abasajja ba Yuda ne biba bisongovu nnyo n’okusinga ebigambo eby’abasajja ba Isirayiri.

2 Samwiri 20

Seba Ajeemera Dawudi

¹ Waaliwo omusajja omujeemu erinnya lye Seba, mutabani wa Bikuli, Omubenyamini. Yafuuwa ekkondeere n’ayogerera n’eddoboozi ery’omwanguka nti, “Tetulina mugabo mu Dawudi, so tetulina busika mu mutabani wa Yes! Buli muntu adde mu weema ye, ggwe Isirayiri!”

²Awo abantu ba Isirayiri bona ne balekulira Dawudi ne bagoberera Seba mutabani wa Bikuli. Naye abantu ba Yuda bo ne basigala ne kabaka waabwe, okuva ku Yoludaani okutuuka e Yerusaalemi.

³Dawudi bwe yadda mu lubiri lwe e Yerusaalemi, n’addiria abakyala be ekkumi be yali alese okulabirira olubiri n’abasibira mu kkomera. N’abagabirira mu byokulya kwabwe, naye n’atebaka nabo. Ne baggalirwa eyo okutuusa lwe baafa, nga bali nga bannamwandu.

⁴ Awo kabaka n’agamba Amasa nti, “Nkuŋjaanyiza abasajja ba Yuda mu nnaku ssatu, naawe obeerewo.”

⁵Naye Amasa bwe yagenda okukola ky’alagiddwa, n’atwala ekiseera kiwanvu okusinga kabaka kye yali amuwadde.

⁶Dawudi n’agamba Abisaayi nti, “Seba mutabani wa Bikuli alitukola akabi okusinga Abusaalomu bwe yakola. Noolwekyo twala abasajja ba mukama wo omugoberere aleme okuddukira mu bibuga ebiriko bbugwe, n’atusimatuka.”

⁷Awo abasajja ba Yowaabu, n’Abakeresi, n’Abaperesi, n’abaserikale abazira bona, ne bava mu Yerusaalemi ne bagenda okunoonya Seba mutabani wa Bikuli nga baduumirwa Abisaayi.

⁸ Bwe baatuuka ku lwazi olunene mu Gibyoni, Amasa n’ajja okubasisinkana. Yowaabu yali yeesibye ebyambalo bye eby’olutalo, ne mu kiwato nga yeesibye olukoba olwaliko ekitala ekyali mu kiraato kyakyo. Bwe yasituka, ne kisowoka mu kiraato kyakyo ne kigwa wansi.

⁹Yowaabu n'alamusa Amasa ng'ayogera nti, "Mirembe, muganda wange?" Yowaabu n'akwata Amasa ekirevu n'omukono gwe ogwa ddyo, n'aba nga agenda okumunywegera.

¹⁰Naye Amasa n'atassaayo mwoyo okwekuuma ekitala ekyali mu mukono gwa Yowaabu; Yowaabu n'akimufumita mu lubuto, n'ayiwa ebyenda bye wansi. N'atamufumita lwakubiri, Amasa bw'atyo n'afa. Awo Yowaabu ne muganda we Abisaayi ne beeyongera okugoberera Seba mutabani wa Bikuli.

¹¹Omukazi ba Yowaabu n'ayimirira okumpi n'omulambo gwa Amasa n'ayogera nti, "Buli ayagala Yowaabu, era buli ali ku luuyi lwa Dawudi, agoberere Yowaabu."

¹²Omulambo gwa Amasa ne gubeera mu musaayi gwe nga gukulukunyirizibwa omwo wakati mu luguudo. Ne wabaawo omusajja eyalaba nga buli eyatuukanga awali omulambo gwa Amasa ng'ayimirira; omusajja oyo n'agusitula n'aguggya mu luguudo n'agutwala ebbali mu nsiko, n'agusuulako olugoye.

¹³Awo omulambo gwa Amasa bwe gwaggyibwa mu kkubo abantu bona ne beeyongerayo ne Yowaabu okugoberera Seba mutabani wa Bikuli.

¹⁴Seba n'ayita mu bika byonna ebya Isirayiri ng'abakunga okutuuka mu Aberi eky'e Besumaaka, n'ayita ne mu kitundu kyonna eky'Ababeri ne bakuññaanira gy'ali ne bamugoberera.

¹⁵Eggye lyonna eryali ne Yowaabu, ne bazingiza Seba mu Aberi eky'e Besumaaka. Ne bakola ebifunvu okutuuka ku kibuga n'okwolekera ekigo. Bwe baali nga bakyamenya bbugwe,

¹⁶ne wavaayo omukazi ow'amagezi mu kibuga, n'akoowoola ng'ayogera nti, "Muwulirize. Muwulirize! Mugambe Yowaabu ajje wano, mbeeko kye mmugamba."

¹⁷Yowaabu n'agenda okumpi ne we yali, omukazi n'amubuuza nti, "Ggwe Yowaabu?" N'addamu nti, "Nze nzuuyo." N'amugamba nti, "Wuliriza omuweereza wo by'anaayogera." N'addamu nti, "Mpuliriza."

¹⁸N'ayongera n'ayogera nti, "Edda baayogeranga nti, 'Bw'oba ng'olina ky'obuuza genda mu Aberi,' era ekyo kye ky'amalanga ensonga.

¹⁹Ffe bantu abaagazi b'emirembe era abeesigwa mu Isirayiri. Mwagala okuzikiriza ekibuga, nnyina w'abaana mu Isirayiri. Lwaki oyagala okumira obusika bwa MUKAMA?"

²⁰Yowaabu n'addamu nti, "Kikafuuwe, nze okumira ekibuga kino newaakubadde okukizikiriza.

²¹Si bwe kiri. Waliwo omusajja erinnya lye ye Seba, mutabani wa Bikuli, ow'omu nsi ey'ensozi eya Efulayimu, agolodde omukono gwe eri kabaka Dawudi. Bwe munaamuwaayo oyo omu yekka, nange nzia kulekayo okubalumba."

²²Omukazi n'agamba Yowaabu nti, "Omutwe gwe gunaakasukibwa gy'oli ku bbugwe." Awo omukazi n'agenda n'ekiteeso kye eri abantu bonna, ne basalako omutwe gwa Seba mutabani wa Bikuli, ne bagusuulira Yowaabu. Yowaabu n'afuuwa ekkondeere, abasajja be ne bava ku kibuga ne basaasaana, bonna ne baddayo ewaabwe. Yowaabu ye n'addayo eri kabaka mu Yerusaalemi.

²³Yowaabu yali muduumizi wa ggye lya Isirayiri, ne Benaya mutabani wa Yekoyaada nga y'akulira Abakeresi, n'Abaperesi.

²⁴Adolaamu ye yakuliranga abapakasi, Yekosafaati mutabani wa Akirudi ye yali omujjukiza.

²⁵Seva ye yali omuwandiisi, Zadooki ne Abiyasaali nga be bakabona,

²⁶ne Ira Omuyayiri nga ye kabona wa Dawudi.

2 Samwiri 21

Dawudi Atangirira Abagibyoni

¹Awo mu mirembe gya Dawudi ne waba enjala okumala emyaka esatu, Dawudi ne yeeyongera nnyo okunoonya MUKAMA. MUKAMA n'ayogera nti, "Ennyumba ya Sawulo ejjudde omusaayi, kubanga yatta Abagibyoni."

²Kabaka n'akuinjaanya Abagibyoni n'ayogera gye bali. (Abagibyoni tebaali Bayisirayiri naye baali bakaawonawo ab'oku baana b'Abamoli. Abayisirayiri baali babalayiridde obutabakola kabi, naye Sawulo olw'obuggya bwe yalina n'agezaako okubazikiriza ku lwa Isirayiri ne Yuda.)

³Dawudi n'abuuza Abagibyoni nti, "Mbakolere ki? Nnaabatangirira ntya, mmwe okuwa Isirayiri, obusika bwa MUKAMA omukisa?"

⁴Abagibyoni ne bamuddamu nti, "Kye twetaaga okuva eri Sawulo oba ennyumba ye, si kigambo kya ffeeza oba zaabu, so tetulina buyinza kutta muntu yenna mu Isirayiri." Dawudi n'abuuza nti, "Kiki kye mwagala mbakolere?"

⁵Ne baddamu kabaka nti, "Ku lw'omusajja eyatuyigganyanga n'ayagala okutuuzikiriza, ne tubulwako ne we tubeera mu Isirayiri,

⁶tuwe musanvu ku batabani be tubatte tubaanike mu maaso ga MUKAMA e Gibe ekya Sawulo, omulonde wa MUKAMA." Kabaka n'ayogera nti, "Ndibabawa."

⁷Kabaka n'alekawo Mefibosesi mutabani wa Yonasaani, mutabani wa Sawulo.

⁸Naye kabaka n'addiria Alumoni ne Mefibosesi batabani ba Lizupa muwala wa Aya bombi be yazaalira Sawulo, ne batabani ba Mikali muwala wa Sawulo be

yazaalira Abuliyeri mutabani wa Baluzirayi Omumekolasí Sawulo be yalabiriranga bataano, n'abawaayo.

⁹N'abawaayo eri Abagibyoní, ne babatta ne babaanika ku lusozi mu maaso ga MUKAMA. Bonna omusanvu ne battibwa mu nnaku ezaasooka ez'amakungula nga batandika amakungula ga sayiri.

¹⁰Lizupa muwala wa Aya n'addira ebibukutu, n'abyaliira ku lwazi, okuva ku ntandikwa ey'amakungula okutuusa enkuba lwe yatonnya okuva mu ggulu, n'ataganya nnyonyi za mu bbanga newaakubadde ensolo enkambwe okulya emirambo gyabwe emisana oba ekiro.

¹¹Dawudi bwe yategeeezebwa, Lizupa omuzaana wa Sawulo, muwala wa Aya, kye yakola,

¹²n'agenda, n'aggya amagumba ga Sawulo n'aga mutabani we Yonasaani ku bantu ab'e Yabesugireyaadi, Abafirisuuti gye baagawanika, ku lunaku kwe battira Sawulo e Girubowa, abaali bagatutte mu bubba mu kifo ekigazi eky'abantu bona e Besusani.

¹³Dawudi n'aggyayo amagumba ga Sawulo n'aga mutabani we Yonasaani, n'agakuññaanya n'amagumba g'abo abattibwa ne baanikibwa.

¹⁴Ne baziika amagumba ga Sawulo n'aga mutabani we Yonasaani mu ntaana ya Kiisi kitaawe wa Sawulo, e Zeera mu nsi ya Benyamini, ne bakola byonna kabaka bye yalagira. Oluvannyuma Katonda n'addamu okusaba kw'ensi.

Entalo n'Abafirisuuti

¹⁵Ne waba nate olutalo wakati w'Abafirisuuti n'Abayisirayiri. Dawudi n'aserengeta n'abasajja be okulwana n'Abafirisuuti, n'akoowa nnyo.

¹⁶Awo Isubibenobu omu ku bazzukulu b'agasajja agawanvu yalina effumu ng'obuzito bw'omutwe gw'alyo kilo ssatu n'ekitundu ng'alina n'ekitala ekiggya, n'ayogera nti agenda okutta Dawudi.

¹⁷Naye Abisaayi mutabani wa Zeruyiya n'adduukirira Dawudi, n'alumba Omufirisuuti, n'amutta. Awo abasajja ba Dawudi ne bamulayirira nti, "Tokyatabaala naffe ettaala ya Isirayiri ereme okuzikira."

¹⁸Bwe waayitawo ebbanga ne wabaawo olutalo olulala n'Abafirisuuti e Gobu. Sibbekayi Omukusasi n'atta Safu omu ku bazzukulu b'agasajja gali agawanvu.

¹⁹Ne wabaawo nate olutalo olulala n'Abafirisuuti e Gobu, Erukanani mutabani wa Yayiri Omubesirekemu n'atta muganda wa Goluyaasi Omugitti eyalina olunyago lw'effumu olwali ng'omuti ogulukirwako engoye.

²⁰Ne waba olutalo olulala e Gaasi, ne wabaayo omusajja omuwavu ennyo eyalina engalo mukaaga ku buli mukono n'ebigere mukaaga ku buli kigere,

byonna awamu abiri mu bina. Era naye yali muzzukulu w'agasarja gali agawanvu ennyo.

²¹Bwe yasoomooza Isirayiri, Yonasaani mutabani wa Simeeya, muganda wa Dawudi, n'amutta.

²²Abo abana baali bazzukulu b'agasarja gali agawanvu ennyo mu Gaasi, era bona ne bagwa mu mukono gwa Dawudi ne basajja be.

2 Samwiri 22

Oluylimba Iwa Dawudi olw'Okutendereza

¹Awo Dawudi n'ayimbira MUKAMA ebigambo eby'oluylimba luno, MUKAMA bwe yamulokola mu mukono gw'abalabe be ne mu mukono gwa Sawulo.

²N'ayogera nti, "MUKAMA lwe lwazi lwange, era ekigo kyange era omulokozi wange;

³Katonda wange lwe lwazi lwange, omwo mwe neekweka, ye ngabo yange era amaanyi ge bwe bulokozi bwange. Kye kiddukiro kyange, mwe nneekweka era ye mulokozi wange; ggwe ondokola eri abantu ababi.

⁴Nkaabira MUKAMA asaanidde okutenderezebwa, n'andokola eri abalabe bange.

⁵"Amayengo ag'okufa ganzingiza; embuyaga ez'okusaanawo zansaanikira.

⁶Ebisiba eby'amagombe byanneetooloola; n'emitego gy'okufa ne ginjolekera.

⁷Mu nnaku yange nakoowoola MUKAMA; nakoowoola Katonda wange. Yawulira eddoboobi lyange ng'ali mu yeekaalu ye; n'okukaaba kwange kwamutuukako.

⁸"Ensi n'ekankana n'ejjugumira, emisingi gy'eggulu ne ginyeenyezebwa, ne gikankanyizibwa kubanga yali asunguwadde.

⁹Omukka ne gunyooka okuva mu nnyindo ze, n'omuliro ne guva mu kamwa ke, n'amanda agaaliko omuliro ne gava mu ye.

¹⁰Yayabuluza eggulu n'akka wansi; ebire ebikutte nga biri wansi w'ebigere bye.

¹¹Ne yeebagala kerubi n'abuuka, n'aseeyeyeza ku biwaawaatiro by'empewo.

¹²Yafuula ekizikiza ekyamwetooloolanga okuba enkuuifiira, n'ebire ebikutte okuba ekitaba ky'amazzi.

¹³Okumasamasa okwali mu maaso ge kwayakisa amanda ag'omuliro.

¹⁴MUKAMA yabwatuka ng'asinziira mu ggulu; Ali Waggulu Ennyo n'ayogera mu ddoboozi lye.

¹⁵Yalasa obusaale n'asaasaanya abalabe n'okumyansa okw'eggulu, n'abawangula.

- ¹⁶ Ebiwonvu eby'omu nnyanja ne bibikkulwa n'emisingi gy'ensi ne gyeruka olw'okunenya kwa MUKAMA n'olw'okubwatuka kw'omukka ogw'omu nnyindo ze.
- ¹⁷ "Yasinzira waggulu n'antwala n'ansika mu mazzi amangi.
- ¹⁸ Yamponya abalabe bange ab'amaanyi abankyawa, abo abaali bansinza amaanyi.
- ¹⁹ Bannumba mu nnaku yange naye MUKAMA n'ampanirira.
- ²⁰ Yandeeta mu kifo ekigazi; yandokola kubanga yansanyukira.
- ²¹ "MUKAMA yampa empeera yange ng'obutuukirivu bwange bwe bwali; n'ansasula ng'obulongoofu bwe ngalo zange bwe buli.
- ²² Ntambulidde mu kkubo lya MUKAMA, era sivanga ku Katonda wange okukola ebitali bya butuukirivu.
- ²³ Amateeka ge gonna gaali mu maaso gange, era ssaava ku biragiro bye.
- ²⁴ Sizzanga na musango mu maaso ge, era neekuumye eri obutali butuukirivu.
- ²⁵ MUKAMA kyavudde ansasula ng'obutuukirivu bwange bwe buli, era ng'obulongoofu bwange bwe buli mu maaso ge.
- ²⁶ "Eri abeesigwa weeraga okuba omwesigwa; n'eri abatalina musango ne weeraga obutaba na musango;
- ²⁷ eri omulongoofu weeraga okuba omulongoofu n'eri omukujjukuju ne weeraga okuba omukujjukuju okumusinga.
- ²⁸ Olokola abantu abawombeefu, naye amaaso go ganoonya ab'amalala n'obakkakkanya.
- ²⁹ Oli ttaala yange, Ayi MUKAMA era MUKAMA wange yammulisiza mu nzikiza yange.
- ³⁰ Ku lulwe mpangula eggye, era ku lwa Katonda wange mbuuka bbugwe.
- ³¹ Ekkubo lya Katonda golokofu, n'ekigambo kye kituukirira; era ngabo eri abo bona abaddukira gy'ali.
- ³² Kubanga ani Katonda wabula MUKAMA, era ani lwazi okuggyako Katonda waffe?
- ³³ Katonda kye kiddukiro kyange, era alongoosa ekkubo lyange.
- ³⁴ Ebigure byange abifuula okuba ng'ebi'ennangaazi, era ampanirira mu bifio ebya waggulu.

- ³⁵ Anteekateeka okulwana entalo, era n'ansobozesa okulasa obusaale obw'ebikomo.
- ³⁶ Ompadde engabo ey'obulokozi bwo, ne weefeebya ne wessa wansi olyoke onfuule ow'ekitiibwa.
- ³⁷ Ogaziyizza ekkubo mwe mpita, n'obukongovvule bwange tebukoonagana.
- ³⁸ “Nagoba abalabe bange ne mbazikiriza, so saakyuka kudda mabega okutuusa lwe baamalibwawo.
- ³⁹ Na babetentera ddala ne batayinza kuyimuka, era bali wansi w'ebigere byange.
- ⁴⁰ Wampa amaanyi okulwana entalo, n'oteeka abo abanjigganya wansi wange.
- ⁴¹ Waleetera abalabe bange okunziruka, ne nsanyaawo abo abankywawa.
- ⁴² Baalindirira okuyambibwa naye ne wataba n'omu ababeera, ne bakaabira MUKAMA, naye n'atabaanukula.
- ⁴³ Nabasekulasekula ne bafuuka ng'enfuufu ey'oku nsi, ne mbabetenta, ne mbalinnyirira ne bafuuka ng'ebitosi eby'omu nguudo.
- ⁴⁴ “Ondokodde mu nnumbagana ez'abantu bange, n'onfuula omukulu w'amawanga; abantu be saamanya be bampeereza.
- ⁴⁵ Bannaggwanga bajja gye ndi nga beegayirira, bwe bawulira eddoboozi lyange ne banjondera.
- ⁴⁶ Bonna baggwaamu omwoyo, ne bajja nga bakankana okuva gye beekwese.
- ⁴⁷ “MUKAMA mulamu! Olwazi lwange yeebazibwe. Agulumizibwe Katonda wange, olwazi lwange, era obulokozi bwange.
- ⁴⁸ Oyo ye Katonda ampalanira eggwanga, era ateeka amawanga wansi wange;
- ⁴⁹ anziggya mu balabe bange. Wangulumiza okusinga abalabe bange, n'ondokola okuva mu basajja abakambwe.
- ⁵⁰ Kyenaava nkutenderezanga, Ayi MUKAMA Katonda, mu mawanga gonna, era nnaayimbanga nga ntendereza erinnya lyo.
- ⁵¹ Kabaka we amuwadde obuwanguzi obw'amaanyi, era alaze okwagala okutayogerekka eri oyo gwe yafukako amafuta, eri Dawudi n'ezzadde lye emirembe gyonna.”

2 Samwiri 23

Ebigambo ebya Dawudi eby'Enkomerero

¹ Bino bye bigambo ebya Dawudi, mutabani wa Yese, eby'enkomerero: ebiambo eby'omusajja eyagulumizibwa, Ali Waggulu ennyo, Katonda wa Yakobo gwe yafukako amafuta, omuyimbi wa Zabbuli za Isirayiri:

² "Omwoyo wa MUKAMA yayogerera mu nze, ekigambo kye kyali mu kamwa kange.

³ Katonda wa Isirayiri yayogera, olwazi lwa Isirayiri yaŋŋamba nti, 'Omuntu bw'afuga n'obutuukirivu, n'afugira mu kutya Katonda,

⁴ ali ng'ekitangaala eky'oku makya, enjuba ng'evaayo ku ggulu nga tekuli bire, obudde nga butangaala oluvannyuma lw'enkuba okukya ereetera omuddo okuvaayo mu ttaka.'

⁵ Ennyumba yange tetuukiridde mu maaso ga Katonda? Teyalagaana nange endagaano ey'enkalakkira, n'agiteekateeka era n'aginyweza mu buli nsongea? Ekimulobera okumpa omukisa, n'okuddamu buli kye mmusaba, kiki?

⁶ Naye abataty Katonda baliba nga amaggwa agasuulibwa wa bbali, kizibu okugakwata n'engalo.

⁷ Buli agakwatako kimugwanira okukozesa ekyuma oba olunyago lw'effumu, era gookerwa awo omuliro we bagakunŋaanyirizza."

Abasajja ba Dawudi ab'Amaanyi

⁸ Gano ge mannya ag'abasajja ba Dawudi abalwanyi ab'amaanyi be yalina: Yosebu-Basusebesi Omatakemoni eyali omukulu wa bazira abasatu ab'oku ntikko; yatta abasajja lunaana mu lulumbagana lumu.

⁹ Eyamuddiriranga ye yali Eriyazaali mutabani wa Dodayi Omwakowa. Yali ne Dawudi bwe baasoomooza Abafirisuuti abaali bakuŋŋaanye okulwana. Abasajja ba Isirayiri baali bazze ennyuma,

¹⁰ naye ye nayimirira ku bubwe n'atta Abafirisuuti, n'omukono gwe ne gukoowa, ne gusanyalalira ku kitala. MUKAMA n'abawa obuwanguzi obw'amaanyi olunaku olwo, abaserikale ne baddayo eri Eriyazaali okunyaga ebintu byabo abattibwa.

¹¹ Owookusatu ye yali Samma mutabani wa Agee Omukalali. Abafirisuuti bwe baakuŋŋaanira mu musiri ogw'ebijanjaalo, abasajja ba Isirayiri ne babadduka,

¹² Samma yayimirira wakati mu musiri, n'agulwanirira, era n'atta Abafirisuuti. MUKAMA n'awa Abayisirayiri obuwanguzi obw'amaanyi.

¹³ Mu kiseera eky'okukungula, basatu ku bakungu amakumi asatu ne bagenda eri Dawudi mu mpuku eya Adulamu, ekibinja ky'Abafirisuuti nga basiidde mu kiwonvu Lefayimu.

¹⁴ Mu kiseera ekkyo Dawudi yali mu kigo, n'olusiisira lw'Abafirisuuti nga luli mu Besirekemu.

¹⁵Dawudi n'alumwa ennyonta, n'ayogera nti, "Waliwo omuntu ayinza okunsenera amazzi okuva mu luzzi oluliraanye wankaaki wa Besirekemu?"

¹⁶Awo abasajja be abazira abasatu ne bawaguza mu nkambi ey'Abafirisuuti, ne basena amazzi okuva mu luzzi lwa Besirekemu olwali luliraanye wankaaki, ne bagatwalira Dawudi.

¹⁷Naye mu kifo eky'okuganywa n'agayiwayo eri MUKAMA. N'ayogera nti, "Kikafuuwe, Ayi MUKAMA Katonda, nze okukola ekyo. Nnyinza ntya okunywa omusaayi ogw'abasajja abawaddeyo obulamu bwabwe?" Bw'atyo n'ataganywa. Ebyo bye bimu ku bintu abasajja abo abazira bye baakola.

¹⁸Waaliwo ne Abisaayi muganda wa Yowaabu, mutabani wa Zeruyiya, naye nga mukulu w'abasajja amakumi asatu. Yayimusiza effumu lye eri abasajja ebikumi bisatu n'abatta, ne yeekolera erinnya okwenkanankana abasatu.

¹⁹N'aba wa kitiiibwa nnyo mu bali amakumi asatu newaakubadde nga teyatuuka ku ssa ery'abali abasatu.

²⁰Ne Benaya mutabani wa Yekoyaada ow'e Kabuzeeri yali musajja mulwanyi nnyo eyakola ebyobuzira ebikulu. Yatta babiri ku basajja abazira aba Mowaabu, ate n'aserengeta ne mu bunnya n'atta empologoma mu kiseera eky'obutiti.

²¹N'atta Omumisiri omunene ennyo. Newaakubadde ng'Omumisiri yalina effumu mu mukono gwe, Benaya ye ng'alina muggo; yamunyagako effumu lye, n'alimuttisa.

²²Ebyo bye byobuzira Benaya mutabani wa Yekoyaada bye yakola, era naye n'ayatiikirira ng'abasajja bali abasatu abazira.

²³N'aweebwa ekitiibwa mu makumi asatu, newaakubadde nga teyatuuka ku ssa ery'abasatu. Dawudi n'amufuula omukulu w'abambowa.

²⁴Mu makumi asatu mwe mwali: Asakeri muganda wa Yowaabu, Erukanani mutabani wa Dodo ow'e Besirekemu,

²⁵Samma Omukalodi, Erika Omukalodi,

²⁶Kerezi Omupaluti, Ira mutabani wa Ikkesi Omutekowa,

²⁷Abiyezeeri Omwanasosi, Mebunnayi Omukusasi,

²⁸Zalumoni Omwakowa, Makalayi Omunetofa,

²⁹Kerebu mutabani wa Baana Omunetofa, Ittayi mutabani wa Libayi ow'e Gibea eky'e Benyamini,

³⁰Benaya Omupirasoni, Kiddayi ow'oku bugga obw'e Gaasi,

³¹Abi-Aluboni Omwalubasi, ne Azumavesi Omubalukumi,

- ³²ne Eriyaba Omusaaluboni, batabani ba Yaseni, Yonasaani,
- ³³ne Samma Omukalali, Akiyamu mutabani wa Salali Omwalali,
- ³⁴Erifereti mutabani wa Akasubayi Omumaakasi, Eriyaamu mutabani wa Akisoferi Omugiro,
- ³⁵Kezulo Omukalumeeri, Paalayi Omwalubi,
- ³⁶Igali mutabani wa Nasani ow'e Zoba, Bani Omugaadi,
- ³⁷Zerekki Omwamoni, Nakalayi Omubeerosi, eyasitulanga ebyokulwanyisa bya Yowaabu mutabani wa Zeruyiya,
- ³⁸Ira Omuyisuli, Galebu Omuyisuli,
- ³⁹ne Uliya Omukiiti. Bonna awamu baali amakumi asatu mu musanvu.

2 Samwiri 24

Dawudi Abala Eggye

- ¹Awo MUKAMA n'asunguwalira Isirayiri nate, n'aleetera Dawudi okubabala. Dawudi n'alagira nti, "Genda obale Isirayiri ne Yuda."
- ²Kabaka n'alagira Yowaabu n'abaduumizi ab'eggye nti, "Mugende mu bika byonna ebya Isirayiri okuva e Ddaani okutuuka e Beeruseba mubale abantu, ntegeere omuwendo gwabwe."
- ³Naye Yowaabu n'addamu kabaka nti, "MUKAMA Katonda wo ayongere ku bantu bo emirundi kikumi n'okusingawo, nga mukama wange kabaka akyali mulamu. Nayekiki ekikukoza ekintu bwe kityo mukama wange kabaka?"
- ⁴Naye ekigambo kya kabaka ne kisinga amaanyi ebiligambo bya Yowaabu n'abaduumizi b'eggye, era ne bava mu maaso ga kabaka ne batanula okubala abantu ba Isirayiri.
- ⁵Oluvannyuma olw'okusomoka Yoludaani, ne basiisira okumpi ne Aloweri ku luuyi olw'obukiikaddyo olw'ekibuga mu kiwonvu, ne bayitira mu Gaadi okutuuka e Yazeri.
- ⁶Ne bagenda e Gireyaadi ne mu kitundu kya Tatimukodusi, ne batuuka e Ddaani-Yaani ne beebungulula ne baggukira e Sidoni.
- ⁷Ne bagenda ku kigo eky'e Ttuulo ne mu bibuga byonna eby'Abakiivi n'ebi'Abakanani, ne bakomekkereza omulimu gwabwe e Beeruseba mu bukiikaddyo obwa Yuda.
- ⁸Awo oluvannyuma olw'okuyitaayita mu nsi yonna omulimu nga bagukoledde emyezi mwenda n'ennaku amakumi abiri, ne baddayo e Yerusaalemi.

⁹Yowaabu n'awaayo omuwendo gw'abantu bona eri kabaka. Mu Isirayiri mwaweramu abasajja abalwanyi emitwalo kinaana, ne mu Yuda ne muweramu abasajja abalwanyi emitwalo amakumi ataano.

¹⁰Naye Dawudi n'akeŋeentererwa emmeeme olw'ekikolwa ekyo eky'okubala abantu. N'agamba MUKAMA nti, "Nnyonoonye nnyo olw'ekyo kye nkoze. Kaakano, Ayi MUKAMA Katonda nziggyako omusango guno omuddu wo gw'azizza, kubanga nkoze eky'obusirusiru."

¹¹Awo mu kiro ekigambo kya MUKAMA Katonda ne kijjira nnabbi Gaadi, omulabi wa Dawudi nti,

¹²"Genda otegeeze Dawudi nti, 'Bw'atyo bw'ayogera MUKAMA Katonda nti: ku bino ebisatu londawo ekimu kye nnaakukola.'

¹³Gaadi n'agenda eri Dawudi n'amugamba nti, "Ndireeta enjala mu nsi okumala emyaka musanvu? Oba, ndikuddusa mu maaso g'abalabe bo okumala emyezi esatu, nga bakugoba? Oba, walibaawo ennaku ssatu eza kawumpuli mu nsi yo? Kirowoozeeko, ontegeeze ky'onoosalawo, nzizeeyo obubaka eri oyo antumye."

¹⁴Awo Dawudi n'agamba Gaadi nti, "Nsobeddwa nnyo; wakiri tugwe mu mukono gwa MUKAMA Katonda, kubanga okusaasira kwe kungi; okusinga okugwa mu mikono gy'abantu."

¹⁵Awo MUKAMA Katonda n'aweereza kawumpuli ku Isirayiri okuva ku makya okwo okumala ekiseera MUKAMA kye yateekateeka, abantu emitwalo musanvu ne bafa okuva mu bitundu ebya Ddaani okutuuka e Beeruseba.

¹⁶Malayika bwe yagolola omukono gwe eri Yerusaalemi okukizikiriza, MUKAMA ne yejusa olw'ekikolwa ekyo, n'agamba malayika eyabonereza abantu nti, "Kinaamala, toyoongera nate." Olwo malayika wa MUKAMA Katonda yali atuuse ku gguuliro lya Alawuna Omuyebusi.

¹⁷Awo Dawudi bwe yalaba malayika wa MUKAMA Katonda eyabonereza abantu, n'ayogera nti, "Nze nnyonoonye era nze nkoze eby'ekyejo, naye endiga zino, tezirina kye zikoze. Nkwegayiridde, omukono gwo ka gubonereze nze n'ennyumba ya kitange."

Dawudi Azimbira MUKAMA Ekyoto

¹⁸Ku lunaku olwo Gaadi n'agenda eri Dawudi n'amugamba nti, "Yambuka ozimbire MUKAMA Katonda ekyoto ku gguuliro lya Alawuna Omuyebusi."

¹⁹Awo Dawudi n'agondera ebiragiro bya MUKAMA Katonda bye yayisa mu Gaadi, n'ayambuka ku gguuliro.

²⁰Alawuna n'alengera kabaka n'abasajja be nga bajja gy'ali, n'afuluma n'avuunama mu maaso ga kabaka, ne yeeyala wansi.

²¹ Alawuna n'abuuza nti, "Kiki ekireese mukama wange kabaka eri omuddu we?" Dawudi n'addamu nti, "Nzize okugula egguliro lyo, nzimbire MUKAMA ekyoto, kawumpuli aleke okubuna mu bantu."

²² Alawuna n'agamba Dawudi nti, "Mukama wange kabaka atwale kyonna ky'anaasiima akiweeyo. Ente ziizo ez'ekiweebwayo ebyokebwa, n'ebintu ebiwuula n'ebikoligo by'ente byonna mbiwaddeyo okuba enku.

²³ Ebyo byonna, Alawuna abiwaddeyo eri kabaka." Alawuna n'ayongerako nti, "Olabe ekisa mu maaso ga MUKAMA Katonda wo."

²⁴ Naye kabaka n'agamba Alawuna nti, "Nedda, nzija kulisasulira. Sijja kuwaayo ssaddaaka ez'ebiweebwayo ebyokebwa eri MUKAMA Katonda wange, nga sisasulidde muwendo." Awo Dawudi n'asasulira egguliro n'ente, omuwendo ogw'enkana effeeza, gulaamu lukaaga.

²⁵ Dawudi n'azimbira MUKAMA ekyoto n'awaayo ebiweebwayo ebyokebwa n'ebiweebwayo olw'emirembe. Olwo MUKAMA Katonda n'ayanukula okusaba kwe ku lw'ensi, kawumpuli n'ava ku Isirayiri.

1 Bassekabaka

1 Bassekabaka 1

Adoniya yeefuula Kabaka

¹Awo kabaka Dawudi bwe yali akaddiye nnyo, nga ne bwe bamubikka takyabuguma,

²abaweeereza be ne bamuwa ekirowoozo nti, “Banoonyeze mukama waffe kabaka, omuwala embeerera ayimirirenga mu maaso ga kabaka era amuweerezenga; era agalamirenga mu kifuba kya mukama waffe kabaka amubugumyenga.”

³Awo ne banoonya okubuna ensalo zonna eza Isirayiri omuwala omulungi, ne bazuula Abisaagi Omusunammu, ne bamuleetera kabaka.

⁴Omuwala oyo yali mulungi nnyo; n’ajjanjabanga kabaka era n’amuweerezanga, naye kabaka teyamumanya.

⁵Awo Adoniya mutabani wa Dawudi gwe yazaala mu Kaggisi ne yeegulumiza ng’ayogera nti, “Nze ndiba kabaka.” Ne yeetegekera amagaali n’abeebagala embalaasi, n’abasajja amakumi ataano ab’ebigere okuddukiranga mu maaso ge.

⁶Kitaawe n’atamunenya ku mubuuza nti, “Lwaki weeyisa bw’otyo?” Adoniya yali alabika bulungi nnyo, nga y’adda ku Abusaalomu.

⁷Adoniya yateesa ne Yowaabu mutabani wa Zeruyiya ne Abiyasaali kabona, ne baamuwigira.

⁸Naye Zadooki kabona, ne Benaya mutabani wa Yekoyaada, ne Nasani nnabbi, ne Simeeyi, ne Leeyi, n’abasajja ba Dawudi ab’amaanyi abalala tebaali ku ludda lwa Adoniya.

⁹Adoniya n’attira endiga n’ente n’ebiyassava awali ejinja Zokeresi eririraanye Energeri, n’ayita baganda be bona, abaana ba kabaka, n’abakungu bona aba Yuda,

¹⁰naye n’atayita Sulemaani muganda we wadde Nasani nnabbi, newaakubadde Benaya, newaakubadde abasajja ba Dawudi ab’amaanyi abalala.

¹¹Awo Nasani n’agenda eri Basuseba nnyina Sulemaani n’amugamba nti, “Towulidde nga Adoniya mutabani wa Kaggisi alidde obwakabaka, Dawudi mukama waffe nga takimanyi?

¹²Kale nno kankuwe amagezi, owonye obulamu bwo n’obwa mutabani wo Sulemaani.

¹³Genda eri Kabaka Dawudi, omugambe nti, ‘Mukama wange Kabaka, tewalayirira muzaana wo nti, Sulemaani mutabani wo y’alirya obwakabaka

oluvannyuma lwange, era y'alituula ku ntebe yange ey'obwakabaka? Kale lwaki Adoniya alidde obwakabaka?"

¹⁴Laba bw'onooba ng'okyayogera ne kabaka, nange nnaayingira ne nkakasa ebigambo byo."

¹⁵Awo Basuseba n'agenda eri Kabaka, mu kisenge kye, era Kabaka yali mukadde nnyo nga Abisaagi Omusunammu amuweereza.

¹⁶Basuseba n'akka n'afukamirira kabaka. Kabaka n'amubuuza nti, "Nkukolere ki?"

¹⁷N'amuddamu nti, "Mukama wange, ggwe walayirira omuzaana wo eri MUKAMA Katonda wo nti, 'Sulemaani mutabani wo y'alirya obwakabaka oluvannyuma lwange, era y'alituula ku ntebe yange ey'obwakabaka.'

¹⁸Naye kaakano Adoniya alidde obwakabaka, newaakubadde mukama wange kabaka, tokimanyi.

¹⁹Asse ente, n'ebiyassava n'endiga nnyingi, era ayise abaana ba kabaka bonna, ne Abiyasaali kabona, ne Yowaabu omukulu w'eggye, naye Sulemaani omuddu wo tamuyise.

²⁰Kaakano mukama wange kabaka, amaaso ga Isirayiri gatunuulidde gwe, okubategeeza anaatuula ku ntebe y'obwakabaka eya mukama wange kabaka, oluvannyuma lwe.

²¹Bw'otookole bw'otyo, awo olulituuka, mukama wange kabaka bw'olyebakira awamu ne bajjajaabo, nze ne mutabani wange Sulemaani tuliyitibwa babi."

²²Awo bwe yali akyayogera ne kabaka, Nasani nnabbi n'ayingira.

²³Ne babuulira kabaka nti, "Nasani nnabbi ali wano." Awo n'ayingira mu maaso ga kabaka, era n'avuunama amaaso ge mu maaso ga kabaka.

²⁴Nasani n'ayogera nti, "Mukama wange, wagamba nti Adoniya y'alirya obwakabaka oluvannyuma lwo, era y'alituula ku ntebe yo?

²⁵Olwa leero aserengese, era asse ente, n'ebiyassava n'endiga nnyingi, era ayise abaana ba kabaka bonna n'abakulu b'eggye ne Abiyasaali kabona. Mu kiseera kino balya era banywera wamu naye, nga boogera nti, 'Kabaka Adoniya awangaale!'

²⁶Naye nze omuddu wo, ne Zadooki kabona, ne Benaya mutabani wa Yekoyaada n'omuddu wo Sulemaani, tatuyise.

²⁷Kino mukama wange kabaka, okikoze n'ototegeeza baweereza bo alituula ku ntebe ya mukama wange kabaka ey'obwakabaka, oluvannyuma lwe?"

²⁸Awo Kabaka Dawudi n'addamu nti, "Muyite Basuseba." Basuseba n'ajja awali kabaka n'ayimirira mu maaso ge.

²⁹Awo kabaka n'alayira ng'ayogera nti, "Nga MUKAMA bw'ali omulamu eyannunula mu buli kabi konna;

³⁰era nga bwe nakulayirira mu maaso ga MUKAMA, Katonda wa Isirayiri, Sulemaani mutabani wo y'alirya obwakabaka oluvannyuma lwange, era y'alituula ku ntebe yange ey'obwakabaka mu kifo kyange."

³¹Awo Basuseba n'avuunama ku ttaka mu maaso ga kabaka ng'agamba nti, "Mukama wange Kabaka Dawudi awangaale emirembe gyonna!"

³²Kabaka Dawudi n'ayogera nti, "Muyite Zadooki kabona, ne Nasani nnabbi ne Benaya mutabani wa Yekoyaada bayingire." Bwe bajja mu maaso ga kabaka,

³³n'abagamba nti, "Mutwale abawereza ba mukama wammwe, mwebagaze Sulemaani mutabani wange ennyumbu yange, mumuserengese e Gikoni.

³⁴Zadooki kabona ne Nasani nnabbi bamufukireko eyo amafuta okuba kabaka wa Isirayiri. Mufuuwe ekkondeere era muleekaane nti, 'Kabaka Sulemaani awangaale.'

³⁵Mwambuke naye, atuule ku ntebe yange ey'obwakabaka era afuge mu kifo kyange. Mmufudde omukulembeze wa Isirayiri ne Yuda."

³⁶Benaya mutabani wa Yekoyaada n'addamu kabaka nti, "Amiina! MUKAMA Katonda wa mukama wange kabaka akituukirize.

³⁷MUKAMA nga bwe yabeeranga ne mukama wange kabaka, abeere ne Sulemaani okufuula entebe ye ey'obwakabaka ey'ekitiibwa n'okusinga entebe ey'obwakabaka eya mukama wange Kabaka Dawudi!"

³⁸Awo Zadooki kabona, ne Nasani nnabbi ne Benaya mutabani wa Yekoyaada, n'Abakeresi n'Abaperesi ne beebagaza Sulemaani ennyumbu ya Kabaka Dawudi, ne baserengeta nga bamuwerekera okugenda e Gikoni.

³⁹Zadooki kabona n'aggya ejjembe ery'amafuta mu weema, n'afuka amafuta ku Sulemaani. Awo ne bafuuwa ekkondeere, abantu bona ne baleekaana mu ddoboozi ery'omwanguka nti, "Kabaka Sulemaani awangaale."

⁴⁰Abantu bona ne bambuka okumugoberera nga bafuuwa endere, era nga basanyuka essanyu lingi, ettaka n'okwatika ne lyatika olw'oluyoogaano olunene.

⁴¹Adoniya n'abagenyi be bona ne bawulira oluyoogaano bwe baali nga bamaliriza okulya. Yowaabu bwe yawulira eddoboozi ly'ekkondeere, n'abuuza nti, "Ekibuga nga kiyoogaana?"

⁴²Awo bwe yali ng'akyayogera laba, Yonasaani mutabani wa Abiyasaali kabona n'atuuka. Adoniya n'ayogera nti, "Yingira kubanga omusajja omulungi nga ggwe atekwa kuba ng'aleese mawulire malungi."

⁴³Yonasaani n'addamu nti, "Nedda. Mukama waffe Kabaka Dawudi, obwakabaka abuwadde Sulemaani,

⁴⁴era kabaka atumye Zadooki kabona, ne Nasani nnabbi, ne Benaya mutabani wa Yekoyaada, n'Abakeresi n'Abaperesi, okugenda naye nga bamwebagazza ennyumbu ya kabaka.

⁴⁵Zadooki kabona ne Nasani nnabbi bamufukiddeko amafuta e Gikoni, era bambuse okuvaayo nga bajaguza, n'ekibuga kiwuumira ddala. Okwo kwe kuleekaana kwe muwulira.

⁴⁶Kaakano Sulemaani atudde ku ntebe ey'obwakabaka.

⁴⁷N'abakungu ba kabaka bazze okusanyukirako mukama waffe Kabaka Dawudi, nga boogera nti, 'Katonda wo afuule erinnya lya Sulemaani ekkulu n'okusinga eriryo era n'entebe ye ey'obwakabaka enkulu n'okusinga eyiyo!' Era Kabaka akutamye ng'asinza ku kitanda kye,

⁴⁸n'agamba nti, 'Yeebazibwe MUKAMA, Katonda wa Isirayiri, akkirizza amaaso gange okulaba omusika ku ntebe yange ey'obwakabaka leero.' "

⁴⁹Abagenyi ba Adoniya bona olwawulira ebyo ne beekanga nnyo, ne basituka ne basaasaana.

⁵⁰Adoniya n'aggwaamu amaanyi olwa Sulemaani okulya obwakabaka, era n'agenda ne yeekwata ku mayembe g'ekyoto.

⁵¹Awo ne babuulira Sulemaani nti, "Adoniya atidde kabaka Sulemaani era yeekutte ku mayembe g'ekyoto. Agambye nti, 'Kabaka Sulemaani andayirire leero nti tajja kutta muddu we n'ekitala.' "

⁵²Sulemaani n'addamu nti, "Bw'alyeraga okuba omusajja omulungi, tewaliba luviiiri lwe na lumu oluligwa wansi; naye bw'alirabikamu ekibi, alifa."

⁵³Awo Kabaka Sulemaani n'atuma abasajja, ne baggya Adoniya ku kyoto. N'ajja n'avuunamira kabaka Sulemaani, Sulemaani n'amugamba nti, "Weddireyo ewuwo."

1 Bassekabaka 2

Dawudi Abuulirira Sulemaani

¹Dawudi bwe yali anaatera okufa, n'abuulirira mutabani we Sulemaani ng'amukuutira nti,

²“Nze njenda bona ab’omu nsi gye bagenda, kale beera n’amaanyi era n’obuvumu,

³era tambuliranga mu makubo ga MUKAMA Katonda wo ng’okwatanga ebiragiro bye, era okwatenga amateeka ge, n’ebiragiro bye n’ebyo by’ayagala, nga bwe byawandiikibwa mu mateeka ga Musa, olyoke obeerenga n’omukisa mu byonna by’onookolanga na buli gy’onoogendanga yonna.

⁴MUKAMA anyweze ekisuubizo kye gye ndi nti, ‘Abaana bo bwe baneegenderezanga mu kkubo lyabwe, era bwe banaatambuliranga mu maaso gange mu mazima n’omutima gwabwe gwonna n’emmeeme yaabwe yonna, tewalibaawo muntu ku ntebe ey’obwakabaka bwa Isirayiri atali wa mu zzadde lyo.’

⁵“Ate ojjukiranga Yowaabu mutabani wa Zeruyiya kye yankola, bwe yatta abakulu ababiri ab’eggye lya Isirayiri, Abuneeri mutabani wa Neeri ne Amasa mutabani wa Yeseri n’ayiwa omusaayi gwabwe mu biseera eby’emirembe ng’eyali mu lutalo, era omusaayi gwabwe ne gumansukira olukoba lwe olwali mu kiwato n’engatto ze ezaali mu bigere bye.

⁶Kale muyise ng’okutegeera kwo bwe kuli, so tomuganyanga kukka emagombe mirembe mu bukadde bwe.

⁷“Naye batabani ba Baluzirayi Omugireyaadi obakoleranga ebyekisa, era babenga ku abo abanaatuulanga ku mmeeza yo, kubanga baali wamu nange bwe nadduka Abusaalomu muganda wo.

⁸“Era jjukira Simeeyi mutabani wa Gera Omubenyamini ow’e Bakulimu ali naawe, kubanga yankolimira mu ngeri enzibu ennyo, ku lunaku lwe nagenderako e Makanayimu. Kyokka bwe yaserengeta okunsisinkana ku Yoludaani ne mulayirira MUKAMA nti, ‘Sijja kukutta na kitala.’

⁹Kaakano tomubala ng’ataliko musango. Oli musajja w’amegezi, era olimanya ekirikugwanira okumukola; tomuganyanga okukka emagombe mu mirembe mu bukadde bwe.”

¹⁰Awo Dawudi ne yeebakira wamu ne bajjajaabe, n’aziikibwa mu kibuga kya Dawudi.

¹¹Yafugira Isirayiri yonna emyaka amakumi ana, ng’afugira emyaka musanvu e Kebbulooni, n’emyaka amakumi asatu mu esatu e Yerusaalemi.

¹²Awo Sulemaani n’atuula ku ntebe ey’obwakabaka bwa Dawudi kitaawe, obwakabaka bwe ne bunywezebwaa nnyo.

Obwakabaka bwa Sulemaani Bunywezebwaa

¹³ Adoniya omwana wa Kaggisi, n'alaga eri Basuseba nnyina Sulemaani. Basuseba n'amubuuza nti, "Ojja mirembe?" N'addamu nti, "Weewaawo mirembe."

¹⁴ N'ayogera nate nti, "Nnina kye njagala okukubuulira." Basuseba n'amuddamu nti, "Kimbuulire."

¹⁵ Adoniya n'amugamba nti, "Nga bw'omanyi, obwakabaka bwali bwange, era ne Isirayiri yenna baatunuulira nze nga kabaka waabwe. Naye ebintu byakyuka, era n'obwakabaka bugenze eri muganda wange, kubanga bumuweereddwa MUKAMA.

¹⁶ Kaakano nkusaba ekigambo kimu, era tokinnyima." Basuseba n'amugamba nti, "Kyogere."

¹⁷ Adoniya n'ayogera nti, "Nkwegayiridde gamba Sulemaani kabaka ampe Abisaagi Omusunammu okuba mukyala wange, kubanga kabaka anaakuwuliriza."

¹⁸ Basuseba n'addamu nti, "Kale, nnaakwogererayo eri Kabaka."

¹⁹ Awo Basuseba bwe yagenda eri Kabaka Sulemaani, okwogererayo Adoniya, Kabaka n'agolokoka okumusisinkana, n'akutama n'olvannyuma n'atuula ku ntebe ye ey'obwakabaka. N'atumya entebe ey'obwakabaka endala nnyina atuuleko, n'atuula ku mukono gwa kabaka ogwa ddyo.

²⁰ Basuseba n'amugamba nti, "Nkusaba ekigambo kimu ekitono, era tokinnyima." Kabaka n'amuddamu nti, "Kisabe, maama, nange siikikumme."

²¹ N'ayogera nti, "Kkiriza Abisaagi Omusunammu afumbirwe muganda wo Adoniya."

²² Kabaka Sulemaani n'addamu nnyina nti, "Lwaki osabira Adoniya, Abisaagi Omusunammu? Musabire n'obwakabaka, ate obanga ye mukulu wange; ky'ekyo, sabira ye, ne Abiyasaali kabona ne Yowaabu mutabani wa Zeruyiya!"

²³ Awo Kabaka Sulemaani n'alayira ng'agamba nti, "Katonda ankole bw'atyo n'okusingawo, Adoniya bw'atasasule n'obulamu bwe olw'ekyo ky'asabye!

²⁴ Kale nga MUKAMA bw'ali omulamu, oyo annywezezza ku ntebe ey'obwakabaka eya kitange Dawudi, era ampadde olulyo nga bwe yasuubiza, Adoniya anattibwa leero!"

²⁵ Awo Kabaka Sulemaani n'alagira Benaya mutabani wa Yekoyaada okutta Adoniya, era Adoniya n'attibwa.

²⁶ Kabaka n'agamba Abiyasaali kabona nti, "Ggwe genda e Anasosi mu byalo byo. Osaanidde okufa, naye siikutte mu biro bino, kubanga wasitulanga essanduuko

ya MUKAMA mu maaso ga kitange Dawudi, era n'obonyaabonyezebwa wamu naye mu bibonoobono bye."

²⁷Awo Sulemaani n'agoba Abiyasaali ku bwakabona bwa MUKAMA, okutuukiriza ekigambo MUKAMA kye yayogerera e Siiro ku nnyumba ya Eri.

²⁸Amawulire bwe gaatuuka eri Yowaabu, eyali akyuse okugoberera Adoniya, newaakubadde nga teyagoberera Abusaalomu, n'addukira mu weema ya MUKAMA, n'akwata ku mayembe g'ekyoto.

²⁹Bwe baategeeza kabaka Sulemaani nti Yowaabu addukidde mu weema ya MUKAMA, era nti ali ku kyoto, n'alagira Benaya mutabani wa Yekoyaada nti, "Genda omutte."

³⁰Benaya n'agenda mu weema ya MUKAMA, n'agamba Yowaabu nti, "Kabaka akulagidde okufuluma." Naye ye n'addamu nti, "Nedda, nzija kufiira wano." Benaya n'azzaayo obubaka eri kabaka, nga Yowaabu bwe yamuddamu.

³¹Awo kabaka n'alagira Benaya nti, "Kola nga bw'ayogedde, omutte era omuzike oggyewo omusango ku nze ne ku nnyumba ya kitange olw'omusaayi Yowaabu gwe yayiwa awatali nsong'a.

³²Era MUKAMA alimusasula olw'omusaayi gwe yayiwa, kubanga yagwa ku basajja babiri n'abatta n'ekitala, Abuneeri mutabani wa Neeri, omukulu w'eggye lya Isirayiri, ne Amasa mutabani wa Yeseri, omukulu w'eggye lya Yuda, kitange Dawudi n'atakimanya, ate nga baali bamusinga obutuukirivu n'obulungi.

³³Bwe gutyo omusango gw'omusaayi gwabwe gubeere ku mutwe gwa Yowaabu ne ku zzadde lye emirembe gyonna. Naye ku Dawudi ne ku zzadde lye, era ne ku nnyumba ye ne ku ntebe ye ey'obwakabaka, wabeerewo emirembe gyaa MUKAMA emirembe gyonna."

³⁴Awo Benaya mutabani wa Yekoyaada n'ayambuka n'atta Yowaabu, n'aziikibwa mu ttaka lye mu ddungu.

³⁵Awo kabaka n'afuula Benaya mutabani wa Yekoyaada omukulu w'eggye mu kifo kya Yowaabu, n'afuula ne Zadooki kabona mu kifo kya Abiyasaali.

³⁶Kabaka n'atumya Simeeyi n'amugamba nti, "Weezimbire ennyumba mu Yerusaalemi obeere omwo, so tovangamu okugenda awantu wonna.

³⁷Olunaku lw'olivaayo n'osomoka ekiwonvu Kiduloni, tegeererera ddala nga tolirema kufa, era omusaayi gwo guliba ku mutwe gwo ggwe."

³⁸Simeeyi n'addamu Kabaka nti, "Ky'oyogedde kirungi. Omuddu wo ajja kukola nga mukama wange kabaka bw'ayogedde." Awo Simeeyi n'amala ekiseera kiwanvu mu Yerusaalemi.

³⁹ Naye bwe waayitawo emyaka esatu, babiri ku baddu ba Simeeyi ne baddukira eri Akisi mutabani wa Maaka kabaka w'e Gaasi. Simeeyi n'ategeezebwa nti, "Abaddu bo bali Gaasi."

⁴⁰ Simeeyi olwawulira ebyo, ne yeebagala endogoyi ye n'agenda e Gaasi eri Akisi okunoonya abaddu be. Simeeyi n'agenda okuleeta abaddu be okuva e Gaasi.

⁴¹ Bwe baabuulira Sulemaani nti Simeeyi yava e Yerusaalemi n'agenda e Gaasi era n'akomawo,

⁴² kabaka n'amutumya, n'amubuuza nti, "Saakulayiza MUKAMA ne nkulabula nti, 'Tegeerera ddala nga olunaku lw'olivaawo okugenda awantu wonna, olifa?' N'oñjamba nti, 'Kye njogedde kirungi era nzija kukigondera.'

⁴³ Kale kiki ekyakulobera okwekuuma ekirayiro kya MUKAMA n'ekiragiro kye nakulagira?"

⁴⁴ Awo kabaka n'agamba Simeeyi nti, "Omanyi mu mutima gwo obubi bwonna bwe wakola Dawudi kitange. Kaakano MUKAMA alikusasula olw'obubi bwo.

⁴⁵ Naye kabaka Sulemaani aliweebwa omukisa, ne ntebe ya Dawudi ey'obwakabaka erinywezebwaa mu maaso ga MUKAMA emirembe gyonna."

⁴⁶ Kabaka n'alagira Benaya mutabani wa Yekoyaada, okutta Simeeyi. Obwakabaka ne bunywezebwaa mu mukono gwa Sulemaani.

1 Bassekabaka 3

Sulemaani Asaba Amagezi

¹ Awo Sulemaani n'akola endagaano ne Falaawo, ye kabaka w'e Misiri era n'awasa muwala we. N'amuleeta mu kibuga kya Dawudi okutuusa lwe yamala okuzimba ennyumba ye n'ennyumba ya MUKAMA, era ne bbugwe okwetooloola Yerusaalemi.

² Kyokka ennyumba ya MUKAMA yali tenazimbibwa,abantu nga baweerayo ssaddaaka mu bifo eby'enjawulo.

³ Sulemaani n'ayagala MUKAMA, ng'atambulira mu mateeka ga Dawudi kitaawe, newaakubadde nga yaweerangayo ssaddaaka era ng'ayotereza n'obubaane ku bifo ebigulumivu.

⁴ Awo kabaka n'agenda e Gibyoni okuweerayo ssaddaaka, kubanga ekyo kye kyali ekifo ekikulu mu byonna, era Sulemaani n'aweerayo ku kyoto ekyo ssaddaaka ezookebwaa lukumi.

⁵ MUKAMA n'alabikira Sulemaani ekiro mu kirooto e Gibyoni, Katonda n'amugamba nti, "Saba ky'oyagala kyonna kye mba nkuwa."

⁶ Sulemaani n'addamu nti, "Olaze ekisa kingi eri omuddu wo, Dawudi kitange, kubanga yali mwesigwa gy'oli, era mutuukirivu ate nga mwesimbu gy'oli. Era

oyongedde okulaga ekisa kino ekingi gy'ali n'omuwa omwana okutuula ku ntebe ye ey'obwakabaka leero.

⁷Kaakano, Ayi MUKAMA Katonda wange, ofudde omuddu wo okuba kabaka mu kifo kya Dawudi kitange. Naye ndi mwana muto era simanyi ngeri ya kuddukanyaamu mirimu gyange.

⁸Omuddu wo ali wakati mu bantu bo be walonda, eggwanga ekkulu, eritabalika.

⁹Kale omuddu wo muwe amagezi okufuganga abantu bo, njawulenga ekirungi n'ekibi: kubanga ani ayinza okufuga eggwanga lyo lino ekkulu?"

¹⁰Mukama n'asanyuka kubanga Sulemaani yasaba ekkyo.

¹¹Katonda n'amugamba nti, "Kubanga osabye kino, so teweessabidde kuwangaala wadde bugagga, oba okufa kw'abalabe bo, naye weesabidde amagezi okwawulanga emisango,

¹²n'akola ky'osabye. Nzija kukuwa omutima omugezi era omutegeevu, so tewalibeerawo eyali akwenkanye oba alikwenkana.

¹³Era ndikuwa, ne by'otosabye: obugagga n'ekitiibwa waleme kubeerawo kabaka akwenkana mu kiseera kyo.

¹⁴Era bw'onootambuliranga mu makubo gange, n'okukwatanga amateeka gange n'ebiragiro byange, nga kitaawo Dawudi bwe yakola, ndyongera ku nnaku zo."

¹⁵Awo Sulemaani n'azuukuka n'amanya nga kibadde kirooto. N'akomawo e Yerusaalemi, n'ayimirira mu maaso g'essanduuko ey'endagaano ya Mukama n'awaayo ebiweebwayo ebyokebwa n'ebiweebwayo olw'emirembe, era n'agabula abaweereza be ekijulo.

Sulemaani Asala Omusango Omuzibu

¹⁶Awo abakazi bamalaaya babiri ne bajja eri kabaka, ne bayimirira mu maaso ge.

¹⁷Omu ku bo n'amugamba nti, "Mukama wange, omukazi ono nange tubeera mu nnyumba emu, era nazaala omwana nga naye waali.

¹⁸Bwe waayitawo ennaku ssatu, naye n'azaala omwana we. Twali ffekka, so tewaali muntu n'omu eyali naffe mu nnyumba.

¹⁹"Awo mu kiro omukazi ono, ne yeebakira omwana we n'amutta.

²⁰N'agolokoka ekiro mu ttumbi n'aggya omwana wange mu mbiriizi zange, nze omuweereza wo nga neebase, n'amuteeka mu kifuba kye, ate n'addira owuwe afudde n'amussa mu kifuba kyange.

²¹Awo bwe nagolokoka enkyo okuyoonsa omwana wange, nga mufu. Naye bwe n'amwekaliriza amaaso, ne ndaba nga si ye mwana gwe nazaala."

²²Omukazi oli omulala n'agamba nti, "Nedda! Omulamu ye mwana wange, omufu ye wuwo." Naye ow'olubereberye n'aggumiza nti, "Nedda! Omufu ye wuwo, omulamu ye wange." Ne bawakanira mu maaso ga kabaka.

²³Kabaka n'agamba nti, "Omu agamba nti, 'Omwana wange ye mulamu, owuwo ye mufu,' n'omulala agamba nti, 'Omwana wange ye mulamu, owuwo ye mufu.'"

²⁴Awo kabaka n'agamba nti, "Mundeetere ekitala." Ne baleetera kabaka ekitala.

²⁵N'alyoka alagira nti, "Musaleemu omwana omulamu, muwe omu ekitundu n'omulala ekitundu ekirala."

²⁶Nnyina w'omwana omulamu n'ajjula ennaku olw'omwana we, n'agamba kabaka nti, "Nkwegayiridde mukama wange, omwana omulamu mumuwe! Tomutta!" Naye omukazi oli n'agamba nti, "Tajja kuba wange oba wuwo. Mumusalemu!"

²⁷Awo kabaka n'asalawo ng'agamba nti, "Omwana omulamu mumuwe omukazi ow'olubereberye, so temumutta, kubanga oyo ye nnyina."

²⁸Isirayiri yonna bwe yawulira okusalawo kwa kabaka, ne beewuunya kabaka, kubanga baalaba ng'alina amagezi okuva eri Katonda okulamula ensonga.

1 Bassekabaka 4

Abakungu ba Sulemaani

¹Kabaka Sulemaani n'aba kabaka wa Isirayiri yonna.

²Era bano be baali abakungu be: Azaliya muzzukulu wa Zadooki, yali kabona,

³Erikolefu ne Akiya, batabani ba Sisa, baali bawandiisi, Yekosafaati mutabani wa Akirudi, yali mujukiza,

⁴Benaya mutabani wa Yekoyaada, yali muduumizi w'eggye omukulu, Zadooki ne Abiyasaali baali bakabona,

⁵Azaliya mutabani wa Nasani, yali mukulu w'abaami, Zabudi mutabani wa Nasani, yali kabona ate nga ye muwi wa magezi wa kabaka omukulu,

⁶Akisaali, yali ssabakaaki wa kabaka; ne Adoniraamu mutabani wa Abuda, yali mukulu w'abaddu.

⁷Sulemaani yalina abakungu kkumi na babiri abaakuliranga Isirayiri yonna, era baavunaanyizibwanga ebyokulya bya kabaka n'ab'omu nnyumba ye. Buli omu kyamugwaniranga okusolooza ebyokulya okumala omwezi gumu buli mwaka.

⁸Era gano ge mannya gaabwe: Benikuli, mu nsi ey'ensozi eya Efulayimu;

⁹Benidekeri, mu Makazi, mu Saalubimu, mu Besusemesi, ne mu Eroni Besukanani;

- ¹⁰ Benikesedi, mu Alubbosi, Soko n'ensi yonna ey'e Kefera yali yiye;
- ¹¹ Beniyabinadabu eyali awasizza Tafasi muwala wa Sulemaani, mu kifo kyonna ekigulumivu eky'e Doli;
- ¹² Baana mutabani wa Akirudi, mu Taanaki ne Megiddo, ne mu Besuseyani yonna ekiriraanye Zalesani wansi w'e Yezuleeri, okuva ku Besuseyani okutuuka ku Aberumekola okuyita ku Yokumyamu;
- ¹³ Benigeberi, mu Lamosugireyaadi, ebibuga bya Yayiri mutabani wa Manase mu Gireyaadi byali bibye, era n'essaza Alugobu eriri mu Basani n'ebibuga byayo enkaaga ebyalina bbugwe ne wankaaki ow'ekikomo;
- ¹⁴ Akinadaabu mutabani wa Iddo, mu Makanayimu;
- ¹⁵ Akimaazi eyali awasizza Basemesi muwala wa Sulemaani, mu Nafutaali,
- ¹⁶ Baana mutabani wa Kusaayi, mu Aseri ne mu Beyaloosi;
- ¹⁷ Yekosafaati mutabani wa Paluwa, mu Isakaali;
- ¹⁸ Simeeyi mutabani wa Era, mu Benyamini;
- ¹⁹ Geberi mutabani wa Uli, mu Gireyaadi, ensi ya Sikoni kabaka w'Abamoli, n'ensi ya Ogi kabaka w'e Basani. Ye yali omwami yekka akulira essaza.
- ²⁰ Abantu ba Yuda ne Isirayiri baali bangi nga bali ng'omusenyu ku lubalama lw'ennyanya, era baalyanga, ne banywanga nga basanyuka.
- ²¹ Sulemaani n'afuga obwakabaka bwonna okuva ku Mugga Fulaati okutuuka ku nsi ey'Abafirisuuti n'okutuuka ku nsalo ey'e Misiri, era baamuleeteranga ebirabo, era ne bamuweerezanga ennaku zonna ez'obulamu bwe.
- ²² Bye baasoloolezanga Sulemaani ebya buli lunaku byali ebigero by'obutta obulungi kilo mukaaga n'obutundu mukaaga, n'ebigero eby'obutta obutaali buse, kilo kumi na ssatu n'obutundu bubiri;
- ²³ ente eza ssava kkumi, n'ente ezaavanga mu ddundiro amakumi abiri, wamu n'endiga kikumi, n'enjaza, n'empeewo, n'ennangaazi, n'enkoko ze baalondangamu.
- ²⁴ Yafuganga ensi yonna eri emitala w'Omugga Fulaati, okuva e Tifusa okutuuka e Gaaza, era yalina emirembe enjuuyi zonna okumwetooloola.
- ²⁵ Mu mirembe gya Sulemaani, Yuda ne Isirayiri yonna, okuva e Ddaani okutuuka e Beeruseba buli muntu yalina emirembe, era ng'alina ennimo ye ey'emizabbibu n'ey'emitiiini.
- ²⁶ Sulemaani yalina ebisibo by'embalaasi ezisika amagaali enkumi nnya, n'abasajja abeebagala embalaasi omutwalo gumu mu enkumi bbiri.

²⁷ Abaami ba masaza, buli mwezi baalabiriranga Kabaka Sulemaani wamu n'abaatuulanga ku mmeeza ye, nga bamuweereza ebyokulya.

²⁸ Era baaleetanga sayiri n'essubi olw'embalaasi ez'embiro n'embalaasi endala, buli muntu ng'omulimu gwe bwe gwali gwe yalagirwa.

Amagezi ga Sulemaani

²⁹ Katonda n'awa Sulemaani amagezi n'okutegeera kungi nnyo n'obugunjufu bungi, ng'omusenyu oguli ku mabbali g'enyanja.

³⁰ Amagezi ga Sulemaani gaali mangi nnyo okukira ag'abasajja bona ab'ebuvanjuba, ate n'okusinga ago ag'e Misiri.

³¹ Yali mugezi okukira abantu bona, era n'okukira Esani Omwezulaki, ne Kemani, ne Kalukoli ne Daluda batabani ba Makoli, era erinnya lye ne lyatiikirira mu mawanga gonna ageetoolodde.

³² Yagera engero enkumi ssatu, n'ennyimba ze zaali lukumi mu ttaano.

³³ Yayogera ku bulamu bwe bimera, okuva ku muvule gwa Lebanooni okutuuka ku ezobu ameri ku bbugwe. Ate era yayogera ne ku nsolo n'ennyonyi, n'ebewalula n'ebennyanja.

³⁴ Era abantu bangi okuva mu mawanga gonna ne bajjanga okuwuliriza amagezi ga Sulemaani, nga batumiddwa bakabaka okuva mu nsi yonna, abaali bawulidde ku magezi ge.

1 Bassekabaka 5

Enteekateeka y'Okuzimba Yeekaalu

¹ Awo Kiramu kabaka w'e Ttuulo bwe yawulira nga Sulemaani bamufuseeko amafuta okuba kabaka, ng'asikidde kitaawe Dawudi, n'atuma ababaka be eri Sulemaani, kubanga yali mukwano gwa Dawudi.

² Sulemaani n'atumira Kiramu ng'ayogera nti,

³ "Omanyi nti, Olw'entalo ennyingi ezeetooloola Dawudi kitange, teyasobola kuzimbira linnya lya MUKAMA Katonda we yeekaalu, okutuusa MUKAMA lwe yamala okuteeka abalabe be wansi w'ebigere bye.

⁴ Naye kaakano MUKAMA Katonda wange awadde Isirayiri yonna emirembe ku njuyi zonna, era tewakyali mulabe wadde akabi ak'engeri yonna.

⁵ Era, laba, nsuubira okuzimbira Erinnya lya MUKAMA Katonda wange yeekaalu, nga MUKAMA bwe yagamba Dawudi kitange, bwe yayogera nti, 'Mutabani wo gwe nditeeka ku ntebe ey'obwakabaka mu kifo kyo, yalizimbira Erinnya lyange yeekaalu.'

⁶ "Noolwekyo lagira basajja bo bantemere emivule gya Lebanooni. Abaddu bange banaakoleranga wamu n'abaddu bo, era nakuweerezanga empeera

yonna, gy'olinsaba olw'abaddu bo. Omanyi nga ku ffe tekuli n'omu alina magezi kutema miti okwenkana ab'e Sidoni."

⁷Awo Kiramu bwe yawulira obubaka bwa Sulemaani, n'asanyuka nnyo era n'ayogera nti, "MUKAMA yeebazibwe, kubanga awadde Dawudi omwana ow'amagezi okufuga eggwanga lino eddene."

⁸Awo Kiramu n'atumira Sulemaani ng'ayogera nti, "Obubaka bwe wampeereza mbufunye, era nnaakola by'oyagala byonna eby'emiti egy'emivule n'emiti egy'emiberosi.

⁹Basajja bange baligiggya mu Lebanooni ne bagiserengesa ku nnyanja, era ndigisengeka ng'ebitindiro okuyita ku nnyanja okugituusa mu kifo ky'olindaga. Nga gituuse eyo ndiragira ne bagisumulula, ne gikuweebwa. Kye njagala okolere ab'omu nnyumba yange, kwe kubawanga emmere."

¹⁰Awo Kiramu n'awa Sulemaani emitii gy'emivule n'emiti egy'emiberosi nga bwe yayagala,

¹¹ne Sulemaani n'amuwanga ebigeri by'enjaano kilo enkumi nnya mu bina eby'emmere ey'ennyumba ye, n'amafuta ag'omuzeeyituuni ebigeri amakumi abiri, ze kilo nga bina mu ana buli mwaka. Kino Sulemaani yakikoleranga Kiramu buli mwaka.

¹²MUKAMA n'awa Sulemaani amagezi, nga bwe yamusuubiza. Ne waba emirembe wakati wa Kiramu ne Sulemaani, n'okulagaana ne balagaana endagaano bombi.

¹³Kabaka Sulemaani n'akuinjaanya abakozi mu Isirayiri yonna, ne bawera abasajja emitwalo esatu.

¹⁴N'abaweerezanga e Lebanooni mu mpalo; buli luwalo nga lumala omwezi gumu e Lebanooni n'emyezi ebiri ewaabwe, era Adoniraamu ye yabavunaanyizibwanga.

¹⁵Sulemaani yalina abantu emitwalo musanvu abaasitulanga emigugu, n'emitwalo munaana abaatemanga amayinja ku nsozi,

¹⁶ate n'abaami be enkumi ssatu mu bisatu abaalabiriranga omulimu n'okulagirira abakozi.

¹⁷Kabaka n'alagira bateme amayinja amanene ddala nga bagaggya mu kirombe ky'amayinja ag'omuwendo, okuzimba emisingi gya yeekaalu n'amayinja amateme obulungi.

¹⁸Abaweesi ba Sulemaani n'aba Kiramu, wamu n'abasajja ba Gebali ne balongoosa n'okutegeeka ne bategeeka emitii n'amayinja eby'okuzimba yeekaalu.

1 Bassekabaka 6

Sulemaani Azimba Yeekaalu

¹ Mu mwaka ogw'ebina mu kinaana, abaana ba Isirayiri kasookedde bava mu nsi y'e Misiri, mu mwaka ogwokuna ogw'obufuzi bwa Sulemaani, mu mwezi ogwokubiri ogwa Zivu, Sulemaani n'atandika okuzimba yeekaalu ya MUKAMA.

² Eyeekaalu kabaka Sulemaani gye yazimbira MUKAMA yali obuwantu mita amakumi abiri mu musanvu, n'obugazi mita mwenda, n'obuwantu mita kkumi na ssatu n'ekitundu.

³ Awayingirirwa mu maaso g'ekisenge ekinene ekya yeekaalu, waali mita mwenda, ng'obugazi bwa yeekaalu bwe bwali, ate ng'obugazi bwakyo mu maaso kiri mita nnya n'ekitundu okuva mu maaso ga yeekaalu.

⁴ N'akola amadirisa amafunda mu kisenge kya yeekaalu.

⁵ Wakati w'ebisenge eby'ekisenge ekinene, n'ekifo aw'okwogerera, n'azimba obusenge obw'okubbabbali okwetooloola wo.

⁶ Ekisenge ekya wansi kyali mita bbiri ne desimoolo ssatu obugazi, n'ekisenge eky'essa erya wakati kyali mita bbiri ne desimoolo musanvu, n'ekisenge eky'essa eryokusatu kyali mita ssatu ne desimoolo bbiri. N'asalako emitii okwetooloola eyeekaalu gireme okukomererwa mu bisenge bya yeekaalu.

⁷ Bwe baali nga bazimba yeekaalu, baakozesanga amayinja agaali galongosereddwa gye bagatemeranga, era tewaawulirwa kuvuga okw'engeri yonna okw'ennyondo newaakubadde embazzi wadde ekyuma eky'engeri yonna mu kifo awaali wazimbirwa yeekaalu.

⁸ Omulyango ogw'ekisenge ekya wakati gwali ku luuyi olw'obukiikaddyo obwa yeekaalu; waabangawo amadaala agaakozesebwanga okugenda mu kisenge ekya wakati, n'okweyongerayo mu kisenge ekyokusatu ekya waggulu.

⁹ Awo n'azimba yeekaalu n'agimala, n'agiserekia n'emitii n'embaawo ez'emivule.

¹⁰ N'azimba n'ebisenge ebitono okwetooloola yeekaalu, n'obugulumivu bwa buli kimu bwali mita emu n'ekitundu, nga byesigamizibbwa ku kisenge kya yeekaalu n'emitii gy'emivule.

¹¹ Awo ekigambo kya MUKAMA ne kijjira Sulemaani nti,

¹² "Bino bye bikwata ku yeekaalu eno gy'ozimba; bw'onootambuliranga mu mateeka gange, n'ogondera ebiragiro byange, n'okwatanga n'amateeka gange gonna ng'ogatambuliramu, kale ndituukiriza ekigambo kye nayogera eri Dawudi kitaawo.

¹³ Era nnaabeeranga wamu n'abaana ba Isirayiri, so siryabuulira bantu bange Isirayiri."

¹⁴ Sulemaani n'azimba yeekaalu n'agimala.

¹⁵Ku bisenge eby'omunda n'assaako embaawo ez'emivule n'azikomelera okuva wansi wa yeekaalu okutuukira ddala ku kasolya, era ne wansi wa yeekaalu n'ayaliirirawo embaawo ez'emiberosi.

¹⁶N'ayawuzaamu emabega wa yeekaalu, n'akolawo ekifo mu yeekaalu ekyenkana mita mwenda, nga ky'ekisenge awaayimirirwanga okwogera, eky'awatukuvu ennyo, ng'akozesa embaawo ez'emivule okuva wansi okutuuka ku kasolya.

¹⁷Ekisenge ekinene ddala ekyali mu maaso g'ekisenge, awaayimirirwanga okwogera waali obuwanvu mita kkumi na munaana.

¹⁸Ne munda wa yeekaalu mwali mwaliriddamu emivule egayolebwako entaabwa n'ebimuli ebyanjulukuse. Byonna byali bya mivule; tewали jjinja eryalabika.

¹⁹N'ateekateeka ekisenge eky'omunda ddala okumpi n'awaayimirirwanga okwogera mu yeekaalu, okuteekamu essanduuko ey'endagaano ya MUKAMA.

²⁰Era munda awaayimirirwanga okwogera mwalimu ebbanga erya mita mwenda obuwanvu, ne mita mwenda obugazi, ne mita mwenda obugulumivu. Munda mwonna n'asiigamu zaabu ennongoose, era n'akola n'ekyoto n'akisabika n'emivule.

²¹Sulemaani n'asabika munda wa yeekaalu ne zaabu ennongoose, n'ayongerako n'enjegere eza zaabu mu maaso g'omu kisenge eky'omunda ekyali kibikiddwako zaabu.

²²Munda wa yeekaalu mwonna, n'assaamu zaabu, ne ku kyoto eky'omu kisenge awaayimirirwanga okwogera n'asiigako zaabu.

²³Mu kisenge awaayimirirwanga okwogera n'akolawo bakerubi babiri ab'emiti egy'emizeeyituuni, buli kerubi obugulumivu bwe mita nnya n'ekitundu.

²⁴Obuwanvu bw'ekiwaawaatiro ekimu ekya kerubi omu bwali mita bbiri n'obutundu busatu, n'ekiwaawaatiro ekyokubiri mita bbiri n'obutundu busatu, ze mita nnya n'ekitundu okuva ku luuyi olumu olw'ekiwaawaatiro ekimu okutuuka ku luuyi olw'ekiwaawaatiro ekyokubiri.

²⁵Kerubi owookubiri naye yali mita nnya n'ekitundu, era bakerubi bombi baali ekigero kye kimu n'endabika yaabwe nga y'emu.

²⁶Obugulumivu bwa buli kerubi bwali mita nnya n'ekitundu.

²⁷N'ateeka bakerubi mu kisenge eky'omunda ddala mu yeekaalu, ng'ebiwaawaatiro byabwe byanjuluzibbwa. Ekiwaawaatiro ekya kerubi omu ne kikwata ku kisenge eruuyi, n'ekiwaawaatiro ekya kerubi omulala ne kikwata ku kisenge ekirala eruuyi, ebiwaawaatiro byabwe ne bikwatagana wakati wa yeekaalu.

²⁸Bakerubi n'abasiigako zaabu.

²⁹Ku bisenge byonna ebya yeekaalu okwetooloola, mu bisenge eby'omunda, ne mu bisenge eby'ebweru, n'akola ebifaananyi ebyole ebya bakerubi, n'enkindu, n'ebimuli ebyanjulukuse.

³⁰Ne wansi mu bisenge eby'omunda n'eby'ebweru ebya yeekaalu n'assaamu zaabu.

³¹Awayingirirwa mu kifo awaayimirirwanga okwogera, waali wawaniriddwa emifuubeeto n'empagi ez'enzigi, omulyango nga gwa nsonda ttaano.

³²Ku nzigi zombi ez'emiti egy'emizeeyituuni n'akubako ebifaananyi ebyole ebya bakerubi, n'enkindu, n'ebimuli ebyanjulukuse, bakerubi n'enkindu n'abisiiga zaabu.

³³Mu ngeri y'emu n'akola omulyango oguyingira mu kisenge ekinene ddala, n'ateekawo emifuubeeto egy'emizeeyituuni, omulyango nga gwa nsonda nnya.

³⁴N'akola n'enzigi bbiri za miberosi, buli luggi nga lulina embaawo bbiri ezakyukiranga mu myango.

³⁵Ku zo n'ayolako ebifaananyi ebya bakerubi, n'enkindu n'ebimuli ebyanjulukuse, n'abisiiga zaabu ensanuuse.

³⁶N'azimba oluggya olw'omunda n'embu ssatu ez'amayinja amateme obulungi, n'olubu olw'emiti egy'emivule.

³⁷Awo mu mwaka ogwokuna, mu mwezi Zivu omusingi gwa yeekaalu ya MUKAMA ne gumalirizibwa.

³⁸Mu mwaka ogw'ekkumi n'ogumu mu mwezi Buli, gwe mwezi ogw'omunaana, ebitundu byonna ebya yeekaalu ne bimalirizibwa ng'ebigero byabyo bwe byali. Yamala emyaka musanvu ng'agizimba.

1 Bassekabaka 7

Sulemaani Azimba Olubiri Iwe

¹Sulemaani kyamutwalira ebbanga lya myaka kkumi n'esatu okuzimba olubiri iwe.

²N'azimba olubiri nga luli ng'Ekipira kya Lebanooni, obuwantu mita amakumi ana mu mukaaga, n'obugazi mita amakumi abiri mu ssatu, n'obugulumivu mita kkumi na ssatu n'ekitundu, nga luwaniriddwa ku mpagi nnya ez'emivule.

³Ne luserekebwa n'emivule ku mikiikiro amakumi ana mu etaano, buli lunyiriri nga lulimu kkumi na ttaano.

⁴Waaliwo amadirisa agaateekebwa mu nnyiriri ssatu, buli limu nga litunuulidde linnaalyo.

⁵Buli mulyango gwalina omwango nga gwa nsonda nnya, era nga gitunuuliraganye mu nnyiriri ssatu.

⁶N'azimba ekisenge ekinene eky'empagi obuwantu mita amakumi abiri mu ssatu n'obugazi mita kkumi na ssatu n'ekitundu. Mu maaso gaakyo waaliwo ekisasi, ekyali kiwaniriddwa empagi ez'emiti.

⁷Yazimba n'ekisenge ekinene omwali entebe ey'obwakabaka, nga kye kisenge mwe yasaliranga emisango, era nga kyonna ky'ateebewamu emivule okuva wansi okutuuka waggulu.

⁸Olubiri lwe yali agenda okubeeramu olwali emanju w'ekisenge ekinene lwali lukifaanana. N'azimbira ne muwala wa Falaawo, gwe yali awasizza, olulufaanana.

⁹Okuva ku musingi okutuuka waggulu, ebizimbe ebyo byonna n'oluggya olunene, byazimbibwa n'amayinja agaagerebwa ne gasalibwa n'emisumeeno, mu bigera byago.

¹⁰Omusingi gw'azimbibwa n'amayinja amanene amalungi, agamu ng'obuwantu genkana mita nnya n'ekitundu n'amalala ng'obuwantu genkana mita ssatu n'obutundu mukaaga.

¹¹Waggulu okumpi n'akasolya waaliyo amayinja ag'omuwendo omungi, agatemebwa nga bwe gaagerebwa, n'emiti egy'emivule.

¹²Oluggya olunene lwali lwetooloddwa bbugwe ow'embu ssatu ez'amayinja amateme, n'olubu olumu nga lwa miti egy'emivule, ng'ekisasi eky'omu maaso n'oluggya olw'omunda olwa yeekaalu bwe byali bizimbiddwa.

Ebintu bya Yeekaalu

¹³Kabaka Sulemaani n'atumya Kiramu ow'e Ttuulo, eyali mutabani wa nnamwandu ow'omu kika kya Nafutaali.

¹⁴Kitaawe yali musajja w'e Ttuulo nga muweesi wa bikomo. Kiramu yali musajja mugezi, mumanyirivu nnyo era ng'ategeera emirimu egyptebikomo egya buli ngeri. N'agenda eri Kabaka Sulemaani, n'akola emirimu gyonna egya muweebwa.

¹⁵Kiramu n'akola empagi bbiri ez'ekikomo, buli emu obuwantu mita munaana n'akatundu kamu, n'okwetooloola buli emu mita ttaano n'obutundu buna.

¹⁶Waggulu wa buli mpagi n'assaako ebitikkiro ebyalina ebitimba egyptomulimu ogw'ekikomo, n'emigo egyptomulimu ogw'emikuufu egylukibwa.

¹⁷N'akola empagi zombi n'ebitikkiro byakwo nga zitimbiddwa buli emu ng'erina ebiruke ng'amalanga ag'amakomamawanga, musanvu.

¹⁸Ebitikkiro ebyali ku mpagi ez'olubalaza zakolebwa ng'amalanga ag'ebimuli eby'amakomamawanga.

¹⁹Ebitikkiro eby'empagi byali ng'amalanga nga ziri mita emu n'obutundu munaana obugulumivu.

²⁰Ku buli nkufiira ey'empagi kwaliko ekifaanana ng'ebakuli okuliraana n'omulimu ogufaanana ng'ekintu ekiruke, era waaliwo amakomamawanga ebikumi bibiri mu mbu okwetooloola ebitikkiro ebyo.

²¹N'akola empagi bbiri ku lubalaza lwa yeekaalu, emu n'agizimba ku luuyi olw'obukiikaddyo n'agituma Yakini, n'eyokubiri n'agizimba ku luuyi olw'obukiikkono n'agituma Bowaazi.

²²Ebitikkiro byabyo byakolebwako ebimuli eby'amalanga, era bwe gutyo omulimu ogw'okuzimba empagi ne guggwa.

²³N'akola ttanka ennene ey'ekikomo ekisaanuuse, nga neekulungirivu ng'eri mita nnya n'ekitundu okuva ku mugo okutuuka ku mugo, ne mita bbiri n'obutundu busatu obugulumivu. Obwekulungirivu bwali mita kkumi na ssatu n'ekitundu.

²⁴Wansi w'omugo gwayo kwaliko entaabwa okugyetooloola, kkumi buli butundu busatu obwa mita, era nga ziri embu bbiri, ezasaanuusibwa nayo.

²⁵Ettanka ennene yatuulanga ku bifaananyi by'ente ennume kkumi na bbiri, esatu nga zitunudde mu bukiikkono, n'endala essatu nga zitunudde ebugwanjuba, n'endala essatu nga zitunudde mu bukiikaddyo, n'endala essatu nga zitunudde ebuvanjuba, era ng'ebitundu byabyo eby'emabega nga bitunuuliraganye mu masekkati gaayo.

²⁶Obugazi bwayo yali oluta lumu, n'omugo gwayo gwakolebwa ng'omugo gw'ekibya, ng'ekimuli ky'amalanga. Yajjulanga lita emitwalo ena mu enkumi nnya.

²⁷N'akola n'ebitebe ebiseetulwa, mu bikomo buli kimu obuwanvu bwakyo mita emu n'obutundu munaana, n'obugazi bwe bumu, ate obugulumivu mita emu n'obutundu busatu.

²⁸Ebitebe ebyo by'akolebwa bwe biti: byalina enkulukumbi mu myango gyabyo.

²⁹Ku nkulukumbi wakati mu myango mwalimu ebifaananyi bya bakerubi n'eb'y'empologoma, n'eb'y'ente ennume; kwaliko n'ebintu ebireebeeta ebyakolebwa n'emikono.

³⁰Buli kitebe ky'alina nnamuziga nnya ez'ebikomo, n'entobo za nnamuziga nga za bikomo, era nga buli kimu kirina ebensani ewaniriddwa mu nsonda nnya n'emisituliro egyasaanuusibwa, nga ku buli musituliro kuliko ebireebeeta.

³¹Ekitebe ekimu kyalina akamwa akalina omwango omwekulungirivu ogwali kitundu kya mita mu kukka. Akamwa kaagwo kaali keekulungirivu n'omulimu ogwa wansi kwe kyaterezebwanga, nga gwa butundu musanvu obwa mita mu kukka. Ku kamwa kaagwo kwaliko enjola, n'enkulumbi zaakyo nga si nnekulungirivu naye ng'enjuyi zonna zenkanankana.

³²Nnamuziga ennya zaali wansi w'enkulumbi; n'emisingi gya nnamuziga gyali gikomereddwa ku kitebe. Okusala mu bukiika bwa nnamuziga emu bwali obutundu musanvu obwa mita.

³³Nnamuziga zaakolebwa nga nnamuziga ez'amagaali, era kwaliko emisingi, n'empanka, n'empagi, n'emisumaali nga byonna by'akolebwa mu kyuma ekisaanuuse.

³⁴Kwaliko emisituliro ena ku nsonda ennya eza buli kitebe era gyonna nga gya kika kyekimu n'ekitebe.

³⁵Ku ntikko eya buli kitebe kwaliko engeri ey'ekikoba ekyekulungirivu; okukka kwakyo obutundu bubiri obwa mita, n'embiriizi zaakyo n'enkulukumbi ebyagwaniriranga, byakwatagananga ku ntikko.

³⁶Ku biwanirira ne ku nkulukumbi, Kiramu yakolako ebifaananyi ebyole ebya bakerubi, n'eb'y'empologoma, n'eb'y'enkindu mu buli kifo omwali ebbanga, era n'ayolako ebimuli okwetooloola.

³⁷Bw'atyo bwe yakola ebitebe ekkumi. Byonna yabikola mu kyuma ekisaanuuse kyekimu, era n'abikola byonna nga bya kigero kyekimu, n'okufaanana nga bifaanana.

³⁸N'alyoka akola amabensani kkumi, nga ga kikomo, buli emu ng'egyamu lita lunaana mu kinaana, era buli emu nga yenkana mita emu ne desimoolo munaana obugazi, ate buli bensani ng'etuula ku kitebe kyayo.

³⁹N'addira ebitebe bitaano ku byo n'abiteeka ku luuyi olw'obukiikaddyo obwa yeekaalu, n'ebitaano ebirala ku luuyi olw'obukiikkono; n'ateeka Ennyanja ku luuyi olw'obukiikaddyo obw'ebuvanjuba obwa yeekaalu.

⁴⁰N'akola n'ensuwa, n'amabensani, n'ebijiiko, n'amabensani ag'okumansira. Bw'atyo Kiramu n'amaliriza omulimu gwa yeekaalu ya MUKAMA gwonna gwe yakolera Kabaka Sulemaani.

⁴¹Empagi ebbiri zombi; ebitikkiro byombi eby'ebibya ebyayolebwa waggulu ku mpagi; embu ebbiri ez'ebitimbe ebyali ku bitikkiro byombi eby'empagi;

⁴²n'ebitone ebikumi ebina eby'amakomamawanga ebyali mu mbu ebbiri, ebyali bibikka ku nkufiira ez'empagi;

⁴³ebitebe ekkumi n'amabensani gaakwo agaabituulangako kkumi;

⁴⁴ettanka ennene n'ebifaananyi eby'ente ennume ekkumi n'ebbiri ebyali wansi w'ettanka ennene;

⁴⁵ n'ensuwa, n'ebisena, n'amabensi agamansira. Ebintu byonna Kulamu bye yakolera Kabaka Sulemaani ku lwa yeekaalu ya MUKAMA byali bya bikomo bizigule.

⁴⁶ Kabaka yalagira babisaanuusize mu lusenyi lwa Yoludaani awali ettaka ery'ebbumba wakati w'e Sukkosi n'e Zalesani.

⁴⁷ Sulemaani teyapima bintu ebyo byonna, kubanga byali biyitiridde obungi; era tewali yapima buzito obw'ekikomo ebintu mwe byakolebwa.

⁴⁸ Awo Sulemaani n'akozesa n'ebintu ebirala byonna ebyateekebwa mu yeekaalu ya MUKAMA: ekyoto ekya zaabu; emmeeza eya zaabu okwaberanga emigaati egy'okulaga;

⁴⁹ ebikondo by'ettaala ebya zaabu ennongoose, bitaano ku luuyi olwa ddyo n'ebitaano ku luuyi olwa kkono, byonna awamu kkumi, mu kifo awaayimirirwanga okwogera; obusumbi bw'ebimuli; ettabaaza ne makansi nga bya zaabu;

⁵⁰ bbensi, ne makansi ezisala ebisirinza, ne bbakuli ezifukirira, n'ebibya ne fulampeni, nga bya zaabu ennongoose; eminyolo gy'enzigi egy'ekisenge eky'omunda ddala, kye Kifo Ekitukuvu Ennyo nga gya zaabu, n'egy'enzigi ez'ekisenge ekinene ddala ekya yeekaalu nga gya zaabu.

⁵¹ Omulimu gwonna Kabaka Sulemaani gwe yakola ku yeekaalu ya MUKAMA bwe gwaggwa, n'aleeta ebintu Dawudi kitaawe bye yayawulirako MUKAMA, effeeza ne zaabu n'ebintu ebirala byonna, n'abiteeka mu mawanika ga yeekaalu ya MUKAMA.

1 Bassekabaka 8

Essanduuko ya MUKAMA Ereetebwa mu Yeekaalu

¹ Awo Sulemaani n'ayita abakadde ba Isirayiri, n'abakulu b'ebika bona, n'abaami b'ennyumba za Isirayiri bona, okuggya essanduuko ey'endagaano ya MUKAMA mu Sayuuni ekibuga kya Dawudi, okugireeta e Yerusaalemi.

² Bonna ne bakuñjaanira ewa Kabaka Sulemaani ku mbaga mu mwezi ogwa Esanimu gwe mwezi ogw'omusanvu.

³ Abakadde bona aba Isirayiri bwe baatuuka, bakabona ne basitula essanduuko,

⁴ ne bagireeta, ne baleeterako n'Eweema ey'Okukuñjaanirangamu n'ebintu byonna ebitukuvu ebyalimu.

⁵Bakabona n'Abaleevi ne babisitula, Kabaka Sulemaani n'abo abaali awamu naye, n'eggwanga lyonna erya Isirayiri eryali liri naye mu maaso g'essanduuko, ne bawaayo ebiweebwayo ebya ssaddaaka eby'endiga, n'ente, ebitaamanyibwa muwendo.

⁶Bakabona ne bayingiza essanduuko ey'endagaano ya MUKAMA mu kifo kyayo, mu kisenge eky'omunda, mu Kifo Ekitukuvu Ennyo, wansi w'ebiwaawaatiro bya bakerubi.

⁷Ebiwaawaatiro bya bakerubi byali byanjuluze ku kifo essanduuko we yateekebwa, ne bibikka ku ssanduuko ne ku misituliro gyayo.

⁸Emisituliro gino gyali miwanvu nnyo nga n'okulabika girabikira mu kifo ekitukuvu mu maaso g'ekisenge ekitukuvu ennyo, naye nga tegirabika okuva ebweru; era gikyaliyo ne leero.

⁹Temwali kintu mu ssanduuko okuggyako ekipande ebibiri eby'amayinja Musa bye yateekamu e Kolebu, MUKAMA bwe yalagaana endagaano n'abaana ba Isirayiri, nga bavudde mu nsi y'e Misiri.

¹⁰Awo bakabona bwe baava mu kifo ekitukuvu, ekire ne kibuna yeekaalu ya MUKAMA,

¹¹bakabona n'okuyinza ne batayinza kuweereza olw'ekire, kubanga ekitiibwa kya MUKAMA kyali kibunye mu yeekaalu.

¹²Awo Sulemaani n'agamba nti, "MUKAMA yayogera nti anaabeeranga mu kire ekikutte.

¹³Nkuzimbidde yeekaalu ey'ekitiibwa, ekifo ky'onoobeerangamu emirembe gyonna."

¹⁴Ekibiina kyonna ekya Isirayiri bwe kyali kiyimiridde awo, kabaka n'abakyukira n'abasabira omukisa.

¹⁵N'ayogera nti, "MUKAMA yeebazibwe, Katonda wa Isirayiri, atuukirizza n'omukono gwe bye yasuubiza Dawudi kitange ne bye yayogerera mu ye.

¹⁶Yayogera nti, 'Okuva ku lunaku lwe naggyirako abantu bange Isirayiri mu Misiri, seerobozanga kibuga na kimu mu bika byonna ebya Isirayiri okuzimbamu yeekaalu, naye neeroboza Dawudi okufuga abantu bange Isirayiri.'

¹⁷"Era kyali mu mutima gwa Dawudi kitange okuzimbira erinnya lya MUKAMA, Katonda wa Isirayiri yeekaalu.

¹⁸Naye MUKAMA n'agamba Dawudi kitange nti, 'Kubanga kyali mu mutima gwo okuzimbira erinnya lyange eyeekaalu, walowooza bulungi.

¹⁹Naye si ggwe olinzimbira yeekaalu, mutabani wo alikuzaalirwa, ow'omusaayi gwo yennyini, y'alizimbira erinnya lyange eyeekaalu.'

²⁰ "MUKAMA atuukirizza kye yasuubiza, ne nsikira Dawudi kitange, n'okutuula ne ntuula ku ntebe ey'obwakabaka bwa Isirayiri, nga MUKAMA bwe yasuubiza, era nzimbidde erinnya lyu MUKAMA Katonda wa Isirayiri eyeekaalu.

²¹ Ntaddewo ekifo ky'essanduuko, omuli endagaano ya MUKAMA gye yakola ne bajjajjaffe, ng'abaggya mu nsi y'e Misiri."

Okusaba kwa Sulemaani okw'Okuwaayo Yeekaalu eri MUKAMA

²² Awo Sulemaani n'ayimirira mu maaso g'ekyoto kya MUKAMA ekibiina kyonna ekya Isirayiri nga kiraba, n'ayanjuluza emikono gye eri eggulu,

²³ n'ayogera nti, "Ayi MUKAMA Katonda wa Isirayiri, tewali Katonda akufaanana mu ggulu waggulu oba wansi ku nsi, gwe akuumma endagaano yo ey'okwagala n'okuuma n'abaddu bo abatambulira mu maaso go n'emitima gyabwe gyonna.

²⁴ Okuumye ekisuubizo kyo eri omuddu wo Dawudi kitange; wasuubiza n'akamwa ko era okituukirizza n'omukono gwo, nga bwe kiri leero.

²⁵ "Kaakano MUKAMA, Katonda wa Isirayiri, otuukirize bye wasuubiza omuddu wo Dawudi kitange, bwe wagamba nti, 'Abaana bo bwe baneegenderezanga mu buli kye banaakolanga, ne batambuliranga mu maaso gange nga bw'okoze, wanaabangawo ow'omu lulyo lwo anaatuulanga ku ntebe ey'obwakabaka bwa Isirayiri mu maaso gange.'

²⁶ Era kaakano, Ayi Katonda wa Isirayiri, ekigambo kyo kye wasuubiza omuddu wo Dawudi kitange, okituukirize.

²⁷ "Naye ddala Katonda anaabeeranga ku nsi? Laba, eggulu n'eggulu ly'eggulu terikumala, ne yeekaalu eno toyinza kugiyamu.

²⁸ Kaakano osseeyo omwoyo eri okusaba kw'omuddu wo n'okwegayirira kwe, Ayi MUKAMA Katonda wange. Owulire okukaaba n'okusaba omuddu wo kw'asaba mu maaso go leero.

²⁹ Amaaso go gatunuulirenga yeekaalu eno emisana n'ekiro, ekifo kino kye wayogerako nti, 'Erinnya lyange linaabeeranga omwo,' okuwulira okusaba kw'omuddu wo kw'asabira ekifo kino.

³⁰ Owulire okwegayirira kw'omuddu wo, n'okw'abantu bo Isirayiri, bwe banasabanga nga batunuulidde ekifo kino. Owulire okuva mu ggulu, ekifo gy'obeera, era bw'otuwulira, tukwegayiride otusonyiwe.

³¹ "Omuntu bw'anaasobyanga muliraanwa we, ne kimugwanira okulayira, n'ajja n'alayirira mu maaso g'ekyoto mu yeekaalu eno,

³² Owulire okuva mu ggulu, era omukole nga bw'olaba. Osale omusango wakati wa baddu bo, era obonereze oyo omusango gwe gusinze nga bwe kimusaanidde. Olangirire nti atasobezza taliiko musango, ekijo kinaakakasa nti taliiko musango.

³³ “Abantu bo Isirayiri bwe banaawaangulibwanga omulabe olw’ebibi byabwe, ne bakyuka ne badda gy’oli, ne baatula erinnya lyo, ne basaba ne bakwegayirira mu yeekaalu muno,

³⁴ kale owulirenga ng’oli mu ggulu, era osonyiwenga abantu bo Isirayiri olw’ebibi byabwe, era obakomyengawo mu nsi gye wawa bajjajaabwe.

³⁵ “Eggulu bwe linaggalwangawo ne wataba nkuba, olw’ebibi byabwe, era bwe banasabanga nga batunuulira ekifo kino ne baatula erinnya lyo ne bakyuka okuleka ekibi kyabwe, olw’okubabonereza,

³⁶ kale owulirenga ng’oli mu ggulu, era obasonyiwenga ekibi ky’abaddu bo, abantu bo Isirayiri. Obayigirize ekkubo etuu fu ery’okutambulirangamu, era otonnyese enkuba ku nsi gye wawa abantu bo ng’omugabo gwabwe.

³⁷ “Bwe wanaabangawo enjala mu nsi, oba kawumpuli, oba okugengewala oba buku, oba enzige, oba omulabe ng’abazingizza mu bibuga byabwe, endwadde yonna ne bweneefaanangananya etya,

³⁸ omuntu yenna ku bantu bo bw’anaasabiranga ekintu kyonna, buli omu n’amanya endwadde ey’omu mutima gwe, era n’ayanjuluza emikono gye eri yeekaalu eno, kale owulirenga ng’oli mu ggulu, ekifo gy’obeera.

³⁹ Osonyiwenga era okolenga buli muntu ng’ebikolwa bye bwe biri, kubanga ggwe wekka ggwe omayi, emitima gy’abantu bonne,

⁴⁰ balyoke bakutyenga ennaku zonna ze banaabeeranga mu nsi gye wawa bajjajaffe.

⁴¹ “Ebikwata ku munaggwanga atali wa mu bantu bo Isirayiri, naye ng’avudde mu nsi ey’ewala olw’erinnya lyo,

⁴² kubanga abantu baliwulira erinnya lyo ekkulu n’omukono gwo ogw’amaanyi, bw’anajjanga n’asaba ng’atunuulidde yeekaalu eno;

⁴³ owulirenga ng’oli mu ggulu, ekifo gy’obeera, era okolenga buli kintu kyonna omunaggwanga oyo ky’anaakusabanga, abantu bonne ab’omu nsi bamanye erinnya lyo era bakutyenga, ng’abantu bo Isirayiri bwe bakola, era bamanyenga nti Ennyumba eno gye nzimbye, etuumiddwa erinnya lyo.

⁴⁴ “Abantu bo bwe banaatabaalanga abalabe baabwe gy’onoobasindikanga ne basaba MUKAMA nga batunuulidde ekibuga kye weeroboza ne yeekaalu gye nzimbidde erinnya lyo,

⁴⁵ kale owulirenga okusaba kwabwe n’okwegayirira kwabwe ng’oli mu ggulu, otegeere ensonga zaabwe.

46 “Bwe banaayoonoona mu maaso go, kubanga tewali muntu atasobyanga, n’obasunguwalira n’obagabula eri omulabe, ne batwalibwa mu nsi eyewala oba eyokumpi;

47 era bwe banaakyusanga emitima gyabwe nga bali mu nsi gye baabatwala ne babasibira eyo, ne beenenya era ne bakwegayiririra mu nsi y’abo abaabatwala nga boogera nti, ‘Twayonoona, twakola ebikyamu era ne tukola ekyejo;’

48 bwe banaakukyukiranga n’omutima gwabwe gwonna n’emmeeme yaabwe yonna mu nsi ey’abalabe baabwe abaabawamba, ne bakusaba nga batunuulidde ensi gye wawa bajjajaabwe, ekibuga kye weeroboza ne yekalu gye nzimbidde erinnya lyo;

49 kale owulirenga okusaba kwabwe n’okwegayirira kwabwe ng’oli mu ggulu ekifo gy’obeera, era otegeerenga ensonga yaabwe.

50 Osonyiwenga abantu bo abakusobezza, era obasonyiwenga ebibi byabwe byonna, era abo abaabawangula babakwadirwe ekisa,

51 kubanga bantu bo era gwe mugabo gwo, be waggya mu Misiri, mu kyoto ekisaanuusa ekyuma.

52 “Ontunuulize amaaso ag’ekisa olabe okwegayirira kw’abantu bo Isirayiri, era obawulirenga buli lwe banaakukaabiriranga.

53 Ayi MUKAMA Ayinzabyonna gwe walonda abantu bo mu mawanga gonna ag’omu nsi okuba ababo, nga bwe wayogerera mu muddu wo Musa, bwe waggya bajjajaffe mu Misiri.”

54 Awo Sulemaani bwe yamala okusaba n’okwegayiririra abantu eri MUKAMA, n’asituka okuva we yali afukamidde ng’emikono gye ajanjuluza eri eggulu, mu maaso g’ekyoto kya MUKAMA.

55 N’ayimirira n’asabira ekibiina kyonna ekya Isirayiri omukisa mu ddoboozi ery’omwanguka ng’agamba nti,

56 “MUKAMA yeebazibwe awadde abantu be Isirayiri okuwummula nga bwe yasuubiza. Tewali kigambo na kimu ekitatuukiridde ku ebyo ebirungi bye yasuubiza omuddu we Musa.

57 MUKAMA Katonda waffe abeere wamu naffe nga bwe yali ne bajjajaffe, era aleme okutuleka wadde okutwabulira.

58 Akyuse emitima gyaffe tudde gyali, okutambuliranga mu makubo ge gonna, n’okukwatanga ebiragiro bye, n’amateeka ge, n’ebigambo bye n’emisango gye bye yawa bajjajaffe.

⁵⁹N'ebigambo byange bino bye nsabye mu maaso ga MUKAMA, bibeerenga kumpi ne MUKAMA Katonda waffe emisana n'ekiro, alyoke awanirire ensonga y'abantu be Isirayiri, ng'ebiyetaago ebya buli lunaku,

⁶⁰abantu bona ab'oku nsi bategeere nga MUKAMA ye Katonda era tewali mulala.

⁶¹Naye emitima gyammwe giteekwa okunywerera ku MUKAMA Katonda waffe, nga mutambulira mu mateeka ge, n'okugondera ebiragiro bye, nga bwe mukola leero."

Okuwonga kwa Yeekaalu

⁶²Awo Kabaka ne Isirayiri yonna ne bawaayo ssaddaaka mu maaso ga MUKAMA.

⁶³Sulemaani yawaayo ssaddaaka ey'ebiweebwayo olw'emirembe eri MUKAMA, era bino bye yawaayo: ente emitwalo ebiri, n'endiga n'embuzi emitwalo kkumi n'ebiri. Bwe batyo Kabaka n'Abayisirayiri bona ne bawonga yeekaalu ya MUKAMA.

⁶⁴Ku lunaku olwo Kabaka kwe yatukuliza oluggya olwa wakati mu maaso ga yeekaalu ya MUKAMA, era eyo n'aweerayo ebiweebwayo ebyokebwa, n'ebi'obutta, n'amasavu g'ebiweebwayo olw'emirembe, kubanga ekyoto eky'ekikomo mu maaso ga MUKAMA kyali kitono nnyo okugyaako ebiweebwayo ebyokebwa, n'ebiweebwayo eby'obutta, n'amasavu g'ebiweebwayo olw'emirembe.

⁶⁵Sulemaani ne Isirayiri yonna wamu naye, ne batuukiriza embaga eyo mu biro ebyo, ekibiina ekinene ddala mu maaso ga MUKAMA Katonda waffe, nga beegatiddwako abantu abaava ku mulyango gwa Kamasi n'abaava ku mukutu gw'e Misiri, okumala ennaku kkumi na nnya.

⁶⁶Ku lunaku olwaddirira abantu ne basabira Kabaka omukisa, n'abasiibula ne baddayo ewaabwe nga basanyuka era nga bajaguza mu mutima olw'ebirungi byonna MUKAMA bye yali akoledde Dawudi omuddu we n'abantu be Isirayiri.

1 Bassekabaka 9

MUKAMA Alabikira Sulemaani

¹Awo Sulemaani bwe yamala okuzimba yeekaalu ya MUKAMA n'olubiri lwe, n'okuzimba ebyo byonna bye yasiima,

²MUKAMA n'amulabikira omulundi ogwokubiri, nga bwe yamulabikira e Gibyon.

³MUKAMA n'amugamba nti, "Mpulidde okusaba n'okwegayirira kw'owaddeyo gye ndi; ntukuzizza yeekaalu eno gy'ozimbye, n'erinnya lyange, emirembe gyonna. Amaaso gange n'omutima gwange binaabeeranga omwo.

⁴ “Naawe bw’onootambuliranga mu maaso gange n’omutima ogw’amazima n’obugolokofu, nga Dawudi kitaawo bwe yakola, era n’okolanga bye nkulagira byonna, n’okwatanga amateeka gange,

⁵ nnaanyweza entebe yo ey’obwakabaka mu Isirayiri emirembe gyonna, nga bwe nasuubiza Dawudi kitaawo bwe n’ayogera nti, ‘Tolirema kuba na musajja ow’omu lulyo lwo anaatuulanga ku ntebe ey’obwakabaka bwa Isirayiri.’

⁶ “Naye ggwe oba batabani bo bwe munanjeemeranga ne mutakwatanga biragiro byange n’amateeka ge mbawadde, ne mutanula okuweereza bakatonda abalala,

⁷ kale ndiggya ku Isirayiri ensi gye mbawadde era ne yeekaalu gye ntukuzizza n’erinnya lyange ndigireka. Olwo Isirayiri erifuuka eky’okunyoomoolwa n’ekyokusekererwa mu mawanga gonna.

⁸ Newaakubadde nga yeekaalu eno eyatiikirira kaakano, buli anaayitangawo aneewunyanga n’ajjoola ng’agamba nti, ‘Kiki ekireetedde MUKAMA okukola ekintu bwe kiti ku nsi eno ne ku yeekaalu eno?’

⁹ Abantu baliddamu nti, ‘Kubanga baava ku MUKAMA Katonda waabwe, eyaggya bajjajaabwe mu Misiri, ne basembeza bakatonda abalala, n’okubasinza ne babasinza era n’okubawereza ne babawereza. MUKAMA kyavudde ababonereza mu ngeri eyo.’”

Ebantu Ebirala Sulemaani bye Yakola

¹⁰ Ku nkomerero y’emyaka amakumi abiri, mu kiseera Sulemaani mwe yazimbira ebizimbe byombi, eyeekaalu ya MUKAMA, n’olubiri lwe olw’obwakabaka,

¹¹ Kabaka Sulemaani yagabira Kiramu kabaka w’e Ttuulo ebibuga amakumi abiri, olw’emivule, n’emiberosi ne zaabu bye yaweereza Sulemaani.

¹² Naye Kiramu bwe yava e Ttuulo n’agenda okulambula ebibuga Sulemaani bye yamugabira, ne bitamusanya.

¹³ N’amubuuza nti, “Bino bibuga bya ngeri ki by’ompadde muganda wange?” N’abituuma erinnya Kabuli, era bwe biyitibwa n’okutuusa olunaku lwa leero.

¹⁴ Kiramu yali aweerezza kabaka ttani nnya eza zaabu.

¹⁵ Kabaka Sulemaani mu buyinza bwe n’amaanyi ge, yakuinjaanya abasajja ab’amaanyi bangi okuzimba yeekaalu ya MUKAMA, n’olubiri lwe, n’obusenge obuwagika bbugwe wa Yerusaalemi, n’ebibuga ebya Kazoli, ne Megiddo ne Gezeri.

¹⁶ Falaawo, ye kabaka w’e Misiri yali atabadde, n’okuwamba n’awamba Gezeri, n’akireka ng’akikumyeko omuliro, ng’asse Abakanani abaakibeerangamu. Ekifo ekijo n’akigabira muwala we, muka Sulemaani ng’ekirabo ku mbaga yaabwe.

- ¹⁷Awo Sulemaani n'akizimba buggy;a; n'azimba ne Besukolooni ekya wansi,
- ¹⁸Baalasi ne Tamali mu ddungu,
- ¹⁹n'ebibuga eby'amawanika, n'omwakuumirwanga amagaali, n'abeebagala embalaasi ze, ne byonna bye yayagala okuzimba mu Yerusaalemi, ne mu Lebanooni ne mu bitundu byonna bye yafuganga.
- ²⁰Abantu bona abaasigalawo ku Bamoli, n'Abakiiti, n'Abaperezi, n'Abakiivi n'Abayebusi, abataali Bayisirayiri,
- ²¹Abayisirayiri be bataayinza kuzikiririza ddala, Sulemaani n'abafuula baddu, n'okutuusa leero.
- ²²Naye teyafuula Muyisirayiri n'omu muddu, wabula bo baali nga balwanyi be, na bakungu be, na baami be, na baduumizi b'amagaali na beebagazi ba mbalaasi ze.
- ²³Era be baali nga abakungu abaavunaanyizibwanga emirimu gye gyonna, era abo bona abaavunaanyizibwanga emirimu egyo, awamu nga bawera abakungu ebikumi bitaano mu ataano.
- ²⁴Awo muwala wa Falaawo bwe yava mu kibuga kya Dawudi n'agenda mu lubiri Sulemaani lwe yamuzimbira, Sulemaani n'azimba obusenge obuwagika bbugwe.
- ²⁵Sulemaani yawangayo ebiweebwayo ebyokebwa n'ebiweebwayo eby'emirembe ku kyoto kye yazimbira MUKAMA, emirundi esatu mu mwaka, ng'ayotereza obubaane mu maaso ga MUKAMA, ng'atuukiriza obulombolombo bwa yeekaalu.
- ²⁶Kabaka Sulemaani yazimba n'ebiyombo mu Eziyonigeba okuliraana Erosi mu Edomu, ku lubalama lw'enyanja Emyufu.
- ²⁷Kiramu n'aweereza abasajja be abalunnyaanja okukoleranga awamu n'aba Sulemaani.
- ²⁸Ne baseeyeeya okutuuka mu Ofiri, ne baleeta ttani kkumi na nnya eza zaabu eri Sulemaani.

1 Bassekabaka 10

Okukyala kwa Kabaka Omukazi ow'e Seeba

- ¹Awo kabaka omukazi ow'e Seeba bwe yawulira ettutumo lya Sulemaani n'okwagala kwe yalina eri MUKAMA, n'ajja amugezese n'ebibuuzo ebizibu.
- ²Yatuuka mu Yerusaalemi, n'ekibiina ky'abantu ekinene ennyo, n'enjamira ezaali zeetisse ebyakaloosa, ne zaabu ennyingi ennyo, n'amayinja ag'omuwendo. Yanyumya ne Sulemaani ku ebyo byonna ebyali ku mutima gwe.

³Awo Sulemaani n'addamu ebibuuzo byonna, era tewaali na kimu ku byo ekyamuzibuwalira.

⁴Kabaka omukazi ow'e Seeba bwe yalaba amagezi ga Sulemaani ago gonna, n'olubiri lwe yazimba,

⁵n'emmere eyagabulwanga ku mmeeza ye, n'engeri abakungu be gye baatuuzibwangamu, n'ennyambala y'abaddu be, n'abasenero be, n'ebiweebwayo ebyokebwa bye yawangayo mu yeekaalu ya MUKAMA, ne yeewunya nnyo.

⁶N'amugamba nti, "Bye nawulira nga ndi mu nsi yange, ku ebyo by'okoze n'amagezi go, bya mazima.

⁷Sakkiriza bigambo ebyo okutuusa lwe neesitukira ne nzija neerabireko n'agange. Kya mazima ddala nabulirwako kitundu butundu kyokka; kubanga amagezi go, n'obugagga bwo bisinga ku ebyo bye nawulira.

⁸Abasajja bo nga beesiimye! N'abakungu abayimirira mu maaso go ne bawulira ebigambo eby'amagezi nga beesiimye!

⁹Yeebazibwe MUKAMA Katonda wo akusanyukira era akutadde ku ntebe ey'obwakabaka bwa Isirayiri. Olw'okwagala kwa MUKAMA okutaggwaawo, akufudde kabaka, okukuma obwenkanya n'obutuukirivu."

¹⁰N'agabira kabaka ttani nnya eza zaabu, n'ebiyakaloosa bingi nnyo nnyini, n'amayinja ag'omuwendo. Tewaaletebwa nate byakaloosa byenkana awo obungi ng'ebyo kabaka omukazi ow'e Seeba bye yawa Sulemaani.

¹¹(Emmeeri za Kiramu zaaleetanga zaabu okuva e Ofiri, n'emitogo mingi, era n'amayinja ag'omuwendo.

¹²Kabaka yakozesa emitogo okukola empagi za yeekaalu ya MUKAMA Katonda n'ez'olubiri lw'obwakabaka, n'okukola ennanga, n'entongooli z'abayimbi. Tewalabikanga mitoogo mingi bwe gityo n'okutuusa ku lunaku lwa leero.)

¹³Awo kabaka Sulemaani n'awa kabaka omukazi ow'e Seeba byonna bye yayagala ne bye yasaba, obutassaako ebyo Sulemaani bye yamuwa okuva ku byobugagga bw'obwakabaka bwe. Oluvannyuma kabaka omukazi ow'e Seeba n'addayo mu nsi ye n'ekibiina ky'abantu be, be yajja nabo.

Obugagga bwa Sulemaani

¹⁴Obuzito obwa zaabu obwaleetebwanga eri Sulemaani buli mwaka bwali ttani amakumi abiri mu ssatu,

¹⁵nga tobaliddeeko musolo ogwawebwangayo abasuubuzi n'ab'ebiyamaguzi, ate era n'ogwasoloozebwanga okuva ku bakabaka Abawalabu bona ne bagavana.

¹⁶ Kabaka Sulemaani yaweesa engabo ennene ebikumi bibiri mu zaabu, buli ngabo ng'erimu kilo ssatu n'ekitundu eza zaabu.

¹⁷ Yakola n'engabo entono ebikumi bisatu, nga nazo za zaabu, buli ngabo nga ya kilo emu n'ekitundu eza zaabu. Ezo zonna kabaka yaziterekanga mu lubiri olwazimbibwa mu miti egyava mu kibira kya Lebanooni.

¹⁸ Awo kabaka n'akola entebe ey'obwakabaka ennene ddala nga ya masanga n'agibikkako zaabu ennongoose.

¹⁹ Entebe ey'obwakabaka yalina amadaala mukaaga, waggulu waayo aweesigamwa nga weekulungirivu. Eruuyi n'eruuyi w'entebe waaliyo empologoma nga ziylimiridde ku mabbali g'emikono.

²⁰ Empologoma kkumi na bbiri zaali ku madaala mukaaga, eruuyi mukaaga n'eruuyi mukaaga. Tewali ntebe ndala yonna ey'obwakabaka eyali ekoleddwa eri ng'eyo mu bwakabaka obulala bwonna mu biseera ebyo.

²¹ Ebikompe byonna ebya kabaka Sulemaani byali bya zaabu, ne byonna ebyali mu lubiri lwe olwakolebwa mu kibira kya Lebanooni. Tewali kyakolebwa mu ffeeza, kubanga ffeeza teyali ya muwendo nnyo mu biro ebyo.

²² Kabaka yalina ebyombo ebya maguzi ku nnyanja ebyakozesebwanga awamu n'ebya Kiramu, ebyaleetanga zaabu, ne ffeeza, n'amasanga, n'enkobe n'enkima eza buli ngeri omulundi gumu mu buli myaka esatu.

²³ Kabaka Sulemaani yalina obugagga bungi nnyini, n'amagezi mangi nnyo okusinga bakabaka abalala bona ku nsi.

²⁴ Ensi yonna yanoonyanga era yeesunganga okulaba ku Sulemaani n'okuwuliriza amagezi, Katonda ge yamuwa.

²⁵ Buli mwaka, buli omu eyajjanga okumukyalira, yamuleeteranga ekirabo, oluusi yabeeranga zaabu ne ffeeza, oluusi ngoye, oluusi byakulwanyisa, oluusi byakaloosa, oluusi mbalaasi n'ennyumbu.

²⁶ Sulemaani yakuinjaanya embalaasi n'amagaali, era yalina amagaali lukumi mu bina, n'abeebagazi b'embalaasi omutwalo gumu mu enkumi bbiri, be yakuumiranga mu bibuga omwakuumirwanga amagaali, ne mu Yerusaalemi okumpi naye.

²⁷ Kabaka n'afuula ffeeza okuba ng'amayinja aga bulijo mu Yerusaalemi, n'emivule n'agifuula okuba ng'emisukamooli egiri mu biwonvu olw'obungi bwagyo.

²⁸ Embalaasi za Sulemaani zaagulibwanga mu Misiri.

²⁹Eggaali zaagulibwanga kilo musanvu eza ffeeza, na buli mbalaasi ng'egulibwa kilo emu n'ekitundu eza ffeeza mu Misiri. Ate era baazitunzanga ne bakabaka ab'Abakiiti ne bakabaka ab'e Busuuli.

1 Bassekabaka 11

Abakazi ba Sulemaani

¹Kabaka Sulemaani yayagala abakazi bannaggwanga bangi: Abamowaabu, n'Abamoni, n'Abayedomu, n'Abasidoni, n'Abakiiti, ng'okwo kw'ogasse muwala wa Falaawo,

²nga bava mu mawanga MUKAMA ge yayogerako ng'alabula Abayisirayiri nti, "Temufumbiriganwanga nabo kubanga tebalirema kukyusa mitima gyammwe okugoberera bakatonda baabwe." Naye omutima gwa Sulemaani ne guwugulwa, era naabagala.

³Sulemaani yalina abakyala lusanvu abambejja, n'abakazi abalala ebikumi bisatu, era abo bona ne bamuwabya.

⁴Mu bisera bya Sulemaani eby'obukadde, bakyala be ne basendasenda omutima gwe okugoberera bakatonda abalala.

⁵N'atanula okusinza Asutoleesi katonda omukazi ow'Abasidoni, ne Mirukomu katonda ow'omuzizo ow'Abamoni.

⁶Sulemaani n'akola ebitaali bya butuukirivu mu maaso ga MUKAMA n'atagobererera ddala MUKAMA, n'atakola nga Dawudi kitaawe bwe yakola.

⁷Sulemaani n'azimba ebifo ebigulumivu ku kasozi akali ebuvanjuba w'e Yerusaalemi, ng'abizimbira Kemosi katonda ow'omuzizo ow'Abamowaabu, ne Moleki katonda ow'omuzizo ow'Abamoni.

⁸Bakyala be bona bannamawanga, abaayoterezanga obubaane eri bakatonda baabwe, nabo n'abakolera bw'atyo.

⁹MUKAMA n'asunguwalira Sulemaani kubanga omutima gwe gwava ku MUKAMA Katonda wa Isirayiri, eyamulabikira emirundi ebiri.

¹⁰Newaakubadde nga MUKAMA yali alabudde Sulemaani obutagoberera bakatonda abalala, Sulemaani teyagondera kiragiyo kya MUKAMA.

¹¹MUKAMA kyeyava agamba Sulemaani nti, "Olw'empisa zo, n'obutakuumu ndagaano yange newaakubadde okugondera amateeka gange ge nakulagira, ndikuggyako obwakabaka, ne mbuwa omu ku baddu bo.

¹²Naye olwa Dawudi kitaawo, ekayo sirikikola mu biro byo, ndikikola, mutabani wo atandise okufuga.

¹³Ate era sirimuggyako bwakabaka bwonna, naye ndimuwa ekika kimu ku lwa Dawudi omuddu wange, n'olwa Yerusaalemi, kye neerondera."

Abalabe ba Sulemaani

¹⁴Awo MUKAMA n'ayimusiza Sulemaani omulabe erinnya lye Kadadi Omwedomu, ow'olulyo olulangira mu Edomu.

¹⁵Emabegako Dawudi bwe yali alwana ne Edomu, Yowaabu omuduumizi w'eggye eyali agenze okuziika Abayisirayiri abaali battiddwa, yasigalayo n'atta abasajja bona mu Edomu.

¹⁶Yowaabu n'Abayisirayiri bona be yagenda nabo ne babeera eyo okumala emyezi mukaaga, okutuusa lwe baasaanyaawo abasajja bona mu Edomu.

¹⁷Naye Kadadi, ng'akyali mulenzi, yaddukira e Misiri n'abakungu abamu Abayedomu abaweerezanga kitaawe.

¹⁸Ne bagolokoka okuva mu Midiyaani okugenda e Palani. Ne bafuna abasajja okuva mu Palani, ne bagenda e Misiri, ewa Falaawo, ye kabaka w'e Misiri, eyamuwa ennyumba ne ttaka, era n'amuwanga n'emmere ey'okulya.

¹⁹Awo Kadadi n'alaba ekisa mu maaso ga Falaawo n'okumuwa n'amuwa mulamu we, muganda wa Tapenesi kaddulubaale, okumufumbirwa.

²⁰Muganda wa Tapenesi n'azaalira Kadadi omwana wabulenzi n'amutuma Genubasi, era Tapenesi n'amutwala mu lubiri okumulabirira. Genubasi n'akulira eyo wamu n'abaana ba Falaawo.

²¹Kadadi bwe yali mu Misiri, n'awulira nti Dawudi yeebakira wamu ne bajjajjaabe era nga ne Yowaabu omuduumizi w'eggye yafa, n'agamba Falaawo nti, "Ka nzireyo ewaffe mu nsi yange."

²²Falaawo n'amubuuza nti, "Kiki ky'otofunye wano, ekikwagaza okuddayo mu nsi yo?" Kadadi n'amuddamu nti, "Tewali, naye nzikiriza nyende."

²³Katonda n'ayimusiza Sulemaani, omulabe omulala, erinnya lye Lezoni mutabani wa Eriyada, eyali adduse ku mukama we Kadadezeri kabaka w'e Zoba.

²⁴Dawudi bwe yatta eggye ly'e Zoba, Lezoni n'akuññaanya abasajja abajeemu n'afuuka mukulu waabwe, n'addukira e Ddamasiko, n'akiwamba, n'abeera eyo nga gy'afugira.

²⁵Yali mulabe wa Isirayiri ennaku zonna ez'obulamu bwa Sulemaani, ng'okwo kw'otadde emitawaana Kadadi gye yaleetera Isirayiri. Lezoni n'addukira mu Alamu, era n'abeera mulabe wa Isirayiri omuzibu ennyo.

Yerobowaamu Ajeemera Sulemaani

²⁶Yerobowaamu mutabani wa Nebati, Omwefulayimu ow'e Zereda, nnyina nga ye nnamwandu wa Zeruwa, ate nga y'omu ku bakungu ba Sulemaani, n'ajeemera kabaka.

²⁷Eno y'engeri gye yajeemeramu kabaka: Sulemaani yali azimbye obusenge obuwagika, ng'azibye ebituli ebyali mu bbugwe ow'ekibuga kya Dawudi kitaawe.

²⁸Yerobowaamu yali musajja mwesimbu, era Sulemaani bwe yalaba omulimu gwe omulungi, n'amusiima n'amufuula omukulu w'emirimu gyonna egy'amaanyi mu nnyumba ya Yusufu.

²⁹Awo mu biro ebyo Yerobowaamu bwe yali ng'ava mu Yerusaalemi, n'asisinkana Akiya nnabbi w'e Siiro ng'ayambadde ekyambalo ekiggya, baali bokka ku ttale.

³⁰Akiya n'addira ekyambalo kye n'akiyuzaamu ebitundu kkumi na bibiri.

³¹N'agamba Yerobowaamu nti, "Weetwalire ebitundu kkumi, kubanga bw'atyo bw'ayogera MUKAMA, Katonda wa Isirayiri nti, 'Laba, ηnjenda kuggya ku Sulemaani obwakabaka, nkuweeko ebika kkumi.

³²Naye olw'omuddu wange Dawudi n'ekibuga Yerusaalemi, kye neerondera mu bika byonna ebya Isirayiri, alisigazaako ekika kimu.

³³Kino ndikikola kubanga banvuddeko ne basinza Asutoleesi katonda omukazi ow'Abamoni, ne batatambulira mu kkubo lyange, wadde okukola ebituufu mu maaso gange newaakubadde okugondera ebiragiro byange oba amateeka gange, nga Dawudi kitaawe wa Sulemaani bwe yakola.

³⁴"Naye Sulemaani sirimuggyako bwakabaka bwonna, wabula ndimuleka nga y'afuga ennaku zonna ez'obulamu bwe olw'omuddu wange Dawudi, gwe nalonda era eyagondera amateeka n'ebiragiro byange.

³⁵Ndiggya obwakabaka ku mutabani wa Sulemaani, ne nkuwa ebika kkumi.

³⁶Ekika ekimu ndikiwa mutabani we, omuddu wange Dawudi abeerenga n'ettabaaza mu maaso gange mu Yerusaalemi, ekibuga kye neeroboza olw'erinnya lyange.

³⁷Wabula, ggwe ndikutwala, era olifuga wonna omutima gwo gye gulisiima, era olibeera kabaka wa Isirayiri.

³⁸Bw'onoogonderanga byonna bye nkulagira n'otambuliranga mu makubo gange, era n'okolanga ebituufu mu maaso gange ng'okugonderanga ebiragiro n'amateeka gange, nga Dawudi omuddu wange bwe yakola, nnaabeeranga naawe. Ndikukolera ekika eky'enkalakkalira, nga kye nakolera Dawudi, era ndikuwa ne Isirayiri.

³⁹Kyendiva nzikakkanya ezzadde lya Dawudi, naye si bbanga lyonna.' "

⁴⁰Sulemaani n'agezaako okutta Yerobowaamu, naye Yerobowaamu n'addukira e Misiri, ewa Sisaki kabaka waayo, n'abeera eyo okutuusa Sulemaani bwe yafa.

Okufa kwa Sulemaani

⁴¹Ebyo byonna ebyabaawo ku mulembe gwa Sulemaani, ne byonna bye yakola, n'amagezi ge yalaga, byawandiikibwa mu bitabo eby'ebafaayo ebya Sulemaani.

⁴²Sulemaani yafuga Isirayiri yonna ng'ali mu Yerusaalemi okumala emyaka amakumi ana.

⁴³N'afa n'aziikibwa mu kibuga kya Dawudi kitaawe. Awo Lekobowaamu mutabani we n'amusikira.

1 Bassekabaka 12

Isirayiri Bajeemera Lekobowaamu

¹Lekobowaamu n'alaga e Sekemu, Abayisirayiri bona gye baali bakuŋjaanidde okumufula kabaka.

²Yerobowaamu mutabani wa Nebati bwe yawulira ekyo, ng'ali e Misiri, gye yali yeewaŋjangusirizza, n'akomawo.

³Abantu ne batumira Yerobowaamu, ye n'ekibiina kyonna ekya Isirayiri ne bagenda ewa Lekobowaamu, ne bamugamba nti,

⁴"Kitaawo yatuteekako ekikoligo ekizito, naye kaakano wewula ku mirimu emizibu ne ku kikoligo ekizito kye yatuteekako, naffe tunaakuweereza."

⁵Lekobowaamu n'abaddamu nti, "Mumpe ebbanga lya nnaku ssatu, n'olvannyuma nnaabaddamu." Abantu ne beetambulira.

⁶Awo kabaka Lekobowaamu n'agenda ne yeebuza ku bakadde abaaweerezanga kitaawe Sulemaani, mu biseera bwe yali ng'akyali mulamu. N'ababuuza nti, "Mumpa magezi ki, ku nsonga abantu bano gye bansabye?"

⁷Ne bamuddamu nti, "Leero bw'onoobeera omuwulize eri abantu bano ne weetoowaza, n'obaweereza, era n'obaddamu n'eggonjebwa, kale banaabeeranga bawereza bo."

⁸Naye Lekobowaamu n'atawuliriza magezi abakadde ge baamuwa, n'agenda ne yeebuza ku bavubuka be yali akuze nabo, era nga be bamuweereza.

⁹N'ababuuza nti, "Mumpa magezi ki okuddamu abantu abasabye okuwewula ku kikoligo kitange kye yabateekako?"

¹⁰Abavubuka abaakulira awamu naye ne bamuddamu nti, "Gamba abantu abo abakusabye nti, 'Okendeeze ku kikoligo kitaawo kye yabateekako nti, "Engalo yange eya nasswi esinga ekiwato kya kitange obunene.

¹¹Kitange yabateekako ekikoligo ekizito, naye nze ndyongera ku kikoligo kyammwe. Kitange yabakangavvulanga na nkoba, naye nze nnaabakangavvulanga n'enjaba ez'obusagwa.””

¹²Oluvannyuma lw'ennaku ssatu, Yerobowaamu n'abantu bona, ne baddayo eri Lekobowaamu, nga bwe yali abagambye okudda oluvannyuma lw'ennaku essatu.

¹³Awo kabaka n'addamu abantu n'ebboggo, n'agaana amagezi abakadde ge baamuwa,

¹⁴n'agoberera ag'abavubuka, n'ayogera nti, “Kitange yafuula ekikoligo kyammwe okuba ekizito, naye nze nnaayongera ku kikoligo kyammwe. Kitange yabakangavvulanga na nkoba, naye nno nze nnaabakangavvula na njaba ez'obusagwa.”

¹⁵Kabaka n'atawuliriza bantu. Bino byonna byabaawo MUKAMA atuukirize ekigambo kye yayogera eri Yerobowaamu mutabani wa Nebati ng'ayita mu Akiya Omusiiro.

¹⁶Awo Isirayiri yenna bwe baalaba nga kabaka agaanye okubawuliriza, ne bamuddamu nti, “Mugabo ki gwe tulina mu Dawudi, oba kitundu ki kye tulina mu mutabani wa Yese? Mudde mu weema zammwe ayi Isirayiri! Weerabirire ggwe ennyumba ya Dawudi.” Awo Abayisirayiri ne beddirayo ewaabwe.

¹⁷Naye abaana ba Isirayiri abaabeeranga mu bibuga bya Yuda, ne bafugibwa Lekobowaamu.

¹⁸Lekobowaamu yalagira Adolaamu eyakuliranga emirimu egypt'obuwaze okugenda eri Abayisirayiri, okubalagira egypt'okukola, naye ne bamukuba amayinja ne bamutta. Naye ye Kabaka Lekobowaamu n'awona, n'alinnya eggiali lye n'addukira e Yerusaalemi.

¹⁹Bw'atylo Isirayiri n'ajeemera ennyumba ya Dawudi n'okutuusa leero.

²⁰Abayisirayiri bona bwe baawulira nti Yerobowaamu akomyewo, ne bamutumira ajje eri ekibiina, ne bamutikkira okuba kabaka wa Isirayiri yonna. Ekika kya Yuda kyokka kye kyasigala nga kigoberera ennyumba ya Dawudi.

²¹Awo Lekobowaamu bwe yatuuka mu Yerusaalemi n'akuñjaanya ennyumba ya Yuda yonna, n'ekika kya Benyamini, abasajja abalwanyi emitwalo kkumi na munaana, okulwanagana n'ennyumba ya Isirayiri, asobole okweddiza obwakabaka.

²²Naye ekigambo kya Katonda ne kijjira Semaaya omusaja wa Katonda nti,

²³“Gamba Lekobowaamu mutabani wa Sulemaani kabaka wa Yuda, n'ennyumba ya Yuda yonna n'eya Benyamini, era n'abantu bona nti,

²⁴‘Bw’ati bw’ayogera MUKAMA nti, Temwambuka kulwana ne baganda bammwe, Abayisirayiri. Buli omu ku mmwe addeyo eka kubanga kino nze nkisazeewo.’” Awo ne bagondera ekigambo kya MUKAMA, ne baddayo ewaabwe, nga MUKAMA bwe yalagira.

Yerobowaamu Asinza Ennyana eza Zaabu e Beseri n'e Ddaani

²⁵ Awo Yerobowaamu n'azimba Sekemu mu Efulayimu ensi ey'ensozi, era n'abeera eyo. Eyo gye yava n'agenda n'azimba Penieri.

²⁶ Yerobowaamu ne yeerowooza munda ye nti, “Obwakabaka sikulwa nga budda mu nnyumba ya Dawudi!

²⁷ Abantu bano bwe banayambukanga okuwaayo ebiweebwayo mu yeekaalu ya MUKAMA mu Yerusaalemi, olunaku olumu emitima gyabwe giyinza okukyukira mukama waabwe, Lekobowaamu, kabaka wa Yuda. Balinzita ne badda gy'ali.”

²⁸ Awo Kabaka Yerobowaamu n'aweebwa amagezi okukola ennyana bbiri eza zaabu. N'agamba abantu nti, “Kijja kubazitoowerera nnyo okwambukanga e Yerusaalemi. Baabano bakatonda bammwe, Ayi Isirayiri, abaabaggya mu Misiri.”

²⁹ Emu n'agiteeka mu Beseri n'endala mu Ddaani.

³⁰ Ekintu ekyo ne kiba kibi nnyo, kubanga abantu baatuuka n'okugenda e Ddaani okusinza ekifaananyi ky'ennyana ekyali kiteekeddwa eyo.

³¹ Yerobowaamu n'azimba amasabo mu bifo ebigulumivu n'alonda bakabona ng'abaggya mu bantu abaabulijjo, newaakubadde nga tebaali ba kika kya Leevi.

³² N'akola embaga ku lunaku olw'ekkumi n'ettaano mu mwezi ogw'omunaana, okufaanana n'embaga ebeerawo mu Yuda, era n'awaayo ebyokebwa ku kyoto. Kino yakikola mu Beseri ng'awaayo ssaddaaka eri ennyana ze yakola. N'assa bakabona mu bifo ebigulumivu bye yali akoze e Beseri.

³³ Ku lunaku olw'ekkumi n'ettaano mu mwezi ogw'omunaana gwe yeerondera, n'awaayo ebiweebwayo ebyokebwa ku kyoto kye yazimba e Beseri. Era n'assaawo embaga Abayisirayiri gye baakumanga, n'ayambukanga ne ku kyoto okuwaayo ebyokebwa.

1 Bassekabaka 13

Omusajja wa Katonda Ava mu Yuda

¹ Omusajja wa Katonda n'ajja e Beseri okuva mu Yuda olw'ekigambo kya MUKAMA, n'asanga Yerobowaamu ng'ayimiridde mu maaso g'ekyoto ng'ateekateeka okwotereza obubaane.

² N'ayogerera mu ddoboозi ery'omwanguka eri ekyoto olw'ekigambo kya MUKAMA ng'agamba nti, “Ayi ekyoto, ekyoto! Kino MUKAMA ky'agamba nti,

'Omwana erinnya lye Yosiya alizaalibwa mu nnyumba ya Dawudi, ku ggwe kw'aliweerayo bakabona ab'ebifo ebigulumivu ng'ebiweebwayo era n'amagumba g'abantu galyokerwa ku ggwe.'

³Ku lunaku olwo omusajja wa Katonda n'awa akabonero: "Kano ke kabenro MUKAMA kalangirira. Ekyoto kiryatika n'evvu lyakyo liriyiyibwa ebweru."

⁴Awo kabaka Yerobowaamu bwe yawulira omusajja wa Katonda bye yayogera, n'ayogera n'eddoboozi eddene ku kyoto e Beseri ng'awanise omukono gwe mu maaso g'ekyoto nti, "Mumukwate!" Omukono gwe yawanika eri omusajja wa Katonda ne gukala ne gukalambalirayo n'okuyinza n'atayinza kuguzza.

⁵N'ekyoto ne kyatikamu, n'evvu ne liyiika ng'akabonero omusajja wa Katonda ke yawa olw'ekigambo kya MUKAMA.

⁶Awo Kabaka n'agamba omusajja wa Katonda nti, "Negayiririra MUKAMA Katonda wo, onsabire omukono gwange guwonyezebwe." Omusajja wa Katonda n'amwegayiririra eri MUKAMA, omukono gwe ne guddawo nga bwe gwali olubereberye.

⁷Kabaka n'agamba omusajja wa Katonda nti, "Jjangu eka ewange obeeko ky'olya, n'okukuwa nkuweeyo ekirabo."

⁸Naye omusajja wa Katonda n'agamba kabaka nti, "Ne bw'onompa ekitundu ky'obugagga bwo, sijja kugenda naawe, wadde okulya omugaati oba okunywa amazzi wano.

⁹Kubanga nkuutiddwa ekigambo kya MUKAMA nti, "Tolya mugaati newaakubadde okunywa amazzi wadde okuddira mu kkubo ly'ojiiddemu."

¹⁰Awo naddirayo mu kkubo eddala, so si mu eryo lye yajjiramu e Beseri.

¹¹Awo mu biro ebyo waaliwo nnabbi omukadde eyabeeranga mu Beseri, eyategezebwba batabani be ebyo byonna omusajja wa Katonda bye yali akoze ku lunaku olwo, ne bye yali agambye kabaka.

¹²Kitaabwe n'ababuuza nti, "Akutte kkubo ki?" Awo batabani be ne bamulaga ekkubo omusajja wa Katonda ow'e Yuda ly'akutte.

¹³Awo n'agamba batabani be nti, "Munteekereteekere endogoyi." Bwe baamala okumutegekera endogoyi, n'agyebagala,

¹⁴n'akwata ekkubo omusajja wa Katonda lye yali akutte. Yamusanga atudde wansi w'omwera, n'amubuuza nti, "Gwe musajja wa Katonda eyavudde e Yuda?" N'addamu nti, "Nze nzuuno."

¹⁵Awo nnabbi n'amugamba nti, "Tuddeyo eka olye ku mmere."

¹⁶ Omusajja wa Katonda n'amuddamu nti, "Siyinza kuddayo newaakubadde okugenda naawe, wadde okulya omugaati oba okunywa amazzi naawe mu kifo kino.

¹⁷ Ndagiddwa ekigambo kya MUKAMA nti, 'Toteekwa kulyayo ku mmere newaakubadde okunywayo amazzi, wadde okuddirayo mu kkubo lye wajjidde mu.'"

¹⁸ Awo nnabbi omukadde n'amuddamu nti, "Nze nange ndi nnabbi nga ggwe. Era malayika yanjambye ekigambo kya Katonda nti, 'Mukomyewo mu nnyumba yo alye ku mmere anywe ne ku mazzi.'" Naye yali amulimba.

¹⁹ Awo omusajja wa Katonda n'addayo naye mu nnyumba ye n'alya era n'anywa.

²⁰ Bwe baali batudde nga balya, ekigambo kya MUKAMA ne kijjira nnabbi omukadde eyali amukomezzaawo.

²¹ N'ayogerera mu ddoboozi ery'omwanguka eri omusajja wa Katonda eyava mu Yuda nti, "Bw'ati bw'ayogera MUKAMA nti, 'Ojeemedde ekigambo kya MUKAMA era tokuumye kiragiro MUKAMA Katonda kye yakulagidde.

²² Wakomyewo n'olya emmere era n'onywa amazzi mu kifo kye yakugaanye okulyamu wadde okunywamu amazzi. Noolwekyo omulambo gwo teguliziikibwa mu ntaana ya bajajaabo.'"

²³ Omusajja wa Katonda bwe yamala okulya n'okunywa, nnabbi oli eyali amukomezzaawo, n'ategeka endogoyi y'omusajja wa Katonda.

²⁴ Awo bwe yali ng'ali ku lugendo lwe, empologoma n'emusangiriza n'emutta, era n'esuula omulambo gwe ku kkubo, empologoma n'endogoyi ne biyimirira okumpi nagwo.

²⁵ Laba, abantu abamu abaalaba omulambo nga gusuuliddwa wansi, nga n'empologoma eyimiridde kumpi nagwo, ne bagenda mu kibuga nnabbi mwe yabeeranga ne bategeeza abaayo.

²⁶ Nnabbi eyali amukomezzaawo bwe yakiulira n'ayogera nti, "Ye musajja wa Katonda ataagondedde kigambo kya MUKAMA. MUKAMA amuwaddeyo eri empologoma emutaagudde n'emutta, ng'ekigambo kya MUKAMA bwe ky'amulabudde."

²⁷ Awo nnabbi n'agamba batabani be nti, "Muntegekere endogoyi." Ne bagimutegekera.

²⁸ Nagenda n'asanga omulambo gw'omusajja wa Katonda nga gusuuliddwa mu kkubo n'endogoyi n'empologoma nga ziyimiridde kumpi nagwo; empologoma nga teridde mulambo so nga tetaaguddetaagudde ndogoyi.

²⁹Nnabbi n'asitula omulambo gw'omusajja wa Katonda n'aguteeka ku ndogoyi, era n'aguzzaayo mu kibuga kye n'amukungubagira, omulambo n'aguziika.

³⁰N'ateeka omulambo gwe mu ntaana ye ye, ne bamukungubagira nga bakaaba nti, "Woowe, muganda wange!"

³¹Awo bwe baamala okumuziika, n'agamba batabani be nti, "Bwe nfanga, munziikanga mu ntaana omusajja wa Katonda mw'aziikkidwa; muteekanga amagumba gange kumpi n'amagumba ge.

³²Ekigambo kya MUKAMA, omusajja wa Katonda kye yayogera n'eddoboozi ery'omwanguka ku kyoto ekiri mu Beseri ne ku masabo ag'ebifo ebigulumivu ebiri mu bibuga eby'e Samaliya, tekirirema kutuukirira."

³³Oluvannyuma lw'ekigambo ekyo Yerobowaamu n'atakyuka kuleka amakubo ge amabi, naye ne yeeyongera nate okussaawo bakabona ab'ebifo ebigulumivu ng'abaggya mu bantu abaabulijo. Buli eyayagalanga okubeera kabona, n'amwawulanga okubeera mu bifo ebigulumivu.

³⁴Kino kye kyalí ekibi ky'ennyumba ya Yerobowaamu ekyagireetera okugwa, okugimalawo n'okugizikiriza okuva ku nsi.

1 Bassekabaka 14

Akiya Alagula Yerobowaamu

¹Awo mu biro ebyo Abiya mutabani wa Yerobowaamu n'alwala,

²Yerobowaamu n'agamba mukyala we nti, "Golokoka ogende e Siiro, nga weefuddefudde baleme kumanya nga bw'oli mukazi wa Yerobowaamu. Akiya nnabbi, eyanjogerako nti ndiba kabaka w'abantu bano ali eyo.

³Twala emigaati kkumi, ne bukeeke, n'ensumbi ey'omubisi gw'enjuki, ogende gy'ali era ye alikubuulira omwana bw'aliba."

⁴Awo muka Yerobowaamu n'akola bw'atyo, n'agenda ewa Akiya e Siiro. Akiya yali muzibe, kubanga amaaso ge gaali gayimbadde olw'obukadde.

⁵Naye MUKAMA yali alabudde Akiya nga muka Yerobowaamu bw'anajja okumubuuza ebifa ku mutabani waabwe, eyali alwadde era nga bw'ajja okumuddamu, nga bw'anaatuuka aija kwefuula okuba omuntu omulala.

⁶Awo Akiya bwe yawulira enswagiro ku mulyango, n'amugamba nti, "Yingira muka Yerobowaamu. Lwaki weefuula okuba omuntu omulala? Ntumiddwa gy'oli n'amawulire amabi.

⁷Genda ogambe Yerobowaamu nti kino MUKAMA, Katonda wa Isirayiri ky'agamba nti, 'Nakugulumiza nga nkuggya mu bantu, ne nkufuula omukulembeze wa bantu bange Isirayiri.

⁸Naggya obwakabaka mu nnyumba ya Dawudi, ne mbukuwa, naye tobadde ng'omuddu wange Dawudi, eyagondera ebiragiro byange era n'abigoberera n'omutima gwe gwonna, ng'akola ekyo ekyali ekirungi mu maaso gange.

⁹Oyonoonye nnyo okusinga bona abaakusooka. Weekoledde bakatonda abalala, n'okola n'ebifaananyi ebisaanuuse n'onneerabira; onsunguwazizza nnyo.

¹⁰“Kyendiva nsanyaawo ennyumba ya Yerobowaamu, era ndiggyawo ku Yerobowaamu buli mwana owoobulenzi yenna mu Isirayiri, omuddu n'atali muddu. Ndiyokya ennyumba ya Yerobowaamu, ng'omuntu bw'ayokya obusa, okutuusa lwe liggweerawo ddala.

¹¹Abo bona aba Yerobowaamu abalifiira mu kibuga, embwa zirirya emirambo gyabwe, n'ennyonyi ez'omu bbanga zirirya egy'abo abalifiira ku ttale, kubanga MUKAMA y'akyogedde!”

¹²“Wabula ggwe, ddayo eka. Bw'onooba wakalinnya ekigere mu kibuga kyo, omulenzi anaafa.

¹³Isirayiri yonna banaamukaabira era ne bamuziika. Ye yekka ow'ennyumba ya Yerobowaamu aliziikibwa, kubanga ye yekka mu nnyumba ya Yerobowaamu MUKAMA Katonda wa Isirayiri, gw'alabyemu akalungi.

¹⁴“MUKAMA alyeyimusiza kabaka wa Isirayiri alisaanyaawo ennyumba ya Yerobowaamu mu kiseera ekitali ky'ewala nnyo.

¹⁵MUKAMA aliva ku Isirayiri, abeere ng'ekitoogo bwe kinyeenyezebw mu mazzi, era alisimbula Isirayiri okubaggya mu nsi eno ennungi eya bajjajaabwe, n'abasaasaanyiza emitala w'Omugga, kubanga baasunguwaza MUKAMA bwe baakola bakatonda Baaseri.

¹⁶Era aliva ku Isirayiri olw'ebibi bya Yerobowaamu n'ebyo by'ayonoonesezza Isirayiri.”

¹⁷Awo muka Yerobowaamu n'agolokoka okugenda e Tiruza. Olwayingira mu nnyumba yaabwe, omulenzi n'afa.

¹⁸Ne bamuziika, era Isirayiri yonna ne bamukungubagira ng'ekigambo kya MUKAMA kye yayogerera mu nnabbi Akiya bwe kyali.

¹⁹N'ebirala byonna ebyabaawo mu mirembe gya Yerobowaamu, entalo ze, n'okufuga kwe, tebyawandiikibwa mu kitabo eky'ebi'omu mirembe gya bassekabaka ba Isirayiri?

²⁰Yafugira emyaka amakumi abiri mu ebiri, oluvannyuma ne yeebakira wamu ne bajjajaabe; Nadabu mutabani we n'amusikira, n'alya obwakabaka.

Lekobowaamu Kabaka wa Yuda

²¹Lekobowaamu mutabani wa Sulemaani n'alya obwakabaka bwa Yuda, ng'alina emyaka amakumi ana mu gumu. Yafugira emyaka kkumi na musanvu mu Yerusaalemi, ekibuga MUKAMA kye yeeroboza mu bika byonna ebya Isirayiri olw'erinnya lye. Nnyina yayitbwanga Naama, Omwamoni.

²²Yuda ne bakola ebibi mu maaso ga MUKAMA, okusinga ne bajjajaabwe bye baakola era ebibi byabwe ne bikwasa MUKAMA obuggyga.

²³Beezimbira ebifo ebigulumivu n'empagi za Baaseri ku buli lusozi oluwanvu ne wansi wa buli muti omugazi.

²⁴Era waaliwo n'abaalyanga ebisiyaga mu nsi, ne bakolanga eby'emizizo byonna abamawanga Katonda be yagoba mu maaso g'Abayisirayiri bye baakolanga.

²⁵Mu mwaka ogwokutaano ogw'obufuzi bwa kabaka Lekobowaamu, Sisaki kabaka w'e Misiri n'alumba Yerusaalemi.

²⁶N'atwala eby'obugagga eby'omu yeekaalu ya MUKAMA, n'ebiyobugagga eby'omu lubiri lwa kabaka byonna, ng'okwo kw'otadde engabo eza zaabu Sulemaani ze yali akoze.

²⁷Awo kabaka Lekobowaamu n'akola engabo ez'ebikomo okuzzaawo ziri, era n'azikwasa abaduumizi b'abambowa abaakuumanga wankaaki w'olubiri lwa kabaka.

²⁸Buli Kabaka lwe yalaganga mu yeekaalu ya MUKAMA, abambowa ne bambilira engabo ezo, era Oluvannyuma ne bazizaayo mu kisenge ky'abambowa we zaaterekebwanga.

²⁹Ebyafaayo ebirala byonna eby'omulembe gwa Lekobowaamu, ne bye yakola byonna, tebyawandiikibwa mu kitabo eky'ebiyomumirembe gya bassekabaka ba Yuda?

³⁰Waabangawo entalo ez'olubeerera wakati wa Lekobowaamu ne Yerobowaamu.

³¹Lekobowaamu ne yeebakira wamu ne bajjajaabe, era n'aziikibwa mu kibuga kya Dawudi. Nnyina yayitbwanga Naama Omwamoni. Abiyaamu mutabani we n'amusikira, n'alya obwakabaka.

1 Bassekabaka 15

Abiyaamu Kabaka wa Yuda

¹Awo mu mwaka ogw'ekkumi n'omunaana ogw'obufuzi bwa Yerobowaamu mutabani wa Nebati, Abiyaamu n'atandika okufuga Yuda.

²Yafugira mu Yerusaalemi emyaka esatu. Nnyina ye yali Maaka muwala wa Abusaalomu.

³ N'akola ebibi byonna kitaawe bye yakolanga, omutima gwe ne gutatuukirira mu maaso ga MUKAMA Katonda we ng'omutima gwa jjajjaawe Dawudi bwe gwali.

⁴ Naye ku lwa Dawudi, MUKAMA Katonda we n'amuteerawo ettabaaza mu Yerusaalemi era n'ayimusa ne mutabani we okumusikira, era n'okunyweza Yerusaalemi.

⁵ Dawudi yakola ebirungi mu maaso ga MUKAMA, n'agondera ebiragiro bya MUKAMA ennaku zonna ez'obulamu bwe, okuggyako ensonga ya Uliya Omukiiti.

⁶ Ne wabangawo entalo wakati w'ennyumba ya Lekobowaamu n'ennyumba ya Yerobowaamu ennaku zonna ez'obulamu bwa Abiyaamu.

⁷ N'ebafaayo ebirala byonna eby'okufuga kwa Abiyaamu, ne bye yakola, tebyawandiikibwa mu kitabo eky'ebiomumirembe gya bassekabaka ba Yuda? Ne wabangawo entalo wakati wa Abiyaamu ne Yerobowaamu.

⁸ Awo Abiyaamu ne yeebakira wamu ne bajjajaabe era n'aziikibwa mu kibuga kya Dawudi. Asa mutabani we n'amusikira, n'alya obwakabaka.

Asa Kabaka wa Yuda

⁹ Awo mu mwaka ogw'amakumi abiri ogw'obufuzi bwa Yerobowaamu kabaka wa Isirayiri, Asa n'alya obwakabaka bwa Yuda.

¹⁰ Yafugira mu Yerusaalemi emyaka amakumi ana mu gumu. Jjajjaawe omukazi nga ye Maaka muwala wa Abusaalomu.

¹¹ Asa n'akola ebirungi mu maaso ga MUKAMA, nga jjajjaawe Dawudi bwe yakola.

¹² N'agoba mu nsi abaalyanga ebisiyaga, era n'aggyawo n'ebifaananyi ebyakolebwa n'emikono byonna bajjajaabe bye baakola.

¹³ Era n'agoba ne jjajjaawe Maaka ku bwa namasole kubanga yali akoze empagi ya Asera. Asa n'agitema era n'agyokera ku kagga Kidulooni.

¹⁴ Newaakubadde nga teyaggyawo bifo bigulumivu, omutima gwe gwali ku MUKAMA ennaku ze zonna.

¹⁵ N'ayingiza mu yeekaalu ya MUKAMA effeeza, ne zaabu n'ebintu ebirala kitaawe bye yawaayo ne Asa yennyini bye yawaayo.

¹⁶ Ne wabangawo entalo wakati wa Asa ne Baasa kabaka wa Isirayiri ennaku zonna ez'okufuga kwabwe.

¹⁷ Baasa kabaka wa Isirayiri n'alumba Yuda n'azingiza Laama obutaganya muntu n'omu okufuluma wadde okuyingira mu kitundu kya Asa kabaka wa Yuda.

¹⁸ Awo Asa n'addira effeeza ne zaabu yonna eyali esigadde mu ggwanika lya yeekaalu ya MUKAMA n'ey'olubiri lwe, n'abikwasa abakungu be, n'abiweereza

Benikadadi mutabani wa Tabulimmoni, muzzukulu wa Keziyon, eyali kabaka wa Busuuli ng'afugira e Ddamasiko.

¹⁹N'ayogera nti, "Wabeewo endagaano wakati wo nange, ng'eyaliwo wakati wa kitaawo ne kitange. Laba nkuweereza ekirabo ekya ffeeza ne zaabu, omenyewo kaakano endagaano yo ne Baasa kabaka wa Isirayiri, anveeko."

²⁰Benikadadi n'akkiriziganya ne kabaka Asa era n'aweereza abaduumizi b'eggye lye okulumba ebibuga bya Isirayiri. N'akuba Iyon, ne Ddaani, ne Aberubesumaaka ne Kinnerosi yonna ng'okwo kw'otadde Nafutaali.

²¹Awo Baasa bwe yakiwulira n'alekeraawo okuzimba Laama, n'addukira e Tiruza.

²²Kabaka Asa n'awa ekiragiro mu Yuda yonna nga kikwata ku buli muntu. Ne batwala amayinja ag'e Laama n'embaawo Baasa bye yazimbisanga, kabaka Asa n'abizimbisa Geba ekya Benyamini, ne Mizupa.

²³Ebyafaayo ebirala byonna eby'omu mirembe gya Asa, n'obuwanguzi bwe era n'ebibuga bye yazimba, tebyawandiikibwa mu kitabo eky'ebiomumirembe gya bassekabaka ba Yuda? Kyokka mu bukadde bwe, n'alwala ebigere.

²⁴Awo Asa ne yeebakira wamu ne bajajjaabe n'aziikibwa mu kibuga kya jjajjaawe Dawudi. Yekosafaati, mutabani we n'amusikira, n'alya obwakabaka.

Nadabu Kabaka wa Isirayiri

²⁵Nadabu mutabani wa Yerobowaamu n'alya obwakabaka bwa Isirayiri mu mwaka ogwokubiri ogw'obufuzi bwa Asa kabaka wa Yuda. Yafugira Isirayiri emyaka ebiri.

²⁶N'akola ebibi mu maaso ga MUKAMA, ng'atambulira mu ngeri za kitaawe ne mu kibi kye, ebyaleetera Isirayiri okwonoona.

²⁷Awo Baasa mutabani wa Akiya ow'omu nnyumba ya Isakaali n'amukolera olukwe, n'amuttira e Gibbesoni ekibuga ky'Abafirisuuti, Nadabu ne Isirayiri yenna bwe baali bakitaayizza.

²⁸Baasa n'atta Nadabu mu mwaka ogwokusatu ogw'obufuzi bwa Asa kabaka wa Yuda, ye n'alya obwakabaka bwa Isirayiri.

²⁹Amangwago nga kyajje alye obwakabaka, n'atta ennyumba ya Yerobowaamu yonna n'atalekaawo muntu n'omu omulamu. Yabazikiriza bona ng'ekigambo kya MUKAMA kye yayogerera mu muddu we Akiya Omusiiro,

³⁰olw'ebibi bya Yerobowaamu bye yakola, era bye yayonoonyesa Isirayiri, n'okusunguwaza ne bisunguwaza MUKAMA Katonda wa Isirayiri.

³¹Ebyafaayo ebirala eby'omu mirembe gya Nadabu, ne bye yakola, tebyawandiikibwa mu kitabo eky'ebiomumirembe gya bassekabaka ba Isirayiri?

³²Ne wabangawo entalo wakati wa Asa ne Baasa kabaka wa Isirayiri, ennaku zonna ez'okufuga kwabwe.

Baasa Kabaka wa Isirayiri

³³Awo mu mwaka ogwokusatu ogw'obufuzi bwa Asa kabaka wa Yuda, Baasa mutabani wa Akiya n'afuuka kabaka wa Isirayiri yonna e Tiruza, era n'afugira emyaka amakumi abiri mu ena.

³⁴N'akola ebibi mu maaso ga MUKAMA, ng'atambulira mu ngeri za Yerobowaamu, ne mu kibi kye, kye yayonoonyesa Isirayiri.

1 Bassekabaka 16

¹Awo ekigambo kya MUKAMA ne kijjira Yeeku mutabani wa Kanani nga kyogera ku Baasa nti,

²“Nakugulumiza nga nkuggya mu nfuufu ne nkufuula mukulembeze w'abantu bange Isirayiri, naye watambulira mu ngeri za Yerobowaamu era n'oyonoonyesa abantu bange Isirayiri, ne bansunguwaza n'ebibi byabwe.

³Laba, ndisaanyizaawo ddala Baasa n'ennyumba ye, era ndifuula ennyumba ye okuba ng'eya Yerobowaamu mutabani wa Nebati.

⁴Omuntu yenna owa Baasa bw'alifiira mu kibuga, omulambo gwe guliriibwa embwa, n'abo abalifiira ku ttale, ennyonyi ez'omu bbanga zirirya emirambo gyabwe.”

⁵Ebyafaayo ebirala eby'omu mirembe gya Baasa, bye yakola, awamu n'ebintu ebirungi bye yakola, tebyawandiikibwa mu kitabo eky'ebiomumirembe gya bassekabaka ba Isirayiri?

⁶Awo Baasa ne yeebakira wamu ne bajjajaabe n'aziikibwa e Tiruza, mutabani we Era n'amusikira, n'alya obwakabaka.

⁷Ekigambo kya MUKAMA ne kituukirira, ekyajjira Yeeku mutabani wa Kanani ekikwata ku Baasa n'ennyumba ye olw'ebibi bye yakola mu maaso ga MUKAMA, ng'amusunguwaza olw'ebyo bye yakola, n'olw'okwonoona ng'afaanana ennyumba ya Yerobowaamu, ate era n'olw'okuba nga yagisaanyaawo.

Era Kabaka wa Isirayiri

⁸Mu mwaka ogw'amakumi abiri mu omukaaga ogw'obufuzi bwa Asa kabaka wa Yuda, Era mutabani wa Baasa n'afuuka kabaka wa Isirayiri; n'afugira mu Tiruza emyaka ebiri.

⁹Awo Zimuli, omu ku bakungu be, eyakuliranga ekitundu ky'amagaali ge, n'amukolera olukwe. Mu kiseera ekyo Era yali Tiruza, ng'atamiirira mu maka ga Aluza, omusajja eyavunaanyizibwanga olubiri lw'e Tiruza.

¹⁰Mu kiseera ekyo, Zimuli n'ayingira n'amukuba n'amutta, n'olvannyuma n'alya obwakabaka. Gwali mwaka ogw'amakumi abiri mu omusantu ogw'obufuzi bwa Asa kabaka wa Yuda.

¹¹Awo olwatuuka nga kyajje atuule ku ntebe ey'obwakabaka n'atta abantu b'ennyumba ya Baasa bona, obutalekaawo musajja n'omu wa luganda lwa Baasa wadde mikwano gye.

¹²Bw'atylo Zimuli n'asaanyaawo ennyumba ya Baasa yonna, ng'ekigambo kya MUKAMA bwe kyali kye yayogera ku Baasa ng'ayita mu nnabbi Yeeku,

¹³olw'ebibi bya Baasa ne mutabani we Era bye baakola n'okwonoonyesa Isirayiri, nga basunguwaza MUKAMA Katonda wa Isirayiri olwa bakatonda beebeekolera abatagasa.

¹⁴Eby'afaayo ebirala eby'omu mirembe gya Era, ne bye yakola byonna, tebyawandiikibwa mu kitabo ky'ebiomumirembe gya bassekabaka ba Isirayiri?

Zimuli Kabaka wa Isirayiri

¹⁵Mu mwaka ogw'amakumi abiri mu omusantu ogw'obufuzi bwa Asa kabaka wa Yuda, Zimuli n'afugira e Tiruza ennaku musantu. Eggye lyali lisiisidde okumpi ne Gibbesoni ekibuga ky'Abafirisuuti.

¹⁶Ku lunaku olwo Abayisirayiri abaali mu nkambi bwe baawulira nti Zimuli yasala olukwe, n'atta kabaka, Isirayiri yonna ne balangirira Omuli omuduumizi w'eggye okuba kabaka wa Isirayiri.

¹⁷Omuli n'Abayisirayiri bona abaali awamu naye ne bava e Gibbesoni ne bambuka okuzingiza Tiruza.

¹⁸Zimuli bwe yalaba ng'ekibuga kiwambiddwa, n'addukira mu lubiri olw'omunda, olubiri lwonna n'alukumako omuliro. N'afiira omwo.

¹⁹Ekyo kyamutuukako olw'ebibi bye yakola mu maaso ga MUKAMA, n'okutambilira mu ngeri za Yerobowaamu, ne mu kibi kye yakola, ne bye yayonoonyesa Isirayiri.

²⁰Eby'afaayo ebirala eby'omu mirembe gya Zimuli, n'obujeemu bwe, tebyawandiikibwa mu kitabo eky'ebiomumirembe gya bassekabaka ba Isirayiri?

Omuli Kabaka wa Isirayiri

²¹Abantu ba Isirayiri ne baawukanamu ebibiina bibiri, ekitundu ekimu nga kiwagira Tibuni mutabani wa Ginasi okuba kabaka, nga n'ekitundu ekirala kiwagira Omuli.

²²Naye abagoberezi ba Omuli ne basinza aba Tibuni mutabani wa Ginasi amaanyi; Tibuni n'afa, Omuli n'afuuka kabaka.

²³Mu mwaka ogw'amakumi asatu mu ogumu ogw'obufuzi bwa Asa kabaka wa Yuda, Omuli n'alya obwakabaka obwa Isirayiri era n'afugira emyaka kkumi n'ebiri, mukaaga ku gyo ng'ali mu Tiruza.

²⁴Yagula olusozi lw'e Samaliya ku Semeri, ekilo nsanvu eza ffeeza, n'aluzimbako ekibuga, n'akituumu Samaliya, okukibbulamu Semeri eyali nannyini lusozi.

²⁵Naye Omuli n'akola ebyali ebibi mu maaso ga MUKAMA, era n'ayonoona nnyo okusinga n'abo abaamusooka.

²⁶N'atambulira mu ngeri zonna eza Yerobowaamu mutabani wa Nebati, ne mu kibi kye, kye yayonoonyesa Isirayiri era n'asunguwaza MUKAMA Katonda wa Isirayiri olwa bakatonda beebeekolera abatagara.

²⁷Ebyafaayo ebirala eby'omu mirembe gya Omuli, ne bye yakola, n'ebiyobuzira bye, tebyawandiikibwa mu kitabo eky'ebiyomumirembe gya bassekabaka ba Isirayiri?

²⁸Omuli ne yeebakira wamu ne bajjajaabe n'aziikibwa mu Samaliya; Akabu n'amusikira, n'alya obwakabaka.

Akabu alya Obwakabaka bwa Isirayiri

²⁹Mu mwaka ogw'amakumi asatu mu omunaana ogw'obufuzi bwa Asa Kabaka wa Yuda, Akabu mutabani wa Omuli n'alya obwakabaka bwa Isirayiri, n'afugira Isirayiri mu Samaliya emyaka amakumi abiri mu ebiri.

³⁰Akabu mutabani wa Omuli n'akola ebibi mu maaso ga MUKAMA okusinga bona abaamusooka.

³¹Teyakoma ku kukola bibi bya Yerobowaamu mutabani wa Nebati, naye era n'awasa ne Yezeberi muwala wa Esubaali kabaka w'Abasidoni, era n'atandika okuweereza n'okusinza Baali.

³²Yazimbira Baali ekyoto mu ssabo lya Baali lye yazimba mu Samaliya.

³³Akabu n'akola n'empagi ya Baaseri, ne yeeyongera nnyo okusunguwaza MUKAMA Katonda wa Isirayiri, okusinga bakabaka abalala bona aba Isirayiri abaamusooka.

³⁴Ku mirembe gya Akabu, Kyeri Omubeseri n'addaabiriza era n'azimba Yeriko. Era olw'ekigambo kya MUKAMA kye yayogerera mu Yoswa mutabani wa Nuuni, Kyeri bwe yassaawo emisingi gyakyo, n'afiirwa Abiraamu mutabani we omukulu; bwe yazimba wankaaki waakyo, Segubi mutabani we asembayo obuto naye n'afa.

1 Bassekabaka 17

Bannamuñjoona Baliisa Eriya

- ¹Awo Eriya Omutisubi ow'e Tisubi mu Gireyaadi, n'agamba Akabu nti, "MUKAMA Katonda wa Isirayiri gwe mpeereza nga bw'ali omulamu, tewaabe musulo newaakubadde enkuba mu myaka egijja wabula olw'ekigambo kyange."
- ²Awo ekigambo kya MUKAMA ne kijjira Eriya nga kigamba nti,
- ³"Vva wano ogende ebuvanjuba weekweke ku kagga Kerisi akoolekera Yoludaani.
- ⁴Ojja kunywanga mu kagga, era ndagidde bannamuñjoona okukuliisiza eyo."
- ⁵N'akola nga MUKAMA bwe yamulagira, n'alaga ku kagga Kerisi, akoolekera Yoludaani, n'abeera eyo.
- ⁶Bannamuñjoona ne bamuleeteranga emmere n'enyyama buli nkya na buli kawungeezi, era n'anywanga mu kagga.

Nnamwandu ow'e Zalefaasi

- ⁷Bwe waayitawo ebbanga, akagga ne kakalira olw'obutabaawo nkuba mu nsi.
- ⁸Awo ekigambo kya MUKAMA ne kimujjira nga kigamba nti,
- ⁹"Situkiramu ogende e Zalefaasi ekya Sidoni obeere eyo. Ndagidde nnamwandu ali eyo okukuwanga emmere."
- ¹⁰Awo n'agolokoka n'alaga e Zalefaasi. Bwe yatuuka ku wankaaki w'ekibuga, waliwo nnamwandu eyali alondalonda obuku. Eriya n'amusaba ng'agamba nti, "Nkwegayiridde, ndeetera ku mazzi matono mu kibya nnyweko."
- ¹¹Bwe yali ng'agenda okugakima, Eriya n'amukoowoola ng'agamba nti, "Nkwegayiridde, ndeeteraayo n'omugaati."
- ¹²N'addamu nti, "MUKAMA nga bw'ali omulamu, sirina mugaati okuggyako olubatu lw'obutta mu kibya n'otufuta mu kasumbi, era kaakano nkuññaanya buku mbutwale eka neefumbire nze n'omwana wange tubulye tufe."
- ¹³Eriya n'amugamba nti, "Totya. Genda eka okole nga bw'ogambye. Naye sooka onfumbire akagaati, okuva mu by'olina okandeteere, oluvannyuma weefumbire ggwe n'omwana wo.
- ¹⁴Kubanga kino MUKAMA Katonda wa Isirayiri ky'agamba nti, 'Ekibya ky'obutta tekiriggwaamu, so n'akasumbi k'amafuta tekalikalira okutuusa olunaku MUKAMA lw'alitonyesa enkuba ku nsi.'
- ¹⁵N'agenda n'akola nga Eriya bwe yamugamba, era ne waba emmere bulijjo eya Eriya ne nnamwandu n'amaka ge.
- ¹⁶Ekibya ky'obutta tekyakendeera wadde akasumbi k'amafuta okukalira, ng'ekigambo kya MUKAMA kye yayogerera mu Eriya bwe kyali.

¹⁷Bwe waayitawo ebbanga, omwana wa nnamwandu n'alwala nnyo, obulwadde ne bweyongera okutuusa lwe yafa.

¹⁸Nnamwandu n'agamba Eriya nti, "Kiki ky'onnanga, omusajja wa Katonda? Wajja okunzijukiza ekibi kyange n'okutta omwana wange?"

¹⁹Eriya n'amuddamu nti, "Mpa omwana wo." N'amuggya mu kifuba kye, n'amusitula n'amutwala mu kisenge ekya waggulu gye yabeeranga, n'amugalamiza ku kitanda kye.

²⁰N'akoowoola MUKAMA ng'agamba nti, "Ayi MUKAMA Katonda wange, ne nnamwandu ono gwe mbeera naye omuleeseko ekikangabwa kino, n'otta omwana we?"

²¹Eriya ne yeegololera ku mulenzi emirundi esatu, n'akaabira MUKAMA ng'agamba nti, "Ayi MUKAMA Katonda wange, obulamu bw'omulenzi ono bukomewo nate!"

²²MUKAMA n'awulira okukaaba kwa Eriya, obulamu bw'omulenzi ne bumuddamu, era n'alama.

²³Awo Eriya n'asitula omwana n'amuserengesa okuva mu kisenge n'amuleeta mu nnyumba, n'amuwa nnyina, n'amugamba nti, "Laba mutabani wo mulamu!"

²⁴Awo nnamwandu n'agamba Eriya nti, "Kaakano ntegedde ng'oli musajja wa Katonda, era n'ekigambo kya MUKAMA ekiva mu kamwa ko kiba kya mazima."

1 Bassekabaka 18

Eriya ne Obadiya Basisinkana

¹Awo nga wayiseewo ebbanga lya myaka essatu kasookedde enkuba ebula, ekigambo kya MUKAMA ne kijjira Eriya nti, "Genda weerage eri Akabu, omutegeze nti nditonnyesa enkuba ku nsi."

²Awo Eriya n'agenda okwelianjula eri Akabu.

³Mu biro ebyo enjala ng'ennyinnyitidde nnyo mu Samaliya, Akabu n'ayita Obadiya omukulu w'olubiri eyali assaamu ennyo MUKAMA ekitiibwa.

⁴Olwali olwo nga Yezeberi atandika okutta bannabbi bona aba MUKAMA, Obadiya n'addira bannabbi kikumi n'abakweka mu mpuku bbiri buli emu ng'erimu amakumi ataano ataano, n'abaweeranga omwo emmere n'amazzi.

⁵Akabu n'amugamba nti, "Tuuka buli wantu awali enzizi ez'amazzi n'awali obugga bwonna, oboolyawo tunaafuna omuddo ne tuwonya embalaasi zaffe n'ennyumbu okufa, tuleme okufiirwa ensolo zonna."

⁶Ne beeyawulamu bombi okubuna ensi, Akabu n'akwata ekkubo lye ne Obadiya n'akwata eriryе.

⁷ Awo Obadiya bwe yali ng'ali ku lugendo lwe, Eriya n'amusisinkana. Obadiya bwe yamutengeera n'avuunama wansi n'agamba nti, "Ddala ggwe wuuyo, mukama wange Eriya?"

⁸ N'addamu nti, "Ye nze. Genda ogambe mukama wo nti, 'Eriya ali wano.'"

⁹ Obadiya n'amugamba nti, "Kiki kye nkusobezza, okutuma omuddu wo eri Akabu ajja okunzita?

¹⁰ MUKAMA Katonda wo nga bw'ali omulamu, tewali ggwanga oba bwakabaka mukama wange gy'atatumye mubaka kukunoonya. Era buli ggwanga, oba bwakabaka obwagambanga nti tolifiyo, yabalayizanga okukakasa nti tobangayo.

¹¹ Kaakano oñjamba ñjende ewa mukama wange njogere nti, 'Eriya ali wano.'

¹² Simanyi Mwoyo wa MUKAMA gy'anaakutwala nga kyenzije nveewo. Bwe nnaagenda ne ntegeeza Akabu n'atakusangawo, ajja kunzita, ate nga nze omuddu wo okuva mu buto bwange, nsinza MUKAMA.

¹³ Mukama wange totegeebewanga, kye nakola nga Yezeberi atta bannabbi ba MUKAMA? Nakweka kikumi ku bannabbi ba MUKAMA mu mpuku bbiri, ataano ataano mu buli mpuku, era ne mbawa emigaati okulya n'amazzi okunywa.

¹⁴ Kaakano, oñjamba ñjende ewa mukama wange mugambe nti, 'Eriya ali wano.' Ajja kunzita!"

¹⁵ Eriya n'amugamba, "Nga MUKAMA ow'Eggye bw'ali omulamu, gwe mpeereza, siireme kweraga eri Akabu leero."

Eriya ku Lusozi Kalumeeri

¹⁶ Awo Obadiya n'agenda okusisinkana Akabu, n'amutengeeza; Akabu n'ajja okusisinkana Eriya.

¹⁷ Akabu bwe yalaba Eriya, n'amubuuza nti, "Ggwe wuuyo, gwe ateganya Isirayiri?"

¹⁸ Eriya n'addamu nti, "Sinnateganya Isirayiri, naye ggwe n'ennyumba ya kitaawo, muvudde ku biragiro bya MUKAMA ne mugoberera ba Baali.

¹⁹ Kaakano kuñjaanya abantu bona okuva mu Isirayiri yonna bajje ku lusozi Kalumeeri era oleete ne bannabbi ba Baali ebikumi ebina mu ataano wamu ne bannabbi ba Baaseri ebikumi ebina, abaliira ku mmeesa ya Yezeberi."

²⁰ Awo Akabu n'atumira abantu ba Isirayiri bona, era n'akuñjaanya ne bannabbi bona ku lusozi Kalumeeri.

²¹ Awo Eriya n'ayimirira mu maaso g'abantu n'ayogera nti, "Mulituusa wa okutta aganaaga? Obanga MUKAMA ye Katonda mumugoberere, naye obanga Baali ye Katonda mugoberere oyo." Naye abantu ne batamuddamu kigambo na kimu.

²²Eriya n'abagamba nti, "Nze nsigaddewo nzekka ku bannabbi ba MUKAMA, naye Baali alina bannabbi ebikumi bina mu ataano.

²³Kale mutuwe ente ennume bbiri, bo beerobozeeko emu, bagitemeeteme, bagiteeke ku nku, naye tebagikumamu. Nange naalongoosa eyookubiri, ne ngiteeka ku nku naye sijja kuzikumamu muliro.

²⁴Kale oluvannyuma mukoowoole erinnya lya katonda wammwe, nange nnaakowoola erinnya lya MUKAMA; anaddamu n'omuliro nga ye Katonda." Abantu bona ne baddamu nti, "Ky'oyogedde kirungi."

²⁵Eriya n'agamba bannabbi ba Baali nti, "Mmwe musooke okweroboza ente emu ennume nga bwe muli abangi, mugiteeketeke. Mukoowoole erinnya lya katonda wammwe, naye temukoleeza muliro."

²⁶Ne batwala ente ebaweeddwa ne bagiteekateeka. Oluvannyuma ne bakoowoola erinnya lya Baali okuva ku makya okutuusa mu ttuntu. Ne baleekaanira waggulu nti, "Ayi Baali, otuwulire!" Naye ne wataba kuddibwamu, newaakubadde eddobaozi lyonna. Ne bazina nga beetooloola ekyoto kye baali bakoze.

²⁷Mu ssaawa ez'omu ttuntu Eriya n'atandika okubaduulira, ng'ayogera nti, "Muleekaane nnyo! Katonda ddala! Osanga ali mu birowoozo bingi, oba aliko ebimutawaanya, oba ali ku lugendo. Ayinza okuba nga yeebase, nga yeetaaga kumuukusa."

²⁸Ne baleekaana nnyo nga bwe beesala n'obwambe ne beefumita n'amafumu ng'empisa yaabwe bwe yali, okutuusa omusaayi lwe gwabakulukuta.

²⁹Obudde bwali buyise nnyo, naye ne beeyongera okulagula kwabwe okutuusa ekiseera eky'ekiweebwayo eky'akawungeezi. Ne wataba kuddibwamu, newaakubadde eddobaozi lyonna, wadde assaayo omwoyo.

³⁰Awo Eriya n'alyoka agamba abantu bona nti, "Musembere kumpi nange." Bonna ne bamuseemberera, n'addaabiriza ekyoto kya MUKAMA ekyali kisuuliddwa.

³¹N'addiria amayinja kkumi n'abiri, buli limu n'aliteeka ku linnaalyo ng'ebika bya Yakobo bwe byali, MUKAMA gwe yayogerako nti, "Erinnya lye linaabanga Isirayiri."

³²N'azimba ekyoto mu linnya lya MUKAMA n'amayinja ago, n'asima olusalosalo okwetooloola ekyoto, ng'alugyamu lita kkumi na ttaano ez'amazzi.

³³N'atindikira enku, n'atemaatema ente, n'agiteekako. N'alyoka abagamba nti, "Mujuze ebibya bina amazzi, mugafuke ku kiweebwayo ne ku nku."

³⁴N'abagamba baddemu bakole bwe batyo omulundi ogwokubiri, ne bakiddamu, ate era n'abagamba okuddamu omulundi ogwokusatu ne baddamu ogwokusatu nga bwe yalagira.

³⁵Amazzi ne gakulukuta okwetooloola ekyoto, n'okujjula ne gajjula olusalosalo.

³⁶Mu kiseera eky'ekiweebwayo eky'akawungeezi, nnabbi Eriya n'asembera mu maaso n'asaba nti, "Ayi MUKAMA, Katonda wa Ibulayimu, owa Isaaka ne Isirayiri, olwa leero kimanyibwe nti ggwe Katonda mu Isirayiri, era nti nze muddu wo, era nkoze ebintu bino byonna olw'ekigambo kyo.

³⁷Onziremu, Ayi MUKAMA, onziremu, abantu bano bamanye, Ayi MUKAMA nti ggwe Katonda, era nti ggwe okyusa emitima gyabwe okudda gy'oli."

³⁸Omuliro gwa MUKAMA ne gulyoka gugwa ne gwokya ekiweebwayo, n'enku, n'amayinja, n'ettaka, ne gumalirawo ddala n'amazzi mu lusalosalo.

³⁹Awo abantu bona bwe baakiraba, ne bavuunama ne bakaaba nnyo nga bagamba nti, "MUKAMA, ye Katonda! MUKAMA, ye Katonda!"

⁴⁰Eriya n'alyoka abalagira nti, "Mukwate bannabbi ba Baali, waleme okuba n'omu abaddukako." Ne babakwata, Eriya n'abaserengesa ku kagga Kisoni, n'abattira eyo.

Ekyeya Kikoma

⁴¹Eriya n'agamba Akabu nti, "Genda olye, n'okunywa onywe; kubanga waliwo okubwatuka kw'enkuba ey'amaanyi."

⁴²Awo Akabu n'agenda okulya n'okunywa, naye Eriya n'alinnya ku ntikko y'olusozi Kalumeeri, n'akutama, n'ateeka omutwe gwe wakati w'amaviivi ge.

⁴³N'agamba omuweereza we nti, "Yambuka, olengere okwolekera ennyanja." Omuweereza n'agenda n'alaba n'akomawo n'amugamba nti, "Teri kye ndabyewo." Eriya n'amugamba addeyo emirundi musanvu.

⁴⁴Ku mulundi ogw'omusanvu omuweereza n'akomawo n'agamba nti, "Laba, ekire ekitono ekyenkana ng'omukono gw'omuntu kyambuka okuva mu nnyanja." Eriya n'amugamba nti, "Genda ogambe Akabu nti, 'Teekateeka eggaali lyo, oserengete, enkuba nga tennakuziyiza.'"

⁴⁵Mu kiseera kyekimu, eggulu ne libindabinda, kibuyaga ne yeeyongera, enkuba ey'amaanyi n'ejja, Akabu n'ayolekera e Yezuleeri.

⁴⁶Amaanyi ga MUKAMA ne gakka ku Eriya ne yeesiba ekimyu, n'adduka ng'akuleembedde Akabu okutuuka e Yezuleeri.

1 Bassekabaka 19

Eriya Addukira e Kolebu

¹ Awo Akabu n'abuulira Yezeberi byonna Eriya bye yakola, ne bwe yatta bannabbi bona n'ekitala.

² Yezeberi n'atumira Eriya omubaka okumugamba nti, "Bakatonda bankole bwe batyo n'okukirawo, bwe siifuule obulamu bwo okuba ng'obulamu bw'omu ku bo, essaawa nga zino enkya."

³ Eriya n'atyia nnyo, n'adduka okuwonya obulamu bwe. Bwe yatuuka e Beeruseba mu Yuda, n'aleka eyo omuweereza we.

⁴ Naye ye n'atambula olugendo lwa lunaku lumu mu ddungu, n'atuuka awali omwoloola, n'atuula wansi waagwo, n'asaba afe. N'ayogera nti, "Kino kimala, MUKAMA, kaakano twala obulamu bwange, kubanga sisinga bajjajjange."

⁵ N'agalamira wansi w'omwoloola ne yeebaka. Amangwago malayika n'amukomako, n'amugamba nti, "Golokoka olye."

⁶ N'agolokoka, laba ng'emitwetwe we waliwo akasumbi k'amazzi n'omugaati omwokye. N'alya n'anywa, n'addamu n'agalamira.

⁷ Malayika wa MUKAMA n'akomawo omulundi ogwokubiri n'amukomako n'amugamba nti, "Golokoka olye, kubanga olugendo lunene."

⁸ Awo n'agolokoka n'alya, n'anywa, n'afuna amaanyi, era n'atambula olugendo lwa nnaku amakumi ana emisana n'ekiro, okutuuka e Kolebu, olusozi lwa Katonda.

MUKAMA Alabikira Eriya

⁹ Bwe yatuuka eyo, n'ayingira mu mpuku, n'asula omwo. Awo ekigambo kya MUKAMA ne kimujjira nga kigamba nti, "Okola ki wano, Eriya?"

¹⁰ N'addamu nti, "Nyiikidde nnyo okuweereza MUKAMA Katonda ow'Eggye ne nk watibwa n'obuggywa ku lulwe. Abayisirayiri balese endagaano yo, bamenye ebyoto byo, era ne batta ne bannabbi bo n'ekitala. Nze nsigaddewo nzekka, ne kaakano bannoonya okunzita."

¹¹ MUKAMA n'amugamba nti, "Ffuluma, oyimirire ku lusozi mu maaso ga MUKAMA, kubanga MUKAMA ali kumpi kuyitawo." Kale laba, embuyaga nnyingi ey'amaanyi n'emenya ensozi n'eyasa n'enjazi mu maaso ga Eriya, naye MUKAMA nga taliimu. Oluvannyuma lw'embuyaga, musisi ow'amaanyi n'ayita naye era MUKAMA nga taliimu.

¹² Oluvannyuma lwa musisi ne wajja omuliro, naye era MUKAMA teyaliimu mu muliro. Oluvannyuma lw'omuliro, ne wajja eddoboozi ttono nga lya ggonjebwa.

¹³ Eriya bwe yaliwulira, n'abikka amaaso ge n'omunagiro gwe n'afuluma n'ayimirira ku mulyango gw'empuku. Awo MUKAMA n'amugamba nti, "Okola ki wano Eriya?"

¹⁴ N'addamu nti, "Nyiikidde nnyo okuweereza MUKAMA Katonda ow'Eggye, naye Abayisirayiri balese endagaano yo, bamenyeemenye ebyoto byo, era ne batta ne bannabbi bo n'ekitala. Nze nsigaddewo nzeka, ne kaakano bannoonya okunzita."

¹⁵ MUKAMA n'amugamba nti, "Ddirayo mu kkubo lye wajiddemu ogende mu ddungu lya Ddamasiko. Bw'onootuuka eyo ofuke amafuta ku Kazayeeri okuba kabaka w'e Busuuli,

¹⁶ ne ku Yeeku mutabani wa Nimusi okuba kabaka wa Isirayiri, ate era ofuke n'amafuta ku Erisa mutabani wa Safati ow'e Aberumekola okudda mu kifo kyo.

¹⁷ Era Yeeku anatta oyo yenna anadduka okuwona ekitala kya Kazayeeri, ate Erisa ye n'atta oyo yenna anadduka okuwona ekitala kya Yeeku.

¹⁸ Wabula nesigaliza akasanvu mu Isirayiri, abatavuunamiranga Baali wadde okumunywegera."

Okuyitibwa kwa Erisa

¹⁹ Awo Eriya n'ava eyo n'asisinkana Erisa mutabani wa Safati ng'alima n'emigogo gy'ente kkumi n'ebiri, ye ng'alimisa ogw'ekkumi n'ebiri. Eriya n'agenda gy'ali n'amusuulako omunagiro gwe.

²⁰ Erisa n'aleka ente ze, n'adduka ng'agoberera Eriya. N'amugamba nti, "Ka nsibile kitange ne mmange, ndyoke njende naawe." Eriya n'amugamba nti, "Ddayo, nkukoze ki?"

²¹ Awo Erisa n'amulekako akabanga, n'addayo, n'agenda n'asala omugogo gw'ente, ennyama n'agifumbisa ebiti by'enkumbi, n'agabiraabantu ne balya. Awo n'agolokoka n'agoberera Eriya era n'amuweerezanga.

1 Bassekabaka 20

Benikadadi Alumba Samaliya

¹ Awo Benikadadi kabaka w'e Busuuli n'akuñjaanya egghe lye lyonna wamu ne bakabaka amakumi asatu mu babiri n'embalaasi n'amagaali gaabwe, bona ne bambuka okuzingiza Samaliya n'okulwana nakyo.

² N'atuma ababaka mu kibuga eri Akabu kabaka wa Isirayiri ng'agamba nti, "Bw'ati bw'ayogera Benikadadi nti,

³ Effeeza yo ne zaabu yo byange ate era ne bakyala bo abasinga obulungi n'abaana bo nabo bange.'"

⁴ Kabaka wa Isirayiri n'addamu nti, "Nga bw'ogambye, mukama wange kabaka, nze ne bye nnina byonna bibyo."

⁵ Ababaka ne baddayo ewa Akabu nate ne bamugamba nti, "Kino Benikadadi ky'agamba nti, 'Natuma nga njagala ffeeza yo ne zaabu yo, n'abakyala bo n'abaana bo.

⁶Naye olunaku lw'enkya essaawa nga zino nzija kuweereza abakungu bange banoonyeemu mu lubiri lwo ne mu nnyumba z'abakungu bo, era bajja kutwala ebibyo byonna eby'omuwendo.'"

⁷Awo kabaka wa Isirayiri n'ayita abakadde bona ab'ensi, n'abagamba nti, "Mulabe omusajja ono bw'anoonya emitawaana! Bwe yatumya bakyala bange n'abaana bange wamu ne ffeeza yange ne zaabu yange, sabimumma."

⁸Abakadde n'abantu bona ne bamuddamu nti, "Tomuwuliriza wadde okukkiriziganya naye."

⁹Awo kabaka n'addamu ababaka ba Benikadadi nti, "Mutegeeze mukama wange kabaka nti, 'Omuddu wo nzija kukola byonna bye walagidde ku ntandikwa, naye kino eky'oluvannyuma siyinza kukikola.'"

¹⁰Awo Benikadadi n'aweereza obubaka obulala eri Akabu nti, "Bakatonda bankole bwe batyo n'okukirawo, enfuuufu ya Samaliya bwe teebune mu bibatu by'abasajja bona abangoberera."

¹¹Kabaka wa Isirayiri n'amuddamu nti, "Mumugambe nti, 'Eyeesiba ebyokulwanyisa aleme okwenyumiriza ng'oyo abyесумулла.'"

¹²Benikadadi bwe yawulira obubaka obwo, ng'ali mu kutamiira ne bakabaka abalala mu weema zaabwe, n'alagira abasajja be nti, "Mweteeketeke okulumba." Ne beeteekateeka okulumba ekibuga.

Akabu Awangula Benikadadi

¹³Mu kiseera ekyo ne wabaawo nnabbi eyajja eri Akabu kabaka wa Isirayiri n'langirira nti, "Bw'ati bw'ayogera MUKAMA nti, 'Olabo eggye lino eddene? Nzija kulikuwa mu mukono gwo leero, otegeere nga nze MUKAMA.'"

¹⁴Akabu n'abuuza nti, "Anakikola atya?" Nnabbi n'addamu nti, "Bw'ati bw'ayogera MUKAMA nti, 'Abavubuka bo ab'abaduumizi b'amasaza, bajja kukubeera.'" Akabu ne yeeyongera okubuuza nti, "Ani anasooka okulumba?" Nnabbi n'addamu nti, "Ggwe."

¹⁵Awo Akabu n'ayita abavubuka ab'abaduumizi b'amasaza, ne bawera ebikumi bibiri mu asatu mu babiri (232). Era n'akuنجаanya ne Isirayiri yenna, bona awamu ne baba kasanvu (7,000).

¹⁶Ne batabala mu ttuntu nga Benikadadi ne bakabaka amakumi asatu mu ababiri be yali alagaanye nabo bali mu kutamiira.

¹⁷Abavubuka b'abaduumizi b'amasaza be baasooka okulumba. Naye Benikadadi yali atumye ababaka okuketta, ne bamutegeeza nti, "Waliwo abasajja abajja nga bava Samaliya."

¹⁸N'ayogera nti, "Bwe baba bazze na mirembe, mubawambe, ne bwe baba nga baze ku lutalo, era mubawambe."

¹⁹Abavubuka b'abaduumizi b'amasaza ne bafuluma ne balumba okuva mu kibuga, nga n'eggye libagoberera.

²⁰Buli omu ku bo n'atta gwe yayolekera. Abasuuli ne badduka, nga n'Abayisirayiri bwe babagoba, naye Benikadadi kabaka w'e Busuuli n'awonera ku mbalaasi n'abamu ku basajjabe abeebagala embalaasi.

²¹Awo kabaka wa Isirayiri n'abagobera ddala era n'awamba embalaasi n'amagaali, era Abasuuli bangi ne bafa.

²²Awo ebyo nga biwedde, nnabbi n'agenda eri kabaka wa Isirayiri n'amugamba nti, "Weenyweze, olabe ekiteekwa okukolebwa, kubanga omwaka ogunaddirira kabaka w'e Busuuli ajja kukulumba nate."

²³Mu kiseera ekyo, abakungu ba kabaka w'e Busuuli ne bamuwa amagezi nti, "Bakatonda b'Abayisirayiri bakatonda ba nsozi, era kyebavudde batusinza amaanyi. Naye bwe tunaabalwanyisizza mu lusenyi, mazima ddala tunaabasinza amaanyi.

²⁴Kola bw'oti, ggyawo bakabaka bona mu bifo byabwe eby'okuduumira, osseewo abaduumizi abalala.

²⁵Oteekwa okufuna egghe ery'enkana liri lye wafirwa, embalaasi edde mu kifo ky'embalaasi, n'eggaali mu kifo ky'eggaali, tulyoke tulwane nabo mu lusenyi, olwo tunaabasinzizza ddala amaanyi." N'abawuliriza era n'akola bw'atyo.

²⁶Omwaka ogwaddirira Benikadadi n'akuŋjaanya Abasuuli, n'ayambuka mu Afeki okulwana ne Isirayiri.

²⁷Awo abantu ba Isirayiri nabo ne bakuŋjaana ne baweebwa entanda yaabwe, ne bagenda okubasisinkana. Abayisirayiri ne basiisira okuboolekera ne bafaanana ng'ebisibo bibiri ebitono eby'embuzi, naye Abasuuli ne babuna ensi yonna.

²⁸Awo omusajja wa Katonda n'asembera, n'agamba kabaka wa Isirayiri nti, "Bw'ati bw'ayogera MUKAMA nti, 'Olw'okuba Abasuuli balowooza nga MUKAMA Katonda wa ku nsozi so si Katonda wa mu biwonvu, ndigabula egghe lino eddene mu mukono gwo, otegeere nga nze MUKAMA.'"

²⁹Ne basiisira nga boolekaganye okumala ennaku musanvu, ku lunaku olw'omusanvu ne balumbagana. Abayisirayiri ne batta abaserikale ab'ebigere Abasuuli emitwalo kkumi mu lunaku lumu.

³⁰Abalala ne baddukira mu kibuga Afeki, era eyo bbugwe w'ekibuga ekkyo gye yagwira ku bantu emitwalo musanvu ku baali bawonyeewo.

Akabu Asaasira Benikadadi

Benikadadi naye nadduka ne yeekweka mu kibuga mu kimu ku bisenge eby'omunda.

³¹Abakungu be ne bamugamba nti, “Laba, tuwulidde nti bakabaka b’ennyumba ya Isirayiri, ba kisa, twesibe ebibukutu mu biwato byaffe, tuzingirire emige ku mitwe gyaffe tugende ewa kabaka wa Isirayiri, oboolyawo anaakusaasira.”

³²Ne beesiba ebibukutu mu biwato byabwe, ne bazingirira emige ku mitwe gyabwe, ne balaga ewa kabaka wa Isirayiri, ne bamugamba nti, “Omuddu wo Benikadadi agamba nti, ‘Nkwegayiridde tonzita.’” Kabaka n’ababuuza nti, “Akyali mulamu? Oyo muganda wange.”

³³Abasajja ne balowooza nti ako kabonero kalungi, era ne banguwa okwogera nti, “Weewaawo, muganda wo Benikadadi.” Kabaka n’ayogera nti, “Mugende mumuleete.” Benikadadi bwe yavaayo, Akabu n’amuleetera mu gaali lye.

³⁴Awo Benikadadi n’agamba nti, “Ndikuddiza ebibuga kitange bye yawamba ku kitaawo, era olyessizaawo obutale obubwo ggwe mu Ddamasiko, nga kitange bwe yakola mu Samaliya.” Akabu n’addamu nti, “Nzija kukuleka ogende nga tukoze endagaano.” Era ne bakola endagaano, n’amuleka n’agenda.

Nnabbi Anenya Akabu

³⁵Omúku batabani ba bannabbi n’agamba munne nti, “Katonda alagidde onfumite n’ekyokulwanyisa kyo,” naye munne oyo n’agaana.

³⁶Mutabani wa nnabbi n’ayogera nti, “Olw’obutagondera ddoboozi lya MUKAMA, bw’onooba wakava wano, empologoma eneekutta.” Awo bwe baali kyebajje baawukane, n’asanga empologoma era n’emutta.

³⁷Mutabani wa nnabbi n’asanga omusajja omulala, n’amugamba nti, “Nfumita, nkwegayiridde.” Omusajja n’amufumita n’amuleetako ekiwundu.

³⁸Awo n’agenda n’alindirira kabaka mu kkubo, ne yeebuzaabuza ng’abisse ekiremba kye ku maaso ge.

³⁹Kabaka bwe yali ng’ayitawo, mutabani wa nnabbi n’amukoowoola ng’agamba nti, “Omuddu wo yagenze wakati mu lutalo, ne wabaawo omuserikale eyandetedde omusibe n’anjamba nti, ‘Kuuma omusajja ono. Bw’anaabula ggw’onottibwa mu kifo kye, oba si kyo oteekwa okusasula kilo amakumi asatu mu nnya eza ffeeza.’

⁴⁰Omuddu wo bwe yali ng’atawaana erudda n’erudda, laba omusajja n’abula.” Kabaka wa Isirayiri n’amuddamu nti, “Ogwo musango gwo, era ogwesalidde.”

⁴¹Awo mutabani wa nnabbi n’ayanguwa, okuggya ekiremba ku maaso ge, kabaka wa Isirayiri n’amutegeera nga y’omu ku bannabbi.

⁴²N’agamba kabaka nti, “Bw’ati bw’ayogera MUKAMA nti, ‘Otadde omusajja gwe namaliridde okutta. Noolwekyo ggw’ojja okufa mu kifo kye, n’abantu bo bafe mu kifo ky’abantu be.’”

⁴³Kabaka wa Isirayiri n'alaga mu lubiri lwe e Samaliya ng'aswakidde era nga munyiivu.

1 Bassekabaka 21

Akabu Yeegomba Ennimiro ya Nabosi

¹Awo ebyo bwe byaggwa, ne wabaawo ensonga ekwata ku nnimiro ya Nabosi Omuyezuleeri ey'emizabbibu, eyali eriraanye olubiri lwa Akabu kabaka wa Samaliya.

²Awo Akabu n'agamba Nabosi nti, "Mpa ennimiro yo ey'emizabbibu nnimiremu enva, nga bw'eriraanye olubiri lwange. Mu kifo kyayo nzija kukuwaamu ennimiro ey'emizabbibu endala, oba bw'onoosiima, nnaakusasulamu omuwendo ogugigyamu."

³Nabosi n'amuddamu nti, "Kikafuuwe, nze okukuwa obusika bwa bajajjange."

⁴Awo Akabu n'addayo eka ng'annyogoze nnyo era nga munyiivu kubanga Nabosi Omuyezuleeri yamugamba nti, "Sijja kukuwa busika bwa bajajjange." N'agalamira ku kitanda kye nga yeesooza, n'agaana n'okulya.

⁵Naye Yezeberi mukazi we n'ayingira, n'amubuuza nti, "Lwaki onnyogoze nnyo bw'otyo n'okulya n'otalya?"

⁶N'amuddamu nti, "Kubanga njambye Nabosi Omuyezuleeri antunze ennimiro ye ey'emizabbibu, oba bw'anaasiima muwaanyisseemu ennimiro endala. Nayé agambye nti, 'Sijja kukuwa nnimiro yange ey'emizabbibu.'"

⁷Yezeberi mukazi we n'amugamba nti, "Bw'otyo bwe weeyisa nga kabaka wa Isirayiri? Golokoka olye! Ddamu amaanyi. Nzija kukufunira ennimiro ya Nabosi Omuyezuleeri ey'emizabbibu."

⁸Awo Yezeberi n'awandiika amabaluwa mu linnya lya Akabu, n'agassaako akabonero ke, era n'agaweereza eri abakadde n'abakungu abaabeeranga mu kibuga kya Nabosi.

⁹Mu bbaluwa ezo n'awandiika nti, "Mulangirire okusiiba, mutuuze Nabosi mu kifo abantu bona we bamulengerera,

¹⁰era mutuuze abasajja babiri okumwolekera bamuwaayirize nti akolimidde Katonda ne kabaka. Oluvannyuma mumutwale ebweru mumukube amayinja, mumutte."

¹¹Awo abakadde n'abakungu abaabeeranga mu kibuga ekyo ne bakola nga Yezeberi bwe yalagira mu mabaluwa ge yabawandiikira.

¹²Ne balangirira okusiiba era ne batuuza Nabosi mu kifo w'alabikira obulungi mu bantu.

¹³Abasajja babiri ne bajja ne batuula okumwolekera ne bamuwaayiriza mu maaso g'abantu nga bagamba nti, "Nabosi yakolimide Katonda ne kabaka." Awo abantu ne bamutwala ebweru w'ekibuga ne bamukuba amayinja ne bamutta.

¹⁴Ne batumira Yezeberi nti, "Nabosi akubiddwa amayinja era afudde."

¹⁵Amangwago Yezeberi bwe yawulira nti Nabosi yakubibwa amayinja era n'afa, n'agamba Akabu nti, "Golokoka otwale ennimiro ey'emizabbibu eya Nabosi Omuyezuleeri gye yagaana okukuguza, kubanga takyali mulamu, mufu."

¹⁶Akabu bwe yawulira nti Nabosi afudde n'agolokoka n'aserengeta okutwala ennimiro ya Nabosi Omuyezuleeri ey'emizabbibu.

¹⁷Awo ekigambo kya MUKAMA ne kijjira Eriya Omutisubi nti,

¹⁸"Serengeta eri Akabu kabaka wa Isirayiri afugira mu Samaliya, kubanga laba ali mu nnimiro ey'emizabbibu eya Nabosi era agenze okugitwala.

¹⁹Mugambe nti, 'Bw'ati bw'ayogera MUKAMA nti, Tosse omusajja n'okutwala n'otwala obugagga bwe?' Olyoke omugambe nti, 'Bw'ati bw'ayogera MUKAMA nti: Mu kifo embwa wezikombedde omusaayi gwa Nabosi, embwa mwezirikombera ogugwo.'

²⁰Akabu n'agamba Eriya nti, "Onsanze, ggwe omulabe wange!" N'amuddamu nti, "Nkusenze, kubanga weewaddeyo okukola ebibi mu maaso ga MUKAMA.

²¹MUKAMA agamba nti, 'Laba ndikuleetako akabi, ndimalawo ennyumba yo yonna, era ndiggya ku Akabu buli musajja yenna mu Isirayiri, omuddu n'atali muddu.

²²Ndifuula ennyumba yo okuba nga eya Yerobowaamu mutabani wa Nebati, n'eya Baasa mutabani wa Akiya, olw'okusunguwaza kwe wansunguwaza bwe wayonoonyesa Isirayiri.'

²³"Ate era n'eri Yezeberi MUKAMA bw'ati bw'agamba nti, 'Embwa ziririira Yezeberi okuliraana bbugwe w'e Yezuleeri.

²⁴Embwa ziririira omuntu yenna owa Akabu alifiira mu kibuga, ate ennyonyi zirye abo bona abalifiira ku ttale.'

²⁵Tewali musajja eyafaanana nga Akabu, eyeewaayo okukola ebibi mu maaso ga MUKAMA ng'awalirizibwa mukazi we Yezeberi.

²⁶Yakola eby'ekivve ng'agoberera ebifaananyi bya bakatonda, ng'Abamoli be yagoba mu maaso g'abantu ba Isirayiri bwe baakolanga.

²⁷Awo Akabu bwe yawulira ebigambo ebyo, n'ayuza engoye ze, n'ayambala ebibukutu n'okusiba n'asiiba. N'agalamira mu bibukutu, era n'atambula nga yeewombeese.

²⁸Awo ekigambo kya MUKAMA ne kijjira Eriya Omutisubi nti,

²⁹“Olabye Akabu bwe yeewombeese mu maaso gange? Olw'okubanga yeewombeese mu maaso gange, sirireeta kabi ako mu mirembe gye, naye ndikaleeta mu nnyumba ye mu mirembe gya mutabani we.”

1 Bassekabaka 22

Nnabbi Mikaaya Alabula Akabu

¹Ne wataba ntalo wakati wa Busuuli ne Isirayiri okumala emyaka esatu.

²Naye mu mwaka ogwokusatu Yekosafaati kabaka wa Yuda n'aserengeta okugenda okukyalira kabaka wa Isirayiri.

³Kabaka wa Isirayiri yali agambye abaami be nti, “Mumanyi nti Lamosugireyaadi kyaffe, naye ate nga tetulina kye tukola wo okukiggya ku kabaka wa Busuuli?”

⁴Mu kiseera ekyo n'abuuza Yekosafaati nti, “Onoogenda nange mu lutalo e Lamosugireyaadi?” Yekosafaati n'addamu kabaka wa Isirayiri nti, “Nze ndi nga bw'oli abantu bange ng'abantu bo, n'embalaasi zange ng'ezizo.”

⁵Naye Yekosafaati n'ayongerako nti, “Sooka weebuuze ku MUKAMA.”

⁶Awo kabaka wa Isirayiri n'akuŋŋanya bannabbi awamu nga bawera ng'ebikumi bina, n'ababuuza nti, “Njende ntabaale e Lamosugireyaadi oba ndekeyo?” Ne baddamu nti, “Genda kubanga Mukama alikigabula mu mukono gwa kabaka.”

⁷Naye Yekosafaati n'abuuza nti, “Wano tewaliwo nnabbi wa MUKAMA gwe tuyinza kwebuzaako?”

⁸Kabaka wa Isirayiri n'addamu Yekosafaati nti, “Wakyaliyo omusajja omu gwe tuyinza okwebuzaako eri MUKAMA erinnya lye ye Mikaaya mutabani wa Imula naye namukyawa kubanga tewali kirungi ky'alagula ku nze, wabula ebibi.”

⁹Awo kabaka wa Isirayiri n'alagira omu ku baami be nti, “Yanguwa mangu okuleeta Mikaaya mutabani wa Imula.”

¹⁰Awo Kabaka wa Isirayiri ne Yekosafaati kabaka wa Yuda nga bambadde ebyambalo byabwe eby'obwakabaka era nga batudde ku ntebe zaabwe ez'obwakabaka mu mulyango ogwa wankaaki w'ekibuga Samaliya, nga ne bannabbi bona balagulira awo we baali;

¹¹Zeddekiya mutabani wa Kenaana yali yeekoledde amayembe ag'ebiyuma, n'ayogera nti, “Bw'ati bw'ayogera MUKAMA nti, ‘Olisindikiriza Abasuuli ne gano okutuusa lwe balisaanyizibwawo.’”

¹²Bannabbi abalala bona nabo baalagula kye kimu, nga boogera nti, "Yambuka olumbe Lamosugireyaadi obe muwanguzi kubanga MUKAMA ajja kukigabula mu mukono gwa kabaka."

¹³Omubaka eyatumibwa okuleeta Mikaaya n'amugamba nti, "Laba ebiligambo bya bannabbi abalala biragula buwanguzi eri kabaka, kale ekigambo kyo nakyo kikkiriziganye nabyo, oyogere bulungi."

¹⁴Naye Mikaaya n'ayogera nti, "Nga MUKAMA bw'ali omulamu, nzija kwogera ekyo kyokka MUKAMA ky'anañjamba."

¹⁵Bwe yatuuka awali kabaka, kabaka n'amubuuza nti, "Mikaaya tulumbe Lamosugireyaadi, nantiki tulekeyo?" N'amuddamu nti, "Kirumbe obe muwanguzi kubanga MUKAMA anakigabula mu mukono gwa kabaka."

¹⁶Kabaka n'amubuuza nti, "Nnaakulayiza emirundi emeka okutegeeza amazima mu linnya lya MUKAMA?"

¹⁷Nnabbi n'addamu nti, "Nalaba Isirayiri yenna ng'esaasaanye ku nsozi, ng'endiga ezitalina musumba." MUKAMA n'ayogera nti, "Bano tebalina mukama waabwe, era buli omu ku bbo addeyo ewuwe mirembe."

¹⁸Awo kabaka wa Isirayiri n'agamba Yekosafaati nti, "Saakugambye nti, talina kirungi ky'andagulako wabula ekibi?"

¹⁹Mikaaya n'ayogera nti, "Noolwekyo wulira ekigambo kya MUKAMA nti: Nalaba MUKAMA ng'atudde ku ntebe ye ey'obwakabaka nga n'eggye lyonna ery'omu ggulu liyimiridde ku mukono gwe ogwa ddyo ne mukono gwe ogwa kkono.

²⁰MUKAMA n'ayogera nti, 'Ani anaasendasenda Akabu ayambuke okulumba Lamosugireyaadi afiire eyo?' Omu ku bo n'addamu bulala, n'omulala n'addamu bulala.

²¹Ku nkomerero ne wavaayo omwoyo ne guyimirira mu maaso ga MUKAMA ne gwogera nti, 'Nze nnaamusendasenda.'

²²"MUKAMA n'abuuza nti, 'Mu ngeri ki?' Omwoyo ne guddamu nti, 'Nzija kugenda nfuuke omwoyo ogw'obulimba mu mimwa gya bannabbi be bona.' MUKAMA n'addamu nti, 'Ojja kusobola okumusendasenda, genda okole bw'otyo.'

²³"Kale nno, MUKAMA atadde omwoyo omulimba mu mimwa gya buli nnabbi wo era MUKAMA amaliridde okukusaanyaawo."

²⁴Awo Zeddekiya mutabani wa Kenaana n'asembera n'akuba Mikaaya oluyi ku ttama, n'ayogera nti, "Omwovo wa MUKAMA yampiseeko atya okwogera nawe?"

²⁵Awo Mikaaya n'addamu nti, "Laba, ekyo onokimanya ku lunaku lw'oligenda okwekweka mu kisenge eky'omunda."

²⁶Awo kabaka wa Isirayiri n'alagira nti, "Mukwate Mikaaya, mumuzzeeyo ewa Amoni omukulu w'ekibuga, n'eri Yowaasi mutabani wa kabaka,

²⁷era mwogere nti, 'Bw'ati bw'ayogera kabaka nti: muteke omuntu ono mu kkomera, ate temumuwa ekintu kyonna okuggyako omugaati n'amazzi okutuusa lwe ndikomawo emirembe.'"

²⁸Mikaaya n'alangirira nti, "Bw'olikomawo emirembe, MUKAMA nga tayogeredde mu nze." Era n'ayongerako nti, "Mugenderere ebigambo byange, mmwe abantu mwenna."

Okufa Kwa Akabu e Lamosugireyaadi

²⁹Awo kabaka wa Isirayiri ne Yekosafaati kabaka wa Yuda ne bambuka e Lamosugireyaadi.

³⁰Kabaka wa Isirayiri n'agamba Yekosafaati nti, "Nzija kugenda mu lutalo nga nneefudde omuntu omulala, naye ggwe oyambale ebyambalo eby'obwakabaka." Awo kabaka wa Isirayiri ne yeefuula omuntu omulala n'agenda mu lutalo.

³¹Kabaka w'e Busuuli yali alagidde abaduumizi b'amagaali nti, "Temulwanagana na muntu yenna, kabe mutono oba mukulu, wabula kabaka wa Isirayiri yekka."

³²Awo abaduumizi b'amagaali bwe baalaba Yekosafaati, ne balowooza nti, "Ddala ono ye kabaka wa Isirayiri." Ne batanula okumulumba, naye Yekosafaati n'aleekaanira waggulu,

³³abaduumizi b'amagaali ne bategeera nti si ye kabaka wa Isirayiri ne balekeraawo okumugoba.

³⁴Awo omuntu omu n'amala galasa akasaale ke, ne kakwata kabaka wa Isirayiri ebyambalo bye eby'ebiyuma we bigattira, n'agamba omugoba w'eggaali lye nti, "Kyusa eggaali onzigye mu lutalo, kubanga nfumitiddwa."

³⁵Olutalo ne lweyongerera ddala nnyo ku lunaku olwo, era kabaka ne bamukwatirira mu gaali lye nga litunuulaganye n'Abasuuli. Omusaayi okuva mu kiwundu kye ne gukulukuta nnyo mu gaali, n'oluvannyuma n'afa.

³⁶Enjuba bwe yali ng'eneetera okugwa, ne waba ekirango ekyabuna mu ggye nti, "Buli muntu adde mu kibuga ky'ewaabwe, era buli muntu adde mu nsi y'ewaabwe!"

³⁷Awo kabaka n'afa n'aleetebwa e Samaliya, era n'aziikibwa eyo.

³⁸Ne booleza eggiali lye awaali ekidiba kya Samaliya, bamalaaya we baanaabiranga, embwa ne zikomba omusaayi gwe, ng'ekigambo kya MUKAMA bwe kyayogerwa.

³⁹Ebyafaayo ebirala eby'omulembe gwa Akabu, n'ebyo bye yakola, n'olubiri lwe yazimba n'alulongoosa n'amasanga, n'ebibuga bye yazimbako bbugwe, tebyawandiikibwa mu kitabo eky'ebiomumirembe gya bassekabaka ba Isirayiri?

⁴⁰Awo Akabu ne yeebakira wamu ne bajjajaabe, Akaziya mutabani we n'amusikira.

Yekosafaati Kabaka wa Yuda

⁴¹Awo Yekosafaati mutabani wa Asa n'atandika okufuga mu Yuda mu mwaka ogw'amakumi ana ogwa Akabu kabaka wa Isirayiri.

⁴²Yekosafaati yalina emyaka egypt'obukulu amakumi asatu mu etaano we yatandikira okufuga, era n'afugira mu Yerusaalemi okumala emyaka amakumi abiri mu etaano. Nnyina erinnya lye ye yali Azuba muwala wa Siruki.

⁴³N'atambulira mu ngeri za kitaawe Asa era n'atazivaamu, ng'akola ebirungi mu maaso ga MUKAMA, newaakubadde nga teyaggyawo bifo bigulumivu, abantu ne beeyongeranga okuweerayo ssaddaaka n'okwokya obubaane.

⁴⁴Yekosafaati n'atabagana ne kabaka wa Isirayiri.

⁴⁵Ebyafaayo ebirala eby'omulembe gwa Yekosafaati, ebintu bye yakola, n'amaanyi ge mu ntalo, tebyawandiikibwa mu kitabo eky'ebiomumirembe gya bassekabaka ba Yuda?

⁴⁶N'aggyirawo ddala abaalyanga ebisiyaga abaali basigaddewo mu nsi, oluvannyuma lw'omulembe gwa kitaawe Asa.

⁴⁷Awo mu biro ebyo ne wataba kabaka mu Edomu, omusigire wa kabaka n'afuga.

⁴⁸Yekosafaati yali azimbye ekibinja eky'ebiombo okugenda e Ofiri okukimangayo zaabu, naye ne bitasobola, kubanga byonna byabbira e Eziyonigeba.

⁴⁹Mu kiseera ekyo Akaziya mutabani wa Akabu yali agambye Yekosafaati nti, "Abasajja bange ka baseeyeeeye n'ababo," naye Yekosafaati n'atakyagala.

⁵⁰Awo Yekosafaati ne yeebakira wamu ne bajjajaabe era n'aziikibwa mu kibuga kya Dawudi jjajjaawe, Yekolaamu mutabani we n'amusikira.

Akaziya Kabaka wa Isirayiri

⁵¹Awo Akaziya mutabani wa Akabu n'alya obwakabaka kabaka bwa Isirayiri mu Samaliya mu mwaka ogw'ekkumi n'omusanvu ogwa Yekosafaati kabaka wa Yuda, era n'afuga Isirayiri okumala emyaka ebiri.

⁵²N'akola ebibi mu maaso ga MUKAMA, ne yeeyisa nga kitaawe bwe yeeyisanga, era nga ne nnyina bwe yakolanga, ate era nga Yerobowaamu mutabani wa Nebati, eyaleetera Isirayiri okwonoona bwe yakolanga.

⁵³Yaweereza era n'asinza Baali, n'asunguwaza MUKAMA Katonda wa Isirayiri, mu ngeri zonna nga kitaawe bwe yakola.

2 Bassekabaka

2 Bassekabaka 1

MUKAMA asalira Akaziya Omusango

¹ Awo Akabu ng'amaze okufa, ab'omu nsi ya Mowaabu ne bajeemera Abayisirayiri.

² Akaziya ng'ali mu Samaliya y'asimatuka n'ayita mu ddirisa ly'ekisenge kye ekya waggulu, n'agwa, n'alwala. Awo n'atuma ababaka eri Baaluzebubi bakatonda b'e Ekuloni, okubeebuzaako obanga obulwadde bwe buliwona.

³ Malayika wa MUKAMA n'ajja eri Eriya Omutisubi n'amugamba nti, "Golokoka, ogende osisinkane ababaka ba kabaka w'e Samaliya, obabuuze nti, 'Teri Katonda mu Isirayiri, kyemuvudde mugenda mwebuuza eri Baaluzebubi bakatonda b'e Ekuloni?'

⁴ Noolwekyo bw'ati bw'ayogera MUKAMA nti, toliwona bulwadde bwo, naye ogenda kufa." Eriya bwe yamala okwogera ebyo n'agenda.

⁵ Oluvannyuma lw'ebyo, ababaka kabaka be yatuma ne baddayo eri kabaka, n'ababuuza nti, "Kiki ekibakomezaawo amangu?"

⁶ Ne bamuddamu nti, "Waliwo omusajja eyatusisinkanye mu kkubo n'atugamba nti, 'Muddeyo eri kabaka mumugambe nti olw'okugenda eri Baaluzebubi bakatonda b'e Ekuloni okulagulwa, n'otogenda kwebuuza ku Katonda wa Isirayiri, togenda kuva ku kitanda ekyo era togenda kuwona bulwadde obwo wabula ogenda kufa.'"

⁷ N'ababuuza nti, "Omusajja oyo gwe musisinkanye abadde afaanana atya?"

⁸ Ne bamuddamu nti, "Abadde ayambadde ekyambalo kya bwoya, nga yeesibye n'olukoba lwa bwoya." Kabaka n'ayogera nti, "Oyo yandiba Eriya Omutisubi."

⁹ Awo kabaka n'atuma omukulu eyali akulira ekibinja ky'abasajja amakumi ataano n'abasajja be eri Eriya. Bwe yatuuka awaali Eriya, yamusanga atudde ku ntikko eya kasozi, n'amugamba nti, "Musajja wa Katonda, kabaka akwetaaga."

¹⁰ Eriya n'addamu omukulu w'ekibinja nti, "Obanga ndi musajja wa Katonda, omuliro guve mu ggulu gukwokye ggwe n'ekibinja kyo!" Awo omuliro ne guva mu ggulu ne gumwokya ye n'ekibinja kye.

¹¹ Kabaka bwe yawulira ebyo n'atuma omukulu omulala n'ekibinja kye eky'amakumi ataano eri Eriya. Omukulu oyo eyatumibwa n'agamba Eriya nti, "Ggwe omusajja wa Katonda, kabaka akuyita mangu." p

¹² Eriya n'amuddamu nti, "Obanga ndi musajja wa Katonda, kale omuliro guve mu ggulu gukwokye ggwe n'ekibinja kyo." Awo omuliro ne guva mu ggulu ne gumwokya ye n'ekibinja kye.

¹³ Naye kabaka teyakoma ku abo, n'amutumira omukulu owookusatu ow'ekibinja ekirala eky'amakumi ataano, n'agenda eri Eriya. Bwe yatuuka awaali Eriya n'afukamira mu maaso ge, n'amwegayirira ng'agamba nti, "Omusajja wa Katonda nkwegayiridde, onsasire, nneme okufa.

¹⁴ Laba, omuliro gwavudde mu ggulu ne gwokya abakulu bombi n'ebibinja byabwe, naye kaakano osaasire obulamu bwange."

¹⁵ Awo malayika wa MUKAMA n'agamba Eriya nti, "Serengeta naye, so tomutya." Awo Eriya n'asituka n'aserengeta n'omubaka wa kabaka eri kabaka.

¹⁶ Eriya n'agamba kabaka nti, "Bw'ati bw'ayogera MUKAMA nti, 'Nsonga ki eyakutwala eri Baaluzebubi bakatonda b'e Ekuloni okulagulwa, mu kifo ky'okulaga eri Katonda wa Isirayiri ne gw'oba weebuuzako?' Ky'oliva olema okuva ku kitanda ekyo kye weebaseeko, era ojja kufa."

¹⁷ N'afa, ng'ekigambo kya MUKAMA kye yatuma Eriya bwe kyali. Olwokubanga Akaziya teyalina mwana wabulenzi, Yekolaamu n'amusikira okuba kabaka, mu mwaka ogwokubiri ogwa Yekolaamu mutabani wa Yekosafaati eyali kabaka wa Yuda.

¹⁸ Ebyafaayo ebirala ebyabaawo mu mirembe gya Akaziya ne bye yakola, tebyawandiikibwa mu kitabo eky'ebiomumirembe gya bassekabaka ba Isirayiri?

2 Bassekabaka 2

Okutwalibwa kwa Eriya mu Ggulu

¹ Awo MUKAMA bwe yali ng'anaatera okutwala Eriya mu ggulu mu mbuyaga ey'amaanyi, nga Eriya ne Erisa bava e Girugaali,

² Eriya n'agamba Erisa nti, "Sigala wano, njende e Beseri MUKAMA gy'antumye." Naye Erisa n'amuddamu nti, "Mazima nga MUKAMA bw'ali omulamu, era nga nawe bw'oli omulamu, siireme kugenda naawe." Awo ne baserengeta bona e Beseri.

³ Ekibiina ekya bannabbi abaali e Beseri ne bagenda eri Erisa ne bamugamba nti, "Okimanyi nga MUKAMA anaatwala mukama wo olwa leero?" Erisa n'abaddamu nti, "Nkimanyi, naye temukyogerako."

⁴ Eriya n'addamu omulundi ogwokubiri n'agamba Erisa nti, "Sigala wano, njende e Yeriko MUKAMA gy'antumye." Naye Erisa n'amuddamu nti, "Mazima nga MUKAMA bw'ali omulamu, era nga nawe bw'oli omulamu, siireme kugenda naawe." Awo ne bagenda bona e Yeriko.

⁵ Awo ekibiina ekya bannabbi abaali e Yeriko ne batuukirira Erisa ne bamugamba nti, "Okimanyi nga MUKAMA anaatwala mukama wo olwa leero?" Erisa n'abaddamu nti, "Weewaawo nkimanyi, naye temukyogerako."

⁶ Eriya n'addamu nate n'amugamba nti, "Sigala wano, nserengete ku Yoludaani MUKAMA gy'antumye." Naye Erisa n'amuddamu nti, "Mazima nga MUKAMA bw'ali omulamu, era nga nawe bw'oli omulamu, siireme kugenda naawe." Awo ne batambula bombi.

⁷ Ne waba ekibiina kya bannabbi amakumi ataano abaali bayimiridde akabanga okuva Eriya ne Erisa we baali ku lubalama lw'omugga Yoludaani.

⁸ Awo Eriya n'addira omunagiro gwe n'aguzinga wamu n'akuba amazzi ne gaawulibwamu, agamu ne gadda ku luuyi olwa ddyo n'amalala ku luuyi olwa kkono, bombi ne bayita ku lukalu.

⁹ Awo bwe baamala okusomoka, Eriya n'abuuza Erisa nti, "Kiki ky'oyagala nkukolere nga sinnaba kukuggyibwako?" Erisa n'amuddamu nti, "Nkusaba, nsikire emigabo ebiri egy'Omwoyo akuliko."

¹⁰ N'amugamba nti, "Ky'osabye kigambo kizibu, naye bw'onondaba nga ntwalibwa, kale kinaaba nga bw'osabye, naye bw'otondabe tekiibe bwe kityo."

¹¹ Awo bwe baali batambula nga bwe banyumya bokka na bokka, ne walabika eggaali ey'omuliro n'embalaasi ez'omuliro ne zibaawula, era mu kiseera kye kimu Eriya n'atwalibwa mu ggulu mu mbuyaga ey'amaanyi.

¹² Awo Erisa bwe yalaba ekyo, n'ayogerera waggulu nti, "Kitange, Kitange, amagaali n'abeebagala embalaasi aba Isirayiri!" Erisa n'ataddamu kumulaba nate. N'addira engoye ze yali ayambadde, n'aziyuzaayuza.

¹³ Waaliwo omunagiro ogwali gusuulibbwa Eriya ng'atwalibwa mu ggulu, era ogwo Erisa gwe yalonda n'addayo ku mugga Yoludaani n'ayimirira ku lubalama lw'omugga.

¹⁴ N'addira omunagiro gwe yali alonze n'aguzinga n'akuba amazzi n'ayogera nti, "Kaakano MUKAMA, Katonda wa Eriya ali luuyi wa?" Bwe yakuba amazzi ne geeyawulamu, agamu ne gadda ku luuyi olwa ddyo n'amalala ku luuyi olwa kkono, n'asomoka.

¹⁵ Awo ekibiina ekya bannabbi abaali mu Yeriko ne bayogera nti, "Omwoyo wa Eriya ali ku Erisa." Ne bagenda okumusisinkana ne bamuvuunamira.

¹⁶ Ne bamugamba nti, "Laba, ffe abaddu bo tulina abasajja abazira amakumi ataano. Bagende banoonye mukama wo, osanga Omwoyo wa MUKAMA amututte n'amuteeka ku bumu ku busozi oba mu kiwonvu." Erisa n'abaddamu nti, "Temutawaana, era temubatuma."

¹⁷ Naye bwe baamuwaliriza, n'atendewalirwa, n'abagamba nti, "Kale, mubatume." Awo ne batuma abasajja amakumi ataano, ne banoonya okumala ennaku ssatu naye ne batamulaba.

¹⁸Bwe bakomawo gy'ali mu Yeriko, n'abagamba nti, "Saabalabudde obutagenda?"

Okutukuzibwa kwa Mazzi

¹⁹Awo abasajja ab'omu kibuga ne bagenda eri Erisa ne bamugamba nti, "Mukama waffe, ekibuga kino kiri mu kifo kirungi, nga nawe bw'olaba, naye amazzi gaamu mabi, era n'ensi si njimu."

²⁰N'abagamba nti, "Mundeetere ebbakuli empya nga mutaddemu omunnyo." Ne bagimuleetera.

²¹N'aserengeta ku nsulo ey'amazzi, n'ayiwamu omunnyo, n'ayogera nti, "Bw'ati bw'ayogera MUKAMA nti, 'Nnoongosezza amazzi gano era tegakyaddamu kuleeta kufa wadde okufuula ensi obutaba njimu.'"

²²Amazzi ne galongooka, ng'ekigambo kya MUKAMA kye yayogerera mu Erisa bwe kyalí, n'okutuusa ku lunaku lwa leero.

Abavubuka basekerera Erisa

²³Erisa bwe yava eyo n'akwata ekkubo erigenda e Beseri. Naye ng'ali mu kkubo, n'asisinkana abavubuka ab'omu kibuga ekyo ne bamusekerera nga bwe boogera nti, "Mulabe ow'ekiwalaata! Mulabe ow'ekiwalaata!"

²⁴N'akyuka n'abatunuulira, n'abakolimira mu linnya lya MUKAMA. Awo ebisolo ebinene bibiri eby'ekika eky'eddubu ne biva mu kibira ne bitaagulataagula abavubuka amakumi ana mu babiri ku bo.

²⁵Ne yeeyongerayo n'alaga ku Lusozi Kalumeeri, oluvannyuma n'addayo e Samaliya.

2 Bassekabaka 3

Okujeema kwa Mowaabu

¹Mu mwaka ogw'ekkumi n'omunaana ogw'obwakabaka bwa Yekosafaati kabaka wa Yuda, Yekolaamu mutabani wa Akabu n'alya obwakabaka bwa Isirayiri e Samaliya, era n'afugira emyaka kkumi n'ebiri.

²Yakola ebibi mu maaso ga MUKAMA, newaakubadde nga teyatuuuka ku bibi bya kitaawe ne nnyina. Yazikiriza n'empagi eya Baali kitaawe gye yali asimbye.

³Newaakubadde ng'ekyo yakikola, teyalekayo kukola ebibi ng'ebyo Yerobowaamu mutabani wa Nebati bye yakola, n'ayonoonyesa Isirayiri.

⁴Mesa Kabaka wa Mowaabu yalundanga endiga, era yalina omutemwa ogw'okuwangayo abaana b'endiga emitwalo kkumi, n'ebyoya by'endiga ennume emitwalo kkumi eri Akabu.

⁵Naye Akabu olwafa, kabaka wa Mowaabu n'atandika okujeemera kabaka wa Isirayiri.

⁶Awo mu biro ebyo kabaka Yekolaamu n'asitula okuva e Samaliya, n'akunga Isirayiri yenna okugenda naye.

⁷N'atumira ne Yekosafaati kabaka wa Yuda nti, "Kabaka wa Mowaabu anjeemedde, onooyinza okumbeera tumulwanyise?" Yekosafaati n'amuddamu nti, "Nnaagenda naawe, kubanga nze ndi nga bw'oli, era abantu bange be bantu bo, n'embalaasi zange ze zizo."

⁸Yekosafaati n'amubuuza nti, "Ye, tunaalumba kuva ku luuyi ki?" Yekolaamu n'amuddamu nti, "Tunaayita mu ddungu erya Edomu."

⁹Awo kabaka wa Isirayiri, n'asitukira wamu ne kabaka wa Yuda ne kabaka wa Edomu ne bagenda mu lutalo. Ne batambula olugendo lwa nnaku musanvu, n'oluvannyuma ne beesanga ng'eggye amazzi galiweddeko, nga n'ebisolo byabwe tebirina wadde ettundo.

¹⁰Kabaka wa Isirayiri ne yeekanga nnyo. N'ayogera nti, "Zitusanze! Ffenna abasatu, MUKAMA atuwaddeyo mu mukono gwa Mowaabu?"

¹¹Kyokka Yekosafaati n'abuuza nti, "Tewali wano nnabbi wa MUKAMA tumwebuuzeeko?" Awo omu ku bakungu ba kabaka wa Isirayiri n'amuddamu nti, "Wano waliwo Erisa mutabani wa Safati. Ye yali omuweereza wa Eriya ow'oku mwanjo."

¹²Yekosafaati n'ayogera nti, "Alina ekigambo okuva eri MUKAMA." Awo Yekosafaati kabaka wa Yuda, awamu ne kabaka wa Isirayiri, ne kabaka wa Edomu ne baserengeta gy'ali.

¹³Awo Erisa n'agamba kabaka wa Isirayiri nti, "Onnanga ki? Genda eri bannabbi ba kitaawo n'aba maama wo." Kabaka wa Isirayiri n'amuddamu nti, "Nedda sijja kugendayo; kubanga kirabika nga MUKAMA atukuŋŋanyaiza ffensatule, okutuwaayo mu mukono gwa Mowaabu."

¹⁴Erisa n'ayogera nti, "Nga MUKAMA Katonda Ayinzabyonna gwe mpeereza bw'ali omulamu, singa nnali siwa Yekosafaati kabaka wa Yuda kitibwa, sandikukubyeko munye ya liiso wadde okukusaako omwoyo.

¹⁵Naye kaakano, mundeetere omukubi w'ennanga." Omukubi w'ennanga bwe yali ng'akyakuba ennanga, amaanyi ga MUKAMA ne gakka ku Erisa,

¹⁶n'ayogera nti, "Bw'ati bw'ayogera MUKAMA nti, 'Musime ensalosalu mu kiwonvu kino.'

¹⁷MUKAMA agamba nti, 'Temuulabe mbuyaga wadde enkuba, naye ekiwonvu kino kijja kujjula amazzi, era mmwe munaanywa, n'ente zammwe zinaanywa, n'ebisolo byammwe ebirala nabyo binywe.

¹⁸Eyo nsonga nnyangu mu maaso ga MUKAMA, era n'Abamowaabu mujja kubawangula.

¹⁹Mulizikiriza buli kibuga ekyetooloddwa bbugwe na buli kibuga ekikulu, era mulitema buli muti omulungi, ne muziyiza n'enzizi okuleeta amazzi, era ne mwonoona buli nnimiro nga mugijuza amayinja.””

²⁰Awo obudde bwe bwakya, mu kiseera eky'okuweerayo ssaddaaka, amazzi ne gakulukuta nga gava ku luuyi olwa Edomu, ensi n'ejjula amazzi.

²¹Abamowaabu bonne bwe baawulira nga bakabaka babalumbye okulwana nabo, buli musajja, omuto n'omukulu abaali basobola okwambala ebyokulwanyisa, ne bayitibwa okugenda okutabaala.

²²Enkeera enjuba bwe yayaka ku mazzi, Abamowaabu ne balowooza nti amazzi mamyufu kubanga gaabalabikira ng'omusaayi.

²³Ne bagamba nti, “Guno musaayi! Kirabika nga bakabaka baalwanye bokka ne bokka, ne battijjana, kale Mowaabu mugwe ku munyago.”

²⁴Naye Abamowaabu bwe baali nga baakayingira mu nkambi y'Abayisirayiri, amangwago Abayisirayiri ne batandika okulwana nabo, oktuusa Abamowaabu lwe badduka.

²⁵Ne bamenyaamenya ebibuga by'Abamowaabu, ne bakanya amayinja ku buli kibanja ekirungi okutuusa lwe gaakolangako entuumo; ne baziba enzizi zonna ez'amazzi, ne batema na buli muti omulungi. Kirukalesesi kye kifo kyokka ekyali kitalumbiddwa, naye oluvannyuma abasajja ab'envuumuulo ne bakirumba.

²⁶Awo kabaka wa Mowaabu bwe yalaba ng'olutalo lumugendedde bubi, n'atwala abasajja ab'ebitala lusanvu, ne bagenda naye okulumba kabaka wa Edomu, kyokka ne balemelerwa.

²⁷N'addirra mutabani we omuggulanda, eyali ateekwa okumusikira, n'amuweerayo ku bbugwe w'ekibuga ng'ekiweebwayo ekyokebwa. Abayisirayiri ne beesisiwala nnyo ne beetamwa, era ne baddayo mu nsi yaabwe.

2 Bassekabaka 4

Nnamwandu n'Akasumbi ak'Amafuta

¹Awo olwatuuka ne wabaawo nnamwandu, eyali afumbiddwa omu ku abo abaali mu kibiina kya bannabbi, n'agenda eri Erisa ng'akaaba n'amugamba nti, “Omuddu wo, baze yafa, era omanyi nga omuddu wo yatyanga MUKAMA. Naye kaakano eyali amubanja azze, ng'ayagala okutwala batabani bange okubafuula abaddu be.”

²Erisa n'amuddamu nti, “Oyagala nkuyambe ntya? Ntegeeza, olini ki mu nnyumba?” N'amugamba nti, “Omuweereza wo ky'alinawo kyokka mu nnyumba twe tufuta otutono ennyo.”

³Erisa n'amugamba nti, "Genda mu baliraanwa bo bona obeeyazikeko ebintu ebyereere, nga bingi ddala.

⁴Oyingire mu nnyumba yo weggaliremu ggwe ne batabani bo, ottululire amafuta mu bintu ebyo byonna, ng'ekijjula ky'ossa wa bbali."

⁵Bwe yava waali n'addayo eka ne yeggalira mu nnyumba ye n'abaana be. Ne bamuleetera ebita nga ye bw'attulula.

⁶Ebintu byonna ebyali awo bwe byajjula, n'agamba omu ku batabani be nti, "Ndeetera ekintu ekirala." Naye n'amuddamu nti, "Biweddeyo." Awo amafuta ne gakoma.

⁷Amangwago nnamwandu n'addayo ew'omusajja wa Katonda. Omusajja wa Katonda n'amugamba nti, "Genda otunde amafuta ago, osasule amabanja go, ebinaafikkawo bikuliisenga ggwe ne batabani bo."

Mutabani w'Omusunammu Azuukizibwa

⁸Awo olwatuuka Erisa n'agenda e Sunemu. Mu Sunemu mwalimu omukazi nnaggagga, eyamwegayirira alye ku mmere ey'omu nnyumba ye. Awo olwatuuka, buli lwe yayitangawo, n'akyamira eyo okulya ku mmere.

⁹Omukazi n'agamba bba nti, "Laba kimbikkuliddwa nti oyo musajja wa Katonda, atera okuyitira wano.

¹⁰Kale nno katumutegekere ekisenge waggulu, tumuteekereyo ekitanda n'emmeeza, n'entebe, n'ettabaaza by'anaakozesanga ng'azze okutukyalira."

¹¹Lumu, Erisa n'akyalayo, n'agenda mu kisenge kye, n'awummulirako eyo.

¹²N'agamba omuweereza we Gekazi nti, "Yita Omusunammu oyo." N'amuyita, n'ajja n'ayimirira mu maaso ge.

¹³Erisa n'agamba Gekazi nti, "Mugambe nti, 'Otulabiridde bulungi nnyo. Kaakano kiki kyewandyagadde kikukolerwe? Wandyagadde tukwogerere eri Kabaka oba ew'omuduumizi w'eggye ku nsonga yonna?'" N'amuddamu nti, "Mbeera mu bantu bange."

¹⁴Erisa n'abuuza Gekazi nti, "Kiki ekiba kimukolerwa?" Gekazi n'addamu nti, "Laba talina mwana, ate ng'akaddiye."

¹⁵Erisa n'amugamba nti, "Muyite." Bwe yamuyita, n'ajja n'ayimirira mu mulyango.

¹⁶Erisa n'amugamba nti, "Omwaka ogujja, mu biro ng'ebya kaakano oliwambaatira omwana owoobulenzi." Omukyala n'amuddamu nti, "Nedda mukama wange, tolimba muweereza wo, ayi omusajja wa Katonda."

¹⁷Naye oluvannyuma omukazi n'aba olubuto, era omwaka ogwaddirira mu biro bye bimu, n'azaala omwana wabulenzi, nga Erisa bwe yali amugambye.

¹⁸ Omwana n'akula, naye olunaku lumu n'addukira ewa kitaawe eyali mu nnimiro n'abakunguzi.

¹⁹ N'amutegeeza nti, "Omutwe gunnuma, omutwe gunnuma!" Kitaawe n'agamba omu ku baddu be nti, "Mutwalire maama we."

²⁰ Awo omuddu n'amusitula n'amutwala eri nnyina, omwana n'atuula ku mubiri gwa nnyina okutuusa essaawa ey'omu ttuntu n'olvannyuma n'afa.

²¹ Nnyina n'asitula omulambo gwe, n'agutwala waggulu n'aguteeka ku kitanda eky'omusajja wa Katonda, n'afuluma, n'aggalawo oluggi.

²² N'atumira bba ng'agamba nti, "Mpayo omuddu omu n'endogoyi emu ɲjende mangu ew'omusajja wa Katonda, nkomewo."

²³ N'amubuuza nti, "Kiki ekikutwala gy'ali leero? Si lunaku lwa mwezi ogwakaboneka wadde olwa Ssabiiti." Omukazi n'amuddamu nti, "Teweeraliikirira, kiri bulungi."

²⁴ Ne yeebagala endogoyi, n'agamba omuddu we nti, "Ggwe kulemberamu, totta ku bigere wabula nga nkugambye."

²⁵ Ne basitula, n'agenda eri omusajja wa Katonda ku Lusozi Kalumeeri. Omusajja wa Katonda bwe yamuleengera ng'akyali walako, n'agamba omuddu we Gekazi nti, "Laba, Omusunammu wuuli!"

²⁶ Dduka omusisinkane omubuuze nti, 'Oli bulungi ne balo ali bulungi? Ate omwana?' Omukazi n'amuddamu nti, "Kiri bulungi."

²⁷ Bwe yatuuka okumpi n'olusozi awaali omusajja wa Katonda, n'agwa wansi ne yeenyweza ku bigere by'omusajja wa Katonda. Amangwago Gekazi n'ajja ng'ayagala okumugobawo, naye omusajja wa Katonda n'amugamba nti, "Muleke! Kubanga ali mu nnaku nnyingi nnyo, ate nga MUKAMA tannambikkulira nsonga, wadde okuginteggeza."

²⁸ Omukazi n'alyoka ayogerera mu ddoboozi ery'omwanguka nti, "Nakusaba omwana, mukama wange? Saakugamba obutansuubiza ekisukkiridde?"

²⁹ Erisa n'agamba Gekazi nti, "Weesibe ekimyu, okwate omuggo gwange otambule mangu nnyo nga bw'osobola. Bw'onoosisinkana omuntu yenna mu kkubo tomulamusa, ate bw'akulamusa tomwanukula. Ddira omuggo gwange ogugalamize ku kyenyi ky'omwana."

³⁰ Naye nnyina w'omwana n'agamba nti, "Nga MUKAMA bw'ali omulamu, era nga naawe bw'oli omulamu, sijja kukuleka mabega." Erisa n'asituka n'amugoberera.

³¹ Gekazi ye n'abakulemberamu, n'agenda n'ateeka omuggo ku kyenyi ky'omulenzi, naye ne wataba kanyego newaakubadde okuddamu. Amangwago Gekazi n'addayo n'asisinkana Erisa, n'amutegeeza nti, "Omwana tagolokose."

32 Awo Erisa n'atuuka ku nnyumba, n'agenda butereevu mu kisenge gye yasanga omulambo gw'omwana nga gugalamiziddwa ku kitanda kye.

33 N'ayingira ekisenge, ne yeggalirayo, n'atandika okusaba MUKAMA.

34 N'alinnya waggulu ku kitanda n'agalamira ku mulambo, omumwa ku mumwa, amaaso ku maaso, n'emikono ku mikono eby'omulambo. Mu kiseera ekyo ng'akyagugalamiddeko ne gutandika okubuguumirira.

35 Erisa n'ayimuka, n'atambulatambula mu kisenge, n'oluvannyuma n'addamu n'agalamira ku mulambo. Omulenzi n'ayasimula emirundi musanvu, omulenzi n'azibula amaaso ge.

36 Awo Erisa n'ayita Gekazi n'amugamba nti, "Yita Omusunammu oyo." N'amuyita. Omusunammu bwe yajja n'amugamba nti, "Situla omwana wo."

37 Omukazi n'ayingira, n'avuunama ku bigere bya Erisa, n'asitula omwana we n'afuluma.

Erisa n'Enva Ezirimu Obutwa

38 Oluvannyuma, Erisa ng'azeeyo e Girugaali, ate nga mu kiseera kye kimu enjala egudde mu nsi, ekibiina kya bannabbi ne bakuŋjaanira ewuwe. N'agamba omuweereza we nti, "Abaana ba bannabbi bafumbireyo enva mu ntamu ennene."

39 Omu ku bo n'alaga mu nnimiro n'anoga amaboga, n'alaba n'omuzabbibu ogw'omu nsiko, n'anoga ku bibala byagwo ebiwera, n'assa mu lugoye lwe. N'addayo n'abisalirasalira mu ntamu ey'enva. Teyamanya nga bye yanoga birimu akabi.

40 Buli muntu ne bamusenera ku nva; naye bwe baaziryako, ne bayogerera waggulu nti, "Omusajja wa Katonda mu ntamu mulimu okufa." Ne batazirya.

41 Erisa n'agamba nti, "Mundeeterayo obuwunga." Ne babumuleetera n'abuteeka mu ntamu y'enva, n'abagamba nti, "Mugabule abantu balye." Ne wataba kabi mu ntamu y'enva.

Erisa Agabula Abantu Ekikumi

42 Waaliwo omusajja eyava e Baalusalisa, n'aleetera omusajja wa Katonda emigaati egya sayiri kumi n'ebiri nga mmere ey'okubibala ebibereberye, ate era n'amuleetera n'ebirimba eby'enjaano embisi. Erisa n'agamba omuweereza we nti, "Bigabire abantu babirye."

43 Omuweereza we n'amuddamu nti, "Bino mbigabula ntya abantu ekikumi?"

44 Naye Erisa n'amuddamu nti, "Bigabire abantu babirye, kubanga bw'ati bw'ayogera MUKAMA nti, 'Banaalya ne bibalemeranawo.'" N'abibagabula, ne balya, ne bibalemeranawo, ng'ekigambo kya MUKAMA bwe kyali.

2 Bassekabaka 5

Naamani Awonyezebwa Ebigenge

¹ Awo waaliwo omusajja erinnya lye nga ye Naamani eyali omuduumizi w'eggye lya kabaka w'e Busuuli, nga musajja wa maanyi mu maaso ga mukama we, era ng'ayagalibwa nnyo, kubanga MUKAMA yali awadde Busuuli obuwanguzi ku lulwe. Yali muserikale muzira ddala; naye nga mugenge.

² Awo mu biro ebyo Abasuuli ne balumba Isirayiri, ne bawamba omuwala omuto okuva mu Isirayiri, n'aweerezanga mukazi wa Naamani.

³ Omuwala n'agamba mugole we nti, "Singa mukama wange Naamani agenda n'alaba nnabbi ali mu Samaliya, nnabbi oyo yandiyinzizza okumuwonya ebigenge bye."

⁴ Awo Naamani n'agenda n'ategeeza mukama we ebigambo by'omuwala eyava mu Isirayiri.

⁵ Kabaka wa Busuuli n'amuddamu nti, "Genda kaakano, era ogende n'ebbaluwa gye nnaawandiikira kabaka wa Isirayiri." Awo Naamani n'asitula, n'atwala kilo bisatu mu ana eza ffeeza, ne kilo nsanvu eza zaabu, n'ebika by'engoye eby'enjawulo kkumi.

⁶ Era n'atwalira kabaka wa Isirayiri ebbaluwa, ng'egamba nti, "Nkuweerezza ebbaluwa eno n'omuweereza wange Naamani omuwonye ebigenge bye."

⁷ Kabaka wa Isirayiri olwasoma ebbaluwa, n'ayuza ebyambalo bye, n'ayogera nti, "Ndi Katonda, atta era awonya, omusajja ono alyoke ampeereze omusajja we mmuwonye ebigenge bye? Mulaba bw'ansosonkerezaako oluyombo?"

⁸ Erisa omusajja wa Katonda bwe yawulira nti kabaka wa Isirayiri ayuzizza ebyambalo bye, n'amutumira ng'agamba nti, "Lwaki oyuzizza ebyambalo byo? Nsindikira omusajja, alyoke ategeere nga mu Isirayiri mulimu nnabbi."

⁹ Awo Naamani n'asitula n'embalaasi ze n'amagaali ge n'ayimirira ku luggi lw'ennyumba ya Erisa.

¹⁰ Erisa n'atuma omubaka okumugamba nti, "Genda, onaabe mu Yoludaani emirundi musanvu, onoowonyezebwa, omubiri gwo ne gudda buto."

¹¹ Naye Naamani n'anyiiga, n'agenda nga yeemulugunya nti, "Ndowoozezza nti anaavaayo n'ajja, n'ayimirira n'akoowoola erinnya lya MUKAMA Katonda we, n'awuba omukono gwe ku bitundu ebirina ebigenge, n'amponya.

¹² Abana ne Faafa, emigga gy'e Damasiko tegisinga amazzi gonna ag'omu Isirayiri? Lwaki sinaabira mu gyo ne mponyezebw?" N'akyuka n'agenda ng'ajjudde obusungu bungi.

¹³ Naye abaddu ba Naamani ne bamusemberera, ne bamugamba nti, "Kitaffe, singa nnabbi yakulagidde okukola ekyobuzira, tewandikikoze? Lwaki kikukaluubiridde bw'akugambye nti, 'Nnaaba obe mulongoofu?'"

¹⁴ N'aserengeta n'agenda ne yebbika mu Yoludaani emirundi musanvu, ng'omusajja wa Katonda bwe yamulagira, n'aba mulongoofu, omubiri gwe ne guba ng'ogw'omwana omuto.

Erisa Agaana Ekirabo ky'Aweereddwa

¹⁵ Awo Naamani n'ekibinja kye ne baddayo eri omusajja wa Katonda. N'agenda n'ayimirira mu maaso ge, n'ayogera nti, "Kaakano ntegeeredde ddala nga teri Katonda mu nsi endala zonna wabula mu Isirayiri. Noolwekyo kkiriza ekirabo okuva eri omuddu wo."

¹⁶ Nnabbi n'amuddamu nti, "Mazima ddala, nga MUKAMA gwe mpeereza bw'ali omulamu, siitwale kintu na kimu." Naamani n'agezaako okumuwaliriza, naye ye n'agaana.

¹⁷ Naamani n'amugamba nti, "Bwe kitaabe bwe kityo, nkwegayiridde omuddu wo aweebwe ettaka eriyinza okusitulibwa ennyumbu bbiri, kubanga omuddu wo taliddayo nate okuwaayo ebiweebwayo ebyokebwa wadde ssaddaaka eri katonda omulala yenna wabula eri MUKAMA.

¹⁸ Era ne mu nsonga eno MUKAMA asaasire omuddu wo; mukama wange bw'anayingira mu ssabo lya Limoni okusinza, ne yeesigama omukono gwange, ne nvuunamira eyo mu ssabo lya Limoni, MUKAMA asonyiwe omuddu we olw'ensonga eyo."

¹⁹ Erisa n'amuddamu nti, "Genda mirembe."

Omululu gwa Gekazi n'Ekiponerezo kye

Naye Naamani bwe yali yakagendako ebbanga ttono,

²⁰ Gekazi omuweereza wa Erisa omusajja wa Katonda, n'alowooza mu mutima gwe nti, "Laba mukama wange bw'asaasidde Naamani ono Omusuuli, n'atakkiriza kirabo kimuweerebbwa. Mazima ddala, nga MUKAMA bw'ali omulamu nzija kumugoberera, mbeeko kye muggyako."

²¹ Amangwago, Gekazi n'agoberera Naamani. Naamani bwe yamulengera ng'ajja adduka, n'ava mu gaali lye okumusisinkana, n'amubuuza nti, "Byonna biri bulungi?"

²² N'amuddamu nti, "Byonna biri bulungi, naye mukama wange antumye okukutegeeza nti, 'Wabaddewo bannabbi abavubuka babiri abazze gy'ali okuva mu nsi ey'ensozi eya Efulayimu, era akusabye obaweko kilo amakumi asatu mu nnya eza ffeeza n'ebika by'engoye bya mirundi ebiri.'"

²³ Naamani n'amugamba nti, "Tewali kikugaana kutwala kilo nkaaga munaana." N'awaliriza Gekazi, n'amusibirako kilo bbiri eza ffeeza mu nsawo bbiri, n'ebika

by'engoye bya mirundi ebiri, Naamani n'abitikka abaddu be babiri, abaabyetikka nga bakulembeddemu Gekazi.

²⁴Gekazi bwe yatuuka ku lusozi, n'abibaggyako, n'abiteeka mu nnyumba ye, n'abasindika bagende.

²⁵N'ayingira n'ayimirira mu maaso ga Erisa mukama we. Erisa n'amubuuza nti, "Ova wa Gekazi?" Gekazi n'addamu nti, "Omuddu wo taliiko gy'agenze."

²⁶Naye Erisa n'amugamba nti, "Ssaagenze naawe mu mwoyo, omusajja bwe yavudde mu ggaali lye okukusisinkana? Kino ky'ekiseera eky'okutwala ensimbi, oba engoye, oba ennimiro ez'emizeeyituuni, oba ez'emizabbibu, oba endiga, oba ente, oba abaddu, oba abawereza abawala?

²⁷Noolwekyo ebigenge bya Naamani binaakuberangako gwe ne bazzukulu bo emirembe gyonna." Awo Gekazi n'ava mu maaso ga Erisa nga mugenge, atukula ng'omuzira.

2 Bassekabaka 6

Omutwe gw'Embazzi ogwali gubuze guzuulibwa

¹Awo ekibiina kya bannabbi ne bagamba Erisa nti, "Laba, ekifo we tukuŋŋaanira wafunda nnyo.

²Leka tulage ku lubalama lwa Yoludaani, buli omu ku ffe atemeyo omuti gumu, twezimbire ekifo ekigazi mwe tuyinza okubeera." N'abagamba nti, "Mugende."

³Awo omu ku bo n'amubuuza nti, "Toogende n'abaddu bo?" N'addamu nti, "Nzija kugenda nammwe."

⁴N'agenda nabo. Ne baserengeta ne balaga ku Yoludaani, ne batandika okutema emitii.

⁵Naye omu ku bo bwe yali ng'atema omuti, omutwe gw'embazzi ye ne gusowokamu ne gugwa mu mazzi, n'ayogerera waggulu nti, "Ayi mukama wange, nagyeyazise bweyazisi!"

⁶Awo omusajja wa Katonda n'amubuuza nti, "Yagudde wa?" Bwe yamulaga ekifo, Erisa n'atema akati, n'akakanyuga mu kifo ekyo, ekyuma ne kiva wansi ne kiseeyeyea kungulu ku mazzi.

⁷Erisa n'amugamba nti, "Giggyeemu." Omusajja n'agiggyamu.

Erisa Aziba Amaaso g'Abasuuli

⁸Awo olwatuuka kabaka wa Busuuli yali atabadde Isirayiri, ne yeebuza ku baserikale be ng'agamba nti, "Kifo ki mwe ndikuba olusiisira lwange?"

⁹Naye mu kiseera kye kimu omusajja wa Katonda n'aweereza kabaka wa Isirayiri obubaka nti, "Weegendereze obutayita mu kifo gundi, kubanga Abasuuli bajja kubeerayo."

¹⁰Awo kabaka wa Isirayiri n'atuma bakebere mu kifo ekyo omusajja wa Katonda kye yayogerako. Era bulijjo Erisa yamulabulanga, kabaka n'awona si mulundi gumu so si ebiri.

¹¹Ekyo kyanyiiza nnyo kabaka wa Busuuli, era n'ayita abaserikale be, n'ababuuza nti, "Muntegeeze, ani mu ffe ali ku ludda lwa kabaka wa Isirayiri?"

¹²Omu ku bo n'amuddamu nti, "Tewali n'omu ku ffe mukama wange kabaka, naye Erisa nnabbi ali mu Isirayiri, y'ategeeza kabaka wa Isirayiri, ebigambo by'oyogerera mu kisenge kyo."

¹³Kabaka n'alagira nti, "Mugende mulabe w'ali, ndyoke ntume abasajja bamukwate." Ne bakomyawo obubaka nti, "Ali mu Dosani."

¹⁴Amangwago n'asindika embalaasi, n'amagaali, n'eggye ery'amaanyi, ne bajja mu kiro ne bazingiza ekibuga.

¹⁵Omeweereza ow'omusajja wa Katonda bwe yazuukuka ku makya n'afuluma ebweru, laba, eggye eririna embalaasi, n'amagaali nga lyetoolodde ekibuga. Omeweereza n'ayogerera waggulu nti, "Ayi mukama wange tunaakola tutya?"

¹⁶Nnabbi n'addamu nti, "Totya kubanga abali naffe bangi okusinga abali nabo."

¹⁷Awo Erisa n'asaba ng'agamba nti, "Ayi MUKAMA, zibula amaaso ge asobole okulaba." Amangwago MUKAMA n'azibula amaaso ag'omuweereza, laba ng'ensozi zижудде embalaasi n'amagaali ag'omuliro nga geetoolodde Erisa.

¹⁸Abalabe bwe baaserengeta okulumba Erisa, n'asaba MUKAMA, n'ayogera nti, "Nkwegayiridde, ozibe amaaso g'abantu bano." N'aziba amaaso gaabwe nga Erisa bwe yamusaba.

¹⁹Erisa n'abagamba nti, "Lino si lye kkubo, era kino si kye kibuga. Mungoberere, mbatwale eri omusajja gwe munooonya." N'abakulemberamu n'abatwala e Samaliya.

²⁰Olwayingira mu kibuga, n'asaba MUKAMA nti, "Zibula amaaso g'abasajja bano, balabe." MUKAMA n'azibula amaaso gaabwe, ne batunula, laba nga bali mu Samaliya wakati.

²¹Awo kabaka wa Isirayiri bwe yabalaba, n'abuuza Erisa nti, "Kitange, mbatte? Mbatte?"

²²N'amuddamu nti, "Tobatta. Oyinza okutta abo b'owambye n'ekitala kyo, n'omutego gw'akasaale? Bategekere emmere n'amazzi, balye n'okunywa banywe, n'oluvannyuma obasindike baddeyo eri mukama waabwe."

²³N'abateekerateekera embaga nnene, era bwe baamala okulya n'okunywa, n'abasindika ne baddayo eri mukama waabwe. Abasuuli okwo kwe baakoma okulumba ensi ya Isirayiri.

Enjala egwa mu Kibuga ekizingize, Samaliya

²⁴Bwe waayitawoko ebbanga, Benikadadi kabaka w'e Busuuli, n'akuinjaanya eggye lye lyonna, n'alumba n'azingiza Samaliya.

²⁵Ne waba enjala nnyingi nnyo mu kibuga olw'okuzingiza okwo, omutwe gw'endogoyi ne gutundibwanga kilo emu eya ffeeza, n'ekimu ekyokuna eky'ekibya eky'obusa bw'enjiibwa ne kitundibwanga gulaamu ataano mu ttaano eza ffeeza.

²⁶Awo kabaka wa Isirayiri yali ayita okumpi ne bbugwe, omukazi omu n'ayogerera mu ddoboozi ery'omwanguka ng'agamba nti, "Nnyamba mukama wange kabaka!"

²⁷Kabaka n'amuddamu nti, "MUKAMA bw'ataakuyambe, nze nnaakuyamba ntya? Obuyambi nnaabuggy mu gguuliro oba mu ssogolero?"

²⁸Era kwe ku mubuuza nti, "Mutawaana ki?" Omukazi n'amuddamu nti, "Omukazi ono gw'olaba yateesessa nti, 'Waayo omwana wo owoobulenzi tumulye leero, enkyo tulye owange.'

²⁹Ne nzikiriza, ne tufumba owange ne tumulya. Enkeera ne mugamba nti, 'Waayo omwana wo owoobulenzi tumulye,' naye amukwese."

³⁰Kabaka bwe yawulira ebigambo by'omukazi oyo, n'ayuza ebyambalo bye. Bwe yali ng'atambula ku bbugwe, abantu ne bamulengera, laba ng'ayambadde ebibukutu wansi w'ebiyambalo bye.

³¹N'ayogera nti, "Katonda ankole bw'atyo n'okusingawo, omutwe gwa Erisa mutabani wa Safati bwe gunaabeera ku bibegabega bye leero!"

³²Mu kiseera kye kimu ekyo, Erisa yali atudde mu nnyumba ye nga n'abakadde batudde wamu naye, kabaka n'atuma omubaka okumukulemberamu, naye omubaka oyo bwe yali tannatuuka, Erisa n'agamba abakadde nti, "Mulaba omutemu oyo bw'atemye omuntu okuntemako omutwe? Laba, omubaka ajja, muggaleewo oluggi mulunyweze so temumukkiriza kuyingira. Ebigere bya mukama we tebiri mabega we, tamuvaako mabega?"

³³Awo Erisa bwe yali ng'akyayogera nabo, omubaka n'atuuka, n'ayogera nti, "Akabi kano kavudde eri MUKAMA. Lwaki nnindirira MUKAMA nate?"

2 Bassekabaka 7

¹Naye Erisa n'agamba nti, "Muwulire ekigambo kya MUKAMA, kubanga bw'atyo bw'ayogera MUKAMA nti, Jjo obudde nga buno ekigero ky'obutta obulungi ekyenkana lita omusanvu ne desimoolo ssatu kiritundibwa gulaamu kkumi

n'emu, n'ebigero bibiri ebya sayiri bitundibwe gulaamu kkumi n'emu ebweru wa wankaaki w'e Samaliya."

² Awo omukungu kabaka gwe yeesigamangako n'agamba omusajja wa Katonda nti, "MUKAMA ne bw'anakuba ebituli mu ggulu, ekyo tekiyinzika kubaawo." Erisa n'amuddamu nti, "Ekyo olkiraba n'amaaso go, naye tolibaako na kimu ky'olyako ku byo."

Abasuuli Badduka

³ Waaliwo abasajja bana abaagengewala abaabeeranga ku mulyango gwa wankaaki w'ekibuga. Ne bagambagana bokka ne bokka nti, "Kiki ekitutuuza wano okutuusa okufa?

⁴Bwe tunaagamba nti, 'Tuyingire mu kibuga,' enjala gy'eri, era tunaafiirayo; ate bwe tusigala wano, era nawo tujja kufiirawo. Noolwekyo tulage mu nkambi y'Abasuuli, bwe banaatusaasira, tunaaba balamu, bwe banaatutta, kale kinaaba bwe kityo."

⁵Awo ekiro mu ttumbi ne bagolokoka ne balaga mu lusiisira lw'Abasuuli. Naye bwe baatuuka mu kitundu ekisembayo eky'olusiisira, tewaali muntu n'omu.

⁶Mukama yallowozesa egghe ly'Abasuuli nti kabaka wa Isirayiri yali apangisizza bakabaka b'Abakiiti n'ab'Abamisiri okujja okumulwanirira, bwe lyawulira eddoboazi ly'amagaali n'eddoboazi ly'embalaasi.

⁷Ne bagolokoka ne badduka okuva mu nkambi yaabwe amatumbibudde ne baleka awo eweema zaabwe, n'embalaasi zaabwe n'endogoyi zaabwe, ne badduka okuwonya obulamu bwabwe.

⁸ Abagenge bwe baatuuka ku nkambi w'ekoma, ne bayingira mu emu ku weema, ne balya ne banya era ne beetikka n'effeeza ne zaabu n'engoye, ne bagenda ne babikweka. N'oluvannyuma ne bakomawo, ne bayingira mu weema endala, ne baggyayo ebyalimu, ne bagenda ne babikweka nabyo.

⁹Awo ne bagambagana nti, "Kye tukola si kituufu. Luno olunaku lwa bigambo birungi; bwe tunaasirika ne tulinda okutuusa enkyo, tujja kubonerezebwa. Noolwekyo tugende tutegeez ab'omu nju ya kabaka."

¹⁰Awo ne bagenda ne bakoowoola abakuumi ba wankaaki w'ekibuga, ne boogera nti, "Twalaze mu nkambi y'Abasuuli ne tutasangayo muntu n'omu okuggyako embalaasi nga zisibiddwa, n'endogoyi nga zisibiddwa, n'eweema nga ziri nga bwe baazirese."

¹¹Abakuumi ne balangirira amawulire ago, n'ab'omu lubiri ne bakiwulira.

¹² Kabaka n'agolokoka mu kiro ekyo, n'agamba abakungu be nti, "Ka mbategeezze Abasuuli kye bategese okutukola. Bamanyi nga tuli bayala; era bavudde mu nkambi yaabwe ne bagenda okwekweka ku ttale, nga balowooza nti, 'Mazima

ddala bajja kuvaayo, n'oluvannyuma tunaabawamba nga balamu, tulyoke tuyingire mu kibuga.'"

¹³Awo omu ku bakungu be n'aleeta ekirowoozo nti, "Ffuna abasajja bagende n'embalaasi ttaano ku ezo ezsigaddewo, kubanga bali ng'ekibiina kyonna ekya Isirayiri ekisigaddewo; baliba ng'ekibiina kyonna ekya Isirayiri ekimaliddwawo. Ka tubasindikeyo bagende balabe ekiriyo."

¹⁴Awo ne balonda abeebagala embalaasi babiri n'embalaasi zaabwe, kabaka n'abatuma okuwondera eggye ly'Abasuuli, ng'abagamba nti, "Mugende mulabe."

¹⁵Ne babawondera okutuukira ddala ku Yoludaani, ne basanga ng'ekkubo lyonna lijjudde engoye n'ebintu ebirala Abasuuli bye baasuula nga badduka. Awo ababaka ne bakomawo eri kabaka ne bamutegeeza bye baalaba.

Okunyaga mu Nkambi y'Abasuuli

¹⁶Awo abantu ne bafuluma, ne bakaliza olusiisira lw'Abasuuli. Ekigero ky'obutta obulungi ekyenkana lita musanvu ne desimoolo ssatu ne kitundibwa gulaamu kkumi n'emu, n'ebigero bibiri ebya sayiri ne bitundibwa gulaamu kkumi n'emu, ng'ekigambo kya MUKAMA bwe kyali.

¹⁷Kabaka yali alonze omukungu we oli gwe yeesigamangako, okuvunaanyizibwa wankaaki, abantu ne bamulinnyiririra mu mulyango, n'afa, ng'omusajja wa Katonda bwe yayogera, mu kiseera kabaka bwe yalaga ewuwe.

¹⁸Bwe kityo bwe kyali kubanga omusajja wa Katonda bwe yagamba kabaka nti, "Jjo essaawa nga zino ebigero bibiri ebya sayiri biritundibwa gulaamu kkumi n'emu, n'ekigero ky'obutta obulungi ne kitundibwa gulaamu kkumi n'emu, mu wankaaki ya Samaliya,"

¹⁹omukungu oyo, yaddamu omusajja wa Katonda nti, "Laba, MUKAMA ne bwaggulawo ebituli eby'omu ggulu, tekiyinzika kubaawo." Omusajja wa Katonda n'amugamba nti, "Olikiraba n'amaaso go, naye toliryako na kimu."

²⁰Era bwe kityo bwe kyali ekyamutuukako, abantu bwe bamulinnyiririra mu wankaaki, n'afa.

2 Bassekabaka 8

Omukyala Omusunammu Addizibwa Ebibye

¹Mu biro ebyo Erisa n'agamba omukazi gwe yazuukiriza mutabani we nti, "Golokoka ove wano ogende n'ab'omu nnyumba yo bona mu nsi gy'oliyinza okubeeramu, kubanga MUKAMA alireeta ekyeeya mu nsi okumala emyaka musanvu."

²Omukazi n'asitukiramu n'akola ng'omusajja wa Katonda bwe yayogera, n'alaga ye n'ab'omu nnyumba ye mu nsi y'Abafirisuuti okumala emyaka musanvu.

³Oluvannyuma lw'emyaka omusanvu, n'akomawo okuva mu nsi y'Abafirisuuti, n'alaga eri kabaka okumwegayirira addizibwe ekibanja kye n'ennyumba ye.

⁴Mu kiseera ekkyo kye kimu kabaka yali anyumyamu ne Gekazi omuweereza w'omusajja wa Katonda, nga kabaka amugambye nti, "Ntegeeza ebintu ebikulu byonna Erisa by'akoze."

⁵Awo Gekazi bwe yali ng'akyanyumiza kabaka, engeri Erisa bwe yazuukiza abafu, omukazi eyali ne mutabani we, Erisa gwe yazuukiza n'atuuka, okwegayirira kabaka ng'asaba ekibanja kye n'ennyumba ye. Gekazi n'ayogera nti, "Mukama wange kabaka, ono ye mukazi, era ne mutabani we Erisa gwe yazuukiza y'oyo."

⁶Awo kabaka bwe yabuuza omukazi, n'amutegeeza nti bwe kyal. N'alyoka alagira omu ku bakungu amutereereze ensonga ze; n'amugamba nti, "Muddize buli kintu kyonna ekikye, n'obusuulu bwonna obwa kuinjaanyizibwa okuva mu kibanja kye okuva ku lunaku lwe yakivaamu okutuusa kaakano."

Kazayeeri Atta Benikadadi

⁷Erisa n'agenda e Ddamasiko n'asanga Benikadadi kabaka w'e Busuuli ng'alwadde. Kabaka bwe yategeezebwa nti, "Omusajja wa Katonda atuuse mu kitundu,"

⁸n'agamba Kazayeeri nti, "Ffuna ekirabo, ogende osisinkane omusajja wa Katonda, weebuuze ku MUKAMA ng'oyita mu ye oba, ndiwona endwadde eno."

⁹Kazayeeri n'agenda okusisinkana Erisa, n'amutwalira n'ebirabo eby'engeri zonna okuva e Ddamasiko, ku njamira amakumi ana. N'agenda n'ayimirira mu maaso ge, n'amugamba nti, "Mutabani wo Benikadadi kabaka w'e Busuuli antumye okukubuuza nti, 'Ndiwona endwadde eno?'"

¹⁰Erisa n'amuddamu nti, "Genda omutegeeze nti, 'Ojja kuwona;' naye MUKAMA akimbikulidde nti talirema kufa."

¹¹N'amutunuulira n'amaaso ag'enkaliriza, okutuusa Kazayeeri bwe yakwatibwa ensonyi, omusajja wa Katonda n'atandika okukaaba.

¹²Kazayeeri n'abuuza nti, "Kiki ekikaabya mukama wange?" Erisa n'amuddamu nti, "Kubanga mmanyi obubi bw'olikola Abayisirayiri; olıkuma omuliro ku bigo byabwe, n'otta abavubuka baabwe n'ekitala, n'osesebbulira abaana abato ku ttaka, era n'obaaga n'abakyala abali embuto."

¹³Awo Kazayeeri n'addamu nti, "Nze ani omuddu wo, embwa obubwa, ayinza okukola ekintu ng'ekyo?" Erisa n'amuddamu nti, "MUKAMA akimbikulidde nti ggwe ogenda okubeera kabaka w'e Busuuli."

¹⁴Awo n'ava mu maaso ga Erisa, n'addayo eri mukama we. Benikadadi n'amubuuza nti, "Erisa yakugambye ki?" Kazayeeri n'amuddamu nti, "Yanjambye nti eky'amazima ojja kuwona."

¹⁵Naye olunaku olwaddirira, enkeera, n'addirira ekiwero ekinene, n'akinyika mu mazzi, n'akibikka ku maaso ga kabaka, okutuusa bwe yafa. N'olvannyuma Kazayeeri n'alya obwakabaka mu kifo kye.

Yekolaamu, Kabaka wa Yuda

¹⁶Mu mwaka ogwokutaano nga Yolaamu mutabani wa Akabu ye kabaka wa Isirayiri, Yekolaamu mutabani wa Yekosafaati, kabaka wa Yuda, n'atandika okufuga Yuda.

¹⁷Yalina emyaka amakumi asatu mu ebiri, we yaliira obwakabaka, era n'afugira emyaka munaana mu Yerusaalemi.

¹⁸Yekolaamu n'atambulira mu makubo ga bassekabaka ba Isirayiri ng'ab'ennyumba ya Akabu bwe baakola, n'okuwasa n'awasa omu ku bawala ba Akabu. N'akola ebibi mu maaso ga MUKAMA.

¹⁹Naye MUKAMA n'atazikiriza Yuda, ku lwa Dawudi omuddu we, gwe yasuubiza nti alireka ettabaaza ye ng'eyaka n'okutuusa ku bazzukulu be emirembe gyonna.

²⁰Mu mirembe gya Yekolaamu, Edomu ne bajeemera obufuzi bwa Yuda, ne bassaawo kabaka owaabwe.

²¹Awo Yekolaamu n'asomoka n'agenda e Zayiri n'amagaali ge, n'agolokoka mu kiro n'abaduumizi be ne batta Abayedomu abaali bamizingizza, olwo eggyle lye ne lidduka okuddayo ewaabwe.

²²Okuva mu kiseera ekkyo Edomu n'ajeemera obufuzi bwa Yuda n'okutuusa ku lunaku lwa leero. Mu kiseera kye kimu ab'e Libuna nabo ne bajeema.

²³Ebyafaayo ebirala ebyabaawo ku mulembe gwa Yekolaamu, ne bye yakola byonna, tebyawandiikibwa mu kitabo eky'ebiomumirembe gya bassekabaka ba Yuda?

²⁴Yekolaamu n'afa n'aziikibwa ku biggya bya bajjajaabe mu kibuga kya Dawudi. Akaziya mutabani we n'amusikira.

Akaziya, Kabaka wa Yuda

²⁵Mu mwaka ogw'ekkumi n'ebiri nga Yolaamu mutabani wa Akabu ye kabaka wa Isirayiri, Akaziya mutabani wa Yekolaamu kabaka wa Yuda, n'atandika okufuga Yuda.

²⁶Akaziya yalina emyaka amakumi abiri mu ebiri we yaliira obwakabaka, n'afugira omwaka gumu mu Yerusaalemi. Erinnya lya nnyina ye yali Asaliya, muzzukulu wa Omuli kabaka wa Isirayiri.

²⁷N'atambulira mu makubo ga b'ennyumba ya Akabu n'akola ebibi mu maaso ga MUKAMA, ng'ab'omu nnyumba ya Akabu bwe baakola, kubanga yali mukoddomi wa nnyumba ya Akabu.

²⁸Akaziya n'agenda ne Yolaamu mutabani wa Akabu okutabaala Kazayeeri kabaka w'e Busuuli e Lamosugireyaadi, era eyo Abasuuli ne bafumitirayo Yolaamu, n'afunirayo ebiwundu.

²⁹Awo kabaka Yolaamu n'addayo e Yezuleeri okumujjanjaba ebiwundu Abasuuli bye baamuleetako ng'ali e Lama, bwe yali ng'alwanagana ne Kazayeeri kabaka w'e Busuuli. Akaziya mutabani wa Yekolaamu kabaka wa Yuda n'aserengeta e Yezuleeri okulaba ku Yolaamu mutabani wa Akabu, kubanga yali afumitiddwa ebiwundu.

2 Bassekabaka 9

¹Nnabbi Erisa n'ayita omu ku bannabbi abato n'amugamba nti, "Weesibe ekimyu, otwale eccupa eno ey'amatuta, ogende nayo e Lamosugireyaadi.

²Bw'otuuka eyo, onoonye Yeeku mutabani wa Yekosafaati, muzzukulu wa Nimusi, omuggye mu banne, omutwale mu kisenge eky'omunda.

³Oddire eccupa ey'amatuta, ogafuke ku mutwe gwe, oyogere nti, 'Bw'ati bw'ayogera MUKAMA nti: Nkufukako amafuta okuba kabaka wa Isirayiri.' Oluvannyuma oggulewo oluggi odduke, so tolwawo n'akatono."

⁴Awo omuvubuka nnabbi n'agenda e Lamosugireyaadi.

⁵Bwe yatuuka, n'asanga ng'abaserikale abakulu ab'omu ggye bakuŋŋaanye n'ayogera nti, "Nnina obubaka bwo, ssebo omuduumizi." Yeeku n'amubuuza nti, "Bw'ani ku ffe ffenna?" N'amuddamu nti, "Bubwo, ggwe omuduumizi."

⁶Yeeku n'asituka n'ayingira mu nnyumba, nnabbi n'amufukako amafuta, n'ayogera nti, "Bw'ati bw'ayogera MUKAMA Katonda wa Isirayiri nti, 'Nkufukako amafuta okuba kabaka w'abantu ba MUKAMA, Abayisirayiri.'

⁷Olivikiriza ennyumba ya Akabu mukama wo, nga mpalana eggwanga olw'omusaayi gw'abaddu ba MUKAMA bona, Yezeberi gwe yayiwa.

⁸Ennyumba yonna eya Akabu erisaanyizibwawo, era ndizikiririza ddala buli mwana wabulenzi, oba muddu oba wa ddembe mu Isirayiri.

⁹Ndifuula ennyumba ya Akabu okuba ng'ennyumba ya Yerobowaamu mutabani wa Nebati, era n'okufaanana ng'ennyumba ya Baasa mutabani wa Akiya.

¹⁰N'embwa ziririira Yezeberi mu kibanja eky'e Yezuleeri era tewaliba muntu n'omu amuziika.'" Oluvannyuma olw'okwogera ebyo n'aggulawo oluggi n'adduka.

¹¹Yeeku bwe yafuluma okugenda eri bakungu banne, omu ku bo n'amubuuza nti, "Kiri bulungi? Omulalu oyo abadde akunoonyeza ki?" Yeeku n'addamu nti, "Omusajja mumumanyi n'enjogera ye mugimanyi."

¹²Ne bamugamba nti, "Ekyo si kituufu! Tutegeeze amazima." Yeeku n'ayogera nti, "Bw'ati bw'aŋjambye nti, 'Bw'ati bw'ayogera MUKAMA nti nkufukako amafuta okuba kabaka wa Isirayiri.'"

¹³ Ne banguwa okuggyako eminagiro gyabwe, ne bagyaliira wansi ku madaala, ne bafuuwa ekkondeere, nga bwe baleekaana nti, "Yeeku ye kabaka."

Yeeku atta Yolaamu ne Akaziya

¹⁴ Awo Yeeku mutabani wa Yekosafaati, muzzukulu wa Nimusi n'asalira Yolaamu olukwe. Yolaamu wamu ne Isirayiri yenna baali bakuuma e Lamosugireyaadi, Kazayeeri kabaka w'e Busuuli aleme okubalumba.

¹⁵ Naye Yolaamu yali azeeyo e Yezuleeri okujjanjabibwa ebiwundu Abasuuli bye baali bamutaddeko, mu kulwanagana ne Kazayeeri kabaka w'e Busuuli. Yeeku n'ayogera nti, "Bwe muba nga bwe mutyo bwe muwlira, kale waleme okubaawo omuntu yenna atoloka okuva mu kibuga anaabunyisa amawulire mu Yezuleeri."

¹⁶ N'alinnya mu ggaali lye, n'agenda e Yezuleeri, kubanga Yolaamu yali awummulidde eyo, nga ne Akaziya aserengese okugenda okumulabako.

¹⁷ Awo omukuumi eyali mu kigo mu Yezuleeri, bwe yalengera ekibinja kya Yeeku nga kijja, n'akoowoola mu ddoboozi ery'omwanguka ng'agamba nti, "Waliwo ekibinja kye nnengera ekijja." Yolaamu n'alagira nti, "Mufune omu ku beebagala embalaasi, mumutume agende abasisinkane, ababuuze nti, 'Mujja mirembe?'"

¹⁸ Awo eyeebagala embalaasi n'agenda okusisinkana Yeeku, n'amugamba nti, "Kabaka abuuza nti, 'Mujja mirembe?'" Yeeku n'amuddamu nti, "Emirembe ogifaako ki? Kyuka odde ennyuma wange ongoberere." Omukuumi eyali mu kigo n'ayogera nti, "Atuuse gye bali, naye tadda."

¹⁹ Awo kabaka n'atuma eyeebagala embalaasi owookubiri. Bwe yatuuka we baali, n'ayogera nti, "Bw'ati bw'ayogera kabaka nti, 'Mujja mirembe?'" Yeeku n'amuddamu nti, "Emirembe ogifaako ki? Kyuka odde ennyuma wange ongoberere."

²⁰ Omukuumi n'addamu n'ayogera nti, "Oli naye atuuse, gye bali, naye tadda. N'enneebagala y'embalaasi efaanana ng'enneebala ya Yeeku muzzukulu wa Nimusi, kubanga enneebagala ye yakiralu."

²¹ Yolaamu n'ayogera nti, "Muteeketeke eggiali lyange." Bwe baamala okuliteekateeka, Yolaamu kabaka wa Isirayiri ne Akaziya kabaka wa Yuda, ne

bafuluma ekibuga, buli omu ng'ali mu ggaali lye, ne bagenda okusisinkana Yeeku, era baamusisinkanira mu nnimiro eyali eya Nabosi Omuyezuleeri.

²²Awo Yolaamu bwe yalaba Yeeku, n'amubuuza nti, "Ojja mirembe Yeeku?" Yeeku n'amuddamu nti, "Kiyinzika kitya okubaawo emirembe, nga wakyaliwo obwenzi n'obulogo bwa nnyoko Yezeberi?"

²³Amangwago Yolaamu n'akyusa n'adduka, ng'akoowoola Akaziya ng'agamba nti, "Akaziya waliwo olukwe!"

²⁴Awo Yeeku n'aggyayo omutego gwe n'obusaale bwe, n'amaanyi ge gonna n'anaanuula omutego n'alasa Yolaamu mu kibegabega, akasaale ne kafumita omutima gwe, n'agwa mu ggaali lye.

²⁵Yeeku n'agamba Bidukali, omugoba we ggaali lye nti, "Mumuggyeemu, mumusuule mu nnimiro eyali eya Nabosi Omuyezuleeri. Ojjukira bwe twali tuvugira amagaali gaffe emabega wa Akabu kitaawe, MUKAMA n'ayogera nti ekintu kino kirimutuukako.

²⁶Mazima ddala, nga jjo bwe nnalabye omusaayi gwa Nabosi n'omusaayi gw'abaana be, siireme kukusasulira mu kibanja kino kyennyini,' bw'ayogera MUKAMA. Kaakano mumusitule mumusuule mu kibanja ekyo ng'ekigambo kya MUKAMA bwe kiri."

²⁷Awo Akaziya kabaka wa Yuda bwe yalaba ebyabaawo, n'addukira mu kkubo ery'omu nnyumba ey'ennimiro. Yeeku n'amugoba, nga bw'ayogerera waggulu nti, "Naye mumutte!" Ne bamulasa, ne bamuleetako ekiwundu ng'addukira e Guli ekiriraanye Ibuleamu, ng'ali mu ggaali lye, naye n'asobola okutuuka e Megiddo, era eyo gye yafiira.

²⁸Abaddu be ne bateeka omulambo gwe mu ggaali ne bagutwala e Yerusaalemi, ne bamuziika mu ntaana ye ku biggya bya bajjajaabe mu kibuga kya Dawudi.

²⁹Awo mu mwaka ogw'ekkumi n'ogumu ogw'obufuzi bwa Yolaamu mutabani wa Akabu, Akaziya n'atandika okufuga Yuda.

Okufa kwa Yezeberi

³⁰Yeeku n'agenda Yezeberi gye yali, Yezeberi n'akimanya, n'asiiga amaaso ge, n'alongoosa enviiri ze, n'atunula ebweru ng'asinziira mu ddirisa.

³¹Awo Yeeku bwe yali ng'ayingirira mu wankaaki, Yezeberi n'amubuuza nti, "Ojja mirembe, ggwe Zimuli, eyatemula mukama wo?"

³²Yeeku n'ayimusa amaaso ge waggulu, n'akoowoola ng'abuuza nti, "Ani ali ku ludda lwange? Ani?" Abalaawe babiri oba basatu ne balingiza mu ddirisa.

³³N'ayogera nti, "Mumusuule wansi!" Ne bamusuula wansi, n'omusaayi gwe ogumu ne gumansukira ekisenge ne ku mbalaasi, n'okumulinyirira ne zimulinnyirira.

³⁴Awo Yeeku n'ayingira, n'alya era n'anywa. N'ayogera nti, "Mulabirire omulambo gw'omukazi oyo eyakolimirwa, era mulabe nga guziikibwa kubanga yali mumbejja."

³⁵Naye bwe bagatuukako, tebaalina kye basangawo okuggyako akawanga ke, n'ebigere bye, n'ebibatu by'emikono gye.

³⁶Ne baddayo eri Yeeku ne bamutegheeza. N'abagamba nti, "Kino kye kigambo kya MUKAMA, kye yayogerera mu muddu we Eriya Omutisubi ng'agamba nti, 'Mu kibangirizi ky'e Yezuleeri, embwa mwe ziririira omulambo gwa Yezeberi.

³⁷Era omulambo gwa Yezeberi guliba ng'obusa ku ttale mu kibangirizi ky'e Yezuleeri, omuntu yenna aleme okugamba nti, Ono ye Yezeberi.'"

2 Bassekabaka 10

Ezadde Iya Akabu Littibwa

¹Mu Samaliya waaliyo batabani ba Akabu nsanvu. Awo Yeeku n'awandiika amabaluwa n'agaweereza e Samaliya eri abakungu b'e Yezuleeri, n'eri abakadde ab'ekibuga, n'eri abakuza b'abaana ba Akabu. N'awandiika nti,

²"Amangwago ng'ebbaluwa eno ebatuuseeko, ng'abaana ba mukama wammwe bwe bali nammwe, ate nga mulina amagaali n'embalaasi, era n'ekibuga kiriko enkomera n'eb yokulwanyisa,

³mulonde ku batabani ba mukama wammwe asinga obulungi, ng'asaanira, mumuteeke ku ntebe ey'obwakabaka eya kitaawe, mulwanirire ennyumba ya mukama wammwe."

⁴Naye ekkyo ne bakitya nnyo, ne boogera nti, "Obanga bakabaka ababiri tebaayinza kumwesimbamu, ffe tunaayinza tutya?"

⁵Awo eyavunaanyizibwanga ebyolubiri, n'omukulembeze ow'ekibuga, n'abakuza ab'abaana ne baweereza obubaka eri Yeeku nti, "Ffe tuli baddu bo era tunaakola byonna by'onootulagira. Tetujja kufuula muntu n'omu kabaka; gw'oba okola ky'olowooza nga kye kisinga obulungi."

⁶Awo Yeeku n'abawandiikira ebbaluwa eyookubiri ng'agamba nti, "Obanga muli ku lwange era nga muñjondera, mutemeeko emitwe gy'abatabani ba mukama wammwe, mugindetere e Yezuleeri, mugintuseeko enkyo mu kiseera nga kino." Abalangira ensanvu baabeeranga n'abakuza baabwe abaali abaami abakulu mu kibuga ekkyo.

⁷Ebbaluwa bwe yabatuukako, ne bakwata abalangira ensanvu bona ne babatta, ne bateeka emitwe gyabwe mu bisero, mwe baagiweerereza eri Yeeku e Yezuleeri.

⁸Omubaka n'agenda n'agamba Yeeku nti, "Emitwe gy'abalangira bagireese." Yeeku n'alagira nti, "Mugituume entuumo bbiri ku mulyango gwa wankaaki okutuusa enkyा."

⁹Yeeku n'afuluma, n'ayimirira mu maaso g'abantu bona n'ayogera nti, "Mmwe temuliiko musango, era nze nasalira mukama wange olukwe ne mutta, naye ani asse bano bona?

¹⁰Kale mukitegeere nga tewali kigambo kya MUKAMA, kye yayogera ku nnyumba ya Akabu ekitalituukirira, kubanga MUKAMA akoze ekyo kye yayogerera mu muddu we Eriya."

¹¹Bw'atyo Yeeku n'atta ab'enju ya Akabu bona abaali basigaddewo mu Yezuleeri; n'atta n'abakungu be, ne mikwano gye enfirabulago, ne bakabona be, obutalekaawo n'omu.

¹²Awo Yeeku n'asitula n'ayolekera Samaliya. N'asisinkana baganda ba Akaziya kabaka wa Yuda mu kkubo okumpi n'ennyumba eyasalirwangamu endiga ebyoya,

¹³n'ababuuza nti, "Mmwe b'ani?" Ne bamuddamu nti, "Tuli baganda ba Akaziya, era tuzze okulamusa abaana ba kabaka n'abaana ba nnamasole."

¹⁴N'alagira nti, "Mubakwate." Ne babakwata, abasajja amakumi ana mu babiri bona ne babattira kumpi n'obunnya obw'ennyumba gye baasalirangamu endiga ebyoya. N'atalekaawo n'omu.

¹⁵Eyo bwe yavaayo, n'asanga Yekonadabu mutabani wa Lekabu ng'ajja okumusisinkana. Yeeku n'amulamusa, n'amubuuza nti, "Ossa kimu nange, nga nze bwe nzisa ekimu naawe?" Yekonadabu n'addamu nti, "Weewaawo." Yeeku n'amugamba nti, "Obanga weewaawo, mpa omukono gwo." N'amuwa omukono gwe, Yeeku n'amulinnyisa gy'ali mu ggaali.

¹⁶Yeeku n'amugamba nti, "Jjangu tugende ffembi olabe obuniikivu bwange eri MUKAMA." Awo n'atambulira wamu naye mu ggaali lye.

¹⁷Awo Yeeku bwe yatuuka e Samaliya, n'atta bona abaali basigaddewo ab'omu nnyumba ya Akabu, n'abazikiriza ng'ekigambo kya MUKAMA kye yayogera eri Eriya bwe kyali.

Okuttibwa kw'Abawereza ba Baali

¹⁸Awo Yeeku n'akuŋŋanya abantu bona, n'abagamba nti, "Akabu yaweerezaako Baali ebbanga ttono naye Yeeku anaamuweereza okusingawo.

¹⁹Kale nno muyite bannabbi bona aba Baali, bakabona be bona, n'abawereza be bona, waleme okubulawo n'omu kubanga ŋŋenda okuwaayo ssaddaaka enku lu ennyo eri Baali, ne buli ataabeerewo alittibwa." Naye okukola ekyo, Yeeku yasala lukwe alyoke azikirize abaasinzanga Baali.

²⁰ Yeeku n' alagira nti, "Mukole olukunjaana olutukuvu eri Baali." Ne balulangirira.

²¹ Awo n' aweereza obubaka okubuna Isirayiri yonna, abaweereza ba Baali bona ne bajja, n' okusigala n' etasigala muntu n' omu. Ne bakunjaanira mu ssabo lya Baali, ne lijulira ddala okuva ku luuyi olumu okutuukira ddala ku luuyi olulala.

²² Yeeku n' agamba eyavunaanyizibwanga ebyambalo byabwe nti, "Leetera abaweereza ba Baali bona ebyambalo." Bonna n' abaleetera ebyambalo.

²³ Awo Yeeku ne Yekonadabu mutabani wa Lekabu ne bagenda mu ssabo lya Baali. Yeeku n' agamba abaweereza ba Baali nti, "Mwetegereze nnyo mulabe nga mu mmwe temuliimu muweereza wa MUKAMA, wabula abasinza Baali bokka."

²⁴ Ne bayingira okuwaayo ssaddaaka n' ebiweebwayo ebyokebwa. Naye Yeeku yali atadde abasajja kinaana ebweru w' essabo, ng' abalabudde nti, "Omuntu yenna anaataako n' omu ku basajja abo be ntadde mu mikono gyammwe, anaaliwa n' obulamu bwe ye."

²⁵ Amangwago bwe yamala okuwaayo ekiweebwayo ekyokebwa, n' alagira abaserikale n' abaami nti, "Muyingire mubatte; waleme okuwonawo n' omu." Bwe baamala okubatta n' ekitala, ne basuula emirambo gyabwe ebweru, ne bayingira munda mu ssabo ekkulu erya Baali.

²⁶ Ne bafulumya empagi ezaali mu ssabo lya Baali, ne bazookya.

²⁷ Ne bamenyaamenya empagi ya Baali, ne bamenyaamenya ne ssabo lya Baali, ne balifuula kabuyonjo ne leero.

²⁸ Awo Yeeku n' amalirawo ddala okusinza kwa Baali mu Isirayiri.

²⁹ Naye teyaleka kukola ebibi ebya Yerobowaamu mutabani wa Nebati, bye yayonoonyesa Isirayiri, ng' okusinza ennyana eza zaabu ezaali mu Beseri ne mu Ddaani.

³⁰ MUKAMA n' agamba Yeeku nti, "Olw' okukola obulungi n' otuukiriza byonna mu maaso gange, n' okola ennyumba ya Akabu byonna ebyali ku mutima gwange bye nnali nteeseteese okukola, bazzukulu bo kyebaliva batuula ku ntebe ey' obwakabaka eya Isirayiri okutuusa ku muzzukulu owa nnakana."

³¹ Naye Yeeku n' atassaayo mwoyo okutambulira mu mateeka ga MUKAMA Katonda wa Isirayiri. Era teyakyuka okuva mu kkubo ery' ebibi erya Yerobowaamu, lye yayonoonyesa Isirayiri.

³² Mu biro ebyo MUKAMA n' atandika okukendeeza ensalo za Isirayiri. Kazayeeri n' abawangula ng' atandikira

³³ku luuyi olw'ebuvanjuba mu nsi ey'e Gireyaadi mu bitundu eby'Abagaadi, n'Abalewubeeni, n'Abamanase okuva ku Aloweri okuliraana ekiwonvu kya Alunoni n'okuyita e Gireyaadi okutuuka e Basani.

³⁴ Ebyafaayo ebirala ebyabaawo mu mirembe gya Yeeku, n'ebintu byonna ebikulu bye yakola, tebyawandiikibwa mu kitabo eky'ebiomumirembe egya bassekabaka ba Isirayiri?

³⁵ Yeeku n'afa, n'aziikibwa mu Samaliya, Yekoyakaazi mutabani we n'amusikira.

³⁶ Ebbanga Yeeku lye yafuga Isirayiri mu Samaliya lyali emyaka amakumi abiri mu munaana.

2 Bassekabaka 11

Asaliya ne Yekoyaasi

¹ Awo Asaliya nnyina Akaziya bwe yalaba mutabani we ng'afudde, n'atandika okusaanyaawo olulyo olulangira lwonna.

² Naye omumbejja Yekoseba muwala wa kabaka Yolaamu mwannyina Akaziya n'abba Yekoyaasi n'amuggya mu balangira abaali bagenda okuttibwa, n'abateeka ye n'omukuza we mu kisenge ekimu ng'abakweka Asaliya, era Yekoyaasi n'atattibwa.

³ N'abeera mu yeekaalu ya MUKAMA n'omukuza we okumala emyaka mukaaga, Asaliya nga y'afuga ensi.

⁴ Mu mwaka ogw'omusanvu Yekoyaada n'atumya abaduumizi ab'ebibinja by'ekikumi, ab'oku Bakali n'abakumi, ne babaleeta gy'ali mu yeekaalu ya MUKAMA. N'alagaana nabo endagaano, n'abalayiriza mu yeekaalu ya MUKAMA, n'olvannyuma n'abalaga mutabani wa kabaka.

⁵ N'abawa ebiragiro bino nti, "Kino kye muteekwa okukola: kimu kya kusatu ku kibinja ekikuuma ku ssabbiiti, kye kinaakuumanga olubiri lwa kabaka,

⁶ n'ekimu kya kusatu ekirala ne kikuuma Omulyango Suuli, n'ekimu kya kusatu ekirala ne kikuuma emanju w'omulyango ewabeera abakumi abakuma yeekaalu mu mpalo;

⁷ n'ebibiina byammwe ebibiri ebitatera kikuuma ku ssabbiiti, mwenna mugenda kuvunaanyizibwa okukuma yeekaalu ya MUKAMA ku lwa kabaka.

⁸ Era muneetooloola kabaka enjuuyi zonna, buli muntu ng'akutte ebyokulwanyisa bye mu mukono gwe, ne buli anaŋŋaanga okubasemberera attibwe. Mukuumenga kabaka butiribiri, bw'anaafulumanga ne bw'anaayingiranga."

⁹Abaduumizi ab'ebibinja b'ekikumi ne bakola byonna nga Yekoyaada kabona bwe yalagira, buli omu n'afuna abasajja be, abaali ab'okukola ku ssabbiiti, n'abaali bamaze oluwalo lwabwe, ne bajja eri Yekoyaada kabona.

¹⁰Kabona n'awa abaduumizi amafumu n'engabo ebyali ebya kabaka Dawudi, ebyali mu yeekaalu ya MUKAMA,

¹¹buli mukuumi n'ayimirira n'ebyokulwanyisa bye nga beetoolodde kabaka enjuuyi zonna, okuliraana ekyoto ne yeekaalu okuva ku luuyi olw'obukiikkaddyo okutuuka ku luuyi olw'obukiikkakkono.

¹²Awo Yekoyaada n'afulumya mutabani wa kabaka, n'amutikkira engule, n'amuwa n'endagaano gye baali bakoze, ne bamufuula kabaka. N'afukibwako amafuta, abantu ne bakuba mu ngalo nga bwe bayogera mu ddoboozi ery'omwanguka nti, "Wangaala kabaka!"

¹³Asaliya bwe yawulira oluyoogaano lw'abakuumi n'olw'abantu, n'alaga eri abantu ku yeekaalu ya MUKAMA.

¹⁴Bwe yatunula, laba, nga kabaka ayimiridde awali empagi, ng'empisa bwe yabanga, n'abaami n'abafuuwa amakondeere nga bayimiridde okuliraana kabaka, n'abantu bona ab'omu nsi nga basanyuka era nga bwe bafuuwa amakondeere. Awo Asaliya n'ayuza ebyambalo bye, n'aleekaanira waggulu nti, "Bujeemu, bujeemu!"

¹⁵Amangwago Yekoyaada kabona n'alagira abaduumizi ab'ebibinja b'ekikumi, abaali bakulira eggye nti, "Mumufulumye wakati w'enneyiriri, na buli amugoberera mumutte n'ekitala." Kabona yali agambye nti, "Temumuttira mu yeekaalu ya MUKAMA."

¹⁶Ne bakwata Asaliya, ng'anaatera okuyita mu mulyango gw'embalaasi w'eziyingira mu luggyia lw'olubiri, ne bamuttira awo.

¹⁷Awo Yekoyaada n'akola endagaano ne MUKAMA, ne kabaka n'abantu, nti banaabeera abantu ba MUKAMA, era n'akola n'endagaano ne kabaka n'abantu.

¹⁸Abantu bona ab'omu nsi ne bagenda ku ssabo lya Baali ne balimenaamenya; ne bamenaamenya ebyoto n'ebifaananyi, era ne battira Matani kabona wa Baali mu maaso g'ebioto ebyo. Yekoyaada kabona n'ateekawo abakuumi ku yeekaalu ya MUKAMA.

¹⁹Awo n'alaga n'abaduumizi ab'ebibinja b'ekikumi, n'Abakali, n'abakuumi, n'abantu bona ab'omu nsi ku yeekaalu, n'aggyayo kabaka mu yeekaalu ya MUKAMA n'amutwala mu lubiri ng'ayita mu mulyango ogw'abakuumi. Kabaka n'atuula ku ntebe ey'obwakabaka,

²⁰abantu bona ab'omu nsi ne bajaguza, n'ekibuga n'ekitereera, kubanga Asaliya yali attiddwa n'ekitala okumpi n'olubiri.

²¹Yekoyaasi yali aweza emyaka musanvu bwe yatandika okufuga.

2 Bassekabaka 12

Yekoyaasi Addaabiriza Yeekaalu

¹ Mu mwaka ogw'omusantu ogw'obufuzi bwa Yeeku, Yekoyaasi, nnyina nga ye Zebbiya ow'e Beeruseba, n'atandika okuba kabaka, n'afugira emyaka amakumi ana mu Yerusaalemi.

²Yekoyaasi n'akola ebirungi mu maaso ga MUKAMA, ebbanga lyonna, kubanga Yekoyaada kabona ye yamuyigirizanga.

³Wabula, ebifo ebigulumivu tebyaggibwawo, n'abantu ne beeyongeranga okuwaayo ssaddaaka n'okwoterezanga obubaane ku bifo ebyo.

⁴Awo Yekoyaasi n'agamba bakabona nti, "Mukunjaanye ensimbi zonna ezireetebwa ng'ebiweebwayo ebitukuzibwa mu yeekaalu ya MUKAMA, ensimbi ez'omusolo buli muntu z'awaayo, n'ensimbi buli muntu z'awaayo ng'endobolo mu yeekaalu, n'ensimbi buli muntu ze yeesalira kyeyagalire, n'azireeta mu yeekaalu ya MUKAMA,

⁵n'olvannyuma buli kabona addire ezo z'akuunjaanyizza aziweeyo okuddaabiriza buli aweetaagisa ku yeekaalu."

⁶Naye oluvannyuma lw'emyaka amakumi abiri mu esatu eg'yobufuzi bwa kabaka Yekoyaasi, bakabona ne baba nga tebannaddaabiriza yeekaalu.

⁷Awo kabaka Yekoyaasi n'atumya Yekoyaada kabona asinga obukulu ne bakabona abalala, n'ababuuza nti, "Kiki ekibalobera okuddaabiriza yeekaalu? Kale nno, mulekeraawo okutoola ku nsimbi ezikuunjaanyizibwa, naye muwiweeyo olw'okuddaabiriza yeekaalu."

⁸Bakabona ne bakkiriziganya obutaddayo kukuunjaanya nsimbi ku bantu, wadde bo bennyini okuvunaanyizibwa okuddaabiriza yeekaalu.

⁹Yekoyaada kabona asinga obukulu n'addiru essanduuko n'awumula ekituli mu kisaanikizo kyayo, n'agiteeka ku luuyi olwa ddyo okumpi n'ekyoto okuliraana n'awayingirirwa. Bakabona abaakuumanga omulyango ne bateekangamu ensimbi zonna ezaaleetebwanga mu yeekaalu ya MUKAMA.

¹⁰Awo bwe baalabanga ng'ensimbi ezireeteddwa mu yeekaalu ya MUKAMA ziweze nnyingi mu ssanduuko, omuwandiisi wa kabaka ne kabona asinga obukulu ne bajjanga okuzibala n'okuzitereka.

¹¹N'olvannyuma ensimbi ezo baazikwasanga abasajja abaali baweereddwa obuvunaanyizibwa okulabiriranga omulimu ogwakolebwanga ku yeekaalu, bo ne basasulanga abakozi, n'abazimbi abaabilijo, n'abazimbi b'amayinja, n'abatema amayinja, abo bona nga baddaabiriza yeekaalu ya MUKAMA.

¹²Ate era ku ezo ensimbi kwe baagulanga embaawo, n'amayinja amabajje okuddaabiriza yeekaalu ya MUKAMA n'olwebirala ebyetaagisanga mu kuddaabiriza okwo.

¹³Ensimbi ezaaleetebwanga mu yeekaalu tezaakozesebwanga kukola bensani eza ffeeza, oba ebisalako ebisirinza, oba ebibya, oba amakondeere wadde ekintu kyonna ekya zaabu oba ffeeza ebyabeeranga mu yeekaalu ya MUKAMA;

¹⁴kubanga baazisasulanga abakozi abaali baddaabiriza yeekaalu.

¹⁵Era kyalí tekyetagisa abasajja be baakwasa ensimbi, okulaga enkozes a y'ensimbi ezo kubanga baakolanga n'obwesigwa.

¹⁶Ensimbi ezaavanga mu biweebwayo eby'okulumiriza n'ebiweebwayo olw'ekibi tezaaleetebwanga mu yeekaalu ya MUKAMA, zaabanga za bakabona.

¹⁷Mu biro ebyo Kazayeeri kabaka w'e Busuuli n'alumba ekibuga ky'e Gaasi, n'akiwamba, n'oluvannyuma n'atandika okulumba n'e Yerusaalemi.

¹⁸Naye Yekoyaasi kabaka wa Yuda n'addir ebantu byonna ebyatukuzibwa Yekosafaati, ne Yekolaamu ne Akaziya bajjajaabe bassekabaka ba Yuda, n'ebirabo bye yali awonze, ne zaabu yonna eyali mu mawanika, n'abiggya mu yeekaalu ya MUKAMA n'abiweereza Kazayeeri kabaka w'e Busuuli. Oluvannyuma Kazayeeri n'alekayo okulumba Yerusaalemi.

¹⁹Ebyafaayo ebirala ebyabaawo mu mirembe gya Yekoyaasi, ne bye yakola byonna, tebyawandiikibwa mu kitabo eky'ebiomumirembe gya bassekabaka ba Yuda?

²⁰Abaami be ne beekobaana, ne bamuttira mu nnyumba ey'e Miilo, ku kkubo eriserengeta e Siiro.

²¹Abaali mu lukwe olwo baali Yozakali mutabani wa Simeyaasi ne Yekozabadi mutabani wa Someri, era be baamutta. N'afa n'aziikibwa awali bajjajaabe mu kibuga kya Dawudi. Amaziya mutabani we n'amusikira.

2 Bassekabaka 13

Yekoyakaazi Kabaka wa Isirayiri

¹Mu mwaka ogw'amakumi abiri mu esatu ogwa Yowaasi mutabani wa Akaziya kabaka wa Yuda, Yekoyakaazi n'afuuka kabaka wa Isirayiri mu Samaliya era n'afugira emyaka kkumi na musanvu.

²N'akola ebibi mu maaso ga MUKAMA ng'akola ebibi Yerobowaamu mutabani wa Nebati bye yayonoonyesa Isirayiri, ate n'atabirekaayo.

³Obusungu bwa MUKAMA ne bubuubuukira ku Isirayiri, n'abawaayo okubeera wansi ow'omukono gwa Kazayeeri kabaka w'e Busuuli ne Benikadadi mutabani we.

⁴Awo Yekoyakaazi ne yegayirira MUKAMA, MUKAMA n'amuwlira, era n'alaba okucocca, kabaka w'e Busuuli kwe yacoccanga Isirayiri.

⁵MUKAMA n'abaddiramu n'abawa omulokozi, ne bawona obufuzi bw'Abasuuli, n'oluvannyuma Abayisirayiri ne babeeranga mirembe mu nnyumba zaabwe nga bwe baali olubereberye.

⁶Naye ne batalekaayo kukola ebibi eby'ennyumba ya Yerobowaamu bye yayonoonyesa Isirayiri, wabula beeyongeranga bwetyongezi okubikola. N'empagi ey'Asera n'esigalayo mu Samaliya.

⁷MUKAMA teyalekerawo ggye lya Yekoyakaazi kintu okuggyako abasajja abeebagala embalaasi amakumi ataano, n'amagaali kkumi, n'abaserikale ab'ebigere omutwalo gumu, kubanga kabaka w'e Busuuli yabizikiriza, n'abifuula ng'enfuufu ey'omu gguuliro.

⁸Ebyafaayo ebirala ebyabaawo mu mirembe gya Yekoyakaazi, ne bye yakola byonna, n'ebyobuzira bwe byonna, tebyawandiikibwa mu kitabo eky'ebiomumirembe gya bassekabaka ba Isirayiri?

⁹Yekoyakaazi n'afa, n'aziikibwa mu Samaliya, Yowaasi mutabani we n'amusikira.

Yekoyaasi Kabaka wa Isirayiri

¹⁰Awo mu mwaka ogw'amakumi asatu mu omusanvu ogwa Yowaasi kabaka wa Yuda, Yekoyaasi mutabani wa Yekoyakaazi n'afuuka kabaka wa Isirayiri mu Samaliya, era n'afugira emyaka kkumi na musanvu.

¹¹N'akola ebibi mu maaso ga MUKAMA, n'atalekaayo ebibi bya Yerobowaamu mutabani wa Nebati, bye yayonoonyesa Isirayiri, wabula ne yeeyongera bwetyongezi okubikola.

¹²Ebyafaayo ebirala ebyabaawo mu mirembe gya Yekoyaasi, bye yakola byonna, n'amaanyi ge, nga kwe kuli n'olutalo lwe yalwana ne Amaziya kabaka wa Yuda, tebyawandiikibwa mu kitabo eky'ebiomumirembe gya bassekabaka ba Isirayiri?

¹³Yekoyaasi n'afa, n'aziikibwa mu Samaliya, Yerobowaamu n'amusikira okuba kabaka.

Okufa kwa Erisa

¹⁴Awo mu biro ebyo Erisa n'alwala nnyo, endwadde eyamutta, Yowaasi n'aserengeta gy'ali okumulaba, n'akaabira amaziga, mu maaso ge ng'agamba nti, "Kitange, Kitange, amagaali n'abeebagala embalaasi aba Isirayiri!"

¹⁵Erisa n'amuddamu nti, "Ffuna omutego n'obusaale," era n'akola bw'atyo.

¹⁶N'agamba kabaka wa Isirayiri nti, "Bikwate mu ngalo." Bwe yamala okukola ekkyo, Erisa n'ateeka emikono gye ku gya kabaka.

¹⁷Erisa n'amugamba nti, "Ggulawo eddirisa ery'ebuvanjuba," n'aliggulawo. N'amulagira okulasa. Erisa n'ayogera nti, "Akasaale ka MUKAMA ak'obuwanguzi, akasaale ak'obuwanguzi eri Obusuuli, era ojja kusaanyaawo ddala Abasuuli mu Afeki."

¹⁸N'amugamba nti, "Kwata obusaale," n'abukwata. N'agamba kabaka wa Isirayiri okulasa ettaka. N'alirasa emirundi esatu, n'akoma awo.

¹⁹Omusajja wa Katonda n'amunyiigira, n'amugamba nti, "Wandirasizza emirundi etaano oba mukaaga, olwo n'olyoka owangulira ddala Abasuuli era n'obasaanyaawo. Naye kaakano olibawangula emirundi esatu gyokka."

²⁰Erisa n'afa, n'aziikibwa. Ebibinja by'Abamowaabu byateranga okulumba ensi ku ntandikwa ya buli mwaka.

²¹Awo olwatuuka, Abayisirayiri abamu baali baziika omusajja, ne balengera ekibinja eky'abasajja nga kijja, ne basuula omulambo gwe mu ntaana ya Erisa ne badduka. Omulambo gwe bwe gw'akoma ku magumba ga Erisa omusajja n'alamuka, era n'ayimirira.

²²Mu kiseera kye kimu Kazayeeri kabaka w'e Busuuli n'ajooga Isirayiri ebbanga lyonna Yekoyakaazi we yabeerera kabaka.

²³Naye MUKAMA n'abakwatirwa ekisa n'abasaasira, era n'assaayo omwoyo gye bali olw'endagaano gye yakola ne Ibulayimu, ne Isaaka ne Yakobo nti talibazikiririza ddala. N'okutuusa ku lunaku olwa leero tayagalanga kubazikiriza okuva mu maaso ge.

²⁴Kazayeeri kabaka w'e Busuuli n'afa, Benikadadi mutabani we n'amusikira.

²⁵Awo Yekoyaasi mutabani wa Yekoyakaazi n'awamba nate ebibuga Benikadadi mutabani wa Kazayeeri bye yali awambye ku kitaawe Yekoyakaazi mu ntalo. Yowaasi ye n'amuwangula emirundi esatu, era n'akomyawo ebibuga bya Isirayiri ebyali biwambiddwa.

2 Bassekabaka 14

Amaziya Kabaka wa Yuda

¹Mu mwaka ogwokubiri ogw'obufuzi bwa Yowaasi mutabani wa Yowakazi kabaka wa Isirayiri, Amaziya mutabani wa Yowaasi ssekabaka wa Yuda n'alya obwakabaka.

²Yali aweza emyaka amakumi abiri mu etaano weyatandikira okufuga, era n'afugira emyaka amakumi abiri mu mwenda mu Yerusaalemi. Nnyina erinnya lye ye yali Yekoyadiini ow'e Yerusaalemi.

³N'akola ebirungi mu maaso ga MUKAMA, newaakubadde nga tebyenkana bya jjajjaawe Dawudi bye yakola. Mu buli nsonga yonna yagobereranga ekyokulabirako kya Yowaasi kitaawe.

⁴Kyokka beeyongeranga okuweerayo ssaddaaka n'okwoterezanga obubaane ku bifo ebigulumivu kubanga byali tebiggyiddwawo.

⁵Bwe yalaba ng'obwakabaka bunywezeddwa mu buyinza bwe, n'atta abakungu abaatemula kabaka kitaawe.

⁶Wabula teyatta batabani baabwe kubanga mu byawandiikibwa mu Kitabo eky'Amateeka ga Musa, MUKAMA yalagira nti, "Abazadde tebattibwenga ku lw'abaana, so n'abaana tebattibwenga ku lw'abazadde baabwe; buli muntu anaafanga olw'ebibi bye ye."

⁷Yawangula ab'e Edomu mu Kiwonvu eky'Omunnyo, era n'atta omutwalo gumu ku bo, n'okuwamba n'awamba Seera mu lutalo, n'akituma Yokuseeri, era kye kikyayitibwa ne ku lunaku lwa leero.

⁸Awo mu biro ebyo Amaziya n'atumira Yekoyaasi mutabani wa Yekoyakaazi, muzzukulu wa Yeeku, kabaka wa Isirayiri, obubaka ng'amusosonkereza nti, "Jjangu tulabagane amaaso n'amaaso."

⁹Naye Yekoyaasi kabaka wa Isirayiri n'addamu Amaziya kabaka wa Yuda nti, "Omwennyango mu Lebanooni gw'aweereza obubaka eri omuvule mu Lebanooni nga gugamba nti, 'Waayo muwala wo afumbirwe mutabani wange.' Nayé ensolo enkambwe eya Lebanooni bwe yali ng'eyitawo n'erinnyirira omwennyango.

¹⁰Kaakano wegulumizza kubanga owangudde Edomu. Wenyumirize mu buwanguzi bwo ewuwo. Lwaki oyagala okweleetera emitawaana, n'okugwa kwo era n'okwa Yuda?"

¹¹Naye Amaziya teyawuliriza, era ekyavaamu Yekoyaasi kabaka wa Isirayiri n'amulumba. Ne balabagana amaaso n'amaaso mu lutalo e Besusemesi ekya Yuda.

¹²Yuda n'awangulibwa Isirayiri, buli musaja n'addukira ewuwe.

¹³Awo Yekoyaasi kabaka wa Isirayiri n'awambira Amaziya kabaka wa Yuda mutabani wa Yekoyaasi muzzukulu wa Akaziya e Besusemesi; Yekoyaasi ne yeeyongerayo e Yerusaalemi, n'amenyaamenya bbugwe wa Yerusaalemi, obuwanvu mita kikumi mu kinaana, okuva ku wankaaki wa Efulayimu okutuuka ku wankaaki ow'oku Nsonda.

¹⁴N'atwala ezaabu n'effeeza yonna, n'ebikozesebwa byonna ebyali mu yeekaalu ya MUKAMA, n'eb'obugagga ebyali mu lubiri lwa kabaka, era n'abantu n'abatwala nga basibe, n'addayo e Samaliya.

Okufa kwa Yekoyaasi

15 Ebyafaayo ebirala byonna ebyaliwo mu mirembe gya Yekoyaasi, ne bye yakola n'ebiyamagero bye, ne bwe yatabala Amaziya kabaka wa Yuda, tebyawandiikibwa mu kitabo eky'ebiomumirembe gya bassekabaka ba Isirayiri?

16 Yekoyaasi n'afa n'aziikibwa mu Samaliya mu masiro ga bakabaka ba Isirayiri. Mutabani we Yerobowaamu n'amusikira okuba kabaka.

Okufa kwa Amaziya

17 Awo Amaziya mutabani wa Yowaasi n'awangaala emyaka kkumi n'ettaano emirala oluvannyuma lw'okufa kwa Yekoyaasi mutabani wa Yekoyakaazi kabaka wa Isirayiri.

18 Ebyafaayo ebirala eby'omulembe gwa Amaziya, tebyawandiikibwa mu kitabo eky'ebiomumirembe gya bassekabaka ba Yuda?

19 Ne bamusalira olukwe olw'okumuttira mu Yerusaalemi, n'addukira e Lakisi, naye ne bamuwerekereza abasajja era ne bamuttira e Lakisi.

20 Ne bakomyawo omulambo gwe ku mbalaasi, era n'aziikibwa ku biggya bya bajjajjaabe mu Yerusaalemi, mu kibuga kya Dawudi.

21 Awo eggwanga lyonna erya Yuda, ne bafuula Azaliya ow'emyaka ekkumi n'omukaaga kabaka, ng'asikira kitaawe Amaziya.

22 Ye yaddaabiriza Erasi era n'azza Yuda obuggyga, nga Amaziya amaze okufa.

Yerobowaamu II Kabaka wa Isirayiri

23 Mu mwaka ogw'ekkumi n'ettaano ogw'obufuzi bwa Amaziya mutabani wa Yowaasi kabaka wa Yuda, Yerobowaamu II mutabani wa Yowaasi ssekabaka wa Isirayiri n'afuuka kabaka mu Samaliya, era n'afugira emyaka amakumi ana mu gumu.

24 N'akola ebibi mu maaso ga MUKAMA, n'atakyuka okuva mu bibi ebya Yerobowaamu mutabani wa Nebati bye yayonoonyesa Isirayiri.

25 Yatuukiriza ekigambo kya MUKAMA, Katonda wa Isirayiri kye yayogerera mu muddu we Yona mutabani wa Amitayi nnabbi ow'e Gasukeferi, n'azzaawo ensalo ya Isirayiri okuva ku mulyango gwa Kamasi okutuuka ku Nnyanja ey'Omunnoyo.

26 MUKAMA yalaba okubonaabona kwa buli omu mu Isirayiri, omuddu n'atali muddu, nga tewali ayinza ku babeera.

27 Olw'okubanga MUKAMA yali tagambye nti alisaanyaawo erinnya lya Isirayiri wansi w'eggulu, n'atuma Yerobowaamu II mutabani wa Yowaasi okubalokola.

28 Ebyafaayo ebirala ebyabaawo mu mirembe gya Yerobowaamu II, ne byonna bye yakola, ne bwe yalwana entalo n'obuzira, n'engeri gye yakomezaawo

Isirayiri Ddamasiko ne Kamasi ebyali ebya Yuda, tebyawandiikibwa mu kitabo eky'ebiomumirembe gya bassekabaka ba Isirayiri?

²⁹Yerobowaamu ne yeebakira wamu ne bajjajjaabe, bassekabaka ba Isirayiri, Zekkaliya mutabani we n'amusikira okuba kabaka.

2 Bassekabaka 15

Azaliya Kabaka wa Yuda

¹ Mu mwaka ogw'amakumi abiri mu omusanvu ogw'obufuzi bwa Yerobowaamu kabaka wa Isirayiri, Azaliya mutabani wa ssekabaka Amaziya n'alya obwakabaka bwa Yuda.

²Yalina emyaka kkumi na mukaaga bwe yatandika okufuga, n'afugira emyaka amakumi ataano mu ebiri mu Yerusaalemi. Erinnya lyu nnyina ye yali Yekoliya ow'e Yerusaalemi.

³Yakola ebyali ebirungi mu maaso ga MUKAMA, nga kitaawe Amaziya bwe yali akoze.

⁴Wabula ebifo ebigulumivu gye baweeranga ssaddaaka tebyaggibwawo, era abantu beeyongeranga okuweerangayo ssaddaaka n'okwoterezangayo obubaane.

⁵ Awo MUKAMA n'aleetera kabaka obulwadde n'agengewala, ennaku ze zonna okutuusa bwe yafa, era n'aggyibwako emirimu egy'obuvunaanyizibwa n'ateekebwa mu nnyumba ey'enjawulo. Azaliya n'asigira Yosamu mutabani we okuvunaanyizibwanga ensonga zonna ez'omu lubiri, era n'afuganga n'abantu ab'omu nsi.

⁶Ebyafaayo ebirala byonna ebyabaawo mu mirembe gya Azaliya, ne bye yakola byonna, tebyawandiikibwa mu kitabo eky'ebiomumirembe gya bassekabaka ba Yuda?

⁷Awo Azaliya n'afa, n'aziikibwa ku biggya bya bajjajjaabe mu kibuga kya Dawudi, Yosamu mutabani we n'amusikira okuba kabaka.

Zekkaliya Kabaka wa Isirayiri

⁸Mu mwaka ogw'amakumi asatu mu omunaana ogw'obufuzi bwa Azaliya kabaka wa Yuda, Zekkaliya mutabani wa Yerobowaamu n'alya obwakabaka bwa Isirayiri mu Samaliya, n'afugira emyezi mukaaga.

⁹N'akola ebibi mu maaso ga MUKAMA, nga bajjajjaabe bwe baakola, n'atakyuka okuva mu bibi bya Yerobowaamu mutabani wa Nebati bye yayonoonyesa Isirayiri.

¹⁰Awo Sallumu mutabani wa Yabesi, n'asala olukwe n'amuttira mu lujjudde lw'abantu, era n'alya obwakabaka.

¹¹Ebyafaayo ebirala ebyabaawo mu mirembe gya Zekkaliya, byawandiikibwa mu kitabo eky'ebiomumirembe gya bassekabaka ba Isirayiri.

¹²Awo ekigambo MUKAMA kye yagamba Yeeku ne kituukirira, era kyali kigamba nti, "Bazzukulu bo balirya obwakabaka bwa Isirayiri okutuusa ku muzzukulu owookuna."

¹³Awo Sallumu mutabani wa Yabesi n'atandika okufuga mu mwaka ogw'amakumi asatu mu mwenda ogw'obufuzi bwa Uzziya kabaka wa Yuda, era n'afugira omwezi gumu mu Samaliya.

¹⁴Menakemu mutabani wa Gaadi n'ava e Tiruza n'agenda okulumba Sallumu mutabani wa Yabesi e Samaliya, era n'amutta. Ye n'afuuka kabaka mu kifo kye.

¹⁵Ebyafaayo ebirala ebyabaawo mu mirembe gya Sallumu, n'olukwe lwe yasala, byawandiikibwa mu kitabo eky'ebiomumirembe gya bassekabaka ba Isirayiri.

¹⁶Mu kiseera ekkyo Menakemu n'alumba Tifusa n'azikiriza buli muntu eyalimu, na buli kintu ekyali kikirinaanye ng'atandikira ku nsalo yaakyo ne Tiruza, kubanga tebaamwaniriza. Abakyala abaali embuto nabo n'abatta ng'ababaaga.

Menakemu Kabaka wa Isirayiri

¹⁷Mu mwaka ogw'amakumi asatu mu mwenda ogw'obufuzi bwa Azaliya kabaka wa Yuda, Menakemu mutabani wa Gaadi n'alya obwakabaka bwa Isirayiri, era n'afugira emyaka kkumi mu Samaliya.

¹⁸Yakola ebibi mu maaso ga MUKAMA, era ebbanga lyonna we yabeerera kabaka, n'atakyuka kuleka bibi bya Yerobowaamu mutabani wa Nebati bye yayonoonyesa Isirayiri.

¹⁹Awo Puli kabaka w'e Bwasuli n'alumba Isirayiri, naye Menakemu n'amusuubiza okumuwa ttani amakumi asatu mu nnya eza ffeeza ng'amusaba okumuwanirira n'okumunyweza ku ntebe ey'obwakabaka.

²⁰Menakemu n'asoloozanga ensimbi ku Bayisirayiri, buli musajja omugagga ng'awaayo gulaamu desimoolo mukaaga eza ffeeza, okuwa kabaka w'e Bwasuli. Awo kabaka w'e Bwasuli n'abaviira mu nsi yaabwe.

²¹Ebyafaayo ebirala ebyabaawo mu mirembe gya Menakemu, ne bye yakola byonna, tebyawandiikibwa mu kitabo eky'ebiomumirembe gya bassekabaka ba Isirayiri?

²²Menakemu n'afa, Pekakiya mutabani we n'amusikira okuba kabaka.

Pekakiya Kabaka wa Isirayiri

²³Mu mwaka ogw'amakumi ataano ogw'obufuzi bwa Azaliya kabaka wa Yuda, Pekakiya mutabani wa Menakemu n'alya obwakabaka bwa Isirayiri mu Samaliya, era n'afugira emyaka ebiri.

²⁴Yakola ebibi mu maaso ga MUKAMA, n'atakyuka kuleka bibi bya Yerobowaamu mutabani wa Nebati bye yayonoonyesa Isirayiri.

²⁵Awo omu ku baserkale be abakulu nga mukulu wa kibinja erinnya lye Peka mutabani wa Lemaliya, ne yeekobaana n'abasajja abalala amakumi ataano Abagireyaadi ne battira Pekakiya wamu ne Alugobu, ne Aliye mu kigo eky'omu lubiri e Samaliya. Peka n'atta Pekakiya, n'alya obwakabaka.

²⁶Ebyafaayo ebirala ebyabaawo mu mirembe gya Pekakiya, ne bye yakola byonna, byawandiikibwa mu kitabo eky'ebiomumirembe gya bassekabaka ba Isirayiri.

Peka Kabaka wa Isirayiri

²⁷Mu mwaka ogw'amakumi ataano mu ebiri ogw'obufuzi bwa Azaliya kabaka wa Yuda, Peka mutabani wa Lemaliya n'alya obwakabaka bwa Isirayiri mu Samaliya, era n'afugira emyaka amakumi abiri.

²⁸Yakola ebibi bya Yerobowaamu mutabani wa Nebati bye yayonoonyesa Isirayiri.

²⁹Mu biro bya Peka kabaka wa Isirayiri, Tigulasupireseri kabaka w'e Bwasuli n'alumba ebibuga: by'e Iyon, n'e Aberubesumaaka, n'e Yanoa, n'e Kedes, n'e Kazoli, n'e Gireyaadi n'e Ggaliraaya, n'ensi yonna eya Nafutaali, abantu baayo n'abatwala nga basibe e Bwasuli.

³⁰Awo Koseya mutabani wa Era n'asala olukwe okutta Peka mutabani wa Lemaliya, n'amulumba era n'amutta, n'alya obwakabaka mu mwaka ogw'amakumi abiri ogw'obwakabaka bwa Yosamu mutabani wa Uzziya.

³¹Ebyafaayo ebirala ebyabaawo mu mirembe gya Peka, ne bye yakola byonna byawandiikibwa mu kitabo eky'ebiomumirembe gya bassekabaka ba Isirayiri.

Yosamu Kabaka wa Yuda

³²Mu mwaka ogwokubiri ogw'obufuzi bwa Peka mutabani wa Lemaliya, Yosamu mutabani wa Uzziya n'alya obwakabaka bwa Yuda.

³³Yali wa myaka amakumi abiri mu etaano we yatandikira okufuga, era n'afugira emyaka kkumi na mukaaga mu Yerusaalemi, ne nnyina erinnya lye nga ye Yerusa muwala wa Zadooki.

³⁴N'akola ebirungi mu maaso ga MUKAMA, nga kitaawe Uzziya bwe yakola.

³⁵Naye ebifo ebigulumivu tebyaggibwawo, era abantu ne beeyongeranga okuweerangayo ssaddaaka n'okwoterezangako obubaane. Yaddaabiriza n'Omulyango ogw'ekyengulu ogwa yeekaalu ya MUKAMA.

³⁶Ebyafaayo ebirala ebyabaawo mu mirembe gya Yosamu, ne bye yakola byonna, tebyawandiikibwa mu kitabo eky'ebiomumirembe gya bassekabaka ba Yuda?

³⁷Mu biro ebyo MUKAMA n'atandika okusindikira Yuda abalabe nga Lezini kabaka w'e Busuuli ne Peka mutabani wa Lemaliya.

³⁸Yosamu n'afa, n'aziikibwa ku biggya bya bajjajaabe mu kibuga kya Dawudi jjajjaawe, Akazi mutabani we n'amusikira okuba kabaka.

2 Bassekabaka 16

Akazi Kabaka wa Yuda

¹Mu mwaka ogw'ekkumi n'omusanvu ogw'obufuzi bwa Peka mutabani wa Lemaliya, Akazi mutabani wa Yosamu kabaka wa Yuda, n'atandika okufuga.

²Akazi yali wa myaka amakumi abiri we yatandikira okufuga, era n'afugira emyaka kkumi na mukaaga mu Yerusaalemi. N'akola ebibi mu maaso ga MUKAMA Katonda we, obutafaanana nga jjajjaawe Dawudi.

³N'atambulira mu ngeri za bassekabaka ba Isirayiri, era n'okuwaayo n'awaayo mutabani we ng'ekiweebwayo, ng'agoberera eby'emizizo eby'amawanga MUKAMA ge yali agobye mu maaso g'Abayisirayiri.

⁴N'awangayo ssaddaaka, era n'ayoterezanga n'obubaane ku bifo ebigulumivu, ku nsozi waggulu, ne wansi wa buli muti.

⁵Lezini kabaka wa Busuuli ne Peka, mutabani wa Lemaliya kabaka wa Isirayiri ne bambuka okulumba Yerusaalemi ne bazingiza Akazi, naye ne batayinza kumuwangula.

⁶Mu kiseera kye kimu, Lezini kabaka wa Busuuli n'agoba abasajja ba Yuda okuva mu Erasi n'akiddiza Abasuuli, era gye babeera ne leero.

⁷Awo Akazi n'atuma ababaka eri Tigulasupireseri kabaka w'e Bwasuli, okumugamba nti, "Ndi muddu wo era mutabani wo, nkwegayiridde jjangu ondokole okuva mu mukono gwa kabaka wa Busuuli; n'okuva mu mukono gwa kabaka wa Isirayiri abannumbye."

⁸Akazi n'aggya effeeza ne zaabu ebyabeeranga mu yeekaalu ya MUKAMA, ne mu mawanika ag'omu lubiri lwa kabaka, n'agiweereza ng'ekirabo eri kabaka w'e Bwasuli.

⁹Awo kabaka w'e Bwasuli n'awulira okwegayirira kwe, n'alumba Ddamasiko, n'akiwamba, n'abantu abaabeerangamu n'abawereza mu buwanjanguse e Kiri, era n'okutta n'atta Lezini.

¹⁰Awo kabaka Akazi n'agenda e Ddamasiko okusisinkana Tigulasupireseri kabaka w'e Bwasuli, era eyo n'alabayo ekyoto ekyali mu Ddamasiko. Amangwago kabaka Akazi n'aweereza Uliya kabona ekifaananyi ky'ekyoto ekyo, n'engeri gye kiteekwa okuzimbibwa.

¹¹Awo Uliya kabona n'azimba ekyoto, ng'ebiragiro bya kabaka Akazi bye yaweereza okuva e Ddamasiko bwe byali, era n'agimaliriza nga kabaka Akazi tannava Ddamasiko.

¹²Kabaka bwe yakomawo okuva e Ddamasiko, n'alaba ekyoto, n'akisemberera era ku kyo n'aweerako ssaddaaka.

¹³N'aweerayo ssaddaaka ey'ekyokebwa ne ssaddaaka ey'obutta n'ayiwako ne ssaddaaka ey'ekyokunywa, era n'amansirako omusaayi ogw'ebiweebwayo olw'emirembe ku kyoto.

¹⁴N'aggyawo ekyoto eky'ekikomo ekyabeeranga mu maaso ga MUKAMA mu yeekaalu wakati w'ekyoto kye ne yeekaalu ya MUKAMA, n'akiteeka ku luuyi olw'obukiikaddyo obw'ekyoto kye.

¹⁵Awo kabaka Akazi n'alagira Uliya kabona nti, "Ku kyoto ekinene, weerayo ekiweebwayo ekyokebwa eky'enkyo n'ekiweebwayo eky'obutta eky'akawungeezi, eky'okuwaayo ekyokebwa ekya kabaka, n'ekyokuwaayo kye eky'obutta, n'ekyokuwaayo ekyokebwa eky'abantu ab'omu nsi, n'ekiweebwayo kyabwe eky'obutta, n'ekiweebwayo kyabwe ekyokunywa. Omansire ku kyoto omusaayi gwonna ogw'ebiweebwayo ebyokebwa, n'omusaayi gwonna ogwa ssaddaaka. Wabula ekyoto eky'ekikomo kinaabeeranga kyange nga kya kwebuuzaako."

¹⁶Uliya kabona n'akola byonna, nga kabaka Akazi bwe yamulagira.

¹⁷Kabaka Akazi n'atemako emigo gye biyimirirwako, ne bensani n'aziggya kwe zaabeeranga, ate n'aggya n'enyanja okuva ku nte ennume ez'ekikomo, eza giwaniriranga, n'agiteeka ku mayinja amaliire.

¹⁸N'aggyawo n'ekyabikkanga ku kkubo erya ssabbiiti eryali lizimbiddwa okumpi ne yeekaalu, ate era n'aggyawo n'ekkubo erya kabaka ery'ebweru wa yeekaalu ya MUKAMA, olwa kabaka w'e Bwasuli.

¹⁹Ebyafaayo ebirala ebyabaawo mu bufuzi Akazi, ne bye yakola, tebyawandiikibwa mu kitabo eky'ebiomumirembe gya bassekabaka ba Yuda?

²⁰Awo Akazi n'afa n'aziikibwa ku biggya bya bajjajaabe mu kibuga kya Dawudi. Keezeekiya mutabani we n'amusikira okuba kabaka.

2 Bassekabaka 17

Koseya, Kabaka eyasembayo owa Isirayiri

¹Mu mwaka ogw'ekkumi n'ebiri ogw'obufuzi bwa Akazi kabaka wa Yuda, Koseya mutabani wa Era n'afuuka kabaka wa Isirayiri mu Samaliya, n'afugira emyaka mwenda.

²N'akola ebibi mu maaso ga MUKAMA, naye tebyenkana nga bassekabaka ba Isirayiri bye baakola.

³Salumaneseri kabaka w'e Bwasuli n'amulumba, Koseya n'afuuka muddu we era n'amuwanga obusuulu.

⁴Naye oluvannyuma kabaka w'e Bwasuli n'akizuula nga Koseya yali amuliddemu olukwe, kubanga yali atumye ababaka ewa So kabaka w'e Misiri, ate nga takyaweereza busuulu ewa kabaka w'e Bwasuli, nga bwe yakolanga buli mwaka. Salumaneseri kyeyava amukwata n'amuteeka mu kkomera.

⁵Awo kabaka w'e Bwasuli n'alumba ensi yonna, n'atuuka e Samaliya, n'akizingiriza emyaka esatu.

⁶Mu mwaka ogw'omwenda ogwa Koseya, kabaka w'e Bwasuli n'awamba Samaliya, n'atwala Abayisirayiri mu buwanjjanguse e Bwasuli, n'abateeka mu Kala, ne mu Kaboli ku mugga ogw'e Gozani, ne mu bibuga eby'Abameedi.

Isirayiri Batwalibwa mu Buwanjjanguse olw'Eki

⁷Bino byonna byabaawo kubanga Abayisirayiri bayonoona mu maaso ga MUKAMA Katonda waabwe, eyali abaggye mu Misiri okuva mu mukono gwa Falaawo, ye kabaka w'e Misiri. Baasinzanga bakatonda abalala,

⁸ne bagobereranga empisa za baamawanga MUKAMA ge yali agobye mu maaso gaabwe. Era bagobereranga n'emizizo bassekabaka ba Isirayiri gye baali bataddewo.

⁹Abayisirayiri ne bakolanga mu nkizo ebyo ebitaali birungi mu maaso ga MUKAMA. Ne bazimba ebifo ebigulumivu mu bibuga byabwe byonna, okuvira ddala ku minaala omwabeeranga abakuumi okutuuka ku kibuga ekiriko bbugwe.

¹⁰Ne beesimbira empagi ez'amayinja n'eza Baasera, ku buli kasozi akawanvu, ne wansi wa buli muti.

¹¹Ne bookera obubaane ku buli kifo ekigulumivu ng'amawanga gali MUKAMA ge yali agobye mu maaso gaabwe bwe gaakolanga. Ne bakola ebintu eby'ekivve ne basunguwaza MUKAMA.

¹²Ne basinza ebifaananyi, ate nga MUKAMA yali abalagidde nti, "Temukolanga ekyo."

¹³MUKAMA n'alabula Isirayiri ne Yuda ng'akozesa bannabbi n'abalabi nti, "Mukyuke muve mu bibi byammwe, mukuumi amateeka gange n'ebiragiro byange, ng'etteeka bwe liri lye nalagira bajjajjammwe, lye nabaweeereza nga nkозesa abaddu bange bannabbi."

¹⁴Naye ne batawuliriza, ne baba bakakanyavu nga bajjajaabwe bwe baali, abateesiga MUKAMA Katonda waabwe.

¹⁵Ne banyooma ebiragiro n'endagaano gye yali akoze ne bajjajaabwe, n'okulabula kwe yali abawadde. Ne bagoberera bakatonda abataliimu, ate nabo ne bafuuka ebitagasa. Ne bakola ng'amawanga agaali gabeetoolodde bwe gaakolanga, newaakubadde nga MUKAMA yali abalabudde nti, "Temukolanga ebyo bye bakola." Ne bakola byonna MUKAMA bye yali abagaanye okukola.

¹⁶Ne bava ku mateeka ga MUKAMA Katonda waabwe gonna, ne baweesa ebifaananyi by'ennyana bibiri, n'empagi ey'Asera, ne basinza n'eggye lyonna ery'omu ggulu era ne basinzanga ne Baali.

¹⁷Ne bawaayo abaana baabwe aboobulenzi n'aboobuwala ng'ebiweebwayo mu muliro, ne bakola eby'obufumu n'eb'yobulogo, ne beetunda okukola ebibi mu maaso ga MUKAMA, okumusunguwaza.

¹⁸MUKAMA kyeyava asunguwalira ennyo Isirayiri, n'abagoba mu maaso ge, n'alekawo ekika kya Yuda kyokka.

¹⁹Kyokka ne Yuda ne batakuuma mateeka ga MUKAMA Katonda waabwe, naye ne bagoberera empisa za Isirayiri.

²⁰MUKAMA kyeyava aleka ezzadde lyonna erya Isirayiri, n'ababonereza, n'abawaayo mu mikono gy'abanyazi, n'okubagoba n'abagobera ddala okuva mu maaso ge.

²¹Bwe yayawula Isirayiri ku nnyumba ya Dawudi, ne bafuula Yerobowaamu mutabani wa Nebati kabaka waabwe. Yerobowaamu n'aleetera Isirayiri okuviiira ddala ku mukama, n'abayonoonyesa n'okusingawo.

²²Abaana ba Isirayiri ne batambulira mu bibi byonna Yerobowaamu bye yakola, ne batabirekaayo,

²³okutuusa MUKAMA lwe yabaggyira ddala okuva mu maaso ge, nga bwe yali abalabudde ng'ayita mu baddu be bannabbi. Awo Abayisirayiri ne batwalibwa mu buwañjanguse mu nsi eya Bwasuli, gye bali ne kaakano.

Abayisirayiri Babeera awamu n'Abasuuli

²⁴Awo kabaka w'e Bwasuli n'akuñjaanya abantu okuva e Babulooni, Kusa, Ava, Kamasi ne Sefavayimu, n'abaleeta mu bibuga bya Samaliya, Abayisirayiri mwe baabeeranga, Samaliya ne bakiwalira ddala era ne babeera mu bibuga byakyo.

²⁵Ku ntandikwa bwe babeeramu ne batasinza MUKAMA, kyeyava abasindikira empologoma ne zitta abamu ku bo.

²⁶Kabaka w'e Bwasuli n'ategeezewa nti, "Amawanga ge watwala n'obateeka mu bibuga bya Samaliya tebamanyi tteeka lya Katonda w'ensi eyo, kyeyavudde abasindikira empologoma okubatta, kubanga tebamanyi Katonda w'ensi kye yeetaaga."

²⁷Amangwago kabaka w'e Bwasuli n'alagira nti, "Mutumeyo omu ku bakabona be mwawamba okuva mu Samaliya agende abeere eyo, ayigirize abantu amateeka ga Katonda w'ensi eyo."

²⁸Awo omu ku bakabona eyali awanjangusibbwा okuva mu Samaliya n'agenda n'abeera e Beseri, n'abayigiriza bwe kibagwanira okusinza MUKAMA.

²⁹Newaakubadde nga kabona yagendayo, buli ggwanga beekolera bakatonda baabwe, ne babateeka mu masabo Abasamaliya ge baali bazimbye ku bifo ebigulumivu mu bibuga byabwe.

³⁰Abasajja ab'e Babulooni ne bakola Sukkosubenosi, abasajja ab'e Kuusi ne bakola Nengali, abasajja ab'e Kamasi ne bakola Asima:

³¹Abavi ne bakola Nibukazi ne Talutaki, Abasefavayimu ne bookera abaana baabwe mu muliro, nga babawaayo ng'ebiweebwayo eri Adulammerekı ne Anammerekı, bakatonda ba Sefavayimu.

³²Baasinzanga MUKAMA, naye ne balonda n'abantu ab'engeri zonna okuva mu bokka ne bokka okuba bakabona, ab'ebifo ebigulumivu, abaabaweerangayo ssaddaaka mu masabo ag'ebifo ebigulumivu.

³³Ne basinzanga MUKAMA, naye nga bwe baweereza ne bakatonda baabwe, ng'empisa ez'amawanga gye baali bavudde bwe zalinga.

³⁴Ne leero bakyeyisa mu ngeri y'emu. Tebasinza MUKAMA so tebagoberera biragiro n'amateeka MUKAMA bye yalagira bazzukulu ba Yakobo, gwe yatumma Isirayiri.

³⁵MUKAMA bwe yakola endagaano n'Abayisirayiri, yabalagira nti, "Temusinzanga bakatonda balala, so temubavuunamiranga so temubaweerezanga, wadde okuwaayo ssaddaaka gye bali.

³⁶Mwekuumenga okugobereranga ebiragiro n'amateeka, n'etteeka, n'ekiragiro bye yabawandiikira. Temusinzanga bakatonda abalala.

³⁷Naye musinzanga MUKAMA eyabaggya mu Misiri n'amaanyi amangi n'omukono gwe, gwe yagolola. Oyo ggwe munavuunamiranga era ne muwaayo ssaddaaka eri ye.

³⁸Temwerabiranga endagaano gye nakola nammwe, era temusinzanga bakatonda abalala.

³⁹Wabula musinzanga MUKAMA Katonda wammwe, kubanga y'anaabalokolanga mu mukono gw'abalabe bammwe bona."

⁴⁰Naye ne batawuliriza, ne beeyongeranga mu mpisa zaabwe ez'edda.

⁴¹Newaakubadde ng'amawanga ago baasinzanga MUKAMA, kyokka beeyongeranga okusinza bakatonda baabwe. Ne leero abaana baabwe ne bazzukulu baabwe bakola nga bajajjaabwe bwe baakolanga.

2 Bassekabaka 18

Keezeekiya Kabaka wa Yuda

¹Mu mwaka ogwokusatu ogw'obufuzi bwa Koseya mutabani wa Era kabaka wa Isirayiri, Keezeekiya mutabani wa Akazi kabaka wa Yuda, n'atandika okufuga.

²Yali wa myaka amakumi abiri mu etaano, we yatandikira okufuga, n'afugira emyaka amakumi abiri mu mwenda mu Yerusaalemi, n'erinnya lya nnyina ye yali Abi muwala wa Zekkaliya.

³N'akola ebirungi mu maaso ga MUKAMA nga jjajjaawe Dawudi bwe yakola.

⁴N'aggyawo ebifo ebigulumivu n'amenyaamenya amayinja amoole, n'atema n'empagi eza Baasera. N'amenyaamenya omusota ogw'ekikomo Musa gwe yakola, kubanga ne mu biro ebyo Abayisirayiri baagwoterezangako obubaane.

⁵Keezeekiya yeesiga MUKAMA, Katonda wa Isirayiri, ne wataba n'omu eyamwenkana ku bakabaka bona aba Yuda mu abo abaamusooka ne mu abo abamuddirira.

⁶N'anywerera ku MUKAMA, n'ataleka kumugoberera, era n'akuuma n'amateeka MUKAMA ge yawa Musa.

⁷MUKAMA n'abeera wamu naye, era n'abeera n'omukisa mu buli kye yakolanga. N'agyemera kabaka w'e Bwasuli, n'agaana okumuweereza.

⁸N'awangula Abafirisuuti, mu buli kigo na buli kibuga ekyaliko bbugwe, okuva e Gaza n'okutuuka ku nsalo zaakyo.

⁹Mu mwaka ogwokuna ogw'obufuzi bwa Keezeekiya, ate nga gwe mwaka ogw'omusanvu ogw'obufuzi bwa Koseya mutabani wa Era, kabaka wa Isirayiri, Salumaneseri kabaka w'e Bwasuli n'alumba Samaliya n'akizingiza.

¹⁰Bwe wayitawo emyaka esatu, mu mwaka ogw'omukaga ogw'obufuzi bwa Keezeekiya, ate nga gwe mwaka ogw'omwenda ogwa Koseya kabaka wa Isirayiri, Samaliya ne kiwambibwa.

¹¹Kabaka w'e Bwasuli n'atwala Abayisirayiri e Bwasuli mu buwanjanguse, n'abateeka mu Kala, ne mu Kaboli ku mugga gw'e Gozani ne mu bibuga by'Abameedi,

¹²kubanga tebagondera ddoboozi lya MUKAMA Katonda waabwe, naye baasobya endagaano ye, n'ebyo byonna Musa omuddu wa Katonda bye yalagira. Naye ne batabiwulirizza wadde okubigondera.

¹³Awo mu mwaka ogw'ekkumi n'ena ogw'obufuzi bwa kabaka Keezeekiya, Sennakeribu kabaka w'e Bwasuli n'alumba ebibuga byonna ebyaliko bbugwe ebya Yuda, n'abiwamba.

¹⁴Awo Keezeekiya kabaka wa Yuda n'aweereza obubaka eri kabaka w'e Bwasuli e Lakisi ng'agamba nti, "Nnyonoonye mu maaso go; ddayo ondeke. Nnaakusasula byonna by'ononsalira." Kabaka w'e Bwasuli n'awooza ku Keezeekiya kabaka wa Yuda ttani kkumi eza ffeeza ne ttani emu eya zaabu.

¹⁵Keezeekiya n'amuwa ffeeza yonna eyali mu yeekaalu ya MUKAMA n'eyo eyali mu mawanika ag'omu lubiri.

¹⁶Mu kiseera ekkyo Keezeekiya kabaka wa Yuda n'aggyako zaabu gwe yali atadde ku nzigi ne ku minyolo egya yeekaalu ya MUKAMA, n'amuwa kabaka w'e Bwasuli.

Sennakeribu Atiisatiisa Yerusaalemi

¹⁷Kabaka w'e Bwasuli n'atuma Talutani, omuduumizi we ow'oku ntikko, Labusalisi, omukulu wa bakungu, ne Labusake omuduumizi we alwanira ku ttale n'eggye eddene, okuva e Lakisi okugenda ewa kabaka Keezeekiya e Yerusaalemi. Ne batuuka e Yerusaalemi, ne bakoma awali olusalosalo olw'ekidiba eky'engulu ekiri ku kkubo ery'Ennimozi ey'Omwozi w'Engoye.

¹⁸Awo ne bayita kabaka, naye Eriyakimu mutabani wa Kirukiya eyali ssabakaaki, Sebuna omuwandiisi ne Yowa mutabani wa Asafu omujukiza ne baganda gye bali.

¹⁹Awo Labusake n'abagamba nti, "Mutegeze Keezeekiya nti, "'Bw'ati bw'ayogera kabaka omukulu, kabaka w'e Bwasuli nti, Kiki kye weesiga?

²⁰Olowooza nti ebigambo obugambo, kakoddyo akalaga amaanyi n'obuvumu mu kulwana? Ani gwe weesiga, n'okujeema n'onjeemera?

²¹Laba nno, weesize Misiri, olumuli olwo olwatifu, oluyinza okufumita omukono gw'omuntu ne lumuleetako ekiwundu. Bw'atyo bw'ali Falaawo, ye kabaka w'e Misiri eri abo bona abamwesiga.

²²Ate era bw'oñjamba nti, "Twesize MUKAMA Katonda waffe," oyo si y'omu Keezeekiya gwe yaggyirawo ebifo ebigulumivu n'ebyoto, ng'agamba Yuda ne Yerusaalemi nti, "Munaasinizizanga mu maaso g'ekyoto kino mu Yerusaalemi"?

²³"Kale nno, jjangu oteese ne mukama wange kabaka w'e Bwasuli, nange n'akuwa embalaasi enkumi bbiri bw'onooba ng'olina abeebagazi.

²⁴Onooyinza otya okuwangula omu ku baserikale ba mukama wange asembayo, bw'onooba nga weesiga amagaali n'abeebagala embalaasi ab'e Misiri?

²⁵Olowooza nti nnyinza okujja okutabaala ekifo kino n'okukizikiriza awatali kigambo kya MUKAMA? MUKAMA yennyini yanjambye nyambuke nzikirize ensi eno."

²⁶ Awo Eriyakimu mutabani wa Kirukiya, Sebuna ne Yowa ne bagamba Labusake nti, "Tukwegayiridde yogera eri abaddu bo mu lulimi Olusuuli, kubanga tulutegeera. Toyogera naffe mu lulimi olw'Abayudaaya ng'abantu bona abali ku bbugwe bawuliriza."

²⁷ Naye Labusake n'abaddamu nti, "Mulowooza nti mukama wange yantuma eri mukama wammwe n'eri mmwe okwogera ebigambo bino, so si eri abasajja abatudde ku bbugwe, abali mu kabi nammwe kubanga okufaanana nga mmwe bagenda kulya empitambi yaabwe n'okunywa omusulo gwabwe?"

²⁸ Awo Labusake n'ayimirira n'akoowoola mu ddoboozi ery'omwanguka mu lulimi olw'Abayudaaya nti, "Muwulire ekigambo kya kabaka omukulu, kabaka w'e Bwasuli!"

²⁹ Bw'ati bw'ayogera kabaka nti, 'Keezeekiya tabalimbanga, kubanga taliyinza kubalokola mu mukono gwange.

³⁰ Temuganya Keezeekiya kubasendasenda mwesige MUKAMA ng'agamba nti, MUKAMA alibalokola, era n'ekibuga kino tekiriweebwayo mu mukono gwa kabaka w'e Bwasuli.'

³¹ "Temuwuliriza Keezeekiya. Bw'ati bw'ayogera kabaka w'e Bwasuli nti, 'Mutabagane nange mujje gye ndi, buli omu ku mmwe anywe okuva mu muzabbibu ggwe, buli muntu ku mutiini gwe, na buli muntu anywe amazzi ag'omu kidiba kye ye;

³² okutuusa lwe ndija ne mbatwala mu nsi efaanana ensi yammwe, ensi ey'enjaano n'omwenge omusu, ensi ey'emigaati n'ennimiro ez'emizabbibu, ensi ey'amafuta aga zeyituuni n'omubisi gw'enjuki, mube balamu muleme okufa.' "Temuwuliriza Keezeekiya kubanga abawabya bw'agamba nti, 'MUKAMA alibalokola.'

³³ Waliwo katonda n'omu owa baamawanga eyali alokodde ensi ye mu mukono gwa kabaka w'e Bwasuli?

³⁴ Bali ludda wa bakatonda b'e Kamasi n'ab'e Alupadi? Bali ludda wa bakatonda b'e Sefavayimu, ab'e Kena n'ab'e Yiva? Baali balokodde Samaliya mu mukono gwange?

³⁵ Ani ku bakatonda abo bona ab'ensi ezo eyali alokodde ensi ye mu mukono gwange, mulyoke mulowooze nti MUKAMA alirokola Yerusaalemi mu mukono gwange?"

³⁶ Naye abantu ne basirika ne bataddamu kigambo na kimu, kubanga kabaka yali alagidde nti, "Temumuddamu."

³⁷ Awo Eriyakimu mutabani wa Kirukiya, eyali ssabakaaki, ne Sebuna omuwandiisi ne Yowa mutabani wa Asafu omujjukiza ne bagenda eri

Keezeekiya nga bayuzizza engoye zaabwe, ne bamutegeeza ebigambo Labusake bye yali ayogedde.

2 Bassekabaka 19

Okulokolebwa Kwa Yerusaalemi Kutegeezebwa

¹ Kabaka Keezeekiya olwawulira ebyo byonna, n'ayuza ebyambalo bye, n'ayambala ebibukutu, n'alaga mu yeekaalu ya MUKAMA.

² N'atuma Eriyakimu eyali ssabakaaki, ne Sebuna omuwandiisi ne bakabona ab'oku ntokko, nga bona bambadde ebibukutu, okugenda eri Isaaya nnabbi mutabani wa Amozi.

³ Ne bamugamba nti, "Bw'ati bw'ayogera Keezeekiya nti Leero lunaku lwa buyinike, era lwa kunenyezebwa, era lwa kuswazibwa, ng'abaana bwe batuuka okuzaalibwa, naye ne wataba maanyi ga ku bazaala.

⁴ Kiyinzika okuba nga MUKAMA Katonda wo yawulidde obubaka bwonna obwa Labusake, mukama we kabaka w'e Bwasuli bwe yaweereza ng'anyooma Katonda omulamu, era nti amunenye olw'ebigambo byonna MUKAMA Katonda wo by'awulidde. Noolwekyo ssabira ekitundu ekikyasigaddewo."

⁵ Awo abakungu ba Kabaka Keezeekiya bwe baatuuka eri Isaaya,

⁶ Isaaya n'abagamba nti, "Mutegeeze mukama wammwe nti, 'Bw'ati bw'ayogera MUKAMA nti, Ebigambo by'owulidde, abaddu ba kabaka w'e Bwasuli bye banvumye, tebikutiisa.

⁷ Wuliriza! Nzija kumuteekamu omwoyo, awulire olugambo ku bikwata ku nsi ye addeyo mu nsi ye, era gye ndimuzikiririza n'ekitala.' "

⁸ Labusake bwe yawulira nti kabaka w'e Bwasuli avudde mu Lakisi, n'avaayo, n'asanga kabaka ng'alwana ne Libuna.

⁹ Awo Sennakeribu n'afuna obubaka obukwata ku Tiraka kabaka w'e Esiyopya nti, "Laba amaliridde okulwana naawe," era n'addamu n'atuma ababaka eri Keezeekiya ng'agamba nti,

¹⁰ "Bwe muti bwe munagamba Keezeekiya kabaka wa Yuda nti, 'Tokkiriza Katonda wo gwe weesiga kukulimalimbwa ng'akusuubiza nti Yerusaalemi teriweebwayo mu mukono gwa kabaka w'e Bwasuli.'

¹¹ Ekyamazima wawulira bakabaka b'e Bwasuli kye bakoze amawanga gonna, nga bagasaanyaizaawo ddala. Olowooza nti olirokolebwa?

¹² Bakatonda baamawanga ag'e Gozani, n'e Kalani, n'e Lezefu, n'abantu ba Adeni abaali mu Terasali, abasaanyizibwawo bajajjange, babalokola?

¹³Kabaka w'e Kamasi, kabaka w'e Alupadi, kabaka w'ekibuga kya Sefavayimu, oba kabaka w'e Kena oba kabaka w'e Yiva, bali ludda wa?"

Okusaba kwa Keezeekiya

¹⁴Keezeekiya n'afuna ebbaluwa eyaleetebwa ababaka, n'agisoma. N'ayambuka n'agenda mu yeekaalu ya MUKAMA, n'agyanjuluza mu maaso ga MUKAMA.

¹⁵Keezeekiya n'asaba eri MUKAMA ng'agamba nti, "Ayi MUKAMA Katonda wa Isirayiri, atuula waggulu ku bakerubi, ggwe wekka, ggwe Katonda ow'obwakabaka bwonna obw'ensi, era ggwe wakola eggulu n'ensi.

¹⁶Otege okutu kwo, Ayi MUKAMA, owulire; ozibule amaaso go Ayi MUKAMA, olabe; owulire ebigambo bya Sennakeribu, byayogedde ng'avvoola Katonda omulamu.

¹⁷"Kya mazima, Ayi MUKAMA, nti bakabaka b'e Bwasuli baazikiriza amawanga n'ensi zaabwe,

¹⁸ne basuula bakatonda baabwe mu muliro. Naye abo tebaali Katonda, baali mirimu gy'emikono gy'abantu, nga mbaawo n'amayinja, era kyebaava bazikirizibwa.

¹⁹Kaakano, Ayi MUKAMA, Katonda waffe, tukwegayiridde, otulokole mu mukono gwe, amawanga gonna ku nsi gamanye nga ggwe, Ayi MUKAMA, gwe Katonda wekka."

Isaaya Ayogera Ebyobunnabbi ku kugwa kwa Sennakeribu

²⁰Awo Isaaya mutabani wa Amozi n'aweereza Keezeekiya obubaka nti: "Bw'ati bw'ayogera MUKAMA, Katonda wa Isirayiri nti, Mpulidde okusaba kwo ku bikwata ku Sennakeribu kabaka w'e Bwasuli.

²¹Kino kye kigambo MUKAMA ky'ayogedde ku bimukwatako: "'Omuwala wa Sayuuni embeerera akunyooma era akusekerera. Omuwala wa Yerusaalemi akunyeenyeza omutwe gwe nga bw'odduka.

²²Ani gw'ovumye era n'ovvoola? Ani gw'okandulidde eddoboozi lyo, era ani gw'oyimusirizza amaaso go n'amalala? Obikoze Omutukuvu wa Isirayiri!

²³Ojereze Mukama ng'oyita mu babaka bo. Era ogambye nti, "Nninye ku ntikko z'ensozi n'amagaali gange amangi, ku ntikko ezisingirayo ddala obuwanvu eza Lebanooni. Ntemye emivule egisingirayo ddala obuwanvu n'emiberosi gyayo egisingirayo ddala obulungi. Ntuuse ne mu bifo ebisingirayo ddala okuba ebikusike ne mu bibira ebisingirayo ddala okuba ebirungi.

²⁴Nsimye enzizi mu bannamawanga, n'enya amazzi gaamu. Nkazizza emigga egy'e Misiri gyonna, nga ngirinnyirira n'ebisinziiro by'ebigere byange."

²⁵"Tewawulira nga nakisalawo dda? Mu biro eby'edda nakiteekateeka, era kaakano nkituukirizza, olyoke ofuule ebibuga ebiriko bbugwe okuba ng'entuumo y'amayinja.

²⁶ Ababituulamu tebakyalina buyinza, batekemuse era baswazibbwa. Bafaanana ng'ebimera eby'omu nnimiro, ng'omuddo omubisi, ng'omuddo ogusibuse mu busolya bw'ennyumba, ne gutugibwa nga tegunnakula.

²⁷ “Naye mmanyi obutuuliro bwo era mmanyi okufuluma kwo n'okuyingira kwo n'obuswandi bw'ondaga.

²⁸ Kubanga ondaze obuswandi bwo, n'obujoozi bwo ne mbuwulira mu matu gange, kyendiva nteeka eddobo lyange mu nnyindo yo n'olukoba lwange mu mumwa gwo, era oliddirayo mu kkubo lye wajjiramu.’

²⁹ “Era kano ke kanaaba akabonero ko, ggwe Keezeekiya. “Omwaka guno olirya ekkyo ekimera kyokka, ne mu mwaka ogwokubiri ekiriva mw'ekkyo. Naye mu mwaka ogwokusatu siga era okungule; era simba ennimiro ez'emizabbibu, olye ku bibala bya kwo.

³⁰ Ekitundu ekisigaddewo eky'ennyumba ya Isirayiri kyekiriva kiddamu ne kisimba emizi wansi, ne kibala ebibala waggulu.

³¹ Mu Yerusaalemi muliva ekitundu ekifisseewo, ne mu Lusozi Sayuuni ne muva abo abaliwona. Obuggya bwa MUKAMA ow'Eggye bulikituukiriza.

³² “Noolwekyo bw'ati bw'ayogera MUKAMA ku bikwata ku kabaka w'e Bwasuli, nti, “Kabaka oyo taliyingira mu kibuga kino, wadde okulasayo akasaale. Talikisemberera n'engabo newaakubadde okutuumako ekifunvu ng'akitaayiza.

³³ Ekkubo lye yakwata ng'ajja, omwo mw'aliddira, naye taliyingira mu kibuga kino, bw'ayogera MUKAMA.

³⁴ Ndirwanirira ekibuga kino nkirokole, ku lwange, ne ku lw'omuddu wange Dawudi.”

³⁵ Ekiro ekkyo malayika wa MUKAMA n'agenda mu nkambi ey'Abasuuli n'atta abasaja emitwalo kkumi na munaana mu enkumi ttaano. Ku makya abantu bwe baagolokoka, laba nga bona mirambo.

³⁶ Awo Sennakeribu kabaka w'e Bwasuli n'ava mu nkambi, n'addayo ewuwe, n'agenda n'abeera e Nineeve.

³⁷ Awo bwe yali ng'asinziza mu ssabo lya katonda we Nisuloki Adulammereki ne Salezeri batabani be ne bamutta n'ekitala, ne baddukira mu nsi y'e Alalati. Esaladoni mutabani we n'amusikira.

2 Bassekabaka 20

Okulwala kwa Keezeekiya

¹ Mu biro ebyo Keezeekiya n'alwala n'abulako katono okufa. Nnabbi Isaaya mutabani wa Amozi n'agenda gy'ali n'amugamba nti, “Bw'ati

bw'ayogera MUKAMA nti: Teekateeka ennyumba yo, kubanga ogenda kufa so togenda kuwona."

²Keezeekiya ne yeekyusa n'atunuulira ekisenge, ne yeegayirira MUKAMA ng'agamba nti,

³"Jjukira, Ayi MUKAMA Katonda, nga bwe ntambulidde mu maaso go mu bwesigwa n'omutima ogutuukiride, era ne nkola ebirungi mu maaso go." Keezeekiya n'akaaba nnyo.

⁴Awo Isaaya bwe yali nga tannava mu luggya olwa wakati, ekigambo kya MUKAMA ne kimujjira nti,

⁵"Ddayo ogambe Keezeekiya omukulembeze w'abantu bange nti, 'Bw'ati bw'ayogera MUKAMA, Katonda wa jjajjaawo Dawudi nti: Mpulidde okusaba kwo, era n'amaziga go ngalabye. Nzija kukuwonya. Oluvannyuma lw'ennaku ssatu onoooyambuka n'olaga mu yeekaalu ya MUKAMA.

⁶Ndikwongerako emyaka emirala kkumi n'ettaano, era laba ndikulokola ggwe n'ekibuga kino mu mukono gwa kabaka w'e Bwasuli, nga nnwanirira ekibuga kino ku lwange nze ne ku lw'omuddu wange Dawudi."

⁷Awo Isaaya n'alagira baleete ekitole ky'ettiini, ne bakisiiga ku jjute, Keezeekiya n'awona.

⁸Keezeekiya yali abuuzizza Isaaya nti, "Kabonero ki akalindaga nti MUKAMA amponyezza, era nti ndyambuka mu yeekaalu ya MUKAMA nga wayiseewo ennaku ssatu?"

⁹Isaaya n'addamu nti, "Kano ke kaliba akabonero gy'oli okuva eri MUKAMA nti ajja kutuukiriza kye yasuubiza: ekisiikirize kinaatambula mu maaso amadaala kkumi, oba kinaaddayo emabega amadaala kkumi?"

¹⁰Keezeekiya n'addamu nti, "Kintu kyangu nnyo ekisiikirize okugenda mu maaso amadaala kkumi, Noolwekyo kiddeyo emabega amadaala kkumi."

¹¹Awo Isaaya n'akoowoola erinnya lya MUKAMA, era MUKAMA n'azzaayo ekisiikirize emabega amadaala kkumi okuva ne we kyali ku madaala ga Akazi.

Obusirusiru bwa Keezeekiya

¹²Mu biro ebyo Berodakubalandani mutabani wa Baladani kabaka w'e Babulooni n'aweereza Keezeekiya ebbaluwa n'ekirabo, kubanga yawulira nti Keezeekiya yali alwadde.

¹³Keezeekiya n'ayaniriza ababaka abaleeta ebbaluwa, n'abalambuza amawanika ge gonna omwali eby'omuwendo ebingi ng'effeeza, ne zaabu, n'ebiyakaloosa n'amatuta ag'omuwendo omungi. Yabalambuza ennyumba omwali ebyokulwanyisa, n'ebiy'omuwendo ebirala ebyali mu mawanika ge. Tewali kintu mu lubiri wadde mu bwakabaka bwe bwonna Keezeekiya ky'ataabalaga.

¹⁴Awo nnabbi Isaaya n'agenda eri Kabaka Keezeekiya n'amubuuza nti, "Abasajja abo bagambye ki era bavudde wa?" Keezeekiya n'addamu nti, "Bavudde mu nsi ey'ewala mu Babulooni."

¹⁵Nnabbi n'amubuuza nti, "Balabye ki mu lubiri lwo?" N'addamu nti, "Balabye buli kintu mu lubiri lwange, tewali na kimu ku by'omu mawanika gange kye nabakwese."

¹⁶Isaaya n'agamba Keezeekiya nti, "Wuliriza MUKAMA Katonda ky'agamba:

¹⁷Laba, ekiseera kijja byonna ebiri mu lubiri lwo, ne byonna bajjajaabo bye baaterekwa, lwe biritwalibwa e Babulooni. Tewaliba kintu ekirisigalawo," bw'ayogera MUKAMA.

¹⁸"Era abamu ku bazzukulu bo, ab'omubiri gwo n'omusaayi gwo, abaliba bakuzaaliddwa balitwalibwa mu busibe, era baliba balaawe mu lubiri lwa kabaka w'e Babulooni."

¹⁹Keezeekiya n'addamu nti, "Ekigambo kya MUKAMA ekyo ky'oyogedde kirungi." Yalowooza mu mutima gwe nti, "Kasita, emirembe n'obutebenkevu binaabeerangawo mu mirembe gyange."

²⁰Ebirala byonna ebyabaawo mu mirembe gya Keezeekiya n'ebiyobuzira bye byonna, ne bwe yakola ekidiba n'omudumu omunene ebyaleetanga amazzi mu kibuga, tebyawandiikibwa mu kitabo ky'ebafaayo eky'ebiyomumirembe bya bassekabaka ba Yuda?

²¹Keezeekiya n'afa, mutabani we Manase n'amusikira okuba kabaka.

2 Bassekabaka 21

Manase Kabaka wa Yuda

¹Manase yatandika okufuga ng'alina emyaka kkumi n'ebiri, era n'afugira emyaka amakumi ataano mu etaano mu Yerusaalemi. Nyina ye yali Kefuziba.

²N'akola ebibi mu maaso ga MUKAMA, ng'atambulira mu makubo amabi ag'amawanga MUKAMA ge yali agobye mu maaso g'Abayisirayiri.

³Yaddamu n'azimba ebifo ebigulumivu eby'okusamira, Keezeekiya kitaawe bye yali amenye: era yazimba n'ebyoto ebya Baali, n'asimba n'empagi kya Asera, nga Akabu kabaka wa Isirayiri bwe yakola, n'okusinza n'asinza egghe ery'omu ggulu.

⁴Yazimba n'ebyoto mu yeekaalu ya MUKAMA, MUKAMA gye yali ayogeddeko nti, "Mu Yerusaalemi mwe mulibeera Erinnya lyange."

⁵Era yazimbira egghe lyonna ery'omu ggulu ebyoto mu mpya zombi eza yeekaalu ya MUKAMA.

⁶N'awaayo mutabani we okuba ekyokebwa, ng'akola eby'obufumu n'eb'y'obulogo, ate ng'alagulwa n'abaliko emizimu, n'abalogo. N'akola ebibi bingi mu maaso ga MUKAMA, era n'amusunguwaza.

⁷Yaddira ekifaananyi ekyole ekya Asera n'akiteeka mu yeekaalu, MUKAMA gye yali ayogeddeko ng'agamba Dawudi ne mutabani we Sulemaani nti, "Mu Yeekaalu eno ne mu Yerusaalemi, bye nneeroboza mu bika byonna ebya Isirayiri, mwe munaabeeranga erinnya lyange emirembe gyonna.

⁸Siriddayo nate kujja bigere eby'Abayisirayiri mu nsi gye nawa bajjajaabwe, bwe baneekuumanga okukola bye nablagira byonna wamu n'amateeka omuddu wange Musa ge yabawa."

⁹Naye abantu tebaawuliriza, era Manase n'abasendasenda okukola ebibi okusinga n'ebyo amawanga MUKAMA ge yazikiririza mu maaso g'Abayisirayiri bye gaakola.

¹⁰Awo MUKAMA n'ayogerera mu baddu be bannabbi

¹¹nti, "Olw'emizizo gino Manase kabaka wa Yuda gy'akoze, ng'ayonoona okusinga Abamoli abaamusooka bye baakola, n'ayonoonyesa Yuda n'ebifaananyi bye,

¹²bw'ati bw'ayogera MUKAMA, Katonda wa Isirayiri nti, 'Ndireeta ku Yerusaalemi ne ku Yuda obubi obusingirayo ddala, era na buli muntu alikiwulira, alisasamala.

¹³Ndigolola omuguwa ogwakozesebwा ku Samaliya n'ejinja erigera eryakozesebwा ku nnyumba ya Akabu eri Yerusaalemi, era ne mmalirawo ddala Yerusaalemi ng'omuntu bw'akomba esowaani okumalirako ddala emmere, n'okugifuula n'agifuula.

¹⁴Era ndyabulira ekitundu ekyafikkawo eky'obusika bwange, ne nkigabula mu mukono gw'abalabe baabwe, ne bababbako buli kantu,

¹⁵kubanga baakola ebibi mu maaso gange, ne bansunguwaza nnyo okuvira ddala ku lunaku bajjajaabwe kwe baaviirako mu Misiri n'okutuusa ku lunaku lwa leero.'"

¹⁶Ate, era Manase yayiwa omusaayi mungi gw'abo abataaliko musango, n'agujuzu Yerusaalemi, obutasaako ebibi ebirala bye yayonoonyesa Yuda, ne bakola ebibi mu maaso ga MUKAMA.

¹⁷Ebyafaayo ebirala ebyabaawo mu mirembe gya Manase, ne byonna bye yakola, okwo nga kwe kuli n'ebibi bye yakola, tebyawandiikibwa mu kitabo eky'ebiomumirembe gya bassekabaka ba Yuda?

¹⁸Awo Manase n'afa, n'aziikibwa mu nnimiro ey'olubiri lwe, ye nnimiro ya Uzza, ne mutabani we Amoni n'amusikira okuba kabaka.

Amoni Kabaka wa Yuda

¹⁹Amoni lwe yatandika okufuga, yali awezezza emyaka amakumi abiri mu ebiri, era n'afugira mu Yerusaalemi okumala emyaka ebiri. Nnyina ye yali Mesullemesi muwala wa Kaluzi ow'e Yotuba.

²⁰N'akola ebibi mu maaso ga MUKAMA, nga kitaawe bwe yakola.

²¹N'atambulira mu ngeri za kitaawe, n'asinzanga ebifaananyi kitaawe bye yasinzanga.

²²Yava ku MUKAMA, Katonda wa bajajjaabe, n'atatambulira mu kkubo lya MUKAMA.

²³Awo abakungu ba Amoni ne bamusalira olukwe, ne bamuttira mu lubiri lwe.

²⁴Awo olwatuuka, abantu mu nsi ne beekobaana, ne batta abo bona abaali mu lukwe olw'okumutta, era ne bafuula Yosiya mutabani we kabaka.

²⁵Ebyafaayo ebirala ebyabaawo mu mirembe gya Amoni, tebyawandiikibwa mu kitabo eky'ebiomumirembe gya bassekabaka ba Yuda?

²⁶Kabaka n'aziikibwa mu ntaana ye mu nnimiro ya Uzza, mutabani we Yosiya n'amusikira okuba kabaka.

2 Bassekabaka 22

Ekitabo ky'Amateeka Kizuulibwa

¹Yosiya n'atandika okufuga nga wa myaka munaana, era n'afugira mu Yerusaalemi emyaka amakumi asatu mu gumu, ng'erinnya lya nnyina ye Yedida, muwala wa Adaya ow'e Bozukasi.

²N'akola ebirungi mu maaso ga MUKAMA, ng'atambulira mu ngeri za jjajjaawe Dawudi, awatali kutaaganaaga.

³Mu mwaka ogw'ekkumi n'omunaana ogw'obufuzi bwa kabaka Yosiya, kabaka n'atuma omuwandiisi Safani mutabani wa Azaliya ate muzzukulu wa Mesullamu okulaga mu yeekaalu ya MUKAMA. N'amugamba nti,

⁴"Yambuka eri Kirukiya kabona Asinga obukulu, akutegeeze omuwendo gw'ensimbi ezireeteddwa mu yeekaalu ya MUKAMA abaggazi ze basoloozezza ku bantu.

⁵Ensimbi ezo zikwasibwe abasajja abaalondebwa okulabirira omulimu ogwa yeekaalu basasule abakozi abaddaabiriza yeekaalu ya MUKAMA,

⁶ababazzi, n'abazimbi, n'abaasa b'amayinja. Ate era baguleko n'embaawo n'amayinja amateme nga byonna bya kuddaabiriza yeekaalu.

⁷Naye tebabuuzibwa engeri gye bakozesezaamu ensimbi ezo, kubanga basajja abakola n'obwesigwa."

⁸ Awo Kirukiya kabona asinga obukulu n'ategeeza Safani omuwandiisi nti, "Ekitabo eky'Amateeka nkizudde we kibadde mu yeekaalu." N'akiwa Safani n'akisoma.

⁹ Safani omuwandiisi n'addayo eri kabaka n'amugamba nti, "Abakungu bawaddeyo ensimbi ezibadde mu yeekaalu ya MUKAMA era bazikwasizza abakozi n'abalabirizi ab'omulimu okuzikozesa n'okulabirira enkozesza yaazo."

¹⁰ Ate era Safani omuwandiisi n'ategeeza kabaka nti, "Kirukiya kabona, ampadde ekitabo." Awo Safani n'akisomera kabaka.

¹¹ Kabaka bwe yawulira ebigambo ebyasomebwa okuva mu Kitabo eky'Amateeka n'ayuza ebyambalo bye.

¹² N'alagira Kirukiya kabona, Akikamu mutabani wa Safani, ne Akubooli mutabani wa Mikaaya, ne Safani omuwandiisi, ne Asaya omuweereza wa kabaka nti,

¹³ "Mugende mumbuulize eri MUKAMA, nze, n'abantu bange ne Yuda yonna ku bigambo ebiwandiikkidwa mu kitabo kino ekizuuliddwa. Obusungu bwa MUKAMA bungi nnyo gye tuli olwa bajjajjaffe obutawuliriza bigambo eby'omu kitabo kino, era tebaakola ng'ebyawandiikibwa bino bwe bitugamba."

¹⁴ Awo Kirukiya kabona, ne Akikamu, ne Akubooli, ne Safani, ne Asaya ne bagenda eri Kuluda nnabbi omukyala muka Sallumu mutabani wa Tikuva muzzukulu wa Kalukasi omuwanika w'ebiyambalo, okumwebuuzaako. Yabeeranga mu kitundu ekyokubiri mu Yerusaalemi.

¹⁵ N'abagamba nti, "Bw'ati bw'ayogera MUKAMA, Katonda wa Isirayiri nti,

¹⁶ 'Mutegeeze oyo abatumye nti njenda kuleeta ku kifo kino n'abantu bano akabi, ng'ebyawandiikibwa mu kitabo bwe bigamba, kabaka wa Yuda by'asomye.

¹⁷ Olw'okunvaako n'olw'okwotereza obubaane eri bakatonda, nga baleetera obusungu bwange okubuubiuka olwa bakatonda be bakoze, ndibaleetako obusungu bwange era tewaliba n'omu alibukkakkanya.'

¹⁸ Naye mugambe kabaka wa Yuda eyabatumye okwebuuza ku MUKAMA nti, 'Bw'ati bw'ayogera MUKAMA, Katonda wa Isirayiri nti, ebikwata ku bigambo bye wawulidde:

¹⁹ kubanga obadde mumenyefu mu mutima ne weetoowaza mu maaso ga MUKAMA bwe wawulidde ebigambo ebyo bye nayogedde ku kifo kino ne ku bantu bano, nti baakuzikirira era baggweewo, ate n'oyuza n'ebiyambalo byo nga wennyamidde mu maaso gange, mpulidde okukaaba kwo, bw'ayogera MUKAMA.

²⁰Kyendiva nkutwala eri bajjajaabo, n'ozikibwa mu mirembe, era amaaso go tegaliraba kabi kendireeta ku kifo kino.'" Awo ne bazaayo obubaka obwo eri kabaka.

2 Bassekabaka 23

Endagaano Eragaanibwa buggyya

¹Awo kabaka n'ayita abakadde bona ab Yuda n'ab'omu Yerusaalemi.

²N'ayambuka mu yeekaalu ya MUKAMA ne bakabona, ne bannabbi, n'abantu bona okuva ku wa wansi okutuukira ddala ku wa waggulu mu bitiibwa byabwe. N'asoma ebigambo eby'omu Kitabo eky'Endagaano ekyali kizuuliddwa mu yeekaalu ya MUKAMA, nga bona bawulira.

³Awo kabaka n'ayimirira okuliraana empagi n'azza obuggyga endagaano ne MUKAMA, okutambuliranga mu kkubo lya MUKAMA, n'okukwatanga amateeka ge, n'okutambuliranga mu mpya ze, n'okugonderanga ebiragiro bye, n'omutima gwe gwonna, n'emmeeme ye yonna, ng'akakasa ebyawandiikibwa ebyali mu kitabo ekyo. Awo abantu bona ne beewaayo okuzza endagaano obuggyga.

⁴Awo kabaka n'alagira Kirukiya kabona asinga obukulu ne bakabona abaamuddiriranga, wamu n'abaggazi okuggya mu yeekaalu ya MUKAMA ebintu byonna ebya Baali n'ebya Asera, n'eb'yeggye lyonna ery'omu ggulu, n'abyokera ebweru wa Yerusaalemi mu ttale eriri mu kiwonvu kya Kiduloni, evvu n'alitwala e Beseri.

⁵N'agoba bakabona abaasinzanga ebifaananyi abaali balondeddwa bassekabaka ba Yuda okwoterezanga obubaane mu bifo ebigulumivu mu bibuga ebya Yuda n'okwetooloola Yerusaalemi, n'abo abayoterezanga obubaane eri Baali n'enjuba n'omwezi, n'eri emunyeeny n'eri eggye lyonna ery'omu ggulu.

⁶N'aggya empagi ya Asera mu yeekaalu ya MUKAMA, n'agitwala ebweru wa Yerusaalemi mu kiwonvu ekya Kiduloni, n'agyokera eyo. N'agisekulasekula n'asaasaanya evvu lyayo ku malaalo ag'abantu abaabulijjo.

⁷Ate era yamenyaamenya n'ennyumba ez'abaalyanga ebisiyaga ezaali mu yeekaalu ya MUKAMA, era eyo abakazi gye baalukiriranga Asera ebitimbibwa.

⁸Awo Yosiya n'aleeta bakabona bona okuva mu bibuga bya Yuda, n'ayonoona ebifo ebigulumivu okuva e Geba okutuuka e Beeruseba, bakabona gye baayoterezanga obubaane, era n'amenzaamenya amasabo agaali okumpi ne wankaaki ow'oku Mulyango gwa Yoswa, omukulembeze ow'ekibuga, agaali ku luuyi olwa kkono olwa wankaaki ow'ekibuga.

⁹Newaakubadde nga bakabona bali ab'oku bifo ebigulumivu tebawereezanga ku kyoto kya MUKAMA mu Yerusaalemi, balyanga emigaati egitali mizimbulukuse wamu ne bakabona bannaabwe.

¹⁰Yavvoola era n'amenyaamenya ekyoto kya Tofesi ekyali mu Kiwonvu ky'abaana ba Kinomu, obutaganya muntu yenna kuwaayo mwana we owoobulenzi newaakubadde owoobuwala ng'ekiweebwayo eri Moleki.

¹¹Era yaggyawo n'embalaasi ezaali mu mulyango gwa yeekaalu, bassekabaka ba Yuda ze baali bawonze eri enjuba, era n'ayokya amagaali ze gaasikanga. Zaabeeranga mu luggyaa okuliraana n'ekisenge ekyali eky'omukungu Nasanumereki.

¹²Yamenyaamenya n'ebyoto bassekabaka ba Yuda bye baali bazimbye ku kasolya okumpi n'ekisenge ekya waggulu ekya Akazi, era n'ebyoto Manase bye yali azimbye mu mpya zombi eza yeekaalu ya MUKAMA. Byonna yabiggyayo, n'abimenaamenya, enfuufu yaabyo n'agiyiwa mu kiwonvu ekya Kiduloni.

¹³Era kabaka n'ayonoona n'ebifo ebiligulimivu ebyali ebuvanjuba w'e Yerusaalemi ku luuyi olwa bukiikkaddyo ku lusozi olw'okuzikirira, ebyo Sulemaani kabaka wa Isirayiri bye yazimbira bakatonda ab'omuzizo: Asutoleesi katonda omukazi ow'Abasidoni, ne Kemosi ow'Abamowaabu, ne Mirukomu ow'Abamoni.

¹⁴N'amenyaamenya empagi, n'atemaatema empagi za Asera era ebifo ebyo n'abijuza amagumba g'abantu.

Amasabo n'Ebyoto Bimenyebwamenyebwa

¹⁵Era n'ekyoto ekyali e Beseri, n'ekifo ekigulimivu ekyaleetera Isirayiri okwonoona, Yerobowaamu mutabani wa Nebati bye yali azimbye, byonna Yosiya n'abimenaamenya. N'ayokya era n'asekulasekula ekifo ekigulimivu okutuusa lwe kyafuuka enfuufu era n'ayokya n'empagi eya Asera.

¹⁶Awo Yosiya bwe yatunulatunula, n'alaba amalaalo agaali ku lusozi, n'agenda n'aggyamu amagumba g'abafu n'agokera ku kyoto n'akyonoona, ng'ekigambo kya MUKAMA bwe kyali omusajja wa Katonda kye yalangirira.

¹⁷Awo kabaka n'abuuza nti, "Kijjukizo ki ekyo kye ndaba?" Abasajja ab'ekibuga ne bamuddamu nti, "Ago ge malaalo ag'omusajja wa Katonda eyava mu Yuda n'alangirira ebigambo ebikwata ku kyoto eky'e Beseri, by'okikoze."

¹⁸N'abagamba nti, "Mugaleke, era temuganya muntu yenna kukwata ku magumba ge." Awo ne batakawata ku magumba ge, wadde aga nnabbi ow'e Samaliya.

¹⁹N'amasabo gonna agaali mu bifo ebiligulimivu bassekabaka ba Yuda bye baali bazimbye mu bibuga bya Samaliya ne baleetera obusungu bwa MUKAMA okubuubuuka, Yosiya n'agavvoola era n'agaggyawo nga bwe yakola e Beseri.

²⁰Yosiya n'atta bakabona bona abaaeweerezanga mu bifo ebigulumivu ku byoto byayo, era amagumba gaabwe n'agokera okwo, n'oluvannyuma n'addayo e Yerusaalemi.

Okukuma Embaga ey'Okuyitako

²¹Awo kabaka n'alagira abantu bona ng'agamba nti, "Mukwate Okuyitako kwa MUKAMA Katonda wammwe ng'ekyawandiikibwa bwe kiri mu Kitabo eky'endagaano."

²²OkUVIIRA ddala ku mirembe gy'abalamuzi, ne ku mirembe gya bassekabaka ba Isirayiri n'aba Yuda, tewaaliwo kukwata Mbaga ey'Okuyitako.

²³Naye mu mwaka ogw'ekkumi n'omunaana ogw'obufuzi bwa kabaka Yosiya, Embaga eyo n'ebaawo mu Yerusaalemi.

²⁴Ate era n'abafumu, n'aboogeza emizimu, n'ebifaananyi, n'ebi'ezo byonna ebyali mu Yuda ne mu Yerusaalemi, Yosiya, n'abiwera. Ekyo yakikola okutuukiriza ebigambo eby'etteeka eryali mu kitabo Kirukiya kabona kye yazuula mu Yeekaalu ya MUKAMA.

²⁵Era tewali kabaka eyasooka Yosiya wadde eyamuddirira eyamuafanana era eyakyukira MUKAMA n'omutima gwe gwonna, n'emmeeme ye yonna era n'amaanyi ge gonna, ng'agoberera Amateeka ga Musa.

²⁶Kyokka MUKAMA n'atakendeesa ku busungu bwe obungi obwabuubuukira ku Yuda, olw'ebikolwa byonna ebya Manase ebyaleetera MUKAMA okusunguwala.

²⁷Awo MUKAMA n'ayogera nti, "Ndiggyawo Yuda mu maaso gange nga bwe nnaggyawo Isirayiri, era n'ekibuga Yerusaalemi kye nneeroboza, wamu ne yeekaalu eno gye nayogerako nti, 'Erinnya lyange linaabanga omwo,' siribisaako nate mwoyo."

²⁸Ebyafaayo ebirala byonna eby'omu mirembe gya Yosiya, ne bye yakola byonna, tebyawandiikibwa mu kitabo eky'ebiomumirembe gya bassekabaka ba Yuda?

²⁹Awo mu biro ebyo, Falaawo Neko nga ye kabaka wa Misiri n'ayambuka okutabaala kabaka w'e Bwasuli ku Mugga Fulaati; kabaka Yosiya n'agenda okumubeera, naye Falaawo Neko olwamulengera ng'ajja, n'amuttira e Megiddo.

³⁰Abaddu ba Yosiya ne bateeka omulambo gwe mu gaali ne baguggya e Megiddo ne bagutwala e Yerusaalemi, ne bamuziika mu ntaana ye. Awo abantu ab'omu nsi ne batwala Yekoyakaazi mutabani wa Yosiya ne bamufukako amafuta ne bamufuula kabaka n'asikira kitaawe okuba kabaka.

Yekoyakaazi kabaka wa Yuda

³¹ Yekoyakaazi we yaliira obwakabaka yalina emyaka amakumi abiri mu esatu, era n'afugira mu Yerusaalemi okumala emyezi esatu. Nnyina erinnya lye yali Kamutali muwala wa Yeremiya ow'e Libuna.

³² N'akola ebibi mu maaso ga MUKAMA nga bajjajaabe bwe baakola.

³³ Falaawo Neko n'amuggya ku bwakabaka n'amusibira mu masamba e Libula mu nsi y'e Kamasi obutaddayo kufuga mu Yerusaalemi, era n'asalira Yuda omusolo ogw'effeeza ttani ssatu ne bisatu byakuna ne zaabu kilo amakumi asatu mu nnya.

³⁴ Awo Falaawo Neko n'afuula Eriyakimu mutabani wa Yosiya kabaka, n'akyusa n'erinnya lye, n'amutuuma Yekoyakimu. N'aggyayo Yekoyakaazi, n'amutwala e Misiri, era eyo gye yafiira.

³⁵ Awo Yekoyakimu n'awangayo effeeza ne zaabu nga Falaawo Neko bwe yalagira. Era okusobola okutuukirizanga ekyo, Yekoyakimu yawoozanga abantu, n'abaggyangako effeeza ne zaabu nga buli muntu bwe yagerekebwa.

Yekoyakimu, Kabaka wa Yuda

³⁶ Yekoyakimu we yafuukira kabaka yali awevezza emyaka amakumi abiri mu etaano, era n'afugira mu Yerusaalemi okumala emyaka kkumi na gumu. Nnyina erinnya lye yali Zebida muwala wa Pedaya ow'e Luuma.

³⁷ Naye n'akola ebibi mu maaso ga MUKAMA, nga bajjajaabe be bwe baakola.

2 Bassekabaka 24

¹ Mu biro ebyo, Nebukadduneeza kabaka w'e Babulooni n'alumba, era n'afuula Yekoyakimu omuddu we okumala emyaka esatu. Naye Yekoyakimu oluvannyuma n'ajeema, n'akola olutalo ku Nebukadduneeza.

² Awo MUKAMA n'asindikira Yekoyakimu ebibinja by'Abakaludaaya, n'Abasuuli, n'Abamowaabu, n'Abamoni, n'abatuma okulumba Yuda, ng'ekigambo kya MUKAMA kye yayogerera mu baweereza be bannabbi bwe kyali.

³ Era ddala ebyo by'atuukirira ku Yuda ng'ekiragiro kya MUKAMA bwe kyali, okubaggya mu maaso ge olw'ebibi bya Manase n'ebirala byonna bye yakola,

⁴ ng'okwo kwe kuli okuyiwa omusaayi ogutaliiko musango. Yajjuza Yerusaalemi n'omusaayi ogutaliiko musango, MUKAMA kye yali tagenda kusonyiwa.

⁵ Ebyafaayo ebirala ebyaliwo ku mulembe gwa Yekoyakimu ne byonna bye yakola, tebyawandiikibwa mu kitabo eky'ebiomumirembe gya bassekabaka ba Yuda?

⁶ Awo Yekoyakimu n'afa, mutabani we Yekoyakini n'amusikira okuba kabaka.

⁷Kabaka w'e Misiri teyava nate mu nsi ye, kubanga kabaka w'e Babulooni yali awambye ebibye byonna okuvira ddala ku mukutu gw'Omugga ogw'e Misiri oguyiwa ku Nnyanja Ennene okutuuka ku Mugga Fulaati.

Yekoyakini Kabaka wa Yuda

⁸Yekoyakini we yafuukira kabaka yalina emyaka kkumi na munaana, era n'afugira mu Yerusaalemi okumala emyezi esatu. Nnyina erinnya lye yali Nekusita muwala wa Erunasani ow'e Yerusaalemi.

⁹N'akola ebibi mu maaso ga MUKAMA, nga kitaawe bwe yakola.

¹⁰Mu biro ebyo egghe lya Nebukadduneeza kabaka w'e Babulooni ne lirumba ekibuga ky'e Yerusaalemi, ne kizingizibwa.

¹¹Nebukadduneeza yennyini n'ajja mu kibuga, ng'egghe lye likyakizingizza.

¹²Awo Yekoyakini kabaka wa Yuda, ne nnyina, n'abaddu ba kabaka, n'abakungu be, n'abaami be bona ne beewaayo eri kabaka w'e Babulooni mu mwaka gwe ogw'omunaana bukya alya bwakabaka, era Yekoyakini n'atwalibwa nga musibe.

¹³Era mu kiseera kye kimu, Nebukadduneeza n'atwala eby'obugagga byonna okuva mu yeekaalu ya MUKAMA, n'okuva mu lubiri lwa kabaka, era n'atemaatema ebibya byonna ebya zaabu, Sulemaani kabaka wa Isirayiri bye yali akoze ng'abitadde mu yeekaalu ya MUKAMA, nga MUKAMA bwe yalagira.

¹⁴N'atwala Yerusaalemi kyonna, n'abakungu bona, n'abasajja abalwanyi bona, ne baffundi bona n'abaweesi bona mu buwanjjanguse, awamu ne bawera abantu ng'omutwalo gumu. Abasemberayo ddala obwavu be yalekamu bokka.

¹⁵Nebukadduneeza n'atwala Yekoyakini e Babulooni nga musibe okuva mu Yerusaalemi, era n'atwala ne nnyina, ne bakyala ba kabaka, n'abakungu be, n'abaami abaali ab'ekitiibwa mu nsi.

¹⁶Ate era yawamba abasajja ab'amaanyi kasanvu, ne baffundi n'abaweesi lukumi, bona n'abatwala e Babulooni nga basibe.

¹⁷Nebukadduneeza n'addiria Mataniya kitaawe wa Yekoyakini omuto, n'amufuula kabaka, era n'amukyusa n'erinnya n'amutuumma Zeddekiya.

Zeddekiya, Kabaka wa Yuda

¹⁸Zeddekiya we yafuukira kabaka yalina emyaka amakumi abiri mu gumu, era n'afugira mu Yerusaalemi emyaka kkumi na gumu. Nnyina erinnya lye yali Kamutali muwala wa Yeremiya ow'e Libuna.

¹⁹N'akola ebibi mu maaso ga MUKAMA, nga Yekoyakini bwe yakola.

²⁰Ebyo byonna ebyatuuka ku Yerusaalemi ne ku Yuda, byabaawo olw'obusungu bwa MUKAMA obwababubuukirako, era n'oluvannyuma n'abagoba mu maaso ge. Naye oluvannyuma Zeddekiya y'ajeemera kabaka w'e Babulooni.

2 Bassekabaka 25

¹Awo Zeddekiya nga yakafugira emyaka mwenda, Nebukadduneeza kabaka w'e Babulooni n'eggye lye lyonna ne balumba Yerusaalemi ku lunaku olw'ekkumi mu mwezi ogw'ekkumi; ne basiisira ebweru waakyo, ne bakizimbako ebigo okukyetooloola.

²Awo ekibuga ne kizingizibwa okumala emyaka ebiri nga Zeddekiya y'akyali kabaka.

³Ku lunaku olw'omwenda mu mwezi ogwokuna enjala n'eba nnyingi nnyo mu kibuga, abantu ab'omu nsi ne babulwako n'emmere ey'okulya.

⁴Awo kabaka n'eggye lye lyonna abaali mu kibuga ne bawagula mu bbugwe ekituli, ekiro, ne badduka nga bayita mu mulyango ogwaliraananga ennimiro ya kabaka ne bayita ne ku Bakaludaaya abaali bazingizza ekibuga enjuuyi zonna.

⁵Naye egghe ly'Abakaludaaya ne bagoberera kabaka, okutuusa lwe bamukwatira mu nsenyi ez'e Yeriko n'eggye lye lyonna ne lisaasaana okumwabulira.

⁶Ne bawamba kabaka, ne bamuleeta eri kabaka w'e Babulooni e Libula gye yasalirwa omusango.

⁷Ne battira batabani ba Zeddekiya mu maaso ge, ne bamuggyamu amaaso, ne bamuteeka mu masamba, n'atwalibwa e Babulooni.

Yerusaalemi ne Yeekaalu bisaanyizibwawo

⁸Awo ku lunaku olw'omusantu mu mwezi ogwokutaano mu mwaka ogw'ekkumi n'omwenda ogw'obwakabaka bwa Nebukadduneeza, kabaka w'e Babulooni, Nebuzaladaani omuduumizi ow'eggye lya kabaka ery'oku ntikko, ate nga mwami wa kabaka w'e Babulooni n'ajja mu Yerusaalemi.

⁹N'ayokya yeekaalu ya MUKAMA, n'olubiri lwa kabaka, n'ennyumba zonna na buli kizimbe ekikulu era nga kya muwendo mu Yerusaalemi.

¹⁰Awo egghe lyonna ery'Abakaludaaya nga bakulemberwa omuduumizi ow'eggye ery'oku ntikko, ne bamenya bbugwe wa Yerusaalemi.

¹¹Nebuzaladaani omuduumizi ow'eggye ery'oku ntikko n'atwala abantu bona abaaali basigaddewo mu kibuga, mu buwanjanguse nga basibe, n'abaali baasenga kabaka w'e Babulooni, n'abalala bona abaaali mu kibuga.

¹²Wabula yalekamu abaaali basemberayo ddala obwavu mu nsi eyo, okulabiriranga emizabbibu n'okulimanga.

¹³Abakaludaaya ne bamenyaamenza empagi ez'ebikomo n'ebyuma ebyawaniriranga ennyanja ey'ekikomo, n'enyanja ey'ekikomo, ebyali mu yeekaalu ya MUKAMA, n'ebikomo byamu ne babitwala e Babulooni.

¹⁴Era baatwala n'entamu, n'ebisena, n'ebisalako ebisirinza, n'ebijiiko n'ebintu byonna eby'ekikomo ebyakozesewanga mu yeekaalu.

¹⁵Omuduumizi ow'eggye ery'oku ntikko n'atwala n'ebyoterezo wamu n'ebibya ebyali ebya zaabu n'ebyali ebya ffeeza.

¹⁶Ekikomo ekyava mu mpagi ebbiri, ne mu nnyanja, ne mu byuma ebyawaniriranga ennyanja ey'ekikomo, Sulemaani bye yakolera yeekaalu ya MUKAMA, obuzito bwakyo nga tebumanyiddwa.

¹⁷Buli mpagi obugulumivu yali mita munaana ne desimoolo emu ne ku mutwe gwayo nga kuliko ekikomo ng'obugulumivu bwakyo mita emu ne desimoolo ssatu, nga kitoneddwatoneddwa n'ebifaananyi n'amakomamawanga ag'ekikomo okukyetooloola. N'empagi eyookubiri yali ekoleddwa mu ngeri y'emu.

¹⁸Omuduumizi ow'eggye ery'oku ntikko n'atwala nga basibe: Seraya kabona Asinga obukulu, n'omumyuka we Zeffaniya, n'abaggazi abasatu.

¹⁹Era yatwala n'omukungu eyaduumiranga abasajja abalwanyi, n'abakungu abalala bataano abatuulanga ku lukiiko lwa kabaka; era n'atwala n'omuwandiisi omukulu eyavunaanyizibwanga okuyingizanga abantu mu magye mu nsi ya Yuda, n'abasajja abannansi nkaaga abaasangibwa mu kibuga.

²⁰Abo bonna Nebuzaladaani omuduumizi ow'eggye ery'oku ntikko n'abatwalira kabaka w'e Babulooni e Libula.

²¹Kabaka w'e Babulooni n'abattira eyo e Libula, mu nsi y'e Kamasi. Bw'atyoy Yuda n'atwalibwa mu buwañjanguse nga musibe, okuva mu nsi ye.

²²Awo Nebukadduneeza kabaka w'e Babulooni n'alonda Gedaliya mutabani wa Akikamu, muzzukulu wa Safani okuba omukulembeze w'abo abaali basigaddewo mu Yuda.

²³Awo abakungu ab'eggye n'abasajja abalala bwe baawulira nga kabaka w'e Babulooni alonze Gedaliya okuba omukulembeze, ne bagenda eri Gedaliya e Mizupa. Abasajja abakungu abo baali Isimayiri mutabani wa Nesaniya, ne Yokanaani mutabani wa Kaley, ne Seraya mutabani wa Tanukumesi Omunetofa, ne Yaazaniya mutabani w'Omumaakasi.

²⁴Gedaliya n'abalayirira bo n'abasajja baabwe n'abagamba nti, "Temutya bakungu Bakaludaaya, naye mutereere mu nsi muweereze kabaka w'e Babulooni kale ebintu byonna binaabagendera bulungi."

²⁵Naye mu mwezi ogw'omusantu, Isimayiri mutabani wa Nesaniya, muzzukulu wa Erisaama ow'olulyo olulangira n'ajja n'abasajja kkumi, n'alumba Gedaliya era n'amutta, awamu n'Abayudaaya; n'Abakaludaaya abaali awamu naye e Mizupa nabo n'abatta.

²⁶Awo abantu bona okuvira ddala ku wawansi okutuukira ddala ku w'eddaala erya waggulu, n'abamaggye abakulu bona, ne baddukira e Misiri, nga batidde Abakaludaaya.

Yekoyakini Ateebwa

²⁷Awo Yekoyakini kabaka wa Yuda nga yakamala emyaka amakumi asatu mu musantu mu buwanjanguse mu busibe, nga Evirumerodaki kyajje afuuke kabaka w'e Babulooni, Evirumerodaki n'ata Yekoyakini kabaka wa Yuda okuva mu kkomera ku lunaku olw'amakumi abiri mu omusantu mu mwezi ogw'ekkumi n'ebiri.

²⁸N'ayogera naye ebigambo ebyekisa, n'amuwa n'ekitiibwa ekya waggulu okusinga ne bakabaka abalala abaali awamu naye mu buwanjanguse mu busibe e Babulooni.

²⁹Awo Yekoyakini n'aggyamu ebyambalo bye eby'ekkomera n'aliiranga wamu ne kabaka w'e Babulooni ku mmeeza ya kabaka ennaku zonna ez'obulamu bwe.

³⁰Kabaka n'awanga Yekoyakini omugabo ogwa buli lunaku ennaku zonna ez'obulamu bwe.

1 Ebyomumirembe

1 Ebyomumirembe 1

Ebyafaayo by'Okuzaalibwa kwa Adamu Okutuuka ku Ibulayimu

- ¹ Adamu yazaala Seezi, Seezi n'azaala Enosi;
- ² Enosi n'azaala Kenani, Kenani n'azaala Makalaleri, Makalaleri n'azaala Yaledi;
- ³ Yaledi n'azaala Enoka, Enoka n'azaala Mesuseera, Mesuseera n'azaala Lameka, Lameka n'azaala Nuuwa.
- ⁴ Nuuwa n'azaala Seemu, ne Kaamu ne Yafeesi.
- ⁵ Batabani ba Yafeesi baali: Gomeri, ne Magogi, ne Madayi, ne Yavani, ne Tubali, ne Meseiki, ne Tirasi.
- ⁶ Batabani ba Gomeri baali: Asukenaazi, ne Difasi ne Togaluma.
- ⁷ Batabani ba Yavani baali: Erisa, ne Talusiisi, ne Kittimu, ne Lodanimu.
- ⁸ Batabani ba Kaamu baali: Kuusi, ne Mizulayimu, ne Puuti, ne Kanani.
- ⁹ Batabani ba Kuusi baali: Seeba, ne Kavira, ne Sabuta, ne Laama, ne Sabuteka. Ne batabani ba Laama baali: Seeba ne Dedani.
- ¹⁰ Kuusi n'azaala Nimuloodi, Nimuloodi n'akula n'afuuka omusajja omuzira ow'amaanyi mu nsi.
- ¹¹ Mizulayimu n'azaala Ludimu, ne Anamimu, ne Lekabimu, ne Nafutukimu;
- ¹² ne Pasulusimu, ne Kasulukimu (Abafirisuuti mwe basibuka), ne Kafutolimu.
- ¹³ Kanani n'azaala Sidoni, ye mutabani we omukulu, ne Keesi;
- ¹⁴ n'Abayebusi, n'Abamoli, n'Abagirugaasi;
- ¹⁵ n'Abakiivi, n'Abaluki, n'Abasiini;
- ¹⁶ n'Aballuvadi, n'Abazemali n'Abakamasi.
- ¹⁷ Batabani ba Seemu baali: Eramu, ne Asuli, ne Alupakusaadi, ne Ludi ne Alamu. Ate batabani ba Alamu baali: Uzi, ne Kuuli, ne Geseri, ne Meseiki.
- ¹⁸ Alupakusaadi n'azaala Seera, Seera n'azaala Eberi.
- ¹⁹ Eberi yazaala abaana babiri aboobulenzi, erinnya ly'omu nga ye Peregi, amakulu nti ensi yali egabiddwamu, n'erinnya ly'omulala nga ye Yokutaani.
- ²⁰ Yokutaani n'azaala Alumodaadi, ne Serefu, ne Kazalumaveesi, ne Yera;
- ²¹ ne Kadolaamu, ne Uzali, ne Dikula;
- ²² ne Ebali, ne Abimayeeri, ne Seeba;

- ²³ne Ofiri, ne Kavira ne Yobabu. Era abo bona be baali batabani ba Yokutaani.
- ²⁴Enda ya Seemu okutuuka ku Ibulaamu ye yali eno; Seemu n'azaala Alupakusaadi, Alupakusaadi n'azaala Seera,
- ²⁵Seera n'azaala Eberi, Eberi n'azaala Peregi, ne Peregi n'azaala Lewu.
- ²⁶Lewu n'azaala Serugi, Serugi n'azaala Nakoli, ne Nakoli n'azaala Teera,
- ²⁷Teera n'azaala wa Ibulaamu, oyo ye Ibulayimu.
- ²⁸Batabani ba Ibulayimu baali Isaaka ne Isimayiri.
- ²⁹Luno lwe lulyo lwabwe: Nebayoosi ye yali mutabani wa Isimayiri omukulu, ne kulyoka kuddako Kedali, ne Adubeeri, ne Mibusamu,
- ³⁰ne Misuma, ne Duma, ne Massa, ne Kadadi, ne Teema,
- ³¹ne Yetuli, ne Nafisi ne Kedema. Eyo y'enda ya Isimayiri.

Ezadde Iya Ketula

³²Batabani ba Ketula, omuweereza omukazi owa Ibulayimu be baali Zimulaani, ne Yokusaani, ne Medani, ne Midyaani, ne Isubaki ne Suwa. Ate batabani ba Yokusaani baali Seeba ne Dedani.

³³Batabani ba Midyaani baali Efa, ne Eferi, ne Kanoki, ne Abida ne Eruda. Abo bona be baali bazzukulu ba Ketula.

Ezadde Iya Sala

³⁴Ibulayimu n'azaala Isaaka; batabani ba Isaaka baali Esawu ne Isirayiri.

³⁵Batabani ba Esawu baali Erifaazi, ne Leweri, ne Yewusi, ne Yalamu ne Koola.

³⁶Batabani ba Erifaazi baali Temani, ne Omali, ne Zeefi, ne Gatamu, ne Kenozi, ne Timuna ne Amaleki.

³⁷Batabani ba Leweri baali Nakasi, ne Zeera, ne Samma ne Mizza.

³⁸Batabani ba Seyiri baali Lotani, ne Sobali, ne Zibyoni, ne Ana, ne Disoni, ne Ezeri ne Disani.

³⁹Batabani ba Lotani baali Kooli, ne Komamu; Timuna yali mwannyina Lotani.

⁴⁰Batabani ba Sobali baali Aliyani, ne Manakasi, ne Ebali, ne Seefi ne Onamu. Ne batabani ba Zibyoni baali Aya ne Ana.

⁴¹Mutabani wa Ana yali Disoni, batabani ba Disoni nga be ba Kamulani, ne Esubani, ne Isulani ne Kerani.

⁴²Batabani ba Ezeri baali Birukani, ne Zaavani ne Yaakani; batabani ba Disani baali Uzi ne Alani.

Bakabaka ba Edomu

⁴³Bano be bakabaka abaafuga mu Edomu nga tewannabaawo kabaka mu Isirayiri abafuga: Bera mutabani wa Byoli n'erinnya ly'ekibuga kye lyali Dinukaba.

⁴⁴Bera bwe yafa, Yokabu mutabani wa Zeera ow'e Bozula n'amusikira okuba kabaka.

⁴⁵Yokabu bwe yafa, Kusamu eyava mu nsi y'Abateman, n'amusikira okuba kabaka.

⁴⁶Kusamu bwe yafa, Kadadi mutabani wa Bedadi, eyali awangudde Midiyaani mu nsi Mowaabu, n'afuga mu kifo kye n'erinnya ly'ekibuga kye lyali Avisi.

⁴⁷Kadadi bwe yafa, Samula ow'e Masuleka n'afuga mu kifo kye.

⁴⁸Samula bwe yafa, Sawuli ow'e Lekobosi ekiri okumpi n'omugga Fulaati, n'afuga mu kifo kye.

⁴⁹Sawuli bwe yafa, Baalukanani mutabani wa Akubooli n'afuga mu kifo kye.

⁵⁰Baalukanani bwe yafa, Kadadi n'afuga mu kifo kye, n'erinnya ly'ekibuga kye lyali Payi, ate nga mukyala we ye Meketaberi muwala wa Matuledi, ate era nga ye muzzukulu wa Mezakabu.

⁵¹Kadadi naye n'afa. Abakungu ba Edomu baali Timuna, ne Aliya, Yesesi,

⁵²ne Okolibama, ne Era, ne Pinoni,

⁵³ne Kenozi, ne Temani, ne Mibuzali,

⁵⁴ne Magudyeri, ne Iramu. Abo be baali abakungu ba Edomu.

1 Ebyomumirembe 2

Abaana ba Isirayiri

¹Bano be baali batabani ba Isirayiri: Lewubeeni, ne Simyoni, ne Leevi, ne Yuda, ne Isakaali, ne Zebbulooni,

²ne Ddaani, ne Yusufu, ne Benyamini, ne Nafutaali, ne Gaadi ne Aseri.

³Batabani ba Yuda baali Eri, ne Onani ne Seera, era nnyabwe ye yali Basusuwa Omukanani. Eri, eyali mutabani wa Yuda omukulu n'akola ebibi mu maaso ga MUKAMA, era MUKAMA n'amutta.

⁴Tamali muka mwana wa Yuda, n'azaalira Yuda Pereezi, ne Zeera. Batabani ba Yuda bona awamu baali bataano.

⁵Batabani ba Perezi baali Kezulooni ne Kamuli.

⁶Batabani ba Zeera baali Zimuli, ne Esani, ne Kemani, ne Kalukoli, ne Dala, bona awamu bataano.

- ⁷ Mutabani wa Kalumi ye yali Akali, eyaleetera Isirayiri emitawaana kubanga yayonoona mu ebyo ebyawongebwa.
- ⁸ Mutabani wa Esani ye yali Azaliya.
- ⁹ Batabani ba Kezulooni baali Yerameeri, ne Laamu ne Kerubayi.
- ¹⁰ Laamu n'azaala Amminadaabu, Amminadaabu n'aba kitaawe n'azaala Nakusoni, eyali omukulu w'ekika kya Yuda.
- ¹¹ Nakusoni n'azaala Saluma, ne Saluma n'azaala Bowaazi,
- ¹² Bowaazi ye n'azaala Obedi ate Obedi n'azaala Yese.
- ¹³ Yese n'azaala Eriyaabu, eyali mutabani we omukulu; Abinadaabu nga ye wookubiri, Simeeyi nga ye wookusatu,
- ¹⁴ Nesaneeri nga ye wookuna, Laddayi nga ye wookutaano,
- ¹⁵ Ozemu n'aba ow'omukaaga, Dawudi nga ye wa musanvu.
- ¹⁶ Bannyinaabwe be baali Zeruyiya ne Abbigayiri. Batabani ba Zeruyiya baali basatu nga be ba Abisaayi, Yowaabu ne Asakeri.
- ¹⁷ Abbigayiri yali nnyina wa Amasa, ne Amasa n'azaala Yeseri Omuyisimayiri.
- ¹⁸ Kalebu mutabani wa Kezulooni n'azaala abaana mu Azuba mukyala we ate era ne mu Yeriyoozi. Yeseri, ne Sobabu, ne Aludoni be baali abaana ba Azuba.
- ¹⁹ Azuba bwe yafa, Kalebu n'awasa Efulaasi, eyamuzaalira Kuuli.
- ²⁰ Kuuli n'azaala Uli, Uli n'azaala Bezaleeri.
- ²¹ Oluvannyuma Kezulooni, ne yeebaka ne muwala wa Makiri kitaawe wa Gireyaadi, gwe yali afumbiddwa nga wa myaka nkaaga, n'amuzaalira Segubu.
- ²² Segubu n'azaala Yayiri, eyafuganga ebibuga amakumi abiri mu bisatu mu nsi ye Gireyaadi.
- ²³ Naye Gesuli ne Alamu ne bawamba ebibuga bya Yayiri, Kenasi n'ebyalo byayo, byonna awamu byali ebibuga nkaaga. Abo bona be baali abazzukulu ba Makiri, kitaawe wa Gireyaadi.
- ²⁴ Kezulooni ng'amaze okufa, Kalebu ne yeebaka ne maama we omuto Efulaasi eyali mukyala wa kitaawe, n'amuzaalira Asukuli, n'azaala Tekowa.
- ²⁵ Yerumeeri mutabani wa Kezulooni omukulu yalina batabani be bataano nga be ba Laamu, mutabani we omukulu, ne Buna, ne Oleni, ne Ozemu ne Akiya.
- ²⁶ Wabula Yerumeeri yalina omukyala omulala ng'erinnya lye ye Atala, era oyo yali nnyina Onamu.

²⁷Batabani ba Laamu mutabani omukulu owa Yerameeri baali Maazi, ne Yamuni ne Ekeri.

²⁸Batabani ba Onamu be baali Sammayi ne Yada, ate batabani ba Sammayi nga be ba Nadabu ne Abisuli.

²⁹Abisuli yalina omukyala erinnya lye Abikayiri, era n'amuzaalira Abani ne Molidi.

³⁰Batabani ba Nadabu be baali Seredi ne Appayimu, naye Seredi n'afa nga tazadde mwana.

³¹Mutabani wa Appayimu yali Isi, ate nga Isi ye kitaawe wa Akulayi.

³²Batabani ba Yada muganda we Sammayi be baali Yeseri ne Yonasaani, naye Yeseri n'afa nga tazadde mwana.

³³Batabani ba Yonasaani be baali Peresi ne Zaza. Abo bona be baali bazzukulu ba Yerameeri.

³⁴Sesani ye yalina baana ba buwala bokka, ng'alina n'omuddu Omumisiri, erinnya lye Yala.

³⁵Sesani n'awaayo omu ku bawala be okufuumbirwa omuddu we Yala, era omuwala n'azaala Attayi.

³⁶Attayi n'azaala Nasani, ne Nasani n'azaala Zabadi.

³⁷Zabadi n'azaala Efulali, ne Efulali n'azaala Obedi.

³⁸Obedi n'azaala Yeeku, ne Yeeku n'azaala Azaliya.

³⁹Azaliya n'azaala Kerezi, ne Kerezi n'azaala Ereyasa.

⁴⁰Ereyasa n'azaala Sisumaayi, ne Sisumaayi n'azaala Sallumu.

⁴¹Sallumu n'azaala Yekamiya, ne Yekamiya n'azaala Erisaama.

⁴²Omwana omukulu owa Kalebu muganda wa Yerameeri, ye yali Mesa, ate Mesa n'azaala Zifu. Zifu n'azaala Malesa, Malesa n'azaala Kebbulooni.

⁴³Batabani ba Kebbulooni baali Koola, ne Tappua, ne Lekemu, ne Sema.

⁴⁴Sema n'azaala Lakamu, ne Lakamu n'azaala Yolukeyaamu. Lekemu n'azaala Sammayi.

⁴⁵Mutabani wa Sammayi n'azaala Manoni, ne Mawoni n'azaala Besuzuli.

⁴⁶Efa omukazi omulala owa Kalebu yamuzaalira Kalani, ne Moza ne Gazezi. Ate Kalani n'azaala omulenzi gwe yatuumma Gazezi.

⁴⁷Batabani ba Yadai baali Legemu, ne Yosamu, ne Gesani, ne Pereti, ne Efa ne Saafu.

⁴⁸Ate era Kalebu yalina omukazi omulala, Maaka eyamuzaalira Seberi ne Tirukaana.

⁴⁹Mukazi we oyo yazaalayo n'omwana omulala erinnya lye Saafu, eyazaala Madumanna. Seva n'azaala Makubena ne Gibe. Muwala wa Kalebu ye yali Akusa.

⁵⁰Abo be baali bazzukulu ba Kalebu. Batabani ba Kuuli baali Efulaasa omuggulanda, Sobali n'azaala Kiriyasuyalimu,

⁵¹Saluma n'azaala Besirekemu, ne Kalefu n'azaala Besugaderi.

⁵²Sabali eyazaala Kiriyasuyalimu, yalina abaana abalala nga be ba Kalowe, ne kimu kyakubiri eky'Abamenukosi,

⁵³n'ebika ebya Kiriyasuyalimu nga be ba Abayisuli, n'Abapusi, n'Abasumasi, n'Abamisulayi. Muno mwe mwasibuka Abazolasi n'Abayesutawooli.

⁵⁴Batabani ba Saluma baali Besirekemu, n'Abanetufa, Atulosubesuyowabu, ne kimu kyakubiri eky'Abamanakasi, Abazooli,

⁵⁵n'ebika by'abawandiisi b'amateeka abaabeeranga e Yabezi, nga be b'Abatirasi, Abasimeyasi, n'Abasukasi. Bano be Bakeeni abasibuka mu Kammasi, era be baavaamu oluggyga lwa Lekabu.

1 Ebyomumirembe 3

Ennyumba ya Dawudi

¹Bano be baana Dawudi be yazaalira mu Kebbulooni: Omuggulanda ye yali Amunoni gwe yazaala mu Akinoamu Omuyezuleeri; owookubiri ye yali Danyeri gwe yazaala mu Abbigayiri Omukalumeeri;

²owookusatu ye yali Abusaalomu gwe yazaala mu Maaka muwala wa Talumaayi kabaka w'e Gesuli; n'owookuna ye yali Adoniya gwe yazaala mu Kaggisi.

³Owookutaano ye yali Sefatiya, gwe yazaala mu Abitali n'ow'omukaaga nga ye Isuleyamu gwe yazaala mu Egula.

⁴Bano omukaaga Dawudi be yazaalira mu Kebbulooni, gye yafugira emyaka musanvu n'emyezi mukaaga. Dawudi yafugira mu Yerusaalemi emyaka amakumi asatu mu esatu,

⁵era bano be baana be yazaalira eyo: Simeeyi, ne Sobabu, ne Nasani, ne Sulemaani be yazaala mu Besusebba muwala wa Amiyeeri.

⁶N'abalala baali Ibukali, ne Erisaama, ne Erifereti,

⁷ne Noga, ne Nefegi, ne Yafiya,

⁸ne Erisaama, ne Eriyada, ne Erifereti, bona awamu mwenda.

⁹ Bano bona be baali batabani ba Dawudi, obutabala batabani be abalala aba bazaana be. Tamali ye yali mwannyinaabwe.

Olulyo Iwa Sulemaani

¹⁰ Mutabani wa Sulemaani yali Lekobowaamu, ne Abiya nga ye mutabani wa Lekobowaamu, ne Asa nga ye mutabani wa Abiya, ne Yekosafaati nga ye mutabani wa Asa,

¹¹ ne Yolaamu nga ye mutabani wa Yekosafaati, ne Akaziya nga ye mutabani wa Yolaamu, ne Yowaasi nga ye mutabani wa Akaziya,

¹² Amaziya nga ye mutabani wa Yowaasi, ne Azaliya nga ye mutabani wa Amaziya, ne Yosamu nga ye mutabani wa Azaliya.

¹³ Akazi yali mutabani wa Yosamu, ne Keezeekiya nga ye mutabani wa Akazi, ne Manase nga ye mutabani wa Keezeekiya.

¹⁴ Amoni yali mutabani wa Manase, ne Yosiya nga ye mutabani wa Amoni.

¹⁵ Batabani ba Yosiya baali Yokanaani omuggulanda, ne Yekoyakimu ye yali owookubiri, ne Zeddekiya nga wa wakusatu, ne Sallumu nga wakuna.

¹⁶ Batabani ba Yekoyakimu baali Yekoniya ne Zeddekiya.

Olulyo Olulangira Oluvannyuma Iw'Okuva mu Buwaŋjanguse

¹⁷ Abaddirira mu lulyo lwa Yekoniya omuwambe be ba: Seyalutyeri mutabani we,

¹⁸ ne Malukiramu, ne Pedaya, ne Senazzali, ne Yekamiya, ne Kosama ne Nedabiya.

¹⁹ Batabani ba Pedaya baali Zerubbaberri ne Simeeyi. Batabani ba Zerubbaberri baali Mesullamu ne Kananiya, ne Seronisi nga ye mwannyinaabwe.

²⁰ N'abalala abataano be yazaala baali Kasuba, ne Okeri, ne Berekiya, ne Kasadiya ne Yusubukesedi.

²¹ Batabani ba Kananiya baali Peratiya ne Yesukaya, ne mutabani wa Yesukaya nga ye Lefaya, ne mutabani wa Lefaya nga ye Alunani, ne mutabani wa Alumani nga ye Obadiya, ne mutabani wa Obadiya nga ye Sekaniya.

²² Ab'olulyo lwa Sekaniya baali Semaaya mutabani we, ng'abazzukulu be ba Kattusi, ne Igali, ne Baliya, ne Neyaliya, ne Safati. Abazzukulu bona awamu baali mukaaga.

²³ Batabani ba Neyaliya baali Eriwenayi, ne Kizukiya, ne Azulikamu, be baana basatu bona awamu.

²⁴ Batabani ba Eriwenayi baali Kodaviya, ne Eriyasibu, ne Peraya, ne Akkubu, ne Yokanaani, ne Deraya ne Anami, be baana musanvu.

1 Ebyomumirembe 4

Ebika Ebirala ebya Yuda

¹ Bazzukulu ba Yuda abalala baali Pereezi, ne Kezulooni, ne Kalumi, ne Kuuli ne Sobali.

² Leyaya mutabani wa Sobali n'azaala Yakasi, ne Yakasi n'azaala Akumayi ne Lakadi. Bano baali ba mu nnyumba ya Abazolasi.

³ Ne bano, be baali baganda ba Etamu, ne Yezuleeri, ne Isuma, ne Idubasi, ne mwannyinaabwe nga ye Kazzereruponi.

⁴ Penueri n'azaala Gedoli, ne Ezeri n'azaala Kusa. Bano be baali abazzukulu ba Kuuli, ng'omuzzukulu omukulu mu luggyga ye Efulaasa, omukulembeze wa Besirekemu.

⁵ Asukuli n'azaala Tekowa eyalina abakyala babiri omu nga ye Keera omulala nga ye Naala.

⁶ Naala n'amuzaalira Akuzzamu, ne Keferi, ne Temeni ne Kaakusutali; era abo be baali abaana ba Naala.

⁷ Keera n'amuzaalira Zeresi, ne Izukali, ne Esumani

⁸ ne Kakkozi eyali kitaawe wa Anubu, ne Zobeba, ate n'aba jjajja w'ennyumba ya Akalukeri mutabani wa Kalumu.

⁹ Yabezi yali wa kitibwa okusinga baganda be, ne nnyina n'amutuumma erinnya Yabezi amakulu nti, "Namuzaalira mu bulumi."

¹⁰ Yabezi n'akoowoola Katonda wa Isirayiri ng'agamba nti, "Ompeere ddala omukisa, ogaziye ensalo yange! Omukono gwo gubeere wamu nange, gunkuumbe obutagwa mu kabi konna, nneme okulumwa mu mutima." Katonda n'addamu okusaba kwe.

¹¹ Kerubu muganda wa Suwa, n'azaala Mekiri, ate nga kitaawe wa Esutoni.

¹² Esutoni n'azaala Besulafa, ne Paseya, ne Tekina eyali omukulembeze wa Irunakasi. Bano be basajja ab'e Leka.

¹³ Batabani ba Kenazi baali Osuniyeri ne Seraya. Batabani ba Osuniyeri baali Kasasi ne Myonosaayi.

¹⁴ Myonosaayi n'azaala Ofula. Ate Seraya n'azaala Yowaabu, ne Yowaabu ye yali jjajja wa Gekalasimu abaalinga abaweesi.

¹⁵ Batabani ba Kolebu mutabani wa Yefune baali Iru, ne Era ne Naamu. Ne Era n'azaala Kenazi.

¹⁶ Batabani ba Yekalereri baali Zifu, ne Zifa, ne Tiriya ne Asaleri.

¹⁷ Batabani ba Ezula baali Yeseri, ne Meredi, ne Eferi, ne Yaloni. Omu ku bakyala ba Meredi ye yali Bisiya muwala wa Falaawo, era n'amuzaalira Miryamu, ne Sammayi, ne Isuba eyazaala Esutemoa.

¹⁸ Abo be baana ba muwala wa Falaawo Bisiya, Meredi gwe yali awasizza. Omukyala we Omuyudaaya yamuzaalira Yeredi kitaawe wa Gedoli, ne Keberi kitaawe wa Soko, ne Yekusyeri kitaawe wa Zanona.

¹⁹ Kodiya n'azaala abaana mu mwannyina wa Nakamu era be baali ekika kya Keyira Omugalumi ne Esutemoa Omumaakasi.

²⁰ Batabani ba Simoni baali Amunoni, ne Linna, ne Benikanani, ne Tironi. N'ab'enneyumba ya Isi baali Zokesi ne Benizokesi.

²¹ Batabani ba Seera mutabani wa Yuda baali Eri eyazaala Leka, kitaawe wa Malesa, ate era jjajja w'ebika by'abo abaalukanga linena e Besiyasubeya,

²² Yokimu ye yali jjajja w'abasajja ab'e Kozeba, ne Yowaasi ne Salafu abaafuganga Mowaabu ne Yasubirekemu. (Ebigambo bino bya mu biseera bya dda).

²³ Abo be baali ababumbi b'ensuwa abaabeeranga e Netayimu n'e Gedera, era baabeeranga mu lubiri lwa kabaka nga bamukolera.

Ekika kya Simyoni

²⁴ Batabani ba Simyoni baali Nemweri, ne Yanini, ne Yalibu, ne Zeera ne Sawuli.

²⁵ Mutabani wa Sawuli yali Sallumu, ne bazzukulu be nga be Mibusamu ne Misuma.

²⁶ Mutabani wa Misuma yali Kammweri, eyazaala Zakkuli, nga ate jjajja wa Simeeyi.

²⁷ Simeeyi yalina abaana aboobulenzi kumi na mukaaga n'aboobuwala mukaaga, naye baganda be tebalina baana bangi, ekika kyabwe kyekyava tekyala nnyo ng'ekya Yuda.

²⁸ Babeeranga mu Beeruseba, ne Molada, ne Kazalusuwali,

²⁹ ne Biruka, ne Ezemu, ne Toladi,

³⁰ ne Besweri, ne Koluma, ne Zikulagi,

³¹ ne Besumalukabosi, ne Kozalususimu, ne Besubiri ne Saalayimu. Bino byali bibuga byabwe okutuusa Dawudi lwe yalya obwakabaka.

³² Ebyalo byabwe ebirala byali Etamu, ne Ayini, ne Limmoni, ne Tokeni ne Asani, byonna awamu by'ebitaano,

³³ n'ebyalo ebirala byonna ebyali byetoolodde ebibuga ebyo okutuukira ddala e Baali. Eyo gye baasenga era ne bakooma ebyafaayo by'obujjajjabwe.

³⁴Mesobabu, ne Yamulaki, ne Yosa mutabani wa Amonya;

³⁵ne Yoweeri, ne Yeeku mutabani wa Yosibiya, muzzukulu wa Seraya, muzzukulu wa Asyeri.

³⁶Eriwenayi, ne Yaakoba, ne Yesokaya, ne Asaya, ne Adyeri, ne Yesimyeri, ne Benaya,

³⁷ne Ziza mutabani wa Sifi muzzukulu wa Alooni, muzzukulu wa Yedaya, muzzukulu wa Simuli, muzzukulu wa Semaaya.

³⁸Abo aboogeddwako baali bakulu ba bika byabwe. Ennyumba zaabwe ne zeeyongera nnyo.

³⁹Be basenguka okwolekera omulyango gwa Gedoli ekiri ku luuyi olw'ebuvanjuba lw'ekiwonvu, nga banoonya aw'okulundira ebisibo byabwe.

⁴⁰Baalaba omuddo omugimu omulungi, n'ensi yali ngazi, ng'erimu emirembe era nga nteefu. Bazzukulu ba Kaamu be baaberangamu edda.

⁴¹Abasajja abo aboogeddwako baaliwo mu mirembe nya Keezeekiya kabaka wa Yuda, era baalumba eweema za bazzukulu ba Kaamu n'Abamewuni abaabeeranga omwo ne babazikiririza ddala, obutalekaawo muntu n'omu wadde ekintu kyonna. Ne babeeranga omwo kubanga waaliyo omuddo ogw'okuwa ebisibo byabwe.

⁴²Awo abamu ku batabani ba Simyoni, abasajja enkumi ttaano nga bakuleembeddwamu Peratiya, ne Neyaliya, ne Lefaya ne Wuziyeeri batabani ba Isi ne balumba Seyiri ensi ey'ensozi.

⁴³Era baazikiriza n'ekitundu ky'Abamaleki ekyali kisigaddewo, oluvannyuma ne basenga eyo, okutuusa olunaku lwa leero.

1 Ebyomumirembe 5

Ekika kya Lewubeeni

¹Batabani ba Lewubeeni, mutabani omukulu owa Isirayiri, ye yali omubereberye, naye nayonoona obufumbo bwa kitaawe, obusika bwe ng'omuggulanda ne buweebwa batabani ba Yusufu mutabani wa Isirayiri, kyeyava tabalirwa mu byafaayo ng'omubereberye.

²Yuda yali w'amaanyi okusinga baganda be, era mu ye mwe mwava kabaka ow'eggwanga lya Isirayiri, wabula ebyobusika eby'obuggulanda byali bya mutabani wa Yusufu omukulu.

³Batabani ba Lewubeeni, mutabani omukulu owa Isirayiri baali: Kanoki, ne Palu, ne Kezulooni ne Kalumi.

⁴Ab'enda ya Yoweeri baali Semaaya mutabani we, ne Gogi muzzukulu we, ne Simeeyi muzzukulu we.

⁵Mikka yali mutabani wa Simeeyi, ne Leyaya n'aba muzzukulu we, ne Baali n'aba muzzukulu we.

⁶Mutabani wa Baali yali Beera, omukulu w'ekika ky'Abalewubeeni, Tirugazupiruneseri kabaka w'e Busuuli gwe yatwala mu buwaŋjanguse.

⁷Baganda be ng'enda zaabwe bwe zaali be bano: Yeyeri omukulu w'ekika, Zekkaliya,

⁸Bera mutabani wa Azozi, muzzukulu wa Sema, muzzukulu wa Yoweeri. Be baasenga mu Aloweri okutuuka e Nebo ne Baalu Myoni.

⁹Ate baasenga n'ebuvanjuba w'eddungu okutuukira ddala ku mugga Fulaati, kubanga amagana gaabwe gaali gaaze nnyo.

¹⁰Awo ku mirembe gya Sawulo ne balumba Abakaguli, era Abakaguli ne bagwa mu mikono gyabwe, era bali ne beegazaanyiza mu nsi y'Abakaguli okutuukira ddala ku luuyi olw'ebuvanjuba olw'e Gireyaadi.

Ekika kya Gaadi

¹¹Bazzukulu ba Gaadi baabeeranga okuliraana Basani okwolekera Saleka.

¹²Yoweeri ye yali omukulembeze, ne Safamu nga ye mumyuka we, ate ne wabaawo ne Yanayi ne Safati mu Basani.

¹³Baganda baabwe mu nda z'abajjajaabwe bwe baali Mikayiri, ne Mesullamu, ne Seeba, ne Yolayi, ne Yakani, ne Ziya, ne Eberi, bona awamu musanvu.

¹⁴Bano be baali ab'omu nnyumba ya Abikayiri mutabani wa Kuuli, muzzukulu wa Yalowa, muzzukulu wa Gireyaadi, muzzukulu wa Mikayiri, muzzukulu wa Yesisiyi, muzzukulu wa Yakudo, ne muzzukulu wa Buzi.

¹⁵Aki mutabani wa Abudyeri, muzzukulu wa Guni, omukulu w'ennyumba yaabwe.

¹⁶Baabeeranga mu Gireyaadi, mu Basani, ne mu bibuga byayo ebirala ne mu malundiro g'e Saloni okutuuka ku nsalo yaayo.

¹⁷Bino byonna byawandiikibwa mu bitabo ebyafaayo mu mirembe gya Yosamu kabaka wa Yuda, ne Yerobowaamu kabaka wa Isirayiri.

¹⁸Abalewubeeni, n'Abagaadi, n'ekitundu ky'ekika kya Manase baalina abasajja emitwalo ena mu enkumi nnya mu lusanvu mu nkaaga, ab'amaanyi era nga bazira mu kukwata engabo, ekitala, ne mu kukozesa obusaale, era nga batendeke mu kulwana.

¹⁹Ne balumba Abakaguli, ne Yetuli, ne Nafisi ne Nodabu.

²⁰Olw'okwesiga n'okusaba Katonda okubabeera, baawangula Abakaguli mu lutalo.

²¹Baanyaga amagana g'ente, n'eñjamira emitwalo etaano, n'endiga emitwalo abiri mu etaano n'endogoyi enkumi bbiri ate ne bawamba n'abasajja emitwalo kkumi.

²²Era bangi ku bo battibwa kubanga olutalo lwali lwa Katonda. Ne basenga eyo okutuusa lwe baawanjangusibwa.

Ekitundu ky'Ekika kya Manase

²³Abantu ab'ekitundu ky'ekika kya Manase baali bangi nnyo, era baasenga mu nsi eya Basani okutuuka ku Baalukerumooni, ne Seniri, ne ku lusozi Kerumooni.

²⁴Bano be baali abakulu b'ennyumba zaabwe: Eferi, ne Isi, ne Eryeri, ne Azulyeri, ne Yeremiya, ne Kodaviya, ne Yakudyeri, abasajja abazira era ab'amaanyi, abettutumu, nga gy'emitwe gy'ennyumba zaabwe.

²⁵Naye ne bakola ebibi ebimenya ebiragiro bya Katonda wa bajajjaabwe, ne bagoberera bakatonda baamawanga ag'omu nsi eyo, Katonda be yazikiririza mu maaso gaabwe.

²⁶Katonda wa Isirayiri kyeyava akubiriza omwoyo gwa Puli kabaka w'e Bwasuli, eyayitbwanga Tirugazupiruneseri, n'alumba Abalewubeeni, n'Abagaadi n'ekitundu ekyali kisigaddewo ku Manase, n'abawamba era n'abatwala mu buwanjanguse e Kala, n'e Kaboli, n'e Kaala ne ku mugga Gozani, gye bali n'okutuusa leero.

1 Ebyomumirembe 6

Ekika kya Leevi

¹Batabani ba Leevi baali Gerusoni, ne Kokasi ne Merali.

²Batabani ba Kokasi ne baba Amulaamu, ne Izukali, ne Kebbulooni, ne Wuziyeeri.

³Ate abaana ba Amulaamu baali Alooni, ne Musa ne Miryamu. Batabani ba Alooni baali Nadabu, ne Abiku, ne Eriyazaali ne Isamaali.

⁴Eriyazaali n'azaala Finekaasi, ate Finekaasi n'azaala Abisuwa;

⁵Abisuwa n'azaala Bukki, ate Bukki n'azaala Uzzi;

⁶Uzzi n'azaala Zerakiya, ne Zerakiya n'azaala Merayoosi;

⁷Merayoosi n'azaala Amaliya, ne Amaliya n'azaala Akitubu;

⁸Akitubu n'azaala Zadooki, ate Zadooki n'azaala Akimaazi;

⁹Akimaazi n'azaala Azaliya, ne Azaliya n'azaala Yokanaani;

- ¹⁰ Yokanaani n'azaala Azaliya (oyo ye yaweerezanga nga kabona mu yeekaalu sulemaani gye yazimba mu Yerusaalemi);
- ¹¹ Azaliya n'azaala Amaliya, ne Amaliya n'azaala Akitubu;
- ¹² Akitubu n'azaala Zadooki, ne Zadooki n'azaala Sallumu;
- ¹³ Sallumu n'azaala Kirukiya, ne Kirukiya n'azaala Azaliya;
- ¹⁴ Azaliya n'azaala Seraya, ne Seraya n'azaala Yekozadaki;
- ¹⁵ Yekozadaki yatwalibwa mu buwaŋjanguse MUKAMA bwe yawaayo Yuda ne Yerusaalemi mu mukono gwa Nebukadduneeza.
- ¹⁶ Batabani ba Leevi baali Gerusomu, ne Kokasi ne Merali.
- ¹⁷ Gano ge mannya g'abatabani ba Gerusomu, ne Libuni ne Simeeyi.
- ¹⁸ Batabani ba Kokasi baali Amulaamu, ne Izukali, ne Kebbulooni ne Wuziyeeri.
- ¹⁹ Batabani ba Merali baali Makuli ne Musi. Gino gy'emituba egypt'Abaleevi okutandika ne bajjajja baabwe:
- ²⁰ Abaava mu Gerusomu baali Libuni mutabani we, ne Yakasi, ne Zimura,
- ²¹ ne Yowa, ne Iddo, ne Zeera, ne Yeyaserayi.
- ²² Bazzukulu ba Kokasi baali Amminadaabu mutabani we, Koola muzzukulu we, Assiri muzzukulu we;
- ²³ Erukaana muzzukulu we, Ebiyasaafu muzzukulu we, Assiri muzzukulu we;
- ²⁴ Takasi muzzukulu we, Uliyeri muzzukulu we, Uzziya muzzukulu we, ne Sawuli muzzukulu we.
- ²⁵ Batabani ba Erukaana baali Amasayi ne Akimosi,
- ²⁶ ne bazzukulu be nga be ba Erukaana, ne Zofayi, ne Nakasi,
- ²⁷ ne Eriyaabu, ne Yerokamu, ne Erukaana ne Samwiri.
- ²⁸ Batabani ba Samwiri baali Yoweeri omuggulanda we, n'owokubiri nga ye Abiya.
- ²⁹ Bazzukulu ba Merali baali Makuli, ne Libuni, ne Simeeyi, ne Uzza,
- ³⁰ ne Simeeyi, ne Kaggiya ne Asaya, ng'omu ye kitaawe w'omulala nga bwe baddiriŋjana.
- ³¹ Bano be basajja Dawudi be yalonda okukulira egypt'ennyimba mu nnyumba ya MUKAMA, essanduuko ng'eteekeddwamu.
- ³² Baaweererezanga mu nnyimba mu maaso g'ekunŋaaniro ey'Eweema ey'Okusisikanirangamu, okutuusa Sulemaani lwe yazimba yeekaalu

ya MUKAMA mu Yerusaalemi. Era bakolanga emirimu gyabwe, nga bagoberera ebiragiro ebyabaweebwa.

³³ Bano be basajja abaaweerezanga, wamu ne batabani baabwe: Okuva mu Abakokasi; Kemani, omuyimbi, mutabani wa Yoweeri, muzzukulu wa Samwiri,

³⁴ muzzukulu wa Erukaana, muzzukulu wa Yerokamu, muzzukulu wa Eryeri, muzzukulu wa Toowa,

³⁵ muzzukulu wa Zufu, muzzukulu wa Erukaana, muzzukulu wa Makasi, muzzukulu wa Amasayi;

³⁶ muzzukulu wa Erukaana, muzzukulu wa Yoweeri, muzzukulu wa Azaliya, muzzukulu wa Zeffaniya,

³⁷ muzzukulu wa Takasi, muzzukulu wa Assiri, muzzukulu wa Ebiyasaafu, muzzukulu wa Koola,

³⁸ muzzukulu wa Izukali, muzzukulu wa Kokasi, muzzukulu wa Leevi, mutabani wa Isirayiri.

³⁹ Kemani yalina muganda we Asafu eyamuyambangako mu mulimu ogwo, era n'ab'enju ye baali bwe bat: Asafu mutabani wa Berekiya, muzzukulu wa Simeeyi,

⁴⁰ muzzukulu wa Mikayiri, muzzukulu wa Baaseya, muzzukulu wa Malukiya,

⁴¹ muzzukulu wa Esuni, muzzukulu wa Zeera, muzzukulu wa Adaaya,

⁴² muzzukulu wa Esani, muzzukulu wa Zimma, muzzukulu wa Simeeyi,

⁴³ muzzukulu wa Yakasi, muzzukulu wa Gerusoni, mutabani wa Leevi.

⁴⁴ Ne baganda be abalala abaamuyambangako baali abazzukulu ba Merali, mutabani wa Leevi, Esani mutabani wa Kiisi, muzzukulu wa Abudi, muzzukulu wa Malluki,

⁴⁵ muzzukulu wa Kasukabiya, muzzukulu wa Amaziya, muzzukulu wa Kirukiya, muzzukulu wa Amaziya,

⁴⁶ muzzukulu wa Amuzi, muzzukulu wa Bani, muzzukulu wa Semeri,

⁴⁷ muzzukulu wa Makuli, muzzukulu wa Musi, muzzukulu wa Merali, mutabani wa Leevi.

⁴⁸ Baganda baabwe Abaleevi baavunaanyizibwanga okukola emirimu gyonna egy'omu Weema, ye Nnyumba ya Katonda.

Ennyumba ya Aloon

⁴⁹ Naye Aloon ne batabani be ne bazzukulu be, be baawangayo ku kyoto ebiweebwayo ebyokebwa ne ku kyoto eky'okwoterezangako obubaane

olw'ebyo byonna ebyakolebwanga mu Kifo ekisinga Obutukuvu, olw'okutangirira Isirayiri, nga Musa, omuddu wa Katonda bwe yalagira.

⁵⁰Bano be baava mu nda ya Aloon: mutabani we Eriyazaali, muzzukulu we Finekaasi, muzzukulu we Abisuwa,

⁵¹muzzukulu we Bukki, muzzukulu we Uzzi, muzzukulu we Zerakiya,

⁵²muzzukulu we Merayoosi, muzzukulu we Amaliya, muzzukulu we Akitubu,

⁵³muzzukulu we Zadooki, ne muzzukulu we Akimaazi.

⁵⁴Bino by'ebifo ebyabawebwa okutuulamu ng'ensi yaabwe era bino bye byali biweereddwa bazzukulu ba Aloon Abakokasi, kubanga be baasooka okufuna omugabo.

⁵⁵Baaweebwa Kebbulooni mu nsi ya Yuda, n'amalundiro agakyetoolodde,

⁵⁶naye ennimiro n'ebyalo ebyetoolodde ekibuga ekyo, byaweebwa Kalebu mutabani wa Yefune.

⁵⁷Bazzukulu ba Aloon baaweebwa Kebbulooni, ekibuga eky'okwekwekamu, Libuna n'amalundiro gaakyo,

⁵⁸Kireni n'amalundiro gaakyo, Debiri n'amalundiro gaakyo,

⁵⁹Asani n'amalundiro gaakyo, ne Besusemesi n'amalundiro gaakyo.

⁶⁰Ate n'okuva eri ekika kya Benyamini baaweebwa Gibyon ne Geba, ne Allemesi, ne Anasosi wamu n'amalundiro gaabyo. Ebibuga byonna awamu ebyaweebwa Abakokasi byali kkumi na bisatu.

⁶¹Bazzukulu ba Kokasi abalala baweebwa ebibuga kkumi okuva ku nda ez'ekitundu ky'ekika kya Manase nga bakuba akalulu.

⁶²Bazzukulu ba Gerusoni, ng'enda zaabwe bwe zaali, baaweebwa ebibuga kkumi na bisatu okuva ku bika bya Isakaali, Aseri, Nafutaali, n'okuva ku kika kya Manase mu Basani.

⁶³Bazzukulu ba Merali ng'enda zaabwe bwe zaali, baaweebwa ebibuga kkumi na bibiri okuva ku bika bya Lewubeeni, Gaadi ne Zebbulooni.

⁶⁴Awo Abayisirayiri ne bawa Abaleevi ebibuga ebyo ne babaweerako n'amalundiro byabyo.

⁶⁵N'ebibuga okuva mu bika bya Yuda, ne Simyoni ne Benyamini ebyogeddwako byabaweebwa nga bakuba akalulu.

⁶⁶Enda ezimu eza Kokasi zaaweebwa ebibuga okuva eri ensi y'ekika kya Efulayimu.

- ⁶⁷ Okuva eri ensi ya Efulayimu baaweebwa Sekemu, ekibuga ky'obuddukiro, Gezeri,
- ⁶⁸ ne Yokumyamu, ne Besukolooni,
- ⁶⁹ ne Ayalooni ne Gasulimmoni, n'amalundiro gaabyo.
- ⁷⁰ N'okuva eri ekitundu ky'ekika kya Manase, Abayisirayiri ne babagabira Aneri ne Biryamu, wamu n'amalundiro byako eri enda ezaali zisigaddewo eza Kokasi.
- ⁷¹ Abagerusomu baaweebwa ebifo bino wansi: okuva eri ekitundu ky'ekika kya Manase baafuna Golani mu Basani ne Asutoleesi, wamu n'amalundiro byako.
- ⁷² Okuva eri ekika kya Isakaali baafuna Kedesi, Daberasi
- ⁷³ Lamosi ne Anemu wamu n'amalundiro gaabyo (byako);
- ⁷⁴ okuva eri ekika kya Aseri, baafuna Masali, Abudoni,
- ⁷⁵ Kukkoki ne Lekobu wamu n'amalundiro gaabyo;
- ⁷⁶ n'okuva eri ekika kya Nafutaali baafuna Kedesi eky'omu Ggaliraaya, ne Kammoni ne Kiriyasayimu wamu n'amalundiro byako.
- ⁷⁷ Abaleevi abaali basigaddewo, be bazzukulu ba Merali, baaweebwa ebifo bino wansi: okuva eri ekika kya Zebbulooni baafuna Limunono ne Taboli wamu n'amalundiro byabyo;
- ⁷⁸ okuva eri ekika kya Lewubeeni, emitala wa Yoludaani ku luuyi olw'ebuvanjuba lw'e Yeriko, baafuna Bezeri ekiri mu ddungu, Yaza,
- ⁷⁹ Kedemosi ne Mefaasi wamu n'amalundiro byabyo;
- ⁸⁰ n'okuva eri ekika kya Gaadi baafuna Lamosi ekiri mu Gireyaadi, Makanayimu,
- ⁸¹ Kesuboni ne Yazeri wamu n'amalundiro byabyo.

1 Ebyomumirembe 7

Ekika kya Isakaali

- ¹ Abaana ba Isakaali baali bana: Tola, ne Puwa, ne Yasubu, ne Simuloni.
- ² Batabani ba Tola baali Uzzi, Lefaya, Yeryeri, Yamayi, Ibusamu ne Semweri, era be baali abakulu b'enda zaabwe. Ku mulembe gwa Dawudi, bazzukulu ba Tola baali abasajja abalwanyi nga bawera emitwalo ebiri mu enkumi bbiri mu lukaaga.
- ³ Uzzi n'azaala Izulakiya. Izulakiya n'azaala Mikayiri, ne Obadiya, ne Yoweeru ne Issiya, era bona baali bakulu.

⁴Okusinziira ku nda yaabwe, baali basajja b'amaanyi era nga balwanyi ba ntalo, nga balina abakyala n'abaana bangi, nga bawera abasajja emitwalo esatu mu kakaaga.

⁵Baganda baabwe bona awamu abaali ab'ekika kya Isakaali baali abasajja abalwanyi emitwalo munaana mu kasanvu bona awamu.

Ekika kya Benyamini

⁶Benyamini yalina abatabani basatu, Bera, ne Bekerri ne Yediyayeri.

⁷Batabani ba Bera baali Ezuboni, ne Uzzi, ne Wuziyeeri, ne Yerimosi ne Iri, be baana bataano, ate nga bona bakulu b'enda zaabwe. Mu kubalibwa baali abasajja abalwanyi emitwalo ebiri mu enkumi bbiri mu amakumi asatu mu bana.

⁸Batabani ba Bekerri baali Zemira, ne Yowaasi, ne Eryeza, ne Eriwenayi, ne Omuli, ne Yeremosi, ne Abiya, ne Anasosi ne Alemesi. Bano be baali abaana ba Bekerri ate nga bona bakulu b'enda zaabwe.

⁹Mu kubalibwa baali abasajja abalwanyi emitwalo ebiri mu ebikumi bibiri mu bibiri.

¹⁰Mutabani wa Yediyayeri, yali Birukani, ate batabani ba Birukani nga be ba Yewusi, ne Benyamini, ne Ekudi, ne Kenaana, ne Zesani, ne Talusiisi ne Akisakali.

¹¹Bano bona baali bazzukulu ba Yediyayeri ate nga be bakulu b'enda zaabwe. Era baali abasajja abalwanyi omutwalo gumu mu kasanvu mu ebikumi bibiri.

¹²Abasuppimu n'Abakupimu baali bazzukulu ba Iri, ate ng'Abakusimu bazzukulu ba Akeri.

Ekika kya Nafutaali

¹³Batabani ba Nafutaali baali Yaziyeri, ne Guni, ne Yezeri ne Sallumu, era bano be bazzukulu ba Biruka.

Ekika kya Manase

¹⁴Bano be baali bazzukulu ba Manase: Asuliyeri ne Makiri mukyala we Omwalamu. Be yamuzaalira. Makiri n'azaala Gireyaadi.

¹⁵Makiri n'awasa okuva mu Bakupimu n'Abasuppimu, n'erinnya lya mwannyina nga ye Maaka. Omuzzukulu omulala yali Zerokekadi, era ng'alina baana ba buwala bokka.

¹⁶Maaka mukyala wa Makiri n'azaala omwana wabulenzi n'amutuumma Peresi. Muganda we ye yali Seresi, nga ne batabani ba Seresi be ba Ulamu ne Lekemu.

¹⁷Mutabani wa Ulamu yali Bedani, era bano nga be batabani ba Gireyaadi, mutabani wa Makiri, mutabani wa Manase.

¹⁸Mwannyina Kammolekisi n'azaala Isukondi, ne Abiyezeeri ne Makula.

¹⁹Batabani ba Semida baali Akyani, ne Sekemu, ne Liki ne Aniyamu.

Ekika kya Efulayimu

²⁰Mutabani wa Efulayimu yali Susera, mutabani wa Susera nga ye Beredi, mutabani wa Beredi nga ye Takasi, mutabani wa Takasi nga ye Ereyadda, mutabani wa Ereyadda nga ye Takasi,

²¹mutabani wa Takasi nga ye Zabadi, ate mutabani wa Zabadi nga ye Susera. Efulayimu yalina batabani be abalala babiri, nga be ba Ezeri ne Ereyaddi abattibwa mu nsi ya Gusi nga bagenze okubba (okunyaga) ente.

²²Efulayimu n'abakungubagira okumala ennaku nnyingi, era baganda be ne bajja okumukungubagirako.

²³Awo Efulayimu n'amanya mukyala we, mukyala we n'azaala omwana owoobulenzi omulala, n'amutuumma Beriya kubanga ennyumba ye yatuukibwako emitawaana.

²⁴Ne muwala we yali Sera, era oyo yazimba Besukoloni ekya eky'emmanga n'eky'engulu, ne Uzzemmuseera.

²⁵Efulayimu yalinayo n'omutabani omulala erinnya lye Leefa, nga ye kitaawe wa Lesefu, Lesefu n'azaala Teera, Teera n'azaala Takani,

²⁶Takani n'azaala Ladani, Ladani n'azaala Ammikudi, Ladani n'azaala Erisaama,

²⁷Erisaama n'azaala Nuuni, Nuuni n'azaala Yoswa.

²⁸Ettaka lyabwe n'ebifo we baasenga byali Beseri n'obubuga obutono obukyetoolodde, ebuvanjuba w'e Naalani, ebugwanjuba w'e Gezeri, n'obubuga bwakyo, n'e Sekemu n'obubuga bwakyo, okutuukira ddala ku Azza n'obubuga obukyetoolodde.

²⁹Bazzukulu ba Yusufu, Abamanase, mutabani wa Isirayiri babeeranga Besuseyani, n'e Taanaki, n'e Megiddo, n'e Doli n'obubuga obwali bubiriranye.

Ekika kya Aseri

³⁰Abaana ba Aseri baali Imuna, ne Isuva, ne Isuvi, ne Beriya, ne Seera mwannyinaabwe.

³¹Batabani ba Beriya baali Keberi ne Malukiyeeri, ne Malukiyeeri nga ye kitaawe wa Biruzayisi.

³²Keberi n'azaala Yafuleti, ne Somera, ne Kosamu ne mwannyinaabwe Suwa.

³³Batabani ba Yafuleti baali Pasaki, ne Bimukali, ne Asuvasi.

³⁴Batabani ba Semeri baali Aki, ne Loga, ne Yekubba ne Alamu.

³⁵Batabani ba muganda we Keremu baali Zofa, ne Imuna, ne Seresi ne Amali.

³⁶Batabani ba Zofa baali Suwa, ne Kaluneferi, ne Suwali, ne Beri, ne Imula,

³⁷ne Bezeri, ne Kodi, ne Samma, ne Sirusa, ne Isulani ne Beera.

³⁸Batabani ba Yeseri baali Yefune, ne Pisupa ne Ala.

³⁹Batabani ba Ulla baali Ala, ne Kanieri ne Liziya.

⁴⁰Bano bona baali bazzukulu ba Aseri, abamu nga bakulu ba nda zaabwe abalala nga basajja baakitiibwa, n'abalala nga balwanyi abazira, n'abalala nga baami bakulu ddala mu bitiibwa byabwe. Abasajja abalwanyi bona awamu bawera emitwalo ebiri mu kakaaga.

1 Ebyomumirembe 8

Ekika kya Benyamini

¹ Benyamini n'azaala Bera, era oyo ye yali omubereberye, Asuberi nga ye wookubiri, Akala nga ye wookusatu;

²Noka nga wakuna, ne Lafa nga ye wookutaano.

³ Batabani ba Bera baali Addali, ne Gera, ne Abikudi,

⁴ne Abisuwa, ne Naamani, ne Akowa

⁵ne Gera, ne Sefufani ne Kulamu.

⁶ Bazzukulu ba Ekudi mutabani wa Gera baali bakulu b'enda z'abo abaabeeranga mu Geba nga baabatwala e Manakasi nga basibe era be bano:

⁷Naamani, ne Akiya, ne Gera eyabakulembra nga bagenda mu buwanjjanguse, ate nga ye kitaawe wa Uzza ne Akikudi.

⁸Sakalayimu n'azaala abaana abalala mu nsi y'e Mowaabu, ng'amaze okugoba abakyala be ababiri, Kusimu ne Baala.

⁹Kodesi yamuzaalira Yokabu, ne Zibiya, ne Mesa, ne Malukamu,

¹⁰ne Yewuzi, ne Sakiya, ne Miruma, era bano be baali abakulu b'enda za bajajajaabwe.

¹¹Kusimu yamuzaalira Abitubu ne Erupaali.

¹² Batabani ba Erupaali baali Eberi, ne Misamu, ne Semedi, eyazimba Ono ne Loodi n'ebibuga ebibyetoolodde,

¹³Beriya, ne Sema abakulu b'enda z'abo abaabeeranga e Ayalooni, era be baagoba abaabeeranga mu Gaasi.

¹⁴Abaana abalala baali Akiyo, ne Sasaki, ne Yeremosi,

¹⁵ne Zebadiya, ne Aladi, ne Ederi

¹⁶ne Mikayiri, ne Isupa, ne Yoka,

¹⁷ne Zebadiya, ne Mesullamu, ne Kizuki, ne Keberi,

- ¹⁸ne Isumerayi, ne Izuliya, ne Yobabu.
- ¹⁹Batabani ba Simeeyi baali Yakimu, ne Zikuli, ne Zabudi,
- ²⁰ne Eryenayi, ne Ziresayi, ne Eryeri,
- ²¹ne Adaaya, ne Beraya, ne Simulasi.
- ²²Batabani ba Sasaki baali Isupani, ne Eberi, ne Eryeri,
- ²³ne Abudoni, ne Zikuli, ne Kanani,
- ²⁴ne Kananiya, ne Eramu, ne Anusosiya,
- ²⁵Sasaki ne Ifudeya ne Penueri.
- ²⁶Batabani ba Yerokamu baali Samuserayi, ne Sekaliya, ne Asaliya,
- ²⁷ne Yaalesiya, ne Eriya, ne Zikuli.
- ²⁸Bano wammanga be baali abakulu b'enda, abaami, nga bwe bayogerwako mu nnyiriri zaabwe, era baabeeranga mu Yerusaalemi.
- ²⁹Yeyeri omukulembeze we Gibyoni yabeeranga Gibyoni, ne mukyala we ye yali Maaka.
- ³⁰Mutabani we omuggulanda yali Abudoni, ne Zuuli n'amuddirira, ne Kiisi n'amuddako, ne Baali, ne Nadabu,
- ³¹ne Gedoli, ne Akiyo, ne Zekeeri
- ³²ne Mikuloosi n'azaala Simeeyi. Nabo baabeeranga kumpi ne baganda baabwe mu Yerusaalemi.
- ³³Neeri n'azaala Kiisi, ne Kiisi n'azaala Sawulo, ne Sawulo n'azaala Yonasaani, ne Malukisuwa, ne Abinadaabu ne Esubaali.
- ³⁴Mutabani wa Yonasaani yali Meribubaali, ye Mefibosesi, eyazaala Mikka.
- ³⁵Batabani ba Mikka baali Pisoni, ne Merek, ne Taleya ne Akazi.
- ³⁶Akazi n'azaala Yekoyaada, Yekoyaada n'azaala Alemesi, ne Azumavesi, ne Zimuli, ne Zimuli n'azaala Moza.
- ³⁷Moza n'azaala Bineya, Bineya n'azaala Lafa, ne Ereyaasa ne Azeri.
- ³⁸Azeri yazaala abaana aboobulenzi mukaaga, nga be ba Azulikamu, ne Bokeru, ne Isimayiri, ne Seyaliya, ne Obadiya ne Kanani.
- ³⁹Batabani ba muganda we Eseki baali Ulamu omubereberye, ne Yewusi nga ye owookubiri ne Erifereti nga ye wookusatu.

⁴⁰Batabani ba Ulamu baali basajja bazira era nga b'amaanyi, nga balasi ba busaale, nga n'abaana n'abazzukulu bangi ddala. Bonna awamu baali kikumi mu ataano. Abo bona baali bazzukulu ba Benyamini.

1 Ebyomumirembe 9

Ebika Ebyava mu buwañjanguse mu Babulooni

¹Eggwanga lyonna erya Isirayiri lyabalibwa ng'okuzaalibwa kwabwe bwe kwali era ne bawandiikibwa mu kitabo ky'ebafaayo bya bassekabaka ba Isirayiri. Olw'okukola ebibi mu maaso ga MUKAMA, abantu ba Yuda nabo baatwalibwa mu buwañjanguse.

²Abaasooka okubeera ewaabwe mu bibuga byabwe be baali Abayisirayiri abamu, ne bakabona, n'Abaleevi, n'abalala abaaweerezanga mu yekaaalu.

³Abamu ku abo abaabeeranga mu Yerusaalemi nga bava mu Yuda, ne Benyamini, ne Efulayimu ne Manase baali:

⁴Usayi mutabani wa Ammikudi, muzzukulu wa Omuli, muzzukulu wa Imuli, muzzukulu wa Bani, muzzukulu wa Pereezi, mutabani wa Yuda.

⁵Ku Basiiro, Asaya omuggulanda mu nnyumba ye, wamu ne batabani be.

⁶Ku bazzukulu ba Zeera, Yeweri n'ab'omu kika kye okuva mu Yuda abantu lukaaga mu kyenda.

⁷Ku bazzukulu ba Benyamini, Sallu mutabani wa Mesullamu, muzzukulu wa Kodaviya, muzzukulu wa Kassenuwa,

⁸ne Ibuneya mutabani wa Yerokamu, ne Era mutabani wa Uzzi, muzzukulu wa Mikuli, ne Mesullamu mutabani wa Sefatiya, muzzukulu wa Leweri, muzzukulu wa Ibuniya.

⁹Abantu b'omu kika kya Benyamini, baali bawera lwenda mu ataano mu mukaaga, ate nga bona bakulu ba nda zaabwe.

¹⁰Ku bakabona abaakomawo kwaliko Yedaya, ne Yekoyalibu, ne Yakini,

¹¹ne Azaliya mutabani wa Kirukiya, muzzukulu wa Mesullamu, muzzukulu wa Zadooki, muzzukulu wa Merayoosi, muzzukulu wa Akituubu, omukulu eyavunaanyizibwanga ennyumba ya Katonda;

¹²ne Adaaya mutabani wa Yerokamu, muzzukulu wa Pasukuli, muzzukulu wa Malukiya, ne Maasayi mutabani wa Adyeri, muzzukulu wa Yazera, muzzukulu wa Mesullamu, muzzukulu wa Mesiremisi, muzzukulu wa Immeri.

¹³Bakabona abaali abakulu b'enda zaabwe baali lukumi mu lusanvu mu nkaaga. Baali basajja babuvunaanyizibwa mu buweereza bwabwe mu nnyumba ya Katonda.

¹⁴Ku baleevi kwaliko: Semaaya mutabani wa Kassubu, muzzukulu wa Azulikamu, muzzukulu wa Kasabiya, omu ku b'enda ya Merali,

¹⁵ne Bakubakkali, ne Keresi, ne Galali ne Mattaniya mutabani wa Mikka, muzzukulu wa Zikuli, muzzukulu wa Asafu,

¹⁶ne Obadiya mutabani wa Semaaya, muzzukulu wa Galali, muzzukulu wa Yedusuni; ne Berekiya mutabani wa Asa, muzzukulu wa Erukaana, eyabeeranga mu byalo eby'Abanetofa.

¹⁷Abaggazi ba wankaaki baali, Sallumu, ne Akabu, ne Talumoni, ne Akimaani ne baganda baabwe abalala, era mukulu waabwe ye yali Sallumu;

¹⁸be baayimiriranga ku ludda olw'ebuvanjuba olwa wankaaki ya Kabaka, era gwe mulimu gwabwe n'okutuusa leero. Abo be baali abaggazi ab'omu kika ky'Abaleevi.

¹⁹Sallumu yali mutabani wa Koole, muzzukulu wa Ebiyasaafu, muzzukulu wa Koola, ne ab'omu nnyumba ya kitaawe be baavunaanyizibwanga okukuma enzigi za yeekaalu nga bajajaabwe nabo bwe baavunaanyizibwanga omulyango gw'ekifo MUKAMA gy'abeera.

²⁰Finekaasi mutabani wa Eriyazaali ye yakuliranga abaggazi mu biro eby'edda, era MUKAMA n'abeeranga wamu naye.

²¹Zekkaliya mutabani wa Meseremiya ye yali omuggazi ku mulyango gw'Eweema ey'Okukunjaanirangamu.

²²Bonna awamu, abaalondebwu okuba abaggazi b'emiryango baali bibiri mu kkumi na babiri, era baali baawandiikibwa mu byalo byabwe ng'okuzaalibwa kwabwe bwe kwali. Dawudi ne nnabbi Samwiri be bayawula emirimu gy'abaggazi nga bwe gyali.

²³Bo ne bazzukulu baabwe, be baavunaanyizibwanga okukuma enzigi z'ennyumba ya MUKAMA, ennyumba eyayitbwanga Eweema.

²⁴Abaggazi baabeeranga ku njuyi ennya, olw'ebuvanjuba, olw'ebugwanjuba, olw'obukiikkono, n'olwobukiikkaddyo,

²⁵era baganda baabwe okuva mu byalo byabwe, bajjanga mu mpalo ne bakumanga okumala ebbanga kya nnaku musanvu.

²⁶Abaggazi abana, abaali Abaleevi, be baaweebwa obuvunaanyizibwa okulabiriranga ebisenge eby'omunda n'amawanika ag'omu nnyumba ya Katonda.

²⁷Baasulanga okuliraana ne nnyumba ya Katonda kubanga be baagikuumanga, era nga buli nkya be bavunaanyizibwa okugiggalawo.

²⁸Abamu ku bo baavunaanyizibwanga okukuumma ebintu ebyakozesebwanga mu kuweereza mu yeekaalu, era nga be babala ennyingiza yaabyo ne nfulumya yaabyo.

²⁹Abalala baavunaanyizibwanga okulabirira ebikozesebwa mu mirimu n'ebintu byonna eby'omu watukuvu, era nga be bavunaanyizibwa okulabirira obutta obulungi, n'omwenge, n'amafuta, n'omugavu, n'ebyakaloosa.

³⁰Wabula abamu ku bakabona baategekanga byakaloosa.

³¹Mattisiya mutabani wa Sallumu Omukoola, ate nga y'omu ku Baleevi, ye yavunaanyizibwanga okufumba emigaati gy'ebiweebwayo,

³²era abamu ku baganda b'Abakokasi baavunaanyizibwanga okussanga emigaati egya buli ssabbiiti ku m meeza.

³³Abayimbi, abakulu b'ekika ky'Abaleevi baasulanga mu bisenge eby'omunda wa Yeekaalu, era nga tebakola mulimu mulala gwonna emisana n'ekiro okuggyako ogwo ogwabwe omutongole.

³⁴Abo bona baali bakulu b'enda ez'Abaleevi, nga bwe baawandiikibwa mu kuzaalibwa kwabwe, era baabeeranga mu Yerusaalemi.

Enda ya Sawulo

³⁵Yeyeri kitaawe wa Gibyoni era yatulanga mu Gibyoni, n'erinnya lya mukyalawenga ye Maaka,

³⁶ne mutabani waabwe omuggulanda yali Abudoni, Zuuli n'amuddirira, Kiisi n'addako, Baali n'addako, Neeri n'addako, Nadabu n'addako,

³⁷ne Gedoli n'addako, Akiyo n'addako, Zekkaliya n'addako, Mikuloosi n'asembayo.

³⁸Mikuloosi yazaala Simyamu, era nabo baabeeranga kumpi ne baganda baabwe mu Yerusaalemi.

³⁹Neeri n'azaala Kiisi, Kiisi n'azaala Sawulo. Sawulo n'azaala Yonasaani, ne Malukisuwa, ne Abinadaabu ne Esubaali.

⁴⁰Mutabani wa Yonasaani ye yali Meribubaali, ne Meribubaali n'azaala Mikka.

⁴¹Batabani ba Mikka baali Pisoni, ne Merek, ne Taleya ne Akazi.

⁴²Akazi n'azaala Yala, Yala n'azaala Alemesi, ne Azumavesi ne Zimuli, ate Zimuli n'azaala Moza.

⁴³Moza n'azaala Bineya, Bineya n'azaala Lefaya, Lefaya n'azaala Ereyasa, Ereyasa n'azaala Azeri.

⁴⁴Azeri yalina batabani be mukaaga, era gano ge gaali amannya gaabwe: Azulikamu, ne Bokeru, ne Isimayiri, ne Seyaliya, ne Obadiya, ne Kanani.

1 Ebyomumirembe 10

Sawulo Yetta

¹Awo Abafirisuuti ne balumba Isirayiri, abasajja Abayisirayiri ne babadduka era bangi ku bo ne battibwa ku Lusozi Girubowa.

²Abafirisuuti ne bagohera ddala Sawulo ne batabani be, era batabani be Yonasaani, ne Abinadaabu ne Malukisiwa ne battibwa.

³Olutalo ne lweyongererera ddala ne Sawulo ne yeeraliikirira nnyo, anti n'abalasi nga bamutuseeko era baamulasa n'alumizibwa.

⁴Awo Sawulo n'agamba eyamusituliranga ebyokulwanyisa bye nti, "Sowola ekitala kyo, onfumite, ng'abasajja abo abatali bakomole tebannajja ku nswaza." Naye eyamusituliranga ebyokulwanyisa bye n'aty a nnyo, era n'agaana. Sawulo kyeyava asowolayo ekitala kye n'akigwako.

⁵Awo eyamusituliranga ebyokulwanyisa bwe yalaba nga Sawulo afudde, naye n'asowolayo ekikye ne yetta.

⁶Sawulo n'afa bw'atyo ne batabani be bonsatule, era n'abo mu nnyumba ye bona ne bafa.

⁷Awo Abayisirayiri bona abaali mu kiwonvu, bwe baalaba ng'eggye lyabwe lidduse, nga ne Sawulo ne batabani be bafudde, ne baleka ebibuga byabwe ne badduka, Abafirisuuti ne bajja ne babibeeramu.

⁸Enkeera, Abafirisuuti bwe bajja okwambula abafudde, ne basanga Sawulo ne batabani be nga bafiiridde ku Lusozi Girubowa.

⁹Ne bamwambula, ne bamuggyako ebyokulwanyisa bye, ne bamutemako omutwe, era ne batuma n'babaka okuddayo mu nsi y'Abafirisuuti okubategeeza amawulire ago.

¹⁰Ne bateeka ebyokulwanyisa bya Sawulo mu ssabo lya bakatonda baabwe, ate n'omutwe gwe ne guwanikibwa mu ssabo lya Dagoni.

¹¹Awo ab'e Yabesugireyaadi bona bwe baawulira byonna Abafirisuuti bye baakola Sawulo,

¹²abasajja abazira mu bo ne bagenda ne baggyayo omulambo gwa Sawulo n'eggya batabani be, ne bagireeta e Yabesi. Ne baziika amagumba gaabwe wansi w'omwera e Yabesi, era ne basiibira ennaku musanvu.

¹³Bw'atyo Sawulo n'afa olw'obutaba mwesigwa eri MUKAMA, n'obutakwata kigambo kya MUKAMA, ate n'okulagulwa omusamize n'amwebuuzaako,

¹⁴mu kifo ky'okwebuuza ku MUKAMA. MUKAMA kyeyava atta Sawulo n'obwakabaka n'abuwa Dawudi mutabani wa Yese.

1 Ebyomumirembe 11

Dawudi Afuuka kabaka wa Isirayiri Yonna

¹ Isirayiri yenna ne bakuñjaanira eri Dawudi e Kebbulooni, ne boogera nti, “Laba tuli ba mubiri gwo, na musaayi gwo.

² Mu biro eby'edda, Sawulo bwe yali kabaka ggwe wakulembera Isirayiri mu ntalo. Era MUKAMA Katonda wo n'akugamba nti, ‘Ggwe olirabirira abantu bange Isirayiri, era oliba mukulembeze waabwe.’”

³ Awo abakadde ba Isirayiri bona ne bakuñjaanira eri Kabaka Dawudi e Kebbulooni, n'akola endagaano nabo e Kebbulooni mu maaso ga MUKAMA, era ne bafuka amafuta ku Dawudi okuba kabaka wa Isirayiri, nga MUKAMA bwe yasuubiza mu kigambo kye ng'ayita mu Samwiri.

⁴ Awo Dawudi ng'ali wamu n'Abayisirayiri bona ne boolekera Yerusaalemi, ye Yebusi. Ne basangayo Abayebusi abaabeerangamu.

⁵ Abayebusi ne bagamba Dawudi nti, “Tojja kuyingira muno.” Naye Dawudi n'awamba ekigo kya Sayuuni, ky'ekibuga kya Dawudi.

⁶ Dawudi yaliasuubizza nti, “Oyo anaakulembera okulumba Abayebusi, ye aliba Omuduumizi w'eggye omukulu.” Awo Yowaabu mutabani wa Zeruyiya n'abakulembera era n'aweebwa obukulu obwo.

⁷ Awo Dawudi n'abeeranga mu kigo, era ne kituumibwa Ekibuga kya Dawudi.

⁸ N'azimba ekibuga okukyetooloola, okuva ku Miyo okutuukira ddala ku bbugwe w'ekibuga, ate Yowaabu ye n'addaabiriza ebitundu ebirala eby'ekibuga.

⁹ Awo Dawudi ne yeeyongeranga okuba ow'amaanyi, kubanga MUKAMA ow'Eggye yali wamu naye.

Abasajja Abazira aba Dawudi

¹⁰ Bano be baali abasajja abalwanyi abazira aba Dawudi, abaamuwigiranga ennyo mu bwakabaka bwe, wamu ne Isirayiri yenna okumufulira ddala kabaka ow'enkalakkalira ng'ekigambo kya MUKAMA kye yasuubiza Isirayiri bwe kyali;

¹¹ Bano be basajja ba Dawudi abalwanyi ab'amaanyi be yalina: Yasobeyamu Omukakumoni, eyali omukulu w'abaduumizi abasatu; era yayimusiza abasajja abalwanyi bisatu effumu lye bona n'abatta mu lulumbagana lumu.

¹² Eyamuddiriranga mu buyinza ye yali Eriyazaali mutabani wa Dodo Omwakowa, era nga y'omu ku baduumizi abasatu.

¹³ Yali wamu ne Dawudi e Pasudawinimu, bwe baali bakuñjaanidde eyo okulwana, mu nnimiro eyalimu sayiri omungi, era abaserikale badduka Abafirisuuti.

¹⁴Naye baayimirira wakati mu nnimiro ne bagirwanirira, era ne batta Abafirisuuti, nga MUKAMA y'abawadde obuwanguzi.

¹⁵Awo abasajja basatu ne balaga mu mpuku ya Adulamu omwali Dawudi, nga n'eggye ly'Abafirisuuti lisiisidde mu kiwonvu Lefayimu.

¹⁶Mu kiseera ekyo Dawudi yali mu kigo, nga n'eggye ly'Abafirisuuti liri e Besirekemu.

¹⁷Dawudi n'ayagala amazzi, n'agamba nti, "Singa wabaddewo omuntu anfunira amazzi ag'okunywa ag'omu luzzi oluli okumpi ne wankaaki ya Besirekemu."

¹⁸Awo abasajja abazira abasatu ne bawaguza mu ggye ly'Abafirisuuti, ne basena amazzi okuva mu luzzi oluli okumpi ne wankaaki wa Besirekemu, era ne bagatwalira Dawudi. Naye Dawudi mu kifo ky'okuganywa yagawaayo ng'agafuka eri MUKAMA.

¹⁹N'agamba nti, "Nnyinza ntya okunywa omusaayi gw'abasajja bano, abawaddeyo obulamu bwabwe, okumpi n'okubufiirwa?" Olw'okuwaayo obulamu bwabwe okugaleeta, Dawudi yali tasobola kuganywa. Obwo nno bwe bwali obuzira bw'abasajja abo.

²⁰Abisayi muganda wa Yowaabu ye yali omukulu w'abo abasatu, era oyo ye yayimusiza effumu abasajja abalwanyi bisatu era n'abatta, era kyeyava ayatiikirira mu basatu.

²¹Yali mwatiikirivu nnyo okusinga abasatu, abooluberebery, era n'aba muduumizi waabwe, newaakubadde nga teyalibwa ng'omu ku bakulu.

²²Benaya mutabani wa Yekoyaada yali mulwanyi omuzira ow'e Kabuzeeri, eyakola ebyobuzira bingi, era n'okutta yatta abasajja ababiri abaali basingayo amaanyi mu Mowaabu. Ate era yakka mu bunnya mu biro eby'omuzira n'atta empologoma.

²³Yatta Omumisiri omuwanvu ennyo eyali fuuti musanvu n'ekitundu. Newaakubadde nga Omumisiri yalina effumu eryenkana omuti ogulukirwako engoye, Benaya ye yagenda gyali ng'alina omuggo, era n'amuggyako effumu, n'alimuttisa.

²⁴Ebyo bye bimu ku byobuzira Benaya mutabani wa Yekoyaada bye yakola, era naye n'ayatiikirira nga bali abasajja abasatu ab'amaanyi.

²⁵Yaweebwa ekitiibwa kya waggulu nnyo okusinga abakulu amakumi asatu, newaakubadde nga teyatuu ka ku ssa lya bali abasatu. Era Dawudi yamufuula omukulu w'abambowa be.

²⁶Abasajja abazira ab'eggye baali: Asakeri muganda wa Yowaabu, ne Erukanani mutabani wa Dodo ow'e Besirekemu,

- ²⁷ ne Sammosi Omukalooli, ne Kerezi Omuperoni;
- ²⁸ ne Ira mutabani wa Ikkesi Omutekowa, ne Abiyenzeeri Omwanasosi,
- ²⁹ ne Sibbekayi Omukusasi, ne Irayi Omwakowa,
- ³⁰ ne Makalayi Omunetofa, ne Keredi mutabani wa Bayana Omunetofa,
- ³¹ ne Isayi mutabani wa Libayi ow'e Gibea ow'ekika kya Benyamini, ne Benaya Omupirasoni,
- ³² ne Kulayi ow'oku bugga obw'e Gaasi, ne Abyeri Omwalubasi,
- ³³ ne Azumavesi Omubakalumi, ne Eriyaba Omusaaluboni,
- ³⁴ batabani ba Kasamu Omugizoni, ne Yonasaani mutabani wa Sage Omukalali;
- ³⁵ ne Akiyamu mutabani wa Sakali Omukalali, ne Erifali mutabani wa Uli,
- ³⁶ ne Keferi Omumekera, ne Akiya Omuperoni,
- ³⁷ ne Kezulo Omukalumeeri, ne Naalayi mutabani wa Ezubayi,
- ³⁸ ne Yoweeri muganda wa Nasani, ne Mibukali mutabani wa Kaguli;
- ³⁹ ne Zerekki Omwamoni, ne Nakalayi Omubeerosi, ey'etikkanga ebyokulwanyisa bya Yowaabu mutabani wa Zeruyiya,
- ⁴⁰ ne Ira Omuyisuli, ne Galebu Omuyisuli,
- ⁴¹ ne Uliya Omukiiti, ne Zabadi mutabani wa Akulayi,
- ⁴² ne Adina mutabani wa Siza Omulewubeeni, eyali omukulembeze wa Balewubeeni, n'amakumi asatu abaabeeranga naye,
- ⁴³ ne Kanani mutabani wa Maaka, ne Yosafaati Omumisuni,
- ⁴⁴ ne Uzziya Omwasutaloosi, ne Samma ne Yeyeri batabani ba Kosamu Omwaloweri,
- ⁴⁵ ne Yediyayeri mutabani wa Simuli, ne muganda we Yoka, nga bombi Batiizi,
- ⁴⁶ ne Eryeri Omumakavi, ne Yeribayi ne Yosaviya batabani ba Erunaamu, ne Isuma Omumowaabu,
- ⁴⁷ ne Eryeri, ne Obedi ne Yaasiyeri Omumezoba.

1 Ebyomumirembe 12

Abawagizi ba Dawudi

¹ Bano be basajja abajja eri Dawudi e Zikulagi, gye yali yeekwese Sawulo mutabani wa Kiisi, era be bamu ku bamuyamba mu lutalo.

²Baalina obusaale, era nga balasa bulungi, n'okuvuumuula nga bavuumuula amayinja n'emikono gyabwe egya ddyo n'egya kkono, ate nga balina oluganda ne Sawulo ow'ekika kya Benyamini.

³Akiyezeeri ye yali omukulu, muganda we Yowaasi n'amuddirira, bombi nga batabani ba Semaa Omugibeya; Yeziyeri ne Pereti batabani ba Azumavesi; Beraka, ne Yeeku Omwanasoni,

⁴ne Isumaya Omugibyoni, omusajja omuzira ku bali amakumi asatu, era omukulu waabwe; ne Yeremiya, ne Yakaziyeri, ne Yokanaani, ne Yozabadi Omugederi;

⁵ne Eruzayi, ne Yerimosi, ne Beyaliya, ne Semaliya, ne Sefatiya Omukalufu;

⁶ne Erukaana, ne Issiya, ne Azaleri, ne Yowezeeri, ne Yasobeyamu, Abakoola;

⁷ne Yowera ne Zebadiya, batabani ba yerokamu ow'e Gedoli.

⁸Abamu ku Bagaadi be yawula ku bannaabwe, ne bagenda eri Dawudi ku kigo kye mu ddungu. Baali basajja b'amaanyi abazira nga balina amafumu n'engabo era nga beetegefu okulwana. Amaaso gaabwe gaali nga ag'empologoma, era nga bawenyuka emisinde ng'empeewo mu nsozi.

⁹Ezeri ye yali omukulu waabwe, ne Obadiya n'amuddirira, ne Eriyaabu nga ye wookusatu,

¹⁰ne Misumanna nga ye wookuna, ne Yeremiya nga ye wookutaano,

¹¹ne Attayi nga ye w'omukaaga, ne Eryeri nga ye w'omusanvu,

¹²ne Yokanaani nga ye wa munaana, ne Eruzabadi nga ye wa mwenda,

¹³ne Yeremiya nga ye wa kkumi, ne Makubannayi nga ye wa kkumi n'omu.

¹⁴Abagaadi abo baali baduumizi ba ggye, era asembayo mu bukulu ng'aduumira ekibinja eky'abantu lukumi.

¹⁵Era abo be basajja abaasomoka omugga Yoludaani, mu mwezi ogw'olubereberye, amazzi gaagwo bwe gaabimba ne ganjaala ku ttale ne bagoba abo bona abaabeeranga mu biwonvu, ebuvanjuba era n'ebugwanjuba.

¹⁶Abamu ku basajja ba Benyamini ne Yuda nabo beegatta ku Dawudi mu kigo kye.

¹⁷Dawudi n'afuluma okubasisinkana, n'abagamba nti, "Bwe muba muzze gye ndi mu mirembe, okunyamba, ndimwetegefu okubasembeza. Naye obanga muzze okundyamu olukwe eri abalabe bange, ate nga sirina musango, Katonda wa bajjajjaffe akirabe era abanenye."

¹⁸Awo Omwoyo n'aka ku Amasayi, omukulu w'abo amakumi asatu, n'ayogera nti, "Ffe tuli babo, Dawudi! Tuli naawe, Omwana wa Yes! Obuwanguzi,

Obuwanguzi gy'oli; era Obuwanguzi bubeere eri abo abakuyamba, kubanga Katonda wo ajja kukubeera." Awo Dawudi n'abaaniriza era n'abafuula bakungu mu ggye lye.

¹⁹ Abasajja abamu ab'ekika kya Manase ne badda ku ludda lwa Dawudi, bwe yagenda n'Abafirisuuti okutabaala Sawulo newaakubadde nga ye n'abasajja be tebayamba Abafirisuuti kubanga oluvannyuma lw'okwetesaganyaamu, abakungu b'Abafirisuuti baamugoba. Baagamba nti, "Bw'anadda ku ludda lwa mukama we Sawulo, tunaagwa mu katyabaga."

²⁰ Dawudi bwe yali ng'agenda e Zikulagi, abasajja ab'ekika kya Manase abaasalawo okumwegattako baali: Aduna, ne Yozabadi, ne Yediyayaeri, ne Mikayiri, ne Yozabadi, ne Eriku, ne Zirresayi, n'abakungu abaakuliranga ebibinja eby'olukumi mu Manase.

²¹ Baayamba nnyo Dawudi okulwana n'ebibinja bya bayeekera, kubanga bona baali baserikale bazira, ate nga baduumizi mu ggye lye.

²² Buli lwakyanga nga wabeerawo abasajja abajja okuyamba ate era n'okwegatta ku Dawudi, okutuusa egghe lye bwe lyafuuka eddene, ery'amaanyi.

Abasajja Abeegatta ku Dawudi e Kebbulooni

²³ Guno gwe muwendo gw'abasajja abaali beetegekedde olutalo abajja eri Dawudi e Kebbulooni, okuggyga obwakabaka ku Sawulo okubumuwa, ng'ekigambo kya MUKAMA bwe kyali:

²⁴ abasajja ba Yuda abaakwatanga engabo n'effumu baali kakaaga mu lunaana abeetegese okulwana;

²⁵ abasajja ba Simyoni, baali kasanvu mu kikumi;

²⁶ abasajja ba Leevi, enkumi nnya mu lukaaga;

²⁷ ng'omwo mwe muli Yekoyaada omukulu w'ennyumba ya Alooni n'abasajja enkumi ssatu mu lusanvu;

²⁸ ne Zadooki omuvubuka omulwanyi era omuzira, n'abakungu okuva mu nnyumba ye amakumi abiri mu babiri.

²⁹ Abalala baali abasajja aba Benyamini, baganda ba Sawulo, nga bali enkumi ssatu, era okutuusa ku lunaku olwo abo baali banyweredde ku ludda lwa Sawulo;

³⁰ abasajja aba Efulayimu, abalwanyi abazira, ng'era batutumufu mu nda zaabwe, baali emitwalo ebiri mu lunaana;

³¹ abasajja ku kitundu eky'ekika kya Manase, abaayatulwa erinnya okujja okufuula Dawudi kabaka baali omutwalo gumu mu kanaana;

³² abasajja aba Isakaali abategeera ebiseera, ne bamanya ebigwanidde Isirayiri baali abakulembeze ebikumi bibiri, n'ab'enjanda zaabwe bona abaabagobereranga;

³³ abasajja aba Zebbulooni, nga baserkale bamanyirivu mu by'entalo, nga balina buli kya kulwanyisa kyonna, abayamba Dawudi n'omutima gumu baali emitwalo etaano;

³⁴ abasajja aba Nafutaali baali abakulu lukumi, n'abasajja abaakwatanga engabo n'amafumu nga bali emitwalo esatu mu kasanvu;

³⁵ abasajja aba Ddaani baali emitwalo ebiri mu kanaana mu lukaaga;

³⁶ abasajja aba Aseri, nga baserkale bamanyirivu mu ntalo baali emitwalo ena;

³⁷ emitala wa Yoludaani, wavaayo abasajja aba Lewubeeni, aba Gaadi, n'ekitundu ky'ekika kya Manase, abaalina ebyokulwanyisa ebya buli ngeri, nga bali emitwalo kkumi n'ebiri.

³⁸ Abo bona baali basajja balwanyi abeewaayo mu bitiibwa byabwe. Ne bajja e Kebbulooni okuweereza n'okufuula Dawudi kabaka wa Isirayiri yenna.

³⁹ Eyo ne bamalayo ennaku ssatu ne Dawudi nga balya, nga banywa, ebyo ab'enjanda zaabwe bye baali babasibiridde.

⁴⁰ Ate era waaliyo ne baliraanwa baabwe ab'e Isakaali, ne Zebbulooni, ne Nafutaali abaabaleeteranga emmere ku ndogoyi, ne ku njamira, ne ku nnyumbu ne ku nte, era baalina ejjaano nnyingi, ne keke ez'ettiini, n'ebirimba eby'ezabbibu, n'omwenge, n'amafuta, n'ente n'endiga. Baasanyuka essanyu lingi nnyo nnyini mu Isirayiri.

1 Ebyomumirembe 13

Essanduuko Ekomezebwawo

¹ Dawudi n'ateesa n'abaduumizi be ab'enkumi n'ab'ekikumi.

² N'ayogera eri ekkuinjaaniro ly'abantu bona aba Isirayiri nti, "Bwe munaasiima, era nga kwe kusiima kwa MUKAMA Katonda waffe, ekigambo kitwalibwe era kibune eri baganda baffe mu nsi yonna eya Isirayiri, n'eri bakabona, n'Abaleevi ababeera nabo mu bibuga byabwe ne mu malundiro, bajje batwegatteko.

³ Tukomyewo essanduuko ya Katonda waffe, kubanga tetwamwebuuzangako mu mirembe gya Sawulo."

⁴ Olukuinjaana lwonna ne likikiriziganyako, kubanga ky'alabika nga kigambo kirungi mu maaso g'abantu bona.

⁵ Awo Dawudi n'akunjaanya Abayisirayiri bona okuva ku Sikoli omugga gw'e Misiri okutuuka ku wayingirirwa e Kamasi, n'aleeta essanduuko ya Katonda okugiggya e Kiriyasuyalimu.

⁶ Dawudi n'Abayisirayiri bona ne bagenda e Baala, ye Kiriyasuyalimu, ekya Yuda okuggyayo essanduuko ya Katonda atuula ku ntebe ey'obwakabaka wakati wa bakerubi, eyitibwa erinnya lya MUKAMA.

⁷ Ne basitulira essanduuko ya Katonda ku ggaali eriggya okuva mu nnyumba ya Abinadaabu, nga Uzza ne Akiyo be bagikulembera.

⁸ Dawudi ne Isirayiri yenna ne basanyuka nnyo mu maaso ga Katonda n'amaanyi gaabwe gonna, nga bayimba nga bakuba entongooli, n'ennanga, n'ebitaasa, n'ebisaala, n'amakondeere.

⁹ Bwe baatuuka ku gguuliro lya Kidoni, ente ezaali zisika essanduuko ne zeesittalamu, Uzza n'agolola omukono gwe okutereeza essanduuko.

¹⁰ Obusungu bwa MUKAMA ne bubuubuukira Uzza, n'afirawo, kubanga yakwata ku ssanduuko. N'afira mu maaso ga Katonda.

¹¹ Awo Dawudi n'anyiiga nnyo kubanga obusungu bwa MUKAMA bwagwa ku Uzza, era ekifo ekyo ne kituumibwa Perezuzza, ne leero.

¹² Dawudi n'atya nnyo Katonda ku lunaku olwo, n'abuuza nti, "Nnyinza ntya okuleeta essanduuko ya Katonda gye ndi?"

¹³ Awo n'atatlala ssanduuko mu kibuga kya Dawudi, naye n'agitwala mu nnyumba ya Obededomu Omugitti.

¹⁴ Essanduuko ya Katonda n'ebeera mu maka ga Obededomu okumala emyezi esatu, ne MUKAMA n'awa ennyumba ye n'ebintu bye byonna omukisa.

1 Ebyomumirembe 14

¹ Kabaka Kiramu ow'e Ttuulo n'atuma ababaka ne batwala emivule, ne bagenda n'abazimbi b'amayinja, n'ababazzi eri Dawudi okumuzimbira olubiri.

² Awo Dawudi n'ategeera nga MUKAMA amunywezezza okuba kabaka wa Isirayiri, era nga n'obwakabaka bwe bwagulumizibwa nnyo olw'abantu ba MUKAMA Isirayiri.

³ Dawudi ne yeeyongera okuwasa abakazi abalala mu Yerusaalemi, ne bamuzaalira abaana abalala bangi aboobulenzi n'aboobuwala.

⁴ Amannya g'abaana abaamuzaalirwa ge gaano: Sammuwa, ne Sobabu, ne Nasani, ne Sulemaani,

⁵ ne Ibukali, ne Eriswa, ne Erupereti,

⁶ne Noga, ne Nefegi, ne Yafiya,

⁷ne Erisaama, ne Beeriyadda, ne Erifereti.

⁸Awo Abafirisuuti bwe baawulira nti Dawudi yafukibwako amafuta okuba kabaka wa Isirayiri yenna, ne bambuka okugenda okumunoonya, naye Dawudi n'akiwulirako era n'agenda okubatabaala.

⁹Abafirisuuti baali bazze nga bazine ekiwonvu Lefayimu;

¹⁰Dawudi ne yeebuuza ku MUKAMA nti, “Njende ntabaale Abafirisuuti? Onoobagabula mu mukono gwange?” MUKAMA n'amuddamu nti, “Genda, kubanga nnaabagabula mu mukono gwo.”

¹¹Awo Dawudi n'ayambuka ne basajja be e Baaluperazimu, n'atabaala Abafirisuuti n'abawangula. N'ayogera nti, “Katonda awangudde abalabe bange n'omukono gwe, ng'amazzi bwe gawaguza.” Era ekifo ekyo kyekyava kituumibwa Baaluperazimu.

¹²Abafirisuuti baali balese awo balubaale baabwe be beekolera, Dawudi n'alagira okwokya balubaale abo.

¹³Abafirisuuti ne badda, ne bazinda ekiwonvu.

¹⁴Awo Dawudi n'addamu ne yeebuuza ku MUKAMA, MUKAMA n'amuddamu nti, “Tobatabaalirawo, naye beetooloole, obalumbe ng'obafuluma mu maaso g'emitungunda.

¹⁵Awo bw'onoowulira eddoboozi ery'okukumba waggulu mu mitugunda, onootabaala, kubanga ekyo kinaategeeza nti Katonda akukuleembedde okuzikiriza eggye ly'Abafirisuuti.”

¹⁶Dawudi n'akola nga MUKAMA bwe yamulagira, ne bazikiriza eggye ly'Abafirisuuti, okuva e Gibyoni okutuuka e Gezeri.

¹⁷Awo ettutumo lya Dawudi ne libuna ensi zonna, MUKAMA n'aleetera amawanga gonna okutya Dawudi.

1 Ebyomumirembe 15

Essanduuko Ereetebwa e Yerusaalemi

¹Dawudi bwe yamala okwezimbira embiri ze mu kibuga kya Dawudi, n'ategekera essanduuko ya Katonda ekifo, n'agikubira eweema.

²Awo Dawudi n'ayogera nti, “Tewali muntu yenna akkirizibwa kusitula essanduuko ya Katonda wabula Abaleevi, kubanga MUKAMA be yalonda okugisitula, era n'okumuweerezanga ennaku zonna.”

³Dawudi n'akuŋŋaanya Abayisirayiri bona mu Yerusaalemi, okulinnyisa essanduuko ya MUKAMA mu kifo kyayo kye yali agitegekedde.

- ⁴N'ayita abazzukulu ba Alooni n'Abaleevi:
- ⁵ku bazzukulu ba Kokasi, Uliyeri omukulembeze ne baganda be kikumi mu abiri;
- ⁶ku bazzukulu ba Merali, Asaya omukulembeze ne baganda be bibiri mu abiri;
- ⁷ku bazzukulu ba Gerusomu, Yoweeri omukulembeze ne baganda be kikumi mu asatu;
- ⁸ku bazzukulu ba Erizafani, Semaaya omukulembeze ne baganda be ebikumi bibiri,
- ⁹ku bazzukulu ba Kebbulooni, Eryeri omukulembeze ne baganda be kinaana;
- ¹⁰ku bazzukulu ba Wuziyeeri, Amminadaabu omukulembeze ne baganda be kikumi mu kkumi na babiri.
- ¹¹Awo Dawudi n'atumya Zadooki ne Abiyasaali bakabona, ne Uliyeri, ne Asaya, ne Yoweeri, ne Semaaya, ne Eryeri ne Amminadaabu Abaleevi,
- ¹²n'abagamba nti, "Mmwe bakulembeze mu nnyumba z'Abaleevi, era mmwe ne baganda bammwe mujja kwetukuza, mulyoke mwambuse essanduuko ya MUKAMA Katonda wa Isirayiri, okugiteeka mu kifo kye ngitegekedde.
- ¹³Kubanga mmwe temwagisitula omulundi ogwasooka MUKAMA Katonda waffe kyeyava atusunguwalira, olw'obutamwebuuzaako okutegeera nga bwe kyalagibwa."
- ¹⁴Awo bakabona n'Abaleevi ne beetukuza okulinnyisa essanduuko ya MUKAMA, Katonda wa Isirayiri.
- ¹⁵Abaleevi ne basitulira essanduuko ya MUKAMA ku bibegabega byabwe n'emisituliro gyako, nga Musa bwe yalagira, ng'ekigambo kya MUKAMA bwe kyali.
- ¹⁶Awo Dawudi n'alagira abakulembeze b'Abaleevi okulonda baganda baabwe okuba abayimbi, nga bayimba ennyimba ez'essanyu, nga bakuba ebivuga: entongooli, n'ennanga, n'ebitaasa.
- ¹⁷Abaleevi ne balonda Kemani mutabani wa Yoweeri, ku baganda be ne balonda Asafu mutabani wa Berekiya, ne ku batabani ba Merali, baganda baabwe, ne balonda Esani mutabani wa Kusaya;
- ¹⁸ne baganda baabwe abaabaddiriranga nga be ba Zekkaliya, ne Yaaziyeri, ne Semiramosi, ne Yeyeri, ne Unni, ne Eriyaabu, ne Benaaya, ne Maaseya, ne Mattisiya, ne Erifereku, ne Mikuneya, n'abaggazi Obededomu ne Yeyeeri,
- ¹⁹ne Kemani, ne Asafu, ne Esani abayimbi abaalina okukuba ebitaasa eby'ebikomo;

²⁰ne Zekkaliya, ne Aziyeri, ne Semiramosi, ne Yekyeri, ne Unni, ne Eriyaabu, ne Maaseya ne Benaya baali baakukuba entongooli ez'ekyalamosi;

²¹naye Mattisiya, ne Erifereku, ne Mikuneya, ne Obededomu, ne Yeyeri, ne Azaziya baali baakukulemberamu nga bakuba ennanga ez'ekiseminisi.

²²Kenaniya omukulembeze w'Abaleevi mu by'okuyimba, avunaanyizibwe eby'okuyimba kubanga yali mukugu mu byo.

²³Berekiya ne Erukaana be baali abaggazi b'omulyango gw'ekifo essanduuko mw'ebeera.

²⁴Sebaniya, ne Yosafaati, ne Nesaneri, ne Amasayi, ne Zekkaliya, ne Benaya, ne Eryeza be bakabona abaafuuwanga amakondeere mu maaso g'essanduuko ya Katonda. Obededomu ne Yekiya n'abo baali baggazi b'omulyango gw'ekifo essanduuko mw'ebeera.

²⁵Awo Dawudi n'abakadde aba Isirayiri, n'abaduumizi b'enkumi ne bagenda okwambusa essanduuko ey'endagaano ya MUKAMA okugiggya mu nnyumba ya Obededomu nga basanyuka.

²⁶Olw'okubeera Katonda kwe yabeera Abaleevi abaali basitudde essanduuko ey'endagaano ya MUKAMA, baawaayo sseddume z'ente musanvu ne z'endiga musanvu nga ssaddaaka.

²⁷Dawudi yali ayambadde olugoye olwa linena, ng'Abaleevi bona abaali basitudde essanduuko, era ng'abayimbi ne Kenaniya eyali avunaanyizibwa okuyimba. Dawudi yali ayambadde n'ekkanzu eya linena.

²⁸Awo Isirayiri yenna ne bambusa essanduuko ey'endagaano ya MUKAMA nga baleekaana n'amaloboozi ag'essanyu, n'eddoboozi ery'enjombe, ery'amakondeere, n'ebitaasa, era nga bakuba nnyo entongooli n'ennanga.

²⁹Awo essanduuko ey'endagaano ya MUKAMA bwe yali ng'eyingizibwa mu kibuga kya Dawudi, Makali muwala wa Sawulo n'alingiza mu ddirisa, n'alaba Kabaka Dawudi ng'azina era ng'ajjaguza, n'amunyooma mu mutima gwe.

1 Ebyomumirembe 16

¹Awo ne baleeta essanduuko ya MUKAMA, ne bagiyingiza mu weema Dawudi gye yali agisimbidde, ne bawaayo ebiweebwayo ebyokebwa n'ebiweebwayo olw'emirembe eri Katonda.

²Awo Dawudi bwe yamala okuwaayo ebiweebwayo ebyokebwa n'ebiweebwayo olw'emirembe, n'asabira abantu omukisa mu linnya lya MUKAMA,

³era n'agabira buli Muyisirayiri omusajja n'omukazi, omugaati n'ekitole eky'ezabbibu enkalu, n'ekiyungula ky'ennyama.

⁴ Yalonda abamu ku Baleevi okuweerezanga mu maaso g'essanduuko ya MUKAMA, okukoowoola nga basaba, nga beebaza, era nga batendereza MUKAMA, Katonda wa Isirayiri.

⁵ Asafu ye yali omukulu waabwe, Zekkaliya n'amuddirira, Yeyeeri n'addako, n'oluvannyuma Semiramosi, ne Yekyeri, ne Mattisiya, ne Eriyaabu, ne Benaya, ne Obededomu, ne Yeyeri, abookukuba entongooli n'ennanga, Asafu ye ng'akuba ebitaasa.

⁶ Benaya ne Yakaziyeeri bakabona be baafuuwanga amakondeere bulijjo mu maaso g'essanduuko ey'endagaano ya Katonda.

Zabbuli ya Dawudi ey'Okwebaza

⁷ Awo ku lunaku olwo, Dawudi n'alagira Asafu n'abantu be yakolanga nabo, basooke okwebaza MUKAMA nga bagamba nti:

⁸ Mwebaze MUKAMA, mukoowoole erinnya lye, mumanyise ebikolwa bye mu mawanga.

⁹ Mumuyimbire, muyimbe okumutendereza mwogere ku byamagero bye byonna.

¹⁰ Erinnya lye ligulumizibwe, n'emitima gy'abo abanoonya MUKAMA gisanyuke.

¹¹ Mutunuulire MUKAMA n'amaanyi ge; munooyme amaaso ge ennaku zonna.

¹² Mujukire ebyewuunyo by'akoze, n'ebiyamagero bye, n'ensala ye ey'emisango gy'alangirira,

¹³ mmwe abazzukulu ba Isirayiri, abaweereza be, mmwe abaana ba Yakobo, abalonde be.

¹⁴ Ye MUKAMA Katonda waffe; okusalawo kwe okw'emisango kubuna ensi yonna.

¹⁵ Ajjukira endagaano ye emirembe gyonna, n'ekigambo kye yalagira, okutuusa ku mirembe olukumi,

¹⁶ gye yakola ne Ibulayimu, era n'agirayiza Isaaka.

¹⁷ N'aginyweza ng'etteeka eri Yakobo, n'eri Isirayiri ng'endagaano ey'olubeerera,

¹⁸ ng'agamba nti, "Ndikuwa ensi ya Kanani, ng'omugabo, ogw'obusika bwo."

¹⁹ Omuwendo gwabwe bwe gwali omutono, era omutono ddala, nga batambuze mu yo,

²⁰ baatambulatambulanga okuva mu nsi emu okudda mu ndala, n'okuva mu bwakabaka obumu okudda mu bantu abalala.

²¹ Teyaganya muntu n'omu kubanyigiriza; weewaawo, yanenya bakabaka ku lwabwe:

²² ng'agamba nti, "Temukwatanga ku abo be nnafukako amafuta, so bannabbi bange temubakolanga akabi."

²³ Muyimbire MUKAMA, mmwe ensi zonna; mulangirire obulokozi bwe buli lunaku.

²⁴ Mbuulire ekitiibwa kye mu mawanga, n'ebikolwa bye ebyamagero mu bantu bona.

²⁵ MUKAMA mukulu era asaanira okutenderezebwa; era atiibwenga okusinga bakatonda abalala bona.

²⁶ Bakatonda bona abamawanga bifaananyi, naye MUKAMA ye yakola eggulu.

²⁷ Ekitiibwa n'obukulu biri mu maaso ge, amaanyi n'essanyu biri wamu naye.

²⁸ Mugulumize MUKAMA, mmwe ebika eby'amawanga byonna, mutende ekitiibwa kya MUKAMA awamu n'amaanyi ge.

²⁹ Muyimusize MUKAMA ekitiibwa ekigwanira erinnya lye; muleete ekiweebwayo, mujje mu maaso ge; musinze MUKAMA mu kitibwa ky'obutukuvu bwe.

³⁰ Mukankane mu maaso ge ensi yonna, weewaawo ensi nywevu, teyinza kusesetulwa.

³¹ Eggulu lisanyuke, n'ensi ejaguze; boogere mu mawanga nti, "MUKAMA afuga!"

³² Ennyanja ewuume, n'ebigirimu byonna, n'ennimiro zijaguze, n'okujjula kwazo!

³³ Awo emit iegy'omu kibira ginaayimba, ginaayimbira MUKAMA n'essanyu, kubanga akomawo okusalira ensi omusango.

³⁴ Weebaze MUKAMA kubanga mulungi; era okwagala kwe kubeerera emirembe gyonna.

³⁵ Mwogerere waggulu nti, "Tulokole, Ayi Katonda ow'obulokozi bwaffe; tukunjaanye, otulokole eri amawanga, twebaze erinnya lyo ettukuvu, era tujagulize mu ttendo lyo."

³⁶ MUKAMA yeebazibwe, Katonda wa Isirayiri ow'emirembe n'emirembe. Abantu bona ne baddamu nti, "Amiina, MUKAMA yeebazibwe."

³⁷ Awo Dawudi n'aleka Asafu n'ababeezi be, okuweereza MUKAMA mu maaso g'essanduuko ey'endagaano ya MUKAMA, nga bwe kyagwaniranga buli lunaku.

³⁸Obededomu n'ababeezi be enkaaga mu omunaana nabo yabaleka bawereze eyo. Obededomu mutabani wa Yedusuni, era ne Kosa be baali abaggazi.

³⁹Dawudi yaleka Zadooki, kabona ne bakabona banne mu maaso g'eweema ya MUKAMA mu kifo ekigulumivu e Gibyoni

⁴⁰okuwangayo ebiweebwayo ebyokebwa eri MUKAMA ku kyoto eky'ebiweebwayo ebyokebwa, buli nkya na buli kawungeezi, nga byonna bwe byawandiikibwa mu mateeka ga MUKAMA, ge yawa Isirayiri.

⁴¹Kemani ne Yedusuni n'abalala abaalondebwa ne bayitibwa amannya gaabwe okwebaza MUKAMA, "kubanga okwagala kwe kubeerera emirembe gyonna," baali wamu nabo.

⁴²Era Kemani ne Yedusuni baavunaanyizibwanga okufuuwa amakondeere, n'okukuba ebitaasa, n'okukubira ebivuga ebirala ku luyimba lwa Katonda. Batabani ba Yedusuni baabeeranga ku wankaaki.

⁴³Awo abantu bona ne baddayo ewaabwe, ne Dawudi n'addayo okusabira ennyumba ye omukisa.

1 Ebyomumirembe 17

Okusuubiza kwa MUKAMA eri Dawudi

¹Awo Dawudi ng'amaze okukkalira mu nnyumba ye mu lubiri, n'agamba nnabbi Nasani nti, "Teebereza, nze mbeera mu lubiri olwazimbibwa n'emivule, naye nga essanduuko ey'endagaano ya MUKAMA ebeera mu weema."

²Nasani n'addamu Dawudi nti, "Ky'olowooza kyonna mu mutima gwo kikole, kubanga Katonda ali wamu naawe."

³Ekiro ekyo ekigambo kya MUKAMA ne kijjira Nasani nti,

⁴"Genda otegeeze omuddu wange Dawudi nti, 'Bw'ati bw'ayogera MUKAMA nti si gwe oija okunzimbira ennyumba mwe nnaabeeranga.

⁵Sibeeranga mu nnyumba kasookedde nzija Isirayiri mu Misiri, okutuusa ku lunaku lwa leero. Nvudde mu weema emu ne nzira mu ndala, ne nva mu kifo ekimu ne nzira mu kirala.

⁶Mu bifo byonna bye ntambuddemu ne Isirayiri yenna, nnina kye nnali ḥjambye omulamuzi wa Isirayiri, kw'abo be nalagira okukulembira abantu bange nti, "Kiki ekibalobedde, okunzimbira ennyumba ey'emivule?"'

⁷"Kaakano nno tegeeza omuddu wange Dawudi nti, 'Bw'ati bw'ayogera MUKAMA ow'eggye nti, nakuggya ku ttale ng'olunda ndiga, ne nkufuula omukulembeze ow'abantu bange Isirayiri.

⁸Mbadde naawe buli gy'ogenze, era nzikiririzza abalabe bo bona mu maaso go. Ndifuula erinnya lyo okuba ekkulu, ne liba ng'erimu ku g'abasajja abamanyiddwa mu nsi.

⁹Era abantu bange Isirayiri ndibawa ekifo, kibeere ekifo kyabwe eky'olubeerera, nga tebatawanyizibwa, n'abantu ababi tebalibacocca, nga bwe baakolanga olubereberye,

¹⁰era nga bwe bakola kati kasookedde nnonda abalamuzi okufuga abantu bange Isirayiri. Ndikuwa obuwanguzi okuba omukulembeze w'abantu bange Isirayiri. Ndikuwa obuwanguzi eri abalabe bo bona. "Nkirangirira gy'oli kaakano nti MUKAMA alikuzimbira ennyumba:

¹¹Ennaku zo bwe zirituuka, era n'ogenda okubeera ne bajjajaabo, ndiyimusa ezzadde lyo okuba obusika bwo, omu ku batabani bo ddala, era ndinyweza obwakabaka bwe.

¹²Oyo y'alinzimbira ennyumba, era ndinyweza entebe ey'obwakabaka bwe emirembe gyonna.

¹³Ndiba kitaawe, naye aliba mwana wange, era sirimukyawa, nga bwe nakyawa oyo eyakusooka.

¹⁴Ye y'aliba omukulu mu nnyumba yange ne mu bwakabaka bwange emirembe gyonna, era entebe ye ey'obwakabaka eribeerera emirembe gyonna."

¹⁵Awo Nasani n'ategeeza Dawudi ebigambo byonna eby'okubikkulirwa okwo.

Esaala ya Dawudi

¹⁶Awo Kabaka Dawudi n'agenda n'atuula mu maaso ga MUKAMA n'ayogera nti, "Nze ani, Ayi MUKAMA Katonda, era ennyumba yange kye ki, gwe okuntuusa wano?

¹⁷Kino tekyali kitono mu maaso go, okwogera ku bigenda okuba ku nnyumba ey'omuddu wo, n'ontunuulira ng'omu ku basajja abasingirayo ddala ekitiibwa, Ayi MUKAMA Katonda.

¹⁸"Dawudi ayinza kwongerako ki ku ebyo okumuwa ekitiibwa bwe kityo, kubanga ggwe omanyi omuddu wo.

¹⁹Olw'omuddu wo Ayi MUKAMA Katonda, n'olw'okusiima kwo, okoze ebintu bino ebikulu, era n'osuubiza ebintu ebyo byonna ebikulu bwe bityo.

²⁰"Tewaliwo akufaanana, Ayi MUKAMA, era tewali Katonda mulala wabula ggwe, okusinziira ku bye twewuliridde n'amatu gaffe.

²¹Era ggwanga ki mu nsi erifaanana ng'abantu bo Isirayiri, eggwanga Katonda lye wanunula ggwe kennyini, ne weekolera erinnya, era n'okola ebikolwa

eby'amaanyi, n'ebyewunyisa bwe wagoba amawanga okuva mu maaso g'abantu bo, be wanunula okuva mu Misiri?

²²Abantu bo Abayisirayiri wabafuulira ddala babo emirembe gyonna, era ggwe Ayi MUKAMA wafuuka Katonda waabwe.

²³"Kaakano, Ayi MUKAMA Katonda, kye wasuubiza omuddu wo n'ennyumba ye kinywezebwembe emirembe gyonna.

²⁴Kola nga bwe wasuubiza, erinnya lyo ligulumizibwenga emirembe gyonna, n'abantu boogerenga nti, MUKAMA ow'Eggye, Katonda afuga Isirayiri, ye Katonda wa Isirayiri! Era ennyumba ey'omuddu wo Dawudi erinywezebwembe mu maaso go.

²⁵"Ayi Katonda wange, wakibikulidde omuddu wo nti olimuzimbira ennyumba, era omuddu wo kyavudde aija okukwebaza.

²⁶Ggwe Ayi MUKAMA oli Katonda, era osuubizza omuddu wo ebirungi ebyo.

²⁷Kaakano osiimye okuwa ennyumba ey'omuddu wo omukisa, ebeerewo emirembe gyonna mu maaso go kubanga, ggwe Ayi MUKAMA Katonda ogiwadde omukisa, era egya kuba ya mukisa emirembe gyonna."

1 Ebyomumirembe 18

Obuwanguzi bwa Dawudi

¹Awo oluvannyuma lw'ebyo, Dawudi n'awangula Abafirisuuti, era n'awamba ne Gaasi n'ebyalo ebyali bikyetoolodde okuva mu mukono gw'Abafirisuuti.

²Dawudi n'awangula n'Abamowaabu, ne bafuuka baddu be, ne bamuwanga obusuulu.

³Ate era Dawudi yalwanagana ne Kadalezeri kabaka w'e Zoba okutuukira ddala e Kamasi, bwe yali ng'anyweza okufuga kwe ku nsalo ey'Omugga Fulaati.

⁴Dawudi n'amuwambako amagaali lukumi, n'abeebagala embalaasi abasajja kasanvu, n'abasajja abeebigere emitwalo ebiri. Embalaasi endala zonna ez'amagaali n'azitema enteega, ne yeerekerawo kikumi.

⁵Awo Abasuuli ab'e Ddamasiko bwe bajja okudduukirira Kadalezeri kabaka w'e Zoba, Dawudi n'abattamu abantu emitwalo ebiri mu enkumi bbiri.

⁶N'ateeka olusiisira lw'eggye lye mu Busuuli e Ddamasiko, era Abasuuli baafuuka baweereza be, ne bamutonera ebirabo. MUKAMA n'awa Dawudi obuwanguzi buli gye yatabaalanga.

⁷Dawudi n'atwala engabo eza zaabu abaserikale ba Kadalezeri ze baasitulanga, n'azireeta e Yerusaalemi.

⁸Mu Tibukasi ne mu Kuni, ebibuga ebyali ebya Kadadezeri n'aggyayo ebikomo bingi nnyo, era ebyo Sulemaani bye yakolamu ennyanja ey'ekikomo, n'empagi, n'ebintu eby'ebikomo ebirala.

⁹Awo kabaka Toowu ow'e Kamasi bwe yawulira nga Dawudi awangudde egghe lyonna erya Kadadezeri, kabaka w'e Zoba

¹⁰n'atuma mutabani we Kadolaamu eri kabaka Dawudi okumulamusako n'okumuyozaayoza okuwangula olutalo wakati we ne Kadadezeri, kubanga Kadadezeri yalwananga ne Toowu. Kadolaamu yaleeta zaabu, n'effeeza, n'ebikomo, nga bya ngeri za ngyawulo.

¹¹Ebintu byonna ebyaleetebwa, kabaka Dawudi yabiwonga eri MUKAMA, nga bwe yakola effeeza ne zaabu gye yawamba ku mawanga amalala nga Edomu ne Mowaabu, n'Abamoni, n'Abafirisuuti, ne Amaleki.

¹²Ye Abisaayi mutabani wa Zeruyiya yattira abasajja ba Edomu omutwalo gumu mu kanaana mu Kiwonvu eky'Omunyyo.

¹³Era yateeka olusiisira lw'abaserikale mu Edomu, era aba Edomu bona ne bafuuka baweereza ba Dawudi. MUKAMA n'awa Dawudi obuwanguzi mu bifo byonna gye yatabaalanga.

¹⁴Dawudi n'afuga Isirayiri yenna, mu bwenkanya ne mu butuukirivuabantu be bona.

¹⁵Yowaabu mutabani wa Seruyiya ye yali omuduumizi w'eggye; Yekosafaati mutabani wa Akirudi nga ye mujjukiza;

¹⁶Zadooki mutabani wa Akitubu ne Abimerek mutabani wa Abiyasaali be baali bakabona; Savusa ye yali muwandiisi;

¹⁷Benaya mutabani wa Yekoyaada ye yakuliranga Abakeresi n'Abaperesi; ate batabani ba Dawudi baali bakungu bakulu ddala era nga babeera ku lusegere lwa kabaka.

1 Ebyomumirembe 19

¹Awo oluvannyuma lw'ebyo, nga wayiseewo ebbanga, Nakasi kabaka w'Abamoni n'afa, mutabani we n'amusikira.

²Dawudi n'alowooza nti, "Nzija kulaga ebyekisa Kanuni mutabani wa Nakasi, kubanga ne kitaawe yankolera ebyekisa." Awo Dawudi n'amuweereza ababaka okumukubagiza nga kitaawe amaze okufa. Naye abasajja ba Dawudi bwe baatuuka eri Kanuni mu nsi ey'Abamoni okumukubagiza,

³abakungu b'abaana ba Amoni ne bagamba Kanuni nti, "Olowooza nga Dawudi assaamu kitaawo ekitiibwa, bwakuweerezza abakubagizza? Era olowooza nga, abasajja be tebazze kulawuna na kuketta nsi era na kugirya?"

⁴Awo Kanuni n'ala gira abasajja ba Dawudi bakwatibwe, n'abamwako enviiri n'abasalako n'ebirevu, n'asala ebyambalo byabwe wakati okukoma ku nnyuma, n'oluvannyuma n'abagoba baddeyo.

⁵Awo Dawudi bwe yawulira bye baakola abasajja be yatuma, n'abagamba nti, "Musigale e Yeriko okutuusa ebirevu byammwe lwe birikula, mulyoke mukomewo."

⁶Awo abaana ba Amoni bwe baalaba nga Dawudi abanyiigidde; bo ne kabaka waabwe Kanuni ne baweereza ttani eza ffeeza amakumi asatu mu nnya e Mesopotamiya n'e Alamumaaka, ne Zoba, okubeyazikako amagaali n'abeebagala embalaasi.

⁷Beeyazika amagaali n'abeebagala embalaasi emitwalo esatu mu enkumi bbiri, era ne kabaka w'e Maaka n'eggye lye, abajja okumwegattako ne basiisira okumpi ne Medeba. Abaana ba Amoni bo baakuinjaana okuva mu bibuga byabwe ne bagenda okutabaala.

⁸Olwawulira ekyo, Dawudi n'aweereza Yowaabu n'eggye lyonna ery'abasajja abalwanyi abazira.

⁹Abamoni ne bavaayo bategeke okutabaala nga basimbye ennyiriri ku wankaaki w'ekibuga kyabwe, ate nga bakabaka abaali bazze okubayamba baali bokka ku ttale.

¹⁰Awo Yowaabu bwe yalaba ng'abalabe bamutabaala mu maaso n'emabega, n'alonda mu basajja be, abasajja abazira mu Isirayiri, era abo n'abaweeresa okulwana n'Abasuuli.

¹¹Abalala n'abakwasa Abisaayi muganda we okubaduumira, ne bagenda okulwana n'Abamoni.

¹²Yowaabu n'agamba muganda we nti, "Abasuuli bwe banaaba nga bansinza amaanyi, onojja n'ombeera, naye Abamoni bwe banaaba nga bakusinza amaanyi nange nzija kujja nkubeere.

¹³Guma omwoyo, tulwanirire abantu baffe n'ebibuga bya Katonda waffe n'obuzira. MUKAMA akole ng'okusima kwe bwe kuli."

¹⁴Awo Yowaabu n'abalwanyi be yalina ne batabaala Abasuuli, Abasuuli ne babadduka.

¹⁵Abaana ba Amoni bwe balaba ng'Abasuuli badduse, nabo ne badduka Abisaayi muganda wa Yowaabu, ne bayingira ekibuga. Awo Yowaabu n'addayo e Yerusaalemi.

¹⁶Abasuuli bwe baalaba nga Isirayiri abawangudde, ne batuma ababaka, okuggyayo Abasuuli abaali emitala w'Omugga Fulaati, nga Sofaki omuduumizi ow'eggye lya Kadalezeri yabakulembedde.

¹⁷ Awo Dawudi bwe yategeeezbwa ebyo, n'akuṇṇaanya Isirayiri yenna, n'asomoka Yoludaani nabo, n'agenda n'abalumba n'asimba ennyiriri ng'abesimbye mu maaso. Dawudi n'atandika okulwana n'Abasuuli, n'abo ne bamulwanyisa.

¹⁸ Naye Abasuuli ne badduka Isirayiri, era Dawudi n'atta abeebagala embalaasi kasanvu, n'abaserikale ab'ebigere emitwalo ena. Ate n'atta ne Sofaki omuduumizi w'eggye lyabwe.

¹⁹ Awo abantu ba Kadalezeri bwe baalaba nga bawanguddwa Isirayiri, ne batabagana ne Dawudi era ne bafuuka abaddu be; so n'Abasuuli tebakkiriza kuyamba abaana be Amooni nate.

1 Ebyomumirembe 20

Labba Kiwambibwa

¹ Awo mu biro, bakabaka mwe bagenderanga okulwana, Yowaabu n'akulembira eggye, n'azisa ensi y'abaana ba Amoni, ate era n'azingiza Labba. Naye Dawudi ye n'asigala mu Yerusaalemi, Yowaabu ye n'alumba Labba, n'akizikiriza.

² Awo Dawudi n'addiru engule eyali eya kabaka waabwe, obuzito bwayo kilo asatu mu nnya eza zaabu, nga mu yo baateekamu amayinja ag'omuwendo, n'agitikka ku mutwe. N'atwala n'omunyago mungi ddala okuva mu kibuga ekayo.

³ Yatwala abantu abaali mu kibuga ekayo n'abawa emirimu nga bakozesa n'emisumeeno, n'ensuuluulu, n'embazzi. Bw'atyo Dawudi bwe yakola ebibuga byonna eby'abaana ba Amoni, oluvannyuma ye n'eggye lye lyonna ne baddayo e Yerusaalemi.

⁴ Awo olwatuuka oluvannyuma lw'ebyo ne wabalukawo entalo n'Abafirisuuti e Gezeri. Mu kiseera ekayo Sibbekayi Omukusasi n'atta Sippayi omu ku bazzukulu b'agasajja aganene ddala, era ne bawangula Abafirisuuti.

⁵ Mu lutalo olulala n'Abafirisuuti, Erukanani mutabani wa Yayiri n'atta Lakani muganda wa Goliyaasi Omugitti, eyalina olunyago lw'effumu olwali ng'omuti ogulukirwako engoye.

⁶ Mu lutalo olulala olwali e Gaasi, waaliwo omusajja omuwanvu ennyo eyali omu ku bazzukulu b'agasajja aganene, ng'alina engalo mukaaga ku buli mukono, n'obugere mukaaga ku buli kigere.

⁷ Yasoomooza nnyo Isirayiri, era Yonasaani mutabani wa Simeeyi, muganda wa Dawudi n'amutta.

⁸ Abo bona baali bazzukulu ba lisajja Laafa ow'e Gaasi, era bona ne bagwa mu mikono gya Dawudi n'abasajja be.

1 Ebyomumirembe 21

Okubalibwa kw'Abayisirayiri

- ¹ Awo Setaani n'atandika okulwana ne Isirayiri, Dawudi n'asendebwasendebwa okubala Abayisirayiri.
- ² Dawudi n'alagira Yowaabu, n'abaduumizi b'eggye nti, "Mugende mubale Abayisirayiri okuva e Beeruseba okutuuka e Ddaani, mukomewo, muntegeeze bwe beenkana."
- ³ Naye Yowaabu n'amuddamu nti, "MUKAMA ayongere ku bantu be, n'okusingawo emirundi kikumi. Mukama wange kabaka, bona si baweereza ba mukama wange, kale kiki ekimukoza kino? Lwaki aleetera Isirayiri emitawaana?"
- ⁴ Naye ekigambo kya kabaka ne kisinga ebya Yowaabu, era Yowaabu n'agenda n'abuna Isirayiri yonna, n'akomawo e Yerusaalemi.
- ⁵ Yowaabu n'ategeeza Dawudi omuwendo gw'abasajja abalwanyi. Mu Isirayiri mwalimu abasajja abalwanyi akakadde kamu n'emitwalo kkumi, ng'okwo kw'otadde emitwalo amakumi ana mu emitwalo musanvu abaali mu Yuda.
- ⁶ Naye teyabalirako Baleevi n'Ababenayamini, kubanga ekiragiro kya kabaka tekyasanyusa Yowaabu.
- ⁷ Ekikolwa ekyo ky'okubala abantu, kyali kya kivve mu maaso ga Katonda era n'abonereza Isirayiri.
- ⁸ Awo Dawudi n'agamba Katonda nti, "Nnyonoonye nnyo olw'ekikolwa ekyo. Kaakano, nkusaba ogyewo obutali butuukirivu obw'omuddu wo, kubanga nkoze ekintu eky'obusirusiru ennyo."
- ⁹ MUKAMA Katonda n'ayogera ne nnabbi Gaadi eyaluŋŋamyanga Dawudi nti,
- ¹⁰ "Genda otegeeze Dawudi nti, 'Bw'ati bw'ayogera MUKAMA nti: nkuteekeddewo eby'okulondako bisatu, weerobozeeko ekimu kye nnaakukola.'"
- ¹¹ Awo Gaadi n'agenda eri Dawudi n'amugamba nti, "Bw'ati bw'ayogera MUKAMA nti, 'Weerobozeeko ku bisatu:
- ¹² emyaka esatu eg'yenjala, oba emyezi esatu eg'yokumalibwawo abalabe bo, oba ennaku ssatu ez'ekitala kya MUKAMA Katonda, kawumpuli agwe mu nsi, ne malayika wa MUKAMA azikirize abantu mu bitundu byonna ebya Isirayiri.' Kale nno, ssalawo kye mbanziramu oyo antumye."
- ¹³ Dawudi n'addamu Gaadi nti, "Nsobeddwa nnyo. Wakiri ka ngwe mu mukono gwa MUKAMA Katonda, kubanga okusaasira kwe kungi, okusinga okugwa mu mukono gw'omuntu."
- ¹⁴ Awo MUKAMA Katonda n'aweereza kawumpuli ku Isirayiri, abantu emitwalo musanvu ne bafa.

¹⁵Ate era Katonda n'atuma malayika okuzikiriza Yerusaalemi. Naye MUKAMA bwe yalaba ebyo byonna, n'alumwa nnyo olw'ebyo byonna, n'lagira malayika eyali azikiriza abantu nti, "Ekyo kimala! Zzaayo omukono gwo." Mu kiseera ekyo malayika wa MUKAMA Katonda yali ayimiridde kumpi ne gguuliro lya Olunaani Omuyebusi.

¹⁶Dawudi n'ayimusa amaaso ge, n'alaba malayika wa MUKAMA Katonda ng'ayimiridde wakati w'ensi n'eggulu ng'asowodde ekitala mu mukono gwe, nga kigoloddwa ku Yerusaalemi. Awo Dawudi n'abakadde, nga bambadde ebibukutu ne bavuunama amaaso gaabwe.

¹⁷Dawudi n'agamba Katonda nti, "Si nze nalagira abantu babalibwe? Nze nnyonoonye, era nkoze ebibi. Bano ndiga, kiki kye bakoze? Ayi MUKAMA Katonda wange, ombonereze nze ne nnyumba yange, naye toganya kawumpuli ono kusigala ku bantu bo."

¹⁸Awo malayika wa MUKAMA Katonda n'lagira Gaadi okugamba Dawudi ayambuke, azimbire MUKAMA ekyoto ku gguuliro lya Olunaani Omuyebusi.

¹⁹Awo Dawudi n'agondera ekigambo Gaadi kye yayogera mu linnya lya MUKAMA Katonda, n'ayambuka.

²⁰Laba Olunaani bwe yali ng'awuula enjaano, n'akyuka n'alaba malayika wa MUKAMA, ne batabani be abana abaaliwo ne beekweka.

²¹Awo Dawudi bwe yasembera okumpi ne Olunaani we yali, Olunaani n'amulaba, n'ava mu gguuliro, n'amuvuunamira.

²²Dawudi n'amugamba nti, "Mpa ekifo egguliro lyo mwe liri, nzimbire MUKAMA ekyoto, nange n'asasula omuwendo gwakyo gwonna, kawumpuli ave ku bantu."

²³Olunaani n'addamu Dawudi nti, "Kitwale! Mukama wange kabaka akole nga bw'asiima. Laba, nzija kukuwa ziseddume z'onoowaayo ng'ebiweebwayo ebyokebwa, n'ebintu ebiwuula ng'enku, n'enjaano okuba ekiweebwayo eky'obutta. Ebyo byonna nzija kubikuwa."

²⁴Naye Dawudi n'agamba Olunaani nti, "Nedda, maliridde okusasula omuwendo omujjuvu. Sijja kutwalira MUKAMA ekikyo, wadde okuwaayo ekiweebwayo ekyokebwa bye sisasulidde."

²⁵Awo Dawudi n'agula ekifo kya Olunaani kilo musanvu eza zaabu.

²⁶Dawudi n'azimbira MUKAMA ekyoto mu kifo ekyo, era n'awaayo ebiweebwayo ebyokebwa n'ebiweebwayo olw'emirembe, ng'akoowoola MUKAMA, era MUKAMA n'amuddamu n'omuliro okuva mu ggulu ogwaka ku kyoto eky'ebiweebwayo ebyokebwa.

²⁷Awo MUKAMA Katonda n'ala gira malayika okuzaayo ekitala kye mu kiraato kyakyo.

²⁸Okuva mu kiseera ekyo, MUKAMA bwe yaddamu Dawudi ku gguuliro lya Olunaani Omuyebusi, Dawudi n'aweerangayo ssaddaaka eyo.

²⁹Mu biro ebyo Eweema ya MUKAMA, Musa gye yali azimbidde mu ddungu, n'ekyoto eky'ebiweebwayo ebyokebwa byali mu kifo ekigulumivu e Gibyon.

³⁰Naye Dawudi yali tasobola kugendayo kwebuuza ku Katonda, kubanga yali atya ekitala kya malayika wa MUKAMA Katonda.

1 Ebyomumirembe 22

¹Awo Dawudi n'ayogera nti, "Wano we wanaabeeranga ennyumba ya MUKAMA Katonda, n'ekyoto eky'ebiweebwayo ebyokebwa ku lwa Isirayiri."

Enteekateeka ey'okuzimba Yeekaalu

²Dawudi n'ala gira okukuñjaanya bannaggwanga abaali mu Isirayiri, era mu bo n'alondamu abatemi b'amayinja, bagabajje nga kuzimbisa nnyumba ya MUKAMA.

³Yateekawo ebyuma bingi olw'okukola emisumaali egy'enzigi egya wankaaki, n'olwebigatta, n'ebikomo bingi ebyayinga obungi n'obuzito.

⁴Yawaayo n'emivule egitalika, Abazidoni n'Abatuulo gye baamuleetera.

⁵Dawudi n'ayogera nti, "Sulemaani mutabani wange akyali mwana muto n'obumanyirivu bwe butono. Ennyumba egenda okuzimbira MUKAMA egwana okuba ey'ekitiibwa ekinene ennyo, ng'eyatiikirira era ng'etenderezebwa mu mawanga gonna. Noolwekyo nzija kuteekateeka ebinaagizimba." Era Dawudi yakola entegeka nnene ddala nga tannaba kufa.

⁶Awo n'ayita Sulemaani mutabani we n'amukuutira okuzimbira MUKAMA Katonda wa Isirayiri ennyumba.

⁷Dawudi n'agamba Sulemaani nti, "Mwana wange, kyali mu mutima gwange okuzimba ennyumba ku lwa MUKAMA Katonda wange.

⁸Naye ekigambo kya MUKAMA ne kinzijira nga kigamba nti, 'Oyiye omusaayi mungi, era olwanye entalo nnyingi. Tolizimbira linnya lyange nnyumba, kubanga oyiye omusaayi mungi mu maaso gange.

⁹Laba, omwana owoobulenzi alizaalibwa gy'oli, era aliba omusajja ow'emirembe, ne muwa emirembe eri abalabe bona enjuuyi zonna. Aliyitibwa Sulemaani. Ndiwa Isirayiri emirembe n'obutabenkevu ku mulembe gwe.

¹⁰Oyo ye alizimba ennyumba ku lw'erinnya lyange. Aliba mutabani wange, nange ndiba kitaawe. Era ndinyweza entebe ye ey'obwakabaka bwe mu Isirayiri emirembe gyonna.'

¹¹ “Kaakano, mwana wange, MUKAMA abeere naawe, era olabe omukisa, ozimbire MUKAMA Katonda wo ennyumba, nga bwe yayogera.

¹² MUKAMA akuwe amagezi ag’okwawula n’okutegeera ng’okulembera Isirayiri, olyoke okuumenga amateeka ga MUKAMA Katonda wo.

¹³ Olwo onoolaba omukisa bw’oneekuumanga ebiragiro n’amateeka MUKAMA ge yawa Musa ku lwa Isirayiri. Beera n’amaanyi era gguma omwoyo, totya so totekemuka.

¹⁴ “Mu kutegana okungi ntegekedde yeekaalu ya MUKAMA ttani eza zaabu enkumi ssatu mu bina mu ataano, ne ttani eza ffeeza emitwalo esatu mu enkumi nnya mu bitaano; n’ebikomo n’ebiyuma bingi nnyo ebitapimika muwendo gwabyo, n’embaawo n’amayinja. Ate okyayinza n’okwongerako.

¹⁵ Olina abakozi bangi; abatemi b’amayinja, n’abazimbi, n’ababazzi, n’abantu bona abalina obumanyirivu mu kuweesa

¹⁶ zaabu ne ffeeza, n’ebikomo, n’ekyuma. Kaakano tandikirawo okukola era MUKAMA akuluŋŋjamye.”

¹⁷ Awo Dawudi n’alagira abakulembeze bona aba Isirayiri okuyamba mutabani we Sulemaani ng’agamba nti,

¹⁸ “MUKAMA Katonda wammwe tali wamu nammwe? Era tabawadde okuwummula n’emirembe ku njuyi zonna? Agabudde ababeera mu nsi mu mukono gwange, era ensi ekkakkanye eri MUKAMA n’eri abantu be.

¹⁹ Kaakano mumalirire mu mitima gyammwe ne mu mmeeme zammwe okunoonya MUKAMA Katonda wammwe. Mutandike okuzimba awatukuvu wa MUKAMA, n’oluvannyuma muleete essanduuko ey’endagaano ya MUKAMA, n’ebintu ebitukuvu ebya Katonda mu yeekaalu eneezimbibwa ku lw’erinnya lya MUKAMA.”

1 Ebyomumirembe 23

Abaleevi

¹ Awo Dawudi bwe yawangaala ennyo n’akaddiwa emyaka mingi n’afuula Sulemaani mutabani we okuba kabaka wa Isirayiri.

² Era yakuŋŋanya abakulembeze ba Isirayiri bona, wamu ne bakabona n’Abaleevi.

³ Abaleevi abaali baweza emyaka amakumi asatu n’okusingawo baabalibwa, n’omuwendo gw’abasajja bona gwali emitwalo esatu mu kanaana.

⁴ Awo Dawudi n’agamba nti, “Ku abo emitwalo ebiri mu enkumi nnya be banaalabiriranga omulimu ogwa yeekaalu ya MUKAMA, ate kakaaga banaabanga bakungu n’abalamuzi.

⁵Enkumi nnya banaabanga baggazi, ate enkumi ennya abasigaddewo be banatenderezanga MUKAMA n'ebivuga bye nateekateeka ku lw'okutenderezza."

⁶ Awo Dawudi n'agabanyamu Abaleevi mu bibinja ng'abaana ba Leevi bwe baali: Gerusoni, ne Kokasi ne Merali.

⁷Abaana ba Gerusoni baali Ladani ne Simeeyi.

⁸Batabani ba Ladani baali Yekyeri omukulu, ne Zesamu, ne Yoweeri, basatu bona awamu.

⁹Batabani ba Simeeyi baali Seromisi, ne Kasiyeri, ne Kalani, basatu bona awamu, era be baali abakulu b'ennyumba ya Ladani.

¹⁰Batabani ba Simeeyi omulala Yakasi, ne Zina, ne Yewusi ne Beriya, be bana bona awamu.

¹¹Yakasi ye yali omukulu, ne Ziza ye yali owookubiri, naye Yewusi be Beriya tebaalina baana noolwekyo baabalibwa ng'ekika kimu era nga bakola omulimu gwe gumu.

¹²Batabani ba Kokasi baali Amulaamu, ne Izukali, ne Kebbulooni ne Wuziyeeri, be bana.

¹³Batabani ba Amulaamu baali Alooni ne Musa. Alooni yayawulibwa, ye n'abazzukulu be emirembe gyonna, atukuzenga ebintu ebitukuvu ennyo, okuwangayo ssaddaaka eri MUKAMA, n'okumuweerezanga, era n'okusabanga omukisa mu linnya lye emirembe gyonna.

¹⁴Batabani ba Musa omusajja wa Katonda babalibwa nga ba mu kika kya Leevi.

¹⁵Batabani ba Musa baali Gerusomu ne Eryeza.

¹⁶Mu bazzukulu ba Gerusomu, Sebweri ye yali omukulu.

¹⁷Mu bazzukulu ba Eryeza, Lekabiya ye yali omukulu. Eryeza teyalina baana balala, naye batabani ba Lekabiya baali bangi ddala.

¹⁸Mu batabani ba Izukali, Seromisi ye yali omukulu.

¹⁹Mu batabani ba Kebbulooni, Yeriya omukulu, Amaliya nga wakubiri, Yakaziyeri nga wakusatu, ne Yekameyamu nga ye wookuna.

²⁰Mu batabani ba Wuziyeeri, Mikka ye yali omukulu, ne Issiya nga ye wookubiri.

²¹Batabani ba Merali baali Makuli ne Musi. Batabani ba Makuli baali Eriyazaali ne Kiisi.

²²Eriyazaali n'afa nga tazadde baana babulenzi wabula aboobuwala bokka. Baganda baabwe, batabani ba Kiisi be babawassa.

²³Batabani ba Musi baali Makuli, Ederi ne Yeremosi be basatu.

²⁴Abo be baali abazzukulu ba Leevi mu bika byabwe, ng'emitwe gy'ennyumba bwe gyali giwandiikibba mu manya gaabwe, era nga bwe baabalibwa buli kinoomu, be bakozi abaalina emyaka amakumi abiri n'okusingawo abaaweerezanga mu yeekaalu ya MUKAMA.

²⁵Dawudi yali agambye nti, "Olw'okuba MUKAMA Katonda wa Isirayiri, awadde abantu be emirembe, era abeera mu Yerusaalemi emirembe gyonna,

²⁶Abaleevi tekikyabagwaniranga kusitula eweema oba ebintu ebikozesebwa mu kuweereza."

²⁷Nga bagoberera ebigambo bya Dawudi ebyasembayo, Abaleevi abaabalibwa baali ba myaka amakumi abiri n'okusingawo.

²⁸Omulimu gwabwe gwali gwa kuyambanga bazzukulu ba Aloon mu buweereza obwa yeekaalu ya MUKAMA, nga bavunaanyizibwa mu mpya ne mu bisenge, ne mu kutukuzanga ebintu byonna ebitukuvu, n'okukola emirimu emirala mu nnyumba ya Katonda.

²⁹Baavunaanyizibwanga emigaati eg'y'okulaga ku mmeeza, n'obutta obulungi obw'ekiweebwayo eky'obutta, n'obugaati obutazimbulukusibba, n'okufumba, n'okutabula, olw'ebiweebwayo, n'ebigero byonna mu bungi bwabyo ne mu bunene bwabyo.

³⁰Be baayimiriranga okwebazanga n'okutenderezanga MUKAMA buli nkya na buli akawungeezi,

³¹ne mu kuwaayo ebiweebwayo ebyokebwa, ebyaweebwangayo ku ssabbiiti, n'emyezi nga kye gjije giboneke, ne ku mbaga ezaateekebwawo. Kyabagwaniranga okuweerezanga mu maaso ga MUKAMA obutayosa, mu mpalo zaabwe, nga bwe balagibwa.

³²Awo Abaleevi ne bakolanga emirimu gyabwe mu Weema ey'Okukujjaanirangamu, ne mu Kifo Ekitukuvu, nga bayamba baganda baabwe bazzukulu ba Aloon, okuweerezanga okw'omu yeekaalu ya MUKAMA.

1 Ebyomumirembe 24

¹Ebibinja eby'abazzukulu ba Aloon nga bwe bagabanyizibwamu byali bwe biti: Batabani ba Aloon baali Nadabu, ne Abiku, ne Eriyazaali ne Isamaali.

²Naye Nadabu ne Abiku baasooka kitaabwe okufa, ate nga baafa tebazzadde baana. Eriyazaali ne Isamaali kyebaava baawulibwa era ne batandika okukola omulimu ogw'obwakabona.

³Dawudi ng'ayambibwako Zadooki muzzukulu wa Eriyazaali, ne Akimereki muzzukulu wa Isamaali, yabaawulamu ebibinja nga bwe baalondebwa mu kuweereza kwabwe.

⁴Kyazuulibwa nga abakulembeze mu bazzukulu ba Eriyazaali baali bangi okusinga abazzukulu ba Isamaali, bwe batu bwe bagabanyizibwamu: mu bazzukulu ba kkumi na mukaaga, okuba abakulu b'ennyumba ne ku bazzukulu ba Isamaali munaana okuba abakulu b'ennyumba.

⁵Baabagabanyamu nga bakubye obululu, kubanga waaliwo abakungu abamu nga ba mu kifo ekitukuvu, n'abalala nga bakungu ba Katonda naye nga bona bazzukulu ba Eriyazaali ne Isamaali.

⁶Semaaya Omuwandiisi, mutabani wa Nesaneri, Omuleevi, n'awandiikira amannya gaabwe mu maaso ga kabaka n'abakungu nga Zadooki kabona, ne Akimereki mutabani wa Abiyasaali, n'abakulu b'ennyumba za bakabona, n'Abaleevi, ennyumba emu ng'eronderwa Eriyazaali, n'endala ng'eronderwa Isamaali.

⁷Akalulu akaasooka kaagwa ku Yekoyalibu, n'akokubiri ku Yedaya,

⁸n'akokusatu ku Kalimu, n'akokuna ku Seyolimu,

⁹n'akookutaano ku Malukiya, n'ak'omukaaga ku Miyamini,

¹⁰n'ak'omusanvu ku Kakkozi, n'ak'omunaana ku Abiya,

¹¹n'ak'omwenda ku Yesuwa, n'ak'ekkumi ku Sekaniya,

¹²n'ak'ekkumi n'akamu ku Eriyasibu, n'ak'ekkumi noobubiri ku Yakimu,

¹³n'ak'ekkumi noobusatu ku Kuppa, n'ak'ekkumi noobuna ku Yesebeyabu,

¹⁴ak'ekkumi noobutaano ku Biruga, n'ak'ekkumi n'omukaaga ku Immeri,

¹⁵n'ak'ekkumi n'omusanvu ku Keziri, n'ak'ekkumi n'omunaana ku Kapizzezi,

¹⁶n'ak'ekkumi n'omwenda ku Pesakiya, n'ak'amakumi abiri ku Yekezukeri,

¹⁷ak'amakumi abiri mu kamu ku Yakini, n'ak'amakumi abiri mu bubiri ku Gamuli,

¹⁸n'ak'amakumi abiri mu busatu ku Deraya, n'ak'amakumi abiri mu buna ku Maaziya.

¹⁹Kuno kwe kwali okulondebwa kw'obuweereza bwabwe, bwe baayingiranga mu yeekaalu ya MUKAMA, nga bagoberera ebiragiro ebyabaweebwa jjajaabwe Aloon, nga MUKAMA Katonda wa Isirayiri bwe yamulagira.

Abaleevi Abalala

²⁰Bazzukulu ba Leevi abalala baali: okuva mu batabani ba Amulaamu, yali Subayeri; okuva mu batabani ba Subayeri yali Yedeya.

²¹Ku ba Lekabiya, Issiya ye yali omuggulanda.

²²Ku Bayizukaali Seromosi, ate ku batabani ba Seromosi yali Yakasi.

²³ Ku batabani ba Kebbulooni, Yeriya ye yali omukulu, Amaliya nga ye wookubiri, Yakaziyeri nga ye wookusatu, ne Yekameyamu nga ye wookuna.

²⁴ Mutabani wa Winziyeeri, ye yali Mikka; ne ku batabani ba Mikka, ne Samiri.

²⁵ Muganda wa Mikka ye yali Issiya, ne ku batabani ba Issiya, Zekkaliya.

²⁶ Batabani ba Merali baali Makuli ne Musi. Mutabani wa Yaaziya ye yali Beno.

²⁷ Batabani ba Merali, mu Yaaziya: Beno, ne Sokamu, ne Zakkuli, ne Ibili.

²⁸ Okuva ku Makuli, Eriyazaali, ataazaala baana babulenzi.

²⁹ Okuva ku Kiisi, yali mutabani we Yerameeri.

³⁰ Ne ku batabani ba Musi, Makuli, ne Ederi ne Yerimosi. Abo be baali Abaleevi, ng'ennyumba zaabwe bwe zaali.

³¹ Era ne bano bwe batyo ne bakuba obululu, nga baganda baabwe bazzukulu ba Alooni bwe baakola, mu maaso ga Kabaka Dawudi, ne Zadooki, ne Akimereki, n'abakulu b'ennyumba za bakabona n'Abaleevi. Ennyumba ya muganda waabwe omukulu yayisibwanga mu ngeri y'emu ng'ey'omuto.

1 Ebyomumirembe 25

Abayimbi

¹ Awo Dawudi n'abaduumizi b'eggye, ne baawula abamu ku batabani ba Asafu, n'aba Kemani, n'aba Yedusuni okuweereza, n'okukola obunnabbi, nga bwe bakuba ennanga, n'entongooli, n'ebitaasa. Olukalala lw'abasajja abaakolanga omulimu ogw'okuweereza okwo, lwali:

² Ku batabani ba Asafu: Zakkuli, ne Yusufu, ne Nesaniya ne Asalera, era abo nga bakulirwa Asafu, eyakolanga ogw'obunnabbi, ate ye ng'akulirwa kabaka.

³ Ku batabani ba Yedusuni: Gedaliya, ne Zeri, ne Yesaya, ne Simeeyi, ne Kasabiya ne Mattisiya, be mukaaga awamu, nga bakulirwa kitaabwe Yedusuni, eyakolanga ogw'obunnabbi, nga bw'akuba n'ennanga nga beebaza n'okutendereza MUKAMA.

⁴ Ku batabani ba Kemani kabona wa kabaka: Bukkiya, ne Mattaniya, ne Wuziyeeri, ne Sebuweri, ne Yerimosi, ne Kananiya, ne Kanani, ne Eriyaasa, ne Giddaluti, ne Lomamutyeleri, ne Yosubekasa, ne Mallosi, ne Kosiri, ne Makaziyoosi.

⁵ Abo bona baali baana ba Kemani nnabbi aweereza kabaka, abaamuweebwa olw'okusuubiza kwa Katonda, okuyimusanga erinnya lye. Katonda yamuwa abaana aboobulenzi kkumi na bana, n'aboobuwala basatu.

⁶ Abo bona baavunaanyizibwanga ba kitaabwe, olw'okuyimba mu yeekaalu ya MUKAMA, nga bakuba ebitaasa, n'entongooli, n'ennanga, olw'okuweerezanga

okw'omu nnyumba ya Katonda. Asafu, ne Yedusuni, ne Kemani baali bakolera wansi kabaka.

⁷Omuwendo gw'abo n'eñjanda zaabwe abatendekebwa ne bakuguka mu by'okuyimbira MUKAMA baali ebikumi bibiri mu kinaana mu munaana.

⁸Bonna baakubira obululu emirimu gye baaweebwa, abato n'abakulu, omutendesi ne gwe batendeka.

⁹Akalulu akaasooka akaali aka Asafu kagwa ku Yusufu, batabani be n'ab'eñjanda ze, kkumi na babiri; akookubiri kagwa ku Gedaliya, batabani be, n'ab'eñjanda ze, kkumi na babiri;

¹⁰akookusatu kagwa ku Zakkuli, batabani be n'ab'eñjanda ze, kkumi na babiri;

¹¹akookuna kagwa ku Izuli, batabani be n'ab'eñjanda ze, kkumi na babiri;

¹²akookutaano kagwa ku Nesaniya, batabani be n'ab'eñjanda ze, kkumi na babiri;

¹³ak'omukaaga kagwa ku Bukkiya, batabani be, n'ab'eñjanda ze, kkumi na babiri;

¹⁴ak'omusanvu kagwa ku Yesalera, batabani be, n'ab'eñjanda ze, kkumi na babiri;

¹⁵ak'omunaana kagwa ku Yesaya, batabani be n'ab'eñjanda ze, kkumi na babiri;

¹⁶ak'omwenda kagwa ku Mattaniya, batabani be, n'ab'eñjanda ze, kkumi na babiri;

¹⁷ak'ekkumi kagwa ku Simeeyi, batabani be n'ab'eñjanda ze, kkumi na babiri;

¹⁸ak'ekkumi n'akamu kagwa ku Azaleri, batabani be n'ab'eñjanda ze, kkumi na babiri;

¹⁹ak'ekkumi noobubiri kagwa ku Kasabiya, batabani be n'ab'eñjanda ze, kkumi na babiri;

²⁰ak'ekkumi noobusatu kagwa ku Subayeri, batabani be n'ab'eñjanda ze, kkumi na babiri;

²¹ak'ekkumi noobuna kagwa ku Mattisiya, batabani be n'ab'eñjanda ze, kkumi na babiri;

²²ak'ekkumi noobutaano kagwa ku Yeremosi, batabani be n'ab'eñjanda ze, kkumi na babiri;

²³ak'ekkumi n'omukaaga kagwa ku Kananiya, batabani be n'ab'eñjanda ze, kkumi na babiri;

- ²⁴ak'ekkumi n'omusanvu kagwa ku Yosubekasa, batabani be n'ab'eñjanda ze, kkumi na babiri;
- ²⁵ak'ekkumi n'omunaana kagwa ku Kanani, batabani be n'ab'eñjanda ze, kkumi na babiri;
- ²⁶ak'ekkumi n'omwenda kagwa ku Mallosi, batabani be n'ab'eñjanda ze, kkumi na babiri;
- ²⁷ak'amakumi abiri kagwa ku Eriyaasa, batabani be n'ab'eñjanda ze, kkumi na babiri;
- ²⁸ak'amakumi abiri mu akamu kagwa ku Kosiri, batabani be, n'ab'eñjanda ze, kkumi na babiri;
- ²⁹ak'amakumi abiri mu bubiri kagwa ku Giddaluti, batabani be n'ab'eñjanda ze, kkumi na babiri;
- ³⁰ak'amakumi abiri mu busatu, kagwa ku Makaziyoosi, batabani be n'ab'eñjanda ze, kkumi na babiri;
- ³¹ak'amakumi abiri mu buna kagwa ku Lomamutyezeri, batabani be n'ab'eñjanda ze, kkumi na babiri.

1 Ebyomumirembe 26

Ebibinja eby'abaggazi

- ¹ Ebibinja by'abaggazi byali: Mu Bakola, waaliyo Meseremiya mutabani wa Kole, omu ku batabani ba Asafu.
- ² Meseremiya yalina abaana aboobulenzi nga Zekkaliya ye w'olubereberye, ne Yediyayeri nga wakubiri, ne Zebadiya nga wakusatu, ne Yasuniyeri nga wakuna,
- ³ ne Eramu nga wakutaano, ne Yekokanani nga wamukaaga, ne Eriwenayi nga wa musanvu.
- ⁴ Obededomu naye yalina abaana aboobulenzi nga Semaaya ye w'olubereberye, ne Yekozabadi nga wakubiri, ne Yowa nga wakusatu, ne Sakali nga wakuna, ne Nesaneeri nga wakutaano,
- ⁵ ne Ammiyeri nga wamukaaga, ne Isakaali nga wa musanvu, Pewulesayi nga wa munaana, Katonda gwe yawa omukisa.
- ⁶ Mutabani we Semaaya naye yalina abaana aboobulenzi, abaali abakulembeze mu nnyumba ya kitaabwe kubanga baali basajja bazira.
- ⁷ Batabani ba Semaaya baali Osuni, ne Lefayeri, ne Obedi ne Eruzabadi, ne baganda baabwe abaayitbwanga Eriku ne Semakiya nabo baali basajja bakozi.

⁸Abo bona baali bazzukulu ba Obededomu, era bona awamu ne batabani baabwe n'ab'enjanda zaabwe abalala baali basajja bajjumbize, ate nga bakozi ab'amaanyi olw'omulimu ogwo. Bonna awamu baali nkaaga mu babiri.

⁹Meseremiya naye yalina abaana aboobulenzi, n'ab'enjanda ze bona awamu abasajja abakozi, kkumi na munaana.

¹⁰Kosa, omu ku bazzukulu ba Merali yalina abaana aboobulenzi nga Simuli ye mukulu, newaakubadde nga si ye yali omubereberye kitaawe yali amufudde omukulu;

¹¹Kirukiya nga wakubiri, ne Tebaliya nga wakusatu, ne Zekkaliya nga wakuna. Batabani ba Kosa n'ab'enjanda be bona awamu baali kkumi na basatu.

¹²Ebibinja bino eby'abagazi, omwali abakulu b'ebyalo, baalina obuvunaanyizibwa okuweereza mu yeekaalu ya MUKAMA, ng'Abaleevi abalala bona.

¹³Ne bakubira obululu, buli nnyumba, abato n'abakulu, ng'emiryango bwe gyali.

¹⁴Akalulu ak'Omulyango ogw'Ebuwanjuba ne kagwa ku Seremiya. Ate akalulu ak'Omulyango ogw'Obukiikkono, ne kagwa ku Zekkaliya mutabani we, era omuteesa ow'amagezi.

¹⁵Akalulu ak'Omulyango ogw'Obukiikkaddyo kagwa ku Obededomu, ate ak'eggwanika ne kagwa ku batabani be.

¹⁶Akalulu ak'Omulyango ogw'Ebugwanjuba n'Omulyango Salekesi awaali olutindo okwambuka, ne kagwa ku Suppima ne Kosa. Abakuumi baali boolekera bakuumi bannaabwe.

¹⁷Ku luuyi olw'ebuvanjuba waaliyo Abaleevi mukaaga, olunaku, ne ku luuyi olw'obukiikkono waaliyo bana olunaku ne ku luuyi olw'obukiikkaddyo waaliyo bana olunaku, ne ku ggwanika babiri babiri.

¹⁸Ku luuyi olw'ebugwanjuba olw'oluggya waaliyo bana, ne mu Luggya lwennyini waaliyo babiri.

¹⁹Eyo ye yali engabanya ey'abagazi abaali bazzukulu ba Kola ne Merali.

Abawanika n'Abakungu Abalala

²⁰Ku Baleevi, Akiya ye yali omukulu w'amawanika g'ennyumba ya Katonda, era n'amawanika g'ebintu ebyawongebwa.

²¹Bazzukulu ba Ladani, abaali bazzukulu b'Abagerusoni mu Ladani, abaali abakulu b'ennyumba za bakitaabwe nga be ba Yekyeri,

²²batabani ba Yekyeri, ne Zesamu, ne Yoweeri muganda we, be baavunaanyizibwanga amawanika ga yeekaalu ya MUKAMA.

²³ Ku Bamulaamu, ne ku Bayizukaali, ne ku Bakebbulooni, ne ku Bawuziyeeri:

²⁴ Sebweri muzzukulu wa Gerusomu, mutabani wa Musa, ye yali omuwanika omukulu.

²⁵ Baganda be okuva ku Eryeza nga be ba Lekabiya, ne Yesaya, ne Yolaamu, ne Zikuli ne Seromosi, bona nga batabani be.

²⁶ Seromosi ne baganda be, be baali abawanika b'ebintu byonna ebyawongebwa Dawudi kabaka, n'abakulu b'ennyumba, n'abaali abaduumizi b'olukumi, n'abaduumizi b'ekikumi, n'abaduumizi abalala.

²⁷ Ebimu ku byanyagibwa mu ntalo babiwonga, ne babiwaayo okuddaabiriza yeekaalu ya MUKAMA.

²⁸ Ne byonna ebyawongebwa Samwiri nnabbi, ne Sawulo mutabani wa Kiisi, ne Abuneeri mutabani wa Neeri, ne Yowaabu mutabani wa Zeruyiya byavunaanyizibwanga Seromisi n'ab'eñjanda ze.

²⁹ Ku Bayizukaali, Kenaniya ne batabani be baaweebwa obuvunaanyizibwa ebweru wa yeekaalu, okuba abakungu era abalamuzi okufuganga Isirayiri.

³⁰ Ku Bakebbulooni, Kasabiya n'ab'eñjanda ze abasajja abazira, lukumi mu lusanvu, baavunaanyizibwanga omulimu gwonna gwa MUKAMA, n'okuweereza kabaka, ku luysi olw'ebugwanjuba emitala wa Yoludaani mu Isirayiri.

³¹ Mu Bakebbulooni, Yeriya ye yali omukulu, okusinziira ku byafaayo eby'okuzaalibwa okw'ennyumba zaabwe. Mu mwaka ogw'amakumi ana Dawudi nga ye kabaka, ne waba okunoonyereza mu byafaayo, era ne mulabika mu Yazeri eky'e Gireyaadi abasajja abazira ng'Abakebbulooni.

³² Yeriya yalina abasajja abazira era nga mitwe gy'ennyumba zaabwe, enkumi bbiri mu lusanvu, era kabaka Dawudi n'amufuula mulabirizi wa Balewubeeni, n'Abagaadi, n'ekitundu ky'ekika eky'Abamanase, olwa buli kigambo kya Katonda, n'olw'ebigambo bya kabaka.

1 Ebyomumirembe 27

Ebibinja eby'Eggye

¹ Luno lwe lukalala lw'Abayisirayiri emitwe gy'ennyumba, abaduumizi b'olukumi, n'abaduumizi b'ekikumi abaaweerezanga kabaka nga bamutegeeza buli nsonga eyakwatanga ku bibinja eby'eggye, ebyabeeranga ku mpalo buli mwezi mu mwaka. Buli kibinja kyalimu abasajja emitwalo ebiri mu enkumi nnya.

² Yasobeyamu mutabani wa Zabudyeri ye yavunaanyizibwanga ekibinja ekisooka, era kyalimu abasajja emitwalo ebiri mu enkumi nnya.

³Yali muzzukulu wa Perezi, ate nga mukulu w'abaami b'eggye mu mwezi ogwasooka

⁴ Dodayi Omwakowa ye yavunaanyizibwanga ekibinja eky'omwezi ogwokubiri nga Mikuloosi ye mukulu ow'ekibinja ekyo. Mwalimu abasajja emitwalo ebiri mu enkumi nnya mu kibinja ekyo.

⁵ Benaya mutabani wa Yekoyaada kabona ye yali omuduumizi ow'eggye owookusatu mu mwezi gwokusatu, era yali mwami. Kyalimu abasajja emitwalo ebiri mu enkumi nnya.

⁶Oyo ye Benaya eyali omusajja ow'amaanyi mu bali amakumi asatu, era nga ye mukulu mu bo. Mutabani we Ammizabaadi yavunaanyizibwanga ekibinja ekyo.

⁷ Asakeri muganda wa Yowaabu ye yavunaanyizibwanga ekibinja ekyokuna mu mwezi ogwokuna, era mutabani we Zebadiya ye yamusikira. Ekibinja ekyo kyalimu abasajja emitwalo ebiri mu enkumi nnya.

⁸ Samukusi Omuyizula ye yali omuduumizi ow'ekibinja ekyokutaano mu mwezi ogwokutaano, era kyalimu abasajja emitwalo ebiri mu enkumi nnya.

⁹ Ira mutabani wa Ikkesi Omutekowa ye yali omukulu ow'ekibinja eky'omukaaga mu mwezi ogw'omukaaga, era kyalimu abasajja emitwalo ebiri mu enkumi nnya.

¹⁰ Kerezi Omuperoni, ate nga muzzukulu wa Efulayimu ye yali omukulu ow'ekibinja eky'omusanvu mu mwezi ogw'omusanvu, era kyalimu abasajja emitwalo ebiri mu enkumi nnya.

¹¹ Seibbekayi Omukusasi, ate nga wa ku Bazera ye yali omukulu ow'ekibinja eky'omunaana mu mwezi ogw'omunaana, era kyalimu abasajja emitwalo ebiri mu enkumi nnya.

¹² Abiyezeeri Omwanasosi, ate nga wa ku Babenyamini ye yali omukulu ow'ekibinja eky'omwenda mu mwezi ogw'omwenda, era kyalimu abasajja emitwalo ebiri mu enkumi nnya.

¹³ Makalayi Omunetofa, ate nga wa ku Bazera ye yali omukulu ow'ekibinja eky'ekkumi mu mwezi ogw'ekkumi, era kyalimu abasajja emitwalo ebiri mu enkumi nnya.

¹⁴ Benaya Omupirasoni, ate nga muzzukulu wa Efulayimu ye yali omukulu ow'ekibinja eky'ekkumi n'omu mu mwezi ogw'ekkumi n'ogumu, era kyalimu abasajja emitwalo ebiri mu enkumi nnya.

¹⁵ Kerudayi Omwetofa, ow'omu nnyumba ya Osuniyeri, ye yali omukulu ow'ekibinja eky'ekkumi n'ababiri mu mwezi ogw'ekkumi n'ebiri, era kyalimu abasajja emitwalo ebiri mu enkumi nnya.

Abataka ab'Ebika

¹⁶Abataka ab'ebika bya Isirayiri baali: eyafuganga Abalewubeeni yali Eryeza mutabani wa Zikuli; eyafuganga Abasimyoni yali Sefatiya mutabani wa Maaka;

¹⁷eyafuganga Leevi yali Kasabiya mutabani wa Kemweri; eyafuganga Alooni yali Zadooki;

¹⁸eyafuganga Yuda yali Eriku, omu ku baganda ba Dawudi; eyafuganga Isakaali yali Omuli mutabani wa Mikayiri;

¹⁹eyafuganga Zebbulooni yali Isumaaya mutabani wa Obadiya; eyafuganga Nafutaali yali Yeremozi mutabani wa Azulyeri;

²⁰eyafuganga Abefulayimu yali Koseya mutabani wa Azaziya; eyafuganga ekitundu ky'ekika kya Manase yali Yoweeri mutabani wa Pedaya;

²¹eyafuganga ekitundu ky'ekika kya Manase ekirala ekyabeeranga mu Gireyaadi yali Iddo mutabani wa Zekkaliya; eyafuganga Benyamini yali Yaasiyeri mutabani wa abuneeri;

²²n'eyafuganga Ddaani yali Azaleri mutabani wa Yerokamu. Abo be baali abataka abaakuliranga ebika bya Isirayiri.

²³Dawudi teyabala muwendo ogw'abasajja abaali abaakamaze emyaka abiri n'abaali tebanaba kugituusa, kubanga MUKAMA yaliasuubiza okufuula Abayisirayiri abangi ng'emmunyeenye ez'omu ggulu.

²⁴Naye Yowaabu mutabani wa Zeruiya n'atandika okubala abasajja, n'atamaliriza. Obusungu bwa MUKAMA ne bubuubuukira ku Isirayiri olw'okubala okwo, so n'omuwendo ogwo tegwawandiikibwa mu kitabo eky'ebiomumirembe gya kabaka Dawudi.

Abalabirizi ba Kabaka

²⁵Azumavesi mutabani wa Adyeri yavunaanyizibwanga amawanika ga kabaka, ne Yonasaani mutabani wa Uzziya n'avunaanyizibwanga amawanika ag'amasaza n'ag'ebibuga, ag'ebyalo, n'ag'ebigo.

²⁶Ezuli mutabani wa Kerubu ye yavunaanyizibwanga abalimi ab'omu nnimiro.

²⁷Simeeyi Omulaama ye yavunaanyizibwanga ennimo z'emizabbibu, ne Zabudi Omusifumu ye n'avunaanyizibwanga ebibala eby'ennimiro olw'amasesero ag'omwenge.

²⁸Baalukanani Omugedera ye yavunaanyizibwanga emizeeyituuni n'emisukomooli egiali mu nsenyi ez'ebugwanjuba; ne Yowaasi ye n'avunaanyizibwanga amawanika g'amafuta.

²⁹Situlayi Omusaloni ye yavunaanyizibwanga ebisibo mu Saloni, ne Safati mutabani wa Adulayi n'avunaanyizibwanga ebisibo ebyali mu biwonvu.

³⁰Obiri Omuyisimayiri ye yavunaanyizibwanga enjamira, ne Yedeya Omumeronoosi ye n'avunaanyizibwanga endogoyi.

³¹Yazizi Omukaguli ye yavunaanyizibwanga ebisibo eby'endiga. Abo bona be baali abakungu ba kabaka Dawudi abaavunaanyizibwanga ebintu bye.

³²Yonasaani, kitaawe wa Dawudi omuto yali muteesa wa bigambo, era nga musajja mutegeevu omuwandiisi, ne Yekyeri mutabani wa Kakumoni ye yali mukuza w'abalangira.

³³Akisoferi naye yali muteesa wa kabaka, ate nga Kusaayi Omwaluki ye mukwano gwa kabaka nnyo.

³⁴Yekoyaada mutabani wa Benaya ne Abiyasaali be badda mu bigere bya Akisoferi. Yowaabu ye yali muduumizi w'eggye lya kabaka.

1 Ebyomumirembe 28

Enteekateeka ya Dawudi ku bikwata ku Yeekaalu

¹Dawudi n'akuinjaanya abakungu bona aba Isirayiri e Yerusaalemi ng'omwo mwe muli abakulu b'ebika, n'abakulu b'ebitongole abaaweerezanga kabaka, n'abaduumizi ab'olukumi, n'abaduumizi ab'ekikumi, n'abakungu abaavunaanyizibwanga eby'obugagga n'amagana ebyali ebya kabaka ne batabani be, n'abakungu ab'omu lubiri, n'abasajja ab'amaanyi era n'abasajja bona abazira.

²Awo kabaka Dawudi n'ayimirira n'ayogera nti, "Mumpulirize baganda bange era abantu bange. Nnali nteseeteese mu mutima gwange okuzimbira essanduuko ey'endagaano ya MUKAMA n'entebe ey'ebigere bya Katonda, ennyumba, era nga nentegeka eyaayo ewedde okukolebwa.

³Naye Katonda n'anjamba nti, 'Tolinzimbira linnya lyange nnyumba, kubanga oli mutabaazi wa ntalo era wayiwa omusaayi.'

⁴"Naye ate MUKAMA Katonda wa Isirayiri yannonda mu nnyumba ya kitange yonna okuba kabaka wa Isirayiri emirembe gyonna. Yalonda Yuda okuba omukulembeze, ne mu nnyumba ya Yuda n'alondamu ennyumba ya kitange, ne mu batabani ba kitange n'asiima okunfuula kabaka wa Isirayiri yenna.

⁵Mu batabani bange bona, kubanga MUKAMA ampadde bangi, Sulemaani mutabani wange gwalonze okutuula ku ntebe ey'obwakabaka bwa MUKAMA mu Isirayiri.

⁶Yajjamba nti, 'Sulemaani mutabani wo y'alizimba ennyumba yange n'empya zange, kubanga mmulonze okuba omwana wange, era nange n'abeeranga kitaawe.

⁷Ndinyweza obwakabaka bwe emirembe gyonna, bwatalirekayo okugondera ebiragiro byange n'amateeka gange nga bwe bigobelerwa mu nnaku zino.'

⁸"Kaakano nkukuutira mu lujjudde lwonna olwa Isirayiri, ekuŋŋaaniro ly a MUKAMA, ne Katonda waffe ng'awulira, nti weekuumé okugondera ebiragiro ebya MUKAMA Katonda wo, olyoke olye ensi eno ennungi era (n'abazzukulu) n'abaana ab'obusika bwo bagisikirenga emirembe gyonna.

⁹"Era Sulemaani mutabani wange tegeera Katonda wa kitaawo, omuweerezenga n'omutima gumu n'emmeeme yo yonna, kubanga MUKAMA akebera emitima, era ategeera okufumiitiriza okw'ebirowoozo. Bw'onomunoonyanga, onoomulabanga, naye bw'onomulekanga, anaakuvangako emirembe gyonna.

¹⁰Kaakano weekuumé, kubanga MUKAMA akulonze okuzimba ennyumba ey'okusinzizangamu. Ba n'amaanyi, okole omulimu."

¹¹Awo Dawudi n'akwasa Sulemaani mutabani we ekyokulabirako eky'ekisasi kya yeekaalu, n'ebizimbe byabyo, n'amawanika gaayo, n'ebisenge ebya waggulu, n'ebisenge eby'omunda, n'ekifo eky'entebe ey'okusaasira.

¹²Yamuwa n'enteekateeka ya buli kintu nga eky'empya za yeekaalu ya MUKAMA, n'ebisenge, ebyali bigiriranye, n'amawanika ga yeekaalu ya MUKAMA, n'ebintu byonna ebyawongebwa, ng'Omwoyo bwe yali agitadde ku mutima gwe.

¹³Yamuwa n'ebiragiro eby'okugobereranga ku bibinja bya bakabona, n'Abaleevi, n'olw'omulimu gwonna ogw'okuweerezanga mu yeekaalu ya MUKAMA, n'olw'ebintu byonna ebyakozesebwanga mu kuweereza mu nnyumba ya MUKAMA.

¹⁴Yawaayo ebipimo ebya zaabu olw'ebintu byonna ebya zaabu ebyasabwanga buli mulundi, n'ebipimo ebya ffeeza olw'ebintu byonna ebya ffeeza ebyakozesebwanga buli mulundi;

¹⁵n'ebipimo eby'ettabaaza eza zaabu, n'ettabaaza zaakwo, n'ebipimo ebya zaabu ebya buli kikondo n'ettabaaza yaakyo, n'ebipimo ebya buli kikondo ekya ffeeza n'ettabaaza yaakyo;

¹⁶n'ebipimo ebya zaabu eby'emmeeza ez'emigaati emitukuze egy'okulaga, n'ebipimo ebya ffeeza eby'emmeeza eza ffeeza;

¹⁷n'ebipimo ebya zaabu ennongoose eya wuuma, n'ebbakuli ezimasamasa, n'ekikopo, n'ebipimo ebya zaabu eby'ebbakuli eza zaabu, n'ebipimo ebya ffeeza eby'ebbakuli eza ffeeza;

¹⁸n'ebipimo ebya zaabu ennongoose ey'ekyoto eky'obubaane. N'amuwa n'enteekateeka ey'eggaali, be bakerubi aba zaabu abanjala ebiwaawaatiro byabwe ne babikka ku ssanduuko ey'endagaano ya MUKAMA.

¹⁹ Awo Dawudi n'ayogera nti, "Ebyo byonna biri mu buwandiike, kubanga omukono gwa MUKAMA gwali wamu nange, era yampa okukitegeerera ddala."

²⁰ Dawudi n'ayongera n'agamba Sulemaani mutabani we nti, "Ba n'amaanyi era guma omwoyo, okole omulimu. Totya so totekemuka wadde okuggwamu omwoyo, kubanga MUKAMA Katonda, Katonda wange ali wamu naawe. Taakwabulirenga so taakulekenga okutuusa omulimu gwonna ogw'okuweereza ogwa yeekaalu ye MUKAMA nga guwedde.

²¹ Era, laba, ebibiina bya bakabona n'Abaleevi beeteefuteefu okukola omulimu ku yeekaalu ya Katonda, na buli musajja omumanyirivu mu kuweesa okw'engeri zonna anaakuyamba mu mulimu gwonna. Era n'abakungu wamu n'abantu bona banaagonderanga buli kiragiro kyo."

1 Ebyomumirembe 29

Ebirabo eby'Okuzimba Yeekaalu

¹ Awo Kabaka Dawudi n'ayogera eri ekibiina kyonna ekyali kikuŋjaanye nti, "Sulemaani mutabani wange, Katonda gw'alonde, mwana muto atalina bumanyirivu, ate nga omulimu munene. Ekizimbe kino si kya ku lwa muntu wabula kya ku lwa MUKAMA Katonda.

² Ntegese olwa yeekaalu ya Katonda wange, zaabu olw'omulimu gwa zaabu, ne ffeeza olw'omulimu gwa ffeeza, n'ebikomo olw'omulimu ogw'ebikomo, n'ebiyuma olw'omulimu ogw'ebiyuma, n'embaawo olw'omulimu ogw'embaawo, amayinja aga onuku mangi n'amayinja ag'okutona, amayinja ag'omulimu ogw'enjola n'ag'amabala mangi, n'amayinja ag'omuwendo omungi ag'engeri zonna, n'amayinja amanyirivu mangi nnyo.

³ Okwongera kw'ebyo byonna, n'okwewaayo kwange olwa yeekaalu ya Katonda wange, mpaddeyo amawanika gange aga zaabu ne ffeeza ku lwa yeekaalu ya Katonda wange;

⁴ ttani kikumi mu kkumi eza zaabu eya Ofiri, ne ttani bibiri mu nkaaga eza ffeeza omulongoosemu okugibissa ku bisenge by'ekizimbe,

⁵ n'olw'omulimu ogwa zaabu n'ogwa ffeeza, n'omulimu gwonna ogunaakolebwa abafundi. Kale ani aneewaayo okwewonga leero eri MUKAMA?"

⁶ Awo emitwe gy'ennyumba, n'abataka b'ebika bya Isirayiri, n'abaduumizi ab'olukumi n'ab'ekikumi, n'abakungu abaavunaanyizibwanga emirimu nya kabaka, ne beewaayo awatali kuwalirizibwa.

⁷ Ne bawaayo zaabu ttani kikumi mu kyenda ne kilo kinaana mu nya, ne ffeeza ttani bisatu mu nsanvu mu ttaano, n'ebikomo ttani lukaaga mu nsanvu mu ttaano, n'ebiyuma ttani enkumi ssatu mu lusanvu mu ataano, olw'omulimu gwa yeekaalu ya Katonda.

⁸Abo abaalina amayinja ag'omuwendo, baagawaayo eri eggwanika lya yeekaalu ya MUKAMA, eyakuumibwanga Yekyeri Omugerusoni.

⁹Abantu ne basanyukira nnyo okwewaayo abakulembeze baabwe kwe beewaayo, kubanga baawaayo n'omutima ogutuukiridde eri MUKAMA. Ne kabaka Dawudi n'asanyuka nnyo nnyini.

Essala ya Dawudi

¹⁰Awo Dawudi n'atendereza MUKAMA mu lujjudde lw'abantu bona, n'ayogera nti, "Weebazibwe, Ayi MUKAMA Katonda, Katonda wa jjajjaffe Isirayiri, emirembe n'emirembe.

¹¹Obukulu, n'amaanyi, n'ekitiibwa, n'obuwanguzi, n'okugulumizibwa bibyo, Ayi MUKAMA Katonda, kubanga byonna ebiri mu ggulu ne mu nsi bibyo. Obwakabaka bubwo, Ayi MUKAMA Katonda, era ogulumizibwa okuba omukulu wa byonna.

¹²Obugagga n'ekitiibwa biva gy'oli, era ggwe ofuga ebintu byonna; omukono gwo gwa maanyi era gwa buyinza era gugulumiza ne guwa amaanyi bona.

¹³Kale nno, Katonda waffe, tukwebaza era tutendereza erinnya lyo ery'ekitiibwa.

¹⁴"Naye nze ani n'abantu bange kye ki, ffe okusobola okuwaayo bwe tutyo nga ffe tweyagalidde? Byonna biva gy'oli, era tukuwadde ku bibyo.

¹⁵Ffe tuli bagenyi era abatambuze mu maaso go, nga bajjajjaffe bona bwe baali, n'ennaku zaffe ez'oku nsi ziri ng'ekisiikirize, awatali ssuubi.

¹⁶Era Ayi MUKAMA Katonda waffe, ebintu bino byonna bye tuwaddeyo olw'okuzimba eyeekaalu ku lw'erinnya lyo, biva gy'oli, era byonna bibyo.

¹⁷Katonda wange, mmanyi nti okebera emitima, era osanyukira obwesimbu, n'ebintu bino byonna mbiwaddeyo awatali kuwalirizibwa, era n'omutima omwesimbu. Era kaakano ndabye abantu bo nga bakuwa n'essanyu n'omwoyo gumu.

¹⁸Ayi MUKAMA, Katonda wa bajjajjaffe Ibulayimu, Isaaka, ne Isirayiri, okuumé omuliro ogwo mu mitima gy'abantu bo emirembe gyonna, era emitima gyabwe ginywerere ku gwe.

¹⁹Owe Sulemaani mutabani wange omutima ogumaliridde okukumanga ebiragiro byo, empya zo, n'amateeka go, era omuwe amaanyi okuzimba ekizimbe kye ntegese."

²⁰Awo Dawudi n'agamba ekibiina kyonna nti, "MUKAMA Katonda wammwe atenderezebwe." Ekibiina kyonna ne kitendereza MUKAMA, Katonda wa bajjajjaabwe nga bakutamye emitwe gyabwe, nga bwe bagwa ne ku ttaka mu maaso ga MUKAMA ne kabaka.

Sulemaani atikirwa okuba kabaka

21 Ku lunaku olwaddirira ne bawaayo ssaddaaka n'ebiweebwayo ebyokebwa eri MUKAMA, ng'omwo mwe muli seddume lukumi, n'endiga ennume lukumi, n'obwana bw'endiga obulume lukumi, era n'ebiweebwayo eby'okunywa ne ssaddaaka endala ku lwa Isirayiri yenna.

22 Ne baliira era ne banywera mu maaso ga MUKAMA nga bajjudde essanyu lingi ku lunaku olwo. Awo Sulemaani mutabani wa Dawudi n'akakasibwa nga kabaka omulundi ogwokubiri, era n'afukibwako amafuta mu maaso ga MUKAMA okuba omukulembeze ne Zadooki okuba kabona.

23 Awo Sulemaani n'atuula ku ntebe ey'obwakabaka eya MUKAMA nga ye kabaka mu kifo kya Dawudi kitaawe, era n'alaba omukisa ne Isirayiri yenna ne mugondera.

24 Abakungu bona n'abasajja abazira bona, ne batabani ba kabaka Dawudi bona ne bawera eri kabaka Sulemaani.

25 MUKAMA n'agulumiza nnyo Sulemaani mu maaso ga Isirayiri yenna, era n'aweebwa ekitiibwa eky'obwakabaka ekyali kitaweebwanga kabaka mulala yenna mu Isirayiri.

Okufa kwa Dawudi

26 Dawudi mutabani wa Yese yali kabaka wa Isirayiri yenna.

27 Yafugira Isirayiri okumala emyaka amakumi ana, nga musanvu yagifugira e Kebbulooni, n'emirala amakumi asatu n'agifugira mu Yerusaalemi.

28 N'afa ng'akaddiye nnyo, ng'ajjudde essanyu olw'emyaka gye yamala ku nsi, mu bugagga ne mu kitiibwa, era Sulemaani mutabani we n'amusikira.

29 Era ebyafaayo ebyomumirembe gya kabaka Dawudi okuvira ddala ku ntandikwa okutuukira ddala ku nkomerero, byawandiikibwa mu bitabo ebyomumirembe bya nnabbi Samwiri ne mu bitabo ebyomumirembe ebya Gaadi omulabirizi,

30 era n'ebi'okufuga kwe, n'obuyinza bwe, n'ebyo byonna ebyamutuukako, ne ku Isirayiri, ne ku bwakabaka obulala obwali bumwetoolodde, byonna byawandiikibwa omwo.

2 Ebyomumirembe

2 Ebyomumirembe 1

Sulemaani Asaba Amagezi

¹ Sulemaani mutabani wa Dawudi n'atebenkera ku bwakabaka bwe, kubanga MUKAMA Katonda we yali wamu naye, era n'amugulumiza nnyo.

² Awo Sulemaani n'ayita Isirayiri yonna, n'atumya abaduumizi b'enkumi n'ab'ebikumi, n'abalamuzi, n'abakadde bonne mu Isirayiri yonna, n'abakulembeze b'ennyumba za bajajjaabwe.

³ Sulemaani n'ekibiina kyonna ne bagenda e Gibyoni eyali ekifo ku lusozi awaali Eweema ya Katonda ey'Okukuŋjaanirangamu, Musa omuweereza wa MUKAMA gye yakuba, eyo mu ddungu.

⁴ Naye Dawudi yali aggye essanduuko ya Katonda okuva e Kiriyasuyalimu, n'agitwala e Yerusaalemi gye yali agitegekedde ng'agizimbidde eweema.

⁵ Era n'ekyoto eky'ekikomo Bezaaleeri mutabani wa Uli, muzzukulu wa Kuuli kye yali azimbye, kyalieyo mu lusiisira lwa MUKAMA, ne Sulemaani n'ekibiina kyonna gye beebuulizanga ku MUKAMA.

⁶ Sulemaani n'ayambuka eri ekyoto eky'ekikomo n'alaga mu maaso ga MUKAMA mu Weema ey'Okukuŋjaanirangamu n'aweerayo ku kyoto ebiweebwayo ebyokebwa lukumi.

⁷ Ekiro ekyo Katonda n'alabikira Sulemaani n'amugamba nti, "Saba kyonna ky'oyagala nkuwe."

⁸ Sulemaani n'addamu Katonda nti, "Olazze kitange Dawudi ekisa n'okwagala kungi nnyo, n'onfuula omusika we.

⁹ Kaakano, MUKAMA Katonda, kye wasuubiza kitange Dawudi, nsaba kituukirizibwe, kubanga onfudde kabaka ow'eggwanga eryenkana ng'enfuufu ku nsi mu bungi bwayo.

¹⁰ Ompe amagezi n'okumanya, ndyoke nkulembere abantu bano; kubanga ani ayinza okufuga eggwanga lyo lino eddene bwe liti?"

¹¹ Katonda n'addamu Sulemaani nti, "Kubanga ekyo kibadde mu mutima gwo, n'otosaba bintu, oba obugagga, wadde ekitiibwa newaakubadde okuwangula abalabe bo, ate n'otosaba na buwangaazi, naye n'osaba amagezi n'okumanya osobole okufuga abantu bange, ggwe, nga kabaka waabwe,

¹² amagezi n'okumanya bikuweereddwa. Era nzija kukuwa obugagga, n'ebintu, n'ekitiibwa, ebitenkana ebyo bakabaka abaakusooka bye baalina, wadde abalija ng'ovuddewo, bye balifuna."

¹³Awo Sulemaani n'ava mu maaso g'Eweema ey'Okukuŋŋaanirangamu e Gibyonи n'addayo e Yerusaalemi. N'afuga Isirayiri.

¹⁴Sulemaani n'akuŋŋanya amagaali n'abeebagala embalaasi; n'aba n'amagaali lukumi mu bina, n'abeebagala embalaasi omutwalo gumu mu enkumi bbiri, be yateeka mu bibuga eby'amagaali, ne mu Yerusaalemi gye yabeeranga.

¹⁵Kabaka n'afuula effeeza ne zaabu okuba ebyabolijo mu Yerusaalemi, nga bingi ng'amayinja; era n'afuula n'emivule okuba emingi ng'emisukamooli mu nsenyi.

¹⁶Embalaasi za Sulemaani zaasubulibwanga okuva e Misiri, era abasuubuzi ba kabaka be baazigulangayo.

¹⁷Eggaali baagisuubulanga kilo musanvu eza ffeeza, embalaasi ne bagisuubulanga kilo emu ne desimoolo musanvu eza ffeeza okuva e Misiri. Ate era baazitunzanga ne bakabaka bona ab'Abakiiti ne bakabaka ab'e Busuuli.

2 Ebyomumirembe 2

Enteekateeka z'Okuzimba Yeekaalu

¹Sulemaani n'awa ebiragiro okuzimbira erinnya lya MUKAMA eyeekaalu, ate naye okwezimbira olubiri olwa kabaka.

²N'alonda abasajja emitwalo musanvu okuba abeetissi, n'abalala emitwalo munaana okutema amayinja mu nsozi, n'abalala enkumi ssatu mu lukaaga okubakuliranga.

³Awo Sulemaani n'aweereza Kulamu kabaka w'e Ttuulo obubaka nti, "Nga bwe wakolagananga ne Dawudi kitange, n'omuweereza emivule egy'okwezimbira olubiri lwe okubeeramu, nange kolagana nange mu ngeri y'emu.

⁴Laba kaakano nnaatera okuzimbira erinnya lya MUKAMA Katonda wange eyeekaalu, era ngiwonge olw'okwoterezaayo obubaane obw'ebiyakaloosa obulungi mu maaso ge, n'okuweerayo emigaati egya buli lunaku, n'olw'okuweerayo ebiweebwayo ebyokebwa enkya n'akawungeezi buli ssabbiiti ne ku myezi nga kye gijke giboneke ne ku mbaga ezaatekebwawo eza MUKAMA Katonda waffe, ng'ekiragiro eky'enkalakkalira eri Isirayiri.

⁵"Eyeekaalu gye ḥnjenda okuzimba ejja kuba yaakitiibwa, kubanga Katonda waffe waakitiibwa okusinga bakatonda abalala bona.

⁶Naye ani ayinza okumuzimbira eyeekaalu, nga n'eggulu erya waggulu ddala taligyamu? Noolwekyo nze ani okumuzimbira eyeekaalu, okuggyako okumuzimbira ekifo eky'okwoterezangamu obubaane mu maaso ge?

⁷"Noolwekyo mpeereza omusajja omumanyirivu nga mugezi asobola okuweesa zaabu, ne ffeeza, n'ebikomo, n'ebiyuma, ate era asobola okuluka engoye eza kakobe, n'entwakaavu, n'eza bbululu, ate era nga mumanyirivu mu kukola

enjola ez'engeri zonna, ngakolaganira wamu n'abasajja bange abamanyirivu mu by'omu Yuda ne mu Yerusaalemi, Dawudi kitange be yateekateeka.

⁸“Era mpeereza n'emivule, n'emiberosi, n'emitogo okuva e Lebanooni, kubanga mmanyi nti abasajja bo bamanyirivu mu kutema emitu mu Lebanooni. Abaddu bange banaakolagananga n'ababo

⁹okunteekerateekera embaawo mu bungi, kubanga eyeekaalu gye ɳjenda okuzimba egenda kuba nnene era nga yaakitiibwa.

¹⁰Laba, ndiwa abaweereza bo, abasajja ababazzi, lita ez'enjaano ense emitwalo amakumi ana mu ena, ne lita eza sayiri, emitwalo amakumi ana mu ena, n'ebita eby'omwenge emitwalo ebiri, n'ebita eby'amafuta ag'omuzeeyituuni emitwalo ebiri.”

¹¹Awo Kulamu n'addamu ebbaluwa Sulemaani gye yamuweereza ng'agamba nti, “Kubanga MUKAMA ayagala abantu be, kyavudde akufuula kabaka waabwe.”

¹²N'ayongerako na kino nti, “MUKAMA Katonda wa Isirayiri eyakola eggulu n'ensi, yeebazibwe, kubanga awadde kabaka Dawudi omwana omutegeeveu, alina okutegeera n'okwawula ebirungi n'ebibi, agenda okuzimbira MUKAMA eyeekaalu, n'okwezimbira olubiri.

¹³“Nkuweereza Kulamu omusajja omumanyirivu, era alina okutegeera n'obumanyirivu bungi,

¹⁴ne nnyina y'omu ku bazzukulu ba Ddaani, nga ne kitaawe musajja w'e Ttuulo. Yatendekebwa mu kuweesa zaabu n'effeza, n'ebikomo n'ebiyuma n'okutema amayinja era nga mubazzi, ate n'okuluka engoye eza kakobe, n'ezza bbululu, n'entwakaavu, n'ezza bafuta. Era alina obumanyirivu mu kwola enjola ez'engeri zonna, era ayinza okuyiiya engeri yonna ey'okukolamu ekintu kyonna ekimuweereddwa. Y'anaakolanga n'abaweesi bo n'aba mukama wange Dawudi.

¹⁵“Kaakano mukama wange aweereze abaddu be ejjaano ne sayiri, n'amafuta ag'omuzeeyituuni ne wayini gwe yasuubiza,

¹⁶tulyoke tuteme emitu gyonna gye weetaaga okuva e Lebanooni. Tunaagiseeyeyeteza ku nnyanja okutuuka e Yopa, naawe oligyambusa e Yerusaalemi.”

¹⁷Awo Sulemaani n'abala bannaggwanga bona abaali mu nsi eya Isirayiri, ng'okubala Dawudi kitaawe kwe yakola bwe kwali; baali abasajja emitwalo kkumi n'ettaano mu enkumi ssatu mu lukaaga.

¹⁸N'alonda mu bo emitwalo musanvu okuba abeetissi, n'abalala emitwalo munaana okutemanga amayinja mu nsozi, n'abalala enkumi ssatu mu lukaaga okulabiriranga abantu abaakolanga.

2 Ebyomumirembe 3

Sulemaani Azimba Yeekaalu

¹ Awo Sulemaani n'atandika okuzimba yeekaalu ya MUKAMA mu Yerusaalemi ku lusozi Moliya, MUKAMA gye yalabikira Dawudi kitaawe, ekifo Dawudi kye yali alonze ku gguuliro lyu Olunaani Omuyebusi.

² Yatandika okugizimba mu mwezi ogwokubiri mu mwaka ogwokuna ogw'obufuzi bwe.

³ Omusingi Sulemaani gwe yasima ogwa yeekaalu ya Katonda gwali obuwantu mita amakumi abiri mu musantu ng'obugazi mita mwenda, mu kukozesa ebipimo okw'edda.

⁴ Ekisasi ekyali mu maaso ga yeekaalu kyali obuwantu mita mwenda n'obugazi nga kye kimu, n'obugulumivu kyali mita mwenda. Munda mu yeekaalu n'asiigamu ne zaabu ennongoofu.

⁵ Mu kisenge ekinene n'assaamu embaawo ez'emiberosi, ne munda waakyo n'akisiiga ne zaabu ennongoofu, ate era n'akitimba n'enkindu n'emikuufu.

⁶ N'ayonja yeekaalu n'amayinja ag'omuwendo, ne zaabu gwe yakozesa yali zaabu owa Paluvayimu.

⁷ Ku myango, ne ku miryango, ne ku bisenge ne ku nzigi za yeekaalu, byonna n'abisiiako zaabu; ate era n'awoola ne bakerubi ku bisenge.

⁸ N'azimba n'Ekifo Ekitukuvu Ennyo, ng'obuwantu kyenkanankana obugazi bwa yeekaalu, obuwantu kyali mita mwenda n'obugazi mita mwenda. Munda waakyo n'asiigamu ttani amakumi abiri mu ssatu eza zaabu ennongoofu.

⁹ Obuzito bw'emisumaali bwali desimoolo mukaaga era nga zaabu.

¹⁰ Mu Kifo Ekitukuvu Ennyo n'abajirayo bakerubi babiri n'abasiiga ne zaabu.

¹¹ Obugazi bw'ebiwaawaatiro bya bakerubi bwali mita mwenda, ng'ekimu obuwantu bwakyo kiri mita bbiri ne desimoolo ssatu, nga kituuka ku kisenge kya yeekaalu, n'ekirala obuwantu nga kiri mita bbiri ne desimoolo ssatu, nga kituuka ku kerubi oli omulala.

¹² N'ekiwaawaatiro kya kerubi omulala kyali obuwantu mita bbiri ne desimoolo ssatu nga kituuka ku ludda lw'ekisenge kya yeekaalu ekirala, n'ekiwaawaatiro ekirala obuwantu nga kiri mita bbiri ne desimoolo ssatu, nga kituuka ku kerubi oli omulala.

¹³ Obuwantu bw'ebiwaawaatiro bya bakerubi bwali mita mwenda awamu, era baasimbibwa ku bigere byabwe, nga batunuuliraganye.

¹⁴N'akola olutimbe nga lulimu bbululu, effulungu, era nga lutwakaavu, ne bafuta ennungi n'alukubako ebifaananyi bya bakerubi.

¹⁵Mu maaso ga yeekaalu yassaawo empagi bbiri, obuwantu bwazo mita kkumi na mukaaga, nga buli emu ku zo eriko omutwe ogwenkana mita bbiri ne desimoolo ssatu.

¹⁶N'akola emikuufu mu kifo eky'omunda awasinzirwa okwogera n'agissa ku mitwe gy'empagi, ate era n'akola n'amakomamawanga kikumi, n'agateeka ku mikuufu egyo.

¹⁷N'asimba empagi mu maaso ga yeekaalu, emu ku luuyi olw'ebugwanjuba obwa ddyo, n'endala ku luuyi olw'ebugwanjuba obwa kkono. Ey'oku luuyi olw'ebugwanjuba obwa ddyo yagituma Yakini, n'eyo ku luuyi olw'ebugwanjuba obwa kkono n'agitunga Bowaazi.

2 Ebyomumirembe 4

Ebintu Ebyole ebya Yeekaalu

¹Yazimba ekyoto eky'ekikomo, obuwantu bwakyo mita mwenda, n'obugazi bwakyo mita mwenda, ng'obugulumivu bwakyo mita nnya n'ekitundu.

²N'akola Ennyanja ensaanuuse, nga neekulungirivu, nga ya mita nnya n'ekitundu okuva ku mugo okutuuka ku mugo, ng'obugulumivu eri mita bbiri ne desimoolo ssatu, ate ng'obwetoolooovu eri mita kkumi na ssatu n'ekitundu.

³Wansi waakyo waaliyo ebifaananyi by'ente ennume nga mumbe, nga buli emu eri kitundu kya mita obuwantu, era nga zikyetoolodde. Ebifaananyi byasaanuusibwanga mu nnyiriri bbiri bbiri, ekidiba bwe kyasaanuusibwanga.

⁴Ennyanja yatuulanga ku bifaananyi by'ente ennume kkumi na bbiri, essatu nga zitunuulira obukiikkono, n'essatu endala nga zitunuulira ebugwanjuba, n'essatu endala nga zitunuulira obukiikkaddyo, n'essatu endala nga zitunuulira ebuvanjuba. Ennyanja yatuulanga ku zo waggulu, n'amagulu gaazo ag'emabega nga gatunudde munda, wakati waayo.

⁵Obukwafu bwayo bwali nga luta, n'omugo gwayo ng'omugo gw'ekikopo, n'okufaanana ng'efaanana ng'ekimuli ky'amalanga. Yatekebwangamu lita emitwalo mukaaga.

⁶N'akolayo ne bensani kkumi ez'okwolezangamu, etaano n'azissa ku luuyi olw'obukiikkaddyo, n'ettaano endala n'azissa ku luuyi olw'obukiikkono. Omwo mwe mwanyumungulizibwanga ebintu ebyakozesebwanga mu kiseera eky'okuwaayo ebiweebwayo ebyokebwa, naye ng'Ennyanja ya bakabona okuginaabirangamu.

⁷N'akola ebikondo eby'ettaala ez'omukono kkumi nga bya zaabu, ng'ekiragiro kyabyo bwe kyali, n'abiteeka mu yeekaalu, ebitaano ku luuyi olw'obukiikkaddyo, n'ebitaano ebirala ku luuyi olw'obukiikkakkono.

⁸N'akola n'emmeeza kkumi, n'aziteeka mu yeekaalu, etaano ku luuyi olw'obukiikkaddyo, n'etaano endala ku luuyi olw'obukiikkakkono. N'akola ne bbakuli ezikozesewa okumansira kkumi nga za zaabu.

⁹N'akola oluggya lwa bakabona, n'oluggya olunene ddala, n'enzigi ez'oluggya, n'enzigi n'azisaaba n'ekikomo.

¹⁰Ennyanja n'agineeka ku luuyi olw'obukiikkaddyo obw'ebuvanjuba mu yeekaalu.

¹¹N'akola n'ensuwa, n'ebisena, ne bbakuli. Awo Kulamu n'amaliriza omulimu ogwali gumuwereddwa kabaka Sulemaani ku yeekaalu ya Katonda:

¹²empagi bbiri, n'emitwe egifaanana ng'ebakuli ku mitwe gy'empagi, n'ebitimba bya mirundi ebiri nga bibeera ku mitwe egiali ku mpagi,

¹³n'amakomamawanga ebikumi bina obw'ebitimba biri ebibiri, buli kitimba nga kirina ennyiriri bbiri ez'amakomamawanga, nga zitimbye emitwe gy'empagi.

¹⁴N'akola n'ebiyimirirwako, n'amabensani gaakwo,

¹⁵n'Ennyanja n'ebifaananyi by'ente ennume emumbe,

¹⁶n'ensuwa, n'ebisena, n'ewuuma ez'ennyama, n'ebintu byonna ebigenderako. Ebintu byonna Kulamu bye yakolera Kabaka Sulemaani ku lwa yeekaalu ya MUKAMA yabizigula n'ekikomo.

¹⁷Kabaka yalagira babisaanuusize mu lusenyi lwa Yoludaani, awali ettaka ery'ebbumba wakati w'e Sukkosi n'e Zereda.

¹⁸Sulemaani n'akola ebintu ebyo byonna nga bingi nnyo nnyini, n'obuzito bw'ekikomo mwe byakolebwa ne butamanyibwa.

¹⁹Sulemaani n'akola ebintu byonna ebyole mu yeekaalu ya Katonda: ekyoto ekya zaabu, n'emmeeza okwabanga emigaati eg'yokulaga,

²⁰n'ebikondo eby'ettaala ez'omukono nga bya zaabu, wamu ne ttaala zaabyo, okwakiranga mu maaso g'awaayimirirwanga okwogera, ng'ekiragiro bwe kyali,

²¹n'ebimuli, ne ttaala, ne wuuma nga byonna zaabu ntuukirivu,

²²n'ebisalako ebisirinza, ne bensani, ne bbakuli ez'okumansira akaloosa, ne fulampeni nga bya zaabu ennongoose, n'enzigi za yeekaalu, n'enzigi ez'omunda mu Kifo Ekitukuvu Ennyo, n'enzigi ez'ekisenge ekinene, nga byonna bya zaabu.

2 Ebyomumirembe 5

¹ Bw'atyo Sulemaani n'amaliriza omulimu gwonna ogwa yeekaalu ya MUKAMA. N'alyoka aleeta ebintu kitaawe Dawudi bye yawonga, effeeza ne zaabu n'ebintu ebirala byonna ebyole, n'abiteeka mu mawanika ga yeekaalu ya Katonda.

Essanduuko Ereetebwa mu Yeekaalu

² Awo Sulemaani n'akuñjaanya abakadde ba Isirayiri, n'abakulu b'ebika, n'abakulu b'ennyumba za bajajja b'abantu ba Isirayiri bagende baleete essanduuko ey'endagaano ya MUKAMA okuva mu Sayuuni, ekibuga kya Dawudi.

³ Abasajja bona aba Isirayiri ne bakuñjaanira mu maaso ga kabaka mu kiseera eky'embaga mu mwezi ogw'omusanvu.

⁴ Abakadde bona aba Isirayiri bwe baatuuka, Abaleevi ne basitula essanduuko,

⁵ ne bagireeta, n'Eweema ey'Okukunyaaanirangamu, n'ebintu byonna ebitukuvu ebyali mu weema. Bakabona n'Abaleevi be baabisitula.

⁶ Awo kabaka Sulemaani n'ekibiina kyonna ekya Isirayiri, abaali bakuñjaanye nga bamwetoolodde, nga bali mu maaso g'essanduuko, ne bawaayo ssaddaaka ez'endiga n'ente, ezitaabalibwa muwendo.

⁷ Awo bakabona ne baleeta essanduuko ey'endagaano ya MUKAMA munda mu kifo kyayo mu watukuvu wa yeekaalu, mu Kifo Ekitukuvu Ennyo, ne bagiteeka wansi w'ebiwaawaatiro bya bakerubi.

⁸ Bakerubi baayanjalanga ebiwaawaatiro byabwe okubuna ekifo eky'essanduuko, ne babikkanga essanduuko n'emisituliro gyayo.

⁹ Era emisituliro gyali miwanvu nnyo nga n'okulengerebwa girengerebwa okuva mu watukuvu, naye nga tegirabika ng'omuntu asinzidde ebweru; era ekyali eyo ne leero.

¹⁰ Essanduuko yalimu ebipande Musa bye yateekamu nga ali ku Kolebu, MUKAMA gye yakolera endagaano n'Abayisirayiri, bwe baali bavudde mu Misiri.

¹¹ Awo bakabona bona ne bava mu Kifo Ekitukuvu. Bonna abaaliwo baali beetukuzizza, obutayawula mu bibiina byabwe.

¹² Abaleevi bona abaali abayimbi, ng'omwo mwe muli Asafu, Kemani, Yedusuni ne batabani baabwe n'ab'enjanda zaabwe nga bambadde bafuta ennungi, nga bakutte ebitaasa, n'entongooli, n'ennanga, ne bayimirira ku luuyi olw'ebuvanjuba olw'ekyoto, wamu ne bakabona kikumi mu abiri abaafuuwanga amakondeere.

¹³ Awo abaafuuwanga amakondeere n'abayimbi ne beegattira wamu mu ddoboozi ery'awamu ne batendereza era ne beebaza MUKAMA. Ne batendereza MUKAMA nga bafuuwa amakondeere, nga bakuba n'ebitaasa, n'ebivuga ebirala nga bayimba nti, "Mulungi, kubanga okwagala kwe

okwenkalakkalira kubeerera emirembe n'emirembe." Awo yeekaalu ya MUKAMA n'ejjula ekire.

¹⁴Bakabona ne batasobola kukola mulimu gwabwe ogw'obuwereza olw'ekire, kubanga ekitiibwa kya MUKAMA kyajjula yeekaalu ya MUKAMA.

2 Ebyomumirembe 6

¹Mu kiseera ekyo Sulemaani n'ayogera nti, "MUKAMA eyagamba nti Alituula mu kizikiza ekikutte;

²nkuzimbidde yeekaalu ey'ekitiibwa, ekifo ky'onoobeerangamu emirembe gyonna."

³Awo kabaka n'akyuka n'atunuulira ekibiina kyonna ekya Isirayiri ekyali kiyimiridde awo, n'abasabira omukisa.

⁴N'ayogera nti, "Yeebazibwe MUKAMA Katonda wa Isirayiri, atuukiriza n'omukono gwe ekyo kye yasuubiza n'akamwa ke eri Dawudi kitange, ng'agamba nti,

⁵"Okuva ku lunaku lwe naggya abantu bange mu nsi y'e Misiri, tewali kibuga kye nnalonda mu bika byonna ebya Isirayiri okuzimba mu eyeekaalu olw'erinnya lyange, wadde omuntu yenna okuba omukulembeze w'abantu bange Isirayiri.

⁶Naye kaakano nnonze Yerusaalemi okubeeramu Erinnya lyange, era nnonze Dawudi okufuga abantu bange Isirayiri.'

⁷"Kitange Dawudi yali akiteeseteese mu mutima gwe okuzimbira Erinnya lya MUKAMA Katonda wa Isirayiri eyeekaalu.

⁸Naye MUKAMA n'agamba kitange Dawudi nti, 'Newaakubadde nga kyali mu mutima gwo okuzimbira Erinnya lyange eyeekaalu, era wakola bulungi okuba nakyo mu mutima gwo,

⁹naye si ggwe olizimba yeekaalu eyo, wabula mutabani wo, ow'omubiri gwo n'omusaayi gwo; y'alizimbira Erinnya lyange eyeekaalu.'

¹⁰"Kaakano, MUKAMA atuukirizza kye yasuubiza. Nsikidde Dawudi kitange, era ntudde ku ntebe ey'obwakabaka bwa Isirayiri, nga MUKAMA bwe yasuubiza, era nzimbidde Erinnya lya MUKAMA Katonda wa Isirayiri eyeekaalu.

¹¹Era omwo mwe ntadde essanduuko, omuli endagaano eya MUKAMA ggye yakola n'abantu ba Isirayiri."

Okusaba kwa Sulemaani okw'Okuwonga Eyeekaalu

¹²Awo Sulemaani n'ayimirira mu maaso g'ekyoto kya MUKAMA mu maaso g'ekibiina kyonna ekya Isirayiri, n'ayimusa emikono gye.

¹³Yali akoze ekituuti eky'ekikomo, ekyali mita bbiri ne desimoolo ssatu obuwanvu n'obugazi mita bbiri ne desimoolo ssatu, n'obugulumivu mita emu ne desimoolo ssatu, era ng'akitatde wakati mu luggya olw'ebweru era kye yali ayimiriddeko. N'afukamira mu maaso g'ekibiina kyonna ekya Isirayiri, n'ayimusa emikono gye eri eggulu.

¹⁴N'ayogera nti, "Ayi MUKAMA Katonda wa Isirayiri tewali Katonda akufaanana mu ggulu newaakubadde ku nsi, atuukiriza endagaano ye ey'okwagala eri abaddu be abatambulira mu maaso ge n'emitima gyabwe gyonna.

¹⁵Otuukirizza ekyo kye wasuubiza omuddu wo Dawudi kitange, kubanga wasuubiza n'akamwa ko, era okituukirizza n'omukono gwo leero.

¹⁶"Kaakano Ayi MUKAMA Katonda wa Isirayiri, tuukiriza ebyo bye wasuubiza Dawudi kitange bwe wayogera nti, 'Tolirema kufuna musika mu maaso gange kutuula ku ntebe ey'obwakabaka bwa Isirayiri, ab'ezzadde lyo bwe baneegenderezanga okutambuliranga mu maaso gange ng'etteeka lyange bwe liri, nga ggwe bw'otambulidde mu maaso gange.'

¹⁷Kale nno, Ayi MUKAMA Katonda wa Isirayiri ekigambo kyo kye wasuubiza Dawudi omuddu wo kituukirire.

¹⁸"Naye ddala Katonda alituula n'abantu ku nsi? Laba, eggulu n'eggulu erisinga okuba erya waggulu tolifyamu, kale ate olwo yeekaalu gye nzimbye gy'oyniza okugyamu?

¹⁹Wuliriza okusaba kw'omuddu wo n'okwegayirira kwe, Ayi MUKAMA Katonda wange, owulire okusaba kw'omuddu wo kwasaba gy'oli.

²⁰Amaaso go gatunuulirenga eyeekaalu eno emisana n'ekiro, ekifo kye wayogerako nti oliteeka omwo Erinnya lyo, era owulire okusaba kw'omuddu wo eri ekifo kino.

²¹Wulira kaakano okwegayirira kw'omuddu wo n'okw'abantu bo Isirayiri, bwe banaabanga basaba nga batunuulide ekifo kino; owulirenga okuva mu kifo eyo gy'obeera, era bw'owuliranga, osonyiwenga.

²²"Omuntu bw'anaayoonoonanga ku muliraanwa we, ne kimugwanira okulayira, era n'ajja n'alayira mu maaso g'ekyoto mu yeekaalu eno,

²³owulirenga okuva mu ggulu, obeeko ky'okola. Osalenga omusango wakati w'abaddu bo osasulenga gwe gusinze, ng'ebikolwa bye bwe bimusaanira. Oyatulenga atalina musango, era omusasulenga ng'obutuukirivu bwe, bwe bunaabanga.

²⁴"Abantu bo Isirayiri bwe banaabanga bawanguddwa omulabe olw'obutali butuukirivu bwabwe, naye ne bakyuka ne baatula erinnya lyo, ne basaba ne beegayiririra mu maaso go mu yeekaalu eno,

²⁵kale owulirenga ng'osinziira mu ggulu, osonyiwe ekibi ky'abantu bo Isirayiri era obakomyewo mu nsi gye wabawa bo ne bajjajaabwe.

²⁶"Eggulu bwe linaggalwangawo ne wataba nkuba, kubanga boonoonye gy'oli, naye ne basaba nga batunuulidde ekifo kino, ne baatula erinnya lyo, ne bakyuka okuleka ekibi kyabwe ekibaweezesessa ekibonerezo,

²⁷kale owulirenga ng'osinziira mu ggulu, osonyiwe ekibi ky'abaddu bo, abantu bo Isirayiri, obayigirize ekkubo eggolokofu, lye bateekwa okutambulirangamu, era obaweereze enkuba ku nsi gye wawa abantu bo, obusika bwo.

²⁸"Bwe wanaagwangawo enjala oba kawumpuli mu nsi, oba ne wabaawo okugengewala oba obukuku, oba enzige oba ebisaanyi, oba abalabe baabwe ne babazingiriza mu bibuga byabwe wadde ne bw'anaabanga kawumpuli ow'engeri etya, oba bulwadde bwa ngeri ki,

²⁹ne wabaawo okusaba oba okwegayirira okw'engeri zonna okukoleddwa omuntu yenna, oba abantu bo bona Isirayiri, nga buli omu ategedde endwadde ye, n'obuyinike bwe, era ng'ayanjurizza engalo ze eri yeekaalu eno,

³⁰kale owulirenga ng'osinziira mu ggulu gy'obeera osonyiwe, era osasule buli muntu ng'ebikolwa bye bwe biri, kubanga ggwe wekka gw'omanyi emitima gy'abaana b'abantu;

³¹balyoke bakutyenga, era batambulirenga mu makubo go ennaku zonna ze banaabeeranga mu nsi gye wawa bajjajjaffe.

³²"Era mu ngeri y'emu, bwe wanaabangawo munaggwanga atali wa ku bantu bo Isirayiri, ng'ava mu nsi ey'ewala, olw'erinnya lyo ekkulu, n'olw'omukono gwo ogw'amaanyi, n'omukono gwo ogugoloddwa, bw'anajjanga n'asaba ng'atunuulidde eyeekaalu eno,

³³kale owulirenga ng'osinziira mu ggulu gy'obeera, okolere omunnaggwanga oyo kyonna ky'anaakusabanga; abantu bona ab'omu nsi balyoke bamanye erinnya lyo era bakutye, ng'abantu bo Isirayiri bwe bakola, era bategeere nti ennyumba eno gye nzimbye etuumiddwa Erinnya lyo.

³⁴"Abantu bo bwe banaatabaalanga abalabe baabwe, yonna gy'onoobasindikanga, ne basaba nga batunuulidde ekibuga kino ky'olonze ne yeekaalu gye nzimbidde Erinnya lyo,

³⁵kale owulirenga okusaba kwabwe n'okwegayirira kwabwe, ng'osinziira mu ggulu, obaddiremu.

³⁶"Bwe banaakolanga ebisoby, kubanga tewaliwo muntu atasobia, n'obasunguwalira, n'obawaayo eri omulabe, ne batwalibwa nga basibe mu nsi ey'ewala oba ey'okumpi,

³⁷oluvannyuma ne beenenya mu mutima nga bali mu nsi gye bali abasibe, ne bakwegayiririra mu nsi ey'okusibibwa kwabwe nga boogera nti, 'Twayonoona, twakola eby'obubambavu, era twagira ekyejo,'

³⁸era bwe beenenyanga n'omutima gwabwe gwonna n'emmeeme yaabwe yonna mu nsi ey'okusibibwa kwabwe gye baatwalibwa, ne basaba nga batunuulidde ensi gye wawa bajjajaabwe, n'eri ekibuga kye walonda, n'eri eyeekaalu gye nazimba ku lw'Erinnya lyo,

³⁹kale, owulirenga okusaba kwabwe n'okwegayiririra kwabwe, ng'osinziira mu ggulu, ekifo gy'obeera obaddiremu, era osonyiwe abantu bo abakwonoonye.

⁴⁰"Kaakano Katonda wange, amaaso go gazibukenga, n'amatu go gawulirenga okusaba okunaaweerwangayo mu kifo kino.

⁴¹"Era kaakano, Ayi MUKAMA Katonda golokoka, okke mu kifo kyo eky'okuwummulirangamu, ggwe n'essanduuko ey'amaanyi go. Bakabona bo Ayi MUKAMA Katonda, bambazibwe obulokozi, era n'abatukuvu bo basanyukire obulungi bwo.

⁴²Ayi MUKAMA Katonda, tokyusa maaso go okuva ku oyo gwe wafukako amafuta. Ojjukire ekisa kye walaga Dawudi omuddu wo."

2 Ebyomumirembe 7

Okuwongebwa kwa Yeekaalu

¹Awo Sulemaani bwe yamaliriza esaala ye, omuliro ne guva mu ggulu ne gwokya ekiweebwayo ekyokebwa ne ssaddaaka era n'ekitiibwa kya MUKAMA ne kijjula eyeekaalu.

²Bakabona ne batayinza kuyingira mu yeekaalu ya MUKAMA kubanga ekitiibwa kya MUKAMA kyajjula eyeekaalu ya MUKAMA.

³Awo Abayisirayiri bona bwe baalaba omuliro nga gukka, n'ekitiibwa kya MUKAMA nga kiri ku yeekaalu, ne bavuunama ku lubalaza ng'amaaso gaabwe gatunudde wansi ne basinza era ne beebaza MUKAMA nga boogera nti, "Mulungi, era okwagala kwe kubeerera emirembe gyonna."

⁴Awo kabaka n'abantu bona, ne baweerayo ssaddaaka mu maaso ga MUKAMA.

⁵Kabaka Sulemaani n'awaayo ssaddaaka ey'ente ezawera emitwalo ebiri, n'endiga n'embuzi emitwalo kkumi n'ebiri. Awo kabaka n'abantu bona ne bawonga eyeekaalu ya MUKAMA.

⁶Bakabona ne bayimirira mu bifo byabwe, n'Abaleevi nabo mu bifo byabwe nga bakutte ebivuga bya MUKAMA, kabaka Dawudi bye yali akoze olw'okutenderezanga MUKAMA, buli lwe yeebazanga MUKAMA ng'agamba nti,

"Okwagala kwe kuberera emirembe gyonna." Ku luuyi olwaddirira Abaleevi, bakabona ne bafuuwa amakondeere, Isirayiri yenna n'ayimirira.

⁷Sulemaani n'atukuza olugya olwa wakati olwali mu maaso ga yeekaalu ya MUKAMA, era eyo n'aweerayo ebiweebwayo ebyokebwa n'amasavu ag'ebiweebwayo olw'emirembe kubanga ku kyoto eky'ekikomo kye yali akoze kwali tekugyako biweebwayo byokebwa n'ebiweebwayo ebyobutta, n'ebitundu n'amasavu.

⁸Era mu kiseera kyekimu Sulemaani n'akuuma embaga eyo okumala ennaku musanvu, ne Isirayiri yenna wamu naye, n'ekibiina ekinene ennyo okuva awayingirirwa e Kamasi okutuuka ku kagga ak'e Misiri.

⁹Ku lunaku olw'omunaana ne bakuba olukunjaana, kubanga baali bajagulizza okuwongebwa kw'ekyoto ennaku musanvu, n'embaga ennaku endala musanvu.

¹⁰Ku lunaku olw'amakumi abiri mu esatu olw'omwezi ogw'omusantu, Kabaka Sulemaani n'asindika abantu baddeyo ewaabwe, era ne bagenda nga basanyufu era nga bajaguza mu mitima gyabwe olw'obulungi bwa MUKAMA bwe yalaga Dawudi ne Sulemaani n'abantu be Isirayiri.

MUKAMA Alabikira Sulemaani Omulundi Ogwokubiri

¹¹Awo Sulemaani bwe yamaliriza eyeekaalu ya MUKAMA, n'olubiri lwa kabaka, era ng'amalirizza n'ebyo byonna bye yali ateeseteese mu mutima gwe okukola mu yeekaalu ya MUKAMA ne mu lubiri lwa kabaka,

¹²MUKAMA n'amulabikira mu kiro n'amugamba nti, "Mpulidde okusaba kwo, era neerobozza gye ndi ekifo kino okuba eyeekaalu ey'okuweerangamu ssaddaaka.

¹³"Bwe nnaggalangawo eggulu enkuba n'etatonnya, oba ne ndagira enzige okulya ensi oba ne nsindikira abantu bange kawumpuli,

¹⁴abantu bange abatumiddwa erinnya lyange bwe baneetowazanga, ne basaba, ne banoonya amaaso gange, ne bakyuka okuleka amakubo gaabwe amakyamu, kale nnaawuliranga nga nsinziira mu ggulu ne nsonyiwa ekibi kyabwe era ne mponya ensi yaabwe.

¹⁵Era amaaso gange ganaazibukanga, n'amatu gange ganaawuliranga esaala ezinaawebwangayo mu kifo kino.

¹⁶Nnonze era neewongedde yeekaalu eno, Erinnya lyange libeerenga omwo ennaku zonna. Amaaso gange n'omutima gwange binaabeeranga omwo ekiseera kyonna.

¹⁷"Bw'onootambuliranga mu maaso gange nga Dawudi kitaawo bwe yakola, n'okola bye nkulagira byonna, n'okuma ebiragiro byange n'amateeka gange,

¹⁸ndinyweza entebe ey'obwakabaka bwo, nga bwe nalagaana ne Dawudi kitaawo bwe nayogera nti, 'Tolirema kuba na musika alifuga Isirayiri.'

¹⁹ “Naye bwe munaakyuka ne muva ku mateeka gange n’ebiragiro byange bye mbawadde, ne mugenda okuweereza bakatonda abalala ne mubasinza,

²⁰ ndisiguukulula Isirayiri okuva mu nsi yange, gye mbawadde, era sirifaayo na ku yeekaalu eno gye neewongera olw’Erinnya lyange. Ndigifuula ekisekererwa era ekinyoomebwa mu mawanga gonna.

²¹ Newaakubadde nga yeekaalu eno eyatiikiridde nnyo, abaliyitawo bonne balyewuunya, nga boogera nti, ‘Lwaki MUKAMA akoze ekifaanana bwe kiti ku nsi eno ne ku yeekaalu eno?’

²² Abantu baliddamu nti, ‘Kubanga baava ku MUKAMA, Katonda wa bajjajaabwe eyabaggya mu Misiri, ne bagoberera bakatonda abalala, nga babasinza era nga babaweereza, kyavudde abaleetako emitawaana gino gyonna, ginnamuzisa.’”

2 Ebyomumirembe 8

Ebirala Sulemaani bye yakola

¹ Bwe wayitawo emyaka amakumi abiri, mu myaka Sulemaani gye yazimbiramu eyeekaalu ya MUKAMA n’olubiri lwe,

² Sulemaani n’addaabiriza ebibuga Kulamu bye yali amuwadde, n’abiwa Abayisirayiri okubibeerangamu.

³ Sulemaani n’alumba Kamasuzoba n’akiwamba.

⁴ Era n’azimba ne Tadumoli mu ddungu, n’ebibuga byonna, eby’etterekero mu Kamasi.

⁵ N’addaabiriza Besukolooni ekya waggulu ne Besukolooni ekya wansi, n’abizimba nga bibuga ebiriko bbugwe, n’enkomera, ne wankaaki, n’ebisiba eby’empagi,

⁶ n’ekya Baalasi n’ebibuga bye byonna eby’amaterekero, n’ebibuga byonna eby’amagaali ge, n’abavuga amagaali ge, ne kyonna kye yayagala okuzimba mu Yerusaalemi, mu Lebanooni ne mu nsi yonna gye yafuganga.

⁷ Abantu bonne abaalekebwawo ku Bakiiti, n’Abamoli, n’Abaperezi, n’Abakiivi, n’Abayebusi, nga bano be bataali Bayisirayiri,

⁸ be bazzukulu abaasigalawo, Abayisirayiri be bataazikiriza, Sulemaani n’abafuula abaddu, ne leero.

⁹ Naye Sulemaani n’atafuula Bayisirayiri baddu be; bo baali baserikale be, n’abaduumizi b’eggye lye, n’abaduumizi ab’amagaali ge n’abeebagala embalaasi ze.

¹⁰ Waaliwo n’abakungu ba kabaka Sulemaani ab’oku ntikko, ebikumi bibiri mu ataano, abaafuganga abantu.

¹¹ Sulemaani n'aggya muwala wa Falaawo mu kibuga kya Dawudi n'amutwala mu lubiri lwe yamuzimbira ng'agamba nti, "Mukyala wange tajja kubeera mu lubiri lwa Dawudi kabaka wa Isirayiri, kubanga ebifo essanduuko ya MUKAMA by'etuusemu bitukuvu."

¹² Awo Sulemaani n'awangayo ebiweebwayo ebyokebwa, ebiweebwayo ebyokebwa ku kyoto kya MUKAMA kye yali azimbye mu maaso ag'olubalaza,

¹³ nga bwe kyali kigwanirwa buli lunaku, okuwangayo ebiweebwayo ng'etteeka lya Musa bwe lyali, erikwata ku ssabbiiti, n'emyezi nga kye gijje giboneke, ne ku mbaga essatu eza buli mwaka, era ze zino: embaga ey'emigaati egitazimbulukuswa, n'embaga eya ssabbiiti, n'embaga ey'ensiisira.

¹⁴ N'alonda ebibinja ebya bakabona olw'obuweereza bwabwe, n'Abaleevi olw'emirimu gyabwe egy'okutenderezanga mu nnyumba, ng'ekiragiro kya Dawudi kitaawe kye yayogera ne mu kuyambangako bakabona mu mirimu egya buli lunaku. Ate era n'alonda n'abaggazi mu bibinja byabwe olw'emiryango egy'enjawulo kubanga bw'atyo Dawudi omusajja wa Katonda bwe yalagira.

¹⁵ Ne batava ku biragiro kabaka bye yali awadde bakabona, n'Abaleevi ku bikwatagana n'ensonga yonna, wadde ku bikwatagana n'ebyetterekero ly'ebintu eby'omuwendo.

¹⁶ Omulimu gwa Sulemaani ne guggwa bulungi okuva ku lunaku omusingi ogwa yeekaalu ya MUKAMA lwe gwa simibwa okutuusa yeekaalu lwe yaggwa, era n'emalibwa bulungi.

¹⁷ Awo Sulemaani n'agenda e Eziyonigeba n'e Erosi ebibuga ebyali ku lubalama lw'ennyanja mu nsi ya Edomu.

¹⁸ Kulamu n'amuweereza ebyombo, nga bigobebwa baduumizi be, abasajja abaali bamanyi ennyanja. Ne bagenda e Ofiri n'abaddu ba Sulemaani nga babeegasseko, ne baaleetera kabaka Sulemaani ettani za zaabu kkumi na musanvu.

2 Ebyomumirembe 9

Okukyala kwa Kabaka omukazi w'e Seeba

¹ Kabaka omukazi w'e Seeba bwe yawulira ettutumo lya Sulemaani n'ajja e Yerusaalemi okumugeza n'ebibuuzo ebikalubo, ng'awerekeddwako ekibinja ekinene omwali ejnjamira ezaali zeetise ebyakaloosa, ne zaabu nnyingi nnyo n'amayinja ag'omuwendo omungi. Awo bwe yatuuka eri Sulemaani, n'anyumya naye ku ebyo byonna ebyali ku mutima gwe.

² Sulemaani n'addamu ebibuuzo bye byonna, ne wataba n'ekimu ekyamulema okumunnyonyola.

³Awo Kabaka omukazi w'e Seeba bwe yalaba amagezi ga Sulemaani, n'olubiri lwe yali azimbye,

⁴n'emmere eyaliibwanga ku mmeeza ye, n'okutuula okw'abakungu be, n'abaweereza be mu byambalo byabwe, n'enyambuka gye yayambukangamu okugenda okuwaayo ebiweebwayo mu yeekaalu ya MUKAMA, n'aggwaamu omwoyo.

⁵N'agamba kabaka nti, "Bye nnawulira nga ndi mu nsi yange ku bikwata ku bikolwa byo n'amagezi go bya mazima,

⁶naye nnali sibikkirizanga okutuusa bwe najja ne mbyelabirako n'amaaso gange. Laba saabuulirwa wadde ekitundu eky'ettutumo lyo; bye mpulidde bisingawo ku ebyo bye nnawulira.

⁷Abantu bo nga balina omukisa! Abaddu bo abakuweereza bulijo ne bawulira amagezi go nga balina omukisa!

⁸MUKAMA Katonda wo yeebazibwe akwenyumiririzaamu, era eyakuteeka ku ntebe yo ey'obwakabaka. Olw'okwagala kwa Katonda wo eri Isirayiri, era n'okwagala okubanyweza emirembe gyonna, kyeyava akufuula kabaka okubafuga, okukola obwenkanya n'obutuukirivu."

⁹N'alyoka awa kabaka ettani nnya n'ekitundu eza zaabu, n'ebjakaloosa bingi nnyo nnyini, n'amayinja ag'omuwendo. Waali tewabangawo bya kaloosa bingi bwe bityo nga Kabaka omukazi w'e Seeba bye yawa kabaka Sulemaani.

¹⁰Abasajja ba Kulamu n'abasajja ba Sulemaani abaasuubulanga zaabu okuva e Ofiri baaleetanga n'emitogo n'amayinja ag'omuwendo omungi.

¹¹Kabaka n'akozesa emitogo egyo okuzimba amaddaala aga yeekaalu ya MUKAMA n'ag'olubiri lwa kabaka, ate era n'akolamu n'ennanga n'entongooli z'abayimbi. Waali tewabangawo bifaanana ng'ebyo mu nsi ya Yuda.

¹²Kabaka Sulemaani n'awa Kabaka omukazi w'e Seeba byonna bye yayagala, okusinga n'ebyo bye yali amuleetedde. N'olvannyuma n'addayo mu nsi ye n'ekibinja kye.

Obugagga bwa Sulemaani

¹³Obuzito bwa zaabu obwaleetebwanga eri Sulemaani buli mwaka bwaweranga ettani amakumi abiri mu ttaano,

¹⁴okwo nga tagasseeko ey'obusuulu eyaweebwangayo abasuubuzi n'abamaguzi. Ate era ne bakabaka ab'e Buwalabu ne bagavana ab'ensi bamuleeteranga zaabu n'effeeza.

¹⁵Kabaka Sulemaani n'aweesa engabo ennene ebikumi bibiri okuva mu zaabu omukubeekube, buli emu ku zo ng'erimu kilo ssatu n'ekitundu eza zaabu omukubeekube.

¹⁶N'aweesa n'engabo entono ebikumi bisatu okuva mu zaabu omukubeekube, buli emu ku zo ng'erimu kilo emu ne desimoolo musanvu eza zaabu. Kabaka n'aziteeka mu lubiri lw'Ekibira kya Lebanooni.

¹⁷Kabaka n'akola entebe ey'obwakabaka ennene nga ya masanga, n'agibikkako zaabu ennongoose.

¹⁸Entebe ye ey'obwakabaka yaliko amaddala mukaaga, n'akatebe kawumulizaako ebigere akaakolebwa mu zaabu, era yaliko n'emikono eruuyi n'eruuyi, n'ebibumbe by'empologoma ennume bbiri nga ziyimiridde ku mabbali g'emikono.

¹⁹N'empologoma kkumi na bbiri emmumbe zaali zisimbiddwa eruuyi n'eruuyi ku madaala omukaaga. Tewaali eyakolebwa ng'eyo mu bwakabaka obulala bwonna.

²⁰Ebinywerwamu byonna ebya kabaka Sulemaani byali bya zaabu, n'ebintu byonna ebyali mu lubiri lw'Ekibira kya Lebanooni byali bya zaabu omulongoseemu. Tewaali kyakolebwa mu ffeeza kubanga mu biro bya Sulemaani effeeza yabanga ya muwendo gwa wansi.

²¹Kabaka yalina ebyombo ebyagendanga e Talusiisi n'abasajja ba Kulamu, era buli myaka esatu byaleetanga zaabu n'effeeza, n'amasanga, n'enkoba n'enkima okuva e Talusiisi.

²²Kabaka Sulemaani yali mugagga nnyo era nga mugezi okusinga bakabaka bona ab'ensi.

²³Bakabaka bona baagendanga gyali okumwebuuzaako, n'okuwulira amagezi Katonda ge yali atadde mu mutima gwe.

²⁴Buli mwaka, buli eyajjanga, yaleetanga ekirabo, ebimu byali bintu bya ffeeza ne zaabu, n'ebirala nga byambalo, n'ebirala nga byakulwanyisa, n'ebirala nga byakaloosa, n'embalaasi, n'ennyumbu.

²⁵Sulemaani yalina ebisibo enkumi nnya omwaterekewanga embalaasi n'amagaali; n'abavuzi ab'amagaali baali emitwalo ebiri be yateeka mu bibuga eby'amagaali, n'abamu ku bo nga babeera naye mu Yerusaalemi.

²⁶Era yafuganga bakabaka bona okuva ku mugga Fulaati okutuuka ku nsi eya Abafirisuuti, n'okutuuka ku nsalo ya Misiri.

²⁷Kabaka n'afuula ffeeza okuba ekya bulijo ng'amayinja mu Yerusaalemi era n'emivule ne giba mingi ng'emisukamooli egiri mu biwonvu.

²⁸Sulemaani yasuubulanga embalaasi okuva mu Misiri n'ensi endala.

Okufa kwa Sulemaani

²⁹Ebyafaayo ebirala byonna ebyabaawo mu mulembe gwa Sulemaani okuva ku ntandikwa okutuusa ku nkomerero, tebyawandiikibwa mu byafaayo bya nnabbi

Nasani, ne mu kwolesebwa kwa Akiya Omusiro, ne mu birooto eby'omulabi Iddo ebikwata ku Yerobowaamu mutabani wa Nebati?

³⁰Sulemaani n'afugira Isirayiri yenna mu Yerusaalemi okumala emyaka amakumi ana.

³¹N'afa era n'aziikibwa mu kibuga kya kitaawe Dawudi, Lekobowaamu mutabani we n'amusikira.

2 Ebyomumirembe 10

Isirayiri Ejemera Lekobowaamu

¹Lekobowaamu n'agenda e Sekemu, Abayisirayiri bona gye baali bagenze okumufula kabaka.

²Yerobowaamu mutabani wa Nebati bwe yakiwulira, kubanga yali mu Misiri gye yali addukidde mu buwanjanguse, nga yeewala kabaka Sulemaani, n'akomawo.

³Awo ne bamutumira, Yerobowaamu ne Isirayiri yenna ne bagenda eri Lekobowaamu ne bamugamba nti,

⁴“Kitaawo yatuteekako ekikoligo ekinene, naye kaakano tukendeereze ku lyanyi n'ekikoligo kye yatuteekako, naffe tunaakuweereza.”

⁵N'abaddamu nti, “Mulikomawo gye ndi mu nnaku ssatu.” Abantu ne bagenda.

⁶Awo kabaka Lekobowaamu ne yeebuuza ku bakadde abaaweerezanga kitaawe Sulemaani ng'akyali mulamu. N'ababuuza nti, “Mumpa kya kuddamu ki eri abantu bano?”

⁷Ne bamugamba nti, “Bw'onooba ow'ekisa eri abantu bano, n'obasanyusa, n'obaddamu bulungi, banaabeeranga baddu bo ennaku zonna.”

⁸Naye Lekobowaamu n'aggaya amagezi abakadde ge baali bamuwadde, n'agenda ne yeebuuza ku bavubuka be yali akuze nabo, ate nga be bamuweereza mu kiseera ekyo.

⁹N'ababuuza nti, “Mumpa magezi ki okuddamu abantu bano abajambya nti, ‘Tukendeereze ku kikoligo kitaawo kye yatuteekako?’”

¹⁰Abavubuka be yali akuze nabo ne bamuddamu nti, “Gamba abantu abakugambya nti, ‘Ekikoligo kitaawo kye yatuteekako kyali kizito, naye kaakano kitukendeerezeko,’ nti, ‘Nasswi wange asinga ekiwato kya kitange obunene. Kitange yababinika ekikoligo ekizito, naye nze nzija kwongera ku kikoligo kyammwe obuzito.

¹¹Kitange yabakangavvulanga na nkoba naye nze nzija kubakangavvulanga na njaba ez'obusagwa.”

¹²Bwe waayitawo ennaku essatu Yerobowaamu n'abantu bona ne bagenda eri Lekobowaamu, nga kabaka bwe yali ayogedde nti, "Mukomeewo oluvannyuma lw'ennaku ssatu."

¹³Kabaka n'addamu n'ebboggo. N'agaana okuwuliriza amagezi g'abakadde,

¹⁴n'agoberera amagezi ag'abavubuka, n'ayogera nti, "Kitange yababinika ekikoligo ekizito, naye nze nzija kukyongerako obuzito. Kitange yabakangavvulanga na nkoba, naye nze nzija kubakangavvulanga na njaba ez'obusagwa."

¹⁵Kabaka n'atawuliriza bantu kubanga bw'atyo Katonda bwe yasiima, okutuukiriza ekigambo MUKAMA kye yayogera ku Yerobowaamu mutabani wa Nebati ng'ayita mu Akiya Omusiiro.

¹⁶Awo Isirayiri yenna bwe baalaba nga kabaka agaanye okubawuliriza, ne bamuddamu nti, "Mugabo ki gwe tulina mu Dawudi, era busika ki bwe tulina mu mutabani wa Yese? Buli omu ku mmwe, addeyo mu weema ye, ayi Isirayiri! Mmwe ennyumba ye Dawudi mwerabirire." Awo Abayisirayiri bona ne baddayo ewaabwe.

¹⁷Naye abo abaabeeranga mu bibuga bya Yuda, Lekobowaamu n'asigala ng'abafuga.

¹⁸Kabaka Lekobowaamu n'atuma Kadolaamu eyavunaanyizibwanga emirimu egy'ekipaksi, naye Abayisirayiri ne bamukuba amayinja ne bamutta. Kabaka Lekobowaamu ye n'ayanguwa okulinnya eggaali lye n'addukira e Yerusaalemi.

¹⁹Awo Isirayiri ne bajemera ennyumba ya Dawudi n'okutuusa leero.

2 Ebyomumirembe 11

¹Awo Lekobowaamu bwe yatuuka mu Yerusaalemi, n'akuŋjaanya ennyumba ya Yuda n'eya Benyamini, bona nga bawera abasajja abalwanyi emitwalo kkumi na munaana, bagende balwanyise Isirayiri, obwakabaka babuddize Lekobowaamu.

²Naye ekigambo kya MUKAMA ne kijiira Semaaya omusajja wa Katonda nti,

³"Gamba Lekobowaamu mutabani wa Sulemaani kabaka wa Yuda, n'Abayisirayiri bona abali mu Yuda ne Benyamini nti,

⁴Bw'ati bw'ayogera MUKAMA, 'Temulumba baganda bammwe. Buli omu ku mmwe addeyo ewuwe, kubanga kino kivudde gye ndi.' Awo ne bagondera ekigambo kya MUKAMA, ne baddayo, ne batagenda kulumba Yerobowaamu.

Lekobowaamu Anyweza Yuda

⁵Lekobowaamu n'abeera mu Yerusaalemi, n'azimba ebibuga eby'okwerinda mu Yuda:

- ⁶n'azimba Besirekemu, ne Etamu, ne Tekowa,
- ⁷ne Besuzuli, ne Soko, ne Adulamu,
- ⁸ne Gaasi, ne Malesa, ne Zifu,
- ⁹ne Adorayimu, ne Lakisi, ne Azeka,
- ¹⁰ne Zola, ne Ayalooni, ne Kebbulooni nga bye bibuga ebiriko bbugwe ebyali mu Yuda ne Benyamini.
- ¹¹N'anyweza bbugwe waabyo, n'ateekayo abaduumizi, n'emmere ey'okwerinzisa n'amafuta ag'omuzeeyituuni ne wayini.
- ¹²N'ateekayo engabo n'amafumu mu bibuga byonna, n'abinywereza ddala, Yuda ne Benyamini ne biba bibye.
- ¹³Bakabona n'Abaleevi okuva mu Isirayiri yonna ne bakkiriziganya naye.
- ¹⁴Abaleevi ne bava mu butaka bwabwe ne baleka n'ebi'obugagga bwabwe ne bajja mu Yuda ne Yerusaalemi, kubanga Yerobowaamu ne batabani be babagobaganya era ne babagaana okuweereza MUKAMA mu bwakabaka bwabwe,
- ¹⁵nga balonda bakabona abaabwe okuweerezanga ku bifo ebigulumivu, ne bakatonda baabwe ab'ebifaananyi eby'embuzi n'ente, bye yali abumbye.
- ¹⁶N'abo bonna abaali beewaddeyo mu mitima gyabwe okunoonya MUKAMA Katonda wa Isirayiri ne bagenda n'Abaleevi e Yerusaalemi okuwaayo ssaddaaka eri MUKAMA Katonda wa bajajjaabwe.
- ¹⁷Ne banyweza obwakabaka bwa Yuda, era ne bawagira Lekobowaamu mutabani wa Sulemaani okumala emyaka esatu, nga batambulira mu kkubo lya Dawudi ne Sulemaani.

Ennyumba ya Lekobowaamu

- ¹⁸Lekobowaamu n'awasa Makalasi muwala wa Yerimosi mutabani wa Dawudi, ne Abikayiri muwala wa Eriyaabu mutabani wa Yese,
- ¹⁹Makalasi n'azaalira Lekobowaamu abaana aboobulenzi: Yewusi, ne Semaliya ne Zakamu.
- ²⁰Oluvannyuma Lekobowaamu n'awasa Maaka muwala wa Abusaalomu, n'amuzaalira Abiya, ne Attayi, ne Ziza ne Seromisi.
- ²¹Lekobowaamu n'ayagala nnyo Maaka muwala wa Abusaalomu okusinga bakazi be abalala. Bonna awamu n'awasa abakazi kkumi na munaana n'afunayo n'abalala nkaaga, abaamuzaalira abaana aboobulenzi amakumi abiri mu munaana n'abaana aboobuwala nkaaga.

²² Lekobowaamu n'alonda Abiya mutabani wa Maaka okuba omukulu wa baganda be, ng'agenderera okumufula kabaka.

²³ N'akola eky'amagezi, n'asaasaanya batabani be abamu mu masaza ag'enjawulo aga Yuda ne Benyamini, ne mu bibuga byonna ebyaliko bbugwe, n'abawa eby'obugagga bingi, n'abafunira n'abakazi bangi.

2 Ebyomumirembe 12

Sisaki Alumba Yerusaalemi

¹ Awo Lekobowaamu bwe yanywera ku bwakabaka, n'aba mugumu, ye ne Isirayiri yonna ne bava ku mateeka ga MUKAMA.

² Mu mwaka ogwokutaano ogw'obufuzi bwa kabaka Lekobowaamu, Sisaki kabaka w'e Misiri n'alumba Yerusaalemi kubanga tebaali beesigwa eri MUKAMA.

³ N'ajja n'amagaali lukumi mu bibiri, n'abeebagala embalaasi emitwalo mukaaga, ate n'abaserikale ab'ebigere bangi nnyo: Abalubimu, n'Abasukkiyimu, n'Abaesiyopiya okuva e Misiri.

⁴ N'awamba ebibuga ebiriko bbugwe ebya Yuda n'atuuka n'e Yerusaalemi.

⁵ Awo Semaaya nnabbi n'agenda eri Lekobowaamu n'eri abakulembeze ba Yuda abaali bakunjaanidde mu Yerusaalemi olw'okutya Sisaki, n'abagamba nti, "Bw'ati bw'ayogera MUKAMA nti, 'Mwanvaako, nange kyenvudde mbawaayo mu mukono gwa Sisaki.'"

⁶ Awo abakulembeze ba Isirayiri, nga bali wamu ne kabaka ne beetoowaza ne boogera nti, "MUKAMA asala bulungi emisango."

⁷ Awo MUKAMA bwe yalaba okwetoowaza kwabwe, ekigambo kya MUKAMA ne kijjira Semaaya nti, "Beetoowazizza noolwekyo siribazikiriza. Ndibalokola, era n'obusungu bwange tebulifikibwa ku Yerusaalemi nga buyita mu mukono gwa Sisaki.

⁸ Wabula baliba baddu be, balyoke bategeere enjawulo eriwo wakati w'okumpeereza n'okuweereza bakabaka baamawanga amalala."

⁹ Awo Sisaki kabaka w'e Misiri n'alumba Yerusaalemi n'atwala obugagga obw'omu yeekaalu ya MUKAMA, n'obugagga obw'omu lubiri lwa kabaka, n'atwala buli kintu kyonna, era n'atwala n'engabo eza zaabu Sulemaani ze yali akoze.

¹⁰ Awo kabaka Lekobowaamu n'akola engabo ez'ekikomo okudda mu kifo kyaziri eza zaabu, n'azikwasa abaduumizi b'abambowa abaakuumanga wankaaki ow'olubiri lwa kabaka.

¹¹ Buli kabaka bwe yalaganga mu yeekaalu ya MUKAMA, abakuumi baazeetikkanga nga bamuwerekera, n'olvannyuma ne bazizaayo mu kisenge ky'abakuumi.

¹² Lekobowaamu bwe yeetoowaza, MUKAMA n'alekeraawo okumusunguwalira n'atasaanyizibwawo ddala, ne mu Yuda ne mubaamu emirembe.

¹³ Kabaka Lekobowaamu ne yeenyweza mu Yerusaalemi, n'afuga nga ye kabaka. Yalina emyaka amakumi ana mu gumu we yafuukira kabaka, era n'afugira emyaka kkumi na musanvu mu Yerusaalemi, ekibuga MUKAMA kye yalonda mu bika byonna ebya Isirayiri n'ateekamu Erinnya lye. Nnyina erinnya lye ye yali Naama Omwamoni.

¹⁴ Lekobowaamu n'akola ebibi, n'atamatirira kunoonya MUKAMA mu mutima gwe.

¹⁵ Ebyafaayo ebirala ebyabaawo mu mirembe gya Lekobowaamu okuva ku ntandikwa ye okutuusa ku nkomerero ye, tebyawandiikibwa mu byafaayo bya Semaaya nnabbi n'ebya Iddo omulabi? Ne wabangawo entalo wakati wa Lekobowaamu ne Yerobowaamu.

¹⁶ Awo Lekobowaamu ne yeebakira wamu ne bajjajaabe, n'aziikibwa mu kibuga kya Dawudi, Abiya mutabani we n'amusikira.

2 Ebyomumirembe 13

Abiya Kabaka wa Yuda

¹ Awo mu mwaka ogw'ekkumi n'omunaana ogw'obufuzi bwa Yerobowaamu, Abiya n'afuuka kabaka wa Yuda,

² era n'afugira mu Yerusaalemi emyaka esatu. Erinnya lya nnyina yali Mikaaya muwala wa Uliyeri ow'e Gibe.

³ Ne waba olutalo wakati wa Abiya ne Yerobowaamu. Abiya n'agenda mu lutalo ng'alina eggye lya basajja emitwalo amakumi ana, ate Yerobowaamu ng'alina abasajja emitwalo kinaana.

⁴ Awo Abiya n'ayimirira ku Lusozi Zemalayimu mu nsi ey'ensozi eya Efulayimu, n'ayogera nti, "Yerobowaamu ne Isirayiri yenna, mumpulirize!"

⁵ Temumanyi nga MUKAMA Katonda wa Isirayiri, yagabula obwakabaka bwa Isirayiri eri Dawudi ne zadde lye emirembe gyonna olw'endagaano ey'omunyyo?

⁶ Naye Yerobowaamu mutabani wa Nebati, omuddu wa Sulemaani mutabani wa Dawudi, n'amugolokokerako n'amujeemera.

⁷ Era waaliwo abasajja abalalulalu abamu abeegatta ku Yerobowaamu ne bajeemera Lekobowaamu mutabani wa Sulemaani bwe yali omuto, nga talina kyayinza kusalawo, nga n'amaanyi ag'okubaziyiza tagalina.

⁸ "Kaakano mulowooza nti muyinza okwaŋjanga obwakabaka bwa MUKAMA obuli mu mikono gy'abazzukulu ba Dawudi, kubanga muli ekibiina

kinene, abalina n'enyanana eza zaabu Yerobowaamu ze yabakolera okuba bakatonda bammwe abalala?

⁹Mwagoba bakabona ba MUKAMA, batabani ba Aloon, n'Abaleevi, ne mussaawo bakabona abammwe ng'amawanga ag'omu nsi endala bwe gakola. Buli aleeta ente ennume ento n'endiga ennume musanvu ayinza okwewaayo okufuuka kabona wa bakatonda abalala.

¹⁰"Naye ffe, MUKAMA ye Katonda waffe, era tetumuvangako. Bakabona abawereza MUKAMA, batabani ba Aloon, era bayambibwako Abaleevi.

¹¹Buli nkya na buli kawungeezi bawaayo ebiweebwayo ebyokebwa n'obubaane obwa kawoowo eri MUKAMA, ne bategeka n'emigaati egy'okulaga ku mmeza eya zaabu omwerefere, ne bakoleeza n'ettaala eziri ku bikondo ebya zaabu buli kawungeezi. Tugondera MUKAMA Katonda waffe nga tukola bye yatkuutira, naye mmwe mwamuvaako.

¹²Laba, Katonda ali naffe, era ye mukulembeze waffe, era ne bakabona be banaafuuwa amakondeere mu maloboozi ag'olutalo, okuggulawo okulwana nammwe. Abasajja Abayisirayiri temulwanyisa MUKAMA, Katonda wa bajajjammwe, temuja kuwangula."

¹³Naye mu kiseera kye kimu Yerobowaamu yali asindise abaserikale be okutaayiza emabega ne mu maaso ga Yuda.

¹⁴Laba Yuda bwe baakyuka ne balaba nga balumbiddwa okuva mu maaso n'emabega, ne bakaabira MUKAMA, ne bakabona ne bafuuwa amakondeere.

¹⁵Awo abasajja ba Yuda olwa wowoggira waggulu n'eddoboobi ery'olutalo, Katonda n'awangula Yerobowaamu ne Isirayiri yenna mu maaso ga Abiya ne Yuda.

¹⁶Abayisirayiri ne badduka okuva mu maaso ga Yuda, naye MUKAMA n'abawaayo mu mukono gwa Yuda.

¹⁷Abiya n'abasajja be ne batta bangi nnyo ku Bayisirayiri, ne waba emitwalo amakumi ataano ku abo abaafa.

¹⁸Mu kiseera ekkyo abasajja Abayisirayiri ne bawangulwa; abasajja ba Yuda ne baba bawanguzi kubanga beesiga MUKAMA, Katonda wa bajajjaabwe.

¹⁹Abiya n'agoba Yerobowaamu, n'amutwalako Beseri, ne Yesana, ne Efulooni wamu n'ebyalo ebiriraanye ebibuga ebyo.

²⁰Yerobowaamu n'ataddamu nate kuba na buyinza mu mirembe gya Abiya, MUKAMA n'alwaza Yerobowaamu n'afa.

²¹Awo Abiya n'aba w'amaanyi n'awasa abakazi kkumi na bana, n'abeera n'abaana aboobulenzi amakumi abiri mu babiri n'abaana aboobuwala kkumi na mukaaga.

²²Ebyafaayo ebirala ebyomumirembe gya Abiya, ne bye yakola ne bye yayogera, byawandiikibwa mu ngero za nnabbi Iddo.

2 Ebyomumirembe 14

¹Abiya ne yeebakira wamu ne bajajjaabe n'aziikibwa mu kibuga kya Dawudi. Asa mutabani we n'amusikira, era ku mulembe gwe ensi n'eba n'emirembe okumala emyaka kkumi.

Asa kabaka wa Yuda

²Asa n'akola ebyali ebirungi nga bituufu mu maaso ga MUKAMA Katonda we.

³N'aggyawo ebyoto eby'abannamawanga n'ebifo ebigulumivu, era n'amenyaamenya empagi, n'ebifaananyi bya Asera n'abitemaatema.

⁴N'alagira Yuda okunoonya MUKAMA Katonda wa bajajjaabe, era n'okukuumma amateeka ge n'ebiragiro bye.

⁵Era n'aggyawo ebifo ebigulumivu n'ebyoto eby'obubaane mu bibuga byonna ebya Yuda, n'obwakabaka ne buba n'emirembe mu bufuzi bwe.

⁶N'azimba ebibuga ebiriko bbugwe mu Yuda, era ne wataba n'omu eyayanjanga okulwana naye, kubanga MUKAMA yamuwa okuwummula ku njuyi zonna.

⁷N'agamba Yuda nti, "Tuzimbe ebibuga bino, tubiteekko bbugwe, ne wankaaki n'emitayimbwa. Ensi ekyali yaffe, kubanga tunoonyezza MUKAMA Katonda waffe; tumunoonyezza, n'atuwa emirembe ku buli luuyi." Ne bazimba era ne bagaggawala.

⁸Asa yalina egghe nga lya basajja emitwalo amakumi asatu okuva mu Yuda, nga balina engabo ennene n'amafumu, n'abalala emitwalo amakumi abiri mu munaana abaava mu Benyamini nga balina engabo entono n'obusaale, era bona nga basajja bazira.

⁹Olunaku lumu, Zeera Omwesiyopya n'abalumba ng'alina egghe lya basajja akakadde kamu, n'amagaali ebikumi bisatu, n'atuuka n'e Malesa.

¹⁰Asa n'agenda okumutabaala, buli omu ku bo n'asimba ennyiriri ez'entalo mu kiwonvu Zefasa e Malesa.

¹¹Awo Asa n'akoowoola MUKAMA Katonda we ng'agamba nti, "MUKAMA, tewali akwenkana mu kuyamba abanafu, nga balumbiddwa ab'amaanyi. Tuyambe Ayi MUKAMA Katonda waffe, kubanga twesize ggwe, era mu linnya lyo tuzze okutabaala egghe lino eddene. Ayi MUKAMA, oli Katonda waffe, toganya muntu yenna okutuwangula."

¹² Awo MUKAMA n'akubira Abaesiyopiya mu maaso ga Asa ne mu maaso ga Yuda, Abaesiyopiya ne badduka.

¹³ Asa n'eggye lye ne babagoba okutuuka e Gerali, era bangi ku Baesiyopya ne bagwa, ne wataba n'omu ku bo alama, kubanga eggye lya MUKAMA lyabazikiriza. Abasajja aba Yuda ne beetikka omunyago mungi.

¹⁴ Ne bazikiriza ebibuga byonna ebyali byetoolodde Gerali, kubanga entiisa ya MUKAMA yabagwira. Ne banyaga ebyalo byonna, kubanga byalimu omunyago mungi.

¹⁵ Ne balumba n'ebibinja by'abalaalo, ne batwala ente, n'endiga, n'embuzi, n'eñjamira nnyingi nnyo, ne balyoka baddayo e Yerusaalemi.

2 Ebyomumirembe 15

¹ Awo Omwoyo wa Katonda n'akka ku Azaliya mutabani wa Obedi,

² n'agenda n'asisinkana Asa n'amugamba nti, "Mumpulirize, mmwe Asa, ne Yuda ne Benyamini mwenna, MUKAMA ali nammwe bwe muba mu ye. Bwe munaamunoonyanga, munaamulabanga, naye bwe munaamulekuliranga naye anaabalekuliranga.

³ Isirayiri yamala ebbanga ddene nga tegondera Katonda ow'amazima, nga tebalina kabona abayigiriza, wadde okuba n'amateeka.

⁴ Naye wakati mu nnaku yaabwe ne bakyukira MUKAMA Katonda wa Isirayiri, ne bamunoonya, era ne bamulaba.

⁵ Mu biro ebyo tewaali mirembe abantu okutambula nga bwe baayagalanga, kubanga baali mu kweraliikirira kungi nnyo.

⁶ Amawanga n'amawanga gaalwanagananga, n'ebibuga ne birumbagananga kubanga Katonda yabaleetako ebizibu bingi nnyo.

⁷ Naye mmwe mugume omwoyo! Temuganya mikono gyammwe kunafuwa kubanga omulimu gwammwe guliko empeera."

⁸ Awo Asa bwe yawulira ebigambo ebyo, n'ebiyobunnabi bwa Azaliya mutabani wa Obedi, n'aguma omwoyo, n'aggyawo ebifaananyi ebyole okuva mu nsi yonna eya Yuda ne Benyamini, n'okuva mu bibuga bye yali awambye mu nsi ey'ensozi eya Efulayimu. N'addaabiriza ekyoto kya MUKAMA ekyali mu maaso g'ekisasi ekya yeekaalu ya MUKAMA.

⁹ N'akuññaanya aba Yuda n'aba Benyamini bona, n'abantu b'e Efulayimu, n'e Manase, n'e Simyoni abaabeeranga nabo, kubanga bangi basenga gyali okuva mu Isirayiri bwe baalaba nga MUKAMA Katonda ali wamu naye.

¹⁰Ne bakunjaanira e Yerusaalemi mu mwezi ogwokusatu mu mwaka ogw'ekkumi n'ettaano ogw'obufuzi bwa Asa.

¹¹Ku lunaku olwo ne bawaayo eri MUKAMA ebimu ku by'omunyago: ente lusanvu, n'endiga n'embuzi zonna kasantu.

¹²Ne beeyama okunoonyanga MUKAMA, Katonda wa bajjajaabwe, n'omutima gwabwe gwonna, n'emmeeme yaabwe yonna.

¹³Era abo bona abatanoonyanga MUKAMA, Katonda wa Isirayiri battibwanga, oba bato oba bakulu, oba bakazi oba basajja.

¹⁴Ne balayirira MUKAMA mu ddoboozi ery'omwanguka, wamu n'okufuuwa amakondeere n'enjombe.

¹⁵Yuda yonna ne basanyukira ekirayiro ekyo, kubanga baali balayidde n'omutima gwabwe gwonna, era nga bamunoonyezza n'okwagala kwabwe kwonna, ne bamulaba. Era MUKAMA n'abawa emirembe enjuuyi zonna.

¹⁶Kabaka Asa n'agoba jjajjaawe Maaka ku bwannamasole kubanga yali akoze ekifaananyi ekyole ekya Asera. Asa n'akitemaatema n'akimanyaamenya, n'akyokera mu kagga Kidulooni.

¹⁷Newaakubadde nga teyaggyawo bifo ebigulumivu mu Isirayiri, Asa yamalirira mu mutima gwe okunywerera ku MUKAMA ennaku ze zonna.

¹⁸Mu yeekaalu ya MUKAMA n'aleetamu effeeza ne zaabu, n'ebintu ye ne kitaawe bye baawonga.

¹⁹Ne wataba ntalo nate okumala emyaka amakumi asatu mu etaano egy'obufuzi bwa Asa.

2 Ebyomumirembe 16

Emyaka gyा Asa eg Yasembayo

¹Mu mwaka ogw'amakumi asatu mu omukaaga ogw'obufuzi bwa Asa, Baasa kabaka wa Isirayiri n'alumba Yuda, n'azimba ebigo ku Laama okuziyiza omuntu yenna okuyingira wadde okufuluma mu nsalo ya Asa kabaka wa Yuda.

²Awo Asa n'addira ffeeza ne zaabu ebyali mu mawanika ga yeekaalu ya MUKAMA, n'ebali mu lubiri lwa kabaka, n'abiweereza Benikadadi kabaka w'e Busuuli, eyabeeranga e Ddamasiko, n'aweereza n'obubaka nti,

³"Wabeerewo endagaano wakati wo nange, ng'eri eyaliwo wakati wa kitange ne kitaawo. Laba, nkuweerezza ffeeza ne zaabu omenyewo endagaano yo wakati wo ne Baasa kabaka wa Isirayiri, anveeko."

⁴Benikadadi n'akkiriziganya ne kabaka Asa, era n'aweereza abaduumizi b'eggye lye okulumba ebibuga bya Isirayiri; ne bawamba Yiyoni, ne Ddaani ne Aberumayimu, n'ebibuga byonna eby'amaterekero ebya Nafutaali.

⁵Awo Baasa bwe yawulira ekyo, n'alekeraawo okuzimba mu Laama, n'omulimu n'agukomya.

⁶Kabaka Asa n'aleeta Yuda yenna e Laama, ne baggyayo amayinja n'embaawo Baasa bye yali azimbisa, Asa n'abikozesa okuzimba Geba ne Mizupa.

⁷Mu biro ebyo Kanani omulabi n'ajja eri Asa kabaka wa Yuda, n'amugamba nti, "Olw'okwesiga kabaka w'e Busuuli mu kifo ky'okwesiga MUKAMA Katonda wo, eggye lyu kabaka w'e Bwasuli kyelivudde likuddukako.

⁸Abaesiyopiya n'Abalubimu tebaali ggye ddene nga balina amagaali mangi n'abeebagala embalaasi bangi? Naye, olwokubanga weesiga MUKAMA, kyeyava abagabula mu mukono gwo.

⁹Kubanga amaaso ga MUKAMA galaba wonna mu nsi, nga ganyweza emitima gy'abo abamwesigira ddala. Ky'okoze kya busirusuru, era okuva ne leero ojja kubeeranga n'entalo."

¹⁰Awo Asa n'anyiigira nnyo omulabi, n'amuteeka ne mu kkomera. Mu kiseera kye kimu Asa n'ayisa bubi nnyo abantu abamu.

¹¹Ebyafaayo eby'obufuzi bwa Asa okuva ku ntandikwa okutuusa ku nkomerero, byawandiikibwa mu kitabo kya bassekabaka ba Yuda ne Isirayiri.

¹²Mu mwaka ogw'amakumi asatu mu mwenda ogw'obufuzi bwe, Asa n'alwala ebigere. Newaakubadde ng'obulwadde bwetyongera, teyanoonyanga buyambi okuva eri MUKAMA, yabunoonyanga mu basawo bokka.

¹³Awo mu mwaka ogw'amakumi ana mu ogumu ogw'obufuzi bwe, Asa ne yeebakira awamu ne bajjajaabe.

¹⁴N'aziikibwa mu ntaana gye yali yeezimbiddie mu kibuga kya Dawudi. Ne bamuteeka ku kitanda ekyaliko obuloosa obwenjawulo n'obuwoo obwa buli kika, ne bamukumira n'ekyoto ky'omuliro kinene nnyo okujjukira bye yakola.

2 Ebyomumirembe 17

Yekosafaati Kabaka wa Yuda

¹Yekosafaati mutabani wa Asa n'asikira Asa bw'atyo n'afuuka kabaka, n'okwenyweza ne yeenyweza eri Isirayiri.

²N'ateeka abaserikale mu bibuga ebiriko bbugwe ebya Yuda, n'ateeka n'eggye mu Yuda, ne mu bibuga ebya Efulayimu, kitaawe Asa bye yali awambye.

³ MUKAMA n'abeera wamu ne Yekosafaati kubanga mu buto bwe yatambuliranga mu makubo ga jjajjaawe Dawudi ge yatambulirangamu. Teyeebuuza ku Babaali,

⁴naye yanoonya Katonda wa kitaawe, era n'agoberera amateeka ge okusinga engeri za Isirayiri.

⁵MUKAMA n'anyweza obwakabaka mu mukono gwe, era Yuda yenna ne baleetera Yekosafaati ebirabo, n'aba n'obugagga bungi n'ekitiibwa kinene.

⁶Omutima gwe ne gunywerera mu kkubo lya MUKAMA, n'okuggyawo n'aggyawo ebifo ebigulumivu n'ebifaananyi bya Baasera mu Yuda.

⁷Mu mwaka ogwokusatu ogw'obufuzi bwe, n'atuma abakungu be bano: Benikayiri, ne Obadiya, ne Zekkaliya, ne Nesaneeri, ne Mikaaya okugenda nga bayigiriza mu bibuga bya Yuda.

⁸Ne wabaawo n'Abaleevi abagenda nabo: Semaaya, ne Nesaniya, ne Zebadiya, ne Asakeri, ne Semiramoosi, ne Yekonasaani, ne Adoniya, ne Tobbiya, ne Tobadoniya, wamu ne Erisaama ne Yekolaamu.

⁹Ne bayigiriza mu Yuda yonna, nga bakozesa Ekitabo ekya Mateeka ga MUKAMA; ne babuna mu bibuga byonna ebya Yuda ne bayigiriza abantu.

¹⁰Awo entiisa ya MUKAMA n'egwa ku bwakabaka obw'amawanga agaali geetoolodde Yuda, ne batakola ntalo na Yekosafaati.

¹¹Abamu ku Bafirisuuti ne baleetera Yekosafaati ebirabo, ne ffeeza ng'omusolo, ate Abawalabu ne bamuleetera ebisibo eby'endiga ennume kasanvu mu lusanvu, n'embuzi kasanvu mu lusanvu.

¹²Yekosafaati ne yeeyongeranga amaanyi, n'azimba ebigo n'ebibuga eby'amatererekero mu Yuda,

¹³n'abeera n'ebiyamaguzi bingi ddala mu bibuga bya Yuda. Yalina n'abaserikale abatendeke mu Yerusaalemi nga bazira.

¹⁴Okubalibwa ng'enju za bakitaabwe bwe zaali kwali bwe kuti: Okuva mu Yuda, abaduumizi ab'ebibinja eby'olukumi (1,000) baali: Aduna omuduumizi ow'abasajja abalwanyi emitwalo amakumi asatu (300,000),

¹⁵n'eyamuddiriranga yali Yekokanani omuduumizi ow'abasajja emitwalo amakumi abiri mu munaana (280,000);

¹⁶n'eyamuddiriranga yali Amasiya mutabani wa Zikuli, eyewaaayo obwebange okuweerezanga MUKAMA, omuduumizi ow'abasajja emitwalo amakumi abiri (200,000).

¹⁷Okuva mu Benyamini: Eriyada, omuserikale omuzira, eyaduumiranga abasajja ab'obusaale n'engabo emitwalo amakumi abiri (200,000),

¹⁸n'eyamuddiriranga ye yali Yekozabadi eyaduumiranga abasajja emitwalo kkumi na munaana abaali beeteeseteese okulwana (180,000).

¹⁹Abo be basajja abaaweerezanga kabaka, obutassaako abo abaali mu bibuga ebyaliko bbugwe n'ebigo okubuna Yuda yonna.

2 Ebyomumirembe 18

Mikaaya Ayogera Ebyobunnabbi Akabu

¹Yekosafaati yali mugagga nnyo era nga wa kitibwa kinene nnyo, ate nga mukoddomi wa Akabu.

²Bwe waayitawo emyaka, n'aserengeta okugenda okulaba ku Akabu e Samaliya. Akabu n'amuteekerateekera ekijjulo eky'amaanyi n'amuttira endiga nnyingi n'ente nnyingi, ye n'abantu be yagenda nabo, era n'amusendasenda okulumba Lamosugireyaadi.

³Akabu kabaka wa Isirayiri n'abuuza Yekosafaati kabaka wa Yuda nti, "Onoogenda nange okulumba Lamosugireyaadi?" Yekosafaati n'addamu nti, "Ky'oli kye ndi, era n'abantu bo be bantu bange, tujja kukwegattako mu lutalo."

⁴Naye Yekosafaati n'alabula kabaka wa Isirayiri nti, "Sooka weebuuze ku MUKAMA."

⁵Awo kabaka wa Isirayiri n'akuŋŋanya bannabbi bona awamu; baali abasajja ebikumi bina, n'ababuuza nti, "Tugende tulumbe Lamosugireyaadi nantiki tulekeyo?" Ne bamuddamu nti, "Tugende, kubanga MUKAMA anaakigabula mu mukono gwa kabaka."

⁶Naye Yekosafaati n'abuuza nti, "Tewaliwo wano nnabbi wa MUKAMA gwe tuyinza okwebuuzaako?"

⁷Awo kabaka wa Isirayiri n'addamu Yekosafaati nti, "Waliyo omusajja omulala gwe tuyinza okwebuuzaako ku MUKAMA, ye Mikaaya mutabani wa Imula, naye namukyawa kubanga tandagulako birungi, wabula ebibi ebyereere." Yekosafaati n'ayogera nti, "Kabaka teyandiyogedde bw'atyo."

⁸Kabaka wa Isirayiri n'alyoka alagira omu ku bakungu be nti, "Kima Mikaaya mutabani wa Imula ku bwangu."

⁹Awo kabaka wa Isirayiri ne Yekosafaati kabaka wa Yuda ne batuula ku ntebe zaabwe ez'obwakabaka mu gguuliro ku mulyango gwa wankaaki w'e Samaliya, nga bambadde ebyambalo byabwe, nga ne bannabbi bona balagulira mu maaso gaabwe.

¹⁰Zeddekiya mutabani wa Kenaana yali yeewe sereza amayembe ag'ekyuma, n'ayogera nti, "Bw'ati bw'ayogera MUKAMA nti, 'Abasuuli balitomerwa na gano okutuusa lwe balimalibwawo.'"

¹¹ Era ne bannabbi abalala bona baalagulanga kye kimu nti, "Yambuka olumbe Lamosugireyaadi onoowangula kubanga MUKAMA anaakiwaayo mu mukono gwa kabaka."

¹² Awo omubaka eyali agenze okuyita Mikaaya, n'amugamba nti, "Laba, ebigambo ebya bannabbi bali abalala byogera kyekimu, kale naawe ba bumu nabo."

¹³ Naye Mikaaya n'ayogera nti, "Nga MUKAMA bw'ali omulamu Katonda ky'ananjamba ekyo kye nnaayogera."

¹⁴ Awo bwe yatuuka ewa kabaka, kabaka n'amubuuza nti, "Mikaaya tulumbe Lamosugireyaadi, oba tulekeyo?" N'amuddamu nti, "Mugende mukirumbe, munaakiwangula, kubanga banaaweebwayo mu mukono gwo."

¹⁵ Naye kabaka n'amugamba nti, "Nnaakulayizanga emirundi emeka, obutannimbanga wabula okuntegeezanga amazima mu linnya lya MUKAMA?"

¹⁶ Awo Mikaaya n'addamu nti, "Nalaba Isirayiri yenna, nga basaasaanye ku nsozi ng'endiga ezitalina musumba, MUKAMA n'ayogera nti, 'Abantu bano tebalina abakulembira, buli omu addeyo ewaabwe mirembe.'"

¹⁷ Kabaka wa Isirayiri n'agamba Yekosafaati nti, "Sakugambye nti talina kirungi ky'andagulako, okuggyako ebibi?"

¹⁸ Mikaaya n'ayongerako na bino nti, "Noolwekyo muwulire ekigambo kya MUKAMA: Nalaba MUKAMA ng'atudde ku ntebe ye ey'obwakabaka n'eggye lyonna ery'omu ggulu nga liyimiridde okumwetooloola ku mukono gwe ogwa kkono.

¹⁹ Awo MUKAMA n'abuuza nti, 'Ani anasendasenda Akabu kabaka wa Isirayiri okulumba Lamosugireyaadi n'olvannyuma afire eyo?' "Omu ku bo n'ateesa kino, n'omulala kiri.

²⁰ Ku nkomerero, omwoyo ogumu ne gusembera, ne guyimirira mu maaso ga MUKAMA ne gwogera nti, 'Nze nzija kumusendasenda.' "MUKAMA n'agubuuza nti, 'Ekyo onookikola otya?'

²¹ "Ne guddamu nti, 'Nzija kugenda, mbeere omwoyo omulimba mu kamwa ka buli nnabbi we.' "MUKAMA n'agugamba nti, 'Ggwe onoosobola okumusendasenda, era genda okole bw'otyo.'

²² "Kale nno MUKAMA atadde omwoyo ogw'obulimba mu kamwa ka bannabbi bo, era MUKAMA akwogeddeko kabi keereere."

²³ Awo Zeddekiya mutabani wa Kenaana n'asembera okumpi ne Mikaaya we yali n'amukuba oluyi mu maaso, n'amubuuza nti, "Omwovo wa MUKAMA yampiseeko wa okwogera naawe?"

²⁴Mikaaya n'amuddamu nti, "Laba, ekyo olirimanya ku lunaku lw'oligenda okwekweka mu kisenge eky'omunda."

²⁵Awo kabaka wa Isirayiri n'alagira nti, "Mukwate Mikaaya mumuzzeeyo ewa Amoni ew'omukulu w'ekibuga n'ewa Yowaasi omulangira,

²⁶mwogere nti, 'Bw'ati bw'ayogera kabaka nti, Omuntu ono mumuteeke mu kkomera, temumuwa kintu kyonna wabula omugaati omutono n'amazzi amatono, okutuusa lwe ndikomawo mirembe.'

²⁷Awo Mikaaya n'alangirira nti, "Bw'olikomawo mirembe, MUKAMA nga tayogeredde mu nze," ate n'ayongerako na kino nti, "Mmwe mwenna, mwekuume ebigambo byange."

Akabu Afiira e Lamosugireyaadi

²⁸Awo kabaka wa Isirayiri ne Yekosafaati kabaka wa Yuda ne bambuka e Lamosugireyaadi.

²⁹Kabaka wa Isirayiri n'agamba Yekosafaati nti, "Nze nzija kugenda mu lutalo nga nneefudde ng'omuntu omulala, naye ggwe yambala ebyambalo byo." Awo kabaka wa Isirayiri ne yeefuula ng'omuntu omulala, ne bagenda mu lutalo.

³⁰Naye kabaka w'e Busuuli yali alagidde abaduumizi ab'amagaali ge nti, "Temulwanagananga na muntu yenna, oba wa kitiiibwa oba si wa kitiiibwa, okuggyako kabaka wa Isirayiri."

³¹Awo abaduumizi ab'amagaali bwe balaba Yekosafaati, ne boogera nti, "Oyo ye kabaka wa Isirayiri." Ne bakyuka ne bamulumba, naye Yekosafaati n'ayogera mu ddoboozi ery'omwanguka, MUKAMA n'amubeera, era Katonda n'abaziyiza, n'okubaggyawo n'abaggyawo.

³²Abaduumizi ab'amagaali bwe baakizuula nti si ye kabaka wa Isirayiri, ne balekeraawo okumugoba.

³³Naye omu ku basajja n'amala ganaanuula omutego gwe, n'alasa kabaka wa Isirayiri mu kifo ekimu ebyambalo bye eby'olutalo we byegattira. Kabaka n'agamba omugoba w'eggaali lye nti, "Kyusa onzigye mu lutalo kubanga nfumitiddwa."

³⁴Olutalo ne lukanya olunaku lwonna, kyokka kabaka wa Isirayiri ne yeewaliriza okusigala mu gaali lye ng'atunuulidde Abasuuli okutuusa akawungeezi, era enjuba bwe yali ng'egwa n'afa.

2 Ebyomumirembe 19

¹Awo Yekosafaati kabaka wa Yuda n'akomawo mirembe mu lubiri lwe mu Yerusaalemi.

²Yeeku, Omulabi, mutabani wa Kanani n'agenda okumusisinkana, n'agamba Yekosafaati nti, "Kituufu ggwe okuyamba ababi, ate n'okukolagana n'abo abakyawa MUKAMA? Olw'ekikolwa ekkyo, obusungu bwa MUKAMA kyebuvudde bukubuubukirako.

³Kyokka mu ggwe mulimu ebirungi, kubanga wazikiriza Baaserosi n'obaggya mu nsi, n'omalirira mu mutima gwo okunoonya Katonda."

Yekosafaati Alonda Abalamuzi

⁴Awo Yekosafaati n'abeeranga mu Yerusaalemi, n'addayo eri abantu okuva e Beeruseba okutuuka mu Efulayimu mu nsi ey'ensozi, bona n'abakomyawo eri MUKAMA, Katonda wa bajajjaabwe.

⁵N'alonda abalamuzi mu nsi, ne mu buli kibuga kya Yuda ekiriko Bbugwe.

⁶N'abategeeza nti, "Mufumiitirize nnyo ku bye mukola, kubanga temulamula ku bw'abantu wabula ku bwa MUKAMA, abeera nammwe buli bwe musala omusango.

⁷Noolwekyo entiisa ya MUKAMA ebeere mu mmwe, musale omusango nga mugwekanyizza bulungi, kubanga MUKAMA Katonda waffe takkiriziganya na butali butuukirivu, era tewali kusosola mu bantu wadde okulya enguzi."

⁸Ate ne mu Yerusaalemi Yekosafaati yalonda abamu ku Baleevi, ne bakabona, n'emitwe gy'ennyumba za Isirayiri okulamulanga ku bwa MUKAMA, n'okusalangawo ensonga enzibu.

⁹N'abakuutira ng'agamba nti, "Mukole nga mutya MUKAMA, n'obwesigwa era n'omutima gumu.

¹⁰Bwe wanaabangawo ensonga evudde eri baganda bammwe okuva mu bibuga byabwe, ng'ekwata ku kuyiwa omusaayi, oba ku nsongea endala yonna ekwata ku kiragiro, ku mateeka oba ku biragiro, munaabalabulanga obutayonoona MUKAMA, obusungu bwe muleme okubatuukako mmwe ne baganda bammwe. Bwe mutyo bwe munaakolanga muleme okubaako omusango.

¹¹"Era Amaliya kabona asinga obukulu y'anaababeerangako n'obuvunaanyizibwa mu nsongea zonna eza MUKAMA, ate Zebadiya mutabani wa Isimayiri omukulu ow'ekika kya Yuda ye n'avunaanyizibwanga mu nsongea zonna eza kabaka, era n'Abaleevi banaaweerezanga ng'abaami mu maaso gammwe. Mube n'obuvumu, era MUKAMA abeere n'abo abakola obutuukirivu."

2 Ebyomumirembe 20

Yekosafaati Awangula Abamowaabu n'Abamoni

¹Bwe wayitawo ebbanga, Abamowaabu n'Abamoni nga bali wamu n'abamu ku Bamoni ne balumba Yekosafaati okumulwanyisa.

² Abasajja abamu ne bagenda ne bategeeza Yekosafaati nti, “Eggye ddene eriva e Busuuli okuva emitala w’Ennyanja ey’Omunno, likulumbye, era lituuse mu Kazazonutamali, ye Engedi,”

³ Yekosafaati n’atya nnyo n’amalirira okwebuuza ku MUKAMA, era n’alangirira okusiiba mu Yuda yonna.

⁴ Yuda yonna n’ekuŋjaana okunoonya okubeerwa okuva eri MUKAMA okuva mu bibuga byonna ebya Yuda.

⁵ Awo Yekosafaati n’ayimirira mu maaso g’ekkuŋjaaniro lya Yuda ne Yerusaalemi, mu yeekaalu ya MUKAMA mu maaso g’oluggya olupya,

⁶ n’ayogera nti, “Ayi MUKAMA, Katonda wa bajjajjaffe, si ggwe Katonda ow’omu ggulu? Si ggwe ofuga obwakabaka bwonna mu nsi? Obuyinza n’amaanyi biri mu mukono gwo, n’okubaawo ne watabaawo n’omu ayinza okuyimirira mu maaso go.

⁷ Ayi Katonda waffe, si ggwe wagobamu abatuuze abaali mu nsi eno mu maaso g’abantu bo Isirayiri, n’ogiwa ezzadde lya Ibulayimu mukwano gwo okugibeerangamu emirembe gyonna?

⁸ Era bagibaddemu ne bazimbamu ekifo ow’okusinziza erinnya lyo, nga boogera nti,

⁹ ‘Bwe tulituukibwako akabi konna, oba ekitala eky’okusala omusango, oba lumbe, oba njala, tunaayimiriranga mu maaso go, ne mu maaso ga yeekaalu eno okuli erinnya lyo, ne tukukaabiriranga mu kulumwa kwaffe n’otuwulira era n’otulokola.’

¹⁰ “Naye kaakano laba, abasajja ba Amoni ne Mowaabu n’ab’oku Lusozi Seyiri, ab’omu kibangirizi kye wagaana Isirayiri okulumba bwe baava mu nsi y’e Misiri, era babeewala ne batagenda kubazikiriza,

¹¹ laba bwe baagala okutusasula nga batugobaganya mu kifo kye watuwa ng’omugabo gwaffe.

¹² Ayi Katonda waffe, toobasalire musango? Kubanga tetulina maanyi ga kulwana na ggye lino eddene eritulumbye. Tetumanyi kya kukola, wabula amaaso gaffe gatunuulidde ggwe.”

¹³ Abasajja bona abu Yuda, wamu ne bakyala baabwe, n’abaana baabwe, n’abaana abasemberayo ddala obuto, ne bayimirira mu maaso ga MUKAMA.

¹⁴ Awo Omwoyo wa MUKAMA n’akka ku Yakaziyeeri mutabani wa Zekkaliya, muzzukulu wa Benaya muzzukulu wa Yeyeri, muzzukulu wa Mattaniya, Omuleevi ow’ezzadde lya Asafu ng’ayimiridde wakati mu lukuŋjaana.

¹⁵ N’ayogera nti, “Kabaka Yekosafaati, ne Yuda yenna, n’abatuuze ba Yerusaalemi, kino MUKAMA ky’abagamba nti, ‘Temutya era temuggwaamu

mwoyo olw'eggye eryo eddene, kubanga olutalo si lwammwe, naye lwa Katonda.

¹⁶Enkya muserengete mubasisinkane; laba bajja kwambukira awalinnyirwa e Zizi, era munaabasisinkana ekiwonvu we kikoma mu ddungu lya Yerweri.

¹⁷Tekijja kubeetagisa kulwana lutalo luno. Mubeere mu bifo byammwe, mube bagumu mulabe obuwanguzi MUKAMA bw'anaabawa mmwe Yuda ne Yerusaalemi. Temutya wadde okuggwaamu omwoyo; enkya mugende mubasisinkane, MUKAMA anaabeera nammwe.”

¹⁸Awo Yekosafaati n'avuunama amaaso ge ku ttaka, era ne Yuda yenna n'abatuuze bona ab'e Yerusaalemi ne bavuunama wansi mu maaso ga MUKAMA ne bamusinza.

¹⁹Abamu ku Baleevi, Abakokasi n'abalala nga Bakoola ne bayimirira okutendereza MUKAMA, Katonda wa Isirayiri, n'eddoboozi ery'omwanguka.

²⁰Ne bakeera mu makya ne bagenda mu ddungu lya Tekowa. Bwe baali nga bagenda Yekosafaati n'ayimirira n'abagamba nti, “Mumpulirize, Yuda n'abantu ab'e Yerusaalemi! Mube n'okukkiriza mu MUKAMA Katonda wammwe munaanywezebwa; mukkirize bannabbi be, munaalaba omukisa.”

²¹Awo bwe yamala okwebuuza ku bantu, n'alonda abasajja ab'okuyimbira MUKAMA, n'okumutendereza olw'ekitiibwa ky'obutuukirivu bwe, abakulemberamu egghe, nga bogera nti, “Mwebaze MUKAMA kubanga okwagala kwe kubeerera emirembe gyonna.”

²²Awo bwe batandika okuyimba n'okutendereza, MUKAMA n'ataayiza abasajja ba Amoni, n'aba Mowaabu, n'ab'oku Lusozi Seyiri, abaali balumbye Yuda, ne bawangulwa.

²³Abasajja ba Amoni n'aba Mowaabu ne bagolokokera ku basajja ab'oku Lusozi Seyiri ne babazikiriza, era bwe baamala okubazikiriza, ne bakyukiragana ne battijjana.

²⁴Awo abasajja aba Yuda bwe baatuuka ku munaala ogw'eddungu, ne batunuulira egghe eddene, laba nga bona mirambo egigudde, nga tewaliwo n'omu eyawonyeewo.

²⁵Yekosafaati n'abantu be bwe bajja okutwala omunyago, basangawo ebintu bingi n'engoye nnyingi, n'ebi'obugagga bingi, okusinga n'ebyo bye baali basobola okwetikka. Baamala ennaku ssatu nga babisomba, olw'obungi bwabyo.

²⁶Ku lunaku olwokuna ne bakuñjaanira mu kiwonvu ekya Beraka, okutendereza MUKAMA, kyekyava kituumibwa Ekiwonvu kya Beraka, ne leero.

²⁷Oluvannyuma, buli musajja wa Yuda n'owa Yerusaalemi, nga bakulemberwamu Yekosafaati, ne baddayo e Yerusaalemi nga basanyuse, kubanga MUKAMA yali abawadde essanyu olw'okuwangula abalabe baabwe.

²⁸Ne bayingira Yerusaalemi, ne bagenda mu yeekaalu ya MUKAMA nga bakutte entongooli, n'ennanga, n'amakondeere.

²⁹Entisa ya MUKAMA n'ejja ku bwakabaka bwonna obw'omu mawanga, bwe baawulira nga MUKAMA yalwana n'abalabe ba Isirayiri.

³⁰Era obwakabaka bwa Yekosafaati ne buba n'emirembe, kubanga Katonda we yamuwa emirembe enjuuyi zonna.

Enkomerero ey'Obufuzi bwa Yekosafaati

³¹Yekosafaati n'afuga Yuda. Yalina emyaka amakumi asatu mu etaano we yafuukira kabaka wa Yuda, era n'afugira emyaka amakumi abiri mu etaano mu Yerusaalemi, ne nnyina erinnya lye nga ye Azuba muwala wa Siruki.

³²N'atambulira mu kkubo lya Asa kitaawe, n'atalivaamu, era n'akola ebyali ebirungi mu maaso ga MUKAMA.

³³Naye ebifo ebigulumivu teyabiggyaawo, so n'abantu ne bataweerayo ddala mitima gyabwe eri Katonda wa bajajjaabwe.

³⁴Ebyafaayo ebirala ebyaliwo mu mulembe gwa Yekosafaati, okuva ku ntandikwa ye okutuusa ku nkomerero ye, byawandiikibwa mu bitabo bya Yeeku mutabani wa Kanani, era biri ne mu kitabo ekya bassekabaka ba Isirayiri.

³⁵Bwe waayitawo ebbanga, Yekosafaati kabaka wa Yuda n'akola endagaano ne Akaziya kabaka wa Isirayiri, omukozi w'ebibi.

³⁶N'ateesa naye okuzimba ebyombo ebyamaguzi biseeyeeeyenga okugenda e Talusiisi, era ne babizimbira mu Eziyonigeba.

³⁷Mu kiseera ekyo Eryeza mutabani wa Dodavaku ow'e Malesa n'ayogera ebyobunnabi eri Yekosafaati ng'agamba nti, "Kubanga okoze endagaano ne Akaziya, n'omwegattako, MUKAMA alizikiriza by'okoze." Era ebyombo ne bimenyekamenyeka, ne bitasobola kugenda Talusiisi.

2 Ebyomumirembe 21

¹Awo Yekosafaati ne yeebakira wamu ne bajajjaabe, n'aziikibwa mu kibuga kya Dawudi; Yekolaamu mutabani we n'amusikira.

²Yekolaamu yalina baganda be, batabani ba Yekosafaati, nga be ba Azaliya, ne Yekyeri, ne Zekkaliya, ne Azaliya, ne Mikayiri ne Sefatiya. Abo bona bali baana ba Yekosafaati kabaka wa Yuda.

³Kitaabwe yabawa eby'obugagga bingi, ebya ffeeza ne zaabu, n'ebintu eby'omuwendo ebirala, wamu n'ebibuga ebiriko bbugwe mu Yuda, naye obwakabaka n'abuwa Yekolaamu kubanga ye yali omuggulanda.

Yekolaamu Kabaka wa Yuda

⁴Awo Yekolaamu bwe yamala okwenywerezza ddala ku ntebe ye ey'obwakabaka, n'atta baganda be bona n'ekitala, era n'abakungu abamu aba Isirayiri.

⁵Yekolaamu yalina emyaka amakumi asatu mu ebiri we yafuukira kabaka, era n'afugira emyaka munaana mu Yerusaalemi.

⁶N'atambulira mu makubo ga bakabaka ba Isirayiri, ng'ennyumba ya Akabu bwe yakolanga, era n'okuwasa n'awasa muwala wa Akabu. N'akola eby'ebibi mu maaso ga MUKAMA.

⁷Newaakubadde ng'ebyo byonna byali bwe bityo, MUKAMA teyayagala kusaanyaawo nnyumba ya Dawudi, kubanga yali akoze endagaano ne Dawudi, ate ng'asuubizza okukuma ettabaaza ye n'eya bazzukulu be ng'eyaka emirembe gyonna.

⁸Mu biro bya Yekolaamu Edomu n'ajeemera okufuga kwa Yuda ne beeteekerawo kabaka owaabwe.

⁹Awo Yekolaamu n'agendayo n'abakungu be n'amagaali ge gonna. Abayedomu ne bamutaayiza ye n'abaduumizi ab'amagaali ge mu kiro, naye n'abagolokokerako n'abakuba.

¹⁰Okuva ku olwo Edomu ne bajeemera Yuda n'okutuusa leero. Mu kiseera ekyo Libuna naye ne n'amujeemera, kubanga Yekolaamu yali avudde ku MUKAMA Katonda wa bajajjaabe.

¹¹Yali azimbye n'ebifo ebigulumivu ku nsozi za Yuda, era ng'aleetedde n'abatuuze ba Yerusaalemi obutaba beesigwa, nga ne Yuda bawabye.

¹²Yekolaamu n'afuna ebbaluwa okuva eri Eriya nnabbi ng'egamba nti, "Bw'ati bw'ayogera MUKAMA Katonda wa jjajjaawo Dawudi nti, 'Olw'obutatambulira mu makubo ga kitaawo Yekosafaati, wadde mu makubo ga Asa kabaka wa Yuda,

¹³naye n'otambulira mu kkubo lya bakabaka ba Isirayiri, n'oleetera Yuda n'abantu b'e Yerusaalemi obutaba beesigwa, ng'ennyumba ya Akabu bwe yakola, era n'otta ne baganda bo ab'ennyumba ya kitaawo, abaali bakusinga empisa,

¹⁴MUKAMA kyaliva aleeta kawumpuli ow'amaanyi, ku bantu bo, n'abaana bo, n'abakyala bo, ne ku bintu byo byonna,

¹⁵ate naawe olirwala obulwadde obw'amaanyi mu lubuto, erireetera ebyenda byo okuvaayo, buli lunaku.'"

¹⁶ Awo MUKAMA n'asitusa obusungu bw'Abafirisuuti n'Abawalabu abaabeeranga okumpi n'Abaesiyopiya eri Yekolaamu,

¹⁷ ne balumba Yuda, ne bakiwangula, ne batwala ebintu byonna ebyali mu lubiri lwa kabaka, ne batabani be, ne bakazi be, ne wataba mutabani we n'omu eyalekebwa okuggyako Yekoyakaazi, omuggalanda.

¹⁸ Oluvannyuma lw'ebyo byonna, MUKAMA n'aleetako Yekolaamu obulwadde obutawonyezeka obw'omu lubuto.

¹⁹ Awo ebiro bwe byayitawo, nga wayiseewo emyaka ebiri, ebyenda bye ne bitanula okumuvaamu, olw'obulwadde, n'afa mu bulumi bungi. Abantu be ne batamukumira lumbe, nga bwe baali bakoledde bajajjaabe.

²⁰ Yekolaamu yali wa myaka amakumi asatu mu ebiri bwe yatandika okuba kabaka, era n'afugira mu Yerusaalemi emyaka munaana. Okufa kwe tekwaleetera muntu n'omu kwejjusa, n'aziikibwa mu kibuga kya Dawudi naye si ku biggya bya bassekabaka.

2 Ebyomumirembe 22

Akaziya Kabaka wa Yuda

¹ Abantu ab'omu Yerusaalemi ne bafuula Akaziya, mutabani wa Yekolaamu omuggalanda, kabaka, kubanga abasajja abanyazi abajja n'Abawalabu baali bamaze okutta abaana be bonna abakulu. Awo Akaziya mutabani wa Yekolaamu n'atandika okufuga Yuda.

² Akaziya yalina emyaka amakumi ana mu ebiri bwe yatandika okufuga, era n'afugira omwaka gumu mu Yerusaalemi. Erinnya lya nnyina yali Asaliya, muzzukulu wa Omuli.

³ Ne Akaziya n'atambulira mu makubo ag'ennyumba ya Akabu, kubanga nnyina yamupikirizanga okukola ebibi.

⁴ N'akola ebibi mu maaso ga MUKAMA, ng'ennyumba ya Akabu bwe yakola, kubanga oluvannyuma olw'okufa kwa kitaawe be baamuwabyanga, okukola ebikyamu.

⁵ Era naye yagobereranga ebirowoozo byabwe, era n'agenda ne Yekolaamu, mutabani wa Akabu kabaka wa Isirayiri okutabaala Kazayeeri kabaka w'e Busuuli e Lamosugireyaadi. Abasuuli ne bafumita Yolaamu ebiwundu

⁶ era n'addayo e Yezuleeri okujjanjabibwa ebiwundu bye yali afunidde e Laama, bwe yali ng'alwana ne Kazayeeri kabaka w'e Busuuli. Awo Akaziya mutabani wa Yekolaamu kabaka wa Yuda n'agenda okulaba ku Yolaamu mutabani wa Akabu olw'ebisago ebyali bimutuusibbwako.

⁷ Naye kyali kyategekebwa Katonda, nti okugwa kwa Akaziya kulimutuukako ng'akyalidde Yolaamu. Awo Akaziya bwe yatuuka eyo, n'agenda ne Yolaamu

okusisinkana Yeeku mutabani wa Nimusu, MUKAMA gwe yali afuseeko amafuta okuzikiriza ennyumba ya Akabu.

⁸Awo Yeeku bwe yali ng'asalira ennyumba ya Akabu omusango, n'asanga abakungu ba Yuda, ne batabani ba baganda ba Akaziya, abaaweerezanga Akaziya, n'abatta.

⁹N'oluvannyuma n'anoonya Akaziya, era abasajja be ne bamuwambira e Samaliya gye yali yeekwese, n'aleetebwa ewa Yeeku n'attibwa. Ne bamuziika nga boogera nti, "Ono ye muzzukulu wa Yekosafaati, eyanoonya MUKAMA, n'omutima gwe gwonna." Era mu nnyumba ya Akaziya ne wataba n'omu eyayinza okusikira obwakabaka.

Asaliya ne Yowaasi

¹⁰Awo Asaliya, nnyina Akaziya bwe yalaba nga mutabani we afudde, n'asitula olutalo era n'azikiriza ennyumba yonna ey'obwakabaka bwa Yuda.

¹¹Naye Yekosabeyaasi, muwala wa kabaka Yekolaamu, n'abba Yowaasi mutabani wa Akaziya okuva mu balangira abaali bagenda okuttibwa, n'amukweka ye n'omukozi we mu kimu ku bisenge. Awo Yekosabeyaasi muwala wa kabaka Yekolaamu, ate nga ye yali mukyala wa Yekoyaada kabona, n'akweka omwana, Asaliya aleme okumutta. Yekosabeyaasi, yali mwannyina Akaziya.

¹²Omwana n'akwekebwa okumala emyaka mukaaga mu nnyumba ya Katonda, nga Asaliya y'afuga ensi.

2 Ebyomumirembe 23

¹Naye mu mwaka ogw'omusanvu Yekoyaada n'alaga obuyinza bwe. N'akola endagaano n'abaduumizi ab'ebibinja eby'ekikumi, era baali Azaliya mutabani wa Yekokamu, ne Isimayiri mutabani wa Yekokanani, ne Azaliya mutabani wa Obedi, ne Maaseya mutabani wa Adaya, ne Erisafaati mutabani wa Zikuli.

²Ne bagenda mu Yuda yonna ne bakuŋñaanya Abaleevi n'abakulembeze b'ennyumba za bajjajja ba Isirayiri okuva mu bibuga byonna ebya Yuda ne bajja e Yerusaalemi.

³Ekibiina kyonna ne bakola endagaano ne kabaka mu yeekaalu ya Katonda. Awo Yekoyaada n'abagamba nti, "Mutabani wa kabaka y'alifuga, nga MUKAMA bwe yasuubiza bazzukulu ba Dawudi.

⁴Era bwe muti bwe munaakola: kimu kya kusatu ku mmwe bakabona n'Abaleevi abanaaberanga ku luwalo ku ssabbiiti munaakuumanga wankaaki,

⁵ate kimu kya kusatu ekirala munaakuumanga olubiri lwa kabaka, n'ekimu kya kusatu ekirala munaakuumanga Omulyango ogw'Omusingi, n'abantu abalala bona banaabeeranga mu luggyga olwa yeekaalu ya MUKAMA.

⁶Tewabanga n'omu ayingira mu yeekaalu ya MUKAMA wabula bakabona, n'Abaleevi abanaabeeranga mu luwalo; abo banaayingiranga kubanga batukuvu, naye abantu abalala bona banaagobereranga ekyo MUKAMA kye yalagira.

⁷Abaleevi banaayimiriranga okwetooloola kabaka, buli omu ku bo ng'akutte ebyokulwanyisa bye mu mukono gwe, na buli anaayingiranga mu yeekaalu wa kuttibwa. Mubeere kumpi nnyo ne kabaka, buli gy'anaalaganga."

⁸Abaleevi n'abantu bona aba Yuda ne bakola nga Yekoyaada kabona bwe yalagira. Buli omu ku bo n'atwala abasajja be, abo abaali mu luwalo ku Ssabbiiti, wamu n'abo abaali bamaliriza olwabwe, kubanga Yekoyaada kabona yali tannabagaba mu mpalo.

⁹N'awa abaduumizi ab'ekikumi amafumu, n'engabo ennene, n'engabo entono, ebyali ebya Kabaka Dawudi, ebyabeeranga mu yeekaalu ya Katonda.

¹⁰Era n'ateekateeka buli musajja okuba omukuumi wa kabaka, nga buli omu ku bo akutte ekyokulwanyisa mu mukono gwe, nga beetoolodde kabaka, n'okwetooloola ekyoto ne yeekaalu, okuva mu bukiikkaddyo, okutuuka ku bukiikkono obwa yeekaalu.

¹¹Awo Yekoyaada ne batabani be ne bafulumya mutabani wa kabaka ne bamutikkira engule ey'obwakabaka, ne bakola endagaano, era ne bamulangirira okuba kabaka. Ne bamufukako amafuta, ne boogera mu ddoboozi ery'omwanguka nti, "Wangaala kabaka!"

¹²Naye Asaliya bwe yawulira oluyoogaano lw'abantu nga badduka era nga batendereza kabaka, n'agenda gye bali mu yeekaalu ya MUKAMA.

¹³N'atunula, laba, kabaka ng'ayimiridde okuliraana empagi ye ku mulyango, n'abakungu n'abafuuwa amakondeere nga bayimiridde okumwetooloola, era nga n'abantu bona ab'ensi nga basanyuka nga bafuuwa n'amakondeere, n'abayimbi nga bakutte ebivuga byabwe nga bakuleembedde okujaguza. Awo Asaliya n'ayuza ebyambalo bye, n'aleekaanira waggulu nti, "Bujeemu! Bujeemu!"

¹⁴Yekoyaada kabona n'atuma abaduumizi ab'ebibinja eby'ekikumi, abaavunaanyizibwanga eggye, n'abagamba nti, "Mumufulumye mumuteeke wakati w'enyiriri, mutte n'ekitala omuntu yenna anaamugoberera." Kabona yali ayogedde nti, "Temumuttira mu yeekaalu ya MUKAMA."

¹⁵Bwe yali ng'anaatera okutuuka ku mulyango ogw'embalaasi mu luggya olwokubiri, ne bamuktira eyo.

¹⁶Awo Yekoyaada n'akola endagaano wakati we n'abantu bona era ne kabaka, nti baliba bantu ba MUKAMA.

¹⁷abantu bona ne bagenda mu ssabo lya Baali ne balimenaamenya, ne bamenyaamenya n'ebyoto bye n'ebifaananyi bye, era ne battira ne Matani kabona wa Baali mu maaso g'ebyoto bya Baali.

¹⁸Awo Yekoyaada n'assaawo abanaalabiriranga yeekaalu ya MUKAMA, era n'alonda bakabona n'Abaleevi Dawudi be yali awadde obuvunaanyizibwa obw'okuwangayo ebiweebwayo ebyokebwa eri MUKAMA, nga bwe kyawandiikibwa mu mateeka ga Musa, nga bajaguza era nga bayimba, nga Dawudi bwe yalagira.

¹⁹N'ateeka n'abaggazi ku wankaaki za yeekaalu ya MUKAMA, waleme okubaawo omuntu yenna atali mulongoofu ayingira.

²⁰N'agenda n'abaduumizi ab'ekikumi, n'abakungu, n'abafuzi b'abantu, n'abantu bona ab'eggwanga, ne baggya kabaka mu yeekaalu ya MUKAMA, ne bayita mu wankaaki ow'ekyengulu ne balaga mu lubiri lwa kabaka. Ne batuuza kabaka ku ntebe ye ey'obwakabaka.

²¹Abantu bona ab'ensi ne bajaguza, n'ekibuga ne kitereera, kubanga Asaliya yali attiddwa n'ekitala.

2 Ebyomumirembe 24

Yowaasi Addaabiriza Yeekaalu

¹Yowaasi yalina emyaka musanvu we yafuukira kabaka, era n'afugira emyaka amakumi ana mu Yerusaalemi n'erinnya lya nnyina ye yali Zebbiya ow'e Beeruseba.

²Yowaasi n'akola ebirungi mu maaso ga MUKAMA mu biro byonna ebya Yekoyaada kabona.

³Yekoyaada n'amulondera abakyala babiri, era ne bamuzaalira abaana aboobulenzi n'aboobuwala.

⁴Bwe waayitawo ebbanga, Yowaasi n'ayagala okuddaabiriza yeekaalu ya MUKAMA.

⁵N'ayita bakabona n'Abaleevi, n'abagamba nti, "Mugende mu bibuga bya Yuda, musolooze ensimbi eza buli mwaka okuva mu Isirayiri yenna, olw'okuddaabiriza yeekaalu ya MUKAMA, era mutandikirewo." Naye Abaleevi ne batakikolerawo.

⁶Awo kabaka n'atumya Yekoyaada kabona asinga obukulu, n'amubuuza nti, "Kiki ekyakulobera okugamba Abaleevi, n'ekibiina kya Isirayiri ku lw'eweema ey'Obujulirwa, okuva eri Yuda ne Yerusaalemi okuleetanga omusolo, Musa omuddu wa Katonda gwe yalagira?"

⁷Mu biro eby'emabegako, batabani ba Asaliya, omukazi oli omubi, baali baamenya ne bayingira mu yeekaalu ya MUKAMA, ne bakozesa ebintu byonna ebyawongebwa mu yeekaalu ya MUKAMA, emirimu nya Baali.

⁸Awo kabaka n'alagira ne bakola essanduuko, ne bagissa ebweru wa wankaaki wa yeekaalu ya MUKAMA.

⁹Ekiragiro ne kiyita mu Yuda yonna ne mu Yerusaalemi yonna, okuleeteranga MUKAMA omusolo, Musa omuddu wa Katonda gwe yalagira Isirayiri nga bali mu ddungu.

¹⁰Abakungubonna n'abantu bonna ne baleetanga omusolo ogwo nga basanyufu, ne baguteekanga mu ssanduuko, okutuusa lwe yajjulanga.

¹¹Buli essanduuko bwe yaleetebwanga Abaleevi eri abakungu ba kabaka ne balaba ng'erimu sente nnyingi, omuwandiisi wa kabaka n'omukungu wa kabona asinga obukulu, baagitwalanga ne baziggyamu, ne bagikomyawo mu kifo kyayo. Kino baakikolanga buli lunaku, era ne bakunjaanya ensimbi nnyingi.

¹²Kabaka ne Yekoyaada ne bazikwasa abo abaavunaanyizibwanga omulimu gwa yeekaalu ya MUKAMA, bo ne bapangisa abaagula amayinja n'ababazzi okuddaabiriza yeekaalu ya MUKAMA, n'abalala baali baweesi ba byuma n'ebikomo era nabo nga baakuddaabiriza yeekaalu ya MUKAMA.

¹³Abasajja abaavunaanyizibwanga omulimu ogwo baali banyikivu, era n'omulimu ogwo gwali mu mikono gyabwe, era ne baddaabiriza yeekaalu ya Katonda okutuuka ku mutindo gwayo ogugisaanira, ne baginyweza.

¹⁴Awo bwe baamaliriza, ensimbi ezafikkawo ne bazikomyawo ewa kabaka ne Yekoyaada, ate ezo ne zikozesewa okukola ebintu eby'omu yeekaalu ya MUKAMA, eby'obuweereza n'ebi'ebiweebwayo ebyokebwa, ne bbakuli ez'obubaane, n'ebibya eby zaabu ne ffeeza. Era ne baweerangayo ebiweebwayo ebyokebwa mu yeekaalu ya MUKAMA ennaku zonna eza Yekoyaada.

¹⁵Yekoyaada n'akaddiwa, n'awangaala nnyo, n'afa ng'aweza emyaka kikumi mu asatu egy'obukulu.

¹⁶N'aziikibwa mu kibuga kya Dawudi ne bassekabaka, kubanga yakola ebirungi mu Isirayiri, ku lwa Katonda ne ku lwa yeekaalu ye.

Enneeyisa Embi eya Yowaasi

¹⁷Awo Yekoyaada ng'amaze okufa, abakungu ba Yuda ne bajja ne bavuunamira kabaka, n'abawuliriza.

¹⁸Ne baleka yeekaalu ya MUKAMA, Katonda wa bajjajaabwe, ne baweerezanga Baasera n'ebifaananyi, obusungu bwa Katonda kyebwava bubuubuukira ku Yuda ne Yerusaalemi.

¹⁹Newaakubadde nga MUKAMA yabatumira bannabbi okubakomyawo gy'ali, ne babalumiriza, tebassaayo mwoyo.

²⁰Awo Omwoyo wa Katonda n'akka ku Zekkaliya muzzukulu wa Yekoyaada, n'ayimirira mu maaso g'abantu n'ayogera nti, "Bw'ati bw'ayogera Katonda nti, 'Lwaki mujeemera amateeka ga MUKAMA? Temujja kufuna mukisa kukulaakulana. Kubanga muvudde ku MUKAMA naye kyavudde abaleka.'

²¹Naye ne basala olukwe okutta Zekkaliya, kabaka n'alagira n'akubibwa amayinja, n'afiira mu luggya lwa yeekaalu ya MUKAMA.

²²Kabaka Yowaasi n'atajjukira kisa Yekoyaada kitaawe wa Zekkaliya kye yamulaga, n'atta mutabani we. Zekkaliya bwe yali ng'afa n'ayogera nti, "MUKAMA kino akirabe, era akuvunaane."

²³Ku nkomerero ey'omwaka, egghe ery'Abasuuli ne lirumba Yowaasi. Ne bajja mu Yuda ne mu Yerusaalemi ne bazikiriza abakungu bona, ne baweereza omunyago gwonna eri kabaka waabwe e Ddamasiko.

²⁴Newaakubadde ng'egghe ery'Abasuuli ly'ajja n'abasajja batono, MUKAMA yawaayo egghe eddene ennyo erya Yuda mu mukono gw'Abasuuli kubanga Yuda baava ku MUKAMA, Katonda wa bajjajaabwe. Abasuuli ne babonereza Yowaasi.

²⁵Awo Abasuuli bwe baavaayo, ne baleka nga Yowaasi alumizibbwa nnyo, era abaddu be ne bamusalira olukwe, olw'omusaayi gw'abaana ba Yekoyaada kabona, gwe yayiwa, ne bamuttira mu kitanda kye. Bwe yafa, n'aziikibwa mu kibuga kya Dawudi, naye si mu masiro ga bassekabaka.

²⁶Abaamusala olukwe baali Zabadi mutabani wa Simeyaasi omukazi Omwamoni, ne Yekozabadi mutabani wa Simulisi omukazi Omumowaabu.

²⁷Ebyafaayo ebikwata ku batabani be, n'ebiyamulagulwako, n'ebi'okuddaabiriza kwa yeekaalu ya Katonda, byawandiikibwa mu ngero ez'ekitabo ekya bassekabaka. Amaziya mutabani we n'amusikira.

2 Ebyomumirembe 25

Amaziya Kabaka wa Yuda

¹Amaziya yalina emyaka amakumi abiri mu etaano we yafuukira kabaka, era n'afugira emyaka amakumi abiri mu mwenda mu Yerusaalemi. Nnyina ye yali Yekoyadaani ow'e Yerusaalemi.

²N'akola ebirungi mu maaso ga MUKAMA, naye si na mutima ogutuukiridde.

³Obwakabaka bwe bwanywezebw mu buyinza bwe, n'atta abakungu abatta kabaka kitaawe.

⁴Naye n'atatta baana baabwe, wabula n'akola ng'etteeka mu kitabo kya Musa, MUKAMA we yalagira nti, "Abazadde tebattibwenga olw'ekibi ky'abaana baabwe, so n'abaana tebattibwenga olw'ekibi ky'abazadde baabwe, naye buli muntu anaafanga olw'ekibi kye ye."

⁵ Amaziya n'akuŋjaanya abasajja ba Yuda, n'abategeka mu nnyiriri z'ennyumba zaabwe, nga baduumirwa ab'enkumi n'ab'ebikumi mu Yuda yonna ne mu Benyamini. N'oluvannyuma n'abala abo abaalina emyaka amakumi abiri n'okusingawo, ne baba abasajja emitwalo amakumi asatu, abaali basobola okugenda mu lutalo, era nga bayinza n'okukwata effumu n'ekitala.

⁶Ate era n'agulayo n'abasajja abalala ab'amaanyi nga bazira emitwalo kkumi okuva mu Isirayiri, olwa ttani ssatu ne bisatu byakuna ebya ffeeza.

⁷ Naye ne wabaawo omusajja wa Katonda eyagenda gy'ali n'amugamba nti, "Ayi kabaka, tokkiriza egghe lya Isirayiri okugenda naawe, kubanga MUKAMA tali wamu ne Isirayiri, talina n'omu gwali naye ku bantu ba Efulayimu.

⁸Ate ne bw'onoogenda ng'olowooza nti oli muzira nnyo mu ntalo, Katonda alikuwaayo mu maaso g'omulabe, kubanga Katonda alina obuyinza okuyamba, n'okulekerera."

⁹ Awo Amaziya n'abuuza omusajja wa Katonda nti, "Naye tunaakola tutya ku bya ttani esatu n'ebisatu byakuna ebya ffeeza ze nasasula egghe lya Isirayiri?" Omusajja wa Katonda n'addamu nti, "MUKAMA ayinziza ddala okukuwa n'ebisinga ku ebyo."

¹⁰ Awo Amaziya n'alagira egghe eryali lizze gy'ali okuva mu Efulayimu okuddayo ewaabwe waalyo. Ne banyiigira nnyo Yuda, era ne baddayo ewaabwe nga banyiize nnyo.

¹¹Amaziya ne yeefungiza, n'akulembera abantu be, n'agenda mu kiwonvu eky'omunnyo n'atta abasajja omutwalo gumu ab'e Seyiri.

¹²Egghe lya Yuda ne liwamba n'abasajja abalala omutwalo gumu nga balamu, ne babatwala waggulu ku lwazi, ne babasuula wansi okuva ku bbangabanga, ne basesebbuka ebifiififi.

¹³Naye egghe liri Amaziya lye yasindika okuddayo, n'ataliganya kugenda naye mu lutalo; lyalumba ebibuga bya Yuda okuva e Samaliya okutuuka e Besukolooni, ne litta abantu enkumi ssatu ku bo, era ne litwala n'omunyago mungi.

¹⁴Awo Amaziya bwe yakomawo ng'amaze okutta Abayedomu, n'aleeta bakatonda b'abantu ab'e Seyiri, n'abassaawo nga bakatonda be, n'abasinzunga, era n'abaweerangayo ebiweebwayo ebyokebwa.

¹⁵Obusungu bwa MUKAMA kyebwava bubuubuukira ku Amaziya, n'amuweereza nnabbi, eyamuteggeeza nti, "Lwaki ogoberera bakatonda b'abantu, abataayinza kulokola bantu baabwe mu mukono gwo?"

¹⁶Naye bwe yali ng'akyayogera, kabaka n'amubuuza nti, "Twali tukulonze okuba omuwi wa magezi owa kabaka? Sirika! Lwaki onoonya okuttibwa?" Awo nnabbi nga tannasirika, n'ayogera kino nti, "Mmanyi nga Katonda amaliridde okukuzikiriza, kubanga tossizaayo mwoyo ku kubuulirira kwange."

¹⁷Awo Amaziya kabaka wa Yuda ne yeebuuza ku bawi b'amagezi be, n'aweereza obubaka eri Yowaasi mutabani wa Yekoyakaazi, muzzukulu wa Yeeku, kabaka wa Isirayiri, ng'agamba nti, "Jjangu tusisinkane amaaso n'amaaso."

¹⁸Naye Yowaasi kabaka wa Isirayiri n'addamu Amaziya kabaka wa Yuda bw'ati nti, "Omwennyango ogwali mu Lebanooni gw'aweereza obubaka eri omuvule ogwali mu Lebanooni, nga gugamba nti, 'Waayo muwala wo eri mutabani wange, amufumbirwe,' naye ensolo ey'omu nsiko eyali mu Lebanooni, ng'eyitawo, n'erinnyirira omwennyango.

¹⁹Weewaana nga bw'owangudde Edomu, era omutima gwo gujjudde okwegulumiza n'okwenyumiriza. Naye sigala ewuwo. Lwaki onoonya emitawaana, ne weeretera okugwa, ggwe ne Yuda?"

²⁰Naye Amaziya n'atawliriza, kubanga okuwangulwa abalabe baabwe kwava eri Katonda, kubanga bava ku Katonda waabwe ne banoonya bakatonda ba Edomu.

²¹Awo Yowaasi kabaka wa Isirayiri n'alumba, ye ne Amaziya kabaka wa Yuda ne basisinkana amaaso n'amaaso mu lutalo e Besusemesi ekya Yuda.

²²Isirayiri n'awangula Yuda, buli muntu n'addukira ewuwe.

²³Yowaasi kabaka wa Isirayiri n'awambira Amaziya kabaka wa Yuda mutabani wa Yowaasi, muzzukulu wa Yekoyakaazi e Besusemesi, n'amuleeta e Yerusaalemi. Yowaasi n'amenyaamenya n'ekitundu ekya bbugwe wa Yerusaalemi okuva ku mulyango gwa Efulayimu okutuuka ku Mulyango ogw'oku Nsonda, eyali mita kikumi mu kinaana obuwanvu.

²⁴N'atwala ezaabu n'effeza yonna, n'ebintu ebirala byonna ebyali mu yeekaalu ya Katonda ebyali bikuumibwa Obededomu, wamu n'ebi'obugagga eby'omu lubiri, n'abawambe, n'addayo e Samaliya.

²⁵Awo Amaziya mutabani wa Yowaasi kabaka wa Yuda n'awangaala emyaka emirala kkumi n'ettaano, oluvannyuma olw'okufa kwa Yowaasi mutabani wa Yekoyakaazi, kabaka wa Isirayiri.

²⁶Ebyafaayo ebirala ebyabaawo mu mirembe gya Amaziya, okuva ku ntandikwa okutuuka ku nkomerero, tebyawandiikibwa mu kitabo kya bassekabaka ba Yuda ne Isirayiri?

²⁷Okuva mu kiseera, Amaziya lwe yakyuka okuva ku MUKAMA, baamusalira olukwe mu Yerusaalemi, n'addukira e Lakisi. Kyokka ne bamusindikira abasajja abaamugoberera okutuuka e Lakisi, era ne bamuttira eyo.

²⁸Omulambo gwe ne baguleetera ku mbalaasi, n'aziikibwa mu masiro ga bajajjaabe mu kibuga kya Yuda.

2 Ebyomumirembe 26

Uzziya Kabaka wa Yuda

¹Awo Uzziya bwe yali ng'aweza emyaka kkumi na mukaaga eg'yobukulu, abantu bona aba Yuda, ne bamufuula kabaka n'asikira kitaawe Amaziya.

²N'addaabiriza Erosi, n'akiddiza Yuda nga Amaziya amaze okuziikibwa.

³Uzziya yali awezezza emyaka kkumi na mukaaga we yaliira obwakabaka, n'afugira emyaka amakumi ataano mu ebiri mu Yerusaalemi. Nnyina ye yali Yekkiriya ow'e Yerusaalemi.

⁴N'akola ebirungi mu maaso ga MUKAMA, nga kitaawe Amaziya bwe yasooka okukola.

⁵N'amalirira okunoonya Katonda mu biro bya Zekkaliya eyamubuuliriranga okutya Katonda. Era ebbanga lyonna lye yanoonya MUKAMA, Katonda n'amuwa omukisa.

⁶N'agenda n'alwana n'Abafirisuuti, n'amenyaamenya bbugwe wa Gaasi, ne bbugwe wa Yabune ne bbugwe wa Asudodi, n'olvannyuma n'azimba ebibuga okumpi ne Asudodi ne mu bitundu ebirala wakati mu Bafirisuuti.

⁷Katonda n'amuyambanga ng'alwana n'Abafirisuuti, n'Abawalabu abaabeeranga mu Gulubaali, era n'Abamewunimu.

⁸Abamoni ne bawanga Uzziya busuulu, era n'erinnya lye ne lyatiikirira n'okutuusa ku nsalo ya Misiri, kubanga yali afuuse wa maanyi nnyo.

⁹Uzziya n'azimba eminaala mu Yerusaalemi ku wankaaki ow'oku Nsonda, ne ku wankaaki ow'omu Kiwonvu, ne mu kifo bbugwe w'akyukira, era n'agissaako bbugwe.

¹⁰Era n'azimba n'eminaala mu ddungu, ate era n'asima n'ebidiba bingi mu biwonvu ne mu lusenyi, olw'amaggana amanene ge yalina. Yalina n'abantu abaakolanga mu nnimiro ze ez'emizabbibu mu nsozi n'abaalimanga ettaka eggimu, kubanga yayagalanga nnyo okulima.

¹¹Uzziya yalina egghe ery'abasajja abalwanyi abaatendekebwa obulungi, abaatabaalanga mu bibinja ng'emiwendo gyabwe bwe gyali, Yeyeri omuwandiisi gye yabala ne Maaseya omukungu, eyali wansi wa Kananiya, omu ku baduumizi b'eggye lya kabaka.

¹²Omuwendo gwonna awamu ogw'abakulu b'ennyumba ez'abasajja abalwanyi gwali enkumi bbiri mu lukaaga (2,600).

¹³Abo be baaduumiranga egghe ery'abasajja abatendeke mu kulwana, abaawera emitwalo amakumi asatu mu kasanvu mu ebikumi bitaano (307,500), abaakuumanga kabaka.

¹⁴Uzziya n'awa egghe lyonna, engabo, n'amafumu, n'enkuufira ez'ebyuma, n'ebizibaawo eby'ebyuma, n'emitego emigumu, n'envuumuulo.

¹⁵N'akozesa ebyuma mu Yerusaalemi ebyayiyizibwa abasajja abamanyirivu, ebyakozesewanga ku minaala ne ku nkamera okulasa obusaale n'okuvuumuula amayinja amanene. Yayambibwa nnyo, n'atutumuka era erinnya lye ne lyatiikirira nnyo.

¹⁶Kyokka Uzziya bwe yatutumuka, ne yeegulumiza, n'okugwa n'agwa kubanga teyali mwesigwa eri MUKAMA Katonda we, n'okuyingira n'ayingira mu yeekaalu ya MUKAMA okwotereza obubaane ku kyoto eky'obubaane.

¹⁷Azaliya kabona ne bakabona ba MUKAMA abalala abazira kinaana ne bagenda gy'ali,

¹⁸ne bamuziyiza, nga bamugamba nti, "Si mulimu gwo, Uzziya, okwotereza MUKAMA obubaane, naye mulimu gwa bakabona bazzukulu ba Aloonni abaayawulibwa okwotezanga obubaane. Ffuluma ove mu watukuvu, kubanga osobezza, era tojja kusiimibwa MUKAMA Katonda."

¹⁹Awo Uzziya n'asunguwala ng'akyakutte ekyoterezo mu mukono gwe. Mu kiseera ekyo ng'asunguwalidde bakabona ng'ayimiridde ku mabbali g'ekyoto eky'obubaane mu yeekaalu ya MUKAMA, ebigenge ne bimukwata ekyenyi kyonna.

²⁰Awo Azaliya kabona asinga obukulu ne bakabona abalala bwe bamutunuulira, ne balaba ng'akwatiddwa ebigenge mu kyenzi kye ne banguwa okumufulumya ebweru. Ate era naye yennyini n'ayagala okufuluma kubanga MUKAMA yali amukubye omuggo.

²¹Kabaka Uzziya n'aba mugenge okutuusa lwe yafa, ng'abeera mu nnyumba eyayawulibwa ku ndala zonna olw'obugenge bwe, nga n'obuvunaanyizibwa bwonna bumuggyibbwako, ate era nga takkirizibwa kuyingira mu yeekaalu ya MUKAMA. Yosamu mutabani we n'atwala obuvunaanyizibwa obw'olubiri n'afuga abantu ab'eggwanga.

²²Ebyafaayo ebirala eby'omu mirembe gya Uzziya, okuva ku ntandikwa okutuusa ku nkomerero, byawandiikibwa Isaaya nnabbi, mutabani wa Amozi.

²³Uzziya n'afa, n'aziikibwa okumpi ne bajajjaabe mu kiggya kya bakabaka, kubanga, yali mugenge. Yosamu mutabani we n'amusikira, bw'atyo n'afuga mu kifo kye.

2 Ebyomumirembe 27

Yosamu Kabaka wa Yuda

¹Yosamu yali wa myaka amakumi abiri mu etaano, bwe yalya obwakabaka, n'afugira mu Yerusaalemi emyaka kkumi na mukaaga. Nnyina ye yali Yerusa muwala wa Zadooki.

²Newaakubadde ng'abantu beeyongera okukola eitali bya butuukirivu, Yosamu yakola ebirungi mu maaso ga MUKAMA, nga kitaawe Uzziya bwe yakola; naye obutafaanana nga kitaawe bwe yakola, teyayingira mu yeekaalu ya MUKAMA.

³N'addaabiriza Omulyango ogw'Ekyengulu ogwa yeekaalu ya MUKAMA, ate era n'akola omulimu munene ogw'okuddaabiriza bbugwe wa Oferi.

⁴N'azimba n'ebibuga mu nsozi za Yuda, ate mu bibira n'azimbamu ebigo n'asimbamu n'eminaala.

⁵Yosamu n'alwana ne kabaka w'Abamoni n'amuwangula, era omwaka ogwo Abamoni ne bamuwa ttani ssatu eza ffeeza ne desimoolo nnya, n'ebigero by'enjaano obukadde bubiri mu emitwalo amakumi abiri, n'ebigero bya sayiri obukadde bubiri mu emitwalo amakumi abiri. Abamoni ne bamuleeteranga ebintu byebimu mu bigero byebimu mu mwaka ogwokubiri ne mu mwaka ogwokusatu.

⁶Yosamu n'aba n'obuyinza bungi kubanga yatambuliranga mu makubo ga MUKAMA Katonda we.

⁷Ebyafaayo ebirala ebyabaawo mu mirembe gya Yosamu, entalo ze yalwana, ne bye yakola, byawandiikibwa mu kitabo kya Bassekabaka ba Isirayiri ne Yuda.

⁸Yosamu yali wa myaka amakumi abiri mu etaano bwe yalya obwakabaka, era n'afugira emyaka kkumi na mukaaga mu Yerusaalemi.

⁹Ne yeebakira wamu ne bajajjaabe, n'aziikibwa mu Kibuga kya Dawudi; Akazi mutabani we n'amusikira.

2 Ebyomumirembe 28

Akazi Kabaka wa Yuda

¹ Akazi yali wa myaka amakumi abiri we yaliira obwakabaka, n'afugira emyaka kkumi na mukaaga mu Yerusaalemi. Naye obutafaanana nga jjajjaawe Dawudi, yakola ebitali bya butuukirivu mu maaso ga MUKAMA.

² N'atambulira mu makubo ga bassekabaka ba Isirayiri, n'okukola n'akola ebifaananyi ebisaanuuse ebyakozesebwanga mu kusinza Baali.

³ N'ayoterezanga obubaane mu kiwonvu kya mutabani wa Kinomu, n'awaayo batabani be okuba ebiweebwayo ebyokebwa, ng'agoberera emizizo gy'abannaggwanga, MUKAMA be yagoba mu maaso g'Abayisirayiri.

⁴ N'awangayo ssaddaaka wamu n'okwoterezanga obubaane mu bifo ebigulumivu, ne ku ntikko z'ensozi, ne wansi wa buli muti omubisi.

⁵ MUKAMA Katonda we kyeyava amuwaayo mu mukono gwa kabaka w'e Busuuli, eyamuwangula n'atwala abantu ba Yuda bangi nga basibe, n'abaleeta e Ddamasiko. Ate era yaweebwayo ne mu mukono gwa kabaka wa Isirayiri, eyaleeta ku bantu ba Yuda ebisago ebinene.

⁶ Peka mutabani wa Lemaliya yatta abaserikale ba Yuda emitwalo kkumi n'ebiri mu lunaku lumu, kubanga baali bavudde ku MUKAMA Katonda wa bajjajaabwe.

⁷ Ne Zikuli, omusajja omulwanyi omuzira owa Efulayimu n'atta Maaseya mutabani wa kabaka, ne Azulikamu omukulu w'olubiri ne Erukaana omukungu, addirira kabaka.

⁸ Abayisirayiri ne bawamba abakyala, n'abaana aboobulenzi, n'aboobuwala, emitwalo amakumi abiri ku baganda baabwe, ne babatwala nga basibe e Samaliya, ate ne babatwalako n'omunyago mungi.

⁹ Awo Odedi nnabbi wa MUKAMA eyali eyo n'agenda okusisinkana eggye eryali liija e Samaliya, n'abagamba nti, "Laba, kubanga MUKAMA Katonda wa bajjajammwe yasunguwalira Yuda, kyeyava abawaayo mu mukono gwammwe, kyokka mubasse n'ekiruyi n'okutuuka ne kituuka mu ggulu.

¹⁰ Kaakano, abasajja n'abakazi aba Yuda ne Yerusaalemi mumaliridde, okubafuula abaddu bammwe. Naye bwe mmwekebera, temulina kye mwali musobezza MUKAMA Katonda wammwe?

¹¹ Kale nno, mumpulirize, muleke baganda bammwe be muwambye baddeyo ewaabwe, kubanga MUKAMA abasunguwalidde mmwe."

¹² Awo abamu ku bakadde ba Efulayimu, Azaliya mutabani wa Yokanaani, ne Berakiya mutabani wa Mesiremosi, ne Yekizukiya mutabani wa Sallumu, ne Amasa mutabani wa Kadalayi, ne bayimirira okuziyiza abo abaali bava mu lutalo.

¹³Ne babagamba nti, "Temujja kuleeta basibe abo wano, kubanga mujja kutuleetako omusango eri MUKAMA nga mwongereza ku kibi ne ku musango bye tulina. Omusango gwaffe munene, n'obusungu bwe buli ku Isirayiri."

¹⁴Awo abaserikale ne basumulula abasibe, n'omunyago ne baguwaayo mu maaso g'abakungu n'ekibiina kyonna.

¹⁵Ne balonda abasajja abaatwala abasibe ne baggya engoye mu munyago ne bambaza abo bona abaaali obwerefere, ne babawa engoye endala, n'engatto, ne babawa emmere n'ekyokunywa, ne babanyiga n'ebiwundu. N'abaali abanafu ennyo bona ne babasitulira ku ndogoyi, ne babazzaayo eri baganda baabwe e Yeriko, ekibuga eky'enkindu, bo ne bakomawo e Samaliya.

¹⁶Awo mu biro ebyo kabaka Akazi n'asaba kabaka w'e Bwasuli amuyambe,

¹⁷kubanga Abayedomu baali bazeemu okulumba Yuda, ne batwala abantu mu busibe.

¹⁸Mu kiseera kyekimu Abafirisuuti baali balumbye ebibuga eby'omu nsenyi n'ebi'omu bukiikaddyo obwa Yuda, nga bawambye Besusemesi, ne Ayalooni, ne Gederosi, ne Soko, ne Timuna, ne Gimuzo n'ebyalo ebyali byetoolodde ebibuga ebyo, era ng'omwo mwe babeera.

¹⁹MUKAMA yakkakkanya nnyo Yuda olw'ebibi n'obutali bwesigwa bwa Akazi kabaka wa Isirayiri eri MUKAMA, Akazi bye yakola mu Yuda.

²⁰Tirugazupiruneseri kabaka w'e Bwasuli n'ajja gy'ali, n'amucocca mu kifo eky'okumuyamba.

²¹Akazi n'aggya ebimu ku bintu ebyali mu yeekaalu ya MUKAMA, ne ku ebyo ebyali mu lubiri lwa kabaka, ne ku bya balangira n'abiwa kabaka w'e Bwasuli; naye ekyo ne kitamuyamba.

²²Mu kiseera ekyo kabaka Akazi we yalabira ennyo ennaku, yeeyongera obutaba mwesigwa eri MUKAMA.

²³N'awangayo ssaddaaka eri bakatonda b'e Ddamasiko, abaaali bamuwangudde, kubanga yallowooza nti, "Engeri bakatonda ba bakabaka b'e Busuuli bwe babayambye, nnaawaayo ssaddaaka gye bali, nange bannyambe." Naye okwo kwe kwali okuzikirira kwe n'okwa Isirayiri yenna.

²⁴Akazi n'akuñjaanya ebintu eby'omu yeekaalu ya Katonda, n'abiggyamu, n'aggalawo enzigi za yeekaalu ya MUKAMA, ne yeezimbira ebyoto mu buli nsonda mu Yerusaalemi.

²⁵Mu buli kibuga kya Yuda n'azimbamu ebifo ebigulumivu okuwerangayo ssaddaaka eri bakatonda abalala, n'asunguwaza MUKAMA Katonda wa bajjajaabe.

²⁶Ebyafaayo ebirala eby'omu mulembe gwe n'empisa ze zonna, okuva ku ntandikwa okutuusa ku nkomerero, byawandiikibwa mu kitabo kya bassekabaka ba Yuda ne Isirayiri.

²⁷Akazi n'afa n'aziikibwa mu kibuga kya Yerusaalemi, naye si mu masiro ga bassekabaka ba Isirayiri. Keezeekiya mutabani we n'amusikira.

2 Ebyomumirembe 29

Keezeekiya Atukuza Yeekaalu

¹Keezeekiya yali wa myaka amakumi abiri mu etaano bwe yalya obwakabaka; n'afugira emyaka amakumi abiri mu mwenda mu Yerusaalemi. Nnyina ye yali Abiya muwala wa Zekkaliya.

²Keezeekiya n'akola ebirungi mu maaso ga MUKAMA, nga jjajjaawe Dawudi bwe yakola.

³Mu mwaka gwe ogwasooka, mu mwezi ogw'olubereberye, n'aggulawo enzigi za yeekaalu ya MUKAMA, n'aziddaabiriza.

⁴N'ayingiza bakabona n'Abaleevi, n'abakuinjaanyiza mu luggya olugazi ku luuyi olw'ebuvanjuba,

⁵n'abagamba nti, "Mumpulirize Abaleevi, kaakano mwetukuze, ate mutukuze ne yeekaalu ya MUKAMA Katonda wa bajjajammwe, muggye buli kitali kirongoofu mu watukuvu.

⁶Bajjajaffe baayonoona, ne bakola ebitali birungi mu maaso ga MUKAMA Katonda waffe ne bamuvaako. Baggya amaaso gaabwe ku kifo MUKAMA gy'abeera, ne bamukuba amabega.

⁷Baggalawo n'enzigi ez'ekisasi ne bazikiza n'ettabaaza, so tebootereza bubaane wadde okuwaayo ebiweebwayo ebyokebwa mu watukuvu eri Katonda wa Isirayiri.

⁸Obusungu bwa MUKAMA kyebwava bukka ku Yuda ne ku Yerusaalemi, era abafudde ekikangabwa, n'ekisekererwa era ekinyoomebwa, nga bwe mulaba n'amaaso gammwe.

⁹Bajjajaffe kyebaava bagwa n'ekitala, ate batabani baffe, ne bawala baffe ne bakyala baffe bo ne batwalibwa mu busibe.

¹⁰Kaakano mmaliridde mu mutima gwange okukola endagaano ne MUKAMA, Katonda wa Isirayiri obusungu bwe obw'amaanyi butuveeko.

¹¹Batabani bange temuddangayo kulagajjala nate, kubanga MUKAMA abalonze okuyimiriranga mu maaso ge okumuweerezanga, n'okumwoterezanga obubaane."

¹² Awo Abaleevi ne batandika okukola era baali: Makasi mutabani wa Amasayi, ne Yoweeri mutabani wa Azaliya ab'omu lulyo lwa Bakokasi, ne Kiisi mutabani wa Abudi, ne Azaliya mutabani wa Yekalereri ab'omu lulyo lwa Merali, ne Yowa mutabani wa Zimma, ne Adeni mutabani wa Yowa ab'omu lulyo lwa Bagerusoni,

¹³ ne Simuli ne Yeyeri bazzukulu ba Erizafani, ne Zekkaliya ne Mattaniya, bazzukulu ba Asafu,

¹⁴ ne Yekweri ne Simeeyi, bazzukulu ba Kemani, ne Semaaya ne Wuziyeeri bazzukulu ba Yedusuni.

¹⁵ Ne bakuŋjaanya baganda baabwe, ne beetukuza bo bennyini, n'oluvannyuma ne bayingira okutukuza yeekaalu ya MUKAMA nga kabaka bwe yali alagidde, ng'agoberera ebigambo bya MUKAMA.

¹⁶ Bakabona ne bayingira mu watukuvu wa MUKAMA ne batukuzaamu. Ne bafulumya ebitaali birongoofu byonna ebyasangibwa mu yeekaalu ya MUKAMA ne babiteeka mu luggya lwa yeekaalu ya MUKAMA, Abaleevi ne babitwala ebweru mu Kiwonvu Kiduloni.

¹⁷ Okutukuza ne kutandika ku lunaku olusooka mu mwezi ogw'olubereberye; ku lunaku olw'omunaana mu mwezi ogwo ne batuuka ku kisasi kya MUKAMA. Ne bamala ennaku munaana nga batukuza yeekaalu ya MUKAMA; ku lunaku olw'ekkumi n'omukaaga olw'omwezi ogw'olubereberye ne bamaliriza.

¹⁸ Awo ne bagenda eri kabaka Keezeekiya ne bamutegeeza nti, "Tutukuzizza yeekaalu ya MUKAMA yonna, ekyoto eky'okuweerayo ebiweebwayo ebyokebwa n'ebintu byakwo byonna, n'em meeza ey'emigaati egypt'okulaga n'ebintu byakwo byonna.

¹⁹ N'ebintu byonna kabaka Akazi bye yaggyamu olw'obutali bwesigwa bwe, tubiteeseteese ne tubitukuza, era laba biri mu maaso g'ekyoto kya MUKAMA."

²⁰ Awo bwe bwakya, enkeera kabaka Keezeekiya n'akuŋjaanya abakungu ab'omu kibuga, ne balaga mu yeekaalu ya MUKAMA.

²¹ Ne baleeta ente ennume musanvu, n'endiga ennume musanvu, n'endiga ento nga nnume musanvu, n'embuzi ennume musanvu okuba ebiweebwayo olw'ekibi ku lw'obwakabaka, ne ku lwa watukuvu, ne ku lwa Yuda. N'alyoka alagira bakabona, bazzukulu ba Alooni okubiweerayo ku kyoto kya MUKAMA.

²² Awo ne batta ente ennume, bakabona ne baddira omusaayi ne bagumansira ku kyoto, oluvannyuma ne batta endiga ennume ne bamansira omusaayi gwazo ku kyoto, n'oluvannyuma ne batta n'endiga ento ne bamansira omusaayi gwazo ku kyoto.

²³ Embuzi ennume ezaali ez'ekiweebwayo ku lw'ekibi ne zireetebwa mu maaso ga kabaka n'ekibiina, ne bazisaako emikono gyabwe,

²⁴n'oluvannyuma bakabona ne bazitta, ne bawaayo omusaayi gwazo ng'ekiweebwayo olw'ekibi ku kyoto, okutangiririra Isirayiri yenna, kubanga kabaka yali alagidde okuwaayo ekiweebwayo ekyokebwa n'ekiweebwayo olw'ekibi ku lwa Isirayiri yenna.

²⁵N'ateeka Abaleevi mu yeekaalu ya MUKAMA nga balina ebitaasa, entongooli, n'ennanga, ng'ekiragiro kya Dawudi, ne Gaadi omulabi wa kabaka ne Nasani nnabbi bwe kyali; kubanga ekiragiro ekyo kyava eri MUKAMA ng'ayita mu bannabbi be.

²⁶Awo Abaleevi ne bayimirira nga bakutte ebivuga bya Dawudi, ne bakabona nga bakutte amakondeere.

²⁷Keezeekiya n'alagira okuwaayo ssaddaaka ey'ekiweebwayo ekyokebwa ku kyoto. Era okuwaayo ekiweebwayo ekyokebwa bwe kwatandika, abayimbi nabo ne batandika okuyimbira MUKAMA, n'amakondeere n'ebivuga ebirala ebya Dawudi kabaka wa Isirayiri nabyo ne bivuga.

²⁸Ekibiina kyonna ne basinza, abayimbi ne bayimba, n'abamakondeere ne bagafuuwa, era ebyo byonna ne byongerwa okukolebwa okutuusa okuwaayo ssaddaaka ey'ekiweebwayo ekyokebwa bwe kwaggwa.

²⁹Awo okuwaayo ebiweebwayo bwe kwaggwa, kabaka n'abo bona abaaliwo ne bavuunama ne basinza.

³⁰Kabaka Keezeekiya n'abakungu ne balagira Abaleevi okuyimba nga batendereza MUKAMA mu bigambo bya Dawudi n'ebya Asafu omulabi. Ne bayimba nga batendereza n'essanyu, ne bavuunama ne basinza.

³¹Awo Keezeekiya n'ayogera nti, "Kaakano mwetukuzizza eri MUKAMA, musembere, muleete ssaddaaka n'ebiweebwayo ebyokwebaza mu yeekaalu ya MUKAMA." Ekibiina ne kireeta ssaddaaka n'ebiweebwayo eby'okwebaza, n'abo bona abeesiimira ne baleeta ebiweebwayo ebyokebwa.

³²Omuwendo gw'ebiweebwayo ebyokebwa ekibiina gwe kyaleeta gwali ente ennume nsanvu, n'endiga ennume kikumi, n'endiga ento nga nnume ebikumi bibiri, ng'ebyo byonna bye byali ebiweebwayo ebyokebwa eri MUKAMA.

³³N'ensolo ezatukuzibwa okuba ssaddaaka zaali ente ennume lukaaga, n'endiga enkumi ssatu.

³⁴Wabula bakabona ne baba batono ne batayinza kubaaga biweebwayo ebyokebwa byonna, baganda baabwe Abaleevi ne babayambako okutuusa bakabona abalala bwe beetukuza; omulimu ne guggwa, kubanga Abaleevi baali beegendereza nnyo mu kwetukuza okusinga bakabona.

³⁵Ebiweebwayo ebyokebwa bingi, wamu n'amasavu ag'ebiweebwayo olw'emirembe, n'ebiweebwayo ebyokunyuwa ebyawerekerezebwa ku biweebwayo ebyokebwa. Okuweereza mu yeekaalu ya MUKAMA ne kuzzibwawo.

³⁶Awo Keezeekiya n'abantu bona ne bajaguza olw'ekyo Katonda kye yali akoledde abantu be mu bbanga ettono ennyo.

2 Ebyomumirembe 30

Keezeekiya Atukuza Embaga ey'Okuyitako

¹Awo Keezeekiya n'aweereza obubaka eri Isirayiri yonna ne Yuda, n'awandiikira ne Efulayimu ne Manase amabaluwa, ng'abayita okujja e Yerusaalemi mu yeekaalu ya MUKAMA, okukwata Embaga ey'Okuyitako eya MUKAMA Katonda wa Isirayiri.

²Kabaka n'abakungu be, n'ekibiina kyonna mu Yerusaalemi baasalawo okukwata Embaga ey'Okuyitako mu mwezi ogwokubiri;

³baali tebasobola kukwata mbaga eyo mu kiseera kyayo kubanga bakabona abaali beetukuzizza, baali batono ate nga n'abantu tebanakuññaanira mu Yerusaalemi.

⁴Enteekateeka eyo n'erabika nga nnungi eri kabaka n'ekibiina kyonna.

⁵Ne basalawo okulangirira mu Isirayiri yenna, okuva e Beeruseba okutuuka e Ddaani, nga bategeeza abantu okujja e Yerusaalemi okukwata Embaga ey'Okuyitako eya MUKAMA Katonda wa Isirayiri; baali batutte ebbanga nga tebagikwata ng'ekibiina ekinene eky'awamu, nga bwe kyawandiikibwa.

⁶Awo ababaka ne batwala amabaluwa mu Isirayiri yonna ne mu Yuda okuva ewa kabaka n'abakungu be, ng'ekiragiro kya kabaka bwe kyali nti, "Abantu ba Isirayiri, mudde eri MUKAMA Katonda wa Ibulayimu, ne Isaaka, ne Isirayiri, Katonda alyoke adde gye muli, mmwe ekitundu ekisigaddewo, ekiwonye omukono gwa bakabaka b'e Bwasuli.

⁷Temuba nga bajajjammwe ne baganda bammwe abataali beesigwa eri MUKAMA Katonda wa bajajaabwe n'abafuula ekyelolerwa, nga bwe mulaba.

⁸So temuba ba nsingo nkakanyavu nga bajajjammwe bwe baali, naye mukkakkane eri MUKAMA, mujje mu watukuvu we, we yatkuza emirembe gyonna, muweereze MUKAMA Katonda wammwe, obusungu bwe bubaveeko.

⁹Bwe munadda eri MUKAMA, olwo ne baganda bammwe n'abaana bammwe banaalaba ekisa mu maaso g'abo abaabawamba, ne bakomawo mu nsi eno. MUKAMA Katonda wammwe wa kisa era aijudde okusaasira, so taakyuse maaso ge, okubavaako bwe munadda gyali."

¹⁰ Ababaka ne bagenda mu buli kibuga mu nsi ya Efulayimu ne Manase, ne batuuka ne mu Zebbulooni, naye abasinga obungi ne babasekerera, ne babaduulira.

¹¹ Kyokka abamu ku bantu ab'e Aseri, ne Manase ne Zebbulooni ne beetoowaza ne bagenda e Yerusaalemi.

¹² Ne mu Yuda, omukono gwa Katonda ne gukwata ku bantu ne bakkiriziganya ku ekyo kabaka n'abakungu kye baalagira, nga bagoberera ekigambo kya MUKAMA.

¹³ Awo abantu bangi ne bakujjaanira mu Yerusaalemi mu mwezi ogwokubiri okukwata Embaga ey'Emigaati Egitali Mizimbulukuse.

¹⁴ Ne baggyawo ebyoto ebyali mu Yerusaalemi, n'ebyoto byonna eby'okwoterezaako obubaane, ne babisuula mu Kiwonvu Kidulooni.

¹⁵ Ne batta Endiga Ento ey'Embaga ey'Okuyitako ku lunaku olw'ekkumi n'enya olw'omwezi ogwokubiri. Bakabona n'Abaleevi ne baswala, ne beetukuza, ne baleeta ebiweebwayo ebyokebwa mu yeekaalu ya MUKAMA.

¹⁶ Ne bayimirira mu bifo byabwe ng'etteeka lya Musa omusajja wa Katonda bwe lyali libalagira. Bakabona ne bamansira omusaayi ogwabaweerezebwa Abaleevi.

¹⁷ Bangi ku bo, baali tebeetukuzizza nga tebasobola kuwaayo ndiga zaabwe; Abaleevi kyebaava battira buli muntu ataali mulongoofu Endiga Ento ey'Embaga ey'Okuyitako, okubatukuza eri MUKAMA.

¹⁸ Newaakubadde ng'abantu abasinga abaava mu Efulayimu, ne Manase, ne Isakaali, ne Zebbulooni baali tebeetukuzizza, baalya Embaga ey'Okuyitako, ekyali tekikkiriziganya na biwandiike. Naye Keezeekiya n'abasabira ng'agamba nti, "MUKAMA omulungi asonyiwe buli muntu

¹⁹ amaliridde mu mutima gwe okunoonya Katonda, MUKAMA Katonda wa bajjajaabe, newaakubadde nga tabadde mulongoofu okusinziira ku mateeka g'awatukuvu."

²⁰ MUKAMA n'awulira okusaba kwa Keezeekiya, n'atabazikiriza.

²¹ Abayisirayiri abaali mu Yerusaalemi ne bakwata Embaga ey'Emigaati Egitali Mizimbulukuse okumala ennaku musanvu nga bajjudde essanyu lingi; Abaleevi ne bakabona ne batenderezanga MUKAMA buli lunaku, nga bakuba n'ebivuga eby'okumutendereza.

²² Keezeekiya n'ayogera ebigambo eby'okugumya Abaleevi bona abaalaga nga bategeera obuwereza bwa MUKAMA. Abantu ne balya emmere ey'embaga okumala ennaku musanvu, ne bawaayo ssaddaaka ez'ebiweebwayo olw'emirembe, ne batendereza MUKAMA Katonda wa bajjajaabwe.

²³ Ekibiina kyonna ne bakkiriziganya okweyongerayo ennaku endala musanvu nga bali ku mbaga; bwe batyo ne bamala ennaku endala musanvu nga bajaguza.

²⁴ Keezeekiya kabaka wa Yuda n'awa ekibiina ente ennume nga nto lukumi n'endiga kasanvu okuba ebiweebwayo, ne bakabona bangi nnyo ne beetukuza.

²⁵ Ekibiina kyonna ekya Yuda, ne bakabona, n'Abaleevi, n'ekibiina kyonna ekyava mu Isirayiri, n'abagenyi abaali bavudde mu nsi ya Isirayiri, n'abagenyi abaabeeranga mu Yuda ne bajaguliza wamu.

²⁶ Ne waba essanyu lingi mu Yerusaalemi kubanga okuva mu biro bya Sulemaani mutabani wa Dawudi kabaka wa Isirayiri, waali tewabangawo kintu kifaanana bwe kityo mu Yerusaalemi.

²⁷ Awo bakabona n'Abaleevi ne bayimirira ne basabira abantu omukisa, Katonda n'abawulira; kubanga okusaba kwabwe kwatuuka mu kifo kye ekitukuvu gy'abeera, mu ggulu.

2 Ebyomumirembe 31

¹ Ebyo byonna bwe byaggwa, Abayisirayiri bonna abaaliyo ne bagenda mu bibuga bya Yuda, ne baasaayasa amayinja agaasinzbwanga, ne bamenyaamena n'empagi za Baasera. Ne basaanyizaawo ddala ebifo ebigulumivu n'ebyoto ebyali mu Yuda, ne mu Benyamini, ne mu Efulayimu ne mu Manase. Awo Abayisirayiri bwe baamala okubisaanyaawo byonna, ne baddayo mu bibuga byabwe, ku butaka bwabwe.

Ebirabo eby'Okusinza

² Keezeekiya n'addirakababona n'Abaleevi n'abassa mu bibinja, buli omung'obuweereza bwe bwali, oba kabona oba muleevi, okuwangayo ebiweebwayo ebyokebwa n'ebiweebwayo olw'emirembe okuveerezanga, n'okwebazanga, n'okutenderezanga ku nzigi eza yeekaalu ya MUKAMA.

³ Kabaka n'awaayo ku byobugagga bwe ebiweebwayo ebyokebwa eby'enkya n'eb'y'akawungeezi, n'ebiweebwayo ebyokebwa ebya ssabiiti, n'eb'y'emyezi egyakaboneka, n'assaawo n'embaga ezaalagirwa nga bwe kyawandiikibwa mu tteeka lya MUKAMA.

⁴ N'alagira abantu abaabeeranga mu Yerusaalemi okuwangayo omugabo nga bwe kyaliki bagwanira eri bakabona n'Abaleevi, nabo beeweerengayo ddala nga bwe kyalagirwa mu tteeka lya MUKAMA.

⁵ Awo ekiragiro ekyo bwe kyabuna wonna, amangwago Abayisirayiri ne bawaayo ku bibala byabwe ebibereberye bingi eby'enjaano, n'ebya wayini omusu, n'eb'y'amatuta, n'eb'y'omubisi gw'enjuki ne ku ebyo byonna ebyava mu nnimiro. Ne baleeta bingi nnyo, ekitundu eky'ekkumi ku buli kintu.

⁶Abantu ba Isirayiri ne Yuda abaabeeranga mu bibuga bya Yuda, nabo ne baleeta ekimu eky'ekkumi ku nte n'endiga, n'ekimu eky'ekkumi eky'ebintu ebyatukuzibwa ebyayawulirwa MUKAMA Katonda waabwe, ne babituumu entuumo.

⁷Baatandika okutuumu ebintu ebyo entuumo mu mwezi ogwokusatu ne bamaliriza mu mwezi ogw'omusanvu.

⁸Awo Keezeekiya n'abakungu be, bwe bajja ne balaba entuumo ne beebaza MUKAMA, ne basabira n'abantu be, Isirayiri, omukisa.

⁹Keezeekiya n'abuuza bakabona n'Abaleevi ebikwata ku ntuumu.

¹⁰Azaliya kabona asinga obukulu ow'omu nnyumba ya Zadooki n'amuddamu nti, "Okuva abantu lwe baatandika okuleeta ebirabo byabwe mu yeekaalu ya MUKAMA, tubadde n'eb yokulya ebiwera n'ebirala ne bifikkawo, kubanga MUKAMA awadde abantu be omukisa, n'ebfisseewo bye bino obungi."

¹¹Awo Keezeekiya n'alagira bateeketeke amaterekero mu yeekaalu ya MUKAMA, ne bagateekateeka.

¹²Ne balyoka baleeta ebirabo, ebintu eby'ekimu eky'ekkumi, n'ebintu ebyatukuzibwa. Konaniya Omuleevi ye yavunaanyizibwanga ebintu ebyo, ate nga Simeeyi muganda we ye mumyuka we.

¹³Yekyeri, ne Azaziya, ne Nakasi, ne Asakeri, ne Yerimosi, Yozabadi, ne Eryeri, ne Isumakiya, ne Makasi ne Benaya be baabayambangako. Konaniya ne Simeeyi muganda we, baalondebwa Kabaka Keezeekiya ne Azaliya omukungu omukulu eyavunaanyizibwanga yeekaalu ya Katonda.

¹⁴Kole mutabani wa Imuna Omuleevi, omuggazi w'omulyango ogw'ebuvanjuba, ye yavunaanyizibwanga ebyo bye baawangayo eri Katonda ku bwabwe awatali kuwalirizibwa, ng'agabanyamu ebyatonebwanga eri MUKAMA, n'ebirabo ebyayawulibwanga.

¹⁵Edene, ne Miniyamini, ne Yesuwa, ne Semaaya, ne Amaliya ne Sekaniya, be baamuyambangako n'obwesigwa mu bibuga bya bakabona okugabiranga bakabona bannaabwe ng'ebibinja byabwe bwe byali, abakulu n'abato.

¹⁶Ate era baagabiranga n'abalenzi ab'emyaka esatu n'okukirawo abaali babalibbwa ng'okuzaalibwa kwe mbala bwe kwalinga, abo bona abayingiranga mu yeekaalu ya MUKAMA okutuukirizanga emirimu gyabwe nga bwe kyabagwaniranga, mu bibinja byabwe.

¹⁷Ne bagabiranga ne bakabona abaabalibwa ng'enzaalwa mu kubala okw'okuzaalibwa kwabwe bwe kwali, n'Abaleevi abaali ab'emyaka amakumi abiri n'okukirawo ne babagabira ng'eb'obuvunaanyizibwa bwabwe mu bibinja byabwe bwe byali.

¹⁸Omwo mwe mwali abaana abato, n'abakyala, ne batabani baabwe, ne bawala baabwe ng'ebitundu byabwe bwe byali biwandiikiddwa mu byafaayo eby'okuzaalibwa. Ne babeera beesigwa mu kwekuuma nga batukuvu.

¹⁹Bazzukulu ba Aloonni, bakabona abaabeeranga ku ttaka okwalimibwanga, eryabanga ery'ebibuga byabwe, mu buli kibuga, buli musajja mu bo yaweebwa omugabo, n'abo bonna abaali bawandiikiddwa mu byafaayo eby'okuzaalibwa kw'Abaleevi, nabo ne bagabana.

²⁰Bw'atyo Keezeekiya bwe yakola ne mu Yuda yonna, n'akola ebirungi era ebituufu n'obwesigwa mu maaso ga MUKAMA Katonda we.

²¹Buli mulimu gwe yatandika mu buweereza mu yeekaalu ya Katonda, ng'agoberera amateeka n'ebiragiro, yanoonyanga Katonda we, era n'akolanga n'omutima gwe gwonna, n'alaba omukisa.

2 Ebyomumirembe 32

Sennakeribu Atiisatiisa Okulumba Yerusaalemi

¹Oluvannyuma lw'ebyo byonna Keezeekiya bye yakola n'obwesigwa, Sennakeribu kabaka w'e Bwasuli n'alumba Yuda, n'asiisira ebweru w'ebibuga ebiriko bbugwe, n'alowooza mu mutima gwe okubyetwalira.

²Awo Keezeekiya bwe yalaba nga Sennakeribu azze, era ng'amaliridde okulwana ne Yerusaalemi,

³n'ateesa n'abakungu be n'abasajja be abalwanyi abazira, ku ky'okuziba enzizi ezaali ebweru w'ekibuga, era ne bakikola.

⁴Ekibiina kinene eky'abantu ne kikuŋjaana, ne baziba enzizi zonna n'akagga akayita mu nsi, nga bagamba nti, "Lwaki bakabaka b'e Bwasuli bajja ne basanga amazzi amangi bwe gatyo?"

⁵N'afuba nnyo n'addaabiriza ebitundu byonna ebya bbugwe ebyali bimenyese, n'azimba n'eminaala ku bbugwe, n'anyweza n'ebigulumu ebyanywezanga ekibuga kya Dawudi. N'akozesa n'eb yokulwanyisa bingi n'engabo nnyingi.

⁶N'alonda abaduumizi b'eggye okukulembera abantu, ne babakuŋjaanyiza gy'ali mu kifo ekigazi awali wankaaki w'ekibuga; n'abagumya ng'agamba nti,

⁷"Mube n'amaanyi, mugume omwoyo. Temutya so temwelariikirira olwa kabaka w'e Bwasuli n'eggye lye eddene, kubanga waliwo eggye eririsinga eriri awamu naffe.

⁸Sennakeribu akozesa omukono ogw'omubiri, naye ffe tulina MUKAMA Katonda waffe atulwanirira mu ntalo zaffe." Abantu ne baguma omwoyo olw'ebigambo Keezeekiya kabaka wa Yuda bye yayogera.

⁹ Awo Sennakeribu kabaka w'e Bwasuli n'eggye lye lyonna bwe baali bakyali e Lakisi kye baali bazingizza, n'atuma abakungu be e Yerusaalemi eri Keezeekiya kabaka wa Yuda, n'eri abantu bona aba Yuda abaaliyo, ng'agamba nti,

¹⁰ "Bw'ati bw'ayogera Sennakeribu kabaka w'e Bwasuli nti, 'Mwesiga ki okusigala mu Yerusaalemi nga kizingiziddwa?

¹¹ Mulowooza nga Keezeekiya bw'ayogera nti, "MUKAMA Katonda waffe alitulokola mu mukono gwa kabaka w'e Bwasuli," abatalimba, n'okwagala okubassa enjala n'ennyonta?

¹² Keezeekiya si ye yaggyawo ebifo ebigulumivu n'ebiyoto, n'alagira Yuda ne Yerusaalemi ng'agamba nti, "Munaasinzizanga mu maaso g'ekyoto kimu, era okwo kwe munaayoterezanga obubaane"?

¹³ "Temumanyi, nze ne bajjajjange bye twakola amawanga gonna ag'omu nsi endala? Bakatonda abamawanga ago, baayinza okubawonya mu mukono gwange?

¹⁴ Ani ku bakatonda abamawanga ago bajjajjange ge baazikiriza, eyayinza okubalokola mu mukono gwange? Katonda wammwe anaabawonya atya mu mukono gwange?

¹⁵ Kale nno, Keezeekiya aleme kubalimbalimba newaakubadde okubasendasenda mu nsonga eyo. Temumukkiriza, kubanga tewali katonda ow'eggwanga lyonna oba bwakabaka, eyayinza okulokola abantu be mu mukono gwange newaakubadde eyayinza okubalokola mu mukono gwa bajjajjange. Kale Katonda wammwe alibawonya atya mu mukono gwange?"

¹⁶ Abakungu ba Sennakeribu ne boogera bingi nnyo n'okusingawo ku MUKAMA Katonda ne ku muddu we Keezeekiya.

¹⁷ Kabaka oyo n'awandiika n'amabaluwa agavuma MUKAMA Katonda wa Isirayiri, ng'agamba nti, "Nga bakatonda abamawanga ag'ensi bwe bataabawonya mu mukono gwange, bw'atyo ne Katonda wa Keezeekiya bw'ataliwonya bantu be mu mukono gwange."

¹⁸ Ne bakoowoola abantu ba Yerusaalemi abaali ku bbugwe mu Iw'Ebbulaniya, nga babatiisatiisa baggweemu amaanyi, balyoke bawambe ekibuga.

¹⁹ Ne boogera ku Katonda wa Yerusaalemi nga bwe baayogeranga ku bakatonda abamawanga amalala ag'omu nsi endala, abakolebwa abantu.

²⁰ Awo Kabaka Keezeekiya ne nnabbi Isaaya mutabani wa Amozi ne basaba nga bakaabira eri eggulu ku nsonga eyo.

²¹ MUKAMA n'atuma malayika, n'atemaatema abasajja abalwanyi abazira ab'amaanyi bona n'abaduumizi, n'abakungu mu nkambi ya kabaka w'e

Bwasuli. Sennakeribu n'addayo mu nsi ye ng'ensonyi zimukutte. Bwe yayingira mu yeekaalu ya katonda we, abamu ku batabani be ne bamutta n'ekitala.

22Awo MUKAMA n'alokola Keezeekiya n'abantu ba Yerusaalemi mu mukono gwa Sennakeribu kabaka w'e Bwasuli ne mu mukono gw'abalabe baabwe bona abalala. N'abaakuumanga enjuuyi zonna.

23Bangi ne baleetera MUKAMA ebirabo e Yerusaalemi, ne Keezeekiya kabaka wa Yuda n'afuna ebirabo eby'omuwendo omungi. N'okuva ku lunaku olwo n'aweebwa ekitiibwa kinene mu mawanga gonna.

Amalala ga Keezeekiya, Obuwanguzi bwe, n'Okufa kwe

24Mu biro ebyo, Keezeekiya n'alwala nnyo kumpi n'okufa. N'asaba MUKAMA amuwonye, n'amuddamu n'akabonero.

25Naye Keezeekiya n'ateebaza ebyekisa ekya mukolerwa, olw'amalala agaali mu ye. Obusungu bwa MUKAMA kyebwava bubuubuukira ku ye ne ku Yuda ne ku Yerusaalemi.

26Oluvannyuma, Keezeekiya ne yeenenya amalala agaali mu ye, ku lulwe ne ku lw'abantu ab'omu Yerusaalemi, ekiruyi kya MUKAMA ne butababuubuukirako mu mirembegya Keezeekiya.

27Keezeekiya yalina eby'obugagga bingi nnyo n'ekitiibwa, ne yeezimbira n'amawanika ag'okukuumirangamu effeeza, ne zaabu, n'amayinja ag'omuwendo omungi, n'ebiyakaloosa, n'engabo, n'ebintu eby'engeri zonna eby'omuwendo.

28N'azimba n'amaterekero ag'enjaano, ne wayini, n'amatufuta; n'azimba n'ebiraalo eby'ebika by'ente byonna, n'ebifo eby'ebisibo by'endiga.

29Ne yeezimbira ebibuga, ne yeefunira n'ebisibo n'amagana mangi, kubanga Katonda yali amuwadde eby'obugagga bingi nnyo nnyini.

30Keezeekiya, ye yaziba oluzzi olwa waggulu olwa Gikoni, amazzi n'agaserengesa ku luuyi olw'ebugwanjuba olw'ekibuga kya Dawudi. N'alaba omukisa mu buli kye yakolanga.

31Naye mu bigambo eby'ababaka abaatumibwa abakungu b'e Babulooni okumubuuza ku byamagero ebyakolebwa mu nsi ye, Katonda n'amugeza alyoke ategeere byonna ebyali mu mutima gwe.

32Ebyafaayo ebirala ebyabaawo mu mirembegya Keezeekiya, n'ebikolwa bye ebirungi eby'obunyiikivu, byawandiikibwa mu kwolesebwa kwa Isaaya nnabbi mutabani wa Amozi, mu kitabo kya bassekabaka ba Yuda ne Isirayiri.

33Keezeekiya ne yeebakira wamu ne bajjajjaabe, n'aziikibwa mu masiro g'abazzukulu ba Dawudi, era Yuda yonna, n'abatuuze bona aba Yerusaalemi ne

bamukungubagira ne bamuwa ekitiibwa ne mu kufa kwe. Manase mutabani we n'amusikira.

2 Ebyomumirembe 33

Manase Kabaka wa Yuda

¹ Manase yalya obwakabaka nga wa myaka kkumi n'ebiri, n'afugira emyaka amakumi ataano mu etaano mu Yerusaalemi.

² N'akola ebitaali bya butuukirivu mu maaso ga MUKAMA, ng'agoberera ebikolwa eby'ekivve eby'amawanga MUKAMA ge yagoba mu maaso g'Abayisirayiri.

³ N'addaabiriza ebifo ebigulumivu kitaawe Keezeekiya bye yali amenyeemenye, n'azimbira ne Baali ebyoto, n'akola ne Baasera, n'asinza era n'aweereza n'eggye lyonna ery'oku ggulu.

⁴ N'azimba ebyoto mu yeekaalu ya MUKAMA, MUKAMA gye yayogerako nti, "Mu Yerusaalemi erinnya lyange mwe linaabeeranga emirembe gyonna."

⁵ N'azimba ebyoto eby'okusinzizangako egghe lyonna ery'oku ggulu, mu mpya zombi eza yeekaalu ya MUKAMA.

⁶ N'awaayo abaana be ng'ekiweebwayo, n'abookera mu kiwonvu ekya mutabani wa Kinomu, n'akola eby'obufumu, n'alagulira mu bire, n'akola eby'obulogo, n'agendanga n'eri abaliko emizimu ne ddayimooni. N'akola ebitaali bya butuukirivu bingi mu maaso ga MUKAMA, n'asunguwaza nnyo MUKAMA.

⁷ N'addiria ekifaananyi ekyole kye yakola, n'akiteeka mu yeekaalu ya Katonda, Katonda gye yayogerako eri Dawudi ne Sulemaani mutabani we nti, "Mu yeekaalu eno ne mu Yerusaalemi muno, bye nalonda mu bika byonna ebya Isirayiri, mwe munaabeeranga Erinnya lyange emirembe gyonna.

⁸ Sijjululenga nate kigere kya Isirayiri okuva mu nsi gye nawa bajajjammwe, bwe baneekuumanga okukola bye mbalagidde, nga bagoberera amateeka gonna, n'ebiragiro, n'obulombolombo bye nnawa Musa."

⁹ Naye Manase n'asendasenda Yuda n'abantu b'e Yerusaalemi okukola ebitaali bya butuukirivu okusinga amawanga MUKAMA ge yazikiririza mu maaso g'Abayisirayiri.

¹⁰ MUKAMA n'ayogera ne Manase n'abantu be, kyokka ne batassaayo mwoyo.

¹¹ MUKAMA kyeyava abasindikira abaduumizi b'eggye lya kabaka w'e Bwasuli, ne basiba Manase mu njegere ne mu masamba, ne bateeka eddobo mu nnyindo ye, ne bamutwala e Babulooni nga musibe.

¹² Ng'ali eyo mu nnaku ye, ne yeegayirira MUKAMA Katonda we, ne yeetoowaza nnyo mu maaso ga Katonda wa bajajjaabe.

¹³N'amusaba, MUKAMA n'awulira okwegayirira kwe, n'amukomyawo e Yerusaalemi n'eri obwakabaka bwe. Awo Manase n'ategeera nga MUKAMA ye Katonda.

¹⁴Oluvannyuma lw'ebyo n'addaabiriza bbugwe ow'ebweru ow'ekibuga kya Dawudi, ku luuyi olw'ebugwanjuba olwa Gikoni, mu kiwonvu, okutuuka awayingirirwa mu Mulyango ogw'Ebyennyanja, n'okwetooloola olusozi lwa Oferi, n'okumuzimba n'amuzimba ng'asingako bbugwe eyaliwo obuwanyu. N'ateeka n'abaduumizi b'eggye mu bibuga byonna ebiriko bbugwe mu Yuda.

¹⁵N'aggyamu bakatonda abamawanga n'ekifaananyi ekyole mu yeekaalu ya MUKAMA, n'ebyoto byonna bye yazimba ku kasoz ka yeekaalu ne mu Yerusaalemi, n'abisuula ebweru w'ekibuga.

¹⁶N'addaabiriza ekyoto kya MUKAMA, n'aweerayo ssaddaaka ez'ebiweebwayo olw'emirembe n'ez'okwebaza, n'alagira Yuda okuweerezanga MUKAMA Katonda wa Isirayiri.

¹⁷Wabula abantu bo, ne beeyongera okuweerangayo ssaddaaka ku bifo ebigulumivu, nga baziwaayo eri MUKAMA Katonda waabwe.

¹⁸Ebyafaayo ebirala ebyabaawo mu mirembe gya Manase, ng'omwo mwe muli okusaba kwe eri MUKAMA n'ebigambo abalabi bye baamutegeezanga mu linnya lya MUKAMA Katonda wa Isirayiri, byawandiikibwa mu bitabo eby'omu mirembe gya bassekabaka ba Isirayiri.

¹⁹Okusaba kwe, n'okusaasira kwa Katonda gy'ali, n'ebibi bye, n'obutali bwesigwa bwe, n'ebifo ebigulumivu bye yazimba, ne Baasera, n'ebifaananyi ebyole bye yassaawo nga taneetoowaza, byonna byawandiikibwa mu bitabo eby'omu mirembe gy'abalabi.

²⁰Manase ne yeebakira wamu ne bajjajaabe, n'aziiikibwa mu lubiri lwe, Amoni mutabani we n'amusikira.

Amoni kabaka wa Yuda

²¹Amoni yali wa myaka amakumi abiri mu ebiri we yaliira obwakabaka.

²²N'akola ebitaali bya butuukirivu mu maaso ga MUKAMA, nga Manase kitaawe bwe yakola.

²³Naye obutafaanana nga kitaawe Manase, Amoni n'ayongera ekibi ku kibi, n'ateetoowaza mu maaso ga MUKAMA.

²⁴Abakungu ba Amoni ne bamusalira olukwe ne bamuttira mu lubiri lwe.

²⁵Naye Abantu ab'omu nsi ne batta abo bona abasala olukwe okutta kabaka Amoni; ne bafuula Yosiya mutabani we okuba kabaka mu kifo kye.

2 Ebyomumirembe 34

Enkyukakyuka Yosiya ze yaleeta

- ¹ Yosiya yali wa myaka munaana bwe yalya obwakabaka, era n'afugira emyaka amakumi asatu mu gumu mu Yerusaalemi.
- ² N'akola ebirungi mu maaso ga MUKAMA, n'atambulira mu makubo ga Dawudi jjajjaawe, n'akwata ekkubo lya MUKAMA eggolokofu.
- ³ Mu mwaka ogw'omunaana ogw'okufuga kwe, ng'akyali muto, n'atandika okunoonya Katonda wa Dawudi jjajjaawe, era mu mwaka ogw'ekkumi n'ebiri n'atandika okuggya ebifo ebigulumivu, ne Baasera, n'ebifaananyi ebyole, n'ebifaananyi ebisaanuuse mu Yuda ne mu Yerusaalemi.
- ⁴ N'alagira bamenyeemeeny ebyoto bya Baali, n'atemaatema ebyoto kwe baayoterezanga obubaane ebyali waggulu waabyo, n'amenyaamenya ne Baasera, n'ebifaananyi ebyole, n'ebifaananyi ebisaanuuse; n'abisesebbulu, enfuufu yaabyo n'agimansula ku malaalo g'abo abaaweerangayo ssaddaaka.
- ⁵ N'ayokera amagumba ga bakabona abaakolanga eby'ebivve ebyo ku byoto ebyo, n'atukuza Yuda ne Yerusaalemi.
- ⁶ Ne mu bibuga bya Manase, ne Efulayimu, ne Simyoni, okutuukira ddala mu Nafutaali, ne mu matongo gaabyo okubyetooloola,
- ⁷ n'amenyaamenya ebyoto ne Baasera, n'asesebbulu n'ebifaananyi ebyole, n'atemaatema ebyoto byonna kwe baayokeranga obubaane mu Isirayiri yonna, n'olvannyuma n'addayo e Yerusaalemi.
- ⁸ Awo mu mwaka ogw'ekkumi n'omunaana ogw'okufuga kwe ng'amaze okulongoosa ensi ne yeekaalu, n'alonda Safani mutabani wa Azaliya, ne Maaseya omwami w'ekibuga, ne Yowa mutabani wa Yowakazi omujukiza, okuddaabiriza yeekaalu ya MUKAMA Katonda we.
- ⁹ Ne bagenda eri Kirukiya kabona asinga obukulu ne bawaayo ensimbi ezaaleetebwa mu yeekaalu ya Katonda, Abaleevi abaggazi ze baali basoloozezza mu bantu b'e Manase, ne Efulayimu, n'ekitundu kyonna ekyasigalawo, ne Yuda yonna, ne Benyamini, n'okuva eri abantu b'e Yerusaalemi.
- ¹⁰ Ne bazikwasa abakozi abaalondebwu okulabirira omulimu gwa yeekaalu ya MUKAMA. Abo be basajja abaasasulanga abakozi abaddaabirizanga n'okulongoosa yeekaalu.
- ¹¹ Ababazzi n'abazimbi nabo ne baweebwa ensimbi okugula amayinja amawoole, n'embaawo ez'ebizimbe bakabaka ba Yuda bye baalagajjalira okuddaabiriza.
- ¹² Abasajja ne bakola omulimu n'obwesigwa. Abaababalbiriranga baali: Yakasi ne Obadiya Abaleevi ab'omu kika kya Merali, ne Zekkaliya ne Mesullamu ab'omu kika ky'Abakokasi. Abaleevi bona abakubanga ebivuga

¹³be baavunaanyizibwanga abapakasi, n'okulabirira abakozi bonne mu kuweereza okw'engeri zonna. Abamu ku Baleevi baali bawandiisi, n'abalala ng'abaami, n'abalala nga baggazi.

Ekitabo ky'Amateeka Kirabibwa

¹⁴Awo bwe baali bakunjaanya ensimbi ze baggya mu yeekaalu ya MUKAMA, Kirukiya kabona, n'azuula ekitabo eky'amateeka ga MUKAMA agaaweebwa Musa.

¹⁵Awo Kirukiya kabona n'agamba Safani omuwandiisi nti, "Nzudde ekitabo eky'amateeka mu yeekaalu ya MUKAMA." N'akiwa Safani.

¹⁶Safani n'akitwalira kabaka, n'amutegeeza ne ku by'omulimu ng'agamba nti, "Byonna abaddu bo bye baalagirwa babikola.

¹⁷Ensimbi ezaali mu yeekaalu ya MUKAMA ziweereddwa abalabirira n'abakozi."

¹⁸Safani omuwandiisi n'ategeeza kabaka nti, "Kirukiya kabona ampadde ekitabo." Awo Safani n'akisomera kabaka.

¹⁹Kabaka bwe yawulira ebigambo by'amateeka, n'ayuza ebyambalo bye.

²⁰N'alagira Kirukiya ne Akikamu mutabani wa Safani, ne Abudoni mutabani wa Mikka, ne Safani omuwandiisi, ne Asaya omuddu wa kabaka, ng'ayogera nti,

²¹"Mugende mumbulize ku MUKAMA, nze n'abasigadde mu Isirayiri ne mu Yuda, ku bikwata ku bigambo eby'omu kitabo ekizuuliddwa, kubanga obusungu bwa MUKAMA bungi nnyo nnyini era butubuubukirako olwa bajjajjaffe abataagoberera kigambo kya MUKAMA okukikola nga bwe kyawandiikibwa mu kitabo kino."

²²Awo Kirukiya n'abo kabaka be yali atumye ne bagenda eri Kuluda nnabbi omukazi, muka Sallumu mutabani wa Tokasi muzzukulu wa Kasula omuwanika w'ebiyambalo. Yabeeranga mu Yerusaalemi mu kitundu ekyokubiri.

²³N'abagamba nti, "Bw'ati bw'ayogera MUKAMA, Katonda wa Isirayiri nti, 'Mutegeeze omusajja abatumye nti,

²⁴bw'ati bw'ayogera MUKAMA nti, "Laba ndireeta ku kifo kino ne ku bantu baamu akabi, n'ebikolimo byonna ebyawandiikibwa mu kitabo, ekyasomeddwa mu maaso ga kabaka wa Yuda.

²⁵Kubanga banvuddeko ne bookera bakatonda abalala obubaane, era bansunguwazizza n'emirimu gyonna egy'emikono gyabwe. Kyennaava mbasunguwalira ne wataba n'omu akkakkanya busungu bwange."

²⁶Naye mugambe kabaka wa Yuda eyabatumye okujja okwebuuza ku MUKAMA nti, 'Bw'ati bw'ayogera MUKAMA Katonda wa Isirayiri nti,

²⁷"Kubanga omutima gwo gubadde mumenyefu ne weetowaza mu maaso ga Katonda, bwe wawulidde ebigambo bye, ebikwata ku kifo kino n'abo

abakibeeramu, ne weetoowaza mu maaso gange, n'oyuza ebyambalo byo, n'okaabira mu maaso gange, nkuwulidde.

²⁸Laba, ndikukuŋŋanyaiza eri bajjajaabo, n'ofa mirembe, era amaaso go tegalirega ku kabi ke ndireeta ku kifo kino ne ku bantu baamu."'" Ne bazaayo obubaka eri kabaka.

²⁹Awo kabaka n'akuŋŋanya abakadde bona ab Yuda n'ab'omu Yerusaalemi.

³⁰N'ayambuka mu yeekaalu ya MUKAMA, n'abantu bona ab Yuda, n'abantu b'e Yerusaalemi, ne bakabona, n'abaleevi, n'abantu bona ab'ekitiibwa n'abatali ba kitiiibwa. N'asoma ebigambo byonna eby'omu kitabo eky'endagaano, ekyazuulibwa mu yeekaalu ya MUKAMA.

³¹Kabaka n'ayimirira mu kifo kye, ne yeeyama mu maaso ga MUKAMA, okutambuliranga mu mpya za MUKAMA n'okukwatanga amateeka ge, n'ebyo bye yategeeza, n'ebiragiro bye, n'omutima gwe gwonna n'omwoyo gwe gwonna, okutuukirizanga ebigambo ebyawandiikibwa mu kitabo.

³²Oluvannyuma n'alagira bona abaali mu Yerusaalemi ne mu Benyamini okweyama. Abatuuze b'omu Yerusaalemi ne bakola ng'endagaano ya Katonda, Katonda wa bajjajaabwe bw'egamba.

³³Yosiya n'aggya eby'emizizo byonna ku butaka bwonna obw'Abayisirayiri, n'alagira bona abaali mu Isirayiri okuweerezanga MUKAMA Katonda waabwe. Mu kufuga kwe kwonna, tebaava ku MUKAMA Katonda wa bajjajaabwe.

2 Ebyomumirembe 35

Yosiya Akwata Embaga ey'Embaga ey'Okuyitako

¹Awo Yosiya n'akwata Embaga ey'Okuyitako mu Yerusaalemi, era ne batta omwana gw'endiga, ogw'Embaga ey'Okuyitako ku lunaku olw'ekkumi n'enya olw'omwezi ogw'olubereberye.

²N'alonda bakabona mu bifo eby'obuvunaanyizibwa bwabwe, n'abakuutira mu kuweereza kwabwe mu yeekaalu ya MUKAMA.

³N'agamba Abaleevi abaayigirizanga Isirayiri yenna, era abaali abawonge eri MUKAMA nti, "Muteke essanduuko entukuvu mu yeekaalu ya Sulemaani mutabani wa Dawudi, kabaka wa Isirayiri, gye yazimba. Si yaakwetikkanga ku bibegabega byammwe. Kaakano muweereze MUKAMA Katonda wammwe n'abantu be Isirayiri,

⁴mweteeketeke ng'ennyumba za bajjajammwe bwe ziri mu masiga gammwe, nga mugoberera ebiragiro Dawudi kabaka wa Isirayiri ne Sulemaani mutabani we bye yawandiika.

⁵“Muyimirire awatukuvu mu bibinja eby’Abaleevi eby’ennyumba za bajajjammwe eza baganda bammwe abantu abaabulijjo.

⁶Mutte ennyana n’abaana b’endiga ab’Embaga ey’Okuyitako, mwetukuze, muteekereteekere baganda bammwe, nga mugoberera ebyo MUKAMA bye yalagira ng’ayita mu Musa.”

⁷Yosiya n’agabira abantu abaabulijjo bona abaaliwo endiga n’embuzi emitwalo esatu okuba ebiweebwayo olw’Embaga ey’Okuyitako, n’ente enkumi ssatu okuva mu byobugagga bwe.

⁸Abakungu be nabo, ku bwabwe ne bagabira abantu ne bakabona n’abaleevi ebintu. Kirukiya, ne Zekkaliya ne Yekyeri abaddukanyanga emirimu gya yeekaalu ya MUKAMA ne bawa bakabona abaana b’endiga n’ab’embuzi enkumi bbiri mu lukaaga, n’ente ebikumi bisatu.

⁹Konaniya, ne Semaaya ne Nesaneri, baganda be, ne Kasabiya ne Yeyeri ne Yozabadi, abakulu b’Abaleevi, nabo ne bawa Abaleevi abaana b’endiga n’ente enkumi ttaano nga by’ebiweebwayo eby’Embaga ey’Okuyitako.

¹⁰Ne bateekateeka eby’okusinza, bakabona ne bayimirira mu bifo byabwe n’Abaleevi mu bibinja byabwe nga kabaka bwe yalagira.

¹¹Ne batta abaana b’endiga ab’Embaga ey’Okuyitako, bakabona ne bamansira omusaayi gwe baggyanga mu bisolo, Abaleevi bye baabaaganga.

¹²Ne baawuula ebiweebwayo ebyokebwa balyoke babigabire abantu abaabulijjo mu bibinja byabwe mu nnyumba za bajajjaabwe, babiweeyo eri MUKAMA, nga bwe kyawandiikibwa mu kitabo kya Musa. Bwe batyo bwe baakola n’ente.

¹³Ne bookya ensolo ez’Embaga ey’Okuyitako mu muliro nga bwe kyawandiikibwa, ne bafumba ebiweebwayo ebitukuvu mu ntamu, ne mu sefuliya ne mu nsaka, n’oluvannyuma ne babigabira mangu buli muntu owabulijjo.

¹⁴Oluvannyuma lw’ebyo Abaleevi ne bakabona ne beeteekerateekera bo ne bakabona kubanga bakabona bazzukulu ba Aloon tebaalina bbanga olw’omulimu ogw’okuwaayo ebiweebwayo n’amasavu gwe baakola okuzibya obudde. Abaleevi kyebaava beeteekerateekera bo ne bakabona batabani ba Aloon.

¹⁵N’abayimbi bazzukulu ba Asafu baali mu bifo byabwe nga Dawudi, ne Asafu, ne Kemani ne Yedusuni, omulabi wa kabaka, bwe baalagira. N’abaggazi baali ku buli luggi, nga tebava ku kuweereza kwabwe, kubanga baganda baabwe Abaleevi baabateekerateekera.

¹⁶Bwe kutyo okuweereza kwonna okw'Embaga ey'Okuyitako n'okuwaayo ebiweebwayo ebyokebwa ku kyoto kya MUKAMA bwe kwali, Kabaka Yosiya kwe yalagira.

¹⁷Abayisirayiri abaaliwo mu kiseera ekyo, ne bakwata Embaga ey'Okuyitako, ne bafumba n'embaga ey'Emigaati egitali mizimbulukuse, okumala ennaku musanvu.

¹⁸Waali tewabangawo Mbaga ya Kuyitako ng'eyo mu Isirayiri okuva mu nnaku za Samwiri nnabbi, nga eyaliwo mu kiseera kya Yosiya, ne bakabona n'Abaleevi, ne Yuda yonna ne Isirayiri abaaliwo, n'abatuuze ba Yerusaalemi.

¹⁹Embaga ey'Okuyitako eyo yakwatibwa mu mwaka gwa kkumi na munaana ogw'okufuga kwa Yosiya.

Okufa kwa Yosiya

²⁰Oluvannyuma lw'ebyo byonna, Yosiya ng'amaze okuteekateeka yeekaalu, Neeko kabaka w'e Misiri n'atabaala Kalukemisi ku mugga Fulaati, ne Yosiya n'agenda amutabaale.

²¹Naye Neeko n'amutumira ababaka ng'amugamba nti, "Onvunaana ki gwe kabaka wa Yuda? Sitabaala gwe leero, wabula Kalukemisi ggwe nnwana naye, kubanga Katonda andagidde okwanguwa. Noolwekyo toziyiza Katonda, kubanga ali wamu nange. Bw'otoobeerwe anaakuzikiriza."

²²Naye Yosiya n'atamuwliriza, ne yeebulizabuliza mu ggye n'agenda okumutabaala. N'atawliriza bigambo bya Neeko ebyava eri Katonda, naye n'agenda okumulwanyisa mu lusenyi lwa Megiddo.

²³Abalasi ne balasa kabaka Yosiya n'agamba abaserikale be nti, "Munziggyeewo kubanga nfumitiddwa nnyo."

²⁴Awo ne bamuggyga mu ggaali lye ne bamuteeka mu ggaali eddala lye yalina, ne bamuleeta e Yerusaalemi, era eyo gye yafiira. N'aziikibwa mu masiro ga bajajjaabe. Yuda yonna ne Yerusaalemi ne bamukungubagira.

²⁵Yeremiya n'ayiiya ennyimba ez'okukungubagira Yosiya, era ne leero abayimbi bona abasajja n'abakazi bayimba nga bamujjukira mu nnyimba ez'okukungubaga. Ennyimba ezo zaafuuka kijjukizo mu Isirayiri era zawandiikibwa mu kungubaga.

²⁶Ebyafaayo ebirala ebyaliwo mu mirembe gya Yosiya, n'ebikolwa bye ebirungi, nga bwe byawandiikibwa mu tteeka lya MUKAMA,

²⁷ne byonna okuva ku ntandikwa ye okutuuka ku nkomerero ye, byawandiikibwa mu kitabo kya bassekabaka ba Isirayiri ne Yuda.

2 Ebyomumirembe 36

¹Awo abantu b'ensi eyo ne balonda Yekoyakaazi mutabani wa Yosiya, n'asikira kitaawe mu Yerusaalemi.

Yekoyakaazi Kabaka wa Yuda

²Yekoyakaazi yali wa myaka amakumi abiri mu esatu bwe yalya obwakabaka, n'afugira mu Yerusaalemi emyezi esatu.

³Kabaka w'e Misiri yamugoba ku ntebe ey'obwakabaka mu Yerusaalemi, n'asalira Yuda obusuulu obwa ttani ssatu n'obutundu buna obwa ffeeza ne kilo amakumi asatu mu nnya eza zaabu.

⁴Kabaka w'e Misiri n'afuula Eriyakimu muganda wa Yekoyakaazi okuba kabaka wa Yuda ne Yerusaalemi, n'akyusa n'erinnya lye, n'amutuumma Yekoyakimu, naye n'atwala Yekoyakaazi muganda we nga musibe e Misiri.

Yekoyakimu Kabaka wa Yuda

⁵Yekoyakimu yali wa myaka amakumi abiri mu etaano bwe yalya obwakabaka, n'afugira emyaka kkumi na gumu mu Yerusaalemi. N'akola ebitali bya butuukirivu mu maaso ga MUKAMA Katonda we.

⁶Awo lumu Nebukadduneeza kabaka w'e Babulooni n'amulumba, n'amusiba mu masamba, n'amutwala e Babulooni.

⁷Nebukadduneeza n'atwala n'ebintu ebyali mu yeekaalu ya MUKAMA e Babulooni, n'abiteeka mu ssabo lye.

⁸Ebyafaayo ebirala ebyabaawo ku mulembe gwa Yekoyakimu, eby'ekivve bye yakola, ne byonna bye yavunaanibwa, byawandiikibwa mu kitabo kya bassekabaka ba Isirayiri ne Yuda. Yekoyakini mutabani we n'amusikira.

Yekoyakini Kabaka wa Yuda

⁹Yekoyakini yali wa myaka munaana bwe yalya obwakabaka, n'afugira emyezi esatu n'ennaku kkumi mu Yerusaalemi. N'akola ebitali bya butuukirivu mu maaso ga MUKAMA.

¹⁰Awo omwaka bwe gwali nga gunaatera okuggwaako, kabaka Nebukadduneeza n'amutumya, n'aleetebwa e Babulooni n'ebintu byonna eby'omuwendo okuva mu yeekaalu ya MUKAMA. Nebukadduneeza n'afuula Zeddekiya kitaawe omuto okuba kabaka wa Yuda ne Yerusaalemi.

¹¹Zeddekiya yali wa myaka amakumi abiri mu gumu bwe yalya obwakabaka, n'afugira emyaka kkumi na gumu mu Yerusaalemi.

¹²N'akola ebitali bya butuukirivu mu maaso ga MUKAMA Katonda we, n'ateetoowaza mu maaso ga nnabbi Yeremiya, eyayogeranga ekigambo kya MUKAMA.

¹³N'ajeemera ne kabaka Nebukadduneeza eyamulayiza mu maaso ga Katonda. N'akakanyaza ensingo ye n'omutima gwe, n'atakyuka kudda eri MUKAMA Katonda wa Isirayiri.

¹⁴Ate ne bakabona abakulu bona n'abantu, ne bataba beesigwa ne bagoberera eby'obukaafiiri eby'amawanga amalala, ne bagwagwawaza yeekaalu ya MUKAMA, gye yali atukuzizza mu Yerusaalemi.

Okugwa kwa Yerusaalemi

¹⁵Awo MUKAMA Katonda wa bajjajaabwe n'ayogera nabo ng'ayita mu babaka be, ng'asaasira abantu be n'ekifo mu abeera.

¹⁶Naye ne baduuliranga ababaka ba Katonda, ne banyoomanga n'ebigambo bye, ne basekereranga bannabbi be, okutuusa obusungu bwa Katonda bwe bwabuubuukira ku bantu be awatali kubasaasira.

¹⁷Kyeyava aweereza kabaka w'Abakaludaaya okubalumba, n'atta n'ekitala abavubuka baabwe mu nnyumba awasinzizibwa, n'atalekaawo muvubuka n'omu newaakubadde abawala abato, newaakubadde abasajja abakulu wadde abakadde ennyo. Bonna Katonda yabawaayo mu mukono gwa Nebukadduneeza.

¹⁸Ne yeetikka ebintu ebinene n'ebitono byonna okuva mu yeekaalu ya Katonda, n'ebi'obugagga eby'omu yeekaalu ya MUKAMA, n'amawanika ga kabaka n'abakungu be.

¹⁹Ne bookya yeekaalu ya Katonda ne bamenyaamenya ne bbugwe wa Yerusaalemi, ne bookya n'embiri zonna, ne bazikiriza n'ebintu eby'omuwendo byonna.

²⁰N'abo abaawona ekitala, n'abatwala mu buwanjanguse e Babulooni, ne babeera baddu be n'aba batabani be okutuusa ku kufuga kw'obwakabaka bw'Obuperusi.

²¹Ensi n'ekuumma ssabbiiti zaayo, ekiseera kyonna kye yamala mu kubonaabona kwayo okutuusa emyaka ensanvu bwe gyagwako, ng'ekyo kituukiriza ekigambo MUKAMA kye yayogera mu Yeremiya.

²²Mu mwaka ogw'olubereberye ogwa Kuulo kabaka wa Buperusi, MUKAMA n'akoma ku mutima gwa Kuulo kabaka wa Buperusi ng'ekigambo MUKAMA kye yayogerera mu Yeremiya bwe kyali, okulangirira mu bwakabaka bwe bwonna, n'okuwandiika nti,

²³"Bw'atyo bw'ayogera Kuulo kabaka wa Buperusi nti, "MUKAMA Katonda w'eggulu ampadde obwakabaka bwonna obw'omu nsi, era annonze okumuzimbira yeekaalu e Yerusaalemi mu Yuda. Bwe wabaawo omuntu yenna mu mmwe ow'oku bantu be, MUKAMA Katonda abeere naye, ayambuke."

Ezera

Ezera 1

Kuulo Ayamba Abawaŋjanguse okuddayo

¹ Awo mu mwaka ogw'olubereberye ogw'obufuzi bwa Kuulo kabaka wa Buperusi, ekigambo MUKAMA kye yayogerera mu Yeremiya ne kituukirira, MUKAMA n'akoma ku mutima gwa Kuulo kabaka w'e Buperusi okulangirira mu bwakabaka bwe bwonna, n'okukiteeka mu buwandiike nti,

² "Bw'ati bw'ayogera Kuulo kabaka w'e Buperusi nti, "Obwakabaka bwonna obw'omu nsi MUKAMA Katonda w'eggulu abumpadde, era annonze okumuzimbira yeekaalu e Yerusaalemi mu Yuda.

³ Omuntu yenna mu mmwe abantu be, Katonda we abeere naye, agende e Yerusaalemi mu Yuda addaabirize yeekaalu ya MUKAMA, Katonda wa Isirayiri, Katonda ali mu Yerusaalemi.

⁴ Na buli Muyisirayiri eyasigalawo gy'ali, abantu abo baabeeramu, banaamuwa ffeeza ne zaabu, n'ebintu n'ebisolo ebirundibwa, obutasaako ebiweebwayo bye bawaayo ku bwabwe ebya yeekaalu ya Katonda eri mu Yerusaalemi."

⁵ Awo abakulu b'enyyumba za Yuda ne Benyamini, ne bakabona, n'Abaleevi, na buli muntu Katonda gwe yakubiriza, ne beeteekateeka okwambuka okugenda okuddaabiriza yeekaalu ya MUKAMA eri mu Yerusaalemi.

⁶ Baliraanwa baabwe bona ne babawa ebintu ebya ffeeza ne zaabu, n'ebintu ebirala n'ebisolo ebirundibwa, n'ebirabo eby'omuwendo omungi, okwo nga kwe kuli ebiweebwayo bye baawaayo nga beeyagalidde.

⁷ Ebintu ebyali mu yeekaalu ya MUKAMA, Nebukadduneeza bye yanyaga mu Yerusaalemi n'abiteeka mu ssabo ly a bakatonda be, Kabaka Kuulo, n'abiggyayo.

⁸ Kuulo kabaka w'e Buperusi n'abikwasa Misuledasi omuwanika, eyabikwasa Sesubazzali omulangira wa Yuda.

⁹ Guno gwe gwali omuwendo gwabyo:

Esowaani eza zaabu amakumi asatu	30,
Esowaani eza ffeeza lukumi	1,000,
Ebis o ebya ffeeza amakumi abiri mu mwenda	29,
¹⁰ Ebibya ebya zaabu amakumi asatu	30,
n'ebibya ebya ffeeza ebigenderako ebikumi bina mu kumi	410,

n'ebintu ebirala lukumi

1,000.

¹¹Byonna awamu ebintu ebya zaabu ne ffeeza byali enkumi ttaano mu ebikumi bina (5,400). Sesubazzali n'agenda nabyo byonna e Yerusaalemi okuva e Babulooni mu buwanjjanguse.

Ezera 2

Olukalala olw'Abawaŋjangušibwa Abaddayo

¹ Bano be bantu ab'omu ssaza, abanyagibwa Kabaka Nebukadduneeza ow'e Babulooni ne batwalibwa e Babulooni, abaddayo e Yerusaalemi ne Yuda buli muntu mu kibuga ky'ewaabwe.

² Abaabakulembera baali Zerubbaber, ne Yesuwa, ne Nekkemiya, ne Seraya, ne Leeraya, ne Moluddekaayi, ne Birusani, ne Misupaali, ne Biguvaayi, ne Lekumu, ne Baana. Omuwendo gw'abantu ba Isirayiri gwali:

³ bazzukulu ba Palosi enkumi bbiri mu kikumi mu nsavu mu babiri (2,172),

⁴ bazzukulu ba Sefatiya bisatu mu nsavu mu babiri (372),

⁵ bazzukulu ba Ala lusanvu mu nsavu mu bataano (775),

⁶ bazzukulu ba Pakasumowaabu ab'olunnyiriri olwa Yesuwa ne Yowaabu enkumi bbiri mu lunaana mu kkumi na babiri (2,812),

⁷ bazzukulu ba Eramu lukumi mu bibiri mu ataano mu bana (1,254),

⁸ bazzukulu ba Zattu lwenda mu ana mu bataano (945),

⁹ bazzukulu ba Zakkayi lusanvu mu nkaaga (760),

¹⁰ bazzukulu ba Bani lukaaga mu ana mu babiri (642),

¹¹ bazzukulu ba Bebayi lukaaga mu abiri mu basatu (623),

¹² bazzukulu ba Azugaadi lukumi mu bibiri mu abiri mu babiri (1,222),

¹³ bazzukulu ba Adonikamu lukaaga mu nkaaga mu mukaaga (666),

¹⁴ bazzukulu ba Biguvaayi enkumi bbiri mu amakumi ataano mu mukaaga (2,056),

¹⁵ bazzukulu ba Adini ebikumi bina mu ataano mu bana (454),

¹⁶ bazzukulu ba Ateri ow'olunnyiriri lwa Keezeekiya kyenda mu munaana (98),

¹⁷ bazzukulu ba Bezayi ebikumi bisatu mu amakumi abiri mu basatu (323),

¹⁸ bazzukulu ba Yola kikumi mu kumi na babiri (112),

¹⁹ bazzukulu ba Kasumu ebikumi bibiri mu abiri mu basatu (223),

- ²⁰bazzukulu ba Gibbali kyenda mu bataano (95).
- ²¹Abazzukulu ab'e Besirekemu kikumi mu abiri mu basatu (123),
- ²²abazzukulu ab'e Netofa amakumi ataano mu mukaaga (56),
- ²³abazzukulu ab'e Anasosi kikumi abiri mu munaana (128),
- ²⁴abazzukulu ab'e Azumavesi amakumi ana mu babiri (42),
- ²⁵abazzukulu ab'e Kiriaswalimu, n'e Kefira n'e Beerosi lusanvu mu ana mu basatu (743),
- ²⁶abazzukulu ab'e Laama n'e Geba lukaaga mu abiri mu omu (621),
- ²⁷abazzukulu ab'e Mikumasi kikumi mu abiri mu babiri (122),
- ²⁸abazzukulu ab'e Beseri n'e Ayi ebikumi bibiri mu abiri mu basatu (223),
- ²⁹abazzukulu ab'e Nebo amakumi ataano mu babiri (52),
- ³⁰abazzukulu ab'e Magubisi kikumi ataano mu mukaaga (156),
- ³¹abazzukulu ab'e Eramu omulala lukumi mu bibiri mu ataano mu bana (1,254),
- ³²abazzukulu ab'e Kalimu ebikumi bisatu mu amakumi abiri (320),
- ³³abazzukulu ab'e Loodi, n'e Kadidi, n'e Ono lusanvu mu abiri mu bataano (725),
- ³⁴abazzukulu ab'e Yeriko ebikumi bisatu mu amakumi ana mu bataano (345),
- ³⁵n'abazzukulu ab'e Sena enkumi ssatu mu lukaaga mu amakumi asatu (3,630).
- ³⁶Bano be bakabona: bazzukulu ba Yedaya ab'ennyumba ya Yesuwa lwenda mu nsavu mu basatu (973),
- ³⁷bazzukulu ba Immeri lukumi mu amakumi ataano mu babiri (1,052),
- ³⁸bazzukulu ba Pasukuli lukumi mu bibiri mu amakumi ana mu musanvu (1,247),
- ³⁹bazzukulu ba Kalimu lukumi mu kumi na musanvu (1,017).
- ⁴⁰Ne bano be Baleevi: bazzukulu ba Yesuwa ne Kadumyeri ab'olunnyiriri olwa Kadaviya nsavu mu bana (74).
- ⁴¹Bano be bayimbi: bazzukulu ba Asafu kikumi mu amakumi abiri mu munaana (128).
- ⁴²Bano be baakuumanga enzigi za yeekaalu: bazzukulu ba Sallumu, bazzukulu ba Ateri, bazzukulu ba Talumoni, bazzukulu ba Akkubu, bazzukulu ba Katita, ne bazzukulu ba Sobayi kikumi mu amakumi asatu mu mwenda (139).

- ⁴³ Abaaweerezanga mu yeekaalu be bano: bazzukulu ba Zika, bazzukulu ba Kasufa, bazzukulu ba Tabbawoosi,
- ⁴⁴ bazzukulu ba Kerosi, bazzukulu ba Siyaka, bazzukulu ba Padoni,
- ⁴⁵ bazzukulu ba Lebana, bazzukulu ba Kagaba, bazzukulu ba Akkubu,
- ⁴⁶ bazzukulu ba Kagabu, bazzukulu ba Samulaayi, bazzukulu ba Kanani,
- ⁴⁷ bazzukulu ba Gidderi, bazzukulu ba Gakali, bazzukulu ba Leyaya,
- ⁴⁸ bazzukulu ba Lezini, bazzukulu ba Nekoda, bazzukulu ba Gazzamu,
- ⁴⁹ bazzukulu ba Uzza, bazzukulu ba Paseya, bazzukulu ba Besayi,
- ⁵⁰ bazzukulu ba Asuna, bazzukulu ba Meyunimu, bazzukulu ba Nefisimu,
- ⁵¹ bazzukulu ba Bakubuki, bazzukulu ba Kakufa, bazzukulu ba Kalukuli,
- ⁵² bazzukulu ba Bazulusi, bazzukulu ba Mekida, bazzukulu ba Kalusa,
- ⁵³ bazzukulu ba Balukosi, bazzukulu ba Sisera, bazzukulu ba Tema,
- ⁵⁴ bazzukulu ba Neziya, ne bazzukulu ba Katifa.
- ⁵⁵ Bazzukulu b'abaweereza ba Sulemaani baali: bazzukulu ba Sotayi, bazzukulu ba Kassoferesi, bazzukulu ba Peruda,
- ⁵⁶ bazzukulu ba Yaala, bazzukulu ba Dalukoni, bazzukulu ba Gidderi,
- ⁵⁷ bazzukulu ba Sefatiya, bazzukulu ba Kattiri, bazzukulu ba Pokeresukazzebayimu, ne bazzukulu ba Ami.
- ⁵⁸ Omuwendo ogw'abaaweerezanga mu yeekaalu ne bazzukulu b'abaweereza ba Sulemaani bona awamu, gwali ebikumi bisatu mu kyenda mu babiri (392).
- ⁵⁹ Ne bano be baava mu bibuga eby'e Terumeera, n'e Terukalusa, n'e Kerubu, n'e Yaddani, n'e Immeri, naye tebaalina bukakafu bulaga nti bava mu nnyumba ya Isirayiri.
- ⁶⁰ Baali bazzukulu ba Deraya, bazzukulu ba Tobiya, ne bazzukulu ba Nekoda n'omuwendo gwabwe gwali lukaaga mu amakumi ataano mu babiri (652).
- ⁶¹ Ne ku bakabona kwaliko bazzukulu ba Kobaya, ne bazzukulu ba Kakkazi, ne bazzukulu ba Baluzirayi eyawasa muwala wa Baluzirayi Omugireyaadi, n'atuumibwa erinnya eryo.
- ⁶² Ate waaliwo abalala abaanoonya amannya gaabwe mu abo abaabalibwa naye ne batagalaba, era ne batabalibwa mu bakabona kubanga kyagambibwa nti si balongoofu.
- ⁶³ Omukulembeze n'abalagira baleme okulya ku bintu ebitukuvu ennyo, okuggyako nga waliwo kabona alina Ulimu ne Sumimu.

⁶⁴Bonna awamu baali emitwalo ena mu enkumi bbiri mu bisatu mu nkaga (42,360),

⁶⁵okwo nga kw'otadde abaddu n'abaddu abakazi abaali kasanvu mu bisatu mu amakumi asatu mu musanvu (7,337), n'abayimbi abasajja n'abakazi abaali ebikumi bibiri (200).

⁶⁶Baalina embalaasi lusanvu mu asatu mu mukaaga (736), n'ennyumbu ebikumi bibiri mu amakumi ana mu ttaano (245),

⁶⁷n'ejjjamira ebikumi bina mu amakumi asatu mu ttaano (435), n'endogoyi kakaaga mu lusanvu mu abiri (6,720).

⁶⁸Awo abakulu b'ennyumba z'abajajaabwe bwe baatuuka ku kifo ennyumba ya MUKAMA we yali mu Yerusaalemi, ne bawaayo ebiweebwayo nga beeyagalidde, olw'okuddaabiriza ennyumba ya Katonda.

⁶⁹Ne bawaayo mu ggwanika ng'obusobozi bwabwe bwe bwali; ne bawaayo kilo bitaano eza zaabu (500), ne tani ssatu (3), n'ebiyambalo bya bakabona kikumi (100) mu ggwanika.

⁷⁰Awo bakabona, n'Abaleevi, n'abayimbi, n'abaakuumanga enzigi za yeekaalu, n'abakozi ba yeekaalu ne baddayo mu bibuga byabwe, awamu n'abamu ku bantu abalala, n'Abayisirayiri abalala bona ne baddayo mu bibuga byabwe.

Ezera 3

Okuddaabiriza Ekyoto

¹Omwezi ogw'omusantu bwe gwatuuka, Abayisirayiri ne bava mu bibuga gye baali, ne bakunjaanira e Yerusaalemi nga bali bumu.

²Awo Yesuwa mutabani wa Yozadaki ne bakabona banne, ne Zerubbaber mutabani wa Seyalutyeri n'ab'ennyumba ye ne batandika okuzimba ekyoto kya Katonda wa Isirayiri, okuweerangako ebiweebwayo ebyokebwa nga bwe kyawandiikibwa, mu Mateeka ga Musa omusajja wa Katonda.

³Newaakubadde nga baalina entiisa ey'abamawanga agaali gabeetoolodde, basooka okuzimba ekyoto ku musingi gwakyo ne bawaayo ebiweebwayo ebyokebwa eri MUKAMA, nga bawaayo eby'enkyo n'eb'yakawungeezi.

⁴Era ng'etteeka bwe liri, nebakwata embaga ey'ensiisira ne bawaayo ebiweebwayo ebyokebwa ebya buli lunaku ng'omuwendo ogwetaagibwa buli lunaku bwe gwali.

⁵N'olvannyuma baawaayo ebiweebwayo ebyokebwa ebya buli kiseera, omwezi nga gwa kaboneka ne ku buli mbaga zonna ezaatukuzibwa eza MUKAMA ezaalagirwa, ate n'ekiweebwayo ekya buli muntu eyawaayo eri MUKAMA ekiweebwayo awatali kuwalirizibwa.

⁶Okuva ku lunaku olw'olubereberye olw'omwezi ogw'omusantu ne batandika okuwaayo ebiweebwayo ebyokebwa eri MUKAMA, newaakubadde ng'omusingi gwa yekalu ya MUKAMA gwali tegunnazimbibwa.

Okuddaabiriza Yekalu

⁷ Ne bawa abazimbi n'ababazzi ensimbi, ne bawa n'ab'e Sidoni n'ab'e Tuulo ebyokulya n'ebiyokunywa n'amafuta, okuleeta emivule okuva mu Lebanooni okugituusa ku nnyanja e Yopa, ng'ekiragiro kya Kuulo kabaka w'e Buperusi bwe kyali.

⁸ Awo mu mwezi ogwokubiri mu mwaka ogwokubiri nga batuuse awali yekalu ya Katonda mu Yerusaalemi, Zerubbaberi mutabani wa Seyalutyeri, ne Yesuwa mutabani wa Yozadaki ne baganda baabwe bakabona n'Abaleevi ne bona abajja e Yerusaalemi okuva mu buwanjhanguse ne batandika omulimu ogw'okuzimba, era ne beerondamu abaali ab'emyaka amakumi abiri egy'obukulu, n'okusingawo, okulabirira omulimu ogw'okuddaabiriza yekalu ya MUKAMA.

⁹ Awo Yesuwa ne batabani be ne baganda be, ne Kadumyeri ne batabani be, ne bazzukulu ba Yuda, nga bayambibwako ne batabani ba Kenedadi n'Abaleevi bona ne bavunaanyizibwa okulabirira omulimu ogw'okuddaabiriza ennyumba ya MUKAMA.

¹⁰ Awo abazimbi bwe baamala okuzimba omusingi gwa yekalu ya MUKAMA, bakabona nga bambadde ebyambalo byabwe ne bavaayo nga bakutte amakondeere, n'abaleevi, bazzukulu ba Asafu, nga bakutte ebitaasa, ne bayimirira mu bifo byabwe okutendereza MUKAMA, nga Dawudi kabaka wa Isirayiri bwe yateekateeka.

¹¹ Ne bayimba ennyimba ez'okwebaza n'okutendereza MUKAMA nga bogera nti, "Mulungi, n'okwagala kwe eri Isirayiri kubeerera emirembe gyonna." Abantu bona ne bayimusa amaloboozi gaabwe nga batendereza MUKAMA, kubanga omusingi gw'ennyumba ya MUKAMA gwali guzimbiddwa.

¹² Naye bangi ku bakabona n'Abaleevi abakadde, n'Abakulu b'ebika, abaalaba yekalu eyasooka, ne bakaaba nnyo ng'amaloboozi gaabwe gawulikika bwe baalaba ng'omusingi gwa yekalu empya guzimbiddwa, newaakubadde ng'abalala bangi baasanyuka nnyo nga bwe baleekaana;

¹³ nga si kyangu okwawula amaloboozi g'abo abaali bakaaba n'abaali basanyuka, kubanga abantu bona baawowogana mu ddoboozi ery'omwanguka, era n'amaloboozi gaabwe ne gawulirwa wala.

Ezera 4

Abalabe ba Yuda

¹Awo abalabe ba Yuda ne Benyamini bwe baawulira ng'abaana ba Isirayiri abaali mu buwanjjanguse batandise okuddaabiriza yeekaalu ya MUKAMA, Katonda wa Isirayiri,

²ne bagenda eri Zerubbaberi n'abakulu b'ebika ne boogera nti, "Mutukkirize tubayambeko okuzimba, kubanga tuli nga mmwe, era tusinza Katonda wammwe, era okuva ku mirembe gya Esaludaddoni kabaka w'e Bwasuli, eyatuleeta wano tuwaayo ssaddaaka eri Katonda wammwe."

³Naye Zerubbaberi ne Yesuwa n'abakulu b'ebika bya Isirayiri abalala ne babaddamu nti, "Temulina mugabo naffe mu kuddaabiriza yeekaalu ya Katonda waffe. Tuligizimbira MUKAMA Katonda wa Isirayiri ffekka, nga kabaka Kuulo kabaka w'e Buperusi bwe yatulagira."

⁴Awo abantu be baalimu ne bamalirira okulemesa abantu ba Yuda, ne babatiisatiisa okuzimba.

⁵Ne bagulirira abantu okubawakanya n'okulemesa enteekateeka yaabwe, ebbanga lyonna Kuulo kabaka w'e Buperusi lye yafuga, okutuusa Daliyo kabaka w'e Buperusi lwe yalya obwakabaka.

⁶Awo ku mirembe gya Akaswero nga ky'ajje alye obwakabaka, abalabe baabwe ne baawandiika ebintu eby'obulimba ne baloopa abantu ba Yuda ne Yerusaalemi.

⁷Awo mu biro bya Alutagizerugizi, Bisulamu ne Misuledasi ne Tabeeri ne bannaabwe abalala ne bawandiikira Alutagizerugizi ebbaluwa mu nnukuta ez'Aramayika ne mu lulimi Olwaramayika.

⁸Lekumu ow'essaza, ne Simusaayi omuwandiisi ne bawandiikira Alutagizerugizi ebbaluwa ekwata ku Yerusaalemi.

⁹Lekumu ow'essaza ne Simusaayi omuwandiisi awamu ne bannaabwe abalala, abalamuzi n'abakungu, n'Abaperusi, n'Abalukevi, n'Abababulooni, n'Abasusanuki, n'Abaweramu,

¹⁰n'amawanga amalala, omukungu Osunappali be yakomyawo, n'abateeka mu bibuga bya Samaliya ne mu bitundu ebirala ebiri emitala w'omugga Fulaati ne bawandiika nti:

¹¹Ebbaluwa gye baawandiikira kabaka yali egamba nti, Eri kabaka Alutagizerugizi, Okuva eri abaddu bo abasajja ab'omu ssaza eriri emitala w'omugga Fulaati.

¹²Kabaka asaanye ategeere nti Abayudaaya abaava gy'oli ne bajja gye tuli bagenze e Yerusaalemi okuddaabiriza ekibuga ekyo ekijeemu eky'abantu abakozi b'ebibi. Batandise okuddaabiriza emisingi n'okuzaawo bbugwe.

¹³ Ne nsonga endala, kabaka asaanye akimanye ng'ekibuga ekyo bwe kirizimbibwa ne bbugwe bw'aliggwa okukola, tebalisasula misolo nate, newaakubadde okuwa empooza, era ekiriva mu ekyo bwe bwakabaka okufiirwa.

¹⁴ Kale nno, olw'okuba nga tulina obuvunaanyizibwa eri obwakabaka, ate nga tetwandiyagadde kulaba nga kabaka aswazibwa, kyetuvudde tuweereza obubaka buno eri kabaka,

¹⁵ banoonye mu bitabo eby'okujukiza ebya bajajjaabo. Mu bitabo ebyo oija kuzuula ng'ekibuga ekyo kibuga kijeemu, ekyalumya emitwe gya bakabaka n'abaamasaza, era nga kifo ekimanyiddwa ng'ekijeemu okuva mu biro eby'edda. Era kyekyava kizikirizibwa.

¹⁶ Tukakasa kabaka nti ekibuga kino bwe kirizimbibwa ne bbugwe waakyo n'azzibwawo, tolibaako ne ky'osigaza emitala w'omugga Fulaati.

¹⁷ Awo kabaka n'abaddamu bw'ati nti: Eri Lekumu ow'essaza, ne Simusaayi omuwandiisi ne bannaabwe abalala abaabeeranga mu Samaliya, ne mu bifo ebirala ebiri mu ssaza eriri emitala w'omugga Fulaati, Mbalamusizza.

¹⁸ Ebbaluwa gye mwatuweereza esomeddwa mu maaso gange ne ngitegeera.

¹⁹ Nalagira, okunoonyereza ne kukolebwa, era ne kizuulibwa ng'ekibuga ekyo, okuva edda kijeemera bakabaka, era ng'obujeemu n'ekyejo byakolebwanga omwo.

²⁰ Yerusaalemi kyalina bakabaka ab'amaanyi abaafuganga essaza lyonna eriri emitala w'omugga Fulaati, era baaweebwanga emisolo, n'empooza okuva mu kitundu ekyo.

²¹ Kaakano muweereze ekiragiro eri abasajja abo bakomye omulimu ogw'okuddaabiriza ekibuga ekyo okutuusa ate bwe ndibalagira.

²² Musseeyo nnyo omwoyo okulaba nga temutenguwa mu nsonga eyo. Lwaki tukkiriza ensonga eyo okugenda mu maaso, okuleeta okufiirwa eri obwakabaka?

²³ Amangwago ebbaluwa eyava ewa kabaka Alutagizerugizi bwe yasomerwa Lekumu ne Simusaayi omuwandiisi ne bannaabwe, ne bayanguwa okugenda eri Abayudaaya e Yerusaalemi, ne babalekesaayo n'amaanyi okugenda mu maaso.

²⁴ Awo omulimu ku nnyumba ya Katonda mu Yerusaalemi ne guyimirira okutuusa omwaka ogwokubiri ogw'omulembe gwa Daliyo kabaka w'e Buperusi.

Ezera 5

¹ Awo bannabbi Kaggayi ne Zekkaliya muzzukulu wa Iddo ne bategeeza Abayudaaya abaabeeranga mu Yuda ne Yerusaalemi obubaka obuva eri Katonda wa Isirayiri, Katonda waabwe.

² Zerubbaberi mutabani wa Seyalutyeri ne Yesuwa mutabani wa Yozadaki ne bagolokoka ne bagenda mu maaso n'omulimu gw'okuddaabiriza ennyumba ya Katonda mu Yerusaalemi, era ne bannabbi ba Katonda nga babayambako.

³ Mu kiseera kyekimu Tattenayi ow'essaza ly'emitala w'omugga Fulaati, ne Sesalubozenayi ne bagenda gye bali ne bababuuza nti, "Ani eyabawa obuyinza okuddaabiriza yeekaalu eyo n'okuzaawo bbugwe oyo?"

⁴ Ate era ne bababuuza n'amannya g'abasajja abaakolanga ku kizimbe ekyo.

⁵ Naye Katonda waabwe n'abeeranga wamu n'abakulu b'Abayudaaya, ne bataziyizibwa kugenda mu maaso n'omulimu okutuusa ekigambo nga kivudde eri Daliyo, n'okuddamu kwe nga kuli mu buwandiike.

⁶ Kopi ey'ebbaluwa Tattenayi ow'essaza ly'emitala w'omugga Fulaati, ne Sesalubozenayi ne bannaabwe abakungu ab'emitala w'omugga Fulaati gye baaweereza Kabaka Daliyo,

⁷ yalimu ebigambo bino wansi. Eri Kabaka Daliyo, Mirembe myereere.

⁸ Kitugwanidde okumanyisa kabaka nga bwe twagenze mu ssaza lya Yuda ku yeekaalu ya Katonda omukulu. Abantu bagizimba n'amayinja amanene era bateeka n'embaawo mu bbugwe, era n'omulimu gukolebwa n'obunyiikivu n'okugenda gugenda mu maaso olw'okufuba kwabwe.

⁹ Twabuuza abakulu nti, "Ani eyabawa obuyinza okuddaabiriza yeekaalu eyo n'okuzaawo bbugwe oyo?"

¹⁰ Era twababuuza n'amannya gaabwe, tusbole okukuweereza amannya g'abakulembeze baabwe.

¹¹ Baatuddamu nti: "Tuli baddu ba Katonda w'eggulu n'ensi, era tuddaabiriza yeekaalu eyazimbibwa emyaka egy'edda omu ku bakabaka abakulu aba Isirayiri, n'agimala.

¹² Naye olw'okuba nga bajajjaffe baasunguwaza Katonda w'eggulu, yabawaayo mu mukono gwa Nebukadduneeza Omukaludaaya, kabaka w'e Babulooni, eyazikiriza yeekaalu eno n'atwala abantu e Babulooni.

¹³ "Naye mu mwaka ogw'olubereberye ogw'obufuzi bwa Kuulo kabaka w'e Babulooni, kabaka Kuulo oyo n'awa ekiragiro okuddaabiriza ennyumba ya Katonda eno.

¹⁴ Ebintu ebya zaabu n'ebya ffeeza eby'omu nnyumba ya Katonda, Nebukadduneeza bye yanyaga mu yeekaalu eyali mu Yerusaalemi n'abitwala mu

ssabo ly'e Babulooni, Kabaka Kuulo n'abiggyayo. Kabaka Kuulo n'abikwasa omusajja erinnya lye Sesubazaali, gwe yalonda okuba owessaza,

¹⁵era n'amugamba nti, 'Twala ebintu ebyo, ogende obiteeke mu yeekaalu eri mu Yerusaalemi, era olabe ng'ennyumba ya Katonda edda mu kifo kyayo.'

¹⁶"Sesubazaali oyo n'ajja n'azimba omusingi gw'ennyumba ya Katonda mu Yerusaalemi, era okuva mu kiseera ekyo n'okutuusa kaakano omulimu gukyagenda mu maaso, tegunnagwa."

¹⁷Noolwekyo kabaka bw'aba ng'asiimye, wabeewo okunoonyereza mu bitabo mu ggwanika lya kabaka eyo e Babulooni obanga ddala Kabaka Kuulo yawa ekiragiro okuddaabiriza ennyumba ya Katonda mu Yerusaalemi. N'olvannyuma kabaka atutumire okututegeeza ky'asazeewo ku nsonga eyo.

Ezera 6

Ekiragiro kya Daliyo

¹Awo kabaka Daliyo n'awa ekiragiro okunoonyereza mu bitabo ebyabeeranga mu ggwanika e Babulooni.

²Awo omuzingo gw'ekitabo ogwawandiikibwamu ekijjukizo ne guzuulibwa mu kibuga ekikulu Yakumesa eky'essaza ly'e Bumeedi nga kigamba nti: Ekiwandiiko:

³Mu mwaka ogw'olubereberye ogw'obufuzi bwa kabaka Kuulo, kabaka yateeka etteeka erikwata ku yeekaalu ya Katonda mu Yerusaalemi, nga ligamba nti: Yeekaalu eddaabirizibwe ebeere ekifo eky'okuweerangayo ssaddaaka, n'emisingi gyayo gitekebwewo ginywezebw. Eriba mita amakumi abiri mu musanvu obugulumivu (27), ne mita amakumi abiri mu musanvu obugazi (27),

⁴ng'erina embu ssatu ez'amayinja amanene, n'olubu olulala nga lwa mbaawo. Omuwendo gwonna gwakusasulibwa okuva mu gwanika lya kabaka.

⁵Ate era n'ebintu ebya zaabu n'ebya ffeeza eby'omu nnyumba ya Katonda, Nebukadduneeza bye yaggya mu yeekaalu e Yerusaalemi n'abireeta e Babulooni, bizibweyo mu bifo byabyo mu yeekaalu e Yerusaalemi; mulibiteeka mu nnyumba ya Katonda.

⁶Kale nno, Tattenayi ow'essaza ery'emitala w'omugga Fulaati, ne Sesalubozenayi, n'abakungu abeeyo mwewale okutabulatabula.

⁷Temuyingirira mulimu ogukolebwa ku yeekaalu ya Katonda eyo. Muleke ow'essaza ly'Abayudaaya n'abakulu b'Abayudaaya bazzeewo ennyumba ya Katonda mu kifo kyayo.

⁸Ate era nteeka etteeka erikwata ku bye muteekwa okukolera abakulu abo ab'Abayudaaya nga bazimba yeekaalu ya Katonda: Ebirikozesebwa abasajja abo

byonna, bya kusasulibwa okuva mu ggwanika lya Kabaka, ku misolo egiva emitala w'omugga Fulaati, omulimu guleme okuyimirira.

⁹Bwe baliba beetaaze okuwaayo ebiweebwayo ebyokebwa eri Katonda w'eggulu, oba nte nnume ento, oba ndiga nnume, oba ndiga nnume ento, oba njaaano, oba munnyo, oba nvinnyo, oba mafuta, muteekwa okuwa bakabona ab'omu Yerusaalemi byonna nga bwe baliba basabye buli lunaku obutayosa,

¹⁰basobole okuwaayo ssaddaaka ezisiimbwa Katonda w'eggulu, era basabire kabaka ne batabani be.

¹¹Era nteeka etteeka, omuntu yenna bwalikyusa ekiragiro ekyo, empagi eyazimba ennyumba ye eriggyibwa ku nnyumba ye, era n'awanikibwa ku mpagi eyo. N'ennyumba ye erifuulibwa olubungo olw'ekikolwa ekyo.

¹²Katonda eyaleetera Erinnya lye okubeera mu kifo ekyo, aggyewo kabaka yenna n'eggwanga eririyimusa omukono gwalyo okukyusa etteeka eryo oba n'okuzikiriza eyeekaalu eyo mu Yerusaalemi. Nze Daliyo ntaddewo etteeka eryo. Likwatibwe butiribiri.

Yeekaalu eggwa okuzimbibwa

¹³Olw'ekiragiro kabaka Daliyo kye yaweereza, Tattenayi ow'essaza ly'emitala w'omugga Fulaati, ne Sesalubozenayi ne bannaabwe ne bakola bye baalagibwa n'obunyiikivu bwonna.

¹⁴Abakadde b'Abayudaaya ne bagenda mu maaso n'okuzimba era ne balaba omukisa ng'okutegeeza kwa nnabbi Kaggayi n'okwa nnabbi Zekkaliya muzzukulu wa Ido bwe kwali. Ne bamaliriza okuzimba yeekaalu, ng'ekiragiro kya Katonda wa Isirayiri bwe kyali, era ng'amateeka ga Kuulo, ne Daliyo ne Alutagizerugizi bakabaka b'e Buperusi bwe gaali.

¹⁵Awo yeekaalu eyo n'emalirizibwa ku lunaku olwokusatu olw'omwezi Adali, mu mwaka ogw'omukaaga ogw'obufuzi bwa kabaka Daliyo.

Okutukuza Yeekaalu

¹⁶Awo abantu ba Isirayiri, bakabona n'Abaleevi n'abalala abaali mu buwanjanguse ne bakomawo mu ssanyu ne bakola embaga ey'okutukuza ennyumba ya Katonda nga balina essanyu.

¹⁷Olw'okutukuza ennyumba eyo eya Katonda, baawaayo ente ennume kikumi, n'endiga ennume ebikumi bibiri, n'endiga ennume ento ebikumi bina, ate n'ekiweebwayo olw'ekibi ku lwa Isirayiri yenna, embuzi ennume kkumi na bbiri, ng'omuwendo bwe gwali ogw'ebika bya Isirayiri.

¹⁸Ne bateeka bakabona mu bibinja byabwe n'Abaleevi mu biti byabwe olw'okuweereza Katonda e Yerusaalemi, nga bwe kyawandiikibwa mu kitabo kya Musa.

Embaga ey'Okuyitako

¹⁹ Ku lunaku olw'ekkumi n'enya olw'omwezi ogw'olubereberye, abawaŋŋaangusibwa baafumba embaga ey'Okuyitako.

²⁰ Bakabona n'Abaleevi baali beetukuzizza era bona nga balongoofu okukola emikolo. Abaleevi ne batta omwana gw'endiga ogw'Okuyitako, ku lwa baganda baabwe bakabona, nabo bennyini.

²¹ Awo Abayisirayiri abaava mu buwaŋŋanguse ne bagirya wamu n'abo bona abaali beeyawudde, nga basinza MUKAMA Katonda wa Isirayiri.

²² Ne bamala ennaku musanvu nga balya n'essanyu Embaga ey'Emigaati Egitazimbulukuswa, kubanga MUKAMA yabajuza essanyu bwe yakyusa omutima gwa kabaka w'e Bwasuli, n'abayamba mu mulimu ogw'enyyumba ya Katonda wa Isirayiri.

Ezera 7

Ezera Akomawo e Yerusaalemi

¹ Awo oluvannyuma lw'ebyo, mu biro eby'obufuzi bwa Alutagizerugizi kabaka w'e Buperusi, Ezera mutabani wa Seraya, muzzukulu wa Azaliya, muzzukulu wa Kirukiya,

² muzzukulu wa Sallumu, muzzukulu wa Zadooki, muzzukulu wa Akitubu,

³ muzzukulu wa Amaliya, muzzukulu wa Azaliya, muzzukulu wa Merayoosi,

⁴ muzzukulu wa Zerakiya, muzzukulu wa Uzzi, muzzukulu wa Bukki,

⁵ muzzukulu wa Abisuwa, muzzukulu wa Finekaasi, muzzukulu wa Eriyazaali, muzzukulu wa Alooni kabona asinga obukulu,

⁶ n'ava e Babulooni. Yali munnyonnyozi w'amateeka mukugu mu mateeka, MUKAMA Katonda wa Isirayiri ge yawa Musa. Kabaka n'amuwa buli kintu kye yasaba kubanga omukono gwa MUKAMA Katonda we gwali wamu naye.

⁷ Abamu ku bantu ba Isirayiri, omwo nga mwe muli bakabona, n'Abaleevi, n'abayimbi, n'abaakuumanga wankaaki, n'abaaweerezanga mu yeekaalu, ne bagenda wamu naye e Yerusaalemi mu mwaka ogw'omusanvu ogw'obufuzi bwa kabaka Alutagizerugizi.

⁸ N'atuuka mu Yerusaalemi mu mwezi ogwokutaano ogw'omwaka ogw'omusanvu ogw'obufuzi bwa kabaka oyo.

⁹ Yasitula okuva e Babulooni ku lunaku olw'olubereberye olw'omwezi ogw'olubereberye, n'atuuka e Yerusaalemi ku lunaku olw'olubereberye olw'omwezi ogwokutaano, kubanga omukono gwa Katonda we omulungi gwali wamu naye.

¹⁰Ezera yali amaliridde mu mutima gwe okusoma n'okukuma Etteeka lya MUKAMA, era n'okuyigirizanga amateeka n'ebiragiro byalyo mu Isirayiri.

Ebbaluwa Kabaka Alutagizerugizi gye yawandiikira Ezera

¹¹Eno ye kopi ey'ebbaluwa kabaka Alutagizerugizi gye yawa Ezera kabona era omusomesa, omusajja eyali omukugu mu nsonga ez'amateeka n'ebiragiro bya MUKAMA eri Isirayiri.

¹²Alutagizerugizi, kabaka wa bakabaka, Eri Ezera kabona era omunyyonnyozi w'amateeka ga Katonda w'eggulu: Nkulamusizza.

¹³Nteeka etteeka nga buli muntu ow'omu ggwanga lya Isirayiri, omwo nga mwe muli bakabona n'Abaleevi, awulira okugenda e Yerusaalemi naawe, ayinza okugenda.

¹⁴Otumiddwa kabaka n'abakungu be omusanvu ab'oku ntikko okugenda okunoonyereza ku bikwata ku Yuda ne Yerusaalemi nga mugoberera etteeka lya Katonda wammwe, lye mumanyi obulungi.

¹⁵Bwe muba nga mugenda mutwale effeeza ne zaabu kabaka n'abakungu be bye bawaddeyo ku bwabwe eri Katonda wa Isirayiri, atuula mu Yerusaalemi,

¹⁶awamu n'effeeza ne zaabu yonna gye muliggya mu ssaza lya Babulooni, n'ebiweebwayo eby'obuwa abantu ne bakabona bye baliwaayo ku lwa yekala ya Katonda waabwe mu Yerusaalemi.

¹⁷Ensimbi ezo mulizikozesa okugula ente ennume, n'endiga ennume, n'abaana b'endiga, n'ebiweebwayo byako eby'obutta, n'ebiweebwayo byako ebyokunywa era munaabiweerangayo ku kyoto eky'omu yekala ya Katonda wammwe mu Yerusaalemi.

¹⁸Ggwe ne baganda bo Abayudaaya, kye mulisiima okukolamu effeeza ne zaabu erifikkawo kiriva gye muli ng'okusima kwa Katonda wammwe bwe kuli.

¹⁹Ebintu byonna ebibaweeddwa okukozesa mu yekala ya Katonda wammwe mubiwangayo olw'okusinza Katonda wa Yerusaalemi.

²⁰N'ekintu ekirala kyonna kye muliba mwetaaze okukozesa mu yekala ya Katonda wammwe, kinaggyibwanga mu ggwanika lya kabaka.

²¹Kaakano, nze kabaka Alutagizerugizi nteeka etteeka nga ndagira abawanika bona abali mu ssaza eriri emitala w'omugga Fulaati okuwanga Ezera kabona era omunyyonnyozi w'amateeka ga Katonda w'eggulu, by'anaabasabanga

²²n'okutuusa ku ttani ssatu n'ekitundu eza ffeeza, oba kilo enkumi bbiri mu bibiri ez'enjaano, oba lita enkumi bbiri mu bibiri ez'envinnyo, oba lita enkumi bbiri mu bibiri ez'amafuta, oba n'omunyyo gwe baliba baagala gwonna.

²³Ekintu kyonna ekyalagirwa Katonda w'eggulu, kiribaweebwa mu bungi, ku lwa yeekaalu ya Katonda w'eggulu. Kale kiki ekirimuleetera okusunguwalira kabaka ne batabani be?

²⁴Ate era mutegeere nga temusaana kuwooza musolo, oba empooza ey'engeri yonna ku kabona yenna newaakubadde Abaleevi newaakubadde abayimbi newaakubadde abakuumi ab'oku nzigi newaakubadde abaweeresa ab'omu yeekaalu newaakubadde abaddu abalala ab'omu nnyumba ya Katonda eyo.

²⁵“Naawe, ggwe Ezera, ng'okozesa amagezi Katonda ge yakuwa, londa abaami n'abalamuzi, abanaalamulanga abantu bona ab'omu ssaza eriri emitala w'omugga Fulaati, abamanyi amateeka ga Katonda wo, era oyigirize n'abo abatagamanyi.

²⁶Omuntu yenna ataligondera tteeka lya Katonda wo, n'etteeka lya Kabaka aliweebwa ekibonerezko kya kuttibwa, oba okugobebwa mu bantu, oba okuggyibwako ebibye, oba okusibibwa mu kkomera.”

²⁷ MUKAMA Katonda w'abajajjaffe atenderezebwé ayolesezza kabaka okuwa ennyumba ya MUKAMA mu Yerusaalemi ekitiibwa,

²⁸era ansobozesezza okulaba omukisa mu maaso ga kabaka ne mu maaso g'abawi b'amagezi be ab'oku ntikko, n'abakungu ba kabaka bona, n'olw'omukono gwa MUKAMA Katonda wange ogubadde awamu nange, nsobile okukunjaanya abakulembeze ba Isirayiri okugenda nange.

Ezera 8

Amannya g'Abaddayo ne Ezera

¹ Bano be bakulu b'ennyumba, n'abo abewandiisa n'abo abaayambuka nange okuva e Babulooni mu mulembe gwa kabaka Alutagizerugizi:

²okuva mu bazzukulu ba Finekaasi, Gerusomu; n'okuva mu bazzukulu ba Isamaali, Danyeri; n'okuva mu bazzukulu ba Dawudi, Kattusi

³muzzukulu wa Sekaniya, n'okuva mu bazzukulu ba Palosi, Zekkaliya, era wamu naye abasajja abewandiisa kikumi mu ataano (150);

⁴ n'okuva mu bazzukulu ba Pakasumowaabu, Eriwenayi mutabani wa Zekkaliya, era wamu naye abasajja ebikumi bibiri (200);

⁵n'okuva mu bazzukulu ba Sekaniya, mutabani wa Yakazyeri, era wamu naye abasajja ebikumi bisatu (300);

⁶ n'okuva mu bazzukulu ba Adini, Ebedi mutabani wa Yonasaani, era wamu naye abasajja amakumi ataano (50);

⁷n'okuva mu bazzukulu ba Eramu, Yesaya mutabani wa Asaliya, era wamu naye abasajja nsanvu (70);

⁸n'okuva mu bazzukulu ba Sefatiya, Zebadiya mutabani wa Mikayiri, era wamu naye abasajja kinaana (8o);

⁹n'okuva mu bazzukulu ba Yowaabu, Obadiya mutabani wa Yekyeri, era wamu naye abasajja ebikumi bibiri mu kkumi na munaana (218);

¹⁰n'okuva mu bazzukulu ba Seromisi, mutabani wa Yosifiya, era wamu naye abasajja kikumi mu nkaaga (16o);

¹¹n'okuva mu bazzukulu ba Bebayi, Zekkaliya mutabani wa Bebayi, era wamu naye abasajja amakumi abiri mu munaana (28);

¹²n'okuva mu bazzukulu ba Azugadi, Yokanaani mutabani wa Kakkatani, era wamu naye abasajja kikumi mu kkumi (110);

¹³n'okuva mu bazzukulu ba Adonikamu, abajja oluvannyuma, Erifereti, ne Yeyeri, ne Semaaya, era wamu nabo abasajja nkaaga (6o);

¹⁴n'okuva mu bazzukulu ba Biguvaayi, Usayi ne Zabudi, era wamu nabo abasajja nsanvu (7o).

Okuddayo e Yerusaalemi

¹⁵Ne mbakuŋŋanyaiza ku mugga ogukulukutira e Yakava, ne tusiisira eyo okumala ennakku ssatu. Awo bwe nnali nga nneekebejja abantu ne bakabona, ne sirabamu Baleevi.

¹⁶Kyennava ntumya Eryeza ne Alyeri ne Semaaya ne Erunasani ne Yalibu ne Erunasani ne Nasani ne Zekkaliya ne Mesullamu, abaali abakulembeze ne Yoyalibu ne Erunasani, abaali abategeevu,

¹⁷ne mbatuma eri Iddo omukulu w'ekifo eky'e Kasifiya, ne mbategeeza bye baba bagamba Iddo ne baganda be, abaaweerezanga mu yeekaalu mu kifo eky'e Kasifiya, batuuweereze abaweereza abaliyamba mu nnyumba ya Katonda waffe.

¹⁸Olw'omukono gwa Katonda ogwali awamu naffe, ne batuleetera omusajja omutegeevu, omu ku bazzukulu ba Makuli, mutabani wa Leevi, mutabani wa Isirayiri, erinnya lye Serebiya, wamu ne baganda be ne batabani baabwe, abasajja kkumi na munaana;

¹⁹ne Kasabiya, wamu naye Yesaya omu ku bazzukulu ba Merali, ne baganda be ne batabani baabwe, abasajja amakumi abiri.

²⁰Ate era ne baleeta n'abweereza ba yeekaalu Dawudi n'abakungu be baalonda okubeeranga Abaleevi ebikumi bibiri mu abiri. Bonna baali beewandiisizza.

²¹Awo ku mugga Akava, ne nangirira okusiiba, twetoowaze mu maaso ga Katonda waffe, nga tumwegayirira okubeera awamu naffe n'abaana baffe n'ebintu byaffe byonna mu lugendo lwaffe.

²²Nakwatibwa ensonyi okusaba kabaka abaserikale abakuumi ab'ebigere n'abeebagala embalaasi okutukuma eri abalabe, kubanga twali tumutegeeezeza nti, "Omukono omulungi ogwa Katonda waffe gubeera ku buli muntu amunoonya, naye obusungu bwe bubeera ku abo abamujeemera."

²³Kyetwava tusiiba ne twegayirira Katonda waffe ku nsonga eyo, era n'addamu okusaba kwaffe.

²⁴Awo ne nonda Serebiya ne Kasabiya ne baganda baabwe abalala kkumi, be bantu kkumi na babiri okuva mu bakabona abakulu,

²⁵ne mbapimira ffeeza ne zaabu n'ebintu kabaka, n'abaami be, n'abakungu be, ne Isirayiri yenna, bye baawaayo ku lw'ennyumba ya Katonda waffe.

²⁶Ne mbagererera ttani amakumi abiri mu ttaano eza ffeeza, n'ebintu ebya ffeeza obuzito bwabyo ttani ssatu n'ebitundu bisatu byakuna, ne zaabu ttani ssatu n'ebitundu bisatu byakuna,

²⁷ne kilo munaana n'ekitundu eza zaabu, n'ebitundu bibiri eby'ekikomo ebirungi ebizigule, eby'omuwendo nga zaabu.

²⁸Ne mbategeeza nti, "Muli batukuvu eri MUKAMA, n'ebintu bino bitukuvu eri MUKAMA. Efeeza ne zaabu biweebwayo kyeyagalire eri MUKAMA Katonda wa bajajjammwe.

²⁹Mubikume bulungi era mubituisse bulungi eri bakabona abakulu n'Abaleevi, n'abakulu b'ennyumba za Isirayiri."

³⁰Awo bakabona n'Abaleevi ne baweebwa effeeza ne zaabu, n'ebintu ebyawongebwa, ebyali bipimiddwa, okubitwala mu nnyumba ya Katonda waffe e Yerusaalemi.

³¹Ku lunaku olw'ekkumi n'ebbiri olw'omwezi ogw'olubereberye ne tusitula okuva ku mugga Akava okugenda e Yerusaalemi. Omukono gwa Katonda waffe ne gubeera wamu naffe, n'atukuma eri abalabe n'abanyazi mu kkubo.

³²Ne tutuuka e Yerusaalemi gye twawumulira okumala ennaku ssatu.

³³Awo ku lunaku olwokuna, nga tuli mu nnyumba ya Katonda waffe, ne tupima ffeeza ne zaabu n'ebintu ebyawongebwa ne tubikwasa Meremoosi kabona, mutabani wa Uliya, ne Eriyazaali mutabani wa Finekaasi eyali awamu naye, ne Yozabadi mutabani wa Yeswa, ne Nowadiya mutabani wa Binnuyi, Abaleevi.

³⁴Byonna ne bibilibwa ng'omuwendo gwabyo bwe gwali n'obuzito bwabyo bwe bwali era ne biwandiikibwa.

³⁵Mu kiseera ekkyo abaawaŋŋangusibwa, abakomawo okuva mu busibe, ne bawaayo ebiweebwayo ebyokebwa eri Katonda wa Isirayiri: ente ennume kkumi na bbiri ku lwa Isirayiri yenna, n'endiga ennume kyenda mu mukaaga, n'obuliga obuto nga bulume nsanvu mu musanvu, n'embuzi ennume kkumi na

bbiri okuba ekiweebwayo olw'ekibi, ebyo byonna ne biba ebiweebwayo ebyokebwa eri MUKAMA.

³⁶Ate era ne batuusa n'ebiragiro bya kabaka eri bagavana n'abaamasaza abaali emitala w'omugga Fulaati, abafuzi abo ne bayamba abantu ne bawaayo n'obuyambi eri ennyumba ya Katonda.

Ezera 9

Okusaba kwa Ezera ku Nsonga ey'Okufumbiriganwa mu mawanga

¹Oluvannyuma lw'ebintu ebyo okukolebwa, abakulembeze ne bajja gye ndi ne boogera nti, "Abantu ba Isirayiri, omwo nga mwe muli bakabona n'Abaleevi, tebeeyawudde ku mawanga agabaliraanye n'ebikolwa byabwe eby'emizizo. Tebeeyawudde ku Bakanani, ne ku Bakiiti ne ku Baperizi ne ku Bayebusi ne ku Bamoni ne ku Bamowaabu ne ku Bamisiri ne ku Bamoli.

²Bawasizza abamu ku bawala baabwe, n'abawala ne bafumbirwa abamu ku batabani baabwe, bwe kityo eggwanga ettukuvu ne lyetabula n'amawanga agabeetoolodde. Ku nsonga eyo abakulembeze n'abakungu, be basinze okwonoona."

³Awo bwe nawulira ebigambo ebyo, ne njuza ekkanzu yange n'omunagiro gwange, ne nkunuula enviiri ku mutwe gwange ne mu kirevu kyange ne ntuula wansi nga nnakuwadde.

⁴Bonna abatya ebigambo bya Katonda wa Isirayiri ne bakuñjaanira we ndi, olw'obutali bwesigwa obw'abaawanñangusibwa. Ne ntuula wansi nga nnakuwadde okutuusa ekiseera eky'ekiweebwayo eky'akawungeezi bwe kyatuuka.

⁵Awo mu kiseera eky'ekiweebwayo eky'akawungeezi ne ngolokoka okuva we nnali ntudde, n'ekkanzu yange enjulifu n'omunagiro gwange omuyulifu, ne nfukamira ne ngolola emikono gyange eri MUKAMA Katonda wange,

⁶ne nsaba nti: "Ayi Katonda wange, nkwatiddwa ensonyi, era sisobola kuyimusa maaso gange eri gwe Katonda wange, kubanga obutali butuukirivu bwaffe busukiridde emitwe gyaffe, n'omusango gwaffe gutuuse mu ggulu.

⁷Okuva mu biro bya bajajjaffe n'okutuusa leero, omusango gugenze gweyongera; era olw'obutali butuukirivu bwaffe, bakabaka baffe, ne bakabona baffe bawereeddwayo mu mukono gwa bakabaka ab'ensi, n'eri ekitala, n'eri obusibe, n'eri obunyazi, n'eri obuswavu obungi, nga bwe kiri mu nnaku zino.

⁸"Naye kaakano, akaseera katono, MUKAMA Katonda waffe atulaze ekisa n'atulekawo ffe abatono, n'atuwa ekifo ekisooka era ekinywevu mu watukuvu we, Katonda waffe n'amulisa amaaso gaffe, n'atuwa okuweeraweerako akatono mu busibe bwaffe.

⁹Newaakubadde nga tuli baddu, Katonda waffe tatulekulidde mu busibe bwaffe, naye atulaze okusaasirwa mu maaso ga bakabaka b'e Buperusi. Atuwadde obulamu obuggya okuzimba ennyumba ya Katonda waffe, n'okuddaabiriza ebyo ebyayonooneka, era atutaddeko Bbugwe okutwetooloola okutukuumu mu Yuda ne mu Yerusaalemi.

¹⁰“Kaakano Katonda waffe tunaayogera ki oluvannyuma lw'ebyo? Twaleka amateeka go

¹¹ge watuwa ng'oyita mu baddu bo bannabbi, bwe wayogera nti, ‘Ensi gye mugenda okulya, nsi ejjudde obutali bulongoofu olw'abantu baamu, era bagijjuzizza ebikolwa eby'obugwagwa enjuuyi zonna.

¹²Noolwekyo temuwaayo bawala bammwe kufumbirwa batabani baabwe newaakubadde batabani bammwe okuwasa bawala baabwe. Temwongeranga ku bulungi bwabwe newaakubadde obugagga bwabwe, mulyoke mube n'amaanyi mulye ebirungi by'ensi, ate era mubirekere n'abaana bammwe okuba omugabo ogw'emirembe n'emirembe.’

¹³“Bino byonna bitutuuseeko olw'ebikolwa byaffe ebitali bya butuukirivu n'olw'omusango omunene gwe tulina, ate nga Katonda waffe totubonerezza ng'ebikolwa byaffe bwe biri, naye otulesewo nga bwe tuli kaakano.

¹⁴Tunaayinza nate okumenya ebiragiro byo ne tuwasa mu mawanga ago agakola ebitasaana? Tolitunyiigira nnyo n'okusingawo n'otuzikiriza obutalekaawo muntu yenna?

¹⁵Ayi MUKAMA Katonda wa Isirayiri oli mutuukirivu, era otulesewo ffe ekitundu kino leero. Laba tuli mu maaso go nga tuzzizza omusango, newaakubadde nga tewali eyandisobodde okuyimirira mu maaso go.”

Ezera 10

Abantu Baatula Ekibi Kyabwe

¹Awo Ezera bwe yali ng'asaba, ng'ayatula ebibi mu lwatu, ng'akaaba, era ng'avunnamye mu maaso g'ennyumba ya Katonda, ekibiina ekinene eky'Abayisirayiri, abasajja, n'abakyala, n'abaana ne bakuññaana gy'ali, nabo nga bakaaba nnyo nnyini.

²Awo Sekaniya mutabani wa Yekyeri, omu ku bazzukulu ba Eramu n'agamba Ezera nti, “Tetubadde beesigwa eri Katonda waffe, kubanga twawasa abakazi bannaggwanga ab'oku mawanga agatwetoolodde. Naye newaakubadde nga twakola bwe tutyo, wakyaliwo essuubi eri Isirayiri.

³Noolwekyo tukole endagaano ne Katonda waffe tuve ku bakazi abo bona n'abaana be twabazaalamu, ng'okuteesa kwa mukama wange n'abo abatyab ebiragiro bya Katonda waffe bwe kuli, era kikolebwe ng'etteeka bwe litulagira.

⁴Golokoka kubanga obuvunaanyizibwa obwo buli mu mukono gwo era tuli beeteefuteefu okukuwagira, noolwekyo guma omwoyo okikole.”

⁵Awo Ezera n'agolokoka n'alayiza bakabona abakulu n'Abaleevi ne Isirayiri yenna okukola nga bwe kyateesebwa. Ne balayira.

⁶Ezera n'agolokoka n'ava mu maaso g'ennyumba ya Katonda n'agenda mu kisenge kya Yekokanani mutabani wa Eriyasibu, naye n'atalya mmere newaakubadde okunywa amazzi ng'akyanakuwalidde obutali bwesigwa bw'abaawanjangusibwa.

⁷Awo ekirango ne kiyisibwa mu Yuda yonna ne mu Yerusaalemi nti abawaanjangusibwa abaakomawo bakujaanire mu Yerusaalemi.

⁸Era ne kigambibwa nti omuntu yenna aliba tazze mu nnaku ssatu, alifiirwa ebintu bye byonna, ate n'agobebwa ne mu kujaaniro lya baawanjangusibwa.

⁹Mu nnaku ssatu, abasajja bona aba Yuda ne Benyamini ne bakujaanira e Yerusaalemi. Awo ku lunaku olw'amakumi abiri olw'omwezi ogw'omwenda abantu bona ne batuula mu luggyga olugazi mu maaso g'ennyumba ya Katonda nga banakuwawu olw'ensonga eyo ate era n'olw'enkuba eyatonnya.

¹⁰Awo Ezera kabona n'ayimirira n'abagamba nti, “Mwayonoona bwe mwawasa abakazi bannamawanga ne mwongera ku musango gwa Isirayiri.

¹¹Kaakano mwatule ebibi byammwe eri MUKAMA Katonda wa bajajjammwe, mukole ebyo by'asiima. Mweyawule ku mawanga agabeetoolodde era muleke n'abakazi bannamawanga.”

¹²Awo ekibiina kyonna ne kiddamu n'eddoboozi ery'omwanguka nti, “Oli mutuufu, tuteekwa okukola nga bw'ogambye.

¹³Naye abantu bangi, era n'ekiseera kya nkuba, tetuyinza kuyimirira bweru. N'ensonga eyookubiri, omulimu guno teguyinza kukolebwa mu lunaku lumu oba mu nnaku bbiri, kubanga twonoonye nnyo nnyini mu kigambo ekyo.

¹⁴Abakulu baffe beeyimirire olukujjaana lwonna, na buli muntu awamu n'abakadde n'abalamuzi aba buli kibuga mu bibuga byaffe eyawasa omukazi omunnaggwanga, ajje mu kiseera ekiragaane alongoose ensonga eyo, okutuusa obusungu bwa Katonda waffe lwe bulituyaako olw'ekigambo ekyo.”

¹⁵Yonasaani mutabani wa Asakeri ne Yozeya mutabani wa Tikuva, nga bawagirwa Mesullamu ne Sabbesayi Omuleevi be bokka abawakanya ekiteeso ekyo.

¹⁶Awo abaava mu buwaanjanguse ne bakola ng'ekiteeso bwe kyali. Ezera kabona n'abaalondebwa ku bakulu b'ennyumba, omu mu buli nnyumba ne baawulibwa mu manya gaabwe. Ku lunaku olw'olubereberye olw'omwezi ogw'ekkumi ne batuula okunoonyereza ku bigambo ebyo;

¹⁷ku lunaku olw'olubereberye olw'omwezi ogw'olubereberye ne bamaliriza ensonga eyo ey'abasajja bona abaali bawasizza abakazi abannamawanga.

Abaasingibwa Omusango

¹⁸Mu lulyo olwa bakabona, abaali bawasizza abakazi bannamawanga baali: Maaseya, ne Eryeza ne Yalibu ne Gedaliya bazzukulu ba Yesuwa mutabani wa Yozadaki ne baganda be.

¹⁹Ne bamalirira okulekayo bakazi baabwe abo, n'omutango gwe baawaayo olw'omusango gwali ndiga nnume.

²⁰Ku bazzukulu ba Immeri: Kanani ne Zebadiya.

²¹Ku bazzukulu ba Kalimu: Maaseya, ne Eriya, ne Semaaya, ne Yekyeri ne Uzziya.

²²Ku bazzukulu ba Pasukuli: Eriwenayi, ne Maaseya, ne Isimayiri, ne Nesaneri, ne Yozabadi ne Erasa.

²³Ku Baleevi: Yozabadi, ne Simeeyi, ne Keraya (era ye Kerita), ne Pesakiya, ne Yuda ne Eryeza.

²⁴Ku bayimbi: Eriyasibu, ne ku baakuumanga wankaaki: Sallumu, ne Teremu ne Uli.

²⁵Mu Bayisirayiri abalala: Ku bazzukulu ba Palosi: Lamiya, ne Izziya, ne Malukiya, ne Miyamini, ne Eriyazaali, ne Malukiya ne Benaya.

²⁶Ku bazzukulu ba Eramu: Mattaniya, ne Zekkaliya, ne Yekyeri, ne Abudi, ne Yeremoosi ne Eriya.

²⁷Ku bazzukulu ba Zattu: Eriwenayi, ne Eriyasibu, ne Mattaniya, ne Yeremoosi, ne Zabadi, ne Aziza.

²⁸Ku bazzukulu ba Bebayi: Yekokanani, ne Kananiya, ne Zabbayi ne Asulaayi.

²⁹Ku bazzukulu ba Bani: Mesullamu, ne Malluki, ne Adaya, ne Yasubu, ne Seyaali ne Yeremoosi.

³⁰Ku bazzukulu ba Pakasumowaabu: Aduna, ne Kerali, ne Benaya, ne Maaseya, ne Mattaniya, ne Bezaleeri, ne Binnuyi ne Manase.

³¹Ku bazzukulu ba Kalimu: Eryeza, ne Isusiya, ne Malukiya, ne Semaaya, ne Simyoni,

³²ne Benyamini, ne Malluki, ne Semaliya.

³³Ku bazzukulu ba Kasumu: Mattenayi, ne Mattata, ne Zabadi, ne Erifereti, ne Yeremayi, ne Manase, ne Simeeyi.

³⁴Ku bazzukulu ba Baani: Maadayi, ne Amulaamu, ne Uweri,

³⁵ne Benaya, ne Bedeya, ne Keruki,

³⁶ne Vaniya, ne Meremoosi, ne Eriyasibu,

³⁷ne Mattaniya, ne Mattenayi, ne Yaasu,

³⁸ne Bani, ne Binnuyi, ne Simeeyi,

³⁹ne Seremiya, ne Nasani, ne Adaya,

⁴⁰ne Makunadebayi, ne Sasayi, ne Salaayi,

⁴¹ne Azaleri, ne Seremiya, ne Semaliya,

⁴²ne Sallumu, ne Amaliya ne Yusufu.

⁴³Ku bazzukulu ba Nebo: Yeyeri, ne Mattisiya, ne Zabadi, ne Zebina, ne Iddo, ne Yoweeri ne Benaya.

⁴⁴Abo bona baali bawasizza abakazi bannamawanga, n'abamu ku bo nga babazaddemu abaana.

Nekkemiya

Nekkemiya 1

Okusaba kwa Nekkemiya

¹ Ebigambo bya Nekkemiya mutabani wa Kakaliya: Awo mu mwezi gwa Kisuleevu mu mwaka ogw'amakumi abiri bwe nnali nga ndi mu lubiri mu kibuga ekikulu ekya Susani,

² Kanani, omu ku baganda bange, n'ajja n'abamu ku basajja okuva mu Yuda, ne mubuuza ku bikwata ku kitundu ky'Abayudaaya ekyasigalawo, ne ku bifia mu Yerusaalemi.

³ Ne bantegeeza nti, "Abaawaŋjangušibwa abaddayo mu ssaza bali mu kabi kanene ne mu nnaku nnyingi; bbugwe wa Yerusaalemi yamenyebwa, era ne wankaaki waakyo yayokebwa omuliro."

⁴ Awo bwe nawulira ebigambo ebyo, ne ntuula wansi ne nkaaba, ne mmala ebiro nga nnakuwadde, nga nsiiba era nga nsaba mu maaso ga Katonda w'eggulu.

⁵ Ne njogera nti, "Ayi MUKAMA Katonda w'eggulu, Katonda omukulu ow'entiisa, akuumma endagaano ye, era ayagala abo abagondera amateeka ge.

⁶ Ozibule amaaso go, otege okutu okuwulira okusaba kw'omuddu wo kwe nsaba mu maaso go emisana n'ekiro ku lwa baddu bo abantu ba Isirayiri. Njatula ebibi bye twakola, ffe Abayisirayiri, nga nange n'ennyumba ya kitange mwe tuli.

⁷ Twasobya mu maaso go, ne tutagoberera mateeka go n'ebiragiro byo bye watuma omuddu wo Musa.

⁸ "Jjukira ebiragiro bye wawa omuddu wo Musa, ng'oyogera nti, 'Bwe mutaabeerenga beesigwa, ndibasaasaanya mu mawanga,

⁹ naye bwe mulikyuka ne mukomawo gye ndi, ne mugondera amateeka gange, abantu bammwe abaawaŋjangušibwa ne bwe banaabeeranga ku nkomerero y'eggulu, ndibakuŋŋaanyayo ne mbaleeta mu kifo kye neeroboza okubeerangamu Erinnya lyange.'

¹⁰ "Abo be baddu bo era be bantu bo be wanunula n'amaanyi go amangi era n'omukono gwo ogw'amaanyi.

¹¹ Ayi Mukama, otege okutu eri okusaba kw'omuddu wo n'eri okusaba kw'abaddu bo abatya erinnya lyo. Omuddu wo omusobozese okulaba ekisa mu maaso g'omusajja ono." Ebiro ebyo nnali musenero wa kabaka.

Nekkemiya 2

Alutagizerugizi Aweereza Nekkemiya e Yerusaalemi

¹ Awo mu mwezi gwa Nisani mu mwaka ogw'amakumi abiri ku mulembe gwa Kabaka Alutagizerugizi, nga bamuleetedde wayini, ne nzirira wayini ne muwa kabaka. Nnali sinakuwalirangako mu maaso ge.

² Kabaka n'ambuuza nti, "Kiki ekikunakuwazizza otyo ng'omulwadde? Kino si kigambo kirala wabula obuyinike obw'omu mutima." Ne ntya nnyo,

³ naye ne ɲjamba kabaka nti, "Kabaka abeere omulamu emirembe gyonna. Lwaki sinakuwala ng'ekibuga bajjajjange gye baaziikibwa kizise, nga ne wankaaki waakyo yayokebwa omuliro?"

⁴ Kabaka n'ambuuza nti, "Kiki ky'oyagala?" Awo ne nsaba eri Katonda w'eggulu,

⁵ n'oluvannyuma ne nziramu kabaka nti, "Kabaka bw'anasiima, era omuddu wo bw'anaalaba ekisa mu maaso go, ansindike ɲjende mu Yuda, mu kibuga bajjajjange gye baaziikibwa, nkiddaabirize."

⁶ Awo kabaka, ne mukyala we ng'amuli ku lusegere, n'ambuuza nti, "Olugendo lwo luliba lwa nnaku meka, era olidda ddi?" Kabaka n'asiima okuntuma, ne neegerera ekiseera.

⁷ Ne nsaba kabaka nti, "Kabaka bw'anaasiima, awandiikire abaamasaza abali emitala w'omugga Fulaati ebbaluwa, ntambule mirembe okuntuuka mu Yuda.

⁸ Ate era nsaba ebbaluwa gye nnaatwalira Asafu omukuumi w'ekibira kya kabaka, ampe emit gye ndikolamu embaawo ez'okubajjamu enzigi za yeekaalu, n'ezza wankaaki wa bbugwe w'ekibuga, n'ekifo we nnaabeeranga." Olw'omukono gwa Katonda wange ogwali nange, kabaka n'ampa bye namusaba.

⁹ Awo ne ndaga eri abaamasaza abaali emitala w'omugga Fulaati ne mbakwasa ebbaluwa eziva ewa kabaka. Kabaka yampa abakungu b'eggye n'abeebagala embalaasi okumperekero.

¹⁰ Naye Sanubalaati Omukoloni ne Tobiya omukungu Omwamoni bwe baakiwulira, ne banyiiga nnyo bwe baamanya nga waliwo omuntu afuddeyo ku mbeera y'abaana ba Isirayiri.

Nekkemiya Alambula Bbugwe wa Yerusaalemi

¹¹ Ne ntuuka e Yerusaalemi, ne mbeerayo ennaku ssatu,

¹² ne ngolokoka mu kiro ne ntambulatambula n'abamu ku basajja, naye ne sibuulira muntu n'omu ku ebyo Katonda wange bye yali atadde ku mutima gwange okukolera Yerusaalemi. Twagenda n'ensolo emu yokka gye nnali neebagadde.

¹³ Ekiro ekyo ne mpita mu Mulyango ogw'omu Kiwonvu ne njolekera Oluzzi olw'Omusege, n'Omulyango ogw'Obusa, ne ɲjenda nga neetegereza bbugwe wa Yerusaalemi eyali amenyeddwa, ne wankaaki waakyo eyayokebwa omuliro.

¹⁴N'oluvannyuma ne neyongerayo eri Omulyango ogw'Oluzzi n'eri Ekidiba kya Kabaka, naye ensolo yange n'eteyinza kuyitawo.

¹⁵Kyennava nserengeta mu kiwonvu ekiro nga ijjenda neetegereza bbugwe. Bwe namaliriza ne nkyuka ne nkomawo nga mpitira mu Mulyango ogw'omu Kiwonvu.

¹⁶Abakungu tebaamanya gye nnali ndaze newaakubadde kye nnali nkola; era nnali sinnabuulirako Bayudaaya newaakubadde bakabona, newaakubadde abakungu newaakubadde abakulu, n'abalala abaali bateekwa okukola omulimu.

¹⁷Awo ne mbagamba nti, "Mulaba akabi ke tulimu; Yerusaalemi kizise, ne wankaaki waakyo ayokeddwa omuliro. Mujje tuddaabirize bbugwe wa Yerusaalemi tuve mu buswavu bwe tulimu."

¹⁸Ne mbategeeza omukono gwa Katonda ogw'ekisa bye gwali gunkoledde, ne kabaka bye yaŋŋamba. Ne baddamu nti, "Tugolokoke tutandike okuzimba." Era ne batandika omulimu.

¹⁹Naye Sanubalaati Omukoloni, ne Tobiya omukungu Omwamoni ne Gesemu Omuwalabu bwe baakiwulira ne batunyooma n'okutusekerera ne batusekerera. Ne batubuuza nti, "Kiki kye mukola? Mwagala kujeemera kabaka?"

²⁰Ne mbaddamu nti, "Katonda w'eggulu alituyamba okukituukiriza, era ffe abaddu be tulitandika okuzimba, naye mmwe temulina mugabo newaakubadde obusika newaakubadde ekijukizo mu Yerusaalemi."

Nekkemiya 3

Amannya g'abo Abaazimba Bbugwe

¹Awo Eriyasibu kabona asinga obukulu wamu ne baganda be bakabona ne batandika okukola n'okuddaabiriza Omulyango gw'Endiga. Ne baguwonga eri MUKAMA, ne bazzaamu n'enzigi zaagwo. Ne bakola okutuukira ddala ku Munaala gwe Kikumi, n'okweyongerayo okutuuka ku Munaala gwa Kananeri, ekifo kyonna ne bakiwonga eri MUKAMA.

²Abasajja ab'e Yeriko ne bazimba ekitundu ekyaddirira, ne Zakkuli mutabani wa Imuli n'addaabiriza ekitundu ekyali kiddiridde.

³Batabani ba Kassena ne bazimba Omulyango ogw'Ebyennyanja, ne bazzaawo emyango n'enzigi zaagwo, n'eminyolo n'ebiyuma byagwo mu kifo kyabyo.

⁴Meremoosi mutabani wa Uliya, muzzukulu wa Kakkozi n'addaabiriza ekitundu ekyaddirira; Mesullamu mutabani wa Berekiya, muzzukulu wa Mesezaber n'addaabiriza ekitundu ekyaddako ekya Meremoosi. Zadooki mutabani wa Baana n'addaabiriza ekitundu ekyali kiriraanyeewo.

⁵Abasajja Abatekowa ne baddaabiriza ekitundu ekyaddirira, naye abakungu baabwe ne bagaana okukolera wansi waabwe.

⁶Ne Yoyada mutabani wa Paseya ne Mesullamu mutabani wa Besodeya ne baddaabiriza Omulyango ogw'Edda, ne bazaamu emyango n'enziги zaagwo, n'emyolo n'ebuma byagwo.

⁷Ekifo ekyaddirira kyaddaabirizibwa Meratiya Omugibyonи n'abasajja ab'e Gibyonи ne Yadoni Omumeronoosi n'abasajja ab'e Mizupa. Ebyo by'ebifo ebyafugibwanga ow'essaza eriri emitala w'omugga Fulaati.

⁸Wuziyeeri mutabani wa Kalukaya, omuweesi wa zaabu n'addaabiriza ekitundu ekyaddirira, ne Kananiya omukozi w'obuwoowo, n'addaabiriza ekitundu ekyaddirira, era abo ne baddaabiririza ddala Yerusaalemi okutuuka ku Bbugwe Omugazi.

⁹Lefaya mutabani wa Kuuli eyafuganga ekitundu ky'eggombolola ya Yerusaalemi n'addaabiriza ekitundu ekyaddirira.

¹⁰Ekitundu ekyaddirira kyalı kiriraanye ennyumba ya Yedaya mutabani wa Kalunafu, era ekyo kye yaddaabiriza; n'ekitundu ekyaddako Kattusi mutabani wa Kasabuneya n'akiddaabiriza.

¹¹Malukiya mutabani wa Kalimu ne Kassubu mutabani wa Pakasumowaabu ne baddaabiriza ekitundu ekirala ekya bbugwe n'Omunaala ogw'Ekikoomi.

¹²Eyaddaabiriza ekitundu ekyaddirira yali Sallumu mutabani wa Kallocesi ne bawala be, eyafuganga ekitundu ky'eggombolola ya Yerusaalemi ne bawala be.

¹³Kanuni n'abatuuze b'e Zanowa ne baddaabiriza Omulyango ogw'omu Kiwonvu, ne bazzaamu enziги zaagwo, n'emyolo gyagwo n'ebuma byagwo mu bifo byabyo; ate era ne baddaabiriza n'ekitundu ekirala ekya bbugwe, olugendo lwa mita nga kikumi obuwanvu, okutuuka ku Mulyango ogw'Obusa.

¹⁴Malukiya mutabani wa Lekabu ow'eggombolola y'e Besukakkeremu n'addaabiriza Omulyango ogw'Obusa, n'azzaamu enziги zaagwo, n'emyolo gyagwo n'ebuma byagwo mu bifo byabyo.

¹⁵Salluni mutabani wa Kolukoze ow'eggombolola y'e Mizupa n'addaabiriza Omulyango ogw'Oluzzi, n'azzaamu enziги zaagwo n'emiryango gyagwo n'ebuma byagwo. N'addaabiriza n'ekisenge eky'Ekidiba kya Seera ekiriraanye ennimiro ya kabaka, okutuuka ku madaala agaserengeta okuva mu kibuga kya Dawudi.

¹⁶Nekkemiya mutabani wa Azubuki eyafuganga ekitundu ky'eggombolola y'e Besuzuli n'addaabiriza ekitundu ekyaddirira okutuuka ku kifo ekyolekera ebiggya bya Dawudi, n'okutuuka ku kidiba ekyasimibwa, n'okutuuka ku Nnyumba y'Abalwanyi Abazira.

¹⁷ Abaleevi nga bakulemberwamu Lekumu mutabani wa Baani ne baddaabiriza ekitundu ekyaddirira, ne Kasabiya eyafuganga ekitundu ky'eggombolola ly'e Keyira n'addaabiriza ekitundu ekyaddako ku lw'eggombolola ye.

¹⁸ Baganda baabwe nga bakulemberwamu Bavvayi mutabani wa Kenadadi eyafuganga ekitundu ekyokubiri eky'egombolola ly'e Keyira ne baddaabiriza ekitundu ekyaddirira.

¹⁹ Ezeri mutabani wa Yesuwa, omukulembeze w'e Mizupa n'addaabiriza ekitundu ekyaddirira, n'atuuka ku nsonda ya bbugwe, kye kitundu ekyolekedde awaakumirwanga ebyokulwanyisa.

²⁰ Baluki mutabani wa Zabbayi n'addaabiriza ekitundu ekyaddirira n'obunyiikivu bungi, okuva ku nsonda ya bbugwe okutuuka ku mulyango gw'ennyumba ya Eriyasibu kabona asinga obukulu.

²¹ Meremoosi mutabani wa Uliya, muzzukulu wa Kakkozi n'addaabiriza ekitundu ekyaddirira okuva ku mulyango gw'ennyumba ya Eriyasibu okutuuka ku nkomerero yaayo.

²² Bakabona ab'omu lusenyi ne baddaabiriza ekitundu ekyaddirira.

²³ Ekitundu ekyaddirira ne kibuukibwa, Benyamini ne Kassubu ne baddaabiriza okwolekera ennyumba yaabwe, Azaliya mutabani wa Maaseya muzzukulu wa Ananiya naye n'addaabiriza ekifo ekiriraanye ennyumba ye.

²⁴ Binnuyi mutabani wa Kenadadi n'addaabiriza ekitundu ekyaddirira okuva ku nnyumba ya Azaliya okutuuka ku nsonda ya bbugwe,

²⁵ Palali mutabani wa Uzayi n'addaabiriza ekitundu kya bbugwe ku nsonda ya bbugwe, ekyolekedde omunaala ogwazimbibwa ku lubiri lwa kabaka olw'ekyengulu okuliraana oluggyga lw'abambowa. Pedaya mutabani wa Palosi

²⁶ n'abakozi ba yeekaalu abaabeeranga ku lusozi Oferi ne baddaabiriza ekitundu ekyaddirira okutuuka ku Mulyango gw'Amazzi ng'agenda ebuvanjuba ne ku munaala ogwazimbibwa.

²⁷ Abasajja b'e Tekowa ne baddaabiriza ekitundu ekyaddirira, okuva ku munaala omunene ogwazimbibwa okutuuka ku bbugwe w'e Oferi.

²⁸ Bakabona ne baddaabiriza ekyengulu w'Omulyango ogw'Embalaasi buli muntu okwolekera ennyumba ye.

²⁹ Zadooki mutabani wa Immeri n'addaabiriza ekifo ekyolekedde ennyumba ye, ne Semaaya mutabani wa Sekaniya omukuumi w'omulyango gw'ebuvanjuba n'addaabiriza ekitundu ekyaddirira.

³⁰Kananiya mutabani wa Seremiya ne Kanuni mutabani wa Zalafu ow'omukaaga n'addaabiriza ekitundu ekyaddirira. Mesullamu mutabani wa Berekiya n'addaabiriza ekitundu ekyaddirira okwolekera amaka ge.

³¹Malukiya omu ku baweesi ba zaabu n'addaabiriza ekitundu okutuuka ku nnyumba y'abaweereza ba yeekaalu, ne ku nnyumba ya basuubuzi okwolekera Omulyango Awaakeberebwanga Ebyamagazi, n'okutuuka ku kisenge ekya waggulu ku nsonda.

³²Abaweesi ba zaabu n'abasuubuzi ne baddaabiriza ekitundu ekiri wakati w'ekisenge ekya waggulu ku nsonda n'Omulyango gw'Endiga.

Nekkemiya 4

Olukwe olw'Okulemesa Okuzimba

¹Awo Sanubalaati olwawulira nga tuddaabiriza bbugwe, n'anyiiga nnyo era n'ajjula obuswandi. N'aduulira Abayudaaya

²mu maaso ga mikwano gye ne mu maaso g'eggye ly'e Samaliya n'ayogera nti, "Bano Abayudaaya abanafu bali ku ki? Balizzaawo bbugwe waabwe? Baliwaayo ssaddaaka? Balimalira mu lunaku lumu? Bayinza okulamusa amayinja okuva mu ntuumu z'ebisaaniiko, ate ebyayokebwa?"

³Tobiya Omwamoni yali amuyimiridde kumpi, n'ayogera nti, "Ebyo bye bazimba, singa ekibe kinaalinnako kinaasuula bbugwe waabwe ow'amayinja!"

⁴Ne nsaba Katonda nti, "Otuwulire Ayi Katonda waffe kubanga tunyoomebwa. Ebivumo byabwe bizze ku mitwe gyabwe bo, era baweeyo eri okunyagibwa mu nsi eribafuula abasibe.

⁵Oleme okubikka ku musango gwabwe newaakubadde ekibi kyabwe okukisangula mu maaso go kubanga bakusunguwazizza mu maaso g'abazimbi."

⁶Awo ne tweyongerayo n'okuzimba bbugwe okutuuka wakati w'obugulumivu bwayo, kubanga abantu baakolanga n'obumalirivu.

⁷Naye Sanubalaati, ne Tobiya, n'Abawalabu, n'Abamoni, n'Abasudodi bwe baawulira ng'omulimu gw'okuddaabiriza bbugwe wa Yerusaalemi gugenda mu maaso, nga tutandise n'okuziba ebituli, ne banyiiga nnyo.

⁸Bonna ne beegatta wamu ne basala olukwe okulwanyisa Yerusaalemi n'okugitabulatabula.

⁹Ne tusaba eri Katonda waffe, ne tuteekawo n'abakuumi abaakuumanga emisana n'ekiro.

¹⁰Mu kiseera kyekimu abantu b'e Yuda ne boogera nti, "Abakozi bagenda baggwaamu amaanyi, ate nga wakyaliwo ebifunfugu bingi nnyo, tetuyinza kuddaabiriza bbugwe."

¹¹N'abalabe baffe ne boogera nti, "Baliba tebanamanya newaakubadde okukiraba, tulibagwako kiyifuyiifu, era tulibatta ne tukomya omulimu."

¹²Awo Abayudaaya abaali babeera okumpi nabo ne bajja ne batulabula emirundi kkumi, nga boogera nti, "Balitulumba enjuuyi zonna."

¹³Kyennava nteeka abamu ku bantu mu njuyi eza wansi eza bbugwe awali amabanga, nga balina ebitala, n'amafumu n'emitego n'obusaale.

¹⁴Bwe namala okulaba embeera bwe yali, ne ngolokoka ne ɳjamba abakungu, n'abakulu, n'abantu abalala nti, "Temubatya. Mujukire Mukama, omukulu era ow'entiisa, mulwanirire baganda bammwe, ne batabani bammwe, ne bawala bammwe, ne bakyala bammwe n'amaka gammwe."

¹⁵Awo abalabe baffe bwe baawulira nga tutegedde olukwe lwabwe, nga Katonda alemesezza enteekateeka yaabwe, ffenna ne tuddayo ku bbugwe, buli muntu ku mulimu gwe.

¹⁶Okuva ku lunaku olwo, ekitundu ku basajja bange bazimbanga n'ekitundu ekirala nga bakutte amafumu, n'engabo, n'obusaale n'eb yokulwanyisa ebirala. Abakulembeze bona ne bawagira abantu bona aba Yuda abaali bazimba bbugwe.

¹⁷Abeetikkanga, baasitulanga n'omukono gumu eby'okuzimbisa n'omulala ne gukwata ekyokulwanyisa,

¹⁸na buli muzimbi yalina ekitala mu kiwato kye ng'akola. Naye omusajja eyafuwanga ekkondeere yambeeranga kumpi.

¹⁹Ne ɳjamba abakungu n'abakulu n'abantu abalala nti, "Omulimu munene ate mugazi, ate twesudde amabanga ku bbugwe, buli muntu ali wala ne munne.

²⁰Buli kifo gye munaawuliriranga eddoboozi ly'ekkondeere nga mujja okutudduukirira. Katonda waffe alitulwanirira."

²¹Ne tweyongerayo n'omulimu, ekitundu ekimu ne kikwatanga amafumu obudde we bwakereranga okutuusa emmunyeenyi lwe zaalabikanga.

²²Mu biro ebyo, ne nnyongera okutegeesa abantu nti, "Buli muntu n'oyo amubeera, basigalenga mu Yerusaalemi ekiro, bakuumenga ekiro, naye emisana babe nga bakola."

²³Tewaali n'omu ku ffe newaakubadde nze newaakubadde baganda bange newaakubadde abasajja bange wadde abakumi, eyayambulangamu engoye; buli omu yalina ekyokulwanyisa kye, ne bwe yagendanga ku luzzi.

Nekkemiya 5

Nekkemiya Ayamba Abaavu

¹Awo ekibinja ky'abasajja ne bakazi baabwe ne bakaayana nnyo olwa baganda baabwe Abayudaaya.

²Abamu ku bo ne boogera nti, "Ffe, ne batabani baffe ne bawala baffe tuli bangi nnyo, tulina okufuna ejjaano ey'okulya okutubeezaawo nga tuli balamu."

³Abamu ne boogera nti, "Twasingawo ebibanja byaffe, n'ennimiro zaffe ez'emizabbibu n'amaka gaffe tuleme okufa enjala mu kyeya."

⁴N'abalala ne boogera nti, "Twewola sente okusobola okusasula omusolo gwa kabaka ku bibanja byaffe ne ku nnimiro zaffe ez'emizabbibu.

⁵Newaakubadde nga tuli omusaayi gumu ne baganda baffe, n'abaana baffe baana baabwe, kyatuleetera okuwaliriza batabani baffe ne bawala baffe okubawaayo mu buddu. Abamu ku bawala baffe twali twabawaayo dda mu busibe; kaakano tetusobola kununula bibanja byaffe ebyo kubanga abantu abalala baabitwala awamu n'ennimiro zaffe ez'emizabbibu."

⁶Bwe nawulira okukaaba kwabwe n'ebigambo ebyo ne nsunguwala nnyo.

⁷Ne mbirowoozaako, ne nnenya abakungu n'abafuzi. Ne mbagamba nti, "Muggya omusolo ku baganda bammwe ne mukola amagoba!" Kyennava mpita olukujjaana olunene okugonjoola ensonga ezo,

⁸ne mbagamba nti, "Twakola kye tusobola okununula baganda baffe Abayudaaya abaatundibwa mu bannamawanga, naye mmwe mutunda baganda bammwe, ffe ne tubagula okuva ku be mubaguzziza!" Ne basiriikirira, kubanga tebaalina kyakuddamu.

⁹Ne nyongera okubagamba nti, "Kye mukola si kirungi. Tekibagwanidde okutambula nga mutya Katonda waffe, okwewala okuswala mu maaso g'abalabe baffe, bannamawanga?

¹⁰Nze, baganda bange ne basajja bange, tuwola abantu ensimbi n'emmere ey'empeke, naye ekigambo ky'okuggya omusolo ku bantu nga kuliko amagoba kikome.

¹¹Mubaddize leero ebibanja byabwe, n'ennimiro zaabwe ez'emizabbibu, n'ez'emizeeyituuni, n'ennyumba zaabwe, ne ku misolo gye mu bawooza, mubaddize kimu kya kikumi ku nsimbi, ne ku mmere ey'empeke ne ku wayini omuggyga ne ku mafuta."

¹²Awo ne baddamu nti, "Tulibibaddiza, so tetuliddayo kubasaba kintu kyonna. Tunaakola nga bw'olagidde." Kyennava mpita bakabona ne ndayiza abakungu n'abakulembeze okukola ebyo bye baasuubiza.

¹³Ne nkunkumula ne nsawo ez'ekyambalo kyange ne njogera nti, "MUKAMA Katonda akole bw'atyo ennyumba y'omuntu oyo, n'ebi'obugagga bwe abimuggyeko, ataakole nga bw'asuubizza. Omuntu oyo akunkumulibwe bw'atyo

aleme okusigaza ekintu!" Olukujjaana lwonna ne baddamu nti, "Amiina, era MUKAMA yeebazibwe." Abantu ne bakola nga bwe baasuubiza.

¹⁴ Ate era okuva mu kiseera mwe nalondebwa okuba owessaza w'ensi ya Yuda, mu mwaka ogw'amakumi abiri ogw'obufuzi bwa Kabaka Alutagizerugizi okutuuka ku mwaka ogw'amakumi asatu mu ebiri, gy'emyaka ekkumi n'ebiri, nze newaakubadde baganda bange tetwalya ku mmere eyatugerekebwa, eyali eteekwa okuba ey'owessaza.

¹⁵ Naye abessaza abansooka baazitoowerezanga abantu, nga babawooza ekitundu kya kilo eya ffeeza, ne bagattako emmere ne wayini. Naye nze si bwe nakolanga, olw'okutya Katonda.

¹⁶ Ne mmalirira okukola omulimu ku bbugwe oyo, nze n'abasajja bange bona ne twewaayo okukola ne tutadda mu kululunkanira ttaka.

¹⁷ Abantu kikumi mu ataano, Abayudaaya abaabulijo n'abakulu, be baaliranga awamu nange ku mmeeza, okwo nga kw'otadde n'abaava mu mawanga agaatuliraananga.

¹⁸ Buli lunaku ente emu, n'endiga ensava mukaaga n'enkoko nga tezibuzeeko bye byantgekerwanga, ne buli nnaku kkumi ne nfunanga wayini owa buli kika. Wakati mu ebyo byonna saasaba mmere eyali eteekwa okuweebwa owessaza, kubanga abantu baandizitoowereddwa nnyo.

¹⁹ Nzijukira Ayi Katonda wange, olw'ebyo byonna bye nkoledde abantu bano.

Nekkemiya 6

Okuwakanya Okuzimba Bbugwe Kweyongera

¹ Awo Sanubalaati, ne Tobiya ne Gesemu Omuwalabu n'abalabe baffe abalala bwe baawulira nga nzimbye bbugwe era nga tewali mabanga gaasigalamu, newaakubadde nga twali tetunateekamu nzigi mu miryango,

² Sanubalaati ne Gesemu ne bampeereza obubaka nti, "Jjangu tusisinkane mu kyalo ekimu eky'omu lusenyi lwa Ono." Naye ekigendererwa kyabwe kyali kundeetako kabi.

³ Kyennava mbatumira ababaka okubategeeza nti, "Nnina omulimu munene, siisobole kuserengeta gye muli. Lwaki ndeka omulimu ne nzija okubasisinkana?"

⁴ Ne baweereza obubaka bwe bumu emirundi ena, buli mulundi ne mbaddangamu mu ngeri y'emu.

⁵ Awo Sanubalaati n'antumira omuddu we omulundi ogwokutaano n'ebbaluwa etaali nsibe mu mukono gwe,

⁶ng'erimu ebigambo bino nti, "Tuwulidde mu mawanga, era ne Gesemu akirinako obukakafu, nga ggwe n'Abayudaaya, mweteseteese okujeema era kyemuvudde muzimba bbugwe, era n'olugambo luyitayita nga ggwe olina enteekateeka ey'okufuuka kabaka waabwe.

⁷Kigambibwa nga walonda bannabbi mu Yerusaalemi okukulangiririra nti, 'Mu Yuda mulimu kabaka.' Noolwekyo obubaka obwo nga tebunatwalibwa eri kabaka, jjangu tukkiriziganye ku nsonga eyo."

⁸Ne muweereza obubaka nga ḥjamba nti, "Tewabanga kigambo bwe kityo ku byoyogedde; ogunja bigunje okuva mu mutima gwo."

⁹Bonna baali bagezaako okututiisatiisa, nga balowooza nti, "Emikono gyabwe girinafuwa omulimu ne gulema okuggwa." Naye ne nsaba nti, "Ayi Katonda, nyweza emikono gyaffe."

¹⁰Olunaku olumu ne ḥjenda mu nnyumba ya Semaaya mutabani wa Deraaya, muzzukulu wa Meketaber; yali yeesibidde mu nnyumba, n'āḥjamba nti, "Tusisinkane mu nnyumba ya Katonda, mu yeekaalu munda, tuggalewo enzigi za yeekaalu, kubanga bajja okukutta, ekiro kino bajja kukutta."

¹¹Naye ne nziramu nti, "Omusajja nga nze nnyinza okudduka? Kiki ekitwala omusajja afaanana nga nze mu yeekaalu okuwonya obulamu bwange? Sijja kugenda yo."

¹²Ne nkizuula nga Katonda yali tamutumye, naye yali antegeesa ebigambo ebyo kubanga Tobiya ne Sanubalaati baamugulirira.

¹³Bamugulirira okuntiisatiisa n'okunkozesa ekyo nnyonoone, balyoke boonoone erinnya lyange nga banjogerako ebigambo ebya swakaba.

¹⁴Ayi Katonda wange ojjukire Tobiya ne Sanubalaati olw'ebikolwa ebyo, era ojjukire ne Nowadiya nnabbi omukazi ne bannabbi abalala abaagezaako okuntiisatiisa.

Bbugwe Amalirizibwa

¹⁵Bbugwe n'aggwa okukola ku lunaku olw'amakumi abiri mu etaano mu mwezi ogwa Eruli, mu nnaku amakumi ataano mu bbiri.

¹⁶Abalabe baffe bona bwe baakiwulira, amawanga gonna agaali gatwetoolodde ne bamulaba, ne batya era ne baggwaamu omwoyo, kubanga baalaba ng'omulimu gwakolebwa olw'okubeerwa kwa Katonda waffe.

¹⁷Ate era mu biro ebyo abakungu ba Yuda baaweerezanga ebbaluwa eri Tobiya. Tobiya n'aziddangamu.

¹⁸Bangi ku bo mu Yuda abaamulayirira, kubanga yali mukoddomi wa Sekaniya mutabani wa Ala, ate nga ne mutabani we Yekokanani yali awasizza muwala wa Mesullamu mutabani wa Berekiya.

¹⁹Baamuwaanawaananga mu maaso gange, n'oluvannyuma ne bamutegeeza bye nayogeranga. Tobiya n'aweerezanga ebbaluwa okuntiisatiisa.

Nekkemiya 7

¹Bbugwe bwe yaggwa okuzimba nga n'enziyi ziwangiddwamu, abakumi ba wankaaki, n'abayimbi, n'Abaleevi nga bamaze okulondebw,

²ne ndyoka nonda muganda wange Kanani awamu ne Kananiya omuduumizi w'ekigo okuvunaanyizibwanga Yerusaalemi, kubanga Kananiya yali yeesigika, ate ng'atyia Katonda okusinga abantu abalala bangi.

³Ne mbagamba nti, "Emiryango gya Yerusaalemi tegiteekwa kuggulwawo okutuusa ng'omusana tegunnakaalama nnyo. Abakumi nga bakyali ku miryango, muggaleewo muginywereze ddala. Mu batuuze ba Yerusaalemi, mulondemu abanaakuumanga, abamu ku bo bakuumenga mu mpalo n'abalala bakuumenga ebifo ebiriraanye ennyumba zaabwe."

Amannya g'Abaawanjangusibwa Abaakomawo

⁴Ekibuga kyali kinene era nga kigazi naye abantu abaakibeerangamu nga batono, nga n'ennyumba tezinnaddaabirizibwa.

⁵Awo Katonda wange nannumiriza, okuyita abakungu n'abakulembeze, n'abantu abaabulijjo okujja okwewandiisa ng'ennyiriri zaabwe bwe zaali. Ne ndaba ekitabo ekyalimu ennyiriri zaabo abaasooka okudda, ne nsangamu amannya gano:

⁶Bano be bantu ab'omu ssaza abaava mu buwanjanguse abaali banyagiddwa Nebukadduneeza kabaka w'e Babulooni; ne baddayo e Yerusaalemi ne Yuda, buli muntu mu kibuga ky'ewaabwe.

⁷Bajja ne Zerubbaberi, ne Yesuwa, ne Nekkemiya, ne Azaliya, ne Laamiya, ne Nakamani, ne Moluddekaayi, ne Birusani, ne Misuperesi, ne Biguvaayi, ne Nekumu ne Baana. Gano ge mannya g'Abasajja ba Isirayiri:

⁸bazzukulu ba Palosi baali enkumi bbiri mu kikumi mu nsavu mu babiri (2,172),

⁹bazzukulu ba Sefatiya baali bisatu mu nsavu mu babiri (372),

¹⁰bazzukulu ba Ala baali lukaaga mu ataano mu babiri (652),

¹¹bazzukulu ba Pakasumowaabu abaali ab'olunnyiriri lwa Yesuwa ne Yowaabu baali enkumi bbiri mu lunaana mu kumi na munaana (2,818),

¹²bazzukulu ba Eramu baali lukumi mu bibiri mu ataano mu bana (1,254),

¹³bazzukulu ba Zattu baali lunaana mu ana mu bataano (845),

¹⁴bazzukulu ba Zakkayi baali lusanvu mu nkaaga (760),

- ¹⁵bazzukulu ba Binnuyi baali lukaaga mu ana mu munaana (648),
- ¹⁶bazzukulu ba Bebayi baali lukaaga mu abiri mu munaana (628),
- ¹⁷bazzukulu ba Azugaadi baali enkumi bbiri mu bisatu mu abiri mu babiri (2,322),
- ¹⁸bazzukulu ba Adonikamu baali lukaaga mu nkaaga mu musanvu (667),
- ¹⁹bazzukulu ba Biguvaayi baali enkumi bbiri mu nkaaga mu musanvu (2,067),
- ²⁰bazzukulu ba Adini baali lukaaga mu ataano mu bataano (655),
- ²¹bazzukulu ba Ateri ow'olunnyiriri lwa Keezeekiya baali kyenda mu munaana (98),
- ²²bazzukulu ba Kasumu baali bisatu mu abiri mu munaana (328),
- ²³bazzukulu ba Bezayi baali bisatu mu abiri mu bana (324),
- ²⁴bazzukulu ba Kalifu baali kikumi mu kumi na babiri (112),
- ²⁵bazzukulu ba Gibyoni baali kyenda mu bataano (95).
- ²⁶Abaava e Besirekemu n'e Netofa baali kikumi mu kinaana mu munaana (188),
- ²⁷ab'e Anasosi baali kikumi mu abiri mu munaana (128),
- ²⁸ab'e Besuwazumavesi baali amakumi ana mu babiri (42),
- ²⁹ab'e Kiriyasuyalimu, n'e Kefira n'e Beerosi baali lusanvu mu ana mu basatu (743),
- ³⁰ab'e Laama n'e Geba lukaaga mu abiri mu omu (621),
- ³¹ab'e Mikumasi kikumi mu abiri mu babiri (122),
- ³²ab'e Beseri n'e Ayi baali kikumi mu abiri mu basatu (123),
- ³³ab'e Nebo ekyokubiri baali amakumi ataano mu babiri (52),
- ³⁴ab'e Eramu ekyokubiri baali lukumi mu bibiri mu ataano mu bana (1,254),
- ³⁵ab'e Kalimu baali bisatu mu abiri (320),
- ³⁶ab'e Yeriko baali bisatu mu ana mu bataano (345),
- ³⁷ab'e Loodi, n'e Kadidi ne Ono baali lusanvu mu abiri mu omu (721),
- ³⁸n'ab'e Sena baali enkumi ssatu mu lwenda mu asatu (3,930).
- ³⁹Bano be bakabona: bazzukulu ba Yedaya ow'olunnyiriri lwa Yesuwa baali lwenda mu nsavu mu basatu (973),
- ⁴⁰bazzukulu ba Immeri baali lukumi mu amakumi ataano mu babiri (1,052),

⁴¹bazzukulu ba Pasukuli baali lukumi mu bibiri mu ana mu musanvu (1,247),

⁴²ne bazzukulu ba Kalimu baali lukumi mu kumi na musanvu (1,017).

⁴³Ne bano be Baleevi: bazzukulu ba Yesuwa ow'olunnyiriri lwa Kadumyeri mu nda ya Kodeva baali nsavu mu bana (74).

⁴⁴Abayimbi: bazzukulu ba Asafu baali kikumi mu amakumi ana mu munaana (148).

⁴⁵Abaakuumanga wankaaki baali: bazzukulu ba Sallumu, bazzukulu ba Ateri, bazzukulu ba Talumoni, bazzukulu ba Akkubu, bazzukulu ba Katita, ne bazzukulu ba Sobayi nga bali kikumi mu amakumi asatu mu munaana (138).

⁴⁶Abaaweerezanga mu yeekaalu be bano: bazzukulu ba Zika, bazzukulu ba Kasufa, bazzukulu ba Tabbawoosi,

⁴⁷bazzukulu ba Keriso, bazzukulu ba Siya, bazzukulu ba Padoni,

⁴⁸bazzukulu ba Lebana, bazzukulu ba Kagaba, bazzukulu ba Samulaayi,

⁴⁹bazzukulu ba Kanani, bazzukulu ba Gidderi, bazzukulu ba Gakali,

⁵⁰bazzukulu ba Leyaya, bazzukulu ba Lezini, bazzukulu ba Nekoda,

⁵¹bazzukulu ba Gazzamu, bazzukulu ba Uzza, bazzukulu ba Paseya,

⁵²bazzukulu ba Besayi, bazzukulu ba Meyunimu, bazzukulu ba Nefisimu,

⁵³bazzukulu ba Bakubuki, bazzukulu ba Kakufa, bazzukulu ba Kalukuli,

⁵⁴bazzukulu ba Bazulusi, bazzukulu ba Mekida, bazzukulu ba Kalusa,

⁵⁵bazzukulu ba Balukosi, bazzukulu ba Sisera, bazzukulu ba Tema,

⁵⁶bazzukulu ba Neziya, ne bazzukulu ba Katifa.

⁵⁷Bazzukulu b'abaweereza ba Sulemaani be bano: bazzukulu ba Sotayi, bazzukulu ba Soferesi, bazzukulu ba Perida,

⁵⁸bazzukulu ba Yaala, bazzukulu ba Dalukoni, bazzukulu ba Gidderi,

⁵⁹bazzukulu ba Sefatiya, bazzukulu ba Kattiri, bazzukulu ba Pokeresukazzebayimu, ne bazzukulu ba Amoni.

⁶⁰Omuwendo ogw'abaaweerezanga mu yeekaalu ne bazzukulu b'abaweereza ba Sulemaani bona awamu, gwali bisatu mu kyenda mu babiri (392).

⁶¹Bano wammanga be baava mu bibuga eby'e Temmeera, n'e Terukalusa, n'e Kerubu, n'e Yaddoni, n'e Immeri, naye tebaalina bukakafu bulaga lulyo lwabwe newaakubadde ensibuko gye baava, nti Bayisirayiri:

⁶²bazzukulu ba Deraya, bazzukulu ba Tobiya, ne bazzukulu ba Nekoda baali lukaaga mu amakumi ana mu babiri (642).

⁶³Ne ku bakabona kwaliko bazzukulu ba Kobaya, bazzukulu ba Kakkazi, ne bazzukulu ba Baluzirayi, eyawasa muwala wa Baluzirayi Omugireyaadi, era n'atuumibwa erinnya eryo.

⁶⁴Abo waggulu ne banoonya amannya gaabwe mu biwandiiko naye nga tegaliimu, kyeavaava baziyizibwa okubeera bakabona nga bayitibwa abatali balongoofu.

⁶⁵Era owessaza n'abagaana okulya ku bintu ebitukuvu, okutuusa nga kabona alina Ulimu ne Sumimu azze.

⁶⁶Ekibiina kyonna awamu kyali emitwalo ena mu enkumi bbiri mu bisatu mu nkaaga (42,360),

⁶⁷obutassaako bawereza baabwe abasajja n'abawereza baabwe abakazi abaali akasanvu mu bisatu mu asatu mu musanvu (7,337); ate nga baalina n'abayimbi abasajja n'abakazi bibiri mu ana mu bataano (245).

⁶⁸Baalina embalaasi lusanvu mu asatu mu mukaaga (736), ennyumbu ebikumi bibiri mu ana mu ttaano (245),

⁶⁹n'ejjamira ebikumi bina mu asatu mu ttaano (435), n'endogoyi kakaaga mu lusanvu mu abiri (6,720).

⁷⁰Abamu ku bakulu b'obusolya baawaayo ensimbi okukola omulimu. Gavana n'awaayo, kilo munaana n'ekitundu eza zaabu, n'ebbensani amakumi ataano (50), n'ebiyambalo bya bakabona ebikumi bitaano mu asatu (530) mu ggwanika.

⁷¹Abamu ku bakulu b'obusolya ne baawaayo kilo kikumi mu nsanvu eza zaabu, ne ttani emu n'obutundu bubiri obwa ffeeza mu ggwanika, olw'omulimu ogwali gukolebwa.

⁷²Omuwendo gwnna awamu ogwawebwayo abantu abalala gwali kilo kikumi mu nsanvu eza zaabu, ne ttani emu n'akatundu kamu aka ffeeza, n'ebiyambalo bya bakabona nkaaga mu musanvu.

⁷³Awo bakabona, n'Abaleevi, n'abaakuumanga wankaaki, n'abayimbi, n'abamu ku bantu, abaaweerezanga mu yeekaalu, ne Isirayiri yenna, ne batereera mu bibuga byabwe.

Ezera Asoma Etteeka

Awo mu mwezi ogw'omusantu,

Nekkemiya 8

¹abantu bona nga bassa kimu ne bakunjaanira mu kifo ekigazi ekyali mu maaso g'Omulyango gw'Amazzi. Ne bagamba Ezera omuwandiisi, okuleeta Ekitabo ky'Amateeka ga Musa, MUKAMA ge yalagira Isirayiri.

²Ku lunaku olw'olubereberye olw'omwezi ogw'omusantu, Ezera kabona n'aleeta Ekitabo ky'Amateeka mu maaso g'ekibiina ekyalimu abasajja n'abakazi n'abalala abaali basobola okutegeera.

³N'akisomera mu kifo ekigazi mu maaso g'Omulyango gw'Amazzi mu ddoboozi ery'omwanguka, okuva ku makya okutuusa essaawa mukaaga ez'omu tuntu, mu maaso g'abasajja n'abakazi n'abalala abasobola okutegeera. Abantu bona ne batega amatu okuwulira ebyava mu Kitabo ky'Amateeka.

⁴Ezera omuwandiisi n'ayimirira ku kituuti eky'embaawo kye baazimbira omukolo ogwo. Mattisiya, ne Sema, ne Anaya, ne Uliya, ne Kirukiya ne Maaseya be baamuliraana ku mukono gwe ogwa ddyo, ate Pedaya, ne Misayeri, ne Malukiya, ne Kasimu, ne Kasubaddana, ne Zekkaliya ne Mesullamu be baamuliraana ku mukono gwe ogwa kkono.

⁵Awo Ezera n'abikkula ekitabo, abantu bona nga bamutunuulidde kubanga ekifo we yali ayimiridde kyali waggulu w'abantu bona, era bwe yali ng'ayanjuluza ekitabo, abantu bona ne bayimirira.

⁶Ezera ne yeebaza MUKAMA Katonda omukulu; abantu bona ne bayimusa emikono gyabwe ne baddamu nti, "Amiina! Amiina!" Ne bavuunama amaaso gaabwe ku ttaka ne basinza MUKAMA.

⁷Yesuwa, ne Baani, ne Serebiya, ne Yamin, ne Akkubu, ne Sabbesayi, ne Kodiya, ne Massey, ne Kerita, ne Azaliya, ne Yozabadi, ne Kanani ne Peraya, Abaleevi ne bannyonnyola abantu Amateeka, abantu nga bayimiridde mu bifo byabwe.

⁸Ne basoma mu Kitabo ky'Amateeka ga Katonda, nga bataputa, era nga bannyonnyola amakulu, abantu bategeere ebyasomebwa.

⁹Naye Nekkemiya owessaza, ne Ezera kabona era omuwandiisi, n'Abaleevi abaali bayigiriza abantu, ne bagamba abantu bona nti, "Olunaku lwa leero lutukuvu eri MUKAMA Katonda wammwe; temunakuwala so temukaaba."

¹⁰Nekkemiya n'abagamba nti, "Mugende mulye ebyassava, munywe n'ebiwoomerera, muweerezeeko n'abo abatalina kye bateeseteese. Leero lunaku lutukuvu eri Mukama, temunakuwala, kubanga essanyu eriva eri MUKAMA ge maanyi gammwe."

¹¹Awo Abaleevi ne bakkakkanya abantu bona, nga boogera nti, "Mubeere bakkakkamu kubanga leero lunaku lutukuvu. Temunakuwala."

¹² Oluvannyuma abantu bona ne beddirayo ewaabwe ne balya ne banywa ne baweerezaako ne bannaabwe abatalina kyakulya, era ne basanyuka nnyo, kubanga baategeera amakulu g'ebigambo ebyabategeezebwa.

¹³ Ku lunaku olwokubiri olw'omwezi ogwo, abakulu b'enyyumba awamu ne bakabona n'Abaleevi, ne bakuŋjaanira eri Ezera omuwandiisi okusoma n'okutegeera ebigambo by'Amateeka.

¹⁴ Ne basanga mu byawandiikibwa mu Mateeka, MUKAMA ge yalagira Musa, nga Abayisirayiri baali bateekwa okusulanga mu weema mu biseera eby'embaga ey'omwezi ogw'omusanvu,

¹⁵ era nga kibagwanidde okubunyisa amawulire ago n'okulangirira mu bibuga byabwe byonna ne mu Yerusaalemi, nga boogera nti, "Mugende mu nsozi mukunŋaanye amatabi ag'emizeeyituuni n'ago ag'emizeeyituuni egy'omu nsiko, n'ag'emikadasi, n'ag'enkindu, n'ag'emiti emirala egirina ebikoola ebingi okuzimba weema nga bwe kyawandiikibwa."

¹⁶ Awo abantu ne bagenda ne bagaleeta ne beeziimbira weema, abamu ku busolya bwabwe, ne mu mpya zaabwe, ne mu luggyia lw'enyyumba ya Katonda, ne mu kibangirizi okuliraana Omulyango gw'Amazzi, ne mu kibangirizi okuliraana Omulyango gwa Efulayimu.

¹⁷ Awo ekibiina kyonna ekyakomawo okuva mu buwaŋjanguse, ne beeziimbira weema ne babeera omwo; kubanga okuva mu biro bya Yesuwa mutabani wa Nuuni okutuusa ku lunaku olwo, Abayisirayiri baali tebakwatanga kiseera ekyo bwe batyo. Ne basanyuka nnyo nnyini.

¹⁸ Buli lunaku, Ezera n'asomanga mu Kitabo ky'Amateeka ga Katonda okuva ku lunaku olwasooka okutuusa ku lunaku olwasembayo. Ne bakwata embaga okumala ennaku musanvu, ne ku lunaku olw'omunaana, ne bakola olukunŋaana, ng'ekiragiro bwe kiri.

Nekkemiya 9

Abayirisirayiri Baatula Ebibi Byabwe

¹ Awo ku lunaku olw'amakumi abiri mu ennya mu mwezi gwe gumu, Abayisirayiri ne bakuŋjaana ne basiiba, nga bambadde ebibukutu era nga beesiize enfuufu ku mitwe gyabwe.

² Ab'ezzadde lya Isirayiri beeyawula ku bannamawanga bona, ne bayimirira mu bifo byabwe ne baatula ebibi byabwe n'obutali butuukirivu bwa bajjajjaabwe.

³ Ne bayimirira we baali ne basoma mu Kitabo ky'Amateeka ga MUKAMA Katonda waabwe, okumala essaawa ssatu, n'oluvannyuma ne baatula era ne basinza MUKAMA Katonda waabwe okumala essaawa endala nga ssatu.

⁴Bano be Baleevi abaali bayimiridde ku madaala: Yesuwa, ne Baani, ne Kadumyeri, ne Sebaniya, ne Bunni, ne Serebiya, ne Baani ne Kenani, abaakoowoolanga MUKAMA Katonda waabwe mu ddoboozi ery'omwanguka.

⁵Awo Abaleevi, Yesuwa, ne Kadumyeri, ne Baani, ne Kasabuneya, ne Serebiya, ne Kodiya, ne Sebaniya ne Pesakiya ne boogera nti, "Muyimirire, mwebaze MUKAMA Katonda wammwe ow'emirembe n'emirembe." "Erinnya lyo ligulumizibwe, litiibwe era ligulumizibwe okukira okusinza kwonna n'okutendereza kwonna.

⁶Ggwe wekka, ggwe MUKAMA, era ggwe wakola eggulu, n'eggulu erya waggulu, n'eggye lyalyo lyonna, n'ensi n'ebigirimu byonna, n'enyanja n'ebigirimu byonna. Buli kintu gw'okiwa obulamu, era n'eggye ery'omu ggulu likusinza.

⁷"Ggwe MUKAMA Katonda, eyalonda Ibulaamu n'omuggya mu Uli eky'Abakaludaaya n'omutuumma Ibulayimu.

⁸Walaba omutima gwe nga mwesigwa gy'oli, n'okola naye endagaano, okuwa bazzukulu be ensi ey'Abakanani, n'Abakiiti, n'Abamoli, n'Abaperezi, n'Abayebusi, n'Abagirugaasi; era otuukiriza ekyo kye wasuubiza kubanga oli mutuukirivu.

⁹"Walaba okubonaabona kwa bajajjaffe mu Misiri, n'owulira okukaaba kwabwe ku lubalama lw'Enyanja Emyufu.

¹⁰Waweereza obubonero obwewuunyisa n'eb Yamagero eri Falaawo, n'eri abakungu be, n'eri abantu be bona ab'ensi ye, kubanga wamanya engeri Abayisirayiri gye baajoogebwamu. Weekolera erinnya eryayatiikirira, n'okutuusa leero.

¹¹Wayawula mu mazzi g'enyanja n'ogalaza ebbali n'ebbali mu maaso gaabwe, ne bayita wakati mu y'oku lukalu, naye abaali babagoberera wabazaaya mu buziba, ng'ejjinja bwe likasukibwa mu mazzi ag'amaanyi.

¹²Emisana wakulemberanga abantu bo n'empagi ey'ekire, era n'ekiro wabakulemberanga n'empagi ey'omuliro okubamulisiza ekkubo lye baali bateekwa okukwata.

¹³"Wava mu ggulu, n'okka ku Lusozi Sinaayi n'oyogera gye bali. Wabawa ebiragiro eby'obwenkanya, n'amateeka ag'amazima, byonna nga birungi.

¹⁴Wabamanyisa Ssabbiiti yo entukuvu, era n'obawa ebiragiro n'amateeka ng'oyita mu muddu wo Musa.

¹⁵Bwe baalumwa enjala wabawa emmere okuva mu ggulu, ne bwe baalumwa ennyonta n'obawa amazzi okuva mu lwazi; n'obagamba bagende balye ensi gye wabalayiririra.

¹⁶ “Naye bo bajjajjaffe ne beekulumbaza ne bakakanyaza ensingo zaabwe ne batagondera biragiro byo.

¹⁷ Baagaana okukuwuliriza, ne batassaayo mwoyo okujukira ebyamagero bye wakolera mu bo. Baakakanyaza ensingo zaabwe, era mu bujeemu bwabwe ne balonda omukulembeze okuddayo mu buddu bwabwe. Naye ggwe Katonda asonyiwa, ow'ekisa era ajjudde okusaasira, alwawo okusunguwala era ajjudde okwagala, tewabaleka.

¹⁸ Ne bwe beebumbira ennyana ensanuuse ne boogera nti, ‘Ono ye katonda wammwe eyabaggya mu Misiri,’ ne bakola n’ebitasaana bingi, mu kusaasira kwo okungi tewabaleka mu ddungu.

¹⁹ “Emisana, empagi ey’ekire teyalekerawo kubalujnjamyu mu kkubo lyabwe, newaakubadde ekiro, empagi ey’omuliro nayo teyalekerawo kubaakira mu kkubo lye baali bateekwa okukwata.

²⁰ Wabawa Omwoyo omulungi okubayigiriza, so tewabammanga manu okulya, era wabawanga n’amazzi okumalawo ennyonta yaabwe.

²¹ Wabalabirira okumala emyaka amakumi ana mu ddungu, ne batabulwa kintu, so n’engoye zaabwe tezaayulika newaakubadde ebigure byabwe okuzimba.

²² “Wabawa obwakabaka n’amawanga, n’obawa na buli nsonda ey’ebyalo. Baalya ensi ya Sikoni kabaka w’e Kesuboni, n’ensi ya Ogi kabaka w’e Basani.

²³ Wayaza abazzukulu baabwe ne baba bangi ng’emmunyeenye ez’omu ggulu, n’obaleeta mu nsi gye wagamba bajjajaabwe okuyingira bagirye.

²⁴ Bazzukulu baabwe baayingira ne balya ensi, ne bawangula Abakanani abaabeeranga mu nsi, n’obawaayo mu mikono gyabwe wamu ne bakabaka baabwe, n’abantu b’ensi zaabwe ne babakola nga bwe baagala.

²⁵ Baawamba ebibuga ebyaliko bbugwe n’ensi enjimu, ne batwala amayumba agaali gajudde ebintu ebirungi ebya buli ngeri, enzizi ezasimibwa edda, n’ennimiro ez’emizabbibu, n’ennimiro ez’emizeeyituuni, n’emiti egy’ebibala mingi nnyo. Baalya ne bakkuta era ne banyirira, n’okubasanyusa n’obasanyusanga olw’obulungi bwo.

²⁶ “Naye tebaakugondera, baakujeemera ne batagoberera mateeka go. Batta bannabbi bo, abaababuuliriranga okudda gy’oli; baakola ebitasaana.

²⁷ Kyewava obawaayo eri abalabe baabwe ne bababonyaabonya. Naye nga babonaabona bwe batyo, ne bakukaabirira, n’obawulira okuva mu ggulu, n’olw’okusaasira kwo okungi ennyo n’obaweereza abaabanunula era abaabalokola okuva mu mukono gw’abalabe baabwe.

²⁸ “Naye bwe baafunanga emirembe, baddangamu okukola ebibi mu maaso go. Kyewava obawaayo mu mukono gw’abalabe baabwe, babafuge. Bwe

baakukaabiriranga nate, ng'obawulira okuva mu ggulu, n'obalokolanga emirundi mingi ng'okusaasira kwo bwe kuli.

²⁹ "Wabalabula okuddamu okugoberera amateeka go, naye ne baba b'amalala, ne batagondera biragiyo byo. Baajeemera ebiragiyo, ebireetera omuntu obulamu bw'aba ng'abigondedde. Baakunyooma ne bakuvaako, ne bakakanyaza ensingo zaabwe, ne bagaana okuwulira.

³⁰ Wabagumiikiriza okumala emyaka mingi, Omwoyo wo n'abayigirizanga ng'ayita mu bannabbi bo, naye ne batassaayo mwoyo, kyewava obawaayo mu mukono gw'abamawanga agabaliraanye.

³¹ Naye olw'okusaasira kwo okungi, tewabaviirako ddala so tewabaleka, kubanga oli Katonda ow'ekisa era ajjudde okusaasira.

³² "Kale nno, Ayi Katonda waffe, omukulu ow'ekitiibwa, Katonda ow'entiisa, akuuma endagaano ye ey'okwagala, toganya bizibu bino byonna kututuukako: ebizibu ebyatuuka ne ku bakabaka baffe, ne ku bakulembeze baffe, ne ku bakabona baffe, ne ku bannabbi baffe, ne ku bajjajjaffe, ne ku bantu bo bona okuva mu biro ebya bakabaka b'e Bwasuli n'okutuusa leero.

³³ Mu byonna ebitutuukako, wali wa bwenkanya, era omwesigwa naye ffe nga tukola bibi byereere.

³⁴ Bakabaka baffe, n'abakulembeze baffe, ne bakabona baffe, ne bajjajjaffe, tebaagobereranga mateeka go, nga tebassaayo mwoyo ku biragiyo byo newaakubadde nga wabalabulanga.

³⁵ Ne bwe baali mu bwakabaka bwabwe, nga basanyuka nnyo, mu nsi engazi era enjimu, tebaakuweerezanga newaakubadde okukyuka okuleka amakubo gaabwe amabi.

³⁶ "Laba, tuli baddu leero, abaddu mu nsi gye wawa bajjajjaffe okulya ebibala byamu n'ebirungi ebirala by'ereeta.

³⁷ Olw'ebibi byaffe, ebikungulwa eby'ensi eyo ebingi bitwalibwa bakabaka be wassaawo okutufuga. Batufuga n'ente zaffe nga bwe baagala, era tuli mu nnaku nnyingi nnyo."

Endagaano ey'Abantu ne Katonda waabwe

³⁸ "Olw'ebyo byonna, tukola naawe endagaano ey'enkalakkalira, ne tugiteeka mu buwandiike; abakulembeze baffe, n'Abaleevi baffe, ne bakabona baffe ne bagissaako omukono n'envumbo zaabwe."

Nekkemiya 10

¹ Abassaako emikono be bano: Nekkemiya owessaza, mutabani wa Kakaliya. Ne Zeddekiya,

- ²ne Seraya, ne Azaliya, ne Yeremiya,
- ³ ne Pasukuli, ne Amaliya, ne Malukiya,
- ⁴ne Kattusi, ne Sebaniya, ne Malluki,
- ⁵ ne Kalimu, ne Meremoosi, ne Obadiya,
- ⁶ne Danyeri, ne Ginnesoni, ne Baluki,
- ⁷ne Messulamu, ne Abiya, ne Miyamini,
- ⁸ne Maaziya, ne Birugayi ne Semaaya. Abo be baali bakabona.
- ⁹ Abaleevi be bano: Yesuwa mutabani wa Azaniya, ne Binnuyi batabani ba Kenadaadi ne Kadimiyeeri
- ¹⁰n'abaabayambangako be ba Sebaniya, ne Kodiya, ne Kerita, ne Peraya, ne Kanani,
- ¹¹ne Mikka, ne Lekobu, ne Kasabiya,
- ¹²ne Zakkuli, ne Serebiya, ne Sebaniya,
- ¹³ne Kodiya, ne Baani ne Beninu.
- ¹⁴Abakulembeze b'abantu baali: Palosi, ne Pakasumowaabu, ne Eramu, ne Zattu, ne Baani,
- ¹⁵ne Bunni, ne Azugaadi, ne Bebayi,
- ¹⁶ ne Adoniya, ne Biguvaayi, ne Adini,
- ¹⁷ne Ateri, ne Keezeekiya, ne Azzuli,
- ¹⁸ne Kodiya, ne Kasumu, ne Bezayi,
- ¹⁹ne Kalifu, ne Anasosi, ne Nebayi,
- ²⁰ ne Magupiyasi, ne Mesullamu, ne Keziri,
- ²¹ne Mesezaberi, ne Zadooki, ne Yadduwa,
- ²²ne Peratiya, ne Kanani, ne Anaya,
- ²³ ne Koseya, ne Kananiya, ne Kassubu,
- ²⁴ne Kallokesi, ne Piruka, ne Sobeki,
- ²⁵ne Lekumu, ne Kasabuna, ne Maaseya,
- ²⁶ne Akiya, ne Kanani, ne Anani,
- ²⁷ne Malluki, ne Kallimu ne Baana.

28 “Abantu abalala bakabona, n’Abaleevi, n’abaakuumanga wankaaki, n’abayimbi, n’abawereza b’omu yeekaalu, n’abo bona abeeyawula ku mawanga agaali gabaliraanye olw’Amateeka ga Katonda, awamu ne bakyala baabwe, ne batabani baabwe bona ne bawala baabwe bona; bona abamanyi era abategeera

29 beegatte ku baganda baabwe abakungu balayire okugobereranga Amateeka ga Katonda agaabaweebwa Musa omuddu wa Katonda, n’okugonderanga, amateeka gonna, n’ebiragiro, byonna ebya MUKAMA Katonda waffe.

30 “Tusuubiza obutafumbiza bawala baffe mu bantu abatwetoolodde, newaakubadde okukkiriza batabani baffe okuwasa bawala baabwe.

31 “Abantu abamawanga agatwetoolodde, bwe banaaleetanga ebyamaguzi oba ebyokulya okubitunda ku lunaku olwa ssabbiiti, tetuubibagulengako ku Ssabbiiti newaakubadde ku lunaku olwatukuzibwa olulala lwonna. Buli mwaka ogw’omusanvu tetuulimenga ttaka lyaffe, era tunaasonyiwanga be tubanja bona.

32 “Tunaatwalanga obuvunaanyizibwa okuwangayo eri Katonda waffe kya kusatu ekya sekeri buli mwaka olw’obuweereza mu nnyumba ya Katonda waffe:

33 olw’emigaati egy’okulaga; olw’ekiweebwayo eky’obutta ekya buli kiseera, n’olw’ekiweebwayo ekyokebwa ekya buli kiseera, n’olw’ebiweebwayo ebya Ssabbiiti, n’ebi’embaga y’omwezi ogwakaboneka, n’embaga ezaateekebwawo n’olw’ebintu ebyatukuzibwa; n’olw’ebiweebwayo olw’ekibi okutangiririra Isirayiri; n’olw’emirimu gyonna egy’omu nnyumba ya Katonda waffe.

34 “Ffe bakabona, n’Abaleevi, n’abantu twekubidde obululu okumanya ebiseera ennyumba zaffe mwe zinaaleeteranga enku mu nnyumba ya Katonda waffe, okwakanga mu kyoto kya MUKAMA Katonda waffe nga kyaka buli mwaka, nga bwe kyawandiikibwa mu mateeka.

35 “Ate era tutwala obuvunaanyizibwa okulaba nga buli mwaka tuleeta mu nnyumba ya MUKAMA ebibala ebisooka ku bisimbe byaffe ne ku buli muti ogubala ebibala.

36 “Era nga bwe kyawandiikibwa mu mateeka, tunaaleetanga abaana aboobulenzi ababereberye, n’ennyana ennume ezisooka ez’ente zaffe, n’ennyana z’amagana gaffe, n’ez’ebisibo byaffe, eri bakabona abaweerereza mu nnyumba ya Katonda waffe.

37 “Tunaaleetanga mu mawanika g’ennyumba ya Katonda waffe, eri bakabona, ekitole ekipereberye ku mmere gye tunaabanga tugoyezza, ne ku biweebwayo byaffe, ne ku bibala ebya buli muti gwaffe ebiriibwa, ne ku wayini waffe, ne ku mafuta. Ate era tunaaleeteranga Abaleevi ekimu eky’ekkumi ku bimera byaffe,

kubanga Abaleevi be bakunjaanya ebitundu eby'ekkumi mu byalo byaffe byonna gye tulimira.

³⁸Kabona, ow'omu lulyo lwa Alooni, yanaawerekeranga abaleevi, bwe banaabanga bagenze okukima ebitundu eby'ekkumi, era Abaleevi banaaleetanga kimu kya kkumi ku bitundu eby'ekkumi mu nnyumba ya Katonda waffe, mu bisenge, mu mawanika.

³⁹Abantu ba Isirayiri okwo nga kw'otadde n'Abaleevi, banaaleetanga ebirabo byabwe eby'emmere ey'empeke, ne wayini omuggya, n'omuzigo mu mawanika, ebintu eby'omu kifo ekitukuvu gye biterekebwa, era bakabona abawereza, n'abakuma wankaaki n'abayimbi gye babeera. "Tetuulagajjalirenga nnyumba ya Katonda waffe."

Nekkemiya 11

Abatuuze Abapya aba Yerusaalemi

¹ Abakulembeze b'abantu ne babeeranga mu Yerusaalemi, abantu abalala ne bakuba akalulu okulonda omuntu omu ku buli bantu kkumi okugenda okubeera mu Yerusaalemi, ekibuga ekitukuvu; omwenda bo ne basigala mu byalo byabwe.

²Abantu ne beebaza abo bona abeewaayo okubeera mu Yerusaalemi.

³ Bano be bakungu b'amasaza abaasenga mu Yerusaalemi: Abayisirayiri abamu, nga mwe muli bakabona n'Abaleevi, n'abawereza ab'omu yeekaalu, ne bazzukulu ba baddu ba Sulemaani; buli omu yabeeranga ku ttaka lye mu kibanja kye.

⁴Mu Yerusaalemi mwabeerangamu abamu ku bazzukulu ba Yuda, n'abamu ku bantu abaava mu Benyamini. Bazzukulu ba Yuda abaasenga eyo be bano: Ataya mutabani wa Uzziya, muzzukulu wa Zekkaliya, muzzukulu wa Amaliya, muzzukulu wa Sefatiya, muzzukulu wa Makalaleri, ow'omu lulyo lwa Pereezi;

⁵ne Maaseya mutabani wa Baluki, muzzukulu wa Kolukoze, muzzukulu wa Kazaya, muzzukulu wa Adaya, muzzukulu wa Yoyalibu, muzzukulu wa Zekkaliya, ow'omu lulyo lwa Siiro.

⁶Bazzukulu ba Pereezi abaasenga mu Yerusaalemi baawerera ddala abasajja ebikumi bina mu nkaaga mu munaana (468), abaali abalwanyi abazira.

⁷Bazzukulu ba Benyamini abaasenga eyo be bano: Sallu mutabani wa Mesullamu, muzzukulu wa Yowedi, muzzukulu wa Pedaya, muzzukulu wa Kolaya, muzzukulu wa Maaseya, muzzukulu wa Isiyeri, muzzukulu wa Yesaya;

⁸n'abagoberezi be Gabbayi ne Sallayi, bona ne bawera abasajja lwenda mu abiri mu munaana (928).

⁹Yoweeri mutabani wa Zikuli ye yali omulabirizi waabwe, ne Yuda mutabani wa Kassenuwa nga ye mukulu w'Ekitundu Ekyokubiri eky'ekibuga.

¹⁰Bakabona baali: Yedaya mutabani wa Yoyalibu, ne Yakini,

¹¹ne Seraya mutabani wa Kirukiya, muzzukulu wa Mesullamu, muzzukulu wa Zadooki, muzzukulu wa Merayoosi, muzzukulu wa Akitubu, alabirira ennyumba ya Katonda,

¹²ne baganda baabwe abaakolanga emirimu mu yeekaalu, be basajja lunaana mu abiri mu babiri (822); Adaya mutabani wa Yerokamu, muzzukulu wa Peraliya, muzzukulu wa Amuzi, muzzukulu wa Zekkaliya, muzzukulu wa Pasukuli, muzzukulu wa Malukiya,

¹³ne baganda be, abaali abakulu b'ennyumba; abasajja ebikumi bibiri mu ana mu babiri (242); Amasusaayi mutabani wa Azaleri, muzzukulu wa Azayi, muzzukulu wa Mesiremoosi, muzzukulu wa Immeri,

¹⁴ne baganda be, abaali abalwanyi abazira; abasajja kikumi mu abiri mu munaana (128). Omukulu waabwe ye yali Zabudyeri mutabani wa Kaggedolimu.

¹⁵Abaleevi baali: Semaaya mutabani wa Kassubu, muzzukulu wa Azulikamu, muzzukulu wa Kasabiya, muzzukulu wa Bunni;

¹⁶Sabbesayi ne Yozabadi, abakulu b'Abaleevi, abaavunaanyizibwanga emirimu egy'ebweru egy'ennyumba ya Katonda;

¹⁷Mattaniya mutabani wa Mikka, muzzukulu wa Zabudi muzzukulu wa Asafu, eyakulemberanga okwebaza mu kiseera eky'okusaba; Bakubukiya omumyuka we mu baganda be; ne Abuda mutabani wa Sammuwa, muzzukulu wa Galali, ate muzzukulu wa Yedusuni.

¹⁸Abaleevi abaabeeranga mu kibuga ekitukuvu bona awamu, baali ebikumi bibiri mu kinaana mu bana (284).

¹⁹Abakuumi b'emiryango baali: Akkubu, ne Talumoni ne baganda baabwe; abaakuumanga emiryango nga bawera abasajja kikumi mu nsanvu mu babiri (172).

²⁰Abayisirayiri abalala bona, awamu ne bakabona, n'Abaleevi, baabeeranga mu byalo byonna ebya Yuda, buli muntu ng'ali ku butaka bwe.

²¹Naye abawereza ba yeekaalu baabeeranga ku lusozi Oferi, era Zika ne Gisupa be baali abakulu baabwe.

²²Omukulu w'Abaleevi mu Yerusaalemi yali Uzzi mutabani wa Baani, muzzukulu wa Kasabiya, muzzukulu wa Mattaniya, era muzzukulu wa Mikka. Ate era Uzzi yali omu ku bazzukulu ba Asafu, abaakulemberanga okuyimba mu nnyumba ya Katonda.

²³Abayimbi baakoleranga ku biragiro bya kabaka, nga buli lunaku bwe lwetaaganga.

²⁴Pesakiya mutabani wa Mesezaber, omu ku bazzukulu ba Zeera mutabani wa Yuda, ye yali omusigire wa Kabaka, ku nsonga zonna ez'abantu.

²⁵Abantu abamu aba Yuda baabeeranga mu Kirasualuba n'ebyalo ebikyetoolodde, n'abalala mu Diboni n'ebyalo ebikyetoolodde, n'abalala mu Yekabuzeeri n'ebyalo ebikyetoolodde,

²⁶n'abalala mu Yesuwa, n'abalala mu Molada n'abalala mu Besupereti,

²⁷n'abalala mu Kazalusuwali, n'abalala mu Beeruseba n'ebyalo ebikyetoolodde,

²⁸n'abalala mu Zikulagi, n'abalala mu Mekona n'ebyalo ebikyetoolodde

²⁹n'abalala mu Enulimmoni, n'abalala mu Zola, n'abalala mu Yalamusi,

³⁰n'abalala mu Zonowa, n'abalala mu Adulamu n'ebyalo ebikyetoolodde, n'abalala mu Lakisi n'ennimiro ezikyetoolodde, n'abalala mu Azeka n'ebyalo ebikyetoolodde. Ne basiisira okuva e Beeruseba okutuuka ku kiwonvu kya Kinomu.

³¹Bazzukulu ba Benyamini abaava e Geba baabeeranga mu Mikumasi, ne mu Ayiya, ne mu Beseri n'ebyalo ebikyetoolodde,

³²ne mu Anasosi, ne mu Nobu, ne mu Ananiya,

³³ne mu Kazoli, ne mu Laama, ne mu Gittayimu,

³⁴ne mu Kadidi, ne mu Zeboyimu, ne mu Neballati,

³⁵ne mu Loodi ne mu Ono, ne mu kiwonvu kya babumbi.

³⁶Abamu ku b'omu bibinja by'Abaleevi aba Yuda, ne beegatta ku b'omu Benyamini.

Nekkemiya 12

Bakabona n'Abaleevi

¹Bano be bakabona n'Abaleevi abaakomawo ne Zerubbaber mutabani wa Seyalutyeri ne Yesuwa: Seraya, ne Yeremiya, ne Ezera,

²ne Amaliya, ne Malluki, ne Kattusi,

³ne Sekaniya, ne Lekumu, ne Meremoosi,

⁴ne Iddo, ne Ginnesoyi, ne Abiya,

⁵ne Miyamini, ne Maadiya, ne Biruga,

⁶ne Semaaya, ne Yoyalibu, ne Yedaya,

⁷ne Sallu, ne Amoki, ne Kirukiya ne Yedaya. Abo be baali abakulembeze ba bakabona ne baganda baabwe mu biro bya Yesuwa.

⁸Abaleevi baali: Yesuwa, ne Binnuyi, ne Kadumyeri, ne Serebiya, ne Yuda ne Mattaniya awamu ne baganda be, abaakulemberanga ennyimba ez'okwebaza mu kusinza.

⁹Bakubukiya ne Unni ne baganda baabwe bo, baayimiriranga nga baboolekedde mu biseera eby'okusinza.

¹⁰Yesuwa yali kitaawe wa Yoyakimu, ate Yoyakimu nga ye kitaawe wa Eriyasibu, ne Eriyasibu nga ye kitaawe wa Yoyaada,

¹¹Yoyaada nga ye kitaawe wa Yonasaani, ate Yonasaani nga ye kitaawe wa Yadduwa.

¹²Mu biro bya Yoyakimu, bano be baali abakulu b'ennyumba za bakabona: eya Seraya, yali Meraya; eya Yeremiya, yali Kananiya;

¹³eya Ezera, yali Mesullamu, eya Amaliya, yali Yekokanani;

¹⁴eya Malluki, yali Yonasaani; eya Sebaniya, yali Yusufu;

¹⁵eya Kalimu, yali Aduna; eya Merayoosi, yali Kerukayi;

¹⁶eya Iddo, yali Zekkaliya; eya Ginnesoni, yali Mesullamu;

¹⁷eya Abiya, yali Zikuli; eya Miniyamini ne Mowadiya, yali Pirutayi;

¹⁸eya Biruga, yali Sammuwa; eya Semaaya, yali Yekonasaani;

¹⁹eya Yoyalibu, yali Mattenayi; eya Yedaya, yali Uzzi;

²⁰eya Sallayi, yali Kallayi; eya Amoki, yali Eberi;

²¹eya Kirukiya, yali Kasabiya; n'eya Yedaya, yali Nesaneeri.

²²Abakulu b'ennyumba z'Abaleevi abaakola mu biro bya Eriyasibu, ne Yoyada, ne Yokanaani ne Yadduwa, awamu ne bakabona, baawandiikibwa mu mirembe gya Daliyo Omuperusi.

²³Abakulu b'enju abaava mu bazzukulu ba Leevi okutuuka ku mulembe gwa Yokanaani mutabani wa Eriyasibu, ne bawandiikibwa mu bitabo eby'ebafaayo.

²⁴Abakulembeze b'Abaleevi baali: Kasabiya, ne Serebiya, ne Yesuwa mutabani wa Kadumyeri, n'abaabayambangako nga baboolekedde, nga batendereza era nga beebaza, ng'ekibinja ekimu kiddamu ekirala kye biyimba, nga Dawudi omusajja wa Katonda bwe yalagira.

²⁵Mattaniya, ne Bakubukiya, ne Obadiya, ne Mesullamu, ne Talumoni, ne Akkubu be baakuumanga amawanika g'oku miryango.

²⁶Baaweerereza mu biro bya Yoyakimu mutabani wa Yesuwa, mutabani wa Yozadaki, ne mu biro bya Nekkemiya owessaza, ne Ezera kabona era omuwandiisi.

Okutukuza Bbugwe wa Yerusaalemi

²⁷Awo okutukuza kwa bbugwe wa Yerusaalemi bwe kwatuuka, ne banoonya Abaleevi okuva gye baabeeranga, ne baleetebwa e Yerusaalemi okujaguza nga bwe bayimba n'okukuba ebitaasa n'entongooli n'ennanga.

²⁸Abayimbi nabo ne bajja okuva mu bitundu ebyetoolodde Yerusaalemi, nga bava mu byalo by'Abanetofa,

²⁹n'okuva mu Besugirugaali, n'okuva mu bitundu by'e Geba n'e Azumavesi; abayimbi baali beefunidde ebyalo okwetooloola Yerusaalemi.

³⁰Bakabona n'Abaleevi bwe baamala okwetukuza olw'emikolo egyo, ne balyoka batukuza abantu, n'emiryango ne bbugwe.

³¹Ne ndyoka ntwala abakulembeze ba Yuda waggulu ku bbugwe, ne ndagira n'ebibinja bibiri eby'abayimbi okwebaza. Ekimu kyalaga waggulu wa bbugwe ku mukono ogwa ddyo, n'ekirala ne kiraga ku Mulyango gw'Obusa.

³²Kosaaya ne kimu kyakubiri eky'abakulembeze ba Yuda ne babagoberera,

³³nga bali wamu ne Azaliya, ne Ezera, ne Mesullamu,

³⁴ne Yuda, ne Benyamini, ne Semaaya, ne Yeremiyा,

³⁵ne bakabona abamu nga bakutte amakondeere, ne Zekkaliya mutabani wa Yonasaani, muzzukulu wa Semaaya, muzzukulu wa Mikaaya, muzzukulu wa Zakkuli, muzzukulu wa Asafu;

³⁶ne banne abaamuyambangako nga be bano: Semaaya, ne Azuleeri, ne Miralayi, ne Giralayi, ne Maayi, ne Nesaneeri, ne Yuda, ne Kanani, nga balina ebivuga ebyalagirwa Dawudi omusajja wa Katonda, era Ezera omuwandiisi, ye yabakulemberangamu.

³⁷Bwe baatuuka ku Mulyango gw'Oluzzi, ne bambuka amadaala g'Ekibuga kya Dawudi okutuukira ddala ku bbugwe; ne bayita ku lubiri lwa Dawudi ne batuuka ku Mulyango ogw'Amazzi, oguli ku luuyi olw'ebuvanjuba.

³⁸Ekibinja ekyokubiri eky'abayimbi, ne kiraga ku luuyi olwolekedde luli bali gye baali balaze. Nze ne kimu kyakubiri eky'abantu ne tubagoberera okutuukira ddala waggulu ku bbugwe, ne tuyita ku Munaala gw'Ebkoomi ne tutuuka ku Bbugwe Omugazi,

³⁹ne ku Mulyango gwa Efulayimu, ne ku Mulyango gwa Yesana, ne ku Mulyango gw'Ebyennyanya, n'okutuuka ku Munaala gwa Kananeri, ne ku Munaala

gw'Ekikumi, n'okutuukira ddala ku Mulyango gw'Endiga, ne tuyimirira ku Mulyango gw'Abambowa.

⁴⁰Ebibinja byombi eby'abayimbi ne batuula mu bifo byabwe mu nnyumba ya Katonda; nange ne kimu kyakubiri eky'abakulembeze ne tutuula,

⁴¹awamu ne bakabona bano: Eriyakimu, ne Maaseya, ne Miniyamini, ne Mikaaya, ne Eriwenayi, ne Zekkaliya, ne Kananiya nga balina amakondeere;

⁴²Maaseya, ne Semaaya, ne Eriyazaali, ne Uzzi, ne Yekokanani, ne Malukiya, ne Eramu, ne Ezera nabo baaliwo. Abayimbi ne bayimba, Yekulakiya nga ye mukulu waabwe.

⁴³Ku lunaku olwo, ne bawaayo ssaddaaka nnyingi nnyo nnyini, nga batendereza kubanga Katonda yali abawadde essanyu lingi nnyo nnyini. Abakazi n'abaana nabo ne basanyukira wamu nabo, era okujaguza okwo mu Yerusaalemi ne kuwulirwa mu bifo eby'ewala.

⁴⁴Mu kiseera ekyo, abantu ne balondebwa okulabiriranga amawanika omwaterekewanga ebyaleetebwanga, nga mwe muli ebibala ebibereberye, ne kimu kya kkumi, nga bireetebwa okuva mu bibanja ebyetoolodde ebibuga, nga bwe kyalagibwa mu Mateeka, ne biweebwa bakabona n'Abaleevi. Yuda baali basanyufu olw'obuweereza bwa bakabona awamu n'obw'Abaleevi.

⁴⁵Bakabona n'Abaleevi ne bakwata embaga ya Katonda waabwe era ne bagitukuza, n'abayimbi awamu n'abakuumi ba wankaaki nabo ne bakola bwe batyo, ng'ekiragiyo kya Dawudi ne Sulemaani mutabani we bwe kyali.

⁴⁶Mu biro eby'edda, mu biseera bya Dawudi ne Asafu, waabangawo abakulu b'abayimbi, ate nga waliwo n'enyyimba ezaayimbibwanga okutendereza Katonda.

⁴⁷Noolwekyo mu biro bya Zerubbaberri ne mu biro bya Nekkemiya, Isirayiri kyeyava ewaayo ebibinja by'abayimbi n'abakuumi ba wankaaki. Ne balonda n'ekibinja ky'Abaleevi abalala, n'Abaleevi nabo ne balondayo ekibinja ekyava mu bazzukulu ba Aloonii.

Nekkemiya 13

Enkyukakyuka za Nekkemiya Ezasembayo

¹Ku lunaku olwo, Ekitabo kya Musa ne kisomebwa ng'abantu bawulira, ne bazuula nga kyawandiikibwa nti tewabanga Omwamoni newaakubadde Omumowaabu akkirizibwanga okuyingira mu kunjaaniro lya Katonda,

²kubanga tebaayaniriza Bayisirayiri na mmere newaakubadde amazzi, wabula baagulirira Balamu akolimire Abayisirayiri. Kyokka Katonda waffe yafuula ekikolimo okuba omukisa.

³Abantu bwe baawulira etteeka eryo, ne bagoba bannaggwanga bona mu Isirayiri.

⁴Ebyo nga tebinnabaawo, Eriyasibu omu ku bakabona, yali aweereddwa obuvunaanyizibwa okulabiriranga amawanika g'ennyumba ya Katonda waffe, kyokka nga mukwano nnyo wa Tobiya.

⁵Eriyasibu yali awadde Tobiya ekimu ku bisenge ebigazi omwali muterekebwa ekiweebwayo eky'emmere ey'empeke, n'omugavu, n'ebintu ebikozesebwa mu kusinza, ne kimu kya kkumi eky'emmere ey'empeke, ne wayini omuggya, awamu n'omuzigo ogwaweebwanga Abaleevi, n'abayimbi, n'abakuumi ba wankaaki, n'ebyo ebyaweebwanga bakabona.

⁶Kyokka ebyo byonna bwe byali bikolebwa, ssaali mu Yerusaalemi, kubanga mu mwaka ogw'amakumi asatu mu ebiri ogw'obufuzi bwa Alutagizerugizi kabaka w'e Babulooni, nnali nzizeeyo eri kabaka. Oluvannyuma lw'ebbanga, ne nsaba kabaka,

⁷ne nkomawo e Yerusaalemi, ne manyisibwa ekibi Eriyasibu kye yali akoze, bwe yawa Tobiya ekisenge mu mpya z'ennyumba ya Katonda.

⁸Ne nyiiga nnyo era ne nkasuka ebintu bya Tobiya byonna ebweru, okubiggya mu kisenge.

⁹Ne ndagira ebisenge bitukuzibwe, n'oluvannyuma ebintu ebyabeeranga mu nnyumba ya Katonda, n'emmere ey'empeke, n'omugavu ne biddizibwamu.

¹⁰Ne ntegeezebwa ng'emigabo gy'Abaleevi nagyo gyali tegibaweeerebbwa, era nga n'Abaleevi bona awamu n'abayimbi baali bazzeeyo mu bibanja byabwe.

¹¹Kyenava nnenya abakungu ne mbabuuza nti, "Lwaki ennyumba ya Katonda terabiriddwa?" Bonna ne mbayita ne mbagamba bakomewo mu bifo mwe baabeeranga.

¹²Yuda yenna ne baleeta ekimu eky'ekkumi eky'emmere ey'empeke ne wayini omuggya n'omuzigo, ne babiteeka mu mawanika.

¹³Ne nnonda Seremiya omu ku bakabona, ne Zadooki omuwandiisi, ne Pedaya omu ku Baleevi balabirirenga amawanika. Ne nnonda ne Kanani mutabani wa Zakkuli, mutabani wa Mattaniya okubayambangako; baali basajja beesimbu.

¹⁴Ozinjukirenga Ayi Katonda wange olw'ekikolwa ekyo, oleme okusangulawo ebyo byonna bye nakolera ennyumba ya Katonda wange, n'okuweereza kwe naweereza n'obwesigwa.

¹⁵Mu biro ebyo, ne ndaba abasajja mu Yuda, nga basogola omwenge ku Ssabbiiti, era nga baleeta emmere ey'empeke awamu ne wayini, n'emizabbibu, n'ettiini, n'emigugu emirala egya buli ngeri, nga babitisse endogoyi. Bino baali

babiyingiza mu Yerusaalemi ku Ssabbiiti. Kyenava mbalabula obutatunda mmere ku lunaku olwo.

¹⁶Abantu b'e Ttuulo abaatuulanga mu Yerusaalemi, baaleetanga ebyennyanya n'ebiyamagazi eby'engeri ez'enjawulo, nga babitunza abantu ba Yuda mu Yerusaalemi ku Ssabbiiti.

¹⁷Nanensa abakulembeze ba Yuda ne mbagamba nti, "Kiki kino eky'ekivve kye mukola nga mwonoona olunaku lwa Ssabbiiti?

¹⁸Bajjajammwe tebaakola bintu bye bimu, Katonda waffe n'alyoka aleeta ekikangabwa kino kyonna ku ffe ne ku kibuga kyaffe kino? Kaakano mwongera kusiikula kiruyi kirala eri Isirayiri nga mwonoona Ssabbiiti?"

¹⁹Awo ebisiikirize ebya kawungeezi bwe byali bitandise okugwa ku miryango nya Yerusaalemi, nga Ssabbiiti tennatuuka, ne ndagira emiryango okuggalwa era gireme okuggulwa okutuusa nga Ssabbiiti eweddeko. Nateeka abamu ku basajja bange ku miryango, waleme kubaawo mugugu guyingizibwa wadde ogufulumizibwa ku Ssabbiiti.

²⁰Omulundi gumu oba ebiri, abasuubuzi n'abatundanga ebintu eby'engeri zonna baasula ebweru w'ekibuga Yerusaalemi.

²¹Kyokka ne mbalabula nga mbagamba nti, "Lwaki musula awo ku bbugwe? Bwe munaddamu okukikola nzija kubabonereza." Okuva ku olwo tebaddayo kujja ku Ssabbiiti.

²²Ne ndyoka ndagira Abaleevi okwetukuza bagende bakuumi emiryango, okusobola okukuma olunaku lwa Ssabbiiti nga lutukuvu. Onzijukire olwa kino nakyo Ayi Katonda wange, era ondage ekisa okusinziira ku kwagala kwo okungi.

²³Ate era mu nnaku ezo, ne ndaba abasajja ba Yuda abaali bawasizza abakazi okuva mu Asudodi, ne Amoni, ne Mowaabu.

²⁴Kimu kyakubiri ku baana baabwe baali boogera olulimi lw'Abasudodi, oba olumu ku nnimi z'abantu abalala.

²⁵Ne mbanensa ne mbakolimira. Ne nkubako abamu ku basajja abo Abayudaaya, ne mbakuunyuulako enviiri. Ne mbalayiza mu linnya lya Katonda nga mbagamba nti, "Temuwangayo bawala bammwe kufumbirwa batabani baabwe, wadde bawala baabwe okufumbirwa batabani bammwe, oba mmwe mwennyini.

²⁶Okufumbiriganwa okw'engeri eyo, si kwe kwaleetera Sulemaani kabaka wa Isirayiri okwonoona? Mu mawanga gonna, tewaali kabaka nga ye. Yali ayagalibwa nnyo Katonda, era Katonda yamufuula kabaka wa Isirayiri yonna, kyokka abakazi bannaggwanga amalala, baamuwabya, n'akola ebibi.

²⁷Ate tuwulira nga mukoze ebintu bino ebibi bwe bityo. Temuba beesigwa eri Katonda waffe bwe muwasa abakazi bannamawanga."

²⁸Omú ku batabani ba Yekoyaada, mutabani wa Eriyasibu kabona omukulu yali mukoddomi wa Sanubalaati Omukoloni. Ne mmugoba we ndi.

²⁹Bajjukire, Ayi Katonda wange, kubanga baayonoona omulimu gw'obwakabona n'endagaano y'obwakabona ne ey'Abaleevi.

³⁰Ne ntukuza bakabona awamu n'Abaleevi okuva mu buli kintu kyonna ekitali kitukuvu, buli omu ne mmuwa emirimu egy'okukola.

³¹Ne nteekawo enkola ey'abantu okuwaayo enku mu biseera ebigereke, era n'ebibala ebibereberye. Onzijukire n'okwagala kwo Ayi Katonda wange.

Eseza

Eseza 1

Nnabagereka Vasuti Aggyibwa ku Bukulu

¹ Kino kye kyabaawo ku mirembe gya Akaswero, eyafuga amasaza kikumi mu abiri mu musanvu (127) okuva e Buyindi okutuuka e Buwesiyopya.

² Mu kiseera ekkyo Kabaka Akaswero we yafugira mu lubiri e Susani,

³ mu mwaka ogwokusatu ogw'obufuzi bwe, yagabula abakungu n'abaami be abakulu embaga. Abaduumizi ba magye aga Buperusi ne Bumeedi, n'abalangira n'abakungu b'amasaza bona baagiriko.

⁴ Yayolesa obugagga n'ekitiibwa n'ettendo eby'obwakabaka bwe okumala emyezi mukaaga.

⁵ Ennaku ezo bwe zaggwaako, Kabaka n'agabula abantu bona okuva ku asemberayo ddala okutuuka ku asingirayo ddala ekitiibwa embaga endala eyali mu luggya, mu lubiri e Susani okumala ennaku musanvu.

⁶ Oluggyga lwalimu entimbe ez'engoye enjeru n'ezza bbululu, nga zisibiddwa n'emiguwa egya linena omulungi n'olugoye olwa kakobe nga lusibiddwa n'empeta eza ffeeza ku mpagi ez'amayinja aganyirira. Waaliwo n'ebitanda ebya zaabu n'effeeza ku lubalaza olwaliire n'amayinja aganyirira, amamyufu, n'ameeru, n'aga kyenvu n'amaddugavu.

⁷ Mu kugabula kwa kabaka, wayini yaweerezebwa mu bikopo bya zaabu, nga buli kimu tekifanagana na kinnaakyo, ne wayini wa Kabaka yali mungi ddala.

⁸ Buli mugenyi yanywanga nga bwe yayagala kubanga kabaka yalagira nti, "Buli mugenyi anywe nga bw'ayagala."

⁹ Ne Nnabagereka Vasuti naye n'agabula abakyala embaga mu lubiri lwa Kabaka Akaswero.

¹⁰ Awo ku lunaku olwomusanvu, Kabaka Akaswero mu ssanyu lingi olwa wayini gwe yali anywedde, n'alagira abalaawe musanvu, abaamuweerezanga: Mekuman, ne Bizusa, ne Kalubona, ne Bigusa, ne Abagusa, ne Zesali ne Kalukasi,

¹¹ okugenda okuyita Nnabagereka Vasuti ajje mu maaso ge ng'atikkiddwa engule eya Nnabagereka, asobole okulaga obubalagavu bwe eri abantu n'abakungu, kubanga yali mulungi, mubalagavu okukamala.

¹² Naye abawereza bwe baatuusa ekiragiro kya kabaka, Nnabagereka Vasuti n'agaana okugenda. Era ekyavaamu kabaka n'asunguwala, era obusungu bwe ne bubuubaaka.

¹³ Naye Kabaka yalina empisa ey'okwebuuzanga ku bakugu mu by'amateeka, era n'ateesa n'abasajja abagezigezi abategeera ebifa ku nsongha eyo.

¹⁴Amannya ga bakungu abo abakulu omusantu mu bwakabaka bwe Buperusi ne Bumeedi ge gano: Kalusena, ne Sesali, ne Adumasa, ne Talusiisi, ne Meresi, ne Malusema ne Memukani. Bano be baamubeeranga ku lusegere.

¹⁵Awo Kabaka n'ababuuza nti, "Okusinziira ku mateeka, Nnabagereka Vasuti agwanidde kibonerezo ki olw'obutagondera kiragiro kya Kabaka Akaswero ekimutuusibbwako abalaawe?"

¹⁶Memukani n'addamu Kabaka n'abakungu nti, "Nnabagereka Vasuti asobezza nnyo, ate si eri Kabaka yekka, naye n'eri abakungu n'abantu bona ab'omu bitundu byonna Kabaka Akaswero by'afuga.

¹⁷Era olw'enneyisa Nnabagereka gye yeeyisizaamu, bwe kinaamanyibwa abakyala, nabo bajja kunyoomanga ba bbaabwe nga bagamba nti, 'Nga Kabaka Akaswero yalagira Nnabagereka Vasuti okuleetebwa gy'ali, n'ajeema.'

¹⁸Era olunaku lwa leero abakyala bona mu Buperusi ne Bumeedi aba bakungu abawulidde ku nneeyisa ya Nnabagereka bajjanga kweyisa mu ngeri y'emu eri abakungu ba Kabaka. Era obunyoomi wamu n'obutabanguko tebuggwengawo mu maka.

¹⁹Noolwekyo Kabaka bw'anaasiima, awe ekiragiro, era kiwandiikibwe mu mateeka ga Buperusi ne Bumeedi agatakyuka, nti Vasuti aleme okujja nate mu maaso ga Kabaka Akaswero. Ate n'ekifo kye eky'Obwannabagereka, kiweebwe omukazi omulala amusinga.

²⁰Awo ekiragiro kya kabaka bwe kinaabuna mu bwakabaka bwonna, abakyala bona banassangamu ba bbaabwe ekitiibwa okuva ku wawagulu okutuukira ddala ku wawansi asembayo."

²¹Ekigambo ekyo kyasanyusa nnyo Kabaka n'abakungu be, era Kabaka n'akola ng'ekiteeso kya Memukani bwe kyali.

²²N'aweereza obubaka eri ebitundu byonna eby'obwakabaka buli ssaza ebbaluwa yaayo, era buli bantu mu lulimi lwabwe nga bugamba nti buli musajja afugenga mu nnyumba ye.

Eseza 2

Eseza Aweebwa obwa Nnabagereka

¹Oluvannyuma, obusungu bwa Kabaka Akaswero bwe bwakkakkana, yasigala ng'alowooza ku Vasuti, kye yakola, n'ekyali kisaliddwawo.

²Awo abaddu ba Kabaka ne baleeta ekirowoozo nti, "Banoonyeze Kabaka omuwala ku bawala abato abalungi nga mbeerera.

³Kabaka alonde ababaka mu buli kitundu mu bwakabaka bwe, bamuleetere abawala abato ababalagavu abalungi mu lubiri lwe e Susani bakuumibwe mu

nnyumba y'abakyala. Era Kegayi omulaawe wa Kabaka avunaanyizibwe abawala abo, ng'abawa ne by'okulungiya byonna bye beetaaga.

⁴Awo omuwala anasiimibwa kabaka, ye anafuuka Nnabagereka mu kifo kya Vasuti." Ekirowoozo ekyo kyasanyusa kabaka, era n'akissa mu nkola.

⁵Mu biro ebyo mu lubiri e Susani, waaliyo Omuyudaaya ow'omu kika kya Benyamini, erinnya lye Moluddekaayi, mutabani wa Yayiri, muzzukulu wa Simeeyi, muzzukulu wa Kiisi,

⁶eyawaambibwa Nebukadduneeza, Kabaka we Babulooni n'aleetebwa mu buwanjjanguse nga y'omu ku basibe abaasibibwa ne Yekoniya, eyali Kabaka wa Yuda, okuva e Yerusaalemi.

⁷Moluddekaayi yalina omuwala omuto erinnya lye Kadasa, gwe yalinako oluganda, eyakulira mu mikono gye, kubanga yali mulekwa nga yafiirwa kitaawe ne nnyina. Erinnya ly'omuwala ono eddala nga ye Eseza, era yali ng'alabika bulungi nnyo.

⁸Awo olwatuuka ekiragiro kya Kabaka bwe kyalangirirwa, abawala bangi, nga ne Eseza mwali ne baleetebwa mu lubiri e Susani ne bakwasibwa Kegayi eyali alabirira abakyala ba Kabaka.

⁹Eseza n'asiimibwa Kegayi, era n'amuwa ebintu eby'okulungiya, n'emmere ey'enjawulo. Era yamuwa n'abazaana musanvu abaalondebwa okuva mu lubiri lwa Kabaka, era n'amuteeka mu kifo ekisinga obulungi awakuumibwa abakyala.

¹⁰Eseza yali tamanyiddwa ggwanga lye, wadde ekika kye, kubanga Moluddekaayi yali amugaanye okulyogera.

¹¹Buli lunaku Moluddekaayi yalagangako mu luggya lw'ennyumba ya bakyala okumanya ebyafanga ku Eseza.

¹²Awo oluwalo lwa buli muwala bwe lwatuukanga okugenda eri Kabaka Akaswerero, omuwala oyo yalinanga okuba ng'amaze emyezi kkumi n'ebiri egy'okufumbirirwa, ng'era mu bbanga eryo, emyezi omukaaga aba ng'akozesa amafuta ag'omugavu n'emyezi omukaaga omulala nga yeyambisa obuwoo wo n'ebintu ebirala ebifumbirira.

¹³Bw'atyo omuwala n'alyokanga agenda eri Kabaka. Omuwala bwe yatuukanga okugenda ewa Kabaka yabanga wa ddembe okuweebwa kyonna ky'ayagala okuva mu nnyumba y'abakyala.

¹⁴Yagendangayo kawungeezi, ate bwe bwakeeranga, n'addayo mu kifo ekirala era eky'abakyala ekyalabirirwanga Saasugazi, omulaawe wa Kabaka eyakuumanga abakyala ba Kabaka abalala. Era omuwala oyo teyaddanga wa Kabaka wabula ng'amusiimye, era ng'amutumizza.

¹⁵ Awo oluwalo lwa Eseza omuwala eyakuzibwa Moluddekaayi, ate nga muwala wa Abikayiri, eyalina oluganda ku Moluddekaayi, bwe lwatuuka okugenda eri Kabaka, Eseza talina birala bye yasaba okuggyako ebyo Kegayi, omulaawe wa Kabaka bye yamuwa. Era Eseza n'aganja mu maaso g'abo bona abaamutunuulira.

¹⁶ Yatwalibwa eri Kabaka Akasweru mu lubiri lwe mu mwezi ogw'ekkumi, gwe mwezi Tebesi, mu mwaka ogw'omusantu ogw'okufuga kwe.

¹⁷ Kabaka n'ayagala nnyo Eseza okukira abakyala abalala bona, era n'aganja mu maaso ge okusinga abawala embeerera bona. N'amutikkira engule okuba Nnabagereka mu kifo kya Vasuti.

¹⁸ Awo Kabaka n'akolera Eseza embaga ennene, n'ayita abakungu be wamu n'abaami be, era n'alangirira abantu okusonyiyibwa emisolo mu bitundu byonna, ate n'agaba n'ebirabo nga bwe yayagala.

Moluddekaayi Agwa mu Lukwe Iw'Okutta Kabaka

¹⁹ Olunaku olumu Moluddekaayi bwe yali ng'atudde ku wankaaki w'olubiri lwa Kabaka, abawala ne bakuñjaanira eri Kabaka omulundi ogwokubiri.

²⁰ Eseza yakuuma ekyama Moluddekaayi kye yali amukuutidde, eky'obutayogera ekika kye newaakubadde eggwanga lye.

²¹ Awo mu biro ebyo Moluddekaayi ng'atudde ku wankaaki wa Kabaka, abalaawe ba Kabaka babiri, Bigusani ne Teresi, ku abo abaakuumanga omulyango, ne banyiigira Kabaka Akasweru, era ne bateesa okumutemula.

²² Naye Moluddekaayi n'agwa mu lukwe olwo, n'ategeezaako Eseza Nnabagereka, eyagenda n'abuulira Kabaka nga Moluddekaayi bwe yamutgeeza.

²³ Awo ekigambo ekyo bwe baakyekenneanya, ne kirabika nga kituufu, abasajja abo bombi ne bawanikibwa ku kalabba. Awo ebigambo bino byonna ne biwandiikibwa mu kitabo eky'ebafaayo ebya buli lunaku mu maaso ga Kabaka.

Eseza 3

Olukwe Iwa Kamani Okusaanyaawo Abayudaaya

¹ Oluvannyuma lw'ebyo Kabaka Akasweru n'akuza Kamani mutabani wa Kammedasa, Omwagaagi era n'amusukkiriza n'amuwa n'entebe ey'ekitiibwa okusinga abakungu abalala bona.

² Era abaddu ba Kabaka bona abaabeeranga ku wankaaki wa Kabaka baamufukaamiriranga ne bamuwa ekitiibwa, kubanga kyali kiragiro ekyava eri Kabaka. Naye Moluddekaayi teyamufukaamirira wadde okumussaamu ekitiibwa.

³ Awo abagalagala ba Kabaka ab'oku wankaaki ne babuuza Moluddekaayi nti, "Nsonga ki ekulobera okugondera ekiragiro kya Kabaka?"

⁴ Buli lunaku baayogeranga naye ku nsonga eyo naye ye n'agaana okubawuliriza. Ekyavaamu kwe kbuulira Kamani ku nsonga y'emu, balabe oba Moluddekaayi anaakyusa ku nneeyisa ye, kubanga yali yabategeezaako nti Muyudaaya.

⁵ Awo Kamani bwe yalaba nga Moluddekaayi tamufukaamirira wadde okumussaamu ekitiibwa, Kamani n'asunguwala nnyo.

⁶ Bwe yategeera abantu ba Moluddekaayi kye bali, Kamani n'alaba ng'okumutta yekka tekigasa. Kamani n'anoonya engeri gy'ayinza okuzikiriza abantu ba Moluddekaayi, Abayudaaya bona mu bwakabaka bwonna obwa Akaswero.

⁷ Awo mu mwezi ogw'olubereberye ogwa Nisani, mu mwaka ogw'ekkumi n'ebiri ogwa kabaka Akaswero, ne bakuba Puli, ke kalulu, mu maaso ga Kamani okufuna olunaku n'omwezi, era omwezi ogw'ekkumi n'ebiri ogwa Adali ne gulondebwa.

⁸ Awo Kamani n'agamba Kabaka Akaswero nti, "Waliwo abantu abasaasaanye ate nga beeyawudde ku mawanga mu bitundu byonna eby'obwakabaka bwo; n'amateeka gaabwe ga njawulo ku g'abantu abalala bona, era tebakuumma mateeka ga Kabaka. Noolwekyo tekigasa Kabaka kubagumiikiriza.

⁹ Kabaka bw'anasiima, kiwandiikibwe era kiyisibwe, n'okuzikirizibwa bazikirizibwe: nange ndisasula ttalanta eza ttani ebikumi bisatu mu nsavu mu ttaano ebya ffeeza mu ggwanika lya Kabaka."

¹⁰ Awo kabaka n'aggya empeta ye ku ngalo ye n'agiwa Kamani mutabani wa Kammedasa Omwagaagi omulabe w'Abayudaaya.

¹¹ Ate era Kabaka n'agamba Kamani nti, "Ensimbi zikuweereddwa n'abantu bakole nga bw'osiima."

¹² Ne bayita abawandiisi ba Kabaka ku lunaku olw'ekkumi n'essatu mu mwezi ogw'olubereberye, ne bawandiika byonna nga Kamani bwe yalagira, ne bawandiikira abaamasaza ne bagavana ba buli kitundu, n'abakungu ba buli ggwanga; era n'eri buli kitundu ng'empandiika yaakyo bwe yali, n'eri buli ggwanga ng'olulimi lwabwe bwe lwali; byawandiikibwa mu linnya lya Kabaka Akaswero era ne biteekewako akabonero n'empeta ya Kabaka.

¹³ Ebbaluwa zaatwalibwa ababaka mu bitundu byonna ebya Kabaka n'ekiragiro, eky'okuzikiriza, n'okutta n'okumalawo Abayudaaya bona, abato n'abakadde, abaana abato n'abakazi mu lunaku lumu olw'ekkumi n'essatu mu mwezi ogw'ekkumi n'ebiri ogwa Adali, awamu n'okunyaga ebyabwe byonna.

¹⁴ Ebyaggyibwa mu kiwandiike ne biraalikibwa eri amawanga gonna, ekiragiro ne kirangirirwa mu buli kitundu, balyoke beeteekereteekere olunaku olwo.

¹⁵ Awo ababaka ne banguwa okugenda olw'ekiragiro kya Kabaka, etteeka ne libuulirwa mu lubiri lw'e Susani. Awo Kabaka ne Kamani ne batuula okunywa; naye ekibuga kya Susani ne kisasamala.

Eseza 4

Moluddekaayi Akkirizisa Eseza Okuyamba Abayudaaya

¹ Awo Moluddekaayi bwe yategeera byonna ebyakolebwa, n'ayuza ebyambalo bye n'ayambala ebibukutu ne yeesiiga evvu, n'afuluma n'agenda mu kibuga wakati, n'akaaba n'eddoboozi ddene olw'ennaku ennyingi:

² naye n'akoma ku wankaaki wa kabaka, kubanga tewali eyakirizibwanga okuyingira mu mulyango gwa Kabaka ng'ayambadde ebibukutu.

³ Mu buli kitundu ekiragiro kya Kabaka n'etteeka lye gye byatuukanga ne waba okukuba ebiwoobe bingi n'okusiiba n'okukaaba amaziga mangi mu Bayudaaya era bangi ku bo ne bambala ebibukutu.

⁴ Awo abaweereza ba Eseza abakazi n'abalaawe be ne bajja gyali okumutegeeza ku bibadde wo, era Nnabagereka n'anakuwala nnyo: n'aweereza Moluddekaayi ebyambalo yeyambulemu ebibukutu bye yali ayambadde naye Moluddekaayi n'atabikkiriza.

⁵ Eseza n'atumya Kasaki omu ku balaawe ba Kabaka, gwe yali ataddewo okumuweereza n'amukuutira okugenda okumanya ekizibu ekyali kituuse ku Moluddekaayi era n'ensonga.

⁶ Awo Kasaki n'afuluma n'agenda ebweru mu kifo ekigazi eky'ekibuga ekyayolekera omulyango gwa Kabaka, Moluddekaayi gye yali.

⁷ Moluddekaayi n'amutegeeza byonna ebyamutuukako, n'omuwendo gw'ensimbi Kamani gwe yaliasuubizza okuteeka mu ggwanika lya Kabaka olw'okuzikiriza Abayudaaya.

⁸ Era n'amuwa n'ebagyibwa mu kiwandiiko eky'etteeka eryalaalikibwa mu Susani, okuliraga Eseza n'okulimunnyonnyola ate era n'okukuutira Eseza okugenda amwegayiririre ye n'abantu be eri Kabaka.

⁹ Amangwago Kasaki n'agenda n'abuulira Eseza ebigambo Moluddekaayi bye yali amutegeezeza.

¹⁰ Awo Eseza n'alagira Kasaki okuzzaayo obubaka ewa Moluddekaayi nti,

¹¹ "Abakungu ba kabaka bona n'abantu bona ab'omu bitundu byonna eby'obwakabaka bakimanyi nti tewali musajja oba mukyala eyeyanjula mu maaso ga Kabaka mu luggyia olw'omunda ng'atayitiddwa kabaka. Era waliwo n'etteeka nti akolanga bw'atylo attibwenga, wabula nga Kabaka amugololedde

omuggo gwe ogwa zaabu, n'aba omulamu. Naye wayiseewo ennaku amakumi asatu kasookedde mpitibwa kugenda wa kabaka."

¹²Ebigambo ebyo bwe byatuuka ku Moluddekaayi,

¹³Moluddekaayi n'amuddamu nti, "Tolowooza nti olw'okuba oli mu lubiri lwa Kabaka, gwe onowonawo wekka mu Bayudaaya bona.

¹⁴Kubanga ggwe bw'onoosirika mu kiseera kino, okubeerwa n'okulokolebwa kw'Abayudaaya kuliva awalala, naye ggwe n'enyyumba ya Kitaawo mulizikizibwa. Ate ani amanyi obanga wafuulibwa Nnabagereka lwa kiseera kino?"

¹⁵Awo Eseza n'aweereza obubaka eri Moluddekaayi nti,

¹⁶"Genda okunjaanye Abayudaaya bona abali mu Susani, musiibe ku lwange, so temulya wadde okunywa ekintu emisana n'ekiro okumala ennaku ssatu. Nze n'abawereza bange abakyala tunaasiibira wamu nammwe. Ekyo nga kiwedde, ndigenda eri Kabaka, newakubadde nga tekikkirizibwa mu mateeka. Bwe ndiba ow'okuzikirira, nzikirira."

¹⁷Amangwago Moluddekaayi n'agenda, era n'akola byonna Eseza bye yamulagira.

Eseza 5

Eseza Yeegayirira Kabaka

¹Awo ku lunaku olwokusatu, Kabaka yali atudde ku ntebe ey'obwakabaka mu kisenge ekinene ekyolekera omulyango, Eseza n'ayambala ebyambalo bye ebyobwannabagereka, n'ayimirira mu luggya olw'omunda olwokubiri okwolekera ekisenge ekyo ekinene.

²Kabaka bwe yalengera Nnabagereka Eseza ng'ayimiridde mu luggya, n'aganja mu maaso ge era n'amugololera omuggo ogwa zaabu ogwali mu mukono gwe. Awo Eseza n'asembera n'akoma ku musa gw'omuggo.

³Kabaka n'alyoka amubuuza nti, "Oyagala ki Nnabagereka Eseza? Era kiki ky'osaba? Onookiweebwa ne bwe kinaaba ekitundu ky'obwakabaka."

⁴Awo Eseza n'addamu nti, "Kabaka bw'anaasiima, ajje ne Kamani leero ku mbaga gye nfumbidde Kabaka."

⁵Amangwago Kabaka n'agamba nti, "Mwanguwe okuyita Kamani ajje tugende ku mbaga Eseza gyateeseteese."

⁶Awo bwe baali banya wayini, Kabaka n'addamu n'abuuza Eseza nti, "Wegayirira ki era osaba ki? Kinaakuweebwa. Ne bwe kinaaba ekitundu ky'obwakabaka kinaakuweebwa."

⁷Eseza n'amugamba nti, "Kye negayirira era kye nsaba kye kino.

⁸Obanga ɲjanze mu maaso ga Kabaka era ng'anaasiima okuddamu okusaba kwange, n'okutuukiriza kye neegayirira, nkusaba kabaka ne Kamani mujje enkyo ku mbaga gye nnaabategekera. Olwo nno, nzija kuddamu ekibuuozo kya kabaka."

Kamani Asunguwalira Moluddekaayi

⁹Ku lunaku olwo Kamani n'afuluma nga musanyufu era ng'ajaguza mu mwoyo. Naye bwe yalaba Moluddekaayi mu wankaaki wa Kabaka, nga tayimuse wadde okulaga nti amussaamu ekitiibwa, Kamani n'asunguwalira nnyo Moluddekaayi.

¹⁰Wakati mu ebyo byonna Kamani n'azibiikiriza era n'addayo eka. Oluvannyuma n'atumya mukyala we Zeresi ne mikwano gye,

¹¹era n'abeewaanirako ekitiibwa n'obugagga bwe, bwe byenkana obungi, n'abaana be bwe benkana obungi, n'ebitiibwa byonna Kabaka bye yamuwa, ate ne bwe yakuzibwa okusinga abakungu ba Kabaka n'abaana be.

¹²"Ate si ekyo kyokka," Kamani n'ayongerako na kino nti, "Nnabagereka Eseza teyaganyizza muntu mulala n'omu kuwerekera Kabaka ku mbaga gye yategese, wabula nze; era n'enkyo ampise ɲjende wamu ne Kabaka.

¹³Naye ebyo byonna tebimpa mirembe nga nkyalaba Moluddekaayi Omuyudaaya ng'atudde ku wankaaki wa Kabaka."

¹⁴Awo mukazi we Zeresi ne mikwano gye gyonna ne bamugamba nti, "Bazimbe akalabba obuwandu bwako, mita amakumi abiri mu ssatu, enkyo bw'onooyogera ne Kabaka, Moluddekaayi anaawanikibwa okwo, kale olyoke ogende ku mbaga ne Kabaka ng'oli musanyufu." Ekirowoozo ekyo kyasanyusa nnyo Kamani, era akalabba ne kazimbibwa.

Eseza 6

Moluddekaayi Aweebwa Ekitiibwa

¹Ekiro ekyo Kabaka teyayinza kwebaka; era n'alagira ekitabo eky'ebijjukizo eky'ebigambo ebya buli lunaku, bisomebwe mu maaso ge.

²Awo ne kisangibwa mu byafaayo nti Moluddekaayi yamanya olukwe lwa Bigusani ne Teresi babiri ku balaawe ba Kabaka abaali bakooma omulyango nga baali bagezaako okutta Kabaka Akaswero, era nga Moluddekaayi ye yabaloopayo.

³Kabaka n'abuuza nti, "Kitiibwa ki na bukulu ki Moluddekaayi bye yaweebwa olw'ekyo?" Awo abawereza ba Kabaka ne baddamu nti, "Tewali kintu kye yali aweereddwa."

⁴Awo Kabaka n'abuuza nti, "Ani ali mu luggya?" Mu kiseera ekyo Kamani yali yakayingira mu luggya olw'ebweru olw'oku lubiri lwa Kabaka, nga azze

okwogera ne Kabaka ku kigambo eky'okuwanika Moluddekaayi ku kalabba Kamani ke yali amuzimbidde.

⁵ Amangwago abaweereza ne baddamu nti, "Kamani wuuno waali ayimiridde mu luggya." Kabaka n'ayogera nti, "Mumukkirize ayingire."

⁶ Awo Kamani n'ayingira, Kabaka n'amubuuza nti, "Anaakolebwa ki omusajja Kabaka gw'asanyukira era gw'ayagala okuwa ekitiibwa?" Kamani n'alowooza mu mutima gwe nti, "Ani Kabaka gwe yandisanyukidde okumuwa ekitiibwa okusinga nze?"

⁷ Kamani n'addamu Kabaka nti, "Omusajja Kabaka gw'asanyukira okumuwa ekitiibwa,

⁸ bamuleetere ebyambalo Kabaka bye yali ayambaddemu, n'embalaasi Kabaka gye yali yeebagadde atikkirweko engule ey'obwakabaka ku mutwe.

⁹ Ebyambalo n'embalaasi bikwasibwe omu ku bakungu kabaka basinga okuwa ekitiibwa, n'oluvannyuma omusajja oyo kabaka gw'ayagala okuwa ekitiibwa ayambazibwe ebyambalo ebyo era yeebagale n'embalaasi, era omulangira Kabaka gw'anaalonda amukulembere mu nguudo z'ekibuga ng'alangirira waggulu nti, 'Bw'atyo bw'anaakolebwa omusajja Kabaka gw'asiima okuwa ekitiibwa!'

¹⁰ Awo Kabaka n'alagira Kamani nti, "Yanguwa ofune ebyambalo n'embalaasi nga bw'oyogedde, okolere ddala bw'otyo Moluddekaayi Omuyudaaya atuula ku wankaaki wa Kabaka, ate waleme okubulako n'ekimu ku ebyo byonna by'oyogedde."

¹¹ Awo Kamani n'addiria ebyambalo, n'ayambaza Moluddekaayi, n'amwebagaza ku mbalaasi, era n'amukulembere mu nguudo z'ekibuga ng'alangirira mu maaso ge nti, "Bw'atyo bw'akoleddwa omusajja Kabaka gw'asiima okuwa ekitiibwa."

¹² Oluvannyuma Moluddekaayi n'akomawo ku wankaaki wa Kabaka, naye Kamani n'ayanguwa n'addayo ewuwe, ng'anakuwadde era ng'abisse ku mutwe gwe,

¹³ n'ategeeza Zeresi mukazi we ne mikwano gye bona byonna ebimutuuseeko. Awo abamuwa amagezi ne mukazi we Zeresi ne bamugamba nti, "Engeri Moluddekaayi gw'otanulidde okugwa mu maaso ge, nga bw'ava mu ggwanga ly'Abayudaaya, tojja kumusinga, era tolirema kuzikirira mu maaso ge."

¹⁴ Awo bwe baali nga bakyayogera naye, abalaawe ba Kabaka ne batuuka, ne banguwa okutwala Kamani ku mbaga Eseza gye yali afumbye.

Eseza 7

Kamani Asalirwa ogw'Okufa

¹ Awo Kabaka ne Kamani ne bagenda ku mbaga ya Nnabagereka Eseza gye yateekateeka.

² Ku lunaku olwokubiri bwe baali banya wayini Kabaka n'addamu n'abuuza Eseza nti, "Nnabagereka Eseza osaba ki? Onookiweebwa. Kiki kye weegayirira? Ne bwe kinaaba ekitundu ky'obwakabaka, kinaakuweebwa."

³ Awo Eseza n'addamu nti, "Obanga ɲjanze mu maaso go, ayi Kabaka, era Oweekitiibwa bw'onoosiima, kino kye nsaba, mpeebwe obulamu bwange. Ate era n'abantu bange bawonye obulamu bwabwe. Kino kye nneegayirira.

⁴ Nze n'abantu bange tutuundiddwa eri okuzikirizibwa, okuttibwa n'okubula. Wakiri singa tutuundiddwa okuba abaddu n'abakazi abawereza, nandisirise ne sikuteganya newaakubadde nga omulabe teyandiyinzizza kuliwa kabaka bwe yandifiiriddwa."

⁵ Awo Kabaka Akaswerero n'abuuza Nnabagereka Eseza nti, "Ani era ali ludda wa oyo ayanjanga okugezaako mu mutima gwe okukola bw'atyo?"

⁶ Awo Eseza n'addamu nti, "Omulabe waffe, atukyawa, ye Kamani ono omubi." Kamani n'atyaa nnyo mu maaso ga Kabaka ne Nnabagereka.

⁷ Awo Kabaka n'agolokoka ng'aliko ekiruyi, n'aleka wayini we, n'alaga ebweru mu nnimiro ey'omu lubiri. Kamani bwe yalaba nga Kabaka amaliridde okumubonereza, n'asigala emabega okusaba obulamu bwe eri Nnabagereka Eseza.

⁸ Kabaka n'akomawo okuva mu nnimiro ey'omu lubiri n'ayingira mu kifo eky'embaga, n'asanga Kamani ng'agudde ku ntebe ey'olugalamiriro Eseza kwe yali. Kabaka ne yekanga nnyo era n'akangula eddoboobi ng'agamba nti, "N'okukwata ayagala kukwatira Nnabagereka mu maaso gange wano mu nnyumba?" Kabaka bwe yali nga yakamala okwogera ekigambo ekayo, ne babikka ku maaso ga Kamani.

⁹ Awo Kalubona, omu ku balaawe abaali bawereza Kabaka n'ayogera nti, "Waliwo akalabba kumpi ne nnyumba ya Kamani obuwanyu bwako mita amakumi abiri mu ssatu ke yazimba okuttirako Moluddekaayi eyayogera n'awonya obulamu bwa Kabaka." Kabaka n'agamba nti, "Mumuwanike okwo."

¹⁰ Awo ne bawanika Kamani ku kalabba ke yali azimbiddde Moluddekaayi, olwo obusungu bwa kabaka ne bukkakkana.

Eseza 8

Kabaka Awa Ekiragiyo Obutatta Bayudaaya

¹ Awo ku lunaku olwo Kabaka Akaswerero n'awa Nnabagereka Eseza ebintu byonna ebya Kamani omulabe w'Abayudaaya. Eseza n'ategeeza Kabaka nti alina

oluganda ku Moluddekaayi, era okuva mu kiseera ekyo Moluddekaayi n'ajjanga mu maaso ga Kabaka.

²Kabaka n'aggyako empeta ye gye yaggya ku Kamani n'agiwa Moluddekaayi, ate era ne Eseza n'afuula Moluddekaayi okuvunaanyizibwa ebintu ebyali ebya Kamani.

³Awo Eseza n'agenda ewa Kabaka nate ng'amwegayirira ng'agwa ku bigere bye n'okukaaba nga bw'akaaba, ng'amusaba akomye enteekateeka embi zonna eza Kamani Omwagaagi, n'enkwe ze yali asalidde Abayudaaya.

⁴Kabaka n'agololera Eseza omuggo ogwa zaabu, amangu ago Eseza n'agolokoka n'ayimirira mu maaso ga Kabaka.

⁵Eseza n'ayogera nti, "Kabaka bw'anasiima, era obanga ijjaanje mu maaso ga Kabaka, nange obanga musanyusa, bawandiike ekiragiro okujjulula ebbaluwa Kamani mutabani wa Kammedasa Omwagaagi, ze yayiiya era n'awandiika okuzikiriza Abayudaaya mu bitundu byonna ebya kabaka.

⁶Nnyinza ntua okugumiikiriza okulaba obulabe obulija ku bantu bange, era n'okulaba okuzikirizibwa okw'ennyumba yange?"

⁷Awo Kabaka Akasweru n'agamba Nnabagereka Eseza ne Moluddekaayi Omuyudaaya nti, "Olw'okuba Kamani yali ayagala kuzikiriza Abayudaaya, ebintu bye mbiwadde Eseza, era n'okuwanikibwa awanikibwa ku Kalabba.

⁸Noolwekyo muwandiike ekiwandiiko ekirala mu linnya lya Kabaka ku lw'Abayudaaya nga bwe musiima, era mukisseeko akabonero n'empeta ya Kabaka, kubanga tewali kiwandiiko ekiwandiikkidwa mu linnya lya Kabaka era ekiteekeddwako akabonero n'empeta ya Kabaka ekiyinza okujjululwa."

⁹Ku lunaku olw'amakumi abiri mu esatu mu mwezi ogwokusatu, gwe mwezi Sivaani abawandiisi ba Kabaka ne bayitibwa ne bawandiika byonna Moluddekaayi bye yalagira Abayudaaya, ebbaluwa n'eweerezebw eri abaamasaza, ne bagavana n'abakungu abaafuganga mu bitundu ekikumi mu abiri mu omusanvu (127) okuva e Buyindi okutuusa ku Buwesiyopya. Ebiragiro by'awandiikibwa eri buli ssaza ng'empandiika yaalyo bwe yali, n'eri buli ggwanga ng'olulimi lwabwe bwe lwali, n'eri Abayudaaya mu mpandiika yaabwe era ne mu lulimi lwabwe.

¹⁰Moluddekaayi n'awandiika mu linnya lya Kabaka Akasweru, ebbaluwa n'azissaako akabonero n'empeta ya Kabaka, n'aziweereza zitwalibwe ababaka abeebagala embalaasi ezidduka ennyo ate nga zaakuzibwa mu bisibo bya Kabaka.

¹¹Ekiragiro kya Kabaka ky'awa Abayudaaya mu buli kibuga olukusa okukuñjaana n'okwekuuma; okuzikiriza, n'okutta, n'okusaanyaawo eggye

lyonna ery'eggwanga lyonna oba essaza lyonna erinaabalumba, abakazi baabwe n'abaana baabwe abato, ate era n'okunyaga ebintu by'abalabe baabwe.

¹²Olunaku olwalondebwa Abayudaaya okukola bino mu bitundu byonna ebya Kabaka Akaswerero lwe lwali olunaku olw'ekkumi n'essatu mu mwezi ogw'ekkumi n'ebiri, gwe mwezi Adali.

¹³Ebyaggyibwa mu kiragiro ekyo byali bya kuba nga tteeka mu buli kitundu, era n'okumanyibwa eri abantu aba buli ggwanga, nti ku lunaku olwo Abayudaaya beeteekereteekere okulwanyisa abalabe baabwe.

¹⁴Awo ababaka abeebagala embalaasi za Kabaka, ne bagenda mbiro, ku kiragiro kya Kabaka, era n'ekiragiro ekiwandiikiddwa ne kirangirirwa mu lubiri lw'e Susani.

Abayudaaya Bawangula Abalabe Baabwe

¹⁵Awo Moluddekaayi n'ava mu maaso ga Kabaka ng'ayambadde ebyambalo bya Kabaka ebya kaniki n'ebyeru, era ng'atikkiddwa engule ennene eya zaabu, era ng'ayambadde omunagiro ogwa bafuta ennungi n'olugoye olw'effulungu. Ekibuga ekya Susani ne kisanyuka nnyo.

¹⁶Ate n'eri Abayudaaya kyali kiseera kya ssanyu, n'okujaguza n'ekitiibwa.

¹⁷Mu buli kitundu, ne mu buli kibuga, ekiragiro kya Kabaka we kyatuuka, waaliyo essanyu n'okujaguza n'embaga nnene ddala mu Bayudaaya. Era abantu bangi abamawanga amalala ne bafuuka Abayudaaya olw'entiisa ey'Abayudaaya eyali ebakutte.

Eseza 9

¹Ku lunaku olw'ekkumi n'ebiri gwe mwezi Adali, ekiragiro kya Kabaka lwe kyali kigenda okutuukirizibwa. Ku lunaku olwo abalabe b'Abayudaaya kwe baasuubirira okubafuga, naye ate Abayudaaya ne bafuga abo abaabakyawa.

²Abayudaaya ne bakuŋŋaana mu bibuga byabwe okubuna ebitundu byonna ebya Kabaka Akaswerero, okukwata abo abaali baagala okubaleetako obulabe, so tewaali muntu eyayanjanga okubayinza, kubanga entiisa yali egudde ku bantu bona abamawanga gonna.

³Awo abakungu bona ab'ebitundu, n'abaamasaza, ne bagavana n'abasigire ba kabaka abaafuganga ne bayamba Abayudaaya, kubanga entiisa yali ebakutte olwa Moluddekaayi.

⁴Moluddekaayi yali akulaakulanye mu lubiri, era n'ettutumu lye ne lyatiikirira okubuna ebitundu byonna, ate era ne yeeyongera amaanyi n'obuyinza.

⁵Awo Abayudaaya ne batta era ne bazikiriza abalabe baabwe bona n'ekitala, era ne bakola nga bwe baayagala abo abaabakyawa.

⁶Mu lubiri olw'e Susani, Abayudaaya batta ne bazikiriza abasajja ebikumi bitaano.

⁷Ate era batta Palusandasa, ne Dalufoni, ne Asupasa,

⁸Polasa, ne Adaliya, ne Alidasa,

⁹Palumasuta, ne Alisayi, ne Alidayi, ne Vaizasa

¹⁰abatabani ekkumi aba Kamani mutabani wa Kammedasa omulabe w'Abayudaaya. Naye tebaakwata ku munyago.

¹¹Ku lunaku olwo, Kabaka n'ategeezebwa omuwendo gw'abo abattibwa mu lubiri e Susani.

¹²Awo Kabaka n'agamba Nnabagereka Eseza nti, "Abayudaaya basse era bazikirizza abasajja ebikumi bitaano, ate era ne batabani ba Kamani ekkumi nabo battiddwa. Kale kyenkana wa kye bakoze mu bitundu bya Kabaka ebirala? Kiki ky'osaba kaakano? Onookiweebwa. Era kiki kye weegayirira? Kale n'akyokinaakolebwa."

¹³Eseza n'addamu nti, "Kabaka bw'anaasiima, enkyo Abayudaaya baweebwe olukusa okukola nga ekiragiro ekya leero bwe kibadde era emirambo gya batabani ba Kamani ekkumi giwanikibwe ku miti."

¹⁴Amangwago Kabaka n'alagira kikolebwe. Ekiragiro ne kirangirirwa mu Susani, era emirambo gya batabani ba Kamani ekkumi ne giwanikibwa.

¹⁵Awo ku lunaku olw'ekkumi n'enya mu mwezi ogwa Adali, Abayudaaya mu Susani ne beekuŋjaanya, era ne batta abasajja ebikumi bisatu mu Susani, naye ne batakwata ku munyago.

¹⁶Mu kiseera kyekimu Abayudaaya abalala abaali mu bitundu bya Kabaka nabo ne bakuŋjaana okwerwanirira, n'okufuna ne bafuna okuwummula eri abalabe baabwe. Ne batta emitwalo nsanvu mu etaano ku bo naye ne batakwata ku munyago.

¹⁷Bino byabaawo ku lunaku olw'ekkumi n'essatu mu mwezi ogwa Adali, ku lunaku olw'ekkumi n'enya ne bawummula era ne balufuula lunaku lwa kuliirangako mbaga n'olw'okusanyukirangako.

Entandikwa y'Embaga Eyitibwa Pulimu

¹⁸Abayudaaya ab'omu Susani ne bakuŋjaananga ku lunaku olw'ekkumi n'essatu ne ku lunaku olw'ekkumi n'enya, ate ku lunaku olw'ekkumi n'ettaano ne bawummula, era ne balufuula olunaku olw'okuliirangako embaga n'okusanyukirangako.

¹⁹Abayudaaya ab'omu byalo abaabeeranga mu bibuga ebitaaliiko bbugwe kyebaava bafuula olunaku olw'ekkumi n'enya olw'omwezi Adali okuba

olunaku okuliirangako embaga n'olw'okusanyukirangako, era olunaku olw'okuweerazaganirako ebirabo.

²⁰Awo Moluddekaayi n'awandiika ebyabaawo byonna, era n'aweereza Abayudaaya bona abaali mu bitundu byonna ebya Kabaka Akaswero ebbaluwa, mu matwale ag'okumpi n'agewala,

²¹ng'abalagira okukuumanga olunaku olw'ekkumi n'enya n'olw'ekkumi n'ettaano mu mwezi ogwa Adali nga lwa mbaga,

²²era nga kye kiseera Abayudaaya kye baafunirako eddembe eri abalabe baabwe, ate era nga gwe mwezi obuyinike bwabwe lwe bwafuulibwa essanyu, n'okunakuwala kwabwe ne kukoma. Moluddekaayi n'abiwandiika okujjukira ennaku ezo ng'ennaku ez'okuliirangako embaga n'okusanyukirangako, ate era n'okuweerezaganya ebyokulya ebirungi, era n'okugabiranga abaavu ebirabo.

²³Awo Abayudaaya ne basuubiza okukola nga bwe baatandika, nga Moluddekaayi bwe yabawandiikira.

²⁴Kamani mutabani wa Kammedasa Omwagaagi omulabe w'Abayudaaya bona, yali asalidde Abayudaaya olukwe okubazikiriza, era ng'akubye akalulu Puli, okubasaanyaawo n'okubazikiriza.

²⁵Naye Eseza bwe yakimanyisa Kabaka, Kabaka n'awa ekiragiro mu buwandiike nti olukwe olubi Kamani lwe yali asalidde Abayudaaya ludde ku mutwe gwe, era ye ne batabani be ne bawanikibwa ku kalabba.

²⁶Ennaku ezo kyebaava baziyyita Pulimu ng'erinnya lya Puli bwe liri. Awo olw'ebigambo byonna ebyawandiikibwa mu bbaluwa, n'olw'ebyo bye baalaba, n'ebiyabatuukako,

²⁷Abayudaaya kyebaava balagira ne basuubiza, era ne basuubiriza ezzadde lyabwe n'abo bona abanaabeegattangako, nti awatali kwekwasa nsonga yonna, bateekwa okukwatanga ennaku ezo zombi buli mwaka ng'ekiwandiiko kyazo bwe kyali era ng'ebiro byazo bwe byali.

²⁸Ennaku ezo zижжukirwenga ku mirembe gyonna, na buli kika, na buli ssaza era na buli kibuga, era ennaku zino eza Pulimu, Abayudaaya tebalekangayo okuzijagulizaangako, wadde okuzeerabira.

²⁹Awo Nnabagereka Eseza muwala wa Abikayiri ne Moluddekaayi Omuyudaaya ne bawandiika n'obuyinza bwonna okunyweza ebbaluwa eyo eyookubiri eya Pulimu.

³⁰Ebbaluwa ne ziweerezebw, mu bitundu ekikumi mu abiri mu omusanvu (127) eby'obwakabaka bwa Akaswero,

³¹n'okuwa ebiragiro nti ennaku ezo eza Pulimu zikuumibwenga mu biro byazo nga Omuyudaaya Moluddekaayi ne Nnabagereka Eseza bwe baabalagira, era

nga bwe beeyama bo bennyini n'ezzadde lyabwe okusinziira ku biseera byabwe bye baayitamu eby'okusiiba n'okukungubaga.

³²Awo ekiragiro kya Eseza ne kinyweza ebigambo ebyo ebya Pulimu, era ne kiwandiikibwa mu byafaayo.

Eseza 10

Obwatiikirivu bwa Moluddekaayi

¹Kabaka Akaswero n'asalira abantu bona ab'obwakabaka bwe omusolo, abaabeeranga ku lukalu n'abo abaabeeranga ku bizinga.

²Era ebikolwa bye byonna eby'obuyinza n'amaanyi ge, n'okutegeereza ddala obukulu bwa Moluddekaayi, Kabaka bwe yamukuza, byawandiikibwa mu kitabo eky'ebiomumirembe gya bassekabaka b'e Bumeedi n'e Buperusi.

³Moluddekaayi Omuyudaaya ye yali addirira Kabaka Akaswero mu buyinza, era yali mukulu mu Bayudaaya ate nga bamussaamu nnyo ekitiibwa, kubanga yakolanga bulungi abantu be, ate era ng'ayagaliza ezzadde lye lyonna emirembe.

Yobu

Yobu 1

Yobu n'ebi'Amaka ge byonna

¹ Waaliwo omusajja mu nsi ya Uzzi erinnya lye Yobu; yali muntu ataliiko kya kunenyezebwa, nga wa mazima, eyewalanga ekibi, era ng'atya Katonda.

² Yalina abaana aboobulenzi musanvu n'aboobuwala basatu.

³ Mu byobugagga ebingi ennyo bye yalina; mwe mwali endiga kasanvu, enjamira enkumi ssatu, emigogo gy'ente ezirma ebikumi bitaano, endogoyi enkazi ebikumi bitaano, n'abaddu bangi nnyo nnyini; yali mwatiikirivu okusinga abantu abalala bona mu nsi z'ebuvanjuba.

⁴ Batabani be baakwatanga embaga z'amazaalibwa gaabwe buli omu mu mpalo ng'ennaku zaabwe bwe zaali ziddirijjananga mu maka ga buli omu; era baayitanga bannyinaabwe bonsatule okubajagulizaangako.

⁵ Ennaku z'embaga bwe zaggwangako, Yobu yabatumyanga n'abatukuza; yakeeranga mu makya n'abaweerangayo ebiweebwayo ebyokebwa ng'omuwendo gwabwe bwe gwali ng'alowooza nti, "Oboolyawo ng'abaana bange bayonoonye ne bavoola Katonda mu mitima gyabwe." Kino yakikolanga bulijjo.

Setaani Agezesza Yobu

⁶ Olunaku lumu, bamalayika ne bajja mu maaso ga MUKAMA, ne Setaani naye n'ajjiramu.

⁷ MUKAMA n'abuuza Setaani nti, "Ova wa?" Setaani n'addamu MUKAMA nti, "Nva kutalaaga nsi yonna okulaba ebintu nga bwe biri."

⁸ MUKAMA Katonda n'abuuza Setaani nti, "Weetegerezza omuddu wange Yobu, atalina amufaanana, anzisaamu ekitiibwa, ataliiko kyakunenyezebwa era eyewala buli ngeri yonna eyinza okukozesa omuntu ebibi?"

⁹ Setaani n'addamu MUKAMA Katonda nti, "Ekitiibwa akussaamu kya bwereere?

¹⁰ Tomukozeeko lukomera ye n'ennyumba ye, n'ebi'obugagga by'alina? Buli ky'akola okiwadde omukisa; n'ebi'obugagga bye byeyongedde nnyo obungi!

¹¹ Kale geza okwate ku by'alina obimuggyeko olabe nga taakwegaane nga n'ensi yonna eraba!"

¹² MUKAMA Katonda n'agamba Setaani nti, "Byonna by'alina biri mu mikono gyo, naye togeza n'okwata ku bulamu bwe." Oluvannyuma lw'ebyo Setaani n'ava mu maaso ga MUKAMA.

Yobu afiirwa Abaana be n'ebi'Obugagga bwe

¹³Awo olunaku lumu, batabani ba Yobu ne bawala be bwe baali banywa omwenge era nga baliira ebyassava mu maka ga mukulu waabwe,

¹⁴omubaka n'ajja eri Yobu n'amugamba nti, "Ente zibadde zirima nga n'endogoyi ziri kumpi nazo,

¹⁵Abaseba ne bazigwako ne bazitwala era n'abaddu bona ne babatta nze nsigaddewo nzekka okujja okukutegeeza bino."

¹⁶Oyo aba akyayogera ebyo, laba, omubaka omulala n'atuuka naye n'amugamba nti, "Omuliro gubuubuuse nga guva mu ggulu ne gusaanyaawo endiga zonna n'abasumba baazo, nze nsigaddewo nzekka okukutegeeza bino."

¹⁷N'oyo aba akyayogera, n'omubaka omulala n'atuuka, n'agamba nti, "Abakaludaaya bazze nga beetegese mu bibinja bisatu, ne bagwa ku ηηjamira ne bazitwala era ne batta n'abaddu ababadde bazirabirira, era nze nzekka nze nsigaddewo okujja okukumanyisa bino."

¹⁸Aba akyayogera, laba, n'omulala n'ajja n'amugamba nti, "Batabani bo ne bawala bo babadde baliira era nga banywera omwenge mu nnyumba ya mukulu waabwe,

¹⁹laba, omuyaga ogw'amaanyi guvudde mu ddungu ne gugoyaagoya ennyumba yonna mwe babadde era bona bafiiriddemu nze mponyeewo nzekka okujja okukubikira."

²⁰Yobu olwawulira bino byonna, n'agolokoka n'ayuza ebyambalo bye n'amwa omutwe gwe, n'avuunama n'asinza:

²¹n'agamba nti, "Nazaalibwa sirina kantu era bwe ntyo bwe ndiddayo. MUKAMA ye yawa era MUKAMA y'aggyeewo, erinnya lya MUKAMA Katonda lyebazibwe."

²²Mu bino byonna Yobu teyayonoona kubanga teyeemulugunyiza Katonda.

Yobu 2

Obulamu bwa Yobu Bukwatibwako

¹Ku lunaku olulala bamalayika ne bajja okukiika mu maaso ga MUKAMA Katonda, ne Setaani naye n'ajjiramu.

²MUKAMA Katonda n'abuuza Setaani nti, "Ova wa?" Setaani n'amuddamu nti, "Nva kutalaaga ensi yonna."

³MUKAMA Katonda n'agamba Setaani nti, "Olowoozezza ku muddu wange Yobu? Talina kyakunenyezebwa, mwesimbu, atya Katonda era eyewala ekibi bw'atyo talina amufaanana. Anywezezza obutuukirivu bwe newaakubadde nga wansokasoka mmuzikirize awatali nsong'a."

⁴Setaani n'amuddamu nti, "Eddiba olw'eddiba, omuntu kyaliva awaayo byonna by'alina olw'okuwonya obulamu bwe;

⁵naye golola omukono gwo okwate ku magumba ge n'omubiri gwe olabe oba taakwegaane."

⁶ MUKAMA Katonda n'amugamba nti, "Weewaawo, ali mu mukono gwo, kyokka mulekere obulamu bwe."

⁷ Awo Setaani n'ava awali MUKAMA Katonda, n'alwaza Yobu amayute amazibu okuva ku mutwe, okutuukira ddala ku bigere.

⁸Yobu n'atandika okwewayaguzanga oluggyo ng'eno bw'atudde mu vv.

⁹Kyokka mukyala we n'amugamba nti, "Okyagugubidde ku butuukirivu bwo? Weegaane Katonda ofe!"

¹⁰Naye ye n'amuddamu nti, "Oyogera ng'omu ku bakazi abatategeera bwe bandyogedde! Tunaafunanga birungi byereere mu mukono gwa Katonda?" Mu bino byonna Yobu teyayonoonaa na kamwa ke.

Mikwano gyा Yobu Abasatu

¹¹Awo mikwano gyा Yobu abasatu; Erifaazi Omutemani, Birudaadi Omusuki, ne Zofali Omunaamasi bwe baawulira emitawaana egiali gituuse ku mukwano gwabwe, ne bajja buli omu okuva ewuwe ne basisinkana nga bwe baali bateesessa, bagende bamusaasire bamuzzeemu amaanyi.

¹²Tebaamutegeererawo nga bakyali wala, olw'embeera gye yalimu; ne bayimusa amaloboozi gaabwe ne bakuba ebiwooobe ne bayuza ebyambalo byabwe ne bayiwa enfuufu ku mitwe gyabwe.

¹³Awo ne batuula naye we yali atudde okumala ennaku musanvu emisana n'ekiro nga tewali anyega, olw'obulumi obungi Yobu bwe yalimu.

Yobu 3

Yobu Akolimira Olunaku kwe Yazaalirwa

¹Oluvannyuma lw'ebyo, Yobu n'ayasamya akamwa ke n'akolimira olunaku kwe yazaalirwa.

²N'agamba nti,

³"Olunaku kwe nazaalirwa luzikirire, n'ekiro lwe kyalangirirwa nti omwana mulenzi.

⁴Olunaku olwo lubuutikirwe ekizikiza, omusana guleme okulwakako, Katonda aleme okulufaako.

⁵Ekizikiza n'ekisiikirize eky'okufa birujjule, ekire kirutuuleko, ekizikiza kikankanye ekitangaala kyalwo.

- ⁶ Ekizikiza ekikutte be zigizigi kirunyage, luleme okubalirwa awamu n'ennaku eziri mu mwaka, wadde okuyingizibwa mu ezo eziri mu mwezi.
- ⁷ Yee, lubeere lugumba, waleme okuba eddoboozi lyonna ery'essanyu eririwulirwako.
- ⁸ Abo abakolimira ennyanja n'ennaku balukolimire, n'abo abamanyi okuzuukusa agasolo galukwata mu nnyanja, balukolimire.
- ⁹ Emmunyeeny'e ez'omu matulutulu gaalwo zibe ekizikiza, lulindirire ekitangaala kirubulwe, luleme okulaba ebikowe by'oku nkya.
- ¹⁰ Kubanga terwaggala nzigi za lubuto lwa mmange, nneme okulaba obuyinike.
- ¹¹ "Lwaki saafa nga nzalibwa, oba ne nfa nga nva mu lubuto lwa mmange?
- ¹² Lwaki amaviivi ganzikiriza okugatuulako era n'amabeere okugayonka?
- ¹³ Kaakano nandibadde ngalamidde nga neesirikidde, nandibadde neebase nga neewummulidde,
- ¹⁴ wamu ne bakabaka n'abakungu ab'ensi, abezimbira embiri kaakano amatongo,
- ¹⁵ oba n'abalangira abaalina zaabu, abajjuzanga ffeeza mu nnyumba zaabwe.
- ¹⁶ Oba lwaki saaziikibwa ng'omwana azaaliddwa ng'afudde, atalabye ku kitangaala?
- ¹⁷ Eyo ababi gye batatawaanyizibwa, era n'abakooye gye bawummulira.
- ¹⁸ Abasibe gye bawummulira awamu, gye batawulirira kiragiro ky'oyo abaduumira.
- ¹⁹ Abakopi n'abakungu gye babeera; abaddu gye batatuntuzibwa bakama baabwe.
- ²⁰ "Lwaki omuyinike aweebwa ekitangaala, ne kimulisiza oyo alumwa mu mwoyo,
- ²¹ era lwaki yeegomba okufa naye ne kutajja, n'akunoonya okusinga obugagga obuziikkidwa,
- ²² abajaguza ekisukkiridde, ne basanyuka ng'atuuse ku ntaana?
- ²³ Lwaki okuwa ekitangaala oyo, atayinza kulaba kkubo, Katonda gw'akomedde?
- ²⁴ Kubanga nkaaba mu kifo ky'okulya, n'okusinda kwange kufukumuka ng'amazzi.
- ²⁵ Ekintu kye nantiiranga ddala era kye nakyawa kye kyantukako.

²⁶ Siwummudde wadde okusiriikirira wadde okuba n'emirembe, wabula buzibu bwereere bwe bunzijidde."

Yobu 4

Erifaazi Ayogera

¹Awo Erifaazi Omutemani n'ayanukula ng'agamba nti,

²"Omuntu bw'anaayogera naawe onoonyiiga? Naye ani ayinza okusirika obusiris?

³ Laba, wayigiriza bangi, emikono eminifu wagizzaamu amaanyi.

⁴ Ebigambo byo byanyweza abaali bagwa, era ng'ozzaamu amaanyi amaviivi agaali gakankana.

⁵ Naye kaakano kikutuuseeko, oweddemu amaanyi; kikutte ku ggwe n'oggwaawo!

⁶ Okutya Katonda wo si bwe bwestige bwo, n'obwesimbu bwo si ly'essuubi lyo?

⁷ "Kaakano lowooza; ani ataliiko musango eyali azikiridde? Oba wa abatuukirivu gye baali bamaliddwawo?

⁸ Okusinziira ku kyendabye; abo abateekateeka okukola ebibi era ne basiga ebitali bya butuukirivu, bakungula bizibu.

⁹ Bazikirizibwa omukka Katonda gw'assa, bamalibwawo obusungu bwe.

¹⁰ Okuwuluguma kw'empologoma, n'eddoboozi ly'empologoma enkambwe, n'amannya g'empologoma ento gamenyeka.

¹¹ Empologoma ey'amaanyi ezikirira olw'okubulwa omuyiggo, n'obwana bw'empologoma busaasaana.

¹² "Nategeezebwa ekigambo eky'ekyama, ne nkitegera okutu.

¹³ Wakati mu birowoozo n'okwolesebwa kw'ekiro ng'otulo otungi tukutte omuntu,

¹⁴ okutya n'okukankana byankwata ne bireetera amagumba gange okunyegenya.

¹⁵ Omwoyo gw'ayita mu maaso gange, obwoya bw'oku mubiri gwange ne buyimirira.

¹⁶ Ne buyimirira butengerera, naye saasobola kwetegereza ndabika yaabwo, n'ekifaananyi kyali mu maaso gange, ne wabaawo akasiriikiriro, ne ndyoka mpulira eddoboozi nga ligamba nti,

¹⁷ 'Omuntu afa ayinza okuba omutuukirivu okusinga Katonda? Omuntu ayinza okuba omulongoofu okusinga Omutonzi we?

¹⁸ Obanga abaddu be tabeesiga, nga bamalayika be abalanga ensobi

¹⁹ kale kiriba kitya, abo abasula mu z'ebbumba ezirina emisingi egiri mu nfuufu, ababetentebwa n'okusinga ekiwojjolo?

²⁰ Bamalibwawo wakati w'amakya n'akawungeezi, bazikirira emirembe n'emirembe awatali abafaako.

²¹ Omuguwa gwa weema yaabwe gusimbulwa munda, ne bafa ng'abasirusiru.' "

Yobu 5

¹ "Koowoola kaakano, waliwo anaakuyitaba? Era ani ku batukuvu gw'onoolaajaanira?

² Obukyayi butta atalina magezi, n'obuggyga butta omusirusiru.

³ Ndabye abasirusiru nga banywevu, naye mangu ddala ne nkolimira ekifo kye batuulamu.

⁴ Abaana baabwe tebalina bukumi, babetenterwa mu luggya nga tewali abawolereza.

⁵ Omuyala alya amakungula gaabwe era atwala n'ag'omu maggwa era awankirawankira eby'obugagga byabwe.

⁶ Kubanga okulaba ennaku tekuva mu nsi, wadde obuzibu okuva mu ttaka,

⁷ wabula abantu bazaalibwa kulaba nnaku, ng'ensasi bwe zibuuka waggulu.

⁸ Naye nze, nzija kunoonya Katonda era mmulekere ensonga zange.

⁹ Akola ebikulu, ebitanoonyezeka, ebyewuunyisa ebitabalika.

¹⁰ Atonnyesa enkuba ku nsi, n'aweereza amazzi mu byalo.

¹¹ Ayimusa abo abanyigirizibwa n'abo abakaaba ne basitulibwa mu mirembe.

¹² Aziyiza enkwe z'ababi, emikono gyabwe gireme okutuukiriza bye bateesa.

¹³ Agwikiririza abagezigezi mu bukujukujju bwabwe, n'enkwe zaabwe n'aziziyiriza ddala.

¹⁴ Ekizikiza kibabuutikira emisana, ne bawammanta mu ttuntu ng'ekiro.

¹⁵ Naye aggya abali mu bwetaavu mu mukono gw'abo ab'amaanyi, n'abawonya ekitala kyabwe.

¹⁶ Abaavu ne balyoka baba n'essuubi, n'akamwa k'abatali benkanya ne kazibibwa.

¹⁷ “Alina omukisa omuntu Katonda gw’abuulirira; noolwekyo tonyooma kukangavvula kw’oyo Ayinzabyonna.

¹⁸ Kubanga ye y’afumita ate era y’anyiga, y’alumya era y’awonya.

¹⁹ Alikuwonya mu buzibu bwa ngeri mukaaga. Weewaawo ne mu ngeri musanvu tootuukibwengako kulumizibwa.

²⁰ Mu njala alikuwonya okufa, era anaakuwonyanga mu lutalo olw’ekitala.

²¹ Onookuumibwanga eri olulimi olukambwe, era tootyenga okuzikirira bwe kunaabanga kujja gy’oli.

²² Oliseka ng’okuzikirira n’enjala bizze, era tootyenga nsolo nkambwe ez’oku nsi.

²³ Onoobanga n’enkolagana n’amayinja ag’omu nnimiro, era onoobanga n’emirembe awali ensolo enkambwe.

²⁴ Olimanya nti, ensiisira yo eri mirembe; era eby’obugagga byo olibibala n’olaba nga tewali kibuzeeko.

²⁵ Olimanya ng’ezzadde lyo liriba ddene, ne bazzukulu bo baliba bangi ng’omuddo og’oku nsi.

²⁶ Olituusibwa ku ntaana yo nga wakaddiyira ddala, ng’ejjaano bwe tuukira mu kiseera kyayo.

²⁷ “Ekyo twakyekenneanya, kituufu. Kimanye nga kikwata ku ggwe.”

Yobu 6

Yobu Ayanukula

¹ Yobu n’ayanukula ng’agamba nti,

² “Singa okweraliikirira kwange, n’okubonaabona kwange bipimibwa ne bitekeebwa ku minzaani!

³ Weewaawo byandisinze omusenyu gw’ennyanja okuzitowa; ebigambo byange kyenvudde mbyanguyiriza.

⁴ Obusaale bwa Ayinzabyonna buli mu nze n’omwoyo gwange gunywedd obusagwa bwabwo: entiisa ya Katonda erwana nange.

⁵ Entulege ekaaba awali omuddo, oba ente ennume ejooonja awali emmere yaayo?

⁶ Emmere etaliimu nsa eriika omutali munnyo, oba amazzi g’eggi okubaamu akawoomerera?

⁷ Omutima gwange tegusikirizibwa kubikombako, biri ng’emmere etangasa.

- ⁸ “Singa Katonda ampa kye nsaba, n’ampa kye nsuubira,
- ⁹ yandisiimye okumbetenta ne mmalibwawo omukono gwe.
- ¹⁰ Kino kyandikkakkanyizza obulumi obutakoma kubanga sigaanye bigambo bya Mutukuvu.
- ¹¹ Amaanyi ngaggya wa, ndyoke mbe n’essuubi? Era enkomerero yange, eruwa ndyoke ngumiikirize?
- ¹² Amaanyi gange ga mayinja oba omubiri gwange gwa kikomo?
- ¹³ Mu mazima sirina maanyi n’obusobozi bwanzigwako.
- ¹⁴ Oyo agaana ebyekisa okuva eri mukwano gwe tafaayo kutya Ayinzabyonna.
- ¹⁵ Baganda bange tebeesigika, bali ng’akagga akabooga ate ne kakalira,
- ¹⁶ akaddugalirira buli lwe kakwata, ng’omuzira,
- ¹⁷ ate ne kaggwaawo buli lwe wabaawo ebbugumu.
- ¹⁸ Ebibinja by’abatambuze we biviira ku mugendo ne biraga mu ddungu ne bizikirira.
- ¹⁹ Abatambuze b’e Teema banoonya, bo ab’e Seeba ne balindirira n’essuubi.
- ²⁰ Baalina essuubi naye bwe baatuukayo ne banyolwa nnyo.
- ²¹ Kaakano bwe mundabye ne mutya ne mukakasizza ddala nga temuliiko kye muyinza kukola.
- ²² Nnali mbagambye nti, ‘Mumpe ekirabo,’ oba nti, ‘Mumpeereyo ekintu ku by’obugagga bwammwe,
- ²³ okumponya nve mu mukono gw’omulabe, n’okumpeerayo ekintu mpone emitego gy’abakambwe’?
- ²⁴ “Njigiriza nange n’aba musirise; ndaga we nsobezza.
- ²⁵ Ebigambo eby’amazima nga bya bulumi! Naye okuwakana kwammwe kukakasa ki?
- ²⁶ Mugezaako okugolola ebigambo byange, ne mufuula ebigambo by’omuntu ali obubi okuba ng’empewo?
- ²⁷ Mukubira ne bamulekwa akalulu ate ne mukubira ne mukwano gwammwe.
- ²⁸ “Naye kaakano mubeere ba kisa muntunuulire. Ndabika ng’omulimba?
- ²⁹ Mufumiitirize, temusuula bwenkanya; Mukiroozzeeko, kubanga obujulirwa bwange buli ku kalebwerebwe.

³⁰ Emimwa gyange girabika ng'egirimba? Emimwa gyange tegisobola kutegeera ttima?"

Yobu 7

¹ "Ebiseera by'omuntu ku nsi, tebyagerebwa? Ennaku ze tezaagerebwa nga ez'omupakasi?

² Ng'omuddu eyeegomba ekisiikirize okujja, ng'omupakasi bwe yeesunga empeera ye;

³ bwe ntyo bwe nnaweebwa emyezi egy'okubonaabona, ebiro ebyokutegana bwe byangererwa.

⁴ Bwe ngalamira neebake, njogera nti, 'Ndiyimuka ddi, ekiro kinaakoma ddi?' Nga nzijudde okukulungutana okutuusa obudde lwe bukya.

⁵ Omubiri gwange gujjudde envunyu n'ebikakampa, n'olususu lwange lukutusekutuse era lulabika bubi.

⁶ "Ennaku zange zidduka okusinga ekyuma ky'omulusi w'engoye bw'atambuza ky'alusisa engoye ze; era zikoma awatali ssuubi.

⁷ Ojjukira Ayi Katonda, nti obulamu bwange tebuliimu, wabula mukka bukka, amaaso gange tegaliddayo kulaba bulungi.

⁸ Eriiso ly'oyo eryali lindabyeko teririddayo kundaba; amaaso gammwe galinnoonya, naye nga sokyaliwo.

⁹ Nga ekire bwe kibulawo ne kigenda, bw'atyo n'aziikwa mu ntaana talivaayo.

¹⁰ Taliddayo mu nnyumba ye, amaka ge tegaliddayo kumumanya nate.

¹¹ Noolwekyo sijja kuziyiza kamwa kange, nzija kwogera okulumwa kw'omutima gwange; nzija kwemulugunyiza mu bulumi bw'emmeeme yange.

¹² Ndi nnyanja oba ndi lukwata ow'omu buziba, olyoke onkuume?

¹³ Bwe ndowooza nti, obuliri bwange bunampa ku mirembe, ekiriri kyange kinakendeeza ku kulumwa kwange;

¹⁴ n'olyoka ontisa n'ebirooto era n'onkanga okuyita mu kwolesebwa.

¹⁵ Emmeeme yange ne yeegomba okwetuga, nfe okusinga okuba omulamu.

¹⁶ Sokyeyagala, neetamiddwa. Sijja kubeera mulamu emirembe gyonna. Ndeka, kubanga ennaku zange butaliimu.

¹⁷ Omuntu kye ki ggwe okumugulumiza, n'omulowoozaako?

¹⁸ Bw'otyo n'omwekebejja buli makya, n'omugezesu buli kaseera?

¹⁹ Olituusa ddi nga tonvuddeeko n'ondeka ne mmira ku malusu?

²⁰ Nyonoonye; kiki kye nakukola, ggwe omukuumi w'abantu? Lwaki onfudde nga akabonero ak'obulabe gy'oli, ne neefuukira omugugu?

²¹ Era lwaki tosonyiwa kwonoona kwange, n'oggyawo obutali butuukirivu bwange? Kubanga kaakano nzija kwebaka mu ntaana; era ojja kunnoonya ku makya naye naaba sikyaliwo."

Yobu 8

Birudaadi Ayogera

¹Awo Birudaadi Omusukusi n'addamu n'agamba nti,

²"Onookoma ddi okwogera ebintu bino? Era ebigambo bino by'oyogera n'akamwa ko binaakoma ddi okuba ng'empewo ey'amaanyi?

³Katonda akyusakyusa mu nsala ye? Oba oyo Ayinzabyonna akyusakyusa amazima?

⁴Abaana bo bwe baayonoona eri MUKAMA, n'abawaayo eri empeera y'ekibi kyabwe.

⁵Kyokka bw'onoonoonya Katonda, ne weegayirira oyo Ayinzabyonna,

⁶bw'onooba omulongoofu era ow'amazima, ddala ddala anaakuddiramu n'akuzzaayo mu kifo kyo ekituufu.

⁷Wadde ng'entandikwa yo yali ntono, embeera yo ey'enkomerero ejja kuba nnungi ddala.

⁸Buuza ku mirembe eg'yedda, era onoonyereze ku bakitaabwe bye baayiga;

⁹kubanga ffe twazaalibwa jjuuzi era tetulina kye tumanyi, era ne nnaku ze twakamala ku nsi ziri ng'ekisiikirize.

¹⁰Tebaakulage bakumanyise era bakutegeeze ebigambo bye mitima gyabwe oba by'okutegeera kwabwe?

¹¹Ebitoogo biyinza okumera awatali bitosi?

¹²Biba bikyakula nga tebinnasalibwa, bikala mangu okusinga omuddo.

¹³Bw'etyo enkomerero bw'ebeera ey'abo bona abeerabira Katonda, essuubi ly'abataty Katonda bwe libula.

¹⁴Ebyo bye yeesiga byatika mangu, ebyo bye yeesiga, nnyumba ya nnabbubi!

¹⁵Yeesigama wuzi za nnabbubi ne zikutuka azeekwatako nnyo naye ne zitanywera.

¹⁶ Ali ng'ekimera ekifukirire obulungi ekiri mu musana, nga kyanjadde amatabi gaakyo mu nnimiro;

¹⁷ emirandira gyakyo nga gyezingiridde, okwetooloola entuumu y'amayinja, nga ginoonya ekifo mu mayinja.

¹⁸ Naye bwe bakiggya mu kifo kyakyo, ekifo ekyo kikyegaana ne kigamba nti, Sikulabangako.

¹⁹ Mazima ddala essanyu lyakyo liggwaa wo, ebirime ebirala ne bikula okuva mu ttaka.

²⁰ Mazima ddala Katonda talekerera muntu ataliiko musango, era tanyweza mukono gw'abakola ebibi.

²¹ Ajja kuddamu ajjuze akamwa ko enseko, n'emimwa gyo amaloboozi ag'essanyu.

²² Abalabe bo balijjula obuswavu, era n'ennyumba z'abakozi b'ebibi zirimilibwawo."

Yobu 9

Yobu Ayanukula

¹ Yobu n'alyoka addamu nti,

² "Ddala nkimanyi nga kino kituufu. Naye omuntu asobola atya okuba omutuukirivu eri Katonda?

³ Wadde ng'omuntu yandyagadde okuwakana naye, tayinza kumuddamu kibuuzo na kimu ku bibuuzo olukumi.

⁴ Amagezi ge ga nsusso, amaanyi ge mangi nnyo; ani eyali amuwakanyizza n'avaayo nga taliiko binuubule?

⁵ Asimbula ensozi ne zivaayo nga tezimanyiridde era n'azivuunika ng'asunguwadde.

⁶ Ensi aginyeenya n'eva mu kifo kyayo era n'akankanya empagi zaayo.

⁷ Ayogera eri enjuba ne teyaka, akugira n'alemesa ekitangaala ky'emmunyeenye okulabika.

⁸ Ye yekka abamba eggulu era n'atambulira ku mayengo g'enyanja.

⁹ Ye mukozi wa Nabaliyo, entungalugoye ne Kakaaga, n'ebibinja eby'emunyeenye eby'obukiikaddyo.

¹⁰ Akola ebyewuunyo ebizibu okunnyonnyola, n'akola n'ebyamagero ebitabalika.

- ¹¹ Bw'ayita we ndi sisobola kumulaba, bw'ampitako, sisobola kumutegeera.
- ¹² Bw'aba alina ky'aggya ku muntu, ani ayinza okumuziyiza? Ani ayinza okumubuuza nti kiki ky'okola?
- ¹³ Katonda taziyiza busungu bwe; n'ebibinja bya Lakabu byakankanira wansi w'ebigere bye.
- ¹⁴ Kaakano nnyinza ntya okuwakana naye? Nnyinza ntya okufuna ebigambo mpakane naye?
- ¹⁵ Wadde nga siriiko musango, sisobola kubaako kye muddamu, mba nnyinza kwegayirira bwegayirizi oyo Omulamuzi wange ankwatirwe ekisa.
- ¹⁶ Ne bwe na ndimukooowodde n'ampitaba, sirowooza nti yandimpadde ekiseera n'ampuliriza.
- ¹⁷ Yandimenyeeme mu muyaga nannyongerako ebiwundu awatali nsonga.
- ¹⁸ Teyandindese kuddamu mukka naye yandimmaliddewo ddala nga mbonaabona.
- ¹⁹ Bwe kiba nga kigambo kya maanyi bwanyi, ye wa maanyi. Era bwe kiba kya kusala musango, ani alimuyita?
- ²⁰ Ne bwe sandibaddeko musango, akamwa kange kandigunsalidde. Ne bwe bandinnangiridde nti siriiko kyakunenyezebwa, kandirangiridde nti gunsinze.
- ²¹ "Wadde nga sirina kyakunenyezebwa, sikyefaako, obulamu bwange mbunyooma.
- ²² Byonna kye kimu, kyenva ɳjamba nti, Azikiriza bona abataliiko musango awamu n'abakozi b'ebibi.
- ²³ Kawumpuli bw'aba asse mbagirawo, MUKAMA asekerera okubonaabona kw'abatalina musango.
- ²⁴ Ensi yaweebwayo mu mukono gw'abakozi b'ebibi. Abikka ku maaso g'abagiramula. Bw'aba nga si MUKAMA, kale ani?
- ²⁵ Kaakano ennaku zange zidduka okusinga omuddusi, zifuumuuka, tezirina kalungi ke ziraba.
- ²⁶ Zifuumuuka ng'amaato ag'ebitoogo agadduka ennyo, ng'empungu eyanguyiriza okugenda eri omuyiggo.
- ²⁷ Bwe ɳjamba nti, Leka neerabire okusinda kwange, oba nti neerabire obunyiikaavu bwange, nsekemu,
- ²⁸ ne neekokkola okubonaabona kwange, mmanyi nga MUKAMA tombale ng'ataliiko musango.

- ²⁹ Omusango gunsinze, lwaki nteganira obwerefere?
- ³⁰ Ne bwe nandinaabye sabbuuni n'engalo zange ne nzitukuza,
- ³¹ era wandinsudde mu kinnya, n'engoye zange zennyini ne zinneetamwa.
- ³² Kubanga MUKAMA si muntu nga nze bwe ndi nti muddemu, era nti tusisinkane tuwozanjanye mu mbuga z'amateeka.
- ³³ Tewali mutabaganya ayinza kututeekako mukono gwe ffembi,
- ³⁴ eyandizigye omuggo gwa Katonda entiisa ye n'erekeraawo okunzijira.
- ³⁵ Olwo nno nandyogedde nga simutya; naye nga bwe kiri kaakano, sisobola."

Yobu 10

- ¹ "Obulamu bwange mbukyayidde ddala, noolwekyo leka nfukumule okwemulugunya kwange, njogerere mu kulumwa kw'emmeeme yange.
- ² Nnaagamba Katonda nti, Tonsalira musango ne gunsinga, ntegeeza ky'onvunaana.
- ³ Kikusanyusa okunnyigiriza, okunyooma omulimu gw'emikono gyo, n'owagira emirimu gy'abakozi b'ebibi?
- ⁴ Amaaso go ga mubiri? Olaba ng'omuntu bw'alaba?
- ⁵ Ennaku zo zisinga ez'omuntu, n'emyaka gyo gisinga egy'omuntu,
- ⁶ olyoke onoonye ebisobyo byange era obuulirize ekibi kye nkoze,
- ⁷ newaakubadde ng'omanyi nti sirina musango era nga tewali n'omu ayinza kunzigya mu mukono gwo?
- ⁸ "Emikono gyo gye gyammumba, gye gyankola. Ate kaakano onookyuka okunsanyaawo?
- ⁹ Jjukira nti wammumba ng'ebumbba, ate kaakano onoonfuula ng'enfuufu?
- ¹⁰ Tewanzitulula ng'amata n'onkwasa ng'omuzigo?"
- ¹¹ Tewannyambaza omubiri n'olususu, n'oluka amagumba n'ebinywa n'ongatta?
- ¹² Kale wampa okuganja mu maaso go, era walabirira, n'omwoyo gwange.
- ¹³ Naye bino wabikweka mu mutima gwo, era mmanyi nga byali mu birowoozo byo.
- ¹⁴ Singa nyonoona, ondaba era tewandindese n'otombonereza.

¹⁵ Bwe mba nga nsingibbwा omusango, zinsanze nze! Newaakubadde nga sirina musango, sisobola kuyimusa mutwe gwange, kubanga nzijjudde obuswavu era mu kunyigirizibwa kwange, mwe nsaanikiddwa.

¹⁶ Bwe mba ng'asituka, n'onjigga ng'empologoma, era n'onnumba n'amaanyi go amangi ennyo.

¹⁷ Oleeta abajulizi abajja okunnumiriza, era obusungu bwo ne bwéyongera gye ndi; amayengo ne gajja okunnumba olutata.

¹⁸ "Kale lwaki wanziggya mu lubuto lwa mmange? Wandindese nga tewannabaawo liiso lyonna lindabyeko.

¹⁹ Singa satondebwa, oba singa natwalibwa butereevu okuva mu lubuto ne nzikibwa.

²⁰ Ennaku zange entono kumpi teziweddeeko? Ndeka mbeeko n'akaseera ak'okusanyuka,

²¹ nga sinnaba kugenda mu kifo eteri kudda, ekiri mu nsi ejjudde ekizikiza, n'ekisiikirize eky'ebuziba,

²² y'ensi ey'ekizikiza ekikutte, eyeekisiikirize eky'ebuziba era n'okutabukatabuka, ng'omusana gwayo guli nga ekizikiza."

Yobu 11

Zofali Ayogera

¹ Awo Zofali Omunaamasi n'ayogera nti,

² "Ebigambo ebyo byonna bisigale nga tebiddiddwamu? Omwogezi ono anaabalibwa ng'ataliko musango?

³ Okwogera kwo okutaliimu kunaatusirisa? Oduule bw'otyo wabulewo akunenya?

⁴ Ogamba Katonda nti, 'Ebirowoozo byange tebirina nsobi, era ndi mutukuvu mu maaso go.'

⁵ Naye, singa Katonda ayogera, singa abikkula akamwa ke n'akuddamu,

⁶ n'akubikkulira ebyama by'amagezi; kubanga amagezi amatuufu ddala galiko enjuuyi bbiri. Manya kino: Katonda n'okwerabira yeerabira ebimu ku bibi byo.

⁷ "Osobola okupima ebyama bya Katonda? Oyinza okunoonyereza ku Ayinzabyonna n'omumalayo?

⁸ Bigulumivu okusinga eggulu, kiki ky'osobola okukola? Bikka okusinga obuziba bw'emagombe, kiki ky'osobola okumanya?

⁹ Obuwantu bwabyo businga ensi era bugazi okusinga ennyanja.

¹⁰ “Singa ajja n'akusibira mu kkomera era n'atuuza olukiiko, ani ayinza okumuwakanya?

¹¹ Mazima ddala amanya abantu abalimba. Bw'alaba ebibi, tabifaako?

¹² Naye omuntu omusirusiru, talifuna magezi, ng'omwana gw'endogoyi ogw'omu nsi bwe gutayinza kuzaalibwa nga gusobola okufugibwa.

¹³ “Naye bw'owaayo omutima gwo gy'ali, n'ogolola emikono gyo gy'ali,

¹⁴ singa oggyawo ekibi ekiri mu mukono gwo, n'otokkiriza kibi kubeera mu weema yo,

¹⁵ olwo onoositula omutwe n'obwenyi bwo nga tokwatibwa nsonyi, era oyimirire ng'oli munywevu awatali kutya.

¹⁶ Mazima ddala ojja kwerabira emitawaana gyo, oljjukira bujjukizi ng'amazzi agaayita edda.

¹⁷ Obulamu bujja kwaka okusinga omusana ogw'omu ttuntu, n'ekizikiza kijja kufuuka ng'obudde obw'oku nkya.

¹⁸ Olibeera munywevu, kubanga olibeera n'essuubi; olitunuulira ebikwetooloodde n'owummulira mu mirembe.

¹⁹ Oligalamira nga tewali n'omu akutiisa, era bangi abalikunoonyaako omukisa.

²⁰ Naye amaaso g'abakozi b'ebibi galiremererwa, era tebalisobola kuwona, essuubi lyabwe libeere ng'omukka ogw'enkomerero.”

Yobu 12

Yobu Ayanukula

¹ Awo Yobu n'amuddamu nti,

² “Awatali kubuusabuusa muli bantu. Bwe mulifa n'amagezi gammwe ne gafa.

³ Naye nange nnina amagezi ntegeera, temunsinga. Ani atabimanyi ebyo byonna?

⁴ Nfuuse ekisekererwa eri mikwano gyange. Nze eyakoowolanga Katonda n'anziramu, ne nsekererwa obusekererwa, ate nga ndi mutukuvu ataliiko musango!

⁵ Abantu abali mu ddembe lyabwe batera okusekerera abali mu mitawaana, ng'ebizibu bwe biba ku abo ababa batuuse awazibu.

⁶ Weema z'abanyazi tezibaako mutawaana, era abo abanyiiza Katonda babeera mu ddembe abo abeetikka katonda waabwe mu mikono gyabwe.

- ⁷Naye buuza ensolo zija kukuyigiriza, oba ebinyonyi eby'omu bbanga binaakubuulira.
- ⁸Oba yogera n'ettaka linaakusomesa oba ebyennyanja eby'omu nnyanja binaakunnyonnyola.
- ⁹Biki ku bino ebitamanyi nti, omukono gwa MUKAMA gwe gukoze ebyo?
- ¹⁰Buli bulamu bwa kitonde buli mu mukono gwe, na buli mukka ogussibwa abantu bona.
- ¹¹Okutu tekugezesza bigambo ng'olulimi bwe lukomba ku mmere?
- ¹²Amagezi tegasangibwa mu bakaddiye? Okuwangaala tekuleeta kutegeera?
- ¹³Katonda y'alina amagezi n'amaanyi; y'ateesa ebigambo era y'alina okutegeera.
- ¹⁴Ky'amenya teri ayinza kuddamu kukizimba; ky'asiba mu kkomera tekiyinza kuteebwa.
- ¹⁵Bw'aziyiza amazzi, ekyeeya kijja, bw'agata gazikiriza ensi.
- ¹⁶Ye, ye nannyini maanyi n'obuwanguzi, abalimba n'abalimbibwa bona babe.
- ¹⁷Aggyawo abawi b'amagezi nga tebalina kantu, abalamuzi n'abafuula abasirusiru.
- ¹⁸Bakabaka abaggyako enjegere ze beesiba ebiwato byabwe, n'abasibamu obukete.
- ¹⁹Bakabona abatwala nga tebalina kantu, n'asuula abasajja abaanywera.
- ²⁰Aziba emimwa egy'abawi b'amagezi abeesigwa, era n'aggyawo okwolesebwa kw'abakadde.
- ²¹Ayiwa ekivume ku bakungu, era n'aggya ebyokulwanyisa ku b'amaanyi.
- ²²Abikkula ebintu eby'ebuziba eby'ekizikiza, n'aleeta n'ebisiikirize eby'amaanyi mu kitangaala.
- ²³Afuula amawanga okuba ag'amaanyi, era n'agazikiriza; agaziya amawanga n'agasaasaanya.
- ²⁴Abakulembeze baamawanga abaggyako okukola ebisaanidde; n'abasindika nga bagwirana mu ddungu eritaliimu kkubo.
- ²⁵Bawammantira mu kizikiza awatali kitangaala; abaleetera okutagala ng'abatamiivu."

Yobu 13

- ¹“Laba, eriiso lyange lyalaba ebyo byonna, n’okutu kwange ne kuwulira ne mbitegeera.
- ² Kye mumanyi nange kye mmanyi; siri wa wansi ku mmwe.
- ³ Naye neegomba okwogera n’oyo Ayinzabyonna, era n’okuleeta ensonga zange mu maaso ga Katonda.
- ⁴ Naye mmwe mumpayiriza; muli basawo abatagasa mmwe mwenna!
- ⁵ Kale singa musirika! Olwo lwe mwandibadde n’amagezi.
- ⁶ Muwulire kaakano endowooza yange, muwulirize okwegayirira kw’emimwa gyange.
- ⁷ Katonda munaamwogerera nga mwogera ebitali bya butuukirivu? Munaamwogerera eby’obulimba?
- ⁸ Munaamulaga ng’ataliko luuyi, munaamuwoleza ensonga ze.
- ⁹ Singa akukebera, anaakusanga oli bulungi? Oyinza okumulimba nga bw’oyinza okulimba abantu?
- ¹⁰ Tayinza butakunenya, singa osaliriza mu bubba.
- ¹¹ Ekitiibwa kye ekisukiridde tekyandikutiisizza? Entiisa ye teyandikuguddeko?
- ¹² Ebigambo byammwe ebijjukirwa ngero za vvü, n’okwewolereza kwammwe kwa bbumba.
- ¹³ Musirike nze njogere; kyonna ekinantukako kale kintuukeko.
- ¹⁴ Lwaki neeteeka mu mitawaana, obulamu bwange ne mbutwalira mu mikono gyange?
- ¹⁵ Ne bw’anzita, mu ye mwe nnina essuubi, ddala ddala nditwala ensonga zange mu maaso ge.
- ¹⁶ Ddala kino kinaavaamu okusumululwa kwange, kubanga teri muntu atatya Katonda ayinza kwetantala kujja mu maaso ge!
- ¹⁷ Muwulirize ebigambo byange n’obwegendereza; amatu gammwe gawulire bye ɲjamba.
- ¹⁸ Kaakano nga bwe ntegese empoza yange, mmanyi nti nzija kwejeerera.
- ¹⁹ Waliwo ayinza okuleeta emisango gye nvunaanibwa? Bwe kiba bwe kityo, nzija kusirika nfe.
- ²⁰ Ebintu ebyo ebibiri byokka by’oba ompa, Ayi Katonda, awo sijja kukwekweka.
- ²¹ Nzigyako omukono gwo, olekere awo okuntiisatiisa n’okunkangakanga.

- ²² Kale nno ompite nzija kukuddamu, oba leka njogere ggwe onziremu.
- ²³ Nsobi meka era bibi bimeka bye nkoze? Ndaga ekibi kyange era n'omusango gwange.
- ²⁴ Lwaki okweka amaaso go, n'onfuula omulabe wo?
- ²⁵ Onoobonyaabonya ekikoola ekifuuyiddwa omuyaga? Onooyigga ebisasiro ebikaze?
- ²⁶ Kubanga ompadiikako ebintu ebiruma, n'ondeetera okuddamu okwetikka ebibi byange eby'omu buvubuka.
- ²⁷ Oteeka ebigure byange mu nvuba, era okuumma butiribiri amakubo gange mwe mpita ng'oteeka obubonero ku bisinziiro by'ebigure byange.
- ²⁸ Bw'atyo omuntu bw'aggwaawo ng'ekintu ekivundu, ng'olugoye oluliiriddwa ennyenje."

Yobu 14

- ¹ "Omuntu azaalibwa omukazi, abeera ku nsi akaseera katono era abeera mu kutegana.
- ² Amulisa ng'ekimuli n'awotoka; abulawo mangu ng'ekisiikirize, tabeerera.
- ³ Otunuulira omuntu afaanana bw'atyo? Olimuleeta gy'oli asalirwe omusango?
- ⁴ Ani ayinza okuggyga ekirongoofu mu kitali kirongoofu? Tewali n'omu!
- ⁵ Ennaku z'omuntu zaagererwa, wagera obungi bw'emyezi gye era n'oteekawo ekkomo ly'atasobola kusukka.
- ⁶ Kale tomufaako muleke yekka, okutuusa lw'alimala okutuukiriza emirimu gye ng'omupakasi.
- ⁷ "Wakiri waliwo essuubi ng'omuti guloka: Bwe gutemebwa, guloka nate, era ekikolo kyagwo ekiggya tekifa.
- ⁸ Emirandira gyagwo gyandikaddiyidde mu ttaka era n'ekikonge ne kifiira mu ttaka,
- ⁹ naye olw'emirandira okutambula ne ginoonya amazzi kimulisa ne kireeta amatabi ng'ekisimbe.
- ¹⁰ Naye omuntu afa era n'agalamizibwa, assa ogw'enkomerero n'akoma.
- ¹¹ Ng'amazzi bwe gaggwa mu nnyanja oba omugga bwe gukalira ne guggwaawo,
- ¹² bw'atyo omuntu bw'agalamira, era n'atasituka okutuusa eggulu bwe linaggwaawo, abantu tebajja kuzuukuka oba kuggyibwa mu tulo twabwe.

¹³ “Singa kale onkweka emagombe era n'onziika okutuusa obusungu bwo lwe buliggwaawo! Singa ongerera ekiseera n'onzijukira!

¹⁴ Omuntu bw'afa, addamu n'abeera omulamu? Ennaku zange zonna ez'okuweereza nnaalindanga okuwona kwange kujje.

¹⁵ Olimpita nange ndikuyitaba; olyegomba ekitonde emikono gyo kye gyatonda.

¹⁶ Ddala ku olwo bw'olibala ebigere byange, naye tolyekaliriza bibi byange.

¹⁷ Ebisobyo byange biriba bisibiddwa mu kisawo; olibikka ku kibi kyange.

¹⁸ “Naye ng'olusozi bwe luseebengerera ne luggwaawo, era ng'ejjinja bwe liva mu kifo kyalyo,

¹⁹ ng'amazzi bwe gaggwereeza amayinja era ng'okwanjaala kwago bwe kutwala ettaka ly'oku nsi; bw'atyo bw'azikiriza essuubi ly'omuntu.

²⁰ Omumalamu amaanyi omuwangula lumu n'aggweerawo ddala; okyusa enfaanana ye n'omugoba.

²¹ Abaana be bwe bafuna ekitiibwa, takimanya, bwe bagwa, takiraba.

²² Obulamu bw'omubiri gwe bwokka bw'awulira ne yekungubagira yekka.”

Yobu 15

Erifaazi Ayogera

¹ Awo Erifaazi Omutemani n'addamu n'ayogera nti,

² “Omuntu ow'amagezi yandizzeemu n'amagezi agataliimu, oba n'ajjuza olubuto lwe embuyaga ez'ebuvanjuba?

³ Yandiwakanye n'ebigambo ebitaliiko kye bigasa, oba okwogera ebigambo ebitalina kye bikola?

⁴ Naye onyooma Katonda n'oziyiza okwewaayo eri Katonda.

⁵ Kubanga obutali butuukirivu bwo bwe buyigiriza akamwa ko, era olonzeewo okukozaesa olulimi lw'abalimba.

⁶ Akamwa ko kennyni ke kakusalira omusango si nze, emimwa gyo gyennyni gye gikulumiriza.

⁷ “Gwe wasooka abantu bonna okuzaalibwa? Oba ggwe wazaalibwa ensozi nga tezinnabaawo?

⁸ Ofaayo okuwuliriza okuteesa kwa Katonda? Olowooza gwe mugezi wekka?

⁹ Kiki ky'omanyi kye tutamanyi? Kubikkulirwa ki kw'olina ffe kwe tatalina?

¹⁰ Ab'envi abakaddiye bali ku ludda lwaffe, abasajja abakulu n'okusinga kitaawo.

- ¹¹ Katonda by'akugambye ebikuzzaamu amaanyi bitono nnyo tebikumala, ebigambo ebikubuuliddwa mu bukkakkamu?
- ¹² Lwaki omutima gwo gukubuzizza, amaaso go ne gatemereza
- ¹³ n'olyoka ofuka obusungu bwo eri Katonda, n'ofukumula ebigambo bwe bityo okuva mu kamwa ko?
- ¹⁴ "Omuntu ye ani, alyoke abeere omutukuvu, oba oyo azaalibwa omukazi nti ayinza okuba omutuukirivu?
- ¹⁵ Katonda bw'aba tassa bwestige mu batukuvu be, n'eggulu ne liba nga si ttukuvu mu maaso ge,
- ¹⁶ oba oleeta otya omuntu obuntu, omugwagwa era omuvundu, anywa obutali butuukirivu nga amazzi!
- ¹⁷ "Mpuliriza nnaakunnyonnyola, leka nkubuulire kye ndabye:
- ¹⁸ abasajja ab'amagezi kye bagambye nga tebalina kye bakwese ku kye baafuna okuva eri bakadde baabwe
- ¹⁹ abo bokka abaweebwa ensi nga tewali mugwira agiyitamu.
- ²⁰ Omuntu omukozi w'ebibi, aba mu kubonaabona ennaku ze zonna, n'anyigirizibwa emyaka gyonna egyptegekerwa.
- ²¹ Amaloboozi agatiisa gaijuza amatu ge; byonna bwe biba ng'ebiteredde, abanyazi ne bamulumba.
- ²² Atya okuva mu kizikiza adde, ekitala kiba kimulinze okumusala.
- ²³ Adda eno n'eri ng'anoonya ky'anaalya, amanyi ng'olunaku olw'ekizikiza lumutuukiridde.
- ²⁴ Okweraliikirira n'obubalagaze bimubuutikira, bimujjula nga kabaka eyetegekedde olatalo.
- ²⁵ Kubanga anyeenyerezza Katonda ekikonde, ne yeegereegeranya ku oyo Ayinzabyonna,
- ²⁶ n'agenda n'ekyejo amulumbé, n'engabo ennene enzito.
- ²⁷ "Wadde nga yenna yagejja amaaso ng'ajjudde amasavu mu mbiriizi,
- ²⁸ wakubeera mu bibuga ebyamatongo, ne mu bifulukwa, ennyumba ezigwa okufuuka ebifunfugu.
- ²⁹ Taddeyo kugaggawala, n'obugagga bwe tebulirwawo, n'ebintu by'alina tebirifuna mirandira mu ttaka.

³⁰ Taliwona kizikiza, olulimi lw'omuliro lunaakazanga amatabi ge, era omukka gw'omu kamwa gulimugobera wala.

³¹ Alemenga okwerimba nga yeesiga ebitaliimu, kubanga talina ky'ajja kuganyulwa.

³² Wa kusasulwa byonna ng'obudde tebunnatuuka, n'amatabi ge tegalikula.

³³ Aliba ng'omuzabbibu ogugiddwako emizabbibu egitannaba kwengera, ng'omuzeyituuni ogukunkumula ebikoola byagwo.

³⁴ Kubanga ekibiina ky'abataty Katonda kinaabeeranga kigumba, era omuliro gunaayokyanga weema ezinaabangamu enguzi.

³⁵ Baba embuto ez'ekibi ne bazaala obutali butuukirivu, embuto zaabwe zizaala obulimba."

Yobu 16

Yobu Ayanukula

¹ Yobu n'addamu nti,

² "Mpulidde ebintu bingi ebiri nga bino; mwenna muli mikwano gyange egitagasa.

³ Ebigambo byammwe bingi, tebiikome? Kiki ekibaluma ne mutalekeraawo kuwakana?

⁴ Nange nandyogedde nga mmwe, singa mmwe mubadde mu kifo kyange; nandyogedde ebigambo ebisengeke obulungi ebibanyiga, ne mbanyeenyeza n'omutwe gwange.

⁵ Naye akamwa kange kandibazizzaamu amaanyi; ebigambo eby'essuubi okuva mu kamwa kange byandibaleetedde eddembe.

⁶ "Ate bwe njogera, obulumi bwange tebuwona, bwe nsirika era busigalawo.

⁷ Mazima ddala, Ayi Katonda, ommazeemu amaanyi; osaanyiririzzaawo ddala ennyumba yange yonna.

⁸ Onsibye n'onyweza ekinnmiririza ddala, obukovvu bwange bwe bukulaga bwe ndi, kirabika ne ku maaso.

⁹ Katonda annumba n'obusungu bwe n'anjuzaayuza, annumira emba; omulabe wange antunuulira nkaliriza n'amaaso ge agafumita.

¹⁰ Abantu bayasamya emimwa gyabwe ne bansekerera; bankuŋjaanirako ne bankuba empi ku matama.

¹¹ Katonda ampaddeyo eri omukozi w'ebibi, era n'ansuula mu mikono gy'ababi.

- ¹² Nnali bulungi, n'anjuzaamu wakati; yankwata ku nsingo n'ammenyamu. Anfudde ssabbaawa,
- ¹³ abakubi b'obusaale banneetoolodde. Awatali kusaasira, afumita ensigo zange, omususa gwange ne guyika ku ttaka.
- ¹⁴ Annumba, emirundi n'emirundi, n'anfubutukirako ng'omulwanyi omuzira.
- ¹⁵ "Neetungidde ebikutiya eby'okukungubagiramu, ne nkweka obwenyi bwange mu nfuufu.
- ¹⁶ Nzenna mmyuse amaaso olw'okukaaba, ekisiikirize ekikwafu ennyo kyetoolodde amaaso gange,
- ¹⁷ newaakubadde ng'emikono gyange tegirina bibi bye gikoze, n'okusaba kwange nga kutukuvu.
- ¹⁸ "Ggwe ensi, tobikka ku musaayi gwange; nneme okusirisibwa!
- ¹⁹ Era kaakano omujulirwa wange ali mu ggulu; omuwolereza wange ali waggulu nnyo ddala.
- ²⁰ Mikwano gyange bansekerera, amaaso gange nga gakulukusa amaziga eri Katonda.
- ²¹ Ku lw'omuntu, yeegayirira eri Katonda ng'omuntu bwe yeegayiririra mukwano gwe.
- ²² "Emyaka mitono eginaayitawo nga sinnakwata lugendo olw'obutadda."

Yobu 17

- ¹ Omutima gwange gwennyise, ennaku zange zisalibbwaaako, entaana enninze.
- ² Ddala abanekerera bannetoolodde; amaaso gange gabeekengera.
- ³ "Ompe, Ayi Katonda akakalu k'onsaba. Ani omulala ayinza okunneeyimirira?
- ⁴ Ozibye emitima gyabwe obutategeera; noolwekyo toobakkirize kuwangula.
- ⁵ Omusajja avumirira mikwano gye olw'empeera alireetera amaaso g'abaana be okuziba.
- ⁶ "Katonda anfudde ekisekererwa eri buli omu, anfudde buli omu gw'afujjira amalusu mu maaso.
- ⁷ Amaaso gange gayimbadde olw'okunakuwala; omubiri gwange gwonna kaakano guli nga kisiikirize.
- ⁸ Abantu ab'amazima beesisiwala olwa kino; atalina musango agolokokedde ku oyo atatya Katonda.

⁹ Naye era abatuukirivu banaakwatanga amakubo gaabwe, n'abo ab'emikono emirongoofu banneeyongeranga amaanyi.

¹⁰ "Naye mukomeewo mwenna kaakano, mujje, naye siraba muntu mugazi mu mmwe!

¹¹ Ennaku zange ziyyise entegeka zange zoonoonese, era bwe kityo n'okwegomba kw'omutima gwange.

¹² Abantu bano ekiro bakifuula emisana; mu kizikiza mwennyini mwe bagambira nti, Ekitangaala kinaatera okujja.

¹³ Amagombe bwe gaba nga ge maka mwe nnina essuubi, bwe njala obuliri bwange mu kizikiza,

¹⁴ ne ijnjamba amagombe nti, 'Ggwe kitange,' era n'eri envunyu nti, 'Ggwe mmange,' oba nti, 'Ggwe mwannyinaze,'

¹⁵ kale essuubi lyange liba ludda wa? Ani ayinza okuliraba?

¹⁶ Nalyo lirigenda eri enzigi z'emagombe Oba tuligenda ffenna mu nfuufu?"

Yobu 18

Birudaadi Ayanukula

¹ Awo Birudaadi Omusukusi n'ayanukula n'agamba nti,

² "Mulikomya ddi okufuulafuula ebigambo? Muddeemu amagezi, tulyoke twogere.

³ Lwaki tutwalibwa ng'ente era ne tulowoozebwu okuba abasirusiru mu maaso gammwe?

⁴ Ggwe eyeyuzayuza olw'obusungu, abantu ensi bagiveeko ku lulwo, oba enjazi zive mu bifo byazo?

⁵ "Ddala etabaaza y'omukozi w'ebibi ezikidde, era n'omuliro gw'ekyoto kye tegukyayaka.

⁶ Ekitangaala kivudde mu weema ye; n'ettaala eri ku mabbali ge nayo ezikidde.

⁷ Amaanyi gamuwedde, ebigere bye tebikyali bya maanyi, era enkwe ze, ze zimusuula.

⁸ Eky'amazima ebigere bye byamusuula mu kitimba era n'atangatanga mu butimba.

⁹ Omutego gumukwata ekisinziiro; akamasu ne kamunyweeza.

¹⁰ Omuguwa gumukwekerwa mu ttaka; akatego kamulindirira mu kkubo lye.

¹¹ Entisa emukanga enjuuyi zonna era n'emugoba kigere ku kigere.

- ¹² Emitawaana gimwesunga; ekikangabwa kirindiridde okugwa kwe.
- ¹³ Kirya ebitundu by'olususu lwe; omubereberye wa walumbe amulyako emikono n'ebigere.
- ¹⁴ Aggyibwa mu bukumi bwa weema ye era n'atwalibwa eri kabaka w'ebikangabwa.
- ¹⁵ Omuliro gumalirawo ddala byonna eby'omu weema ye; ekibiriiti kyakira mu kifo mw'abeera.
- ¹⁶ Emirandira gye gikala wansi, n'amatabi ge gakala waggulu.
- ¹⁷ Ekijjukizo kye kibula ku nsi; talina linnya mu nsi.
- ¹⁸ Agobebwa okuva mu kitangaala, agenda mu kizikiza n'aggyibwa mu nsi.
- ¹⁹ Talina mwana wadde omuzzukulu mu bantu be, newaakubadde ekifo mwabeera.
- ²⁰ Abantu ab'ebugwanjuba beewuunya ebyamutuukako; n'ab'ebuvanjuba ne bakwatibwa ekikangabwa.
- ²¹ Ddala bw'etyo bw'ebeera ennyumba y'omukozi w'ebibi; bwe gaba bwe gatyo amaka g'oyo atamanyi Katonda."

Yobu 19

Yobu Amuddamu

- ¹Awo Yobu n'addamu nti:
- ²"Mulikomya ddi okunnyigiriza ne mummenya n'ebigambo?
- ³Emirundi kkumi nga munvuma; temukwatiddwa nsonyi kunnumba.
- ⁴Bwe kiba nga kituufu nti nawaba, obukyamu bwange, bwange nzekka.
- ⁵Bwe muba munneegulumiririzaako ne mukozesa obulumi bwange okunfeebya,
- ⁶mumanye nga Katonda ankoze bubi era anzingizza mu kitimba kye.
- ⁷"Wadde nga nkaaba nti, 'Mpisiddwa bubi,' siddibwamu; ne bwe nkuba enduulu, tewali antaasa.
- ⁸Azibye ekkubo lyange sisobola kuyita; amakubo gange agalese mu kizikiza.
- ⁹Anziggyeeko ekitiibwa kyange n'anziggyako n'engule ku mutwe gwange.
- ¹⁰Anjuzaayuza ku buli ludda okutuusa lwe watasigalawo kantu, asigula essuubi lyange ng'omuti.
- ¹¹Obusungu bwe bumbubuukirako; ambala ng'omu ku balabe be.

¹² Amaggye ge galumba n'amaanyi; ganzimbako enkomera ne gagumba okwetooloola weema yange.

¹³ "Anziggyeeko baganda bange; abo bwe twali tumanyiganye banviiriddeko ddala.

¹⁴ Ab'ekika kyange banviiriddeko ddala, mikwano gyange ginneerabidde.

¹⁵ Abagenyi bange n'abweereza bange abawala, bampisa nga gwe batamanyi, ne bandaba nga mun Nagwanga.

¹⁶ Mpita omuddu wange naye tawulira, wadde nga mwegayirira n'akamwa kange.

¹⁷ Omukka gwange gwe nzisa, guwunyira bubi mukyala wange; nakyayibwa baganda bange bennyini.

¹⁸ N'obulenzi obuto bunsekerera; buli lwe bundaba bunvuma.

¹⁹ Mikwano gyange gyonna enfirabulago gya nkyawa; abo be nnayagalanga banneefuukira.

²⁰ Siriiko bwe ndi wabula ndi ddiba na magumba: nsigazzaawo bibuno byokka.

²¹ "Munkwatirwe ekisa mikwano gyange, munkwatirwe ekisa, kubanga omukono gwa Katonda gunkubye.

²² Lwaki munjigga nga Katonda bw'anjigga? Omubiri gwe mufunye tegumala?

²³ "Singa nno ebigambo byange byawandiikibwa, Singa byawandiikibwa ku muzingo, bandiguwadde ani?

²⁴ Singa byawandiikibwa n'ekyuma ku lubaati, oba okuwandiikibwa ku lwazi ne bibeerawo emirembe n'emirembe!

²⁵ Mmanyi nga Omununuzi wange mulamu, era nga ku nkomerero aliylimirira ku nsi.

²⁶ Era ng'olususu lwange bwe luweddewo, kyokka mu mubiri gwange ndiraba Katonda;

²⁷ nze mwene ndimulaba, n'amaaso gange, Nze, so si mulala. Emmeeme yange ng'eyaayaana munda mu nze!

²⁸ "Bwe mugamba nti, 'Tujja kumuyigganya, kubanga ensibuko y'emitawaana eri mu ye;'

²⁹ nammwe bennyini musaana mutye ekitala. Kubanga obusungu buleeta okubonereza okw'ekitala, olwo mulyoke mumanye ng'eriyo okusalirwa omusango."

Yobu 20

Zofali Addamu

- ¹Awo Zofali Omunaamasi n'amuddamu nti,
- ²"Ebirowoozo byange ebiteganyiziddwa binkubiriza okukuddamu kubanga nteganyizibbwaa nnyo.
- ³Mpulidde nga nswadde olw'okunenya, okutegeera kwange kunkubiriza okuddamu.
- ⁴"Ddala omanyi nga bwe byali okuva edda, okuva omuntu lwe yateekebwa ku nsi,
- ⁵nti Enseko z'omwonoonyi ziba z'akaseera katono, era n'essanyu ly'abatamanyi Katonda terirwawo.
- ⁶Newaakubadde ng'amalala ge gatuuka ku ggulu n'omutwe gwe ne gutuuka ku bire,
- ⁷alizikirira emirembe n'emirembe nga empitambi ye: abo abamulaba babuuze nti, 'Ali ludda wa?'
- ⁸Abulawo ng'ekirooto, n'ataddayo kulabika; abuzeewo ng'okwolesebwa kw'ekiro.
- ⁹Eriiso eryamulaba teririddayo kumulaba, taliddayo kulaba kifo kye nate.
- ¹⁰Abaana be basaana bakolagane n'abaavu, emikono gye gyennyini gye gisaana okuwaayo obugagga bwe.
- ¹¹Amaanyi ag'ekivubuka agajjudde amagumba ge, ge ganaagalamiranga naye mu nfuufu.
- ¹²"Okukola ebibi kuwoomerera mu kamwa ke era akukweka wansi w'olulimi lwe,
- ¹³tayagala kukuleka, wadde okukuta era akukuumira mu kamwa ke.
- ¹⁴Naye emmere ye erimwonoonekera mu byenda, era erifuuka butwa bwa nsweera munda ye.
- ¹⁵Aliwandula eby'obugagga bye yamira; Katonda alireetera olubuto lwe okubisesema.
- ¹⁶Alinywa obutwa bw'ensweera; amannyo g'essalambwa galimutta.
- ¹⁷Alisubwa obugga, n'emigga egikulukuta n'omubisi gw'enjuki n'amata.
- ¹⁸Bye yateganira alina okubiwaayo nga tabiridde; talinyumirwa magoba ga kusuubula kwe,

¹⁹ kubanga yanyigiriza abaavu n'abaleka nga bakaaba, yawamba amayumba g'ataazimba.

²⁰ "Ddala ddala talifuna kikkusa mululu gwe, wadde okuwonya n'ebyo bye yeeterekera.

²¹ Tewali kimulekeddwawo ky'anaalya; obugagga bwe tebjija kusigalawo.

²² Wakati mu kufuna ebingi okulaba ennaku kumujjira; alibonaabonera ddala nnyo.

²³ Ng'amaze okujuza olubuto lwe, Katonda alyoke amusumulurire obusungu bwe amukube ebikonde ebitagambika.

²⁴ Bw'alidduka ekyokulwanyisa eky'ekyuma, akasaale ak'ekikomo kalimufumita.

²⁵ Akasaale kaliviirayo mu mugongo gwe, omumwa gwako ogumasamasa gusikibwe mu kibumba. Entiisa erimujjira.

²⁶ Ekizikiza ekikutte kye kirindiridde obugagga bwe. Omuliro ogutazikira gwe gulimumalawo, gwokye ebisigadde mu weema ye.

²⁷ Eggulu liryolesa obutali butuukirivu bwe; ensi erimusitukirako n'emujeemera.

²⁸ Ebintu by'ennyumba biritwalibwa, biribilira ku lunaku lw'obusungu bwa Katonda.

²⁹ Eyo y'engeri Katonda gy'asasulamu abakozi b'ebibi, nga gwe mugabo Katonda gwe yabategekera."

Yobu 21

Yobu Ayanukula

¹ Awo Yobu n'addamu n'ayogera nti,

² "Muwulirize n'obwegendereza ebigambo byange, era kino kibazzeemu amaanyi.

³ Mungumiikirizeeko nga njogera, oluvannyuma museke.

⁴ "Okwemulugunya kwange nkw'olekezza muntu? Lwaki okugumiikiriza tekunzigwako?

⁵ Muntunuulire mwewuunye, mujja kukwata ne ku mumwa.

⁶ Bwe ndowooza ku kino, nfunu entiisa; omubiri gwange ne gukankana.

⁷ Lwaki abakozi b'ebibi bawangaala, ne bakaddiwa ne beeyongera n'amaanyi?

⁸ Balaba abaana baabwe bwe banywezebbwa, ezzadde lyabwe nga balaba.

⁹ Amaka gaabwe gaba n'emirembe nga temuli kutya; omuggo gwa Katonda tegubabeerako.

¹⁰ Ennume zaabwe teziremererwa, ente zaabwe enkazi zizaala awatali kusowola mwana gwazo.

¹¹ Abaana baabwe bagendera wamu nga kisibo; obuto ne bubeera mu kuzina.

¹² Bayimbira ku bitaasa n'ennanga, ne basanyukira eddoboozi ly'omulere.

¹³ Emyaka gyabwe gyonna babeera bulungi, mangwago ne bakka mu ntaana.

¹⁴ Kyokka bagamba Katonda nti, 'Tulekere emirembe gyaffe! Tetwegomba kumanya makubo go.

¹⁵ Ayinzabyonna ye ani tulyoke tumuweereze? Kiki kye tuganyulwa bwe tumusaba?

¹⁶ Naye obugagga bwabwe tebuli mu mikono gyabwe, noolwekyo amagezi g'abakozi b'ebibi ganneewunyisa.

¹⁷ "Ettaala y'abakozi b'ebibi yo, ezikira emirundi emeka? Ennaku ebajjira emirundi emeka? Katonda abatuusaako obulumi, ng'abasunguwalidde.

¹⁸ Bali ng'ebisasiro ebitwaalibwa empewo; ng'ebisusunku embuyaga bye zitwala.

¹⁹ Katonda abonereza abaana olw'ekibi kya bakitaabwe. Asasule omuntu yennyini oyo alyoke ategere!

²⁰ Leka amaaso ge ye yennyini galabe okuzikirira; leka anywe ku kiruyi kya Ayinzabyonna.

²¹ Kubanga aba afaayo ki ku maka g'aba alese, nga emyezi gye eyamatgekerwa giweddeko?

²² "Eriyo ayinza okuyigiriza Katonda amagezi, kubanga asalira omusango n'abo abasinga okuba aba waggulu?

²³ Omusajja omu afira w'abeerera ow'amaanyi, nga munywevu ddala ali mu mirembe gye,

²⁴ omubiri gwe nga guliisiddwa bulungi, amagumba ge nga gajjudde obusomyo.

²⁵ Omusajja omulala n'afa ng'alina obulumi ku mutima, nga teyafuna kintu kyonna kirungi.

²⁶ Ne beebaka kye kimu mu ttaka, envunu ne zibabikka bombi.

²⁷ "Mmanyi bulungi ddala kye mulowooza, enkwe ze mwagalala okunsalira.

²⁸ Mugamba nti, ‘Kaakano eruwa ennyumba y’omusajja ow’amaanyi, eweema abasajja abakozi b’ebibi mwe baabeeranga?’

²⁹ Temwebuzanga ku abo abatambula ejnjendo? Temukkiriza bye babagamba,

³⁰ nti omusajja omukozi w’ebibi awona ku lunaku olw’emitawaana, era awona ku lunaku olw’ekiruyi?

³¹ Ani avumirira ebikolwa bye maaso ku maaso, ani amusasula ebyo by’akoze?

³² Atwalibwa ku ntaana, era amalaalo ge gakuumibwa.

³³ Ettaka eriri mu lusenyi limuwoomera, abantu bona bamugoberera, n’abalala abatamanyiddwa muwendo ne bamukulembera.

³⁴ “Kaakano musobola mutya okuŋŋumya n’ebitaliimu? Tewali kisigaddeyo ku bye mwanzizeemu wabula obulimba!”

Yobu 22

Erifaazi Addamu

¹ Awo Erifaazi Omutemani n’addamu n’ayogera nti,

² “Omuntu ayinza okugasa Katonda? Wadde oyo ow’amagezi ayinza okumuyamba?

³ Ayinzabyonna yandifunye kwesiima ki singa wali mutuukirivu? Yandiganyuddwa ki singa amakubo go gaali magolokofu?

⁴ “Akukangavvula lwa kumutya era kyava akuvunaana?

⁵ Okwonoona kwo si kunene nnyo? Ebibi byo si bingi nnyo?

⁶ Kubanga waggya ku muganda wo emisingo awatali nsonga; waggya engoye ku bantu, n’obaleka bwereere.

⁷ Tewawa bakoowu mazzi, abaagala wabamma emmere,

⁸ wadde nga wali musajja wa maanyi, eyalina ettaka, omusajja ow’ekitiibwa, era nga byonna ggwe nnyini byo.

⁹ Weegobako bannamwandu bagende nga toliko ky’obawadde; abatalina bakitaabwe n’obamalamu amaanyi.

¹⁰ Emitego kyegivudde gikwetooloola. Lwaki entiisa ey’amangu ekujjira?

¹¹ Lwaki enzikiza ekutte nnyo tosobola kulaba, era lwaki amataba gakubikkako?

¹² “Katonda tali waggulu mu ggulu? Era laba, emmunyeenye ezisingayo okuba waggulu, nga bwe ziri ewala!

¹³ Ate n’ogamba nti, ‘Katonda amanyi ki? Ayinza okulamulira mu kizikiza?’

¹⁴ Ebire ebikutte bimubikkako, n'aba ng'atatalaba bw'aba atambula mu bifo by'omu ggulu.'

¹⁵ Onoosigala mu kkubo ery'edda abasajja abakozi b'ebibi lye baakwata?

¹⁶ Baatwalibwa ng'ekiseera kyabwe tekinnatuuka, emisingi gyabwe gyatwalibwa amataba.

¹⁷ Be bagamba Katonda nti, 'Tulekere emirembe! Ayinzabyonna ayinza kutukola ki?'

¹⁸ Ate nga ye, ye yajjuza ennyumba zaabwe ebintu ebirungi, noolwekyo neewuunya nnyo amagezi g'abakozi b'ebibi.

¹⁹ Abatuukirivu balaba okuzikirira kwabwe ne bajaguza; abataliiko musango babasekerera nga bagamba nti,

²⁰ 'Ddala abalabe baffe bazikiridde, era omuliro gulidde obugagga bwabwe.'

²¹ "Gonderanga Katonda ofunenga emirembe; mu ngeri eno ebirungi lwe binajjanga gy'oli.

²² Kkiriza ebiragiro ebiva mu kamwa ke era oteeke ebigambo bye mu mutima gwo.

²³ Bw'onodda eri oyo Ayinzabyonna, onodda buggyaa, bwonooteeka ebibi ewala ne weema yo,

²⁴ n'oteeka n'amayinja go ag'omuwendo mu ttaka, zaabu yo eya Ofiri ku njazi z'omu mugga,

²⁵ awo Ayinzabyonna anaabeeranga zaabu yo, era ffeeza esingayo obulungi.

²⁶ Ddala ddala olisanyukira mu oyo Ayinzabyonna era oyimuse amaaso go eri Katonda.

²⁷ Olimusaba, alikuwulira, era olituukiriza obweyamo bwo.

²⁸ Ky'olisalawo kirikolebwa, era ekitangaala kirimulisa amakubo go.

²⁹ Abantu abalala bwe balisuulibwa n'ogamba nti, 'Bayimuse!' Olwo alirokola abagudde.

³⁰ Alinunula n'oyo aliko omusango, alinunulwa olw'obulongoofu bw'emikono gyo."

Yobu 23

Yobu Ayanukula

¹Awo Yobu n'addamu nti,

- ² “N’okutuusa leero okwemulugunya kwange kubalagala, omukono gwe gunzitoowerera wadde mbadde mu kusinda.
- ³ Singa nnali mmanyi aw’okumusanga nandisobodde okulaga gy’abeera!
- ⁴ Nanditutte empoza yange gy’ali, akamwa kange nga nkajuzizza ensonga zange.
- ⁵ Nanditegedde kye yandinizeemu, ne neetegereza kye yandijambye.
- ⁶ Yandimpakanyizza n’amaanyi mangi? Nedda, teyandinteeseko musango.
- ⁷ Eyo omuntu omuntuukirivu asobola okutwalayo ensonga ye, era nandisumuluddwa omulamuzi wange emirembe n’emirembe.
- ⁸ “Bwe njenda ebuvanjuba, nga taliyo; ne bwe njenda ebugwanjuba, simusangayo.
- ⁹ Bw’aba akola mu bukiikkono simulaba, bw’adda mu bukiikkaddyo, simulabako.
- ¹⁰ Naye amanyi amakubo mwe mpita, bw’anaamala okungezesha, nzija kuvaamu nga zaabu.
- ¹¹ Ebigere byange bimugoberedde; ntambulidde mu makubo ge nga sikyamakyama.
- ¹² Saava ku biragiro by’akamwa ke. Nayagala ebigambo by’akamwa ke okusinga emmere yange gyendya bulijo.
- ¹³ “Naye yeemalirira, ani ayinza okumuwakanya? Akola kyonna ekimusanyusa.
- ¹⁴ Weewaawo ajja kutuukiriza by’asazzeewo okunjolekeza, era bingi byategese by’akyaleeta.
- ¹⁵ Kyenva mba n’entiisa nga ndi mu maaso ge; bwe ndowooza ku bino byonna, ne mmutyta.
- ¹⁶ Katonda anafuyizza nnyo omutima gwange, Ayinzabyonna antiisizza nnyo.
- ¹⁷ Naye ekizikiza tekinsirisizza, ekizikiza ekikutte ennyo ekibisse amaaso gange.”

Yobu 24

- ¹ “Lwaki Ayinzabyonna tagera biseera? Lwaki abo abamumanyi tebalaba nnaku zaageze?
- ² Abantu bajjulula amayinja agalamba ensalo, ne balunda ebisolo bye babbye.
- ³ Batwala endogoyi ya mulekwa ne batwala ennume ya nnamwandu ng’omusingo.

- ⁴ Basindiikiriza omunaku ne bamuggyga mu kkubo, ne bawaliriza abaavu bona mu ggwanga okwekweka.
- ⁵ Endogoyi ez'omu ddungu nga bwe zeeyisa, n'abaavu bagenda bategana nnyo nga balondalonda obumere; mu ddungu mwe balonderera emmere y'abaana baabwe.
- ⁶ Essubi eririibwa ensolo zaabwe baliggya ku ttale lye, ne banoga n'emizabbibu gy'aboonoonyi.
- ⁷ Olw'okubulwa engoye, basula bwereere; tebalina kye beebikka mu mpewo.
- ⁸ Enkuba y'oku nsozi ebatobya, ne banywegera enjazi olw'okubulwa we beggama.
- ⁹ Omwana atalina kitaawe bamusika ku mabeere; omwana omuwere ow'omwavu bamuwamba olw'ebbanja.
- ¹⁰ Olw'okubulwa engoye bayita bwereere; betikka ebinywa by'emmere naye basigala tebalidde.
- ¹¹ Basogolera emizabbibu ku mayinja, ne basambira mu ssogolero, naye ne basigala nga balumwa ennyonta.
- ¹² Okusinda kw'abantu kuwulirwa mu kibuga, n'emmeeme z'abafunye ebisago zikaabira obuyambi. Naye Katonda talina gw'asinzisa musango.
- ¹³ "Waliwo abo abajeemera omusana, abatamanyi makubo ge, abatasigala mu kwaka kwagwo.
- ¹⁴ Omutemu agolokoka nga obudde buzibye n'atta omwavu n'ali mu kwetaaga; ekiro abbira ddala.
- ¹⁵ Eriiso ly'omwenzi lirinda buzibe, ng'agamba nti, 'Tewali liiso linandaba,' n'abikka ne ku maaso ge.
- ¹⁶ Mu kizikiza mwe basimira amayumba, kyokka emisana baba beggalidde. Tebaagala kitangaala.
- ¹⁷ Eri abo bona ekizikiza ekikutte bwe budde bwabwe obw'oku makya. Kubanga bakola omukwano n'ebitiisa eby'omu nzikiza.
- ¹⁸ Bali ng'ebiyovu ebiri kungulu ku mazzi, era omugabo gwabwe mukolimire mu nsi. Tewali musogozi n'omu alaga mu nnimiro zaabwe ez'emizabbibu.
- ¹⁹ Nga ekyeeya n'ebbugumu bwe bimalawo amazzi agava mu muzira, aboonoonyi bwe batyo bwe bamalibwawo emagombe.
- ²⁰ Olubuto lunaamwerabiranga; envunyu eneemulyanga n'ewoomerwa. Tajjukirwenga nate, omukozi w'ebibi amenyeka ng'omuti.

²¹ Bayiikiriza ne banyaga omugumba atazaala. Tebakolera nnamwandu bya kisa.

²² Naye Katonda awalula ab'amaanyi olw'obuyinza bwe. Newaakubadde nga bakulaakulana, kyokka tebalina bukakafu ku bulamu bwabwe.

²³ Ayinza okubaleka ne babeera mu mirembe n'amaaso ge gabeera ku makubo gaabwe.

²⁴ Bayimusibwa akaseera katono, oluvannyuma nga tebakyaliwo. Bakkakkanyizibwa ne bakala ne baggyibwawo nga abalala bona. Basalibwa ng'emitwe gy'ebirimba by'enjaano.

²⁵ "Bwe kiba nga si bwe kiri, ani anannumiriza obulimba, n'afuula okwogera kwange okutaliimu?"

Yobu 25

Birudaadi Addamu

¹Awo Birudaadi Omusuki n'addamu n'ayogera nti,

²"Okufuga kwa Katonda n'entiisa ya Katonda; ateekawo enkola entuufu mu bifo ebya waggulu mu ggulu.

³ Amaggye ge gasobola okubalibwa? Ani atayakirwa musana gwe?

⁴ Olwo omuntu ayinza atya okwelowooza nti mutuukirivu awali Katonda? Omuntu eyazaalibwa omukazi ayinza atya okuba omulongoofu?

⁵ Laba n'omwezi tegulina bye gwaka, n'emmunyeenye si nnongoofu mu maaso ge.

⁶ Ate omuntu obuntu oyo envunyu obuvunyu, omwana w'omuntu, oyo olusirijjanyi, ayinza atya okwelowooza nti mulongoofu!"

Yobu 26

Yobu Ayanukula

¹Awo Yobu n'addamu nti,

²"Ng'oyambye oyo atalina maanyi! Ng'oyambye omukono ogwo ogatalina maanyi!

³Ng'amagezi ga kitalo ago g'owadde oyo atalina magezi! Ng'owadde okulunjjamizibwa okuyitirivu!

⁴Ani akuyambye okwogera ebigambo ebyo? Era mwoyo ki ogwogeredde mu kamwa ko?

⁵"Abafu kye balimu tekigumiikirizika, n'abo abali wansi w'amazzi ne bona abagabeeramu.

⁶ Amagombe gali bwereere mu maaso ga Katonda; n'okuzikiriza tekulina kikubisse.

⁷ Ayanjuluza eggulu ery'obukiikkono mu bbanga ejgereere, awanika ensi awatali kigwanirira.

⁸ Asiba amazzi mu bire bye; ate ebire tebyabika olw'okuzitoowererwa.

⁹ Abikka obwenyi bw'omwezi, agwanjululizaako ebire bye.

¹⁰ Ateekawo ekipimo ekiraga waggulu amazzi g'enyanja we gayita, ng'ensalo eyawula ekitangaala n'ekizikiza.

¹¹ Empagi z'eggulu zikankana, zeewuunya olw'okunenya kwe.

¹² Afuuakuula ennyanja n'obuyinza bwe, n'asalaasala Lakabu mu bitundutundu n'amagezi ge.

¹³ Yafuuwa omukka ogwatereeza eggulu, omukono gwe gwafumita omusota oguwulukuka.

¹⁴ Naye nga bino katundu butundu ku bye yakola. Nga kye tumuwulirako katundu butundu ku ekyo ky'ali! Ani ayinza okutegeera okubwatuka kw'obuyinza bwe?"

Yobu 27

¹ Yobu n'ayongera okwogera kwe bw'ati nti,

² "Nga Katonda bw'ali omulamu, agaanye okusala ensonga yange mu mazima, oyo Ayinzabyonna, aleetedde emmeeme yange okulumwa,

³ gye nkomye okuba nga nkyalina obulamu mu nze, omukka gwa Katonda nga gukyali mu nnyindo zange,

⁴ emimwa gyange tegijja kwogera butali butuukirivu, era olulimi lwange terujja kwogera bulimba.

⁵ Sirikkiriza nti muli batuufu; okutuusa lwe ndifa, siryeggyako bugolokofu bwange.

⁶ Nzija kwongera okunywerera ku butuukirivu bwange obutabuleka; omutima gwange tegunsalira musango nga nkyali mulamu.

⁷ "Abalabe bange babeere ng'abakozi b'ebibi, n'abo abangolokokerako babeere ng'abatali batuukirivu!

⁸ Kubanga ssuubi ki oyo atalina Katonda ly'aba nalyo ng'asaliddwako, nga Katonda amuggyeko obulamu?

⁹ Katonda awulira okukaaba kwe ng'ennaku emujjidde?

¹⁰ Alifuna essanyu mu oyo Ayinzabyonna? Aliyita Katonda ebbanga lyonna?

¹¹ Nzija kubayigiriza ebikwata ku maanyi ga Katonda; ebikwata ku oyo Ayinzabyonna sijja kubikweka.

¹² Weekalirize bino byonna bye mwerabiddeko, lwaki kaakano okwogera ebyo ebitalina makulu?

Empeera y'abakozi b'ebibi

¹³ "Eno y'empeera Katonda gy'awa abakozi b'ebibi, omugabo omuntu omujoozi gw'afuna okuva eri oyo Ayinzabyonna:

¹⁴ Abaana be ne bwe baba bangi batya, enkomerero yaabwe kitala; ezzadde lye teririfuna byakulya bibamala.

¹⁵ Abo abaliwona kawumpuli, balifa ne baziikibwa, ne bannamwandu baabwe tebalibakaabira.

¹⁶ Wadde ng'atereka effeeza ng'enfuufu, n'engoye ng'entuumo y'ebbumba,

¹⁷ ebyo bye yeeterekera omutuukirivu y'alibyambala, era abo abatalina musango be baligabana effeeza ye.

¹⁸ Ennyumba gy'azimba eribeera ng'ey'ekiwojjolo; ng'akasiisira akazimbiddwa omukuumi.

¹⁹ Agenda okwebaka nga mugagga, naye ekkyo tekiddemu kubaawo, kubanga alizuukuka nga byonna biweddewo.

²⁰ Entiisa erimuzingako ng'amataba; kibuyaga amutwala ekiro mu kyama.

²¹ Embuyaga ey'ebuvanjuba emutwalira ddala n'agenda; emuggya mu kifo kye n'amaanyi.

²² Emukuba awatali kusaasira, ng'adduka ave mu maanyi gaayo.

²³ Erimukubira engalo zaayo, n'emusiiya okuva mu kifo kye."

Yobu 28

¹ "Ddala ddala waliwo ebirombe mwe basima effeeza, n'ekifo gye balongooseza effeeza.

² Ekyuma kisimibwa mu ttaka, n'ekikomo ne bakisaanuusa okukiggya mu mayinja.

³ Omuntu agoberera enzikiza n'anoonya eyo mu ttaka wansi, asime ekyuma mu kizikiza ekiri wansi ennyo.

⁴ Asima ekinnya ekiri ewala n'abantu gye babeera, mu bifo eteyita bantu, ewala okuva abantu gye bayita.

- ⁵ Ensi evaamu emmere, naye wansi waayo yafuusibwa nga muliro.
- ⁶ Safira eva mu mayinja gaayo, era enfuufu yaayo erimu zaabu.
- ⁷ Tewali kinyonyi kiyizzi kimanyi kkubo lino, wadde n'amaaso ga kamunye tegarirabanga.
- ⁸ Ekibinja ky'empologoma ento tekituukangayo, tewali mpologoma yali eyiseeyo.
- ⁹ Omuntu ayasa n'omukono gwe ejinja ery'embalebaale, n'avuunika ensozi okuvira ddala we zisibuka.
- ¹⁰ Asima ensalosalo ku njazi; n'amaaso ge galaba eby'omuwendo byonna.
- ¹¹ Anoonya wansi mu migga, n'aggyayo ebintu ebyakwekebwa.
- ¹² "Naye amagezi gasangibwa wa? Okutegeera kuva wa?
- ¹³ Omuntu tayinza kutegeera mugaso gwago; tegasangibwa mu nsi y'abalamu.
- ¹⁴ Obuziba bwogera nti, 'Tegali mu nze,' ennyanja eyogera nti, 'Tegali mu nze.'
- ¹⁵ Tegayinza kugulibwa na zaabu asingayo obulungi, wadde omuwendo gwago okupimibwa mu ffeeza.
- ¹⁶ Tegayinza kugulibwa na zaabu wa Ofiri, mu mayinja ag'omuwendo aga onuku oba safiro.
- ¹⁷ Zaabu n'endabirwamu tebiyinza kugenkana: so tegayinza kugeraageranyizibwa n'amayinja ag'omuwendo.
- ¹⁸ Kolali n'amayinja ag'endabirwamu tebyogerwa nako; omuwendo ogugula amagezi gusinga amayinja amatwakaavu.
- ¹⁹ Topazi eva mu Esiyopa teyinza kugenkana, tegayinza wadde okugulibwa mu zaabu etetabikiddwamu kantu konna.
- ²⁰ "Kale amagezi gava ludda wa? N'okutegeera kubeera ludda wa?
- ²¹ Gakwekebwa okuva mu maaso g'ebintu byonna ebiram, era gakwekedwa ebinyonyi by'omu bbanga.
- ²² Okuzikiriza n'Okufa kwogera nti, 'Nawulirako buwulizi ku lugambo lwakwo mu matu gange.'
- ²³ Katonda atgeera ekkubo erigatuukako era ye yekka y'amanyi gye gabeera,
- ²⁴ kubanga alaba enkomerero y'ensi era alaba ebintu byonna wansi w'eggulu.
- ²⁵ Bwe yateekawo amaanyi g'empewo, n'apima n'amazzi,

²⁶bwe yateekera enkuba etteeka era n'ekkubo eggulu we linaayitanga nga limyansa,

²⁷olwo n'atunuulira amagezi n'agalangirira; n'agateekawo, n'agagezesza.

²⁸N'agamba omuntu nti, 'Laba, okutya Mukama, ge magezi, n'okuleka ekibi, kwe kutegeera.' "

Yobu 29

¹Yobu n'ayongera okwogera nti,

²"Nga nneegomba emyezi egayaita, ennaku Katonda mwe yali nga y'andabirira,

³ettaala ye bwe yayakiranga omutwe gwange, n'ekitangaala kye bwe kyanjakiranga nga ntambulira mu kizikiza.

⁴Mu biro we nabeerera ow'amaanyi, omukwano gwa Katonda omuyitirivu nga gukuuma amaka gange,

⁵Ayinzabyonna bwe yali ng'akyali nange n'abaana bange nga bakyanneetoolodde,

⁶n'ekkubo lyange nga lisiigiddwa omuzigo n'olwazi nga lunfukirira omugga ogw'amafuta.

⁷"Bwe nalaganga ku mulyango gw'ekibuga ne ntuula ku ntebe mu kifo we baakubiranga enkiiko,

⁸abavubuka abato bandabanga ne badda ebbali, abakadde ne basituka ne bayimirira;

⁹abakungu ab'oku ntikko ne balekeraawo okwogera, ne bakwata ne ku mimwa;

¹⁰ab'ebitiibwa ne balekeraawo okwogera, ennimi zaabwe ne zeesibira waggulu mu kamwa.

¹¹Buli kutu okwampuliranga nga kwesiima, era n'abo abandabanga nga basiima

¹²kubanga nawonyanga abaavu abaakaabiranga obuyambi, n'abatalina bakitaabwe abatalina abayamba.

¹³Omusajja ng'afa, y'ansabira omukisa, ne ndeetera omutima gwa nnamwandu okuyimba.

¹⁴Ne nnyambala obutuukirivu ng'engoye zange, obwenkanya bwe bwali omunagiro gwange era ekitambala kye neesiba ku mutwe.

¹⁵Nnali maaso g'abamuzibe era ebigure by'abalema.

¹⁶Nnali kitaawe w'abanaku, ne nneyama okuwolereza besimanyiiko.

¹⁷ Namenyanga amannyo g'abakozi b'ebibi, ne nziggya mu kamwa kaabwe, be baali bakutte.

¹⁸ "Nalowooza nti, 'Ndifiira mu nnyumba yange nga mpezezza ennaku zange nga nnyingi ng'omusenyu ogw'oku nnyanja.

¹⁹ Omulandira gwange gulituuka mu mazzi, era n'omusulo gulibeera ku ttabi lyange okukeesa obudde.

²⁰ Ekitiibwa kyange tekirkaddiwa mu nze, n'omutego gwange ogw'akasaale gusigale nga tegukaddiye mu mukono gwange.'

²¹ "Abantu beesunganga okumpuliriza, nga balindirira mu kasirise amagezi gange.

²² Bwe namalanga okwogera, nga tewaba addayo kwogera, ebigambo byange byagwanga mpola mpola mu matu gaabwe.

²³ Bannindiriranga ng'enkuba ne banywa ebigambo byange ng'enkuba eya ttoggo.

²⁴ Bwe nabamwenyeranga nga tebakikkiriza; ekitangaala ky'oku maaso gange kyali kya muwendo gye bali.

²⁵ Nabasalirangawo eky'okukola, ne ntuula nga kabaka n'amaggye ge; nnali ng'abo ababeeesabeesa abakungubazi."

Yobu 30

¹ "Naye kaakano bansekerera; abantu abansinga obuto, bakitaabwe be nnandibadde nteeka wamu n'embwa ezikuuma endiga zange.

² Amaanyi g'emikono gyabwe gaali gangasa ki? Abantu abaali baweddemu amaanyi ag'obuvubuka bwabwe,

³ abakoozimbye abaali mu bwetaavu era abayala, bameketa ettaka ekkalu mu nsi enjereere mu budde obw'ekiro.

⁴ Banoga ebiragala ebiwoomerera ng'omunyyo mu bisaka, enkolokolo ez'omwoloola y'emmere yaabwe.

⁵ Baagobebwa bave mu bantu bannaabwe, ne babaleekaanira gy'obeera nti, baali babbi.

⁶ Baawalirizibwa okubeera mu migga egyakalira, mu njazi ne mu binnya wansi mu ttaka.

⁷ Baakaabira mu bisaka ng'ensolo ne beekweka mu bikoola by'emiti.

⁸ Ezzadde ly'abasirusiru abatalina bwe bayitibwa, baagobebwa mu nsi.

⁹ Naye kaakano abaana baabwe bansekerera nga bannyimba; nfuuse ekyenyinyalwa gye bali,

¹⁰ abatanjagala abanneesalako, banguwa okunfujjira amalusu mu maaso.

¹¹ Kaakano Katonda nga bw'atagguludde akasaale kange, ammazeemu amaanyi; beeyisizza nga bwe balaba mu maaso gange.

¹² Abantu bano bannumba ku mukono gwange ogwa ddyo; bategera ebigure byange emitego, ne baziba amakubo banzikirize.

¹³ Banzingiza ne banzikiriza, nga tewali n'omu abayambye.

¹⁴ Banzingiza ng'abayita mu kituli ekigazi, bayingira nga bayita mu muwaatwa.

¹⁵ Nnumbiddwa ebitiisa eby'amaanyi; ekitiibwa kyange kifuumuuse ng'ekifuuyiddwa empewo, era n'obukumi bwange ne bubulawo ng'ekire."

Okubonaabona kwa Yobu

¹⁶ "Era kaakano obulamu bwange buseebengerera buggwaawo, ennaku ez'okubonaabona zinzijidde.

¹⁷ Ekiro kifumita amagumba gange era obulumi bwe nnina tebukoma.

¹⁸ Mu maanyi ge amangi Katonda abeera ng'olugoye lwe nnueblo, n'ensibibwa ng'ekitogi ky'ekyambalo kyange.

¹⁹ Ansuula mu bitosi, ne nfuuka ng'enfuufu n'evvu.

²⁰ "Nkukaabirira nti, Ayi Katonda, naye toddamu; nnyimirira, naye ontunuulira butunuulizi.

²¹ Onkyukira n'obusungu; onnumba n'omukono gwo ogw'amaanyi.

²² Onsitula mu bbanga n'ongobesa empewo, n'onziza eno n'eri mu muyaga.

²³ Mmanyi nga olintuusa mu kufa, mu kifo kye wateekerawo abalamu bonna.

²⁴ "Ddala tewali ayamba muntu anyigirizibwa ng'akaaba mu kunyigirizibwa kwe.

²⁵ Saakaabira abo abaali mu buzibu? Emmeeme yange teyalumirirwa abaavu?

²⁶ Naye bwe nanoonya obulungi, ekibi kye kyajja; bwe nanoonya ekitangaala, ekizikiza kye kyajja.

²⁷ Olubuto lwange lutokota, terusirika; ennaku ez'okubonaabona kwange zinjolekedde.

²⁸ Nzenna ḥejenda nzirugala naye si lwa kwokebwa musana; nnyimirira mu lukuḥjaana, ne nsaba obuyambi.

²⁹ Nfuuse muganda w'ebibe, munne w'ebiwuugulu.

³⁰ Olususu lwange luddugadde, era lususumbuka; n'omubiri gwange gwokerera.

³¹ Ettendo lyange lifuuseemu kukaaba n'akalere kange ne kavaamu eddoboozi ery'ebiwoobe."

Yobu 31

Obutukuvu bwa Yobu

¹ "Nakola endagaano n'amaaso gange; obutatunuulira muwala n'amaaso ag'obukaba.

² Kiki Katonda kye yandinsasudde okuva waggulu, omugabo ogwandivudde eri oyo Ayinzabyonna ali waggulu?

³ Emitawaana tegijjira abo abatali batukuvu, n'okulaba ennaku ne kujjira abakola eby'obujeemu?

⁴ Amakubo gange gonna tagalaba, era tamanyi ntambula yange?

⁵ Obanga natambulira mu bulimba era nga n'ekigere kyange kyayanguyiriza okukola obukuusa;

⁶ leka mpimibwe ku minzaani ya Katonda amanye obutuukirivu bwange.

⁷ Obanga ekigere kyange kyali kikyamye okuva mu kkubo, n'omutima gwange ne gugoberera amaaso gange, engalo zange ne zibaako ebbala lyonna;

⁸ kale nsige, omulala abirye, weewaawo ebirime byange bikuulibwe.

⁹ Obanga omutima gwange gwali gusendeddwasendeddwa omukazi, oba ne mmuteegera ku mulyango gwa muliraanwa,

¹⁰ kale omukazi wange ase ejjaano y'omusajja omulala, n'abasajja abalala beebake naye.

¹¹ Kubanga ekyo kyandibadde kya kivve, ekibi ekiñjwanira okubonerezebwa.

¹² Ogwo gwandibadde muliro ogwokya okutuusa mu kuzikirira, ogwandyokezza ebyange byonna bye nasimba."

Abaddu n'Abaavu Okubassaako Omwoyo

¹³ "Obanga nnali nnyoomye ensonga y'omuddu wange oba omuddu wange omukazi, bwe banninaako ensonga,

¹⁴ kale ndikola ntya Katonda bw'alinnymukiram? Era bw'alimbuuza, ndimuddamu ki?

¹⁵ Eyantonda mu lubuto nabo si ye yabatonda? Ffenna si ye yatukola mu mbuto za bannyaffe?

¹⁶ "Obanga namma omwavu ekintu kyonna, era obanga nakaabya nnamwandu;

- ¹⁷ obanga nnali ndidde akamere kange nzekka atalina kitaawe n'atalyako,
- ¹⁸ kubanga okuva mu buto bwange namulera nga kitaawe, era okuva mu lubuto lwa mmange nayamba nnamwandum.
- ¹⁹ Obanga nnali ndabye omuntu yenna ng'afa olw'okubulwa ebyambalo, oba ali mu kwetaaga atalina kye yeebikka;
- ²⁰ mpozzi omutima gwe, gwe gutansiima, olw'okumubugumya n'ebyoya by'endiga zange;
- ²¹ obanga nayimusa omukono gwange eri abatalina bakitaabwe, kubanga mmanyi nti, mmanyiganye n'ab'obuyinza,
- ²² kale omukono gwange gukutuke ku kibegabega kyange, leka gukutukireyo mu kinywa we guyungira.
- ²³ Olw'okutya okuzikirizibwa Katonda n'olw'obukulu bwe, nnali sisobola kukola bintu ng'ebyo.
- ²⁴ "Obanga nateeka obweyamo bwange mu zaabu oba ne ijambala zaabu ennongoose nti, 'Gewe bwesige bwange;'
- ²⁵ obanga neeyagala olw'okuba n'obugagga obungi, oba olw'okuba emikono gyange gy'ali ginfunyisizza bingi;
- ²⁶ obanga nnali ntunuulidde enjuba, oba omwezi nga byaka mu kitiiibwa,
- ²⁷ omutima gwange ne gusendebwasendebwa mu kyama, ne mbinywegera nga mbisaamu ekitiibwa,
- ²⁸ era n'ekyo kyandibadde kibi ekinjywanyiza okusalirwa omusango olw'obutaba mwesigwa eri Katonda ali waggulu."

Abalabe n'abagwira Okubassaako Omwoyo

- ²⁹ "Obanga nasanyuka ng'omulabe wange afunye emitawaana oba ne njaguza olw'ebizibu ebyamutuuukako,
- ³⁰ sakkiriza kamwa kange kwonoona nga nkolinira obulamu bwe.
- ³¹ Abantu b'omu nnyumba yange bwe baba tebabuuzanga nti, 'Ani atakkuse nnyama?'
- ³² Tewali mutambuze yasula ku kkubo, kubanga oluggi lwange lwali luggule eri buli tuyise.
- ³³ Obanga nakweka ekibi kyange ng'abantu bwe bakola, nga nkweka obutali butuukirivu bwange mu mutima gwange,
- ³⁴ olw'okutya ekibiina, nga ntya okuswala mu kika, ne nsirika ne ntya n'okufuluma ebweru,

³⁵ so nga waliwo ayinza okumpulira, leka nteekeko omukono ku mpoza yange, leka Ayinzabyonna anziremu; n'oyo ampawaabira abiteeke mu buwandiike.

³⁶ “Ddala ddala nandibyambadde ku kibegabega kyange, nandibyambadde ku mutwe ng'engule.

³⁷ Nandimunnyonnyodde buli kifo we nalinnya ekigere, nandimuseemberedde ng'omulangira.

³⁸ “Singa ettaka lyange linkaabirira, n'ebinnya byalyo bye nsimye ne bitotobala n'amaziga;

³⁹ obanga ndiddemu ebibala awatali kusasula, era ne ndeetera bannannyini lyo okufa,

⁴⁰ leka omwennyango gumere mu kifo ky'eŋjaano, n'omuddo oguwunya gumere mu kifo kya sayiri.” Ebigambo bya Yobu byakoma wano.

Yobu 32

Eriku Ayogera

¹ Awo abasajja abo abasatu ne balekeraawo okwogera ne Yobu, kubanga yali yeeraba nga mutuukirivu.

² Naye Eriku, mutabani wa Balakeri Omubuzi, ow'omu kika kya Laamu, n'anyiigira nnyo Yobu olw'okweraba ng'atalina musango, naye n'anenya Katonda.

³ Yanyiigira ne mikwano gye abasatu, kubanga baalemwa okulumiriza Yobu kyokka nga baali bamusingisizza omusango.

⁴ Eriku yali alinzeeko okwogera ne Yobu kubanga banne baali bakulu okumusinga.

⁵ Naye bwe yalaba ng'abasajja bano abasatu tebakyalina kirala kya kwogera, n'anyiiga.

⁶ Awo Eriku mutabani wa Balakeri Omubuzi n'addamu n'ayogera nti, “Nze ndi muto mu myaka, mmwe muli bakulu, kyenavudde ntya okubabuulira kye ndowooza.

⁷ Nalowoozezza nti, Emyaka gye gisaanye okwogera, n'emyaka emingi gye gisaanye okuyigiriza amagezi.

⁸ Kyokka omwoyo oguli mu muntu, nga gwe mukka gw'oyo Ayinzabyonna, gwe guwa omuntu okutegeera.

⁹ Abakadde si be bokka abalina amagezi, wadde abakulu bokka okuba nga be bategeera ekituufu.

¹⁰“Kyenva ηnjamba nti, Mumpulirize, nange mbabuulire kye mmanyi.

¹¹Nassizzaayo omwoyo nga mwogera, nawulirizza ensonga ze mwawadde nga munooanya eby'okwogera.

¹²Nabawulirizza bulungi. Kyokka tewali n'omu ku mmwe yalaze Yobu bw'ali omukyamu; tewali n'omu ku mmwe eyayanukudde ebiambo bye.

¹³Mwegendereze temugamba nti, ‘Tusanze omuntu ow'amagezi; muleke Katonda amuwangule so si bantu.’

¹⁴Kyokka Yobu ebiambo bye tabyolekezza nze, era sijja kumuddamu na bigambo byammwe.

¹⁵“Basobeddwa, tebalina kya kwogera, ebiambo bibaweddeko.

¹⁶Kaakano nsirike busirisi, nga bayimiridde buyimirizi, nga tebalina kye boogera?

¹⁷Nange nnina eky'okwogera, era nnaayogera kye mmanyi,

¹⁸kubanga nzijjudde ebiambo, era omwoyo ogwange gumpaliriza okwogera.

¹⁹Munda mu nze omutima guli nga wayini, asaanikiddwa mu ccupa, ng'amaliba amaggya agalindiridde okwabika.

²⁰Nteekwa okwogera, nsobole okufuna eddembe, nteekwa okwasamya akamwa kange mbeeko kye njogera.

²¹Sijja kubaako gwe nkwatirwa nsonyi, era sijja na kuwaana muntu yenna.

²²Kubanga singa mpaaniriza, Omuronzi wange yandyanguye okunziggyawo.”

Yobu 33

¹“Kaakano ggwe Yobu, wuliriza ebiambo byange: ssaayo omwoyo ku byonna bye njogera.

²Laba nnaatera okwasamya akamwa kange, ebiambo byange bindi ku lulimi.

³Ebigambo byange biva mu mutima omulongoofu; olulimi lwange, mu bwesimbu, lwogera bye mmanyi.

⁴Omwovo wa Katonda ye yankola, era omukka gw'oyo Ayinzabyonna gumpa obulamu.

⁵Onnyanukule nno bw'oba osobola, teekateeka ebiambo byo onjolekere.

⁶Laba, nange ndi ggwe mu maaso ga Katonda. Nange nava mu bbumba.

⁷Tobaako ky'otya, sijja kukunyigiriza.

⁸Ddala ddala oyogedde mpulira, ebigambo byennyini mbiwulidde ng'ogamba nti,

⁹Ndi mulongoofu sirina kibi, siriiko musango so mu nze temuli butali butuukirivu.

¹⁰Kyokka Katonda antekako omusango, anfudde omulabe we.

¹¹Asiba ebigere byange mu nvuba, antwala okuba omulabe we.

¹²"Naye leka nkubuulire, mu kino toli mutuufu. Katonda asinga omuntu.

¹³Lwaki omwemulugunyiza nti, taddamu bigambo bya muntu yenna?

¹⁴Kubanga Katonda ayogerera mu ngeri emu, n'awalala n'ayogerera mu ngeri endala, wadde ng'omuntu tassaayo mwoyo.

¹⁵Mu kirooto mu kwolesebwa ekiro ng'otulo tungi tukutte abantu nga beebase ku bitanda byabwe,

¹⁶aggula amatu g'abantu, n'abalabula n'ebiekango,

¹⁷alyoke akyuse omuntu okumuggyga mu bikolwa ebibi n'amalala,

¹⁸aziyize emmeeme ye okukka mu bunnya, n'obulamu bwe buleme okuzikirira n'ekitala.

¹⁹"Omuntu ayinza okubonerezebw, olumbe ne lumulumira ku kitanda kye, n'alumwa olutatadde mu magumba ge,

²⁰obulamu bwe ne bwetamira ddala emmere, emmeeme ye n'ekyayira ddala ebyassava.

²¹Omubiri gwe gugwako ku magumba, n'amagumba ge ne gafubutukayo gye gaali geekwese,

²²emmeeme ye n'esembera kumpi n'obunnya; obulamu bwe ne bulaga eri abo abaleeta okufa.

²³Singa wabaawo malayika ku ludda lwe, amuwolerez, omu ku lukumi, okubuulira omuntu ekigwanidde;

²⁴yandimukwatiddwa ekisa n'amugamba nti, 'Muwonye aleme kusuulibwa magombe, mmusasulidde omutango,'

²⁵omubiri gwe guzzibwa buggyga ng'ogw'omwana omuwere, era guddayo ne gubeera nga bwe gwali mu nnaku ze ez'obuvubuka.

²⁶Omuntu asaba Katonda, Katonda n'amukwatirwa ekisa. Alaba amaaso ga Katonda n'ajaguza n'essanyu, Katonda n'amuddiza nate ekifo kye eky'obutuukirivu.

²⁷ Awo omuntu n'akomawo eri abantu n'abagamba nti, Nayonoona, ne nkola ekyo ekitaali kirungi, naye ne sibonerezebwa nga bwe kyali kinjwanidde.

²⁸ Yanunula emmeeme yange n'amponya okukka mu bunnya; kyenaava mbeera omulamu ne nsigala nga mpoomerwa ekitangaala.

²⁹ "Bw'atyo Katonda bw'akola omuntu emirundi ebiri oba esatu,

³⁰ okuzza emmeeme ye ng'agiggya emagombe, ekitangaala eky'obulamu kimwakire.

³¹ "Yobu, weetegereze nnyo, ompulirize; siriikirira nkubuulire.

³² Bw'oba ng'olina eky'okwogera kyonna, nziraamu; yogera kubanga njagala wejejerere.

³³ Bwe kitaba kityo, mpuliriza; sirika nange nnaakuyigiriza amagezi."

Yobu 34

¹ Awo Eriku ne yeeyongera okwogera nti,

² "Muwulire ebigambo byange, mmwe abasajja ab'amagezi; mumpulirize mmwe abayivu.

³ Kubanga okutu kugezesha ebigambo ng'olulimi bwe lugezesha emmere.

⁴ Leka twesalirewo ekituufu; muleke tulondewo ekisaanidde.

⁵ "Yobu agamba nti, 'Siriiko musango, naye Katonda agaanye okusala omusango gwange mu mazima.

⁶ Wadde nga ndi mutuufu, ntwalibwa okuba omulimba, wadde nga siriiko musango, akasaale ke kanteseko ekiwundu ekitawonyezeka.'

⁷ Musajja ki ali nga Yobu, anywa okunyoomebwa ng'anywa amazzi?

⁸ Atambula n'abakozi b'ebibi, mukwano gw'abo abakola ebitali bya butuukirivu.

⁹ Kubanga agambye nti, 'Omuntu talina kyaganyulwa bw'agezaako okusanyusa Katonda.'

¹⁰ Noolwekyo mumpulirize mmwe abasajja abalina okutegeera. Kikafuuwe Katonda okukola ebibi, wadde Ayinzabyonna okukola ebikyamu.

¹¹ Asasula omuntu olw'ekyo ky'aba akoze; n'amutuusaako ebyo ebimusaanidde olw'empisa ze.

¹² Weewaawo amazima gali nti, Katonda tasobia. Ayinzabyonna tasaliriza musango.

¹³ Obuyinza yabuggyga eri ani okukulembera ensi? Ani eyamuwa olukusa okufuga ensi yonna?

¹⁴ Singa asalawo n'atwala omwoyo gw'omuntu awamu n'omukka gwe,

¹⁵ abantu bonna bandizikiriridde wamu, era omuntu yandizzeeyo mu nfuufu.

¹⁶ "Bw'oba olina okutegeera, wuliriza kino; wuliriza kye njamba.

¹⁷ Oyo atayagala bwenkanya asobola okufuga? Onosalira abatuukirivu n'oyo ow'amaanyi omusango?

¹⁸ Oyo si ye agamba bakabaka nti, 'Tolina mugaso,' n'abakungu nti, 'Oli mukozi wa bibi,'

¹⁹ atattira balangira ku liiso era nga tafa ku bagagga kusinga bw'afa ku baavu, kubanga egyo gye mirimu gy'emikono gye?

²⁰ Mu kaseera buseera baba bafiiridde wakati mu ttumbi. Abantu banyeenezebwawa ne baggyibwawo. Abo ab'amaanyi batwalibwa n'omukono ogutali gw'abantu.

²¹ "Amaaso ge gatunuulira amakubo g'abantu; atunuulira buli kigere kye batambula.

²² Teri kifo kikwafu wadde ekisiikirize eky'amaanyi, ababi gye bayinza okwekweka.

²³ Katonda teyeetaaga kwongera kwekebejja bantu okulabika mu maaso ge okusalirwa omusango.

²⁴ Awatali kwebuuza ku muntu yenna, amenyaamenya ab'amaanyi n'ateekawo abalala mu kifo kyabwe.

²⁵ Olw'okubanga amanyi ebikolwa byabwe, abamalamu amaanyi ekiro ne babetentebwa.

²⁶ Ababonereza olw'ebikolwa byabwe ebibi abantu bonna nga balaba,

²⁷ kubanga baamuvaako ne balekeraawo okumugoberera ne bataddayo kufaayo n'akatono ku makubo ge gonna.

²⁸ Baleetera abaavu okukaaba, ne kumutuukako era n'awulira okukaaba kw'abanyigirizibwa.

²⁹ Naye bw'asalawo obutabaako ky'ayogera, ani ayinza okumunenya? Bwakweka amaso ge ani ayinza okumulaba? Eggwanga n'omuntu abalinako obuyinza bwe bumu;

³⁰ aziyiza omuntu atatya Katonda okufuga, aleme okutega abantu emitego.

³¹ "Singa omuntu agamba Katonda nti, gunsinze, sikuaddayo kwonoona,

- ³² kye sitegeera kinjigirize, bwe mba nga nsobezza sikuaddayo kukikola,
- ³³ olwo Katonda akuddemu nga bw'oyagala, akuleke ng'ogaanye okwenenya? Kaakano ggwe olina okusalawo, so sinze; noolwekyo mbuulira ggwe ky'omanyi.
- ³⁴“Abantu abalina okutegeera mumbuulire, abasajja abagezi abawulira muntegeeeze,
- ³⁵ ‘Yobu ayogeba butamanya ebigambo bye tebiriimu kwolesebwa.’
- ³⁶ Singa Yobu agezesebbwa okutuusa ku nkomerero, olw'okwogera ng'abasajja abakozi b'ebibi!
- ³⁷ Kubanga ku kibi kye ayongeddeko obujeemu, n'akuba mu ngalo wakati mu ffe, n'ayongera okwogera ng'awakanya Katonda.”

Yobu 35

- ¹ Eriku n'ayongera okwogera nti,
- ² “Olowooza kiba kituufu ggwe okugamba nti, Katonda ananziggyako omusango. Oyogera nti, obutuukirivu bwange businga obwa Katonda.
- ³ Ate obuuza nti, ‘Nganyulwa ntya?’ Kirungi ki kye nfunu mu kwonoona kwange?
- ⁴ “Nandyagadde okukuddamu ne mikwano gyo egoy gy'oli nagyo.
- ⁵ Tunula eri eggulu olabe; tunuulira ebire, ebiri waggulu ennyo okukusinga.
- ⁶ Singa oyonoona ekyo kimukwatako kitya? Ebyonoono byo bwe byeyongera, ekyo kimukolako ki?
- ⁷ Bw'oba omutuukirivu, kiki ky'oba omuwadde, oba kiki ky'aba afunye okuva mu ngalo zo?
- ⁸ Okwonoona kwo kukosa muntu nga ggwe, era n'obutuukirivu bwo bukwata ku baana b'abantu.
- ⁹ Abantu bakaaba olw'okunyigirizibwa okw'amaanyi, balaajaanira ab'omukono ogw'amaanyi.
- ¹⁰ Naye tewali n'omu agamba nti, Aluwa MUKAMA Omuronzi wange atuwa ennyimba ekiro,
- ¹¹ atuyigiriza ebingi okusinga ensolo ez'omu nsiko, era n'atufuula bagezi okusinga ebinyonyi eby'omu nsiko?
- ¹² Newaakubadde nga bakaaba, tayinza kuwlira n'addamu kukaaba kw'abasajja ab'amalala abakozi b'ebibi.
- ¹³ Ddala ddala Katonda tawuliriza kukoowoola kwabwe okwo okutaliimu; Ayinzabyonna takufaako.

¹⁴ Kale kiba kitya bw'ogamba nti tomulaba, era nti, Omusango gwo guli mu maaso ge era oteekwa okumulindirira;

¹⁵ oba nti, ne bw'asunguwala tabonereza era tafaayo nnyo ku butali butuukirivu.

¹⁶ Kale nno Yobu ayasamya akamwa ke okwogera ebitaliimu; obutamanya bumwogeza ebigambo olukunkumuli.”

Yobu 36

¹Eriku ne yeeyongera okwogera nti,

²“Yongera okujjumiikirizaako katono nkulage, nkyalina bye nnina okwogera ebifa ku Katonda.

³ Amagezi ge nnina gava wala, era mmanyi nga Omuronzi wange alamula mu bwenkanya.

⁴ Eky'amazima ebigambo byange si bikyamu, oyo akakasa by'amanyi y'ayogera naawe.

⁵ “Laba, Katonda wa buyinza, tanyooma bantu; w'amaanyi, anywerera ku bigendererwa bye.

⁶ Talamya bakozi ba bibi, era awa ababonyaabonyezebwa ebibasaanira.

⁷ Taggya maaso ge ku batuukirivu, abatuuza ku ntebe ey'obwakabaka n'abagulumiza emirembe n'emirembe.

⁸ Naye abantu bwe baba basibiddwa enjegere nga banywezeddwa n'emiguwa eg'yokulumwa

⁹ n'abategeeza ensobi zaabwe, n'okwonoona kwabwe, nti, beewaggudde,

¹⁰ aggula amatu gaabwe bawulirize okunenyezezbwa n'abalagira beenenye ekibi kyabwe.

¹¹ Bwe bamugondera ne bamuweereza, ennaku zaabwe zonna balizimala mu kwesiima, era n'emyaka gyabwe mu kusanyuka.

¹² Naye bwe batamugondera, baalizikirizibwa n'ekitala, bafe nga tebalina magezi.

¹³ “Ab'emitima egitatya Katonda baba n'obukyayi. Ne bw'abasiba, tebamukaabirira abasumulule.

¹⁴ Bafiira mu buvubuka bwabwe era obulamu bwabwe buzikiririra mu basajja abenzi.

¹⁵ Anunula anyigirizibwa mu kubonaabona kwe, n'aggula okutu kwe mu kujoogebwa kwe.

¹⁶ “Akusendasenda okukuggya mu kamwa k’okubonaabona, akuteeke mu kifo ekigazi ekitaliimu kuziyizibwa, omanye emirembe gy’emeeza yo ejjudde emmere ennungi.

¹⁷ Naye kaakano weetisse omugugu ogw’okusalirwa omusango abakozi b’ebibi gwe basaanira; okusalirwa omusango n’obwenkanya byakunyweza.

¹⁸ Weegendereze oleme kukkiriza kusendebwasendebwa; obunene bw’enguzi buleme okukukyamyam.

¹⁹ Obugagga bwo oba okufuba kwo kwonna binaakuyamba okukuggya mu buyinike?

²⁰ Teweegomba budde bwa kiro olyoke ovalule abantu okuva mu bifo byabwe.

²¹ Weegendereze oleme kukola bitali bya butuukirivu, by’osinga okwagala okukira okubonyaabonyezebwa.

²² “Laba Katonda yagulumira mu maanyi ge; ani ayigiriza nga ye?

²³ Ani eyali amukubidde amakubo, oba okumugamba nti, ‘Ky’okoze si kituufu?’

²⁴ Jjukira ng’oteekwa okugulumizanga emirimu gye, abantu gye bayimba mu nnyimba.

²⁵ Abantu bona baagiraba, omuntu agirengerera wala.

²⁶ Laba, Katonda agulumizibwe! Assukiridde okutegeera kwaffe; obungi bw’emyaka gye tebunoonyezeka.

²⁷ “Kubanga akuŋjaanya amatondo g’amazzi, agafuuka enkuba etonnya mu bugga;

²⁸ ebire bivaamu amazzi gaabyo, enkuba n’ekuba abantu.

²⁹ Ani ayinza okutegeera engeri gy’asaasaanyamu ebire, okubwatuka okuva ku kituuti kye?

³⁰ Laba, asaasaanya okumyansa kw’eggulu, era n’abikka obuziba bw’ennyanya.

³¹ Eyo y’engeri gy’afugamu amawanga, n’agawa emmere mu bungi.

³² Emikono gye agijjuza eraddu, n’agiragira ekube ebifo bye yeerondeddemu.

³³ Okubwatuka kwayo kulangirira kibuyaga ajja, n’ente ne zirangirira okujja kwayo.”

Yobu 37

¹ “Kino kikankanya omutima gwange, ne gubuuka okuva mu kifo kyagwo.

² Wuliriza okubwatuka kw’eddoboozi lye, n’okuwuluguma okuva mu kamwa ke.

³Asumulula eggulu ne limyansa wansi w'eggulu wonna, n'aliragira ligende ku nkomerero y'ensi.

⁴Kino oluggwa, okuwuluguma kw'eddoboozi lye kwe kuddako, abwatuka n'eddoboozi lye ery'omwanguka, era eddoboozi lye bwe liwulirwa, tewabaawo kisigala nga bwe kibadde.

⁵Eddoboozi lya Katonda libwatuka mu ngeri ey'ekitalo; akola ebintu ebikulu ebisukka okutegeera kwaffe.

⁶Agamba omuzira nti, 'Ggwa ku nsi,' ate eri enkuba etonnya nti, 'Ttonnya nnyo.'

⁷Emirimu gya buli muntu giyimirira, buli omu n'alyoka amanya amaanyi ga Katonda.

⁸Ensolo ne ziryoka zessogga empuku zaazo, ne zigenda zeekukuma.

⁹Omuyaga ne gulyoka guva mu nnyumba yaagwo, n'obunnyogovu ne buva mu mpewo ekuñjunta.

¹⁰Omuzira ne guva mu mukka gwa Katonda n'amazzi amangi ne gekwata kitole.

¹¹Ebire abijuza amatondo g'amazzi, n'asaasaanya okumyansa kw'eggulu.

¹²Byetooloolatooloola nga y'abiragira, ne bituukiriza byonna by'abiragira, ku nsi yonna okubeera abantu.

¹³Bwe kuba kubonereza, oba okufukirira ensi oba okulaga okwagala kwe, atonnyesa enkuba.

¹⁴"Wuliriza kino Yobu; sooka oyimirire olowooze ku bikolwa bya Katonda eby'ettendo.

¹⁵Omanyi Katonda engeri gy'alagiramu ebire, n'aleetera eggulu okumyansa?

¹⁶Omanyi engeri ebire gye bituulamu mu bbanga, amakula g'emirimu gy'oyo eyatuukirira mu kumanya?

¹⁷Gwe alina ebyambalo ebibuguma, ensi bw'eba ng'ekkakkanyizibba embuyaga ez'obukiikaddyo,

¹⁸oyinza okumwegattako ne mubamba eggulu, eryaguma ne libeera ng'endabirwamu ensanuuse?

¹⁹"Tubuulire kye tunaamugamba; tetusobola kuwoza nsonga zaffe gy'ali olw'ekizikiza kye tulimu.

²⁰Asaanidde okubuulirwa kye njagala okwogera? Eriyo omuntu yenna ayinza okusaba okumalibwawo?

²¹Kaakano tewali n'omu ayinza kutunula mu njuba, olw'engeri gy'eyakamu ku ggulu, ng'empewo emaze okuyita, n'eyelula ebire.

²²Mu bukiakkono evaayo zaabu; Katonda ajja mu kitibwa eky'amaanyi.

²³Ayinzabyonna tatuukikako era agulumidde mu maanyi, mu bwenkanya bwe era ne butuukirivu bwe, tawaliriza muntu yenna.

²⁴Noolwekyo abantu bamutya, takitwala ng'ekikulu olw'abo abeerowooza okuba abagezi mu mitima gyabwe."

Yobu 38

MUKAMA Ayogera

¹ MUKAMA n'addamu Yobu ng'ayita mu muyaga, n'ayogera nti,

²"Ani ono aleeta ekizikiza ku kuteesa kwange, n'ebigambo ebitaliimu magezi?

³Yambala ebyambalo byo ng'omusajja, mbeeko bye nkubuuza naawe onziremu.

⁴"Wali ludda wa nga nteekawo emisingi gy'ensi? Mbuulira bw'oba otegeera.

⁵Ani eyasalawo ebipimo byayo? Ddala otekwa okuba ng'omanyi! Oba ani eyagipima n'olukoba?

⁶Entobo zaayo zaateekebwa ku ki?

⁷Emunyeeny e'oku makya bwe zaali ziyimba, era n'abaana ba Katonda bonna nga baleekaana olw'essanyu,

⁸ani eyasiba enzigi n'aggalira ennyanja, bwe yava mu lubuto lwayo?

⁹"Bwe nakolera ebire ekyambalo kyabyo, ne mbisibira mu kizikiza ekikwafu,

¹⁰bwe n'abiteekerawo we bikoma ne mbiteerako emitayimbwa n'enzigi,

¹¹bwe nagamba nti, Wano we mutuuse we munaakoma temujja kweyongerayo, era wano amayengo gammwe ag'amalala we ganaakoma?

¹²"Oba wali olagidde ku budde okukya kasookedde obaawo ku nsi, oba emmambya okugiraga ekifo kyayo,

¹³eryoke ekwate ensi w'ekoma eginyeeny esuule eri ababi bagiveeko bagwe eri?

¹⁴Ensi eggayao ebyafaayo byayo n'eba ng'ebbumba wansi w'akabonero, ebyafaayo ebyo ne byefaananyiriza olugoye.

¹⁵Abakozi b'ebibi bammibwa ekitangaala kyabwe, n'omukono gwabwe gwe bayimusa gumenyebw.

¹⁶"Wali otuuseeko ku nsulo ennyanja w'esibuka, oba n'olaga mu buziba bw'ennyanja?

- ¹⁷ Wali obikuliddwa enzigi z'emagombe? Oba wali olabye enzigi z'ekisiikirize ky'okufa?
- ¹⁸ Wali otegedde obugazi bw'ensi? Byogere, oba bino byonna obimanyi.
- ¹⁹ "Ekkubo eridda mu nnyumba omusana gye gusula liri ludda wa? N'ekifo ekizikiza gye kisula kye kiruwa?
- ²⁰ Ddala, osobola okubitwala gye bibeera? Omanyi ekkubo erigenda gye bisula?
- ²¹ Ddala otekwa okuba ng'obimanyi, kubanga wali wazaalibwa dda!
- ²² "Wali oyengidde amazzi agakwata mu butiti, gye gaterekewa, oba wali olabye omuzira gye guterekewa?
- ²³ Bye nterekera ebiseera eby'emitawaana, bikozesebwe mu nnaku ez'entalo n'okulwana?
- ²⁴ Kkubo ki erituusa ekitangaala ky'omusana gye kisaasaanira, oba empewo ey'ebuvanjuba gy'esaasaanira ku nsi?
- ²⁵ Ani akubira amataba emikutu mwe ganaayita, oba ekkubo eggulu eribwatuka mwe liyita?
- ²⁶ Ani atonnyesa enkuba mu nsi abantu mwe batabeera, eddungu omutali muntu yenna,
- ²⁷ n'okufukirira ettaka eryalekebw awo, eryazika, n'okulimezaako omuddo?
- ²⁸ Enkuba erina kitaawe waayo? Ani azaala amatondo ag'omusulo?
- ²⁹ Omuzira guva mu lubuto lw'ani? Ani azaala obutiti obukwafu obw'omu ggulu,
- ³⁰ amazzi mwe gakwatira ne gakaluba ng'amayinja, ne kungulu kw'obuziba ne kukwata?
- ³¹ "Oyinza okuziyiza okwakaayakana kwa Kakaaga, oba okutaggulula enkoba za Ntungalugoye?
- ³² Oyinza okufulumya emunyeeny eiveeyo zaake ng'ekiseera kyazo kituuse, oba okulujjamya eddubu n'abaana balyo?
- ³³ Omanyi amateeka n'obufuzi bw'eggulu? Oyinza okuteekawo obufuzi bw'alyo oba obwa Katonda ku nsi?
- ³⁴ "Oyinza okuyimusa eddoboozi lyo olekaanire ebire, olyoke obiggyemu amataba gakubikke?
- ³⁵ Ggwe otuma eggulu limyanse era libwatuke? Lisobola okukwelianjulira nti, 'Tuutuno tuli wano'?

³⁶ Ani eyateeka amagezi mu mutima gw'omuntu, oba eyateeka okutegeera mu mmeeme?

³⁷ Ani alina amagezi agabala ebire? Ani ayinza okuwunzika ebibya by'amazzi eby'omu ggulu,

³⁸ enfuufu ng'efuuse ettaka ekkalu, era amafunfugu ne geegattira ddala?

³⁹ "Empologoma enkazi, oyinza okugiyiggira ky'eneerya, oba okuliisa empologoma n'ozimalako enjala,

⁴⁰ bwe zeezinga mu mpuku zaazo, oba bwe zigalamira nga ziteeze mu bisaka?

⁴¹ Ani awa namujjona emmere, abaana baayo bwe bakaabirira Katonda, nga batambulatambula nga babuliddwa emmere?"

Yobu 39

¹ "Omanyi ebiro embuzi z'oku nsozi mwe zizaalira? Oba oyinza okumanya empeewo we ziwakira?

² Oyinza okubala emyezi gye zimala zizaale? Omanyi obudde mwe zizaalira?

³ Zikutama ne zizaala abaana baazo, ne ziwona obulumi bw'okuzaala.

⁴ Abaana baazo bakula ne bagejjeru ku ttale, batambula ne bagenda obutadda.

⁵ "Ani eyaleka entulege okwetambulira mu ddembe lyayo? Ani eyasumulula emiguwa gyayo,

⁶ gye nawa ensi ey'omuddo okuba amaka gaayo, n'ensi ey'omunnyo okubeerangamu?

⁷ Esekerera oluyoogaano lw'ekibuga, tewuliriza kulekaana kw'abavuzi ba bidduka.

⁸ Ebuna ensozi, ly'eddndiro lyayo, ng'enoonya ekintu kyonna ekibisi.

⁹ "Embogo eyinza okukkiriza okuba omuweereza wo, n'esula ekiro mu kisibo kyo?

¹⁰ Oyinza okugisiba ku muguwa n'ogirimisa olubimbi? Eyinza okukuvaako emabega ng'erima mu kiwonvu.

¹¹ Oyinza okugyesiga olw'amaanyi gaayo amangi? Oyinza okugirekera emirimu gyo egy'amaanyi?

¹² Oyinza okugyesiga okukuleetera emmere yo ey'empeke, oba okukuleetera ejjaano mu gguuliro lyo?

¹³ "Ebiwaawaatiro bya maaya bisanyusa nga byewujja, naye ebiwaawaatiro n'ebyoya bya kalooli tebiraga kisa.

¹⁴Kubanga emaaya ebiika amagi gaayo ku ttaka, n'egaleka ne gabugumira mu musenyu,

¹⁵ne yeerabira nti, ekigere kisobola okugaasa, era nga ensolo ey'omu nsiko eyinza okugalinnya.

¹⁶Obwana bwayo ebuyisa bubi ng'obutali bwayo gy'obeera nti, yazaalira bwereere.

¹⁷Kubanga Katonda teyagiwa magezi wadde okutegeera.

¹⁸Ate bw'eyanjuluza ebiwaawaatiro byayo edduke esoomooza embalaasi n'omugoba waayo.

¹⁹"Embalaasi ggwe ogiwa amaanyi, oba ggwe oyambaza ensingo yaayo obwoya obwewumba?

²⁰Ggwe ogisobozesa okubuuka ng'enzige n'ekanga n'okukaaba kwayo okw'entiisa?

²¹Etakula ettaka mu kiwonvu, nga yeeyagala olw'amaanyi gaayo, n'eryoka efuluma okusisinkana abalwanyi abakutte ebyokulwanyisa.

²²Esekerera okutya, n'eteba na kigitisa. Ekitala tekigitisa kugizza mabega.

²³Omufuko ogujjudde obusaale gwesuukundira ku lubuto lwayo, awamu n'effumu erimasamasa, n'akasaale.

²⁴Mu busungu obungi emira ettaka, tesobola kusigala mu kifo kimu ng'ekkondeere livuze.

²⁵Ekkondeere bwe livuga n'egamba nti, 'Awo!' N'ewunyiriza olutalo olukyali ewala, n'ewulira n'okuleekaana kwa baduumizi b'amaggye.

²⁶"Amagezi go ge gabuusa kamunye, n'ayanjuluza ebiwaawaatiro bye e bukiikaddyo?

²⁷Ggwe olagira empungu okubuukira ewala mu bbanga, era n'ezimba n'ekisu kyayo waggulu ennyo?

²⁸Ku lwazi kw'ezimba amaka gaayo ekiro n'esula okwo, ku lwazi olunywevu olutabetentebwa.

²⁹Eyo gy'ekettera omuyiggo gw'eneerya, eriiso lyayo ligulengerera wala.

³⁰Obwana bwayo bunywa omusaayi, era awali emirambo w'ebeera."

Yobu 40

¹Awo MUKAMA n'agamba Yobu nti,

²“Oyo anoonya okuyombera eitaliimu anaayombesa Ayinzabyonna? Oyo aleeta empaka ku Katonda, amuddemu.”

³Awo Yobu n'addamu MUKAMA nti,

⁴“Laba, sisaanidde, kiki kye nnaakuddamu? Emimwa kangibikkeko n'engalo.

⁵ Njogedde omulundi gumu, so siddemu; weewaawo emirundi ebiri sseeyongere mulundi mulala.”

⁶ Awo MUKAMA ng'ali mu tuyaga ogw'amaanyi n'addamu Yobu nti,

⁷ “Weesibe engoye zo onywere ng'omusajja. Ka nkubuuze, naawe onziremu.

⁸ “Onojjulula ensala yange ey'emisango; ononsingisa omusango ggwe atuukiridde?

⁹ Olina omukono ng'ogwa Katonda, eddoboozi lyo lisobola okubwatuka ng'erirye?

¹⁰ Kale nno yambala ekitiibwa n'obukulu weesibe ekitiibwa n'okusukkuluma osukkulume.

¹¹ Yolesa obusungu bw'ekiruyi kyo otunuulire buli wa malala omusse wansi.

¹² Tunuulira buli musajja ow'amalala omukkakkanye era olinnyirire abakozi b'ebibi obabetentere we bali.

¹³ Bonna baziikire wamu mu nfuufu, emitwe gyabwe ogibikkire mu ntaana.

¹⁴ Nange kennyni ndyoke nzikirize, ng'omukono gwo ogwa ddyo, gusobola okukuwa amaanyi.”

Amaanyi g'envubu

¹⁵ Laba ekisolo ekyefaananyiriza ng'envubu kye natonda nga ggwe, erya omuddo ng'ente,

¹⁶ nga kirina amaanyi mayitirivu mu kiwato kyakyo amaanyi mangi mu binywa by'olubuto lwakyo.

¹⁷ Kiwuuba omukira gwakyo ne guba ng'omukira gw'omuvule Ebinywa by'ebisambi byakyo byakwatagana nnyo.

¹⁸ Amagumba gaakyo gali ng'enseke ez'ebikomo; amagulu n'emikono ng'emitayimbwa.

¹⁹ Kibalibwa mu bitonde bya Katonda ebisooka, ate nga Katonda eyakitonda asobola okukisemberera n'ekitala kye.

²⁰ Weewaawo ensozi zikireetera emmere, eyo ku nsozi, ensolo ez'omu nsiko zonna gye zizannyira.

²¹Wansi w'ebisiikirize by'emiti egy'amaggwa, we kyebaka, ne kyekweka mu bitoogo ne mu bitosi.

²²Ebisiikirize by'emiti bikibikkako, emitii egiri ku mabbali g'omugga ne gikibikkako.

²³Laba omugga ne bwe gusiikuuka tekyekanga; kiba kinywevu, Yoludaani ne bwajjula n'abooga.

²⁴Eriyo omuntu yenna ayinza okukikwata, oba okuyuza ennyindo yaakyo n'akasaale?"

Yobu 41

Amaanyi ga Lukwata

¹"Oyinza okusikayo lukwata n'eddobo, oba okusiba olulimi lwayo n'omuguwa?

²Oyinza okuyingiza omuguwa mu nnyindo zaayo, oba okuwummula oluba lwayo n'eddobo?

³Eneekwegayirira ng'ekusaba nti, ogikwatirwe ekisa? Eneeyogera naawe mu bigambo ebigonvu?

⁴Eneekola naawe endagaano ogitwale ekuweereze obulamu bwayo bwonna?

⁵Onoozannya nayo nga bw'ozannya n'akanyonyi, oba okugisiba n'olukoba ng'agisibira bawala bo?

⁶Abasuubuzi banaagiramuza, oba banaagibala ng'ekyamaguzi?

⁷Oyinza okuvuba eddiba lyayo n'olijuza amalobo, oba omutwe okugufumita n'amafumu agafumita ebyennyanja?

⁸Bw'oligissaako engalo zo ekirivaamu tolikyerabira, toliddayo kukikola!

⁹Essuubi lyonna ery'okugiwangula ffu, okugirabako obulabi kimalamu amaanyi.

¹⁰Teri n'omu mukambwe nnyo asobola kugyanjanga. Kale, ani oyo asobola okuyimirira mu maaso gange?

¹¹Ani alina kye yali ampoze musasule? Byonna ebiri wansi w'eggulu byange.

¹²"Ku bikwata ku mikono n'ebigere byayo siisirike, amaanyi gaayo n'ekikula kyayo bya ssimbo.

¹³Ani ayinza okugiggyako eddiba lyayo ery'oku ngulu? Ani ayinza okuyuza ekizibaawo kyayo eky'amaliba abiri?

¹⁴Ani ayinza okuggula enzigi z'akamwa kaayo? Amannyo gaayo geetooloddwa entiisa.

¹⁵Omugongo gwe gujjudde enkalala z'engabo ezisibiddwa okumukumu.

- ¹⁶Zonna zisibaganye nga tewali mpewo weeyita.
- ¹⁷Zakwatagana, ziri ku zinnaazo era tezisobola kwawulibwa.
- ¹⁸Bw'eyasimula, ebimyanso bijja, n'amaaso gaayo gali nga enjuba ng'egwa.
- ¹⁹Mu kamwa kaayo muvaamu ebiriro ebyaka. Kavaamu ensasi ez'omuliro.
- ²⁰Mu nnyindo zaayo muvaamu omukka ng'ogwentamu eyeesera eri ku muliro ogw'emmuli ezaaka.
- ²¹Omukka oguva mu nnyindo zaayo gukoleeza Amanda.
- ²²Mu nsingo yaayo mulimu amaanyi, n'entiisa eri mu maaso gaayo.
- ²³Emiwula gy'ennyama yaayo gyegasse; gikutte nnyo era tegisobola kwenyeenya.
- ²⁴Ekifuba kyayo kigumu ng'olwazi, kigumu ng'olubengo.
- ²⁵Bwesituka ab'amaanyi batya. Badduka olw'okubwatuka kwayo.
- ²⁶Ekitala bwe kigituukako tekirina kye kiyinza kumukolako, oba ffumu, oba omuwunda wadde akasaale akasongovu.
- ²⁷Emenza ebyuma gy'obeera nti ekutulakutula bisasiro, ebyo ebikomo ebimenyaamenya ng'emiti emivundu.
- ²⁸Akasaale tekayinza kugiddusa, amayinja ag'envumuulo gaba nga biti gy'eri.
- ²⁹Embukuuli nayo eri ng'ebisusunku gy'eri. Esekerera amafumu agakasukibwa.
- ³⁰Amagalagamba g'oku lubuto lwayo gali ng'engyo z'ensuwa. Bwe yeekulula mu bitosi ebeera ng'ekyuma ekiwuula.
- ³¹Ereetera obuziba bw'ennyanja okuba ng'entamu eyeesera. Ennyanja n'eba ng'entamu y'omuzigo ogufumbibwa.
- ³²Mu mazzi mw'eyise, erekamu ekkubo ery'amayengo ameeru; ne kireeta n'ekirowoozo nti obuziba bulina envi.
- ³³Tewali kigyenkana ku nsi; ekitonde ekitatya.
- ³⁴Enyooma buli kisolo. Ye kabaka w'abo bona ab'amalala."

Yobu 42

Yobu Yeenenya nga Yeeyiyeeko Enfuufu ne Vvu

¹Awo Yobu n'addamu MUKAMA nti,

²"Mmanyi ng'oyinza okukola ebintu byonna, era tewali kyotegeka kyonna kiyinza kuziyizibwa.

³ Wabuuza nti, ‘Ani ono aziyiza okuteesa kwange atalina magezi?’ Mazima ddala nayogera ebintu bye sitegeera, ebintu ebyassukirira okutegeera kwange.

⁴ “Wulira nkwegayiridde, nange mbeeko kye nkubuuza, onziremu.

⁵ Amatu gange gaali gaakuwulirako dda, naye kaakano amaaso gange gakulabye.

⁶ Kyenvudde neenyooma era neenenyezza mu nfuufu ne mu vvu.”

⁷ Nga MUKAMA amaze okwogera ebigambo bino eri Yobu, n’agamba Erifaazi Omutemani nti, “Nkunyiigide ggwe ne mikwano gyo ababiri; kubanga temwanjogerako bituufu, ng’omuddu wange Yobu bw’akoze.

⁸ Noolwekyo kaakano mutwale ente ennume musanvu, n’endiga ennume musanvu, mugende eri omuddu wange Yobu, mweweereyo eyo ekiweebwayo ekyokebwa, n’omuddu wange Yobu ajja kubasabira, kubanga nzija kukkiriza okusaba kwe nneme okubakolako ng’obusirusiru bwammwe bwe buli. Kubanga temwanjogerako bituufu ng’omuddu wange bw’akoze.”

⁹ Awo Erifaazi Omutemani, ne Birudaadi Omusuki, ne Zofali Omunaamasi ne bagenda ne bakola nga MUKAMA bwe yabalagira. Awo MUKAMA n’akkiriza okusaba kwa Yobu.

¹⁰ Awo MUKAMA n’aggyawo ennaku ya Yobu bwe yamala okusabira mikwano gye. MUKAMA n’awa Yobu ebintu emirundi ebiri okusinga bye yalina okusooka.

¹¹ Awo baganda be bona ne bannyina bona ne bajja n’abo abaali bamumanyi okusooka, ne balya naye emmere mu nnyumba ye; ne bamusaasira ne bamukulisa okubonaabona kwonna MUKAMA kwe yakkiriza okumutuukako. Buli omu ku bo n’amuwaayo ffeeza nga bwe yasobola, n’empeta ya zaabu.

¹² Awo MUKAMA n’awa Yobu omukisa mu nnaku ze ezaasembayo n’okusinga entandikwa ye bwe yali: yafuna endiga omutwalo gumu mu enkumi nnya, n’ejnjamira kakaaga, ne ziseddume z’ente lukumi, n’endogoyi enkazi lukumi.

¹³ Era MUKAMA n’amuwa n’abaana aboobulenzi musanvu, n’aboobuwala basatu.

¹⁴ Omuwala ow’olubereberye n’amutuumma Yemima, n’owokubiri n’amutuumma Keeziya, n’owookusatu n’amutuumma Keremukappuki, n’aboobulezi musanvu.

¹⁵ Awo mu nsi yonna ne wataba bakazi balungi kwenkana bawala ba Yobu. Kitaabwe n’abawa omugabo ogw’ebintu ogwenkanankana ne gwe yawa bannyinaabwe abalenzi.

¹⁶ Oluvannyuma lw’ebyo, Yobu n’awangaala emyaka kikumi mu ana; n’alaba ku baana be ne ku bazzukulu be okutuuka ku bannakasatwe.

¹⁷ N’oluvannyuma n’afa ng’akaddiyidde ddala ng’awezezza emyaka mingi.

Zabbuli

Zabbuli 1

EKITABO I

Zabbuli 1–41

- ¹ Alina omukisa omuntu atatambulira mu kuteesa kw'ababi, era atayimirira mu kibiina ky'ababi, newaakubadde okutuula n'abo abanyooma ebya Katonda.
- ² Naye asanyukira okugondera amateeka ga MUKAMA, era mu mateeka ago mw'alowoooleza emisana n'ekiro.
- ³ Afaanana ng'omuti ogwasimbibwa ku mabbali g'omugga, ogubala ebibala byagwo mu ntuuko zaabyo, n'ebikoola byagwo tebiwotoka. Na buli ky'akola kivaamu birungi byereere.
- ⁴ Naye abakola ebibi tebakola bwe batyo. Bali ng'ebisusunku ebifuumuuliddwa.
- ⁵ Noolwekyo abakola ebibi tebaligumira lunaku lwa kusalirako musango; newaakubadde aboonoonyi okuyimirira mu kibiina ky'abatuukirivu.
- ⁶ Kubanga MUKAMA alabirira ekkubo ly'abatuukirivu, naye ekkubo ly'abakola ebibi liribula.

Zabbuli 2

- ¹ Lwaki amawanga geegugunga n'abantu ne bateganira obwerefere okusala enkwe?
- ² Bakabaka ab'ensi bakunjaanye, n'abafuzi ne bateeseza wamu ku MUKAMA ne ku Kristo we, nga bagamba nti,
- ³ “Ka tukutule enjegere zaabwe, era tweyambulemu ekikoligo kyabwe.”
- ⁴ Naye Katonda oyo atuula mu ggulu, abasekerera busekerezi, n'enkwe zaabwe ezitaliumu zimusesa.
- ⁵ N'alyoka abanenya ng'ajjudde obusungu, n'abatiisa nnyo ng'aswakidde.
- ⁶ N'abagamba nti, “Ddala ddala nateekawo kabaka owange ku lusozi lwange Sayuuni olutukuvu.”
- ⁷ Nzija kulangirira ekiragiro kya MUKAMA: kubanga yanjamba nti, “Ggwe oli Mwana wange, olwa leero nfuuse kitaawo.
- ⁸ Nsaba, nange ndikuwa amawanga gonna okuba obusika bwo, era n'ensi yonna gy'ekoma okuba amatwale go.
- ⁹ Olibafugisa omuggo ogw'ekyuma, era olibabetenta ng'entamu y'omubumbi.”

¹⁰Kale nno mubeere n'amagezi mmwe bakabaka; muyige okulabulwa mmwe abafuzi b'ensi.

¹¹Muweereze MUKAMA nga mumutya, era musanyuke n'okukankana.

¹²Mwanirize Omwana, mumusembeze MUKAMA aleme okubasunguwalira n'okubazikiriza nga muli mu kkubo lyammwe; kubanga obusungu bwe bubuubuuka mangu. Kyokka bona abaddukira gy'ali balina omukisa.

Zabbuli 3

Zabbuli ya Dawudi bwe yadduka mutabani we Abusaalomu.

¹Ayi MUKAMA, abalabe bange nga beeyongedde obungi! Abanfubutukiddeko okunnumba nga bangi!

²Bangi abanjogerako nti, "Katonda tagenda kumununula."

³Naye ggwe, Ayi MUKAMA, ggwe ngabo yange enkuuma; ggwe kitibwa kyange, era gw'onzizaamu amaanyi.

⁴Nkoowoola MUKAMA n'eddoboozi ery'omwanguka, n'annyanukula ng'asinziira ku lusozi lwe olutukuvu.

⁵Ngalamira ne neebaka, era ne nzuukuka bulungi, kubanga MUKAMA ye ampanirira.

⁶Siityenga enkumi n'enkumi z'abalabe bange abanneetoolodde, okunnumba.

⁷Golokoka, Ayi MUKAMA, ondokole Ayi Katonda wange okube abalabe bange bona omenye oluba Iw'abakola ebibi.

⁸Obulokozi buva gy'oli, Ayi MUKAMA. Emikisa gyo gibeerenga ku bantu bo.

Zabbuli 4

Ya mukulu wa Bayimbi. Eyimbibwa n'ebivuga eby'enkoba. Zabbuli ya Dawudi.

¹Bwe nkukoowoola onnyanukule, Ayi Katonda wange omuntuukirivu. Bwe mba mu nnaku, onnyambe. Onkwatirwe ekisa owulire okusaba kwange.

²Mmwe abaana b'abantu, mulituusa wa okuswazanga ekitibwa kyange? Mulituusa ddi okugoberera okwagala eitaliimu, n'okunoonya eby'obulimba?

³Naye mutengeere nga MUKAMA yeerondeddemu abo abamugondera. Bwe nnaamukoowoolanga anampuliranga era anannyanukulanga.

⁴Ne bwe munyiiga ennyo, temusaana kwonoona; musiriikirire, mwekebere era mufumiitirize mu mitima gyammwe nga mugalamidde ku bitanda byammwe.

⁵Muweeyo ebiweebwayo ebisaanidde; era mwesigenga MUKAMA.

⁶ Waliwo bangi abasaba nti, "Oyongere okutulaga ebirungi, Ayi MUKAMA, otumulisize omusana gw'amaaso go."

⁷ Ondeetedde essanyu lingi mu mutima gwange erisinga ne lye bafuna mu makungula nga batunuulira ku bibala byabwe ebingi.

⁸ Nnaagalamira ne nneebaka mirembe; kubanga ggwe wekka, Ayi MUKAMA, ggwe ondabirira akabi ne katantuukako.

Zabbuli 5

Ya mukulu wa Bayimbi. Ya ndere. Zabbuli ya Dawudi.

¹ Otege okutu eri ebigambo byange, Ayi MUKAMA; olowooze ku kunyolwa kwange.

² Wuliriza eddoboozi ly'omulanga gwange, Ayi Kabaka wange era Katonda wange: kubanga ggwe gwe nsaba.

³ Ayi MUKAMA, buli nkya owulira eddoboozi lyange; buli nkya ndeeta gy'oli okusaba kwange, ne nnindirira onziremu.

⁴ Kubanga ggwe Ayi Katonda, tosanyukira bibi: n'ebitasaana tobigumiikiriza.

⁵ Ab'amalala era abakola ebibi tobeetaaga mu maaso go: kubanga okyawa abakola ebibi bona.

⁶ Abalimba bona obazikiriza; MUKAMA akyawa abatemu era n'abalimba.

⁷ Naye olw'ekisa kyo ekingi, nze nnaayingiranga mu nnyumba yo: ne nkusinziza mu Yeekaalu yo Entukuvu n'okutya okungi.

⁸ Onkulembere, Ayi MUKAMA, mu butuukirivu bwo, olw'abalabe bange, ondage ekkubo eggolokofu ery'okutambilirangamu.

⁹ Abalabe bange bye boogera tebyesigibwa; emitima gyabwe gjijudde bussi bwereere. Emimiro gyabwe ntaana eyasaamiridde: akamwa kaabwe koogera bya bulimba.

¹⁰ Basalire omusango gubasinge, Ayi Katonda; baleke bagwe mu mitego gyabwe. Bagobe kubanga baakujeemera.

¹¹ Naye leka abo bona abakwesiga basanyukenga; ennaku zonna bayimbenga n'essanyu, obakuumenga, abo abaagala erinnya lyo basanyukirenga mu ggwe.

¹² Kubanga, Ayi MUKAMA, omutuukirivu omuwa omukisa; era omukuma, n'omwetoolooza okwagala ng'engabo.

Zabbuli 6

Eri Omukulu wa Bayimbi. Eyimbibwa n'ebivuga eby'enkoba. Zabbuli ya Dawudi.

- ¹ Ayi MUKAMA, tonnenya ng'ojjudde obusungu; so tombonereza mu kiruyi kyo.
- ² Onsaasire, Ayi MUKAMA, kubanga ndi munafu. Omponye, Ayi MUKAMA, kubanga amagumba gange gali mu bulumi.
- ³ Emmeeme yange ejjudde ennaku. Olirindirira kutuusa ddi olyoke onnyambe?
- ⁴ Onkyukire, Ayi MUKAMA, ollokole omwoyo gwange; omponye okufa olw'okwagala kwo okungi.
- ⁵ Kubanga tewali ayinza kukujukira ng'amaze okufa. Ani alikutendereza ng'asinziira emagombe?
- ⁶ Mpweddemu amaanyi olw'okusinda. Buli kiro obuliri bwange bujula amaziga gange n'omutto ne gutoba.
- ⁷ Amaaso gange ganafuye olw'okunyolwa, tegakyalaba bulungi olw'abalabe bange.
- ⁸ Muve we ndi mmwe mwenna abakola ebibi; kubanga MUKAMA awulidde okukaaba kwange.
- ⁹ MUKAMA awulidde okwegayirira kwange, n'okusaba kwange akukkirizza.
- ¹⁰ Abalabe bange bona baliswazibwa era balitya nnyo; bazzibwe emabega nga bajjudde obuswavu mangu ago.

Zabbuli 7

Zabbuli ya Dawudi gye yayimbira MUKAMA ng'efa ku Kuusi Omubenyamini.

- ¹ Ayi MUKAMA, Katonda wange, neesiga ggwe: ngobaako bona abangigganya era omponye,
- ² si kulwa nga bantagulataagula ng'empologoma ne bankutulakutula obufiififi ne watabaawo amponya.
- ³ Ayi MUKAMA, Katonda wange, obanga nkoze kino, era ng'engalo zange ziriko omusango,
- ⁴ obanga waliwo andaze ebirungi nze ne si muyisa bulungi, oba nzibye omulabe wange awatali nsong:
- ⁵ Kale, abalabe bange baleke bangoberere bankwate, bankube wansi banninnyirire, banzitire mu nfuufu.
- ⁶ Golokoka, Ayi MUKAMA, mu busungu bwo oziyize abalabe bange abajjudde obukambwe. Golokoka, Ayi Katonda wange, onnyambe ggwe asala omusango mu bwenkanya.
- ⁷ Kuinjaanya bannaggwanga bona okukwetooloola; obafuge ng'oli waggulu ennyo.

⁸ Ggwe, Ayi MUKAMA, Ali Waggulu Ennyo, asalira amawanga gonna emisango, osale omusango gwange Ayi MUKAMA Ali Waggulu Ennyo ng'obutuukirivu bwange bwe buli, era n'amazima agali mu nze bwe gali.

⁹ Ayi Katonda omutukuvu, akebera emitima n'emmeeme; okomye ebikolwa by'abakola ebibi: era onyweze abatuukirivu.

¹⁰ Katonda Ali Waggulu Ennyo ye ngabo yange; alokola abo abalina omutima omulongoofu.

¹¹ Katonda mulamuzi wa mazima; era alaga ekiruyi kye buli lunaku.

¹² MUKAMA awagala ekitala kye n'aleega omutego gwe ogw'obusaale.

¹³ Era ategese ebyokulwanyisa ebissi; era akozesza obusaale obw'omuliro.

¹⁴ Omuntu ajjudde ebibi afuna emitawaana, n'azaala obulimba.

¹⁵ Asima ekinnya, n'akiwanvuya nnyo; ate n'akigwamu ye kye yasimye.

¹⁶ Emitawaana gye gimwebunguludde; n'obukambwe bwe bumuddire.

¹⁷ Nneebazanga MUKAMA olw'obutuukirivu bwe; nnaayimbanga nga ntendereza erinnya lyu MUKAMA Ali Waggulu Ennyo.

Zabbuli 8

Ya Mukulu wa Bayimbi. Zabbuli ya Dawudi.

¹ Ayi MUKAMA, Mukama waffe, erinnya lyo nga ddungi era kkulu nnyo mu nsi yonna! Ekitiibwa kyo kitenderezebwa okutuuka waggulu mu ggulu.

² Abaana abato n'abawere wabawa amaanyi okukutendereza; ne basirisa omulabe wo n'oyo ayagala okwesasuza.

³ Bwe ntunuulira eggulu lyo, omulimu gw'engalo zo, omwezi n'emmunyeenye bye watonda;

⁴ omuntu kye ki ggwe okumujjukira, omuntu obuntu ggwe okumussaako omwoyo?

⁵ Kubanga wamukola n'abulako katono okuba nga Katonda; n'omussaako engule ey'obukulu n'ekitiibwa.

⁶ Wamukwasa okufuga ebintu byonna bye wakola n'emikono gyo: byonna wabissa wansi w'ebigere bye,

⁷ ebisibo n'amagana ag'ebisolo byonna eby'omu nsiko,

⁸ n'ennyonyi ez'omu bbanga, n'ebyenyanja eby'omu nnyanja; era na buli kiramu kyonna ekiyita mu nnyanja.

⁹ Ayi MUKAMA, Mukama waffe, erinnya lyo nga ddungi era kkulu nnyo mu nsi yonna!

Zabbuli 9

Ya Mukulu wa Bayimbi. Eyimbibwa okujjukira Okufa kw'Omwana. Zabbuli ya Dawudi.

¹ Nnaakutenderezanga, Ayi MUKAMA n'omutima gwange gwonna; nnaayolesanga ebikolwa byo eby'ekitalo byonna.

² Nnaasanyukanga era nnaajagulizanga mu ggwe. Nnaayimbanga nga ntendereza erinnya lyo, Ayi MUKAMA Ali Waggulu Ennyo.

³ Abalabe bange bazzeeyo emabega, beesittadde ne bazikiririra mu maaso go.

⁴ Kubanga owagidde ebiñjwanira, n'ensonga zange; era otudde ku ntebe yo ey'obwakabaka n'osala omusango mu bwenkanya.

⁵ Waboggolera amawanga, n'ozikiriza ababi; erinnya lyabwe n'olisangulirawo ddala emirembe n'emirembe.

⁶ Abalabe obamaliddewo ddala, n'ebibuga byabwe obizikirizza, era tewali aliddayo kubijjukira.

⁷ Naye MUKAMA afuga emirembe gyonna; era ataddewo entebe ye ey'okusalirako emisango.

⁸ Aliramula ensi mu butuukirivu, era alisalira abantu bona emisango mu bwenkanya.

⁹ MUKAMA kye kiddukiro ky'abo abanyigirizibwa; era kye kigo kyabwe mu biseera eby'akabi.

¹⁰ Abo abamanyi erinnya lyo, Ayi MUKAMA, banaakwesiganga; kubanga abakunoonya tobaleka bokka.

¹¹ Muyimbe okutendereza MUKAMA, atudde ku ntebe ey'obwakabaka mu Sayuuni; mutgeeeze amawanga gonna by'akoze.

¹² Ajjukira n'awoolera eggwanga era assaayo omwoyo eri abo abanyigirizibwa.

¹³ Onsaasire, Ayi MUKAMA; otunuulire abalabe bange abangigganya, onzigye ku miryango gy'okufa.

¹⁴ Ndyoke nkutenderezenga mu lwatu mu miryango gy'omuwala wa Sayuuni: era njagulizenga mu bulokozi bwo.

¹⁵ Abantu mu mawanga bagudde mu binnya bye baasima; era n'emitego gyabwe gimasuse ne gibakwasa.

¹⁶ MUKAMA yeeraze nga bw'asala emisango egy'ensonga. Omubi akwatiddwa mu mutego gw'emikono gye.

¹⁷ Ababi balisuulibwa emagombe; ebyo bye bituuka ku mawanga gonna ageerabira Katonda.

¹⁸ Kubanga abali mu kwetaaga tebalyerabirwa ennaku zonna, era n'ababonyaabonyezebw tebaliggwaamu ssuubi emirembe gyonna.

¹⁹ Ogorokoke, Ayi MUKAMA, tokkiriza muntu kuwangula; leka amawanga gasalirwe omusango mu maaso go.

²⁰ Bakankanye n'okutya, Ayi MUKAMA; amawanga gonna galyoke gategeere nti bantu buntu.

Zabbuli 10

¹ Lwaki otwekwese, Ayi MUKAMA? Lwaki otwekwese mu biseera eby'emitawaana?

² Omubi, mu malala ge, ayigganya abanafu; muleke agwe mu nkwe ezo z'asaze.

³ Kubanga omubi yeewaana ng'anyumya ku bibi ebiri mu mutima gwe, agabula aboomululu n'avuma MUKAMA.

⁴ Omubi mu malala ge tanoonya Katonda.

⁵ Buli ky'akola kimugendera bulungi. Amateeka go tagafaako, era n'abalabe be abanyooma.

⁶ Ayogera mu mutima gwe nti, "Sikangibwa, nzija kusanyuka emirembe gyonna."

⁷ Mu kamwa ke mujjudde okukolima n'obulimba awamu n'okutisatiisa; ebigambo bye bya mutawaana era bibi.

⁸ Yeekukuma mu byalo okutemula abantu abataliiko musango. Yeekweka ng'aliiimisa b'anatta.

⁹ Asooba mu kyama ng'empologoma, ng'alindirira okuzinduukiriza abateesobola. Abakwasa n'abatwalira mu kitimba kye.

¹⁰ B'abonyaabonya bagwa wansi ne babetentebwa ng'amaanyi g'omubi gabasukkiridde.

¹¹ Ayogera mu mutima gwe nti, "Katonda yeerabidde, amaaso ge agakwese, era takyaddayo kubiraba."

¹² Golokoka, Ayi MUKAMA, ozikirize omubi, Ayi Katonda; abanaku tobeerabiranga.

¹³ Omuntu omubi ayinza atya okukunyooma, Ayi Katonda, n'agamba mu mutima gwe nti "Sigenda kwennyonnyolako?"

¹⁴ Naye ggwe, Ayi Katonda, ennaku zaabwe n'okubonaabona kwabwe obiraba era ojja kubikolako. Ateesobola yeewaayo mu mikono gyo, kubanga gwe mubeezi w'abatalina bakitaabwe.

¹⁵ Malawo amaanyi g'omwonoonyi, muyite abyogere ebyo ebibadde bitajja kuzuulwa.

¹⁶ MUKAMA ye Kabaka emirembe n'emirembe. Amawanga galizikirizibwa mu nsi ye.

¹⁷ MUKAMA awulira okwetaaga kw'ababonyaabonyezebwa, ogumye emitima gyabwe; otege okutu kwo obaanukule.

¹⁸ Olwanirira abataliiko bakitaabwe n'abajoogebwa; omuntu obuntu ow'oku nsi n'ataddayo kubatiisa.

Zabbuli 11

Ya Mukulu wa Bayimbi. Zabbuli ya Dawudi.

¹ Mu MUKAMA mwe neekweka; ate muyinza mutya okuṇjamba nti, "Ddukira ku nsozi ng'ebinyonyi?

² Kubanga laba ababi baleega emitego gyabwe egy'obusaale, balase abalina omutima omulongoofu.

³ Emisingi nga gizikirizibwa, omutuukirivu ayinza kukola ki?"

⁴ MUKAMA ali mu Yeekaalu ye entukuvu; MUKAMA atudde ku ntebe ye ey'obwakabaka eri mu ggulu. Amaaso ge gatunuulira era geetegereza abaana b'abantu.

⁵ MUKAMA akebera abatuukirivu naye omutima gwe gukyawa ababi, n'abakola eby'obukambwe.

⁶ Ababi alibayiwako amanda ag'omuliro; n'empewo ezibambula gwe guliba omugabo gwabwe.

⁷ Kubanga MUKAMA mutuukirivu era ayagala eby'obutuukirivu; abo abalongoofu be balimulaba.

Zabbuli 12

Ya Mukulu wa Bayimbi. Zabbuli ya Dawudi.

¹ Tuyambe, Ayi MUKAMA, kubanga tewakyali n'omu amanyi Katonda; abantu abeesigwa bona baweddewo.

² Buli muntu alimba munne; akamwa kaabwe akawaana koogera bya bulimba.

³ MUKAMA, osirise akamwa k'abo bona abeewaanawaana, na buli lulimi olwenyumiriza;

⁴nga boogera nti, "Tujja kuwangula n'olulimi lwaffe, era tufune byonna bye twetaaga n'akamwa kaffe, kubanga ani alitukuba ku mukono."

⁵ MUKAMA ayogera nti, "Olw'okujoogebwa kw'abanafu, n'olw'okusinda kw'abali mu bwetaavu, nnaasituka kaakano ne nnwanirira abo abalumbibwa."

⁶ Ebigambo bya MUKAMA bya bwesigwa era bya mazima. Bigeraageranyizibwa n'effeeza erongoosebbwa obulungi emirundi musanvu mu kyoto eky'ebbumba.

⁷ Ayi MUKAMA, tukwesiga ng'onootukuumanga, n'otuwonya abantu abali ng'abo emirembe gyonna.

⁸ Ababi beeyisaayisa nga bagulumiza ebitaliimu nsa.

Zabbuli 13

Ya Mukulu wa Bayimbi. Zabbuli ya Dawudi.

¹ Olinneerabira kutuusa ddi, Ayi MUKAMA? Okutuusa emirembe gyonna? Olikomya ddi okunkweka amaaso go?

² Okulumwa mu mmeeme yange kulikoma ddi, n'okunyolwa okwa buli lunaku mu mutima gwange kuliggwaamu ddi? Abalabe bange balikomya ddi okumpangulanga nga beegulumiza?

³ Onnyanukule, Ayi MUKAMA Katonda wange; onzizeemu amaanyi nneme okufa.

⁴ Si kulwa ng'omulabe wange yeewaana nti, "Mmuwangudde;" abalabe bange ne bajaguza nga ngudde.

⁵ Naye nze neesiga okwagala kwo okutajjulukuka; era omutima gwange gunaasanyukiranga mu bulokozi bwo.

⁶ Nnaayimbiranga MUKAMA, kubanga ankoledde ebirungi.

Zabbuli 14

Ya Mukulu wa Bayimbi. Zabbuli ya Dawudi.

¹ Omusirusiru ayogera mu mutima gwe nti, "Tewali Katonda." Aboogera bwe batyo boonoonefu, bakola ebitasaana tekuli n'omu ku bo akola kirungi.

² MUKAMA atunuulira abantu bona mu nsi ng'asinziira mu ggulu, okulaba obanga mulimu mu bo ategeera, era abanoonya Katonda.

³ Naye bona bakyamye boonoonese; teri akola kirungi, era teri n'omu.

⁴ Abo bona abakola ebibi tebaliyiga? Kubanga basaanyaawo abantu bange ng'abalya emmere; so tebakooowoola MUKAMA.

⁵ Balitya nnyo! Kubanga Katonda abeera wamu n'abatuukirivu.

⁶ Mulemesa entegeka z'omwavu, songa MUKAMA kye kiddukiro kye.

⁷ Singa obulokozi bwa Isirayiri butuuse mu kiseera kino nga buva mu Sayuuni! MUKAMA bw'alirokola abantu be, Yakobo alijaguza ne Isirayiri alisanyuka.

Zabbuli 15

Zabbuli ya Dawudi.

¹ Ayi MUKAMA, ani anaabeeranga mu nnyumba yo? Ani anaatuulanga ku lusozi lwo olutukuvu?

² Oyo ataliiko kya kunenyezebwa, akola eby'obutuukirivu, era ayogera eby'amazima nga biviira ddala mu mutima gwe.

³ Olulimi lwe talwogeza bya bulimba, era mikwano gye tagiyisa bubi, so tasaasaanya ɲjambo ku baliraanwa be.

⁴ Anyooma ababi, naye abatya MUKAMA abassaamu ekitiibwa. Atuukiriza ky'asuubiza ne bwe kiba nga kimulumya.

⁵ Bw'awola tasaba magoba; so takkiriza kulya nguzi ku muntu yenna. Oyo akola ebyo aliba munywevu emirembe gyonna.

Zabbuli 16

Ya Dawudi.

¹ Onkuume, Ayi Katonda, kubanga ggwe buddukiro bwange.

² Nagamba MUKAMA nti, "Ggwe Mukama wange, ebirungi byonna bye nnina biva gy'oli."

³ Abatukuvu abali mu nsi be njagala era mu bo mwe nsanyukira.

⁴ Ennaku y'abo abagoberera bakatonda abalala yeeyongera. Siriwaayo ssaddaaka zaabwe ez'omusaayi, wadde okusinza bakatonda baabwe.

⁵ MUKAMA, ggwe mugabo gwange, era ggw'oliisa obulamu bwange; era ggw'olabirira ebyange.

⁶ Ensalo zange ziri mu bifo ebisanyusa, ddala ddala omugabo omulungi.

⁷ Nnaatenderezanga MUKAMA kubanga annujjamya ne mu kiro ayigiriza omutima gwange.

⁸ Nkulembeza MUKAMA buli kiseera, era ali ku mukono gwange ogwa ddyo, siinyenyezebwenga.

⁹ Noolwekyo omutima gwange gusanyuka, n'akamwa kange ne kajaguza; era n'omubiri gwange gunaabeeranga mu mirembe.

¹⁰ Kubanga omwoyo gwange toliguleka magombe, wadde okukkiriza Omutukuvu wo okuvunda.

¹¹ Olindaga ekkubo ery'obulamu; w'oli we wanaabanga essanyu erijjuvu, era mu mukono gwo ogwa ddyo nga mwe muli ebisanyusa emirembe gyonna.

Zabbuli 17

Okusaba kwa Dawudi.

¹ Wulira, Ayi MUKAMA, okukoowoola kwange nga nneegayirira, wuliriza okukaaba kwange. Tega okutu owulirize okukoowoola kwange, kubanga tekuva ku mimwa gya bulimba.

² Nzigyako omusango; kubanga olaba ekituufu.

³ Weekenneenyezza omutima gwange era n'onkebera n'ekiro. Ne bw'onongezesa toobeko kibi ky'onsangamu; kubanga mmaliridde obutayogeranga bya bulimba.

⁴ Ggwe, gwe nkoowoola, ngoberedde ebigambo by'akamwa ko, ne neewala ebikolwa by'abantu abakambwe.

⁵ Nnyweredde mu makubo go, era ebigere byange tebiigalekenga.

⁶ Nkukoowoola, Ayi Katonda, kubanga mmanyi ng'onnyanukula; ontegere okutu kwo owulire okusaba kwange.

⁷ Ndaga okwagala kwo okutaggwaawo, okwewuunyisa, ggwe alokola n'omukono gwo ogwa ddyo abo bona abakweyuna nga badduka abalabe baabwe.

⁸ Onkuume ng'emmunye ey'eriso lyo; onkweke mu kisiikirize ky'ebiwaawaatiro byo.

⁹ Omponye ababi abannumba, n'abalabe bange abanneetoolodde.

¹⁰ Omutima gwabwe mukakanyavu, n'akamwa kaabwe koogera by'amalala.

¹¹ Banzingizza era banneetoolodde; bansimbye amaaso nga beeteseteese okunsuula wansi.

¹² Bali ng'empologoma enjala gy'eruma eyeeteeseteese okutaagula omuyiggo gwayo era ng'empologoma enkulu eteeze.

¹³ Golokoka n'ekitala kyo, Ayi MUKAMA, oyolekere abalabe bange obawangule, omponye ababi abo.

¹⁴ Ayi MUKAMA, mponya abantu, abantu ab'ensi n'omukono gwo, kubanga balowooleza mu bya bulamu buno byokka, n'emigabo gyabwe giri mu nsi. Embuto zaabwe zigezze, obagaggawazizza ne baterekera n'abaana baabwe ne bazzukulu baabwe.

¹⁵ Nze ndikulaba n'amaaso mu butuukirivu era ndimatira, bwe ndiraba obwenyi bwo nga nzuukuse.

Zabbuli 18

Ya Mukulu wa Bayimbi. Zabbuli ya Dawudi gye yayimbira MUKAMA bwe yamuwonya abalabe be ne Sawulo.

¹ Nkwagala Ayi MUKAMA kubanga ggwe maanyi gange.

² MUKAMA lwe lwazi lwange, ky'ekigo kyange ekigumu era ye mununuzi wange, ye Katonda wange era lwe lwazi lwange mwe neekweka; ye ngabo yange era ye mulokozi wange ow'amaanyi, era kye kigo kyange ekinyewe.

³ Nkoowoola MUKAMA asaana okutenderezebwa, era amponya eri abalabe bange.

⁴ Emiguwa gy'okufa gyanneetooloola; embuyaga ez'okusaanawo zansaankira.

⁵ Ebisiba eby'amagombe byanneetooloola; n'emitego gy'okufa ne ginjolekera.

⁶ Mu nnaku yange nakoowoola MUKAMA; ne nkaabirira Katonda wange annyambe. Yawulira eddoboozi lyange ng'ali mu yeekaalu ye; omulanga gwange ne gutuuka mu matu ge.

⁷ Emisingi gy'ensi ne gikankana ne giyuuguuma; ensozi ne zinyeenyezebwa ne ziseeseeetuka, kubanga yali asunguwadde.

⁸ Omukka ne gunyooka nga guva mu nnyindo ze. Omuliro ne guva mu kamwa ke, ne gukoleeza amanda ne gabuubuuk.

⁹ Yayabuluza eggulu n'akka wansi; ebire ebikutte nga biri wansi w'ebigere bye.

¹⁰ Yeebagala kerubi n'abuuka, n'aseeyeyeza ku biwaawaatiro by'empewo.

¹¹ Yafuula ekizikiza ekyamwetooloolanga okuba enkuufira ey'ebire ebijjudde amazzi.

¹² Okumasamasa okwali mu maaso ge ne kuva mu bire bye, n'okumyansa kw'eggulu n'omuzira.

¹³ MUKAMA yabwatuka ng'asinziira mu ggulu; oyo Ali Waggulu Ennyo yayogera; mu kamwa ke ne muvaamu omuzira n'okumyansa kw'eggulu.

¹⁴ Yalasa obusaale bwe n'asaasaanya abalabe; n'okumyansa okw'eggulu n'abawangula.

¹⁵ Ebiwonvu eby'omu nnyanja ne bibikkulwa n'emisingi gy'ensi ne gyeyerula olw'okunenya kwo Ayi MUKAMA n'olw'okubwatuka kw'omukka ogw'omu nnyindo zo.

- ¹⁶ MUKAMA yagolola omukono gwe ng'ali waggulu, n'ankwata n'annyinyulula mu mazzi amangi.
- ¹⁷ Yamponya abalabe bange ab'amaanyi, abankyawa, abo abaali bansinza amaanyi.
- ¹⁸ Bannumba nga ndi mu buzibu, naye MUKAMA n'annyamba.
- ¹⁹ N'antwala mu kifo ekigazi n'amponya, kubanga yansanyukira nnyo.
- ²⁰ MUKAMA ankoledde ng'obutuukirivu bwange bwe buli, ansasudde ng'ebikolwa byange ebirungi bwe biri.
- ²¹ Kubanga ntambulidde mu makubo ga MUKAMA, ne sikola kibi eri Katonda wange.
- ²² Ddala ddala amateeka ga MUKAMA gonna ngagondedde, era ne siva ku biragiro bye.
- ²³ Sisobyanga mu maaso ge era nneekuma obutayonoona.
- ²⁴ Noolwekyo, MUKAMA ansasudde ng'obutuukirivu bwange bwe buli, era ng'ebikolwa byange ebirungi bwe biri by'alaba.
- ²⁵ Eri omwesigwa weeraga ng'oli mwesigwa, n'eri atalina musango weeraga nga tolina musango.
- ²⁶ Eri abalongoofu weeraga ng'oli mulongoofu, n'eri abakyamu weeraga ng'obasinza amagezi.
- ²⁷ Owonya abawombeefu, naye abeegulumiza obakkakkanya.
- ²⁸ Okoleezessa ettaala yange; Ayi MUKAMA Katonda wange, ekizikiza kyange okimulisizza.
- ²⁹ Bwe mbeera naawe nsobola okulumba abalabe bange; nga ndi ne Katonda wange nsobola okuwalampa bbugwe.
- ³⁰ Katonda byonna by'akola bigolokofu; MUKAMA ky'asuubiza akituukiriza; era bwe buddukiro bw'abo bona abamwekwekamu.
- ³¹ Kale, ani Katonda, wabula MUKAMA? Era ani Lwazi, wabula Katonda waffe?
- ³² Oyo ye Katonda ampa amaanyi era alunjjamya ekkubo lyange.
- ³³ Ebigere byange abinyweza ng'ebi'emeewo, n'ansobozesa okuyimirira ku ntikko z'ensozi.
- ³⁴ Anjigiriza okulwana entalo, ne nsobola n'okuleega omutego ogw'obusaale ogw'ekikomo.

³⁵ Ompadde obulokozi bwo okuba engabo yange; era ompaniridde n'omukono gwo ogwa ddyo; weetooowazizza n'ongulumiza.

³⁶ Ongaziyirizza ekkubo ebigure byange we biyita, obukongovvule bwange ne butanuuka.

³⁷ Nagoba abalabe bange embiro, ne mbakwata ne sidda mabega okutuusa nga mbazikirizza.

³⁸ Nababetenta ne batasobola na kugolokoka, ne mbalinnyako ebigure byange.

³⁹ Ompadde amaanyi ag'okulwana; abalabe bange ne banvuunamira.

⁴⁰ Okyusizza abalabe bange ne bankuba amabega ne badduka, ne ndyoka nsanyaawo abo bona abankyawawa.

⁴¹ Baalaajana naye tewaali yabawonya; ne bakaabirira MUKAMA, naye n'atabaddamu.

⁴² Ne mbamerengula ng'enfuufu empewo gy'efuumuula; ne mbasammula eri ng'ebisooto by'omu luguudo.

⁴³ Omponyezza obulumbaganyi bw'abantu; n'onfuula omufuzi w'amawanga. Abantu be nnali simanyi ne bafuuka abaweereza bange.

⁴⁴ Olumpulira ne baŋjondera, bannamawanga ne bajugumira mu maaso gange.

⁴⁵ Bannamawanga baggwaamu omutima ne bava mu bigo byabwe nga bakankana.

⁴⁶ MUKAMA mulamu! Atenderezebwe, Olwazi lwange; era agulumizibwe Katonda w'obulokozi bwange.

⁴⁷ Ye Katonda, asasula ku lwange abankola obubi era akakkanya amawanga ne ngafuga. Amponyeza abalabe bange.

⁴⁸ Ayi MUKAMA, ongulumizizza okusinga abalabe bange, n'onkuuma abakambwe ne batankwatako.

⁴⁹ Noolwekyo, Ayi MUKAMA, nnaakutenderezanga mu mawanga, era nnaayimbanga nga ntendereza erinnya lyo.

⁵⁰ Awa kabaka obuwanguzi obw'amaanyi, amulaga ebyekisa emirembe gyonna oyo gwe yafukako amafuta, eri Dawudi n'eri ezzadde lye.

Zabbuli 19

Ya Mukulu wa Bayimbi. Zabbuli ya Dawudi.

¹ Eggulu litegeeza ekitiibwa kya Katonda, ebbanga ne litegeeza emirimu gy'emikono gye.

- ² Buli lunaku litegeeza ekitiibwa kye, era liraga amagezi ge buli kiro.
- ³ Tewali bigambo oba olulimi olwogerwa, era n'eddoboozi lyabyo teriwulikika.
- ⁴ Naye obubaka bwabyo bubunye mu nsi yonna. Mu ggulu omwo Katonda mwe yasimbira enjuba eweema.
- ⁵ Evaayo ng'awasa omugole bw'ava mu nju ye, era ng'omuddusi asinga bona bw'ajjula essanyu ng'agenda mu mpaka.
- ⁶ Evaayo ku ludda olumu olw'eggulu, ne yeetooloola okutuuka ku nkomerero yaalyo, era tewali kyekweka bbugumu lyayo.
- ⁷ Ekiragiro kya MUKAMA kirimu byonna, era kizzaamu amaanyi mu mwoyo. Etteeka lya MUKAMA lyesigika, ligeziwaza abatalina magezi.
- ⁸ Okuyigiriza kwa MUKAMA kutuufu, kusanyusa omutima gw'oyo akugondera. Ebiragiro bya MUKAMA bimulisiza amaaso, bye galaba.
- ⁹ Okutya MUKAMA kirungi, era kya mirembe gyonna. Ebiragiro bya MUKAMA bya bwenkanya, era bya butuukirivu ddala.
- ¹⁰ Ebyo byonna bisaana okuyaayaanirwa okusinga zaabu, okusingira ddala zaabu ennungi ennyo. Biwoomerera okusinga omubisi gw'enjuki, okusukkirira omubisi gw'enjuki ogutonnya nga guva mu bisenge byagwo.
- ¹¹ Ebyo bye birabula omuddu wo, era mu kubigondera muvaamu empeera ennene.
- ¹² Ani asobola okulaba ebyonoono bye? Onsonyiwe, Ayi MUKAMA, ebibi ebinkisiddwa.
- ¹³ Era omuddu wo omuwonye okukola ebibi ebigenderere, bireme kunfuga. Bwe nt yo mbeere ng'ataliko kyakunenyezebwa nneme okuzza omusango omunene ogw'ekibi.
- ¹⁴ Nsaba ebigambo by'omu kamwa kange, n'okulowooza okw'omu mutima gwange, bisiimibwe mu maaso go, Ayi MUKAMA, Olwazi lwange, era Omununuzi wange.

Zabbuli 20

Ya Mukulu wa Bayimbi. Zabbuli ya Dawudi.

- ¹ MUKAMA akwanukulenga ng'oli mu buzibu. Erinnya lya Katonda wa Yakobo likukuumenga.
- ² Akuweerezenga obuyambi obuva mu kifo kye ekitukuvu; akudduukirirenga okuva ku lusozi Sayuuni.

³ Ajjukirenga ssaddaaka zo zonna z'omuwa, era asiimenga ebiweebwayo byo ebyokebwa.

⁴ Akuwenga omutima gwo bye gwetaaga, era atuukirizenga by'oteekateeka byonna.

⁵ Tulijaganya olw'obuwanguzi bwo, ne tuwuuba ebendera zaffe mu linnya lya Katonda waffe. MUKAMA akuwenga byonna by'omusaba.

⁶ Kaakano ntegedde nga MUKAMA awanguza oyo gwe yafukako amafuta, amwanukula ng'amuwa obuwanguzi n'omukono gwe ogwa ddyo, ng'asinziira mu ggulu lye ettukuvu.

⁷ Abamu beesiga amagaali, n'abalala beesiga embalaasi, naye ffe twesiga erinnya lya MUKAMA Katonda waffe.

⁸ Batalantuka ne bagwa wansi ne balemerawo, naye ffe tugolokoka ne tuyimirira nga tuli banywevu.

⁹ Ayi MUKAMA, lokola kabaka, otwanukule bwe tukukoowoola.

Zabbuli 21

Ya Mukulu wa Bayimbi. Zabbuli ya Dawudi.

¹ Ayi MUKAMA, kabaka ajaguliza mu maanyi go. Obuwanguzi bw'omuwadde nga bumuleetedde essanyu lingi!

² Omuwadde omutima gwe bye gwetaaga, era buli ky'asabye n'akamwa ke tokimummye.

³ Ddala ddala wamwaniriza n'emikisa gyo egijjudde ebirungi, n'omutikkira engule eya zaabu omuka ennyo ku mutwe gwe.

⁴ Yakusaba obulamu, era n'obumuwa, ennaku ennyingi ez'emirembe n'emirembe.

⁵ Obuwanguzi bwe wamuwa bumuleetedde ekitiibwa kinene. Omuwadde ekitiibwa n'oyatiikirira.

⁶ Ddala omuwadde emikisa gyo egy'olubeerera, n'omujjuza essanyu ng'oli naye buli kiseera.

⁷ Kubanga kabaka yeesiga MUKAMA, era olw'okwagala okutaggwaawo okw'oyo Ali Waggulu Ennyo, kabaka tagenda kunyeenyezebwawa.

⁸ Omukono gwo guliwamba abalabe bo bona; omukono gwo ogwa ddyo gulikwata abo abakukyawa.

⁹ Bw'olirabika, Ayi MUKAMA, olibasiriiza n'omuliro ng'ogw'omu kyoto ekyengeredde. MUKAMA, ng'ajjudde obusungu, alibamira bona, era alibamalirawo ddala.

¹⁰ Olizikiriza ezzadde lyabwe ku nsi, n'abaana baabwe bona n'obamalawo mu baana b'abantu.

¹¹ Newaakubadde nga bakusalira enkwe, ne bateekateeka ebikolwa ebibi, kyokka tewali kye basobola kutuukiriza.

¹² Balikyuka ne bakudduka bwe baliraba ng'obaleezeemu omutego gwo ogw'obusaale.

¹³ Ogulumizibwenga, Ayi MUKAMA, mu maanyi go. Tunaayimbanga nga tutendereza obuyinza bwo.

Zabbuli 22

Ya Mukulu wa Bayimbi. Zabbuli ya Dawudi.

¹ Katonda wange, Katonda wange, lwaki onjabulidde? Lwaki ogaana okunnyamba wadde okuwuliriza okwaziirana kwange?

² Ayi Katonda wange, emisana nkukoowoola, naye tonnyanukula; n'ekiro bwe ntyo, naye siweerako.

³ Songa ggwe Mutukuvu atudde ku Ntebe, era ettendo lya Isirayiri yonna.

⁴ Bajjajaffe baakwesiganga; baakwesiga naawe n'obawonya.

⁵ Baakukoowoolanga n'obalokola; era baakwesiganga ne batajulirira.

⁶ Naye nze ndi lusirijjanyi, siri muntu; abantu bampisaamu amaaso, n'abalala bannyooma.

⁷ Bonna abandaba banduulira, era banvuma nga bwe banyeenyeza omutwe nga bagamba nti,

⁸ "Yeesiga MUKAMA; kale amuwonye. Obanga MUKAMA amwagala, kale nno amulokole!"

⁹ Naye ggwe wanziggya mu lubuto lwa mmange, era wampa okukwesiga ne mu buto bwange bwonna nga nkyayonka.

¹⁰ Olwazaalibwa ne nteekebwa mu mikono gyo; olwava mu lubuto lwa mmange n'obeera Katonda wange.

¹¹ Tobeera wala nange, kubanga emitawaana ginsemberedde, ate nga tewali mulala n'omu asobola kunnyamba.

¹² Zisseddume nnyingi zinneetoolodde, zisseddume enkambwe ez'e Basani zinzingizizza.

¹³ Banjasamiza akamwa kaabwe ng'empologoma bw'ewuluguma ng'etaagulataagula omuyiggo gwayo.

¹⁴ Ngiyiddwa ng'amazzi, n'amagumba gange gasowose mu nnyingo zaago. Omutima gwange guli ng'obubaane, era gusaanuukidde mu mubiri gwange.

¹⁵ Amaanyi gampweddemu, gakaze ng'oluggyoo; n'olulimi lwange lukutte waggulu mu kibuno kyange. Ondese awo mu nfuufu ng'omufu.

¹⁶ Abantu ababi banneetoolodde; banneebunguludde ng'embwa ennyingi; banfumise ne bawummula ebibatu byange n'ebigere byange.

¹⁷ Amagumba gansowose nnyinza n'okugabala. Abalabe bange bantunuulira nga bannyoomoola.

¹⁸ Bagabana engoye zange; era ekyambalo kyange bakikubira akalulu.

¹⁹ Naye ggwe, Ayi MUKAMA, tobeera wala nange. Ggwe, Amaanyi gange, yanguwa okunnyamba!

²⁰ Omponye okuttibwa n'ekitala; obulamu bwange obw'omuwendo butaase mu maanyi g'embwa!

²¹ Nziga mu kamwa k'empologoma, omponye amayembe g'embogo enkambwe.

²² Nnaategezanga ku linnya lyo mu booluganda; nnaakutenderezanga mu kibiina ky'abantu.

²³ Mmwe abatya MUKAMA, mumutenderezenga. Abaana ba Yakobo mwenna mumugulumizenga; era mumussengamu ekitiibwa nga mumutya, mmwe abaana ba Isirayiri mwenna.

²⁴ Kubanga tanyooma kwaziirana kw'abo abali mu nnaku, era tabeekweka, wabula abaanukula bwe bamukoowoola.

²⁵ Mu ggwe mwe muva ettendo lyange mu kibiina ekinene, ne nkutenderezola olw'ebyo by'onkoledde. Obweyamo bwange nnaabutuukirizanga mu maaso gaabo abakutya.

²⁶ Abaaavu banaalyanga ne bakkuta, abo abanoonya MUKAMA banaamutenderezanga. Emitima gyabwe ginaajaguzanga emirembe gyonna.

²⁷ Ensi zonna zirijjukira ne zikyukira MUKAMA, ebika byonna eby'amawanga gonna birimuvuunamira.

²⁸ Kubanga obwakabaka bwonna bwa MUKAMA, era y'afuga amawanga gonna.

²⁹ Abagagga bona ab'omu nsi balirya embaga, ne bamusinza. Bonna abagenda mu nfuufu, balimufukaamirira, abatakyali balamu.

³⁰ Ezadde lyabwe lirimuweereza; abaliddawo balibuulirwa ekigambo kya Mukama.

³¹ N'abo abatannazaalibwa balibuulirwa obutuukirivu bwe nti, "Ekyo yakikoze."

Zabbuli 23

Zabbuli ya Dawudi.

¹ MUKAMA ye Musumba wange, seetaagenga.

² Angalamiza ne mpummulira mu ddundiro ly'omuddo omuto. Antwala awali amazzi amateefu.

³ Akomyawo emmeeme yange. Annunjamya okukola eby'obutuukirivu olw'erinnya lye.

⁴ Newaakubadde nga ntambulira mu kiwonvu eky'ekisiikirize eky'olumbe, siritya kabi konna; kubanga ggwe oli nange. Oluga lwo n'omuggo gwo bye binsanyusa.

⁵ Onsosootolera emmere abalabe bange nga balaba; onsiize amafuta ku mutwe, ekikompe kyange kiyiwa.

⁶ Ddala ddala obulungi n'okwagala okutaggwaawo binaagendanga nange ennaku zonna ez'obulamu bwange; nange nnaabeeranga mu nnyumba ya MUKAMA, ennaku zonna.

Zabbuli 24

Zabbuli ya Dawudi.

¹ Ensi ya MUKAMA n'ebigirimu byonna, n'ensi zonna n'abo abazibeeramu.

² Kubanga yasimba emisingi gyayo mu nnyanja, n'agizimba ku mazzi amangi.

³ Alyambuka ku lusozi lwa MUKAMA ye afaanana atya? Era wa ngeri ki aliyingira n'ayimirira mu nnyumba ye entukuvu?

⁴ Oyo alina omutima omulongoofu, nga n'emikono gye mirongoofu; atasinza bakatonda abalala, era atalayirira bwereere.

⁵ Oyo MUKAMA anaamuwanga omukisa, n'obutuukirivu okuva eri Katonda ow'obulokozi bwe.

⁶ Ogwo gwe mulembe gw'abo abakunoonya, Ayi Katonda wa Yakobo.

⁷ Mweggulewo, mmwe bawankaaki! Muggulwewo, mmwe enzigi ez'edda, Kabaka ow'ekitiibwa ayingire.

⁸ Kabaka ow'ekitiibwa ye ani? Ye MUKAMA ow'amaanyi era ow'obuyinza, omuwanguzi mu ntalo.

⁹Mweggulewo, mmwe bawankaaki, muggulwewo mmwe enzigi ez'edda! Kabaka ow'ekitiibwa ayingire.

¹⁰Kabaka ow'ekitiibwa oyo ye ani? MUKAMA Ayinzabyonna; oyo ye Kabaka ow'ekitiibwa.

Zabbuli 25

Zabbuli ya Dawudi.

¹Eri ggwe, Ayi MUKAMA, gye ndeeta okusaba kwange.

²Neesiga ggwe, Ayi MUKAMA, tondeka kuswala mu maaso g'abalabe bange. Tobaganya kumpangula.

³Ddala ddala abakwesiga tebaajulirirenga, naye ab'enkwe baliswazibwa.

⁴Njigiriza nga bwe nnaakolanga, Ayi MUKAMA, ondage amakubo go mwe nnaatambuliranga.

⁵Onjigirizenga okunywerera ku mazima go, era onkulemberenga mu byonna; kubanga ggwe Katonda, ow'obulokozi bwange era essuubi lyange liri mu ggwe olunaku lwonna.

⁶Jjukira, Ayi MUKAMA, okusaasira kwo okunene, n'okwagala kwo okungi, kubanga byava dda.

⁷Tojjukira bibi byange n'obujeemu bwange eby'omu buvubuka bwange. Onzijukire, Ayi MUKAMA, ng'okwagala kwo gye ndi bwe kuli, kubanga oli mulungi.

⁸MUKAMA mulungi, era wa mazima, noolwekyo ayigiriza aboonoonyi ekkubo lye.

⁹Abawombeefu abalujjamya mu kkubo ettuufu n'abayigiriza ekkubo lye.

¹⁰Amakubo ga MUKAMA gonna gajjudde okwagala n'amazima eri abo abagondera endagaano ye n'ebiragiro bye.

¹¹Olw'erinnya lyo, Ayi MUKAMA, onsonyiwe ebibi byange, kubanga bingi.

¹²Omuntu wa ngeri ki atya Katonda? Oyo gw'anaayigirizanga okukwata ekkubo lye yamulondera.

¹³Obulamu bwe bunajjuzibwanga emikisa gya Katonda, era bazzukulu be ensi eriba yaabwe.

¹⁴Mikwano gya MUKAMA be bo abamugondera; anaababikkuliranga ekyama eky'endagaano ye.

¹⁵Ntunuulira MUKAMA buli kiseera, kubanga yekka y'anzigya mu kabi.

¹⁶ Nkyukira, Ayi MUKAMA, onkwatirwe ekisa, kubanga nsigadde bw'omu, era ndi munafu.

¹⁷ Obuyinike bweyongedde mu mutima gwange; mponya okweraliikirira kwange.

¹⁸ Tunuulira ennaku endiko, weetegereze obulumi bwange; onzigyeko ebibi byange byonna.

¹⁹ Laba abalabe bange nga bwe beeyongedde obungi n'okunkyawawa kwe bankyawamu!

²⁰ Labiriranga obulamu bwange, obamponye; tondekanga mu buswavu, kubanga ggwe kiddukiro kyange.

²¹ Amazima n'obulongoofu bindabirirenga, essubi lyange liri mu ggwe.

²² Nunula Isirayiri, Ayi Katonda, omuwonye emitawaana gye gyonna.

Zabbuli 26

Zabbuli ya Dawudi.

¹ Onnejjeereze, Ayi MUKAMA, kubanga obulamu bwange tebuliiko kya kunenyezebw; nneesiga ggwe, Ayi MUKAMA, nga sibuusabuusa.

² Neetegereza, Ayi MUKAMA, ongezesese; weekalirize ebiri mu mutima gwange ne mu mmeeme yange.

³ Kubanga okwagala kwo kwe kunkulembra, era mu mazima go mwe ntambulira.

⁴ Situula na bantu balimba, so siteesaganya na bakuusa.

⁵ Nkyawa ekibiina ky'aboonoonyi; so situula na bakozi ba bibi.

⁶ Naaba mu ngalo zange okulaga nga bwe sirina misango; ne ndyoka nzija ku Kyoto kyo, Ayi MUKAMA;

⁷ ne nnyimba oluyimba olw'okwebaza, olwogera ku bikolwa byo ebyewuunyisa.

⁸ Ennyumba yo mw'obeera njagala, Ayi MUKAMA, kye kifo ekijjudde ekitiibwa kyo.

⁹ Tombalira mu boonoonyi, wadde mu batemu,

¹⁰ abakozesa emikono gyabwe okutegeka ebikolwa ebibi, era abali b'enguzi.

¹¹ Naye nze ntambula nga siriiko kye nnenyezebw; nkwatirwa ekisa, Ayi MUKAMA, ondokole.

¹² Nnyimiridde watereevu. Nnaatenderezanga MUKAMA mu kibiina ky'abantu ekinene.

Zabbuli 27

Zabbuli ya Dawudi.

- 1 MUKAMA gwe musana gwange n'obulokozi bwange; ani gwe nnaatyanga? MUKAMA ge maanyi ag'obulamu bwange; ani asobola okuntiisa?
- 2 Abalabe bange n'abantu ababi bona bwe banannumba nga baagala okunzita, baneesittala ne bagwa.
- 3 Newaakubadde ng'eggye linaasiisira okunneebungulula, omutima gwange teguutyenga; olutalo ne bwe lunansitukirangako, nnaabanga mugumu.
- 4 Ekintu kimu kye nsaba MUKAMA, era ekyo kye nnoonya: okubeeranga mu nnyumba ya MUKAMA ennaku zonna ez'obulamu bwange, ne ndabanga obulungi bwa MUKAMA, era ne nsinzizanga mu Yeekaalu ye.
- 5 Kubanga mu biseera eby'obuzibu anansuzanga mu nju ye; anankwekanga mu weema ye, n'ankuumira ku lwazi olugulumivu.
- 6 Olwo ononnyimusanga waggulu w'abalabe bange abanneetoolodde. Nnaaweerangayo ssaddaaka mu weema ye nga bwe ntendereza n'eddoboozi ery'omwanguka olw'essanyu; nnaayimbiranga MUKAMA ennyimba ez'okumutenderezanga.
- 7 Wulira eddoboozi lyange, Ayi MUKAMA, nga nkukoowoola; onkwatirwe ekisa onnyanukule!
- 8 Omutima gwange guwulidde eddoboozi lyo nga lyogera nti, "Munnoonye, munsinze." Omutima gwange ne guddamu nti, "Nnaakunoonyanya, Ayi MUKAMA."
- 9 Tonneekweka, so tonyiigira muweereza wo, kubanga ggw'obadde omubeezi wange bulijjo. Tonneggyaako, so tonsuula, Ayi Katonda, Omulokozi wange.
- 10 Kitange ne mmange bwe balindeka, MUKAMA anandabiriranga.
- 11 Njigiriza, Ayi MUKAMA, by'oyagala nkole, era onkulembere mu kkubo lyo, kubanga abalabe bange banneetoolodde.
- 12 Tompaayo mu balabe bange, kubanga abajulizi ab'obulimba bansitukiddeko n'enewe zaabwe, okunkambuwalira.
- 13 Nkyakakasiza ddala nga ndiraba obulungi bwa MUKAMA mu nsi ey'abalamu.
- 14 Lindirira MUKAMA. Ddamu amaanyi, ogume omwoyo. Weewaawo, lindirira MUKAMA.

Zabbuli 28

Zabbuli ya Dawudi.

¹ Nkukoowoola ggwe, Ayi MUKAMA, Olwazi lwange, tolema kumpuliriza; kubanga bw'onoonsiriikirira nzija kuba nga bali abakkirira mu kinnya.

² Owulire eddobaozi ery'okwegayirira kwange, nga mpanise emikono gyange okwolekera ekifo kyo ekisinga byonna obutukuvu, nga nkukaabirira okunnyamba.

³ Tontwalira mu boonoonyi, abakola ebibi; abanyumya obulungi ne bannaabwe, so ng'emitima gyabwe gjijudde bukyayi bwerere.

⁴ Basasule ng'ebikolwa byabwe bwe biri, n'olw'ebiyambyone bye bakoze. Basasule olwa byonna emikono gyabwe gye bisobezza, obabonereze nga bwe basaanidde.

⁵ Olwokubanga tebafaayo ku mirimu gya MUKAMA, oba ku ebyo bye yakola n'emikono gye, alibazikiririza ddala, era talibaddiramu.

⁶ Atenderezebwe MUKAMA, kubanga awulidde eddobaozi ly'okwegayirira kwange.

⁷ MUKAMA ge maanyi gange, era ye ngabo yange, ye gwe neesiga. Bwe nt yo ne nyambibwa. Omutima gwange gunaajaguzanga, ne mmuyimbira ennyimba ez'okumwebazanga.

⁸ MUKAMA y'awa abantu be amaanyi, era kye kiddukiro eky'obulokozi bw'oyo gwe yafukako amafuta.

⁹ Olokole abantu bo, obawe omukisa abalonde bo. Obakulemberenga ng'omusumba, era obawanirirenga emirembe gyonna.

Zabbuli 29

Zabbuli ya Dawudi.

¹ Mutendereze MUKAMA, mmwe abaana b'ab'amaanyi.
Mutendereze MUKAMA n'ekitiibwa n'amaanyi.

² Mutendereze MUKAMA n'ekitiibwa ekisaanira erinnya lye;
musinze MUKAMA mu kitibwa eky'obutukuvu bwe.

³ Eddobaozi lya MUKAMA liwulirwa ku mazzi; Katonda ow'ekitiibwa abwatuka, n'eddobaozi lye ne liwulirwa ku mazzi amangi.

⁴ Eddobaozi lya MUKAMA ly'amaanyi; eddobaozi lya MUKAMA lijjudde ekitiibwa.

⁵ Eddobaozi lya MUKAMA limenya emivule; MUKAMA amenyaamenya emivule gya Lebanooni.

⁶ Aleetera Lebanooni okubuukabuuka ng'akayana, ne Siriyooni ng'enneyana y'embogo.

⁷Eddoboozi ly a MUKAMA libwatukira mu kumyansa.

⁸Eddoboozi ly a MUKAMA likankanya eddungu; MUKAMA akankanya eddungu ly a Kadesi.

⁹Eddoboozi ly a MUKAMA linyoolanyoola emivule, n'emit mu bibira ne gitasigalako makoola. Mu Yeekaalu ye, abantu bona boogerera waggulu nti, "Ekitiibwa kibe eri MUKAMA!"

¹⁰MUKAMA atuula waggulu w'amataba ku ntebe ye ey'obwakabaka. MUKAMA ye Kabaka afuga emirembe gyonna.

¹¹MUKAMA awa abantu be amaanyi; MUKAMA awa abantu be emirembe.

Zabbuli 30

Zabbuli n'Oluyimba. Okuwaayo Yeekaalu. Zabbuli ya Dawudi.

¹Nnaakugulumizanga, Ayi MUKAMA, kubanga wannyimusa; n'otoganya balabe bange kunneeyagalirako.

²Ayi MUKAMA, nakukaabirira onnyambe, n'omponya.

³Ayi MUKAMA, omwoyo gwange waguggya emagombe, n'omponya ekinnya.

⁴Muyimbire MUKAMA nga mumutendereza, mmwe abatukuvu be; mutendereze erinny lye ettukuvu.

⁵Kubanga obusungu bwe bwa kiseera buseera, naye obulungi bwe bwa mirembe gyonna. Amaziga gayinza okubaawo ekiro kyokka essanyu ne lijja nga bukedde.

⁶Bwe namala okunywera ne njogera nti, "Sigenda kusiguukululwa."

⁷Ayi MUKAMA, bwe wanjalaga, wanyweza olusozi lwange; naye bwe wankweka amaaso go ne neeraliikirira.

⁸Gewe gwe nakoowoola, Ayi MUKAMA; ne nkukaabirira Mukama, onsaasire.

⁹"Kingasa ki bwe nzika mu kinnya ne nzikirira? Enfuufu eneekutenderezanga n'etegeeza abantu obwesigwa bwo?

¹⁰Mpuliriza, Ayi MUKAMA, onsaasire; Ayi MUKAMA, onnyambe."

¹¹Ofudde okwaziirana kwange amazina; onnyambuddemu ebibukutu, n'onnyambaza essanyu.

¹²Omutima gwange gulemenga kusirika busiris, wabula gukuyimbirenga ennyimba ez'okukutenderezanga. Ayi MUKAMA, Katonda wange, nnaakwebazanga emirembe gyonna.

Zabbuli 31

Ya Mukulu wa Bayimbi. Zabbuli ya Dawudi.

- 1 Ayi MUKAMA, ggwe kiddukiro kyange, leka nneme kuswazibwa. Ndokola mu butuukirivu bwo.
- 2 Ontegere okutu kwo oyanguwe okunziruukirira. Beera ekiddukiro kyange eky'olwazi era ekigo eky'amaanyi eky'okumponya.
- 3 Nga bw'oli olwazi lwange era ekigo kyange; olw'erinnya lyo onkulembebere era onnuujjamye.
- 4 Omponye mu mutego gwe banteze; kubanga ggwe kiddukiro kyange.
- 5 Nteeka omwoyo gwange mu mikono gyo; ondokole, Ayi MUKAMA, Katonda ow'amazima.
- 6 Nkyawa abo abeesiga bakatonda abalala; nze nneesiga MUKAMA.
- 7 Nnaajaguzanga ne nsanyukira mu kwagala kwo, kubanga olabye okubonaabona kwange era omanyi ennaku endi ku mwoyo.
- 8 Tompaddeeyo mu balabe bange, naye otadde ebigure byange mu kifo ekigazi.
- 9 Onsaasire, Ayi MUKAMA, kubanga ndi mu nnaku nnyingi; amaaso gange gakooye olw'ennaku; omwoyo gwange n'omubiri gwange nabyo binafuye olw'obuyinike.
- 10 Obulamu bwange buweddewo olw'obunaku n'emyaka gyange ne giggwaawo olw'okusinda. Amaanyi gampweddemu olw'okwonoona kwange, n'amagumba ganafuye.
- 11 Abalabe bange bona bansekerera, banneetamiddwa. Nfuuse ekyenyinyalwa mu mikwano gyange, n'abandaba mu kkubo banziruka.
- 12 Nneerabiddwa ng'eyafa edda; nfuuse ng'ekibumbe ekyatifu.
- 13 Buli ludda mpulirayo obwama nga bangeya; bye bantessaako nga basala olukwe okunzita.
- 14 Naye nneesiga ggwe, Ayi MUKAMA; nga njogera nti, "Oli Katonda wange."
- 15 Entuuko zange ziri mu mikono gyo; ondokole mu mikono gy'abalabe bange n'abangigganya.
- 16 Amaaso go ogatunuulize omuweereza wo; ondokole n'okwagala kwo okutaggwaawo.
- 17 Ayi MUKAMA tondeka kuswazibwa, kubanga nkukoowoola; leka abo ababi baswale, era bagalamire emagombe nga basirise.
- 18 Akamwa kaabwe akayogera eby'obulimba kasirisibwe, kubanga boogera ebitaliimu ku batuukirivu bo, nga babyogeza amalala n'okunyooma.

¹⁹ Obulungi bwo, bwe waterekera abo abakutya nga buyitirivu, n'obuwa mu lwatu abo abaddukira gy'oli.

²⁰ Obalabirira n'obawonya enkwe z'abalabe baabwe, n'obakuma bulungi mu nnyumba yo, n'ennyombo z'abantu ne zitabatuukako.

²¹ MUKAMA atenderezebwenga kubanga yandaga okwagala kwe okungi, bwe nnali mu kibuga kye baali bazingizza.

²² Bwe natya ennyo ne njogera nti, "Ngobeddwa mu maaso go." Kyokka wampulira nga nkukaabirira n'onsaasira.

²³ Mwagalenga MUKAMA abatukuvu be mwenna! MUKAMA akuumu abo abamwesiga, naye ab'amalala abalonereza mu bujjuvu.

²⁴ Muddeemu amaanyi mugume omwoyo mmwe mwenna abalina essuubi mu MUKAMA.

Zabbuli 32

Zabbuli ya Dawudi.

¹ Alina omukisa oyo asonyiyiddwa ebyonoono bye ekibi ne kiggyibwawo.

² Alina omukisa omuntu oyo MUKAMA gw'atakyabalira kibi kye, ne mu mutima gwe nga temuli bukuusa.

³ Bwe nasirikiranga ekibi kyange, ne nkogga, kubanga nasindanga olunaku lwonna.

⁴ Wambonerezanga emisana n'ekiro, amaanyi ne ganzigwamu ng'amazzi bwe gakalira mu kyeya.

⁵ Awo ne nkwatulira ekibi kyange, ne sibikkirira kwonoona kwange. Ne njogera nti, "Leka neenenyeze MUKAMA ebibi byange." Bw'otyo n'onsonyiwa, n'onziggyako omusango gw'ebibi byange.

⁶ Noolwekyo abaweereza bo bona abeesigwa bakwegayirire ng'okyalabika; oluvannyuma ebizibu bwe birijja, ng'amazzi ag'amaanyi amangi tebiribatuukako.

⁷ Oli kifo kyange mwe nneekweka, ononkuumanga ne situukwako kabi era ononneetooloozanga ennyimba ez'obulokozi.

⁸ Nnaakulagiranga era ne nkuyigiriza ekkubo mw'onootambuliranga; nnaakuwanga amagezi nga bwe nkulabirira.

⁹ Temubeeranga ng'embalaasi oba ennyumbu ezitategeera, ze bateekwa okussa ekyuma mu kamwa ekisibwa ku lukoba, ziryoke zifugibwe zijje gy'oli.

¹⁰ Ababi balaba ennaku nnyingi; naye abeesiga MUKAMA bakuumirwa mu kwagala kwe okutaggwaawo.

¹¹ Musanyukire mu MUKAMA era mujaguze mmwe abatuukirivu, era muyimbire waggulu n'essanyu mmwe abalina omutima omulongoofu.

Zabbuli 33

Zabbuli ya Dawudi.

¹ Muyimbire MUKAMA n'essanyu mmwe abatuukirivu; kisaanira abalongoofu okumutenderezanga.

² Mutendereze MUKAMA n'ennanga, mumukubire ennyimba ku ntongooli ey'enkoba ekkumi.

³ Mumuyimbire oluyimba oluggya; musune enkoba ze ntongooli n'amagezi nga bwe muyimba mu ddoboozi ery'omwanguka olw'essanyu.

⁴ Kubanga ekigambo kya MUKAMA kituufu era kya mazima; mwesigwa mu buli ky'akola.

⁵ MUKAMA ayagala obutuukirivu n'obwenkanya. Ensi ejjudde okwagala kwa MUKAMA okutaggwaawo.

⁶ MUKAMA yayogera kigambo, eggulu ne likolebwa; n'assiza omukka mu kamwa ke eggye lyonna ery'omu ggulu ne litondebwa.

⁷ Yakuungaanya amazzi g'enyanja mu ntuumu, agayanja n'agasibira mu masitoowa gaago.

⁸ Ensi yonna esaana etyenga MUKAMA, n'abantu ab'omu mawanga gonna bamussengamu ekitiibwa;

⁹ kubanga yayogera bwogezi n'etondebwa, n'alagira n'eyimirira nga nywevu.

¹⁰ MUKAMA asansulula enteekateeka y'amawanga; alemesa abantu okutuukiriza bye bagenderera.

¹¹ Naye enteekateeka za MUKAMA zibeerawo nga nywevu emirembe gyonna; n'ebigendererwa by'omutima gwe bya lubeerera.

¹² Lirina omukisa eggwanga eririna Katonda nga ye MUKAMA waalyo, ng'abantu baalyo yabalonda babeere bantu be.

¹³ MUKAMA asinziira mu ggulu n'alaba abaana b'abantu bona;

¹⁴ asinziira mu kifo kye mw'abeera n'alaba abantu bona abali ku nsi.

¹⁵ Ye y'ategeka ebirowoozo byabwe bona ne yeetegereza byonna bye bakola.

¹⁶ Tewali kabaka asobola kuwona olw'obunene bw'eggye lye; era tewali mulwanyi ayinza kuwona olw'amaanyi ge amangi.

¹⁷ Okusuubira embalaasi yokka okukuwanguza olutalo kuteganira bwerere; newaakubadde erina amaanyi mangi naye tesobola kulokola.

¹⁸ Naye amaaso ga MUKAMA galabirira abo abamutya; abalina essuubi mu kwagala kwe okutaggwaawo,

¹⁹ abawonya okufa, era abawonya enjala.

²⁰ Tulindirira MUKAMA nga tulina essuubi, kubanga ye mubeezi waffe era ye ngabo yaffe.

²¹ Mu ye emitima gyaffe mwe gijaguliza, kubanga twesiga erinnya lye ettukuvu.

²² Okwagala kwo okutaggwaawo kubeerenga mu ffe, Ayi MUKAMA, ng'essuubi lyaffe bwe liri mu ggwe.

Zabbuli 34

Ya Dawudi. Bwe yeefuula okuba omugu w'eddalu mu maaso ga Abimerek, oluvannyuma eyamugoba, era naye n'amuviiira.

¹ Nnaagulumizanga MUKAMA buli kiseera, akamwa kange kanaamutenderezanga bulijo.

² Omwoyo gwange gunenyumiririzanga mu MUKAMA; ababonyaabonyezebwa bawulire bajaguzenga.

³ Kale tutendereze MUKAMA, ffenna tugulumizenga erinnya lye.

⁴ Nanoonya MUKAMA, n'annyanukula; n'ammalamu okutya kwonna.

⁵ Abamwesiga banajjulanga essanyu, era tebaaswalenga.

⁶ Omunaku ono yakoowoola MUKAMA n'amwanukula, n'amumalako ebyali bimuteganya byonna.

⁷ Malayika wa MUKAMA yeebungulula abo abatya MUKAMA, n'abawonya.

⁸ Mulegeeko mulabe nga MUKAMA bw'ali omulungi! Balina omukisa abaddukira gy'ali.

⁹ Musseemu MUKAMA ekitiibwa mmwe abatukuvu be, kubanga abamutya tebaajulenga.

¹⁰ Empologoma zirumwa enjala ne ziggwaamu amaanyi; naye abo abanoonya MUKAMA, ebirungi tebiibaggwengako.

¹¹ Mujje wano baana bange, mumpulirize; mbayigirize okutya MUKAMA.

¹² Oyagala okuwangaala mu bulamu obulungi, okuba mu ssanyu emyaka emingi?

¹³ Olulimi lwo lukuumenga luleme okwogera ebitasaana, n'akamwa ko kaleme okwogera eby'obulimba.

¹⁴ Lekeraawo okukola ebibi, okolenga ebirungi; noonya emirembe era ogigobererenga.

¹⁵ Amaaso ga MUKAMA gatunuulira abo abatuukirivu, n'amatu ge gawulira okukaaba kwabwe.

¹⁶ MUKAMA amaliridde okumalawo abakola ebibi, okubasaanyaawo ddala n'obutaddayo kujjukirwa ku nsi.

¹⁷ Abatuukirivu bakooowola MUKAMA n'abawulira n'abawonya mu byonna ebiba bibateganya.

¹⁸ MUKAMAabeera kumpi n'abalina emitima egimenyese, era alokola abo abalina emyoyo egyennyise.

¹⁹ Omuntu omuntuukirivu ayinza n'okuba n'ebizibu bingi, naye byonna MUKAMA abimuyisaamu.

²⁰ Amagumba ge gonna MUKAMA agakuumma, ne watabaawo na limu limenyeka.

²¹ Ekibi kiritta abakola ebibi, n'abalabe b'abatuukirivu balibonerezebwa.

²² MUKAMA anunula abaweereza be; so tewali n'omu ku abo abaddukira gy'ali alibonerezebwa.

Zabbuli 35

Zabbuli ya Dawudi.

¹ Ayi MUKAMA, wakanya abo abampakanya, lwanyisa abo abannwanyisa.

² Golokoka okwate engabo, n'akagabo onziruukirire.

³ Galula effumu, abangigganya obazibire ekkubo; otegeeze omwoyo gwange nti, "Nze bulokozi bwo."

⁴ Abo bona abannoonya okunzita bajolongebwe era baswazibwe; abo abateesa okunsanyaawo bazzibweyo ennyuma babune emiwabo.

⁵ Babe ng'ebisusunku ebifuumuulibwa empewo, malayika wa MUKAMA ng'abagoba.

⁶ Ekkubo lyabwe libe lya kizikiza era lijjule obuseerezi, ne malayika wa MUKAMA ng'abagoba.

⁷ Nga bwe bantega omutego nga siriiko kye mbakoze, ne bansimira n'ekinnya mu kkubo lyange awatali nsongá,

⁸ bazikirizibwe nga tebategedde, n'omutego gwe banteze be baba bagugwamu, era bagwe ne mu kinnya kiri bazikirire.

⁹ Omwoyo gwange ne gulyoka gujaguliza mu MUKAMA, ne gusanyukira mu bulokozi bwe.

¹⁰ Amagumba gange galyogera nti, "Ani afaanana nga ggwe, Ayi MUKAMA? Kubanga abaavu obaddukirira n'obawonya ababasinza amaanyi, n'abali mu kwetaaga n'obawonya abanyazi."

¹¹ Abajulizi abakambwe bagolokoka ne bambuuza ebintu bye sirinaako kye mmanyi.

¹² Bwe mbayisa obulungi bo bampisa bubi, ne banakuwaza omwoyo gwange.

¹³ So nga bwe baalwala nanakuwala ne nnyambala ebibuketu, ne neerumya nga nsiiba, ne nsaba MUKAMA nga nkotese omutwe, naye okusaba kwange bwe kutaddibwamu,

¹⁴ ne mbeera mu nnaku ng'ankungubagira ow'omukwano oba owooluganda nkoteka omutwe gwange mu buyinike ng'akaabira nnyina.

¹⁵ Naye bwe nagwa mu kabi ne beekuŋjaanya nga basanyuse; ne bannumba nga simanyi, ne bampayiriza obutata.

¹⁶ Banduulidde n'ettima ng'abatamanyi Katonda bwe bakola, ne bannumira obujiji.

¹⁷ Ayi Mukama, olituusa ddi ng'otunula butunuzi? Nziruukirira nga bannumba, obulamu bwange obuwonye okutaagulwataagulwa, obulamu bwange obw'omuwendo eri empologoma zino.

¹⁸ Nnaakwebalizanga mu lukuŋjaana olukulu, ne nkutenderezanga mu kibiina ky'abantu abangi ennyo.

¹⁹ Tokkiriza balabe bange kunneeyagalirako, abankyawa awatali nsongá; abankyayira obwerefere tobakkiriza kunziimuula.

²⁰ Teboogera bya mirembe, wabula okuwaayiriza abantu abeetuulidde emirembe mu nsi.

²¹ Banjasamiza akamwa kaabwe ne boogera nti, "Leero luno, ky'okoze tukirabye n'amaaso gaffe."

²² Bino byonna obirabye, Ayi MUKAMA. Noolwekyo tosirika. Tonsuulirira, Ayi Mukama.

²³ Golokoka ojje onnyambe; nnwanirira Ayi Katonda wange era Mukama wange.

²⁴Mu butuukirivu bwo nnejjeereza, Ayi MUKAMA Katonda wange, tobaganya kunneeyagalirako.

²⁵Tobaleka kulowooza nti, “Leero luno! Kino kye twali twagala!” Oba nti, “Tumusaanyizzaawo!”

²⁶Abo bona abanneeyagalirako olw'ennaku yange ne beesanyusa, batabulwetabulwe era baswazibwe; abo bona abanneegulumirizaako baswazibwe era banyoomebwe.

²⁷Abo abasanyuka ng'annejeeereza, baleekaanire waggulu olw'essanyu n'okujaganya; era boogerenga nti, “MUKAMA agulumizibwe, asanyuka omuweereza we ng'atebenkedde.”

²⁸Olulimi lwange lunaayogeranga ku butuukirivu bwo, era nnaakutenderezanga olunaku lwonna.

Zabbuli 36

Ya Mukulu wa Bayimbi. Zabbuli ya Dawudi.

¹Nnina obubaka mu mutima gwange obukwata ku bwonoonyi bw'omukozi w'ebibi. N'okutya tatya Katonda.

²Ye nga bw'alaba yeewaanawaana n'atasobola kutegeera oba okukyawa ekibi kye.

³Ebigambo ebiva mu kamwa ke biba bibi era nga bya bulimba; takyalina magezi era takyakola birungi.

⁴Ne ku kitanda kye afumiitiriza ebibi by'anaakola; amalirira okutambuliranga mu kkubo ekyamu, era ebitali bituufu tabywala.

⁵Okwagala kwo, Ayi MUKAMA, kutuuka ne ku ggulu; obwesigwa bwo butuuka ku bire.

⁶Obutuukirivu bwo bugulumivu ng'agasozi aganene, n'obwenkanya bwo buwanvu nnyo ng'ennyanja ennene ennyo. Ayi MUKAMA, olabirira abantu n'ebisolo.

⁷Okwagala kwo okutaggwaawo nga tekugeraageranyizika. Ab'ebitiibwa n'abatali ba bitiibwa baddukira mu biwaawaatiro byo.

⁸Balya ku bingi eby'omu nnyumba yo ne bakkuta; obawa ebyokunywa by'omugga gwo ogwesiimisa.

⁹Kubanga gw'olina ensulo ey'obulamu, era gw'otwakiza omusana.

¹⁰Yongeranga okwagala abo abakutegeera, era n'obutuukirivu bwo eri abo abalina emitima emirongoofu.

¹¹Ab'amalala baleme okunninnyirira, wadde ababi okunsindiikiriza.

¹²Laba, ababi nga bwe bagudde! Basuuliddwa wansi era tebasobola na ku golokokawo.

Zabbuli 37

Zabbuli ya Dawudi.

¹Teweeraliikiriranga olw'abantu ababi, so tokwatirwanga buggyabo abakola ebitasaana.

²Kubanga bagenda kuwotoka ng'omuddo, bafiire ddala ng'essubi ekkalu.

³Weesigenga MUKAMA okolenga bulungi, onoobeeranga n'emirembe mu nsi n'ofuna ebirungi.

⁴Sanyukiranga mu MUKAMA, anaakuwanga omutima gwo bye gwetaaga.

⁵By'okola byonna byesigamyenga ku MUKAMA; mwesigenga, anaakukoleranga ky'oyagala.

⁶Anaayolekanga obutuukirivu bwo ng'omusana, n'obwenkanya bw'ebikolwa byo ne bwakaayakana ng'enjuba ey'omu ttuntu.

⁷Siriikirira awali MUKAMA, ogumiikirize ng'olindirira ky'anaakola. Tofangayo ng'abalala bafunye ebirungi nga bayita mu kutetenkanya kwabwe okubi.

⁸Tonyiiganga era weewale ekiruyi; teweeraliikiriranga kubanga bivaamu bibi byereere.

⁹Kubanga ababi balisalibwako, naye abeesiga MUKAMA baligabana ensi.

¹⁰Wanaayitawo akabanga katono ababi baggweerewo ddala; wadde mulibanoonya temulibalabako.

¹¹Naye abateefu baligabana ensi ne beeyagalira mu ddembe eritatendeka.

¹²Ababi basalira abatuukirivu enkwe, ne babalumira obujiji.

¹³Naye Mukama asekerera ababi, kubanga amanyi ng'entuuko zaabwe ziri kumpi.

¹⁴Ababi basowoddeyo ebitala byabwe ne baleega emitego gy'obusaale, batte abaavu n'abali mu kwetaaga era basaanyeewo abo abatambulira mu kkubo eggolokofu.

¹⁵Naye ebitala byabwe birifumita mitima gyabwe gyennyini, n'emitego gyabwe eg'yobusaale girimenyebwa.

¹⁶Ebitono omantuukirivu by'alina bisinga obugagga bw'ababi abangi;

¹⁷ kubanga amaanyi g'abakola ebibi galikoma, naye MUKAMA anaawaniriranga abatuukirivu.

¹⁸ Ennaku z'abataliiko kya kunenyezebwwa, zimanyibwa MUKAMA, era omugabo gwabwe gunaabanga gwa lubeerera.

¹⁹ Mu biseera eby'akabi ebyakatyabaga tebaayongoberenga, ne mu biro eby'enjala banakkusibwanga.

²⁰ Naye ababi balizikirira; abalabe ba MUKAMA balifaanana ng'obulungi bwe ttale, era baliggwaawo, baliggwaawo ng'omukka.

²¹ Ababi beewola, ne batasasula; naye abatuukirivu basaasira era bagaba bingi.

²² Abo MUKAMA b'awa omukisa baligabana ensi, naye abo b'akolimira balizikirizibwa.

²³ MUKAMA bw'asanyukira ekkubo ly'omuntu, alunjamya entambula ye.

²⁴ Ne bw'aneesittalanga, taagwenga wansi, kubanga omukono gwa MUKAMA gumuwanirira.

²⁵ Nnali muto kati nkaddiye, naye sirabanga batuukirivu nga balekeddwa ttayo, wadde abaana baabwe nga basabiriza ekyokulya.

²⁶ Bagaba bingi bulijjo, era baazika ku byabwe n'essanyu. Abaana baabwe banaaweebwanga omukisa.

²⁷ Muve mu bibi, mukolenga ebirungi, munaabanga balamu emirembe gyonna.

²⁸ Kubanga MUKAMA ayagala ab'amazima, n'abeesigwa be taabaabulirenga. Banaalabirirwanga emirembe gyonna; naye ezzadde ly'ababi lirizikirizibwa.

²⁹ Abatuukirivu baligabana ensi ne babeeranga omwo emirembe gyonna.

³⁰ Akamwa k'omutuukirivu koogera bya magezi, n'olulimi lwe lwogera bya mazima.

³¹ Amateeka ga Katonda we gali mu mutima gwe, era ebigure bye tebiseerera.

³² Omubi ateega omutuukirivu ng'anoonya okumutta,

³³ naye MUKAMA taliganya babi kuwangula, wadde okukkiriza abatuukirivu okusingibwa omusango.

³⁴ Lindirira MUKAMA n'okugumiikiriza, otambulirenga mu makubo ge; naye alikugulumiza n'akuwa ensi; ababi bwe balisalirwako olomitegeera.

³⁵ Nalaba omuntu omubi era omukambwe ennyo, naye nga buli ky'akola kimugendera bulungi, ng'agimuse ng'omuti ogukulidde mu ttaka eggimu,

³⁶ naye teyalwawo n'abula, ne mmumagamaga buli wantu, nga talabikako.

³⁷ Tunuulira omuntu ataliiko kya kunenyezebwa, wekkaanye oyo omulongoofu; obulamu bwe bunajjulanga emirembe.

³⁸ Naye aboonoonyi bona balizikirizibwa; ezzadde ly'ababi lirisaanyizibwawo.

³⁹ Obulokozi bw'abatuukirivu buva eri MUKAMA; ye ky'ekigo kyabwe ekinywevu gye baddukira mu kiseera eky'emitaawaana.

⁴⁰ MUKAMA abayamba n'abalokola; abaggya mu mikono gy'ababi n'abalokola, kubanga gy'ali gye baddukira.

Zabbuli 38

Zabbuli ya Dawudi, ey'okujukiza.

¹ Ayi MUKAMA tonnenya ng'okyaliko obusungu, oba okunkangavvula ng'oliko ekiruyi.

² Kubanga obusaale bwo bunfumise, n'omuggo gwo gunkubye nnyo.

³ Obusungu bwo bundwazizza nzenna, n'amagumba gange gonna gansagala olw'ebyonoono byange.

⁴ Omusango gwe nzizizza guyitiridde, gunzitoowerera ng'omugugu omunene oguteetikkika.

⁵ Ebiwundu byange bitanye era biwunya, olw'okwonoona kwange okw'obusirusiru.

⁶ Nkootakoota era mpweddemu ensa, ηnjenda nsinda obudde okuziba.

⁷ Omugongo gunnuma nnyo, ne mu mubiri gwange temukyali bulamu.

⁸ Sikyalimu maanyi era nzenna mmenyesemenyese; nsinda buli bbanga olw'obulumi mu mutima.

⁹ Mukama, bye neetaaga byonna obimanyi, n'okusinda kwange okuwulira.

¹⁰ Omutima gumpejjawejja, amaanyi gampweddemu; n'okulaba sikyalaba.

¹¹ Mikwano gyange ne be nayitanga nabo banneewala olw'amabwa gange; ne bannange tebakyasansemberera.

¹² Abaagala okunzita bantega emitego, n'abo abangigganya bateesa okummalawo. Buli bbanga baba bateesa kunkola kabi.

¹³ Ndi ng'omuggavu w'amatu, atawulira; nga kiggala, atayogera.

¹⁴ Nfuuse ng'omuntu atalina ky'awulira, atasobola kwanukula.

¹⁵ Ddala ddala nnindirira ggwe, Ayi MUKAMA, onnyanukule, Ayi Mukama Katonda wange.

¹⁶ Tobakkiriza kunneeyagalirako, oba okunneegulumirizaako ng'ekigere kyange kiseeredde.

¹⁷ Kubanga nsememberedde okugwa, era nga nnumwa buli kiseera.

¹⁸ Ddala ddala njatula ebyonoono byange; nnumirizibwa ekibi kyange.

¹⁹ Abalabe bange bangi era ba maanyi; n'abo abankayira obwerefere bangi nnyo.

²⁰ Abalabe bange bankyawa olw'okuba omulongoofu, era bwe nkola ebirungi banjogerako ebitasaana.

²¹ Ayi MUKAMA, tonjabulira; tobeera wala nange, Ayi Katonda wange.

²² Ayi Mukama Omulokozi wange, yanguwa okumbeera.

Zabbuli 39

Ya Mukulu wa Bayimbi: Ya Yedusuni. Zabbuli ya Dawudi.

¹ Nagamba nti, "Nneekuumanga mu bye nkola, n'olulimi lwange lulemenga okwogera ebitali birongoofu. Abakola ebitali bya butuukirivu bwe banaabanga awamu nange nnaabuniranga bubunizi ne soogera."

² Naye bwe nasirika ne sibaako kye njogedde wadde ekirungi, ate obuyinike bwange ne bweyongera.

³ Omutima gwange ne gumbabuukirira munda yange. Bwe nnali nkyakifumiitirizaako, omuliro ne gukoleera munda yange; kyenava njogera nti:

⁴ "Ayi MUKAMA, ntegeeza entuuko zange nga bwe ziriba, n'ennaku ze nsigazza; ommanyise ebiseera byange mu bulamu buno bwe biri ebimpi ennyo."

⁵ Ennaku z'obulamu bwange wazitegeka ziri ng'oluta. Obungi bw'emyaka gyange tobulabamu kantu. Buli muntu, mukka bukka.

⁶ Ddala ddala omuntu ku nsi ali ng'ekisiikirize. Atawaana mu kino ne mu kiri, naye byonna butaliimu. Akuŋjaanya obugagga, so nga tamanyi agenda kubutwala.

⁷ Naye kaakano, Ayi Mukama, nnoonya ki? Essuubi lyange liri mu ggwe.

⁸ Ondokole mu bibi byange byonna, abasirusiru baleme okunsekerera.

⁹ Nasirika busirisi, saayasamya kamwa kange; kubanga kino ggwe wakikola.

¹⁰ Olekere awo okunkuba, emiggo gy'onkubye giyitiridde!

¹¹ Onenya omuntu ng'omukangavvula olw'ekibi kye ky'akola, omumaliramu ddala ensa, ng'ennyenje bw'ekola olugoye. Ddala omuntu mukka bukka.

¹² Ayi MUKAMA, wulira okusaba kwange, owulire okukaaba kwange onnyambe. Tonsiriikirira nga nkukaabirira. Kubanga ndi mugenyi bugenyi, omutambuze, nga bajjajjange bona bwe baali.

¹³ Ndeka nsanyukemu, nga sinnava mu nsi muno, ne mbulirawo ddala.

Zabbuli 40

Ya Mukulu wa Bayimbi. Zabbuli ya Dawudi.

¹ Nalindirira MUKAMA n'obugumiikiriza, n'antegera okutu, n'awulira okukoowoola kwange,

² n'anziggya mu kinnya eky'entiisa, n'annyinyulula mu bitosi, n'anteeka ku lwazi olugumu kwe nyimiridde.

³ Anjigirizza oluyimba oluggya, oluyimba olw'okutenderezanga Katonda waffe. Bangi bino balibiraba ne batandika okutya MUKAMA n'okumwesiganga.

⁴ Balina omukisa abo abeesiga MUKAMA, abatagoberera ba malala abasinza bakatonda ab'obulimba.

⁵ Ayi MUKAMA Katonda wange, otukoledde eby'ewunyisa bingi. Ebintu by'otuteekeddetekedde tewali ayinza kubikutegeeza. Singa ngezaako okubittottola, sisobola kubimalayo byonna olw'obungi bwabyo.

⁶ Ssaddaaka n'ebiweebwayo tewabyagala. Ebiweebwayo ebyokebwa olw'okutangirira ebibi, tobyetaaga. Naye onzigudde amatu.

⁷ Kyenava njogera nti, "Nzuuno, nzize nga bwe kyampandiikibwako mu muzingo gw'ekitabo."

⁸ Nsanyukira okukola ky'oyagala, Ayi Katonda wange, kubanga amateeka go gali mu mutima gwange.

⁹ Ntegeeza obutuukirivu mu lukuŋjaana olunene. Sisirika busirisi, nga naawe bw'omanyi, Ayi MUKAMA.

¹⁰ Bye mmanyi ku butuukirivu bwo sisirika nabyo mu mutima gwange, naye ntegeeza ku bwesigwa bwo n'obulokozi bwo. Abantu nga bakuŋjaanye, sirema kubategeeza ku mazima go n'okwagala kwo okungi.

¹¹ Onsasirenga bulijo, Ayi MUKAMA, amazima n'okwagala kwo byeyongerenga okunkuuma.

¹² Kubanga ebizibu bye siyinza na kubala binneetoolodde; ebibi byange binsukiridde, sikyasobola na kulaba; bisinga enviiri ez'oku mutwe gwange obungi, mpweddemu amaanyi.

¹³ Onsasire ayi MUKAMA ondokole; Ayi MUKAMA, oyanguwe okumbeera.

¹⁴ Abo abaagala okunzita batabuketabuke baswale; n'abo bona abagenderera okummalawo bagobebwe nga baswadde.

¹⁵ Abo abankubira akasonso baswazibwe nnyo.

¹⁶ Naye abo abakunoonya basanyuke era bajaguze; abo abaagala obulokozi bwo boogerenga bulijjo nti, "MUKAMA agulumizibwenga."

¹⁷ Ndi mwavu, eyeetaaga ennyo. Mukama ondowoozeeko. Tolwawo, Ayi Katonda wange. Ggwe mubeezi wange era Omulokozi wange.

Zabbuli 41

Ya Mukulu wa Bayimbi. Zabbuli ya Dawudi.

¹ Alina omukisa asaasira omunaku; MUKAMA amulokola ku lunaku olw'akabi.

² MUKAMA anaamukuumanga anaawonyanga obulamu bwe, era anaamuwanga omukisa mu nsi; n'atamuwaayo eri okwegomba kw'abalabe be.

³ MUKAMA anaamujjanjabanga nga mulwadde; n'amuwonya mu bulumi.

⁴ Nayogera nti, "Ayi MUKAMA onsaasire omponye; kubanga nnyonoonye mu maaso go."

⁵ Abalabe bange boogeza obukyayi nti, "Alifa ddi n'okwerabirwa ne yeerabirwa?"

⁶ Bwe bajja okundaba beefuula mikwano gyange; naye munda yaabwe bankyawa era basanyuka okulaba nga ngalamidde awo nnumwa. Bwe bansiibula bagenda beesekera nga bwe baduula.

⁷ Abalabe bange bona abo bateesa mu kaama; nga banjogerako ebitali birungi.

⁸ Boogera nti, "Endwadde emukutte mbi nnyo, emukubyie wansi tayinza kuwona."

⁹ Era ne mukwano gwange gwe neesiganga bwe twalyanga, anneefuukidde.

¹⁰ Naye ggwe, Ayi MUKAMA, onsaasire, onzizeemu amaanyi ndyoke nneesasuze.

¹¹ Mmanyi ng'onsanyukira, kubanga omulabe wange tampangudde.

¹² Onnywezezza mu bwesimbu bwange, ne mbeera mu maaso go ennaku zonna.

¹³ Atenderezebwenga MUKAMA Katonda wa Isirayiri, oyo eyabaawo okuva edda n'edda lyonna n'okutuusa emirembe gyonna. Amiina era Amiina.

Zabbuli 42

EKITABO II Zabbuli 42–72

Ya Mukulu wa Bayimbi: Zabbuli ya Batabani ba Koola.

¹ Ng'emppeewo bw'ewejjawejja olw'amazzi, n'emmeeme yange bw'etyo bwe wejjawejja ku lulwo, Ayi Katonda.

² Emmeeme yange eyaayaanira Katonda, Katonda omulamu. Ndigenda ddi ne nsisinkana Katonda?

³ Nkaabirira MUKAMA emisana n'ekiro. Amaziga gange gabadde emmere yange emisana n'ekiro, abantu ne banjamba nti, "Katonda wo ali ludda wa?"

⁴ Bino mbijjukira nga nfuka emmeeme yange nga bwe nagendanga n'ekibiina ekinene, ne nkulembera ennyiriri z'abantu empanvu, nga tugenda mu nnyumba ya Katonda, nga tuyimba mu ddoboozi ery'omwanguka n'okwebaza mu kibiina ekijaguza.

⁵ Lwaki oweddemu amaanyi ggwe emmeeme yange? Lwaki otabusetabuse mu nda yange? Essuubi lyo liteke mu Katonda, kubanga natenderezanga omulokozi wange era Katonda wange; ye mubeezi wange.

⁶ Ayi Katonda wange, emmeeme yange yennyise, yeeraliikiridde; naye nkujjukira olw'ebyo bye wakola mu nsi ya Yoludaani ne ku nsozi engulumivu eza Kalumooni ne ku Lusozi Mizali.

⁷ Obuziba bukoowoola obuziba, olw'okuwuluguma kw'ebiyiriro amayengo n'amasingisira go bimpiseeko.

⁸ MUKAMA alaga okwagala kwe emisana n'ekiro ne muyimbira oluyimba lwe; y'essaala eri Katonda w'obulamu bwange.

⁹ Njamba Katonda, olwazi lwange nti, "Lwaki onneerabidde? Lwaki njenda nkungubaga olw'okujoogebwa abalabe bange?"

¹⁰ Mbonyaabonyezebwa ng'abalabe bange bancocca, nga bwe bagamba buli kiseera nti, "Katonda wo ali ludda wa?"

¹¹ Lwaki wennyise Ayi ggwe emmeeme yange? Lwaki otabusetabuse mu nda yange? Weesigenga Katonda, kubanga nnaamutenderezanga, Omulokozi wange era ye Katonda wange.

Zabbuli 43

¹ Ayi Katonda, onnejjeereze omponye eggwanga eritatya Katonda ondokole mu mikono gy'abantu abalimba, abakola ebibi.

² Ddala ddala ggwe Katonda, ekigo kyange eky'amaanyi. Lwaki ondese? Lwaki njenda nkaaba nga nnyigirizibwa omulabe?

³ Kale tuma omusana gwo n'amazima binnujjamye; bindeete ku lusozi lwo olutukuvu, mu kifo mw'obeera.

⁴ Ne ndyoka ndaga ku kyoto kya Katonda, eri Katonda wange era essanyu lyange eritasingika. Weewaawo nnaakutenderezanga n'ennanga, Ayi Katonda, Katonda wange.

⁵ Lwaki wennyise ggwe emmeeme yange? Lwaki otabusetabuse munda yange? Weesige Katonda; kubanga nnaamutenderezanga, Omulokozi wange era Katonda wange.

Zabbuli 44

Ya mukulu wa bayimbi. Zabbuli ya Batabani ba Koola.

¹ Ayi Katonda, twawulira n'amatu gaffe, bajjajjaffe baatubuulira, ebyo bye wakola mu biro byabwe, mu nnaku ez'edda ezaayita.

² Nga bwe wagoba amawanga mu nsi n'ogiwa bajjajjaffe, wasaanyaawo amawanga n'okulaakulanya bajjajjaffe.

³ Ekitala kyabwe si kye kyabaleetera okuwangula ensi, n'omukono gwabwe si gwe gwabalokola; wabula baawangula n'omukono gwo ogwa ddyo awamu n'obulungi bwo, kubanga wabaagala.

⁴ Ggwe oli Kabaka wange, era Katonda wange; awa Yakobo obuwanguzi.

⁵ Ku lulwo tunaawangulanga abalabe baffe; ku lw'erinnya lyo tunaalinniriranga abalabe baffe.

⁶ Ddala ddala omutego gwange ogw'obusaale si gwe neesiga, n'ekitala kyange si kye kimpa obuwanguzi.

⁷ Wabula ggwe otulokola mu balabe baffe, n'oswaza abo abatuyigganya.

⁸ Twenyumiririza mu Katonda olunaku lwonna. Era tunaatenderezanga erinnya lyo emirembe gyonna.

⁹ Naye kaakano otusudde ne tuswala; era tokyatabaala na magye gaffe.

¹⁰ Watuzza emabega okuva mu bifo mwe twali ng'abalabe baffe balaba, abatuyigganya ne batunyaga.

¹¹ Watuwaayo okuliibwa ng'endiga; n'otusaasaanya mu mawanga.

¹² Watunda abantu bo omuwendo mutono nnyo, n'otobaako ky'oganyulwa.

¹³ Watufuula ekivume eri baliraanwa baffe, ekinyoomebwa era ekisekererwa abo abatwetoolodde.

¹⁴ Otufudde ekinyoomebwa mu mawanga gonna; era abantu banyeenya emitwe gyabwe.

¹⁵ Nswazibwa obudde okuziba, amaaso gange ne gajjula ensonyi,

¹⁶ olw'abo abangigganya, abanvuma nga tebandabamu ka buntu, olw'omulabe amaliridde okuwoolera eggwanga.

¹⁷ Ebyo byonna bitutuseeko, newaakubadde nga tetukwerabidde, wadde obutagondera ndagaano yo.

¹⁸ Omutima gwaffe tegukuvuddeeko, so tetugaanyi kutambulira mu kkubo lyo.

¹⁹ Naye ggwe otubonerezza n'otulekera emisege, n'otuleka mu kizikiza ekikutte.

²⁰ Ddala singa twerabira erinnya lya Katonda waffe, ne tusinza katonda omulala,

²¹ ekyo Katonda waffe teyandikizudde? Kubanga ye amanyi n'ebikisibwa mu mutima.

²² Katonda waffe, tetukuvuddeeko, kubanga ku lulwo tuttibwa obudde okuziba, era tuli ng'endiga ez'okusalibwa.

²³ Golokoka Ayi Mukama, lwaki weebase? Zuukuka! Totusuula Ayi Mukama!

²⁴ Lwaki otwekwese? Lwaki tofaayo ku kulumwa kwaffe n'okujoogebwa?

²⁵ Ddala ddala tusuuliddwa mu nfuufu; tuli ku ttaka.

²⁶ Golokoka otuyambe; tulokole olw'okwagala kwo okutaggwaawo.

Zabbuli 45

Ya Mukulu wa Bayimbi. Oluyimba “olw'Amalanga.” Zabbuli ya Batabani ba Koola.

¹ Omutima gwange gujjudde ebigambo ebirungi nga nnyimba oluyimba lwa Kabaka. Olulimi lwange kkalaamu y'omuwandiisi omukugu.

² Ggw'osinga abaana b'abantu obulungi; n'akamwa ko nga kafukiddwako amafuta ag'ekisa. Kubanga Katonda akuwadde omukisa emirembe gyonna.

³ Weesibe ekitala kyo, Ayi ggwe ow'amaanyi, yambala ekitiibwa kyo n'obukulu bwo!

⁴ Weebagale embalaasi yo mu kitiiibwa kyo eky'obuwanguzi, ng'olwanirira amazima, obuwombeefu, n'obutuukirivu. Omukono gwo ogwa ddyo gukole ebyewuunyisa.

⁵ Obusaale bwo obwogi bufumite emitima gy'abalabe ba kabaka; afuge amawanga.

⁶ Entebe yo ey'obwakabaka, Ayi Katonda, ya lubeerera; n'omuggo ogw'obwenkanya gwe guliba ogw'obwakabaka bwo.

⁷ Oyagala obutuukirivu n'okyawa okukola ebibi; noolwekyo Katonda, Katonda wo, kyavudde akugulumiza n'akufukako amafuta ag'essanyu okusinga bakabaka banno bona.

⁸ Ebyambalo byo birina akawoowo ka mmooli ne alowe, ne kasiya. Ebivuga eby'enkoba bikusanyusiza mu mbiri zo ez'amasanga.

⁹ Mu bakyala bo mulimu abambejja; namasole ali ku mukono gwo ogwa ddyo ng'ayambadde ebya zaabu ya Ofiri.

¹⁰ Muwala, wuliriza bye nkugamba: "Weerabire ab'ewammwe n'ab'omu nnyumba ya kitaawo.

¹¹ Kabaka akulowoozaako nnyo, kubanga walungiwa n'oyitirira; nga bw'ali mukama wo, muwenga ekitiibwa."

¹² Muwala w'e Ttuulo alija n'ekirabo, abasajja abagagga balikwegayirira obalage ekisa kyo.

¹³ Omuwala wa kabaka ajjudde ekitiibwa mu kisenge kye, ng'ayambadde ekyambalo ekyalukibwa ne zaabu.

¹⁴ Aleetebwa mu maaso ga kabaka ng'ayambadde ebyambalo eby'emidalizo emingi. Emperekeze ze zimuwerekerako; bona ne bajja gy'oli.

¹⁵ Baleetebwa nga bajjudde essanyu n'okwewayagala, ne bayingira mu lubiri lwa kabaka.

¹⁶ Batabani bo baliweebwa ebifo bya bajjajaabwe, olibafuula ng'abalangira mu nsi omwo.

¹⁷ Erinnya lyo linajjukirwanga emirembe gyonna. Amawanga kyeganaavanga gakutendereza emirembe n'emirembe.

Zabbuli 46

Ya Mukulu wa Bayimbi: Zabbuli ya Batabani ba Koola.

¹ Katonda kye kiddukiro kyaffe, era ge maanyi gaffe; omubeezi ddala atabulawo mu kulaba ennaku.

² Kyetunaavanga tulema okutya, ensi ne bw'eneeyuugumanga, ensozi ne bwe zinaasiguulukukanga ne zigwa mu buziba bw'enyanja;

³ amazzi g'enyanja ne bwe ganaayiranga ne gabimba ejjovu ensozi ne zikankana olw'okwetabula kwago.

⁴ Waliwo omugga, emyala gyagwo gisanyusa ekibuga kya Katonda, kye kifo ekitukuvu ekya Katonda Ali Waggulu Ennyo.

⁵ Tekirigwa kubanga Katonda mw'abeera. Katonda anaakirwaniriranga ng'obudde bunaatera okukya.

⁶ Amawanga geetabula, obwakabaka bugwa; ayimusa eddoboozi lye ensi n'esaanuuka.

- ⁷ MUKAMA ow'Eggye ali naffe, Katonda wa Yakobo kye kigo kyaffe.
- ⁸ Mujje, mulabe MUKAMA by'akola, mulabe nga bw'afaafaaganya ensi.
- ⁹ Y'akomya entalo mu nsi yonna; akutula emitego gy'obusaale, effumu alimenyaamenya; amagaali n'engabo abyokya omuliro.
- ¹⁰ Musiriikirire mutengeere nga nze Katonda. Nnaagulumizibwanga mu mawanga. Nnaagulumizibwanga mu nsi.
- ¹¹ Katonda ow'Eggye ali naffe; Katonda wa Yakobo kye kigo kyaffe.

Zabbuli 47

Ya Mukulu wa Bayimbi. Zabbuli ya Batabani ba Koola.

- ¹ Mukube mu ngalo mmwe amawanga gonna; muyimuse amaloboozi muyimbire nnyo Katonda ennyimba ez'essanyu;
- ² MUKAMA Ali Waggulu Ennyo wa ntiisa. Ye Kabaka afuga ensi yonna.
- ³ Yatujeemululira abantu, n'atujeemululira amawanga ne tugafuga.
- ⁴ Yatulondera omugabo gwaffe, Yakobo gw'ayagala mwe yeenyumiririza.
- ⁵ Katonda alinnye waggulu ng'atenderezebwa mu maloboozi ag'essanyu eringi. MUKAMA alinnye nga n'amakondeere gamuvugira.
- ⁶ Mutendereze Katonda, mumutendereze. Mumutendereze Kabaka waffe, mumutendereze.
- ⁷ Kubanga Katonda ye Kabaka w'ensi yonna, mumutendereze ne Zabbuli ey'ettendo.
- ⁸ Katonda afuga amawanga gonna; afuga amawanga ng'atudde ku ntebe ye entukuvu.
- ⁹ Abakungu bannaggwanga bakuñjanye ng'abantu ba Katonda wa Ibulayimu; kubanga Katonda y'afuga abakulembeze b'ensi. Katonda agulumizibwenga nnyo.

Zabbuli 48

Oluyimba. Zabbuli ya Batabani ba Koola.

- ¹ MUKAMA mukulu, asaanira okutenderezebwa ennyo mu kibuga kya Katonda waffe, ku lusozi lwe olutukuvu.
- ² Sayuuni lwe lusozi lwe olulungi olugulumivu, olusanyusa ensi yonna. Ku ntikko Zafoni kwe kuli ekibuga kya Kabaka Omukulu;
- ³ Katonda mw'abeera; yeeraze okuba ekigo kye.

- ⁴ Kale laba, bakabaka b'ensi baakunjaana ne bakyolekera bakirumbe;
- ⁵ bwe baakituukako ne bakyewuunya, ne batya nnyo ne badduka;
- ⁶ nga bakankana, ne bajjula obulumi ng'omukazi alumwa okuzaala.
- ⁷ Wabazikiriza ng'omuyaga ogw'ebuvanjuba bwe guzikiriza ebyombo by'e Talusiisi.
- ⁸ Ebyo bye twawuliranga obuwulizi, kaakano tubirabye mu kibuga kya MUKAMA ow'Eggye, mu kibuga kya Katonda waffe, kyalinywereza ddala emirembe gyonna.
- ⁹ Ayi Katonda, tufumiitiriza ku kwagala kwo okutaggwaawo nga tuli mu Yeekaalu yo.
- ¹⁰ Erinnya lyo nga bwe liri ekkulu, Ayi Katonda, bw'otyo bw'otenderezebwa mu nsi yonna. Omukono gwo ogwa ddyo gujjudde obuwanguzi.
- ¹¹ Sanyuka gwe Sayuuni, musanyuke mmwe ebibuga bya Yuda; kubanga Katonda alamula bya nsong'a.
- ¹² Mutambule mu Sayuuni, mukibune; mubale n'ebigo byakyo.
- ¹³ Mwekalirize nnyo munda wa bbugwe waakyo n'olusiisira lw'amaggye lwamu lwonna; mulyoke mutegheeze ab'emirembe egiriddawo.
- ¹⁴ Kubanga Katonda ono, ye Katonda waffe emirembe gyonna; y'anaatuluujjamyang'a ennaku zonna okutuusa okufa.

Zabbuli 49

Ya Mukulu wa Bayimbi. Zabbuli ya Batabani ba Koola.

- ¹ Muwulire mmwe amawanga gonna, muteghe amatu mmwe mwenna abali mu nsi.
- ² Ab'ekitiibwa n'abakopi, abagagga n'abaavu, mwenna; muwulirize ebigambo byange.
- ³ Kubanga ebigambo by'omu kamwa kange bya magezi, ebiva mu mutima gwange bijjudde okutegeera.
- ⁴ Nnaakozesanga ebikwata ku ngero, nga nnyinnyonnyola amakulu gaazo n'oluyimba ku nnanga.
- ⁵ Siityenga ne bwe nnaabanga mu buzibu; newaakubadde ng'abalabe bange banneetoolodde,
- ⁶ abantu abeesiga obugagga bwabwe beenyumiririza mu bintu ebingi bye balina.

⁷Ddala ddala, tewali muntu ayinza kununula bulamu bwa munne, wadde okwegula okuva eri Katonda.

⁸Kubanga omuwendo ogununula obulamu munene nnyo, tewali n'omu agusobola;

⁹alyoke awangaale ennaku zonna nga tatuuse magombe.

¹⁰Kubanga n'abantu abagezi bafa; abasirusiru n'abatalina magezi bonne baaggwaawo, obugagga bwabwe ne babulekera abalala.

¹¹Entaana zaabwe ge ganaabanga amaka gaabwe ennaku zonna; nga bye bisulo ebya buli mulembe ogliddawo; baafuna ettaka mu mannya gaabwe.

¹²Omuntu tabeerera mirembe gyonna, ne bw'aba mugagga atya, alifa ng'ensolo bwe zifa.

¹³Ako ke kabi akatuuka ku beesiga ebitaliimu, era ye nkomerero y'abo abeesiga obugagga bwabwe.

¹⁴Okufaanana ng'endiga, bateekwa kufa; olumbe ne lubalya. Bakka butereevu emagombe, obulungi bwabwe ne bubula, amagombe ne gafuuka amaka gaabwe.

¹⁵Naye Katonda alinunula emmeeme yange mu magombe, ddala ddala alintwala gy'ali.

¹⁶Omuntu bw'agaggawalanga n'ekitiibwa ky'ennyumba ye nga kyeyongedde, tomutyanga,

¹⁷kubanga bw'alifa taliiko ky'alitwala, wadde n'ekitiibwa kye tekirigenda naye.

¹⁸Newaakubadde nga mu bulamu yeerwoozaako ng'aweereddwa omukisa kubanga omugagga abantu bamugulumiza,

¹⁹kyokka alikka emagombe eri bajajajaabe, n'ayingira mu kizikiza ekikutte.

²⁰Omuntu omugagga naye nga simutegeevu tabeerera mirembe gyonna, alizikirira ng'ensolo ez'omu nsiko.

Zabbuli 50

Zabbuli ya Asafu.

¹Oyo Owaamaanyi, MUKAMA Katonda, akoowoola ensi okuva enjuba gy'eva okutuuka gy'egwa.

²Katonda ayakaayakana ng'ava mu Sayuuni n'obulungi bw'ekitiibwa kye ekituukiridde.

³Katonda waffe ajja, naye tajja kasirise, omuliro ogusaanyaawo buli kintu gwe gumukulembra, n'omuyaga ogw'amaanyi ne gumwetooloola.

- ⁴ Akoowoola abali mu ggulu ne ku nsi, azze okusalira abantu be omusango.
- ⁵ Agamba nti, "Munkunjaaanyize abantu bange abaayawulibwa, abaakola nange endagaano nga bawaayo ssaddaaka."
- ⁶ Eggulu litegeeza obutuukirivu bwa Katonda kubanga Katonda yennyini ye mulamuzi.
- ⁷ "Muwulirize, mmwe abantu bange, nange nnaayogera. Ggwe Isirayiri bino bye nkuvunaana: Nze Katonda, Katonda wo.
- ⁸ Sikunenya lwa ssaddaaka zo, oba ebiweebwayo ebyokebwa by'ossa mu maaso gange bulijjo.
- ⁹ Sikyakkiriza nte nnume n'emu evudde mu kiralo kyo, wadde embuzi ennume ezivudde mu bisibo byo.
- ¹⁰ Kubanga buli nsolo ey'omu kibira yange, awamu n'ente eziri ku nsozi olukumi.
- ¹¹ Ennyonyi zonna ez'oku nsozi nzimanyi, n'ebiramu byonna eby'omu nsiko byange.
- ¹² Singa nnumwa enjala sandikubuulidde: kubanga ensi n'ebigirimu byonna byange.
- ¹³ Ndyo ennyama y'ente ennume, wadde okunywa omusaayi gw'embuzi?
- ¹⁴ "Owangayo ssaddaaka ey'okwebaza eri Katonda; era otuukirizanga obweyamo bwo eri oyo Ali Waggulu Ennyo.
- ¹⁵ Bw'obanga mu buzibu, nnaakuwonyanga, naawe onongulumizanga."
- ¹⁶ Naye omubi Katonda amugamba nti, "Lekeraawo okwatulanga amateeka gange, n'endagaano yange togyogerangako.
- ¹⁷ Kubanga okyawa okuluñjamizibwa, n'ebigambo byange tobissaako mwoyo.
- ¹⁸ Bw'olaba omubbi, ng'omukwana; era weetaba n'abensi.
- ¹⁹ Okolima era olimba; olulimi lwo lwogera ebitali bya butuukirivu.
- ²⁰ Muganda wo omwogerako bibi byereere buli kiseera, era owayiriza omwana wa nnyoko yennyini.
- ²¹ Ebyo byonna obikoze, ne nsirika, n'olowooza nti twenkanankana. Naye kaakano ka nkunenye, ebisobyo byonna mbikulage.
- ²² "Ggwe eyeerabira Katonda, ebyo bisseeko omwoyo, nneme kukuyuzaayuza nga tewali na wa kukuwonya.
- ²³ Oyo awaayo ssaddaaka ey'okwebaza angulumiza, era ateekateeka ekkubo ndyoke mulage obulokozi bwa Katonda."

Zabbuli 51

Ya Mukulu wa Bayimbi. Zabbuli ya Dawudi. Nnabbi Nasani bwe yajja eri Dawudi, Dawudi ng'amaze okutwala Basuseba n'okutemula bba, Uliya.

- 1 Onsaasire, Ayi MUKAMA, ggwe alina okwagala okutaggwaawo. Olw'okusaasira kwo okungi nziggyaako ebyonoono byange byonna.
- 2 Nnaazaako obutali butuukirivu bwange, ontukulize ddala okuva mu kibi kyange.
- 3 Ebyonoono byange mbikkiriza, era ebibi byange mbimanyi bulijjo.
- 4 Ggwe wennyini ggwe nnyonoonye, ne nkola eitali bya butuukirivu mu maaso go ng'olaba; noolwekyo by'oyogera bituufu, era n'ensala yo ey'omusango ya bwenkanya.
- 5 Ddala, nazaalibwa mu kibi; kasookedde ntondebwa mu lubuto lwa mmange ndi mwonoonyi.
- 6 Oyagala amazima agaviira ddala mu mutima gwange. Ompe amagezi munda ddala mu nze.
- 7 Onnaaze n'ezobu ntukule onnaaze ntukule n'okusinga omuzira.
- 8 Onzirize essanyu n'okwesiima, amagumba gange ge wamenyaamenya gasanyuke.
- 9 Totunuulira bibi byange, era osangule ebyonoono byange byonna.
- 10 Ontondemu omutima omulongoofu, Ayi Katonda, era onteekemu omwoyo omulungi munda yange.
- 11 Tongoba w'oli, era tonzigyako Mwoyo wo Omutukuvu.
- 12 Onkomezeewo essanyu ery'obulokozi bwo, era ompe omutima ogugondera by'oyagala,
- 13 ndyoke njigirizenga aboonoonyi amakubo go, n'abakola ebibi bakukyukirenga bakomewo gy'oli.
- 14 Ondokole mu kibi eky'okuyiwa omusaayi, Ayi Katonda, ggwe Katonda ow'obulokozi bwange; olulimi lwange lunaatenderezanga obutuukirivu bwo.
- 15 Ayi Mukama, yasamya emimwa gyange, n'akamwa kange kanaakutenderezanga.
- 16 Tosanyukira ssaddaaka, nandigikuleetedde; n'ebiweebwayo ebyokebwa tobisanyukira.
- 17 Ssaddaaka Katonda gy'ayagala gwe mwoyo ogutegedde okusobya kwagwo. Omutima ogumenyese era oguboneredde, Ayi Katonda, toogugayenga.

¹⁸ Okulaakulanye Sayuuni nga bw'osiima. Yerusaalemi okizzeeko bbugwe waakyo.

¹⁹ Olyoke osanyukire ssaddaaka ey'obutuukirivu, ebiweebwayo ebyokebwa ebikusanyusa; n'ente ziweebwego ku kyoto kyo.

Zabbuli 52

Ya Mukulu wa Bayimbi. Zabbuli ya Dawudi Dowegi Omwedomu bwe yagenda n'abuulira Sawulo nti, "Dawudi alaze mu nnyumba ya Akimerek."

¹ Lwaki weenyumiririza mu kibi ggwe omusajja ow'amaanyi? Endagaano ya Katonda ey'obwesigwa ebeerera emirembe n'emirembe.

² Oteekateeka enkwe ez'okuzikiriza. Olulimi lwo lwogi nga kkirita era buli kiseera lwogera bya bulimba.

³ Oyagala okukola ebibi okusinga okukola ebirungi, n'okulimba okusinga okwogera amazima.

⁴ Osanyukira nnyo okwogera ebirumya. Ggwe olulimi kalimbira!

⁵ Kyokka Katonda alikuzikiriza emirembe gyonna; alikusikula, akuggye mu maka go; alikugoba mu nsi y'abalamu.

⁶ Bino abatuukirivu balibiraba, ne babitunuulira nga batidde. Naye balikusekerera, nga bwe bagamba nti,

⁷ "Mumulabe omusajja ateesiga Katonda okuba ekiddukiro kye, naye ne yeesiganga obugagga bwe obungi, ne yeeyongera n'amaanyi ng'azikiriza abalala."

⁸ Naye nze nfaanana ng'omuti omuzeyituuni ogukulira mu nnyumba ya Katonda. Neesiga okwagala kwa Katonda okutaggwaawo emirembe n'emirembe.

⁹ Nnaakwebazanga emirembe gyonna olw'ekyo ky'okoze. Nneesiganga erinnya lyo kubanga erinnya lyo ddungi; era nnaakutendererezanga awali abatuukirivu bo.

Zabbuli 53

Ya Mukulu wa Bayimbi. Zabbuli ya Dawudi.

¹ Omusirusiru ayogera mu mutima gwe nti, "Tewali Katonda." Boonoonefu, n'empisa zaabwe mbi nnyo; tewali n'omu akola kirungi.

² Katonda atunuulira abaana b'abantu ng'asinziira mu ggulu, alabe obanga mulimu mu bo abamutegeera era abamunoonya.

³ Bonna bamukubye amabega ne boonooneka; tewali akola kirungi, tewali n'omu.

⁴Aboonoonyi tebaliyiga? Basaanyaawo abantu bange, ng'abalya emmere; so tebakooowoola Katonda.

⁵Balitya okutya okutagambika; kubanga Katonda alisaasaanya amagumba g'abalabe be. Baliswazibwa kubanga Katonda yabanyooma.

⁶Singa obulokozi bwa Isirayiri bufuluma mu Sayuuni, Katonda n'akomyawo emirembe eri abantu be, Yakobo asanyuka ne Isirayiri n'ajaguza.

Zabbuli 54

*Ya Mukulu wa Bayimbi. Eyimbibwa n'ebivuga eby'enkoba. Zabbuli ya Dawudi,
Abazifu bwe bajja ne babuulira Sawulo nti, "Dawudi yeekwese mu ffe."*

¹Olw'erinnya lyo ondokole, Ayi Katonda, n'amaanyi go amangi onzigyeko omusango.

²Wulira okusaba kwange, Ayi Katonda, owulirize ebigambo by'omu kamwa kange.

³Abantu be simanyi bannumba; abantu abalina ettima abatatyा Katonda; bannoonya okunzita.

⁴Laba, Katonda ye mubeezi wange, Mukama ye mukuumi wange.

⁵Leka ebintu ebibi byonna bye bantegekera, bibeekyusize, obazikirize olw'obwesigwa bwo.

⁶Nnaakuleeteranga ssaddaaka ey'ekyeyagalire; ne ntendereza erinnya lyo, Ayi MUKAMA, kubanga ddungi.

⁷Kubanga Katonda amponyezza ebizibu byange byonna; era amaaso gange galabye ng'awangula abalabe bange.

Zabbuli 55

Ya Mukulu wa Bayimbi. Eyimbibwa n'ebivuga eby'enkoba. Zabbuli ya Dawudi.

¹Owulirize okusaba kwange, Ayi Katonda, togaya kwegayirira kwange.

²Ompulire era onziremu, kubanga ndi mu buzibu, nga nsinda olw'okweraliikirira okunene.

³Mpulira amaloboozi g'abalabe bange; ababi bankanulidde amaaso ne banvuma nga bajjudde obusungu.

⁴Omutima gwange gulumwa nnyo munda yange; entiisa y'okufa entuukiridde.

⁵Okutya n'okukankana binnumbye; entiisa empitiridde.

⁶Ne njogera nti, Singa nnina ebiwaawaatiro ng'ejjiba, nandibuuse ne ηnjenda mpummulako.

- ⁷“Nandiraze wala nnyo, ne mbeera eyo mu ddungu;
- ⁸ nandiyanguye ne ntuuka mu kifo kyange eky'okuwummuliram, eteri kibuya na mpewo ekunta n'amaanyi.”
- ⁹ Mukama tabulatabula ennimi z'ababi, ozikirize enkwe zaabwe; kubanga ndaba obukambwe n'okulwanagana mu kibuga.
- ¹⁰ Beetooloola bbugwe waakyo emisana n'ekiro, ne munda mu kyo mujjudde ettima n'ebikolwa ebibi.
- ¹¹ Obutemu n'obussi obwa buli ngeri biri mu kibuga omwo. Buli lw'oyita mu nguudo zaakyo osanga bulimba bwereere na kutiisibwatiisibwa.
- ¹² Singa omulabe wange y'abadde anvuma, nandikigumiikirizza; singa oyo atakkiriziganya nange y'anumbaganye n'anduulira, nandimwekwese.
- ¹³ Naye ggwe munnange, bwe tuyita, era mukwano gwange ddala!
- ¹⁴ Gwe twabanga naye mu ssanyu ng'abooluganda, nga tutambulira mu kibiina ekinene mu nnyumba ya Katonda.
- ¹⁵ Okufa kubatuukirire, bakke emagombe nga bakyali balamu; kubanga bajjudde okukola ebibi.
- ¹⁶ Naye nze nkoowoola MUKAMA Katonda, n'andokola.
- ¹⁷ Ekiro, ne mu makya ne mu ttuntu, ndaajana nga bwe nsinda; n'awulira eddoboozi lyange.
- ¹⁸ Amponyezza mu lutalo nga siriiko kintuseeko newaakubadde ng'abannwanyisizza babadde bangi.
- ¹⁹ Katonda oyo atudde ku ntebe ye ebbanga lyonna, aliwulira n'ababonereza abo abatakyusa makubo gaabwe era abataty Katonda.
- ²⁰ Agololera emikono gye ku mikwano gye; n'amenya endagaano ye.
- ²¹ By'ayogera bigonvu okusinga omuzigo, so nga mu mutima gwe alowooza lutalo; ebigambo bye biweweera okusinga amafuta, so nga munda mu mutima gwe asowodde bitala byennyini.
- ²² Ebizibu byo byonna bireete eri MUKAMA, ajja kukuwanirira; kubanga talireka mutuukirivu kugwa.
- ²³ Naye ggwe, Ayi Katonda, olisuula abakola ebibi mu kinnya eky'okuzikirira; era abatemu n'abalimba bona tebagenda kuwangaala kimu kyakubiri eky'obulamu bwabwe. Naye nze, neesiga ggwe.

Zabbuli 56

Ya Mukulu wa Bayimbi. Zabbuli ya Dawudi. Abafirisuuti bwe baamukwatira mu Gaasi.

- ¹ Onsaasire, Ayi Katonda, kubanga abalabe bange banjigganya; buli lunaku bannumba n'amaanyi.
- ² Abalabe bange bannondoola, bangi bannwanyisa nga bajjudde amalala.
- ³ Buli lwe ntya, neesiga ggwe.
- ⁴ Nditendereza Katonda ne nyweerera mu kigambo kye, ye Katonda gwe neesiga; siityenga. Abantu obuntu bagenda kunkolako ki?
- ⁵ Olunaku lwonna bye njogera babifulafuula; ebbanga lyonna baba basala nkwe kunkola kabi.
- ⁶ Beekobaana ne bateesa, banneekwekerera ne bawuliriza enswagiro zange; nga bannindirira banzite.
- ⁷ Tobakkiriza kudduka ne bawona; mu busungu bwo, Ayi Katonda, osuule amawanga.
- ⁸ Emirundi gye ntawaanyizibwa nga njaziirana ogimanyi; amaziga gange gateeke mu ccupa yo! Wagawandiika.
- ⁹ Bwe nkukoowoola, abalabe bange nga badduka. Kino nkimanyi kubanga Katonda ali ku ludda lwange.
- ¹⁰ Katonda gwe ntendereza olw'ekisuubizo kye; MUKAMA gwe ntendereza olw'ekisuubizo kye;
- ¹¹ Katonda oyo gwe neesiga, siityenga. Abantu bayinza kunkolako ki?
- ¹² Ndituukiriza obweyamo bwange gy'oli, Ayi Katonda; ndikuleetera ebirabo eby'okukwebaza.
- ¹³ Kubanga emmeeme yange ogiwonyezza okufa. Ebigere byange tobiwonyezza okwesittala; ne ndyoka ntambulira mu maaso ga Katonda mu musana nga ndi mulamu?

Zabbuli 57

Ya Mukulu wa Bayimbi. Ku ddoboozi, "Tozikiriza." Zabbuli ya Dawudi bwe yadduka Sawulo, n'alaga mu mpuku.

- ¹ Onsaasire, Ayi Katonda, onsaasire, kubanga neesiga ggwe. Nzija kwekweka mu kisiikirize ky'ebiwaawaatiro byo okutuusa okuzikirira bwe kulikoma.
- ² Nkoowoola Katonda Ali Waggulu Ennyo, Katonda atuukiriza bye yantegekera.
- ³ Alisinzira mu ggulu n'andokola, n'amponya abo abampalana. Katonda anandaganga obwesigwa bwe n'okwagala kwe okutaggwaawo.

⁴ Mbeera wakati mu mpologoma, nsula mu bisolo ebirya abaana b'abantu. Amannyo g'abalabe bange gali ng'amafumu n'obusaale. Ennimi zaabwe ziri ng'ebitala ebyogi.

⁵ Ayi Katonda, ogulumizibwenga okusinga eggulu; n'ekitiibwa kyo kibune ensi yonna.

⁶ Baatega ekitimba mu kkubo lyange, ne ntya nnyo; ne basimamu obunnya, ate bo bennyini ne babugwamu.

⁷ Omutima gwange munywevu, Ayi Katonda, omutima gwange munywevu. Nnaakutenderezanga n'ennyimba.

⁸ Zuukuka, ggwe omwoyo gwange! Zuukuka ggwe ennanga ey'enkoba, naawe entongooli, ndyoke nnyimbe okukeesa obudde.

⁹ Ayi Mukama, ndikwebaza mu mawanga; ndiyimba nga nkutendereza mu bantu.

¹⁰ Kubanga okwagala kwo kungi nnyo, kutuuka ne ku ggulu; n'obwesigwa bwo butuuka ku bire.

¹¹ Ogulumizibwenga, Ayi Katonda, okusinga eggulu; n'ekitiibwa kyo kibune ensi yonna.

Zabbuli 58

Ya Mukulu wa Bayimbi. Ku ddoboozi, "Tozikiriza." Zabbuli ya Dawudi.

¹ Ddala mwogera eby'amazima oba musirika busirisi? Abaana b'abantu mubasalira emisango mu bwenkanya?

² Nedda, mutegeka ebitali bya bwenkanya mu mitima gyammwe; era bye mukola bireeta obwegugungo mu nsi.

³ Abakola ebibi bakyama nga baakazaalibwa, bava mu lubuto nga balina ekibi, era bakula boogera bya bulimba.

⁴ Balina obusagwa ng'obw'omusota; bali ng'enswera etawulira ezibikira amatu gaayo;

⁵ n'etawulira na luyimba lwa mukugu agisendasenda okugikwata.

⁶ Ayi Katonda, menya amannyo gaabwe; owangulemu amannyo g'empologoma zino, Ayi MUKAMA.

⁷ Leka babule ng'amazzi agakulukuta ne gagenda. Bwe banaanuula omutego, leka obusaale bwabwe bwe balasa bufufuggale.

⁸ Babe ng'ekkovu erisaanuukira mu lugendo lwalyo. Babe ng'omwana azaaliddwa ng'afudde, ataliraba ku njuba!

⁹ Nga n'entamu tennabuguma, alibayerawo n'obusungu obungi nga kibuyaga ow'amaanyi ennyo.

¹⁰ Omutuukirivu alisanyuka ng'alabye bamuwalanidde eggwanga, olwo n'ebigere bye ne bisaabaana omusaayi ogw'abakola ebibi.

¹¹ Awo abantu bona balyogera nti, "Ddala, abatuukirivu balwanirirwa. Ddala waliwo Katonda alamula mu bwenkanya ku nsi."

Zabbuli 59

Ya Mukulu wa Bayimbi. Ku ddoboozi, "Tozikiriza." Zabbuli ya Dawudi, Sawulo bwe yatumba bakuumenju ya Dawudi bamutte.

¹ Ayi Katonda wange, mponya abalabe bange; onnwanirire, abantu bwe bangolokokerako.

² Omponye abakola ebitali bya butuukirivu, era ondokole mu batemu.

³ Laba banneekwekeredde nga banteega okunzita. Abasajja ab'amaanyi abakambwe banneekobera, Ayi MUKAMA, so nga soonoonye wadde okubaako ne kye nsobezza.

⁴ Sirina kye nsobezza, naye bateekateeka okunnumba. Tunuulira obuzibu bwange, osituke, onnyambe.

⁵ Ayi MUKAMA Katonda ow'Eggye, Katonda wa Isirayiri, golokoka obonereze amawanga gonna; abo bona abasala enkwe tobasaasira.

⁶ Bakomawo buli kiro, nga babolooga ng'embwa, ne batambulatambula mu kibuga.

⁷ Laba, bwe bavuma! Ebigambo biwamatuka mu kamwa kaabwe ng'ebitala, nga boogera nti, "Ani atuwulira?"

⁸ Naye ggwe, Ayi MUKAMA, obasekerera, era amawanga ago gonna oganyooma.

⁹ Ayi Katonda, Amaanyi gange, nnaakwesiganga era nnaakutenderezanga, kubanga ggwe kigo kyange ekinywevu.

¹⁰ Katonda wange anjagala anankulemberanga, ne ndyoka neeyagalira ku balabe bange.

¹¹ Tobatta, Ayi Mukama, engabo yaffe, abantu bange baleme kwerabira; mu buyinza bwo obungi, baleke batangetange; n'oluvannyuma obakkakkanyize ddala.

¹² Amalala gaabwe n'ebyonoono ebiva mu kamwa kaabwe, n'ebigambo by'oku mimwa gyabwe leka byonna bibatege ng'omutego. Kubanga bakolima era ne boogera eby'obulimba.

¹³ Bamaleewo n'ekiruyi kyo, bamalirewo ddala; amawanga gonna galyoke gategeere nga Katonda wa Yakobo y'afuga ensi yonna.

¹⁴ Bakomawo nga buwungedde nga babolooga ng'embwa, ne batambulatambula mu kibuga.

¹⁵ Banoonya emmere buli wantu mu kibuga, ne bawowoggana bwe batakkuta.

¹⁶ Naye nze nnaayimbanga nga ntendereza amaanyi go; mu makya nnaayimbanga ku kwagala kwo; kubanga ggwe kigo kyange, era ggwe kiddukiro kyange mu buzibu bwange.

¹⁷ Ggwe, Ayi Katonda, Amaanyi gange, nnaakuyimbiranga nga nkutendereza; kubanga ggwe kigo kyange, era ggwe Katonda wange, anjagala.

Zabbuli 60

Ya Mukulu wa Bayimbi. Ku ddoboozi, "Eddanga ery'Endagaano." Zabbuli ya Dawudi. Yakuyigiriza. Dawudi bwe yalwana n'Abaalamu abaava e Nakalayimu n'abaava e Zoba, Yowaabu n'akomawo n'atta Abayedomu omutwalo gumu mu enkumi bbiri mu Kiwonvu eky'Omunno.

¹ Otusudde, Ayi Katonda, otumazeemu amaanyi, otunyiigidde. Tukwegayiridde otuzze gy'oli.

² Ensi ogiyuuguumizza n'ogyasaayasa; tukwegayirira enjatika ozizibe, kubanga ekankana.

³ Obadde mukambwe nnyo eri abantu bo; tuli nga b'owadde omwenge omungi ne gututagaza.

⁴ Naye abo abakutya obawanikidde ebbendera okuba akabonero akabakuṇṇanya awamu, era akatiisa abalabe baabwe.

⁵ Otulokole era otuyambe n'omukono gwo ogwa ddyo, abakwagala baleme kutuukibwako kabi konna.

⁶ Katonda ayogedde ng'asinziira mu kifo kye ekitukuvu, n'agamba nti, "Mu buwangizi, ndisala mu Sekemu, era n'ekiwonvu kya Sukkosi ndikigabanyaagabanyaamu.

⁷ Ensi ya Gireyaadi yange, n'eya Manase nayo yange. Efulayimu ye nkufiira ey'oku mutwe gwange; ate Yuda gwe muggo gwange ogw'okufuga.

⁸ Mowaabu kye kinaabirwamu kyange, ate Edomu gye nkasuka engatto yange: ne ku Bafirisuuti ndeekaana mu buwangizi."

⁹ Ani anantuusa ku kibuga ekigumu ekinywevu? Ani anankulembra okunnyingiza mu Edomu?

¹⁰ Si ggwe Ayi Katonda, atusudde, atakyatabaala na magye gaffe?

¹¹ Tudduukirire, nga tulwanyisa abalabe baffe, kubanga obuyambi bw'abantu temuli nsa.

¹² Bwe tunaabeeranga ne Katonda, tunaabanga bawanguzi, kubanga ye y'anaalinnyiriranga abalabe baffe wansi w'ebigere bye.

Zabbuli 61

Ya Mukulu wa Bayimbi. Ebivuga eby'enkoba. Zabbuli ya Dawudi.

¹ Wulira okukaaba kwange, Ayi Katonda; wulira okusaba kwange.

² Nkukoowoola okuva ku nkomerero y'ensi, omutima gwange nga gugenda gunafuwa. Onkulembere ontuuse ku lwazi olunsinga obuwantu mwe nnyinza okwekweka.

³ Kubanga gw'oli kiddukiro kyange. Oli kigo eky'amaanyi mwe neekweka omulabe.

⁴ Nnaabeeranga mu weema yo ennaku zonna; ndyoke nkumirwenga mu biwaawaatiro byo.

⁵ Kubanga ggwe, Ayi Katonda, owulidde obweyamo bwange: ompadde omugabo awamu n'abo abatya erinnya lyo.

⁶ Oyongere ku nnaku z'obulamu bwa kabaka; emyaka gye gimutuuse mu mirembe mingi,

⁷ alyoke abeerenga mu maaso ga Katonda ennaku zonna. Okwagala kwo n'obwesigwa bwo bimukuumenga.

⁸ Ndyoke nnyimbenga nga ntendereza erinnya lyo ennaku zonna, nga ntuukiriza obweyamo bwange buli lunaku.

Zabbuli 62

Ya Mukulu wa Bayimbi. Ya Yedusuni. Zabbuli ya Dawudi.

¹ Emmeeme yange ewummulira mu Katonda yekka; oyo obulokozi bwange mwe buva.

² Ye yekka, lwe lwazi lwange era bwe bulokozi bwange; ye kye kigo kyange siinyeenezebwenga n'akatono.

³ Mulituusa ddi nga mulumba omuntu, mmwe mwenna okwagala okumusuula wansi ng'ekisenge ekyewunzise era ng'olukomera oluyuuguuma?

⁴ Bateesa okumuggyga mu kifo kye ekinywevu, basanyukira eby'obulimba. Basaba omukisa n'emimwa gyabwe so nga munda bakolima.

⁵ Emmeeme yange ewummulire mu Katonda yekka; kubanga mu ye mwe muli essuubi lyange.

⁶Ye yekka lwe lwazi lwange era bwe bulokozi bwange, ye kye kigo kyange, siinyeenyezebwenga.

⁷ Okulokolebwa kwange n'ekitiibwa kyange biri mu Katonda yekka; ye lwe lwazi lwange olw'amaanyi era kye kiddukiro kyange.

⁸ Mumwesigenga bulijjo mmwe abantu, mumutegeezenga byonna ebiri mu mitima gyammwe, kubanga Katonda kye kiddukiro kyaffe.

⁹ Abaana b'abantu mukka bukka, abazaalibwa mu bugagga bulimba bwereere; ne bwe bageraageranyizibwa ku minzaani, n'omukka gubasinga okuzitowa.

¹⁰ Temwesigamanga ku bujoozi wadde ku bintu ebibbe. Temuyitirira okwewaanirawaanira mu bugagga bwammwe ne bwe bweyongeranga, era temubumalirangako mwoyo gwammwe.

¹¹ Katonda ayogedde ekintu kimu, kyokka nze nziggyemu ebintu bibiri nti: Katonda, oli w'amaanyi,

¹² era ggwe, Ayi Mukama, ojjudde okwagala. Ddala olisasula buli muntu ng'ebikolwa bye bwe biri.

Zabbuli 63

Zabbuli ya Dawudi, bwe yali mu ddungu lya Yuda.

¹ Ayi Katonda, oli Katonda wange, nkunoonya n'omutima gwange gwonna; emmeeme yange ekwetaaga, omubiri gwange gwonna gukuyaayaanira, nga nnina ennyonta ng'ali mu nsi enkalu omutali mazzi.

² Nkulabye ng'oli mu kifo kyo ekitukuvu, ne ndaba amaanyi go n'ekitiibwa kyo.

³ Kubanga okwagala kwo okutaggwaawo kusinga obulamu; akamwa kange kanaakutenderezanga.

⁴ Bwe ntyo nnaakutenderezanga obulamu bwange bwonna; nnaayimusanga emikono gyange mu linnya lyo.

⁵ Emmeeme yange enekkutanga ebyassava n'obugagga; nnaayimbanga nga nkutendereza n'emimwa eg'yessanyu.

⁶ Nkujukira nga ndi ku kitanda kyange, era nkufumiitirizaako mu ssaawa ez'ekiro.

⁷ Olw'okuba ng'oli mubeezi wange, nnyimba nga ndi mu kisiikirize ky'ebiwaawaatiro byo.

⁸ Emmeeme yange yeekwata ku ggwe; omukono gwo ogwa ddyo gumpanirira.

⁹ Naye abo abannoonya okunzita balizikirizibwa, baliserengeta emagombe.

¹⁰ Balisaanawo n'ekitala; ne bafuuka emmere y'ebibe.

¹¹ Naye ye kabaka anaajagulizanga mu Katonda; bona abalayira mu linnya lya Katonda banaatenderezanga Katonda, naye akamwa k'abalimba kalisirisibwa.

Zabbuli 64

Ya Mukulu wa Bayimbi. Zabbuli ya Dawudi.

¹ Ayi Katonda, owulire eddoboozi lyange, ery'okwemulugunya kwange; okuumu obulamu bwange eri okutiisibwatiisibwa omulabe.

² Onkweke mpone enkwe z'abakola ebibi, onzigye mu kibinja ky'aboonoonyi, abaleekaana

³ abawagala ennimi zaabwe ng'ebitala, ne balasa ebigambo byabwe ng'obusaale obutta.

⁴ Beekweka ne bateeega oyo atalina musango bamulase; amangwago ne bamulasa nga tebatya.

⁵ Bawagiragana mu kigendererwa kyabwe ekibi ne bateesa okutega emitego mu kyama; ne boogera nti, "Ani asobola okutulaba?"

⁶ Beekobaana okukola ebitali bya bwenkanya, ne boogera nti, "Tukoze enteekateeka empitirivu." Ddala ddala ebirowoozo by'omuntu n'omutima gwe byekusifu.

⁷ Naye Katonda alibalasa n'obusaale bwe; alibafumita, mangwago ne bagwa ku ttaka.

⁸ Ebyo bye boogera biribaddira, ne bibazikiriza, ababalaba ne babanyeenyeza emitwe.

⁹ Olwo abantu bona ne batya, ne bategeeza abalala omulimu gwa Katonda, ne bafumiitiriza ku ebyo by'akoze.

¹⁰ Omuntuukirivu ajagulizenga mu MUKAMA, era yeekekwekenga mu ye. Abo bona abalina omutima omulongoofu bamutenderezenga!

Zabbuli 65

Ya Mukulu wa Bayimbi. Oluyimba, Zabbuli ya Dawudi.

¹ Osaanira okutenderezebwanga, Ayi Katonda, ali mu Sayuuni; tunaatuukiririzanga obweyamo bwaffe gy'oli.

² Ayi ggwe awulira okusaba kw'abantu bo, abantu bona banajjanga gy'oli olw'ebibi byabwe.

³ Ebibi byaffe bwe byatusukkirira, n'otutangiririra.

⁴ Alina omukisa oyo gw'olonda n'omusembeza okumpi naawe, abeerenga mu mpya zo. Tunaamalibwanga ebirungi eby'omu nnyumba yo; eby'omu Yeekaalu yo entukuvu.

⁵ Otwanukula n'ebikolwa byo eby'obutuukirivu eby'entiisa n'otulokola, Ayi Katonda ow'obulokozi bwaffe; ggwe ssuubi ly'abo abali mu nsi yonna n'abo bona abali ewala mu nnyanja zonna,

⁶ ggwe, eyakola ensozi n'obuyinza bwo, n'ozinyweza n'amaanyi go,

⁷ ggwe, asirisa okusiikuuka kw'enyanja, n'okkakkanya okwetabula kw'amayengo gaayo, era ggw'okkakkanya okwegugunga kw'amawanga.

⁸ Abo bona ababeera ewala balaba ne batya ebyewuunyo byo; ne bakuyimbira ennyimba ez'essanyu okuva ku makya okutuusa akawungeezi.

⁹ Ensi ogirabirira n'ogifikirira n'egimuka nnyo. Emigga gyia Katonda gjjudde amazzi, okuwa abantu emmere ey'empeke, kubanga bw'otyo bwe wakiteekateeka.

¹⁰ Otonnyesa enkuba mu nnimiro, n'ojuza ebitaba byamu; n'ogonza ettaka, ebibala by'omu nsi n'obiwa omukisa.

¹¹ Ofundikira omwaka n'amakungula amangi, ebigaali ne bigenda nga byetisse ebibala nga bikubyeko.

¹² Ebifo awali omuddo mu ddungu bijjula amazzi, n'obusozi ne bulabika bulungi nga bweyagala.

¹³ Amalundiro gajjula ebisibo, n'ebiwonvu ne bijjula emmere ey'empeke. Ensi yonna eyimba mu ddoboozi ery'omwanguka ng'ejjudde essanyu.

Zabbuli 66

Ya mukulu wa bayimbi. Oluyimba, Zabbuli ya Dawudi.

¹ Yimbira MUKAMA n'eddoboozi ery'omwanguka, ggwe ensi yonna.

² Muyimbe ekitiibwa ky'erinnya lye. Mumuyimbire ennyimba ezimusuuta.

³ Gamba Katonda nti, "Ebikolwa byo nga bya ntiisa! Olw'amaanyi go amangi abalabe bo bakujeemulukukira.

⁴ Ab'omu nsi yonna bakuvuunamira, bakutendereza, bayimba nga bagulumiza erinnya lyo."

⁵ Mujje mulabe Katonda ky'akoze; mulabe eby'entiisa by'akoledde abaana b'abantu!

⁶ Ennyanja yagifuula olukalu. Abantu baasomoka omugga n'ebigere nga temuli mazzi, kyetuva tujaguza.

⁷ Afuga n'amaanyi ge emirembe gyonna; amaaso ge agasimba ku mawanga, ab'omutima omujeemu baleme okumujeemera.

⁸ Mutendereze Katonda waffe, mmwe amawanga; eddoboozi ery'okumutendereza liwulirwe wonna.

⁹ Oyo y'atukuumye ne tuba balamu, n'ataganya bigere byaffe kuseerera.

¹⁰ Kubanga ggwe, Ayi Katonda, otugezesenza, n'otulongoosa nga bwe bakola ffeeza mu muliro.

¹¹ Watuteeka mu kkomera, n'otutikka emigugu.

¹² Waleka abantu ne batulinnyirira; ne tuyita mu muliro ne mu mazzi, n'otutuusa mu kifo eky'okwesiima.

¹³ Nnaayambukanga mu yeekaalu yo n'ebiweebwayo ebyokebwa, ntuukirize obweyamo bwange gy'oli,

¹⁴nga ndeeta ekyo emimwa gyange kye gyasuubiza; akamwa kange kye kaayogera bwe nnali mu kabi.

¹⁵ Nnaawaayo gy'oli ssaddaaka ez'ensolo ensava, mpeeyo ne ssaddaaka ey'endiga ennume; mpeeyo ente ennume n'embuzi.

¹⁶ Mujje muwulire, mmwe mwenna abatya Katonda, mbategeze ebyo by'ankoledde.

¹⁷ Namukaabirira n'akamwa kange, ne mutendereza n'olulimi lwange.

¹⁸ Singa nnali nsirikidde ekibi mu mutima gwange, Mukama teyandimpulirizza;

¹⁹ ddala ddala Katonda yampuliriza era n'awulira eddoboozi lyange nga nsaba.

²⁰ Katonda atenderezebwenga, atagobyte kusaba kwange, wadde okunziggyako okwagala kwe okutaggwaawo!

Zabbuli 67

Ya Mukulu wa Bayimbi. Ebivuga eby'enkoba. Zabbuli. Oluyimba.

¹ Ayi Katonda tukwatirwe ekisa, otuwe omukisa, era otwakize amaaso go.

² Ekkubo lyo limanyibwe mu nsi, n'obulokozi bwo mu mawanga gonna.

³ Abantu bakutenderezenga, Ayi Katonda, abantu bona bakutenderezenga.

⁴ Amawanga gonna gasanyuke, gayimbe nga gajjudde essanyu. Kubanga ofuga abantu bona mu bwenkanya, n'oluŋŋamya amawanga ag'ensi.

⁵ Abantu bakutenderezenga, Ayi Katonda, abantu bona bakutenderezenga.

⁶ Ensi erireeta amakungula gaayo; era Katonda, Katonda waffe, anaatuwanga omukisa.

⁷ Katonda anaatuwanga omukisa; n'enkomerero z'ensi zinaamuttyanga.

Zabbuli 68

Ya Mukulu wa Bayimbi. Oluyimba Iwa Dawudi.

¹ Katonda agolokoke, abalabe be basaasaane, n'abo abamukyawa bamudduke.

² Ng'empewo bw'efuumuula omukka, naawe bafuumuule bw'otyo; envumbo nga bw'esaanuuka mu muliro, n'abakola ebibi bazikirire bwe batyo mu maaso ga Katonda!

³ Naye abatuukirivu basanyuke bajagulize mu maaso ga Katonda, nga bajjudde essanyu.

⁴ Muyimbire Katonda, muyimbe nga mutendereza erinnya lye; mumuyimusize amaloboozi gammwe oyo atambulira mu bire. Erinnya lye ye MUKAMA, mujagulize mu maaso ge.

⁵ Ye Kitaawe w'abataliiko bakitaabwe, ye mukuumi wa bannamwandu; ye Katonda abeera mu kifo kye ekitukuvu.

⁶ Katonda afunira abatalina we babeera ekifo eky'okubeeramu, aggya abasibe mu kkomera n'abagaggawaza; naye abajeemu babeera mu bifo bikalu ddala.

⁷ Ayi Katonda, bwe wakulembera abantu bo, n'obayisa mu ddungu,

⁸ ensi yakankana, eggulu ne lifukumula enkuba mu maaso ga Katonda; n'olusozi Sinaayi ne lukankana awali Katonda, Katonda wa Isirayiri!

⁹ Watonnyesa enkuba nnyingi ku nsi, Ayi Katonda; ensi y'obusika bwo n'ogizzaamu obugimu bwe bwali nga buggweerera;

¹⁰ abantu bo ne babeera omwo; era olw'ekisa kyo ekingi, Ayi Katonda, abaavu ne bafuna bye beetaaga okuva ku bugagga bwo.

¹¹ Mukama yalangirira; ne babunyisa ekigambo kye; baali bangi ne boogera nti:

¹² "Bakabaka badduse n'amaggye gaabwe; abantu ne bagabana omunyago.

¹³ Balabe bwe banyirira n'obugagga bwa ffeeza ne zaabu! Babikkiddwa ng'ejjuba bwe libikkibwa ebiwaawaatiro byalyo."

¹⁴ Ayinzabyonna yasaasaanya bakabaka, ne baba ng'omuzira bwe gugwa ku Zalumoni.

¹⁵ Ggwe olusozi olw'ekitiibwa, olusozi lwa Basani; ggwe olusozi olw'emitwe emingi, olusozi lwa Basani!

¹⁶ Lwaki otunuza obuggyga ggwe olusozi olw'emitwe emingi? Lwaki okwatirwa obuggyga olusozi Katonda lwe yalonda okufugirako? Ddala okwo MUKAMA kw'anaabeeranga ennaku zonna.

¹⁷ Mukama ava ku lusozi Sinaayi nga yeetooloddwa amagaali enkumi n'enkumi n'ajja mu kifo kye ekitukuvu.

¹⁸ Bwe walinnyalinnya olusozi, ng'abanyage bakugoferera; abantu ne bakuwa ebirabo nga ne bakyewaggula mwebali; bw'atyo MUKAMA Katonda n'abeeranga wamu nabo.

¹⁹ Atenderezebwe Mukama, Katonda omulokozi waffe, eyeetikka emigugu gyaffe egya buli lunaku.

²⁰ Katonda waffe ye Katonda alokola; era tuddukira eri MUKAMA Katonda okuwona okufa.

²¹ Ddala, Katonda alibetenta emitwe gy'abalabe be, kubanga ne mu bukadde bwabwe balemera mu bibi byabwe.

²² Mukama agamba nti, "Ndibakomyawo nga mbaggya mu Basani, ndibazza nga mbaggya mu buziba bw'enyanja,

²³ mulyoke munaabe ebigere byammwe mu musaayi gw'abalabe bammwe, n'embwa zammwe zeefunire ebyokulya."

²⁴ Ekibiina kyo ky'okuleembedde bakirabye, Ayi Katonda, balabye abali ne Katonda wange, era Kabaka wange, ng'otambula okugenda mu watukuvu;

²⁵ abayimbi nga bakuleembedde, ab'ebivuga nga bavaako emabega ne wakati waabwe nga waliwo abawala abakuba ebitaasa.

²⁶ Mutendereze Katonda mu kibiina ekinene; mumutendereze MUKAMA, mmwe abakuŋŋaanye abangi Abayisirayiri.

²⁷ Waliwo ekika kya Benyamini asinga obuto kye kikuleembedde, ne kuddako ekibinja ekinene eky'ablangira ba Yuda, n'ablangira ba Zebbulooni n'ablangira ba Nafutaali.

²⁸ Laga obuyinza bwo, Ayi Katonda, otulage amaanyi go, Ayi Katonda onyweze ebyo by'otukoledde.

²⁹ Bakabaka balikuleetera ebirabo olwa Yeekaalu yo eri mu Yerusaalemi.

³⁰ Nenya ensolo enkambwe ey'omu bisaalu, eggana lya ziseddume eriri mu nnyana z'amawanga. Gikkakkanye ereete omusolo ogwa ffeeza. Osaasaanye amawanga agasanyukira entalo.

³¹ Ababaka baliva e Misiri, ne Kuusi aligondera Katonda.

³²Muyimbire Katonda mmwe obwakabaka obw'ensi zonna. Mutendereze Mukama.

³³Oyo eyeebagala eggulu erya waggulu ery'edda, eddoboozi lye ery'amaanyi liwuluguma okuva mu ggulu.

³⁴Mulangirire obuyinza bwa Katonda, ekitiibwa kye kibuutikidde Isirayiri; obuyinza bwe buli mu bire.

³⁵Oli wa ntiisa, Ayi Katonda, mu kifo kyo ekitukuvu. Katonda wa Isirayiri, yawa abantu obuyinza n'amaanyi. Katonda atenderezebwe.

Zabbuli 69

Ya Mukulu wa Bayimbi. Mu ddoboozi ery'Amalanga. Zabbuli ya Dawudi.

¹Ondokole, Ayi Katonda, kubanga amazzi gandi mu bulago.

²Ntubira mu bitosi nga sirina we nnywereza kigere. Ntuuse ebuziba n'amataba gansaanikira.

³Ndajanye ne nkoowa, n'emimiro ginkaze. Amaaso ganzizeeko ekifu gakooye olw'okutunula enkaliriza nga nnindirira Katonda wange.

⁴Abo abankayayira obwerefere bangi okusinga enviiri ez'oku mutwe gwange; abalabe bange bangi abannoonya okunzita awatali nsonga; ne mpalirizibwa mbaddizeewo ekyo kye sibbanga.

⁵Ayi Katonda, omanyi obusirusiru bwange, n'okusoby a kwange tekukukwekeddwa.

⁶Sisaana kuswaza abo abakwesiga, Ayi Mukama, MUKAMA ow'Eggye. Abo abakunoonya baleme kuswazibwa ku lwange, Ayi Katonda wa Isirayiri.

⁷Ngumiikirizza okuvumwa ku lulwo, n'amaaso gange ne gajjula ensonyi.

⁸Nfuuse nga omugwira eri baganda bange, munnaggwanga eri abaana ba mmange.

⁹Nzijudde obuggyaa olw'ennyumba yo, n'abo abakuvuma bavuma nze.

¹⁰Bwe nkaaba ne nsiba, ekyo nakyo ne kinvumisa.

¹¹Bwe nnyambala ebibukutu ne nfuuka eky'okuzanyisa kyabwe.

¹²Abo abatuula ku mulyango gw'ekibuga banduulira, era nfuuse luyimba lw'abatamiivu.

¹³Naye nze, Ayi MUKAMA, nsaba ggwe, mu kiseera eky'ekisa kyo. Olw'okwagala kwo okungi, onnyanukule, Ayi Katonda, ondokole nga bwe wasubiza.

- ¹⁴ Onnyinyulule mu ttosi nneme okutubira; omponye abankyawa, onzigye mu mazzi amangi;
- ¹⁵ amataba galeme okumbuutikira n'obuziba okunsanyaawo, n'ennyanja ereme okummira.
- ¹⁶ Onnyanukule, Ayi MUKAMA olw'obulungi bw'okwagala kwo; onkyukire olw'okusaasira kwo okungi.
- ¹⁷ Tokisa muddu wo maaso go; yanguwa okunziramu, kubanga ndi mu kabi.
- ¹⁸ Onseemberere onziruukirire, onnunule mu balabe bange.
- ¹⁹ Omanyi bwe nsekererwa, ne bwe nswazibwa ne bwe siteekewamu kitibwa, era n'abalabe bange bona obamanyi.
- ²⁰ Okusekererwa kunkutudde omutima era kummazeemu amaanyi. Nanoonya okusaasirwa ne kumbula, n'ow'okumpooyawooya naye nga simulaba.
- ²¹ Mu kifo ky'emmere bampa mususa, era bwe nalumwa ennyonta bampa nkaatu.
- ²² Emmere yaabwe gye bategese okulya ebafuukire ekyambika, n'embaga zaabwe ez'ebiweebwayo zibafuukire omutego.
- ²³ Amaaso gaabwe gazibe baleme okulaba, n'emigongo gyabwe gyewetenga ennaku zonna.
- ²⁴ Bayiweeko ekiruyi kyo, obamalewo n'obusungu obw'amaanyi go obungi.
- ²⁵ Ebifo byabwe bifuuke bifulukwa, waleme kubaawo n'omu abeera mu weema zaabwe.
- ²⁶ Kubanga bayigganya oyo gw'ofumise, ne boogera ku bulumi bw'oyo gw'olumizza.
- ²⁷ Bavunaane omusango kina gumu, era tobaganya kugabana ku bulokozi bwo.
- ²⁸ Bawanduukululwe mu kitabo ky'obulamu; baleme kulabika ku lukalala lw'abatuukirivu.
- ²⁹ Ndi mu bulumi era mu nnaku; obulokozi bwo, Ayi Katonda, bunkume.
- ³⁰ Nnaatenderezanga erinnya lya Katonda nga nnyimba; nnaamugulumizanga n'okwebaza.
- ³¹ Kino kinaasanyusanga MUKAMA okusinga okumuwa ente ennume, oba okumuwa seddume n'amayembe gaayo, n'ebigere byayo.
- ³² Abaavu banaakirabanga ne basanyuka; mmwe abanoonya Katonda omutima gwammwe ne gubeera omulamu.

³³ Kubanga MUKAMA awulira abo abali mu kwetaaga, era ababe ne bwe baba mu busibe, tabanyooma.

³⁴ Kale eggulu n'ensi bimutenderezenga awamu n'ennyanja zonna n'ebyo ebizirimu.

³⁵ Kubanga Katonda alirokola Sayuuni, n'ebibuga bya Yuda n'abizimba buggyga, abantu ne babibeerangamu nga byabwe.

³⁶ Abaana b'abweereza be balikisikira; n'abo abaagala erinnya lya MUKAMA omwo mmwe banabeeranga.

Zabbuli 70

Ya Mukulu wa Bayimbi. Zabbuli ya Dawudi, ey'okujukiza.

¹ Ayi Katonda oyanguwa okundokole. Ayi MUKAMA oyanguwe okumbeera.

² Abo abannoonya okunzita batabulwetabulwe; abo abannoonya okunzikiriza, bagobebwe nga baswadde.

³ Abagamba nti, "Kasonso," badduke nga bajjudde ensonyi.

⁴ Naye bona abakunoonya basanyukenga bajagulizenga mu ggwe. Abo abaagala obulokozi bwo boogerenga bulijjo nti, "Katonda agulumizibwenga!"

⁵ Naye nze ndi mwavu era ndi mu kwetaaga; oyanguwe okujja gye ndi, Ayi Katonda. Ggwe onnyamba era ggwe ondokola, Ayi MUKAMA, tolwa!

Zabbuli 71

¹ Mu ggwe, Ayi MUKAMA, mwe neekweka, tondeka kuswazibwa.

² Mu butuukirivu bwo ondokole, omponye; ontegere okutu ondokole.

³ Onfuukire olwazi obuddukiro bwange, ekifo eky'amaanyi; ondokole kubanga oli lwazi lwange era ekiddukiro kyange.

⁴ Ayi Katonda wange omponye mu mukono gw'ababi, omponye abantu abatali batuukirivu era abakambwe.

⁵ Kubanga ggwe, Ayi MUKAMA, ggwe ssuubi lyange; ggwe, ggwe neesiga, okuvira ddala mu buvubuka bwange.

⁶ Neesiga ggwe kasookedde nzalibwa; ggwe wanziggya mu lubuto lwa mmange. Nnaakutenderezanga ennaku zonna.

⁷ Eri abangi nafuuka; naye ggwe kiddukiro kyange eky'amaanyi.

⁸ Akamwa kange kajjudde ettendo lyo, nga ntenda ekitiibwa kyo obudde okuziba.

⁹ Tonsuula mu kiseera kyange eky'obukadde. Tondekerera ng'amaanyi gampweddemu.

¹⁰ Kubanga abalabe bange banjogerako; abo abaagala okunzita bansalira olukwe.

¹¹ Bagamba nti, "Katonda amulese, ka tumugobe tumukwate, kubanga taliiko anaamuwonya."

¹² Ayi Katonda, tombera wala, Ayi Katonda wange, yanguwa ojje ombeere.

¹³ Abo abampawaabira bazikirizibwe nga bajjudde ensonyi, abanoonya okunnumya baswale era banyoomebwe.

¹⁴ Naye nze nnaabanga n'essuubi ennaku zonna. Era nneeyongeranga okukutenderezanga.

¹⁵ Akamwa kange kanaayogeranga ku bikolwa byo eby'obutuukirivu obudde okuziba; nnaayogeranga ku bulokozi bwo, wadde siyinza kubupima.

¹⁶ Nnaatambuliranga mu maanyi go, Ayi MUKAMA Katonda, era ne ntegeezanga nti ggwe wekka ggwe mutuukirivu.

¹⁷ Ayi Katonda, ggwe wanjiriza okuva mu buvubuka bwange; n'okutuusa leero nkyatenda ebikolwa byo eby'ekitalo.

¹⁸ Ne bwe ndiba nga nkaddiye nga mmeze n'envi, tonjabuliranga, Ayi Katonda, okutuusiza ddala nga mmaze okutendera abo abaliddawo amaanyi go amangi, n'okumanyisa emirembe egigenda okujja obuyinza bwo.

¹⁹ N'obutuukirivu bwo, Ayi Katonda, butuuka mu ggulu. Ggw'okoze ebikulu, Ayi Katonda, ani akwenkana?

²⁰ Newaakubadde wandeka ne mbonaabona nnyo bwe ntyo, ggw'olinzizaamu obulamu, n'ompa amaanyi amaggya, n'onnyimusa okuva mu kinnya ekiwanvu ennyo wansi w'ensi.

²¹ Olinnyongerako ekitiibwa n'oddamu okunsanyusa.

²² Nnaakutenderezanga ne nnanga ey'enkoba olw'obwesigwa bwo, Ayi Katonda wange; nnaakutenderezanga n'entongooli, Ayi ggwe Omukukuvu wa Isirayiri.

²³ Nnaayimusanga eddoboozi lyange olw'essanyu nga nkutendereza, nze gw'onunudde!

²⁴ Olulimi lwange nalwo lunaayogeranga ku bikolwa byo eby'obutuukirivu obudde okuziba, kubanga abo ababadde baagala okunkola akabi otabuddetabudde enkwe zaabwe ne baswazibwa.

Zabbuli 72

Zabbuli ya Sulemaani.

- 1 Ayi Katonda, kabaka omuwe okuba omwenkanya, ne mutabani we omuwe obutuukirivu,
- 2 alyoke alamulenga abantu bo mu butuukirivu, n'abaavu abalamulenga mu mazima.
- 3 Ensozi zireeterenga abantu bo okukulaakulana n'obusozi bubaleetere obutuukirivu.
- 4 Anaalwaniriranga abaavu, n'atereeza abaana b'abo abeetaaga, n'omujoozi n'amusaanyaawo.
- 5 Abantu bakutyenga ng'enjuba n'omwezi gye bikoma okwaka mu mirembe gyonna.
- 6 Abeere ng'enkuba bw'etonnya ku muddo ogusaliddwa, afaanane ng'oluwandaggirize olufukirira ensi.
- 7 Obutuukirivu bweyongere nnyo mu mulembe gwe, n'okufuga kwe kujjule emirembe okutuusa omwezi lwe gulikoma okwaka!
- 8 Afugenga okuva ku nnyanja okutuuka ku nnyanja, n'okuva ku mugga Fulaati okutuuka ku nkomerero z'ensi!
- 9 Ebika eby'omu malungu bimugonderenga, n'abalabe be bamujeemulukukire beekulukuunye ne mu nfuufu.
- 10 Bakabaka b'e Talusiisi n'ab'oku bizinga eby'ewala bamuwenga omusolo; bakabaka b'e Syeba n'ab'e Seeba bamutonerenga ebirabo.
- 11 Bakabaka bona banaavuunamanga mu maaso ge; amawanga gonna ganaamuweerezanga.
- 12 Kubanga anaawonyanga eyeetaaga bw'anaamukoowoolanga, n'omwavu ne kateeyamba ataliiko mwasirizi.
- 13 Anaasaasiranga omunafu n'omwavu; n'awonya obulamu bwa kateeyamba.
- 14 Anaabanunulanga mu mikono gy'omujoozi n'abawonya obukambwe bwe; kubanga obulamu bwabwe bwa muwendo mungi gy'ali.
- 15 Awangaale! Aleeterwe zaabu okuva e Syeba. Abantu bamwegayiririrenga era bamusabirenga emikisa buli lunaku.
- 16 Ejjaano ebale nnyingi nnyo mu nsi, ebikke n'entikko z'ensozi. Ebibala byayo byale ng'eb'y'e Lebanooni; n'abantu baale mu bibuga ng'omuddo ogw'oku ttale.
- 17 Erinnya lye libeerengawo ennaku zonna, n'okwatiikirira kwe kube kwa nkalakkalira ng'enjuba. Amawanga gonna ganaaweebwanga omukisa ku lu lw'erinnya lye, era abantu bona bamuyitenga aweereddwa omukisa.

¹⁸ MUKAMA Katonda agulumizibwe, Katonda wa Isirayiri, oyo yekka akola ebyewuunyisa.

¹⁹ Erinnya lye ekkulu ligulumizibwenga emirembe n'emirembe! Ensi yonna ejjule ekitiibwa kye. Amiina era Amiina!

²⁰ Okusaba kwa Dawudi mutabani wa Yese kukomye awo.

Zabbuli 73

EKITABO III

Zabbuli 73–89

Zabbuli ya Asafu.

¹ Ddala Katonda mulungi eri Isirayiri n'eri abo abalina omutima omulongoofu.

² Naye nze amagulu gange gaali kumpi okutagala era n'ebigere byange okuseerera.

³ Kubanga nakwatirwa ab'amalala obuggyga; bwe nalaba ababi nga bagaggawala nnyo.

⁴ Kubanga tebalina kibaluma; emibirgyabwe miramu era minyirivu.

⁵ Tebeeraliikirira kabi konna ng'abalala. So tebalina kibabonyaabonya.

⁶ Amalala kyegavudde gabafuukira ng'omukuufu ogw'omu bulago, n'obukambwe ne bubafuukira ekyambalo.

⁷ Bagezze n'amaaso gaabwe ne gazimbagatana; balina bingi okusinga bye beetaaga.

⁸ Baduula era emboozi zaabwe zижjudde eby'okujooga. Batiisatiisa abalala n'okubeeragirako.

⁹ Emimwa gyabwe gyolekedde eggulu; n'ennimi zaabwe zoogera eby'okwewaanawaana buli wantu.

¹⁰ Abantu ba Katonda kyebava babakyukira ne banywa amazzi mangi.

¹¹ Era ne beebuuza nti, "Katonda bino abimanyi atya? Ali Waggulu Ennyo abitegeera?"

¹² Aboonoonyi bwe bafaanana bwe batyo; bulijo babeera mu ddembe, nga beeyongera kugaggawala.

¹³ Ddala omutima gwange ngukuumidde bwereere obutayonoona, n'engalo zange ne nzinaaba obutaba na musango.

¹⁴ Naye mbonaabona obudde okuziba, era buli nkya mbonerezebwa.

¹⁵Singa ηηjamba nti njogere bwe nti, nandibadde mukuusa eri omulembe guno ogw'abaana bo.

¹⁶Bwe nafumiitiriza ntegeere ensonga eyo; nakisanga nga kizibu nnyo,

¹⁷okutuusa lwe nalaga mu watukuvu wa Katonda, ne ntegeera enkomerero y'ababi.

¹⁸Ddala obatadde mu bifo ebiseerera; obasudde n'obafaafaaganya.

¹⁹Nga bazikirizibwa mangu nga kutemya kikowe! Entiisa n'ebamalirawo ddala!

²⁰Bali ng'omuntu azuukuse n'ategeera nti yaloose buloosi; era naawe bw'otyo, Ayi Mukama, bw'oligolokoka olinyooma embeera yaabwe omutali nsa.

²¹Omutima gwange bwe gwanyikaala, n'omwoyo gwange ne gujjula obubalagaze,

²²n'aggwaamu okutegeera ne nfuuka ataliiko kye mmanyi, ne mba ng'ensolo obusolo mu maaso go.

²³Newaakubadde ebyo biri bwe bityo naye ndi naawe bulijjo; gw'onkwata ku mukono gwange ogwa ddyo.

²⁴Mu kuteesa kwo onkulembra, era olintuusa mu kitibwa.

²⁵Ani gwe nnina mu ggulu, wabula ggwe? Era tewali na kimu ku nsi kye neetaaga bwe mba naawe.

²⁶Omubiri gwange n'omutima gwange biyinza okulemwa; naye Katonda ge mmanyi g'omutima gwange, era ye wange ennaku zonna.

²⁷Kale laba, abo bona abatakussaako mwoyo balizikirira; kubanga bona abatakxesiga obamalirawo ddala.

²⁸Naye nze kye nsinga okwetaaga kwe kubeera okumpi ne Katonda wange. Ayi MUKAMA Katonda, nkufudde ekiddukiro kyange; ndyoke ntegeezengaabantu bona ebikolwa byo eby'ekyewuunyo.

Zabbuli 74

Zabbuli ya Asafu.

¹Ayi Katonda, lwaki otusuulidde ddala ennaku zonna? Obusungu bwo lwaki bunyookera ku ndiga z'omu ddundiro lyo?

²Ojjukire abantu bo be wagula edda; ekika kye wanunula okuba ababo. Ojjukire olusozi Sayuuni gye wabeeranga.

³Tambulatambulako mu bifo by'ekibuga olabe bwe byonooneddwa! Olabe omulabe nga bw'azikirizza ennyumba yo.

- ⁴ Abalabe bo baleekaanira mu kifo kyo gye twakuññaaniranga; ne bagenda nga bakiramba n'ebendera zaabwe.
- ⁵ Beeyisa ng'abantu ababagalidde embazzi abatema emit mu kibira.
- ⁶ Batemyetemye n'embazzi ebintu ebyole, era ne babissessebbula n'obubazzi.
- ⁷ Bookezza awatukuvu wo; ne bafaafaaganya ekifo kyo eky'Erinnya lyo.
- ⁸ Baateesa nga bagamba nti, "Tujja kubazikiririza ddala!" Baayokya dda amasinzizo ga Katonda gonna agali mu nsi eno.
- ⁹ Tetukyalaba ku bubonero bwo; ne bannabbi tewakyali n'omu. So tewali n'omu mu ffe ategereera ebyo lwe birikoma.
- ¹⁰ Ayi Katonda, omulabe alituusa ddi ng'akuduulira? Omulabe anavvoolanga erinnya lyo ennaku zonna? Bazikirize.
- ¹¹ Lwaki totuyambye n'omukono gwo ogwa ddyo? Kiki ekikukuumisa omukono gwo ogwa ddyo mu kifuba kyo?
- ¹² Naye ggwe, Ayi Katonda, oli Kabaka wange wa dda; gw'oleeta obulokozi mu nsi.
- ¹³ Ggwe wayawula mu mazzi g'enyanja; omulabe n'omuzikiririza mu mazzi.
- ¹⁴ Wamenyaamenya emitwe gya lukwata ogunene; n'oguwaayo okuba ekyokulya eri ebitonde eby'omu ddungu.
- ¹⁵ Ggwe wazibukula ensulo n'emysala; ate n'okaza n'emigga egyakulukutanga bulijjo.
- ¹⁶ Obudde bw'emisana bubwo, n'ekiro kikyo; ggwe wakola omwezi n'enjuba.
- ¹⁷ Ggwe wateekawo ensalo z'ensi; ggwe wakola ebiro eby'ekyeya n'ebi'obutiti.
- ¹⁸ Jjukira ebyo, Ayi Katonda, olabe okuduula kw'omulabe, n'abantu abasirusiru nga bwe banyoomodde erinnya lyo.
- ¹⁹ Ayi Katonda, towaayo mwoyo gwa jjiba lyo eri ensolo enkambwe; so teweerabiriranga ddala bulamu bw'abantu bo ababonyaabonyezebwa.
- ²⁰ Ojjukire endagaano yo; kubanga ensi ejjudde ekizikiza n'abantu abakambwe.
- ²¹ Tokkiriza abo abajoogebwa okuwangulwa; era leka abaavu n'abeetaaga batenderezenga erinnya lyo ennaku zonna.
- ²² Yimuka, Ayi Katonda, osalire abalabe baffe omusango. Jjukira abo abatakussaamu kitibwa, nga bwe bakuduulira obudde okuziba.
- ²³ Tonyooma luyoogaano lw'abalabe bo, n'okuleekaana okwa buli kiseera.

Zabbuli 75

Ya Mukulu wa Bayimbi. Ku ddoboozi, "Tozikiriza." Zabbuli ya Asafu. Oluyimba.

¹ Tukwebaza, Ayi Katonda. Tukwebaza, kubanga Erinnya lyo liri kumpi. Abantu boogera ku bikolwa byo eby'ekyewuunyo.

² MUKAMA Katonda oyogera nti, "Neerondera ekiseera kye neetegekera era nsala omusango gwa bwenkanya.

³ Kyokka newaakubadde ng'ensi eyuuguma abantu ne beeraliikirira, naye nze nywezezza empagi zaayo."

⁴ Nalabula ab'amalala bagaleke, n'ababi bakomye okuyimusa ejjembe lyabwe ng'ery'embogo.

⁵ Mukomye okuyimusa ejjembe lyammwe eri eggulu n'okwogera nga muduula.

⁶ Kubanga okugulumizibwa tekuva mu ddungu era n'obuyinza tebuva buvanjuba wadde obugwanjuba bw'ensi,

⁷ wabula biva eri Katonda; era ye y'agulumiza omu ate n'atoowaza omulala.

⁸ MUKAMA akutte mu mukono gwe ekikompe eky'obusungu bwe ekijjudde omwenge ogutabuddwamu ebirungo era kijjudde ejjovu; akifuka, aboonoonyi bona ku nsi ne bakinywa ne bakimaliramu ddala.

⁹ Naye nze nnaatendanga obulungi bwa MUKAMA; nnaatenderezanga Katonda wa Yakobo ennaku zonna.

¹⁰ MUKAMA ayogera nti, Ababi ndibamalamu amaanyi, naye abatuukirivu nnaabongeranga amaanyi.

Zabbuli 76

Ya Mukulu wa Bayimbi. Eyimbibwa n'ebivuga eby'enkoba. Zabbuli ya Asafu.

¹ Katonda amanyiddwa mu Yuda; erinnya lye kkulu mu Isirayiri.

² Eweema ye eri mu Yerusaalemi; era abeera mu Sayuuni.

³ Eyo gy'asinziira n'amenyaamenya obusaale bw'omulabe obujja bwesooza; n'engabo n'ebitala n'ebokulwanyisa byonna eby'olutalo.

⁴ Owa ekitangaala, oli wa kitibwa okusinga ensozi ennene eziriko ensolo eziyiggibwa.

⁵ Ab'amaanyi bagalamira nga banyaguluddwa, beebaka ne batasobola kugolokoka, ne watabaawo n'omu asobola okuyimusa omukono gwe.

⁶ Bw'obaboggolera, Ayi Katonda wa Yakobo, abeebagala embalaasi ezisika ebigaali bagwiira wamu n'ebigaali ne batagolokoka.

⁷ Ggwe ayi Katonda, osaanira okutiibwanga. Ani ayinza okuyimirira mu maaso go ng'osunguwadde?

⁸ Osalira abantu emisango ng'osinziira mu ggulu, ensi n'etya n'ekankana n'esirika olw'obusungu bwo,

⁹ bw'ogolokoka okusala omusango, okuwonya ababonyaabonyezebwa mu nsi.

¹⁰ Bw'osunguwalira omuntu kikuleetera okutenderezebwa, n'abo b'otasunguwalidde ne beegendereza.

¹¹ Mweyame obweyamo bwammwe eri MUKAMA Katonda wammwe, era mubutuukirizenga; bona abamuli okumpi bamuleetere ebirabo, kubanga asaanidde okutiibwa.

¹² MUKAMA akkakkanya abalangira, ne bakabaka b'ensi bamutya.

Zabbuli 77

Ya Mukulu wa Bayimbi. Zabbuli ya Asafu.

¹ Nnaakaabirira Katonda ambeere, ddala nnaakaabirira Katonda nga musaba ampulire.

² Bwe nnali mu nnaku, nanoonya Mukama, ekiro kyonna ne ngolola emikono gyange obutakoowa; emmeeme yange neegaana okusanyusibwa.

³ Nakujukiranga, Ayi Katonda ne nsinda, ne nfumiitiriza emmeeme yange n'ezirika.

⁴ Tewanjanya kwebaka; natawaanyizibwa nnyo ne sisobola kwogera.

⁵ Ne ndowooza ku biseera eby'edda, ne nzijkira emyaka egyayita.

⁶ Najjukiranga ennyimba zange ekiro, ne nfumiitiriza nga bwe neebuuza mu mutima gwange nti:

⁷ "Mukama anaatusuuliranga ddala ennaku zonna naataddayo kutulaga kisa kye?

⁸ Okwagala kwe okutaggwaawo kukomedde ddala? Kye yasuubiza kibulidde ddala emirembe n'emirembe?

⁹ Katonda yeerabidde ekisa kye? Asunguwalidde ddala ne yeggyako n'okusaasira kwe?"

¹⁰ Awo ne ndowooza nti, "Ebyo bye mmanyi eby'emyaka emingi eby'omukono ogwa ddyo ogw'oyo Ali Waggulu Ennyo."

¹¹ Nnajjukiranga ebikolwa bya MUKAMA, weewaawo, nnajjukiranga ebyamagero byo eby'edda.

¹²Nnaafumiitirizanga ku bikolwa byo byonna eby'amaanyi; nnaalowoozanga ku byamagero byo byonna.

¹³Ekkubo lyo, Ayi Katonda, liri mu watukuvu. Tewali katonda yenkana Katonda waffe.

¹⁴Ggwe Katonda akola eby'amagero; era amaanyi go ogalaga mu mawanga.

¹⁵Wanunula abantu bo n'omukono gwo, abazzukulu ba Yakobo ne Yusufu.

¹⁶Amazzi gaakulaba, Ayi Katonda; amazzi bwe gaakulaba ne gatya, n'obuziba ne bukankanira ddala.

¹⁷Ebire byayiwa amazzi ne bivaamu n'okubwatuka, era n'obusaale bwo ne bubuna.

¹⁸Eddoboozi lyo ery'okubwatuka lyawulirwa mu kikuñjunta okumyansa kwo ne kumulisa ensi. Ensi n'ekankana n'enyenyezebwa.

¹⁹Ekkubo lyo lyali mu nnyanja; wayita mu mazzi amangi, naye ebigure mwe walinnya tebyalabika.

²⁰Wakulembera abantu bo ng'ekisibo, nga bali mu mikono gyा Musa ne Aloonī.

Zabbuli 78

Oluyimba Iwa Asafu.

¹Muwulire okuyigiriza kwange mmwe abantu bange, musseeyo omwoyo ku bye njogera.

²Ndyogerera mu ngero, njogere ebintu eby'ekyama ebyaliwo edda,

³ebintu bye twawulira ne tumanya; ebintu bajjajjaffe bye baatutgeeeza.

⁴Tetuubikisenga baana baabwe, naye tunaabuuliranga buli mulembe ogunnaddangawo ebikolwa bya MUKAMA eby'ekitalo, n'amaanyi ge n'ebiyamagero bye yakola.

⁵Yawa Yakobo ebiragiro, n'ateeka amateeka mu Isirayiri; n'alagira bajjajjaffe babiyigirizenga abaana baabwe,

⁶ab'omu mulembe ogliddirira nabo babimanye, n'abaana abalizaalibwa, nabo babiyigirize abaana baabwe,

⁷balyoke beesigenga Katonda, era balemenga okwerabira ebyo byonna Katonda bye yakola; naye bagonderenga ebiragiro bye.

⁸Baleme okuba nga bajjajjaabwe, omulembe ogw'abakakanyavu era abajeemu abatali bawulize, ab'emyoyo egitali myesigwa eri Katonda.

⁹ Abaana ba Efulayimu abaalina obusaale obw'okulwanyisa, naye ne badduka mu lutalo,

¹⁰ tebaatuukiriza ndagaano ya Katonda; ne bagaana okugondera amateeka ga MUKAMA.

¹¹ Beerabira ebyo bye yakola, n'ebyamagero bye yabalaga.

¹² Yakola ebyamagero mu maaso ga bajajjaabwe nga bali mu nsi y'e Misiri, mu kitundu kya Zowani.

¹³ Ennyanja yajaawulamu, amazzi ne geetuma ebbali n'ebbali ng'ebisenge.

¹⁴ Emisana yabakulemberanga n'ekire, n'ekiro n'abakulemberanga n'empagi ey'omuliro.

¹⁵ Yayasa enjazi mu ddungu, n'abawa amazzi amangi agaali ng'agava mu buziba bw'ennyanja.

¹⁶ Yaggya ensulo mu lwazi, n'akulukusa amazzi ng'emigga.

¹⁷ Naye bo ne beeyongera bwetyongezi okwonoona, ne bajeemera Oyo Ali Waggulu Ennyo nga bali mu ddungu.

¹⁸ Ne bagezesu Katonda mu bugenderevu, nga bamusaba emmere gye baalulunkanira.

¹⁹ Era ne boogera ku Katonda; nga bagamba nti, "Katonda asobola okutuliisiza mu ddungu?"

²⁰ Weewaawo yakuba olwazi, amazzi ne gakulukuta ng'emigga; naye anaatuwa emmere? Anaawa abantu be ennyama?"

²¹ Awo MUKAMA bwe yawulira ebyo n'asunguwala nnyo; omuliro gwe ne gwaka ku Yakobo, n'obusungu bwe ne bubuubuukira ku Isirayiri.

²² Kubanga tebakkiriza Katonda, era tebeesiga maanyi ge agalokola.

²³ Naye era n'alagira eggulu; n'aggulawo enzigi z'omu ggulu.

²⁴ N'abaweereza maanu okuva mu ggulu balye. Yabawa emmere eyava mu ggulu.

²⁵ Abantu ne balya emmere ya bamalayika; MUKAMA n'abawanga emmere nnyingi eyabamaliranga ddala.

²⁶ N'akunsa empewo ey'Ebuwanjuba okuva mu ggulu, era n'aweereza empewo okuva obukiika obwaddyo n'amaanyi ge.

²⁷ Yatonnaesa ennyama okuva mu ggulu ennyingi ennyo ng'enfuufu; n'abaweereza n'obunyonyi enkumu ennyo ng'omusenyu gw'okulubalama lw'ennyanja.

²⁸Ebyokulya ebyo n'abisuula wakati mu lusiisira lwabwe; okwetooloola eweema zaabwe.

²⁹Awo ne balya ne bakkuta nnyo; kubanga yabawa kye baali bayaayaanira.

³⁰Naye bwe baali nga bakyalulunkana, nga n'emmere ekyali mu kamwa kaabwe,

³¹obusungu bwa MUKAMA ne bubabuubuukirako, n'abattamu abasajja abasinga amaanyi; abavubuka ba Isirayiri ne bazikirizibwa.

³²Naye newaakubadde ebyo byonna byabatuukako, kyokka beeyongera okwonoona; newaakubadde nga yabakolera ebyamagero, naye tebakkiriza.

³³MUKAMA kyeyava asala ku myaka gyabwe, n'abaleetako okuzikirizibwa okw'amangu era okw'entiisa.

³⁴Bwe yattanga abamu ku bo, ne balyoka bamunoonya, ne beenenya ne badda gy'ali.

³⁵Ne bajjukira nti Katonda lwe Lwazi lwabwe; era nti Katonda Ali Waggulu Ennyo ye Mununuizi waabwe.

³⁶Kyokka baamuwaananga n'emimwa gyabwe, nga bwe bamulimba n'ennimi zaabwe,

³⁷so tebaali beesigwa mu mitima gyabwe, era nga tebatuukiriza ndagaano ye.

³⁸Naye ye n'abakwadirwanga ekisa n'abasonryiwanga, n'atabazikiriza; emirundi n'emirundi ng'akoma ku busungu bwe, n'atabamalirako kiruyi kye okubazikiririza ddala.

³⁹Yajjukira nga baali mubiri bubiri; ng'empewo egenda n'etedda!

⁴⁰Baamujeemeranga nnyo bwe baali mu ddungu; ne banakuwaza nnyo omutima gwe.

⁴¹Ne baddamu ne bakema Katonda, ne banyiiza Omutukuvu wa Isirayiri.

⁴²Tebajjukira buyinza bwe; wadde olunaku lwe yabanunulirako mu mikono gy'omulabe;

⁴³bwe yalaga obubonero bwe mu Misiri, n'ebyamagero bye mu kitundu kya Zowani,

⁴⁴yafuula amazzi g'emigga gyabwe omusaayi, ne batanywa mazzi gaagyo.

⁴⁵Yabawereesa agabinja g'ensowera ne zibaluma, n'abawereesa n'ebikere ne bibadaaza.

⁴⁶Ebirime n'ebibala byabwe yabiwa enzige ne bulusejjera.

⁴⁷ Yazikiriza emizabbibu gyabwe n'omuzira, era ne gukuba n'emisukomooli gyabwe.

⁴⁸ Yatta ente zaabwe n'amayinja g'omuzira; n'ebisibo byabwe ne bittibwa eraddu.

⁴⁹ Obusungu bwe obungi bwababuubuukirako, n'ekiruyi kye n'obukambwe ne bibamalamu ensa. N'alyoka abasindikira ekiginja kya bamalayika okubazikiriza.

⁵⁰ Yabalaga obusungu bwe, n'atabasonyiwa kufa, n'abasindikira kawumpuli.

⁵¹ Yatta ababereberye bonne ab'omu Misiri, nga be bavubuka ab'ebibala ebibereberye eby'omu nnyumba ya Kaamu.

⁵² N'alyoka afulumya abantu be ng'endiga, n'abatambuza mu ddungu ng'ekisibo.

⁵³ N'abaluŋŋamya mu mirembe nga tebatya, ennyanja n'esaanyaawo abalabe baabwe.

⁵⁴ N'abatuusa ku nsalo y'ensi entukuvu; ku lusozi lwe yeewangulira, n'omukono gwe ogwa ddyo.

⁵⁵ Yagobamu amawanga nga balaba, n'abagabanyiza ebitundu by'ensi eyo; n'atuuza bulungi ebika bya Isirayiri mu maka gaabyo.

⁵⁶ Naye era ne bakema Katonda; ne bamujeemera oyo Ali Waggulu Ennyo, ne bagaana okugondera ebiragiro bye.

⁵⁷ Ne bamuvaako ne baba bakuusa nga bajjajaabwe bwe baali, ne baggwaamu obwesigwa ng'omutego gw'obusaale omukyamu.

⁵⁸ Kubanga baasunguwaza Katonda olw'ebifo ebigulumivu bo bye beegunjira okusinzizangamu, ne bamukwasa obuggyaa olwa bakatonda baabwe abalala.

⁵⁹ Katonda bwe yibiraba n'asunguwala nnyo, n'aviira ddala ku Isirayiri.

⁶⁰ N'ava mu weema ey'omu Siiro, eweema mwe yabeeranga ng'ali mu bantu be.

⁶¹ N'awaayo amaanyi ge mu busibe, n'ekitiibwa kye n'akiwaayo eri omulabe.

⁶² Abantu be yabaleka ne battibwa n'ekitala, n'asunguwalira omugabo gwe.

⁶³ Omuliro ne gusaanyaawo abavubuka baabwe abalenzi, ne bawala baabwe ne babulwa ow'okubawasa.

⁶⁴ Bakabona baabwe battibwa n'ekitala, ne bannamwandu baabwe tebaasobola kubakungubagira.

⁶⁵ Awo Mukama n'alyoka agolokoka ng'ali nga ava mu tulo, ng'omusajja omuzira azuukuka mu tulo ng'atamidde.

⁶⁶ N'akuba abalabe be ne badduka; n'abaswaza emirembe gyonna.

- ⁶⁷ MUKAMA yaleka ennyumba ya Yusufu, n'ekika kya Efulayimu n'atakironda;
- ⁶⁸ naye n'alonda ekika kya Yuda, lwe lusozi Sayuuni lwe yayagala.
- ⁶⁹ N'azimba awatukuvu we ne wagulumira ng'ensozi empanvu; ne waba ng'ensi gye yanyweza emirembe gyonna.
- ⁷⁰ Yalonda Dawudi omuweereza we; n'amuggya mu kulunda endiga.
- ⁷¹ Ave mu kuliisa endiga, naye alundenga Yakobo, be bantu be, era alabirirenga Isirayiri omugabo gwe, gwe yeerondera.
- ⁷² N'abalabirira n'omutima ogutaliimu bukuusa, n'abakulembera n'amagezi g'emikono gye.

Zabbuli 79

Zabbuli ya Asafu.

- ¹ Ayi Katonda omugabo gwo gulumbiddwa amawanga; boonoonye yeekaalu yo entukuvu ne Yerusaalemi kizikiriziddwa, ne kifuuka entuumo.
- ² Emirambo gy'abaweereza bo bagifudde mmere ya nnyonyi ez'omu bbanga, n'emibiri gy'abatukuvu bo giweereddwa ensolo ez'omu nsiko.
- ³ Omusaayi gwabwe ne guyibwa ng'amazzi okwetooloola Yerusaalemi, so nga abafudde tewali muntu abaziika.
- ⁴ Baliraanwa baffe batuyisaamu amaaso, era tufuuse ekisekererwa eri abo abatwetoolodde.
- ⁵ Ayi MUKAMA olitusunguwalira kutuusa ddi, nnaku zonna? Obuggya bwo bunaabubuukanga ng'omuliro?
- ⁶ Obusungu bwo bubuubuukire ku mawanga agatakumanyi, ne ku bwakabaka obutakoowoola linnya lyo.
- ⁷ Kubanga bazikirizza Yakobo, ne basaanyaawo ensi ye.
- ⁸ Totubalira kibi kya bajjajaffe; tukusaba oyanguwe okutusaasira kubanga tuli mu bwetaavu bungi nnyo.
- ⁹ Tuyambe olw'ekitiibwa ky'erinnya lyo, Ayi Katonda ow'obulokozi bwaffe; otuwonye era otutangiririre olw'ebibi byaffe olw'erinnya lyo.
- ¹⁰ Lwaki abamawanga babuuza nti, "Katonda waabwe ali ludda wa?" Kkiriza okuwalana eggwanga olw'omusaayi gw'abaweereza bo ogwayiyibwa, kumanyibwe mu mawanga gonna nga naffe tulaba.
- ¹¹ Wuliriza okusinda kw'omusibe; okozese omukono gwo ogw'amaanyi owonye abo abasaliddwa ogw'okufa.

¹² Ayi Mukama, baliraanwa baffe abakuduulira, bawalane emirundi musanvu.

¹³ Kale nno, ffe abantu bo era endiga ez'omu ddundiro lyo, tulyoke tukutenderezenga emirembe gyonna; buli mulembe gulyoke gukutenderezenga emirembe gyonna.

Zabbuli 8o

Ya Mukulu wa Bayimbi. Ku ddoboozi, "Amalanga g'Endagaano." Zabbuli ya Asafu.

¹ Wulira, Ayi Omusumba wa Isirayiri; ggwe akulembera Yusufu ng'alunda ekisibo kyo; ggwe atudde ku ntebe ey'obwakabaka mu bakerubi, twakire.

² Amaanyi go galabike mu Efulayimu, ne mu Benyamini ne mu Manase, ojje otulokole.

³ Tukomyewo gy'oli, Ayi Katonda, otutunuulize amaaso ag'ekisa, otulokole.

⁴ Ayi Katonda, MUKAMA ow'Eggye, olituusa ddi okusunguwalira okusaba kw'abantu bo?

⁵ Wabaliisa emmere ejjudde amaziga; n'obanywesa ebikopo by'amaziga musera.

⁶ Otufudde eky'okusekererwa mu baliraanwa baffe, n'abalabe baffe ne batuduulira.

⁷ Tukomyewo gy'oli, Ayi MUKAMA ow'Eggye, otutunuulize amaaso go ag'ekisa, tulokolebwe.

⁸ Waleeta omuzabbibu ng'oguggya mu Misiri; n'ogobamu amawanga agaali mu nsi muno n'ogusimba.

⁹ Wagulongooseza ettaka, ne gumera, emirandira ne ginywera bulungi, ne gwagaagala mu nsi.

¹⁰ Ekisiikirize kyagwo ne kibikka ensozi, n'amatabi gaagwo ne gaba ng'emivule eg'yamaanyi.

¹¹ Amatabi gaagwo ne gatuuka ku Nnyanja eya Wakati n'amatabi g'enyanja gaayo ne gatuuka ku Mugga Fulaati.

¹² Kale wamenyera ki ebisenge byagwo, abayitawo bona ne beenogera ebibala byagwo?

¹³ Embizzi ez'omu kibira zigwonoona, na buli nsolo ey'omu nsiko egulya.

¹⁴ Tukyukire, Ayi Katonda ow'Eggye, otunuulire ensi ng'osinziira mu ggulu; olabirire omuzabbibu guno.

¹⁵ Gwe wagwesimbira n'omukono gwo ogwa ddyo, era ggwe weerondera omwana wo.

¹⁶ Bagutemye, ne bagwokya omuliro; abakoze ekyo banenye mu bukambwe, obazikirize.

¹⁷ Naye muwe amaanyi omusajja oyo gw'oyagala era omwana oyo gwe weerondera.

¹⁸ Bwe tutyo tuleme okukuvaako, n'okukukuba amabega. Otuzzeemu amaanyi, naffe tunaakoowoolanga erinnya lyo.

¹⁹ Otukomyewo gy'oli, Ayi MUKAMA Katonda ow'Eggye, otutunuulize amaaso go ag'ekisa, tulyoke tulokolebwe.

Zabbuli 81

Ya Mukulu wa Bayimbi. Zabbuli ya Asafu.

¹ Mumuyimbire nnyo n'essanyu Katonda amaanyi gaffe; muyimuse waggulu amaloboozi gammwe eri Katonda wa Yakobo!

² Mutandike okuyimba, mukube ebitasa n'ennanga evuga obulungi ey'enkoba awamu n'entongooli.

³ Mufuuwe ejnjombe ng'omwezi gwakaboneka, era mugifuuwe nga gwa ggabogabo, ku lunaku olw'embaga yaffe.

⁴ Ekyo kye kiragiro eri Isirayiri, lye tteeka lya Katonda wa Yakobo.

⁵ Yaliteekera Yusufu, Katonda bwe yalumba ensi ya Misiri; gye nawulirira olulimi olwannema okutegeera.

⁶ "Nnamutikkula omugugu okuva ku kibegabega kye; n'emikono gye ne ngiwummuza okusitula ebisero.

⁷ Mwankoooola nga muli mu nnaku ne mbadduukirira ne mbawonya, nabaanukulira mu kubwatuka mu kire; ne mbagezesu ku mazzi ag'e Meriba.

⁸ Muwulire, mmwe abantu bange, nga mbalabula. Singa onompuliriza, ggwe Isirayiri!

⁹ Temubeeranga na katonda mulala, wadde okuvuunamira katonda omulala yenna.

¹⁰ Nze MUKAMA Katonda wo, eyakuggyga mu nsi y'e Misiri. Yasamya akamwa ko, nange nnaakajuza.

¹¹ "Naye abantu bange tebampuliriza; Isirayiri teyanjondera.

¹² Nange ne mbawaayo eri obujeemu bw'omutima gwabwe, okugoberera ebyo bye baagala.

¹³ "Singa abantu bange bampuliriza; singa Isirayiri agondera ebiragiro byange,

¹⁴ mangwago nandirwanyisizza abalabe baabwe, ne mbawangula.

¹⁵ Abo abakyawa MUKAMA ne beegonza gy'ali; ekibonerezo kyabwe kya mirembe gyonna.

¹⁶ Naye ggwe, Isirayiri, nandikuliisizza enjaano esingira ddala obulungi, ne nkukkusa omubisi gw'enjuki nga guva mu lwazi."

Zabbuli 82

Zabbuli ya Asafu.

¹ Katonda akubiriza olukiiko lwe olukulu olw'omu ggulu, ng'alamula bakatonda.

² Mulituusa ddi okusala emisango n'obukuusa, nga musalira abanafu?

³ Abanafu n'abatalina bakitaabwe mubalamulenga mu bwenkanya; abaavu n'abanyigirizibwa mubayambenga mu bwenkanya.

⁴ Mulwanirire abatalina maanyi n'abali mu kwetaaga, mubawonye; mubanunule nga mubaggya mu mikono gy'ababi.

⁵ Tebalina kye bamanyi, era tebategeera. Batambulira mu kizikiza; emisingi gy'ensi gyonna ginyeenyezebwa.

⁶ Njogedde nti, Muli bakatonda, era mwenna muli baana b'oyo Ali Waggulu Ennyo.

⁷ "Naye mugenda kufa ng'abantu obuntu; muliggwaawo ng'abafuzi abalala bona bwe baggwaawo."

⁸ Ogolokoke, Ayi Katonda, olamule ensi; kubanga amawanga gonna gago.

Zabbuli 83

Oluyimba. Zabbuli ya Asafu.

¹ Ayi Katonda, tosirika busirisi n'etebaayo kanyego. Tosirika, Ayi Katonda, n'otobaako ky'okola.

² Wuliriza oluyoogaano oluva mu balabe bo; abo abaagala okukulwanyisa bali mu keetaloo.

³ Bateesa n'obujagujagu okulumba abantu bo; basalira enkwe abo b'oyagala ennyo.

⁴ Bagamba nti, "Mujje eggwanga lyabwe tulizikirize, n'erinnya lya Isirayiri lireme okujukirwanga emirembe gyonna!"

⁵ Basala olukwe n'omwoyo gumu; beegasse wamu bakulwanyise.

⁶ Abantu b'omu weema za Edomu, n'ez'Abayisimayiri, n'eza Mowaabu, n'Abakagale;

- ⁷ Gebali ne Amoni, ne Amaleki, n'Abafirisuuti n'abantu b'omu Ttuulo.
- ⁸ Era ne Asiriya yeegasse nabo, okuyamba bazzukulu ba Lutti.
- ⁹ Bakoleko nga bwe wakola Midiyaani, era nga bwe wakola Sisera ne Yabini ku mugga Kisoni,
- ¹⁰ abaazikiririra mu Endoli ne bafuuka ng'obusa ku ttaka.
- ¹¹ Abakungu baabwe bafuule nga Olebu ne Zeebu, n'abalangira baabwe bona bafuuke nga Zeba ne Zalumunna,
- ¹² abaagamba nti, "Ka tutwale amalundiro ga Katonda, tugeefunire."
- ¹³ Ayi Katonda wange, bafuumuule ng'enfuufu, obasaasaanye ng'ebisusunku mu mbuyaga.
- ¹⁴ Ng'omuliro bwe gwokya ekibira; n'ennimi z'omuliro ne zikoleeza ensozi,
- ¹⁵ naawe bw'otyo bw'oba obawondera n'omuyaga gwo, obatiise ne kibuyaga wo ow'amaanyi.
- ¹⁶ Baswaze nnyo, balyoke banoonyenga erinnya lyo, Ayi MUKAMA.
- ¹⁷ Bajjule ensonyi n'okutya, bazikirire nga baswadde nnyo.
- ¹⁸ Balyoke bategeere nti, Ggwe wekka, Ayi MUKAMA, ggw'oyitibwa YAKUWA, gw'obeera waggulu ennyo ng'ofuga ensi yonna.

Zabbuli 84

Ya Mukulu wa Bayimbi. Zabbuli ya Batabani ba Koola.

- ¹ Eweema zo nga nnungi, Ayi MUKAMA ow'Eggye!
- ² Omwoyo gwange guyayaana, gwagala na kuzirika, olw'empya za MUKAMA, omutima gwange n'omubiri gwange bikoowoola Katonda omulamu.
- ³ Weewaawo, ne nkazaluggyga yeekoledde ekisu, n'akataayi ennyumba mwe binaakulizanga abaana baabyo awo okumpi n'Ebyoto byo, Ayi MUKAMA Ayinzabyonna, Kabaka wange, era Katonda wange.
- ⁴ Balina omukisa ababeera mu nnyumba yo, banaakutenderezanga.
- ⁵ Alina omukisa omuntu eyeesiga amaanyi go, era assaayo omwoyo okutambulira mu makubo go.
- ⁶ Bayita mu kiwonvu Baka, ne bakifuula ekifo ky'ensulo; n'enkuba ya ddumbi n'ejjuza ebidiba byakyo.
- ⁷ Bagenda beeyongera amaanyi, okutuusa lwe batuuka mu maaso ga Katonda mu Sayuuni.

⁸Wulira okusaba kwange, Ayi MUKAMA Katonda ow'Eggye; mpuliriza, Ayi Katonda wa Yakobo.

⁹ Ayi Katonda, Engabo yaffe, tunuulira kabaka wo n'okusaasira oyo gwe wafukako amafuta.

¹⁰ Okumala olunaku olumu mu mpya zo, kisinga okubeera emyaka olukumi mu bifo ebirala. Njagala okuba omuggazi mu nnyumba ya Katonda wange, okusinga okubeeranga mu weema z'abakola ebibi.

¹¹ Kubanga MUKAMA Katonda ye njuba yaffe era ye ngabo yaffe; atuwa emikisa gye awamu n'ekitiibwa; tewaliwo kirungi na kimu ky'ataawa abo abatambulira mu makubo ge nga tebaliiko kyakunenyezebwa.

¹² Ayi MUKAMA ow'Eggye alina omukisa omuntu akwesiga.

Zabbuli 85

Ya Mukulu wa Bayimbi. Zabbuli ya Batabani ba Koola.

¹ Ensi yo ogikoledde ebyekisa Ayi MUKAMA; Yakobo omuddizza ebibye.

² Abantu bo obasonyiye ebyonoono byabwe, n'ebibi byabwe byonna n'obibikkako.

³ Ekiruyi kyo kyonna okirese, n'oleka n'obusungu bwo obubuubiuka.

⁴ Tukomyewo gy'oli, Ayi Katonda w'obulokozi bwaffe, oleke okutusunguwalira.

⁵ Onootusunguwaliranga emirembe gyonna? Onootunyiigiranga emirembe n'emirembe?

⁶ Tolituzaamu ndasi, abantu bo basanyukirenga mu ggwe?

⁷ Tulage okwagala kwo okutaggwaawo Ayi Katonda, era otuwe obulokozi bwo.

⁸ Nnaawulirizanga MUKAMA Katonda by'agamba;asuubiza abantu be, be batukuvu be, okubawa emirembe; naye tebaddayo mu byonoono byabwe.

⁹ Ddala ddala obulokozi bwe buseemberera abo abamutya, ensi yaffe n'eryoka ejjula ekitiibwa kye.

¹⁰ Okwagala n'obwesigwa bisisinkanye; obutuukirivu n'emirembe binywegeraganye.

¹¹ Obwesigwa bulose mu nsi, n'obutukuvu ne butunuulira ensi nga businzira mu ggulu.

¹² Ddala ddala Katonda anaatuwanga ebirungi, n'ensi yaffe eneebalanga ebibala bingi.

¹³Obutuukirivu bunaamukulemberanga, era bunaateekateekanga ekkubo mw'anaayitanga.

Zabbuli 86

Okusaba kwa Dawudi.

¹Otege okutu kwo, Ayi MUKAMA, owulire okusaba kwange, onnyanukule, kubanga ndi mwavu atalina kintu.

²Okuumu obulamu bwange, kubanga nkuweereza n'obwesigwa. Katonda wange, ondokole nze omuddu wo akwesiga.

³Onsaasire, Ayi Mukama, kubanga olunaku lwonna nsiiba nkukoowoola.

⁴Osanyuse omuweereza wo Ayi Mukama; kubanga omwoyo gwange nguyimusa eyo gy'oli.

⁵Ddala ddala olina ekisa era osonyiwa, Ayi Mukama; n'abo bona abakukoowoola obaagala nnyo.

⁶Owulire okusaba kwange, Ayi MUKAMA; owulirize eddoboozi erikaabirira ekisa kyo.

⁷Bwe nnaabanga mu buzibu nnaakukoowoolanga; kubanga ononnyanukulanga.

⁸Mu bakatonda bona tewali ali nga ggwe, Ayi Mukama; era teriiyo akola bikolwa ng'ebibyo.

⁹Ayi Mukama amawanga gonna ge watonda ganajjanga mu maaso go ne gakusinza; era ne bagulumiza erinnya lyo ery'ekitiibwa.

¹⁰Kubanga oli mukulu, era okola ebyewunyisa; ggwe wekka ggwe Katonda.

¹¹Onjigirize ekkubo lyo, Ayi MUKAMA, ntambulirenga mu mazima go; ompe omutima omunywevu ogutasagaasagana, ntyenga erinnya lyo.

¹²Nnaakutenderezanga, Ayi Mukama Katonda wange, n'omutima gwange gwonna; erinnya lyo nnaaligulumizanga emirembe gyonna.

¹³Okwagala kwo okutaggwaawo kungi nnyo gye ndi; wawonya omwoyo gwange amagombe.

¹⁴Ayi Katonda, ab'amalala bannumba, ekinja ky'abantu abataliimu kusaasira bannoonya okunzita, be bantu abatakufiirako ddala.

¹⁵Naye ggwe, Mukama Katonda oli musaasizi era ow'ekisa, olwawo okusunguwala, ojjudde okwagala n'obwesigwa.

¹⁶Onkyukire, onsaasire, ompe amaanyi go nze omuweereza wo; nze omwana w'omuweereza wo omukazi ondokole.

¹⁷Nkolera akabonero akalaga ebirungi byo, abalabe bange bakalabe baswale; kubanga ggwe, Ayi MUKAMA, onnyambye era onzizizzaamu amaanyi.

Zabbuli 87

Zabbuli ya Batabani ba Koola. Oluyimba.

¹Atadde emisingi gye ku lusozi olutukuvu.

² MUKAMA ayagala emiryango gya Sayuuni okusinga ennyumba zonna eza Yakobo.

³ Ebintu eby'ekitiibwa bikwogerwako, ggwe ekibuga kya Katonda.

⁴ "Mu mawanga ge mmayi mwe muli Lakabu, ne Babulooni; era ndyogera ku Bufirisuuti, ne ku Ttuulo ne ku Esiyopya nti, 'Ono yazaalirwa mu Sayuuni.' "

⁵Bwe baliba boogera ku Sayuuni baligamba nti, "Ono n'oli baazaalirwa omwo," n'oyo Ali Waggulu Ennyo alikinyweza.

⁶ MUKAMA aliwandiika mu kitabo bw'ati, omuli amannya g'abantu nti, "Ono yazaalibwa omwo."

⁷ Banaakubanga ebivuga nga bwe bayimba nti, "Ensulo zange zonna ziri mu ggwe."

Zabbuli 88

Ya Mukulu wa Bayimbi. Zabbuli ya Batabani ba Koola.

¹ Ayi MUKAMA Katonda, Omulokozi wange, nkaaba emisana n'ekiro mu maaso go.

²Kkiriza okusaba kwange kutuuke gy'oli; otege okutu kwo nga nkukoowoola.

³ Kubanga emmeeme yange ejjudde ebizibu, era nseemberedde okufa.

⁴ Mbalirwa mu abo abaserengeta emagombe; nfaanana ng'omuntu atalina maanyi.

⁵ Bandese wano ng'afudde, nga ndi ng'abo be basse abalinda obulinzi entaana, nga tokyaddayo kubajjukira, era nga tewakyali kya kubakolera.

⁶ Ontadde mu kinnya ekisinga obuwantu, era eky'ekizikiza ekikutte ennyo.

⁷ Obusungu bwo bumbuubuukiddeko nnyo, ng'ennyanja esiikuuse n'amayengo gaayo ne gankuba okusukkirira.

⁸ Ab'emikwano abasingira ddala okunjagala obammazeeko, n'onfuula ekyenyinyalwa gye bali. Nsibiddwa, so sisobola kwesumattula.

⁹ Amaaso gange gayimbadde olw'ennaku. Nkukoowoola buli lunaku, Ayi MUKAMA, ne ngolola emikono gyange gy'oli nga nkwegayirira.

¹⁰ Ebyamagero byo onoobikoleranga bafu? Abafudde banaagolokokanga ne bakutendereza?

¹¹ Okwagala kwo onookulaganga abali emagombe n'obwesigwa bwo abo abali mu kifo eky'okuzikirira?

¹² Ebyamagero byo binaamanyibwanga mu kifo ekyo eky'ekizikiza? Oba ebikolwa byo eby'obutuukirivu bwo bye binaamanyibwanga mu nsi eyamala edda okwerabirwa?

¹³ Naye nze, Ayi MUKAMA, naakabiriranga ggwe okunnyamba; buli nkya okusaba kwange kunaatuukanga gy'oli.

¹⁴ Ayi MUKAMA, onsuulidde ki? Onkwekedde ki amaaso go?

¹⁵ Ombonyaabonyezza okuvira ddala mu buvubuka bwange, era nga mbeera kumpi n'okufa; ngumiikirizza nnyo entiisa yo, era kaakano mpweddemu essuubi.

¹⁶ Obusungu bwo obubuubaaka bunzigwereddeko era bunzikkiriza. Entiisa yo tendeseemu ka buntu.

¹⁷ Binzingiza nga mukoka olunaku lwonna; binsaanikiridde ddala.

¹⁸ Ommazeeko ab'emikwano n'abo abanjagala ennyo; nsigazza nzikiza yokka.

Zabbuli 89

Endagaano ya Katonda ne Dawudi.

¹ Nnaayimbanga ku kwagala kwo okungi, Ayi MUKAMA, emirembe gyonna. Nnaatenderezanga obwesigwa bwo n'akamwa kange, bumanyibwe ab'emirembe gyonna.

² Ddala ddala nnaategeezanga nti okwagala kwo tekuggwaawo ennaku zonna; n'obwesigwa bwo bunywevu ng'eggulu.

³ Nakola endagaano n'omulonde wange; nalayirira omuweereza wange Dawudi nti,

⁴ “Ezadde lyo nnaalinywezanga ennaku zonna, era entebe yo ey'obwakabaka nnaaginiwezanga emirembe gyonna.”

⁵ Eggulu linaatenderezanga ebyamagero byo n'obwesigwa bwo, Ayi MUKAMA, mu kibiina ky'abatukuvu bo.

⁶ Kale, mu ggulu waggulu, ani ageraageranyizika ne MUKAMA? Ani afaanana nga MUKAMA, mu abo ababeera mu ggulu?

⁷ Katonda atiibwa nnyo mu lukiiko olw'abatukuvu; era wa ntiisa okusinga bona abamwetooloola.

⁸ Ayi MUKAMA Katonda ow'Eggye, ani akufaanana? Oli wa buyinza, Ayi MUKAMA, ojjudde obwesigwa.

⁹ Ggwe ofuga amalala g'enyanja; amayengo gaayo bwe geekulumulula ogakkakkanya.

¹⁰ Lakabu wamubetentera ddala; abalabe bo n'obasaasaanya n'omukono gwo ogw'amaanyi.

¹¹ Eggulu liryo, n'ensi yiyo; ensi yonna gwe wagitonda ne byonna ebigirimu.

¹² Watonda obukiikkono n'obukiikkaddyo; ensozi Taboli ne Kerumooni zitendereza erinnya lyo.

¹³ Oli wa buyinza bungi nnyo; omukono gwo gwa maanyi, omukono gwo ogwa ddyo gunaagulumizibwanga.

¹⁴ Obutuukirivu n'obwenkanya gwe musingi gw'obwakabaka bwo. Okwagala n'obwesigwa bye binaakukulemberanga.

¹⁵ Balina omukisaabantu abamanyi okukutendereza MUKAMA n'amaloboozi ag'essanyu; Ayi MUKAMA, banaatambuliranga mu ssanyu lyo.

¹⁶ Banaasanyukiranga mu linnya lyo okuzibya obudde, n'obutuukirivu bwo banaabugulumizanga.

¹⁷ Kubanga gw'obawa amaanyi ne bafuna ekitiibwa. Olw'okwagala kwo otutuusa ku buwanguzi olw'ekisa kyo.

¹⁸ Ddala ddala, MUKAMA ye ngabo yaffe, Omutukuvu wa Isirayiri kabaka waffe.

¹⁹ Mu biro biri eby'edda wayogera n'omuweereza wo omwesigwa mu kwolesebwa nti, Ngulumizizza omuzira ow'amaanyi; ngulumizizza omuvubuka okuva mu bantu abaabulijjo.

²⁰ Nalaba Dawudi, omuweereza wange; ne mufukako amafuta gange amatukuvu okuba kabaka.

²¹ Nnaamukulemberanga, n'omukono gwange gunaamunywezanga.

²² Tewaliba mulabe we alimuwangula, so n'aboonoonyi tebaamunyigirizenga.

²³ Abalabe be n'abamukyawa ndibamerengula, n'amaggye agamulwanyisa ndigabetenta.

²⁴ Obwesigwa bwange n'okwagala kwange kunaabanga naye, ne mu linnya lyange aneeyongeranga okuba ow'amaanyi.

²⁵ Alifuga okuva ku migga okutuuka ku nnyanja ennene.

²⁶ Anankowoolanga ng'agamba nti, Ggwe Kitange era Katonda wange, ggwe Lwazi olw'Obulokozi bwange.

²⁷ Ndimufuula omwana wange omubereberye, era kabaka asinga okugulumizibwa mu bakabaka bona ab'ensi.

²⁸ Okwagala kwange kunaabeeranga naye ennaku zonna; n'endagaano gye nkoze naye teeremenga kutuukirira.

²⁹ Ezzadde lye teririggwaawo emirembe gyonna, n'obwakabaka bunaavanga mu kika kye ennaku zonna.

³⁰ Abaana be bwe banaanyoomanga amateeka gange, ne batagoberera biragiro byange;

³¹ bwe banaamenyanga ebiragiro byange, ne batagondera mateeka gange,

³² ndibabonereza n'omuggo olw'ebibi byabwe, ne mbakuba emiggo olw'ebyonoono byabwe.

³³ Naye ssirirekayo kumwagala, wadde okumenyawo obwesigwa bwange gy'ali.

³⁴ Sigenda kulemwa kutuukiriza ndagaano yange, wadde okukyusa ku ebyo akamwa kange bye koogedde.

³⁵ Nalayira omulundi gumu, ng'obutuukirivu bwange bwe buli, nti, "Dawudi sigenda kumulimba."

³⁶ Ezzadde lye teririggwaawo emirembe gyonna; n'entebe ye ey'obwakabaka enaabeerangawo emirembe gyonna okufaanana ng'enjuba.

³⁷ Entebe ye ey'obwakabaka erinywezebwa emirembe n'emirembe, ng'omwezi ku ggulu era nga ye mujulirwa wange omwesigwa.

³⁸ Naye kaakano, gwe wafukako amafuta omusudde, omukyaye era omunyiigidde.

³⁹ Endagaano gye wakola n'omuweereza wo wagimenyawo, n'engule ye n'ogisuula eri mu nfuufu.

⁴⁰ Wamenyaamena bbugwe we yenna, n'oggyawo n'ebigo bye.

⁴¹ Abatambuze baanyaga ebintu bye; n'afuuka ekisekererwa mu baliraanwa be.

⁴² Wayimusa omukono gw'abalabe be ogwa ddyo, n'osanyusa abalabe be bona.

⁴³ Wakyusa ekitala kye n'otomuyamba mu lutalo.

⁴⁴ Ekitiibwa kye wakikomya; entebe ye ey'obwakabaka n'ogisuula wansi.

⁴⁵ Ennaku z'obuvuka bwe wazisalako, n'omuswaza.

⁴⁶ Ayi MUKAMA, olyekweka ennaku zonna? Obusungu bwo obubuubiuka ng'omuliro bulikoma ddi?

⁴⁷ Jjukira ekiseera ky'obulamu bwange nga bwe kiri ekimpi. Wateganira bwereere okutonda abantu bona!

⁴⁸ Muntu ki omulamu atalifa, omuntu asobola okwewonya okufa n'awangula amaanyi g'emagombe?

⁴⁹ Ayi Mukama, okwagala kwo okw'edda okutaggwaawo, kwe walayirira Dawudi mu bwesigwa bwo, kuli luuyi wa?

⁵⁰ Ayi Mukama, jjukira abaweereza bo nga basekererwa, engeri abantu ab'omu mawanga amangi, bwe banzitoowerera mu mutima nga banvuma;

⁵¹ abalabe bo banvuma, Ayi MUKAMA; ne bajerega oyo gwe wafukako amafuta, nga bamukijjanya buli gy'alaga.

⁵² MUKAMA atenderezebwenga emirembe gyonna! Amiina era Amiina!

Zabbuli 90

EKITABO IV Zabbuli 90–106

Okusaba kwa Musa, omusajja wa Katonda.

¹ Ayi Mukama, obadde kifo kyaffe eky'okubeeramu emirembe gyonna.

² Ensozi nga tezinnabaawo, n'ensi yonna nga tonnagitonda; okuva ku ntandikwa okutuusa ku nkomerero y'emirembe gyonna, ggwe Katonda.

³ Omuntu omuzzaayo mu nfuufu, n'oyogera nti, "Mudde mu nfuufu, mmwe abaana b'abantu."

⁴ Kubanga emyaka olukumi, gy'oli giri ng'olunaku olumu olwayita, oba ng'ekisisimuka mu kiro.

⁵ Obeera n'obamalirawo ddala nga bali mu tulo otw'okufa. Ku makya baba ng'omuddo omuto.

⁶ Ku makya guba munyirivu, naye olw'eggulo ne guwotoka ne gukala.

⁷ Ddala ddala obusungu bwo butumalawo, n'obukambwe bwo bututiisa nnyo.

⁸ Ebyonoono byaffe obyanjadde mu maaso go, n'ebyo bye tukoze mu kyama obyanise awo w'oli.

⁹ Ddala ddala tumala ennaku z'obulamu bwaffe zonna ng'otunyiigidde; tukomekkereza emyaka gyaffe n'okusinda.

¹⁰ Obungi bw'ennaku zaffe gy'emyaka nsanvu, oba kinaana bwe tubaamu amaanyi. Naye emyaka egyo gjijula ennaku n'okutegana, era giyita mangu, olwo nga tuggwaawo.

¹¹ Ani amanyi amaanyi g'obusungu bwo? Kubanga ekiruyi kyo kingi ng'ekitiibwa kye tusaana okukuwa bwe kyenkana.

¹² Otuyigirize okutegeeranga obulungi ennaku zaffe, tulyoke tubeere n'omutima ogw'amagezi.

¹³ Ayi Mukama, komawo gye tuli. Olitusuula kutuusa ddi? Abaweereza bo bakwatirwe ekisa.

¹⁴ Tujjuze okwagala kwo okutaggwaawo ku makya, tulyoke tuyimbenga nga tujaguza n'essanyu era tusanyukenga obulamu bwaffe bwonna.

¹⁵ Tusanyuse, Ayi MUKAMA, okumala ennaku nga ze tumaze ng'otubonyaabonya, era n'okumala emyaka nga gye tumaze nga tulaba ennaku.

¹⁶ Ebikolwa byo biragibwe abaweereza bo, n'abaana baabwe balabe ekitiibwa kyo.

¹⁷ Okusaasira kwo, Ayi MUKAMA Katonda waffe, kubeerenga ku ffe, otusobozesenga okutuukiriza obulungi emirimu gyaffe; weewaawo, otusobozesenga okutuukiriza obulungi emirimu gyaffe.

Zabbuli 91

Obwesige bw'oyo atya Katonda.

¹ Oyo abeera mu kifo eky'ekyama eky'oyo Ali Waggulu Ennyo; aliwumulira mu kisiikirize kya Katonda Ayinzabyonna.

² Nnaayogeranga ku MUKAMA nti, Oli kiddukiro kyange era ekigo kyange; ggwe Katonda wange gwe nneesiga.

³ Ddala ddala y'anaakuwonyanga omutego gw'omuyizzi, ne kawumpuli azikiriza.

⁴ Alikubikka n'ebyoya bye, era mu biwaawaatiro bye mw'onoddukiranga; obwesigwa bwe bunaabanga ngabo yo okukukuumanga.

⁵ Tootyenga ntiisa ya kiro, wadde akasaale akalasibwa emisana;

⁶ newaakubadde olumbe olusoobasooba mu kizikiza, wadde kawumpuli azikiriza mu ttuntu.

⁷ Abantu olukumi balifiira ku lusegere lwo, n'omutwalo ne bafiira ku mukono gwo ogwa ddyo, naye olumbe terulikutuukako.

⁸ Olitunuulira butunuulizi n'amaaso go; n'olaba ekibonerezo ky'omukozi w'ebibi.

⁹ Kubanga bw'olifuula MUKAMA ekiddukiro kyo; Ali Waggulu Ennyo n'omufuula ekifo kyo mw'obeera,

- ¹⁰ tewali kabi kalikutuukako, so tewali kibonoobono kirisemberera nnyumba yo.
- ¹¹ Kubanga MUKAMA aliragira bamalayika be bakukuume mu makubo go gonna.
- ¹² Balikuwanirira mu mikono gyabwe; oleme okwekoona ekigere kyo ku jjinja.
- ¹³ Olirinnya ku mpologoma ne ku nswera; olirinnyirira empologoma ey'amaanyi, n'omusota.
- ¹⁴ "Olw'okuba nga njagala kyendiva muwonya; nnaamukuumanga, kubanga amanyi erinnya lyange.
- ¹⁵ Anankowoolanga ne muyitabanga; nnaabeeranga naye mu biseera eby'akabi. Ndimuwonya era ndimuwa ekitiibwa.
- ¹⁶ Ndimuwangaaza n'asanyuka era ndimulaga obulokozi bwange."

Zabbuli 92

Zabbuli. Oluyimba Iwa Ssabbiiti.

- ¹ Kirungi okwebazanga MUKAMA, n'okuyimba ennyimba n'okutenderezanga erinnya lyo, Ayi Ggwe, Ali Waggulu Ennyo;
- ² okutendanga okwagala kwo okutakoma buli nkya, n'okutendanga obwesigwa bwo buli kiro.
- ³ Okukutenderezanga n'amaloboozi g'enkoba z'ennanga n'endere awamu n'entongooli.
- ⁴ Kubanga ggwe, Ayi MUKAMA, onkoledde ebinsanyusizza; kyenva nkuyimbira n'essanyu olw'emirimu gy'emikono gyo.
- ⁵ Emirimu gyo nga mikulu, Ayi MUKAMA; ebirowoozo byo nga tebitegeerekeka!
- ⁶ Omuntu atalina magezi tamanyi; n'omusirusiru kino tasobola kukitegeera;
- ⁷ newaakubadde ng'abakola ebibi baloka ng'omuddo, n'aboonoonyi bona ne bafuna ebirungi, boolekedde okuzikirira okw'emirembe n'emirembe!
- ⁸ Naye ggwe, Ayi MUKAMA, ogulumizibwa emirembe gyonna.
- ⁹ Kubanga abalabe bo, Ayi MUKAMA, abalabe bo balizikirira, abakola ebibi bona balisaasaanyizibwa.
- ¹⁰ Naye nze wanfuula wa maanyi okwenkana embogo, n'onfukako amafuta amalungi.
- ¹¹ Amaaso gaalaba bbugwe ng'agwa ku balabe bange; n'amatu gange gawulidde akabi akatuuse ku abo abanjigganya.
- ¹² Abatuukirivu balyegolola ng'enkindu, ne bakula ne bawanvuwa ng'emivule gy'e Lebanooni.

¹³ Egisimbibwa mu nnyumba ya MUKAMA. Baligimukira mu mpya za Katonda waffe.

¹⁴ Ne mu bukadde bwabwe balibala ebibala; baliba balamu era abagimu,

¹⁵ kiryoche kitegeeze nti, MUKAMA w'amazima, lwe Lwazi lwange era mu ye temuli butuukirivu.

Zabbuli 93

¹ MUKAMA afuga; ayambadde ekitiibwa. MUKAMA ayambadde ekitiibwa era yeesibye amaanyi. Ensi yanywezebwa; teyinza kunyeenyebwa.

² Entebe yo ey'obwakabaka yanywezebwa okuva edda n'edda. Ggwe, Ayi Katonda, oli wa mirembe na mirembe.

³ Amayengo gatumbidde, Ayi MUKAMA; ennyanja ziyimusizza amaloboozi gaazo, n'amazzi g'ennyanja gayira.

⁴ MUKAMA, Ali Waggulu Ennyo, oli wa maanyi okusinga okuyira kw'amazzi amangi; oli wa maanyi okusinga amayengo g'ennyanja.

⁵ Ayi MUKAMA ebiragiro byo binywevu, n'obutukuvu bujjudde ennyumba yo, ennaku zonna.

Zabbuli 94

¹ Ayi MUKAMA, ggwe Katonda awalana eggwanga, ggwe Katonda awalana eggwanga, labika omasemase.

² Golokoka, Ayi ggwe Omulamuzi w'ensi, osasule ab'amalala nga bwe kibagwanidde.

³ Ayi MUKAMA, omukozi w'ebibi alikomya ddi? Omukozi w'ebibi alituusa ddi ng'asanyuka?

⁴ Bafukumula ebigambo eby'okwewaanawaana; abakola ebibi bona beepankapanka.

⁵ Babetenta abantu bo, Ayi MUKAMA, babonyaabonya ezzadde lyo.

⁶ Batta nnamwandu n'omutambuze; ne batemula ataliiko kitaawe.

⁷ Ne boogera nti, "Katonda talaba; Katonda wa Yakobo tafaayo."

⁸ Mwerinde mmwe abantu abatategeera. Mmwe abasirusiru muligeziwala ddi?

⁹ Oyo eyatonda okutu tawulira? Oyo eyakola eriiso talaba?

¹⁰ Oyo akangavvula amawanga, taakubonereze? Oyo ayigiriza abantu talina ky'amanyi?

- ¹¹ MUKAMA amanyi ebirowoozo by'abantu; amanyi nga mukka bukka.
- ¹² Ayi MUKAMA, alina omukisa oyo gw'ogunjula, gw'oyigiriza eby'omu mateeka go;
- ¹³ omuwummuzaako mu kabi kaalimu, okutuusa abakola ebibi lwe balisimirwa ekinnya.
- ¹⁴ Kubanga MUKAMA talireka bantu be; talyabulira zzadde lye.
- ¹⁵ Aliramula mu butuukirivu, n'abo abalina emitima emigolokofu bwe banaakolanga.
- ¹⁶ Ani alinnwanyisizaako abakola ebibi? Ani alinnwanirira eri abakola ebibi?
- ¹⁷ Singa MUKAMA teyali mubeezi wange, omwoyo gwange gwandiserengese emagombe.
- ¹⁸ Bwe naleekaana nti, "Nseerera!" Okwagala kwo okutaggwaawo, Ayi MUKAMA, ne kumpanirira.
- ¹⁹ Ebyeraliikiriza omutima gwange bwe byayitirira obungi, okusaasira kwo ne kuzzaamu omwoyo gwange amaanyi.
- ²⁰ Oyinza okukolagana n'obufuzi obukyamu, obukaabya abantu n'amateeka gaabwe?
- ²¹ Abakola ebibi beegatta ne balumbagana abatuukirivu; atasobezza ne bamusalira ogw'okufa.
- ²² Naye MUKAMA afuuse ekiddukiro kyange eky'amaanyi; ye Katonda wange, era Olwazi lwange mwe neekweka.
- ²³ MUKAMA alibabonereza olw'ebibi byabwe, n'abazikiriza olw'ebyonoono byabwe; MUKAMA Katonda waffe alibamalirawo ddala.

Zabbuli 95

- ¹ Mujje tuyimbire MUKAMA; tuyimbire waggulu n'essanyu nga tutendereza MUKAMA Olwazi olw'obulokozi bwaffe.
- ² Tujje mu maaso ge n'okwebaza; tumuyimbire ennyimba ez'okumutendereza.
- ³ Kubanga MUKAMA ye Katonda Omukulu; era Kabaka Omukulu asinga bakatonda bona.
- ⁴ Enkonko ez'ensi ziri mu mukono gwe; n'entikko z'ensozi nazo zize.
- ⁵ Ennyanja yiye, kubanga ye yagikola; n'emikono gye, gye gyabumba olukalu.
- ⁶ Mujje tusinze tuvuuname mu maaso ge; tufukamire mu maaso ga MUKAMA, Omutonzi waffe.

⁷ Kubanga ye Katonda waffe, naffe tuli bantu ab'omu ddundiro lye, era tuli ndiga ze z'alabirira. Olwa leero bwe muwulira eddoboozi lye,

⁸ "Temukakanyaza mitima gyammwe nga bwe kyali e Meriba, ne ku lunaku luli e Maasa mu ddungu;

⁹ bajjajammwe gye bangezes; newaakubadde baali baalaba dda ebyamagero bye nakola.

¹⁰ Abantu b'omulembe ogwo ne mbasunguwalira okumala emyaka amakumi ana; ne njamba nti, 'Be bantu abakyama mu mutima gwabwe, era tebamanyi makubo gange.'

¹¹ Kyennava ndayira nga nsunguwadde nti, "Tebaliyingira mu kiwummulo kyange."

Zabbuli 96

¹ Muyimbire MUKAMA oluyimba olugya; muyimbire MUKAMA mmwe ensi yonna.

² Muyimbire MUKAMA; mutendereze erinnya lye, mulangirire obulokozi bwe buli lukya.

³ Mutende ekitiibwa kye mu mawanga gonna, eby'amagero bye mubimanyiseabantu bona.

⁴ Kubanga MUKAMA mukulu era asaanira nnyo okutenderezebwa; asaana okutiibwa okusinga bakatonda bona.

⁵ Kubanga bakatonda bona abakolebwa abantu bifaananyi bufaananyi; naye MUKAMA ye yakola eggulu.

⁶ Ekitiibwa n'obukulu bimwetooloola; amaanyi n'obulungi biri mu nnyumba ye entukuvu.

⁷ Mugulumize MUKAMA mmwe ebika eby'amawanga byonna; mutende ekitiibwa kya MUKAMA awamu n'amaanyi ge.

⁸ Mugulumize MUKAMA mu ngeri esaanira erinnya lye; muleete ekiweebwayo mujje mu mbuga ze.

⁹ Musinze MUKAMA mu kitibwa eky'obutuukirivu bwe. Ensi yonna esinze MUKAMA n'okukankana.

¹⁰ Mutegeeze amawanga gonna nti MUKAMA y'afuga. Ensi nnywevu, tewali asobola kuginyeenyaako; MUKAMA aliramula abantu mu bwenkanya.

¹¹ Kale eggulu lisanyuke n'ensi ejaguze; ennyanja eyire ne byonna ebigirimu.

¹² Ennimiro n'ebirime ebizirimu bijaguze; n'emiti gyonna egy'omu kibira nagyo gimutendereze n'ennyimba ez'essanyu.

¹³ Kubanga MUKAMA ajja; ajja okusalira ensi omusango. MUKAMA aliramula ensi mu butuukirivu, n'abantu bona abalamule mu mazima.

Zabbuli 97

- ¹ MUKAMA afuga; ensi esanyuke, n'embalama eziri ewala zijaguze.
- ² Ebire n'ekizikiza bimwetooloola; obutuukirivu n'obwenkanya gwe musingi gw'entebe y'obwakabaka bwe.
- ³ Omuliro gumukulembera ne gwokya abalabe be ku njuyi zonna.
- ⁴ Okumyansa kwe kumulisa ensi; ensi n'ekulaba n'ekankana.
- ⁵ Ensozi zisaanuuka ng'envumbo awali MUKAMA, mu maaso ga Mukama ow'ensi yonna.
- ⁶ Eggulu lirangirira obutuukirivu bwe; n'abantu bona ne balaba ekitiibwa kye.
- ⁷ Abasinza ebifaananyi ebikole n'emikono bona baswadde, abo abeenyumiririza mu bifaananyi ebyole. Mumusinze mwe mwenna bakatonda.
- ⁸ Sayuuni akiwulira n'asanyuka, n'ebyalo bya Yuda bijaguza; kubanga ogoberera eby'ensonga, Ayi Katonda.
- ⁹ Kubanga ggwe, Ayi MUKAMA, oli waggulu nnyo okusinga ensi; ogulumizibwa okusinga bakatonda bona.
- ¹⁰ Abo abaagala MUKAMA bakyawa ekibi, akuma obulamu bw'abamwesiga, n'abawonya okuva mu mukono gw'omukozi w'ebibi.
- ¹¹ Omusana gwe gwakira abatuukirivu, n'abalina omutima ogw'amazima bajjula essanyu.
- ¹² Musanyukirenga mu MUKAMA mmwe abatuukirivu, era mwebazenga erinnya lye ettukuvu.

Zabbuli 98

Zabbuli.

- ¹ Muyimbire MUKAMA oluyimba oluggyga, kubanga akoze eby'ekitalo. Omukono gwe ogwa ddyo, era omukono omutukuvu, gumuwadde obuwanguzi.
- ² MUKAMA ayolesezza obulokozi bwe, era abikkulidde amawanga obutuukirivu bwe.
- ³ Ajjukidde okwagala kwe okutakoma n'obwesigwa bwe eri ennyumba ya Isirayiri. Enkomero z'ensi yonna zirabye obulokozi bwa Katonda waffe.
- ⁴ Muyimbire MUKAMA n'essanyu lingi mwe ensi yonna; muyimbe ennyimba mu maloboozi ag'essanyu.

- ⁵ Mutendereze MUKAMA n'ennanga ez'enkoba; n'ennanga ez'enkoba n'amaloboozi ag'okuyimba,
- ⁶ n'amakondeere n'eddoboozi ly'enjnombe. Muyimbe n'essanyu mu maaso ga MUKAMA era Kabaka.
- ⁷ Ennyanja eyire ne byonna ebigirimu, n'ensi ne byonna ebigirimu bijaguze.
- ⁸ Emigga gikube mu ngalo n'ensozi zonna ziyimbire wamu olw'essanyu;
- ⁹ byonna biyimbe mu maaso ga MUKAMA, kubanga aija okulamula ensi. Aliramula ensi mu butuukirivu; aliramula amawanga mu bwenkanya.

Zabbuli 99

- ¹ MUKAMA afuga, amawanga gakankane; atuula wakati wa bakerubi, ensi ekankane.
- ² MUKAMA mukulu mu Sayuuni; agulumizibwa mu mawanga gonna.
- ³ Amawanga gonna gatendereze erinnya lye ekkulu era ery'entiisa. MUKAMA mutukuvu.
- ⁴ Ye Kabaka ow'amaanyi, ayagala obwenkanya. Onywezezza obwenkanya; era by'okoledde Yakobo bya bwenkanya era bituufu.
- ⁵ Mumugulumize MUKAMA Katonda waffe; mumusinzize wansi w'entebe y'ebigere bye. MUKAMA mutukuvu.
- ⁶ Musa ne Alooni baali bamu ku bakabona be; ne Samwiri yali mu abo abaakoowoolanga erinnya lye; baasabanga MUKAMA n'abaanukula.
- ⁷ Yayogera nabo mu mpagi ey'ekire; baagondera amateeka ge n'ebiragiro bye, bye yabawa.
- ⁸ Ayi MUKAMA Katonda waffe, wabaanukulanga; n'obeeranga Katonda asonyiwa eri Isirayiri, newaakubadde wababonerezanga olw'ebikolwa byabwe ebibi.
- ⁹ Mugulumizenga MUKAMA Katonda waffe, mumusinzizenga ku lusozi lwe olutukuvu, kubanga MUKAMA Katonda waffe mutukuvu.

Zabbuli 100

Zabbuli ey'okwebaza.

- ¹ Muleetere MUKAMA eddoboozi ery'essanyu mmwe ensi zonna.
- ² Muweereze MUKAMA n'essanyu; mujje mu maaso ge n'ennyimba ez'essanyu.
- ³ Mumanye nga MUKAMA ye Katonda; ye yatutonda, tuli babe, tuli bantu be era endiga ez'omu ddundiro lye.

⁴ Muyingire mu miryango gye nga mwebaza, ne mu mpya ze n'okutendereza; mumwebaze mutendereze erinnya lye.

⁵ Kubanga MUKAMA mulungi, n'okwagala kwe kwa lubeerera; n'obwesigwa bwe bwa mirembe gyonna.

Zabbuli 101

Zabbuli ya Dawudi.

¹ Nnaayimbanga ku kwagala kwo n'obutuukirivu bwo; nnaayimbiranga ggwe, Ayi MUKAMA.

² Nneegenderezanga, mu bulamu bwange ne nkola eby'obutuukirivu, naye olija ddi gye ndi? Nnaabeeranga mu nnyumba yange nga siriiko kya kunenyezebwa.

³ Sijjanga kwereetereza kintu kyonna ekibi. Nkyayira ddala ebikolwa by'abo abava mu kkubo lyo; sijjanga kubyeteekako.

⁴ Sijjanga kuba mukuusa; ekibi nnaakyewaliranga ddala.

⁵ Oyo alyolyoma muliraanwa we mu kyama, nnaamuzikirizanga ddala; amaaso ag'amalala n'omutima ogw'amalala sijja kubigumiikirizanga.

⁶ Abeesigwa abali mu nsi yaffe nnaabasanyukiranga, balyoke babeerenga nange; akola eby'obutuukirivu y'anamperezanga.

⁷ Atayogera mazima taabeerenga mu nnyumba yange. Omuntu alimba sirimuganya kwongera kubeera nange.

⁸ Buli nkya nnaazikirizanga abakola ebibi bona mu nsi, bwe ntyo abakozi b'ebibi ne mbamalirawo ddala mu kibuga kya MUKAMA.

Zabbuli 102

Okusaba kw'oyo ali mu buyinike ng'ayigganyizibwa nga yeeyongedde okunafuwa, n'afukumula byonna ebimuli ku mutima mu maaso ga MUKAMA.

¹ Wulira okusaba kwange, Ayi MUKAMA, okkirize okukoowoola kwange kutuuke gy'oli.

² Tonneekweka mu biseera eby'obuyinike bwange. Ntegera okutu kwo onnyanukule mangu bwe nkukoowoola!

³ Kubanga ennaku zange zifuumuuka ng'omukka, n'amagumba gange gaaka ng'amanda.

⁴ Omutima gwange gulinnyirirwa ng'omuddo, era guwotose; neerabira n'okulya emmere yange.

⁵ Olw'okwaziirana kwange okunene, nzenna nfuuse ηηumbagumba.

- ⁶ Ndi ng'ekiuugulu eky'omu ddungu, era ng'ekiuugulu eky'omu nsiko.
- ⁷ Nsula ntunula, nga ndi ng'ekinyonyi ekitudde kyokka ku kasolya k'ennyumba.
- ⁸ Abalabe bange banvuma olunaku lwonna; abo abanduulira bakozesa linnya lyange nga bakolima.
- ⁹ Kubanga ndya evvu ng'alya emmere, n'amaziga gange ne geegattika mu kyokunywa kyange.
- ¹⁰ Olw'obusungu n'okuniiga kwo; onneegobyeko n'onsuula eyo.
- ¹¹ Ennaku zange ziri ng'ekisiikirize ky'olweggulo nga buziba; mpotoka ng'omuddo.
- ¹² Naye ggwe, Ayi MUKAMA, obeera mu ntebe yo ey'obwakabaka emirembe n'emirembe; erinnya lyo linajjukirwanga ab'omu mirembe gyonna.
- ¹³ Olisituka n'osaasira Sayuuni, kino kye kiseera okulaga Sayuuni omukwano; ekiseera kye wateekateeka kituuse.
- ¹⁴ Kubanga amayinja gaakyo abaweereza bo bagaagala nnyo, n'enfuufu y'omu kibuga ekyo ebakwasa ekisa.
- ¹⁵ Amawanga gonna ganaatyanga erinnya lya MUKAMA; ne bakabaka bona ab'ensi banaakankananga olw'ekitiibwa kyo.
- ¹⁶ Kubanga MUKAMA alizimba Sayuuni buto, era n'alabika mu kitibwa kye.
- ¹⁷ Alyanukula okusaba kw'abanaku; talinyooma kwegayirira kwabwe.
- ¹⁸ Bino leka biwandiikirwe ab'omu mirembe egirija, abantu abatannatondebwa bwe balibisoma balyoke batenderezze MUKAMA.
- ¹⁹ Bategeere nti MUKAMA yatunula wansi ng'asinziira waggulu mu kifo kye ekitukuvu; MUKAMA yasinzira mu ggulu n'atunuulira ensi,
- ²⁰ okuwulira okusinda kw'abasibe, n'okusumulula abo abasaliddwa ogw'okufa.
- ²¹ Erinnya lya MUKAMA, liryoke litenderezebwe mu Sayuuni, bamutenderezenga mu Yerusaalemi;
- ²² abantu nga bakuŋjaanye, awamu n'obwakabaka, okusinza MUKAMA.
- ²³ MUKAMA ammazeemu amaanyi nga nkyali muvubuka; akendeezezza ku nnaku z'obulamu bwange.
- ²⁴ Ne ndyoka mmukaabira nti, "Ayi Katonda wange, tontwala nga nkyali mu makkati g'emyaka gy'obulamu bwange, ggw'abeera omulamu emirembe gyonna.

²⁵ Ku ntandikwa wassaawo omusingi gw'ensi; n'eggulu gy'emirimu gy'emikono gyo.

²⁶ Byonna biriggwaawo, naye ggwe oli wa lubeerera. Byonna birikaddiwa ng'ebyambalo. Olibikyusa ng'ebyambalo, ne bisuulibwa.

²⁷ Naye ggwe tokyuka oli wa lubeerera n'emyaka gyo tegirikoma.

²⁸ Abaana b'abaweereza bo baliba mu ddembe; ne bazzukulu baabwe banaabeeranga w'oli nga tebalina kye batya."

Zabbuli 103

Zabbuli Ya Dawudi.

¹ Weebaze MUKAMA, ggwe emmeeme yange; ne byonna ebiri mu nze byebaz erinnya lye ettukuvu.

² Weebaze MUKAMA, ggwe emmeeme yange, era teweerabiranga birungi bye byonna.

³ Asonyiwa ebibi byo byonna, n'awonya n'endwadde zo zonna.

⁴ Anunula obulamu bwo emagombe, n'akusaasira era n'akwagala n'okwagala okutaggwaawo.

⁵ Awa emmeeme yo ebintu ebirungi byeyagala; obuvubuka bwo ne budda buggy ng'empungu.

⁶ MUKAMA asala mu butuukirivu ne mu bwenkanya, ensonga z'abo bona abajoogebwa.

⁷ Yamanyisa Musa ebyo by'ayagala, n'alaga abaana ba Isirayiri ebikolwa bye.

⁸ MUKAMA wa kisa era ajjudde okusaasira, tasunguwala mangu, era alina okwagala okutaggwaawo.

⁹ Taasibenga busungu ku mwoyo, era tasunguwala kumala bbanga lyonna.

¹⁰ Tatukola ng'okwonoona kwaffe bwe kuli, wadde okutusasula ng'ebikolwa byaffe ebitali bya butuukirivu bwe biri.

¹¹ Ng'eggulu bwe litumbidde ennyo waggulu w'ensi, n'okwagala kwe bwe kuli okunene bwe kutyo eri abo abamutya.

¹² Ebibi byaffe abituggyako n'abitwala wala ng'ebuvanjuba bw'eri ewala okuva ebugwanjuba.

¹³ Kitaawe w'abaana nga bw'asaasira abaana be, ne MUKAMA bw'atyo bw'asaasira abo abamutya.

¹⁴ Kubanga amanyi nga bwe twakolebwa era ng'ajjukira nti tuli nfuufu.

¹⁵ Wabula omuntu, ennaku z'obulamu bwe ziri ng'omuddo; akula n'agimuka ng'ekimuli eky'omu nnimiro;

¹⁶ empewo ekifuuwa, ne kifa; nga ne we kyali tewakyajjukirwa.

¹⁷ Naye okwagala kwa Katonda eri abo abamutya tekuggwaawo emirembe gyonna, n'obulokozi bwe eri abaana b'abaana baabwe.

¹⁸ Be bo abakuma endagaano ye ne bajjukira okugondera amateeka ge.

¹⁹ MUKAMA anywezezza entebe ye ey'obwakabaka mu ggulu, n'obwakabaka bwe bufuga ensi yonna.

²⁰ Mwebaze MUKAMA mmwe bamalayika be, mmwe ab'amaanyi abakola ky'agamba, era abagondera ekigambo kye.

²¹ Mwebaze MUKAMA mmwe amaggye ge ag'omu ggulu, mmwe abaweereza be abakola by'ayagala.

²² Mwebaze MUKAMA, mmwe ebitonde bye byonna ebiri mu matwale ge gonna. Weebaze MUKAMA, ggwe emmeeme yange.

Zabbuli 104

¹ Weebaze MUKAMA, ggwe emmeeme yange. Ayi MUKAMA Katonda wange, oli mukulu nnyo; ojjudde obukulu n'ekitiibwa.

² Yeebika ekitangaala ng'ayeebikka ekyambalo n'abamba eggulu ng'eweema,

³ n'ateeka akasolya k'ebisulo bye eby'oku ntikko kungulu ku mazzi; ebire abifuula amagaali ge, ne yeebagala ebiwaawaatiro by'empewo.

⁴ Afuula empewo ababaka be, n'ennimi z'omuliro ogwaka abaweereza be.

⁵ Yassaawo ensi ku misingi gyayo; teyinza kunyeenyezebwा.

⁶ Wagibikkako obuziba ng'ekyambalo; amazzi ne gatumbiira okuyisa ensozi ennene.

⁷ Bwe wagaboggolera ne gadduka; bwe gaawulira okubwatuka kwo ne gaddukira ddala;

⁸ gaakulukutira ku nsozi ennene, ne gakkirira wansi mu biwonvu mu bifo bye wagategekera.

⁹ Wagassizaawo ensalo ze gatasaana kusukka, na kuddayo kbuutikira nsi.

¹⁰ Alagira ensulo ne zisindika amazzi mu biwonvu; ne gakulukutira wakati w'ensozi.

¹¹ Ne ganywesa ebisolo byonna eby'omu nsiko; n'endogoyi ne gazimalako ennyonta.

- ¹² Ebinyonyi eby'omu bbanga bizimba ebisu byabyo ku mabbali g'amazzi, ne biyimbira mu matabi.
- ¹³ Afukirira ensozi ennene ng'osinziira waggulu gy'obeera; ensi n'ekkuta ebibala by'emirimu gyo.
- ¹⁴ Olagira omuddo ne gukula okuliisa ente, n'ebirime abantu bye balima, balyoke bafune ebyokulya okuva mu ttaka.
- ¹⁵ Ne wayini okusanyusa omutima gwe, n'ebizigo okwesiiga awoomye endabika ye, n'emmere okumuwa obulamu.
- ¹⁶ Emiti gya MUKAMA gifuna amazzi mangi; gy'emivule gy'e Lebanooni gye yasimba.
- ¹⁷ Omwo ebinyonyi mwe bizimba ebisu byabyo; ne ssekanyolya asula mu miti omwo.
- ¹⁸ Ku nsozi empanvu eyo embulabuzi ez'omu nsiko gye zibeera; n'enjazi kye kiddukiro ky'obumyu.
- ¹⁹ Wakola omwezi okutegeeza ebiro; n'enjuba bw'egwa n'eraga olunaku.
- ²⁰ Oleeta ekizikiza, ne buba ekiro; olwo ebisolo byonna eby'omu bibira ne biryoka bivaayo.
- ²¹ Empologoma ento zikaabira emmere gye zinaalya; nga zinoonya ebyokulya okuva eri Katonda.
- ²² Enjuba bw'evaayo ne zigenda, n'oluvannyuma ne zikomawo ne zigalamira mu mpuku zaazo.
- ²³ Abantu ne bagenda ku mirimu gyabwe, ne bakola okutuusa akawungeezi.
- ²⁴ Ayi MUKAMA, ebintu bye wakola nga bingi nnyo! Byonna wabikola n'amagezi ag'ekitalo; ensi ejjudde ebitonde byo.
- ²⁵ Waliwo ennyanja, nnene era ngazi, ejjudde ebitonde ebitabalika, ebintu ebirina obulamu ebinene era n'ebitono.
- ²⁶ Okwo amaato kwe gaseeyeyera nga galaga eno n'eri; ne galukwata ge wakola mwe gabeera okuzannyiranga omwo.
- ²⁷ Ebyo byonna bitunuulira ggwe okubiwa emmere yaabyo ng'ekiseera kituuse.
- ²⁸ Bw'ogibiwa, nga bigikuŋjaanya; bw'oyanjuluza engalo zo n'obigabira ebintu ebirungi ne bikkusibwa.
- ²⁹ Bw'okweka amaaso go ne byeraliikirira nnyo; bw'obiggyamu omukka nga bifia, nga biddayo mu nfuufu.

³⁰Bw'oweereza Omwoyo wo, ne bifuna obulamu obuggyga; olwo ensi n'ogizza buggyga.

³¹Ekitiibwa kya Katonda kibeerengawo emirembe gyonna; era MUKAMA asanyukirenga ebyo bye yakola.

³²Atunuulira ensi, n'ekankana; bw'akwata ku nsozi ennene, ne zinyooka omukka.

³³Nnaayimbiranga MUKAMA obulamu bwange bwonna; nnaayimbanga nga ntendereza Katonda wange ennaku zonna ze ndimala nga nkyali mulamu.

³⁴Ebirowoozo byange, nga nfumiitiriza, bimusanyusenga; kubanga mu MUKAMA mwe neeyagalira.

³⁵Naye abakola ebibi baggweewo ku nsi; aboonoonyi baleme kulabikirako ddala. Weebaze MUKAMA, gwe emmeeme yange. Mumutenderezenga MUKAMA.

Zabbuli 105

¹Mwebaze MUKAMA, mukoowoole erinnya lye; amawanga gonna mugategeeze by'akoze.

²Mumuyimbire, mumutendereze; muyimbe ku byamagero bye.

³Mumusuute, ng'erinnya lye ettukuvu muligulumiza; emitima gy'abo abanoonya MUKAMA gjijule essanyu.

⁴Munoonye MUKAMA n'amaanyi ge; mumunoonyenga ennaku zonna.

⁵Mujjukirenga eby'ekitalo bye yakola, ebyamagero bye, n'emisango gye yasala;

⁶mmwe abazzukulu ba Ibulayimu, abaweereza be mmwe abaana ba Yakobo, abalonde be.

⁷Ye MUKAMA Katonda waffe; ye alamula mu nsi yonna.

⁸Ajjukira endagaano ye emirembe gyonna, kye kigambo kye yalagira, ekyakamala emirembe olukumi,

⁹ye ndagaano gye yakola ne Ibulayimu, era kye kisuubizo kye yalayirira Isaaka.

¹⁰Yakikakasa Yakobo ng'etteeka, n'akiwa Isirayiri ng'endagaano eteriggwaawo nti,

¹¹"Ndikuwa ggwe ensi ya Kanani okuba omugabo gwo."

¹²Bwe baali bakyali batono, nga si bangi n'akamu, era nga bagwira mu nsi omwo,

¹³baatambulatambulanga okuva mu ggwanga erimu okulaga mu ddala, ne bavanga mu bwakabaka obumu ne balaga mu bulala.

¹⁴ Teyaganya muntu yenna kubayisa bubi; n'alabulanga bakabaka ku lwabwe nti,

¹⁵ "Abalonde bange, ne bannabbi bange temubakolangako kabi."

¹⁶ Yaleeta enjala mu nsi, emmere yaabwe yonna n'agizikiriza.

¹⁷ N'atuma omuntu okubeesooka mu maaso, ye Yusufu eyatundibwa ng'omuddu,

¹⁸ ebigure bye ne binuubulwa enjegere ze baamusibya, obulago bwe ne buteekebwa mu byuma,

¹⁹ okutuusa bye yategeeza lwe byatuukirira, okutuusa ekigambo kya MUKAMA lwe kyamukakasa nti bye yayogera bya mazima.

²⁰ Kabaka n'atuma ne bamusumulula; omufuzi w'ensi eyo yamuggya mu kkomera.

²¹ Yamufuula omukulu w'ebi'omu maka ge, n'akulira byonna omufuzi oyo bye yalina;

²² okukangavvulanga abalangira be nga bwe yalabanga, n'okuyigiriza abakulu eby'amagezi.

²³ Oluvannyuma Isirayiri n'ajja mu Misiri; Yakobo bw'atyo n'atuula mu nsi ya Kaamu nga munnaggwanga.

²⁴ MUKAMA n'ayaza nnyo abantu be; ne baba bangi nnyo, n'abalabe baabwe ne beeraliikirira,

²⁵ n'akyusa emitima gyabwe ne bakyawa abantu be, ne basalira abaweereza be enkwe.

²⁶ Yatuma abaweereza be Musa ne Aloon, be yalonda.

²⁷ Ne bakola obubonero bwe obw'ekitalo mu bantu abo; ne bakolera ebyamagero bye mu nsi ya Kaamu.

²⁸ Yaleeta ekizikiza ensi yonna n'ekwata, kubanga baali bajeemedde ekigambo kye.

²⁹ Amazzi gaabwe yagafuula omusaayi, ne kireetera ebyennyanja byabwe okufa.

³⁰ Ensi yaabwe yajjula ebikere, ebyatuukira ddala ne mu bisenge by'abafuzi baabwe.

³¹ Yalagira, ebiwuka ebya buli ngeri ne bijja, n'ensekere ne zeeyiwa mu bitundu byonna eby'ensi yaabwe.

³² Yafuula enkuba okuba amayinja g'omuzira; eggulu ne libwatuka mu nsi yaabwe yonna.

- ³³ Yakuba emizeeyituuni n'emizabbibu, n'azikiriza emit gy'omu nsi yaabwe.
- ³⁴ Yalagira, enzige ne zija ne bulusejjer obutabalika muwendo.
- ³⁵ Ne birya buli kimera kyonna mu nsi yaabwe, na buli kisimbe kyonna mu ttaka lyabwe ne kiriibwa.
- ³⁶ N'azikiriza abaana ababereberye bona mu nsi yaabwe, nga bye bibala ebisooka eby'obuvubuka bwabwe.
- ³⁷ Yaggya Abayisirayiri mu nsi eyo nga balina ffeeza nnyingi ne zaabu; era bona baali ba maanyi.
- ³⁸ Abamisiri baasanyuka bwe baalaba Abayisirayiri nga bagenze, kubanga baali batandise okubatiira ddala.
- ³⁹ Yayanjuluzanga ekire ne kibabikka, n'omuliro ne gubamulisiza ekiro.
- ⁴⁰ Baamusaba, n'abawereza enkwale era n'abaliisanga emmere eva mu ggulu ne bakkuta.
- ⁴¹ Yayasa olwazi, amazzi ne gatiiriika, ne gakulukuta mu ddungu ng'omugga.
- ⁴² Kubanga yajjukira ekisuubizo kye ekitukuvu kye yawa omuweereza we Ibulayimu.
- ⁴³ Abantu be yabaggyayo nga bajaguza, abalonde be nga bayimba olw'essanyu.
- ⁴⁴ Yabawa ensi eyali ey'amawanga amalala, ne basikira ebyo abalala bye baakolerera;
- ⁴⁵ balyoke bakwatenga amateeka ge, era bagonderenga ebiragiro bye. Mumutendereze MUKAMA.

Zabbuli 106

- ¹ Mumutendereze MUKAMA! Mwebaze MUKAMA kubanga mulungi, kubanga okwagala kwe tekuggwaawo emirembe gyonna.
- ² Ani ayinza okwogera ku bikulu MUKAMA by'akola n'abimalayo, oba okumutendereza obulungi nga bw'asaanira?
- ³ Balina omukisa abalina obwenkanya, era abakola ebituufu bulijo.
- ⁴ Onzijukiranga, Ayi MUKAMA, bw'obanga okolera abantu bo ebirungi; nange onnyambe bw'olibalokola,
- ⁵ ndyoke neeyagalire wamu n'abalonde bo nga bafunye ebirungi, nsanyukire wamu n'eggwanga lyo, era ntendererezenga mu bantu bo.
- ⁶ Twonoonye, nga bajajjaffe bwe baakola; tukoze ebibi ne tusobyaa nnyo.

⁷ Bakadde baffe tebaafaayo kujjukira ebyamagero bye wakola nga bali mu Misiri; n'ebiekisa ebingi bye wabakolera tebaabijukira, bwe baatuuka ku Nnyanja Emyufu ne bakujeemera.

⁸ Naye MUKAMA n'abalokola, olw'erinnya lye, alyoke amanyise amaanyi g'obuyinza bwe obungi.

⁹ Yaboggolera Ennyanja Emyufu, n'ekalira; n'abakulembera okubayisa mu buziba ng'abayita ku lukalu mu ddungu.

¹⁰ Yabawonya abalabe baabwe; n'abanunula mu mikono gy'abo ababakyawa.

¹¹ Amazzi ne gabuutikira abalabe baabwe; ne wataba n'omu awona.

¹² Olwo ne bakkiriza ebigambo bye, bye yabasuubiza; ne bayimba nga bamutendereza.

¹³ Waayita akabanga katono ne beerabira ebyo byonna bye yakola; ne batawulirizanga kbuulirira kwe.

¹⁴ Bwe baatuuka mu ddungu, okwegomba ne kubasukkirira; ne bagezesha Katonda nga bali mu lukoola olwo.

¹⁵ Bw'atyo n'abawa kye baasaba, kyokka n'abaleetera n'olumbe olw'amaanyi.

¹⁶ Nga bali mu lusiisira baakwatirwa obuggyra eri Musa ne Alooni abalonde ba MUKAMA.

¹⁷ Ettaka ne lyasama ne limira Dasani; Abiraamu ne banne ne libasaanyaawo.

¹⁸ Omuliro ne gukoleera ne gukwata abagoberezi baabwe; ennimi z'omuliro ne zookya aboonoonyi.

¹⁹ Bwe baali e Kolebu ne beekolera ennyana; ne basinza ekifaananyi ekyo kye baakola mu byuma bye baasaanuusa.

²⁰ Ekitiibwa kya Katonda ne bakiwaanyaamu ekibumbe ekifaanana ente erya omuddo.

²¹ Ne beerabira Katonda eyabanunula, eyabakolera ebintu ebikulu bwe bityo mu Misiri,

²² ebyamagero bye yabakolera mu nsi ya Kaamu, n'ebikolwa eby'entiisa ku Nnyanja Emyufu.

²³ N'agamba nti, Ajja kubazikiriza. Naye Musa, omulonde we, n'ayimirira mu maaso ge n'amwegayirira, obusungu bwe ne bumuggwaako n'atabazikiriza.

²⁴ Baanyooma eby'ensi ennungi, kubanga ekisuubizo kye tebaakirinaamu bwesige.

²⁵ Beemulugunyiriza mu weema zaabwe, ne batagondera ddoboozi lya MUKAMA.

- ²⁶ Kyeyava yeerayirira nti alibazikiririza mu ddungu,
- ²⁷ era nga n'abaana baabwe balisaasaanira mu mawanga ne bafiira eyo.
- ²⁸ Baatandika okusinza Baali e Peoli; ne balya ebyaweebwangayo eri bakatonda abataliimu bulamu.
- ²⁹ Ne banyiiza Katonda olw'ebikolwa byabwe ebibi; kawumpuli kyeyava abagwamu.
- ³⁰ Naye Finekaasi n'ayimirira wakati waabwe ne Katonda, kawumpuli n'agenda.
- ³¹ Ekyo ne kimubalirwa nga kya butuukirivu emirembe gyonna.
- ³² Bwe baatuuka okumpi n'amazzi ag'e Meriba ne banyiiza MUKAMA, ne baleetera Musa emitawaana;
- ³³ kubanga baajeemera ebiragiro bye, ne kimwogeza n'ebigambo ebitaali bya magezi.
- ³⁴ Abantu be baalwanyisa tebabazikiriza nga MUKAMA bwe yali abalagidde,
- ³⁵ naye beetabika n'abannaggwanga ago ne bayiga empisa zaabwe.
- ³⁶ Baasinza ebifaananyi ebikole n'emikono eby'amawanga ago ne bibafuukira omutego.
- ³⁷ Baawaayo batabani baabwe ne bawala baabwe eri bakatonda abo.
- ³⁸ Ne bayiwa omusaayi gwa batabani baabwe ne bawala baabwe abataliiko musango, be baawangayo eri ebifaananyi ebikole n'emikono Abakanani bye baakola, ensi n'eyonoonebwa n'omusaayi gwabwe.
- ³⁹ Beeyonoona olw'ebyo bye baakola, ebikolwa byabwe ne bibafuula abataliimu nsa nga bavudde ku Katonda waabwe.
- ⁴⁰ MUKAMA kyeyava asunguwalira abantu be, n'akyawa ezzadde lye.
- ⁴¹ N'abawaayo eri amawanga amalala, abalabe ne babafuga.
- ⁴² Abalabe baabwe ne babanyigiriza, ne babatuntuza nnyo ddala.
- ⁴³ Yabawonyanga abalabe baabwe emirundi mingi, naye obujeemu ne bubalemeramu, ebibi byabwe ne bigenda nga bibasaanyaawo.
- ⁴⁴ Naye bwe yawulira okukaaba kwabwe, n'abakwatirwa ekisa;
- ⁴⁵ ku lwabwe, n'ajjukira endagaano ye; okwagala kwe okungi ne kumuleetera okukyusa ekirowoozo kye.
- ⁴⁶ N'abaleetera okusaasirwa abo abaabawambanga.

⁴⁷ Ayi MUKAMA Katonda, otulokole, otukunjaanye, otuggye mu mawanga, tulyoke twebazenga erinnya lyo ettukuvu, era tusanyukenga nga tukutendereza.

⁴⁸ MUKAMA atenderezebwenga, Katonda wa Isirayiri, emirembe n'emirembe. Abantu bona ka boogere nti, "Amiina!" Mumutendereze MUKAMA.

Zabbuli 107

EKITABO V Zabbuli 107–150

¹ Mwebaze MUKAMA, kubanga mulungi; okwagala kwe kubeerera emirembe gyonna.

² Kale abanunule ba MUKAMA boogere bwe batyo; abo be yanunula mu mikono gy'abalabe;

³ abo be yakuinjaanya mu mawanga; okuva Ebugwanjuba n'Ebuwanjuba, n'okuva obukiikkono ne mu bukiikkaddyo.

⁴ Abamu baataataaganira mu malungu nga babuliddwa ekkubo eribatwala ku kibuga gye banaabeeranga.

⁵ Baalumwa ennyonta n'enjala, obulamu bwabwe ne butandika okusereba.

⁶ Bwe batyo ne bakaabira MUKAMA nga bali mu kabi; n'abawonya mu kveralikirira kwabwe.

⁷ Yabakulembera butereevu n'abatuusa mu kibuga mwe baabeera.

⁸ Kale singa beebazanga MUKAMA olw'okwagala kwe okutaggwaawo, n'olw'eb'yekitalo by'akolera abaana b'abantu!

⁹ Kubanga abalina ennyonta abanywesa, n'abayala abakkusa ebirungi.

¹⁰ Abamu baatuulanga mu kizikiza ne mu kisiikirize eky'okufa; abasibiddwa mu byuma era abali mu nnaku ennyingi;

¹¹ kubanga baajeemera ekigambo kya Katonda, ne banyoomoola amagezi g'oyo Ali Wagglu Ennyo.

¹² Baakozesebwa emirimu egy'amaanyi, emitima gyabwe ne gjijula obuyinike; baagwanga wansi, naye nga tebalina abasitulawo.

¹³ Bwe batyo ne bakaabirira MUKAMA nga bali mu bizibu byabwe, era n'abawonya;

¹⁴ n'abaggya mu kizikiza ne mu kisiikirize eky'okufa; n'enjegere ezaali zibasibye n'azikutula.

¹⁵ Kale singa beebazanga MUKAMA olw'okwagala kwe okutaggwaawo, n'olwebikolwa bye eby'yekitalo by'akolera abaana b'abantu!

¹⁶Kubanga enzigi ez'ebikomo azaasaayasa, n'emitayimbwa egy'ekyuma agimenyamu.

¹⁷Abamu baafuuka basirusiru olw'obujeemu bwabwe; ne babonaabona olw'ebikolwa byabwe ebibi.

¹⁸Ne batamwa emmere yonna, ne babulako katono ddala okufa.

¹⁹Bwe batyo ne bakaabirira MUKAMA nga bali mu buzibu obwo, n'abawonya.

²⁰Yabatumira ekigambo kye, n'awonya endwadde zaabwe; n'abalokola mu kuzikirira.

²¹Kale singa beebazanga MUKAMA olw'okwagala kwe okutaggwaawo, n'olw'ebikolwa bye eby'ekyewuunyo by'akolera abaana b'abantu!

²²Bamuleeterenga ebiweebwayo eby'okwebaza, era batendenga ebikolwa bye n'ennyimba ez'essanyu.

²³Abalala baasaabalira mu maato ku nnyanja; baali basuubuzi b'oku gayanja aganene.

²⁴Baalaba MUKAMA bye yakola, ebikolwa bye eby'ekitalo mu buziba bw'ennyanja.

²⁵Kubanga yalagira omuyaga ne gusitula amayengo waggulu.

²⁶Ne gagulumira okutuuka ku ggulu, ate ne gakka wansi mu ddubi; akabenje ne kabayitirira, ne baggwaamu amaanyi.

²⁷Ne beesunda, eruuyi n'eruuyi ne baba ng'omutamiivu atagala; n'amagezi ne gabaggwaako.

²⁸Bwe batyo ne bakaabira MUKAMA nga bali mu buzibu; n'abawonya mu kweraliikirira kwabwe.

²⁹Omuyaga yagusirisa, ennyanja n'etteeka.

³⁰Ne bajjula essanyu kubanga ennyanja yateeka; n'abakulembra n'abatuusa bulungi ku mwalo gwabwe.

³¹Kale singa abantu beebazanga MUKAMA olw'okwagala kwe okutaggwaawo, n'olw'ebikolwa bye eby'ekyewuunyo by'akolera abaana b'abantu!

³²Bamugulumizenga ng'abantu bakuinjaanye, era bamutenderezenga mu lukiiko lw'abakulu.

³³Afuula emigga amalungu, n'emikutu gy'amazzi ne giba ng'ettaka ekkalu,

³⁴ensi engimu n'agifuula olukoola olw'olunnyo olw'obwonoonyi bw'abantu baamu.

³⁵ Eddungu yalijuza ebidiba by'amazzi, n'ensi enkalu n'agikulukusizaamu amazzi,

³⁶ abalina enjala n'abateeka omwo, ne beezimbira ekibuga eky'okubeeramu,

³⁷ ennimiro zaabwe ne bazisigamu emmere, ne basimba emizabbibu, ne bakungula ebibala bingi.

³⁸ Yabawa omukisa gwe, ne beeyongera obungi; n'ebisibo byabwe n'atabiganya kukendeera.

³⁹ Ate ne bakendeera obungi, ne bakkakkanyizibwa olw'okujezebwa, n'okujoogebwa n'okulaba ennaku;

⁴⁰ oyo anyooma n'abakungu, n'ababungeetanyiza mu lukoola omutali kantu.

⁴¹ Naye abaali mu kwetaaga yabamalako ennaku n'okubonaabona, n'ayaza ezzadde lyabwe ng'ebisibo.

⁴² Abagolokofu, bino babiraba ne basanyuka; naye abakola ebibi bo basirika busiris.

⁴³ Abalina amagezi bonne, bagondere ebigambo bino era bategeere okwagala kwa MUKAMA okutaggwaawo.

Zabbuli 108

Oluyimba. Zabbuli ya Dawudi.

¹ Omutima gwange munywevu, Ayi Katonda; nnaayimbanga ne nkutendereza n'omwoyo gwange gwonna.

² Muzuukuke, mmwe entongooli n'ennanga ey'enkoba, nzija kuyimba okukeesa obudde.

³ Nnaakutenderezanga, Ayi MUKAMA, mu bantu bonne, nnaakuyimbiranga mu mawanga gonna.

⁴ Okwagala kwo kunene, kutumbiira okutuuka ku ggulu; n'obwesigwa bwo butuuka ku bire.

⁵ Ogulumizibwenga, Ayi Katonda, okuyisa eggulu; n'ekitiibwa kyo kibune ensi yonna.

⁶ Tulokole otuyambe n'omukono gwo ogwa ddyo, abo booyagala banunulibwe.

⁷ Katonda ayogedde ng'asinziira mu kifo kye ekitukuvu n'agamba nti, "Nga nzijudde essanyu, ndisala mu Sekemu, era n'Ekiwonvu kya Sukkosi ndikigabanyaagabanyaamu.

⁸ Ensi ya Gireyaadi yange, n'eya Manase nayo yange. Efulayimu mwe muli abalwanyi bange abazira; ate mu Yuda mwe munaavanga bakabaka.

⁹Mowaabu be bawereesa bange abawulize; ate Edomu be baddu bange; Abafirisuuti ndibaleekaanira mu ddoboozi ery'omwanguka ery'obuwanguzi."

¹⁰Ani anantuusa ku kibuga ekigumu ekinywevu? Ani anankulembera okunnyingiza mu Edomu?

¹¹Si ggwe, ayi Katonda, atusudde, atakyatabaala n'amaggye gaffe?

¹²Tudduukirire nga tulwanyisa abalabe baffe, kubanga obuyambi bw'abantu temuli nsa.

¹³Bwe tunaabeeranga ne Katonda tunaabanga bawanguzi; kubanga y'anaalinnyiriranga abalabe baffe wansi w'ebigere bye.

Zabbuli 109

Ya Makulu wa Bayimbi. Zabbuli ya Dawudi.

¹Ayi Katonda wange gwe ntendereza, tonsiriikirira.

²Kubanga abantu abakola ebibi era abalimba, banjogeddeko eby'obulimba.

³Banfukumulidde ebigambo eby'obukyayi, ne bannumbagana awatali nsonga.

⁴Bwe mbalaga omukwano, bo bandaga bukyayi; kyokka nze mbasabira.

⁵Bwe mbakolera ebirungi bo bansasulamu bibi; bwe mbalaga okwagala bo bankyawa bukyayi.

⁶Mumulabire omuntu omukozi w'ebibi amwolekere; wabee wo amuwawaabira.

⁷Bwe banaawoza, omusango gumusinge; n'okusaba kwe kufuuke kwonoona.

⁸Aleme kuwangaala; omuntu omulala amusikire.

⁹Abaana be basigalire awo nga tebaliiko kitaabwe, ne mukyala we afuuke nnamwandu.

¹⁰Abaana be bataataaganenga nga bagenda basabiriza; bagobebwe ne mu bifulukwa mwe basula.

¹¹Amubanja ajje awambe ebibye byonna; n'abagwira bamunyageko ebintu bye byonna bye yakolerera.

¹²Waleme kubaawo amusaasira, wadde akolera abaana be ebyekisa.

¹³Ezzadde lye lizikirizibwe, n'amannya g'abazzukulu be gasangulwe mu ago ag'omu mulembe ogliddirira.

¹⁴MUKAMA ajjukirenga ebyonoono bya bakadde be; n'ekibi kya nnyina kireme kwerabirwanga.

¹⁵MUKAMA ajjukirenga ebyonoono byabwe bulijjo, n'ensi ebeerabirire ddala.

¹⁶ Kubanga talowoozangako kukolera muntu yenna kya kisa; naye yayigganyanga abaavu, n'abeetaaga, n'abanakuwavu n'abatuusa ne ku kufa.

¹⁷ Yayagalanga nnyo okukolima; kale ebikolimo bimwefuulire. Teyayagalanga mikisa; kale gimwesambire ddala!

¹⁸ Yeeteekako okukolima ng'ekyambalo, ne kumutobya ng'amazzi, ne kuyingira mu magumba ge ng'amafuta.

¹⁹ Kubeerenga ng'ekyambalo ky'ayambadde, era ng'olukoba lwe yeesibye emirembe gyonna.

²⁰ Ebyo byonna y'eba ebeera empeera, MUKAMA gy'awa abo abandoopaloopa, era abanjogerako eby'akabi ebyereere.

²¹ Naye ggwe, Ayi MUKAMA Katonda wange, nnwanirira olw'erinnya lyo; era omponye olw'okwagala kwo okulungi okutaggwaawo.

²² Kubanga ndi mwavu era ali mu kwetaaga, n'omutima gwange gunyolwa nnyo.

²³ Sikyalivo, ndi ng'ekisiikirize eky'akawungeezi; mmansuddwa eri ng'enzige.

²⁴ Amaviivi gange ganafuye olw'okusiba; omubiri gwange gukozze ne guggwaamu ensa.

²⁵ Abandoopaloopa bansekerera; bwe bandaba nga banyenyeza omutwe.

²⁶ Mbeera, Ayi MUKAMA Katonda wange! Ondokole ng'okwagala kwo okutaggwaawo bwe kuli.

²⁷ Baleke bategeere nti ggwe okikoze, n'omukono gwo Ayi MUKAMA.

²⁸ Balikoma, naye ggwe olimpa omukisa! Leka abannumbagana baswale, naye nze omuddu wo nga nsanyuka!

²⁹ Abandoopa baswazibwe, n'ensonyi zaabwe zibabuzeeko obwekyusizo.

³⁰ Nneebazanga MUKAMA n'akamwa kange; nnaamutenderezanga wakati mu kibiina ekinene.

³¹ Kubanga alwanirira omunaku ali mu kwetaaga, n'amuwonya abo abaagala afe.

Zabbuli 110

Zabbuli ya Dawudi.

¹ MUKAMA yagamba Mukama wange nti: "Tuula wano ku mukono gwange ogwa ddyo, okutuusa lwe ndimala okufufuggaza abalabe bo ne mbassa wansi w'ebigere byo."

² MUKAMA aligaziya obufuzi bwo okuva mu Sayuuni; olifuga abalabe bo.

³ Abantu bo balyewaayo bokka mu ggye lyo ng'ekiseera ky'olutalo kituuse. Abavubuka bo, nga bali mu by'ekitiibwa ekitukuvu, balikukuŋŋaanirako ng'omusulo bwe gulabika ng'obudde bwakakya.

⁴ MUKAMA yalayira, era tagenda kukijjulula, yagamba nti, "Olibeera kabona emirembe gyonna ng'engeri ya Merukizeddeeki bw'eri."

⁵ Mukama anaakulwaniriranga; bakabaka abakulwanyisa anaababetentanga mu busungu bwe obungi.

⁶ Aliramula amawanga, abafuzi b'ensi yonna n'abazikiriza, n'entuumo z'emirambo ziriba nnyingi ku nsi yonna.

⁷ Alinywa amazzi mu kagga ku kkubo, n'addamu amaanyi ag'obuwanguzi.

Zabbuli 111

¹ Mutendereze MUKAMA! Nneebazanga MUKAMA n'omutima gwange gwonna, mu lukiiko lw'abalongoofu, era ne mu lukuŋŋaanana.

² MUKAMA by'akola bikulu; bifumiitirizibwako abo bona ababisanyukira.

³ Emirimu gye mikulu nnyo era gya kitibwa, n'obutuukirivu bwe tebuggwaa wo emirembe gyonna.

⁴ Ayamba abantu okujjukira ebyamagero bye, MUKAMA wa kisa era ajjudde okusaasira.

⁵ Agabira abamutya emmere; era ajjukira endagaano ye buli kiseera.

⁶ Abantu be abalaze ng'ebikolwa bye bwe biri eby'amaanyi; n'abagabira ensi eyali ey'abannaggwanga.

⁷ By'akola byonna bya bwesigwa era bya bwenkanya; n'amateeka ge gonna ga bwesigwa,

⁸ manywevu emirembe gyonna; era yagassaawo nga ga bwesigwa era nga ga mazima.

⁹ Yanunula abantu be; n'alagira endagaano ye ebeerewo emirembe gyonna. Erinnya lye ttukuvu era lya ntiisa!

¹⁰ Mu kutyia MUKAMA amagezi mwe gasookera era abo abagondera ebiligambo ebyo bajjudde obutegeevu. MUKAMA atenderezbwenga emirembe gyonna.

Zabbuli 112

¹ Mutendereze MUKAMA! Alina omukisa omuntu atya Katonda, era asanyukira ennyo mu mateeka ge.

²Abaana be baliba ba kituibwa mu nsi; omulembe gw'abalongoofu guliweebwa omukisa.

³Ennyumba ye enejjulanga ebintu n'obugagga obungi; era anaabanga mutuukirivu ennaku zonna.

⁴Ne mu kizikiza, ekitangaala kyakira omulongoofu, alina ekisa, n'oyo alina okusaasira, era omuntuukirivu.

⁵Omuntu oyo agabira abeetaaga, era tawolera magoba, era akola emirimu gye gyonna n'obwenkanya, alifuna ebirungi.

⁶Omuntuukirivu talinyeenyezebwa, era anajjukirwanga ennaku zonna.

⁷Amawulire amabi tegaamutiisenga, kubanga omutima gwe munywevu gwasiga MUKAMA.

⁸Omutima gwe guteredde, tewali ky'anaatyanga, era oluvannyuma alitunuulira abalabe be n'amaaso ag'obuwangizi.

⁹Agabidde abaavu bye beetaaga; mutuukirivu ebbanga lyonna; era bona banaamussangamu ekitiibwa.

¹⁰Omubi anaabirabanga ebyo, n'asunguwala, n'aluma abugigi, naye nga talina kya kukola. Okwegomba kw'ababi tekuubengako kye kubagasa.

Zabbuli 113

¹Mutendereze MUKAMA! Mumutendereze, mmwe abaweereza be, mutendereze erinnya lya MUKAMA.

²Erinnya lya MUKAMA litenderezebwe okuva leero n'okutuusa emirembe gyonna.

³Enjuba weeviirayo okutuusa bw'egwa, erinnya lya MUKAMA litenderezebwenga.

⁴MUKAMA agulumizibwa okusinga amawanga gonna, era n'ekitiibwa kye kisinga eggulu.

⁵Ani afaanana nga MUKAMA Katonda waffe, atuula ku ntebe ye ey'obwakabaka eri waggulu ennyo,

⁶ne yeetoowaza okutunuulira eggulu n'ensi?

⁷Abaavu abayimusa n'abaggya mu nfuufu; n'abali mu kwetaaga n'abasitula ng'abaggya mu vvü,

⁸n'abatuuza wamu n'abalangira, awamu n'abalangira abo abafugaabantu be.

⁹ Omukazi omugumba amuwa abaana, n'abeera mu maka ge n'ezzadde lye ng'ajjudde essanyu. Mutendereze MUKAMA!

Zabbuli 114

- ¹ Isirayiri bwe yava mu Misiri, abaana ba Yakobo abo, ne bava mu bantu abaayogeranga olulimi olutali lwabwe;
- ² Yuda n'afuuka omutukuvu wa Katonda, Isirayiri n'afuuka amatwale ge.
- ³ Ennyanja bwe yabalaba n'edduka; Omugga Yoludaani ne gudda emabega.
- ⁴ Ensozi ne zibuukabuuka ng'endiga zisseddume, n'obusozi obutono ng'obuliga obuto.
- ⁵ Ggwe ennyanja, lwaki wadduka? Ggwe Yoludaani, lwaki wadda emabega?
- ⁶ Mmwe ensozi, lwaki mwabuukabuuka ng'endiga zisseddume, nammwe obusozi obutono ng'obuliga obuto?
- ⁷ Kankana, ggwe ensi, mu maaso ga Mukama, mu maaso ga Katonda wa Yakobo,
- ⁸ eyafuula olwazi ekidiba eky'amazzi, n'olwazi olugumu n'aluggyamu ensulo ez'amazzi.

Zabbuli 115

- ¹ Si ffe, Ayi MUKAMA, si ffe. Wabula erinnya lyo lye ligwana okuweebwanga ekitiibwa, olw'okwagala kwo n'olw'obwesigwa bwo.
- ² Lwaki amawanga gabuuza nti, "Katonda waabwe ali ludda wa?"
- ³ Katonda waffe ali mu ggulu; akola buli ky'ayagala.
- ⁴ Bakatonda baabwe bakole mu ffeeza ne zaabu, ebikolebwa n'emikongo'abantu.
- ⁵ Birina emimwa, naye tebyogera; birina amaaso, naye tebiraba.
- ⁶ Birina amatu, naye tebiwlira; birina ennyindo, naye tebiwunyiriza.
- ⁷ Birina engalo, naye tebikwata; birina ebigure, naye tebitambula; ne mu bulago bwabyo temuvaamu ddoboozi n'akamu,
- ⁸ abakozi ababikola, n'abo bona ababyesiga balibifaanana.
- ⁹ Mmwe ennyumba ya Isirayiri mwesigenga MUKAMA, ye mubeezi wammwe era ye ngabo yammwe.
- ¹⁰ Mmwe ennyumba ya Aloonni mwesigenga MUKAMA, ye mubeezi wammwe era ye ngabo yammwe.

¹¹Mmwe abamutya, mwesigenga MUKAMA, ye mubeezi wammwe, era ye ngabo yammwe.

¹²MUKAMA anaatujjukiranga, era anaatuwanga omukisa. Ab'ennyumba ya Isirayiri anaabawanga omukisa; ab'omu nnyumba ya Aloon anaabawanga omukisa;

¹³n'abo abamutya, ab'ekitiibwa n'abatali ba kitibwa, MUKAMA anaabawanga omukisa.

¹⁴MUKAMA abaaze mweyongere nnyo obungi, mmwe n'abaana bammwe.

¹⁵MUKAMA, eyakola eggulu n'ensi, abawe omukisa.

¹⁶Eggulu ery'oku ntikko lya MUKAMA, naye ensi yagiwa abantu bona.

¹⁷Abafu tebatendereza MUKAMA, wadde abo abaserengeta emagombe.

¹⁸Naye ffe tunaatenderezanga MUKAMA, okuva leero n'okutuusa emirembe gyonna. Mutendereze MUKAMA!

Zabbuli 116

¹MUKAMA mmwagala, kubanga awulidde eddoboozi lyange n'okwegayirira kwange.

²Kubanga ateze okutu kwe gye ndi, kyennaavanga mmukoowoola ebbanga lyonna lye ndimala nga nkyali mulamu.

³Emiguwa gy'okufa gyansiba, n'okulumwa okw'emagombe kwankwata; ne nzijula ennaku nnyingi n'okutya.

⁴Ne ndyoka nkoowoola erinnya lya MUKAMA nti, "Ayi MUKAMA, ndokola."

⁵MUKAMA wa kisa, era mutuukirivu; Katonda waffe ajjudde okusaasira.

⁶MUKAMA alabirira abantu abaabulijjo; bwe nnali mu buzibu obunene, n'andokola.

⁷Wummula ggwe emmeeme yange, kubanga MUKAMA abadde mulungi gy'oli.

⁸Kubanga ggwe, Ayi MUKAMA, owonyezza omwoyo gwange okufa, n'amaaso gange ogawonyezza okukaaba; n'ebigere byange n'obiwonya okwesittala,

⁹ndyoke ntambulirenga mu maaso ga MUKAMA mu nsi ey'abalamu.

¹⁰Nakkiriza kyennava njogera nti, "Numizibbwa nnyo."

¹¹Ne njogera nga nterebuse nti, "Abantu bona baliraba."

¹²MUKAMA ndimusasula ntya olw'ebirungi bye ebingi bwe bityo by'ankoledde?

¹³Nditoola ekikompe eky'obulokozi, ne nkoowoola erinnya lya MUKAMA.

- ¹⁴ Ndituukiriza obweyamo bwange eri MUKAMA, mu maaso g'abantu bebonna.
- ¹⁵ Okufa kw'abatukuvu ba MUKAMA kwa muwendo nnyo eri MUKAMA.
- ¹⁶ Ayi MUKAMA, onsumuluddeko ebyansiba n'onfuula wa ddembe, nange nnaakuweerezanga ennaku zonna.
- ¹⁷ Ndiwaayo ekiweebwayo eky'okwebaza, ne nkoowoola erinnya lya MUKAMA.
- ¹⁸ Ndituukiriza obweyamo bwange eri MUKAMA, mu maaso g'abantu bebonna,
- ¹⁹ mu mpya z'ennyumba ya MUKAMA; wakati wo, ggwe Yerusaalemi. Mutendereze MUKAMA.

Zabbuli 117

- ¹ Mutendereze MUKAMA, mmwe ensi zonna; mumugulumize, mmwe amawanga gonna.
- ² Kubanga okwagala kwe okutaggwaawo kungi gye tuli; n'obwesigwa bwa MUKAMA bwa lubeerera. Mutendereze MUKAMA.

Zabbuli 118

- ¹ Mwebaze MUKAMA, kubanga mulungi; okwagala kwe kubeerera emirembe gyonna.
- ² Kale Isirayiri ayogere nti, "Okwagala kwa MUKAMA kubeerera emirembe gyonna."
- ³ N'ab'ennyumba ya Aloon boogere nti, "Okwagala kwe kubeerera emirembe gyonna."
- ⁴ Abo abatya MUKAMA boogere nti, "Okwagala kwe kubeerera emirembe gyonna."
- ⁵ Bwe nnali mu nnaku empitirivu, nakoowoola MUKAMA, n'annyanukula, n'agimponya.
- ⁶ MUKAMA ali ku ludda lwange, siriiko kye ntya. Abantu bayinza kunkolako ki?
- ⁷ MUKAMA ali nange, ye anyamba. Abalabe bange nnaabatunuuliranga n'amaaso ag'obuwanguzi.
- ⁸ Kirungi okwesiga MUKAMA okusinga okwesiga omuntu.
- ⁹ Kirungi okuddukira eri MUKAMA okusinga okwesiga ablangira.
- ¹⁰ Ensi zonna zanzinda ne zinneebungulula, naye mu linnya lya MUKAMA naziwangula.
- ¹¹ Banneebungulula enjuuyi zonna; naye mu linnya lya MUKAMA nabawangula.

¹² Bankujjaanirako ne banneebungulula ng'enjuki; naye ne basirikka ng'amaggwa agakutte omuliro; mu linnya lya MUKAMA nabawangula.

¹³ Bannumba n'amaanyi mangi, ne mbulako katono okugwa; naye MUKAMA n'annyamba.

¹⁴ MUKAMA ge maanyi gange, era lwe luyimba lwange, afuuse obulokozi bwange.

¹⁵ Muwulire ennyimba ez'essanyu ez'obuwanguzi, nga ziyimbirwa mu weema z'abatuukirivu nti, "Omukono gwa MUKAMA ogwa ddyo gutukoledde ebikulu!"

¹⁶ Omukono gwa MUKAMA ogwa ddyo gugulumizibba; omukono gwa MUKAMA ogwa ddyo gutukoledde ebikulu!"

¹⁷ Sijja kufa, wabula nzija kuba mulamu, ndyoke ntegeeze ebyo byonna MUKAMA by'akoze.

¹⁸ MUKAMA ambonerezza nnyo, naye tandese kufa.

¹⁹ Munzigulirewo emiryango egy'obutuukirivu, nnyingire, neebaze MUKAMA.

²⁰ Guno gwe mulyango omunene ogwa MUKAMA, abatuukirivu mmwe banaayingiriranga.

²¹ Nkwebaza kubanga onnyanukudde n'ofuuka obulokozi bwange.

²² Ejinja abazimbi lye baagaana lye lifuuse ejinja ekkulu ery'oku nsonda.

²³ Kino MUKAMA ye yakikola; era ffe tukiraba nga kya kitalo mu maaso gaffe.

²⁴ Luno lwe lunaku MUKAMA lw'akoze; tusanyuke tulujagulizeeko.

²⁵ Ayi MUKAMA tukwegayiridde, tulokole, Ayi MUKAMA tukwegayiridde otuwe obuwanguzi.

²⁶ Alina omukisa oyo ajja mu linnya lya MUKAMA. Tubasabidde omukisa nga tuli mu nnyumba ya MUKAMA.

²⁷ MUKAMA ye Katonda, y'atwakiza omusana. Mukumbire wamu nga mukutte amatabi mu ngalo zammwe n'ekiweebwayo kyammwe kituukire ddala ku mayembe g'ekyoto.

²⁸ Ggwe Katonda wange, nnaakwebazanga; ggwe Katonda wange, nange nnaakugulumizanga.

²⁹ Mwebaze MUKAMA kubanga mulungi, n'okwagala kwe kubeerera emirembe gyonna.

Zabbuli 119

¤ Alefu

¹ Balina omukisa abo abatambulira mu butuukirivu; abatambulira mu mateeka ga MUKAMA.

² Balina omukisa abo abagondera ebiragiro bye, era abanoonya MUKAMA n'omutima gwabwe gwonna.

³ Abo abatasobya, era abatambulira mu makubo ge.

⁴ Ggwe wateekawo ebiragiro byo; n'olagira bigonderwenga n'obwegendereza bungi.

⁵ Ayi MUKAMA, nsaba mbeerenga munywevu bulijjo; nga nkuma bye walagira.

⁶ Bwe ntyo siriswazibwa, amaaso gange nga ngasimbye ku ebyo bye walagira byonna.

⁷ Nga njiga ebiragiro byo ebitukuvu, nnaakutenderezanga n'omutima omulungi.

⁸ Nnaakwatanga amateeka go; Ayi MUKAMA, tonsuulira ddala.

彖 Bessi

⁹ Omuvubuka anaakuumanga atya ekkubo lye nga ttereenv? Anaalikuumanga ng'agoberera ekigambo kyo nga bwe kiri.

¹⁰ Nkunoonya n'omutima gwange gwonna; tonzikiriza kuva ku mateeka go.

¹¹ Ntadde ekigambo kyo mu mutima gwange; ndyoke nneme okwonoona.

¹² Ogulumizibwe, Ayi MUKAMA; onjigirize amateeka go.

¹³ Njatula n'akamwa kange amateeka go gonna ge walagira.

¹⁴ Nsanyukira okugondera ebiragiro byo, ng'asanyukira eby'obugagga.

¹⁵ Nnaafumiitirizanga ku biragiro byo, ne nzisaayo omwoyo ku makubo go.

¹⁶ Nnaasanyukiranga amateeka go, era siigerabirenga.

彖 Gimero

¹⁷ Omuddu wo omukolere ebirungi, mbe omulamu, ngobererenga ekigambo kyo.

¹⁸ Ozibule amaaso gange, nsobole okulaba eby'ekitalo ebiri mu mateeka go.

¹⁹ Nze ndi tuyise ku nsi; tonkisa bye walagira.

²⁰ Bulijjo emmeeme yange eyaayaanira amateeka go.

²¹ Onenya ab'amalala, abaakolimirwa, abaleka amateeka go.

²² Mponya okuduula kwabwe n'okunyooma kwabwe; kubanga bye walagira mbigondera.

²³Newaakubadde ng'ablangira bansalira enkwe; naye nze, omuweereza wo, nnaafumiitirizanga ku biragiro byo.

²⁴Amateeka go lye ssanyu lyange, era ge gannuŋŋamya.

¶ Daleeti

²⁵Nzigweddemu amaanyi, ndi wansi mu nfuufu; nkusaba onzizeemu endasi ng'ekigambo kyo bwe kiri.

²⁶Nakutegeeza bye nteesessa okukola, n'onnyanukula; onjigirize amateeka go.

²⁷Njigiriza amateeka go bye gagamba, nange nnaafumiitirizanga ku byamagero byo.

²⁸Emmeeme empweddemu ensa olw'okunakuwala; onzizeemu amaanyi ng'ekigambo kyo bwe kiri.

²⁹Nzigiraako ddala ebyo eitali bya butuukirivu; olw'ekisa kyo njigiriza amateeka go.

³⁰Nonzeewo okubeera omwesigwa; ntambulire mu ebyo bye walagira.

³¹Nnyweredde ku biragiro byo, Ayi MUKAMA, tondeka kuswazibwa.

³²Bw'onoosumulula omutima gwange, nnaatambuliranga mu makubo go ng'ebiragiro byo bwe biri.

¶ Eh

³³Njigiriza, Ayi MUKAMA, okugonderanga ebiragiro byo; ndyoke mbinywezenga ennaku zonna ez'obulamu bwange.

³⁴Mpa okutegeera ndyoke nkuume amateeka go era ngakwate n'omutima gwange gwonna.

³⁵Ntambuliza mu mateeka go, kubanga mwe nsanyukira.

³⁶Okyuse omutima gwange ogulaze eri ebyo bye walagira; so si eri eby'okufuna eitaliimu.

³⁷Kyusa amaaso gange galeme okunneegombesa eitaliimu; obulamu bwange obufuule obuggyga ng'ekigambo kyo bwe kiri.

³⁸Tuukiriza kye wasuubiza omuddu wo, kubanga ekyo kye wasuubiza abo abakutya.

³⁹Nziggako okunyooomebwa kuno kwe ntya, kubanga ebiragiro byo birungi.

⁴⁰Laba, njayaanira ebiragiro byo; onkomyewo mu butuukirivu bwo.

I Waawu

⁴¹Okwagala kwo okutaggwaawo kujje gye ndi, Ayi MUKAMA; ompe obulokozi bwo nga bwe wasuubiza;

⁴²ndyoke mbeere n'eky'okwanukula abo abambonyaabonya; kubanga neesiga kigambo kyo.

⁴³Toganya kigambo ekitali kya mazima okuva mu kamwa kange; kubanga essuubi lyange liri mu ebyo bye walagira.

⁴⁴Nnaagonderanga amateeka go ennaku zonna, emirembe n'emirembe.

⁴⁵Era nnaatambulanga n'emirembe, kubanga ngoberedde ebyo bye walagira.

⁴⁶Era nnaayogeranga ku biragiro by'omu maaso ga bakabaka, nga sikwatibwa nsonyi.

⁴⁷Kubanga nsanyukira amateeka go, era ngaagala.

⁴⁸Nzisaamu nnyo ekitiibwa ebiragiro byo era mbyagala. Nnaafumiitirizanga ku mateeka go.

τ Zayini

⁴⁹Jjukira ekigambo kye wansuubiza, nze omuddu wo, kubanga gwe wampa essuubi.

⁵⁰Ekiwummuza omutima gwange nga ndi mu bulumi kye kisuubizo kyo ekimpa obulamu.

⁵¹Ab'amalala banduulira obutamala, naye nze siva ku mateeka go.

⁵²Bwe ndowooza ku biragiro byo eby'edda, Ayi MUKAMA, biwummuza omutima gwange.

⁵³Nkyawa nnyo abakola ebibi, abaleka amateeka go.

⁵⁴Ebiragiro byo binfuukidde ennyimba buli we nsula nga ndi mu lugendo lwange.

⁵⁵Mu kiro nzijkira erinnya lyo, Ayi MUKAMA, ne neekuumma amateeka go.

⁵⁶Olw'okukugonderanga nfunye emikisa gyo mingi.

n Esi

⁵⁷Ggwe mugabo gwange, Ayi MUKAMA; nasuubiza okukugonderanga.

⁵⁸Nkwegayirira n'omutima gwange gwonna, ondage ekisa kyo nga bwe wasuubiza.

⁵⁹Bwe ndabye amakubo amakyamu ge nkutte, ne nkyuka okugoberera ebiragiro byo.

⁶⁰Nyanguwa nnyo okugondera amateeka go, so seekunya.

⁶¹ Newaakubadde ng'emiguwa gy'ababi ginsibye, naye seerabirenga mateeka go.

⁶² Nzuukuka mu ttumbi okukwebaza, olw'ebiragiro byo ebituukirivu.

⁶³ Ntambula n'abo abakutya, abo bona abakwata amateeka go.

⁶⁴ Ensi, Ayi MUKAMA, ejjudde okwagala kwo; onjigirize amateeka go.

⦿ Teesi

⁶⁵ Okoze bulungi omuddu wo, Ayi MUKAMA, ng'ekigambo kyo bwe kiri.

⁶⁶ Njigiriza okumanya n'okwawula ekirungi n'ekibi, era ompe okumanya; kubanga nzikiririza mu mateeka go.

⁶⁷ Bwe wali tonnambonereza nakyama nnyo, naye kaakano ɲjonderra ekigambo kyo.

⁶⁸ Ayi MUKAMA, oli mulungi era okola ebirungi; onjigirize amateeka go.

⁶⁹ Ab'amalala banjogeddeko nnyo eby'obulimba, naye nze nkwata ebyo bye walagira, n'omutima gwange gwonna.

⁷⁰ Omutima gwabwe gugezze ne gusavuwala; naye nze nsanyukira amateeka go.

⁷¹ Okubonerezebwa kwangasa, ndyoke njige amateeka go.

⁷² Amateeka go ge walagira ga mugaso nnyo gye ndi okusinga enkumi n'enkumi eza ffeeza ne zaabu.

⦿ Yoodi

⁷³ Emikono gyo gye gyankola ne gimmumba, mpa okutegeera ndyoke njige amateeka go.

⁷⁴ Abo abakutya banandabanga ne basanyuka, kubanga essuubi lyange liri mu kigambo kyo.

⁷⁵ Mmanyi, Ayi MUKAMA, ng'amateeka go matukuvu, era wali mutuufu okumbonereza.

⁷⁶ Kale okwagala kwo okutaggwaawo kumbeere kumpi kunsanyuse, nga bwe wansuubiza, nze omuddu wo.

⁷⁷ Kkiriza okusaasira kwo kuntuukeko ndyoke mbeere mulamu; kubanga mu mateeka go mwe nsanyukira.

⁷⁸ Ab'amalala baswazibwe, kubanga bampisizza bubi nga siriiko kye nkoze. Naye nze nnaafumiitirizanga ku biragiro byo.

⁷⁹ Abo abakutya bajje gye ndi, abategeera amateeka go.

⁸⁰Mbeera, omutima gwange guleme kubaako kya kunenyezebwa mu mateeka go, nneme kuswazibwa!

♦ Kaafu

⁸¹Emmeeme yange erumwa nnyo ennyonta ng'eyaayaanira obulokozi bwo, essuubi lyange liri mu kigambo kyo.

⁸²Ntunuulidde ebbanga ddene n'amaaso gange ne ganfuuyirira nga nninda okutuukirira kw'ekisuubizo kyo; ne neebuuza nti, "Olinsanyusa ddi?"

⁸³Newaakubadde nga nfuuse ng'ensawo ey'eddiba, eya wayini eri mu mukka, naye seerabira bye walagira.

⁸⁴Ayi MUKAMA, nze omuddu wo nnaalindirira kutuusa ddi nga tonnabonereza abo abanjigganya?

⁸⁵Abantu ab'amalala abataty Katonda bansimidde ebinnya mu kkubo; be bo abatagondera mateeka go.

⁸⁶Amateeka go gonna geesigibwa; abo abatakwegala banjigganyiza bwereere; nkusaba onnyambe!

⁸⁷Baali kumpi okunzikiririza ddala ku nsi kuno; naye nze sivudde ku ebyo bye walagira.

⁸⁸Olw'okwagala kwo okutaggwaawo ndekera obulamu bwange, ndyoke nkumee ebyo bye walagira ebiva mu kamwa ko.

՚ Lamedi

⁸⁹Ayi MUKAMA, Ekigambo kyo kinywevu mu ggulu, kya mirembe gyonna.

⁹⁰Obwesigwa bwo tebuggwaawo emirembe gyonna; watonda ensi era enyweredde ddala.

⁹¹Amateeka go na buli kati manywevu; kubanga ebintu byonna bikuweereza.

⁹²Singa nnali sisanyukira mu mateeka go, nandizikiride olw'obulumi bwe nalimu.

⁹³Siyinza kwerabira biragiro byo; kubanga mu ebyo obulamu bwange mw'obufuulidde obuggyga.

⁹⁴Ndi wuwo, ndokola, kubanga neekuumye bye walagira.

⁹⁵Newaakubadde ng'abakola ebibi beekukumye nga banteeze okunzikiriza; naye nze nyweredde ku ebyo bye walagira.

⁹⁶Ebintu byonna biriko we bikoma naye amateeka go tegakugirwa.

¤ Meemu

⁹⁷ Amateeka go nga ngagala nnyo! Ngafumiitirizaako olunaku lwonna.

⁹⁸ Amateeka go ganfuula mugezi okusinga abalabe bange, kubanga ge gannuŋjamya bulijjo.

⁹⁹ Ntegeera okusinga abasomesa bange bona, kubanga nfumiitiriza nnyo ebyo bye walagira.

¹⁰⁰ Ntegeera okusinga abakadde; kubanga ɻjondera ebyo bye walagira.

¹⁰¹ Neekuumye obutatambulira mu kkubo lyonna ekyamu, nsobole okugondera ekigambo kyo.

¹⁰² Sivudde ku mateeka go, kubanga ggwe waganjigiriza.

¹⁰³ Ebisuubizo byo nga bimpoomera nnyo! Biwoomera akamwa kange okusinga omubisi gw'enjuki.

¹⁰⁴ Mu biragiro byo mwe nfunira okutegeera; kyenva nkyawa ekkubo lyonna ekyamu.

¤ Nuuni

¹⁰⁵ Ekigambo kyo ye ttaala eri ebigere byange, era kye kimulisa ekkubo lyange.

¹⁰⁶ Ndayidde ekirayiro era nkikakasizza nga nnaakwatanga amateeka ag'obutuukirivu bwo.

¹⁰⁷ Nnumizibwa nnyo; nzizaamu obulamu, Ayi MUKAMA, ng'ekigambo kyo bwe kiri.

¹⁰⁸ Okkirize Ayi MUKAMA ettendo akamwa kange lye kakuwa; era onjigirize amateeka go.

¹⁰⁹ Newaakubadde ng'obulamu bwange ntera okubutambuza nga bwe njagala, naye seerabira mateeka go.

¹¹⁰ Abakola ebibi banteze omutego, naye sikiyamye kuva ku ebyo bye walagira.

¹¹¹ Ebiragiro byo gwe mugabo gwange emirembe gyonna; weewaawo, ebyo bye bisanyusa omutima gwange.

¹¹² Omutima gwange gweteseteese okukwatanga ebiragiro byo ennaku zonna ez'obulamu bwange.

¤ Sameki

¹¹³ Nkyawa abalina emitima egisagaasagana, naye nze njagala amateeka go.

¹¹⁴ Gwe kiddukiro kyange era ggwe ngabo yange; essuubi lyange liri mu kigambo kyo.

¹¹⁵ Muve we ndi mmwe abakola ebitali bya butuukirivu, mundeke nkuate ebiragiro bya Katonda wange.

¹¹⁶ Onnyweze nga bwe wasuubiza, ndyoke mbeere omulamu; nneme kuswazibwa ne nzigwamu essuubi.

¹¹⁷ Onnyweze ndyoke nfuuke ow'eddembe, era nkwatenga ebiragiro byo bulijjo.

¹¹⁸ Onyooma abo bona abaleka ebiragiro byo; weewaawo obugezigezi bwabwe tebuliimu kantu.

¹¹⁹ Abakola ebibi bona mu nsi obalaba ng'ebisasiro; nze kyenva njagala ebyo bye walagira.

¹²⁰ Nkankana nzenna nga nkutya, era ntua amateeka go.

¶ Ayini

¹²¹ Nkoze eby'obwenkanya era eby'obutuukirivu; tondeka mu mikono gy'abo abanjooga.

¹²² Okakase okundaganga ekisa kyo bulijjo, oleme kukkiriza ababi okunjooganga.

¹²³ Amaaso gange ganfuyuiririra, nga nnindirira obulokozi bwo n'ebyo bye wasuubiza mu butuukirivu bwo.

¹²⁴ Nze omuddu wo nkolaako ng'okwagala kwo bwe kuli; era onjigirize amateeka go.

¹²⁵ Ndi muddu wo, mpa okwawula ekirungi n'ekibi; ndyoke ntegeere ebiragiro byo.

¹²⁶ Ekiseera kituuse, Ayi MUKAMA, okubaako ky'okola, kubanga amateeka go gamenyeddwa.

¹²⁷ Naye nze njagala amateeka go okusinga zaabu, wadde zaabu omulongoose.

¹²⁸ Kubanga mmanyi ng'ebiragiro byo byonna bituufu; nkyawa buli kkubo lyonna ekyamu.

¶ Pe

¹²⁹ Ebiragiro byo bya kitalo; kyenva mbigondera.

¹³⁰ Ebigambo byo bwe binnyonnyolwa bireeta omusana; n'atategeera bulungi bimugeziwaza.

¹³¹ Njasamya akamwa kange ne mpejjaweija nga njaayaanira amateeka go.

¹³² Nkyukira, onkwatirwe ekisa, nga bw'okolera bulijjo abo abaagala erinnya lyo.

¹³³ Oluṇṇamye ebigere byange ng'ekigambo kyo bwe kiri, era tokkiriza kibi kyonna kunfuga.

¹³⁴ Mponya okujooga kw'abantu, bwe ntyo nkwatenga ebiragiro byo.

¹³⁵ Ontunuulire, nze omuddu wo, n'amaaso ag'ekisa, era onjigirizenga amateeka go.

¹³⁶ Amaziga gakulukuta mu maaso gange ng'omugga, olw'abo abatakwata mateeka go.

¶ Tisade

¹³⁷ Oli mutuukirivu, Ayi Katonda, era amateeka go matuufu.

¹³⁸ Ebiragiro byo bye wateekawo bituukirivu, era byesigibwa.

¹³⁹ Nnyiikadde nnyo munda yange, olw'abalabe bange abatassaayo mwoyo eri ebiragiro byo.

¹⁴⁰ Ebisuubizo byo byetegerezebwa nnyo, kyenva mbyagala.

¹⁴¹ Newaakubadde ndi muntu wa bulijjo era anyoomebwa, naye seerabira biragiro byo.

¹⁴² Obutuukirivu bwo bwa lubeerera, n'amateeka go ga mazima.

¹⁴³ Newaakubadde nga ndi mu kulumwa n'okutegana okungi, amateeka go ge gansanyusa.

¹⁴⁴ Ebiragiro byo bituufu emirembe gyonna; onjigirize okubitegeera ndyoke mbeere omulamu.

¶ Koofu

¹⁴⁵ Nkoowoola n'omutima gwange gwonna, Ayi MUKAMA, onnyanukule! Nnaagonderanga amateeka go.

¹⁴⁶ Nkukaabirira, ondokole, nkuate ebiragiro byo.

¹⁴⁷ Ngolokoka bunatera okukya ne nkukaabirira onnyambe; essuubi lyange liri mu kigambo kyo.

¹⁴⁸ Seebaka ekiro kyonna nga nfumiitiriza ku ebyo bye wasuubiza.

¹⁴⁹ Olw'okwagala kwo okutaggwaawo wulira eddoboozi lyange, Ayi MUKAMA, ompe obulamu obuggyga ng'amateeka go bwe gali.

¹⁵⁰ Abó ab'enewe era abatakwata mateeka go bansemberedde, kyokka bali wala n'amateeka go.

¹⁵¹ Naye ggwe, Ayi MUKAMA, oli kumpi nange, era n'amateeka go gonna ga mazima.

¹⁵² Okuva edda n'edda nayiga mu biragiro byo, nga wabissaawo bibeerewo emirembe gyonna.

¶ Leesi

¹⁵³ Tunuulira okubonaabona kwange omponye, kubanga seerabira mateeka go.

¹⁵⁴ Ompolereze, onnunule, onzizeemu obulamu nga bwe wasuubiza.

¹⁵⁵ Abakola ebibi obulokozi bubabeera wala, kubanga tebanoonya mateeka go.

¹⁵⁶ Ekisa kyo kinene, Ayi MUKAMA, onzizeemu obulamu nga bwe wasuubiza.

¹⁵⁷ Abalabe abanjigganya bangi, naye nze siivenga ku biragiro byo.

¹⁵⁸ Nnakuwalira abo abatakxesiga, kubanga tebakwata biragiro byo.

¹⁵⁹ Laba, Ayi MUKAMA, bwe njagala ebiragiro byo! Onkuumenga ng'okwagala kwo bwe kuli.

¹⁶⁰ Ebigambo byo byonna bya mazima meereere; n'amateeka go ga lubeerera.

₪ Sini ne Sikini

¹⁶¹ Abafuzi banjigganyiza bwereere, naye ekigambo kyo nkissaamu ekitiibwa.

¹⁶² Nsanyukira ekisuubizo kyo okufaanana ng'oyo afunye obugagga obungi.

¹⁶³ Nkyawa era ntamwa obulimba, naye amateeka go ngagala.

¹⁶⁴ Mu lunaku nkutendereza emirundi musanvu olw'amateeka go amatuukirivu.

¹⁶⁵ Abo abaagala amateeka go bali mu ddembe lingi; tewali kisobola kubesittaza.

¹⁶⁶ Nnindirira obulokozi bwo, Ayi MUKAMA, era mu biragiro byo mwe ntambulira.

¹⁶⁷ Njondera ebiragiro byo, mbyagala nnyo nnyini.

¹⁶⁸ Buli kye nkola okimanyi, era olaba nga bwe nkwata ebiragiro byo.

¤ Taawu

¹⁶⁹ Okukaaba kwange kutuuke gy'oli, Ayi MUKAMA, ompe okutegeera ng'ekigambo kyo bwe kiri.

¹⁷⁰ Okwegayirira kwange kutuuke gy'oli, onnunule nga bwe wasuubiza.

¹⁷¹ Akamwa kange kanaakutenderezanga, kubanga gw'onjigiriza amateeka go.

¹⁷² Olulimi lwange lunaayimbanga ekigambo kyo, kubanga bye walagira byonna bya butuukirivu.

¹⁷³ Omukono gwo gumbeerenga, kubanga nnonzeewo okukwatanga ebiragiro byo.

¹⁷⁴ Neegomba nnyo obulokozi bwo, Ayi MUKAMA, era amateeka go lye ssanyu lyange.

¹⁷⁵ Ompe obulamu nkutenderezenga, era amateeka go gampanirirenga.

¹⁷⁶ Ndi ng'endiga ebuze. Onoonye omuddu wo, kubanga seerabidde mateeka go.

Zabbuli 120

Oluyimba nga balinnya amadaala.

¹ Nkoowoola MUKAMA nga ndi mu nnaku, era n'annyanukula.

² Omponye, Ayi MUKAMA, emimwa egy'obulimba, n'olulimi olw'obukuusa.

³ Onooweebwa ki, era onookolebwa otya, ggwe olulimi olukuusa?

⁴ Onoofumitibwa n'obusaale obwogi obw'omulwanyi omuzira, n'oyokerwa ku manda ag'omuti entaseesa.

⁵ Ndabье ennaku, kubanga mbeera mu Meseki; nsula mu weema za Kedali!

⁶ Ndudde nnyo mu bantu abakyawa eddembe.

⁷ Nze njagala mirembe, naye bwe njogera bo baagala ntalo.

Zabbuli 121

Oluyimba nga balinnya amadaala.

¹ Nnyimusa amaaso gange eri ensozi, okubeerwa kwange kuva wa?

² Okubeerwa kwange kuva eri MUKAMA, eyakola eggulu n'ensi.

³ Taliganya kigere kyo kusagaasagana; oyo akukuma taabongootenga.

⁴ Laba, oyo akukuma Isirayiri taabongootenga so teyebakenga.

⁵ MUKAMA ye mukuumi wo; MUKAMA y'akusiikiriza ku mukono gwo ogwa ddyo;

⁶ emisana enjuba teekwokyenga, wadde omwezi ekiro.

⁷ MUKAMA anaakukumanga mu buli kabi; anaalabiriranga obulamu bwo.

⁸ MUKAMA anaakukumanga amagenda go n'amadda, okuva leero n'okutuusa emirembe gyonna.

Zabbuli 122

Oluyimba nga balinnya amadaala. Lwa Dawudi.

¹ Nasanyuka bwe bañjamba nti, "Tugende mu nnyumba ya MUKAMA!"

- ²Ebigere byaffe biyimiridde mu miryango gyo, Ayi Yerusaalemi.
- ³Yerusaalemi yazimbibwa okuba ekibuga ekinywevu ekiyimiridde awamu.
- ⁴Eyo ebika byonna gye biraga, ebika bya MUKAMA, okutendereza erinnya lya MUKAMA ng'ebiragiro ebyaweebwa Isirayiri bwe biri.
- ⁵Eyo entebe ez'okusalirako emisango gye zaateekebwa; z'entebe ez'obwakabaka ez'ennyumba ya Dawudi.
- ⁶Musabirenga Yerusaalemi emirembe: "Abo abakwagala bafune ebirungi.
- ⁷Emirembe gibeerenga munda w'ebisenge byo; n'amayumba go amanene gabeerenga n'omukisa era nga manywevu."
- ⁸Olwa baganda bange ne mikwano gyange nnaayogeranga nti, "Emirembe gibeerenga mu ggwe."
- ⁹Olw'obulungi bw'ennyumba ya MUKAMA Katonda waffe, nnaanoonyanga okukulaakulana kwa Yerusaalemi.

Zabbuli 123

Oluyimba nga balinnya amadaala.

- ¹Nnyimusa amaaso gange gy'oli, Ayi ggwe atuula ku ntebe ey'obwakabaka mu ggulu.
- ²Amaaso g'abaddu nga bwe gatunuulira omukono gwa mukama waabwe; n'amaaso g'omuweereza omukazi nga bwe gatunuulira omukono gwa mugole we, n'amaaso gaffe bwe gatyo bwe gatunuulira MUKAMA Katonda waffe, okutuusa lw'alitusaasira.
- ³Tusaasire, Ayi MUKAMA, tusaasire, kubanga tunyoomeddwa nnyo ddala.
- ⁴Emitima gyaffe gjijjudde ennaku olw'okuduulirwa abo abeeyagala, n'okunyoomebwa ab'amalala.

Zabbuli 124

Oluyimba nga balinnya amadaala. Lwa Dawudi.

- ¹Isirayiri agamba nti, singa Katonda teyali ku ludda lwaffe,
- ²singa Katonda teyali ku ludda lwaffe abalabe baffe bwe baatulumba,
- ³banditusanyaizzaawo mu kaseera buseera, obusungu bwabwe bwe bwatubuubuukirako.
- ⁴Amataba g'obusungu bwabwe ganditusanyaizzaawo, ne mukoka n'atukulukutirako;
- ⁵amazzi ag'obusungu bwabwe agayira ganditukuluggusizza.

⁶ MUKAMA atenderezebwé atatugabuddeeyo ne tutaa gulgwataagulwa amannyo gaabwe.

⁷ Tuwonye ng'ekinyonyi bwe kiva ku mutego gw'abatezi; omutego gukutuse, naffe tuwonye!

⁸ Okubeerwa kwaffe kuli mu linnya lya MUKAMA, eyakola eggulu n'ensi.

Zabbuli 125

Oluyimba nga balinnya amadaala.

¹ Abeesiga MUKAMA bali ng'olusozi Sayuuni olutayinza kusiguukululwa, naye olubeerawo emirembe gyonna.

² Ensozi nga bwe zeetooloola Yerusaalemi, ne MUKAMA bw'atyo bwe yeetooloola abantu be, okuva kaakano n'okutuusa emirembe gyonna.

³ Kubanga abafuzi abakola ebibi tebalifugira mu nsi y'abatuukirivu, baleme okuwaliriza abatuukirivu okukola ebibi.

⁴ Ayi MUKAMA, abalungi n'abo abalina omutima omulongoofu bakolere ebirungi.

⁵ Naye abo abalaga mu makubo gaabwe amakyamu, MUKAMA alibawañjangusa wamu n'abakola ebitali bya butuukirivu. Emirembe gibe ku Isirayiri.

Zabbuli 126

Oluyimba nga balinnya amadaala.

¹ MUKAMA bwe yakomyawo abawañjanguse ba Sayuuni, twafaanana ng'abaloota.

² Olwo akamwa kaffe ne kajjula enseko, ne nnimi zaffe ne ziyimba ennyimba ez'essanyu. Amawanga ne gagamba nti, "MUKAMA abakoledde ebikulu."

³ MUKAMA atukoledde ebikulu, kyetuvudde tusanyuka.

⁴ Otuzze obuggyia, Ayi MUKAMA, tufaanane ng'emigga egikulukutira mu lusenyi.

⁵ Abo abasiga nga bakaaba amaziga, baliyimba ennyimba ez'essanyu nga bakungula.

⁶ Oyo agenda ng'akaaba ng'atwala ensigo okusiga; alikomawo ng'ayimba ennyimba ez'essanyu ng'aleeta ebinywa bye.

Zabbuli 127

Oluyimba nga balinnya amadaala. Lwa Sulemaani.

¹ MUKAMA bw'atazimba nnyumba, abo abagizimba bazimbira bwereere. MUKAMA bw'atakuuma kibuga, abakumi bateganira bwereere.

² Oteganira bwereere bw'okeera mu makya n'okola, ate n'olwawo n'okwebaka ng'okolerera ekyokulya; kubanga MUKAMA abaagalwa be abawa otulo.

³ Abaana aboobulenzi kya bugagga okuva eri MUKAMA; era abaana mpeera gy'agaba okuva gy'ali.

⁴ Ng'obusaale bwe bubeera mu mukono gw'omulwanyi, n'abaana abazaalibwa mu buvubuka bw'omuntu bwe bali bwe batyo.

⁵ Alina omukisa omuntu oyo ajjuza ensawo ye n'obusaale, kubanga tebaliswazibwa; balyolekera abalabe baabwe mu mulyango omunene.

Zabbuli 128

Oluyimba nga balinnya amadaala.

¹ Balina omukisa abatya Katonda; era abatambulira mu makubo ge.

² Olirya ebibala ebiriva mu kutegana kwo; oliweebwa emikisa era olifuna ebirungi.

³ Mu nnyumba yo, mukyala wo aliba ng'omuzabbibu ogubala ennyo; abaana bo aboobulenzi baliba ng'amatabi g'emizeeyituuni nga beetoolodde emmeeza yo.

⁴ Bw'atylo bw'aweebwa emikisa omuntu atya MUKAMA.

⁵ MUKAMA akuwenga omukisa ng'asinziira mu Sayuuni, era olabe Yerusaalemi nga kijjudde ebirungi ennaku zonna ez'obulamu bwo.

⁶ Owangaale olabe abaana b'abaana bo! Emirembe gibeere mu Isirayiri.

Zabbuli 129

Oluyimba nga balinnya amadaala.

¹ Isirayiri ayogere nti, "Bambonyaabonyezza nnyo okuva mu buvubuka bwange."

² Ddala bambonyaabonyezza nnyo okuva mu buvubuka bwange; naye tebampangudde.

³ Newaakubadde ng'omugongo gwange gujjudde enkovu olw'embooko ze bankubye era ne gulabika nga kwe bayisizza ekyuma ekirma,

⁴ kyokka MUKAMA mutuukirivu; amenyeemenye enjegere z'abakola ebibi.

⁵ Abo bona abakyawa Sayuuni bagobebwe era bazzibweyo emabega nga baswadde.

⁶ Babeere ng'omuddo ogumera waggulu ku nnyumba, oguwotoka nga tegunnakula.

⁷ Omukunguzi tagufaako, n'oyo asiba ebinywa agunyooma.

⁸ Wadde abayitawo baleme kwogera nti, "Omukisa gwa MUKAMA gube ku mmwe. Tubasabidde omukisa mu linnya lya MUKAMA."

Zabbuli 130

Oluyimba nga balinnya amadaala.

- ¹ Ayi MUKAMA, nkukaabira nga nsobeddwa nnyo.
- ² Ayi Mukama, wulira eddoboozi lyange; otege amatu go eri eddoboozi ly'okwegayirira kwange.
- ³ Ayi MUKAMA, singa otubalira obutali butuukirivu bwaffe, ani eyandiyimiridde mu maaso go?
- ⁴ Naye osonyiwa; noolwekyo ossibwamu ekitiibwa.
- ⁵ Nnindirira MUKAMA, emmeeme yange erindirira era essuubi lyange liri mu kigambo kye.
- ⁶ Emmeeme yange erindirira Mukama; mmulindirira okusinga ng'abakuumi bwe balindirira obudde okukya; okusingira ddala ng'abakuumi bwe balindirira obudde okukya.
- ⁷ Ayi Isirayiri, weesigenga MUKAMA, kubanga MUKAMA y'alina okwagala okutaggwaawo; era y'alina okununula okutuukiridde.
- ⁸ MUKAMA y'alinunula Isirayiri n'amuggyga mu byonoono bye byonna.

Zabbuli 131

Oluyimba nga balinnya amadaala. Lwa Dawudi.

- ¹ Ayi MUKAMA siri wa malala, so n'amaaso gange tegeegulumiza. Siruubirira bintu binsukiridde newaakubadde ebintu eby'ekitalo ebinsinga.
- ² Naye njonzessa emmeeme yange era ngisiriikirizza ng'omwana bw'asiriikirira nga nnyina amuggyne ku mabeere. Omwana avudde ku mabeere nga bw'asiriikirira, n'emmeeme yange bw'eri bw'etyo.
- ³ Ayi Isirayiri, weesigenga MUKAMA okuva leero n'okutuusa emirembe gyonna.

Zabbuli 132

Oluyimba nga balinnya amadaala.

- ¹ Ayi MUKAMA jjukira Dawudi n'okubonaabona kwe yagumiikiriza kwonna.
- ² Nga bwe yalayirira MUKAMA, ne yeeyama eri Katonda Ayinzabyonna, Katonda wa Yakobo,
- ³ ng'agamba nti, "Siriyingira mu nnyumba yange, wadde okulinnya ku kitanda kyange.

- ⁴Sirikkiriza tulo kunkwata newaakubadde okuzibiriza amaaso gange,
- ⁵okutuusa lwe ndimala okufunira MUKAMA ekifo; ekifo eky'okubeeramu ekya Katonda Ayinzabyonna, Katonda wa Yakobo."
- ⁶Laba, twakiwulirako mu Efulasa, ne tukizuula mu nnimiro ya Jaali.
- ⁷Kale tugende mu kifo kye mw'abeera, tumusinzirize awali entebe y'ebigere bye.
- ⁸Golokoka, Ayi MUKAMA, ogende mu kifo kyo mw'owummulira; ggwe n'Essanduuko yo ey'Endagaano, eraga obuyinza bwo.
- ⁹Bakabona bo bambazibwe obutuukirivu, n'abatukuvu bo bayimbe n'essanyu.
- ¹⁰Ku lulwe Dawudi omuddu wo, tomugaana oyo gwe wafukako amafuta.
- ¹¹MUKAMA Katonda yalayirira Dawudi ekirayiro ekitaliggwaawo, era talikivaako. Kubanga yamugamba nti, "Omu ku batabani bo gwe ndituza ku ntebe yo ey'obwakabaka.
- ¹²Batabani bo bwe banaakuumanga Endagaano yange n'ebiragiro byange bye nnaabayigirizanga, ne batabani baabwe nabo banaatuulanga ku ntebe yo ey'obwakabaka emirembe gyonna."
- ¹³Kubanga MUKAMA yalonda Sayuuni, nga kye yasiima okutuulangamu, n'agamba nti:
- ¹⁴"Kino kye kifo mwe nnaawummuliranga emirembe gyonna; omwo mwe nnaatuulanga nga ndi ku ntebe ey'obwakabaka kubanga nkisiimye.
- ¹⁵Nnaakiwanga omukisa ne nkiwa n'ebirungi, era n'abaavu baamu nnaabakkusanga ebyokulya.
- ¹⁶Bakabona baakyo, obulokozi bunaabanga kyambalo kyabwe; n'abatukuvu baakyo banaayimbanga ennyimba ez'essanyu n'essanyu.
- ¹⁷"Eyo gye ndyaliza batabani ba Dawudi obuyinza; ne muteekerawo ettabaaza olw'oyo gwe nayiwako amafuta.
- ¹⁸Abalabe be ndibajjuza ensonyi, naye ye ndimwambaza engule ey'ekitiibwa ekingi."

Zabbuli 133

Oloyimba nga balinnya amadaala. Lwa Dawudi.

- ¹Laba bwe kiri ekirungi era nga kisanyusa, abooluganda okubeera awamu nga batabaganye.

² Kiri ng'amatuta ag'omuwendo omungi agafukibwa ku mutwe gwa Alooni ne gakulukutira mu kirevu; gakulukutira mu kirevu kya Alooni, ne gakka ku kitogi ky'ebiyambalo bye.

³ Kiri ng'omusulo gw'oku lusozi Kerumooni, ogugwa ne ku nsozi za Sayuuni; kubanga eyo MUKAMA gy'agabira omukisa n'obulamu emirembe gyonna.

Zabbuli 134

Oluyimba nga balinnya amadaala.

¹ Mulabe, mutendereze MUKAMA, mmwe mwenna abaddu ba MUKAMA, abaweeereza ekiro mu nnyumba ya MUKAMA.

² Mugolole emikono gyammwe mu kifo ekitukuvu, mutendereze MUKAMA.

³ MUKAMA eyakola eggulu n'ensi akuwe omukisa ng'asinziira mu Sayuuni.

Zabbuli 135

¹ Mutendereze MUKAMA. Mutendereze erinnya lya MUKAMA. Mumutendereze mmwe abaddu ba MUKAMA;

² mmwe abaweeereza mu nnyumba ya MUKAMA, mu mpya z'ennyumba ya Katonda waffe.

³ Mutendereze MUKAMA, kubanga MUKAMA mulungi; mutendereze erinnya lye kubanga ekyo kisanyusa.

⁴ Kubanga MUKAMA yeerondera Yakobo okuba owuwe; ye Isirayiri gwe yeeroboza okuba eky'omuwendo.

⁵ Mmanyi nga MUKAMA mukulu wa kitibwa, era nga Mukama oyo y'asinga bakatonda bona.

⁶ MUKAMA kyonna ky'asiima ky'akola, mu ggulu ne ku nsi; mu nnyanja ne mu buziba bwayo.

⁷ Alagira ebire ne byekulumulula okuva ku nkomerero y'ensi; atonnyesa enkuba erimu okumyansa, n'asumulula empewo okuva mu mawanika ge.

⁸ Ye yakuba ababereberye ab'e Misiri; ababereberye b'abantu n'ebibereberye by'ebisolo.

⁹ Ye yaweereza obubonero n'ebywunyo wakati wo, ggwe Misiri, eri Falaawo n'abaweeereza be bona.

¹⁰ Ye yakuba amawanga amangi, n'atta bakabaka ab'amaanyi era be bano,

¹¹ Sikoni kabaka w'Abamoli, ne Ogi kabaka w'e Basani ne bakabaka bona ab'e Kanani.

- ¹² Ensi yaabwe n'agiwaayo ng'obusika, okuba obusika bw'abantu be Isirayiri.
- ¹³ Ayi MUKAMA, erinnya lyo lya lubeerera, era n'obukulu bwo bumanyibwa emirembe gyonna.
- ¹⁴ Kubanga Katonda aliggyako abantu be omusango, era alisaasira abaweeereza be.
- ¹⁵ Abamawanga ebifaananyi byonna ebyole bye basinza, ebyakolebwa n'emikono gy'abantu mu ffeeza ne zaabu,
- ¹⁶ birina emimwa, naye tebyogera; birina amaaso, naye tebiraba;
- ¹⁷ birina amatu naye tebiwulira; so ne mu kamwa kaabyo temuyitamu mukka.
- ¹⁸ Ababikola balibifaanana; na buli abyésiga alibifaanana.
- ¹⁹ Ayi ennyumba ya Isirayiri mutendereze MUKAMA; mmwe ennyumba ya Alooni mutendereze MUKAMA.
- ²⁰ Mmwe ennyumba ya Leevi mutendereze MUKAMA; mmwe abatya MUKAMA mutendereze MUKAMA.
- ²¹ MUKAMA ali mu Sayuuni yeebazibwe; yeebazibwe oyo abeera mu Yerusaalemi. Mutendereze MUKAMA.

Zabbuli 136

- ¹ Mwebaze MUKAMA kubanga mulungi, kubanga okwagala kwe kubeerera emirembe gyonna.
- ² Mwebaze Katonda wa bakatonda bona, kubanga okwagala kwe kubeerera emirembe gyonna.
- ³ Mwebaze Mukama w'abafuzi, kubanga okwagala kwe kubeerera emirembe gyonna.
- ⁴ Oyo yekka akola ebyamagero ebikulu, kubanga okwagala kwe kubeerera emirembe gyonna.
- ⁵ Oyo eyakola eggulu mu kutegeera kwe, kubanga okwagala kwe kubeerera emirembe gyonna.
- ⁶ Oyo eyabamba ensi ku mazzi, kubanga okwagala kwe kubeerera emirembe gyonna.
- ⁷ Oyo eyakola ebyaka ebinene, kubanga okwagala kwe kubeerera emirembe gyonna.
- ⁸ Enjuba yagikola okufuganga emisana, kubanga okwagala kwe kubeerera emirembe gyonna.

⁹Omwezi n'emmunyeenye yabikola okufuganga ekiro, kubanga okwagala kwe kubeerera emirembe gyonna.

¹⁰Oyo eyatta ababereberye b'Abamisiri, kubanga okwagala kwe kubeerera emirembe gyonna.

¹¹N'aggya Isirayiri mu Misiri, kubanga okwagala kwe kubeerera emirembe gyonna.

¹²Yabaggyamu n'omukono gwe ogw'amaanyi gwe yagolola; kubanga okwagala kwe kubeerera emirembe gyonna.

¹³Oyo eyayawulamu amazzi g'Ennyanja Emyufu, kubanga okwagala kwe kubeerera emirembe gyonna.

¹⁴N'ayisa abaana ba Isirayiri wakati waayo, kubanga okwagala kwe kubeerera emirembe gyonna.

¹⁵Naye n'asaanyaawo Falaawo n'eggye lye mu Nnyanja Emyufu; kubanga okwagala kwe kubeerera emirembe gyonna.

¹⁶Oyo eyakulembera abantu be mu ddungu, kubanga okwagala kwe kubeerera emirembe gyonna.

¹⁷Ye yafufuggaza bakabaka abaatiikirivu, kubanga okwagala kwe kubeerera emirembe gyonna.

¹⁸N'atta bakabaka ab'amaanyi, kubanga okwagala kwe kubeerera emirembe gyonna.

¹⁹Ye yatta ne Sikoni, kabaka w'Abamoli, kubanga okwagala kwe kubeerera emirembe gyonna.

²⁰Era ye yatta ne Ogi kabaka wa Basani, kubanga okwagala kwe kubeerera emirembe gyonna.

²¹N'awaayo ensi yaabwe okuba obutaka, kubanga okwagala kwe kubeerera emirembe gyonna.

²²Okuba obutaka bwa Isirayiri omuddu we, kubanga okwagala kwe kubeerera emirembe gyonna.

²³Oyo eyatujukira nga tuweddemu ensa, kubanga okwagala kwe kubeerera emirembe gyonna.

²⁴N'atuwonya abalabe baffe, kubanga okwagala kwe kubeerera emirembe gyonna.

²⁵Oyo awa abantu n'ebiramu byonna ekyokulya, kubanga okwagala kwe kubeerera emirembe gyonna.

²⁶Kale mwebaze Katonda w'eggulu, kubanga okwagala kwe kubeerera emirembe gyonna.

Zabbuli 137

¹Twatuula ku mabbali g'emigga gy'e Babulooni, ne tukaaba amaziga bwe twajjukira Sayuuni.

²Ne tuwanika ennanga zaffe ku miti egiali awo.

³Abaatunyaga ne batulagira okuyimba, abaatubonyaabonya ne batulagira okusanyuka; nga bagamba nti, "Mutuyimbireyo lumu ku nnyimba za Sayuuni."

⁴Tunaayimba tutya oluyimba Iwa MUKAMA mu nsi eteri yaffe?

⁵Bwe nnaakwerabiranga, ggwe Yerusaalemi, omukono gwange ogwa ddyo gukale!

⁶Olulimi lwange lwesibire waggulu w'ekibuno kyange singa nkwerabira, ggwe Yerusaalemi, ne sikulowoozaako okusinga ebintu ebirala byonna.

⁷Jjukira, Ayi MUKAMA, batabani ba Edomu kye baakola, ku lunaku Yerusaalemi lwe kyawambibwa; ne baleekaana nti, "Kisuule, kimalirewo ddala n'emisingi gyakyo."

⁸Ggwe omuwala wa Babulooni, agenda okuzikirizibwa, yeesiimye oyo alikusasula ebyo nga naawe bye watukola.

⁹Yeesiimye oyo aliddira abaana bo n'ababetentera ku lwazi.

Zabbuli 138

Zabbuli Ya Dawudi.

¹Nnaakutenderezanga Ayi MUKAMA, n'omutima gwange gwonna; ne mu maaso ga bakatonda abalala nnaayimbanga okukutendereza.

²Nvuunama nga njolekedde Yeekaalu yo Entukuvu, ne ntendereza erinnya lyo olw'okwagala kwo n'olw'obwesigwa bwo; kubanga wagulumiza ekigambo kyo n'erinnya lyo okusinga ebintu byonna.

³Olunaku lwe nakukoowoolerako wannyanukula; n'onnyongeramu amaanyi mu mwoyo gwange.

⁴Bakabaka bona ab'omu nsi banaakutenderezanga, Ayi MUKAMA, nga bawulidde ebigambo ebiva mu kamwa ko.

⁵Banaatenderezanga ebikolwa byo Ayi MUKAMA; kubanga ekitiibwa kya MUKAMA kinene.

⁶ Newaakubadde nga MUKAMA asukkulumye, naye afaayo eri abo abeetooowaza; naye abeegulumiza ababeera wala.

⁷ Newaakubadde nga neetooloddwa ebizibu, naye ggwe okuma obulamu bwange; ogolola omukono gwo eri abalabe bange abakambwe, era omukono gwo ogwa ddyo ne gumponya.

⁸ MUKAMA alituukiriza ebyo by'anteekeddetekedde; kubanga okwagala kwo, Ayi MUKAMA, kubeerera emirembe gyonna. Tolekulira ebyo bye watonda.

Zabbuli 139

Ya Mukulu wa Bayimbi. Zabbuli ya Dawudi.

¹ Ayi MUKAMA, okebedde omutima gwange, n'otegeera byonna ebiri munda yange.

² Bwe ntuula omanya, ne bwe ngolokoka omanya; era otegeera byonna bye ndowooza, ne bwe mbeera ewala ennyo.

³ Otegeera okutambula kwange kwonna n'okuwummula kwange. Omanyi amakubo gange gonna.

⁴ Ekigambo kye nnaayogera, Ayi MUKAMA, okimanya nga sinnaba na kukyogera.

⁵ Ondi mu maaso n'emabega, era ontaddeko omukono gwo.

⁶ Okumanya okw'engeri eyo kunsukkiridde, era nkeweuunya nnyo, kunnema okutegeera.

⁷ Nnaagenda wa Omwoyo wo gy'atali? Oba nnaagenda wa ggwe gy'otoli?

⁸ Bwe nnaalinya mu ggulu, nga gy'oli; bwe nnakka emagombe, nayo nga gy'oli.

⁹ Bwe nneebagala empewo ez'oku makya ne zintwala ne mbeera mu bitundu by'ennyanja ebisinga okuba ewala;

¹⁰ era n'eyo omukono gwo gunannujjamya, omukono gwo ogwa ddyo gunannywezanga.

¹¹ Bwe nnaagamba nti, "Ekizikiza kimbuitikire, n'obudde obw'emisana bwe ndimu bufuuke ekiro."

¹² Naye era ekizikiza gy'oli tekiba kizikiza, ekiro kyakaayakana ng'emisana; kubanga gy'oli ekizikiza n'omusana bifaanana.

¹³ Ggwe watonda byonna ebiri munda mu nze; ggwe wammumbira mu lubuto lwa mmange.

¹⁴ Nkutendereza, kubanga wankola mu ngeri ey'entiisa era ey'ekitalo; emirimu gyo gya kyewuunyo; era ekyo nkimanyidde ddala bulungi.

¹⁵ Wammanya nga ntondebwa, bwe nakolerwa mu kyama; bwe natondebwa mu buziba bw'ensi n'amagezi go amangi.

¹⁶ Wandaba nga si natondebwa. Ennaku zange zonna ze wanteekerateekera zawandiikibwa mu kitabo kyo.

¹⁷ By'ondowooleza nga bya muwendo munene, Ayi Katonda! Omuwendo gwabyo munene!

¹⁸ Singa ngezaako okubibala bisinga omusenyu obungi. Ne bwe ngolokoka mu makya oba okyandowoozaako.

¹⁹ Abakola ebibi batte, Ayi Katonda; abasajja abassi b'abantu banveeko.

²⁰ Abantu abo bakwogerako bibi; bakwegulumiririzaako mu butategeera bwabwe.

²¹ Abakukyawa, Ayi MUKAMA, nange mbakyawa; abo abakwegulumiririzaako bansunguwaza.

²² Mbakyayira ddala nnyo, era mbayita balabe bange.

²³ Nkebera, Ayi Katonda, otegeere omutima gwange. Ngezesha omanye ebirowoozo byange.

²⁴ Olabe obanga mu nze mulimu engeri yonna enkyamu; era onkulembere mu kkubo erintuusa mu bulamu obutaggwaawo.

Zabbuli 140

Ya mukulu w'okuyimba. Zabbuli ya Dawudi.

¹ Omponye abakola ebibi, Ayi MUKAMA, omponye abantu abakambwe;

² abateesa mu mitima gyabwe okukola ebibi; abanoonya entalo buli kiseera.

³ Ebigambo byabwe byogi ng'ennimi z'emisota; ebiva mu kamwa kaabwe busagua ng'obw'essalambwa.

⁴ Onkuume abakola ebibi baleme okunkwatako, Ayi MUKAMA; omponye abantu abakambwe abateesa okunkyamya.

⁵ Abantu ab'amalala banteze omutego; banjuluzza ekitimba kyabwe; ne batega emitego mu kkubo lyange.

⁶ Nagamba MUKAMA nti, "Ggwe oli Katonda wange." Wulira okwegayirira kwange, onsaasire, Ayi MUKAMA!

⁷ Ayi MUKAMA, MUKAMA wange, ggw'omponya n'amaanyi go, ggwe engabo yange mu lutalo.

⁸ Ayi MUKAMA, abakola ebibi tobawa bye beetaaga, era tokkiriza ntekateeka zaabwe kutuukirira; baleme kuba na malala wadde okwenyumiriza.

⁹ Abanneetoolodde baleke enkwe zaabwe zibeekyusizeeko baboneebone.

¹⁰ Amanda agaaka omuliro gabagwire; basuulibwe mu muliro, bakasukibwe mu bunnya obutakoma mwe bataliva emirembe gyonna.

¹¹ Tokkiriza balimba kweyongera bungi; abakambwe bayigganyizibwe bazikirire.

¹² Mmanyi nga MUKAMA ayamba abo ababonaabona, y'ayamba abanaku okuyisibwa mu bwenkanya.

¹³ Abatuukirivu banaakutenderezanga, era w'oli we banaabeeranga.

Zabbuli 141

Zabbuli Ya Dawudi.

¹ Ayi MUKAMA nkukaabira; oyanguwe okujja gye ndi! Owulire eddoboozi lyange, nga nkukoowoola.

² Okusaba kwange kubeere ng'ebiyakaloosa mu maaso go, n'okugolola emikono gyange gy'oli kubeere nga ssaddaaka ey'akawungeezi.

³ Onkuume, Ayi MUKAMA, nneme okwasamya akamwa kange, era bwe njogera onkomeko.

⁴ Okyuse omutima gwange guleme kugoberera kibi, n'okwemalira mu bikolwa ebibi; nneme okwetaba n'abantu abakola ebitali bya butuukirivu, wadde okulya ku mmere yaabwe.

⁵ Leka omuntu omutuukirivu ankube, kubanga anaaba ankwatiddwa ekisa; muleke anneny, ekyo kinaaba ng'amafuta amalungi agafukiddwa ku mutwe gwange; sijja kugagaana. Naye nnaasabanga bulijo nga sikkiriziganya na babi wadde n'ebikolwa byabwe.

⁶ Abakola ebibi bwe baliweebwayo eri ab'okubasalira omusango, olwo ne balyoka bayiga nti ebigambo byange bya mazima.

⁷ Balyogera nti, "Ng'omuntu bw'akabala n'akuba amavuunike, n'amagumba gaffe bwe galisaasaanyizibwa bwe gatyo mu kamwa k'emagombe."

⁸ Naye nze amaaso ngatadde ku ggwe, Ayi MUKAMA Katonda; mu ggwe mwe neekwese, tondeka nga sirina anambeera!

⁹ Nkuuma omponye omutego gwe banteze, n'ebitimba by'abo abakola ebitali bya butuukirivu.

¹⁰ Ebitimba bye banteze abakola ebibi abo bona, baleke babigwemu, kyokka nze mpone.

Zabbuli 142

Okusaba kwa Dawudi bwe yali mu mpuku.

¹ Nkaabirira MUKAMA n'eddoboozi ery'omwanguka; neegayirira MUKAMA ansaasire.

² Mmutegeeza byonna ebinneemulugunyisa, ne mmwanjulira ebinteganya byonna.

³ Omwoyo gwange bwe gunnennyika, gw'omanyi eky'okunkolera. Banteze omutego mu kkubo lyange mwe mpita.

⁴ Bwe ntunula ku mukono gwange ogwa ddyo, sirabayo anambeera; sirina wa kwekweka, era tewali n'omu anfaako.

⁵ Nkaabirira ggwe, Ayi MUKAMA, nga ɲjamba nti, "Ggwe kiddukiro kyange, ggwe mugabo gwange mu nsi muno."

⁶ Owulire okukaaba kwange, kubanga njeezebwa nnyo! Mponya abanjigganya, kubanga bansinza nnyo amaanyi.

⁷ Nziggya mu kkomera, ndyoke nkwebaze nga ntendereza erinnya lyo. Abatuukirivu balinneetooloola, ng'onkoledde ebyekisa ekingi ebingi.

Zabbuli 143

Zabbuli Ya Dawudi.

¹ Wulira okusaba kwange, Ayi MUKAMA, wulira okwegayirira kwange! Ggwe omwesigwa era omuntuukirivu jjangu ombeere.

² Tonsalira musango, kubanga mu maaso go tewali n'omu atuukiridde.

³ Omulabe wange angoba n'ankwata n'ansuula wansi; anteka mu kizikiza ne nfaanana ng'abaafa edda.

⁴ Noolwekyo omwoyo gwange guweddemu endasi, n'omutima gwange gwennyise.

⁵ Nzijkira ennaku ez'edda, ne nfumiitiriza ku ebyo bye wakola byonna, ne ndowooza ku mirimu gy'emikono gyo.

⁶ Ngolola emikono gyange gy'oli, ne nkuyaayaanira ng'ettaka ekkalu bwe liyaayaanira enkuba.

⁷ Yanguwa okunziramu, Ayi MUKAMA, kubanga omwoyo gwange guggwaamu amaanyi. Tonkisa maaso go, nneme okufaanana ng'abafu.

⁸ Obudde nga bukedde, nsaba ondage okwagala kwo okutaggwaawo; kubanga ggwe gwe neesiga. Njigiriza ekkubo lye nsaana okutambuliramu, kubanga omwoyo gwange gwonna guli gy'oli.

⁹ Mponya, Ayi MUKAMA, abalabe bange, kubanga ggwe kiddukiro kyange.

¹⁰ Njigiriza okukola by'oyagala, kubanga ggwe Katonda wange! Omwoyo wo omulungi ankulembere, antambulize mu kkubo eddungi ery'omuseetwe.

¹¹ Olw'erinnya lyo, Ayi MUKAMA, onkuume, mu butuukirivu bwo onzigye mu kabi.

¹² Omalewo abalabe bange olw'okwagala kwo, ozikirize n'abanjigganya bona, kubanga nze ndi muddu wo.

Zabbuli 144

Zabbuli ya Dawudi.

¹ Atenderezebwé MUKAMA, olwazi lwange, atendeka emikono gyange okulwana, era ateekerateekera engalo zange olutalo.

² MUKAMA anjagala ye Katonda wange era kye kiddukiro kyange, ge maanyi gange amangi era ye mulokozi wange. Ye ngabo yange mwe neekweka. Awangula amawanga n'agassa wansi w'ebigere byange.

³ Ayi MUKAMA, omuntu kye ki ggwe okumufaako, oba omwana w'omuntu, ggwe okumulowoozaako?

⁴ Omuntu ali nga mukka. Ennaku ze ziri ng'ekisiikirize ekiyita obuyisi.

⁵ Yawula mu ggulu lyo, Ayi MUKAMA, okke! Kwata ku nsozi zinyooke omukka!

⁶ Myansa abalabe basaasaane, era lasa obusaale bwo obazikirize.

⁷ Ogolole omukono gwo ng'osinziira waggulu ennyo, omponye, onzigye mu mazzi amangi, era onzigye mu mikono gya bannamawanga;

⁸ ab'emimwa egyogera eby'obulimba, abalayira nti kya mazima, so nga bulimba bwereere.

⁹ Ayi MUKAMA, nnaakuyimbiranga oluyimba oluggya; nnaakukubiranga ennanga ey'enkoba ekkumi,

¹⁰ ggwe awa bakabaka obuwanguzi; amponya, nze omuddu wo Dawudi, ekitala ekyogi.

¹¹ Ndokola, omponye onzigye mu mukono gwa bannamawanga bano ab'emimwa egyogera eby'obulimba, era omukono gwabwe ogwa ddyo gwa bulimba.

¹² Batabani baffe mu buvubuka bwabwe, Ayi MUKAMA, babeere ng'ebisimbe ebikulidde ddala obulungi, ne bawala baffe babe ng'empagi ennungi ez'oku nsonda okuzimbirwa ennyumba ya kabaka mu lubiri.

¹³ Amawanika gaffe gajjule ebibala ebya buli ngeri. Endiga zaffe zizaale enkumi n'obukumi zijjule amalundiro gaffe.

¹⁴ Ente zaffe ziwalule ebizito. Ebisenge by'ekibuga bireme kumenyebwa. Waleme kubaawo kukaaba n'okwaziirana kwonna mu nguudo ez'omu bibuga byaffe.

¹⁵ Abantu abaweereddwa emikisa egyo beesiimye! Balina omukisa abantu abo abalina Katonda waabwe nga ye MUKAMA.

Zabbuli 145

Oluyimba Iwa Dawudi olw'okutenderezza.

¹ Nnaakugulumizanga ggwe Katonda wange, era Kabaka wange; era nnaatenderezanga erinnya lyo buli lunaku emirembe n'emirembe.

² Nnaakutenderezanga buli lunaku; era nnaasutanga erinnya lyo emirembe n'emirembe.

³ MUKAMA mukulu, wa kitibwa, era asaanira okutenderezebwanga ennyo, n'obukulu bwe tebwogerekka.

⁴ Buli mulembe gunaatenderanga gunnaagwo ebikolwa byo, era gunaatendanga emirimu gyo eg'yamaanyi.

⁵ Nnaatendanga obukulu n'obulungi bw'ekitiibwa kyo, era nnaafumiitirizanga ku bikolwa byo ebyewuunyisa.

⁶ Abantu banaatendanga amaanyi g'ebikolwa byo eby'ekitalo, nange nnaatendanga obukulu bwo obw'ekitiibwa.

⁷ Banaayogeranga ku bulungi bwo obw'ekitalo nga bajaguza; era banaayimbanga olw'obutuukirivu bwo.

⁸ MUKAMA wa kisa, ajudde okusaasira, alwawo okusunguwala era ajudde okwagala okutaggwaawo.

⁹ MUKAMA mulungi eri buli muntu, era okusaasira kwe kubuna byonna bye yatonda.

¹⁰ Byonna bye watonda binaakutenderezanga, Ayi MUKAMA; n'abatukuvu bo banaakugulumizanga.

¹¹ Banaayogeranga ku kitibwa ky'obwakabaka bwo, era banaatendanga amaanyi go.

¹² Balyoke bategeeze abantu bona ebikolwa byo eby'amaanyi, n'ekitiibwa ky'obukulu obw'obwakabaka bwo.

¹³ Obwakabaka bwo, bwakabaka bwa lubeerera, n'obufuzi bwo bwa mirembe na mirembe. MUKAMA by'ayogera byonna bya bwesigwa, n'ebikolwa bye bijjudde okusaasira.

¹⁴ MUKAMA awanirira abo bona abazitoowereddwa, era ayimusa bona abagwa.

¹⁵ Amaaso g'abantu bona gatunuulira ggwe, Ayi MUKAMA, era bona gw'obawa ebyokulya mu biseera byabyo.

¹⁶ Oyanjuluza engalo zo, ebiramu byonna n'obigabira bye byetaaga ne bikkuta.

¹⁷ MUKAMA mutuukirivu mu bikolwa bye byonna era ayagala byonna bye yatonda.

¹⁸ MUKAMAabeera kumpi n'abo bona abamukoowoola; abo bona abamukoowoola mu mazima.

¹⁹ Abo bona abamussaamu ekitiibwa abawa bye baagala, era awulira okukaaba kwabwe n'abawonya.

²⁰ MUKAMA akuumma bona abamwagala, naye abakola ebibi alibazikiriza.

²¹ Akamwa kange kanaatenderezanga MUKAMA, era na buli kitonde kinaatenderezanga erinnya lye ettukuvu emirembe n'emirembe.

Zabbuli 146

¹ Tendereza MUKAMA! Tendereza MUKAMA ggwe emmeeme yange!

² Nnaatenderezanga MUKAMA ennaku zonna ez'obulamu bwange; nnaayimbanga okutendereza Katonda wange nga nkyali mulamu.

³ Teweesiganga bafuzi, wadde abantu obuntu omutali buyambi.

⁴ Kubanga bafa ne bakka emagombe; ne ku lunaku olwo lwennyini, byonna bye baba bateeseteese ne bifia.

⁵ Yeesiimye oyo ayambibwa Katonda wa Yakobo; ng'essuubi lye liri mu MUKAMA Katonda we,

⁶ eyakola eggulu n'ensi n'ennyanja ne byonna ebirimu, era omwesigwa emirembe gyonna.

⁷ Atereeza ensonga z'abajoogebwa mu bwenkanya, n'abalumwa enjala abawa ebyokulya. MUKAMA asumulula abasibe.

⁸ MUKAMA azibula amaaso ga bamuzibe, era awanirira abazitoowereddwa. MUKAMA ayagala abatuukirivu.

⁹ MUKAMA alabirira bannamawanga, era ayamba bamulekwa ne bannamwandu; naye ekkubo ly'abakola ebibi alifaafaaganya.

¹⁰ MUKAMA anaafuganga emirembe gyonna, Katonda wo, Ayi Sayuuni, anaabanga Katonda wa buli mulembe. Mutendereze MUKAMA!

Zabbuli 147

¹ Mutendereze MUKAMA! Kubanga kirungi okutenderezanga Katonda waffe; kubanga ajjudde ekisa, n'oluyimba olw'okumutenderezanga lumusaanira.

² MUKAMA azimba Yerusaalemi; era akuŋjaanya Abayisirayiri abaali mu buwanjjanguse.

³ Azzaamu amaanyi abo abalina emitima egimenyese, era aijanjaba ebiwundu byabwe.

⁴ MUKAMA ategeka omuwendo gw'emmunyeenye; era buli emu n'agituumma erinnya.

⁵ Mukama waffe mukulu era wa kitibwa; amaanyi g'obuyinza bwe tegatendeka, n'okutegeera kwe tekuliiko kkomo.

⁶ MUKAMA awanirira abawombeefu, naye abakola ebibi abasuulira ddala wansi.

⁷ Muyimbire MUKAMA ennyimba ez'okumwebaza; mumukubire entongooli ezivuga obulungi.

⁸ MUKAMA abikka eggulu n'ebire, ensi agitonnyeseza enkuba, n'ameza omuddo ne gukula ku nsozi.

⁹ Ente aziwa emmere, ne bannamuŋjoona abato abakaaba abaliisa.

¹⁰ Essanyu lyá MUKAMA teriri mu maanyi ga mbalaasi, wadde mu magulu g'omuntu,

¹¹ wabula MUKAMA asanyukira abo abamussaamu ekitibwa, era abalina essuubi mu kwagala kwe okutaggwaawo.

¹² Tendereza MUKAMA ggwe Yerusaalemi, tendereza Katonda wo ggwe Sayuuni,

¹³ kubanga ebisiba enzigi zo, ye abinyweza, n'abantu bo abasulamu n'abawa omukisa.

¹⁴ Aleeta emirembe ku nsalo zo; n'akukkusa ejŋaano esinga obulungi.

¹⁵ Aweereza ekiragiro kye ku nsi; ekigambo kye ne kibuna mangu.

¹⁶ Ayaliira omuzira ku ttaka ne gutukula ng'ebiyoya by'endiga enjeru, n'omusulo ogukutte n'agusaasaanya ng'evvu.

¹⁷ Omuzira agukanyuga ng'obuyinjayinja; bw'aleeta obutiti ani ayinza okubusobola?

¹⁸ MUKAMA aweereza ekigambo kye, omuzira ne gusaanuuka; n'akunsa empewo, amazzi ne gakulukuta.

¹⁹ Yategeeza Yakobo ekigambo kye; Isirayiri n'amanya amateeka ga MUKAMA n'ebiragiro bye.

²⁰ Tewali ggwanga na limu lye yali akolaganye nalyo bw'atyo; amawanga amalala tegamanyi mateeka ge. Mutendereze MUKAMA!

Zabbuli 148

¹ Mutendereze MUKAMA! Mumutendereze nga musinziira mu ggulu, mumutenderereze mu bifo ebiri waggulu.

² Mumutendereze mmwe mwenna bamalayika be, mumutendereze mmwe mwenna egghe lye ery'omu ggulu.

³ Mmwe enjuba n'omwezi mutendereze MUKAMA, nammwe mwenna emmunyeenye ezaaka mumutendereze.

⁴ Tendereza MUKAMA ggwe eggulu eriri waggulu ennyo, naawe amazzi agali waggulu w'eggulu.

⁵ Leka byonna bitendereze erinnya lya MUKAMA! Kubanga ye yalagira, ne bitondebwa.

⁶ Yabinywereza ddala mu bifo byabyo ennaku zonna, n'ateekawo etteeka eritaliggwaawo.

⁷ Mumutendereze nga musinziira ku nsi, mmwe balukwata n'ebifo byonna eby'omu buziba bw'enyanja,

⁸ mmwe okumyansa, n'omuzira ogw'amakerenda, n'omuzira ogukutte era n'olufu, naawe kikuŋŋunta, mugondere ekiragiro kye,

⁹ mmwe agasozi n'obusozi, emit iegy'ebibala n'emivule;

¹⁰ ensolo ez'omu nsiko era n'ente zonna, ebyewalula n'ebinyonyi ebibuuka,

¹¹ bakabaka b'ensi n'amawanga gonna, ablangira n'abafuzi bona ab'ensi,

¹² abavubuka abalenzi n'abawala; abantu abakulu n'abaana abato.

¹³ Bitendereze erinnya lya MUKAMA, kubanga erinnya lye lyokka lye ligulumizibwa; ekitiibwa kye kisinga byonna eby'omu nsi n'ebi'omu ggulu.

¹⁴ Abantu be abawadde amaanyi, era agulumizizza abatukuvu be, be bantu be Isirayiri abakolagana naye. Mutendereze MUKAMA.

Zabbuli 149

- ¹ Mutendereze MUKAMA! Muyimbire MUKAMA oluyimba oluggya, mumutenderereze wamu n'ekibiina ky'abatukuvu.
- ² Isirayiri asanyukirenga eyamutonda; n'abantu ba Sayuuni bajagulize Kabaka waabwe!
- ³ Batenderezenga erinnya lye nga bwe bazina, bamutenderezenga nga bwe bakuba ennanga n'ebitaasa.
- ⁴ Kubanga MUKAMA asanyukira abantu be, n'abawombeefu abawa engule ey'obulokozi.
- ⁵ Abatuukirivu bajagulizenga mu kitiibwa kino; bayimbire ku bitanda byabwe olw'essanyu.
- ⁶ Batenderezenga Katonda waabwe, bakwate ekitala eky'obwogi obubiri,
- ⁷ bawoolere eggwanga, babonereze n'amawanga,
- ⁸ bateeke bakabaka baago mu njegere, n'abakungu baago babasibe amagulu n'ebyuma,
- ⁹ babasalire omusango ogwabawandiikirwa. Kino kye kitiibwa ky'abatukuvu be bona. Mutendereze MUKAMA.

Zabbuli 150

- ¹ Mutendereze MUKAMA! Mutendereze Katonda mu kifo kye ekitukuvu; mumutenderereze ne mu ggulu lye ery'amaanyi.
- ² Mumutendereze olw'ebikolwa bye ebiraga amaanyi ge; mumutendereze olw'obukulu bwe obusukkiridde.
- ³ Mumutendereze n'eddoboozi ery'ekkondeere, mumutendereze n'ennanga ey'enkoba n'endere.
- ⁴ Mumutendereze n'ebitaasa n'amazina; mumutendereze n'ebivuga eby'enkoba n'endere!
- ⁵ Mumutendereze nga mukuba ebitaasa; mumutendereze n'ebitaasa ebivuga ennyo!
- ⁶ Buli ekissa omukka kitenderezenga MUKAMA! Mutendereze MUKAMA.

Engero

Engero 1

- ¹ Engero za Sulemaani, mutabani wa Dawudi, kabaka wa Isirayiri.
- ² Yaziwandiika okuyigiriza abantu okuba n'amagezi n'okuyiga, era n'okutegeera ebigambo eby'obulabufu; eby'obulamu eby'amagezi n'empisa.
- ³ Sulemaani yayagala abantu okuba n'empisa, n'obulamu obw'amagezi, okukolanga ebituufu, n'okubeera abenkanya n'okugobereranga ensonga;
- ⁴ okuyigiriza amagezi abatalina bumanyirivu, n'abavubuka okufuna okumanya n'okutegeera.
- ⁵ N'abantu ab'amagezi nabo bwe bawulira beeyongere okuyiga n'abategeevu beeyongere okubangulwa.
- ⁶ Era engero zino zaawandiikibwa okutegeera engero, enjogera n'ebikokyo.
- ⁷ Kale mu kutya MUKAMA amagezi mwe gasookera, naye abasirusiru banyooma amagezi n'okulagirirwa.

Amagezi eri Abavubuka

- ⁸ Mwana wange ossangayo omwoyo eri ebiragiro bya kitaawo, era tolekanga kukuutira kwa maama wo;
- ⁹ bijja kuba ngule eneeweesanga omutwe gwo ekitiibwa, n'emikuufu mu bulago bwo.
- ¹⁰ Mwana wange abakozi b'ebibi bwe bakusendasendanga, tokkirizanga.
- ¹¹ Bwe bakugambanga nti, "Tugende ffenna twesanyuse, tunyage, tubbe n'okutta; tokkirizanga;
- ¹² ng'entaana bw'emira abantu, naffe tubamire tutyo nga bakyali balamu, era nga balamba, ng'abagenda mu bunnya obuwantu;
- ¹³ nga twefunira eby'obugagga bye tutakoleredde, ne tujjuza amayumba gaffe obugagga obubbe;
- ¹⁴ ng'ababi batuyita tubeegattekko, tugabane kyenkanyi ebibbe n'ebinyage."
- ¹⁵ Mwana wange totambuliranga wamu nabo, era ekigere kyo kiziyize okukwatanga ekkubo lyabwe:
- ¹⁶ Kubanga ebigere byabwe bidduka bunnambiro okukola ebibi, era kibanguyira okuyiwa omusaayi.
- ¹⁷ Nga kuba kumala biseera okutega omutego, ng'ekinyonyi ky'oyagala okukwata kikulaba,

¹⁸naye abantu ng'abo baba beetega bokka, baba beetega omutego ogunaabakwasa bo bennyini.

¹⁹Bwe lityo bwe libeera ekkubo lya buli muntu anoonya okugaggawalira mu bukyamu. Obugagga obw'engeri eyo busaanyaawo obulamu bw'abo ababufuna.

Okulabula Eri Abanyooma Amagezi

²⁰Amagezi galeekaanira waggulu mu nguudo; gayimusa amaloboozi gaago, mu bifo ebigazi eby'omu bibuga.

²¹Ne galeekaanira waggulu, mu kifo enguudo ennene we zisisinkanira, era gasinzira mu miryango gy'ekibuga ne googera:

²²Mulituusa ddi mmwe ab'amagezi amatono obutayagala kweyongera kuyiga by'amagezi, nammwe ab'amalala okunyoomanga eby'amagezi n'abasirusiru okukyawanga okumanya?

²³Kale singa muwuliriza okunenya kwange, laba, ndifuka omutima gwange n'ebirowoozo byange mu mmwe.

²⁴Kubanga na bayita ne mugaana okuwuliriza, ne ngolola omukono ne wataba n'omu afaayo,

²⁵era ne mutafaayo ku magezi ge nabawa, era ne mugaana okubuulirira kwange kwonna,

²⁶kale nange ndibasekerera nga muli mu nnaku, era mbakudaalire ng'entiisa ebagwiridde.

²⁷Entiisa bw'eribajjira ng'omuyaga omungi, ennaku n'okubonaabona, okulumwa n'obubalagaze,

²⁸kale balinkoowoola, naye siriyyitaba; balinnoonya obutaweera naye ne batandaba.

²⁹Kubanga baakyawa okuyigirizibwa, n'okumanya, era ne bamalirira obutatya MUKAMA.

³⁰Ne bagaana okuwuliriza amagezi gange; ne banyooma okunenya kwange kwonna.

³¹Kyebaliva balya ebibala eby'ekkubo lyabwe ebbi, era ne bajjula ebibala eby'enkwe zaabwe.

³²Obusirusiru bulitta ab'amagezi amatono n'obutafaayo bulizikiriza abasirusiru,

³³naye buli ampuliriza anaabeeranga mirembe, ng'agumye nga talina kutya kwonna.

Engero 2

Empeera y'Okunoonya Amagezi

- ¹Mwana wange, bw'onookwatanga ebigambo byange, n'otereka ebiragiro byange mu bulamu bwo,
- ²era n'ossaayo omwoyo eri amagezi, era n'ossa omutima gwo eri okutegeera,
- ³ddala ddala singa oyaayaanira okumanya era n'oyimusa eddoboozi lyo osabe okutegeera,
- ⁴bw'onooganoonyanga nga ffeeza, era n'oganoonyanga ng'ekyobugagga ekyakwekebwa,
- ⁵awo w'olitegeerera okutya MUKAMA, era n'ovumbula okumanya Katonda.
- ⁶Kubanga MUKAMA awa amagezi; era mu kamwa ke muvaamu okumanya n'okutegeera.
- ⁷MUKAMA aterekera abatuukirivu amagezi amalungi, era aba ngabo y'abo abatambulira mu bugolokofu.
- ⁸Abatambuliza mu makubo ag'obwenkanya, era bw'atylo MUKAMA akuumma ekkubo ly'abatukuvu be.
- ⁹Olwo lw'olitegeera obutuukirivu, amazima n'obwenkanya; weewaawo buli kkubo eddungi.
- ¹⁰Kubanga amagezi galiyingira mu mutima gwo, n'okumanya kulisanyusa omwoyo gwo.
- ¹¹Okwesalirawo obulungi kunaakulabiriranga n'okutegeera kunaakukuumanga:
- ¹²Amagezi ganaakuwonyanga ekkubo ly'omubi, n'abantu aboogera eby'obugwagwa,
- ¹³abaleka amakubo ag'obutuukirivu ne batambulira mu makubo ag'ekizikiza,
- ¹⁴abasanyukira okukola ebikolwa ebibi, abanyumirwa eby'obusirusiru,
- ¹⁵abantu abo be b'amakubo amakyamu, era abakujukujju mu ngeri zaabwe.
- ¹⁶Amagezi MUKAMA g'awa ge gokka agajja okukuwonya ekkubo ly'omukazi omwenzi, n'okukuwonya ebigambo bye ebisendasenda,
- ¹⁷eyaleka bba ow'omu buvubuka bwe era eyeerabira endagaano gye yakola mu maaso ga Katonda we.
- ¹⁸Kubanga ennyumba ye ekka mu kufa, n'amakubo ge galaga eri abafu.
- ¹⁹Tewali n'omu agenda ewuwe adda wadde okufunirayo amakubo g'obulamu.

²⁰Kale tambuliranga mu kkubo ly'abo abatya Katonda era onywelerere mu makubo g'abatuukirivu.

²¹Kubanga abatuukirivu balituula mu nsi, era abo abagolokofu baligisigalamu.

²²Naye abakozi b'ebibi balifiirwa ebirungi eby'ensi, n'abatali beesigwa balizikirizibwa.

Engero 3

Emikisa Egiva mu kuba n'amagezi

¹Mwana wange, teweerabiranga bintu bye nakuyigiriza, era okuumanga ebiragiro byange mu mutima gwo,

²kubanga bijja kuwangaaza obulamu bwo ku nsi, era bikukulaakulanye.

³Amazima n'ekisa tobyerabiranga; byesibe mu bulago bwo, obiwandiike ku mutima gwo.

⁴Bw'otyo bw'onoofuna okuganja n'okusiimibwa eri Katonda n'eri abantu.

⁵Weesige MUKAMA n'omutima gwo gwonna, so teweegamanga ku magezi go gokka.

⁶MUKAMA mukulembezinga mu by'okola byonna, naye anaakuluŋŋamyanga n'owangula.

⁷Amagezi go tegakusigulanga, naye otyanga MUKAMA, era weewale okukola ebibi.

⁸Onoofunanga obulamu mu mubiri gwo n'amagumba go ne gadda buggy.

Amagezi n'Obugagga

⁹MUKAMA mugulumizinga n'ebi'obugagga byo; n'ebibala ebisooka eby'ebintu byonna eby'omu nnimiro yo,

¹⁰olwo amaterekero go lwe ganajjulanga ebintu enkumu, era n'amasenero go ne gajjula ne gabooga omwenge omusu.

¹¹Mwana wange tonyoomanga kukangavvula kwa MUKAMA, n'okunenya kwe kulemenga okukukooya,

¹²kubanga MUKAMA anenya oyo gw'ayagala, nga kitaawe w'omwana bw'anenya mutabani we gwe yeenyumiririzaamu.

¹³Aweereddwa omukisa oyo afuna amagezi, omuntu oyo afuna okutegeera,

¹⁴kubanga amagezi gasinga ffeeza era galimu amagoba okusinga zaabu.

¹⁵Amagezi ga muwendo mungi okusinga amayinja ag'omuwendo omungi: era tewali kyegombewa kiyinza kugeraageranyizibwa nago.

¹⁶ Mu mukono gwago ogwa ddyo mwe muli obuwanguzi; ne mu mukono gwago ogwa kkono ne mubaamu obugagga n'ekitibwa.

¹⁷ Mu magezi mulimu essanyu, era n'amakubo gaago ga mirembe.

¹⁸ Amagezi muti gwa bulamu eri abo abagakwata ne baganyweza; abo abagakwata ne baganyweza baliweebwa omukisa.

¹⁹ Amagezi, MUKAMA ge yakozesa okuteekawo emisingi gy'ensi; n'okutegeera kwe yakozesa okuteekawo eggulu;

²⁰ n'okumanya kwe, kwe yakozesa okwawula obuziba bw'enyanja, era n'ebire ne bivaamu omusulo.

Ab'amagezi Baweebwa Ekitiibwa

²¹ Mwana wange, beeranga n'okuteesa okulungi n'okusalawo ebisaana, ebyo biremenga okukuvaako,

²² binaabeeranga obulamu eri emmeeme yo, era ekyokwambala ekirungi ekinaawomesanga obulago bwo.

²³ Bw'otyo bw'onootambulanga nga onyweredde mu kkubo lyo, era ekigere kyo tekijanga kwesittala.

²⁴ Bw'onoogalamiranga toobenga na kutya, weewaawo bw'oneebakanga otulo tunaakuwoomeranga.

²⁵ Totyanga kabende kootomanyiridde, wadde okuzikirira okujjira abakozi b'ebibi,

²⁶ Kubanga MUKAMA y'anaabeeranga obwesigwa bwo, era anaalabiriranga ekigere kyo ne kitakwatibwa mu mutego.

²⁷ Tommanga birungi abo be bisaanira bwe kibeera mu buyinza bwo okukikola.

²⁸ Togambanga muliraanwa wo nti, "Genda, onodda enkya ne nkuwa," ate nga kye yeetaaga okirina.

²⁹ Totegekanga kukola bulabe ku muliraanwa wo, atudde emirembe ng'akwesiga.

³⁰ Tovunaananga muntu n'omu awatali nsonga nga talina kabi k'akukoze.

³¹ Tokwatirwanga obuggya omuntu ayigganya abalala, era tokolanga nga ye bw'akola,

³² kubanga omuntu omugwagwa wa muzizo eri MUKAMA, naye abo abagolokofu abalinamu obwesige.

³³ Ekikolimo kya MUKAMA kiri ku nnyumba y'ababi, naye awa omukisa ennyumba y'abatuukirivu.

³⁴ Ddala ddala, MUKAMA anyooma abanyoomi, naye abeetooowaza abawa ekisa.

³⁵ Ab'amagezi balisikira ekitiibwa, naye abasirusiru baliswazibwa.

Engero 4

Amagezi ge gali ku Ntikko

¹ Muwulirize baana bange okuyigiriza kwange ng'okwa kitammwe, era musseeyo omwoyo mufune okutegeera.

² Kubanga mbawa okuyigiriza okulungi; temulekanga biragiro byange.

³ Bwe nnali omuvubuka nga ndi ne kitange, omwana omu yekka omwagalwa, owa mmange,

⁴ yanjigiriza n'aŋjamba nti, "Ebigambo byange bikuumenga ku mutima gwo, kuuma ebiragiro byange obeere mulamu.

⁵ Funa amagezi; funa okutegeera, teweerabiranga era tovanga ku bigambo bya mu kamwa kange.

⁶ Togalekanga, nago ganaakukuumanga, gaagale nago ganaakulabiriranga.

⁷ Ddala amagezi kye kintu ekisingira ddala obukulu; noolwekyo fuba ofune amagezi, era fubira ddala nnyo ofune okutegeera.

⁸ Amagezi gagulumize, nago gajja kukuyimusa, gaanirize, nago gajja kukuweesa ekitiibwa.

⁹ Amagezi gajja kukutikkira engule ey'ekisa, era gakuwe n'engule ey'ekitiibwa."

Enjawulo wakati w'Ab'amagezi n'Abagwenyufu

¹⁰ Wuliriza ggwe, mutabani, era okkirize ebigambo byange olyoke owangaalire ku nsi n'essanyu eringi.

¹¹ Nkulujŋjamya mu kkubo ery'amagezi, ne nkukulembera mu makubo ag'obutuukirivu.

¹² Bw'onootambulanga, ekigere kyo kireme okuziyizibwa; era bw'onoddukanga, tojjanga kwesittala.

¹³ Nywerezanga ddala okuyigrizibwa, tokutanga: kukuumenga kubanga bwe bulamu bwo.

¹⁴ Toyngiranga mu kkubo ly'abakozi b'ebibi, wadde okutambulira mu kkubo ly'abantu aboonoonyi.

¹⁵ Lyewalenga, tolitambulirangamu, liveeko okwate ekkubo lyo.

¹⁶ Kubanga abakozi b'ebibi tebayinza kwebaka okuggyako nga bakoze ebibi, era otulo tubabulira ddala bwe baba tebalina gwe bakozeeko bulabe.

¹⁷Okukola ebibi y'emmere yaabwe, n'okukozesa eryanyi kye kyokunywa kyabwe.

¹⁸Ekkubo ly'abatuukirivu liri ng'enjuba eyakavaayo, eyeeyongera okwaka okutuusa obudde lwe butangaalira ddala.

¹⁹Naye ekkubo ly'ababi liri ng'ekizikiza ekikutte, tebamanyi kibaleetera kwesittala.

²⁰Mutabani wange wuliriza n'obwegendereza ebigambo byange; osseeyo omwoyo eri bye nkutegeeza;

²¹ebigambo bino tebikuvangako, bikuumire ddala mu mutima gwo,

²²kubanga bya bulamu eri abo ababifuna, era biwonya omubiri gwabwe gwonna.

²³Ekisinga byonna kuuma omutima gwo, kubanga y'ensulo y'obulamu bwo.

²⁴Weewalire ddala eby'obubambavu era n'okwogera ebya swakaba.

²⁵Amaaso go gatunulenga butereevu, era otunulenga n'obumalirivu eyo gy'olaga.

²⁶Tereeza bulungi amakubo go; okwate amakubo ageesigika gokka.

²⁷Tokyamanga ku mukono ogwa ddyo oba ogwa kkono; ebigere byo byewalenga ekkubo ekyamu.

Engero 5

Okulabula ku Bwenzi

¹Mutabani, ossangayo omwoyo eri ebiragiro byange, era owulirizanga bulungi ebigambo byange eby'amagezi,

²olyoke oyige okusalawo okw'amagezi, era akamwa ko kavengamu eby'obutegevu.

³Kubanga emimwa gy'omukazi omwenzi gitonnya omubisi gw'enjuki, n'ebigambo bye biweweetu okusinga omuzigo;

⁴naye enkomerero ya byonna, akaawa ng'omususa era asala ng'ekitala eky'obwogi obubiri.

⁵Ebigere bye bituuka mu kufa, ebisinde bye biraga emagombe.

⁶Tafaayo ku kkubo lya bulamu, amakubo ge gaakyamakyama dda, naye nga takimanyi.

⁷Kaakano, batabani bange mumpulirize, temuvanga ku bigambo bya kamwa kange.

- ⁸ Mwewalenga omukazi oyo era temuseembereranga luggi lwa nnyumba ye;
- ⁹ si kulwa nga mufiirwa ekitiibwa kyammwe, n'okumalira ebiseera byammwe ku oyo alina ettima,
- ¹⁰ ate si kulwa nga b'otolina ky'obamanyiiko bakwavuwaza, n'amaanyi go n'ogamalira ku maka g'omulala.
- ¹¹ Ku nkomerero y'obulamu bwo olisinda, ennyama yo n'omubiri gwo nga biwedde.
- ¹² Oligamba nti, "Nga nakyawa okulabulwa, n'omutima gwange ne gukyawa okunenyezebwa,
- ¹³ era ne sigondera ddoboozi ly'abasomesa bange, wadde okussaayo omwoyo eri abo abampanga amagezi.
- ¹⁴ Ntuuse ku njegoyego z'okuzikirira nga ndi wakati mu kuŋjaaniro ly'ekibiina."

Obuvunaanyizibwa n'Essanyu mu Bufumbo

- ¹⁵ Onoonywanga amazzi ag'omu kidiba kyo, n'amazzi agava mu luzzi lwo goonoonywanga.
- ¹⁶ Ensulo zo zisaanye okukulukutira mu nguudo, n'enzizi zo mu bifo ebigazi eby'omu kibuga?
- ¹⁷ Leka bibeere bibyo wekka, bireme kugabanibwako b'otomanyiiko n'akamu.
- ¹⁸ Kale leka ensulo yo ebeere n'omukisa, era osanyuke ne mukazi wo ow'omu buvubuka bwo.
- ¹⁹ Ng'ennangaazi eyeeyagaza n'empeewo esanya, leka okusuuta kwe kukumalenga ennaku zonna era naye akwetoloozenga okwagala kwe.
- ²⁰ Lwaki mwana wange osendebwasendebwa omukazi omwenzi, n'ogwa mu kifuba ky'omukazi w'omusajja omulala?
- ²¹ Kubanga MUKAMA alaba amakubo g'omuntu gonna, era n'akebera n'amakubo ge gonna.
- ²² Ebikolwa by'omukozi w'ebibi bimufuukira omutego, era emiguwa gy'ebikolwa bye ebibi girimusibira ddala.
- ²³ Alifa, kubanga yagaana okwekuuma, era alizikirira olw'obusirusiru bwe obungi.

Engero 6

Okulabula ku Butamanya n'Obusirusiru

- ¹ Mutabani obanga weeyimirira muliraanwa wo, ne weeyama okuyamba omuntu gw'otomanyi, oli mu katyabaga.

²Obanga weesibye n'ebigambo ggwe kennyini bye wayogera, ng'ebigambo by'omu kamwa ko bikusibye,

³kino mwana wange ky'oba okola okusobola okwewonya, kubanga kaakano oli mu buyinza bwa muliraanwa wo: Yanguwa, ogende weetooowaze, weegayirire muliraanwa wo.

⁴Amaaso go togaganya kwebaka, wadde ebikowe byo okubongoota.

⁵Onunule obulamu bwo ng'empeewo bw'edduka okuva mu ngalo z'omuyizzi, era ng'ekinyonyi, bwe kiva mu mutego gw'omutezi.

⁶Yigira ku biwuka, mugayaavu ggwe; fumiitiriza engeri gye bikolamu obiyigireko.

⁷Tebirina mukulembeze, mukungu oba mufuzi yenna abikulembera,

⁸kyokka byekuŋjaanyiza emmere mu biseera eby'amakungula, ne bitereka emmere mu biseera ebituufu mu mwaka.

⁹Olituusa ddi okwebaka mugayaavu ggwe? Oligolokoka ddi n'ova mu tulo two?

¹⁰Otulo otutonotono, n'okusumagira akatono, n'okufunya emikono okuwummulako,

¹¹obwavu bulikutuukako ng'omutemu, era n'obwetaavu ng'omutemu.

Okulabula eri Omuntu Omutabuzitabuzi

¹²Omuntu ataliiko ky'agasa, omusajja omubi agenda ayogera ebigambo ebitabulatabula,

¹³agenda atemyatemya ku liiso, nga bw'akuba ebigere ate nga bw'asongasonga olunwe,

¹⁴olw'omutima omukyamu, atekateeka okukola ebibi, bulijo aleeta obutakkaanya mu bantu!

¹⁵Noolwekyo okuzikirira kulimujira mbagirawo, mu kaseera buseera alibetentebwa awatali kuwona.

Okulabula ku Bibi Omusanvu

¹⁶Waliwo ebintu mukaaga MUKAMA by'akyawa, weewaawo musanvu eby'omuzizo gy'ali.

¹⁷Amaaso ag'amalala, emimwa egirimba, okuttira abantu obwerefere;

¹⁸omutima ogutegeka okukola ebibi, ebigere ebyanguwa okukola ebibi,

¹⁹obujulizi obw'obulimba, n'omuntu aleeta obutakkaanya mu booluganda.

Okulabula Ku Bwenzi

²⁰ Mwana wange nyweza ebiragiro bya kitaawo, era togayaalirira kuyigiriza kwa maama wo.

²¹ Bisibenga ku mutima gwo ennaku zonna era obisibe binywerere mu bulago bwo.

²² Bijja kukuluñjamyangi buli gy'onooolaganga, ne bw'onoobanga weebase binaakukuumanga, ate ng'ozuukuse binaabanga naawe.

²³ Kubanga amateeka ttabaaza, era n'okuyigiriza kitangaala, okukulabula olw'okukuluñjamya, ly'ekkubo ery'obulamu,

²⁴ okukuwonya omukazi ow'ebibi, okukuggya mu kunyumiikiriza kw'omukazi omwenzi.

²⁵ Teweegombanga bulungi bwe mu mutima gwo, wadde okumukkiriza okukuwamba n'amaaso ge,

²⁶ kubanga malaaya akussa ku muwendo ogugula omugaati, era omukazi omwenzi anoonya kuzikiririza ddala bulamu bwo.

²⁷ Omuntu ayinza okuwambaatira omuliro mu kifuba kye, ebyambalo bye ne bitaggya?

²⁸ Oba omuntu ayinza okutambulira ku manda agookya, ebigere bye ne bitasiriira?

²⁹ Bwe kityo bwe kiri eri omusajja agenda ne muka muliraanwa we, buli akwata ku mukazi ng'oyo talirema kubonerezebwa olw'ekibi kye.

³⁰ Abantu tebasekerera muntu bw'abba, olw'okwewonya enjala.

³¹ Naye bwe bamukwata aba alina okuwa engassi ya mirundi musanvu; ne bwe kiba nga kimumalako ebintu bye byonna eby'omu nju ye.

³² Naye buli ayenda ku mukazi talina magezi; kubanga azikiririza ddala emmeeme ye ye.

³³ Alifuna ebiwundu n'okunyoomebwa; n'obuswavu tebulimusangulibwako.

³⁴ Kubanga obuggyga buleetera omusajja okuswakira, era taliba na kisa n'akatono nga yeesasuza.

³⁵ Talikkiriza mutango gwonna, wadde okuwooyawooyezebwa enguzi ennene.

Engero 7

Emitawaana Egiva mu Kukwana Omukazi Omwenzi

¹ Mutabani nyweeza ebigambo byange, era okuumenga ebiragiro byange.

- ² Kwata ebiragiro byange obeere mulamu, n'amateeka gange ogakuumeng'emmunye y'eriiso lyo;
- ³ togalekanga kuva mu ngalo zo, gawandiike ku mutima gwo.
- ⁴ Amagezi gatwalire ddala nga mwannyoko, n'okutegeera, ng'wooluganda ow'omu kika kyo.
- ⁵ Binaakuwonyanga omukazi omwenzi, omukazi omutambuze awaanawaana n'ebigambo ebisendasenda.
- ⁶ Lumu nnali nnyimiridde ku ddirisa ly'ennyumba yange.
- ⁷ Ne ndaba mu bavubuka abatoototo, omulenzi atalina magezi,
- ⁸ ng'ayita mu luguudo okumpi n'akafo k'omukazi omwenzi, n'akwata ekkubo eridda ku nnyumba y'omukazi oyo,
- ⁹ olw'eggulo ng'obudde buzibye, ekizikiza nga kikutte.
- ¹⁰ Awo omukazi n'ajja okumusisinkana ng'ayambadde nga malaaya, ng'ajjudde ebirowoozo eby'obukaba mu mutima gwe.
- ¹¹ Omukazi omukalukalu, atambulatambula ennyo atabeerako waka,
- ¹² wuuyo mu luguudo, wuuyo mu bifo ebikuŋjaanirwamu, mu buli kafo konna ng'ateega!
- ¹³ N'amuvumbagira, n'amunywegera era ng'amutunuulidde nkaliriza n'amaaso agatatyा n'amugamba nti:
- ¹⁴ "Nnina ssaddaaka ez'ebiweebwayo olw'emirembe, leero ntukiriza obweyamo bwange.
- ¹⁵ Noolwekyo nzize okukusisinkana, mbadde njagala nnyo okukulaba, era kaakano nkusanze.
- ¹⁶ Obuliri bwange mbwaze bulungi n'engoye eza linena ava mu Misiri.
- ¹⁷ Mbukubye n'akaloosa, n'omugavu, n'obubaane, ne kinamoni, ne kalifuuwa.
- ¹⁸ Jjangu tuwoomerwe omukwano okutuusa obudde okukya; leka twesanyuse ffembi mu mukwano.
- ¹⁹ Kubanga baze taliiyo eka; yatambula olugendo luwanvu:
- ²⁰ Yagenda n'ensawo y'ensimbi; era alikomawo nga wayiseewo wiiki bbiri."
- ²¹ Yamusendasenda n'ebigambo ebisikiriza; n'amuwabya n'ebigambo ebiwoomerera.
- ²² Amangwago omuvubuka n'amugoberera ng'ente etwalibwa okuttibwa obanga empeewo egwa mu mutego,

²³ okutuusa akasaale lwe kafumita ekibumba kyayo, ng'akanyonyi bwe kanguwa okugwa mu mutego, so tamanyi ng'alifiirwa obulamu bwe.

²⁴ Kaakano nno batabani bange mumpulirize, era musseeyo nnyo omwoyo eri ebigambo byange.

²⁵ Temukkiriza mitima gyammwe kugoberera bigambo bye; temukkiriza bigere byammwe kukyamira mu makubo ge.

²⁶ Kubanga bangi bazikiridde, ddala ab'amaanyi bangi bagudde.

²⁷ Ennyumba ye, lye kkubo eridda emagombe, nga likka mu bisenge eby'okufa.

Engero 8

Amagezi Gakoowoola

¹ Amagezi tegakoowoolera waggulu, n'okutegeera ne kuyimusa eddoboozi lyakwo?

² Ku ntikko y'ebifo ebigulumivu okumpi n'ekkubo, mu masanjanzira, amagezi we gayimirira butengerera,

³ ku mabbali g'enzigi eziyingira mu kibuga, ku miryango, gakoowoolera waggulu nga gagamba nti,

⁴ Mmwe abantu, mmwe b'empita; nnyimusa eddoboozi lyange eri buli omu ali ku nsi.

⁵ Mmwe abatategeera mufune okutegeera; nammwe abasirusiru mufune amagezi.

⁶ Muwulirize kubanga nnina ebintu ebikulu eby'okubagamba, era mu kamwa kange muvaamu bituufu.

⁷ Akamwa kange koogera bituufu byereere; kubanga emimwa gyange gikyawa ebitali bya butuukirivu.

⁸ Ebigambo by'emimwa gyange byonna bya bwenkanya tewali na kimu kikyamu oba kya bukuusa.

⁹ Ebigambo byange byonna bitegeerekeka eri oyo ategeera, era tebirina kabi eri oyo alina amagezi.

¹⁰ Mu kifo kya ffeeza, londawo okuyigiriza kwange, era n'okumanya mu kifo kya zaabu ennongoose obulungi,

¹¹ kubanga amagezi gasinga amayinja ag'omuwendo omungi, era n'ebyo byonna bye weegomba tebiyinza kugeraageranyizibwa nago.

¹² Nze Magezi, mbeera wamu n'okuteesa okulungi, era mu nze mulimu okumanya n'okwawula ekirungi n'ekibi.

- ¹³ Okutya MUKAMA kwe kukyawa ekibi; nkyawa amalala n'okwemanya, n'obuteeyisa bulungi n'enjogera ey'obubambaavu.
- ¹⁴ Okuteesa okulungi n'okusalawo okw'amagezi bye byange; ntegeera era ndi wa buyinza.
- ¹⁵ Ku bwange, Magezi, bakabaka bafuga, abafuzi ne bakola amateeka ag'obwenkanya.
- ¹⁶ Abalangira bafuga ku bwange, n'abakungu bona abafuga ku nsi.
- ¹⁷ Njagala abo abanjagala, n'abo abanyikira okunnoonya bandaba.
- ¹⁸ Obugagga n'ekitiibwa biri mu nze, obugagga obutakoma n'okukulaakulana.
- ¹⁹ Ekibala kyange kisinga zaabu ennongoose, n'ebinvaamu bisinga ffeeza ey'omuwendo omungi.
- ²⁰ Ntambulira mu kkubo ery'obutuukirivu, mu kkubo ery'obwenkanya,
- ²¹ n'abo abanjagala mbagaggawaza era nzijuza amawanika gaabwe.
- ²² MUKAMA nze gwe yasooka okwoleka nga tannabaako kirala ky'akola.
- ²³ Nateekebwawo dda nnyo, ku lubereberye ng'ensi tennabaawo.
- ²⁴ Nateekebwawo ng'obuziba bw'ennyanja tebunnateekebwawo, nga n'emigga egireeta amazzi teginnabaawo,
- ²⁵ ng'ensozi tezinnateekebwa mu bifo byazo, nga n'obusozi tebunnabaawo;
- ²⁶ nga tannakola nsi newaakubadde amalundiro gaakwo, wadde enfuufu eyasooka ey'oku nsi.
- ²⁷ Naliwo ng'ateekawo eggulu mu kifo kyalyo, ne bwe yakola enkulungo kungulu ku buziba,
- ²⁸ ate ne bwe yawanika ebire n'abinywerezza waggulu mu bbanga, n'anywerezza ddala ensulo z'amazzi,
- ²⁹ bwe yawa ennyanja ensalo zaazo we zikoma, amazzi galeme kusukka we yagalagira, ne bwe yali ng'alamba emisingi gy'ensi.
- ³⁰ Nnali naye ng'omukozi omukugu, nga nzijudde essanyu lye erya buli lunaku, nga nsanyukira mu maaso ge bulijo,
- ³¹ nga nsanyukira mu nsi ye yonna, era nga ne nesiima olw'abaana b'abantu.
- ³² Kale nno, batabani bange mumpulirize; balina omukisa abo abakwata amakubo gange!
- ³³ Muwulirizenga okuyigirizibwa, mubenga n'amagezi, so temugalekanga.

³⁴ Alina omukisa omuntu ampuliriza, alindirira nga bw'akuma ku nzigi zange buli lunaku.

³⁵ Kubanga buli andaba afuna obulamu, era afuna okuganja eri MUKAMA.

³⁶ Oyo atannoonya yeerumya yekka, era n'abo bona abankyawa banoonya kufa.

Engero 9

Empagi z'Amagezi Omusanvu

¹ Amagezi gazimbye ennyumba yaago, gagizimbidde ku mpagi musanvu.

² Gategese ennyama yaago ne wayini waago; gategese ekijjulo.

³ Gatumye abawala abaweereza bakoowoolere mu bifo ebigulumivu nti,

⁴ "Buli atalina kutegeera akyameko wano!" Eri abo abatalina magezi gabagamba nti,

⁵ "Mujje mulye ku mmere yange era munywe ne ku nvinnyo gwe ntabudde.

⁶ Mulekeraawo obutaba na kutegeera mubeere balamu, era mutambulire mu kkubo ly'okumanya."

⁷ Oyo anenya omunyoomi ayolekera kuvumwa, n'oyo abuulirira omukozi w'ebibi yeeretera kuvumibwa.

⁸ Tonenyanga munyoomi, aleme okukukyawa, naye nenya ow'amagezi naye anaakwagalanga.

⁹ Yigirizanga ow'amagezi naye aneeyongeranga okuba n'amagezi, yigirizanga omutuukirivu, aneeyongerangako okuyiga.

¹⁰ "Mu kutya MUKAMA amagezi mwe gasookera, era n'okumanya oyo Omutukuvu Katonda, kwe kutegeera.

¹¹ Ku lwange oliwangaala emyaka mingi nnyo, era olyongerwako emyaka.

¹² Bw'obeera omugezi, amagezi go gakuyamba, naye bw'onyooma amagezi weerumya wekka."

¹³ Omukazi omusirusiru aleekaana, taba na mpisa era taba na magezi!

¹⁴ Era atuula mu mulyango gw'ennyumba ye, ne ku ntebe mu bifo eby'ekibuga ebisinga obugulumivu,

¹⁵ ng'akoowoola abo abayitawo, ababa batambula amakubo gaabwe abali ku byabwe.

¹⁶ Abagamba nti, "Buli alina okumanya okutono ajje muno." Era eri oyo atalina kutegeera agamba nti,

¹⁷ "Amazzi amabbe nga gawooma! emmere eriibwa mu kyama ng'ewooma!"

¹⁸ Naye oyo agwa mu kitimba kye tamanya nti nnyumba yakuzikirira, era nti abagenyi be bali mu buziba obw'emagombe.

Engero 10

Engero za Sulemaani

¹ Engero za Sulemaani: Omwana ow'amagezi asanyusa kitaawe; naye omwana omusirusiru anakuwaza nnyina.

² Eby'obugagga ebifuniddwa mu makubo amakyamu tebirina kye bigasa, naye abatuukirivu banunulwa okuva mu kufa.

³ MUKAMA taalekenga mutuukirivu we kufa njala, naye aziyiza abakozi b'ebibi okufuna bye beetaaga.

⁴ Emikono emigayaavu gyavuwaza, naye emikono eminyiikivu gireeta obugagga.

⁵ Omuvubuka ow'amagezi akungulira mu biseera ebituufu, naye oyo eyeebakira mu biro eby'okukunguliramu mwana aswaza ennyo.

⁶ Omukisa gubeera ku mutwe gw'omutuukirivu, naye akamwa k'omukozi w'ebibi kajjula obukambwe.

⁷ Omuntuukirivu anajjukirwanga n'essanyu, naye erinnya ly'omubi linaavundanga.

⁸ Alina omutima ogw'amagezi agondera ebiragiro, naye omusirusiru ayogerayogera, azikirizibwa.

⁹ Atambulira mu bwesimbu y'atambula emirembe, naye akwata amakubo amakyamu alitegeereebwa.

¹⁰ Oyo atta ku liiso ng'akweka amazima aleeta ennaku, n'omusirusiru ayogerayogera alizikirizibwa.

¹¹ Akamwa ak'omutuukirivu nsulo ya bulamu, naye akamwa k'omukozi w'ebibi kajjula bulabe.

¹² Obukyayi buleeta enjawukana, naye okwagala kubikka ku bibi bingi.

¹³ Amagezi gasangibwa ku mimwa gy'oyo alina okutegeera, naye omuggo gukangavvula oyo atamanyi kusalawo bulungi.

¹⁴ Abantu ab'amagezi batereka okumanya, naye akamwa k'omusirusiru kaaniriza kuzikirira.

¹⁵ Obugagga bw'omugagga kye kibuga kye ekiriko ebigo, naye obwavu kwe kuzikirira kw'omwavu.

¹⁶ Empeera y'omutuukirivu bulamu, naye empeera y'omukozi w'ebibi emuleetera kubonerezebwa.

¹⁷ Oyo assaayo omwoyo eri okubuulirirwa aba mu kkubo ery'obulamu, naye oyo atassaayo mwoyo ku kunenyezebwa aleetera abalala okuwaba.

¹⁸ Oyo akisa obukyayi alina emimwa egirimba, era omuntu akonjera, musirusiru.

¹⁹ Mu bigambo ebingi temubula kwonoona, naye akuumma olulimi lwe aba wa magezi.

²⁰ Olulimi lw'omutuukirivu ffeeza ya muwendo, naye omutima gw'omukozi w'ebibi gugasa katono.

²¹ Ebigambo by'omutuukirivu biriisa abantu bangi, naye abasirusiru bazikirira olw'okubulwa amagezi.

²² Omukisa gwa MUKAMA guleeta obugagga era tagwongerako buyinike.

Okuwangaala Okuli mu Kutyा MUKAMA

²³ Omusirusiru asanyukira okukola ebibi, naye omuntu alina okutegeera asanyukira eby'amagezi.

²⁴ Omukozi w'ebibi ky'atayagala kirimutuukako, naye abatuukirivu bye baagala biribaweebwa.

²⁵ Embuyaga bw'eija, abakozi b'ebibi batwalibwa, naye abatuukirivu banywera emirembe gyonna.

²⁶ Ng'omususa bwe gunyeenyeza amannyo, n'omukka nga bwe gubalagala mu maaso, n'omugayaavu bw'abeera bw'atyo eri abamutuma.

²⁷ Okutyा MUKAMA kuwangaaza omuntu, naye emyaka gy'ababi girisalibwako.

²⁸ Essuubi ly'abatuukirivu livaamu ssanyu, naye okusuubira kw'abakozi b'ebibi tekulivaamu kantu.

²⁹ Ekkubo lya MUKAMA kye kiddukiro ky'abatuukirivu, naye abakozi b'ebibi libasaanyaawo.

³⁰ Abatuukirivu tebajjululwenga ennaku zonna, naye abakozi b'ebibi tebalisigala mu nsi.

³¹ Akamwa k'omutuukirivu koogera eby'amagezi, naye olulimi olwogera eby'obubambavu lulisalibwamu.

³² Emimwa gy'omutuukirivu gyogera ebisaanidde; naye emimwa gy'omukozi w'ebibi gyogera eby'obubambavu.

Engero 11

- ¹ Minzaani eteri ya mazima ya muzizo eri MUKAMA, naye ebipimo ebituufu bye bimusanyusa.
- ² Amalala bwe gajja, ng'obuswavu butuuse, naye obwetoowaze buleeta amagezi.
- ³ Obwesimbu bw'abatuukirivu bubaluñjamya, naye enkwe z'abatali beesigwa zibazikirizisa.
- ⁴ Obugagga tebugasa ku lunaku olw'okusalirwako omusango, naye obutuukirivu buwonya okufa.
- ⁵ Obutuukirivu bw'abalongoofu bubatambuliza mu kkubo eggolokofu naye abakozi b'ebibi bagwa olw'ebikolwa byabwe ebibi.
- ⁶ Obutuukirivu bw'abagolokofu bubawonya, naye abatali beesigwa bagwa mu mutego olw'okwegomba ebibi.
- ⁷ Omukozi w'ebibi bw'afa, essuubi lye libula, ne byonna bye yasuubira mu maanyi bikoma.
- ⁸ Omutuukirivu aggyibwa mu mitawaana, naye jjijjira omukozi w'ebibi.
- ⁹ Akamwa k'oyo atatya Katonda, kazikiriza muliraanwa, naye olw'okumanya, abatuukirivu bawona.
- ¹⁰ Abatuukirivu bwe bakulaakulana ekibuga kijaguza; abakozi b'ebibi bwe bazikirira wawulirwawo amaloboozi ag'essanyu.
- ¹¹ Omukisa gw'abatuukirivu gukulaakulanya ekibuga: naye olw'akamwa k'abakozi b'ebibi, ekibuga kizikirizibwa.

Abeesigwa n'Abatambuza Eñjambo

- ¹² Omuntu atalina magezi anyooma muliraanwa we, naye omuntu ategeera akuumma olulimi lwe.
- ¹³ Aseetula olugambo atta obwesigwa, naye omuntu omwesigwa akuumma ekyama.
- ¹⁴ Awatali kuluñjamizibwa eggwanga lidobonkana, naye abawi b'amagezi abangi baleeta obuwanguzi.
- ¹⁵ Eyeeyimirira omuntu gw'atamanyiko alibonaabona, naye oyo akyawa okweyimirira aliba bulungi.
- ¹⁶ Omukazi ow'ekisa aweebwa ekitiibwa, naye abasajja ab'amawaggali bakoma ku bugagga bwokka.
- ¹⁷ Omusajja alina ekisa aganyulwa, naye alina ettima yeereetako akabi.
- ¹⁸ Omukozi w'ebibi afuna empeera ey'obukuusa, naye oyo asiga eby'obutuukirivu akungula empeera eya nnama ddala.

¹⁹Omuntu omutuukirivu ddala alifuna obulamu, naye oyo akola ebitali bya butuukirivu alifa.

²⁰ MUKAMA akyawa abantu abalina emitima emikyamu, naye ab'amakubo amagolokofu be bamusanyusa.

²¹ Mutegeerere ddala ng'abakozi b'ebibi tebalirema kubonerezebwa, naye bazzukulu b'abatuukirivu tebalibaako musango.

²²Ng'empeta ya zaabu mu nnyindo y'embizzi, bw'atyo bw'abeera omukazi omulungi atalaba njawulo wakati w'ekirungi n'ekibi.

²³Abatuukirivu bye beegomba bivaamu birungi byereere, naye abakozi b'ebibi bye bakola bisunguwaza.

Omuntu Omugabi

²⁴Omuntu agaba obuteerekereza, yeeyongera bweyongezi kugaggawala; naye akwatirira kye yandigabye, yeeyongera kwavuwala.

²⁵ Omuntu agaba anagaggawalanga, n'oyo ayamba talibulako amuyamba.

²⁶Abantu bakolimira oyo akweka enjaano mu kiseera eky'obwetaavu, naye oyo agitunda mu kiseera ekyo afuna emikisa.

²⁷ Oyo anyiikira okukola obulungi afuna okuganja, naye oyo anoonya ekibi, kimujjira.

²⁸ Oyo eyeesiga obugagga bwe aligwa, naye abatuukirivu banaakulaakulananga ne baba ng'amalagala amalamu.

²⁹ Omuntu aleeta emitawaana mu maka g'ewaabwe, alisikira mpewo; era n'omusirusiru aliba muddu w'oyo alina omutima ogw'amagezi.

³⁰ Ekibala ky'omutuukirivu muti gwa bulamu, era n'oyo asikiriza emyoyo gy'abantu ne balokoka wa magezi.

³¹ Obanga omutuukirivu alifuna ekimusaanidde ku nsi kuno, oyo atatyia Katonda n'omwonoonyi balirema obutafuna ekibasaanidde?

Engero 12

¹ Buli asanyukira okukangavvulwa ayagala amagezi; naye oyo akyawa okunenyezebwा musirusiru.

² Omuntu omulungi aganja mu maaso ga MUKAMA, naye MUKAMA asalira omusango omuntu ow'enkwe.

³ Omuntu tanywezebwা lwa kukola bitali bya butuukirivu, naye omulandira gw'omutuukirivu tegulisigulwa.

⁴ Omukyala ow'empisa ennungi ssanyu era ngule ya mwami we, naye omukazi eyeeyisa obubi ali nga kookolo mu magumba ga bba.

⁵ Enteekateeka z'omutuukirivu ziba za mazima, naye amagezi g'abakozi b'ebibi ge bawa gaba ga bulimba.

⁶ Ebiteeso by'abakozi b'ebibi kuyiwa musaayi, naye ebigambo by'abatuukirivu bye bibawonya.

⁷ Abakozi b'ebibi bagwa ne basaanirawo ddala, naye ennyumba y'omutuukirivu teesagaasaganenga emirembe gyonna.

⁸ Ebigambo by'omugezi bimuleetera okusiimibwa, naye eby'omusirusiru bimunyoomesa.

⁹ Omuntu eyeetoowaza ne yeekolera, asinga oyo eyeegulumiza n'abulwa ky'alya.

¹⁰ Omutuukirivu afaayo ku bisolo bye, naye omukozi w'ebibi abiraga bukambwe bwereere.

¹¹ Oyo eyeerimira aliba n'emmere nnyingi, naye oyo anoonya ebitaliimu talina magezi.

¹² Abakozi b'ebibi baagala okubba omunyago gwa babbi bannaabwe, naye omulandira gw'abatuukirivu gunywera.

¹³ Ebigambo by'omukozi w'ebibi bimusuula mu mitawaana, naye omutuukirivu awona akabi.

¹⁴ Omuntu ajjuzibwa ebirungi okuva mu bibala bye bigambo by'akamwa ke, n'emirimu gy'emikono gye gimusasula bulungi.

¹⁵ Ekkubo ly'omusirusiru ddungi mu kulaba kwe ye, naye omugezi assaayo omwoyo ku magezi agamuweebwa.

¹⁶ Omusirusiru alaga mangu obusungu bwe, naye omutegeevu tassa mwoyo ku kivume.

¹⁷ Omujulizi ow'amazima awa obujulizi obutuufu, naye omujulizi ow'obulimba ayogera bya bulimba.

¹⁸ Ebigambo ebyanguyirize bisala ng'ekitala ekyogi, naye olulimi lw'omuntu omugezi luwonya.

¹⁹ Emimwa egyogera amazima gibeerera emirembe gyonna, naye olulimi olulimba lwa kiseera buseera.

²⁰ Obulimba buli mu mitima gyabo abategeka okukola ebibi, naye essanyu liri n'abo abakolerera emirembe.

- ²¹ Tewali kabi konna kagwa ku batuukirivu, naye abakozi b'ebibi tebaggwaako mitawaana.
- ²² MUKAMA akyawa emimwa egirimba, naye asanyukira ab'amazima.
- ²³ Omuntu omutegeevu talaga nnyo by'amanyi, naye abasirusiru balaga obutamanya bwabwe.
- ²⁴ Omukono gw'omunyiikivu gulimufuula omufuzi, naye obugayaavu bufuula omuntu omuddu.
- ²⁵ Omutima ogweraliikirira guleetera omuntu okwennyika, naye ekigambo eky'ekisa kimusanyusa.
- ²⁶ Omutuukirivu yeegendereza mu mikwano gye, naye ekkubo ly'ababi libabuza.
- ²⁷ Omuntu omugayaavu tayokya muyiggo gwe, naye omunyiikivu kyayizze, kiba kya muwendo gyali.
- ²⁸ Mu kkubo ery'obutuukirivu mulimu obulamu, era mu kkubo eryo temuli kufa.

Engero 13

Ensibuko y'Obugagga Obungi

- ¹ Omwana omugezi assaayo omwoyo eri ebiragiro bya kitaawe, naye omunyoomi tafaayo ku kunenyezebwa.
- ² Omuntu asanyuka olw'ebirungi ebiva mu bibala bya kamwa ke, naye atali mwesigwa yeegomba kuleeta ntalo.
- ³ Oyo eyeegendereza by'ayogera akuma obulamu bwe, naye oyo amala googera, alizikirira.
- ⁴ Omuntu omugayaavu yeegomba kyokka n'atabaako ky'afuna, naye omunyiikivu byayagala byonna abifuna.
- ⁵ Omuntu omutoukirivu akyawa obulimba, naye omukozi w'ebibi yeereetera kunyooomebwa.
- ⁶ Obutuukirivu bukuuma omuntu omwesimbu, naye okukola ebibi kuzikiriza omwonoonyi.
- ⁷ Omuntu omu ayinza okwefuula omugagga ate nga taliiko ky'alina, ate omulala ne yeefuula okuba omwavu so nga mugagga nnyo.
- ⁸ Obugagga bw'omuntu buyinza okumununula, naye omwavu talina ky'atya.
- ⁹ Ekitangaala ky'abatuukirivu kyaka nnyo, naye ettaala y'abakozi b'ebibi ezikira.
- ¹⁰ Amalala gazaala buzaazi nnyombo, naye amagezi gasangibwa mu abo abakkiriza okulabulwa.

¹¹ Ensimbi enkumpanye ziggwaawo, naye ezija empolampola zeeyongera obungi.

¹² Essuubi erirwaho okutuukirira lirwaza omutima, naye ekyegombewa bwe kituukirira kiba muti gwa bulamu.

¹³ Omuntu anyooma ebiragiro aligwa mu mitawaana, naye oyo awuliriza ebimulagirwa aliweebwa empeera.

¹⁴ Okuyigiriza kw'omuntu alina amagezi nsulo ya bulamu, era kuggya omuntu mu mitego gy'okufa.

¹⁵ Okutegeera okulungi kuleeta okuganja, naye ekkubo ly'abateesigibwa liba zzibu.

¹⁶ Omuntu omwegendereza akola amaze kulowooza, naye omusirusiru alaga obutamanya bwe.

¹⁷ Omubaka omubi yeesuula mu mitawaana, naye omubaka omwesigwa aleeta kuwonyezebwa.

¹⁸ Anyooma okukangavvulwa yeereetako obwatu n'obuswatu, naye oyo assaayo omwoyo ku kunyenezebwaa weebwa ekitiibwa.

¹⁹ Ekyegombewa bwe kituukirira kisanyusa omutima, naye okulekayo okukola ebibi kya muzizo eri abasirusiru.

²⁰ Oyo atambula n'abantu abagezi ageziwala, naye oyo atambula n'abasirusiru alaba ennaku.

²¹ Emitawaana gigoberera aboonoonyi, naye okukulaakulana y'empeera y'abatuukirivu.

²² Omuntu omulungi alekera bazzukulu be ebyobusika, naye obugagga bw'omwonoonyi buterekirwa omutuukirivu.

²³ Ennimiro z'abaavu ziyinza okuvaamu emmere nnyingi, naye obutali bwenkanya ne bugyera yonna.

²⁴ Atakozesa kaggo akyawa omwana we, naye oyo amwagala afaayo okumukangavvula.

²⁵ Omutuukirivu alya emmere ye n'akkuta, naye abakozi b'ebibi basigala nga bayala.

Engero 14

¹ Omukazi ow'amagezi yeezimbira ennyumba ye, naye omusirusiru eyiye agyemenyera n'emikono gye.

- ²Omuntu atambulira mu bugolokofu atya MUKAMA, naye ow'amakubo amakyamu anyooma MUKAMA.
- ³Ebigambo by'omusirusiru bye bimuvuirako okukubwa, naye eby'abatuukirivu binaabakuumanga.
- ⁴Awataba nte nnume ezirma ebyagi biba bikalu, naye emmere ennyingi eva mu maanyi gaazo.
- ⁵Omujulizi ow'amazima talimba, naye ow'obulimba ayogera bya bulimba.
- ⁶Omukudaazi anoonya amagezi n'atagalaba, naye okumanya kwanguyira omuntu ategeera.
- ⁷Teweeretereza muntu musirusiru, kubanga tewali by'amagezi biva mu kamwa ke.
- ⁸Omutgeevu mugezi kubanga afaayo okutegeera by'akola, naye atalina magezi musirusiru kubanga yeerimba nti amanyi.
- ⁹Abasirusiru banyooma okugololwa nga bakoze ensobi, naye abalongoofu baagala emirembe.
- ¹⁰Buli mutima gumanya okulumwa kwagwo, tewali ayinza kugusanyukirako.
- ¹¹Ennyumba y'abakozi b'ebibi erizikirizibwa, naye eweema y'abatuukirivu erikulaakulana.
- ¹²Waliwo ekkubo erirabika nga ttuufu eri omuntu, naye ng'enkomerero yaalyo kufa.
- ¹³Enseko zandibaawo naye ng'omutima gujjuppe ennaku, era n'enkomerero y'essanyu eyinza okufuuka obuyinike.
- ¹⁴Omuntu atalina kukkiriza alisasulwa empeera emusaanira olw'ebikolwa bye, n'omuntu omulungi naye alisasulwa eyiye.
- ¹⁵Ow'amagezi amatono amala gakkiriza buli kigambo ky'awulira, naye omuntu omutegeevu yeegendereza amakubo ge.
- ¹⁶Omuntu ow'amagezi atya MUKAMA n'aleka okukola ebibi, naye omusirusiru yeepankapanka era teyeegendereza.
- ¹⁷Omuntu asunguwala amangu akola eby'obusirusiru, n'omukalabakalaba akyayibwa.
- ¹⁸Abatalina magezi basikira butaliimu, naye abategeevu batikkirwa engule ey'okumanya.
- ¹⁹Abakozi b'ebibi balivuunamira abatuukirivu, n'aboonoonyi ne bavuunama mu miryango gy'abatuukirivu.

Omugagga n'Omwavu

- ²⁰ Omwavu alagajjalirwa abantu nga ne muliraanwa we omutwaliddemu, naye abagagga baba n'emikwano mingo.
- ²¹ Anyooma muliraanwa we akola kibi, naye alina omukisa oyo asaasira abaavu.
- ²² Abateekateeka okukola ebibi, tebawaba? Naye okwagala n'amazima binaabeeranga n'abo abateesa okukola obulungi.
- ²³ Buli mulimu ogukolebwa n'amaanyi gubaako amagoba, naye okwogera obwogezi kireeta bwavu bwokka.
- ²⁴ Abagezi bafuna engule ey'obugagga, naye obusirusiru bw'abatalina magezi buzaala busirusiru.
- ²⁵ Omujulizi ow'amazima awonya obulamu bw'abantu, naye omujulizi ow'obulimba aba mulimba.
- ²⁶ Atya MUKAMA alina ekiddukiro eky'amaanyi, era n'abaana be balibeera n'obuddukiro.
- ²⁷ Okutya MUKAMA ye nsulo y'obulamu, kuleetera omuntu okwewala emitego gy'okufa.
- ²⁸ Ekitiibwa kya kabaka kiri mu kuba n'abantu bangi, naye omukulembeze ataba n'abantu abeera mu kabi.
- ²⁹ Omuntu omugumiikiriza aba n'okutegeera kungi, naye oyo asunguwala amangu ayolesa obusirusiru.
- ³⁰ Omutima oglina emirembe guwangaaza omuntu, naye obuggyga buvunza amagumba ge.
- ³¹ Omuntu atulugunya abaavu anyooma oyo eyabatonda, naye buli abakwatirwa ekisa, agulumiza Katonda.
- ³² Akacwano bwe kajja, omukozi w'ebibi agwa, naye omutuukirivu ne mu kufa aba n'obuddukiro.
- ³³ Amagezi gabeera mu mutima gw'omuntu alina okutegeera, era yeeyoleka ne mu basirusiru.
- ³⁴ Obutuukirivu buzimba eggwanga, naye ekibi kiswaza abantu ab'engeri zonna.
- ³⁵ Kabaka asanyukira omuddu akola eby'amagezi, naye obusungu bwa kabaka bunaabuubuukiranga ku oyo akola ebiswaza.

Engero 15

- ¹ Okuddamu n'eggonjebwa kumalawo ekiruyi, naye ekigambo eky'obukambwe kisaanuula obusungu.

- ² Olulimi lw'omugezi lwogera by'amagezi, naye akamwa k'abasirusiru kafukumula busirusiru bwereere.
- ³ Amaaso ga MUKAMA galaba buli wantu, alaba abatuukirivu n'abakozi b'ebibi.
- ⁴ Olulimi oluzimba muti gwa bulamu, naye olulimi olulimba lubetenta omutima.
- ⁵ Omusirusiru anyooma okubuulirirwa kwa kitaawe, naye omutegeevu assaayo omwoyo eri okunenyezebwa.
- ⁶ Mu nnyumba y'omutuukirivu mubaamu obugagga bungi, naye omukozi w'ebibi by'afuna, bimuleetera emitawaana.
- ⁷ Akamwa k'amagezi kabunyisa okumanya, naye omutima gw'abasirusiru si bwe gukola.
- ⁸ Ssaddaaka y'aboonoonyi ya muzizo eri MUKAMA, naye okusaba kw'abalongoofu lye ssanyu lye.
- ⁹ Ekkubo ly'omwonoonyi lya muzizo eri MUKAMA, naye MUKAMA ayagala oyo anoonya obutuukirivu.
- ¹⁰ Oyo aleka ekkubo ettuufu alikangavvulwa n'amaanyi, n'oyo akyawa okunenyezebwa alifa.
- ¹¹ Okufa n'okuzikirira biri mu maaso ga MUKAMA, n'okulaba alaba nnyo emitima gy'abaana b'abantu!
- ¹² Omunyoomi tayagala kunenyezebwa, era teeyeebuuza ku b'amagezi.
- ¹³ Omutima omusanyufu guleeta essanyu ku maaso, naye omutima omunyiikaavu gunafuya emmeeme.
- ¹⁴ Omutima omutegeevu gunoonya okumanya, naye akamwa k'abasirusiru kalya busirusiru.
- ¹⁵ Omuntu bw'aba omunyiikaavu, buli kimu kimwononekera, naye omutima omusanyufu gujaguza buli kaseera.
- ¹⁶ Okuba n'akatono ng'otya MUKAMA, kusinga okuba n'ebingi naye ng'oli mu mitawaana.
- ¹⁷ Okulya emmere ng'eriko enva endiirwa awali okwagalana, kisinga okuliirako ebyassava awali obukyayi.
- ¹⁸ Omuntu asunguwala amangu asaanuula oluyombo, naye omugumiikiriza akakkanya embeera.
- ¹⁹ Ekkubo ly'omugayaavu lijjula amaggwa, naye ekkubo ly'omutuukirivu golokofu.

²⁰ Omwana omugezi asanyusa kitaawe, naye omuntu omusirusiru anyooma nnyina.

²¹ Obusirusiru ssanyu eri oyo atalina magezi, naye omuntu ategeera atambulira mu kkubo eggolokofu.

²² Awatali kuluŋŋamizibwa entegeka zifa, naye awali abawi b'amagezi abangi ziyyitamu.

²³ Okuddamu obulungi kisanyusa, era kirungi ekigambo ekirungi okujjira mu kiseera ekituufu.

²⁴ Ekkubo ery'obulamu liyimusa omugezi, ne limuziyiza okukka emagombe.

²⁵ MUKAMA azikiriza ennyumba y'ab'amalala, kyokka akuma ensalo za nnamwandu.

²⁶ Enkwe za muzizo eri MUKAMA, naye ebigambo ebisaanidde, bimusanyusa.

²⁷ Oyo anoonya okugaggawalira mu bukyamu aleetera ennyumba ye emitawaana, naye oyo akyawa enguzi aliba mulamu.

²⁸ Omutima gw'omutuukirivu gufumiitiriza bye gunaayanukula, naye akamwa k'omwonoonyi kafubutula ebitasaana.

²⁹ MUKAMA ali wala n'aboonoonyi, naye awulira okusaba kw'abatuukirivu.

³⁰ Amaaso agajjudde essanyu gasanyusa omutima, n'amawulire amalungi galeetera amagumba obulamu.

³¹ Oyo assaayo omwoyo eri okunenyezebwा okuleeta obulamu, alituula wamu n'abagezi.

³² Agayaalirira okubuulirirwa yeerumya yekka, naye oyo assaayo omwoyo eri okunenyezebwা afuna okutegeera.

³³ Okutya MUKAMA kuyigiriza omuntu amagezi, n'obwetoowaze kye kitibwa ky'omuntu oyo.

Engero 16

MUKAMA Agera Ekkubo ly'Omuntu

¹ Omuntu atekateeka by'ayagala okukola mu mutima gwe, Naye okuddamu kuva eri MUKAMA.

² Amakubo g'omuntu gonna gaba matuufu mu maaso ge ye, naye MUKAMA y'apima ebigendererwa.

³ Emirimu gyo gyonna gikwasenga MUKAMA, naye anaatuukirizanga entegeka zo.

⁴ MUKAMA buli kimu akikola ng'alina ekigendererwa, n'abakozi b'ebibi y'abakolera olunaku lwe batuukibwako ebizibu.

⁵ Buli muntu alina omutima ogw'amalala wa muzizo eri MUKAMA; weewaawo talirema kubonerezebwwa.

⁶ Olw'okwagala n'olw'obwesigwa, ekibi kisasulibwa, n'okutya MUKAMA kuleetera omuntu okwewala okukola ebibi.

⁷ Amakubo g'omuntu bwe gaba gasanyusa MUKAMA, aleetera abalabe b'omuntu oyo okubeera naye mu mirembe.

⁸ Akatono akafune mu butuukirivu, kasinga obugagga obungi obufune mu bukyamu.

⁹ Omutima gw'omuntu guteekateeka ekkubo lye, naye MUKAMA y'alunjamya bw'anaatambula.

¹⁰ Kabaka ky'ayogera kiba ng'ekiva eri Katonda, n'akamwa ke tekasaanye kwogera bitali bya bwenkanya.

¹¹ Ebipimo ne minzaani ebituufu bya MUKAMA, ebipimo byonna ebikozesebwwa y'abikola.

¹² Kya muzizo bakabaka okukola ebibi, kubanga entebe ye ey'obwakabaka enywezebwwa butuukirivu.

¹³ Akamwa akogera eby'amazima bakabaka ke basanyukira, era baagala oyo ayogera amazima.

¹⁴ Obusungu bwa kabaka buli ng'ababaka abaleese okufa, omusajja ow'amagezi alibukkakkanya.

¹⁵ Kabaka bw'asanyuka kireeta obulamu; n'okuganza kwe, kuli nga ekire eky'enkuba mu biseera ebya ttoggo.

¹⁶ Okufuna amagezi nga kusinga nnyo okufuna zaabu, era n'okufuna okutegeera kikira ffeeza!

¹⁷ Ekkubo ly'abagolokofu kwe kwewala ebibi, n'oyo eyeekuumu mu kutambula kwe, awonya emmeeme ye.

¹⁸ Amalala gakulembera okuzikirira, n'omwoyo ogwegulumiza gukulembera ekigwo.

¹⁹ Okubeera n'omwoyo ogwetoowaza era n'okubeera n'abaavu, kisinga okugabana omunyago n'ab'amalala.

²⁰ Oyo assaayo omwoyo ku kuyigirizibwa alikulaakulana, era alina omukisa oyo eyeesiga MUKAMA.

²¹ Abalina emitima egy'amagezi baliyitibwa bategeevu, n'enjogera ennungi eyongera okuyamba okutegeera.

²² Amagezi nsulo ya bulamu eri oyo agalina, naye obusirusiru buleetera abasirusiru okubonerezebwa.

²³ Omutima gw'omuntu ow'amagezi gmuwa enjogera ennungi, era akamwa ke kayigiriza abalala.

²⁴ Ebigambo ebirungi biri ng'ebisenge by'omubisi gw'enjuki, biwoomera emmeeeme, ne biwonya n'amagumba.

²⁵ Wabaawo ekkubo erirabika ng'ettuufu eri omuntu, naye ku nkomerero limituusa mu kufa.

²⁶ Okwagala okulya kuleetera omuntu okukola n'amaanyi, kubanga enjala emukubiriza okweyongera okukola.

²⁷ Omuntu omusirusiru ategeka okukola eitali bya butuukirivu, era n'ebigambo bye, biri ng'omuliro ogwokya ennyo.

²⁸ Omuntu omubambaavu asiikuula entalo, n'ow'olugambo ayawukanya ab'omukwano enfirabulago.

²⁹ Omuntu omukyamu asendasenda muliraanwa we n'amutwala mu kkubo eritali ttuufu.

³⁰ Omuntu atemya ku liiso atekateeka kwonoona, n'oyo asongoza emimwa ategeka kukola bitali birungi.

³¹ Omutwe ogw'envi ngule ya kituibwa, gufunibwa abo abatambulira mu bulamu obutuukirivu.

³² Omuntu omugumiikiriza asinga omutabaazi, n'oyo afuga obusungu bwe akira awamba ekibuga.

³³ Akalulu kayinza okukubibwa, naye okusalawo kwa byonna kuva eri MUKAMA.

Engero 17

¹ Okulya akamere akaluma awali emirembe, kisinga okuba mu nnyumba ejjudde ebyassava nga mulimu entalo.

² Omuddu omugezi alifuga omwana wa bowo akwasa ensonyi, era alifuna ebyobusika ng'omu ku baana b'awaka.

³ Entamu erongoosa yakolebwa lwa ffeeza, n'ekikoomi ky'okulongoosa lwa zaabu, naye MUKAMA agezesza emitima.

⁴ Omubi assaayo omwoyo eri eby'obulimba, era n'omulimba awuliriza olulimi olukuusa.

⁵ Oyo akudaalira omwavu avvoola eyamutonda, n'oyo asanyukira obuyinike bw'abalala talirema kubonerezebwa.

⁶ Abazzukulu ngule ya bajjajaabwe, era n'abaana beenyumiririza mu bakadde baabwe.

⁷ Enjogerannungi teba ya musirusiru, ng'owekitiibwa bw'atasaana kwogera bya bulimba.

⁸ Enguzi eri ng'ejjinja ery'omufuusa mu maaso g'oyo agigaba, alowooza nti buli gy'akyukira eneemuyamba.

⁹ Okwagala tekulondoola nsobi, naye oyo atasonyiwa nsobi akyawaganya ab'omukwano enfirabulago.

¹⁰ Okunenya kuyamba nnyo omuntu ategeera, okusinga okukuba omusirusiru embooko ekikumi.

¹¹ Omukozi w'ebibi anoonya bujeemu bwereere, era kyaliva asindikirwa omubaka omukambwe.

¹² Okusisinkana eddubu enyagiddwako abaana baayo, kisinga okusisinkana omusirusiru mu busirusiru bwe.

Ebbeeyi y'Amagezi

¹³ Omuntu bw'asasula ekibi olw'obulungi, ekibi tekiriva mu nnyumba ye.

¹⁴ Okutandika oluyombo kuli ng'omuntu bw'asumulula omudumu gw'amazzi, noolwekyo vvaawo ng'oluyombo terunnatandika.

¹⁵ Eyejeeereza omukozi w'ebibi n'oyo avumirira omutuukirivu, bombi ba muzizo eri MUKAMA.

¹⁶ Omusirusiru agasibwa ki okuba ne ssente ezisasulibwa amagezi, ng'ate ye talina mutima gwegomba magezi?

¹⁷ Omukwano ogw'amagezi guba gwa lubeerera, era owooluganda yeesigibwa mu biro eby'ennaku.

¹⁸ Omuntu atalina magezi awa obweyamo ne yeetema okusasula amabanja ga muliraanwa we.

¹⁹ Oyo ayagala ekibi anyumirwa ennyombo, n'oyo akola omulyango omunene ogw'omu maaso gwa bbugwe ye nga guyitiridde obunene gulimuteganya nnyo.

²⁰ Omuntu ow'omutima omubambaavu takulaakulana, n'oyo ow'olulimi olulimba agwa mu katyabaga.

²¹ Omwana omusirusiru aleetera kitaawe obuyinike, kitaawe w'omusirusiru taba na ssanyu.

²² Omutima ogw'essanyu ddagala ddungi, naye omwoyo omunyiikaavu gukozza omubiri.

²³ Omuntu omubi alya enguzi mu kyama, alyoke aziyize amazima okweyoleka.

²⁴ Omuntu omutegeevu, ebirowoozo abissa eri amagezi, naye amaaso g'omusirusiru gasamaalirira ensi gy'ekoma.

²⁵ Omwana omusirusiru buyinike eri kitaawe, era aleeta ennaku eri nnyina eyamuzaala.

²⁶ Si kirungi okuweesa omutuukirivu engassi ey'obwerefere wadde okukuba ab'ekitiibwa embooko olw'obwesimbu bwabwe.

²⁷ Omuntu omwegendereza mu bigambo bye abeera n'okutegeera, n'oyo alina omwoyo omuteefu aba muntu wa magezi.

²⁸ Omusirusiru bw'asirika alowoozebwा okuba n'amugezi, era aba muteggeevu bw'afuga akamwa ke.

Engero 18

Ebigambo by'Abagezi n'Abasirusiru

¹ Eyeggya ku banne aba yeerowoozako yekka, era tawuliriza magezi gamuweebwa.

² Omusirusiru tasanyukira kutegeera, ky'asanyukira kyokka kwe kwogera by'allowooza.

³ Okukola ekibi bwe kujja n'okunyooma kujjirako, era awali okuyisaamu omuntu amaaso wabaawo okunyoomoola.

⁴ Ebigambo by'omu kamwa k'omuntu mazzi ga buziba, naye ensulo ey'amagezi mugga ogukulukuta.

⁵ Si kirungi kuttira mubi ku liiso, oba okusaliriza omutuukirivu.

⁶ Akamwa k'omusirusiru kamuleetera entalo era akamwa ke kamuleetera okukubwa emiggo.

⁷ Akamwa k'omusirusiru ke kamuleetera okuzikirira, era n'emimwa gye mutego eri emmeeme ye.

⁸ Ebigambo by'omuntu ageya biri ng'emmere ewoomerera, bigenda mu bitundu by'omubiri eby'ewala.

⁹ Omuntu omugayaavu mu mirimu gy'akola, waluganda n'oyo azikiriza.

¹⁰ Erinnya lya MUKAMA kigo ky'amaanyi, omutuukirivu addukira omwo n'afuna emirembe.

¹¹ Obugagga bw'omugagga, kye kibuga kye ekiriko bbugwe ow'amaanyi, era mu kulaba kwe, kigo kye ekigumu ekitarinnyika.

¹² Omuntu nga tannagwa, omutima gwe gwegulumiza, naye okwetoowaza kumuweesa ekitiibwa.

¹³ Oyo addamu amangu mu nsonga gy'ateetegerezza, buba busirusiru bwe era buswavu.

¹⁴ Omwoyo gw'omuntu gumuwanirira mu bulwadde, naye emmeeme eyennyise ani ayinza okugigumiikiriza?

¹⁵ Omutima gw'omwegendereza guyiga okumanya, amatu g'omuntu omugezi gawuliriza.

¹⁶ Ekirabo ky'omuntu kimuseguliza, era kimutuusa ne mu maaso g'abeekitiibwa.

¹⁷ Asooka okwewayogerako y'afaanana ng'omutuufu, okutuusa omulala lw'amubuuza ebibuuzo.

¹⁸ Okukuba akalulu kimalawo empaka, era kisalawo eggoye wakati w'abawakana ab'amaanyi.

¹⁹ Kyangu okuwamba ekibuga ekiriko bbugwe ow'amaanyi, okusinga okukomyawo owooluganda anyiize, era ennyombo ziba ng'empagi z'ekigo.

²⁰ Omuntu anakkutanga ebigambo ebiva mu kamwa ke; ebibala ebijjula akamwa ke bye binamukkusanga.

²¹ Olulimi lulina obuyinza okuwa obulamu oba okutta, era n'abo abalwagala balirya ebibala byalwo.

²² Azuula omukazi omulungi ow'okuwassa aba azudde ekirungi, era aganja eri MUKAMA.

²³ Omwavu yeegayirira, naye omugagga addamu na bbogo.

²⁴ Akwana emikwano emingi yeereetera okuzikirira, naye wabaawo ow'omukwano akwagala ennyo okusinga owooluganda.

Engero 19

¹ Omuntu omwavu atambulira mu butuukirivu, asinga akamwa ak'omusirusiru akaweebuula.

² Si kirungi okuba omujjumbize naye nga tolina kumanya, n'okwanguyiriza okukola ekintu kuleetera omuntu okukwata ekkubo ekyamu.

³ Obusirusiru bw'omuntu bwe bwonoona obulamu bwe, kyokka omutima gwe ne gunenya MUKAMA.

- ⁴ Obugagga buleeta emikwano mingi, naye emikwano gy'omwavu gimuddukako.
- ⁵ Omujulizi ow'obulimba talirema kubonerezebwa, era oyo ayogera eby'obulimba taliba na buddukiro.
- ⁶ Bangi banoonya okuganja mu maaso g'omufuzi, era buli muntu aba mukwano gw'oyo agaba ebirabo.
- ⁷ Baganda b'omwavu bona bamwewala, mikwano gye tebaasingewo nnyo okumwewala? Wadde abagoberera ng'abeegayirira, naye tabalaba.
- ⁸ Oyo afuna amagezi ayagala emmeeme ye, n'oyo asanyukira okutegeera, akulaakulana.
- ⁹ Omujulizi ow'obulimba talirema kubonerezebwa, n'oyo ayogera eby'obulimba alizikirira.
- ¹⁰ Omusirusiru tasaana kubeera mu bulamu bwa kwejalabya, kale kiwulikika kitya ng'omuddu afuga abalangira?
- ¹¹ Omuntu omutegeevu alwawo okusunguwala, era kiba kya kitibwa obutafa ku bye bamusobezza.
- ¹² Obusungu bwa kabaka buli ng'okuwuluguma kw'empologoma, naye ekisa kye kiri ng'omusulo ku ssubi.
- ¹³ Omwana omusirusiru aleetera kitaawe okuzikirira, n'omukazi omuyombi ali ng'enkuba etonnya olutata.
- ¹⁴ Ennyumba n'obugagga bisikirwa okuva ku bazadde, naye omukazi omutegeevu ava eri MUKAMA.
- ¹⁵ Obugayaavu buleeta otulo tungi, n'omuntu atakola mirimu alirumwa enjala.
- ¹⁶ Oyo akwata ebiragiro akuma obulamu bwe, naye oyo eyeyisa mu ngeri embi alifa.
- ¹⁷ Oyo akwatirwa omwavu ekisa awola MUKAMA, era MUKAMA alimusasula olw'ekikolwa kye ekyo.
- ¹⁸ Kangavvulanga omwana wo kubanga mu ekyo mulimu essuubi, oleme kumuwaayo mu kuzikirira.
- ¹⁹ Omuntu omukambwe ennyo alisasula ebiriva mu bukambwe bwe, kubanga ne bw'omununula ogusooka era oteekwa okukiddiinjaana.
- ²⁰ Ssangayo omwoyo ku magezi agakuweebwa ne ku kuyigirizibwa, oluvannyuma lwa byonna oliba n'amagezi.
- ²¹ Enteekateeka z'omuntu ziba nnyingi mu mutima gwe; byo ebigendererwa bya MUKAMA bituukirira.

²²Ekintu omuntu kye yeegomba kwe kwagala okutaggwaawo, okuba omwavu kisinga okuba omulimba.

²³Okutya MUKAMA kutuusa mu bulamu; olwo omuntu n'awummula nga mumativu nga tatuukiddwako kabi.

²⁴Omugayaavu annyika omukono gwe mu kibya, n'atagukomyawo nate ku mumwa gwe.

²⁵Kangavvula omunyoomi, abatamanyi bayigire ku ye, buulirira ategeera, ajja kweyongera okutegeera.

²⁶Omwana abba ebya kitaawe n'agobaganya ne nnyina, aleeta obuswavu n'obuyinike.

²⁷Mwana wange konoolekayo okuyigirizibwa, onoowaba okuva ku bigambo by'okumanya.

²⁸Omujulizi omulimba atyoboola ensala ey'amazima, n'akamwa k'ababi, kavaabira ebitali bya butuukirivu.

²⁹Ebbonerezo bitekebwavo kukangavvula banyoomi, n'embooko zaakolebwa lwa migongo gy'abasirusiru.

Engero 20

¹Omwenge mukudaazi, ekitamiiza muleekaanyi, era buli alaga mu kkubo ekyamu olw'ebyo talina magezi.

²Obusungu bwa kabaka buli ng'okuwuluguma kw'empologoma, n'oyo amusunguwaza yeefiiriza bulamu bwe.

³Kya kitibwa omuntu okwewala entalo, naye buli musirusiru ayagala okuyomba.

⁴Omugayaavu talima mu budde butuufu, kyanaavanga anoonya eby'amakungula nga talina kantu.

⁵Ebigendererwa ebiba mu mutima gw'omuntu biba ng'amazzi ag'ebuziba, naye omuntu alina okutegeera alibiggyayo.

⁶Abantu bangi bagamba nti balina okwagala okutaggwaawo, naye ani ayinza okuzuula omuntu omwesigwa?

⁷Omuntu omutuukirivu, atambulira mu bulamu obutaliiko kyakunenyezebwa; ba mukisa abaana be abalimuddira mu bigere.

⁸Kabaka bw'atuula ku ntebe ye ey'obwakabaka ng'asala emisango, amaaso ge gasunsulamu ne gaggyamu ebibi byonna.

⁹ Ani ayinza okugamba nti, "Ntukuzza omutima gwange, ndi mulongoofu era sirina kibi?"

¹⁰ Ebipima obuzito ebitatuuka n'ebigera ebikyamu, byombi bya muzizo eri MUKAMA.

¹¹ Omuvubuka naye amanyibwa olw'ebikolwa bye, obanga birongoofu era nga birungi.

¹² Okutu okuwulira n'eriiso eriraba byombi MUKAMA ye y'abikola.

¹³ Toyagalanga kwebaka oleme kwavuwala, tunula, obeerenga n'ebyokulya bingi.

¹⁴ "Si kirungi, si kirungi," bw'ayogera agula; naye bw'agenda n'alyoka yeenyumiririza mu ky'aguze.

¹⁵ Zaabu n'amayinja ag'omuwendo weebiri, naye emimwa eglyceria eby'amagezi kye ky'omuwendo ekisingako.

¹⁶ Omuntu bw'aleeta ekyambalo kye ne yeeyimiririra gw'atamanyi, kitwalire ddala, na ddala bw'abanga yeeyimiririra omukazi omubambaavu.

¹⁷ Emmere enfune mu bukyamu ewooma mu kulya, naye emufuukira amayinja mu kamwa.

¹⁸ Kola entegeka nga weebuuza ku magezi, bw'oba onoolangirira olutalo sooka weebuuze.

¹⁹ Oyo agenda ng'asaasaanya olugambo abotola ebyama, noolwekyo weewale omuntu ayogerayogera ennyo ebtaliimu.

²⁰ Omuntu akolimira kitaawe oba nnyina, ettabaaza ye erizikizibwa n'asigala mu kizikiza ekikutte ennyo.

²¹ Eby'obusika ebifune ng'ekiseera kyabyo tekinnatuuka, ku nkomerero tebiba na mukisa.

²² Toyogera nti, "Nzija kukusasula olw'ekibi kino!" Lindirira MUKAMA alikuyamba.

²³ Ebipima ebikyamu bya muzizo eri MUKAMA, ne minzaani ez'obulimba tezisanyusa.

²⁴ Amakubo g'omuntu gategekebwia MUKAMA, omuntu ayinza atya okutegeera ekkubo lya MUKAMA?

²⁵ Kyambika eri omuntu okwanguyiriza okwewayama eri MUKAMA, naye oluvannyuma n'afumiitiriza ku bye yeeyamye.

26 Kabaka omugezi asengejja n'aggyamu abakozi b'ebibi, n'ababonereza awatali kusaasira.

27 Etabaaza ya MUKAMA ekebera omwoyo gw'omuntu, n'enoonya mu bitundu eby'omunda ennyo.

28 Okwagala n'obwesigwa bikuma kabaka mu butebenkevu, era obufuzi bwe bunywezebwa na kwagala.

29 Amaanyi kye kitibwa ky'abavubuka, envi kye kitibwa ky'abakadde.

30 Emiggo n'ebiwundu biggyawo ebibi, n'embooko zitereeza ebifo eby'omunda ennyo.

Engero 21

1 Omutima gwa kabaka guli ng'amazzi agakulukutira mu mukono gwa MUKAMA, era agukyusiza gy'ayagala yonna.

2 Buli kkubo lya muntu liba ng'ettuufu mu maaso ge, naye MUKAMA apima omutima.

3 Okukola ebituufu n'ebi'amazima kisanyusa MUKAMA okusinga ssaddaaka.

4 Amaaso ageegulumiza, n'omutima ogw'amalala, ye ttabaaza y'ababi, era ebyo kwonoona.

5 Enteekateeka z'omunyiikivu zivaamu magoba meereere, naye okwanguyiriza okutalina nteekateeka kuvaamu bwavu.

6 Okufuna obugagga n'olulimi olulimba, mpewo buwewo etwalibwa eruuyi n'eruuyi era mutego gwa kufa.

7 Obukambwe bw'ababi bulibamalawo, kubanga bagaana okukola eby'ensonga.

8 Ekkubo ly'abazza emisango liba kyamu, naye ery'abataliiko musango liba golokofu.

9 Okusula ku kasolya k'ennyumba, kisinga okubeera mu nnyumba n'omukazi omuyombi.

10 Emmeeme y'omubi yeegomba okukola ebibi; talaga muliraanwa we kisa n'akatono.

11 Omukudaazi bw'abonerezebwa, atalina magezi agafuna; n'ow'amagezi bw'ayigrizibwa afuna okutegeera.

12 Katonda alaba ebifa mu nnyumba y'omubi, era abakozi b'ebibi abazikkiririza ddala.

¹³ Oyo aziba amatu ge eri okulaajana kw'omwavu, naye alikoowoola nga talina amwanukula.

¹⁴ Ekirabo ekigabire mu kyama kikakkanya obusungu obungi, n'enguzi ebikiddwa mu munagiro eggyawo ekiruyi ekingi.

¹⁵ Ensonga bwe zisalibwa mu bwenkanya, lye ssanyu eri abatuukirivu, naye kiba kyekango eri abakozi b'ebibi.

¹⁶ Omuntu awaba okuva mu kkubo ly'okutegeera, agukira mu bafu.

¹⁷ Aganza eby'amasanyu anaabanga mwavu, n'oyo ayagala omwenge n'amafuta taligaggawala.

¹⁸ Abakozi b'ebibi batuukibwako emitawaana egyligudde ku balungi, n'ekyandituuse ku b'amazima kituuka ku batali beesigwa.

¹⁹ Okubeera mu ddungu, kisinga okubeera n'omukazi omuyombi anyiiganyiiga.

²⁰ Mu nnyumba y'omutuukirivu mubaamu eby'obugagga eby'omuwendo, naye omusirusiru ebibye byonna abyonoona.

²¹ Agoberera obutuukirivu n'ekisa, alibeera n'obulamu obukulaakulana n'ekitibwa.

²² Omuntu ow'amagezi alumba ekibuga eky'abazira nnamige, era n'asesebbulu enfo yaabwe gye beesiga.

²³ Afuga akamwa ke n'olulimi lwe, yeewoonya emitawaana.

²⁴ "Mukudaazi," lye linnya ly'ab'amalala abeeraga, abeetwalira mu kwemanya okw'ekitalo mwe batambulira.

²⁵ Okwetaaga kw'omugayaavu lwe luliba olumbe lwe, kubanga emikono gye tegyagala kukola.

²⁶ Olunaku lwonna aba yeegomba kweyongezaako, naye omutuukirivu agaba awatali kwebalira.

²⁷ Ssaddaaka y'omubi ya muzizo, na ddala bw'agireeta ng'alina ekigendererwa ekitali kirungi.

²⁸ Omujulizi ow'obulimba alizikirira, naye ekigambo ky'oyo ayogera eby'amazima kiribeerera emirembe gyonna.

²⁹ Omuntu omubi yiekazaakaza, naye omuntu ow'amazima yeegendereza amakubo ge.

³⁰ Tewali magezi, newaakubadde okutegeera, wadde ebiteeso ebiyinza okulemesa MUKAMA.

³¹ Embalaasi etegekerwa olunaku olw'olutalo, naye obuwanguzi buva eri MUKAMA.

Engero 22

Omugaso gw'Erinnya Eddungi

¹ Erinnya eddungi lyagalibwa okusinga eby'obugagga ebingi, n'okuganja kusinga ffeeza oba zaabu.

² Abagagga n'abaavu balina kimu ekibagatta, MUKAMA ye Mutonzi waabwe bona.

³ Omuntu omutegeevu bw'alaba akabi yeekweka, naye abatalina magezi bagenda bugenzi mu maaso ne balumizibwa.

⁴ Obugagga n'ekitiibwa n'obulamu y'empeera ey'okwetoowazanga n'okutyanga MUKAMA.

⁵ Amaggwa n'emitego biri mu kkubo ly'omubambaavu; naye oyo akuumma emmeeeme ye anaabyewalanga.

⁶ Manyiiriza omwana mu kkubo erimugwanira okutambulirangamu, ne bw'alikula talirivaamu.

⁷ Omugagga afuga abaavu, naye eyewola aba muddu w'oyo amuwola.

⁸ Asiga obutali butuukirivu akungula mitawaana, n'oluga olw'obusungu bwe lulizikirizibwa.

⁹ Omuntu omugabi anaabanga n'omukisa, kubanga emmere ye agirya n'abaavu.

¹⁰ Goba omunyoomi, entalo zinaagenda, ennyombo n'okuvumagana binaakoma.

¹¹ Omuntu eyeegomba omutima omulongoofu era ayogera n'eggonjebwa, talirema kuganja ewa kabaka.

¹² Amaaso ga MUKAMA galabirira amazima, era adibya entegeka z'abatali beesigwa.

¹³ Omugayaavu ayogera nti, "Ebweru eriyo empologoma," oba nti, "Nnyinza okutemulirwa mu kkubo."

¹⁴ Malaaya mutego gwa kabi, akolimiddwa MUKAMA mw'afiira.

¹⁵ Obusirusiru busibiddwa ku mutima gw'omwana omuto, naye omuggo ogukangavvula gulimuwyonyeza ddala.

¹⁶ Omuntu atulugunya abaavu ne yeeyongera okugaggawala, n'oyo agabira omugagga awa abagagga enguzi, enkomerero ya bombi bwavu.

¹⁷ Ossangayo omwoyo okuwuliriza ebigambo by'omugezi, n'omutima gwo eri ebyo bye njigiriza.

¹⁸ Kibeera kya ssanyu bw'obikwata ku mutima gwo, n'oba mwetegefu okubiddamu byonna.

¹⁹ Mbikumanyisa leero ggwe, obwesige bwo bubeerenga mu MUKAMA.

²⁰ Kale sikuwandiikidde ebintu amakumi asatu ebikuwabula era ebikuwa okumanya?

²¹ Sikulaze ekirungi n'ekituufu, olyoke obe n'eky'okuddamu eri oyo eyakutuma?

²² Tonyaganga mwavu, kubanga mwavu, oba okutulugunyanga aleeteddwa mu mbuga.

²³ Kubanga MUKAMA alibawolereza, n'abo ababanyaga alibanyaga.

²⁴ Tokwananga muntu wa busungu, oba okuyitanga n'omuntu anyiiganyiiga amangu,

²⁵ oleme okuyiga amakubo ge ne weesuula mu mitawaana.

²⁶ Teweegattanga ku abo abeeyama, newaakubadde ku abo abeeyimirira ab'amabanja.

²⁷ Bw'olibo nga tolina kya kusasula ekitanda kyo kyennyini kye kirikuggyibwako.

²⁸ Tojjululanga nsalo bajjajjaabo gye bassaawo edda.

²⁹ Omanyi omuntu omunyiikivu era omukugu mu mulimu gwe? Aliweereza bakabaka; taliweereza bantu batamanyiddwa.

Engero 23

¹ Bw'otuulanga okulya n'omufuzi, weetegerezanga ebiri mu maaso go;

² era weegendereze bw'obanga omanyi ng'olulunkanira ebyokulya.

³ Tolulunkanira mmere ye ennungi, kubanga erimbalimba.

⁴ Teweemalangako mirembe ng'oyaayaanira obugagga; weefuge obeere mukkakkamu.

⁵ Eby'obugagga obikubako eriiso limu nga by'agenze dda, kubanga ddala bimera ebiwaawaatiro ne bibuuka mu bbanga ng'empungu.

⁶ Tolyanga mmere ya muntu mukodo, wadde okwegomba ebirungi by'alya.

⁷ Kubanga ye muntu abalirira ensimbi z'asaasaanyizza, n'akugamba nti, "Weeriire, weenywere," naye ng'omutima gwe tegukusanyukira.

- ⁸Akatono k'onooba olidde onookasesema, ebigambo byo ebirungi eby'okwebaza bibe bya bwereere.
- ⁹Totegana kubuulirira musirusiru, kubanga ajja kunyooma ebigambo byo eby'amagezi.
- ¹⁰Tojjululanga nsalo ey'edda, so toyingiriranga nnimiro za bamulekwa,
- ¹¹kubanga abalwanirira w'amaanyi, alikuggulako omusango.
- ¹²Ossangayo omwoyo eri okuyigirizibwa, n'amatu go eri ebigambo by'okutegeera.
- ¹³Tolekangayo kukangavvula mwana, bw'omubonereza n'akaggo tekimutta.
- ¹⁴Mubonerezenga n'akaggo, kiwonye emmeeme ye okufa.
- ¹⁵Mwana wange, bw'oba n'omutima ogw'amagezi, kinsanyusa.
- ¹⁶Nnaajjaguzanga okuva ku ntobo y'omutima gwange, bw'onooyogeranga ebituufu.
- ¹⁷Omutima gwo gulemenga okukwatirwa aboonoonyi obuggyga, kyokka nyikira okutya MUKAMA ebbanga lyonna.
- ¹⁸Mazima ddala onoobanga n'essuubi mu biseera eby'omu maaso, n'essuubi lyo eryo teririggwaawo.
- ¹⁹Mwana wange wulirizanga, obeerenga n'amagezi, okumenga omutima gwo mu kkubo ettuufu.
- ²⁰Teweegattanga ku abo abeekamirira omwenge, n'abalulunkanira ennyama:
- ²¹Kubanga omutamiivu n'omuluvu baavuwala, n'okubongoota olutata kubambaza enziina.
- ²²Wulirizanga kitaawo eyakuzaala, so togayanga nnyoko ng'akaddiye.
- ²³Gula amazima so togatunda, ffuna amagezi, n'okuyigirizibwa n'okutegeera.
- ²⁴Kitaaawe w'omutuukirivu alina essanyu lingi, n'oyo azaala omwana ow'amagezi amwenyumiirizaamu.
- ²⁵Leka kitaawo ne nnyoko basanyuke, omukazi eyakuzaala ajaguzenga.
- ²⁶Mwana wange mpa omutima gwo, n'amaaso go geekalirize amakubo gange,
- ²⁷kubanga omukazi omwenzi lukonko luwanvu, n'omukazi omubambaavu luzzi lufunda.
- ²⁸Ateeega ng'omutemu, n'ayongera ku muwendo gw'abasajja abatali beesigwa eri bakazi baabwe.

²⁹Ani alina obuyinike? Ani alina ennaku? Ani alina ennyombo? Ani alina okwemulugunya? Ani alina ebiwundu eby'obwerefere? Ani amyuse amaaso?

³⁰Abo abatava ku mwenge, nga bagenda baloza ku mwenge omutabule.

³¹Totunuulira wayini ng'amyuse, bw'atemaganira mu ggiraasi ng'akka empolampola;

³²ku nkomerero alumna ng'omusota, wa busagwa ng'essalambwa.

³³Amaaso go galiraba ebyewuunyo, n'omutwe gwo ne gulowooza ebitategeerekeka.

³⁴Oliba ng'omuntu eyeebase wakati mu nnyanja, obanga oyo alengejjerwa waggulu ku mulongooti.

³⁵Olyogera nti, "Bankubye, naye sirumiddwa. Bankubye naye sirina kye mpuliddemu. Nnaazuukuka ddi, neeyongere okunywa?"

Engero 24

¹Teweegombanga bakozi ba bibi era tobeesemberezanga.

²Kubanga emitima gyabwe giteesa kukola bya butemu, era akamwa kaabwe koograha ku kukola bya ffujjo.

³Amagezi ge gazimba ennyumba, n'okutegeera kwe kugiggumiza.

⁴Olw'amagezi ebisenge by'ayo bijjula ebintu ebirungi, eby'obugagga ebitabalikalabika eby'omuwendo omungi.

⁵Omuntu ow'amagezi aba n'obuyinza, n'omuntu alina okumanya yeeyongera amaanyi.

⁶Kubanga okulwana olatalo weetaaga okuluŋŋamizibwa, n'okuluwangula, weetaaga abawi b'amagezi bangi.

⁷Amagezi gasukkirira nnyo omusirusiru, talina ky'asobola kwogera mu lukuŋŋaana olw'oku wankaaki.

⁸Oyo asala enkwe ez'okukola ebibi, aliyitibwa mukujukuju.

⁹Entegeka ez'obusirusiru muvaamu kwonoona, abantu beetamwa omukudaazi.

¹⁰Bw'oyongobera mu kiseera eky'ebizibu, olwo ng'olina amaanyi matono!

¹¹Odduukiriranga n'owonya abo abatwalibwa okuttibwa, n'abo abali ku njegoyego z'okuttibwa, obawonye okuttirwa obwemage.

¹²Bw'ogambanga nti, "Laba kino twali tetukimanyi," oyo akebera emitima aba talaba? Oyo akuma obulamu bwo takimanyi? Talisasula buli muntu ng'omulimu gwe bwe guli?

¹³Mwana wange olyanga omubisi gw'enjuki kubanga mulungi, omubisi oguva mu bisenge byagwo guwoomerera.

¹⁴Era manya nti amagezi gawoomera emmeeme yo, bw'onoogafuna onoobeera n'essuubi mu bulamu obw'omu maaso, n'essuubi lyo terikoma.

¹⁵Toteeganga, ng'omunyazi bw'akola ku nnyumba y'omutuukirivu, tonyaganga maka ge.

¹⁶Omuntu omutuukirivu ne bw'agwa emirundi omusanvu, addamu n'ayimuka, naye abakozi b'ebibi basuulibwa mu mitawaana.

¹⁷Tosanyukanga ng'omulabe wo agudde, bwe yeesittalanga omutima gwo gulemenga okujaguza.

¹⁸Si kulwa nga MUKAMA akiraba ne kitamusanyusa, n'amusunguwalira.

¹⁹Teweeraliikiriranga olw'abo abakola ebibi, so abakozi b'ebibi tobakwatirwanga buggyaa.

²⁰Kubanga omuntu omubi talina ssuubi mu maaso, ettabaaza y'abakozi b'ebibi erizikizibwa.

²¹Mwana wange otyanga MUKAMA, ne kabaka, era teweetabanga na bajeemu.

²²Kubanga obusungu bwabwe bulibuubuukira ku bajeemu era ani amaanyi akabi akalibatuukako?

Ebigambo Eby'amagezi

²³Bino nabyo era bigambo by'abalina amagezi. Okwekubiira ng'osala emisango si kirungi.

²⁴Kale oyo agamba azizza omusango nti, "Toliiko ky'ovunaanibwa," abantu banaamukolimiranga, n'amawanga ganaamwetamwanga.

²⁵Naye abo abasalira omusobya omusango ne gumusinga banaabanga n'essanyu, n'omukisa omulungi gulibatuukako.

²⁶Eky'okuddamu eky'amazima, kiri ng'okunywegerwa.

²⁷Malirizanga omulimu gwo ogw'ebweru, oteeketekee ennimiro zo, n'olvannyuma olyoke weezimbire ennyumba yo.

²⁸Towanga bujulizi bwa bulimba ku muliraanwa wo, so akamwa ko tekalimbanga.

²⁹Toyogeranga nti, "Omuntu oyo ndimukola nga bw'ankoze, era ndimusasuza nga bw'ampisizza."

³⁰Nayita ku nnimiro ey'omugayaavu, ne mpita ne ku nnimiro y'emizabbibu ey'oyo atalina kutegeera.

³¹Kale laba, ng'ennimiro eyo ebunye amaggwa, wansi wonna nga wabikkiddwa omuddo, n'olukomera lwayo olw'amayinja nga lugudde.

³²Ne neekaliriza ne ntegeera ne nfunu ekyokuyiga mu bye nalaba.

³³Otulo otutonotono, n'okusumagira akatono, n'okufunya emikono okuwummulako,

³⁴obwavu bulikutuukako ng'omutemu, era n'obwetaavu ng'omutemu.

Engero 25

Engero Endala Eza Sulemaani

¹Zino nazo ngero za Sulemaani abasajja ba Keezeekiya kabaka wa Yuda ze baakoppolola.

²Okukisa ensonga kitibwa kya Katonda, naye okunoonyereza ensonga kitibwa kya bakabaka.

³Ng'eggulu bwe lyewanise waggulu ennyo n'ensi bw'ekka ennyo wansi, bwe gityo n'emitima gya bakabaka bwe gitategeerekeka.

⁴Efeeza giggyeemu ebisejja, olyoke ofune omuweesi ky'anaakozesa.

⁵Ggyawo abakozi b'ebibi mu maaso ga kabaka, entebe ye ey'obwakabaka eryoke enywezebw mu butuukirivu.

⁶Teweekuzanga mu maaso ga kabaka, wadde okwewa ekifo mu bantu ab'ekitiibwa.

⁷Kubanga okukugamba nti, "Jjangu wano mu maaso," kisingako okukuswaza mu maaso g'ow'ekitiibwa.

⁸Amaaso go bye galabye tobyanguyirizanga kubireeta mu mbuga, kubanga oluvannyuma onookola otya munno bw'anaakuswaza?

⁹Bw'owozanga ne muliraanwa wo, tobikkulanga kyama kya muntu mulala,

¹⁰akiwulira aleme okukuswaza; n'onyoomebw ebbanga lyonna.

¹¹Ekigambo ekyogere nga bwe kisaanidde, kiba kya muwendo nnyo nga zaabu gwe batonye mu bintu bye bakoze mu ffeeza.

¹²Ng'empeta ey'omu kutu eya zaabu, oba akakomo aka zaabu ennungi, bw'atyo omuntu ow'amagezi ananya, bw'abeera eri okutu okuwuliriza.

¹³Ng'obunnyogovu bw'omuzira bwe bubeera mu biseera eby'okukunguliram, bw'atyo bw'abeera omubaka omwesigwa eri abo abamutuma, aweweza emmeeeme ya bakama be.

¹⁴Ng'ebire n'empewo omutali nkuba, omuntuasuubiza ebirabo by'atagaba bw'abeera.

Muliraanwa n'Omulabe

¹⁵Okugumiikiriza okungi kuyinza okukkirizisa omufuzi, n'olulimi olw'eggonjebwa lumenya eggumba.

¹⁶Bw'ozuula omubisi gw'enjuki, lyako ogwo gwokka ogukumala, si kulwa ng'ogukkuta nnyo n'ogusesema.

¹⁷Tokyalanga lunye ewa muliraanwa wo, si kulwa ng'akwetamwa n'akuwyawa.

¹⁸Omuntu awa obujulizi obw'obulimba ku muliraanwa we, ali ng'embuukuuli, oba ekitala, oba akasaale akoogi.

¹⁹Okwesiga omuntu ateesigika, kiri ng'oli alina erinnyo eddwadde oba ekigere ekirema.

²⁰Ng'omuntu eyeeyambula engoye mu kiseera eky'obutiti, era ng'omwenge omukaatuufu bwe guteekewako oluvu, bw'atyo bw'abeera ayimbira oyo ali mu buyinike.

²¹Omulabe wo bw'aba alumwa enjala, muwe emmere alye, bw'aba alumwa ennyonta muwe amazzi anywe.

²²Kubanga oliba otuma amanda g'omuliro ku mutwe gwe, era MUKAMA alikuwa empeera.

²³Ng'empewo ey'obukiakkono bwereeta enkuba, n'olulimi oluyomba bwe luleetera omuntu obusungu.

²⁴Okusulanga mu kasonda waggulu ku nnyumba, kisinga okubeera n'omukazi omuyombi mu nnyumba.

²⁵Ng'amazzi amannyogovu bwe gaba eri emmeeme erumwa ennyonta, bwe gatyo bwe gaba amawulire amalungi agava mu nsi ey'ewala.

²⁶Ng'oluzzi olusiikuuse, oba ensulo eyoononese, bw'atyo bw'abeera omutuukirivu eyeewaayo eri omukozi w'ebibi.

²⁷Si kirungi kulya mubisi gwa njuki mungi, bwe kityo si kirungi omuntu okwenoonyeza ekitiibwa.

²⁸Omuntu ateefuga ali ng'ekibuga ekimenyeemenye ne kirekebwa nga tekirina bbugwe.

Engero 26

Omusirusiru n'Obusirusiru bwe

- ¹ Ng'omuzira bwe gutasaana mu biseera bya kusiga oba enkuba mu makungula, n'ekitiibwa bwe kitasaanira musirusiru.
- ² Ng'enkazaluggya ewabye, ng'akataayi akabuukabuuka, ekikolimo ekitasaanidde tekibaako kye kikola.
- ³ Embooko ya mbalaasi, n'olukoba lwa ndogoyi, n'omuggo gusaanira migongo gya basirusirusiru.
- ⁴ Toyanukulanga musirusiru ng'obusirusiru bwe, bwe buli, oleme kubeera nga ye.
- ⁵ Omusirusiru omuddangamu ng'obusirusiru bwe, bwe buli, si kulwa nga yeerowooza nti mugezi.
- ⁶ Omuntu atuma omusirusiru, aba ng'eyeetemyeko ebigure n'anywa obusungu.
- ⁷ Ng'amagulu g'omulema bwe galengejja obulengezzi, bwe lutyo n'olugero bwe lubeera mu kamwa k'omusirusiru.
- ⁸ Ng'atadde ejinja mu nvuumuulo bw'aba, n'oyo awa omusirusiru ekitiibwa bw'atyo bw'abeera.
- ⁹ Ng'eriggwa bwe lifumita mu mukono gw'omutamiivu, bwe lutyo n'olugero bwe lubeera mu kamwa k'abasirusiru.
- ¹⁰ Ng'omulasi w'akasaale, amala galasa buli gw'asanze, bw'abeera bw'atyo apangisa omusirusiru oba omuyise yenna gw'asanze.
- ¹¹ Ng'embwa bw'eddira ebisesemye by'ayo, bw'atyo bw'abeera omusirusiru adda mu nsobi ze.
- ¹² Olaba omuntu omugezi mu maaso ge ye? Omusirusiru alina essuubi okumusinga.
- ¹³ Omugayaavu agamba nti, "Mu kkubo eriyo empologoma, empologoma enkambwe eyita mu luguudo!"
- ¹⁴ Ng'oluggi bwe lukyukira ku ppata zaalwo, bw'atyo omugayaavu bw'akyukira ku kitanda kye.
- ¹⁵ Omugayaavu akoza n'engalo ze mu kibya, naye olw'obunafu bwe n'atasobola kuzizza mu kamwa.
- ¹⁶ Omugayaavu alowooza nti mugezi, okusinga abantu omusanvu abaddamu ebibuuzo mu butuufu.
- ¹⁷ Ng'asika embwa amatu, omuyise bw'abeera eyeyingiza mu luyombo olutali lulwe.
- ¹⁸ Ng'omulalu akasuka emmuli ez'omuliro oba obusaale obutta,

- ¹⁹bw'abeera omuntu alimba munne, n'agamba nti, "Mbadde nsaaga busaazi."
- ²⁰Enku bwe zibula omuliro guzikira, awatali lugambo ennyombo ziggwaawo.
- ²¹Ng'amanda ku gannaago agaliko omuliro, oba enku ku muliro, bw'abeera omusaja omuyombi mu kuwakula entalo.
- ²²Ebigambo by'omuntu ageya biri ng'emmere ewoomerera, bigenda mu bitundu by'omubiri eby'ewala.
- ²³Ng'ekintu eky'ebbumba ekibikkiddwako amasengere, bwe gibeera emimwa eminyikivu egisibuka ku mutima omubi.
- ²⁴Omuntu ow'enkwe alimbalimba n'emimwa gye naye ng'aterese obulimba mu mutima gwe.
- ²⁵Wadde nga by'ayogera bisanyusa, tomukkiririzaamu kubanga eby'emizizo musanvu bijjuza mu mutima gwe.
- ²⁶Enkwe ze ziyanza okubikkibwa mu kubuzaabuuza, naye obutali butuukirivu bwe buliggyibwayo mu lukanjaana.
- ²⁷Buli asima ekinnya y'alikigwamu, n'oyo aliyiringisa ejinja gwe liriddira.
- ²⁸Olulimi olulimba lukyawa abo be lufumita, n'akamwa akawaanawaana kaleeta okuzikirira.

Engero 27

Amagezi aga Leero n'Ebisera eby'omu mu Maaso

- ¹Tweeneyumirizanga mu bya nkya, kubanga olunaku bye lunaaleeta tobimanyi.
- ²Leka omulala akutenderezenga so si kamwa ko ggwe, omuntu omulala so si mimwa gyo.
- ³Ejinja lizitowa, n'omusenyu muzito, naye obulumbaganyi bw'omusirusiru businga byonna okuzitowa.
- ⁴Obusungu bwa ttima, n'ekiruyi kifugira ddala nnyo, naye ani ayinza okwolekera amaaso g'obuggy?
- ⁵Okunenya mu lwatu, kisinga okwagala okukisibba.
- ⁶Okunywegera kw'omulabe kwandiba okungi, naye ebiwundu by'okunenya kw'woomukwano tebitiisa.
- ⁷Oyo akkuse akyawa omubisi gw'enjuki, naye eri omuyala n'ekikaawa kiba kiwoomerera.
- ⁸Ng'akanyonyi akadduka mu kisu kyako, bw'atyo bw'abeera omuntu abula mu maka ge.

⁹ Ebyakaloosa bisanyusa omutima, n'obuwoomerevu bw'omukwano gw'omuntu bwe butyo bwe buvaamu okubuulirira okw'amazima.

¹⁰ Mukwano gwo ne mukwano gwa kitaawo tobaabuuliranga, olemenga okutawaana okuswala ewa muganda wo ng'ogudde mu mitawaana. Muliraanwa wo akira muganda wo akuli ewala.

¹¹ Beeranga n'amagezi mwana wange, osanyusenga omutima gwange, ndyoke nyanukule oyo yenna ansekerera.

¹² Omuntu omutegeevu alaba akabenje ne yeekweka, naye abatalina magezi batambula butambuzi ne bagwa mu kabi.

¹³ Twalanga ekyambalo ky'oyo eyeyimirira gw'atamanyi, era kwatanga eky'oyo eyeyimirira omukazi omwenzi kye yeeyamye.

¹⁴ Okulamuska ku muliraanwa wo mu makya ennyo, ng'oleekaana, obanga amukolimidde.

¹⁵ Omukazi omuyombi ali ng'enkuba etonnya olutata, ku lunaku olw'enkuba ennyingi.

¹⁶ Okumuziyiza obanga aziyiza empewo oba ng'anyweza omuzigo mu ngalo.

¹⁷ Ng'ekyuma bwe kiwagala ekyuma, n'omuntu bw'abangula muntu munne.

¹⁸ Buli alabirira omutiini alirya ku bibala byagwo, n'oyo aweereza mukama we alissibwamu ekitiibwa.

¹⁹ Ng'amazzi bwe galaga omuntu bw'afaanana mu maaso, bwe gutyo omutima gw'omuntu bwe gulaga omuntu bw'afaanana.

²⁰ Amagombe ne ggeyeena tebikkuta, n'amaaso g'abantu nago bwe gatyo tegakkuta.

²¹ Entamu erongoosa ya ffeeza n'ekikoomi kikola ku zaabu, naye omuntu ekimugezesza kutenderezebwa.

²² Ne bw'osekula omusirusiru mu kinu, nga bw'osekula emmere y'empeke mu kinu, obusirusiru bwe tobumuggyam.

²³ Okakasanga nti omanyi bulungi embeera z'ekisibo kyo, ossangayo omwoyo ku ggana lyo.

²⁴ Kubanga eby'obugagga tebibeerera mirembe gyonna, n'engule tebeerera mirembe gyonna.

²⁵ Ng'omuddo gw'ensolo omukulu gumaze okusalibwawo, ng'omutoototo gutandise okusibukawo, nga n'omuddo ogw'omu busozi guleeteddwa,

²⁶abaana b'endiga balikuwa engoye ez'okwambala, n'embuzi ziritundibwa ne zivaamu ensimbi.

²⁷Olibeera n'amata mangi g'onoggyanga mu mbuzi, okukuliisa ggwe n'ab'omu nnyumba yo, n'okuliisa abaweereza bo abawala.

Engero 28

¹Abakozi b'ebibi badduka nga tewali abagoba, naye abatuukirivu babeera n'obuvumu ng'empologoma.

²Eggwanga bwe lijeema, liba n'abafuzi bangi, naye olw'omuntu alina okutegeera n'okumanya obutebenkevu budda nate mu nsi.

³Omufuzi anyigiriza abaavu, afaanana nga enkuba etonnya ezikiriza n'eterekaawo birime.

⁴Abo abava ku mateeka ga MUKAMA batendereza aboonoonyi, naye abo abagakuma babawakanya.

⁵abantu abakozi b'ebibi tebategeera bwenkanya, naye abo abanoonya MUKAMA babutegeerera ddala bulungi.

⁶Omuntu omwavu atambulira mu butuukirivu, asinga omugagga ow'amakubo amakyamu.

⁷Oyo akuumma amateeka ga MUKAMA mwana eyeegendereza, naye mukwano gw'ab'omululu akwasa kitaawe ensonyi.

⁸Ayongera ku bugagga bwe mu bukumpanya, abukuŋyaanyiza omulala anaayinza okuba ow'ekisa eri abaavu.

⁹Atassaayo mwoyo kuwulira mateeka ga MUKAMA, n'okusaba kwe tekukkirizibwa.

¹⁰Buli akyamya abatuukirivu mu kkubo ebbi, aligwa mu katego ke ye, naye abatuukirivu balisikira ebirungi.

¹¹Omugagga alowooza nti mugezi, naye omwavu alina okutegeera, amunyooma.

¹²Abatuukirivu bwe bawangula wabaawo okujaguza okw'amaanyi, naye abakakanyalira mu kukola ebikyamu bwe bafuna obuyinza abantu beekweka.

¹³Oyo akweka ebibi bye, talifuna mukisa kukulaakulana, naye buli abyatula n'abireka, alisaasirwa.

¹⁴Alina omukisa omuntu atya MUKAMA ebbanga lyonna, naye oyo akakanyaza omutima gwe abonaabona.

¹⁵Ng'empologoma ewuluguma oba eddubu eritiisatiisa, bw'abeera omufuzi omubi atulugunya abateesobola.

¹⁶Omufuzi nantagambwako tafuga na bwenkanya, naye oyo akyawa amagoba agafuniddwa mu bukyamu alibeera n'essanyu ery'obulamu obuwangaazi.

¹⁷ Omuntu alumirizibwa olw'okutta munne, alibeera mu kutegana okutuusa okufa, tewabanga n'omu amuyamba.

¹⁸ Omuntu atambulira mu bugolokofu alinunulibwa talibeerako kabi, naye oyo ow'amakubo amabi aligwa mbagirawo.

¹⁹ Omuntu alima ennimiro ye aliba n'emmere nnyingi, naye oyo ali mu birowoozo ebitaliimu alifa bwavu.

²⁰ Omusajja omwesigwa aliweebwa emikisa mingi, naye oyo ayanguyiriza okugaggawala talirema kubonerezebwa.

²¹ Okuttira abantu ku liiso ng'osala emisango si kirungi, naye ate olw'okunoonya akokulya omuntu ayinza okuzza omusango.

²² Omusajja omukodo yeegomba okugaggawala, naye nga tamanyi nti obwavu bumulindiridde.

²³ Oyo anenya omuntu, oluvannyuma aliganja, okusinga oyo awaaniriza n'olulimi.

²⁴ Buli anyaga kitaawe, oba nnyina, n'agamba nti, "Si nsonga," afaanana n'oyo azikiriza.

²⁵ Omuntu ow'omululu aleeta oluyombo, naye oyo eyeesiga MUKAMA aligaggawazibwa.

²⁶ Eyeesiga omutima gwe, musirusiru, naye oyo atambulira mu magezi alifuna emirembe.

²⁷ Agabira abaavu talibaako ne kye yeetaaga, naye abakodowalira anaabanga n'ebikolimo bingi.

²⁸ Abakozi b'ebibi bwe babeera mu buyinza, abantu beekweka, naye abakozi b'ebibi bwe bazikirira, abatuukirivu bakulaakulana.

Engero 29

Obukulembeze bw'Abatuukirivu

¹ Omuntu akakanyaza omutima gwe oluvannyuma lw'okunenyezebwa emirundi emingi, alizikirira ng'atamanyiridde awatali kuwona.

² Abatuukirivu bwe bakulaakulana, abantu basanyuka, naye abakakanyalira mu kukola ebikyamu bwe bafuga abantu babeera mu kusinda.

³ Ayagala amagezi asanyusa kitaawe, naye munne w'abamalaaya ayiwaayiwa obugagga bwe.

- ⁴ Kabaka afuga n'obwenkanya, abantu be baba mu butebenkevu, naye oyo alulunkanira enguzi, ensi agyonoona.
- ⁵ Omuntu awaanawaana munne, aba yeetega yekka ekitimba.
- ⁶ Ebibi by'omwonoonyi bye bimutega, naye omutuukirivu abeera mu kuyimba na kusanyuka.
- ⁷ Omuntu ukirivu afaayo ku nsonga z'abaavu, naye abakozi b'ebibi tebakola bwe batyo.
- ⁸ Abakudaazi basasamaza ekibuga, naye abantu abalina amagezi baziyiza entalo.
- ⁹ Omuntu ow'amagezi bw'awoza n'omusirusiru, omusirusiru ayongera kusunguwala, n'okujerega ne wataba mirembe.
- ¹⁰ Abeegomba okuyiwa omusaayi bakyawa omuntu ow'amazima, era banoonya okusaanyaawo obulamu bwe.
- ¹¹ Omusirusiru alaga obusungu bwe bwonna, naye omuntu ow'amagezi abuziyiza n'abukkakkanya.
- ¹² Omufuzi bw'awuliriza eby'obulimba, abakungu be bona bafuuka babi.
- ¹³ Omwavu n'oyo amubonyaabonya balina ekibagatta: MUKAMA bombi ye yabawa amaaso.
- ¹⁴ Kabaka bw'asalira abaavu emisango n'obwesigwa, obufuzi bwe bubeerera emirembe gyonna.
- ¹⁵ Akaggo akakangavvula, kaleeta amagezi, naye omwana alekeddwa awo, aswaza nnyina.
- ¹⁶ Abakozi b'ebibi bwe beeyongera obungi, okumenya amateeka kweyongera, naye abatuukirivu baliraba okugwa kwabwe.
- ¹⁷ Kangavvula omwana wo, alikuwa emirembe, alireetera emmeeme yo essanyu.
- ¹⁸ Awatali kwolesebwa abantu tebaba beegendereza, naye wa mukisa oyo akuumma amateeka ga MUKAMA.
- ¹⁹ Omuweereza tayinza kubuulirirwa na bigambo byokka; ne bw'aba ategedde tafaayo.
- ²⁰ Olaba omuntu ayanguiriza ebigambo bye? Omusirusiru alina essuubi okumusinga.
- ²¹ Atiitiibya omuweereza we ekiyitiridde ng'akyali mwana muto, oluvannyuma omuweereza aleetera mukama we obuyinike.
- ²² Omuntu ow'obusungu aleeta ennyombo, n'omuntu asunguwala amangu ayonoona nnyo.

²³ Amalala g'omuntu galimuleetera okugwa, naye omuntu ow'omwoyo ogwetoowaza alifuna ekitiibwa.

²⁴ Buli assa ekimu n'omubbi akyawa obulamu bwe ye, era ne bw'alayizibwa tasaanira kubaako ky'ayogera.

²⁵ Okutya omuntu kuleeta ekyambika, naye buli eyeesiga MUKAMA anaabanga mirembe.

²⁶ Bangi abanoonya okuganja mu maaso g'omufuzi, naye obwenkanya obwa nnama ddala buva eri MUKAMA.

²⁷ Atali mutuukirivu wa muzizo eri abatuukirivu; era omwesimbu wa muzizo eri abakozzi b'ebibi.

Engero 30

Ebigambo ba Aguli

¹ Bino bye bigambo bya Aguli mutabani wa Yake; obubaka bwe yawa bwe bunno: Bw'ati omusajja ono bwe yagamba Isiyeri, Isyeri ono ne Ukali.

² Ddala Ayi Katonda wange nze nsinga obutategeera, sirina kutegeera kwa bantu.

³ Siyize magezi, so n'oyo Omutukuvu simumanyi.

⁴ Ani eyali alinnye mu ggulu n'akka? Ani eyali akujjaanyiza empewo mu kibatu ky'engalo ze? Ani eyali asibye amazzi mu kyambalo kye? Ani eyatonda enkomerero zonna ez'ensi? Erinnya lye y'ani, ne mutabani we y'ani? Mbulira obanga obimanyi.

⁵ Buli kigambo kya Katonda kya mazima, era aba ngabo eri abo abamwesiga.

⁶ Toyongeranga ku bigambo bye, alemenga okukunenya naawe olabike ng'omulimba.

⁷ Ebintu bibiri bye nkusaba; Ayi MUKAMA, tobinnymanga nga sinnafa:

⁸ Ebigambo eby'obutaliimu n'ebi'obulimba binteeke wala, ate era tonjavuwazanga wadde okungaggawaza, naye ndiisanga emmere eya buli lunaku.

⁹ Nneme okukkutanga ne nkwegaanne ne njogera nti, "MUKAMA ye y'ani?" Era nnemenga okuba omwavu ne nziba, ne nvumisa erinnya lya Katonda wange.

¹⁰ Tosekeetereranga muweereza eri mukama we, alemenga okukukolimira, naawe omusango ne gukusinga.

¹¹ Waliwo abo abakolimira bakitaabwe ne batasabira na bannyaabwe mukisa;

¹² abo abeeraba ng'abatuukirivu bo mu maaso gaabwe, ate nga tebanaazibwangako bibi byabwe.

¹³ Waliwo abo ab'amalala amayitirivu, abatunuza okw'ekitalo,

¹⁴ n'ebeerayo abo abalina amannya agali ng'ebitala, n'emba zaabwe nga zirimu ebiso, okusaanyaawo abaavu mu nsi, n'abo abali mu kwetaaga.

¹⁵ Ekinoso kirina bawala baakyo babiri abaleekaana nti, "Mpa! mpa!" Waliwo ebintu bisatu ebitakkuta, weewaawo bina ebitagamba nti, "Matidde,"

¹⁶ Amagombe, olubuto olugumba, ettaka eritakutta mazzi, n'omuliro ogutayogera nti, "Ebyo binaamala!"

¹⁷ Eriiso ly'oyo anyooma kitaawe, era n'atagondera nnyina, liriggibwamu bannamuŋŋoona ab'omu kiwonvu, ne liriibwa ensegga.

¹⁸ Waliwo ebigambo bisatu eby'ekitalo ennyo gye ndi, weewaawo bina bye sitegeera:

¹⁹ Empungu engeri gye yeeyisaamu mu bbanga, n'omusota engeri gye gwewalulamu wakati mu mayinja, n'ekyombo gye kiseeyeyeeyamu ku nnyanja, n'engeri omusajja gye yeeyisaamu ng'ali n'embeerera.

²⁰ Bw'ati bwe yeeyisa omukazi omwenzi: alya n'asimuula emimwa gye n'agamba nti, "Sirina kibi kye nkoze."

²¹ Ensi ekankanira wansi w'ebintu bisatu weewaawo bina:

²² omuweereza bw'afuuka kabaka, n'omusirusiru bw'akutta emmere;

²³ n'omukazi eyadibira mu ddya; n'omuweereza omuwala bw'afumbirwa bba wa mugole we.

²⁴ Waliwo ebintu ebitono bina ku nsi, ebirina amagezi amangi ennyo.

²⁵ Enkolooto bye biwuka ebtalina maanyi mangi, naye byeterekera emmere yaabyo mu kyeya;

²⁶ obumyu busolo bunafu naye bwezimbira ennyumba zaabwo mu mayinja;

²⁷ enzige tezirina kabaka, kyokka zitabaala zonna mu bibiina byazo;

²⁸ omunya oyinza okugukwasa engalo, naye mu mbiri za bakabaka gusangibwamu.

²⁹ Waliwo ebintu bisatu ebyesimba obulungi mu kitiiibwa nga bitambula, weewaawo bina ebitambulira mu kitiiibwa:

³⁰ empologoma esinga ensolo zonna amaanyi era kabaka waazo, so tewali gy'esegulira yonna;

³¹ sseggwanga, n'embuzi ennume, ne kabaka eyeetooloddwa eggye lye.

³² Bw'oba ng'obadde okoze eby'obusirusiru ne weegulumiza, obanga obadde oteekateeka okukola ebibi, weekomeko weekwate ku mumwa.

³³ Kubanga okusunda amata kuzaala omuzigo, n'okunyiga ennyindo kuleeta omusaayi, okutankuula obusungu, bwe kutyo kuleeta entalo.

Engero 31

Okulabula ku Kunywa Ekitamiiza

¹ Ebigambo bya kabaka Lemweri bye yayogera, nnyina bye yamuyigiriza.

² Ggwe mutabani wange, ggwe mutabani w'enda yange, ggwe mutabani w'obweyamo bwange.

³ Tomaliranga maanyi go ku bakazi, newaakubadde amaanyi go ku abo abazikiriza bakabaka.

⁴ Ggwe Lemweri, si kya bakabaka, si kya bakabaka okunywanga omwenge, so si kya balangira okwegombanga omwenge,

⁵ si kulwa nga bagunywa ne beerabira amateeka, ne batalamula mu bwenkanyaabantu baabwe abatulugunyizibwa.

⁶ Ekitamiiza mukiwenga oyo ayagala okufa, n'omwenge oyo alina emmeeme eriko obuyinike.

⁷ Mumuleke anywenga yeerabire obwavu bwe, alemenga kujukira nate buyinike bwe.

⁸ Yogereranga abo abatasobola kweyogerera, otunulenga mu nsong z'abo bona abaasigala ettayo.

⁹ Yogera olamulenga n'obwenkanya, olwanirirenga abaavu n'abali mu bwetaavu.

Omukazi ow'Amagezi

¹⁰ Omukazi omwegendereza ani ayinza okumulaba? Wa muwendo nnyo okusinga amayinja ag'omuwendo ennyo.

¹¹ Bba amwesiga n'omutima gwe gwonna, era bba talina kyonna kya muwendo ky'abulwa.

¹² Aleetera bba essanyu so tamukola kabi, obulamu bwe gwonna.

¹³ Anoonya ebyoya by'endiga n'anoonya ne ppamba, n'akola emirimu gye mu ssanyu eritayogerekka.

¹⁴ Ali ng'ebombo by'abasuubuzi, aleeta emmere okuva mu nsi ezeewala.

¹⁵ Agolokoka tebunnakya, n'awa ab'omu nnyumba ye ebyokulya, n'agabira abawereza be abawereza emirimu egy'okukola.

¹⁶Alowooza ku nnimiro n'agigula; asimba ennimiro ey'emizabbibu n'ebibala by'emikono gye.

¹⁷Omukazi oyo akola n'amaanyi omulimu gwe, emikono gye gikwata n'amaanyi emirimu gye.

¹⁸Ayiiya ebyamaguzi ebirimu amagoba n'abisuubula, era n'ettabaaza ye ekiro tezikira.

¹⁹Anyweza omuti oguluka ppamba mu mukono gwe, engalo ze ne zikwata akati akalanga.

²⁰Ayanjululiza abaavu omukono gwe, n'agololera omukono gwe oyo ali mu bwetaavu.

²¹Mu biseera by'obutiti taba na kutya, kubanga ab'omu nnyumba ye bona baba n'engoye ez'okwambala.

²²Yeekolera ebibikka obuliri bwe, era engoye ze za linena omulungi, za ffulungu.

²³Bba amanyibbwa, y'omu ku bakulu abakulembera ensi, era ateesenza mu nkiiko enkulu.

²⁴Omukazi atunga ebyambalo ebya linena n'abitunda, n'aguza abasuubuzi enkoba.

²⁵Amaanyi n'ekitiibwa bye byambalo bye, era tatya ebiro ebigenda okujja.

²⁶Ayogera n'amagezi, era ayigiriza ebyekisa.

²⁷Alabirira nnyo empisa z'ab'omu nnyumba ye, era talya mmere ya bugayaavu.

²⁸Abaana be bagolokoka ne bamuyita wa mukisa, ne bba n'amutendereza ng'ayogera nti,

²⁹"Abakazi bangi abakola eby'ekitiibwa naye bona ggwe obasinga."

³⁰Obubalagavu bulimba n'endabika ennungi teriiko kyegasa, naye omukazi atya MUKAMA anaatenderezebwanga.

³¹Mumusasule empeera gy'akoleredde, n'emirimu gye gimuweesenga ettendo ku miryango gy'ekibuga.

Omubuulizi

Omubuulizi 1

Obutaliimu bw'Amagezi g'abantu

- ¹ Ebigambo by'Omubuulizi, mutabani wa Dawudi kabaka mu Yerusaalemi.
- ² "Obutaliimu! Obutaliimu!" bw'ayogera Omubuulizi. Byonna butaliimu.
- ³ Omuntu afuna ki mu byonna by'akola, mu byonna ebimukooya wansi w'enjuba?
- ⁴ Omulembe ogumu gugenda, omulala ne gujja, naye ensi ebeerera emirembe gyonna.
- ⁵ Enjuba evaayo era n'egwa, ate n'eyanguwa okutuuka mu kifo mw'eviirayo.
- ⁶ Empewo ekunta ng'eraga obukiikaddyo, ne yeetooloola okutuuka obukiikkono; empewo yeetooloola ne yeetooloola, n'ekomerawo ku biwaawaatiro byayo.
- ⁷ Emigga gyonna gikulukuta nga giraga mu nnyanja, naye ennyanja tejjula; ekifo emigga gye gikulukutira era gye gyeyongera okukulukutira.
- ⁸ Ebintu byonna bijjudde obukoowu omuntu bw'atasobola kutenda! Eriiso terimatira kulaba, wadde okutu okukoowa okuwulira.
- ⁹ Ekyo ekyabaawo era kye kigenda okubaawo, n'ekyo ekikoleddwa era kye kigenda okukolebwa; era tewali kintu kiggya wansi w'enjuba.
- ¹⁰ Waali wabaddewo ekintu ekyali kigambiddwa nti, "Laba kino kiggya"? Kyaliwo dda mu mirembe egyatusooka?
- ¹¹ Tewali kujjukira bintu byasooka era tewaliba kujjukira bintu ebyo ebitanabaawo mu ebyo ebijja oluvannyuma.

Amagezi Agatali ga Katonda Butaliimu

- ¹² Nze Omubuulizi nali kabaka wa Isirayiri mu Yerusaalemi.
- ¹³ Nagezaako n'omutima gwange okuyiga n'okwetegereza n'amagezi gange gonna mu ebyo ebikolebwa wansi w'eggulu; omulimu Katonda gwe yawa abaana b'abantu okukola, guteganya.
- ¹⁴ Ndabye ebintu byonna ebikolebwa wansi w'enjuba; era laba, byonna butaliimu na kugoberera mpewo.
- ¹⁵ Ekyo ekyakyama tekisoboka kugololebwa, n'ekibulako tekibalibwa.
- ¹⁶ Nayogera munda yange nti, "Nfunye amagezi mangi agasinga ag'abo bona abaali babadde mu Yerusaalemi, era nfunye amagezi n'okumanya kungi."

¹⁷Era omutima gwange ne gumanya okwawula amagezi n'eddalu, n'obutategeera. Ne ntegeera nti na kino nakyo kugoberera mpewo.

¹⁸Kubanga mu magezi amangi mujjiramu okunakuwala kungi; amagezi gye gakoma obungi, n'okunakuwala gye gukoma.

Omubuulizi 2

Amasanyu Tegagasa

¹Nayogera munda yange nti, "Jjangu kaakano ngezese okusanyuka. Weesanyuse." Naye laba, na kino kyali butaliimu.

²Nagamba nti, "Okuseka busirusiru. Era okusanyuka kugasa ki?"

³Nanoonyereza n'omutima gwange, bwe nnaasanyusa omubiri gwange n'omwenge, nga nkyagoberera okunoonya amagezi. Nayagala okulaba abantu kyebasaanira okukola wansi w'enjuba mu nnaku ez'obulamu bwabwe entono.

⁴Natandikawo emirimu egy'amaanyi: ne neezimbira amayumba ne neesimbira ennimiro ez'emizabbibu.

⁵Ne neerimira ennimiro, ne neekolera n'ebifo ebigazi, ne nsimbamu buli ngeri ya miti egy'ebibala.

⁶Ne neesimira ebidiba omuva amazzi ag'okufukirira ebibira by'emitি emitio.

⁷Neefunira abaddu abasajja n'abakazi, era nalina abaddu abaazaalirwa mu nnyumba yange. Ne mbeera n'amagana g'ente n'ebisibo by'endiga okusinga bona abansooka okubeera mu Yerusaalemi.

⁸Ne neekuñjaanyiza ffeeza ne zaabu ebyavanga mu misolo, egyampebwanga bakabaka n'egyavanga mu bwakabaka bwabwe. Neefunira abayimbi abasajja n'abakazi, ne nfunu n'ebintu byonna ebisanyusa omuntu, ne neefunira n'abakazi.

⁹Ne nfuuka mukulu ne nsukkirira bona abansooka mu Yerusaalemi. Mu ebyo byonna nasigala siweebuuse mu magezi.

¹⁰Na buli amaaso gange kye gaayagala okulaba sa kigamma, omutima gwange ne ngusanyusa mu buli kimu. Omutima gwange gwasanyukira bye nakola byonna, era eyo y'empeera yange olw'okutegana kwange kwonna.

¹¹Awo bwe nalowooza byonna emikono gyange bye gyakola, n'okutegana kwonna nga nkola, laba, byonna bwali butaliimu na kugoberera mpewo, tewaalii na kimu kye nagabolola wansi w'enjuba.

Amagezi Agatali ga Katonda n'Obusirusiru Byombi Butaliimu

¹² Awo ne nkyuka ne ndowooza ku magezi, ne ku ddalu ne ku busirusiru, kubanga oyo aliddirira kabaka mu bigere alibaako ki ky'akola, okuggyako ekyo kabaka ky'akoze?

¹³ Awo ne ndaba amagezi nga gasinga obusirusiru, n'ekitangaala nga kisinga ekizikiza.

¹⁴ Omugezi amaaso ge gali mu mutwe gwe, naye atalina magezi atambulira mu kizikiza. Kyokka ne ntegeera nga bombi akabi kabatuukako.

¹⁵ Ne ndyoka njogera mu mutima gwange nti, "Ekyo ekigwa ku musirusiru nange kirintuukako. Kale lwaki mbeera omugezi?" Era na kino ne nkizuula nga butaliimu.

¹⁶ Kubanga ku mugezi ne ku musirusiru tewaliwo ajjukirwa lubeerera; mu nnaku ezirijja bombi baliba beerabirwa dda. Okufaanana ng'omusirusiru n'omugezi naye alifa.

¹⁷ Awo ne nkyawa obulamu kubanga buli ekikolebwa wansi w'enjuba kindeetera buyinike. Byonna butaliimu na kugoberera mpewo.

¹⁸ Nakyawa okutegana kwange kwonna kwe nateganamu wansi w'enjuba, kubanga byonna ndi wakubirekera oyo alinzirira mu bigere.

¹⁹ Kale ani amanyi obanga aliba musajja mugezi oba musirusiru? Kyokka ye y'aliba mukama w'ebyo byonna bye nateganira nga nkozesha amagezi gange wansi w'enjuba; era na kino nakyo butaliimu.

²⁰ Awo ne nterebuka olw'okutegana kwange kwonna wansi w'enjuba.

²¹ Kubanga oluusi omuntu ategana ng'akozesa amagezi ge n'okumanya awamu n'obukalabakalaba bwe, naye byonna ateekwa okubirekera oyo atabiteganiranga nako. Na kino nakyo butaliimu na kabi keereere.

²² Omuntu afuna ki mu kutegana kwe kwonna n'okukaluubirirwa mu ebyo by'ateganamu wansi w'enjuba?

²³ Kubanga ennaku ze zonna n'okutegana kwe bijjula bulumi; era ne mu kiro omutima gwe teguwummula; na kino nakyo butaliimu.

²⁴ Tewali kisingira muntu kulya na kunywa na kusanyukira mu ebyo by'akola. Na kino nkiraba, kiva mu mukono gwa Katonda,

²⁵ kubanga awatali ye, ani ayinza okulya oba asobola okusanyuka?

²⁶ Kubanga omuntu asanyusa Katonda, Katonda amuwa amagezi n'okumanya n'essanyu; naye omwonoonyi Katonda amuwa omulimu gw'okukuŋjaanyiza oyo asanyusa Katonda. Na kino nakyo butaliimu na kugoberera mpewo.

Omubuulizi 3

Buli Kintu Kirina Ekiseera Kyakyo

- ¹ Buli kintu kirina ekiseera kyakyo, na buli ekikolebwa wansi w'eggulu kirina ekiseera kyakyo.
- ² Waliwo ekiseera eky'okuzaalibwa n'ekiseera eky'okufa; ekiseera eky'okusimba ate n'ekiseera eky'okukungula ebyo ebyasimbibwa;
- ³ ekiseera eky'okutta n'ekiseera eky'okuwonya; ekiseera eky'okumenya n'ekiseera eky'okuzimba;
- ⁴ ekiseera eky'okukaabiramu n'ekiseera eky'okusekeramu; ekiseera eky'okukungubaga n'ekiseera eky'okuzina;
- ⁵ ekiseera eky'okusaasaanyizaamu amayinja, n'ekiseera eky'okugakuŋjaanyizaamu; ekiseera eky'okugwiramu mu kifuba n'ekiseera eky'okukyewaliramu;
- ⁶ waliwo ekiseera eky'okunoonyezaamu n'ekiseera eky'okulekeraawo okunoonya; ekiseera eky'okukuumiram mu kintu n'ekiseera eky'okukisuuiliram;
- ⁷ n'ekiseera eky'okuyulizaamu n'ekiseera eky'okuddabiririzaamu; ekiseera eky'okusirikiramu n'ekiseera eky'okwogereramu;
- ⁸ waliwo ekiseera eky'okwagaliramu n'ekiseera eky'okukyayiramu; ekiseera eky'entalo n'ekiseera eky'eddembe.
- ⁹ Ddala omuntu kiki ky'afuna mu kutegana kwe?
- ¹⁰ Ndabye omugugu Katonda gw'atadde ku bantu.
- ¹¹ Buli kimu yakikola nga kirungi mu kiseera kyakyo. Kyokka newaakubadde nga Katonda yateeka mu mitima gy'abantu okutegeera obulamu obutaggwaawo, omuntu tayinza kuteebereza mulimu gwa Katonda gwonna, we gutandikira oba we gukoma.
- ¹² Mmanyi nga tewali kisingira bantu kusanyuka na kukola bulungi nga balamu.
- ¹³ Buli muntu alyoke alye, anywe afune okwesiima olw'ebyo ebiva mu kutegana kwe, kubanga ekyo kirabo kya Katonda.
- ¹⁴ Mmanyi nga buli Katonda ky'akola kya lubeerera; tekyongerwako, era tewali kikijibwako. Katonda yakikola bw'atyo, abantu balyoke bamutye.
- ¹⁵ Ekyo ekiriwo ky'amala dda okubaawo; n'ekyo ekinaaberawo kyabaawo dda; era Katonda alagira ebyali bibaddewo, ne byongera okubaawo.
- ¹⁶ Ate era nalaba nga wansi w'enjuba, mu kifo ky'okusala amazima waliwo kusaliriza; ne mu kifo ky'obutuukirivu waliwo bwonoonyi.

¹⁷ Ne njogera munda yange nti, “Katonda aliramula abatuukirivu n'aboonoonyi; kubanga yateekawo ekiseera ekya buli kimu; era na buli mulimu.”

¹⁸ Ne ndowooza nti, “Katonda agezesha abaana b'abantu era bajjukire nti nsolo busolo.

¹⁹ Kubanga ekituuka ku baana b'abantu kye kituuka ne ku nsolo; omuntu afa, n'ensolo n'efa. Bonna bassa omukka gwe gumu; omuntu talina nkizo ku nsolo. Byonna butaliimu.

²⁰ Bonna bagenda mu kifo kye kimu, bona bava mu nfuufu era mu nfuufu mwe badda.

²¹ Ani amanyi obanga omwoyo gw'omuntu gwambuka waggulu, ogw'ensolo gwo ne gukka mu ttaka?”

²² Bwe ntyo nalaba nga tewali kisinga muntu kusanyukira mulimu gwe, kubanga ekyo gwe mugabo gwe. Anti tewali asobola kumukomyawo alabe ebyo ebiribaawo oluvannyuma lwe.

Omubuulizi 4

Amaziga g'Abanyigirizibwa

¹ Ate nalaba okunnyigirizibwa kwonna okukolebwa wansi w'enjuba. Ate laba, amaziga gaabo abanyigirizibwa, era nga tebalina wakugabasangulako! Ababanyigiriza baalina obuyinza, kyokka nga tewali asobola kubagambako.

² Ne ndowooza ku abo abaafa, nga baali ba mukisa okusinga abo abakyali abalamu;

³ naye abasinga abo, y'oyo atannaba kuzaalibwa, atannalaba bibi obukolebwa wansi w'enjuba.

⁴ Awo ne ndaba ng'okutegana, n'okutuukiriza mu bikolebwa, kuva mu kukwatirwa obuggyaa muliraanwa. Na kino butaliimu na kugoberera mpewo.

⁵ Omusirusiru awumba emikono gye, ne yeezikiriza yekka.

⁶ Kirungi okuba n'emirembe emijjuvu okusinga okujjula okubonaabona n'okugoberera empewo.

⁷ Ate era ne ndaba obutaliimu wansi w'enjuba:

⁸ nalaba omuntu ng'ali bwannamunigina, nga talina mwana wabulenzi wadde muganda we, naye ng'ategana okukamala, nga tamatira na bugagga bwe, ne yeebuza nti, “Nteganira ani ne neefiiriza essanyu? Kino nakyo butaliimu, era tekiriiko kye kigasa.”

⁹ Ababiri basinga omu, kubanga bagasibwa nnyo mu kukola kwabwe.

¹⁰Kubanga singa omu agwa, munne amuyimusa. Naye zimusanz oyo ali obw'omu, bw'agwa tabaako amuyimusa.

¹¹Ababiri bwe bagalamira bombi awamu babuguma; naye oyo ali obw'omu, ayinza atya okubuguma?

¹²Om u awangulwa mangu, kyokka ababiri bayinza okwerwanako. Kubanga omuguwa ogw'emiyondo esatu tegukutuka mangu.

¹³Omuvubuka omwavu nga mugezi, akira kabaka amusinga emyaka nga musirusiru, atafaayo ku kubuulirirwa.

¹⁴Omuvubuka ayinza okuba ng'avudde mu kkomera n'alya obwakabaka, oba okulya obwakabaka ng'abadde mwavu.

¹⁵Nalaba abalamu bona abatambula wansi w'enjuba nga bagoberera omuvubuka oyo ow'okulya obwakabaka.

¹⁶Abantu be yafuganga baali bangi nnyo. Naye abo abajja oluvannyuma lwe tebaamusiiima. Na kino nakyo butaliimu na kugoberera mpewo.

Omubuulizi 5

Mutyte Katonda

¹Weekuumme ng'oyingira mu nnyumba ya Katonda; okumuseemberera n'okumuwuliriza, kisinga okuwaayo ssaddaaka ng'ez'abasirusiru abatamanyi nga bakola ebibi.

²Toyanguyirizanga na kamwa ko okwogera ekigambo, wadde omutima gwo ogwanguyiriza, okwogera ekigambo mu maaso ga Katonda. Katonda ali mu ggulu ng'ate ggwe oli ku nsi; kale ebigambo byo bibeerenga bitono.

³Ng'okutawaana ennyo bwe kuleetera omuntu ebirooto, n'ebigambo by'omusirusiru bwe bityo bwe biba nga bingi.

⁴Bwe weeyamanga obweyamo eri Katonda tolwanga kubutuukiriza, kubanga tasanyukira basirusiru. Tuukirizanga obweyamo bwo.

⁵Obuteyama kisinga okweyama n'ototuukiriza kye weeyamye.

⁶Akamwa ko kaleme ku kwonoonyesa, n'ogamba oyo atumiddwa gy'oli nti, "Nakola kisobyo okweyama." Kale lwaki weeretako okusunguwalirwa Katonda olw'ebigambo byo, n'azikiriza emirimu gy'emikono gyo?

⁷Ebirooto entoko n'ebigambo ebingi temuli makulu; noolwekyo otyanga Katonda.

Obugagga ku Bwabwo Bwokka Butaliimu Bwereere

⁸ Bw'olabanga ng'omwavu anyigirizibwa mu ssaza, amazima n'obwenkanya nga tewali, teweewuunyanga! Kubanga omukungu waalyo alinako amusinga, ate nga bombi balina ababatwala.

⁹ Bonna balya ku bibala bya nsi eyo; kabaka yennyini mu nnimiro zaayo mw'afuna.

¹⁰ Oyo alulunkanira ensimbi, tasobola kuba na nsimbi zimumala; wadde oyo alulunkanira obugagga n'amagoba: na kino nakyo butaliimu.

¹¹ Ebintu nga bwe byeyongera obungi, n'ababirya gye bakoma okweyongera. Kale nnyini byo agasibwa ki, okuggyako okusanyusa amaaso ge?

¹² Otulo tuwoomera omupakasi ne bw'aba agabana bitono oba bingi. Naye obugagga bw'omugagga obuyitiridde, tebumuganya kwebaka.

Okukola n'Essanyu

¹³ Waliwo ekibi ekinene kye nalaba wansi w'enjuba: nannyini bugagga abuterekera mu kwerumya,

¹⁴ ebyembi bw'ebigwawo eby'obugagga ebyo bibula, kale bw'aba ne mutabani tewabaawo mutabani we ky'asigaza.

¹⁵ Omuntu nga bwe yava mu lubuto lwa nnyina n'ajja mu nsi nga talina kintu, bw'atyo bw'aliddayo nga mwereere ng'ava mu nsi. Tewali ky'aggya mu mirimu gye, wadde kyayinza okugenda nakyo mu mukono gwe.

¹⁶ Na kino kya bulumi bwereere: nga bwe yajja era bw'atyo bw'aligenda; mugaso ki gwe yafuna mu kugoberera empewo?

¹⁷ Era yamala obulamu bwe bwonna mu kizikiza ne mu buyinike, ne mu kweraliikirira, ne mu bulumi ne mu kunyiiga.

¹⁸ Ne ndyoka ntegeera nti kituufu omuntu okulya n'okunywa n'okulaba nga yeagalira mu kutakabana ne mu kukola kwe wansi w'enjuba, mu nnaku ze entono Katonda z'amuwadde, kubanga ekyo gwe mugabo gwe.

¹⁹ Ate Katonda bw'awa omuntu obugagga, n'ebintu n'amusobozesa okubyeyagaliramu, n'okutegeera omugabo gwe n'okusanyukira by'akoze, ekyo kiba kirabo ekivudde ewa Katonda.

²⁰ Emirundi giba mitono gy'alowooletaamu ekiseera ky'obulamu ky'amaze, kubanga Katonda ajuza omutima gw'omuntu oyo essanyu.

Omubuulizi 6

Obutaliimu bw'Obugagga n'Ettiibwatiibwa

¹ Waliwo ekibi ekirala kye ndabye wansi w'enjuba era kibuutikidde abantu.

²Katonda awa omuntu obugagga, n'amuwa ebintu ebingi awamu n'ekitiibwa, na buli mutima gwe kye gwetaaga n'akifuna; naye Katonda n'amumma okubisanyukiramu, kyokka omugwira n'ajja n'abisanyukiramu. Kino butaliimu era kya bubalagaze!

³ Omuntu ayinza okuba n'abaana kikumi, n'awangaala; bw'atasanyukira mu bugagga bwe, era n'ataziikwa mu kitibwa, ne bw'aba ng'awangadde nnyo, omwana afiira mu lubuto ng'agenda okuzaalibwa amusingira wala.

⁴Omwana oyo ajja nga taliiko ky'amanyi n'agendera mu butamanya era n'erinnya lye ne libulira mu butamanya.

⁵Newaakubadde talabye njuba, wadde okubaako ky'amanyi, kyokka awummula bulungi okusinga omusajja oyo:

⁶omusajja oyo ne bw'awangaala emyaka enkumi bbiri, naye n'atasanyukira mu bya bugagga bwe. Bombi tebalaga mu kifo kye kimu?

⁷Buli muntu ateganira mumwa gwe, naye tasobola kukkuta by'alina.

⁸Kale omuntu omugezi asinga oyo omusirusiru? Omwavu bw'amanya okwefuga mu maaso g'abalala, agasibwa ki?

⁹Amaaso kye galaba kisinga olufulube lw'ebirowoozo. Era na kino nakyo butaliimu, na kugoberera mpewo.

¹⁰Buli ekibaawo ky'ateekewateekebwa dda, n'omuntu kyalikiyibwa, tewali muntu ayinza kulwana n'oyo amusinza amaanyi, n'amusobola.

¹¹Ebigambo gye bikoma obungi, gye bikoma n'obutabaamu makulu; kale ekyo kigasa kitya omuntu?

¹²Kale ani amanyi ekirungi eri omuntu, mu nnaku ezo entono z'amala mu bulamu bwe obutaliimu, obuli ng'ekisiikirize? Ani wansi w'enjuba ayinza okutegeeza ekirimubaako ng'avudde mu bulamu buno?

Omubuulizi 7

Okulondawo Ekisinga Obulungi

¹Obwatiikirivu bw'erinnya eddungi businga eby'akawoowo ebirungi; n'olunaku olw'okufa lusinga olwo olw'okuzaalirwako.

²Kirungi okulaga mu nnyumba ey'abakungubaga okusinga okulaga mu nnyumba ey'ebiyassava. Kubanga buli omu wa kufa, ekyo kiteekwa okuba ku mutima gwa buli muntu.

³Okunakuwala kusinga okuseka, kubanga amaaso amanakuwavu gazzaamu omutima amaanyi.

⁴ Omutima gw'omugezi guba wamu n'abo abali mu nnaku; naye ogw'omusirusiru guba mu kusanyuka.

⁵ Kirungi okussaayo omwoyo ku kunenya kw'omuntu ow'amagezi okusinga okuwuliriza ennyimba z'abasirusiru.

⁶ Okuseka kw'abasirusiru kuli ng'okutulikatulika kw'amaggwa agali mu muliro gw'entamu; na kino nakyo butaliimu.

⁷ Kya mazima, okunyigirizibwa kufuula ow'amagezi okuba omusirusiru, n'enguzi efaafaaganya okutegeera.

⁸ Enkomerero y'ekintu esinga entandikwa yaakyo, n'omugumiikiriza asinga ow'amalala.

⁹ Tosunguwalanga mangu nga waliwo akusokaasoka, kubanga obusungu bubeera munda y'abasirusiru.

¹⁰ Teweebuuzanga nti, "Lwaki ennaku ziri ez'edda zisinga zino?" Kubanga si kya magezi okwebuuza ekibuuzo ng'ekyo.

¹¹ Amagezi kintu kirungi, okufaanana ng'eky'obugagga ky'obusika, era kigasa abo abakyalaba enjuba.

¹² Amagezi kiwummulo, ng'ensimbi bwe ziri ekiwummulo, naye enkizo y'okumanya y'eno: amagezi gakuma obulamu bw'oyo agalina.

¹³ Lowooza ku Katonda ky'akoze: ani ayinza okugolola ekyo ekyakyama Katonda kye yakola?

¹⁴ Ebiseera bwe biba ebirungi, sanyuka; naye bwe biba ebibi, kirowoozeeko; Katonda eyakola ekimu era ye yakola ne kinnaakyo. Noolwekyo omuntu tayinza kuzuula kirimubaako mu nnaku ze ez'omu maaso.

¹⁵ Mu bulamu bwange buno obutaliimu ndabye bino byombi: omutuukirivu azikiririra mu butuukirivu bwe, n'omukozi w'ebibi n'awangaalira mu bibi bye.

¹⁶ Teweefulanga mutuukirivu ayitiridde wadde okwefuula ow'amagezi ow'ekitalo; oleme okwezikiriza.

¹⁷ Tobanga mwonoonyi kakuzzi wadde okuba omusirusiru; oleme okufa ng'ekiseera kyo tekinnatuuka.

¹⁸ Ekyo kirungi okiyige, na kiri oleme kukibuusa maaso, kubanga oyo atya Katonda abyewala okubiyitiriza.

¹⁹ Ow'amagezi ne bw'aba omu mu kibuga, aba w'amaanyi okusinga abakulembeze ekkumi ab'omu kibuga ekyo.

²⁰ Ddala ku nsi tekuli muntu mutuukirivu, atakola bibi.

²¹Towulirizanga buli kigambo, bantu kye boogera, si kulwa ng'owulira omuweereza wo ng'akukolimira,

²²kubanga naawe okimanyidde ddala mu mutima gwo, ng'emirundi mingi okolimidde abalala.

²³Ebyo byonna nabyekenneanya n'amagezi ne ηηjamba nti, "Mmaliridde okuba omugezi," wabula kino kyandi wala.

²⁴Amagezi ne bwe gaba ga kikula ki, gali wala nnyo era tegalojjeka, kale ani ayinza okugavumbula?

²⁵Bwe ntyo ne nkyusa omutima gwange nnoonye okutegeera, nekkanye, era nnoonyereze amagezi ndowooze ne ku bintu nga bwe biri, n'okutegeera obusirusiru bw'okukola ebibi: n'eddalu ery'obusirusiru.

²⁶Ekintu kye nalaba eky'obulabe ekisinga okufa, ye mukazi alina omutima ogusendasenda, era ogusikiriza, era emikono gye gisiba ng'enjegere. Oyo ayagala Katonda, y'awona omukazi oyo, kyokka ye omwonoonyi talema kugwa mu mutego gwe.

²⁷Omubuulizi agamba nti, "Laba, kino kyenvumbudde: "Okugatta ekintu ku kinnaakyo, okuzuula enkola y'ebintu,

²⁸bwe nnali nga nkyanoonyereza nabulako kye nzuula, okuggyako okulaba omusaja omwesimbu omu mu basajja lukumi, kyokka mu bakazi bona ssaalabamu n'omu atuukiridde.

²⁹Wabula kino kyokka kye nalaba: Katonda yatonda omuntu nga mugolokofu, naye abantu ne beenoonyeza ebintu ebirala bingi."

Omubuulizi 8

Obuwulize eri Abakulembeze

¹Ani afaanana omuntu omugezi amanyi okunnyonnyola buli kintu? Amagezi gaakaayakanyisa obwenyi bw'omuntu, ne gakyusa emitafu gyamu.

²Nkugamba nti gondera ekiragiro kya kabaka, kubanga walayira mu maaso ga Katonda.

³Toyanguyiriza kuva mu maaso ga kabaka. Kyokka ensonga bw'ebanga etali ntuu, tobanga ku ludda lumuwakanya, kubanga ye akola buli ky'ayagala.

⁴Kubanga ekigambo kya kabaka kisukkuluma byonna; kale ani ayinza okumubuuza nti, "Okola ki ekyo?"

⁵Oyo agondera ekiragiro kye talituukibwako kabi, omutima ogw'amagezi gulimanya ekiseera ekisaana okukoleramu ekintu gundi, n'engeri ey'okukolamu ekintu ekyo.

⁶ Kubanga waliwo ekiseera ekituufu n'enkola esaana ku buli kintu, newaakubadde ng'obuyinike bw'omuntu bumuzitoowerera okukamala.

⁷ Nga bwe watali muntu amanyi binaabaawo, kale ani ayinza okumutegeeza ebinajja?

⁸ Tewali muntu alina buyinza kufuga mpewo; bwe kityo tewali n'omu alina buyinza ku lunaku lwa kufa kwe. Ng'omuntu bw'aweebwa ebiragiro mu biseera eby'olutalo, bwe kityo n'obutali butuukirivu bwe buduumira abo ababutambuliram.

⁹ Ebyo byonna bye nalaba bwe nagezaako okwekenneenya buli kintu ekikolebwa wansi w'enjuba. Waliwo ekiseera omufuzi buli lw'abinika baafuga, kyokka nga yeerumya yekka.

¹⁰ Ndabye abantu abakozi b'ebibi nga baziikibwa, abo abaawaanibwanga mu kibuga nga bazze mu kifo ekitukuvu. Na kino nakyo butaliimu.

¹¹ Omuntu bw'asalirwa omusango n'atabonererezebwawo, emitima gy'ababi gjijula kuteekateeka kukola bubi.

¹² Newaakubadde ng'omuntu omubi azza emisango kikumi, ate n'awangaala, nkimanyi ng'abatuukirivu, abo abatya Katonda bijja kubagendera bulungi.

¹³ Naye olwokubanga abakozi b'ebibi tebatya Katonda, tebiyinza kubagendera bulungi, era n'ennaku zaabwe zinaayitanga mangu ng'ekisiikirize.

¹⁴ Waliwo ekintu ekirala ekiraga obutaliimu ekiri ku nsi: abantu abatuukirivu batukibwako ebyo ebisaanira ababi, ate abatali batuukirivu ne batuukibwako ebyo ebigwanira abatuukirivu. Kino nakyo nkiyita butaliimu.

¹⁵ Bwe ntyo nteesa nti omuntu yeyagalire mu bulamu: kubanga wansi w'enjuba tewali kisinga, wabula omuntu okulya n'okunywa n'okweyagala. Kale essanyu linaamuwerekeranga mu mirimu gye, ennaku zonna ez'obulamu bwe Katonda bw'amuwadde wansi w'enjuba.

¹⁶ Bwe nanoonyereza amagezi ne neetegereza okutegana kw'omuntu ku nsi kuno, nga teyeebaka emisana n'ekiro.

¹⁷ Ne ndaba ebyo byonna Katonda by'akoze, nga tewali n'omu ayinza kutegeera Katonda by'akola wansi w'enjuba, omuntu ne bw'agezaako ennyo okukinoonyereza tayinza kukivumbula. Newaakubadde omuntu omugezi yeefuula nti akimanyi, tayinza kukitegeera.

Omubuulizi 9

Ekkubo Bonna Iye Bakwata

¹ Awo ne ndowooza ku ebyo, ne nzuula ng'omutuukirivu n'omugezi bye bakola biri mu mukono gwa Katonda; naye tewali muntu n'omu amanyi obanga kwagalibwa oba kukyayibwa bye bimulindiridde.

² Omuntuukirivu n'omwonoonyi, omulungi n'omubi, omuyonjo n'omujama, abo abawaayo ssaddaaka n'abo abatagiwaayo bona gye bagenda y'emu. Nga bwe kiri eri omuntu omulungi, era bwe kiri n'eri omwonoonyi; Nga bwe kiri eri abo abalayira, era bwe kiri n'eri abo abatyia okulayira.

³ Bonna ekibalindiridde kimu; kano ke kabi akabeera wansi w'enjuba. Ate emitima gy'abantu mu bulamu buno giraluse gjijudde ebibi, bayaayaanira buli kimu; n'oluvannyuma ne bakka emagombe eri bannaabwe.

⁴ Naye omuntu omulamu aba n'essuubi, wadde embwa ennamu esinga empologoma enfu!

⁵ Kubanga buli kiramu kimanya nga kya kufa, naye abafu tebaliiko kye bamanyi: tebakyagasa wadde okujukirwa.

⁶ Okwagala kwabwe, n'obukyayi bwabwe, n'obuggya bwabwe nga bizikiridde; nga tebakyetaba mu ebyo byonna ebikolebwa wansi w'enjuba.

⁷ Genda olye emmere yo ng'osanyuka, onywe ne wayini wo nga weeyagala; kubanga Katonda asiimye ky'okola.

⁸ Yambalanga engoye ennyonjo, era weesiigenga n'ebakaloosa.

⁹ Ssanyukanga ne mukyala wo gw'oyagala ennaku zo zonna, mu bulamu buno obutaliimu, Katonda bw'akuwadde wansi w'enjuba, kubanga ekkyo gwe mugabo gwo mu kutegana kwo kw'oteganamu wansi w'enjuba.

¹⁰ Buli omukono gwo kye gugenda okukola, kikole n'amaanyi go gonna; kubanga teri mulimu wadde okulowooza, oba okutegeera wadde amagezi emagombe gy'olaga.

¹¹ Ate nalaba nga wansi w'enjuba, ng'ow'embiro ennyingi si y'awangula mu mpaka, era ne kirimaanyi si y'awangula olutalo, ng'ate bakalimagezi bona si be baatiikirira; wabula ng'omukisa gukwata bukwasi oyo aba aliwo mu kifo ekituufu ne mu kiseera ekituufu.

¹² Kubanga omuntu tamanya kinaamubaako. Ng'ekyenyanja bwe kikwatibwa mu muyonjo, oba ennyonyi nga bw'egwa ku mutego, n'abaana b'omuntu bwe batyo bwe beesanga mu biseera eby'akabi, ebibatuukako nga tebabyetgekedde.

¹³ Era ekirala kye nalaba ekyampuniikiriza ennyo kye kino:

¹⁴ waaliwo akabuga nga kalimu abantu batono ddala, kabaka ow'amaanyi n'ajja n'akazingiza n'akazimbako ekigo ekinene.

¹⁵Mu kabuga ako mwalimu omusajja omugezi, omwavu, ng'amanyi eky'okukola okuwonya akabuga ako, bw'atyo mu magezi ge ne kanunulwa. Naye nno ne wabulawo amujjukira.

¹⁶Awo ne ndaba nti newaakubadde ng'amagezi gasinga amaanyi, naye ow'amagezi bw'aba omwavu, anyoomebwa, ne ky'ayogera tekissibwako mwoyo.

¹⁷Naye ne bwe kiba kityo, ebigambo eby'ekimpowooze ebiva mu kamwa k'omugezi bissibwako omwoyo, okusinga okuleekaana kw'omufuzi w'abasirusiru.

¹⁸Amagezi gasinga ebyokulwanyisa mu lutalo, naye omwonoonyi omu azikiriza ebirungi bingi.

Omubuulizi 10

Omugezi n'Omusirusiru

¹Nga ensowera enfu bwe zoonoona akaloosa akawunya obulungi, bwe katyo akasobyo akatono bwe koonoona amagezi n'ekitiibwa.

²Omutima gw'omuntu ow'amagezi gumukozesa ekituufu, naye ogw'omusirusiru gumutwala kukola bitasaana.

³Ne bw'aba ng'atambula, amanyibwa nga talina magezi, era buli amulaba agamba nti musirusiru.

⁴MUKAMA wo bw'akunyiigiranga, tomulaganga busungu; okuddamu n'eggonjebwa kukyusa ekiruyi.

⁵Ekibi ekirala kye nalaba, kye kikwata ku nsobi y'omufuzi:

⁶nalaba ng'abasirusiru baweebwa ebifo ebisava, naye ng'abagagga bo baweebwa ebyo ebya wansi.

⁷Ate nalaba ng'abaddu beebagala embalaasi, songa abalangira batambuza bigere ng'abaddu.

⁸Asima ekinya alikigwamu, n'oyo amenya ekisenge omusota gulimubojja.

⁹Oyo ayasa amayinja gamulumya, n'oyo ayasa enku zimulumya.

¹⁰Embazzi bwe tebaako bwogi, n'etewagalwa, agitemya ateeckwa okufuba ennyo, naye obumanyirivu bwe buwangula.

¹¹Omusota bwe guluma nga tegunnakola bya bufuusa, omufuusa talina kyafunamu.

¹²Ebigambo ebiva mu kamwa k'omuntu ow'amagezi bya muwendo nnyo eri abo ababiwulira, naye akamwa k'omusirusiru kamusuula mu ntata.

¹³Entandikwa y'ebigambo bye nga temuli nsa, ne ku nkomerero yaabyo biba mususa.

¹⁴ Omusirusiru asavuwaza ebigambo. Tewali amanyi birijja, kale ani asobola okumubuulira ebiribaawo oluvannyuma lwe?

¹⁵ Omusirusiru aterebuka mangu olw'ekitamugendedde bulungi, n'abulwa n'ekkubo erimutwala mu kibuga.

¹⁶ Zikusanze gw'ensi kabaka bw'aba nga yali muddu, nga n'abalangira bakeera kwetamiirira!

¹⁷ Olina omukisa gw'ensi kabaka wo bw'aba nga wa lulyo lulangira, ate nga n'abalangira bo bamanyi ekiseera eky'okuliiramu, olw'okufuna amaanyi so si lwa kutamiira.

¹⁸ Obugayaavu buleetera akasolya k'ennyumba okutonnya, n'emikono egitayagala kukola gireetera ennyumba okutonnya.

¹⁹ Ekijjulo kikolebwa lwa kusanyuka, ne wayini yeeyagaza obulamu, naye ensimbi y'esobola byonna.

²⁰ Tokolimira kabaka mu mutima gwo newaakubadde okukolimira omugagga mu kisenge kyo, kubanga ennyonyi ey'omu bbanga eyinza okwetikka ebigambo byo nga biwandiikkida ku biwaawaatiro byayo n'ebibatuusaako.

Omubuulizi 11

Bw'ogaba Katonda Akuddizaawo

¹ Siganga emmere yo ng'enkuba etonnya, kubanga ebbanga lyayo bwe lirituuka olirkungula.

² Gabiranga musanvu weewaawo munaana, kubanga mu biseera eby'oluvannyuma oyinza okubeera mu kwetaaga.

³ Ebire bwe bijjula amazzi, bitonnyesa enkuba ku nsi; n'omuti bwe gugwa nga gwolekedde obukiikkaddyo oba obukiikkakkono, mu kifo mwe gugwa mwe gulibeera.

⁴ Oyo alabirira embuyaga talisiga; n'oyo atunuulira ebire talikungula.

⁵ Nga bw'otosobola kutegeera kkubo mpewo, oba omubiri nga bwe guzimbibwa ku mwana ali mu lubuto; bw'otyo bw'otosobola kutegeera Katonda Omuronzi wa byonna by'akola.

⁶ Ku makya siga ensigo zo, n'akawungeezi toddiriza mukono gwo; kubanga tomanyi eziryala, zino oba ziri, oba zombi ziriba nnungi.

⁷ Ekitangaala kirungi, era okulaba ku musana kisanyusa.

⁸ Kale omuntu bw'awangaala emyaka emingi, agisanyukirengamu gyonna, naye ajjukirenga nti waliwo ennaku ez'ekizikiza nnyingi ezijja. Ebyo byonna ebija butaliimu.

⁹ Omuvubuka sanyukiranga mu buvubuka bwo, n'omutima gwo gusanyukenga mu nnaku ez'obuvubuka bwo; tambulira mu makubo g'omutima gwo ne mu kulaba kw'amaaso go. Naye manya nga mu byonna, Katonda agenda kukusalira omusango.

¹⁰ Noolwekyo ggyawo okweraliikirira mu mutima era weggyeko emitawaana mu ggwe, kubanga obuvubuka n'amaanyi gaabwe butaliimu.

Omubuulizi 12

Ennaku ze Tumala ku Nsi

¹ Jjukiranga omutonzi wo mu nnaku ez'obuvubuka bwo, ng'ennaku embi tezinnakutuukako n'emyaka nga teginnasembera, mw'olyogerera nti, "Sizisanyukira";

² ng'enjuba n'obutangaavu, omwezi n'emmunyeenye nga tebinnafuuka kizikiza; nga n'ebire biweddemu enkuba;

³ abakumi b'enju mwe balikankanira, n'abasajja ab'amaanyi mwe bakutamizibwa, nga n'abo abasa baleseeyo okusa, kubanga batono, n'abo abalingiza mu butuli nga tebakyalaba;

⁴ nga n'enzigi ez'olekedde enguudo zigaddwawo, n'eddoboozi ly'okusa nga livumbbedde; ng'abasajja bagolokoka olw'eddoboozi ly'ennyonyi, naye nga ennyimba zaabwe zivumbedde;

⁵ nga batya buli kiwanvu n'akabi akali mu nguudo, ng'omubira gumulisizza, ng'enseenene yeewalula era nga tewakyali alimu keetaaga kino oba kiri. Omuntu n'agenda mu nnyumba ye gy'alimala ekiseera ekiwanvu n'abakungubazi ne babuna enguudo.

⁶ Jjukira omutonzi wo ng'omuguwa gwa ffeeza tegunnakutuka oba ebbakuli eya zaabu nga tennayatika, ng'ensuwa tennayatikira ku luzzi obanga ne nnamuziga tennamenyekera ku luzzi,

⁷ ng'enfuufu edda mu ttaka mwe yava, n'omwoyo ne gudda eri Katonda eyaguwa omuntu.

⁸ Obutaliimu! Obutaliimu! Omubuulizi bw'agamba, "Buli kintu butaliimu."

Ebikomererayo

⁹ Omubuulizi teyali mugezi kyokka, wabula yayigiriza n'abantu eby'amagezi. Yalowooza n'anoonyereza n'ayiiyaayo engero nnyingi.

¹⁰Omubuulizi yanoonyereza n'afuna ebigambo ebituufu byennyini, ne bye yawandiika byali byesimbu era nga bya mazima.

¹¹Ebigambo byabantu abagezi biri ng'emiwunda, engero zino ezakunjaanyizibwa omusumba omu ziri ng'emisumaali egyakomererwa ne ginywezebwba ennyo.

¹²Mwana wange weekuumé ekintu kyonna ekyongerwako. Okuwandiika ebitabo ebingi tekukoma, n'okuyiga okungi kukooya omubiri.

¹³Kale byonna biwuliddwa; eno y'enkomerero yaabyo: Tyanga Katonda okwatenga amateeka ge, kubanga ekyo omuntu ky'agwanira okukola.

¹⁴Kubanga Katonda alisala omusango olwa buli kikolwa; ekyo ekyakwekebwba, nga kirungi oba nga kibi.

Oluyimba

Oluyimba 1

¹ Oluyimba lwa Sulemaani olusinga ennyimba zonna.

Omwagalwa

² Leka annywegere n'emimwa gye kubanga okwagala kwo kusinga envinnyo,

³ n'amafuta go gawunya akaloosa akalungi; erinnya lyo liri ng'amafuta agattululwa, era abawala kyebava bakwagala.

⁴ Baako ne gy'ontwala, yanguwa! Kabaka ansembezezza kumpi nnyo antutte mu bisenge bye.

Abemikwano

Tunaasanyuka ne tukujagulizaamu; era tunaatendereza okwagala kwo okusinga envinnyo.

Omwagalwa

Nga batuufu okukwegomba!

⁵ Ndi muddugavu, ndi mulungi, Mmwe abawala ba Yerusaalemi muli ng'eweema ez'e Kedali, era ng'entimbe za Sulemaani.

⁶ Temuntunuulira kubanga ndi muddugavu, olw'okuba omusana gunjokezza. Batabani ba mmange baansunguwalira; ne bandagira okukuuma ennimiro ez'emizabbibu. Ennimiro yange ngigayaaliridde.

⁷ Ntegeeza ggwe gwe njagala, gy'oliisiza ekisibo kyo, ne gy'owumuliza endiga zo mu ssaawa ez'omu ttuntu. Lwaki mbeera ng'omukazi eyeebisce amaaso nga nninaanye ebisibo eby'abanywanyi bo?

Abemikwano

⁸ Bw'oba nga tomanyi, ggwe omukyala asinga bona obulungi, goberera ekkubo endiga lye zikutte, ogende oliisize embuzi zo ento, okumpi n'eweema z'abasumba.

Owoomukwano

⁹ Omwagalwa wange, nkugeraageranya n'embalaasi esika amagaali ga Falaawo.

¹⁰ Amatama go galabika bulungi ng'oyambadde ebikomo eby'oku matu, n'ensingo yo nerabika bulungi ng'erimu eby'omu bulago eby'omuwendo.

¹¹ Tunaakukolera eby'oku matu ebya zaabu, nga birina amapeesa aga ffeeza.

Omwagalwa

¹² Kabaka bwe yali ng'atudde ku mmeeza ye, akawoowo kange ne kamuwunyira bulungi.

¹³Muganzi wange ali ng'ensawo eya kaloosa aka mooli gye ndi, ng'awummulidde mu kifuba kyange.

¹⁴Muganzi wange ali ng'ekiganda eky'ebimuli ebya kofera ebivudde mu nnimiro ez'emizabbibu ez'e Engedi.

Owoomukwano

¹⁵Laba, oli mubalagavu, omwagalwa wange oli mubalagavu olabika bulungi. Amaaso go mayiba.

Omwagalwa

¹⁶Olabika bulungi muganzi wange, era onsanyusa. Ekitanda kyaffe kya muddo muto.

Owoomukwano

¹⁷Emikiikiro gy'ennyumba yaffe mivule, n'enzooba zaffe nkanaga.

Oluyimba 2

¹Ndi kimuli kya looza ekya Saloni, eddanga ery'omu biwonvu.

Owoomukwano

²Ng'eddanga mu maggwa, gwe njagala ennyo bw'ali bw'atyo mu baweereza abakazi.

Omwagalwa

³Ng'omucungwa mu miti egy'omu kibira, aŋŋanza bw'ali bw'atyo mu bavubuka. Neesiima okutuula mu kisiikirize kye, n'ekibala kye kimpomera.

⁴Yantwala ku kijjulo, n'okwagala kwe ne ku mmaamira.

⁵Munzizeemu amaanyi n'ezabbibu enkalu, mumbuddeebudde n'emicungwa kubanga okwagala kunzirisizza.

⁶Omukono gwe ogwa kkono guli wansi wa mutwe gwange, n'omukono gwe ogwa ddyo gumpambatira.

⁷Mmwe abawala ba Yerusaalemi, mbakuutira, ng'empeewo n'enjaza ez'omu ttale, temusisimula newaakubadde okuzuukusa okwagala okutuusa nga kweyagalidde.

⁸Wuliriza omwagalwa wange, Laba, ajja ng'abuukirabuukira ku nsozi, ng'azinira ku busozi.

⁹Omwagalwa wange ali ng'empeewo oba ennangaazi ento. Laba ayimiridde emabega w'olukomera lwaffe, Alingiza mu madirisa, alabikira mu mulimu oglukibwa ogw'omu ddirisa.

¹⁰Omwagalwa wange yaŋŋamba nti, "Golokoka, Owoomukwano, omulungi wange, ojje tugende,

¹¹kubanga laba ttoggo aweddeko, n'enkuba eweddeyo.

¹²Ebimuli bimulisizza, n'ebiro eby'okuyimba bituuse, era n'okukaaba kw'amayiba kuwulirwa mu nsi.

¹³Omutiini gubala ettiini zaagwo, n'emizabbibu gimulisizza ne gibunya akawoowo kaagyo. Golokoka Owoomukwano, omulungi wange ojje tugende."

Owoomukwano

¹⁴Ggwe ejjiba lyange, eribeera mu njatika ez'omu njazi, mu bwekwewkero obw'amayinja, ndaga amaaso go, ka mpulire eddoboozi lyo, kubanga eddoboozi lyo ddungi nnyo, n'amaaso go gasanyusa.

¹⁵Tukwatire ebibe, obube obutono, obwonoona ennimiro ez'emizabbibu, kubanga ennimiro zaffe ez'emizabbibu zimulisizza.

Omwagalwa

¹⁶Muganzi wange, wange nzekka, era nange ndi wuwe; aliisiza ekisibo kye mu malanga,

¹⁷okutuusa obudde nga bukedde n'ebisiikirize nga biddukidde ddala; okyuke omwagalwa wange obe ng'empeewo oba ennangaazi ento ku busozi obw'e Beseri.

Oluyimba 3

¹Ekiro kyonna nga ndi ku kitanda kyange, nalindirira emmeeme yange gw'eyagala, ne munoonya naye saamulaba.

²Nnaagolokoka ne ntambulatambulako mu kibuga, mu nguudo ne mu bifo ebigazi; nanoonya emmeeme yange gw'eyagala, ne nnindirira naye saamulaba.

³Abakuumi b'ekibuga abaali balawuna mu kibuga, ne bansisinkana, ne mbabuuza nti, "Mundabidde ku oyo emmeeme yange gw'eyagala?"

⁴Twali twakayisiñjanya, ne ndaba oyo emmeeme yange gw'eyagala. Ne munywegera ne simuganya kugenda, okutuusa lwe namuleeta mu nnyumba ya mmange, ne mutwala mu kisenge ky'oyo eyanzaala.

⁵Mbakuitira mmwe abawala ba Yerusaalemi, ng'empeewo n'enjaza ez'oku ttale, temusisimula newaakubadde okuzuukusa okwagala okutuusa nga kwesiimidde.

⁶Ani oyo ajja ng'ava mu ddungu, afaanana ng'empagi ey'omukka, asaabye ebyakaloosa ebya mooli n'omugavu, okuva mu byakaloosa byonna eby'omusuubuzi?

⁷Laba, kye kigaali kya Sulemaani, ekiwererekdwako abasajja ab'amaanyi nga nkaaga, abalwanyi abazira abasingayo mu Isirayiri,

⁸bonna balina ebitala, era bamanyirivu mu kulwana; buli omu n'ekitala kye mu kiwato kye, nga beetegekedde entiisa ey'ekiro.

⁹Kabaka Sulemaani yeekolera ekigaali eky'emiti egy'omu Lebanooni.

¹⁰Empagi zaakyo yazisiigako ffeeza, ne wansi waakyo nga wa zaabu, n'entebe yaamu ng'eriko olugoye lwa ffulungu; ne munda nga mwaliire bulungi n'okwagala, okw'abawala ba Yerusaalemi.

¹¹Mufulume, mmwe abawala ba Sayuuni, mulabe ku Kabaka Sulemaani ng'ayambadde engule, engule nnyina gye yamutikkira ku lunaku olw'embaga ye, ku lunaku omutima gwe kwe gwasanyukira.

Oluyimba 4

Owoomukwano

¹Ng'olabika bulungi, gwe njagala, laba ondabikidde bulungi. Amaaso go mayiba mu lugoye mw'ogabisse. Enviiri zo ziri ng'eggana ly'embuzi ezisereneta okuva ku lusozi Gireyaadi.

²Amannyo go gali ng'ekisibo ky'endiga nga kye zijje zisalibweko ebyoya, nga ziva okunaazibwa. Buli emu nnongo eri n'ennongo ginnaayo, so tewali eri yokka.

³Emimwa gyo giri ng'ewuzi ey'olugoye olutwakaavu; n'akamwa ko kandabikira bulungi. Amatama go mu lugoye lw'ogabisseeko gali ng'ekitundu ky'ekkomamawanga.

⁴Ensingo yo eri ng'omulongooti gwa Dawudi, ogwatereezebwa obulungi; ne ku gwo nga kuliko engabo lukumi, zonna nga ngabo z'abasajja abalwanyi.

⁵Amabeere go gombi gali ng'abaana b'empeewo, ab'empeewo, nga balongo, abaliira mu malanga.

⁶Okutuusa obudde nga bukedde, n'ebisiikirize nga biweddewo, ndigenda ku lusozi olunene olwa mooli ne ku kasozi ak'omugavu.

⁷Ng'olabika bulungi wenna, omwagalwa wange, toliiko bbala na limu.

⁸Jjangu tuve mu Lebanooni, omugole wange, jjangu tuve mu Lebanooni. Lengera okuva ku ntikko ya Amana, n'okuva ku ntikko ya Seniri ne ku ntikko ya Kerumooni, n'okuva mu mpuku ey'empologoma, ne ku nsozi ez'engo.

⁹Osenzesenze omutima gwange, mwannyinaze, omugole wange; otutte omutima gwange, ne munye y'eriiso lyo gy'onkubye, n'omukuufu ogumu ogw'omu bulago bwo.

¹⁰Ng'okwagala kwo kulungi mwannyinaze, omugole wange, okwagala kwo nga kusinga nnyo envinnyo, n'akawoowo ak'amafuta go kasinga eby'akawoowo eby'engeri zonna obulungi.

¹¹ Emimwa gyo gitonnya obuwoomi ng'ebisenge eby'omubisi gw'enjuki, omugole wange; amata n'omubisi gw'enjuki biri wansi w'olulimi lwo. Akaloosa ak'ebiyambalo byo kali ng'akawoowo ak'e Lebanooni.

¹² Oli nnimiro eyasimbibwa, mwannyinaze, omugole wange, era oli luzzi olwasibibwa, ensulo eyateekebwako akabonero.

¹³ Ebimera byo nnimiro ya mikomamawanga, erina ebibala byonna eby'omuwendo, ne kofera n'emiti egy'omugavu

¹⁴ n'omugavu ne kalikomu, ne kalamo ne kinamoni, n'emiti egy'ebika by'omugavu byonna, ne mooli ne alowe, wamu n'ebi'akawoowo byonna ebisinga obulungi.

¹⁵ Oli nsulo ya nnimiro, oluzzi olw'amazzi amalamu, olukulukuta okuva mu Lebanooni.

Omwagalwa

¹⁶ Zuukuka gwe empewo ey'obukiikkono, naawe empewo ey'obukiikkaddyo jjangu. Mukuntire ku nnimiro yange, akaloosa, kaayo akalungi kasaasaane wonna, Muleke muganzi wange ajje mu nnimiro ye, alye ebibala byamu eby'omuwendo.

Oluyimba 5

Owoomukwano

¹ Nzize mu nnimiro yange mwannyinaze, omugole wange; nkuŋjaanyiza mooli yange n'ebi'akawoowo byange. Ndiddie ebisenge byange eby'omubisi gw'enjuki gwange ne nywa n'omubisi gwange, Nywedde wayini wange n'amata gange.

Abemikwano

Abemikwano mulye munywe, munywere ddala, mmwe abaagalana.

Omwagalwa

² Nnali ngalamidde, ng'omutima gwange guwulira. Ne mpulira muganzi wange ng'akonkona, n'ayogera nti, "Nziguilaawo mwannyinaze, Owoomukwano, ejjiba lyange, owe wange ataliiko bbala, kubanga omutwe gwange gutobye omusulo, n'enviiri zange zibisiwadde olw'obunnyogovu."

³ Nziggynko ekooti yange, nnaagyambala ntua nate? Nanaabye ebigere, nnaddayo ntua mu ttaka gye binaddugalira?

⁴ Muganzi wange bwe yakwata ku munyolo, omutima gwange ne gubuukabuuka.

⁵ Ne ngolokoka okuggulirawo muganzi wange, emikono gyange nga gitonnya mooli, n'engalo zange nga zikulukuta mooli, ku minyolo gy'ekufulu.

⁶ Ne njenda okuggulirawo muganzi wange, naye muganzi wange ng'avuddewo, yeetambulidde. Omutima gwange gwasanyuka bwe nnawulira eddoboozi lye. Ne munoonya naye n'ambula, ne mukoowoola naye nga taddamu.

⁷ Abakuumi baansanga bwe baali nga balawuna mu kibuga; baankuba, ne bandeetako ebinuubule, ne batwala n'ekyambalo kyange, abasajja abo abakuuma bbugwe.

⁸ Mmwe abawala ba Yerusaalemi, mbakuutira nti bwe mulaba ku muganzi wange, mumutegeeze ng'okwagala kwange gy'ali bwe kunzita.

Abemikwano

⁹ Owange, kiki muganzi wo ky'alina kyasinza abalungi abalala ggwe omukazi akira abalala obulungi? Kiki muganzi wo kyasinza abalala n'okutukuutira n'otukuutira bw'otyo?

Omwagalwa

¹⁰ Muganzi wange alabika bulungi nnyo era mumyufu, atabula ne mu bantu omutwalo.

¹¹ Omutwe gwe gwa zaabu ennongoose ennyo; n'enviiri ze zirimu amayengo, era nzirugavu nga nnamujjonoona.

¹² Amaaso ge gali ng'amayiba ku mabbali g'emigga eg'yamazzi, agaanaazibwa n'amata, ne gaba ng'amayinja ag'omuwendo omungi.

¹³ Amatama ge gali ng'emisiri eg'yobuwoo, obuleeta akaloosa akalungi. Emimwa gye giri ng'amalanga agakulukuta mooli.

¹⁴ Emikono gye giri ng'emitayimbwa egya zaabu egiteebewamu amayinja ag'omuwendo. Omubiri gwe guli ng'amasanga amayooyote agatoneddwa ne safiro.

¹⁵ Amagulu ge gali ng'empagi ez'amayinja aganyirira ezsimbibwa mu zaabu ennungi. Mu ndabika afaanana Lebanooni omulungi ng'emivule gyayo.

¹⁶ Enjogera ye mpomerevu, weewaawo awamu n'ebyo byonna ayagalibwa. Ono ye muganzi wange, ye mukwano gwange; mmwe abawala ba Yerusaalemi.

Oluyimba 6

Abemikwano

¹ Muganzi wo alaze wa, ggwe akira abakyala bona obulungi? Muganzi wo yakutte lya wa tumukunoonyezeeko?

Omwagalwa

² Muganzi wange aserengese mu nnimiro ye, mu misiri eg'yebirime ebyakaloosa, okulabirira ennimiro ye n'okunoga amalanga.

³ Muganzi wange, wange, nange ndi wuwe; anoonyeza mu malanga.

Owoomukwano

⁴ Oli mubalagavu nga Tiruza, omwagalwa wange, omulungi nga Yerusaalemi, era ow'ekitiibwa ng'eggye eririna ebendera.

⁵ Tontunuulira nnyo kubanga amaaso go gantawanya. Enviiri zo ziri ng'ekisibo eky'embuzi, eziserengeta okuva e Gireyaadi.

⁶ Amannyo go gali ng'ekisibo eky'endiga eziva okunaazibwa; buli emu nnongo eri n'ennongo ginnaayo, so tewali eri yokka.

⁷ Obwenyi bwo bw'obisse mu lugoye, buli ng'ebitundu by'amakomamawanga.

⁸ Ne bwe walibeerawo bakabaka abakazi nkaaga, n'abazaana kinaana, n'abawala embeerera abatamanyiddwa muwendo,

⁹ ejjiba lyange, owange ataliiko bbala, ow'enjawulo, mwana muwala eyazaalibwa yekka, ayagalibwa ennyo nnyina okusinga abalala, y'ansingira mu bona. Abawala baamulaba ne bamuyita wa mukisa; bakabaka abakazi n'abazaana baamutenda.

Abemikwano

¹⁰ Ani ono alabika ng'emmambya, omulungi ng'omwezi, atangalijja ng'enjuba, alina ekitiibwa ng'eky'emunnyeenye?

Owoomukwano

¹¹ Naserengeta mu nnimiro ey'emiti egyptensigo okwetegereza okumulisa okw'ebimera eby'omu kiwonvu, okulaba omuzabbibu obanga gwamulisa, n'okulaba emikomamawanga oba nga gyamera.

¹² Bwe nnali nkyali awo emmeeme yange n'egenda eri amagaali ag'obwakabaka ag'omu bantu bange.

Abemikwano

¹³ Komawo, Komawo, ggwe Omusulamu; komawo, komawo tukutunuleko.

Owoomukwano

Lwaki mutunuulira Omusulamu ng'abali ku mazina ga Makanayimu?

Oluyimba 7

¹ Ebigere byo nga birabika bulungi mu ngatto, ggwe omumbejja! Amagulu go gali ng'amayinja ag'omuwendo, omulimu gw'omuweesi omukalabakalaba.

² Ekkundi lyo kibya kyekulungirivu, ekitaggwaamu nvinnyo entabule obulungi. Ekiwato kyo ntuumu ya ηjaano eyeetooloddwa amalanga.

³ Amabeere go gali ng'abaana b'empeewo, abalongo.

⁴ Ensingo yo eri ng'omunaala ogw'amasanga. Amaaso go gali ng'ebidiba eby'omu Kesuboni ebiri ku mulyango ogw'e Basulabbimu. Ennyindo yo eri ng'omulongooti ogw'e Lebanooni ogwolekera Ddamasiko.

⁵ Omutwe gwo gukuwoomera ng'olusozi Kalumeeri, n'enviiri zo ziranga emiguwa egy'effulungu; Kabaka asendebwasendebwa ebintu byakwo.

⁶ Ng'olabika bulungi, ng'osanyusa ggwe omwagalwa n'obulungi bwo.

⁷ Oli muwanvu ng'olukindu, n'amabeere go gali ng'ebirimba eby'ebibala byakwo.

⁸ Nayogera nti, "Ndirinnya olukindu, era ndikwata ebibala byalwo." Amabeere go gabeere ng'ebirimba eby'oku muzabbibu, n'akawoowo ak'omu kamwa ko ng'ebibala eby'omucungwa

⁹ n'akamwa ko nga nvinnyo esinga obulungi.

Omwagalwa

Ne wayini amirwe bulungi muganzi wange, ng'akulukuta mpola mpola ku mimwa gy'abo abeebase.

¹⁰ Ndi wa muganzi wange, era naye anjagala nnyo.

¹¹ Jjangu, muganzi wange tugende ebweru w'ekibuga, tusuleko mu byalo.

¹² Tukeere tugende mu nnimiro z'emizabbibu, tulabe obanga emizabbibu gimulisizza, obanga n'ebimuli byagwo byanjuluzza, obanga n'emikomamawanga gimulisizza, era eyo gye nnaakulagira okwagala kwange.

¹³ Amadudayimu gawunya akawoowo, ne ku miryango gyaffe waliwo ebibala ebisinga obulungi, Ebyakanogebwa awamu n'ebikadde, bye nkuterekedde muganzi wange.

Oluyimba 8

¹ Singa wali muganda wange eyakuzibwa mmange era eyayonka amabeere ga mmange, nandikusanze ebweru nandikunywegedde ne wataba n'omu annyooma.

² Nandikukuleembedde ne nkuleeta mu nnyumba ya mmange, oyo eyangigiriza. Nandikuwadde wayini okunywa ng'alimu ebyakaloosa, omubisi ogw'amakomamawanga gange.

³ Omukono gwe ogwa kkono guli wansi wa mutwe gwange n'omukono gwe ogwa ddyo gumpambaatira.

⁴ Mmwe abawala ba Yerusaalemi mbakuutira, temusiikuula newaakubadde okuzuukusa okwagala okutuusa ng'ekiseera ekituufu kituuse.

Abemikwano

⁵ Ani oyo gwe tulengera ng'ava mu ddungu nga yeesigamye muganzi we?

Omwagalwa

Nakuzuukusa ng'oli wansi w'omuti ogw'omucungwa. Eyo maama wo gye yafunira olubuto era eyo maama wo gye yakuzaalira mu bulumi obungi.

⁶ Nteeka ng'akabonero ku mutima gwo, era ng'akabonero ku mukono gwo, kubanga okwagala kwa maanyi ng'okufa, obuggya bwakwo buli ng'obusungu obw'emagombe. Kwaka ng'ennimi ez'omuliro, omuliro ogwaka n'amaanyi ennyo.

⁷ Amazzi amangi tegamalaawo nnyonta ya kwagala n'emigga tegiyinza kukumalawo. Singa omuntu awaayo obugagga bwe bwonna obw'ennyumba ye okufuna okwagala, asekererwa nnyo.

Abemikwano

⁸ Tulina muto waffe atannamera mabeere, naye tulikola tutya bw'alituuka okwogerezebwa?

⁹ Singa abadde bbugwe twandimuzimbyeko eminaala egya ffeeza, singa abadde luggi twandimuggalidde na mivule.

Omwagalwa

¹⁰ Ndi bbugwe era n'amabeere gange gali ng'ekitikkiro, noolwekyo mu maaso ge, mmufuukidde aleeta emirembe.

¹¹ Sulemaani yalina ennimo y'emizabbibu e Baaluka Kamooni, n'agisigira abalimi. Buli omu ku bo yamusalira ebitundu bya ffeeza lukumi.

¹² Ennimo yange ey'emizabbibu, yange, ebitundu olukumi bibyo ggwe Sulemaani, ebitundu ebikumi bibiri by'abo abalabirira ennimo.

Owoomukwano

¹³ Gwe abeera mu nnimo ne mikwano gyo nga weebali, ka mpulire eddoboozi lyo.

Omwagalwa

¹⁴ Yanguwa okuvaayo eyo, odduke mangu ng'empeewo oba ng'ennangaazi ento, oddukire ku nsozi ezijjudde ebyakaloosa.

Isaaya

Isaaya 1

1 Okwolesebwa kwa Isaaya, mutabani wa Amozi, kwe yafuna okukwata ku Yuda ne Yerusaalemi mu bufuzi bwa Uzziya, ne Yosamu, ne Akazi ne Keezeekiya, bassekabaka ba Yuda.

Eggwanga Ejjeemu

2 Wulira ggwe eggulu, mpuliriza ggwe ensi, kubanga bw'ati MUKAMA bw'ayogera nti, "Nayonsa ne ndera abaana naye ne banjeemera.

3 Ente emanya nannyini yo n'endogoyi emanya ekisibo kya mukama waayo, naye Isirayiri tammanyi, abantu bange tebanorgeera."

4 Woowe! Eggwanga erijjudde ebibi, abantu abajjudde obutali butuukirivu, ezzadde eryabakola ebibi, abaana aboonoonyi! Balese MUKAMA banyoomye Omutukuvu wa Isirayiri, basenguse bamuvuddeko bamukubye amabega.

5 Lwaki mweyongera okujeema? Mwagala mwongere okubonerezebwa? Omutwe gwonna mulwadde, n'omutima gwonna gunafuye.

6 Okuva mu mala g'ekigere okutuuka ku mutwe temuli bulamu wabula ebiwundu, n'okuzimba, n'amabwa agatiiriika amasira agatanyigibwanga, okusibibwa, wadde okuteekebwako eddagala.

7 Ensi yammwe esigadde matongo, ebibuga byammwe byokeddwa omuliro, nga nammwe bennyini mulaba. Bannamawanga balidde ensi yammwe, era ezise kubanga bannaggwanga bagisudde.

8 Omuwala wa Sayuuni alekeddwa ng'ensiisira esigadde mu nnimiro y'emizabbibu, ng'ekiwummulirwamu mu nnimiro y'emyungu, ng'ekibuga ekizingiziddwa.

9 Singa MUKAMA ow'Eggye teyatulekerawo bantu abatonotono abaasigalawo twandibadde nga Sodomu, twandifuuse nga Ggomola.

10 Muwulirize ekigambo kya Katonda mmwe abafuzi ba Sodomu! Musseeyo omwoyo eri okuyigiriza kwa Katonda waffe mmwe abantu b'e Ggomola!

11 "Ssaddaaka enkumu ze munsalira zingasa ki? Nkooye endiga ennume enjokye eziweebwayo, so sisanyukira musaayi gwa nte, newaakubadde ogw'abaana b'endiga, newaakubadde ogw'embuzi ennume," bw'ayogera MUKAMA.

12 Bwe mujja mu maaso gange, ani aba abayise ne mujja okulinnyirira empya zange?

13 Mulekeraawo okuleeta ssaddaaka zammwe ezitalimu; obubaane bwammwe bwa muzizo gye ndi. Omwezi Ogubonese ne Ssabbiiti n'enkuŋjaana zammwe zижjudde obutali butuukirivu.

¹⁴ Emyezi gyammwe Egibonese n'embaga zammwe ez'ennaku entukuvu, emmeeme yange ebikyaye, binfuukidde omugugu, nkooye okubigumiikiriza.

¹⁵ Bwe munaayimusanga emikono gyammwe musabe nnaabakwekanga amaaso gange, era ne bwe munaasabanga ennyo siiwulirenga kubanga emikono gyammwe gisaabaanye omusaayi.

¹⁶ Munaabe, mwetukuze muggirewo ddala ebikolwa byammwe ebibi gye ndi, mulekeraawo okukola ebibi.

¹⁷ Muyige okukola obulungi, musalenga emisango n'amazima, mudduukirirenga abajoogebwa, musalenga omusango gw'atalina kitaawe, muwolerezenga bannamwandu.

¹⁸ "Mujje nno tukubaganye ebirowoozo," bw'ayogera MUKAMA; "ebibi byammwe ne bwe biba ng'olugoye olumyufu binaafuuka byeru ng'omuzira, ne bwe binaaba bitwakaavu nga langi emyufu enkwafu, binaatukula ng'ebyoya by'endiga.

¹⁹ Bwe munaagondanga ne muwulira, munaalyanga ebirungi eby'ensi;

²⁰ naye bwe munaagaananga ne mujeemanga ekitala kinaabalyanga," kubanga akamwa ka MUKAMA ke kakyogedde.

²¹ Laba ekibuga ekyesigwa bwe kifuuse ng'omwenzi! Oyo eyasalanga emisango mu bwenkanya! Obutuukirivu bwatuulanga mu ye, naye kaakano batemu bennyini nnyini!

²² Effeeza yo efuuse masengere, wayini wo afuuse wa lujjulungu.

²³ Abafuzi bo bajeemu, mikwano gya babbi, bonne bawoomerwa enguzi, era banoonya kuweebwa birabo; tebayamba batalina ba kitaabwe, so n'ensonga za bannamwandu tebazifaako.

²⁴ Noolwekyo kyava ayogera Mukama, MUKAMA ow'Eggye, ow'amaanyi owa Isirayiri nti, "Ndifuka obusungu ku balabe bange, era ne nesasuza abo abankywawa.

²⁵ Era ndikukwatamu n'omukono gwange, ne nnoongoosereza ddala amasengere go gonna ne nkuggyamu ebitali birungi byonna.

²⁶ Era ndikomyawo abalamuzi bo ng'olubereberye n'abo abakuwa amagezi, nga bwe kyalilokusooka. Olwo olyoke oyitibwe ekibuga eky'obutuukirivu, ekibuga ekyesigwa."

²⁷ Sayuuni alinunulibwa lwa bwenkanya, n'abantu baamu abalyenanya mu butuukirivu.

²⁸ Naye abeewaggula n'abakozi b'ebibi balizikirizibwa wamu, n'abo abava ku MUKAMA Katonda, balimalibwawo.

²⁹ "Kubanga mulikwatibwa ensonyi olw'emit mwe mwenyumiririzanga, n'olw'ennimiro ze mweroboza.

³⁰ Kubanga mulibeera ng'omuvule oguwotoka era ng'ennimiro etaliimu mazzi.

³¹ N'omusajja ow'amaanyi alifuuka ng'enfuuzi, n'omulimu gwe ng'akasasi akavudde ku lyanda, era byombi biriggiira wamu so tewaliba azikiza omuliro ogwo."

Isaaya 2

Olusozi Iwa MUKAMA

¹ Kuno kwe kwolesebwa Isaaya omwana wa Amozi kwe yalaba ku Yuda ne Yerusaalemi.

² Olulituuka mu nnaku ez'oluvannyuma olusozi okuli ennyumba ya MUKAMA Katonda lulinywezebwya lusinge ensozi zonna okugulumira, luliyimusibwa lusukke ku ndala zonna, era amawanga gonna galilwolekera.

³ Abantu bangi balijja bagambe nti, Mujje twambuke tulinnye ku lusozi iwa MUKAMA, mu nnyumba ya Katonda wa Yakobo, alyoke atuyigirize amakubo ge, tulyoke tutambulire mu mateeka ge. Kubanga MUKAMA aliteeka amateeka ng'asinziira mu Sayuuni, era mu Yerusaalemi abayigirize ekigambo kye.

⁴ Alisala enkaayana z'amawanga, aliramula emisango gy'abantu bangi, era ebitala byabwe balibiwesaamu enkumbi, n'amafumu gaabwe bagaweeseemu ebiwabyo. Eggwanga teririymusa kitala ku ggwanga linnaalyo, so tebalyetegeka kulwana ntalo nate.

MUKAMA Ayita Ennyumba Ya Yakobo Okwenenya

⁵ Ggwe ennyumba ya Yakobo, mujje tutambulire mu kitangaala kya MUKAMA Katonda.

⁶ Wayabulira abantu bo ab'ennyumba ya Yakobo, kubanga eggwanga lijudde obusamize obuva mu buvanjuba, n'obulaguzi obuli nga obw'omu Bafirisuuti, era basizza kimu ne bannamawanga.

⁷ Ensi yaabwe ejjudde effeeza ne zaabu, n'obugaggga bwabwe tebuliiko kkomo: ensi yaabwe ejjudde embalaasi, era erimu n'amagaali g'embalaasi mangi nnyo.

⁸ Ensi yaabwe ejjudde bakatonda ababumbe, basinza omulimu gw'emikono gyabwe bo, engalo zaabwe gwe zeekolera.

⁹ Kale omuntu wa kukkakkanyizibwa, omuntu wa kussibwa wansi. MUKAMA, tobasonyiwa!

¹⁰ Mugende mwekweke mu njazi, mwekweke mu binnya wansi mu ttaka, nga mudduka entiisa ya MUKAMA Katonda, nga mudduka entiisa y'ekitiibwa ky'obukulu bwe.

¹¹ Olunaku lujja okweyisa kw'omuntu n'amalala ge lwe birizikirizibwa, era MUKAMA Katonda yekka yaligulumizibwa ku olwo.

¹² Kubanga MUKAMA Katonda ow'Eggye alina olunaku lw'ategese eri abo bona ab'amalala era abeewanise, eri ebyo byonna eby'egulumiza ebijjudde okwemanya n'okwewulira.

¹³ Alizikiriza emit gy'omu Lebanooni, emiwanvu emigulumivu, n'emivule gyonna egya Basani.

¹⁴ Era n'ensozi zonna empanvu, n'obusozi bwonna obugulumivu.

¹⁵ Na buli mulongooti gwonna omuwantu, na buli bbugwe gwe bakomese.

¹⁶ Alizikiriza emmeeri zonna ez'e Talusiisi, n'ebifaananyi byonna ebisiige eby'omuwendo omungi.

¹⁷ Era okwegulumiza kw'abantu kulijemulukuka, n'amalala g'abantu galissibwa; era MUKAMA Katonda yekka yaligulumizibwa ku lunaku olwo.

¹⁸ N'ebifaananyi bye basinza birizikirizibwa ddala ku olwo.

¹⁹ Abantu balidduka ne beekweka mu mpuku mu mayinja, ne mu binnya mu ttaka, nga badduka entiisa n'ekitiibwa ky'obukulu bwa MUKAMA Katonda, bwaliyimuka okukankanya ensi n'amaanyi.

²⁰ Ku lunaku olwo abantu balisuuulira ddala bakatonda baabwe abakole mu ffeeza, n'abakole mu zaabu, be beekolera nga ba kusinzanga, ne babakanyuga eri emmese n'eri ebinyira.

²¹ Balidduka ne beekukuma mu mpuku ez'amayinja amaatifu nga badduka entiisa n'ekitiibwa ky'obukulu bwa MUKAMA Katonda, bwaliyimuka okukankanya ensi.

²² Mulekeraawo okwesiga omuntu alina omukka obukka mu nnyindo ze. Kiki ennyo kyali?

Isaaya 3

Yerusaalemi ne Yuda Bisalirwa Omusango

¹ Laba kaakano, Mukama, MUKAMA Katonda ow'Eggye, aggya ku Yerusaalemi ne ku Yuda ekibeesiguza ne kwe banyweredde, ekibeesiguza kyonna k'ebeere mmere, ka gabe mazzi.

² Omusajja ow'amaanyi, n'omusajja omulwanyi omuzira, omulamuzi, ne nnabbi, n'omulaguzi, n'omukadde.

³ Omuduumizi akulira ekibinja ky'amakumi ataano, n'omuwi w'amagezi, omulogo, omufuusa omugezigezi.

⁴“Era ndifuula abalenzi obulenzi okuba abafuzi baabwe, n’abaana obwana balibafuga.”

⁵ Era abantu balijooga bannaabwe, buli muntu anyigirize munne, ne muliraanwa anyigirize muliraanwa we. Abato baliyisa mu bakulu amaaso n’oyo omuntu ataliiko bw’ali ajooge omuntu ow’ekitiibwa.

⁶Ekiseera kirituuka omusajja agambe muganda we nti, “Ggwe alina ku ngoye ba omukulembeze waffe, n’ebizibu bino ggwe oba obyetikka!”

⁷ Naye ku olwo lwennyini aliddamu nti, “Si nze n’aba ow’okubawonya, mu nnyumba yange temuli mmere, wadde ebyambalo. Temumpa kukulembera bantu!”

⁸ Kubanga Yerusaalemi kizikiride ne Yuda agudde! Kubanga ebigambo byabwe byonna n’ebikolwa biwakanya MUKAMA Katonda, bityoboola ekitiibwa kye.

⁹ Engeri gye batunulamu eragira ddala nga bwe balina omusango, era boolesa ekibi kyabwe nga Sodomu awatali kukweka n’akatono. Zibasanze! Kubanga bo bennyini be beereeteedde okuzikirira.

¹⁰ Gamba abatuukirivu nti bo tebaabeeko mutawaana, kubanga baakuwoomerwa ebibala by’ebikolwa byabwe.

¹¹ Zisanze abakozi b’ebivve! Banaatuuka mu kuzikirira! Balisasulibwa emikono gyabwe kye gikoze.

¹² Abantu bange banyigirizibwa abaana abato, abakazi kaakano be babafuga. Woowe! Abantu bange bakyamizibwa abakulembeze baabwe era babatabulatabula okubaggya mu kkubo ettuufu.

¹³ MUKAMA Katonda ali mu kifo kye mu mbuga, ayimiridde okusalira abantu be omusango.

¹⁴ MUKAMA Katonda asala omusango gw’abakadde n’abakulembeze b’abantu be. “Mmwe mwayonoona ennimiro yange ey’emizabbibu. Ebyanyagibwa ku baavu biri mu nnyumba zammwe.

¹⁵ Lwaki mulinnyirira abantu bange, Iwaki mutulugunya abaavu?” bw’ayogera MUKAMA Katonda Ayinzabyonna.

¹⁶ MUKAMA Katonda agamba nti, “Abakazi b’omu Sayuuni beemanyi, era batambula balalambazza ensingo nga batunuza bukaba. Batambula basiira nga bavuza obukomo bw’oku magulu gaabwe.

¹⁷Mukama kyaliva aleeta amabwa ku mitwe gy’abakazi ba Sayuuni, ne gifuuka gyा biwalaata.”

¹⁸ Olunaku lujja Mukama lwaliggya ku bakazi b'omu Yerusaalemi ebintu byonna ebibaleetera amalala, ebikomo by'oku magulu, ebitambaala ebibikka ku mitwe, n'obukuufiira,

¹⁹ ebyokumatu, ebyambalwa mu bulago, n'obutimba bw'omu maaso,

²⁰ ebyokumitwe, ebyokumikono, ebyomukiwato,

²¹ empeta ez'oku ngalo n'ez'omu nnyindo,

²² engoye ennungi, n'eminagiro, n'amaganduula, n'obusawo,

²³ n'endabirwamu, n'engoye ez'obutimba, n'eza linena, n'ebitambaala eby'oku mitwe ebinaanikiddwa n'amayinja ag'omuwendo, n'engoye ezibabikka.

²⁴ Mu kifo ky'akaloosa walibaawo kuwunya kivundu, awandibadde enkoba ennungi wabeeewo biguwa, n'awaali enviiri ennongoose obulungi wabeeewo kiwalaata, mu kifo ky'engoye babeere mu nziina, n'awaali obulungi waddewo obulambe.

²⁵ Abasajja bo balittibwa kitala, abalwanyi bo abazira bagwire mu lutalo.

²⁶ N'enzigi za Sayuuni zirikaaba ne zikungubaga era ekibuga kyennyini kiriba ng'omukazi alekeddwa obwerefere ng'atudde mu ttaka.

Isaaya 4

¹ Ekiseera ekyo bwe kirituuka abakazi musanvu balyekwata omusaja omu nga boogera nti, Tuyitbwenga erinnya lyo, otuggyeko ekivume. Tunenoonyezanga emmere yaffe era twenoonyeze n'ebokwambala.

Yerusaalemi Kizzibwa Obuggyga

² Ku lunaku luli ettabi lya MUKAMA Katonda liriba ddungi era lya kitiibwa, era n'ebibala by'ensi biryeyagaza nnyo Abayisirayiri abaasigalawo.

³ Era buli alisigala mu Sayuuni na buli alisigala mu Yerusaalemi aliyitibwa mutukuvu, buli muntu alibalirwa mu balamu mu Yerusaalemi.

⁴ Mukama aliggyawo obutali butuukirivu bw'abakazi ba Sayuuni, era n'omwoyo ogusala ensonga n'omwoyo ogwokya, alisangulawo amatondo g'omusaayi mu Yerusaalemi.

⁵ Olwo MUKAMA Katonda atondewo ekire mu budde obw'emisana, n'omukka n'okumasaamasa ng'omuliro ogwaka ekiro ku kifo kyonna eky'olusozi Sayuuni ne ku bantu bonna abakunjaaniddeko; kubanga ku byonna era wonna kunaaba kubikkiddwako ekitiibwa kya Katonda.

⁶ Era kiribeera ekibikka n'ekisiikirize ekiziyiza ebbugumu ly'emisana, era ekiddukiro omwewogomebwa kibuyaga n'enkuba.

Isaaya 5

Olugero Iw'Ennimoiro y'Emizabbibu

¹ Ka nnyimbire omwagalwa wange oluyimba olukwata ku nnimiro ye ey'emizabbibu. Omwagalwa wange yalina nnimiro ey'emizabbibu ku lusozi olugimu.

² Era n'agirima n'agiggyamu amayinja gonna, n'agisimbamu emizabbibu egisinga obulungi. Era wakati mu yo n'azimbamu ebigulumu okulengererwa. N'agisimamu n'essogolero n'agisuubira okubala emizabbibu emirungi naye n'ebala emizabbibu nga si mirungi n'akatono.

³ "Era kaakano abatuuze b'omu Yerusaalemi n'abasajja b'omu Yuda, munsalirewo nze n'ennimoiro yange ey'emizabbibu."

⁴ Ate kiki kye nandikoledde ennimoiro yange eno, kye ssaagikolera? Bwe naginoonyamu emizabbibu emirungi, lwaki saalabamu mirungi?

⁵ Kaakano muleke mbabuulire kye nnaakola ennimoiro yange ey'emizabbibu. Nzija kugiggyako olukomera eyonooneke. Ndimenya ekisenge kyayo yonna erinnyirirwe.

⁶ Era ndigireka n'ezika, sirigirima wadde okugisalira. Naye ndigireka n'emeramu emyeeramanno n'amaggwa. Ndiragira n'ebire obutatonnyesaamu nkuba.

⁷ Ennyumba ya Isirayiri y'ennimoiro ya MUKAMA Katonda Ayinzabyonna ey'emizabbibu. Abantu ba Yuda y'ennimoiro gye yasiima. Yali abasuubiramu bwenkanya naye yabalabamu kuyiwa musaayi. Yabasuubiramu butuukirivu naye nawulira kukaaba na kulaajana.

⁸ Zibasanze mmwe aboongera amayumba ku ge mulina, n'ennimoiro ne muzongerako endala ne wataba kafo konna kasigadde, ne mubeera mwekka wakati mu nsi!

⁹ MUKAMA Katonda alayidde nga mpulira nti, "Mu mazima ennyumba nnyingi zirifuuka bifulukkwa, n'ezo ennene ez'ebbeeyi zibulemu abantu.

¹⁰ Kubanga yika kkumi ez'ennimoiro y'emizabbibu zinaavangamu ekabbo kimu, n'ogusero ogw'ensigo, kabbo bubbo ak'amakungula."

¹¹ Zibasanze abo abakeera enkya ku makya banoonye ekitamiiza, abalwawo nga banywa omwenge ettumbi ly'obudde, okutuusa omwenge lwe gubalalusa!

¹² Ababeera n'ennanga n'entongooli, ebitaasa n'endere, n'omwenge ku mbaga zaabwe; naye ne batalowooza ku mulimu gwa MUKAMA Katonda, wadde okussa ekitiibwa mu ebyo bye yatonda.

¹³ Abantu bange kyebavudde bagenda mu buwaŋjanguse kubanga tebalina kutegeera. Abantu baabwe ab'ekitiibwa bafe enjala, n'abantu aba bulijjo bafe ennyonta.

¹⁴ Amagombe kyegavudde gagaziya omumiro gwago, era ne gaasamya akamwa kaago awatali kkomu. Mu ko mwe munaagenda abakungu baabwe n'abantu baabwe abaabulijjo, n'ab'effujjo n'abatamiivu.

¹⁵ Buli muntu alitoowazibwa, abantu bona balikkakkanyizibwa era amaaso g'abo abeemanyi nago gakkakkanyizibwe.

¹⁶ Naye MUKAMA Katonda ow'Eggye aligulumizibwa olw'obwenkanya, era Katonda Omukutuvu yeerage nga bw'ali omukutuvu mu butuukirivu bwe.

¹⁷ Endiga ento ziryoze zirye ng'eziri mu malundiro gaazo, n'ensolo engenyi ziriire mu bifo ebyalekebwa awo, ebyalundirwangamu eza ssava.

¹⁸ Zibasanze abo abasikaasikanya ebibi byabwe ng'embalaasi bw'esika ekigaali.

¹⁹ Aboogera nti, "Ayanguyeeko, ayite mu bwangu tulabe ky'anaakola. Entegeka z'omukutuvu wa Isirayiri nazo zijke, zituuke nazo tuzimanye."

²⁰ Zibasanze abo abayita ekibi ekirungi n'ekirungi ekibi, abafuula ekizikiza okuba ekitangaala, n'ekitangaala okuba ekizikiza, abafuula ekikaawa okuba ekiwoomerera n'ekiwoomerera okuba ekikaawa.

²¹ Zibasanze abo abeeraba ng'abalina amagezi, era abagezigezi bo nga bwe balaba.

²² Zibasanze abo abazira mu kunywa omwenge era mu kutabula ekitamiiza,

²³ abejereza abatemu olw'enguzi era abamma abatuukirivu obwenkanya obubagwanidde.

²⁴ Kale ng'olulimi lw'omuliro bwe lwokya ekisagazi ekikal, era ng'omuddo omukalu bwe guggweerera mu muliro, bwe gityo n'emirandira gyabwe bwe girivunda, era n'ebimuli byabwe bifuumuuke ng'enfuufu; kubanga baajeemera etteeka lya MUKAMA Katonda ow'Eggye, era ne banyooma ekigambo ky'Omukutuvu wa Isirayiri.

²⁵ Noolwekyo obusungu bwa MUKAMA Katonda bubuubuukira ku bantu be, n'agolola omukono gwe n'abasanjaga, ensozi ne zikankana era n'emirambo gyabwe ne gibeera ng'ebisasiro wakati mu nguudo. Naye wadde nga biri bwe bityo, obusungu bwa MUKAMA Katonda tebunnakkana era omukono gwe gukyagoloddwa.

²⁶ Era aliymusiza eggwanga eriri ewala bbendera, alibakoowoola ng'asinziira ku nkomerero y'ensi, era laba, balyanguwako okujja.

²⁷ Tewali n'omu akooye, tewali n'omu yeesittala. Tewali n'omu asumagira wadde okwebaka. Tewali aliba yeesibye lukoba olutanywedde mu kiwato kye, wadde aliba n'olukoba lw'engatto olulikutuka.

²⁸ Obusaale bwabwe bwogi, n'emitego gyabwe gyonna mireege. Ebinuulo by'embalaasi zaabwe biriba ng'amayinja ag'embalebaale, Ne nnamuziga w'amagaali gaabwe ng'adduka ng'embuyaga y'akazimu.

²⁹ Okuwuluguma kwabwe kuliba nga okw'empologoma, balikaaba ng'empologoma ento: weewaawo baliwuluguma bakwate omuyiggo gwabwe bagutwalire ddala awatali adduukirira.

³⁰ Era ku lunaku olwo baliuumira ku munyago gwabwe ng'enyanja eyira. Omuntu yenna bw'alitunuulira ensi, aliraba ekizikiza n'ennaku; n'ekitangaala kiribuutikirwa ebire ebikutte.

Isaaya 6

Katonda Atuma Isaaya

¹ Awo mu mwaka kabaka Uzziya mwe yafiira, nalaba Mukama ng'atudde ku ntebe empanvu ng'agulumizibbwa, n'ekirenge ky'ekyambalo kye nga kijula yeekaalu.

² Waggulu we yali waali wayimiriddewo basseraafi: buli omu ng'alina ebiwaawaatiro mukaaga, ebibiri nga bye bibikka ku maaso ge, ebibiri nga bye bibikka ku bigere bye, n'ebibiri ng'abibuusa.

³ Buli omu yali ng'ayogera ne munne n'eddoboozi ery'omwanguka nti, "Mutukuvu, mutukuvu, mutukuvu, MUKAMA Katonda Ayinzabyonna: ensi yonna ejjudde ekitiibwa kye."

⁴ N'emisingi gy'emiryango ne ginyeenyezebwa olw'eddoboozi ly'oyo eyali akoowoola mu ddoboozi ery'omwanguka, yeekaalu n'ejjula omukka.

⁵ Ne ndyoka nkaaba nti, "Zinsanze nze! Nfudde mpeddewo! Kubanga ndi muntu ow'emimwa egitali mirongoofu, era mbeera wakati mu bantu ab'emimwa egitali mirongoofu; kubanga amaaso gange galabye Kabaka, MUKAMA Katonda ow'Eggye!"

⁶ Olwo omu ku basseraafi n'alyoka abuuka n'ajja gye ndi ng'alina eryanda eryaka mu ngalo ze, lye yali aggye ku kyoto ne nnamagalo.

⁷ Era n'alikomya ku kamwa kange, n'agamba nti, "Laba, lino likoonye ku mimwa gyo, era obutali butuukirivu bwo bukuggyiddwako. Era n'ekibi kyo kikusonyiyiddwa."

⁸ Ne mpulira eddoboozi lya Mukama ng'abuuza nti, "Naatuma ani, era ani anaagenda ku lwaffe?" Ne ndyoka njogera nti, "Nze wendi! Tuma nze!"

⁹ Nayogera nti, "Genda obuulire abantu bano nti, " 'Okuwulira munaawuliranga naye temutegeerenga, n'okulaba munaalabanga naye temutegeerenga kye mulabye.'

¹⁰ Okakanyaze omutima gw'abantu bano, oggale amatu gaabwe, n'amaaso gazibe si kulwa nga balaba n'amaaso gaabwe oba okuwulira n'amatu gaabwe oba okutegeera n'emita gyabwe ne bakyuka bawonyezebwe."

¹¹ Ne ndyoka njogera nti, "Mukama wange birituusa ddi okuba bwe biti?" Nanziramu nti, "Okutuusa ebibuga lwe birizika nga tewali abibeeramu, ne mu mayumba nga temuli muntu, ensi ng'esigalidde awo,

¹² okutuusa nga MUKAMA Katonda agobedde wala buli muntu, era ng'ensi esigadde matongo.

¹³ N'ekimu eky'ekkumi ekiriba kisigaddewo, nakyo kirizikirizibwa. Naye ng'omumyuliru n'omuvule bwe gireka ebikolo byagyo bwe gitemebw, bw'etyo ensigo entukuvu bw'erigwa mu ttaka n'esigala ng'ekikolo mu nsi."

Isaaya 7

Akabonero Akategeeza Okujja kwa Emmanweri

¹ Awo olwatuuka mu mirembe gya Akazi omwana wa Yosamu, omwana wa Uzziya, kabaka wa Yuda, Lezini kabaka w'e Busuuli, ne Peka omwana wa Lemaliya, kabaka wa Isirayiri ne bambuka okulwanyisa Yerusaalemi naye ne balemererwa.

² Amawulire bwe gatuuka eri Kabaka wa Yuda nti, "Obusuuli bwegasse ne Efulayimu okubalumba"; omutima gwe n'egy'abantu ba Yuda bona ne gikankana, ne giba ng'emiti egy'omu kibira eginyeenyezebw embuyaga.

³ MUKAMA Katonda n'alyoka agamba Isaaya nti, "Fuluma kaakano osisinkane Akazi, ggwe ne mutabani wo Seyalusayubu, olusalosalo olw'ekidiba ekyengulu we lukoma, mu luguudo olw'Ennimo y'Omwozi w'Engoye,

⁴ omugambe nti, 'Weegendereze, beera mukkakkamu toba na kutya omutima gwo teguggwaamu maanyi olw'emimuli gino eginyooka egiggweeredde, olw'obusungu bwa Lezini, n'obwa Obusuuli n'obw'omwana wa Lemaliya obubuubiuka.'

⁵ Kubanga Obusuuli ne Efulayimu ne mutabani wa Lemaliya bateesessa okukuleetako obulabe nga boogera nti,

⁶ 'Ka twambuke tulumbe Yuda, tukiyuzeeyuze tukyegabanye, tufuule omwana wa Tabeeri okuba kabaka waakyo.'

⁷ Bw'ati bw'ayogera MUKAMA Katonda nti, " 'Ekyo tekiibeewo era tekirituukirira.

⁸ Kubanga Damasiko ge maanyi ga Busuuli era ne Lezini ge maanyi ga Damasiko. Mu bbanga lya myaka nkaaga mu etaano Efulayimu kiribetentebwatentebwa nga tekikyali ggwanga.

⁹ Ne Samaliya ge maanyi ga Efulayimu, era mutabani wa Lemaliya ge maanyi ga Samaliya. Bwe mutualinywerera mu kukkiriza kwammwe, ddala temuliyimirira n'akatono.'

¹⁰ MUKAMA Katonda n'addamu n'agamba Akazi nti,

¹¹"Saba MUKAMA Katonda wo akabonero, ne bwe kanaaba mu buziba, oba mu magombe oba mu bwengula."

¹²Naye Akazi n'agamba nti, "Sijja kusaba kabonero, sijja kugezesza MUKAMA Katonda."

¹³ Isaaya n'ayogera nti, "Muwulire mmwe kaakano, mmwe ennyumba ya Dawudi! Okugezesza abantu tekibamala? Ne Katonda munaamugezesza?

¹⁴Noolwekyo Mukama yennyini kyaliva abawa akabonero; laba omuwala atamanyi musajja alizaala omwana wabulenzi era alituumibwa erinnya Emmanweri.

¹⁵Bw'alituuka okwawula ekirungi n'ekibi aliba alyu muzigo na mubisi gwa njuki.

¹⁶Kubanga ng'omwana bw'aba nga tannamanya kugaana kibi n'alondawo ekirungi, ensi eza bakabaka ababiri bootya erisigala matongo.

¹⁷MUKAMA Katonda alikuleetako ne ku bantu bo ne ku nnyumba ya kitaawo ennaku ezitabangawo bukyanga Efulayimu eva ku Yuda; agenda kuleeta kabaka w'e Bwasuli."

¹⁸ Olunaku olwo nga lutuuse, MUKAMA Katonda alikoowoola ensowera eri mu bifo eby'ewala eby'emigga egy'e Misiri, n'enjuki eri mu nsi y'e Bwasuli.

¹⁹Era byonna birijja bituule mu biwonvu ebyazika, ne mu njatika z'omu mayinja, ku maggwa, ne ku malundiro gonna.

²⁰Ku lunaku luli Mukama alimwesa akawembe akapangisiddwa emitala w'emigga, ye kabaka w'e Bwasuli, kammwe omutwe, n'obwoya bw'oku magulu, kasalireko ddala n'ekirevu.

²¹Newaakubadde mu nnaku ezo, ng'omuntu alisigaza ente emu yokka n'endiga bbiri,

²²naye olw'obungi bw'amata agabivaamu, aliryu ku muzigo. Kubanga buli alisigalawo mu nsi aliryu muzigo na mubisi gwa njuki.

²³Era ng'olunaku lutuuse, buli kifo awaabanga emizabbibu, ng'olukumi lubalibwamu kilo kkumi n'emu n'ekitundu, kiriba kisigaddemu myeramannyo n'amaggwa.

²⁴Abantu baligendayo na busaale na mitego, kubanga ensi yonna eriba efuuse myeramannyo na maggwa.

²⁵N'ensozi zonna ze baalimanga n'enkumbi nga tezikyatuukikako olw'okutya emyeramannyo n'amaggwa, era kirifuuka ekifo ente n'endiga we byerundira.

Isaaya 8

MUKAMA Akozesa Bwasuli Okubonereza Isirayiri

¹Awo MUKAMA Katonda n'anjamba nti, "Kwata ekipande ekinene okiwandiikeko n'ekkalaamu nti: Kya Makerusalalukasubazi."

²Ne ndyoka neeyitira abajulirwa abeesigwa, Uliya kabona, ne Zekkaliya omwana wa Yeberekiya.

³Ne njenda eri nnabbi omukazi, n'aba olubuto, n'azaala omwana wabulenzi. MUKAMA Katonda n'alyoka agamba nti, "Mmutuumi erinnya Makerusalalukasubazi.

⁴Kubanga omwana nga tannamanya kugamba nti, 'Taata', oba 'Maama', obugagga bw'e Ddamasiko n'omunyago gwe Samaliya birinyagibwa kabaka w'e Bwasuli."

⁵MUKAMA Katonda n'addamu n'ayogera nange nti,

⁶"Kubanga abantu bano bagaanye amazzi g'e Sirowa agakulukuta empolampola, ne bajaguza olwa Lezini ne mutabani wa Lemaliya,

⁷kale nno Mukama anaatera okubaleetako amazzi ag'Omugga, ag'amaanyi era amayitirivu, ye kabaka w'e Bwasuli n'ekitiibwa kye kyonna; galisukka ensalosalo zonna, ne ganjaala ku ttale lyonna.

⁸Era galyeyongera ne ganjaala mu Yuda, galyanjaala ne gamuyitamu gakome ne mu bulago, n'emikutu gyago gyegolole okujuza ensi yo, ggwe Emmanweri."

⁹Muyimbe ennyimba z'entalo mmwe amawanga naye mwekaabire. Mutege amatu mmwe mwenna ab'ensi ezeewala; mwenyeweze naye mwekaabire; mwenyeweze naye mwekaabire.

¹⁰Muteese enkola yammwe, naye yakugwa butaka, mwogere ekigambo naye tekirituukirira.

¹¹Kubanga MUKAMA Katonda yayogera nange ng'antaddeko omukono gwe ogw'amaanyi, ng'andabula nneme okugoberera ekkubo ly'abantu bano, ng'anjamba nti,

¹² “Ebintu byonna abantu bano bye bayita enkwe, temubiyita nkwe, era temutya bye batya, wadde okutekemuka omutima.

¹³ Naye mujjukire nti nze MUKAMA Katonda ow'Eggye, nze Mutukuvu, nze gwe muba mutya, era gwe muba mwekengera.

¹⁴ Olw'obutukuvu eri ennyumba zombi eza Isirayiri aliba ejinja era olwazi kwe bagwa, era alibeera omutego era ekyambika eri ab'omu Yerusaalemi.

¹⁵ Era bangi abaliryesittalako, bagwe, bamenyeke, bategebwe bakwatibwe.”

¹⁶ Nyweza obujulirwa okakase amateeka mu bayigirizwa bange.

¹⁷ Nange nnaalindirira MUKAMA Katonda akwese amaaso ge okuva ku nnyumba ya Yakobo, mmunoonye n'essuubi.

¹⁸ Laba, nze n'abaana MUKAMA Katonda bampadde tuli bubonero n'ebywuuunyo mu Isirayiri obuva eri MUKAMA Katonda ow'Eggye, abeera ku lusozi Sayuuni.

¹⁹ Abantu bwe babagamba nti mwebuuze ku abo abaliko emizimu, n'abasamize abakaaba ng'ennyonyi era abajoboja, eggwanga tekirigwanira kwebuuza ku Katonda waalyo? Lwaki ebikwata ku balamu mubibuza abafu?

²⁰ Tuisse eri amateeka n'obujulirwa! Bwe baba teboogera bwe batyo, mazima obudde tebugenda kubakeerera.

²¹ Era baliyita mu nsi nga beeraliikirira nnyo nga balumwa enjala; era enjala bweriyitirira okubaluma ne banyiiga era nga batunudde waggulu balikolimira kabaka ne Katonda waabwe.

²² Era bwe balitunula ku nsi baliraba nnaku na kizikiza, n'entiisa ey'okubonaabona basuulibwe mu kizikiza ekikutte zigizigi.

Isaaya 9

Omulokozi Atuzaaliddwa

¹ Naye tewaliba kizikiza eri oyo eyali mu kubonaabona. Edda yatoowaza ensi ya Zebbulooni n'ensi ya Nafutaali, naye mu kiseera ekijja aliwa Ggaliraaya ekitiibwa, ensi ey'abamawanga emitala wa Yoludaani, awali ekkubo erigenda ku nnyanja.

² Abantu abaatambuliranga mu kizikiza balabye ekitangaala eky'amaanyi, abo abaatuulanga mu nsi ey'ekizikiza ekingi, omusana gubaakidde.

³ Oyazizza eggwanga, obongedde essanyu, basanyukira mu maaso go ng'abantu bwe basanyuka mu biseera eby'amakungula, ng'abasajja bwe basanyuka nga bagabana omunyago.

⁴ Nga ku lunaku Abamidiyaani lwe baawangulwa, omenye ekikoligo ekyamuzitoowereranga, n'ekiti eky'oku kibegabega kye, n'oluga lw'oyo amunyigiriza.

⁵ Kubanga buli ngatto ya mulwanyi ekozesebwa mu lutalo na buli kyambalo ekibunye omusaayi, biriba bya kwokebwa, bye birikozesebwa okukoleeza omuliro.

⁶ Kubanga omwana atuzaaliddwa ffe, omwana owoobulenzi atuweereddwa ffe, n'okufuga kunaabanga ku bibegabega bye. N'erinnya lye aliyitibwa nti, Wa kitalo, Omuwi w'amagezi, Katonda Ayinzabyonna, Kitaffe ow'Emirembe Gyonna, Omulangira w'Emirembe.

⁷ Okufuga kwe n'emirembe biryeyongeranga obutakoma. Alifugira ku ntebe ya Dawudi ne ku bwakabaka bwe, n'okubuwaniirira n'obwenkanya n'obutuukirivu okuva leero okutuusa emirembe gyonna. Obumalirivu bwa MUKAMA Katonda ow'Eggye bulikituukiriza ekyo.

Obusungu bwa MUKAMA Ku Isirayiri

⁸ Mukama yaweereza obubaka obukwata ku Yakobo, ku birituuka ku Isirayiri.

⁹ Era abantu bona balibumanya, Efulayimu n'abantu b'omu Samaliya aboogera n'amalala n'omutima omukakanyavu,

¹⁰ nti, "Amatoffaali gagudde wansi naye tulizimbya amayinja amateme, emisukamooli gitemeddwawo naye tulizzaawo emivule."

¹¹ MUKAMA Katonda kyaliva awa abalabe ba Lezini amaanyi bamulumbe; alibakumaakuma bamulumbe.

¹² Abasuuli balisinziira mu buvanjuba, n'Abafirisuuti bave ebugwanjuba, balyoke basaanyeewo Isirayiri n'akamwa akaasamye. Newaakubadde nga biri bityo, obusungu bwa MUKAMA buliba tebunnavaawo era omukono gwe guliba gukyagoloddwa.

¹³ Kubanga abantu tebakuse kudda wadde okunoonya MUKAMA Katonda ow'Eggye eyabakuba.

¹⁴ Bw'atyo MUKAMA Katonda kyaliva asala ku Isirayiri, omutwe n'omukira, ettabi n'olukindu mu lunaku lumu.

¹⁵ Omutwe be bakadde n'abantu ab'ekitiibwa, n'omukira be bannabbi abayigiriza eby'obulimba.

¹⁶ Kubanga abakulembra abantu bano bababuzaabuuza, n'abo abakulembewa babuzibwabuzibwa.

¹⁷ Noolwekyo, Mukama tajja kusanyukira bavubuka, wadde okukwatirwa ekisa abo abataliiko ba kitaabwe wadde bannamwandu; kubanga buli omu mukozi wa

bibi, era buli kamwa konna kogera eby'obuwemu. Olwa bino byonna, obusungu bwa MUKAMA tebunakyusibwa kubavaako, era omukono gwe gukyagoloddwa.

¹⁸ Ddala ekibi kyokya ng'omuliro; gumalawo emyeramannyo n'obusaana. Era gukoleeza eby'omu kibira, omukka ne gunyooka ne gutumbiira waggulu.

¹⁹ Olw'obusungu bwa MUKAMA Katonda ow'Eggye ensi eggiiridde ddala, era n'abantu bali ng'enku ez'okukuma omuliro, tewali muntu alekawo muganda we.

²⁰ Balimalawo eby'oku mukono ogwa ddyo, naye balisigala bayala; balirya n'ebi'oku kkono, naye tebalikkuta. Buli omu alirya ku mubiri gw'ezzadde lye.

²¹ Manase alirya Efulayimu ne Efulayimu n'alya Manase ate bombi ne balya Yuda. Naye wadde nga biri bityo, obusungu bwa MUKAMA buliba tebunnavaawo, era n'omukono gwe guliba gukyagoloddwa.

Isaaya 10

¹ Nga zibasanze abo abateeka amateeka agatali ga bwenkanya, n'abo abawa ebiragiro ebinyigiriza,

² okulemesa abaavu ne batafuna nsala ebagwanidde; era n'okunyaga ku bantu bange abaavu ebyabwe, ne bafuula bannamwandu omunyago gwabwe, n'abatalina ba kitaabwe omuyiggo gwabwe!

³ Mulikola mutya ku lunaku MUKAMA lwalisalirako omusango ne mu kuzikirira okuliva ewala? Muliddukira w'ani alibayamba? Obugagga bwammwe mulibuleka wa?

⁴ Muliba temusigazza kya kukola kirala wabula okutwalibwa nga mukutaamiridde mu busibe oba okuba mu abo abattiddwa. Naye wadde nga biri bityo, obusungu bwe buliba tebunnaggwaawo, era n'omukono gwe guliba gukyagoloddwa.

Omusango Katonda gwalisalira Bwasuli

⁵ "Zikusanze Bwasuli, omuggo gw'obusungu bwange, era omuggo gw'ekiruyi kyange.

⁶ Mmutuma okulumba eggwanga eritatya MUKAMA, era mmusindika eri abantu abansunguwazizza, abanyage, ababbire ddala, n'okubasambirira abasambirire ng'ebitoomi eby'omu nguudo.

⁷ Naye kino si kye kigendererwa kye, kino si ky'alowooza. Ekigendererwa kye kwe kuzikiriza, okumalirawo ddala amawanga mangi.

⁸ 'Abaduumizi bange bona tebenkana bakabaka?' bw'atyo bw'ayogera.

⁹ 'Kalino tetwakizikiriza nga Kalukemisi, ne Kamasi nga Alupaadi, ne Samaliya nga Ddamasiko?

¹⁰ Ng'omukono gwange bwe gwawamba obwakabaka obusinza bakatonda ababajje, abasinga n'abo ab'omu Yerusaalemi ne Samaliya,

¹¹ nga bwe nakola Samaliya ne bakatonda baabwe abalala si bwe nnaakola Yerusaalemi ne bakatonda baabwe ababajje?"

¹² Mukama bw'alimaliriza omulimu gwe ku lusozi Sayuuni era ne ku Yerusaalemi n'alyoka abonereza kabaka w'e Bwasuli olw'okwewaana n'okuduula kwe n'entunula ye ey'amalala.

¹³ Kubanga yayogera nti, " 'Bino byonna mbikoze olw'amaanyi g'omukono gwange, era n'olw'amagezi gange, kubanga ndi mukalabakalaba: Najjulula ensalo z'amawanga ne nnyaga obugagga bwabwe, ng'ow'amaanyi omuzira ne nzikakkanya bakabaka baabwe.

¹⁴ Ng'omuntu bw'akwata mu kisu, omukono gwange gw'akunuukiriza ne gukwata mu bugagga bw'amawanga; ng'abantu bwe balondalonda amagi agalekeddawo, bwe nt yo bwe nakuinjaanya amawanga gonna, tewali na limu lyayanjuluza ku kiwaawaatiro, newaakubadde eryayasamya akamwa kaalyo okukaaba.'

¹⁵ Embazzi eyinza okweyita ey'ekitalo okusinga oyo agitemesa? Omusumeeno gulyekuza okusinga oyo agusazisa? Gy'obeera nti oluga luyinza okuwuuba omuntu alukoza, oba omuggo okusitula oyo atali muti.

¹⁶ Noolwekyo Mukama, MUKAMA Katonda Ayinzabyonna, kyaliva aweereza obukovvu bulye abasajja be abaagejja, era wansi w'okujaganya n'ekitiibwa kye akoleeze wo omuliro ogwokya ng'oluyiira.

¹⁷ Ekitangaala kya Isirayiri kirifuuka omuliro, n'Omukonuvu waabwe abeere olulimi lw'omuliro, mu lunaku lumu kyokye kimalirewo ddala amaggwa ge n'emyeramannyo gye.

¹⁸ Era kiryokya ne kimalirawo ddala ekitiibwa ky'ebibira bye, n'ennimiro ze, engimu, ng'omusajja omulwadde bwaggweerawo ddala.

¹⁹ N'emiti egy'omu kibira kye egirisigalawo giriba mitono nnyo nga n'omwana ayinza okugibala.

Abalisigalawo ku Isirayiri

²⁰ Awo olulituuka ku lunaku olwo, abaliba bafisseewo ku Isirayiri, n'abo abaliba bawonye ku nnyumba ya Yakobo nga tebakyeyinulira ku oyo eyabakuba naye nga beesigama ku MUKAMA Katonda, omukonuvu wa Isirayiri mu mazima.

²¹ Ekitundu ekirifikkawo kirikomawo, ekitundu kya Yakobo kirikomawo eri Katonda ow'amaanyi.

²² Kubanga wadde abantu bo bangi ng'omusenyu gw'enyanja, abalikomawo nga balamu baliba batono. Okuzikirira kwo kwa kubaawo kubanga kusaanidde.

²³ Kubanga Mukama, MUKAMA Katonda ow'Eggye alireeta enkomerero eteriiko kubuusabuusa nga bwe yateekateeka entuuko mu nsi yonna.

²⁴ Noolwekyo Mukama, MUKAMA Katonda ow'Eggye kyava ayogera nti, "Mmwe abantu bange ababeera mu Sayuuni, temutyanga Abasuli, newaakubadde nga babakuba n'oluga era nga babagololera omuggo nga Abamisiri bwe baakola.

²⁵ Kubanga mu kaseera katono nnyo obusungu bwange gy'oli bujja kukoma era ekiruyi kyange kiribazikiriza."

²⁶ MUKAMA Katonda ow'Eggye alibakuba n'akaswanyu nga bwe yakuba aba Midiyaani ku lwazi lw'e Olebu. Era aligololera oluga lwe ku nnyanja nga bwe yakola e Misiri.

²⁷ Ku lunaku olwo, omugugu gwe guliggyibwa ku bibegabega byo, n'ekikoligo kye kive ku nsingo yo; ekikoligo kirimenyebwa olw'obugevvu bwo.

²⁸ Laba eggye ly'omulabe lituuse liwambye Yagasi, liyise mu Migulooni, era mu Mikumasi gye balireka emigugu gyabwe.

²⁹ Bayise awavvuunukirwa, e Geba ne basulayo ekiro kimu, Laama akankana, Gibeia wa Sawulo adduse.

³⁰ Kaaba n'eddoboozi ery'omwanguka ggwe omuwala wa Galimu! Ggwe Layisa wuliriza! Ng'olabye Anasosi!

³¹ Madumena adduse, abantu b'e Gebimu beekukumye.

³² Olwa leero bajja kusibira Nobu, balyolekeza ekikonde kyabwe eri olusozi lwa Muwala wa Sayuuni, akasozi ka Yerusaalemi.

³³ Laba, Mukama, MUKAMA Katonda ow'Eggye, alitema amatabi n'entiisa n'emiti emiwanvu n'emiwagguufu giritemerwa ddala, n'emiti emiwanvu girikkakkanyizibwa.

³⁴ Era alitemera ddala n'embazzi ebisaka by'omu kibira; Lebanooni aligwa mu maaso g'oyo Ayinzabyonna.

Isaaya 11

Ettabi Eririva ku Yeso

¹ Ensibuka erimera ng'eva ku kikonge kya Yeso, ne ku mirandira kulivaako omuti, ne ku muti kulivaako Ettabi eriribala ekibala.

² Mwoyo wa MUKAMA alibeera ku ye, Mwoyo ow'amagezi n'okutegeera ne Mwoyo w'okusala ensonga, n'ow'amaanyi ne Mwoyo w'okumanya era n'okutya MUKAMA Katonda.

³ Era n'essanyu lye liribeera mu kutya MUKAMA Katonda. Taasalenga misango ng'asinziira ku maaso ge gokka nga bwe galaba, oba okusalawo ng'asinziira ku byawulira n'amatu ge byokka,

⁴ naye anaasaliranga abaavu emisango mu bwenkanya, era asalire mu bwenkanya abo abawombeefu ab'omu nsi; era alikuba ensi n'omuggo ogw'omu kamwa ke, era alitta omukozi w'ebibi n'omukka ogw'omu kamwa ke.

⁵ Obutuukirivu, bwe buliba olukoba lwe yeesibya, n'obwesigwa, bw'alyesiba mu kiwato kye.

⁶ Omusege gulisulanga wamu n'omwana gw'endiga, n'engo egalamire wamu n'omwana gw'embuzi; era ennyana n'empologoma n'ennyana eya ssava binaagalamiranga wamu; era omwana omuto yalizirabirira.

⁷ Ente n'eddubu biririira wamu, abaana baazo banaagalamiranga wamu. Empologoma erirya omuddo ng'ente.

⁸ N'omwana ayonka alizannyira ku kinnya ky'enswera, n'omwana omuto aliteeka omukono gwe mu kinnya ky'essalambwa.

⁹ Tewalibeera kukolaganako bulabe wadde okuttiñjana ku lusozi lwange olutukuvu. Kubanga ensi eribeera ejjudde okumanya MUKAMA Katonda, ng'amazzi bwe gajjuza ennyanja.

¹⁰ Awo ku lunaku luli, muzzukulu wa Yese aliyimirira ng'ebendera eri amawanga. Oyo amawanga gwe ganaanoonyanga, n'ekifo kye eky'okuwummuliram, kiribeera kya kitibwa.

¹¹ Era ku lunaku olwo Mukama aligolola omukono gwe omulundi ogwokubiri okununula abasigalawo ku bantu be, okubaggya mu Bwasuli ne mu Misiri ne mu Pasuloosi ne mu Kuusi ne mu Eramu ne mu Sinaali ne mu Kamasi ne mu bizinga eby'omu nnyanja.

¹² Era aliwanikira amawanga bbendera, akuñjaanye abawanjanguse ba Isirayiri; aleete wamu abantu ba Yuda abaali basaasaanye mu nsonda ennya ez'ensi.

¹³ Olwo obuggya bwa Efulayimu bulyoke buggweewo, n'abo abateganya Yuda balizikirizibwa. Efulayimu talikwatirwa Yuda buggya wadde Yuda okubeera omulabe wa Efulayimu.

¹⁴ Bombi awamu balirumba ne bamalawo Abafirisuuti mu busozi bw'ebugwanjuba; era bombiriri balinyaga abantu b'omu buvanjuba. Baligolola omukono gwabwe ku Edomu ne Mowaabu; n'abaana ba Amoni balibagondera.

¹⁵ Era MUKAMA Katonda alikaliza omukutu gw'ennyanja y'Abamisiri; era aliwujira omukono gwe ku mugga Fulaati ne guleetawo omuyaga ogukaza, agwawulemu ebitundu musanvu abantu bye banaasomokanga ku bigere.

¹⁶ Era abo abalisigalawo ku bantu be balibeera n'ekkubo ery'okuyitamu ery'eggwanga eryasigala ku Bwasuli nga bwe kyali eri Isirayiri ku lunaku lwe baaviirako mu Misiri.

Isaaya 12

Okwebaza MUKAMA olw'Obulokozi bwe

¹ Ku lunaku olwo oligamba nti, "Nnaakwebazanga ayi MUKAMA Katonda; newaakubadde nga wansunguwalira, obusungu bwo bwaggwaawo era onzizizzaamu amaanyi.

² Laba Katonda bwe bulokozi bwange; nzija kumwesiga era siritya; kubanga MUKAMA Katonda ge maanyi gange era lwe luyimba lwange, era afuuse obulokozi bwange."

³ Munaasenanga n'essanyu amazzi okuva mu nzizi ez'obulokozi.

⁴ Era ku lunaku olwo mulyogera nti, "Mwebaze MUKAMA Katonda, mukoowoole erinnya lye, mbuulire ebikolwa bye mu mawanga, mwogere nti erinnya lye ligulumizibwe.

⁵ Mumuyimbire MUKAMA Katonda ettendo kubanga akoze eby'ettendo; muleke kino kimanyibwe mu mawanga gonna.

⁶ Leekaana n'eddoboozi ery'omwanguka oyimbe n'essanyu ggwe omuntu w'omu Sayuuni, kubanga Omutukuvu wa Isirayiri ali wakati mu ggwe mukulu."

Isaaya 13

Obunnabbi Obukwata ku Kugwa kwa Babulooni

¹ Obubaka bwa Babulooni Isaaya mutabani wa Amozi bwe yalaba.

² Muwanike bbendera ku lusozi olutaliiko bantu, mubakaabirire mubawenye bayingire mu miryango gy'abakungu.

³ Nze MUKAMA ndagidde abatukuvu bange mpise abalwanyi bange ab'amaanyi, babonereze abo abeeyisaawo abeemanyi.

⁴ Muwulirize oluyoogaano lw'ekibiina ku nsozi, nga luwulikika ng'olw'ogubiina ogunene! Wuliriza, oluyoogaano lw'obwakabaka, olw'amawanga ag'ekuijjaanyaizza awamu! MUKAMA Katonda ow'Eggye ateekekateeka eggye lye okulwana.

⁵ Bava wala mu nsi ezeewala ennya okuva ku nkomerero y'eggulu. Mu busungu bwe MUKAMA Katonda aleese ebyokulwanyisa eby'okuzikiriza ensi yonna.

⁶ Mukungubage, kubanga olunaku lwa MUKAMA luli kumpi, lulijja ng'okuzikirira okuva eri MUKAMA Katonda bwe kuba!

⁷ Emikono gyonna kyegiriva giggwaamu amaanyi, na buli mutima gwa muntu gulisaanuuka;

⁸ era bakenjentererwe n'okubalagala kulibakwata, balyoke balumwe ng'omukazi alumwa okuzaala. Balitunulaganako nga bawuniikiridde amaaso gaabwe nga gatangaalirira.

⁹ Laba olunaku lwa MUKAMA lujja, olunaku olubi ennyo olw'ekiruyi n'obusungu obubuubaaka okufuula ensi amatongo, n'okuzikiriza abakozi b'ebibi okubamalamu.

¹⁰ Kubanga emmunyeeny e z'omu ggulu n'ebibiina byazo tebiryaka; enjuba nayo teryaka nga bw'ekola bulijjo, n'omwezi nagwo tegulyaka.

¹¹ Ndibonereza ensi olw'okwonoona kw'ayo, n'abakozi b'ebibi olw'ebyonoono byabwe. Era ndimalawo okweyisa kw'ab'amalala era nzikakkanya okwenyumiriza kw'abo abakambwe.

¹² Abantu ndibafuula abebbulu okusinga zaabu ennongoose eya ofiri.

¹³ Noolwekyo ndikankanya eggulu, era n'ensi ngiyuuguumye okuva mu kifo kyayo, olw'obusungu bwa MUKAMA Katonda ow'Eggye, ku lunaku lw'obusungu bwe obungi.

¹⁴ Era ng'empeewo eyiggibwa, ng'endiga eteriiko agirunda, buli muntu aliddukira eri abantu be buli muntu aliddukira mu nsi y'ewaabwe.

¹⁵ Buli anaalabwangako ng'ekitala kimuyitamu, buli gwe banaakwatangako ng'attibwa n'ekitala.

¹⁶ N'abaana baabwe abawere banabetenterwanga mu maaso gaabwe nga balaba; ennyumba zaabwe zinyagibwe, n'abakazi baabwe bakwatibwe olw'empaka.

¹⁷ Laba, ndibayimbulira Abameedi, abatafa ku ffeeza era abateeguya zaabu.

¹⁸ Emitego gyabwe girikuba abavubuka era tebaliba na kisa eri abawere. Amaaso gaabwe tegalisaasira baana bato.

¹⁹ Ne Babulooni, ekitiibwa eky'obwakabaka, obulungi obw'okwemanya kw'Abakaludaaya, kiriba nga Sodomu ne Ggomola Katonda bye yawamba.

²⁰ Tekiriddamu kusulwamu ennaku zonna, so tekiribeerwamu emirembe n'emirembe, so teri Muwalabu alisimbayo weema ye, teri musumba aligalamizaayo ggana lye kuwummulirayo.

²¹ Naye ensolo enkambwe ez'omu ddungu ze zinaagalamirangayo; ennyumba zjjule ebintu ebiwoowoola; bammaaya banaabeeranga eyo, n'ebikulekule bibuukire eyo.

²² N'empisi zinaakaabiranga mu bigulumu by'ebigo byabwe, ebibe bikaabire mu mbiri zaabwe ezitemagana. Ekiseera kyakyo kinaatera okutuuka, ennaku ze teziryongerwako.

Isaaya 14

¹ MUKAMA Katonda alikwatirwa Yakobo ekisa, addemu alonde Isirayiri abazze ku ttaka lyabwe. Ne bannamawanga balibeegettako era babeere wamu nga babeeyungiddeko ddala.

² N'amawanga mangi galibayamba okudda mu nsi yaabwe, n'ennyumba ya Isirayiri ebeere n'abantu abamawanga amangi mu nsi ya MUKAMA Katonda, nga baweereza baabwe abasajja n'abakazi. Baliwamba abaali babawambye, bafuge abo abaabakijanyanga.

³ Awo olunaku MUKAMA Katonda lw'alibawa okuwummula okuva mu kulumwa kwammwe n'okukijjanyizibwa kwe mubaddemu nga mukozesewba,

⁴ oligera olugero luno ku kabaka w'e Babulooni n'oyogera nti: Omujoozi ng'agudde n'aggwaawo! Ekibuga ekya zaabu ekibadde kitutigomya nga tekikyaliwo!

⁵ MUKAMA Katonda amenye omuggo ogw'abakozi b'ebibi, omuggo gw'obwakabaka ogw'abo abafuga.

⁶ Ogwakubanga olutata amawanga n'obusungu, ogwafugisanga amawanga ekiruyi, ne gubayigganyanga nga tewali aguziyiza.

⁷ Ensi yonna ewummudde eri mu mirembe, era batandise okuyimba.

⁸ Si ekyo kyokka n'enfugo n'emivule gya Lebanononi, nagyo gikuyeyeyeereza nti, "Kasookanga ogwa tebangayo ajja kututema."

⁹ Amagombe wansi gagugumuka ku lulwo okukusisinkana ng'oija, gagolokosa emyoyo gy'abafu ku lulwo, bona abaali abakulembeze b'ensi; gayimusizza bakabaka ku ntebe zaabwe, bona abaali bakabaka baamawanga.

¹⁰ Abo bona balyogera ne bakugamba nti, "Naawe oweddemu amaanyi nga ffe! Naawe ofuuse nga ffe!"

¹¹ Ekitiibwa kyo kyonna kissibbwaa emagombe, awamu n'amaloboozi g'ennanga zo; bakwalidde envunyu, n'ensirijjanyi zikubisseeko.

¹² Ng'ogudde okuva mu ggulu, ggwe emunyeenye ey'enkyo, omwana w'emambya! Ng'otemeddwa n'ogwa ku ttaka, ggwe eyamegganga amawanga!

¹³ Wayogera mu mutima gwo nti, "Ndirinnya mu ggulu, ndigulumiza entebe yange okusinga emunyeenye za Katonda; era nditeeka entebe yange waggulu

ntuule ku lusozi olw'okukuññaanirako ku njuyi ez'enkomerero ez'obukiikkono;

¹⁴ ndyambuka okusinga ebire we bikoma, ndyoke nfuuke ng'oyo ali waggulu ennyo."

¹⁵ Naye ossibbwa wansi emagombe, ku ntobo y'obunnya.

¹⁶ Abo abanaakulabanga banaakwekalirizanga bakwewuunye nga bagamba nti, "Ono si ye musajja eyayugumyanga ensi, ng'anyeenyanyeenya obwakabaka!"

¹⁷ Eyafuula ensi okuba eddungu n'asuula ebibuga byayo, atakkirizanga bawambe kudda waabwe!"

¹⁸ Bakabaka bona ab'ensi bagalamidde mu kitibwa, buli omu mu ntaana ye,

¹⁹ naye osuulibbwa okukuggyga mu malaalo go ng'ettabi ery'omuzizo eryakyayibwa, ng'oteekeddwa wamu n'abattibwa, abaaafumitibwa n'ekitala, abakka eri amayinja g'obunnya; ng'omulambo ogulinyiriddwa.

²⁰ Toligattibwa n'abo mu kuziikibwa kubanga wazikiriza ensi yo n'otta abantu bo; ezzadde ly'abo abaakola ebibi teriryongerwako n'akatono.

²¹ Mutegeke ekifo batabani be we banattirwa olw'obutali butuukirivu bwa bakitaabwe, baleme okugolokoka ne balya ensi, ne bajjuza ensi yonna ebibuga byabwe.

²² "Nange ndibagolokokerako," bw'ayogera MUKAMA Katonda ow'Eggye, "ne mmalawo mu Babulooni erinnya lye, n'abalifikkawo, n'omwana n'omuzzukulu," bw'ayogera MUKAMA Katonda.

²³ "Era ndimufuula obutaka bw'ebiwuugulu, n'entobazzi era mwere n'olweyo oluzikiriza," bw'ayogera MUKAMA Katonda ow'Eggye.

Obunnabbi bw'Okusuulibwa kwa Bwasuli

²⁴ MUKAMA Katonda ow'Eggye alayidde n'ayogera nti, "Ddala nga bwe nalowooza, bwe kirituukirira bwe kityo era nga bwe nateesa, bwe kirinywera bwe kityo.

²⁵ Ndimenyera Omwasuli mu nsi yange, era ndimulinnyirira ku nsozi zange. Ekikoligo kye kiribavaako, n'omugugu gwe guliggyibwa ku kibegabega kye."

²⁶ Eno y'entegeka eyategekerwa ensi yonna: era guno gwe mukono ogwagololwa ku mawanga gonna.

²⁷ Kubanga MUKAMA Katonda ow'Eggye ye yateesa, kale ani ayinza okukijulula? Omukono gwe gugoloddwa, kale ani ayinza okuguzzaayo?

Obunnabbi Obukwata ku Bufirisuuti

²⁸ Mu mwaka kabaka Akazi mwe yafiira ne wabaawo obubaka buno.

²⁹ Tosanyuka ggwe Bufirisuuti yonna, kubanga omuggo ogwakukuba gumenyese, ne ku kikolo ky'omusota kulivaako enswera, n'ezzadde lyalyo liriba musota ogw'obusagwa oguwalabuka.

³⁰ Abasingirayo ddala okuba abaavu balifuna ekyokulya, n'abali mu kwetaaga balifuna ku tulo naye ekikolo kyo ndikittisa enjala ate abo abalisigalawo mbattise ekitala.

³¹ Leekaana ggwe wankaaki, kaaba ggwe ekibuga, osaanuuke olw'entiisa ggwe Bufirisuuti yonna! Kubanga mu bukiakkono muvaamu omukka, eggycery'abalwanyi omutali munafu.

³² Kale kiki kye banaddamu ababaka b'eggwanga eryo? "MUKAMA yassaawo Sayuuni, ne mu kyo abantu be ababonyaabonyezebwa mwe balifuna obuddukiro."

Isaaya 15

Obunnabbi Obukwata ku Mowaabu

¹ Mu kiro kimu kyokka Ali ekya Mowaabu kirizikirizibwa ne kimalibwawo. Kiiri ekya Mowaabu nakyo ne kizikirizibwa mu kiro!

² Abantu b'e Diboni bambuse ku lusozi okukaabira mu ssabo lyabwe. Abantu ba Mowaabu bakaaba bakungubagira ebibuga byabwe ebya Nebo ne Medeba. Buli mutwe gwonna gumwereddwako enviiri na buli kirevu kyonna kimwereddwa.

³ Beesibye ebibukutu mu nguudo; ku nnyumba waggulu era ne mu bibangirize ebinene eby'omu bibuga bakaaba. Buli muntu atema emiranga n'abikaabira amaziga amayitirivu.

⁴ Kesuboni ne Ereyale bakaaba mu ddoboozi ery'omwanguka, n'amaloboozi gaabwe gawulikika e Yakazi. Abasajja ba Mowaabu abalina ebyokulwanyisa kyebava bakaaba mu ddoboozi ery'omwanguka, emmeeme ekankanira munda mu Mowaabu.

⁵ Omutima gwange gukaabira Mowaabu; abantu be babundabunda, baddukira e Zowaali ne Yegulasuserisiya. Bambuka e Lakisi nga bwe bakaaba; bakaabira mu kkubo ery'e Kolonayimu nga boogera ku kuzikirizibwa kwabwe.

⁶ Amazzi g'e Nimulimu gakalidde, omuddo guwotose, omuddo omugonvu, guggwaawo, tewali kintu kimera.

⁷ Abantu basomoka akagga ak'enzingu nga badduka n'ebintu byabwe bye baafuna ne babitereka.

⁸ Okukaaba kwetooloodde ensalo za Mowaabu; amaloboozi gatuuse e Yegalayimu, n'ebiwoobe ne bituuka e Beererimu.

⁹ Amazzi g'e Diboni gajjudde omusaayi, naye ndyongera okuleeta ebirala ku Diboni; empologoma egwe ku abo abalisigalawo mu Mowaabu, ne ku abo abalisigalawo ku nsi.

Isaaya 16

¹ "Muweereze abaana b'endiga eri oyo afuga ensi, okuva e Seera, ng'oyita mu ddungu, okutuuka ku lusozi lwa Muwala wa Sayuuni.

² Ng'ennyonyi ezabulwako ekisu n'ezisaasaana nga zidda eno n'eri, bwe batyo bwe baliba abawala ba Mowaabu awasomokerwa Alunooni.

³ "Tuwe ku magezi, tubuulire, tukole tutya? Mutusiikirize mubeere ng'ekittuluze wakati mu ttuntu, Abajja bagobebwa mubakweke, abajja badaaga temubalyamu lukwe.

⁴ Muleke aba Mowaabu abajja bagobebwa babeere nammwe. Mubataakirize oyo ayagala okubamalawo." Omujoozi bw'aweddewo, n'okubetentebwa ne kuggwaawo; omulumbaganyi aliggwaawo mu nsi.

⁵ Entebe ey'obwakabaka eryoke etekewewo mu kwagala, era ku yo kutuuleko omufuzi ow'omu nnyumba ya Dawudi alamula mu bwestigwa era anoonya obwenkanya era ayanguwa okukola eby'obutuukirivu.

⁶ Tuwulidde amalala ga Mowaabu, nga bw'ajjudde okwemanya, n'amalala ge n'okuvuma; naye okwemanya kwe tekugasa.

⁷ Noolwekyo leka Mowaabu akaabe, leka buli muntu akaabire ku Mowaabu. Mukungubage, musaalirwe obugaati bw'emizabbibu egy'e Kirukalesesi.

⁸ Ennimo ez'e Kesuboni zikaze, n'emizabbibu gy'e Sibuma giwedde. Abafuzi b'amawanga batemeddewo ddala emit gyabwe egysinganga obulungi, egabunanga ne gituuka e Yazeri nga giggukira mu ddungu n'emitunsi nga gibuna nga gituukira ddala mu nnyanja.

⁹ Noolwekyo kyenva nkaaba amaziga nga Yazeri bw'akaaba olw'omuzabbibu ogw'e Sibuma. Nakufukirira nkutobyne n'amaziga gange, ggwe Kesuboni ne Ereyale: kubanga essanyu ery'ebibala byo n'ebiyokukungula byo lizikiziddwa.

¹⁰ Ennimo engimu ziweddemu essanyu n'okweyagala; ne mu nnimiro z'emizabbibu temuliba ayimba wadde aleekaana; mu masogolero temulibaamu musogozi asogoleramu nvinnyo; okuleekaana kw'omusogozi ng'asogola kukomye.

¹¹ Omutima gwange kyeguva gukaabira Mowaabu mu ddoboozi ng'ery'ennanga, emmeeeme yange munda n'ekaabira Kirukeresi.

¹² Awo Mowaabu bw'alyeyanjula, mu bifo ebigulumivu, alyekooya yekka; bw'aligenda okusamira, tekirimuyamba.

¹³Ekyo kye kigambo MUKAMA kye yayogera ku Mowaabu mu biro eby'edda.

¹⁴Naye kaakano MUKAMA Katonda agamba nti, "Mu myaka esatu, ng'omukozi gwe bapangisizza bwe yandigibaze, ekitiibwa kya Mowaabu kijja kuba nga kifuuse ekivume ekinyoomebwa, newaakubadde ng'alina ekibiina ekinene; era walisigalawo abantu batono ate nga banafu ddala."

Isaaya 17

Obubaka Obukwata ku Ddamasiko

¹"Laba Ddamasiko tekikyali kibuga, kifuuse matongo.

²Ebibuga bya Aloweri babidduseemu: birirekerwa ensolo mwe zinaagalamiranga nga tewali azikanga.

³Ekigo eky'amaanyi kirisaanyizibwaho mu Efulayimu, n'obwakabaka mu Ddamasiko bulimalibwaho; naye abalisigalawo mu Busuuli, baliba n'ekitiibwa ng'eky'abaana ba Isirayiri," bw'ayogera MUKAMA Katonda ow'Eggye.

⁴"Awo olulituuka ku lunaku luli, ekitiibwa kya Yakobo kirikendeera; era akoggere ddala.

⁵Ne kiba ng'omukunguzi bw'akuŋjaanya eŋjaano, n'omukono gwe ne gukungula empeke; weewaawo kiriba ng'omuntu bw'alonda ebinywa by'eŋjaano mu Kiwonvu kya Lefayimu.

⁶Naye mulisigalamu ebinywa ebirondererwa ng'omuzeyituuni bwe gubeera nga gukubiddwa, ne guleka ebibala bibiri oba bisatu waggulu ku busongezo, bina oba bitaano ku busongezo bw'omuti omugimu," bw'ayogera MUKAMA, Katonda wa Isirayiri.

⁷Ku lunaku luli abantu balirowooza ku Mutonzi waabwe, n'amaaso gaabwe galikyukira Omutukuvu wa Isirayiri.

⁸So tebalirowooza ku byoto bya balubaale baabwe, emirimu gy'emikono gyabwe, be beekolera, oba empagi za katonda wa Baasera oba ebyoto kwe bootereza obubaane.

⁹Mu biro ebyo ebibuga byabwe eby'amaanyi Abayisirayiri bye baabalesa, biriba ng'ebifo ebyameramu ebisaka ne kalandalugo. Byonna birisigala matongo.

¹⁰Weerabidde Katonda Omulokozi wo, so tojjukidde Lwazi lwa maanyi go; kyova osimbamu ebisimbe eby'okukusanyusa n'osigamu omuzabbibu oguvudde ebweru.

¹¹Wadde obisimba bulungi nnyo ne bimera ku lunaku lw'obisimbye, era ne bimerusa ensigo ku makya kwennyini kwe bisimbiddwa, tolibaako ky'okungula wabula obulumi obutawonyezeka n'ennaku ey'ekitalo.

¹² Woowe oluyoogaano olw'amawanga amangi, bawuluguma ng'okuwuluguma kw'enyanja esiikuuse! Okuwuluguma kw'abantu, bawuluguma ng'amazzi agayiika n'amaanyi amangi!

¹³ Wadde amawanga galiwuma n'okuwulikika ne gawulikika ng'amazzi agayiika n'amaanyi amangi, MUKAMA bw'aligagoba, galibulawo mbagirawo. Galiba ng'ebisusunku bwe bitwalibwa empewo; era ng'enfuufu ekunta nga yeetooloola, enkuba ng'eneetera okutonnya.

¹⁴ Entisa ey'amaanyi eribagwako akawungeezi. Buliba tebunnakya ng'abalabe bona tewakyali. Guno gwe mugabo gw'abo abatunyaga, era y'empeera y'abo abatunyagako ebyaffe.

Isaaya 18

Obunnabbi Obukwata ku Kuusi

¹ Zikusanze, ggwe ensi ey'ebiwaawaatiro ebikwakwaya, eri emitala w'emigga gya Kuusi,

² etuma ababaka ne bagendera mu maato ag'ebitoogo ku nnyanja. Mugende mmwe ababaka abangu, eri abantu abawanvu ab'emibiru emiweweetu, eri abantu abatiibwa abeewala n'ab'okumpi, eggwanga ery'amaanyi eryogera olulimi olutamanyiddwa, ensi eyawulwamu emigga.

³ Mmwe mwenna abantu abali mu nsi, mmwe ababeera ku nsi, bendera lweriwanikibwa ku nsozi, muligiraba, era ekkondeere bwe lirifuyibwa, muliriwulira.

⁴ Kubanga bw'atyo MUKAMA bw'anjambye nti, "Ndyesirikira ntunule nga nsinziira ewange, ng'olubugumu olutemagana mu musana, ng'ekire ky'omusulo mu lubugumu olw'omu biro eby'amakungula."

⁵ Kubanga okukungula kuliba tekunatuuka, okumulisa nga kuwedde, n'ekimuli nga kifuuka zabbibu eyengedde, aliwawaagula obutabi n'ebiwabyo, n'amatabi agalanda aligasalira.

⁶ Gonna galirekerwa ennyonyi ez'oku nsozi ezirya ebiramu n'ensolo ez'ensi. Era ennyonyi ezirya ebiramu zirye okwo mu biseera by'ekyeya, n'ensolo zonna ez'omu nsiko zirye okwo mu biseera by'obunnyogovu.

⁷ Mu kiseera ekyo MUKAMA Katonda ow'Eggye balimuleetera ebirabo, ensi ey'abantu abawanvu ab'emibiru emiweweetu, abantu abatiibwa abeewala n'abookumpi, ensi ey'eryanyi, eyawulwamu emigga, ku lusozi Sayuuni ekifo ky'erinnya lya MUKAMA Ayinzabyonna.

Isaaya 19

Obunnabbi Obukwata ku Misiri

¹ Obunnabbi obukwata ku Misiri: Laba, MUKAMA yeebagadde ku kire ekidduka ennyo ajja mu Misiri. Ne bakatonda b'e Misiri balijugumira mu maaso ge, n'emitima gy'Abamisiri girisaanuukira munda mu bo.

² Era ndiyimusa Abamisiri okulwana n'Abamisiri, balwane buli muntu ne muganda we, na buli muntu ne muliraanwa we; ekibuga n'ekibuga, obwakabaka n'obwakabaka.

³ Abamisiri baliggwaamu omwoyo era entegeka zaabwe zonna ndizitta; era baliragulwa ebifaananyi ebibajje, n'abasamize, n'abaliko emizimu n'abalogo.

⁴ Era ndigabula Abamisiri mu mukono gw'omufuzi omukambwe, era kabaka ow'entiisa alibafuga, bw'ayogera Mukama, MUKAMA Katonda ow'Eggie.

⁵ Omugga gulikalira n'entobo y'omugga ekale ejemu enjatika.

⁶ N'emikutu giriwunya ekivundu, n'emyala egifyiwa mu mugga omunene nagyo gikale; ebitoogo n'essaalu nabyo biwotoke.

⁷ Ebimera ebiri ku Kiyira, ku lubalama lwa Kiyira kwennyini, ne byonna ebyasimbibwa ku Kiyira, birikala, birifuumuulibwa ne biggweerawo ddala.

⁸ Era n'abavubi balisinda ne bakungubaga, n'abo bona abasuula amalobo mu Kiyira balijjula ennaku, abatega obutimba baliggweeramu ddala amaanyi.

⁹ Era nate n'abo abakozesa obugoogwa obusunsule balinifuwa, n'abo abaluka engoye enjeru mu linena nabo bakenjentererwe.

¹⁰ Abakozi balikwatibwa ennaku, bona abakolera empeera ne baggwaamu omwoyo.

¹¹ Abakulu ab'e Zowani basiruwalidde ddala, n'abagezigezi ba Falaawo bye boogera tebiriumu nsa. Mugamba mutya Falaawo nti, "Ndi mwana w'abagezi, omwana wa bassekabaka ab'edda"?

¹² Kale nno abasajja bo ab'amagezi bali ludda wa? Leka bakubuulire bakutegeeze MUKAMA Katonda ow'Eggie ky'ategese okutuusa ku Misiri.

¹³ Abakungu ab'e Zowani basiriwadde, abakungu ab'e Noofu balimbiddwa, abo ababadde ejinja ery'oku nsonda ery'ebika by'eggwanga bakyamizza Misiri.

¹⁴ MUKAMA abataddemu omwoyo omubambaavu era baleetedde Misiri okutabukatabuka mu byonna by'ekola, ng'omutamiivu atagalira mu bisesemye bye.

¹⁵ Tewali mukulembeze newaakubadde afugibwa, agasa ennyo oba agasa ekitono mu Misiri alibaako ky'akola.

¹⁶ Ku lunaku luli Abamisiri balibeera ng'abakazi. Balikankana n'entiisa olw'omukono gwa MUKAMA Katonda ow'Eggie ogugoloddwa gye bali.

¹⁷N'ensi ya Yuda erifuuka ntiisa eri Misiri, buli muntu anagibuulirwangako anatyanga, olw'okuteesa kwa MUKAMA Katonda ow'Eggye kw'ateesa ku yo.

¹⁸Ku lunaku olwo walibaawo ebibuga bitaano mu nsi y'e Misiri ebyogera olulimi lwa Kanani, era birirayira okwekwata ku MUKAMA Katonda ow'Eggye. Ekimu kiriyitibwa Ekipuba Ekyokuzikirira.

¹⁹Ku olwo waliteekebwawo ekyoto kya MUKAMA wakati mu nsi y'e Misiri, era n'ekijjukizo kya MUKAMA Katonda kiteebewe ku nsalo.

²⁰Kaliba kabonero era bujulizi eri MUKAMA Katonda ow'Eggye mu nsi y'e Misiri. Kubanga balikoowoola MUKAMA nga balumbiddwa, naye alibaweereza omulokozi, era abalwanirira, era alibalokola.

²¹Noolwekyo MUKAMA alimanyibwa mu Misiri, n'Abamisiri balimanya MUKAMA era bamusinze ne ssaddaaka, n'ebirabo era balyeyama obweyamo eri MUKAMA ne babantuukiriza.

²²Era MUKAMA alibonereza Misiri, ng'akuba, ate ng'awonya. Nabo balidda gy'ali, balimwegayirira era alibawonya.

²³Ku olwo walibaawo oluguudo olugazi oluva mu Misiri olugenda mu Bwasuli, n'Omwasuli alijja mu Misiri, n'Omumisiri n'agenda mu Bwasuli; n'Abamisiri balisinziza wamu n'Abaasuli.

²⁴Ku olwo Isirayiri eriba yakusatu wamu ne Misiri n'Obwasuli, baliweesa ensi omukisa.

²⁵Kubanga MUKAMA Katonda ow'Eggye abawadde omukisa, ng'ayogera nti, "Baweebwe omukisa Misiri abantu bange, n'Obwasuli omulimu gw'emikono gyange, ne Isirayiri obusika bwange."

Isaaya 20

Obunnabbi Obukwata ku Misiri ne Kuusi

¹Mu mwaka Talutani omuduumizi w'oku ntikko mwe yajjira mu Asudodi ng'atumiddwa Salugoni kabaka we Bwasuli n'alwana ne Asudodi n'akiwamba;

²mu kiseera ekyo MUKAMA Katonda n'ayogera ne Isaaya mutabani wa Amozi nti, "Genda osumulule ebibukutu mu kiwato kyo era oyambulemu engatto mu bigere byo." N'akola bw'atyo n'atambula engatto ng'aziggyemu.

³MUKAMA Katonda n'ayogera nti, "Ng'omuddu wange Isaaya bwe yatambula obwerefere emyaka esatu nga tayambadde ngoye wadde engatto okuba akabonero n'ekyewuunyo ku Misiri ne ku Kuusi;

⁴bw'atyo kabaka w'e Bwasuli bw'aliwambira ddala Abamisiri, aliwanjangusa Abakuusi, abato n'abakulu nga bali bwerefere nga tebalina na ngatto, amakugunu gaabwe nga tegabikiddwako, Misiri ekwatibwe ensonyi.

⁵Era balitya bakwatibwe ensonyi olwa Kuusi essuubi lyabwe, n'olwa Misiri ekitiibwa kyabwe.

⁶Ku olwo abantu abatuula ku lubalama Iw'enyanja baligamba nti, 'Mulabe ekigudde ku bantu be tubadde twesiga okutukuma, gye twadda tuwonyezebwe nga tudduka kabaka w'e Bwasuli! Kaakano ffe tunaawonyezebwa tutya?"

Isaaya 21

Obunnabbi Obukwata ku Babulooni

¹ Obunnabbi obukwata ku Ddungu eririraanye ennyanja: Ng'embuyaga bwe zikunta nga ziyita mu nsi ey'obukiikaddyo, bw'atyo alumba bw'ava mu ddungu eririraanye ensi etiisa.

² Nfunye okwolesebwa okw'entiisa: alyamu olukwe akola omulimu gwe, n'omunyazi anyaga. Eramu, lumba! Obumeedi zingiza! Ndikomya okusinda kwonna kwe yaleeta.

³ Omubiri gwange kyeguvudde gulumwa, n'obulumi bunkwata, ng'omukazi alumwa okuzaala; nnyiize olw'ebyo bye mpulira, bye ndaba bimazeemu amaanyi.

⁴ Omutima gwange gutya, Entiisa endetera okukankana; Akasendabazaana ke nnali njayaanira, kanfukidde ekikankano.

⁵ Bateekateeka olujuliro, bayalirira ebiwempe, ne balya, ne banywa! Mugolokoke mmwe abakulembeze, musiige engabo amafuta.

⁶Kino Mukama ky'anjamba nti, "Genda ofune omukuumi akuleetere amawulire ku ebyo by'alaba.

⁷ Bw'alaba amagaali n'ebibinja by'embalaasi, n'abeebagazi ku ndogoyi obaabeebagazi ku ɳjamira yeekuume, era yeegendereze."

⁸ Awo omukuumi n'ayogera mu ddobozi ery'omwanguka ng'agamba nti, "Mukama wange, buli lunaku nnyimirira ku munaala, buli kiro mbeera ku mulimu gwange.

⁹ Laba omusajja wuuno ajira mu ggaali, ng'alina n'ekibinja ky'embalaasi. Era ayanukula bw'ati nti, 'Babulooni kigudde, weewaawo kigudde. Ebifaananyi bya bakatonda baakyo byonna bibetendedwa wansi ku ttaka.'

¹⁰ Abantu bange, abasesebbuddwa ku gguuliro, mbategeeza kyempulidde okuva eri MUKAMA Katonda ow'Eggye, Katonda wa Isirayiri.

Obunnabbi obukwata ku Edomu

¹¹ Obunnabbi obukwata ku Duuma: Waliwo ankowoola okuva mu Seyiri ng'ayogera nti, "Omukuumi, bunaakya ddi? Omukuumi, bunaakya ddi?"

¹²Omukuumi ayanukula bw'ati nti, "Bulikya, era buliziba. Bw'obaako ne ky'obuuza kibuuze okomewo nate."

Obunnabbi obukwata ku Buwalabu

¹³ Obunnabbi obukwata ku Buwalabu: Mmwe Abadedeni abatambulira mu bibinja, abasiisira mu bisaka bya Buwalabu,

¹⁴ muleetere abalumwa ennyonta amazzi; mmwe ababeera mu Teema, muleetere abanoonyi b'obubudamu emmere.

¹⁵ Badduka ekitala, badduka ekitala ekisowole, badduka omutego ogunaanuddwa, badduka n'akabi k'entalo.

¹⁶ Bw'ati Mukama bw'anjamba nti, "Mu mwaka gumu, ng'endagaano gye bakolera omukozi bw'eba, ekitiibwa kyonna ekya Kedali kirikoma.

¹⁷ Ku b'obusaale abaliwona, ne ku basajja abalwanyi abazira ab'e Kedali, walisigalawo batono." MUKAMA Katonda wa Isirayiri ayogedde.

Isaaya 22

Obunnabbi Obufa ku Yerusaalemi

¹ Obunnabbi obukwata ku Kiwonvu ky'Okwolesebwa: Kiki ekikutawanya kaakano, n'okulinnya n'olinnya waggulu ku busolya,

² ggwe ekibuga ekijjudde oluyoogaano, ggwe ekibuga eky'amasanyu era eky'ebinyumu? Abantu bo abattibwa, tebaafa kitala newaakubadde okufiira mu lutalo.

³ Abakulembeze bo bona baddukidde wamu; bawambiddwa awatali kulwana. Bonna baakwatibwa ne batwalibwa wamu nga basibe, kubanga badduka.

⁴ Kyenava njogera nti, "Munveeko, mundeke nkaabire ddala nnyo. Temugezaako kunsaasira olw'okuzikirizibwa kw'omuwala w'abantu bange."

⁵ Mukama, MUKAMA Katonda ow'Eggye alina olunaku olw'akatabanguko, olw'okulinyirirwa n'entiisa mu Kiwonvu ky'Okwolesebwa; olunaku olw'okumenya bbugwe, n'okukaabirira ensozi.

⁶ Eramu ayambalidde omufuko gw'obusaale, n'atwala n'abavuzi b'amagaali ge n'embalaasi, Kiri asabuukulula engabo.

⁷ Ebiwonvu byo ebisinga obulungi bijjudde amagaali, n'abeebagala embalaasi bassibbwaa ku wankaaki.

⁸ Okwerinda kwa Yuda kuggyiddwawo. Ku lunaku olwo watunuulira ebyokulwanyisa eby'omu Lubiri olw'Ekipira.

⁹ Walaba amabanga agaali mu kwerinda kw'Ekipira kya Dawudi, wakuñjaanya amazzi mu Kidiba eky'Emmanga.

¹⁰Wabala ebizimbe mu Yerusaalemi n'omenya amayumba okusobola okunyweza bbugwe.

¹¹Wasima ekidiba omuterekebwa amazzi wakati w'ebisenge ebibiri, n'okuŋjaanya ag'ekidiba ekikadde, naye tewatunuulira Oyo eyakisima, wadde okussaamu ekitiibwa Oyo eyakiteekateeka mu biro eby'edda.

¹²Ku lunaku olwo MUKAMA Katonda ow'Eggye yalangirira okukaaba n'okukuba ebiwoobe, n'okwemwako enviiri n'okwambala ebibukutu.

¹³Naye laba, ssanyu na kujaguza, okubaaga ente n'okutta endiga, okulya ennyama n'okunywa envinnyo. Mwogere nti, "Leka tulye, era tunywe kubanga enkya tunaafa."

¹⁴MUKAMA ow'Eggye akimbikulidde n'aŋjamba nti, "Ekibi kino tekirisoniyibwa wadde okuggyibwawo okutuusa lw'olifa," bw'ayogera MUKAMA Katonda ow'Eggye.

¹⁵Bw'ati bw'ayogera MUKAMA Katonda ow'Eggye nti, "Genda eri omuwanika oyo, eri Sabuna avunaanyizibwa olubiri omugambe nti,

¹⁶Okola ki wano era ani yakuwadde olukusa okwetemera entaana wano, n'otema n'amaanyi entaana yo waggulu mu lwazi, ne weerongoosereza eyo ekifo eky'okuwummuliramu?

¹⁷"Weegendereze MUKAMA Katonda anaatera okukuvumbagira, akuggyewo ggwe omusajja ow'amaanyi.

¹⁸Alikuzingazingako, n'akukanyuga mu nsi engazi, nga bwe yandikanyuze omupiira ogusambwa. Eyo gy'olifiira, era eyo amagaali go ag'ekitiibwa gye galisigala, ggwe ensonyi ez'ennyumba ya MUKAMA wo.

¹⁹Ndikuggyga ku ntebe yo, era oliggyibwa mu kifo kyo.

²⁰"Mu biro ebyo nditumya omuweereza wange Eriyakimu mutabani wa Kirukiya.

²¹Ndimwambaza ekyambalo kyo, ne munyweza n'olukoba lwo, ne mukwasa obuyinza bwo. Aliba kitaawe w'abo ababeera mu Yerusaalemi, n'eri ennyumba ya Yuda.

²²Ndimukwasa ekisumulozo ky'ennyumba ya Dawudi; bw'aliggulawo tewaliba aggalawo, bw'aliggalawo tewaliba aggulawo.

²³Ndimunyweza mu kifo ng'enkondo ennene, era aliba ntebe ya kitibwa eri ennyumba ya kitaawe.

²⁴Ekitiibwa ky'ennyumba ye kiribeera ku nnyumba ye, ne ku zadde lye ne ku nda ye yonna, ne ku bintu bye ebinywerwamu, okuva ku bibya okutuuka ku nsumbi."

²⁵ Bw'ati bw'ayogera Katonda ow'Eggye nti, "Ku lunaku olwo, enkondo ennene eyakomererwa mu kifo n'enywera erisalibwa, n'eneguka, n'egwa, n'omugugu gw'ekutte gulisarwako." MUKAMA ayogedde.

Isaaya 23

Obunnabbi Obukwata ku Tuulo

¹ Obunnabbi obukwata ku Tuulo: Mukube ebiwoobe, mmwe ebyombo by'e Talusiisi, kubanga Tuulo kizikirizibbwa ne mutasigala nnyumba newaakubadde ebyombo we biyinza okugohera. Ekigambo kyababikulirwa okuva mu nsi ya Kittimu.

² Musirike mmwe ab'oku kizinga nammwe abasuubuzi b'e Sidoni abagaggawalidde ku nnyanja.

³ Ku nnyanja ennene kwajjirako ensigo za Sikoli, n'eb Yamakungula bya Kiyira bye byali amagoba ga Tuulo, era yafuuka akatale k'amawanga.

⁴ Okwatibwe ensonyi ggwe Sidoni naawe ggwe ekigo ky'enyanja, kubanga enyanja eyogedde nti: "Sirumwangako kuzaala wadde okuzaalako. Sirabiriranga baana babulenzi newaakubadde okukuza abaana aboobuwala."

⁵ Ekigambo bwe kirijja eri Misiri, balinakuwalira ebigambo ebiva e Tuulo.

⁶ Muwunguke mugende e Talusiisi, mukube ebiwoobe mmwe abantu ab'oku kizinga.

⁷ Kino kye kibuga kyammwe eky'amasanyu, ekibuga ekikadde, ekyagenda okusenga mu nsi eyewala?

⁸ Ani eyateekateeka kino okutuuka ku Tuulo, Tuulo ekitikkira engule, ekibuga ekirina abasuubuzi abalangira, ekirina abasuubuzi abamanyifu mu nsi?

⁹ MUKAMA Katonda ow'Eggye yakiteekateeka, amuggyemu amalala n'ekitiibwa kyonna, akkakkanye n'abo bona abamanyifu ku nsi.

¹⁰ Ne bw'otambula ku lukalu lwonna olw'omugga Kiyira, tokyalina kifo ebyombo we bituukira ggwe muwala wa Talusiisi.

¹¹ MUKAMA Katonda agolodde omukono gwe eri enyanja, n'akankanya obwakabaka bwayo. Awadde ekiragiro ekikwata ku Kanani nti ebigo byakyo birizikirizibwa.

¹² Yayogera nti, "Tokyaddayo kukola bya masanyu nate, ggwe muwala wa Sidoni embeerera obetenteddwa. Yambuka osomoke ogende e Kittimu, naye nayo tolifunirayo kuwummula."

¹³ Laba ensi ey'Abakaludaaya abantu abo abatakyaliwo. Omwasuli agifudde ekifo ekibeeramu ensolo ez'omu ddungu. Baayimusa eminaala gyabwe, ne bamenya ebigo byabwe, era n'abazikiriza.

¹⁴ Mukube ebiwoobe mmwe ebyombo by'e Talusiisi, ekigo kyo kizikiriziddwa.

¹⁵ Mu biro ebyo Tuulo kiryerabirwa okumala emyaka nsanvu, gy'emyaka kabaka gy'awangaala. Naye oluvannyuma lw'emyaka egoye ensanvu, ekirituuka ku Tuulo kiriba ng'ekiri mu luyimba olw'omwenzi.

¹⁶ "Kwata ennanga, otambulire mu kibuga, ggwe omwenzi eyeerabiddwa. Ennanga gikube bulungi, oyimbe ennyimba nnyingi olyoke ojjukirwe."

¹⁷ Oluvannyuma lw'emyaka ensanvu, MUKAMA alikyalira Tuulo. Aliddayo ku mulimu gwe ogw'obwamalaaya, era alibukola mu bwakabaka bwonna obuli ku nsi.

¹⁸ Wabula amagoba ge ne byalifunamu biriyawulibwako bibe bya MUKAMA, tebiriterekebwa newaakubadde okukwekebwa, omuntu okubikozesa by'ayagala. Amagoba ge galigenda eri abo ababeera mu maaso ga MUKAMA, basobole okuba n'emmere emala, n'okuba n'ebiyambalo ebirungi.

Isaaya 24

MUKAMA Ayogera ku Kuzikiriza Ensi

¹ Laba MUKAMA alifuula ensi amatongo, agimalirewo ddala, era azikirize n'obwenyi bwayo era asaasaanye n'abagibeeramu.

² Bwe kityo bwe kiriba, ekiriba ku kabona kye kiriba ne ku bantu, ekiriba ku mwami kye kiriba ne ku muweereza omusajja, ekiriba ku mugole we kye kiriba ne ku muweereza we omukazi, ekiriba ku atunda kye kiriba ne ku mugazi, ekiriba ku awola kye kiriba ne ku yeewola, ekiriba ku abanja kye kiriba ne ku abanjibwa.

³ Okumalibwamu ensa, ensi erimalibwamu ddala ensa, n'okunyagibwa, erinyagibwa. MUKAMA Katonda y'akyogedde.

⁴ Ensi ekala n'eggwaamu obulamu, ensi ekala n'ewuubaala, abantu ab'ekitiibwa baggwaamu amaanyi.

⁵ Ensi eyonooneddwa abantu baayo, bajeemedde amateeka, bamenye ebiragiyo, ne bamenyawo n'endagaano ey'emirembe n'emirembe.

⁶ Noolwekyo ekikolimo kimalawo ensi; n'abantu baayo bateekwa okusasula olw'omusango ogwabasinga. Abatuuze b'ensi bayidde, Era abatono be basigaddewo.

⁷ Wayini omusu aggwaamu, n'omuzabbibu gukala, ab'amasanyu bona bakaaba olw'obulumi.

⁸ Okujaguza kw'ebitaasa kusirise, n'oluyoogaano lw'abo ababeera mu masanyu lusirise, entongooli esanyusa esirise.

⁹ Tebakyanywa nvinnyo nga bwe bayimba, n'omwenge gukaayira abagunywa.

¹⁰ Ekibuga ekyazikirizibwa kisigadde nga matongo, na buli mulyango oguyingira mu nnyumba guzibiddwa.

¹¹ Bakaabira envinnyo mu nguudo, n'essanyu lyonna liweddewo, n'okujaguza kwonna tekukyaliwo mu nsi.

¹² Ekibuga kizikiridde wankaaki waakyo amenyeddwamenyeddwa.

¹³ Bwe kityo bwe kiriba ku nsi ne mu mawanga ng'omuzeyituuni bwe gunyeenyezebwa oba ng'ebinywa ebisigaddewo bwe bibeera oluvannyuma lw'okukungula kw'ezabbibu.

¹⁴ Bayimusa amaloboozi gaabwe, baleekaana olw'essanyu, batendereza ekitiibwa kya MUKAMA Katonda okuva mu bugwanjuba.

¹⁵ Noolwekyo abo abali mu buvanjuba mugulumize MUKAMA, mutendereze erinnya lya MUKAMA Katonda wa Isirayiri, mu bizinga eby'enyanja.

¹⁶ Tuwulira okuyimba okuva ku nkomerero y'ensi, "Ekitiibwa kibeere eri Omutuukirivu." Naye ne njogera nti, "Nsanawo, nsanawo. Zinsaze. Ab'olukwe balya mu bannaabwe olukwe, Ab'enkwe bakozesa enkwe okulya mu bannaabwe olukwe."

¹⁷ Entisa n'obunnya n'omutego bibalindiridde, mmwe abantu b'ensi.

¹⁸ Buli alidduka eddoboozi ery'entiisa, aligwa mu kinnya, na buli alirinnya n'ava mu kinnya alikwatibwa mu mutego. Enzigi z'eggulu ziguddwawo, N'emisingi gy'ensi gikankana.

¹⁹ Ensi emenyeddwamenyeddwa, ensi eyawuliddwamu, ensi ekankanira ddala.

²⁰ Ensi etagala ng'omutamiivu, eyuugayuuga ng'akasiisira bwe kayuugayuuga mu kibuyaga, omusango gwe gumulumiriza nnyo olw'obujeemu bwe, era ensi egwa n'etaddamu kuyimuka.

²¹ Ku lunaku olwo MUKAMA Katonda alibonereza ab'amaanyi abali waggulu mu bwengula, ne bakabaka abali wansi ku nsi.

²² Balikuŋjaanyirizibwa wamu ng'abasibe bwe bakuŋjanyirizibwa mu kkomera, era baliweebwa ekibonerezo eky'okuggalirwa mu kkomera ennaku ennyingi.

²³ Omwezi gulitabulwatabulwa, n'enjuba eriswazibwa; MUKAMA Katonda ow'Eggye alifugira mu kitibwa ku Lusozi Sayuuni ne mu Yerusaalemi, ne mu maaso g'abakadde.

Isaaya 25

- ¹ Ggwe, Ayi MUKAMA, gwe Katonda wange; ndikugulumiza ne ntendereza erinnya lyo, kubanga okoze ebintu eby'ettendo, ebintu bye wateekateeka edda, mu bwsigwa bwo.
- ² Ekibuga okifudde ntuumu ya bisasiro, ekibuga ekiriko ekigo okifudde matongo, ekibuga omwaddukiranga bannaggwanga tekikyali kibuga, tekirizimbibwa nate.
- ³ Abantu ab'amaanyi kyebaliva bakussaamu ekitiibwa n'ebibuga eby'amawanga ag'entiisa birikutya.
- ⁴ Ddala obadde kiddukiro eri abaavu, ekiddukiro eri oyo eyeetaaga, ekiddukiro ng'eriyo embuyaga n'ekisiikirize awali ebbugumu. Omukka gw'ab'entiisa guli ng'embuyaga ekuntira ku kisenge
- ⁵ era ng'ebbugumu ery'omu ddungu. Osirisa oluyoogaano lw'abannaggwanga, era ng'ekisiikirize eky'ekire bwe kikendeeza ebbugumu, n'oluyimba lw'abakambwe bwe lusirisibwa.
- ⁶ Ku lusozi luno MUKAMA Katonda ow'Eggye aliteekerateekerako abantu bona ekijulo eky'emmere ennungi, n'embaga eya wayini omuka n'ennyama esingayo obulungi, ne wayini asinga obulungi.
- ⁷ Ku lusozi luno alizikiriza ekibikka ekyetoolodde abantu bona, n'eggigi eribikka amawanga gonna,
- ⁸ era alimalirawo ddala okufa. MUKAMA Katonda alisangula amaziga mu maaso gonna, era aliggyawo okuswazibwa kw'abantu be mu nsi yonna. MUKAMA ayogedde.
- ⁹ Mu biro ebyo balyogera nti, "Eky'amazima oyo ye Katonda waffe; twamwesiga n'atulokola. Ono ye MUKAMA Katonda twamwesiga; tusanyukire mu bulokozi bwe, era tumujagulizeemu."
- ¹⁰ Ddala omukono gwa MUKAMA Katonda guliwummulira ku lusozi luno, naye Mowaabu alirinnyirirwa wansi we, ng'essubi bwe lirinnyirirwa okukolamu ebijimusa.
- ¹¹ Aligolola emikono gye, ng'omuwuzi bw'agolola emikono gye ng'awuga. Katonda alikkakkanya amalala ge newaakubadde ng'emikono gye gikola eby'amagezi.
- ¹² Alimenya bbugwe omuwanvu, n'amusuula, alimusuula ku ttaka, mu nfuufu.

Isaaya 26

Oluylimba olw'Okutendereza

¹ Mu biro ebyo oluyimba luno luliyimbibwa mu nsi ya Yuda. Tulina ekibuga eky'amaanyi; Katonda assaawo obulokozi okuba bbugwe waakyo n'ekigo kyakyo.

² Ggulawo wankaaki, eggwanga ettukuvu liyingire, eggwanga erikuma okukkiriza.

³ MUKAMA alikuuma mirembe oyo amaliridde okumwesiga mu mutima gwe.

⁴ Weesigenga MUKAMA ennaku zonna, kubanga emirembe giri waggulu mu MUKAMA, MUKAMA Katonda oyo atoowaza.

⁵ MUKAMA lwe lwazi olutaggwaawo, akkakkanya ekibuga eky'amalala, akissa wansi ku ttaka, n'akisuula mu nfuufu.

⁶ Kirinnyirirwa ebigere by'abanyigirizibwa, n'ebisinde by'abaavu.

⁷ Ekkubo ly'abatuukirivu ttereenvu; Ggwe atuukiridde, olongoosa olugendo lw'omutuukirivu.

⁸ Weewaawo MUKAMA Katonda tukulindirira nga tutambulira mu mateeka go, era erinnya lyo n'okumanyibwa kwo kwe kwegomba kw'emitima gyaffe.

⁹ Omwoyo gwange gukuyaayaanira mu kiro, omwoyo gwange gukunoonyeza ddala. Bw'osalira ensi omusango, abantu b'ensi bayiga obutuukirivu.

¹⁰ Omukozi w'ebibi ne bw'akolerwa ebyekisa, tayiga butuukirivu. Ne bw'abeera mu nsi ey'abatuukiridde, yeeyongera kukola bibi, era talaba kitibwa kya MUKAMA Katonda.

¹¹ MUKAMA Katonda omukono gwo guyimusibbwagaggulu, naye tebagulaba. Ka balabe obunyiikivu bwo eri abantu bo baswazibwe, omuliro ogwaterekerwa abalabe bo ka gubamalewo.

¹² MUKAMA Katonda, otuteekerateekera emirembe, n'ebyo byonna bye tukoze, ggw'obitukoledde.

¹³ Ayi MUKAMA Katonda waffe, abafuzi abalala batufuze nga wooli naye erinnya lyo lyokka lye tussaamu ekitiibwa.

¹⁴ Baafa, tebakyali balamu; egyo emyoyo egyagenda tegikyagolokoka. Wababonereza n'obazikiriza, wabasaanyaawo ddala bona, ne watabaawo akyabajjukira.

¹⁵ Ogaziyizza eggwanga, Ayi MUKAMA Katonda ogaziyizza eggwanga. Weefunidde ekitiibwa, era ogaziyizza ensalo zonna ez'ensi.

¹⁶ MUKAMA Katonda, bajja gy'oli mu nnaku yaabwe, bwe wabakangavvula, tebaasobola na kukusaba mu kaama.

¹⁷ Ng'omukyala ow'olubuto anaatera okuzaala, bw'alumwa n'akaaba mu bulumi, bwe tutyo bwe twali mu maaso go, Ayi MUKAMA Katonda.

¹⁸ Twali lubuto, twalumwa, naye twazaala mpewo Tetwaleeta bulokozi ku nsi, tetwazaala bantu ba nsi.

¹⁹ Naye abafiira mu ggwe balirama, emibiri gyabwe girizuukira. Mugolokoke, muleekaane olw'essanyu. Ssuulwe wo ali ng'omusulo ogw'oku makya, ensi erizaala abafudde.

²⁰ Mugende abantu bange muyingire mu bisenge byammwe muggalewo enzigi zammwe. Mwekweke okumala akabanga katono, okutuusa ekiruyi kye lwe kirimuggwaako.

²¹ Weewaawo laba MUKAMA Katonda ava mu kifo kye gy'abeera okubonereza abantu b'ensi olw'ebibi byabwe. Ensi erikwekula omusaayi ogwagiyiikako, era teriddayo nate kukweka abattibwa.

Isaaya 27

Okununulibwa kwa Isirayiri

¹ Mu biro ebyo, MUKAMA Katonda alibonereza n'ekitala kye, ekitala kye eky'amaanyi, ekikambwe era ekinene, alibonereza Lukwata omusota ogwekulungula, Lukwata omusota ogwezinga, atte n'ogusota gw'enyanja.

² Mu biro ebyo "Yimba oluyimba ku bibala eby'ennimiro ey'emizabbibu ebaze ebibala.

³ Nze MUKAMA Katonda, ennimo nze ngirabirira era nze ngifukirira buli kiseera. Ngikuuma emisana n'ekiro Waleme kubaawo n'omu agikola akabi.

⁴ Siri munyiivu. Singa katazamiti n'amaggwa binnumba, nandibitabadde mu lutalo? Byonna nandibyokezza omuliro.

⁵ Oba si weewaawo ajje gye ndi afune obuddukiro, tutabagane, weewaawo tutabagane."

⁶ Mu biro ebija Yakobo alisimba emirandira, Isirayiri aliroka n'amulisa n'ajjuza ensi yonna ebibala.

⁷ MUKAMA amukubye omuggo ng'akuba abo abaamukuba? Attiddwa nga be yatta, bwe battibwa?

⁸ Olwanagana naye n'omusobola, n'omuwañjangusa, omugoba n'okuwuumma okw'amaanyi, ng'embuyaga ey'ebuvanjuba bw'efuuwa ku lunaku lwayo.

⁹ Ekyo kye kiriggyawo omusango gwa Yakobo, era ekyo kye kiriba ekibala ekijjuvu ekiriggyawo ekibi kye. Bw'aliddira amayinja gonna ag'ekyoto okuba

amayinja ag'ennoni agayasiddwayasiddwa, tewaliba Baasera newaakubadde ebyoto eby'okwoterezaako obubaane ebirisigala biyimiridde.

¹⁰ Ddala ddala ekibuga ekyaliko enkomera kaakano matongo, ekirekeddwa awo ng'eddungu. Eyo ennyana gy'eriira era gy'egalamira, n'erya amalagala gonna ku matabi gaago.

¹¹ Amatabi gaakyo bwe gakala, gamenyebwako, abakazi ne bagakuŋjaanya ne bagakumisa omuliro. Bano bantu abatategeera, eyamukola tamusaasira, n'eyamutonda tamukwatirwa kisa.

¹² Mu biro ebyo MUKAMA alikusengejja okuva mu mazzi agakulukuta ag'Omugga Fulaati okutuuka ku mugga gw'e Misiri we guyiwa, era mmwe abaana ba Isirayiri mulikuŋjaanyizibwa kinnoomu.

¹³ Era mu biro ebyo ekkondeere eddene lirivuga, n'abo abaali boolekedde okuzikiririra mu nsi y'e Bwasuli, n'abo abaali baawaŋŋangusizibwa mu Misiri balikomawo ne basinza MUKAMA ku lusozi olutukuvu e Yerusaalemi.

Isaaya 28

Zikusanze Efulayimu

¹ Zikusanze engule ey'amalala g'abatamiivu aba Efulayimu, zikusanze ekimuli ekiwotoka eky'obulungi bw'ekitiibwa kye, ekiri ku mutwe gw'ekiwonvu ekigimu, Zikusanze ekibuga ky'abo abatamiivu.

² Laba, Mukama wa maanyi mangi ddala, ng'embuyaga ey'omuzira n'embuyaga ezikiriza, ng'enkuba ey'amaanyi ereeta amataba, bwe ndisuula ekibuga ekyo n'amaanyi mangi.

³ Engule ey'amalala ey'abatamiivu ba Efulayimu aligibetenta n'ebigere bye.

⁴ Ekimuli ekyo ekiwotoka eky'obulungi bw'ekitiibwa kye ekiri waggulu w'ekiwonvu ekigimu, kiriba ng'ettiini erisooka okwengera nga n'amakungula tegannatuuka, era omuntu bw'aliraba alinoga n'alirya.

⁵ Mu biro ebyo MUKAMA Katonda ow'Eggye aliba ngule ya kitiiibwa, engule ennungi ey'abantu be abaasigalawo.

⁶ Aliba n'omwoyo ogw'okusala ensonga mu bwenkanya oyo atuula n'asala emisango, Aliba nsibuko ya maanyi eri abo abawoza olutabaalo ku wankaaki.

⁷ Ne bano nabo batagala olw'omwenge, era bawabye olw'ekitamiiza; Bakabona ne bannabbi batagala olw'ekitamiiza, era bawabye olw'omwenge; bawabye olw'ekitamiiza, batagala ne bava mu kwolesebwa, era tebasalawo nsong.

⁸ Weewaawo emmeeza zonna ziriko ebisesemye, tewakyali kifo kiyonjo.

⁹ “Ani gw’agezaako okuyigiriza? Ani gw’annyonnyola obubaka bwe? Abaana abaakalekayo okuyonka ova abo abaakaggibwa ku mabeere?

¹⁰ Kubanga kola okole, kola okole Ekiragiro ku kiragiro, ekiragiro ku kiragiro, Wano katono na wali katono.”

¹¹ Weewaawo, Katonda alyogera eri abantu abo n’emimwa emigenyi mu lulimi olugwira,

¹² abo be yagamba nti, Kino kye kifo eky’okuwummuliramu eri oyo akooye, era kye kifo eky’okuwerera naye ne bagaana okuwuliriza.

¹³ Noolwekyo ekigambo kya MUKAMA kyekiriva kibeera gye bali kola okole, kola okole, ekiragiro ku kiragiro, ekiragiro ku kiragiro, wano katono na wali katono, balyoke bagende bagwe kya bugazi, era balitegebwa, era ne batuukako ebisago ne bawambibwa.

¹⁴ Noolwekyo muwulire ekigambo kya MUKAMA Katonda mmwe abantu abanyoomi, mmwe abafuga abantu ababeera mu Yerusaalemi ne mubanyooma.

¹⁵ Weewaawo mwewaana nga bwe mugamba nti, “Twakola endagaano n’okufa, era twalagaana n’amagombe. Ekikangabwa eky’amaanyi ne bwe kijja, tekirina kye kiyinza kutukola, kubanga tufudde obulimba ekiddukiro kyaffe, era mu bukuusa mwe twekwese.”

¹⁶ MUKAMA Katonda Ayinzabyonna kyava agamba nti, “Laba, nteeka mu Sayuuni ejinja, ejinja eryagezesewa, ery’oku nsonda, ery’omuwendo, okuba omusingi; oyo alyesiga taliterebuka.

¹⁷ Ndifuula obwenkanya okuba omuguwa ogupima, n’obutuukirivu okuba omuguwa ogutereeza, era omuzira gulyera ekiddukiro ekyobulimba, n’amazzi galyanjaala ku kifo eky’okwekwekamu.

¹⁸ N’endagaano gye walagaana n’okufa erijjulukuka, n’endagaano gye walagaana n’amagombe terinywera. Ekikangabwa eky’amaanyi bwe kirijja, kiribagwira.

¹⁹ Weewaawo buli lwe kinaayitanga, kinaabagwiranga buli lukya emisana n’ekiro.” Era okutegeera obubaka buno kirireeta ntiisa njereere.

²⁰ Weewaawo ekitanda kimpi okwegololerako, ne bulangiti nnyimpi okwebikka.

²¹ Weewaawo MUKAMA aligolokoka nga bwe yagolokoka ku Lusozi Perazimu, era alisunguwala nga bwe yasunguwalira mu Kiwonvu eky’e Gibyoni, alyoke akole omulimu gwe, omulimu gwe ogwewuunyisa, atuukirize omulimu gwe, omulimu gwe ogwewuunyisa.

²² Noolwekyo mulekeraawo okunyooma, enjegere zammwe zireme kweyongera kubazitoowerera. Nawulira okuva eri MUKAMA Katonda ow’Eggye ng’awa ekiragiro ekizikiriza ensi yonna.

²³Muwulirize, era muwulire eddoboozi lyange; Musseeyo omwoyo, muwulire kye njamba.

²⁴Omulimi bw'alima nga yeetegekera okusimba, alima lutata? Alima bw'ayimirira n'atema amavuunike mu ttaka?

²⁵Bw'amala okulyanjaala, tasigamu mpinnamuti, n'asaasaanya kumino? Tasiga njaaano mu kifo kyayo, ne sayiri mu kibanja kyayo, n'omukyere mu nnimiro yaagwo?

²⁶Katonda we amuwa ebiragiro, n'amuyigiriza ekkubo etuufu.

²⁷Empinnamuti teziwuulibwa na luso, newaakubadde okunyiga kumino ne nnamuziga w'eggaali. Empinnamuti zikubibwa na muggo ne kumino n'ekubibwa n'oluga.

²⁸Empeke eteekwa okuseebwa okuvaamu omugaati, So n'omuntu tagiwula butamala. Newaakubadde ng'agitambulizaako nnamuziga w'eggaali lye eriuuula, Embalaasi ze si zeezigisa.

²⁹Bino byonna nabyo biva eri MUKAMA Katonda ow'Eggye, ow'ekitalo mu kuteesa ebigambo, asinga amagezi.

Isaaya 29

Zikusanze Ekibuga kya Dawudi

¹Zikusanze ggwe Alyeri, Alyeri ekibuga Dawudi kye yabeeramu, yongera omwaka ku mwaka, n'entuuko zo ez'embaga zigende mu maaso.

²Wabula ndizingiza Alyeri, alikuba ebiwoobe era alikungubaga, era aliba gye ndi ng'ekyoto kya Alyeri.

³Ndikuba olusiisira okukwetooloola wonna, era ndikwetoolooza eminaala, ne nkusaako ebifunvu.

⁴Olikkakkanyizibwa era olyogera ng'oli mu ttaka, n'ebigambo byo biriwulikika nga biri wansi nnyo ng'oli mu nfuufu. Eddoboozi lyo liriba ng'ery'oyo aliko akazimu nga liva mu ttaka, n'ebigambo byo biriba bya kyama nga biva mu nfuufu.

⁵Naye abalabe bo abangi baliba ng'enfuufu ewewedda, n'ebibinja by'abakozi b'ebibi abasingayo obubi bibe ng'ebisasiro ebifumuuka.

⁶Amangwago mu kaseera katono MUKAMA Katonda ow'Eggye alikukyalira mu kubwatuuka ne mu musisi, ne mu ddoboozi ery'omwanguka, ne mu kibuyaga ne mu nnimi z'omuliro omukambwe oguzikiriza.

⁷Awo ebibinja by'amawanga gonna ebirwana ne Alyeri birimulumba, birirumba n'ekigo kye ne bimutaayiza; kiriba ng'ekirooto, ng'okwolesebwa mu kiro

⁸ ng'omuntu alumwa enjala bw'aloota ng'alya naye bw'agolokoka n'asigala ng'akyalumwa enjala; oba ng'omuntu alumwa ennyonta bw'aloota ng'anywa naye n'agolokoka nga munafu ng'akyalumwa ennyonta. Ekyo kye kirituuka ku bibinja by'amawanga gonna agalwana n'Olusozi Sayuuni.

⁹ Muwuniikirire era mwewuunye Muzibirire era muzibe amaaso; Batamiire, naye si na nvinnyo, batagala, naye si lwa mwenge.

¹⁰ MUKAMA akuwadde otulo tungi, azibye amaaso gammwe bannabbi, era abisse emitwe gyammwe abalabi.

¹¹ Okwolesebwa kuno kwonna tekulina makulu gy'oli okuggyako okuba ebigambo ebissibwako akabonero mu muzingo. Omuzingo bw'oguwa omuntu, asobola okusoma n'omugamba nti, "Nkwegayiridde kino kisome," ajja kukuddamu nti, "Sisobola, kuliko akabonero."

¹² Oba omuzingo bw'oguwa omuntu atasobola kusoma, n'omugamba nti, "Nkwegayiridde kino kisome," ajja kukuddamu nti, "Simanyi kusoma."

¹³ Mukama agamba nti, "Abantu bano bansemberera n'akamwa kaabwe, ne banzisaamu ekitiibwa n'emimwa gyabwe, naye ng'emitima gyabwe gindi wala. Okunsinza kwe bansinza, biragiro abantu bye baayigiriza.

¹⁴ Noolwekyo, laba njenda kwewuunyisa abantu bano. Amagezi g'abagezi galizikirira, n'okutegeera kw'abategeeve kuliggwaawo."

¹⁵ Zibasanze abo abakola kyonna kye basobola okukweka MUKAMA enteekateeka zaabwe, abo abakola emirimu gyabwe mu kizikiza nga bagamba nti, "Ani atulaba? Ani alimanya?"

¹⁶ Mufuula ebintu ne birabika ng'omubumbi alowoozebwa okwenkanankana n'ebbumba. Ekyakolebwa kiyinza okwogera ku eyakikola nti, "Teyankola"? Ensuwa eyinza okugamba omubumbi nti, "Talina ky'amanyi"?

¹⁷ Mu kiseera kitono, Lebanooni tekirifuulibwa nnimiro ngimu, n'ennimiro engimu n'erabika ng'ekibira?

¹⁸ Mu biro ebyo abaggavu b'amatu baliwulira ebigambo by'omuzingo, n'amaaso g'abazibe galizibuka okuva mu kiseera ekizibu ne mu kizikiza.

¹⁹ Abawombeefu balisanyukira mu MUKAMA nate, n'abeetaaga balisanyukira mu Mutukuvu wa Isirayiri.

²⁰ Weewaawo asinga obubi aliggwaawo, n'omunyoomi alibula, n'abo bona abeesunga okukola obutali butuukirivu,

²¹ abo abakozesa ebigambo okufuula omuntu omusobya, abatega eyeerwanako mu mbuga z'amateeka, abawa obujulizi obw'obulimba, ne baleetera abataliiko musango obutawulirwa mu mbuga z'amateeka, balisalibwako.

²² Noolwekyo MUKAMA eyanunula Ibulayimu bw'ati bw'ayogera eri ennyumba ya Yakobo nti, Yakobo taliddayo kuswazibwa, n'obwenyi bwabwe tebulisiwuuka.

²³ Bwe baliraba omulimu gw'emikono gyange mu baana baabwe, balikuuma erinnya lyange nga ttukuvu. Balikakasa obutuukirivu bw'Omukuvu wa Yakobo era baliyimirira ne beewuunya Katonda wa Isirayiri.

²⁴ Abo abaabula mu mwoyo balifuna okutegeera, n'abo abeemulugunya balikkiriza okuyigirizibwa.

Isaaya 30

Zirisanze Eggwanga Ejjeemu

¹ "Zibasanze abaana abajeemu, Abakola enteekateeka ezitali zange ne bazituukiriza ne batta omukago awatali Mwoyo wange ne bongera ekibi ku kibi," bw'ayogera MUKAMA.

² "Baserengeta e Misiri nga tebanneebuuzizzaako, ne banoonya obuyambi ewa Falaawo, n'okuva eri ekisiikirize kya Misiri okuba obuddukiro.

³ Naye obukuumi bwa Falaawo buliswazibwa, n'ekisiikirize kya Misiri kirikuswaza.

⁴ Newaakubadde nga balina abakungu mu Zowani n'ababaka baabwe batuuse e Kanesi,

⁵ buli muntu aliswazibwa olw'eggwanga eritabagasa, abataleeta buyambi newaakubadde okuba ab'omugaso, okuggyako ensonyi n'ekivume," bw'ayogera MUKAMA.

⁶ Obunnabbi obukwata ku nsolo za Negevu bwe buno: Ababaka bayita mu nsi nga balaba ennaku ne batawaanyizibwa mu nsi erimu empologoma ensajja n'enkazi, erimu essalambwa n'omusota ogw'obusagwa nga batadde eby'obugagga byabwe ku ndogoyi, n'ebintu byabwe eby'omuwendo ku mabango g'enjamira nga boolekedde ensi etaliimu magoba.

⁷ Bagenda e Misiri, eterina kyeyinza kubayamba n'akatono. Kyenva muyita Lakabu ataliiko kyayinza kukola.

⁸ Genda kaakano, okibawandiikire ku kipande, okiwandiike ku mizingo, kibabeererenga obujulizi obw'emirembe n'emirembe mu nnaku ezigenda okujja.

⁹ Weewaawo bano bantu bajeemu, baana balimba, baana abateetegese kuwulira biragiyo bya MUKAMA.

¹⁰ Bagamba abalabi nti, "Temuddayo kufuna kwolesebwa," N'eri bannabbi boogera nti, "Temuddayo kututegeeza kwolesebwa kutuufu. Mututegeeze ebitusanyusa, mulagule ebituwabya.

¹¹ Muve mu kkubo lino, mukyame muve ku luguudo luno, mulekeraawo okututegeeza ku Mutukuvu wa Isirayiri."

¹² Noolwekyo bw'ati bw'ayogera Omutukuvu wa Isirayiri nti, "Olw'okugaana obubaka buno, ne mwesiga okunyigirizibwa, ne mwesiga omulimba,

¹³ ekibi kino kyekiriva kikufuukira bbugwe omuwanvu, alimu enjatika era azimbye, okutemya n'okuzibula ng'agudde.

¹⁴ Alimenyekamenyeka mu bitundutundu ng'ensumbi eyakolebwa mu bbumba, n'asaasaanyizibwa awatali kusaasira, era tewaliba luggyo ku byamenyekamenyeka olulirabika okusobola okuyoozesza omuliro mu kyoto, oba okusenyesa amazzi mu kinnya."

¹⁵ Weewaawo bw'ati bw'ayogera MUKAMA Ayinzabyonna Omutukuvu wa Isirayiri nti, "Mu kwenenya ne mu kuwummula mwe muli obulokozi bwammwe, mu kusiriikirira ne mu kwesiga mwe muli amaanyi gammwe, naye temufuddeeyo.

¹⁶ Wayogera nti, 'Nedda tuliddukira ku mbalaasi.' Kyoliva odduka. Wayogera nti, 'Tuliddukira ku mbalaasi ezidduka ennyo.' Ababagoba kyebaliva bawenyuka emisinde.

¹⁷ Abantu olukumi balidduka olw'okutiisibwatiisibwa kw'omuntu omu; Olw'okutiisibwatiisibwa kw'abataano, olidduka, Okutuusa lw'olisigala ng'omulongooti okuwanikibwa bbendera oguli ku ntikko y'olusozi, ng'ebendera eri ku kasozi."

¹⁸ Songa MUKAMA ayagala nnyo okuba ow'ekisa gy'oli; era agolokoka okukulaga okusaasira. Kubanga MUKAMA Katonda wa bwenkanya, balina omukisa bona abamulindirira.

¹⁹ Mmwe abantu ba Sayuuni ababeera mu Yerusaalemi, temuliddayo kukaaba. Alikukwatirwa ekisa bw'olimukaabira ng'omusaba akuyambe. Amangwago ng'awulidde, alikwanukula.

²⁰ Newaakubadde nga Mukama akuwa omugaati ogw'okulaba ennaku, n'amazzi ag'okubonaabona, abasomesa bo tebaliddamu kukwekebwa, era olibalaba n'amaaso go.

²¹ Bw'olidda ku mukono ogwa ddyo oba ku gwa kkono, amatu go galiwulira eddoboozi emabega wo nga ligamba nti, "Lino ly'ekkubo, litambuliremu."

²²Olwo olyoonoonayonoona ebintu ebyakolebwa n'emikono ebiriko ffeeza, n'ebifaananyi byo ebyabikkibwako zaabu, era olibisuula nga bw'osuula ekiwero ekikozesebwa mu nsonga za bakyala era olibigamba nti, "Muveewo."

²³Alibaweereza n'enkuba olw'ensigo z'osiga mu ttaka, n'emmere eva mu ttaka eggimu nga nnyingi. Mu biro ebyo ente zo ziririira mu ddundiro eggazi.

²⁴Ente n'endogoyi ezirma ettaka zirirya omuddo ogwaterekewa n'emmere ensotte, eyawewebwa n'ekitiyo eky'amannyo.

²⁵Mu biro eby'okuttibwa okunene, emirongooti bwe girigwa, emigga gy'amazzi girikulukuta ku buli lusozi oluwanvu na ku buli kasozi akagulumivu.

²⁶Omwezi gulyaka ng'enjuba, n'omusana gulyaka emirundi musanvu okusinga ogwa bulijjo, ng'ekitangaala ky'ennaku omusantu zonna awamu, MUKAMA bw'alinyiga ekinuubule ky'abantu be, n'awonya ekiwundu ky'abaakosebwa.

²⁷Laba, erinnya lya MUKAMA liva wala n'obusungu obubuubbuka n'omukka ogukutte ng'ekire; emimwa gye gjjjudde ekiruyi, n'olulimi lwe muliro ogusaanyaawo.

²⁸Omukka gwe guli ng'omugga gw'amazzi agakulukuta n'amaanyi, agabimba okutuuka mu bulago. Anyeenyanyeenya amawanga mu kakuñjunta ak'okuzikirizibwa era mu mba z'abantu atee kamu eddobo ery'okubawabya.

²⁹Oluyimba luliba ng'olwo lwoyimba mu kiro ng'oja guza ku mbaga entukuvu; omutima gwo gulijaguza ng'abantu bwe bajaguza nga bafuuwa endere ku lusozi lwa MUKAMA, ku lwazi lwa Isirayiri.

³⁰MUKAMA aliyamba abantu okuwulira eddoboozi lye ery'ekitiibwa, alibaleetera okulaba omukono gwe nga gukka mu busungu obungi ennyo ne mu muliro ogusaanyaawo, ne mu bire ebibwatuka, ne mu muzira.

³¹Weewaawo eddoboozi lya MUKAMA lirisesebbula Bwasuli, alibakuba n'omuggo gwe ogw'obwakabaka.

³²Buli muggo MUKAMA gw'anakukubanga n'oluga lwe olubonereza, guliba ng'ebivuga by'ebitaasa n'entongooli, ng'abalwanyisa n'omukono gwe mu ntalo.

³³Weewaawo Tofesi amaze ebbanga ddene nga yeeteekateeka; ky'ateekebwateekewa kabaka. Ekinnya kyakyo eky'omuliro kiwanvu era kigazi, kijjudde omuliro n'enku; omukka gwa MUKAMA gugukoleeza ng'omugga gwa salufa.

Isaaya 31

Zibasanze abo Abeesiga Misiri

¹ Zibasanze abo abaserengeta e Misiri okuyambibwa, abeesiga embalaasi, abeesiga amagaali gaabwe amangi, abeesiga amaanyi amangi ag'abeebagala embalaasi ne batatunuulira Omutukuvu wa Isirayiri wadde okunoonya obuyambi bwa MUKAMA.

² Kyokka MUKAMA mugezi era asobola okuleeta akabi; tajjulula bigambo bye. Aligolokokera ku nnyumba y'abatali batuukirivu, ne ku abo abayamba abakozi b'ebibi.

³ Naye Abamisiri bantu buntu si Katonda n'embalaasi zaabwe mibiri bubiri. Katonda bw'agolola omukono gwe oyo ayamba, alyesittala, n'oyo ayambibwa aligwa era bombi balizikiririra wamu.

⁴ Ddala ddala bw'ati bw'ayogera MUKAMA gye ndi nti, "Ng'empologoma bwe wuluguma, empologoma ey'amaanyi bwe wulugumira ku muyiggo gwayo era newaakubadde ng'ekibinja ky'abasumba kiyitibwa awamu okugirumba, tetiisibwatiisibwa kuwowogana kwabwe, newaakubadde oluyoogaano lwabwe. Bw'atyo ne MUKAMA Katonda ow'Eggye bw'aliserengeta, okulwanira ku lusozi Sayuuni ne ku busozi bwa lwo.

⁵ Ng'ebinyonyi bwe bibuukira waggulu, bw'atyo MUKAMA Katonda ow'Eggye bw'alisaanikira Yerusaalemi; alikkuuma, n'akiwonya, alikiyitamu n'akirokola."

⁶ Mudde eri oyo gwe mwajeemera ennyo, mmwe abaana ba Isirayiri.

⁷ Mu biro ebyo buli omu ku mmwe alisuulira ddala wala ebitali Katonda ebya ffeeza ne zaabu, emikono gyo egitali mituukirivu gye byakola.

⁸ "Bwasuli kirigwa n'ekitala ekitali kya muntu; ekitala ekitali ky'abo abafa kirimusaanyaawo. Alidduka ekitala, n'abavubuka be balikozesebwemirimu egy'amaanyi n'obuwaze.

⁹ Eko kyabwe kirigwa olw'okutya, n'abaduumizi baabwe balitekemuka omutima olw'okulaba ebbendera ey'olutalo," bw'ayogera MUKAMA nannyini muliro oguli mu Sayuuni, era nannyini kikoomi ekiri mu Yerusaalemi.

Isaaya 32

Obwakabaka obw'Obutuukirivu

¹ Laba, Kabaka alifuga mu butuukirivu, n'abafuzi balifuga mu bwenkanya.

² Buli muntu aliba ng'ekifo eky'okwekwemamu empewo, ng'ekiddukiro okuva eri kibuyaga, ng'emigga gy'amazzi mu ddungu, ng'ekisiikirize eky'olwazi olunene mu nsi ey'ennyonta.

³ Olwo amaaso gaabo abalaba tegaliziba, n'amatu g'abo abawulira galiwuliriza.

⁴ Omutima gw'abatali bagumiikiriza gulimanya era gulitegeera, n'olulimi olw'abanaanaagira lulitereera ne bogera bulungi.

⁵ Omusirusiru taliddayo kuyitibwa wa kitibwa, newaakubadde omuntu omwonoonyi okuteekewamu ekitibwa.

⁶ Omusirusiru ayogera bya busirusiru, n'omutima gwe gwemalira ku kukola ebitali bya butuukirivu. Akola eby'obutatya Katonda, era ayogera bya bulimba ku MUKAMA, n'abayala abaleka tebalina kintu, n'abalumwa ennyonta abamma amazzi.

⁷ Empisa z'omwonoonyi si za butuukirivu. Akola entegeka ezitali za butuukirivu, alyoke azikirize abaavu n'ebigambo eby'obulimba, ensonga y'abali mu kwetaaga ne bw'eba nga ntuu fu.

⁸ Naye omuntu ow'ekitiibwa akola entegeka za kitibwa, era ku bikolwa bye eby'ekitiibwa kw'anywerera.

⁹ Mmwe abakazi abateefirayo, mugolokoke muwulirize eddoboozi lyange; mmwe abawala abawulira nga muli wanywevu, muwulire bye ηnjamba.

¹⁰ Mu mwaka gumu oba n'okusingawo, mmwe abawulira nga muli wanywevu, mulyta, amakungula g'emizabbibu galifa, n'amakungula g'ebibala tegalijja.

¹¹ Mutye mmwe abakazi abateefirayo, mukankane mmwe abawala abawulira nga muli wanywevu. Muggyeko engoye zammwe, mwesibe ebibukutu mu biwato byammwe.

¹² Munakuwalire ennimiro ezaali zisanyusa, olw'emizabbibu egyabalanga,

¹³ n'olw'ensi ey'abantu bange, ensi eyamerangamu amaggwa ne katazamiti. Weewaawo mukaabire ennyumba zonna ezaali ez'amasanyu, na kino ekibuga ekyali eky'amasanyu.

¹⁴ Weewaawo ekigo kirirekebwawo, ekibuga ekirimu oluyoogaano kirifuuka kifulukwa. Ebigo n'eminaala birifuuka ebitagasa ennaku zonna, ekifo ekisanyusa endogoyi, eddundiro ly'ebisibo,

¹⁵ okutuusa Omwoyo lw'alitufukibwako okuva waggulu, n'eddungu ne lifuuka ennimiro engimu, n'ennimiro engimu n'erabika ng'ekibira.

¹⁶ Obwenkanya bulituula mu ddungu, n'obutuukirivu bulibeera mu nnimiro engimu.

¹⁷ Ekibala ky'obutuukirivu kiriba mirembe, n'ekiriva mu butuukirivu kiriba kusiriikirira na bwesige emirembe gyonna.

¹⁸ Abantu bange balibeera mu bifo eby'emirembe, mu maka amateefu mu bifo eby'okuwummuliramu ebitatawaanyizibwa.

¹⁹ Omuzira ne bwe guligwa ne gukuba ekibira okukimalawo, n'ekibuga ne kiggirwawo ddala,

²⁰ ggwe oliraba omukisa, ng'osiga ensigo y'oku migga gyonna, n'ente zo n'endogoyi zo ne zirya nga zeeyagala.

Isaaya 33

¹ Zikusanze ggwe omuzikiriza ggwe atazikirizibwanga. Zikusanze ggwe alya olukwe mu balala, ggwe, gwe batalyangamu lukwe, bw'olirekaraawo okuzikiriza, olizikirizibwa. Bw'olirekeraawo okulya mu balala olukwe, balikulyamu olukwe.

² Ayi MUKAMA tusaasire, tukuyaayaanira. Obeere amaanyi gaffe buli makya, obulokozi bwaffe mu biro eby'okulabiramu ennaku.

³ Olw'eddoboozi ery'okubwatuka, abantu balidduka, bw'ogolokoka, amawanga gasasaasaana.

⁴ Omunyago gwo, gukungulwa enzige ento, era abantu bagugwako ng'ekibinja ky'enzige.

⁵ MUKAMA agulumizibwe, kubanga atuula waggulu, alijuza Sayuuni n'obwenkanya n'obutuukirivu.

⁶ Y'aliba omusingi omugumu mu biro byo, nga lye tterekero eggagga ery'obulokozi, n'amagezi n'okumanya. Okutya MUKAMA kye kisumuluzo kye tterekero ly'obugagga obwo.

⁷ Laba abasajja abazira ab'amaanyi bakaabira mu nguudo mu ddoboozi ery'omwanguka, n'ababaka ab'emirembe bakaaba nnyo.

⁸ Enguudo ennene tezitambulirwako, tewali azitambulirako. Endagaano yamenyebwa, n'abajulizi baayo banyoomebwa, tewali assibwamu kitibwa.

⁹ Ensi ekungubaga era eyongobera, Lebanooni aswadde era awotose; Saloni ali ng'eddungu, ng'asuula Basani ne Kalumeeri.

¹⁰ MUKAMA agamba nti, "Kaakano nnaagolokoka, kaakano nnaagolumizibwa, kaakano nnaayimusibwa waggulu.

¹¹ Ofuna olubuto olw'ebisusunku, ozaala ssubi, omukka gwo, muliro ogukusaanyaawo.

¹² Abantu balyokebwa nga layimu bw'ayokebwa, balyokebwa omuliro ng'ebisaka by'amaggwa amasale."

¹³ Mmwe abali ewala, mutengeere kye nkoze. Mmwe abali okumpi, mukkirize amaanyi gange.

¹⁴ Abakozi b'ebibi ab'omu Sayuuni batidde, okutya kujjidde abatalina Katonda. "Ani ku ffe ayinza okubeera awamu n'omuliro ogusaanyaawo? Ani ku ffe ayinza okubeera awamu n'omuliro ogutaliggwaawo?"

¹⁵ Atambulira mu butuukirivu, n'ayogera ebituufu, oyo atatwala magoba agava mu bubbi, n'akuuma emikono gye obutakkiriza nguzi, aziba amatu ge n'atawulira ntegeka za kutta, n'aziba amaaso ge obutalaba nteekateeka ezitali za butuukirivu,

¹⁶ ye muntu alituula waggulu mu bifo ebya waggulu, n'obuddukiro bwe buliba ebigo eby'omu nsozi. Aliweebwa emmere, n'amazzi tegalimuggwaako.

¹⁷ Amaaso go galiraba kabaka mu bulungi bwe, ne galaba ensi eyewala.

¹⁸ Omutima gwo gulifumiitiriza ku ntiisa ng'ogamba nti, "Omukungu omukulu ali ludda wa? Ali ludda wa eyasoloozanga omusolo? Omukungu avunaanyizibwa eminaala ali ludda wa?"

¹⁹ Toliddayo kulaba bantu abo ab'amalala, abantu ab'olulimi olutamanyiddwa, olulimi olutategeerekeka.

²⁰ Tunuulira Sayuuni ekibuga eky'embaga zaffe, amaaso go galiraba Yerusaalemi, ekifo eky'emirembe, eweema etalisimbulwa enkondo zaayo tezirisimbulwa, newaakubadde emiguwa gyayo okukutulwa.

²¹ Weewaawo MUKAMA aliba Amaanyi gaffe era aliba ekifo eky'emigga emigazi n'ensulo engazi. Temuliyitamu lyato newaakubadde ekyombo ekinene tekiriseeyeeyeramu.

²² Kubanga MUKAMA ye mulamuzi waffe, MUKAMA y'atuwa amateeka, MUKAMA ye Kabaka waffe, y'alitulokola.

²³ Emiguwa gyo gisumulukuse n'omulongooti si munywevu, n'ettanga si lyanjuluze. Awo omugabo omungi guligabanyizibwamu, n'abalala balitwala eby'omunyago.

²⁴ Tewali abeera mu Sayuuni alyogera nti, "Ndi mulwadde," n'abo ababeeramu balisonyiyibwa ekibi kyabwe.

Isaaya 34

Amawanga gasalirwa Omusango

¹ Musembere mmwe amawanga muwulirize. Musseeyo omwoyo mmwe abantu. Ensi ewulirize, ne byonna ebigrimu, ensi ne byonna ebivilamu.

² MUKAMA anyiigidde amawanga gonna, ekiruyi kye kiri ku magye gaabwe gonna. Alibazikiririza ddala, alibawaayo okuttibwa.

³ Abantu baabwe abattibwa balisuulibwa ebweru, n'emirambo gyabwe giriwunya, n'ensozi zirinnyikira omusaayi gwabwe.

⁴ Emmunyeenye zonna ez'omu ggulu zirisaanuuka, n'eggulu liryezingako ng'omuzingo; n'eggye ery'omu ggulu lirigwa, ng'ebikoola ebiwotose ebiva ku muzabbibu, ng'ebirimba ebyayongobera ebiva ku mutiini.

⁵ Weewaawo ekitala kyange kinywedde ne kijjuzibwa mu ggulu, era laba, kikkira ku Edomu okusala omusango, abantu be mmaliddewo ddala.

⁶ Ekitala kya MUKAMA kisaabye omusaayi, kiriko amasavu, omusaayi gw'abaana b'endiga n'embuzi, amasavu agava mu nsingo za sseddume. MUKAMA alina ekiweebwayo mu Bozula, era waliyo n'okuttibwa okw'amaanyi mu Edomu.

⁷ Embogo zirifiira wamu nazo, n'obute obulume, ne ziseddume zirifiira wamu nazo. Ensi yaabwe erijjula omusaayi, n'enfuufu erinnyikira amasavu.

⁸ MUKAMA alina olunaku olw'okuwalanirako eggwanga, omwaka ogw'okwesasuza, olw'ensonga eya Sayuuni.

⁹ Emigga gyा Edomu girikalira ne gifuuka bulimbo, n'enfuufu ye erifuuka ng'obuwunga bwa salufa ayokya. Ensi ye erifuuka ng'obulimbo obuggyaa omuliro.

¹⁰ Talizikizibwa emisana n'ekiro, n'omukka gwe gulinyooka ennaku zonna. Edomu alisigala kifulukwa emirembe n'emirembe, era tewaliba n'omu ayita mu nsi eyo.

¹¹ Ekiwuugulu eky'omu ddungu n'ekiwuugulu ekireekaana, birikibeeramu. Ekiwuugulu ekinene ne namujjoona birizimbamu ebisu byabyo. Katonda aligololera ekipimo eky'okwewunika, n'ekipimo ekinaaleka Edomu nga njereere.

¹² Abakungu be tebalibaako kye bayita bwakabaka, n'abalingira be bona baliggwaawo.

¹³ Amaggwa galimera ku minaala egy'ekibuga kye, n'emyennyango n'amatovu ne bimera mu bigo bye ebyanywezebw. Aliyiggibwa ebibe, era ebiwuugulu birimufuula ekifo eky'okuwummulirangamu.

¹⁴ Ensolo ez'omu ddungu gye zirisisinkana empisi, n'embuzi enkambwe ez'omu nsiko gye ziriramusiganyiza. Era eyo ebisolo ebitambula ekiro nabyo biriwummula nga byefunidde ekifo eky'okuwummulirangamu.

¹⁵ Ekiwuugulu kiribiikira eyo amagi, ne kigaalula, ne kirabirira abaana baakyo wansi w'ekisiikirize kyakyo. Era eyo ne kamunye gy'alikuujjaanira, empanga n'enseera.

¹⁶ Tunula mu muzingo gwa MUKAMA osome. Tewali na kimu ku ebyo ekiribulayo, era ekirume kiriba n'ekikazi, n'ekikazi ne kiba n'ekirume. Akamwa ka MUKAMA ke kalagidde, era Omwoyo we yalibikuujjaanya.

¹⁷ Agabira buli kimu omugabo gwakyo, era omukono gwe gubigabanyiza mu kigera. Birikibeeramu ennaku zonna, bibeere omwo emirembe n'emirembe.

Isaaya 35

Essanyu ly'Abanunule

¹ Eddungu n'ensi enkalu birijaguza; Eddungu lirisanyuka ne limeramu ebantu. Ebimuli ebifaanana ng'ejjirikiti

²birimeruka, birijaguza nnyo ne biwowogana n'essanyu mu ddoboozi ery'omwanguka. Ekitiibwa kya Lebanooni kirigiweebwa, ekitiibwa kya Kalumeeri ne Saloni; baliraba ekitiibwa kya MUKAMA, ekitiibwa kya Katonda waffe.

³ Muzzeemu amaanyi emikono eminifu, n'amaviivi agajugumira mugagumye.

⁴ Mugambe abo abalina omutima omuti nti, Mubeere n'amaanyi temutya: laba Katonda wammwe alijja; alibalwanirira, alage abalabe bammwe obusungu obw'Obwakatonda, era alibalokola.

⁵ Olwo amaaso g'abazibe galiraba, era n'amatu ga bakiggala galigguka;

⁶ omulema alibuuka ng'ennangaazi, n'olulimi lw'abatayogera luliyimba n'essanyu. Amazzi galifubutuka ne gakulukutira mu lukoola n'emigga mu ddungu.

⁷ N'omusenyu ogwokya gulifuuka ekidiba, n'ensi eyakala edda n'etiiriika ensulo ez'amazzi. Ebibe we byagalimiranga walimera omuddo, n'essaalu, n'ebitoogo.

⁸ Era eribaayo oluguudo olunene, n'ekkubo, eririyitibwa Ekkubo Ettukuvu. Abatali balongoofu tebaliriyitamu, liriba ly'abali abalongoofu, kubanga abasirusiru abatali balongoofu tebaliriyitamu.

⁹ Teribaayo mpologoma, so teririnnyayo nsolo yonna nkambwe; tezirirabikayo, naye abanunule balitambilira eyo.

¹⁰ N'abantu ba MUKAMA abaanunulibwa balikomawo, ne bajja mu Sayuuni nga bayimba, n'essanyu eritaggwaawo nga libajjudde. Balifuna essanyu lingi nnyo n'okujaguza, okunakuwala n'okusinda nga biggweereddewo ddala.

Isaaya 36

Sennakeribu Atiisatiisa Yerusaalemi

¹ Awo olwatuuka, mu mwaka ogw'ekkumi n'ena ogw'obufuzi bwa kabaka Keezeekiya, Sennakeribu kabaka w'e Bwasuli n'ayambuka okulumba ebibuga byonna ebya Yuda ebyali bizimbiddwako bbugwe n'abiwamba.

²Awo kabaka w'e Bwasuli n'asindika Labusake omuduumizi we ow'oku ntikko okuva e Lakisi n'eggye eddene ayolekere Yerusaalemi ewa kabaka Keezeekiya.

Omuduumizi ono n'asimba amakanda ku mabbali g'omukutu gw'amazzi omunene ku luguudo olugenda ku Nnimiro y'Omwozi w'Engoye.

³Awo Eriyakimu mutabani wa Kirukiya, eyali akulira olubiri, ne Sebuna omuwandiisi, ne Yoswa mutabani wa Asafu eyavunaanyizibwanga ebiwandiiko ne bafuluma okumusisinkana.

⁴Labusake n'abagamba nti, "Mugambe Keezeekiya nti, 'Bw'ati bw'ayogera kabaka omukulu, kabaka w'e Bwasuli nti, Kiki ddala kye weesiga?

⁵Olowooza ebigambo obugambo birina amaanyi n'amagezi okuwangula olutalo. Ani gwe weesiga olyoke onjemere?

⁶Laba weesiga Misiri, ogwo omuggo obuggo, olumuli olubetente, oluyinza okufumita engalo z'omuntu ng'alwesigamyeko: bw'atyo Falaawo, ye kabaka w'e Misiri bw'ayisa bona abamwesiga.'

⁷Naye bw'onoñjamba nti, 'Twesiga MUKAMA Katonda waffe,' si ye yali nannyini byoto n'ebifo ebigulumivu Keezeekiya bye yaggyawo n'agamba Yuda ne Yerusaalemi nti, 'Mu maaso g'ekyoto kino we munaasinzizanga?'

⁸"Kale nno MUKAMA wange Kabaka w'e Bwasuli agamba nti, Ajja kukuwa embalaasi enkumi bbiri bw'obanga ddala olina abanaazeebagala.

⁹Mu mbeera eyo gy'olimu oyinza otya okuwangula wadde omuduumizi asembayo obunafu mu gye lyaffe ne bwe weesiga ebigaali n'embalaasi za Misiri?

¹⁰Ate ekirala olowooza nzize okulumba ensi eno n'okugizikiriza nga MUKAMA si y'andagidde? MUKAMA yanñamba nnumbe ensi eno ngizikirize.'"

¹¹Awo Eriyakimu ne Sebuna ne Yoswa ne bagamba Labusake nti, "Tukwegayiride yogera n'abaddu bo mu Lusuuli kubanga tulumanyi, toyogera naffe mu Luyudaaya ng'abantu abali ku bbugwe bawulira."

¹²Naye Labusake n'ayogera nti, "Ebyo ebigambo MUKAMA wange yantumye kubyogera eri mukama wo n'eri ggwe mwekka, so si n'eri abasajja abatudde ku bbugwe abali nga mmwe abagenda okulya obubi bwabwe n'okunywa omusulo gwabwe?"

¹³Awo Labusake n'ayimirira n'ayogera mu ddoboozi ery'omwanguka mu lulimi olw'Abayudaaya nti, "Muwulire ebigambo bya kabaka omukulu, kabaka w'e Bwasuli.

¹⁴Kabaka agambye bw'ati nti, Temukkiriza Keezeekiya kubalimbalimba tayinza kubawonya.

¹⁵Temukkiriza Keezeekiya kubasigula ng'abagamba nti, 'MUKAMA ddala ajja kutununula, ekibuga kino tekijja kugwa mu mukono gwa Bwasuli.'

¹⁶ “Temuwuliriza Keezeekiya kubanga bw’ati bw’ayogera kabaka w’e Bwasuli nti, ‘Mutabagane nange mufulume mujje gye ndi, olwo buli muntu ku mmwe lw’aliryu ku muzabbibu gwe na buli muntu ku mutiini gwe, era buli omu alinywa ku mazzi ag’omu kidiba kye,

¹⁷ okutuusa lwe ndijja ne mbatwalira ddala mu nsi efaanana ensi yammwe, ensi ey’enjaano ne wayini, ensi ey’emigaati n’ennimiro ez’emizabbibu.’

¹⁸ “Mwekuume Keezeekiya aleme okubasendasenda ng’ayogera nti, ‘MUKAMA alibalokola.’ Waliwo katonda yenna ow’amawanga eyali awonyezza ensi ye mu mukono gwa kabaka w’e Bwasuli?

¹⁹ Bali ludda wa bakatonda ab’e Kamasi ne Alupadi? Bali ludda wa bakatonda ab’e Sefarayimu? Baali bawonyezza Samaliya mu mukono gwange?

²⁰ Baani ku bakatonda bona ab’ensi ezo abaali bawonyezza ensi zaabwe mu mukono gwange? Kale MUKAMA asobola atya okuwonya Yerusaalemi mu mukono gwange?”

²¹ Kyokka bo baasirika busirisi tebaddamu, kubanga kabaka yali alagidde nti, “Temumuddamu.”

²² Awo Eriyakimu mutabani wa Kirukiya eyali akulira olubiri ne Sebuna Omuwandiisi ne Yoswa mutabani wa Asafu Omukuumi w’ebiwandiiko, ne baddayo eri Keezeekiya nga bayuzizza engoye zaabwe, ne bamubuulira ebigambo bya Labusake.

Isaaya 37

Keezeekiya Akaabirira MUKAMA

¹ Awo kabaka Keezeekiya bwe yabiwulira n’ayuza engoye ze n’ayambala ebibukutu n’ayingira mu nnyumba ya MUKAMA.

² N’atuma Eriyakimu eyali akulira olubiri ne Sebuna omuwandiisi ne bakabona abakulu, nga bambadde ebibukutu, eri nnabbi Isaaya mutabani wa Amozi.

³ Ne bamugamba nti, “Keezeekiya atutumye okukugamba nti, Olunaku luno lunaku lwa kulabiramu nnaku era lwa kuvumirwamu era lwa kujoogebwa; kubanga abaana batuuse okuzaalibwa naye nga tewali maanyi ga kubazaala.

⁴ Oboolyawo MUKAMA Katonda wo anaawulira ebigambo bya Labusake eyatumibwa kabaka w’e Bwasuli mukama we okuvuma Katonda omulamu, MUKAMA Katonda wo n’amunenya olw’ebigambo by’awulidde: Kale waayo okusaba kwo wegayiririre ekitundu ekikyasigaddewo.”

⁵ Abaddu ba kabaka Keezeekiya bwe bajja eri Isaaya,

⁶Isaaya n'abagamba nti, "Mutegeeze mukama wammwe nti, 'Bw'ati bw'ayogera MUKAMA nti, Ebigambo by'owulidde abaddu ba kabaka w'e Bwasuli bye banvumye, tebikutiisa.

⁷Laba ndimusindikira omwoyo omubi, awulire olugambo addeyo mu nsi ye. Era eyo gye ndimuzikiririza afe ekitala."

⁸Awo Labusake omuduumizi wa Bwasuli bwe yaddayo, n'asanga kabaka w'e ng'alwana ne Libuna: kubanga yawulira nti avudde e Lakisi.

⁹Ate era kabaka Sennakeribu n'afuna obubaka nti Tiraaka kabaka w'e Kuusi azze okumulwanyisa. Bwe yakiwulira n'asindika ababaka eri Keezeekiya n'obubaka buno nti,

¹⁰"Keezeekiya kabaka wa Yuda mumugambe nti, Katonda wo gwe weesiga takulimbanga ng'ayogera nti, 'Yerusaalemi tekirigabulwa mu mukono gwa kabaka w'e Bwasuli.'

¹¹Laba wawulira bakabaka b'e Bwasuli kye baakola amawanga gonna, ne bagazikiririza ddala. Mwe munaawona?

¹²Amawanga bokitange ge baasaanyaawo, Gozani, ne Kalani, ne Lezefu n'abantu ba Adeni abaabanga mu Terasali, bakatonda baago, baabayamba?

¹³Ali ludda wa kabaka w'e Kamasi ne kabaka w'e Alupadi ne kabaka w'ekibuga Sefarayimu oba ow'e Keena, oba ow'e Yiva?"

Okusaba kwa Keezeekiya

¹⁴Keezeekiya n'aggya ebbaluwa mu mukono gw'ababaka n'agisoma: Keezeekiya n'ayambuka mu nnyumba ya MUKAMA n'agyanjuluza mu maaso ga MUKAMA.

¹⁵N'asaba ne yeegayirira MUKAMA nga agamba nti,

¹⁶"Ayi MUKAMA ow'Eggye, Katonda wa Isirayiri, atuula wakati mu bakerubbi, ggwe Katonda wekka afuga obwakabaka bwonna obw'omu nsi, ggwe wakola eggulu n'ensi.

¹⁷Otege okutu kwo Ayi MUKAMA owulire, ozibule amaaso go, Ayi MUKAMA, olabe: owulire ebigambo byonna ebya Sennakeribu by'aweerezza okuvuma Katonda omulamu.

¹⁸"Mazima ddala MUKAMA, bakabaka b'e Bwasuli baazisa amawanga gonna n'ensi zaago,

¹⁹ne basuula bakatonda baabwe mu muliro: kubanga tebaali bakatonda, naye mulimu gwa ngalo z'abantu, miti na mayinja; kyebaava babazikiriza.

²⁰Kale nno, ayi MUKAMA Katonda waffe, tulokole mu mukono gwa Sennakeribu, obwakabaka bwonna obw'ensi butegeere nga ggwe wekka ggwe MUKAMA."

²¹ Awo Isaaya mutabani wa Amozi n'atumira Keezeekiya ng'ayogera nti, "Bw'ati bw'ayogera MUKAMA Katonda wa Isirayiri nti, Kubanga onneegayiridde ku bya Sennakeribu kabaka w'e Bwasuli,

²² kino kye kigambo kye mmwogeddeko: "Omuwala wa Sayuuni embeerera akunyooma era akusekerera. Omuwala wa Yerusaalemi akunyeenyeza omutwe gwe nga bw'odduka.

²³ Ani gw'ovumye gw'ovodde? Era ani gw'oyimuyisirizzaako eddoboozi lyo n'okanulira n'amaaso? Omutukuvu wa Isirayiri!

²⁴ Okozesezza abaddu bo okuvuma Mukama n'oyogera nti, Nyambuse n'amagaali gange amangi ku ntikko y'olusozi, ntuse ku njuyi ez'omunda eza Lebanooni; era ntemedde ddala emivule gyakwo emiwanvu, n'enfugo zaakwo ezisinga obulungi, era natuuka ne ku lusozi lwakwo olukomererayo, ekibira kyayo ekisinga obunene.

²⁵ Waduula nti wasima enzizi era n'onywa n'amazzi mu mawanga era nti ebigere by'abajaasi bo byakaliza amazzi g'omugga Kiyira mu Misiri.'

²⁶ "Tewawulira nga nakisalawo dda? Nakiteekateeka dda. Mu biro eby'edda nakiteekateeka; era kaakano nkituukirizza, olyoke ofuule ebibuga ebiriko bbugwe okuba ng'entuumo y'amayinja.

²⁷ Abantu baamu kyebaavanga baggwaamu amaanyi, ne baterebuka ne bakenjentererwa ne baba ng'essubi mu nnimiro, ng'omuddo omuto, ng'omuddo ogumera ku nnyumba ogwokebwa ne gufa nga tegunnakula.

²⁸ "Naye mmanyi obutuuliro bwo era mmanyi okufuluma kwo n'okuyingira kwo n'obuswandi bw'ondaga.

²⁹ Kubanga oneereegeddeko, okwepanka kw'okoze nkutuuseeko. Era kaakano ntuse okuteeka eddobo mu nnyindo zo, n'oluuma ndufumite mu mimwa gyo, nkuzzeeyo ng'opaala mu kkubo lye wajjiramu."

Katonda Atuukiriza Ekisuubizo kye

³⁰ Awo Isaaya n'agamba Keezeekiya nti, "Kano ke kabonero akanaakuweebwa: Omwaka guno mugenda kulya ejjaano eyeemeza yokka. Eno gye muliryako n'omwaka ogwokubiri. Mu mwaka ogwokusatu mulirya ku birime byammwe bye musize era ne mukungula mu nnimiro zammwe ez'emizabbibu.

³¹ Abantu ba Yuda abalifikkawo baliba ng'ebisimbe emirandira gyabyo nga gikka wansi ate nga bigimuka ne bibala.

³² Mu Yerusaalemi walibaawo abalisigalawo ne ku Lusozi Sayuuni walibeerawo abaliwona, kubanga MUKAMA Ayinzabyonna mu bumalirivu bwe, yeewaddeyo okukikola.

³³“Noolwekyo bw’ati bw’ayogera MUKAMA ku bikwata ku Kabaka w’e Bwasuli nti, “Kabaka oyo taliyingira mu kibuga kino wadde okulasayo akasaale. Talikisemberera n’engabo newaakubadde okutuumako ekifunvu ng’akitaayiza.

³⁴ Ekkubo lye yajjiramu lye limu ly’anaakwata okuddayo. Tajja kuyingira mu kibuga kino,” bw’ayogera MUKAMA.

³⁵ “Ndirwanirira ekibuga kino nkirokole.”

³⁶ Awo malayika wa MUKAMA n’afuluma n’atta mu lusiisira olw’Abasuli abantu emitwalo kkumi na munaana mu enkumi ttaano. Abaasigalawo bagenda okuzuukuka enkyia nga wonna wajjudde mirambo.

³⁷ Awo Sennakeribu kabaka w’e Bwasuli n’avaayo n’addayo n’abeera e Nineeve.

³⁸ Lumu bwe yali ng’asinziza mu ssabo lya Nisuloki katonda we, Adulammereki, ne Salezeri batabani be ne bamusalira olukwe ne bamutta: ne baddukira mu nsi ya Alalati. Esaludooni mutabani we n’amusikira.

Isaaya 38

Okusaba Kwa Keezeekiya ng’Alwadde

¹ Mu nnaku ezo Keezeekiya n’alwala nnyo, katono afe. Nnabbi Isaaya mutabani wa Amozi n’ajja gy’ali n’amugamba nti, “Bw’ati bw’ayogera MUKAMA nti, Teekateeka ennyumba yo, kubanga togenda kulama, ogenda kufa.”

²Awo Keezeekiya n’akyuka n’atunuulira ekisenge n’asaba ne yeegayirira MUKAMA

³ng’agamba nti, “Jjukira kaakano, Ayi MUKAMA, nkwegayiridde, engeri gye natambuliranga mu maaso go n’amazima n’omutima ogutuukiridde, ne nkola ebisaanidde mu maaso go.” Era Keezeekiya n’akaaba nnyo amaziga.

⁴Awo Ekigambo kya Katonda ne kijja eri Isaaya,

⁵nga MUKAMA agamba nti, “Genda ogambe Keezeekiya nti, ‘Bw’ati bw’ayogera MUKAMA Katonda wa Dawudi kitaawo nti, Mpulidde okusaba kwo, ndabye amaziga go: laba nzija kwongera ku nnaku zo emyaka kkumi n’ettaano.

⁶Era ndikuwonya ggwe n’ekibuga kino mu mukono gwa kabaka w’e Bwasuli: Era ndikuuma ekibuga kino.

⁷ “‘Era kano ke kabonero k’onoofuna okuva eri MUKAMA nti MUKAMA alikola ekigambo ky’ayogedde.

⁸Laba nzija kuzza emabega ekisiikirize ebigure kkumi enjuba bw’eneeba egwa, ky’eneekola ku madaala kabaka Akazi ge yazimba.’” Bw’etyo enjuba n’edda emabega ebigure kkumi.

⁹Awo Keezeekiya Kabaka wa Yuda bwe yassuuka, n’awandiika ebigambo bino;

¹⁰ nayogera nti, "Mu maanyi g'obulamu bwange mwe nnali njenda okufira nnyingire mu miryango gy'emagombe, nga simazeeyo myaka gyange egisigaddeyo."

¹¹ Ne ndyoka njogera nti, "Sigenda kuddayo kulaba MUKAMA, mu nsi y'abalamu. Sikyaddamu kulaba bantu mu nsi abantu mwe babeera.

¹² Obulamu bwange buzingiddwako ng'eweema y'omusumba w'endiga bw'enzigibwako. Ng'olugoye lwe babadde balanga ate ne balusala ku muti kwe babadde balulukira, bwe nt yo bwe nawuliranga emisana n'ekiro nga obulamu bwange obumalirawo ddala.

¹³ Ekiro kyonna nakaabanga olw'obulumi nga ndi ng'empologoma gw'emmennaamenya amagumba, ekiro n'emisana nga ndowooza nga MUKAMA yali amalawo obulamu bwange.

¹⁴ Nakaabanga ng'akasanke oba akataayi, n'empuubaala ng'enjiibwa, amaaso gange ne ganfuyirira olw'okutunula mu bbanga eri eggulu. Ne nkaaba nti, Ayi Mukama, nga nnyigirizibwa, nziruukirira."

¹⁵ Naye ate nga naagamba ki? Yali ayogedde nange nga ye yennyini ye yali akikoze. N'atambulanga n'obwegendereza mu bulumi buno obw'obulamu bwange.

¹⁶ Ayi Mukama, olw'ebyo, abantu babeera abalamu, era mu ebyo omwoyo gwange mwe gubeerera omulamu. Omponye, mbeere mulamu.

¹⁷ Ddala laba okulumwa ennyo bwe nt yo kyali ku lwa bulungi bwange, naye ggwe owonyezza obulamu bwange okugwa mu bunnya obw'okuzikirira. Kubanga otadde ebibi byange byonna emabega wo.

¹⁸ Kubanga tewali n'omu mu nsi y'abafu ayinza kukutendereza, abafu tebayinza kukusuuta; tebaba na ssuubi mu bwesigwa bwo.

¹⁹ Akyali omulamu, y'akutendereza nga nze bwe nkola leero; bakitaabwe b'abaana babategeeza nga bw'oli omwesigwa ennyo.

²⁰ MUKAMA alindokola, kyetunaavanga tuyimba ne tukuba n'ebivuga eby'enkoba ennaku zonna ez'obulamu bwaffe, mu nnyumba ya MUKAMA.

²¹ Isaaya yali agambye nti, "Baddire ekitole ky'ettiini bakisiige ku jjute, liwone."

²² Kubanga Keezeekiya yali abuuizza nti, "Kabonero ki akalaga nga ndiwona ne ntuuka okulagako mu nnyumba ya MUKAMA?"

Isaaya 39

Ababaka Okuva e Babulooni

¹ Awo mu nnaku ezo Merodakubalandani mutabani wa Baladani kabaka w'e Babulooni, n'aweereza Keezeekiya ebbaluwa n'ekirabo, kubanga yawulira nti yali alwadde naye ng'awonye.

² Keezeekiya n'abasanyukira, n'abalaga ennyumba ye ey'ebintu bye eby'omuwendo omungi, effeeza ne zaabu, n'ebiyakaloosa, n'amafuta ag'omuwendo omungi, n'ennyumba yonna ey'ebiyokulwanyisa. Byonna ebyali mu bugagga bwe, tewали kintu mu nnyumba ye newaakubadde mu bwakabaka bwe bwonna Keezeekiya ky'ataabalaga.

³ Awo Isaaya nnabbi n'ajja eri kabaka Keezeekiya n'amubuuza nti, "Abasajja banno bagamba ki? Era bavudde wa okuja gy'oli?" Keezeekiya n'amuddamu nti, "Bazze wange, bava mu nsi ey'ewala e Babulooni."

⁴ N'amubuuza nti, "Balabye ki mu nnyumba yo?" Keezeekiya n'addamu nti, "Byonna ebiri mu nnyumba yange babirabye, tewali kintu mu byobugagga bwange kye sibalaze."

⁵ Awo Isaaya n'agamba Keezeekiya nti, "Wuliriza MUKAMA Katonda ow'Eggye ky'agamba:

⁶ Laba, ennaku zija, byonna ebiri mu nnyumba yo n'ebyo bajjajjaabo bye baaterekanga ebikyalivo n'okutuusa leero, lwe biritwalibwa e Babulooni, ne watasigala kintu na kimu, bw'ayogera MUKAMA.

⁷ N'abamu ku batabani bo, ggwe kennini b'ozaala balitwalibwa mu lubiri lwa kabaka w'e Babulooni ne balaayibwa."

⁸ Awo Keezeekiya n'agamba Isaaya nti, "Ekigambo kya MUKAMA ky'oñjambye kirungi." Kubanga yalowooza nti, "Kasita emirembe, n'obutebenkevu binaabangawo mu mulembe gwange."

Isaaya 40

Ebigambo eby'Essuubi

¹ Mugumye, mugumye abantu bange, bw'ayogera Katonda wammwe.

² Muzzeemu Yerusaalemi amaanyi mumubuulire nti, entalo ze ziwedde, n'obutali butuukirivu bwe busasuliddwa. Era MUKAMA amusasudde emirundi ebiri olw'ebibi bye byonna.

³ Eddoboozi ly'oyo ayogera liwulikika ng'agamba nti, "Muteeketeke ekkubo lya MUKAMA mu ddungu, mutereeze oluguudo lwe mu ddungu.

⁴ Buli kiwonvu kirigulumizibwa, na buli lusozi n'akasozi ne bikkakkanyizibwa. N'obukyamu buligololwa, ebifo ebitali bisende ne bitereezebwa.

⁵ Ekitiibwa kya MUKAMA kiribikkulwa, ne bona abalina omubiri balikirabira wamu, kubanga akamwa ka MUKAMA ke kakyogedde."

⁶ Ne mpulira eddoboozi nga ligamba nti, "Yogera mu ddoboozi ery'omwanguka." Ne ɲjamba nti, "Nnaayogera ki?" Ne linziramu nti, gamba nti, "Abantu bona bali nga muddo, n'obulungi bwabwe bumala ennaku ntono ng'ebimuli eby'omu nnimiro.

⁷ Omuddo guwotoka, ekimuli kiyongobera, omukka gwa MUKAMA bwe gugufuwako. Mazima abantu muddo.

⁸ Omuddo guwotoka, ekimuli kiyongobera, naye ekigambo kya Katonda waffe kibeerera emirembe gyonna."

⁹ Ggwe abuulira Sayuuni ebigambo ebirungi, werinnyire ku lusozi oluwanvu; ggwe abuulira Yerusaalemi ebigambo ebirungi, yimusa eddoboozi lyo n'amaanyi, liyimuse oyogere, totya. Gamba ebibuga bya Yuda nti, "Laba Katonda wammwe ajja!"

¹⁰ Laba, MUKAMA Katonda ajja n'amaanyi mangi era afuga n'omukono gwe ogw'amaanyi ag'ekitalo. Laba empeera ye eri mu mukono gwe, buli muntu afune nga bw'akoze.

¹¹ Aliisa ekisibo kye ng'omusumba, akuŋjaanya abaana b'endiga mu mukono gwe n'abasitula mu kifuba kye, n'akulembra mpola mpola ezibayonsa.

¹² Ani eyali ageze amazzi g'enyanja mu kibatu kye, n'apima eggulu n'oluta, n'apima enfuufu y'oku nsi mu kibbo, oba n'apima ensozi ku minzaani, n'obusozi ku kipima?

¹³ Ani eyali aluŋjamizza Omwoyo wa MUKAMA? Ani ayinza okumuyigiriza n'amuwa amagezi?

¹⁴ Ani gwe yali yeebuuzzako amuwe ku magezi, era ani eyali amuyigirizza ekkubo ettuufu? Ani eyali amusomesessa eby'amagezi n'amulaga okuyiga, n'okumanya n'okutegeera?

¹⁵ Laba amawanga gali ng'ettundo eriri mu nsuwa, era ng'enfuufu ekutte ku minzaani, apima ebizinga ng'apima olufuufu ku minzaani.

¹⁶ N'ensolo zonna ez'omu kibira kya Lebanooni tezimala kubeera kiweebwayo eri Katonda waffe, n'emiti gyamu gyonna mitono nnyo tegisobola kuvaamu nku zimala.

¹⁷ Amawanga gonna ag'omu nsi gabalibwa mu maaso ge, gy'ali gabalibwa nga si kintu n'akamu.

¹⁸ Kale ani gwe mulifaananya Katonda? Oba kifaananyi ki kye mulimugeraageranyizaako?

¹⁹ Ekifaananyi ekyole omukozi akifumba, n'omuweesi wa zaabu n'akibikkako zaabu, n'akibikkako n'emikuufu egya ffeeza.

²⁰ Oyo omwavu atasobola kufuna ffeeza oba zaabu afuna omuti omugumu ogutavunda ne yenoonyeza omukozi omugezigezi okusimba n'okunyweza ekifaananyi ekyole.

²¹ Temunnamanya, temunnawulira, temubuulirwanga okuva ku kutondebwa kw'ensi?

²² Katonda atuula ku nsi enneekulungirivu, era gy'ali abantu bali ng'amayanzi. Atimba eggulu ng'olutimbe era alibamba ng'eweema ey'okubeeramu.

²³ Afuula abafuzi obutaba kintu, afuula n'abalamuzi mu nsi okuba ekitaliimu.

²⁴ Bali ng'ebisimbe ebyakamera biba bya kasimbibwa, biba byakasigibwa, biba byakaleeta emirandira, nga abifuwa nga biwotoka, ng'embuyaga ebitwalira ddala ng'ebisasiro.

²⁵ "Kale mulinfaananya ani, ani gwe mulinnenkanya?" bw'ayogera Omutukuvu.

²⁶ Muyimuse amaaso gammwe mulabe ebiri ku ggulu. Ani eyatonda ebyo byonna? Oyo afulumya ebyaka eby'omu bbanga afulumya kina kimu, byonna nga bwe biri, n'abiyita amannya gaabyo. Olw'obukulu bw'obuyinza bwe era kubanga wa maanyi ga nsusso, tewali na kimu kibulako.

²⁷ Lwaki ogamba ggwe Yakobo era ne wemulugunya ggwe Isirayiri nti, "MUKAMA tamanyi mitawaana gye mpitamu, era tafaayo nga tuggyibwako eddembe lyaffe ery'obwebange"?

²⁸ Tonnamanya? Tonnawulira? MUKAMA, ye Katonda ataliggwaawo. Omuronzi w'enkomerero y'ensi. Tazirika so takoowa era n'amagezi ge tewali n'omu ayinza kugapima.

²⁹ Awa amaanyi abazirika, n'oyo atalina buyinza amwongerako amaanyi.

³⁰ Abavubuka bazirika, bakoowa, n'abalenzi bagwira ddala.

³¹ Naye abo abalindirira MUKAMA baliddamu buggyaa amaanyi gaabwe, balitumbiira n'ebiwaawaatiro ng'empungu; balidduka mbiro ne batakoowa, balitambula naye ne batazirika.

Isaaya 41

Katonda Agumya Isirayiri

¹ "Musirike mumpulirize mmwe ebizinga, amawanga gaddeemu amaanyi. Mwetegeke okuleeta emisango gyammwe mu mbuga mujja kufuna obwogerero. Tukunjaane tulabeko omuntuufu.

² "Ani eyayita omuweereza we okuva mu buvanjuba, eyamuyita akole emirimu gye amuweereze mu butuukirivu? Ani eyamuwa obuwanguzi ku bakabaka ne ku

mawanga, n'abafuula ng'enfuufu n'ekitala kye, obusaale bwe ne bubafuula ebisasiro ebitwalibwa empewo?

³N'agenda ng'abagoba embiro n'ayita bulungi mu makubo ebigere bye gye by'ali bitayitanga.

⁴Ani eyakola kino ng'ayita emirembe gy'abantu okuva ku lubereberye? Nze MUKAMA ow'olubereberye era ow'enkomerero, nze wuuyo."

⁵Ebizinga by'alaba ne bitya; n'ensi yonna n'ekankana: baasembera kumpi ne batuuka.

⁶Buli muntu yayamba muliraanwa we ng'agamba nti; "Guma omwoyo!"

⁷Awo omubazzi n'agumya omuweesi wa zaabu omwoyo, n'oyo ayoyoota n'akayondo n'agumya oyo akuba ku luyijja ng'ayogera ku kyuma ekigatta nti, "Nga kirungi," era ne bakikomerera n'emisumaali kireme okusagaasagana.

Isirayiri Yalondebwa Katonda

⁸"Naye ggwe Isirayiri omuweereza wange, Yakobo gwe nalonda, ezzadde lyा Ibulayimu mukwano gwange,

⁹ggwe, gwe naggya ku nkomerero y'ensi ne nkuyita okuva mu bitundu by'ensi ebikomererayo ddala, ne nkugamba nti, 'Oli muddu wange,' nze nakulonda so sikusuulanga:

¹⁰Totya kubanga nze ndi wamu naawe; tokejnjentererwa, kubanga nze Katonda wo. Nnaakuwanga amaanyi. Wewaawo nnaakuyambanga n'omukono ogwa ddyo ogw'obutuukirivu bwange."

Isirayiri Alinnya ku Balabe be

¹¹"Laba, abo bona abakukambuwalidde balikwatibwa ensonyi ne balaba ennaku. Abo abakuwakanya balifuuka ekitagasa ne baggwaawo.

¹²Olibanoonya abo abaakukijjanyanga naye n'otobalaba. Abo abaakulwanyisanga baliggwaamu ensa.

¹³Kubanga nze MUKAMA Katonda wo akukwata ku mukono ogwa ddyo, nze nkugamba nti, Totya nze nzija kukuyamba.

¹⁴Wadde ng'oli lusirijjanyi totya, ggwe Isirayiri, kubanga nnaakuyamba," bw'ayogera MUKAMA Omununuzi wo, Omutukuvu wa Isirayiri.

¹⁵"Laba ndikufuula ng'ekyuma ekiggya ekisala ennyo, ekyogi eky'amannyo amangi. Muliwuula ensozi ne muzimementulira ddala, obusozi ne mubufuula ebisusunku.

¹⁶Oliziwewa empewo n'ezifuumula, embuyaga ezifuumuka zizisaasaanye. Era naawe olisanyukira mu MUKAMA, era mu Mutukuvu wa Isirayiri mw'olyenyumiririza."

MUKAMA Ayimusa Isirayiri

17 “Abaavu n’abali mu bwetaavu bwe baneetaganga amazzi ne baganoonya naye ne gababula, ate nga ennimi zaabwe zikaze, nze MUKAMA ndibawulira, nze Katonda wa Isirayiri siribaleka.

18 Ndigola emigga ku busozi obutaliiko kantu, era n’ensulo wakati mu biwonvu. Olukoola ndirufuula ennyanja, n’eddungu lirivaamu enzizi z’amazzi.

19 Ndisimba mu lukoola omuvule ne akasiya, omumwanyi n’omuzeyituuni, ate nsimbe mu ddungu enfugo n’omuyovu awamu ne namukago.

20 Abantu balyoke balabe bamanye, balowooze era batuuke bona okutegeera nti omukono gwa MUKAMA gwe gukoze kino, nti Omutukuvu wa Isirayiri yakikoze.”

MUKAMA Asoomooza bakatonda Abalala

21 Bw’ati bw’ayogera MUKAMA Katonda gye muli mmwe nti, “Mmwe bakatonda baamawanga, mujje nammwe mwogere. Muleete ensonga zammwe tuziwulire,” bw’ayogera Kabaka wa Yakobo.

22 “Baleete bakatonda bwabwe batubuilire ebigena okubaawo. Batubuilire n’ebiyaliwo emabega, tusobole okubimanya, n’okubirowoozaako n’okumanya ebinaavaamu oba okutubuilira ebigena okujja.

23 Mutubuilire ebigena okubaawo tulyoke tumanye nga muli bakatonda. Mubeeko kye mukola ekirungi oba ekibi tulyoke tutye era tukejñentererwe mu mutima.

24 Laba, temuliiko bwe muli ne bye mukola tebigasa. Abo ababasinza bennyamiza.

25 Nonze omuntu alifuluma mu bukiakkono akoowoola erinnya lyange, abeera mu buvanjuba. Alirinnyirira abafuzi ng’asamba ettaka, abe ng’omubumbi asamba ebbumba.

26 Ani eyakyogera nti kiribeerawo tulyoke tumanye, eyakyogera edda tulyoke tugambe nti, ‘Wali mutuufu?’ Tewali n’omu yakyogerako, tewali n’omu yakimanya era tewali n’omu yawulira kigambo na kimu okuva gye muli.

27 Nasooka okubuilira Sayuuni era ne mpeereza omubaka e Yerusaalemi ababuilire amawulire amalungi.

28 Naye tewali n’omu mu bakatonda bammwe eyabategeeza kino. Tewali n’omu awa bigambo biruñjamya, tewali n’omu addamu bwe mbuuza.

29 Laba, bona temuli nsa! Bye bakola byonna tebigasa. Ebifaananyi byabwe byonna ebibajje, mpewo na butaliimu.”

Isaaya 42

Omuweereza wa Katonda

- ¹ Laba omuweereza wange gwe mpanirira, omulonde wange gwe nsanyukira ennyo. Ndimuwa Omwoyo wange era alireeta obwenkanya eri amawanga.
- ² Talireekaana wadde okuyimusa eddoboozi lye mu luguudo.
- ³ Talimenya lumuli lubetentefu oba okuzikiza olutambi olwaka empola ennyo; mu bwesigwa alireeta obwenkanya.
- ⁴ Taliremererwa oba okuggwaamu essuubi okutuusa ng'aleesewo obutebenkevu ku nsi. N'ebizinga eby'ewala biririndirira amateeka ge.
- ⁵ Bw'atyo bw'ayogera MUKAMA Katonda, eyatonda eggulu n'alibamba. Eyayanjuluza ensi ne byonna ebivilamu; awa omukka abantu baakwo era n'obulamu eri bona abagitambulirako.
- ⁶ "Nze MUKAMA, nakuyita mu butuukirivu. Ndikukwata ku mukono era ndikukuma. Ndikufuula okuba endagaano eri abantu, era omusana eri bannamawanga.
- ⁷ Okuzibula amaaso g'abazibe, okuta abasibe okuva mu makomera n'okuggya abo abali mu bunnya, abo abali mu kizikiza.
- ⁸ "Nze MUKAMA, eryo lye linnya lyange, n'ekitiibwa kyange sirikiwa mulala, newaakubadde ettendo lyange okukiwa bakatonda abalala.
- ⁹ Laba, ebyo bye nagamba nti biribaawo bituuse, kaakano mbabuulira ku bigenda okujja; mbibategeeza nga tebinnabaawo."

Oluyimba olw'Okutendereza MUKAMA

- ¹⁰ Muyimbire MUKAMA oluyimba oluggya, ettendo lye okuva ku nkomerero y'ensi! Mmwe abasaabala ku nnyanja ne byonna ebivilimu, mmwe ebizinga ne bona ababibeeramu.
- ¹¹ Leka eddungu n'ebibuga byamu biyimuse amaloboozi gaabyo, ebyalo Kedali mw'atuula. Leka abantu b'e Seera bayimbe n'essanyu. Leka baleekaanire waggulu ku ntikko z'ensozi.
- ¹² Leka MUKAMA bamuwe ekitiibwa era balangirire ettendo lye mu bizinga.
- ¹³ MUKAMA, anafuluma okulwana ng'omutabaazi ow'amaanyi, era ng'omutabaazi ow'amaanyi alijja yeeswanta, n'okuleekaana ng'alangirira olatalo. Era aliwangula abalabe be.

Katonda Asuubiza Okuyamba Abantu be

- ¹⁴ "Ebbanga ggwanvu nga siriiko kye njamba, nga nsirise neekuumye. Naye okufaanana ng'omukazi alumwa okuzaala, nkaaba, mpejjawejja era nzisa ebikkowe.

¹⁵ Ndizikiriza ensozi n'obusozi, egyo emiddo gyakwo gyonna ndi wakugiwotosa. Era ndikaza ebinywa byabwe byonna n'emigga ndigifuula ebizinga.

¹⁶ Era ndikulembera abantu bange abazibe ba maaso mu kkubo lye batamanyi n'abayise mbalunjjamize mu makubo ge batamanyidde. Ndifuula ekizikiza okuba omusana mu maaso gaabwe n'ebifo ebizibu okuyitamu ndibirongoosa. Ebyo by'ebintu bye ndikola, sirireka bantu bange.

¹⁷ Naye abo abeesiga bakatonda abalala, ababagamba nti, 'Mwe bakatonda baffe,' balikwasibwa ensonyi, era baligobebwa, mu buswatu obungi.'

Ekibi ky'Eggwanga n'Okubonerezebwa

¹⁸ "Muwulire mmwe bakiggala, mutunule mmwe bamuzibe, mulabe.

¹⁹ Ani muzibe okuggyako omuweereza wange, oba kiggala okuggyako omubaka wange gwe ntuma? Eriyo eyaziba amaaso asinga oyo eyeewaayo gye ndi, oba omuzibe ng'omuweereza wa MUKAMA?

²⁰ Olabye ebintu bingi naye tobifuddeko, amatu go maggule naye tolina ky'owulira."

²¹ Kyasanyusa MUKAMA olw'obulungi obw'obutuukirivu bwe okukuza amateeka ge n'okugassaamu ekitiibwa.

²² Naye bano, bantu be, ababbibwa ne banyagibwa bona ne basibibwa mu binnya oba abasibibwa mu makomera. Bafuuka munyago nga tewali n'omu abanunula, bafuuliddwa abanyage nga tewali n'omu agamba nti, "Bateebe baddeyo."

²³ Ani ku mmwe anaawuliriza kino, oba anaafaayo ennyo n'awuliriza mu biro ebigenda okujja?

²⁴ Ani eyawaayo Yakobo okuba omunyago ne Isirayiri eri abanyazi? Teyali MUKAMA gwe twayonoona? Ekyo yakikola kubanga tebaagoberera makubo ge. Tebaagondera mateeka ge.

²⁵ Kyeyava abafukako obusungu bwe obubuubiuka n'obulumi bw'entalo. Beebungululwa ennimi z'omuliro naye tebaategeera. Gwabookya naye ne batakissaako mwoyo.

Isaaya 43

Omulokozi wa Isirayiri Ali Omu Yekka

¹ Naye kaakano bw'atyo bw'ayogera MUKAMA oyo eyakutonda, ggwe Yakobo, eyakukola ggwe Isirayiri: "Totya kubanga nkununudde, nakuyita nga mpitira ddala erinnya lyo, oli wange.

² Bw'onooyitanga mu mazzi amawanvu nnaabeeranga naawe, ne bw'onooyitanga mu migga tegirikusaanyaawo; bw'onooyitanga mu muliro tegukwokyenga, ennimi z'omuliro tezirkwokya.

³ Kubanga nze MUKAMA Katonda wo, Katonda Omutukuvu owa Isirayiri; Omulokozi wo. Mpayo Misiri ggwe osobole okuteebwa, era Kuusi ne Seba mbiwaayo gwe ofune emirembe gyo.

⁴ Kubanga oli wa muwendo gye ndi, ow'ekitiibwa, era kubanga nkwegala, ndiwaayo abasajja ku lulwo mpeeyo n'abantu ku lw'obulamu bwo.

⁵ Totya, kubanga nze ndi nawe, ndireeta ezzadde lyo okuva ebuvanjuba era nkukunjaanye okuva ebugwanjuba.

⁶ Ndigamba obukiikkono nti, 'Waayo b'olina,' n'obukiikkaddyo nti, 'Tobagaanira.' Leeta batabani bange okuva ewala ne bawala bange okuva ku nkomerero y'ensi.

⁷ Buli muntu yenna ayitibwa erinnya lyange, gwe natonda olw'ekitiibwa kyange, gwe nakola gwe natonda."

Eggwanga erironeddwa nga Omujulirwa

⁸ Fulumya abo abalina amaaso naye nga tebalaba, abalina amatu naye nga tebawulira.

⁹ Amawanga gonna ka gakunjaane n'abantu bajje. Ani ku bo eyali ayogedde ku bintu bino? Ani ku bo eyali alangiridde ebyaliwo? Leka baleete abajulizi okukakasa nti baali batuufu abawulira bagambe nti, "Ddala bwe kiri."

¹⁰ "Muli bajulirwa bange," bw'ayogera MUKAMA, "omuweereza wange gwe nalonda: mulyoke mummanye, munzikirize, mutengeere nga Nze wuuyo: Tewali Katonda eyansooka era teriba mulala alinzirira.

¹¹ Nze, Nze mwene, nze MUKAMA; okuggyako nze tewali Mulokozi.

¹² Nze naleeta okwolesewba ne nangirira ne ndokola; nze so si katonda mulala mugwira mu mmwe. Muli bajulirwa bange," bw'ayogera MUKAMA.

¹³ "Weewaawo, okuva mu nnaku ez'edda Nze Nzuuyo; tewali n'omu ayinza okuwonya omuntu mu mukono gwange. Kye nkola ani ayinza okukikyusa?"

¹⁴ Bw'ati bw'ayogera MUKAMA, Omununuzi wammwe, Omutukuvu wa Isirayiri nti, "Ku lwammwe nditumya e Babulooni, ndeetere ab'e Babulooni bona nga bawambe mu byombo ebyabeeewanya.

¹⁵ Nze MUKAMA, Omutukuvu wammwe, Omutonzi wa Isirayiri, Kabaka wammwe."

¹⁶ Bw'ati bw'ayogera MUKAMA, oyo eyakola ekkubo mu nnyanja, n'oluguudo mu mazzi amangi ennyo,

¹⁷ eyaleetera amagaali, n'embalaasi n'eggye, n'abaali bazze okubayamba, byonna awamu okugwa omwo, ne bitaddamu kusituka, nga bizikiridde, nga bikomye ng'akatambi akabadde kaaka:

¹⁸ "Mwerabire eby'emabega, so temulowooza ku by'ayita.

¹⁹ Laba, nkola ekintu ekiggya! Kaakano kitandise okulabika, temukiraba? Nkola oluguudo mu ddungu ne ndeeta emigga mu lukoola.

²⁰ Ensolo ez'omu nsiko zinzisaamu ekitiibwa, ebibe n'ebiwuugulu; kubanga nze ngaba amazzi mu ddungu, n'emigga mu lukoola, okunywesa abantu bange, abalonde bange,

²¹ abantu be nnekolera balangirire ettendo lyange.

²² "So tonkowodde ggwe, Yakobo, era teweekooyeza ggwe Isirayiri.

²³ Tondeetedde ndiga ey'ebiweebwayo ebyokebwa, wadde okunzisaamu ekitiibwa ne ssaddaaka zo. Sikukaluubirizanga nga nkusaba ebiweebwayo ebyempeke wadde okukukooya n'obubaane.

²⁴ Tondeeteddeeyo bubaane buwunya kawoowo wadde okunzikusa n'amasavu ga ssaddaaka zo, naye onkoyesessa n'ebibi byo, era n'onteganya n'obutali butuukirivu bwo.

²⁵ "Nze, Nze mwene, nze wuuyo asangula ebyonoono byo ku lwange nze, so sirijukira bibi byo.

²⁶ Nzijukiza eby'edda, tuwoze ffembi, jjangu ensonga tuzoogereko fembi, yogera ebiraga nga toliiko musango.

²⁷ Kitaawo eyasooka yasobia, abakulembeze bo baanjemera.

²⁸ Kyendiva ndiswaza abakungu ba yeekaalu yo, era ndiwaayo Yakobo azikirizibwe ne Isirayiri aswazibwe."

Isaaya 44

Isirayiri Eyalondebwa

¹ "Naye kaakano ggwe Yakobo omuweereza wange, wuliriza, ggwe Isirayiri gwe nalonda.

² Bw'ati bw'ayogera MUKAMA oyo, eyakutonda era eyakubumba mu lubuto, ajja kukuyamba. Totya ggwe Yakobo, omuweereza wange, ggwe Yesuruni gwe nalonda.

³ Kubanga ndifuka amazzi ku ttaka eririna ennyonta n'enzizi ku ttaka ekkalu. Ndifuka Omwoyo wange ku zadde lyo, era n'omukisa gwange ku bazzukulu bo.

⁴ Era balimera ng'omuddo ku mabbali g'enzizi, babe ng'emiti egiri ku mabbali g'emigga.

⁵ Omu aligamba nti, 'Nze ndi wa MUKAMA,' n'omulala ne yeeyita erinnya lya Yakobo, n'omulala ne yeewandiikako nti, 'Wa MUKAMA,' ne yeetuumma Isirayiri.

⁶ "Bw'ati bw'ayogera MUKAMA kabaka wa Isirayiri era Omununuzi we, MUKAMA Katonda ow'Eggye: Nze w'olubereberye era nze nkomererayo era tewali Katonda mulala we ndi.

⁷ Ani afaanana nga nze, akirangirire, eyali asobola okumanya n'alangirira ebigena okubaawo okuvira ddala ku ntandikwa? Leka batubuulire ebigena okubaawo.

⁸ Temutya wadde okuggwaamu amaanyi. Saakirangirira ne ntegeeza ebigena okuja? Mmwe bajulirwa bange. Eriyo Katonda omulala okuggyako nze? Nedda. Tewali Lwazi lulala, sirina lwe mmanyi."

⁹ Abo abakola bakatonda abakole n'emikono tebalimu nsa, era ebyo bye basanyukira okukola tebirina kye bigasa. Abajulirwa baabwe tebalaba so tebalina kye bamanyi, balyoke bakwatibwe ensonyi.

¹⁰ Ani akola Katonda omubajje oba asaanusa ekifaananyi ekyole ekitaliiko kye kiyamba?

¹¹ Laba ye ne banne balikwatibwa ensonyi. N'ababazzi nabo bantu buntu. Leka bona bakuŋjaane, banjolekere; balikwatibwa ensonyi n'entiisa. Ensonyi ziribatta bona era bagwemu entiisa.

¹² Omuweesi akwata ekitundu ky'ekyuma n'akiyissa mu manda, agaliko omuliro. Akikolako n'akitereeza n'ennyondo mu maanyi ge. Enjala emuluma, n'aggwaamu amaanyi, tanywa mazzi era akoowa.

¹³ Omubazzi akozesa olukoba okupima olubaawo era n'alamba n'ekkalaamu. Akinyiriza ne landa, n'akiramba kyonna n'ekyuma ekigera, n'akikolamu ekifaananyi ky'omuntu ng'omuntu bw'afaanana, kiryoke kiteebewe mu nnyumba.

¹⁴ Atema emivule oba n'addir enzo oba omuyovu n'agusimba oba n'aguleka gukule n'emiti mu kibira, oba n'asimba enkanaga, enkuba n'egikuza.

¹⁵ Abantu bagukozesa ng'enku, ezimu n'azitwala n'azikozesa okukuma omuliro ne yeebugumya. Akuma omuliro n'afumba emigaati. Naye ekitundu ekirala akikolamu katonda n'amusinza, akola ekifaananyi ekikole n'emikono n'akivuunamira.

¹⁶ Ekitundu ky'olubaawo akyokya mu muliro, ekitundu ekirala akyokesa ennyama n'agirya n'akutta. Ayotako n'abuguma nga bw'agamba nti, "Mbugumye, omuliro ngutegedde!"

¹⁷ Ekitundu ekisigaddewo akikolamu katonda, ekifaananyi ekikole n'emikono, era n'akivuunamira n'akisinja n'akyegayirira n'agamba nti, "Mponya, kubanga ggwe katonda wange."

¹⁸ Tebaliiko kye bamanyi so tebaliiko kye bategeera, amaaso gaabwe gazibye n'okuyinza ne batayinza kulaba, n'okutegeera ne batayinza kutegeera.

¹⁹ Tewali n'omu ayimirira n'alowooza, tewali n'omu amanyi wadde ategeera okugamba nti, "Ekimu ekyokubiri ekyakwo nkyokezza mu muliro, era ne nfumba n'obugaati ku manda gaakyo, njokezzaako n'ennyama n'engiryia. Ekitundu kyakyo kifuuse eky'omuzizo? Nvuunamire ekisiki ky'omuti?"

²⁰ Alya vv. Omutima gwe gumulimbalimba, tasobola kwerokola wadde okwebuuza nti, "Kino ekiri mu mukono gwange ogwa ddyo si bulimba?"

MUKAMA, Omuronzi era Omulokozi

²¹ "Jjukira ebintu bino, ggwe Yakobo; oli muweereza wange ggwe Isirayiri. Nze nakubumba, oli muweereza wange, ggwe Isirayiri sirikwerabira.

²² Ebyonoono byo mbyezeewo n'embisenda ng'ekire, n'ebibi byo ne mbyerawo ng'olufu olw'omu makya. Komawo gye ndi kubanga nakununula."

²³ Yimba n'essanyu ggwe eggulu kubanga ekyo MUKAMA yakikoze. Muleekaane n'essanyu mmwe abali wansi ku nsi. Muyimbe mmwe ensozi, mmwe ebibira na buli muti ogulimu. MUKAMA anunudde Yakobo era yeegulumiriza mu Isirayiri.

Yerusaalemi kya kuzzibwawo

²⁴ "Bw'ati bw'ayogera MUKAMA Omulokozi wo, eyakutondera mu lubuto. "Nze MUKAMA, eyatonda ebintu byonna, eyabamba eggulu nzekka, eyayanjuluza ensi obwomu,

²⁵ asazaamu abalaguzi bye balagudde era abalogo abafuula abasirusiru. Asaabulula eby'abagezi n'afuula bye balowoozezza okuba eby'obusirusiru.

²⁶ Anyweza ekigambo ky'omuweereza we n'atuukiriza obubaka bwa babaka bange. "Ayogera ku Yerusaalemi nti, 'Kirituulibwamu,' ne ku bibuga bya Yuda nti, 'Birizimbibwa,' ne ku bifo ebyazika nti, 'Ndibizzaawo.'

²⁷ Agamba amazzi g'obuziba bwe nnyanja nti, 'Kalira, era ndikaliza emigga gyo.'

²⁸ Ayogera ku Kuulo nti, 'Musumba wange era alituukiriza bye njagala byonna.' Alyogera ku Yerusaalemi nti, 'Kizimbibwe,' ne ku yeekaalu nti, 'Emisingi gyayo gizimbibwe.'

Isaaya 45

¹ "Bw'ati MUKAMA bw'agamba Kuulo gwe yafukako amafuta, oyo gwe mpadde amaanyi mu mukono gwe ogwa ddyo okujeemulula amawanga mu maaso ge era

n'okwambula bakabaka ebyokulwanyisa byabwe, okuggulawo enzigi ezimuli mu maaso, emiryango eminene gireme kuggalwawo.

² Ndikukulembera ne ntereeza ebifo ebigulumivu. Ndimenyaamenya emiryango egy'ebikomo ne ntemaatema ebisiba eby'ekyuma.

³ Era ndikuwa obugagga obwakwekebwa mu bifo ebyekusifu era n'ebintu ebyakwekebwa mu bifo ebyekyama olyoke omanye nga nze MUKAMA, Katonda wa Isirayiri akuyitira ddala erinnya lyo.

⁴ Ku lwa Yakobo omuweereza wange ne ku lwa Isirayiri omulonde wange kyenvudde nkuyita erinnya, ne nkuwa ekitiibwa wadde nga tonzisaako mwoyo.

⁵ Nze MUKAMA, tewali mulala. Tewali katonda mulala wabula nze. Ndikuwa amaanyi wadde nga tonzisaako mwoyo,

⁶ balyoke bamanye nga okuva enjuba gy'eva okutuuka gyegenda tewali mulala wabula nze. Nze MUKAMA, tewali mulala.

⁷ Nze nteekawo ekitangaala ne ntonda ekizikiza. Nze ndeeta okukulaakulana n'okubonaabona. Nze MUKAMA akola ebyo byonna.

⁸ "Mmwe eggulu eriri waggulu, mutonnyese obutuukirivu. Ebire bitonnyese obutuukirivu. Ensi egguke n'obulokozi bumeruke, ereete obutuukirivu. Nze MUKAMA nze nagitonda.

⁹ "Zimusenze oyo ayomba n'omutonzi we! Zimusenze oyo oluggygo mu nzigyo z'ensi. Bbumba ki eribuza oyo alibumba nti, 'Obumba ki?' Oba omulimu gwo okukubuuza nti, 'Aliko emikono?'

¹⁰ Zimusenze oyo agamba kitaawe nti, 'Wazaala ki?' Oba nnyina nti, 'Kiki ky'ozadde?'

¹¹ "Bw'ati bw'ayogera MUKAMA Omutukuvu wa Isirayiri era Omutonzi we nti, 'Lwaki mumbuuza ebigenda okujja, oba ebikwata ku baana bange, oba okumpa ebiragiro ku bikwata ku mirimu gy'emikono gyange?'

¹² Nze nakola ensi ne ngitonderamu abantu. Emikono gyange gyennyini gye gyayanjuluza eggulu, era ne ndagira eby'omu bwengula byonna bitondebwewo.

¹³ Ndiyimusa Kuulo mu butuukirivu era nditereeza amakubo ge gonna. Alizimba ekibuga kyange n'asumulula abantu bange abaawanjangusibwa; naye si lwa mpeera oba ekirabo," bw'ayogera MUKAMA Katonda ow'Eggye.

¹⁴ Bw'ati bw'ayogera MUKAMA nti, "Ebiva mu Misiri n'ebiyamagazi bya Kuusi birireetebwa, n'abo Abasabeya abawanvu balijja babeere abaddu bo, bajje nga bakugoberera nga basibiddwa mu njegere. Balikuvuunamira bakwegayirire nga bagamba nti, 'Ddala Katonda ali naawe, ye Katonda yekka, tewali Katonda mulala.'"

- ¹⁵ Ddala oli Katonda eyeekweka, ggwe Katonda wa Isirayiri era Omulokozi we.
- ¹⁶ Bonna abakola bakatonda abakole n'emikono baliswazibwa, balikwatibwa ensonyi,bonna balikwata ekkubo limu nga baswadde.
- ¹⁷ Naye Isirayiri alirokolebwa MUKAMA n'obulokozi obutaliggwaawo. Temuukwatibwenga nsongyi, temuuuswalenga emirembe gyonna.
- ¹⁸ Kubanga bw'atyo bw'ayogera MUKAMA eyatonda eggulu, ye Katonda eyabumba ensi n'agikola. Ye yassaawo emisingi gyayo. Teyagitonda kubeera nkalu naye yagikola etuulwemu. Ye yagamba nti, "Nze MUKAMA so tewali mulala.
- ¹⁹ Soogereranga mu kyama, oba mu nsi eyeekizikiza. Sigambanga bazzukulu ba Yakobo nti, 'Munoonyeze bwereere.' Nze MUKAMA njogera mazima, mbuulira ebigambo eby'ensonga.
- ²⁰ "Mwekuunjaanye mujje, mukuunjaane, mmwe abasigaddewo mu mawanga. Tebalina magezi abo abasitula ebifaananyi ebibajje, abasaba eri katonda atasobola kubalokola.
- ²¹ Mukuunjaane muleete ensonga zammwe. Muteese tuyambagane. Ani eyayogera nti kino kiribaawo? Ani eyakyogerako edda? Si nze MUKAMA? Tewali Katonda mulala wabula nze, Katonda omuntuukirivu era Omulokozi, tewali mulala wabula nze.
- ²² "Mudde gye ndi, mulokoke, mmwe mwenna abali ku nkomerero z'ensi, kubanga nze Katonda so tewali mulala.
- ²³ Neerayiridde, ekigambo kivudde mu kamwa kange mu mazima so tekiriggibwawo mu maaso gange. Buli vviivi lirifukamira, na buli lulimi lulirayira!
- ²⁴ Balinjogerako nti, 'Mu MUKAMA mwokka mwe muli obutuukirivu n'amaanyi.' Bonna abaamusunguwalira balijja gy'ali nga baswadde.
- ²⁵ Naye mu MUKAMA ezzadde lyonna erya Isirayiri mwe liriweerwa obutuukirivu era mwe liryenyumiririza.

Isaaya 46

Bakatonda b'e Babulooni

- ¹ Beri avunnama, Nebo akutamye! Ebifaananyi bya bakatonda baabwe biteekeddwa ku nsolo ez'omu nsiko, era ne ku nte. Ebifaananyi bya bakatonda baabwe migugu mizito ddala ku ndogoyi ezikooye.
- ² Bikutamye byonna bivuunamye. Tebiyinza kuyamba ku mbeera, byo byennyini bitwaliddwa mu busibe.

³ “Mumpulire mmwe, ennyumba ya Yakobo n'abantu bona abasigaddewo mu nnyumba ya Isirayiri. Mmwe be nnalera okuva lwe mwava mu lubuto, be nasitula okuva lwe mwazaalibwa.

⁴ Ne mu bukadde bwammwe nzija kusigala nga ye nze Nzuuyo. Ne bwe muliba mulina envi nnaabasitulanga. Nze nabakola era nze nnaabawekanga. Nnaabasitulanga era nnaabanunulanga.

⁵ “Ani gwe mulinfaananya era gwe mulinnenkanya era gwe mulingerageranyaako tufaanane?

⁶ Eriyo abaggya zaabu ennyingi mu nsawo zaabwe ne bapima ne ffeeza ku minzaani. Olwo ne bapangisa omuweesi wa zaabu n'agiweesaamu katonda waabwe, ne bagwa wansi ne basinza.

⁷ Katonda waabwe ne bamusitulira ku kibegabega, ne bamuwa ekifo w'anaayimiriranga. N'ayimirira awo, n'atava mu kifo kye. Oli ne bw'amukaabirira tayinza kumuddamu, tayinza kumuwonya mu mitawaana gye.

⁸ “Mujjukire kino mmwe, mulowooze mu mitima gyammwe. Mwekube mu kifuba, mmwe abajeemu.

⁹ Mujjukire ebigambo ebyasooka eby'edda ennyo. Kubanga nze Katonda, teri mulala. Nze Katonda, teri ali nga nze;

¹⁰ alanga ku ntandikwa ebigenda okubaawo. Okuva ku mirembe egy'edda ennyo, nalanga ebintu ebitannabaawo, nga njamba nti, ‘Enteekateeka zange zija kubaawo era ndituukiriza byonna bye nategeka.’

¹¹ Mpita ekinyonyi ekikwakkula ebiramu ebirala. Omusaja ava ebuvanjuba mu nsi eyewala, anaakola bye njagala. Weewaawo njogedde era nnaatuukiriza. Nga bwe nategeka bwe nnaakola.

¹² Mumpulirize mmwe abalina emitima emikakanyavu, abakyama ennyo ne bava mu kkubo ly'obutuukirivu.

¹³ Nsembeza kumpi obutuukirivu bwange, tebuli wala. N'obulokozi bwange tebuulwewo. Ndireeta obulokozi mu Sayuuni, ne nzizaawo ekitiibwa kyange mu Isirayiri.”

Isaaya 47

Babulooni Esalirwa Omusango

¹ “Omuwala wa Babulooni embeerera, kakkana wansi otuule mu nfuufu, tuula wansi awatali ntebe ya bwakabaka, ggwe omuwala w'Abakaludaaya. Ekibuga ekitawangulwangako. Toliddayo nate kuyitibwa kyatika oba nnalulungi.

² Ddira olubengo ose obutta. Ggyako akatimba ku maaso, situla ku ngoye z'oku magulu oyite mu mazzi.

³ Obwerefere bwo bulibikkulwa; obusungu bwo bulyeraga. Nzija kuwoolera eggwanga; tewali muntu yenna gwe ndirekawo.”

⁴ Omununuzi waffe MUKAMA Katonda ow'Eggye lye linnya lye, ye Mutukuvu wa Isirayiri.

⁵ “Tuula mu kasirise yingira mu kizikiza ggwe omuwala w'Abakaludaaya, tebakyakuyita kabaka omukazi afuga obwakabaka obungi.

⁶ Nnali nsunguwalidde abantu bange, ne nyonoonesa omugabo gwange. Nabawaayo mu mikono gyo, n'otobasaasira n'akatono. N'abakadde wabateekako ekikoligo ekinene ennyo.

⁷ Wayogera nti, ‘Nzija kubeera kabaka omukazi emirembe gyonna,’ naye n'otolowooza ku bintu bino wadde okulowooza ku kyali kigenda okubaawo.

⁸ “Kale nno kaakano wuliriza kino, ggwe awoomerwa amasanyu ggwe ateredde mu mirembe gyo, ng’oyogera mu mutima gwo nti, ‘Nze ndiwo era tewali mulala wabula nze. Siribeera nnamwandu wadde okufiirwa abaana.’

⁹ Ebintu bino byombi birikutuukako mangu nnyo mu lunaku lumu, eky'okufiirwa abaana n'okufuuka nnamwandu. Birikutuukako mu kigera kyabyo ekituufu, newaakubadde obulogo bwo nga bungi okuyitirira, n'eb'yobufumu byo nga bigenze wala.

¹⁰ Weesiga obutali butuukirivu bwo, n'olowooza nti, ‘Siriiko annondoola.’ Amagezi go era n'okumanya kwo byakuwabya, bwe wayogera nti, ‘Nze ndiwo, era teri mulala wabula nze.’

¹¹ Kyokka ensasagge erikujjira era tolimanya ngeri yakugyeggyako; n'okuzikirira kw'otoliyinza kweggyako na muwendo gwa nsimbi; akabi k'otolirabirawo kalikutuukako amangu ddala.

¹² “Weeyongere nno n'obulogo bwo n'obufumu bwo obwayinga obungi, bwe wanyikiriramu okuva mu buto bwo. Oboolyawo olibaako kyoggyamu, oboolyawo olikalawo ekyobulabe.

¹³ Amagezi ago g'ofuna gakukooya bukooya. Abalagulira ku munyeenye basembera, n'abo abakebera emmunyeenye, era aboogera ebiribaawo buli mwezi, babadduukirire mu bigenda okubatuukako.

¹⁴ Laba, bali ng'ebisusunku era omuliro gulibookya! Tebalyewonya maanyi ga muliro. Tewaliwo manda ga kukubugumya wadde omuliro ogw'okwota!

¹⁵ Ekyo kye bayinza okukukolera kyokka; b'obonyeebonye nabo b'oteganidde okuva mu buto bwo. Buli muntu alikwata ekkubo lye nga yeeyongera okukola ebibi bye era tewali n'omu ayinza okukulokola.”

Isaaya 48

Katonda bye Yayogera Bituukirira

¹ “Muwulire kino, mmwe ennyumba ya Yakobo, abayitibwa erinnya lya Isirayiri, era abaava mu nda ya Yuda. Mmwe abalayirira mu linnya lya MUKAMA, era abaatula Katonda wa Isirayiri, naye si mu mazima wadde mu butuukirivu.

² Kubanga beeyita ab'ekibuga ekitukuvu, abeesiga Katonda wa Isirayiri, MUKAMA Katonda ow'Eggye lye linnya lye.

³ Okuva ku ntandikwa, nayasanguza ebyali bigenda okubaawo; byava mu kamwa kange ne mbyogera. Amangwago ne tubikola ne bituukirira.”

⁴ Kubanga namanya obukakanyavu bwammwe; ebinywa by'ensingo nga bikakanyavu ng'ekyuma; ekyenyi ng'ekikomo.

⁵ Nabamanyisizaawo edda ebyali bigenda okujja nga tebinnabaawo, muleme kugamba nti, “Bakatonda bange be baabikola: Ekifaananyi kyange ekyole n'ekifaananyi ekisaanuuse bye byakikola.”

⁶ Mulabe ebintu bino nabibagamba dda, era temubikkirize? “Okuva leero nzija kubabuulira ku bintu ebiggya ebigenda okujja, eby'ekyama bye mutawulirangako.

⁷ Mbikola kaakano, so si ekiseera ekyayita: mwali temubiwlirangako mu biseera eby'emabega si kulwa nga mugamba nti, ‘Laba nnali mbimanyi.’

⁸ Towulirangako wadde okutegeera. Okuva edda n'edda okutu kwo tekuggukanga. Kubanga namanya nti wali kyewaggula, okuva ku kuzaalibwa kwo wayitibwa mujeemu.

⁹ Olw'erinnya lyange ndwawo okusunguwala. Olw'ettendo lyange ndwawo okukusunguwalira nneme okukuzikiriza.

¹⁰ Laba nkugezesessa naye si nga ffeeza. Nkugezesessa mu kirombe ky'okubonaabona.

¹¹ Ku lwange nze, ku lwange nze ndikikola. Erinnya lyange nga livumiddwa. Ekitiibwa kyange sirikiwa mulala.

Isirayiri Enunulibwa

¹² “Mpuliriza ggwe Yakobo. Isirayiri gwe nalonda. Nze Nzuyoo. Nze ow'olubereberye era nze ow'enkomerero.

¹³ Omukono gwange gwe gwateekawo omusingi gw'ensi, era omukono gwange ogwa ddyo ne gwanjuluza eggulu. Bwe mbiyita byombi bijja.

¹⁴ “Mwekuñjaanye mwenna mujje muwulire! Ani ku bo eyali alangiridde ebintu bino? MUKAMA amwagala; aija kutuukiriza ekigendererwa kye e Babulooni, era omukono gwe gholekere Abakaludaaya.

¹⁵ Nze; Nze nzennyini nze njogedde. Nze namuyita. Ndimuleeta era alituukiriza omulimu gwe.

¹⁶ “Munsemberere muwulirize bino. “Okuva ku luberebery saayogera mu kyama. Nze mbaddewo okuvira ddala ku ntandikwa.” Era kaakano MUKAMA Ayinzabyonna n’Omwoyo we antumye.

¹⁷ Bw’atyo bw’ayogera MUKAMA, Omununuzi wammwe, Omutukuvu wa Isirayiri nti, “Nze MUKAMA Katonda wo akuyigiriza okukulaakulana, akukulembera mu kkubo ly’oteekwa okutambuliramu.

¹⁸ Singa kale wali owulirizza ebiragiro byange! Wandibadde n’emirembe egikulukuta ng’omugga! Era n’obutuukirivu bwo ng’amayengo g’ennyanya,

¹⁹ ezzadde lyo lyandibadde ng’omusenyu abaana bo ng’obuweke bwagwo. Erinnya lyabwe teryandivuddewo wadde okuzikirira nga wendi.”

²⁰ Muve mu Babulooni, mudduke Abakaludaaya. Mugende nga mutgeeza amawulire gano n’essanyu. Mugalangirire wonna wonna n’okutuusa ku nkomerero y’ensi. Mugambe nti, “MUKAMA anunudde omuddu we Yakobo!”

²¹ So tebaalumwa nnyonta bwe yabayisa mu malungu. Yabakulukusiza amazzi mu lwazi: yayasa olwazi amazzi ne gavaamu.

²² “Tewali mirembe eri aboonoonyi,” bw’ayogera MUKAMA.

Isaaya 49

Omuweereza wa MUKAMA

¹ Mumpulirize mmwe ebizinga, mmwe muwulire kino amawanga agali ewala. Nnali sinazaalibwa MUKAMA n’ampita. Bwe nnali nkyali mu lubuto lwa mmange n’ayatula erinnya lyange.

² Yakola akamwa kange ng’ekitala eky’obwogi, nankweka mu kisiikirize ky’omukono gwe. Yanfuula akasaale akazigule era nankweka mu mufuko gwe.

³ Era n’ajnjamba nti, “Ggwe muweereza wange, Isirayiri, mu ggwe mwe ndiweerwa ekitiibwa.”

⁴ Naye ne njogera nti, “Nteganidde bwereere, amaanyi gange ng’amalidde bwereere era gafudde busa. Kyokka ate MUKAMA yannamula, n’empeera yange eri ne Katonda wange!”

⁵ Era kaakano MUKAMA ayogera, oyo eyammumba mu lubuto okubeera omuweereza we, okukomyawo Yakobo gy’ali era n’okukuŋjaanya Isirayiri gy’ali. Kubanga ndi wa kitiiibwa mu maaso ga MUKAMA era Katonda wange afuuse amaanyi gange.

⁶ MUKAMA agamba nti, “Eky’okubeera omuweereza wange n’okuzza amawanga ga Yakobo era n’okukomyawo abantu ba Isirayiri kintu kitono nnyo. Nzija

kukufuula ekitangaala eri abamawanga, olyoke oleete obulokozi bwange eri ensi yonna.”

⁷ Bw’ati bw’ayogera MUKAMA, Omununuzi era Omutukuvu wa Isirayiri, eri oyo eyanyoomebwa n’akyayibwa amawanga, eri omuweereza w’abafuzi nti, “Bakabaka baliyimirira ne bakuwa ekitiibwa, abalangira balikulaba ne bakuvuunamira. Kino kiribaawo ku lwa MUKAMA, omwesigwa Omutukuvu wa Isirayiri, oyo akulonze.”

Isirayiri Azzibwawo

⁸ Bw’ati bw’ayogera MUKAMA nti, “Ndikwanukula mu biro mwe ndisiimira, ku lunaku olw’obulokozi ndikuyamba. Ndikukuma ne nkufuula endagaano eri abantu, muliddayo ku ttaka lyammwe ne muddizibwa ebitundu byammwe ebyazika,

⁹ nga mugamba abasibe nti, ‘Muveemu,’ n’abo abali mu kizikiza nti, ‘Mube n’eddembe!’ “Banaaliranga ku mabbali g’ekkubo, ne ku ntikko z’obusozi bwonna obwereere banasangangako omuddo.

¹⁰ Tebaalumwenga njala newakubadde ennyonta, ebugumu ly’omu ddungu teriibakwatenga newakubadde omusana okubookya. Oyo abakwatirwa ekisa alibakulembra, anaabatwalanga awali enzizi z’amazzi.

¹¹ Era ndifuula ensozi zange zonna okuba amakubo era enguudo zange ennene zirigulumizibwa.

¹² Laba, abantu bange balidda okuva ewala, abamu, baliva mu bukiikkono n’abalala ebuvanjuba, n’abalala bave mu nsi ye Sinimu.”

¹³ Yogerera waggulu n’essanyu, era jjaguza ggwe ensi. Muyimbe mmwe ensozi! Kubanga MUKAMA agumya abantu be era alisaasira abantu be ababonyaabonyezebwa.

¹⁴ Naye Sayuuni n’ayogera nti, “MUKAMA andese, era Mukama wange anneerabidde.”

¹⁵ “Nnyina w’omwana ayinza okwerabira omwana we gw’ayonsa, n’atasaaasira mwana eyava mu lubuto lwe? Weewaawo, wadde ng’ayinza okumwerabira naye nze sirikwerabira.

¹⁶ Laba, nkuwandiise mu bibatu by’engalo zange; ebisenge byo binaabeeranga mu maaso gange.

¹⁷ Abaana bo banguwa okujja era abakuzimba balisukkuluma ku bakuzikiriza era abo abaakuzikirizanga balikuvaamu bagende.

¹⁸ Yimusa amaaso go otunule enjuuyi zonna olabe. Abantu bo beekunjaanya bajja gy’oli. Nga bwe ndi Katonda omulamu, balikwesiimisa, obambale

ng'ebikomo n'emidaali ebyebbeeyi ng'omugole bw'ayambala malidaadi," bw'ayogera MUKAMA.

¹⁹ "Wadde nga wazika n'olekebwa awo ensi yo n'ezikirizibwa, kaakano ojja kubeera mufunda nga toja mu bantu bo, era abo abakuteganya banaakubeeranga wala.

²⁰ Abantu bo abazaalibwa mu buwanjanguse lumu balyogera ng'owulira nti, 'Ekifo kino nga kifuuse kifunda bulala; tuwe ekifo aw'okubeera.'

²¹ N'olyoka oyogera mu mutima gwo nti, 'Ani eyanzaalira abaana bano bona? Nafiirwa abaana bange bona ng'ate ndi mugumba. Nawajangusibwa ne nsigala nzekka. Bano baava ludda wa? Nasigala nzekka, naye ate bano, baava wa?" "

Okuzzibwawo kwa Isirayiri mu Kitiibwa

²² Bw'atyo bw'ayogera MUKAMA Katonda nti, "Laba, ndikolera abamawanga obubonero era ndiyimusiza abantu ebbendera yange: era balireeta batabani bo nga babasitulidde mu bifuba ne bawala bo nga babasitulidde ku bibegabega byabwe.

²³ Era bakabaka be balibeera ba kitammwe babalabirire, ne bannabagereka babeere bamaama ababayonsa. Balivuunama mu maaso go nga batunudde wansi; balikomba enfuufu y'omu bigere byo. Olwo lw'olimanya nti nze MUKAMA, abo bona abannindirira n'abansuubiriramu tebalikwatibwa nsonyi."

²⁴ Omunyago guyinza okuggyibwa ku mutabaazi, oba omuwambe omutuukirivu okuwona omutabaazi?

²⁵ Naye bw'ati bw'ayogera MUKAMA: "N'oyo eyawambibwa omutabaazi alisumululwa ateebwé, n'omunyago guggyibwe ku mulabe wo, kubanga ndiyomba n'oyo ayomba naawe, era ndirokola mponye abaana bo.

²⁶ Ndiriisa abakujooga ennyama yaabwe bo. Era balittijjana batamiire omusaayi gwabwe, nga wayini. Olwo abalina omubiri bona bamanye nti nze MUKAMA Omulokozi wo, Omununuzi wo, ow'Amaanyi owa Yakobo."

Isaaya 50

Ekibi Kyawukanya Isirayiri ku Katonda

¹ Bw'ati bw'ayogera MUKAMA nti, "Ebbaluwa egoba nnyammwe, kwe namugobera eri ludda wa? Oba nabatunda eri ani? Mwatundibwa lwa bikolwa byammwe ebibi; olw'obutali butuukirivu bwammwe nnyammwe kyeyava agobwa.

² Lwaki bwe najja tewaali muntu n'omu? Bwe nakoowoola lwaki tewaali muntu n'omu annyanukula? Omukono gwange gwali mumpi nnyo okukununula? Mbuliddwa amaanyi agakununula? Laba nnyinza okwogera obwogezi ennyanja

n'ekalira, emigga ne ngifuula eddungu, ebyennyanya byamu ne bifa ennyonta, ne bivunda olw'okubulwa amazzi.

³ Nyambaza eggulu, n'ekizikiza ne nkiwa ebibukutu okulibikka."

⁴ MUKAMA Ayinzabyonna ampadde olulimi oluyigirizibba, mmanye ebigambo ebigumya abo abakooye. Anzukusa buli nkya, buli nkya anzukusa okuwulira by'anjigiriza.

⁵ MUKAMA Ayinzabyonna azibudde okutu kwange ne siba mujeemu. Sizzeeyo mabega.

⁶ N'awaayo omugongo gwange eri abankuba, n'amatama gange eri abo abankunyuulako ekirevu. Saakweka maaso gange eri abo abansekerera n'eri abo abanfujjira amalusu.

⁷ Kubanga MUKAMA Ayinzabyonna anyamba kyennaava siswazibwa. Noolwekyo kyenvudde n'egumya era mmanyi nti siriswazibwa.

⁸ Kubanga oyo ampolereza ali kumpi. Ani alinnimiriza omusango? Twolekagane obwenyi. Ani annumiriza? Ajje annumbe.

⁹ MUKAMA Ayinzabyonna y'anyamba. Ani alinsalira omusango? Bonna balikaddiwa bayulike ng'ekyambalo; ennyenje ziribalya.

¹⁰ Ani ku mmwe atya MUKAMA, agondera ekigambo ky'omuweereza we? Oyo atambulira mu kizikiza, atalina kitangaala yeesige erinnya lya MUKAMA era yeesigame ku Katonda we.

¹¹ Naye mmwe mwenna abakoleeza omuliro, ne mwekoleereza ettaala z'omuliro, mutambulire mu kitangaala ky'omuliro gwammwe, ne mu kitangaala kye ttaala ze mukoleezeza. Naye kino kye munaafuna okuva mu mukono gwange; muligalamira mu nnaku.

Isaaya 51

Okukubirizibwa Okwesiga Katonda

¹ "Mumpulirize, mmwe abanoonya obutuukirivu, mmwe abanoonya MUKAMA: Mutunuulire olwazi lwe mwatemebwako, n'obunnya bw'ekirombe gye mwasimibwa.

² Mulowooze ku Ibulayimu jjajammwe ne Saala eyabazaala. Kubanga we namuyitira yali bw'omu ne mmuwa omukisa ne mmwaza.

³ Kubanga ddala MUKAMA alikubagiza Sayuuni; akwatirwe ekisa ebifo byakyo byonna ebyazika era afuule olukoola lwe lwonna okuba Adeni, n'eddungu libeere ng'ennimiro ya MUKAMA; Essanyu n'okujaguza biryoke bibeere omwo, okwebaza n'amaloboozi ag'okuyimba.

⁴ “Mumpulirize, mmwe abantu bange; era muntegere okutu mmwe ensi yange. Kubanga etteeka lifuluma okuva gye ndi, obwenkanya bwange bubeere omusana eri amawanga.

⁵ Obutuukirivu bwange busembera mangu nnyo, obulokozi bwange buli mu kkubo. Era omukono gwange gujja kuleeta obwenkanya eri amawanga. Ebizinga birinnindirira era birindirire n'essuubi omukono gwange okubirokola.

⁶ Muyimuse amaaso gammwe eri eggulu, mutunuulire ensi wansi! Kubanga eggulu lirivaawo ng'omukka n'ensi ekaddiwe ng'ekyambalo. Abagituulamu balifa ng'ensowera. Naye obulokozi bwange bunaabeereranga emirembe gyonna, so n'obutuukirivu bwange tebjujulukukenga.

⁷ “Mumpulirize, mmwe abamanyi obutuukirivu, eggwanga eririna amateeka gange mu mitima gyammwe. Temutya kuvumibwa bantu wadde okukenjentererwa olw'okuyomba kwabwe.

⁸ Kubanga ennyenje ziribalya nga bwe zirya ebyambalo. N'obuwuka bubalye ng'obulya ebyoya by'endiga. Naye obutuukirivu bwange bunaabeereranga ennaku zonna. Obulokozi bwange bunywere emirembe gyonna.”

⁹ Zuukuka, zuukuka oyimuke otuyambe Ayi MUKAMA Katonda. Kozesa amaanyi go otuyambe. Gakozese nga edda. Si ggwe wuuyo eyatemaatemamu Lakabu obufiififi? Si ye ggwe eyafumita ogusota?

¹⁰ Si ggwe wuuyo eyakaliza ennyanja, amazzi ag'obuziba obuwantu ennyo ne gafuuka ekkubo abantu be wanunula bayitewo?

¹¹ N'abo MUKAMA be wawonya balikomawo ne bajja mu Sayuuni nga bayimba. Essanyu ery'emirembe n'emirembe liriba nga ngule ku mitwe gyabwe. Balisanyuka ne bajaguza; ennaku n'okusinda bibadduke.

MUKAMA Alinunula Abantu be

¹² “Nze, nze mwene, nze nzuuno abawa amaanyi. Mmwe baani abatya omuntu alifa, n'omwana w'omuntu ali ng'omuddo,

¹³ ne weerabira MUKAMA Omuronzi wo eyabamba eggulu, n'ateekawo n'emisingi gy'ensi, ebbanga lyonna ne mubeera mu kutya obusungu bw'abo abakunyigiriza, oyo eyemalidde mu kuzikiriza? Kubanga kale buliruddawa obulabe bw'oyo abanyigiriza?

¹⁴ Abo be bawamba ne basibibwa banaatera okuteebwa, tebalifiira mu bunnya, era tebalibulwa mmere gye balya.

¹⁵ Kubanga nze MUKAMA Katonda wo, asiikuula amayengo g'enyanja ne gawuluguma: MUKAMA ow'Eggye lye linnya lye.

¹⁶ Ntadde ebigambo byange mu kamwa ko, era nkubisse mu kisiikirize ky'omukono gwange. Nze nakola eggulu ne nteekawo emisingi gy'ensi; era nze wuuyo agamba Sayuuni nti, 'Muli bantu bange!'"

Ekikopo ky'Obusungu bwa MUKAMA

¹⁷ Zuukuka, zuukuka, oyimirire ggwe Yerusaalemi eyanywa okuva eri MUKAMA ekikompe eky'obusungu bwe, eyanywa n'omaliramu ddala ekibya ekitagaza.

¹⁸ Ku baana aboobulenzi bona be yazaala tewali n'omu wa kumukulembra. Ku baana bona aboobulenzi be yakuza tewali n'omu wa kumukwata ku mukono.

¹⁹ Ebintu bino ebibiri bikuguddeko ani anaakunakuwalirako? Okuzika n'okuzikirira, enjala, n'ekitala, ani anaakubeesabeesa?

²⁰ Batabani bo bazirise, bagudde ku buli nsonda y'oluguudo ng'engabi egudde mu kitimba. Babuutikiddwa ekiruyi kya MUKAMA, n'okunenyezebwa kwa Katonda wo.

²¹ Noolwekyo wulira kino ggwe, atamidde naye si lwa mwenge.

²² Bw'atyo bw'ayogera MUKAMA Ayinzabyonna, Katonda wo alwanirira abantu be. "Laba mbaggyeeko ekikompe kye nabawa olw'ekiruyi kye nalina, ekyabatagaza. Temuliddayo kukinywa nate.

²³ Ndikiteeka mu mikono gy'abo abaababonyaabonya abaabagamba nti, 'Mugwe wansi mwegolole tubatambulireko.' Emigongo gyammwe gibe ng'ettaka, ng'oluguudo olw'okulinnyirira."

Isaaya 52

Katonda Alizzaawo Yerusaalemi

¹ Zuukuka, zuukuka, oyambale amaanyi go, ggwe Sayuuni. Ggwe Yerusaalemi ekibuga ekitukuvu, teekako ebyambalo byo ebitemagana. Kubanga okuva leero mu miryango gyo temukyayingira mu atali mukomole n'atali mulongoofu.

² Weekunkumuleko enfuufu, yimuka otuule ku ntebe ey'obwakabaka ggwe Yerusaalemi. Weesumulule enjegere mu bulago bwo, ggwe Omuwala wa Sayuuni eyanyagibwa.

³ Kubanga bw'ati bw'ayogera MUKAMA nti, "Mwatundibwa bwereere era mujja kununulibwa awatali kusasula nsimbi."

⁴ Kubanga bw'ati bw'ayogera MUKAMA Ayinzabyonna nti, "Omulundi ogwasooka abantu bange baagenda e Misiri okusengayo, oluvannyuma, Omwasuli n'abajooga.

⁵ “Kaakano kiki ate kye ndaba wano? “Kubanga abantu bange baatwalirwa bwereere era abo ababafuga babasekerera,” bw’ayogera MUKAMA. “Erinnya lyange livvoolebwa olunaku lwonna.

⁶ Mu biseera ebijja abantu bange balimmanya. Olunaku lujja lwe balitegeera nga nze nakyogera. Weewaawo, Nze.”

⁷ Nga birungi ku nsozi ebigure by’oyo aleeta amawulire amalungi, alangirira emirembe, aleeta ebigambo ebirungi, alangirira obulokozi, agamba Sayuuni nti, “Katonda wo afuga.”

⁸ Wuliriza! Amaloboozi g’abakuumi bo gawulikika, gayimusiddwa. Bonna awamu bajaguza olw’essanyu. Kubanga okudda kwa MUKAMA mu Sayuuni balikulaba n’amaaso gaabwe.

⁹ Mubaguke okuyimba ennyimba ez’essanyu mwenna, mmwe ebifo bya Yerusaalemi ebyazika. Kubanga MUKAMA asanyusizza abantu be, anunudde Yerusaalemi.

¹⁰ MUKAMA aliraga omukono gwe omutukuvu eri amawanga gonna, bagulabe. Enkomerero z’ensi zonna ziriraba obulokozi bwa Katonda waffe.

¹¹ Mugende, mugende muveewo awo. Temukwata ku kintu kyonna kitali kirongoofu. Mukifulumemu mubeere balongoofu mmwe abasitula ebyombo bya MUKAMA.

¹² Naye temulivaamu nga mwanguyiriza so temuligenda nga mudduka; kubanga MUKAMA alibakulembra abasookeyo; Katonda wa Isirayiri y’alibakuumma.

Okubonaabona n’Ekiuibwa ky’Omuweereza wa MUKAMA

¹³ Laba, omuweereza wange by’akola alibikozesa magezi, aliyimusibwa asitulibwe, era assibwemu nnyo ekitiibwa.

¹⁴ Ng’abaamulaba ne bennyamira bwe baali abangi, endabika ye ng’eyonooneese nnyo nga takyafaananika, era ng’eyonooneese evudde ku y’abantu,

¹⁵ bw’atyo bw’anawuniikiriza amawanga mangi; bakabaka balibunira ku lulwe; kubanga ekyo ekitababulirwanga balikiraba, era ekyo kye batawulirangako, balikitegeera.

Isaaya 53

¹ Ani akkiriza ebigambo byaffe, era ani abikkuliddwa omukono gwa MUKAMA?

² Kubanga yakulira mu maaso ga MUKAMA ng’ekisimbe ekigonvu era ng’omulandira oguva mu ttaka ekkalu. Teyalina kitibwa wadde obulungi obutusikiriza tulage gy’ali; tewали kalungi mu ye katumwegombesa.

³ Yanyoomebwa n'agaanibwa abantu; omuntu eyagumira ennaku n'obuyinike. Tetwayagala na kumutunulako, ng'omuntu gwe wandikubye amabega ng'ayitawo, bwe twamunyooma ne tutamuyitamu ka buntu.

⁴ Mazima ddala yeetikka obuyinike bwaffe, n'atwala ennaku yaffe, obulumi obwanditulumye bwe bwamunyiga. Ate nga twalowooza nti okubonaabona kwe kyali kibonerezo okuva eri Katonda.

⁵ Naye yafumitibwa olw'okusobia kwaffe. Yabetentebwa olw'obutali butuukirivu bwaffe. Yeetikka ekibonerezo ffe tusobole okubeera n'emirembe. Ebiwundu bye, bye bituwonya.

⁶ Ffenna twawaba ng'endiga; buli omu ku ffe n'akwata ekkubo lye; MUKAMA n'amuteekako obutali butuukirivu bwaffe ffenna.

⁷ Yanyigirizibwa era n'obonyaabonyezebwa naye talina kye yanyega, yali ng'omwana gw'endiga ogutwalibwa okuttibwa, era ng'endiga bwesirika obusirisi mu maaso g'abo abagisalako ebyoya bwesirika, bw'atyo bwe yasirika.

⁸ Mu kunyigirizibwa n'okusalirwa omusango yatwalibwa. Ani amanyi ku bye zadde lye? Yaggyibwa mu nsi y'abalamu, ng'akubiddwa olw'okusobia kw'abantu, bange.

⁹ Ne bamussa mu ntaana n'abakozi b'ebibi, n'aziikibwa n'abagagga mu kufa kwe, newaakubadde nga teyazza musango wadde akamwa ke okwogera eby'obulimba.

¹⁰ Songa ate yali nteekateeka ya MUKAMA okumubetenta, era n'okumuleetera okubonaabona. Naye wadde nga MUKAMA yafuula obulamu bwe, okuba ekiweebwayo olw'ekibi, aliraba ezzadde, era obulamu bwe bulyongerwako, n'ebyo MUKAMA by'asiima biriraba omukisa mu mukono gwe.

¹¹ Oluvannyuma lw'okubonaabona kw'obulamu bwe, bw'aliraba ku ebyo ebiva mu kubonaabona kwe, omutima gwe gulitereera. Era olw'ebyo bye yayitamu omuweereza wange omutuukirivu alireetera bangi okubalirwa obutuukirivu; era alyetikka obutali butuukirivu bwabwe.

¹² Kyendiva mmuwa ekifo eky'ekitiibwa mu bangi, era aligabira bangi omunyago kubanga yafuka obulamu bwe okutuusa okufa, n'abalirwa wamu n'abakozi b'ebibi. Era yeetikka ebibi by'abangi era ne yeegayiririra abakozi b'ebibi.

Isaaya 54

Ekitiibwa Kya Sayuuni eky'Oluvannyuma

¹ "Yimba ggwe omugumba atazaalanga; tandika okuyimbira mu ddoboozi ery'omwanguka osanyukire ddala ggwe atalumwanga kuzaala. Kubanga ggwe eyalekebwa ojja kuba n'abaana bangi okusinga oyo akyalina bba," bw'ayogera MUKAMA.

² "Gaziya weema yo, owanvuye emiguwa gyayo, tokwata mpol; nyweza enkondo zo.

³ Kubanga olisaasaanira ku mukono gwo ogwa ddyo era n'ogwa kkono, n'ezzadde lyo liriryamawanga, era abantu bo balituula mu bibuga ebyalekebwa awo ebyereere.

⁴ "Totya kubanga toliddayo kukwatibwa nsonyi. Toggwaamu maanyi kubanga togenda kuswazibwa. Olyerabira ensonyi z'obuvubuka bwo, n'ekivume ky'obwannamwandu bwo tolkijjukira nate.

⁵ Kubanga Omuronzi wo ye balo, MUKAMA Katonda ow'Eggye lye linnya lye. Omutukuvu wa Isirayiri ye Mununuzi wo, Katonda ow'ensi yonna, bw'ayitibwa.

⁶ Kubanga MUKAMA Katonda yakuyita okomewo, ng'omukazi eyali alekeddwawo ng'alina ennaku ku mutima; omukazi eyafumbirwa ng'akyali muto, n'alekebwawo," bw'ayogera Katonda wo.

⁷ "Nakulekako akaseera katono nnyo; naye ndikukunjaanya n'okusaasira okungi.

⁸ Obusungu obubuubuuka bwe bwankwata nakweka amaaso gange okumala ekiseera, naye ndikukwadirwa ekisa n'okwagala okutaliggwaawo," bw'ayogera MUKAMA Katonda, Omununuzi wo.

⁹ "Kubanga gye ndi, bino biri nga bwe byali mu biseera bya Nuuwa. Nga bwe nalayira nti amazzi ga Nuuwa tegagenda kuddamu kulabikako ku nsi, bwe ntyo ndayira nti siriddayo kukusunguwalira wadde okukunenya.

¹⁰ Kubanga ensozi ziyinga okuvaawo n'obusozi okuggyibwawo naye okwagala kwange okutaggwaawo tekulisagaasagana so n'endagaano yange ey'emirembe teriggyibwawo," bw'ayogera MUKAMA Katonda akusaasira.

Yerusaalemi eky'Ebiro Ebija

¹¹ MUKAMA agamba nti, "Gewe Yerusaalemi ekibuga ekibonyaabonyezebwa, ekisuukundibwa emiyaga awatali kulaba ku mirembe; laba ndikuzimba buto n'amayinja ag'amabala amalungi, emisingi gyo ne gizimbibwa ne safiro.

¹² Ebitikkiro byo ndibikola n'amayinja amatwakaavu, n'emiryango gyo ne ngikola ne kabunkulo, ne bbugwe yenna ne mwetoolooza amayinja ag'omuwendo.

¹³ N'abaana bo bona baliyigirizibwa MUKAMA; n'emirembe gy'abaana bo giriba mungi.

¹⁴ Olinywezebwa mu butuukirivu era toojoogebwenga, kubanga tolitya, onoobanga wala n'entiisa kubanga terikusemberera.

15 Omuntu yenna bwakulumbanga kiriba tekivudde gye ndi. Buli anaakulumbanga anaawangulwanga ku lulwo.

16 Laba nze natonda omuweesi, awujja amanda agaliko omuliro n'aweesa ekyokulwanyisa olw'omugaso gwakyo. Era nze natonda abazikiriza abakozesa ekyokulwanyisa okumalawo obulamu.

17 Naye teri kyakulwanyisa kye baliweesa ekirikwolekera ne kikusobola, era oliwangula buli lulimi olulikuvunaana era oluwoza naawe. Guno gwe mugabo gw'abaddu ba MUKAMA, n'obutuukirivu bwabwe obuva gye ndi," bw'ayogera MUKAMA.

Isaaya 55

Abalumwa Ennyonta Bayitibwa

1 "Kale mujje, mmwe mwenna abalumwa ennyonta, mujje eri amazzi. Mujje mmwe abatalina ssente zigula, mujje muweebwe bye mwagala, envinnyo oba amata ebitali bya kugula ebitaliiko miwendo gya kusasula.

2 Lwaki musaasaanya ensimbi zammwe ku ebyo ebitali bya kulya muteganira ebyo ebitakkusa? Mumpulirize, mumpulirize n'obwegendereza mulye ebyo ebirungi, emmeeme yammwe eneesanyuka nnyo.

3 Mumpulirize mujje gye ndi. Muwulirize mubeere balamu; nnaabakolera endagaano ey'olubeerera, era egyo gy'emikisa gyange n'okwagala bye nasuubiza Dawudi.

4 Laba namufuula omujulirwa eri abantu, omukulembeze era omugabe w'abantu.

5 Laba oliyita amawanga g'otomanyi, era amawanga g'otomanyi galyanguwa okujja gy'oli. Kiribaawo olw'obuyinza bwa MUKAMA Katonda wo era Omutukuvu wa Isirayiri kubanga akugulumizza."

6 Munoonye MUKAMA nga bw'akyayinzika okulabika, mumukaabirire nga bw'akyali okumpi.

7 Omubi aleke ekkubo lye, n'atali mutuukirivu aleke ebirowoozo bye. Leka adde eri MUKAMA naye anaamusaasira, adde eri Katonda waffe kubanga anaamusonyiyira ddala.

8 "Kubanga ebirowoozo byange si birowoozo byammwe era n'amakubo gammwe si ge makubo gange," bw'ayogera MUKAMA.

9 "Ng'eggulu bwe liri waggulu okukira n'ensi, bwe gatyo amakubo gange bwe gali ewala ennyo n'amakubo gammwe, n'ebirowoozo byange bwe biri eri ebirowoozo byammwe.

¹⁰ Era ng'enkuba bwetonnya n'omuzira ne gugwa okuva mu ggulu n'ebitaddayo, wabula ne bifukirira ettaka, ebirime ne bikula, ne bimerusa ensigo z'omusizi, era ne biwa omuli emmere,

¹¹ bwe kityo ekigambo kyange ekiva mu kamwa kange bwe kiri; tekiriddayo bwereere, naye kirikola ekyo kye njagala era kirituukiriza ekyo kye nakitura.

¹² Kubanga mulifuluma n'essanyu ne mugenda mirembe, ensozi n'obusozi nabyo ne bitandika okuyimba nga bibalabye, n'emiti gyonna ne gitendereza n'essanyu.

¹³ Mu kifo ky'omweramanno mulimeramu olusambya, ne mu kifo ky'omutovu mulimeramu omumwanyi. Era kino kiribaawo erinnya lya MUKAMA limanyibwe era ako ke kaliba akabonero akataliggwaawo ak'emirembe n'emirembe."

Isaaya 56

Abantu ba Katonda Baliva mu Mawanga Gonna

¹ Bw'ati bw'ayogera MUKAMA nti, "Mukolenga obwenkanya era ebituufu, kubanga obulokozi bwange bunaatera okujja, n'obutuukirivu bwange bunatera okubikkulibwa.

² Alina omukisa omuntu akola ekyo, n'omwana w'omuntu akinyweererako. Akwata ssabbiiti obutagyonoona, n'akuuma omukono gwe obutakola kibi na kimu."

³ Era ne munnaggwanga eyeegatta ku MUKAMA tayogeranga nti, "MUKAMA, oboolyawo alinjawula ku bantu be," so n'omulaawe okugamba nti, "Ndi muti mukalu."

⁴ Kubanga bw'atyo bw'ayogera MUKAMA nti, "Eri abalaawe abakwata ssabbiiti zange ne basalawo okugoberera ebyo ebinsanyusa, ne bakuumu endagaano yange,

⁵ amannya gaabwe galijjukirwa mu yeekaalu yange mu bisenge byamu, ng'ekijjukizo n'okusinga bwe mwandibadde n'abaana aboobulenzi n'aboobuwala. Ndibawa erinnya eritaliggwaawo ery'emirembe n'emirembe.

⁶ N'abo bannaggwanga abasalawo okwegatta ku MUKAMA, okumuweereza era n'okwagala erinnya lya MUKAMA era n'okubeera abawereza be, abakwata ssabbiiti ne batagyonoona era ne banyweza endagaano yange,

⁷ bano ndibaleeta ku lusozi lwange olutukuvu era ne mbawa essanyu mu nnyumba yange ey'okusabiramu. Ebiweebwayo byabwe ebyokebwa ne ssaddaaka zaabwe birikkirizibwa ku kyoto kyange. Kubanga ennyumba yange eriyitibwa nnyumba ya kusabiramu eri amawanga gonna."

⁸ Bw'ati bw'ayogera MUKAMA Ayinzabyonna, akuṇṇaanya Abayisirayiri abaawaṇṇangusibwa nti, "Ndikuṇṇaanyaayo abantu abalala ng'oggyeko abantu bange aba Isirayiri be nkunṇaanyizza."

Katonda Alumiriza Abakulembeze ba Isirayiri Ebibi byabwe

⁹ MUKAMA agamba amawanga amalala okujja ng'ensolo ez'omu nsiko, galye abantu be.

¹⁰ Kubanga abakulembeze ba Isirayiri bazibe ba maaso, bona tebalina magezi, bona mbwa ezitasobola kuboggola, zibeera mu kuloota nakugalaamirira ezaagala okwebaka obwebasi.

¹¹ Embwa ezirina omululu omuyitirivu ezitakkuta. Basumba abatayinza kutegeera, bona abakyamye mu makubo gaabwe; buli muntu ng'afa ku kwenoonyeza ky'anaalya.

¹² Bagambagana nti, "Mujje, leka tukime omwenge tunywe tutamiire. N'olw'enkya lunaku ng'olwa leero, oba n'okusingawo."

Isaaya 57

¹ Abantu abatuukirivu bazikirira, naye tewali akirowoozako n'akatono. Abantu abeewaddeyo eri Katonda batwalibwa nga tewali n'afuddeyo kukirowoozaako. Kubanga omutuukirivu aggyibwawo olw'akabi akagenda okujja.

² Ayingira mu mirembe n'afuna okuwummulira mu kufa kwe, ne bawummula ga beebase, abo abatambulira mu bugolokofu.

³ "Naye mmwe mujje musembere wano batabani b'omukazi omufumu ezzadde ly'omwenzi omukazi eyeetunda.

⁴ Muzannyira ku ani? Ani gwe mukongoola ne mumusoomooza? Temuli baana ba bujeemu, ezzadde eryobulimba?

⁵ Mwaka ne mwegoomba wansi w'emiti na buli wansi wa buli muti oguyimiridde; mmwe abasaddaaka abaana bammwe mu biwonvu ne wansi w'enjatika z'enjazi.

⁶ Bakatonda bo ge mayinja amaweweetu gosinziza mu biwonvu, abo be babo, obusika bwo; abo b'ofukira ekiweebwayo ekyokunywa era n'ebiweebwayo eby'empeke. Nga weemalidde mu kukola bino byonna, olowooza nnyinza okusanyuka?

⁷ Mwambuka ku ntikko z'ensozi okwenda nga mugenze okuwaayo ssaddaaka.

⁸ Emabega w'enzigi zammwe we muteeka ebibumbe eby'obuwemu bye musinza. Mwandeka ne mukola eby'obuwemu mu bitanda byammwe ebigazi. Eyo gye mweyambulira ne mukola endagaano n'abo be mwagala be muleeta mu bitanda byammwe.

⁹ Ne weekuba kalifuuwa omuyitirivu ng'ogenda okutwala amafuta ag'omuzeeyituuni ewa Moleki katonda wo, n'otuma ababaka bo ewala ennyo banoonye bakatonda, kumpi batuuke n'emagombe.

¹⁰ Amakubo go gonna gakuteganya ne gakukooya nnyo naye teweegamba nako nti, 'Nteganira ki atalina kyeñjanyurwa?' Singa tewanoonya bikuzaamu maanyi, wandizirise.

¹¹ "B'ani abo be watya n'otekemuka n'obawuliriza, n'olyoka olimba, nze n'otonzijukira n'akatono wadde okundowoozaako? Olw'okubanga nsirise n'esikunyega ky'ekikuyinudde n'onneerabira n'ompisaamu amaaso.

¹² Nnaayoleta obutuukirivu bwo ne by'okola, naye tebigenda kukugasa.

¹³ Bw'okaabanga nga weetaaga obuyambi, leka bakatonda bo be wakuññaanya bakununule; naye empewo eribatwala, omukka obukka abantu gwe bassa gulibaggirawo ddala bona. Naye oyo anfuula ekiddukiro kye aliryा ensi era alitwala olusozi lwange olutukuvu."

Ekisa eri Abeenanya

¹⁴ Era kiryogerwa nti, "Muzimbe, muzimbe, mulongoose ekkubo! Muggyeewo enkonge zonna mu kkubo ly'abantu bange."

¹⁵ Kubanga bw'atyō bw'ayogera oyo ali waggulu omugulumivu omulamu emirembe n'emirembe, ow'erinnya ettukuvu nti, "Ntuula mu kifo ekigulumivu ekitukuvu awamu n'oyo alina omwoyo oguboneredde ogwetoowaza, okuzzaamu amaanyi omwoyo gw'abakkakkamu, era n'ogw'abo ababoneredde.

¹⁶ Kubanga sirumiriza bantu bange emirembe n'emirembe era siribasunguwalira bbanga lyonna. Kubanga omutima gw'omuntu gwandigweredde mu maaso gange nga ndaba, emmeeme y'omuntu nze gye nakola.

¹⁷ Olw'okwegomba kwe okw'obutali butuukirivu nnali nzijjudde obusungu. Namubonereza ne nkweka amaaso gange olw'obusungu obungi naye yeeyongera okugenda mu maaso mu makubo amabi.

¹⁸ Nalaba by'akola, naye ndimuwonya. Ndimuluñjamya ne muddiza emirembe era ne mbeesabeesa abo abakungubaga.

¹⁹ Mirembe, era mirembe, eri abo abali ewala n'eri abo abali okumpi, era ndibawonya," bw'ayogera MUKAMA.

²⁰ Naye ababi bali ng'enyanja esiikuuse, eteyinza kutereera, ey'amayengo agasiikuula ebitosi n'ebitaka.

²¹ "Tewali mirembe, eri aboonoonyi," bw'ayogera Katonda wange.

Isaaya 58

Okusiiba okw'Amazima

- ¹ Kyogere mu ddoboozi ery'omwanguka, tokisirikira. Yimusa eddoboozi lyo ng'ekkondeere, obuulire abantu bange okusobya kwabwe, n'ennyumba ya Yakobo ebibi byabwe.
- ² Kubanga bannoonya buli lunaku era beegomba okumanya amakubo gange, nga bali ng'abantu abakola eby'obutuukirivu so si abaaleka edda ebiragiro bya Katonda waabwe. Bambuuza ensala ennuñjamu, ne basanyukira Katonda okusembera gye bali.
- ³ Beebuuza nti, "Lwaki twasiiba, naye ggwe n'otokifaako? Lwaki twetooowaza naye ggwe n'otokissaako mwoyo?" Musooke mulabe, ennaku ze musiiba muba munoonya ssanyu lyammwe ku bwammwe, musigala munyigiriza abakozi bammwe.
- ⁴ Njagala mulabe. Kalungi ki akali mu kusiiba ng'ate mugenda kudda mu nnyombo, n'okukaayana n'okukuba bannammwe agakonde. Temuyinza kusiiba nga bwe mukola kaakano eddoboozi lyammwe ne liwulirwa mu ggulu.
- ⁵ Okusiiba kwe nalonda bwe kutyo bwe kufaanana? Olunaku omuntu lw'eyetoowalizaako? Kukutamya bukutamya mutwe, kuguweta nga lumuli n'okugalamira mu bibuktu mu vvu? Okwo kwe muyita okusiiba, olunaku olusiimibwa MUKAMA?
- ⁶ Kuno kwe kusiiba kwe nalonda; okusumulula enjegere ezinyigiriza abantu, n'okuggyawo emiguwa gy'ekikoligo, n'okuta abo abanyigirizibwa, n'okumenya buli kikoligo?
- ⁷ Si kugabira bayala ku mmere yo, n'okusembeza abaavu abatalina maka mu nnyumba yo; bw'olaba ali obwerefere, n'omwambaza n'otekweka bañjanda zo abeetaaga obuyambi bwo?
- ⁸ Awo omusana gwo gulyoke guveeyo gwake ng'emmambya esala, era okuwonyezebwa kwo kujje mangu; obutuukirivu bwo bukukulembere, era ekitiibwa kya Katonda kikuveeko emabega.
- ⁹ Olwo olikoowoola, MUKAMA n'akuddamu; olikaaba naye n'akuddamu nti, Ndi wano. "Bwe muliggyawo ekikoligo ekinyigiriza n'okusonga ennwe, n'okwogera n'eijoogo;
- ¹⁰ bw'olyewaayo okuyamba abayala n'odduukirira abali mu buzibu, olwo omusana gwo gulyaka n'ova mu kizikiza, ekibadde ekiro kifuuke ettuntu.
- ¹¹ Era MUKAMA anaakuluñjamyangi ennaku zonna, n'akuwa ebintu ebirungi obulamu bwo bye bwetaaga, amagumba go aligongeramu amaanyi; era olibeera ng'ennimiro enfukirire obulungi, era ng'oluzzi olw'amazzi agatakalira.

¹² N'abantu bo balizimba ebifo eby'edda ebyazika era baddemu okuzimba emisingi egy'edda. Olyoke oyitibwe omuddaabiriza wa bbugwe eyamenyeka, omuddaabiriza wa mayumba ag'okusulamu.

¹³ "Bw'oneekuumanga obutayonoona Ssabbiiti, obutakola nga bw'oyagala ku lunaku lwange olutukuvu, bw'onooluyitanga olw'essanyu era olunaku lwa MUKAMA olw'ekitiibwa, singa muluwa ekitiibwa ne mutakwata makubo gammwe oba obutakola nga bwe mwagala oba okwogera ebigambo eby'okubalaata,

¹⁴ awo olifuna essanyu eriva eri MUKAMA era olitambulira mu bifo by'ensi ebya waggulu era ndikuwa obusika bwa kitaawo Yakobo" Akamwa ka MUKAMA ke kakyogedde.

Isaaya 59

Ekibi, Okwatula Ebibi, n'Okusonyiyibwa

¹ Mulabe, omukono gwa MUKAMA teguyimpawadde n'okuyinza ne gutayinza kulokola, era si muzibe wa matu nti tawulira.

² Naye obutali butuukirivu bwammwe bwe bubaawudde ku Katonda wammwe. Ebibi byammwe bye bimukwesezza amaaso ge, n'atawulira.

³ Kubanga emikono gyammwe gibunye omusaayi n'engalo zammwe zibunye obutali butuukirivu, emimwa gyammwe gyogedde eby'obulimba, n'ennimi zammwe z'ogedde eby'ekko.

⁴ Tewali awaaba bya nsonga so tewali awoza mu mazima; Beesiga ensonga ezitalimu, ne boogera eby'obulimba, ne baleeta emitawaana ne bazaala obulabe.

⁵ Baalula amagi ag'essalambwa ne balanga ewuzi za nnabbubi: alya ku magi gaabwe afa n'eryo eriba lyatise livaamu mbalasaasa.

⁶ Naye enkwe zaabwe ze bakola tezibayamba, ziri ng'engoye enkole mu wuzi za nnabbubi! Tebasobola kuzeebikka. Emirimu gyabwe mirimu gya kwonoona, n'ebikolwa byabwe bulabe.

⁷ Ebigere byabwe byanguyirira bikole ebibi era bapapirira bayiwe omusaayi ogatalina musango. Ebirowoozo byabwe birowoozo bya bubi, n'okuzika n'okuzikiriza bye biba buli we bagenda.

⁸ Ekkubo ery'emirembe tebalimanyi wadde okukozesa obwenkanya mu makubo gaabwe. Beekubidde amakubo, tewali n'omu agayitamu afuna emirembe.

⁹ Amazima gatuli wala, n'obutuukirivu tetubufunye. Tunoonyezza omusana naye ekizikiza kitwesibyeko, we tusuubira obutangaavu, tutambulidde mu bisiikirize byereere.

¹⁰ Tuwammantawammanta bbugwe ng'abazibe, ne tukwatakwata ng'abatalina maaso; twesittala mu ttuntu ng'ekiro mu abo abalina amaanyi ne tuba ng'abafu.

¹¹ Ffenna tuwuluguma ng'eddubu ne tusinda nga bukaamukuukulu. Tusuubira okuggyibwa mu kunyigirizibwa naye nga bwereere, n'obulokozi butuliwala.

¹² Kubanga ebisobyo byaffe bingi mu maaso go era ebibi byaffe bitulumiriza, kubanga ebisobyo byaffe biri naffe, era tumanyi obutali butuukirivu bwaffe;

¹³ obujeemu n'enkwe eri MUKAMA era n'okulekeraawo okugoberera Katonda waffe. Okutegeka obwediimo n'okunyigiriza, okwogera eby'obulimba n'emitima gyaffe bye girowoozezza.

¹⁴ Obwenkanya buddiridde n'obutuukirivu ne bubeera wala. Amazima geesitalidde mu luguudo, n'obwesimbu tebuyinza kuyingira.

¹⁵ Tewali w'oyinza kusanga mazima, era oyo ava ku kibiasuulibwa. MUKAMA yakiraba n'atasanyuka kubanga tewaali bwenkanya.

¹⁶ N'alaba nga tewali muntu, ne yennyamira nti tewali muntu ayinza kudduukirira. Noolwekyo kwe kusalawo okukozesa omukono gwe ye kennyini okuleeta obulokozi n'obutuukirivu bwe okuwangula.

¹⁷ Yayambala obutuukirivu bwe ng'eky'omu kifuba, era n'enkuufiira ey'obulokozi ku mutwe gwe; n'ateekako ebyambalo by'okuwoolera eggwanga era n'ayambala obunyiikivu ng'omunagiro.

¹⁸ Ng'ebikolwa byabwe bwe biri bwalisasula ekiruyi ku balabe be, n'abamukyawa alibawa empeera yaabwe, n'abo abali ewala mu bizinga abasasule.

¹⁹ Noolwekyo balitya erinnya lya MUKAMA okuva ebugwanjuba, n'ekitiibwa kye okuva ebuvanjuba, kubanga alijja ng'omugga ogukulukuta n'amaanyi, omukka gwa MUKAMA gwe gutwala.

²⁰ "Era Omununuizi alijja mu Sayuuni, eri abo abeenenya ebibi byabwe mu Yakobo," bw'ayogera MUKAMA.

²¹ "Era, eno y'endagaano yange gye nkola nabo," bw'ayogera MUKAMA. "Omwoyo wange ali ku ggwe era n'ebigambo byange bye ntadde mu kamwa ko, tebiivenga mu kamwa ko, oba mu kamwa k'abaana bo, wadde mu kamwa k'abaana b'abaana bo, okuva kaakano okutuusa emirembe n'emirembe," bw'ayogera MUKAMA.

Isaaya 60

Ekitiibwa kya Sayuuni Ekijja

¹ "Yimuka, oyake, kubanga ekitangaala kyo kizze kyase era ekitiibwa kya MUKAMA kikwakirako.

² Kubanga laba ensi eribikkibwa ekizikiza era n'ekizikiza ekikutte ennyo kibikke abantu baamawanga gonna, naye ggwe MUKAMA alikwakirako era ekitiibwa kye kikulabikeko.

³ Amawanga galija eri omusana gwo ne bakabaka eri okumasamasa okunaakubangako ng'oja.

⁴ "Yimusa amaaso go olabe; abantu bo bona bakuinjaana okujja gy'oli batabani bo abava ewala ne bawala bo abasituliddwa mu mikono.

⁵ Kino oli wakukirabako ojjule essanyu, omutima gwo, gujjule okweyagala n'okujaguza. Obugagga bw'amawanga bulyoke bukuleetebwe, era n'ebirungi byonna eby'omu nnyanja birikweyuna.

⁶ Ebisibo by'enjamira birijjula ensi yammwe, enjamira ento ez'e Midiyaani ne Efa. Era ne zonna ez'e Seba zirijja nga zeetisse zaabu n'obubaane okulangirira ettendo lya Katonda.

⁷ N'ebisibo byonna eby'e Kedali birikukuññanyizibwa, endiga ennume ez'e Nebayoosi zirikuweereza. Zirikkirizibwa ng'ekiweebwayo ku kyoto kyange era ndyolesa ekitiibwa kyange mu yeekaalu yange.

⁸ "Bano baani abaseyeeya nga ebire, ng'amayiba agadda mu bisu byago?

⁹ Ddala ddala ebizinga bitunuulidde nze; ebidyeri by'e Talusiisi bye bikuleembedde bireete batabani bammwe okubaggya ewala awamu ne zaabu yaabwe ne ffeeza, olw'ekitiibwa kya MUKAMA Katonda wammwe, Omutukuvu wa Isirayiri, kubanga akufudde ow'ekitiibwa.

¹⁰ "Abaana b'abamawanga amalala balizimba bbugwe wo, era bakabaka baabwe bakuweereze; Olw'obusungu bwange, nakukuba, naye mu kusaasira kwange ndikukwatirwa ekisa.

¹¹ Emiryango gyo ginaabanga miggule bulijjo, emisana n'ekiro tegiggalwenga, abantu balyoke bakuleeterenga obugagga obw'amawanga gaabwe nga bakuleembeddwamu bakabaka baabwe.

¹² Kubanga eggwanga oba obwakabaka ebitakuweereze byakuzikirira. Ensi ezo zijja kuggweerawo ddala.

¹³ "Ekitiibwa kya Lebanooni kirikujjira, emit i eg'yettendo eg'y'enfugo, omuyovu ne namukago gireetebwe okutukuza ekifo eky'awatukuvu wange, ekifo ebigere byange we biwummulira eky'ettendo.

¹⁴ Batabani baabo abaakunyigirizanga balija okukuvuunamira; era bona abaakusekereranga balivuunamira ku bigere byo. Balikuyita kibuga kya Katonda, Sayuuni ey'Omutukuvu wa Katonda.

¹⁵ "Wadde nga wali olekeddwa awo ng'okyayibbwa, nga tewali n'omu akuyitamu, ndikufuula ow'ettendo, essanyu ery'emirembe gyonna.

¹⁶ Olinywa amata ag'amawanga. Ku mabeere ga bakungu kw'onooyonkanga, era olimanyira ddala nti, Nze, nze MUKAMA, nze Mulokozi wo era Omununuzi wo, ow'Amaanyi owa Yakobo.

¹⁷ Mu kifo ky'ekikomo ndireeta zaabu, mu kifo ky'ekyuma ndireeta effeeza, mu kifo ky'omuti ndireeta kikomo, ne mu kifo ky'amayinja ndeete ekyuma. Emirembe gye girifuuka omufuzi wo n'obutuukirivu ne buba omukulembeze wo.

¹⁸ Okutabukatabuka tekuddeyo kuwulirwa mu nsi yo, wadde okwonoona n'okuzikiriza munda mu nsalo zo. Ebisenge byo olifiyita Bulokozi, Era n'enzigi zo, Kutendereza.

¹⁹ Enjuba si yeenekumulisizanga emisana, oba omwezi okukumulisizanga ekiro. Kubanga MUKAMA y'anaabeeranga ekitangaala kyo eky'emirembe n'emirembe, era Katonda wo y'anaabeeranga ekitiibwa kyo.

²⁰ Enjuba yo terigwa nate, n'omwezi gwo tegulibula; MUKAMA y'anaabeeranga ekitangaala kyo eky'emirembe n'emirembe era ennaku zo ez'okukungubanga zikome.

²¹ Abantu bo babeere batuukirivu, ensi ebeere yaabwe emirembe n'emirembe. Ekisimbe kye nnesimbira; omulimu gw'emikono gyange, olw'okulaga ekitiibwa kyange.

²² Asembayo okuba owa wansi alyala n'aba lukumi, n'asembayo obutono afuuke eggwanga ery'amaanyi. Nze MUKAMA, ndikyanguya mu biseera byakyo."

Isaaya 61

Amawulire Amalungi ag'Obulokozi

¹ Omwoyo wa MUKAMA Katonda ali ku nze, kubanga MUKAMA anfuseeko amafuta okubuulira abaavu n'abali obubi ebigambo ebirungi, antumye okuyimusa abalina emitima egimenyese. Okulangirira eddembe eri abawambe, n'abasibe bateebwe bave mu makomera.

² Okulangirira omwaka gwa MUKAMA ogw'okulabiramu obulungi bwe; olunaku lwa MUKAMA olw'okuwalanirako eggwanga era n'okuzzaamu amaanyi abo bona abakungubaga.

³ Okugabirira abo bona abali mu Sayuuni abakungubaga, okubawa engule ey'obubalagavu mu kifo ky'evvu, n'amafuta ag'essanyu mu kifo ky'ennaku. Ekyambalo ky'okutendereza mu kifo ky'omwoyo w'okukeŋjeentererwa balyoke bayitibwe miti gy'abutuukirivu, ebisimbe bya MUKAMA, balyoke baweebwe ekitiibwa.

⁴ Baliddamu bazimbe ebyali bizise, balirongoosa ebibuga ebyali byerabirwa edda.

⁵ Abaamawanga balibalundira ebisibo byammwe, abagwira babakolere mu nnimiro zammwe ne mu nnimiro z'emizabbibu.

⁶ Era muyitibwe bakabona ba MUKAMA, abantu baliboogerako ng'abweereza ba MUKAMA, mulirya obugagga bw'amawanga, era mu bugagga bwabwe mwe mulyenyumiririza.

⁷ Mu kifo ky'ensonyi, abantu bange baliddizibwaho emirundi ebiri. Mu kifo ky'okuswala basanyuke olw'ebyo bye balifuna era balifuna omugabo gwa mirundi ebiri, essanyu lyabwe liribeerera emirembe gyonna.

⁸ "Kubanga nze, MUKAMA, njagala obwenkanya, nkyawa okunyaga era n'obutali butuukirivu. Mu bjesigwa bwange ndibasasula era nkole nabo endagaano ey'emirembe n'emirembe.

⁹ N'ezzadde lyabwe liritutumuka nnyo mu mawanga n'abaana baabwe eri abantu. Abo bona abalibalaba balibamanya, nti bantu MUKAMA be yawa omukisa."

¹⁰ Nsanyukira nnyo mu MUKAMA, emmeeme yange esanyukira mu Katonda wange. Kubanga annyambazizza ebyambalo eby'obulokozi era n'anteekako n'omunagiro ogw'obutuukirivu, ng'omugole omusajja bw'ayambala engule nga kabona, ng'omugole omukazi bw'ayambala amayinja ge ag'omuwendo.

¹¹ Kuba nga ettaka bwe livaamu ebimera, era ng'ennimiro bwereetera ensigo okumeruka, bw'atyo MUKAMA Katonda bwalireeta obutuukirivu n'ettendo okumeruka, ensi zonna zikirabe.

Isaaya 62

Erinnya Iya Sayuuni Eriggya

¹ Ku lwa Sayuuni ssiisirike, era ku lwa Yerusaalemi ssiiwummule, okutuusa nga obutuukirivu bwe butemagana ng'emmambya esala, obulokozi bwe ng'ettaala eyaka.

² Amawanga galiraba obutuukirivu bwo, era ne bakabaka bona baliraba ekitiibwa kyo. Olyitibwa erinnya epya akamwa ka MUKAMA lye kalikuwa.

³ Olibeera ngule etemagana mu mikono gya MUKAMA, enkuufiira y'obwakabaka mu mukono gwa Katonda wo.

⁴ Ataliddayo kuyitibwa nti, Eyalekebwa, ensi yo teriddamu kuyitibwa nti, Yazika. Naye oliyitibwa nti, Gwe nsanyukira, n'ensi yo eyitibwe nti, Eyafumbirwa. Kubanga MUKAMA akusanyukira era ensi yo eribeera ng'omukazi afumbiddwa.

⁵ Kubanga ng'omuvubuka bwawasa omuwala omuto bw'atyo eyakutonda bwalikulabirira. Nga omugole omusajja bwasanyukira oyo gw'awasizza, bw'atyo Katonda bwalikusanyukira.

⁶ Ntadde abakuumi ku bbugwe wo, ggwe Yerusaalemi abataasirike emisana n'ekiro. Mmwe abakoowoola MUKAMA temuwummula.

⁷ Era temumuganya kuwummula okutuusa nga azimbye Yerusaalemi era ng'agifudde ettendo mu nsi.

⁸ MUKAMA yalayira n'omukono gwe ogwa ddyo era n'omukono gwe ogw'amaanyi: "Siriddayo nate kuwaayo ɳjaano yo kubeera mmere y'abalabe bo, era bannaggwanga tebaddeyo kunywa nvinnyo yo gy'otawaanidde.

⁹ Naye abo abagikungula be baligirya ne batendereza MUKAMA, n'abo abanoga emizabbibu be baliginywera mu mpya z'omu watukuvu wange."

¹⁰ Muyiteemu, muyite mu miryango mugende! Muzimbe oluguudo, mulugyemu amayinja. Muyimusize amawanga ebbendera.

¹¹ Laba MUKAMA alangiridde eyo yonna ensi gy'ekoma, nti, "Gamba omuwala wa Sayuuni nti, 'Laba omulokozi wo ajja, Laba aleeta n'ebirabo bingi, n'abantu b'anunudde bamukulembedde.'

¹² Era baliyitibwa Abantu Abatukuvu, Abanunule ba MUKAMA, ne Yerusaalemi kiyitibwe, Ekibuga MUKAMA ky'ayagala, Ekibuga Ekitakyali ttayo.

Isaaya 63

Katonda Iw'Aliwoolera Eggwanga n'Okununula Abantu be

¹ Ani ono ava mu Edomu mu kibuga Bozula anekaanekanye mu ngoye emyufu. Ani ono ali mu ngoye za bakabaka akumba mu bukulu bw'ekitiibwa kye? "Ye nze alangirira obutuukirivu, ow'amaanyi okulokola."

² Lwaki oyambadde ebyambalo ebimyufu ng'ebi'omusogozi w'omu ssogolero lya wayini?

³ "Nva kulinnyirira amawanga nga emizabbibu, tewali n'omu yajja kunnyambako. Nabalinnyiririra mu busungu era omusaayi gwabwe ne gusammukira ku ngoye zange, era guyiise ku byambalo byange.

⁴ Kubanga olunaku olw'okununula abantu bange Iwali lutuuse, olunaku olw'okuwoolera eggwanga abalabe baabwe.

⁵ Natunula naye nga tewali n'omu ayinza kunnyamba, newuunya okulaba nga tewaali n'omu ayinza kunkwatirako. Kale omukono gwange ne gundeetera obuwanguzi, era obusungu bwange ne bunnyweza.

⁶ Mu busungu bwange nalinnyirira abantu, mu kiruyi kyange ne mbatamiiza, omusaayi gwabwe ne nguyiwa ku ttaka.”

⁷ Ndibuulira ku bulungi bwa MUKAMA, ebikolwa ebyamugwanyisa okutenderezebwa, okusinziira ku byonna MUKAMA by'atukoledde; weewaawo ebirungi ebingi by'akoledde ennyumba ya Isirayiri, okusinziira ku kisa kye, okusinziira ku bungi bw'okwagala kwe okutajjulukuka.

⁸ Yagamba nti, “Ddala bantu bange, abaana aboobulenzi abatannimbelimbe,” era bw'atyo n'afuuka omulokozi waabwe.

⁹ Yabonaabonera wamu nabo mu kubonaabona kwabwe kwonna, era malayika ayimirira mu maaso ge n'abawonya. Mu kwagala kwe n'ekisa kye yabanunula; yabayimusa n'abeetikka mu nnaku zonna ez'edda.

¹⁰ Naye baajeema ne banyiiza Mwoyo Mutukuvu, kyeyava abakyukira n'afuuka omulabe waabwe era ye kennyini n'abalwanyisa.

¹¹ Ne balyoka bajjukira ennaku ez'edda, ennaku ez'edda eza Musa n'abantu be; aluwa oyo eyabayisa mu nnyanja n'omulunzi w'ekisibo kye. Aluwa oyo eyateeka Mwoyo Mutukuvu wakati mu bo

¹² eyatuma omukono gwe ogw'ekitiibwa ogw'amaanyi okubeera ku mukono gwa Musa ogwa ddyo, eyayawulamu amazzi nga balaba, yekolere erinnya ery'emirembe n'emirembe?

¹³ Ani eyabakulembra n'abayisa mu buziba? Ng'embalaasi mu nsi eyeetadde enjereere tebeesittala.

¹⁴ Ng'ente ezigenda mu nsi eyeetadde, Omwoyo wa MUKAMA yabawummuza. Bw'otyo bwe wakulembra abantu bo okwekolera erinnya ery'ettendo.

¹⁵ Tunula wansi ng'oli waggulu mu ggulu olabe, ng'oli ku ntebe yo ey'ekitiibwa egulumidde entukuvu. Obunyiikivu bwo n'ebikolwa byo eby'amaanyi biri ludda wa? Obulungi bwo n'ekisa bitukwekeddwa.

¹⁶ Ggwe Kitaffe, wadde nga Ibulayimu tatumanyi era nga Isirayiri tatutegeera, Ayi MUKAMA Katonda, ggwe Kitaffe Omununuzi waffe okuva edda n'edda lye linnya lyo.

¹⁷ Ayi MUKAMA Katonda, lwaki otuleka ne tuva ku makubo go, n'okakanyaza omutima gwaffe, ne tutakutya? Komawo olw'obulungi bw'abaddu bo amawanga g'omugabo gwo.

¹⁸ Abantu bo abatukuvu baali mu kifo kyo ekitukuvu akaseera katono, naye kaakano abalabe baffe bakirinnyiridde.

¹⁹ Ffe tuli bantu bo okuva edda n'edda; naye bo tobafuganga, tebayitibwanga linnya lyo.

Isaaya 64

Okusingibwa Omusango mu Maaso ga MUKAMA

- ¹ Kale singa oyuzizza eggulu n'okka wansi, ensozi ne zikankana mu maaso go!
- ² Ng'omuliro bwe gukoleerera mu buku, oba nga bwe gufumba amazzi ne gatuuka okwesera, ka wansi omanyise erinnya lyo eri abalabe bo, n'amawanga galyoke gakankanire mu maaso go!
- ³ Kubanga bwe wakola ebintu eby'entiisa bye twali tetusuubira, wakka ensozi ne ziryoka zikankanira mu maaso go.
- ⁴ Okuva mu mirembe egy'edda teri yali awulidde oba kutu kwali kutegedde, oba liiso lyali lirabye Katonda yenna okuggyako ggwe, alwanirira abo abamulindirira.
- ⁵ Ojja n'odduukirira abo abakola eby'obutuukirivu n'essanyu, abo abajjukira amakubo go. Naye bwe tweyongera okwonoona ne tugavaako, wakwatibwa obusungu. Ebbanga ddene lye tumaze mu bibi byaffe, ddala tulirokolebwa?
- ⁶ Ffenna twafuuka batali balongoofu era obutuukirivu bwaffe buli nga nziina ezijjudde obukyafu. Ffenna tuwotookerera ne tukala ng'ekikoola, era ebibi byaffe bitutwala nga mpewo.
- ⁷ Tewali n'omu akoowoola linnya lyo oba eyewaliriza okukukwatako, kubanga watwekweka tetukyalaba maaso go, era n'otuwaayo ne tuzikirira olw'ebibi byaffe.
- ⁸ Ate ng'era, Ayi MUKAMA Katonda, ggwe Kitaffe. Ffe tuli bbumba, ggwe mubumbi, ffe ffenna tuli mulimu gwa mikono gyo.
- ⁹ Tosunguwala kisukkiridde nnyo, Ayi MUKAMA Katonda, tojjukira bibi byaffe mirembe gyonna. Weewaawo, tutunuulire, tusaba, kubanga tuli bantu bo.
- ¹⁰ Ebibuga byo ebitukuvu bifuisse malungu ne Sayuuni kifuuse ddungu, ne Yerusaalemi nakyo kifulukwa.
- ¹¹ Yeekaalu yaffe entukuvu ey'ekitiibwa bakitaffe gye bakutendererezangamu eyokebbwa omuliro, era byonna eby'obugagga bye twakuumanga byazikirira.
- ¹² Nga bino byonna biguddewo, MUKAMA, era toofeeyo? Onoosirika busirisi n'otubonereza ekisukkiridde?

Isaaya 65

Omusango n'Obulokozi

- ¹ MUKAMA n'alyoka agamba nti, "Nze nnali mwetegefu okweyoleka eri abo abaali tebannoonya. Neeraga abo abaali tebannoonya. Eri eggwanga eryali

litakoowoola linnya lyange nneyoleka gye bali ng'ajnjamba nti, 'Ndi wano, Ndi wano.'

² Nagolola emikono gyange olunaku lwonna okutuusa obudde okuziba eri abantu abeewagguzze, abatambulira mu makubo amabi abagoberera entegeka ezaabwe ku bwabwe;

³ abantu bulijo abansomooza mu maaso gange gennyini nga bawaayo ebiweebwayo mu nnimiro ne bookera n'ebiweebwayo ku byoto eby'amatoffaali;

⁴ abatuula mu malaalo ne bamalako ekiro kyonna mu bifo ebyekusifu, abalya ennyama y'embizzi, era n'amaseffuliya gaabwe gajjudde ennyama etali nnongoofu.

⁵ Bagamba nti, 'Beera wala, tojja kumpi nange, kubanga ndi mutuukirivu nnyo ggwe okunsaanira!' Abantu bwe batyo mukka mu nnyindo zange, omuliro ogwaka olunaku lwonna.

⁶ "Laba kiwandiikiddwa mu maaso gange. Sijja kusirika naye nzija kusasula mu bujjuvu, nzija kubasasula bibatuukireko ddala;

⁷ olw'ebibi byammwe byonna era n'olw'ebibi bya bakitammwe," bw'ayogera MUKAMA Katonda. "Kubanga baayokera ebiweebwayo byabwe ku lusozi era ne bannyoomera ku busozi, ndibalira mu mikono gyabwe empeera yennyini enzijuvu ey'ebikolwa byabwe eby'edda."

⁸ Bw'atyo bw'ayogera MUKAMA: "Ng'omubisi bwe gusangibwa mu kirimba ky'emizabbibu abantu ne bagamba nti, 'Togwonoona, gukyalimu akalungi,' bwe nt yo bwe ndikibakolera olw'obulungi bw'abawereza bange. Sijja kubasaanyaawo bonna.

⁹ Ndiggya ezzadde okuva mu Yakobo era ne mu Yuda abo abalitwala ensozi zange; abantu bange abalonde balizigabana, era eyo abawereza bange gye balibeera.

¹⁰ Awo Saloni kiribeera ddundiro lya bisibo, era n'ekiwonvu kya Akoli kifo kya nte we zigalamira olw'abantu bange abannoonya.

¹¹ "Naye mmwe abava ku MUKAMA ne mwerabira olusozi lwange olutukuvu ne muteekerateekera emmeeza katonda wammwe, Mukisa, ne mujuliza katonda wammwe, Kusalawo, ebikopo eby'envinnyo,

¹² ndibawaayo eri ekitala era mwenna mukutaamirire musalibwe, kubanga nabayita naye temwayitaba, nayogera naye temwampuliriza. Mwakola ebitasaana era ne musalawo okukola ebitansanyusa."

¹³ Noolwekyo kino MUKAMA Ayinzabyonna ky'agamba: "Abawereza bange bajja kulya, naye mmwe mujja kulumwa enjala, abawereza bange bajja kunywa, naye

mmwe mulumwe ennyonta; abaweereza bange bajja kujaguza, naye mmwe mukwatibwe ensonyi.

¹⁴ Abaweereza bange bajja kuyimba olw'essanyu erinaaba mu mitima gyabwe, naye mmwe muli ba kukaaba olw'okulumwa okunaabeera mu mitima gyammwe era mukaabe olw'okulumwa emyoyo.

¹⁵ Ekikolimo kiryoche kibagwire, Nze MUKAMA Katonda ow'Eggye mbatte amannya gammwe geerabirwe, naye mpe amannya amaggya abo abaŋjondera.

¹⁶ Kiryoche kibeere nti buli muntu ananoonya okufuna omukisa anaagunoonya kuva eri Katonda Ow'amazima buli anaalayiranga mu ggwanga anaalayiranga Katonda ow'amazima. Kubanga emitawaana egyayita gya kwerabirwa gikwekebwé okuva mu maaso gange.

Eggulu Epya n'Ensi Empya

¹⁷ "Laba nditonda eggulu eriggya n'ensi empya. Ebintu eby'edda tebijja kujjukirwa wadde okulowoozebwako mu mutima.

¹⁸ Naye musanyukire ekkyo kye ntonda mujaguze emirembe n'emirembe, kubanga nditonda Yerusaalemi okuba essanyu n'abantu baamu okuba okujaguza.

¹⁹ Ndijaguza olwa Yerusaalemi era nsanyukire abantu bange; amaloboozi ag'okukaaba tegaliddayo kuwulirwamu.

²⁰ "Teriddayo kuba mu kyo mwana muwere anaaberawo ennaku obunaku, oba omusaja omukulu ataamalengayo myaka gye; oyo alifiira ku myaka ekikumi alitwalibwa ng'omuvubuka obuvubuka. Oyo atalituusa kikumi abalibwe ng'eyakolimirwa.

²¹ Balizimba ennyumba bazisulemu, balisimba emizabbibu balye ebibala byagyo.

²² Tebalizimba nnyumba ate omulala agisulemu, tebalisimba ate omulala abirye. Kubanga emyaka gy'emiti nga bwe giba bwe gityo bwe giribeera emyaka gy'abantu bange. Abalonde bange balirwawo nga bawoomerwa emirimu gy'emikono gyabwe.

²³ Tebalikolera bwereere oba okuzaala abaana ab'okugwa mu katyabaga, kubanga balibeera abantu abaweebwa MUKAMA Katonda omukisa, bo awamu n'ab'enda yaabwe.

²⁴ Nga tebanakoowoola ndibaddamu, nga bakyayogera bati mbaddemu.

²⁵ Omusege n'omwana gw'endiga biriire wamu, era empologoma erye omuddo ng'enneume, era ettaka libeere emmere y'omusota. Tewaliba kulunya wadde kuzikiriza ku lusozi lwange olutukuvu," bw'ayogera MUKAMA Katonda.

Isaaya 66

¹ Bw'ati bw'ayogera MUKAMA Katonda, "Eggulu y'entebe yange kwe nfugira n'ensi ke katebe kwe mpummuliza ebigere byange, nnyumba ki gye mulinzimbira? Kifo ki kye mulimpa okuwummuliram?"

² Ebintu bino byonna emikono gyange si gye gyagikola, noolwekyo ebintu bino byonna byange?" bw'ayogera MUKAMA Katonda. "Ono ye muntu gwe ntunulako; oyo ow'eggonjebwa era omwetoowaze mu mwoyo, oyo akankanira ekigambo kyange.

³ Naye asaddaaka ente aba ng'asse omuntu, oyo awaayo omwana gw'endiga n'aba ng'amene ensingo y'embwa, n'oyo awaayo ekiweebwayo eky'empeke aba ng'awaddeyo omusaayi gw'embizzi, era oyo anyookeza obubaane bw'ekijjukizo aba ng'asinza ekifaananyi ekikole n'emikono. Abantu bakutte amakubo gaabwe, era emmeeme zaabwe zisanyukira eby'emizizo byabwe.

⁴ Nange ndisalawo mbatuuseeko ekibambulira, mbaleeteko kye batandyagadde kibatuukeko. Kubanga bwe nayita, teri n'omu yayanukula, bwe nnaayogera tebanfaako. Bakola ebibi mu maaso gange ne bagoberera ebitansanyusa."

⁵ Muwulirize ekigambo kya MUKAMA Katonda mmwe abakankanira ekigambo kye. "Baganda bammwe abatabaagala era ababayigganya olw'erinnya lyange babasekerera nti, 'Leka MUKAMA alage obukulu bwe abalokole tulabe bwe musanyuka!' Naye bo be banaakwasibwa ensonyi.

⁶ Muwulirize. Oluyoogaano oluva mu kibuga, muwulirize eddoboobi eriva mu yeekaalu. Eddoboobi eryo lya MUKAMA Katonda ng'asasula abalabe be nga bwe kibagwanira.

⁷ "Ekibuga kyange ekitukuvu kiri ng'omukazi azaala nga tannatuusa kulumwa, obulumi nga tebunatuuka n'akubawo eddenzi.

⁸ Ani eyali awulidde ekintu bwe kityo? Ani eyali alabye ekiri ng'ekyo? Ensi eyinza okuzaalibwa mu lunaku lumu oba eggwanga okutondebwawo mu kaseera obuseera? Akaseera katono bwe kati, Sayuuni anaaba yakalumwa ng'eggwanga litondebwawo.

⁹ Nnyinza okutuusa abantu bange ku kuzaalibwa ne batazaalibwa?" bw'ayogera MUKAMA Katonda. "Ate olubuto ndusiba ntya nga ndutuusizza ku kuzaala?" bw'ayogera MUKAMA Katonda wo.

¹⁰ "Mujagulize wamu ne Yerusaalemi era mumusanyukireko mwenna abamwagala, mujaganye nnyo mmwe mwenna abamukaabira.

¹¹ Kubanga muliyonka munywe n'essanyu mukkutire ddala ku kitibwa kye ekingi."

¹² Kubanga bw'ati bw'ayogera MUKAMA Katonda nti, "Laba mbaleetera obugagga obutaliiko kkomoo, obugagga bw'amawanga bube gye muli ng'omugga ogwanaala. Muliyonkako, musitilibwe mu mbiriizi era bababuusizebuusize ku mubiri gwe.

¹³ Ng'omwana bw'asanyusibwa nnyina, bwe ntyo bwe ndikuzzaamu amaanyi mu Yerusaalemi."

¹⁴ Kino bw'olikiraba omutima gwo gulisanyuka, era kirikufuula w'amaanyi omulamu obulungi ng'omuddo ogukuze. Olwo kiryoke kimanyibwe nti omukono gwa MUKAMA Katonda guyamba abaweereza be, ate obusungu bwe ne bulagibwa abalabe be.

¹⁵ "Kubanga laba MUKAMA Katonda alijjira mu muliro, era n'amagaali ge ag'embalaasi galiba ng'empewo ey'omuyaga. Alija n'obusungu bwe n'ekiruyi era alibanenya n'ennimi ez'omuliro.

¹⁶ Omuliro n'ekitala MUKAMA Katonda by'alibonerezesa abantu bona, n'abo abalisaanyizibwawo baliba bangi.

¹⁷ "Abo abeetukuza balyoke balage mu nnimiro entukuvu okukola eby'emizizo, abatambulira mu nnyiriri nga bwe balya embizzi, omusonso n'emmere ey'omuzizo, bona balizikirira wamu," bw'ayogera MUKAMA Katonda.

¹⁸ "Olw'ebyo bye bakola ne bye balowooza, nnaatera okujja nkunjaanye amawanga gonna n'ennimi zonna, era balija balabe ekitiibwa kyange.

¹⁹ "Nditeeka akabonero mu bo. Ndiwonyaako abamu mbasindike mu mawanga, e Talusiisi, e Puuli, n'e Luudi, abaleega omutego, eri Tubali ne Yavani, mu bizinga eby'ewala, abatawuliranga ttutumu lyange, wadde okulaba ekitiibwa kyange.

²⁰ Balikomyawo baganda bammwe bona okuva mu mawanga nga ekirabo gye ndi. Balibaleetera ku mbalaasi, ne mu magaali ge mbalaasi n'ebigaali ne ku nnyumbu n'enjamira ku lusozi lwange olutukuvu nga Isirayiri bwe baleeta ebiweebwayo ebirongoofu mu nnyumba ya MUKAMA Katonda.

²¹ Era ndifuula abamu ku bo okubeera bakabona n'abaleevi," bw'ayogera MUKAMA Katonda.

²² "Kubanga nga eggulu eppya n'ensi empya, bye ndikola bwe biribeerawo olw'amaanyi gange, bw'ayogera MUKAMA Katonda, bwe lityo ezzadde lyammwe n'erinnya lyammwe bwe birisigala.

²³ Okuva ku mwezi okutuuka ku mwezi, n'okuva ku ssabbiiti okutuuka ku ssabbiiti, bona abalina omubiri banajjanga okusinziza mu maaso gange," bw'ayogera MUKAMA Katonda.

²⁴“Kale bwe baliba bafuluma, baliraba emirambo gy’abasajja abanneewaggulako; kubanga envunyu zaabwe tezirifa, so n’omuliro gwabwe tegulizikizibwa; era baliba kyennyinnyalwa eriabantubonna.”

Yeremiya

Yeremiya 1

- ¹Ebigambo ebyayogerwa Yeremiya, mutabani wa Kirukiya, ow'oku bakabona abaali mu Anasosi mu nsi ya Benyamini.
- ²MUKAMA Katonda yayogera naye mu mirembe gya Yosiya, kabaka wa Yuda, mutabani wa Amoni, nga yakafugira emyaka kkumi n'esatu,
- ³ne mu biro bya Yekoyakimu mutabani wa Yosiya kabaka wa Yuda, okutuusa mu mwezi ogwokutaano, ogw'omwaka ogw'ekkumi n'ogumu ogw'obufuzi bwa Zeddekiya mutabani wa Yosiya kabaka wa Yuda, abantu b'e Yerusaalemi lwe baatwalibwa mu buwañjanguse.

Okuyitibwa kwa Yeremiya

- ⁴Ekigambo kya MUKAMA Katonda ne kinzijira, ng'agamba nti,
- ⁵“Nakumanya bwe nnali sinnakubumba mu lubuto lwa maama wo; nga tonnava mu lubuto n'akutukuza. Nakulonda okubeera nnabbi eri amawanga.”
- ⁶Ne ndyoka ḥajjamba nti, “Laba nno, MUKAMA Katonda! Simanyi kwogera mu bantu, ndi mwana muto.”
- ⁷Naye MUKAMA Katonda n'ahajjamba nti, “Toyogera nti, ‘Ndi mwana bwana;’ kubanga yonna gye nnaakutumanga gy’onoogendanga, era byonna bye nnaakulagiranga by’onooyogeranga.
- ⁸Tobatyanga, kubanga nze ndi naawe okukuwonya,” bw’ayogera MUKAMA Katonda.
- ⁹Awo MUKAMA Katonda n’agolola omukono gwe, n’akwata ku mimwa gyange, n’ahajjamba, nti, “Wuliriza. Nkuwa ebigambo by’onooyogeranga.
- ¹⁰Leero nkutaddewo okuba n’obuyinza ku mawanga era ne ku bwakabaka. Okusimbula n’okumenya, okuzikiriza n’okuwamba; okuzimba n’okusimba.”
- ¹¹Ekigambo kya MUKAMA Katonda ate ne kinzijira nga kigamba nti, “Yeremiya kiki ekkyo ky’olaba?” Ne ḥajjamba nti, “Ndaba ettabi ly’omuti ogw’omulozi.”
- ¹²Awo MUKAMA Katonda n’ahajjamba nti, “Olabye bulungi, kubanga neetegereza ndabe ng’ekigambo kyange kituukirira.”
- ¹³Ekigambo kya MUKAMA Katonda ne kinzijira nate nti, “Kiki ky’olaba, kaakano?” Ne ḥajjamba nti, “Ndaba ensuwa ey’amazzi ageesera, ng’etunudde waggulu mu bukiakkono.”
- ¹⁴Awo MUKAMA Katonda n’ahajjamba nti, “Okuzikirira kujja kubaawo nga kutandikira mu bukiakkono kutuuke ku bantu bona abali mu ggwanga.

¹⁵Kubanga laba nnaatera okuyitaabantu bona ab'omu bwakabaka obuli mu bukiakkono," bw'ayogera MUKAMA Katonda. Bakabaka baabwe balyoke bajje bateeke entebe zaabwe ez'obwakabaka mu miryango egiyingira ekibuga Yerusaalemi, balizinda bbugwe waakyo yenna era bazinde n'ebibuga byonna ebya Yuda.

¹⁶Era ndibonereza abantu bange olw'ebibi byabwe byonna, kubanga banvaako ne booteesa obubaane eri bakatonda abalala, era ne basinza ebibajje bye beekolera n'emikono gyabwe.

¹⁷"Naye ggwe weetegeke! Yimirira obabuulire byonna bye nkulagira. Tobatya kubanga bw'onoobatya nzija kubakutiisa.

¹⁸Kubanga leero nze nkufudde ekibuga ekiriko enkomera ez'amaanyi, era empagi ey'ekyuma, era bbugwe ow'ekikomo eri ensi yonna, eri bakabaka ba Yuda, eri abakungu baayo, ne bakabona n'abantu ab'omu nsi.

¹⁹Balirwana naawe naye tebalikuwangula; kubanga nze ndi wamu naawe okukununula," bw'ayogera MUKAMA Katonda.

Yeremiya 2

Isirayiri eva ku Katonda

¹Ekigambo kya MUKAMA Katonda ne kinzijira nga kigamba nti,

²"Genda olangirire nga Yerusaalemi ewulira nti: "Bw'ati bw'ayogera MUKAMA Katonda nti, "'Nzijukira okwewaayo kwe weewaayo ng'okyali muto, engeri gye wanjalalamu nga twakafumbiriganwa, wangoberera mu ddungu mu nsi etali nnime.

³ Isirayiri wali mutukuvu wa MUKAMA, ebibala ebibereberyey ebyamakungula ge; bona abaakulyangako nga bazzizza omusango, akabi nga kabatuukako," bw'ayogera MUKAMA Katonda.

⁴Muwulirize ekigambo kya MUKAMA mwe ezzadde lya Yakobo, era n'ab'enju zonna ez'ebika eby'omu Isirayiri.

⁵ Bw'ati bw'ayogera MUKAMA nti, Kibi ki bakitammwe kye bansangamu ne banvaako ne bagenda ewala ennyo bwe batyo? Baagoberera ebifaananyi bya bakatonda abakole n'emikono ebitaliimu nabo bennyini ne bafuuka ebitaliimu.

⁶ Ne batagamba nako nti; "Ali ludda wa MUKAMA eyatuggya mu nsi y'e Misiri; eyatuyisa mu lukoola, mu nsi ey'amalungu n'obunnya, mu nsi enkalu n'ekisiikirize eky'okufa, mu nsi omutali muntu n'omu, so n'omuntu yenna mw'atayinza kuyita?"

⁷ Ne mbaleeta mu nsi engimu, mulye ebibala byamu n'ebintu ebirungi. Naye bwe mwajja ne mwonoona ensi yange, ne mufuula omugabo gwange ekivume.

⁸ Bakabona ne batabuuzaako nti, "MUKAMA ali ludda wa?" Abo abakola ku mateeka tebammany. Abakulembeze ne banjeemera. Bannabbi nga baweereza ku lwa Baali, ne bagoberera ebitagasa.

⁹ "Kyenva nnyongera okubalumiriza," bw'ayogera MUKAMA, "Era ndirumiriza n'abaana b'abaana bammwe."

¹⁰ Muwunguke ennyanja mugende ku bizinga bya Kittimu mulabe; era mutume e Kedali, mwetegereze. Mujja kulaba nga tekibangawo.

¹¹ Waali wabaddewo eggwanga erikyusa bakatonda baalyo, wadde nga si bakatonda, naye nga bitalimu? Naye abantu bange baawaanyisa ekitiibwa kyabwe n'ebitagasa.

¹² Wewuunye ggwe eggulu, era okankane n'entiisa ey'amaanyi," bw'ayogera MUKAMA.

¹³ "Kubanga abantu bange bakoze ebibi bibiri, banvuddeko nze ensulo ey'amazzi amalamu ne beesimira ettanka ez'omu ttaka, ettanka ez'omu ttaka ezirimu enjatika ezitanyweeramu mazzi."

Ebyava mu kubula kwa Isirayiri

¹⁴ "Isirayiri muddu, omuddu omuzaale? Kale lwaki afuuse omuyiggo?

¹⁵ Bamuwulugumirako ng'empologoma bw'ewuluguma, abalabe bawulugumye nnyo. Ensi ye efuuse matongo, ebibuga bye bigyiridde ddala omuliro birekeddwa ttayo, nga temukyali muntu n'omu.

¹⁶ Ate era abasajja b'e Noofu n'e Tapeneesi bamaliddewo ddala ekitiibwa kyo.

¹⁷ Si ggwe weeretedde bino ng'ova ku MUKAMA Katonda wo, eyakukuleberanga akulage ekkubo?

¹⁸ Kaakano olowooza onooganyulwamu ki okugenda okukolagana ne Misiri? Olowooza kiki ky'onoganyulwa bw'onogenda okukolagana ne Bwasuli?

¹⁹ Ebibi byo byennyini bye biri kubonereza, n'okudda kwo emabega kwe kulikusalira omusango. Kale lowooza era otegeere nga bwe kiri ekibi era eky'omutawaana gy'oli bw'ova ku MUKAMA Katonda wo, n'oba nga tokyantya," bw'ayogera MUKAMA, Katonda ow'eggye.

Isirayiri Ebonerezebwa olw'Okusinza bakatonda abalala

²⁰ MUKAMA ow'eggye agamba nti, "Isirayiri, ebbanga ddene eriyiseewo bukya weggya mu buyinza bwange, n'ogamba nti, 'Sijja kukugondera.' Era ddala, ku buli kasozia na buli wansi w'omuti oguyimiridde wakuba obwamalaaya ng'ovuunamira bakatonda abalala.

²¹ Songa nnali nkusimbye ng'oli muzabbibu omulungi, ensigo eteriimu kikyamu n'akatono, naye ate lwaki oyonooneese n'ofuuka ng'omuzabbibu ogw'omu nsiko?

²²Kubanga ne bw'onaaba n'oluvu n'okozesa ne sabbuuni omungi, naye era ebbala lyo n'obutali butuukirivu bwo bisigala bikyalabika," bw'ayogera MUKAMA Katonda.

²³Oyinza otya okugamba nti, "Sseeyoononanga, sigobereranga ba Baali?" Jjukira bwe weeyisa ng'oli mu kiwonvu; tegeera kye wakola. Oli ng'enjamira enkazi efuumuuka embiro ngeraga eno n'eri,

²⁴ng'endogoyi ey'omu nsiko eddukira mu ddungu mw'emanyidde, ng'ewunyiriza mu bbanga eno n'eri mu kwaka kwayo, mu kiseera ekkyo ani ayinza okugiziyiza? Ensajja zonna ezigyetaaga tezeetaaga kwekooya; mu biseera by'okulabaganiram za kugifuna.

²⁵Tokooya bigere byo, era tokaza mimiro gyo. Naye n'oddamu nti, "Ebyo bya bwereere, sisobola kokyuka, nayagala bakatonda abalala, nteekwa okubanoonya."

²⁶Ng'omubbi bw'aswala ng'akwatiddwa, n'ennyumba ya Isirayiri bw'eswala bw'etyo, bakabaka baayo, n'abalangira baayo, ne bakabona baayo, era ne bannabbi baayo,

²⁷nga bagamba emit nti, "Ggwe kitange," era n'ejjinja nti, "Ggwe wanzaala." Bankubye amabega, naye bwe balaba ennaku bankaabirira nti, "Yimuka ojje otulokole."

²⁸Kale bakatonda be weekolera baluwa? Leka bajje, bwe baba basobola okukulokola mu biseera eby'emitawaana. Kubanga obungi bwa bakatonda bammwe bwenkanankana n'ebibuga byo ggwe Yuda.

Okubonerezewa kutuuse

²⁹"Lwaki munneemulugunyiza? Mwenna mwanneeddiimira," bw'ayogera MUKAMA.

³⁰Abaana bammwe nababonereza naye nga bwerere, tebakkiriza kugololwa. Mmwe bennyini ne mwettira bannabbi bammwe ng'empologoma bw'etta.

³¹Mmwe ab'omulembe guno muwulirize ekigambo kya Katonda. Mbadde nga ddungu gye muli ng'ensi ejjudde ekizikiza ekky'amaanyi? Kale lwaki abantu bange bagamba nti, "Tulina eddembe, tetukyadda gy'oli?"

³²Omuwala omuto ayinza okwerabira ebikomo, oba omugole okwerabira ekymbalo kye? Naye ng'ate abantu bange Bannerabidde!

³³Ng'omanyi nnyo okukuba amakubo ag'okunoonya abanaakwagal! N'asembayo okuba omukugu mu bamalaaya aba alina kuyigira ku ggwe.

³⁴Engoye zo zижудде omusaayi gw'abaavu n'abatalina musango, awatali kugamba nti bakwatibwa nga babba. Ate nga wadde byonna biri bwe bityo

³⁵ ogamba nti, "Sirina musango, ddala takyanninako busungu!" Laba, njenda kukusalira omusango olw'okugamba nti, "Sirina kibi kye nkoze."

³⁶ Lwaki ogenda ng'okyusakyusa amakubo go! Misiri ejja kukuswaza nga Bwasuli bwe yakuswaza.

³⁷ Era n'eyo olivaayo ng'emikono ogyetisse ku mutwe, kubanga MUKAMA agaanye abo be weesiga; tagenda kukuyamba.

Yeremiya 3

Yuda Omukazi Atali Mwesigwa

¹ "Omusalija bw'agoba mukazi we, omukazi oyo n'agenda n'afuuka ow'omusalija omulala, omusalija we alimukomyawo nate? Ensi eba teyonoonekedde ddala nnyo? Naye obadde nga malaaya, ng'olina abasajja bangi; naye kaakano oyagala okukomawo gye ndi?" bw'ayogera MUKAMA.

² Yimusa amaaso go olabe ku ntikko y'obusozi. Waliwo ekifo we bateebakira naawe? Ku mabbali g'ekkubo we watulanga n'olinda abasajja ng'oli nga Omuwalabu mu ddungu; n'olyoka oyonoona ensi n'obwenzi bwo n'ekibi kyo.

³ Noolwekyo enkuba kyevudde eziyizibwa, n'enkuba eya ttoggó n'etetonnya. Naye era otemya nga malaaya tokwatibwa nsonyi.

⁴ Tewakanjamba nti Kitange ggwe mukwano gwange okuva mu buto bwange,

⁵ onoonyiigira ddala emirembe gyonna, olisunguwala emirembe gyonna? Bw'otyo bw'oyogera, naye okoze ebibi byonna ebisoboka.

Isirayiri, Atali Mwesigwa

⁶ Mu nnaku z'obufuzi bwa kabaka Yosiya MUKAMA yayogera nange n'anjambamba nti, "Olabye Isirayiri etali neesigwa ky'ekoze? Agenze ku buli kasozi na buli wansi w'omuti oguyimiridde ne yeeyisa ng'omukazi omwenzi.

⁷ Nalowooza nti, Bw'alimala okukola bino byonna agenda kudda gye ndi naye teyadda, era muganda we atali mwesigwa Yuda n'akiraba.

⁸ Yalaba nti bwe namala okugoba Isirayiri eyanvaako, ne muwa n'ebbaluwa ey'okumugoba olw'obwenzi bwe. Naye ate ne ndaba muganda we atali mwesigwa Yuda nga taliimu kutya, naye n'agenda n'akola obwenzi.

⁹ Awo obwenzi bwe bwatuuka ne bumwanguyira nnyo n'ayenda n'asinza amayinja n'ebikonge.

¹⁰ Naye wadde nga byonna bimaze okubaawo, muganda we Yuda atali mwesigwa, teyakomawo gye ndi na mutima gwe gwonna, naye yali alimbalimba," bw'ayogera MUKAMA.

¹¹ MUKAMA n'ajjamba nti, Isirayiri asudde obwesigwa, mutukuvu okusinga Yuda atali mwesigwa.

¹²Genda obuulire abantu b'omu bukiakkono obubaka buno, obagambe nti, “Komawo ggwe Isirayiri, eyanvaako,’ bw’ayogera MUKAMA. ‘Siribatunuuliza busungu kubanga ndi waakisa,’ bw’ayogera MUKAMA; ‘Sirisiba busungu ku mwoyo emirembe gyonna.

¹³Mukkirize bukkiriza ekibi kyammwe, mwajeemera MUKAMA Katonda wammwe, mwasinza bakatonda abalala, wansi wa buli muti oguyimiridde, era ne mutajjondera,’” bw’ayogera MUKAMA.

¹⁴“Mukomeewo mmwe abaana abanvaako,” bw’ayogera MUKAMA; “kubanga nze bbammwe, era ndibalondamu omu ku omu okuva mu buli kibuga, babiri babiri okuva mu buli kika mbaleete ku lusozi Sayuuni.

¹⁵Era ndibawa abasumba abakola ng’omutima gwange bwe gwagala, abalibakulembra mu kumanya era ne mu kutegeera.

¹⁶Ennaku bwe zirituuka nga mwaze era nga muli bangi nnyo mu nsi,” bw’ayogera MUKAMA, “abantu baliba tebakyayogera ku Ssanduuko y’Endagaano. Baliba tebakyagirowooza nako, okugijjukira; oba okulumwa emitima olw’obutaba nayo wadde okukola endala.

¹⁷Ebbanga lyonna Yerusaalemi kiriyitibwa Entebe ya MUKAMA ey’Obwakabaka, amawanga gonna mwe ganaakuinjaaniranga okumugulumiza MUKAMA mu Yerusaalemi era tebaliddayo kugoberera mitima gyabwe minyoomi.

¹⁸Mu nnaku ezo ennyumba ya Yuda eryegatta ku nnyumba ya Isirayiri, era bombi awamu baliva mu nsi ey’omu bukiakkono ne bajja mu nsi gye ndiwa bakitammwe okuba omugabo.

¹⁹“Nze kennyini nalowooza “nga nayagala okubayisanga nga batabani bange, era mbawe ensi eyeegombewa, nga gwe mugabo ogusinga obulungi mu mawanga gonna. Nalowooza nti mulimpita ‘Kitammwe,’ ne mutanvaako ne mwongera okungoberera.

²⁰Naye ng’omukazi atali mwesigwa eri bba bw’abeera, bwe mutyo bwe mutabadde beesigwa gye ndi, mmwe ennyumba ya Isirayiri,” bw’ayogera MUKAMA.

Okuyitibwa Okwenenya

²¹Okukaaba kw’Abaana ba Isirayiri kuwuliddwa ku ntikko z’ensozi ezitaliiko kantu, nga bakaaba n’okwegayirira, kubanga baatambulira mu kukola ebibi, ne beerabira MUKAMA Katonda waabwe.

²² “Mukomeewo mmwe abantu abatali beesigwa, nnaabawonya ne mbafuula abeesigwa.” Ne mugamba nti, “Weewaawo tujja kudda gy’oli, kubanga ggwe MUKAMA Katonda waffe.

²³ Ddala okusuubira obuyambi okuva mu nsozi gye twasinzizanga bakatonda abalala temuli kantu. Ddala mu MUKAMA Katonda waffe mwe muli obulokozi bwa Isirayiri.

²⁴ Naye okuva mu buto bwaffe bakatonda abo abalala abatagasa balidde ne bamalawo ebibala bakitaffe bye baamalirako amaanyi gaabwe, embuzi zaabwe, n’ente zaabwe, batabani baabwe ne bawala baabwe.

²⁵ Leka tugalamire, ng’ensonyi zitutta, n’obuswavu bwaffe butuyitiridde kubanga twoonoonye eri MUKAMA Katonda waffe, ffe ne bakadde baffe, okuva mu buto bwaffe n’okutuusa ku lunaku luno; kubanga tetugondedde ddoboozi lya MUKAMA Katonda waffe.”

Yeremiya 4

¹ “Bw’oba odda, ggwe Isirayiri,” bw’ayogera MUKAMA, “eri nze gy’olina okudda. Bw’oneggyako eby’omuzizo byonna n’otosagaasagana,

² era singa olayira mu mazima, mu bwenkanya era mu ngeri entuufu yennyini nti, ‘Ddala nga MUKAMA bw’ali omulamu,’ olwo amawanga gonna mu ye mwe gajja okuweerwa omukisa era mu ye mwe ganeenyumiririzanga.”

³ Kubanga bw’ati bw’ayogera MUKAMA eri abantu ba Yuda era n’eri abantu b’omu Yerusaalemi nti, “Mulime ennimiro zammwe ezitali nnime, temusiga mu maggwa.

⁴ Mukoowoole MUKAMA, mweweeyo mutukuze emitima gyammwe mwe abantu ba Yuda ne Yerusaalemi, obusungu bwange buleme okubuubuuaka ng’omuliro, olw’ebikolwa byammwe ebibi, ne wataba ayinza kubuzikiza.”

Yuda Erumbibwa

⁵ “Kirangirire mu Yuda era okitegeeze mu Yerusaalemi ogambe nti, ‘Mufuuwe ekkondeere mu nsi yonna! Mulangirire nga mugamba nti, Mukanjaaane, tuddukire mu bibuga ebiriko ebigo!’

⁶ Weereza obubaka eri Sayuuni nti, Mudduke temulwa, kubanga ndireeta okuzikiriza okuva mu bukiakkono, okuzikiriza okw’amaanyi.”

⁷ Empologoma evudde mu kisaka kyayo, omuzikiriza w’amawanga afulumye gy’abeera, azze okumalawo ensi yo. Ebibuga byammwe bijja kuzikirizibwa bibuleko abibeeramu.

⁸ Noolwekyo mwambale ebibuktu mukungubage, mukube ebiwoobe kubanga obusungu bwa MUKAMA obw’amaanyi tebutuvuddeeko.

⁹ MUKAMA n'agamba nti, "Ku lunaku olwo, kabaka n'omukungu baliggwaamu omwoyo, bakabona basamaalirire ne bannabbi beewuunye."

¹⁰ Ne ndyoka ɲnjamba nti, "Woowe MUKAMA Katonda, mazima olimbidde ddala abantu bano ne Yerusaalemi ng'ogamba nti, 'Mulibeera n'emirembe,' ate nga ekitala kiri ddala ku mimiro gyaffe."

¹¹ Mu biseera ebyo abantu bano ne Yerusaalemi balibuirwa nti, "Embuyaga ezookya eziva ku nsozi ezaakala ez'omu ddungu zifuuwa abantu bange nga teziwujja buwuzzi wadde okulongoosa obulongoosa

¹²embuyaga ezisingako awo ze ziriva gye ndi. Era kaakano mbasalira emisango."

¹³ Laba ajja ng'ebire, amagaali ge ng'empewo y'akazimu, embalaasi ze zidduka okusinga empungu; zitusanze ffe kubanga tuzikiridde!

¹⁴ Ayi Yerusaalemi, naaza omutima gwo guve mu kukola ebibi olyoke olokolebwe. Olikomya ddi ebirowoozo ebibi?

¹⁵ Eddoboozi lyawulirwa okuva mu Ddaani, nga lirangirira okuzikirizibwa okuva mu nsozi za Efulayimu.

¹⁶ "Labula amawanga nti ajja: kirangirirwe mu Yerusaalemi nti, 'Abalabe bajja okuva mu nsi ey'ewala nga bayimba ennyimba ez'entalo nga balumba ebibuga bya Yuda.

¹⁷ Bakyetoolodde ng'abasajja abakuma ennimiro kubanga Yuda yanjeemera," bw'ayogera MUKAMA.

¹⁸ "Empisa zammwe, n'ebikolwa byammwe bye bibaleeseko bino. Kino kye kibonerezo kyammwe. Nga kya bulumi! Nga kifumita omutima."

¹⁹ Obulumi, Ayi Obulumi! Neenyoolera mu bulumi! Ayi obulumi bw'omutima gwange! Omutima gunkubagana munda, sisobola kusirika, kubanga mpulidde eddoboozi ly'ekkondeere, mpulidde enduulu z'olatalo.

²⁰ Okuzikirizibwa kweyongeddeko era ensi yonna eyonooneddwa. Eweema zange zisaanyiziddwawo mu kaseera buseera, n'entimbe zange nga kutemya kikowe.

²¹Ndituusa ddi nga ndaba bbendera z'olatalo n'okuwulira amaloboozi g'amakondeere?

²² "Kubanga abantu bange basirusiru, tebammanyi. Baana abatalina magezi; abatategeera. Bakagezimunyyu mu kukola ebibi, tebamanyi kukola birungi."

²³ Natunuulira ensi, nga njereere, ate ne ntunula ne ku ggulu, ng'ekitangaala kigenze.

²⁴ Natunuulira agasozi nga gajugumira, n'ensozi zonna zaali ziyyuguma.

²⁵ Natunula, era laba, waali tewasigadde muntu n'omu, era n'ebinyonyi byonna eby'omu bbanga byali bidduse.

²⁶ Natunula, era laba, ensi ey'ebibala ebingi ng'efuuse ddungu, era n'ebibuga byayo byonna nga byonoonese, mu maaso ga MUKAMA, olw'obusungu bwe obungi.

²⁷ Kubanga bw'atyo bw'ayogera MUKAMA nti, "Ensi yonna eriyonoonebwa, wadde nga sirigizikiririza ddala.

²⁸ Noolwekyo ensi erikungubaga era n'eggulu waggulu lirkwata ekizikiza, kubanga njogedde era maliridde sija kwejjusa wadde okukyusaamu."

²⁹ Olw'okuyoogona kw'abeebagazi b'embalaasi n'abalasa obusaale, ebibuga byonna biribuna emiwabo, abamu beesogge ebisaka; n'abalala balinnye waggulu ku njazi. Ebibuga byonna birekeddwa ttayo; tewali abibeeramu.

³⁰ Okola ki ggwe, ggwe eyayonoonebwa? Lwaki oyambala engoye entwakaavu, ne weeteekako eby'obugagga ebya zaabu, n'amaaso n'ogasiiga langi? Omala biseera nga weeyonja. Baganzi bo bakunyoomoola; era baagala kukutta.

³¹ Mpulira okukaaba ng'okw'omukazi alumwa okuzaala, okusinda ng'okw'oyo asindika omwana we asooka, okukaaba kw'omuwala wa Sayuuni ng'awejjawejja anoonya w'anassiza omukka, ng'agolola emikono gye ng'agamba nti, "Zinsanze nze, nzirika. Obulamu bwange buweereddwayo mu batemu."

Yeremiya 5

Tewali n'Omumugolokofu

¹ "Dduka ogende eno n'eri mu nguudo za Yerusaalemi, tunulatunula olabe, noonya wonna we bakunjjaanira, bw'onoosanga omuntu omu bw'ati omwesimbu ow'amazima, nnaasonyiwa ekibuga kino.

² Ne bwe boogera nti, 'Nga MUKAMA bwali omulamu;' baba balayirira bwereere."

³ Ayi MUKAMA Katonda, amaaso go teganoonya mazima? Wabakuba naye ne batawulira bulumi wababetenta, naye ne bagaana okukangavvulwa. Beeyongedde kukakanyala, bagubye obwenyi okusinga n'amayinja; era bagaanyi okwenenya.

⁴ Ne njogera nti, "Bano baavu abasirusiru. Kubanga tebamanyi kkubo lya MUKAMA, amateeka ga Katonda waabwe."

⁵ Kale ndigenda eri abakulembeze njogere nabo; Kubanga bamanyi ekkubo lya MUKAMA, amateeka ga Katonda waabwe." Naye nabo bwe batyo baali baamenya dda ekikoligo nga baakutula ebisiba.

⁶ Noolwekyo empologoma eriva mu kibira n'ebalya, n'omusege ogw'omu ddungu gulibasaanyaawo. Engo erikuumira okumpi n'ebibuga byabwe, buli

muntu abifuluma ayuzibweyuzibwe; Kubanga ebibi byabwe bingi, okudda ennyuma kunene.

⁷ “Mbasonyiwe ntya? Abaana bammwe banvuddeko, ne balayiririra bakatonda abatali bakatonda. Bwe nabaliisa ne bakkuta, badda mu kwenda, ne beekujjaanya ku nnyumba z’abenzi.

⁸ Baali ng’embalaasi ennume ezikkuse ezitaamye, buli muntu ng’akaayanira muka munne.

⁹ Lwaki sibabonereza olw’ebintu ebyo? bw’ayogera MUKAMA, Lwaki siwoolera ggwanga ku nsiefaanana bw’etyo?”

Ekiragiro ky’Okulumba Yuda

¹⁰ “Yita mu nnimiro z’emizabbibu gyabwe ogyonooneyonoone, naye togimalirawo ddala. Giggyeeko amatabi gaagyo, kubanga si bantu ba MUKAMA.

¹¹ Kubanga ennyumba ya Isirayiri n’ennyumba ya Yuda zifuukidde ddala njeemu gye ndi,” bw’ayogera MUKAMA.

¹² Boogedde eby’obulimba ku MUKAMA ne bagamba nti, “Talina kyajja kukola, tewali kabi kanaatugwako, era tetujja kulaba wadde kitala oba kyeya.

¹³ Bannabbi mpewo buwewo era ekigambo tekibaliimu; noolwekyo leka kye boogera kikolebwe ku bo.”

¹⁴ Noolwekyo bw’ati bw’ayogera MUKAMA, Katonda ow’Eggie nti, “Kubanga abantu boogedde ebigambo bino, ndifuula ekigambo kyange mu kamwa kammwe okuba ng’omuliro, n’abantu bano okuba enku era omuliro gubookye.

¹⁵ Laba, mbaleetera eggwanga eriva ewala, ggwe ennyumba ya Isirayiri,” bw’ayogera MUKAMA. Ensi eyaguma ey’edda, abantu ab’olulimi lwe mutamanyi aboogera bye mutategeera

¹⁶ omufuko gwabwe ogw’obusaale guli ng’entaana eyasaamiridde, bona balwanyi nnamige.

¹⁷ Balirya amakungula gammwe n’emmere yammwe; balirya batabani bammwe era ne bawala bammwe; balye emizabbibu n’emitiini gyammwe, ebibuga byammwe ebiriko bbugwe bye mwesiga birizikirizibwa n’ebitala.

¹⁸ Bw’ati bw’ayogera MUKAMA nti, “Naye ne mu nnaku ezo sigenda kubazikiririza ddala kubamalawo.

¹⁹ Era abantu bammwe bwe bagamba nti, ‘Lwaki Katonda waffe atukoze ebintu bino byonna?’ Onoobagamba nti, ‘Nga bwe mwanvaako ne muweereza bakatonda abalala mu nsi yammwe, mujja kuweereza bakatonda abagwira mu nsi eteri yammwe.’

²⁰ “Langirira kino mu nnyumba ya Yakobo, kirangirire mu Yuda.

²¹ Wulira kino, mmwe abantu abasirusiru abatalina kutegeera, abalina amaaso naye nga tebalaba, abalina amatu naye nga tebawulira.

²² Temuntya?” bw’ayogera MUKAMA; “temunkankanira? Nateeka omusenyo okuba ensalo y’ennyanja, olukomera olutaliggwaawo, lwetasobola kuvvuunuka; wadde ng’amayengo galukubaakuba, tegasobola kuluwaguza, gayinza okuwuluguma, naye tegasobola kuluyitako.

²³ Naye abantu bano balina omutima omwewagguze era omujeemu. Bajeemye banvuddeko.

²⁴ Abateekuba mu kifuba kugamba nti, ‘Tutye MUKAMA Katonda waffe agaba enkuba, eya ddumbi n’eya ttoggo, mu ntuuko zaayo; atugerekera ssabbiiti ez’okukunguliramu.’”

²⁵ Obutali butuukirivu bwammwe bubibakwese ebibi byammwe bibaggyeeko ebirungi.

²⁶ “Kubanga abasajja abakozi b’ebibi basangibwa mu bantu bange; abagalamira ne balindirira ng’abasajja abatezi b’obunyonyi. Batega abantu omutego.

²⁷ Ng’ebisero ebijjudde ebinyonyi, enju zaabwe bwe zижjudde eby’enkwe. Noolwekyo bafuuse ab’amaanyi abagagga, ne bagejja era ne banyirira.

²⁸ Ekibi kyabwe tekiriiko kkombo, tebasala misango mu bwenkanya, abatawolereza bataliiko ba kitaabwe okubayamba basinge emisango, era abatafaayo ku ddembe lya bakateeyamba.

²⁹ Lwaki sibabonereza olw’ebintu ebyo?” bw’ayogera MUKAMA. “Nneme okwesasuza ku ggwanga eriri nga eryo?

³⁰ “Ekigambo eky’ekitalo era eky’ekivve kigudde mu nsi:

³¹ Bannabbi bawa obunnabbi obw’obulimba, bakabona bafugisa buyinza bwabwe ate abantu bange bwe batyo bwe bakyagala. Naye ku nkomerero munaakola mutya?”

Yeremiya 6

Abeesigwa Bagambibwa Okudduka

¹ Mwekuŋjaanye mudduke mmwe abantu ba Benyamini! Mmudduke muve mu Yerusaalemi. Fuuwa ekkondeere mu Tekowa, era yimusa ebbendera mu Besukakkeremu: kubanga akacwano kasinzidde mu bukiakkono, okuzikirira okw’entiisa.

² Ndizikiriza omuwala wa Sayuuni, omulungi oyo omubalagavu.

³ Abasumba balimulumba n’ebisibo byabwe. Balimwetoolooza weema zaabwe zimwolekere enjuuyi zonna, buli omu yeezimbire w’ayagala.

⁴ "Mwetegeke mumulwanyise! Muyimuke, tumulumbe mu ttuntu! Naye, nedda, omusana gugenda guggwaayo, n'ebisiikirize by'akawungeezi biwanvuye!

⁵ Tugende, tulumbe kiro tuzikirize amayumba ge."

⁶ Bw'ati MUKAMA Katonda ow'Eggye bw'agamba nti, "Muteme emit i mukole entuumo muzingize Yerusaalemi. Ekibuga kino kiteekwa okubonerezebwa kyonna, kubanga kijjudde bujoozi bwerere.

⁷ Ng'oluzzi bwe lukulukusa amazzi, bwe kityo bwe kikulukusa ebibi byakyo, entalo era n'okuzikirira biwulirwa munda waakyo. Obulwadde n'ebiwundu bye ndaba buli bbanga.

⁸ Nkulabula, ggwe Yerusaalemi, emmeeme yange ereme okwawukana naawe, si kulwa ng'ofuuka amatongo."

⁹ Bw'ati bw'ayogera MUKAMA Katonda ow'Eggye nti, "Balisusumbulira ddala n'abo abatono abaliba basigaddewo mu Isirayiri. Ddamu oyise omukono mu matabi ng'omunozi we zabbibu bw'akola."

¹⁰ Ndyogera eri ani gwe ndirabula? Ani alimpuliriza? Amatu gaabwe gagaddwa ne batasobola kuwlirira. Ekigambo kya MUKAMA kiri nga kyakusesa gye bali, tebakisanyukira n'akamu.

¹¹ Kyenva nzijula ekiruyi sikyasobola kukizibiikiriza. "Kiyiwe ku baana abali mu luguudo, ne ku bavubuka abakuŋjaanye; abaami awamu n'abakazi n'abakadde abo abawezenza emyaka emingi baliwambibwa.

¹² Enju zaabwe ziritwalibwa abalala, n'ennimiro zaabwe awamu ne bakazi baabwe; kubanga ndigolola omukono gwange ku abo abali mu nsi," bw'ayogera MUKAMA.

¹³ "Kubanga okuva ku asembayo wansi okutuusa ku asingayo waggulu, buli omu alulunkanira kufuna. Nnabbi ne kabona bona bogera eby'obulimba.

¹⁴ Ekiwundi ky'abantu bange bakijjanjaba ng'ekitali ky'amaanyi. Bogera nti, 'Mirembe, mirembe.' So nga tewali mirembe.

¹⁵ Bakwatibwa ensonyi olw'ebikolwa byabwe eby'emizizo? Nedda. Tebakwatibwa nsongyi n'akatono. Noolwekyo baligwira wamu n'abo abaligwa; balisuulibwa wansi bwe ndibabonereza," bw'ayogera MUKAMA.

¹⁶ Kino MUKAMA ky'agamba nti, "Yimirira mu masajjanzira otunule. Buuza amakubo ag'edda, buuza ekkubo eddungi gye liri, era otambulire omwo, emmeeme yammwe erifuna ekiwummulo. Naye ne mugamba nti, 'Tetujja kulitambuliramu.'

¹⁷ Nabateerawo abakuumi babategeeze nti, Muwulirize eddoboozi ly'ekkondeere, naye ne mugamba nti, 'Tetujja kuwliriza.'

¹⁸Kale muwulire, mmwe amawanga era mulabe mmwe ab'ekkuññaaniro ekyo ekiribatuukako.

¹⁹Wuliriza, ggwe ensi: laba, ndeeta akabi ku bantu bano, by'ebibala by'enkwe zaabwe, kubanga tebafuddeeyo ku bigambo byange n'etteeka lyange baligaanye.

²⁰Omugavu oguva e Seeba bampa gwa ki? Oba zino emmuli ezakaloosa eziva mu nsi ey'ewala? Ebiweebwayo byammwe ebyokebwa sijja kubikkiriza, n'essaddaaka zammwe tezinsanyusa."

²¹Noolwekyo bw'ati bw'ayogera MUKAMA nti, "Laba nditeeka enkonge mu maaso g'abantu bano; bakitaabwe ne batabani baabwe bona bazesittaleko. Muliraanwa we ne mukwano gwe balizikirira."

²²Bw'ati bw'ayogera MUKAMA, nti, "Laba, egghe liija eriva mu nsi ey'omu bukiikkono, eggwanga ery'amaanyi liyimusibwa okuva ku nkomerero z'ensi.

²³Bakutte omutego n'effumu, abakambwe abatalina kusaasira. Bawulikika ng'ennyanya ewuma, nga beebagadde embalaasi zaabwe: bajja ng'abalwanyi mu byambalo by'olutalo okulumba ggwe Muwala wa Sayuuni!"

²⁴Tuwulidde ettutumu lyabwe; era emikono gyaffe giweddemu amaanyi okulumwa okunene kutukutte n'okulumwa ng'okw'omukazi alumwa okuzaala.

²⁵Togeza kugenda mu nnimiro newaakubadde okutambilira mu kkubo; kubanga omulabe abunye wonna wonna n'entiisa ejjudde mu bantu.

²⁶Kale nno mmwe abantu, mwambale ebibukutu era mwevulunge mu vv; mukungubage ng'abakaabira omwana owoobulenzi omu yekka. Kubanga oyo agenda okuzikiriza ajja kutugwako mavumbavumba.

²⁷"Nkufudde ekigezesu abantu bange n'ekyuma, osbole okulaba n'okugezesu amakubo gaabwe.

²⁸Bonna bakyewaggula abakakanyavu abagenda bawaayiriza, bikomo era kyuma, bona boonoonefu.

²⁹Emivubo bagifikuta n'amaanyi, omuliro gumalawo essasi, naye balongoosereza bwereere kubanga ababi tebaggyibwamu.

³⁰Baliyitibwa masengere ga ffeeza, kubanga MUKAMA abalese."

Yeremiya 7

Yeremiya Abuulira mu Yeekaalu

¹Kino kye kigambo ekyajjira Yeremiya okuva eri MUKAMA.

²Yimirira ku mulyango gw'ennyumba ya MUKAMA otegeeze abantu obubaka buno. Muwuliriza ekigambo kya MUKAMA, mmwe mwenna abantu ba Yuda abayita mu miryango gino okusinza MUKAMA.

³Bw'ati bw'ayogera MUKAMA ow'Eggye, Katonda wa Isirayiri nti, "Mulongoose amakubo gammwe n'ebikolwa byammwe, nange ndibalekera ekifo kino ne mubeeramu.

⁴Teweesiga bigambo bino ebibuzaabuza ne mwogera nti, 'Eno ye yeekaalu ya MUKAMA, yeekaalu ya MUKAMA, yeekaalu ya MUKAMA!'

⁵Kubanga bwe munaalongoosezanga ddala amakubo gammwe n'ebikolwa byammwe; era bwe munaalaganga obwenkanya eri omuntu ne munne,

⁶ne mulekayo okunyigiriza omugwira, ne mulekwa, ne nnamwandu, ne mulekayo n'okutta abataliiko musango mu kifo ekyo, era ne mutasinza bakatonda abalala okwereeetera emisango mmwe bennyini,

⁷kale ndibatuuza mu kifo ekyo mu nsi gye nawa bajjajjammwe ebeere yammwe emirembe n'emirembe.

⁸Kale laba, mwesiga ebigambo ebitaliimu, ebitagasa.

⁹"Munabba ne mutta, ne mukola obwenzi ne mulayira eby'obulimba, ne mwoteza obubaane eri Baali, ne mutambula okugoberera bakatonda abalala be mutamanyanga;

¹⁰ne mulyoka mujja ne muyimirira mu maaso gange mu nnyumba eno, eyitibwa Erinnya lyange, ne mugamba nti, 'Tuli bulungi, tuli bulungi,' ne mulyoka mukola eby'emizizo byonna?

¹¹Mulowooza nti ennyumba eno eyitibwa ennyumba yange, mpuku y'abanyazi? Laba, nze kennyni nkirabye," bw'ayogera MUKAMA.

¹²"Mugende kaakano mu kifo kyange ekyali e Siiro ekifo gye nasooka okuteeka essinzizo ly'erinnya lyange, mulabe kye nakikola olw'ekibi ky'abantu bange Isirayiri.

¹³Bw'ati bw'ayogera MUKAMA nti, Bwe mwali mukola ebintu bino byonna, nayogera nammwe emirundi mingi naye ne mutampulira; nabakoowoola ne mutampitaba.

¹⁴Noolwekyo, ekkyo kye nakola e Siiro nzija kukikola kaakano ku nnyumba eyitibwa Erinnya lyange, era gye mwesiga, era n'ebifo bye nabawa mmwe ne bakitammwe.

¹⁵Ndibagoba ne mu maaso gange, nga bwe nagoba baganda bammwe bonna, ezzadde lya Efulayimu lyonna.

¹⁶"Noolwekyo tosabira bantu abo wadde okubegayiririra newaakubadde okubasabira oba okubawolereza, kubanga siikuwulire.

¹⁷Tolaba bye bakola mu bibuga bya Yuda era ne mu nguudo za Yerusaalemi?

¹⁸Abaana balonda enku, bakitaabwe ne bakuma omuliro, olwo abakazi ne bakanda ejjaano ne bakolera kabaka w'eggulu omukazi emigaati. Bafuka ekiweebwayo ekyokunywa eri bakatonda abalala okunkwasa obusungu.

¹⁹Naye nze gwe balumya?" bw'ayogera MUKAMA. "Tebeerumya bokka, ne beeswazaswaza?"

²⁰Noolwekyo bw'atyo bw'ayogera MUKAMA nti, "Laba obusungu bwange n'ekiruyi kyange bijja kufukibwa ku kifo kino, ku bantu ne ku nsolo, ku miti egy'omu ttale era ne ku bibala eby'omu ttaka; bujja kubuubuuka era tebjija kukoma."

Okugaana Okuwulira Bannabbi

²¹"Bw'ati bw'ayogera MUKAMA ow'Eggye, Katonda wa Isirayiri nti, Mugatte ebiweebwayo byammwe ebyokebwa ku ssaddaaka zammwe, ennyama mugyeriire.

²²Kubanga ku lunaku lwe nabagga mu Misiri saayogera eri bakitammwe wadde okubalagira ebikwata ku biweebwayo ebyokebwa wadde ssaddaaka.

²³Naye etteeka lino lye nabawa ligamba nti, 'Muñjondere, nange nnaabeera Katonda wammwe, nammwe munaabeera bantu bange. Mutambulire mu makubo gonna ge mbalagira, mulyoke mubeere bulungi.'

²⁴Naye tebampulira wadde okunzisaako omwoyo, wabula bagoberera okuteesa kw'emitima gyabwe egijjudde ebibi. Badda emabega so tebaalaga mu maaso.

²⁵Okuva mu biseera bajajjammwe bye baaviiram e Misiri okutuusa kaakano, mbadde mpeereza abaddu bange bannabbi emirundi n'emirundi.

²⁶Naye tebampuliriza wadde okunzisaako omwoyo, bakakanyaza ensingo zaabwe era ne bakola ebibi ne basinga ne bajjajaabwe.

²⁷"Kale ojja kubagamba bino byonna naye tebajja kukuwuliriza, bw'onoobayita tebajja kukwanukula.

²⁸Noolwekyo bagambe nti, 'Lino ly'eggwanga eritagondera MUKAMA Katonda waalyo oba okufaayo ku kugololwa. Amazima gabulawo, tegali ku mimwa gyabwe.

²⁹Salako enviiri zo ggwe Yerusaalemi, ozisuule wala ddala okaabire ku ntikko z'ensozi, kubanga MUKAMA alese abantu be era n'asuula ab'omu mulembe guno mw'asunguwalidde ennyo.'"

Ekiwonvu eky'Okufiiramu

³⁰"Abantu ba Yuda bakoze ekintu eky'ekivve mu maaso gange, bw'ayogera MUKAMA. Batadde bakatonda abalala mu nnyumba yange eyitibwa erinnya lyange ne bagyonoona.

³¹Bazimbye ebifo ebigulumivu ebya Tofesi mu kiwonvu kya mutabani wa Kinomu ne bassaddaakiramu batabani baabwe be bazaala n'abawala, kye saalowoozaako wadde okukibalagira.

³²Laba, ennaku zija," bw'atyo bw'ayogera MUKAMA, bwe kitariyitibwa Kiwonvu kya Tofesi oba ekya Kinnomu ne kiyitibwa Kiwonvu kya ttambiro: kubanga baliziikamu Tofesi okutuusa we wataliba bbanga ly a kuzikamu.

³³Era emirambo gy'abantu bano gifuuke emmere y'ebinyonyi eby'omu bbanga era n'ensolo ez'omu nsiko, era waleme kubaawo muntu wakuzigoba;

³⁴olwo nga nkomezza amaloboozi ag'okusanyuka n'okujaguza, n'eddoboozi ly'omusajja awasa n'ery'omugole we mu bibuga bya Yuda ne mu nguudo za Yerusaalemi, olwo ensi ng'efuuse matongo.

Yeremiya 8

¹"Mu kiseera ekyo, bw'ayogera MUKAMA, amagumba ga bakabaka ba Yuda, n'amagumba g'abalangira, n'amagumba ga bakabona, n'amagumba ga bannabbi, n'amagumba g'abatuuze b'omu Yerusaalemi galiggyibwa mu ntaana zaago.

²Kale galyanikibwa mu musana, eri omwezi n'emmunyeeny eez'omu ggulu, ze baayagala era ne baaweereza era ze baagoberera ne beebuuzaako ne basinza. Tebalikuunjaanyizibwa wadde okuziikibwa naye balibeera ng'ebisasiro wansi ku ttaka.

³N'abantu b'ensi eno ennyonoonyi bw'etyo abalisigalawo, be ndiba nsasaanyizza mu mawanga, balyegomba okufa okusinga okuba abalamu," bw'ayogera MUKAMA Katonda ow'Eggie.

Ekibi n'Okubonerezebwa

⁴"Bategeeze nti, Bw'ati bw'ayogera MUKAMA nti, "Omuntu bw'agwa, tayimuka? Oba omuntu bw'ava mu kkubo ettuufu, takyusa n'adda?

⁵Kale lwaki abantu bange bano banvaako ne bagendera ddala?

⁶Nawuliriza n'obwegendereza naye tebayogera mazima; tewali muntu yenna yeenenya bibi byakoze n'okwebuuza nti, 'Kiki kino kye nkoze?' Buli muntu akwata kkubo lye ng'embalaasi efubutuka ng'etwalibwa mu lutalo.

⁷Ebinyonyi ebibuukira mu bbanga bimanyi ebiseera mwe bitambulira; ne kaamukuukulu n'akataayi ne ssekanyolya bimanyi ebiseera mwe bikomerawo, naye abantu bange tebamanyi biragiro bya MUKAMA."

⁸Muyinza mutya okwogera nti, "Tuli bagezi nnyo, n'amateeka ga MUKAMA tugalina, ate nga ekkalaamu y'abawandiisi ey'obulimba yeebikyusizza.

⁹ Abagezigezi baliswala ne bakeŋjentererwa era balitwalibwa. Bagaanyi ekigambo kya MUKAMA, magezi ki ge balina?

¹⁰ Noolwekyo bakazi baabwe ndibagabira abasajja abalala n'ennimiro zaabwe zitwalibwe abantu abalala. Bonna ba mululu okuva ku asembayo wansi okutuuka ku akomererayo waggulu, nnabbi ne kabona bona balimba ne babba abantu.

¹¹ Ebiwundu by'abantu bange babijjanjaba nga tebafaayo, babikomya kungulu nga boogera nti, Mirembe, Mirembe, ate nga teri mirembe.

¹² Baakwatibwa ensonyi bwe baakola ebivve? Nedda tebakwatibwa nsonyi wadde, so tebamanyi wadde okulimbalimba. Noolwekyo baligwira mu bagudde, balikka lwe balibonerezebwa," bw'ayogera MUKAMA.

¹³ "Ndimalirawo ddala amakungula gaabwe," bw'ayogera MUKAMA. Tewaliba zabbibu, na mutiini, n'ebikoola byabwe biriwotoka. Bye mbawadde biribaggyibwako.

¹⁴ Kiki ekitutuuzizza wano obutuza? Mukuŋjaane. Tuddukire mu bibuga ebiriko bbugwe tuzikiririre eyo. MUKAMA Katonda atuwaddeyo tuzikirire era atuwadde amazzi agalimu obutwa tuganywe, kubanga twonoonye mu maaso ge.

¹⁵ Twasuubira mirembe naye tewali bulungi bwajja; twasuubira ekiseera eky'okuwonyezebwa naye waaliwo ntiisa.

¹⁶ Okukaaba kw'embalaasi z'omulabe kuwulirwa mu Ddaani; ensi yonna yakankana olw'okukaaba kw'embalaasi. Bajja okuzikiriza ensi ne byonna ebigirimu, ekibuga ne bona abakibeeramu.

¹⁷ "Laba, ndikusindikira emisota egy'obusagwa, amasalambwa g'otasobola kufuga, emisota egyo girikulum," bwayogera MUKAMA.

¹⁸ Nnina ennaku etewonyezeka, omutima gwange gwennyise.

¹⁹ Wuliriza okukaaba kw'abantu bange okuva mu nsi ey'ewala. "MUKAMA taliimu mu Sayuuni? Kabaka we takyalimu?" "Lwaki bansunguwaza n'ebifaananyi byabwe, bakatonda abalala abatagasa?"

²⁰ "Amakungula gayise, n'ekyeya kiyise, tetulokolebbwa."

²¹ Nnumiziddwa olw'okulumizibwa kwa muwala wange. Nkaaba ne nzijula ennaku.

²² Teri ddagala mu Gireyaadi? Teriiyo musawo? Lwaki ekiwundu ky'abantu bange tekiwonyezebwa?

Yeremiya 9

- ¹ Woowe, singa omutwe gwange gubadde mugga n'amaaso gange luzzi lwa maziga, nnandikaabye emisana n'ekiro olw'abantu bange be batta!
- ² Woowe singa mbadde n'ekisulo ky'abatambuze mu ddungu, nnandivudde ku bantu bange ne mbaleka kubanga bona benzi, bibiina by'abasajja ab'enkwe.
- ³ "Bategeka olulimi lwabwe ng'omutego ogunasula obulimba; bakulaakulanye mu ggwanga naye nga tebayimiridde ku mazima, kubanga bakola ekibi kino ate ne bongera ekirala; era tebammanyi," bw'ayogera MUKAMA.
- ⁴ "Mwegendereze mikwano gyammwe era temwesiganga baganda bammwe: kubanga buli wa luganda mulimba na buli wamukwano agenda awaayiriza buwaayiriza.
- ⁵ Buli muntu alimba muliraanwa we era tewali n'omu ayogera mazima. Bayigirizza ennimi zaabwe okulimba ne beemalamu amaanyi nga bakola ebitali bya butuukirivu.
- ⁶ Mubeera wakati mu bulimba; mu bulimba bwabwe bagaana okummanyia," bw'ayogera MUKAMA Katonda.
- ⁷ Noolwekyo bw'ati bw'ayogera MUKAMA Katonda ow'Eggye nti, "Laba, ndibalongoosa ne mbagezesza, kiki ate kye nnaakolera abantu bange kubanga boonoonye?
- ⁸ Olulimi lwabwe kasaale akatta, lwogera bya bulimba, buli muntu ayogeza mirembe n'akamwa ke, naye mu mutima gwe ategeka kumutega.
- ⁹ Nneme okubabonereza olw'ebintu bino?" bw'ayogera MUKAMA. "Seesasuze ku ggwanga eriri nga lino?"
- ¹⁰ Ndikaaba ne nkungubagira ensozi era ne nkungubagira amalundiro ag'omu ddungu. Galekeddwa awo era tegayitwamu, n'okukaaba kw'ente tekuwulirwa. Ebinyonyi eby'omu bbanga tebikyawulirwa n'ensolo ez'omu nsiko zidduse.
- ¹¹ "Ndifuula Yerusaalemi entuumu y'ebifunfugu, ekisulo ky'ebibe. Era ndyonoona ebibuga bya Yuda waleme kubaawo muntu yenna abeeramu."
- ¹² Mugezigezi ki anaayinza okutegeera kino? Ani oyo MUKAMA gw'abuulidde alyoke akinnyonnyole? Lwaki ensi eyonoonese ng'eddungu ne wataba agiyitamu?
- ¹³ MUKAMA n'agamba nti, "Kubanga balese amateeka gange, ge nabateekerawo. Tebanjondedde wadde okugoberera amateeka gange.
- ¹⁴ Naye, bagoberedde obukakanyavu bw'emitima gyabwe ne basinza ebifaananyi bya Babaali nga bajjajaabwe bwe baabayigiriza."

¹⁵Noolwekyo bw'ati bw'ayogera MUKAMA ow'Eggye, Katonda wa Isirayiri nti, "Laba ndiriisa abantu bano emmere ekaawa ne mbanyweesa n'amazzi ag'obutwa.

¹⁶Ndibasaasaanya mu mawanga bakitaabwe ge bataamanya; era ndibasindiikiriza n'ekitala, okutuusa nga mbazikirizza."

¹⁷Bw'ati bw'ayogera MUKAMA Katonda ow'Eggye nti, "Mulowooze kaakano, muyite abakazi abakungubazi, bajje; era mutumye abasingayo obumanyirivu.

¹⁸Leka bajje mangu batukaabireko okutuusa amaaso gaffe lwe ganaakulukuta amaziga, n'obukooweckoowe bwaffe ne butiiriika amazzi.

¹⁹Kubanga amaloboozi ag'okukungubaga gawuliddwa mu Sayuuni; 'Nga tunyagiddwa! Nga tuswadde nnyo! Tuteekwa okuva mu nsi yaffe kubanga amayumba gaffe gazikiriziddwa.'

²⁰Kaakano mmwe abakazi, muwulirize ekigambo kya Katonda, era mutege okutu kwammwe kuwulire ekigambo ky'akamwa ke. Muyigirize bawala bammwe okukaaba, era buli muntu ayigirize munne okukungubaga.

²¹Kubanga okufa kutuingiridde mu madirisa, kuyingidde mu mbiri zaffe, okugoba abaana okubaggya ku nguudo, n'abavubuka okubaggya mu bifo ebisanyukirwamu.

²²"Yogera," bw'atyb'ayogera MUKAMA nti, "'Emirambo gy'abasajja abafudde gjija kugwa ng'obusa ku ttale ng'ebinywa by'enjaano ensale bwe bigwa emabega w'omukunguzi nga tebiriiko alonda.'

²³Bw'ati bw'ayogera MUKAMA nti, "Omusajja omugezi aleme kwenyimiririza mu magezi ge, oba omusajja ow'amaanyi okwenyimiririza mu maanyi ge oba omugagga mu bugagga bwe.

²⁴Naye leka oyo eyeenyimiriza yeenyimirizenga mu kino: nti antegeera era ammanyi, nti nze MUKAMA akola ebyekisa n'ebi'ensonge n'ebi'obutuukirivu mu nsi, kubanga mu byo mwe nsanyukira," bw'ayogera MUKAMA.

²⁵"Ennaku zija," bw'ayogera MUKAMA, "lwe ndibonereza abo bona abakomole obukomozi mu mubiri:

²⁶Misiri, ne Yuda, ne Edomu, n'abaana ba Amoni, ne Mowaabu, era n'abo bona ababeera mu ddungu mu bifo eby'ewala. Kubanga amawanga gano gonna ddala si makomole, ate era n'ennyumba ya Isirayiri yonna si nkomole mu mutima."

Yeremiya 10

Katonda ne bakatonda abalala

¹Muwulire ekigambo Katonda ky'abagamba, mmwe ennyumba ya Isirayiri.

²Bw'ati bw'ayogera MUKAMA nti, "Temugobereranga makubo g'amawanga oba okweraliikirira obubonero obw'oku ku ggulu, kubanga amawanga ge byeraliikirira.

³Kubanga empisa ez'amawanga tezigasa; batema omuti mu kibira, omubazzi n'aguyoooyoota n'ebrema bye.

⁴Bagunyiriza ne ffeeza ne zaabu, bagukomerera n'enninga n'ennyondo guleme okunyeenyanyeenya.

⁵Bakatonda bafaanana nga ssemufu mu nnimiro y'ebibala, era tebasobola kwogera kubanga basitulwa busitulwa tebasobola kutambula. Tobaty, tebayinza kukukola kabi konna, wadde okukola akalungi n'akamu."

⁶Tewali ali nga ggwe, Ayi MUKAMA Katonda. Oli mukulu, era erinnya lyo ly'amaanyi nnyo.

⁷Ani ataakutye, Ayi Kabaka w'amawanga? Kubanga kino kye kikugwanira. Kubanga mu bagezigezi bona bannaggwanga ne mu bwakabaka bwabwe bwonna tewali ali nga ggwe.

⁸Bonna tebalina magezi basirusiru, abo abayigira ku bakatonda ababajje mu miti.

⁹Ffeeza eyaweesebwa ey'empewere eggibwa e Talusiisi, ne zaabu eva e Yufazi, ffundi n'omuweesi wa zaabu bye bakoze byambazibwa engoye eza kaniki ne z'effulungu. Gino gyonna mirimu gy'abasajja abakalabakalaba.

¹⁰Naye MUKAMA ye Katonda ddala, ye Katonda omulamu, era Kabaka ow'emirembe gyonna. Bw'asunguwala, ensi ekankana, amawanga tegasobola kugumira busungu bwe.

Katonda Omulamu ne Bakatonda Abataliimu

¹¹"Bw'oti bw'oba obagamba nti, 'Bakatonda abataakola ggulu na nsi ba kuzikirira bave ku nsi ne wansi w'eggulu.'

¹²MUKAMA yakola ensi n'amaanyi ge, n'atonda ebitonde byonna n'amagezi ge, era okutegeera kwe, kwe kwayanjuluza eggulu.

¹³Bw'afulumya eddoboozi lye, amazzi agali mu bire gawuluguma, asobozesa ebire okusituka nga biva ku nkomerero y'ensi. Amyansisa eggulu mu nkuba, era n'aggya empewo mu mawanika ge.

¹⁴Buli muntu talina magezi era taliimu kutegeera; buli muweesi wa zaabu aswala olw'ekifaananyi ky'akoze. Kubanga ebifaananyi bye ebisaanuuse bulimba, era tebiriimu bulamu.

¹⁵Tebiriiko kye bigasa, ebisaanye okunyoomebwa ebirizikirizibwa nga MUKAMA azze okusala omusango.

¹⁶ Oyo Katonda Omugabo gwa Yakobo tali ng'ebyo, ye Mutonzi w'ebintu byonna, era owa Isirayiri, eggwanga ery'omugabo gwe, MUKAMA Katonda ow'Eggye lye linnya lye.

Okuzikirira Okujja

¹⁷ Mukuṇṇaanye ebyammwe muve mu nsi, mmwe abazingiziddwa.

¹⁸ Kubanga bw'ati bw'ayogera MUKAMA Katonda nti, "Laba nfuumuula abantu mbaggye mu nsi eno, era ndibaleetako ennaku balyoke bawambibwe."

¹⁹ Zinsanze nze olw'ekiwundu kyange ekinnuma ennyo. Naye ate ne ṇṇamba nti, "Eno ndwadde yange, nteekwa okugigumira."

²⁰ Eweema yange eyonooneddwa, era emiguwa gyonna gikutuse, abaana bange bandese, tewakyali. Tewali n'omu asigaddewo kaakano kuzimba weema yange wadde okuzimba ekigango kyange.

²¹ Kubanga abasumba bafuuse ng'ensolo tebakyebuuza ku MUKAMA. Noolwekyo tebakulaakulana era endiga zaabwe zonna zisaasaanye.

²² Wuliriza! Amawulire gatuuse, waliwo akeegugungo ak'amaanyi okuva mu nsi ey'omu bukiakkono, kajja kufuula ebibuga bya Yuda amatongo, ebisulo by'ebibe.

Okusaba kwa Yeremiya

²³ Mmanyi Ayi MUKAMA Katonda ng'obulamu bw'omuntu si bubwe, omuntu si y'alunṇamya amakubo ge.

²⁴ Nnuṇṇamya, MUKAMA Katonda naye mu kigera ekisaanidde, si mu busungu bwo, si kulwa ng'onfuula ekitaliimu.

²⁵ Yiwa obusungu bwo ku mawanga agatakumanyi, agataktwala ng'ekikulu, ku bantu abatakoowoola linnya lyo. Kubanga bamazeewo Yakobo, bamuliiridde ddala era ne boonoona ensi ye.

Yeremiya 11

Yuda Amenye Endagaano

¹Kino kye kigambo kya MUKAMA ekyajjira Yeremiya.

²Wuliriza ebigambo by'endagaano eno era yogera n'abantu ba Yuda era n'abo ababeera mu Yerusaalemi.

³Bagambe nti, "Bw'ati MUKAMA Katonda wa Isirayiri bw'ayogera nti, 'Akolimiddwa omuntu atagondera bigambo by'endagaano eno

⁴bye nalagira bakitammwe bwe nabaggya mu nsi y'e Misiri, okuva mu kikoomi ky'omuliro.' Nabagamba nti, 'Muṇṇondere era mukole ebintu byonna nga bwe

mbalagira, munaabeeranga bantu bange, nange nnaabeeranga Katonda wammwe,

⁵ndyoke ntuukirize ekirayiro kye nalayirira bajjajammwe, okubawa ensi ekulukuta amata n'omubisi gw'enjuki, ensi gye mulimu leero.' " Awo ne nziramu nti, "Kibeere bwe kityo MUKAMA."

⁶ MUKAMA n'aŋjamba nti, "Langirira ebigambo bino byonna mu bibuga bya Yuda ne mu nguudo za Yerusaalemi. 'Muwulire ebigambo by'endagaano era mubikole.

⁷Okuva lwe naggya bajjajammwe mu Misiri okutuusa leero, mbakuutidde emirundi mingi nga mbagamba nti, "Muŋjondere."

⁸Naye tebampuliriza wadde okussaayo omwoyo, wabula buli muntu yeeyongera okutambulira mu bukakanyavu bw'omutima gwe omubi. Ne ndyoka mbaleetako ebikolimo byonna ebiri mu ndagaano gye nablagira okukwata ne batagikwata.'"

⁹Ate MUKAMA n'aŋjamba nti, "Waliwo olukwe mu basajja ba Yuda ne mu batuuze b'omu Yerusaalemi.

¹⁰Bazzeeyo mu butali butuukirivu bwa bajjajaabwe abaagaana okugoberera ebibambo byange. Bagoberedde bakatonda abalala ne babaweereza. Ennyumba zombi eya Isirayiri n'eya Yuda zimenye endagaano gye nakola ne bajjajaabwe.

¹¹Noolwekyo, bw'atyo bw'ayogera MUKAMA nti, 'Laba, ndibaleetako akabi ke batayinza kuwona; wadde banaankaabirira, sijja kubawuliriza.

¹²Ebibuga bya Yuda n'abantu ba Yerusaalemi bajja kugenda bakaabirire bakatonda baabwe be bootereza obubaane, naye tebabayambe n'akamu nga bali mu nnaku.

¹³Mulina bakatonda abenkana ebibuga byammwe obungi, ggwe Yuda; n'ebyoto bye mukoze okwoterezaako obubaane eri Baali byenkana enguudo za Yerusaalemi obungi.'

¹⁴"Noolwekyo tosabira bantu bano, tobakaabiririra wadde okubegayiririra kubanga siribawulira mu biro lwe baligwako akabi.

¹⁵"Omwagalwa akola ki mu yeekaalu yange ng'ate akoze eby'ekivve? Okuwaayo ssaddaaka kuyinza okukuggyako ekibonerezo ekijja? Okola ebibi n'olyoka ojaguza!"

¹⁶ MUKAMA yakutuuma Omuzeyituuni ogubala ennyo, ogluko ebibala ebirungi. Naye ajja kugukumako omuliro n'okuwuuma okw'omuyaga ogw'amaanyi, amatabi gaagwo gakutuke.

¹⁷ MUKAMA Katonda ow'Eggye, eyakusimba akulangiriddeko akabi kubanga ennyumba ya Isirayiri n'ennyumba ya Yuda zikoze eby'ekivve ne zinkwasa obusungu bwe zooterezza Baali obubaane.

¹⁸ MUKAMA yambikkulira nnamanyisa mu bbanga eryo olukwe lwe baali bansalira.

¹⁹ Nnali ng'omwana gw'endiga gwe batwala okuttibwa. Nnali simanyi nga nze gwe baali balyamu olukwe, nga bagamba nti, "Ka tuzikirize omuti n'ekibala kyagwo, ka tumutemere ddala ave ku nsi y'abalamu, erinnya lye lireme okuddayo okujjukirwa n'akatono."

²⁰ Naye ggwe MUKAMA Katonda ow'Eggye, alamula mu bwenkanya, agezesu omutima n'ebirowoozo, ka ndabe bw'obawoolera eggwanga, kubanga ggwe gwenkwasizza ensonga yange.

²¹ Noolwekyo bw'atylo bw'ayogera MUKAMA Katonda ku basajja b'e Anasosi abanoonya obulamu bwo nga bagamba nti, "Totubuulira bunnabbi mu linnya lya MUKAMA, tuleme okukutta."

²² Noolwekyo bw'ati bw'ayogera MUKAMA Katonda ow'Eggye nti, "Laba, nzija kutta abavubuka n'ekitala; ne batabani baabwe n'abawala bafe enjala.

²³ So tewaliba n'omu alisigalawo, kubanga ndireeta akabi ku basajja b'e Anasosi, mu mwaka gwe ndibabonererezaamu."

Yeremiya 12

Okwemulugunya kwa Yeremiya

¹ Bulijjo oba mutuukirivu, Ayi MUKAMA Katonda, bwe nkuleetera ensonga yange. Noolwekyo nnaaleeta ensonga yange gy'oli. Lwaki abakozi b'ebibi baba mu kwesiima? Lwaki abalimbalimba bona baba mu bulamu obw'emirembe?

² Wabasimba, emirandira ne ginywera, bakula ne baleeta ebibala. Tova ku mimwa gyabwe bulijjo wadde ng'oliwala n'emitima gyabwe.

³ Ate ng'ommanyi Ayi MUKAMA Katonda, ondaba era otegeera bye nkulowoozaako. Sika otwale abasajja bano ababi ng'endiga ezigenda okuttibwa. Bategekere olunaku lwe balisanjagirwako.

⁴ Ensi erikoma ddi okwonooneka, n'omuddo mu buli nnimiro okukala? Kubanga abo abali mu nsi bakozi ba bibi, ensolo n'ebinyonyi bizikiridde, kubanga abantu bagamba nti, "Katonda taalabe binaatutuukako."

Katonda Addamu

⁵ "Bw'oba owakana n'abaddusi b'embiro n'oggwaamu amaanyi oyinza otya okudduka n'embalaasi? Obanga mu nsi entereevu weesitadde n'ogwa bugwi, onoosobolayo otya mu nsiko y'oku Yoludaani?"

⁶ Ne baganda bo n'ab'omu nnyumba ya kitaawo nabo bennyini bakwefuukidde, beegasse ku abo abawowoggana nga bakulangiriza. Tobeesiga wadde nga bakwogerako bulungi."

Ennaku ya MUKAMA olw'Abantu be

⁷ "Njabulidde ennyumba yange, ne ndeka omugabo gwange; mpaddeyo abo emmeeme yange b'eyagala, mu mikono gy'abalabe baabwe.

⁸ Abantu bange be nalonda banfuukidde ng'empologoma eri mu kibira; empulugumira, noolwekyo mbakyaye.

⁹ Abantu bange be nalonda tebanfuukidde ng'ennyonyi erya ginnaazo ey'amabala, ebinyonyi ebirala ebirya binaabyo gye bizingiza ne bigirumba? Mugende mukuŋyaanye ensolo zonna ez'omu nsiko muzireete zirye.

¹⁰ Abasumba bangi boonoonye ennimiro yange ey'emizabbibu, balinnyiridde ennimiro yange, ensi yange ennungi bagirese njereere.

¹¹ Eyooneddwa efuuse ddungu esigadde awo ng'enkaabirira. Ensi yonna efuuse matongo kubanga tewali muntu n'omu agifaako.

¹² Abanyazi bazze batuuse ku nsozi zonna ez'omu ddungu, kubanga ekitala kya MUKAMA kijja kulya okuva ku nsonda emu ey'ensi okutuuka ku ndala, awataliiwo n'omu kuwona.

¹³ Basize ejjaano, ne bakungula amaggwa. Bakooyledde bwereere ne bataba na kebaggyamu. Bakwatiddwa ensonyi olw'ebibala bye bakunguddeyo, kubanga ebyo MUKAMA y'abikoze olw'obusungu bwe obungi."

¹⁴ Bw'ati bw'ayogera MUKAMA nti, "Ebikwata ku baliraanwa bange ababi nga bifika ku mugabo gwe nawa abantu bange Isirayiri okuba ogwabwe, laba ndibasiguukulula okuva mu nsi yaabwe, era ndiggya ennyumba ya Yuda mu bo.

¹⁵ Naye nga mmaze okubasiguukululamu, ndibakwatirwa ekisa ne mbakomyawo buli omu eri omugabo gwe mu nsi ye.

¹⁶ Era nga bwe bayigiriza abantu bange okulayirira mu linnya lya Baali bwe batyo balikwatira ddala empisa z'abantu bange, okulayirira mu linnya lyange nga boogera nti, 'Nga MUKAMA bw'ali omulamu,' olwo balizimbibwa wakati mu bantu bange.

¹⁷ Naye eggwanga bwe litalissaayo mwoyo, ndirisiguukulula ne ndisaanyizaawo ddala," bw'ayogera MUKAMA.

Yeremiya 13

¹ Bw'ati MUKAMA bwe yanjamba nti, "Genda ogule olukoba olwa linena olwesibe mu kiwato kyo, naye tolunnyikanga mu mazzi."

²Bwe ntyo ne neegulira olukoba, nga MUKAMA bwe yandagira, ne ndwesiba mu kiwato kyange.

³Awo ekigambo kya MUKAMA ne kinzijira omulundi ogwokubiri

⁴nti, “Ddira olukoba lwe wagula lwe weesibye mu kiwato kyo ogende ku mabbali g’omugga Fulaati olukweke eyo mu lwatika lw’olwazi.”

⁵Bwe ntyo ne ɲjenda ne ndukweka ku mabbali g’omugga Fulaati nga MUKAMA bwe yandagira.

⁶Ennaku nnyingi nga ziyiseewo, ate MUKAMA nandagira nti, “Genda kaakano ku Fulaati oleete olukoba lwe nakulagira okukwekayo.”

⁷Awo ne ndyoka ɲjenda ku mugga Fulaati, ne nsimulayo olukoba ne nduggya mu kifo we nnali ndukwese. Naye laba, olukoba lwali lwonoonese, nga terukyalina kye lugasa.

⁸Awo ekigambo kya MUKAMA ne kinzijira nga kyogera nti,

⁹“Bw’ati bw’ayogera MUKAMA nti, ‘Bwe ntyo bwe ndikkakkanya okwegulumiza kwa Yuda ne Yerusaalemi.

¹⁰Abantu bano aboonoonyi abagaana okukwata ebigambo byange, abagoberera obujeemu bw’emitima gyabwe ne bagoberera bakatonda abalala okubaweweereza n’okubasinza, bajja kuba ng’olukoba olwo olutaliiko kye lugasa.

¹¹Ng’olukoba bwe lunywerera mu kiwato ky’omuntu, bwe ntyo bwe nzija okwagala ennyumba ya Isirayiri yonna n’eya Yuda zinneesibeko,’ bw’ayogera MUKAMA, ‘balyoke babeere abantu bange, bagulumize erinnya lyange n’ettendo; naye bo ne batawulira.’”

Olugero Iw’Ekita

¹²“Bagambe bw’oti nti, ‘Bw’ati bw’ayogera MUKAMA Katonda wa Isirayiri, buli kita kiba kya kujjuza nvinnyo.’ Nabo balikuddamu nti, ‘Tetumanyi nga buli kita kiba kya kujjuza nvinnyo?’

¹³Olwo olyoke obagambe nti, ‘Bw’ati bw’ayogera MUKAMA nti, Laba nditamiiza abantu bona abatuula mu nsi eno, ne bakabaka abatuula ku ntebe ya Dawudi ey’obwakabaka, ne bakabona, ne bannabbi n’abantu bona ab’omu Yerusaalemi.

¹⁴Era buli omu alikoonagana ne munne, abalenzi ne bakitaabwe, bw’ayogera MUKAMA. Siribalumirwa, wadde okubaleka oba okubakwatirwa ekisa, ndibazikiriza.”

Amalala n’Okuswazibwa kwa Yerusaalemi

¹⁵Wuliriza ontegere okutu; toba na malala, MUKAMA y’akyogedde.

¹⁶ MUKAMA Katonda wo mugulumize nga tannaleeta kizikiza, nga ebigure byo tebinneesittala ku nsozi ezikutte ekizikiza. Musuubira ekitangaala, naye ajja okukifullamu ekisiikirize eky'okufa akikyuse kibe ekizikiza ekikutte ennyo.

¹⁷ Naye bwe mutaafeeyo, emmeeme yange eneekaabira mu kyama olw'amalala gammwe; amaaso gange gajja kukaaba nnyo nnyini gakulukuse amaziga era ekisibo kya MUKAMA kijja kuwambibwa.

¹⁸ Gamba kabaka era ne namasole nti, "Mukke muve ku ntebe zammwe ez'obwakabaka, kubanga engule zammwe ez'ebitiibwa zija kugwa okuva ku mitwe gyammwe."

¹⁹ Ebibuga by'e Negebu biggaddwawo, tewali n'omu anaabiggulawo; Yuda yonna yaakutwalibwa mu buwanjanguse, yonna yaakutwalibwa.

²⁰ Muyimuse amaaso gammwe mulabe abo abava mu bukiikkono. Kiruwa ekisibo ekyabaweebwa, endiga ezaabeeinuzanga?

²¹ Muligamba mutya MUKAMA bw'alibawaayo okufugibwa abo be mwali mutwala nga ab'omukago? Temulirumwa ng'omukazi alumwa okuzaala?

²² Era bwe weebuuza nti, "Lwaki kino kintuseeko?" Olw'ebibi byo ebingi engoye zo kyezivudde ziyuzibwa, era omubiri gwo ne gubonerezebwa.

²³ Omuwesiyopya ayinza okukyusa olususu lw'omubiri gwe oba engo okukyusa amabala gaayo? Bwe mutyo bwe mutasobola kukola birungi, mmwe abaamanyiira okukola ebibi.

²⁴ "Ndibasaasaanya ng'ebisusunku ebifuyibwa empewo eva mu ddungu.

²⁵ Guno gwe mugabo gwo gwe nakupimira," bw'ayogera MUKAMA, "kubanga wanneerabira ne weesiga bakatonda ab'obulimba.

²⁶ Nze kennyini ndibikkula engoye zammwe ne nzibikka ku mitwe gyammwe, obwtereere bwammwe ne bulabika.

²⁷ Ndabye obwenzi bwammwe n'obwamalaaya bwe mukoze. Ndabye ebikolwa byo eby'ekivve ku busozi era ne mu nnimiro. Zikusanze ggwe, ayi Yerusaalemi! Olituusa ddi obutaba mulongoofu?"

Yeremiya 14

Ekyeya, Enjala, n'Ekitala

¹ Ekigambo kya MUKAMA ekyajjira Yerusaalemi ekikwata ku kyeya.

² "Yuda ekungubaga n'ebibuga byayo bifafaaganye, bakaabira ensi, era omulanga gusimbuse mu Yerusaalemi.

³ Abakungu batuma abaddu baabwe okuleeta amazzi; bagenda mu ttanka ez'omu ttaka nga temuli kantu, bakomawo n'ebintu ebikalu; ensonyi nga zibakutte n'essuubi nga libaweddemu; babikka amaaso gaabwe.

⁴ Ettaka lyatise kubanga enkuba tekyatonnya, abalimi baweddemu amaanyi, babikka ku mitwe gyabwe.

⁵ N'empeewo ku ttale ezaala n'ereka awo omwana gwayo kubanga tewali muddo.

⁶ N'ennyumbu ez'omu nsiko ziylimirira ku busozi obukalu nga ziwejjawejja ng'ebibe, amaaso gaazo nga tegalaba bulungi kubanga tezirina kye zirya."

⁷ Wadde obutali butuukirivu bwaffe butulumiriza, Ayi MUKAMA, baako ky'okola olw'erinnya lyo. Kubanga tuzze ennyuma emirundi mingi, tukwonoonye nnyo.

⁸ Ayi ggwe essuubi lya Isirayiri, Omulokozi waalyo mu biseera eby'okulabiram mu ennaku, lwaki oli ng'omuyise mu nsi, ng'omutambuze asula ekiro ekimu?

⁹ Lwaki oli ng'omuntu gwe baguddeko obugwi, ng'omulwanyi ataliimu maanyi ganunula? Ggwe, Ayi MUKAMA Katonda, oli wakati mu ffe, era tuyitibwa linnya lyo. Totuleka.

¹⁰ Bw'ati bw'ayogera MUKAMA Katonda ku bantu be nti, "Baagala nnyo okubula, tebaziyyiza bigere byabwe. Noolwekyo MUKAMA tabakkiriza era kaakano wakujukira obutali butuukirivu bwabwe era abalonereze olw'ebibi byabwe."

¹¹ Awo MUKAMA Katonda n'aŋjamba nti, "Tosabira bantu bano kubeera bulungi.

¹² Newaakubadde nga basiiba, sijja kuwulira kukaaba kwabwe, era wadde bawaayo ebiweebwayo ebyokebwa n'ebiweebwayo eby'empeke, sijja kubikkiriza. Naye nnaabazikiriza n'ekitala, n'enjala ne kawumpuli."

¹³ Naye ne njogera nti, "Woowe, MUKAMA Katonda, bannabbi abalala babagamba nti, 'Tewajja kubaawo lutalo wadde okulumwa enjala. Naye nzija kuleeta mirembe egitakoma mu kifo kino.'"

¹⁴ Awo MUKAMA n'alyoka aŋjamba nti, "Bannabbi bawa obunnabbi obw'obulimba mu linnya lyange, sibatumanga wadde okubalagira okwogera nabo. Babategeeza okwolesebwa okw'obulimba n'obunnabbi obutaliimu, n'obutaliimu bw'emitima gyabwe.

¹⁵ Noolwekyo, bw'atyo bw'ayogera MUKAMA, ebikwata ku bannabbi abategeeza ebyobunnabbi mu linnya lyange wadde nga sibatumanga, era abagamba nti, 'Ekitala n'enjala tebijja kujja mu nsi eno.' Bannabbi abo bennyini bajja kuzikirizibwa ekitala n'enjala.

¹⁶N'abantu be bategeeezezza obunnabbi balifa enjala n'ekitala ne bakasukibwa mu nguudo babulweko abaziika, bo ne bakazi baabwe, ne batabani baabwe, n'abawala. Kubanga ndibayiwako obusungu obubasaanira.

¹⁷"Kino ky'oba obagamba nti, "Leka amaaso gange gakulukute amaziga emisana n'ekiro awatali kukoma; kubanga muwala wange embeerera, abantu bange, bafunye ekiwundu ekinene, ekintu eky'amaanyi.

¹⁸Bwe ηnjenda mu byalo ndaba abafumitiddwa n'ekitala! Bwe ηnjenda mu kibuga ndaba okutaagulgataagulwa okw'enjala. Naye nnabbi ne kabona beeyongera okukola emirimu gyabwe mu ggwanga kyokka nga bye boogera bya bulimba."

¹⁹Yuda ogigaanidde ddala? Sayuuni ogyetamiriddwa ddala? Otufumitidde ddala awatali kuwonyezebwa? Twasuubira emirembe naye tewali kalungi ke tufunye, ekiseera eky'okuwonyezebwa naye laba tufunye bulabe bwereere.

²⁰Ayi MUKAMA tukkiriza ebibi byaffe era n'obutali butuukirivu bwa bajajjaffe, kubanga ddala twayonoona gy'oli.

²¹Olw'erinnya lyo totugoba, tovumaganyisa ntebe yo ey'obwakabaka ey'ekitiibwa. Jjukira endagaano gye wakola naffe, togimenya, gituukirize.

²²Waliwo ku bakatonda ababajje bannaggwanga asobola okutonnyesa enkuba? Eggulu ku bw'alyo lisobola okuleeta enkuba? Nedda, wabula ggwe, Ayi MUKAMA Katonda waffe. Noolwekyo essuubi lyaffe liri mu ggwe, kubanga ggwe okola bino byonna.

Yeremiya 15

Yuda Wakuzikirira

¹Awo MUKAMA n'alyoka aŋjamba nti, "Musa ne Samwiri ne bwe bandiyimiridde okunneegayirira, sandisonyiye bantu bano. Bagobe okuva mu maaso gange, banviire.

²Era bwe bakubuuza nti, "Tunaagenda wa?" "Bagambe nti, 'Kino MUKAMA kyagamba nti, Ab'okuttibwa bagenda kuttibwa, n'ab'ekitala bafe ekitala, n'ab'enjala bafe enjala, n'ab'okuwambibwa bawambibwe.'

³"Ndiweereza engeri nnya ez'okubazikiriza," bw'ayogera MUKAMA. "Ekitala kya kufumita, embwa zikulule, ebinyonyi eby'omu bbanga n'ensolo ez'omu nsiko zirye n'okuzikiriza.

⁴Era ndibawaayo babeetamwe eruuyi n'erusi mu bwakabaka bwonna obw'omu nsi olw'ekyo Manase mutabani wa Keezeekiya kabaka wa Yuda kye yakola mu Yerusaalemi.

⁵ “Ani alikukwatirwa ekisa ggwe Yerusaalemi? Oba ani alikukungubagira? Oba ani alikyama okubuuza ebikuafaako?

⁶ Mwanneegaana,” bw’ayogera MUKAMA. “Temutya kudda nnyuma. Noolwekyo mbagololeddeko omukono gwange ne mbazikiriza. Sikyasobola kukukwatirwa kisa.

⁷ Era ndibakunyunta n’ekitiyo eky’amannya mu miryangy gy’ebibuga eby’omu nsi. Ndizikiriza abantu bange ne mbamalawo kubanga tebaaleka makubo gaabwe.

⁸ Bannamwandum beeyongedde obungi okusinga n’omusenyu gw’ennyanya. Mu ttuntu mbaleetedde omuzikiriza amalewo ababazaalira abalenzi abato. Mbakubiddeko obubalagaze n’entiisa.

⁹ Eyazaala omusanvu ayongobedde, awejjawejja. Enjuba ye egudde nga bukyali misana, amaanyi gamuwedde, ensonyi zimukutte, awuunze, awuubadde. N’abo abawonyeewo ndi wa kubasogga ekitala, mu maaso ga balabe baabwe,” bwayogera MUKAMA.

¹⁰ Zinsanze, mmange lwaki wanzaala omuntu eggwanga lyonna gwe lirwanyisa ne likuluusanya? Siwolanga wadde okweyazika, kyokka buli muntu ankolimira.

¹¹ MUKAMA agamba nti, “Ddala ndikununula olw’ekigendererwa ekirungi, ddala ndireetera abalabe bo okukwegayirira, mu biseera eby’okuluma obujiji, mu biseera eby’akabi.

¹² “Omusajja ayinza okumenya ekikomo oba ekyuma eky’omu bukiakkono?

¹³ “Ndiwaayo eby’obugagga byo n’ebintu byo eby’omuwendo ennyo binyagibwe awatali kusasulwa, olw’ebibi byo byonna ebikoleddwa mu ggwanga lyonna.

¹⁴ Ndibafuula abasibe b’abalabe bammwe mu ggwanga lye mutamanyi, kubanga obusungu bwange bwakukoleeza omuliro ogunaabookya gubamalewo.”

Yeremiya Yeekaabirako

¹⁵ Ayi MUKAMA ggwe omanyi byonna. Nzijukira ondabirire. Ompalanire eggwanga ku abo abanjigganya. Mu kugumiikiriza kwo okunene tontwala. Lowooza ku ngeri gye mbonyeebonye ku lulwo.

¹⁶ Ebigambo byo bwe byanzijira, ne mbirya, byali ssanyu era okujaguza kw’omutima gwange. Kubanga mpitibwa linnya lyo, Ayi MUKAMA Katonda ow’Eggye.

¹⁷ Situulangako mu kuinjaaniro ly’abo ab’ebinyumu era sibeerangako mu biduula nabo. Natuulanga nzekka kubanga naliko omukono gwo, era wandeetera okwekyawa.

¹⁸ Lwaki okulumwa kwange tekukoma era n'ekiwundu kyange ne kitawona? Onomberera ng'akagga akalimbalimba ng'ensulo ekalira?

¹⁹ Noolwekyo kino MUKAMA ky'agamba nti, "Bwe muneenenya, ndibakomyawo musobole okumpeereza; bwe mulyogera ebiambo ebisaana so si ebitasaanidde, mulibeera boogezi bange. Leka abantu bano be baba bajja gy'oli, so si ggwe okugenda gye bali.

²⁰ Ndikufuula ekisenge eri abantu bano, ekisenge ekinywezebbwa eky'ekikomo. Balikulwanyisa naye tebalikuwangula, kubanga ndi naawe, okukununula, n'okukulokola," bw'ayogera MUKAMA.

²¹ "Ndikununula okuva mu mukono gw'abakozi b'ebibi era n'enkuggya mu mukono gw'abasajja abakambwe," bw'ayogera MUKAMA.

Yeremiya 16

Olunaku ol'Akabi

¹ Ekigambo kya MUKAMA ne kinzijira nga kigamba nti,

² "Towasa, kuzaalira balenzi na bawala mu kifo kino.

³ Kubanga kino MUKAMA ky'agamba ku balenzi n'abawala abazaalibwa mu nsi eno era ne ku bakazi ba nnyaabwe ne ku basajja ba kitaabwe.

⁴ Balifa endwadde ez'akabi. Tebalibakungubagira wadde okuziikibwa naye balibeera ng'ebisaaniko ebisuuliddwa ku ttaka. Balizikirira na kitala era balifa njala; n'emirambo gyabwe girifuuka mmere ya binyonyi eby'omu bbanga n'ebisolo eby'omu nsiko."

⁵ Kubanga bw'ati bw'ayogera MUKAMA nti, "Toyingira mu nnyumba we balya emmere y'olumbe, togenda kukungubaga wadde okubasaasira kubanga nziggyewo omukisa gwange n'okwagala kwange era n'okusaasira kwange ku bantu bano," bw'ayogera MUKAMA.

⁶ Bonna ab'ekitiibwa n'abakopi baakufiira mu nsi eno. Tebajja kuziikibwa wadde okukungubagirwa era tewali ajja kwesala misale wadde okumwa omutwe ku lwabwe.

⁷ Tewaliba n'omu aliwaayo mmere okuliisa abakungubagira abafiiriddwa, ne bwaliba kitaabwe oba nnyaabwe nga kwe kuli afudde; tewaliba n'omu alibawaayo wadde ekyokunywa okubakubagiza.

⁸ Era toyingiranga mu nnyumba muli kinyumu n'otuula okulya n'okunywa.

⁹ Kubanga kino MUKAMA ow'Eggye, Katonda wa Isirayiri, ky'agamba nti, "Nga weerabirako n'amaaso go, mu nnaku z'obulamu bwo, ndikomya eddoboozi ery'essanyu era n'ery'okwesiima ery'abagole omusajja ne mukyala we mu kifo kino.

¹⁰ “Bw’oligamba abantu bino byonna ne bakubuuza nti, ‘Lwaki MUKAMA atutuusizaako akabi kano konna? Kibi ki kye tukoze? Musango ki gwe tuzizza eri MUKAMA Katonda waffe?’

¹¹ Kale bagambe nti, ‘Kubanga bakitammwe bandeka ne batakuuma mateeka gange,’ bw’ayogera MUKAMA, ‘ne bagoberera bakatonda abalala ne babaweereza ne babasinza. Bandeka ne batakuuma mateeka gange.

¹² Era mweyisizza bubi n’okusinga bakitammwe. Laba buli omu nga bwe yeeyisa ng’akakanyaza omutima gwe ogujjudde ebibi mu kifo ky’okuñjondera.

¹³ Noolwekyo ndibaggya mu nsi eno ne mbateeka mu nsi mmwe gye mutamanyi wadde bakitammwe gye bataamanya, era nga muli eyo muliweereza bakatonda abalala emisana n’ekiro, era siribakwatirwa kisa.’

¹⁴ “Naye ennaku zija,” bw’ayogera MUKAMA. “Abantu lwe bataliddayo kwogera nti, ‘Ddala nga Katonda bw’ali omulamu eyaggya Isirayiri mu nsi y’e Misiri,’

¹⁵ naye baligamba nti, ‘Ddala nga MUKAMA bw’ali omulamu eyaggya Abayisirayiri mu nsi ey’omu bukiakkono era n’okuva mu nsi zonna gye yali abasudde.’ Kubanga ndibakomyawo mu nsi gye nawa bajjajaabwe.

¹⁶ “Naye kaakano leka ntumye abavubi bange,” bw’ayogera MUKAMA, “era bajja kubavuba. Ng’ekyo kiwedde nzija kutumya abayizzi bange, era bajja kubayigga ku buli lusozi era na buli kasozi na buli lwatika lwonna mu njazi.

¹⁷ Amaaso gange galaba buli kye bakola, tebinkwekeddwa wadde obutali butuukirivu bwabwe okuunkwekebwa.

¹⁸ Ndibasasula olw’obutali butuukirivu bwabwe n’olw’ekibi kyabwe emirundi ebiri, kubanga boonoonye ensi yange olw’ebintu ebitaliimu bulamu ne bajjuza omugabo gwange ebifaananyi bya bakatonda baabwe abakolerere, eby’emizizo.”

¹⁹ Ayi MUKAMA, amaanyi gange era ekigo kyange, ekiddukiro kyange mu biro eby’okulabiramu ennaku, bannaggwanga balijja gy’oli, okuva ku nkomerero z’ensi bagambe nti, “Bakitaffe tebaalina kantu okuggyako bakatonda ab’obulimba, ebifaananyi ebikolerere ebitagasa ebitaabayamba.

²⁰ Abantu beekolera bakatonda baabwe? Ye, naye si Katonda!

²¹ “Noolwekyo ndibayigiriza, ku mulundi guno; ηnjenda kubalaga amaanyi gange n’obuyinza bwange. Olwo balyoke bamanye nti erinnya lyange nze MUKAMA.”

Yeremiya 17

Ekibi n’Ekibonerezo kya Yuda

¹ “Ekibi kya Yuda kiwandiikkidwa n’ekkalaamu ey’ekyuma n’ejinja essongovu; kirambiddwa ku mitima gyabwe ne ku mayembe g’ebiyoto byabwe.

² N'abaana baabwe basinziza ku byoto bya bakatonda ba Asera ebiri ku buli muti oguyimiridde era ne ku busozi obuwantu.

³ Olusozi lwange oluli mu nsi, obugagga bwammwe n'ebintu byo eby'omuwendo byonna, ndibiwaayo byonna binyagibwe n'ebifo byammwe ebigulumivu kwe musaddaakira olw'ekibi ekibunye mu nsi yonna.

⁴ Musango gwo ggwe nti olifiirwa ensi gye nakuwa okuba omugabo gwo, ndikufuula muddu wa balabe bo mu nsi gy'otomanyangako, kubanga mu busungu bwange omuliro gukoleezeddwa ogunaayakanga emirembe gyonna."

⁵ Bw'ati bw'ayogera MUKAMA nti, Akolimiddwa oyo eyeesiga omuntu era eyeesiga omubiri okuba amaanyi ge, era alina omutima oguva ku Katonda.

⁶ Aliba ng'ekisaka mu ddungu, ataliraba birungi bwe birijja, naye alibeera mu biwalakate mu ddungu, ensi ey'omunnyo omutali abeeramu.

⁷ Naye alina omukisa omusajja oyo eyeesiga MUKAMA, nga MUKAMA ly'essuubi lye.

⁸ Ali ng'omuti ogusimbiddwa awali amazzi, ne gulandiza emirandira gyagwo ku mabbali g'omugga, nga wadde omusana gujja, tegutya n'amakoola gaagwo tegawotoka, so tegulyeralikirira mu mwaka ogw'ekyeya era teguliremwa kubala bibala.

⁹ Omutima mulimba okusinga ebintu byonna, era gulwadde endwadde etawonyezeka. Ani ayinza okugutegeera?

¹⁰ "Nze MUKAMA nkebera omutima, ngezesha emmeeme, okuwa buli muntu ng'amakubo ge bwe gali, ng'ebikolwa bye bwe biri."

¹¹ Ng'enkwale bw'eyalula amagi geetebiikanga, bw'atyo bw'abeera oyo afuna obugagga mu makubo amakyamu; obulamu bwe nga bwakabeerawo kaseera buseera, bulimuggwaako era oluvannyuma alizuulibwa nga musiru.

¹² Ekifo kyaffe ekitukuvu, ntebe ey'ekitiibwa eyagulumizibwa okuva ku lubereberye.

¹³ Ayi MUKAMA essuubi lya Isirayiri, bona abakuvaako baliswala. Abo abakuvaako ne bakuleka baliba ng'abawandiikkidwa mu nfuufu, kubanga bavudde ku MUKAMA, oluzzi olw'amazzi amalamu.

¹⁴ Mponya, Ayi MUKAMA, nange nnaawona, ndokola nange nnaalokoka, kubanga ggwe gwe ntendereza.

¹⁵ Tobakkiriza kuŋjamba nti, "Ekigambo kya MUKAMA kiri ludda wa? Ka kituukirire nno kaakano!"

¹⁶Sirekeddaawo kuba musumba wa ndiga zo, omanyi nga sikusabanga kubaleetako nnaku. Byonna ebiva mu kamwa kange tebikukwekeddwa, obimanyi.

¹⁷Toba wa ntiisa gye ndi, ggwe oli buddukiro bwange mu kiseera eky'okulabiramu ennaku.

¹⁸Abo abanjigganya leka baswale, era onkuume nneme kuswala; leka bagwemu ekyekango nze onkuume nneme okwekanga, batuuse ku lunaku olw'ekikangabwa, bazikiririze ddala.

Okukuma Ssabiiti nga Ntukuvu

¹⁹Bw'ati MUKAMA bwe yaŋjamba nti, "Genda oyimirire ku mulyango gw'abantu, bakabaka ba Yuda mwe bayingirira n'okufuluma; yimirira ne ku nzigi endala eza Yerusaalemi.

²⁰Bagambe nti, 'Muwulirize ekigambo kya MUKAMA mmwe bakabaka ba Yuda n'abantu bonna ababeera mu Yerusaalemi, abayita mu miryango gy'ekibuga.

²¹Bw'ati bw'ayogera MUKAMA nti, Weegendereze oleme kufulumya mugugu gwonna mu nnyumba yo wadde okukola omulimu gwonna ku ssabiiti, naye mukuume olunaku lwa Ssabiiti nga lutukuvu nga temulukolerako mulimu gwonna,

²²era kuuma olunaku lwa Ssabiiti nga lutukuvu nga bwe nalagira bajajjammwe.'

²³Naye tebaawuliriza wadde okukkiriza okunenyezebwa.

²⁴Kyokka bwe muneegendereza ne muŋjondera, bw'ayogera MUKAMA, 'ne mutayisa kintu kyonna kye mwetisse mu miryango gy'ekibuga ku ssabiiti, naye ne mukuma olwa Ssabiiti nga lutukuvu obutakolerako mulimu gwonna,

²⁵olwo bakabaka abatuula ku ntebe ya Dawudi bajja kuyita mu miryango gy'ekibuga n'abakungu baabwe. Bo n'abakungu baabwe baakujja ng'abamu bavuga amagaali abalala nga beebagadde embalaasi, nga bawerekeddwako abasaja ba Yuda n'abo abali mu Yerusaalemi era ekibuga kino kiribeerwamu emirembe gyonna.

²⁶Abantu balijja okuva mu bibuga bya Yuda ne mu byalo ebiriraanye Yerusaalemi, okuva mu bitundu bya Benyamin ne mu biwonvu ne mu nsozi z'ebugwanjuba, n'okuva mu nsi ey'ensozi ey'e Negevu, nga baleeta ebiweebwayo ebyokebwa, ne ssaddaaka, ebiweebwayo eby'empeke, n'obubaane era n'ebiweebwayo eby'okwebaza mu nnyumba ya MUKAMA.

²⁷Naye bwe mutajjondere kukuma lunaku lwa Ssabiiti nga lutukuvu ne mwetikkirako emigugu gyammwe nga mufuluma mu nguudo za Yerusaalemi ku

lunaku olwa Ssabbiiti, ndikoleeza omuliro ogutazikira mu miryango gya Yerusaalemi oguliyokya ebigo byakyo.’”

Yeremiya 18

Olugero Iw'Omubumbi n'Ebbumba

1Kino ky'ekigambo ekyajjira Yeremiya ekyava eri MUKAMA nti,

2“Serengeta mu nnyumba y'omubumbi nkuweere eyo obubaka bwange.”

3Awo ne nserengeta eri ennyumba y'omubumbi ne mmulaba ng'akolera emirimu gye ku nnamuziga.

4Naye ekintu kye yali abumba kyalí kyonoonekedde mu ngalo ze, omubumbi kyeyava akibumbamu ekintu ekirala ng'akibumba nga bwe yasiima.

5Awo ekigambo kya MUKAMA ne kinzijira nga kigamba nti,

6“Gwe ennyumba ya Isirayiri, siyinza nze kubakola ng'omubumbi ono bw'akoze?” bw'ayogera MUKAMA. “Okufaanana ng'ebbumba mu mukono gw'omubumbi, bwe mutyo bwe muli mu ngalo zange, ggwe ennyumba ya Isirayiri.

7Ekiseera kyonna bwe nnangirira nti eggwanga oba obwakabaka bwa kusiguukululwa, okumenyebwa era n'okuzikirizibwa,

8era singa eggwanga lye nalabula lyenenya ebibi byalyo, olwo ndyejjusa ne sibatuusaako kabi ke nnali ḥjambye okubakola.

9Era ekiseera kyonna nnangirira ebikwata ku ggwanga oba obwakabaka nti ndizimba era ndisimba,

10era bwe likola ebibi mu maaso gange, ne litanjondera, ndyejjusa obulungi bwe nagamba okubakolera.

11“Noolwekyo gamba abantu ba Yuda n'abo ababeera mu Yerusaalemi nti, ‘Kino MUKAMA ky'ayogera nti, Laba ntekateeka okubatuusaako ekikangabwa era nteesessa okubakola akabi. Kale muve mu makubo gammwe amabi, buli omu ku mmwe, mukyuse enneeyisa yammwe n'ebikolwa byammwe.’

12Naye ne boogera nti, ‘Tekirina kye kigasa. Tujja kugenda mu maaso n'entegeka yaffe; buli omu ku ffe anaakolanga ng'obukakanyavu bw'omutima gwe bwe buli.’”

13 Noolwekyo bw'ati MUKAMA ng'agamba nti, “Mwebuuzeeko mu mawanga. Ani eyali awuliddeko ekintu bwe kit? Muwala wange Isirayiri akoze ekintu eky'ekivve.

14Omuzira oguli ku Lebanooni gwali guwedde ku njazi zaakwo? Amazzi gaakwo amannyogovu agava ewala gaali galeseyoko okukulukuta?

¹⁵ Naye ate abantu bange banneerabidde, banyookezza obubaane eri bakatonda abalala, abaleetera okwesittala mu makubo gaabwe era ne mu makubo ag'edda era ne balaga mu bukubokubo.

¹⁶ Ensi yaabwe ya kusigala matongo, ekintu eky'okusekererwa emirembe gyonna, abo bona abayise balyewuunya era ne banyeentya emitwe gyabwe.

¹⁷ Ndibasaasaanya mu maaso g'abalabe baabwe ng'empewo eva ebuvanjuba; ndibalaga mabega so si maaso gange ku lunaku olw'okulabirako ennaku."

¹⁸ Awo ne balyoka bagamba nti, "Mujje tubeeko kye tukola Yeremiya. Kubanga bakabona weebali banaatutegeezanga amateeka, n'amagezi tunaagafunanga ku bagezi, era n'ebiyobunnabbi binaavanga mu bannabbi. Kaakano mujje tumulumbe tumuwakanye era tuleme okussaayo omwoyo ku bigambo bye."

¹⁹ Ompulirize, Ayi MUKAMA, owulirize abampakanya kye bagamba.

²⁰ Ebikolwa ebirungi binaasasulwanga na bikolwa ebibi? Bansimidde obunny. Ojjukire nga nayimirira mu maaso go ne nkaaba ku lwabwe, nga nsaba olekeraawo okubasunguwalira.

²¹ Noolwekyo abaana baabwe baleke bafe enjala, obaweyeo battibwe n'ekitala. Leka bakazi baabwe bafuuke bagumba era babe bannamwandu; abasajja baabwe battibwe; abavubuka baabwe batirimbulwe n'ekitala mu lutalo.

²² Leka okukaaba kuwulirwe nga kuva mu nnyumba zaabwe, bwe banaalumbibwa ne bazindibwa embagirawo, kubanga bansimidde ekinnya bankwate era bateze ebigere byange emitego.

²³ Naye Ayi MUKAMA, gw'omanyi byonna, bye bateesa banzite. Tobasonyiwa byonoono byabwe wadde okusangulawo ebibi byabwe mu maaso go. Obawangulire ddala, era obabonereze mu kiseera ky'obusungu bwo.

Yeremiya 19

Olugero Iw'Ensumbi Eyayatika

¹ Bw'ati bw'ayogera MUKAMA nti, "Genda ogule ensumbi ey'ebbumba okuva ku mubumbi. Twala abamu ku bakadde ne ku bakabona,

² ofulume ogende mu kiwonvu kya mutabani wa Kinomu ekiri awayingirirwa mu mulyango Kalusiisi, olangiririre eyo ebigambo bye nnaakutegeeza.

³ Ogambe nti, 'Muwulire ekigambo kya MUKAMA mmwe bakabaka ba Yuda nammwe abali mu Yerusaalemi, bw'atyo bw'ayogera MUKAMA ow'Eggye, Katonda wa Isirayiri nti, Muwulirize! Ndireeta ekikangabwa mu kifo kino ekiriwaawaaza buli kutu.

⁴ Kubanga banvuddeko ekifo kino ne bakifuula ekya bakatonda abalala. Bookerezaamu ebiweebwayo eri bakatonda, bakitaabwe wadde bakabaka ba

Yuda be batamanyangako, nga bajuzzza ekifo kino omusaayi gw'abataliiko musango.

⁵Bazimbye ebifo ebigulumivu ebya Baali, bookereyo batabani baabwe mu muliro ng'ekiweebwayo eri Baali, ekintu kye siragiranga, era kye soogerangako, wadde okukirowoozaako.

⁶Noolwekyo bw'ati bw'ayogera MUKAMA nti, Mwegendereze, ennaku zija, ng'ekifo kino abantu tebakyakiyita Tofesi newaakubadde Kiwonvu kya mutabani wa Kinomu, wabula nga bakiyita ekiwonvu eky'ettambiro.

⁷“Mu kifo kino ndizikiriza entegeka za Yuda ne Yerusaalemi. Ne mbawaayo mu mikono gy'abalabe baabwe battibwe n'ekitala, era ndiwaayo emirambo gyabwe okuba emmere y'ebinyonyi eby'omu bbanga n'ebisolo eby'omu nsiko.

⁸Ndidibaga ekibuga kino ne nkifuula eky'okusekererwa, n'abo bona abayitawo bennyamire era baseke olw'ebiwundu byakyo byonna.

⁹Olw'okuzingizibwa n'okunyigirizibwa abalabe baabwe abanoonya okubatta, ndibaliisa emirambo gya batabani baabwe n'egy'abawala baabwe era buli omu alirya munne.’

¹⁰“Awo n'olyoka omenya ensumbi abo b'ogenze n'abo nga balaba,

¹¹obagambe nti, ‘Bw'ati bw'ayogera MUKAMA Katonda ow'Eggye nti, Ndiyasaayasa eggwanga lino n'ekibuga kino ng'ensumbi y'omubumbi eno bw'engiyasaayasa nga tekikyayinzika kugiddaabiriza. Baliziika abafu mu Tofesi okutuusa ekifo awaziikibwa lwe kirijjula.

¹²Kino kye ndikola ekifo kino n'abo abakibeeramu, bw'ayogera MUKAMA. Ekibuga kino ndikifuula nga Tofesi.

¹³Amayumba g'omu Yerusaalemi n'aga bakabaka ba Yuda galionoonebwa ng'ago mu Tofesi, ennyumba zonna mwe booterezza obubaane eri egghe lyonna erya bakatonda ab'omu bbanga, ne baweerayo ekiweebwayo ekyokunywa.’”

¹⁴Awo Yeremiya n'akomawo okuva e Tofesi MUKAMA gye yali amutumye okuwa obunnabbi, n'ayimirira mu mbuga ya yeekaalu ya MUKAMA n'agamba abantu bona nti,

¹⁵“Bw'ati bw'ayogera MUKAMA ow'Eggye, Katonda wa Isirayiri nti, ‘Muwulirize, ndireeta ku kibuga kino ne ku bubuga obukyetoolodde buli kikangabwa kyonna kye nakirangirirako, kubanga baakakanyaza ensingo zaabwe ne batagondera bigambo byange.’”

Yeremiya 20

Yeremiya Ayigganyizibwa ng'Abuulira

¹ Awo Pasukuli eyali kabona mutabani wa Immeri, eyali omukulu mu yeekaalu ya MUKAMA, yawulira nga Yeremiya awa obubaka buno,

²n' alagira Yeremiya akubibwe. N'asibibwa mu nvuba eyali mu mulyango ogw'ekyengulu ogwa Benyamini ku yeekaalu ya MUKAMA.

³ Olunaku olwaddirira, nga Pasukuli amusumuludde mu nvuba, Yeremiya n'amugamba nti, "MUKAMA takyakuyita Pasukuli, naye Magolumissabibu.

⁴ Kubanga bw'ati bw'ayogera MUKAMA nti, 'Laba, ndikufuula eky'entiisa, ekikangabwa, eri ggwe n'eri mikwano gyo bona; era balifa ekitala ky'abalabe baabwe, n'amaaso go galikiraba, era Yuda yonna ndigiwaayo mu mukono gwa kabaka w'e Babulooni, alibatwala e Babulooni oba okubattisa ekitala.

⁵ Era ndigabula obugagga bw'ekibuga kino bwonna obulimu, n'ebi'omuwendo omungi era n'ebi'obugagga byonna ebya bakabaka ba Yuda mu mukono gw'abalabe baabwe. Balibutwala babwetikke ng'omunyago mu Babulooni.

⁶ Era ggwe Pasukuli, era n'abo bona ab'omu nnyumba yo balitwalibwa mu busibe, e Babulooni. Eyo gy'olifiira era oziikibwe, ggwe ne mikwano gyo bona b'otegeezessa obunnabbi obw'obulimba.'

Okwemulugunya kwa Yeremiya

⁷ Ayi MUKAMA, wannimba era n'ennimbibwa, wansinza amaanyi n'ompangula. Nvumibwa okuva ku makya okuzibya obudde, buli muntu ankudaalira.

⁸ Buli lwe njogera, ndeekaana ne nnangirira akatabanguko n'okuzikirira. Kale ekigambo kya MUKAMA kindeetera kuvumwa na kusekererwa buli lunaku.

⁹ Naye bwe ηjamba nti, "Sijja kumwogerako oba okwelogera mu linnya lye," ekigambo kye mu mutima gwange kiri ng'omuliro ogwaka, ogukwekeddwa mu magumba gange. Nkooye okukizibiikiriza era ddala sisobola.

¹⁰ Mpulira bangi nga beegeya nti, "Akabi kali enjuuyi zonna. Mumuloope. Leka naffe tumuloope." Mikwano gyange bona banninda ngwe, nga bagamba nti, "Oboolyawo anaasobia, tumugweko tuwoolere eggwanga."

¹¹ Naye MUKAMA ali nange ng'omulwanyi ow'amaanyi ow'entiisa, kale abanjigganya kyebaliva bagwa ne bataddayo kuyimirira. Baakulemererwa era baswalire ddala n'okuswala kwabwe tekulyerabirwa emirembe gyonna.

¹² Ayi MUKAMA Katonda ow'Eggye oyo agezesha abatuukirivu, alaba ebiri munda mu mitima era n'ebirowoozo, kale leka ndabe bw'obawoolererako eggwanga, kubanga ensonga zange nzitadde mu mikono gyo.

¹³ Muyimbire MUKAMA Katonda. Mumuwe ettendo. Kubanga awonyezza obulamu bw'omunaku mu mikono gy'abo abakozi b'ebibi.

¹⁴ Lukolimirwe olunaku kwe nazaalirwa! Olunaku mmange kwe yanzaalira luleme kuweebwa mukisa!

¹⁵ Akolimirwe eyaleetera kitange amawulire, agaamusanyusa ennyo, ng'agamba nti, "Omwana omulenzi akuzaaliddwa."

¹⁶ Omusajja oyo abeere ng'ebibuga MUKAMA bye yamenyaamenya awatali kusaasira kwonna. Okukaaba kuwulirwe ku makya, ne nduulu z'ablwanyi mu ttuntu.

¹⁷ Yandinxitidde mu lubuto lwa mmange. Mmange yandibadde entaana yange, olubuto lwe ne luba lunene emirembe gyonna.

¹⁸ Lwaki nava mu lubuto okulaba emitawaana n'obuyinike era ennaku zange ne nzimala mu buswavu?

Yeremiya 21

Katonda Agaana Okusaba kwa Zeddekiya

¹ Kino kye kigambo ekyajja eri Yeremiya okuva eri MUKAMA, kabaka Zeddekiya bwe yamutumira Pasukuli mutabani wa Malukiya ne Zeffaniya kabona mutabani wa Maaseya okumugamba nti,

² "Tubuulize kaakano ku MUKAMA kubanga Nebukadduneeza kabaka w'e Babulooni atulumbye. Oboolyawo MUKAMA anatukolera ekyamagero ng'edda, Nebukadduneeza n'atuleka."

³ Naye Yeremiya n'abaddamu nti, "Mugambe Zeddekiya nti,

⁴ 'Bw'ati bw'ayogera MUKAMA Katonda wa Isirayiri nti, Nnaatera okuboolekeza ebyokulwanyisa byammwe ebiri mu mikono gyammwe bye mukozesa okulwanyisa kabaka w'e Babulooni n'Abakaludaaya ababazinze ne beetooloola ebweru wa bbugwe w'ekibuga kyammwe. Nzija kubakunyanya munda mu kibuga kino.

⁵ Nze kennyini nzija kubalwanyisa n'omukono gwange ogw'amaanyi, ogugoloddwa mu busungu, n'ekiruyi n'obukambwe obungi.

⁶ Era ndittisa kawumpuli omubi, abantu awamu n'ensolo enkambwe, mu kibuga kino.

⁷ Oluvannyuma lw'ekyo, nnaawaayo Zeddekiya kabaka wa Yuda, n'abakungu be n'abantu bonna mu kibuga kino abanaaba bawonye kawumpuli, ekitala n'enjala ebya Nebukadduneeza kabaka w'e Babulooni n'abalabe baabwe ababanoonya okubatta. Nebukadduneeza anaabatta n'ekitala, taabalage kisa n'akatono wadde okubasaasira oba okubasonyiwa.'

⁸ "Era abantu bagambe nti, 'Bw'ati MUKAMA bw'ayogera nti: Laba mbateereddewo ekkubo ery'obulamu era n'ekkubo ery'okufa.

⁹Buli anaasigala mu kibuga kino ajja kufa ekitala, oba enjala oba kawumpuli. Naye buli afuluma ne yeewaayo eri Abakaludaaya ababazingizza, ajja kuba mulamu, era anaawonya obulamu bwe.

¹⁰Mmaliridde okuleetera ekibuga kino akabi so si mirembe, bw'ayogera MUKAMA. Kijja kuweebwayo mu mikono gyा kabaka w'e Babulooni, era ajja kukizikiriza n'omuliro.'

¹¹"N'ekirala gamba ennyumba ya Yuda ey'obwakabaka nti, 'Wulira ekigambo kya MUKAMA;

¹²ggwe ennyumba ya Dawudi, " 'kino MUKAMA ky'agamba: Musale emisango mu bwenkanya, mununule ababa banyagiddwa ababanyigiriza, obusungu bwange buleme kuvaayo bubookye ng'omuliro olw'ekibi kye mukoze, nga tewakyali n'omu abuziyiza.

¹³Laba nkugguddeko olutalo, ggwe Yerusaalemi abeera waggulu w'ekiwonvu, ku lusozi olwagaagavu olw'ekyaziysi, bw'ayogera MUKAMA, mmwe abagamba nti, "Ani ayinza okutulumba? Ani ayinza okuyingira mu nnyumba zaffe?"

¹⁴Nzija kubabonereza ng'ebikolwa byammwe bwe biri, era ndikoleeza omuliro mu kibira kyammwe, gwokye byonna ebikyetoolodde,' " bw'ayogera MUKAMA.

Yeremiya 22

Omusango eri Bakabaka Ababi

¹Bw'ati bw'ayogera MUKAMA nti, "Serengeta ogende mu lubiri lwa kabaka wa Yuda

²olangirire obubaka buno nti, Wulira ekigambo kya Katonda ggwe kabaka wa Yuda, ggw'atuula ku ntebe ya Dawudi, mmwe abakungu n'abantu bammwe abayita mu miryangi gino.

³Bw'ati bw'ayogera MUKAMA nti, Musale emisango egyptensong, mukole ebituufu. Anyagiddwako ebibye mumuggye mu mukono gw'oyo amujooga. Temukola kibi oba eby'obukambwe eri omugwira, newaakubadde atalina kitaawe, newaakubadde nnamwandu so temuyiwa musaayi gw'abantu abataliiko musango mu kifo kino.

⁴Kubanga bwe muneegendereza ne mukuma ebiragiro bino, olwo bakabaka abatuula ku ntebe ya Dawudi baliyita mu miryangi gy'olubiri luno nga batudde mu magaali gaabwe n'abo abeebagadde embalaasi nga bawerekerwako n'abakungu baabwe, n'abantu baabwe.

⁵'Naye bwe mutaagondere biragiro bino, nneelayirira ku lwange nti olubiri luno lulifuuka matongo,' bw'ayogera MUKAMA."

⁶ Kubanga kino MUKAMA ky'agamba ku lubiri lwa kabaka wa Yuda nti, "Newaakubadde ng'oli nga Gireyaadi gye ndi, ng'entikko y'olusozi Lebanooni, ddala ddala nzija kukufuula ddungu, ng'ebibuga ebitaliimu bantu.

⁷ Ndiokusindikira abakuzikiriza, buli musajja n'ebiyokulwanyisa bye, era balitema emivule gyo egisinga obulungi ne bagisuula mu muliro.

⁸ "Abantu abava mu mawanga amangi baliyita ku kibuga kino nga beebuuzaganya bokka ne bokka nti, 'Lwaki MUKAMA yakola ekintu ekifaanana bwe kiti ku kibuga kino ekikulu bwe kiti?'

⁹ Era eky'okuddamu kibeere nti, 'Kubanga beerabira endagaano ya MUKAMA Katonda waabwe ne basinza era ne baweereza bakatonda abalala.'"

¹⁰ Temukaabira kabaka afudde oba okumukungubagira, wabula mukaabire nnyo oyo omuwanjjanguse, kubanga taliddayo kulaba nsi ye nate.

¹¹ Kubanga kino MUKAMA ky'agamba ku Sallumu mutabani wa Yosiya kabaka wa Yuda eyasikira Yosiya n'afuuka kabaka wa Yuda naye n'atwalibwa. "Talidda.

¹² Alifiira eyo gye baamutwala nga musibe, taliraba nsi eno nate."

¹³ "Zimusenze oyo azimba olubiri ku butali butuukirivu, ebisenge bye ebya waggulu ku butali bwenkanya abantu b'ensi ye n'abakozeseza bwereere n'atabasasula mpeera yaabwe.

¹⁴ Agamba nti, 'Nzija kwezimbira olubiri olunene n'ebisenge ebya waggulu ebigazi ennyo.' Kale nnaakola amadirisa amanene nnaateekamu emivule era nnaasiigako langi emyufu.

¹⁵ "Okweyongerayongera emivule emingi kikufuula kabaka? Kitaawo teyalina byakulya na byakunywa? Yakola ebituufu eby'obwenkanya. Noolwekyo byonna byamugendera bulungi.

¹⁶ Yalwanirira abaavu n'abali mu bwetaavu kale byonna ne bimugendera bulungi. Ekyo si kye kitegeeza okummany?" bw'ayogera MUKAMA.

¹⁷ "Naye amaaso gammwe n'emitima gyammwe biri ku magoba ag'obukuusa, ne ku kuyiwa omusaayi ogutaliiko musango ne ku kunyigiriza ne ku kunyaga."

¹⁸ Noolwekyo kino MUKAMA ky'ayogera ku Yekoyakimu omwana wa Yosiya kabaka wa Yuda nti, "Tebalimukungubagira; 'Kikafuuwe, mukama wange!' Kikafuuwe, obugagga bwe!

¹⁹ Aliziikibwa nga bwe baziika endogoyi, akululwe asuulibwe ebweru w'enzigi za Yerusaalemi."

²⁰ "Genda mu Lebanooni okaabe, leka eddoboozi lyo liwulirwe mu Basani. Kaabira ku Abalimu, kubanga bona ababade ku ludda lwo bazikiridde.

²¹ Nayogera gy'oli ng'okyali mu biseera byo eby'obugagga naye n'ogamba nti, 'Sijja kuwuliriza!' Bw'oti bw'obadde okuva mu buto bwo, togonderanga ku ddoboozi lyange.

²² Empewo erikunguzza abalunzi b'ebisibo byo bona, n'abawagizi bo batwalibwe mu buwanjanguse. Olwo okwatibwe ensonyi oggweemu amaanyi olw'ebibi byo byonna.

²³ Mmwe abali mu Lebanooni, abesulira mu bizimbe eby'emivule, nga mulikaaba, ng'obulumi bubajjidde! Okulumwa ng'okw'omukazi alumwa okuzaala.

²⁴ "Ddala ddala nga bwe ndi omulamu, wadde ggwe Koniya omwana wa Yekoyakimu, singa wali mpeta ey'obuyinza ku mukono gwange ogwa ddyo, nandikusiseeko," bw'ayogera MUKAMA.

²⁵ "Ndikuwaayo eri abo abanoonya obulamu bwo, abo bootya, Nebukadduneeza kabaka w'e Babulooni era n'eri Abakaludaaya.

²⁶ Ndikusuula mu nsi endala gye mutaazaalibwa, ggwe ne maama wo eyakuzaala, era eyo mwembi gye mulifiira.

²⁷ Temulidda mu nsi gye mwegomba okuddamu."

²⁸ Omusajja ono Koniya kintu ekinyoomebwa, ekimenyese, ekitaliiko ayagala? Lwaki ye n'abaana be balikanyugibwa ebweru, basuulibwe mu nsi gye batamanyi?

²⁹ Ayi ggwe ensi, ensi, wulira ekigambo kya Katonda!

³⁰ Bw'ati bw'ayogera MUKAMA nti, "Omusajja ono mumubale ng'atazaalangako kubanga tewali ku baana be alikulaakulana, alituula ku ntebe ya Dawudi oba aliddayo okufuga mu Yuda."

Yeremiya 23

Etabi Ettukuvu

¹ "Zibasanze abasumba abazikiriza era abasaasaanya endiga z'ekisibo kyange!" bw'ayogera MUKAMA.

² Noolwekyo, bw'ati bw'ayogera MUKAMA, Katonda wa Isirayiri ebikwata ku basumba abalabirira abantu bange nti, "Kubanga musaasaanyizza abantu bange ne mubagoba ne mutabalabirira, nzija kubaleetako ebibonerezo olw'ebibi bye mukoze," bw'ayogera MUKAMA.

³ "Nze kennyini nzija kukunjaanya abaasigalawo ku kisibo kyange okuva mu mawanga gonna gye nabagobera, mbakomyewo mu kisibo kyabwe, gye banaabalira ebibala beeyongere obungi.

⁴Ndibawa abasumba abanaabalabirira, era tebaliddayo kutya oba kuggwaamu maanyi, era tewaabe n'omu abula," bw'ayogera MUKAMA.

⁵"Ennaku zija, lwe ndiyimusiza Dawudi Ettabi ettukuvu, Kabaka alikulembera n'amagezi akole ebituufu eby'obwenkanya mu nsi," bwayogera MUKAMA.

⁶Mu mirembe gye, Yuda alirokolebwa ne Isirayiri alibeera mu mirembe. Lino lye linnya lye balimuyita: MUKAMA OBUTUUKIRIVU BWAFFE.

⁷"Noolwekyo ennaku zija, abantu lwe batalyogera nate nti, 'Ddala nga MUKAMA bwali omulamu eyaggya Abayisirayiri mu Misiri,' bwayogera MUKAMA,

⁸naye bagambe nti, 'Ddala nga MUKAMA bw'ali omulamu, eyaggya abaana ba Isirayiri mu nsi ey'omu bukiakkono era ne mu nsi zonna gye yali abagobedde.' Olwo balibeera mu nsi yaabwe ku bwabwe," bw'ayogera MUKAMA.

Bannabbi Abalimba

⁹Ebikwata ku bannabbi: omutima gwange gwennyise mu nda yange amagumba gange gonna gakankana, nninga omusajja omutamiivu, ng'omusajja afugiddwa omwenge, ku lwa MUKAMA n'ebigambo bye ebitukuvu.

¹⁰Ensi ejjudde abenzi; olw'ekikolimo ensi esigadde nkalu era n'amalundiro g'omu ddungu meereere. Bannabbi bagoberera amakubo amabi era bakozesa obuyinza bwabwe mu butali bwenkanya.

¹¹"Nnabbi ne kabona bombi tebalina Katonda, ne mu yeekaalu yange mbasanze nga bakoleramu ebibi," bw'ayogera MUKAMA.

¹²"Noolwekyo amakubo gaabwe gajja kuseerera era bajja kusuulibwa mu kizikiza era eyo gye baligwira. Ndibaleetako okuzikirira mu mwaka gwe balibonerezebwamu," bw'ayogera MUKAMA.

¹³"Mu bannabbi b'e Samaliya nalaba ekintu kino ekyenyinyalwa. Balagulira wansi wa Baali ne babuza abantu bange Isirayiri.

¹⁴Era ne mu bannabbi ba Yerusaalemi ndabye ekintu ekibi ennyo. Bakola eby'obwenzi ne batambulira mu bulimba. Bagumya abo abakozi b'ebibi ne wataba n'omu ava mu kwonoona kwe. Bonna bali nga Sodomu gye ndi; abantu ba Yerusaalemi bali nga Ggomola."

¹⁵Noolwekyo, bw'ati bw'ayogera MUKAMA Katonda ow'Eggye ebikwata ku bannabbi nti, "Nzija kubaliisa emmere ekaawa banywe amazzi ag'obutwa, kubanga okuva mu bannabbi ba Yerusaalemi, obutatya Katonda bubunye mu nsi yonna."

¹⁶Bw'ati bw'ayogera MUKAMA Katonda ow'eggye nti, "Temuwuliriza bannabbi bye babategeeza: babajuza essuubi ekyamu. Boogera ebirooto ebiva mu mitima gyabwe, so si ebiva mu kamwa ka MUKAMA Katonda.

¹⁷ Bagamba abo abannyooma nti, ‘MUKAMA Katonda agamba onoobeera n’emirembe.’ Abo abagoberera obukakanyavu bw’emitima gyabwe babagamba nti, ‘Tewali kabi kanaakujira.’

¹⁸ Naye ani ku bo eyali abadde mu lukiiko Iwa MUKAMA Katonda okulaba oba okuwulira ekigambo kye?

¹⁹ Laba, omuyaga gwa MUKAMA gujja kubwatuka n’ekiruyi, empewo ey’akazimu eyetooloolera ku mitwe gy’abakozi b’ebibi.

²⁰ Obusungu bwa MUKAMA tebjija kukoma okutuusa ng’amaze okutuukiriza ekigendererwa ky’omutima gwe. Mu nnaku ezijja, mujja kukitegeera bulungi.

²¹ Situmanga bannabbi bano, songa bagenda badduka n’obubaka buno, era sogeranga nabo, songa bategeeza obunnabbi.

²² Naye singa bayimirira mu maaso gange, bandibuulidde abantu bange ebigambo byange, era bandibaggye mu makubo gaabwe amabi era ne mu bikolwa byabwe ebibi.

²³ “Ndi Katonda abeera okumpi wokka, so si abeera ewala?” bw’ayogera MUKAMA.

²⁴ “Omuntu ayinza okwekweka mu bifo eby’ekyama ne sisobola kumulaba?” bw’ayogera MUKAMA. “Sijuza eggulu n’ensi?” bw’ayogera MUKAMA.

²⁵ “Mpulidde bannabbi aboogera eby’obulimba mu linnya lyange. Bagamba nti, ‘Naloose! Naloose!’

²⁶ Kino kinaakoma ddi mu mitima gy’abo bannabbi b’obulimba, abategeeza eby’obulimba ebiva ku mitima gyabwe?

²⁷ Balowooza nti ebirooto bye balootolola bannaabwe bijja kuleetera abantu bange okwerabira erinnya lyange, nga bakitaabwe bwe beerabira erinnya lyange nga basinza Baali.

²⁸ Nnabbi alina ekirooto ayogere ekirooto kye, n’oyo alina ekigambo kyange akyogere mu bwesigwa. Kubanga ebisusunku birina nkolagana ki n’eŋŋaano?” bw’ayogera MUKAMA.

²⁹ “Ekigambo kyange tekiri nga muliro, ng’ennyondo eyasaayasa olwazi?” bw’ayogera MUKAMA.

³⁰ “Noolwekyo, ndi mulabe wa bannabbi ababbiŋjanako ebigambo ebiva gye ndi,” bw’ayogera MUKAMA.

³¹ “Weewaawo,” bw’ayogera MUKAMA, “saagalira ddala bannabbi abayogerayogera nga bagamba nti, ‘Bw’atyo MUKAMA bw’agamba.’

³² Ddala ddala ndi mulabe w’abo abawa obunnabbi bw’ebirooto ebikyamu. Babyogera ne babuza abantu bange n’obulimba bwabwe obutaliimu, ate nga

saabatuma wadde okubateekawo. Tebalina kye bayamba bantu bano n'akatono," bw'ayogera MUKAMA.

Obubaka Obukyamu ne Bannabbi Aboobulimba

³³"Abantu bano, oba nnabbi oba kabona bw'abuuza nti, 'Bubaka ki MUKAMA bw'atutumye?' Bagambe nti, 'Bubaka ki? Nzija kubabuulira, bw'ayogera MUKAMA.'

³⁴Nnabbi, oba kabona oba omuntu yenna bw'agamba nti, 'Buno bwe bubaka bwa MUKAMA,' Nzija kubonereza omusajja oyo n'ab'omu maka ge.

³⁵Kino buli omu ky'anagamba mikwano gye oba ab'enjanda ze. 'MUKAMA, azeemu ki? Oba kiki MUKAMA ky'ayogedde?'

³⁶Naye temuddayo kugamba nti, 'Buno bwe bubaka bwa MUKAMA,' kubanga buli kigambo kya muntu kifuuka bubaka bwe era mukyusa ebigambo bya Katonda omulamu, MUKAMA ow'Eggye, Katonda waffe.

³⁷Kino kye munaabuuza nnabbi nti, 'Kiki MUKAMA kyakuzzeemu?' Oba nti, 'MUKAMA, agambye ki?'

³⁸Naye era mujja kugamba nti, 'Buno bwe bubaka MUKAMA bwatutumye,' wadde nga nabagamba nti, Temusaanye kwogera nti, 'Buno bwe bubaka bwa MUKAMA,'

³⁹kyenaava mbagobera ddala mu maaso gange ne mu kibuga ekyo kye nabawa, mmwe ne bakitammwe.

⁴⁰Ndibaleetako ekivume ekitaliggwaawo, n'ensonyi ez'olubeerera ebitagenda kwerabirwa."

Yeremiya 24

Ebibbo by'Emitiini

¹Yekoyakini mutabani wa Yekoyakimu kabaka wa Yuda n'abakungu, n'abaweesi n'abafundi ba Yuda bwe baatwalibwa kabaka Nebukadduneeza mu buwanjanguse mu Babulooni okuva mu Yerusaalemi, MUKAMA yandaga ebibbo bibiri eby'emitiini nga biteekeddwa mu maaso ga yeekaalu ya MUKAMA.

²Ekibbo ekimu kyalimu ettiini nga nnungi nnyo ng'eyo esooka okwengera, n'ekibbo ekirala kyalimu ettiini nga mbi nnyo, ezitayinza kuliika.

³ MUKAMA n'ambuuza nti, "Olabi ki Yeremiya?" Ne muddamu nti, "Ndaba ettiini. Ennungi nga nnungi nnyo naye embi nga mbi nnyo ezitayinza kuliika."

⁴Awo ekigambo kya MUKAMA ne kinzijira nti,

⁵"Bw'ati bw'ayogera MUKAMA, Katonda wa Isirayiri nti, 'Ng'ettiini zino ennungi, ndaba nti abawanjanguse b'omu Yuda balungi, be natwala okuva mu kifo kino eri mu nsi ey'Abakaludaaya.

⁶Amaaso gange gajja kubalabirira olw'obulungi bwabwe, era nzija kubakomyawo mu nsi eno. Nzija kubazimba era nneme kubamenyaamena: nzija kubasimba nneme kubakuula.

⁷Ndibawa omutima bammanye, nti nze MUKAMA. Balibeera bantu bange, nange ndibeera Katonda waabwe, kubanga balidda gye ndi n'omutima gwabwe gwonna.

⁸“Naye ng'ettiini embi, embi ennyo ezitayinzika kuliika, bwe ntyo bwe nnaakola Zeddekiya kabaka wa Yuda, n'abakungu be n'abo abaasigalawo mu Yerusaalemi, oba abaasigalawo mu nsi eno oba ababeera mu Misiri,’ bw'ayogera MUKAMA.

⁹Ndibafuula kyennyinnyalwa era eky'omuzizo eri amawanga g'ensi, eky'okusekererwa era olugero obugero, ekintu eky'okusekererwa era eky'okukolimirwanga yonna gye nnaabagoberanga.

¹⁰Ndireeta ekitala, n'ekyeyya, ne kawumpuli okubalumba okutuusa lwe balizikirira babule ku nsi gye nabawa ne bakitaabwe.”

Yeremiya 25

Emyaka Nsanvu egy'Obusibe

¹Ekigambo ekikwata ku bantu bonna aba Yuda ne kijjira Yeremiya mu mwaka ogwokuna ogw'obufuzi bwa Yekoyakimu mutabani wa Yosiya kabaka wa Yuda, ogwali omwaka ogusooka ogw'obufuzi bwa kabaka Nebukadduneeza mu bwakabaka bwa Babulooni.

²Awo Yeremiya nnabbi n'agamba abantu bonna aba Yuda n'abantu bonna abaali mu Yerusaalemi nti,

³Okuva mu mwaka ogw'ekkumi n'esatu ogw'obufuzi bwa Yosiya mutabani wa Amoni kabaka wa Yuda, gy'emyaka amakumi abiri mu esatu okutuusa leero, ekigambo kya MUKAMA kizze gye ndi era njogedde gye muli emirundi mingi, naye temufuddeeyo.

⁴Newaakubadde nga MUKAMA abaweerezza bannabbi be emirundi mingi, temuwulirizza wadde okufaayo.

⁵Babagamba nti, “Mukyuke kaakano, buli omu ku mmwe okuva mu bikolwa bye ebibi, mulyoke musigale mu nsi MUKAMA gye yabawa mmwe ne bakitammwe emirembe gyonna.

⁶Temugoberera bakatonda balala, temubawereza wadde okubasinza; temunsunguwaza olw'ekyo emikono gyammwe kye gyakola, nneme okubakolako obulabe.”

⁷ “Naye temwampuliriza, mwansunguwaza n’ekyo kye mwakola n’emikono gyammwe, era ne mwereetera akabi,” bw’ayogera MUKAMA Katonda.

⁸ Noolwekyo bw’ati bw’ayogera MUKAMA Katonda ow’Eggye nti, “Kubanga temuwulirizza bigambo byange,

⁹ nzija kukoowoolaabantu bona ab’omu bukiakkono n’omuddu wange Nebukadduneesa, balumbe ensi eno n’abantu baamu era n’ensi zonna ezibeetoolodde. Nzija kuzizikiririza ddala nzifuule ekintu eky’entiisa era eky’okusekererwa, era zoonoonekere ddala.

¹⁰ Ndibagobako eddoboozi ery’essanyu era n’okujaguza, eddoboozi ery’awasa omugole n’ery’omugole, eddoboozi ly’olubengo n’okwaka kw’ettaala.

¹¹ Ensi eno yonna ejja kufuuka matongo, n’amawanga gano gaja kuweereza kabaka w’e Babulooni emyaka nsanvu.

¹² “Naye emyaka ensanvu bwe giriggwako, ndibonereza kabaka w’e Babulooni n’eggwanga lye, ensi ya Babulooni olw’ekibi kyabwe, ngifuule matongo emirembe gyonna,” bw’ayogera MUKAMA.

¹³ “Ndireeta ku nsi eno ebintu byonna bye njogeddeko, ebyo byonna ebiwandiikkidwa ku muzingo guno era ne Yeremiya byategeezessa amawanga gano gonna.

¹⁴ Bo bennyini balifuulibwa baddu ba mawanga mangi era baddu ba bakabaka ab’ekitiibwa; ndibasasula ng’ebikolwa byabwe bwe biri n’emirimu gy’emikono gyabwe bwe giri.”

Ekikopo ky’Obusungu bwa MUKAMA

¹⁵ Bw’ati MUKAMA, Katonda wa Isirayiri bwe yanjamba nti, “Twala ekikopo kino, okuva mu mukono gwange, ekijjudde wayini ow’obusungu bwange, okinywese amawanga gonna gye nnaakutuma okukibanywesa.

¹⁶ Bwe banaakinywa, bajja kugwa eddalu batagale olw’ekitala kye nnaabasindikamu.”

¹⁷ Awo ne ntwala ekikopo okuva mu Mukono gwa MUKAMA ne nkitwala eri amawanga gonna gye yantuma okukibanywesa;

¹⁸ Yerusaalemi n’ebibuga bya Yuda, ne bakabaka baabyo n’abakungu basaanewo era bafuuke ekintu eky’entiisa n’okuzikirira, n’okusekererwa n’ekikolimo nga bwe bali kaakano.

¹⁹ Falaawo, ye kabaka w’e Misiri, ne bakalabaalaba be, n’abakungu be n’abantu be bona,

²⁰n'abagwira bona abaaliyo; bakabaka ba Uzi bona, ne bakabaka b'Abafirisuuti bona, abo ab'e Asukulooni, n'e Gaza, n'e Ekuloni, n'abantu abaalekebwa e Asudodi,

²¹n'e Edomu, n'e Mowaabu n'e Ammoni,

²²bakabaka bona ab'e Tuulo ne Sidoni, bakabaka ab'oku lubalama ng'osomose ennyanja;

²³Dedani, n'e Teema, n'e Buuzi n'abo bona abali mu bifo eby'ewala,

²⁴ne bakabaka bona ab'e Buwalabu, ne bakabaka b'abannamawanga ababeera mu ddungu;

²⁵ne bakabaka bona ab'e Zimuli, n'e Eramu n'e Meedi;

²⁶n'abo bona bakabaka ab'omu bukiikkono, abeewala, n'ab'okumpi, omu ku omu, obwakabaka bwonna obuli ku nsi. Oluvannyuma lwabo kabaka w'e Sesaki naye balikinywa.

²⁷"Era onoobagamba nti, 'Bw'atyo bw'ayogera MUKAMA ow'Eggye, Katonda wa Isirayiri nti, Munywe mutamiire, museseme, mugwe muleme kuddayo kusituka olw'ekitala ekkyo kye ḥejenda okusindika mu mmwe.'

²⁸Naye bwe bagaana okuggya ekikopo mu mukono gwo okukinywa, bagambe nti, 'Kino MUKAMA Katonda ow'Eggye ky'agamba nti, Muteekwa okukinywa!

²⁹Laba, ntandika okuzikiriza ekibuga ekiyitibwa Erinnya lyange, ddala munaagenda nga temubonerezeddwa? Mujja kubonerezebwa kubanga nkoowoola ekitala kikke ku abo bona abali ku nsi, bw'ayogera MUKAMA Katonda ow'Eggye.'

³⁰"Kaakano bategeeze ebigambo bino byonna obagambe nti, " 'MUKAMA Katonda anaayoyerera waggulu, era anaayimusa eddoboozi lye okuva mu kifo kye ekitukuvu awulugume n'amaanyi mangi nnyo ng'awakanya bona abali mu nsi. Ajja kuleekaana ng'abasogozi abasamba emizabbibu, ng'aleekaanira abo abali ku nsi.

³¹Eddoboozi lye liriwulirwa n'ensi gy'ekoma. Kubanga MUKAMA alisalira amawanga emisango gy'abavunaana, alisalira abantu bona omusango, atte ababi n'ekitala,' " bw'ayogera MUKAMA.

³²Bw'ati bw'ayogera MUKAMA Katonda ow'Eggye nti, "Laba okuzikirira kugenda kusaasaana kuva nsi ku nsi; enkuba ey'amaanyi ejja kuva ku nkomerero y'ensi."

³³Mu kiseera ekkyo abo abattiddwa MUKAMA bajja kubeera buli wamu okuva ku nsonda emu ey'ensi okutuuka ku ndala. Tebajja kukungubagirwa wadde okukuṇjaanyizibwa oba okuziikibwa, naye banaaba ng'obusa obulekeddwa ku ttaka.

³⁴ Mukaabe mulaajane mmwe abasumba, mwevulunge mu ttaka, mmwe abakulu b'ebisibo. Kubanga obudde bwammwe obw'okuttibwa butuuse mujja kugwa mubetentebwe ng'ebibya eby'ebbumba.

³⁵ Abasumba tebaabeeko na buddukiro, n'abakulu b'ebisibo tebaabeeko na wa kwekweka.

³⁶ Muwulire okukaaba kw'abasumba, okwaziirana kw'abanannyini b'ebisibo, kubanga MUKAMA alizikiriza amalundiro gaabwe.

³⁷ Amalundiro amalungi galifuuka matongo olw'obusungu bwa MUKAMA obubuubiuka.

³⁸ Ajja kuleka ekisulo kye ng'empologoma bw'eva w'esula, n'ensi yaabwe ejja kusigala njereere olw'ekitala ky'omulumbaganyi era n'olw'obusungu bwa MUKAMA obw'entiisa.

Yeremiya 26

Yeremiya Atiisibwatiisibwa okuttibwa

¹ Awo Yekoyakimu mutabani wa Yosiya kabaka wa Yuda nga yakalya obwakabaka, ekigambo kino kyajja okuva eri MUKAMA.

² “Bw'ati bw'ayogera MUKAMA nti, Yimirira mu luggyia lw'ennyumba ya MUKAMA oyogere eri abantu bona ab'ebibuga bya Yuda abazze okusinza mu nnyumba ya MUKAMA. Bagambe byonna bye nkulagira; tobaako na ky'olekayo.

³ Oboolyawo banaawulira, buli muntu n'akyuka okuva mu makubo ge amabi. Olwo nnejjuse nneme kubaleetako kikangabwa kyembadde ntegeka olw'okwonoona kwabwe.

⁴ Bagambe, bw'ati bw'ayogera MUKAMA nti, ‘Bwe mutampulirize ne mugoberera amateeka gange ge mbawadde,

⁵ era bwe mutaawulirize bigambo bya baddu bange bannabbi, be mbatumidde emirundi emingi wadde nga temubafuddeeko,

⁶ ndifuula enju eno nga Siiro era n'ekibuga kino ng'ekintu eky'okukolimirwa mu mawanga ag'ensi.’”

⁷ Bakabona ne bannabbi n'abantu bona ne bawulira Yeremiya ng'ayogera ebigambo bino mu nnyumba ya MUKAMA.

⁸ Naye nga Yeremiya ya kamaliriza okubuulira abantu bona ebintu byonna MUKAMA bye yali amulagidde okwogera, bakabona ne bannabbi, n'abantu bona ne bamukwata ne bagamba nti, “Otekwa okufa!

⁹Lwaki oyogera ebyobunnabbi mu linnya lya MUKAMA nti, Ennyumba eno eneebeera nga Siiro, n'ekibuga kino kinaakubwa kisigale matongo?" Awo abantu bona ne beetooloola Yeremiya mu nnyumba ya MUKAMA.

¹⁰Awo abakungu ba Yuda bwe baawulira ebigambo bino, ne bava mu lubiri ne bambuka mu nnyumba ya MUKAMA ne batuula mu bifo byabwe awayingirirwa ku Mulyango Omuggya ogw'ennyumba ya MUKAMA.

¹¹Awo bakabona ne bannabbi ne bagamba abakungu n'abantu bona nti, "Omusajja ono asaana kusalirwa musango gwa kufa kubanga ayogedde ebyobunnabbi ebibi ku kibuga kino. Mukiwulidde n'amatu gammwe gennyini."

¹²Awo Yeremiya n'agamba abakungu bona n'abantu bona nti, "MUKAMA yantuma njogere ebyobunnabbi bwe bityo ku nnyumba eno n'ekibuga kino ebintu byonna bye muwulidde.

¹³Kaakano mukyuse amakubo gammwe n'ebikolwa byammwe mugondere MUKAMA Katonda wammwe. Olwo MUKAMA anaakyusa n'ataleeta bikangabwa by'aboogeddeko.

¹⁴Nze, ndi mu mikono gyammwe; munkole kyonna kye mulowooza nga kye kirungi era kye kituufu.

¹⁵Mumanyire ddala nno nti bwe munzita, mujja kwereetako omusango gw'okuyiwa omusaayi ogatalina musango, mmwe n'ekibuga kino n'abo abakibeeramu, kubanga eky'amazima MUKAMA ye yantumye okwogera gye muli ebigambo bino byonna mubiwlire."

¹⁶Awo abakungu n'abantu bona ne bagamba bakabona ne bannabbi nti, "Omusajja ono tasaana kusalirwa musango gwa kufa! Ayogedde naffe mu linnya lya MUKAMA Katonda waffe."

¹⁷Abamu ku bakadde ne bavaayo ne bajja mu maaso ne boogera eri ekibiina kyonna eky'abantu nti,

¹⁸"Mikka ow'e Moreseesi yawa obunnabbi mu nnaku za Keezeekiya kabaka wa Yuda. Yagamba abantu bona aba Yuda nti, 'Bw'ati bw'ayogera MUKAMA Katonda ow'Eggye nti, "'Sayuuni ajja kulimibwa ng'ennimiro, Yerusaalemi ajja kufuuka ntuumu ya mafunfugu, olusozi lwa yeekaalu, lufuuke akasozi akamezeeko ebisaka.'

¹⁹Keezeekiya oba omuntu omulala yenna mu Yuda, yamutta? Keezeekiya teyatya MUKAMA n'anoonya ekisa kye? Era MUKAMA teyakyusa n'ataleeta kuzikirira kwe yali agambye okubaleetako? Naye tunaatera okwereetera obulabe obw'amaanyi!"

²⁰ Waaliwo omusajja omulala Uliya omwana wa Semaaya ow'e Kiriyasuyalimu, eyawa obunnabbi mu linnya lya MUKAMA. Yawa obunnabbi bwe bumu ng'obwa Yeremiya obugugumbula ekibuga kino era n'ensi eno.

²¹ Wabula kabaka Yekoyakimu n'abakungu be bona n'abasajja be n'ab'obuyinza, bwe baawulira ebigambo bye, kabaka n'amunoonya okumutta, naye Uliya bwe yakiwulira n'aty a n'addukira e Misiri.

²² Awo kabaka Yekoyakimu n'atuma Erunasani mutabani wa Akubooli n'abasajja abawerako,

²³ ne baggya Uliya e Misiri ne bamutwala eri kabaka Yekoyakimu, eyalagira attibwe n'ekitala omulambo gwe ne gusuulibwa mu kifo ekiziikibwamu ekya lukale.

²⁴ Akikamu mutabani wa Safani n'awolereza Yeremiya n'amuwagira n'ataweebwayo eri bantu kuttibwa.

Yeremiya 27

Yuda Alibeera Muddu wa Nebukadduneeza

¹ Ku ntandikwa y'obufuuzi bwa Zeddekiya mutabani wa Yosiya kabaka wa Yuda, ekigambo kino kyajjira Yeremiya okuva eri MUKAMA:

² Bw'ati MUKAMA bwe yanjamba nti: "Weekolere ekikoligo okiteeke ku nsingo yo,

³ oweereze ekigambo eri bakabaka ba Edomu, ne Mowaabu, ne Ammoni, ne Tuulo ne Sidoni, ng'otuma ababaka abazze mu Yerusaalemi eri Zeddekiya kabaka wa Yuda.

⁴ Tumira bakama baabwe obagambe nti, 'Bw'ati bw'ayogera MUKAMA ow'Eggye, Katonda wa Isirayiri nti, "Kino mukitegeeze bakama bammwe.

⁵ N'amaanyi gange amangi n'omukono ogugoloddwa natonda ensi n'abantu baamu n'ensolo ezigiriko, era ngiwa omuntu yenna gwe njagala.

⁶ Kaakano njenda kuwaayo amawanga gammwe eri omuddu wange Nebukadduneeza kabaka w'e Babulooni, n'ensolo ez'omu nsiko nzija kuziteeka wansi we.

⁷ Amawanga gonna galimuweereza ne mutabani we ne muzzukulu we okutuusa ekiseera eky'ensi ye okusalirwa omusango lwe kirituuka; olwo amawanga mangi ne bakabaka bangi ab'amaanyi balimuwangula.

⁸ "Naye singa eggwanga lyonna oba obwakabaka bwonna tebuliweereza Nebukadduneeza kabaka w'e Babulooni oba okuteeka ensingo wansi w'ekikoligo ky'abwo, nzija kubonereza ensi eyo n'ekitala, n'ekyeyea, ne

kawumpuli, bw'ayogera MUKAMA, okutuusa lwe ndigizikiriza n'omukono gwange.

⁹Noolwekyo bannabbi bammwe, n'abalaguzi, n'abavvuunuzi b'ebirooto, temubawuliriza wadde abalogo wadde abafumu ababagamba nti, 'Temulibeera baddu ba kabaka w'e Babulooni.'

¹⁰Baabawa bunnabbi bwa bulimba obunaabaleetera okutwalibwa ewala okuva mu mawanga gammwe. Ndibagobera wala era mulizikirira.

¹¹Naye singa eggwanga lirikutamya ensingo yaalyo wansi w'ekikoligo kya kabaka w'e Babulooni limeweereze, nzija kuleka eggwanga eryo lisigale mu nsi yaalyo, okugirima, n'okugibeeramu, bw'ayogera MUKAMA."'"

¹²Nategeeza obubaka bwe bumu eri Zeddekiya kabaka wa Yuda nga ɲjamba nti, "Kutamya ensingo yo wansi w'ekikoligo kya kabaka w'e Babulooni, beera omuddu we n'abantu be, onoobeera mulamu.

¹³Lwaki ggwe n'abantu bo mufa ekitala, n'ekyeya ne kawumpuli MUKAMA by'agambye okutuuka ku nsi yonna etefuuke muddu wa kabaka w'e Babulooni?

¹⁴Towuliriza bigambo bya bannabbi abakugamba nti, 'Tolibeera muddu wa kabaka w'e Babulooni,' kubanga bakutegeeza bya bulimba.

¹⁵'Sibatumanga,' bw'ayogera MUKAMA. 'Bawa obunnabbi bwa bulimba mu linnya lyange. Noolwekyo, nzija kubagobera wala muzikirire, mmwe ne bannabbi ababateeza obunnabbi.'

¹⁶Olwo ne ɲjamba bakabona n'abantu bano bona nti, "Kino MUKAMA ky'agamba nti, Temuwuliriza bannabbi abagamba nti, 'Amangu ddala ebintu by'omu nnyumba ya MUKAMA bijja kukomezebwawo okuva mu Babulooni.' Bababuulira bunnabbi bwa bulimba.

¹⁷Temubawuliriza. Muweereze kabaka w'e Babulooni, mubeere balamu. Lwaki ekibuga kino kifuuka amatongo?

¹⁸Bwe baba bannabbi nga balina ekigambo kya MUKAMA, leka bakaabirire MUKAMA Katonda ow'Eggye nti ebintu eby'omuwendo ebikyasigadde mu nnyumba ya MUKAMA ne mu lubiri lwa kabaka wa Yuda ne mu Yerusaalemi bireme kutwalibwa Babulooni.

¹⁹Kubanga bw'ati MUKAMA Katonda ow'Eggye bw'ayogera ku mpagi, n'Ennyanja, okuteekebwa ebintu, n'ebintu ebirala ebrisigadde mu kibuga kino,

²⁰kabaka Nebukadduneeza ow'e Babulooni by'ataatwala lwe yatwala Yekoyakini mutabani wa Yekoyakimu kabaka wa Yuda n'abakungu bona aba Yuda ne Yerusaalemi.

21Bw'atyo bw'ayogera MUKAMA ow'Eggye, Katonda wa Isirayiri ku bikwata ku bibya ebyasigala mu nnyumba ya MUKAMA ne mu lubiri olwa kabaka wa Yuda ne mu Yerusaalemi nti,

22'Biritwalibwa mu Babulooni eyo gye birisigala okutuusa ku lunaku lwe ndibikima, olwo ndibikomyawo mbizze mu kifo kino,' " bw'ayogera MUKAMA.

Yeremiya 28

Kananiya Nnabbi ow'Obulimba

1 Mu mwezi ogwokutaano ogw'omwaka gwe gumu, gwe mwaka ogwokuna, obufuzi bwa Zeddekiya kabaka wa Yuda nga bw'akatandika, nnabbi Kananiya omwana wa Azuri eyali abeera e Gibyoni n'aŋjambira mu nnyumba ya MUKAMA nga bakabona n'abantu bona we bali nti,

2"Bw'ati bw'ayogera MUKAMA ow'Eggye, Katonda wa Isirayiri nti, 'Nzija kumenya ekikoligo kya kabaka w'e Babulooni.

3Emyaka ebiri nga teginnaggwaako, ndikomyawo ebintu by'omu nnyumba ya MUKAMA mu kifo kino, Nebukadduneeza kabaka w'e Babulooni bye yaggya wano n'abitwala e Babulooni.

4Era ndikomyawo wano Yekoyakini mutabani wa Yekoyakimu kabaka wa Yuda n'abantu abalala bona abaava mu Yuda abaatwalibwa e Babulooni,' bw'ayogera MUKAMA, 'kubanga ndimenya ekikoligo kya kabaka w'e Babulooni.'

5Awo nnabbi Yeremiya n'addamu mu bunnabbi bwa Kananiya nga ne bakabona n'abantu bona we bali bayimiridde mu nnyumba ya MUKAMA, n'agamba nti,

6"Amiina! Bw'atyo MUKAMA bw'aba akola! MUKAMA atuukirize ebigambo by'oyogedde ng'akomyawo ebintu eby'omu nnyumba ya MUKAMA era n'abawambe bona abakomyewo mu kifo kino okuva mu Babulooni.

7Wabula, wuliriza kye ŋjenda okwogera ng'owuliriza n'abantu bano bona nga bawulira.

8Okuva edda n'edda bannabbi abaatusooka, ggwe nange baategeezanga kubaawo kwa ntalo, na bikangabwa na kawumpuli okugwa ku mawanga n'obwakabaka obw'amaanyi.

9Naye nnabbi eyategeeza obunnabbi obw'emirembe ajja kulabibwa nga ddala atumiddwa MUKAMA era ng'obubaka bw'ategeeza butuukiridde."

10Awo nnabbi Kananiya n'alyoka akwata ekikoligo ekyali ku nsingo ya Yeremiya n'akimanya,

11n'alyoka ayogera eri abantu bona nti, "Bw'ati bw'ayogera MUKAMA nti, 'Mungeri y'emu bw'eti, bwe ndimenya ekikoligo ekya Nebukadduneeza kabaka w'e

Babulooni okuva ku mawanga gonna mu myaka ebiri.'” Naye ye nnabbi Yeremiya n'avaawo ne yeetambulira.

¹²Bwe waayitawo ebbanga ttono nga nnabbi Kananiya amenye ekikoligo ku nsingo ya Yeremiya, ekigambo kya MUKAMA ne kijjira Yeremiya nti,

¹³“Genda ogambe Kananiya nti, ‘Bw’ati bw’ayogera MUKAMA nti, Omenye ekikoligo kya muti naye mu kifo kyakyo ojja kufunamu kikoligo kya kyuma.

¹⁴Bw’ati bw’ayogera MUKAMA ow’Eggye, Katonda wa Isirayiri nti, Nditeeka ekikoligo eky’ekyuma mu nsingo z’amawanga gano gonna baweereze Nebukadduneeza kabaka w’e Babulooni era balimuweereza. Ndimuwa obuyinza n’ensolo azifuge.’”

¹⁵Awo nnabbi Yeremiya n’agamba nnabbi Kananiya nti, “Wuliriza, Kananiya! MUKAMA tannakutuma naye ggwe ovalirizza eggwanga lino okwesiga obulimba.

¹⁶Noolwekyo kino MUKAMA kyagamba nti, ‘Ndikumpi okukuggya ku nsi. Omwaka guno gwennyini ogenda kufa, kubanga oyigirizza abantu okujeemera MUKAMA.’”

¹⁷Mu mwezi ogw’omusantu ogw’omwaka gwe gumu, Kananiya n’afa.

Yeremiya 29

Ebbaluwa eri Abawanjanguse

¹Bino bye byali mu bbaluwa nnabbi Yeremiya gye yaweereza okuva mu Yerusaalemi eri abakadde abaali bakyasigaddeo mu bawanjanguse n’eri bakabona, ne bannabbi n’abantu bona Nebukadduneeza be yali atutte mu buwanjanguse mu Babulooni okuva mu Yerusaalemi.

²Kino kyaliwo nga kabaka Yekoyakini n’abakungu be ne Namasole we n’abakulembeze ba Yuda ne Yerusaalemi, n’abafundi n’abaweesi bona baggyiddwa mu Yerusaalemi.

³Ebbaluwa yagiwa Erasa mutabani wa Safani ne Bemaliya mutabani wa Kirukiya, ne Zeddekiya kabaka wa Yuda be yatuma eri kabaka Nebukadduneeza mu Babulooni. Yali egamba bw’eti nti,

⁴Bw’ati bw’ayogera MUKAMA ow’Eggye, Katonda wa Isirayiri, ng’agamba abo bona be natwala mu buwanjanguse okuva mu Yerusaalemi okugenda mu Babulooni nti,

⁵“Mwezimbire amayumba mutuule omwo; mulime ennimiro mulye ebibala byamu.

⁶Muwase muzaale abaana aboobulenzi n'aboobuwala; muwasize batabani bammwe abakazi, ne bawala bammwe mubafumbize, nabo bazaale abaana abalenzi n'abawala. Mweyongere obungi eyo, temukendeera.

⁷Era munooonye emirembe n'okukulaakulana kw'ekibuga gye mbatutte mu buwañjanguse. Musabenga MUKAMA, ekibuga mukisabire kubanga bwe kikulaakulana nammwe mujja kukulaakulana."

⁸Ddala kino MUKAMA ow'Eggye, Katonda wa Isirayiri ky'agamba nti, "Temukkiriza bannabbi n'abalaguzi abali mu mmwe kubalimbalmiba. Temussaayo mwoyo ku birooto byabwe bye babalootolola.

⁹Babategeeza obunnabbi bwa bulimba mu linnya lyange. Sibatumanga," bw'ayogera MUKAMA.

¹⁰Ddala ddala bw'ati bw'ayogera MUKAMA nti, "Emyaka nsanvu nga giweddeko e Babulooni, ndija gye muli ntuukirize ekisuubizo kyange eky'ekisa mbakomyewo mu kifo kino.

¹¹Kubanga mmanyi enteekateeka ze nnina gye muli, enteekateeka ez'okubakulaakulanya so si okubakolako akabi, enteekateeka ez'okubawa essuubi era n'obulamu obw'omu maaso," bw'ayogera MUKAMA.

¹²"Awo mulimpita ne mujja ne munsaba, nange ne mbawulira," bw'ayogera MUKAMA.

¹³"Mulinnoonya ne mundaba bwe mulinnoonya n'omutima gwammwe gwonna.

¹⁴Mulinzuula era ndibakomyawo okubaggya mu buwañjanguse. Ndibakuñjaanya mu mawanga gonna n'ebifo byonna, gye nabagobera, era ndibakomyawo mu kifo mwe nabaggya okubatwala mu buwañjanguse," bw'ayogera MUKAMA.

¹⁵Muyinza okugamba nti, "MUKAMA atuyimusirizza bannabbi mu Babulooni."

¹⁶Naye kino MUKAMA ky'agamba ku kabaka atuula ku ntebe ya Dawudi n'abantu bona abaasigala mu kibuga kino, n'abantu ab'ensi yammwe abataagenda nammwe mu buwañjanguse.

¹⁷Bw'ati bwayogera MUKAMA Katonda ow'Eggye nti, "Ndisindika ekitala, n'enjala ne kawumpuli okubalumba era mbafuule ng'emitiini emibi ennyo egitayinza kuliika olw'obubi bwagyo.

¹⁸Ndibagoberera n'ekitala, n'enjala ne kawumpuli ne mbafuula ekyenyinyalwa eri obwakabaka bwonna obw'ensi era ekikolimo n'ekikangabwa, n'eky'okusekererwa n'okuvumwa eri amawanga gonna gye ndibagobera.

¹⁹Kubanga tebaawuliriza bigambo byange,” bwayogera MUKAMA, “ebigambo bye nabatumira emirundi emingi mu baweereza bange bannabbi. Era nammwe abawañjanguse temuwulirizza,” bw’ayogera MUKAMA.

²⁰Noolwekyo, muwulirize ekigambo kya MUKAMA, mmwe mwenna abali mu buwañjanguse be nagoba mu Yerusaalemi okugenda mu Babulooni.

²¹Kino MUKAMA ow’Eggye, Katonda wa Isirayiri, ky’ayogera ku Akabu mutabani wa Kolaya ne Zeddekiya mutabani wa Maaseya, abaawa obunnabbi mu linnya lyange nti, “Ndibawaayo eri Nebukadduneeza kabaka w’e Babulooni, abatte nga mulaba.

²²Olw’abasajja abo, abali mu buwañjanguse bonaava mu Yuda abali mu Babulooni balikozesa ekikolimo kino nti, ‘MUKAMA akukole nga bwe yakola Zeddekiya ne Akabu, kabaka w’e Babulooni be yayokya mu muliro.’

²³Kubanga bakoze eby’ekivve mu Isirayiri; bakoze obwenzi ne baka baliraanwa baabwe era ne boogera eby’obulimba mu linnya lyange, bye sibagambanga kwogera. Nkimanyi era ndi mujulirwa ku ekyo,” bw’ayogera MUKAMA.

Obubaka eri Semaaya

²⁴Semaaya Omunekeramu mugambe nti,

²⁵“Bw’ati bw’ayogera MUKAMA ow’Eggye, Katonda wa Isirayiri nti, Waweereza ebbaluwa mu manny go eriabantu bona mu Yerusaalemi, eri Zeffaniya mutabani wa Maaseya kabona ne bakabona bona. Wagamba Zeffaniya nti,

²⁶‘MUKAMA yakuteekawo okuba kabona mu kifo kya Yekoyaada okutwala obuvunaanyizibwa ku nnyumba ya MUKAMA; otekwa okuteeka omulalu yenna eyefuula nga nnabbi mu nvuba ne mu masamba.

²⁷Noolwekyo lwaki tokangavudde Yeremiya ow’e Yanasosi, eyefuula nnabbi wakati mu mmwe?

²⁸Atuweerezza obubaka buno mu Babulooni ng’agamba nti, Obuwañjanguse bwammwe bujja kubeera bwa bbanga ddene. Noolwekyo mwezimbire amayumba mutereere mu nsi, mulime ennimiro mulye ebibala byamu.”

²⁹Wabula Zeffaniya kabona nasomera nnabbi Yeremiya ebbaluwa eno.

³⁰Awo ekigambo kya MUKAMA ne kijjira Yeremiya nti,

³¹“Muweereze obubaka buno eri abawañjanguse nti, ‘Kino MUKAMA ky’agamba ku Semaaya Omunekeramu. Kubanga Semaaya yakuwa obunnabbi, wadde nga ssamutuma, era akutusizza ku kjesiga eby’obulimba,

³²kino MUKAMA ky’agamba nti, Ddala ddala ndibonereza Semaaya Omunekeramu n’abantu b’omu nju ye. Tewaliba n’omu alisigalawo ku bantu be,

wadde aliraba ebirungi bye ndikolera abantu bange, kubanga ayigirizza abantu okunjeemera, bw'ayogera MUKAMA.'"

Yeremiya 30

Isirayiri Azzibwawo

- 1** Kino kye kigambo kya MUKAMA ekyajjira Yeremiya nti,
- 2** "Bw'ati bw'ayogera MUKAMA Katonda wa Isirayiri nti, 'Wandiika ku muzingo ebigambo byonna bye njogedde naawe.
- 3** Ennaku zija, lwe ndikomyawo abantu bange Isirayiri ne Yuda okuva mu busibe, mbazzeeyo mu nsi gye nawa bajjajaabwe babeere omwo,' bw'ayogera MUKAMA."
- 4** Bino bye bigambo MUKAMA bye yayogera ebikwata ku Isirayiri ne Yuda nti,
- 5** "Bw'ati bw'ayogera MUKAMA nti, " 'Emiranga egy'okutya giwulirwa, bulabe teri mirembe.
- 6** Mubuuze mulabe. Omusajja alumwa okuzaala? Kale lwaki ndaba buli musajja ow'amaanyi ng'atadde emikono gye ku lubuto ng'omukazi alumwa okuzaala, buli muntu mu maaso yenna asiiwuuse ng'agenda okufa?
- 7** Nga luliba lwa nnaku olunaku olwo! Tewali lulirufaanana. Kiriba kiseera kya kabi eri Yakobo, naye aliwona n'akiyitamu.
- 8** " 'Olulituuka ku lunaku olwo, ndimenya ekikoligo okuva mu nsingo zaabwe era ne mbasaleko amasamba, ab'amawanga nga tebakyaddayo kubafuula baddu,' bw'ayogera MUKAMA ow'Eggye.
- 9** Wabula, bajja kuweerezanga MUKAMA Katonda waabwe ne Dawudi kabaka waabwe gwe ndibayimusiza.
- 10** " 'Noolwekyo totya, ggwe Yakobo omuweereza wange, toggwaamu maanyi ggwe Isirayiri,' bw'ayogera MUKAMA. 'Ddala ddala ndibalokola okubaggya mu kifo eky'ewala, nziggye ezzadde lyammwe okuva mu nsi ey'obuwanjanguse. Yakobo aliddamu okuba n'emirembe n'obutebenkevu, era tewali n'omu alimutiisatiisa.
- 11** Ndi wamu nammwe era ndibalokola, wadde nga ndizikiririza ddala amawanga gye mbagobedde, siribazikiririza ddala mmwe,' bw'ayogera MUKAMA. Ndibakangavvula n'obwenkanya, siribaleka nga temubonerezebbwa n'akatono.
- 12** "Bw'ati bw'ayogera MUKAMA nti, " 'Ekiwundu kyo tekiwonyezeka, Ebisago byo si byakuwona.

¹³ Tewali n'omu wa kukuwolereza, tewali ddagala lya kiwundu kyo, toowonyezebwe.

¹⁴ Abakuyamba bona bakwerabidde tebakufaako. Nkukubye ng'omulabe bwe yandikoze ne nkubonereza ng'owettima bwe yandikoze, kubanga omusango gw'ozzizza munene nnyo n'ebibi byo bingi ddala.

¹⁵ Lwaki okaaba olw'ekiwundu kyo, obulumi bwo obutaliiko ddagala? Olw'okwonoona kwo okunene n'ebibi byo ebingi ennyo nkuleeseko ebantu bino.

¹⁶ “Naye bona abakumira nabo baliriibwa, abalabe bo bona baligenda mu buwanjjanguse. Abo abaakunyaga balinyagibwa, abo abaakwelula balyelulwa.

¹⁷ Naye ndikuzzaawo owone, ndiwonya ebiwundu byo,’ bw’ayogera MUKAMA, ‘kubanga oyitibwa eyasuulibwa, Sayuuni atalina n’omu amufaako.’

¹⁸ “Bw’ati bw’ayogera MUKAMA nti, “Ndizzaawo eby’obugagga by’eweema za Yakobo era mbeere n’ekisa ku kifo kyammwe kye mwabeerangamu. Ekibuga kirizimbibwa awaali amatongo gaakyo, n’olubiri luzzibwe mu kifo kyalwo ekituufu.

¹⁹ Mu bo mulivaamu ennyimba ez’okwebaza era n’eddoboozi ery’okujaguza, ndibaaza, era tebaliba batono, ndibawa ekitiibwa, tebalinyoomebwa.

²⁰ Abaana baabwe baliba nga bwe baali mu nnaku ez’edda, era n’ebitundu byabwe mwe baabeeranga bizimbibwe nga ndaba. Ndibonereza bona ababanyigiriza.

²¹ Omukulembeze waabwe aliba omu ku bo; omukulembeze waabwe aliylimuka okuva mu bo. Ndimuleeta wendi era musembeze kumpi nange, kubanga ani oyo alyewaayo okunyikira okubeera okumpi nange?’ bw’ayogera MUKAMA.

²² ‘Noolwekyo munaabeeranga bantu bange, nange n’abeeranga Katonda wammwe.’

²³ Laba, omuyaga gwa MUKAMA gulikuntira mu kiruyi, empewo ey’amaanyi eyeetooloolera ku mitwe gy’abakozi b’ebibi.

²⁴ Obusungu bwa MUKAMA obubuubiuka tebjja kukoma okutuusa ng’atuukirizza ekigendererwa ky’omutima gwe. Mu nnaku ezirija, kino mulikitegeera.

Yeremiya 31

¹ “Mu kiseera ekijja, ndiba Katonda w’ebika byonna ebya Isirayiri, era balibeera bantu bange,” bw’ayogera MUKAMA.

² Bw'ati bw'ayogera MUKAMA nti, "Abantu abawona ekitala baliraba ekisa mu ddungu. Ndijja n'empa Isirayiri ekiwummulo."

³ MUKAMA yatulabikira edda ng'agamba nti, "Nkwagadde n'okwagala okutaliggwaawo, kyenvudde nkusembeza gye ndi n'ekisa ekijjudde okwagala.

⁴ Ndi kuzimba nate, era olizimbibwa, ggwe Omuwala Isirayiri. Era oliddamu okuyonjebwa okwate ebitasa byo ofulume ozine n'abo abasanyuka.

⁵ Oliddamu okusimba emizabbibu ku lusozi Samaliya, abalimi baligisimba balye ebibala byakwo.

⁶ Walibeerawo olunaku abakuumi lwe balikoowoola ku busozi bwa Efulayimu nti, 'Mujje, tugende ku Sayuuni, eri MUKAMA Katonda waffe.'

⁷ Bw'ati bw'ayogera MUKAMA nti, "Muyimbe n'essanyu olwa Yakobo Muleekaanire waggulu olw'ensi esinga zonna." Ettendo lyammwe liwulikike, era mugambe nti, "Ayi MUKAMA, lokola abantu bo, abaasigalawo ku Isirayiri."

⁸ Laba, ndibakomyawo okuva mu nsi ey'obukiikkono, ne mbakunjaanya okuva ku nkomerero y'ensi. Mu bo mulibaamu abazibe b'amaaso, n'abalema, n'abakyala ab'embuto, n'abalumwa okuzaala, era abantu bangi balikomawo.

⁹ Balikomawo nga bakaaba, balisaba nga mbakomyawo. Ndibakulembira ku mabbali g'emingga, mu kkubo eggolokofu mwe batalyesittalira kubanga nze Kitaawe wa Isirayiri, era Efulayimu ye mutabani wange omubereberye.

¹⁰ "Muwulire ekigambo kya MUKAMA mmwe amawanga, mukyogere mu nsi ezeewala. 'Oyo eyasaasaanya Isirayiri alibakunjaanya era alirabirira ekisibo kye ng'omusumba w'endiga.'

¹¹ Kubanga MUKAMA aligula Yakobo era abanunule okuva mu mukono gw'oyo abasinga amaanyi.

¹² Balija baleekaana olw'essanyu ku nsozi za Sayuuni; balisanyukira okugabula kwa MUKAMA: emmere ey'empeke, ne wayini omusu, n'omuzigo, n'abaana b'endiga era n'ebisibo. Balibeera ng'ennimiro efukiririddwa obulungi, era tebalyongera kulaba nnaku.

¹³ Abawala balizina beesiime, n'abavubuka, n'abakadde. Okukaaba kwabwe ndikufuula essanyu; ndibawa emirembe n'essanyu okusinga ennaku.

¹⁴ Ndikkusa bakabona ebintu ebingi, n'abantu bange mbajjuze ebintu," bw'ayogera MUKAMA.

¹⁵ Bw'ati bw'ayogera MUKAMA nti, "Eddoboozi liwulirwa mu Laama, nga likungubaga n'okukaaba okungi. Laakeeri akaabira abaana be era agaanye okusirisibwa, kubanga abaana be baweddewo."

¹⁶ Bw'ati bw'ayogera MUKAMA nti, "Ziyiza eddoboozi lyo lireme okuwulikika ng'okaaba n'amaaso go galeme okujja amaziga, kubanga omulimu gwo gulisasulibwa," bw'ayogera MUKAMA. Balikomawo okuva mu nsi y'omulabe.

¹⁷ Waliwo essuubi, bw'ayogera MUKAMA. Abaana bo baliddayo mu nsi yaabwe.

¹⁸ "Ddala mpulidde Efulayimu ng'akungubaga nti, 'Wankangavvula ng'enyanan endalu era kaakano nkangavvuddwa. Nziza, n'akomawo gy'oli kubanga ggwe MUKAMA Katonda wange.

¹⁹ Nga mmaze okubula, neenenya, nga nzizeemu amagezi agategeera ne neekuba mu kifuba. Nakwatibwa ensonyi era ne nswala, kubanga naliko ekivume ky'obuvubuka bwange.'

²⁰ Efulayimu si mwana wange omwagalwa, omwana gwe nsanyukira? Wadde nga ntera okumunenya naye nkyamujukira. Noolwekyo omutima gwange gumuyaayaanira; nnina ekisa kingi gy'ali," bw'ayogera MUKAMA.

²¹ "Muteeke ebipande ku nguudo; muteekeeko ebipande. Mwetegereze ekkubo eddene, ekkubo mwe muyita. Komawo ggwe Omuwala Isirayiri, komawo mu bibuga byo.

²² Olituusa ddi okudda eno n'eri, ggwe omuwala atali mwesigwa? MUKAMA alikola ekintu ekiggya ku nsi, omukazi aliwa omusajja obukuumi."

²³ Bw'ati bw'ayogera MUKAMA ow'Eggye, Katonda wa Isirayiri nti, "Bwe ndibakomyawo okubaggya mu busibe, abantu b'omu nsi ye Yuda ne mu bibuga byamu bajja kuddamu okukozesa ebigambo bino nti, 'MUKAMA akuwe omukisa, ggwe ekifo ekitukuvu, ggwe olusozi olutukuvu.'

²⁴ Abantu balibeera wamu mu Yuda ne mu bibuga byakyo byonna, abalimi n'abo abatambula n'amagana gaabwe.

²⁵ Abalumwa ennyonta ndibanywesa, nzizeemu amaanyi abazirika."

²⁶ Awo we nazuukukira ne ntunulatunula. Otulo twange twali tunnyumidde.

²⁷ "Ennaku zija," bwayogera MUKAMA, "lwe ndisimba ennyumba ya Isirayiri ne nnyumba ya Yuda n'ezzadde ly'abantu n'ery'ensolo.

²⁸ Nga bwe nabalabirira nga bakuulibwa era nga bayuzibwayuzibwa, nga babetentebwa, era nga bazikirizibwa ne beeleetako ekikangabwa, bwe ntyo bwe ndibalabirira nga bazimbibwa era nga basimbibwa," bw'ayogera MUKAMA.

²⁹ "Mu nnaku ezo abantu banaaba tebakyagamba nti, " 'Bakitaabwe balidde emizabbibu egikaawa, n'amannyo g'abaana ne ganyenyeeera.' "

³⁰ Wabula buli muntu alifa olw'obutali butuukirivu bwe ye, buli muntu alya ezabbibu erinyenyeeza amannyo, amannyo ge galinyenyeeera.

³¹ Bw'ati bw'ayogera MUKAMA nti, "Ekiseera kijja, lwe ndikola endagaano empya n'ennyumba ya Isirayiri era n'ennyumba ya Yuda.

³² Teribeera ng'endagaano eri gye nakola ne bajajjaabwe bwe nabakwata ku mukono okubakulembera okubaggya mu nsi y'e Misiri, kubanga baamenya endagaano yange nabo wadde nga nze nnali nga omwami waabwe," bw'ayogera MUKAMA.

³³ "Eno y'endagaano gye nnaakola n'ennyumba ya Isirayiri mu kiseera ekyo," bw'ayogera MUKAMA. "Nditeeka amateeka gange mu birowoozo byabwe, ne ngawandiika ku mitima gyabwe. Ndibeera Katonda waabwe, nabo balibeera bantu bange.

³⁴ Omuntu taliddayo kuyigiriza muliraanwa we, oba omusajja muganda we ng'agamba nti, 'Manya MUKAMA,' Kubanga bona balimmanya, okuva ku asokerwako wansi okutuuka ku akomererayo waggulu," bw'ayogera MUKAMA. "Kubanga ndisonyiwa obutali butuukirivu bwabwe, n'ekibi kyabwe ne siddamu kukijjukira."

³⁵ Bw'ati bw'ayogera MUKAMA nti, Oyo atEEKAWO enjuba okwaka emisana, n'alagira omwezi n'emmunyeeny e okwaka ekiro, asiikuula ennyanja amayengo gaayo ne gawuluguma; MUKAMA Katonda ow'Eggye lye linnya lye.

³⁶ "Amateeka gano nga bwe gavudde mu maaso gange, n'ezzadde lya Isirayiri we linaakoma okubeera eggwanga olw'ebyo byonna bye bakoze," bw'ayogera MUKAMA Katonda.

³⁷ Bw'ati bw'ayogera MUKAMA Katonda nti, "Okuggyako ng'eggulu lisobola okupimibwa n'emisingi gy'ensi wansi okunoonyezebwa, olwo lw'endigoba ezzadde lya Isirayiri olw'ebyo bye bakoze," bw'ayogera MUKAMA.

³⁸ "Ennaku zija," bw'ayogera MUKAMA, "ekibuga lwe kinaazimbibwa okuva ku Munaala gwe Kananeri okutuuka ku Mulyango gw'oku Nsonda.

³⁹ Omuguwa ogupima gujja kupima okuva eyo okutuuka ku lusozi lw'e Galebu n'olvannyuma gupime okuva eyo okutuuka e Gowa.

⁴⁰ Ekiwonvu kyonna emirambo n'evvu gye bisuuliddwa, era n'ennimiro zonna okutuuka ku kagga Kidulooni ku bukiikkono n'okutuuka ku nsonda eyitibwa Omulyango gw'Embalaasi, kinaaba kitukuvu eri Katonda. Ekibuga tekigenda kuddayo kusimbulwa wadde okusaanyizibwawo."

Yeremiya 32

Yeremiya Agula Ennimiro

¹ Kino kye kigambo kya MUKAMA ekyajjira Yeremiya mu mwaka ogw'ekkumi ogw'obufuzi bwa Zeddekiya kabaka wa Yuda, ogwali omwaka ogw'ekkumi n'omunaana ogw'obufuzi bwa Nebukadduneeza.

²Amaggye ga kabaka w'e Babulooni gaali gazingizza Yerusaalemi, era ne Yeremiya nnabbi baali bamusibidde mu luggyia lw'omukuumi mu lubiri lwa kabaka wa Yuda.

³Zeddekiya kabaka wa Yuda yali amusibidde eyo ng'agamba nti, "Lwaki otegeeza obunnabbi mu ngeri eyo? Ogamba nti, 'Bw'ati bw'ayogera MUKAMA. Nnaatera okuwaayo ekibuga kino eri kabaka w'e Babulooni, era agenda kukiwamba.

⁴Zeddekiya kabaka wa Yuda tajja kuwona mikono gy'Abakaludaaya naye ddala wa kuweebwayo eri kabaka w'e Babulooni era ajja kwogera naye, balabagane amaaso n'amaaso.

⁵Alitwala Zeddekiya mu Babulooni, gy'alisigala okutuusa lwe ndimujjira. Bwe munaalwanyisa Abakaludaaya, temujja kuwangula,' bw'ayogera MUKAMA."

⁶Yeremiya n'agamba nti, "Ekigambo kya MUKAMA kyanzijira:

⁷Laba Kanameri mutabani wa Sallumu kojjaawo agenda kujja gy'oli akugambe nti, 'Gula ennimiro yange eri mu Anasosi kubanga ng'owooluganda asinga okuba okumpi guba mukisa gwo era buvunaanyizibwa bwo okugigula.'

⁸"Awo nga MUKAMA bwe yali agambye, omwana wa kojja wange Kanameri yajja mu luggyia lw'omukuumi gye nnali n'aŋŋamba nti, 'Gula ennimiro yange eri mu Anasosi mu kitundu kya Benyamini, kubanga okirinako obuyinza n'obuvunaanyizibwa okukinunulayo n'okyefunira, kyegulire.' "Olwo ne mmanya nti kino kye kigambo kya MUKAMA.

⁹Ne ndyoka ngula ennimiro ey'e Anasosi ku Kanameri omwana wa kojjange, ne mubalira ensimbi, ebitundu kkumi na musanvu ebya ffeeza.

¹⁰Ne nteeka omukono ku kiwandiiko ky'endagaano okugulirwa ettaka ne nkissaako n'akabonero, ne nfunu abajulirwa, ne mpima ffeeza ku minzaani.

¹¹Ne ntwala ekiwandiiko ekimpa obwannannyini ekirimu enkola era n'ebisuubirwa okugobererwa, era ne kkopi ey'olwatu.

¹²Ne mpa Baluki mutabani wa Neriya mutabani wa Maseya ekiwandiiko ky'obwannannyini, Kanameri omwana wa kojjange nga waali n'abajulirwa nga weebali abaateeka emikono ku kiwandiiko eky'obwannannyini n'Abayudaaya bona abaali batudde mu luggyia lw'omukuumi.

¹³"Ne nkuutirira Baluki mu maaso gaabwe nti,

¹⁴'Bw'ati bw'ayogera MUKAMA ow'Eggye, Katonda wa Isirayiri nti, Twala ebiwandiiko bino byombi, ekisibeko envumbo n'ekitali kisibeko obiteeke mu nsumbi ey'ebbumba bisobole okulwawo ebbanga gwanvu.

¹⁵Kubanga bw'atyo bw'ayogera MUKAMA ow'Eggye Katonda wa Isirayiri nti, Ennyumba, n'ebibanja n'ennimiro ez'emizabbibu biriddamu okugulibwa mu nsi eno.'

¹⁶"Nga mmaze okuwaayo ekiwandiiko kino eri Baluki mutabani wa Neriya, nasaba MUKAMA nti,

¹⁷"Ayi MUKAMA Katonda, ggwe wakola eggulu n'ensi n'amaanyi go amangi ennyo, n'omukono gwo ogugoloddwa. Tewali kintu na kimu kikulema.

¹⁸Olaga okwagala kwo eri enkumi n'enkumi ate oleeta ekibonerezo ky'ebibi bya bakitaabwe ku baana baabwe. Ayi Katonda ow'ekitalo era ow'amaanyi, ayitibwa MUKAMA Katonda ow'Eggye,

¹⁹ebigendererwa byo nga binene era n'ebikolwa byo nga bikulu. Amaaso go gatunuulidde amakubo gonna ag'abantu, osasula buli muntu ng'enneyisa ye bweri era ng'ebikolwa bye bwe biri.

²⁰Wakola obubonero n'ebikolwa ebyamagero mu Misiri era weeyongedde okubikola leero, wonna mu Isirayiri ne mu bantu bona era erinnya lyo lyeyongedde okwatiikirira.

²¹Waggya abantu bo Isirayiri mu Misiri n'obubonero n'eb'yamagero, n'omukono gwo ogw'amaanyi gwe wagolola n'entiisa ey'amaanyi.

²²Wabawa ensi eno gye wali olayidde okuwa bajjajaabwe, ensi ekulukuta amata n'omubisi gw'enjuki.

²³Baagituukamu ne bagitwala, naye tebaakugondera wadde okugoberera amateeka go, byonna bye wabalagira tebaliiko wadde na kimu kye baakola. Kyewava obaleetako akabi kano konna.

²⁴"Laba entuumo z'omulabe z'atuumye okuzinda ekibuga okukiwamba n'ekitala, n'enjala ne kawumpuli, ekibuga kigenda kuweebwayo eri Abakaludaaya abakirumba. Ekyo kye wagamba kituukiridde nga kaakano bw'olaba.

²⁵Era wadde ng'ekibuga kigenda kuweebwayo eri Abakaludaaya, ggwe Ayi MUKAMA Katonda oñjambye nti, "Toola ffeeza weegulire ennimiro era wabeerewo n'abajulirwa."

²⁶Awo ekigambo kya MUKAMA ne kijjira Yeremiya nti,

²⁷"Nze MUKAMA, Katonda w'abantu bona. Eriyo ekinnema?

²⁸Noolwekyo, bw'ati bw'ayogera MUKAMA nti, 'Nnaatera okuwaayo ekibuga kino eri Abakaludaaya ne Nebukadduneeza kabaka w'e Babulooni, abanaakiwamba.

²⁹Abakaludaaya abanaalumba ekibuga kino bajja kukikumako omuliro, bakyokye kiggye, n'amayumba gonna abantu mwe bankwasiza obusungu nga

bootereza Baali obubaane waggulu ku mayumba era n'okuwaayo ebiweebwayo eby'okunywa eri bakatonda abalala.'

³⁰ "Abantu ba Isirayiri ne Yuda bye bakoze bibi byereere mu maaso gange okuva mu buvubuka bwabwe; era ddala abantu ba Isirayiri tebalina kirala kye bakoze wabula okunnyiiza n'ebyo emikono gyabwe gye gikoze, bw'ayogera MUKAMA.

³¹ Okuva ku lunaku lwe kyazimbibwa ne leero, ekibuga kino kindeetedde obusungu bungi n'ekiruyi, noolwekyo nteekwa okukiggya mu maaso gange.

³² Abantu ba Isirayiri ne Yuda bannyiizizza olw'ebibi byonna bye bakoze, bo ne bakabaka baabwe n'abakungu baabwe, ne bakabona baabwe ne bannabbi, abasaja ba Yuda n'abantu ba Yerusaalemi.

³³ Banvaako ne bankuba amabega mu kifo ky'okuntunuulira; wadde nga nabayigiriza ne nkiddiñjana emirundi mingi naye tebaawuliriza wadde okufaayo eri okukangavvulwa.

³⁴ Baateekawo ebifaananyi bya bakatonda baabwe abakole n'emikono, eby'omuzizo mu nnyumba eyitibwa Erinnya lyange ne bagyonoona.

³⁵ Baazimba ebifo ebigulumivu ebya Baali mu kiwonvu kya mutabani wa Kinomu, basaddaake batabani baabwe ne bawala baabwe mu muliro eri Moleki, newaakubadde nga sibalagiranga, wadde okukirowooza mu magezi gange, nti balikola ekintu ekibi ennyo bwe kityo kiviireko Yuda okwonoona.

³⁶ "Bw'ati bw'ayogera MUKAMA, Katonda wa Isirayiri nti, 'Ekibuga kino okyogerako nti, Kijja kuweebwayo eri kabaka w'e Babulooni lwa kitala, n'enjala, ne kawumpuli.'

³⁷ Naye laba, ndibakuñjaanya mu mawanga gye mbagobedde n'obusungu bwange n'ekiruyi eky'amaanyi; ndibakomyawo mu kifo kino, mubeere n'emirembe.

³⁸ Era balibeera bantu bange, nange mbeere Katonda waabwe.

³⁹ Ndibawa omutima gumu n'ekkubo limu, bantyenga emirembe gyonna, olw'obulungi bwabwe, n'obulungi bw'abaana abaliddawo.

⁴⁰ Ndikola nabo endagaano eteriggwaawo: siribaleka era sirirekeraawo kubakolera birungi, era ndibassaamu omwoyo oguntya, baleme kuddayo kunvaako.

⁴¹ Ndisanyuka olw'okubakolera ebirungi era awatali kubuusabuusa ndibasimba mu nsi eno n'omutima gwange gwonna n'emmeeme yange yonna.

⁴² "Bw'ati bw'ayogera MUKAMA nti, Nga bwe naleeta akabi kano konna ku bantu bano, era nze ndibawa okukulaakulana kwonna kwe mbasuubizza.

⁴³Era nate ennimiro zirigulwa mu ggwanga lino lye mugamba nti, ‘Lifuuse matongo agatagambika, omutali bantu wadde ensolo kubanga kiweereddwayo eri Abakaludaaya.’

⁴⁴Ennimiro zirigulibwa ffeeza, era n’ebiwandiiko eby’obwannannyini biteekebweko omukono, bisabikibwe era bifune n’ababijulira mu Benyamini, ne mu byalo ebyetoolodde Yerusaalemi, ne mu bibuga bya Yuda ne mu bibuga ebyetoolodde Yerusaalemi, ne mu byalo bya Yuda ne mu bibuga eby’omu nsi ey’ensozi, ne mu bibuga eby’omu nsenyi ne mu bibuga eby’omu bukiikkaddyo, kubanga ndikomyawo okukulaakulana kwabwe, bw’ayogera MUKAMA.”

Yeremiya 33

Ebisuubizo by’Okuddawo

¹ Yeremiya bwe yali ng’akyali mu kkomera mu luggya lw’omukuumi, ekigambo kya MUKAMA ne kimujjira omulundi ogwokubiri nti,

²“Bw’ati bw’ayogera MUKAMA, oyo eyakola ensi, MUKAMA eyagikola era n’agiteekawo, MUKAMA lye linnya lye:

³‘Mumpite n’abayitaba ne mbalaga ebikulu ebitanoonyezeka bye mutamanyi.’

⁴Kubanga bw’ati bw’ayogera MUKAMA, Katonda wa Isirayiri ku mayumba agali mu kibuga kino era ne ku mbiri z’obwakabaka bwa Yuda ebyamenyebwamenyebwa okukozesebwa ng’entuumo eziziyiza obulumbaganyi n’ekitala

⁵mu lutalo n’Abakaludaaya. ‘Birijjula emirambo gy’abasajja be nditta olw’obusungu bwange n’ekiruyi. Ndikweka amaaso gange okuva ku kibuga kino olw’obutali butuukirivu bwabwe bwonna.

⁶“Naye ndikiwa obulamu n’okuwonyezebwa; ndiwonya abantu bange, mbaleetere okweyagalira mu mirembe emigazi era eminywevu.

⁷Ndikomyawo Yuda ne Isirayiri okubaggya mu buwambe era mbazimbe nga bwe baasooka okubeera.

⁸Ndibalongoosa okubaggyako ebibi byonna bye bannyonoona era mbasonryiwe n’ekibi eky’okunjeemera.

⁹Olwo ekibuga kino kirindetera okwongera okumanyika, n’essanyu, n’ettendo era n’ekitiibwa eri amawanga gonna ku nsi agaliwulira ebintu byonna ebirungi bye mbakolera; era balyewuunya bakankane olw’okukulaakulana n’emirembe gye nkiwa.’

¹⁰“Bw’ati bw’ayogera MUKAMA nti, ‘Mwogera ku kifo kino nti, “Matongo agaalekebwa awo, omutali bantu wadde ensolo.” Ate nga mu bibuga bya Yuda

n'enguudo za Yerusaalemi ezalekebwawo omutali bantu wadde ensolo, muliddamu okuwulirwa nate

¹¹ amaloboozi ag'essanyu n'okujaguza, n'amaloboozi g'omugole ne bba, n'amaloboozi gaabo abaleeta ekiweebwayo eky'okwebaza eri ennyumba ya MUKAMA, nga bagamba nti, ““Mumwebaze MUKAMA Katonda ow'Eggye, kubanga MUKAMA mulungi; okwagala kwe kubeerera emirembe gyonna.” Kubanga ndizzaawo omukisa gw'eggwanga lino nga bwe gwali mu kusooka,’ bw'ayogera MUKAMA Katonda.

¹² “Bw'ati bw'ayogera MUKAMA Katonda ow'Eggye nti, ‘Mu kifo kino ekirekeddwa awo omutali bantu wadde ensolo, mu bibuga byakyo byonna nate muliddamu amalundiro ag'abasumba mwe banaawummulizanga ebisibo byabwe.

¹³ Mu bibuga eby'ensi ey'obusozi, eby'eri wansi w'ensozi ez'omu bugwanjuba era ne Negebu, mu kitundu kya Benyamini, mu byalo ebyetoolodde Yerusaalemi n'ebibuga ebyetoolodde Yuda mwonna ebisibo biriddamu okuyita wansi w'omukono gw'oyo abibala,’ bw'ayogera MUKAMA.

¹⁴ “‘Ennaku zija,’ bw'ayogera MUKAMA, ‘lwe ndituukiriza ekisuubizo eky'ekisa kye nakolera ennyumba ya Isirayiri n'ennyumba ya Yuda.

¹⁵ “‘Mu nnaku ezo era mu kiseera ekyo ndireeta Ettabi ettukuvu mu lunyiriri lwa Dawudi era alikola eby'amazima era ebituufu mu nsi.

¹⁶ Mu nnaku ezo Yuda alirokolebwa ne Yerusaalemi alibeera mirembe. Lino lye linnya ly'aliyitibwa nti, MUKAMA Obutuukirivu bwaffe.’”

¹⁷ Kubanga bw'ati bw'ayogera MUKAMA nti, “Dawudi talirema kubeera na muntu kutuula ku ntebe ey'obwakabaka bw'ennyumba ya Isirayiri,

¹⁸ wadde bakabona, n'Abaleevi, okulemwa okubeera n'omusajja ow'okuyimirira mu maaso gange ebbanga lyonna okuwaayo ssaddaaka ezokebwa, okwokya ekiweebwayo eky'empeke era n'okuwaayo ssaddaaka.”

¹⁹ Ekigambo kya MUKAMA kyajjira Yeremiya nti,

²⁰ “Bw'ati bw'ayogera MUKAMA nti, ‘Bw'oba osobola okumenya endagaano yange n'emisana era n'endagaano yange n'ekiro, ne kiba nti emisana n'ekiro tebijja mu biseera byabyo ebyateekebwawo,

²¹ olwo endagaano yange ne Dawudi omuddu wange, n'endagaano yange n'Abaleevi, ne bakabona, n'abawereza bange eyinza okumenyebwa, Dawudi aleme kuddayo kuba na muntu wa mu nju ye okufuga ku ntebe ye ey'obwakabaka.

²²Ndifuula ab'enu ya Dawudi omuddu wange n'Abaleevi abaweeereza mu maaso gange okwala ng'emmunyeenye ez'oku ggulu ezitalika era abatabalika ng'omusenyu gw'okulubalama lw'enyanja ogutapimika."

²³Ekigambo kya MUKAMA ne kijjira Yeremiya nti,

²⁴Tonategeera nti abantu bano bagamba nti, "MUKAMA agaanye obwakabaka obubiri bwe yalonda? Kale banyooma abantu bange era tebakyababala ng'eggwanga.

²⁵Bw'ati bw'ayogera MUKAMA nti, 'Bwe mba nga sassawo ndagaano yange n'emisana n'ekiro n'amateeka ag'enkalakkalira ag'eggulu n'ensi,

²⁶olwo nzi ja kwegaana ezzadde lya Yakobo ne Dawudi omuddu wange era sirironda n'omu ku batabani be okufuga ezzadde lya Ibulayimu, ne Isaaka ne Yakobo. Kubanga ndizzaawo nate emikisa gyabwe, era ne mbakwatirwa ekisa.'

Yeremiya 34

Okulabula Zeddekiya

¹Nebukadduneeza kabaka w'e Babulooni n'amaggye ge gonna, n'abantu bona ab'ensi ze yali afuga bwe baali balwanyisa Yerusaalemi n'ebibuga ebikyetoolodde, ekigambo kya MUKAMA ne kijjira Yeremiya nga kigamba nti,

²"Bw'ati bw'ayogera MUKAMA, Katonda wa Isirayiri nti, Genda eri Zeddekiya kabaka wa Yuda omugambe nti, 'Bw'ati bw'ayogera nti, Nnaatera okuwaayo ekibuga kino eri kabaka w'e Babulooni, era agenda kukyokya.

³Tolisumattuka mukono gwe era oliwambibwa otwalibwe gy'ali. Oliraba kabaka w'e Babulooni n'amaaso go, olyogera naye nga mutunuuliraganye, era olitwalibwa e Babulooni.

⁴"Wabula wulira ekisuubizo kya MUKAMA, ggwe Zeddekiya kabaka wa Yuda. Bw'ati bw'ayogera MUKAMA ku bikukwatako nti, Tolifa kitala;

⁵Olifa mu mirembe. Ng'abantu bwe bakuma ebyoto mu nnyimbe za bakitaawo, bakabaka abasooka, bwe batyo bwe balikuwa ekitiibwa nga bakujukira nga bakukungubagira nga bagamba nti, "Woowe mukama waffe!" Nze kennyini mpa ekisuubizo kino, bw'ayogera MUKAMA."

⁶Awo Yeremiya nnabbi bino byonna n'abibuulira Zeddekiya kabaka wa Yuda, mu Yerusaalemi,

⁷nga amaggye ga kabaka w'e Babulooni bwe galwanyisa Yerusaalemi n'ebibuga ebirala ebya Yuda, Lakisi ne Azeka, ebyali bikyanywereddewo. Bino bye bibuga byokka ebyaliko eminaala egiali gisigadde mu Yuda.

Eddembe ly'Abaddu

⁸ Kino kye kigambo ekyajjira Yeremiya okuva eri MUKAMA nga kabaka Zeddekiya amaze okukola endagaano n'abantu bona mu Yerusaalemi okulangirira nti abaddu baweededdwa eddembe.

⁹ Buli muntu yenna yali atekwa okuta omuddu we Omwebbulaniya, abasajja n'abakazi; nga tewali n'omu alina kukuumira Muyudaaya munne mu busibe.

¹⁰ Abakungu bona n'abantu abaayingira mu ndagaano eno bakkiriziganya nti baali bakusumulula abaddu baabwe abasajja n'abakazi baleme kubakuumira mu buddu nate. Era ne babasumulula.

¹¹ Naye oluvannyuma ne bakyuka ne bazzaayo abaddu be baali bawadde eddembe.

¹² Ekigambo kya MUKAMA ne kijjira Yeremiya nti,

¹³ “Bw'ati bw'ayogera MUKAMA, Katonda wa Isirayiri nti, Nakola endagaano ne bajjajjammwe bwe nabaggya mu nsi y'e Misiri, mu nsi ey'obuddu. Nagamba nti,

¹⁴ ‘Buli mwaka ogw'omusanvu buli omu ku mmwe atekwa okuta Mwebbulaniya munne eyeetunda gy'ali. Bwakuweererezanga emyaka omukaaga, oteekwa okumuta agende.’ Naye bakitammwe tebampuliriza wadde okunfaako.

¹⁵ Emabegako mmwe mwennyini mwenenya ne mukola ekisaanidde mu maaso gange. Buli omu ku mmwe yalangirira eddembe eri abantu b'ensi ye, era ne mukola n'endagaano mu nnyumba yange eyitibwa Erinnya lyange.

¹⁶ Naye kaakano mwekyusizza ne mwonoona erinnya lyange; buli omu ku mmwe yeddiza abaddu abasajja n'abakazi be mwali mutadde bagende gye baali beeyagalidde. Mubawalirizza babeere abaddu bammwe nate.

¹⁷ “Noolwekyo, bw'ati bw'ayogera MUKAMA nti, Temujjondedde; temutadde bantu ba nsi yammwe. Kale kaakano nangirira ‘eddembe’ gye muli, bw'ayogera MUKAMA, ‘eddembe’, okuttibwa n'ekitala, ne kawumpuli n'enjala. Ndibafuula ekyenyinyalwa eri obwakabaka bwonna obw'oku nsi.

¹⁸ Abasajja abamenye endagaano yange ne batatuukiriza bweyamo buli mu ndagaano gye baakola mu maaso gange, nziya kubakolako ng'ennyana gye basalamu ebitundu ebibiri ne bayita wakati w'ebitundu byayo.

¹⁹ Abakulembeze b'omu Yuda ne Yerusaalemi, n'abakungu b'embuga ya kabaka, ne bakabona n'abantu bona ab'omu nsi abaatambulira wakati w'ebitundu by'ennyana,

²⁰ ndibawaayo eri abalabe baabwe abanoonya obulamu bwabwe. Emirambo gyabwe gya kufuuka mmere eri ebinyonyi eby'omu bbanga era n'eri ensolo ez'omu nsiko.

21 “Ndiwaayo Zeddekiya kabaka wa Yuda n’abakungu be bona eri abalabe baabwe ababanoonya okubatta, n’eri egghe lya kabaka w’e Babulooni, eribadde lizzeeyo emabega.

22 Njenda kuwa ekiragiro, bw’ayogera MUKAMA, era ndibakomyawo mu kibuga kino. Balikirwanyisa bakiwale, bakyokye. Era ndizikiriza ebibuga bya Yuda waleme kubaawo abibeeramu.”

Yeremiya 35

Abalekabu

1 Kino kye kigambo kya MUKAMA ekyajjira Yeremiya mu bufuzi bwa Yekoyakimu kabaka wa Yuda, mutabani wa Yosiya nga kigamba nti,

2 “Genda eri ekika eky’Abalekabu obayite bajje mu kimu ku bisenge mu nnyumba ya MUKAMA obawe envinnyo banywe.”

3 Awo ne ntwala Yaazaniya mutabani wa Yeremiya, mutabani wa Kabazziniya ne baganda be ne batabani be bona, ekika kyonna eky’Abalekabu.

4 Ne mbayingiza mu nnyumba ya MUKAMA, mu kisenge kya batabani ba Kanani mutabani wa Igudaliya omusajja wa Katonda. Kyali kiriraanye ekisenge kya bakungu, ekyali waggulu w’ekisenge kya Maaseya mutabani wa Sallumu omukuumi w’oluggi.

5 Ne nteeka ebibya ebijjudde envinnyo n’ebikopo ebimu mu maaso g’abasajja ab’ennyumba y’Abalekabu ne mbagamba nti, “Munywe ku nvinnyo.”

6 Naye ne baddamu nti, “Tetujja kunywa nvinnyo kubanga jjajjaffe Yonadabu mutabani wa Lekabu yatulagira nti, ‘Tewabanga n’omu ku mmwe wadde abaana bammwe anywanga envinnyo.

7 Era temuzimbanga ennyumba, wadde okusiganga ensigo wadde okusimba emizabbibu; temubanga na bintu bino byonna, naye mubeeranga mu weema zokka. Olwo munaawangaliranga mu nsi gye munaaberangamu.’

8 Twagondera ekiragiro kya jjajjaffe Yonadabu mutabani wa Lekabu kye yatulagira. Ffe wadde bakazi baffe wadde batabani baffe wadde bawala baffe tetunywangako ku nvinnyo,

9 oba okuzimba ennyumba okusulamu oba okuba n’ennimiro ez’emizabbibu, oba ebibanja oba ebirime.

10 Tusula mu weema era tugondedde bulambalamba byonna jjajjaffe Yonadabu bye yatulagira.

11 Naye Nebukadduneesa kabaka w’e Babulooni bwe yazinda ensi eno ne tugamba nti, ‘Tugende e Yerusaalemi tuwone egghe ery’Abakaludaaya n’ery’Abasuuli,’ kyetuvudde tubeera mu Yerusaalemi.”

¹²Awo ekigambo kya MUKAMA ne kijjira Yeremiya nti,

¹³“Bw’ati bw’ayogera MUKAMA ow’Eggye, Katonda wa Isirayiri nti, Genda ogambe abantu ba Yuda n’ab’omu Yerusaalemi nti, ‘Temuyinza kubaako kye muyiga, ne mugondera ebigambo byange?’

¹⁴Yonadabu mutabani wa Lekabu yalagira batabani be obutanywa nvinnyo n’ekiragiro kino kyakumibwa. Okutuusa ne leero tebanywa nvinnyo, kubanga baagondera etteeka lya jjajaabwe. Naye njogedde nammwe emirundi mingi, naye temujjondedde.

¹⁵Emirundi mingi, natuma abaddu bange bona bannabbi gye muli. Babagamba nti, “Buli omu ku mmwe ateekwa okuva mu makubo ge amabi akyuse ebikolwa bye, muleme kugoberera bakatonda balala okubaweereza, mulyoke mubeere mu nsi gye nabawa ne bajajammwe.” Naye temwanfaako wadde okumpuliriza.

¹⁶Ab’enda ya Yonadabu mutabani wa Lekabu baakuma ekiragiro jjajaabwe kye yabalagira, naye abantu bano tebañjondedde.’

¹⁷“Noolwekyo, bw’ati bw’ayogera MUKAMA Katonda ow’Eggye, Katonda wa Isirayiri nti, ‘Muwulirize, ḥnjenda kuleeta ku Yuda ne ku buli muntu yenna atuula mu Yerusaalemi buli kibonoobono kye naboogerako. Nayogera nabo, naye tebampuliriza; nabayita, naye tebanziramu.’”

¹⁸Awo Yeremiya n’agamba ennyumba y’Abalekabu nti, “Bw’ati bw’ayogera MUKAMA ow’Eggye, Katonda wa Isirayiri nti, ‘Mugondedde ekiragiro kya jjajaammwe Yonadabu ne mukwata byonna bye yabalagira ne mutuukiriza byonna bye yabagamba.’

¹⁹Noolwekyo, bw’ati bw’ayogera MUKAMA ow’Eggye, Katonda wa Isirayiri nti, ‘Yonadabu mutabani wa Lekabu talirema kuba na mwana we alimpeereza.’”

Yeremiya 36

Yekoyakimu Ayokya Ekiwandiiko kya Yeremiya

¹Mu mwaka ogwokuna ogw’obufuzi bwa Yekoyakimu mutabani wa Yosiya kabaka wa Yuda ekigambo kya MUKAMA ne kijjira Yeremiya nga kigamba nti,

²“Twala omuzingo gw’empapula oguwandiikeko ebigambo byonna bye njogedde naawe ebikwata ku Isirayiri, ne Yuda n’amawanga gonna okuva mu biseera bye natandika okwogera naawe okuva mu bufuzi bwa Yosiya okutuusa kaakano.

³Oboolyawo abantu ba Yuda bwe banaawulira ku bikangabwa bye ntegeka okubateekako, buli omu ku bo anaakyuka okuleka amakubo ge amabi, ndyoke mbasonyiwe ebibi byabwe n’obutali butuukirivu bwabwe.”

⁴ Awo Yeremiya n'ayita Baluki mutabani wa Neriya, era nga Yeremiya ayogera ebigambo byonna MUKAMA bye yali ayogedde naye, Baluki n'abiwandiika ku muzingo.

⁵ Awo Yeremiya n'agamba Baluki nti, "Nagaanibwa okugenda mu nnyumba ya MUKAMA.

⁶ Kale laga mu nnyumba ya MUKAMA ku lunaku olw'okusiiba osomere abantu ebigambo bya MUKAMA ebiri ku muzingo by'owandiise nga njogera. Bisomere abantu ba Yuda bona abava mu bibuga byabwe.

⁷ Oboolyawo banaaleeta okwegayirira kwabwe eri MUKAMA, era buli omu anaava mu makubo ge amabi, kubanga obusungu n'ekiruyi MUKAMA by'agambye okutuusa ku bantu bano binene nnyo."

⁸ Baluki mutabani wa Neriya n'akola byonna nnabbi Yeremiya bye yamugamba okukola; n'asomera, ebigambo bya MUKAMA okuva mu muzingo, mu yeekaalu ya MUKAMA.

⁹ Mu mwezi ogwomwenda ogw'omwaka ogwokutaano ogw'obufuzi bwa Yekoyakimu mutabani wa Yosiya kabaka wa Yuda, ekiseera eky'okusiibira mu maaso ga MUKAMA kyalangirirwa eri abantu bona mu Yerusaalemi era n'abo abaali bavudde mu bibuga bya Yuda.

¹⁰ Awo ng'abantu bona bawulira, Baluki n'asoma ebigambo bya Yeremiya okuva mu muzingo, mu nnyumba ya MUKAMA ng'ali mu kisenge kya Gemaliya mutabani wa Safani omuwandiisi, ekyali mu luggyga olw'ekyengulu, mu mulyango omuggya ogw'ennyumba ya MUKAMA ng'abantu bona bawulira.

¹¹ Mikaaya mutabani wa Gemaliya mutabani wa Safani bwe yawulira ebigambo bya MUKAMA byonna ebyali mu muzingo,

¹² n'agenda eri ennyumba y'omuwandiisi mu lubiri lwa kabaka, abakungu bona gye baali batudde: Erisaama omuwandiisi, ne Deraya mutabani wa Semaaya, ne Erunasani mutabani wa Akubooli, ne Gemaliya mutabani wa Safani, ne Zeddekiya mutabani wa Kananiya, n'abakungu bona abalala.

¹³ Mikaaya ng'ababuulidde byonna bye yali awulidde Baluki asomera abantu okuva ku muzingo,

¹⁴ abakungu bona ne batuma Yekudi mutabani wa Nesaniya, mutabani wa Seremiya mutabani wa Kuusi eri Baluki amugambe nti, "Leeta omuzingo gw'osomedde abantu, naawe ojje." Awo Baluki mutabani wa Neriya n'atwalira omuzingo mu mikono gye n'agubaleetera.

¹⁵ Ne bamugamba nti, "Tuula wansi, ogutusomere." Awo Baluki n'agubasomera.

¹⁶Bwe baawulira ebigambo ebyo byonna, buli omu n'atunula ku munne ng'atidde ne bagamba Baluki nti, "Tuteekwa okubuulira kabaka ebigambo bino byonna."

¹⁷Awo ne babuuza Baluki nti, "Tubuulire, wazze otya okuwandiika bino byonna? Yeremiya ye yabikugambye?"

¹⁸Baluki n'abaddamu nti, "Weewaawo ye yayogedde ebigambo bino byonna, nze ne mbiwandiika ne bwino ku muzingo."

¹⁹Awo abakungu bona ne bagamba Baluki nti, "Ggwe ne Yeremiya mugende mwekweke. Temukkiriza muntu yenna kumanya gye muli."

²⁰Bwe baamala okutereka omuzingo mu kisenge kya Erisaama omuwandiisi, ne bagenda eri kabaka mu luggyaa ne bamutegeeza byonna.

²¹Kabaka n'atuma Yekudi okuleeta omuzingo, Yekudi n'aguleeta okuva mu kisenge kya Erisaama omuwandiisi agusomere kabaka n'abakungu bona abaali bamuyimiridde ku lusegere.

²²Gwali mwezi gwa mwenda ne kabaka yali atudde mu nnyumba etuulwamu mu budde obw'obutiti, ng'omuliro gwakira mu kibya kyagwo mu maaso ge.

²³Buli Yekudi lwe yasomangako empapula ssatu oba nnya ez'omuzingo, kabaka ng'azisala n'akambe k'omuwandiisi n'azisuula mu muliro okutuusa omuzingo gwonna lwe gwajjiira mu muliro.

²⁴Kabaka n'abantu bona abaawulira ebigambo bino tebaatya, wadde okuyuza engoye zaabwe.

²⁵Newaakubadde nga Erunasani, ne Deraaya ne Gemaliya beegayirira kabaka obutayokya muzingo, teyabawuliriza.

²⁶Naye kabaka yalagira Yerameeri mutabani wa kabaka ne Seraya mutabani wa Azulyeri ne Seremiya mutabani wa Abudeeri okukwata Baluki omuwandiisi ne nnabbi Yeremiya, wabula MUKAMA ng'abakwese.

²⁷Kabaka ng'amaze okwokya omuzingo ogwalimu ebigambo Baluki bye yali awandiise nga Yeremiya abyogera, ekigambo kya MUKAMA ne kijjira Yeremiya nti,

²⁸"Twala omuzingo omulala oguwandiikeko ebigambo byonna ebyali ku muzingo ogwasooka, Yekoyakimu kabaka wa Yuda gwe yayokya.

²⁹Gamba ne Yekoyakimu kabaka wa Yuda nti, 'Bw'ati bw'ayogera MUKAMA nti, Wayokya omuzingo ogwo n'ogamba nti, "Lwaki wakiwandiikamu nti kabaka w'e Babulooni alija azikiririze ddala ensi eno agimalemu abantu n'ensolo?"

30 Noolwekyo bw'ati bw'ayogera MUKAMA eri Yekoyakimu kabaka wa Yuda nti, Tajja kubeera na muntu n'omu kutuula ku ntebe ya Dawudi, n'omulambo gwe gulisuulibwa ebweru gwanikibwe mu musana emisana ne mu butiti ekiro.

31 Ndimubonereza n'abaana be, ne bakalabaalaba be olw'okwonoona kwabwe. Ndimuleetako ne bona ababeera mu Yerusaalemi ne bona ababeera mu Yuda buli kibonoobono kye nabogerako, kubanga tebawulirizza.' "

32 Olwo Yeremiya n'atwala omuzingo omulala n'aguwa omuwandiisi Baluki mutabani wa Neriya; nga Yeremiya ayogera, Baluki yawandiikamu ebigambo byonna ebyali mu muzingo guli Yekoyakimu kabaka wa Yuda gwe yayokya mu muliro. N'ebigambo bingi ebifaanana bwe bityo byayongerwamu.

Yeremiya 37

Yeremiya asibibwa mu Kkomera

1 Nebukadduneeza kabaka w'e Babulooni n'afuula Zeddekiya mutabani wa Yosiya kabaka wa Yuda okuba kabaka wa Yuda mu kifo kya Koniya mutabani wa Yekoyakimu.

2 Wabula ye wadde abakungu be waddeabantu ab'omu nsi tebaafaayo ku bigambo MUKAMA bye yali ayogedde ng'ayita mu nnabbi Yeremiya.

3 Wabula kabaka Zeddekiya n'atuma Yekukaali mutabani wa Seremiya ne Zeffaniya mutabani wa Maaseya kabona eri nnabbi Yeremiya, bamutegeeze nti, "Tusabire eri MUKAMA Katonda waffe."

4 Awo Yeremiya yali alina eddembe okujja nga bw'ayagala mu bantu, kubanga yali tannaba kuteekewa mu kkomera.

5 Egghe lya Falaawo lyali livudde e Misiri era Abakaludaaya abaali balumbye Yerusaalemi bwe baakiwulira, ne bava e Yerusaalemi.

6 Awo ekigambo kya MUKAMA ne kijjira nnabbi Yeremiya nga kigamba nti,

7 "Bw'ati bw'ayogera MUKAMA, Katonda wa Isirayiri nti, Mugambe kabaka wa Yuda eyabatumye okunnebuuzako nti, 'Egghe lya Falaawo erizze okubayambako, liija kuddayo mu nsi yaalyo e Misiri.'

8 Abakaludaaya bakomewo balumbe ekibuga kino; bajja kukiwamba bakyokye.'

9 "Bw'ati bw'ayogera MUKAMA nti, Temwerimbarimba nga mulowooza nti, 'Abakaludaaya ddala baakutuleka.' Tebajja kubaleka.

10 Wadde nga mwandiwangudde, egghe lyonna erya Babulooni eribalumbye, abatuusiddwako ebisago bokka nga be basigadde mu weema zaabwe, bandivuddeyo ne bookya ekibuga kino."

¹¹Awo eggye ly'Abakaludaaya nga livudde mu Yerusaalemi olw'eggye lya Falaawo,

¹²Yeremiya n'ava mu kibuga agende mu bitundu bya Benyamini afune omugabo gwe ogw'ebintu mu bantu eyo.

¹³Naye bwe yatuuka ku mulyango gwa Benyamini, Omukulu w'abaserikale eyali ayitibwa Iriya mutabani wa Seremiya mutabani wa Kananiya n'amukwata n'agamba nti, "Ogenda kwegatta ku Bakaludaaya!"

¹⁴Yeremiya n'amuddamu nti, "Ompayiriza! Sigenda kusenga Bakaludaaya." Nayé Iriya n'atamuwliriza; n'akwata Yeremiya n'amutwala eri abakungu.

¹⁵Baanyiigira Yeremiya ne bamukuba ne bamusibira mu nnyumba ya Yonasaani omuwandiisi, gye baali bafudde ekkomera.

¹⁶Yeremiya yateekebwa mu kasenge akaali mu kkomera mwe yamala ebbanga eddene.

¹⁷Awo kabaka Zeddekiya n'amutumya n'amuleeta mu lubiri gye yamubuuliza mu kyama nti, "Olinayo ekigambo kyonna okuva eri MUKAMA?" Yeremiya n'addamu nti, "Weewaawo, ojja kuweebwayo eri kabaka w'e Babulooni."

¹⁸Awo Yeremiya n'agamba Kabaka Zeddekiya nti, "Musango ki gwe nzizizza gy'oli oba eri abakungu bo obaabantu bano; mulyoke munteeke mu kkomera?

¹⁹Bannabbi bo baluwa abakulagula nti, 'Kabaka w'e Babulooni tajja kukulumba ggwe wadde ensi eno?

²⁰Naye kaakano mukama wange kabaka nsaba owulirize, nkwegayirira, tonzizaayo mu nnyumba ya Yonasaani omuwandiisi, kuba nandifiira eyo.'

²¹Kabaka Zeddekiya n'alyoka alagira Yeremiya okutekebwa mu luggyia lw'abakuumi n'aweebwanga omugaati buli lunaku okuva ew'omufumbi waagyo mu Yerusaalemi, okutuusa emigaati lwe gyaggwa mu kibuga. Awo Yeremiya n'asigala mu luggyia lw'abaserikale abakuumi.

Yeremiya 38

Yeremiya Asuulibwa mu Kinnya

¹Awo Sefatiya mutabani wa Mattani ne Gedaliya mutabani wa Pasukuli ne Yukali mutabani wa Malukiya ne bawulira ebigambo Yeremiya bye yali agambaabantu bona nti,

²"Bw'ati bw'ayogera MUKAMA nti, 'Buli muntu anaasigala mu kibuga kino aija kufa ekitala, enjala oba kawumpuli, naye buli afuluma n'agenda eri Abakaludaaya aija kuba mulamu.'

³Era bw'ati bw'ayogera MUKAMA nti, ‘Ekyamazima ekibuga kino kya kuweebwayo eri eggye lya kabaka w'e Babulooni; anaakiwamba.’”

⁴Awo abakungu ne bagamba kabaka nti, “Omusajja ono asaana kuttibwa. Amalamu abaserikale abasigadde mu kibuga amaanyi, era n'abantu bonne, olw'ebintu by'abagamba. Omuntu ono tanoonya bulungi bw'abantu naye kuzikirizibwa kwabwe.”

⁵Kabaka Zeddekiya n'addamu nti, “Ali mu mikono gyammwe, siyinza kubawakanya.”

⁶Awo ne batwala Yeremiya ne bamuteeka mu kinnya kya Malukiya mutabani wa kabaka ekyali mu luggya lw'abakuumi. Yeremiya ne baamussaayo n'emiguwa mu kinnya. Tekyalimu mazzi wabula ebitosi, era omwo Yeremiya mwe yabbika.

⁷Naye Ebedumeleki Omuwesiyopya omu ku balaawe b'omu lubiri lwa kabaka bwe yawulira nga batadde Yeremiya mu kinnya, nga ne kabaka atudde ku mulyango gwa Benyamini,

⁸Ebedumeleki n'ava mu lubiri n'agenda eri kabaka n'amugamba nti,

⁹“Mukama wange kabaka, abantu bano bakoze bubi mu byonna bye bakoze nnabbi Yeremiya okumusuula mu kinnya, gy'anafiira enjala nga tekyali mugaati gwonna mu kibuga.”

¹⁰Awo kabaka n'alagira Ebedumeleki Omuwesiyopya nti, “Twala abasajja amakumi asatu okuva wano musitule nnabbi Yeremiya okuva mu kinnya nga tannafa.”

¹¹Awo Ebedumeleki n'atwala abasajja ne bagenda mu kisenge wansi w'etterekero ly'ensimbi mu lubiri. Nakwata ebigoye ebimu ebikadde n'engoye enziinaziina n'abissa awamu n'emiguwa eri Yeremiya mu kinnya.

¹²Ebedumeleki Omuwesiyopya n'agamba Yeremiya nti, “Teeka ebigoye bino ebikadde wansi w'enkwawa zo okunyweza emiguwa wansi w'emikono gyo.” Yeremiya n'akola bw'aty.

¹³Ne bamusikayo n'emiguwa ne bamuggyga mu kinnya. Yeremiya n'asigala mu luggya lw'abakuumi.

Zeddekiya Addamu Okubuuza Yeremiya

¹⁴Kabaka Zeddekiya n'atumya nnabbi Yeremiya bamuleete ku mulyango ogwokusatu ogwa yeekaalu ya MUKAMA. Kabaka n'agamba Yeremiya nti, “Nnina kye njenda okukubuuza. Tobaako ky'onkweka.”

¹⁵Yeremiya n'agamba Zeddekiya nti, “Bwe nnaakuddamu tonzite? Ne bwe nnaakuwa amagezi tojja kumpuliriza.”

¹⁶ Naye kabaka Zeddekiya n'alayira ekirayiro mu kyama eri Yeremiya nti, "Nga Katonda bw'ali omulamu, eyatuwa omukka gwe tussa, sijja kukutta wadde okukuwaayo eri abo abanoonya okukutta."

¹⁷ Awo Yeremiya n'agamba Zeddekiya nti, "Bw'ati bw'ayogera MUKAMA Katonda ow'Eggye, Katonda wa Isirayiri nti, 'Singa weewaayo eri abakungu ba kabaka w'e Babulooni, ojja kukuumbwa bulungi tootuukibweko kabi konna, n'ekibuga kino tekija kwokebwa; ggwe n'ab'omu maka go munaabeera balamu.'

¹⁸ Naye bw'oteweeyo eri abakungu ba kabaka w'e Babulooni, ekibuga kino kijja kuweebwayo eri Abakaludaaya bakyokye; nawe wennyini tojja kubawona.'

¹⁹ Kabaka Zeddekiya n'agamba Yeremiya nti, "Ntya Abayudaaya abaddukidde mu Babulooni, kubanga Abakaludaaya bayinza okumpaayo gye bali ne bambonyaabonya."

²⁰ Yeremiya n'amuddamu nti, "Tebaakuweeyo. Ggwe gondera MUKAMA Katonda ng'okola kye nkugamba. Olwo binaakugendera bulungi, nawe tojja kuttibwa.

²¹ Naye bwonoogaana okwewaayo, kino MUKAMA kyandaze:

²² Abakazi bona abasigadde mu lubiri lwa kabaka wa Yuda bajja kuleetebwa eri abakungu ba kabaka w'e Babulooni, bakugambe nti, "'Mikwano gyo gye weesiga baakubuzaabuza ne bakuwangula. Kaakano otubidde mu ttosi. Mikwano gyo gikudduseeko.'

²³ "Bakazi bo n'abaana bo bona balireetebwa eri Abakaludaaya. Ggwe kennyni tojja kubasumattuka ojja kukwatibwa kabaka w'e Babulooni; n'ekibuga kino kijja kwokebwa."

²⁴ Awo Zeddekiya n'agamba Yeremiya nti, "Tobuulirako muntu n'omu ku bye twogedde, bw'onookikola ojja kufa.

²⁵ Abakungu bwe banaawulira nti wayogeddeko nange ne bajja ne bakubuuza nti, 'Tubuulire kye wagambye kabaka ne kabaka kye yakuzeemu, totukweka kintu kyonna sikulwa nga tukutta,'

²⁶ bagambe nti, 'Mbadde neegayirira kabaka aleme kunzizaayo eri mu nnyumba ya Yonasaani okufiira eyo.'

²⁷ Abakungu bona ne bajja eri Yeremiya okumubuuza, n'abaddamu byonna nga kabaka bye yamulagira okwogera. Ne bataddayo ku mubuuza kintu kyonna, kubanga tewaali n'omu eyali awulidde bye yali ayogedde ne kabaka.

²⁸ Yeremiya n'asigala mu luggyia lw'abakuumi okutuusa olunaku Yerusaalemi lwe kyawambibwa.

Okugwa kwa Yerusaalemi

Yerusaalemi bwe kitit bwe kyawambibwa:

Yeremiya 39

- ¹ Mu mwaka ogwomwenda ogw'obufuzi kwa Zeddekiya kabaka wa Yuda, mu mwezi ogw'ekkumi, Nebukadduneeza kabaka w'e Babulooni, n'alumba Yerusaalemi, n'eggye lye lyonna, n'akizingiza.
- ² Ku lunaku olw'omwenda olw'omwezi ogwokuna ogw'omwaka ogw'ekkumi n'ogumu ogw'obufuzi kwa Zeddekiya, ekisenge ky'ekibuga kyabotolwa.
- ³ Awo Nerugalusalezeeri, ne Samugaluneebo, ne Salusekimu, ne Labusalisi, ne Nerugalusalezeeri, ne Labumagi, n'abakungu abalala bona abaka w'e Babulooni ne bajja ne batuula mu mulyango ogwa wakati ogwa Yerusaalemi.
- ⁴ Awo Zeddekiya kabaka wa Yuda n'abaserikale be bona bwe babalaba ne bava mu kibuga kiro ne badduka; ne bayita mu nnimiro ya kabaka, nga bayita mu mulyango wakati w'ebisenge ebibiri, ne boolekera Alaba.
- ⁵ Naye egghe ly'Abakaludaaya ne libagoba ne lisanga Zeddekiya mu nsenyi ez'e Yeriko, ne bamuwamba, ne bamuleeta eri kabaka Nebukadduneeza ow'e Babulooni e Libuna mu nsi y'e Kamasi; n'amusalira eyo omusango.
- ⁶ Kabaka w'e Babulooni n'attira batabani ba Zeddekiya mu maaso ga kitaabwe e Libuna, era kabaka w'e Babulooni n'atta abakungu ba Yuda bona.
- ⁷ Nebukadduneeza n'aggyamu Zeddekiya amaaso, n'amusiba mu masamba n'amutwala e Babulooni.
- ⁸ Abakaludaaya ne bookya ennyumba ya kabaka n'ennyumba z'abantu, ne bamenya n'ebisenge bya Yerusaalemi.
- ⁹ Awo Nebuzaladaani omuduumizi w'eggye n'atwala abantu abaali basigaddewo mu kibuga, n'abo abaali bamwegasseeko, n'abo abaali basigaddewo mu bifo ebirala, e Babulooni.
- ¹⁰ Nebuzaladaani omuduumizi w'eggye, n'aleka abamu ku bantu abaavu abaali batalina kantu, mu nsi ya Yuda; n'abawa ebibanja n'ennimiro z'emizabbibu.
- ¹¹ Awo Nebukadduneeza kabaka w'e Babulooni yali awadde Nebuzaladaani omuduumizi w'eggye lya kabaka w'e Babulooni, ebiragiro bino ebikwata ku Yeremiya ng'amugamba nti,
- ¹² "Mmutwale omulabirire: tomubonyaabonya wabula mukolere byonna by'ayagala."
- ¹³ Awo Nebuzaladaani omuduumizi w'eggye, ne Nebusazibaani omukungu ow'oku ntikko ne Nerugalusalezeeri, ne Labumagi, n'abakungu bona abaka w'e Babulooni,

¹⁴ne batumya ne baggya Yeremiya mu luggya lw'abaserikale. Ne bamukwasa Gedaliya mutabani wa Akikamu, mutabani wa Safani, amuzzeeyo ewaabwe. Olwo n'asigala n'abantu be.

¹⁵Yeremiya bwe yali asibiddwa mu luggya lw'abaserikale abakuumi, ekigambo kya MUKAMA ne kimujjira nga kigamba nti,

¹⁶“Genda ogambe Ebedumeleki Omuwesiyopya nti, ‘Bw’ati bw’ayogera MUKAMA ow’Eggie, Katonda wa Isirayiri nti, Nnaatera okutuukiriza ebigambo byange eri ekibuga kino nga nkozesza ebibonoobono, si kukulaakulana. Mu biseera ebyo birituukirizibwa nga mulaba n’amaaso gammwe.

¹⁷Naye ndikuwonya ku lunaku olwo,’ bw’ayogera MUKAMA; ‘toliweebwayo eri abo b’otya.

¹⁸Ndikuwonya; tolittibwa, olisigala ng’oli mulamu, kubanga onneesiga, bw’ayogera MUKAMA.’”

Yeremiya 40

¹Ekigambo kya MUKAMA ne kijjira Yeremiya, nga Nebuzaladaani omuduumizi w’abambowa amusumuludde e Laama, bwe yamusanga ng’asibiddwa mu masamba n’abasibe abalala bona ab’e Yerusaalemi ne Yuda abaali batwalibwa e Babulooni mu busibe.

²Omuduumizi w’abaserikale yatwala Yeremiya n’amugamba nti, “MUKAMA Katonda wo, ye yaleeta ekivume kino ku kifo kino.

³Kaakano MUKAMA akireese era akikoze nga bwe yasuubiza. Bino byonna byabaawo kubanga abantu bo baasobya eri MUKAMA ne batamugondera.

⁴Naye leero nkusumulula okuva mu njegere ez’oku mikono gyo. Jjangu tugende ffembi e Babulooni obanga oyagala, nnaakulabirira; naye bw’oba nga toyagala, tojja. Laba, ensi yonna eri mu maaso go, genda yonna gy’oyagala.”

⁵Wabula Yeremiya nga tannaba kukyuka kugenda, Nebuzaladaani n’ayongerako nti, “Ddayo eri Gedaliya mutabani wa Akikamu mutabani wa Safani, kabaka w’e Babulooni gw’afudde Gavana w’ebibuga bya Yuda, obeere naye mu bantu, oga genda yonna gy’osiima okubeera.” Awo omuduumizi w’abambowa n’amuwa ebyokulya n’ekirabo n’amuleka.

⁶Awo Yeremiya n’agenda ewa Gedaliya mutabani wa Akikamu e Mizupa n’abeera naye n’abantu abaaliyo abaali balekeddwa mu nsi eyo.

Gedaliya Attibwa

⁷Awo abakulu b’eggie lya Yuda bona n’abasajja baabwe abaali bakyali mu byalo ne bawulira nti, Kabaka w’e Babulooni alonze Gedaliya omwana wa Akikamu okuba Gavana w’ensi era ng’amuwadde obuvunaanyizibwa bw’abantu

bonna, abasajja, n'abakazi, n'abaana, n'abaali basembayo obwavu mu nsi abataatwalibwa mu buwaŋjanguse e Babulooni.

⁸Awo Isimayiri mutabani wa Nesaniya, ne Yokanaani ne Yonasaani batabani ba Kaleyia, ne Seraya mutabani wa Tanukumesi, ne batabani ba Efayi Omunetofa, ne Yezaniya omwana w'omu Maakasi, ne bagenda n'abasajja baabwe eri Gedaliya e Mizupa.

⁹Awo Gedaliya mutabani wa Akikamu mutabani wa Safani n'abalayirira bo n'abasajja baabwe ng'ayogera nti, "Temutya kuweereza Bakaludaaya. Mubeere mu nsi, muweereze kabaka w'e Babulooni munaaba bulungi.

¹⁰Nze kennyini nzija kusigala e Mizupa okubakiikirira eri Abakaludaaya abajja gye tuli, naye mmwe mukungule emizabbibu, n'ebibala eby'omu kyeya, mukunjjaanye n'omuzigo mubiteeke mu materekero gammwe, mubeere mu bibuga bye mufuga."

¹¹Awo Abayudaaya bona mu Mowaabu, ne Amoni, ne Edomu n'ensi endala zonna bwe baawulira nti, Kabaka w'e Babulooni yali aleseeyo abantu mu Yuda era nga ataddewo Gedaliya mutabani wa Akikamu, mutabani wa Safani okuba Gavana waabwe,

¹²bonna ne bakomawo mu nsi ya Yuda eri Gedaliya e Mizupa, ne bava mu nsi zonna gye baali basaasaanidde. Ne bakungula ebirime mu bungi, emizabbibu n'ebibala eby'omu kyeya.

¹³Awo Yokanaani mutabani wa Kaleyia n'abakulu bona ab'ebibinja bya magye abaali mu byalo ne bajja eri Gedaliya e Mizupa.

¹⁴Ne bamugamba nti, "Tomanyi nga Baalisi kabaka w'abaana ba Amoni atumye Isimayiri mutabani wa Nesaniya okukutta?" Naye Gedaliya mutabani wa Akikamu teyakikkiriza.

¹⁵Awo Yokanaani mutabani wa Kaleyia n'ayogera ne Gedaliya e Mizupa kyama ng'agamba nti, "Ka njende nkwegayiride nzite Isimayiri mutabani wa Nesaniya, so tewaliba muntu alikimanya. Lwaki akutta, Abayudaaya bona abakuŋjaanidde gy'oli basaasaane, ekitundu kya Yuda ekifisseewo nakyo kizikirire?"

¹⁶Naye Gedaliya mutabani wa Akikamu n'agamba Yokanaani mutabani wa Kaleyia nti, "Tokola kintu bwe kityo! Ky'oyogera ku Isimayiri si kituufu."

Yeremiya 41

¹Mu mwezi ogw'omusanvu Isimayiri mutabani wa Nesaniya, mutabani wa Erisaama, omu ku balangira ate nga ye omu ku bakulu b'eggye lya Yuda n'ajja n'abasajja kkumi eri Gedaliya mutabani wa Akikamu e Mizupa. Bwe baali nga balya,

²Isimayiri mutabani wa Nesaniya n'abasajja ekkumi abaali naye ne bayimuka ne batta Gedaliya, mutabani wa Akikamu, mutabani wa Safani, n'ekitala, gavana, kabaka w'e Babulooni gwe yali ataddewo okufuga mu nsi.

³Isimayiri n'atta n'Abayudaaya bona abaali ne Gedaliya e Mizupa, n'abaserikale Abakaludaaya abaaliyo.

⁴Olunaku olwaddirira Gedaliya ng'amaze okuttibwa, nga tewannabaawo akimanyiiko,

⁵abasajja kinaana abaali beemwedde ebirevu, nga bayuzizza engoye zaabwe era nga beesazeesaze, bajja okuva e Sekemu, ne Siiro ne Samaliya, nga baleese ekiweebwayo eky'emmere ey'empeke n'obubaane eby'omu nnyumba ya MUKAMA.

⁶Isimayiri omwana wa Nesaniya n'ava e Mizupa okubasisinkana ng'agenda bw'akaaba. Bwe yabatuukako, n'abagamba nti, "Mujje eri Gedaliya omwana wa Akikamu."

⁷Bwe baatuuka mu kibuga, Isimayiri mutabani wa Nesaniya n'abasajja be ne batta abamu ku basajja abo, ne babasuula mu kinnya.

⁸Naye kkumi ku bo ne bagamba Isimayiri nti, "Totutta! Tulina ejjaano ne sayiri, n'omuzigo, n'omubisi gw'enjuki, tubikwese mu nnimiro." Awo ne babaleka ne batabattira wamu na bali abalala.

⁹Ekinnya mwe baasuula emirambo gy'abasajja bona be battira awamu ne Gedaliya, kye kiri kabaka Asa kye yali asimye ng'alwanyisa Baasa kabaka wa Isirayiri. Isimayiri mutabani wa Nesaniya yakijuza abafu.

¹⁰Isimayiri n'awamba abantu bona abalala abaali e Mizupa, abawala ba kabaka n'abalala bona abaali basigaddeyo, Nebuzaladaani omuduumizi w'eggye lyabaka Nebukadduneeza be yali awadde Gedaliya mutabani wa Akikamu. Isimayiri mutabani wa Nesaniya n'abatwala nga bawambe ne yeetegeka okubasomosa okubatwala eri Abamoni.

¹¹Yokanaani mutabani wa Kaleya n'abaduumizi bona abaali naye bwe baawulira ebikolobero Isimayiri mutabani wa Nesaniya bye yali akoze,

¹²ne batwala abasajja baabwe bona ne bagenda okulwanyisa Isimayiri mutabani wa Nesaniya. Ne bamutuukako okumpi n'amazzi amangi e Gibyon.

¹³abantu bona abaali ne Isimayiri bwe baalaba Yokanaani mutabani wa Kaleya n'abaduumizi ba magye be yali nabo, ne basanyuka.

¹⁴abantu bona Isimayiri be yali awambye e Mizupa ne bakyuka ne bagenda eri Yokanaani mutabani wa Kaleya.

¹⁵Naye Isimayiri mutabani wa Nesaniya ne basajja be munaana ne batoloka okuva ku Yokanaani ne bagenda mu ba Amoni.

¹⁶Awo Yokanaani mutabani wa Kaleywa n'abaduumizi b'eggye bonaabaali naye ne batwala abawambe okuva e Mizupa be baali baggye ku Isimayiri mutabani wa Nesaniya ng'amaze okutta Gedaliya mutabani wa Akikamu: abaserikale, n'abakazi, n'abaana n'abakungu b'omu lubiri be yali aggye e Gibyon.

¹⁷Ne beeyongerayo ne bayimirirako e Gerusukimamu okumpi ne Besirekemu, nga boolekedde e Misiri,

¹⁸badduke Abakaludaaya. Baali batidde Abakaludaaya kubanga Isimayiri mutabani wa Nesaniya yali asse Gedaliya mutabani wa Akikamu, oyo kabaka w'e Babulooni gwe yali ataddewo okufuga ensi nga gavana.

Yeremiya 42

¹Awo abaduumizi ba magye bona, ng'ogasseecko Yokanaani mutabani wa Kaleywa ne Yezaniya mutabani wa Kosaaya, n'abantu bona okuva ku asokerwako wansi okutuuka ku akomererayo waggulu baatuukirira

²nnabbi Yeremiya ne bamugamba nti, "Tukwegayiridde, wulira okusaba kwaffe osabe MUKAMA Katonda wo ku lw'abantu bano bona abafisseewo. Kale naawe nga bw'olaba, abaali abangi kaakano tusigaddewo batono nnyo.

³Saba MUKAMA Katonda wo atubuulire gye tusaanye okulaga ne kye tusaanye okukola."

⁴Nnabbi Yeremiya n'abagamba nti, "Mbawulidde, ddala nzija kubasabira eri MUKAMA Katonda wammwe nga bwe munsabye; nzija kubabuulira byonna MUKAMA by'anaanjamba, sirina kye nnaabakisa."

⁵Awo ne bagamba Yeremiya nti, "MUKAMA abeere omujulirwa ow'amazima era omwesigwa gye tuli, bwe tutalikola kyonna MUKAMA Katonda wo ky'anaakutuma okutugamba.

⁶Oba kyangu oba kikalubo tujja kugondera MUKAMA Katonda waffe, gye tukutuma kaakano, tulyoke tufune emirembe, kubanga tujja kugondera MUKAMA Katonda waffe."

⁷Bwe waayitawo ennaku kkumi ekigambo kya MUKAMA ne kijjira Yeremiya.

⁸N'alyoka ayita Yokanaani omwana wa Kaleywa n'abaduumizi b'eggye lya Yuda bona abaali naye, n'abantu bona okuva ku asokerwako wansi okutuuka ku akomererayo waggulu.

⁹N'abagamba nti, "Bw'ati bw'ayogera MUKAMA, Katonda wa Isirayiri, gye mwantuma okubabuuliza nti,

¹⁰‘Bwe munaasigala mu nsi eno, nzija kubazimba era siibaleke kugwa. Nzija kubasimba so si kubasimbula, kubanga nnumiddwa olw’ekikangabwa kye mbatuusizzaako.

¹¹Temutya kabaka w’e Babulooni, kaakano gwe mutya. Temumutya, bw’ayogera MUKAMA, kubanga ndi nammwe era nzija kubalokola, mbanunule mu mukono gwa kabaka oyo.

¹²Nzija kubalaga ekisa alyoke abakwatirwe ekisa, abakomyewo mu nsi yammwe.’

¹³“Wabula bwe mugamba nti, ‘Tetuusigale mu nsi eno gye mbakomezzaamu,’ olwo munaaba temugondedde MUKAMA Katonda wammwe.

¹⁴Bwe mugamba nti, ‘Nedda, tujja kugenda tubeere e Misiri, gye tutaalabe ntalo wadde okuwulira ekkondeere nga livuga oba okubulwa omugaati ogw’okulya,’

¹⁵kale nno muwulire ekigambo kya MUKAMA, mmwe abaasigalawo mu Yuda. Bw’ati bw’ayogera MUKAMA ow’Eggie, Katonda wa Isirayiri nti, ‘Bwe munaamalirira okugenda e Misiri era ne mugenda okubeererayo ddala,

¹⁶olwo ekitala kye mutya kijja kubasanga eyo, n’enjala gye mutya ejja kubagoberera e Misiri era eyo gye mulifiira.

¹⁷Mumanyire ddala nti, Abo bona abamaliridde okugenda e Misiri okusenga eyo balifa kitala, n’enjala ne kawumpuli; tewaliba n’omu alisigalawo wadde okuwona ekikangabwa kye ndibaleetako.’

¹⁸Bw’ati bw’ayogera MUKAMA ow’Eggie, Katonda wa Isirayiri nti, ‘Ng’obusungu bwange n’ekiruyi bwe bifukiddwa ku abo abali mu Yerusaalemi, bwe kityo ekiruyi kyange bwe kinaafukibwa ku mmwe bwe munaagenda e Misiri. Munaabeera kya kukolimirwa, era kya ntiisa, era kya kusalirwa musango era kivume: temuliraba kifo kino nate.’

¹⁹“Mmwe abafisseewo ku Yuda, MUKAMA abagambye nti, ‘Temugenda Misiri.’ Mumanye kino nga mbalabula leero

²⁰nti, Mwakola ekisobyo kinene bwe mwantuma eri MUKAMA Katonda wammwe ne mugamba nti, ‘Tusabire eri MUKAMA Katonda waffe: tubuulire byonna by’agamba tujja kubikola.’

²¹Mbabuulidde leero, naye era temugondedde MUKAMA Katonda wammwe mu byonna bye yantuma okubagamba.

²²Kale nno mutegeerere ddala kino nga mulittibwa na kitala, oba njala oba kawumpuli mu nsi gye mwagala okugenda okusengamu.”

Yeremiya 43

¹ Yeremiya bwe yamala okutegeeza abantu ebigambo byonna MUKAMA Katonda waabwe bye yamutuma okubagamba,

² Azaliya mutabani wa Kosaaya ne Yokanaani mutabani wa Kaleyia n'abasajja bona ab'amalala ne bagamba Yeremiya nti, "Olimba! MUKAMA Katonda wo takutumye kugamba nti, 'Temugenda Misiri kusenga eyo.'

³ Naye Baluki mutabani wa Neriya y'akusendasenda otugabule mu mukono gw'Abakaludaaya, batutte oba batutwale mu buwanjanguse e Babulooni."

⁴ Awo Yokanaani mutabani wa Kaleyia n'abaduumizi ba magye bona n'abantu bona ne bajeemera ekiragiro kya MUKAMA eky'okusigala mu nsi ya Yuda.

⁵ Yokanaani mutabani wa Kaleyia n'abaduumizi ba magye ga Yuda bona ne bakulembera abantu ba Yuda abaali basigaddewo nga bakomyewo okuva mu mawanga gonna gye baali baddukidde okubeera mu nsi ya Yuda.

⁶ Ne batwala n'abasajja bona, n'abakazi n'abaana n'abawala ba kabaka, Nebuzaladaani omuduumizi w'eggye lya kabaka w'e Babulooni be yali alekedde Gedaliya mutabani wa Akikamu, mutabani wa Safani, ne nnabbi Yeremiya ne Baluki mutabani wa Neriya.

⁷ Awo ne bayingira e Misiri nga bajeemedde MUKAMA, ne bagenda okutuukira ddala e Tapaneese.

⁸ Bwe baba bali e Tapaneese, ekigambo kya MUKAMA ne kijjira Yeremiya nti,

⁹ "Twala amayinja amanene ogaziike mu bbumba mu lubalaza olw'amatoffaali ku mulyango gw'olubiri lwa Falaawo e Tapaneese, ng'Abayudaaya bona balaba.

¹⁰ Obagambe nti, 'Bw'ati bw'ayogera MUKAMA ow'Eggye, Katonda wa Isirayiri nti, Nditudya omuddu wange Nebukadduneeza kabaka w'e Babulooni, era nditeeka entebe ye ey'obwakabaka ku mayinja gano ge nziise wano. Ku go kwalikuba eweema ye ey'obwakabaka.

¹¹ Alija n'alumba Misiri, atte abo ab'okufa, awambe n'abo ab'okuwambibwa, n'ab'okuttibwa n'ekitala battibwe n'ekitala.

¹² Alikoleeza omuliro ku masabo ga bakatonda b'e Misiri, n'abatwala mu busibe nga alese amasabo gaabwe agookezza. Ng'omulunzi w'endiga bwe yeezingirira ekyambalo kye, bw'atyo bw'alyezingirira ensi y'e Misiri n'avaayo nga tewali kabi konna kamtuuseeko.

¹³ Alimenyamenya empagi ezaawongebwa mu ssabo ly'enjuba mu Misiri, n'ayokya n'amasabo ga bakatonda b'e Misiri.'"

Yeremiya 44

¹ Ewigambo ne kijjira Yeremiya ekikwata ku Bayudaaya bona abaali mu nsi y'e Misiri e Migudooli n'e Tapaneese n'e Noofu ne mu nsi ey'e Pasuloosi nga kigamba nti,

² "Bw'ati bw'ayogera MUKAMA ow'Eggye, Katonda wa Isirayiri nti, Mwalaba ekikangabwa ekinene kye naleeta ku Yerusaalemi ne ku bibuga byonna ebya Yuda. Leero matongo

³ olw'ebibi bye baakola. Bankwasa obusungu olw'okwotereza bakatonda abalala obubaane n'okusinza, bo newaakubadde mmwe wadde bajajjammwe be batamanyangako.

⁴ Emirundi mingi natuma abaddu bange bannabbi, abaabagamba nti, 'Temukola bintu bino eby'omuzizo bye nkyawa!'

⁵ Naye tebaawulira wadde okufaayo; tebaalekayo mpisa zaabwe embi wadde okulekayo okwotereza bakatonda abalala obubaane.

⁶ Noolwekyo, obusungu bwange obungi ennyo kyebwava bubabuubuukira; ne buzinda ebibuga bya Yuda n'enguudo za Yerusaalemi era ne bifuuka amatongo, ne leero.

⁷ "Kale kaakano bw'ati bw'ayogera MUKAMA ow'Eggye, Katonda wa Isirayiri nti, Lwaki mweretako akabi akanene bwe kati nga musala ku Yuda abasajja n'abakazi, n'abaana abato n'abawere aba Yuda ne mutalekaawo muntu?

⁸ Lwaki munsunguwaza olw'ebyo emikono gyammwe bye gikoze, nga mwotereza bakatonda abalala obubaane e Misiri, gye mwajja okubeera? Mujja kwezikiriza mufuuke eky'omuzizo n'eky'okukolimirwa mu mawanga gonna ag'omu nsi.

⁹ Mwerabidde ebibi bakitammwe ne bakabaka ba Yuda ne bakazi bammwe bye baakola era n'ebibi bye mwakola mmwe ne bakazi bammwe mu nsi ya Yuda ne mu nguudo za Yerusaalemi?

¹⁰ Naye n'okutuusa leero tebeetoowazizza wadde okutya, wadde okugondera amateeka gange n'ebiragiyo bye nabateekerawo mmwe ne bajajjammwe.

¹¹ "Noolwekyo, bw'ati bw'ayogera MUKAMA ow'Eggye, Katonda wa Isirayiri nti, Mmaliridde okubazikiriza mmwe ne Yuda yonna.

¹² Ndiggyawo abaasigalira mu Yuda abaamalirira okugenda e Misiri okusenga eyo. Bonna balizikiririra mu Misiri, balifa ekitala oba enjala. Okuva ku muto okutuuka ku mukulu asingayo balifa era balifuuka ekyenyinyalwa n'eky'okusekererwa era n'okukolimirwa.

¹³ Ndibonereza abo ababeera mu Misiri, bafe ekitala, n'enjala ne kawumpuli, nga bwe nabonereza Yerusaalemi.

¹⁴Tewali n'omu ku baasigalawo mu Yuda eyaddukira e Misiri, aliwona oba alisigalawo okudda mu nsi ya Yuda, gye beegomba okudda, tewali aliddayo okuggyako abatono ennyo."

¹⁵Awo abasajja bona abaali bamanyi nga bakazi baabwe baali bootereza bakatonda abalala obubaane, n'abakazi abalala abaaliwo, olukuŋŋaana nga lunene n'abantu bona abaali babeera mu Misiri e Pasuloosi, ne baddamu Yeremiya nga boogera nti,

¹⁶"Tetujja kuwulira bubaka bw'oyogedde naffe mu linnya lya MUKAMA!

¹⁷Tujja kukola byonna bye twagambye okukola. Tujja kwotereza kabaka omukazi ow'eggulu obubaane, tuweeyo n'ebiweebwayo ebyokunywa nga bwe twakolanga, ffe ne bakitaffe, ne bakabaka baffe n'abakungu baffe mu bibuga bya Yuda ne mu nguudo z'e Yerusaalemi. Mu biseera ebyo twalina emmere nnyingi era nga tuli bulungi nga tetutuukibwako kabi.

¹⁸Naye okuva lwe twalekeraawo okwotereza kabaka omukazi ow'eggulu obubaane, n'okumuwa ekiweebwayo ekyokunywa, tetubadde na kantu konna era tubadde tuzikirira n'ekitala n'enjala."

¹⁹Abakazi ne bongerako nti, "Bwe twayotereza kabaka omukazi ow'eggulu obubaane ne tumuwa n'ekiweebwayo ekyokunywa, abaami baffe tebaamanya nti twali tumukolera obugaati obuliko ekifaananyi kye ne tumuwa n'ekiweebwayo ekyokunywa?"

²⁰Awo Yeremiya n'agamba abantu bona, abasajja n'abakazi n'abantu bona abaali bamuzzeemu nti,

²¹"Obubaane bwammwe bwe mwayotereza mu bibuga bya Yuda ne mu nguudo za Yerusaalemi, mmwe ne bakitammwe, ne bakabaka bammwe, n'abakungu n'abantu bona mu nsi, ebyo MUKAMA si bye yajjukira n'alowoozaako?

²²MUKAMA nga takyayinza kugumiikiriza bikolwa byammwe bibi n'ebi'emizizo bye mwakola, ensi yammwe kyeyava efuuka ekikolimo n'ekyeninyalwa era eteriimu bantu, nga bweri leero.

²³Kubanga mwotereza obubaane abalala era ne mukola ebibi mu maaso ga MUKAMA Katonda ne mutamugondera wadde okugoberera amateeka ge oba ebiragiro bye oba bye yategeeza, emitawaana gibagidde nga kaakano bwe mulabye."

²⁴Awo Yeremiya n'agamba abantu bona, ng'ogasseeko abakazi nti, "Muwulire ekigambo kya MUKAMA Katonda, abantu mwenna aba Yuda mu Misiri.

²⁵Bw'ati bw'ayogera MUKAMA ow'Eggye, Katonda wa Isirayiri nti, mmwe ne bakazi bammwe mulaze mu bikolwa byammwe ebyo bye mwasuubiza nti, 'Tujja kukola nga bwe tweyama okwotereza kabaka omukazi ow'eggulu obubaane era

n'okumuwa ekiweebwayo ekyokunywa.' "Mugende mu maaso, mukole bye mwasuubiza! Mutuukirize obweyamo bwammwe!

²⁶Naye muwulire ekigambo kya MUKAMA, mmwe Abayudaaya mwenna abali mu Misiri. 'Ndayira mu linnya lyange ekkulu,' bw'ayogera MUKAMA nti, 'Tewali n'omu ku abo abaava mu Yuda ababeera mu Misiri, aliddayo okuyita erinnya lyange wadde okulayira nti, "Nga MUKAMA Katonda bw'ali omulamu."

²⁷Kubanga mbawaddeyo eri akabi, si lwa bulungi; Abayudaaya abali mu Misiri balimalibwawo n'ekitala n'enjala okutuusa bona lwe baliggwaawo.

²⁸Abo abaliwona ekitala ne baddayo mu Yuda okuva e Misiri baliba batono nnyo. Olwo abalisigalawo bona okuva mu Yuda abajja okubeera mu Misiri, balitegeera ekigambo ekirikola, ekyange oba ekyabwe.

²⁹"Kano ke kanaabeera akabonero gye muli nti ndibabonerereza mu kifo kino,' bw'ayogera MUKAMA, 'Mulyoke mumanye nga okulabula kwange okw'okubabonereza kujja kutuukirira.'

³⁰Bw'ati bw'ayogera MUKAMA nti, 'Njenda kuwaayo Falaawo Kofera kabaka w'e Misiri eri abalabe be abanoonya okumutta, nga bwe n'awaayo Zeddekiya kabaka wa Yuda eri Nebukadduneeza kabaka w'e Babulooni, omulabe eyamunoonya okumutta.'"

Yeremiya 45

Obubaka eri Baluki

¹Kino kye kigambo nnabbi Yeremiya kye yagamba Baluki mutabani wa Neriya mu mwaka ogwokuna ogw'obufuzi bwa Yekoyakimu mutabani wa Yosiya kabaka wa Yuda, nga Baluki amaze okuwandiika ku muzingo nti,

²"Bw'ati bw'ayogera MUKAMA, Katonda wa Isirayiri gy'oli, ggwe Baluki nti,

³Wagamba nti, 'Zinsanze. MUKAMA Katonda agasse ennaku ku bulumi bwange; mpweddemu endasi era zижудde okusinda n'obutawummula.'"

⁴MUKAMA yagamba nti, "Mugambe bw'oti nti, 'Bw'ati bw'ayogera MUKAMA Katonda nti: ndimenya bye nazimba, nkuule bye nasimba, mu ggwanga lyonna.

⁵Kale lwaki weenoonyeza ebintu ebirungi? Tobinoonya. Kubanga ndireeta akabi ku bantu bona, bw'ayogera MUKAMA Katonda, naye buli gy'olaga nnaakuyambanga osigale ng'oli mulamu.'"

Yeremiya 46

Obubaka Obukwata ku Misiri

¹ Kino kye kigambo kya MUKAMA Katonda ekyajjira nnabbi Yeremiya ekikwata ku mawanga:

² Ebikwata ku Misiri: Buno bwe bubaka obukwata ku ggye lya Falaawo Neko kabaka w'e Misiri, eryawangulwa e Kalukemisi, Nebukadduneeza kabaka w'e Babulooni lye yakuba mu mwaka ogwokuna ogw'obufuzi bwa Yekoyakimu mutabani wa Yosiya kabaka wa Yuda ku Mugga Fulaati.

³ "Mutegeke engabo zammwe, ennene n'entono mukumbe okugenda mu latalo!

⁴ Mutegeke embalaasi muzeebagale! Muyimirire mu bifo byammwe n'esseppeewo zammwe! Muzigule amafumu, mwambale ebizibaawo eby'ebiyuma!

⁵ Kiki kye ndaba? Batidde, badda ennyuma, abalwanyi baabwe bawanguddwa. Badduka mu bwangu awatali kutunula mabega, era waliwo okufa ku buli luuyi," bw'ayogera MUKAMA Katonda.

⁶ "Abawenyusi b'embiro tebasobola kuwona n'ab'amaanyi tebasobola kwewonya. Beesittala ne bagwa mu bukiikkono obw'Omugga Fulaati.

⁷ "Ani oyo ayimuka ng'omugga Kiyira, ng'emigga egy'amazzi agabimba?

⁸ Misiri eyimuka nga Kiyira, ng'emigga egy'amazzi agabimba. Agamba nti, 'Ndisituka ne mbuutikira ensi yonna. Ndizikiriza ebibuga n'abantu baabyo.'

⁹ Mulumbe, mmwe embalaasi! Muzidduse n'amaanyi, mmwe abalwanyi b'oku mbalaasi! Mukumbe mmwe abalwanyi, abasajja b'e Kuusi ne Puuti abeettika engabo, abasajja b'e Luudi abakozesa obusaale.

¹⁰ Naye olunaku olwo lwa Mukama, MUKAMA Katonda ow'Eggye, olunaku olw'okuwalanirako eggwanga, olw'okusalira abalabe omusango. Ekitala kijja kulya nga kimaliddwa, okutuusa nga kyemazeeko ennyonta y'omusaayi. Kubanga Mukama, MUKAMA Katonda ow'Eggye, alibawaayo babeere ng'ekiweebwayo mu nsi ey'obukiikkono ku Mugga Fulaati.

¹¹ "Genda e Gireyaadi ofune eddagala ery'okusaaba, ggwe Omuwala Embeerera owa Misiri. Naye mwongererera bwereere obujjanjabi; temujja kuwonyezebwa.

¹² Amawanga gajja kuwulira obuswavu bwammwe; emiranga gyammwe gjija kujjuza ensi. Omulwanyi omu alitomera omulala bombi ne bagwa."

¹³ Buno bwe bubaka MUKAMA Katonda bwe yayogera eri nnabbi Yeremiya ku bikwata ku kujja kwa Nebukadduneeza kabaka w'e Babulooni okulumba Misiri:

¹⁴ "Langirira kino mu Misiri, era okyogere e Migudooli; kirangirire e Tapaneese ne Noofu nti, 'Muyimirire mu bifo byammwe mwetegeke kubanga ekitala kirya abo ababeetoolodde.'

¹⁵ Lwaki abalwanyi bo bagudde wansi? Tebasobola kuyimirira, kubanga MUKAMA Katonda ajja kubasindika wansi.

¹⁶ Balyesittala emirundi egiwera; baligwiragana. Bagambe nti, 'Yimuka, tuddeyo eri abantu baffe era n'ensi zaffe, tuve awali ekitala ky'oyo atunyigiriza.'

¹⁷ Eyo gye baliwowogganira nti, 'Falaawo kabaka w'e Misiri mulekaanyi bulekaanyi afiiriddwa omukisa gwe.'

¹⁸ "Nga bwe ndi omulamu," bw'ayogera oyo Kabaka ayitibwa MUKAMA Katonda ow'Eggye, "Waliwo alija ali nga Taboli wakati mu nsozi, nga Kulumeeri ku nnyanja.

¹⁹ Musibe engugu zammwe muwanjanguke, mmwe abali mu Misiri kubanga Noofu kirifuuka matongo, ekiryaawo omutali bantu.

²⁰ "Misiri nte nduusi nnungi nnyo, naye kawawa avudde mu bukiikakkono azze okumulumba.

²¹ N'abajaasi be abapangise bagezze ng'ennyana. Nabo bajja kukyuka badduke, tebaasobole kuyimirirawo, kubanga olunaku olw'ekikangabwa lubajjira, ekiseera kyabwe eky'okubonerezebwa kisembedde.

²² Misiri alikaaba ng'omusota ogudduka, omulabe alimulumba mu maanyi, amujjire n'embazzi, ng'abatemi b'emiti.

²³ Balitema ekibira kye," bw'ayogera MUKAMA Katonda, "newaakubadde nga kikutte nnyo. Bangi n'okusinga enzige, tebasobola kubalika.

²⁴ Muwala wa Misiri aliswazibwa, aweebweyo mu mukono gw'abo abava mu bukiikakkono."

²⁵ MUKAMA ow'Eggye, Katonda wa Isirayiri, agamba nti, "Nnaatera okuleeta ekibonerezo ku Amoni katonda w'e Tebeesi, ne ku Falaawo, ne ku Misiri, ne ku bakatonda be, ne ku bakabaka be, ne ku abo abeesiga Falaawo.

²⁶ Ndibawaayo eri abo abaagala okubatta, eri Nebukadduneeza kabaka w'e Babulooni n'abakungu be. Wabula oluvannyuma, Misiri eribeeramu abantu nga bwe yali edda," bw'ayogera MUKAMA Katonda.

²⁷ "Totya, ggwe Yakobo omuweereza wange; toggwaamu maanyi, ggwe Isirayiri. Ddala ddala ndikununula okuva mu kifo eky'ewala, n'ezzadde lyo ndinunule okuva mu nsi ey'obuwajjangu guse bwalyo. Yakobo aliddamu okufuna emirembe n'atebenkera, era tewali alimutiisa.

²⁸ Totya, ggwe Yakobo omuddu wange, kubanga ndi naawe," bw'ayogera MUKAMA. "Wadde nga nazikiririza ddala amawanga gonna gye nabasaasaanyiza, naye mmwe siribazikiririza ddala. Ndibabonereza naye mu bwenkanya; siribaleka nga temubonerezebbwa."

Yeremiya 47

Obubaka Obukwata ku Bafirisuuti

1 Kino kye kigambo kya MUKAMA Katonda ekyajjira nnabbi Yeremiya ekikwata ku Bafirisuuti nga Falaawo tannalumba Gaza nga kigamba nti:

2 Bw'ati bw'ayogera MUKAMA Katonda nti, "Laba amazzi agatumbira mu bukiakkono, galifuuka omugga ogwanjaala. Galyanjaala ku nsi ne mu bibuga byonna ebigrimu n'ababituulamu. Abantu balikaaba; bona abali mu nsi baliwowoggana.

3 Olw'emisinde gy'embalaasi ezidduka n'okufuumuuka kw'amagaali g'omulabe era n'okuwuumma kwa nnamuziga, bakitaabwe tebajja kukyuka kuyamba baana baabwe, emikono gyabwegya kulebera.

4 Kubanga olunaku lutuuse okuzikiriza Abafirisuuti bona, n'okusalako bona abandisigaddewo abandiyambye Ttuulo ne Sidoni. MUKAMA wa kuzikiriza Abafirisuuti abaasigalawo ku mbalama z'ekizinga Kafutoli.

5 Gaza alimwa omutwe gwe ng'akungubaga. Asukulooni alisirisibwa. Ggwe eyasigala mu kiwonvu, olituusa ddi okwesalaasala?

6 "Ayi ggwe ekitala kya MUKAMA Katonda, okaaba, obudde bunaatuuka ddi owummule? Ddayo mu kiraato kyo sirika teweenyenya."

7 Naye kiyinza kitya okuwummula nga MUKAMA y'akiragidde, ng'akiragidde okulumba Asukulooni n'olubalama lw'ennyanya?"

Yeremiya 48

Obubaka Obukwata ku Mowaabu

1 Ebikwata ku Mowaabu: Bw'ati bw'ayogera MUKAMA ow'Eggie, Katonda wa Isirayiri nti, "Zikisanze Nebo, kubanga kijja kuzikirizibwa, Kiriyasayimu kiswale kiwambibwe, ekigo eky'amaanyi kijja kuswala kimenyebwe.

2 Mowaabu taddeyo kutenderezebw; mu Kesuboni abantu balitegeka okugwa kwe, nga boogera nti, 'Mujje, tumalewo ensi eyo.' Nammwe, mmwe Madumeni mulisirisibwa, n'ekitala kirikugoberera.

3 Muwulirize emiranga egiva e Kolonayimu, okwonoonekerwa n'okuzikirizibwa okunene.

4 Mowaabu alimenyebwa; abawere ne bakaaba.

5 Bakwata ekkubo erigenda e Lukisi, nga bwe bakungubaga ku luguudo olugenda e Kolonayimu, emiranga egy'okuzikirizibwa giwulirwa.

6 Mudduke! Muwonye obulamu bwammwe; mubeere ng'ebisaka mu ddungu.

⁷ Kubanga mwesiga ebikolwa byammwe n'obugagga bwammwe, nammwe mulitwalibwa ng'abaddu, ne Kemosi alitwalibwa mu buwañjanguse awamu ne bakabona be n'abakungu be.

⁸ Omuzikiriza alirumba buli kibuga, era tewali kibuga kiriwona. Ekiwonvu kiryonooonebwa n'olusenyu luzikirizibwe kubanga MUKAMA ayogedde.

⁹ Muwe Mowaabu ebiwaawaatiro abuuke agende kubanga alifuuka matongo, ebibuga bye birizikirizibwa, nga tewali abibeeramu.

¹⁰ “Akolimirwe oyo agayaalira omulimu gwa MUKAMA Katonda. Akolimirwe oyo aziyiza ekitala kye okuyiwa omusaayi.

¹¹ “Mowaabu abadde mirembe okuva mu buvubuka bwe, nga wayini gwe batasengezze, gwe bataggye mu kibya ekimu okumuyiwa mu kirala, tagenzeko mu buwañjanguse. Kale awooma ng'edda, n'akawoowo ke tekakyukanga.

¹² Naye ennaku zija,” bw'ayogera MUKAMA Katonda, “lwe ndituma basajja bange abaggya wayini mu bibya, era balimuyiwa ebweru; balittulula ensuwa ze baase n'ebibya bye.

¹³ Awo Mowaabu alikwatibwa ensonyi olwa Kemosi, ng'ennyumba ya Isirayiri bwe yaswala bwe yeesiga Beseri.

¹⁴ “Oyinza otya okugamba nti, ‘Tuli balwanyi, abasajja abazira mu ntalo?’

¹⁵ Mowaabu alizindibwa n'ebibuga bye ne bizikirizibwa; abavubuka be abato bagende battibwe,” bw'ayogera Kabaka, erinnya lye ye MUKAMA Katonda ow'Eggye.

¹⁶ “Okugwa kwa Mowaabu kuseembedde; akabi katuuse.

¹⁷ Mumubeesebeese mwenna abamwetoolodde, mwenna abamanyi ettutumu lye; mugambe nti, ‘Ng’Omuggo ogw’amaanyi ogw’obwakabaka gumenyese, ng’oluga olw’ekitiibwa lumenyese!’

¹⁸ “Mukke muve mu kitibwa kyammwe mutuule ku ttaka, mmwe abatuuze b’Omuwala w’e Diboni, kubanga oyo azikiriza Mowaabu alibajjira azikirize ebibuga byammwe ebya bbugwe.

¹⁹ Muyimirire ku luguudo mulabe, mmwe ababeera mu Aloweri. Mubuuze omusajja adduka, n’omukazi atoloka, mubabuuze nti, ‘Kiki ekiguddewo?’

²⁰ Mowaabu aswadde kubanga amenyesemenyese. Mukaabe muleekaane! Mulangiririre mu Alunoni nti Mowaabu kizikiridde.

²¹ Okusala omusango kutuuse mu nsi ey’ensenyi ku Koloni ne ku Yaza ne ku Mefaasi,

²² ne ku Diboni, ne ku Nebo ne ku Besudibulasayimu,

²³ ne ku Kiriyasayimu ne ku Besugamuli ne ku Besumyoni;

²⁴ ne ku Keriyoosi ne ku Bozula ne ku bibuga byonna eby'omu nsi ya Mowaabu ebiri ewala n'ebiri okumpi.

²⁵ Ejjembe lya Mowaabu lisaliddwako, n'omukono gwe gumenyese," bw'ayogera MUKAMA Katonda.

²⁶ "Mumutamiize; kubanga ajeemedde MUKAMA. Ka Mowaabu yekulukuunyize mu bisesemye bye, era asekererwe.

²⁷ Isirayiri tewagisekereranga? Baali bamukutte mu bubbi, olyoke onyeenye omutwe gwo ng'omusekerera buli lw'omwogerako?

²⁸ Muve mu bibuga byammwe mubeere mu njazi, mmwe ababeera mu Mowaabu. Mubeere ng'ejjiba erikola ekisu kyalyo ku mumwa gw'empuku.

²⁹ "Tuwulidde amalala ga Mowaabu amalala ge agayitiridde n'okwemanya, okwewulira kwe era n'okweyisa kwe era n'okwegulumiza kwe okw'omutima.

³⁰ Mmanyi obusungu bwe obutaliimu," bw'ayogera MUKAMA Katonda, "okwenyimiriza kwe okutaliiko kye kugasa.

³¹ Noolwekyo nkaabirira Mowaabu, olwa Mowaabu yenna nkaaba, nkungubagira abasajja ab'e Kirukeresi.

³² Nkukaabira ggwe amaziga, nga Yazeri bw'akaaba, ggwe omuzabbibu gw'e Sibuna. Amatabi gammwe geegolola okutuuka ku nnyanja; gatuuka ku nnyanja y'e Yazeri. Omuzikiriza agudde ku bibala byo ebyengedde era n'emizabbibu.

³³ Essanyu n'okujaguza biggiddwa ku nnimiro ne ku bibanja bya Mowaabu. Nziyizza okukulukuta kwa wayini mu masogolero; tewali asogola ng'aleekaana olw'essanyu. Newaakubadde nga waliyo okuleekaana, okuleekaana okwo si kwa ssanyu.

³⁴ "Amaloboozi g'okukaaba kwabwe galinnye okuva e Kesuboni okutuuka ku Ereyale, n'okutuuka ku Yakazi. Okuva e Zowaali okutuuka e Kolanayimu n'e Egulasuserisiya, kubanga n'amazzi g'e Nimulimu gakalidde.

³⁵ Ndiggyawo abo abawaayo ebiweebwayo mu bifo ebigulumivu e Mowaabu, ne bootereza n'obubaane eri bakatonda baabwe," bw'ayogera MUKAMA Katonda.

³⁶ "Noolwekyo omutima gwange gukaabira Mowaabu ng'endere; gukaaba ng'endere olw'abasajja b'e Kirukesi. Obugagga bwe baafuna buweddewo.

³⁷ Buli mutwe mumwe na buli kirevu kisaliddwako; buli mukono gutemeddwako na buli kiwato kisibiddwamu ebibukutu.

³⁸ Ku buli kasolya ka nnyumba e Mowaabu ne mu bifo awakuṇṇaanirwa, tewaliwo kintu kirala wabula okukungubaga, kubanga njasizzayasizza Mowaabu ng'ekibya ekitaliiko akyagala," bw'ayogera MUKAMA Katonda.

³⁹"Ng'amenyeddwamenyeddwa! Nga bakaaba! Mowaabu ng'akyusa omugongo gwe olw'obuswavu! Mowaabu afuuse kyakusekererwa, ekyekango eri bona abamwetoolodde."

⁴⁰ Bw'ati bw'ayogera MUKAMA Katonda nti: "Laba! Empungu ekka, ng'eyanjuluza ebiwaawaatiro byayo ku Mowaabu.

⁴¹ Ebibuga birikwatibwa n'ebigo biwambibwe. Ku lunaku olwo emitima gy'abalwanyi ba Mowaabu giribeera ng'omutima gw'omukazi alumwa okuzaala.

⁴² Mowaabu alizikirizibwa, kubanga yajeemera MUKAMA.

⁴³ Entisa n'obunnya n'omutego bibalindiridde, mmwe abantu ba Mowaabu," bw'ayogera MUKAMA Katonda.

⁴⁴ "Buli alidduka entisa aligwa mu bunnya, n'oyo aliba avudde mu bunnya alikwatibwa omutego; kubanga ndireeta ku Mowaabu omwaka gw'okubonaabona kwe," bw'ayogera MUKAMA Katonda.

⁴⁵ "Mu kisiikirize kya Kesuboni, abadduka mwe bayimirira nga tebalina maanyi, kubanga omuliro guvudde mu Kesuboni, ennimi z'omuliro wakati mu Sikoni, era gw'okezza ebyenyi bya Mowaabu, n'obuwanga bw'abo abaleekaana nga beewaanawaana.

⁴⁶ Zikusanze ggwe, Mowaabu. Abantu b'e Kemosi bazikiridde, batabani bo batwaliddwa mu buwanjjanguse ne bawala bammwe mu busibe.

⁴⁷ "Ndikomyawo nate obugagga bwa Mowaabu mu nnaku ezijja," bw'ayogera MUKAMA Katonda. Omusango Mowaabu gw'asaliddwa gukoma wano.

Yeremiya 49

Obubaka Obukwata ku Amoni

¹ Ebikwata ku baana ba Amoni bye bino. Bw'ati bw'ayogera MUKAMA Katonda nti, "Isirayiri terina baana balenzi? Terina basika? Lwaki Malukamu atutte Gaadi? Lwaki abantu be batutte ebibuga by'e Gaadi?

² Naye ennaku zija," bw'ayogera MUKAMA Katonda, "lwe ndiraya ejnjoma ezirangirira olutalo ku Labba eky'abawala ba Amoni. Kirifuuka ntuumu ya mafunfugu, n'ebyalo ebiriraanyeewo byokebwe omuliro. Isirayiri eryoke egobere ebweru abo abagigoba," bw'ayogera MUKAMA Katonda.

³ "Kaaba, ggwe Kesuboni, kubanga Ayi kizikiridde! Mukaabe mmwe abatuuze b'omu Labba! Mwesibe ebibukutu mukungubage. Mudduke mudde eno n'eri mu

bisenge by'ekibuga, kubanga Malukamu alitwalibwa mu busibe, awamu ne bakabona n'abakungu.

⁴ Lwaki mwenyumiriza olw'ebiwonvu byammwe, ne mwenyumiriza olw'ebiwonvu ebigimu? Ggwe omuwala atali mwesigwa, weesiga obugagga bwo n'ogamba nti, 'Ani alinnumba?'

⁵ Ndikuleetako entiisa, okuva mu abo bona abakwetoolodde," bw'ayogera Mukama, MUKAMA Katonda ow'Eggye. "Buli omu ku mmwe aligobebwa, era tewali n'omu alikuinjaanya abadduka.

⁶ "Naye oluvannyuma ndikomyawo nate omukisa gy'abaana ba Amoni," bw'ayogera MUKAMA Katonda.

Obubaka obukwata ku Edomu

⁷ Bw'ati bw'ayogera MUKAMA Katonda ow'Eggye nti, "Tewakyali magezi mu Temani? Abeegendereza babuliddwa okutegeera? Amagezi gaabwe gaweddemu ensa?

⁸ Mukyuke mudduke mwekweke mu mpuku eziri ewala mmwe abatuuze b'e Dedani, kubanga ndireeta ekikangabwa ku Esawu, mu kiseera bwe ndimubonerereza.

⁹ Abanozi b'emizabbibu singa bazze gy'oli, tebandikuleseeko mizabbibu mibale bubazi? Singa ababbi bazze ekiro, tebandibbye byonna bye beetaaga?

¹⁰ Naye ndyambula Esawu mwerule; ndizuula ebifo bye mwe yeekweka, aleme kwekweka. Abaana be, n'ab'enjanda ze n'ab'omuliraano baakuzikirira, era wa kuggwaawo.

¹¹ Bamulekwa mu mmwe mubaleke, ndibalabirira. Ne bannamwandu mu mmwe banneesige."

¹² Bw'ati bw'ayogera MUKAMA Katonda nti, "Obanga abo abatandinywedde ku kikompe bawaliriziddwa okukinywako, Iwaki mmwe temubonerezebwa? Temuuleme kubonerezebwa, mulina okukinywa.

¹³ Neerayirira," bw'ayogera MUKAMA Katonda nti, "Bozula alifuuka matongo era ekibuga ekijjudde entiisa, ekinyoomebwa era ekikolimire, era ebibuga bye byonna biriba matongo emirembe gyonna."

¹⁴ Mpulidde obubaka okuva eri MUKAMA Katonda. Omubaka yatumibwa eri amawanga okugamba nti, "Mwekuinjaanye mukirumbe! Mugolokoke mukole olutalo!"

¹⁵ "Kaakano ndibafuula aba wansi ennyo mu mawanga, abanyoomebwa mu bantu.

¹⁶ Entiisa gy'oleeta n'amalala g'omutima gwo bikulimbye, mmwe ababeera mu bunnya bw'amayinja, mmwe ababeera waggulu mu nsozi. Wadde nga muzimba

ebisu byammwe okubeera waggulu nga eby'empungu, ndibawanulayo ne mbasuula wansi," bw'ayogera MUKAMA Katonda.

¹⁷ "Edomu kirifuuka kyerolerwa, abo bona abayitawo balyewuunya batye olw'ebiwundu bye byonna.

¹⁸ Nga Sodomu ne Ggomola bwe byayonoonebwa, wamu n'ebibuga ebirala ebiriraanyeewo," bw'ayogera MUKAMA Katonda, "tewaliba n'omu abibeeramu; tewali musajja alikituulamu.

¹⁹ "Ng'empologoma eva mu bisaka by'omu Yoludaani okugenda mu muddo omugimu, ndigoba Edomu mu nsi ye amangu n'embiro. Ani oyo omulonde gwe nnaateekawo akole kino? Ani ali nga nze era ani ayinza okunsomooza? Era musumba wa ndiga ki ayinza okunjolekera?"

²⁰ Noolwekyo, muwulire MUKAMA Katonda kyategese okuleeta ku Edomu, kyategekedde abo abatuula mu Temani. Endiga ento mu bisibo za kuwalulwa, alyoononera ddala ebisibo byazo ku lwabwe.

²¹ Bwe baligwa ensi erikankana, emiranga gyabwe giriwulirwa mu Nnyanja Emyufu.

²² Laba, alibuuka mu bire ng'empungu n'atumbiira, n'alyoka akka ng'ayanjululiza ebiwaawaatiro bye ku Bozula. Ku lunaku olwo emitima gy'abalwanyi ba Edomu giribewanika ng'ogw'omukazi alumwa okuzaala.

Obubaka ku Damasiko

²³ Ebikwata ku Damasiko: "Kamasi ne Alupaadi biweddemu amaanyi, kubanga biwulidde amawulire amabi. Bakerijentereddwa, batabuddwa ng'enyanja esiikuuse, tebasobola kutereera.

²⁴ Ddamasiko ayongobedde, akyuse adduke era okutya kumukutte; obubalagaze n'obuyinike bimunyweezza, obulumi nga obw'omukazi alumwa okuzaala.

²⁵ Lwaki ekibuga ekimanyiddwa tebakidduse, ekibuga mwe nsanyukira?

²⁶ Ddala abavubuka baakyo baligwa mu nguudo, n'abalwanyi baakyo bona ku olwo baakusirisibwa," bw'ayogera MUKAMA Katonda ow'Eggye.

²⁷ "Ndiyokya bbugwe wa Ddamasiko omuliro; gwakumalawo n'embiri za Benukadaadi."

Obubaka ku Kedali ne Kazoli

²⁸ Bino bye bikwata ku Kedali n'obwakabaka bwa Kazoli, obwalumbibwa Nebukadduneeza kabaka w'e Babulooni. Bw'ati bw'ayogera MUKAMA Katonda nti, "Golokoka, olumbe Kedali ozikirize abantu be bugwanjuba.

²⁹ Weema zaabwe n'ebisibo byabwe bya kutwalibwa; enju zaabwe ziryetikkibwa n'ebintu byabwe byonna n'eñjamira zaabwe. Abasajja balibakanga nga bawowoggana nti, 'Akabi kavudde ku buli ludda!'

30“Mudduke mwekukume mangu! Mubeere mu mpuku empanvu, mmwe abatuuze b’omu Kazoli,” bw’ayogera MUKAMA Katonda. “Nebukadduneeza kabaka w’e Babulooni abasalidde olukwe; ategese okubalumba.

31“Golokoka olumbe eggwanga eriri mu ggandaalo, eriri mu kweyagala,” bw’ayogera MUKAMA Katonda, “eggwanga eritalina miryango gisibwa wadde ebyuma; abantu baalyo babeera awo bokka.

32 Enjamira zaabwe zaakunyagibwa, n’amagana gaabwe amanene gatwalibwe. Ndibasaasaanya eri empewo, abo abali mu bifo eby’ewala, mbaleeteko akabi okuva ku buli ludda,” bw’ayogera MUKAMA Katonda.

33 “Kazoli alifuuka kifo kya bibe, ekifo eky’amatongo eky’emirembe n’emirembe. Tewali alikibeeramu; tewali muntu alikituulamu.”

Obubaka ku Eramu

34 Kino kye kigambo kya MUKAMA Katonda ekyajjira nnabbi Yeremiya ekikwata ku Eramu, nga Zeddekiya kabaka wa Yuda kyajje alye obwakabaka.

35 Bw’ati bw’ayogera MUKAMA Katonda ow’Eggye nti, “Laba, ndimenya omutego gwa Eramu, amaanyi gaabwe mwe gasinga okwesigibwa.

36 Era ndireeta ku Eramu empewo ennya, okuva mu bitundu ebina eby’eggulu; ndibasaasaanyiza eri empewo ezo ennya, era tewaliba nsi n’emu abawanjanguse ba Eramu gye bataliddukiramu.

37 Ndimenyeramenyera Eramu mu maaso g’abalabe be, mu maaso gaabo abamunoonya okumutta; ndibatuusaako ekikangabwa, n’obusungu bwange obungi ennyo,” bw’ayogera MUKAMA Katonda. “Ndibawondera n’ekitala okutuusa lwe ndibamalirawo ddala.

38 Nditeeka entebe yange ey’obwakabaka mu Eramu era nzikirize kabaka we n’abakungu be,” bw’ayogera MUKAMA Katonda.

39 “Wabula ekiseera kijja, lwe ndiddiramu Eramu,” bw’ayogera MUKAMA Katonda.

Yeremiya 50

Obubaka ku Babulooni

1 Kino kye kigambo MUKAMA Katonda kye yayogerera mu nnabbi Yeremiya ekikwata ku Babulooni n’ensi ey’Abakaludaaya.

2 “Buulira mu mawanga era olangirire, yimusa bendera olangirire, tolekaayo kintu kyonna ogambe nti, ‘Babulooni eriwambibwa; Beri kiswale, ne Meroddaaki kijjule entiisa. Ebifaananyi bya bakatonda abakole n’emikono bijja kuswala era bitye.’

³ Eggwanga okuva mu bukiikkono liija kukirumba lyonoone ensi y'Abakaludaaya. Tewali muntu alisigalamu; abantu bona balikiddukamu era n'ensolo zonna.

⁴ "Mu nnaku ezo, era mu kiseera ekyo," bw'ayogera MUKAMA, "abantu ba Isirayiri awamu n'abantu ba Yuda balikaaba amaziga nga banoonya MUKAMA Katonda waabwe.

⁵ Balibuuza ekkubo eridda e Sayuuni era bakyuse obwenyi bwabwe okukitunuulira, nga boogera nti, Mujje twesibe ku MUKAMA Katonda mu ndagaano ey'emirembe gyonna etegenda kwerabirwa.

⁶ "Abantu bange babadde ndiga ezibuze; abasumba baabwe babawabizza ne babatuusa ku kutaataaganira ku nsozi. Baava ku lusozi ne badda ku kasozi ne beerabira ekifo kyabwe eky'okuwummuliram.

⁷ Buli eyabasanganga nga abatulugunya; abalabe baabwe ne bagamba nti, 'Tetulina musango gwe tuzza, kubanga baajeemera MUKAMA Katonda, obuddukiro bwabwe obwa nnama ddala, ye MUKAMA, essuubi lya bakitaabwe.'

⁸ "Mudduke okuva e Babulooni; muleke ensi y'Abakaludaaya, mubeere ng'embuzi ezikulembra ekisibo.

⁹ Kubanga, laba, ndigolokosa ekibiina ky'amawanga amanene okuva mu nsi ey'obukiikkono okulumba Babulooni. Baliyimirira mu nnyiriri zaabwe bakirumbe, bakiwambe nga basinzira mu bukiikkono. Obusaale bwabwe buliba ng'obw'abalwanyi abakugu, abataddir awo ngalo nsa.

¹⁰ Noolwekyo ensi y'Abakaludaaya erinyagibwa; abo bona abaliginya balitwala byonna bye baagala," bw'ayogera MUKAMA Katonda.

¹¹ "Kubanga musanyuka ne mujaguza, mmwe abaanyaga omugabo gwabwe, kubanga muligita ng'ente enduusi ewuula emmere ey'empeke, ne muleekaana ng'embalaasi ennume enkulu,

¹² nnyammwe alikwatibwa ensonyi; oyo eyakuzaala aliswazibwa. Aliba ensi esemberayo ddala, ensiko, ensi enkalu, eddungu.

¹³ Olw'obusungu bwa MUKAMA Katonda tajja kubeeramu bantu, naye alisigala matongo. Bonna abayita e Babulooni balyewuunya batye era bakisooze olw'ebiwundu bye byonna.

¹⁴ "Musimbe ennyiriri okwetooloola Babulooni, mwenna abanaanuula omutego. Mumulase! Temulekaawo kasaale n'akamu, kubanga yajeemera MUKAMA Katonda.

¹⁵ Mumukube olube ku buli ludda. Ajeemulukuse, eminaala gye gigwa, n'ebisenge bye bimenyeddwa. Kubanga kuno kwe kwesasuza kwa MUKAMA Katonda, mumwesasuzeeko; mumukole nga bw'akoze abalala.

¹⁶ Asiga mumuggye mu Babulooni, n'omukunguzi oyo akwata ekiwabyo mumuggye mu makungula. Olw'ekitala ky'omujoozi, leka buli omu addukire mu nsi y'ewaabwe, buli muntu adde eriabantu be.

¹⁷ "Isirayiri kisibo kya ndiga ezisaasaanye, empologoma kye zigobye. Eysooka okumulya yali kabaka wa Bwasuli; eyasembayo okumenya amagumba ge yali Nebukadduneeza kabaka w'e Babulooni."

¹⁸ Noolwekyo bw'ati bw'ayogera MUKAMA ow'Eggie, Katonda wa Isirayiri nti, "Ndibonereza kabaka w'e Babulooni n'ensi ye nga bwe nabonereza kabaka w'e Bwasuli.

¹⁹ Naye ndikomyawo Isirayiri mu kisibo kye era aliriira ku Kalumeeri ne Basani; alikuttira ku busozi bwa Efulayimu, ne mu Gireyaadi.

²⁰ Mu nnaku ezo, era mu biseera ebyo," bw'ayogera MUKAMA Katonda, "omusango ku Isirayiri gulinoonyezebwa, naye tegulibaawo, era n'ebibi bya Yuda birinoonyezebwa, naye tewaliba na kimu, kubanga ndisonyiwa abo bendeseewo.

²¹ "Mulumble ensi ye Merasayimu n'abo abali mu Pekodi. Mubagoberere mubatte, mubazikirize ddala," bw'ayogera MUKAMA Katonda. "Mukole byonna bye mbalagidde.

²² Oluyoogaano lw'olutalo luwulirwa mu ggwanga, eddoboozi ery'okuzikiriza okunene!

²³ Ennyondo y'ensi yonna ng'ekubiddwa n'emenyeka! Babulooni kifuuse matongo mu mawanga!

²⁴ Nakutegera omutego, ggwe Babulooni, babagwiikiriza ne babakwata nga tebategedde, baakukwata ne bakuwamba kubanga wawakanya MUKAMA.

²⁵ MUKAMA agguddewo etterekero ly'eb yokulwanyisa bye naggyamu ebyokulwanyisa eby'ekiruyi kye, kubanga MUKAMA Katonda ow'Eggie alina omulimu ogw'okukola mu nsi y'Abakaludaaya.

²⁶ Mujje mumulumbe mmwe abava mu buli nsonda, mumenye ebyagi eby'emmere y'empeke, mumukunjaanye abe ng'entuumo y'emmere y'empeke. Mumuzikiririze ddala; waleme kusigalawo n'omu ku bo.

²⁷ Mutte ennume zaabwe zonna, muzitwale zittibwe. Zibasanze kubanga olunaku lwabwe lutuuse, kye kiseera kyabwe eky'okubonerezebwa.

²⁸ Muwulire eby'abadduka n'abanoonyi b'obubudamu okuva mu Babulooni nga balangirira mu Sayuuni engeri MUKAMA Katonda waffe gye yeesasuzza, gye yeesasuzza olwa yee kaalu ye.

²⁹ "Koowoola abalasi b'obusaale balumbe Babulooni, ne bona abanaanuula omutego. Mumwetooloole yenna; tewaba n'omu awona. Mumusasule

olw'ebikolwa bye byonna; mumukole nga bwe yakola banne. Kubanga yanyooma MUKAMA, Omutukuvu wa Isirayiri.

³⁰ Noolwekyo, abavubuka be baligwa mu nguudo; abaserikale be balisirisibwa ku lunaku olwo," bw'ayogera MUKAMA Katonda.

³¹ "Laba, ndi mulabe wo, ggwe ow'amalala," bw'ayogera Mukama, MUKAMA Katonda ow'Eggye, "Kubanga olunaku lwo lutuuse, ekiseera ky'on'obonerezebwamu.

³² Oyo ow'amalala alyesittala agwe era teri n'omu alimuyamba kuyimuka; Ndikoleeza omuliro mu bibuga bye oguliyokya bona abamwetoolodde."

³³ Bw'ati bw'ayogera MUKAMA Katonda ow'Eggye nti, "Abantu ba Isirayiri banyigirizibwa awamu n'abantu ba Yuda; Bonna ababawambye babanywezezza, bagaanye okubata.

³⁴ Omununuzi waabwe w'amaanyi, MUKAMA Katonda ow'Eggye lye linnya lye. Alirwanirira ensonga zaabwe awatali kubuusabuusa, alyoke aleete emirembe mu nsi yaabwe; wabula alireeta okutabukatabuka mu bantu ba Babulooni.

³⁵ "Ekitala kyolekedde Abakaludaaya," bw'ayogera MUKAMA, "n'eri abo ababeera mu Babulooni, n'abakungu baabwe n'abasajja baabwe abajjudde amagezi!

³⁶ Ekitala kyolekedde bannabbi baabwe ab'obulimba! Balifuuka balisiriwala, ekitala kyolekedde abalwanyi baabwe. Balijjula entiisa.

³⁷ Ekitala kyolekedde embalaasi ze n'amagaali n'abagwira bona abamubeeramu! Balifuuka banafu ng'abakazi. Ekitala kyolekedde eby'obugagga bwe! Birinyagibwa!

³⁸ Ekyeya kyolekedde amazzi gaamu! Galikalira. Kubanga ggwanga erisinza ebifaananyi, ebifaananyi ebirigwa eddalu olw'entiisa.

³⁹ "Noolwekyo ensolo z'omu nsiko ziribeera eyo n'empisi, era eyo ekiwuugulu nakyo gye kiribeera. Ekipuga ekyo tekiriddamu kubeeramu bantu wadde kutuulwamu bantu emirembe gyonna.

⁴⁰ Katonda nga bwe yazikiriza Sodomu ne Ggomola n'ebibuga ebiriraanyewe," bw'ayogera MUKAMA, "bw'atyo bw'alikikola ne mutaba muntu n'omu alikibeeramu; tewaliba n'omu alikisigalamu.

⁴¹ "Laba, egghe liva mu bukiikkono; ensi ey'amaanyi ne bakabaka bangi, bakuññaana okuva ku nkomerero y'ensi.

⁴² Balina obusaale n'amafumu, bakambwe si ba kisa. Beebagadde embalaasi zaabwe ne baba ng'amayengo agawuluguma mu nnyanja; bali ng'abasajja abalwanyi abajjira mu nnyiriri z'entalo okukulumba, ggwe Muwala wa Babulooni.

⁴³Kabaka w'e Babulooni afunye amawulire agabafaako, n'emikono gye girebedde. Entiisa emugwiridde, ng'omukazi alumwa okuzaala.

⁴⁴ Ng'empologoma eva mu kibira kya Yoludaani okugenda mu ddundiro eggimu, Babulooni ndimugoba mu nsi ye awatali kutemya kikowe. Ani oyo omulonde gwe nnaawa okukola kino? Ani ali nga nze, era ani ayinza okunsomooza? Era musumba ki ayinza okuyimirirawo okumpakanya?"

⁴⁵ Noolwekyo, wulira MUKAMA ky'ategekedde Babulooni, ky'ategese okuleeta ku nsi y'Abakaludaaya. Obwana bw'ebisibo byabwe bulitwalibwa, alizikiririza ddala ebisibo byabwe ng'abalanga obujeemu bwabwe.

⁴⁶ Olw'oluyoogaano lw'okuwambibwa kwa Babulooni, ensi erikankana; okukaaba kwe kuliwulirwa mu mawanga.

Yeremiya 51

Ekibonerezo kya Babulooni

¹Bw'ati bw'ayogera MUKAMA nti, "Laba, ndiyimusa omwoyo gw'omuzikiriza alumbe Babulooni n'abantu ba Lebukamaayi.

² Ndituma abagwira e Babulooni bamuwewe era bazikirize ensi ye; balimulumba ku buli luuyi ku lunaku olw'okuzikirira kwe.

³ Omulasi talikuba busaale bwe, taliyambala wadde ebyambalo bye ebyokulwanyisa. Temusonyiwa batabani be; muzikiririze ddala amaggye ge.

⁴ Baligwa nga battiddwa e Babulooni, nga batuusiddwako ebiwundu eby'amaanyi mu nguudo ze.

⁵ Kubanga Yuda ne Isirayiri tebinnalekebwa Katonda waabwe, oyo MUKAMA Katonda ow'Eggye, wadde ng'ensi yaabwe esingiddwa omusango mu maaso g'Omukuvu wa Isirayiri.

⁶ "Mudduke Babulooni. Mudduke okuwonya obulamu bwammwe. Temusaanawo olw'ebibi bye. Kiseera kya MUKAMA okwesasuza; alimusasula ekyo ekimusaanira.

⁷ Babulooni yali kikompe kya zaabu mu mukono gwa MUKAMA; yatamiiza ensi yonna. Amawanga gaanywa wayini we, kyegavudde galaluka.

⁸ Babulooni kirigwa mangu ago ne kimenyekamenyeka. Mukikungubagire. Munooanye eddagala olw'obulumi bw'akyo oboolyawo anaawonyezebwa.

⁹ "Twandiwonyezza Babulooni, naye tayinza kuwonyezeka. Leka tumuleke buli muntu adde mu nsi ye, kubanga omusango gwe gutuuse mu bwengula, gusituse gulinnye okutuuka ku bire.'

¹⁰ “MUKAMA atulwaniridde, mujje tukitegeeeze mu Sayuuni ekyo MUKAMA Katonda waffe ky'akoze.”

¹¹ “Muwagale obusaale, mukwate engabo! MUKAMA ayungudde bakabaka ab'e Bumeedi, kubanga ekigendererwa kye kuzikiriza Babulooni. MUKAMA aliwalana eggwanga, aliwalana eggwanga olwa yeekaalu ye.

¹² Muyimuse bendera mwolekere bbugwe wa Babulooni! Mwongerekko abakuumi, muteekeko abaserikale, mutegeke okulumba mbagirawo! MUKAMA alituukiriza ekigendererwa bye, ensala ye okwolekera abantu ba Babulooni.

¹³ Gwe abeera okumpi n'amazzi amangi, omugagga mu bintu eby'omuwendo, enkomerero yo etuuse, ekiseera kyo eky'okuzikirizibwa kituuse.

¹⁴ MUKAMA Katonda ow'Eggye yeerayiridde ku lulwe; ddala ndikujjuza abasajja, ng'ebibinja by'enzige, era balireekaana nga bakuwangudde.

¹⁵ “Ensi yagikola n'amaanyi ge; yagiteekawo n'amagezi ge, n'ayanjuluza eggulu n'okutegeera kwe.

¹⁶ Bw'abwatuka, amazzi ag'omu ggulu gawuluguma; ayimusa ebire okuva ku nkomerero y'ensi. Amyansisa eggulu mu nkuba era n'aggya empewo mu mawanika ge.

¹⁷ “Buli muntu talina magezi wadde okutegeera; Buli muweesi aswadde olw'ebifaananyi bya bakatonda by'akoze n'emikono gye. Ebifaananyi bye bya bulimba; tebirina mukka.

¹⁸ Tebiriiiko kye bigasa, ebisaanye okunyoomebwa ebirizikirizibwa nga MUKAMA azze okusala omusango.

¹⁹ Oyo omugabo gwa Yakobo tali nga bano, kubanga yakola ebintu byonna, nga mwotwalidde n'eggwanga ly'omugabo gwe, n'erinnya lye ye MUKAMA Katonda ow'Eggye.

²⁰ “Muli mbazzi yange, ekyokulwanyisa kyange eky'olatalo, mmwe be nkozesza okubetenta amawanga, mmwe be nkozesza okuzikiriza obwakabaka,

²¹ era ggwe gwe ndikozesa okubetenta embalaasi n'omwebagazi, ggwe gwe ndikozesa okubetenta ekigaali n'omuvuzi waakyo,

²² era ggwe gwe ndikozesa okubetenta omusajja n'omukazi, era ggwe ndikozesa okubetenta omukadde n'omuvubuka, era ggwe gwe ndikozesa okubetenta omuvubuka n'omuwala omuto.

²³ Gwe gwe ndikozesa okubetenta omusumba n'ekisibo kye, ggwe gwe ndikozesa okubetenta omulimi n'ente ennume, ggwe gwe ndikozesa okubetenta bagavana n'abakungu.

²⁴ “Ndisasula Babulooni ne bona ababeeramu nga mulaba olw’ebibi byonna bye baakola mu Sayuuni,” bw’ayogera MUKAMA.

²⁵ “Mbalinako ensonga, ggwe olusozi oluzikiriza, mmwe abazikiriza ensi yonna,” bw’ayogera MUKAMA. “Ndikugolererako omukono gwange, nkusuule ku mayinja g’ensozi, nkufuule olusozi olutakyayaka.

²⁶ Tewali jjinja lirikuggibwako kukola jjinja lya ku nsonda, wadde ejinja lyonna okukola omusingi, kubanga olibeera matongo emirembe gyonna,” bw’ayogera MUKAMA.

²⁷ “Yimusa bendera mu ggwanga! Fuuwa omulere mu mawanga! Tegeka amawanga okumulwanyisa; koowoola obwakabaka buno bumulumbe: obwa Alalati ne Mini ne Asukenaazi. Londa omuduumizi amulumba, weereza embalaasi eziri ng’ekibinja ky’enzige.

²⁸ Teekateeka amawanga okumulwanyisa; bakabaka Abameedi, bagavana baabwe era n’abakungu baabwe bona, n’amawanga ge bafuga.

²⁹ Ensi ekankana ne yeenyola olw’obulumi, kubanga ebigendererwa bya MUKAMA eri Babulooni tebikyuka, okuzikiriza ensi ya Babulooni waleme kubaawo agibeeramu.

³⁰ Abalwanyi ba Babulooni baledde awo okulwana; basigadde mu bigo byabwe. Baweddemu amaanyi; bafuuse nga bakazi. Ebifo bye mw’abeera byokeddwa omuliro; emitayimbwa gy’oku nzigi ze gimenyeddwa.

³¹ Matalisi omu agoberera omulala, omubaka omu n’agoberera munne, okulangirira eri kabaka w’e Babulooni nti ekibuga kye kyonna kiwambiddwa,

³² entindo z’emigga baziwambye, ensenyi ziyyidde omuliro, n’abaserikale batidde.”

³³ Bw’ati bw’ayogera MUKAMA ow’Eggye, Katonda wa Isirayiri nti, “Muwala wa Babulooni ali ng’egguliro, mu kiseera w’analinniyirirwa; ebiseera eby’okumukungula binaatera okutuuka.”

³⁴ “Nebukadduneeza kabaka w’e Babulooni atukubyekubye, atutabudde, tufuuse ekikompe ekyereere. Atumize ng’omusota n’olubuto lwe n’alujjuza ebyassava byaffe ebiwooma, ffe n’atusesema.

³⁵ Leka okubonaabona okututuuseeko kubeere ku Babulooni,” bwe boogera abatuula mu Sayuuni. “Leka omusaayi gubeere ku abo ababeera mu Babulooni,” bwayogera Yerusaalemi.

³⁶ MUKAMA kyava ayogera nti, “Laba ndikulwanirira era ndikuwolerera eggwanga; Ndikaliza ennyanja ye n’ensulo ze.

³⁷ Babulooni kirifuuka bifunvu, mpuku ya bibe, ekintu ekyenyinyalwa n'okusekererwa, ekifo omutali abeeramu.

³⁸ Abantu baakyo bona bawuluguma ng'empologoma ento, bavuumira wamu ng'abaana b'empologoma.

³⁹ Naye nga bakyabuguumirira, ndibategekera ekijjulo, mbatamiize balyoke balekaane nga baseka, olwo beebake emirembe gyonna nga tebazuukuse," bw'ayogera MUKAMA.

⁴⁰ "Ndibaserengesa ng'abaana b'endiga, battibwe, ng'endiga n'embuzi.

⁴¹ "Sesaki nga kiriwambibwa, okujaguza kw'ensi yonna kugwewo. Babulooni kifuuse matongo eri amawanga!

⁴² Ennyanja eribuutikira Babulooni; amayengo gaayo agawuluguma galigisaanikira.

⁴³ Ebibuga bye birisigala matongo, ensi enkalu ey'eddungu, ensi eteriimu muntu, eteyitamu muntu yenna.

⁴⁴ Ndibonereza Beri mu Babulooni, mmusesemye bye yali amize. Amawanga nga tegakyesomba kugenda gyali. Ne bbugwe wa Babulooni aligwa.

⁴⁵ "Mukiveemu, abantu bange! Mudduke muwonye obulamu bwammwe! Mudduke muwone obusungu bwa MUKAMA obubuubuuka.

⁴⁶ Temutya wadde okuggwaamu amaanyi ng'enjambo ziyyitijjana mu nsi; olugambo olumu lujja omwaka guno, olulala omwaka ogujja, enjambo z'entalo mu ggwanga, era ez'omufuzi ng'alwana ne mufuzi munne.

⁴⁷ Kubanga ekiseera kijja lwe ndibonereza ebifaananyi bya bakatonda ba Babulooni abaakolebwa n'emikono; ensi eyo yonna eritabanguka, n'emirambo gy'abantu baayo abattiddwa gyonna gibeere omwo.

⁴⁸ Eggulu n'ensi ne byonna ebibirimu birireekana olw'essanyu olwa Babulooni, abalimuzikiriza balimulumba okuva mu bukiakkono," bw'ayogera MUKAMA.

⁴⁹ "Babulooni kirigwa olw'Abayisirayiri abaafa, nga bona abafa mu nsi yonna bwe baweddewo olwa Babulooni.

⁵⁰ Mmwe abawonye ekitala, mwanguwe okugenda! Mujukire MUKAMA nga muli mu nsi ey'ewala, mulowooze ku Yerusaalemi."

⁵¹ "Tuweddemu amaanyi kubanga tuvumiddwa era tukwatiddwa ensonyi, kubanga abagwira bayingidde mu bifo ebitukuvu eby'ennyumba ya MUKAMA."

⁵² "Naye ennakuzijja," bw'ayogera MUKAMA, "lwe ndibonereza ebifaananyi bya bakatonda be, be yakola n'emikono, era mu nsi ye yonna, abaliko ebisago balisinda.

⁵³ Newaakubadde nga Babulooni atuuka ku bire era ne yeenyweza n'ebigo bye eby'amaanyi, ndimusindikira abazikiriza," bw'ayogera MUKAMA.

⁵⁴ "Eddoboozi ly'okukaaba liva mu Babulooni, eddoboozi ery'okuzikirira okunene okuva mu nsi y'Abakaludaaya.

⁵⁵ MUKAMA alizikiriza Babulooni, alizikiza oluyoogaano lwakyo olunene. Amayengo g'abalabe galija ng'amazzi amangi; okuwuluguma kw'amaloboozi kuliwulirwa.

⁵⁶ Omuzikiriza alirumba Babulooni; abalwanyi be baliwambibwa, n'emitego gyabwe girimenyebwa. Kubanga MUKAMA Katonda asasula, alisasula mu bujuvu.

⁵⁷ Nditamiiza abakungu be n'abasajja be abajjudde amagezi, ne bagavana, ab'ebitongole awamu n'abalwanyi; balyebaka emirembe gyonna era tebalizuukuka," bw'ayogera Kabaka ayitibwa MUKAMA Katonda ow'Eggye.

⁵⁸ Bw'ati bw'ayogera MUKAMA Katonda ow'Eggye nti, "Bbugwe wa Babulooni omunene alisendebwa era n'emiryango gye emiwanvu gyrokebwe; abantu beetawanyiza bwerere nga bafuba, okutawaana kw'eggwanga kuliba nku za muliro."

⁵⁹ Buno bwe bubaka Yeremiya bwe yawa omukungu Seraya mutabani wa Neriya, mutabani wa Maseya, bwe yagenda e Babulooni ne Zeddekiya kabaka wa Yuda, nga Zeddekiya afuga mu mwaka gwe ogwokuna. Seraya ye yali omu ku bakungu abakulu.

⁶⁰ Yeremiya yali awandiise mu muzingo ebikangabwa byonna ebyali bigenda okutuuka ku Babulooni, byonna ebyali biwandiikkidwa ebyali bikwata ku Babulooni.

⁶¹ Yagamba Seraya nti, "Bw'otuuka mu Babulooni, laba ng'osoma mu ddoboozi ery'omwanguka ebigambo bino byonna.

⁶² Olwo ogambe nti, 'Ayi MUKAMA, ogambye nti olizikiriza ekifo kino, nti tewali nsolo oba muntu alikibeeramu; kibeere matongo emirembe gyonna.'

⁶³ Bw'omalanga okusoma omuzingo guno gusibeko ejinja ogukanyuge mu mugga Fulaati.

⁶⁴ Olyoke ogambe nti, 'Bw'ati Babulooni bwalisaanawo aleme kubbulukuka olw'akabi ke ndimuleetako. N'abantu be balizikirira.' " Ebigambo bya Yeremiya bikoma awo.

Yeremiya 52

Okugwa kwa Yerusaalemi

¹ Zeddekiya yali wa myaka amakumi abiri mu gumu egy'obukulu we yafuukira kabaka, n'afugira emyaka kkumi na gumu mu Yerusaalemi. Nnyina yayitbwanga Kamutali muwala wa Yeremiya ow'e Libuna.

² Zeddekiya n'akola eby'omuzizo mu maaso ga MUKAMA, nga Yekoyakimu bwe yali akoze.

³ Abalabe ba Yerusaalemi ne Yuda ne babalumba kubanga MUKAMA yali abanyiigidde. Ku nkomerero n'abagobamu mu nsi. Ebyo byonna ne bituuka ku Yerusaalemi ne ku Yuda, MUKAMA n'okubagoba n'abagoba mu maaso ge, ne Zeddekiya n'ajeemera kabaka w'e Babulooni.

⁴ Mu mwaka ogw'omwenda ogw'obufuzi bwa Zeddekiya, ku lunaku olw'ekkumi mu mwezi ogw'ekkumi, Nebukadduneeza kabaka w'e Babulooni n'eggye lye lyonna, n'alumba Yerusaalemi, ekibuga ekyo n'akizingiza n'akizimbako ebifunvu okukyetooloola.

⁵ Ekibuga ne bakizimbako ebifunvu okutuusa mu mwaka ogw'ekkumi n'ogumu ogw'obufuzi bwa kabaka Zeddekiya.

⁶ Ku lunaku olw'omwenda olw'omwezi ogwokuna enjala n'eba nnyingi nnyo mu kibuga nga tewaali kyakulya.

⁷ Bbugwe w'ekibuga yamenyebwa Abakaludaaya. Eggye lyonna erya Yerusaalemi ne lidduka okuva mu kibuga kiro nga bayita mu mulyango oglili wakati w'ebisenge ebibiri ebiri okumpi n'ennimiro lwa kabaka, newaakubadde ng'Abakaludaaya baali beetoolodde ekibuga. Badduka ne bagenda mu Alaba.

⁸ Eggye ly'Abakaludaaya ne ligoba kabaka Zeddekiya ne bamukwatira mu nsenyi ez'e Yeriko, Abaserikale be bona ne bamuvaako ne basaasaana.

⁹ N'akwatibwa. Zeddekiya n'atwalibwa eri kabaka w'e Babulooni e Libuna mu nsi ey'e Kamasi; n'amusalira omusango ne gumusinga.

¹⁰ Awo kabaka w'e Babulooni n'atta batabani ba Zeddekiya nga kitaabwe alaba; n'atta n'abakungu bona aba Yuda.

¹¹ N'alyoka aggyamu Zeddekiya amaaso n'amusiba mu masamba ag'ebikomo n'amutwala e Babulooni, gye yamuteeka mu kkomera okutuusa lwe yafa.

¹² Ku lunaku olw'ekkumi olw'omwezi ogwokutaano, mu mwaka ogw'ekkumi ogw'obufuzi bwa Nebukadduneeza kabaka w'e Babulooni, Nebuzaladaani omuduumizi w'eggye erikuma kabaka, eyaweerezanga kabaka w'e Babulooni, yajja e Yerusaalemi.

¹³ Nebukadduneeza n'ayokya yeekaalu ya MUKAMA n'olubiri lwa kabaka, n'ennyumba zonna eza Yerusaalemi. Buli kizimbe kyonna eky'omugasoo n'akyokya.

¹⁴Eggye lya Babulooni lyonna eryali liduumirwa omuduumizi w'abakuumi bakabaka ne limenyera ddala ebisenge bya Yerusaalemi.

¹⁵Nebuzaladaani omuduumizi w'abakuumi n'atwala abamu ku baavu ennyo n'abo abaasigala mu kibuga, awamu n'abaweesi n'abaali beewaddeyo, mu buwanjjanguse eri kabaka w'e Babulooni.

¹⁶Naye Nebuzaladaani n'asigazaayo abamu ku baavu ennyo mu ggwanga okulabiriranga emizabbibu n'okulimanga.

¹⁷Abakaludaaya ne bamenya empagi ez'ebikomo, n'ebikondo ebyali biseetulwa, n'Ennyanja ey'ekikomo, ebyali mu nnyumba ya MUKAMA ne batwala ekikomo kyonna e Babulooni.

¹⁸Ne batwala n'entamu, n'ebisena, n'ebisalako ebisirinza, n'ebibya, n'ebijiiko, n'ebintu byonna eby'ekikomo ebyakozesebwanga mu kuweereza mu Yeekaalu.

¹⁹Omuduumizi w'abakuumi ba kabaka n'atwala ebensani n'ebibya by'obubaane, n'ebijiiko, n'ebikondo bye ttaala, n'ebibya, n'entamu ebikozesebwanga mu kiweebwayo ekyokunywa, byonna ebyali byakolebwa mu zaabu ne ffeeza.

²⁰Ekikomo okuva ku mpagi ebbiri, n'Ennyanja, n'ennume ekkumi n'ebbiri ez'ebikomo wansi waayo, n'ebikondo kabaka Sulemaani bye yali akoledde yeekaalu ya MUKAMA, byali bizito nnyo ebitapimika.

²¹Buli emu ku mpagi yali obuwantu mita munaana ne desimoolo emu; n'obwetoolovu mita ttaano ne desimoolo nnya; n'omubiri gwayo gwali nga sentimita musantu nga yamuwuluka.

²²Yaliko n'omutwe gw'ekikomo, n'omutwe gumu ng'obuwantu bwayo nga mita bbiri ne desimoolo ssatu, omutwe nga guliko ebitimbe n'amakomamawanga enjuuyi zonna, byonna nga bya bikomo; empagi eyookubiri nayo yaliko ebifaanana ebyo n'amakomamawanga.

²³Mu buli mbiriizi za buli mpagi kwaliko amakomamawanga kyenda mu mukaaga era gonna awamu okwetooloola empagi gaali amakomamawanga kikumi.

²⁴Omuduumizi w'abakuumi n'atwala Seraaya kabona asinga obukulu ne Sefaniya kabona owookubiri n'abaggazi abasatu nga basibe.

²⁵Abo abaali bakyali mu kibuga, n'atwalako omukungu akulira eggye, n'abawi b'amagezi omusanvu. N'atwala n'omuwandiisi eyali omukungu omukulu avunaanyizibwa okuwandiika abayingira mu magye ne basaja be nkaaga abaasangibwa mu kibuga.

²⁶Nebuzaladaani omuduumizi n'abatwala bona n'abaleeta eri kabaka w'e Babulooni e Libuna.

²⁷Kabaka n'abattira eyo e Libuna, mu Kamasi. Bw'atyo Yuda n'awaŋjangusibwa, okuva mu nsi ya boobwe.

²⁸Buno bwe bungi bw'abantu Nebukadduneeza be yatwala mu buwaŋjanguse: mu mwaka ogw'omusanvu ogw'obufuzi bwe: Abayudaaya enkumi ssatu mu amakumi abiri mu basatu;

²⁹mu mwaka ogw'omunaana ogwa Nebukadduneeza, n'atwala lunaana mu asatu mu babiri okuva e Yerusaalemi;

³⁰mu mwaka gwe ogw'amakumi abiri mu esatu, Abayudaaya lusanvu mu ana mu bataano be baatwalibwa Nebuzaladaani omuduumizi w'abakumi wa kabaka. Bonna awamu ne baba abantu enkumi nnya mu lukaaga.

Yekoyakini Asumululwa

³¹Awo mu mwaka ogw'amakumi asatu mu omusanvu ogw'okusibibwa kwa Yekoyakini kabaka wa Yuda, mu mwaka Evirumerodaki lwe yafuuka kabaka w'e Babulooni, n'ata Yekoyakini kabaka wa Yuda, n'amuggya mu kkomera ku lunaku olw'amakumi abiri mu etaano olw'omwezi ogw'ekkumi n'ebiri.

³²N'ayogera naye n'ekisa n'amuwa entebe ey'ekitiibwa eya waggulu okusinga eza bakabaka abalala abaali naye e Babulooni.

³³Yekoyakini n'akyusa okuva mu ngoye ez'ekkomera era obulamu bwe obusembayo n'aliranga ku mmeeza ya kabaka.

³⁴Era kabaka w'e Babulooni yawanga Yekoyakini ensako eya buli lunaku, obulamu bwe bwonna okutuusa lwe yafa.

Okukungubaga

Okukungubaga 1

Yerusaalemi Kifuuse Matongo

1 Ekipuga ekyajjalanga abantu nga kyabuliddwa! Ekyabanga eky'amaanyi mu mawanga, nga kifuuse nga nnamwandum! Eyali kabaka omukazi ng'alina amasaza, afuuse omuddu omukazi.

2 Ekiro akaaba nnyo nnyini, n'amaziga ne gakulukuta ku matama ge. Mu baganzi be bona, talina n'omu amubeesabeesa. Mikwano gye bona bamuliddemu olukwe, bafuuse balabe be.

3 Yuda agenze mu buwanjanguse oluvannyuma lw'okubonaabona n'okukozesebwu n'obukambwe ng'omuddu. Kati abeera mu bannamawanga, talaba kifo kya kuwummuliram. Bonna abamunoonya bamusanga mu nnaku ye.

4 Engudo za Sayuuni zikungubaga, kubanga tewali n'omu ajja ku mbaga zaakyo ezaalagibwa. Emiryango gye gyonna girekeddwa awo, bakabona be, basinda; bawala be abaweereza bali mu buyinike, naye yennyini ali mu nnaku.

5 Abamuyigganya bafuuse bakama be; abalabe be beeyagala, kubanga MUKAMA amuleeseko ennaku, olw'ebibi bye ebingi. Abaana be batwalibbwu mu buwanjanguse, bawambiddwa omulabe.

6 Ekitiibwa kyonna ekyali ku muwala wa Sayuuni kimuweddeko, abalangira be bafuuse ng'ennangaazi ezibuliddwa omuddo; mu bunafu, badduse ababagoba.

7 Mu nnaku ez'okubonaabona kwe ng'asagaasagana, Yerusaalemi ajjukira ebintu eby'omuwendo byonna bye yalinanga mu nnaku ez'edda. Abantu be bwe baagwa mu mikono gy'omulabe, tewali n'omu amubeera; abalabe be ne bamutunuulira ne bamusekerera olw'okugwa kwe.

8 Yerusaalemi yayonoona nnyo nnyini, bw'atyo n'afuuka atali mulongoofu. Bonna abaamussangamu ekitiibwa bamunyooma, kubanga balabye bw'asigalidde awo; ye yennyini asinda, era akwatibwa ensonyi.

9 Obutali bulongoofu bwe bwali mu birenge bye; teyassaayo mwoyo ku bulamu bwe obw'ebiseera ebijja. Okugwa kwe kwali kwa kyewuunyo; tewali n'omu amubeesabeesa. "Ayi MUKAMA, tunuulira okubonaabona kwange, kubanga omulabe awangudde."

10 Omulabe yagololera omukono ku bintu bya Yerusaalemi byonna eby'omuwendo; yalaba amawanga amakaafiiri nga gayingira awatukuvu we, beebo be wali ogaanye okuyingira mu kuinjaaniro lyo.

¹¹ Abantu be bona basinda nga bwe banoonya ekyokulya; eby'obugagga byabwe babiwanyisaamu emmere, okusobola okuba abalamu. "Laba, Ayi MUKAMA Katonda, onziseeko omwoyo kubanga nnyoomebwा."

¹² "Mmwe tekibakwatako, mmwe mwenna abayitawo? mwetegereze mulabe obanga waliwo obuyinike obwenkana, obwantukako, MUKAMA bwe yanteekako ku lunaku olw'obusungu bwe obungi.

¹³ "Yaweereza omuliro okuva waggulu, ne gukka mu magumba gange. Yatega ebigere byange akatimba, n'anizaayo emabega. Yandeka mpuubadde, nga nzirise olunaku lwonna.

¹⁴ "Ebibi byange binfuukidde ekikoligo; bisibiddwa ne binywezebwा omukono gwe. Binzitoowerera mu bulago, era bimmazeemu amaanyi. Mukama ampaddeyo mu mikono gy'abo be siyinza kugumiikiriza.

¹⁵ "Mukama anyoomye abalwanyi abazira bona abaali nange; akuŋjaanyizza egghe okunwanyisa, okuzikiriza abavubuka bange. Mukama alinnyiridde Omuwala Embeerera owa Yuda, ng'omuntu bw'asambirira ezabbibu mu lyato ng'asogola.

¹⁶ "Kyenva nkaaba, amaaso gange ne gajjula amaziga, kubanga tewali n'omu andi kumpi okumbeesabeesa, ayinza okunzizaamu amaanyi. Abaana bange banakuwawu kubanga omulabe awangudde."

¹⁷ Sayuuni agolola emikono gye, naye tewali n'omu amudduukirira. MUKAMA awadde ekiragiro ku Yakobo baliraanwa be babeere balabe be; Yerusaalemi afuuse ekintu ekitali kirongoofu wakati mu bo.

¹⁸ "MUKAMA mutuukirivu, newaakubadde nga najeemera ekiragiro kye. Muwulirize mmwe amawanga gonna, mutunuulire okubonaabona kwange; Abavubuka bange ne bawala bange batwalibbwा mu busibe.

¹⁹ "Nakoowoola bannange bannyambe, naye tebanfaako; bakabona bange n'abakadde b'ekibuga kyange bazikiririra mu kibuga nga banoonya ekyokulya baddemu amaanyi.

²⁰ "Laba, Ayi MUKAMA Katonda bwe ndi omunakuwawu! Ndi mu kubonaabona, n'omutima gwange teguteredde kubanga njeemye nnyo ekiyitiridde. Ebweru ekitala kirindiridde okunsanyaawo, ne mu nnyumba mulimu kufa kwereere.

²¹ "Abantu bawulidde okusinda kwange, naye tewali n'omu ananyamba. Abalabe bange bona bawulidde okusinda kwange; basanyukidde ekyo ky'okoze. Olunaku lwe walangirira, lubatuukeko, babeere nga nze.

²² "Obabonereze olw'obutali butuukirivu bwabwe bwonna, nga nze bwe wambonereza. Okusinda kwange kungi n'omutima gwange guzirika."

Okukungubaga 2

¹ Obusungu bwa Mukama nga bubuubuukidde ku Muwala wa Sayuuni ne bumussa wansi w'ekire! Ekitiibwa kya Isirayiri, Mukama akissizza wansi okuva mu ggulu okutuuka ku nsi; ne yeerabira entebe ey'ebigere bye ku lunaku lwe yasunguwalirako.

² Mukama azikirizza abatuula mu Yakobo bona awatali kubasaasira; mu busungu bwe amenye ebigo eby'amaanyi eby'omuwala wa Yuda; assizza wansi obwakabaka bwe n'abakungu be n'abamalamu ekitiibwa.

³ Mu busungu obungi amaanyi gonna aga Isirayiri agakendeezezza; bw'alabye omulabe ng'asembera, n'aggyawo omukono gwe ogwa ddyo; anyiigidde Yakobo okufaanana ng'omuliro bwe gubumbujja ne gwokya buli ekiguliraanye.

⁴ Anaanudde omutego gwe okufaanana nga ogw'omulabe, era omukono gwe ogwa ddyo mweteeefuteefu. Azikirizza ebyo byonna ebisanyusa amaaso mu weema ey'omuwala wa Sayuuni, okufaanana ng'omulabe bwe yandikoze; obusungu bwe bubuubuuka ng'omuliro.

⁵ Mukama afuuse ng'omulabe; azikirizza Isirayiri, n'azikiriza embiri ze, n'azikiriza n'ebifo bye eby'amaanyi. Aleetedde muwala wa Yuda okweyongera okukaaba n'okukungubaga.

⁶ Asaanyizzaawo eweema ye n'efaanana ng'ennimiro, era azikirizza n'ekifo kye eky'Okukuŋŋaanirangamu. MUKAMA yeerabizza Sayuuni embaga ze entukuvu ne ssabbiiti, era mu busungu bwe obungi anyoomye kabaka ne kabona.

⁷ Mukama atamiddwa ekyoto kye, n'alekulira n'ekifo kye ekitukuvu. Awaddeyo bbugwe w'embiri ze eri omulabe; era baleekaanidde mu nnyumba ya MUKAMA, ne baleetamu oluyoogaano nga ku lunaku olw'embaga entukuvu.

⁸ MUKAMA yamalirira okumenya bbugwe eyeetoolodde muwala wa Sayuuni, n'agolola omuguwa ogupima, Omukono gwe ne guteewala kuzikiriza. Yaleetera enkomera ne bbugwe okukungubaga, byonna ne biggweererera.

⁹ Emiryango gye gisse mu ttaka, n'emitayimbwa gyagyo agimenye n'agyonoona. Kabaka we n'abakungu be baawaŋŋangusizibwa, eteri mateeka gaabwe agabafuga, era ne bannabbi be tebakyafuna kwolesebwa kuva eri MUKAMA.

¹⁰ Abakadde b'Omuwala wa Sayuuni batuula wansi ku ttaka nga basiriikiridde; bayiye enfuufu ku mitwe gyabwe era beesibye ebibukutu; n'abawala ba Yerusaalemi bakotese emitwe gyabwe.

¹¹ Amaaso gange gakooye olw'okukaaba n'emmeeme yange enyiikadde n'omutima gwange gulumwa olw'okuzikirizibwa kw'abantu bange, n'olw'abaana abato n'abaana abawere okuzirkira wakati mu nguudo ez'omu kibuga.

¹² Bakaabirira bannyaabwe nga bwe boogera nti, “Omugaati n’envinnyo biri ludda wa?” nga bwe bazirika okufaanana ng’abaliko ebiwundu mu nguudo ez’ekibuga, nga bwe bakaabira mu bifuba bya bannyaabwe.

¹³ Nnyinza kugamba ki, era kiki kye nnyinza okukugeraageranyaako ggwe Omuwala wa Yerusaalemi? Kiki kye nnyinza okukufaananya, okukusanyusa ggwe Omuwala Embeerera owa Sayuuni? Ekiwundu kyo kinene nnyo, kale ani ayinza okukiwonya?

¹⁴ Okwolesebwa bannabbi bo kwe baafuna, kwali kwa bulimba era kwa butaliimu; tebaakutegeeza obutali butuukirivu bwo okukuwonya obusibe. Engero ze baabanyumizanga zaali za bulimba era eziwabya.

¹⁵ Bonna abayitawo babakubira mu ngalo ne bafuuwa empa ne banyenyeza omuwala wa Yerusaalemi emitwe gyabwe nga boogera nti, “Kino kye kibuga ekyayitbwanga ekituukiridde, era essanyu ly’ensi zonna?”

¹⁶ Abalabe bo bona baasaamiridde nga beewuunya; nga bafuuwa empa, era baluma amannyo nga boogera nti, “Tumuzikirizza. Luno lwe lunaku lwe twalindirira, kaakano lutuukiridde, era tululabye.”

¹⁷ MUKAMA akoze kye yateekateeka, era atuukirizza ekigambo kye kye yalagira mu nnaku ez’edda. Akuzikirizza awatali kukusaasira, aleetedde omulabe wo okukusekerera, n’amaanyi g’abalabe bo agagulumizza.

¹⁸ Kaabirira Mukama n’eddoboozi ery’omwanguka ggwe Omuwala wa Sayuuni. Leka amaziga go gakulukute ng’omugga emisana n’ekiro. Teweewummuzu so toganya maaso go kuwummula.

¹⁹ Golokoka, okaabe ekiro obudde nga bwa kaziba; Fuka emmeeme yo ng’amazzi mu maaso ga Mukama. Yimusa emikono gyo gy’ali, olw’obulamu bw’abaana bo abato abazirise olw’enjala mu buli luguudo.

²⁰ “Tunula, Ayi MUKAMA Katonda osaasire! Ani gwe wali obonerezza bw’otyo? Ddala, abakyala balye ebibala by’embuto zaabwe, abaana be bakuzizza? Ddala, bakabona ne bannabbi battibwe mu watukuvu wa Mukama?

²¹ “Abato n’abakulu bona bafiiridde wamu mu nfuufu ey’enguudo; abavubuka bange ne bawala bange battiddwa n’ekitala; obattidde ku lunaku olw’obusungu bwo, era obasse awatali kusaasira.

²² “Nga bw’oyita abantu ku lunaku olw’embaga, bw’otyo bw’ompitidde ebikemo ku njuyi zonna; era ku lunaku olw’obusungu bwa MUKAMA, tewali n’omu eyasimattuka newaakubadde eyasigalawo; abo be nalabirira ne nkuza, omulabe wange be yazikiriza.”

Okukungubaga 3

- ¹ Nze muntu eyakangavvulwa n'omuggo ogw'obusungu bwe.
- ² Angobye mu maaso ge n'antambuliza mu kizikiza, awatali kitangaala;
- ³ ddala, omukono gwe gunnwanyisizza emirundi egiddiriñjanwa olunaku lwonna.
- ⁴ Akaddiyizza omubiri gwange n'eddiba lyange era amenye n'amagumba gange.
- ⁵ Antaayizza n'anzijuza obulumi n'okubonaabona.
- ⁶ Antadde mu kizikiza ng'abafu abaafa edda.
- ⁷ Ankomedde n'okuyinza ne siyinza kudduka, ansibye enjegere ezizitowa.
- ⁸ Ne bwe mukoowoola ne mukaabira nga mmusaba anyambe, okusaba kwange akuggalira bweru.
- ⁹ Anteeredde amayinja mu kkubo lyange era akyamizza amakubo gange.
- ¹⁰ Ng'eddubu bwe liteega, n'empologoma bwe yeekweka
- ¹¹ yansikambula n'anziggya mu kkubo lyange n'antaagulataagula n'andeka awo nga sirina anyamba.
- ¹² Yanaanuula omutego gwe, n'anteekawo okuba ssabbaawa ey'obusaale bwe.
- ¹³ Yafumita omutima gwange n'obusaale okuva mu mufuko gwe.
- ¹⁴ Nafuuka ekisekererwa eri abantu bona, era bannyooma nga bannyimbirira okuzibya obudde.
- ¹⁵ Anzijuzza ebikaawa era ampadde ekikompe eky'obubalagaze nkinywe.
- ¹⁶ Ampadde oluyinjayinja okululya amannya gange ne gamenyeka; anninnyiridde mu nfuufu.
- ¹⁷ Emmeeme yange terina mirembe, n'okujukira sijjukira bugagga bwe bufaanana.
- ¹⁸ Era njogera nti, "Ekitiibwa kyange kigenze, n'essuubi lyonna lye nalina mu MUKAMA limpeddeko."
- ¹⁹ Nzijukira okubonaabona kwange n'okuwankawanka kwange, n'obulumi n'obubalagaze.
- ²⁰ Mbijjukira bulungi era bwe mbirowoozaako omutima gwange gulumwa.
- ²¹ Ebyo byonna mbijjukira, kyenvudde mbeera n'essuubi.
- ²² Olw'okwagala kwa MUKAMA okutaggwaawo, tetulimalibwawo, kubanga ekisa kye tekiggwaawo.
- ²³ Buli lukya ekisa kyo kiba kiggya; n'obwesigwa bwo bwa lubeerera.

- ²⁴ Njogera mu mutima gwange nti, "MUKAMA gwe mugabo gwange, kyenaava mbeera n'essuubi mu ye."
- ²⁵ MUKAMA mulungi eri abo abamulinamu essuubi, eri oyo amunoonya.
- ²⁶ Kirungi omuntu okulindirira obulokozi bwa MUKAMA n'obukkakkamu.
- ²⁷ Kirungi omuntu okwetikka ekikoligo kye mu buvubuka bwe.
- ²⁸ Atuulenga yekka mu kasirise kubanga MUKAMA y'akimwambiseemu.
- ²⁹ Leka akweke amaaso ge mu nfuufu, mpozi wanaabaawo essuubi.
- ³⁰ Leka aweeyo oluba lwe okukubibwa, era amalibwe n'okuvumibwa.
- ³¹ Kubanga Mukama taligobera bantu bweru ebbanga lyonna.
- ³² Newaakubadde ng'aleeta obulumi, aliraga ekisa kubanga okwagala kwe kungi nnyo tekuggwaawo.
- ³³ Tagenderera kuleeta bulumi newaakubadde okubonaabona ku baana ba bantu.
- ³⁴ MUKAMA akkiriziganya n'okulinnyirira abasibe,
- ³⁵ n'okuggyako omuntu obwetwaze bwe mu maaso g'Oyo Ali Waggulu Ennyo,
- ³⁶ oba n'obutaba na bwenkanya eri omuntu?
- ³⁷ Ani ayinza okwogera ekintu ne kituukirira, Mukama nga takiragidde?
- ³⁸ Mu kamwa k'oyo Ali Waggulu Ennyo, si mmwe muva ebigambo eby'okubeerwa n'ebi'okubonereza?
- ³⁹ Lwaki omuntu omulamu yeemulugunya, bw'abonerezebwa olw'ebibi bye?
- ⁴⁰ Twekebere engeri zaffe, era tuzeetegereze, tudde eri MUKAMA.
- ⁴¹ Tuyimuse emitima gyaffe n'emikono gyaffe eri Katonda mu ggulu, twogere nti,
- ⁴² "Twayonoona ne tujeema, tokyerabiranga era tonatusonyiwa.
- ⁴³ "Ojjudde obusungu n'otugobaganya, n'otutta awatali kutusaasira.
- ⁴⁴ Weebisseeko ekire, waleme okubaawo okusaba n'okumu okutuuka gy'oli.
- ⁴⁵ Otufudde obusa n'ebisasiro mu mawanga.
- ⁴⁶ "Abalabe baffe bona batwogerako ebigambo ebibi.
- ⁴⁷ Tubonyeebonye olw'entiisa n'emitego n'okunyagibwa n'okuzikirizibwa."
- ⁴⁸ Amaaso gange gakulukuta emigga gy'amaziga olw'okuzikirira kw'abantu bange.

- ⁴⁹ Era amaaso gange ganeeyongeranga okukulukuta amaziga awatali kusirika,
⁵⁰ okutuusa MUKAMA lw'alisinzira mu ggulu n'alaba.
- ⁵¹ Bye ndaba bireeta ennaku ku mutima gwange, olw'ebyo ebyatuuka ku bawala b'ekibuga kyange.
- ⁵² Abalabe bange banjigganya olutata ne baba ng'abayigga ennyonyi.
- ⁵³ Bagezaako okuzikiririza obulamu bwange mu bunnya, ne bankasuukirira amayinja;
- ⁵⁴ amazzi gaabikka omutwe gwange, ne ndowooza nti, nsanyeewo.
- ⁵⁵ "Nakoowoola erinnya lyo, Ayi MUKAMA, nga ndi mu bunnya wansi ennyo;
- ⁵⁶ wawulira okwegayirira kwange: toziba matu go eri okukaaba kwange."
- ⁵⁷ Bwe nakukoowoola wanseemberera n'oyogera nti, "Totya!"
- ⁵⁸ Mukama watunula mu nsonga yange, era n'onunula obulamu bwange.
- ⁵⁹ Ayi MUKAMA, walaba ebibi bye bankola, obasalire omusango nga bwe kibagwanira.
- ⁶⁰ Walaba bwe bampalana, n'enkwe zaabwe zonna ze bansalira.
- ⁶¹ Wawulira bye banvuma, Ayi MUKAMA Katonda, n'enkwe zaabwe zonna ze bansalira,
- ⁶² obwama n'ebirowoozo eby'abalabe bange bye bantesaako obudde okuziba.
- ⁶³ Batunuulire mu kutuula kwabwe ne mu kuyimirira kwabwe; bannyooma nga bwe bannyimbirira.
- ⁶⁴ Obasasule nga bwe kibagwanira Ayi MUKAMA Katonda, olw'ebikolwa eby'emikono gyabwe.
- ⁶⁵ Osseeko ekibikka ku mitima gyabwe, n'ekikolimo kyo kibabeereko.
- ⁶⁶ Obayigganye mu busungu bwo obazikirize ng'osinziira mu ggulu lya MUKAMA Katonda.

Okukungubaga 4

- ¹ Zaibu ng'ettalazze! Zaibu ennungi ng'efuuse! Amayinja ag'omuwendo gasaasaanye buli luguudo we lutandikira.
- ² Abaana ba Sayuuni ab'omuwendo abaali beenkana nga zaibu ennungi, kaakano bali ng'ensuwa ez'ebbumba, omulimu gw'emikono gy'omubumbi.
- ³ Ebibe biyonsa abaana baabyo, naye abantu bange bafuuse ng'abatalina kisa, bafaanana nga bammaaya mu ddungu.

⁴ Olw'ennyonta omwana ayonka gy'alina, olulimi lwe lukwatira ku kibuno ky'akamwa ke; abaana basaba emmere naye tewali n'omu agibawa.

⁵ Abaalyanga ebiwoomerera basabiriza ku nguudo; n'abo abaakuzibwa ng'abambala engoye ezinekaaneka bali ku ntuumu ez'ebisasiro.

⁶ Ekibonerezo ky'abantu bange kisinga ekya Sodomu, ekyawambibwa mu kaseera akatono, nga tewali n'omu azze kukibeera.

⁷ Abalangira baabwe baatukula nnyo okusinga omuzira, nga beeru okusinga amata; n'emibirgyabwe nga mimyufu okusinga amayinja amatwakaavu, era banyirivu nga safiro.

⁸ Naye kaakano badduggala okusinga enziro, era tebakyasobola kutegeerekeka mu nguudo. Olususu lwabwe lukalidde ku magumba gaabwe; lukaze ng'ekiti ekikalu.

⁹ Abafa ekitala bafa bulungi okusinga abafa enjala, kubanga abafa enjala bayongobera ne baggwaawo olw'obutaba na mmere mu nnimiro.

¹⁰ Abakazi ab'ekisa abaagala abaana bafumbye abaana baabwe; abaana abaafuuka emmere abantu bange bwe baazikirizibwa.

¹¹ MUKAMA akituukirizza mu busungu bwe obungi, era abayiyeko obusungu bwe obungi. Yakoleeza omuliro mu Sayuuni ogwayokya emisingi gyakyo.

¹² Bakabaka b'ensi n'abantu ab'ensi endala tebakkiriza, nti abalabe n'ababakyawa baliyingira mu wankaaki wa Yerusaalemi.

¹³ Ebyo byabatuukako olw'ebibi bya bannabbi be, n'olw'obutali butuukirivu bwa bakabona be, abaayiwa omusaayi gw'abatuukirivu abaababeerangamu.

¹⁴ Badoobera mu nguudo nga bamuzibe; bajjudde omusaayi so tewali ayanjanga okukwata ku byambalo byabwe.

¹⁵ Abantu baabagobaganya nga boogera nti, "Muveewo, mmwe abatali balongoofu! Muviireewo ddala, so temutukwatako!" Bwe baafuuka emmombooze, amawanga gabagobaganya nga boogera nti, "Tebakyasaana kubeera wano."

¹⁶ MUKAMA yennyini abasaasaanyizza, takyabafaako. Bakabona tebakyassibwamu kitibwa, newaakubadde abakadde okuweebwa ebifo eby'oku mwanjo.

¹⁷ Amaaso gaffe gakooye olw'okulindirira okubeerwa okutajja; nga tulindirira eggwanga eriyinza okutulokola.

¹⁸ Baatucocca ne batulemesa okutambulira mu nguudo zaffe; enkomerero yaffe n'eba kumpi, n'ennaku zaffe ne ziggwaayo.

¹⁹ Abaatuyiganyanga baatusinga embiro okusinga n'empungu ez'omu bbanga. Baatugobera mu nsozi ne batuteegera mu ddungu.

²⁰ Oyo MUKAMA gwe yafukako amafuta yagwa mu mitego gyabwe. Twalowooza nga tulikwekebwa mu kisiikirize kye ne tubeeranga mu mawanga.

²¹ Sanyuka ojaguze, ggwe Omuwala wa Edomu, abeera mu nsi ya Uzi; naye lumu olinywa ku kikompe n'otamiira ne weeyambula.

²² Ggwe Muwala wa Sayuuni, ekibonerezo kyo kikomye awo, talikwongerayo mu busibe. Naye ggwe omuwala wa Edomu, MUKAMA alikubonereza, n'ayanika ekibi kyo mu lujjudde.

Okukungubaga 5

¹ Jjukira Ayi MUKAMA ekitutuuseeko. Tunula olabe ennaku yaffe.

² Omugabo gwaffe guweereddwa bannamawanga, n'amaka gaffe gatwaliddwa abatali ba mu nnyumba.

³ Tufuuse bamulekwa abatalina bakitaabwe, ne bannyaffe bafuuse bannamwandu.

⁴ Tusasulira amazzi ge tunywa; n'enku tuteekwa okuzigula.

⁵ Abatucocca batugobaganya; tukooye ate nga tetulina wa kuwummulira.

⁶ Twakola endagaano ne Misiri n'Abasuuli okutufuniranga ku mmere.

⁷ Bajajjaffe baayonoona, ne bafa, naye tubonerezebwa olw'ebikolwa byabwe ebitaali bya butuukirivu.

⁸ Abaddu be batufuga, tewali n'omu ayinza okutulokola mu mukono gwabwe.

⁹ Tuba kumpi n'okuttibwa nga tunoonya emmere, olw'ekitala ekiri mu ddungu.

¹⁰ Olususu lwaffe luddugadde ng'enziro olw'enjala ennyingi.

¹¹ Abakyala ba Sayuuni, n'abawala embeerera ab'omu bibuga bya Yuda bakwatiddwa olw'amaanyi.

¹² Abalangira bawanikibbwaa baleebeetera ku mikono gyabwe n'abakadde tewali abassaamu kitibwa.

¹³ Abavubuka bawalrizibwa okusa emmere ku jjinja ne ku lubengo, n'abalenzi batagala nga beetisse entuumu z'enku.

¹⁴ Abakadde tebakyatuula mu wankaaki w'ekibuga, n'abavubuka tebakyayimba.

¹⁵ Emitima gyaffe tegikyasanyuka, n'okuzina kwaffe kufuuse kukungubaga.

¹⁶ Engule egudde okuva ku mitwe gyaffe. Zitusanze kubanga twoonoonye!

¹⁷ Emitima gyaffe kyegivudde gizirika, era n'amaaso gaffe kyegavudde gayimbaala.

¹⁸ Olw'okuba nga olusozi Sayuuni lulekeddwa nga lwereere, ebibe kyebivudde bitambulirako.

¹⁹ Ggwe, Ayi MUKAMA obeerera ennaku zonna; entebe yo ey'obwakabaka ya mirembe na mirembe.

²⁰ Lwaki otwelabiririra ddala okumala ennaku ezo zonna? Tuddiremu, Ayi MUKAMA, tudde gy'oli.

²¹ Tukomyewo gy'oli Ayi MUKAMA, otuzze buggyaa ng'edda;

²² wabula ng'otusuulidde ddala, era ng'otusunguwalidde nnyo nnyini obutayagala na kutuddiramu.

Ezeekyeri

Ezeekyeri 1

Ebintu Ebiramu n'Ekitiibwa kya MUKAMA

¹ Awo mu mwaka ogw'amakumi asatu mu mwezi ogwokuna ku lunaku olwokutaano mu mwezi ogwo, bwe nnali nga ndi mu buwañjanguse ku mabbali g'omugga Kebali, eggulu ne libikkulwa, ne ndaba okwolesebwa okuva eri Katonda.

² Ku lunaku olwokutaano mu mwezi ogwo, gwe gwali omwaka ogwokutaano ogw'obuwañjanguse bwa kabaka Yekoyakini,

³ ekigambo kya MUKAMA ne kinzijjira, nze Ezeekyeri kabona, mutabani wa Buuzi, mu nsi ey'Abakaludaaya ku mabbali g'omugga Kebali, n'omukono gwa MUKAMA gwali ku ye.

⁴ Awo ne ntunula ne ndaba kibuyaga ng'ava mu bukiikkono, n'ekire ekikutte ekimyansa ekyamwetooloola, wakati nga wafaanana ng'awali ekyuma ekimasamasa.

⁵ Wakati mu muliro mwalabika ng'omwali ebiramu ebina, nga birina ekifaananyi ky'omuntu.

⁶ Buli kimu kyalina obwenyi buna, n'ebiwaawaatiro bina.

⁷ Amagulu gaabyo gaali magolokofu, n'ebigere byabyo nga bifaanana ekigere ky'ennyana, era nga bitangalijja ng'ekikomo ekizigule.

⁸ Byalina engalo ez'omuntu wansi w'ebiwaawaatiro byabyo ku njuyi zaabyo ennya. Byonna ebina byalina obwenyi n'ebiwaawaatiro,

⁹ era ebiwaawaatiro byabyo nga bisonga waggulu, buli kiwaawaatiro nga kikoona ku kinnaakyo. Buli kimu kyatambula nga kiraga mu maaso, nga tekikyuse kutunula mabega.

¹⁰ Obwenyi bwabyo bwafaanana bwe buti: Buli kimu kyalina ekyenyi eky'omuntu, oluuyi olwa ddyo olwa buli kyenyi nga lufaanana ekyenyi eky'empologoma, n'oluuyi olwa kkono ku buli kyenyi nga lufaanana ekyenyi eky'ente, ate nga birina n'ekyenyi ky'emunyungu.

¹¹ Ebyenyi byabyo n'ebiwaawaatiro byabyo byali byanjuluze nga bitunudde waggulu. Buli kimu kyalina ebiwaawaatiro bibiri, buli kiwaawaatiro nga kikona ku kinnaakyo, ebibiri ebirala nga bibisse ku mibiri gyabyo.

¹² Buli kimu kyali kitunudde gye kyali kiraga. Omwoyo gye yalaganga nabyo gye byalaganga, ne bitakyuka kudda mabega.

¹³Endabika ey'ebiramu ebyo yafaanana ng'omuliro ogwaka ogw'amanda oba omuliro ogw'omumuli. Omuliro gwavanga mu maaso n'emabega, nga gwakaayaakana era nga gumyansa.

¹⁴Ebiramu byetawulanga ng'okumyansa okw'eggulu.

¹⁵Bwe nnali nga nkyali ku ebyo, ne ndaba zinnamuziga ku ttaka emabbali wa buli kiramu, n'ebyenyi byabyo ebina.

¹⁶Endabika eya zinnamuziga n'okukolebwa kwazo kwali nga berulo, zonna nga zifaanana. Buli emu yafaanana nga nnamuziga ekwataganye ne ginnaayo.

¹⁷Era zeetoolooleranga mu njuyi zonna ennya, nga tezizinaazina ng'ebiramu bitambula.

¹⁸Empanka zaazo zaali mpanvu nga zitiisa, era empanka ennya zonna nga zijjuddemu amaaso.

¹⁹Ebiramu bwe byaseeseetukanga, zinnamuziga zaabyo nazo ne ziseeseteuka; ebiramu bwe byagolokokanga okuva mu ttaka zinnamuziga nazo ne zigolokoka.

²⁰Omwoyo buli gye yabanga agenda, gye byagendanga, ne zinnamuziga ne zisitukira wamu nazo, kubanga omwoyo eyali mu biramu ye yabanga ne mu zinnamuziga.

²¹Ebiramu bwe byaseeseetukanga, nazo ne ziseeseteuka, ebiramu bwe byasitukanga, nazo ne zisituka; ebiramu bwe byagolokokanga okuva ku ttaka, ne zinnamuziga ne zigolokokera wamu nazo, kubanga omwoyo ow'ebiramu yabanga mu zinnamuziga.

²²Waggulu w'emitwe gy'ebiramu waliwo ekifaananyi eky'ekifo ekigazi, ekyatemagananga ng'omuzira.

²³Wansi w'ekifo ekyo ekigazi ebiwaawaatiro byabyo byali bigolole, nga bituukagana, buli kiramu nga kirina ebiwaawaatiro bibiri ebyabikkanga emibiri gyabyo.

²⁴Ebiramu bwe byagenda, nawulira okuwuma kw'ebiwaawaatiro byabyo, ng'okuwuma kw'amazzi amangi, ng'eddoboozi lya Ayinzabyonna, ng'oluyoogaano lw'eggye. Bwe byayimirira, ne bissa ebiwaawaatiro byabyo.

²⁵Awo ne wawulikika eddoboozi okuva waggulu w'ekifo ekigazi waggulu w'emitwe gyabyo, bwe byayimiriranga nga bissizza ebiwaawaatiro byabyo.

²⁶Waggulu w'ekifo ekigazi waggulu w'emitwe gyabyo waaliwo ekyafaanananga entebe ey'obwakabaka, eya safiro, ate waggulu w'ekifaananyi eky'entebe ey'obwakabaka nga watuddeyo eyafaanana ng'omuntu.

²⁷Ekyo nakirabira ku kyafaanana ng'ekiwato kye, okwambuka ng'afaanana ng'ekyuma ekyengeredde, nga kiriko omuliro mungi; n'okuva mu kiwato kye okukka ng'afaanana omuliro, nga yeetooloddwa okumasamasa enjuuyi zonna.

²⁸Ekitiibwa ekyamwetooloolanga kyafaanana nga musoke mu bire ku lunaku olw'enkuba. Ekyo kye kyali ekifaananyi eky'ekitiibwa kya MUKAMA. Bwe nakiraba, ne nvuunama, ne mpulira eddoboozi ly'oyo eyali ayogera.

Ezeekyeri 2

Okuyitibwa kwa Ezeekyeri

¹N'anjamba nti, "Omwana w'omuntu, yimirira njogere naawe."

²Awo bwe yali ng'akyayogera nange, Omwoyo nanzikako n'annyimusa, ne mpulira ng'ayogera nange.

³N'ayogera nti, "Omwana w'omuntu, nkutuma eri Abayisirayiri, eri eggwanga ejeemu eryanjeemera, era bo ne bajajjaabwe banjeemera okuva edda n'okutuusa olunaku lwa leero.

⁴Abantu be nkutumamu bakakanyavu era bakozi ba bibi. Bategeeze nti, 'Bw'ati bw'ayogera MUKAMA Katonda nti,'

⁵Oba banaawuliriza oba tebaawulirize, kubanga nnyumba njeemu, balimanya nga mu bo musituseemu nnabbi.

⁶Kaakano ggwe omwana w'omuntu, tobanya newaakubadde ebiambo bye banaayogera, newaakubadde emyeramanno n'amaggwa nga bikwetoolodde, era ng'obeera wakati mu njaba ez'obusagwa. Totya bigambo bye banaayogera newaakubadde okutekemuka kubanga nnyumba njeemu.

⁷Oteekwa okubategeeza ebiambo byange, oba banaawuliriza oba tebaawulirize, kubanga bajemba.

⁸Naye ggwe omwana w'omuntu wuliriza kye nkugamba. Tojeema ng'ennyumba eyo bwe yanjeemera. Yasamyakamwa ko olye bye nkuwa."

⁹Awo ne ntunula, ne ndaba omukono nga gugoloddwa gye ndi, mu gwo nga mulimu omuzingo gw'ekitabo.

¹⁰N'agwanjuriza mu maaso gange, munda nga muwandiikibbwamu ne kungulu nga kuwandiikibbwako ebiambo eby'okukungubaga n'okukuba ebiwoobe, n'okukaaba.

Ezeekyeri 3

¹Awo n'anjamba nti, "Omwana w'omuntu, lya ekiri mu maaso go, lya omuzingo gw'empapula guno; oluvannyuma ogende oyogere eri ennyumba ya Isirayiri."

²Ne njasama, n'ampa omuzingo gw'empapula ne ngulya.

³N'aŋjamba nti, "Omwana w'omuntu, lya omuzingo gw'empapula gwe nkuwa, ojjuze olubuto lwo." Ne ngulya, ne guwoomerera ng'omubisi gw'enjuki.

⁴Oluvannyuma n'aŋjamba nti, "Omwana w'omuntu, kaakano laga eri ennyumba ya Isirayiri oyogere ebigambo byange gye bali.

⁵Sikutuma eri eggwanga eririna enjogera etategeerekeka era abalina olulimi oluzibu, b'otayinza kutegeera mu njogera, naye eri ennyumba ya Isirayiri,

⁶so si eri abantu abangi abalina enjogera etategeerekeka era abalina olulimi oluzibu, b'otayinza kutegeera bye bagamba. Mazima singa nakutuma gye bali, bandikuwulirizza.

⁷Naye ennyumba ya Isirayiri si beetegefu kukuwuliriza kubanga si beetegefu kumpuliriza; era ennyumba ya Isirayiri yonna balina ekyenyi kikalubo n'emitima mikakanyavu.

⁸Naye naawe ndikufuala omukalubo era omukakanyavu mu mutima nga bo.

⁹Ndifuula ekyenyi kyo okuba ng'ejinja erikaluba ennyo, erikaluba ng'ejinja ery'embaaalebaale. Tobatya so totiisibwatiisibwa, newaakubadde nga nnyumba njeemu."

¹⁰N'aŋjamba nti, "Omwana w'omuntu, wuliriza bulungi era okwate ebigambo byonna bye njogera naawe.

¹¹Genda kaakano eri abantu bo, mu buwanjjanguse, oyogere nabo. Bagambe nti, Bw'ati bw'ayogera MUKAMA Katonda, obanga banaawulira, obanga tebaawulire."

¹²Awo Omwoyo n'ansitula, ne mpulira emabega wange eddoboozi ng'okuwuluguma okunene nga lyogera nti, "Ekitiibwa kya MUKAMA kyebazibwe mu kifo gy'abeera."

¹³Okuwuumma okw'ebiwaawaatiro by'ebiramu nga bikuubagana, n'okuwuumma kwa zinnamuziga ku mabbali gaabyo kwali ng'okuwuluguma okw'amaanyi.

¹⁴Omwoyo n'ansitula n'antwala, ne ŋjendera mu buyinike ne mu busungu, ng'omukono gwa MUKAMA ogw'amaanyi guli ku nze.

¹⁵Ne ntuuka mu kifo ekimu awaali abawaŋjanguse e Terabibu ku mugga Kebali, ne ntuula mu bo okumala ennaku musanvu, nga nsamaaliridde.

Okulabula Isirayiri

¹⁶Oluvannyuma lw'ennaku omusanvu ekigambo kya MUKAMA ne kinzijira:

¹⁷"Omwana w'omuntu, nkufudde omukuumi w'ennyumba ya Isirayiri, era buli lw'onoowuliranga ekigambo kye nnaayogeranga, balabulenga.

¹⁸Bwe njamba atali mutuukirivu nti, ‘Mazima tolirema kufa,’ n’otamulabula newaakubadde okwogera naye ng’omulabula alekeyo engeri ze ezitali za butuukirivu asobole okuwonya obulamu bwe, omuntu oyo atali mutuukirivu alifa olw’obutali butuukirivu bwe, naye omusaayi gwe ndiguvunaana ggwe.

¹⁹Naye bw’olirabula omuntu atali mutuukirivu, n’atalekaayo obutali butuukirivu, newaakubadde engeri ze embi, alifa olw’ekibi kye, naye obulamu bwo bulilokolebwa.

²⁰“Ate era bw’alireka ebikolwa bye eby’obutuukirivu n’akola ebibi, ne nteeka enkonge mu maaso ge, alifa. Olw’okubanga tewamulabula, alifa olw’ekibi kye. Ebikolwa eby’obutuukirivu bye yakola tebirijukirwa, era ndikuvunaana olw’omusaayi gwe.

²¹Kyokka bw’olabulanga omutuukirivu obutayonoona, n’atayonoona, ddala ddala aliba mulamu kubanga yawulira okulabula kwo, era naawe oliba weerokodde.”

²²Omukono gwa MUKAMA gw’andiko eyo, n’anjamba nti, “Golokoka olage ku ttale, era eyo gye nnaayogerera naawe.”

²³Ne nsituka ne ndaga ku ttale. Ekitiibwa kya MUKAMA kyaliwo, nga kifaanana ekitiibwa kye nalaba ku Mugga Kebali; ne neeyala wansi.

²⁴Awo Omwoyo n’anzikako, n’annyimusa okuva we nnali, n’anjamba nti, “Genda weggalire mu nnyumba yo.

²⁵Ggwe omwana w’omuntu balikusiba emiguwa, n’olemwa okugenda okulaba abantu bo.

²⁶Ndiziba akamwa ko, n’osirikira ddala, n’olema okubanenya, newaakubadde nga nnyumba njeemu.

²⁷Kyokka bwe ndyogera gy’oli, ndizibula akamwa ko era olibagamba nti, ‘Bw’ati bw’ayogera MUKAMA Ayinzabyonna.’ Aliwuliriza kale aliwuliriza, n’oyo aligaana okuwuliriza naye muleke agaane okuwuliriza; nnyumba njeemu.”

Ezeekyeri 4

Ekifaananyi Ekiraga Okuzingizibwa kwa Yerusaalemi

¹“Kaakano omwana w’omuntu, ddira ekipande eky’ebbumba okiteeke mu maaso go, okikubeko ekifaananyi ky’ekibuga Yerusaalemi,

²okizingize, okizimbeko bbugwe okukyetooloola, okituumeko ekifunvu, era oteekewo ensiisira okukyetooloola n’ebifunvu bye banaatomera enjuuyi zonna.

³“Olувannyuma oddire olukalango olw’ekyuma, oluteeke okuba bbugwe ow’ekyuma wakati wo n’ekibuga, okyuke okitunuulire. Kiriba mu mbeera

ey'okuzingizibwa, era naawe kizingize. Ako kaliba kabonero eri ennyumba ya Isirayiri.

⁴“N'oluvannyuma oligalamira ku lubiriizi lwo olwa kkono n'oddira ekibi ky'ennyumba ya Isirayiri okyeteekoko. Olyetikka ekibi kyabwe ennaku z'olimala ng'ogalamidde ku lubiriizi lwo.

⁵Ennaku z'olimala ezenkanankana emyaka gye baamala nga boonoona. Noolwekyo olimala ennaku ebikumi bisatu mu kyenda nga weetisse ekibi ky'ennyumba ya Isirayiri.

⁶“Ekyo bw'olikimala, oligalamira nate, ku mulundi guno ku lubiriizi lwo olwa ddyo, ne weetikka ekibi ky'ennyumba ya Yuda. Olimala ennaku amakumi ana, buli lunaku mwaka.

⁷Olikyusa amaaso go n'otunula eri okuzingizibwa kwa Yerusaalemi, okyogerereko ebigambo n'omukono gwo ogutali mubikkeko,

⁸Ndikusiba emiguwa n'otosobola kwekyusa okuva ku luuyi olumu okudda ku lulala, okutuusa ennaku ez'obusibe bwo lwe ziriggwaako.

⁹“Ddira ejjaano ne sayiri, n'obulo, n'omukyere, n'ebijanjalo, n'enva endiirwa endala obisse mu kibya omuterekewa, obikozese okwefumbira omugaati. Oligulya mu nnaku ezo ebikumi ebisatu mu ekyenda z'oliba ogalamidde ku luuyi olw'omubiri gwo.

¹⁰Opime gulaamu ebikumi bibiri mu amakumi asatu ez'emmere gy'olirya buli lunaku, era gy'oliriira mu biseera ebigure.

¹¹Ate opime nga kitundu kya lita ey'amazzi, oganywe mu biseera ebigure.

¹²Olye emmere nga bwe wandiridde keeke eya sayiri; ogifumbe n'obusa bw'omuntu, ng'abantu balaba.”

¹³MUKAMA n'aŋjamba nti, “Mu ngeri eno abantu ba Isirayiri baliriira emmere etali nnongoofu mu mawanga gye ndibasindika.”

¹⁴Ne njogera nti, “Nedda Ayi MUKAMA Katonda. Sseeyonoonesanga, era okuva mu buto bwange n'okutuusa kaakano siryanga kifu wadde ekitaaguddwataaguddwa ensolo enkambwe. Siryanga nnyama etali nnongoofu.”

¹⁵N'ayogera nti, “Weewaawo, nnaakkiriza okukozesa obusa bw'ente okufumba omugaati mu kifo ky'obusa bw'abantu.”

¹⁶N'oluvannyuma n'aŋjamba nti, “Omwana w'omuntu, ndisalako emmere eri mu Yerusaalemi. Abantu balirya emmere engere mu kutya, ne banywa amazzi amapime mu kutya,

¹⁷kubanga emmere n'amazzi biriba bya bbula. Tebalyagala kwetunulako, era baliggwaawo olw'ekibi kyabwe.”

Ezeekyeri 5

- ¹ “Kaakano, omwana w’omuntu, ddira ekitala ekyogi, okikozese nga weembe ya kinyoozi okwemwa omutwe n’ekirevu. N’oluvannyuma oteeke enviiri ku minzaani ozipime era ozigabanyeemu.
- ² Ennaku ez’obusibe bwo bwe ziriggwaako, oyokere kyma kya kusatu ku nviiri ezo mu kibuga. Ekyma kya kusatu ekirala okisaasaanye mu mpewo. Ndibagobesa ekitala.
- ³ Naye ddira ku miguwa mitono, egyp’enviiri ogifundikire mu kyambalo kyo.
- ⁴ Ate era ddira mitono ku egyo, ogisuule mu muliro, ogyokye. Omuliro gulibuna ennyumba ya Isirayiri yonna okuva okwo.
- ⁵ “Bw’ati bw’ayogera MUKAMA Katonda nti, Eno ye Yerusaalemi gye nateeka wakati mu mawanga, ng’ensi zonna zigyetoolodde.
- ⁶ Naye, boonoonye okusinga amawanga n’ensi abemwetoolodde bwe boonoonye ne bajeemera amateeka n’ebiragiro byange. Ajeemedde amateeka gange, n’atagoberera biragiro byange.
- ⁷ “Noolwekyo bw’ati bw’ayogera MUKAMA Katonda nti, Mubadde bajeemu nnyo n’okusinga amawanga agabeetoolodde ne mutagoberera biragiro byange wadde okukuma amateeka gange. Mukoze ebibi okusinga amawanga agabeetoolodde ne mutagoberera biragiro byange wadde okukuma amateeka gange. Mwonoonye okukira amawanga agabeetoolodde bwe gakola.
- ⁸ “Noolwekyo bw’ati bw’ayogera MUKAMA Katonda nti, Nze kennyini ndi mulabe wo, Yerusaalemi, era ndikubonerereza mu maaso g’amawanga.
- ⁹ Olwa bakatonda bo abalala bona ab’emizizo, ndikukola ekyo kye sikolanga, era kye siriddayo kukola.
- ¹⁰ Bakitaabwe baliriira abaana baabwe mu maaso gammwe, ate n’abaana balirya bakitaabwe, era ndikubonereza ne nsasaanya abalisigalawo eri empewo.
- ¹¹ Noolwekyo nga bwe ndi omulamu, olw’okuyonoonesa awatukuvu wange ne bakatonda abalala ab’ekivve, n’ebikolwa byammwe eby’ekivve, nze kennyini kyendiva nnema okukulaga ekisa, era sirikulaga kisa wadde okukusaasira, bw’ayogera MUKAMA Katonda.
- ¹² Kimu kya kusatu ku bantu bo balifa kawumpuli oba bazikirire olw’ekyeya nga bali mu ggwe. Kimu kya kusatu ekirala kirittibwa ekitala ebweru wa bbugwe, ne kimu kya kusatu ekirala ndikisaasaanya eri empewo ne mbagoba n’ekitala ekisowole.

¹³ “Olwo nno obusungu bwange n’ekiruyi kyange birikkakkana, era ndiba nesasuzza. Era bwe ndibasunguwalira balimanya nga nze MUKAMA nkyogeredde mu buggyaa.

¹⁴ “Ndikufuula ekyazikirira era ekivume mu mawanga agakwetoolodde, mu maaso g’abo bona abayitawo.

¹⁵ Bwe ndikubonerereza mu busungu bwange, ne mu kiruyi kyange nga nnyiize, oliba kivume, oyogerebweko oyeyeyerezebwe. Oliba kyakulabula era ekintu ekitiisa eri amawanga agakwetoolodde. Nze MUKAMA nkyogedde.

¹⁶ Bwe ndirasa obusaale obutta era obuzikiriza obw’ekyeya ndirasa okubazikiriza. Ndyongera okuleeta ekyeya, ne nsalako n’emmere ebaweebwa.

¹⁷ Ndibaleetera ekyeya n’ensolo enkambwe ez’omu nsiko, ne zibaleka nga temulina baana. Kawumpuli n’okuyiwa omusaayi biribatuukako, ne mbaleetako ekitala. Nze MUKAMA nkyogedde.”

Ezeekyeri 6

Obubaka eri Ensozi za Isirayiri

¹Awo ekigambo kya MUKAMA Katonda ne kinzijira nti,

²“Omwana w’omuntu tunuulira ensozi za Isirayiri,

³oyogere nti, ‘Mmwe ensozi za Isirayiri, muwulire ekigambo kya MUKAMA Katonda. Bw’ati bw’ayogera MUKAMA Katonda eri ensozi n’obusozi, eri emigga n’ebiwonvu, nti, Nze kennyini ndibaleetako ekitala ne nzikiriza n’ebifo byammwe ebigulumivu.

⁴Ebyoto byammwe birimenyebwamenyebwa, n’ebyoto kwe mwotereza obubaane birimenyebwamenyebwa; ndittira abantu bo mu maaso ga bakatonda bo abalala.

⁵Ndiddira emirambo gy’Abayisirayiri ne ngiteeka mu maaso ga bakatonda baabwe abalala, era ndisaasaanya amagumba go okwetooloola ebyoto byo.

⁶Buli gye mubeera ebibuga biriyonoonebwa n’ebifo byammwe ebigulumivu birisaanyizibwawo, n’ebyoto byammwe ne byonoonebwa ne bimenyebwamenyebwa, ne bakatonda bammwe ne bamenyebwamenyebwa ne boonoonebwa, era n’ebyoto byammwe ebyokerwako obubaane ne bimenyebwa ne bye mukoze ne bisaanawo.

⁷Abantu bo balittibwa wakati mu mmwe, ne mulyoka mumanya nga nze MUKAMA.

⁸ “Naye ndirekawo abamu ku mmwe, era muliba bakaawonawo nga musaasaanye mu nsi ne mu mawanga.

⁹Era eyo mu mawanga bakaawonawo gye mwatwalibwa mu busibe, mulinzijukira, kubanga nnumwa olw'emitima gyabwe eginjeemedde egyegomba era egisinja bakatonda abalala. Balikyama olw'obutali butuukirivu bwabwe, n'olwebikolwa byabwe byonna ebigenyufu.

¹⁰Era balimanya nga nze MUKAMA; saabatiisiza bwereere okubaleetako akabi kano.

¹¹“Bw'ati bw'ayogera MUKAMA Katonda nti, Kuba mu ngalo zo, osambagale era okaabire waggulu oyogere nti, “Woowe”; olw'ebikolwa byonna ebitali bya butuukirivu n'ebintu byonna eby'ekkive eby'ennyumba ya Isirayiri; abamu baligwa n'ekitala, abalala balifa enjala, n'abalala balifa kawumpuli.

¹²Ali ewala alifa kawumpuli, n'oyo ali okumpi aligwa n'ekitala, n'oyo alisigalawo alifa enjala. Bwe ntyo bwe ndiraga obusungu bwange.

¹³Mulitegeera nga nze MUKAMA, abantu baabwe bwe balisangibwa nga bafiiridde wakati mu bakatonda baabwe be baakola n'emikono okwetooloola ebyoto byabwe, ne ku buli lusozi oluwanvu, ne ku buli ntikko ez'ensozi, ne buli wansi w'omuti oguliko ebikoola, n'omwera oguliko ebikoola, ebifo gye baali nga bootereza obubaane eri bakatonda baabwe be baakola n'emikono.

¹⁴Era ndigolola omukono gwange ku bo, ensi ne yonooneka ne tebalamu kintu okuva ku ddungu okutuuka e Dibula, ne buli gye babeera. Olwo balimanya nga nze MUKAMA.”

Ezeekyeri 7

Enkomerero Etuuse

¹Awo ekigambo kya MUKAMA ne kinzijira nti,

²“Omwana w'omuntu, bw'ati bw'ayogera MUKAMA Katonda eri ensi ya Isirayiri nti: “Enkomerero! Enkomerero etuuse ku nsonda ennya ez'ensi.

³Enkomerero ebatuuseeko era ndibasumulurira obusungu bwange, ne mbasalira omusango ng'engeri zammwe bwe ziri era ndibabonereza ng'ebikolwa byammwe eby'ekkive byonna bwe biri.

⁴ Siribatunuulira na liiso lya kisa newaakubadde okubasonyiwa; naye ndibasasula ng'engeri zammwe, n'ebikolwa byammwe eby'ekkive bwe biri mu mmwe. Mulyoke mumanye nga nze MUKAMA.’

⁵“Bw'ati bw'ayogera MUKAMA Katonda nti: “Okuzikirizibwa okutali kumu laba kujja.

⁶Enkomerero etuuse, enkomerero etuuse! Ebagolokokeddeko era ejja.

⁷ Akabi kabajjidde, mmwe abatuuze. Ekiseera kituuse era olunaku luli kumpi, olunaku olw'okutya so si olw'okujaguliriza ku nsozi.

⁸ Nnaatera okubalaga obusungu bwange, n'ekiruyi kyange. Ndibasalira omusango ng'enneyisa yammwe bw'eri, ne mbasasula ng'ebikolwa byammwe byonna eby'ekkive bwe biri.

⁹ Siribatunuulira na liiso lya kisa newaakubadde okubasonyiwa. Ndibabonereza ng'engeri zammwe bwe ziri n'ebikolwa byammwe eby'ekkive bwe biri mu mmwe. Mulyoke mumanye nga nze MUKAMA Katonda, era mbonereza.

¹⁰ "Olunaku luuluno lutuuse. Akabi kabajjidde, obutali bwenkanya bumeze, n'amalala gamulisizza.

¹¹ Obusungu bwetyongedde ne bufuuka omuggo okubonereza obutali butuukirivu; tewaliba n'omu alisigalawo; tewaliba n'omu ku kibiina newaakubadde ku byobugagga byabwe, newaakubadde eky'omuwendo.

¹² Ekiseera kituuse, n'olunaku lutuuse. Agula aleme okusanyukirira, n'oyo atunda aleme okunakuwala, kubanga obusungu bubuubuukidde ku kibiina kyonna.

¹³ Atunda taliddizibwa kintu kye yatunda, bombi bwe banaaba nga bakyali balamu. Kubanga okubonerezebwa kuli ku kibiina kyonna so tekukyajulukuka. Era olw'ebibi byabwe tewaliba n'omu aliwonya obulamu bwe.

¹⁴ "Ne bwe balifuwa ekkondeere ne bateekateeka buli kimu, tewaliba n'omu aligenda mu lutalo, kubanga obusungu bwange bubuubuukidde ku kibiina kyonna.

¹⁵ Ebweru waliyo ekitala ne munda waliyo kawumpuli n'enjala. Abali ku ttale balifa kitala, abali mu kibuga balimalibwawo kawumpuli n'enjala.

¹⁶ N'abo abaliwonawo baliddukira mu nsozi, nga bakaaba nga bukaamukuukulu obw'omu biwonvu, buli omu olw'ebibi bye.

¹⁷ Emikono gyonna giriremala, n'amaviivi gonna galiba ng'amazzi.

¹⁸ Balyambala ebibukutu, ne bakwatibwa ensisi; baliswala, n'emite gyabwe girimwebwa.

¹⁹ "Balisuula effeeza yaabwe mu nguudo, ne zaabu yaabwe eriba ekitali kirongoofu; effeeza yaabwe ne zaabu yaabwe tebiriyinza kubalokola ku lunaku lwa MUKAMA olw'obusungu bwe. Era tebalikkuta newaakubadde okukkusibwa. Ebyo bye byabaleetera okugwa mu kibi.

²⁰ Ebintu byabwe eby'omuwendo byabaleetera amalala, era ekyavaamu kwe kukola bakatonda abalala ab'emizizo n'ebintu ebirala eby'ekivve, era kyendiva mbifuula ebitali birongoofu gye bali.

²¹ Ndibiwaayo byonna eri bannamawanga n'eri abakozi b'ebibi ab'omu nsi okuba omunyago era balibyonoona.

22 Ndikyusa amaaso gange ne si batunuulira, era balyonoona ekifo kyange eky'omuwendo; n'abanyazi balikiyingiramu ne bakyonoona.

23 "Muteeketeke enjegere kubanga ensi ejjudde omusango ogw'okuyiwa omusaayi, n'ekibuga kijjudde effujjo.

24 Ndireeta eggwanga erisingirayo ddala okuba ebbi, ne batwala ennyumba zaabwe, era ndikomya amalala gaabwe n'ebifo byabwe ebitukuvu biryonoonebwa.

25 Entisa bw'erija, balinoonya emirembe naye tebaligifuna.

26 Akabi kalyeyongera ku kabi, ne njambo ne zeeyongera; balinoonya okwolesebwa okuva eri nnabbi, naye okuyigirizibwa kwa kabona kulibula n'okubuulirira kw'abakadde kulyerabirwa.

27 Kabaka alikaaba, n'omulangira alijjula obuyinike, n'emikono gy'abantu mu ggwanga girikankana olw'entiisa. Ndibakolako ng'enneyisa yaabwe bw'eri, era ndibasalira omusango ng'ensala yaabwe bw'eri. Balyoke bamanye nga nze MUKAMA Katonda."

Ezeekyeri 8

Eby'ekivve mu Yeekaalu

1 Awo mu mwaka ogw'omukaaga, mu mwezi ogw'omukaaga ku lunaku olwokutaano, bwe nnali nga ntudde mu nnyumba yange n'abakadde ba Yuda, nga batudde mu maaso gange omukono gwa MUKAMA Katonda ne gunzikako.

2 Bwe natunula ne ndaba ekifaananyi ky'omuntu, okuva mu kiwato kye okukka wansi ngali ng'omuliro, n'okuva mu kiwato kye okwambuka ng'ayakaayakana ng'ekyuma ekyaka omuliro.

3 N'agolola ekyalabika ng'omukono n'akwata enviiri zange. Omwoyo n'ansitula wakati w'ensi n'eggulu mu kwolesebwa kwa Katonda n'antwala e Yerusaalemi ku mulyango ogw'oluggi olutunuulira Obukiikkono olw'oluggya olw'omunda ogutunuulira Obukiikkono, awaali bakatonda abalala abaleetera Katonda obuggyga.

4 Era awo we waali ekitiibwa kya Katonda wa Isirayiri, ng'okwolesebwa kwe nalaba mu kyererezi.

5 Awo n'aŋjamba nti, "Omwana w'omuntu, yimusa amaaso eri Obukiikkono." Awo ne nnyimusa amaaso gange, era laba mu mulyango ogw'Obukiikkono ogw'oluggi lw'ekyoto ne ndaba ekifaananyi eky'obuggyga.

6 N'aŋjamba nti, "Omwana w'omuntu, olaba kye bakola, ebigambo eby'ekivve ennyumba ya Isirayiri byekolera wano, nga bangobera wala n'ekifo kyange ekitukuvu? Naye oliraba ebintu eby'ekivve ebisingawo."

⁷Awo n'antwala ku mulyango ogw'oluggya. Ne ndaba ekituli mu bbugwe.

⁸N'aŋjamba nti, "Omwana w'omuntu, kaakano sima mu bbugwe." Ne nsima mu bbugwe, ne ndabayo omulyango.

⁹Awo n'aŋjamba nti, "Yingira olabe ebikolwa ebitali bya butuukirivu n'eb'yekivve bye bakola eyo."

¹⁰Ne nnyingira ne ndaba, era ku bisenge ne ndabako ebyekulula ebya buli kika kyonna, n'ensolo ez'emizizo ne bakatonda abalala bona ab'ennyumba ya Isirayiri.

¹¹Abakadde nsanvu ab'ennyumba ya Isirayiri baali bayimiridde mu maaso gaabyo, ne Yaazaniya metabani wa Safani, ng'ayimiridde wakati mu bo. Buli omu ku bo yali akute ekyoterezo mu mukono gwe, ng'ekire eky'akaloosa ak'obubaane kinyooka okuva mu byo.

¹²N'aŋjamba nti, "Omwana w'omuntu, olabye abakadde b'ennyumba ya Isirayiri bye bakola mu nzikiza, buli omu ng'ali mu ssabo lya katonda we? Bagamba nti, 'MUKAMA tatulaba, era MUKAMA yeerabira ensi.' "

¹³N'addamu n'aŋjamba nti, "Oliraba ebintu eby'ekivve ebisinga n'ebyo."

¹⁴Awo n'antwala ku mulyango ogw'oluggi olw'Obukiikkono ogw'ennyumba ya MUKAMA, ne ndaba abakazi abatudde eyo nga bakaabira katonda waabwe Tammuzi.

¹⁵N'aŋjamba nti, "Ebyo obirabye, omwana w'omuntu? Oliraba eby'ekivve ebisinga n'ebyo."

¹⁶Awo n'antwala mu luggyga olw'omunda olw'ennyumba ya MUKAMA, awo ku mulyango gwa yeekaalu ya MUKAMA wakati w'ekisasi n'ekyoto, nga waliwo abasajja ng'amakumi abiri mu bataano, nga bakubye amabega eyeekaalu ya MUKAMA, nga batunudde Ebuvanjuba, ne bagwa bugazi nga basinza enjuba nga batunudde Ebuvanjuba.

¹⁷N'ambuuza nti, "Ebyo obirabye, omwana w'omuntu? Kintu kitono ennyumba ya Yuda okukola ebintu eby'ekivve bye baakola wano? Kibagwanira okujjuza ensi n'ebikolwa eby'obukambwe ne bongeranga okunyiiza? Laba basembeza ettabi ku nnyindo yaabwe!"

¹⁸Kyendiva mbabonereza n'obusungu; siribakwatirwa kisa newaakubadde okubasonyiwa, era ne bwe balindekaanira siribawuliriza."

Ezeekyeri 9

Okuttibwa kw'Abasinza bakatonda abalala

¹Awo ne mpulira ng'akoowoola n'eddoboozi ery'omwanguka nti, "Muleete abakuumi b'ekibuga wano, buli omu n'ekyokulwanyisa kye mu mukono gwe."

²Ne ndaba abasajja mukaaga nga bava ku luuyi olw'omulyango ogw'engulu, ogutunudde mu bukiikkono, buli omu ng'akutte ekissi mu ngalo ze; nga ku bo kuliko omusajja ayambadde linena nga yeesibye ebyokuwandiisa ku lukugunu. Ne bayingira ne bayimirira ku mabbali g'ekyoto eky'ekikomo.

³Awo ekitiibwa kya Katonda wa Isirayiri ne kiva mu bakerubi mwe kyali, ne kidda ku mulyango gwa yeekaalu. MUKAMA n'ayita omusajja ayambadde linena nga yeesibye ebyokuwandiisa ku lukugunu,

⁴n'amugamba nti, "Genda ng'oyitaayita mu kibuga kyonna ekya Yerusaalemi, oteeke akabonero ku byenyi by'abeesisiwadde era abanakuwadde olw'ebintu byonna eby'ekivve ebikolebwa wakati mu kyo."

⁵Abalala n'abagamba, nga mpuliriza nti, "Mumugoberere muyiteeyite mu kibuga mutte, nga temusaasira newaakubadde okulaga ekisa.

⁶Mutte abasajja abakadde, abavubuka n'abawala, n'abakyala n'abaana abato, naye temukwata ku aliko akabonero. Mutandikire mu watukuvu wange." Ne batandikira ku bakadde abaali mu maaso ga yeekaalu.

⁷N'abagamba nti, "Eyeekaalu mugyonoone, mujjuze empya abattibwa, mugende!" Ne bafuluma ne bagenda nga batta mu kibuga kyonna.

⁸Bwe baali nga batta ne bandeka awo nzekka, ne nvuunama wansi, ne nkaaba nga njogera nti, "Ayi MUKAMA Katonda, olizikiriza ekitundu kya Isirayiri ekyasigalawo kyonna mu busungu bw'ofuse ku Yerusaalemi?"

⁹N'anziramu nti, "Ekibi ky'ennyumba ya Isirayiri ne Yuda kisusse nnyo; ensi ejjudde okuyiwa omusaayi, n'ekibuga kijjudde obutali bwenkanya. Boogera nti, 'MUKAMA yayabulira ensi, era MUKAMA takyalaba.'

¹⁰Kyendiva nema okubatunuulira n'eriiso erisaasira newaakubadde okubalaga ekisa, naye ndileeta akabi ku mitwe gyabwe olw'ebikolwa byabwe ebibi."

¹¹Awo omusajja ayambadde linena nga yeesibye ebyokuwandiisa ku lukugunu n'akomyawo obubaka eri MUKAMA nti, "Nkoze nga bwe walagidde."

Ezeekyeri 10

Ekitiibwa kya MUKAMA Kiva mu Yeekaalu

¹Ne ntunula, laba, ekifaananyi eky'entebe ey'obwakabaka eya safiro nga kiri waggulu w'ekibangirizi w'emitwe gya bakerubi.

²MUKAMA n'agamba omusajja ayambadde linena nti, "Genda wakati wa zinnamuziga wansi wa bakerubi, otoole amanda mu mukono gwo okuva wakati mu bakerubi, ogasaasaanye mu kibuga." N'ayitawo nga ntunula.

³Bakerubi baali bayimiridde ku luuyi olw'Obukiikkaddyo obwa yeekaalu; omusajja bwe yayingira ekire ne kijula mu luggyga olw'omunda.

⁴Awo ekitiibwa kya MUKAMA ne kyambuka okuva waggulu wa bakerubi ne kidda mu mulyango gwa yeekaalu. Ekire ne kijjula mu yeekaalu, n'oluggya ne lujjula okumasamasa okw'ekitiibwa kya MUKAMA.

⁵N'okuwuumma kw'ebiwaawaatiro bya bakerubi ne kuwulikika wala mu luggya olw'ebweru, ng'eddoboozi lyu MUKAMA ow'Eggye bwe liwulikika ng'ayogedde.

⁶MUKAMA bwe yalagira omusajja ayambadde linena nti, "Toola omuliro okuva mu zinnamuziga, wakati mu bakerubi," omusajja n'ayingira n'ayimirira ku mabbali ga nnamuziga emu.

⁷Awo omu ku bakerubi n'agolola omukono gwe eri omuliro ogwali wakati wa bakerubi, n'addira ogumu ku gwo, n'aguteeka mu ngalo ez'omusajja ayambadde linena, eyagutwala n'afuluma.

⁸Wansi w'ebiwaawaatiro bya bakerubi waalabika ng'awaali emikono gy'omuntu.

⁹Ne ndaba zinnamuziga nnya ku mabbali ga bakerubi buli nnamuziga ng'eriraanye kerubi, zinnamuziga nga ziyakaayakana ng'ejjinja erya berulo.

¹⁰Mu ndabika nga zifaanagana, nnamuziga emu ng'eri ng'etudde mu ginnaayo.

¹¹Mu kuseeseetuka, zaaseeseetukanga mu njuyi nnya bakerubi gye baatunulanga, era zinnamuziga z'omu maaso gye zaayiringitiranga, n'endala zonna gye zaayiringitiranga.

¹²Omubiri gwabwe gwonna, n'emigongo gyabwe, n'emikono gyabwe, n'ebiwaawaatiro byabwe, ne zinnamuziga, nga zижудде amaaso enjuuyi zonna.

¹³Ne mpulira zinnamuziga nga ziyyitibwa "ezeetooloola eziwulukuka."

¹⁴Buli emu ku zo yalina obwenyi buna: obwenyi obw'olubereberye bwali bwa kerubi, obwokubiri nga bwa musajja, obwokusatu nga bwa mpologoma, obwokuna nga bwa mpungu.

¹⁵Awo bakerubi ne basituka. Bye biramu bye nalaba ku mabbali g'omugga Kebali.

¹⁶Bakerubi bwe baaseeseetukanga, zinnamuziga ezaali ku mabbali ne ziseeseetukira wamu nabo; bakerubi bwe baayanjuluzanga ebiwaawaatiro byabwe okusituka okuva ku ttaka, zinnamuziga nazo tezaavanga ku lusegere.

¹⁷Bakerubi bwe baayimiriranga, nazo ne ziyimirira; bakerubi bwe baasitukanga, nnamuziga ne zisitukira wamu nabo, kubanga omwoyo ow'ebiramu yali mu zo.

¹⁸Awo ekitiibwa kya MUKAMA ne kiva ku mulyango gwa yeekaalu ne kiyimirira waggulu wa bakerubi.

¹⁹Ne ndaba bakerubi nga bayanjuluza ebiwaawaatiro byabwe, ne basituka okuva ku ttaka, ne zinnamuziga nazo ne zigendera ku mabbali gaabwe. Ne

bayimirira awayingirirwa ku luggi olw'ebuvanjuba olwa yeekaalu ya MUKAMA, n'ekitiibwa kya Katonda owa Isirayiri nga kiri waggulu waabwe.

²⁰ Era ebyo bye biramu bye nalaba wansi wa Katonda wa Isirayiri ku mugga Kebali, olwo ne ntegeera nga bakerubi.

²¹ Buli omu yalina obwenyi buna n'ebiwaawaatiro bina, ne wansi w'ebiwaawaatiro byabwe nga waliyo ebyali ng'emikono gy'omuntu.

²² Obwenyi bwabwe bwanfaananira nga buli bwe nalaba ku mugga Kebali. Buli omu n'atambula n'agenda mu maaso.

Ezeekyeri 11

Abakulembeze ba Isirayiri Basalirwa Omusango

¹ Awo Omwoyo n'ansitula n'antwala ku luggi olw'ebuvanjuba olw'ennyumba ya MUKAMA. Ku mulyango awo waaliwo abasajja amakumi abiri mu bataano wakati mu bo nga mwe muli Yaazaniya mutabani wa Azuli ne Peratiya mutabani wa Benaya, abakulembeze b'abantu.

² MUKAMA n'anjamba nti, "Omwana w'omuntu, bano be basajja abeekobaana okukola ebitali bya butuukirivu era abawabya ekibuga kino.

³ Boogera nti, 'Ekiseera tekituuse tuzimbe amayumba? Ekibuga kino ye ntamu, ffe nnyama.'

⁴ Kyonoova obawa obunnabbi; era yogera ggwe omwana w'omuntu."

⁵ Awo Omwoyo wa MUKAMA n'anzikako, n'anjamba nti, "Bw'ati bw'ayogera MUKAMA nti, Bwe mutyo bwe mwogera, ggwe ennyumba ya Isirayiri, naye mmanyi ebirowoozo byammwe.

⁶ Musse abantu bangi mu kibuga kino, ne mujjuza enguudo zaakyo abafu.

⁷ "MUKAMA Katonda kyava ayogera nti, Emirambo gye musuddemu ye nnyama, n'ekibuga kino ye ntamu, naye ndikibagobamu.

⁸ Mutya ekitala, era ekitala kye ndibaleetako, bw'ayogera MUKAMA Katonda.

⁹ Ndibagoba mu kibuga, ne mbawaayo mu mukono gwa bannamawanga ne bababonereza.

¹⁰ Muligwa n'ekitala, era ndibasalira omusango ku nsalo ya Isirayiri, ne mumanya nga nze MUKAMA.

¹¹ Ekibuga kino tekiriba ntamu yammwe, era nammwe temuliba nnyama yaakyo. Ndibasalira omusango ku nsalo ya Isirayiri.

¹²Mulitegeera nga nze MUKAMA, kubanga temugoberedde biragiro byange newaakubadde amateeka gange, naye mukoze ng'amawanga amalala agabeetoolodde bwe gakola."

¹³Awo bwe nnali nkyayogera ebyobunnabbi, Peratiya mutabani wa Benaya n'afa. Ne ngwa bugazi wansi ne nkaaba n'eddoboozi ddene, nga njogera nti, "Ayi MUKAMA Katonda, olimalirawo ddala ekitundu kya Isirayiri ekyasigalawo?"

¹⁴Ekigambo kya MUKAMA ne kinzijira n'aŋjamba nti,

¹⁵"Omwana w'omuntu, baganda bo, baganda bo ab'enda yo n'ennyumba yonna eya Isirayiri, beeboabantu ab'omu Yerusaalemi be baayogerako nti, 'Bali wala ne MUKAMA, era ensi eno yatuweebwa okuba omugabo gwaffe.'"

Abayisirayiri Basuubizibwa Okudday

¹⁶"Kyonoova oyogera nti, 'Bw'ati bw'ayogera MUKAMA Katonda nti, Newaakubadde nga nabasindika mu mawanga ne mbasaasaanya mu nsi nnyingi, naye mbalabiriridde mu nsi gye baagenda.'

¹⁷Era kyonoova oyogera nti, 'Bw'ati bw'ayogera MUKAMA Katonda nti: ndibakuŋjaanya okuva mu mawanga ne mbaggya mu nsi gye mwasaasaanyizibwa, ne mbaddiza ensi ya Isirayiri.'

¹⁸"Bwe balikomawo, baliggyamu ebitali bya butuukirivu byonna n'eby'emizizo ebirimu byonna.

¹⁹Ndibawa omutima gumu ne mbateekamu omwoyo omuggya; ndibaggyamu omutima ogw'ejinja, ne mbawa omutima ogw'ennyama.

²⁰Oluvannyuma baligoberera ebiragiro byange, ne bagenderera okukuma amateeka gange, era baliba bantu bange, nange ndiba Katonda waabwe.

²¹Naye abo abanaagoberera ebitali bya butuukirivu n'eby'emizizo, ndibaleetako ebyo bye baakola ku mitwe gyabwe, bw'ayogera MUKAMA Katonda."

²²Awo bakerubi, ne zinnamuziga nga ziri ku mabbali gaabwe ne bayimusa ebiwaawaatiro byabwe, ng'ekitiibwa kya Katonda wa Isirayiri kibali waggulu.

²³Ekitiibwa kya MUKAMA ne kiva wakati mu kibuga ne kiyimirira waggulu w'olusozi oluli ku luuyi olw'ebuvanjuba w'ekibuga.

²⁴Omwovo n'ansitula mu kwolesebwa okw'Omwoyo wa Katonda n'antwala mu Bukaludaaya eri abaawanŋangusibwa.

²⁵Awo okwolesebwa kwe nafuna ne nkuvaako, ne ntegeeza abaawanŋangusibwa byonna MUKAMA bye yali andaze.

Ezeekyeri 12

¹Ekigambo kya MUKAMA ne kinzijira ng'agamba nti,

²“Omwana w’omuntu obeera mu bantu abajeemu. Balina amaaso okulaba, naye tebalaba, balina n’amatu okuwulira naye tebawulira, kubanga bantu bajemmu.

³ “Noolwekyo omwana w’omuntu, sibako ebibyo ogende mu buwañjanguse, ate kikole misana, nga balaba ogende mu kifo ekirala. Oboolyawo balitegeera, newaakubadde nga nnyumba njeemu.

⁴Fulumya ebibyo by’otwala mu buwañjanguse emisana, nga balaba. Ate akawungeezi, ofulume nga balaba, ogende ng’abo abagenda mu buwañjanguse.

⁵Botola ekituli mu bbugwe oyiseemu ebibyo, nga balaba.

⁶Biteeke ku kibegabega kyo nga balaba, obifulumye obudde nga buwungeera. Bikka ku maaso oleme okulaba ensi, kubanga nkufudde akabonero eri ennyumba ya Isirayiri.”

⁷ Ne nkola nga bwe ndagiddwa. Emisana, ne nfulumya ebintu byange nga neetegese okugenda mu buwañjanguse. Akawungeezi ne nkuba ekituli mu bbugwe n’engalo zange, ne nfulumya ebyange nga mbitadde ku kibegabega kyange nga balaba, obudde nga buwungedde, enjuba ng’ebuliddeyo.

⁸Ku makya, ekigambo kya MUKAMA ne kinzijira ng’agamba nti,

⁹“Omwana w’omuntu, ennyumba ya Isirayiri enjeemu teyakubuuza nti, ‘Okola ki ekyo?’

¹⁰“Bagambe nti, ‘Bw’ati bw’ayogera MUKAMA Katonda nti, obubaka buno bukwata ku mufuzi ali mu Yerusaalemi, n’abantu ba Isirayiri bona abaliyo.’

¹¹Bagambe nti, ‘Ndi kabonero gye muli.’ “Nga bwe nkoze, nabo bwe balikibakola. Baliwañjangusibwa ne batwalibwa nga bawambe.

¹²“Omufuzi ali mu bo aliteeka ebintu bye ku kibegabega kye agende ng’obudde buwungedde, enjuba ng’ebuliddeyo, balibotola ekituli mu bbugwe ayitemu agende. Alibikka amaaso ge, aleme kulaba nsi.

¹³Ndimwanjuriza ekitimba kyange, akwatibwe mu mutego gwange. Ndimutwala e Babulooni, mu nsi ey’Abakaludaaya, naye taligiraba, era eyo gy’alifiira.

¹⁴Ndisaasaanyiza eri empewo zonna, bona abamwetoolodde, abakozi be n’eggye lye lyonna era ndibawondera n’ekitala ekisowoddwa.

¹⁵“Balinanya nga nze MUKAMA bwe ndibasaasaanya mu mawanga, ne mbabunya mu nsi.

¹⁶Kyokka ndirekawo batono ku bo abaliwona ekitala, n’abaliwona enjala n’abaliwona kawumpuli, balyoke bejjuse olw’ebikolwa byabwe eby’emizizo, nga bali eyo mu mawanga. Olwo balitegeera nga nze MUKAMA.”

¹⁷Ekigambo kya MUKAMA ne kinzijira ng'agamba nti,

¹⁸“Omwana w'omuntu, lya emmere yo ng'okankana, era nnywa amazzi go ng'ojugumira.”

¹⁹Tegeeza abantu ab'omu nsi nti, “Bw'ati bw'ayogera MUKAMA Katonda ku abo ababeera mu Yerusaalemi ne mu nsi ya Isirayiri nti, Balirya emmere yaabwe nga beeraliikirira, banywe n'amazzi gaabwe nga batya, kubanga ensi yaabwe erinyagibwa mu buli kintu ekirimu, olw'obukambwe bw'abo bona ababeera eyo.

²⁰Ebibuga ebituulwamu birizikirizibwa, n'ensi n'efuuka amatongo, mulyoke mumanye nga nze MUKAMA.”

²¹Ekigambo kya MUKAMA ne kinzijira ng'agamba nti,

²²“Omwana w'omuntu, makulu ki agali mu lugero olukwata ku nsi ya Isirayiri, olugamba nti, ‘Ennaku ziggwaayo naye teri kwolesebwa kutuukirira?’

²³Bagambe nti, ‘Bw'ati bw'ayogera MUKAMA Katonda nti, njenda kukomya olugero luno, era tebaliddayo nate kulwogera, mu Isirayiri.’ Bagambe nti, ‘Ebiro binaatera okutuuka, okwolesebwa kwonna lwe kulituukirira.

²⁴Tewaliba nate kwolesebwa kwa bulimba newaakubadde obunnabbi obusavuwaze mu bantu ba Isirayiri.

²⁵Naye nze MUKAMA ndyogera kye ndisiima, era kirituukirira amangu ddala. Mu nnaku zo ggwe ennyumba enjeemu, ndyogera ekigambo era ndikituukiriza, bw'ayogera MUKAMA Katonda.’”

²⁶Ekigambo kya MUKAMA ne kinzijira ng'agamba nti,

²⁷“Omwana w'omuntu, laba, ennyumba ya Isirayiri egamba nti, ‘Okwolesebwa kwalaba kw'amyaka mingi okuva ne kaakano, era ayogera obunnabbi obulibaawo mu bbanga ery'ewala.’”

²⁸“Noolwekyo bagambe nti, ‘Bw'ati bw'ayogera MUKAMA Katonda nti, tewalibaawo nate kigambo kyange na kimu ekirirwisibwa, buli kye njogera kirituukirira, bw'ayogera MUKAMA Katonda.’”

Ezeekyeri 13

Bannabbi Aboobulimba Basalirwa Omusango

¹Ekigambo kya MUKAMA Katonda ne kinzijira ng'agamba nti,

²“Omwana w'omuntu, yogera ebyobunnabbi eri bannabbi ba Isirayiri aboogera obunnabbi kaakano. Tegeeza abo aboogera obunnabbi bwe bayiiyizza nti, ‘Muwulire ekigambo kya MUKAMA.

³Bw'ati bw'ayogera MUKAMA Katonda nti, zibasanze bannabbi abasirusiru abagoberera omwoyo gwabwe ate nga tebalina kye balabye.

⁴Isirayiri, bannabbi bo bali ng'ebibe ebitambulatambula mu bifulukwa.

⁵Temwambuse kuddaabiriza bbugwe n'okuziba ebituli ebirimu ku lw'ennyumba ya Isirayiri, esobole okuyimirira nga ngumu mu lutalo ku lunaku lwa MUKAMA Katonda.

⁶Okwolesebwa kwabwe kukyamu, n'okubikkulirwa kwabwe kwa bulimba. MUKAMA ne bw'aba tabatumye boogra nti, "bw'ati bw'ayogera MUKAMA Katonda," ne bamusuubira okutuukiriza ebyo bye boogedde.

⁷Temulabye kwolesebwa kukyamu ne mwogera n'okubikkulirwa okw'obulimba, bwe mwogedde nti, "MUKAMA bw'ati bw'ayogera," newakubadde nga mba soogedde?

⁸"Noolwekyo bw'ati bw'ayogera MUKAMA Katonda nti, olw'ebigambo byo ebikyamu n'olw'okwolesebwa kwo okw'obulimba, ndi mulabe wo.

⁹Omukono gwange gulibeera ku bannabbi abalaba okwolesebwa okukyamu era aboogra okubikkulirwa okw'obulimba. Tebalituula mu kibiina eky'abantu bange newakubadde okuwandiikibwa ku nkalala z'ennyumba ya Isirayiri, wadde okuyingira mu nsi ya Isirayiri. Olwo olimanya nga nze MUKAMA Katonda.

¹⁰"Olw'okuba nga babuzaabuza abantu bange nga boogra nti, "Mirembe," ate nga tewali mirembe, ate bwe bazimba bbugwe omunafu, ne basiigako langi okubikka bye batazimbye bulungi,

¹¹kyonoova ogamba abo ababikkirira ne langi nti bbugwe aligwa. Enkuba eritonnya nnyo, era ndisindika omuzira, n'embuyaga ez'amaanyi zirkunta.

¹²Bbugwe bw'aligwa, abantu tebalikubuuza nti, "Langi gye wasiigako eruwa?"

¹³"Noolwekyo bw'ati bw'ayogera MUKAMA Katonda nti, Mu kiruyi kyange ndisindika kibuyaga ow'amaanyi, ne mu busungu bwange ndisindika omuzira, ne mu bukambwe obungi ennyingi ennyo eritonnya okukizikiriza.

¹⁴Ndimenya bbugwe gwe mwasiiga langi musaasaanye ku ttaka, n'omusingi gwe gusigale nga gwasaamiridde. Bw'aligwa, alikugwiira n'ozikirizibwa, olyoke omanye nga nze MUKAMA Katonda.

¹⁵Ndimalira ekiruyi kyange ku bbugwe ne ku abo abaakisiiga langi, nga njamba nti, "Bbugwe agenze, era abaamusiiga langi nabo balugenze,

¹⁶abo bannabbi ba Isirayiri abaayogera eby'obunnabbi eri Yerusaalemi ne balabikirwa okwolesebwa ow'emirembe gye bali, ate nga tewaliwo mirembe, bw'ayogera MUKAMA Katonda."

¹⁷ “Kaakano omwana w’omuntu, amaaso go gateeke ku bawala b’abantu bo aboogera eby’obunnabbi bye bayiiyizza. Bawe obunnabbi, oyogere nti,

¹⁸ ‘Bw’ati bw’ayogera MUKAMA Katonda nti, Zibasanze abakazi abatunga ebikomo eby’obulogo ku mikono gyabwe ne batunga ebyokwebikkirira ku mutwe ebiwanvu mu ngeri ez’enjawulo basobole okutega abantu. Olitega obulamu bw’abantu bange, naye ne weesigaliza obubwo?

¹⁹ Onswazizza mu bantu bange olw’embatu entono eza sayiri n’olw’obukunkumuka bw’emigaati, bw’osse abantu abatateekwa kuttibwa, ate n’oleka abatateekwa kuba balamu, ng’obalimba nabo ne bawuliriza eby’obulimba.

²⁰ “Noolwekyo bw’ati bw’ayogera MUKAMA Katonda nti, Ndi mulabe w’obulogo bwo, bw’okozesa okuteega abantu ng’ateega ebinyonyi, era ndibaggya mu mikono gyo. Ndinunula abantu be wateega ng’ebinyonyi n’obasiba.

²¹ Ndiyuza ebyambalo byo ebyokwebikkirira, ne mponya abantu bange mu mikono gyo, ne bataddayo kugwa mu mutego gwa buyinza bwo, olyoke omanye nga nze MUKAMA Katonda.

²² Kubanga wanakuwaza abatuukirivu n’obulimba bwo, ate nga nnali sibanakuwazza. Olw’okuleetera abakozi b’ebibi okweyongera mu ngeri zaabwe ezitali za butuukirivu, n’owonya obulamu bwabwe,

²³ ky’oliva olewa okulaba okwolesebwa okukyamu wadde okufuna okubikkulirwa. Ndiwonya abantu bange okuva mu mikono gyo, olyokye omanye nga nze MUKAMA Katonda.”

Ezeekyeri 14

¹ Abamu ku bakadde ba Isirayiri ne bajja gye ndi, ne batuula mu maaso gange.

² Awo ekigambo kya MUKAMA ne kinzijira ng’agamba nti,

³ “Omwana w’omuntu, abasajja bano batadde bakatonda abalala ku mitima gyabwe ne bateeka n’ebyesittaza mu maaso gaabwe. Mbakkirize banneebuuzeeko?

⁴ Noolwekyo yogera gye bali obategeeze nti, ‘Bw’ati bw’ayogera MUKAMA Katonda nti, Omuyisirayiri yenna bw’ateeka bakatonda abalala ku mitima gwe, n’ateeka n’ebyesittaza mu maaso ge, n’agenda eri nnabbi, nze kennyini, nze nnaamwanukulanga olwa bakatonda be abalala baayita abakulu.

⁵ Bwe ntyo bwe ndikola okwewangulira emitima gy’ennyumba ya Isirayiri, bona abaanvaako okugoberera bakatonda abalala.’

⁶ “‘Noolwekyo tegeeza ennyumba ya Isirayiri nti, Bw’ati bw’ayogera MUKAMA Katonda nti, Mwenenye muleke bakatonda bammwe, mulekeyo ebikolwa byammwe eby’ekivve.

⁷ “‘Omuyisirayiri yenna oba omugenyi abeera mu Isirayiri bw’anavangako, n’ateeka bakatonda abalala ku mutima gwe n’ateeka n’ebyesittaza mu maaso ge, ate n’agenda eri nnabbi okunneebuuzaako, nze MUKAMA nze nnaamwanukulanga.

⁸ Omuntu oyo nnaamulwanyisanga ne mufuula ekyokulabirako era eky’okunyumyako. Ndimusalako ku bantu be, mulyoke mumanye nga nze MUKAMA.

⁹ “‘Nnabbi bw’anaasendebwasendebwanga okuwa obubaka ng’ategeeza nti nze MUKAMA Katonda nsenzesenze nnabbi oyo, ndigolola omukono gwange ku ye ne muzikiriza okumuggyga mu bantu bange Isirayiri.

¹⁰ Baliba bansingiddwa omusango, era nnabbi aliba asingiddwa omusango gwe gumu n’oyo azze okumwebuuzaako.

¹¹ Olwo ennyumba ya Isirayiri tebaliddayo nate kubula newaakubadde okweyonoona n’ebibi byabwe byonna. Baliba bantu bange, nange ndiba Katonda waabwe, bw’ayogera MUKAMA Katonda.’”

¹² Awo ekigambo kya MUKAMA ne kinzijira ng’agamba nti,

¹³ “Omwana w’omuntu, ensi bw’ekola ebibi mu maaso gange n’ebeera etali nneesigwa, ne ngolola omukono gwange gy’eri ne nsalako obugabirizi bw’emmere yaabwe, ne mbasindikira ekyeya, ne nzita abantu baamu n’ensolo zaabwe,

¹⁴ newaakubadde ng’abasajja bano abasatu Nuuwa, ne Danyeri, ne Yobu bandibadde bagirimu, bandiwonyeza bulamu bwabwe bwokka olw’obutuukirivu bwabwe, bw’ayogera MUKAMA Katonda.

¹⁵ “Oba newaakubadde nga nsindika ensolo enkambwe ez’omu nsiko mu nsi eyo, ne zigyonoona ne zigireka nga temuli mwana n’omu, n’efuuka matongo, ne wataba n’omu agiyitamu olw’ensolo ezo,

¹⁶ ddala nga bwe ndi omulamu, abasajja abo abasatu tebandiwonyezza batabani baabwe wadde bawala baabwe, bw’ayogera MUKAMA Katonda. Bo bokka be bandiwonye, naye ensi yandifuuse matongo.

¹⁷ “Oba singa ndeeta ekitala ku nsi eyo ne njogera nti, ‘Leka ekitala kiyite mu nsi yonna,’ ne nzita abantu baamu n’ensolo zaabwe,

¹⁸ nga bwe ndi omulamu, newaakubadde ng’abasajja bano abasatu bandibadde bagirimu, tebandiwonyezza batabani baabwe wadde bawala baabwe.

Bandiwonyeza bulamu bwabwe bwokka olw'obutuukirivu bwabwe, bw'ayogera MUKAMA Katonda.

¹⁹ “Oba singa ndeeta kawumpuli mu nsi eyo, ne mbafukako ekiruyi kyange, ne njija omusaayi mu nsi eyo, ne nzita abantu baamu n'ensolo zaabwe,

²⁰ nga bwe ndi omulamu, Nuuwa ne Danyeri ne Yobu ne bwe bandigibaddemu, tebandiwonyezza mutabani waabwe newaakubadde muwala waabwe. Bo bokka be nandiwonyezza olw'obutuukirivu bwabwe, bw'ayogera MUKAMA Katonda.

²¹ “Kubanga bw'ati bw'ayogera MUKAMA Katonda nti, Kiriba kitya bwe ndiweereza ebibonerezo byange ebina: ekitala n'ekyeya n'ensolo enkambwe ez'omu nsiko ne kawumpuli, ku Yerusaalemi, okutta abantu baamu n'ensolo zaabwe!

²² Naye ate nga walibaawo abamu abaliwona, abaana aboobulenzi n'aboobuwala abaliggibwamu. Balijja gy'oli, era bw'oliraba enneeyisa yaabwe n'ebikolwa byabwe, olikkiriza akabi ke ndeese ku Yerusaalemi, buli kabi ke mmuleeseko.

²³ Bw'oliraba enneeyisa yaabwe n'ebikolwa byabwe olikkiriza nga sirina kye nkoze mu Yerusaalemi awatali nsongwa, bw'ayogera MUKAMA Katonda.”

Ezeekyeri 15

Yerusaalemi Omuzabbibu Ogutaliimu Nsa

¹ Ekigambo kya MUKAMA Katonda ne kinzijira, n'aŋŋamba nti,

² “Omwana w'omuntu, omuti gw'omuzabbibu gusinga gutya ettabi ery'omuti ku miti egypt'omu kibira?

³ Guvaamu omuti ogukolebwamu ekintu kyonna egypt'omugaso? Kiyinzika ogukolamu eŋŋango egypt'okuwanikako ekintu kyonna?

⁴ Bwe gusuulibwa mu muliro okuba enku, omuliro ne gugwokya eruuyi n'erusi, ne wakati ne wasiriira guba gukyaliko kye gugasa?

⁵ Bwe guba nga tegwali gwa mugaso nga mulamba, olwo guyinza okubaako kye gugasa nga gwokebbwa mu muliro ne gusiriira?”

⁶ MUKAMA Katonda kyava ayogera nti, “Nga bwe njogedde ku muzabbibu mu miti egypt'omu kibira, gwe ntadde mu muliro okuba enku, bwe ntyo bwe ndyokya abatuuze ba Yerusaalemi.

⁷ Ndikyusa amaaso gange ne mbatunuulira, era ne bwe balidduka, omuliro gulibookya, era mulimanya nga nze MUKAMA Katonda.

⁸ Ndizisa ensi, kubanga tebabadde beesigwa, bw'ayogera MUKAMA Katonda.”

Ezeekyeri 16

¹Ekigambo kya MUKAMA Katonda ne kinzijira, n'aŋŋambा nti,

²"Omwana w'omuntu manyisa Yerusaalemi ebikolwa bye eby'ekivve,

³oyogere nti, 'Bw'ati bw'ayogera MUKAMA Katonda eri Yerusaalemi: Wasibuka era n'ozaalibwa mu nsi ey'Abakanani; Kitaawo yali Mwamoli, ne nnyoko nga Mukiiti.

⁴Ku lunaku kwe wazaalirwa, tewasalibwa kkundi, so tewanaazibwa na mazzi kutukula, newaakubadde okusiigibwa omunyyo, newaakubadde okubikkibwa mu ngoye.

⁵Tewali yakusaasira so tewali yakukwatirwa kisa kukukolera ebintu ebyo byonna, naye wasuulibwa ebweru ku ttale, kubanga wanyoomebwa okuva ku lunaku kwe wazaalirwa.

⁶"'Bwe nnali nga mpitaayita ne nkulaba ng'osambagala mu musaayi gwo, ne nkugamba nti, "Ba mulamu!"

⁷Ne nkukuza ne nkulabirira ng'ekimuli mu nnimiro. N'okula n'owanvuwa n'olabika bulungi nnyo mu maaso ng'amayinja ag'omuwendo omungi; n'osuna amabeere, n'enviiri zo ne zikula, ggwe eyali obwerefere nga tobikkiddwako.

⁸"'Oluvannyuma lwa bbanga, bwe nnali nga mpitaayita, ne nkulengera ne ndaba ng'okuze era ng'otuuse okufumbirwa, ne nkwalirako ekirenge kyange ne mbikka ku bwerefere bwo; ne nkulayirira ne nkola naawe endagaano, bw'ayogera MUKAMA Katonda, n'ofuuka wange.

⁹"'Ne nkunaaza n'amazzi, ne nkunaazaako omusaayi, ne nkusiigako amafuta.

¹⁰Ne nkwambaza olugoye oluliko omudalizo, ne nkuwa n'engatto ez'amaliba; ne nkwambaza olugoye olwa linena ne nkubikkako engoye ez'omuwendo omungi.

¹¹Ne kunaanika amayinja ag'omuwendo omungi; ne nkuteeka ebikomo ku mukono, n'omukuufu mu bulago,

¹²ne nkuteeka empeta mu nnyindo, n'eby'omu matu ku matu, ne nkutikkira n'engule ku mutwe.

¹³Wayonjebwa ne zaabu n'effeeza, n'engoye zo zaali za linena, n'ebyambalo byo byali byamuwendō mungi era nga biriko omudalizo. Walyanga emmere ey'obutta obulungi, n'omubisi gw'enjuki n'omuzigo ogw'omuzeyituuni. Walungiwa nnyo n'otuuka ku mwaliiro ery'obwa kabaka omukazi.

¹⁴Ettutumu lyo lyabuna mu mawanga olw'obulungi bwo, kubanga nakuwa ekitiibwa kyange, bw'ayogera MUKAMA Katonda.

¹⁵ “Naye weesiga obulungi bwo, n’okozesa ettutumu lyo okukola obwenzi, n’ofuka obukaba bwo ku buli eyayitangawo obulungi bwo ne bufuuka bubwe.

¹⁶ Waddira ebimu ku byambalo byo ne weekolera ebifo ebigulumivu nga byamabala mangi, gye wakoleranga obwenzi bwo. Ebintu bwe bityo tebikolebwaga, era tebikolebwanga.

¹⁷ Ate era waddira emikuufu emirungi gye nnali nkuwadde, egyakolebwa mu zaabu n’effeeza bye nakuwa, ne weekolera bakatonda abalala abali mu bifaananyi eby’ekisajja, bw’otyo n’okola eby’obwenzi nabyo,

¹⁸ n’oddira ebyambalo byo ebiriko emidalizo n’obibikkako, n’oteeka omuzigo gwange n’obubaane bwange mu maaso gaabyo.

¹⁹ N’emmere gye nnali nkuwadde, obuwunga obw’obutta, n’omuzigo ogw’omuzeyituuni n’omubisi gw’enjuki bye nnali nkuwadde okulya, wabiwaayo okuba ebiweebwayo eby’evvumbe eddungi eri bbyo. Era bw’otyo bwe wakola, bw’ayogera MUKAMA Katonda.

²⁰ “Waddira batabani bo ne bawala bo be wanzaalira, n’obawaayo ng’ebiweebwayo eby’emmere eri bakatonda abalala. Obwenzi bwe wakola bwali tebumala?

²¹ Wattaba abaana bange n’obawaayo ng’ebiweebwayo eri bakatonda abalala.

²² Mu bikolwa byo byonna eby’ekivve n’obwenzi bwo, tewajjukira biseera eby’obuvubuka bwo, bwe wali obwerefere nga toliko bw’oli, era ng’osambagala mu musaayi gwo.

²³ “Zikusanze! Zikusanze, bw’ayogera MUKAMA Katonda. Mu bikolwa byo ebibi byonna,

²⁴ weezimbira ekifo ekigulumivu ne weekolera n’essabo mu buli kibangirizi ekigazi eky’ekibuga.

²⁵ Buli luguudo we lusibuka, wazimbawo essabo lyo, n’okolerawo obwenzi, ng’owaayo omubiri gwo mu bukaba obungi eri buli eyayitangawo.

²⁶ Weetaba mu bwenzi ne baliraanwa bo abakaba Abamisiri, n’oyongera ku bukaba bwo n’onsunguwaza.

²⁷ Kyenava nkugololerako omukono gwange ne nkendeeza ku nsalo yo, ne nkuwaayo eri omululu gw’abalabe bo abawala b’Abafirisuuti, abeekanga olw’obukaba bwo.

²⁸ Weetaba mu bikolwa eby’obwenzi n’Abasuuli, kubanga tewamalibwa, ate n’olvannyuma lw’ekyo n’otamatira.

²⁹ N’olvannyuma n’oyongerayo ebikolwa byo eby’obukaba mu Bakaludaaya, ensi ey’ebiyamagazi, naye era n’otamatira.

³⁰ “‘Omutima gwo nga munafu, n’okwewaayo ne weewaayo okukola ebantu ebyo byonna, ne weeyisa ng’omwenzi ow’amawaggali ateefirayo.

³¹Bwe wazimba ebifo byo ebigulumivu buli luguudo we lusibuka, n’oteeka amasabo go mu buli kibangirizi ekigazi, tewafaanana ng’omwenzi kubanga wanyoomanga empeera.

³²“‘Gewe omukazi omwenzi eyeegomba abatambuze okusinga balo!

³³Buli mwenzi afuna empeera, naye ggwe owa baganzi bo bona ebirabo, ng’obagulirira okujja gy’oli okuva buli wamu olw’obwenzi bwo.

³⁴Era mu bikolwa byo eby’obwenzi tofaanana ng’abalala; tewali akusindika kukola bwenzi. Oli wanjawulo okuva ku balala kubanga osasula empeera, naye ate nga tewali akusasula.

³⁵“‘Kale nno, wulira ekigambo kya MUKAMA ggwe omwenzi.

³⁶Bw’ati bw’ayogera MUKAMA Katonda nti, Olw’obugagga bwo bwe walaga, n’oyanika obwerefere bwo wakati mu baganzi bo ng’okola ebikolwa eby’obwenzi, n’olwa bakatonda bo abalala ab’ekivve, n’okuwaayo omusaayi gw’abaana bo,

³⁷kyendiva nkujjaanya baganzi bo bona, be wasinza, bona be wayagala ne be wakyawa, gy’oli ne bakwetooloola, ne nkufungulirira mu maaso gaabwe, balabe obwerefere bwo.

³⁸Ndikusalira omusango ne nkuwa ekibonerezo ng’eky’abakazi abenzi n’abo abayiwa omusaayi, ne nkuleetako omusaayi ogw’ekiruyi n’obuggyga.

³⁹N’oluvannyuma ndikuwaayo mu mukono gw’abaganzi bo; balimenyaamenya ebifo byo ebigulumivu, ne bazikiriza amasabo go. Era balikwambula ebyambalo byo, ne batwala eby’omuwendo byo, ne bakuleka ng’oli bukunya.

⁴⁰Balisendasenda enkuyanja y’abantu, ne bakukuba amayinja, ne bakutemaatema obufififi n’ebitala byabwe.

⁴¹Balyokya amayumba go ne bakubonereza mu maaso g’abakyala abangi, era ndikulesaayo ebikolwa byo eby’obwenzi so tolisasula baganzi bo mpeera.

⁴²N’oluvannyuma obusungu bwange bulikendeera, n’obuggyga bwange bulikuvaako, era ndiba mukkakkamu, nga sirina busungu.

⁴³“‘Kubanga tojjukira biseera eby’obuvubuka bwo, n’onnyiiza n’ebantu ebyo byonna; kyendiva nkuleetako omusango olw’ebikolwa byo, bw’ayogera MUKAMA Katonda. Ku bukaba obwo bwonna si kwe wayongera ebikolwa ebyo byonna eby’ekivve?

⁴⁴“‘Buli agera engero anaakugereranga olugero luno nga boogera nti, “Nnyina ne muwala we batyo.”

⁴⁵Oli muwala wa nnyoko ddala, eyanyooma bba n'abaana be, era oli mwannyina ddala owa baganda bo abanyooma ba bbaabwe n'abaana baabwe. Nnyoko yali Mukiiti, kitaawo nga Mwamoli.

⁴⁶Mukulu wo yali Samaliya eyabeeranga ne bawala be ku luuyi lwo olw'Obukiikkono, ne muto wo ne bawala be nga babeera ku luuyi lwo olw'Obukiikkaddyo, era nga ye Sodomu.

⁴⁷Tewakoma ku kugoberera ngeri zaabwe kyokka, n'okukoppa ebikolwa byabwe eby'ekivve, naye waayitawo ebbanga ttono engeri zo zonna ne zisukka ku zaabwe obubi.

⁴⁸Nga bwe ndi omulamu, bw'ayogera MUKAMA Katonda, muganda wo Sodomu ne bawala be tebaatuuka ku ssa, ggwe ne bawala bo kwe mwatuuka.

⁴⁹“Guno gwe musango muganda wo Sodomu gwe yazza: ye ne bawala be baali baamalala, nga baamululu abatafaayo, wadde okuyamba abaavu abaali mu bwetaavu.

⁵⁰Baali baamalala, era baakola ebikolwa eby'ekivve mu maaso gange, kyennava mbaggyawo nga bwe nasiima.

⁵¹So ne Samaliya teyatuuka awo; wakola ebikolwa eby'ekivve okusinga ne bwe baakola, era n'oleetera baganda bo okulabika ng'abatuukirivu mu ebyo byonna by'okola.

⁵²Kaakano naawe k'ojjule ensonyi, kubanga owolereza baganda bo, ate n'ebibi bye wakola biswaza okusinga ebyabwe, kyebaliva balabika nga batuukirivu okukusinga. Kyonoova oswala, ne weetikka obuswavu bwo, kubanga oleetedde baganda bo okulabika ng'abatuukirivu.

⁵³“Wabula ndizzaawo obugagga bwa Sodomu ne bawala be, n'obwa Samaliya ne bawala be, ate ne nzizaawo n'obubwo,

⁵⁴olyoke weetikke obuswavu bwo, oswale mu maaso gaabwe olw'ebyo byonna bye wakola ng'obawooyawooya.

⁵⁵Baganda bo, Sodomu wamu ne bawala be, ne Samaliya wamu ne bawala be baliddayo nga bwe baali edda, ate naawe oliddayo n'obeera nga bwe wali edda.

⁵⁶Lwaki muganda wo Sodomu teyayogerwako ku lunaku olw'amalala go,

⁵⁷okwonoona kwo nga tekunnabikkulwa? Kaakano ofuuse kyakusekererwa eri abawala ab'e Busuuli ne baliraanwa be bonna, n'eri abawala aba Bufirisuuti, abo bonna abakwetoolodde abakunyooma.

⁵⁸Olibonerezebwa olw'obukaba bwo n'ebikolwa byo eby'ekivve, bw'ayogera MUKAMA Katonda.

⁵⁹ “Bw’ati bw’ayogera MUKAMA Katonda nti, Ndikukola nga bwe kikusaanira, kubanga wanyooma ekirayiro yange, bwe wamenya endagaano.

⁶⁰ Naye ndijjukira endagaano gye nakola naawe mu biseera eby’obuvubuka bwo, era ndissaawo endagaano ey’emirembe n’emirembe.

⁶¹ Olwo oljjukira engeri zo, n’oswala bw’olitwala baganda bo abakusinga obukulu ne bato bo, ne mbankuwa babeere bawala bo, naye si lwa ndagaano yange naawe.

⁶² Ndinyweza endagaano yange naawe, era olimanya nga nze MUKAMA Katonda,

⁶³ n’olvannyuma olw’okutangiririrwa, oljjukira ne wejjusa n’otaddayo kwasamya nate kamwa ko, bw’ayogera MUKAMA Katonda.”

Ezeekyeri 17

Empungu Ebbiri n’Omuzabbibu

¹ Ekigambo kya MUKAMA Katonda ne kinzijira, n’ajnjamba nti,

² “Omwana w’omuntu, gerera ennyumba ya Isirayiri olugero;

³ obagambe nti, ‘Bw’ati bw’ayogera MUKAMA Katonda nti, Waaliwo empungu ennene eyalina ebiwaawaatiro ebinene, ng’erina ebyoya bingi, nga by’amabala agatali gamu, eyajja mu Lebanooni.

⁴ N’eddira obusongenzo bw’omuvule n’emenyako amasanso gaagwo agasooka waggulu amato, n’egwetikka n’egutwala mu nsi ey’abasuubuzi n’egusimba mu kibuga ky’abatunda ebyamaguzi.’

⁵ “N’etwala emu ku nsigo ez’ensi eyo, n’egisimba mu ttaka eggimu; n’egisimba okumpi n’amazzi amangi, n’emera n’eba ng’omusafusafu,

⁶ n’ebala n’efuuka omuzabbibu, ne gulanda wansi; amatabi gaagwo ne gakula nga gadda ewaayo, naye emirandira gyagwo ne gisigala wansi waagwo. Ne gufuuka omuzabbibu ne guleeta amatabi n’ebikoola byagwo.’

⁷ “Naye ne wabaawo empungu endala ennene eyalina ebiwaawaatiro ebinene, n’ebyoya ebingi. Omuzabbibu ne gukuza emirandira gyagwo eri empungu eyo okuva mu kifo we gwasimbibwa, ate ne gwanjuluza n’amatabi gaagwo gy’eri egifukirire.

⁸ Gwali gusimbiddwa mu ttaka eddungi awali amazzi amangi, guleete amatabi era gubale ebibala gubeere omuzabbibu ogwegombesa.’

⁹ “Bategeeze nti, ‘Bw’ati bw’ayogera MUKAMA Katonda nti, Gulibeerera? Tegulisigulwa n’amatabi gaakwo ne gatemebwa ne gukala? Tekiryetagisa omukono ogw’amaanyi oba abantu abangi okugusigulayo.

¹⁰Ne bwe baligusimbuliza, gulirama? Tegulikalira ddala embuyaga ez'Ebuvanjuba bwe zirigufuuwa, ne gukalira mu kifo we gwakulira?"

¹¹Awo ekigambo kya MUKAMA Katonda ne kinzijira n'aŋŋamba nti,

¹²"Gamba ennyumba enjeemu eyo nti, "Temumanyi bintu ebyo kye bitegeeza?" Bategeeze nti, 'Kabaka w'e Babulooni yagenda e Yerusaalemi, n'awamba kabaka waayo n'abakungu be n'abatwala e Babulooni.

¹³N'oluvannyuma n'addiria omu ku balangira n'akola naye endagaano, ng'amulayiza. Yatwala n'abasajja abalwanyi abazira ab'omu nsi,

¹⁴obwakabaka bukkakkane buleme kwegulumiza, era nga mu kukwata endagaano ye mwe balinywerera.

¹⁵Naye kabaka yamujeemera, n'aweereza ababaka e Misiri okufunayo embalaasi n'eggye eddene. Aliraba omukisa? Omuntu akola ebyo ayinza okuba omulamu? Alimenya endagaano n'awona?"

¹⁶"Nga bwe ndi omulamu, bw'ayogera MUKAMA Katonda, alifiira mu Babulooni, mu nsi eya kabaka eyamufuula kabaka, gwe yanyooma mu kirayiro kye n'amenya n'endagaano gye baakola.

¹⁷Falaawo n'eggye lye eddene, n'ekibiina kye ekinene, tebalibaako kye bamuyamba mu lutalo, bwe balizimba ebifunvu n'ebisenge okuzikiriza obulamu bw'abangi.

¹⁸Olw'okunyooma ekirayiro kye, n'amenya endagaano, n'akola ebintu ebyo byonna ate nga yeewaayo, kyaliva tawona.

¹⁹"MUKAMA Katonda kyava ayogera bw'ati nti, Nga bwe ndi omulamu, ndireeta ku mutwe gwe ekirayiro kye yanyooma, n'endagaano yange gye yamenya.

²⁰Ndimutegera akatimba kange, n'agwa mu mutego gwange, era ndimuleeta e Babulooni ne musalira omusango olw'obutali bwesigwa bwe gye ndi.

²¹Abaserikale be bona abaliba badduka, balifa ekitala, n'abaliwonawo balisaasaanyizibwa empewo; olwo olitegeera nga nze MUKAMA, nze nkyogedde.

²²"Bw'ati bw'ayogera MUKAMA Katonda nti, Nze kennyini ndiddira ettabi okuva ku busongezo bw'omuvule ne ndisimba; era ndimenya amasanso okuva ku matabi gaagwo amato ne ndisimba ku lusozi oluwanvu olugulumivu.

²³Ku ntikko ey'olusozi lwa Isirayiri kwe ndirisimba era lirireeta amatabi ne libala ebibala, ne gaba omuvule ogwegombesa. Ennyonyi eza buli kika ziriwummulira ku gwo, era zirifuna we zituula mu bisiikirize eby'amatabi gaagwo.

²⁴Era emit gyonna eg'yomu ttale giritegeera nga nze MUKAMA ayimpaya omuti omuwanvu, ate ne mpanvuya omuti omumpi. Nkaza omuti ogwakamera, ne

mmerusa n'omuti ogubadde gukaze. “ ‘Nze MUKAMA Katonda nze nkyogedde, era ndikikola.’ ”

Ezeekyeri 18

Omwovo Ogwonoona gwe Gulifa

- 1** Ekigambo kya MUKAMA Katonda ne kinzijira, n'aanjamba nti,
- 2** “Mutegeeza ki bwe mugerera olugero luno ensi ya Isirayiri nti, “ ‘Bakitaabwe balidde ezabbibu ezikaawa, n'amannya g'abaana ganyenyeera’?
- 3** “Nga bwe ndi omulamu, bw'ayogera MUKAMA Katonda, temuliddayo kugera lugero olwo mu Isirayiri.
- 4** Buli kiramu, kyange; obulamu bw'omuzadde n'obw'omwana bwonna nabwo bwange.
- 5** “Emmeeme eyonoona ye erifa, omuntu bw'abeera omutuukirivu n'akola ebyalagirwa era ebituufu;
- 6** nga talya mu masabo agali ku nsozi newaakubadde okusinza bakatonda abalala ab'ennyumba ya Isirayiri; n'atayenda ne mukazi wa muliraanwa we, newaakubadde okwebaka n'omukazi ali mu biseera bye eby'abakyala;
- 7** omuntu atalyazaamaanya muntu yenna, naye asasula ebbanja lye lyonna, atanyaga muntu yenna, naye emmere ye agigabira abayala, n'ayambaza n'abali obwerefere;
- 8** atawola lwa magoba newaakubadde okutwala ensimbi ezsukkamu mu ezo ze yawola. Yeewala okukola ekibi, era asala emisango egy'ensonga.
- 9** Agoberera ebiragiro byange, n'akuuma amateeka gange n'obwesigwa, oyo ye muntu omutuukirivu era aliba mulamu,” bw'ayogera MUKAMA Katonda.
- 10** “Bw'aba n'omwana omulalu, ayiwa omusaayi, oba akola ebifaanana ng'ebyo,
- 11** newaakubadde nga kitaawe ebyo tabikola: “N'alya mu masabo agali ku nsozi, n'ayenda ku mukazi wa muliraanwa we,
- 12** n'anyigiriza omwavu n'omunaku, n'okubba n'abba, n'atasasula kye yeeyama, n'asinza bakatonda abalala, n'akola eby'ekivve,
- 13** n'awola ng'asuubira amagoba, oba n'okutwala ensimbi ezsukka mu ezo ze yawola; omuntu ng'oyo aliba mulamu? Taliba mulamu. Kubanga akoze ebintu ebyo byonna eby'ekivve, kyaliva attibwa, n'omusaayi gwe guliba ku mutwe gwe ye.
- 14** “Naye bw'aba n'omuzzukulu, alaba ebibi byonna kitaawe by'akola, n'atakola bya ngeri eyo;

¹⁵“N’atalya mu masabo agali ku nsozi newaakubadde okusinza bakatonda abalala ab’ennyumba ya Isirayiri, n’atayenda na mukazi wa muliraanwa we,

¹⁶ atanyigiriza muntu yenna newaakubadde okusaba amagoba ku bbanja lye yawola, atabba, naye agabira emmere abayala n’abali obwerefere n’abambaza.

¹⁷Yeekuma obutakola kibi, n’atalya magoba ku bbanja newaakubadde okutwala ensimbi ezsukiridde, era akuma amateeka gange n’agoberera n’ebiragiro byange. Talifa olw’ebibi bya kitaawe, naye aliba mulamu.

¹⁸Naye kitaawe alifa olw’ebibi bye ye kubanga yalyazaamanya, n’anyaga muliraanwa we, n’akola ebitaali birungi mu bantu banne.

¹⁹“Mubuuza nti, ‘Lwaki omwana tabonaabona olw’ebibi bya kitaawe?’ Omwana bw’aba akoze eby’ensonga era ebituufu, ng’agoberedde ebiragiro byange, aliba mulamu.

²⁰Emmeeme eyonoona ye erifa. Omwana talibonaabona olw’ebibi bya kitaawe, so ne kitaawe talibonaabona olw’ebibi eby’omwana we. Obutuukirivu bw’omuntu omutuukirivu bulibalirwa ye, n’obutali butuukirivu bw’oyo atali mutuukirivu bulibalirwa ye.

²¹“Naye omuntu atali mutuukirivu bw’alikyuka n’alekeraawo okukola ebibi byonna, n’akuma ebiragiro byange byonna n’akola eby’ensonga era ebituufu, aliba mulamu, talifa.

²²Tewaliba kyonoono na kimu ku ebyo bye baakola ebirijukirwa, naye olw’ebi’obutuukirivu bye baliba bakoze, baliba balamu.

²³Mulowooza nga nsanyukira okufa kw’atali mutuukirivu? Bw’ayogera MUKAMA. Sisinga kusanyuka nnyo bwe ndaba ng’akyuse okuva mu ngeri ze n’aba omulamu?

²⁴“Naye omuntu omutuukirivu bw’alekeraawo okukola eby’obutuukirivu, n’akola eby’ekivve bye bimu n’ebi’omuntu atali mutuukirivu, aliba mulamu? Tewaliba ne kimu ku ebyo eby’obutuukirivu bye yakola, ebirijukirwa: Olw’obutaba mwesigwa aliba n’omusango, era n’olw’ebibi bye yakola, alifa.

²⁵“Mugamba nti, ‘Mukama si mwenkanya.’ Kaakano muwulire mwe ennyumba ya Isirayiri, enkola yange y’etali ya bwenkanya oba mmwe mutali benkanya?

²⁶Omuntu omutuukirivu bw’aleka okukola ebikolwa bye eby’obutuukirivu n’akola ebibi, mw’alifiira, kubanga ebibi by’akoze bye birimuleetera okufa.

²⁷Naye bw’alikyuka okuva mu butali butuukirivu bwe bw’akoze, n’akola eby’ensonga era ebituufu, alirokola obulamu bwe.

²⁸Era bw’alirowooza ku bibi byonna by’akoze, n’akyuka n’alekeraawo okubikola, mazima ddala aliba mulamu, talifa.

²⁹Naye oluvannyuma ennyumba ya Isirayiri ne mwogera nti, ‘Ekkubo lya Mukama si lya bwenkanya.’ Mmwe ennyumba ya Isirayiri, engeri zange ze zitali za bwenkanya? Engeri zammwe si ze zitali za bwenkanya?

³⁰“Kyendiva mbasalira omusango, mmwe ennyumba ya Isirayiri, buli muntu ng’ebikolwa byammwe bwe biri, bw’ayogera MUKAMA. Mwenenye, muleke ebikolwa ebitali bya butuukirivu, oba nga ssi weewaawo ebibi byammwe biribaleetera okuzikirira.

³¹Mweggyeeko ebikolwa byonna ebitali bya butuukirivu, bye mukoze, mufune omutima omuggya n’omwoyo omuggya. Kiki ekibaleetera okufa, mmwe ennyumba ya Isirayiri?

³²Sisanyukira kufa kwa muntu yenna, bw’ayogera MUKAMA Katonda. Mwenenye mube balamu.”

Ezeekyeri 19

Okukungubagira Abalangira ba Isirayiri

¹Kungubagira abalangira ba Isirayiri,

²Oyogere nti, “‘Maama wo nga yali mpologoma nkazi, mu mpologoma! Yagalamiranga wakati mu mpologoma ento, n’erabirira abaana baayo.

³N’ekuza emu ku baana baayo n’efuuka empologoma ey’amaanyi, n’eyiga okuyingga ebisolo, n’okulyaabantu.

⁴Amawanga gaawulira ebimufaako, n’akwatirwa mu kinnya kye yali asimye, ne bamusibamu amalobo ne bamuleeta mu nsi y’e Misiri.

⁵“‘Awo bwe yalaba essuubi lye nga terituukiridde, ne bye yali alindirira nga biyise, n’eddira emu ku baana baayo ab’empologoma endala, n’egifuula empologoma ey’amaanyi.

⁶N’etambulatambula mu mpologoma, kubanga yali efuuse empologoma ey’amaanyi, era n’eyiga okuyingga ensolo, n’okulyaabantu.

⁷N’emenyaamenya ebifo byabwe eby’amaanyi, n’ezikiriza n’ebibuga byabwe; ensi n’abo bona abaagibeerangamu, ne batya olw’okuwuluguma kwayo.

⁸Awo amawanga gonna ne gagirumba, okuva mu bitundu ebyali byetooloddewo, ne bayanjuluza ekitimba kyabwe, ne bagikwatira mu kinnya kyabwe.

⁹Ne bakozesa amalobo okugisikayo, ne bagiteeka mu kayumba ak’ebiyuma, ne bagitwala eri kabaka w’e Babulooni; n’eteekewa mu kkomera, n’etaddayo kuwlilikika nate ku nsozi za Isirayiri.

¹⁰ “Maama wo yali ng’omuzabbibu mu nnimiro ogwasimbibwa okumpi n’amazzi; ne gubala ebibala ne bijjula amatabi, kubanga waaliwo amazzi mangi.

¹¹ Amatabi gaagwo gaali magumu, era nga gasaanira okukolebwamu omuggo gw’obwakabaka. Omuzabbibu ogwo gwali muwanvu ne guyitamu okusinga emitii emirala, ne gumanyibwa olw’obuwantu bwagwo, n’olw’amatabi gaagwo amangi.

¹² Naye gwasigulibwa n’ekiruyi ne gusuulibwa wansi; embuyaga ez’Ebuvanjuba ne zigukaza, ebibala byagwo ne biggwaako, n’amatabi gaakwo amagumu ne gakala, era ne gwokebwa omuliro.

¹³ Kaakano gusimbiddwa mu ddungu, awakalu awatali mazzi.

¹⁴ Omuliro gwava ku limu ku matabi, ne gwokya amatabi gaagwo n’ebibala byagwo. Tewasigadde ttabi ggumu na limu ku gwo eriyinza okukolwamu omuggo ogw’obwakabaka.’ Kuno kukungubaga, era kukozesebwa ng’okukungubaga.”

Ezeekyeri 20

Isirayiri Omujeemu

¹ Awo mu mwaka ogw’omusanvu, mu mwezi ogwokutaano ku lunaku olw’ekkumi, abamu ku bakadde ba Isirayiri ne bajja okwebuuza ku MUKAMA Katonda, ne batuula wansi mu maaso gange.

² Ekigambo kya MUKAMA ne kinzijira, mbategeeze nti,

³ “Omwana w’omuntu, yogera eri abakadde ba Isirayiri obagambe nti, ‘Bw’ati bw’ayogera MUKAMA Katonda nti: Muzze kunneebuuzaako? Mazima nga bwe ndi omulamu temujja kunneebuuzaako, bw’ayogera MUKAMA Katonda.’

⁴ “Olibasalira omusango? Olibasalira omusango ggwe omwana w’omuntu? Kale bategeeze ebikolwa eby’ekivve bajajjaabwe bye baakola,

⁵ era bategeeze nti, ‘Bw’ati bw’ayogera MUKAMA Katonda nti: ku lunaku lwe, neroboza Isirayiri, nalayirira bazzukulu b’ennyumba ya Yakobo, ne mbeeyabiza mu Misiri nga njogera nti, “Nze MUKAMA Katonda wammwe.”

⁶ Ku lunaku olwo nababayirira nti ndibaggya mu nsi y’e Misiri ne mbatwala mu nsi gye nabanoonyeza, ensi ekulukuta amata n’omubisi gw’enjuki, ensi esinga mu nsi zonna obulungi.

⁷ Ne mbagamba nti, “Buli muntu aggyewo ebintu eby’omuzizo mu maaso ge, muleme okweyonoonyesa ne bakatonda abalala ab’e Misiri, kubanga nze MUKAMA Katonda wammwe.”

⁸ “Naye ne banjeemera, ne bagaana okumpuliriza; tebaggyawo bintu eby’omuzizo mu maaso gaabwe, newaakubadde okuleka bakatonda abalala ab’e Misiri. Kyenava njogera nti ndibabonerereza mu Misiri.

⁹ Naye olw’obutavumisa linnya lyange mu maaso g’amawanga mwe baabeeranga, ne mu maaso gaabo be neeyabiza eri Abayisirayiri nga mbaggya mu Misiri, nakola bwe nti olw’erinnya lyange.

¹⁰ Kyenava mbaggya mu Misiri ne mbatwala mu ddungu.

¹¹ Nabawa ebiragiro byange ne mbamanyisa n’amateeka gange, omuntu yenna bw’abigoberera abeere mulamu.

¹² Ne mbawa ne Ssabiiti zange ng’akabonero wakati wange nabo, bategeere nga nze MUKAMA abatukuza.

¹³ “Naye era abantu ba Isirayiri ne banjeemera mu ddungu, ne batagoberera biragiro byange, ne banyooma amateeka gange, ebyandiyinzizza okulokola omuntu abigondera, ne Ssabiiti zange ne batazitukuza. Kyenava njogera nti ndibasunguwalira ne mbazikiririza mu ddungu.

¹⁴ Naye olw’erinnya lyange nakola ekkyo obutavumisibwa obuteeswaza mu maaso g’amawanga mwe nabaggya.

¹⁵ Era ne mbalayirira mu ddungu nga bwe siribaleeta mu nsi gye nnali mbawadde, ekulukuta amata n’omubisi gw’enjuki, ensi esinga endala zonna obulungi,

¹⁶ kubanga baajeemera amateeka gange ne batagoberera biragiro byange, ne batatukuza Ssabiiti zange, kubanga emitima gyabwe gyasinzanga bakatonda abalala.

¹⁷ Naye wakati mu ebyo byonna ne mbasaasira ne sibazikiriza, newaakubadde okubasaanyaawo mu ddungu.

¹⁸ Ne njamba abaana baabwe mu ddungu nti, “Temugoberera biragiro bya bakitammwe, newaakubadde okukwata amateeka gaabwe, so temweyonoonyesanga ne bakatonda baabwe abalala.

¹⁹ Nze MUKAMA Katonda wammwe, mugoberere ebiragiro byange era mwegendereze okukwata amateeka gange,

²⁰ n’okutukuza Ssabiiti zange, era ebyo binaabanga kabonero wakati wange nammwe, olwo mulimanya nga nze MUKAMA Katonda wammwe.”

²¹ “Naye abaana banjeemera; tebaagoberera biragiro byange newaakubadde okukwata amateeka gange, ebyandiyinzizza okulokola omuntu abigondera, ne Ssabiiti zange ne batazitukuza. Kyenava njogera nti ndibasunguwalira mu ddungu.

22Naye neekuma olw'erinnya lyange obutaliswaza mu maaso g'amawanga mwe nnali mbaggye.

23Era ne mbalayirira mu ddungu nti ndibasaasaanya mu mawanga, ne mbabunya mu nsi,

24kubanga tebaagoberera mateeka gange era ne bajeemera n'ebiragiro byange, era ne batatukuza Ssabiiti zange, naye amaaso gaabwe ne gayaayaanira bakatonda abalala aba bajjajaabwe.

25Kyennava mbawaayo eri ebiragiro ebitali birungi n'amateeka ebitayinza kubabeezesawa mu bulamu;

26ne mbaswaza nga nkozesza ebirabo byabwe, bwe baleeta omuggulanda waabwe ng'ekiweebwayo, balyoke bajjule entiisa, era bamanye nga nze MUKAMA.'

27"Kale omwana w'omuntu, yogera eri abantu ba Isirayiri obagambe nti, 'Bw'ati bw'ayogera MUKAMA Katonda nti: mu kino nakyo bajjajammwe mwe banvumira ne banzivoola.

28Bwe nabaleeta mu nsi gye nabalayirira ne balaba buli lusozi oluwanvu na buli muti ogwamera yo, ne baweerangayo ssaddaaka zaabwe, ne baweerangayo ebiweebwayo ebyannyiiza, ne banyookerezanga obubaane bwabwe, era ne baweerangayo n'ebiweebwayo ebyokunyuwa.

29Kyenava mbabuuza nti, Ekifo ekyo ekigulumivu gye mugenda kya mugaso ki?"

Okusala Omusango n'Okuzzibwa Obuggy

30"Noolwekyo gamba ennyumba ya Isirayiri nti, 'Bw'ati bw'ayogera MUKAMA Katonda nti, Mulyeyonoona nga bajjajammwe bwe baakola ne mugoberera ebintu eby'ekivve?

31Bwe muwaayo ebirabo, ne muwaayo n'abaana bammwe mu muliro ng'ebiweebwayo, mweyongera okweyonoona ne bakatonda bammwe abalala bona. Nnyinza okubakkiriza okunneebuuzaako mmwe ennyumba ya Isirayiri? Nga bwe ndi omulamu temujja kunneebuuzaako, bw'ayogera MUKAMA Katonda.

32"Mwogera nti, "Twagala okuba ng'amawanga amalala, ng'abantu ab'ensi endala, abaweereza embaawo n'amayinja," naye ebyo bye mulowooza tebiribaawo n'akatono.

33Nga bwe ndi omulamu, bw'ayogera MUKAMA Katonda, ndibafuga n'omukono ogw'amaanyi, era ndigolola omukono gwange n'obusungu bungi.

34Ndibaggya mu mawanga n'omukono ogw'amaanyi omugolole, nga nzijudde obusungu, ne mbakuŋjaanya okuva mu nsi gye mwasaasaanira.

³⁵Ndibaleeta mu ddungu ery'amawanga, era eyo gye ndibasalira omusango nga tutunuuliganye amaaso n'amaaso.

³⁶Nga bwe nasalira bajjajjammwe omusango mu ddungu ery'ensi ya Misiri, bwe ntyo bwe ndibasalira omusango, bw'ayogera MUKAMA Katonda.

³⁷Ndibeetegereza nga muyita wansi w'omuggo gwange ne mbassaako envumbo y'endagaano yange.

³⁸Ndibamaliramu ddala mu mmwe abajeemu era abansobya. Era newaakubadde nga ndibaggya mu nsi gye balimu, tebaliyingira mu nsi ya Isirayiri, mulyoke mumanye nga nze MUKAMA.

³⁹“Ate ggwe ennyumba ya Isirayiri, bw'ati bw'ayogera MUKAMA Katonda nti, Mugende muweereze bakatonda bammwe abalala, mugende, naye oluvannyuma mulimpuliriza, ne mulekayo n'okuvumisa erinnya lyange ettukuvu n'ebirabo byammwe era ne bakatonda bammwe abalala.

⁴⁰Ku lusozi lwange olutukuvu, olusozi oluwanvu olwa Isirayiri mu nsi eyo, ennyumba ya Isirayiri yonna balimpeereza, nange ndibasembeza. Era eyo gye ndibasabira ebiweebwayo byammwe, n'ebibala ebibereberye eby'ebirabo byammwe, wamu ne ssaddaaka zammwe ezitukuzibbwa.

⁴¹Bwe ndibaggya mu mawanga ne mbakuinjaanya okuva mu nsi gye mwasaasaanira, ndibakkiriza nga bwenzikiriza akaloosa ak'evvumbe eddungi, era ndibalaga obutukuvu bwange mu maaso g'amawanga.

⁴²Mulimanya nga nze MUKAMA, bwe ndibaleeta mu nsi ya Isirayiri ensi gye nalayirira bajjajjammwe n'omukono ogugoloddwa.

⁴³Era eyo gye mulijuukirira enneeyisa yammwe n'ebikolwa byammwe byonna bye mweyonoonyesa, era mulyetukuza olw'ebibi byonna bye mwakola.

⁴⁴Mulimanya nga nze MUKAMA, bwe ndibakola ng'erinnya lyange bwe liri so si ng'ebibi byammwe bwe biri, n'ebikolwa byammwe eby'obukumpanya bwe biri, mmwe ennyumba ya Isirayiri, bw'ayogera MUKAMA Katonda.”

Obubaka eri Obukiikaddyo

⁴⁵Ekigambo kya MUKAMA ne kinzijira nti,

⁴⁶“Omwana w'omuntu, simba amaaso go mu bukiikaddyo, obabuulire era owe obunnabbi gye bali n'eri ekibira eky'ensi ey'Obukiikaddyo.

⁴⁷Yogera eri ekibira eky'omu bukiikaddyo nti, ‘Wulira ekigambo kya MUKAMA. Bw'ati bw'ayogera MUKAMA Katonda nti, Nnaatera okukukumako omuliro, era gulizikiriza emit gyonna, omubisi n'omukalu. Ennimi ez'omuliro tezirizikizibwa, na buli ludda okuva mu bukiikaddyo okutuuka mu bukiikkono bulyokebwa.

⁴⁸Buli muntu aliraba nga nze MUKAMA abyokezza, era tegulizikizibwa.'"

⁴⁹Awo ne njogera nti, "Ayi MUKAMA Katonda, banjogerako nti, 'Oyo tanyumya ngero bugero.'"

Ezeekyeri 21

Katonda Akozesa Babulooni ng'Ekitala kye

¹Awo ekigambo kya MUKAMA Katonda ne kinzijira, n'aŋŋambा nti,

²"Omwana w'omuntu tunuulira Yerusaalemi oyogere ku bifo ebitukuvu. Wa ekigambo ky'obunnabbi eri ensi ya Isirayiri,

³oyogere nti, 'Bw'ati bw'ayogera MUKAMA Katonda nti, nnina oluyombo naawe, era ndisowola ekitala kyange okuva mu kiraato kyakyo ne nzikiriza abatuukirivu n'abatali batuukirivu abali mu ggwe.

⁴Kubanga ndiba nzikiriza abatuukirivu n'abatali batuukirivu, kyendiva nnema okuzza ekitala kyange mu kiraato kyakyo, ne ntabaala buli muntu nakyo okuva Obukiikkaddyo okutuuka Obukiikkakkono.

⁵Awo abantu bona balimanya nga nze MUKAMA nsowodde ekitala kyange okuva mu kiraato kyakyo, era tekiriddayo mu kiraato kyakyo nate.'

⁶"Omwana w'omuntu, kyonoova okaabira mu maaso gaabwe ng'omutima gwo gujjudde ennaku n'obuyinike.

⁷Bwe balikubuuza nti, 'Okaabira ki?' Oliddamu nti, 'Olw'amawulire ge nfunye, kubanga ebyo bwe birijja, buli mutima gulisaanuuka, na buli mukono ne gulemala, n'emyoyo ne gizirika, n'amaviivi gonna ne ganafuwa ne gafuuka ng'amazzi.' Bijja era birituukirira, bw'ayogera MUKAMA Katonda."

⁸Ekigambo kya MUKAMA ne kinzijira, n'aŋŋambा nti,

⁹"Omwana w'omuntu, wa obunnabbi oyogere nti, 'Bw'ati bw'ayogera Mukama nti, "'Ekitala, ekitala, kiwagaddwa era kiziguddwa,

¹⁰kiwagaddwa okutta, kiziguddwa, era kimasamasa ng'okumyansa kw'eggulu! Tulisanyukira obuyinza bw'omwana wange Yuda? "'Ekitala kinyooma buli muggo.

¹¹"Ekitala kiweereddwayo okuzigulwa kiryoke kinywezebwе mu mukono; kiwagaddwa era kiziguddwa, kiryoke kiweebwe omussi.

¹²Kaaba era wowoggana, omwana w'omuntu, kubanga ekyo nkikola bantu bange, era nkikola ablangira bona aba Isirayiri. Mbawaddeyo eri ekitala wamu n'abantu bange, noolwekyo weekube mu kifuba.

¹³"Okugezesewa kuteekwa okujja. Kiba kitya ng'omuggo gw'obufuzi bwa Yuda ekitala gwe kinyooma, tegulabika nate? bw'ayogera MUKAMA Katonda.'

¹⁴ “Kyonoova owa obunnabbi, omwana w’omuntu, n’okuba ne mu ngalo. Leka ekitala kisale emirundi ebiri oba emirundi esatu. Kitala kya kutta, okutta okunene, nga kibataayiza enjuuyi zonna,

¹⁵ era n’emitima gyabwe girisaanuuka, n’abattiddwa baliba bangi. Ntadde ekitala ekitta ku miryango gyabwe gyonna. Kiwagaddwa era kimyansa ng’okumyansa kw’eggulu era kinywezebbwa olw’okutta.

¹⁶ Ggwe ekitala genda osale ku mukono ogwa ddyo ne ku gwa kkono, ne yonna obwogi bwo gye bunaakyukira.

¹⁷ Nange ndikuba mu ngalo, n’ekiruyi kyange kirikkakkana. Nze MUKAMA njogedde.”

¹⁸ Ekigambo kya MUKAMA ne kinzijira nate, n’ajnjamba nti,

¹⁹ “Omwana w’omuntu, teekawo amakubo abiri ekitala kya kabaka w’e Babulooni we kinaayita, gombi nga gava mu nsi emu. Oteeke ekipande, awo ekkubo we lyawukanira okudda mu kibuga.

²⁰ Okole ekkubo erimu ekitala mwe kinaayita okulumba Labba eky’abaana ba Amoni, n’eddala okulumba Yuda ne Yerusaalemi ekibuga ekiriko enkomera.

²¹ Kabaka w’e Babulooni aliylimirira mu kifo mu masanjanzira, amakubo we gaawukanira, okutegeezebwa ebigambo bya MUKAMA; alisuula obusaale okukuba akalulu, ne yeebuuza ku bakatonda be, era alikebera n’ekibumba.

²² Mu mukono gwe ogwa ddyo mwe mulibeera akalulu ka Yerusaalemi, gy’aliteeka ebitomera wankaaki, era gy’aliyimusiza eddoboozi eririragira okutta kutandike, era gy’aliyimusiza eddoboozi eririrangirira olutalo, era gy’aliteeka ebitomera emiryango, n’okuzimba ebitindiro n’ebigo ebikozesebwba okutaayiza.

²³ Kulirabika ng’obunnabbi obw’obulimba eri abo aba mulayirira, naye alabajukiza omusango gwabwe n’abatwala nga bawambe.

²⁴ “MUKAMA Katonda kyava ayogera nti, ‘Olw’okunzijjukiza omusango gwammwe, olw’obujeemu bwammwe obw’olwatu, ekiggyayo ebibi byammwe mu byonna bye mwakola, era olw’okukola ebyo, kyemuliva mutwalibwa mu buwambe.

²⁵ “Ggwe omulangira wa Isirayiri omwonoonefu, omukozi w’ebibi, olunaku gwe lutuukidde, ekiseera eky’okubonerezebwba kwo, bwe kituukidde ku ntikko esemberayo ddala,

²⁶ bw’ati bw’ayogera MUKAMA Katonda nti, Ggyako ekitambala ku mutwe, oggyeko n’engule, kubanga ebintu tebikyali nga bwe byali. Abakkakkamu baligulumizibwa, n’abeegulumiza balikkakkanyizibwa.

²⁷Matongo, matongo, ndikifuula matongo, era tekirizzibwa buggya okutuusa nnyinikyo lw'alijja, era oyo gwe ndikiwa.'

²⁸"Kaakano ggwe omwana w'omuntu, wa obunnabbi, oyogere nti, 'Bw'ati bw'ayogera MUKAMA Katonda ku baana ba Amoni n'obujoozi bwabwe: "Ekitala, ekitala, kisowoddwa okutta, Kiziguddwa okusaanyaawo era kimyansa ng'okumyansa kw'eggulu.

²⁹Newaakubadde nga baakubuulira ebirooto eby'obulimba, ne bakuwa obunnabbi obw'obulimba, ekitala kiriteekebwa ku bulago bw'abakozi b'ebibi abookuttibwa, olunaku be lutuukidde n'ekiseera eky'okubonerezebwa kwabwe be kituukidde ku ntikko esemberayo ddala.

³⁰"Ekitala kizze mu kiraato kyakyo. Mu kifo mwe watondebwa, mu nsi ey'obujajja, eyo gye ndikusalirira omusango.

³¹Ndikufukako ekiruyi kyange, ne nkufuuwako omuliro ogw'obusungu bwange, ne nkuwaayo mu mikono gy'abasajja abakambwe abali ng'ensolo, abaatendekebwa mu byo kuzikiriza.

³²Oliba nku za muliro, n'omusaayi gwo guliyiyibwa mu nsi yo, era tolijjukirwanate, kubanga nze MUKAMA njogedde.'"

Ezeekyeri 22

Ebibi bya Yerusaalemi

¹Ekigambo kya MUKAMA Katonda ne kinzijira, n'anjamba nti,

²"Omwana w'omuntu, olikalira omusango? Olisalira omusango ekibuga ekiyiwa omusaayi? Kale mulumbe wakati mu bikolwa bye byonna eby'ekivve;

³mugambe nti, 'Bw'ati bw'ayogera MUKAMA Katonda nti, Gwe ekibuga ekittiraabantu mu kyo era ekyeyonoonesa olwa bakatonda abalala be beekolera, weelesseeko wekka ekivume,

⁴era osingiddwa olw'omusaayi gw'oyiye era weeyonoonyesezza olwa bakatonda abalala be weekolera. Ennaku zo ozikomekkerezza, enkomerero ye myaka gyo etuuse. Kyendiva nkuswaza eri amawanga, n'ofuuka eky'okusekererwa eri ensi zonna.

⁵Abali okumpi n'abali ewala balikukudaalira, ggwe ekibuga ekinyoomebwa era ekijudde emivuyo.

⁶"Laba, buli mulangira wa Isirayiri bw'akozesa obuyinza bwe okuyiwa omusaayi.

⁷Bataata ne bamaama banyoomebwa, era n'abagenyi mu mmwe banyigirizibwa, era babonyaabonya bamulekwa ne bannamwandu.

⁸Munyoomye ebintu byange ebitukuvu, ne mwonoona Ssabbiiti zange.

⁹Mu mmwe mulimu abantu abawaayiriza abaamalirira okuyiwa omusaayi, era mulimu n'abo abaliira ku nsozi, ne bakola eby'obugwagwa.

¹⁰Era mu mmwe mulimu abajerega obwerefere bwa bakitaabwe, era mulimu n'abo abeebaka n'abakazi abali mu nsonga zaabwe ez'abakazi nga si balongoofu.

¹¹Mu mmwe mulimu omusajja akola ebibi eby'obwenzi ne muka muliraanwa we, omulala n'ayonoonyesa muka mwana mu buswavu, ate omulala n'akwata mwannyina muwala wa kitaawe.

¹²Mu mmwe mulimu abantu abalya enguzi okuyiwa omusaayi, ne basolooza amagoba agasukkiridde ne bafuna ekisukkiridde okuva ku baliraanwa baabwe mu ngeri ey'obukumpanya, era munneerabidde, bw'ayogera MUKAMA Katonda.

¹³“Kale nno ndikuba mu ngalo olw'amagoba agatasaanidde ge mukoze n'omusaayi ogwayiyibwa wakati mu mmwe.

¹⁴Obuvumu bwo bulibeerera, oba emikono gyo giriba n'amaanyi olunaku lwe ndikubonereza? Nze MUKAMA nkyogedde, era ndikikola.

¹⁵Ndibabunya mu mawanga ne mbasaasaanya mu nsi, era ndikomya obutali bulongoofu bwo.

¹⁶Bw'oliggwaamu ekitiibwa mu maaso g'amawanga, olimanya nga Nze MUKAMA.”

¹⁷Awo ekigambo kya MUKAMA ne kinzijira n'aŋjamba nti,

¹⁸“Omwana w'omuntu, ennyumba ya Isirayiri efuuse amasengere gye ndi; bona bali ng'ebikomo, masasi, n'ebiyuma ebisigalira wansi mu kikoomi ky'ekyokero. Bali ng'amasengere ga ffeeza.

¹⁹MUKAMA Katonda kyava ayogera nti, ‘Kubanga mwenna mufuuse masengere, kyendiva mbakuŋjaanya ne mbateeka wakati mu Yerusaalemi.

²⁰Ng'omuntu bw'okuŋjaanya effeeza, n'ebikomo, n'ebiyuma, n'amassasi mu kyokero okubisaanuusa n'omuliro ogw'amaanyi, nange bwe ntyo bwe ndibakuŋjaanya nga ndiko obusungu n'ekiruyi, ne mbateeka mu kibuga ne mbasaanuusa.

²¹Ndibakuŋjaanya, ne mbafukuta mu muliro ogw'ekiruyi kyange, ne musaanukira munda mu kyo.

²²Era ng'effeeza bw'esaanuusibwa mu kyokero, nammwe bwe mutyo bwe mulisaanuusibwa munda mu kyo, era mulimanya nga Nze MUKAMA mbafuseeko ekiruyi kyange.”

²³Ekigambo kya MUKAMA ne kinzijira nate, n'aŋjamba nti,

²⁴“Omwana w’omuntu, yogera eri ensi nti, ‘Ggwe oli nsi eteri nongoose, era etetonnyebwako nkuba ku lunaku olw’ekiruyi.’

²⁵Bannabbi b’ensi balina enkwe, bali ng’empologoma ewuluguma etaagulataagula omuyiggo gwayo; bavaabira abantu, ne batwala eby’obugagga n’ebintu eby’omuwendo, ne bafuula abakazi bangi mu kyo okuba bannamwandu.

²⁶Bakabona baakyo bajeemedde amateeka gange era boonoonye ebintu byange ebitukuvu; tebaawuddeemu bitukuvu na bya bulijo; bayigiriza nti tewali njawulo wakati wa bitali birongoofu n’ebirongoofu, so tebassaayo mwoyo okukuuma Ssabbiiti zange, ne banswaza Nze mu bo.

²⁷Abakungu baakyo bali ng’emisege egitaagulataagula omuyiggo gwagyo; bayiwa omusaayi ne batta abantu okukola amagoba mu butali bwenkanya.

²⁸Bannabbi baakyo bakkiriza ebikolwa ebyo, nga babalimba n’okwolesebwa okukyamu n’okuwa obunnabbi obw’obulimba, nga boogera nti, ‘Bw’ati bw’ayogera MUKAMA Katonda,’ so nga MUKAMA tayogedde.

²⁹Abantu ab’omu nsi bakola eby’obukumpanya ne babba; banyigiriza omwavu ne babonyaabonya ne munaggwanga ne batabasalira musango mu bwenkanya.

³⁰“Ne nnoonya omuntu mu bo ayinza okuzimba ekisenge era ayinza okubeeyimiririra mu maaso gange ku lw’ensi, naye ne siraba n’omu.

³¹Kyendiva mbayiwako ekiruyi kyange, ne mbamalawo n’omuliro ogw’obusungu bwange, ne mbaleetako ebyo byonna bye baakola,” bw’ayogera MUKAMA Katonda.

Ezeekyeri 23

Abooluganda Ababiri Abenzi

¹Ekigambo kya MUKAMA Katonda ne kinzijira n’anjamba nti,

²“Omwana w’omuntu waaliwo abakazi babiri, nnyabwe omu,

³abeewaayo mu Misiri, ne bakola obwamalaaya okuvira ddala mu buto bwabwe, era eyo gye baakwatirakwatira ku mabeere ne batandika n’okumanya abasajja.

⁴Erinnya ly’omukulu nga ye Okola, ne muto we nga ye Okoliba. Baali bange, era banzalira abaana aboobulenzi n’aboobuwala. Okola ye yali ayitibwa Samaliya, Okoliba nga ye Yerusaalemi.

⁵“Okola n’akola obwamalaaya ng’akyali wange, n’akabawala ku baganzi be Abasuuli,

⁶abaserikale abaayambalanga kaniki, n'abaamasaza, n'abaduumizi b'eggye, bona nga basajja balabika bulungi era nga beebagala embalaasi.

⁷Yeewaayo okubeera malaaya eri abakulembeze ab'e Bwasuli, ne yeeyonoonyesa ne bakatonda abalala bona aba buli muntu gwe yakabawalanga naye.

⁸Teyalekayo bwamalaaya bwe yatandikira mu Misiri.

⁹"Kyenava muwaayo eri baganzi be Abasuuli, be yakabawalanga nabo.

¹⁰Baamwambula, ne batwala batabani be ne bawala be, ye ne bamutta n'ekitala. Yafuuka ekivume mu bakazi ne bamuwa n'ekibonerezo.

¹¹"Newaakubadde nga muganda we Okolib, yibiraba ebyo, yeeyongera mu bukaba bwe ne mu bwamalaaya bwe n'okusinga muganda we.

¹²Yakabawala n'Abaasuli, n'abaamasaza n'abaduumizi b'eggye n'abaserikale abaali bambadde obulungi engoye ennungi n'abeebagalanga embalaasi n'abaalabikanga obulungi abeegombewanga.

¹³Ne ndaba nga naye yeeyonoonye, era bombi nga bakutte ekkubo lye limu.

¹⁴"Naye wakati mu ebyo byonna, ne yeeyongeranga mu bwamalaaya bwe; n'alaba ebifaananyi eby'abasajja ebyasiigibwa ku bisenge, n'ebifaananyi eby'Abakaludaaya ebyatonebwa mu langi emyufu,

¹⁵nga beesibye enkoba mu biwato, nga beesibye n'ebiremba ku mitwe, bona nga bafaanana ng'abakungu ba Babulooni abavuga amagaali ab'omu nsi ey'Abakaludaaya.

¹⁶Awo olwatuuka, n'abeegomba, n'abatumira ababaka mu Bukaludaaya.

¹⁷Era Ababulooni ne bajja gy'ali, ne beebaka naye, era mu kwegomba kwe ne bamwonoona. Bwe baamusobyako n'abaviira, nga yeetamiddwa.

¹⁸Bwe yagenda mu maaso n'obwamalaaya bwe mu lwatu, n'ayolesa obwerefere bwe, ne mmuvira nga nennyamidde, nga bwe nnava ku muganda we.

¹⁹Newaakubadde nga namukola ebyo byonna, yeeyongeranga bweyongezi mu maaso, nga bwe yejjukanya ennaku ez'omu buvubuka bwe, bwe yakola obwamalaaya mu Misiri,

²⁰gye yakabawalira ku baganzi be, abaalina entula ez'ekisajja nga zifaanana ez'endogoyi, n'amaanyi agabavaamu ng'ag'embalaasi.

²¹Bw'otyo n'oyaayaanira okwegomba okw'omu buvubuka bwo, bwe wali mu Misiri ne bakukwatirira mu ngeri ey'obukaba, ne bakwatirira n'amabeere go amato.

²² “Kale ggwe Okoliba, bw’ati bw’ayogera MUKAMA Katonda nti, Ndikuma mu baganzi bo omuliro, ne bakulumba ku njuyi zonna:

²³ Abababulooni, n’Abakaludaaya bona, n’abasajja ab’e Pekodi ne Sara ne Kowa, n’Abaasuli bona wamu nabo, n’abavubuka abalabika obulungi, n’abaamasaza n’abaduumizi b’eggye bona, n’abakungu abavuga amagaali n’abaserikale ab’oku ntikko bona, nga beebagadde embalaasi bona.

²⁴ Balikulumba nga balina amagaali, n’ebiwalulibwa n’ekibiina eky’abantu; balyesega ne beetereeza mu bifo byabwe ne bakulumba enjuuyi zonna nga bakutte engabo ennene n’entono nga bambadde n’enkuufira ez’ebiyuma. Ndikuwaayo mu mukono gwabwe ne bakusalira omusango, era balikubonereza ng’amateeka gaabwe bwe gali.

²⁵ Ndikuyiwako ekiruyi kyange, nabo ne bakubonereza mu busungu. Balibasalako ennyindo zammwe n’amatu gammwe, n’abalisigalawo balifa n’ekitala. Balitwala batabani bammwe ne bawala bammwe, n’abaliba basigaddewo, balyokebwa omuliro.

²⁶ Balibambulamu engoye zammwe, ne batwala n’eb’omu bulago.

²⁷ Era ndikomya obukaba n’obwamalaaya bwe waleeta okuva mu Misiri, so tolibuyaayaanira nate newaakubadde okujukira Misiri.

²⁸ “Bw’ati bw’ayogera MUKAMA Katonda nti, Nnaatera okukuwaayo eri abo abakuwyawa n’eri abo be weetamwa.

²⁹ Balikukwata n’obukyayi obuyitiridde, ne batwala ebintu byonna bye wakolerera, ne bakuleka bwereere nga tolina kantu, n’ensonyi z’obwamalaaya zirabibwe buli muntu. Obukaba bwo n’obugwagwa bwo

³⁰ bwe bukuleetedde ebyo, kubanga weegomba amawanga ne weeyonoona ne bakatonda baabwe.

³¹ Kubanga wagoberera ekkubo lya muganda wo, kyendiva nkuwa ekikompe kye mu mukono gwo.

³² “Bw’ati bw’ayogera MUKAMA Katonda nti, “Olinywa ekikompe kya muganda wo, ekikompe ekigazi era ekinene; kirikuleetera okusekererwa n’okuduulirwa kubanga kirimu ebintu bingi.

³³ Olijuzibwa okutamiira n’ennaku, ekikompe eky’obuyinike era eky’okunakuwala, ekyo kye kikompe kya muganda wo Samaliya.

³⁴ Olikinywa n’okikaliza; olifyasaayasa, ne weeyuzaayuza amabeere. Nze MUKAMA Katonda, nkyogedde.

³⁵ “MUKAMA Katonda kyava ayogera nti, Kubanga mwanneerabira ne munkuba amabega, kyemuliva mubonaabona olw’okwegomba kwammwe.”

³⁶MUKAMA n'ajjamba nti, "Omwana w'omuntu olisalira Okola ne Okolibwa omusango? Kale nno bañjange olw'ebikolwa byabwe eby'ekivve,

³⁷kubanga bakoze eby'obwenzi, n'engalo zaabwe zижудde omusaayi. Benze ne bakatonda baabwe, ne basaddaaka n'abaana baabwe ng'emmere y'abakatonda baabwe, abaana be banzalira.

³⁸Ne kino bakinkoze. Mu kiseera kyekimu boonoonye ekifo kyange ekitukuvu, era boonoonye ne Ssabbiiti zange.

³⁹Ku lunaku kwe baassaddaakira abaana baabwe eri bakatonda baabwe, baayingira mu watukuvu ne bayoononawo. Ebyo bye baakola mu nnyumba yange.

⁴⁰"Baatumababaka okuleeta abasajja okuva ewala ennyo, era bwe baatuuka, ne munaaba ku lwabwe ne mweyonja mu maaso, ne mwambala n'amayinja ag'omuwendo omungi.

⁴¹Watuula ku kitanda ekinene eky'ekitiibwa, n'oyalirira n'emmeeza mu maaso go ng'etegekeddwako obubaane bwange n'amafuta gange.

⁴²"Oluyoogaano olw'ekibinja ky'abantu abatalina nnyo kye bakola ne Abaseba ne lumwetooloola; Abaseba ne baleetebwa okuva mu ddungu wamu n'abasajja abaalyanga mu kasasiro, ne bambaza ebintu eby'ebikomo ku mikono gy'omukazi ne muganda we, ne babatikkira n'engule ennungi ku mitwe gyabwe.

⁴³Awo ne njogera ku oyo eyali akaddiye olw'obwenzi nti, 'Bamukozeseze ddala nga malaaya kubanga ekyo kyali.'

⁴⁴Ne beebaka naye. Ng'abasajja bwe beebaka ne malaaya, bwe batyo beebaka n'abakazi abo abagwenyufu, Okola ne Okolibwa.

⁴⁵Naye abatuukirivu balisalira omusango abakazi abenzi era abassi kubanga benzi era n'engalo zaabwe zижудde omusaayi.

⁴⁶"Bw'ati bw'ayogera MUKAMA Katonda nti, 'Mukunjaanye ekibiina ekinene mubaleeteko entiisa era mubanyage.'

⁴⁷Ekibiina ekyo kiribakuba amayinja ne babatemaatema n'ebitala; balitta batabani baabwe ne bawala baabwe ne bookya n'ennyumba zaabwe.'

⁴⁸"Bwe ntyo bwe ndikomya obukaba mu nsi, abakazi bonne bakitwale ng'ekyokulabula, baleme okukola ebyo bye mwakola.

⁴⁹Mulisasulibwa olw'obukaba bwammwe, era mulibonerezebwa olw'ebibi byammwe eby'okusinza bakatonda abalala, mulyoke mumanye nga nze MUKAMA Katonda."

Ezeekyeri 24

Entamu Efumba

- ¹ Awo olwatuuka mu mwaka ogw'omwenda, mu mwezi ogw'ekkumi ku lunaku olw'ekkumi, ekigambo kya MUKAMA Katonda ne kinzijira n'aŋŋamba nti,
- ² "Omwana w'omuntu wandiika ennaku z'omwezi eza leero, kubanga kabaka w'e Babulooni azingizza Yerusaalemi olwa leero.
- ³ Gerera ennyumba eyo enjeemu olugero obagambe nti, 'Bw'ati bw'ayogera MUKAMA Katonda nti, "Muteke entamu ku kyoto, musseemu amazzi.
- ⁴ Mugiteekemu ebifi eby'ennyama, ebifi byonna ebirungi, ekisambi n'omukono. Mugijuze n'amagumba agasinga obulungi,
- ⁵ mulonde endiga esinga obulungi okuva mu kisibo, Oteeke ebisiki wansi w'entamu, mweseze ebigirimu, era ofumbe n'amagumba agalimu.
- ⁶ "Kubanga bw'ati bw'ayogera MUKAMA Katonda nti, "Zikusanze ggwe ekibuga ekiyiwa omusaayi, ggwe entamu eriko enziro, eteereddwamu ebantu ebitaaveemu. Gyamu ekifi kimu kimu awatali kukuba kalulu.
- ⁷ "Omusaayi gwe yaiwa guli wakati mu ye, yaguyiwa ku lwazi olwereere; teyaguyiwa wansi enfuufu ereme okugubikka.
- ⁸ Okusiikula ekiruyi kyange nsobole okuwalana eggwanga n'ateeka omusaayi gwe ku lwazi olwereere, guleme okubikkibwako.
- ⁹ "MUKAMA Katonda kyava ayogera nti, "Zikusanze ggwe ekibuga ekiyiwa omusaayi! Nange ndituma enku nnyingi ddala.
- ¹⁰ Mutuume ebisiki, mukume omuliro, ennyama mugifumbe bulungi, mugiteekemu ebirungo, n'amagumba gasiriire.
- ¹¹ Oluvannyuma muddire entamu enkalu mugiteeke ku masiga, okutuusa lw'eneeyokya ennyo n'ekikomo mwe yakolebwa ne kyengerera, ebitali birongoofu ebigirimu ne bisaanuuka, n'ebyatheekebbwamu ne byokebwa.
- ¹² Okufuba kwonna kubadde kwa bwereere, kubanga ebyatheekebbwamu ebingi tebigiddwamu, n'omuliro nagwo tegubyokeza.
- ¹³ "Kaakano mu kwonoona kwo wagwenyuka, kubanga nagezaako okukutukuza ggwe, naye ne kitasoboka kukutukuza, era tolitukuzibwa okutuusa ekiruyi kyange bwe kirikkakkana.
- ¹⁴ "Nze MUKAMA njogedde. Ekiseera kituuse okubaako ne kye nkola. Siritunula butunuzi so sirisaasira newaakubadde okwejjusa. Ndikusalira omusango nga nsinziira ku neeyisaayo ne ku bikolwa byo, bw'ayogera MUKAMA Katonda."

Mukazi wa Ezeekyeri Afa

- ¹⁵ Ekigambo kya MUKAMA ne kinzijira n'aŋŋamba nti,

¹⁶“Omwana w’omuntu, luliba lumu oli awo ne nkuggyako ekyo amaaso go kye gasinga okwegomba, naye tokungubaganga newaakubadde okukuba ebiwoobe newaakubadde okukaaba.

¹⁷Osindanga mu kasirise naye tokungubagiranga mufu. Ekiremba ku mutwe gwo okinywezanga, era osigalanga oyambadde engatto zo; tobikkanga wansi w’amaaso go wadde okulya emmere ey’omulumbe.”

¹⁸Awo ne njogera eri abantu ku makya, akawungeezi mukazi wange n’afa. Enkeera ne nkola nga bwe nalagiddwa.

¹⁹Abantu ne bambuuza nti, “Bino bitegeeza ki?”

²⁰Awo ne mbaddamu nti, “Ekigambo kya MUKAMA kyanzijira n’ajnjamba nti,

²¹Tegeeza ennyumba ya Isirayiri nti, ‘Bw’ati bw’ayogera MUKAMA Katonda nti, nnaatera okwonoona awatukuvu wange, ekigo kye mwegulumiririzangamu, amaaso gammwe kye geegombanga, n’emitima gyammwe kye gyayagalanga, ne batabani bammwe ne bawala bammwe abaasigala emabega, balifa n’ekitala.

²²Mulikola nga nze bwe nkoze, so temulibikka wansi w’amaaso gammwe newaakubadde okulya emmere ey’omulumbe.

²³Mulisigala nga mwesibye ebiremba ku mitwe gyammwe, era mulisigala nga mwambadde engatto zammwe. Temulikuba biwoobe newaakubadde okukaaba naye muliyongobera olw’ebibi byammwe, buli muntu n’asindira munne ennaku.

²⁴Era Ezeekyeri aliba kabonero gye muli, era mulikola nga bw’akoze. Ebyo bwe biribaawo, mulimanya nga nze MUKAMA Katonda.’

²⁵“Ate ggwe, omwana w’omuntu, olunaku lwe ndibaggyako ekigo kyabwe, n’essanyu lyabwe n’ekitiibwa kyabwe, n’okwegomba okw’amaaso gaabwe, n’okwegomba okw’emitima gyabwe, ne batabani baabwe ne bawala baabwe,

²⁶ku lunaku olwo aliba awonyeewo y’alikuwa amawulire.

²⁷Mu kiseera ekyo olyasamya akamwa ko, era olyogera eri kaawonawo so toliddayo kusirika. Era oli a kabonero gye bali, bamanye nga nze MUKAMA.”

Ezeekyeri 25

Obunnabbi eri Amoni

¹Awo ekigambo kya MUKAMA Katonda ne kinzijira n’ajnjamba nti,

²“Omwana w’omuntu, simba amaaso go eri abaana ba Amoni obawe obunnabbi.

³Bagambe nti, ‘Muwulire ekigambo kya MUKAMA Katonda. Bw’ati bw’ayogera MUKAMA Katonda nti, kubanga mwakuba mu ngalo ne mwogera nti, “Otyo!” ku watukuvu wange bwe wayonooneka, n’ensi ya Isirayiri bwe yafuuka amatongo, ne ku bantu ba Yuda bwe baatwalibwa mu buwanjhanguse,

⁴kyendiva mbawaayo eri abantu ab'Ebuvanjuba mube bantu baabwe ab'obwannanyini. Balikola olusiisira mu mmwe ne basiisira wakati mu mmwe, era balirya ebibala byammwe ne banya n'amata gammwe.

⁵Ndifuula Labba okubeera eddundiro ly'enjamira ne Amoni ne mufuula ekifo endiga we ziwummulira. Olwo mulimanya nga nze MUKAMA.

⁶Bw'ati bw'ayogera MUKAMA Katonda nti: kubanga wakuba mu ngalo, n'osambagala n'ebigere, n'osanyuka n'ettima lyonna ery'omutima gwo n'osekerera ensi ya Isirayiri,

⁷kyendiva nkugololerako omukono gwange era ndikuwaayo okuba omunyago eri amawanga. Ndikusalirako ddala ku mawanga era nkumalirewo ddala okuva mu nsi. Ndikuzikiriza, era olimanya nga nze MUKAMA.'"

Obunnabbi ku Mowaabu

⁸"Bw'ati bw'ayogera MUKAMA Katonda nti, 'Kubanga Mowaabu ne Seyiri baayogera nti, "Laba ennyumba ya Yuda efuuse ng'amawanga amalala gonna,"

⁹kyendiva nswaza oluuyi olumu olwa Mowaabu okutandika n'ebibuga ebiri ku nsalo yaakyo, Besu Yesimosi, ne Baalu Myoni, ne Kiriyasayimu, ekitiibwa ky'ensi eyo.

¹⁰Ndiwaayo abantu ab'e Mowaabu wamu n'abantu ab'e Amoni eri abantu ab'Ebuvanjuba mube bantu baabwe ab'obwannanyini, abantu ba Amoni balemenga okujjukirwanga mu mawanga,

¹¹era ne Mowaabu ndimubonereza. Olwo balimanya nga nze MUKAMA.'"

Obunnabbi ku Edomu

¹²"Bw'ati bw'ayogera MUKAMA Katonda nti, 'Kubanga Edomu yawoolera eggwanga ku nnyumba ya Yuda, bw'etyo n'esingibwa omusango olw'ekikolwa ekyo,

¹³MUKAMA Katonda kyava ayogera nti, Ndigololera ku Edomu omukono gwange, ne nzita abantu be n'ebisolo byabwe. Ndigisaanyaawo, n'abo abaliba mu Temani okutuuka e Dedani balifa ekitala.

¹⁴Ndiwoolera eggwanga ku Edomu nga nkozesha omukono gw'abantu bange Isirayiri, era balikola ku Edomu ng'obusungu bwange n'ekiruyi kyange bwe byenkana; balimanya okuwoolera eggwanga kwange bwe kwenkana, bw'ayogera MUKAMA Katonda.'"

Obunnabbi ku Bafirisuuti

¹⁵"Bw'ati bw'ayogera MUKAMA Katonda nti, 'Kubanga Abafirisuuti beesasuza nga bawoolera eggwanga ne beesasuza n'ettima, ne banooonya okuzikiriza Yuda, n'obukambwe obw'edda,

¹⁶MUKAMA Katonda kyava ayogera nti, Nnaatera okugololera omukono gwange ku Bafirisuuti, era nditta Abakeresi, n'abaliba basigaddewo ku mabbali g'enyanja ndibazikiriza.

¹⁷Ndibawoolera eggwanga n'ebibonerezo eby'amaanyi eby'ekiruyi. Balimanya nga nze MUKAMA, bwe ndiwoolera eggwanga ku bo.' "

Ezeekyeri 26

Obunnabbi ku Ttuulo

¹Awo olwatuuka mu mwaka ogw'ekkumi n'ogumu ku lunaku olw'olubereberyeye mu mwezi, ekigambo kya MUKAMA Katonda ne kinzijira n'aŋjamba nti,

²"Omwana w'omuntu, kubanga Ttuulo yakuba mu ngalo n'ayogera ku Yerusaalemi nti, 'Otyo! Omulyango ogw'amawanga gumenyeddwa, era n'enzigi zinziguliddwa kaakano nga bw'afuuse amatongo, ndigaggawala,'

³MUKAMA Katonda kyava ayogera nti, Nkuvunaana ggwe Ttuulo, ndiyimusa amawanga mangi gakulumbe, ng'enyanja bw'esitula amayengo gaayo.

⁴Balimena bbugwe wa Ttuulo, ne basuula n'emirongooti gye, era ndiggyawo ebifunfugu bye byonna ne mmufuula olwazi olwereeere.

⁵Wakati mu nnyanja alibeera ekifo eky'okwanjurizangamu obutimba obw'ebennyanja, kubanga nze njogedde bw'ayogera MUKAMA Katonda. Alifuuka omunyago ogw'amawanga,

⁶era ebifo bye eby'oku lukalu kw'abeera birimalibwawo ekitala. Olwo balimanya nga nze MUKAMA.

⁷"Era MUKAMA Katonda agamba nti, 'Ndiweereza Nebukadduneeza kabaka w'e Babulooni kabaka wa bakabaka, eri Ttuulo okuva mu bukiakkono, ng'alina embalaasi n'amagaali, n'abeebagala embalaasi n'eggye eddene.

⁸Alitta n'ekitala abatuuze bo ababeera ku lukalu, era alizimba ebigo okukwolekera, n'ateekawo n'ebitindiro okutuuka ku bbugwe wo n'akwolekeza n'engabo.

⁹Alitunuza ebintu bye ebitomera eri bbugwe wo, n'amenyaamenya emirongooti gyo n'ebokulwanyisa bye.

¹⁰Embalaasi ze ziriba nnyingi nnyo, n'enfuufu yaazo erikubikka era ne bbugwe wo alinyeenyezebwu olw'amaloboozi g'embalaasi ennwanyi, n'olw'ebiwalulibwa n'amagaali bw'aliyingira mu wankaaki wo, ng'abasajja bwe bayingira mu kibuga, nga bbugwe waakyo abotoddwamu ekitali.

¹¹Embalaasi ze ziririnyirira enguudo zo; n'abantu bo alibatta n'ekitala era n'empagi zo ez'amaanyi zirisuulibwa ku ttaka.

¹²Balinyaga obugagga bwo ne babba n'ebiyamagazi byo; balimenya bbugwe wo ne basaanyaawo n'ennyumba zo ennungi, n'amayinja go n'embaawo zo era n'ebifunfugu birisuulibwa wakati mu nnyanja.

¹³Ndikomya okuyimba kwo, era n'amaloboozi ag'ennanga zo tegaliwulirwa nate.

¹⁴Ndikufuula olwazi olwereere, era olibeera ekifo eky'okwanjulurizangamu obutimba obw'ebiyenyanja. Tolizimbibwa nate, kubanga nze MUKAMA njogedde, bw'ayogera MUKAMA Katonda.'

¹⁵"Bw'ati bw'ayogera MUKAMA Katonda eri Ttuulo nti, Ebifo ebiri ku lubalama lw'ennyanja tebirikankana olw'okubwatuka olw'okugwa kwo, abaliba balumizibbwaa bwe balisinda, n'abalala ne battibwa wakati mu ggwe?

¹⁶Olwo ablangira bona ab'oku lukalu lw'ennyanja baliva ku ntebe zaabwe ez'obwakabaka ne bambulamu ebyambalo byabwe ne baggyako n'engoye zaabwe ez'emiddalizo. Mu kutya okungi, balituula wansi ku ttaka, nga bakankana buli kaseera nga basamaaliridde.

¹⁷Balikukungubagira ne bakugamba nti, "Ng'ozikiriziddwa, ggwe ekibuga ekyatutumuka, ekyabeerangamuabantu abalunyanja. Wali wa maanyi ku nnyanja, ggwe n'abantu bo, watiisatiisanga bona abaabeeranga ku lubalama lw'ennyanja.

¹⁸Kaakano olubalama lw'ennyanja lukankana ku lunaku olw'okugwa kwo, era n'ebizinga ebiri mu nnyanja bitidde olw'okugwa kwo.'

¹⁹"Bw'ati bw'ayogera MUKAMA Katonda nti, 'Bwe ndikufuula ekibuga ekirimu ebifulukwa, ng'ebibuga ebitakyabaamu bantu era bwe ndikuyimusizaako obuziba bw'ennyanja, n'amazzi gaayo ne gakubikka,

²⁰kale ndikussa wansi ng'abo abagenda mu bunnya eri abaafa edda. Olibeera wansi mu ttaka, mu bifo ebyazika edda ennyo, n'abo abaserengeta mu bunnya, so tojja kudda wadde okufuna ekifo mu nsi ya balamu.

²¹Ndikutuusa ku nkomerero embi, so toliwulirwa nate. Balikunoonya, naye toliddayo kulabika,' bw'ayogera MUKAMA Katonda."

Ezeekyeri 27

Okukungubagira Ttuulo

¹Ekigambo kya MUKAMA Katonda ne kinzijira n'anjambla nti,

²"Kaakano, ggwe omwana w'omuntu tandika okukungubagira Ttuulo.

³Oyogere eri Ttuulo, ekiri awayingirirwa mu nnyanja, omusuubuzi ow'amawanga ag'oku ttale ery'ennyanja, nti bw'ati bw'ayogera MUKAMA Katonda nti, "Ggwe Ttuulo oyogera nti, "Natuukirira mu bulungi."

⁴Amatwale go gakoma mu nnyanja wakati, era n'abaakuzimba baakola omulimu ogw'ettendo.

⁵ Baakola embaawo zo zonna mu miberosi gya Seniri, ne baddira emivule egy'e Lebanooni ne bakolamu omulongooti.

⁶ Ne bakola enkasi zo okuva mu myera egya Basani, n'emmanga zo, bazikola mu nzo, ez'oku bizinga ebya Kittimu, nga bazaaliiridde n'amasanga.

⁷ Ettanga lyo lyali lya linena aliko omudalizo eryava mu Misiri, era lyakozesebwanga ebendera; n'engoye zo zaali za bbululu n'ez'effulungu ezaaba ku ttale erya Erisa ekyali ku mabbali g'enyanja.

⁸ Abasajja b'e Sidoni ne Aluwadi be baakubanga enkasi, n'abasajja bo abamanyirivu, ggwe Ttuulo, be baali abalunyanja.

⁹ Abasajja abazira ab'e Gebali n'abagezigezi baaberanga mu ggwe, era ng'omulimu gwabwe kunyweza emiguwa gy'ebiyombo; ebiyombo byonna eby'oku nnyanja n'abagoba baabyo bajjanga okusuubula naawe; nga bagula ebyamagazi byo.

¹⁰ "Abantu ab'e Buperusi, ne Luudi ne Puuti, baali mu ggye lyo, era be baawanikanga engabo n'enkuufiira ku bisenge byo ne bakuwa ekitiibwa.

¹¹Abasajja ba Aluwadi n'eggye lyabwe be baakuumanga bbugwe wo enjuuyi zonna; abasajja b'e Gagammada baabanga mu mirongooti gyo nga bawanise engabo zaabwe okwetooloola bbugwe wo, era be baakulabisanga obulungi.

¹² "Talusisi yakolanga naawe obusuubuzi obw'obugagga obw'engeri zonna bwe walina, baawanyisanga effeeza, n'ebiyuma, n'amabaati n'amasisi bafune ebyamagazi byo.

¹³ "Buyonaani, Tubali, ne Meseki be baakusuubulangako, nga muwanyisaganya abaddu n'ebintu eby'ebikomo bafune ebintu byammwe.

¹⁴ "Ab'omu Togaluma baawanyisaganya embalaasi ez'emirimu egya bulijjo, n'embalaasi ez'entalo, n'ennyumbu bafune ebyamagazi byo.

¹⁵ "Abasajja ab'e Dedani baasuubulanga naawe, era n'abatuuze ab'oku lubalama lw'enyanja baali katale ko, nga bakusasula n'amasanga n'emitoo.

¹⁶ "Edomu baakolanga naawe eby'obusuubuzi olw'obungi bw'ebintu byo; era baawanyisanga naawe amayinja aga nnawandagala, n'engoye ez'effulungu, n'emirimu eg'y'eddalizo, ne linena omulungi ne kolali n'amayinja amatwakaavu bafune ebyamagazi byo.

¹⁷ "Yuda ne Isirayiri baakolanga naawe eby'obusuubuzi nga bawaanyisa naawe ejjaano eyavanga e Minnisi n'ebiyakaloosa, n'omubisi gw'enjuki, n'amafuta n'envumbo, bafune ebyamagazi byo.

¹⁸ “Olw’obugagga bwo obungi, n’ebintu byo ebingi, Ddamasiko baasuubulanga naawe wayini ow’e Keruboni, n’ebyoya by’endiga ebyeru eby’e Zakari.

¹⁹ Aba Ddaani ne Yovani (Buyonaani) abaavanga e Wuzari baawanyisanga naawe ekyuma ekiyisiddwa mu muliro n’embawo eza kasiya ne kalamo, ne bagula ebyamagazi byo.

²⁰ “Dedani yakusuubulangako bulangiti ezakozesebwanga ne mu kwebagala embalaasi.

²¹ “Buwalabu n’ablangira bona ab’e Kedali baakusuubulangako era ne bakugulako abaana b’endiga, n’endiga ennume n’embuzi.

²² “Abasuubuzi ab’e Seeba ne Laama baakolagananga naawe, nga bakusuubulako ebyakaloosa ebisinga byonna obulungi, n’amayinja gonna ag’omuwendo omungi ne zaabu, bafune ebyamagazi byammwe.

²³ “Kalani, ne Kaane ne Adeni n’abasuubuzi ab’e Seeba, Asuli, ne Kirumaadi baasuubulanga naawe.

²⁴ Mu katale ko baasubulirangamu engoye ennungi, engoye eza bbululu, n’engoye ez’eddalizo, n’ebiwempe ebineekaneeka ebiriko emiruke egylukibwa obulungi.

²⁵ “Ebyombo eby’e Talusiisi bye byatambuzanga ebyamagazi byo. Era wajjula n’oba n’ebintu bingi wakati mu nnyanja.

²⁶ Abakubi b’enkasi bakutwala awali amayengo amangi. Naye omuyaga ogw’Ebuvanjuba gulikumenyeramenyera wakati mu nnyanja.

²⁷ Obugagga bwo n’ebiyamagazi byo n’ebikozesebwa byo, n’abalunyanja bo, n’abagoba bo, n’abasuubuzi bo n’abaserikale bo bona na buli muntu ali ku kyombo balibbira wakati mu nnyanja ku lunaku kw’oligwiira ku kabenje.

²⁸ Eddoboozi ly’okukaaba kw’abalunyanja bo, kulikankanya ebyalo ebiri ku lubalama lw’ennyanja.

²⁹ Abakubi b’enkasi bona balyabulira ebyombo byabwe; n’abagoba n’abalunyanja bona balyimirira ku lubalama lw’ennyanja.

³⁰ Balyimusa amaloboozi gaabwe ne bakukaabira nnyo; era baliteeka enfuufu ku mitwe gyabwe ne beevulunga mu vv.

³¹ Balikumwera emitwe gyabwe, era Balyambala ebibukutu. Balikukaabira n’emmeeme ezennyamidde nga bakukungubaga n’emitima egijjudde ennyiike.

³² Balikukungubagira nga bwe bakuba ebiwoobe nga boogera nti, Ani eyali asirisibbwa nga Ttuulo eyeetooloddwa ennyanja?

³³ Bwe waweerezanga ebyamaguzi byo ku nnyanja, amawanga mangi gamalibwanga; era ne bakabaka b'ensi baagaggawazibwa eby'obugagga bwo ebingi n'ebyamaguzi byo.

³⁴ Kaakano ennyanja ekumazeewo, mu buziba bw'amazzi; ebyamaguzi byo n'ab'omu kyombo kyo bona babbidde naawe.

³⁵ Abantu bona ab'oku lubalama lw'enyanja bafunye ensisi, era ne bakabaka baabwe bajjudde entiisa tebafaananika mu maaso olw'entiisa.

³⁶ Abasuubuzi ab'omu mawanga bakufuuyira empa; otuuse ku nkomerero embi, so tolbeerawo nate ennaku zonna.”

Ezeekyeri 28

Obunnabbi ku Kabaka w'e Ttuulo

¹ Awo ekigambo kya MUKAMA Katonda ne kinzijira, n'aŋjamba nti,

² “Omwana w'omuntu, gamba omufuzi w'e Ttuulo nti, “Bw'ati bw'ayogera MUKAMA Katonda nti, Kubanga olina amalala mu mutima gwo kyova oyogera nti, ‘Ndi katonda, era ntuula ku ntebe ey'obwakabaka eya Katonda wakati mu nnyanja,’ songa oli muntu buntu, so si katonda, newaakubadde ng'olowooza nga oli mugezi nga katonda.

³ Oli mugezi okusinga Danyeri? Tewali kyama kikukwekeddwa?

⁴ Mu magezi go ne mu kutegeera kwo weefunidde eby'obugagga, n'okunjaanya ezaabu n'effeeza n'obitereka mu mawanika go.

⁵ Olw'obukujukuju bwo mu by'obusuubuzi oyongedde okugaggawala, era n'omutima gwo gwenyumiririza mu byobugagga bwo.”

⁶ MUKAMA Katonda kyava ayogera nti, “Kubanga olowooza ng'oli mugezi, ng'oli mugezi nga katonda,

⁷ kyendiva nkuleetera bannaggwanga ne bakulumba, ab'omu mawanga agasinga obukambwe, ne basowola ebitala byabwe eri obulungi n'amagezi go, ne boonoona okumasamasa kwo.

⁸ Balikusuula mu bunnya n'ofiira eyo okufa okubi wakati mu gayanja.

⁹ Olyogera nate nti, ‘Ndi katonda,’ mu maaso gaabo abakutta? Oliba muntu buntu so si katonda mu mikono gy'abo abakutta.

¹⁰ Olifa okufa okw'abatali bakomole, mu mikono gya bannaggwanga, nze nkyogedde, bw'ayogera MUKAMA Katonda.”

¹¹ Ekigambo kya MUKAMA ne kinzijira, n'aŋjamba nti,

¹²“Omwana w’omuntu kungubagira kabaka w’e Ttuulo, omutegeeze nti, Bw’ati bw’ayogera MUKAMA Katonda nti, “‘Ggwe wali ekyokulabirako ekituukiridde ng’ojjudde amagezi era nga watuukirira mu bulungi.

¹³ Wali mu Adeni, ennimiro ya Katonda; buli jjinja ery’omuwendo nga likubikako, sadio, topazi, alimasi, berulo, onuku, yasipero, safiro, ejinja erya nnawandagala. Okuteebwateekebwa kwo n’ebikunyweza byakolebwa mu zaabu. Era ku lunaku lwe watondebwa, byategekebwa.

¹⁴ Wali kerubi omukuumi eyafukibwako amafuta, nakwawula lwa nsonga eyo. Wabeeranga ku lusozi olutukuvu olwa Katonda, n’otambulira wakati mu mayinja ag’omuliro.

¹⁵Tewaliiko kya kunenyezebwa kyonna okuva ku lunaku lwe watondebwa, okutuusa obutali butuukirivu bwe bwalabika mu ggwe.

¹⁶ Mu bikolwa byo ebingi, wajjula empisa embi, era n’okola ebibi. Kyennava nkugoba ku lusozi lwa Katonda, mu buswavu obungi ne nkugoba ggwe kerubi eyakuumanga okuva mu mayinja ag’omuliro.

¹⁷ Omutima gwo gwalina amalala olw’obulungi bwo, ne weelimalimba olw’ekitiibwa kyo. Kyennava nkukanya ku nsi ne nkufuula eky’okusekerewa mu maaso ga bakabaka.

¹⁸ Olw’ebibi byo ebingi n’olw’obukumpanya bwo oyonoonye ebifo byo ebitukuvu. Kyenava nziggya omuliro mu ggwe ne gukusaanyaawo, ne nkufuula evvu ku nsi wakati mu abo bonaabaakulabanga.

¹⁹ Amawanga gonna agaakumanya gaatya nnyo; otuuse ku nkomerero embi, so tolieberawo nate ennaku zonna.”

Obunnabbi eri Sidoni

²⁰Ekigambo kya MUKAMA ne kinzijira, n’anjamba nti,

²¹“Omwana w’omuntu kyuka otunuulire Sidoni, obawe obunnabbi,

²²oyogere nti, ‘Bw’ati bw’ayogera MUKAMA Katonda nti, “‘Nkulinko ensonga, ggwe Sidoni, era ndyegulumiza mu ggwe. Balimanya nga nze MUKAMA bwe ndimubonereza, ne neeraga mu ye okuba omutukuvu.

²³ Ndiweereza kawumpuli ku ye, era ndikulukusa omusaayi mu nguudo ze. Abafu baligwa wakati mu ye, ekitala kimulumbe enjuuyi zonna. Olwo balimanya nga nze MUKAMA.

²⁴“Tewalibaawo nate eri ennyumba ya Isirayiri omweramanno ogufumita newaakubadde eriggwa eribafumita okuva mu baliraanwa abalina ettima. Era balimanya nga nze Katonda Ayinzabyonna.

²⁵“Bw’ati bw’ayogera MUKAMA Katonda nti, Bwe ndikuinjaanya abantu ba Isirayiri okubaggya mu mawanga gye baasaasaanyizibwa, nditukuzibwa mu bo

mu maaso g'amawanga, era balituula mu nsi eyaabwe gye nawa omuddu wange Yakobo.

²⁶Balituula omwo mirembe, era balizimba amayumba ne basimba n'ennimiro ez'emizabbibu. Bwe ndibonereza baliraanwa baabwe bona abaabayisa obubi, bo baliba batudde mirembe. Olwo balimanya nga nze MUKAMA Katonda waabwe."

Ezeekyeri 29

Obunnabbi eri Misiri

¹Awo mu mwaka ogw'ekkumi, mu mwezi ogw'ekkumi ku lunaku olw'ekkumi n'ebbir, ekigambo kya MUKAMA Katonda ne kinzijira n'anjamba nti,

²"Omwana w'omuntu, tunula eri Falaawo, ye kabaka w'e Misiri olangirire obunnabbi gy'ali n'eri Misiri yonna.

³Yogera gy'ali nti, 'Bw'ati bw'ayogera MUKAMA Katonda nti, "Nkulinko ensonga, Falaawo, ggwe kabaka w'e Misiri, ggwe ogusota ogunene ogugalamidde wakati mu migga gyagwo, ogwogera nti, "Kiyira wange, era nze nnamwekolera."

⁴Nditeeka amalobo mu mba zo, era ndireetera n'ebyenyanja eby'omu migga gyo okukwatira ku magamba go. Ndikusikayo mu migga gyo ng'ebyenyanja byonna bikwatidde ku magamba go.

⁵Ndikutwala mu ddungu, ggwe n'ebyenyanja byonna eby'omu migga gyo. Oligwa ku ttale, so tolikuŋŋaanyizibwa newaakubadde okulondebwalondebwa. Ndikuwaayo okuba emmere eri ensolo enkambwe ez'oku nsi n'eri ebinyonyi eby'omu bbanga.

⁶Awo bona ababeera mu Misiri balimanya nga nze MUKAMA Katonda. "Obadde muggo gwa lumuli eri ennyumba ya Isirayiri.

⁷Bwe bakunyweza n'emikono gyabwe, n'omenyekamenyeka, n'oyuza ebibegabega byabwe; bwe baakwesigamako, n'omenyeka, era n'okutula n'emigongo gyabwe.

⁸"MUKAMA Katonda kyava ayogera nti: Ndikujira n'ekitala, n'enzita abantu bo n'ebisolo byabwe.

⁹Ensi ey'e Misiri erifuuka matongo era ensiko, balyoke bamanye nga nze MUKAMA Katonda. "Kubanga wayogera nti, "Kiyira wange, nze namukola,"

¹⁰kyennaava mbeera n'ensonga eri ggwe n'eri emigga gyo, era ndifuula ensi ey'e Misiri okuba ensiko enjereere ejjudde amatongo okuva ku mulongooti ogw'e Sevone okutuuka ku nsalo ey'e Buwesiypa.

¹¹Tewaliba kigere kya muntu newaakubadde ky'ensolo ekiri giyitamu, so teribeerwamu okumala emyaka amakumi ana.

¹²Ndifuula ensi ey'e Misiri okuba amatongo wakati mu nsi ezaazika, era n'ebibuga byakyo biriba byereere okumala emyaka amakumi ana. Ndibunya Abamisiri mu mawanga ne mbataataanyiza mu nsi nnyingi.

¹³“Naye MUKAMA Katonda agamba nti; Oluvannyuma lw'emyaka amakumi ana ndikunjaanya Abamisiri okuva mu mawanga gye baasaasaanira,

¹⁴era ndibakomyawo okuva mu busibe ne mbazza mu nsi ey'e Pasulo, ensi eya bajjajaabwe, era eyo baliba bwakabaka obwajeezebwa.

¹⁵Bulisinga obwakaba bwonna okujeezebwa, so tebulyegulumiza nate okusinga amawanga amalala. Ndiginafuyiza ddala, era tebalifuga nate amawanga.

¹⁶Misiri talyesigibwa nate abantu ba Isirayiri, naye eriba kijjukizo eky'ekibi kubanga baabakyukira nga banoonya okuyambibwa. Olwo balimanya nga nze MUKAMA Katonda.”

¹⁷Awo mu mwaka ogw'amakumi abiri mu omusanvu, mu mwezi ogw'olubereberye ku lunaku olusooka mu mwezi, ekigambo kya MUKAMA ne kinzijira n'aŋjamba nti,

¹⁸“Omwana w'omuntu, Nebukadduneeza kabaka w'e Babulooni yaweereza egghe lye ne lirumba Ttuulo, buli mutwe ne gufuna ekiwalaata ne buli kibegabega ne kimenyebwa, naye ye n'egghe lye ne bataweebwa mpeera olw'okulumba Ttuulo.

¹⁹MUKAMA Katonda kyava ayogera nti, Nebukadduneeza kabaka w'e Babulooni ndimuwa Misiri ne yeetikka obugagga bwe, n'abanyagira ddala era y'eriba empeera ey'egghe lye.

²⁰Mmuwadde ensi ey'e Misiri okuba empeera ye gye yafubirira kubanga ye n'egghe lye bankolera omulimu, bw'ayogera MUKAMA Katonda.

²¹“Ku lunaku olwo ndiyimusa ejjembe ery'amaanyi mu nnyumba ya Isirayiri, era ndiyasamya akamwa ko mu bo. Olwo balimanya nga nze MUKAMA.”

Ezeekyeri 30

Okukungubagira Misiri

¹Awo ekigambo kya MUKAMA Katonda ne kinzijira n'aŋjamba nti,

²“Omwana w'omuntu, wa obunnabbi oyogere nti: ‘Bw'ati bw'ayogera MUKAMA Katonda nti, “‘Mwekaabireko mwogere nti, “Zibasanze ku lunaku olwo”

³ kubanga olunaku luli kumpi, olunaku lwa MUKAMA luli kumpi, olunaku olw'ebire eri bannaggwanga.

⁴ Ekitala kirirumba Misiri, n'ennaku eribeera mu Buwesiyopya. Bwe balifiira mu Misiri, obugagga bwe bulitwalibwa n'emisingi gyayo girimenyebwa.'

⁵ Obuwesiyopya, ne Puuti, ne Luudi ne Buwalabu yonna, ne Kubu n'abantu bona ab'ensi ey'endagaano balittibwa ekitala awamu ne Misiri.

⁶ "Bw'ati bw'ayogera MUKAMA nti, "Abawagira Misiri baligwa, n'amaanyi ge yeewaana nago galimuggwa. Okuva ku mulongooti ogw'e Sevne baligwa n'ekitala, bw'ayogera MUKAMA Katonda.

⁷ Balirekebwawo wakati mu nsi endala ezalekebwawo, n'ebibuga byabwe biribeera ebimu ku ebyo ebyasaanawo.

⁸ Olwo balimanya nga nze MUKAMA bwe ndikuma ku Misiri omuliro, n'babbeezi baayo bona balibetentebwa.

⁹ "Ku lunaku olwo ndiweereza ababaka mu byombo okutiisatiisa Obuwesiyopya buve mu bugayaavu bwabwo. Entiisa eribakwata ku lunaku Misiri lwe linakuwala, kubanga entiisa erina okujja.

¹⁰ "Bw'ati bw'ayogera MUKAMA Katonda nti, "Ndimalawo ebibinja by'Abamisiri nga nkozesha omukono gwa Nebukadduneeza kabaka w'e Babulooni.

¹¹ Ye n'eggye lye, ensi esinga okuba enkambwe mu mawanga, balireetebwa okuzikiriza ensi. Baligayo ebitala byabwe ne bajjuza ensi ey'e Misiri emirambo.

¹² Ndigaza emigga gya Kiyira, ne ntunda ensi eri abantu ababi; nga nkozesha bannaggwanga, ndizikiriza ensi na buli kintu ekigirimu. Nze MUKAMA nkyogedde.

¹³ "Bw'ati bw'ayogera MUKAMA Katonda nti, "Ndizikiriza bakatonda baabwe ne nzikiriza bakatonda abakole n'emikono mu Noofu. Temulibaamu mulangira mu nsi ey'e Misiri nate, era ensi yonna ndigireetako entiisa.

¹⁴ Ndifuula Pasulo okuba amatongo, ne Zowani ndikikumako omuliro ne mbonereza n'ab'omu No.

¹⁵ Ndifuka ekiruyi kyange ku Sini, ekigo kya Misiri eky'amaanyi, era ndimalawo n'ebibinja bya No.

¹⁶ Ndikuma omuliro ku Misiri, ne Sini baliba mu bubalagaze bungi, ne No balitwalibwa omuyaga, ne Noofu baliba mu kubonaabona okw'olubeerera.

¹⁷ Abavubuka ab'e Oni n'ab'e Pibesesi baligwa n'ekitala, n'ebibuga biriwambibwa.

¹⁸ Enzikiza eriba ku Tapaneese emisana, bwe ndimenya ekikoligo kya Misiri, era n'amaanyi ge yeewaana nago galimuggwaamu. Alibikkibwa n'ebire era n'ebyalo bye biriwambibwa.

¹⁹ Bwe ntyo bwe ndibonereza Misiri, bategeere nga nze MUKAMA.”

²⁰ Awo mu mwaka ogw'ekkumi n'ogumu, mu mwezi ogw'olubereberye ku lunaku olw'omusanvu, ekigambo kya MUKAMA ne kinzijira n'aŋjamba nti,

²¹ “Omwana w'omuntu, mmenye omukono gwa Falaawo, ye kabaka w'e Misiri, era laba tegusibiddwa okusiigako eddagala, n'okugussaako ekiwero okugusiba, guleme okufuna amaanyi okukwata ekitala.

²² MUKAMA Katonda kyava ayogera nti, Nnina ensonga ne Falaawo, ye kabaka w'e Misiri, era ndimenya emikono gye, omulamu ogw'amaanyi n'ogwo ogwamenyekako, ne nsuula ekitala okuva mu mukono gwe.

²³ Ndisaasaanya Abamisiri mu mawanga ne mu nsi ennyingi.

²⁴ Ndinyweza emikono gya kabaka w'e Babulooni ne nteeka ekitala mu mukono gwe, naye ndimenya emikono gya Falaawo, era alisindira mu maaso ga kabaka w'e Babulooni, ng'omuntu afumitiddwa anaatera okufa.

²⁵ Ndinyweza emikono gya kabaka w'e Babulooni, naye emikono gya Falaawo giriremala, balyoke bamanye nga nze MUKAMA. Nditeeka ekitala mu mikono gya kabaka w'e Babulooni, n'akigololera ku nsi y'e Misiri.

²⁶ Ndibunya Abamisiri mu mawanga ne mbasaasaanya ne mu nsi yonna, era balimanya nga nze MUKAMA.”

Ezeekyeri 31

Olugero olw'Omuvule gwa Lebanooni

¹ Mu mwaka ogw'ekkumi n'ogumu, mu mwezi ogwokusatu ku lunaku olw'olubereberye, ekigambo kya MUKAMA Katonda ne kinzijira n'aŋjamba nti,

² “Omwana w'omuntu, tegeeza Falaawo, ye kabaka w'e Misiri n'olufulube lw'abantu be nti, ‘‘Ani ayinza okwegeraageranya naawe mu kituibwa?’

³ Tunuulira Obwasuli, ogwali omuvule mu Lebanooni, nga gulina amatabi amalungi agaasiikirizanga ekibira; ogwali omuwanvu ennyo, nga guyitamu ne mu kasolya ak'ekibira.

⁴ Amazzi gaaguliisanga, n'enzi ezikka wansi ennyo ne ziguwanvuya, n'emigga gyagyo ne gigwetooloola wonna, ne giweerezanga n'amatabi gaagyo eri emit gyonna egy'omu ttale.

⁵ Kyegwava gukula ne guwanvuwa okusinga emitii gyonna egypt'omu kibira, n'amatabi gaagwo amanene ne geeyongera obunene, n'amatabi gaagwo amatono ne gawanvuwa ne gasaasaana olw'obungi bw'amazzi.

⁶ Ebinyonyi byonna egypt'omu bbanga ne bizimba ebisu byazo mu matabi gaagwo amanene, n'ensolo enkambwe ez'oku ttale ne zizaaliranga wansi w'amatabi gaagwo, n'amawanga gonna amakulu ne gabeeranga wansi w'ekisiikirize kyagwo.

⁷ Gwali gwa kitalo mu bulungi bwagwo, n'amatabi gaagwo amanene, kubanga emirandira gyagwo gyasima awali amazzi amangi.

⁸ Emivule egiali mu nnimiro ya Katonda tegyayinza kuguvuganya, newaakubadde emiberoosi okwenkana n'amatabi gaagwo amanene; n'emyalamooni nga tegifaanana matabi gaagwo amatono, so nga tewali muti mu nnimiro ya Katonda ogugwenkana mu bulungi.

⁹ Nagulungiya n'amatabi amangi, emitii gyonna egypt'omu Adeni egiali mu nnimiro ya Katonda ne gigukwatirwa obuggyga.

¹⁰ "MUKAMA Katonda kyava ayogera bw'ati nti; Kubanga gwegulumiza, ne gwewanika waggulu okuyita mu kasolya ak'ekibira, ate ne guba n'amalala olw'obuwanvu bwagwo,

¹¹ kyendiva nguwaayo mu mukono gw'omufuzi ow'amawanga agukole ng'obutali butuukirivu bwagwo bwe buli, era ngugobye.

¹² Era bannaggwanga abasingirayo ddala obukambwe baagutema ne bagusuula. Amatabi gaagwo amanene gaagwa ku nsozi ne mu biwonvu byonna, n'amatabi gaagwo amatono ne gagwa nga gamenyese mu biwonvu byonna egypt'ensi. N'amawanga gonna ag'oku nsi gaava wansi w'ekisiikirize kyagwo, ne gagulekawo.

¹³ Ebinyonyi byonna egypt'omu bbanga ne bituula ku matabi agaagwa, era n'ensolo enkambwe ez'oku ttale zonna ne zibeera mu matabi gaagwo.

¹⁴ Kyewaliva walema okubaawo emitii okumpi n'amazzi egirikula ne giwanvuwa ne gyegulumiza n'okutuuka okuyita mu kasolya k'ekibira. Era tewalibaawo miti mirala egyafukirirwa obulungi egiriwanvuwa okutuuka awo, kubanga gyonna giweereddwayo eri okufa, okugenda emagombe, mu bantu abaabulijjo, n'abo abakka mu bunnya.

¹⁵ "Bw'ati bw'ayogera MUKAMA Katonda nti, Ku lunaku lwe gwaleetebwa wansi emagombe, enzizi zaagukaabira, era naziyyiza n'emigga gyagwo, n'amazzi gaagwo amangi okukulukuta. Ku lulwe nayambaza Lebanooni obuyinike, n'emiti gyonna egypt'oku ttale ne gikala.

¹⁶ Naleetera amawanga okukankana olw'eddoboozi ery'okugwa kwagwo bwe naguserengesa emagombe n'abo abaserengeta wansi mu bunnya. Olwo emitii

gyonna egya Adeni, eg'yamaanyi era egisingayo obulungi egya Lebanooni emit gyonna egiali gifukiriddwa obulungi amazzi, ne gizzibwamu amaanyi wansi mu nsi.

¹⁷Abo bona ababeera mu kisiikirize kyagwo, n'amawanga agassanga ekimu nabo, bakirira nabo emagombe ne beegatta ku abo abattibwa n'ekitala.

¹⁸"Muti ki mu gy'omu Adeni ogw'enkana naawe mu bukulu mu kitibwa kyo? Era naye, olisuulibwa wamu n'emit gy'omu Adeni n'oserengeta emagombe, n'ogalamira eyo wamu n'abatali bakomole, n'abo abattibwa n'ekitala. "Ono ye Falaawo n'ekibinja kye kyonna, bw'ayogera MUKAMA Katonda."

Ezeekyeri 32

Okukungubagira Falaawo

¹Awo mu mwaka ogw'ekkumi n'ebiri, mu mwezi ogw'ekkumi n'ebiri ku lunaku olw'olubereberye, ekigambo kya MUKAMA ne kinzijira n'anjamba nti,

²"Omwana w'omuntu, tandika okukungubagira Falaawo, ye kabaka w'e Misiri, omutegeeeze nti: "Oli ng'empologoma mu mawanga, ng'ogusota wakati mu nnyanja, ng'owaguza mu migga gyo, era ng'otabangula amazzi, n'osiikuula n'emigga.

³"Bw'ati bw'ayogera MUKAMA Katonda nti, "Ndikusuulako akatimba kange, ne nkusindikira ekibiina ky'abantu ekinene, era balikuvuba n'akatimba kange.

⁴Ndikusuula ku lukalu, ne nkuleka ku ttale, era ebinyonyi byonna eby'omu bbanga birikukkako, n'ensolo enkambwe zonna ez'omu nsi zirikulya ne zikkusibwa.

⁵Ndisaasaanya ennyama ey'omubiri gwo ku nsozi, era ndijuza ebiwonvu amagumba go.

⁶Nditotobaza ensi n'omusaayi gwo okutuukira ddala ku nsozi, era ndijuza zonna ennyama ey'omubiri gwo.

⁷Bwe ndikusaanyaawo, ndibikka eggulu ne nfuula emmunyeeny zaakwo okubaako ekizikiza;

⁸Ndibikka omusana n'ekire, era n'omwezi tegulireeta kitangaala kyagwo. Ebitangaala byonna eby'omu ggulu, ndibifuula enzikiza; era n'ensi yo yonna ndigireetako enzikiza, bw'ayogera MUKAMA Katonda.

⁹Ndyeraliikiriza emitima gy'amawanga amangi, bwe ndikuzikiriza mu mawanga, ne mu nsi z'otomanyangako.

¹⁰Amawanga mangi galijjula entiisa era bakabaka baabwe balisasmala, ng'obagalulira ekitala mu maaso gaabwe. Ku lunaku olw'okugwa kwo, buli omu ku bo alikankana, era buli muntu aligezaako okuwonya obulamu bwe.

¹¹ “Kubanga bw’ati bw’ayogera MUKAMA Katonda nti, “Ekitala kya kabaka w’e Babulooni kirikutabaala.

¹² Nditta enkuyanja y’abantu bo n’ekitala eky’abasajja abalwanyi abazira, abasingirayo ddala obukambwe mu mawanga gonna. Balimalawo amalala ga Misiri, n’enkuyanja y’abantu be bona balizikirizibwa.

¹³ Ndizikiriza amagana ge gonna ag’ente okuva awali amazzi amangi, era tewaliba n’omu alirinnyayo okubatabangula newaakubadde ente okulinnyirirayo.

¹⁴ N’olvannyuma nditeesa amazzi ge, n’enzizi ze ne nzifuula ng’amatuta, bw’ayogera MUKAMA Katonda.

¹⁵ Bwe ndizisa ensi ey’e Misiri, ne ngiggyamu buli kantu akalimu, ne nzita bona ababeeramu, balimanya nga nze MUKAMA.’

¹⁶ “Weewaawo kuno kwe kukungubaga kwe balikungubaga. Abawala bannaggwanga balikungubagira Misiri n’enkuyanja y’abantu be bona,” bw’ayogera MUKAMA Katonda.

¹⁷ Mu mwaka ogw’ekkumi n’ebiri, ku lunaku olw’ekkumi n’ettaano mu mwezi ogwo, ekigambo kya MUKAMA ne kinzijira n’anjamba nti,

¹⁸ “Omwana w’omuntu, kaabirako ku nkuyanja y’abantu b’e Misiri, obasindike emagombe ye n’abawala bannaggwanga abaayatiikirira, n’abo abakka mu bunnya.

¹⁹ Babuuze nti, ‘Olowooza gw’osinga okwagalibwa? Ggenda oteekebwé n’abatali bakomole.’

²⁰ Baligwa mu abo abattiddwa ekitala, era n’ekitala kisowoddwa, leka atwalibwe n’enkuyanja y’abantu be.

²¹ Okuva emagombe abakulembeze ab’amaanyi balyogera ku Misiri ne be yekobaana nabo nti, ‘baserengese, era bagalamidde awali abatali bakomole, abattibwa n’ekitala.’

²² “Asuli ali eyo n’eggye lye lyonna; yeetooloddwa amalaalo ag’abattibwa n’ekitala.

²³ Amalaalo ge gali wansi mu bunnya, n’emirambo gy’eggye lye gyetoolodde amalaalo ge. Abo bona abaaleeta entiisa mu nsi ey’abalamu battiddwa, bagudde n’ekitala.

²⁴ “Eramu naye ali eyo, n’enkuyanja y’abantu be bona beetoolodde amalaalo ge. Bonna baafa, battibwa n’ekitala. Bonna abaaleeta entiisa mu nsi ey’abalamu bakka emagombe nga si bakomole, be bagenda wansi mu bunnya nga balina n’ensonyi.

²⁵Bamwalidde ekitanda wakati mu battibwa n'enkuyanja y'abantu be bona okwetooloola amalaalo ge. Bonna tebaali bakomole, era battibwa n'ekitala kubanga baatiisatiisanga ensi ey'abalamu. Bajudde ensonyi wamu n'abo abakka emagombe, era bagalamidde wakati mu abo abattiddwa.

²⁶"Meseiki ne Tubali nabo gye bali n'enkuyanja y'abantu baabwe era beetoolodde amalaalo gaabwe. Bonna tebaali bakomole, era battibwa n'ekitala kubanga baatiisatiisanga ensi ey'abalamu.

²⁷Tebaliziikibwa ng'abakungu, naye baliziikibwa ng'abasajja abalwanyi abazira abatali bakomole, abaaserengeta emagombe n'eb yokulwanyisa byabwe, abaatikkibwa ebitala byabwe ku mitwe gyabwe. Obutali butuukirivu bwabwe bwali ku magumba gaabwe kubanga baaleeta entiisa eri abasajja ab'amaanyi mu nsi ey'abalamu.

²⁸"Naawe ggwe Falaawo, olimenyebwa era olifiira wamu n'abatali bakomole, abattibwa n'ekitala.

²⁹"Edomu naye ali eyo, bakabaka be n'abalangira be, newaakubadde nga baamaanyi, emirambo gyabwe gigalamidde n'egya bali abattibwa n'ekitala. Bagalamidde n'abatali bakomole mu bunnya.

³⁰"Abalangira bona ab'omu bukiakkono n'Abasidoni bona nabo bali eyo; baaziikibwa mu nsonyi n'abattibwa newaakubadde nga baakola eby'entiisa nga be balina obuyinza. Bagalamidde nga si bakomole wamu n'abattibwa n'ekitala, nga balina ensonyi n'abo abakka emagombe.

³¹"Era Falaawo, bw'alibalaba, alyekubagiza olw'eggye lye eryattibwa n'ekitala, bw'ayogera MUKAMA Katonda.

³²Newaakubadde nga namukozesa okutiisatiisa ensi ey'abalamu Falaawo n'enkuyanja y'abantu be baligalamira mu batali bakomole, n'abattibwa n'ekitala, bw'ayogera MUKAMA Katonda."

Ezeekyeri 33

Ezeekyeri Omukuumi wa Isirayiri

¹Ekigambo kya MUKAMA Katonda ne kinzijira nate n'aŋjamba nti,

²"Omwana w'omuntu yogera eri abantu obategeeze nti, 'Bwe ndirumba ensi n'ekitala, abantu ab'omu nsi ne baddira omu ku bo ne bamufuula omukuumi waabwe,

³n'alaba ekitala nga kijja eri ensi, n'afuuwa ekkondeere ng'alabula abantu,

⁴awo omuntu yenna bw'aliwulira ekkondeere n'atalabuka ekitala bwe kirija ne kigyawo obulamu bwe, omusaayi gwe guliba ku mutwe gwe ye.

⁵Kubanga yawulira ekkondeere n'atalabuka, omusaayi gwe kyeguliva gubeera ku mutwe gwe ye. Singa yakola nga bwe yalabulwa yandiwonyezza obulamu bwe.

⁶Naye omukuumi bw'alaba ekitala nga kijja n'atafuwa kkondeere okulabulaabantu, ekitala ne kijja ne kigyawo obulamu bw'omu ku bo, omuntu oyo aliggyibwawo olw'obutali butuukirivu bwe, naye omusaayi gwe ndiguvunaana omukuumi.'

⁷"Omwana w'omuntu, nkufudde omukuumi ow'ennyumba ya Isirayiri, Noolwekyo wulira kye nkugamba, obalabule.

⁸Bwe ɲjambanga omukozi w'ebibi nti, 'Ggwe omwonoonyi, mazima olifa,' n'otoyogera okumulabula okuleka ekkubo lye, omwonoonyi oyo alifa olw'ebibi bye, naye omusaayi gwe ndiguvunaana gwe.

⁹Naye bw'olabulanga omwonoonyi okuleka ekkubo lye, n'ajeema, alifiira mu bibi bye, naye ggwe oliba olkokdde obulamu bwo.

¹⁰"Omwana w'omuntu, tegeeza ennyumba ya Isirayiri nti, Mwogera nti, 'Okusobya kwaffe n'okwonoona kwaffe kutuzitoowerera, era tuyongobera mu kwo, tuyinza tutya okuwona?'

¹¹Bategeeze nti, 'Nga bwe ndi omulamu, bw'ayogera MUKAMA Katonda, sisanyukira kufa kw'abakozi ba bibi, wabula bo okukyuka ne bava mu kkubo lyabwe ebbi ne baba balamu. Mukyuke, mukyuke okuva mu makubo gammwe amabi. Lwaki mufa, mmwe ennyumba ya Isirayiri?'

¹²"Kale nno, omwana w'omuntu kyonoova otegeeza abantu bo nti, 'Obutuukirivu obw'omutuukirivu tebulimuwyenesa bw'alijeema, era n'obutali butuukirivu bw'atalina butuukirivu tebulimuzikiriza bw'alikyuka n'abuleka. Omuntu omutuukirivu, bw'aliyonoona, taliba mulamu olw'obutuukirivu bwe obw'emabega.'

¹³Bwe ndigamba omutuukirivu nga mazima ddala aliba mulamu, naye ne yeesiga obutuukirivu bwe n'ayonoona, tewaliba ne kimu ku bikolwa eby'obutuukirivu bye yakola ebirijukirwa, naye mu butali butuukirivu bwe bw'akoze omwo mw'alifiira.

¹⁴Ate bwe ndigamba omwonoonyi nti, 'Mazima ddala olifa,' naye n'akyuka okuleka ebibi bye, n'akola ebyalagirwa era ebituufu,

¹⁵era bw'alisasula ebbanja lye, n'azaayo ne bye yabba, n'atambulira mu mateeka agaleeta obulamu, n'atayonoona, mazima ddala aliba mulamu, talifa.

¹⁶Tewaliba ne kimu ku bibi bye yakola ebirijukirwa eri ye; aliba akoze ebyalagirwa era ebituufu, era aliba mulamu.

¹⁷“Naye ate abantu ab’ensi yo boogera nti, Ekkubo lya Mukama si lya bwenkanya, so nga ate ekkubo lyabwe lye litali lya bwenkanya.

¹⁸Omuntu omutuukirivu bw’alikyuka okuva mu butuukirivu bwe n’akola ebibi, alifa olw’ebibi bye.

¹⁹Ate omukozi w’ebibi bw’alikyuka okuleka obutali butuukirivu bwe n’akola ebyalagirwa era ebituufu, aliba mulamu olw’ebyo by’akoze.

²⁰Naye mmwe ennyumba ya Isirayiri ne mwogera nti, ‘Ekkubo lya Mukama si lya bwenkanya.’ Naye ndibasalira omusango buli muntu amakubo ge nga bwe gali.”

Okugwa kwa Yerusaalemi Kunyyonnyolwa

²¹Mu mwaka ogw’ekkumi n’ebiri nga tuli mu buwanjanguse, mu mwezi ogw’ekkumi ku lunaku olwokutaano, omusajja kaawonawo n’ava e Yerusaalemi n’ajja okuntegeeza nti, “Ekibuga kiwambiddwa.”

²²Naye akawungeezi nga kaawonawo tannatuuka, omukono gwa MUKAMA gwali gunziseeko, ng’asumuludde akamwa kange, omusajja n’alyoka atuuka enkeera. Nnali ntandise okwogera nga sikyali kasiru.

²³Awo ekigambo kya MUKAMA Katonda ne kinzijira n’anjamba nti,

²⁴“Omwana w’omuntu, abatuuze ab’omu matongo ago mu nsi ya Isirayiri, boogera nti, ‘Obanga Ibulayimu yali muntu omu n’agabana ensi, naffe abangi, tuligabana.’

²⁵Noolwekyo bategeeze nti, ‘Bw’ati bw’ayogera MUKAMA Katonda ow’eggye nti, Bwe muba nga mulya ennyama erimu omusaayi, ne musinza bakatonda bammwe abalala, ne muyiwa omusaayi, musaanidde okugabana ensi?

²⁶Mwesiga ekitala, ne mukola eby’ekivve, buli musajja n’ayenda ku muka muliraanwa we. Kale munaayinza mutya okugabana ensi?”

²⁷“Bagambe nti, ‘Bw’ati bw’ayogera MUKAMA Katonda nti: Nga bwe ndi omulamu, abaasigalawo mu bifulukwa balittibwa n’ekitala, n’abo abaliba ku ttale balitaagulwataagulwa ensolo enkambwe, n’abo abaliba beekwese mu biro ebinywevu ne mu mpuku balifa kawumpuli.

²⁸Era ensi ndigifuula amatongo era etaliimu mugaso, era n’amaanyi ge yeewaana nago galikoma, era n’ensozi za Isirayiri ziryabulirwa, ne wataba n’omu azitambulirako.

²⁹Olwo balimanya nga nze MUKAMA Katonda, bwe ndifuula ensi okuba amatongo era etaliimu mugaso olw’ebikolwa eby’ekivve bye bakoze.’

30“Naawe ggwe omwana w’omuntu, abatuuze ab’omu ggwanga lyo abatuula ku Bbugwe ne mu nzigi ez’amayumba bagambagana nti, ‘Mujje tuwulire ekigambo ekiva eri MUKAMA Katonda,’

31abantu bange nga bwe batera okukola, ne bawulira byoyogera naye ne batabikola, ne boolesa okwagala kwabwe n’emimwa gyabwe, naye ng’emitima gyabwe gigoberera amagoba gaabwe,

32laba gye bali oli ng’omuntu ayimba oluyimba olw’okwagala mu ddoboozi eddungi, era amanyi okukuba obulungi ennanga, kubanga bawulira ebigambo byo naye ne batabissamu nkola.

33“Bino byonna bwe birituukirira, era bijja kutuukirira, kale balimanya nga nnabbi abadde mu bo.”

Ezeekyeri 34

Abasumba n’Endiga

1Ekigambo kya MUKAMA Katonda ne kinzijira n’anjamba nti,

2“Omwana w’omuntu, yogera ebyobunnabbi eri abasumba ba Isirayiri, obagambe nti, ‘Bw’ati bw’ayogera MUKAMA Katonda nti, Zibasenze abasumba ba Isirayiri abeefako bokka. Abasumba tebasaanye kuliisa ndiga?

3Mulya amasavu, ne mwambala ebyoya, ne mutta ensolo ensava, naye temufaayo ku bisibo.

4Ennafu temuzizzaamu maanyi, so n’endwadde temuzijjanjabye, so n’ezirumizibbwaa temusibye biwundu byazo, so n’ezibuze temuzikomezzaawo, naye muzifuze n’amaanyi.

5Kyezaava zisaasaana, kubanga tezaalina musumba, ne ziba kya kulya eri ensolo enkambwe zonna ez’omu nsiko.

6Endiga zange zaasaasaana, ne zibuna ku nsozi zonna na ku buli kasozi akawanvu, ne zisaasaana okubuna ensi yonna, ne zibulwako azinoonya wadde okuzibuiliriza.

7“Noolwekyo mmwe abasumba, muwulire ekigambo kya MUKAMA:

8Nga bwe ndi omulamu, bw’ayogera MUKAMA Katonda, olw’endiga zange okufuuka omuyiggo, n’ekyokulya eri ensolo enkambwe zonna, kubanga tezirina musumba, ate era n’abasumba ne batazinoonya, naye ne beefako bokka, ne bataliisa ndiga zange,

9kale mmwe abasumba muwulire ekigambo kya MUKAMA.

10Bw’ati bw’ayogera MUKAMA Katonda nti, Nnina ensonga ku basumba, era ndibavunaana olw’ekisibo kyange. Ndibaggyako okulabirira endiga

mulekeraawo okuzifuula ekyokulya. Ndiwonya endiga zange mu kamwa kaabwe, zireme okuba ekyokulya kyabwe.

¹¹“Era bw’ati bw’ayogera MUKAMA Katonda nti, Nze kennyini ndinoonya endiga zange ne nzirabirira.

¹²Ng’omusumba bw’alabirira ekisibo kye ng’ezimu ku ndiga zisaasaanye okumuvaako, bwe ntyo bwe ndizirabirira. Ndiziggya mu bifo byonna gye zaasaasaanira ku lunaku olw’ebire olw’ekizikiza.

¹³Ndiziggya mu mawanga ne nzikuŋjaanya mu nsi gye zaasaasaanira ne nzikomyawo mu nsi yaazo. Ndiziriisiza ku nsozi za Isirayiri okumpi n’enzizi ne mu bifo byonna ebibeerwamu mu nsi.

¹⁴Ndizirabiririra mu ddundiro eddungi ne ku ntikko z’ensozi za Isirayiri we zirirundirwa. Eyo gye zirigalamira mu ddundiro eddungi era gye ziririira omuddo omugimu ku nsozi za Isirayiri.

¹⁵Nze kennyini ndirabirira endiga zange, ne nzigalamiza wansi mirembe, bw’ayogera MUKAMA Katonda.

¹⁶Ndinoonya ezaabula, ne nkomyawo ezaawaba. Ndiganjaba ezaalumizibwa, ne njumya ennafu, naye ensava era ez’amaanyi ndizizikiriza. Ndirunda ekisibo mu bwenkanya.

¹⁷“Nammwe ekisibo kyange, bw’ati bw’ayogera MUKAMA Katonda nti, Ndisala omusango wakati w’endiga emu ne ginnaayo ne wakati w’endiga ennume n’embuzi.

¹⁸Tekibamala okulya omuddo? Kale ate lwaki mulinnyirira ogusigaddewo mu ddundiro, nga n’okunywa mwanywa amazzi amayonjo, naye ne musikuula agaasigalawo n’ebigere byammwe!

¹⁹Olwo endiga zange zirye bye mwalinnyirira n’okunywa zinywe amazzi ge mwasiikuula n’ebigere byammwe?

²⁰“MUKAMA Katonda kyava abagamba nti, Laba, nze kennyini ndisala omusango wakati w’endiga ensava n’endiga enkovvu.

²¹Kubanga mwewaana nga muyimusa ebifuba ne musindikiriza ennafu zonna ne muzitomera n’amayembe gammwe okutuusa lwe muzifulumya ebweru,

²²ndiwonyawo ekisibo kyange so teziriba nate muyiggo. Ndisala omusango mu bwenkanya wakati w’endiga n’endiga.

²³Ndiziwa omusumba omu, omuweereza wange Dawudi, alizirunda; alizirabirira era aliba musumba waabwe.

²⁴Nze MUKAMA ndiba Katonda waabwe, n’omuddu wange Dawudi aliba mulangira mu bo. Nze MUKAMA njogedde.

²⁵ “Ndikola endagaano yange ezisubiza emirembe, era ndigoba mu nsi ensolo enkambwe, zibeerenga mu ddungu era zeebakenga mu bibira mirembe nga tezirumbibwa.

²⁶ Ndiziwa omukisa wamu n'ebifo ebyetoolodde akasozi kange, era ndibatonnyeseza enkuba mu ntuuko yaayo; walibaawo enkuba ey'omukisa.

²⁷ Emiti egy'omu ttale girireeta ebibala byagyo, n'ettaka lirimeza ebimera byalyo, era n'abantu balituula mirembe mu nsi yaabwe. Balimanya nga nze MUKAMA bwe ndimenya ebisiba eby'ekikoligo kyabwe ne mbawonya mu mukono gwabwo abaabafuula abaddu.

²⁸ Teziriba munyago nate eri amawanga, so n'ensolo enkambwe tezirizitaagulataagula. Zirituula mirembe so tewaliba muntu n'omu azitiisatiisa.

²⁹ Ndiziwa ensi emanyiddwa olw'ebirime byayo, zireme okulumwa enjala nate mu nsi newakubadde okunyoomebwa amawanga.

³⁰ Era zirimanya nga nze MUKAMA Katonda waazo, ndi wamu nazo, era nga zo, ennyumba ya Isirayiri, bantu bange, bw'ayogera MUKAMA Katonda.

³¹ Mmwe ndiga zange, endiga ez'eddundiro lyange, muli bantu bange, era nze ndi Katonda wammwe, bw'ayogera MUKAMA Katonda.' ”

Ezeekyeri 35

Obunnabbi ku Edomu

¹ Ekigambo kya MUKAMA ne kinzijira n'aŋjamba nti,

² “Omwana w'omuntu, tunuulira olusozi Seyiri owe obunnabbi,

³ oyogere nti, ‘Bw'ati bw'ayogera MUKAMA Katonda nti, Nkulinko ensonga, olusozi Seyiri, era ndikugolererako omukono gwange ne nkufuula amatongo.

⁴ Ndifuula ebibuga byo okuba ebifulukwa era olifuuka matongo, omanyé nga nze MUKAMA.’

⁵ “Kubanga wasiba ekiruyi eky'edda n'owaayo Abayisirayiri okuttibwa mu biro mwe baalabira ennaku, mu biro eby'okubonerezewa kwabwe okwenkomerero,

⁶ nga bwe ndi omulamu, kyendiva mbawaayo muttijjane era okuttijjana kulibalondoola, bw'ayogera MUKAMA Katonda. Kubanga temwakyawa kuyiwa musaayi, okuyiwa omusaayi kyekuliva kubalondoola.

⁷ Ndifuula olusozi Seyiri okuba amatongo, ne nsalako abo bona abajja n'abagenda.

⁸ Ndijuza ensozi zo abafu, n'abattiddwa ekitala baligwa ku busozi bwo, ne mu biwonvu byo, ne mu migga gyo.

⁹Ndikufuula matongo emirembe gyonna, so tewaliba alibeera mu bibuga byo, olyoke omanye nga nze MUKAMA.

¹⁰“Mwalowooza nga amawanga ga Yuda ne Isirayiri gammwe, era ne mulowooza okugeetwalira. Naye nze ndi MUKAMA waabwe,

¹¹era nga bwe ndi omulamu, bw'ayogera MUKAMA Katonda nti, ndibabonereza olw'obusungu n'obuggya bye mwabalaga nga mubakyawa, balyoke bammanye, mmwe bwe ndibasalira omusango.

¹²Oluvannyuma olimanya nga nze MUKAMA mpulidde byonna eby'obunyoomi bye wayogera eri ensozi za Isirayiri. Nagamba nti, “Bafuuse matongo, era baweedreddwayo gye tuli okubamalawo.”

¹³Wanneewanirako, n'oteekuma, kyokka ne nkuwulira.

¹⁴Bw'ati bw'ayogera MUKAMA Katonda nti, Ensi yonna bw'eriba esanyuka, gwe ndikufuula matongo.

¹⁵Olw'okuba nga wasanyuka, omugabo gw'ennyumba ya Isirayiri bwe gwafuuka amatongo nange bwe ntyo bwe ndikukola. Gwe olusozi Seyiri ne Edomu yonna mulifuuka matongo, mulyoke mumanye nga nze MUKAMA.’”

Ezeekyeri 36

Obunnabbi eri Ensozi za Isirayiri

¹“Omwana w'omuntu, yogera obunnabbi eri ensozi za Isirayiri, ogambe nti, Mmwe ensozi za Isirayiri, muwulire ekigambo kya MUKAMA.

²Bw'ati bw'ayogera MUKAMA Katonda nti, omulabe yayogera nti, ‘Otyo, ensozi ez'edda kaakano zaffe.’

³Kyemwava muwa obunnabbi ne mwogera nti, ‘Bw'ati bw'ayogera MUKAMA Katonda nti, Kubanga baabacocca ne babayigganya enjuuyi zona amawanga amalala ne gabeetwalira, era ne mufuuka eky'okwogerwako era ne baboogerako eby'obulimba,

⁴kyemunaava muwulira ekigambo kya MUKAMA Katonda mmwe ensozi za Isirayiri: Bw'ati bw'ayogera MUKAMA Katonda nti eri ensozi n'obusozi, n'eri enzizi n'ebiwonvu, n'eri ebifulukwa n'ebibuga ebyafuuka amatongo ebyanyagibwa ne bifuuka eby'okusekererwa eri amawanga gonna okwetooloola

⁵Bw'ati bw'ayogera MUKAMA Katonda nti; Njogerera mu busungu bwange obungi eri amawanga amalala n'eri Edomu yonna, abajjula okusanyuka n'ettima mu mitima gyabwe, ne baddira ensi yange ne bagifuula eyaabwe manyage obugagga bwayo.’

⁶Kyonoova owa obunnabbi eri ensi ya Isirayiri n'oyogera eri ensozi n'obusozi, n'eri enzizi n'ebiwonvu nti, bw'ati bw'ayogera MUKAMA Katonda nti, Njogera nga nzijudde obuggyga n'obusungu kubanga mwasekererwa nnyo amawanga.

⁷MUKAMA Katonda kyava ayogera nti, Ndayira nti amawanga agabeetoolodde nago galisekererwa.

⁸“Naye mmwe ensozi za Isirayiri mulireeta amatabi gammwe ne mubalira abantu bange Isirayiri ebibala byammwe kubanga banaatera okudda ewaabwe.

⁹Mbalumirwa era ndibatunuulira n'ekisa, era abalimi balikabala ettaka lyammwe ne basigamu ensigo,

¹⁰era ndibaaza mmwe, ennyumba yonna eya Isirayiri. Ebibuga birituulwamu, n'ebyali ebifulukwa biriddaabirizibwa.

¹¹Ndyaza abantu n'ensolo, era abantu balyeyongera n'ensolo ne zeeyongera. Ndibazzaayo mu bifo byammwe eby'edda, era ndibakolera ebirungi ebisingawo ku bye nabakolera, mulyoke mumanye nga nze MUKAMA.

¹²Ndikkiriza abantu bange, Isirayiri babatambulireko, era balibeddiza, nammwe muliba mugabo gwabwe nga temukyaddamu kubaggyako baana baabwe.

¹³“Bw'ati bw'ayogera MUKAMA Katonda nti, Kubanga abantu baboogerako nti, “Musaanyaawo abantu ne mumalawo ezzadde lye ggwanga lyammwe,”

¹⁴kyemuliva mutaddayo kusaanyaawo bantu newaakubadde okubamalako ezzadde ly'eggwanga lyo, bw'ayogera MUKAMA Katonda.

¹⁵Toliwulira nate okusekererwa kw'amawanga newaakubadde okunyoomebwa wadde eggwanga lyo okugwa, bw'ayogera MUKAMA Katonda.’”

¹⁶Nate ekigambo kya MUKAMA ne kinzijira n'aŋjamba nti,

¹⁷“Omwana w'omuntu, abantu ba Isirayiri bwe baaberanga mu nsi yaabwe, baagynoona olw'empisa zaabwe n'ebikolwa byabwe, era n'ebikolwa byabwe byali ng'obutali bulongoofu obw'omukazi mu biseera bye.

¹⁸Olw'omusaayi gwe baayiwa mu nsi, ate n'olw'okusinza bakatonda abalala kwe beeyonoonyesa, kyennava mbayiwako ekiruyi kyange.

¹⁹Naye mbasaasaanyiza mu mawanga, ne basaasaana mu nsi. Era nabasalira omusango ng'empisa zaabwe n'ebikolwa byabwe bwe byali.

²⁰Buli gye baagendanga mu mawanga baaswazanga erinnya lyange ettukuvu, kubanga kyayogerwanga nti, ‘Bano bantu ba MUKAMA, naye baagobebwa mu nsi ye.’

²¹Nafaayo ku linnya lyange ettukuvu, ennyumba ya Isirayiri lye yaswaza mu mawanga gye baagenda.

²² “Kale nno gamba ennyumba ya Isirayiri nti, ‘Bw’ati bw’ayogera MUKAMA Katonda nti: Ggwe ennyumba ya Isirayiri bino sibikola ku lulwo, naye ku lw’erinnya lyange ettukuvu lye mwavumisa mu mawanga gye mwagenda.

²³ Ndiraga obutukuvu bw’erinnya lyange ekkulu, eryavumisibwa mu mawanga, erinnya lye mwavumisa mu bo, era amawanga galimanya nga nze MUKAMA, bw’ayogera MUKAMA Katonda, bwe ndyolesa obutukuvu bwange mu mmwe mu maaso gaabwe.

²⁴ ‘Ndibaggya mu mawanga ne mbakunjaanya okuva mu nsi zonna ne mbakomyawo mu nsi yammwe.

²⁵ Ndibamaansirako amazzi amayonjo, era ndibaggyako obutali bulongoofu bwammwe bwonna n’okuva ku bakatonda abalala bona, ne mbafuula abalongoofu.

²⁶ Ndibawa omutima omuggya era ne nteeka n’omwoyo omuggya mu mmwe. Ndibaggyamu omutima ogw’ejinja ne mbawa omutima ogw’ennyama.

²⁷ Era ndibawa Omwoyo wange alibakubiriza okugoberera ebiragiro byange n’okukuuma obulungi amateeka gange.

²⁸ Mulibeera mu nsi gye nawa bajajjammwe, nammwe mulibeera bantu bange, nange ne mbeera Katonda wammwe.

²⁹ Ndibalokola mu butali bulongoofu bwammwe bwonna, era nditumya emmere ey’empeke ne ngyaza nnyo muleme okulumwa enjala.

³⁰ Ndyaza ebibala eby’oku miti n’ebimera eby’omu nnimiro, nga temukyasekererwa nate mu mawanga olw’enjala.

³¹ Olwo mulijukira amakubo gammwe amabi n’ebikolwa byammwe ebitali birungi, era mulyetamwa olw’ebibi byammwe n’olw’ebikolwa byammwe eby’emizizo.

³² Mukimanye ng’ebyo sibikola ku lwammwe, bw’ayogera MUKAMA Katonda. Muswale olw’ebikolwa byammwe, mmwe ennyumba ya Isirayiri.

³³ ‘Bw’ati bw’ayogera MUKAMA Katonda nti: Ku lunaku lwe ndibanaalizaako ebibi byammwe byonna, abantu balidda mu bibuga byammwe n’ebifulukwa biriddaabirizibwa.

³⁴ Ensi eyazika eririmibwa, ereme kuba nga bwe yali mu maaso gaabo bona abaagiyitangamu.

³⁵ Balyogera nti, “Ensi eno eyali ezise, kaakano efuuse ng’ennimiro Adeni, n’ebifulukwa n’ebibuga ebyali bifuisse amatongo, kaakano mulimu ababibeeramu, era biriko ne bbugwe.”

³⁶Olwo n'amawanga agaasigalawo agabeetoolodde galimanya nga nze MUKAMA, naddaabiriza ebyayonoonebwa, n'ennimiro n'ebiali bizise. Nze MUKAMA nkyogedde, era ndikituukiriza.'

³⁷"Bw'ati bw'ayogera MUKAMA nti: Nate ndiwuliriza ennyumba ya Isirayiri ne mbakolera kino, era ndyaza abantu baabwe babeere bangi ng'ekisibo ky'endiga.

³⁸Balyala ng'ebisibo eby'endiga ez'okuweebwayo e Yerusaalemi ku mbaga ezaalagirwa, era n'ebibuga ebyali amatongo ndibijuza ebibinja by'abantu. Kale balimanya nga nze MUKAMA."

Ezeekyeri 37

Ekiwonvu eky'Amagumba Amakalu

¹ Omukono gwa MUKAMA gwali ku nze, Mwoyo wa MUKAMA n'anfulumya, n'andeeta wakati mu kiwonvu ekyali kijjudde amagumba.

²N'agannaambuza, ne ndaba amagumba mangi, amakalu ennyo wansi mu kiwonvu.

³N'ambuuza nti, "Omwana w'omuntu, amagumba gano gayinza okuba amalamu?" Ne nziramu nti, "Ggwe Ayi MUKAMA Katonda, ggwe wekka gw'omanyi."

⁴Awo n'aŋjamba nti, "Wa obunnabbi ku magumba gano, oyogere nti, 'Mmwe amagumba amakalu, muwulire ekigambo kya MUKAMA!

⁵Bw'ati bw'ayogera MUKAMA Katonda eri amagumba gano nti, Laba ndibateekamu omukka ne mufuuka abalamu.

⁶Ndibateekako ebinywa n'ennyama ne mbabikkako n'olususu; ndibateekamu omukka, ne mufuuka abalamu. Olwo mulimanya nga nze MUKAMA.'"

⁷Awo ne njogera nga bwe nalagirwa. Awo bwe nnali nga njogera, ne waba eddoboozi, ng'ebintu ebikubagana, amagumba ne geegatta, buli limu ku linnaalyo.

⁸Ne ntunula, ebinywa n'ennyama ne birabika ku go, n'olususu ne luddako, naye temwali mukka.

⁹Awo n'aŋjamba nti, "Wa obunnabbi eri omukka; yogera omwana w'omuntu, ogambe nti, 'Bw'ati bw'ayogera MUKAMA Katonda nti, Ggwe omukka vva eri empewo ennya, oyingire mu battibwa, babe balamu.'"

¹⁰Ne mpa obunnabbi nga bwe yandagira, omukka ne gubayingiramu ne balamuka, ne bayimirira, era ne baba eggye ddene nnyo.

¹¹ Awo n'aŋŋamba nti, "Omwana w'omuntu, amagumba gano ye nnyumba yonna eya Isirayiri. Boogera nti, 'Amagumba gaffe gaakala era n'essuubi lyaffe lyaggwaawo, twasalibwako.'

¹² Kyonoova owa obunnabbi gye bali n'oyogera nti, 'Bw'ati bw'ayogera MUKAMA Katonda nti, Mmwe abantu bange, ndyasamya amalaalo gammwe ne mbazuukiza, era ndibakomyawo mu nsi ya Isirayiri.

¹³ Kale mulimanya nga nze MUKAMA, era nga nammwe muli bantu bange, bwe ndyasamya amalaalo gammwe ne mbazuukiza.

¹⁴ Ndibateekamu Omwoyo wange era muliba balamu; ndibateeka mu nsi yammwe mmwe ne mutuula omwo, mulyoke mumanye nga nze MUKAMA nkyogedde, era nkikoze, bw'ayogera MUKAMA Katonda.'

Eggwanga Limu Lifugibwa Kabaka Omu

¹⁵ Awo ekigambo kya MUKAMA Katonda ne kinzijira n'aŋŋamba nti,

¹⁶ "Omwana w'omuntu ddira omuggo owandiikeko nti, 'Guno gwa Yuda n'Abayisirayiri abakolagana nabo.' Oddire n'omuggo omulala owandiikeko nti, 'Guno muggo gwa Efulayimu owa Yusufu n'ennyumba ya Isirayiri yonna, bwe bakolagana.'

¹⁷ Bagatte bafuuke omuggo gumu, bafuuke omuntu omu mu mukono gwo.

¹⁸ "Awo abantu bo bwe bakubuzanga nti, 'Amakulu ga bino kye ki?'

¹⁹ Obategeezanga nti, Bw'ati bw'ayogera MUKAMA Katonda nti, 'Ndiddira omuggo gwa Yusufu oguli mu mukono gwa Efulayimu, n'ebika bya Isirayiri n'abo bwe bakolagana, ne mbigatta ku muggo gwa Yuda, bafuuke omuntu omu mu mukono gwange.'

²⁰ Balage emiggo gy'owandiiseeko,

²¹ obagambe nti, 'Bw'ati bw'ayogera MUKAMA Katonda nti, Ndiggya Abayisirayiri mu mawanga gye baagenda. Ndibakuŋŋanya okuva wonna, ne mbakomyawo mu nsi yaabwe.

²² Ndibafuala eggwanga limu mu nsi, ku nsozi za Isirayiri. Balifugibwa kabaka omu, tebaliddayo kubeera mawanga abiri, wadde okwawulibwa mu bwakabaka obubiri.

²³ Tebaliddayo kweyonoonyesa ne bakatonda abalala, ebintu ebikole obukozi n'emikono eby'ekivve, wadde okweyonoonyesa mu bibi byabwe. Ndibawonya okuva mu bifo byonna gye beeyonoonyesa, ndibafuala abalongoofu, muliba bantu bange, nange ndiba Katonda wammwe.

²⁴ “Omweereza wange Dawudi alibeera kabaka waabwe, era bona baliba n’omusumba omu. Baligoberera amateeka gange, babeere beegendereza okukwata ebiragiro byange.

²⁵ Balibeera mu nsi gye nawa omweereza wange Yakobo, ensi bajjajammwe mwe baabeeranga. Bo n’abaana baabwe, balibeera omwo ennaku zonna, era Dawudi omweereza wange alibeera mulangira waabwe emirembe gyonna.

²⁶ Ndikola endagaano yange ebawa emirembe, eriba ndagaano ey’olubeerera. Ndibanyweza ne mbaaza, era nditeeka ekifo kyange eky’okubeeramu wakati mu bo emirembe gyonna.

²⁷ Ekifo kyange eky’okubeeramu kinaabeeranga mu bo. Nnaabeeranga Katonda waabwe nabo banaabeeranga bantu bange.

²⁸ Amawanga galimanya nga nze MUKAMA Katonda, nze ntukuza Isirayiri; ekifo kyange eky’okubeeramu kiri mu bo emirembe gyonna.’”

Ezeekyeri 38

Obunnabbi eri Googi

¹ Ekigambo kya MUKAMA Katonda ne kinzijira n’anjamba nti,

² “Omwana w’omuntu tunuuliza amaaso go eri Googi ow’omu nsi ya Magoogi, omulangira omukulu owa Meseki ne Tubali, owe obunnabbi gy’ali,

³ oyogere nti, ‘Bw’ati bw’ayogera MUKAMA Katonda nti, Nkulinko ensonga ggwe Googi omulangira omukulu owa Meseki ne Tubali.

⁴ Ndikwetoolooza, ne nteeka amalobo mu mba zo, era ndibakulembra n’eggye lyo lyonna, n’embalaasi n’abeebagala embalaasi, bona nga bambadde ebyokulwanyisa mu kinja ekinene ekirina engabo ennene n’entono, nga bakutte n’ebitala.

⁵ Obuperusi, ne Kuusi ne Puuti balibeera wamu nabo, bona nga balina engabo n’enkuufiira;

⁶ era ne Gomeri n’eggye lye lyonna, n’ennyumba ya Togaluma okuva mu bukiakkono obw’ewala ddala n’eggye lyabwe lyonna, amawanga mangi nga gali wamu nammwe.

⁷ “Weeteeketeke beera bulindaala ggwe n’ekinja kyonna ekikwetoolodde; obaduumire.

⁸ Oluvannyuma olw’ennaku ennyingi mulikuŋŋaanyizibwa era mu myaka egypt’oluvannyuma mulirumba ensi eyaakava mu lutalo, ensi abantu mwe baakuŋŋaanyizibwa okuva mu mawanga amangi ku nsozi za Isirayiri ezalekebwawo. Abantu baayo baggyibwa mu mawanga, kaakano bona batudde mirembe.

⁹Ggwe n'eggye lyo lyonna n'amawanga agali awamu naawe, muliyambuka mubalumbe, era mulibalumba ng'omuyaga, era muliba ng'ekire ekibisse ku nsi.

¹⁰“Bw'ati bw'ayogera MUKAMA Katonda nti, Ku lunaku olwo ebirowoozo biribajjira ne muteesa okukola akabi.

¹¹Muligamba nti, “Ndirumba ensi ey'ebyalo ebitaliiko nkomera, ndirumba eggwanga erijjudde emirembe era eriteeteeseteese, bona nga babeera mu bigango okutali nkomera newaakubadde ebyuma eby'amaanyi.

¹²Ndibba ne nnyaga ne nnumba ebifo ebyazika, kaakano ebibeeramu abantu, abantu abaakuŋjaanyizibwa okuva mu mawanga ag'enjawulo gye babeera, abalina obugagga bw'ente n'ebintu ebirala, ababeera wakati mu nsi.”

¹³Seeba ne Dedani n'abasuubuzi ab'e Talusiisi n'ab'ebyalo bye bona balibabuuza nti, “Muzze kunyaga? Mukuŋjaanyizza ebibinja byammwe mutunyage, mutwale effeeza yaffe ne zaabu yaffe, n'ebisolo byaffe n'ebintu byaffe ebirala, mutwale omunyago omunene?”'

¹⁴“Noolwekyo omwana w'omuntu kyonoova owa obunnabbi, n'ogamba Googi nti, ‘Bw'ati bw'ayogera MUKAMA Katonda nti, Ku lunaku olwo abantu bange Isirayiri bwe baliba ng'abatudde mirembe, temulikiraba?

¹⁵Olijja okuva mu kifo kyo mu bukiakkono obuli ewala ennyo, ggwe n'amawanga mangi wamu naawe, bona nga beebagadde embalaasi, enkuyanja y'abantu, era eggye eddene.

¹⁶Mulitabaala abantu bange Isirayiri ng'ekire ekibikka ku nsi. Era mu nnaku ez'oluvannyuma ndikulinnyisa n'olumba ensi yange, ggwe Googi, amawanga gamanye. Era ndyolesa obutukuvu bwange mu maaso gaabwe.

¹⁷“Bw'ati bw'ayogera MUKAMA Katonda nti, Si mmwe be nayogerako edda nga mpita mu baddu bange bannabbi ba Isirayiri, abaawa obunnabbi mu biro ebyo okumala ebbanga, nga ɳjenda kubasindika mubalumbe?

¹⁸Naye ku lunaku olwo, Googi bw'alirumba ensi ya Isirayiri, ndiraga obusungu bwange, bw'ayogera MUKAMA Katonda.

¹⁹Mu buggyaa bwange ne mu busungu bwange nnangirira nga njogera nti walibaawo musisi ow'amaanyi mu nsi ya Isirayiri;

²⁰n'ebennyanya ebiri mu nnyanja, n'enneyonyi ez'omu bbanga, n'ensolo enkambwe ez'omu nsiko, ne buli kyewalulira ku ttaka, n'abantu bona abali ku nsi balikankana olw'okujja kwange. Ensozi zirisuulibwa n'ebbangla liribulunguka, ne buli bbugwe aligwa ku ttaka.

²¹Nditumira Googi ekitala okuva mu nsozi zange zonna, bw'ayogera MUKAMA Katonda, era buli muntu alirwana ne muganda we.

²²Ndibabonereza ne kawumpuli n'okuyiwa omusaayi, era nditonnyesa amatondo ag'enkuba amanene nga mulimu omuzira n'omuliro ku ye, n'eggye lye ne ku mawanga amangi agaamwegattako.

²³Olwo ndyolesa obukulu bwange n'obutukuvu bwange, era ndyeraga eri amawanga mangi, ne balyoka bamanya nga Nze MUKAMA Katonda.' "

Ezeekyeri 39

¹"Omwana w'omuntu, wa obunnabbi ku Googi oyogere nti, 'Bw'ati bw'ayogera MUKAMA Katonda nti, Nkulinko ensonga ggwe Googi, omulangira omukulu owa Meseki ne Tubali.

²Ndikukyusa nkukulule, era ndikuggya mu bukiikkono obw'ewala ne nkutuma eri ensozi za Isirayiri.

³Ndiggya omutego gwo mu mukono gwo ogwa kkono; n'obusaale bwo obungi obubadde mu mukono gwo ogwa ddyo, ndibukusuza.

⁴Oligwa ku nsozi za Isirayiri ggwe n'eggye lyo lyonna n'amawanga agali naawe; ndibawaayo eri ensegia eza buli ngeri n'eri buli nsolo enkambwe mufuuke emmere yaazo.

⁵Muligwa ku ttale, kubanga nze nkyogedde, bw'ayogera MUKAMA Katonda.

⁶Ndisindika omuliro ku Magogi ne ku abo ababeera mu bifo ebirimu emirembe ku lubalama lw'enyanja; balyoke bamanye nga nze MUKAMA.

⁷"'Ndimanyisa abantu bange Isirayiri Erinnya lyange ettukuvu. Siriganya linnya lyange kuddayo kuvumibwa, era amawanga galimanya nga nze MUKAMA, Omutukuvu mu Isirayiri.

⁸Ekiseera kyakyo kituuse era kirituukirira, bw'ayogera MUKAMA Katonda. Luno lwe lunaku lwe nayogerako.

⁹"'Abo ababeera mu bibuga bya Isirayiri balifuluma ne bakozesa ebyokulwanyisa ng'enku era balibikumako omuliro, engabo entono n'engabo ennene, emitego n'obusaale n'ebiti ebinene n'amafumu. Balibikozesa ng'enku okumala emyaka musanvu.

¹⁰Tekiribeetaagisa kutyaba nku ku ttale so tebalitema nku mu bibira, kubanga ebyokulwanyisa bye balikozesa ng'enku. Balinyaga abo abaabanyaga, ne babba abo abaababba, bw'ayogera MUKAMA Katonda.

¹¹"'Ku lunaku olwo ndiwa Googi ekifo eky'okuziikamu mu Isirayiri mu kiwonvu ky'abatambuze ku luuyi olw'ebuvanjuba ku Nnyanja ey'Omunnyo. Kiriziba ekkubo ly'abatambuze, kubanga Googi n'enkuanya y'abantu be baliziikibwa eyo. Era kiriyitibwa ekiwonvu kya Kamonugoogi.

¹² “Ennyumba ya Isirayiri balimala emyezi musanvu nga babaziika, okusobola okutukuza ensi.

¹³ Abantu bona ab’omu nsi balibaziika, era luliba lunaku lwa kujjukiranga era lwe lunaku lwe ndigulumizibwa, bw’ayogera MUKAMA Katonda.

¹⁴ Wanaabangawo abasajja abanaapangisibwanga okukola omulimu ogw’okutukuza ensi. Abamu ku bo banaayitanga mu nsi nga bakola omulimu ogwo, n’abalala banaaziikanga emirambo gy’abo egirisigala kungulu. “Oluvannyuma olw’emyezi omusantu balitandika okunoonya abaafa.

¹⁵ Bwe baliba nga bayita mu nsi, omu n’alaba eggumba ly’omuntu, aliteeka akabonero mu kifo ekyo, okutuusa abaziika bwe baliba bayita ne balaba akabonero ne baliziika mu kiwonvu kya Kamonugoogi.

¹⁶ (Era ne mu kifo ekyo eribaayo ekibuga ekiyitibwa Kamona). Bwe batyo bwe balitukuza ensi.’

¹⁷ “Omwana w’omuntu, bw’ati bw’ayogera MUKAMA Katonda nti, Koowoola buli kika ky’ennyonyi n’ebisolo byonna ebikambwe obigambe nti, ‘Mukunjjaane, mujje okuva mu njuyi zonna eri ssaddaaka gye mbateekeddetekkedde, ssaddaaka ennene ku nsozi za Isirayiri, mulye ennyama munywe n’omusaayi.

¹⁸ Mulirya ennyama ey’abalwanyi ab’amaanyi, era mulinywa omusaayi gw’ablangira ab’ensi, ng’abanywa ogw’endiga ennume n’obuliga obuto, ogw’embuzi n’ente ziseddume, zonna ensava ez’e Basani.

¹⁹ Mulirya amasavu ne mukkuta, ne munywa omusaayi ne mutamiira ku ssaddaaka yange gye mbategekera.

²⁰ Ku mmeeza yange mulirya embalaasi n’abazeebagala, wamu n’abalwanyi ab’amaanyi n’abasajja abaserikale aba buli kika,’ bw’ayogera MUKAMA Katonda.

²¹ “Ndyoleka ekitiibwa kyange mu mawanga, era amawanga gonna galiraba ekibonerezo kye ndikuwa, nga n’omukono gwange gubateekeddwaako.

²² Okuva ku lunaku olwo, ennyumba ya Isirayiri balimanya nga nze MUKAMA Katonda waabwe.

²³ N’amawanga galimanya ng’abantu ba Isirayiri balitwalibwa mu buwanjanguse olw’ebibi byabwe, kubanga tebaali beesigwa gye ndi. Kyenava mbakweka amaaso gange ne mbawaayo mu mukono gw’abalabe baabwe, bona ne battibwa ekitala.

²⁴ Nababonereza ng’obutali butuukirivu bwabwe n’ebikolwa byabwe bwe byali, ne mbakisa amaaso gange.

²⁵ "Noolwekyo MUKAMA Katonda ayogera nti, Ndikomyawo Yakobo okuva mu buwañjanguse, era ndikwatirwa ekisa ennyumba ya Isirayiri yonna, era ndirwanirira erinnya lyange ettukuvu.

²⁶ Balyerabira okuswazibwa kwabwe, n'obutali bwesigwa bwe bandaga, bwe baabeera mu nsi yaabwe emirembe, nga tebaliko abatiisa.

²⁷ Bwe ndibakomyawo okuva mu mawanga, nga mbakuñjaanyizza okuva mu nsi ez'abalabe baabwe, ndyoleka obutukuvu bwange mu bo eri amawanga mangi.

²⁸ Olwo balimanya nga nze MUKAMA Katonda, kubanga nabasindika mu buwañjanguse mu mawanga, ate ne mbakuñjaanya eri ensi yaabwe, ne sirekaayo n'omu.

²⁹ Siribakisa maaso gange nate, bwe ndifuka Omwoyo wange ku nnyumba ya Isirayiri, bw'ayogera MUKAMA Katonda."

Ezeekyeri 40

Ekifo Ekiggya ekya Yeekaalu

¹ Ku ntandikwa ey'omwaka ogw'amakumi abiri mu etaano nga tuli mu buwañjanguse, ku lunaku lw'omwezi ogw'ekkumi, oluvannyuma lw'emyaka kkumi n'ena ng'ekibuga kigudde, omukono gwa MUKAMA ne gunzikako ku lunaku olwo lwennyini, n'antwalayo.

² Mu kwolesebwa, Katonda n'antwala mu nsi ya Isirayiri n'anteeka ku luuyi olw'Obukiikaddyo obw'olusozi oluwanvu ennyo okwali ebizimbe ebyali ng'ekibuga.

³ N'antwala eyo, ne ndaba omusajja, ng'alabika ng'ayakolebwa mu kikomo, ng'ayimiridde mu mulyango ng'akutte omuguwa ogwa linena n'oluti olupima.

⁴ Omusajja n'añjamba nti, "Omwana w'omuntu, tunula n'amaaso go owulire n'amatu go osseeyo omwoyo ku buli kye nnaakulaga, kyovudde oleetebwa wano. Byonna by'onoolaba obitegeeze ennyumba ya Isirayiri."

Omulyango ogw'Ebuvanjuba okutuuka mu Luggyia Olwa wabweru

⁵ Ne ndaba bbugwe okwetooloola ekifo kya yeekaalu. Obuwanvu bw'oluti olupima olwali mu mukono gw'omusajja lwali emikono mukaaga, nga mita ssatu. Buli mukono gwali nga kitundu kya mita. N'apima bbugwe ng'omubiri gwayo mita ssatu, n'obugulumivu bwayo mita ssatu.

⁶ Oluvannyuma n'alaga ku mulyango ogutunuulira Ebuvanjuba, n'alinnya amadaala n'apima omuziziko ogusooka ogw'omu mulyango, nga guli oluti lumu, ze mita ssatu.

⁷ N'obusenge obw'abakuumi bwali mita ssatu obuwanvu, n'obugazi mita ssatu, ng'ebbanga eryawula obusenge obwo liri mita bbiri n'ekitundu. Waaliwo

n'omuziziko ogwokubiri. N'omuziziko ogwo gwali mita ssatu mu bugulumivu. Mu maaso g'omuziziko ogwo waaliwo ekisasi okutunuulira yeekaalu.

8Awo n'apima ekisasi eky'oku mulyango

9nga kiri mita nnya obugulumivu. Waaliwo empagi bbiri ku nsonda y'ekisasi, n'omubiri ogw'empagi ezo gwali mita emu. Ekisasi eky'oku mulyango kyayolekera yeekaalu.

10Munda mu mulyango ogw'Ebuwanjuba mwalimu obusenge obw'abakuumi busatu ku njuyi zombi, bw'onsatule nga bwenkanankana obunene, nga n'ebbangwa wakati waabwo lyenkanankana obunene.

11N'apima obugazi obw'awayingirirwa mu mulyango nga buli mita ttaano n'obugulumivu bwawo nga buli mita mukaaga n'ekitundu.

12Mu maaso ga buli kasenge waaliwo ekisenge obuwanyu kitundu kya mita, n'obusenge nga buli mita ssatu eruuyi ne mita ssatu eruuyi.

13N'olvannyuma n'apima obugazi bw'akasolya ak'ekibangirizi okuva ku kasenge akamu okutuuka ku kakolekedde; okuva ku ntikko y'empagi okutuuka ku y'empagi eyookubiri waali mita kkumi na bbiri n'ekitundu.

14Waaliwo embu bbiri ez'obusenge. N'apima ekibangirizi okuva ku kasenge akasooka ak'olubu olumu okutuuka ku kasenge akasembayo ak'olubu olwo. N'olvannyuma n'apima n'ekibangirizi okuva ku kasenge akasooka ak'olubu olulala okutuuka ku kasenge akasembayo ak'olubu olwo olulala, wonna awamu n'afuna mita kkumi na ttaano buli lubu. Ekipimo ekyo tekitwaliramu kisasi.

15N'okuva ku bwenyi bw'omulyango awayingirirwa okutuuka ekisasi kyagwo we kikoma waali mita amakumi abiri mu ttaano.

16Era obusenge bwaliko amabanga amafunda okuva wansi okutuuka waggulu mu bisenge byabwo, okwetooloola obusenge bwonna; ate n'ekisasi nakyo kyalina amabanga agafaanagana nga gali ag'obusenge obw'abakuumi. Ku bisenge kwali kwoleddwako ebifaananyi eby'enkindu.

Oluggyga olw'Ebweru

17Awo omusajja n'andeeta mu luggya olw'ebweru; ne ndaba ebisenge ebimu n'olubalaza ebyazimbibwa, ebisenge ebyo ebyazimbibwa ku lubalaza mu bbugwe okwetooloola oluggyga lwonna, byali amakumi asatu.

18Olubalaza lwakolebwa okwetooloola bbugwe. Obugazi bw'olubalaza lwali lwenkanankana n'obuwanyu bw'omulyango, era ng'olubalaza lwolekedde oluggyga. Olubalaza olwo lwe luyitibwa olubalaza olwa wansi.

19N'olvannyuma n'apima ekibangirizi okuva omulyango ogw'Ebuwanjuba we gukoma okutuuka ebweru ow'oluggyga olw'omunda, ze mita amakumi ataano. Waaliwo n'omulyango ogw'Obukiikkono. N'ekibangirizi okuva ku mulyango

ogwo we gukoma okutuuka ebweru w'oluggya olw'omunda nakyo kyali mita amakumi ataano.

Omulyango ogw'Obukiikkakkono

²⁰Awo n'apima obuwantu n'obugazi obw'omulyango ogw'Obukiikkakkono ogufuluma mu luggya olw'ebweru.

²¹Obusenge bwagwo obw'abakuumi, busatu oluuyi n'oluuyi, n'ebbanga wakati waabwo, n'ekisasi kyagwo, byalina ekipimo bye bimu ng'omulyango ogusooka. Omulyango ogwo gwali mita amakumi abiri mu ttaano obuwantu, n'obugazi mita kkumi na bbiri n'ekitundu.

²²Amabanga gaagwo amafunda, n'ekisasi kyagwo, n'ebifaananyi eby'enkindu ebyagwo byalina ekipimo bye bimu ng'ebi'omulyango ogw'Ebuwanjuba. Amadaala musanvu ge galinnyibwanga okutuuka ku mulyango ogw'Obukiikkakkono. Gwalina ekisasi ekyali ku nkomerero y'omulyango ogwo.

²³Waaliwo omulyango ogw'oluggya olw'omunda ogwatunuulira omulyango ogw'Obukiikkakkono, nga ogwali Ebuvanjuba. N'apima okuva ku mulyango ogw'oluggya olw'omunda okutuuka ku mulyango ogw'Obukiikkakkono mita amakumi ataano.

Omulyango ogw'Obukiikkaddyo

²⁴Awo n'ankulembira n'antwala ku luuyi olw'Obukiikkaddyo ne ndaba omulyango ogw'Obukiikkaddyo, n'apima empagi zaagwo n'ekisasi kyagwo, ng'ebigera byabyo byenkanankana n'ebirala.

²⁵Omulyango n'ekisasi kyagwo byalina amabanga amafunda okwetooloola wonna, ng'amabanga ag'ebirala. Omulyango ogwo gwali mita amakumi abiri mu ttaano obuwantu, ng'obugazi mita kkumi na bbiri n'ekitundu.

²⁶Amadaala musanvu ge gaalinnyibwangako okugutuukako. Gwalina ekisasi ekyali ku nkomerero yaagwo. Gwaliko n'ebifaananyi eby'enkindu ebyayolebwa eruuyi n'eruuyi ku bisenge byagwo.

²⁷Waaliwo n'omulyango ogw'oluggya olw'omunda ogwatunuulira omulyango ogw'Obukiikkaddyo. N'apima okuva ku mulyango ogwo okutuuka ku mulyango ogw'Obukiikkaddyo; zaali mita amakumi ataano.

Emiryango egy'Oluggya olw'Omunda

²⁸Awo n'antwala mu luggya olw'omunda nga tuyita mu mulyango ogw'Obukiikkaddyo ogw'oluggya olw'omunda, n'apima, nga gulina ekipimo bye bimu ng'emirala gyonna.

²⁹Obusenge bwagwo obw'abakuumi, n'amabanga gaagwo, n'ekisasi kyagwo byalina ekipimo bye bimu ng'ebirala. Omulyango n'ekisasi kyagwo byalina amabanga amafunda okwetooloola, era gwali mita amakumi abiri mu ttaano obuwantu, n'obugazi mita kkumi na bbiri n'ekitundu.

³⁰Ebisasi eby'emiryango ebyetoolodde oluggya olw'omunda buli kimu kyali obugazi mita kkumi na bbiri n'ekitundu, n'obugulumivu mita bbiri n'ekitundu.

³¹Ekisasi kyagwo kyatunuulira oluggya olw'ebweru. Empagi zaakyo zaali zooleddwa n'ebifaananyi eby'enkindu. Amadaala munaana ge gaalinnyibwanga okutuuka ku kisasi eky'oku mulyango ogw'Obukiikkaddyo ogw'oluggya olw'omunda.

³²Oluvannyuma n'antwala mu luggyga olw'omunda ku mulyango ogw'Ebuwanjuba ogw'oluggya olw'omunda, n'apima omulyango ogwo, nga gulina ebipimo bye bimu ng'emirala.

³³Obusenge bwagwo n'amabanga gaagwo n'ekisasi kyagwo byalina ebipimo bye bimu ng'ebirala. Omulyango n'ekisasi byalina amabanga okwetooloola, era gwali mita amakumi abiri mu ttaano obuwanvu n'obugazi mita kkumi na bbiri n'ekitundu.

³⁴Ekisasi kyagwo kyatunuulira oluggya olw'ebweru. Empagi zaakyo zaali zooleddwa n'ebifaananyi eby'enkindu. Amadaala munaana ge gaalinnyibwanga okutuuka ku kisasi eky'oku mulyango ogw'Ebuwanjuba ogw'oluggya olw'omunda.

³⁵N'antwala ku mulyango ogw'Obukiakkono ogw'oluggya olw'omunda n'alupima ng'ebipimo bye bimu ng'emiryango emirala.

³⁶Obusenge bwagwo obw'abakumi n'amabanga gaagwo, n'ekisasi kyagwo byalina ebipimo bye bimu ng'ebirala. Omulyango n'ekisasi byalina amabanga okwetooloola, era gwali mita amakumi abiri mu ttaano obuwanvu, n'obugazi mita kkumi na bbiri n'ekitundu.

³⁷Ekisasi kyagwo kyatunuulira oluggya olw'ebweru. Empagi zaakyo zaali zooleddwa n'ebifaananyi eby'enkindu. Amadaala munaana ge gaalinnyibwanga okutuuka ku kisasi eky'oku mulyango ogw'Obukiakkono ogw'oluggya olw'omunda.

Ebisenge gye Bategekera Ssaddaaka

³⁸Waaliwo ekisenge n'oluggi lwakyo ekyaliraana ekisasi ku buli mulyango ogw'oluggya olw'omunda. Omwo ebiweebwayo ebyokebwa mwe byayozebwanga.

³⁹Mu kisasi eky'emiryango mwalimu emmeeza bbiri oluuyi olumu n'endala bbiri oluuyi olulala kwe battiranga ebiweebwayo ebyokebwa, n'ebiweebwayo olw'ebibi, n'ebiweebwayo olw'omusango.

⁴⁰Era ebweru w'ekisasi ku mulyango, okumpi n'amadaala awayingirirwa ku mulyango oglu mu bukiikkakkono waaliwo emmeeza bbiri ne ku luuyi olulala olw'amadaala waliwo emmeza bbiri.

41Ne kitegeeza nga waaliwo emmeeza nnya ku luuyi olumu olw'omunda, n'emmeeza endala nnya ku luuyi olulala ng'oyimiridde mu mulyango, awamu z'emmeeza munaana, kwe battiranga ssaddaaka.

42Era waaliwo n'emmeeza endala nnya ez'amayinja amateme ez'ebiweebwayo ebyokebwa, buli emu yali desimoolo nsanvu mu ttaano eza mita obuwantu, obugazi desimoolo nsanvu mu ttaano eza mita n'obugulumivu kitundu kya mita. Okwo kwe baateekanga ebiso ebibaaga ebiweebwayo ebyokebwa n'ebiweebwayo ebirala.

43Era waaliwo n'ewuuma ez'engalo bbiri, obuwantu bwazo sentimita mwenda, ezaawanikibwa ku bisenge okwetooloola. Ku mmeeza kwe baatekanga ennyama ey'ebiweebwayo.

Ebisenge bya Bakabona

44Mu luggyaa olw'omunda waaliyo ebisenge bibiri eby'abayimbi, ekimu ku luuyi olw'omulyango ogw'Obukiikkono ekyolekera Obukiikkaddyo, n'ekirala ku luuyi olw'omulyango ogw'Obukiikkaddyo okutunuulira Obukiikkono.

45N'anjamba nti, "Ekisenge ekyolekera Obukiikkaddyo, kya bakabona abavunaanyizibwa yeekaalu,

46n'ekisenge ekyolekera Obukiikkono kya bakabona abavunaanyizibwa ekyoto. Abo be batabani ba Zadooki, era be Baleevi bokka abasobola okuseemberera MUKAMA okumuweereza."

47N'apima oluggyaa, nga luli mita amakumi ataano obuwantu, n'obugazi mita amakumi ataano, nga kya nsonda nnya ezenkanankana, n'ekyoto kyali mu maaso ga yeekaalu.

Eyeekaalu

48N'antwala ku kisasi kya yeekaalu n'apima empagi ez'ekisasi ezaali eruuyi n'eruuyi olw'ekisasi. Ne ndaba nga ku mukono ogwa ddyo empagi emu epima mita bbiri n'ekitundu ku luuyi olw'ebweru ate ng'empagi eyookubiri ku mukono ogwa kkono erina ebipimo ebyenkanankana na luli. Oluuyi olw'omunda olw'empagi emu lwapima mita emu n'ekitundu, n'oluuyi olw'omunda olw'empagi eyookubiri nga nalwo lupima mita emu n'ekitundu. Okuva ku mpagi we zitandikira okutuuka ku mulyango gwa yeekaalu waali mita musanvu, ekitegeeza nti ekisasi kyali mita musanvu obuwantu.

49Obugazi bw'omulyango ng'otaddeko n'empagi ez'enjuuyi zombi bwali mita kkumi. Okuva ku mpagi okutuuka ku mulyango gwa yeekaalu waali mita ttaano n'ekitundu. Amadaala kkumi ge gaalinnyibwanga okutuuka ku kisasi. Waaliwo n'empagi endala bbiri eruuyi n'eruuyi ezaaliraana empagi eziwanirira ekisasi.

Ezeekyeri 41

¹ Awo omusajja n'antwala ebweru wa yeekaalu Awatukuvu n'apima empagi ez'awayingirirwa mu kifo ekitukuvu, obugazi mita ssatu buli luuyi.

² Awayingirirwa waali obugazi mita ttaano, n'obugazi bw'empagi ez'oku luuyi olw'omunda zaali mita bbiri n'ekitundu eruuyi n'eruuyi. N'apima ebweru wa yeekaalu Awatukuvu nga wali mita amakumi abiri obuwantu, n'obugazi mita kkumi.

³ Oluvannyuma n'ayingira munda wa yeekaalu Awatukuvu w'Awatukuvu, n'apima empagi eziri awayingirirwa, buli emu obugazi mita emu. Omulyango gwali mita ssatu obugazi, n'ebisenge ebyayitangamu eruuyi n'eruuyi ku mulyango oguingirirwamu mu Watukuvu w'Awatukuvu byali mita ssatu n'ekitundu obugazi.

⁴ N'apima Awatukuvu w'Awatukuvu nga wali mita kkumi obuwantu, n'obugazi mita kkumi. N'anjamba nti, "Kino kye kifo ekiyitibwa Awatukuvu w'Awatukuvu."

⁵ N'apima ekisenge ekya yeekaalu, ng'omubiri gwakyo guli mita ssatu, na buli kisenge eky'ebbali okwebungulula yeekaalu obugazi nga kiri mita bbiri.

⁶ Ebisenge eby'ebbali byali emyaliro esatu, buli kimu nga kiri waggulu wa kinnaakyo, ku buli mwaliiro kwaliko ebisenge amakumi asatu. Waaliwo empagi ezawaniriranga ebisenge ebyo naye ng'empagi ezo teziyingira mu kisenge ekya yeekaalu.

⁷ Ebisenge eby'ebbali okwebungulula yeekaalu byagendanga nga byeyongera okugaziwa buli mwaliiro ogweyongerangayo waggulu, era amadaala gaazo agalinnyyirwako gaava wansi okutuuka ku mwaliiro ogusembayo nga guyita ku mwaliiro ogwa wakati.

⁸ Ne ndaba nga yeekaalu eriko ekifo ekyagulumira okugyebungulula nga kye kikola omusingi ogw'ebisenge eby'ebbali. Obuwantu kyali ng'obuwantu obw'oluti, z'emita empanvu ssatu.

⁹ Waaliwo ekisenge ekyebunguludde ebisenge eby'ebbali. Omubiri gw'ekisenge ekyo gwali mita bbiri n'ekitundu. Waaliwo ekibangirizi wakati w'ebisenge eby'ebbali ebya yeekaalu n'ekisenge ekyebunguludde ebisenge eby'ebbali ebya yeekaalu. Waaliwo n'ekibangirizi wakati wa bbugwe n'ekisenge ekyebunguludde ebisenge eby'ebbali ebya yeekaalu.

¹⁰ Ekibangirizi ekyo kyali mita kkumi obugazi.

¹¹ Waaliwo emiryango egayingiranga mu bisenge eby'ebbali okuva mu kibangirizi ekiri wakati w'ekisenge ekyebunguludde ebisenge eby'ebbali n'ebisenge ebyo. Emiryango egyo gyali ku luuyi olw'Obukiikkono, ne ku luuyi olw'Obukiikkaddyo. Ekibangirizi ekyo kyali mita bbiri n'ekitundu obugazi.

¹²Ekizimbe ekyali mu luggya emanju wa yeekaalu, lwe luuyi olw'ebugwanjuba kyali obugazi mita amakumi asatu mu ttaano, n'omubiri gw'ekisenge eky'ekizimbe ekyo gwali mita bbiri n'ekitundu okwebungulula, n'obuwantu bwakyo mita amakumi ana mu ttaano.

¹³Oluvannyuma omusajja n'apima yeekaalu, ng'obuwantu eri mita amakumi ataano, n'oluggya lwa yeekaalu n'ekizimbe n'ebisenge byakwo byali obuwantu mita amakumi ataano.

¹⁴Obugazi bw'oluggya lwa yeekaalu ku luuyi olw'ebuvanjuba ng'ogasseeko emiryango wa yeekaalu waali mita amakumi ataano.

¹⁵N'apima obuwantu obw'ekizimbe ekyali mu maaso g'oluggya emanju wa yeekaalu, okwo nga kw'ogasse embalaza oluuyi n'oluuyi nga wali mita amakumi ataano. Ekifo Awatukuvu ebweru, n'ekifo Awatukuvu munda n'ekisasi mu maaso g'oluggya

¹⁶n'awayingirirwa, n'amadirisa amafunda n'embalaza okugeetooloola gonsatule, okwolekera omulyango byonna byabikkibwako embaawo, ne wansi, n'ekisenge okutuuka ku madirisa, n'amadirisa byabikkibwako.

¹⁷Mu bbanga eryali waggulu w'omulyango okutuuka mu wakuñjaanirwa munda, ne ku bisenge mu bifo ebitali bimu okwetooloola Awatukuvu munda, ne ku bisenge mu bifo ebitali bimu okwetooloola Awatukuvu munda n'ebweru,

¹⁸yakolebwa ne bakerubi n'enkindu, ng'olukindu luteekeddwa wakati wa bakerubi kinnababiry. Ne buli kerubi yalina ebyenyi bibiri

¹⁹ekyenyi ky'omusajja nga kyolekedde olukindu ku luuyi olumu n'ekyenyi ky'empologoma ento nga kyolekedde olukindu oluuyi olulala. Ebyo byakolebwa okwetooloola eyeekaalu yonna.

²⁰Okuva wansi okutuuka mu kibangirizi ekiri waggulu w'omulyango waaliwo bakerubi n'enkindu ebyawoolebwa ebweru ku kisenge ky'Awatukuvu.

²¹Omulyango ogw'Awatukuvu ebweru gwali gwa nsonda nnya era n'ogwo ogwali mu maaso g'Ekifo Ekitukuvu Ennyo gwali gugufaanana

²²Ekyoto kyabajibwa mu muti ng'obugulumivu kiri mita emu n'ekitundu, obuwantu n'obugazi mita emu, eruuyi n'eruuyi. Ensonda zaakyo n'obuwantu bwakyo n'ebisenge byakyo byali bya miti. Omusajja n'añjamba nti, "Eno ye mmeeza ebeera mu maaso ga MUKAMA."

²³Awatukuvu n'Awatukuvu w'Awatukuvu byalina enzigi za mpayi bbiri bbiri.

²⁴Buli luggi lwalina empaii bbiri, buli mwango nga gulina enzigi bbiri.

²⁵Era ku nzigi ezo ez'Awatukuvu kwali kwoleddwako ebifaananyi bya bakerubi n'eb'y'enkindu nga biri ebyayolebwa ku bisenge. Waaliwo n'akasasi akaakolebwa mu muti akali ku kisasi.

²⁶Ku bisenge eby'ebbali eby'ekisasi kwaliko amadirisa amawanvuyirivu nga mafunda agaali gooleddwako ebifaananyi eby'enkindu ku buli luuyi. N'ebisenge eby'ebbali ebya yeekaalu byalina obusasi.

Ezeekyeri 42

¹Awo omusajja n'ankulemberamu n'antwala mu luggya ebweru ku luuyi olw'Obukiikkono, n'antwala mu bisenge eby'ekizimbe ekyayolekera oluggya lwa yeekaalu era ekyayolekera bbugwe ku luuyi olw'Obukiikkono.

²Ekizimbe ekyo ekyaliko omuzigo ogwolekedde Obukiikkono, kyali mita amakumi ataano obuwanvu, n'obugazi mita amakumi abiri mu ttaano.

³Ekizimbe ekyo kyalina ennyumba bbiri. Ennyumba emu yali eyolekera oluggya olw'omunda oluli mita kkumi obugazi. Ennyumba endala n'eyolekera oluggya olw'ebweru. Ennyumba zombi zazimbibwa nga za kalina ssatu, nga zoolekaganye.

⁴Wakati w'ennyumba ezo ebbiri, waaliwo olukuubo mita ttaano obugazi, n'obuwanvu mita amakumi ataano. Enzigi ez'ennyumba eyolekera oluggya olw'omunda zaayolekera Obukiikkono.

⁵Ebisenge ebya waggulu byali bifunda okusinga ebibiri wansi, kubanga olubalaza olwa waggulu lwatwala ekifo kinene okusinga ku myaliiro egya wansi n'egya wakati mu kizimbe.

⁶Oluggya lwalina empagi naye ebisenge ebyali ku mwaliiro ogwokusatu tebyalimu mpagi, noolwekyo byali bitono okusinga ebyali ku mwaliiro ogwa wansi ne ku mwaliiro ogwa wakati.

⁷Waaliwo ekisenge eky'ebweru ekyali kigatta ennyumba zombi ez'ekizimbe, obuwanvu mita amakumi abiri mu ttaano.

⁸Olubu lw'ebisenge olw'ennyumba eri ku luuyi oluliraanye oluggya olw'ebweru obuwanvu bwali mita amakumi abiri mu ttaano, ate n'olubu lw'ebisenge olw'ennyumba ku luuyi olusinga okuliraana yeekaalu obuwanvu bwali mita amakumi ataano.

⁹Ebisenge ebya wansi byaliko omulyango ku luuyi olw'ebuvanjuba ogufuluma mu luggya olw'ebweru.

¹⁰Ku luuyi olw'Obukiikkaddyo obwa yeekaalu, waliwo ekizimbe ekyalina ennyumba bbiri ezaali wakati w'oluggya olwa yeekaalu, ne bbugwe.

¹¹Waaliwo olukuubo wakati w'ennyumba zombi. Zaafaanana ng'ennyumba ez'oku luuyi olw'Obukiikkono, ng'obuwanvu n'obugazi bwazo, n'emiryango nga bya bipimo ebyenkanankana n'eby'Obukiikkono.

¹²Emiryango gy'ebisenge eby'Obukiikkaddyo gyali gifaanana n'emiryango gy'ebisenge eby'Obukiikkono. Ekizimbe kyaliko omuzigo ogwolekedde Obukiikkaddyo, nga bw'oguyingiriramu oyolekera emiryango gy'ennyumba ennene ey'ekizimbe. Waaliwo omulyango omulala ku luuyi olw'ebuvanjuba olukuubo lw'ekizimbe eky'ennyumba zombi we lukoma.

¹³Awo n'aŋjamba nti, "Ebisenge eby'ennyumba eyolekedde yeekaalu eby'omu Bukiikkono n'eby'ennyumba eyolekedde yeekaalu eby'omu Bukiikkaddyo, by'ebisenge bya bakabona. Bakabona abawereza mu maaso ga MUKAMA gye banaaliranga ebintu ebitukuvu ennyo; era eyo gye banaatekanga ebiweebwayo ebitukuvu ennyo, n'ekiweebwayo eky'obutta n'ebiweebwayo olw'ekibi, n'ebiweebwayo olw'omusango, kubanga ekifo kitukuvu.

¹⁴Bakabona bwe bayingirangamu, tebaafulumenga kulaga mu luggya olw'ebweru, okuggyako nga baggyemu ebyambalo eby'obuweereza bwabwe, kubanga byambalo bitukuvu. Banaayambalanga ebyambalo ebirala, ne balyoka basemberera ebifo awali abantu."

¹⁵Bwe yamala okupima munda wa yeekaalu, n'ankulembera n'ampisa mu mulyango ogw'Ebuvanjuba, n'apima ekitundu ekyetoolodde wonna.

¹⁶N'apima oluuyi olw'ebuvanjuba n'oluti olugera, nga luli mita ebikumi bibiri mu ataano.

¹⁷N'apima oluuyi olw'Obukiikkono nga luli mita ebikumi bibiri mu ataano.

¹⁸N'olvannyuma n'apima oluuyi olw'Obukiikkaddyo nga luli mita ebikumi bibiri mu ataano.

¹⁹N'olvannyuma n'akyuka n'apima oluuyi olw'ebugwanjuba, nga luli mita ebikumi bibiri mu ataano.

²⁰N'apima enjuuyi ennya zonna. Yeekaalu yalina bbugwe okugyebungulula, mita ebikumi bibiri mu ataano obuwanvu, n'obugazi mita ebikumi bibiri mu ataano, nga kye kyawula awatukuvu n'awabulijjo.

Ezeekyeri 43

Ekitiibwa kya MUKAMA kikomawo mu Yeekaalu

¹Awo omusaja n'antwala ku mulyango ogwolekera Obuvanjuba,

²ne ndaba ekitiibwa kya Katonda wa Isirayiri nga kiva Ebuvanjuba, n'eddoboozi lye lyali ng'okuwuumma okw'amazzi amangi, n'ensi n'emasaamasa olw'ekitiibwa kye.

³Okwolesebwa kwe nalaba kwali nga kuli kwe nalaba bwe najja okuzikiriza ekibuga, era ng'okwolesebwa kwe nalaba ku lubalama lw'omugga Kebali; ne nvuunama.

⁴Awo ekitiibwa kya MUKAMA ne kiyingira mu yeekaalu nga kiyita mu luggi olwolekera Obuvanjuba,

⁵Omwoyo n'ansitula, n'andeeta mu luggya olw'omunda, n'ekitiibwa kya MUKAMA ne kijjula yeekaalu.

⁶Awo omusaja ng'ayimiridde okunninaana, ne mpulira omuntu ayogera nange ng'asinziira munda mu yeekaalu;

⁷n'aŋjamba nti, "Omwana w'omuntu, kino kye kifo eky'entebe ey'obwakabaka bwange, era ekifo eky'ebigere byange mwe nnaabeeranga wakati mu bantu ba Isirayiri emirembe gyonna. Ennyumba ya Isirayiri tebaliddayo kuvvoola linnya lyange ettukuvu, bo newaakubadde bakabaka baabwe, nga basinza emirambo gya bakabaka baabwe mu bifo byabwe ebigulumivu.

⁸Bwe baliraanya omulyango gwabwe okumpi n'ogwange, era n'emifuubeeto gyabwe okumpi n'egyange, ekisenge ekyereere nga kye kyawula nze nabo, bavvoola erinnya lyange ettukuvu n'emizizo gyabwe. Kyennava mbazikiriza n'obusungu bwange.

⁹Kaakano baggyewo eby'obugwagwa byabwe, n'okusinza emirambo gya bakabaka baabwe, era babiteke wala nange, nange naabeeranga wakati mu bo emirembe gyonna.

¹⁰"Omwana w'omuntu, abantu ba Isirayiri bannyonnyole endabika ya yeekaalu, bakwatibwe ensonyi olw'ebibi byabwe.

¹¹Bwe balikwadirwa ensonyi olw'ebyo byonna bye baakola olibategeeza eyeekaalu bw'efaanana, okutegekebwa kwayo, awafulimirwa n'awayingirirwa, n'ekifaananyi kyayo yonna, era n'ebiragiro byamu n'amateeka gaamu. Obiwandiikire mu maaso gaabwe babeere beesigwa okukuma ebiragiro byamu.

¹²"Etteeka lya yeekaalu lye lino: Ekifo kyonna ekyetoolodde ku ntikko ey'olusozi kinaabeeranga kitukuvu nnyo. Era eryo lye tteeka erya yeekaalu.

Ekyoto

¹³"Bino bye bipimo by'ekyoto: Entobo yaakyo eriba okukka sentimita amakumi ataano mu munaana n'obugazi sentimita amakumi ataano mu munaana, n'omugo gwakyo ku kamwa kaakyo okwetooloola guliba gwa sentimita amakumi abiri mu bbiri. Obugulumivu bw'ekyoto buliba:

¹⁴okuva ku ntobo wansi okutuuka ku mugo ogwa wansi, waliba obugulumivu mita emu ne desimoolo kkumi na mukaaga, obugazi sentimita amakumi ataano mu munaana, ate okuva ku mugo omutono okutuuka ku mugo omunene,

obugulumivu mita bbiri ne desimoolo asatu mu bbiri, obugazi sentimita amakumi ataano mu munaana.

¹⁵Entobo ey'ekyoto eriba obugulumivu mita bbiri ne desimoolo asatu mu bbiri, n'okuva ku ntobo ey'ekyoto okwambuka waliba amayembe ana.

¹⁶Entobo ey'ekyoto eriba ya nsonda nnya, nga zenkanankana, obuwanyu mita mukaaga ne desimoolo kyenda mu mukaaga, n'obugazi mita mukaaga ne desimoolo kyenda mu mukaaga.

¹⁷Omugo ogwa waggulu guliba gwa nsonda nnya ezenkanankana obuwanyu mita munaana ne desimoolo kkumi na bbiri n'obugazi mita munaana ne desimoolo kkumi na bbiri, n'omugo ogugwetooloola guliba obugazi sentimita amakumi abiri mu mwenda, n'entobo yaagwo eriba sentimita ataano mu munaana okugwetooloola. Amadaala ag'ekyoto galitunuulira Ebuvanjuba."

¹⁸N'aŋjamba nti, "Omwana w'omuntu, bw'ati bw'ayogera MUKAMA Katonda nti; Bino bye biriba ebiragiro bye munaagobereranga nga muwaayo ebiweebwayo ebyokebwa n'okumansira omusaayi ku Kyoto, nga kiwedde okuzimbibwa.

¹⁹Muliwaayo ente ennume ento ng'ekiweebwayo olw'ekibi eri bakabona Abaleevi ab'eniyumba ya Zadooki, abampeereza bw'ayogera MUKAMA Katonda.

²⁰Oliddira omusaayi ogumu okuva mu nte eyo n'oguteeka ku mayembe ana ag'ekyoto, ne ku nsonda ennya ez'omugo ogwa waggulu ne ku mugo ogwa kamwa kaakyo okwetooloola, ne mutukuza ekyoto era ne mu kitangirira.

²¹Muliddira ente ennume ey'ekiweebwayo olw'ekibi, ne mugyokera mu kifo ekyalondebwa ekya yeekaalu ebweru w'Awatukuvu.

²²"Ku lunaku olwokubiri muliwaayo embuzi ennume eteriiko kamogo okuba ekiweebwayo olw'ekibi, n'ekyoto kiritukuzibwa mu ngeri y'emu nga bwe kyatukuzibwa n'ente ennume.

²³Bwe mulimala okukitkuza, muliwaayo akalume k'ente akato, n'endiga ennume okuva mu kisibo nga teriiko kamogo.

²⁴Mulizireeta mu maaso ga MUKAMA, bakabona ne bamansira omunyyo ku nnyama yaazo, ne baziwaayo ng'ebiweebwayo ebyokebwa eri MUKAMA.

²⁵"Mulimala ennaku musanvu nga muwayo embuzi ennume emu buli lunaku ng'ekiweebwayo olw'ekibi. Era muliwaayo n'ente ennume n'endiga ennume, byombi nga tebiriko kamogo.

²⁶Balimala ennaku musanvu nga batangirira ekyoto era nga bakitkuza; bwe batyo ne bakiwaayo eri Katonda.

²⁷Oluvannyuma lw'ennaku ezo, okutandika n'olunaku olw'omunaana, bakabona baliwaayo ebiweebwayo byammwe ebyokebwa, n'ebiweebwayo byammwe olw'emirembe ku kyoto. Kale ndibasembeza, bw'ayogera MUKAMA Katonda."

Ezeekyeri 44

Omolangira, Abaleevi Ne Bakabona

¹Awo omusajja n'ankomyawo ku mulyango ogw'ebweru ogw'Awatukuvu ogutunuulira obuvanjuba; gwali muggale.

²MUKAMA n'aŋjamba nti, "Omulyango guno gwa kusigalanga nga muggale. Teguteekwa kugulwanga newaakubadde omuntu yenna okuguyitangamu. Gwa kusigalanga nga muggale kubanga MUKAMA, Katonda wa Isirayiri yaguyitamu.

³Omolangira yennyini, ye yekka anaatulanga mu mulyango n'aliira mu maaso ga MUKAMA, era nnaayingiranga ng'ayita mu kkubo ery'ekisasi eky'omulyango, ne mu kkubo eryo mw'anaafulumiranga."

⁴Awo omusajja n'ankulembera ne tuyita mu kkubo ery'omulyango ogw'Obukiikkono n'antwala mu maaso ga yeekaalu. Ne ntunula ne ndaba ekitiibwa kya MUKAMA nga kijjudde yeekaalu ya MUKAMA, ne nvuunama.

⁵MUKAMA n'aŋjamba nti, "Omwana w'omuntu, tunula weetegereze, owulirize bulungi era osseeyo omwoyo eri buli kye n'akugamba ku biragiro ebikwata ku nzirukanya ya yeekaalu ya MUKAMA. Tunula weetegereze bulungi awayingirirwa mu yeekaalu n'awafulumirwa wonna aw'Awatukuvu.

⁶Tegeeza ennyumba ya Isirayiri enjeemu nti, 'Bw'ati bw'ayogera MUKAMA Katonda nti; ebikolwa byammwe eby'emizizo bikome, mmwe ennyumba ya Isirayiri.'

⁷Ate n'okwogera ku ebyo ebikolwa byammwe eby'emizizo byonna, mukkiriza bannaggwanga, abatali bakomole mu mutima newaakubadde omubiri okuyingira Awatukuvu wange, ne boonoona eyeekaalu yange nga mmwe bwe mumpeerayo emmere, amasavu n'omusaayi ne mumenza endagaano yange.

⁸Mu kifo eky'okukola ebibagwanira ng'ebintu byange ebitukuvu bwe biri, abalala bannaggwanga be mwakwasa okuvunaanyizibwa empya zange.

⁹Kale MUKAMA Katonda kyava ayogera nti, Tewaliba munaggwanga n'omu atali mukomole mu mutima newaakubadde omubiri aliyingira mu Watukuvu wange, newaakubadde bannaggwanga ababeera mu Bayisirayiri wakati.

¹⁰"Naye Abaleevi abanvaako, Isirayiri bwe yakyama, ne bagoberera bakatonda abalala, balibonerezebwa.

¹¹Baliba bawereera mu watukuvu wange, nga balabirira emiryango gya yekala, era ng'omwo mwe baweerereza; banattiranga abantu ebiweebwayo ebyokebwa ne ssaddaaka, era banabawerezanga.

¹²Naye kubanga baabaweerereza mu maaso ga bakatonda abalala, ne baleetera ennyumba ya Isirayiri okugwa mu kibi, kyendiva mbalayirira okubabonereza olw'ekibi kyabwe, bw'ayogera MUKAMA Katonda.

¹³Tebalinsemberera kumpeereza nga bakabona newaakubadde okusemberera ekintu kyonna ku bintu byange ebitukuvu, oba ebiweebwayo byange ebitukuvu ennyo; kubanga baakola ebiswaza n'eb'yekivve.

¹⁴Naye ndibalonda okuvunaanyizibwa emirimu gya yekala, n'eb'yokukola byonna ebiteekwa okukolebwa mu yo.

¹⁵“Naye bakabona Abaleevi ne bazzukulu ba Zadooki, abavunaanyizibwa emirimu mu watukuvu wange n'obwesigwa, ng'abaana ba Isirayiri banjeemedde, balisembera okumpi nange ne bampeereza, era be baliyimirira mu maaso gange okuwangayo gye ndi amasavu n'omusaayi, bw'ayogera MUKAMA Katonda.

¹⁶Abo bokka be banaayingiranga mu watukuvu wange, era be banaasemberanga okumpi n'em meeza yange okumpeerezanga, n'okukuumanga ebyo bye mbalagira.

¹⁷“Bwe banaayingiranga mu miryango egy'oluggya olw'omunda banaayambalanga ebyambalo eby linena; tebateekwa kwambalanga byambalo bya byoya by'endiga, nga baweerereza mu miryango egy'oluggya olw'omunda ne munda wa yekala.

¹⁸Baneesibanga ebitambala ku mutwe nga bya linena, n'engoye ez'omunda nga za linena. Tebateekwa kwambalanga kintu n'ekimu ekibatuuyanya.

¹⁹Bwe banaabanga bafuluma nga balaga mu luggya olw'ebweru eri abantu, banaayambulangamu ebyambalo byabwe bye baweererezaamu, ne babitereka mu bisenge ebyatukuzibwa, ne bambala engoye endala balemenga okutkuza abantu n'ebiyambalo byabwe.

²⁰“Tebateekwa kumwa mitwe gyabwe newaakubadde okuleka enviiri zaabwe okukula ennyo, naye banaazisalangako ne zisigala nga nto.

²¹Tewabanga kabona n'omu anywa nvinnyo ng'ayingidde mu luggya olw'omunda.

²²Tebateekeddwa kuwasa bannamwandu newaakubadde eyanoba, naye banaawasanga abawala embeerera nga ba lulyo lwa Isirayiri oba nga bannamwandu ba bakabona.

²³Banaayigirizanga abantu bange enjawulo wakati w'ekitukuvu n'ekitali kitukuvu, era nga babalaga enjawulo wakati w'ekirongoofu n'ekitali kirongoofu.

²⁴“Bwe wanaabangawo enkaayana, bakabona be banaabanga abalamuzi, okusalawo ng'ebiragiro byange bwe biri. Banaakumanga amateeka gange n'ebiragiro byange ku mbaga zange zonna ezaalagirwa, era banaakumanga Ssabiiti zange nga ntukuvu.

²⁵“Kabona taasembererenga mulambo aleme okweyonoonyesa, naye kitaawe bw'anaabanga y'afudde, oba nnyina, oba mutabani we oba muwala we, oba muganda we, oba mwannyina atafumbirwangako, kale aneeyonoonesanga.

²⁶Oluvannyuma olw'okwetukuza, anaalindanga ennaku musanvu ziyyite.

²⁷Awo ku lunaku lw'anaalaganga mu luggya olw'omunda olwa watukuvu okuweereza mu watukuvu, aneweerangayo ekiweebwayo olw'ekibi, bw'ayogera MUKAMA Katonda.

²⁸“Nze nnaabanga omugabo gwa bakabona. Temuubawenga mugabo na gumu mu Isirayiri; nze mugabo gwabwe.

²⁹Banaalyanga ebiweebwayo eby'obutta, n'ebiweebwayo olw'ekibi, n'ebiweebwayo olw'omusango, ne buli kintu mu Isirayiri ekiwonge eri MUKAMA kinaabanga kyabwe.

³⁰Ebisina obulungi ku bibala byonna ebisooka ebya buli kika n'ebirabo byonna eby'omuwendo binaabanga bya bakabona. Munaabawanga obutta bwammwe obwasooka okugoyebwa, omukisa gubeerenga ku nnyumba zammwe.

³¹Bakabona tebaalyenga kintu na kimu, oba nnyonyi oba nsolo, ebisangiddwa nga bifu olumbe lwabyo nga byataagulwa nsolo.

Ezeekyeri 45

Okugabanyaamu Ensi

¹“Bwe muligabana ensi ng'omugabo gwammwe, musalangako ekitundu ekya MUKAMA ku nsi eyo, ky'ekifo ekitukuvu, obuwanyu mayilo munaana, n'obugazi mayilo mukaaga era ekifo kyonna kinaabanga kitukuvu.

²Ku ttaka eryo kunaasalibwangako ekifo eky'Awatukuvu ekyenkana mita ebikumi bibiri mu nkaaga buli ludda mu buwanvu ne mu bugazi, n'oluggya okukyetooloola luliba lwa mita amakumi abiri mu mukaaga.

³Mu kifo ekitukuvu olipima ekigera obuwanyu mayilo munaana, n'obugazi mayilo ssatu, era omwo mwe muliba awatukuvu, Ekifo Ekitukuvu Ennyo.

⁴Ekyo kye kiriba ekifo ekitukuvu ekya bakabona abaweereza mu watukuvu, era abasemberera MUKAMA okumuweereza. Kye kiriba ekifo eky'ennyumba zaabwe n'ekigo ekitukuvu eky'Awatukuvu.

⁵Ekifo ekirala obuwantu mayilo musantu n'obugazi mayilo ssatu kye kiriba eky'Abaleevi, abawereza mu yeekaalu, era baliba n'ebisenge amakumi abiri eby'okubeeramu ng'ebyo bye bikola ebibuga byabwe.'

⁶"Muteekeddwa okuwa ekibuga obutaka bwakyo: obugazi mayilo emu n'ekitundu, n'obuwantu mayilo musantu okuliraana ekifo eky'omugabo omutukuvu, era kiriba kya nnyumba yonna eya Isirayiri."

⁷"Omulangira alifuna ettaka ku nsalo eri wakati w'omugabo omutukuvu n'ettaka ery'ekibuga, ku luuyi olw'Ebugwanjuba ne ku luuyi olw'ebuvanjuba, mu buwanvu nga buva Ebugwanjuba ne butuuka Ebuvanjuba okuliraana n'omugabo ogw'ekika ekimu.

⁸Ettaka eryo lye linaabanga omugabo gwe mu Isirayiri so n'abalangira tebaajoogenga bantu bange naye balikkiriza ennyumba ya Isirayiri okufuna omugabo mu nsi ng'ebika byabwe bwe biri.'

⁹"Bw'ati bw'ayogera MUKAMA Katonda nti; Kye mukoze kimala, mmwe abalangira ba Isirayiri! Temukuluusanya abantu bange n'okubanyigiriza, mutuukirize eby'ensonga era ebituufu. Temubagobaganya, bw'ayogera MUKAMA Katonda.

¹⁰Munaakozesanga minzaani entuufu okupima ebikalu era n'ebitali bikalu ebiyiika.

¹¹Efa n'ensuwa binaabanga bya kigera kimu, ensuwa ng'egyamu eky'ekimu eky'ekkumi eky'ekomeri, n'efa ng'egyamu eky'ekimu eky'ekkumi eky'ekomeri, ng'ekomeri kye kigera ekikozesebw.

¹²Sekeri eriba gera amakumi abiri, era sekeri amakumi abiri n'ogattako sekeri amakumi abiri mu ttaano, n'oyongerako sekeri kkumi na ttaano, n'ewera maane emu, ekyo kye kiriba ekigera kyammwe.

Ebiweebwayo n'Ennaku Entukuvu

¹³"Kino kye kirabo eky'enjawulo kye muliwaayo: kilo biri n'obutundu musantu n'ekitundu ez'enjaano, ne kilo bbiri n'obutundu bubiri n'ekitundu eza sayiri.

¹⁴Omugabo ogw'amafuta, ogupimibba n'ensuwa, guliba lita bbiri n'obutundu bubiri.

¹⁵Era muliwaayo endiga emu okuva mu kisibo ekimu, buli kisibo nga kirimu endiga ebikumi bibiri, ezirundibwa ku malundiro amagimu aga Isirayiri. Ebyo bye biriba ebiweebwayo eby'obutta n'ebiweebwayo ebyokebwa, n'ebiweebwayo olw'emirembe, okubatangiriranga, bw'ayogera MUKAMA Katonda.

¹⁶Abantu bona ab'omu nsi banaawangayo ekirabo ekyo eri omulangira mu Isirayiri.

¹⁷Omulangira anavunaanyizibwanga okuwaayo ebiweebwayo ebyokebwa, n'ebiweebwayo eby'obutta, n'ebiweebwayo eby'okunywa ku mbaga ez'emyezi egyakaboneka n'ezza Ssabiiti, ne ku mbaga zonna ezaalagirwa ez'ennyumba ya Isirayiri; y'anaagabulanga ebiweebwayo olw'ebibi, n'ebiweebwayo eby'obutta, n'ebiweebwayo ebyokebwa, n'ebiweebwayo olw'emirembe, okutangiriranga ennyumba ya Isirayiri.

¹⁸“Bw'ati bw'ayogera MUKAMA Katonda nti, Mu mwezi ogw'olubereberye ku lunaku olw'olubereberye mu mwezi, oliddira ente ennume nga nto eteriiko kamogo, n'ogiwaayo okutukuza awatukuvu.

¹⁹Kabona anaddiranga ku musaayi ogw'ekiweebwayo olw'ekibi n'agumansira ku mifuubeeto gy'enzigi za yeekaalu, ne ku nsonda ennya ez'ekyoto ne ku mifuubeeto eglyomulyango ogw'oluggya olw'omunda.

²⁰Bwe mutyo bwe munaakolanga ku lunaku olw'omusanvu olw'omwezi ku lw'omuntu yenna aliba ayonoonye mu butali bugenderevu n'oyo aliba ayonoonye olw'obutamanya; bwe mutyo bwe munaatangiriranga eyeekaalu.

²¹“Mu mwezi ogw'olubereberye ku lunaku olw'ekkumi n'enya mukwatenga Okuyitako, era ku mbaga eyo munaalyanga emigaati egitali mizimbulukuse okumala ennaku musanvu.

²²Ku lunaku olwo omulangira alireeta ku lulwe ne ku lw'abantu bona ab'omu nsi ente ennume nga nto okuba ekiweebwayo olw'ekibi.

²³Buli lunaku mu nnaku omusanvu ez'embaga, anaawangayo ente ennume nga nto musanvu n'endiga ennume musanvu nga teziriiko kamogo, okuba ebiweebwayo ebyokebwa eri MUKAMA.

²⁴Anaagabanga n'ekiweebwayo eky'obutta, kilo mwenda ku lwa buli nte nto ennume, n'efa ku lwa buli ndiga ennume, ne lita nnya ez'amafuta buli efa.

²⁵“Mu mwezi ogw'omusanvu, ku lunaku olw'ekkumi n'ettaano mu mwezi, anaateekwa okugabanga ebiweebwayo olw'ekibi, n'ebiweebwayo ebyokebwa, n'ebiweebwayo eby'obutta n'amafuta okumala ennaku musanvu ez'embaga.’

Ezeekyeri 46

¹“Bw'ati bw'ayogera MUKAMA Katonda nti, Omulyango ogw'oluggya olw'omunda olutunuulira Ebuvanjuba gunaabanga muggale ennaku mukaaga ezikolerwamu, naye ku lunaku olwa Ssabiiti ne ku lunaku olw'omwezi ogwakaboneka gunaggulwanga.

²Omulangira anaayingiriranga mu kisasi okuva ebweru, n'ayimirira awali omufuubeeto ogw'omulyango. Bakabona banaateekateekanga ekiweebwayo kye ekyokebwa n'ebiweebwayo bye olw'emirembe. Anaasinzizanga

awayingirirwa ku mulyango; n'oluvannyuma anaafulumanga, naye oluggi teluggalwenga okutuusa akawungeezi.

³Bwe batyo n'abantu ab'omu nsi bateekwa okusinzizanga ku luggi olw'omulyango mu maaso ga MUKAMA ku Ssabbiiti ne ku myezi egyakaboneka.

⁴Ekiweebwayo ekyokebwa omulangira ky'anaaleetanga eri MUKAMA ku lunaku olwa Ssabbiiti kinaabanga abaana b'endiga ennume mukaaga nga tebaliiko kamogo n'endiga ennume enkulu emu eteriiko kamogo;

⁵n'ekiweebwayo eky'emmere ey'empeke ekinaaweebwangayo n'endiga ennume kinaabanga kilo kkumi na mukaaga, n'ekiweebwayo eky'obutta ekinaaweebwangayo n'abaana b'endiga ennume binaabanga ebirabo, awamu ne lita nnya ez'amafuta eza buli efa.

⁶Ku lunaku olw'omwezi ogwakaboneka anaawangayo ente ennume nga nto eteriiko kamogo, n'abaana b'endiga mukaaga n'endiga ennume nga nkulu, ebitaliiko kamogo;

⁷era anaawangayo ekiweebwayo eky'emmere ey'empeke kilo kkumi na mukaaga ku lw'ente ennume, n'eky'emmere ey'empeke n'endiga ennume emu, n'abaana b'endiga nga bye birabo, awamu ne lita nnya ez'amafuta eza buli efa.

⁸Awo omulangira bw'anaayingiranga, anaayitanga mu kisasi ky'omulyango, era mu kkubo lye limu eryo mw'anaafulumiranga.

⁹"'Abantu ab'omu nsi bwe banajjanga mu maaso ga MUKAMA ku mbaga ezaalagirwa, buli anaayingiranga mu mulyango ogw'Obukiikkono okusinza, anaafulumiranga mu mulyango ogw'Obukiikkaddyo; ne buli anaayingiriranga mu mulyango ogw'Obukiikkaddyo anaafulumiranga mu mulyango ogw'Obukiikkono; tewaabenga muntu addirayo mu kkubo ery'omulyango mwe yayingiridde, naye anaayitangamu buyisi n'aggukira ku luuyi olwolekera lwe yayingiriddeko.

¹⁰Omulangira anaabeeranga wakati mu bo, bwe banaayingiranga, naye anaayingiranga, bwe banaafulumanga, naye anaafulumanga.

¹¹Ku mbaga ne mu biseera ebyalondebwa bino bye binaabanga ebiweebwayo: ekiweebwayo eky'emmere ey'empeke nga kya kilo kkumi na mukaaga n'ente ennume emu ne kilo kkumi na mukaaga ez'emmere ey'empeke n'endiga ennume emu, awamu n'abaana b'endiga ng'omuntu bw'anaayinzanga, ng'okwo kw'otadde lita nnya ez'amafuta eza buli efa.

¹²"'Awo omulangira bw'anaateekateekanga ekyo ky'asiimye ku bubwe n'akiwaayo eri MUKAMA, ng'ekiweebwayo ekyokebwa oba ng'ebiweebwayo olw'emirembe, anaaggulirwangawo omulyango ogutunuulira obuvanjuba, era nnaawangayo ekiweebwayo kye ekyokebwa oba ekiweebwayo kye

olw'emirembe nga bw'akola ku lunaku olwa Ssabbiiti. N'oluvannyuma ng'amaze anaafulumanga, omulyango ne guggalwa.

¹³ “Munaawangayo omwana gw'endiga ogw'omwaka ogumu ogutaliiko kamogo okuba ekiweebwayo eri MUKAMA buli lunaku; ekyo munaakikolanga buli nkya.

¹⁴ Munaakiweerangayo n'ekiweebwayo eky'emmere ey'empeke buli nkya, ekiri kilo bbiri n'obutundu musanvu n'ekitundu awamu ne lita ennya ez'amafuta okunnyikiza obutta obulungi okuwangayo ekiweebwayo eky'emmere ey'empeke eri MUKAMA ekya buli lunaku; kinaabanga ekiragiro ekitaliggwaawo.

¹⁵ Noolwekyo omwana gw'endiga n'ekiweebwayo eky'obutta, n'amafuta binaaweebwangayo buli nkya okuba ekiweebwayo ekyokebwa ekya bulijo.

¹⁶ “Bw'ati bw'ayogera MUKAMA Katonda nti; Omulangira bw'anaagabiranga omu ku batabani be ekirabo okuva ku by'omugabo gwe, kinaabanga busika bwa bazzukulu be; era nga bwansikirano.

¹⁷ Naye omulangira bw'anaddiranga ekirabo okuva ku by'omugabo gwe n'akiwa omu ku baddu be, kinaabanga kikye okutuuka ku mwaka ogw'eddembe, n'oluvannyuma kinaddizibwanga omulangira kubanga omugabo gunaabanga gugwe n'abaana be bokka.

¹⁸ Omulangira taatwalenga ttaka ly'abantu okubagoba mu butaka bwabwe; anaagabiranga abaana be omugabo gwabwe okuva ku butaka bwe, waleme okubaawo omuntu yenna ku bantu bange aggyibwako obutaka bwe.”

¹⁹ Awo omusajja n'ampisa mu mulyango ku luuyi olw'omulyango wakati w'ebisenge ebitukuvu ebya bakabona olutunuulira Obukiikkono, n'andaga ekifo ku luuyi olusembayo Ebugwanjuba.

²⁰ N'anjamba nti, “Kino kye kifo bakabona we banaafumbiranga ekiweebwayo olw'omusango n'ekiweebwayo olw'ekibi, era gye banaafumbiranga emigaati egy'ekiweebwayo eky'emmere ey'empeke, baleme okubifulumya mu luggyia olw'ebweru okutukuza abantu.”

²¹ N'oluvannyuma omusajja n'antwala mu luggyia olw'ebweru, n'annambuza ensonda ennya ez'oluggyia, mu buli nsonda ne ndabamu oluggyia olulala.

²² Mu nsonda ennya ez'oluggyia mwalimu empya entonotono obuwanyu mita amakumi abiri mu emu n'obugazi mita kkumi na ttaano ne desimoolo musanvu, era nga za kigera kimu.

²³ Munda okwetooloola empya mwalimu ebifo eby'okuweesezaamu nga mulimu n'ebyoto wansi w'embu enjuuyi zonna.

²⁴ N'anjamba nti, “Gano ge mafumbiro abaweereza gye banaafumbiranga ssaddaaka abantu ze banaawangayo mu yeekaalu.”

Ezeekyeri 47

Oluzzi Olusibuka mu Yeekaalu

¹Awo omusajja n'ankomyawo ku mulyango ogwa yeekaalu, ne ndaba amazzi nga gava wansi w'omulyango gwa yeekaalu ku luuyi olw'ebuvanjuba kubanga yeekaalu yali etunudde ku luuyi olw'ebuvanjuba. Amazzi gaali gakulukuta nga gava wansi ku luuyi olwa ddyo olwa yeekaalu, ku luuyi olw'Obukiikaddyo obw'ekyoto.

²N'anfulumiza mu mulyango gw'Obukiikkono, n'ankulembera n'anneetoolooza ebweru eri oluggi olw'ebweru olutunuulidde Ebuvanjuba, era laba amazzi gaali gakulukuta okuva ku luuyi olw'Obukiikaddyo.

³Awo omusajja eyalina olupimo mu mukono gwe, n'alaga ku luuyi olw'ebuvanjuba yapima mita ebikumi bina mu ataano, n'alyoka ampisa mu mazzi, agaali gakoma mu bukongovvule.

⁴N'apima mita endala ebikumi bina mu ataano, n'ampisa mu mazzi agaali gankoma mu maviivi. N'apima mita endala ebikumi bina mu ataano, n'ampisa mu mazzi agaali gankoma mu kiwato.

⁵N'apima mita endala ebikumi bina mu ataano, naye katimazzi gaali gafuuse mugga gwe nnali sisobola kusomoka kubanga amazzi gaali gatumbidde era nga mangi agawugibwamu obuwugirwa, omugga ogwali gutasoboka kusomokebwa.

⁶N'ambuuza nti, "Omwana w'omuntu, kino okiraba?" N'anzizaayo ku lubalama lw'omugga.

⁷Awo bwe natuuka eyo, laba ne ndaba ku lubalama lw'omugga emitimengi nnyo eruuyi n'eruuyi w'omugga.

⁸N'aŋjamba nti, "Amazzi gano gakulukuta gadda mu kitundu eky'ensi eky'Ebuvanjuba, ne gaserengeta mu ddungu, ne gayingira mu Nnyanja. Omugga bwe guyiwa mu Nnyanja amazzi ne galongooka.

⁹Buli kiramu tekirifa yonna omugga gye guyita, era mulibeeramu ebyennyanja bingi nnyo, kubanga amazzi gano agakulukutirayo gafuula amazzi ag'omu Nnyanja ey'Omunnyo okuba amalungi, noolwekyo omugga gye guyita, ebantu byonna binaabeeranga biramu.

¹⁰Abavubi banaayimiriranga ku lubalama lwagwo okuva mu Engedi okutuuka e Negalayimu; walibeerayo ebifo ebyokwanikamu obutimba. Buli byannyanja biriba mu bika byabyo, era nga bingi nnyo nnyini ng'ebiennyanja eby'omu Nnyanja Ennene, ye Meditereeniya.

¹¹Naye ebifo eby'ettosi n'ebisaalu tebirilongooka, birisigala nga bya munnyo.

¹²Emiti eg'yebibala ebya buli kika girimera eruuyi n'eruuyi w'omugga, n'ebikoola byagyo tebiriwotoka era tegiibulengako bibala. Buli mwezi

ginaabeerangako ebibala, kubanga amazzi gaagyo agava mu Watukuvu gagifikirira. Ebibala byagyo biriba mmere, n'ebikoola byagyo biriba ddagala eriwonya.”

Ensalo ez'ensi

¹³ Bw'ati bw'ayogera MUKAMA Katonda nti, “Bwe muti bwe munaasala ensalo nga mugabanya ensi mu bika bya Isirayiri ekkumi n'ebibiri, ng'ekika kya Yusufu kiweebwa emigabo ebiri.

¹⁴ Muligibagabanyizaamu mu bwenkanya, kubanga nagirayirira bajjajammwe, era ettaka liriba mugabo gwabwe.

¹⁵ “Ensalo z'ensi eyo ziriba bwe ziti: “Ku luuyi olw'Obukiikkono, eriva ku Nnyanja Ennene ku mabbali g'ekkubo ery'e Kesulooni okutuuka awayingirirwa e Kamasi, ng'ogenda e Zedadi,

¹⁶ Berosa, Sibulayimu ekiri ku nsalo wakati w'e Ddamasiko n'e Kamasi, okutuukira ddala e Kazerukattikoni ekiri ku nsalo y'e Kawulaani.

¹⁷ Era ensalo eriva ku nnyanja okutuuka e Kazalenooni ekiri ku nsalo y'e Ddamasiko ey'Obukiikkono, okuliraana Kamasi mu Bukiikkono. Era eyo y'eriba ensalo ey'Obukiikkono.

¹⁸ Ku luuyi olw'ebuvanjuba ensalo eriva e Kazalenooni ekiri wakati wa Kawulaani ne Ddamasiko ku lubalama lwa Yoludaani wakati wa Gireyaadi n'ensi ya Isirayiri era n'okutuuka ku nnyanja ey'Ebuvanjuba. Eyo y'eriba ensalo ey'Ebuvanjuba.

¹⁹ Ku luuyi olw'Obukiikkaddyo eriva e Tamali okutuukira ddala ku mazzi ag'e Meribosukadesi, ne ku kagga ak'e Misiri okutuuka ku Nnyanja Ennene. Eyo y'eriba ensalo ey'Obukiikkaddyo.

²⁰ Ku luuyi olw'ebugwanjuba, Ennyanja Ennene, ye Meditereeniya y'eriba ensalo okutuuka awayolekera awayingirirwa e Kamasi, era eyo y'eriba ensalo ey'Ebugwanjuba.

²¹ “Muligabana ensi eno ng'ebika bya Isirayiri bwe biri.

²² Muligabana ng'omugabo wakati wammwe ne bannaggwanga abali nammwe, abazaalidde abaana mu mmwe. Mulibatwala ng'abazaaliranwa ba Isirayiri, era baligabana omugabo mu bika bya Isirayiri.

²³ Era mu buli kika munnaggwanga mw'anaabeeranga, eyo gye mulimuwa omugabo gwe,” bw'ayogera MUKAMA Katonda.

Ezeekyeri 48

Okugabana kw'Ettaka

¹ “Gano ge mannya g’ebika: “Ku nsalo ey’Obukiikakkono, okuva ku nnyanja n’okuyita mu kkubo Agekusulooni okutuuka awayingirirwa mu Kamasi n’okutuuka Kazalenooni ekiri ku nsalo y’e Ddamasiko ku luuyi olw’Obukiikakkono okuliraana Kamasi, okuva ku luuyi olw’ebuvanjuba okutuuka ku luuyi olw’ebugwanjuba, gwe guliba omugabo gwa Ddaani.

² N’okuliraana Ddaani okuva ku luuyi olw’ebuvanjuba okutuuka ku luuyi olw’ebugwanjuba guliba mugabo gwa Aseri.

³ N’okuliraana Aseri okuva ku luuyi olw’ebuvanjuba okutuuka ku luuyi olw’ebugwanjuba guliba mugabo gwa Nafutaali.

⁴ N’okuliraana Nafutaali okuva ku luuyi olw’ebuvanjuba okutuuka ku luuyi olw’ebugwanjuba guliba mugabo gwa Manase.

⁵ N’okuliraana Manase okuva ku luuyi olw’ebuvanjuba okutuuka ku luuyi olw’ebugwanjuba guliba mugabo gwa Efulayimu.

⁶ N’okuliraana Efulayimu okuva ku luuyi olw’ebuvanjuba okutuuka ku luuyi olw’ebugwanjuba guliba mugabo gwa Lewubeeni.

⁷ N’okuliraana Lewubeeni okuva ku luuyi olw’ebuvanjuba okutuuka ku luuyi olw’ebugwanjuba guliba mugabo gwa Yuda.

⁸ “Okuliraana Yuda okuva ku luuyi olw’ebuvanjuba okutuuka ku luuyi olw’ebugwanjuba gwe guliba omugabo gwe muligaba ng’ekirabo eky’enjawulo. Obugazi guliba mayilo munaana, n’obuwanvu okuva ku luuyi olw’ebuvanjuba okutuuka ku luuyi olw’ebugwanjuba guliba ekipimo kye kimu, ng’ogumu ku migabo gy’ebika. Mu makkati g’ekitundu ekyo we waliba ekifo ky’Awatukuvu.

⁹ “Omugabo ogw’enjawulo gwe muligabira MUKAMA guliba obuwanvu mayilo munaana n’obugazi mayilo ssatu.

¹⁰ Omugabo ogwo ogwawuddwako guliba gwa bakabona era guliba mayilo munaana obuwanvu ku luuyi olw’ebuvanjuba, n’obugazi mayilo ssatu ku luuyi olw’Obukiikakkono, n’obugazi mayilo ssatu ku luuyi olw’ebugwanjuba n’obuwanvu mayilo munaana ku luuyi olw’Obukiikkaddyo. Mu makkati g’ekitundu ekyo we waliba ekifo ky’Awatukuvu wa MUKAMA.

¹¹ Ekifo ekyo kiriba kya bakabona abaatukuzibwa bazzukulu ba Zadooki, abaamperezanga n’obwesigwa ne batawaba ng’abaana ba Isirayiri bwe baakola, era ng’Abaleevi abalala bwe banvaako.

¹² Kiriba kirabo kyabwe eky’enjawulo ekiggiddwa ku mugabo ogwawuddwa ku nsi, ekifo ekitukuvu ennyo okuliraana ekitundu ky’Abaleevi.

¹³ “Okuliraana ekitundu ekya bakabona, Abaleevi balifuna omugabo, obuwanvu mayilo munaana n’obugazi mayilo ssatu. Obuwanvu bwonna buliba mayilo munaana n’obugazi mayilo ssatu.

¹⁴Tebateekwa kikitunda newaakubadde okukiwaanyisa; wadde okuggyamu ebibala ebisooka eby'omu nsi kubanga kitukuvu eri MUKAMA.

¹⁵“Ekitundu ekirifikkawo ekiweza obuwantu mayilo munaana n'obugazi mayilo emu kiriba kifo kya bulijjo eky'ekibuga, okuzimbamu ennyumba. Ekibuga kiriba wakati wakyo,

¹⁶era ebipimo byakyo biriba ku luuyi olw'Obukiakkono mayilo emu n'ekitundu ne ku luuyi olw'Obukiakkono mayilo emu n'ekitundu, ne ku luuyi olw'ebuvanjuba mayilo emu n'ekitundu, ne ku luuyi olw'ebuvanjuba mayilo emu n'ekitundu.

¹⁷Ekifo ekiri ebbali w'ekibuga kiriba n'ebipimo byakyo; ku luuyi olw'Obukiakkono mita ebikumi bibiri mu nkaaga, ne ku luuyi olw'Obukiakkono mita ebikumi bibiri mu nkaaga, ne ku luuyi olw'ebuvanjuba mita ebikumi bibiri mu nkaaga, ne ku luuyi olw'ebuvanjuba mita ebikumi bibiri mu nkaaga.

¹⁸Ekitundu ekirifikkawo okuliraana omugabo omutukuvu, kiriba obuwantu mayilo ssatu ku luuyi olw'ebuvanjuba ne mayilo ssatu ku luuyi olw'ebuvanjuba, n'ebibala byamu bye biriba emmere y'abakola mu kibuga.

¹⁹Abakola mu kibuga baliva mu bika byonna ebya Isirayiri.

²⁰Ekifo kyonna awamu kiriba kyenkana obuwantu n'obugazi ze mayilo munaana buli luuyi. Ekyo kye kiriba ekirabo eky'enjawulo eky'omugabo omutukuvu, awamu n'ettaka ly'ekibuga.

²¹“Ekitundu ekirifikkawo ku njuyi zombi ez'omugabo omutukuvu n'ettaka ly'ekibuga biriba bya mulangira. Okugenda mu Buvanjuba ekimu kiriba mayilo munaana ez'omugabo omutukuvu okutuuka ku nsalo ey'Ebugwanjuba, n'ekirala okudda mu Bugwanjuba kiriba mayilo munaana okutuuka ku nsalo ey'Ebugwanjuba. Ebifo ebyo byombi okuliraana emigabo egy'ebika biriba bya mulangira. Omugabo omutukuvu, awamu n'Awatukuvu wa yeekaalu, biriba wakati wakyo.

²²Ekitundu ky'Abaleevi n'ettaka ly'ekibuga biriba wakati mu kitundu ky'omulangira. Ekifo ky'omulangira kiriba wakati w'ensalo ya Yuda n'ensalo ya Benyamini.

²³“N'ebika ebirala birigabana bwe biti: “Okuva ku luuyi olw'ebuvanjuba okutuuka ku luuyi olw'ebuvanjuba, gwe guliba omugabo gwa Benyamini.

²⁴N'okuliraana ensalo ya Benyamini okuva ku luuyi olw'ebuvanjuba okutuuka ku luuyi olw'ebuvanjuba, guliba mugabo gwa Simyoni.

²⁵N'okuliraana ensalo ya Simyoni okuva ku luuyi olw'ebuvanjuba okutuuka ku luuyi olw'ebuvanjuba, guliba mugabo gwa Isakaali.

26 N'okuliraana ensalo ya Isakaali okuva ku luuyi olw'ebuvanjuba okutuuka ku luuyi olw'ebugwanjuba, guliba mugabo gwa Zebbulooni.

27 N'okuliraana ensalo ya Zebbulooni okuva ku luuyi olw'ebuvanjuba okutuuka ku luuyi olw'ebugwanjuba, guliba mugabo gwa Gaadi.

28 N'okuliraana ensalo ya Gaadi ku luuyi olw'Obukiikaddyo, ensalo eriba kyenkanyi okuva ku Tamali n'etuuka ku mazzi ag'e Meribasukadeesi, n'okutuukira ddala ku Nnyanja Ennene, ye Meditereniyaani.

29 “Obwo bwe butaka bw'oligabanya ng'omugabo mu bika bya Isirayiri, era egyo gye giriba emigabo gyabwe,” bw'ayogera MUKAMA Katonda.

Emiryango egy'Ekibuga

30 “Gino gye giriba emiryango egy'ekibuga egifulumirwamu: “Okuva ku luuyi olw'Obukiikkono, obuli mayilo emu n'ekitundu obuwantu,

31 emiryango girituumibwa ng'ebika bya Isirayiri bwe biri. Era emiryango egy'oluuyi olwo giriba esatu, omulyango ogwa Lewubeeni, n'omulyango ogwa Yuda n'omulyango gwa Leevi.

32 Ne ku luuyi olw'ebuvanjuba obuli mayilo emu n'ekitundu obuwantu, emiryango giriba esatu: omulyango ogwa Yusufu, n'omulyango ogwa Benyamini, n'omulyango ogwa Ddaani.

33 Ne ku luuyi olw'Obukiikaddyo obuli mayilo emu n'ekitundu obuwantu, emiryango giriba esatu: omulyango ogwa Simyoni, n'omulyango ogwa Isakaali, n'omulyango ogwa Zebbulooni.

34 Ne ku luuyi olw'Obugwanjuba obuli mayilo emu n'ekitundu obuwantu, emiryango giriba esatu: omulyango ogwa Gaadi, n'omulyango ogwa Aseri, n'omulyango ogwa Nafutaali.

35 “Okwetooloola ekibuga waliba mayilo mukaaga obuwantu. “N'erinnya ly'ekibuga okuva mu kiseera ekyo liriba: ‘MUKAMA Katonda ali omwo.’”

Danyeri

Danyeri 1

Okutendekebwa kwa Danyeri mu Babulooni

- ¹ Mu mwaka ogwokusatu ogw'obufuzi bwa Yekoyakimu kabaka wa Yuda, Nebukadduneeza kabaka w'e Babulooni n'alumba Yerusaalemi.
- ² Mukama n'awaayo Yekoyakimu kabaka wa Yuda, mu mukono gwa Nebukadduneeza, era n'ebintu ebimu eby'omu yeekaalu ya Katonda, Nebukadduneeza n'abiggyamu n'abitwala e Babulooni n'abiteeka mu ggwanika ery'omu ssabo lya lubaale we.
- ³ Nebukadduneeza n'alagira Asupenaazi omukulu w'abalaawe be alonde mu Bayisirayiri ab'omu lulyo olulangira, ne mu bakungu,
- ⁴ abavubuka abataliiko kamogo, abalabika obulungi mu maaso, nga bategeevu mu nsonga zonna ne mu by'amagezi byonna, era abakalabakalaba mu kutegeera, era abasaanira okuweereza mu lubiri lwa kabaka. Asupenaazi yalina obuvunaanyizibwa obw'okubayigirizanga amagezi g'Abakaludaaya, n'olulimi lwabwe.
- ⁵ Kabaka n'alagira baweebwenga ku mmere ne ku wayini ebyagabulwanga ku mmeeza ya kabaka. Baali baakutendekebwa okumala emyaka esatu, n'olvannyuma bagende bawereze kabaka.
- ⁶ Mu abo abaalondebwa mwe mwali abaava mu Yuda, era n'amannya gaabwe baali Danyeri, ne Kananiya, ne Misayeri, ne Azaliya.
- ⁷ Asupenaazi n'abawa amannya amaggya: Danyeri n'amutuumma Berutesazza, Kananiya n'amutuumma Saddulaaki, Misayeri n'amutuumma Mesaki, ne Azaliya n'amutuumma Abeduneego.
- ⁸ Naye Danyeri n'amalirira mu mutima gwe obuteeyonoonyesa na mmere na wayini ebyavanga ku mmeeza ya kabaka, n'asaba Asupenaazi amukkirize aleme kweyonoonyesa.
- ⁹ Mu biro ebyo Katonda n'akozesa Asupenaazi okulaga ekisa n'okusaasira eri Danyeri.
- ¹⁰ Asupenaazi n'agamba Danyeri nti, "Ntidde mukama wange kabaka, eyalagidde mulye emmere eyo n'ebiyokunywa ebyo. Singa anaabalaba nga mukozze okusinga abavubuka abalala ab'emyaka gyammwe, kabaka aja kunzita."
- ¹¹ Awo Danyeri n'agamba omusigire wa Asupenaazi, Asupenaazi gwe yassaawo okulabiriranga Danyeri, ne Kananiya, ne Misayeri ne Azaliya nti,
- ¹² "Nkwegayiridde ogezese abaddu bo okumala ennaku kkumi, oleme kubawa kintu kirala kyonna okuggyako enva endiirwa n'amazzi ag'okunywa.

¹³N'oluvannyuma otugeraageranye n'abavubuka abalala abalya ku mmere ya kabaka, olyoke okole nga bw'onoolaba."

¹⁴N'akkiriziganya nabo ku nsong aye, n'abagezes a okumala ennaku kkumi.

¹⁵Awo ennaku ekkumi bwe zaggwaako, bo baali banyiridde era nga bafaanana bulungi okusinga abavubuka abaalyanga ku mmere ya kabaka.

¹⁶Awo omusigire n'alekayo okubawa emmere yaabwe ey'enjawulo ne wayini gwe baali bateekwa okunywa, n'abawa enva endiirwa.

¹⁷Abavubuka abo abana, Katonda n'abawa amagezi n'okutegeera eby'okuyiga eby'engeri zonna; Danyeri n'asukkirira mu kutegeera okw'okuvvuunula okwolesebwa okw'engeri zonna, n'ebirooto.

¹⁸Awo ekiseera kabaka kye yalagira abavubuka bona baleetebwe, bwe kyatuuka, Asupenaazi n'abaleeta n'abalaga eri Nebukadduneeza.

¹⁹Kabaka n'ayogera nabo, ne mutualabika mu bo bona eyenkanaankana nga Danyeri, ne Kananiya, ne Misayeri ne Azaliya mu kutegeera; kyebaava baweebwa emirimu egy'obuvunaanyizibwa mu lubiri lwa kabaka.

²⁰Buli nsong aye amagezi n'ey'okutegeera kabaka gye yababuuzanga, baali bagitegeera emirundi kkumi okusinga abasawo n'abafumu bona, mu bwakabaka bwe bwonna.

²¹Awo Danyeri n'aba muweereza mukulu mu bwakabaka okutuusa ku mwaka ogw'olubereberye ogwa Kabaka Kuulo.

Danyeri 2

Ekirooto kya Nebukadduneeza

¹Mu mwaka ogwokubiri ogw'obufuzi bwa kabaka Nebukadduneeza, Nebukadduneeza n'aloota ekirooto; ne yeeraliikirira nnyo, n'otulo ne tumubula.

²Awo kabaka n'atumya abasawo, n'abafumu, n'abalaguzi n'Abakaludaaya okumutegeeza ekirooto kye yaloota. Ne bajja ne bayimirira mu maaso ga kabaka.

³N'abagamba nti, "Naloota ekirooto ekimbuzizza otulo, njagala mukintegeeze n'amakulu gaakyo."

⁴Awo Abakaludaaya ne baddamu kabaka mu lulimi Olusuuli nti, "Ayi kabaka, owangaale emirembe gyonna! Buulira abaddu bo ekirooto, nabo banaakunnyonnyola amakulu gaakyo."

⁵Kabaka n'addamu Abakaludaaya nti, "Kino kye nsazeewo; bwe mutantegeeze kirooto ekyo, n'amakulu gaakyo, nzija kulagira mutemebwetemebwe, era n'amayumba gammwe gamenyebwemenyebwe.

⁶Kyokka bwe munaantegeeza ekirooto n'amakulu gaakyo, nnaabawa ebirabo, n'empeera, n'ekitiibwa kinene. Noolwekyo mumbuulire ekirooto n'amakulu gaakyo."

⁷Ne bamuddamu nate nti, "Tubuulire ekirooto kyo, tusobole okukubuulira amakulu gaakyo."

⁸Awo kabaka n'addamu nti, "Ntegeeredde ddala nga mwagala kufuna bbanga ddene, kubanga mutegedde nga kye nsazeewo mmaliridde okukikola,

⁹era bwe mutantegeeze kirooto, ekibonerezo kiri kimu kyokka. Mwekobaanye okunnimba n'okumbuulira ebigambo ebikyamu, nga munsuubira okukyusa ku ndowooza yange. Kale nno, muntegeeze ekirooto, munnyinnyonyole n'amakulu gaakyo."

¹⁰Abakaludaaya ne baddamu kabaka nti, "Tewali muntu n'omu ku nsi ayinza okukola kabaka ky'asaba. Ate era tewabangawo kabaka ne bw'aba w'amaanyi atya oba wa buyinza atya, eyali asabye omulaguzi yenna newaakubadde omufumu yenna newaakubadde Omukaludaaya yenna ekintu ng'ekyo.

¹¹Kabaka ky'asaba kizibu nnyo. Tewali n'omu ayinza kukibikkulira kabaka, wabula bakatonda abatalina mubiri ogwa bulijo."

¹²Ekigambo ekyo ne kisunguwaza nnyo kabaka, kyeyava alagira abagezigezi bona mu Babulooni okuttibwa.

¹³Ekiragiro ne kiyita okutta abagezigezi bona, era ne wabaawo abasajja abaatumibwa okunoonya Danyeri ne mikwano gye okubatta.

¹⁴Awo Danyeri n'asisinkana Aliyooki omuduumizi w'abakuumi ba kabaka, bwe yali ng'agenda okutta abagezigezi ab'e Babulooni; n'ayogera naye mu magezi n'obukalabakalaba,

¹⁵n'amubuuza nti, "Kyavudde ku ki kabaka okuwa ekiragiro eky'obukambwe bwe kityo?" Aliyooki n'annyonnyola Danyeri ensonga eyavaako ekyo.

¹⁶Awo Danyeri n'alaga eri kabaka, n'asaba aweebwe ekiseera okwogera ne kabaka, alyoke amutegeeze amakulu g'ekirooto.

¹⁷Awo Danyeri n'addayo ewuwe, n'ategeeza mikwano gye Kananiya, ne Misayeri ne Azaliya,

¹⁸n'abagamba basabe Katonda ow'eggulu abalage ekisa ababikkulire amakulu ag'ekyama ekyo, ye ne banne baleme kuzikirizibwa wamu n'abagezigezi abalala ab'e Babulooni.

¹⁹Mu kiro ekyo Danyeri n'afuna okwolesebwa ku kigambo ekyo, n'atendereza Katonda ow'eggulu.

²⁰N'ayogera nti, "Erinnya lya Katonda litenderezebwenga emirembe n'emirembe, kubanga amagezi n'obuyinza bibye.

²¹Ategeera ebiseera n'ebiro; assaawo bakabaka era aggyawo bakabaka; awa amagezi abagezigezi, era n'okumanyisa abo abategeevu.

²²Abikkula ebyama ebyakisibwa edda; amanyi ebifa mu nzikiza, n'ekitangaala kibeera naye.

²³Nkwebaza era nkutendereza, Ayi Katonda wa bajjajjange ompadde amagezi n'amaanyi, ombikkulidde ekkyo kye twakusabye, otutegeezessa ekirooto kya kabaka."

Danyeri Ategeesa Amakulu ag'Ekirooto

²⁴Awo Danyeri n'alaga eri Aliyooki, kabaka gwe yali alonze okuzikiriza abasajja abagezigezi aba Babulooni, n'amugamba nti, "Tozikiriza basajja bagezigezi ba Babulooni. Ntwala eri kabaka mmutegeeze amakulu g'ekirooto kye."

²⁵Amangwago, Aliyooki n'atwala Danyeri eri kabaka, n'ategeesa kabaka nti, "Nsante omusajja, omu ku baawanjangusibwa okuva mu Yuda, asobola okutegeesa kabaka amakulu g'ekirooto kye."

²⁶Kabaka n'abuuza Danyeri eyayitbwanga Berutesazza nti, "Oyinza okuntegeesa ekirooto kye nalabye, n'amakulu gaakyo?"

²⁷Danyeri n'addamu kabaka nti, "Tewali muntu mugezigezi, newaakubadde omufumu, newaakubadde omulaguzi, newaakubadde omulogo asobola okutegeesa kabaka ekigambo kye yasabye.

²⁸Waliwo Katonda ow'omu ggulu annyonnyola abantu ebitategeerekeka. Abikkulidde Kabaka Nebukadduneeza ebigenda okubaawo mu nnaku ez'enkomerero. Ekirooto n'okwolesebwa bye wafuna nga weebase bye bino.

²⁹"Bwe wali ng'ogalamidde mu kitanda kyo, ayi kabaka omutima gwo ne gutandika okulowooza ku bintu ebiribaawo, era oyo abikkula ebigambo ebitategeerekeka bantu abaabulijjo, yakulaze ebigenda okubaawo.

³⁰Naye ekigambo kino ekitategeerekeka bantu abaabulijjo kimbikkuliddwa, si lwa kuba nga ndi mugezi okusinga abantu abalala bonne, naye nkifunye bwe ntyo, kabaka ategeere amakulu gaakyo, era otegeere ebirowoozo bye wafuna mu mutima gwo.

³¹"Watunula, ayi kabaka, era laba, mu maaso go nga wayimiriddewo ekifaananyi ekinene. Ekifaananyi ekkyo kyali kinene nnyo, nga kimasamasa nnyo nnyini era nga kya ntiisa.

³²Omutwe gwakyo gwali gwa zaabu ennongoose, ekifuba kyakyo n'emikono gyakyo nga bya ffeeza, n'olubuto lwakyo n'ebisambi byakyo nga bya kikomo,

³³n'amagulu gaakyo nga ga kyuma. N'ebigere byakyo ekitundu ekimu kyali kya kyuma, n'ekitundu ekirala nga kya bbumba.

³⁴Awo bwe wali ng'okyakitunuulira, olwazi ne lutemebwa, naye si na ngalo, ejinja ne livaako ne likuba ekifaananyi ku bigere byakyo eby'ekyuma n'ebbumba, ne libyasaayasa.

³⁵Ekyuma n'ebbumba, n'ekikomo, ne zaabu, byonna ne biyasibwayasibwa wamu, ne bifuka ng'ebisusunku eby'omu gguuliro mu biro eby'omusana omungi; kibuyaga n'abifuuwa obutalekaawo na kimu. Naye ejinja eryakuba ekifaananyi ne lifuuka olusozi olunene, ne lujjula ensi yonna.

³⁶"Ekyo kye kyali ekirooto; kaakano tunaategeeza kabaka amakulu gaakyo.

³⁷Ggwe, ayi kabaka, ggwe kabaka wa bakabaka, Katonda ow'eggulu gwe yawa obwakabaka, n'obuyinza, n'amaanyi, n'ekitiibwa;

³⁸era akukwasizza abantu n'ensolo ez'omu nsiko, n'ennyonyi ez'omu bbanga. Buli we bibeera, akuwadde okubifuga, era ggwe mutwe ogwa zaabu.

³⁹"Bw'olivaawo, obwakabaka obulala buliddawo, obutenkanankana bubwo. N'olvannyuma waliddawo obwakabaka obwokusatu nga bwa kikomo obulifuga ensi yonna.

⁴⁰Oluvannyuma lw'ebyo byonna waliddawo obwakabaka obwokuna obuliba obw'amaanyi ng'ekyuma; era ng'ekyuma ekimanyaamenya ne kibetentabetenta buli kintu, era ng'ekyuma bwe kimenyaamenya obutundutundu, bwe kityo bwe kiribetentabetenta ne kimenyaamenya obwakabaka obulala bwonna.

⁴¹Nga bwe walaba ebigere n'obugere ekitundu nga kya bbumba ery'omubumbi, n'ekitundu nga kya kyuma, bwe butyo obwakabaka bwe buligabanyizibwamu; ate nga bulisigala n'amaanyi ag'ekyuma, nga bwe walaba ekyuma nga kitabuddwamu ebbumba.

⁴²Ng'obugere bwe bwali, ekitundu nga kya kyuma n'ekitundu ekirala nga kya bbumba, n'obwakabaka buno buliba bwe butyo, ekitundu ekimu nga ky'amaanyi n'ekitundu ekirala nga kinifu.

⁴³Era nga bwe walaba ekyuma nga kitabuddwamu ebbumba bwe batyo n'abantu bwe baliba so tebalisigala bumu, ng'ekyuma bwe kitasobola kwetabula bulungi na bbumba.

⁴⁴"Mu biro ebya bakabaka abo, Katonda w'eggulu alissaawo obwakabaka obutalizikirizibwa, so tebuliweebwa bantu balala. Bulizikiriza obwakabaka obwo bwonna, ne bubumalawo, naye bwo bulibeerera emirembe gyonna.

⁴⁵Gano ge makulu ag'okwolesebwa okukwata ku jjinja eryatemebwa mu lusozi, eritatemebwa na ngalo za muntu; eryabetentabetenta ekyuma, n'ekikomo, n'ebbumba, ne ffeeza, ne zaabu. "Katonda omukulu abikkulidde kabaka

ebigenda okubaawo mu biro eby'omu maaso. Ekirooto kituufu n'amakulu gaakyo tegabuusibwabuusibwa."

⁴⁶ Awo Kabaka Nebukadduneeza ne yeeyaliira ku lubuto lwe mu maaso ga Danyeri n'amuwa ekitiibwa, n'alagira okuwaayo obubaane n'ebiweebwayo eri Danyeri.

⁴⁷ Kabaka n'agamba Danyeri nti, "Mazima Katonda wo ye Katonda wa bakatonda era ye Mukama wa bakabaka, era omubikkuzi w'ebiyama ebyakisibwa, kubanga osobozebbwa okututegeeza ekyama ekyakisibwa."

⁴⁸ Awo kabaka n'akuza Danyeri n'amufuula omuntu omukulu ennyo, n'amuwa n'ebirabo bingi. N'amufuula mufuzi w'essaza lyonna erya Babulooni, n'amuwa n'obuvunaanyizibwa obw'okukulira abasaja abagezigezi bona ab'e Babulooni.

⁴⁹ Awo Danyeri n'asaba kabaka akuze ne Saddulaaki, ne Mesaki, ne Abeduneego; kabaka n'abafuula abakulembeze n'abawa ebifo eby'obuvunaanyizibwa mu ssaza ery'e Babulooni, Danyeri ye n'asigala awali kabaka.

Danyeri 3

Ekibumbe kya Zaabu n'Ekikoomi ky'Omuliro

¹ Kabaka Nebukadduneeza n'abumbisa ekifaananyi ekya zaabu, obugulumivu mita amakumi abiri mu musanvu n'obugazi mita bbiri ne sentimita nsanvu, n'alagira kitekebwe mu lusenyi lwa Dduula, mu ssaza ly'e Babulooni.

² N'atumya abaamasaza, n'abaamagombolola, n'abemiruka, n'abawi b'amagezi, n'abawanika, n'abalamuzi, n'abakungu bona ab'omu masaza, bajje ku mukolo ogw'okuwongera ekibumbe Kabaka Nebukadduneeza kye yabumbisa.

³ Awo abaamasaza, n'abafuzi, n'abamateeka, n'abawi b'amagezi n'abawanika, n'abalamuzi, n'abakungu bona ab'omu masaza, ne bakuŋjaana ku mukolo ogw'okuwongera ekibumbe Kabaka Nebukadduneeza kye yabumbisa.

⁴ Awo omulanzi n'ayogerera waggulu mu ddoboozi ery'omwanguka nti, "Mulagiddwa, mmwe abantu, n'amawanga, n'abantu ab'ennimi eza buli ngeri,

⁵ bwe munaawulira eddoboozi ly'akagombe, n'endere, n'ennanga, n'amadinda, n'ekidongo, n'ekkondeere, na buli ngeri yonna ey'ebivuga eby'amaloboozi, muteekwa okuvuunama musinze ekibumbe ekya zaabu Kabaka Nebukadduneeza kye yabumbisa.

⁶ Omuntu yenna atalivuunama n'akisinza, alisuulibwa mu kikoomi ekyaka omuliro."

⁷ Awo amawanga gonna bwe baawulira eddoboozi ly'akagombe, n'endere, n'ennanga, n'amadinda, n'ekidongo, n'ekkondeere na buli ngeri yonna ey'ebivuga eby'amaloboozi, amawanga gonna n'ensi n'abantu ab'ennimi eza buli

ngeri ne bavuunama ne basinza ekibumbe ekya zaabu Kabaka Nebukadduneeza kye yabumbisa.

⁸ Awo mu biro ebyo Abakaludaaya abamu ne bawawaabira Abayudaaya.

⁹ Ne bagenda eri Kabaka Nebukadduneeza ne bamugamba nti, "Wangaala, ayi kabaka!

¹⁰ Ggwe ayi kabaka otaddewo etteeka, nti omuntu yenna anaawulira eddoboozi ly'akagombe, n'endere, n'ennanga, n'amadinda, n'ekidongo, n'ekkondeere na buli ngeri yonna ey'ebivuga eby'amaloboozi, atekwa okuvuunama n'asinza ekifaananyi kya zaabu,

¹¹ era buli atalivuunama n'akisinza alisuulibwa mu kikoomi ekyaka omuliro.

¹² Naye waliwo abamu ku Bayudaaya be walonda okuvunaanyizibwa ensonga ez'essaza ery'e Babulooni, era be ba Saddulaaki, ne Mesaki ne Abeduneego abatakuwlirirako ddala ayi kabaka. Tebaweereza bakatonda bo newaakubadde okusinza ekifaananyi ekya zaabu kye wabumbisa."

¹³ Awo Nebukadduneeza n'asunguwala nnyo n'alagira baleete Saddulaaki, ne Mesaki ne Abeduneego gy'ali; ne baleetebwa mu maaso ga kabaka.

¹⁴ Nebukadduneeza n'ababuuza nti, "Ebigambo bye mpulira bituufu nti mmwe Saddulaaki, ne Mesaki ne Abeduneego temuweereza bakatonda bange, newaakubadde okusinza ekifaananyi ekya zaabu kye nabumbisa?

¹⁵ Kaakano, bwe munaawulira eddoboozi ly'akagombe, n'endere, n'ennanga, n'amadinda, n'ekidongo, n'ekkondeere na buli ngeri yonna ey'ebivuga eby'amaloboozi, mwetegeke okuvuunama n'okusinza ekifaananyi kye nabumbisa. Naye bwe mutaakisinze, ku ssaawa eyo yennyini munaasuulibwa mu kikoomi ekyaka omuliro, kale tulyoke tulabe katonda oyo anaayinza okubawonya mu mukono gwange."

¹⁶ Saddulaaki, ne Mesaki ne Abeduneego ne baddamu kabaka nti, "Ayi Nebukadduneeza, tekitugwanira kwewolerezza mu maaso go ku nsongwa eyo.

¹⁷ Bwe tunaasuulibwa mu kikoomi ekyaka omuliro, Katonda gwe tuweereza anaatuwonya ekikoomi ekyaka omuliro era anaatulokola mu mukono gwo, ayi kabaka.

¹⁸ Naye ne bwe kitaabe bwe kityo, twagala okimanye, ayi kabaka nga tetugenda kuweereza bakatonda bo, newaakubadde okusinza ekifaananyi ekya zaabu kye wabumbisa."

¹⁹ Awo Nebukadduneeza ne yeeyongera okusunguwalira Saddulaaki, ne Mesaki ne Abeduneego, n'amaaso ge ne gaba masunguwavu nnyo ng'ajjudde obuswandi. N'alagira ekikoomi kyake emirundi musanvu okusinga ne bwe kyali kyase.

²⁰N'ala gira abamu ku baserikale be ab'amaanyi okusiba Saddulaaki, ne Mesaki ne Abeduneego, n'oluvannyuma basuulibwe mu kikoomi ekyaka omuliro.

²¹Amangwago ne basiba Saddulaaki, ne Mesaki ne Abeduneego, nga bambadde ebyambalo byabwe eby'ekitiibwa, ne seruwale zaabwe, n'emagiro gyabwe n'engoye zaabwe endala, ne basuulibwa mu kikoomi ekyaka omuliro.

²²Olw'okubanga ekiragiro kya kabaka kyali kya mbagirawo nga n'ekyoto kyaka nnyo nnyini, ennimi ez'omuliro ne zitta abasajja abaasitula Saddulaaki, ne Mesaki ne Abeduneego.

²³Awo abasajja abo abasatu Saddulaaki, ne Mesaki ne Abeduneego ne basuulibwa wakati mu kikoomi ekyaka omuliro nga basibiddwa.

²⁴Awo Kabaka Nebukadduneeza, mu kwewuunya n'agolokoka mangu n'abuuza abakungu be nti, "Mu muliro tetwasuddemu abasajja basatu nga basibiddwa?" Ne bamuddamu nti, "Bwe kyabadde, ayi kabaka."

²⁵N'ayogera nti, "Naye nga ndaba abasajja bana nga basumuluddwa nga batambulira wakati mu muliro, nga tebaliiko kabi ke bakolebbwako, so n'owookuna ng'afaanana ng'omwana wa bakatonda."

²⁶Nebukadduneeza n'alyoka asemera ku mulyango gw'ekikoomi ekyaka omuliro, n'ayogera mu ddoboozi ery'omwanguka nti, "Saddulaaki, ne Mesaki, ne Abeduneego, abaddu ba Katonda Ali Waggulu Ennyo, mufulume mujje wano." Awo Saddulaaki, ne Mesaki ne Abeduneego ne bava mu muliro.

²⁷Abaamasaza, n'abemiruka, n'abafuzi ab'ebitundu, n'abakungu ba kabaka ne bakuŋŋaana ne babeetegereza. Ne balaba ng'omuliro tegubookezza, so n'enviiri zaabwe nga tezisiridde, so n'engoye zaabwe nga tezookeddwa, so n'olusu lw'omuliro nga terubawunyako.

²⁸Nebukadduneeza n'ayogera nti, "Katonda wa Saddulaaki, ne Mesaki ne Abeduneego atenderezebwe, aweerezza malayika we n'alokola abaddu be, abaamwesize, ne bajeemera ekiragiro kya kabaka, ne bawaayo obulamu bwabwe baleme okuweereza newaakubadde okusinza katonda yenna wabula Katonda waabwe bo.

²⁹Noolwekyo nteeka etteeka nga buli muntu ow'eggwanga lyonna, na buli muntu ow'olulimi lwonna olwa buli ngeri alyogera obubi ku Katonda wa Saddulaaki, ne Mesaki ne Abeduneego, alitemebwatemedwa, n'ennyumba ye erimenyebwamenyebwa, kubanga tewali katonda mulala ayinza okuwonya mu ngeri eyo."

³⁰Awo kabaka n'akuza Saddulaaki, ne Mesaki ne Abeduneego mu ssaza ery'e Babulooni.

Danyeri 4

Ekirooto kya Nebukadduneeza eky'Omuti

- ¹ Kabaka Nebukadduneeza n'alangirira eri abantu, n'amawanga n'abantu ab'ennimi eza buli ngeri, mu nsi yonna bw'ati nti: Emirembe gibeere nammwe!
- ² Lye ssanyu lyange okubategeeza ku bigambo eby'amagero era ebikulu Katonda Ali Waggulu Ennyo byankoledde.
- ³ Obubonero bwe nga bukulu, n'eb'y'amagero bye nga byewuunyisa! Obwakabaka bwe bwa mirembe na mirembe; N'okufuga kwe tekuliggwaawo.
- ⁴ Nze Nebukadduneeza, nnali mpumulidde mu maka gange wakati mu bugagga nga mpumuliddeko mu lubiri lwange.
- ⁵ Ne ndoota ekirooto ekyantiisa; bwe nnali nga ngalamidde ku kitanda kyange, ne ndaba ebifaananyi mu kwolesebwa, ebyantiisa.
- ⁶ Kyennava ndagira abasajja bona abagezigezi ab'e Babulooni baleetebwe mu maaso gange bantegeeze amakulu g'ekirooto.
- ⁷ Abalogo, n'abafumu, n'Abakaludaaya, n'abalaguzi ne bajja, ne mbategeeza ekirooto, naye ne balemwa okuntegeeza amakulu gaakyo.
- ⁸ Naye oluvannyuma Danyeri gwe natuma Berutesazza ng'erinnya lya katonda wange bwe liri, era nga n'omwoyo ogwa bakatonda abatukuvu guli mu ye, n'ajja mu maaso gange ne mutegeeza ekirooto.
- ⁹ Ne mugamba nti, "Berutesazza, omukulu w'abafumu, mmayi ng'omwoyo ogwa bakatonda abatukuvu guli mu ggwe, so tewali kigambo eky'ekyama ekikuzibualira. Ntegeeza ekirooto kyange, n'amakulu gaakyo.
- ¹⁰ Kuno kwe kwolesebwa kwe nafunye nga ngalamidde ku kitanda kyange; nalabye omuti wakati mu nsi, nga muwanvu nnyo nnyini.
- ¹¹ Omuti ne gukula ne guba gwa maanyi, n'entikko yaagwo n'etuuka ku ggulu era nga gulengerwa okuva ku nkomerero y'ensi zonna.
- ¹² Ebikoola byagwo byali birungi okutunulako, n'ebibala byagwo nga bingi, era nga gulina emmere emala bona. Ensolo enkambwe ez'omu nsiko zaatuulanga mu kisiikirize kyagwo, n'ennyonyi ez'omu bbanga zaatuulanga ku matabi gaagwo, na buli kiramu kyonna kyalisibwanga.
- ¹³ "Awo mu kiseera ekyo nga ngalamidde ku kitanda kyange, mu kwolesebwa, ne ndaba omubaka omutukuvu ng'ava mu ggulu.
- ¹⁴ N'ayogerera mu ddoboozi ery'omwanguka nti, 'Tema omuti, otemeko n'amatabi gaagwo; okunkumule amalagala gaagwo, osaasaanye n'ebibala byagwo, n'ennyonyi zibuuke zive ku matabi gaagwo.

¹⁵Naye ekikonge ky'ekikolo kyagwo kireke mu ttaka, nga kiriko ekyuma ekisiba n'ekikomo, mu muddo omuto ku ttale. “ ‘Muleke abisiwale n'omusulo ogw'omu ggulu, era muleke agabanire wamu omuddo, n'ensolo ez'omu nsiko.

¹⁶Era n'amagezi ge ag'obuntu gakyusibwe, afuuke ng'ensolo enkambwe ey'omu nsiko okumala emyaka musanvu.

¹⁷“‘Omusango ogwo gulangiriddwa ababaka, abatukuvu be baasanguza ekisaliddwawo, abalamu balyoke bategeere ng'Oyo Ali Waggulu Ennyo y'afuga obwakabaka bw'abantu, era abuwa buli gw'asiima, era alonda abantu abasemberayo ddala okuba aba wansi okubafuga.’

¹⁸“Ekyo kye kirooto, nze Kabaka Nebukadduneeza kye naloose. Kaakano ggwe Berutesazza, ntegeeza amakulu gaakyo kubanga tewali n'omu ku basajja abagezigezi mu bwakabaka bwange ayinza okuntegeeza amakulu gaakyo. Naye ggwe oyinza, kubanga omwoyo ogwa bakatonda abatukuvu guli mu ggwe.”

Danyeri Avvuunula Ekirooto

¹⁹Awo Danyeri eyayitbwanga Berutesazza n'atawanyizibwa mu mutima okumala akabanga, ne yeeraliikirira. Kabaka n'amugamba nti, “Berutesazza, ekirooto n'amakulu gaakyo bireme okukweraliikiriza.” Berutesazza n'addamu nti, “Mukama wange, ekirooto kibe nga kyogera ku abo abakukyawa, n'amakulu gaakyo gabe nga googera ku balabe bo!

²⁰Omuti gwe walaba, ogwakula ne guba gwa maanyi, ogwawanvuwa ne gutuuka ku ggulu, nga gulabibwa ensi yonna,

²¹ogwaliko amalagala amalungi n'ebibala byagwo nga bingi nnyo, era nga guliko n'emmere emala bona, nga n'ensolo ez'omu nsiko zituula mu kisiikirize kyagwo, nga n'ennyonyi ez'omu bbanga zisiisira ku matabi gaagwo,

²²ye ggwe, ayi kabaka! Okuze n'oba mukulu era n'oba w'amaanyi; n'obukulu bwo bweyongedde ne butuuka ku ggulu, n'obuyinza bwo butuuse ku nkomerero y'ensi.

²³“Ggwe ayi kabaka walabye omubaka, era omutukuvu ng'akka okuva mu ggulu, n'ayogera nti, ‘Tema omuti oguzikirize, naye ekikonge ky'ekikolo kyagwo kireke mu ttaka ng'okisibye n'ekyuma n'ekikomo mu muddo omuto ogw'oku ttale; era muleke abisiwazibwe omusulo ogw'omu ggulu, n'omugabo gwe gubeere n'ensolo enkambwe ez'omu nsiko, emyaka musanvu.’

²⁴“Gano ge makulu, ayi kabaka, era lino lye tteeka Oyo Ali Waggulu Ennyo ly'alangiriridde mukama wange kabaka.

²⁵Oligobebwa okuva mu bantu era olibeera n'ensolo ez'omu nsiko; olirya omuddo ng'ente, era olibisiwala okumala emyaka musanvu okutuusa lw'olitegeera ng'Oyo Ali Waggulu Ennyo y'afuga obwakabaka bw'abantu, era abugabira buli gw'asiima.

²⁶Ekiragiro eky'okuleka ekikonge ky'ekikolo ky'omuti, amakulu gaakyo ge gano: obwakabaka bwo bulikuddizibwa bw'olitegeera ng'eggulu lye lifuga.

²⁷Noolwekyo, ayi kabaka nteesa nti; weetoowaze olekeyo ebibi byo okole eby'obutuukirivu, era n'ebikolwa byo ebitali bya butuukirivu obireke obeere wa kisa eri abanyigirizibwa, olyoke ofuuke mugagga okusinga nga bw'oli kaakano."

Ekirooto Kituukirira

²⁸Ebyo byonna byatuukirira ku Kabaka Nebukadduneeza.

²⁹Bwe wayitawo emyezi kkumi n'ebiri, kabaka yali atambulira ku kasolya k'olubiri lwe olwa Babulooni,

³⁰n'ayogera nti, "Ono si ye Babulooni omukulu gwe nazimba n'amaanyi gange amangi okuba ekibuga ekikulu eky'ekitiibwa eky'obwakabaka bwange?"

³¹Awo bwe yali ng'akyayogera, eddoboozi ne liva mu ggulu nga ligamba nti, "Kuno kwe kulangirira okukukwatako Kabaka Nebukadduneeza: obwakabaka bwo bukuggyiddwako.

³²Oligobebwa mu bantu era olibeera n'ensolo okumala emyaka musanvu okutuusa lw'olitegeera ng'Oyo Ali Waggulu ennyo y'afuga obwakabaka obw'abantu era abuwa buli gw'asiima."

³³Amangwago ebyayogerwa ku Nebukadduneeza ne bituukirira. N'agobebwa mu bantu era n'alya omuddo ng'ente. Omubiri gwe ne gutoba omusulo ogw'omu ggulu okutuusa enviiri ze lwe zaakula ng'ebiyoya by'empungu n'enjala ze ng'enjala z'ennyonyi.

³⁴Oluvannyuma lw'ebbanga eryo, nze, Nebukadduneeza, ne nnyimusa amaaso gange eri eggulu, amagezi gange ne gakomawo. Ne ntendereza Oyo Ali Waggulu Ennyo, ne muwa ekitiibwa ne mugulumiza oyo abeera omulamu emirembe n'emirembe. Okufuga kwe tekuliggwaawo, n'obwakabaka bwe bwa mirembe na mirembe.

³⁵Abantu bona ab'oku nsi abalaba nga si kintu, eggye ery'omu ggulu n'abantu ab'oku nsi abayisa nga bw'asiima. Tewali ayinza okumuziyiza, newaakubadde okumubuuza nti, "Okola ki?"

³⁶Mu kiseera kyekimu okutegeera kwange ne kukomawo, n'ekitiibwa n'obuyinza obw'obwakabaka bwange ne bunzirira. Abawi b'amagezi bange n'abakungu bange ne bannoonya, ne banziriza entebe yange ey'obwakabaka ne nnyongerwako obukulu bungi okusinga ne bwe nalina.

³⁷Kale nze Nebukadduneeza kyennaava mmutendereza era ne mmuwa ekitiibwa ne mmugulumiza Kabaka ow'eggulu, kubanga emirimu gye gyonna gya mazima n'amakubo ge ga nsong, n'abo ab'amalala abakkakkanya.

Danyeri 5

Ekiwandiiko ku Kisenge

¹Kabaka Berusazza n'agabula embaga nnene eri abakungu be lukumi, ne banywa omwenge naye.

²Awo Berusazza, yali ng'anywa omwenge, n'atumya ebikompe ebya zaabu n'ebya ffeeza, Nebukadduneeza kitaawe bye yaggya mu yeekaalu mu Yerusaalemi, ye n'abakungu be, n'abakyala be n'abazaana be babinyweremu.

³Era ne baleeta ebikompe ebya zaabu n'ebya ffeeza ebyaggyibwa mu yeekaalu ya Katonda mu Yerusaalemi, kabaka n'abakungu be, n'abakyala be n'abazaana be ne babinyweramu.

⁴Ne banywa omwenge ne batandika okutendereza bakatonda aba zaabu n'aba ffeeza, n'ab'ebikomo, n'ab'ekyuma, n'ab'emiti n'ab'amayinja.

⁵Mu kiseera ekyo ne walabika engalo z'omukono gw'omuntu ne ziwandiika ku kisenge okuliraana ettaala mu lubiri lwa kabaka; kabaka n'alaba ekibatu ky'omukono nga kiwandiika.

⁶Entunula ye n'ekyuka, n'aty a nnyo, n'amaviivi ge ne gakubagana n'amagulu ge ne galemererwa okumuwanirira.

⁷Kabaka n'alagira mu ddoboozi ery'omwanguka baleete abafumu, n'Abakaludaaya, n'abalaguzi. Kabaka n'agamba abasajja abagezigezi abo ab'e Babulooni nti, "Omuntu yenna anaasoma ekiwandiiko ekyo, n'antegeeza amakulu gaakyo, alyambazibwa engoye ez'effulungu era alyambazibwa omukuufu ogwa zaabu mu bulago, era aliba mukulu owa waggulu ow'ekifo ekyokusatu mu bwakabaka."

⁸Awo abasajja ba kabaka abagezigezi bona ne bajja, naye ne balemwa okusoma ekiwandiiko ekyo newaakubadde okutegeeza kabaka amakulu gaakyo.

⁹Kabaka Berusazza ne yeeyongera nnyo okweraliikirira, n'entunula ye ne yeeyongera okukyuka; n'abakungu be amagezi ne gababula.

¹⁰Awo muka kabaka bwe yawulira ebigambo ebyatuuka ku kabaka n'abakungu be, n'agenda mu kisenge ekinene embaga mwe yali n'ayogera nti, "Ayi kabaka, owangaale! Leka kweraliikirira, so tokeejnentererwa.

¹¹Waliwo omusajja mu bwakabaka bwo alimu omwoyo gwa bakatonda abatukuvu. Mu mirembe gya kitaawo yasangibwa okuba n'okutegeera, n'amagezi, ng'aga bakatonda, era Kabaka Nebukadduneeza kitaawo, n'amufuula omukulu w'abasawo, n'abafumu, n'Abakaludaaya, n'abalaguzi.

¹²Omusajja oyo Danyeri, kabaka gwe yatuma Berutesazza, yasangibwa ng'alina omwoyo ogw'okutegeera, n'okumanya, n'okulootolola ebirooto, n'okubikkula

ebigambo eby'ekyama, n'okutta ebibuzo ebizibu ennyo. Kale Danyeri ayitibwe, anaakutegeeza amakulu g'ekiwandiiko."

¹³ Awo Danyeri n'aleetebwa mu maaso ga kabaka, kabaka n'amubuuza nti, "Ggwe Danyeri, omu ku abo abaaleetebwa kabaka kitange mu buwaŋjanguse okuva mu Yuda?

¹⁴ Bantegeezessa ng'omwoyo wa bakatonda abatukuvu ali mu ggwe, era olaba ebitalabibwa bantu abaabulijo, otegeera era oli w'amagezi amasukkirivu.

¹⁵ Abasajja abagezigezi, n'abafumu baaleeteddwa mu maaso gange basome ekiwandiiko ekyo era bantegeeze n'amakulu gaakyo, naye balemeddwa okukinnyonyola.

¹⁶ Naye ntegeezeddwa, ng'oynza okunnyonnyola amakulu g'ebigambo ebizibu. Kaakano bw'ononsomera ekiwandiiko ekyo, era n'ontegeeza n'amakulu gaakyo, onooyambazibwa engoye ez'effulungu n'omukuufu ogwa zaabu mu bulago, era oliba mukulu owookusatu mu bwakabaka."

¹⁷ Awo Danyeri n'addamu kabaka nti, "Ebirabo byo byeterekere, n'empeera yo ogiwe omuntu omulala. Naye nzija kukusomera ekiwandiiko era nkutegeeze n'amakulu gaakyo.

¹⁸ "Katonda Ali Waggulu Ennyo yawa Nebukadduneeza kitaawo obwakabaka, n'obuyinza, n'ekitiibwa n'obukulu, ayi kabaka;

¹⁹ era olw'obuyinza bwe yamuwa, abantu bona n'amawanga gonna n'abantu ab'ennimi zonna baamutyanga era ne bakankana mu maaso ge. Abo kabaka be yayagalanga battibwe, battibwanga; n'abo be yasoniyiwanga, baasoniyibwanga; n'abo be yayagalanga okugulumiza bagulumizibwanga, n'abo be yayagalanga okutoowaza, baatoowazibwanga.

²⁰ Naye omutima gwe bwe gwegulumiza ne gukakanyala olw'amalala ge, yaggyibwa ku ntebe ye ey'obwakabaka, n'ekitiibwa kye ne kimuggyibwako.

²¹ N'agobebwa mu bantu, n'ebirowoozo bye ne biwaanyisibwa n'aba ng'ensolo ey'omu nsiko, n'abeera wamu n'endogoyi ez'omu nsiko, n'alya omuddo ng'ente, n'omubiri gwe ne gutoba omusulo ogw'eggulu, okutuusa lwe yategeera nga Katonda Ali Waggulu Ennyo, y'afuga obwakabaka bw'abantu, era y'ateekawo buli gw'asiima.

²² "Naye ggwe mutabani we, Berusazza, teweetoowazizza mu mutima newaakubadde ng'ebyo byonna wabimanya.

²³ Weegulumizizza eri Mukama w'eggulu; ebikompe ebyaggyibwa mu yeekaalu ye, obitumizzaayo; era ggwe, n'abakungu bo, n'abakyala bo, n'abazaana bo mubinywereddemu omwenge, n'oluvannyuma ne mutandika okutendereza bakatonda aba ffeeza, n'aba zaabu, n'ab'ebikomo, n'ab'ebiyuma, n'ab'emiti, n'ab'amayinja abatayinza kulaba newaakubadde okuwulira newaakubadde

okutegeera. Naye Katonda oyo alina omukka gwo mu ngalo ze, era amanyi engeri zo zonna, tomugulumizizza.

²⁴Kale kyeyavudde akusindikira omukono ogwawandiise ebigambo ebyo.

²⁵“Era ebigambo ebyawandiikkidwa bye bino nti: Mene, Mene, Tekel, Ufarsin.

²⁶“N'amakulu gaabyo ge gano: “*Mene*: Katonda akendezezza ennaku z'obwakabaka bwo era abukomezza.

²⁷“*Tekel*: Opimiddwa ku minzaani, era osangiddwa ng'obulako;

²⁸“*Peres*: Obwakabaka bwo bugabanyiziddwamu, era buweereddwa Abameedi n'Abaperusi.”

²⁹Awo amangwago Berusazza n'alagira Danyeri ayambazibwe engoye ez'effulungu, era bamwambaze omukuufu ogwa zaabu, era n'ekiragiro ne kiyita nga bw'ali omukulembeze owookusatu mu bwakabaka.

³⁰Ekiro ekyo Berusazza kabaka w'Abakaludaaya n'attibwa.

³¹Daliyo Omumeedi n'alya obwakabaka nga wa myaka nkaaga mu ebiri.

Danyeri 6

Danyeriasuulibwa mu Mpuku y'Empologoma

¹Daliyo yalonda abaamasaza kikumi mu abiri mu bwakabaka bwonna,

²era mu abo n'alonda abaabakuliranga basatu, Danyeri nga y'omu ku bo. Abaamasaza baateekebwavo okutegeezanga ng'obwakabaka bwe, bwe bwaddukanyizibwanga, kabaka aleme kufiirizibwa. Era ekyo ne kisanyusa Daliyo.

³Mu biro ebyo Danyeri n'ayatiikirira nnyo okusinga abakulu abalala bona n'abaamasaza bona kubanga yalimu omwoyo omulungi, era kabaka n'ateekateeka okumukuza okuvunaanyizibwanga ensonga zonna z'obwakabaka bwonna.

⁴Olwawulira ebyo, abakungu abalala ababiri n'abaamasaza ne basala amagezi okunoonya ensonga ku Danyeri ku nzirukanya ye ey'ebymirimu egy'obwakabaka, naye ne batayinza kulaba nsonga nkyamu newaakubadde akabi konna, kubanga yali musajja mwesigwa ataalina kwonoona okw'engeri yonna newaakubadde obulagajjavu.

⁵Awo abasajja abo ne bayiiya ensonga endala, ne boogera nti, “Tetugenda kulaba nsonga evunaanyisa Danyeri wabula ng'ekwata ku tteeka lya Katonda we.”

⁶Abakungu abo n'abaamasaza kyebaava bagenda bona eri kabaka mu kibiina ne boogera nti, “Ayi kabaka Daliyo, owangaale!

⁷Abakungu bona, n'abamyuka baabwe, n'abaamasaza, n'abawi b'amagezi ab'oku ntikko, n'abakungu, bateesessa ne bakkiriziganya okusaba kabaka okuteeka etteeka, n'okuwa ekiragiro ekinywevu, nga buli anaasabanga eri katonda omulala oba omuntu omulala yenna mu nnaku amakumi asatu ezinaddirira, okuggyako ng'asinza ggwe, ayi kabaka, asuulibwe mu mpuku y'empologoma.

⁸Kaakano ayi kabaka teeka etteeka era liwandiikibwe, ng'amateeka g'Abameedi n'Abaperusi agatajjulukuka bwe gali, kireme okukyusibwa."

⁹Awo kabaka Daliyo n'akola etteeka n'alissaako n'omukono gwe.

¹⁰Awo Danyeri bwe yamanya ng'etteeka liwandiikkidwa, n'agenda ewuwe mu nnyumba ye, n'ayambuka mu kisenge kye ekya waggulu ekyalina amadirisa nga goolekedde Yerusaalemi, n'afukamiranga emirundi esatu olunaku, n'asabanga era ne yeebazanga Katonda we nga bwe yakolanga bulijjo.

¹¹Awo abasajja bali ne bateekateeka okugenda ng'ekibiina ne basanga Danyeri ng'asaba era nga yeegayirira Katonda we.

¹²Ne bagenda eri kabaka ne bamujukiza ekiragiro ne boogera nti, "Ayi kabaka, tewateeka etteeka nga buli anaasabanga katonda omulala oba omuntu omulala yenna mu nnaku amakumi asatu eziddirira wabula ng'asinza ggwe, alisuulibwa mu mpuku y'empologoma?" Kabaka n'addamu nti, "Weewaawo, etteeka bwe liri, ng'amateeka g'Abameedi n'Abaperusi bwe gali agatajjulukuka."

¹³Awo ne bagamba nti, "Danyeri omu ku baawanjangusibwa okuva mu Yuda, takussaako mwoyo, ayi kabaka, newaakubadde etteeka ly'owandiise. Asaba eri Katonda we emirundi esatu buli lunaku."

¹⁴Kabaka bwe yawulira ebigambo ebyo n'anakuwala nnyo, n'agezaako okuwonya Danyeri, era n'amala olunaku lwonna ng'afuba nnyo okumuwonya.

¹⁵Naye abasajja ne bagenda bona ng'ekibiina eri kabaka ne bamugamba nti, "Jjukira, ayi kabaka, ng'etteeka ery'Abameedi n'Abaperusi kabaka ly'ataddeko omukono, terikyusibwa."

¹⁶Awo kabaka n'alagira, Danyeri n'aleetebwa, n'asuulibwa mu mpuku y'empologoma. Kabaka n'agamba Danyeri nti, "Nkusabira eri Katonda wo, gw'oweereza bulijjo akulokole!"

¹⁷Ne baleeta ejinja ne baliteeka ku mulyango gw'empuku, kabaka n'alissaako akabonero ke ye, n'abakungu be ne balissaako obubonero bwabwe, ekigambo kyonna kireme okukyusibwa ku nsonga ya Danyeri.

¹⁸Awo kabaka n'addayo mu lubiri lwe, naye n'atalya kintu na kimu ekiro ekyo, era n'atakkiriza kusanyusibwa, n'otulo ne tumubula.

¹⁹Ku makya ennyo emambya ng'esaze, kabaka n'agolokoka n'ayanguwa okugenda ku mpuku ey'empologoma.

²⁰Bwe yasembera okumpi ne Danyeri we yali, n'amukoowoola mu ddoboozi ery'ennaku ng'agamba nti, "Danyeri omuddu wa Katonda omulamu, Katonda wo, gw'oweereza bulijjo akuwonyezza empologoma?"

²¹Danyeri n'addamu nti, "Wangaala, ayi kabaka.

²²Katonda wange yatumye malayika we, n'aziba emimwa gy'empologoma zireme okunkolako akabi kubanga nasangiddwa nga sirina musango mu maaso ge. Ate ne mu maaso go sirina musango, ayi kabaka."

²³Kabaka n'asanyuka nnyo n'alagira Danyeri aggyibwe mu mpuku. Awo Danyeri n'aggyibwa mu mpuku, n'atasangibwako kiwundu na kimu, kubanga yeesiga Katonda we.

²⁴Awo amangwago kabaka n'alagira, abasajja abaalumiriza Danyeri baleetebwe, era basuulibwe mu mpuku y'empologoma, wamu ne bakyala baabwe n'abaana baabwe. Baali tebanatuuka na ku ntobo y'empuku, empologoma ne zibasinza amaanyi ne zimenyaamenya amagumba gaabwe gonna.

²⁵Awo kabaka Daliyo n'awandiikira abantu bona, n'amawanga gonna n'abantu ab'ennimi zonna mu nsi yonna nti, "Emirembe gibeere gye muli!

²⁶"Nteeka etteeka mu buli kitundu ky'obwakabaka bwange bwonna nga ndagira nti abantu bateekwa okutya n'okussaamu Katonda wa Danyeri ekitiibwa. "Kubanga ye Katonda omulamu, abeerera emirembe gyonna; n'obwakabaka bwe tebuliggwaawo, n'okufuga kwe tekulikoma.

²⁷Alokola era awonya: akola obubonero n'ebiyamagero mu ggulu ne ku nsi. Yalokodde Danyeri mu mannyo g'empologoma."

²⁸Awo Danyeri n'aba n'omukisa mu mirembe gya Daliyo era n'awangaala okutuusa ne mu mirembe gya Kuulo Omuperuzi.

Danyeri 7

Ekirooto kya Danyeri eky'Ensolo Ennya

¹Mu mwaka ogw'olubereberye ogw'obufuzi bwa Berusazza kabaka w'e Babulooni, Danyeri n'aloota era n'ayolesebwa ng'agalamidde ku kitanda kye. N'awandiika byonna bye yaloota.

²Danyeri n'ayogera nti, "Mu kwolesebwa kwange ekiro, nalaba empewo ez'omu ggulu nnya nga zisiikuula ennyanja ennene,

³n'ensolo enkambwe nnya ez'ebika eby'enjawulo ne ziva mu nnyanja.

⁴"Eyasooka yali mpologoma ng'erina ebiwaawaatiro eby'empungu. Awo bwe nnali nga nkyagitunuulira, ebiwaawaatiro byayo ne bigikuunyuukako,

n'esitulibwa, n'eyimirira ku magulu abiri ng'omuntu, n'eweewba omutima ogw'omuntu.

5 “Ate ne ndaba ensolo enkambwe eyookubiri, eyali ng'eddubu. N'esitulibwa ku luuyi olumu era yalina embiriizi ssatu mu kamwa kaayo, n'eragirwa nti, ‘Situka olye ennyama nnyingi.’

6 “Oluvannyuma ne ndaba ensolo enkambwe endala eyali ng'engo, ng'erina ebiwaawaatiro bina eby'ennyonyi, ng'erina n'emite ena, n'eweewba n'obuyinza okufuga.

7 “N'oluvannyuma mu kwolesebwa kwange ekiro, ne ndaba ensolo enkambwe eyokuna, nga ya ntiisa, nga ya buyinza era nga ya maanyi mangi nnyo. Yalina amannya amanene ag'ekyuma, n'erya n'ebetenta, n'erinniyirira ebyasigalawo. Yali yanjawulo ku nsolo enkambwe endala, ng'erina n'amayembe kkumi.

8 “Awo bwe nnali nga nkyalowooza ku mayembe, ne walabika mu maaso gange ejjembe eddala, ettono, eryava mu ago; n'amayembe asatu ku ago ag'olubereberye ne gasimbulirwa ddala. Ejjembe eryo lyalina amaaso ng'ag'omuntu, n'akamwa akaayogeranga eby'okwegulumiza.

9 “Era nga nkyali awo ne ndaba, “entebe ez'obwakabaka nga ziteekeddawo, n'Owedda n'Edda n'atuula ku ntebe ye ey'obwakabaka. Ebyambalo bye byali byeru ng'omuzira, n'enviiri ez'oku mutwe gwe nga njeru ng'ebyoya by'endiga. Entebe ye ey'obwakabaka yali eyakaayakana ng'ennimi z'omuliro, ne namuziga zaayo nga zaaka omuliro.

10 Omugga gw'omuliro nga gukulukuta, nga gukulukutira awo mu maaso ge. Abantu nkumi na nkumi baamuweerezanga, n'emite walo n'emite walo baayimiriranga mu maaso ge. Okuwozesha emisango ne kutandika, ebitabo ne bibikkulwa.

11 “Awo ne neyongera okwetegereza ebigambo eby'okwegulumiza, ejjembe lye byayogeranga. Ne ntunula okutuusa ensolo enkambwe bwe yafumitibwa n'ettibwa, n'esuulibwa mu muliro, n'ezikirizibwa.

12 Ensolo enkambwe endala zo zaggibwako obuyinza bwazo, kyokka ennaku zaazo ne zongerwako.

13 “Mu kwolesebwa okwo ekiro ne ndaba, laba, omuntu eyafaanana ng'omwana w'omuntu, ng'ajja n'ebire eby'omu ggulu. N'ajja okumpi n'Owedda n'Edda, n'asembezebwu mu maaso ge.

14 N'aweeewba obuyinza, n'ekitiibwa, n'obwakabaka n'amaanyi agava waggulu; abantu bona, n'amawanga gonna, n'abantu ab'ennimi zonna ne bamusinzanga. Okufuga kwe kwa mirembe na mirembe, tekuliggwaawo, n'obwakabaka bwe tebulizikirizibwa.

Amakulu g'Ekirooto

¹⁵ “Nze Danyeri ne ntawaanyizibwa mu mutima, n’okwolesebwa kwe nafuna ne kunneeraliikiriza.

¹⁶ Ne nsemberera omu ku baali bayimiridde awo ne mubuuza amakulu g’ebyo byonna. “N’antegeeza amakulu g’ebintu ebyo, n’anjambala nti,

¹⁷ ‘Ensolo enkambwe ezo ennya, be bakabaka abana abalisibuka mu nsi.

¹⁸ Naye abatukuvu ab’Oyo Ali Waggulu Ennyo baliweebwa obwakabaka, era buliba bwabwe emirembe n’emirembe, weewaawo okutuusa emirembe gyonna.’

¹⁹ “Awo ne njagala okumanya ensolo enkambwe eyokuna ky’etegeeza, etaafaanana ng’endala zonna, eyali ey’entiisa ennyo, amannyo gaayo nga ga kyuma, n’enjala zaayo nga za kikomo, eyabetenta, n’emenyaamenya era n’erinnyirira ezaasigalawo.

²⁰ Ate ne njagala n’okumanya ku by’amayembe ekkumi agaali ku mutwe gwayo, ne ku by’ejjembe liri eddala eryasibuka wakati mu go, asatu ne galivuunamira, ejjembe eryo lye lyalina amaaso n’akamwa akayogeranga eby’okwegulumiza, era mu buyinza nga lirabika okusinga ganne gaalyo.

²¹ Awo bwe nnali nkyatunula, ejjembe eryo ne lirwana n’abatukuvu ne lyagala okubawangula,

²² okutuusa ow’Edda n’Edda bwe yajja n’asala omusango, abatukuvu b’Oyo Ali Waggulu Ennyo ne bagusinga, era n’ekiseera ne kituuka ne baweebwa obwakabaka.

²³ “N’annyinnyonnyola nti, ‘Ensolo enkambwe eyokuna bwe bwakabaka obwokuna obulirabika ku nsi, era tebulifaanana ng’obwakabaka obulala; era bulirya ensi yonna, ne bugirinnyirira ne bugibetentabetenta.

²⁴ Amayembe ekkumi, be bakabaka ekkumi abaliva mu bwakabaka obwo, era walirabikawo n’omulala oluvannyuma lw’abo, atalifaanana ng’aboolubereberye. Aliwangula bakabaka basatu.

²⁵ Alyogera ebigambo ebibi ku Oyo Ali Waggulu Ennyo, era aligezaako okukyusakyusa ebiseera ebyateekebwawo n’amateeka agassibwawo. Era abatukuvu baliweebwayo mu mukono gwe okufugibwa okumala emyaka esatu n’ekitundu.

²⁶ “Kyokka oluvannyuma omusango gulisalibwa, n’obuyinza bwe ne bumuggyibwako, ne buzikiririzibwa ddala.

²⁷ N’oluvannyuma ekitiibwa, n’obuyinza n’obukulu obw’obwakabaka obuli wansi w’eggulu, buliweebwa abatukuvu b’Oyo Ali Waggulu Ennyo. Obwakabaka bwe bulibeerawo emirembe gyonna, n’amatwale amalala gonna galimugondera ne gamuweereza.’

28 “Ebigambo ebyo wano we bikoma. Naye nze Danyeri natawaanyizibwa nnyo mu mutima, n’amaaso gange ne gammyuka, naye ensonga ezo ne nzeekuumma.”

Danyeri 8

Okwolesebwa kwa Danyeri okw’Endiga Ennume n’Embuzi Ennume

1 Mu mwaka ogwokusatu mu mirembegya Kabaka Berusazza, nze Danyeri ne nfunakwolesebwa oluvannyuma olwa kuli okwasooka.

2 Mu kwolesebwa okwo ne ndaba nga ndi mu kibuga ekikulu Susani mu ssaza Eramu, nga ndi ku mabbali g’omugga Ulaayi.

3 Ne nnyimusa amaaso gange ne ndaba, laba, endiga ennume eyalina amayembe abiri, n’amayembe ago gombi nga mawanvu naye erimu nga lisinga linnaalyo obuwanyu, ate nga lyo lyakula luvannyuma.

4 Ne ndaba endiga ennume ng’etomera edda ku luuyi olw’ebugwanjuba n’eri obukiikkono, ne ku luuyi olw’obukiikkaddyo. Ne wataba nsolo nkambwe n’emu egisinja amaanyi, ate nga mpaawo ayinza kuwona maanyi gaayo. N’ekola nga bwe yayagala era ne yeefuula ya kitalo.

5 Awo bwe nnali nkyalowooza ku ebyo, amangwago ne walabika embuzi ennume eyalina ejjembe eddene mu kyenyi ng’eva ebugwanjuba, n’esala okuva ku luuyi olumu olw’ensi, okulaga ku luuyi olulala nga terinnye ku ttaka.

6 N’erumba n’obusungu bungi endiga ennume eyalina amayembe abiri, gye nalaba ng’eyimiridde ku mabbali g’omugga.

7 Ne ngiraba ng’esemberera endiga eyo ennume, mu busungu obungi n’egitomera era n’emenya amayembe gaayo gombi; endiga ennume n’eggwaamu amaanyi n’eteyinza kwetaasa, embuzi ennume n’egikoona n’egwa wansi n’egirinnyirira, ne wataba n’omu eyayinza okuwonya endiga ennume eyo mu maanyi g’embuzi ennume.

8 Embuzi ennume ne yeegulumiza nnyo, naye mu maanyi gaayo amangi, ejjembe lyayo eddene ne limenyeka, we lyali amayembe ana agalabika obulungi ne gamerawo nga gadda eri embuyaga ennya ez’omu ggulu.

9 Mu ago ne muva ejjembe eddala ettono, ne likula mu maanyi mangi okwolekera obukiikkaddyo, n’ebuvanjuba n’eri ensi ey’ekitalo ennungi.

10 Ne likula ne lituuka eri eggye ery’omu ggulu, ne lisuula abamu ku b’eggye n’emmunyeenye ezimu wansi ku nsi, ne libirinnyirira.

11 Ne lyegulumiza okwenkanankana omukulu w’eggye, ne limuggyako ekiweebwayo ekyokebwa, n’ekifo eky’awatukuvu ne lyoonoonawo.

¹²Olw'obujeemu eggye awamu n'ekiweebwayo ekyokebwa ekya buli lunaku ne biriweebwa. Amazima ne gasuulibwa wansi, ne buli kye lyakolanga ne kiba kya mukisa.

¹³Ne mpulira omutukuvu ng'ayogera, n'omutukuvu omulala n'agamba oyo eyayogera nti, "Okwolesebwa okwogera ku kiweebwayo ekyokebwa ekya buli lunaku, ne ku bujeemu okuleeta okwonoona okungi, ne ku kuwaayo okwa watukuvu, ne ku batukuvu abalinnyrirwa, kulituukirira ddi era ebyo byonna birikoma ddi?"

¹⁴N'aŋjamba nti, "Okutuusa ng'ennaku enkumi bbiri mu bisatu ziyiseewo."

Amakulu g'Okwolesebwa

¹⁵Awo nze Danyeri bwe namala okufuna okwolesebwa okwo nga nkyagezaako okutegeera amakulu gaakwo, laba ne wayimirira mu maaso gange ekifaananyi ng'eky'omusajja.

¹⁶Ne mpulira eddobozi ly'omusajja emitala w'omugga Ulaayi, eryakoowoola, ne lyogera nti, "Gabulyeri, tegeeza omusajja oyo amakulu g'okwolesebwa okwo."

¹⁷Awo n'asembera okumpi ne we nnali nnyimiridde, ne ntya, ne neeyala wansi. Naye n'aŋjamba nti, "Tegeera, ggwe omwana w'omuntu, ng'okwolesebwa, kwogera ku biro eby'enkomerero."

¹⁸Awo bwe yali akyayogera nange, ne nkwatibwa otulo otungi ennyo, ng'amaaso gange nga ngavuunise ku ttaka, ye n'ankwatako n'angolokosa.

¹⁹N'ayogera nti, "Laba, ndikumanyisa ebiribaawo mu biro eby'enkomerero eby'okubonaabona, kubanga okwolesebwa kwogera ku kiseera ekyalondebwa eky'enkomerero.

²⁰Endiga ennume gye walaba ey'amayembe abiri, be bakabaka ab'Obumeedi, n'Obuperusi.

²¹N'embuzi ennume endaawo ye kabaka w'e Buyonaani, n'ejjembe eddene eriri mu kyenyi kyayo ye kabaka ow'olubereberye.

²²N'amayembe ana agadda mu kifo kyalyo nga limenyese, bwe bwakabaka obuna obuliva mu ggwanga lye, naye tebuliba na buyinza bwe bumu ng'obubwe.

²³"Mu biro eby'enkomerero eby'okufuga kwabwe, abajeemu nga batandise okusobya ennyo, kabaka omuzira ate omukambwe, ng'alina obukoddyo bungi alivaayo.

²⁴Aliba n'amaanyi mangi, naye si lwa buyinza bwe ye, era alireeta entiisa nnene, era aliba wa mukisa mu buli ky'akola. Alizikiriza abantu ab'amaanyi n'abantu abatukuvu.

²⁵Aliba mulimba nnyo, n'aleetera obulimba okweyongera, era alyegulumiza nnyo. Aligwikiriza abantu bangi n'abazikiriza, era n'alumba n'Omukulu w'abalangira. Wabula naye alizikirizibwa so si n'amaanyi ag'obuntu.

²⁶"Okwolesebwa okukwata ku biro eby'oku makya ne ku by'akawungeezi, kwe wafuna kwa mazima, naye sirikira okwolesebwa okwo, kubanga kwogera ku biro ebigena okujja."

²⁷Nze Danyeri ne mpulira nga nkooye nnyo era ne ndwala okumala ennaku. N'olvannyuma nga nzisuuse ne nzira ku mirimu gyा kabaka, kyokka okwolesebwa okwo ne kuntawanya nnyo mu mutima, ate nga sitegeera makulu gaakwo.

Danyeri 9

Okusaba kwa Danyeri

¹Mu mwaka ogw'olubereberye ogwa Daliyo mutabani wa Akaswero Omumeedi, gwe yaliiramu obwakabaka bwa Bakaludaaya,

²mu mwaka ogwo ogw'olubereberye, nze Danyeri ne ntegeera amakulu ag'ebyawandiikibwa, ng'ekigambo kya MUKAMA bwe kiri kye yawa Yeremiya nnabbi, ng'okubonaabona kwa Yerusaalemi kulitwala emyaka nsanvu.

³Awo ne nkyukira Mukama Katonda ne nnoonya okubeerwa okuva gyali nga nsaba era nga neegayirira, nga nsiiba era nga nyambadde ebibukutu nga neesiize evvu.

⁴Ne nsaba MUKAMA Katonda wange ne mwatulira nti, "Ayi Mukama omukulu era ow'entiisa, akuuma endagaano ye so n'okwagala kwo tekujjulukuka eri abo bona abakwagala era abagondera ebiragiro byo,

⁵twonoonye era tusobezza, tukoze eby'ekyejo n'ebu'obujeemu, era

⁶tetwawuliriza baddu bo bannabbi, abaayogeranga mu linnya lyo eri bakabaka baffe, n'eri abalangira baffe, n'eri bajajjaffe, n'eri abantu bona ab'omu nsi.

⁷"MUKAMA oli mutukuvu, naye olunaku lwa leero tuswadde, abantu ba Yuda, n'abatuuze ba Yerusaalemi, ne Isirayiri yenna, abali okumpi n'abali ewala mu nsi zonna gye wabawanjangusiriza olw'obutaba beesigwa gy'oli.

⁸Ayi MUKAMA, ffe ne bakabaka baffe, n'abalangira baffe, ne bajajjaffe tuswadde kubanga twonoonye.

⁹MUKAMA Katonda waffe ajjudde okusaasira n'okusonyiwa, newaakubadde nga tumujeemedde,

¹⁰ne tutawuliriza ddoboazi lya MUKAMA Katonda waffe, newaakubadde okukuuma amateeka ge, ge yatuwa ng'ayita mu baddu be bannabbi.

¹¹Isirayiri yenna bamenye amateeka go ne bakuvaako, era bakujeemedde. “Noolwekyo ebikolimo n’ebirayiro ebyawandiikibwa mu mateeka ga Musa omuddu wa MUKAMA kyebivudde bitutuukako kubanga twayonoona mu maaso go.

¹²Otuukirizza ebigambo bye watwogerako, n’eri abakulembeze baffe, bw’otuleeseko akabi akanene; era wansi w’eggulu tewabangawo kintu kinene bwe kityo ekyakolebwa, ng’ekyo ekituuse ku Yerusaalemi.

¹³Nga bwe kyawandiikibwa mu mateeka ga Musa, bwe bityo ebisobyo byonna bwe byatutuukako, naye ate nga tetunneegayirira kisa kya MUKAMA Katonda waffe, okulekayo ebikolwa byaffe ebitali bya butuukirivu tusseeyo omwoyo okugoberera amazima.

¹⁴MUKAMA kyeyava talwa kutuleetako buzibu obwo, kubanga MUKAMA Katonda waffe mutuukirivu mu buli ky’akola, naye tetugondedde ddoboozi lye.

¹⁵“Ggwe, Ayi MUKAMA Katonda waffe eyaggya abantu bo mu nsi ey’e Misiri n’omukono gwo ogw’amaanyi ne weekolera erinnya, eryayatiikirira ne leero, twayonoona ne tukola ebitali bya butuukirivu.

¹⁶Ayi Mukama, ng’obutuukirivu bwo bwonna bwe buli, obusungu bwo n’ekiruyi kyo obiggye ku kibuga kyo Yerusaalemi, olusozi lwo olutukuvu, kubanga olw’ebibi byaffe n’ebikolwa byaffe ebitali bya butuukirivu ebya bajjajjaffe, tufuuse eky’okusekererwa eri abatwetoolodde bona.

¹⁷“Kaakano, Ayi Katonda waffe, owulire okusaba n’okwegayirira kw’omuddu wo, olw’okusaasira kwo Ayi Mukama otunule eri ekifo kyo ekitukuvu.

¹⁸Ayi Katonda wange, otege okutu kwo owulirize, otunuulire okuzika kw’ekibuga ekyatumumbwa erinnya lyo, kubanga tetuleeta byetaago byaffe eri ggwe olw’obutuukirivu bwaffe, wabula olw’okusaasira kwo okungi.

¹⁹Ayi Mukama otuwulire! Ayi Mukama, otusonyiwe! Ayi Mukama otuwulire era obeeko ne ky’okolawo! Olw’okusaasira kwo, Ayi Katonda wange oleme okulwa, kubanga ekibuga kyo n’abantu bo n’eggwanga lyo bayitibwa Erinnya lyo.”

Amakulu ga Wiiki Omusanvu

²⁰Awo bwe nnali nga njogera era nga nsaba, nga njatula ebibi byange n’ebibi by’abantu bange Isirayiri, nga neegayirira MUKAMA Katonda wange ku lw’olusozi lwe olutukuvu,

²¹awo mu kiseera ekyo nga nkyasaba, omusajja Gabulyeri, gwe nalaba mu kwolesebwa okwasooka, n’ajja gye ndi mu mbuyaga ey’amaanyi mu kiseera ekya ssaddaaka ey’akawungeezi.

²²N’anjamba nti, “Danyeri, kaakano nzize okukuwa amagezi n’okutegeera.

²³Amangu nga waakatandika okusaba, okwegayirira kwo kwaddibwamu era nzize okukutegeeza, kubanga oli mwagalwa nnyo. Noolwekyo ssaayo omwoyo eri ekigambo kino, otegeere bye wayolesebwa.

²⁴“Wiiki nsavu ze ziweereddwa abantu bo n’ekibuga kyo ekitukuvu okukomya ebikolwa byabwe ebibi, n’okuleka ebibi, n’okutangiririrwa olw’ebikolwa ebitali bya butuukirivu, n’okuleeta obutuukirivu obutaliggwaawo, n’okukakasa ebyo ebyayolesebwa n’ebyo ebyalangibwa, n’okufuka amafuta ku asinga obutukuvu.

²⁵“Manya era tegeera ng’okuva ne kaakano ekiragiro nga bwe kiweereddwa ku kuzzibwawo kwa Yerusaalemi n’okutuusa ku kujja okw’omufuzi oyo eyafukibwako amafuta, waliba ebbanga lya wiiki musanvu. N’olvannyuma kirizimbibwa mu wiiki nkaaga mu bbiri ne kitekebwamu enguudo n’olusalosalo, newaakubadde nga biriba biro bya kutegana.

²⁶N’olvannyuma lwa wiiki enkaaga mu ebbiri, eyafukibwako amafuta alisalibwako, era taliba na kintu. Abantu ab’omufuzi balijja ne bazikiriza ekibuga n’awatukuvu, n’enkomerero ye erija ng’amataba, n’entalo era n’okuzika okwalagirwa biryeyongera okutuusa ku nkomerero.

²⁷Alikola endagaano enywevu n’abantu bangi okumala wiiki emu, naye wakati wa wiiki eyo aliggyawo emikolo gya ssaddaaka n’ebiweebwayo. Ne ku kiwaawaatiro eky’ebymizizo kulijirako oyo aleeta okubonaabona, okutuusa ekiseera eky’enkomerero ekyalagirwa nga kituukiridde ku ye.”

Danyeri 10

Danyeri Alaba Malayika mu Kwolesebwa

¹Mu mwaka ogwokusatu ogw’obufuzi bwa Kuulo kabaka w’e Buperusi, Danyeri eyayitbwanga Berutesazza n’afuna okwolesebwa okulala. Ekigambo kye yafuna kyali kya mazima nga kyogera ku lutalo olw’amaanyi. N’ategeera obubaka obwamuweebwa mu kwolesebwa okwo.

²Mu biro ebyo, nze Danyeri ne mmala wiiki ssatu nga nkungubaga.

³Saalya ku mmere ennungi, newaakubadde ennyama wadde okunywa ku wayini; era ne nsiwuukira ddala okumala wiiki ssatu.

⁴Ku lunaku olw’amakumi abiri mu ennya olw’omwezi ogw’olubereberye nga nyimiridde ku mabbali g’omugga omunene Tigiriisi,

⁵ne nnyimusa amaaso gange, ne ntunula waggulu, ne ndaba omusajja ayambadde linena, nga yeesibye olukoba olwa zaabu ennongooseemu mu kiwato.

⁶Omubiri gwe gwali gumasamasa ng’ejinja erya berulo, n’ekyenyi kye nga kiri ng’okumyansa okw’eggulu, n’amaaso ge nga gali ng’ettabaaza ez’omuliro,

n'emikono gye n'amagulu ge nga biri ng'ebbala ly'ekikomo ekizigule, n'eddoboozi lye ng'oluyoogaano olw'ekibiina ekinene.

⁷ Nze Danyeri nzekka, nze nalaba okwolesebwa okwo, abasajja be nnali nabo tebaakulaba, wabula bajjula entiisa, ne badduka ne beekweka.

⁸ Ne nsigala nzekka, nga neewuunya okwolesebwa okunene okwo; ne nzigwamu amaanyi; amaaso gange ne gayongobera, ne mba, nga seesobola.

⁹ Awo ne mpulira ng'ayogera, era bwe nnali nga nkyamuwuliriza, ne neebaka otulo tungi nnyo, amaaso gange nga gatunudde wansi ku ttaka.

¹⁰ Ne wabaawo omukono ogunkwatako, emikono gyange n'amaviivi gange ne bitanula okujugumira.

¹¹ N'anjamba nti, "Danyeri, ggwe omusajja omwagalwa ennyo, tegeera era osseeyo omwoyo ku bigambo bye njogera naawe, era yimuka oyimirire kubanga ntumiddwa gy'oli." Awo bwe yayogera ebiambo ebyo gye ndi ne nnyimirira nga nkankana.

¹² N'alyoka anjamba nti, "Totya Danyeri, kubanga okuva ku lunaku olwasooka lwe wamalirira okutegeera ne weetooowaza mu maaso ga Katonda wo, ebiambo byo byawulirwa, era nzize olw'ebiambo byo.

¹³ Namala ennaku amakumi abiri mu lumu nga nkyalwana n'omulangira w'e Buperusi, naye Mikayiri omu ku balangira abakulu n'ajja n'annyamba, kubanga kabaka w'e Buperusi yali ankwaitidde eyo.

¹⁴ Kaakano nzize okukunnyonnyola ebigena okutuuka ku bantu bo mu biro eby'omu maaso; kubanga bye wayolesebwa byogera ku biro ebigena okujja."

¹⁵ Awo bwe yali ng'akyambuulira ebyo, ne nkutama, ne ntunuza amaaso gange wansi, ne nsirika.

¹⁶ Awo ne wajja eyafaanana ng'omuntu n'akoma ku mimwa gyange, ne ntanula okwogera. Ne ηnjamba eyali annyimiridde mu maaso nti, "Mukama wange nzijjudde obuyinike, era n'amaanyi sirina olw'ebyo bye njolesebbwa.

¹⁷ Nnyinza ntya nze omuddu wo okwogera naawe ggwe mukama wange? Amaanyi gampweddemu, sokyayinza na kussa bulungi mukka."

¹⁸ Nate eyafaanana ng'omuntu n'ankomako n'anzizaamu amaanyi.

¹⁹ N'anjamba nti, "Ggwe omwagalwa ennyo, totya. Emirembe gibeere gy'oli, guma omwoyo era beera n'obuvumu." Awo bwe yayogera nange, ne nziramu amaanyi, ne njogera nti, "Yogera mukama wange, kubanga onzizizzaamu amaanyi."

²⁰ N'alyoka ayogera nti, "Ekindeese gy'oli okimanyi? Mu bbanga eritali ly'ewala, nzija kuddayo okulwanyisa omulangira ow'e Buperusi, era bwe ndimuwangula, omulangira ow'e Buyonaani alijja.

²¹ Naye okusooka byonna, ka nkutegeeze ebyawandiikibwa ebiri mu kitabo eky'amazima: Tewali n'omu ambeera okuggyako Mikayiri, omulangira wammwe abakuumma.

Danyeri 11

¹ Mu mwaka ogw'olubereberye ogw'obufuzi bwa Daliyo Omumeedi, nayimirira okumugumya era n'okumunyweza.

Bakabaka ab'omu Bukiikaddyo, n'ab'omu Bukiikkono

² "Kaakano nnaakutegeeza eby'amazima: Bakabaka basatu abalala balifuga mu Buperusi, n'wookuna aliba mugagga nnyo okusinga bali bona; era bw'alimala okwenyweza olw'obugagga bwe, alikubiriza bona okujeemera obwakabaka obwa Buyonaani.

³ N'olvannyuma walirabika kabaka ow'amaanyi, alifuga n'obuyinza bungi n'akola nga bw'ayagala.

⁴ N'olvannyuma obwakabaka bwe bulisasika ne bugabanyizibwa eri embuyaga ennya ez'omu ggulu. Ezzadde lye teriribugabana, era n'obwakabaka obwo tebuliba na buyinza bwe yalina kubanga obwakabaka bwe bulisigulwa ne buweebwa abalala.

⁵ "Kabaka ow'obukiikaddyo aliba w'amaanyi, naye omu ku bakungu be aliba w'amaanyi okumusinga era alifuga obwakabaka bwe n'amaanyi mangi.

⁶ Bwe waliyatwo emyaka, balyegatta wamu n'omuwala wa kabaka ow'obukiikaddyo, aligenda eri kabaka ow'obukiikkono okumwegattako, naye talisigaza buyinza bwe so ne kabaka newaakubadde ezzadde lye tebaliwangaala. Mu biro ebyo aliweebwayo ye n'abo baayita nabo mu lubiri, awamu ne kitaawe, era n'oyo eyamuwigira.

⁷ "Ow'omu lulyo lwe, yaalitwala ekifo kye; alirumba eggye lya kabaka ow'obukiikkono n'ayingira mu lubiri lwe, era alibalwanyisa n'abawangula.

⁸ Aliddira bakatonda baabwe n'ebifaananyi byabwe ebisaanuuse n'ebintu byabwe eby'omuwendo ebya ffeeza n'ebya zaabu n'abitwala e Misiri, era alimala ebbanga nga tazzeeyo kulumba kabaka w'obukiikkono.

⁹ Kabaka w'obukiikkono alirumba amatwale ga kabaka w'obukiikaddyo naye olvannyuma aliwalirizibwa okuddayo mu nsi ye.

¹⁰Batabani be balyeteekateeka ne bakunjaanya eggye eddene era balisaanyaawo ensi eyo ng'amazzi aganjaala n'amaanyi, era balituuka ku lubiri lwe.

¹¹"Mu busungu obungi, kabaka w'obukiikaddyo alirumba kabaka w'obukiikkono ow'eggye eddene, n'amuwangula.

¹²Kabaka w'obukiikaddyo bw'alimala okuwangula eggye eryo eddene, n'aliwamba, alyegulumiza n'atta bangi ku bo, naye taliwangaala.

¹³Bwe walijitawo ebbanga kabaka w'obukiikkono aliquinjaanya n'afuna eggye eddene okusinga ery'olubereberye, n'oluvannyuma lw'emyaka emingi, alirumba n'eggye lye ng'alina ebyokulwanyisa ebiwera.

¹⁴"Mu biro ebyo bangi balijeemera kabaka w'obukiikaddyo; era n'abasajja ab'effujo ab'omu ggwanga lyo balitandika okujeema, naye baliremwa, ebigambo bye wayolesebwa bituukirire.

¹⁵Awo kabaka w'obukiikkono alija n'akola ebifunvu era aliwamba ekibuga ekiriko bbugwe. Eggye ery'omu bukiikaddyo teririsobola kumulwanyisa, newaakubadde abaserikale baabwe abatendeke abakugu ennyo okumusobola.

¹⁶Oyo alibalumba, alikola nga bw'ayagala so tewaliba n'omu alimuziyiza; era alyenyeweza mu nsi ennungi, yonna n'ebeera mu buyinza bwe.

¹⁷Alijja n'ekitiibwa eky'obwakabaka bwe kyonna ng'amaliridde okukola endagaano ne kabaka w'obukiikaddyo. Alimuwa muwala we okumufumbirwa awambe obwakabaka, naye enteekateeka ye terituukirira newaakubadde okumuyamba.

¹⁸N'oluvannyuma alikyuka n'alumba ensi ey'oku mabbali g'enyanja n'agiwamba; naye walibaawo omuduumizi alikomya okujooga kwe, n'amwesasuza.

¹⁹Oluvannyuma lw'ebyo alikyuka okwagala okuddayo mu mbiri ez'omu nsi ye, naye alyesittalira mu kkubo n'agwa, n'ataddayo kulabika.

²⁰"Alimusikira, aliweereza omusolooza w'omusolo alituukiriza eby'obwakabaka, naye mu nnaku ntono alizikirizibwa, si mu lutalo newaakubadde mu busungu.

²¹"Alidda mu kifo ky'oyo, aliba musajja mubi nnyo naye nga taweereddwa buyinza buva eri kabaka. Alirumba obwakabaka abantu nga batudde ntende, n'abuwamba ng'akozesa enkwe.

²²Oluvannyuma lw'ebyo egghe ery'amaanyi liriwangulwa ne lizikirizibwa mu maaso ge; n'omulangira ow'endagaano naye alizikirizibwa.

²³Awo bw'alimala okukola endagaano naye, alibeefuulira, n'aba w'amaanyi ng'ayambibwako abantu batono.

²⁴Mu biro eby'emirembe, alirumbaamasaza amagagga, nga tebamwetegekedde, n'akola bajjajaabe bye bataakolanga newaakubadde bajjaja ba bajjajaabe. Aligabula abagoberezi be, ebinyage n'obugagga, ne yekobaana okuwamba embiri, naye ekkyo kirimala akaseera katono.

²⁵"Alikuŋjaanya egghe ddene mu maanyi ge n'obuvumu bwe n'alumba kabaka w'obukiikaddyo. Kabaka w'obukiikaddyo alyerwanako n'egghe eddene era ery'amaanyi ennyo; naye talimuyinza olw'enkwe ze baamusalira.

²⁶N'abo abanaagabana ku bugagga bwa kabaka baligezaako okumuzikiriza, era egghe lye lirisaanawo, bangi ku bo ne bafiira mu lutalo.

²⁷Bakabaka bombi abaamalirira okukola eby'ekyejo mu mitima gyabwe, balituula ku mmeeza emu, ne bakuusagana naye tewalibaawo kya mazima kiteesebwa kubanga enkomerero erituuka mu biro ebyalagirwa.

²⁸Kabaka w'obukiikkono aliddayo mu nsi ye n'obugagga bungi, n'omutima gwe gulikyawa endagaano entukuvu. Era alikola kye yateekateeka mu mutima gwe n'oluvannyuma n'addayo mu nsi ye.

²⁹"Mu bbanga eryagerebwa, alirumba obukiikaddyo nate, naye ku luno tekiriba nga bwe kyali mu biro eby'olubereberye.

³⁰Emmeeri ez'e Kittimu zirimulwanyisa era aliggwaamu amaanyi, n'oluvannyuma alikyuka okuddayo n'asunguwalira endagaano entukuvu. Bw'aliddayo alikolagana n'abo abakyawa endagaano entukuvu.

³¹"Amaggye ge galigolokoka okugwagwawaza awatukuvu wa yeekaalu era aliggyawo ekiweebwayo ekyokebwa ekya buli lunaku. N'oluvannyuma balissaawo eby'emizizo ebireeta ennaku n'okubonaabona.

³²Alisendasenda abo abaajeemera endagaano, naye abantu abamanyi Katonda waabwe baliyimirira ne bamuwakanya n'amaanyi.

³³"Ab'amagezi baliwabula bangi, newaakubadde nga balittibwa, n'abalala ne bookebwa omuliro, n'abalala ne bawambibwa, n'abalala ne banyagibwa okumala akaseera katono.

³⁴Bwe baligwa baliyambibwako akatono era bangi abatali ba mazima balibasendasenda ne babeegattako.

³⁵Abamu ku b'amagezi balyesittala, balyoke balongoosebwe, batukuzibwe, baleme kuba na bbala mu kiseera eky'enkomerero, kubanga ebiro ebyo byategekebwa era birituukirira.

Kabaka Eyeegulumiza

³⁶ “Kabaka alikola nga bw’ayagala. Alyenyumiriza ne yeegulumiza okusinga katonda yenna, era alyogera ebitawulikikangako ku Katonda wa bakatonda. Aliba mugagga okutuusa ebiro eby’obusungu lwe birituukirira, kubanga ekyasalbwawo kiteekwa okutuukirira.

³⁷ Talissa kitibwa mu bakatonda ba jjajaabe newaakubadde oyo abakazi gwe beegomba, so talissa kitibwa mu katonda yenna, naye alyegulumiza okusinga bona.

³⁸ Mu kifo ky’abo, alissa ekitibwa mu katonda w’embiri, katonda ataamanyibwa bajajjaabe gwalitonera zaabu ne ffeeza, n’amayinja ag’omuwendo n’ebirabo eby’omuwendo omungi.

³⁹ Alirumba embiri ez’amaanyi ennyo ng’ayambibwako katonda omugwira, era abo abalissa ekimu naye, alibawa ekitibwa kinene, n’abawa n’okufuga abantu bangi, n’ensi n’agigabanyaamu olw’amagoba.

⁴⁰ “Mu biro eby’enkomerero kabaka w’obukiikkaddyo alimulumba, naye kabaka w’obukiikkono alifubutuka n’ajja okumusisinkana ng’alina amagaali n’abeebagala embalaasi, n’emmeeri nnyingi, era alirumba ensi nnyingi n’aziyitamu ng’embuyaga.

⁴¹ Alirumba Ensi Ennungi n’awamba n’amawanga mangi, naye Edomu ne Mowaabu n’abakulembeze ba Amoni balimuwona.

⁴² Okufuga kwe kulyeyongera mu mawanga mangi, ne Misiri nga mw’omutwalidde.

⁴³ Alifuga amawanika aga zaabu ne ffeeza, n’eby’obugagga byonna ebya Misiri, n’afuula Abalibiya n’Abaesiyopiya okuba abaddu be.

⁴⁴ Naye amawulire agaliva mu buvanjuba ne mu bukiikkono galimukanga, olwo n’alyoka agolokoka mu busungu obungi ennyo okugenda okuzikiriza n’okumalawo bangi ku bo.

⁴⁵ Alisimba eweema ze ez’olubiri wakati w’ennyanja n’olusozi olulungi era olutukuvu; era naye alikoma so tewaliba amuyamba.

Danyeri 12

Ebiseera eby’Enkomerero

¹ “Mu biro ebyo Mikayiri omulangira omukulu akuumma abantu bo aligolokoka, ne yeeyimirira abantu bo. Waliba ekiseera eky’okubonaaboneramu ekitabangawo okuva ku kutondebwa kw’amawanga. Naye mu biro ebyo, omuntu aliba awandiikkidwa mu kitabo, alirokolebwa.

² Bangi ku beebase mu nfuufu ey’ensi baligolokoka, abamu eri obulamu obutaggwaawo, n’abalala eri ensonyi n’okuswazibwa okutaggwaawo.

³Abo abalina okutegeera balyakaayakana ng'okumasamasa kw'omu bbanga; n'abo abakyusa abangi okudda eri obutuukirivu, balyakaayakana ng'emmunyeenye emirembe n'emirembe.

⁴Naye ggwe Danyeri, bikka era osse envumbo ku kitabo okutuusa ekiseera eky'enkomerero lwe kirituuka. Bangi balitambula eno n'eri, era n'okumanya n'amagezi kulyeyongera."

⁵Nze Danyeri ne ndyoka ndaba, laba babiri abalala nga bayimiridde mu maaso gange, omu ku lubalama lw'omugga olumu, n'omulala ku lubalama lw'omugga olulwolekedde.

⁶Omukono bo n'agamba omusajja, eyali waggulu w'amazzi g'omugga ng'ayambadde linena nti, "Kiritwala bbanga ki ebyewuunyisa ebyo byonna okutuukirira?"

⁷Omusajja eyali waggulu w'amazzi g'omugga ng'ayambadde linena, n'ayimusa omukono gwe ogwa ddyo n'omukono gwe ogwa kkono eri eggulu, ne mmuwulira ng'alayira eri oyo abeera omulamu emirembe n'emirembe, ng'ayogera nti, "Waliyatowo ebbanga lya myaka esatu n'ekitundu. Era amaanyi g'abantu abatukuvu bwe galimalibwawo, ebintu ebyo byonna ne biryoka bituukirira."

⁸Ne mpulira naye ne sitegeera. Kyennava mbuuza nti, "Mukama wange, biki ebiriva mu ebyo byonna?"

⁹N'anziramu nti, "Weetambulire makubo go, Danyeri, kubanga ebigambo bibikiddwako era n'ekitabo kissibbwako envumbo okutuusa ekiseera eky'enkomerero.

¹⁰Bangi balitukuzibwa ne balongoosebwa obutabaako na bbala, naye abatali batuukirivu balyeyongera okukola ebibi. Ku batali batuukirivu tekuliba ategeera, naye ab'amagezi baliba n'okutegeera.

¹¹"N'okuva mu kiseera ekya ssaddaaka eya buli lunaku ng'eggyiddwawo n'ebi'emizizo ebizikiriza nga biteekeddawo, waliyatowo ennaku lukumi mu bibiri mu kyenda.

¹²Alina omukisa oyo alirindirira n'atuuka ku nkomerero ey'ennaku olukumi mu bisatu mu asatu mu ttaano.

¹³"Naye ggwe tambula makubo go okutuusa enkomerero lwe lituuka. Oliwummula, ne ku nkomerero oligolokoka n'oweebwa omugabwo gwo gwe wategekerwa."

Koseya

Koseya 1

¹ Buno bwe bubaka bwa MUKAMA bwe yawa Koseya mutabani wa Beeri mu mulembe gwa Uzziya, n'ogwa Yosamu, n'ogwa Akazi n'ogwa Keezeekiya, nga be bakabaka ba Yuda, ne mu mulembe gwa Yerobowaamu mutabani wa Yowaasi, nga ye kabaka wa Isirayiri.

Koseya Afuna Amaka

² Awo MUKAMA bwe yasooka okwogera eri Koseya, yamulagira nti, "Ggenda owase omukazi malaaya, omuzaalemu abaana, era banaayitbwanga abaana aboobwamalaaya, kubanga ensi eyitirizza okukola ekibi eky'obwenzi, n'eva ku MUKAMA."

³ Awo n'awasa Gomeri muwala wa Dibulayimu, n'aba olubuto, n'amuzaalira omwana wabulenzi.

⁴ MUKAMA n'agamba Koseya nti, "Mmutuume erinnya Yezuleeri, kubanga nnaatera okubonereza ennyumba ya Yeeku, olw'okuyiwa omusaayi gw'abantu ab'e Yezuleeri, era ndimalawo obwakabaka bwa Isirayiri.

⁵ Ku lunaku olwo omutego gwa Isirayiri ndigumenyera mu Kiwonvu kya Yezuleeri."

⁶ Gomeri n'aba olubuto olulala, n'azaala omwana wabuwala. MUKAMA n'agamba Koseya nti, "Mmutuume erinnya Lolukama, kubanga ennyumba ya Isirayiri ndiba sokyagyagala, si kulwa nga mbasonryiwa.

⁷ Naye ab'ennyumba ya Yuda ndibaagala, era ndibalokola, si na kasaale, newaakubadde ekitala, newaakubadde entalo, newaakubadde embalaasi newaakubadde abeebagala embalaasi, wabula nze kennyini MUKAMA Katonda waabwe nze ndibaagala era ne mbalokola."

⁸ Awo Gomeri bwe yamala okuggya Lolukama ku mabeere, n'aba olubuto olulala n'azaala omwana wabulenzi.

⁹ MUKAMA n'ayogera nti, "Mmutuume erinnya Lowami, kubanga temukyalu bantu bange, nange sokyali Katonda wammwe.

¹⁰ "Naye ekiseera kirituuka abantu ba Isirayiri ne baba bangi ng'omusenyu ogw'oku nnyanja, ogutayinzika kupimibwa newaakubadde okubalibwa olw'obungi bwagwo. Mu kifo ky'okuyitbwaga abatali bantu bange, baliyitbwaga, baana ba Katonda omulamu.

¹¹ Abantu ba Yuda baliddamu okwegatta n'abantu ba Isirayiri ne beerondamu omukulembeze, ne bava mu buwanjjanguse, era olunaku lwa Yezuleeri luliba lukulu."

Koseya 2

¹ “Mwogere ku baganda bammwe nti, ‘bantu bange,’ mwogere ne ku bannyinammwe nti, ‘baagalwa bange.’”

Okubonerezebwa kwa Isirayiri, n’Okuzzibwa Obuggywa kwabwe

² Munenye nnyammwe, mumunenye, kubanga si mukazi wange, so nange siri bba. Aggyewo obukaba obuli mu maaso ge, n’obwenzi obuva wakati w’amabeere ge;

³ nneme okumwambulira ddala ne mmulekeraawo nga bwe yali ku lunaku kwe yazaalibwa; ne mmufuula ng’eddungu, ne mmulekawo ng’ensi enkalu eteriiko ky’egasa, ne mmussa ennyonta.

⁴ Sirilaga kwagala kwange eri abaana be, kubanga baana ba bwenzi.

⁵ Nnyabwe yakola obwenzi, n’abazaalira mu buwemu. Yayogera nti, “Ndigenda eri baganzi bange abampa emmere n’amazzi, n’ebimbugumya n’ebyokwambala, n’amatuta n’ekyokunywa.”

⁶ Kyendiva nziba ekkubo lye n’amaggwa, ne mmuzimbako bbugwe okumwetooloola, aleme okulaba ekkubo wayitira.

⁷ Aligezaako okugoberera baganzi be abakwate, naye talibatuukako, alibanoonya naye talibalaba. Oluvannyuma alyogera nti, “Naagenda eri bba wange eyasooka, kubanga mu biro ebyo nabanga bulungi okusinga bwe ndi kaakano.”

⁸ Tajjukira nga nze namuwanga enjaano, ne wayini n’amatuta, era eyamuwa effeeza ne zaabu bye baakozesanga okuweerezanga Baali.

⁹ “Kyendiva neddiza emmere yange ey’empeke ng’eyengedde, ne wayini wange ng’atuuse; era nzija kumuggyako ebyambalo byange eby’ebbugumu n’ebiyambalo byange ebya bulijo, bye yayambalanga.

¹⁰ Era kyenaava nyanika obukaba bwe mu maaso ga baganzi be, so tewaliba amuwonya mu mukono gwange.

¹¹ Ndikomya ebinyumu bye byonna, n’embaga ze eza buli mwaka, n’embaga ze ez’emyezi egyakaboneka, ne ssabbiiti ze, n’enkuinjaana ze zonna entukuvu.

¹² Ndizikiriza emizabbibu gye n’emitiini gye, gye yayogerako nti, ‘Guno gwe musala baganzi bange gwe bansasula.’ Ndibizisa, era n’ensolo ez’omu nsiko ziribyonoona.

¹³ Ndimubonereza olw’ennaku ze yayotereza obubaane eri Babaali, ne yeeyambaza empeta n’ebintu eby’omuwendo ennyo, n’agenda eri baganzi be, naye nze n’aneerabira,” bw’ayogera MUKAMA.

¹⁴Kale kyendiva musendasenda, ne mmutwala mu ddungu, ne njogera naye n'eggonjebwa.

¹⁵Era eyo ndimuddiza ennimiro ze ez'emizabbibu, ne nfuula Ekiwonvu kya Akoli oluggi olw'essuubi. Alimpuliriza nga bwe yampulirizanga mu nnaku ez'obuvubuka bwe, era nga mu biro bye yaviira mu nsi ya Misiri.

¹⁶"Ku lunaku olwo," bw'ayogera MUKAMA, "olimpita nti, 'mwami wange;' toliddayo nate kumpita, 'MUKAMA wange.'"

¹⁷Ndiggya amannya ga Babaali mu kamwa ke, so taliddayo nate okwasanguza amannya gaabwe.

¹⁸Ku lunaku olwo ndibakolera endagaano n'ensolo ez'omu nsiko n'enyyonyi ez'omu bbanga, n'ebiyewalula ku ttaka, era ndiggyawo obusaale, n'ekitala, n'entalo mu nsi, bona ne batuula mirembe.

¹⁹Era ndikwogereza ennaku zonna, ndikwogereza mu butuukirivu, ne mu mazima, ne mu kwagala ne mu kusaasira.

²⁰Ndikwogereza mu bwesigwa, era olimanya MUKAMA.

²¹"Ku lunaku olwo, ndyanukula eggulu, nalyo ne lyanukula ensi;

²²ensi erimeramu emmere ey'empeke, ne wayini n'amafuta, nabyo ne bifunibwa Yezuleeri," bw'ayogera MUKAMA.

²³"Ndimwesimbira mu nsi, ndisaasira oyo eyayitbwanga nti, atasaasirwa, era ndigamba abataali bantu bange nti, 'Bantu bange,' era nabo balyogera nti, 'Ggwe Katonda wange.'"

Koseya 3

Koseya addijjana ne mukazi we

¹MUKAMA n'aŋŋamba nti, "Genda, mukyala wo oyongere okumwagala, newaakubadde nga mwenzi era yakwaniddwa omusajja omulala. Mwagale nga MUKAMA bw'ayagala Abayisirayiri newaakubadde nga bakyukira bakatonda abalala ne baagala obugaati obw'emizabbibu enkalu obuwonge eri bakatonda abalala."

²Awo ne mmugula n'effeeza obuzito bwayo gulaamu kikumi mu nsavu ne lita ebikumi bisatu mu amakumi asatu eza sayiri.

³Bwe nt yo ne mugamba nti, "Oteekwa okubeera nange ebbanga lyonna. Lekeraawo okukuba obwamalaaya, oba okukola obwenzi, nange bwe nt yo naabeeranga naawe."

⁴Era bwe batyo abaana ba Isirayiri bwe balibeera okumala ennaku ennyingi nga tebalina kabaka newaakubadde omulangira, nga tebakyawaayo ssaddaaka eri

bakatonda abalala, newaakubadde okusinza amayinja amawonge oba bakatonda abalala, wadde efodi.

⁵ N'oluvannyuma abaana ba Isirayiri balidda ne banoonya MUKAMA Katonda waabwe ne Dawudi kabaka waabwe. Balijja eri MUKAMA nga bakankana nga banoonya emikisa gye mu nnaku ez'oluvannyuma.

Koseya 4

Okulabula eri Isirayiri

¹ Muwulire ekigambo kya MUKAMA, mmwe abantu ba Isirayiri, kubanga MUKAMA abalinako ensonga mmwe abatuula mu nsi. "Obwesigwa n'okwagala Katonda, n'okumumanya bikendedde mu nsi.

² Waliwo okukolima, n'okulimba, n'okutta, n'okubba, n'okukola eby'obwenzi; bawaguza, era bayiwa omusaayi obutakoma.

³ Ensi kyeneeva ekaaba, ne bona abagibeeramu ne bafuuka ekitagasa; n'ensolo enkambwe ez'omu nsiko zirifa, n'enyyonyi ez'omu bbanga nazo zirifa, n'ebyenneyanja ebiri mu nnyanja ne bifia.

⁴ "Naye temuloopagana, so tewabaawo muntu avunaana munne, kubanga ensonga ngivunaana gwe kabona.

⁵ Wakola ebibi emisana n'ekiro, ne bannabbi ne babikolera wamu naawe; kyendiva nzikiriza maama wo.

⁶ Abantu bange bazikiridde olw'obutamanya. "Kyemunaava mulema okubeera bakabona bange; era olw'okulagajjalira etteeka lya Katonda wo, nange kyendiva ndagajjalira abaana bo.

⁷ Gye beeyongera okuba abangi, gye baakoma n'okukola ebibi; baasuula ekitiibwa kyabwe ne banswaza.

⁸ Bagaggawalira ku bibi by'abantu bange, era basemba okwonoona kwabwe.

⁹ Era bwe kityo bwe kiriba eri abantu n'eri bakabona: ndibabonereza olw'enneyisa yaabwe, era ne mbasasula ng'ebikolwa byabwe.

¹⁰ "Balirya naye tebalikkuta, balikola ebibi eby'obwenzi kyokka tebalyeyongera bungi, kubanga bavudde ku MUKAMA ne beewaayo

¹¹ eri obwenzi, wayini omukadde n'omusu, ne bibamalamu okutegeera.

¹² Abantu bange beebuuza ku kikonge ky'omuti, ne baddibwamu omuti. Omwoyo ogw'obwenzi gubasendasenda ne gubaleetera obutaba beesigwa eri Katonda waabwe.

¹³ Baweerayo ssaddaaka ku ntikko z'ensozi, ne baweerayo ebiweebwayo ebyokebwa ku busozi, wansi w'emyalooni, n'emiribile n'emyera awali

ekisiikirize ekirungi. Bawala bammwe kyebava baba bamalaaya, ne baka baana bammwe ne bakola obwenzi.

¹⁴ "Siribonereza bawala bammwe olw'okubeera bamalaaya, newaakubadde baka baana bammwe okukola eby'obwenzi, kubanga abasajja bennyini bassa bumu ne bamalaaya, ne baweerayo ssaddaaka ne bamalaaya ab'omu masabo; abantu abatategeera balizikirira.

¹⁵ "Newaakubadde ggwe Isirayiri oyenda, omusango guleme okuba ku Yuda. Togenda Girugaali, newaakubadde okwambuka e Besaveni. Tolayiranga nti, 'Nga Katonda bw'ali omulamu.'

¹⁶ Abayisirayiri bakakanyavu mu mitima ng'ennyana endalu. Olwo MUKAMA ayinza atya okubalabirira ng'abaana b'endiga abali mu kisibo?

¹⁷ Efulayimu yeegasse n'abasinza ebifaananyi, mumuleke abeere yekka.

¹⁸ Ebyokunywa ne bwe bibaggwaako, beeyongera mu bwamalaaya; n'abakulembeze baabwe baagala nnyo eby'ensonyi:

¹⁹ Embuyaga kyeziriva zibatwala, ne ssaddaaka zaabwe ne zibaswaza."

Koseya 5

Isirayiri Asalirwa Omusango

¹ Muwulire kino mmwe bakabona! Musseeyo omwoyo, mmwe Isirayiri! Muwulirize, mmwe ennyumba ya Kabaka! Omusango guli ku mmwe: Mubadde kyambika e Mizupa, era ekitimba ekitegeddwa ku Taboli.

² Abajeemu bamaliridde okutta, naye ndibabonerezabonna.

³ Mmanyi byonna ebikwata ku Efulayimu, so ne Isirayiri tankisibwa. Efulayimu weewaddeyo okukuba obwamalaaya, ne Isirayiri yeeyonoonye.

⁴ Ebikolwa byabwe tebibaganya kudda eri Katonda waabwe, kubanga omwoyo ogw'obwamalaaya guli mu mitima gyabwe, so tebamanyi MUKAMA.

⁵ Amalala ga Isirayiri gabalumiriza; Abayisirayiri ne Efulayimu balyesittala olw'omusango gwabwe; ne Yuda alyesittalira wamu nabo.

⁶ Bwe baligenda n'ebisibo byabwe n'amagana gaabwe okunoonya MUKAMA, tebalimulaba; abaviiridde, abeeyawuddeko.

⁷ Tebabadde beesigwa eri MUKAMA; bazadde abaana aboobwenzi. Embaga ez'omwezi ogwakaboneka kyeziriva zibamalawo, n'ennimiro zaabwe ne ziragajjalirwa.

⁸ Mufuuwe ejjombe mu Gibe, n'ekkondeere mu Laama. Muyimuse amaloboozi e Besaveni; mutukulembere mmwe Benyamini.

⁹ Efulayimu alifuuka matongo ku lunaku olw'okubonerezebwa. Nnangirira ebiribaawo mu bika bya Isirayiri.

¹⁰ Abakulembeze ba Yuda bali ng'abo abajjulula ensalo, era ndibafukako obusungu bwange ng'omujjuzo gw'amazzi.

¹¹ Efulayimu anyigirizibwa, era omusango gumumezze, kubanga yamalirira okugoberera bakatonda abalala.

¹² Kyenvudde nfuuka ng'enyenje eri Efulayimu, n'eri ennyumba ya Yuda n'emba ng'ekintu ekivundu.

¹³ "Efulayimu bwe yalaba obulwadde bwe, ne Yuda n'alaba ekivundu kye, Efulayimu n'addukira mu Bwasuli, n'atumya obuyambi okuva eri kabaka waayo omukulu. Naye tasobola kubawonya newaakubadde okubajjanjaba ebiwundu byabwe.

¹⁴ Kyendiva mbeera ng'empologoma eri Efulayimu, era ng'empologoma ey'amaanyi eri ennyumba ya Yuda. Ndibataagulataagula ne njenda; ndibeetikka ne mbatwala, ne babulwako ayinza okubawonya.

¹⁵ Ndiddayo mu kifo kyange, okutuusa lwe balikkiriza omusango gwabwe. Balinnoonya, mu buyinike bwabwe, balinnoonya n'omutima gwabwe gwonna."

Koseya 6

Obujeemu bwa Isirayiri

¹ "Mujje, tudde eri MUKAMA. Atutaaguddetaagudde, naye alituwonya; atuleeseko ebiwundu, naye ebiwundu alibinyiga.

² Oluvannyuma olw'ennaku bbiri alituzzaamu obulamu, era ku lunaku olwokusatu alituzza buggyga, ne tubeera balamu mu maaso ge.

³ Tumanye MUKAMA; tunyiikire okumumanya. Ng'enjuba bw'evaayo enkyaa, bw'atyo bw'alirabika; alija gye tuli ng'enkuba ey'omu kiseera ky'omuzira, era ng'enkuba eya ddumbi efukirira ettaka."

⁴ Nkukolere ki, Efulayimu? Nkukolere ki, Yuda? Okwagala kwo kuli ng'olufu olw'enkyaa, era ng'omusulo ogw'enkyaa ogukala amangu.

⁵ Kyenvudde nkозesa bannabbi okubasalaasala ebitundutundu, ne mbatta n'ebigambo eby'omu kamwa kange, era ne mbasalira emisango ng'okumyansa okw'eggulu.

⁶ Kubanga njagala ekisa so si ssaddaaka, era n'okumanya Katonda, okusinga ebiweebwayo ebyokebwa.

⁷ Okufaanana nga Adamu, bamenye endagaano, tebaali beesigwa.

⁸ Gireyaadi kibuga ky'abakozi ba bibi, era engalo zaabwe zijjudde omusaayi.

⁹ Ng'abatemu bwe bateegerera omuntu mu kkubo, n'ebibiina bya bakabona bwe bityo bwe bittira ku luguudo olugenda e Sekemu, ne bazza emisango egy'obuswavu.

¹⁰ Ndabye eby'ekivve mu nnyumba ya Isirayiri; era eyo Efulayimu gye yeeweereddeyo mu bwamalaaya, ne Isirayiri gy'ayonoonekedde.

¹¹ "Naawe Yuda, amakungula gatuuse. "Bwe ndikomyawo emikisa gy'abantu bange,

Koseya 7

¹ na buli lwe nawonyanga Isirayiri, ebibi bya Efulayimu ne birabika, n'ebikolwa eby'ekyejo ebya Samaliya nabyo ne birabika. Balimba, bamenya ne bayingira mu mayumba, era batemu abateeega abantu mu makubo.

² Naye tebalowooza nga nzijkira ebikolwa byabwe byonna ebibi. Ebibi byabwe bibazingizza, era mbiraba.

³ "Kabaka asanyukira obutali butuukirivu bwabwe, n'abakungu basanyukira obulimba bwabwe.

⁴ Bonna benzi; bali ng'ekyoto ekyaka omuliro, omufumbi w'emigaati gw'ateetaaga kuseesaamu okutuusa obutta bw'agoye, lwabuusa ku kyoto ne buzimbulukuka.

⁵ Ku lunaku kabaka lw'agabula embaga, abakungu ettamiiro lya wayini ne libalwaza, kabaka ne yeegatta n'abanyoomi.

⁶ Emitima gyabwe gyokerera nga oveni mu busungu bwabwe; Obusungu bwabwe bubuguumirira ekiro kyonna; mu makya ne bwaka ng'omuliro.

⁷ Bonna bookya nga oveni, era bazikiriza abakulembeze baabwe. Bakabaka baabwe bona bagudde; tewali n'omu ku bo ankowoola.

⁸ "Efulayimu yeegattika ne bannaggwanga; Efulayimu mugaati oguyiddeko oluuyi olumu.

⁹ Bannaggwanga banyuunyunta amaanyi ge naye takimanyi. Mu nviiri ze mulimu envi, naye takiraba.

¹⁰ Okwekulumbaza kwa Isirayiri kwe kubalumiriza, naye newaakubadde ng'ebyo byonna bimutuuseeko tadda eri MUKAMA Katonda we newaakubadde okumunoonya.

¹¹ "Efulayimu ali ng'ejjiba, alimbibwalimbibwa mangu era talina magezi; bakaabira Misiri, era bagenda eri Obwasuli.

¹² Bwe baliba balaga eyo, ndibasuulako akatimba, era ndibassa wansi ng'ennyonyi ez'omu bbanga. Bwe ndiwulira nga bakuŋjaana, ndibaziyiza.

¹³ Zibasanze, kubanga bawabye ne banvaako. Baakuzikirira kubanga banjemedde. Njagala nnyo okubanunula, naye banjogerako eby'obulimba.

¹⁴ Tebankaabira n'emitima gyabwe, wabula ebiwoobe babikubira ku bitanda byabwe. Bakujjaana awamu olw'emmere ey'empeke ne wayini, naye ne banjeemera.

¹⁵ Nabayigiriza ne mbawa n'amaanyi, naye bansalira enkwe.

¹⁶ Tebakyukira oyo Ali Waggulu Ennyo; bafuuse ng'omutego gw'akasaale ogwayonooneka; abakulembeze baabwe balifa kitala, olw'ebigambo byabwe ebya kalebule. Era kyebaliva babasekerera mu nsi y'e Misiri."

Koseya 8

Isirayiri Akungula Embuyaga

¹ "Ffuwa ekkondeere. Empungu eri ku nnyumba ya MUKAMA kubanga abantu bamenye endagaano yange ne bajeemera amateeka gange.

² Isirayiri bankaabira nga boogera nti, 'Katonda waffe, tukumanyi.'

³ Naye Isirayiri baleseeyo ekirungi; omulabe kyaliva abayigganya.

⁴ Balonda bakabaka nga sikkirizza, balonda abakulembeze be sikakasizza. Beekolera ebifaananyi ebyole mu ffeeza yaabwe ne mu zaabu yaabwe ebiribaleetera okuzikirira.

⁵ Kanyuga ebweru ekifaananyi ky'ennyana yo, ggwe Samaliya. Obusungu bwange bubabuubuukirako. Balituusa ddi okuba abatali batuukirivu?

⁶ Bava mu Isirayiri. Ennyana eyo omuntu eyakuguka mu by'okuweesa, ye yagikola so si Katonda. Era ennyana eyo eya Samaliya eribetentebwa.

⁷ "Basiga empewo, ne bakungula embuyaga. Ekikolo olw'obutaba na mutwe, kyekiriva kirema okubala ensigo. Naye ne bwe kyandibaze, bannaggwanga bandigiridde.

⁸ Isirayiri amaliddwawo; ali wakati mu mawanga ng'ekintu ekitagasa.

⁹ Bambuse ne bagenda eri Obwasuli, ng'endogoyi ey'omu nsiko eri yokka. Efulayimu aguliridde abaganzi.

¹⁰ Newaakubadde nga beetunze eri amawanga, ndibakuujjaanya, era ndibawaayo eri okubonaabona nga banyigirizibwa kabaka ow'amaanyi.

¹¹ "Newaakubadde nga Efulayimu baazimba ebyoto bingi eby'ebiweebwayo olw'ekibi, bifuuse byoto bya kukolerako bibi.

¹² Nabawandiikira ebintu bingi mu mateeka gange, naye ne babifuula ekintu ekigwira.

¹³ Bawaayo ebiweebwayo gye ndi, ne balya ennyama yaabyo, MUKAMA tabasanyukira. Kaakano alijukira obutali butuukirivu bwabwe n'ababonereza olw'ebibi byabwe: Baliddayo e Misiri.

¹⁴ Isirayiri yeerabidde omuronzi we, n'azimba embiri, ne Yuda ne yeeyongera okuzimba ebibuga ebiriko bbugwe; naye ndisindika omuliro ku bibuga byabwe, ne gwokya ebigo byabwe."

Koseya 9

Okubonerezebwa kwa Isirayiri

¹ Tosanyuka ggwe Isirayiri; tojaguza ng'amawanga amalala, kubanga tobaddde mwesigwa eri Katonda wo, weegomba empeera eya malaaya ku buli gguuliro.

² Egguuliro n'essogolero tebiribaliisa, ne wayini omusu alibaggwaako.

³ Tebalisigala mu nsi ya MUKAMA; Efulayimu aliddayo e Misiri n'alya emmere etali nnongoofu mu Bwasuli.

⁴ Tebaliwaayo biweebwayo ebya wayini eri MUKAMA, so ne ssaddaaka zaabwe tezirimusanya. Ssaddaaka zaabwe ziriba ng'emmere ey'abakungubazi, ne bona abaliziryako balifuuka abatali balongoofu. Emmere eyo eriba yaabwe bo, so teriyigizibwa mu yeekaalu ya MUKAMA.

⁵ Kiki ky'olikola ku lunaku olw'embaga ezaalondebwa, ku lunaku olw'embaga ya MUKAMA?

⁶ Ne bwe baliwona okuzikirira, Misiri alibakuŋjaanya, ne Menfisi alibaziika. Eby'obugagga byabwe ebya ffeeza birizika, n'eweema zaabwe zirimeramu amaggwa.

⁷ Ennaku ez'okubonerezebwa zija, ennaku ez'okusasulirwamu ziri kumpi. Ekyo Isirayiri akimanye. Olw'ebibi byammwe okuba ebingi ennyo, n'obukambwe bwammwe obungi, nnabbi ayitibwa musirusiru, n'oyo eyabikkulirwa mumuyita mugu wa ddalu.

⁸ Nnabbi awamu ne Katonda wange ye mukuumi wa Efulayimu, newaakubadde nga waliwo emitego mu kkubo lye, n'obukambwe mu nnyumba ya Katonda we.

⁹ Boonoonye nnyo nnyini nga mu nnaku ez'e Gibe. Katonda alijukira obutali butuukirivu bwabwe, n'ababonereza olw'ebibi byabwe.

¹⁰ We nasangira Isirayiri, kyali nga kulaba zabbibu mu ddungu. Bwe nalaba bajajjammwe, kyali nga kulaba ebibala ebisooka ku mutiini. Naye bwe bajja e Baalipyoli, beewonga eri ekifaananyi eky'ensonyi, ne bafuuka ekyenyinnyalwa ng'ekifaananyi kye baayagala.

¹¹ Ekitiibwa kya Efulayimu kiribuuka ne kigenda ng'ekinyonyi nga tewali kuzaala, newaakubadde okuba olubuto newaakubadde okufuna olubuto.

¹² Ne bwe balikuza abaana baabwe, ndibabaggyako bona. Ziribasanga bwe ndibavaako.

¹³ Nalaba Efulayimu ng'asimbiddwa mu kifo ekirungi, nga Ttuulo bw'ali. Naye Efulayimu alifulumya abaana be ne battibwa.

¹⁴ Bawe Ayi MUKAMA Katonda. Olibawa ki? Leetera embuto zaabwe okuvaamu obawe n'amabeere amakalu.

¹⁵ Olw'ebibi byabwe byonna mu Girugaali, kyennava mbakyayira eyo. Olw'ebikolwa byabwe ebitali bya butuukirivu, kyendiva mbagoba mu nnyumba yange. Siribaagala nate; abakulembeze baabwe bona bajeemu.

¹⁶ Efulayimu balwadde, emirandira gyabwe gikaze, tebakyabala bibala. Ne bwe balizaala abaana baabwe, nditta ezzadde lyabwe lye baagala ennyo.

¹⁷ Katonda wange alibavaako kubanga tebamugondedde; baliba momboze mu mawanga.

Koseya 10

¹ Isirayiri yali muzabbibu ogwagaagadde, ogwabala ebibala byagwo. Ebibala bye gye byeyongera obungi, naye gye yeeyongera okuzimba ebyoto; n'ensi ye gye yeeyongera okuba engagga, gye yeeyongera okulungiya empagi ze.

² Omutima gwabwe mulimba, era ekiseera kituuse omusango gubasinge. MUKAMA alimenya ebyoto byabwe, era alizikiriza empagi zaabwe.

³ Olwo balyogera nti, "Tetulina kabaka kubanga tetwatya MUKAMA. Naye ne bwe twandibadde ne kabaka, yanditukoleddedyo ki?"

⁴ Basuubiza bingi, ne balayirira obwerefere nga bakola endagaano; emisango kyegiva givaayo ng'omuddo ogw'obutwa mu nnimiro ennime.

⁵ Abatuuze b'e Samaliya bali mu ntiisa olw'enneyana ensaannuuse ey'e Besaveni. Abantu baayo baligikungubagira, ne bakabona baayo abaweereza bakatonda abalala, abaasanyukanga olw'ekitiibwa kyayo baligikungubagira, kubanga ekitiibwa kyayo kigivuddeko.

⁶ Erisutulibwa n'etwalibwa e Bwasuli n'eweewba kabaka omukulu ng'ekirabo. Efulayimu aliswazibwa ne Isirayiri alikwatibwa ensonyi olw'ekiteeso kye.

⁷ Samaliya ne kabaka we balitwalibwa ng'ekibajjo eky'omuti ku mazzi n'azikirizibwa.

⁸ Ebifo ebigulumivu eby'obutali butuukirivu birisaanyizibwawo, kye kibi kya Isirayiri. Amaggwa n'amatovu galimera ku byoto byabwe, ne gabibikka. Olwo ne bagamba ensozi nti, "Mutubuutikire," n'obusozi nti, "Mutugweko."

⁹ Okuva mu nnaku za Gibe, wayonoona, ggwe Isirayiri era eyo gye wagugubira. Entalo tezakwatira abakozi b'ebibi mu Gibe?

¹⁰ Bwe ndiba nga njagadde, ndibabonereza; amawanga galikuŋŋaana okulwana nabo, ne basibibwa mu masanga olw'ebibi byabwe eby'emirundi ebiri.

¹¹ Efulayimu nnyana ntendeke eyagala okuwuula; kyendiva nteeka ekikoligo mu nsingo ye ennungi. Ndigoba Efulayimu ne Yuda atekwa okulima ne Yakobo atekwa okukabala.

¹² Musige ensigo ez'obutuukirivu, mukungule ebibala eby'okwagala okutaggwaawo; mukabale ettaka lyammwe eritali ddime, kubanga ekiseera kituuse okunoonya MUKAMA, okutuusa lw'alidda n'abafukako obutuukirivu.

¹³ Naye mwasimba obutali butuukirivu ne mukungula ebibi, era mulidde ebibala eby'obulimba. Olw'okwesiga amaanyi go, n'abalwanyi bo abangi,

¹⁴ olutalo kyeluliva lubawuumira mu matu, n'ebigo byammwe byonna ne bizikirizibwa, nga Sulemaani bwe yazikiriza Beswaluberi ku lunaku olw'olutalo, abakyala ba nnakazadde lwe baggundwa ku ttaka n'abaana baabwe.

¹⁵ Bwe kityo bwe kiribeera, ggwe Besweri kubanga ekibi kyo kinene nnyo. Olunaku olwo bwe lulituuka, kabaka wa Isirayiri alizikiririzibwa ddala.

Koseya 11

Okwagala kwa Katonda eri Isirayiri

¹ "Isirayiri bwe yali omwana omuto, namwagala, era namuyita okuva mu Misiri.

² Naye buli lwe nayongeranga okuyita Isirayiri, nabo gye beeyongeranga okusemberayo ne bawaayo ssaddaaka eri Babaali, ne bootereza ebifaananyi ebyole obubaane.

³ Nze nayigiriza Efulayimu okutambula, nga mbakwata ku mukono; naye tebategeera nga nze nabawonya.

⁴ Nabakulembra n'emiguwa egy'okusaasira okw'obuntu, n'ebisiba eby'okwagala. Naggya ekikoligo mu bulago bwabwe ne neetooowaza ne mbaliisa.

⁵ "Tebaliddayo mu nsi ya Misiri, era Obwasuli tebulibafuga kubanga baagaana okwenenya?

⁶ Ekitala kirimyansiza mu bibuga byabwe ne kizikiriza ebisiba ebya wankaaki waabwe, ne kikomya enteekateeka zaabwe.

⁷ Abantu bange bamaliridde okunvaako. Ne bwe banaakoowoola oyo Ali Waggulu Ennyo, taabagulumize.

⁸ "Nnyinza ntya okukuleka ggwe Efulayimu? Nnyinza ntya okukuwaayo ggwe Isirayiri? Nnyinza ntya okukufuula nga Aduma? Nnyinza ntya okukukola nga

Zeboylimu? Omutima gwange gwekyusiza munda yange, Mpulira nkukwatiddwa ekisa kingi.

⁹ Siikole ng'obusungu bwange obungi bwe buli, so siridda kuzikiriza Efulayimu; kubanga siri muntu wabula ndi Katonda, Omutukuvu wakati mu mmwe: sirija na busungu.

¹⁰ Baligoberera MUKAMA; era aliwuluguma ng'empologoma. Bw'aliwuluguma, abaana be balijja nga bakankana okuva ebugwanjuba.

¹¹ Balijja nga bakankana ng'ebinyonyi ebiva e Misiri, era ng'enjiibwa eziva mu Bwasuli. Ndibafuula abatuuze mu maka gaabwe," bw'ayogera MUKAMA.

Ekibi kya Isirayiri

¹² Efulayimu aneebungulizza obulimba, n'ennyumba ya Isirayiri eneebungulizza obukuusa, ne Yuda ajeemedde Katonda, ajeemedde omwesigwa Omutukuvu.

Koseya 12

¹ Efulayimu alya mpewo; agoba empewo ez'ebuvanjuba olunaku lwonna, era bongera ku bulimba ne ku ttemu. Bakola endagaano n'Obwasuli, n'aweereza n'amafuta e Misiri.

² MUKAMA alina ensonga ne Yuda, era alibonereza Yakobo ng'engeri ze bwe ziri. Amusasule ng'ebikolwa bye bwe biri.

³ Bwe yali mu lubuto lwa nnyina yakwata muganda we ku kisinziiro, ne mu bukulu bwe n'ameggana ne Katonda.

⁴ Yameggana ne malayika n'amuwangula, n'akaaba n'amwegayirira. Yamusisinkana e Beseri, n'ayogera naye.

⁵ MUKAMA Katonda ow'Eggye, MUKAMA ly'erinnya lye erijjukirwa.

⁶ Naye oteekwa okudda eri Katonda wo; kuumu okwagala n'obwenkanya, olindirirenga Katonda wo ennaku zonna.

⁷ Omusuubuzi akozesza ekipimo eby'obulimba, era anyumirwa okukumpanya.

⁸ Efulayimu yeewaana ng'ayogera nti, "Ndi mugagga nnyo, nfunye ebintu bingi. Mu bugagga bwange bwonna, tebayinza kundabamu kibi wadde okwonoona kwonna."

⁹ Nze MUKAMA Katonda wo, eyakuggya mu Misiri; ndikuzzaayo n'obeera mu weema nate, nga mu nnaku ez'embaga ezaalagirwa.

¹⁰ Nayogera eri bannabbi, ne mbawa okwolesebwa kungi, ne mbagerera engero nga mpita mu bo.

¹¹ Gireyaadi butali butuukirivu era n'abantu baamu butaliimu. Mu Gireyaadi basalirayo ente ennume ne baziwaayo nga ssaddaaka, era ebyoto byabwe binaaba ng'entuumo ey'amayinja mu nnimiro enime.

¹² Yakobo yaddukira mu nsi ya Alam; Isirayiri yaweereza okufuna omukazi, era okumufuna yalundanga ndiga.

¹³ MUKAMA yakozesa nnabbi okuggya Isirayiri mu Misiri, era n'akozesa nnabbi okumukuma.

¹⁴ Naye Efulayimu amusoomoozezza era amusunguwazizza, Mukama we kyaliva amutekako omusango olw'omusaayi gwe yayiwa, n'amusasula olw'obunyoomi bwe.

Koseya 13

MUKAMA Asunguwalira Isirayiri

¹ Efulayimu buli lwe yayogeranga, abantu baakankananga. Yagulumizibwanga mu Isirayiri. Naye bwe yayonoona olw'okusinza Baali, n'afa.

² Ne kaakano bongera okwonoona; ne beekolera ebifaananyi ebisaanuuse mu ffeeza yaabwe, ng'okutegeera kwabwe bwe kuli, nga byonna mulimu gw'abaweesi. Kigambibwa nti, "Bawaayo ssaddaaka ez'abantu, ne banywegera ebifaananyi eby'enyyana."

³ Kyebaliva babeera ng'olufu olw'oku makya, oba ng'omusulo oguvaawo amangu, ng'ebisusunku embuyaga ze bifumuula okubiggya mu gguuliro, oba ng'omukka ogufulumira mu ddirisa.

⁴ "Nze MUKAMA Katonda wo eyakuggya mu nsi ya Misiri; so tolimanya Katonda mulala wabula nze, so tewali mulokozi wabula nze.

⁵ Nakulabirira mu ddungu, mu nsi ey'ekyeya ekingi.

⁶ Bwe nabaliisa, bakkuta; bwe bakkuta ne beegulumiza, bwe batyo ne banneerabira.

⁷ Kyendiva mbalumba ng'empologoma, era ndibateegera ku kkubo ng'engo.

⁸ Ng'eddubu erinyagiddwako abaana baalyo, ndibalumba ne mbataagulataagula. Era okufaananko ng'empologoma bw'ekola ndibaliira eyo, ensolo ey'omu nsiko eribataagulataagula.

⁹ Ndibazikiriza mmwe Isirayiri, kubanga munnwanyisa.

¹⁰ Kabaka wammwe ali wa, abalokole? Abafuzi ab'omu bibuga byo byonna bali ludda wa, be wayogerako nti, 'Tuwe kabaka n'abafuzi?'

¹¹ Nabawa kabaka nga nsunguwadde, ate ne mmubaggyako nga ndiko ekiruyi.

¹² Omusango gwa Efulayimu guterekeddwa, era n'ekibi kye kimanyiddwa.

¹³ Obubalagaze ng'obw'omukyala alumwa okuzaala bumujjira, naye omwana olw'obutaba n'amagezi, ekiseera bwe kituuka, tavaayo mu lubuto.

¹⁴ "Ndibanunulayo mu maanyi g'emagombe, era ndibalokola mu kufa. Ggwe kufa, endwadde zo ziri ludda wa? Ggwe Magombe, okuzikiriza kwo kuli ludda wa? "Sirimusaasira,

¹⁵ ne bw'anaakulaakulana mu baganda be. Empewo ey'ebuvanjuba erija okuva eri MUKAMA, ng'eva mu ddungu, n'ensulo ze ne zikalira, n'oluzzi lwe ne lukalira. Eggwanika lye lirinyagibwa, eby'omuwendo byonna ne bitwalibwa.

¹⁶ Abantu b'e Samaliya balivunaanibwa omusango gwabwe kubanga bajeemedde Katonda waabwe. Balittibwa n'ekitala, n'abaana baabwe abato balibetentebwa, n'abakyala baabwe abali embuto balibaagibwa."

Koseya 14

Okwenenya Kuleeta Omukisa

¹ Mudde eri MUKAMA Katonda wammwe, ggwe Isirayiri. Ebibi byammwe bye bibaleetedde okugwa.

² Mudde eri MUKAMA nga mwogera ebigambo bino nti, "Tusonyiwe ebibi byaffe byonna, otwanirize n'ekisa, bwe tutyo tunaawaayo ebibala by'akamwa kaffe, ng'ebiweebwayo eby'ente ennume.

³ Obwasuli tebusobola kutulokola; Tetujja kwebagala mbalaasi ez'omu ntalo. Tetuliddayo kwogera nate nti, 'Bakatonda baffe,' nga twogera ku bintu bye twekoledde n'emikono gyaffe, kubanga mu ggwe, bamulekwa mwe bajja okusaasirwa."

⁴ Ndibalekesaayo empisa zaabwe embi, ne mbaagala awatali kye mbasalidde kya kusasula. Kubanga obusungu bwange butanudde okubavaako.

⁵ Ndifaanana ng'omusulo eri Isirayiri: alimulisa ng'eddanga, era alisimba emirandira ng'emivule gy'e Lebanooni.

⁶ Amatabi ge amato galikula; n'obulungi bwe buliba ng'omuzeyituuni, n'akaloosa ke kaliba ng'akaloosa k'omuvule gw'e Lebanooni.

⁷ Abantu balibeera nate wansi w'ekisiikirize kye, era alibala ng'emmere ey'empeke. Alimulisa ng'omuzabbibu, era alyatiikirira nga wayini ow'e Lebanooni.

⁸ Ggwe Efulayimu mugabo ki gwe nnina mu bakatonda bo? Ndimwanukula ne mulabirira. Nninga omuberosi omugimu, era n'ebibala byo biva mu nze.

⁹ Abalina amagezi bategeera ensonga zino, era abakabakaba balibimanya. Amakuba ga MUKAMA matuufu, n'abatuukirivu bagatambuliramu, naye abajeemu bageesittaliramu.

Yoweeri

Yoweeri 1

- 1** Buno bwe bubaka bwa MUKAMA obwajjira Yoweeri mutabani wa Pesweri.
- 2** Muwulirize mmwe abakadde ba Isirayiri, buli ali mu nsi naye awulirize. Kino kyali kibaddewo mu biseera byammwe, oba mu biseera bya bakitammwe?
- 3** Mukibuulire abaana bammwe, nabo balikibuulira abaana baabwe, nabo balikibuulira ab'emirembe egiriddawo.
- 4** Ebibinja by'enzige ebisooka bye zitalidde, enzige eziddirira zibirumbye, ate ezo bye zireseewo, enzige ento bye ziridde, ate zino bye zireseewo, enzige endala ne zibizikiririza ddala byonna!
- 5** Muzuukuke, mmwe abatamiivu, mwekaabire amaziga; mukube ebiwoobe mmwe mwenna abanywi b'omwenge, mukube ebiwoobe kubanga akamwa kammwe katuuse okwerabira omwenge omusu.
- 6** Eggwanga lirumbye ensi yange, ery'amaanyi ennyo era ery'abantu abatabalika. Amannyo gaalyo gali ng'ag'empologoma, n'amasongezo gaalyo ng'ag'empologoma enkazi.
- 7** Eggwanga eryo lizikirizza emizabbibu gyange, ne limalawo emitini gyange. Lisusumbudde ebikuta byagyo, byonna biri ku ttaka, amatabi gaagyo gasigadde gatukuuliridde.
- 8** Mukungubage nga nnamwandu omuto afiiriddwa bba, ng'ayambadde ebibukutu olw'ennaku.
- 9** Ebiweebwayo eby'emmere ey'empeke n'ebiweebwayo eby'okunywa tewakyali kirabikako mu nnyumba ya MUKAMA. Bakabona abaweerereza mu maaso ga Katonda bakungubaga.
- 10** Ennimiro ziweddemu ebirime; ettaka likaze, Emmere ey'empeke eweddewo, omwenge omusu n'amafuta g'emizeeyituuni ne bibulira ddala.
- 11** Mmwe abalimi mukwatibwe entisa, mmwe abalima emizabbibu mukaabe. Mukaabire enjaano ne sayiri, kubanga ebyandikunguddwa byonna biwedde.
- 12** Omuzabbibu gukaze n'omutiini guyongobedde. Omukomamawanga, n'olukindu ne apo n'emiti gyonna egy'omu nnimiro giwotose. Abantu tebakyalina ssanyu.

Abantu bayitibwa Okwenenya

- 13** Mmwe bakabona, mwesibe mwambale ebibukutu mukungubage. Mmwe abaweerereza ba Katonda wange ab'oku kyoto, mweyale wansi awali ekyoto, musule awo ekiro kyonna nga mukuba ebiwoobe, kubanga mu nnyumba ya

Katonda wammwe temukyali kiweebwayo kyonna, eky'emmere ey'empeke oba eky'envinnyo.

¹⁴ Mulangirire okusiiba okutukuvu n'okukuŋjaana mu maaso ga Katonda. Muyite abakulu abakulembeze n'abantu bona ababeera mu nsi, bajje mu nnyumba ya MUKAMA Katonda waabwe bamukaabirire.

¹⁵ Zitusanze olw'olunaku luli! Kubanga olunaku lwa MUKAMA olw'entiisa luseembedde. Lulijja, ng'okuzikiriza okuva eri Ayinzabyonna.

¹⁶ Emmere tetuweddeeko nga tulaba? Essanyu n'okujaguza mu nnyumba ya Katonda waffe tebikomye?

¹⁷ Ensigo ziwotokedde mu ttaka, amawanika makalu n'ebyagi by'emmere bikaze, kubanga emmere ey'empeke eweddewo.

¹⁸ Ensolo nga zisinda! Amagana gabuliddwa amagezi; kubanga tewali muddo, n'endiga nazo zidooba.

¹⁹ Ayi MUKAMA, Ggwe gwe nkaabirira, kubanga omuddo gwonna gumaliddwawo empiira, n'emiti gyonna egypt'omu nnimiro nagyo guyidde.

²⁰ Ensolo ez'omu nsiko nazo zikukaabira okuziyamba, emigga gikalidde, ne gye ziriira, omuddo gwonna guyidde.

Yoweeri 2

Okulabula ku Lunaku lwa MUKAMA Olujja

¹ Bakabona mufuuyire ekkondeere mu Sayuuni. N'akagombe ak'okulabula kavugire ku lusozi lwange olutukuvu. Buli muntu yenna mu ggwanga akankane olw'entiisa, kubanga olunaku lwa MUKAMA luseembedde, era lunaatera okutuuka.

² Luliba olunaku olutaliiko ssanyu, olw'ekizikiza; olunaku olw'ebire ebingi n'ekizikiza ekikutte. Egghe ery'enzige ery'amaanyi ennyo, ng'ery'abantu abalwanyi ab'ekitalo, libuutikidde ensozi. Tewabangawo ggye lirifaanana mu biro byonna eby'edda, era teribaayo liryenkana mu mirembe gyonna egiriddawo.

³ Enzige ezikuleembedde zirya ng'omuliro ogwokya buli wantu, n'ezizivaako emabega nazo zibizikiririze ddala ng'ennimi z'omuliro. Mu maaso gye ziraga ensi erabika bulungi ng'ennimiro ya Adeni, naye gye ziva buli kimu zikiridde; ensi yonna zigirese nga ddungu jjereere.

⁴ Zifaanana ng'embalaasi, era zidduka ng'embalaasi ez'entalo.

⁵ Zigenda zibuuka ku nsozi nga zikekera ng'amagaali agasikibwa embalaasi bwe gakekera; ne ziwuuma nga bwe zitulikatulika ng'omuliro ogwokya ebisubi ebikalu; era nga ziri ng'egghe eddene mu lutalo eryetegekedde okulumba omulabe.

⁶ Abantu abazirabyeko nga zisembera bali mu bulumi bungi, era bona beeraliikirivu.

⁷ Zirumba n'amaanyi ng'eggye ery'abalwanyi, ne ziwalampa ebisenge ng'abajaasi. Zikumbira mu nnyiriri zaazo nga zitereera bulungi awatali kuwaba n'akamu.

⁸ Tezirinnyaganako, buli emu ekumbira mu kkubo lyayo. Ziweguza mu buli kyakulwanyisa kyonna, ne watabaawo kisobola kuziziyiza.

⁹ Zifubutuka ne zigwira ekibuga. Zikiwalampa ne zibuna bbugwe waakyo. Zirinnya amayumba ne ziyingirira mu madirisa ng'ababbi bwe bakola.

¹⁰ Zikankanya ensi era n'eggulu ne lijugumira. Zibuutikira enjuba n'omwezi, era n'emmunyeenye tezikyayaka.

¹¹ MUKAMA akulembera eggye lye n'eddoboozi eribwatuuka. Eggye lya MUKAMA ddene nnyo era lya maanyi. Abalirimu abatuukiriza ebiragiro bye ba maanyi. Kubanga olunaku lwa MUKAMA lukulu era lwa ntiisa nnyo. Ani ayinza okulugumira?

Abantu Bayitibwa Okwenenya

¹² MUKAMA kyava agamba nti, "Mukomeewo gye ndi n'omutima gwammwe gwonna. Mukomeewo n'okusiiba n'okukaaba awamu n'okukungubaga."

¹³ Muyuze emitima gyammwe so si byambalo byammwe. Mudde eri MUKAMA Katonda wammwe, kubanga ajjudde ekisa n'okusaasira, era tasunguwala mangu; ajjudde okwagala okutaggwaawo; n'abandisaanidde okubonerezebwaa abasonryiwa.

¹⁴ Ani amanyi obanga anaakyuka n'abasonyiwa, n'abawa omukisa gwe ne musobola n'okuwaayo eri MUKAMA Katonda wammwe ekiweebwayo eky'emmere enkalu, n'ekiweebwayo eky'ekyokunywa?

¹⁵ Mufuuyire ekkondeere mu Sayuuni, mulangirire okusiiba okutukuvu. Muyite olukujjaana olussaamu Katonda ekitiibwa.

¹⁶ Mukuujjaanye abantu bona. Mutukuze ekibiina ekyo ekikuujjaanye. Muyite abakulu abakulembeze. Muleete abaana abato n'abo abakyali ku mabeere. N'oyo eyakawasa aveeyo mu kisenge kye, n'eyakafumbirwa naye aveeyo gy'ali.

¹⁷ Bakabona abawereza ba MUKAMA bayimirire wakati w'ekisasi kya yeekaalu n'ekyoto, bakaabirire MUKAMA nga bamusaba nti, "Saasira abantu bo, Ayi MUKAMA; abantu b'obusika bwo tobaleka kugwa mu mikono gya bannamawanga okubafuga era n'okubasekerera. Bannamawanga baleme kuduula nga boogera nti, 'Katonda waabwe ali ludda wa?'"

MUKAMA Asaasira Abantu Be

¹⁸ Awo MUKAMA n'akwatirwa ensi ye ekisa, n'asaasira abantu be.

¹⁹ N'ayanukula abantu be nti, "Muwulirize, nzija kubaweeereza emmere enkalu, n'envinnyo, n'amafuta, ebimala okubakkusiza ddala, era siriddayo kubaleka, ne mufuuka ekivume, bannaggwanga amalala ne babasekerera.

²⁰ "Ndibagobako egghe ery'omu bukiakkono ne ndigobera mu ddungu ery'ewala ennyo. Ekibinja ekikulebeddemu ndikigobera mu nnyanja ey'Ebuwanjuba, n'ekibinja eky'emabega ndikigobera mu nnyanja ey'Ebugwanjuba. Ekivundu n'okuwunya birituuka wala okusinga ebyo byonna bye libakoze."

²¹ Mwe abali mu nsi, temutya. Musanyuke era mujaguze; kubanga MUKAMA abakoledde ebikulu.

²² Nammwe ensolo ez'omu nsiko temutya; kubanga omuddo gwonna mu nsiko gusibukidde. Emiti gibaze ebibala byagyo, era emitii n'emizabbibu nagyo gibaze ebibala bingi.

²³ Musanyuke mmwe abaana ba Sayuuni; mujagulize MUKAMA Katonda wammwe. Kubanga abawadde enkuba esooka mu butuukirivu. Era abawadde enkuba nnyingi esooka n'esembayo mu mwaka ng'obw'edda.

²⁴ Amawuuliro gammwe galijjula ejjaano, n'amasogolero gammwe galijjula envinnyo n'amafuta n'okubooga ne gaboooga.

²⁵ "Ndibaddizaawo byonna enzige bye zaalya mu myaka egyo. Lyali ggye lyange ery'amaanyi lye nabasindikira nga lirimu lusejjera, n'enzige ezisala obusazi, awamu n'ezo ezizikiririza ddala.

²⁶ Kale, munaabanga n'ebyokulya bingi nga bwe muneetaaganga. Munaatenderezanga erinnya lya MUKAMA Katonda wammwe abakoledde ebintu ebirungi bwe bityo. Era abantu bange tebakyaddayo kuswazibwa.

²⁷ Mulimanya nga ndi wakati mu Isirayiri, era nga Nze, MUKAMA, Nze Katonda wammwe, so tewali mulala; n'abantu bange tebakyaddayo kuswazibwa.

MUKAMA Afuka Omwoyo We ku Bantu Be

²⁸ "Awo olulituuka oluvannyuma lw'ebyo, ndifuka Omwoyo wange ku bantu bona. Batabani bammwe ne bawala bammwe balitegeeza eby'omu maaso; abakadde baliroota ebirooto, n'abavubuka bammwe balyolesebwa.

²⁹ Mu biro ebyo ndifuka Omwoyo wange ku baweereza bange abasajja n'abakazi.

³⁰ Era ndyolesa ebyamagero mu ggulu ne ku nsi: omusaayi n'omuliro n'ekikoomi eky'omukka.

³¹ Enjuba erifuuka ekizikiza, n'omwezi gulimyuka ng'omusaayi, olunaku lwa MUKAMA olukulu era olw'entiisa nga terunnatuuka.

³² Awo olulituuka buli alikoowoola erinnya lya MUKAMA okusaasirwa alirokoka. Kubanga mu lusozi Sayuuni ne mu Yerusaalemi walibaawo abaliwona

nga MUKAMA bw'ayogedde, ne mu abo abalifikkawo mulibaamu abo MUKAMA b'aliyita."

Yoweeri 3

Abalabe ba Isirayiri Basalirwa Omusango

¹ "Mu nnaku ezo, era mu biseera ebyo, Yuda n'ekibuga Yerusaalemi ndibiddiza emikisa gyabyo nga bwe gyabanga edda.

² Ndikuñjaanya abamawanga bona ne mbaserengesa mu kiwonvu Yekosafaati, ne mbasalira omusango olwa byonna bye baakola abantu bange Abayisirayiri ab'obusika bwange. Kubanga baasaasaanya Abayisirayiri mu mawanga, ne bagabana ensi yange.

³ Baagabana abantu bange nga babakubirako obululu; ne batunda abalenzi olw'abakazi bamalaaya, n'abawala ne babatundamu omwenge ne beenywera.

⁴ "Mwe Ttuulo ne Sidoni n'enjuyi zonna ez'Abafirisuuti, mmwe b'ani ku Nze? Nnina kye nabakola kye mugezaako okwesasuza? Bwe munaaba nga mugezaako kwesasuza, ebikolwa byammwe nzija kubibakyusizaako mangwago.

⁵ Kubanga mwatwala effeeza yange ne zaabu yange n'ebintu byange eby'omuwendo omungi ne mubissa mu masabo gammwe.

⁶ Mwatwala abantu b'omu Yuda ne mu Yerusaalemi ne mubatunza Abayonaani.

⁷ "Laba, ndibaggyayo mu mawanga gye mwabatunda; mmwe mbakole nga bwe mwabakola.

⁸ Batabani bammwe ne bawala bammwe ndibaguza batabani ba Yuda, nabo balibaguza abantu ab'omu ggwanga ery'ewala ennyo, ery'e Seba." Ebyo MUKAMA y'abyogedde.

Bakabona Balangirira Omusango eri Abaamawanga

⁹ Bakabona mulangirire mu mawanga bwe muti nti, Mwetegekere olutalo! Muyite abalwanyi bammwe ab'amaanyi, buli mulwanyi yenna asembere ajje mu lutalo.

¹⁰ Enkumbi zammwe muziweesemu ebitala, n'obwambe bwammwe mubuweesemu amafumu; omunafu agambe nti, "Ndi wa maanyi."

¹¹ Mujje mangu mwe mwenna abamawanga agatwetoolodde, mukujñaanire mu kiwonvu. Ayi MUKAMA, weereza eggye lyo libalumbe.

¹² "Amawanga geeteketeke gajje mu kiwonvu ekya Yekosafaati; kubanga eyo gye ndisinzira ne nsalira amawanga gonna ageetoolodde wano omusango.

¹³ Kozesa oluwabyo lwo, kubanga ekiseera eky'amakungula kituuse. Mujje mubabetente nga bwe mulinnyirira emizabbibu mu ssogolero okutuusa envinnyo lw'ekulukuta, ekibi kyabwe kinene nnyo."

¹⁴ Abantu bukadde na bukadde abali mu kiwonvu eky'okusalirwamu omusango! Kubanga olunaku lwa MUKAMA luseembedde lwaliramulirako mu kiwonvu eky'okusalirwamu omusango.

¹⁵ Ekizikiza kibuutikidde enjuba n'omwezi, n'emmunyeenytezikyayaka.

¹⁶ MUKAMA aliwuluguma ng'ayima ku Sayuuni; alibwatuka n'eddoboozi lye ng'asinziira mu Yerusaalemi. Eggulu n'ensi birikankana. Naye MUKAMA aliba ekiddukiro ky'abantube, era ekigo ky'abaana ba Isirayiri eky'amaanyi.

¹⁷ "Kale mulimanya nga Nze MUKAMA Katonda wammwe, abeera ku lusozi lwange olutukuvu Sayuuni. Era Yerusaalemi kinaabeeranga kitukuvu, nga ne bannamawanga tebakyakirumba.

¹⁸ "Olunaku luli bwe lulituuka, ensozi ziritonnyesa wayini omuggya, n'obusozi bulikulukusa amata, n'emigga gyonna egya Yuda emikalugirikulukusa amazzi. Ensulo eriva mu nnyumba ya MUKAMA n'efukirira ekiwonvu kya Sittimu.

¹⁹ Misiri erifuuka amatongo n'ensi ya Edomu erifuuka ddungu jjereere olw'ebikolobero bye baakola ku bantu ba Yuda, ensi mwe battira abantu abatalina musango.

²⁰ Naye mu Yuda mulibeeramu abantu ennaku zonna, ne Yerusaalemi kiribeerawo emirembe gyonna.

²¹ Ndyesasuza olw'omusaayi ogw'abo abattibwa, era teriba mutemu asonyiyibwa. Kubanga MUKAMA abeera mu Sayuuni."

Amosi

Amosi 1

¹ Bino bye bigambo Amosi eyali omu ku balunzi b'endiga mu bitundu by'e Tekowa bye yabikkulirwa, musisi amale ajje nga wakayitawo emyaka ebiri, mu mirembe gya Uzziya kabaka wa Yuda, era nga gy'emirembe gya kabaka Yerobowaamu mutabani wa Yowaasi nga y'afuga Isirayiri.

² Amosi yagamba nti, "MUKAMA awuluguma ng'asinziira mu Sayuuni, era eddoboozi lye liwulirwa nga libwatukira mu Yerusaalemi; omuddo mu malundiro gulikala n'entikko y'olusozi Kalumeeri erisigala njereere."

Okulamulwa kwa Baliraanwa ba Isirayiri

³ Bw'ati bw'ayogera MUKAMA nti, "Olw'ebyonoono bya Ddamasiko ebisatu, weewaawo ebina, siriggyawo busungu bwange. Kubanga baabonereza nnyo abantu b'e Gireyaadi nga babasalaasala n'ebyuma.

⁴ Ndiweereza omuliro mu lubiri lwa kabaka Kazayeeri era njokye n'ebigo bya kabaka Benikadadi.

⁵ Era ndimenya enzigi z'ekibuga Ddamasiko era ndizikiriza kabaka ali mu Kiwonvu ky'e Aveni, oyo akwata omuggo ogw'obwakabaka mu Besiadeni. Abantu b'e Busuuli balitwalibwa mu buwanjjanguse mu Kiri," bw'ayogera MUKAMA.

⁶ Bw'ati bw'ayogera MUKAMA nti, "Olw'ebyonoono bya Gaza ebisatu, weewaawo ebina, siriggyawo busungu bwange. Kubanga yatwala eggwanga ddamba mu busibe n'alitunda eri Edomu.

⁷ Ndiweereza omuliro ku bbugwe wa Gaza ogulyokya ebigo byakyo.

⁸ Ndizikiriza atuula mu Asudodi, n'oyo akwata omuggo gw'obwakabaka ndimumalawo okuva mu Asukulooni. Ndibonereza Ekuloni okutuusa lwe ndimalirawo ddala Abafirisuuti," bw'ayogera MUKAMA.

⁹ MUKAMA bw'ati bw'ayogera nti, "Olw'ebyonoono bya Ttuulo ebisatu, weewaawo ebina, siriggyawo busungu bwange. Kubanga yatunda eggwanga ddamba erya Edomu mu busibe n'amenya endagaano ey'obwaseruganda eyali ekoleddwa,

¹⁰ kyenaava mpeereza omuliro ku bbugwe wa Ttuulo, ogunaayokya ebigo byakyo."

¹¹ Bw'ati bw'ayogera MUKAMA nti, "Olw'ebyonoono bya Edomu ebisatu, weewaawo ebina, siriggyawo busungu bwange. Kubanga yayigganya muganda we n'ekitala awatali kusaasira, obusungu bwabwe ne bubuubuuuka obutakoma era ne batabusalako.

¹² Ndiweereza omuliro ku Temani oguliyokya ebigo bya Bozula."

¹³ Bw'ati bw'ayogera MUKAMA nti, "Olw'ebyonoono bya Amoni ebisatu weewaawo ebina, siriggyawo busungu bwange. Mu ntalo ez'okugaziya ensi ye, yabaaga abakazi abaali embuto ab'e Giriyaadi.

¹⁴ Ndiweereza omuliro ku bbugwe wa Labba, era gulyokya ebigo byakyo. Walibaawo n'oluyoogaano olunene ku lunaku olw'olutalo mu mpewo ey'amaanyi, kibuyaga ng'akunta.

¹⁵ Kabaka waakyo alitwalibwa mu buwaŋjanguse, ye n'abakungu be bona," bw'ayogera MUKAMA.

Amosi 2

¹ Bw'ati bw'ayogera MUKAMA nti, "Olw'ebyonoono bya Mowaabu ebisatu weewaawo ebina, siriggyawo busungu bwange. Kubanga yayokya amagumba ga kabaka wa Edomu ne gafuuka evvu.

² Ndiweereza omuliro ku Mowaabu era gulyokya ebigo bya Kerioosi. Abantu ba Mowaabu balifiira wakati mu kusasamala okungi omuliba okuleekaana n'okufuuwa amakondeere.

³ Ndizikiriza omukulembeze wa Mowaabu n'abakungu baamu bona, ndibatta," bw'ayogera MUKAMA.

⁴ Bw'ati bw'ayogera MUKAMA nti, "Olw'ebyonoono bya Yuda ebisatu weewaawo ebina, siriggyawo busungu bwange. Kubanga banyoomye amateeka ga MUKAMA, ne batakuuma biragiro bye nabawa ne bagondera bakatonda ab'obulimba bajajjaabwe be baagobereranga.

⁵ Ndiweereza omuliro ku Yuda ne njokya ebigo bya Yerusaalemi."

⁶ Bw'ati bw'ayogera MUKAMA nti, "Olw'ebyonoono bya Isirayiri ebisatu weewaawo ebina, siriggyawo busungu bwange. Batunda obutuukirivu bafune ffeeza, ne batunda n'abaavu olw'omugogo gw'engatto.

⁷ Balinnyiririra emitwe gy'abaavu mu nfuufu, n'abajoogebwa ne batalamulwa mu bwenkanya. Omwana ne kitaawe bayingira eri omuwala omu ne boonoona erinnya lyange.

⁸ Bagalamira okumpi ne buli kyoto ku ngoye ezaweebwayo ng'obweyamo. Mu nnyumba ya bakatonda baabwe mwe banywera omwenge oguleetebwa abatanziddwa.

⁹ "Nazikiriza Abamoli ku lwabwe newaakubadde nga baali bawanvu ng'emivule era nga ba maanyi ng'emyera. Nazikiriza ebibala ebyali waggulu okutuuka ku mirandira egiali wansi.

¹⁰ Nakuggya mu nsi y'e Misiri, ne nkukulemberera emyaka amakumi ana mu ddungu, weetwalire ensi y'Abamoli.

¹¹ "Nayimusa abamu ku batabani bammwe okubeera bannabbi, ne ku balenzi bammwe okuba Abawonge ba MUKAMA. Si bwe kiri bwe kityo abantu ba Isirayiri?" bw'ayogera MUKAMA.

¹² "Naye mmwe ne mudda mu kuwa Abawonge ba MUKAMA omwenge okunywa, ne muwa bannabbi amateeka nga mubagamba nti temuwa byabunnabbi.

¹³ "Laba, ndibasesebula ng'eggaali eryettisse ebinywa by'emmere ey'empeke bwe lisesebbula ekiri mu kkubo lyalyo.

¹⁴ Abanguwa tebaliwona, n'ab'amaanyi tebalikunjaanya maanyi gaabwe era n'omuzira nnamige talisobola kuwonya bulamu bwe.

¹⁵ Omukubi w'obusaale omukugu taliyimirira kunywera, n'omuserikale ow'ebigere nnakinku talisobola kuwenyuka. Abo abasajja abazira abeebagazi b'embalaasi tebalisobola kuwonya bulamu bwabwe.

¹⁶ Ku lunaku olwo abalwanyi abazira nnamige balidduka bukunya!" bw'atyo bw'ayogera MUKAMA.

Amosi 3

Okulabula Abantu ba Isirayiri

¹ Muwulire ekigambo kino MUKAMA ky'aboogerako mmwe abaana ba Isirayiri, ennyumba yonna gye naggya mu Misiri.

² "Mu bantu bona abali ku nsi, mmwe mwekka be nalonda. Kyendiva mbabonereza olw'ebibi byammwe byonna."

³ Abantu ababiri bayinza okutambulira awamu wabula nga bakkiriziganyizza?

⁴ Empologoma ewulugumira mu kisaka nga terina muyiggo? Empologoma ento ekaabira mu mpuku yaayo nga teriiko ky'ekutte?

⁵ Akanyonyi kayinza okugwa mu mutego nga tewali kikasikirizza? Omutego gumasuka nga tegulikko kye gukwasizza?

⁶ Akagombe kavugira mu kibuga abantu ne batatya? Akabenje kagwa mu kibuga nga MUKAMA si y'akaleese?

⁷ Naye ddala MUKAMA Katonda takola kintu kyonna nga tasoose kukibikkulira baweereza be, bannabbi.

⁸ Empologoma ewulugumye, ani ataatyey? MUKAMA Katonda ayogedde ani ataawe bubaka bwe?

⁹ Langirira eri ebigo by'e Asudodi n'eri ebigo by'e Misiri nti, "Mujje mukunjaanire ku nsozi z'e Samaliya mulabe akajagalalo akanene akali eyo n'abantu be nga bwe bajoogebwa."

¹⁰ MUKAMA agamba nti, "Abantu abajuzzza ebigo byabwe n'ebintu ebinyage, tebamanyi kukola kituufu."

¹¹ Noolwekyo bw'ati bw'ayogera MUKAMA Katonda nti, "Omulabe alirumba ensi, n'amenyaamenya ebigo byo eby'amaanyi era n'abinyagulula."

¹² Bw'ati bw'ayogera MUKAMA nti, "Ng'omusumba bw'agezaako okutaasa endiga ye okuva mu kamwa k'empologoma n'asikayo amagulu abiri obubiri n'ekitundu ky'okutu, bwe batyo Abayisirayiri bwe balinunulibwa, abo abatuula mu Samaliya ku nkomerero y'ebitanda byabwe ne ku bitanda byabwe mu Ddmasiko.

¹³ "Muwulirize kino era mulumirize enju ya Yakobo yonna," bw'ayogera MUKAMA Katonda Ayinzabyonna.

¹⁴ "Ku lunaku lwe lumu lwe ndibonereza Isirayiri olw'ebibi bye, ndisaanyaawo ebyoto by'e Beseri, n'amayembe g'ekyoto galisalibwako ne gagwa wansi.

¹⁵ Era ndisaanyaawo ennyumba ebeerwamu mu biseera eby'obutiti, awamu n'ennyumba ebeerwamu mu biseera ey'ebbugumu; era ndimenyaamenya n'ennyumba ezayolebwa n'amasanga, ne nsanyaawo n'embiri," bw'ayogera MUKAMA.

Amosi 4

Katonda yeerayirira okuzikiriza Abantu

¹ Muwulire kino mmwe ente ez'omu Basani ezibeera ku Lusozi Samaliya, mmwe abakazi abajooga abaavu ne munyigiriza abanaku, era abagamba ba bbaabwe nti, "Mutuletereyo ekyokunywa."

² Mu butukuvu bwe MUKAMA Katonda alayidde nti, "Ekiseera kijja lwe balibasika n'amalobo, era abalisembayo ku mmwe ne basikibwa n'amalobo agavuba.

³ Mulisikibwa okuva mu mayumba gammwe ne musuulibwa ebweru nga muyisibwa mu bituli ebibotoddwa mu bbugwe, musuulibwe ku Kalumooni, bw'ayogera MUKAMA.

⁴ Kale mmwe mugende e Beseri mukoleyo ebitasaana; era mugende ne Girugaali mwongere okukola ebibi. Mutwalengayo ssaddaaka zammwe buli nkya, n'ekimu eky'ekkumi buli myaka esatu.

⁵ Muweeyo ekiweebwayo eky'okwebaza eky'emigaati egizimbulukusibbw, mulangirire n'ebiweebwayo eby'ekyeyagalire; mwe mwenyumiririza, mmwe

Abayisirayiri kubanga ekyo kye mwagala," bw'ayogera MUKAMA Katonda Ayinzabyonna.

6 "Nabaleetera enjala embuto zammwe ne ziba njereere mu buli kibuga, ne ssibawa kyakulya mu buli kabuga, naye era ne mugaana okudda gye ndi," bw'ayogera MUKAMA.

7 "Ne mbamma enkuba ng'ekyabulayo emyezi esatu amakungula gatuuke. Ne ntonnyesa enkuba mu kibuga ekimu ne ngiziyiza mu kirala. Yatonnyanga mu nnimiro emu, mu ndala n'etatonnya, ebirime ne biwotoka.

8 Abantu ne bavanga mu kibuga ekimu ne balaga mu kirala nga banoonya amazzi banyweko, naye ne gababula; naye era ne mutakyuka kudda gye ndi," bw'ayogera MUKAMA.

9 "Emirundi mingi ebirime byammwe n'ennimiro zammwe ez'emizabbibu na bigengewaza. Nabileetako obulwadde. Enzige nazo ne zirya emitiiini gyammwe n'emizeeyituuni gyammwe, naye era temwadda gye ndi," bw'ayogera MUKAMA.

10 "Nabasindikira kawumpuli nga gwe nasindika mu Misiri. Abavubuka bammwe ne mbattira mu lutalo n'ekitala awamu n'embalaasi zammwe ze mwawamba. Okuwunya kw'olusisira lwammwe ne kuyitirira nnyo naye era ne mugaana okudda gye ndi," bw'ayogera MUKAMA.

11 "Nazikiriza abamu ku mmwe nga bwe nakola Sodomu ne Ggomola, ne muba ng'olumuli olusikiddwa mu muliro ogwaka naye era ne mulema okudda gye ndi," bw'ayogera MUKAMA.

12 "Kyendiva nkukola bwe ntyo, ggwe Isirayiri, era ndikwongerako ebibonoobono. Noolwekyo weetegeke okusisinkana Katonda wo, ggwe Isirayiri."

13 Kubanga laba, oyo eyatonda ensozi era ye yatonda n'embuyaga era abikkulira omuntu ebirowoozo bye. Yafuula enkya okubeera ekiro, era alinnya mu bifo ebigulumivu eby'ensi. MUKAMA Katonda ow'Eggye lye linnya lye.

Amosi 5

Okukuba Omulanga ogw'Okukungubaga n'Okwenenya mu Isirayiri

1 Muwulirize mmwe abantu ba Isirayiri ekigambo kino eky'ennaku ekibakwatako.

2 "Isirayiri embeerera agudde obutayimuka nate. Bamwabulidde era tewali amuyimusa."

3 Bw'ati bw'ayogera MUKAMA Katonda nti, "Ekibuga ekiyungula abalwanyi olukumi okugenda mu lutalo kirisigazaawo kikumi bokka, n'ekyo ekiweereza ekikumi, kirizza kkumi bokka!"

⁴ Bw'ati bw'ayogera MUKAMA eri ennyumba ya Isirayiri nti, "Munnoonye kale munaabanga balamu.

⁵ Temunnoonyeza Beseri so temulaga Girugaali wadde okulaga e Beeruseba. Kubanga abantu b'e Girugaali balitwalibwa mu buwañjanguse era ne Beseri kiriggwaawo."

⁶ Munnoonye MUKAMA munaabanga balamu aleme okubuubuuka ng'omuliro ku nnyumba ya Yusufu; guligyokya nga tewali wa kuguzikiza mu Beseri.

⁷ Mmwe abantu ba Isirayiri abafuula obwenkanya okuba eky'okufumwa obufumwa mutulugunya obutuukirivu.

⁸ Oyo eyakola ettendo eriri mu mmunyeenye ezaaka ng'ebizungirizi era afuula ekisiikirize okubeera enkyo era akyusa obudde ne buva mu kitangaala ne bufuuka ekiro, ayita amazzi g'omu nnyanja ne gafukirira ensi ng'enkuba, MUKAMA lye linnya lye.

⁹ Okutemya n'okuzibula aleeta okuzikirira ku b'amaanyi era n'asaanyaawo ebibuga ebiriko ebigo.

¹⁰ Mukyawa abalamuzi abasalawo mu bwenkanya era munyooma n'abo aboogera amazima.

¹¹ Olinnyirira omwavu, n'omuwaliriza okukuwa emmere ey'empeke. Newaakubadde nga mwezimbiddie amayumba ag'amayinja, temuligabeeramu; era newaakubadde nga mwesimbiddie ennimiro z'emizabbibu ennungi, temulinywa ku wayini waamu.

¹² Ebibi byammwe mbimanyi, nga bingi ate nga bisasamaza. Munyigiriza omuntuukirivu ne mulya n'enguzi, abaavu temubasalira musango mu bwenkanya.

¹³ Noolwekyo oyo alina amagezi kyaliva asirika obusirisi mu biseera ng'ebyo kubanga ennaku mbi.

¹⁴ Munnoonyenga okukola obulungi, so si obubi munaabeeranga balamu! Bw'atyo MUKAMA Katonda ow'Eggye anaabeeranga mubeezi wammwe nga bulijo bwe mumuyita.

¹⁵ Mukyawe ekibi, mwagalenga ekirungi era embuga z'amateeka zibeerengamu obwenkanya. Oboolyawo MUKAMA Katonda ow'Eggye anaabakwatirwa ekisa abantu abo abaasigalawo ku Yusufu.

¹⁶ Noolwekyo bw'ati bw'ayogera MUKAMA Katonda ow'Eggye nti, "Walibeerawo okwaziirana mu nguudo n'okukaaba mu buli kibangirizi eky'omu kibuga. N'abalimi baliytibwa, bakaabe, n'abakungubazi bakube ebiwoobe.

¹⁷ Walibaawo okukaaba mu buli nnimiro ya mizabbibu kubanga nzija okuyita wakati mu mmwe."

¹⁸ Zibasanze mmwe abasubbira olunaku lwa MUKAMA. Lwaki mwesunga olunaku lwa MUKAMA? Olunaku olwo luliba kizikiza so si kitangaala.

¹⁹ Olunaku olwo lulibeera ng'omusajja adduka empologoma n'asisinkana eddubu, bw'aba ng'ayingira mu nnyumba ne yeekwata ku kisenge, ate n'abojebwa omusota.

²⁰ Olunaku lwa MUKAMA, teruliba kizikiza awatali kitangaala n'akatono, ng'ekizikiza ekikutte ennyo?

²¹ Nkyawa, era nnyooma embaga zammwe n'emikolo gyammwe eg'y'eddiini so sisanyukira kukuŋjaana kwammwe.

²² Weewaawo, ne bwe munaawaayo gye ndi ebiweebwayo byammwe ebyokebwa n'ebiweebwayo eby'emmere ey'empeke, sijja kubikkiriza. Ne bwe mulireeta ebiweebwayo olw'emirembe ebisinga obulungi, siribikkiriza.

²³ Muggyewo ennyimba zammwe ez'okutendereza. Siriwliriza na bivuga ng'entongooli zammwe.

²⁴ Kye njagala okulaba ge mazima n'obwenkanya nga bikulukuta ng'amazzi, n'obutuukirivu nga bukulukuta ng'omugga ogw'amaanyi.

²⁵ "Mwandeeteranga ssaddaaka n'ebiweebwayo mu ddungu emyaka gyonna amakumi ana, ggw'ennyumba ya Isirayiri?"

²⁶ Muyimusizza essabo lya kabaka wammwe, amaanyi ga bakatonda bammwe, n'emmuneenyenye ya katonda wammwe, bye mwekolera mmwe.

²⁷ Kyendiva mbawanjangusa okusukka Ddamasiko," bw'ayogera MUKAMA, ayitibwa Katonda Ayinzabyonna.

Amosi 6

MUKAMA ananya abali mu Mirembe

¹ Zibasanze abo abateefiirayo mu Sayuuni, n'abo abawulira emirembe ku lusozi lw'e Samaliya. Mmwe abasajja abeekitiibwa ab'ensi enkulembaze, abantu ba Isirayiri gye beeyuna.

² Mugende mulabe e Kalune; muveeyo mulage mu Kamasi ekikulu, ate era muserengete mu kibuga ky'Abafirisuuti eky'e Gaasi. Basinga obwakabaka bwammwe obubiri? Ensi yaabwe esinga eyammwe obunene?

³ Mulindiriza olunaku olw'ekibi, ate ne musembeza effugabbi.

⁴ Mugalamira ku bitanda ebyakolebwa mu masanga ne muwummulira mu ntebe ennyonvu nga muvaabira ennyama y'endiga n'ey'ennyana ensava.

⁵ Mwekubira ennanga nga Dawudi bwe yakolanga, ne muyiiya n'ennyimba ku bivuga.

⁶ Mwekatankira wayini, ne mwesiiga n'ebizigo ebirungi, naye temukaabira kubonaabona kwa Yusufu.

⁷ Noolwekyo mmwe mulisooka okugenda mu buwajjanguse. Era embaga zammwe n'okwewummuza birikoma.

⁸ MUKAMA Katonda ow'Eggye alayidde, MUKAMA Katonda Ayinzabyonna agamba nti, "Neetamiddwa amalala ga Yakobo, nkyawa ebigo bye, era nzija kuwaayo ekibuga ne byonna ebikirimu eri abalabe baakyo."

⁹ Era singa ennyumba eneeba ekyalinawo abasajja ekkumi abasigaddewo, nabo balifa.

¹⁰ Era singa ow'ekika akola ku by'okuziika, anaaba afulumya amagumba n'abuuza oba waliwo omuntu yenna eyeekwese munda mu nnyumba, oba alina gwe yeekwese naye, n'addamu nti, "Nedda," olwo omuziisi anaamusirisa ng'agamba nti, "Sirika; tetwogera ku linnya lya MUKAMA."

¹¹ Laba MUKAMA alagidde, ennyumba ennene erimenyebwamenyebwa, n'ennyumba entono erimenyebwamenyebwa.

¹² Kisoboka embalaasi okuddukira ku mayinja? Waali wabaddewo abalima ku mayinja n'enkumbi ezesikibwa ente? Naye obwenkanya mubufudde obutwa n'ekibala eky'obutuukirivu ne mukifuula ekikaawa.

¹³ Mwenyumiririza bwereere nti muli b'amaanyi olw'okuba nga mwawamba ekibuga Lodeba. Mwogera nti, "Tetwawamba Kanayimu n'amaanyi gaffe?"

¹⁴ MUKAMA Katonda ow'Eggye agamba nti, "Ndibasindikira eggwanga libalumbe, mmwe ennyumba ya Isirayiri; liribajooga ebbanga lyonna okuva e Lebo Kamasi okutuuka mu kiwonvu kye Alaba."

Amosi 7

Okwolesebwa ku by'Omusango

¹ Bino MUKAMA Katonda bye yandaga. Yali atEEKATEEKA ebibinja by'enzige okusaanyaawo ebirime ebyalimwanga, nga baakakungula olukungula olusooka ssinziggu, kabaka kw'afuna omusolo.

² Enzige bwe zaalya buli kantu akaali mu nnimiro akalamu, ne nkaaba nti, "MUKAMA Katonda, sonyiwa abantu bo nkwegayiridde. Yakobo aliwona atya? Nga mutono nnyo."

³ MUKAMA bwe yawulira okukaaba kuno n'akyusa ekirowoozo kye. N'agamba nti, "Ekyo tekiribaawo."

⁴ Bino MUKAMA bye yayongera okundaga. Yali ategeka okubonereza abantu n'omuliro. Gwalya ennyanja eyali wansi w'ensi ne gumalawo n'olukalu.

⁵ Ne nkaaba nti, "Ayi MUKAMA Katonda nkwegayiridde osonyiwe abantu bo! Yakobo anaasobola atya okusigalawo? Nga mutono nnyo!"

⁶ Awo MUKAMA bwe yawulira okukaaba kuno, n'akyusa ekirowoozo kye. Era n'agamba nti, "Era n'ekyo tekijja kubeerawo."

⁷ Ate Mukama n'andaga okwolesebwa okulala. Ne ndaba Mukama ng'ayimiridde ku bbugwe azimbiddwa obulungi nga yatereera era nga Mukama akutte bbirigi mu mukono gwe.

⁸ MUKAMA n'ambuuza nti, "Amosi, kiki ky'olaba?" Ne nziramu nti, "Ndaba bbirigi." Mukama n'alyoka aŋŋamba nti, "Laba nteese bbirigi wakati mu bantu bange Isirayiri. Sijja kuddayo kukyusa kirowoozo kyange nate ku ky'okubabonereza.

⁹ "Ebifo ebigulumivu ebya Isaaka birizikirizibwa, n'ebifo bya Isirayiri ebitukuvu birifuuka matongo. N'ennyumba ya Yerobowaamu ndigirwanyisa n'ekitala."

Amosi Ne Amaziya

¹⁰ Awo Amaziya kabona w'e Beseri n'aweereza kabaka wa Isirayiri, Yerobowaamu, obubaka ng'agamba nti, "Amosi agezaako okukulyamu olukwe wakati mu Isirayiri mwennyini. Ensi teyinza kugumira bigambo bye."

¹¹ Bw'ati Amosi bw'ayogera nti, "'Yerobowaamu alifa kitala, ne Isirayiri balitwalibwa mu buwaŋŋanguse bave mu nsi yaboobwe.'"

¹² Awo Amaziya n'alyoka alagira Amosi nti, "Vva wano ggwe omulabi. Ddayo mu nsi ya Yuda gy'oba oweera obunnabbi, ofunire eyo omusaala gwo.

¹³ Toweera wano bunnabbi nate e Beseri kubanga luno lubiri lwa kabaka era ssinzizo lya bwakabaka."

¹⁴ Amosi n'amuddamu nti, "Saali nnabbi oba omwana wa nnabbi nnali mulunzi wa ndiga era nga ndabirira miti emisukamooli.

¹⁵ Naye MUKAMA yanziggya eyo mu kulunda ekisibo n'aŋŋamba nti, 'Genda owe obunnabbi abantu bange, Isirayiri.'

¹⁶ Noolwekyo ggwe wuliriza ekigambo kya MUKAMA. Ogamba nti, "'Towa bunnabbi bunanya Isirayiri, era lekaraawo okubuulira ebikwata ku nnyumba ya Isaaka.'

¹⁷ "MUKAMA kyava akuddamu nti, "Mukazi wo alifuuka malaaya mu kibuga era n'abaana bo aboobulenzi n'aboobuwala balifa ekitala. Ettaka lyo lirigabanyizibwamu ne liweebwa abalala naawe kennyni olifiira mu nsi ey'abakafiiri. Ekituufu kiri nti abantu ba Isirayiri balitwalibwa mu buwaŋŋanguse, ne baggyibwa mu nsi yaboobwe.'"

Amosi 8

Ekisero Ky'ebibala

¹Bino MUKAMA Katonda bye yandaga. Ne ndaba ekisero ekirimu ebibala ebyengedde.

²MUKAMA n'ambuuza nti, "Amosi, kiki ky'olaba?" Ne muddamu nti, "Ndaba ekisero ky'ebibala ebyengedde." MUKAMA n'alyoka aŋjamba nti, "Ekiseera eky'okubonereza abaana ba Isirayiri kituuse. Siribasonyiwa nate.

³"Ku lunaku olwo," bw'ayogera MUKAMA Katonda, "okuyimba kw'omu yeekaalu kulifuuka kukungubaga. Walibeerawo okufa okuyitirivu, emirambo nga gibunye wonna. Walibaawo akasiriikiriro."

⁴ Muwulire bino mmwe abalinniyirira abateesobola, era abasaanyaawo abanaku b'omu nsi,

⁵ nga mwogera nti, "Ennaku enkulu ez'Omwezi ogwa kaboneka ziggwaako ddi, tulyoke tutunde emmere yaffe ey'empeke, era ne Ssabbiiti eggwaako ddi, tutunde eŋjaano yaffe?" Mukozesa minzaani enkyamu ne mwongera emiwendo ne mukozesa n'ebipimo ebitatuuse,

⁶ mmwe abagula abaavu n'effeeza n'abanaku ne mubagula n'omugogo gw'engatto, ne mutundira ebisaaniiko mu ŋŋaano.

⁷ MUKAMA yeeweredde amalala ga Yakobo ng'agamba nti, "Sigenda kwerabira bintu bye bakoze.

⁸ "Ensi terikankana olw'ekyo, na buli abeeramu n'akungubaga? Ensi yonna eritumbiira ng'omugga Kiyira n'ekka ng'amazzi ag'omugga gw'e Misiri bwe gakola."

⁹ MUKAMA Katonda agamba nti, "Ku lunaku olwo, enjuba erigwiira mu ttuntu era ensi erikwata ekizikiza emisana ttuku.

¹⁰ Embaga zammwe ez'eddini ndizifuula mikolo gya kukungubaga era okuyimba kwammwe kwonna kulifuuka kukaaba. Mwenna nzija kubatuusa ku kwambala ebibukutu n'emitwe gyammwe mugimwe. Olunaku olwo ndilifuula ng'olw'okukungubagira omwana owoobulenzi omu yekka, era n'enkomerero yaabyo ekaayire ddala.

¹¹ "Ekiseera kijja," bw'ayogera MUKAMA Katonda, "lwe ndisindika enjala mu nsi yonna, teriba njala ya mmere oba nnyonta y'amazzi, naye eriba enjala y'ekigambo kya Katonda.

¹² Abantu balibundabunda okuva ku nnyanja emu okudda ku ndala, bave mu bukiakkono badde mu bukiakkono nga banooanya ekigambo kya MUKAMA, naye tebalikifuna.

¹³ “Mu biro ebyo, “abawala ababalagavu n’abalenzi ab’amaanyi balizirika olw’ennyonta.

¹⁴ Abo abaalayira eby’ensonyi eby’e Samaliya oba abaayogera nti, ‘Nga katonda wo bw’ali omulamu ggwe Ddaani,’ oba nti, ‘Nga katonda w’e Beeruseba bw’ali omulamu,’ baligwa obutayimuka nate.”

Amosi 9

Okuzikirira kwa Isirayiri

¹ Bwe ntyo nate ne ndaba Mukama ng’ayimiridde ku mabbali g’ekyoto, n’ayogera nti, “Mukube emitwe gy’empagi bya yeekaalu n’amaanyi mangi, emifuubeeto gikankane. Bisesebbuke bikube emitwe gy’abantu bonna, n’abo abaliba bawonyeewo ndibattisa ekitala. Tewaliba n’omu awona.

² Ne bwe balisima ne baddukira emagombe, omukono gwange gulibaggyayo. Ne bwe balirinnya waggulu mu ggulu ndibawanulayo.

³ Wadde balyekweka ku lusozi Kalumeeri, ndibanoonyaayo ne mbaggyayo. Ne bwe balyekweka wansi mu buziba bw’ennyanja ndiragira ogusota ne gubalumirayo.

⁴ Ne bwe balitwalibwa abalabe baabwe mu buwaŋjanguse, era nayo ndiragira ekitala ne kibattirayo. Ndibasimba amaaso ne batuukibwako bibi so si birungi.”

⁵ Era Mukama, MUKAMA ow’Eggye, akwata ku nsi n’esaanuuka, abantu baayo bonna abagibeeramu ne bakungubaga, ensi yonna n’etumbiira nga Kiyira ate n’ekka ng’amazzi g’omugga gw’e Misiri;

⁶ oyo eyazimba olubiri lwe olulungi ennyo mu ggulu, omusingi gwalwo ne gubeera ku nsi, ayita amazzi g’ennyanja, n’agayiwa wansi ku lukalu, MUKAMA lye linnya lye.

⁷ MUKAMA ayongera n’agamba nti, “Mmwe abaana ba Isirayiri temuli ng’Abakuusi gye ndi? Ssabaggya mu nsi y’e Misiri nga bwe naggya Abafirisuuti e Katufoli, n’Abasuuli e Kiri?”

Essuubi lya Isirayiri

⁸ “Ddala ddala amaaso ga MUKAMA Katonda, gatunuulidde nkaliriza obwakabaka obwonoonyi. Ndibuzikiriza ne mbusaasaanya okuva ku nsi. Kyokka sirizikiririza ddala ennyumba ya Yakobo okugimalawo,” bw’ayogera MUKAMA.

⁹ “Kubanga ndiwa ekiragiro, ennyumba ya Isirayiri erinyeenyezebwा mu mawanga gonna, ng’emmere ey’empeke bwe kuŋjutibwa mu kakuŋjunta era tewaliba kayinja akaligwa wansi.

¹⁰ Aboonoonyi bonna mu bantu bange, balifa kitala, abo bonna aboogera nti, ‘Akabi tekalitutuukako.’”

Isirayiri edda obuggya

11 “Mu biro ebyo ndizzaawo ennyumba ya Dawudi eyagwa era ndiddaabiriza ebifo ebyamenyebwamenyebwa, ne nzizaawo ebyali amatongo, ne biba nga bwe byabeeranga,

12 balyoke batwale ekitundu kya Edomu ekyasigalawo n'amawanga gonna ge nayita okuba abantu bange,” bw'ayogera MUKAMA alikola ebintu ebyo byonna.

13 “Ennaku zija,” bw'ayogera MUKAMA, “akungula lw'alisinga asiga, n'asiga ensigo lw'alisinga atunda emizabbibu. Wayini omuggya alitonnya okuva mu nsozi, n'akulukuta okuva mu busozi.

14 Ndikomyawo abantu bange Isirayiri okuva mu buwanjanguse, ne bazimba nate ebibuga ebyamenyebwa, babibeeremu. Balisimba ennimiro zaabwe ez'emizabbibu ne banya wayini avaamu, era balisimba ennimiro balye ebibala byamu.

15 Ndisimba Isirayiri mu nsi yaabwe, era tebaliggibwa nate mu nsi gye nabawa,” bw'ayogera MUKAMA Katonda wammwe.

Obadiya

Obadiya 1

¹ Kuno kwe kwolesebwa kwa Obadiya. MUKAMA Ayinzabyonna kwe yamuwa ku bikwata ku nsi ya Edomu. Tuwulidde obubaka obuva eri Katonda, Katonda yaweereza omubaka eri amawanga n'obubaka buno nti, "Mugolokoke tulumbe Edomu tumulwanyise."

² "Laba, ndibafuula aba wansi ennyo mu mawanga, era olinyoomererwa ddala.

³ Mwelimbye n'amalala agali mu mitima gyammwe, mmwe abasula mu mpuku ez'omu njazi, era ne muzimba amaka gammwe waggulu ku njazi. Mmwe aboogera nti, 'Ani alituwanulayo n'atussa wansi?'

⁴ Wadde nga mwewanika waggulu ng'empungu era ne muzimba ebisu byammwe wakati w'emmunyeenyenye, ndibawanulayo ne mbasuula wansi," bw'ayogera MUKAMA.

⁵ "Singa ababbi babajjira, n'abanyazi ne babalumba ekiro, akabi nga kaba kabatuuseeko. Tebandibabbyeko byonna bye baagala? Oba singa abanozi b'emizabbibu bakujiridde, tebandireseeko obuzabbibu butono nnyo?

⁶ Esawu alinyagulurwa, eby'obugagga bye ebikusike birinyagibwa.

⁷ Abaalagaana naawe balikusindiikiriza ku nsalo, Mikwano gyo balikulimbalimba ne bakuwangula; abo abalya emmere yo balikutega omutego, balikutega omutego kyokka toliguvumbula.

⁸ "Ku lunaku olwo, sirizikiriza bagezi b'e Edomu, abantu ab'amagezi ababeera mu nsozi za Esawu?" bw'ayogera MUKAMA.

⁹ "Abalwanyi bo abazira ggwe, Temani, balitya, era na buli muntu mu nsozi za Esawu alittibwa.

¹⁰ Olw'ebikolwa eby'obukambwe ebyo bye wakola muganda wo Yakobo, oliswazibwa. Olizikirizibwa n'otaddayo kuwulirwa.

¹¹ Ku lunaku lwe wayimirira ku bbali n'otofaayo, nga banya obugagga bwa Isirayiri, ne bannaggwanga ne bayingira mu miryangyo gye, ne bakuba obululu okulaba atwala Yerusaalemi, wali omu ku bo.

¹² Tosaanye kusekerera muganda wo mu biseera bye eby'okulaba ennaku, wadde okusanyuka ku lunaku olw'okuzikirira kw'abantu ba Yuda, newaakubadde okwewaana ennyo ku lunaku lwe baatawaanyizibwa ennyo.

¹³ Temukumba nga tuyita mu miryangyo gy'abantu bange ku lunaku kwe baalabira obuyinike, wadde okubasekerera ku lunaku kwe baabonaabonera,

newaakubadde okutwala obugagga bwabwe ku lunaku lwe baatuukibwako akabi.

¹⁴Temulindira mu masajjanzira okutta abo abadduka, wadde okuwaayo abawonyeewo mu biro eby'okulabiramu ennaku.

¹⁵“Olunaku luli kumpi kwe ndisalira amawanga gonna omusango. Nga bwe mwakola abalala, nammwe bwe mulikolebwa. Ebikolwa byammwe biribaddira.

¹⁶Ng'abantu bange bwe baanywa ekikompe eky'ekibonerezo ku lusozi lwange olutukuvu n'amawanga ageetooloddewo bwe galikinywa obutakoma; balikinywa, babe ng'abataganywangako.

¹⁷Naye ku Lusozi Sayuuni baliwona, kubanga lutukuvu, n'ennyumba ya Yakobo eritwala omugabo gwabwe.

¹⁸Ennyumba ya Yakobo eriba omuliro, n'ennyumba ya Yusufu olulimi olw'omuliro. Ennyumba ya Esawu eriba bisusunku, era baligyokya n'eggwaawo. Tewaliba muntu wa nnyumba ya Esawu n'omu alisigalawo, kubanga MUKAMA akyogedde.

¹⁹“Abantu b'e Negebu balitwala olusozi Esawu, n'abantu ab'omu biwonvu balitwala ensi y'Abafirisuuti. Balyetwalira n'ennimiro ez'omu Efulayimu ne Samaliya, ne Benyamini ne yeetwalira Gireyaadi.

²⁰Ekibiina ky'Abayisirayiri abaali mu buwanjanguse e Kanani, balyetwalira ensi, okutuukira ddala ku Zalefaasi; abawanjanguse abaava mu Yerusaalemi abali mu Sefalaadi, balyetwalira ebibuga mu Negebu.

²¹Abanunuzi balyambuka ku Lusozi Sayuuni, okufuga ensozi za Esawu. Obwakabaka buliba bwa MUKAMA.”

Yona

Yona 1

Yona Ajeemera Katonda

- ¹ Awo MUKAMA n'ayogera ne Yona omwana wa Amittayi ng'agamba
- ² nti, "Situka ogende e Nineeve mu kibuga ekyo ekinene obatuuseeko obubaka buno obubanenya, kubanga ebibi byabwe birinnye eno waggulu ne bintukako."
- ³ Naye Yona n'adduka okuva mu maaso ga MUKAMA, n'aserengeta okulaga e Talusiisi. N'aserengeta e Yopa gye yasanga ekyombo, n'akirinnya okugenda e Talusiisi. Ng'amaze okusasulira etikiti ye, n'asaabala mu kyombo ekiraga e Talusiisi ng'adduka okuva mu maaso ga MUKAMA.
- ⁴ Awo MUKAMA n'aleeta omuyaga ogw'amaanyi ne gukunta ku nnyanja, n'ekyombo Yona mwe yali ne kyagala okusaanawo.
- ⁵ Entiisa ey'amaanyi n'ekwata abalunyanja bona, buli omu n'akaabirira katonda we amuyambe, nga bwe basuula n'emigugu egy'ebiyamaguzi mu nnyanja bakendeeze ku buzito obwali mu kyombo. Mu kiseera ekyo, Yona yali mu tulo wansi mu ntobo y'ekyombo.
- ⁶ Naye omugoba omukulu ow'ekyombo n'aserengeta gye yali n'amugamba nti, "Oyinza otya okuba nga weebase? Situka okaabirire katonda wo, oboolyawo anaatukwatirwa ekisa n'atulokola."
- ⁷ Awo abalunyanja ne boogeraganya nti, "Mujje tukube obululu, tuvumbule omuntu yennyini avuddeko omutawaana guno." Ne bakuba obululu, akalulu ne kagwa ku Yona.
- ⁸ Abalunyanja ne babuuza Yona nti, "Tubuulire, lwaki otuleetedde akabi akafaanana bwe kati, kiki ky'okoze? Okola mulimu ki? Ova wa era oli wa nsi ki, n'abantu bo be b'ani?"
- ⁹ Yona n'agamba nti, "Ndi Mwebbulaniya; era nsinza MUKAMA, Katonda w'eggulu eyakola eggulu n'ensi."
- ¹⁰ Awo ne batya nnyo ne babuuza nti, "Kiki kino ky'otukoze?" Kubanga baali bategedde nti yali adduka mu maaso ga Katonda nga bwe yali amaze okubategeeza.
- ¹¹ Awo ne bamugamba nti, "Tukukole tutya ennyanja erongooke?" Kubanga ennyanja yali yeeyongera bwetyongezi okufuukuuka.
- ¹² N'abagamba nti, "Munsitule munsuule mu nnyanja ennyanja eneeteeka, kubanga esiikuuse ku lwange."
- ¹³ Naye abalunyanja ne bagezaako nnyo okugoba ku ttale, kyokka ne batayinza, kubanga omuyaga gwagenda gweyongera bwetyongezi.

¹⁴Kyebaava bakaabirira MUKAMA ng'abagamba nti, "Tukwegayiridde Ayi MUKAMA, totuleka kufa olw'obulamu bw'omusajja ono, era totuteekako musango olw'omusaayi gwe n'okufa kwe, kubanga oleese omuyaga olw'esonga."

¹⁵Awo ne basitula Yona ne bamusuula mu nnyanja eyali eyira. Amangwago omuyaga ne gusirika.

¹⁶Abasajja ne batya nnyo MUKAMA, ne bawaayo ekiweebwayo gy'ali ne beeyama obweyamo.

¹⁷ MUKAMA yateekateeka ekyennyanja ekinene ennyo ne kimira Yona; Yona n'amala mu kyennyanja ekkyo ennaku ssatu emisana n'ekiro.

Yona 2

Okusaba Kwa Yona

¹Awo Yona n'asinziira mu kyennyanja n'asaba MUKAMA Katonda we, ng'agamba

²nti, "Mu nnaku yange ennyingi nakaabirira MUKAMA n'anziramu; mu buziba ewala mu magombe nakukoowoola, era n'owulira eddoboobi lyange!"

³Kubanga wansuula ewala mu buziba mu nnyanja, ne nzika, amayengo gonna, ensozi n'ensozi z'amazzi ebikunta ne bimbikka ne binneetooloola.

⁴Ne ndyoka njogera nti, 'Ngobeddu mu maaso go; Ddala ndiddayo nate okulaba yeekaalu yo entukuvu?'

⁵Nakkira ddala ku ntobo wansi w'amayengo, okufa ne kumbeerera ddala kumpi; Amazzi nga ganneetoolodde era ng'omuddo gw'omu nnyanja gunneezingiridde ku mutwe.

⁶Ne nñjendera ddala ku ntobo, ensozi z'omu nnyanja gye zisibuka, eyo, ensi n'ensibirayo emirembe n'emirembe. Naye ggwe MUKAMA Katonda wange, onzigye mu bunnya, Ayi MUKAMA Katonda wange.

⁷"Bwe nnali nga mpweddemu essuubi, emmeeme yange ng'ezirika ne nkujukira, Ayi MUKAMA Katonda. Awo okusaba kwange entakeera ne kutuuka mu yeekaalu yo entukuvu.

⁸"Abo abassaayo omwoyo ku balubaale ne bakatonda abataliimu ne babasinza, beefiiriza okusaasirwa kwa Katonda okubalindiridde!

⁹Naye nze, n'oluyimba olw'okukutendereza, ndikuwa ssaddaaka. Ddala ndituukiriza obweyamo bwange kubanga obulokozi buva eri MUKAMA Katonda."

¹⁰Awo MUKAMA Katonda n'alagira ekyennyanja ne kiwandula Yona n'agwa ettale ku lukalu.

Yona 3

Yona Agondera MUKAMA

¹ Awo ekigambo kya MUKAMA ne kijjira Yona omulundi ogwokubiri, n'amugamba nti,

² "Genda mu kibuga ekinene Nineeve obalabule n'obubaka buno bwe nkuwa."

³ Awo Yona n'agondera MUKAMA n'agenda e Nineeve. Nineeve kyali kibuga kya kitibwa nnyo era nga kitwala ennaku ssatu okukibuna kyonna.

⁴ Ku lunaku olwasooka Yona yatambula olunaku lwonna ng'agenda alangirira nti, "Bwe walijitawo ennaku amakumi ana, Nineeve kirizikirira."

⁵ Abantu b'omu Nineeve ne bakkiriza Katonda, ne balangirira okusiiba ne beesiba ebibukutu, bona okuva ku asinga ekitibwa okutuuka ku asembayo okuba owa wansi.

⁶ Amawulire gano bwe gaatuuka ku kabaka w'e Nineeve, n'ayimuka ku ntebe ye ey'obwakabaka, ne yeeyambalamu ekyambalo kye, ne yeesiba ekibukutu, n'atuula mu nfuufu.

⁷ Kabaka teyakoma awo, wabula n'ayisa n'etteeka n'alibunya Nineeve yonna nga ligamba nti, Olw'ekiragiro kya kabaka n'abakungu be: "Tewaba muntu yenna, wadde ensolo oba eggana n'ekisibo, okukomba ku mmere wadde amazzi;

⁸ naye buli muntu n'ekisibo bibikkibwe n'ebibukutu, era bikaabirire nnyo Katonda, era birekeraawo okwonoona n'okukola eby'obukambwe.

⁹ Ani amanyi? Oboolyawo Katonda anaakyusa ku kibonerezo kye, kye yatusalira n'akkakkanya obusungu bwe n'atatzikiriza."

¹⁰ Awo Katonda bwe yalaba kye bakoze, ne baleka n'ebibi byabwe, n'abasonyiwa n'atabatuusaako kibonerezo, kye yali agambye okubatuusaako.

Yona 4

Obusungu bwa Yona n'Ekisa Kya Katonda

¹ Naye Yona n'anyiiga nnyo.

² N'alyoka yeemulugunyiza Katonda n'amugamba nti, "Kino ddala kye nalowooza, MUKAMA, bwe nnali mu nsi ye waffe, lwe wasooka okunjambwa okujja eno. Kye kyanzirusa n'okunzirusa okugenda e Talusiisi; kubanga namanya nti ggwe oli Katonda ajjudde obulungi, alwawo okusunguwala, alina ekisa ekingi, era namanya nti ojja kwanguwa okukyusa entegeka zo ez'okuzikiriza abantu bano.

³ Kale nno nkwegayiridde MUKAMA nzita; okufa kisinga okuba omulamu."

⁴ Awo MUKAMA n'agamba nti, "Olina ekituufu kw'osinziira okunyiiga?"

⁵Awo Yona n'afuluma ebweru w'ekibuga n'abeera ku luuyi lwakyo olw'ebuvanjuba, era ne yekolerawo akasiisira mu makoola, n'alinda alabe ekinatuuka ku kibuga.

⁶Ebikoola by'akasiisira bwe by'awotoka olw'omusana, MUKAMA Katonda n'ategeka ekiryo ne kimera mangu amakoola gaakyo ne gabikka ku mutwe gwa Yona ne gakendeeza ku musana. Yona n'asanyuka nnyo olw'ekiryo.

⁷Naye ate enkeera Katonda n'aleeta ekiwuka, ne kirya ekiryo ne kikala ne kifa.

⁸Ng'enjuba yeewanise, Katonda n'alyoka alagira embuyaga ey'Ebuwanjuba ey'olubugumu okufuuwa Yona, omusana ne gumwokya nnyo mu mutwe okutuusa lwe yazirika. N'ayagala afe. N'ayogera nti, "Okufa kusinga okuba omulamu."

⁹MUKAMA n'alyoka amubuuza nti, "Olina ekituufu kw'osinziira okunyiiga olw'ekiryo ekikaze ne kifa?" Yona n'addamu nti, "Yee, kituufu nze okunyiiga ennyo n'okwegomba okufa."

¹⁰MUKAMA n'amugamba nti, "Osaalirwa olw'ekibikka kyo ekyoononese songa si ggwe wakimeza, ate nga kyo kyali kya kiseera buseera.

¹¹Kale lwaki nange sandisaasidde Nineeve, ekibuga ekyo ekinene n'abantu baamu emitwalo ekkumi n'ebiri n'okusingawo, n'ente zaakyo ennyingi bwe zityo, abantu abatasobola kwawula kirungi na kibi?"

Mikka

Mikka 1

¹ Mu mirembe Yuda gye yagenda efugibwa bakabaka bano: Yosamu, ne Akazi, ne Keezeekiya, Mikka eyali Omumolasuuti, yafuna obubaka obuva eri MUKAMA, obukwata ku kibuga Samaliya ne Yerusaalemi.

² Muwulire mmwe abantu mwenna, muwulire mmwe ebintu byonna ebiri mu nsi, ne bona abagirimu, MUKAMA Ayinzabyonna asinziira mu yeekaalu ye entukuvu, ng'alina by'abalumiriza.

³ Mulabe, MUKAMA ajja ng'ava mu ggulu ku ntebe ye ng'akka ku nsi ng'atambulira ku nsozi waggulu.

⁴ N'ensozi zirisaanuukira wansi w'ebigere bye era n'ebiwonvu ne byatika ne bisaanuuka ng'ebisenge by'emizindu by'enjuki ebyokeddwa omuliro, ng'amazzi g'ekiyiriro bwe gakulukuta ku lusozi nga gayirira ku bbangabanga.

⁵ Bino byonna biribeerawo olw'okwonoona kwa Yakobo, olw'ebibi by'ennyumba ya Isirayiri. Ekibi kya Yakobo kye kiuwa? Si ye Samaliya? Kifo ki ekigulumivu ekya Yuda? Si Yerusaalemi?

⁶ "Noolwekyo nzia kubetenta Samaliya ngifuule ebifunfugu, kifuuke nga ennimiro ey'okusimbamu emizabbibu. Ndiyiwa amayinja gaakyo mu kiwonvu N'emisingi gyakyo ne ngireka nga gyasamy.

⁷ Bakatonda baakyo bona be basinza, balisekulwasekulwa; ebintu byonna ebyaweebwayo ng'ebirabo mu yeekaalu biriggya omuliro; ndizikiriza bakatonda baakyo bona be beekolera. Ng'ebirabo ebyo bwe byafunibwa mu bwenzi, bwe bityo bwe biritwalibwa mu bwenzi ne bikozesebwa."

Okukaaba n'Okukungubaga

⁸ Kyendiva nkaaba ne nkuba ebiwoobe, ne ntambula nga sambadde ngatto, era nga ndi bukunya. Ndikaaba ng'ekibe, ne nkuba ebiwoobe ng'abaana b'ekiuugulu.

⁹ Ekiwundu kye tekiwonyezeka, ne Yuda ky'alwadde. Kituukidde ddala ku mulyango gw'abantu bange, ne ku Yerusaalemi yennyini.

Omulabe Aseemberera Yerusaalemi

¹⁰ Temukibuulira mu Gaasi, temukaaba maziga n'akatono. Mwevulungulire mu nfuufu mu Besuleyafula.

¹¹ Muyiteewo nga muli bwereere nga muswadde, mmwe ababeera mu Safiri. Ababeera mu Zanani tebalifuluma. Beswezeeri ekuba ebiwoobe, kubanga tokyalinayo buddukiro.

¹² Abo ab'omu Malosi bali mu kulumwa okw'amaanyi nga balindirira okubeerwa, kubanga ekibonoobono kivudde eri MUKAMA, ne kituuka ne ku mulyango gwa Yerusaalemi.

¹³ Mwanguwe okusiba amagaali ku mbalaasi mmwe ababeera mu Lakisi. Mmwe nsibuko y'ekibi mu Bawala ba Sayuuni, kubanga ebibi bya Isirayiri byasangibwa mu mmwe.

¹⁴ Noolwekyo muligabira Molesesu eky'e Gaasi ebirabo ebimusibula. Ebibuga by'e Akuzibu birikakasibwa nga bya bulimba eri bakabaka ba Isirayiri.

¹⁵ Mmwe abantu b'omu Malesa, ndibasindikira alibawangula n'abafuga. Oyo ekitiibwa kya Isirayiri alija mu Adulamu.

¹⁶ Mukungubage, n'emite mugimwe olw'abaana bammwe be mwesiimisa; mumwe enviiri zammwe nga mukungubaga, emitwe gyammwe gibe ng'egy'ensega, kubanga abaana bammwe balibaggyibwako ne batwalibwa mu buwanjanguse.

Mikka 2

¹ Zibasanze mmwe abateesa okukola ebitali bya butuukirivu era abateesa okukola ebibi nga bali ku buliri bwabwe; Obudde bwe bukya ne batuukiriza entegeka zaabwe, kubanga kiri mu nteekateeka yaabwe.

² Beegomba ebyalo ne babitwala, ne beegomba ennyumba nazo ne bazitwala. Banyigiriza omuntu ne batwala amaka ge olw'amaanyi, ne bamubbako ebyobusika bwe.

³ MUKAMA kyava agamba nti, "Laba, ndireeta akabi ku bantu abo, ke mutagenda kweggyamu. Temuliddayo kubeera n'amalala nate kubanga kiriba kiseera kya mitawaana.

⁴ Olwo abantu balikusekerera; Balikuyeeyereza nga bayimba oluyimba luno olw'okukungubaga nti: 'Tugwereddewo ddala; ebintu by'abantu bange bigabanyizibbwamu. MUKAMA anziggirako ddala ettaka lyange, n'aliwa abo abatulyamu enkwe.'"

⁵ Noolwekyo tewalisigalawo muntu n'omu mu kunjaaniro lya MUKAMA, aligabanyaamu ettaka ku bululu.

⁶ Bannabbi baabwe boogera nti, "Temuwa bunnabbi, Temuwa bunnabbi ku bintu ebyo; tewali kabi kagenda kututuukako."

⁷ Ekyo kye ky'okuddamu ggwe ennyumba ya Yakobo? Olowooza Omwoyo wa MUKAMA asunguwalira bwereere, si lwa bulungi bwo? Ebigambo bye tebiba birungi eri abo abakola obulungi?

⁸Ennaku zino abantu bange bannyimukiddeko ng'omulabe. Basika ne bambula eminagiro emirungi ne baggigya ku migongo gy'abayise ababa beetambulira mu mirembe, ng'abasajja abakomawo okuva mu lutabaalo.

⁹Bakazi b'abantu bange mubagoba mu mayumba gaabwe amalungi, abaana baabwe ne mubaggyirako ddala buli mukisa oguva eri Katonda.

¹⁰Muyimuke mugende, kubanga kino tekikyali kiwummulo kyammwe; olw'ebikolwa ebibi bye mukijuzza, kyonoonese obutaddayo kuddaabirizika.

¹¹Omuntu bw'ajja n'omwoyo ogw'obulimba, n'agamba nti, "Ka mbabuulire ku ssanyu ly'omwenge gwe baagala era gwe banoonya," oyo y'aba nnabbi w'abantu abo.

¹²"Ddala ddala ndibakuinjaanya mwenna, ggwe Yakobo; ndikuinjaanya abo abaasigalawo ku Isirayiri. Ndibakuinjaanya ng'akuinjaanya endiga ez'omu ddundiro, ng'ekisibo mu ddundiro lyakyo, ekifo kirijjula abantu.

¹³Oyo aggulawo ekkubo alibakulemba okubaggya mu buwanjanguse, abayise mu mulyango abafulumye. Era kabaka waabwe alibakulemba, MUKAMA alibakulemba."

Mikka 3

Ekibi kya Isirayiri

¹Ne ndyoka njamba nti, "Muwulire mmwe abakulembeze ba Yakobo, mmwe abafuzi b'ennyumba ya Isirayiri. Si mmwe mwandisaanidde okumanya obwenkanya,

²mmwe abakyawa ekirungi ne mwagala ekibi; mmwe ababaagako abantu bange eddiba ne mubaggyako ennyama ku magumba?

³Mulya ennyama yaabwe, ne mubabaagako eddiba, amagumba gaabwe ne mugamenyaamenya, era ne mubasalaasala ng'ennyama eneefumbibwa mu nsaka."

⁴Balikoowoola MUKAMA, naye talibaanukula. Mu biro ebyo alibakweka amaaso ge olw'ebibi bye bakoze.

⁵Bw'atyo bw'ayogera MUKAMA nti, "Bannabbi ababuzaabuza abantu balangirira nti, 'Mirembe,' eri oyo abaliisa, naye oyo atabaliisa bamuggulako olutalo.

⁶Noolwekyo ekiro kiribajjira, awatali kwolesebwa, n'enzikiza ebajjire awatali kulagulwa. Enjuba erigwa nga bannabbi balaba, n'obudde bubazibirire.

⁷Abalabi baliswazibwa n'abalaguzi bakwatibwe ensonyi. Bonna balibikka amaaso gaabwe kubanga Katonda tabaanukula."

⁸ Naye nze, nzijjudde amaanyi n'Omwoyo wa MUKAMA, okwekaliriza ensonga n'obuvumu, njasanguze eri Yakobo olw'ebikolwa bye ebibi by'akola, olw'ekibi kya Isirayiri.

⁹ Mumpulirize mmwe abakulembeze b'ennyumba ya Yakobo, Mmwe abafuzi b'ennyumba ya Isirayiri, Mmwe abanyooma obwenkanya Ne mukyusa ekituufu ne mukifuula ekikyamu;

¹⁰ mmwe abazimbidde Sayuuni ku musaayi, Ne Yerusaalemi ne mugizimbira ku butali butuukirivu.

¹¹ Abakulembeze be, balya enguzi ne basala omusango nga beekubiira, bakabona be, baggya ensimbi ku bantu balyoke bayigirize, ne bannabbi be, baagala okuwa obunnabbi nga bamaze kusasulwa. Kyokka bajuliza MUKAMA nga boogera nti, "MUKAMA tali naffe? Tewali kinaatutuukako."

¹² Noolwekyo ku lwammwe, Sayuuni eririmibwa ng'ennimiro, ne Yerusaalemi erifuuka ntuumu ya bifunfugu, n'akasozi okuli yeekaalu kafuuke ng'akabira akakutte.

Mikka 4

Obufuzi bwa MUKAMA eri Amawanga Gonna

¹ Mu nnaku ez'oluvannyuma olusozi lw'ennyumba ya MUKAMA luligulumizibwa okusinga ensozi zonna; lulisitulibwa waggulu okusukkuluma ku busozi, era abantu balisimba ennyiriri nga balaga gye luli.

² Amawanga mangi galiragayo ne googera nti, "Mujje twambuke ku lusozi lwa MUKAMA, mu nnyumba ya Katonda wa Yakobo. Alituyigiriza by'ayagala tulyoke tutambulire mu makubo ge." Alisinziira mu Sayuuni okuwa abantu etteeka lye, n'ekigambo kya MUKAMA kiriva mu Yerusaalemi.

³ Aliramula amawanga atereeze ensonga wakati w'amawanga gakirimaanyi ag'ewala. Baliddira ebitala byabwe ne babiweesaamu enkumbi, n'amafumu gaabwe ne bagaweesaamu ebiwabyo. Eggwanga teririyimusa kitala ku ggwanga linnaalyo, so tebalyetegeka kulwana ntalo nate.

⁴ Buli muntu aliba mu ddembe wansi w'omuzabbibu gwe ne mu mutiini gwe. Tewalibaawo abatiisa kubanga akamwa ka MUKAMA Ayinzabyonna ke kakyogedde.

⁵ Newaakubadde nga amawanga gonna galigoberera bakatonda baago, naye ffe tunaatambiliranga mu linnya lya MUKAMA Katonda waffe emirembe n'emirembe.

Isirayiri ewona Obusibe

⁶ "Ku lunaku olwo," bw'ayogera MUKAMA, "Ndikuŋjaanya abalema, n'abo abaawanŋangusibwa n'abo abali mu nnaku.

⁷ Abalema ndibafuula abalonde, n'abo be nagoba, mbafuule eggwanga ery'amaanyi. MUKAMA alibafugira mu Lusozi Sayuuni okuva ku lunaku olwo okutuusa emirembe gyonna.

⁸ Ggwe omunaala oguyimirirwamu okulabirira endiga, ggwe ekigo eky'amaanyi ekya Muwala wa Sayuuni, ekitiibwa kyo eky'edda kirikuddira, n'obwakabaka ne bukomawo eri Muwala wa Sayuuni."

⁹ Naye kaakano kiki ekibakaabya ennyo bwe mutyo? Temulina kabaka abakulembera? Omuwi w'amagezi wammwe yafa, ennaku eryoke ebakwate ng'omukazi alumwa okuzaala?

¹⁰ Lumwa, weenyoose ggwe Omuwala wa Sayuuni ng'omukazi alumwa okuzaala. Kubanga kaakano oteekwa okuva mu kibuga ogende obeere ku ttale. Mulitwalibwa mu buwaŋjanguse mu Babulooni, era eyo gye ndibalokolera. Ndibanunulira eyo okuva mu mukono gw'omulabe.

¹¹ Kyokka kaakano amawanga mangi gakujjaanye okubalwanyisa. Boogera nti, Ayonooneebwe, n'amaaso gaffe geelolere Sayuuni.

¹² Naye tebamanyi birowoozo bya MUKAMA; tebategeera kuteesa kwe; oyo akuŋjaanya abalabe be ng'ebinywa by'enjaano bwe bikuŋjaanyizibwa mu gguuliro.

¹³ "Golokoka otandike okusa ggwe Omuwala wa Sayuuni, kubanga ejjembe lyo ndirifuula ekyuma; ndikuwa ebigere eby'ekyuma eky'ekikomo era olibetenta amawanga mangi." Amagoba gaabwe n'ebintu byabwe bye bafunye mu makubo amakyamu olibiwaayo eri MUKAMA, n'obugagga bwabwe n'obuwaayo eri Mukama w'ensi zonna.

Mikka 5

Omufuzi ava mu Besirekemu

¹ Kuŋjaanya amaggye go, ggwe ekibuga ekirina amaggye, kubanga tulumbiddwa. Omukulembeze wa Isirayiri balimukuba omuggo ku luba.

² "Naye ggwe Besirekemu Efulasa, newaakubadde ng'oli mutono mu bika bya Yuda, mu ggwe mwe muliva alibeera omufuzi wange mu Isirayiri. Oyo yaliwo okuva edda n'edda, ng'ensi tennabaawo."

³ MUKAMA kyaliva awaayo Isirayiri eri abalabe baayo okutuusa omukyala alumwa okuzaala lwalizaala omwana, era baganda be abaasigalawo ne balyoka bakomawo eri bannaabwe mu Isirayiri.

⁴ Aliyimirira n'anyweera n'aliisa ekisibo kye mu maanyi ga MUKAMA, mu kitibwa ky'erinnya lya MUKAMA Katonda we. Era abantu be tebalibaako abateganya, kubanga aliba mukulu okutuusa ku nkomerero y'ensi.

⁵ Omukulu oyo aliba mirembe gyabwe. Omwasuli bw'alirumba ensi yaffe n'abuna ebigo byaffe, tulimuyimbulira abasumba musanvu, n'abakulembeze munaana.

⁶ Abo be balifuga ensi ya Asuli n'ekitala era ensi ya Nimuloodi nayo bagyonoone. Naye alitulokola eri Omwasuli bw'alitulumba mu nsi yaffe era bw'aliyingira mu nsalo zaffe.

⁷ Abantu ba Isirayiri abalisigalawo balibeera wakati mu mawanga agabeetoolodde, babe ng'omusulo oguva eri MUKAMA, ng'obukubakuba obutonnyeredde ku muddo obatalindirira muntu oba abaana b'abantu.

⁸ Ng'empologoma bw'ebeera n'ensolo endala ez'omu nsiko, abantu abaasigalawo aba Yakobo balibeera mu mawanga mangi agabeetoolodde; ate era ng'empologoma ento mu bisibo by'endiga, bw'egenda n'eyitamu n'etaagulataagula ne wataba n'omu aziwonya.

⁹ Omukono gwo guliwangula abalabe bo, ne bona abakuyigganya balizikirizibwa.

¹⁰ “Ku lunaku olwo,” bw'ayogera MUKAMA, “Ndizikiriza embalaasi zo ne nsanyaawo n'amagaali go.

¹¹ Ndizikiriza ebibuga eby'omu nsi yo era mmenyemenye n'ebigo byo byonna.

¹² Obulogo bwo ndibumalawo era toliddayo kukolima nate.

¹³ N'ebibumbe bye musinza ndibizikiriza. Ne nziggyawo n'amayinja ge mwawonga; temuliddayo nate kuvuunamira bakatonda be mwekoledde n'emikono gyammwe.

¹⁴ Era ndisigula Baasera okuva mu mmwe, ebibuga byammwe n'embizikiriza.

¹⁵ Era ndyesasuza ku mawanga agatajnjondedde n'obusungu n'ekiruyi.”

Mikka 6

¹ Muwulire MUKAMA by'ayogera ng'agamba nti, “Muyimuke leero tuwoze ensonga zammwe mu maaso g'ensozi, n'obusozi buwulire bye mugamba.

² “Kaakano mmwe ensozi muwulire MUKAMA ky'abavunaana; nammwe emisingi gy'ensi egy'olubeerera muwulire. MUKAMA alina ensonga ku bantu be era agenda kuwawabira Isirayiri.

³ “Mmwe abantu bange kiki kye nnali mbakoze? Nnali mbazitooweredde? Munziremu.

⁴ Nabaggya mu nsi ye Misiri ne mbanunula mu nsi ey'obuddu, ne mbawa Musa, ne Alooni ne Miryamu okubakulembra.

⁵ Mmwe abantu bange mujukire ekigendererwa kya Balaki kabaka wa Mowaabu n'ebigambo, Balamu omwana wa Byoli bye yayogera. Mujukire bye nabakolera okuva e Sittimu okutuuka e Girugaali mulyoke mumanye ebikolwa bya MUKAMA eby'obutuukirivu."

⁶ Mwebuuza nti kiki kye nnaaleeta mu maaso ga MUKAMA nvuuname mu maaso ga Katonda agulumizibwa? Mmuseemberere n'ebiweebwayo ebyokebwa, n'ennyana ezaakamala omwaka ogumu?

⁷ MUKAMA alisiima endiga eza sseddume olukumi, oba emitwalo gy'emigga gy'amatuta? Mpeeyo omwana wange omubereberye olw'ebibi byange, nga mpaayo ekibala ky'omubiri gwange olw'ekibi eky'emmeeme yange?

⁸ MUKAMA akulaze, ggwe omuntu, ekirungi ky'oteekwa okukola. Kaakano, MUKAMA kiki ky'akwetaaza, okuggyako okukola eby'ensonga, okuba n'ekisa era n'okutambulira mu buwombeefu ne Katonda wo.

⁹ Wuliriza, MUKAMA akoowoola ekibuga mu ddoboozi ery'omwanguka. "Kya magezi ddala okutya erinnya lye, n'okussaayo omwoyo eri okukangavvula n'eri oyo akangavvula.

¹⁰ Nnyinza okwerabira eby'obugagga bye mwefunira, mmwe ennyumba erina obutali butuukirivu, erina n'ekigera ekitatuuka eky'omuzizo?

¹¹ Nnyinza okusonyiwa omuntu alina ebigera ebitatuuse, alina ensawo ez'ebipimo eby'obulimba?

¹² Abagagga baakyo bakambwe n'abatuuze baamu balimba n'ennimi zaabwe tezoogera mazima.

¹³ Nange kyenvudde ntandika okukuzikiriza, nkumalewo olw'ebibi byo.

¹⁴ Onoolyanga, naye n'otokutta, era olubuto lwo lulisigala lutokota nga lukubanja. Oligezaako okukujjaanya, weeterekere, naye tolibaako na kimu ky'otereka kubanga byonna ndibiwaayo eri ekitala.

¹⁵ Olisiga naye tolikungula, oligenzaako okusogola emizeeyituuni weggyiremu amafuta naye tolifuna mafuta gamala kusaabako, olisogola emizabbibu naye toliggyamu kyakunywa.

¹⁶ Olw'okuba ng'okolera ku biragiro bya Omuli n'ogoberera n'ebikolwa byonna eby'ennyumba ya Akabu n'ogoberera n'emizizo gyabwe, kyendiva nkufuula ekifulukwa, n'abantu bo bona babeere eky'okuduulirwa era olibaako ekivume ky'amawanga."

Mikka 7

¹Ddala zinsanze nze. Ndi ng'omuntu akungula ebibala okuva mu bifo eby'enjawulo eby'ennimiro y'emizabbibu; tewali kirimba kya mizabbibu kulyako, wadde emizeeyituuni egisooka okwengera gye njagala ennyo.

²Abantu abatya Katonda, baweddewo mu nsi; tewali n'omu mulongoofu asigaddewo. Bonna banoonya okuyiwa omusaayi, buli omu anoonya okutega muganda we ekitimba.

³Emikono gyabwe gyombi mikugu mu kukola ebibi; omufuzi asaba ebirabo, n'omulamuzi alya enguzi, n'ab'amaanyi mu nsi, beekolera kye baagala nga basala enkwe.

⁴Mu abo bona asingamu obulungi, afaanana ng'omweramannyo; asingamu ku mazima y'asinga olukomera lw'amaggwa obubi. Naye olunaku lw'abakuumi bammwe lutuuse, era kino kye kiseera eky'okutabukatabuka.

⁵Tewesiga muntu n'omu, wadde mukwano gwo, newaakubadde mukazi wo, Weegendereze by'oyogera.

⁶Kubanga omulenzi agaya kitaawe, n'omwana alwanyisa nnyina, muka mwana n'alwanyisa nnyazaala we. Abalabe b'omuntu, bantu be, ab'omu nju ye bennyini.

⁷Naye nze nnindirira MUKAMA nga nnina essuubi, nnindirira Katonda Omulokozi wange; Katonda wange anampulira.

⁸Tonjeeyereza ggwe omulabe wange, kubanga wadde ngudde, nnaayimuka. Ne bwe naatuula mu kizikiza, MUKAMA anaabeera ekitangaala kyange.

⁹Nnaagumikirizanga MUKAMA bw'anaabanga ambonereza, kubanga nnyonoonye mu maaso ge, okutuusa lw'alimpolereza, n'anziza buggyaa. Alindeeta mu kitangaala, era ndiraba obutuukirivu bwe.

¹⁰Olwo omulabe wange alikiraba, n'aswala, oyo eyanjeeyerezanga ng'agamba nti, "Ali ludda wa MUKAMA Katonda wo?" Ndisanyuka ng'agudde, era alirinnyirirwa ng'ebitoomi eby'omu nguudo.

¹¹Olunaku olw'okuzimba bbugwe wo lulituuka, olunaku olw'okugaziya ensalo yo.

¹²Mu biro ebyo abantu balijja gy'oli nga bava mu Bwasuli ne mu bibuga by'e Misiri, n'okuva e Misiri okutuuka ku mugga Fulaati, n'okuva ku nnyanja emu okutuuka ku nnyanja endala, n'okuva ku lusozi olumu okutuuka ku lusozi olulala.

¹³Ensi erifuuka matongo, olw'ebikolwa by'abantu abagibeeramu.

Okusaba N'okutendereza

¹⁴ Lunda abantu bo n'omuggo gwo, ekisibo kye weeroboza, ababeera bokka mu kibira mu malundiro amagimu. Baleke baliire mu Basani ne Gireyaadi, nga mu biseera eby'edda.

¹⁵ Nga bwe kyali mu nnaku ze mwaviiramu mu Misiri, nzija kubalaga ebikulu eby'ekitalo.

¹⁶ Amawanga galikiraba ne gakwatibwa ensonyi, ne gamalibwamu amaanyi. Abantu baago balikwata ku mimwa gyabwe n'amatu gaabwe ne gaziba.

¹⁷ Balirya enfuufu ng'omusota, ng'ebisolo ebyewalula. Balifuluma obunnya bwabwe nga bakankana ne bakyuka okudda eri MUKAMA Katonda waffe, ne babatya.

¹⁸ Katonda ki omulala ali nga ggwe, asonyiwa ekibi era n'asonyiwa ebyonoono byabo abaasigalawo ku bantu be? Obusungu bwe tebubeerera emirembe gyonna, naye asanyukira okusaasira.

¹⁹ Alikyuka n'atukwatirwa ekisa nate; alirinnyirira ebibi byaffe, n'asuula ebyonoono byaffe byonna mu buziba bw'enyanja.

²⁰ Olikola eby'amazima bye wasuubiza Yakobo, n'ebiekisa bye wasuubiza Ibulayimu, nga bwe weeyama eri bajajjaffe okuva mu nnaku ez'edda.

Nakkumu

Nakkumu 1

¹ Kuno kwe kwolesebwa Katonda kwe yalaga Nakkumu, Omwerukoosi okukwata ku bibambilira ebyali bijjira Nineeve.

Obusungu bwa MUKAMA ku Nineeve

² Katonda wa bugya era MUKAMA awalana eggwanga. MUKAMA awalana eggwanga era ajudde ekiruyi. MUKAMA yeesasuza ku balabe be era aterekera abamuwakanya obusungu bwe.

³ MUKAMA tatera kusunguwala, ate nga wa maanyi mangi era tayinza n'akatono butabonereza oyo gwe gusinze. Ekkubo lye liri mu mpewo ey'akazimu ne mu kibuyaga, n'ebire ye nfuufu y'ebigere bye.

⁴ Akangavvula ennyanja n'agikaza era akaza emigga gyonna, ennimiro ez'omu Basani zikala, olusozi Kalumeeri lwonna lukayuse, n'ebimuli bya Lebanooni biwotose.

⁵ Ensozi zikankanira mu maaso ga Katonda, obusozi ne busaanuka, ettaka ne lyatikayatika mu maaso ge, ensi n'ekankana n'abantu bona abagirimu.

⁶ Ani ayinza okuyimirira mu maaso ge ng'asunguwadde? Ani ayinza okugumira obusungu bwe obw'amaanyi? Ekiruyi kye kibuubuuka ng'omuliro, n'enjazi n'eziyatikayatika.

⁷ MUKAMA mulungi, kiddukiro mu kiseera eky'okulabiram mu ennaku, era alabirira abo bona abamwesiga.

⁸ Naye alisaanyaawo abalabe be mu mataba amazibu, ekizikiza kiribawondera.

⁹ Buli kye mwekobaana okukola MUKAMA, alikikomya. Akabi tekalijja mulundi gwakubiri.

¹⁰ Kubanga baliba ng'amaggwa agakwataganye, era nga batamidde, balyoke bookebwe omuliro ng'ekisambu ekikaluu.

¹¹ Mu ggwe Nineeve muvuddemu omuntu alowooza akabi era ateesa ebibi ku MUKAMA.

¹² Bw'ati bw'ayogera MUKAMA nti, "Newaakubadde nga balina be bakolagana nabo bangi, ate nga bangi, balizikirizibwa ne baggwaawo. Newaakubadde nga mbabonereza mmwe abantu bange, siriddayo kukikola nate.

¹³ Kaakano nzia kumenya ekikoligo kyabwe nkibaggyeko era n'ebibasibye nnaabikutulakutula."

¹⁴ Kino MUKAMA ky'alagidde ekikwata ku Nineeve: "Erinnya lyo terikyayala nate. Ndizikiriza ekifaananyi ekyole n'ekifaananyi ekisaanuuse ebiri mu masabo g'abakatonda bo; ndisima entaana yo kubanga oyinze obugwagwa."

¹⁵ Yimusa amaaso, tunula ku nsozi, laba, ebigere ebirungi eby'oyo aleese amawulire amalungi, alangirira emirembe. Ggwe Yuda kwata embaga zo entukuvu, era otuukirize obweyamo bwo; omubi kaakano takyakulumba, azikiririzibbwaa ddala, tolimalaba nate.

Nakkumu 2

Okugwa kwa Nineeve

¹ Nineeve, olumbiddwa omulabe; kuuma ekigo, Kuuma ekkubo, weesibire ddala onywere mu kiwato, kuŋjaanya amaanyi go gonna.

² Kubanga MUKAMA alizzaawo ekitiibwa kya Yakobo, kibe ng'ekitiibwa kya Isirayiri, newaakubadde ng'abazikiriza baabasaanyawo, ne boonoona emizabbibu gyabwe.

³ Engabo z'eggye erikutabaddde zonna myufu n'engoye ze bambadde nazo bwe zityo. Amagaali g'ebiyuma gamasamasa ku lunaku lwe gategekebwa, era n'amafumu gagalulwa mu ngeri ey'entiisa!

⁴ Amagaali g'abalwanyi gatayira mu nguudo, gadda eno n'eri, galabika ng'emimuli egyaka, gamyansa ng'eggulu.

⁵ Omuduumizi bw'ayita abalwanyi be bajja bagwirana. Badduka mbiro ku bbugwe w'ekibuga we beetegerekera okwerwanako.

⁶ Enzigi ez'omugga zigguddwawo, amazzi ne gasaanyaawo olubiri.

⁷ Etteeka lyayisibwa ku kibuga nti kiriwajjangusibwa, abaddu abakazi bakungubaga ng'amayiba, nga bwe beekuba mu bifuba.

⁸ Ab'omu Nineeve bafaanana ng'ekidiba eky'amazzi agakalira. Wadde nga babakowoola nti, "Muyimirire, muyimirire!" bo beeyongerayo bwetyongezi.

⁹ Ffeeza yaakyo temugirekaawo, ne zaabu nayo mugitwalire ddala, omunyago teguggwaayo, eby'obugagga byakyo ebitabalika ebirungi ddala.

¹⁰ Ekibuga kisigadde kyangaala! Abantu bona emitima gibeewanise, emibiri gibakankana, amaviivi gabakubagana, basiuuuse ne mu maaso.

¹¹ Eri ludda wa empuku y'empologoma, ekifo we ziriisiza empologoma zaazo ento, empologoma ensaja, n'enkazi, n'ento we zaatambuliranga nga tewali kizikanga?

¹² Empologoma ensajja yayigganga ennyama y'abaana ebamala, n'enkazi n'ezittira eyaazo, n'ejjuza empuku n'omuyiggo, ne mu bisulo ne mujjula ennyama.

¹³ “Laba nze MUKAMA ow'Eggye nkwolekedde, era ndyokya amagaali go gonna ne ganyooka, n'ekitala kirizikiriza empologoma zo ento. Era tolifuna munyago mulala nate ku nsi, n'eddoboozi ly'ababaka bo teririddayo kuwulirwa.”

Nakkumu 3

Ebibi bya Nineeve

¹ Zikusanze ggwe ekibuga eky'omusaayi! Kyonna ekijjudde eby'obulimba n'obunyazi, ekitaggwaamu banyagiddwa.

² Muwulire okuvuga kw'embooko, n'okuvuumma kwa namuziga z'amagaali n'ebigere by'embalaasi nga bwe bivuga n'amagaali nga gakubaganira mu nguudo!

³ Laba eggye ery'embalaasi erirumba, n'ebitala ebitemagana, n'amafumu agamyansa. Abatuukiddwako ebisago nga bayitirivu, ne ntuumu ennene ez'emirambo egitamanyiddwa muwendo; abantu bagirinnyirira.

⁴ Bino byonna biri bityo kubanga Nineeve yeeweerayo ddala okwetunda eri abalabe ba Katonda obutasalako, nga malaaya omukulu, kye kibuga ekikyaamu ekitali kyesigwa ekyawubisa ebirala, omukulu w'obufumu, ekyafuula amawanga abaddu baakyo olw'obwamalaaya bwakyo, n'olw'obulogo bwakyo.

⁵ “Laba nkwolekedde,” bw'ayogera MUKAMA ow'Eggye, “era nditikka engoye zo ne zidda ku mutwe gwo. Ensi zonna ziriraba obwerefere bwo n'obwakabaka bwonna bulabe ensonyi zo.

⁶ Ndikukanyugira kazambi, era ndikufuula ekyenyinyalwa ne nkufuula eky'okwelolera.

⁷ Awo bona abalikutunuulira balikwesamba ne bagamba nti, ‘Nineeve kifuuse matongo, ani anakikungubagira?’ Abalikikubagiza baliva wa?’

⁸ Ggwe Nineeve ggw'osinga Tebesi ekyali kizimbiddwa ku mugga Kiyira ng'amazzi gakyetoolodde okukikuumma ku njuyi zonna? Olukomera lwakyo gwali mugga era amazzi ge gaali bbugwe waakyo.

⁹ Esiyopya ne Misiri ze zaakiwigiranga. Ate nga Abapuuti n'ab'omu Libiya nabo nga bakiyamba.

¹⁰ Kyawambibwa, ne kitwalibwa mu buwanjanguse. Abaana bwakyo abawere babetentebwa mu ntandikwa ya buli luguudo. Abakungu baakyo baakubirwa obululu, n'abasajja be ab'amaanyi baasibibwa mu njegere.

¹¹ Nineeve naawe olitamiira, olyekweka ng'onoonya obuddukiro owone omulabe wo.

¹² Ebigo byo byonna biri ng'emitiini egiriko ebibala ebisooka okwengera; bwe ginyeenyezebwa ne bigwa mu kamwa k'oyo anaabirya.

¹³ Laba abalwanyi bammwe balinifuwa ne batitiira ng'abakazi. Enzigi z'ensi yo nzigule eri abalabe bo. Era omuliro gwokezza emikiikiro gyazo.

¹⁴ Weenyeweze bajja kukulumba! Weeterekere ku mazzi g'onoonywako. Nyweza ebisenge byo. Noonya ettaka olisambe oddaabirize ekisenge eky'amatoffaali.

¹⁵ Omuliro gulikulya, ekitala kirikuzikiriza. Wanna oliriibwa ng'enzige bwe zirya ebirime. Mweyongere obungi ng'enseenene, mwale ng'enzige.

¹⁶ Mwongedde ku bungi bwa basuubuzi bammwe okusinga emmunyeeny'e z'oku ggulu. Naye ensi baligikaza okufaanana ng'enzige bwe zimalawo ensi ne ziryoka zibuuka.

¹⁷ Abakuumi bammwe bali ng'enzige, n'abakungu bammwe ng'ebibinja by'enzige ezibeera ku bisenge ku lunaku olw'obutiti. Enjuba bw'evaayo zibuuka ne ziraga etamanyiddwa.

¹⁸ Abasumba bo nga babongoota, ggwe kabaka wa Bwasuli, n'abakungu abeekitiibwa bagalamidde nga bawumuddeko. Abantu bo basaasaanira ku nsozi nga tewali n'omu abakuinjaanya.

¹⁹ Tewali kisobola kuwonya kiwundu kyo ekinene bwe kityo. Bonna abawulira ebikuguddeko bakuba bukubi mu ngalo olw'okugwa kwo. Ani ataakosebwa olw'ettima lyo eringi? Kubanga muntu ki ataatuusibwako bukambwe bwo obwa buli kakedde?

Kaabakuuku

Kaabakuuku 1

¹ Buno bwe bubaka bwa MUKAMA, Kaabakuuku nnabbi bwe yafuna.

Kaabakuuku yeemulugunya olw'Obutali Bwenkanya

² Ayi MUKAMA, ndituusa ddi okukukaabirira naye nga tompuliriza? Lwaki nkukaabirira nti, “Ebikolwa eby'obukambwe bimpitiriddeko,” naye n'otonnyamba?

³ Lwaki ondaga obutali bwenkanya era lwaki ogumiikiriza obukyamu? Kubanga okuzikiriza n'ebikolwa eby'obukambwe biri mu maaso gange, empaka n'enyyombo byeyongede.

⁴ Amateeka kyegavudde gatagonderwa era n'obwenkanya ne butakolebwa. Ababi be basinga abatuukirivu obungi era babeebunguludde, n'obwenkanya ne bulinnyirirwa.

Okuddamu kwa MUKAMA

⁵ “Mutunuulire amawanga, mwetegereze. Mwewuunyize ddala nnyo. Kubanga njenda kukola omulimu mu nnaku zammwe gwe mutualikkiriza newaakubadde nga mugubuuliddwa.

⁶ Kubanga laba, nkuyimusiza Abakaludaaya, eggwanga eryo eririna ettima era ekkambwe, ababunye ensi eno n'eri nga bawamba amawanga agatali gaabwe.

⁷ Ba ntiisa, batiibwa, be beetekera amateeka gaabwe era be bagassa mu nkola, nga balwanirira ekitiibwa kyabwe.

⁸ Embalaasi zaabwe zidduka okukira engo, era mu bukambwe zikira emisege egy'ekiro. Abasajja abeebagala embalaasi bava mu nsi ey'ewala era bajja beesaasaanyizza ne banguwa okutuuka ng'ensega bw'erumba ky'eneerya.

⁹ Bajja n'eryanyi bona, ebibinja byabwe birumba ng'embuyaga ey'omu ddungu; ne balyoka bayoola abawambe abangi ng'omusenyu.

¹⁰ Weewaawo, basekerera bakabaka ne baduulira n'abakungu. Basekerera buli kibuga ekiriko ekigo ne bakituumako ebifunfugu ne balinnyira okwo, ne bakiwamba.

¹¹ Awo ne bayita nga bakunta ng'embuyaga; abantu bano omusango be gwasinga, eryanyi lyabwe ye katonda waabwe.”

Kaabakuuku Yeemulugunya Ogwokubiri

¹² Ayi MUKAMA toli wa mirembe na mirembe, ggwe MUKAMA Katonda wange, si ggwe Mutukuvu wange? Tetulifa. Ayi MUKAMA ggwe wabateekawo n'obawa amaanyi batusalire emisango. Era ggwe Olwazi, wabateekawo kubonereza.

¹³ Amaaso go gajjudde obulongoofu tegatunula ku kibi, so toyinza kugumiikiriza bukyamu. Kale lwaki ggwe ogumiikiriza ab'enkwe, n'osirika ng'omubi amalirawo ddala omuntu amusinga obutuukirivu?

¹⁴ Kubanga abantu obafudde ng'ebyenyanja eby'omu nnyanja, ng'ebitonde eby'omu nnyanja ebitaliiko abifuga.

¹⁵ Omulabe omubi abakwata bona ng'eddobo, oluusi n'abawalula mu katimba ke, n'abakuñjaanya mu kiragala kye n'alyoka asanyuka n'ajaguza.

¹⁶ Kyava awaayo ssaddaaka eri akatimba ke n'ayotereza n'ekiragala kye obubaane; akatimba ke kamuwa obulamu obw'okwejalabya, n'alya emmere ey'ekigagga.

¹⁷ Kale, bwe batyo bwe banaalekebwa okutikkula obutimba bwabwe, n'okusaanyaawo amawanga awatali kusaasira?

Kaabakuuku 2

Obulamu eri Abatuukirivu

¹ Kale ndiyimirira mu kifo kyange we ntera okubeera ntunule nga ndi waggulu eyo ku ggulumu nnindirire ky'aliñjamba, era ne kye ndimuddamu ekikwata ku kwemulugunya kw'abantu.

² Awo MUKAMA n'anzipamu n'ayogera nti, "Wandiika okwolesewa okwo ku bipande. Kuwandiike bulungi ate omubaka gwe banaatuma, akutwale bunnambiro.

³ Kubanga okwolesewa okwo kujja mu kiseera kyakwo ekigere. Kwogera ku by'enkomerero ate si kwa bulimba. Bwe kunaaba ng'okuluddewo, mukulindirire, kujja kutuukirira, tekugya kulwa.

⁴ "Laba oyo ow'emmeeme eteri nnongoofu wa kugwa, naye omutuukirivu aliba mulamu olw'obwesigwa bwe."

Akabi eri Aboonoonyi

⁵ Weewaawo, omwenge mulimba guleetera omuntu amalala, ate taguwummulako. Ate olwokubanga gwa mululu ng'emagombe, mu butakkuta gufaanana okufa. Era okufaanana ng'olumbe, tegukkuta, amawanga gonna gugeekuñjanyaizaako ne gugafuula abasibe.

⁶ "Bano bona si be balimugererako engero bamusekerere nga bagamba nti, "Zimusanz oyo eyeyongeza ebitali bibye! Oyo eyeetuumako obugagga obuva mu nguzi!"

⁷ Abakubanja tebalikuyimukirako nga tomanyiridde, era tebalizuukuka ne bakweraliikiriza? Oliba togudde mu mikono gyabwe?

⁸ Kubanga onyaze amawanga mangi, abantu abasigaddewo balikunyaga; Oyiye omusaayi gw'abantu, n'oyonoona ensi n'ebibuga n'abantu bona ababibeeramu."

⁹ Zimusenze oyo azimbira amaka ge ku bikolwa ebibi, azimba ekisu kye waggulu, okwekuuma obutatuukwako kabi!

¹⁰ Wategeka okuzikirira kw'abantu bangi, n'oswaza ennyumba yo ne weefiriza obulamu bwo.

¹¹ Amayinja g'oku bbugwe galikaaba, n'emikiikiro gy'ebibajje girikyasanguza.

¹² Zimusenze oyo azimba ekibuga n'omusaayi, atandika ekibuga n'obutali butuukirivu.

¹³ Tekyategekebwa MUKAMA ow'Eggye nti okutegana kw'abantu nku buku za muliro, n'amawanga geemalamu ensa olw'ebintu ebtaliiimu?

¹⁴ Kubanga ensi erijjula okumanya ekitiibwa kya MUKAMA, ng'amazzi bwe ganjaala ku nnyanja.

¹⁵ Zimusenze oyo awa baliraanwa be ekitamiiza n'akibafukira okuva mu kita n'abawa banywe okutuusa lwe batamiira asobole okutunuulira ensonyi zaabwe!

¹⁶ Olijuzibwa ensonyi mu kifo ky'ekitiibwa. Naawe olinywa n'oswala. Ekikompe eky'omu mukono gwa MUKAMA ogwa ddyo kirikyusibwa kidde gy'oli, n'esonyi ez'obuwemu zisaanikire ekitiibwa kyo.

¹⁷ Ebikolwa eby'obukambwe bye watuusa ku Lebanooni, n'okutta ensolo, birikutiisa. Osse abantu n'ozikkiriza ensi n'ebibuga n'abantu ababibeeramu.

¹⁸ "Ekifaananyi ekyole kigasa ki? Anti kibajje bubazzi. Oba ekifaananyi eky'ekyuma, ekisomesa obulimba? Kubanga omuweesi yeesiga mirimu gya mikono gye nga akola ebifaananyi ebitayogera!"

¹⁹ Zimusenze oyo agamba omuti nti, 'Lamuka;' agamba ejinja nti, 'Golokoka!' Kino kisobola okulujjamya? Kibikiddwa zaabu ne ffeeza, so tekiriimu bulamu n'akatono.

²⁰ Naye MUKAMA ali mu yeekaalu ye entukuvu: ensi zonna zisiriikirire mu maaso ge."

Kaabakuuku 3

Okusaba kwa Kaabakuuku

¹ Okusaba kwa nnabbi Kaabakuuku, okw'Ekisigiyonosi.

² Ayi MUKAMA, mpulidde ebigambo byo; mpulidde ettutumu lyo Ayi MUKAMA, ne ntya. Bisse buggyaa mu nnaku zaffe, bimanyise mu biro bino, era mu busungu jjukira okusaasira.

³ Katonda yajja ng'ava e Temani, Omutukuvu oyo ng'ava ku lusozi Palani. Ekitiibwa kye kyatimbibwa ku ggulu, ensi n'eryoka ejjula ettendo lye.

⁴ Okumasamasa kwe ne kulyoka kubeera ng'enjuba evaayo. Ebimyanso byayakanga okuva mu mukono gwe, era omwo mwe mwasinziiranga amaanyi ge ag'ekitalo.

⁵ Kawumpuli ye yakulembera, Endwadde endala zinaamutta ne zigoberera.

⁶ Yayimirira n'anyeenyanyeensa; Yatunula n'akankanya amawanga. Ensozi ez'edda za merenguka, obusizi obw'edda ne buggwaawo. Engeri ze, za mirembe na mirembe.

⁷ Nalaba eweema z'e Kusani nga ziri mu nnaku: n'entimbe ez'ensi ya Midiyaani nga zijugumira.

⁸ Ayi MUKAMA, wanyiigira emigga? Obusungu bwo bwali ku bugga obutono? Wanyiigira ennyanja bwe weebagala embalaasi zo, n'olinnya ku magaali go ag'obuwanguzi?

⁹ Wasowolayo akasaale ko, wategeka okulasa obusaale; ensi n'ogyawulayawulamu n'emigga.

¹⁰ Ensozi zaakulaba, ne zeenyogootola; Amataba ne gayitawo mbiro, obuziba bw'ennyanja ne buwuluguma, ne busitula amayengo gaayo waggulu.

¹¹ Enjuba n'omwezi ne biyimirira butengerera mu bifo byabyo, olw'okumyansa kw'obusaale bwo nga buwenyuka, n'olw'okumyansa kw'effumu lyo eritemagana.

¹² Watambula okuyita mu nsi ng'ojjudde ekiruyi, wasambirirasambirira amawanga mu busungu bwo.

¹³ Wavaayo oleetere abantu bo obulokozi, olokole gwe wafukako amafuta; Wabetenta omukulembeze w'ensi ekola ebibi, ng'omwerulira ddala okuva ku mutwe okutuuka ku bigere.

¹⁴ Wafumita omutwe gwe n'effumu lye ye, abalwanyi be bwe baavaayo okutugoba, nga bali ng'abanaatumalawo, ffe abaali baweddemu essuubi nga twekwese.

¹⁵ Walinnyirira ennyanja n'embalaasi zo, n'otabangula amazzi amangi.

Okusanyukira mu MUKAMA

¹⁶ Nawulira, n'omutima gwange ne gukankana n'emimwa gyange gjugumira olw'eddoboozi eryo; Obuvundu ne buyingira mu magumba gange, amagulu gange ne gakankana. Naye nnaalindirira n'obugumiikiriza olunaku olw'okulabiramu ennaku bwe lulijjira eggwanga eritulumba.

¹⁷ Wadde omutiini tegutojera, so n'emizabbibu nga tegiriiko bibala, amakungula g'emizeeyituuni ne gabula, ennimiro ne zitabala mmere n'akamu, endiga nga ziweddemu mu kisibo, nga n'ente tezikyalimu mu biraalo,

¹⁸ kyokka ndijaguliza MUKAMA, ne nsanyukira mu Katonda Omulokozi wange.

¹⁹ MUKAMA Katonda, ge maanyi gange; afuula ebigure byange okuba ng'ebi'emeewo, era ansobozesa okutambulira mu bifo ebigulumivu. *Ya Mukulu wa Bayimbi, ku bivuga byange ebirina enkoba.*

Zeffaniya

Zeffaniya 1

¹ Ewigambo kya MUKAMA ekyajjira Zeffaniya mutabani wa Kuusi, muzzukulu wa Gedaliya, muzzukulu wa Amaliya, muzzukulu wa Keezeekiya, mu mirembe gya Yosiya mutabani wa Amoni, Kabaka wa Yuda.

Okulabula kw'Omusango n'Okuzikirizibwa kwa Yuda

² "Ndizikiririza ddala byonna okuva ku nsi," bw'ayogera MUKAMA.

³ "Ndizikiriza abantu wamu n'ensolo; ndizikiriza ebinyonyi eby'omu bbanga n'ebiyennyanja; ababi balisigaza ntuumu ya kafakalimbo; bwe ndimalawo abantu okuva ku nsi," bw'ayogera MUKAMA.

⁴ Ndigololera ku Yuda omukono gwange, era ne ku abo bona abali mu Yerusaalemi; era ekitundu kya Baali ekifisseewo n'ennyumba ya Bakemali, bakabona abasinza ebifaananyi, ndibazikiriza okuva mu kifo kino,

⁵ abo abavuunamira eggye ery'omu ggulu ku nnyumba waggulu, ne balisinza n'abo abalayira mu linnya lya MUKAMA, ate nga balayira ne mu linnya lya Malukamu,

⁶ abo abadda emabega obutagoberera MUKAMA, wadde abo abatamunoonya newaakubadde okumwebuuzaako.

⁷ Siriikirira awali MUKAMA Katonda, kubanga olunaku lwa MUKAMA luli kumpi. MUKAMA ategese ssaddaaka, era atukuzizza abagenyi be.

⁸ Ku lunaku olwa ssaddaaka ya MUKAMA, ndibonereza abakungu n'abaana ba Kabaka, n'abo bona abambadde ebyambalo ebitasaana.

⁹ Awo ku lunaku olwo ndibonereza abo bona abeewala okulinnya ku muziziko, n'abo abajjuza ennyumba ya MUKAMA waabwe ebikolwa eby'obukambwe n'obulimba.

¹⁰ Ku lunaku olwo, bw'ayogera MUKAMA, eddoboozi ery'okukaaba liriwulikika ku Mulyango ogw'Ebyennyanja, okukaaba okuva ku luuyi olwokubiri, n'okubwatuka okunene okuva ku nsozi.

¹¹ Mwekaabireko, mmwe abali mu matwale g'akatale; abasuubuzi bammwe bona zibasanze, n'abo abeebinika ffeeza balizikirizibwa.

¹² Awo olulituuka mu biro ebyo ndimulisa Yerusaalemi n'ettabaaza nga nnoonya, mbonereze abo bona abalagajjavu abali ng'omwenge ogutanasengejebwa, abalowooza nti MUKAMA talibaako ne ky'akolawo.

¹³ Obugagga bwabwe bulinyagibwa, n'ennyumba zaabwe zimenyebwemenyebwe. Ne bwe balizimba ennyumba tebalizituulamu, era balisimba enimiro ez'emizabbibu nazo tebalinywa wayini wamu.

Olunaku lwa MUKAMA Olukulu

14 Olunaku lwa MUKAMA olukulu luli kumpi; ddala lunaatera okutuuka. Wuliriza! Omulwanyi alikaabira eyo ng'aliko obuyinike bungi, n'okukaaba ku lunaku lwa MUKAMA kujja kuba kungi nnyo.

15 Olunaku olwo lunaku lwa busungu, lunaku lwa buyinike n'okulaba ennaku, lunaku lwa mutawaana n'okuzikirira, olunaku olw'ekikome n'ekizikiza, olunaku lw'ebire n'ekizikiza ekikutte ennyo;

16 olunaku olw'okufuuwa ekkondeere n'okulangirira olutalo ku bibuga ebiriko ebigo n'eri eminaala emigulumivu.

17 Ndireeta, obuyinike ku bantu, batambule ng'abazibe b'amaaso, kubanga bakoze ebibi mu maaso ga MUKAMA, omusaayi gwabwe guliyiyibwa ng'enfuufu, n'ebienda byabwe bivundire kungulu.

18 Effeeza yaabwe ne zaabu yaabwe tebiriyinza kubataasa ku lunaku olw'obusungu bwa MUKAMA. Ensi yonna erizikirizibwa omuliro gw'obuggyga bwe, era alimalirawo ddala abo bona abali mu nsi.

Zeffaniya 2

Abalabe ba Isirayiri basalirwa omusango

1 Mukunjjaane, weewaawo, mukunjjaane, mmwe eggwanga eritalina nsonyi,

2 ekiseera ekyategekebwba nga tekinnatuuka, olunaku ne luba ng'ebisusunku ebifuumulibwa, obusungu bwa MUKAMA nga tebunnabatuukako, ng'olunaku olw'obusungu bwa MUKAMA terunnabatuukako.

3 Munoonye MUKAMA, mmwe mwenna abawombeefu ab'omu nsi, abakola by'alagira; munoooye obutuukirivu n'obuwombeefu; mpozzi mulikwekebwba ku lunaku olw'obusungu bwe.

Obubaka eri Abafirisuuti

4 Gaza kirirekebwawo, ne Asukulooni kiriba matongo: abantu ba Asudodi baligobebwamu mu ttuntu, ne Ekuloni kirisimbulibwa.

5 Zibasanze mmwe ababeera ku lubalama lw'enyanja, eggwanga ery'Abakeresi! Ekigambo kya MUKAMA kikwolekedde, ggwe Kanani, ensi ey'Abafirisuuti. Ndikuzikiriza so tewaliba asigalawo.

6 Olubalama lw'enyanja ab'Akeresi gye babeera luliba malundiro g'abasumba n'ebisulo by'endiga.

7 Olubalama lw'enyanja luliba lwa kitundu ky'enneyumba ya Yuda ekyasigalawo era we banaalundiranga, ne mu nnyumba za Asukulooni mwe banaagalamiranga akawungeezi. MUKAMA Katonda waabwe alibalabirira, n'akomyawo obugagga bwabwe.

Obubaka eri Abamowaabu n'Abamoni

⁸ Mpulidde okuvuma kwa Mowaabu n'okusekerera kw'Abamoni kwe bavumye abantu bange ne batissatiisa ensi yaabwe.

⁹ Kale nga bwe ndi omulamu, bw'ayogera MUKAMA Ayinzabyonna, Katonda wa Isirayiri, ddala Mowaabu aliba nga Sodomu, n'abaana ba Amoni nga Ggomola, ekifo emyennyango kye gyemala, n'ebirombe by'omunnyo, amatongo agolubeerera. Balinyagibwa abantu bange abaliba basigaddewo, n'ekitundu ky'eggwanga lyange ekifisseewo kiritwala ensi yaabwe.

¹⁰ Eno y'eriba empeera yaabwe olw'amalala gaabwe, kubanga bavumye ne banyooma abantu ba MUKAMA Ayinzabyonna.

¹¹ MUKAMA aliba wa ntiisa gye bali bw'alizikiriza bakatonda bona ab'ensi. Amawanga gonna ag'oku mbalama zonna galimusinza, buli muntu ng'asinziira mu nsi ye.

Obubaka eri Abaesiyopiya

¹² Nammwe Abaesiyopiya, mulittibwa n'ekitala kyange.

Obubaka eri Obwasuli

¹³ Aligololera omukono gwe ku bukiikkakono n'azikiriza Obwasuli; n'afuula Nineeve amatongo era ekikalu ng'eddungu.

¹⁴ Ente n'endiga zinaagalamiranga wakati mu kyo, n'ensolo zonna eza buli kika: ekiwuugulu era ne nnamunnungu banaasulanga ku mpagi zaakyo. Amaloboozi gaabyo ganaawulikikanga mu madirisa; kafakalimbo ajjudde mu miryango, n'emikiikiro egy'emivule giryelulwa.

¹⁵ Kino kye kibuga ekya kyettwala, ekyayogeranga mu mutima gwakyo nti, Nze we ndi, tewali mulala wabula nze: nga kifuuse bifulukwa, ekifo ensolo ez'omu nsiko we zigalamira! Buli muntu akiyitako aneesoozanga n'akinyoomoola.

Zeffaniya 3

Obujeemu bwa Yerusaalemi

¹ Zikisanze ekibuga ekijooga, ekijeemu era ekyonoonefu!

² Tekigondera ddoboozi lya MUKAMA, wadde okukkiriza okubuulirirwa; tekyesiga MUKAMA; wadde okusemberera Katonda waakyo.

³ Abakungu baakyo mpologoma eziwuluguma, era n'abalamuzi baakyo misege gya kiro, bakirimululu abatafissaawo kantu.

⁴ Bannabbi baakyo si ba buvunaanyizibwa era ba nkwe; bakabona baakyo baweebuusizza ekifo ekitukuvu, era bamenya amateeka.

⁵ MUKAMA ali wakati mu kyo, mutuukirivu era tasobya. Buli nkya alamula mu bwenkanya, era buli lukya talemwa; naye atali mutuukirivu taswala.

⁶ “Nsanyizzaawo amawanga, era ebigo byabwe bifufuggaziddwa; nzisizza enguudo zaabwe, ne wataba ayitamu. Ebibuga byabwe bizikiridde, ne watabaawo muntu n’omu abeeramu.

⁷ Nagamba eri ekibuga nti, ‘Ddala onontya, era onokkiriza okubuulirirwa.’ Ennyumba zaakyo tezandimaliddwaho, n’ebibonerezo byange byonna tebyandimutuuseeko. Naye beesunganga nnyo okukola ebitasaana mu byonna bye baakolanga.

⁸ Noolwekyo munnindirire,” bw’ayogera MUKAMA. Olunaku lwe ndiyimirira ne ntegeeza byonna kubanga mmaliridde okukuŋjaanya amawanga, ndireeta obwakabaka wamu okubayiwako obusungu bwange, n’ekiruyi kyange kyonna. Omuliro ogw’obugya bwange gulisaanyaawo ensi yonna.

Essuubi lya Isirayiri

⁹ “Mu biro ebyo ndirongoosa enjogera ey’amawanga; bona balikoowoola erinnya lya MUKAMA, okumuweereza n’omwoyo gumu.

¹⁰ Okuva emitala w’emigga egyp’Obuwesiypa, abo abansinza, abantu bange abasaasaana, balindeetera ssaddaaka.

¹¹ Ku lunaku olwo toliswala olw’ebyo byonna by’osobezza gye ndi: kubanga ndiggya wakati mu ggwe abo abeenyimiririza mu malala, toliddayo nate kwegulumiza ku lusozi lwange olutukuvu.

¹² Naye ndireka wakati mu ggwe abantu abakakkamu era abeetooowaze, abo abesiga erinnya lya MUKAMA.

¹³ Ekitundu kya Isirayiri ekirisigalawo tebalikola bitali bya butuukirivu so tebalyogera bya bulimba wadde okuba abakuusa. Balirya, baligalamira, so tewaliba alibatiisa.”

Oluyimba olw’Essanyu

¹⁴ Yimba, ggwe omuwala wa Sayuuni; yogerera waggulu, ggwe Isirayiri; sanyuka ojaguze n’omutima gwo gwonna, ggwe omuwala wa Yerusaalemi.

¹⁵ MUKAMA akuggyeecko ekibonerezo kyo, agobyewo omulabe wo. Kabaka wa Isirayiri, MUKAMA, ali naawe; tokyaddayo kutya kabi konna.

¹⁶ Ku lunaku olwo Yerusaalemi kirigambibwa nti, “Totya, ggwe Sayuuni; emikono gyo gireme okuddirira.

¹⁷ MUKAMA Katonda ali naawe, ow’amaanyi alokola: alikusanyukira, alikukkakkanyiza mu kwagala kwe, alikusanyukira n’okuyimba.”

¹⁸ “Ennaku eyabakwatanga olw’embaga ezabakuŋjaanyanga ndigibaggyako; kubanga kibafuukidde omugugu.

¹⁹ Laba, mu biro ebyo ndibonereza abo bona abaakubonyaabonya: era ndinunula omulema, ne nkujjaanya n'abo abaasaasaanyizibwa; era ndibafuula ettendo ne mbawa ekitiibwa mu nsi zonna gye baaswazibwa.

²⁰ Mu biro ebyo ndibakuujjaanya; mu kiseera ekyo ndibazza eka. Weewaawo ndibawa ekitiibwa n'ettendo mu mawanga gonna ag'omu nsi zonna, bwe ndikomyawo obugagga bwammwe nga mulaba," bw'ayogera MUKAMA.

Kaggayi

Kaggayi 1

Okukoowoola olw'Okuddaabiriza Ennyumba ya MUKAMA

¹ Mu mwaka ogwokubiri ogw'okufuga kwa kabaka Daliyo, ku lunaku olusooka mu mwezi ogw'omukaaga, ekigambo kya MUKAMA ne kijjira nnabbi Kaggayi okutegeeza Zerubbaberi mutabani wa Seyalutyeri, ow'essaza lya Yuda, ne Yoswa mutabani wa Yekozadaaki kabona asinga obukulu nti:

²Bw'ati bw'ayogera MUKAMA ow'eggye nti, “Abantu bano boogera nti, ‘Ekiseera tekinnatuuka okuddaabiriza ennyumba ya MUKAMA.’”

³Awo ekigambo kya MUKAMA ne kijjira nnabbi Kaggayi nga kyogera nti;

⁴“Kino kye kiseera mmwe okubeera mu nnyumba zammwe enkole obulungi, naye ennyumba eyo n'erekewba nga kifulukwa?”

⁵Kale nno bw'ati bw'ayogera MUKAMA ow'Eggye nti, “Mweddeko ku neeyisa yammwe.

⁶Musimbye bingi naye ne mukungula bitono; mulya naye temukkuta; munywa naye ennyonta tebaggwaako; mwambala naye temubuguma; mukolera empeera naye ze mukoze muziteeka mu nsawo ejjudde ebituli.”

⁷Bw'ati bw'ayogera MUKAMA ow'Eggye nti, “Mweddeko ku neeyisa yammwe.

⁸Mwambuke mu nsozi muleeteyo embaawo muzimbe ennyumba ngisanyukire, ngulumizibwe,” bw'ayogera MUKAMA.

⁹“Mwasuubira bingi, naye mulaba bwe muvuddemu ebitono. Bye mwaleeta eka, nabifuumuuula. Mumanyi ensonga? bw'ayogera MUKAMA ow'Eggye. Kubanga buli muntu afa ku nnyumba ye naye ennyumba yange mugigayaaliridde.

¹⁰Eggulu kyerivudde liziyizibwa okuleeta omusulo, n'ettaka n'okuleeta ne litaleeta bibala byalyo.

¹¹Nasindika ekyeya ku nnimiro ne ku nsozi, ku mmere ey'empeke ne ku wayini omuggya, ku mafuta ne ku buli bibala eby'ettaka, ku bantu ne ku nsolo, ne ku mirimu gyonna egy'engalo.”

¹²Awo Zerubbaberi mutabani wa Seyalutyeri, ne Yoswa mutabani wa Yekozadaaki, ye yali kabona asinga obukulu, n'abantu bona abasigalawo ne bagondera eddoboozi lya MUKAMA Katonda waabwe, n'obubaka bwa nnabbi Kaggayi, kubanga MUKAMA Katonda waabwe ye yamutuma. Abantu ne batya MUKAMA.

¹³Awo Kaggayi omubaka wa MUKAMA n'ategeeza abantu obubaka obwava eri MUKAMA nti, “Ndi wamu nammwe,” bw'ayogera MUKAMA.

¹⁴Awo MUKAMA n'akubiriza omutima gwa Zerubbaberi mutabani wa Seyalutyeri, ow'essaza lya Yuda, n'omutima gwa Yoswa mutabani wa Yekozadaaki, kabona asinga obukulu, n'emitima egypt'abantu bona abaasigalawo, ne bajja ne batandika omulimu ku nnyumba ya MUKAMA ow'Eggye, Katonda waabwe,

¹⁵ku lunaku olw'amakumi abiri mu ennya mu mwezi ogw'omukaaga mu mwaka ogwokubiri ogw'okufuga kwa kabaka Daliyo.

Kaggayi 2

Ekitiibwa ekyasuubizibwa eky'Ennyumba Empya

¹Awo ku lunaku olw'amakumi abiri mu olumu mu mwezi ogw'omusanvu, ekigambo kya MUKAMA ne kijjira nnabbi Kaggayi nti,

²“Yogera ne Zerubbaberi mutabani wa Seyalutyeri, ow'essaza lya Yuda ne Yoswa mutabani wa Yekozadaaki kabona asinga obukulu, n'abantu abaasigalawo, obabuuze nti,

³‘Ani mu mmwe akyasigaddewo eyalaba ku kitiiibwa ky'ennyumba eno? Ebafaananira etya kaakano? Tebafaananira ng'eteriimu kaabuntu?

⁴Kale nno guma omwoyo, ggwe Zerubbaberi, bw'ayogera MUKAMA; guma omwoyo, ggwe Yoswa mutabani wa Yekozadaaki kabona asinga obukulu; mugume omwoyo mmwe mwenna abantu ab'omu nsi,’ bw'ayogera MUKAMA, ‘Mukole, kubanga ndi wamu nammwe,’ bw'ayogera MUKAMA ow'Eggye.

⁵‘Kino kye nalagaana nammwe bwe mwali muva mu Misiri, ng'Omwoyo wange anaabeeranga nammwe. Temutya.’

⁶“Bw'atyo bw'ayogera MUKAMA ow'Eggye nti, ‘Mu bbanga eritali ly'ewala ndikankanya eggulu n'ensi, n'ennyanja n'olukalu.

⁷Ndikankanya amawanga gonna, n'amawanga gonna ge njagala galijja, ne nzijuza ennyumba eno ekitiibwa,’ bw'ayogera MUKAMA ow'Eggye.

⁸‘Efeeza yange, ne zaabu yange,’ bw'ayogera MUKAMA ow'eggye.

⁹‘Ekitiibwa eky'ennyumba eriwo kaakano, kirisinga ekitiibwa ky'eri eyasooka era mu kifo kino ndizzaawo emirembe,’ bw'ayogera MUKAMA ow'Eggye.”

Okubuulirira n'Okusuubiza

¹⁰Awo ku lunaku olw'amakumi abiri mu ennya olw'omwezi ogw'omwenda mu mwaka ogwokubiri ogw'okufuga kwa Daliyo, ekigambo kya MUKAMA ne kijjira nnabbi Kaggayi nti,

¹¹“Bw'atyo bw'ayogera MUKAMA ow'Eggye nti, ‘Buuza bakabona etteeka kye ligamba.

¹²Omuntu bw'asitulira ennyama eyatukuzibwa mu kirenge eky'ekyambalo kye, ekirenge ne kikoma ku mugaati oba ku supu, oba ku wayini, oba ku mafuta oba ku mmere endala yonna, bitukuzibwa?" "Bakabona ne baddamu nti, "Nedda."

¹³Awo Kaggayi n'abuuza nti, "Omuntu atali mulongoofu olw'omulambo, bw'akoma ku bintu ebyo, bifuuka ebitali birongoofu?" Bakabona ne baddamu nti, "Bifuuka ebitali birongoofu."

¹⁴Kaggayi n'addamu nti, "Kale nno bwe batyo bwe bali abantu bano n'eggwanga lino. Buli kye bakola ne buli kye bawaayo ng'ekiweebwayo, si kirongoofu," bw'ayogera MUKAMA.

¹⁵"Kale nno, mweddeko okuva ku lunaku lwa leero, mujjukire ebiseera biri bwe byali, nga n'ejjinja erimu terinnateekebwa ku linnaalyo mu yeekaalu ya MUKAMA.

¹⁶Omuntu yenna bwe yatuukanga ku ntuumu eyandibadde ey'ebipimo amakumi abiri, yassangawo ebipimo kkumi. Omuntu yenna bwe yalaganga mu ssogolero okusenamu lita amakumi ataano, yasangangamu amakumi abiri.

¹⁷Nakolimira emirimu gyonna egy'emikono gyammwe n'okugengewala n'obukuku, n'omuzira, naye ne mutakyuka kudda gye ndi,' bw'ayogera MUKAMA.

¹⁸Okuva olunaku lwa leero, olw'amakumi abiri mu enya mu mwezi ogw'omwenda, mujjukire olunaku lwe baazimba omusingi gwa yeekaalu ya MUKAMA. Mwebuuze nti,

¹⁹Wakyaliwo ensigo eyasigala mu ttereker? Mulabe, emit i gino egimenyeddwa, ogw'omuzabbibu n'ogw'omutiini, n'ogw'omukomamawanga, n'ogw'omuzeeyituuni tegibalangako bibala. "Naye okuva ne leero ndibawa omukisa."

²⁰Awo ekigambo kya MUKAMA ne kijjira Kaggayi omulundi ogwokubiri ku lunaku olw'amakumi abiri mu enya olw'omwezi ogwo nga kigamba nti,

²¹"Tegeeza Zerubbaberi gavana wa Yuda nti ndikankanya eggulu n'ensi.

²²Ndisulika entebe ez'obwakabaka ne nzigyawo obuyinza bw'obwakabaka obunnaggwanga. Ndiwamba amagaali n'abavuzi baago, n'embalaasi na buli abazeebagala, balittibwa baganda baabwe.

²³"Ku lunaku olwo, ggwe omuweereza wange Zerubbaberi mutabani wa Seyalutyeri, ndikufuula ng'akabonero, kubanga nkulonze,' bw'ayogera MUKAMA ow'Eggye."

Zekkaliya

Zekkaliya 1

MUKAMA ayita Abantu be okudda gy'ali

¹ Mu mwaka ogwokubiri ogw'obufuzi bwa kabaka Daliyo omufuzi w'e Buperusi mu mwezi ogw'omunaana, ekigambo kya MUKAMA ne kijjira Zekkaliya omwana wa Berekiya, omwana wa Iddo nnabbi, nga kigamba nti:

² "MUKAMA yasunguwalira nnyo bajajjammwe.

³ Naye kaakano mubagambe nti: Bw'atyo bw'ayogera MUKAMA Katonda ow'eggye nti, 'Mudde gye ndi,' bw'ayogera MUKAMA ow'Eggye, 'nange nadda gye muli,' bw'ayogera MUKAMA ow'Eggye.

⁴ Temuba nga bajajjammwe, bannabbi ab'edda be baakoowoolanga nti, 'Muve mu makubo gammwe amabi, n'ebikolwa byammwe ebikyamu.' Naye tebampuliriza wadde okujonondera, bw'ayogera MUKAMA.

⁵ Ye bajajjammwe bali ludda wa? Ye bannabbi babeera balamu emirembe gyonna?

⁶ Ebigambo byange n'ebiragiro bye nalagira abaddu bange, bannabbi, eri bajajjammwe tebyatuukirira? "Ne balyoka beenenya ne bagamba nti, 'MUKAMA ow'Eggye bye yasuubiza okutukola olw'empisa zaffe embi n'ebikolwa byaffe eitali bya butuukirivu, bw'atyo bw'atukoledde ddala.'

Nnabbi Ayolesewwa Embalaasi

⁷ Ku lunaku olw'amakumi abiri mu ennya, mu mwezi ogw'ekkumi n'ogumu gwe bayita Sebati, mu mwaka ogwokubiri ogw'obufuzi bwa kabaka Daliyo, ekigambo kya MUKAMA ne kijjira Zekkaliya mutabani wa Berekiya, omwana wa Iddo nnabbi nga kigamba nti.

⁸ Nalaba ekiro ng'omusajja yeebagadde embalaasi emyufu era yali ayimiridde mu miti emikadasi mu kiwonvu. Emabega we waaliyo embalaasi endala, enjeru, n'ezza kikuusikuusi, n'emyufu.

⁹ Awo ne mbuuza nti, "Mukama wange bino bitegeeza ki?" Malayika eyali ayogera nange n'anjjamba nti, "Nzija kukulaga kye bitegeeza."

¹⁰ Awo omusajja eyali ayimiridde mu miti n'addamu nti, "Ezo embalaasi MUKAMA z'asindise okulawuna ensi."

¹¹ Ne ziddamu malayika wa MUKAMA eyali ayimiridde mu miti nti, "Tubunye ensi yonna, era laba ensi yonna esiriikiridde teriimu kanyego eteredde mirembe."

¹² Awo malayika wa MUKAMA n'agamba nti, "Ayi MUKAMA ow'Eggye, olituusa ddi obutakwatirwa Yerusaalemi n'ebibuga bya Yuda kisa, by'osunguwalidde okumala emyaka ensanvu?"

¹³MUKAMA n'alyoka addamu malayika eyali ayogera nange ebigambo ebirungi, ebigambo ebizzaamu amaanyi.

¹⁴Awo malayika eyali ayogera nange n'agamba nti, "Langirira ogambe nti, Bw'ati bw'ayogera MUKAMA ow'Eggye nti, 'Yerusaalemi ne Sayuuni mbikwatiririddwa obuggyaa obw'amaanyi,

¹⁵naye nyigidde nnyo amawanga agali mu mirembe, kubanga abantu bange nnali mbanyiigiddeko katono naye bo ne bababonyaabonyeza ddala.'

¹⁶"Noolwekyo, bw'ati bw'ayogera MUKAMA nti, 'Nkomyewo mu Yerusaalemi n'ekisa. Ennyumba yange ne Yerusaalemi kyonna, bijja kuzimbibwa,' bw'ayogera MUKAMA Katonda ow'Eggye.

¹⁷"Yogera n'eddoboozi ery'omwanguka nti, MUKAMA Katonda ow'Eggye alangiridde nti, 'Ebibuga byange bijja kuddamu okukulukuta obugagga, era MUKAMA alizzaamu Sayuuni amaanyi, ne yeeroboza Yerusaalemi.'"

¹⁸Awo ne nnyimusa amaaso gange, era laba, ne ndaba amayembe ana.

¹⁹Malayika eyali ayogera nange ne mbuuza nti, "Amayembe ago gategeeza ki?" N'anziramu nti, "Gategeeza obuyinza obwasaasaanya abantu ab'omu Yuda, n'ab'omu Isirayiri, n'ab'omu Yerusaalemi."

²⁰Awo MUKAMA n'andaga abaweesi bana.

²¹Ne mbuuza nti, "Abo bazze kukola ki?" N'addamu nti, "Ago amayembe, bwe buyinza obwasaasaanya Yuda nga tewali na muntu ayimusa mutwe gwe; naye abaweesi abana bazze okubatiisa era n'okubazikiriza, ago amawanga agaasitukira ku nsi ya Yuda okusaasaanya abantu baamu."

Zekkaliya 2

Okwolesebwa Olukoba Olupima

¹Awo ne nnyimusa amaaso gange, ne ndaba, omusajja ng'alina mu mukono gwe olukoba olupima.

²Ne mbuuza nti, "Ogenda wa?" Nanziramu nti, "Njenda kupima Yerusaalemi okulaba obuwantu n'obugazi bwakyo."

³Awo malayika eyali ayogera nange n'agenda, malayika omulala n'amusisinkana.

⁴N'amugamba nti, "Dduka ogambe omuvubuka oyo nti, 'Yerusaalemi kijja kuba ekibuga ekitaliiko bbugwe olw'obungi bw'abantu n'ebisibo ebinaabeeramu.

⁵Nze ndiba bbugwe ow'omuliro, okukyebungulula enjuuyi zonna era nze ndiba ekitiibwa kyakyo mu kyo,' bw'ayogera MUKAMA.

⁶ “Kale mudduke, mudduke ensi ey’obukiikakkono mugiveemu,” bw’ayogera MUKAMA, “kubanga mbasaasanyizza ng’empewo ennya ez’eggulu bwe ziri,” bw’ayogera MUKAMA.

⁷ “Mmwe Sayuuni mudduke, mudukke muwone mmwe ababeera mu buwañjanguse mu Babulooni.”

⁸ Kubanga bw’ati bw’ayogera MUKAMA ow’Eggye nti, “MUKAMA nga bw’ampadde ekitiibwa n’antuma eri amawanga agaabanyaganga, anaabakwatako anaaba akutte ku mmunye ya liiso lye.

⁹ Kubanga laba ndyolesa omukono gwange gye bali, abaddu baabwe ne babanya. Olwo lwe mulimanya nga MUKAMA ow’Eggye ye yantuma.

¹⁰ “Yimba, osanyuke ggwe muwala wa Sayuuni, kubanga laba nzija era ndibeera wakati mu mmwe,” bw’ayogera MUKAMA.

¹¹ “Era amawanga mangi galyegatta ku MUKAMA ku lunaku olwo, era balibeera bantu bange, era nange nnaabeeranga wakati mu ggwe, naawe onootgeera nga MUKAMA ow’Eggye ye yantuma gy’oli.

¹² Era Yuda aliba mugabo gwa MUKAMA mu nsi entukuvu, era aliddamu okwerondera Yerusaalemi.

¹³ Musiriikirire, abantu mwenna mu maaso ga MUKAMA, kubanga asituse okuva mu kifo kye ekitukuvu.”

Zekkaliya 3

Okwolesebwa kwa Nnabbi Ku Kabona Asinga Obukulu

¹ Awo n’anjolesa Yoswa, kabona asinga obukulu, ng’ayimiridde mu maaso ga malayika wa MUKAMA, ne Setaani ng’ayimiridde ku mukono gwe ogwa ddyo okumulumiriza.

² MUKAMA n’agamba Setaani nti, “MUKAMA akunenye ggwe Setaani, weewaawo MUKAMA eyeerondedde Yerusaalemi akunenye! Omusajja ono si kisiki ekyaka ekigibbwaa mu muliro?”

³ Awo Yoswa yali ayimiridde mu maaso ga malayika ng’ayambadde ebyambalo ebijjudde ekko.

⁴ Malayika n’agamba abaali bayimiridde mu maaso ge nti, “Mumwambulemu ebyambalo bye ebijjudde ekko.” N’agamba Yoswa nti, “Laba nkuggyeeko ekibi kyo, era nnaakwambaza ebyambalo eby’omuwendo.”

⁵ Ne njogera nti, “Mumusibe ekiremba ekitukula ku mutwe gwe.” Awo ne bamusiba ekiremba ekitukula ku mutwe, ne bamwambaza n’engoye, nga malayika wa MUKAMA ayimiridde awo.

⁶Malayika wa MUKAMA n'akuutira nnyo Yoswa ng'ayogera nti,

⁷“Bw’ati bw’ayogera MUKAMA ow’Eggye nti, ‘Bw’onootambuliranga mu makubo gange, era noonywezanga bye nkukuutira, kale, onoofuganga ennyumba yange era onoolamulanga mu mbuga zange, era ndikuwa ekifo obeere mu abo abayimiridde wano.

⁸“Kale wulira, Yoswa kabona asinga obukulu, ggwe ne banno abatuula mu maaso go, abantu kw’otegeerera eby’omu maaso, laba ndireeta omuweereza wange, ye Ttabi.

⁹Kubanga laba, ku jjinja lye ntadde mu maaso ga Yoswa, ku jjinja erimu eririna amaaso omusanvu, laba nditeekako ebiwandiiko,’ bw’ayogera MUKAMA ow’Eggye. ‘Mu lunaku lumu ndiggyawo ekibi ky’ensi eno.

¹⁰“Ku lunaku luli, buli omu ku mmwe, aliyita muliraanwa we okutuulako wansi w’omuzabbibu gwe ne wansi w’omutiini gwe,’ bw’ayogera MUKAMA ow’Eggye.”

Zekkaliya 4

Okwolesebwa kwa Nnabbi ku Kikondo ky’Ettaala ekya Zaabu n’Emiti Emizeeyituuni Ebiri

¹Awo malayika eyali ayogera nange n’akomawo, n’anzuukusa ng’omuntu bw’azuukusibwa mu tulo.

²N’ambuuza nti, “Kiki ky’olaba?” Ne muddamu nti, “Ndaba ekikondo ky’ettaala nga kyonna kya zaabu, nga waggulu kiriko n’akabakuli kaakwo, n’ettaala zaakwo omusanvu, nga buli ttaala eriko omumwa gwayo.

³Era waliwo emit emizeeyituuni ebiri ku mabbali gaakyo, ogumu ku mukono ogwa ddyo ogw’akabakuli, n’omulala ku mukono ogwa kkono.”

⁴Ne mbuuza malayika eyali ayogera nange nti, “Bino biki mukama wange?”

⁵Malayika eyali ayogera nange n’addamu n’ajnjamba nti, “Tobimanyi?” Ne muddamu nti, “Nedda mukama wange.”

⁶Awo n’addamu n’ajnjamba nti, “Kino kye kigambo kya MUKAMA eri Zerubbaber: ‘Si lwa maanyi so si lwa buyinza naye lwa Mwoyo wange,’ bw’ayogera MUKAMA ow’Eggye.

⁷“Ggwe olusozi olunene weyita ki? Mu maaso ga Zerubbaber olibeera lusenyi, era alireeta ejinja erya waggulu mu mizira n’okwogerera mu ddoboozi ery’omwanguka ng’agamba nti, ‘Liweebwe omukisa, liweebwe omukisa!’”

⁸Awo ekigambo kya MUKAMA ne kinzijira nga kyogera nti,

⁹“Emikono gya Zerubbaber gitaddewo omusingi gwa yeekaalu eno era girigumaliriza, era olitegeera nti MUKAMA ow’Eggye ye yantuma gye muli.

¹⁰ “Ani anyooma olunaku olw’ebintu ebitono? Abantu balijaguza, bwe baliraba ejinja erigera mu mukono gwa Zerubbaberi. Gano omusanvu ge maaso ga Katonda agayitaayita mu nsi yonna.”

¹¹ Ne ndyoka mubuuza nti, “Emizeeyituuni gino ebiri ku mukono ogwa ddyo ne ku gwa kkono ogw’ekikondo ky’ettabaaza, gitegeeza ki?”

¹² Ne nnyongera okumubuuza nti, “Gano amatabi abiri ag’emizeeyituuni agaliraanye emidumu nya zaabu ge gayitamu amafuta aga zaabu?”

¹³ N’anziramu nti, “Tobimanyi?” Ne njogera nti, “Nedda, mukama wange.”

¹⁴ Awo n’addamu nti, “Abo be babiri abaafukibwako amafuta abawereza Mukama ow’ensi yonna.”

Zekkaliya 5

Okwolesebwa kw’Omuzingo Ogubuuka

¹ Awo ne nnyimusa amaaso gange era laba ne ndaba, omuzingo gw’ekitabo ogutambulira mu bbanga.

² N’ambuuza nti, “Kiki ky’olaba?” Ne nziramu nti, “Ndaba omuzingo gw’ekitabo ogutambulira mu bbanga, obuwavnu bwagwo buli mita mwenda n’obugazi bwagwo buli mita nya ne desimoolo ttaano.”

³ Awo n’alyoka anjamba nti, “Ekyo ky’ekikolimo ekizze okubuna ensi yonna, kubanga buli muntu yenna abba aliggyibwawo era buli muntu yenna alayiririra obwereere aliggyibwawo, bamutwale ku luuyi olulala.

⁴ Bw’ati bw’ayogera MUKAMA ow’Eggye, ‘Ndikifulumya, era ndikiyingiza mu nnyumba y’omubbi ne mu nnyumba y’oyo alayiririra obwereere erinnya lyange. Era kirisigala mu nnyumba ye wakati, era kirigizikiriza yonna, emit gyayo n’amayinja gaayo.’”

Okwolesebwa kw’Omukazi mu Kisero

⁵ Malayika eyali ayogera nange n’akomawo n’anjamba nti, “Yimusa amaaso go olabe, waliwo ekintu ekirala ekizze.”

⁶ Ne mubuuza nti, “Kiki ekyo?” N’anziramu nti, “Ekyo kisero, kye kifuluma.” Era n’ayongerako nti, “Ekyo kye kifaananyi ekiraga ekibi ekibunye ensi yonna.”

⁷ Awo ekibikka kyakyo, ekyuma eky’essasi ne kibikkulwa era ne ndaba omukazi ng’akittudde.

⁸ Malayika n’anjamba nti, “Buno bwe bwonoonyi.” N’amusindika n’amuzza munda mu kisero, n’aggalawo omumwa gwakyo n’ekisaanikira eky’ekyuma eky’essasi.

⁹ Ne ndyoka nnyimusa amaaso gange, era laba, abakazi babiri nga bajja gye ndi, baali batambulira mu bbanga nga bakozesa empewo mu biwaawaatiro byabwe.

Era ebiwaawaatiro byabwe nga biri ng'ebya kalooli, ne basitula ekisero mu bbanga wakati w'ensi n'eggulu.

¹⁰Ne mbuuza malayika eyali ayogera nange nti, “Abo ekisero bakiwala wa?”

¹¹N'anziramu nti, “Mu nsi ya Sinaali ey'e Babulooni, okuzimba ennyumba y'omukazi ali mu kisero, era ennyumba ye bw'eriggwa, aliteekebwa eyo mu kifo kye.”

Zekkaliya 6

Okwolesebwa kw'Amagaali Ana

¹Ne nyongera okuyimusa amaaso gange, era laba, amagaali g'embalaasi ana nga gava wakati w'ensozi bbiri, n'ensozi ezo zaali nsozi za bikomo.

²Eggaali esooka ng'esikibwa embalaasi za lukunu, eyookubiri nga nzirugavu.

³Eggaali eyokusatu ng'esikibwa mbalaasi njeru, eyokuna yo ng'esikibwa za kikuusikuusi atabikiddwamu n'obwoya obweru. Embalaasi ezo zonna zaali z'amaanyi.

⁴Ne ndyoka mbuuza malayika eyali ayogera nange nti, “Bino bitegeeza ki mukama wange?”

⁵Malayika n'anziramu nti, “Ezo z'empewo ennya ez'omu ggulu; ziva kwelianjula mu maaso ga Mukama ow'ensi yonna.

⁶Ekigaali eky'embalaasi enzirugavu kigenda mu nsi ey'omu bukiakkono, ate ekyo eky'enjeru mu bugwanjuba, ekyo ekyali kisikibwa embalaasi ez'obwoya obweru, kiraga mu nsi ey'omu bukiakkono.”

⁷Awo embalaasi ezo ez'amaanyi nga zivudde mu maaso ga MUKAMA, ne zifuba okutambulatambula mu nsi yonna; n'azigamba nti, “Mugende, mutambuletambule mu nsi yonna.” Awo ne zitambulatambula mu nsi yonna.

⁸Awo n'ampita n'ajnjamba nti, “Laba, ezo eziraga mu nsi ey'obukiakkono ziwummuzza Omwoyo wange mu nsi ey'omu bukiakkono.”

⁹Ekigambo kya MUKAMA ne kijja gye ndi nga kigamba nti,

¹⁰“Genda eri bano: Kerudayi, ne Tobiya, ne Yedaya, abaakomawo okuva mu buwanjanguse mu Babulooni, olunaku olwo lwennyini olage mu nnyumba ya Yosiya, mutabani wa Zeffaniya, mwe bali.

¹¹Ddira effeeza ne zaabu okole engule ogitikkire ku mutwe gwa Yoswa, kabona asinga obukulu, omwana wa Yekozadaaki.

¹²Mugambe nti, bw'ati bw'ayogera MUKAMA ow'Eggye nti, ‘Laba omuntu erinnya lye ye Ttabi; alirokera mu kifo kye, azimbe yeekaalu ya MUKAMA.

¹³Oyo y'alizimba yeekaalu ya MUKAMA, era alijjula ekitiibwa. Alituula ku ntebe ye ey'obwakabaka, n'afuga. Era y'aliba Kabona ku ntebe ye ey'obwakabaka; walibaawo okutegeeragana okw'emirembe wakati wa Ttabi ne Yoswa.'

¹⁴Era n'engule ya kubeera mu yeekaalu ya MUKAMA ng'ekijjukizo eri Keremu, ne Tobiya ne Keeni omwana wa Zeffaniya.

¹⁵Era n'abo abali ewala balija okuyamba okuzimba yeekaalu ya MUKAMA, era mulimanya nga MUKAMA ow'Eggye yantuma gye muli. Bino tebirirema kubaawo singa munaagondera eddoboозi lyu MUKAMA Katonda wammwe n'obumalirivu."

Zekkaliya 7

MUKAMA Avumirira Okusiiba okw'Obulimba

¹Awo olwatuuka mu mwaka ogwokuna ogw'obufuzi bwa kabaka Daliyo, ekigambo kya MUKAMA ne kijjira Zekkaliya, ku lunaku olwokuna olw'omwezi ogw'omwenda oguyitibwa Kisuleevu.

²Abayudaaya mu Beseri baali batumye Salezeeri omukungu wa kabaka ne Legemumereki n'abantu baabwe mu Yerusaalemi okwogerako ne bakabona babegayiririre eri MUKAMA,

³n'okusaba bakabona b'omu nnyumba ya MUKAMA ow'Eggye ne bannabbi nti, "Nkaabe era nsiiibe mu mwezi ogwokutaano nga bwe mbadde nkola okumala emyaka gino gyonna?"

⁴Awo ekigambo kya MUKAMA ow'Eggye ne kinzijira nga kigamba nti,

⁵"Gamba abantu bonna abali mu nsi, ne bakabona nti, 'Bwe mwasiiba ne mukungubaga mu mwezi ogwokutaano ne mu gw'omusantu mu myaka gino ensantu, mwali musiibira nze?

⁶Era bwe mulya ne munywa, muba temulya ku lwammwe era n'okunywa ku lwammwe?

⁷Bino si bye bigambo MUKAMA bye yalangirira mu bannabbi ab'edda, Yerusaalemi bwe kyali kikyalimu abantu era nga kikyakulaakulana, nga n'ebibuga byakyo bikyetoolodde, nga ne mu bukiikaddyo ne mu bitundu eby'ensenyi mukyalimu abantu?"

⁸Ekigambo kya MUKAMA ne kijjira Zekkaliya nate nti,

⁹"Bw'ati bw'ayogera MUKAMA ow'Eggye nti, 'Musalenga emisango egy'ensonga, mukwatirweganenga ekisa n'okusaasiragananga buli muntu eri muganda we.

¹⁰Temutulugunyanga bannamwandi, n'abatalina bakitaabwe, n'abatambuze wadde abaavu, era tewateekwa kubaawo muntu n'omu ku mmwe a lowooza mu mutima gwe okukola obulabe ku muganda we!"

11 “Naye baagaana okuwuliriza ne bakakanyaza emitima gyabwe ne baziba n’amatu gaabwe baleme okuwulira.

12 Ne bakakanyaza emitima gyabwe ng’ejinja, ne batawuliriza mateeka wadde ebiligambo MUKAMA ow’Eggye bye yaweereza n’Omwoyo we mu mukono gwa bannabbi ab’edda. MUKAMA ow’Eggye kyeyava abanyiigira ennyo.

13 “Bwe nabakoowoola ne batafaayo, nange ne ɳjaana okufaayo nga bankowodde,’ bw’ayogera MUKAMA ow’Eggye.

14 Era nabasaasaanya n’omuyaga ogukunta mu mawanga ge baali batamanyi. Ensi gye baaleka n’ebeera matongo nga tewali agibeeramu, ensi ennungi esanyusa, kyeyava efuuka eddungu.”

Zekkaliya 8

MUKAMA Asuubiza Okuzzaawo Yerusaalemi

1 Ekigambo kya MUKAMA ow’Eggye ne kinzijira nate nti:

2 Bw’ati bw’ayogera MUKAMA ow’Eggye nti, “Nkwatirwa Sayuuni obuggyga, obuggyga obungi obw’ekitalo.”

3 Bw’ati bw’ayogera MUKAMA nti, “Ndikomawo mu Sayuuni, ndibeera wakati mu Yerusaalemi era Yerusaalemi kiriyitibwa ekibuga ekyesigwa, olusozi olwa MUKAMA ow’Eggye, Olusozi Olutukuvu.”

4 Bw’ati bw’ayogera MUKAMA ow’Eggye nti, “Abakadde abasajja n’abakazi bajja kuddamu okutuula mu nguudo za Yerusaalemi, nga buli omu akutte omuggo, olw’obukadde.

5 N’enguudo ez’ekibuga zirijjula abalenzi n’abawala nga bazannya.”

6 Bw’ati bw’ayogera MUKAMA ow’Eggye nti, “Kirirabika ng’eky’ekitalo mu maaso g’abantu abo abaasigalawo mu nnaku ezo, naye nange gye ndi bwe kiriba?” bw’ayogera MUKAMA ow’Eggye.

7 Bw’ati bw’ayogera MUKAMA ow’Eggye nti, “Laba ndirokola abantu bange abali mu nsi ey’Ebuvanjuba n’abali mu nsi ey’Ebugwanjuba:

8 Ndibakomyawo, babeere mu Yerusaalemi, nange nnaabeeranga Katonda waabwe mu bwesigwa ne mu butuukirivu.”

9 Bw’ati bw’ayogera MUKAMA ow’Eggye nti, “Emikono gyammwe gibe n’amaanyi, mmwe, mu nnaku zino ababaddle bawulira ebiligambo bino ebiva mu kamwa ka bannabbi abaaliwo mu nnaku okuva omusingi gw’ennyumba ya MUKAMA ow’Eggye lwe gwasimbibwa, yeekaalu ye eryoke ezimbibwe.

10 Ekiseera ekyo nga tekinnatuuka, tewali asobola kutoola nsimbi okupangisa omuntu wadde okupangisa ensolo. Era tewali muntu ayinza kukola mirimu gye

mu mirembe olw'omulabe we, kubanga buli muntu nnali mufudde mulabe wa muliraanwa we.

¹¹Naye kaakano abantu bano abaasigalawo sija kubakola nga mu nnaku ezaayita,” bw’ayogera MUKAMA ow’Eggie.

¹²“Kubanga ensigo erikula bulungi, n’omuzabbibu gubale ekibala kyagwo, n’ettaka lireetenga ekimera kyalyo, n’eggulu lireetenga omusulo gwalyo. Nange abantu bange abaasigalawo ndibawa ebintu ebyo byonna nga gwe mugabo gwabwe.

¹³Nga bwe mwali ekikolimo mu baamawanga, ggwe ennyumba ya Yuda, naawe ennyumba ya Isirayiri, bwe nt yo bwe ndibalokola, era mulibeera omukisa eri abalala. Temutya, munywere emikono gyammwe gibe n’amaanyi.”

¹⁴Kubanga bw’ati bw’ayogera MUKAMA ow’Eggie nti, “Nga bwe nasalawo okubabonereza, bajajjammwe bwe bansunguwaza,” bw’ayogera MUKAMA ow’Eggie, “era ne sibasaasira,

¹⁵bwe nt yo nate bwe nsazeewo kaakano mu nnaku zino okukola obulungi Yerusaalemi n’ennyumba ya Yuda. Temutya.

¹⁶Bino bye bintu bye munaakolanga: buli muntu ayogerenga bya mazima ne muntu munne, musalenga emisango mu bwenkanya mu mpya zammwe;

¹⁷tosaliranga muliraanwa wo lukwe. So tolayiranga bya bulimba, kubanga ebyo byonna mbikyawa,” bw’ayogera MUKAMA.

¹⁸Ekigambo kya MUKAMA ow’Eggie ne kinzijira nate nti:

¹⁹Bw’ati bw’ayogera MUKAMA ow’Eggie nti, “Okusiiba omwezi ogwokuna, n’ogwokutaano, n’ogw’omusanvu, n’ogw’ekkumi kunaabeeranga mbaga ey’essanyu era n’okwesiima mu nnyumba ya Yuda. Noolwekyo mwagalenga amazima n’emirembe.”

²⁰Bw’ati bw’ayogera MUKAMA ow’Eggie nti, “Amawanga mangi n’abantu bangi abalija okuva mu bibuga bingi era n’okuva mu nsi nnyingi;

²¹era ab’ekibuga ekimu baliraga mu kibuga ekirala babagambe nti, ‘Tugende mangu twegayiririre MUKAMA, tunoonye amaaso ga MUKAMA ow’Eggie. Nze kennyni ḥṣenda.’

²²Abantu bangi n’amawanga mangi ag’amaanyi galijja okunoonya MUKAMA ow’Eggie mu Yerusaalemi n’okwegayirira MUKAMA.”

²³Bw’ati bw’ayogera MUKAMA ow’Eggie nti, “Mu nnaku ezo abasajja kkumi okuva mu buli lulimi olwogerwa mu mawanga balyekwata ku kyambalo ky’Omuyudaaya bagambe nti, ‘Muleke tugende nammwe kubanga twawulira nga Katonda ali nammwe.’”

Zekkaliya 9

- ¹ Ekigambo kya Katonda kyolekedde ensi ya Kadulaki era kirituuka e Ddamasiko. Kubanga abantu bona n'ebika byonna ebya Isirayiri batunuulidde MUKAMA,
- ² era ne Kamasi ekiriraanyeewo nakyo bwe kityo, ne Ttuulo ne Sidoni wadde nga birina amagezi mangi.
- ³ Ttuulo kyezimbira ekigo ne kituma ffeeza n'eba ng'enfuufu, ne zaabu n'eba nnyingi ng'ettaka ery'omu kkubo.
- ⁴ Laba, Mukama alikyambulako ebintu byakyo, alizikiriza amaanyi gaakyo ag'oku nnyanja, era kiryokebwa omuliro.
- ⁵ Asukulooni bino kiribiraba ne kitya; ne Gaza bwe kityo kiribeera mu kulumwa okw'amaanyi. Era n'essuubi lya Ekuloni liriggwaawo; Gaza aliggyibwako kabaka we, ne Asukulooni tekiribaamu bantu.
- ⁶ Abagwira balitwala Asudodi, era n'amalala g'Abafirisuuti ndigamalawo.
- ⁷ Era ndiggya omusaayi mu kamwa ke n'emmere ey'omuzizo okuva wakati mu mannyo ge. N'abo bona abalisigalawo mu kyo baliba bantu ba Katonda waffe, balifuuka bakulembeze mu Yuda, ne Ekuloni kiriba nga Abayebusi.
- ⁸ Naye ndirwanirira ennyumba yange eri egghe eddumbaganyi, so tewaliba mulumbaganyi aliddayo kujooga bantu bange kubanga kaakano mbalabirira.
- ⁹ Sanyuka nnyo ggwe omuwala wa Sayuuni: leekaana nnyo, ggwe omuwala wa Yerusaalemi; laba, kabaka wo aija gy'oli; mutuukirivu era muwanguzi; muwombeefu era yeebagadde endogoyi, endogoyi ento, omwana gw'endogoyi.
- ¹⁰ Efulayimu ndimuggyako amagaali, ne Yerusaalemi muggyeko embalaasi ennwanyi, n'omutego gw'obusaale gulimenyebwa era alireeta emirembe mu mawanga, n'obufuzi bwe buliva ku nnyanja emu butuuke ku nnyanja endala era buve ku mugga Fulaati butuuke ku nkomerero z'ensi.
- ¹¹ Naawe ggwe, olw'omusaayi gw'endagaano gye nakola naawe, ndisumulula abasibe bo okuva mu bunnya obutaliimu mazzi.
- ¹² Mudde mu nkambi yammwe mmwe abasibe abalina essuubi; nangirira leero nti ndibadizaawo emirundi ebiri.
- ¹³ Yuda ndigiweta ng'omutego ogw'obusaale ngujjuze Efulayimu. Ndiyimusa batabani ba Sayuuni, balwane n'abaana bo, ggwe Buyonaani, mbakozese ng'ekitala eky'omutabaazi.

¹⁴ Era MUKAMA alirabika ng'ali waggulu waabwe, akasaale ke kamyanse ng'okumyansa kw'eggulu. MUKAMA Katonda alifuuwa ekkondeere, n'akumbira mu muyaga ogw'omu bukiikaddyo.

¹⁵ MUKAMA ow'Eggye alibakuuma. Balirinnyirira ne bawangula envuumuulo, balinywa ne baleekaana ng'abatamiivu. Balijjula ng'ekibya ekikozesebwa okumansira ku nsonda z'ekyoto.

¹⁶ Ku lunaku olwo MUKAMA Katonda alirokola abantu be ng'omusumba bw'alokola ekisibo ky'endiga ze. Balitangalija mu nsi ye, ng'amayinja ag'omuwendo bwe gatemagana mu ngule.

¹⁷ Nga baliba balungi era abatuukirivu! Emmere ey'empeke erireetera abavubuka abalenzi obulamu obweyagaza, n'abawala nabo beeyagale olwa wayini omuggyga.

Zekkaliya 10

MUKAMA Alirabirira Yuda

¹ Musabe MUKAMA enkuba mu biseera byayo; kubanga MUKAMA y'akola ebire enkuba n'etonna, olwo buli muntu n'afuna ebirime.

² Kubanga bakatonda abalala n'abalaguzi balaba okwolesebwa okw'obulimba; ne baloota ebirooto eby'obulimba, ne bagumya abantu eby'obulimba. Abantu kyebava bazunjana ng'endiga, nga banyigirizibwa olw'obutaba na musumba.

³ "Obusungu bwange bubuubuukidde ku basumba era nzija kubonereza abakulembeze ba Yuda, kubanga MUKAMA ow'Eggye ajja kulabirira endiga ze, ennyumba ya Yuda, era alibafuula ng'embalaasi ye emwenyumiririzaamu ennyo mu lutalo.

⁴ Mu Yuda mulivaamu ejinja ery'oku nsonda, muveemu n'enkondo enyweza weema, muveemu n'omutego ogw'akasaale era muveemu na buli mufizi yenna.

⁵ Bonna awamu balyoke babe ng'abasajja abazira ennyo mu lutalo abatambulira mu bitoomi by'omu nguudo mu biseera eby'entalo. Kubanga MUKAMA ali nabo, balirwana ne bawangula egghe eryebagadde embalaasi.

⁶ "Ndiwa ennyumba ya Yuda amaanyi era ndiwonya ennyumba ya Yusufu, ndibakomyawo kubanga mbakwatiddwa ekisa. Balibeera nga be sseegaanangako era ndibawulira kubanga nze MUKAMA Katonda waabwe.

⁷ Olwo aba Efulayimu baliba ng'abasajja ab'amaanyi, emitima gyabwe ne gisanyuka nnyo ng'abanywedde wayini. Abaana baabwe balikiraba ne basanyuka, omutima gwabwe gulisanyukira mu MUKAMA.

⁸ Ddala ndibawonya ne mbakuñjaanya. Ddala ndibanunula, baddeyo babeere bangi nga bwe baabanga.

⁹ Newaakubadde nga nabasaasaanyiza mu mawanga, naye balisinzira eyo mu nsi ezeewala ne banzijukira. Bo n'abaana baabwe baliba balamu era ne bakomawo gye ndi.

¹⁰ Ndibakomyawo okuva mu Misiri, mbakuŋjaanye okuva mu Bwasuli. Ndibaleeta mu Gireyaadi ne Lebanooni ne bajjula ensi ezo ne watasigalawo kabanga ka kubeeramu.

¹¹ Baliyita mu nnyanja ey'okubonaabona; ennyanja ewuluguma erikkakkanyizibwa, n'obuziba bwa Kiyira bwonna bulikala. Amalala ga Bwasuli galibaggwaamu n'omugo ogw'obufuzi bwa Misiri gulimenyebwa.

¹² Ndibafuula ba maanyi mu MUKAMA era nabo balitambulira mu linnya lyange," bw'ayogera MUKAMA.

Zekkaliya 11

¹ Ggulawo enzigi zo ggwe Lebanooni, omuliro gwokye emivule gyo.

² Kaaba ggwe omuberosi, kubanga emivule gigudde! Emiti emirungi ennyo gyonoonese. Mukube ebiwoobe mmwe emyera gya Basani, kubanga ekibira ekikwafu kigudde.

³ Wuliriza ebiwoobe by'abasumba, amalundiro gaabwe amalungi gazikirizibbw. Wuliriza okuwuluguma kw'empologoma. Omuddo omulungi oguli ku Yoludaani guzikirizibbw.

Abasumba Ababiri

⁴ Bw'ati bw'ayogera MUKAMA Katonda wange nti, "Lunda endiga zigejje ezinaatwalibwa okuttibwa.

⁵ Abo abazigula bazitta ne batabaako musango. N'abo abazitunda ne bagamba nti, 'MUKAMA atenderezebw ngaggawadde!' Abasumba baazo bennyini tebazikwatirwa kisa.

⁶ Kubanga sokyaddayo kukwatirwa bantu ba nsi eno kisa," bw'ayogera MUKAMA. "Ndiwaayo buli muntu okugwa mu mikono gya muliraanwa we, ne mu mikono gya kabaka we. Nabo balijooga ensi era sirigiwonya kuva mu mikono gwabwe."

⁷ Awo ne nunda ekisibo ekyateekebwateekebwa okuttibwa, okusingira ddala ezaali zijoogebwa. Ne ntwala emigo gy'abasumba ebiri, ogumu ne ngutuumma erinnya Kisa, omulala ne ngutuumma Kwegatta era ne ndiisa endiga.

⁸ Mu mwezi gumu ne neegobako abasumba basatu, emmeeme yange ng'ebakyaye era nabo nga bankyaye.

⁹ Awo ne ndyoka ɲjamba nti, "Siibeere musumba wammwe, ekinaafa leka kife, ekyokwonooneka kyonooneke, era leka ebyo ebisigaddewo biryanjane, buli kimu kirye kinnaakyo."

¹⁰ Ne ndyoka nkwata omuggo gwange Kisa ne ngumenya, ne mmenya endagaano gye nnali nkoze n'abantu bona.

¹¹ Endagaano n'agikomya ku lunaku olwo era abasuubuzi b'endiga abaali bandaba ne bamanya nti ekyo kyali kigambo kya Katonda.

¹² Ne ndyoka mbagamba nti, "Bwe kiba nga kisaanidde mu maaso gammwe mumpe empeera yange; naye obanga temusiimye mulekeeyo." Awo ne bambalira ensimbi eza ffeeza amakumi asatu.

¹³ Awo MUKAMA n'aŋjamba nti, "Zisuulire omubumbi," omuwendo guno ogw'ekitalo gwe bansasula! Kale ne ntwala ensimbi amakumi asatu eza ffeeza ne nzisuulira omubumbi mu nnyumba ya MUKAMA.

¹⁴ Awo ne mmenya omuggo gwange ogwokubiri Kwegatta, okulaga nti obumu obwali wakati wa Yuda ne Isirayiri bwali bukomye.

¹⁵ MUKAMA n'alyoka aŋjamba nti, "Twala nate ebintu eby'omusumba omusirusiru bye yandikozesezza.

¹⁶ Kubanga laba, nze nyimusizza omusumba mu nsi atafaayo ku ndiga ezizikirira era atanoonya zisaasaanye, era atayunga zimenyeze wadde okuliisa ennamu, naye alya ensolo ensava ng'aziyusaako ebinuulo.

¹⁷ "Zimusenze omusumba wange ataliiko ky'agasa agayaalirira ekisibo! Ekitala kifumite omukono gwe ogwa ddyo, kiggyemu n'eriiso lye erya ddyo! Omukono gwe gukalire ddala, n'eriiso lye erya ddyo lizibire ddala!"

Zekkaliya 12

Okununulibwa kwa Yerusaalemi Okujja

¹ Kino ky'ekigambo kya Katonda ekikwata ku Isirayiri. Bw'ati bw'ayogera MUKAMA eyabamba eggulu era n'assaawo emisingi gy'ensi, era n'akola n'omwoyo gw'omuntu ogumulimu.

² "Laba ŋnjenda okufuula Yerusaalemi ekikompe ekitagaza amawanga gonna ageetoolodde enjuuyi zonna. Yuda awamu ne Yerusaalemi birizingizibwa.

³ Awo ku lunaku olwo ndifuula Yerusaalemi ejinja erizitowa eri amawanga gonna, ag'ensi agalikuŋjaana okukizingiza. Abo bona abaligezaako okuliggyawo, balyetusaako ebisago.

⁴ Ku lunaku olwo, bw'ayogera MUKAMA, ndikuba buli mbalaasi na buli muvuzi waayo ndimusuula eddalu. Ndikuma ennyumba ya Yuda kyokka amaaso g'embalaasi za bannaggwanga ndigaziba.

⁵ Awo abakulembeze ba Yuda baligamba mu mitima gyabwe nti, 'Abantu b'omu Yerusaalemi ba maanyi, kubanga MUKAMA Katonda ow'Eggye ye Katonda waabwe.'

⁶ “Ku lunaku olwo ndifuula abakulembeze ya Yuda ng’ogusigiri ogwaka ogwetooloddwa enku, ng’olumuli olw’omuliro mu makkati g’ebinywa. Balimalawo amawanga gonna ag’oku njuyi zonna, olw’oku kkono n’olw’oku ddyo; naye Yerusaalemi kirisigalawo, n’abantu baakyo mu kifo kyakyo awatali kunyeenyezebwa.

⁷ “MUKAMA alisooka kununula weema za Yuda, ekitiibwa ky’ennyumba ya Dawudi, n’ekitiibwa ky’abatuuze b’omu Yerusaalemi kireme kusukka ku kya Yuda.

⁸ Ku lunaku olwo MUKAMA aliteeka obukuumi ku batuuze b’omu Yerusaalemi; abo abasembayo obunafu ku lunaku olwo babeere nga Dawudi, era ennyumba ya Dawudi ebeere ng’ennyumba ya Katonda, nga malayika wa MUKAMA abakulembeddemu.

⁹ Ku lunaku olwo ndizikiriza amawanga gonna agalumba Yerusaalemi.

¹⁰ “Era ndifuka ku nnyumba ya Dawudi era ku batuuze ba Yerusaalemi Omwoyo ow’ekisa n’okwegayirira. Balintunuulira nze gwe baafumita: era balimukungubagira ng’omuntu bw’akungubagira omwana we omu yekka, era balimulumirwa nnyo omwoyo ng’omuntu bw’alumirwa mutabani we omuberebery.

¹¹ Ku lunaku olwo okukuba ebiwoobe kuliyitirira mu Yerusaalemi okwenkana ng’okwa Kadadulimmoni mu kiwonvu Megiddoni.

¹² Ensi erikungubaga, buli kika kyokka; ekika eky’ennyumba ya Dawudi ne bakazi baabwe kyokka, n’ekika ky’ennyumba ya Nasani ne bakazi baabwe bokka;

¹³ Ekika eky’ennyumba ya Leevi ne bakazi baabwe, n’ekika kya Simeeyi ne bakazi baabwe;

¹⁴ n’ebika byonna ebirala ebisigaddeyo ne bakazi baabwe.

Zekkaliya 13

¹ “Ku lunaku olwo ensulo z’amazzi ziriggulirwa ennyumba ya Dawudi n’abatuuze b’omu Yerusaalemi okubatukuza okuva mu kibi n’obutali bulongoofu.

² “Ku lunaku olwo, ndiggya amannya ga bakatonda abalala okuva mu nsi, galeme kuddayo kujjukirwa, era nzigye bannabbi n’omwoyo ogutali mulongoofu mu nsi,” bw’ayogera MUKAMA ow’Eggye.

³ Era singa omuntu yenna awa obunnabbi, kitaawe ne nnyina abamuzaala bennyini balimugamba nti, “Oteekwa kufa kubanga oyogedde eby’obulimba mu linnya lya MUKAMA.” Bw’aliwa obunnabbi, bakadde be bennyini bamufumitanga.

⁴ “Ku lunaku olwo buli nnabbi alikwatibwa ensonyi olw’okwolesebwa kwe okw’obulimba; era tebalyambala kyambalo kyabwe eky’ebyoza okulimba abantu.

⁵ Aligamba nti, ‘Siri nnabbi nze, ndi mulimi bulimi; era mu nnimiro mwe nkoledde emirimu gyange obulamu bwange bwonna.’

⁶ Era singa omuntu bamubuuza nti, ‘Ate bino ebiwundu ebiri ku mubiri gwo bya ki?’ Aliddamu nti, ‘Ebiwundu n’abifunira mu nnyumba ya mikwano gyange.’”

Isirayiri Ebonerezebwa

⁷ “Zuukuka, ggwe ekitala olwanyise omusumba wange, olwane n’omusajja annyimirira ku lusegere,” bw’ayogera MUKAMA ow’Eggye. “Kuba omusumba endiga zisaasaane nange ndiyimusa omukono gwange ku baana abato.

⁸ Mu nsi yonna,” bw’ayogera MUKAMA, “bibiri bya kusatu bye birikubwa bisaanewo, naye kimu kya kusatu kye kirisigalamu.

⁹ Ekitundu kino eky’ekimu ekyokusatu ndikireeta mu muliro, ne mbalongoosa ng’effeeza bw’erongoosebwa mbagezesi nga zaabu bw’egezesebwa. Balikoowoola erinnya lyange nange ndibaanukula. Ndigamba nti, ‘Bantu bange,’ era nabo baliddamu nti, ‘MUKAMA ye Katonda waffe.’”

Zekkaliya 14

Yerusaalemi enunulibwa MUKAMA

¹ Olunaku lwa MUKAMA lujja, lwe muligabana bye mwanyaga.

² Ndikuinjaanyaiza amawanga gonna mu Yerusaalemi mu lutalo okukirwanyisa; ekibuga kiritwalibwa, enju zinyagibwe n’abakazi bakwatibwe. Kimu kyakubiri eky’ekibuga kiritwalibwa mu buwañjanguse; naye abalala abalisigalawo tebaliggibwa mu kibuga.

³ Awo MUKAMA alivaayo n’alwanyisa amawanga gali nga bwe yalwana ku lunaku olw’olutalo.

⁴ Ku lunaku olwo ebigure bye biriyimirira ku lusozi olwa Zeyituuni olwolekdede obuvanjuba bwa Yerusaalemi, era olusozi lwa Zeyituuni lulyabuluzibwamu ebitundu bibiri okuva Ebuvanjuba okudda Ebugwanjuba era lujjemu oguwonvu oguwanvu ennyo. Ekitundu ekimu eky’olusozi kidde mu Bukiikkono ekirala mu Bukiikkaddyo.

⁵ Nammwe muliddukira mu kkubo ery’omu kiwonvu eky’olusozi lwange kubanga ekiwonvu kirisitulirwa waggulu era muddukanga nga bwe mwadduka musisi eyayita mu mirembe gya Uzziya, kabaka wa Yuda. Awo MUKAMA Katonda wange alijja n’abatukuvu be bona.

⁶ Ku lunaku olwo teriba kitangaala, newaakubadde obunnyogovu wadde obutiti.

⁷Naye luliba lunaku lwa njawulo, awataliba misana wadde kiro: olunaku olumanyiddwa MUKAMA. Obudde bwe buliwungeera walibaawo ekitangaala.

⁸Ku lunaku olwo amazzi amalamu galikulukuta okuva mu Yerusaalemi; agamu gagende mu nnyanja ey'Ebuwanjuba n'amalala mu nnyanja ey'Ebugwanjuba; mu kyeya ne mu ttoggo.

Yuda Kabaka w'Ensi ow'Oku Ntikko

⁹MUKAMA alibeera kabaka ow'ensi zonna: ku lunaku olwo MUKAMA alibeera omu yekka n'erinnya lye liribeera erinnya lyokka.

¹⁰Ensi yonna okuva e Geba okutuuka e Limmoni ku luuyi olw'obukiikaddyo obwa Yerusaalemi; erifuuka nga Alaba naye Yerusaalemi kiriyimusibwa ne kisigala mu kifo kyakyo okuva ku mulongooti gwe Kananeri okutuuka ku masogolero ga kabaka.

¹¹Abantu balikibeeramu, tekigenda kuddayo kuzikirizibwa. Yerusaalemi kiriba kinywevu.

¹²Ono ye kawumpuli MUKAMA gw'alikubisa amawanga gonna agaalwanyisa Yerusaalemi. Emibirri gyabwe girivunda nga bakyali balamu. Amaaso gabavundire mu biwanga, n'ennimi zibavundire mu kamwa.

¹³Ku lunaku olwo MUKAMA alireetera abantu ekyekango eky'amaanyi. Buli muntu alikwata omukono gwa munne nga balwanagana.

¹⁴Ne Yuda alirwanira mu Yerusaalemi era obugagga bw'ensi zonna eziriraanyeewo bukuŋjaanyizibwe, zaabu n'effeeza n'ebiyambalo bingi nnyo nga nabyo bikuŋjaanyizibbwaa.

¹⁵Era kawumpuli ng'oli aligwa ku mbalaasi, ne ku nnyumbu, ne ku ɲjamira, n'endogoyi, ne ku nsolo zonna eziriba mu bisulo ebyo.

¹⁶Abo abalisigalawo ku mawanga agaalumba Yerusaalemi banaayambukanga buli mwaka okusinza MUKAMA kabaka ow'Eggye era n'okukwatanga embaga ey'ensiisira.

¹⁷Omuntu yenna mu nsi bw'ataagendenga Yerusaalemi kusinza MUKAMA Kabaka ow'Eggye, taafunenga nkuba.

¹⁸Abamisiri bwe bataagendenga kwetabamu, tebaafunenga nkuba. MUKAMA anaabareeteranga kawumpuli, gwakubisa amawanga agatagenda kukwata mbaga ey'ensiisira.

¹⁹Ekyo kye kinaabanga ekibonerezo kya Misiri n'amawanga gonna agataayambukenga kukwata mbaga ya nsiisira.

²⁰Ku lunaku olwo ekigambo kino, "kitukuvu eri MUKAMA Katonda," kinaawandikibwa ku bide by'embalaasi era n'entamu ezifuumbirwamu mu nnyumba ya MUKAMA zinaabeeranga ng'ebibya ebitukuvu mu maaso g'ekyoto.

²¹Weewaawo, buli nsuwa mu Yerusaalemi ne mu Yuda eneebangang ntukuvu mu maaso ga MUKAMA ow'Eggye; n'abo bonna abanajjanga okuwaayo ssaddaaka banaafumbiranga mu zimu ku ntamu ezo. Era ku lunaku olwo, waliba tewakyali Mukanani mu nnyumba ya MUKAMA ow'Eggye.

Malaki

Malaki 1

1 Buno bwe bubaka MUKAMA bwe yawa Malaki abutuuse eri abaana ba Isirayiri.

Okwagala kwa MUKAMA eri Isirayiri

2 “Nabaagala,” bw’ayogera MUKAMA. “Naye mmwe ne mumbuuza nti, ‘Watwagala otya?’ “Esawu teyali muganda wa Yakobo?” bw’ayogera MUKAMA: “naye nze Yakobo gwe nayagala.

3 Esawu namukyawa ne nfuula ensi ye ey’ensozi okuba amatongo, obusika bwe ne mbuwa ebibe eby’omu ddungu.”

4 Singa Edomu, ekika ekyava mu Esawu kigamba nti, “Wadde tukubiddwa wansi naye tulidda ne tuzimba ebyagwa.” MUKAMA ow’Eggie ayogera nti, “Bo balizimba, naye nze ndibimenya; era abantu banaabayitanga, ensi embi, era nti abantu MUKAMA be yanyiigira ennaku zonna.

5 Era amaaso gammwe galiraba ne mwogera nti, ‘MUKAMA agulumizibwe okusukka ensalo ya Isirayiri.’

Ekibi kya Bakabona

6 “Omwana assaamu kitaawe ekitiibwa, n’omuddu atya mukama we. Kale obanga ddala ndi kitammwe, ekitiibwa kye munzisaamu kiri ludda wa? Era obanga ndi mukama wammwe, lwaki temuntya?” bw’ayogera MUKAMA ow’Eggie. MUKAMA ow’Eggie bw’abagamba mmwe nti, “Mmwe bakabona munyooma erinnya lyange. “Ne mubuuza nti, ‘Twayonoona tutya?’

7 “Muwaayo ku kyoto kyange emmere eyoononese. “Kyokka ne mwebuuza nti, ‘Twakwonoona tutya?’ “Kubanga olujjuliro lwange mulufuula ekitagasa.

8 Bwe muwaayo ensolo enzibe z’amaaso okuba ssaddaaka, muba temukoze kibi? Ate bwe muwaayo eziwenyera oba endwadde, ekyo si kibi? Kale nno mugezeeko okuzitonera omufuzi wammwe, anaabasanyukira? Ye anaafaayo okukutunulako?” bw’ayogera MUKAMA ow’Eggie.

9 “Kale nno mbasaba mwegayirire Katonda, atukwatirwe ekisa, kubanga ebyo ffe twabyereetera. Nga muleese ebiweebwayo ebifaanana bityo, waliwo n’omu gw’ayinza okukkiriza?” bw’ayogera MUKAMA ow’Eggie.

10 “Kale waakiri singa omu ku bakabona aggalawo enzigi muleme okukuma omuliro ku kyoto kyange ogw’obwerefere! Sibasanyukira n’akatono,” bw’ayogera MUKAMA ow’Eggie, “so sikkirize kiweebwayo kyonna ekiva mu mikono gyammwe.

11 Kubanga okuva enjuba gy’eva okutuusa gy’egwa erinnya lyange kkulu mu baamawanga; obubaane buweerwayo mu buli kifo eri erinnya lyange, nga kuliko

n'ekiweebwayo ekirongoofu, kubanga erinnya lyange kkulu mu baamawanga," bw'ayogera MUKAMA ow'Eggye.

¹²"Naye mmwe bakabona muvumisa erinnya lyange mu baamawanga buli lukya nga mugamba nti kya Mukama okuwaayo emmere etesaana n'ebiweebwayo ku kyoto kyange.

¹³Era mwogera nti, 'Nga tulabye,' ne mugiwunyako ne mwetamwa, era ne mwesooza," bw'ayogera MUKAMA ow'Eggye. "Bwe muleeta ekinyage, n'ekiwenyera, n'ekirwadde, ebyo bye biweebwayo bye mulina okuleeta, mbikkirize?" bw'ayogera MUKAMA ow'Eggye.

¹⁴"Buli mulimba yenna akolimirwe, oyo alina ennume mu kisibo kye eyeyama okugawaayo nga ssaddaaka eri Mukama naye n'awaayo ekintu ekiriko obulema: kubanga ndi Kabaka mukulu," bw'ayogera MUKAMA ow'Eggye, "n'erinnya lyange lya ntisa mu baamawanga."

Malaki 2

Okulabula Bakabona

¹"Kale nno, mmwe bakabona, ekiragiro kino kyammwe.

²Bwe mutaakyuse ku mpisa zammwe n'engeri zammwe, bwe mutaafeeyo kuwa linnya lyange kitibwa," bw'ayogera MUKAMA ow'Eggye, "kale ndibasindikira ekikolimo era emikisa gyammwe girifuuka ekikolimo. Ate ddala mmaze okubakolimira kubanga ebikulu gye ndi temubitaddeko mwoyo.

³"Kale laba, ndibonereza ezzadde lyammwe, mbasiige n'obusa mu maaso, obusa bwa ssaddaaka zammwe, era mbagobewo mu maaso gange.

⁴Olwo lwe mulimanya nga mbawadde ekiragiro kino, endagaano yange ne Leevi eryoke etuukirire," bw'ayogera MUKAMA ow'Eggye.

⁵"Endagaano eri mu mateeka ago yali egenderedde kuleeta bulamu na mirembe era n'embimuwa asobole okunya, era n'antya n'ayimirira ng'atya erinnya lyange.

⁶Amateeka ag'amazima gali mu kamwa ke era nga tewali bulimba busangibwa mu kamwa ke. Yatambula nange mu mirembe ne mu butuukirivu era n'aggya bangi mu kibi.

⁷"Kubanga emimwa gy'abasumba gisaana okukuma eby'amagezi ebya Katonda era abantu basaana okunoonya okutegeera okuva mu bo, kubanga be babaka ba MUKAMA ow'Eggye.

⁸Naye mwakyama ne muva mu kkubo; mwesittaza bangi olw'ebyo bye muyigiriza; mwayonoona endagaano ya Leevi," bw'ayogera MUKAMA ow'Eggye.

9“Noolwekyo nabafuula ekinyoomebwa era ekisekererwa mu maaso g’abantu bona olw’obutagoberera makubo gange era musala emisango nga musaliriza.”

Okulabula eri Abatali Beesigwa mu Maka

10 Kale ffenna tetulina kitaffe omu? Si Katonda omu eyatutonda? Lwaki kale tetuli beesigwa eri bantu bannaffe, ne twonoona endagaano ya bakitaffe?

11 Yuda takuumye bwesigwa n’eby’omuzizo ne bikolebwa mu Isirayiri ne mu Yerusaalemi. Kubanga Yuda yayonoona ekifo kya MUKAMA ekitukuvu, ky’ayagala ennyo, bwe yawasa omuwala wa lubaale.

12 Buli muntu yenna akola kino, oba kabona oba muntu wa bulijjo, MUKAMA alimuggya mu kika kya Yakobo, newaakubadde ng’aleeta ebiweebwayo eri MUKAMA ow’Eggie!

13 Ekirala kye mukola kye kino: Ekyoto kya MUKAMA mukijuzzza amaziga, nga mukaaba nga mukuba ebiwoobe kubanga ebiweebwayo byammwe takyabifaako.

14 Kale mubuuza nti, “Lwaki tabifaako?” Kubanga MUKAMA yali mujulirwa wakati wo ne mukazi wo ow’omu buvubuka bwo, naye ggwe tewali mwesigwa, ng’olimalimbba newaakubadde nga yali munno era mukazi wo gwe walagaana naye endagaano.

15 Katonda teyabafuula omu mu mwoyo? Era lwaki yabafuula omu? Kubanga yali anoonya ezzadde eriritya Katonda. Kale mwekuume nnyo waleme kubaawo agoba mukazi we, era alimbalimba mukazi we ow’omu buvubuka bwe.

16 “Kubanga nkyawa abafumbo okwawukana,” bw’ayogera MUKAMA Katonda wa Isirayiri, “n’omusajja ajooga mukazi we,” bw’ayogera MUKAMA ow’Eggie. Kale mwekuumenga mu mwoyo gwammwe mubeerenga beesigwa.

Olunaku olw’Okusala Omusango

17 MUKAMA mumukooyezza n’ebigambo byammwe. Naye mubuuza nti, “Tumukooyezza tutya?” Kubanga mwogera nti buli akola ekibi, mulungi mu maaso ga MUKAMA, era abasanyukira; oba nti, “Ali ludda wa Katonda ow’obwenkanya?”

Malaki 3

1 “Laba, ntuma omubaka wange, alinkulembra era alirongoosa ekkubo nga sinnajja: era Mukama gwe munoonya alijja mu yeekaalu ye nga tebamanyiridde; omubaka w’endagaano gwe musanyukira, laba ajja,” bw’ayogera MUKAMA ow’Eggie.

2 “Naye ani ayinza okugumiikiriza olunaku olw’okujja kwe, era ani aliymirira ye bw’alirabika? Kubanga ali ng’omuliro gw’oyo alongoosa effeeza era nga sabbuuni ow’abayoza.

³Era alituula n'atunula ng'oyo alongoosa ffeeza n'agimalamu amasengere, era alirongoosa batabani ba Leevi, bakabona ba Katonda, era alibasengejja ng'ezaabu n'effeeza bwe bisengejjebw; balyoke baweeyo ssaddaaka mu butuukirivu.

⁴Awo ekiweebwayo ekya Yuda ne Yerusaalemi kiryoke kisanyuse MUKAMA, nga mu nnaku ez'edda era nga mu myaka egyayita.

⁵“Era mu kiseera ekyo awatali kulonzalonza ndibasemberera nsale omusango. Ndiyanguwa okuwa obujulizi ku baloga ne ku benzi ne ku abo abalayira eby'obulimba, ne ku abo abalyazaamaanya omupakasi empeera ye; abanyigiriza nnamwandumulekwa, era abajoogereza munnaggwanga, abatatya MUKAMA,” bw'ayogera MUKAMA ow'Eggye.

⁶“Kubanga nze MUKAMA sijjulukuka: mmwe, batabani ba Yakobo, noolwekyo siribazikiriza.

⁷Okuva mu nnaku za bajajammwe mwakyuka ne mukyama okuva ku biragiro byange ne mutabikwata. Mudde gye ndi, nange nadda gye muli era nnaabasonyiwa,” bw'ayogera MUKAMA ow'Eggye. “Naye mwebuuza nti, ‘Tunadda tutya?’

⁸“Omuntu alinyaga Katonda? “Naye mmwe munnyaga. Kyokka mugamba nti, ‘Tukunyaga tutya?’ “Mu biweebwayo ne mu kimu eky'ekkumi.

⁹Mukolimiddwa ekikolimo ekyo, kubanga mmwe, eggwanga lyonna munnyaga nze.

¹⁰Muleete ekimu eky'ekkumi ekijjuvu mu nnyumba yange, ennyumba yange ebeeremu emmere, era mungezese,” bw'ayogera MUKAMA ow'Eggye, “obanga siribaggulirawo ebituli eby'omu ggulu, ne mbawa omukisa ne gutabaako ne we guligya.

¹¹Kale ndikuma ennimiro zammwe ne zitazikirizibwa balabe; so n'omuzabbibu gwammwe ne gutakunkumula bibala byagwo ebitannatuuka kwengera,” bw'ayogera MUKAMA ow'Eggye.

¹²“Era amawanga gonna galibayita ba mukisa: kubanga muliba nsi esanyusa, kino ky'ekisuubizo,” bw'ayogera MUKAMA ow'Eggye.

¹³“Weewaawo ebiambo byammwe gye ndi bibadde bya bukambwe,” bw'ayogera MUKAMA. “Ate nga mugamba nti, ‘Twakwogerako tutya obubi?’

¹⁴“Mwayogera nti, ‘Eby'okuweereza Katonda tebigasa, era kigasa ki okukwata ebiragiro bye era n'okutambilira mu maaso ga MUKAMA ow'Eggye ng'abakungubaga?

¹⁵Okuva kaakano abeegulumiza tubayita ba mukisa; abakozi b'ebibi bakulaakulana era n'abo abasoomoza Katonda nabo bawona.”

¹⁶Abo abatya MUKAMA bayogeragana bokka ne bokka, MUKAMA n'abawulira. Ekitabo eky'okujukira abatya MUKAMA ne balowooza ku linnya lye, ne kiwandiikibwa ng'alaba.

¹⁷"Kale baliba bange," bw'ayogera MUKAMA ow'Eggye, "ku lunaku lwe ndibakyusizaako okuba ekintu kyange eky'omuwendo; era ndibasonyiwa ng'omuzadde bw'asonyiwa mutabani we amuweereza.

¹⁸Omulundi omulala mulyawula omuntuukirivu n'omubi, oyo aweereza Katonda n'oyo atamuweereza."

Malaki 4

Olunaku Iwa MUKAMA

¹"Kubanga, laba, olunaku lujja, lwokya ng'ekikoomi, n'ab'amalala bona n'abo bona abakola ebibi baliba bisasiro: ku lunaku lwennyini balyokerwa ddala," bw'ayogera MUKAMA ow'Eggye, "obutabalekerawo mulandira newaakubadde ettabi.

²Naye mmwe abatya erinnya lyange, enjuba ey'obutuukirivu eribaviirayo ng'erina okuwonya mu biwaawaatiro byayo. Mulifuluma ne muligita ng'ennyana ez'omu kiraalo.

³Era mulirinnya ku babi, kubanga baliba vvü wansi w'ebigere byammwe, ku lunaku lwe ndibalokolerako," bw'ayogera MUKAMA ow'Eggye.

⁴"Mujukire okugonderanga amateeka ga Musa omuddu wange, ebiragiro n'amateeka bye namukwasa ku Kolebu olwa Isirayiri yenna.

⁵"Laba, ndibatumira nnabbi Eriya, olunaku Iwa MUKAMA olukulu olw'entiisa nga terunnatuuka,

⁶era alikomyawo omutima gwa bazadde eri abaana baabwe, n'omutima gw'abaana eri bazadde baabwe; nneme okukolimira ensi."

Luganda [Ganda-2014] - All Bible

Matayo

Matayo 1

Ekitabo ky'Olulyo Iwa Yesu Kristo

- ¹ Luno lwe lulyo lwa Yesu Kristo, omwana wa Dawudi omwana wa Ibulayimu:
- ² Ibulayimu yazaala Isaaka, Isaaka n'azaala Yakobo, Yakobo n'azaala Yuda ne baganda be.
- ³ Yuda n'azaala Pereezi ne Zeera mu Tamali, Pereezi n'azaala Kezirooni, Kezirooni n'azaala Laamu.
- ⁴ Laamu yazaala Aminadaabu, Aminadaabu n'azaala Nasoni, Nasoni n'azaala Salumooni.
- ⁵ Salumooni yazaala Bowaazi mu Lakabu, Bowaazi n'azaala Obedi mu Luusi. Obedi n'azaala Yese.
- ⁶ Yese yazaala Kabaka Dawudi. Dawudi n'azaala Sulemaani mu eyali muka Uliya.
- ⁷ Sulemaani yazaala Lekobowaamu, Lekobowaamu n'azaala Abiya, Abiya n'azaala Asa.
- ⁸ Asa n'azaala Yekosafaati, Yekosafaati n'azaala Yolaamu, Yolaamu n'azaala Uzziya.
- ⁹ Uzziya n'azaala Yosamu, Yosamu n'azaala Akazi, Akazi n'azaala Keezeekiya.
- ¹⁰ Keezeekiya n'azaala Manaase, Manaase n'azaala Amosi, Amosi n'azaala Yosiya.
- ¹¹ Yosiya n'azaala Yekoniya ne baganda be mu kiseera eky'okutwalibwa e Babulooni.
- ¹² Nga bamaze okutwalibwa e Babulooni: Yekoniya n'azaala Seyalutyeri, Seyalutyeri n'azaala Zerubbaberri.
- ¹³ Zerubbaberri n'azaala Abiwuudi, Abiwuudi n'azaala Eriyakimu, Eriyakimu n'azaala Azoli.
- ¹⁴ Azoli n'azaala Zadooki, Zadooki n'azaala Akimu, Akimu n'azaala Eriwuudi.
- ¹⁵ Eriwuudi n'azaala Eriyazaali, Eriyazaali n'azaala Mataani, Mataani n'azaala Yakobo.

¹⁶Yakobo n'azaala Yusufu, oyo ye bba wa Maliyamu eyazaala Yesu ayitibwa Kristo.

¹⁷Noolwekyo emirembe gyonna okuva ku Ibulayimu okutuuka ku Dawudi gyali kkumi n'ena, era okuva ku Dawudi okutuuka ku kuwaŋŋaangusibwa e Babulooni, emirembe kkumi n'ena, era okuva ku kuwaŋŋaangusibwa e Babulooni okutuuka ku Kristo, nagyo emirembe kkumi n'ena.

Okuzaalibwa kwa Yesu

¹⁸Okuzaalibwa kwa Yesu Kristo kwali bwe kuti: Maliyamu nnyina bwe yali ng'akyayogerezebwa Yusufu, era nga tebanaba kufumbiriganwa n'alabika ng'ali lubuto ku bwa Mwoyo Omukuvu.

¹⁹Awo Yusufu eyali amwogereza, olwokubanga yali muntu mulungi n'asalawo mu mutima gwe okumuleka, naye ng'ayagala akikole mu kyama aleme kukwasa Maliyamu nsonyi.

²⁰Naye bwe yali ng'agalamidde ku kitanda kye ng'akyabirowoozaako, n'afuna ekirooto; n'alaba malayika wa Mukama ng'ayimiridde w'ali, n'amugamba nti, "Yusufu, omwana wa Dawudi, totya kutwala Maliyamu okuba mukazi wo! Kubanga olubuto lw'alina yalufuna ku bwa Mwoyo Mutukuvu.

²¹Era alizaala Omwana wabulenzi, olimutuuma erinnya Yesu, (amakulu nti, 'Omulokozi') kubanga y'alirokola abantu bona mu bibi byabwe."

²²Bino byonna byabaawo kisobole okutuukirira ekyayogerwa Mukama ng'ayita mu nnabbi we ng'agamba nti,

²³"Laba omuwala atamanyi musajja aliba olubuto, alizaala omwana wabulenzi, era aliytibwa Emmanweri." Amakulu gaalyo nti, "Katonda ali naffe."

²⁴Yusufu bwe yazuukuka, n'akola nga Malayika bwe yamulagira, n'atwala Maliyamu okuba mukazi we.

²⁵Naye Yusufu n'atamumanya okutuusa lwe yamala okuzaala Omwana. Yusufu n'amutuuma erinnya Yesu.

Matayo 2

Okukyala kw'Abagezigezi

¹Yesu bwe yazaalibwa mu kibuga Besirekemu eky'omu Buyudaaya, ku mulembe gwa Kabaka Kerode, abasajja abagezigezi, abaava ebuvanjuba ne bajja mu Yerusaalemi, nga babuuza nti,

²"Aliwa eyazaalibwa nga Kabaka w'Abayudaaya? Kubanga twalaba emmunyeeny ye nga tuli mu buvanjuba, era tuzze okumusinza."

³Awo Kabaka Kerode bwe yabiwlira ne bimweraliikiriza nnyo, era ne bona abaali mu Yerusaalemi.

⁴N'ayita bakabona abakulu bona n'abawandiisi b'amateeka n'abeebuzaako ekifo Kristo gye yali agenda okuzaalibwa.

⁵Ne bamuddamu nti, "Mu Besirekemu eky'omu Buyudaaya, kyawandiikibwa nnabbi nti,

⁶"Naawe Besirekemu ekya Yuda, toli mutono mu balangira ba Yuda, kubanga omufuzi aliva mu ggwe, alifuga abantu bange Isirayiri."

⁷Awo Kerode n'atumya Abagezigezi kyama, n'ababuuza ebiro emmunyeenye bye yalabikiram.

⁸N'abasindika e Besirekemu ng'agamba nti, "Mugende mubuulirize ebikwata ku mwana. Bwe mumulaba, mukomeewo muntegeezee, nange ḥjende musinze!"

⁹Bwe baamala okuwulira Kabaka bye yabagamba ne bagenda. Bwe baafuluma, emmunyeenye eri gye baalaba ebuvanjuba n'eddamu okubalabikira n'okubakulembera, okutuusa lwe yayimirira waggulu Omwana w'ali.

¹⁰Bwe baalaba emmunyeenye ng'eyimiridde, essanyu lyabwe ne libeera lingi nnyo!

¹¹Bwe baayingira mu nnyumba ne balaba Omwana ne Maliyamu nnyina ne bavuunama ne basinza Omwana. Ne basumulula ensawo zaabwe, ne bamutonera ebirabo, zaabu, n'obubaane n'omugavu.

¹²Awo bwe baalabulibwa mu kirooto baleme kuddayo wa Kerode, bwe batyo ne baddayo ewaabwe nga bayita mu kkubo eddala.

Okuddukira e Misiri

¹³Awo abagezigezi bwe baamala okugenda, malayika wa Mukama n'alabikira Yusufu mu kirooto n'amugamba nti, "Golokoka oddusize Omwana ne nnyina e Misiri, mubeere eyo okutuusa lwe ndibalagira okudda. Kubanga Kerode aija kunoonya Omwana ng'ayagala okumutta."

¹⁴Ekiro ekyo n'asituka n'atwala Omwana ne nnyina e Misiri.

¹⁵Ne babeera eyo okutuusa Kerode bwe yafa. Mukama kye yayogerera mu nnabbi we ne kituukirira, bwe yagamba nti: "Nayita Omwana wange okuva mu Misiri."

Okutta Abaana Abato

¹⁶Kerode bwe yalaba ng'Abagezigezi banyoomye ekiragiro kye, n'asunguwala nnyo, n'atuma abaserikale e Besirekemu ne mu byalo byakyo batte abaana bona aboobulenzi ab'emyaka ebiri n'abatannagiweza, ng'asinziira ku bbanga abagezigezi lye baali bamutegheezeza mwe baalabira emmunyeenye.

¹⁷Awo ekigambo nnabbi Yeremiya kye yayogera ne kiryoka kituukirira ng'agamba nti,

¹⁸“Eddoboozi lyawulirwa mu Laama, okukuba emiranga n'okukungubaga okunene, nga Laakeeri akaabira abaana be, nga tewakyali asobola kumuwooyawooya, kubanga bona baweddewo.”

Okuva e Misiri Okudda e Nazaaleesi

¹⁹Kerode bwe yamala okufa malayika wa Mukama n'alabikira Yusufu mu kirooto e Misiri,

²⁰n'amugamba nti, “Golokoka ozzeeyo Omwana ne nnyina mu Isirayiri, kubanga abaali baagala okutta Omwana bafudde.”

²¹Yusufu n'asitukiramu n'azzaayo Omwana ne nnyina mu nsi ya Isirayiri.

²²Naye bwe yatuuka mu kkubo n'aty a nnyo bwe yawulira nga Alukerawo mutabani wa Kerode ye yali alidde obwakabaka. Mukama n'amulabulira nate mu kirooto aleme kugenda Buyudaaya, bw'atyo n'alaga e Ggaliraaya

²³n'atuuka mu kibuga ky'e Nazaaleesi, ne babeera omwo. Ebigambo bya bannabbi bye baayogera biryoke bituukirire nga bagamba nti: “Aliyitibwa Munnazaaleesi.”

Matayo 3

Yokaana Omubatiza Aluṇṇamya Ekkubo Iya Mukama

¹Mu nnaku ezo Yokaana Omubatiza n'ajja ng'abuulira mu ddungu ly'e Buyudaaya ng'agamba nti,

²“Mwenenye, kubanga obwakabaka obw'omu ggulu bunaatera okutuuka.”

³Oyo nnabbi Isaaya gwe yayogerako ng'agamba nti, “Mpulira eddoboozi ly'oyo ayogerera waggulu mu ddungu ng'agamba nti, ‘Mulongoose oluguudo lwa Mukama, muluṇṇamye amakubo ge!’”

⁴Ebyambalo bya Yokaana byakolebwa mu bwoya bwa ḥṇamira, era nga yeesibya lukoba lwa ddiba. N'emmere ye yali nzige na mubisi gwa njuki.

⁵Abantu bangi ne bava mu Yerusaalemi ne mu Buyudaaya mwonna ne mu bifo ebiriraanye Yoludaani ne bajja mu ddungu okuwulira by'abuulira.

⁶N'ababatiza mu mugga Yoludaani, nga baatula ebibi byabwe.

⁷Naye bwe yalaba Abafalisaayo bangi n'Abasaddukaayo nga bajja okubatizibwa n'abagamba nti, “Mmwe, abaana b'essalambwa, ani yabalabula okudduka obusungu bwa Katonda obugenda okuja?”

⁸Kale mubale ebibala ebiraga nti Mwenenyeza.

⁹Temulowooza mu mitima gyammwe nti, ‘Tuli bulungi kubanga tuli Bayudaaya, abaana ba Ibulayimu, tetufaayo, tetulina kye twetaaga.’ Ekyo tekibasigula. Mbategeeza nti, Katonda ayinza okufuula amayinja gano abaana ba Ibulayimu!

¹⁰Kaakano embazzi ya Katonda eteekeddwa ku buli kikolo kya muti, omuti ogutabala bibala birungi, gutemebwa gusuulibwe mu muliro.

¹¹“Nze mbabatiza na mazzi okutuuka ku kwenenya, naye waliwo omulala ajja, oyo ye ansinga amaanyi era sisaanira na kukwata ngatto ze, oyo alibabatiza ne Mwoyo Mutukuvu n’omuliro.

¹²Ekikuñjunta kiri mu mukono gwe, alirongoosa egguliro lye. Enjaano aligitereka mu tterekero lye, naye ebisusunku alibyokya mu muliro ogutazikira.”

Okubatizibwa kwa Yesu

¹³Awo Yesu n’ava e Ggaliraaya n’ajja ku mugga Yoludaani, abatizibwe Yokaana.

¹⁴Naye Yokaana n’ayagala okugaana, n’agamba nti, “Nze neetaaga ggwe okumbatiza, naye ate gw’ojja gye ndi?”

¹⁵Yesu n’amuddamu nti, “Kkiriza ombatize, kubanga kitugwanidde okutuukiriza obutuukirivu bwonna.” Awo Yokaana n’amukkiriza.

¹⁶Awo amangwago Yesu nga yakamala okubatizibwa nga yaakava mu mazzi, eggulu ne libikkuka n’alaba Omwoyo wa Katonda ng’amukkako mu kifaananyi ky’ejjiba.

¹⁷Eddoboozi ne liva mu ggulu ne ligamba nti, “Ono ye Mwana wange omwagalwa gwe nsanyukira ennyo.”

Matayo 4

Okukemebwa kwa Yesu

¹Awo Yesu n’atwalibwa Mwoyo Mutukuvu mu ddungu okukemebwa Setaani.

²N’amala ennaku amakumi ana ng’asiiba, nga talya, emisana n’ekiro, oluvannyuma enjala n’emuluma.

³Setaani n’ajja gy’ali n’amugamba nti, “Obanga oli Mwana wa Katonda, lagira amayinja gano gafuuke emmere.”

⁴Naye Yesu n’amuddamu nti, “Kyawandiikibwa nti: ‘Omuntu tabeera mulamu na mmere yokka, wabula na buli kigambo ekiva mu kamwa ka Katonda.’”

⁵Awo Setaani n’amutwala mu kibuga ekitukuvu n’amussa ku kitikkiro kya Yeekaalu.

⁶N'amugamba nti, "Obanga oli Mwana wa Katonda weesuule wansi kubanga kyawandiikibwa nti, 'Katonda aliweereza bamalayika be bakuwanirire mu mikono gyabwe oleme okwekoona ekigere kyo ku jjinja.'"

⁷Yesu n'addamu Setaani nti, "Kyawandiikibwa nti, 'Tokemanga Mukama Katonda wo.'"

⁸Ate Setaani n'amutwala ku lusozi oluwanvu n'amulengeza ensi zonna n'obwakabaka bwamu n'ekitiibwa kyabwo kyonna,

⁹n'amugamba nti, "Bino byonna nnaabikuwa bw'onoovuunama n'onsinza."

¹⁰Yesu n'addamu nti, "Vvaawo, genda Setaani. Kyawandiikibwa nti, 'Osinzanga Mukama Katonda wo yekka, era gw'oweerezanga.'"

¹¹Setaani n'amuvira n'agenda. Bamalayika ne bajja ne bamuweereza.

Yesu Atandika Okubuulira

¹²Yesu bwe yawulira nga Yokaana bamusibye mu kkomera n'agenda e Ggaliraaya.

¹³Bwe yava e Nazaaleesi n'agenda abeera e Kaperunawumu ekiri ku lubalama lw'ennyanja mu byalo by'e Zebbulooni n'e Nafutaali.

¹⁴Kino ne kituukiriza ekyayogerwa nnabbi Isaaya ng'agamba nti,

¹⁵"Ensi ya Zebbulooni n'ensi ya Nafutaali, okuliraana ennyanja, n'ebyalo ebiri emitala w'omugga Yoludaani, n'e Ggaliraaya ey'ekyengulu omuli bannaggwanga abangi,

¹⁶abantu abaatuulanga mu kizikiza, balabye Omusana mungi. Abaatuulanga mu nsi ey'ekisiikirize eky'okufa, omusana gubaakidde."

¹⁷Okuva mu kiseera ekyo Yesu n'atandika okubuulira nti, "Mwenenye, kubanga obwakabaka obw'omu ggulu busembedde."

Okuyitibwa kw'Abayigirizwa Abaasooka

¹⁸Yesu bwe yali ng'atambula ku lubalama lw'ennyanja y'e Ggaliraaya n'alaba abooluganda babiri: Simooni, gwe bayita Peetero, ne Andereya, nga basuula obutimba bwabwe mu nnyanja, kubanga baali bavubi.

¹⁹Awo Yesu, n'abagamba nti, "Mujje mungoberere, nange ndibafuula abavubi b'abantu."

²⁰Amangwago ne baleka awo obutimba bwabwe, ne bamugoberera.

²¹Bwe yeeyongerayo katono, n'asanga abooluganda abalala babiri: Yakobo, ne Yokaana, nga batudde ne kitaabwe Zebbedaayo mu lyato nga baddaabiriza obutimba bwabwe, nabo n'abayita bamugoberera.

²²Amangwago, ne baleka awo kitaabwe mu lyato ne bagenda naye.

Yesu Awonya Abalwadde

²³ Yesu n'abuna wonna mu Ggaliraaya ng'ayigiriza mu makuŋjaaniro g'Abayudaaya ng'abuulira Enjiri ey'obwakabaka obw'omu ggulu, era ng'awonya buli ndwadde yonna n'obuyongobevu bwonna mu bantu.

²⁴ Amawulire ag'ebiyamagero bye yakolanga ne gatuuka mu Siriya yonna. Ne bamuleetera abayongobevu, n'abalina ebibabonyaabonya, n'ab'ensimbu n'abo abaaliko baddayimooni, abakoozimbye n'ab'endwadde endala ezitali zimu, bona n'abawonya.

²⁵ Ebibiina binene ne bimugoberera, abantu nga bava mu Ggaliraaya ne mu Dekapoli, ne mu Yerusaalemi ne mu Buyudaaya yonna, n'emitala w'omugga Yoludaani.

Matayo 5

Yesu Ayigiriza ku Lusozi

¹ Awo Yesu bwe yalaba ng'ebibiina byeyongera obungi, n'alinnya ku lusozi, abayigirizwa be ne bajja gy'ali,

² n'abayigiriza ng'agamba nti:

³ “Balina omukisa abaavu mu mwoyo, kubanga abo Obwakabaka obw'omu ggulu bwe bwabwe.

⁴ Balina omukisa abali mu nnaku, kubanga abo balisanyusibwa.

⁵ Balina omukisa abeetoowaze, kubanga abo balisikira ensi.

⁶ Balina omukisa abalumwa enjala olw'obutuukirivu kubanga abo balikkusibwa.

⁷ Balina omukisa ab'ekisa, kubanga abo balikwatirwa ekisa.

⁸ Balina omukisa abalina omutima omulongoofu, kubanga abo baliraba Katonda.

⁹ Balina omukisa abatabaganya, kubanga abo baliyitibwa baana ba Katonda.

¹⁰ Balina omukisa abayigganyizibwa olw'obutuukirivu, kubanga abo obwakabaka obw'omu ggulu bwe bwabwe.”

¹¹ “Mulina omukisa mmwe, bwe banaabavumanga, ne babayigganya, ne baboogerako ebibi ebya buli ngeri, ne babawaayiriza, nga babalanga nze.

¹² Musanyuke era mujaguze kubanga empeera yammwe nnene mu ggulu, ne bannabbi ab'edda bwe baayigganyizibwa bwe batyo.”

Omunno n'Omusana

¹³ "Mmwe muli munnyo gwa nsi. Naye kale bwe guggwaamu obuka, guliba munnyo nate? Olwo gukasukibwa ebweru ne gulinnyirirwa n'ebigere, nga tegukyalina mugaso gwonna.

¹⁴ "Mmwe muli musana gwa nsi. Ekibuga tekikwekebwa ku lusozi.

¹⁵ Era omuntu takoleeza ttabaaza ate n'agisaanikirako ekabbo, wabula agiteeka ku kikondo n'emulisiza bona abali mu nju.

¹⁶ Kale nammwe ebikolwa byammwe ebirungi byakirenga abantu bona, babirabenga, bagulumize Kitammwe ali mu ggulu.

Okutuukiriza Amateeka

¹⁷ "Temulowooza nti Najja okuggyawo amateeka ga Musa oba ebya bannabbi. Sajja okubiggyawo wabula okubituukiriza.

¹⁸ Ddala ddala mbagamba nti Eggulu n'ensi biyinza okuggwaawo, naye ennukuta emu wadde akatonnyeze akamu mu mateeka tebirivaawo okutuusa byonna lwe birituukirira.

¹⁹ Noolwekyo oyo amenya etteeka erisembayo obutono, n'ayigiriza n'abalala okukola bwe batyo, y'alisembayo mu bwakabaka obw'omu ggulu.

²⁰ Naye mbalabula nti Okuggyako ng'obutuukirivu bwammwe businga obw'Abaafalisaayo n'obw'abawandiisi, temuliyingira mu bwakabaka bwa mu ggulu."

Etteeka ly'Obutemu

²¹ "Mwawulira ab'edda bwe baagambibwa nti, 'Tottanga, na buli anattanga, anaawozesebwa.'

²² Naye mbagamba nti Buli alisunguwalira muganda we aliwozesebwa. Na buli anaagambanga muganda we nti, 'Laka,' anaatwalibwa mu lukiiko lw'abakulembeze b'Abayudaaya n'awozesebwa. Na buli anaagambanga nti, 'Musirusiru,' asaanidde okusuulibwa mu muliro ogwa ggeyeena.

²³ "Bw'obanga oli mu maaso ga Katonda, ng'omuleetedde ekirabo eky'okuwaayo nga ssaddaaka, n'ojukira nga waliwo gw'olinako ensonga,

²⁴ ekirabo kyo sooka okireke awo oddeyo omale okumwetondera mutegeeragane, olyoke okomewo oweeyo ekirabo kyo eri Katonda.

²⁵ "Tegeeragananga mangu n'oyo akuwawaabira nga mukyali mu kkubo aleme kukutwala wa mulamuzi, n'omulamuzi okukuwaayo eri omuserikale, n'omuserikale okukuteeka mu kkomera.

²⁶ Nkutegeeza nti Olibeera omwo okutuusa lw'olimalayo byonna by'obanjibwa."

Etteeka ly'Obwenzi

²⁷ “Mwawulira bwe kyagambibwa nti, ‘Toyendanga!’

²⁸Naye mbagamba nti Buli muntu atunuulira omukazi n'amwegomba aba amaze okumwendako mu mutima gwe.

²⁹Noolwekyo obanga eriiso Lyo erya ddyo likuleetera okwesittala, liggyeemu olisuule wala. Kubanga kirungi okugenda mu ggulu ng'ebitundu byo ebimu tobirina okusinga okugenda nabyo byonna mu ggeyeena.

³⁰Era obanga omukono gwo ogwa ddyo gukukozesa ebibi, kirungi okugutemako ogusuule wala. Okugenda mu ggulu ng'ekitundu ky'omubiri gwo ekimu tokirina kisinga okugenda mu ggeyeena n'ebitundu by'omubiri gwo byonna.

³¹Kyagambibwa nti, ‘Buli anaagobanga mukazi we, anaawanga omukazi oyo ebbaluwa ey'okumugoba.’

³²Naye mbagamba nti Buli anaagobanga mukazi we wabula olw'obwenzi anaabanga amwenzesenza, n'oyo anaawasanga omukazi gwe bagobye anaabanga ayenze.”

Okulayira

³³ “Mwawulira bwe kyagambibwa ab'edda nti, ‘Buli kye weeyamanga eri Mukama okituukirizanga.’

³⁴Naye mbagamba nti: Temulayiranga n'akatono! Temulayiranga ggulu, kubanga ye ntebe y'obwakabaka bwa Katonda.

³⁵Temulayiranga nsi, kubanga y'entebe y'ebigere bye. Temulayiranga Yerusaalemi, kubanga ky'ekibuga kya Kabaka omukulu.

³⁶Era tolayiranga mutwe gwo, kubanga toyinza na kufuula luviri lwo olumu okuba olweru oba oluddugavu.

³⁷Naye muddangamuuzzi nti, ‘Weewaawo.’ Oba nti, ‘Si weewaawo’. Kubanga bw'ogezaako okukakasa ebigambo byo n'okulayira kiraga nti waliwo ekitali kituufu.”

Eriiso Okugatta Eriiso

³⁸ “Mwawulira nga kyagambibwa nti, ‘Omuntu bw'anaggyangamu eriiso lya munne n'eriryen linaggibwangamu. Oba omuntu bw'anaaggyangamu erinnyo lya munne, n'eriryen banaalikuulangamu.’

³⁹Naye mbagamba nti, Temuwakananga na mubi, naye omuntu bw'akukubanga oluyi ku ttama erya ddyo omukyusizanga n'ettama eryokubiri.

⁴⁰Omuntu bw'ayagalanga okuwoza naawe atwale essaati yo, omulekeranga n'ekkooti yo.

⁴¹N'oyo akuwalirizanga okumwetikkirako omugugu gwe kilomita emu, omutwalirangako n'eyokubiri.

⁴²Akusaba omuwanga, n'oyo ayagala okukwewolako tomukubanga mabega."

Mwagale Abalabe Bammwe

⁴³ "Mwawulira ab'edda bwe baagambibwa nti, 'Yagalanga muliraanwa wo, naye okyawenga mulabe wo.'

⁴⁴Naye nze mbagamba nti, Mwagalenga abalabe bammwe! Musabirenga ababayigganya!

⁴⁵Bwe mulikola bwe mutyo muliba baana ba Kitammwe ali mu ggulu. Kubanga omusana gwe agwakiza abalungi n'ababi, era n'enkuba agitonnyeza ab'amazima n'abatali ba mazima.

⁴⁶Bwe mwagala ababaagala bokka, mufunamu ki? N'abawooza bwe bakola bwe batyo.

⁴⁷Era bwe munaalamusanga baganda bammwe bokka, munaaba mulina njawulo ki n'abalala? Kubanga ne bannamawanga bwe bakola bwe batyo.

⁴⁸Naye mmwe kibagwanira okubeeranga abatuukirivu nga Kitammwe ali mu ggulu bw'ali Omutuukirivu."

Matayo 6

Okuwa Abaavu

¹ "Mwegendereze, ebikolwa byammwe eby'obutuukirivu obutabikoleranga mu lujjudde lw'abantu nga mwagala babasiime, kubanga bwe munaakolanga bwe mutyo Kitammwe ali mu ggulu talibawa mpeera."

² "Bw'obanga ogabira omwavu ekintu teweeraganga nga bannanfuusi bwe bakola ne basooka okufuuwa ejjombe mu makuŋjaaniro ne mu nguudo, nga bagenda okugabira abaavu, abantu babalabe babawe ekitiibwa. Ddala ddala mbagamba nti Abo, eyo y'empeera yaabwe.

³Naye ggwe bw'obanga ogabira omuntu yenna ekintu omukono gwo ogwa kkono guleme kumanya ogwa ddyo kye gukola.

⁴Kale Kitaawo amanyi ebyama byonna alikuwa empeera."

Okusaba

⁵ "Era bwe mubanga musaba mwekuume obutaba nga bannanfuusi abaagala okweraga nga bwe bali bannaddiini, ne basabira mu makuŋjaaniro ne ku nguudo mu lujjudde, abantu babalabe. Abo, eyo y'empeera yokka gye balifuna.

⁶Naye ggwe bw'obanga osaba, oyingiranga mu nnyumba yo, ne weggalira mu kisenge kyo n'osabira eyo mu kyama. Kitaawo ategeera ebyama byo byonna alikuwa by'omusabye.

⁷Era bwe musabanga temuddinjananga mu bigambo oba okwogera ebiambo enkumu ng'abatamanyi Katonda bwe bakola nga balowooza nti Bwe banaddinjana mu bigambo emirundi n'emirundi okusaba kwabwe lwe kunaddibwamu.

⁸Kale temubafaanananga, kubanga Kitammwe amanyidde ddala byonna bye mwetaaga ne bwe muba nga temunnamusaba.”

⁹Noolwekyo mumusabenga bwe muti nti, Kitaffe ali mu ggulu, Erinnya Lyo litukuzibwe.

¹⁰Obwakabaka bwo bujje. By'oyagala bikolebwe mu nsi, nga bwe bikolebwa mu ggulu.

¹¹Otuwenga emmere yaffe eya buli lunaku.

¹²Tusonyiwe ebyonoono byaffe nga naffe bwe tusonyiwa abatwonoona.

¹³Totuganya kukemebwa naye tulokole eri omubi.

¹⁴“Kubanga bwe munaasonyiwanga ababasobezza, nammwe Kitammwe ali mu ggulu anaabasonyiwanga.

¹⁵Naye bwe mutaasonyiwenga bannammwe, nammwe Kitammwe ali mu ggulu taabasonyiwenga.”

Okusiiba

¹⁶“Bwe musiibanga, temukiraganga nga bannanfuusi bwe bakola. Kubanga batunuza ennaku balyoke balabike mu bantu nti basiiba, mbategeeza ng'abo, eyo y'empeera yokka gye bagenda okufuna.

¹⁷Naye ggwe bw'osiibanga olongoosanga enviiri zo n'onaaba ne mu maaso,

¹⁸abantu baleme kutegeera nti osiiba, okuggyako Kitaawo ali mu ggulu era alaba mu kyama alikuwa empeera.”

Obugagga obw'Amazima

¹⁹“Temweterekeranga byabugagga wano ku nsi kwe biyinza okwonoonebwa ennyenje n'obutalagge, n'ababbi kwe bayinza okubbibira.

²⁰Naye mweterekerenga obugagga bwammwe mu ggulu gye butayinza kwonoonebwa nnyenje wadde obutalagge, n'ababbi gye batayinza kuyingira kububba.

²¹Kubanga obugagga bwo gye buli n'omutima gwo gye gunaabeeranga.”

²² “Eriiso y’ettabaaza y’omubiri gwo, noolwekyo eriiso bwe liba eddamu, omubiri gwo gwonna gujula ekitangaala ng’eky’omusana.

²³ Naye eriiso lyo bwe liba ebbi, omubiri gwo gwonna gunaabeeranga n’ekizikiza, noolwekyo ekizikiza ekyo kiba kikwafu nnyo!”

²⁴ “Tewali n’omu ayinza kuweereza bakulu babiri, kubanga alikyawako omu n’ayagala omulala oba aliwulirako omu n’anyooma omulala. Toyinza kuweereza Katonda na mamona.”

Temveraliikiriranga

²⁵ “Noolwekyo mbagamba nti, Temveraliikiriranga bya bulamu bwammwe, bye munaalya oba bye munaanywa, wadde ebyokwambala. Kubanga obulamu businga ebyokulya, n’omubiri gusinga ebyambalo.

²⁶ Mulabire ku nnyonyi ez’omu bbanga! Tezisiga so tezikungula so tezikunjaanyaiza mmere mu tterekero, naye Kitammwe ali mu ggulu aziriisa. Naye mmwe temusinga nnyo ennyonyi ezo?

²⁷ Ani ku mmwe, bwe yeeraliikirira, ayinza okwongerayo obulamu bwe akatundu n’akamu?”

²⁸ “Naye lwaki mveraliikirira ebyokwambala? Mulabire ku malanga ag’oku ttale! Tegaliiko kye geekolera,

²⁹ naye ne Kabaka Sulemaani mu kitibwa kye kyonna teyagenkana mu kwambala.

³⁰ Naye obanga Katonda ayambaza obulungi bw’atyo omuddo ogw’omu nsiko ogw’ekiseera obuseera, ogubaawo leero ate enkeera ne gwokebwa mu kyoto, talisingawo nnyo okubambaza? Nga mulina okukkiriza okutono!

³¹ Noolwekyo temveraliikiriranga nga mugamba nti, ‘Tunaalya ki? Oba nti, Tunaanywa ki? Oba nti, Tunaayambala ki?’

³² Ebyo byonna bannamawanga bye bayaayaanira. Naye Kitammwe ali mu ggulu amanyi ng’ebyo byonna mubyetaaga.

³³ Naye musooke munoonye obwakabaka bwa Katonda n’obutuukirivu bwe, ebyo byonna mulibyongerwako.

³⁴ Noolwekyo temveraliikiriranga bya nkya. Kubanga olunaku olw’enkyia lulyeraliikirira ebyalwo. Buli lunaku lulina emitawaana gyalwo egimala.”

Matayo 7

Temunoonyanga Bisobyo ku Bannammwe

¹ “Temusalanga musango, nammwe muleme okusalirwa omusango.

²Kubanga nga bwe musalira abalala nammwe bwe mujanga okusalirwa. Ekigera kye mugereramu, nammwe kye muligererwamu.”

³“Ofaayo ki ku kasasiro akali ku liiso lya muganda wo so nga ku liryo kuliko kisiki kiramba?

⁴Oyinza otya okugamba muganda wo nti, ‘Leka nkuggyecko akasasiro akakuli ku liiso,’ so nga ku liryo kuliko kisiki?

⁵Munnanfuusi ggwe! Sooka oggyeko ekisiki ekiri ku liiso lyo olyoke olabe bulungi nga bw’oggyako akasasiro akali ku liiso lya muganda wo.”

⁶“Temuddiranga bintu bitukuvu ne mubiwa embwa. N’embizzi temuzisuuliranga mayinja ag’omuwendo omungi, kubanga zigenda kugalinnyirira, n’oluvannyuma zikyuke zibalume.”

Musabe, munoonye, mwelianjule

⁷“Musabe, munaaweebwa. Munooonye, munaazuula. Era mukonkone munaggulirwawo.

⁸Kubanga buli asaba aweebwa, n’oyo anoonya, azuula, n’oyo akonkona aggulirwawo.”

⁹“Oba muntu ki mu mmwe singa omwana we amusaba omugaati, ayinza okumuwa ejjinja?

¹⁰Oba singa asabye ekyennyanja, kitaawe ayinza okumuwa omusota?

¹¹Obanga mmwe abantu ababi musobola okuwa abaana bammwe ebirabo ebirungi, Kitammwe ali mu ggulu talisingawo okubawa ebirungi bye mumusaba?

¹²Noolwekyo ebintu byonna bye mwagala abantu okubakoleranga, nammwe mubibakoleranga, kubanga ebyo bye biri mu mateeka ne mu bunnabbi.”

Omulyango omufunda n’omugazi

¹³“Muyingirire mu mulyango omufunda! Kubanga ekkubo erigenda mu kuzikirira ddene n’omulyango mugazi, n’abalonda ekkubo eryo bangi.

¹⁴Kubanga omulyango mufunda, n’ekkubo eridda eri obulamu ffunda, era n’abaliraba batono.”

Omuti n’Ebibala

¹⁵“Mwekuume abayigiriza ab’obulimba, abajja nga bambadde amaliba g’endiga, songa munda gy’emisege egigenda okubataagulataagula.

¹⁶Mulibalabira ku bikolwa byabwe, ng’omuti bwe muguteeerera ku bibala byagwo. Omuntu tayinza kunoga mizabbibu ku busaana oba okunoga ettiini ku mweramannyo.

¹⁷Noolwekyo buli muti omulungi gubala ebibala ebirungi, naye omuti omuvundu gubala ebibala ebibi.

¹⁸Omuti omulungi teguyinza kubala bibala bibi, n'omuti omuvundu teguyinza kubala bibala birungi.

¹⁹Omuti gwonna ogutabala bibala birungi gutemebwa ne gusuulibwa mu muliro.

²⁰Noolwekyo mulibategeerera ku bibala byabwe."

²¹ "Si bona abampita nti, 'Mukama waffe, Mukama waffe,' be baliyingira obwakabaka obw'omu ggulu, wabula abo bokka abakola ebyo Kitange ali mu ggulu by'ayagala.

²²Ku lunaku Iuli bangi baliŋjamba nti, 'Mukama waffe, Mukama waffe, twayogeranga eby'obunnabbi mu linnya lyo, era ne tugoba ne baddayimooni mu linnya lyo, ne tukola n'eb Yamagero bingi mu linnya lyo.'

²³Ndibaddamu nti, 'Sibamanyi, muve mu maaso gange, kubanga ebikolwa byammwe byali bibi.'"

Omuzimbi Omugezi n'atali Mugezi

²⁴ "Noolwekyo buli awulira ebigambo byange, n'abikola, alifaananyizibwa ng'omusajja ow'amagezi eyazimba enju ye ku lwazi.

²⁵Enkuba n'etonna, emigga ne gikulukuta, omuyaga ne gujja, ne bikuba enju eyo naye n'etegwa kubanga yazimbibwa ku lwazi.

²⁶Naye buli awulira ebigambo byange n'atabikola, alifaananyizibwa ng'omusajja omusirusiru eyazimba ennyumba ye mu musenyu.

²⁷Enkuba n'etonna, emigga ne gikulukuta, omuyaga ne gujja, ne bikuba ennyumba eyo, n'egwa, n'okugwa kwayo ne kuba kunene."

²⁸ Awo Yesu n'amaliriza ebigambo bye ebyo. Abantu bona ne beewuunya nnyo olw'okuyigiriza kwe.

²⁹Kubanga yabayigiriza nga nannyini buyinza, so si ng'abannyonnyozi b'amateeka baabwe bwe baayigirizanga.

Matayo 8

Yesu Awonya Omugenge

¹Awo Yesu bwe yava ku lusozi ekibiina kinene ne kimugoberera.

²Omusajja omugenge n'ajja gy'ali n'amuvuunamira ng'agamba nti, "Mukama wange, bw'obanga oyagala oyinza okunnongoosa."

³Yesu n'agolola omukono gwe n'amukwatako n'amugamba nti, "Njagala, longooka." Amangwago omusajja n'awona ebigenge.

⁴Yesu n'amugamba nti, "Laba, tobaako muntu n'omu gw'obuulira, wabula genda weerage eri kabona otwaleyo n'ekirabo nga Musa bwe yalagira, kibeere obujulirwa gye bali."

Okukkiriza kw'Omuserikale Omuruumi

⁵Awo Yesu bwe yayingira mu Kaperunawumu, omuserikale Omuruumi, omukulu w'ekitongole ky'abaserikale ekikumi, n'ajja n'amwegayirira,

⁶ng'agamba nti, "Mukama omulenzi wange mulwadde nnyo, amaze ebbanga ddene ng'akoozimbye ali ku kitanda era abonaabona nnyo."

⁷Yesu n'amuddamu nti, "Nnajja ne mmuwonya."

⁸Omukulu w'ekitongole n'agamba Yesu nti, "Mukama, sisaanira kukuyingiza mu nnyumba yange, yogera bwogezi ekigambo, omulenzi wange anaawona!"

⁹Kubanga nange waliwo abakulu abantwala, ate nga nange nnina be nfuga. Bwe ndagira omu nti, 'Genda,' agenda, n'omulala nti, 'Jjangu,' era ajja, n'omuddu wange nti, 'Kola kino,' akikola."

¹⁰Yesu bwe yawulira ekyo ne yeewunya nnyo, n'agamba abaali bamugoberera nti, "Ddala ddala mbagamba nti, Sinnalabayo muntu alina kukkiriza nga kuno wadde mu lsirayiri!"

¹¹Mbagamba nti bangi baliva ebuvanjuba n'ebugwanjuba ne batuula wamu ne Ibulayimu ne Isaaka ne Yakobo mu bwakabaka obw'omu ggulu.

¹²Naye abaana b'obwakabaka, baligoberwa ebweru mu kizikiza ekikutte, eriba okukuba ebiwoobe n'okuluma obuji."

¹³Awo Yesu n'agamba omukulu w'ekitongole Omuruumi nti, "Ggenda. Nga bw'okkirizza kikukolerwe." Omulenzi we n'awonerawo mu kiseera ekyo.

Yesu Awonya Nnyina wa muka Peetero

¹⁴Awo Yesu bwe yayingira mu maka ga Peetero yasanga nnyina wa muka Peetero alwadde omusujja mungi, ng'agalamidde ku kitanda.

¹⁵Yesu n'amukwata ku mukono omusujja ne gumuwonako, n'agolokoka n'amuweereza.

¹⁶Obudde bwe bwawungeera, ne bamuleetera abalwadde bangi abaaliko baddayimooni. N'ayogera bwogezi kigambo baddayimooni n'abagoba, era n'awonya n'abalala bonaabaali balwadde.

¹⁷Bwe kityo ekigambo ekyayogerebwa mu nnabbi Isaaya ne kituukirira bwe yagamba nti: "Yatuwonya endwadde zaffe, era n'atwala obunafu bwaffe."

Okugoberera Yesu

¹⁸Awo Yesu bwe yalaba ng'ekibiina ekimwetoolodde kinene n'alagira bawunguke balage ku ludda olulala.

¹⁹Omukulu ku bawandiisi b'amateeka n'amuseemberera n'amugamba nti, "Omuyigiriza, nnaakugobereranga wonna w'onoogendanga!"

²⁰Yesu n'amuddamu nti, "Ebibe birina obunnya mwe bisula, n'ennyonyi ez'omukulu bbanga zirina ebisu, naye Omwana w'Omuntu talina kifo kya kuwumulizaamu mutwe gwe."

²¹Omuyigirizwa we omukulu n'amugamba nti, "Mukama wange, nzikiriza mmale okugenda okuziika kitange."

²²Naye Yesu n'amuddamu nti, "Ngoberera! Leka abo abafu baziike abafu baabwe."

²³Yesu n'ayingira mu lyato n'abayigirizwa be.

²⁴Awo omuyaga mungi ogw'amaanyi ne gujja ku nnyanja, amayengo amagulumivu ne gaba kumpi okubuutikira eryato. Naye yali yeebase.

²⁵Abayigirizwa be ne bajja gy'ali ne bamuzuukusa nga bagamba nti, "Mukama waffe, tulokole, tusaanawo!"

²⁶Yesu n'abaddamu nti, "Mmwe abalina okukkiriza okutono! Lwaki mutya bwe mutyo?" N'agolokoka n'aboggolera omuyaga. Omuyaga ne guggwaawo, ennyanja n'eteeka.

²⁷Naye abayigirizwa ne bawuniikirira nnyo! Ne beebuuza nti, "Muntu ki ono, omuyaga n'enyanja gwe bigondera?"

²⁸Awo bwe yatuuka emitala w'eri mu nsi y'Abagadalen, abasajja babiri abaaliko baddayimooni ne bava mu malaalo ne bajja gy'ali. Baali bakambwe nnyo, nga tewali na muntu ayinza kuyita mu kkubo eryo.

²⁹Ne bawowoggana nnyo nti, "Otwagaza ki, ggwe Omwana wa Katonda! Ojjidde ki okutubonyaabonya ng'ekiseera kyaffe tekinnaba kutuuka?"

³⁰Walako ne we baali waaliwo eggana ly'embizzi nga zirya,

³¹baddayimooni ne basaba Yesu nti, "Obanga ogenda kutogoba ku bantu bano, tusindike mu ggana ly'embizzi."

³²Yesu n'agamba baddayimooni nti, "Kale, mugende." Ne bava ku bantu, ne bayingira mu mbizzi, eggana lyonna ne lifubutuka ne liva ku bbangabanga ne lyeyiwa mu nnyanja embizzi zonna ne zisaanawo.

³³Naye abaali balunda embizzi ne badduka ne bagenda mu kibuga ne babuuliraabantu byonna ebibaddewo, n'eby'abasajja abaaliko baddayimooni.

³⁴abantu b'omu kibuga bona ne bafuluma okuja okusisinkana Yesu. Bwe baamulaba ne bamwegayirira abaviire mu kitundu kyabwe.

Matayo 9

Yesu Awonya eyali Akoozimbye

¹ Awo Yesu n'asaabala mu lyato n'awunguka n'atuuka mu kibuga ky'ewaabwe, Kaperunawumu.

² Amangwago ne bamuleetera omuntu eyali akoozimbye nga bamusitulidde ku katanda. Bwe yalaba okukkiriza kwabwe n'agamba omulwadde nti, "Mwana wange, guma omwoyo, nkusonyiye ebibi byo!"

³ Naye waaliwo abamu ku bannyonnyozi b'amateeka ne boogeraganya bokka na bokka nti, "Omuntu ono avvoola! Alowooza nti Ye Katonda!"

⁴ Yesu n'amanya bye balowooza. N'abagamba nti, "Lwaki mubeera n'ebirowoozo ebibi mu mitima gyammwe?

⁵ Ekyo buli muntu ayinza okukyogera, kubanga kwogera bwogezi.

⁶ Naye mutegeere nga Omwana w'Omuntu alina obuyinza ku nsi okusonyiwa ebibi." Awo n'agamba akoozimbye nti, "Yimirira weetikke akatanda ko, weddireyo ewammwe!"

⁷ N'ayimirira ng'awonye, ne yeddirayo eka.

⁸ Naye abantu abaali mu bibiina bwe baalaba ekyamagero kino ne beewuunya nnyo! Ne bagulumiza Katonda eyawa abantu obuyinza obwenkaniddaawo!

Okuyitibwa kwa Matayo

⁹ Awo Yesu bwe yava mu kifo ekyo n'alaba omuntu, erinnya lye Matayo, ng'atudde mu kifo we basolooleza omusolo, n'amugamba nti, "Ngoberera." Bw'atyo naye n'asitukiramu n'agoberera Yesu.

¹⁰ Awo Yesu bwe yali ng'atudde ku mmere mu nnyumba ya Matayo, abawooza bangi n'abantu abaali bamanyiddwa mu kitundu ekyo nti babi ne bajja ne batuula naye n'abayigirizwa be ku mmere ne balya.

¹¹ Naye Abafalisaayo bwe baakiraba, ne bagamba abayigirizwa be nti, "Lwaki Mukama wammwe alya n'abawooza n'abantu abalina ebibi?"

¹² Yesu bwe yawulira n'abaddamu nti, "Abalamu tebeetaaga musawo wabula abalwadde.

¹³ Mugende muyige amakulu g'Ekyawandiikiba kino nti, 'Ssaddaaka zammwe n'ebirabo byammwe si bye neetaaga, wabula neetaaga mubeerenga ba kisa.' Najjirira kuyita boonoonyi, so sajjirira abo abeerowooza nti batuukirivu."

¹⁴ Lwali lumu abayigirizwa ba Yokaana ne bajja eri Yesu ne bamabuuza nti, "Lwaki abayigirizwa bo tebasiiba nga ffe n'Abaafalaayo bwe tukola?"

¹⁵ Yesu n'ababuuza nti, "Mikwano gy'omugole bayinza okunakuwala ng'omugole akyali nabo? Naye ekiseera kirituuka omugole lwalibaggibwako. Olwo nno balisiiba.

¹⁶ "Tewali muntu atunga kiwero kiggya mu lugoye lukadde, kubanga, ekiwero bwe kyetugga kiyuza olugoye olukadde, n'ekituli ne kigaziwa.

¹⁷ Era tewali ateeka wayini musu mu nsawo ez'amaliba enkadde. Ensawo enkadde zaabika wayini n'ayiika n'ensawo ne zoonooneka. Wayini omusu bamuteeka mu nsawo z'amaliba maggya, byombi ne bitayonooneka."

¹⁸ Bwe yali ng'akyayogera nabo omufuzi n'ajja, n'amusinza n'amugamba nti, "Omwana wange omuwala anfuddeko, naye singa ojja n'omukwatako anaalamuka."

¹⁹ Yesu bwe yasituka n'abayigirizwa be okugenda mu maka g'omukulu w'ekkuŋŋaaniro,

²⁰ omukazi eyali alwadde ekikulukuto ky'omusaayi, okumala emyaka kkumi n'ebiri, n'ajja emabega we n'akoma ku lukugiro lw'ekyambalo kye.

²¹ Kubanga y'agamba mu mutima gwe nti, "Ne bwe nnaakoma obukomi ku kyambalo kye nnaawona."

²² Yesu n'akyuka n'alaba omukazi n'amugamba nti, "Muwala, guma omwoyo! Owonye olw'okukkiriza kwo." Omukazi n'awonera mu kiseera ekyo.

²³ Awo Yesu bwe yatuuka mu maka g'omufuzi n'asanga abafuuyi b'amakondeere n'ekibiina nga kijagaladde,

²⁴ n'agamba nti, "Mufulume kubanga omuwala tafudde wabula yeebase bwebasi." Bonna ne bamusekerera nga bwe beesooza.

²⁵ Naye abantu bwe bamala okufuluma, Yesu n'ayingira, n'akwata omukono gw'omuwala, n'agolokosa omuwala.

²⁶ Ebigambo ebyo ne bibuna mu kitundu ekyo kyonna.

Yesu Awonya Bamuzibe ne Bakiggala

²⁷ Awo Yesu bwe yava eyo, abazibe b'amaaso babiri ne bamugoberera nga bwe baleekaana nti, "Ayi Omwana wa Dawudi, otusaasire!"

²⁸ Bwe yatuuka mu nju, bamuzibe ne bajja w'ali. Yesu n'ababuuza nti, "Mukkiriza nga nnyinza okubazibula amaaso?" Ne bamuddamu nti, "Weewaawo, Mukama waffe."

²⁹Awo n'akoma ku maaso gaabwe n'abagamba nti, "Kale, olw'okukkiriza kwammwe, kye musabye mukiweereddwa."

³⁰Amangwago amaaso gaabwe ne gazibuka. Yesu n'abakuutira nnyo baleme kubuulirako muntu yenna ng'abagamba nti, "Mulabe nga tewaba n'omu ategeera bibaddewo."

³¹Naye bwe baava awo, ne bagenda nga basaasaanya ebigambo ebyo, nga babuulira buli muntu gwe baasisinkananga mu kitundu ekyo.

³²Awo Yesu ne be yali nabo, bwe baali bafuluma ne bamuleetera kiggala eyali tayogera kubanga yaliko dayimooni.

³³Yesu n'amugobako dayimooni, era amangwago abadde kiggala n'ayogera. Ekibiina ky'abantu ne beewuunya nnyo nga bagamba nti, "Kino tekibangawo mu Isirayiri."

³⁴Naye Abafalisaayo ne bagamba nti, "Agoba baddayimooni lwa kubanga ye mukulu wa baddayimooni!"

³⁵Yesu n'agenda ng'ayita mu bibuga byonna eby'omu kitundu ekkyo, ne mu byalo ng'ayigiriza mu makuŋjaaniro gaabwe, era ng'abuulira Enjiri ey'obwakabaka. Era buli we yatuukanga n'awonya abalwadde n'abakoozimbye bona.

³⁶Awo bwe yatunuulira ekibiina ky'abantu nga bajja gy'ali, nga bakooye nnyo, era nga basaasaanye ng'endiga ezitalina musumba, n'abasaasira nnyo.

³⁷N'agamba abayigirizwa be nti, "Eby'okukungula bingi nnyo, naye abakozi abakungula batono.

³⁸Noolwekyo musabe nannyini nnimiro, aweereze abakozi mu nnimiro ye."

Matayo 10

Yesu Atuma Abayigirizwa Ekkumi n'Ababiri

¹Awo Yesu n'ayita abayigirizwa be ekkumi n'ababiri, ne bajja gy'ali n'abawa obuyinza okugobanga baddayimooni, n'okuwonyanga buli ndwadde n'okukozimba ebya buli ngeri.

²Amannya g'abayigirizwa ekkumi n'ababiri ge gano: Simooni, ayitibwa Peetero; ne Andereya, muganda wa Peetero; ne Yakobo, omwana wa Zebbedaayo; ne Yokaana, muganda wa Yakobo;

³Firipo; ne Battolomaayo; ne Tomasi; ne Matayo, omusolooza w'omusolo; ne Yakobo, omwana wa Alufaayo; ne Saddayo;

⁴ne Simooni, Omukananaayo; ne Yuda Isukalyoti, eyalya mu Yesu olukwe.

⁵ Abo ekkumi n'ababiri Yesu n'abatuma ng'abalagira nti: "Temugenda eri bannamawanga wadde mu kibuga ky'Abasamaliya.

⁶ Naye mugende eri abaana ba Isirayiri, endiga za Katonda ezaabula.

⁷ Mugende mubabuulire nti, 'Obwakabaka obw'omu ggulu busembedde.'

⁸ Muwonye abalwadde, muzuukize abafu, mulongoose abagenge, era mugobe ne baddayimooni. Muweereddwa buwa nammwe muwenga buwa.

⁹ "Temubanga na zaabu oba ffeeza wadde ekikomo mu nkoba zammwe,

¹⁰ wadde ensawo ey'oku mugongo, wadde essaati ebbiri, wadde omugogo gw'engatto omulala, wadde omuggo. Kubanga omukozi asaanira okuweebwa eby'okumuyamba.

¹¹ Buli kibuga oba kyalo mwe mutuukanga, munoonyengamu amaka g'omuntu asaanidde, musulenga omwo okutuusa lwe mulivaayo.

¹² Bwe muyingiranga mu nnyumba mubeeyanjulire, amaka ago mugalagenga okwagala kwammwe.

¹³ Amaka ago bwe gabanga ag'abantu abasaanidde, emirembe gyammwe ginaabeeranga ku bo, naye bwe gatabanga bwe gatyo emirembe gyammwe ginaabaddiranga.

¹⁴ Buli atabasembezenga wadde okuwuliriza ebigambo byammwe, bwe mubanga muva mu kibuga ekyo oba mu nnyumba eyo, mukunkumulanga enfuufu ey'oku bigere byammwe.

¹⁵ Ddala ddala mbagamba nti ensi ya Sodomu ne Ggomola ziriweebwa ekibonerezo ku lunaku olw'okusalirako omusango ekirigumiikirizika okukira ekibuga ekyo oba amaka ago.

¹⁶ "Laba mbatuma ng'endiga mu misege. Noolwekyo mubeere bagezigezi ng'emisota, era abataliiko kya kunenyezebwangya ng'amayiba.

¹⁷ Mwekuume abantu! Kubanga balibawaayo eri enkiiko z'Abakadde, ne mu makunjaaniro gaabwe, ne babakuba emigo.

¹⁸ Mulitwalibwa mu maaso ga bagavana ne bakabaka ku lwange, okuba abajulirwa eri bo n'abannaggwanga.

¹⁹ Bwe muweebwangayo, temveraliikiriranga kye munaawoza, kubanga kinaabaweebwanga mu kiseera ekyo.

²⁰ Kubanga si mmwe mugenda okwogera wabula Omwoyo wa Kitammwe y'alyogerera mu mmwe!

²¹ "Owooluganda aliwaayo muganda we okuttibwa era n'abazadde baliwaayo abaana baabwe okuttibwa. Abaana nabo balyefuukira bazadde baabwe ne babatta.

²² Mulikyayibwa abantu bona olw'erinnya lyange. Naye oyo aligumiikiriza okutuuka ku nkomerero alirokolebwa.

²³ Bwe babayigganya mu kibuga ekimu muddukirenga mu kirala! Ddala ddala mbagamba nti muliba temunnabuna bibuga bya Isirayiri, Omwana w'Omuntu n'ajja.

²⁴ "Omuyigirizwa tasinga amusomesa, so n'omuddu tasinga mukama we.

²⁵ Kirungi omuyigirizwa okuba ng'omusomesa we, n'omuddu okuba nga mukama we. Obanga nnannyinimu ayitibwa Beeruzebuli, tekisingawo nnyo ku b'omu nju ye.

²⁶ "Noolwekyo temubatyanga. Teri kyakisibwa ekitalimanyibwa, era tewali kyakwekebwka ekitalizuulibwa.

²⁷ Buli kye mbabuulira mu kizikiza mukyogereranga mu musana, na buli kye mbagamba mu kaama, nakyo mukyasanguzanga waggulu ku nnyumba.

²⁸ Era temubatyanga abo abatta omubiri kubanga tebasobola kutta mwoyo! Naye mutyenga oyo yekka, ayinza okuzikiriza byombi omwoyo n'omubiri mu ggeyeena.

²⁹ Enkazaluggya ebbiri tezigula sente emu? Naye tewali n'emu ku zo eyinza okuttibwa nga Kitammwe tamanyi.

³⁰ Era buli luviiiri oluli ku mitwe gyammwe lwabalibwa.

³¹ Kale temveraliikiriranga kubanga mmwe muli ba muwendo munene eri Kitammwe okusinga enkazaluggya ennyingi.

³² "Buli muntu alinjatulira mu maaso g'abantu, nange ndimwatulira mu maaso ga Kitange ali mu ggulu.

³³ Na buli muntu alinneegaanira mu maaso g'abantu, nange ndimwegaanira mu maaso ga Kitange ali mu ggulu.

³⁴ "Temulowooza nti najja okuleeta emirembe ku nsi! Sajja kuleeta mirembe wabula ekitala.

³⁵ Kubanga najja okwawukanya " 'omwana owoobulenzi ne kitaawe, n'omwana owoobuwala ne nnyina n'okwawukanya muka mwana ne nnyazaala we.

³⁶ Abalabe b'omuntu banaabanga ba mu nju ye.'

³⁷ "Oyo ayagala kitaawe oba nnyina okusinga Nze tansaanira, n'oyo ayagala mutabani we oba muwala we okusinga Nze naye tansaanira.

³⁸N'oyo ateetikkenga musaalaba gwe n'angoberera tansaanira.

³⁹Omuntu ayagala ennyo obulamu bwe alibufirwa, naye alifiirwa obulamu bwe ku lwange, alibulokola.

⁴⁰“Buli abasembeza, aba asembezezza Nze, ate asembeza Nze aba asembezezza oyo eyantuma.

⁴¹Oyo asembeza nnabbi mu linnya lya nnabbi, alifuna empeera y'emu nga nnabbi. Era buli anaasembezanga omuntu omutuukirivu mu linnya ly'omuntu omutuukirivu, alifuna empeera y'emu ng'ey'omutuukirivu.

⁴²Ddala ddala mbagamba nti buli aliwa omu ku baana bano abato egiraasi y'amazzi agannyogoga olw'erinnya ly'omuyigiriza talirema kuweebwa mpeera ye.”

Matayo 11

Yesu ne Yokaana Omubatiza

¹Awo Yesu bwe yamala okulagira abayigirizwa be ekkumi n'ababiri n'avaayo n'agenda okubuulira n'okuyigiriza mu bibuga byabwe.

²Yokaana Omubatiza, eyali omusibe mu kkomera mu kiseera ekyo, bwe yawulira emirimu Kristo gye yali akola, n'amutumira abayigirizwa be.

³Ne babuuza Yesu nti, “Ggwe wuuyo gwe tubadde tulindirira, nantiki tulindirireyo omulala?”

⁴Yesu n'abaddamu nti, “Muddeeyo eri Yokaana mumugambe bye mulaba ne bye muwulira.

⁵Abazibe b'amaaso balaba, n'abalema batambula. Abagenge balongoosebwa ne bakiggala bawulira, n'abafu bazuukizibwa n'abaavu babuulirwa Enjiri.

⁶Era mumumpeeere obubaka buno nti, ‘Alina omukisa oyo atanneesittalako.’”

⁷Awo abayigirizwa ba Yokaana Omubatiza bwe baamala okugenda, Yesu n'ategeeza abantu ebya Yokaana nti, “Bwe mwagenda mu ddungu mwagenderera kulaba ki? Olumuli olunyeenyezebw n'empewo?

⁸Naye kiki kye mwagenda okulaba? Omuntu ayambadde engoye ezinekaaneka? Laba abambala engoye ennungi babeera mu mbiri za bakabaka.

⁹Naye mwagenda kulaba ki? Nnabbi. Weewaawo ka mbabuulire, oyo asinga ne nnabbi.

¹⁰Kubanga ye oyo ayogerwako mu Byawandiikibwa nti, “‘Ndiweereza omubaka wange akukulembere, alikuteekerateekera ekkubo nga tonnaja.’”

¹¹Ddala ddala mbagamba nti tewabangawo muntu eyazaalibwa omukazi asinga Yokaana Omubatiza. Naye asembayo okuba omukulu mu bwakabaka obw'omu ggulu asinga Yokaana.

¹²Era okuva mu biro bya Yokaana Omubatiza n'okutuusa kaakano, obwakabaka obw'omu ggulu buyingirwa n'amaanyi, era abantu ab'amaanyi ennyo be babutwala.

¹³Kubanga amateeka gonna era n'obunnabbi byonna byayogera okutuukira ddala ku Yokaana.

¹⁴Era obanga mwagala okukkiriza, ye Eriya anaatera okujja.

¹⁵Alina amatu agawulira, awulire."

¹⁶"Eggwanga lino nnaaligeraageranya ku ki? Bafaanana ng'abaana abato abazannya emizannyo gyabwe mu katale, nga bagamba bato bannaabwe nti,

¹⁷"Twabafuuyira omulere, ne mutazina; ne tuyimba oluyimba olw'okukungubaga, ne mutakungubaga.'

¹⁸Kubanga Yokaana eyali talya wadde okunywa yajja ne mugamba nti, 'Aliko dayimooni.'

¹⁹Omwana w'Omuntu, bwe yajja ng'alya era ng'anywa, ne boogera nti, 'Wa mululu, muntu munywi, era mukwano gw'abasoloza b'omusolo n'aboonoonyi. B'abeeramu!' So nga amagezi geeragira mu bikolwa."

²⁰Yesu n'anenya nnyo ebibuga mwe yakolera ebyamagero ebisinga obungi, kubanga tebeenenya.

²¹"Zikusanze, ggwe Kolaziini! Zikusanze ggwe Besusayida! Kubanga ebyamagero bye nakolera mu mmwe, singa nabikolera mu Ttuulo ne mu Sidoni, bandibadde beenenya dda nga bali mu bibukutu n'evvu ku mitwe gyabwe.

²²Ddala ddala Ttuulo ne Sidoni biriyisibwa bulungiko okusinga mmwe ku lunaku olw'okusalirako omusango!

²³Naawe Kaperunawumu, newaakubadde nga wagulumizibwa okutuuka eggulu gye likoma, naye oliserengesewa wansi emagombe. Kubanga ebyamagero eby'ekitalo ebyakolebwa ewuwo, singa byakolerwa mu Sodomu, kyandibadde kikyaliwo ne leero.

²⁴Ddala ddala Sodomu kigenda kuyisibwa bulungiko, okusinga ggwe, ku lunaku olw'okusalirako omusango!"

Abakooye n'Abazitoowereddwaa

²⁵Yesu n'asaba bw'ati nti, "Ayi Kitange, Mukama w'eggulu n'ensi, nkwebaza kubanga ebigambo byo bino eby'amazima wabikisa abo abeeyita ab'amagezi ennyo, naye n'obibikkulira abaana abato.

²⁶Weewaawo Kitange, bw'otyo bwe wasiima."

²⁷ "Kitange yankwasa ebintu byonna era Kitange yekka y'amanyi Omwana, nange Omwana Nze nzekka Nze mmanyi Kitange, n'abo Omwana b'aba ayagadde okulaga Kitaawe nabo bamumanyi."

²⁸ "Mujje gye ndi mmwe mwenna abakooye era abazitoowereddwa, nange nnaabawummuza.

²⁹Musitule ekikoligo kyange, muyigire ku nze, kubanga ndi muwombeefu era omuteefu mu mutima, n'emyoyo gyammwe girifuna ekiwummulo.

³⁰Kubanga ekikoligo kyange kyangu, n'omugugu gwange teguzitowa."

Matayo 12

Mukama wa Ssabiiti

¹Awo mu kiseera ekkyo Yesu n'ayita mu nnimiro y'emmere ey'empeke ku lunaku lwa Ssabiiti. Abayigirizwa be ne balumwa enjala ne batandika okunoga ebirimba by'enjaano ne babiryia.

²Naye Abafalisaayo bwe baalaba kino ne bagamba Yesu nti, "Laba abayigirizwa bo bakola ekitakkirizibwa kukolebwa ku Ssabiiti."

³Naye Yesu n'abaddamu nti, "Temusomanga ku Dawudi kye yakola bwe yalumwa enjala ne be yali nabo?

⁴Yayingira mu nnyumba ya Katonda n'alya emigaati egy'okulaga, egikkirizibwa bakabona bokka okulya.

⁵Oba temusomanga mu mateeka nti bakabona ababeera mu luwalo lw'okuweereza mu Yeekaalu ne basobya ku Ssabiiti tebaliiko musango?

⁶Naye mbagamba nti ekisinga Yeekaalu kiri wano.

⁷Naye singa mumanyi amakulu ga kino nti, 'Njagala mubeerenga ba kisa okusinga okuwangayo ssaddaaka,' temwandinenyezza bataliiko musango.

⁸Kubanga Omwana w'Omuntu ye Mukama wa Ssabiiti."

⁹N'avaayo n'ajja mu kuŋjaaniro lyabwe.

¹⁰Laba mwalimu omusajja eyalina omukono ogwakala. Ne babuuza Yesu obanga kikkirizibwa okuwonya ku Ssabiiti. Baali basuubira nti anaddamu nti kituufu, balyoke bamuwawaabire.

¹¹ Naye n'abaddamu nti, "Singa wabaddewo omuntu mu mmwe ng'alina endiga emu, n'egwa mu bunnya ku lunaku lwa Ssabiiti, tagiggyamu?

¹²Kale, omuntu tasinga nnyo endiga omuwendo? Noolwekyo kikkirizibwa okukola ekirungi ku Ssabiiti."

¹³Bw'atyo n'agamba omusajja nti, "Golola omukono gwo." N'agugolola ne guwona, ne guba mulamu nga gunnaagwo!

¹⁴Awo Abafalisaayo ne bafuluma ne bateesa nga bwe banaazikiriza Yesu.

Omeweereza wa Katonda

¹⁵Naye Yesu bwe yakimanya n'afuluma mu kuŋŋaaniro, abantu bangi nnyo ne bamugoberera, n'awonya abaali abalwadde bona,

¹⁶kyokka n'abakomako baleme okumwatuukiriza.

¹⁷Ebyayogerwa Nnabbi Isaaya biryoke bituukirire nti:

¹⁸"Laba Omeweereza wange, ggwe neerondera, gwe njagala ennyo asanyusa emmeeme yange. Ndimuteekako Omwoyo wange era Alisalira amawanga gonna emisango.

¹⁹Taliyomba so talireekaana, era tewaliba n'omu aliwulira eddoboozi lye mu nguudo.

²⁰Talimenya lumuli lunafu, wadde okuzikiriza olutambi lw'ettaala olunyooka.

²¹Era abamawanga baliba n'essuubi mu linnya lye."

Yesu ne Beeruzebuli

²²Awo Yesu ne bamuleetera omusajja eyaliko dayimooni, nga muzibe w'amaaso era nga tayogera. N'amuwonya, omusajja eyali tasobola kwogera n'asobola okwogera n'okulaba.

²³Abantu bona ne beewuunya ne boogera nti, "Ddala ddala ono si mwana wa Dawudi?"

²⁴Naye Abafalisaayo bwe baakiwulira ne boogera nti, "Ono agoba baddayimooni ku bwa Beeruzebuli omukulu wa baddayimooni."

²⁵Yesu bwe yategeera ebirowoozo byabwe n'abagamba nti, "Obwakabaka bwe bwawukanamu, oba ekibuga wadde amaka, tebiyinza kuyimirira.

²⁶Ne Setaani bw'agoba Setaani munne ku muntu aba yeyawuddemu. Obwakabaka bwe bunaayimirira butya?

²⁷Obanga Nze ngoba baddayimooni ku bwa Beeruzebuli omukulu wa baddayimooni, kale batabani bammwe babagoba ku bw'ani? Noolwekyo be bali basalira omusango.

²⁸Naye bwe mba ngoba baddayimooni n'amaanyi g'Omwoyo wa Katonda, kale Obwakabaka bwa Katonda buzze gye muli.

²⁹"Oba omuntu ayinza atya okuyingira mu nnyumba y'omuntu ow'amaanyi, n'amunyagako ebintu bye okuggyako ng'asooka okusiba ow'amaanyi oyo? Olwo n'alyoka anyaga ebintu bye.

³⁰ “Oyo atali nange, mulabe wange. N’oyo atakuŋŋaanyiza wamu nange asaasaanya.

³¹ Noolwekyo mbategeereza ddala nti omuntu alisoniyibwa buli kibi kyonna, na buli kuvvoola. Naye alivvoola Mwoyo Mutukuvu talisoniyibwa.

³² Na buli muntu ayogera ekigambo ekibi ku Mwana w’Omuntu alisoniyibwa, naye ayogera ekibi ku Mwoyo Omutukuvu talisoniyibwa mu mulembe guno wadde ogugenda okujja.

³³ “Buli muti gutegeererwa ku bibala byagwo. Omuti bw’ogulabirira gubala ebibala ebirungi, naye bw’ogulagajjalira tegubala bibala.

³⁴ Mmwe abaana b’embalasaasa, mmwe abalina ebibi muyinza mutya okwogera ebirungi? Akamwa koogera ku biba bijjudde mu mutima.

³⁵ Omuntu omulungi afulumya ebirungi okuva mu tterekero lye eddungi, era n’omuntu omubi afulumya ebibi okuva mu tterekero lye ebbi.

³⁶ Era mbategeeza nti buli kigambo kyonna ekitasaana abantu kye boogera, kiribabuuzibwa ku lunaku olw’okusalirako emisango.

³⁷ Bwe bityo ebigambo byo bye birikuweesa obutuukirivu era ebigambo byo bye birikusalizisa omusango.”

Akabonero ka Nnabbi Yona

³⁸ Awo abamu ku bannyonnyozi b’amateeka n’Abafalisaayo ne bagamba Yesu nti, “Omuyigiriza twagala otulage akabonero.”

³⁹ Naye n’abaddamu nti, “Omulembe omwonoonefu era omwenzi ogunoonya akabonero; temugenda kuweebwa kabonero okuggyako aka nnabbi Yona.

⁴⁰ Kubanga Yona nga bwe yamala mu lubuto lw’ekyennyanja ekinene ennaku ssatu emisana n’ekiro, n’Omwana w’Omuntu bw’atyo bw’alimala mu ttaka ennaku ssatu emisana n’ekiro.

⁴¹ Abantu b’e Nineeve baliyimirira ne basaliza abantu b’omulembe guno omusango okubasinga, kubanga beenenya bwe baawulira okubuulira kwa Yona. Naye laba asinga Yona ali wano.

⁴² Era ku lunaku olw’okusalirako omusango, kabaka omukazi ow’omu bukiikaddyo alisaliza abantu ab’omulembe guno omusango okubasinga, kubanga yava ku nkomerero y’ensi okujja okuwuliriza amagezi ga Sulemaani. Naye laba asinga Sulemaani ali wano.

⁴³ “Omwovo ogutali mulongoofu bwe guva mu muntu guyita mu malungu nga gunoonya aw’okuwumulirako, ne gutafuna wa kuwummulira.

⁴⁴ Kyeguva gugamba nti, ‘Leka nzireyo mu nnyumba mwe nava.’ Bwe guddayo gusanga nkalu, nga eyereddwa era nga ntegeke.

⁴⁵Kyeguva gugenda ne guleeta emyoyo emirala musanvu egigusingako obwonoonefu, ne giyingira mu nnyumba omwo ne gibeera omwo. Olwo omuntu oyo n'abeera bubi nnyo okusinga bwe yali okusooka. Bwe kityo bwe kiriba n'omulembe guno omwonoonefu."

Yesu ne Baganda be ne Nnyina

⁴⁶Yesu bwe yali akyayogera n'ekibiina, nnyina ne baganda be ne batuuka ne bayimirira ebweru nga baagala okwogera naye.

⁴⁷Omuntu omu n'amutegeeza nti, "Nnyoko ne baganda bo, bali wabweru baagala kwogera nawe."

⁴⁸Yesu n'amuddamu nti, "Mmange ye ani era ne baganda bange be baani?"

⁴⁹N'agolola omukono gwe eri abayigirizwa be n'agamba nti, "Mulabe mmange ne baganda bange!"

⁵⁰Kubanga buli akola ebyo Kitange ali mu ggulu by'ayagala oyo ye muganda wange, ye mwannyinaze era ye mmange."

Matayo 13

Olugero Iw'Omusizi

¹Ku lunaku olwo Yesu n'afuluma mu nnyumba n'agenda n'atuula ku lubalama lw'ennyanya.

²Ekibiina kinene ne kimukunjaanirako. Kwe kuyingira mu lyato n'atuula omwo abantu bona ne bayimirira ku lubalama.

³N'ababuulira ebintu bingi mu ngero ng'agamba nti, "Omulimi yali asiga ensigo mu nnimiro ye.

⁴Bwe yagenda ng'amansa ensigo, ezimu ne zigwa ku mabbali g'ekkubo, ennyonyi ne zijja ne zizirya.

⁵Endala ne zigwa ku lwazi okutali ttaka lingi era ne zimera mangu kubanga ettaka teryali ggwanvu.

⁶Naye omusana bwe gwayaka ne ziwotoka kubanga emirandira gyazo gyali kumpi.

⁷Endala ne zigwa mu maggwa, bwe zaamera amaggwa nago ne gakula ne gazisinga amaanyi, obulimi obwali bwakamera ne bukala.

⁸Endala ne zigwa ku ttaka eddungi, ne zimera ne zibala bulungi, ne zivaamu emirundi amakumi asatu, n'endala emirundi nkaaga n'endala emirundi kikumi.

⁹Alina amatu agawulira, awulire."

¹⁰Abayigirizwa be ne bamuseemberera ne bamubuuza nti, “Lwaki oyogera nabo mu ngero?”

¹¹N'abaddamu nti, “Mmwe mulina omukisa kubanga mwaweebwa okutegeera ebyama eby'obwakabaka obw'omu ggulu, naye bo tebaakiweebwa.

¹²Kubanga buli alina alyongerwako abeerere ddala na bingi, naye oyo atalina aliggyibwako n'ako akatono k'alina.

¹³Kyenva njigiriza mu ngero: “Abalaba baleme okulaba, n'abawulira baleme okuwulira wadde okutegeera.

¹⁴Kino kituukiriza nnabbi Isaaya kye yagamba nti, “‘Muliwulira naye temulitegeera n'okulaba muliraba naye temulimanya.

¹⁵Kubanga omutima gw'abantu bano gwasibye, n'amatu gaabwe tegawulira bulungi. N'amaaso gaabwe gazibiridde baleme okulaba n'amaaso wadde okuwulira n'amatu, wadde omutima gwabwe okutegeera, ne bakyuka ne mbawonya.’

¹⁶Naye amaaso gammwe galina omukisa, kubanga galaba, n'amatu gammwe kubanga gawulira.

¹⁷Ddala ddala mbagamba nti, Waaliwo bannabbi bangi, n'abatuukirivu bangi abeegombanga okulaba ku bino bye mulaba, n'okuwulira bye muwulira kyokka ne batafuna mukisa ogwo.

¹⁸“Noolwekyo muwulirize olugero lw'omulimi eyasiga ensigo.

¹⁹Ensigo eyagwa ku mabbali g'ekkubo efaanana ng'omuntu awulira ekigambo kya Katonda n'atakitegeera era omulabe Setaani n'ajja n'akimusikulako okuva ku mutima.

²⁰Ensigo eyagwa ku byaziyazi efaanana ng'omuntu awulira ekigambo, amangwago n'akyaniriza n'essanyu,

²¹naye olw'okuba nga talina mmizi mu ye, wa kaseera buseera, ennaku n'okuyigganyizibwa bwe bijja olw'ekigambo, amangwago n'agwa.

²²N'ensigo eyagwa mu maggwa efaanana ng'omuntu awulira ekigambo naye okweraliikirira kw'ebintu by'ensi n'obugagga obutaliimu ne bibuutikira ekigambo ne kitabala bibala.

²³Naye ensigo eyagwa ku ttaka eddungi efaanana ng'omuntu awulira ekigambo n'akitegeera, n'abalira ddala ebibala, n'abala ebibala amakumi asatu, oba nkaaga oba kikumi.”

²⁴N'abagerera olugero olulala nti, “Obwakabaka obw'omu ggulu bufaanana n'omuntu eyasiga ennungi mu nnimiro ye,

²⁵naye ekiro nga yeebase abasaja abalabe ne bajja ne basiga omuddo wakati mu eŋjaano ye ne bagenda.

²⁶Naye eŋjaano ennungi bwe yamera, n'omuddo ne gumerera wamu nayo.

²⁷"Naye abaddu b'omwami w'ennyumba bwe baamuseemberera ne bamugamba nti, 'Mukama waffe, tewasiga nsigo nnungi mu nnimiro yo? Naye ate omuddo guvudde wa?'

²⁸"Ye n'abaddamu nti, 'Omulabe ye yakola ekyo.' Abaddu kyebaava bamubuuza nti, 'Tugende tugukoolemu?'

²⁹"N'abaddamu nti, 'Nedda, kubanga bwe munaaba mukuulamu omuddo mujja kukuuliramu n'eŋjaano.'

³⁰Kale mubireke byonna bikulire wamu, okukungula bwe kulituuka ne ndyoka ndagira abakunguzi basooke bakujŋaanye omuddo bagusibeko n'olvannyuma bagwokye, naye yo eŋjaano bagikuŋjaanyize mu tterekero lyange.'

Olugero Iw'Akaweke ka Kaladaali n'olw'Ekizimbukusa

³¹N'abagerera olugero olulala ng'agamba nti, "Obwakabaka obw'omu ggulu bufaanana ng'akaweke ka kaladaali, omusajja ke yasiga mu nnimiro.

³²Kaladaali kaweke katono nnyo okusinga ensigo endala zonna. Naye bwe kasimbibwa ne kakula kavaamu omuti omunene ennyo, n'ennyonyi ez'omu bbanga ne zijja ne zibeera ku matabi gaagwo."

³³N'abongerayo olugero olulala nti, "Obwakabaka obw'omu ggulu buyinza okugeraageranyizibwa n'ekizimbukusa omukazi kye yakweka mu buwunga bw'eŋjaano, n'apima ebigeri bisatu okutuusa lwe bwazimbukuka bwonna."

³⁴Bino byonna Yesu yabyogerera mu ngero eri ebibiina era teyayogera gye bali awatali ngero.

³⁵Ekyayogerwa nnabbi ne kiryoka kituukirira nti, "Ndyoyerera mu ngero, njogere ebintu ebyakwekebwa okuva ku kutondebwa kw'ensi."

Okunnyonnyola Olugero Iw'Eŋjaano y'omu Nsiko

³⁶Awo bwe yamala okusiibula ekibiina n'ayingira mu nnyumba, abayigirizwa be ne bamuseemberera ne bamusaba abannyonnyole amakulu g'olugero Iw'omuddo ogwali mu nnimiro.

³⁷N'abannyonnyola ng'agamba nti, "Omwana w'Omuntu ye yasiga ensigo ennungi.

³⁸Ennimiro y'ensi, n'ensigo ennungi be baana b'obwakabaka, naye omuddo be baana ba Setaani.

³⁹Omulabe eyasiga ensigo ez'omuddo ye Setaani, amakungula y'enkomerero y'ensi n'abakunguzi be bamalayika.

⁴⁰“Noolwekyo ng'omuddo bwe gwakuṇjaanyizibwa ne gwokebwa mu muliro, bwe kityo bwe kiriba ku nkomerero y'ensi.

⁴¹Omwana w'Omuntu alitura bamalayika be mu bwakabaka bakuṇjaanye ebintu byonna ebyesittaza, n'abajeemu,

⁴²babasuule mu nkoomi y'omuliro. Omwo mwe muliba okukaaba n'okuluma obujiji.

⁴³Naye abatuukirivu balyakaayakana ng'enjuba mu bwakabaka bwa Kitaabwe. Alina amatu agawulira, awulire.

⁴⁴“Obwakabaka obw'omu ggulu bufaanana n'ekyobugagga ekyakwekebwa mu nnimiro omuntu omu bwe yakigwikiriza. Olw'essanyu lye yafuna n'agenda n'atunda bye yalina byonna, n'agula ennimiro eyo.

⁴⁵“Ate era obwakabaka obw'omu ggulu bufaanana ng'omusuubuzi w'amayinja ag'omuwendo omungi eyali anoonya amayinja ag'omuwendo,

⁴⁶bwe yazuula ejjinja erimu ery'omuwendo n'agenda n'atunda bye yalina byonna n'aligula.

Olugero Iw'Akatimba

⁴⁷“Era obwakabaka obw'omu ggulu bufaanana ng'akatimba akategebwa mu nnyanja ne kakwasa ebyennyanya ebya buli ngeri,

⁴⁸akatimba bwe kajjula ne bakawalulira ku lubalama ne balondamu ebirungi nga babikuṇjaanyiza mu bisero, ebibi nga babisuula.

⁴⁹Bwe kiriba bwe kityo ne ku nkomerero y'ensi, bamalayika balija ne baawulamu abantu abatuukirivu n'ababi.

⁵⁰Ababi balibasuula mu nkoomi y'omuliro eriba okukaaba n'okuluma obujiji.”

⁵¹Yesu n'ababuuza nti, “Ebintu bino byonna mubitegedde?” Ne bamuddamu nti, “Weewaawo.”

⁵²Kyeyava abagamba nti, “Noolwekyo omuwandiisi eyayiga obulungi amateeka g'Ekiyudaaya ate n'afuuka omuyigiriza w'obwakabaka obw'omu ggulu, ali ng'omusajja nnyini nnyumba, aggyayo mu tterekero lye ebipyaa n'ebikadde.”

Yesu Bamwegana e Nazaaleesi

⁵³Awo Yesu bwe yamala okugera engero ezo n'avaayo,

⁵⁴n'addayo mu kibuga ky'ewaabwe n'ayigiriza mu kuṇjaaniro lyabwe. N'abeeewuunyisa ne bagamba nti, “Yaggya wa amagezi n'ebyamagero ebyo?”

⁵⁵Ne beebuuza nti, "Ono si ye mutabani w'omubazzi? Nnyina ye Maliyamu ne baganda be ba Yakobo, ne Yusufu, ne Simooni ne Yuda.

⁵⁶Ne bannyina babeera kuno. Kale, ebyo byonna yabiggya wa?"

⁵⁷Ne bamunyiigira nga balowooza nti abeeragirako. Naye Yesu n'abagamba nti, "Nnabbi aweebwa ekitiibwa mu buli kifo, okuggyako mu kitundu ky'ewaabwe ne mu nnyumba y'ewaabwe."

⁵⁸Era yakolerayo ebyamagero bitono olw'obutakkiriza bwabwe.

Matayo 14

Yokaana Atemwako Omutwe

¹ Mu kiseera ekyo Kabaka Kerode bwe yawulira ettutumu lya Yesu

²n'agamba abaweereza be nti, "Oyo ye Yokaana Omubatiza azuukidde mu bafu, era y'akola eby'amagero."

³ Kuba Kerode yali amaze okukwata Yokaana n'amussa mu kkomera, kubanga Yokaana yamunenya olwa Kerodiya muka Firipo muganda we,

⁴kubanga Yokaana yagamba Kerode nti, "Si kituufu okusigula muka muganda wo n'omufuula owuwo."

⁵Kerode yali ayagala kumutta naye n'aty aabantu kubanga baalowooza Yokaana okuba nnabbi.

⁶Olunaku lw'amazaalibwa ga Kerode bwe lwtuuka muwala wa Kerodiya n'azina nnyo ku mbaga n'asanyusa nnyo Kerode.

⁷Awo Kerode n'asuubiza omuwala ng'alayira okumuwa kyonna ky'anaamusaba.

⁸Naye bwe yaweebwa nnyina amagezi, n'agamba nti, "Mpeera wano omutwe gwa Yokaana Omubatiza ku lusaniya."

⁹Ekintu ekyo ne kinakuwaza nnyo kabaka. Naye olwokubanga yali yakisuubiza mu maaso g'abagenyi be, kyeyava alagira bagumuleetere.

¹⁰Ne bagenda mu kkomera, ne batemako Yokaana omutwe

¹¹ne baguleetera ku lusaniya ne baguwa omuwala, naye n'agutwalira nnyina.

¹²Abayigirizwa ba Yokaana ne banonayo omulambo gwe ne bagutwala ne baguziika, ne balyoka bagenda ne babikira Yesu.

¹³Yesu bwe yabiwulira ebyo, n'asaabala mu lyato, n'abaako gy'alaga abeere yekka mu kyama. Naye aabantu bangi nnyo bwe baakiwulira ne bava mu bibuga bingi, ne beekooloobia, ne bamugoberera nga bayita ku lukalu.

¹⁴Yesu bwe yava eyo n'alaba, abantu bangi n'abasaasira n'awonya abalwadde baabwe.

¹⁵Obudde bwe bwawungeera abayigirizwa be ne bajja gy'ali ne bamugamba nti, "Laba obudde buzibye ate tuli mu ddungu, ssiibula abantu bagende beegulire emmere mu bibuga."

¹⁶Naye Yesu n'abaddamu nti, "Tekyetaagisa kubasiibula, mmwe mubawe ekyokulya."

¹⁷Ne bamuddamu nti, "Ffe tetulina kyakulya kiwinza kubamala, wabula tulinawo emigaati etaano gyokka n'ebennyanya bibiri."

¹⁸N'abagamba nti, "Kale mubindetere wano."

¹⁹N'lagira ekibiina kituule wansi ku muddo, n'addiria emigaati etaano n'ebennyanya ebibiri, n'atunula waggulu ne yeebaza, emigaati n'agimenaamenyamu n'agiwa abayigirizwa ne batandika okugabula ekibiina.

²⁰Bonna ne balya ne bakkuta; obutundutundu obwafikkawo ne babukunjaanya wamu ne bujuza ebisero kkumi na bibiri!

²¹Abantu bona abaalya baali ng'enkumi ttaano nga totaddeeko bakazi na baana.

Yesu Atambulira ku Mazzi

²²Amangwago Yesu n'lagira abayigirizwa be basaabale eryato bagende emitala w'ennyanja, ye asigale ng'akyasiibula abantu.

²³Bwe yamala okusiibula ekibiina n'ayambuka ku lusozi yekka okusaba. Obudde ne buziba ng'ali eyo yekka.

²⁴Eryato abayigirizwa mwe baali bwe lyatuuka ebuziba, omuyaga mungi ne gubafuluma mu maaso eryato ne lyesunda.

²⁵Awo ku ssaawa nga mwenda ez'ekiro, Yesu n'ajja gye bali ng'atambula ku nnyanja.

²⁶Naye abayigirizwa bwe baamulaba ng'atambulira ku nnyanja ne batya, nga balowooza nti muzimu.

²⁷Awo amangwago Yesu n'abagamba nti, "Mugume, Nze nzuuno temutyua."

²⁸Peetero n'amugamba nti, "Obanga ye ggwe ddala Mukama waffe, ndagira nange nzije gy'oli nga ntambulira ku mazzi."

²⁹Yesu n'amuddamu nti, "Kale jjangu." Peetero n'ava mu lyato n'atambulira ku mazzi okugenda eri Yesu.

³⁰Naye Peetero bwe yalaba omuyaga ogw'amaanyi, n'atyia n'atandika okusaanawo, n'akoowoola Yesu nti, "Mukama wange, ndokola!"

³¹ Amangwago Yesu n'agolola omukono gwe n'amukwata, n'amugamba nti, "Gewe alina okukkiriza okutono, lwaki obuusizzabuusizza?"

³² Bwe baalinya mu lyato omuyaga gwonna ne guggwaawo.

³³ N'abo abaali mu lyato ne bamusinza nga bagamba nti, "Dala ddala oli Mwana wa Katonda!"

³⁴ Bwe baasomoka ne bagukkira ku lukalu e Genesaleeti.

³⁵ Abantu b'omu kitundu ekyo bwe baamutegeera ne batumya abalwadde bona ne babamuleetera.

³⁶ Ne bamwegayirira waakiri bakomeko bukomi ku lukugiro lw'ekyambalo kye, era buli eyakomako n'awonyezebwa.

Matayo 15

Obulongoofu n'Obutali Bulongoofu

¹ Awo Abafalisaayo n'abannyonnyozi b'amateeka ne bava e Yerusaalemi ne bajja eri Yesu ne bamubuuza nti:

² "Abayigirizwa bo lwaki banyoomoola obulombolombo bw'Abakadde? Kubanga tebanaaba mu ngalo nga bagenda okulya emmere."

³ Naye Yesu naye n'ababuuza nti, "Lwaki mumenya amateeka ga Katonda, nga mwerimbika mu bulombolombo bwammwe?

⁴ Katonda yagamba nti, 'Kitaawo ne nnyoko obassangamu ekitiibwa. Oyo anaavumanga kitaawe ne nnyina battanga mutte,'

⁵ Naye mmwe mugamba nti, Buli agamba kitaawe oba nnyina nti, 'Ekirabo kye nandikuwadde nkiwaddeyo eri Katonda,' omuntu oyo teyeetaaga kussaamu kitaawe kitiibwa.

⁶ Noolwekyo tassaamu kitaawe oba nnyina kitiibwa. Bwe mutyo ne mudibya etteeka lya Katonda olw'obulombolombo bwammwe.

⁷ Mmwe bannanfusi! Nnabbi Isaaya yayogera bulungi ebyobunnabbi ebibakwatako bwe yagamba nti,

⁸ " 'Abantu bano banzisaamu ekitiibwa kya ku mimwa.' Naye emitima gyabwe gindi wala.

⁹ 'Okusinza kwabwe kwa bwereere. Kubanga bayigiriza amateeka abantu ge beekoledde.'"

¹⁰ Yesu n'ayita ekibiina n'abagamba nti, "Mumpulirize era mutegeere.

¹¹ Omuntu ky'alya si kye kimwonoonyesa, wabula ekyo ekiva mu kamwa ke, kye kimwonoonyesa."

¹²Abayigirizwa be ne bajja gy'ali ne bamugamba nti, "Omanyi ebigambo byo nga bwe binyiizizza Abafalisaayo?"

¹³Naye Yesu n'addamu nti, "Buli kisimbe Kitange ali mu ggulu ky'ataasimba kigenda kusimbula.

¹⁴Noolwekyo mubaleke. Bakulembeze abazibe b'amaaso. Bafaanana omuzibe w'amaaso akulembera muzibe munne, kubanga bombi bagenda kugwa mu kinnya."

¹⁵Peetero n'amugamba nti, "Tunnyonnyole olugero olwo."

¹⁶Yesu n'abagamba nti, "Nammwe era temunnategeera?

¹⁷Temumanyi nti buli muntu ky'alya kigenda mu lubuto mwe kiva n'akifulumiza mu kiyigo?

¹⁸Naye ebintu ebiva mu kamwa, biva mu mutima ne byonoona omuntu.

¹⁹Kubanga mu mutima mwe muva ebirowoozo ebibi, obussi, n'obwenzi, eby'obukaba, n'obubbi, n'okuwaayiriza, n'okuvvoola.

²⁰Ebyo bye byonoona omuntu, naye okulya nga tonaabye mu ngalo, tekwonoona muntu."

Okukkiriza kw'Omukanani

²¹Yesu n'ava mu kifo ekyo, n'agenda mu kitundu omuli ebibuga Ttuulo ne Sidoni.

²²Awo omukazi Omukanani eyali abeera mu bitundu ebyo, n'ajja eri Yesu n'amwegayirira nti, "Onsaasire Mukama wange, Omwana wa Dawudi! Muwala wange aliko dayimooni amubonyaabonya nnyo."

²³Naye Yesu n'asirika n'atamuddamu kigambo na kimu. Abayigirizwa be ne bajja ne bamugamba nti, "Bw'omugoba n'agenda. Ng'ayitirizza okutukaabirira."

²⁴Naye Yesu n'addamu omukazi nti, "Nze saatumibwa walala wonna, wabula eri endiga za Isirayiri ezaabula."

²⁵Naye omukazi n'asembera awali Yesu n'amusinza, n'amwegayirira ng'agamba nti, "Mukama wange, nnyamba."

²⁶Yesu n'amuddamu nti, "Si kituufu okuddira emmere y'omwana okugisuulira embwa."

²⁷Omukazi n'addamu nti, "Weewaawo, Mukama wange, naye n'embwa nazo zirya ku bukunkumuka obugwa wansi okuva ku mmeeza ya mukama waazo."

²⁸Awo Yesu n'amugamba nti, "Mukazi watu, ng'okukkiriza kwo kunene! Kale kikukolerwe nga bw'oyagala." Amangwago muwala we n'awonera mu kiseera ekyo.

Yesu Aliisa Enkumi Ennya

²⁹Yesu n'avaayo n'ajja emitala okumpi n'enyanja y'e Ggaliraaya n'alinnya ku lusozi n'atuula eyo.

³⁰Abantu bangi ne bajja gy'ali, ne bamuleetera, abakoozimbye, n'abatayogera n'abalala bangi ne babassa we yali n'abawonya.

³¹Abantu bangi ne beewuunya, nga balaba ababadde batayogera nga boogera, n'ababadde bakoozimbye nga bawonye, n'ababadde abalema nga batambula, n'ababadde abazibe b'amaaso nga balaba. Ne bagulumiza Katonda wa Isirayiri.

³²Awo Yesu n'ayita abayigirizwa be n'abagamba nti, "Abantu bano mbasaasira, kubanga baakamala nange ennaku ssatu ate tebalina kyakulya. Ssaagala kubasiibula ne bagenda enjala, si kulwa nga bagwa ku kkubo."

³³Abayigirizwa ne bamugamba nti, "Wano mu ddungu tunaggya wa emigaati emingi gye tunaaliisa abantu abangi bwe bati?"

³⁴Yesu n'ababuuza nti, "Mulinawo emigaati emeka?" Ne bamuddamu nti, "Tulinawo emigaati musanvu n'ebennyanya bitono."

³⁵Yesu n'alagira abantu bona batuule wansi,

³⁶n'addiria emigaati omusanvu n'ebennyanya, bwe yamala okwebaza, n'abimenyaamenyamu, n'awa abayigirizwa be ne batandika okugabula ekibiina.

³⁷Buli muntu n'alya n'akkuta. Ne babukunjaanya obutundutundu obwasigalawo ne bujjuza ebisero musanvu.

³⁸Abaalya baawera abasajja enkumi nnya nga totaddeeko bakazi na baana.

³⁹Awo Yesu n'asiibula ekibiina, n'asaabala mu lyato n'agenda mu nsalo y'e Magadani.

Matayo 16

Okusaba Yesu Akabonero

¹Awo Abafalisaayo n'Abassaddukaayo ne bajja eri Yesu okumugezesha nga bamusaba akabonero akava mu ggulu.

²Naye Yesu n'abaddamu nti, "Obudde bwe buwungeera mugamba nti, obudde bujja kuba bulungi kubanga eggulu limyuse nnyo.

³Ate eggulu bwe limyuka ku nkya mumanya nti olunaku lwonna obudde bujja kwefuukuula. Mumanyi bulungi endabika y'eggulu n'okwawula ebiseera, naye lwaki temusobola kutegeera bubonero bwa biro?

⁴Mmwe ab'omulembe omwonoonefu era omwenzi musaba akabonero naye temuliweebwa kabonero okuggyako aka Yona." Yesu n'abaviira n'agenda.

Ekizimbulukusa ky'Abafalisaayo n'Abasaddukaayo

⁵Abayigirizwa bwe baasomoka okuva emitala w'eri ne beerabira okuleeta emigaati.

⁶Naye Yesu n'abagamba nti, "Mwekuume ekizimbulukusa ky'Abafalisaayo n'Abasaddukaayo."

⁷Naye Abayigirizwa ne boogeraganya bokka ne bokka nti, "Ayogedde bw'atyo kubanga tetwaleese migaati."

⁸Yesu bwe yamanya ebirowoozo byabwe n'abagamba nti, "Mmwe abalina okukkiriza okutono lwaki mweraliikirira nga mugamba nti, 'temulina mmere?'

⁹Era temunnategeera wadde okujukira emigaati etaano abantu enkumi ettaano gye baalya, n'ebisero bye mwakuŋjaanya ebyafikkawo?

¹⁰Era n'emigaati omusanvu abantu enkumi enya gye baalya n'ebisero bye mwakuŋjaanya ebyafikkawo?

¹¹Kale lwaki temutegeera nti mbadde ssoogera ku migaati? Naye mwekuume ekizimbulukusa eky'Abafalisaayo n'Abasaddukaayo."

¹²Ne balyoka bategeera nti yali tayogera ku kizimbulukusa kya migaati naye yali ayogera ku njigiriza y'Abafalisaayo n'Abasaddukaayo.

Peetero Ayatula Kristo

¹³Awo Yesu bwe yatuuka mu kitundu kya Kayisaliya ekya Firipo n'abuuza abayigirizwa be nti, "Abantu Omwana w'Omuntu bagamba nti ye ani?"

¹⁴Ne bamuddamu nti, "Yokaana Omubatiza, abalala nti Eriya, n'abalala nti Yeremiya oba omu ku bannabbi."

¹⁵Awo Yesu n'ababuuza nti, "Mmwe mundowooza kuba ani?"

¹⁶Simooni Peetero n'addamu nti, "Ggwe Kristo, Omwana wa Katonda omulamu."

¹⁷Yesu n'amugamba nti, "Olina omukisa Simooni, omwana wa Yona, kubanga ekyo Kitange ali mu ggulu y'akikubikkulidde, so tokiggye mu bantu.

¹⁸Era nkutegeeza nti, Ggwe Peetero, olwazi, era ku lwazi okwo kwe ndizimba Ekkanisa yange, n'amaanyi gonna aga Setaani tegaligiwangula.

¹⁹Era ndikuwa ebisumuluzo by'obwakabaka obw'omu ggulu; era kyonna ky'onoosibanga ku nsi, ne mu ggulu kinaasibwanga, na buli ky'onoosumululanga ku nsi, ne mu ggulu kinaasumululwanga."

²⁰Awo n'akuutira abayigirizwa be baleme kubuulirako muntu n'omu nti Ye Kristo.

²¹ Okuva mu kiseera ekyo Yesu n'atandika okunnyonnyola abayigirizwa be nga bwe kimugwanidde okugenda e Yerusaalemi, abakulembeze b'Abayudaaya ne bakabona abakulu, n'abannyonnyozi b'amateeka bamubonyeebonye, era bamutte; naye ku lunaku olwokusatu azuukire.

²² Peetero n'amizza ebbali n'atandika okumunenya ng'amugamba nti, "Katonda akulage ekisa Mukama waffe. Bino tebirikutuukako."

²³ Naye Yesu n'akyukira Peetero n'amugamba nti, "Dda ennyuma wange Setaani. Oli kyesittaza gye ndi, kubanga tolowoozeza bintu bya Katonda wabula olowooza bintu bya bantu."

²⁴ Awo Yesu n'agamba abayigirizwa be nti, "Omuntu bw'ayagala okungoberera asaana yeefiirize yekka, yeetikke omusaalaba gwe alyoke angoberere.

²⁵ Kubanga buli agezaako okuwonya obulamu bwe alibufiirwa, oyo alifiirwa obulamu bwe ku lwange alibuwonya.

²⁶ Kigasa ki omuntu okufuna ensi yonna naye n'afirwa obulamu bwe? Oba kiki omuntu kyayinza okuwaayo olw'obulamu bwe?

²⁷ Kubanga Omwana w'Omuntu anaatera okujja mu kitibwa kya Kitange ne bamalayika be alyoke asasule buli muntu ng'ebikolwa bye bwe byali.

²⁸ "Ddala ddala mbagamba nti ku mmwe abali wano kuliko abatalirega ku kufa okutuusa lwe baliraba Omwana w'Omuntu ng'ajja n'obwakabaka bwe."

Matayo 17

Okufuusibwa kwa Yesu

¹ Oluvannyuma lw'ennaku mukaaga Yesu n'atwala Peetero, ne Yakobo ne Yokaana muganda we, n'abalinnyisa ku lusozi oluwanvu.

² N'afuusibwa nga balaba, amaaso ge ne gamasamasa ng'enjuba n'ebiyambalo bye ne byeruka ne byakaayakana.

³ Laba Musa ne Eriya ne balabika, ne boogera ne Yesu.

⁴ Peetero n'agamba Yesu nti, "Mukama waffe, nga kya kitalo nnyo ffe okubeera wano! Bw'oba ng'osiimye, nzimbe wano ensiisira ssatu, emu yiyo endala ya Musa n'endala ya Eriya."

⁵ Bwe yali akyayogera ebyo ekire ekimasamasa ne kiva waggulu ne kibabuutikira eddoboozi ne liva mu kire ne ligamba nti, "Ono ye Mwana wange gwe njagala ennyo, era gwe nsanyukira ennyo. Mumuwulirenga."

⁶ Abayigirizwa bwe baakiwulira ne bagwa wansi ne beevuunika nga batidde nnyo.

⁷ Yesu n'ajja gye bali n'abakwatako n'abagamba nti, "Mugolokoke temutyta."

⁸Bwe babbulula amaaso, baalabawo Yesu yekka!

⁹Bwe baali baserengeta olusozi, Yesu n'abakuutira nti, "Ebyo bye mulabye temubibulirako omuntu n'omu okutuusa Omwana w'Omuntu lw'alimala okuzuukira mu bafu."

¹⁰Abayigirizwa ne bamubuuza nti, "Kale lwaki abannyonnyozi b'amateeka bagamba nti, Eriya kimugwanira okumala okujja?"

¹¹Yesu n'abaddamu nti, "Weewaawo, Eriya alijja n'azzaawo ebintu byonna.

¹²Naye mbagamba nti, Eriya yajja dda, naye tebaamutegeera, era naye ne bamukola buli kye baayagala. Bw'atyo n'Omwana w'Omuntu anaatera okubonyaabonyezebwa."

¹³Awo abayigirizwa be ne bategeera nti yali ayogera ku Yokaana Omubatiza.

Omusimbu Awonyezebw

¹⁴Awo bwe yatuuka awaali ekibiina, omusajja n'ajja gy'ali n'afukamira we yali, n'amugamba nti,

¹⁵"Mukama wange, ssaasira mutabani wange, kubanga mulwadde agwa ensimbu, era zimubonyaabonya nnyo kubanga emirundi mingi zimusuula mu muliro ne mu mazzi.

¹⁶Bwe namuleese eri abayigirizwa bo tebasobodde kumuwonya."

¹⁷Yesu n'addamu nti, "Mmwe omulembe ogatalina kukkiriza omubi. Ndituusa ddi okubeera nammwe? Ndibagumiikiriza kutuusa ddi? Kale mumundeetere wano."

¹⁸Yesu n'aboggolera dayimooni, n'ava ku mulenzi, omulenzi n'awona mu kiseera ekyo.

¹⁹Awo oluvannyuma abayigirizwa ne bajja eri Yesu mu kyama ne bamubuuza nti, "Lwaki ffe tetwasobodde kugoba dayimooni oyo?"

²⁰Yesu n'abaddamu nti, "Olw'okukkiriza kwammwe okutono. Kubanga ddala ddala mbagamba nti, bwe muba n'okukkiriza okufaanana ng'akaweke ka kaladaali, mwandiyinzizza okugamba olusozi luno nti, 'Vvaawo wano,' era ne luvaawo era tewandibaddewo kye mulemwa.

²¹Naye kyokka dayimooni ow'engeri eno tagobeka awatali kusaba na kusiiba."

²²Ne bakuññaanira mu Ggaliraaya, Yesu n'abagamba nti, "Omwana w'Omuntu anaatera okuliibwamu olukwe aweebweyo mu mikono gy'abantu

²³abalimutta, kyokka ku lunaku olwokusatu alizuukizibwa." Abayigirizwa be ne banakuwala nnyo.

Omusolo gwa Yeekaalu

²⁴ Bwe baatuuka e Kaperunawumu abasolooza b'omusolo gwa Yeekaalu babiri ne bajja eri Peetero ne bamubuuza nti, "Mukama wammwe tawa musolo?"

²⁵ Peetero n'abaddamu nti, "Awa!" Peetero n'ayingira mu nnyumba. Naye Yesu n'amwesooka n'amubuuza nti, "Olowooza otya Simooni, bakabaka b'ensi basolooza omusolo ku bantu baabwe abatuuze oba ku bannamawanga be baba bawangudde?"

²⁶ Peetero n'addamu nti, "Basolooza ku bannamawanga." Yesu n'amugamba nti, "Kale bannansi bo ba ddembe."

²⁷ "Naye obutabanyiiza, genda ku nnyanja osuulemu eddobo, ekyennyanja ky'onoosooka okukwasa okyasamye akamwa. Mu kamwa kaakyo onoolabamu esutateri, ozitwale oziweeyo osasule omusolo gwange n'ogugwo."

Matayo 18

Omukulu mu Bwakabaka obw'Omugulu

¹ Mu kiseera ekkyo abayigirizwa ba Yesu ne bajja gy'ali nga bagamba nti, "Ani asinga obukulu mu bwakabaka obw'omugulu?"

² Yesu n'ayita omwana omuto n'amussa mu makkati gaabwe.

³ N'abagamba nti, "Ddala ddala mbagamba nti bwe mutakyuke kufaanana ng'abaana abato temugenda kuyingira mu bwakabaka obw'omugulu.

⁴ Noolwekyo buli eyeetoowaza ng'omwana ono omuto y'aliba asinga obukulu mu bwakabaka obw'omugulu.

⁵ "Na buli asembeza omwana omuto ng'ono mu linnya lyange ng'asembeza Nze.

⁶ Naye alyesittaza omugulu baana abato anzikiririzaamu, asaanidde okusibibwa olubengo mu bulagoasuulibwe mu nnyanja."

⁷ "Ensi zigisanze! Kubanga ejjudde ebibi bingi. Okukemebwa okukola ebibi tekulema kubaawo, naye zimusanz oyo akuleeta.

⁸ Obanga omukono gwo gukuleetera okwonoona gutemeko ogusuule. Kisinga okuyingira mu bulamu ng'ogongobadde oba ng'olemadde, okusinga okugenda mu muliro ogutazikira ng'olina emikono ebiri n'ebigere bibiri.

⁹ Obanga eriiso lyo nga likuleetera okwonoona, liggyeemu olisuule. Kisinga okuyingira mu ggulu ng'olina eriiso limu okusinga okusuulibwa mu muliro gwa ggeyeena ng'olina amaaso go gombi."

Olugero Iw'Endiga Eyabula

¹⁰ "Mwekuume obutanyoomanga n'omugulu baana bano abato. Kubanga mbagamba nti bamalayika baabwe ennaku zonna babeera mu maaso ga Kitange ali mu ggulu.

11 Kubanga Omwana w'Omuntu yajja okulokola ekyabula.

12 "Mulowooza kiki ekituufu? Omuntu bw'aba n'endiga ze ekikumi, emu n'emubulako, taleka ziri ekyenda mu omwenda ku lusozi n'agenda anoonya eri emu ebuze?

13 Ddala ddala mbagamba nti, bw'agiraba agisanyukira nnyo okusinga ziri ekyenda mu omwenda ezitaabuze.

14 Kale bwe kityo ne Kitammwe ali mu ggulu tasiima kulaba ng'omu ku bato bano ng'azikirira."

Owooluganda Okusonyiwa Muganda we

15 "Muganda wo bw'akusobyanga ogendanga gy'ali n'omutegeeza ekisobyo kye nga muli babiri. Bw'akkirizanga n'akwetondera olwo ng'oggyeemu omuntu mu muganda wo.

16 Naye bw'agaananga okukuwuliriza, ofunangayo omuntu omulala omu oba babiri obujulirwa bw'abantu ababiri oba abasatu bukakase buli kigambo.

17 Naye bw'agaananga okubawuliriza ng'ensonga ozitwala eri Ekklesia. Singa agaana okuwuliriza Ekklesia, abeere nga munaggwanga, era omuwooza w'omusolo.

18 "Ddala ddala mbagamba nti byonna bye mulisiba ku nsi, ne mu ggulu birisibwa ne bye mulisumulula ku nsi, ne mu ggulu bigenda kusumululwa.

19 "Era ddala ddala mbagamba nti bwe munaabanga babiri mu nsi ne mukkiriziganya ku ekyo kye mwagala okusaba, Kitange ali mu ggulu alikibakolera.

20 Kubanga abantu ababiri oba abasatu bwe banaakuunjaananga mu linnya lyange, nange nnaabeeranga awo wakati waabwe."

Olugero Iw'Omuddu Atasonyiwa

21 Awo Peetero n'ajja n'abuuza Yesu nti, "Mukama wange, muganda wange bw'ansobyanga musonyiwanga emirundi emeka? Emirundi musanvu?"

22 Yesu n'amuddamu nti, "Sikugamba nti emirundi musanvu naye emirundi nsanvu emirundi musanvu."

23 Awo Yesu n'agamba nti, "Obwakabaka obw'omu ggulu bufaananyizibwa nga kabaka eyayagala okubala ebitabo bye eby'ensimbi, n'abaddu be.

24 Bwe yatandika okubikebera ne bamuleetera gw'abanja ettalanta omutwalo gumu.

25 Naye olw'okuba ng'omusajja teyalina nsimbi za kusasula bbanja eryo, mukama we kyeyava alagira batunde omusajja oyo ne mukazi we n'abaana be n'ebintu bye byonna ebbanja ligewe.

²⁶ “Naye omuddu oyo n’agwa wansi mu maaso ga mukama we, n’amwegayirira nti, ‘Ngumiikiriza, nzia kukusasula ebbanja lyonna.’

²⁷ “Mukama we n’asaasira omuddu oyo n’amusonyiwa ebbanja lyonna!

²⁸ “Omuddu oyo bwe yafuluma n’asanga munne gwe yali abanja eddinaali kikumi, n’amugwa mu bulago nga bw’amugamba nti, ‘Ssasula kye nkubanja.’

²⁹ “Naye munne n’agwa wansi, n’amwegayirira ng’agamba nti, ‘Ngumiikiriza, nnaakusasula.’

³⁰ “Naye amubanja n’agaana okumuwliriza, n’amuteeka mu kkomera akuumirwe omwo okutuusa lw’aliasula ebbanja lyonna.

³¹ Awo baddu banne bwe baakiraba ne banakuwala nnyo, ne bagenda bategeeza mukama we ebigambo bye balabye.

³² “Awo mukama we n’atumya omuddu gwe yali asonyiye n’amugamba nti, ‘Oli muddu mubi nnyo. Nakusonyiye ebbanja eryo lyonna, kubanga wanneegayiridde,

³³ naye ggwe kyali tekikugwanira kusaasira muddu munno nga nange bwe nakusaasidde?’

³⁴ Mukama we kyeyava asunguwala nnyo, n’amukwasa abaserikale bamusse mu kkomera okutuusa lw’aliasula ebbanja lyonna.

³⁵ “Kale ne Kitange ali mu ggulu bw’atyo bw’alibakola singa mmwe abooluganda temusonyiwa okuva mu mitima gyammwe.”

Matayo 19

Okugattululwa

¹ Awo Yesu bwe yamala okwogera ebigambo ebyo n’ava e Ggaliraaya n’ajja mu bitundu bya Buyudaaya okusukka emitala wa Yoludaani.

² Ekibiina kinene ne bamugoberera era n’awonya abalwadde baabwe.

³ Abafalisaayo ne bajja gy’ali bamugezese nga bagamba nti, “Kikkirizibwa omusajja okugoba mukazi we olw’ensonga n’emu?”

⁴ Yesu n’abaddamu nti, “Temusomanga nti, ‘Okuva ku lubereberye Katonda yatonda omusajja n’omukazi,’

⁵ era nti, ‘Omusajja anaalekanga kitaawe ne nnyina, ne yeegatta ne mukazi we. Nabo banaabanga omuntu omu,

⁶ nga tebakyali babiri naye omuntu omu.’ Noolwekyo Katonda be yagatta awamu, omuntu tabaawukanyanga.”

⁷ Ne bamubuuza nti, "Kale lwaki Musa yalagira nti omusajja bw'abanga agoba mukazi we amuwenga ebbaluwa ey'okumugoba?"

⁸ Yesu n'abaddamu nti, "Olw'obukakanyavu bw'emitima gyammwe, Musa kyeyava abakkiriza okugoba bakazi bammwe, naye nga okuva olubereberye tekyali bwe kityo.

⁹ Era mbagamba nti omuntu yenna anaagobanga mukazi we okuggyako olw'obwenzi, n'amala awasa omulala, anaabanga ayenze, n'oyo anaawasanga oyo agobeddwa anaabanga ayenze."

¹⁰ Abayigirizwa ne bamugamba nti, "Obanga bwe biri bwe bityo, ekisingako obulungi bwe butawasiza ddala!"

¹¹ Yesu n'abaddamu nti, "abantu bona tebayinza kutegeera kigambo kino okuggyako abo Katonda b'akiwa.

¹² Kubanga abamu bazaalibwa nga tebasobola kuwasa abalala balaayibwa bantu bannaabwe ate abalala bagaana okuwasa ne beewaayo okukola omulimu ogw'obwakabaka obw'omu ggulu. Buli asobola okutegeera kino akitegeere."

Yesu n'Abaana

¹³ Yesu ne bamuleetera abaana abato abasseeko emikono gye abawe n'omukisa. Naye abayigirizwa ne bajunga abaabaleeta.

¹⁴ Naye Yesu n'agamba abayigirizwa be nti, "Mukkirize abaana abato bajje gye ndi so temubaziyiza, kubanga abafaanana ng'abo be bannannyini bwakabaka obw'omu ggulu."

¹⁵ N'abassaako emikono n'abawa omukisa n'alyoka avaayo.

Omuvubuka Omugagga

¹⁶ Awo omuntu omu n'amuseemberera n'amubuuza nti, "Omuyigiriza, nkole ki ekirungi okufuna obulamu obutaggwaawo?"

¹⁷ Yesu n'amuddamu nti, "Lwaki ombuuza ebikwata ku birungi? Omulungi ali omu, naye bw'obanga oyagala okuyingira mu bulamu, ggondera amateeka."

¹⁸ N'amuddamu nti, "Ge galuwa?" Yesu n'amugamba nti, "Tottanga, toyendanga, tobbanga, towaayirizanga,

¹⁹ ossangamu ekitiibwa kitaawo ne nnyoko era yagalanga muliraanwa wo nga bwe weeyagala wekka.'"

²⁰ Omuvubuka oyo n'amuddamu nti, "Ebyo byonna nabikwata dda, ate kiki ekimpeebuuseeko?"

²¹ Yesu n'amugamba nti, "Obanga oyagala okuba omutuukirivu genda otunde ebibyo, ensimbi ozigabire abaavu, kale oliba n'obugagga mu ggulu, olyoke ojje ongoberere."

²²Naye omuvubuka bwe yawulira ebyo n'agenda ng'anakuwadde kubanga yali mugagga.

²³Awo Yesu n'agamba abayigirizwa be nti, "Ddala ddala mbagamba nti, kizibu omugagga okuyingira mu bwakabaka obw'omu ggulu.

²⁴Era mbategeeza nti kyangu eñjamira okuyita mu nnyindo y'empiso, okusinga omugagga okuyingira mu bwakabaka bwa Katonda!"

²⁵Ebigambo ebyo abayigirizwa be ne bibeewuunyisa nnyo, n'okugamba ne bagamba nti, "Kale ani ayinza okulokolebwa?"

²⁶Yesu n'abatunuulira enkaliriza n'abagamba nti, "Eri abantu tekiyinzika. Naye Katonda, ayinza byonna."

²⁷Awo Peetero n'abuuza Yesu nti, "Ffe twaleka byonna ne tukugoberera. Kale ffe tulifuna ki?"

²⁸Yesu n'amuddamu nti, "Ddala ddala mbagamba nti, Omwana w'Omuntu bw'alituula ku ntebe ye ey'ekitiibwa mu nsi empya, nammwe abangoberera mulituula ku ntebe ekkumi n'ebbirini nga mulamula ebika bya Isirayiri ekkumi n'ebbirini.

²⁹Na buli muntu yenna eyaleka ennyumba, oba baganda be, oba bannyina, oba kitaawe oba nnyina, oba baana be, oba ttaka lye olw'erinnya lyange aliweebwa okwenkana emirundi kikumi, era alisikira obulamu obutaggwaawo.

³⁰Bangi aboolubereberye, abaliba abooluvannyuma, n'ab'oluvannyuma ne baba aboolubereberye."

Matayo 20

Olugero Iw'Abalimi mu Nnimiro y'Emizabbibu

¹Awo Yesu n'abagamba nti, "Obwakabaka obw'omu ggulu bufaanana ng'omuntu ssemaka, eyakeera mu makya n'apangisa abakozi okukola mu nnimiro ye ey'emizabbibu.

²N'alagaana n'abapaksi okubasasula omuwendo eddinaali emu emu, ze zaali ensimbi ez'olunaku olumu. N'abasindika mu nnimiro ye ey'emizabbibu.

³"Bwe waayitawo essaawa nga bbiri n'asanga abalala nga bayimiridde mu katale nga tebalina kye bakola,

⁴nabo n'abagamba nti, 'Nammwe mugende mu nnimiro y'emizabbibu, era nnaabasasula empeera ebasaanira.'

⁵Ne bagenda. "Ku ssaawa omukaaga ne ku mwenda n'asindikayo abalala mu ngeri y'emu.

⁶Essaawa nga ziweze nga kkumi n'emu n'asanga abalala nga bayimiridde awo, n'ababuuza nti, 'Lwaki tuyimiridde awo olunaku lwonna nga temulina kye mukola?'

⁷"Ne bamuddamu nti, 'Kubanga tetufunye atuwa mulimu.' N'abagamba nti, 'Nammwe mugende mukole mu nnimiro yange ey'emizabbib.'

⁸"Awo obudde nga buwungeera nannyini nnimiro n'alagira nampala ayite abakozi abawe empeera yaabwe ng'asookera ku b'oluvannyuma.

⁹"Abaatandika ku ssaawa ekkumi n'emu ne baweebwa eddinaali emu emu.

¹⁰Bali abaasookayo bwe bajja ne basuubira nti bo ze banaasasulwa zija kusingako obungi. Naye nabo yabasasula omuwendo gwe gumu ogw'olunaku olumu nga bali.

¹¹Bwe baagifuna ne beemulugunyiza nannyini nnimiro

¹²nga bagamba nti, 'Bano abooluvannyuma baakoledde essaawa emu yokka naye lwaki obawadde empeera eyenkana eyaffe, ffe abaakoze okuva mu makya ne mu musana gw'omu tuntu?'

¹³"Mukama waabwe kwe kuddamu omu ku bo nti, 'Munnange si kubbye; bwe wabadde otandika okukola tetwalagaanye eddinaali emu?

¹⁴Twala eddinaali yo ogende. Naye njagala n'ono asemyeyo okumuwa empeera y'emu nga gye nkuwadde.

¹⁵Siyinza kukozesa byange nga bwe njagala? Obuggyaa bukukutte kubanga ndi wa kisa?"

¹⁶"Kale nno bwe kityo bwe kiriba abooluvannyuma ne baba aboolubereberye, n'aboolubereberye ne baba abooluvannyuma."

¹⁷Awo Yesu bwe yali ayambuka e Yerusaalemi n'atwala abayigirizwa be ekkumi n'ababiri, mu kyama. Bwe baali mu kkubo, n'abagamba nti,

¹⁸"Laba twambuka e Yerusaalemi, Omwana w'Omuntu aliweebwayo eri bakabona abakulu n'abannyonnyozi b'amateeka, bamusalire omusango ogw'okufa.

¹⁹Era balimuwaayo eri Abamawanga ne bamuduulira ne bamukuba, era balimukomerera ku musaalaba. Naye ku lunaku olwokusatu alizuukizibwa."

Okusaba kwa Nnyina Yakobo ne Yokaana

²⁰Awo nnyina w'abaana ba Zebbedaayo, n'ajja eri Yesu ne batabani be bombi, n'amusinza ng'ayagala okubaako ky'amusaba.

²¹ Yesu n'amubuuza nti, "Kiki ky'oyagala?" N'addamu nti, "Nsaba, mu bwakabaka bwo, abaana bange bano bombi batuule naawe omu ku mukono gwo ogwa ddyo n'omulala ku gwa kkono."

²² Naye Yesu n'amuddamu nti, "Tomanyi ky'osaba. Muyinza okunywa ku kikompe nze kye ijenda okunywako?" Ne baddamu nti, "Tuyinza."

²³ N'abagamba nti, "Weewaawo ekikompe mugenda kukinywako. Naye eky'okutuula ku mukono gwange ogwa ddyo oba ogwa kkono nze sikirinaako buyinza. Ebifo ebyo byategekebwa dda Kitange."

²⁴ Abayigirizwa bali ekkumi bwe baawulira ebyo abooluganda ababiri bye baasaba, ne babanyiigira nnyo.

²⁵ Yesu kwe kubayita n'abagamba nti, "Mumanyi ng'abakulembeze b'abamawanga babazitoowereza embeera, n'abakulu baabwe babafuza lyanyi.

²⁶ Naye tekisaanye kuba bwe kityo mu mmwe. Buli ayagala okubeera omukulu mu mmwe, abeerenga muweereza wa banne.

²⁷ Na buli ayagala okuba omwami mu mmwe aweerezenga banne ng'omuddu waabwe.

²⁸ Mube nga Omwana w'Omuntu atajja kuweerezebwa wabula okuweereza, n'okuwaayo obulamu bwe ng'omutango okununula abangi."

Yesu Azibula Bamuzibe Babiri

²⁹ Awo Yesu n'abayigirizwa be bwe baali bava mu kibuga Yeriko, ekibiina kinene ne kimugoberera.

³⁰ Abazibe b'amaaso babiri abaali batudde ku mabbali g'ekkubo bwe baawulira nga Yesu ayita mu kkubo eryo, ne baleekaanira waggulu nnyo nga bakoowoola nti, "Ssebo, Omwana wa Dawudi, otusaasire!"

³¹ Ekibiina ne kibalagira okusirika, naye bo, ne beeyongera bwetyongezi okukoowoolera waggulu nga boogera nti, "Ssebo, Omwana wa Dawudi, tusasire."

³² Yesu bwe yabatuukako n'ayimirira n'ababuza nti, "Mwagala mbakolere ki?"

³³ Ne bamuddamu nti, "Mukama waffe, twagala otuzibile amaaso."

³⁴ Yesu n'abasaasira n'akwata ku maaso gaabwe amangwago ne gazibuka, ne bamugoberera.

Matayo 21

Yesu ayingira n'Ekitiibwa mu Yerusaalemi

¹ Awo Yesu n'abayigirizwa be bwe baali basemberera Yerusaalemi nga batuuse kumpi n'ekibuga Besufaage ku lusozi lwa Zeyituuni, Yesu n'atuma babiri ku bayigirizwa be.

² N'abagamba nti, "Mugende mu kibuga ekiri mu maaso, bwe munaaba mwakakiyingira mujja kulaba endogoyi ng'esibiddwa awo wamu n'omwana gwayo. Muzisumulule muzireete wano.

³ Naye omuntu yenna bw'anaabaako ky'abagamba, mumuddamu nti, 'Mukama waffe y'azeetaaga,' amangwago aija kuziweereza."

⁴ Kino kyabaawo okutuukiriza ebigambo nnabbi bye yayogera nti,

⁵ "Mubuulire omuwala wa Sayuuni nti, 'Laba Kabaka wammwe aija gye muli nga muwombeefu, nga yeebagadde omwana gw'endogoyi.'"

⁶ Awo abayigirizwa ababiri ne bagenda ne bakola nga Yesu bwe yabalagira.

⁷ Ne baleeta endogoyi n'omwana gwayo, ne baaliirako eminagiro gyabwe ku ndogoyi, n'agyebagala.

⁸ Abantu bangi ne baaliira engoye zaabwe mu luguudo n'abalala ne batema amatabi g'emiti ne bagaalira mu luguudo.

⁹ Ebibiina ebyamukulembra, n'ebyo ebyamuva emabega ne bireekaana nti, "Ozaana Omwana wa Dawudi!" "Aweereddwa omukisa oyo aija mu linnya lya Mukama." "Ozaana waggulu ennyo!"

¹⁰ Awo Yesu bwe yayingira mu Yerusaalemi, ne wabaawo oluyoogaano mu kibuga kyonna nga beebuuza nti, "Ono ye ani?"

¹¹ Abaali mu kibiina ne baddamu nti, "Ono ye Yesu Nnabbi ava mu Nazaaleesi eky'omu Ggaliraaya."

Yesu mu Yeekaalu

¹² Awo Yesu n'ayingira mu Yeekaalu n'agobamu abasuubuzi bonna n'avuunika emmeeza z'abaali bawaanyisa ensimbi n'entebe z'abaali batunda amayiba.

¹³ N'abagamba nti, "Kyawandiikibwa nti, 'Ennyumba yange eneeyitibwanga nnyumba ya kusabirangamu,' naye mmwe mugifudde 'empuku y'abanyazi.'"

¹⁴ Awo abazibe b'amaaso n'abalema ne bajja gy'ali mu Yeekaalu n'abawonya.

¹⁵ Naye bakabona abakulu n'abannyonnyozi b'amateeka bwe baalaba eby'ekitalo bye yakola, n'abaana abato abaali mu Yeekaalu nga baleekaanira waggulu nti, "Ozaana Omwana wa Dawudi!" ne banyiiga.

¹⁶ Ne bamubuuza nti, "Owlira bano bye bagamba?" Yesu n'abaddamu nti, "Mpulira. Temusomangako nti, "'Abaana abato n'abawere abayonka balimutenderez!'"

¹⁷ N'abaviira, n'afuluma mu kibuga n'agenda e Besaniya, n'asula eyo.

Omuti Ogwawotoka

¹⁸ Awo enkeera bwe yali ng'addayo mu kibuga n'alumwa enjala,

¹⁹ n'alengera omutiini ku mabbali g'ekkubo, n'agutuukako n'atasangako ttiini okuggyako amakoola ameereere. N'agugamba nti, "Toddangayo okubala ebibala." Amangwago omuti ne guwotoka.

²⁰ Abayigirizwa bwe baakiraba ne beewuunya ne beebruza nti, "Omutiini guwotose gutya amangu?"

²¹ Yesu n'abaddamu nti, "Ddala ddala mbagamba nti bw'oba n'okukkiriza nga tobuuusabuusa, oyinza okukola ekiri nga kino n'ebisingawo. Oyinza n'okulagira olusozi luno nti, 'Siguka ogwe mu nnyanja,' ne kibaawo.

²² Buli kye munaasabanga nga mukkiriza, munaakiweebwanga."

Yesu Abuuzibwa gy'aggya Obuyinza

²³ Awo Yesu bwe yakomawo mu Yeekaalu bakabona abakulu n'abakulembeze b'Abayudaaya ne bajja gy'ali ne bamubuuza nti, "Buyinza ki obukukoza ebyo, era ani yakuwa obuyinza obwo?"

²⁴ Yesu n'addamu nti, "Mumale okunziramu ekibuuzo kyange kino, nange ndyoke mbabuulire obuyinza bwe nkozesha bino.

²⁵ Okubatiza kwa Yokaana kwava wa? Kwava mu ggulu oba mu bantu?" Ne basooka ne boogeraganyaamu bokka na bokka nti, "Bwe tugamba nti, 'Kwava mu ggulu,' ajja kutubuuza nti, 'Kale lwaki temwamukkiriza?'

²⁶ Ate bwe tunaagamba nti, 'Kwava mu bantu,' tutya ekibiina, kubanga bona bamanyi nga Yokaana yali nnabbi."

²⁷ Bwe batyo ne baddamu nti, "Tetumanyil!" Yesu kwe kubaddamu nti, "Nange sijja kubabuulira obuyinza bwe nkozesha bino."

Olugero olw'Abaana Ababiri

²⁸ "Kale mulowooza mutya ku kino? Waaliwo omusajja eyalina abaana be babiri, n'agamba omubereberye nti, 'Genda okole mu nnimiro y'emizabbibu leero.'

²⁹ "Omulenzi n'addamu nti, 'ŋjaanyi,' naye oluvannyuma ne yeerowooza n'agenda.

³⁰ "Ate kitaabwe n'agenda eri omulala n'amugamba ekintu kye kimu. Naye ye n'addamu nti, 'Nnaagenda mukama wange.' Naye n'atagenda.

³¹ "Kale, ku bombi aliwa eyagondera kitaawe?" Ne bamuddamu nti, "Omulenzi ow'olubereberye." Awo Yesu n'abagamba nti, "Ddala ddala mbagamba nti,

abasolooza b'omusolo ne bamalaaya balibasooka okuyingira mu bwakabaka bwa Katonda.

³²Kubanga Yokaana yajja ng'abuulira ekkubo ery'obutuukirivu naye ne mutamukkiriza. Wabula abasolooza b'omusolo ne bamalaaya baamukkiriza, newaakubadde nga mwakiraba, oluvannyuma temwenenya kumukkiririzaamu."

Olugero olw'Abalimi

³³ "Muwulirize olugero olulala. Waaliwo omusajja ssemaka eyalina emizabbibu, n'agyetoolooza olukomera, n'asimamu essogolero, n'azimbamu n'omunaala, n'agipangisa abalimi, n'agenda olugendo.

³⁴Ekiseera ky'amakungula bwe kyatuuka, n'atuma abaddu be eri abalimi banone ebibala byamu.

³⁵ "Naye abalimi ne badda ku baddu be, omu ne bamukuba, n'omulala ne bamutta, n'omulala ne bamukasuukirira amayinja.

³⁶Ate n'abatumira abaddu abalala nga bangiko okusinga abaasooka, era nabo ne babayisa mu ngeri y'emu nga bali abaasooka.

³⁷Oluvannyuma n'abatumira mutabani we, ng'alowooza nti, 'Bajja kumussaamu ekitiibwa.'

³⁸ "Naye abalimi bwe baalaba omwana ng'ajja ne bateesa nti, 'Ono y'agenda okusika, ka tumutte, ebyobusika bwe biriba byaffe!'

³⁹Bwe batyo ne bamufulumya ebweru w'ennimiro y'emizabbibu ne bamutta.

⁴⁰Kale nannyini nnimiro y'emizabbibu bw'alikomawo alibakola atya?"

⁴¹ Ne bamuddamu nti, "Abantu abo ababi bwe batyo alibazikiririza ddala, ennimiro y'emizabbibu n'agipangisa abalimi abalala abanaamuwanga ebibala mu ntuuko zaabyo."

⁴² Awo Yesu n'ababuuza nti, "Temusomanga ku Kyawandiikibwa kino nti, 'Ejjinja abazimbi lye baagaana lye lifuuse ejjinja ekkulu ery'oku nsonda. Kino kyava eri Mukama era kya kyewuunyo.'

⁴³ "Kyenva mbagamba nti, Obwakabaka bwa Katonda bulibaggyibwako ne buweebwa eggwanga eribala ebibala byabwo.

⁴⁴Oyo alyesitala n'agwa ku jjinja eryo, alibetentebwa, na buli gwe lirigwako lirimubetenta."

⁴⁵Awo bakabona abakulu n'Abafalisaayo bwe baabiwlira ne bategeera nga Yesu bo b'ayogerako.

⁴⁶Ne baagala bamukwate, naye ne batya ekibiina, kubanga abantu Yesu baamukkiriza, nga nnabbi.

Matayo 22

Olugero olw'Embaga ey'Obugole

¹Yesu n'addamu n'ayogera nabo mu ngero ng'agamba nti,

²"Obwakabaka obw'omu ggulu bufaanana nga, kabaka eyategekera omwana we embaga ey'obugole.

³N'atuma abaddu be okuyita abaayitibwa ku mbaga, ne batayagala kujja.

⁴ "Kabaka n'abatumira abaddu abalala babategeeze nti, 'Mutegeeze abayite nti nteeseteese, ekijulo, zisseddume zange n'ente ensavuwazze zittiddwa, era buli kimu kitegekeddwa. Mujje ku mbaga.'

⁵ "Naye ne batassaayo mwoyo, omu n'alaga mu nnimiro ye, omulala n'alaga mu bya busuubuzi bye.

⁶Abalala ne babakwata ne bababonyaabonya ne babatta.

⁷Awo Kabaka n'asunguwala, n'ayungula ekibinja ky'abaserikale n'azikiriza abatemu abo, n'ayokya ekibuga kyabwe.

⁸"Awo kabaka n'agamba abaddu be nti, 'Ekijulo ky'embaga kiteekeddwateekeddwa, naye abaayitibwa ne batasaanira.

⁹Noolwekyo mugende mu nguudo z'omu kibuga muyite abantu bona be munaasangayo bajje ku mbaga.'

¹⁰Abaddu bwe baagenda mu nguudo, ne bakuŋjaanya buli gwe baasanga, ababi n'abalungi, ekisenge ky'embaga ne kijjula abagenyi.

¹¹ "Kabaka bwe yayingira okulaba abaali batudde ku mmeeza, n'alaba omusajja eyali tayambadde kyambalo kya mbaga.

¹²Kabaka n'amubuuza nti, 'Munnange, oyingidde otya wano nga toyambadde kyambalo kya mbaga?' Omusajja nga talina ky'addamu.

¹³ "Awo kabaka n'alagira basajja be nti, 'Mumusibe emikono n'amagulu mumukasuke ebweru mu kizikiza ekikutte be zigizigi, eri okukaaba n'okulum obujiji.'

¹⁴ "Abayitibwa bangi, naye abalondemu batono."

Okuwa Kayisaali Omusolo

¹⁵Awo Abafalisaayo ne bagenda ne bateesa engeri gye banaategamu Yesu bamukwase mu bigambo.

¹⁶Ne bamutumira abayigirizwa baabwe awamu n'Abakerodiyani nga bagamba nti, "Omuyigiriza, tumanyi ng'oli mulungi, era oyigiriza mazima awatali kutyu muntu yenna, kubanga tososola mu bantu.

¹⁷Kale tutegeeze, olowooza ekituufu kye kiri wa? Kituufu okuwa Kayisaali omusolo oba si kituufu?"

¹⁸Naye Yesu bwe yamanya obutali butuukirivu bwabwe, n'abagamba nti, "Bannanfuusi mmwe, Lwaki mungezesza?

¹⁹Kale, mundeetero wano ku nsimbi ze muweesa omusolo ndabe." Ne bamuleetera eddinaali.

²⁰N'ababuuza nti, "Kino ekifaananyi n'obuwandiike ebiriko by'ani?"

²¹Ne bamuddamu nti, "Bya Kayisaali." N'abagamba nti, "Kale ebya Kayisaali mubiwenga Kayisaali, n'ebya Katonda mubiwenga Katonda."

²²Bwe baawulira ebigambo ebyo ne beewuunya ne bamuleka ne bagenda.

Obufumbo mu Kuzuukira

²³Ku lunaku olwo lwe lumu, Abasaddukaayo, abagamba nti, "Tewali kuzuukira," ne bajja eri Yesu, ne bamabuuza nti,

²⁴"Omuyigiriza Musa yagamba nti, 'Singa omusajja afa nga tazadde mwana, muganda w'omufu awase nnamwandu oyo azaalire muganda we abaana.'

²⁵Twalina abooluganda musanvu. Owooluganda ow'olubereberye n'awasa, kyokka n'afa nga tazadde mwana, bw'atyo mukazi we n'afumbirwa muganda we.

²⁶Ekintu kye kimu ne kituuka ku wookubiri ne ku wookusatu, okutuusa ku w'omusanvu.

²⁷Oluvannyuma n'omukazi oyo naye n'afa.

²⁸Kale okuzuukira nga kutuuse omukazi oyo aliba muka ani ku abo omusanvu? Kubanga bona abooluganda omusanvu yabafumbirwako."

²⁹Naye Yesu n'abagamba nti, "Olw'obutamanya byawandiikibwa n'obutategeera maanyi ga Katonda kyemuvudde mukyama.

³⁰Kubanga mu kuzuukira teriiyo kuwasa wadde okufumbirwa, nayeabantu bona baba nga bamalayika mu ggulu.

³¹Naye ebikwata ku kuzuukira kw'abafu, temusomanga ku kigambo ekyayogerwa Katonda ng'agamba nti,

³²"Nze, ndi Katonda wa Ibulayimu era ndi Katonda wa Isaaka era ndi Katonda wa Yakobo?" Noolwekyo Katonda si Katonda wa bafu wabula Katonda wa balamu."

³³ Ebibiina ne biwuniikirira bwe baawulira okuyigiriza kwe.

Etteeka Erisinga Obukulu mu Mateeka

³⁴ Abafalisaayo bwe baawulira nga Yesu Abasaddukaayo abamazeeko eby'okwogera, ne bakuŋjaana.

³⁵ Omu ku bo eyali munnamateeka n'amubuuza ekibuuzo ng'amugezesu nti,

³⁶ "Omuyigiriza, tteeka ki erisinga obukulu mu mateeka."

³⁷ Yesu n'addamu nti, "Yagalanga Mukama Katonda wo n'omutima gwo gwonna, n'obulamu bwo bwonna, n'amagezi go gonna."

³⁸ Eryo ly'etteeka ery'olubereberye era lye Iisingira ddala obukulu.

³⁹ N'eryokubiri eririfaananako lye lino nti, 'Yagalanga muliraanwa wo nga gwe bwe weeyagala wekka.'

⁴⁰ Amateeka amalala gonna gasinziira mu mateeka ago gombi ne bya bannabbi."

⁴¹ Awo mu kiseera ekkyo Abafalisaayo nga bakuŋjaanye, Yesu n'ababuuza nti,

⁴² "Kristo mumulowoozako mutya? Mwana waani?" Ne baddamu nti, "Mwana wa Dawudi."

⁴³ Yesu kyeyava ababuuza nti, "Dawudi ng'ajjudde Omwoyo bw'ayogera ku Kristo, lwaki ate amuyita 'Mukama we', ng'agamba nti,

⁴⁴ "Mukama yagamba Mukama wange nti: "Tuulira wano ku mukono gwange ogwa ddyo, okutuusa lwe ndifufuggaza abalabe bo ne mbassa wansi w'ebigere byo?"'

⁴⁵ Noolwekyo obanga Dawudi amuyita 'Mukama we,' kale, ate abeera atya omwana we?"

⁴⁶ Ne wataba n'omu amuddamu, era okuva olwo ne watabaawo ayanjanga kwongera kumubuuza bibuuzo birala.

Matayo 23

¹ Awo Yesu n'ayogera eri ebibiina n'abayigirizwa be ng'agamba nti,

² "Abawandiisi n'Abaflisaayo batudde ku ntebe ya Musa.

³ Noolwekyo mukole era mwekuume buli kye babagamba wabula temugoberera bikolwa byabwe. Kubanga boogera naye ne batakola bye bagamba.

⁴ Basiba emigugu emizito ne bagitikka abalala, so nga bo n'okugezaako tebagezaako kukwatako n'engalo yaabwe.

⁵ “Buli kye bakola bakikola abantu babalabe. Bambala ku mikono gyabwe obusawo omuli ennyiriri eziva mu Byawandiikibwa, ne bawanvuya amatanvuuwa ku byambalo byabwe, agajjukiza abagambala okudda eri Mukama, nga babikola okulaga ababalaba.

⁶ Baagala nnyo ebifo eby'oku mwanjo ku mbaga, ne mu bifo eby'ekitiibwa mu makunjaaaniro.

⁷ Banyumirwa nnyo okuweebwa ekitiibwa mu butale n'okuyitibwa ‘Labbi.’

⁸ “Temweyitanga ‘Labbi,’ kubanga Katonda yekka ye Muyigiriza wammwe, naye mmwe muli baaluganda.

⁹ Era temuyitanga muntu yenna ku nsi ‘Kitammwe,’ kubanga Katonda ali mu ggulu ye yekka gwe muteekwa okuyita bwe mutyo.

¹⁰ Era temuganyanga muntu yenna kubayita ‘bayigiriza,’ kubanga omuyigiriza wammwe ali omu yekka, ye Kristo.

¹¹ Oyo ayagala abantu okumussaamu ekitiibwa. Asaana abeere muweereza waabwe.

¹² Naye buli alyegulumiza alikkakkanyizibwa, na buli alyetooowaza aligulumizibwa.

¹³ “Zibasanze mmwe Abawandiisi, nammwe Abafalisaayo. Bannanfuusi mmwe! Muziyiza abantu abalala okuyingira mu bwakabaka obw’omu ggulu, ate nammwe ne mutayingira.

¹⁴ “Bannanfuusi mmwe Abawandiisi nammwe Abafalisaayo! Mulowoozes aabantu nti muli batuukirivu nga musaba essaala, so ng’ate mwekyusa ne mugobaganya bannamwandu mu mayumba gaabwe.

¹⁵ Zibasanze bannanfuusi mmwe Abawandiisi nammwe Abafalisaayo! Kubanga mutambula okwetooloola ennyanja ne ku lukalu musobole okukyusa omuntu, naye bw’akyuka, mumufuula mwana wa ggeyeena okusingawo emirundi ebiri.

¹⁶ “Zibasanze mmwe abakulembeze abazibe b’amaaso abagamba nti, ‘Okulayira Yeekaalu, si nsonga, naye oyo alayira zaabu ali mu Yeekaalu, asaana okukituukiriza!’

¹⁷ Mmwe abatalina magezi abazibe b’amaaso! Ku ebyo byombi kiuwa ekisingako obukulu, zaabu oba Yeekaalu efuula zaabu okuba entukuvu?

¹⁸ Ate mugamba nti, ‘Omuntu okulayira ekyoto, kirina amakulu, naye bw’alayira ebirabo ebireeteddwa ku kyoto, asaana okukituukiriza!’

¹⁹ Mmwe abazibe b’amaaso, ku byombi kiuwa ekisinga kinnaakyo obukulu, ekirabo ekiri ku kyoto oba ekyoto kyennyini ekifuula ekirabo ekyo okuba ekitukuvu?

- ²⁰Bwe mulayira ekyoto, muba mulayira ekyoto n'ebikiriko byonna,
- ²¹era bwe mulayira Yeekaalu muba mulayira Yeekaalu ne Katonda agibeeramu.
- ²²Era bwe mulayira eggulu, muba mulayira n'entebe ya Katonda ey'obwakabaka n'oyo yennyini agituulako.
- ²³ “Zibasanze, mmwe Abawandiisi, nammwe Abafalisaayo! Bannanfuusi mmwe! Kubanga muwaayo ekimu eky'ekkumi ku buli kintu, ne ku buli kika kya muddo oguwunyisa obulungi era oguwoomesa enva, okutuukira ddala ne ku kalagala akasinga obutono, naye ne mulagajjalira ebintu ebisinga obukulu eby'amateeka, ng'obwenkanya, n'okusaasira n'okukkiriza. Weewaawo musaanidde okuwaayo ekitundu eky'ekkumi, naye ebintu ebirala ebisinga obukulu temusaanidde kubiragajjalira.
- ²⁴Mmwe abakulembeze abazibe b'amaaso! Musengejja akabu muleme kukanywera mu mazzi, naye ne munyweramu ejnjamira!
- ²⁵ “Zibasanze mmwe Abawandiisi nammwe Abafalisaayo! Bannanfuusi mmwe! Muzigula kungulu kw'ekikopo ne kungulu kw'ebbakuli, naye nga munda mujjudde omululu n'okwefaako mwekka.
- ²⁶Mmwe Abafalisaayo abazibe b'amaaso! Musooke mulongoose munda w'ekikopo olwo nno mulongoose ne kungulu.
- ²⁷ “Zibasanze mmwe Abawandiisi nammwe Abafalisaayo! Mulabika ng'amalaalo agatemagana kungulu, songa munda gajjudde amagumba g'abafu n'obuvundu obwa buli ngeri.
- ²⁸Mulabika ng'abantu abatuukirivu kungulu, songa munda mujjudde obunnanfuusi n'obumenyi bw'amateeka.
- ²⁹ “Zibasanze mmwe Abawandiisi nammwe Abafalisaayo! Bannanfuusi mmwe! Kubanga muzimbira bannabbi ebijjukizo, ne mutimba ebijjukizo, by'abatuukirivu,
- ³⁰ne mulyoka mugamba nti, ‘Naye ddala singa twaliwo mu biseera bya bajjajjaffe tetwandisizza kimu nabo mu kuyiwa omusaayi gw'abannabbi.’
- ³¹Bwe mwogera mutyo muba mwessaako omusango nga bwe muli abaana b'abo abatta bannabbi.
- ³²Mugenda nga mutuukiriza ebyo bajjajjammwe bye bataamaliriza.
- ³³ “Mmwe emisota! Abaana b'embalasaasa muliwona mutya omusango ogugenda okubatwaza mu ggeyeena?
- ³⁴Kyenva mbaweereza bannabbi, n'abasajja ab'amagezi, n'abawandiisi, abamu mulibatta nga mubakomerera ku musaalaba, n'abalala mulibakuba embooko mu makunjjaaniro gammwe, ne mubagobaganya mu bibuga byammwe.

³⁵Bwe mutyo omusango gw'okutemula abatuukirivu, okutandikira ku Aberi omutuukirivu okutuuka ku Zaakaliya, mutabani wa Balakiya gwe mwattira wakati wa yekaaalu n'ekyoto, ne gubasingira ddala.

³⁶Ddala ddala mbagamba nti ebyo byonna birituuka ku mulembe guno.

³⁷ “Ggwe Yerusaalemi, ggwe Yerusaalemi atta bannabbi, n'okuba amayinja abo ababa batumiddwa gy'oli, emirundi nga mingi nnyo gye njagadde okukunjaanya abaana bo ng'enkoko bw'ekunjaanya obwana bwayo mu biwaawaatiro byayo, naye n'ogaana.

³⁸Laba kaakano ennyumba yo esigalidde awo, kifulukwa.

³⁹Kubanga nkugamba nti toliddayo kundaba nate, okutuusa ng'oyogedde nti, ‘Aweereddwa omukisa oyo ajja mu linnya lya Mukama.’”

Matayo 24

Ebikangabwa n'Omulembe Okuggwaako

¹Awo Yesu bwe yali ng'ava mu luggya lwa Yeekaaalu, abayigirizwa be ne bajja w'ali okumulaga enzimba ya Yeekaaalu,

²naye n'abagamba nti, “Bino byonna temubiraba? Ddala ddala mbagamba nti tewaliba jjinja na limu eririsigala nga litudde ku linnaalyo eritalibetentebwa.”

³Awo Yesu bwe yali ng'atudde ku lusozi olwa Zeyituuni, abayigirizwa be ne bajja gy'ali ne bamubuuza mu kyama nti, “Ebyo biribaawo ddi? Era kabonero ki akalitegeeza okujja kwo n'enkomerero y'ensi nti eri kumpi?”

⁴Yesu n'abaddamu nti, “Temukkirizanga muntu yenna kubalimbalmiba.

⁵Kubanga bangi balijja mu linnya lyange nga bagamba nti, ‘Nze Kristo’, era balirimba bangi.

⁶Munaatera okuwulira entalo n'eñjambo z'entalo. Temwekanganga, kubanga ebyo biteekwa okubaawo, naye enkomerero eriba tennatuuka.

⁷Amawanga galirwana ne gannaago, n'obwakabaka bulirwana n'obwakabaka, era walibaawo enjala mu bifo bingi ne musisi aliyuuguumya ebifo bingi.

⁸Naye bino byonna biriba ntandikwa butandikwa ng'ey'okulumwa okuzaala.”

⁹ “Muliweebwayo ne mubonyaabonyezebwa era ne muttibwa, era mulikyayibwa amawanga gonna olw'erinnya lyange.

¹⁰Era bangi balisendebwasendebwa okukola ebibi, n'abalala baliryamu bannaabwe olukwe, n'abalala ne bakyawagana.

¹¹Era bannabbi ab'obulimba bangi balijja ne bawubisaabantu bangi.

¹²Olw'obujeemu okuyinga obungi, era bangi okwagala kwabwe kuliwola.

¹³Naye abo abaligumiikiriza okutuuka ku nkomerero be balirokolebwa.

¹⁴Era Enjiri ey'obwakabaka eribuulirwa mu nsi yonna, nga bwe bujulirwa eri amawanga gonna n'olvannyuma enkomerero n'eryoka etuuka."

¹⁵ "Noolwekyo bwe muliraba 'eky'omuzizo eky'entiisa,' nnabbi Danyeri kye yayogerako, nga kiyimiridde mu kifo ekitukuvu asoma bino ategere,

¹⁶n'abo abalibeera mu Buyudaaya baddukiranga mu nsozi.

¹⁷Alibeera waggulu ku kasolya, takkanga kuyingira mu nnyumba ye kubaako byaggyamu.

¹⁸N'oyo alibeera mu nnimiro taddangayo eka okunonayo olugoye lwe.

¹⁹Naye ziribasanga abakyala abaliba balina embuto, n'abaliba bayonsa mu nnaku ezo.

²⁰Naye musabe ekiseera ky'okudduka kireme kutuukira mu biro bya butiti oba ku lunaku lwa Ssabbiiti.

²¹Kubanga wagenda kubeerawo okubonyaabonyezebwa okunene ennyo okutabangawo kasookedde ensi ebaawo era tewaliddayo kubaawo kikifaanana.

²²Singa ennaku ezo tezakendezebwako, tewandibadde n'omu alokolebwa. Naye olw'abalonde be ennaku ezo zirikendezebwako.

²³Bwe wabangawo omuntu agamba nti, 'Kristo ali wano, oba ali wali,' temubakkirizanga.

²⁴Kubanga bakristo ab'obulimba balijja, ne bannabbi ab'obulimba nabo balijja ne bakola eby'amagero n'ebywuuunyo; nga singa kibadde kisoboka, bandilimbyelimbye n'abalonde ba Katonda.

²⁵Laba mbalabudde nga bukyali!"

²⁶ "Noolwekyo omuntu bw'abagambanga nti Kristo akomyewo ali eri mu ddungu, temugendangayo. Oba nti ali mu bisenge eby'omunda, temukkirizanga.

²⁷Kubanga nga bwe mulaba okumyansa kw'eraddu nga kutabaala ebire okuva ebuvanjuba ne kusala okulaga ebugwanjuba, n'okujja kw'Omwana w'Omuntu bwe kutyo.

²⁸Era mukimanyi nti awabeera ekifudde awo ensegé we zikuñjaanira."

²⁹ "Amangu ddala ng'okubonyaabonyezebwa "kw'omu nnaku ezo kuwedde, 'enjuba eriggyako ekizikiza era n'omwezi teguliyaka, n'emmunyeenyé zirigwa n'amaanyi g'eggulu galinyeenyezebwa.'"

³⁰ “Oluvannyuma lw’ebyo akabonero k’Omwana w’omuntu kalirabika ku ggulu, era walibaawo okukungubaga kw’amawanga gonna ag’omu nsi, era baliraba Omwana w’Omuntu ng’ajja ku bire by’eggulu, mu maanyi ne mu kitibwa ekinene.

³¹ Era alitura bamalayika be nga bwe bafuuwa amakondeere mu ddoboozi ery’omwanguka, ne bakunjaanya abalonde be nga babaggya mu mpewo ennya okuva ku ludda olumu olw’eggulu okutuuka ku ludda olulala.”

³² “Kale muyigire ku lugero lw’omutiini. Amatabi gaagwo bwe gatandika okutojjerha nga mumanya nti ebiseera eby’ebbugumu binaatera okutuuka.

³³ Noolwekyo nammwe bwe muliraba ebintu ebyo byonna, nga mumanya nti ekiseera kiri kumpi, era kisemberedde ddala ku luggi.

³⁴ Ddala ddala mbagamba nti, omulembe guno teguliggwaawo okutuusa ng’ebintu ebyo byonna bituukiridde.

³⁵ Eggulu n’ensi biriggwaawo naye ebigambo byange tebiriggwaawo.”

Olunaku n’Essaawa Tebimanyiddwa

³⁶ “Naye eby’olunaku olwo wadde essaawa tewali n’omu abimanyi, newaakubadde bamalayika ab’omu ggulu nabo tebakimanyi, wadde Omwana, okuggyako Kitaffe yekka.

³⁷ Kubanga nga bwe kyali mu biseera bya Nuuwa, okujja kw’Omwana w’Omuntu nakwo bwe kuliba.

³⁸ Nga bwe kyali mu biseera by’amataba, abantu nga balya nga banywa, nga bawasa n’abalala nga bafumbirwa, olunaku ne lutuuka Nuuwa n’ayingira mu lyato,

³⁹ abantu ne batamanya, amataba ne gajja ne gabasaanyaawo ne buli kintu, bwe kutyo n’okudda kw’Omwana w’Omuntu bwe kulibeera.

⁴⁰ Mu biseera ebyo abasajja babiri baliba bakola mu nnimiro, omu n’atwalibwa omulala n’alekebwa.

⁴¹ Abakazi babiri baliba basa ku mmengo zaabwe mu nnyumba y’emu, omu n’atwalibwa omulala n’alekebwa.”

⁴² “Noolwekyo mubeere beetegefu, kubanga olunaku Mukama wammwe lw’aliddirako temulumanyi.

⁴³ Naye mutengeere kino: ssinga ssemaka amanya essaawa omubbi w’anaayingirira okumenya ennyumba ye, yandisigadde ng’atunula, n’ataganya mubbi kumuyingirira.

⁴⁴ Noolwekyo nammwe bwe mutyo mweteeketeke, kubanga Omwana w’omuntu alijjira mu kiseera kye mutamulowoozaamu.”

⁴⁵ “Kale aliwa omuddu omugezi era omwesigwa mukama we gwe yawa obuvunaanyizibwa okulabirira abaddu ab’omu maka ge, n’okubawa emmere mu kiseera ekituufu?

⁴⁶ Alina omukisa omuddu oyo, mukama we gw’alisanga ng’akola bw’atyo.

⁴⁷ Ddala ddala mbagamba nti, alimukwasa ebintu bye byonna.

⁴⁸ Naye obanga omuddu omubi bw’agamba mu mutima gwe nti, ‘Mukama wange tajja kudda mangu,’

⁴⁹ n’adda ku baddu banne, n’abakuba, n’alya, n’anywa n’abatamiivu, okutuusa lw’alidda.

⁵⁰ Mukama w’omuddu oyo n’akomawo ku lunaku lw’atamusuubidde ne mu kiseera ky’atamanyi,

⁵¹ alimubonereza, era omugabo gwe guliba okubeera awamu n’abannanfuusi, eriba okukaaba n’okuluma obujiji.”

Matayo 25

Olugero Iw’Abawala Ekkumi

¹ “Obwakabaka obw’omu ggulu bufaananyizibwa n’abawala embeerera ekkumi, abaatwala ettaala zaabwe ne bagenda okusisinkana anaawasa omugole.

² Abataano tebaalina magezi, abataano abalala ne baba b’amagezi.

³ Abataalina magezi, ne batatwala mafuta gamala mu ttaala zaabwe.

⁴ Naye abagezi baatwala amafuta mu macupa gaabwe ag’okweyambisa wamu n’ettaala zaabwe.

⁵ Naye anaawasa omugole bwe yalwawo okutuuka otulo ne tubawkata bona, ne beebaka.

⁶ “Obudde bwe bwatuuka mu ttumbi oluyoogaano ne lubazuukusa, abantu nga baleekaana nti, ‘Awasa omugole atuuse! Mujje mumwanirize!’

⁷ “Abawala embeerera bona ne bazuukuka ne baseesa ettaala zaabwe.

⁸ Awo abawala abataano abataalina magezi ne bagamba nti, ‘Mutuwe ku mafuta gammwe, kubanga ettaala zaffe zaagala kuzikira ziggweerera.’

⁹ “Naye bannaabwe ne babaddamu nti, ‘Amafuta ge tulinawo gatumala bumazi. Mugende mu maduuka mwegulireyo.’

¹⁰ “Naye baali baakagenda anaawasa omugole n’atuuka, abo abaali beeteeseteese ne bayingira ku mbaga, oluggi ne luggalwawo.

¹¹Oluvannyuma abawala bali abataano ne bakomawo ne bayita nti, ‘Ssebo, tuggulirewo!’

¹²Naye n’abaddamu nti, ‘Ddala ddala mbagamba nti, sibamanyi!’

¹³ “Kale mutunule mweteeketeke, kubanga temumanyi kiseera wadde olunaku.”

Olugero Iw’Ettalanta

¹⁴ “Obwakabaka bwa Katonda, ate buaananyizibwa n’olugero lw’omusajja eyali agenda olugendo, n’ayita abaddu be n’abalekera ebintu bye.

¹⁵Eyasooka yamuwa ttalanta ttaano, owookubiri bbiri n’owookusatu emu, ng’ageraageranya ng’okusobola kwa buli omu bwe kwali. Bw’atyo ne yeetambulira.

¹⁶Omusajja eyafuna ttalanta ettaano n’azisuubuzisa n’afunamu ttalanta ttaano endala.

¹⁷N’oyo eyalekerwa ttalanta ebiri naye n’aviisaamu endala biri.

¹⁸Naye eyaweebwa ttalanta emu, bwe yagifuna n’agenda n’aziika ttalanta ya mukama we mu ttaka.

¹⁹ “Awo nga wayiseewo ekiseera kiwanvu, mukama w’abaddu abo n’akomawo. N’ayita abaddu be bamutegeeze ebyafa ku ttalanta ze yabalekera.

²⁰Omusajja gwe yalekerwa ttalanta ettaano n’ajja n’amuleetera ttalanta endala ttaano ng’agamba nti, ‘Mukama wange wampa ttalanta ttaano, nviisizaamu ttalanta endala ttaano.’

²¹ “Mukama we n’amugamba nti, ‘Weebale, oli muddu mulungi era mwesigwa, obadde mwesigwa mu bintu ebitono, ndikusigira ebintu ebingi. Yingira sanyukira wamu ne mukama wo.’

²² “Eyalekerwa ttalanta ebiri naye n’ajja, n’ategeeza mukama we nti, ‘Ssebo, wandekera ttalanta bbiri, era ne nziviisaamu ttalanta endala bbiri.’

²³ “Mukama we n’amugamba nti, ‘Weebale, oli muddu mulungi era mwesigwa, obadde mwesigwa mu bintu ebitono, ndikusigira ebintu ebingi. Yingira osanyukire wamu ne mukama wo.’

²⁴ “Omusajja eyalekerwa ttalanta emu n’ajja, n’agamba nti, ‘Ssebo, nakumanya nga bw’oli omuntu omuzibu, okungulira gy’otaasigira era okuŋŋaanyiza gy’otaasaasaanyiza.

²⁵Olw’okutya bwe wagenda ne nkweka ttalanta yo mu ttaka era yiino ttalanta yo.’

²⁶ “Naye mukama we n’amugamba nti, ‘Ggwe omuddu omubi era omugayaavu! Obanga wamanya nti ndi muntu akungulira gye ssaasigira,

²⁷ wanditadde ensimbi zange mu bbanka gye bandimpaddemu amagoba nga nkomyewo.’

²⁸ “N’alagira nti, ‘Mumuggyeeko ettalanta eyo mugiwe oli alina ttalanta ekkumi.

²⁹ Kubanga alina aliweebwa abe na bingi naye atalina, n’ebyo by’alina ebitono birimuggyibwako.

³⁰ N’omuddu oyo ataliiko ky’agasa mumusuule ebweru mu kizikiza eri okukaaba n’okuluma obujiji.’

Endiga n’Embuzi

³¹ “Omwana w’Omuntu bw’alija mu kitibwa kye ne bamalayika bona nga bali naye, alituula ku ntebe ey’ekitiibwa kye.

³² Awo amawanga gonna galikuŋjaanyizibwa mu maaso ge era aligaawulamu ng’omusumba bw’ayawulamu endiga n’embuzi.

³³ Endiga aliziteeka ku mukono gwe ogwa ddyo n’embuzi ku gwa kkono.

³⁴ “Awo Kabaka n’alyoka agamba abali ku mukono gwe ogwa ddyo nti, ‘Mujje mmwe Kitange be yawa omukisa, musikire obwakabaka obwabateekerwateekerwa okuva ku kutondebwa kw’ensi.

³⁵ Kubanga nnali tuyala ne mundiisa, nnali tuyonta ne mumpa ekyokunywa, nnali mugenyi ne munnyaniriza,

³⁶ nnali bwereere ne munnyambaza, nnali mulwadde ne munnambula, nnali mu kkomera ne mujja okundaba.’

³⁷ “Abatuukirivu ne bamubuuza nti, ‘Mukama waffe, twakulaba ddi ng’oli tuyala ne tukuliisa? Oba ng’olina ennyonta ne tukuwa ekyokunywa?

³⁸ Oba ng’oli mugenyi ne tukwaniriza? Oba ng’oli bwereere, ne tukwambaza?

³⁹ Twakulaba ddi ng’oli mulwadde oba ng’oli mu kkomera ne tukulambula?’

⁴⁰ “Kabaka, alibaddamu nti, ‘Ddala ddala mbagamba nti bwe mwabikolera baganda bange bano abasembayo wansi kye kimu mwabikolera nze!’

⁴¹ “Bw’atyo aligamba abo abali ku mukono gwe ogwa kkono nti, ‘Muveewo, mmwe abakolimire, mulage mu muliro ogutazikira ogwateekerwateekerwa Setaani ne bamalayika be.

⁴² Kubanga nnali tuyala ne mutampa kyakulya, nnali tuyonta ne mutampa kyakunywa,

⁴³nnali mugenyi ne mutannyaniriza, nnali bwereere ne mutannyambaza, nnali mulwadde ne mu kkomera ne mutajja kunnambula.'

⁴⁴ "Nabo baliddamu nti, 'Mukama waffe, twakulaba ddi ng'oli muyala oba ng'oli muyonta, oba ng'oli mugenyi oba ng'oli bwereere oba mulwadde oba ng'oli mu kkomera, ne tutakuyamba?'

⁴⁵ "Naye alibaddamu nti, 'ddala ddala mbagamba nti, nga bwe mutaakikola omu ku bano abasembayo wansi, nange temwakinkola.'

⁴⁶ "Abo baligenda ku kibonerezo eky'emirembe n'emirembe, naye abatuukirivu baliyingira mu bulamu obutaggwaawo."

Matayo 26

Olukwe olw'Okutta Yesu

¹ Awo Yesu bwe yamala okwogera ebyo byonna, n'agamba abayigirizwa be nti,

² "Nga bwe mumanyi, ebulayo ennakku bbiri tutuuke ku mbaga ey'Okuyitako. Omwana w'Omuntu aliweebwayo akomererwe."

³ Mu kiseera ekyo kyennyini, bakabona abakulu n'abakulembeze b'Abayudaaya baali bakuŋjaanye mu lubiri lwa Kayaafa, Kabona Asinga Obukulu,

⁴nga bakola olukwe mwe banaayita okukwata Yesu bamutte.

⁵ Naye baasalawo kireme kubaawo mu kiseera eky'Embaga, si kulwa nga wabaawo akeegugungo mu bantu.

⁶ Awo Yesu bwe yali mu nnyumba ya Simooni Omugenge e Besaniya,

⁷ ng'ali ku mmeeza, omukazi n'ajja gy'ali ng'alina eccupa y'amafuta ag'akaloosa ag'omuwendo omungi, n'agafuka ku mutwe gwa Yesu.

⁸ Abayigirizwa be bwe baakiraba ne banyiiga. Ne bagamba nti, "Lwaki okwonoona amafuta ag'omuwendo gatyo!"

⁹ Kubanga yandisobodde okugatundamu ensimbi nnyingi n'azigabira abaavu."

¹⁰ Yesu bwe yamanya ebirowoozo byabwe, n'abagamba nti, "Lwaki mutawanya omukazi? Ankoledde ekintu ekirungi.

¹¹ Bulijjo abaavu muli nabo, naye nze sijja kuba nammwe bulijjo.

¹² Anfuseeko amafuta gano okuteekateeka omubiri gwange okuguziika.

¹³ Ddala ddala mbagamba nti, bulijjo ajjanga kujukirwa olw'ekikolwa kino. Ekikolwa ky'omukazi ono kijjanga kwogerwako wonna wonna mu nsi Enjiri gy'eneebuulirwanga."

¹⁴ Awo Yuda Isukalyoti omu ku bayigirizwa ekkumi n'ababiri n'agenda eri bakabona abakulu.

¹⁵ N'ababuuza nti, "Munampa ki okubalaga Yesu mulyoke mumukwate?" Ne bamuwa ebitundu bya ffeeza amakumi asatu.

¹⁶ Okuvira ddala mu kiseera ekyo Yuda n'anoonya akakisa konna alyemu Yesu olukwe.

Ekyekiro kya Mukama Waffe

¹⁷ Awo ku lunaku olusooka mu nnaku ez'Embaga ey'Emigaati egitazimbulukuswa, abayigirizwa ne bajja eri Yesu ne bamubuuza nti, "Embaga y'Okuyitako tukugiteekereteekere wa?"

¹⁸ Yesu n'abaddamu nti, "Mugende mu kibuga ewa 'Gundi,' mumugambe nti, 'Omuyigiriza agambye nti: Ekiseera kyange kituuse, era Embaga ey'Okuyitako njagala kugiriira mu maka go awamu n'abayigirizwa bange.'"

¹⁹ Abayigirizwa ne bagenda ne bakola nga Yesu bwe yabalagira ne bateekateeka Okuyitako.

²⁰ Akawungeezi ako Yesu bwe yali ng'atudde

²¹ ku mmere n'abayigirizwa be ekkumi n'ababiri, nga balya n'abagamba nti, "Omu ku mmwe ajja kundyamu olukwe."

²² Bwe baakiwulira emitima ne gibeewanika, buli omu n'abuuza nti, "Ye nze?"

²³ Yesu n'addamu nti, "Akozezza nange mu kibya, y'oyo.

²⁴ Mutegeere nti Omwana w'Omuntu agenda nga bwe kyamuwandiikibwako, naye zimusenze omuntu oyo agenda okulya mu Mwana w'Omuntu olukwe. Kyandibadde kirungi singa omuntu oyo teyazaalirwa ddala."

²⁵ Yuda anaamulyamu olukwe n'amubuuza nti, "Ddala ddala, ye nze Labbi?" Yesu n'amuddamu nti, "Oyogedde."

²⁶ Bwe baali balya, Yesu n'addiria omugaati n'agusabira omukisa, n'agumenyaamenyamu n'agabira abayigirizwa be, n'agamba nti, "Mutoole mulye, kubanga guno gwe mubiri gwange."

²⁷ Bw'atyo n'asitula ekikompe, ne yeebaza Katonda, n'abawa ng'agamba nti, "Munywe ku kino mwenna,

²⁸ kubanga guno gwe musaayi gwange ogw'endagaano oguyika ku lw'abantu abangi, olw'okusonyiyibwa ebibi.

²⁹ Era mbagamba nti, Sigenda kuddayo kunywa ku kibala kino okutuusa ku lunaku olwo lwe ndikinywa nammwe nga kiggya mu bwakabaka bwa Kitange."

³⁰ Bwe baamala okuyimbayo oluyimba ne bafuluma ne bagenda ku lusozi olwa Zeyituuni.

Yesu Ategeeza Peetero nga bw'Anaamwegaana

³¹ Awo Yesu n'abagamba nti, "Ekiro kya leero mwenna mujja kunjabulira. 'Kubanga kyawandiikibwa nti, 'Ndikuba omusumba n'endiga z'omu kisibo kye ne zisaasaana.'

³² Naye bwe ndimala okuzuukizibwa ndibakulembra okugenda e Ggaliraaya."

³³ Peetero n'amuddamu nti, "Abalala bona bwe banaakwabulira, nze sijja kukwabulira."

³⁴ Yesu n'amugamba nti, "Ddala ddala nkugamba nti, Mu kiro kino kyennyini enkoko eneeba tennakookolima, onooneegaana emirundi esatu."

³⁵ Peetero n'amugamba nti, "Oba kufiira wamu naawe n'afa, naye sijja kukwegaana n'akamu kokka." N'abayigirizwa be abalala bona ne boogera bwe batyo.

Gesusemane

³⁶ Awo Yesu n'agenda nabo mu kifo ekiyitibwa Gesusemane n'abagamba nti, "Mutuule wano okutuusa lwe nnaamala okusaba nkomewo."

³⁷ N'atwala Peetero ne batabani ba Zebbedaayo bombi, n'atandika, okuwulira ennaku nnyingi n'okweraliikirira ennyo.

³⁸ N'abagamba nti, "Omwoyo gwange guliko ennaku egenda na kunzita. Kale mubeere wano tutunule ffenna."

³⁹ N'abaleka awo ne yeeyongerayo akabanga, n'agwa wansi ng'avuunise amaaso ge ku ttaka, n'asaba nti, "Kitange! Obanga kisoboka, leka ekikompe kino kinzigibweko. Naye si nga Nze bwe njagala, wabula nga ggwe bw'oyagala."

⁴⁰ N'addayo eri abayigirizwa be n'abasanga nga beebase. N'agamba Peetero nti, "Peetero, naawe tosobodde kutunula nange n'essaawa emu?"

⁴¹ Mutunule nga bwe musaba. Omwoyo gwo gwagala, naye omubiri gwe munafu!"

⁴² N'abavaako omulundi ogwokubiri akabanga n'agenda n'asaba ng'agamba nti, "Kitange! Oba tekisoboka ekikompe kino kuvaawo wabula Nze okukinywa, kale ky'oyagala kye kiba kikolebwa."

⁴³ N'akomawo nate gye bali n'abasanga nga beebase, kubanga amaaso gaabwe gaali gazitowa nga gajjudde otulo.

⁴⁴ N'abaleka n'agenda asaba ebigambo bye bimu nga biri.

⁴⁵ Ate n'akomawo awali abayigirizwa n'abagamba nti, "Kale mwebakire ddala, muwummule. Kyokka mumanye ng'ekiseera kituuse Omwana w'Omuntu aweebweyo mu mikono gy'abalina ebibi.

⁴⁶ Muzuukuke! Musituke tugende! Laba, omuntu agenda okundyamu olukwe wuuli ajja!"

Yesu Akwatibwa

⁴⁷ Laba Yesu yali akyayogera Yuda omu ku kkumi n'ababiri, n'atuuka ng'alina ekibiina ky'abantu abaali babagalidde ebitala n'emiggo nga batumiddwa bakabona abakulu n'abakulembeze b'Abayudaaya.

⁴⁸ Eyali agenda okumulyamu olukwe yali abategeeezezza akabonero nti omuntu gw'anaalamusa nga y'oyo gwe baali beetaaga, nga bamukwata.

⁴⁹ Amangwago n'ajja eri Yesu n'amulamusa nti, "Mirembe, Labbi," n'amugwa mu kifuba.

⁵⁰ Yesu kwe kumugamba nti. "Munnange, kola ky'ojjiridde." Awo abalala ne bakwata Yesu.

⁵¹ Omuntu omu ku abo abaali ne Yesu n'asowolayo ekitala kye n'asalako okutu kw'omuweereza wa Kabona Asinga Obukulu.

⁵² Naye Yesu n'amulagira nti, "Ekitala kyo kizzeeyo mu kiraato kyakyo. Kubanga abo abakozesa ebitala nabo bagenda kuttibwa na kitala.

⁵³ Tomanyi nti nnyinza okusaba Kitange bamalayika nkumi na nkumi okujja okutulwanirira?

⁵⁴ Naye singa nkola bwe ntyo, olwo Ebyawandiikibwa, ebyogera ku bino ebiriwo kaakano, binatuukirira bitya?"

⁵⁵ Mu kiseera ekyo Yesu n'abuuza ekibiina nti, "Ndi ng'omumenyi w'amateeka ow'akabi ennyo, n'okujja ne mujja okunkwata nga mubagalidde ebitala n'emiggo? Nabeeranga nammwe nga njigiriza mu Yeekaalu buli lunaku, ne mutankwata.

⁵⁶ Naye kino kibaddewo okutuukiriza ebigambo bya bannabbi ebiri mu Byawandiikibwa." Olwo abayigirizwa be bona ne bamwabulira ne badduka.

Yesu mu maaso g'Olukiiko

⁵⁷ Awo ekibiina ne kitwala Yesu ewa Kayaafa, Kabona Asinga Obukulu, n'abakulembeze b'Abayudaaya gye baali bakuŋŋaanidde.

⁵⁸ Mu kiseera ekyo ne Peetero yali agoberera kyokka ng'ali walako emabega w'ekibiina; n'atuuka mu luggyia lw'ennyumba ya Kabona Asinga Obukulu, n'atuula awaali abawereera ng'alinda okutegeera ebinaavaayo.

⁵⁹Bakabona abakulu n'Abasaddukaayo bona ne banoonya obujulizi obw'obulimba ku Yesu obunamuweesa ekibonerezo eky'okufa.

⁶⁰Kyokka ne bafunayo batono ab'obujulirwa obw'obulimba. N'evumbukayo babiri

⁶¹abeesimbawo okugamba nti, "Omuntu ono yagamba nti, 'Nsobola okumenyawo Yeekaalu ya Katonda, ate ne ngizimba ne ngimalira mu nnaku ssatu.'"

⁶²Awo Kabona Asinga Obukulu n'ayimirira n'abuuza Yesu nti, "Tolina ky'oddamu ku bino abasajja bano bye bakuloopa?"

⁶³Naye Yesu n'asirika busirisi. Ate Kabona Asinga Obukulu, n'amuddira ng'amugamba nti, "Nkulagira, mu linnya lya Katonda omulamu otutegeeze obanga Ggwe Kristo, Omwana wa Katonda."

⁶⁴Yesu n'addamu nti, "Okyogedde. Nayé mbagamba nti, okuva ne kaakano mugenda kulaba Omwana w'Omuntu ng'atudde ku mukono ogwa ddyo ogwa Katonda, ng'akomawo ku bire eby'eggulu."

⁶⁵Kabona Asinga Obukulu, n'ayuza ebyambalo bye, n'agamba nti, "Kuno kuvvoola! Ate kati tukyetaagira ki abajulirwa abalala? Mwenna mumuwulidde ng'akyogera!"

⁶⁶Mumusalira mutya?" Ne baddamu nti, "Gumusinze! Asaanidde kufa!"

⁶⁷Olwo ne bawandira Yesu amalusu mu maaso, abamu ne bamukuba ebikonde ne bamukuba empi,

⁶⁸nga bwe bamugamba nti, "Tutegeeze, Kristo, akukubye y'aluwa?"

Peetero Yeegaana Yesu

⁶⁹Mu kiseera ekyo Peetero yali atudde mu luggya. Awo omuweereza omuwala n'ajja awali Peetero n'amugamba nti, "Wali wamu ne Yesu, ow'e Ggaliraaya."

⁷⁰Naye Peetero ne yeegaana mu maaso ga buli omu ng'agamba nti, "Ky'oyogerako sikimanyi."

⁷¹Oluvannyumako nga Peetero ayimiridde okumpi n'oluggi olunene oluva mu luggya, omuwala omulala n'amulaba, n'agamba abo abaali bayimiridde awo nti, "Omusajja ono yali ne Yesu ow'e Nazaaleesi."

⁷²Peetero era n'akyegaana, nga kw'atadde n'okulayira nga bw'agamba nti, "Nze oyo n'okumumanya simumanyi."

⁷³Naye nga wayiseewo akabanga, abasajja abaali bayimiridde awo ne bajja w'ali, ne bamugamba nti, "Ddala ddala oli omu ku bo, kubanga otegeerekeka olw'enjogera yo."

⁷⁴Peetero n'atandika okulayira nate, ne yeeyongera okwegaana ng'agamba nti, "Omuntu simumanyi." Amangwago enkoko n'ekookolima.

⁷⁵Awo Peetero n'ajjukira ebigambo bya Yesu bye yali amugambye nti, "Enkoko eneeba tennakookolima onoonneegaana emirundi esatu." N'afuluma ebweru ng'akaaba nnyo amaziga.

Matayo 27

Yuda Yeetuga

¹Awo obudde bwe bwakya, bakabona abakulu bona n'abakulembeze b'Abayudaaya ne beeyongera okukunjaana ne bateeseza wamu balabe ekkubo lye banaayitamu okutta Yesu.

²Ne bamusiba, ne bamuweereza ewa Piraato eyali gavana Omuruumi.

³Awo Yuda, eyali amuliddemu olukwe, bwe yalaba nga Yesu bamusalidde omusango gwa kufa, n'azzaayo ebitundu amakumi asatu ebya ffeeza eri bakabona abakulu n'abakulembeze b'Abayudaaya,

⁴ng'agamba nti, "Nnyonoonye, kubanga ndiddemu olukwe omusaayi ogatalina musango." Naye ne bamuddamu nti, "kyo kitukwatako kitya? Ezo nsoga zo."

⁵Kyeyava addira ensimbi eza ffeeza n'aziyiwa mu Yeekaalu n'afuluma n'agenda yeetuga!

⁶Bakabona abakulu ne balondalondawo ensimbi eza ffeeza, ne bagamba nti, "Kya muzizo okuzissa mu ggwanika lya yeekaalu kubanga muwendo gwa musaayi."

⁷Bwe baamala okukikubaganyaako ebirowoozo, ne basalawo okuzigulamu ennimiro ababumbi mwe baggyanga ebbumba. Ne bateesa ennimiro eyo okugifuula ekifo eky'okuziikangamu abagwira.

⁸Kyebaava batuma ennimiro eyo, "Ennimiro y'Omusaayi" n'okutuusa leero.

⁹Kino ne kituukiriza nnabbi Yeremiya bye yayogera nti, "Baddira ebitundu bya ffeeza amakumi asatu, nga gwe muwendo abaana ba Isirayiri gwe baamulamula,

¹⁰ne bagulamu ennimiro eyali ey'ababumbi, nga Mukama bwe yalagira."

Yesu mu maaso ga Piraato

¹¹Awo Yesu bwe yayimirira mu maaso ga gavana, Omuruumi, gavana n'amubuuza nti, "Ggwe Kabaka w'Abayudaaya?" Yesu n'amuddamu nti, "Okyogedde."

¹²Naye bakabona abakulu n'abakulembeze b'Abayudaaya bwe baaleeta ensonga zaabwe ze baasinziirako okumuwawaabira, Yesu teyabaanukula.

¹³Piraato kwe ku mubuuza nti, “Ebyo byonna bye bakwogerako tobiwulira?”

¹⁴Naye Yesu n'ataddamu kigambo na kimu, era gavana ne kimwewuunyisa nnyo.

¹⁵Gavana yalina empisa ey'okusumulula omusibe omu mu kiseera eky'Embaga y'Okuyitako, ng'omusibe oyo abantu be baamweronderanga.

¹⁶Mu kkomera mwalimu kkondo lukulwe ng'erinnya lye ye Balaba.

¹⁷Awo Piraato n'abuuza ekibiina ekyali kikuŋjaanye nti, “Mwagala mbasumululire ani, Balaba oba Yesu, ayitibwa Kristo?”

¹⁸Kubanga yamanya ng'abakulembeze b'Abayudaaya bamuwaddeyo lwa buggyaa.

¹⁹Piraato yali akyali wakati mu musango ogwo, mukazi we n'amutumira n'obubaka buno nti, “Toba na nsonga na musajja oyo omuntuukirivu kubanga natawaanyizibbwa n'ekirooto eky'omuntu oyo.”

²⁰Naye bakabona abakulu n'abakulembeze b'Abayudaaya ne basendasenda ebibiina basabeyo Balaba y'aba ateebwa, naye Yesu attibwe.

²¹Gavana bwe yaddamu okubabuuza nti, “Ku bano bombi mbateereko aluwa?” Ekibiina kyonna ne kiddamu nti, “Balaba!”

²²Piraato n'ababuuza nti, “Kale Yesu, ayitibwa Kristo, mukole ntya?” buli omu n'addamu nti, “Akomererwe!”

²³Piraato n'ababuuza nti, “Lwaki, kiki ky'asobezza?” Naye bo ne beeyongera kuleekaanira waggulu nti, “Akomererwe!”

²⁴Awo Piraato bwe yalaba ng'ensoga talina gy'aziraza, ate ng'ebibiina byagala kusasamala, n'atumya amazzi, n'anaaba engalo ze mu maaso g'ekibiina nga bw'agamba nti, “Nze siriiko musango gwonna olw'omusaayi gw'omuntu ono omulungi. Obuvunaanyizibbwa bwonna buli ku mmwe!”

²⁵Abantu bona ne baanukula nti, “Omusaayi gwe gubeere ku ffe ne ku baana baffe!”

²⁶Awo Piraato n'asumulula Balaba n'abamuwa. Naye bwe yamala okukuba Yesu embooko n'amuwaayo bamukomerere.

²⁷Naye abaserikale baasooka kumutwala mu luggya lw'olubiri, oluyitibwa Pulayitoliyo ne bakuŋjaanira eyo, ne bayita bannaabwe bona.

²⁸Awo ne bamwambulamu engoye ze, ne bamwambaza ekyambalo ekimyufu,

²⁹ne bakola engule mu maggwa ne bagimutikkira, ne bamukwasa olumuli mu mukono gwe ogwa ddyo. Ne bamufukaamirira nga bamuduulira nti, “Mirembe, Kabaka w'Abayudaaya!”

³⁰Ne bamuwandira amalusu, ne bamusikako olumuli ne balumukubya ku mutwe.

³¹Eby'okumuduulira bwe byaggwa, ne bamwambulamu ekyambalo ekimyufu, ne bamwambaza ekyambalo kye ekya bulijjo, ne balyoka bamufulumya okumutwala okumukomerera.

Okukomererwa kwa Yesu

³²Bwe baali nga bagenda gye banaamukomerera, ne basisinkana omusajja omukuleene, erinnya lye nga ye Simooni, ne bamulagira lwa maanyi yeetikke omusaalaba gwa Yesu.

³³Bwe baatuuka mu kifo ekiyitibwa Gologoosa, amakulu nti, "Akasozi k'Ekiwanga,"

³⁴ne bawa Yesu wayini atabuddwamu omususa, naye bwe yakombako n'amugaana.

³⁵Bwe baamala okumukomerera, abaserikale ne bagabana ebyambalo bye nga babikubira akalulu.

³⁶Bwe batyo ne batuula awo nga bamukuumma.

³⁷Ne bawanika ekipande waggulu w'omutwe gwe ku musaalaba okuwandiikiddwa nti, "Ono ye Yesu, Kabaka w'Abayudaaya."

³⁸Waaliwo n'abanyazi babiri abaakomererwa naye omu ku ddyo, n'omulala ku kkono.

³⁹Awo abantu abaali bayitawo, ne bamuvuma nga bamunyeenyeza emitwe

⁴⁰nga bwe bagamba nti, "Wagamba okumenya Yeekaalu, ate ogizimbe mu nnaku ssatu! Weerokole okke wansi okuva ku musaalaba, obanga ggwe Mwana wa Katonda."

⁴¹Bakabona abakulu n'abawandiisi, n'abakulembeze abalala ne bamuduulira, nga bagamba nti,

⁴²"Yalokolanga balala, naye ye tasobola kwerokola! Kale nga bw'ali Kabaka wa Isirayiri, ave ku musaalaba akke wansi, naffe tunaamukkiriza!

⁴³Yeesiga Katonda, kale amuggye ku musaalaba obanga Katonda amwagala. Yagamba nti, 'Ndi Mwana wa Katonda.'

⁴⁴N'abanyazi ababiri abaakomererwa awamu naye nabo ne bamuvuma.

Okufa kwa Yesu

⁴⁵Okuvira ddala ku ssaawa mukaaga mu ttuntu okutuusiza ddala essaawa mwenda ez'olweggulo ensi yonna yabikkibwa ekizikiza.

⁴⁶Ku ssaawa nga mwenda Yesu n'ayogerera waggulu n'eddoboozi ery'omwanguka nti, "Eri, Eri lama sabakusaani," ekitegeesa nti, "Katonda wange, Katonda wange, lwaki onjabulidde?"

⁴⁷Naye abamu ku baali bayimiridde awo bwe baakiwulira ne bagamba nti, "Ayita Eriya."

⁴⁸Amangwago omu n'adduka n'addiria ekyangwe n'akinnyika mu mwenge omukaatuufu n'akiteeka ku muti, n'akimuwa anuuneko.

⁴⁹Naye abalala ne bagamba nti, "Mumuleke. Ka tulabe obanga Eriya anajja n'amulokola."

⁵⁰Awo Yesu ne yeeyongera okwogerera waggulu n'eddoboozi eddene, n'awaayo omwoyo gwe.

⁵¹Era laba! Eggigi ly'omu Yeekaalu ne liyulikamu wakati okuva waggulu okutuuka wansi; ensi n'ekankana, n'enjazi ne zaatika.

⁵²Entaana ne zibikkuka era abantu ba Katonda bangi abaali bafudde ne bazuukira,

⁵³era Yesu bwe yamala okuzuukira ne bava mu ntaana gye baali baziikkidwa ne bayingira mu kibuga ekitukuvu ne balabibwa abantu bangi.

⁵⁴Omuserikale omukulu w'ekibinja ky'abaserikale ekikumi, n'abaserikale abaali bakuma Yesu, bwe baalaba okukankana kw'ensi ng'okwa musisi, n'ebirala ebyabaawo, ne batya nnyo. Ne bagamba nti, "Ddala ddala ono abadde Mwana wa Katonda."

⁵⁵Waaliwo n'abakazi bangi abaayitanga ne Yesu abaava naye e Ggaliraaya nga bamuweereza, baali beesuddeko akabanga, nga balaba ebigenda mu maaso.

⁵⁶Mu bo mmwe mwali Maliyamu Magudaleene ne Maliyamu nnyina wa Yakobo ne Yusufu, ne nnyina w'abaana ba Zebbedaayo.

Okuziika Yesu

⁵⁷Obudde bwe bwawungeera, ne wajja omusajja omugagga ng'ava Alimasaya, erinnya lye Yusufu eyali omu ku bagoberezi ba Yesu.

⁵⁸N'agenda eri Piraato n'asabayo omulambo gwa Yesu. Piraato n'alagira bagumuwe.

⁵⁹Yusufu n'atwala omulambo n'aguzinga mu lugoye olulungi olwa linena,

⁶⁰n'agugalamiza mu ntaana ye empya gye yatema mu lwazi, n'addiria ejjinja eddene n'aliyiringisiza mu mulyango gw'entaana n'aggalawo, ne yeetambulira.

⁶¹Maliyamu Magudaleene ne Maliyamu munne, bombi baali batudde awo kumpi n'entaana.

Abakuumi ku Ntaana

⁶²Enkeera, ng'olunaku olusooka mu nnaku z'Embaga y'Okuyitako luweddeko, bakabona abakulu n'Abaafalisaayo ne bagenda eri Piraato,

⁶³ne bamugamba nti, "Oweekitiibwa, omulimba oli tujjukira ng'akyali mulamu yagamba nti, 'Nga wayiseewo ennaku ssatu ndizuukira.'

⁶⁴Noolwekyo tukusaba olagire entaana ye ekuumibwe, okutuusa ku lunaku olwokusatu, abayigirizwa be baleme kumubbamu, ne balyoka bategeezaabantu nti azuukidde! Singa ekyo kiba bwe kityo, ekyo kye kijja okuba ekibi ennyo okusinga n'ekyasooka."

⁶⁵Piraato n'abaddamu nti, "Mukozese abaserikale bammwe be mulina mugende mugikuumi."

⁶⁶Bwe batyo ne bateeka akabonero ak'envumbo ku jjinja eryaggala omulyango gw'entaana, ne bateekawo n'abakumi.

Matayo 28

Yesu Azuukira

¹Oluvannyuma lwa Ssabbiiti ku lunaku olusooka mu nnaku omusanvu, ng'obudde bukya, Maliyamu Magudaleene ne Maliyamu oli omulala ne balaga ku ntaana.

²Mu kiseera ekyo ne wabaawo okukankana ng'okwa musisi. Malayika wa Mukama yakka okuva mu ggulu n'ayiringisa ejinja ne liva mu mulyango gw'entaana, n'alituulako.

³Amaaso ge gaali gamasamasa ng'okumyansa kw'eraddu, n'ekyambalo kye nga kyeru ekitukula be tukutuku.

⁴Abakumi bwe baamulaba, ne bakankana nga batidde nnyo ne bagwa wansi ne baba ng'abafudde.

⁵Awo malayika n'agamba abakazi nti, "Temutya. Mmanyi nga munooonya Yesu, eyakomererwa,

⁶wabula taliiwo wano! Azuukidde mu bafu, nga bwe yagamba. Muyingire mulabe we yali agalamiziddwa.

⁷Kale kaakano, mugende mangu mutegheeze abayigirizwa be nti, Azuukidde mu bafu, era abakulembeddemu okugenda e Ggaliraaya gye mulimusisinkana. Obwo bwe bubaka bwange bwe muba mubatuusaako."

⁸Abakazi abo ne badduka embiro nnyingi nga bava ku ntaana kyokka nga batidde nnyo, naye ate nga bajjudde essanyu. Ne bayanguwa mangu okugenda okubuulira abayigirizwa be.

⁹Bwe baali bagenda, amangwago Yesu n'ayimirira mu maaso gaabwe! N'abalamusa nti, "Mirembe?" Ne bagwa wansi ne bavuunama mu maaso ge, ne bamukwata ku bigere ne bamusinza.

¹⁰Awo Yesu n'abagamba nti, "Temutya, mugende mugambe abooluganda bagende mangu e Ggaliraaya, gye balindabira."

Abakuumi bye Baayogera

¹¹Abakazi bwe baali bagenda mu kibuga, abamu ku bakuumi abaali bakuumma entaana ne bagenda eri bakabona abakulu ne babategeeza byonna ebibaddewo.

¹²Awo abakulembeze b'Abayudaaya bona ne bakuŋjaana ne bateesa era ne batoola ffeeza na basalawo bagulirire abakuumi.

¹³Ne babalagira bagambe nti, "Bwe twali twebase ekiro, abayigirizwa ne bajja ne babba omulambo gwa Yesu ne bagutwala."

¹⁴Abaali mu lukiiko olwo ne basuubiza abakuumi nti, "Singa ebigambo bino bituuka ku gavana, ffe tujja kumuwooyawooya, tubazibire."

¹⁵Bwe batyo abaserikale ne balya enguzi, ne bakkiriza okwogera nga bwe baabagamba. Ebigambo byabwe ne bibuna nnyo wonna mu Buyudaaya, n'okutuusa ku lunaku lwa leero.

Okutumibwa mu Nsi yonna

¹⁶Awo abayigirizwa ekkumi n'omu ne basitula ne bagenda e Ggaliraaya ku lusozi Yesu gye yabagamba okumusanga.

¹⁷Ne bamusisinkana ne bamusinza. Naye abamu ku bo tebaakakasiza ddala nti ye Yesu, ne babuusabuusa!

¹⁸Awo Yesu n'asemberera abayigirizwa be n'abategeeza nti, "Mpeereddwa obuyinza bwonna mu ggulu ne ku nsi.

¹⁹Kale mugende mufuule abantu bona mu nsi zonna, abayigirizwa nga mubabatiza mu linnya lya Kitaffe, Omwana era Mwoyo Mutukuvu.

²⁰Era mubayigirize okugonderanga byonna bye nablagira mmwe, era Ndi nammwe bulijo n'okutuukira ddala ensi lw'eriggwaawo."

Makko

Makko 1

Yokaana Omubatiza Alongoosa Ekkubo

- ¹ Entandikwa y'Enjiri ya Yesu Kristo, Omwana wa Katonda.
- ² Kyawandiikibwa mu kitabo kya nnabbi Isaaya nti, "Laba ntuma omubaka wange akukulembere, ateketeke ekkubo lyo;
- ³ eddobozi ly'oyo ayogelera waggulu mu ddungu nti, 'Muteeketeke ekkubo lya Mukama, mutereeze amakubo ge.'
- ⁴ Yokaana yajja ng'abatiriza mu ddungu, ng'abuulira okubatiza okw'okwenenya olw'okusonyiyibwa ebibi.
- ⁵ Ensi yonna ey'e Buyudaaya n'abantu bona ab'omu Yerusaalemi, ne bagendanga gy'ali, n'ababatiza mu mugga Yoludaani nga baatula ebibi byabwe.
- ⁶ Yokaana yayambalanga ekyambalo eky'obwoya bw'enjamira, ne yeesibanga olukoba olw'eddiba mu kiwato kye, era yalyanga nzige na mubisi gwa njuki.
- ⁷ Yabuuliranga ng'agamba nti, "Waliwo omuntu omukulu era ansinga amaanyi ajja okujja, gwe sisaanira na kusumulula bukoba bwa ngatto ze.
- ⁸ Nze mbabatiza na mazzi, naye ye alibabatiza na Mwoyo Mutukuvu."

Okubatizibwa kwa Yesu n'Okukemebwa kwe

- ⁹ Awo olwatuuka mu nnaku ezo Yesu n'ava e Nazaaleesi mu Ggaliraaya n'ajja, Yokaana n'amubatiza mu mugga Yoludaani.
- ¹⁰ Awo Yesu bwe yali yaakava mu mazzi, n'alaba eggulu nga libikkuse, ne Mwoyo ng'ali ng'ejjiba ng'amukkako.
- ¹¹ Eddobozi ne liva mu ggulu nga ligamba nti, "Ggwe Mwana wange omwagalwa, ggwe, gwe nsanyukira ennyo."
- ¹² Amangwago Mwoyo n'amutwala mu ddungu.
- ¹³ N'amalayo ennaku amakumi ana ng'ali n'ensolo ez'omu nsiko, ng'akemebwa Setaani, kyokka nga bamalayika bamuweereza.

Yesu Ayita Abayigirizwa Abaasooka

- ¹⁴ Oluvannyuma nga Yokaana Omubatiza amaze okusibwa mu kkomera, Yesu n'ajja mu Ggaliraaya okubuulira Enjiri ya Katonda,
- ¹⁵ ng'agamba nti, "Ekiseera kituukiridde, n'obwakabaka bwa Katonda buseembedde! Mwenenye mukkirize Enjiri."

¹⁶Awo Yesu yali ng'ayita ku lubalama lw'ennyanja y'e Ggaliraaya, n'alaba Simooni ne muganda we Andereya nga basuula obutimba bwabwe mu nnyanja; kubanga baali bavubi.

¹⁷Yesu n'abagamba nti, "Mujje mungoberere nange ndibafuula abavubi b'abantu!"

¹⁸Amangwago ne baleka obutimba bwabwe ne bamugoberera.

¹⁹Bwe yeeyongerayo katono, n'alaba Yakobo ne Yokaana batabani ba Zebbedaayo, nga bali mu lyato baddaabiriza obutimba bwabwe.

²⁰Amangwago n'abayita ne baleka kitaabwe Zebbedaayo mu lyato n'abapakasi, ne bagoberera Yesu.

Yesu Awonya Omusajja eyaliko Dayimooni

²¹Awo ne bayingira mu Kaperunawumu. Amangwago n'ayingira mu kyunjaaniro ku Ssabbiiti, n'abayigiriza.

²²Ne beewuunya okuyigiriza kwe, kubanga yabayigiriza nga nannyini buyinza, so si ng'abannyonnyozi b'amateeka bwe baakolanga.

²³Amangwago ne walabika omusajja eyaliko omwoyo omubi mu ssinzizo, n'awowoggana,

²⁴ng'agamba nti, "Otwagaza ki Yesu Omunnazaaleesi? Ozze okutuzikiriza? Nkumanyi gwe Mutukuvu wa Katonda."

²⁵Awo Yesu n'aguboggolera ng'agamba nti, "Sirika era muveeko."

²⁶Awo omwoyo omubi ne gumusikambula nnyo, ne gumuvaako.

²⁷Buli omu ne yeewuunya, ne beebuuzaganya nti, "Kuyigiriza kwa ngeri ki kuno okuggya okujudde obuyinza? So n'emyoyo emibi agiragira ne gimugondera."

²⁸Amangwago amawulire agamukwatako ne gasaasaana wonna mu byalo ebyetoolodde Ggaliraaya.

Yesu Awonya Nnyina wa Muka Simooni

²⁹Amangwago ne bava mu kyunjaaniro ne bagenda mu nnyumba ya Simooni ne Andereya nga bali ne Yakobo ne Yokaana.

³⁰Ne basanga nga nnyina muka Simooni agalamidde mulwadde omusujja. Amangwago ne bakitegeeza Yesu.

³¹Bwe yamusemberera, n'amukwata ku mukono n'amuyimusa, omusujja ne gumuwonako, n'abaweeresa!

Yesu Awonya Abalwadde Abangi

³²Awo obudde bwe bwali buwungeera, ng'enjuba egwa, ne bamuleetera abalwadde bona, n'abaaliko dayimooni.

³³Ekibuga kyonna ne kikuñjaanira ku luggi.

³⁴Era Yesu n'awonya abalwadde bangi abaalina endwadde ez'enjawulo era n'abaaliko baddayimooni bangi n'ababagobako, ne baddayimooni teyabaganya kwogera, kubanga baali bamumanyi.

Yesu Asaba yekka mu Kifo eteri Bantu

³⁵Enkeera ng'obudde tebunnalaba yesu n'azuukuka n'agenda yekka mu kifo ekyekusifu, okusaba.

³⁶Awo Simooni ne be yali nabo ne bamunoonya,

³⁷bwe baamulaba ne bamugamba nti, "Buli muntu akunoonya."

³⁸Naye Yesu n'abagamba nti, "Tugende awalala mu byalo ebituliraanye, n'abeeeyo mbabuulire, kubanga ekyo kye najjirira."

³⁹Awo n'abuulira mu makujjaaniro ag'omu kitundu kyonna eky'e Ggaliraaya, era n'agoba ne baddayimooni.

Yesu Awonya Omugenge

⁴⁰Awo omugenge n'ajja eri Yesu ne yeegayirira ng'afukamidde mu maaso ge, n'amugamba nti, "Bwe kuba nga kwe kusiima kwo, oyinza okunnongoosa."

⁴¹Yesu n'amusaasira, n'agolola omukono gwe, n'amukwatako, n'amugamba nti, "Nsiimye, longooka!"

⁴²Amangwago ebigenge ne bimuwonako, n'aba mulongoofu.

⁴³Awo Yesu n'amukuutira nnyo n'amusiibula,

⁴⁴ng'agamba nti, "Kino tokibuulirako muntu n'omu, wabula genda weeyanjule eri kabona, oweeyo n'ekirabo Musa kye yalagira okuweebwangayo, okuba obujulirwa gye bali."

⁴⁵Naye omusajja n'atandika okwogera ku ebyo ebyamubaako, n'okubibunyisa. Yesu n'atasobola kuyingira mu kibuga mu lwat, naye n'abeeranga mu bifo ebyekusifu. Abantu ne bajjanga gy'ali okuva mu njuyi zonna.

Makko 2

Yesu Awonya Omulwadde w'Olukonvuba

¹Awo bwe waayitawo ennaku nnyingi Yesu n'akomawo mu kibuga Kaperunawumu, ne kiwulirwa nti ali ka.

²Abantu bangi ne bakuñjaana, ne wataba kafo wayinzika kuyisibwa kigere ku mulyango; n'ababuulira Enjiri.

³Omulwadde eyali akoozimbye ne bamuleeta eri Yesu ng'asituliddwa abasajja bana.

⁴Naye bwe balemwa okuyingiza omulwadde eyali akoozimbye olw'ekibiina ekinene ne baseluukulula ku kasolya ne bassa omulwadde ng'ali ku katanda ke.

⁵Yesu bwe yalaba okukkiriza kwabwe, n'agamba omulwadde eyali akoozimbye nti, "Mwana wange ebibi byo bikusonyiyiddwa."

⁶Naye abamu ku bannyonnyozi b'amateeka abaali batudde awo nga balowooza ku bintu bino mu mitima gyabwe ne boogera nti,

⁷"Ono ayinza atya okwogera bw'atyo? Avvodde! Ani ayinza okusonyiwa ebibi okuggyako Katonda?"

⁸Amangwago Yesu n'amanya mu mutima gwe bye baali boogerako bokka ne bokka n'ababuuza nti, "Lwaki mwebuuzaganya ebintu bino mu mitima gyammwe?

⁹Ekyangu kye kiuwa, okugamba akoozimbye nti ebibi byo bikusonyiyiddwa oba nti yimirira ositule akatanda ko otambule?

¹⁰Naye mmwe okusobola okutegeera ng'Omwana w'Omuntu alina obuyinza okusonyiwa ebibi ku nsi;" n'agamba eyali akoozimbye nti,

¹¹"Yimirira ositule akatanda ko oddeyo ewuwo."

¹²Awo omusajja n'asituka, amangwago n'asitula akatanda ke n'afuluma nga bona balaba. Bonna ne bawuniikirira era ne bagulumiza Katonda, nga bagamba nti, "Kino tetukirabangako."

Yesu Ayita Leevi

¹³Awo Yesu n'addayo nate ku lubalama lw'enyanja ekibiina ky'abantu ne bajja gy'ali, n'abayigiriza.

¹⁴Awo bwe yali ng'atambula n'alaba Leevi mutabani wa Alufaayo ng'atudde we yasoloolezanga omusolo, n'amugamba nti, "Ngoberera." Awo Leevi n'asituka n'amugoberera.

¹⁵Awo Yesu bwe yali mu nnyumba ya Leevi nga bali ku mmere, ng'ali wamu n'abawooza, n'abalina ebibi, n'abayigirizwa be, ng'abantu bangi bamugoberedde,

¹⁶abannyonnyozi b'amateeka n'Abafalisaayo ne baalaba Yesu ng'alya n'abalina ebibi n'abawooza, ne bagamba abayigirizwa be nti, "Lwaki alya n'abawooza n'abalina ebibi?"

¹⁷Yesu bwe yakiwulira n'abagamba nti, "Abalamu tebeetaaga musawo, wabula abalwadde! Sajja kuyita batuukirivu wabula abalina ebibi."

Yesu Bamubuuza ku by'Okusiiba

¹⁸ Abayigirizwa ba Yokaana n'ab'Abafalisaayo baali basiiba. Abantu ne bajja eri Yesu ne bamubuuza nti, "Lwaki abayigirizwa ba Yokaana n'abayigirizwa b'Abafalisaayo basiiba, naye abayigirizwa bo ne batasiiba?"

¹⁹ Awo Yesu n'abaddamu nti, "Ddala ddala abali n'awasiza omugole bayinza batya okusiiba, ng'awasizza omugole ali nabo?

²⁰ Naye ekiseera kirituuka awasizza omugole bw'alibaggibwako; okuva olwo ne balyoka basiiba.

²¹ Teri muntu atunga kiwero kiggya mu lugoye olukadde kubanga ekiwero ekiggya kiyuza olugoye olukadde, n'ekituli ne kyeyongera okugaziwa.

²² Teri muntu ateeka mwenge musu mu nsawo z'amaliba nkadde kubanga omwenge omusu gwabya ensawo enkadde, omwenge ne guyika, n'ensawo ne ziyluka. Naye omwenge omusu baguteeka mu nsawo mpya."

Yesu ye Mukama wa Ssabbiiti

²³ Awo mu biro ebyo Yesu yali ayita mu nnimiro y'emmere ey'empeke ku Ssabbiiti, abayigirizwa be ne batandika okunoga ku birimba by'emmere ey'empeke.

²⁴ Abafalisaayo ne bagamba Yesu nti, "Lwaki abayigirizwa bo bakola ekitakkirizibwa ku Ssabbiiti."

²⁵ Yesu n'abaddamu nti, "Temusomanga ku Dawudi kye yakola bwe yalina okwetaaga n'enjala ng'emuluma, ye ne be yali nabo,

²⁶ bwe yayingira mu nnyumba ya Katonda mu biro bya Abiyasaali kabona omukulu, n'alya emigaati egy'okulaga n'awaako n'abo be yali nabo, egitakkirizibwa kuliibwako bantu balala okuggyako bakabona."

²⁷ N'abagamba nti, "Ssabbiiti yateekebwawo lwa muntu, so si omuntu ku lwa Ssabbiiti.

²⁸ Noolwekyo Omwana w'Omuntu ye Mukama wa Ssabbiiti."

Makko 3

¹ Awo Yesu n'ayingira nate mu kkuñjaaniro, nga mulimu omusajja eyalina omukono ogukaze.

² Baali balindirira okulaba obanga anaamuwonya ku Ssabbiiti balyoke bamuwawaabire.

³ Yesu n'agamba omusajja eyalina omukono ogukaze nti, "Yimirira wakati."

⁴ N'abagamba nti, "Kikkirizibwa okukola ekirungi ku Ssabbiiti oba okukola ekibi? Okuwonya bulamu oba okubuzikiriza?" Naye ne batamuddamu.

⁵Yesu n'abatunuulira ng'akambuwadde era nga munakuwavu nnyo olw'obukakanyavu bw'emitima gyabwe, n'agamba omusajja nti, "Golola omukono gwo." N'agolola omukono gwe, ne guwona.

⁶Amangwago Abafalisaayo ne bafuluma ne bateesa n'Abakerodiyaa nga bwe banaamuzikiriza.

Ebibiina Bigoberera Yesu

⁷Awo Yesu n'abayigirizwa be ne bagenda ku nnyanja. Ekibiina kinene ekyava mu Ggaliraaya ne mu Buyudaaya ne kimugoberera.

⁸N'abalala ne bava mu kibuga Yerusaalemi, n'abalala mu Idumaya, n'abalala ne bava emitala w'omugga Yoludaani n'okwetooloola Ttuulo ne Sidoni ne bamugoberera. Ekibiina ky'abantu bwe baawulira bye yali akola ne bajja gy'ali.

⁹Yesu n'agamba abayigirizwa be eryato limubeere kumpi olw'ekibiina ekinene, ekibiina kireme kumunyigiriza.

¹⁰Kubanga yawonya bangi, bangi ne baagala okumugwira bamukwateko olw'endwadde zaabwe.

¹¹Awo emyoyo emibi bwe gyamulaba ne gigwa mu maaso ge nga gireekaana nga gigamba nti, "Gewe Mwana wa Katonda."

¹²Naye n'agikomako gireme okumwatuukiriza.

Yesu Alonda Abayigirizwa Ekkumi n'Ababiri

¹³Awo Yesu n'alinnya ku lusozi, n'ayita abo be yayagala, ne bajja gy'ali.

¹⁴N'alonda kkumi na babiri mu abo, be yafuula abatume babeerenga naye, era abatumenga okubuulira.

¹⁵N'abawa n'obuyinza okugobanga baddayimooni. Ekkumi n'ababiri be yalonda be bano:

¹⁶Awo n'alonda ekkumi na babiri era be bano: Simooni, gwe yatuma "Peetero" ne

¹⁷Yakobo ne Yokaana, batabani ba Zebbedaayo, Yesu be yatuma "Bowenerege" amakulu nti, "Abaana b'Okubwatuka."

¹⁸Andereya, ne Firipo, ne Battolomaayo, ne Matayo, ne Tomasi, ne Yakobo, omwana wa Alufaayo ne Saddayo, ne Simooni, Omukananaayo,

¹⁹ne Yuda Isukalyoti eyamulyamu olukwe.

Yesu ne Beeruzebuli

²⁰Awo Yesu n'ayingira mu nnyumba ekibiina kinene ne bakunjaanira nate w'ali, ye ne be yali nabo ne batasobola kulya.

²¹Awo baganda be bwe baakiwulira ne bagenda bamuggyeyo, kubanga baalowooza nti alaluse.

²²Naye abannyonnyozi b'amateeka abaava e Yerusaalemi ne bagamba nti, "Aliko Beeruzebuli omukulu wa baddayimooni, era obuyinza bwe bw'akozesa okugoba baddayimooni."

²³Awo Yesu n'abayita n'ayogera nabo mu ngero ng'agamba nti, "Setaani ayinza atya okugoba Setaani?"

²⁴Obwakabaka bwe bwawukana tebuyinza kubaawo.

²⁵N'ennyumba eyawukanye, teyinza kubeerawo.

²⁶Ne Setaani bw'atyo bw'alwanagana yekka na yekka tayinza kubaawo. Wabula yeezikiriza yekka.

²⁷Naye tewali ayinza kuyingira mu nnyumba ya muntu w'amaanyi, okunyaga ebintu bye nga tasoose kumusiba n'alyoka anyaga ebintu bye.

²⁸Ddala ddala mbagamba nti buli kintu kyonna omuntu ky'akola kirisoniyibwa abaana b'abantu, ebibi n'okuvvoola kwonna kwe bavvoola.

²⁹Naye buli alivvoola Mwoyo Mutukuvu talisonyiyibwa, emirembe n'emirembe naye alisingibwa omusango olw'ekibi eky'emirembe n'emirembe."

³⁰Yayogera atyo gye bali kubanga baagamba nti, "Aliko omwoyo omubi."

Baganda ba Yesu ne Nnyina

³¹Awo baganda ba Yesu ne nnyina ne bajja gy'ali ebweru nga baagala okumulaba. Awo ne bamutumira bamuyite ajje ayogere nabo.

³²Ekibiina ky'abantu kyali kimwetoolodde, ne bamugamba nti, "Nnyoko ne baganda bo ne bannyoko bali wabweru bakunoonya."

³³Naye n'abaddamu nti, "Mmange ye ani, ne baganda bange be baani?"

³⁴Awo bwe yeetoolooza amaaso abo abaali batudde nga bamwebunguludde, n'abagamba nti, "Bano be mulaba be bammange era be baganda bange!"

³⁵Kubanga buli muntu akola Katonda by'asiima ye muganda wange, ye mwannyinaze era ye mmange."

Makko 4

Olugero Iw'Omusizi

¹Ate era n'atandika okuyigiriza ku lubalama lw'enyanja. Ekibiina ky'abantu kinene nnyo ne bakuŋjaana okumwetooloola. Kyeyava alinnya mu lyato n'ayigiriza ng'atudde omwo.

²Yabayigirizanga ebintu bingi mu ngero. N'abayigiriza ng'agamba nti,

³“Muwulirize. Waaliwo omulimi eyafuluma okusiga ensigo.

⁴Bwe yali ng'azimansa ng'asiga mu nnimiro, ezimu ne zigwa ku mabbali g'ekkubo ennyonyi ne zija ne zizirya.

⁵N'endala ne zigwa ku ttaka ery'ekyaziyazi awatali ttaka lingi, ezo ne zimera mangu kubanga tezaali mu ttaka gwanvu.

⁶Awo omusana bwe gwayaka ne zikalirawo, kubanga emirandira gyali kungulu.

⁷Endala ne zigwa mu maggwa. Awo ensigo ne zikula kyokka amaggwa ne gazitta ne zitabala bibala.

⁸Endala ne zigwa ku ttaka eddungi, ezo ne zibala ebibala, ezimu emirundi amakumi asatu, endala emirundi nkaaga, n'endala kikumi.”

⁹ N'abagamba nti, “Oyo alina amatu agawulira awulire.”

¹⁰Awo bwe yasigala yekka, abayigirizwa be ekkumi n'ababiri n'abantu abalala, ne bamubuuza amakulu g'engero ezo ze yabagerera.

¹¹Yesu n'abagamba nti, “Mmwe muweereddwa omukisa okumanya ekyama ekifa ku bwakabaka bwa Katonda ekyakisibwa abantu abalala abali ebweru waabwo.”

¹² “Balaba bulabi naye nga tebeetegereza, era n'okuwulira bawulira naye tebategeera, si kulwa nga bakyuka ne basonyiyibwa.”

¹³ “Kale obanga temutegedde makulu ga lugero luno olwangu bwe lutimelitegeera mutya endala ze njenda okweyambisa nga njigiriza?

¹⁴Omusizi asiga ekigambo y'asiga.

¹⁵Ate ensigo ezaagwa ku mabbali g'ekkubo, be bawulira ekigambo, amangwago Setaani n'ajja n'akibatwalako.

¹⁶Ate ensigo ezaagwa ku byaziyazi, gy'emitima gy'abantu abawulira ekigambo amangwago ne bakaniriza n'essanyu.

¹⁷Naye tebalina mirandira, babeera bulungi okusooka, naye olutuukibwako ebizibu oba okuyigganyizibwa olw'ekigambo amangwago babivaako.

¹⁸Ate endala ezaagwa mu maggwa, be bawulira ekigambo,

¹⁹naye okweraliikirira n'okusikirizibwa eby'obugagga n'okwegomba ebintu ebirala, bizikiriza ekigambo ne kitabala bibala.

²⁰Ettaka eddungi gy'emitima gy'abantu abawulira ekigambo ne bakkiririza ddala era ne bavaamu ebibala, emirundi amakumi asatu, abalala emirundi nkaaga, n'abalala kikumi.”

²¹ Awo Yesu n'ababuuza nti, "Waliwo omuntu akoleeza ettaala n'agivuunikako ekibbo oba n'agiteeka wansi w'ekitanda? Naye omuntu bw'akoleeza ettaala tagiteeka ku kikondo waggulu?

²² Kubanga buli kintu kyonna ekikolebwa mu kyama kaakano, ekiseera kirituuka ne kiragibwa mu lwatu.

²³ Alina amatu agawulira awulire.

²⁴ Naye mwegendereze ebyo bye mbayigiriza.

²⁵ Alina aliweebwa na buli atalina aliggyibwako n'ebyo by'alina."

Olugero Iw'Ensigo Ekula

²⁶ Awo Yesu n'abagamba nti, "Obwakabaka bwa Katonda bufaanaanyirizibwa n'omusizi asiga ensigo mu ttaka.

²⁷ Ekiro yeebaka, n'emisana ne yeekolera by'ayagala, mu kiseera ekyo kyonna ensigo ziba zimera, naye ate nga takimanyi.

²⁸ Ku bwalyo ettaka lireeta ekibala. Ensigo zisooka kusindika bulimi bwazo okuva mu ttaka, amatabi ne gajjako ebirimba by'enjaano.

²⁹ Enjaano bw'eyengera omusizi ayanguwa mangu n'akwata akayuuyo, kubanga amakungula gatuuse."

³⁰ Awo Yesu n'ayongera n'abagamba nti, "Obwakabaka bwa Katonda tunaabugeraageranya na ki? Oba tukozese lugero ki okubunnyonnyola?

³¹ Bufaananyizibwa n'akasigo aka kaladaali! Kubanga newaakubadde katono nnyo okusinga ensigo zonna ez'oku nsi,

³² naye kavaamu omuti omunene nga gulina amatabi amanene, ennyonyi ez'omu bbanga mwe ziyanza okuzimba ebisu byazo."

³³ Yesu n'abuulira abantu ekigambo kya Katonda ng'akozesa engero nnyingi ezifaanana ng'ezo, nga bwe baasobolanga okuwulira.

³⁴ Yesu bwe yabanga ayigiriza ebibiina yakozesanga engero, naye bwe yaddanga ebbali n'abayigirizwa be n'abannyonnyola amakulu agali mu ngero ezo.

Yesu Akkakkanya Omuyaga

³⁵ Ku lunaku olwo obudde nga buwungedde Yesu n'agamba abayigirizwa be nti, "Tuwunguke tulage emitala."

³⁶ N'aleka awo ekibiina, abayigirizwa be ne balinnya mu lyato Yesu mwe yali ne bagenda naye. Abantu abamu ne babagobera mu maato agaabwe.

³⁷ Amangwago omuyaga mungi nnyo ne gukunta n'amayengo amagulumivu ne geeyiwa mu lyato ne libulako katono okujjula amazzi.

³⁸Yesu yali agalamidde emabega mu lyato nga yeezizise omutto yeebase. Awo abayigirizwa be ne bamuzuukusa nga bagamba nti, “Omuyigiriza, ggwe tofaayo nga ffenna tugenda okusaanawo?”

³⁹N’azuukuka n’aboggolera omuyaga n’agamba ennyanja nti, “Tteeka, sirika.” Omuyaga ne gusirika n’ennyanja n’eteekera ddala.

⁴⁰N’ababuuza nti, “Lwaki mutidde? Temunnaba kubeera na kukkiriza?”

⁴¹Ne batya nnyo, ne beebuuza nti, “Ono ye ani, embuyaga n’ennyanja gwe bigondera?”

Makko 5

Yesu Awonya Omusajja Eyaliko Baddayimooni

¹Awo Yesu n’abayigirizwa be ne batuuka emitala w’ennyanja mu nsi y’Abageresene.

²Yesu bwe yali yaakava mu lyato omuntu eyaliko omwoyo omubi n’ajja gy’ali ng’ava mu malaalo.

³Omuntu ono yasulanga mu malaalo era yali alaluse nnyo nga tewakyali na muntu asobola kumusiba.

⁴Emirundi mingi baagezangako okumussa ku mpingu n’okusiba amagulu ge n’enjegere naye byonna ng’abikutulakutula. Ne wataba na muntu w’amaanyi ayinza kumusiba kumunyweza.

⁵Naye bulijjo yatambulanga emisana n’ekiro mu malaalo ne mu nsozi. Yawowoggananga nga bw’akaaba era nga bwe yeesalaasala n’amayinja.

⁶Awo bwe yalengera Yesu ng’akyali walako ku nnyanja n’adduka n’agenda eryato we lyagoba, n’asinza Yesu.

⁷N’aleekaana nnyo nti, “Onjagaza ki, ggwe Yesu, Omwana wa Katonda, Ali Waggulu Ennyo? Nkwegayirira, olw’ekisa kya Katonda, tombonyaabonya.”

⁸Kubanga Yesu yali alagidde omwoyo omubi okuva ku musajja.

⁹Awo Yesu n’amubuuza nti, “Erinnya lyo ggw’ani?” N’addamu nti, “Erinnya lyange nze Ligyon, kubanga tuli bangi.”

¹⁰N’amwegayirira nnyo aleme okumugoba mu kitundu ekkyo.

¹¹Awo waaliwo eggana ly’embizzi nnyingi nnyo ku lusozi nga ziryा.

¹²Omwovo omubi ne gwegayirira Yesu nti, “Tusindike mu mbizzi ziri.”

¹³Yesu n’abakkiriza, ne bava ku musajja ne bayingira mu ggana ly’embizzi. Awo eggana ly’embizzi lyonna ne liserengetera ku kagulungujjo ne lyeyiwa mu nnyanja, embizzi zonna ne zisaanawo.

¹⁴Awo abaali bazirunda ne badduka mangu ne bagenda bategeeze ab'omu kibuga ne mu byalo ebiriraanyewo. Abantu bangi ne bajja okulaba ebibaddewo.

¹⁵Ekibiina ky'abantu ne kikuññaana awali Yesu, naye bwe baalaba omusajja eyaliko ligyoni ng'ayambadde bulungi era ng'ategeera bulungi, ne batya nnyo.

¹⁶Abo abaaliwo ne babategeeza ebyatuuka ku musajja eyaliko ddayimooni n'ebyatuuuka ku mbizzi.

¹⁷Awo abantu ne batandika okwegayirira Yesu abaviire!

¹⁸Yesu bwe yali ng'alinnya mu lyato, omusajja eyali abaddeko baddayimooni n'amwegayirira bagende bona.

¹⁹Yesu n'atakkiriza, n'amugamba nti, "Ddayo ewammwe mu bantu bo obabuulire ebintu byonna Mukama by'akukoledde era nga bw'akusaasidde."

²⁰Awo omusajja oyo n'agenda ng'atambula mu Dekapoli (ebibuga eby'omu kitundu ekyo) ng'abuulira abantu Katonda bye yali amukoledde byonna. Bonna abaabiwulira ne bawuniikirira nnyo.

Omuwala Eyali Afudde, n'Omukazi Omulwadde

²¹Awo Yesu n'awunguka mu lyato nate n'atuuka emitala w'enyanja. Abantu bangi ne bakuññaanira w'ali ku lubalama lw'enyanja.

²²Omukulu w'ekkuññaaniro erinnya lye Yayiro n'ajja n'agwa w'ali,

²³n'amwegayirira nnyo ng'agamba nti, "Muwala wange abulako katono okufa. Nkwegayiride jjangu omukwateko omuwonye."

²⁴Awo Yesu n'agenda naye n'ekibiina ky'abantu kinene ne kimugoberera nga bagenda bamunyigiriza.

²⁵Mu kibiina omwo mwalimu omukazi eyali amaze emyaka kkumi n'ebiri nga mulwadde ekikulukuto ky'omusaayi.

²⁶Yali yeewuubye mu basawo bangi abaamujabanga okumala emyaka egoygyonna; ne byonna bye yalina nga bimuweddeko, obulwadde ne butawona wabula okweyongera obweyongezi.

²⁷Yali awulidde ebikwata ku Yesu. Bw'atyo n'ajja nga yeenyigiriza mu kibiina ky'abantu n'atuuka emabega wa Yesu, n'akoma ku kyambalo kye.

²⁸Kubanga yagamba mu mutima gwe nti, "Ne bwe nnaakoma obukomi ku kyambalo kye nzija kuwona."

²⁹Awo olwakikomako, amangwago ekikulukuto ky'omusaayi ne kikalira n'ategeerera ddala ng'awonye.

³⁰ Amangwago Yesu n'awulira ng'amaanyi agamuvuddemu, n'akyukira ekibiina ky'abantu n'abuuza nti, "Ani akutte ku kyambalo kyange?"

³¹ Naye abayigirizwa be ne bamuddamu nti, "Ku bantu abangi batibakiunyigiriza oyinza otya okubuuza nti, 'Ani ankutteko?'"

³² Naye Yesu ne yeetoolooza amaaso ge mu bona alabe oyo amukutteko.

³³ Awo omukazi bwe yategeera ekituuseewo n'ajja eri Yesu ng'atidde nnyo era ng'akankana, n'agwa awo mu maaso ga Yesu n'amutegeeza amazima gonna.

³⁴ Yesu n'agamba omukazi nti, "Omuwala, okukkiriza kwo kukuwonyezza, genda mirembe obulwadde bwo buwonedde ddala."

³⁵ Naye yali akyayogera n'omukazi ababaka ne batuuka nga bava mu maka g'omukulu w'ekkuuŋjaaniro, ne babikira Yayiro nti, "Omuwala afudde, noolwekyo tekikyetaagisa kuteganya Muyigiriza."

³⁶ Yesu n'awulira ebiambo ebyayogerwa wabula n'agamba omukulu w'ekkuuŋjaaniro nti, "Totya, ggwe kkiriza bukkiriza."

³⁷ Awo Yesu n'aziyiza ekibiina kyonna okugenda naye, okuggyako Peetero ne Yakobo ne Yokaana muganda wa Yakobo.

³⁸ Bwe baatuuka mu nju y'omukulu w'ekkuuŋjaaniro, n'alaba okwaziirana ng'abantu bakaaba nga bakuba ebiwoobe.

³⁹ Bwe yayingira mu nju n'agamba abantu nti, "Mwaziiranira ki n'okukuba ebiwoobe? Omwana tafudde naye yeebase bwebasi!"

⁴⁰ Awo abantu bona ne bamusekerera nnyo. Naye n'abagamba bona bafulume mu nju. N'atwala abazadde b'omwana n'abayigirizwa be abasatu n'ayingira nabo mu kisenge omwana mwe yali.

⁴¹ Yesu n'akwata omwana ku mukono n'amugamba nti, "Talisa kumi!" amakulu nti, "Omuwala golokoka!"

⁴² Amangwago omuwala eyali aweza emyaka kkumi n'ebiri, n'ayimirira n'atambulatambula. Abaaliwo ne bawuniikirira nnyo.

⁴³ Naye Yesu n'abakuutira nnyo baleme okubuulirako omuntu yenna. Awo n'abalagira bawe omwana ekyokulya.

Makko 6

Nnabbi Tabulwa Kitiiibwa Okuggyako Ewaabwe

¹ Yesu n'ava mu kitundu ekyo n'abayigirizwa be n'addayo mu kibuga ky'ewaabwe.

² Olunaku lwa Ssabbiiti bwe lwatuuka n'agenda mu kkuuŋjaaniro okuyigiriza, abantu bangi abaaliwo ne beewuunya nnyo bwe baawulira bw'ayigiriza, ne

bawuniikirira ne beebuuza nti, "Bino byonna yabiygira wa era magezi ga ngeri ki ono ge yaweebwa n'eby'amagero ebyenkanidde wano by'akola?"

³Ne beebuuza nti, "Ono si ye mwana w'omubazzi? Maliyamu si ye nnyina, ne baganda be si be ba Yakobo, ne Yose, ne Yuda ne Simooni? Ne bannyina tetubeera nabo kuno?" Ekyo ne kibatawanya mu mutima.

⁴Yesu n'abagamba nti, "Nnabbi aweebwa ekitiibwa buli wantu okuggyako mu nsi y'ewaabwe ne mu bantu be ne mu maka ge waabwe."

⁵Naye teyakolerayo byamagero bingi okuggyako abalwadde abatonotono be yakwatako n'abawonya.

⁶N'awuniikirira nnyo okulaba nga tebamukkirizza. Awo n'agenda ng'ayigiriza mu byalo ebiriraanyewo.

Yesu Atuma Ekkumi n'Ababiri

⁷Awo Yesu n'ayita abayigirizwa be ekkumi n'ababiri n'abatuma babiri babiri era n'abawa obuyinza okugoba emyoyo emibi ku bantu.

⁸N'abakuutira obutatwala kantu konna okuggyako omuggo ogw'okutambuza gwokka nti, "Temutwala mmere wadde akagugu newaakubadde ensimbi mu lukoba.

⁹Mwambale engatto naye temutwala kkanzu yakubiri."

¹⁰N'abagamba nti, "Era buli nnyumba gye munaayingirangamu musulanga omwo okutuusa lwe muliva mu kibuga ekyo.

¹¹Era bwe mutuukanga mu kifo ne batabaaniriza yadde okubawuliriza, bwe mubanga muvaayo mukunkumuliranga mu kifo omwo enfuufu ey'omu bigere byammwe, okuba akabonero gye bali."

¹²Awo abayigirizwa ne bagenda nga babuulira buli muntu nti, "Mwenenye."

¹³Ne bagoba baddayimooni bangi ku bantu, ne basiiga abalwadde amafuta ne babawonya.

¹⁴Awo Kabaka Kerode n'awulira ettutumu lya Yesu, kubanga yali ayogerwako wonna olw'ebiyamagero bye yakolanga. Naye Kerode n'alowooza nti Yokaana Omubatiza y'azuukidde, kubanga abantu baayogeranga nti, "Tewali muntu mulala ayinza kukola byamagero nga bino."

¹⁵Naye abalala ne balowooza nti, "Eriya." N'abalala ne bagamba nti, "Nnabbi ng'omu ku bannabbi ab'edda."

¹⁶Kerode bwe yabiwulira ye n'agamba nti, "Oyo Yokaana, omusajja gwe natemako omutwe, y'azuukide mu bafu."

¹⁷Kubanga Kerode yennyini ye yatuma abaserikale be ne bakwata Yokaana Omubatiza ne bamuggalira mu kkomera, olwa Kerudiya muka muganda we Firipo, Kerode gwe yali awasizza.

¹⁸Yokaana yagamba Kerode nti, “Si kituufu okutwala Kerudiya muka muganda wo Firipo.”

¹⁹Kerudiya n’ayagala okutta Yokaana yeesasuze, naye nga tayinza.

²⁰Kubanga Kerode yatyanga Yokaana Omubatiza, ng’amuwa ekitiibwa ng’omuntu wa Katonda ow’amazima era omutukuvu, era ng’amukuumu. Era Kerode bwe yayogeranga ne Yokaana ng’emmeeme ye tetereera, so nga yali ayagala nnyo okuwuliriza by’amugamba.

²¹Naye olwali olwo, Kabaka Kerode n’afumba embaga ku lunaku lw’amazaalibwa ge, n’ayita abakungu be n’abakulu b’abaserikale n’abaami bona abatutumufu mu Ggaliraaya.

²²Awo muwala wa Kerudiya yennyini n’ajja n’azina nnyo, n’asanyusa Kerode n’abagenyi be yali atudde nabo ku mbaga. Awo Kabaka Kerode n’agamba omuwala nti, “Nsaba kyonna ky’oyagala nange nnaakikuwa.”

²³Era n’ayongera okumulayirira nti, “Kyonna kyonna ky’ononsaba yadde ekitundu ky’obwakabaka bwange nnaakikuwa!”

²⁴Awo omuwala n’afuluma ne yeebuuza ku nnyina. Nnyina n’amugamba nti, “Saba omutwe gwa Yokaana Omubatiza!”

²⁵Omuwala n’addayo mangu eri kabaka n’amusaba nti, “Njagala ompe kaakano, ku ssowaani, omutwe gwa Yokaana Omubatiza!”

²⁶Kino ne kinakuwaza nnyo kabaka, n’anyikaala nnyo, kyokka olwokubanga yali amaze okulayira n’okweyama ng’abagenyi be bawulira, n’atya okumenya obweyamo bwe.

²⁷Bw’atyo n’ayita omuserikale we, n’amulagira agende aleete omutwe gwa Yokaana. Omuserikale n’agenda mu kkomera, n’atemako Yokaana omutwe,

²⁸n’agineeteera ku lutiba, n’aguwa omuwala n’omuwala n’agutwalira nnyina.

²⁹Abayigirizwa ba Yokaana bwe baategeera ne bajja ne baggyawo omulambo gwe, ne bagutwala ne baguziika.

Okukomawo kw’Abatume gye baagenda Okubuulira

³⁰Awo abatume ne bakomawo awali Yesu ne bamunyyonyola byonna bye baakola ne bye baayigiriza.

³¹N’abagamba nti, “Mujje tugende mu kifo eteri bantu tuwummuleko.” Kubanga baali babuliddwa n’akaseera ak’okuliiramu ku

mmere olw'abantu abangi abajjanga gye bali; bano baabanga baakavaawo ate ng'abalala bajja.

32 Bwe batyo ne balinnya mu lyato ne bagenda mu kifo ekiwolerevu eteri bantu.

Yesu Aliisa Abantu Enkumi Ettaano

33 Naye abantu bangi abaava mu bibuga bingi ne babalaba nga bagenda ne bategeera gye baali bagenda ne badduka okwetooloola ku lukalu ne babeesookayo.

34 Yesu bwe yava mu lyato n'alaba ekibiina ky'abantu bangi abaali bakuñjaanye n'abasaasira nga bali ng'endiga ezitalina musumba. Awo n'atandika okubayigiriza ebintu bingi.

35 Awo obudde bwe bwawungeera abayigirizwa ne bajja awali Yesu ne bamugamba nti, "Ekifo kino kya ddungu ate n'obudde buwungedde.

36 Abantu basiibule bagende beegulire emmere mu byalo ne mu bibuga ebiriraanye wano."

37 Naye Yesu n'abaddamu nti, "Mmwe mubawe ekyokulya." Ne bamubuuza nti, "Tugende tubagulire emmere nga ya dinaali ebikumi bibiri, tugibawe balye?"

38 Yesu n'babuuza nti, "Mulina emigaati emeka? Mugende mulabe." Bwe baamala okwetegereza ne bamugamba nti, "Waliwo emigaati etaano n'ebennyanya bibiri."

39 Awo Yesu n'alagira abantu bona batuule wansi ku muddo mu bibinja.

40 Awo ne batuula mu bibinja, eby'abantu ataano ataano, awalala kikumi kikumi.

41 Yesu n'atoola emigaati etaano n'ebennyanya ebibiri n'ayimusa amaaso ge eri eggulu ne yeebaza Katonda. N'amenyaamenya emigaati n'ebennyanya ebibiri, n'abiwa abayigirizwa be ne bagabula abantu bona ne babuna.

42 Bonna ne balya ne bakkuta.

43 Ne bakuñjaanya obukunkumuka bw'emigaati n'obw'ebennyanya ebisero kkumi na bibiri.

44 Abasajja abaalya emigaati baali enkumi ttaano.

Yesu Atambulira ku Mazzi

45 Amangwago Yesu n'alagira abayigirizwa be basaabale mu lyato bawunguke bagende emitala w'enyanja e Besusayida abasange eyo, ng'amaze okusiibula ebibiina by'abantu.

46 Bwe yamala okubasiibula n'alinya ku lusozi okusaba.

47 Awo obudde bwe bwawungeera, Yesu ng'asigadde yekka ku lukalu,

⁴⁸n'abalengera nga bategana n'eryato kubanga waaliwo omuyaga mungi n'amayengo amagulumivu ebyabafuluma mu maaso gye baali balaga. Awo obudde bwali bunaatera okukya nga ku ssaawa mwenda ez'ekiro, n'ajja gye bali ng'atambulira ku mazzi, n'aba ng'ayagala okubayitako.

⁴⁹Naye bwe baamulaba ng'atambulira ku nnyanja ne baleekaana nnyo, bona, nga batidde, kubanga baalowooza nti muzimu,

⁵⁰kubanga bona baamulaba ne batya. Naye n'ayanguwa okwogera nabo, n'abagamba nti, "Mugume omwoyo. Ye Nze, temutya."

⁵¹Awo n'alinnya mu lyato, omuyaga ne gulekeraawo okukunta! Abayigirizwa be ne bawuniikirira nnyo.

⁵²Tebategeera kyamagero eky'emigaati kubanga emitima gyabwe gyali mikakanyavu.

Yesu Awonya Abalwadde e Genesaleeti

⁵³Awo eryato lyabwe bwe lyagoba ku lubalama lw'ennyanja Genesaleeti,

⁵⁴ne bavaamu. Abantu bwe balaba Yesu, amangwago ne bamutegererawo.

⁵⁵Ne babuna mu bitundu ebyali biriraanyeewo nga bamuleetera abalwadde nga basituliddwa ku butanda.

⁵⁶Wonna wanna gye yagendanga, mu byalo, mu bibuga, mu butale ne ku nguudo ne baleeta abalwadde ne bamwegayirira waakiri bakwateko bukwasi ku lukugiro lw'ekyambalo kye. Era bona abaakikwatako ne bawona.

Makko 7

Obulombolombo bw'Abayudaaya

¹Awo abafalisaayo n'abannyonnyozi b'amateeka abamu abaali bavudde e Yerusaalemi ne bakuññaanira awali Yesu.

²Ne balaba abamu ku bayigirizwa be nga balya tebanaabye mu ngalo.

³Kubanga Abafalisaayo n'Abayudaaya bona tebaalyanga nga tebasoose kunaaba mu ngalo n'obwegendereza ng'empisa zaabwe bwe zaali.

⁴Era bwe baddanga eka nga bava mu katale, ekyo kye baasookanga okukola nga tebannaba kukwata ku kyakulya kyonna. Waliwo n'obulombolombo obulala bwe baagobereranga ng'okulongoosa ensuwa zaabwe, n'ebikopo, n'ebbinika n'essowaani, n'ebirala bingi.

⁵Awo Abafalisaayo n'abannyonnyozi b'amateeka ne babuuza Yesu nti, "Lwaki abayigirizwa bo tebagoberera mpisa za bajjajjaffe ez'edda? Kubanga balya nga tebanaabye mu ngalo."

⁶Yesu n'abaddamu nti, "Bannanfuusi mmwe! Nnabbi Isaaya yaboogerako bulungi ebyobunnabbi bwe yagamba nti, "'Abantu bano banzisaamu ekitiibwa kya ku mimwa, naye emitima gyabwe tegindiiko.

⁷ Okusinza kwabwe tekuliimu nsa; kubanga bayigiriza bulombolombo bwabwe.'

⁸ Muleka ebiragiro ebiva eri Katonda ne mugoberera obulombolombo bw'abantu."

⁹ N'abagamba nate nti, "Munyooma ekiragiro kya Katonda, ne muggumiza obulombolombo bwammwe.

¹⁰Musa yagamba nti, 'Kitaawo ne nnyoko obassangamu ekitiibwa.' Era n'agamba nti, 'Omuntu yenna ayogera obubi ku kitaawe oba nnyina anattibwanga.'

¹¹Naye mmwe mugamba nti kituufu omuntu okulagajjalira bakadde be nga bali mu kwetaaga n'abagamba bugambi nti, 'Mmunsonyiwe, kubanga kye nandibawadde ye Korubaani.' "

¹²"Omuntu temumukkiriza kubeerako ky'akolera kitaawe oba nnyina.

¹³Bwe mutyo munyooma ekigambo kya Katonda mulyoke mutuukirize obulombolombo bwammwe bwe mwaweebwa. N'ebirala bingi ebiri ng'ebyo bye mukola."

Ebyonoona Omuntu

¹⁴Awo Yesu n'ayita ekibiina ky'abantu n'abagamba nti, "Mmwe mwenna, mumpulirize, era mutegeere.

¹⁵Ebintu ebiyingira mu muntu si bye byonoona empisa ze, wabula ebyo ebiva mu mutima gwe bye bizoonoona.

¹⁶(Omuntu alina amatu agawulira awulirize.)"

¹⁷Yesu n'aviira ekibiina n'ayingira mu nnyumba, abayigirizwa be ne bamubuuza amakulu g'ebigambo bye yayogera.

¹⁸N'abaddamu nti, "Nammwe temutegedde? Temutegeera nti buli kintu ekiyingira mu muntu si kye kimwonoona?

¹⁹Olw'okuba nga tekiyingira mu mutima gwe naye kiyingira mu lubuto lwe ne kiryoka kigenda mu kabuyonjo." Mu kwogera atyo Yesu yakakasa nga buli kyakulya bwe kiri ekirongoofu.

²⁰Era n'ayongerako na bino nti, "Ebirowoozo by'omuntu bye bimwonoona.

²¹Kubanga mu mutima gw'omuntu mwe muva ebirowoozo ebibi eby'obukaba, n'obubbi, n'obutemu, n'obwenzi,

²²n'okwegomba, n'omutima omubi, n'obukuusa, n'obumenyi bw'amateeka, n'obuggyga, n'okusekeeterera, n'obusirusiru.

²³Ebibi bino byonna biva munda mu muntu ne bimwonoona."

Okukkiriza kw'Omukazi Omusulofoyiniiki

²⁴Awo Yesu n'alaga mu bitundu by'e Ttuulo, n'atayagala kitegeerekeke nti ali mu bitundu ebyo, naye ne kitasoboka.

²⁵Omukazi eyalina muwala we ng'aliko omwoyo omubi, olwawulira nga Yesu yaakatuuka, n'ajja eri Yesu, n'agwa ku bigere bye.

²⁶Omukazi teyali Muyudaaya, yali Musulofoyiniiki, n'amwegayirira agobe dayimooni ku mwana we.

²⁷Yesu n'agamba omukazi nti, "Omwana asaana asoke akkute, kubanga tekiba kituufu okuddira emmere y'omwana okugisuulira embwa."

²⁸Naye omukazi n'amuddamu nti, "Ekyo bwe kiri, ssebo, naye era n'embwa ezibeera wansi mu mmeeza, ziweebwa ku bukunkumuka obuva ku ssowaani z'abaana."

²⁹Yesu n'amugamba nti, "Olw'ekigambo ekyo, weddireyo eka, kubanga dayimooni avudde ku muwala wo."

³⁰Omukazi bwe yaddayo eka yasanga muwala we agalamidde awo ku kitanda, nga muteefu era nga dayimooni amuvuddeko.

³¹Yesu bwe yava mu Ttuulo n'agenda e Sidoni, eyo gye yava n'addayo ku nnyanja ey'e Ggaliraaya ng'ayitira mu "Bibuga Ekkumi" (Dekapoli).

³²Awo ne bamuleetera omusajja omuggavu w'amatu ate nga tayogera, abantu bona ne beegayirira Yesu amusseeko emikono gye amuwonye.

³³Yesu n'aggya omusajja mu bantu n'amulaza wabbali, n'assa engalo ze mu matu g'omusajja; n'awanda amalusu, n'agasiiga n'olunwe lwe ku lulimi lw'omusajja.

³⁴Awo Yesu n'atunula waggulu n'assa ekikkowe, n'alyoka alagira omusajja nti, "Efasa!" ekitegeeza nti, "Gguka."

³⁵Amangwago amatu g'omusajja ne gagguka n'awulira buli kintu era n'ayogera bulungi!

³⁶Yesu n'akuutira ekibiina baleme kutegeezako balala ku bigambo ebyo okubisaasaanya, naye bo ne beeyongera okutegeeza.

³⁷Kye yakola kyali kibayitirideko. Ne boogera nga batenda Yesu nti, "Buli ky'akola kya kyewuunyo, aggula n'amatu ga bakiggala n'ayogeza ne bakasiru!"

Makko 8

Yesu Aliisa Abantu Enkumi Ennya

¹Mu biseera ebyo, ebibiina ne byeyongera obunene nate, abantu emmere n'ebaggwaako. Yesu n'ayita abayigirizwa be n'abagamba nti,

²"Abantu bano bankwasa ekisa, kubanga baakamala nange ennaku ssatu, naye tebalina kyakulya.

³Singa mbasiibula baddeyo ewaabwe nga tebalidde, enjala ejja kubasuula ku kkubo! Ate abamu bava wala."

⁴Abayigirizwa ne bamabuuza nti, "Emigaati tunaagiggya wa wano mu ddungu eginaamala abantu bano bona?"

⁵Yesu n'ababuuza nti, "Mulinawo emigaati emeka?" Ne baddamu nti, "Musantu."

⁶Awo Yesu n'alagira abantu batuule wansi. N'addiria emigaati omusanvu, ne yeebaza Katonda, n'agimenyaamenyamu, n'agiwa abayigirizwa be ne bagitwalira ekibiina ne babagabula.

⁷Era baalina wo n'ebennyanya bitono, nabyo Yesu n'abiwa omukisa n'agamba abayigirizwa be babigabule abantu.

⁸Abantu bona ne balya okutuusa lwe bakkuta, ne bakunjaanya ebyabalema ebisero musantu ebijjudde.

⁹Mu kibiina ekijo mwalimu abantu ng'enkumi nnya. N'abasiibula.

¹⁰Amangwago n'asaabala mu lyato n'abayigirizwa be n'ajja mu kitundu eky'e Dalumanusa.

Abaafalisaayo Basaba Yesu Akabonero Akava mu Ggulu

¹¹Abaafalisaayo ne bajja gy'ali ne batandika okuwakana naye nga banoonya akabonero akava mu ggulu nga bamugezesza.

¹²Yesu n'assa ekikkowe, n'abagamba nti, "Lwaki omulembe guno gunoonya akabonero? Ddala ddala mbagamba nti, Tewali kabonero kajja kuweebwa mulembe guno."

¹³N'abaviira n'asaabala mu lyato n'alaga ku ludda olulala olw'ennyanja.

Ekizimbukusa ky'Abaafalisaayo n'ekya Kerode

¹⁴Abayigirizwa beerabira okutwala emigaati egiwera; baalina omugaati gumu gwokka mu lyato.

¹⁵Yesu n'abakuutira nti, "Mwekuume ekizimbukusa eky'Abaafalisaayo n'ekizimbukusa ekya Kerode."

16Ne boogeraganya bokka ne bokka nti tebalina migaati.

17 Yesu bwe yakimanya n'abagamba nti, "Lwaki mugambagana nti temulina migaati? Era temunnategeera? Emitima gyammwe gikyali mikakanyavu?

18 Lwaki temulaba, ate nga mulina amaaso? Lwaki temuwulira ate nga mulina amatu? Temujukira?

19 Mwerabidde emigaati etaano gye namenyamenyamu okuliisa abantu enkumi ettaano? Ebisero byali bimeka eby'obukunkumuka bye mwakuṇjaanya?" Ne baddamu nti, "Kkumi na bibiri."

20 N'ababuuza nti, "Ate abantu bwe baali enkumi ennya n'emigaati omusantu, mwakuṇjaanya ebisero by'obutundutundu bwe baalemwa bimeka?" Ne baddamu nti, "Musanvu."

21 N'abagamba nti, "Era temunnategeera?"

Yesu Awonya Omuzibe w'Amaaso mu Besusayida

22 Awo bwe baatuuka mu Besusayida, ne wabaawo abantu abaamuleetera omusajja omuzibe w'amaaso, ne bamwegayirira amukwateko.

23 Yesu n'akwata omuzibe w'amaaso ku mukono n'amufulumya ebweru w'akabuga ako. N'awanda amalusu ku maaso g'omusajja n'agakwatako, n'amubuuza nti, "Kaakano waliwo ky'olaba?"

24 Omusajja n'amagamaga, n'addamu nti, "Yee! Ndaba abantu kyokka balabika ng'emiti egitambula."

25 Yesu n'ayongera okukwata ku maaso g'omusajja, omusajja n'azibuka amaaso n'awonera ddala buli kintu n'akiraba bulungi.

26 Yesu n'amutuma mu maka g'ewaabwe ng'amugamba nti, "Toddayo mu kyalo."

Peetero Ayatula Kristo

27 Awo Yesu n'abayigirizwa be, ne bagenda mu bubuga obw'e Kayisaliya ekya Firipo. Naye bwe baali batambula, Yesu n'ababuuza nti, "Abantu bampita ani?"

28 Abayigirizwa be ne bamuddamu nti, "Yokaana Omubatiza, abalala Eriya, naye abalala nti omu ku bannabbi."

29 Kwe kubabuuza nti, "Naye mmwe mumpita ani?" Peetero n'addamu nti, "Ggwe Kristo."

30 Naye Yesu n'abakuutira baleme okukibuulirako omuntu yenna!

Yesu Alanga Okufa kwe n'Okuzuukira kwe

31 Awo Yesu n'atandika okubabuulira nti, "Kigwanidde Omwana w'Omuntu okubonaabona ennyo, n'okugaanibwa abakadde, ne bakabona abakulu

n'abannyonyozi b'amateeka, n'okuttibwa, n'oluvannyuma lw'ennaku ssatu okuzuukira."

³²Yayogera nabo ku nsonga zino zonna mu lwatu, Peetero kyeyava amuzza wabbali n'atandika okumunenya.

³³Yesu n'akyuka n'atunuulira abayigirizwa be, n'alyoka anenya Peetero nti, "Setaani dda ennyuma wange, kubanga tolowooza ku bya Katonda wabula olowooza ku by'abantu."

³⁴Awo Yesu n'ayita ekibiina wamu n'abayigirizwa be, n'abagamba nti, "Obanga waliwo omuntu ayagala okungoberera, asaanidde okwefiiriza asitule omusaalaba gwe alyoke angoberere.

³⁵Kubanga buli eyeemalira ku bulamu bwe, alibufiirwa. Naye oyo awaayo obulamu bwe ku lwange ne ku lw'Enjiri alibuwonya.

³⁶Kale omuntu agasibwa ki singa alya ensi yonna, naye n'afuirwa obulamu bwe?

³⁷Omuntu ayinza kuweebwa ki, akiwanyise olw'obulamu bwe?

³⁸Era buli muntu yenna ankwatirwa ensonyi, n'ebigambo byange ne bimukwasa ensonyi mu mulembe guno ogutali mwesigwa era ogujjudde ebibi, Omwana w'Omuntu alimukwatirwa ensonyi bw'alijja mu kitibwa kya Kitaawe ne bamalayika abatukuvu."

Makko 9

Okufuusibwa kwa Yesu

¹Awo Yesu n'abagamba nti, "Ddala ddala mbagamba nti, Abamu ku bantu abali wano tebalifa okuggyako nga bamaze okulaba obwakabaka bwa Katonda nga bujja n'amaanyi."

²Bwe waayitawo ennaku mukaaga Yesu n'atwala Peetero ne Yakobo ne Yokaana n'abakulembira ne bagenda ku ntikko y'olusozi oluwanvu ne babeera eyo bokka. Amangwago n'afuusibwa nga balaba,

³ebiyambalo bye ne byeruka nnyo, nga tewali muntu ku nsi asobola kubyozza kubituusa awo!

⁴Awo Eriya ne Musa ne babalabikira ne batandika okwogera ne Yesu!

⁵Peetero n'agamba Yesu nti, "Labbi, kirungi tubeere wano, tubazimbire ensiisira ssatu, emu nga yiyo, n'endala nga ya Musa, n'endala nga ya Eriya."

⁶Yayogera atyo olw'okutya okungi okwabajjira.

⁷Awo ne walabika ekire, ne kibasaanikira ne muvaamu eddoboozi ne ligamba nti, "Ono ye Mwana wange omwagalwa. Mumuwulirirenga."

⁸Amangwago okugenda okukyusa amaaso gaabwe nga tewali muntu mulala okuggyako Yesu eyaliwo yekka nabo.

⁹Bwe baali baserengeta olusozi, Yesu n'abakuutira ekyo kye balabye obutakyogerangako okutuusa ng'Omwana w'Omuntu amaze okuzuukira mu bafu.

¹⁰Bwe batyo nabo ne bakikuuma nga kya kyama, naye ne beebuuzaganya ku by'okufa n'okuzuukira kwe.

¹¹Awo ne bamubuuza nti, "Lwaki abannyonnyozi b'amateeka bagamba nti Eriya asaanira asooke okujja."

¹²Yesu n'abagamba nti, "Weewaawo Eriya y'ateekwa okusooka okujja alongoose ebintu byonna. Lwaki kyawandiikibwa ku Mwana w'Omuntu nti ateeckwa okubonaabona ennyo n'okunyoomebwa?

¹³Naye mbagamba nti, Ddala ddala Eriya yajja! Naye yayisibwa bubi nnyo, nga bwe baayagala, nga bwe kyawandiikibwa ku ye."

Yesu Awonya Omulenzi Eyaliko Dayimooni

¹⁴Yesu n'abayigirizwa bali abasatu bwe bakka eri bannaabwe okuva ku lusozi, ne basanga ekibiina kinene nga kyetoolodde bannaabwe, abannyonnyozi b'amateeka nga bawakana nabo.

¹⁵Amangwago ekibiina kyonna bwe kyamulaba, ne badduka ne bagenda gy'ali ne bamwaniriza.

¹⁶Yesu n'ababuuza nti, "Kiki kye muwakana nabo?"

¹⁷Omukulu basajja abaali mu kibiina ne yeesowolayo n'agamba nti, "Omuyigiriza, naleese wano omwana wange omuwonye. Tayinza kwogera aliko omwoyo omubi.

¹⁸Era buli lwe gumulumba gumusuula wansi, n'abimba ejjovu ku mimwa n'aluma amannya, olwo yenna n'akakanyala. Nsabye abayigirizwa bo bagumugobeko, naye ne balemwa."

¹⁹Yesu n'agamba nti, "Mmwe, omulembe ogutakkiriza ndituusa ddi okubeera nammwe? Mbagumiikirize kutuusa ddi? Mumundeetere wano."

²⁰Ne bamumuleetera. Omwoyo bwe gwamulaba ne gusikambula omulenzi, ne gumusuula wansi, nga bwe yeevulungula nga bw'abimba n'ejjovu ku mimwa.

²¹Yesu n'abuuza kitaawe w'omwana nti, "Kino kimaze bbanga ki?" Kitaawe n'addamu nti, "Okuviiira ddala mu buto.

²²Oluusi gumusuula mu muliro oluusi mu mazzi nga gwagala okumutta. Obanga olina ky'osobola okutukolera, tusaasire."

²³ Yesu n'amuddamu nti, "Obanga osobola! Buli kimu kisoboka eri oyo akkiriza."

²⁴ Amangwago Kitaawe w'omwana n'ayogerera waggulu nti, "Nzikiriza, naye nnyamba okukkiriza kwange kweyogereko!"

²⁵ Yesu bwe yalaba ng'ekibiina kyeyongera obunene, n'aboggolera dayimooni nti, "Ggwe omwoyo omubi ogutayogera era omuggavu gw'amatu nkulagira muveeko, era tomuddiranga."

²⁶ Awo omwoyo ne guwowoggana nnyo, ne gumusikambula nnyo, ne gmuvaako n'aba ng'afudde, bangi ne balowooza nti afudde.

²⁷ Naye Yesu n'amukwata ku mukono n'amuyimiriza.

²⁸ Awo Yesu bwe yayingira mu nnyumba abayigirizwa be, ne bamubuuza mu kyama nti, "Lwaki ffe tetwasobodde kumugoba?"

²⁹ N'addamu nti, "Ogw'engeri eno teguyinza kugenda awatali kusaba."

³⁰ Bwe baava mu bitundu ebyo ne bayita mu Ggaliraaya. Yesu yali tayagala muntu yenna kumanya.

³¹ Kubanga yali ayigiriza abayigirizwa ng'abagamba nti, "Omwana w'Omuntu, ajja kuliibwamu olukwe era ajja kuweebwayo mu mikono gy'abantu abalimutta era nga wayise ennaku ssatu alizuukira."

³² Wabula tebaategeera bye yayogera ate ne batya okumubuuza.

³³ Awo ne batuuka e Kaperunawumu. Bwe baali mu nnyumba, n'ababuuza nti, "Mubadde muwakana ku ki mu kkubo?"

³⁴ Naye ne basirika kubanga mu kkubo baawakanira asinga ekitiibwa mu bo!

³⁵ Awo bwe yatuula n'ayita ekkumi n'ababiri, n'abagamba nti, "Omuntu yenna bw'ayagala okuba oweekitiiibwa okusinga banne, asaana yeetoowaze era abe omuweereza w'abalala."

³⁶ N'addiria omwana omuto n'amussa wakati waabwe, n'amusitula mu mikono gye n'abagamba nti,

³⁷ "Buli asembeza omwana omuto ng'ono mu linnya lyange, aba asembezezza nze. N'oyo asembeza nze aba tasembezezza nze nzekka, wabula aba asembezezza n'oyo eyantuma."

³⁸ Yokaana n'amugamba nti, "Omuyigiriza, twalaba omuntu ng'agoba baddayimooni mu linnya lyo, ne tumuziyiza kubanga tayita naffe."

³⁹ Naye Yesu n'amuddamu nti, "Temumuziyizanga, kubanga tewali muntu n'omu akola ebikolwa eby'amaanyi mu linnya lyange ate amangwago n'anjogerako bibi.

⁴⁰Kubanga buli atatuvuganya aba akolera wamu naffe.

⁴¹Buli abawa eggiraasi y'amazzi okunywako mu linnya lyange kubanga muli bantu ba Kristo, ddala ddala mbagamba nti talirema kuweebwa mpeera."

Okwesittaza Abato

⁴² "Na buli alyesittaza omu ku bato bano abanzikiriza, ekyandisinze, kwe kumusiba ejinja ery'olubengo olunene, n'asuulibwa mu nnyanja.

⁴³Obanga omukono gwo gukxesittaza, gutemeko! Kisinga okuyingira mu bulamu ng'ogongobadde okusinga okuba n'emikono ebiri n'olaga mu ggeyeena,

⁴⁴mu muliro ogutazikira.

⁴⁵Era obanga ekigere kyo kikxesittaza, kitemeko; okuba omulema n'oyingira mu bulamu kisinga okuba n'ebigere ebibiri n'osuulibwa mu ggeyeena

⁴⁶envunu gye zitafa mu muliro ogutazikira.

⁴⁷Era obanga eriiso lyo likxesittaza, liggyeemu! Kisinga okuyingira mu bwakabaka bwa Katonda ng'oli wa liiso limu okusinga okubeera n'amaaso go gombi,

⁴⁸n'osuulibwa mu ggeyeena, "envunu gye zitafa n'omuliro gye gutazikira.

⁴⁹ Buli muntu aliyisibwa mu muliro, ng'emmere bwerungibwamu omunyyo."

⁵⁰ "Omunyyo mulungi, naye bwe guggwaamu ensa, guzzibwamu gutya obuka bwagwo? Noolwekyo mube n'omunyyo mu mmwe era mubeerenga n'emirembe buli muntu ne munne."

Makko 10

Enteekateeka ya Katonda ku Bufumbo

¹ Awo n'agolokoka n'ava eyo n'alaga mu kitundu kya Buyudaaya okusukka emitala wa Yoludaani. Ebibiina ne bimuguberera era naye n'abayigiriza nga bwe yakolanga bulijo.

² Abamu ku Bafalisaayo ne bajja ne bamubuuza balyoke bamukwase, nga babuuza nti, "Kikkirizibwa omusajja okugoba mukazi we?"

³ Yesu n'addamu nti, "Musa yagamba atya ku nsonga eyo?"

⁴ Ne bamuddamu nti, "Musa yawa omusajja olukusa okuwandiikira mukyala we ebbaluwa emugoba."

⁵ Yesu n'abagamba nti, "Olw'obukakanyavu bw'emitima gyammwe, kyeyava abawandiikira etteeka lino.

⁶ Naye okuva ku lubereberye yabatonda omusajja n'omukazi.

⁷Omusajja ky'anaavanga aleka kitaawe ne nnyina, n'agenda n'agattibwa ne mukazi we.

⁸Olwo nga tebakyalu babiri, wabula nga bafuuse omubiri gumu.

⁹Noolwekyo Katonda be yagatta awamu, omuntu tabaawukanyanga."

¹⁰Bwe baali mu nnyumba, abayigirizwa be, ne bongera okumubuuza ku nsonga eyo.

¹¹Yesu n'abagamba nti, "Omusajja bw'agobanga mukazi we n'awasa omukazi omulala, aba ayenze.

¹²N'omukazi bw'ayawukananga ne bba n'afumbirwa omusajja omulala naye aba ayenze."

Yesu Awa Abaana Omukisa

¹³Awo Yesu ne bamuleetera abaana abato abakwateko, naye abayigirizwa be ne bajunga abaabaleeta.

¹⁴Kyokka Yesu bwe yabiraba n'anyiigira nnyo abayigirizwa be, n'abagamba nti, "Abaana mubaleke bajje gye ndi, temubagaana kubanga abali nga bano, be bannannyini bwakabaka bwa Katonda.

¹⁵Ddala ddala mbagamba nti omuntu yenna atakkiriza bwakabaka bwa Katonda ng'omwana omuto, tagenda kubuyingira n'akatono."

¹⁶Awo n'asitula abaana n'abassaako emikono gye, n'abawa omukisa.

¹⁷Awo Yesu bwe yali ng'atambula, omusajja n'ajja gy'ali ng'adduka, n'amufukaamirira n'amubuuza nti, "Omuyigiriza omulungi, nsaanidde kukola ki okufuna obulamu obutaggwaawo?"

¹⁸Yesu n'amuddamu nti, "Ompitira ki omulungi? Tewali mulungi n'omu wabula Katonda yekka.

¹⁹Amateeka gano ogamanyi. 'Tottanga, toyendanga, tobbanga, towaayirizanga, kitaawo ne nnyoko obassangamu ekitiibwa.'

²⁰N'amuddamu nti, "Omuyigiriza, ebyo byonna simenyangako na kimu okuva mu buvubuka bwange."

²¹Yesu n'amutunuulira enkaliriza, n'amwagala. N'amugamba nti, "Waliwo ekintu kimu kyokka ekikubulako, era kye kino: genda otunde ebintu byonna by'olina, ensimbi z'onoggyamu ozigabire abaavu, oliba n'obugagga mu ggulu, olyoke ojje ongoberere."

²²Bwe yawulira ebigambo ebyo n'anyikaala, n'agenda ng'anakuwadde, kubanga yali mugagga nnyo.

²³ Yesu n'amutunuulira ng'agenda, n'alyoka akyukira abayigirizwa be, n'abagamba nti, "Nga kizibu nnyo abagagga okuyingira mu bwakabaka bwa Katonda!"

²⁴ Kino ne kibeeuwunyisa nnyo. Yesu n'ayongera n'abagamba nti, "Abaana abaagalwa, nga kizibu abo abeesiga obugagga okuyingira mu bwakabaka bwa Katonda!"

²⁵ Kyangu enjamira okuyita mu nnyindo y'empiso okusinga omugagga okuyingira mu bwakabaka bwa Katonda."

²⁶ Ne beewuunya nnyo nga bwe beebuuzaganya nti, "Olwo kale ani ayinza okulokolebwa!"

²⁷ Yesu n'abatunuulira enkaliriza n'abaddamu nti, "Eri abantu tekiyinzika. Naye eri Katonda, buli kintu kyonna kisoboka."

²⁸ Awo Peetero n'agamba Yesu nti, "Tweresa byonna ne tukugoberera."

²⁹ Yesu n'amuddamu nti, "Njagala okubakakasiza ddala nti, Tewali muntu n'omu eyali yeeresezza ekintu kyonna, ng'amaka, abooluganda, bannyina, nnyina, kitaawe, abaana be, oba ettaka n'amayumba olw'okunjagala n'okubuulira Enjiri,

³⁰ ataliddizibwaho emirundi kikumi mu mulembe guno amaka, abooluganda, bannyina, nnyina, abaana, ettaka awamu n'okuyigganyizibwa! Ebyo byonna biriba bibye ku nsi kuno, ate ne mu nsi egenda okujja afunemu obulamu obutaliggwaawo.

³¹ Naye bangi aboolubereberye baliba abooluvannyuma, n'ab'oluvannyuma baliba aboolubereberye."

Yesu Ayongera Okwogera ku Kufa kwe

³² Awo bwe baali nga bali mu kkubo, nga bagenda e Yerusaalemi, Yesu ng'akuleembeddemu, abayigirizwa be ne bamuvaako emabega nga bamugoberera naye nga bajjudde okutya n'okweraliikirira. Yesu n'abazza wa bbali, n'abannyonnyola byonna ebyali bija okumutuukako nga batuuse mu Yerusaalemi.

³³ N'ababuulira nti, "Bwe tunaatuuka eyo, Omwana w'Omuntu aliweebwayo, atwalibwe mu maaso ga bakabona abakulu n'abannyonnyozi b'amateeka. Bajja kumusalira omusango ogw'okufa era balimuwaayo eri Abamawanga bamusalire ekibonerezeky'okufa.

³⁴ Bajja kumuduulira bamuwandire n'amalusu bamukube embooko era bamutte, naye nga wayiseewo ennaku ssatu alizuukira."

Okusaba kwa Yakobo ne Yokaana

³⁵Awo Yakobo ne Yokaana, batabani ba Zebbedaayo ne bajja eri Yesu ne boogera naye mpola mu kyama nti. “Omuyigiriza, waliwo ekintu kye tukusaba otukolere.”

³⁶N’ababuuza nti, “Kiki ekyo?”

³⁷Ne bamuddamu nti, “Tusaba mu bwakabaka bwo tutuule ku ntebe eziriraanye eyiyo, omu atuule ku mukono gwo ogwa ddyo n’omulala ku gwa kkono?”

³⁸Naye Yesu n’abaddamu nti, “Kye musaba temukitegeera! Musobola okunywa ku kikompe eky’okubonaabona kye ɻnjenda okunywako? Oba okubatizibwa mu kubonaabona nga bwe ɻnjenda okubatizibwa?”

³⁹Ne bamuddamu nti, “Tusobola.” Yesu n’abagamba nti, “Okunywa ku kikompe kyange mugenda kukinywako era mulibatizibwa ne mu kubatizibwa kwange.

⁴⁰Naye sirina buyinza kubatuza ku ntebe eziriraanye eyange. Enteekateeka eyo yamala dda okukolebwa.”

⁴¹Abayigirizwa bali ekkumi bwe baategeera Yakobo ne Yokaana kye baasaba, ne babanyiigira nnyo.

⁴²Yesu n’abayita n’abagamba nti, “Mumanyi ng’abakulembeze b’abamawanga, n’abakulu baabwe bakuluusanya abantu,

⁴³naye mu mmwe si bwe kiri bwe kityo. Yenna ayagala okuba omukulembeze mu mmwe, asaanira abeerenga muweereza wa banne.

⁴⁴Ne buli ayagala okuba omwami mu mmwe, asaana abeere muddu wa banne bona.

⁴⁵N’Omwana w’Omuntu, teyajja ku nsi kuweerezebwa, wabula okuweereza abalala, era n’okuwaayo obulamu bwe ng’omutango okununula abangi.”

Yesu Azibula Battimaayo Amaaso

⁴⁶Awo Yesu n’abayigirizwa be ne batuuka mu Yeriko. Oluvannyuma bwe baali bava mu kibuga ekibiina kinene ne kibagoberera. Waaliwo omusajja omuzibe w’amaaso, erinnya lye Battimaayo (mutabani wa Timaayo) eyasabirizanga, eyali atudde ku mabbali g’oluguudo.

⁴⁷Awo Battimaayo bwe yategeera nga Yesu Omunnazaaleesi aja okuyita we yali, n’atandika okuleekaana nti, “Yesu, Omwana wa Dawudi, onsaasire!”

⁴⁸Abamu ku bantu abaali mu kibiina ne bamuboggolera nti, “Sirika! Totuleekaanira!” Naye ye ne yeeyongera bwneyongezi okukoowoola ng’addijjana nti, “Ayi Omwana wa Dawudi, onsaasire!”

⁴⁹Yesu n’ayimirira n’ayogera nti, “Mumuyite.” Ne bayita omuzibe w’amaaso nti, “Guma omwoyo, situka akuyita!”

⁵⁰Battimaayo n'asuula eri ekikooti kye, n'asituka mangu n'ajja eri Yesu.

⁵¹Yesu n'amubuuza nti, "Oyagala nkukolere ki?" Omuzibe w'amaaso n'addamu nti, "Ayi Omuyigiriza, njagala nsobole okulaba!"

⁵²Awo Yesu n'amugamba nti, "Ggenda, okukkiriza kwo kukuwonyezza." Amangwago omusajja n'azibuka amaaso, n'agoberera Yesu.

Makko 11

Yesu Ayingira mu Yerusaalemi n'Ekitiibwa

¹Awo Yesu n'abayigirizwa be, bwe baali basemberedde Besaniya ebiriraanye Yerusaalemi, nga batuuse ku lusozi olwa Zeyituuni, Yesu n'atuma abayigirizwa be babiri babasooke mu maaso.

²N'abalagira nti, "Mugende mu kyallo ekituli mu maaso, bwe munaaba mwakakituukamu mujja kulaba omwana gw'endogoyi oguteebagalwangako nga gusibiddwa awo. Mugusumulule mugundeetere wano.

³Era omuntu yenna bw'ababuuza gye mugutwala, mumuddamu nti, 'Mukama waffe y'agwetaaga, era tujja kugukomyawo mangu.'"

⁴Abaatumibwa ne bagenda, ne balaba omwana gw'endogoyi nga guyimiridde ku luguudo, naye nga gusibiddwa ku muguwa wabweru w'ennyumba. Bwe baali bagusumulula,

⁵abamu ku bantu abaali bayimiridde awo ne bababuuza nti, "Abange, omwana gw'endogoyi, musumulula gwa ki?"

⁶Abayigirizwa ne baddamu nga Yesu bwe yabagamba, ne balyoka babakkiriza okugutwala.

⁷Omwana gw'endogoyi ne baguleetera Yesu. Abayigirizwa be ne baddira ebyambalo byabwe ne babyaliira ku mugongo gwayo, Yesu n'agwebagala.

⁸Awo abantu bangi abaali mu kibiina ne baaliira engoye zaabwe mu luguudo mwe yali agenda okuyita, abalala ne bamenya amatabi g'emiti mu nnimiro ezaali okumpi, nago ne bagaalira mu luguudo.

⁹Abaali mu maaso ge n'abaali emabega we, bona ne baleekaanira waggulu nti: "Ozaana!" "Atenderezebwe oyo ajja mu linnya lya Mukama!"

¹⁰"Atenderezebwe olw'okukomyawo obwakabaka bwa jjajjaffe Dawudi n'okubuwa omukisa!" "Ozaana! Ayi ali waggulu ennyo!"

¹¹Awo Yesu n'atuuka mu Yerusaalemi, n'ayingira mu Yeekalu. N'atunula, ne yeetoolooza amaaso wonna, naye obudde bwali buyise, n'afuluma n'agenda e Besaniya n'abayigirizwa be ekkumi n'ababiri.

Yesu Akolimira Omuti Ogutabala

¹²Enkeera bwe baali bava e Besaniya, Yesu n'alumwa enjala.

¹³N'alengera omutiini, nga guddugazza bulungi amalagala, n'agendayo alabe obanga anaasangako ebibala. Yagenda okugutuukako nga kuliko makoola meereere, kubanga si kye kyali ekiseera kyagwo okubaako ebibala.

¹⁴Awo Yesu n'agamba omuti nti, "Omuntu yenna alemenga okuddayo okulya ekibala kyo!" Abayigirizwa be ne bamuwulira ng'akyogera.

Yesu Alongoosa Yeekaalu

¹⁵Bwe baatuuka mu Yerusaalemi n'ayingira mu Yeekaalu, n'atandika okugobamu abaali batundiramu n'abaali baguliramu, n'avuunika emmeeza z'abaali bawaanyisa ensimbi, n'avuunika n'entebe z'abatunzi b'amayiba.

¹⁶Era n'ataganya muntu kuyisa kintu kyonna.

¹⁷N'abayigiriza ng'agamba nti, "Tekyawandiikabwa nti, 'Ennyumba yange eneebanga nnyumba ya kusabiramu amawanga?' Naye mmwe mugifudde mpuku y'abanyazi."

¹⁸Bakabona abakulu n'abannyonnyozi b'amateeka bwe baakiwulira, ne batandika okusala amagezi balabe bwe bayinza okumuzikiriza. Baali bamutya engeri ekibiina kyonna bwe kyali kyewuunya okuyigiriza kwe.

¹⁹Obudde bwe bwawungeera Yesu n'abayigirizwa be ne bafuluma mu kibuga.

Eky'okuyiga ku Mutiini Ogwakala

²⁰Awo enkeera mu makya abayigirizwa be ne balaba omuti omutiini Yesu gwe yakolimira nga gukaze okuvira ddala ku kikolo!

²¹Peetero n'ajjukira n'agamba Yesu nti, "Omuyigiriza, laba omutiini gwe wakolimira gukaze!"

²²Yesu n'agamba abayigirizwa be nti, "Mukkiririze mu Katonda.

²³Ddala ddala mbagamba nti buli aligamba olusozi luno nti, 'Siguka ogwe mu nnyanja,' n'atabuusabuusa mu mutima gwe, naye n'aba n'okukkiriza, ky'ayogedde kirituukirira.

²⁴Noolwekyo mbagamba nti buli kye munaasabanga, mukkirize nti mukiweeredwa, era kinaabanga bwe kityo gye muli.

²⁵Bwe mubanga mugenda okusaba musonyiwenga omuntu yenna gwe mulinako ensonga, ne Kitammwe ali mu ggulu alyoke abasonyiwe ebyonoono byammwe.

²⁶Naye bwe mutaasonyiwenga, ne Kitammwe ali mu ggulu talibasonyiwa byonoono byammwe."

Yesu Abuuzibwa Obuyinza gy'Abuggyga

²⁷Yesu n'abayigirizwa be bwe baakomawo mu Yerusaalemi yali atambulatambula mu Yeekaalu, bakabona abakulu n'abannyonnyozi b'amateeka n'abakulembeze b'Abayudaaya ne bajja gy'ali

²⁸ne bamubuuza nti, "Buyinza ki obukukoza bino? Era ani yakuwa obuyinza okukola bino?"

²⁹Naye Yesu n'abaddamu nti, "Bwe munaamala okunziramu ekibuuzo kyange kimu, nange n'ababuulira eyampa obuyinza obwo!"

³⁰Okubatiza kwa Yokaana kwava mu ggulu oba kwava eri bantu? Munziremu!"

³¹Ne bakubaganya ebirowoozo bokka na bokka nti, "Bwe tuddamu nti, 'Kwava mu ggulu,' ajja kutubuuza nti, 'Kale, lwaki temwamukkiriza?'

³²Naye, ate bwe tuddamu nti, 'Kwava eri bantu.' Baali batya ekibiina ky'abantu. Kubanga buli muntu yallowooza Yokaana okuba nnabbi.

³³Ne baddamu Yesu nti, "Tetumanyi." Awo Yesu n'abaddamu nti, "Nange sijja kubabuulira obuyinza obunkoza ebintu ebyo gye mbuggya."

Makko 12

Olugero Iw'Abalimi Ababi

¹Awo Yesu n'atandika okwogera nabo mu ngero, ng'agamba nti, "Waaliwo omusajja eyalima ennimiro y'emizabbib, n'ateeka olukomera okugyetooloola, n'ateekamu essogolero, n'azimbamu n'omunaala, n'agifuniramu abalimi abaagipangisa, n'agenda olugendo.

²Ekiseera ky'amakungula bwe kyatuuka, n'abatumira omuddu okufuna ebibala okuva mu nnimiro ey'emizabbib.

³Naye bwe yatuuka ku nnimiro abalimi ne bamukuba ne bamusindika n'addayo ngalo nsa.

⁴Nannyini nnimiro n'atuma omuddu we omulala, oyo ne bamukuba olubale, ne bamuswaza.

⁵Omubaka omulala gwe yatuma baamutta bussi, ate abalala be yazzaako okutuma, abamu baabakuba n'abalala ne babatta.

⁶ "Yali asigazzaawo omu yekka ow'okutuma, ye mutabani we omwagalwa. Bw'aty n'amutuma gye bali ng'agamba nti, 'Bajja kussaamu mutabani wange ekitiibwa.'

⁷ "Naye abalimi abo ne bateesa bokka na bokka nti, Ono ye musika, mujje tumutte ebyobusika tubyesignalize!

⁸Awo ne bamukwata ne bamutta omulambo gwe ne bagusuula ebweru w'ennimiro y'emizabbib.

⁹ "Mulowooza nannyini nnimiro alikola atya? Agenda kujja, abalimi abo bona abazikirize, ennimiro ye agipangiseemu abalimi abalala.

¹⁰ Temusomangako byawandiikibwa nti, "Ejjinja abazimbi lye baagaana, lye lifuuse ejinja ekkulu ery'oku nsonda.

¹¹ Ekyo Mukama ye yakikola era kitwewuunyisa nnyo okukiraba.' "

¹² Abakulembeze b'Abayudaaya ne bamanya ng'olugero lwali lukwata ku bo, olwo ne banoonya engeri gye bayinza okumukwata, naye ne batya ekibiina. Ne bamuvira ne bagenda.

Okuwa Kayisaali Omusolo

¹³ Ne bamuweereza abamu ku Bafalisaayo n'Abakerodiyani boogere, bagezeeko okumutega mu bigambo.

¹⁴ Awo ne bajja gy'ali ne bamugamba nti, "Omuyigiriza, tumanyi ng'oyogera mazima era tolina gw'otya. Toffaayo ku nfaanana y'abantu, wabula amazima ameereere, era oyigiriza ekkubo lya Katonda. Kituufu okuwa Kayisaali omusolo oba tetugumuwa?"

¹⁵ Naye Yesu n'ategeera obunnanfuusi bwabwe n'abagamba nti, "Lwaki munkema. Mundeetere ensimbi ngirabe."

¹⁶ Ne bagimuleetera, n'ababuuza nti, "Ekifaananyi kino n'ebiwandiiko ebiri ku nsimbi kuno by'ani?" Ne bamuddamu nti, "Bya Kayisaali."

¹⁷ N'abagamba nti, "Kale ebintu bya Kayisaali mubiwenga Kayisaali n'ebya Katonda, mubiwenga Katonda!" Ne bamwewuunya nnyo.

Yesu Abuuzibwa ku by'Okuzuukira

¹⁸ Awo Abasaddukaayo abagamba nti tewali kuzuukira, ne bamubuuza nti,

¹⁹ "Omuyigiriza, Musa yatuwa etteeka erigamba nti omusajja omufumbo bw'afanga nga tazadde baana, muganda w'omufu awasenga nnamwandu wa muganda we oyo alyoke amuzaalire abaana.

²⁰ Waaliwo abooluganda musanvu, mukulu waabwe n'awasa, Oluvannyuma n'afa nga tazadde baana.

²¹ Muto w'omufu kwe kuwasa nnamwandu wa mukulu we, waayitawo akabanga katono naye n'afa, nga naye tazadde mwana. Muganda w'omufu amuddako n'awasa nnamwandu oyo, naye n'atazaala.

²² Bonna omusanvu ne bafa ne baggwaawo. Oluvannyuma n'omukazi naye n'afa.

²³ Kale, mu kuzuukira kw'abafu omukazi oyo aliba muka ani, kubanga bona yabafumbirwako?"

²⁴ Yesu n'abaddamu nti, "Ekibaleetedde okukyama bwe butamanya byawandiikibwa, n'obutategeera maanyi ga Katonda.

²⁵ Kubanga bwe balizuukira mu bafu tebagenda kufumbiriganwa, kubanga bona baliba nga bamalayika bwe bali mu ggulu.

²⁶ Ate ebifa ku kuzuukira kw'abafu, temusomanga mu kitabo Musa bwe yali ku kisaka Katonda n'amugamba nti, 'Nze Katonda wa Ibulayimu era Katonda wa Isaaka era Katonda wa Yakobo?'

²⁷ Katonda si Katonda w'abafu, wabula ow'abalamu. Mukyamye nnyo."

Etteeka Ekkulu

²⁸ Awo omu ku bannyonnyozi b'amateeka eyali ayimiridde awo ng'awuliriza bye baali beebuuza, n'ategeera nga Yesu azzeemu bulungi. Naye n'amubuuzaayo nti, "Mu mateeka gonna, erisingamu obukulu lye liruwa?"

²⁹ Yesu n'amuddamu nti, "Ery'olubereberyelye lino nti, 'Wulira, Isirayiri! Mukama Katonda waffe, Mukama ali omu yekka.

³⁰ Era yagala Katonda wo n'omutima gwo gwonna n'omwoyo gwo gwonna, n'amagezi go gonna, n'amaanyi go gonna.'

³¹ N'eryokubiri lye lino nti, 'Oyagalanga muliraanwa wo nga bwe weeyagala wekka.' Tewaliiwo mateeka malala gasinga ago bukulu."

³² Omunyyonnyozi w'amateeka n'agamba nti, "Omuyigiriza ekigambo ky'oyogedde kya mazima bw'ogambye nti waliwo Katonda omu yekka era teriiyo mulala.

³³ Era mmayi nga kikulu nnyo okumwagala n'omutima gwaffe gwonna, n'okutegeera kwaffe n'amaanyi gaffe, n'okwagala muliraanwa wo nga bwe weeyagala wekka, era ng'ekyo kikulu okusinga ebiweebwayo ebyokebwa ne ssaddaaka."

³⁴ Yesu bwe yalaba ng'omusajja azzeemu n'amagezi n'amugamba nti, "Toli wala n'obwakabaka bwa Katonda." Okuva ku ekyo ne watabaawo muntu n'omu eyayarjanga okwongera okumubuuza ebibuuzo ebirala.

Kristo Mwana wa Ani

³⁵ Bwe waayitawo akabanga, Yesu yali ayigiriza mu Yeekaalu, n'ababuuza nti, "Lwaki abannyonnyozi b'amateeka bagamba nti Kristo Mwana wa Dawudi?

³⁶ Kubanga Mwoyo Mutukuvu bwe yali ali ku Dawudi, Dawudi yennyini yagamba ku bwa Mwoyo Mutukuvu nti, "'Mukama yagamba Mukama wange nti, "Tuulira wano ku mukono gwange ogwa ddyo, okutuusa lwe nditeeka abalabe bo wansi w'ebigere byo.'"'

³⁷ Dawudi yennyini amuyita Mukama we, ayinza atya ate okuba Omwana we?" Ekibiina kyalimu abantu bangi, ne bamuwuliriza n'essanyu.

³⁸Awo Yesu n'ayigiriza ng'agamba nti, "Mwekuume abannyonnyozi b'amateeka, kubanga baagala nnyo okwambala ne batambulatambula mu butale ng'abantu babalamusa.

³⁹Baagala nnyo okutuula mu bifo ebisinga obulungi mu makuŋŋaaniro, n'okutuula mu bifo eby'ekitiibwa ku mbaga.

⁴⁰Kyokka, banyagako bannamwandu ebintu byabwe, ne beeraga nga basaba esaala empanvu ennyo. Ekibonerezo kyabwe kyekiriva kibeera ekinene ddala."

Ekirabo kya Nnamwandum

⁴¹Awo Yesu bwe yatuula okwolekera eggwanika ly'ensimbi, n'alaba engeri ekibiina ky'abantu gye bateekamu ensimbi mu ggwanika. Abagagga bangi baali bateekamu ensimbi nnyingi.

⁴²Awo nnamwandum eyali omwavu n'ajja n'ateekamu ebitundu bibiri, ye kodulante.

⁴³Yesu n'ayita abayigirizwa be, n'abagamba nti, "Ddala ddala mbagamba nti nnamwandum oyo omwavu awaddeyo nnyo okusinga bona bali abatadde mu ggwanika.

⁴⁴Kubanga bona bataddemu ku bibafikkiridde, naye ate nnamwandum ono mu kwetaaga kwe ataddemu kyonna ky'abadde nakyo, ekibadde kijja okumuyamba obulamu bwe bwonna."

Makko 13

Obubonero obw'Enkomerero

¹Awo Yesu bwe yali ng'ava mu Yeekaalu omu ku bayigirizwa be n'amugamba nti, "Omuyigiriza, laba, amayinja ago, n'ebizimbe ebyo."

² Yesu n'amuddamu nti, "Ebizembe ebyo eby'ekitalo obiraba? Ne bwe kiriba ki tewaliba jjinja na limu wano eririsigala ku linnaalyo."

³ Awo Yesu bwe yali ng'atudde awo ku lusozi olwa Zeyituuni, okwolekera yeekaalu, Peetero ne Yakobo ne Yokaana ne Andereya ne bamubuuza mu kyama, ne bamubuuza nti,

⁴"Tutegeeze, ebintu byonna we birituukirira, era n'akabonero akalibaawo ng'ebyo byonna bigenda okutuukirira."

⁵ Yesu n'abagamba nti, "Mwekuume omuntu yenna tababuzaabuzanga.

⁶Bangi abalija mu linnya lyange nga bagamba nti, 'Nze nzuuyo,' era balibuzaabuza bangi.

⁷Naye bwe muliwulira entalo, n'eŋŋambo ez'entalo, temutyanga. Kyetaaga ebyo byonna okubaawo naye enkomerero eriba tennatuuka.

⁸Kubanga amawanga galirwanagana, n'obwakabaka bulirwana n'obwakabaka, era musisi aliyita mu bifo bingi, n'enjala nnyingi erigwa. Okulumwa ng'okw'okuzaala kuliba kutandika butandisi."

⁹ "Mwekuume mmwe. Balibawaayo mu mbuga z'amateeka ne mu makuŋjaaniro, mulikubibwa, muliyimirira mu maaso ga bakabaka ne bagavana. Muliyimirira ku lwange, okubeera abajulirwa gye bali.

¹⁰Era Enjiri kigigwanira okumala okubuulirwa amawanga gonna.

¹¹Bwe balibawkata ne babawaayo, temweraliikiriranga kya kuwoza. Kye munaaweebwanga okwogera mu kiseera ekyo kye munaayogeranga kubanga si mmwe muliba mwogera wabula Mwoyo Mutukuvu y'aliba ayogerera mu mmwe."

¹² "Owooluganda aliwaayo muganda we okuttibwa, ne kitaawe w'omwana aliwaayo omwana we. Abaana balijeemera bazadde baabwe ne babatta.

¹³Mulikyayibwa abantu bona, olw'erinnya lyange, naye oyo aligumiikiriza okutuusa ku nkomerero y'alirokolebwa."

¹⁴ "Bwe mulabanga ekintu eky'omuzizo ekizikiriza, nga kiyimiridde mu kifo we kitasaanira (asoma bino, weetegereze) abali mu Buyudaaya baddukiranga ku nsozi.

¹⁵N'oyo alibeera waggulu ku nnyumba takkanga wadde okuyingira okubaako ky'atwala okuva mu nnyumba ye.

¹⁶N'oyo alibeera mu nnimiro, taddanga kutwala bintu bye, wadde okukima yo olugoye lwe.

¹⁷Naye ziribasanga abaliba embuto n'abaliba bayonsa mu nnaku ezo.

¹⁸Naye musabe ekiseera ekyo kireme kuba kya butiti.

¹⁹Kubanga ekiseera ekyo kiriba kya kubonyaabonyezebwa okutabeerangawo kasookedde Katonda atonda eggulu n'ensi, n'okutuusa kaakano n'emirembe egigenda okujja.

²⁰ "Era singa Mukama teyakendeeza ku nnaku ezo, tewandiwonyeewo muntu yenna, naye olw'ablonde be, ennaku ezo yazikendeezaako.

²¹Era omuntu yenna singa abagamba nti, 'Mulabe, Kristo wuuli,' temumukkirizanga.

²²Kubanga bakristo ab'obulimba balijja, ne bannabbi ab'obulimba nabo balijja ne bakola eby'amagero n'ebywuuunyo, nga bagenderera okulimba n'abalonde ba Katonda.

²³Naye mwekuume! Kubanga mbalabudde ng'ebintu bino byonna tebinnabaawo.

²⁴"Ennaku ez'entiisa eyo nga ziweddeko, "‘enjuba eriggyako ekizikiza, era n'omwezi teguliyaka,

²⁵era, emmunyeeny e zirikunkumuka, n'aboobuyinza ab'omu bbanga balikankana."

²⁶"Olwo muliraba Omwana w'Omuntu ng'ajjira ku bire n'amaanyi mangi n'ekitiibwa kinene,

²⁷Era alitura bamalayika okukunjaanya abalonde be okuva eri empewo ennya, n'okuva ensalo z'ensi gye zikoma okutuuka ensalo z'eggulu gye zikoma."

Omutiini kye Guyigiriza

²⁸"Muyigire ku lugero lw'omutiini. Amatabi gaagwo bwe gatandika okutojera, nga mumanya nti ebiseera eby'ebbugumu binaatera okutuuka.

²⁹Noolwekyo nammwe bwe muliraba ebintu ebyo nga bibaawo, nga mumanya nti ekiseera kiri kumpi, era kisemberedde ddala ku luggi.

³⁰Ddala ddala mbagamba nti omulembe guno tegugenda kuggwaako okutuusa ng'ebintu byonna bimaze okubaawo.

³¹Eggulu n'ensi biriggwaawo, naye ebigambo byange biribeerera emirembe n'emirembe."

Tewali Amanyi Lunaku wadde Ekiseera

³²"Naye eby'olunaku olwo oba essaawa tewali n'omu abimanyi, newaakubadde bamalayika mu ggulu wadde Omwana, okuggyako Kitaffe.

³³Mwekuume, mutunule kubanga temumanyi kiseera we kirituukira.

³⁴Ng'omusajja eyatambula olugendo n'ategekera abaddu be, buli omu n'amuwa obuyinza ng'omulimu gwe bwe guli, n'alagira omuggazi w'oluggi atunule alindirire."

³⁵"Noolwekyo mubeere beeteggef kubanga temumanyi ssemaka wakomerawo oba kawungeezi, oba mu ttumbi, oba ng'enkoko zikookolima, oba ng'obudde bukya,

³⁶si kulwa ng'akomawo nga temumanyiridde, n'abasanga nga mwebase.

³⁷Kye mbagamba mmwe, kye njamba buli muntu, mwekuume."

Makko 14

Omukazi Asiiga Yesu Amafuta ag'Omuwendo

¹ Embaga ey'Okuyitako, kwe baliira emigaati egitali mizimbulukuse, yali ebuzaayo ennaku bbiri etuuke. Bakabona abakulu n'abannyonnyozi b'amateeka ne basala olukwe engeri gye banaakwata Yesu bamutte.

² Ne bagamba nti, "Si mu kiseera ky'embaga y'Okuyitako, kubangaabantu bayinza okuleetawo akeegugungo."

³ Mu kiseera ekkyo Yesu ng'ali Besaniya mu nnyumba y'omusajja eyali amanyiddwa nga Simooni Omugenge, ng'atudde, omukazi n'ayingira ng'alina eccupa, eyalimu amafuta ag'akaloosa ag'omuwendo omungi. N'ayasa eccupa n'asiiga amafuta ku mutwe gwa Yesu.

⁴ Abamu ku abo abaaliwo ne basunguwalira nnyo ekikolwa ekkyo, nga beebuuza nti, "Amafuta ago gafudde ki?

⁵ Wakiri singa gatundiddwa dinaali ezisukka mu bikumi ebisatu, ne ziweebwa abaavu!" Ne bamwemulugunyiza.

⁶ Naye Yesu n'abagamba nti, "Omukazi mumuleke. Lwaki mumuteganya? Ankoledde ekikolwa kirungi.

⁷ Abaavu muli nabo bulijjo, era muyinza okubakolera obulungi buli we mwagalidde, naye Nze sija kubeera nammwe bulijjo.

⁸ Akoze ky'asobola, omubiri gwange agusiigiddewo amafuta ag'akaloosa nga bukyali, ng'aguteekateeka okuzikibwa.

⁹ Ddala ddala mbagamba nti buli kifo kyonna Enjiri gy'eneebuulirwanga mu nsi yonna, ekikolwa ky'omukazi ono kinajjukirwanga era kinaayongerwangako okumujjukiranga."

Yuda Alya mu Yesu Olukwe

¹⁰ Awo Yuda Isukalyoti, omu ku bayigirizwa ba Yesu ekkumi n'ababiri, n'agenda eri bakabona abakulu alabe bw'anaalyamu Yesu olukwe amubawe.

¹¹ Bakabona abakulu bwe baakiwulira ne basanyuka nnyo, ne bamusuubiza okumuwa ensimbi. Bw'atylo Yuda n'atandika okunoonyereza engeri entuufu w'anaaweerayo Yesu.

Ekyekiro kya Mukama Waffe

¹² Awo ku lunaku olusooka olw'embaga y'Abayudaaya kwe baliira emigaati egitali mizimbulukuse, nga bawaayo omwana gw'endiga ogw'Okuyitako nga ssaddaaka, abayigirizwa be ne bamubuuza nti, "Oyagala tukutegekere wa gy'onooliira Embaga ey'Okuyitako."

¹³N'atuma babiri ku bayigirizwa be, n'abagamba nti, "Mugende mu kibuga munaasanga omusajja eyeetisse ensuwa y'amazzi, mumugoberere.

¹⁴Muyingire mu nnyumba mw'anaayingira, mubuuze nnyinimu nti, 'Ekisenge nze n'abayigirizwa bange mwe tunaalira Embaga ey'Okuyitako kiri ludda wa?'

¹⁵Ajja kubalaga ekisenge ekinene ekya waggulu, ekiwedde okulongoosa n'okutegeka. Muteekereteekere omwo ekijulo kyaffe."

¹⁶Awo abayigirizwa ababiri ne bagenda mu kibuga, ne basanga byonna nga Yesu bwe yabibagamba, ne bateekateeka Okuyitako.

¹⁷Obudde bwe bwawungeera n'atuuka n'abayigirizwa be ekkumi n'ababiri.

¹⁸Bwe baali batudde nga balya, Yesu n'abagamba nti, "Ddala ddala mbagamba nti omu ku mmwe alya nange anandyamu olukwe."

¹⁹Ennaku n'ebakwata nnyo, ne batandika okumubuuza kinnoomu nti, "Ddala ye nze?"

²⁰N'abagamba nti, "Omú ku mmwe ekkumi n'ababiri, akoza nange mu kibya.

²¹Omwana w'Omuntu agenda ng'Ebyawandiikibwa bwe biri. Naye zimusanz alya mu Mwana w'Omuntu olukwe. Kyandibadde kirungi singa omuntu oyo teyazaalibwa."

²²Awo bwe baali balya, Yesu n'addira omugaati, ne yeebaza, n'agumenyaamenyamu, n'agabira abayigirizwa be, n'abagamba nti, "Mutoole mulye, guno gwe mubiri gwange."

²³Ate n'addira ekikompe ne yeebaza n'akibawa; bona ne banywa.

²⁴N'abagamba nti, "Guno musaayi gwange ogw'endagaano, oguyiika ku lw'abangi.

²⁵Ddala ddala mbagamba nti sigenda kuddayo kunywa ku kibala kya muzabbibu okutuusa ku lunaku luli lwe ndikinywa nga kisingawo obulungi mu bwakabaka bwa Katonda."

²⁶Awo ne bayimbayo oluyimba, ne bafuluma ne bagenda ku lusozi olwa Zeyituuni.

Yesu Ategeeza Peetero nga bw'Anaamwegaana

²⁷Yesu n'abagamba nti, "Buli omu ku mmwe ajja kunjabulira, kubanga kyawandiikibwa nti, "Ndikuba omusumba, endiga ne zisaasaana.'

²⁸Naye bwe ndimala okuzuukizibwa, ndibakulembira okugenda e Ggaliraaya."

²⁹Peetero n'amugamba nti, "Abalala bona ne bwe banaakwabulira, nze siikwabulire!"

³⁰ Yesu n'amugamba nti, "Ddala ddala nkugamba nti ekiro kya leero, enkoko eneeba tennakookolima mirundi ebiri, onooneegaana emirundi esatu."

³¹ Peetero n'akiggumiza nnyo ng'agamba nti, "Oba kufiira wamu naawe n'afa, naye sijja kukwegaana n'akamu kokka." N'abalala bona ne beerayirira bwe batyo.

Yesu mu Gesusemane

³² Awo Yesu n'abayigirizwa be ne batuuka mu kifo ekiyitibwa Gesusemane, n'agamba abayigirizwa be nti, "Mugira mutuula wano, ηnjende nsabe."

³³ N'atwala Peetero, ne Yakobo ne Yokaana; n'atandika okweraliikirira n'okuteganyizibwa mu mutima.

³⁴ N'abagamba nti, "Omwoyo gwange guliko ennaku nnyingi nnyo zaagala na kunzita, kale mubeere wano mukuumbe."

³⁵ Ne yeeyongerako mu maaso katono, n'agwa wansi n'asaba obanga kisoboka, essaawa eyo, ereme kutuuka.

³⁶ N'asaba nti, "Aba, Kitange, ebintu byonna bisoboka gy'oli. Nzifyako ekikompe kino. Naye si nga Nze bwe njagala, wabula nga ggwe bw'oyagala."

³⁷ N'akomawo gye bali, n'abasanga nga beebase. N'agamba Peetero nti, "Simooni! Weebase? Tosobodde kutunulako nange wadde essaawa emu?"

³⁸ Mutunule musabe, muleme kukemebwa. Omwoyo gwagala, naye omubiri munafu."

³⁹ Ate n'abaleka awo n'addayo, n'asaba ebigambo bye bimu na biri bye yasaba olubereberye.

⁴⁰ N'akomawo we bali, n'abasanga nga beebase, kubanga amaaso gaabwe gaali gakambira. Ne batamanya kya kumuddamu.

⁴¹ Bwe yadda gye bali omulundi ogwokusatu n'abagamba nti, "Kale mwebakire ddala. Kinaamala, laba ekiseera kituuse Omwana w'Omuntu aweebweyo mu mikono gy'abalina ebibi.

⁴² Musituke! Tugende, laba andyamu olukwe anaatera okutuuka."

⁴³ Yesu yali akyayogera, amangwago Yuda (omu ku batume be ekkumi n'ababiri) n'ajja ng'ali n'ekibiina kinene, ekyava ewa bakabona abakulu, n'abakulembeze b'Abayudaaya, nga balina ebitala era nga bakutte emiggo.

⁴⁴ Yuda yali abagambye nti, "Gwe nnanywegera, ye wuuyo mumukwate, mumutwale nga mumunywezezza."

⁴⁵ Awo baali baakatuuka Yuda n'alaga eri Yesu, bwe yamutuukako n'agamba nti, "Omuyigiriza!" N'amugwa mu kifuba.

46Ne bavumbagira Yesu ne bamukwata, ne bamunyweza.

47Naye omu ku baali bayimiridde awo n'asowolayo ekitala n'asalako okutu kw'omuddu wa Kabona Asinga Obukulu.

48Yesu n'ababuuza nti, "Lwaki munzijjidde ng'omumenyi w'amateeka, n'ebitala n'emiggo okunkwata?

49Mbadde nammwe ennaku nnyingi mu yeekaalu nga njigiriza, naye temwankwata. Naye kino kikoleddwa ebyawandiikibwa bituukirire."

50Bonna ne bamwabulira ne badduka.

51Naye waaliwo omulenzi omuvubuka eyali agoberera ng'avaako ennyuma, nga yeebikkiridde olugoye, lumu lwokka, ne baagezaako okumukwata,

52n'abeeesumattulako, ne basigaza olugoye n'adduka bwereere.

Yesu mu Maaso g'Olukiiko

53Awo Yesu n'atwalibwa eri Kabona Asinga Obukulu, bakabona abakulu n'abakulembeze b'Abayudaaya n'abannyonnyozi b'amateeka.

54Peetero n'agoberera nga yeesuddeko akabanga, n'ayita mu luggya lwa Kabona Asinga Obukulu, n'atuula ku kyoto n'abaweereza we baali bootera omuliro.

55Bakabona abakulu, n'Abasaddukaayo bona, baali banoonya obujulizi kwe banaasinziira okutta Yesu, naye ne bubabula.

56Bangi baayogera eby'obulimba ku ye, naye obujulizi bwabwe nga bukoonagana bukoonaganyi.

57Abamu ku bo ne bamuwaayiriza nga bagamba nti,

58"Twamuwlira ng'ayogera nti, 'Ndizikiriza Yeekaalu eno eyazimbibwa n'emikono gy'abantu, naye oluvannyuma lw'ennaku ssatu ndizzaawo endala etazimbiddwa na mikono gy'abantu.' "

59Naye era n'olwo ebigambo byabwe tebyatereera bulungi.

60Awo Kabona Asinga Obukulu n'ayimirira, n'abuuza Yesu nti, "Tolina ky'oddamu ku bino bye bakwogerako?"

61Yesu n'atamuddamu kintu. Ate Kabona Asinga Obukulu n'amubuuza nti, "Ggwe Kristo, Omwana w'oyo atenderezebwa?"

62Yesu n'addamu nti, "Ye Nze, era mugenda kulaba Omwana w'Omuntu ng'atudde ku mukono ogwa ddyo ogwa Katonda Ayinzabyonna, ng'akomawo mu bire eby'eggulu."

⁶³ Awo Kabona Asinga Obukulu n'ayuza ebyambalo bye, n'agamba nti, "Ate twetaagira ki abajulizi?"

⁶⁴ Muwulidde obuvvoozi. Musala mutya omusango guno?" Bonna ne bamusalira gwa kufa.

⁶⁵ Abamu ne batandika okumuwandulira amalusu, ne bamusiba kantuntunu ku maaso, ne bamukuba empi mu maaso, nga bwe bamuduulira nga bagamba nti, "Lagula." N'abaserikale nabo ne bamukuba ebikonde nga bamfulumya.

Peetero Yeegaana Yesu

⁶⁶ Peetero yali ali wabweru mu luggya, omu ku bawala abaweereza ba Kabona Asinga Obukulu n'ajja.

⁶⁷ Bwe yalaba Peetero n'amwetegereza ng'ayota omuliro, n'amugamba nti, "Ggwe, wali ne Yesu, Omunnazaaleesi."

⁶⁸ Peetero ne yeegaana ng'agamba nti, "Simanyi wadde okutegeera by'oyogerako!" N'afuluma n'alaga ebweru mu kisasi, enkoko n'ekookolima.

⁶⁹ Omuwala oli n'alengera Peetero, n'ategeeza banne abaali bayimiridde awo nti, "Ono ali omu ku bo."

⁷⁰ Peetero n'ayongera okwegaana. Bwe waayitawo akabanga, abantu abalala abaali bayimiridde awo ne bagamba Peetero nti, "Ddala ddala oli omu ku bo, kubanga oli Mugaliraaya!"

⁷¹ Peetero n'atandika, okukolima n'okulayira nga bw'agamba nti, "Omusajja ono gwe mwogerako, simumanyi."

⁷² Amangwago enkoko n'ekookolima omulundi ogwokubiri, Peetero n'ajjukira ebigambo Yesu bye yali amugambye nti, "Enkoko eneeba tennakookolima mirundi ebiri, onoonneegaana emirundi esatu." Awo Peetero n'atulika n'akaaba amaziga.

Makko 15

Yesu Atwalibwa eri Piraato

¹ Amangwago mu makya olukiiko lwa bakabona abakulu, n'abakulembeze b'Abayudaaya, n'abannyonnyozi b'amateeka lwe Lukiko Olukulu lwonna, ne bakunjjaana ne basiba Yesu, ne bamuweereza ewa Piraato.

² Piraato n'abuuza Yesu nti, "Ggwe Kabaka w'Abayudaaya?" Yesu n'amuddamu nti, "Oyogedde."

³ Awo bakabona abakulu ne bamulumiriza ebintu bingi.

⁴ Naye Piraato n'addamu n'amubuuza nti, "Lwaki toliiko ky'oddamu? Laba bakulumiriza ebintu bingi."

- ⁵ Naye Yesu n'asirika busirisi, era Piraato n'amwewuunya nnyo.
- ⁶ Ku buli mbaga, Piraato yabateeranga omusibe omu gwe baabanga bamusabye.
- ⁷ Omu ku basibe mu kiseera ekyo yali ayitibwa Balaba, eyali asibiddwa ne bajeemu banne olw'okutta abantu nga bakola obwegugungo.
- ⁸ Awo Piraato n'agenda eri ekibiina n'ababuuza nga bwe yateranga okukola.
- ⁹ N'ababuuza nti, "Mwandyagadde mbasumululire kabaka w'Abayudaaya?"
- ¹⁰ Kubanga yamanya nga bakabona abakulu bamuwaddeyo lwa buggyya.
- ¹¹ Naye bakabona abakulu ne bafukuutirira ekibiina babateere Balaba sso ssi Yesu.
- ¹² Naye Piraato n'addamu n'ababuuza nti, "Omuntu ono gwe muyita kabaka w'Abayudaaya mwandyagadde mmukole ntya?"
- ¹³ Ne bawowoggana nti, "Mukomerere!"
- ¹⁴ Piraato n'ababuuza nti, "Lwaki? Azziza musango ki?" Naye bo ne beeyongera bwetyongezi okuleekaana nti, "Mukomerere."
- ¹⁵ Awo Piraato okusanyusa ekibiina, n'abasumululira Balaba. N'awaayo Yesu akomererwe ng'amaze okumukuba.

Abaserikale baduulira Yesu

- ¹⁶ Awo Abaserikale ne batwala Yesu mu luggya lw'olubiri, oluyitibwa Pulayitoliyo, ne bayita bannaabwe bona abakuma olubiri, ne bakuŋjaana.
- ¹⁷ Ne bamwambaza ekyambalo ekya ffulungu, ne bakola engule mu maggwa ne bagissa ku mutwe gwe.
- ¹⁸ Ne balyoka bamulamusa nga bwe bagamba nti, "Mirembe! Kabaka w'Abayudaaya!"
- ¹⁹ Ne bamukuba omuggo ku mutwe, ne bamuwandulira amalusu, ne bamufukaamirira nga bwe bamuvuunamira.
- ²⁰ Bwe baamala okumuudulira, ne bamwambulamu ekyambalo ekya ffulungu ne bamwambaza engoye ze, ne bamutwala okumukomerera.

Yesu akomererwa ku musaalaba

- ²¹ Bwe baali bagenda ne basanga omusajja erinnya lye Simooni ow'e Kuleene, kitaawe wa Alegezanda ne Luufo eyali ava mu kyalo, ne bamuwaliriza yeetikke omusaalaba gwa Yesu.
- ²² Awo ne batwala Yesu ne bamutuusa mu kifo ekiyitibwa Gologoosa, amakulu gaakyo nti Ekifo ky'Ekiwanga.

²³Ne baddira wayini atabuddwamu envumbo ne bamuwa anyweko, naye n'amugaana.

²⁴Awo ne bamukomerera ku musaalaba. Ne bagabana ebyambalo bye nga babikubira akalulu.

²⁵Baamukomerera ku ssaawa ssatu ez'enkyo.

²⁶Ne batimba ekipande waggulu w'omutwe gwa Yesu, okwawandiikibwa nti, "Kabaka w'Abayudaaya."

²⁷Waaliwo abanyazi babiri abaakomererwa awamu naye, omu ku ludda lwa Yesu olwa ddyo, n'omulala ku kkono.

²⁸Bwe kityo Ekyawandiikibwa ne kituukirira ekigamba nti, "Yabalirwa wamu n'abamenyi b'amateeka."

²⁹Awo abaali bayitawo, ne bakoteka ku mitwe gyabwe nga bamuduulira, nga bwe bagamba nti, "Mumulaba! Wagamba okumenya Yeekaalu n'okugizimbira ennaku ssatu,

³⁰weerokole, okke wansi okuva ku musaalaba."

³¹Bakabona abakulu n'abawandiisi nabo baali bayimiridde awo nga baduulira Yesu, nga bagamba nti, "Yalokola balala, naye ye tasobola kwerokola!

³²Ggwe! Kristo, Kabaka wa Isirayiri! Kale kka ove ku musaalaba naffe tunaakkukkiriza!" N'abanyazi ababiri abaakomererwa naye, nabo ne bamuvuma.

Okufa kwa Yesu

³³Okuva ku ssaawa mukaaga ez'omu ttuntu okutuukira ddala ku ssaawa mwenda ez'olweggulo, ekizikiza ne kikwata ensi yonna.

³⁴Awo Yesu n'akoowoola n'eddoboozi eddene nti, "Eroi, Eroi, lama, sabakusaani?" Amakulu nti, "Katonda wange, Katonda wange, Lwaki onjabulidde?"

³⁵Abamu ku bantu abaali bayimiridde awo bwe baamuwlira ne bagamba nti, "Ayita Eriya."

³⁶Awo ne wabaawo eyadduka n'addiru ekyangwe n'akijuza wayini omukaatuufu, n'akisonseka ku lutu, n'akiwanika eri Yesu anyweko, nga bw'agamba nti, "Mumuleke, ka tulabe obanga Eriya anajja n'amuwannulayo!"

³⁷Awo Yesu n'akoowoola n'eddoboozi ddene, n'awaayo obulamu bwe.

³⁸Eggigi ery'omu Yeekaalu ne liyulikamu wabiri okuvira ddala waggulu okutuuka wansi.

³⁹Omuserikale Omuruumi eyakuliranga ekibinja ky'abaserikale ekikumi eyali ayimiridde okwolekera omusaalaba gwa Yesu, bwe yalaba enfa gye yafaamu, n'agamba nti, "Ddala ddala, omusajja ono abadde Mwana wa Katonda!"

⁴⁰Waaliwo abakazi abaali bayimiridde awo nga beesuddeko akabanga nga balengera, okwali Maliyamu Magudaleene, ne Saalome ne Maliyamu nnyina Yakobo omuto ne Yose.

⁴¹Abo baayitanga naye mu Ggaliraaya era nga bamuweereza, n'abalala bangi abajja naye e Yerusaalemi.

Okuzikibwa kwa Yesu

⁴²Awo bwe bwawungeera, kubanga lunaku lwa kuteekateeka, olunaku olukulembera Ssabbiiti,

⁴³Yusufu ow'e Alimasaya, nga mukungu mu Lukiiko Olukulu olw'Abayudaaya, naye eyali alindirira obwakabaka bwa Katonda, n'aba muvumu n'agenda eri Piraato okusabayo omulambo gwa Yesu.

⁴⁴Piraato ne yeewuunya nnyo okuba nti Yesu yafudde dda. N'atumya omuserikale Omuruumi eyali akulembera banne ekikumi, n'amubuuza obanga Yesu yafudde dda.

⁴⁵Bwe yakikakasa okuva eri omuserikale, Piraato n'awa Yusufu omulambo.

⁴⁶Awo Yusufu n'agula olugoye olwa linena, n'amuggya ku musaalaba, n'amuzinga mu lugoye olwa linena, n'amuteeka mu ntaana eyali etemeddwa mu lwazi, n'ayiringisa ejjinja n'aggalawo omulyango gw'entaana.

⁴⁷Maliyamu Magudaleene ne Maliyamu nnyina Yose baaliwo era baalaba Yesu we yateekebwa.

Makko 16

¹Oluvannyuma lwa Ssabbiiti, Maliyamu Magudaleene, ne Saalome ne Maliyamu nnyina Yakobo, ne bagula ebyakaloosa eby'okusiiga omulambo gwa Yesu.

²Mu makya nnyo ku lunaku olusooka olwa wiiki ng'enjuba yaakavaayo, ne bagenda nabyo ku ntaana.

³Awo ne bagenda nga bwe beebuuzaganya gye banaggya omuntu anaabayiringisiza ejjinja eddene lityo okuliggya ku mulyango gw'entaana.

⁴Naye bwe baatuukawo, ne balaba ng'ejinja lyayiringisiddwa. Ejinja lyali ddene nnyo.

⁵Bwe baayingira mu ntaana, ne balaba omusajja omuvubuka, ng'ayambadde engoye enjeru, ng'atudde ku ludda olwa ddyo! Ne bawuniikirira nnyo!

⁶ Naye n'abagamba nti, "Temutya. Munoonya Yesu, Omunnazaaleesi eyakomererwa. Wano taliwo! Azuukidde. Mulabe, omulambo gwe we gwali gugalamiziddwa.

⁷ Kale mugende mutegheeze abayigirizwa be, ne Peetero, ebigambo bino nti, 'Yesu abakuleembeddemu okugenda e Ggaliraaya. Eyo gye mulimulabira nga bwe yabagamba.'

⁸ Awo abakazi abo ne badduka emisinde mungi okuva ku ntaana, nga batidde nnyo, nga bwe bakankana, ne batabaako n'omu gwe bategeeza olw'okutya.

Yesu Alabikira Maliyamu Magudaleene

⁹ Ku lunaku olusooka olwa wiiki, Yesu kwe yazuukirira, n'asooka okulabikira Maliyamu Magudaleene, omukazi gwe yagobako baddayimooni omusanvu.

¹⁰ Maliyamu n'agenda eri abayigirizwa, n'abasanga nga bakaaba era nga bakungubaga.

¹¹ N'ababuulira nti Yesu amulabyeko era mulamu! Naye ne batamukkiriza!

Yesu Alabikira Abayigirizwa Ababiri

¹² Oluvannyuma lw'ebyo, Yesu ng'ali mu kifaananyi kirala n'alabikira abayigirizwa babiri bwe baali nga batambula mu kkubo nga bagenda mu kyaloo.

¹³ Oluvannyuma nabo ne bagenda ne bategeeza abalala, naye nabo tebaakkirkiriza.

Yesu Alabikira Abayigirizwa be Ekkumi n'Omoo

¹⁴ Oluvannyuma Yesu n'alabikira abayigirizwa ekkumi n'omoo bwe baali nga balya. N'abanenya olw'obutakkiriza bwabwe, n'olw'obukakanyavu bw'emitima gyabwe kubanga tebakkiriza abo abaali bamulabyeko ng'amaze okuzuukira.

¹⁵ *N'abagamba nti, "Mugende mu nsi yonna mubuulire Enjiri eriabantu bona.*

¹⁶ *Abo bona abakkiriza ne babatizibwa balirokolebwa, naye abo abatakkiriza balisalirwa omusango ne gubasinga.*

¹⁷ *Era abo abakkiriza baligoba baddayimooni ku bantu mu linnya lyange, era balyogera ennimi empya.*

¹⁸ *Banaakwatanga ku misota, era bwe banaanywanga ekintu kyonna ekyobutwa tekiibakolengako kabi, era banasanga emikono gyabwe ku balwadde ne babawonya."*

Yesu Atwalibwa mu Ggulu

¹⁹ *Awo Mukama waffe Yesu bwe yamala okwogera nabo, n'atwalibwa mu ggulu n'atuula ku mukono ogwa ddyo ogwa Katonda.*

²⁰Abayigirizwa ne bagenda buli wantu nga babuulira; era Mukama n'abeeranga nabo, n'anywezanga buli kye baayogeranga mu bubaka bwabwe, ng'abakozesanga eby'amagero.

Lukka

Lukka 1

¹Abantu bangi bagezezzaako okuwandiika ebyafaayo ebyatuukirizibwa mu ffe,

²ng'abo abaasooka edda bwe baabitubuulira, nga be baali abajulirwa era abawereza b'Ekgambo okuviira ddala ku lubereberye.

³Bwe ntyo bwe mmaze okukakasiza ddala buli kintu n'obwegendereza okuva ku by'olubereberye okutuukira ddala ku byasembayo, ne ndaba nga kirungi okukuwandiikira ggwe Teefiro ow'ekitiibwa ennyo, ndyoke mbikuwandiikire nga bwe byaliraanagana.

⁴Olyoke omanyamazima g'ebyo bye wayigirizibwa.

Okulanga Okuzaalibwa kwa Yokaana Omubatiza

⁵Awo mu biro Kabaka Kerode we yafugira Obuyudaaya, waaliwo kabona erinnya lye Zaakaliya, nga wa mu kitongole kya Abiya, nga mukyala we naye yali wa mu kika kya Aloon, erinnya lye Erisabesi.

⁶Abantu abo bombi baali batuukirivu mu maaso ga Katonda, era nga batambulira mu mateeka ga Katonda gonna, ne mu biragiro bya Mukama, nga tebaliiko kya kunenyezezbwa.

⁷Bombi baali bakaddiye nnyo, era tebaalina mwana, kubanga Erisabesi yali mugumba.

⁸Awo lwali lumu, Zaakaliya bwe yali ng'ali ku mulimu gwe ogw'obwakabona mu maaso ga Katonda, kubanga kye kyali ekiseera eky'oluwalo lwe,

⁹n'alondebwra okwoteza obubaane mu yeekaalu ya Mukama, ng'emirimugy'obwakabona bwe gyabanga.

¹⁰Mu ssaawa eyo ey'okwoteza obubaane ekibiina kyonna eky'abantu baali bakunjaanidde mu luggya lwa Yeekaalu.

¹¹Awo malayika wa Mukama n'alabikira Zaakaliya, n'ayimirira ku luuyi olwa ddyo olw'ekyoto okwoterezebwra obubaane!

¹²Zaakaliya n'atyamnyo bwe yalaba malayika, entisa n'emukwata.

¹³Naye malayika n'amugamba nti, "Totya Zaakaliya! Kubanga okusaba kwo kuwliddwa, era mukazi wo Erisabesi ajja kukuzaalira omwana wabulenzi. Olimutuumma erinnya Yokaana.

¹⁴Mwembi mulisanyuka nnyo ne mujaguza. Era bangi abalibasanyukirako olw'okuzaalibwa kwe.

¹⁵Kubanga aliba mukulu mu maaso ga Katonda. Talinywa mwenge wadde ekitamiiza kyonna. Era alijuzibwa Mwoyo Mutukuvu ng'akyali mu lubuto lwa nnyina.

¹⁶Era alireetera abaana ba Isirayiri bangi okudda eri Mukama Katonda waabwe.

¹⁷Aliweerereza mu mwoyo ne mu maanyi aga nnabbi Eriya, n'akyusa emitima gy'aba kitaabwe okudda eri abaana baabwe, n'okukyusa emitima gy'abajeemu okudda eri amagezi g'abatuukirivu alyoke ateekeeteke abantu okulindirira Mukama."

¹⁸Zaakaliya n'agamba malayika nti, "Ekyo nnaakimanya ntya? Kubanga nze ndi mukadde, ne mukazi wange naye akaddiya nnyo."

¹⁹Malayika n'amugamba nti, "Nze Gabulyeri ayimirira mu maaso ga Katonda, era y'antumye okwogera naawe n'okukuleetera amawulire gano.

²⁰Naye olw'okuba nga tokkirizza bigambo byange, ojja kuziba omumwa, era togenda kuddamu kwogera okutuusa ng'ebintu ebyo bimaze okubaawo. Kubanga ebigambo byange byonna birimala kutuukirira mu kiseera kyabyo."

²¹Abantu abaali balindirira ebweru wa Yeekaalu okulaba Zaakaliya ne beewuunya nnyo ekyamulwisaayo ennyo bw'atyo.

²²Oluvannyuma ennyo bwe yavaayo, yali tasobola kwogera nabo, ne bategeera nga mu Yeekaalu afuniddeyo okwolesebwa. N'asigala ng'azibye omumwa naye ng'abategeeza mu bubonero.

²³N'abeera mu Yeekaalu okutuusa ennaku ze ez'oluwalo lwe zaggwaako n'alyoka addayo eka.

²⁴Ennaku ezo bwe zaayitawo, mukazi we Erisabesi n'aba olubuto, ne yeekwekera ebbanga lya myezi etaano.

²⁵N'agamba nti, "Mukama nga wa kisa kingi, kubanga anziggyeeko ensonyi olw'obutaba na mwana."

Okuzaalibwa kwa Yesu Kulangibwa

²⁶Awo mu mwezi ogw'omukaaga, Katonda n'atuma malayika Gabulyeri mu kibuga Nazaaleesi eky'omu Ggaliraaya

²⁷eri omuwala erinnya lye Maliyamu, nga tamanyi musajja, eyali ayogerezebwa omusajja erinnya lye Yusufu, ow'omu lulyo lwa Dawudi.

²⁸Awo Gabulyeri n'alabikira Maliyamu n'amulamusa nti, "Mirembe! Ggwe aweereddwa omukisa! Mukama ali naawe!"

²⁹Maliyamu n'aty, n'abulwa n'ekyokwogera, ng'okulamusa okwo kumutabudde, nga n'amakulu gaakwo tagategeera.

³⁰Awo malayika n'amugamba nti, "Totya, Maliyamu, kubanga olabye ekisa mu maaso ga Katonda.

³¹Kubanga, laba, olibeera olubuto, olizaala omwana wabulenzi era olimutuumma erinnya, Yesu.

³²Agenda kuba mukulu, wa kitibwa, era aliyitibwa Omwana w'Oyo Ali Waggulu Ennyo, era Mukama Katonda alimuwa entebe ey'obwakabaka eya jjajjaawe Dawudi.

³³Alifuga ennyumba ya Yakobo emirembe gyonna, era n'obwakabaka bwe tebulikoma."

³⁴Awo Maliyamu n'abuuza malayika nti, "Ekyo kiriba kitya? Kubanga simanyi musajja."

³⁵Malayika n'amuddamu nti, "Mwoyo Mutukuvu alikukkako, n'amaanyi g'Oyo Ali Waggulu Ennyo galikubuutikira, n'omwana alizaalibwa aliba mutukuvu, Omwana wa Katonda.

³⁶Laba, muganda wo Erisabesi eyayitbwanga omugumba, kati ali lubuto lwa myezi mukaaga mu bukadde bwe.

³⁷Kubanga buli kigambo kiyinzika eri Katonda."

³⁸Maliyamu n'addamu nti, "Nze ndi muweereza wa Mukama, kibe ku nze nga bw'ogambye." Malayika n'ava w'ali, n'agenda.

Maliyamu Akyalira Erisabesi

³⁹Awo mu biro ebyo, Maliyamu n'ayanguwa okugenda mu nsi ya Buyudaaya ey'ensozi, mu kibuga kyayo.

⁴⁰N'ayingira mu nnyumba ya Zaakaliya n'alamusa Erisabesi.

⁴¹Naye Maliyamu bwe yalamusa Erisabesi, omwana eyali mu lubuto lwa Erisabesi n'abuukabuuka era n'ajjuzibwa Mwoyo Mutukuvu.

⁴²Erisabesi n'alyoka ayogerera mu ddoboozi ery'omwanguka nti, "Oweereddwa omukisa, ggwe mu bakazi, era n'omwana ali mu lubuto lwo aweereddwa omukisa.

⁴³Nga nfunye ekitiibwa kinene ggwe nnyina wa Mukama wange okujja okunkyalira!

⁴⁴Kubanga bw'oyingidde n'onnamusa, omwana ali mu lubuto lwange oluwalidde ku ddoboozi lyo ne yekyusakyusa olw'essanyu!

⁴⁵Oweereddwa omukisa bw'okkirizza nti ebintu ebyo Mukama bya kwogeddeko birituukirizibwa."

Oluyimba Iwa Maliyamu

46 Maliyamu n'agamba nti,

47 “Emmeeme yange etendereza Mukama. N'omwoyo gwange gusanyukidde Katonda omulokozi wange,

48 Kubanga alabye obuwombeefu bw'omuweereza we. Kubanga laba, okuva kaakano, ab'emirembe gyonna banaampitanga eyaweebwa omukisa.

49 Kubanga Owaamaanyi ankoledde ebikulu; N'erinnya lye ttukuvu.

50 N'okusaasira kwe kwa mirembe na mirembe eri abo abamutya.

51 Akoze eby'amaanyi n'omukono gwe. Asaasaanyizza ab'emitima egy'amalala.

52 Awanudde abafuzi ku ntebe zaabwe ez'obwakabaka n'agulumiza abawombeefu.

53 Abali mu kwetaaga abakkusizza ebirungi. Naye abagagga n'abagoba nga tabawaddeeyo kantu.

54 Adduukiridde omuweereza we Isirayiri, n'ajjukira okusaasira,

55 nga bwe yayogera ne bajjajjaffe, eri Ibulayimu n'ezzadde lye emirembe gyonna.”

56 Maliyamu n'amala ewa Erisabesi muganda we, ng'emyezi esatu, n'alyoka addayo ewuwe.

Okuzaalibwa kwa Yokaana

57 Awo ekiseera kya Erisabesi eky'okuzaala ne kituuka, n'azaala omwana wabulenzi.

58 Baliraanwa ba Erisabesi n'ab'ekika kye ne bawulira nga Mukama bw'amulaze ekisa, ne basanyukira wamu naye.

59 Awo omwana bwe yaweza ennaku omunaana, ne bajja okumukomola, bona nga balowooza nti aija kutuumibwa erinnya lya kitaawe Zaakaliya.

60 Naye Erisabesi n'abagamba nti, “Nedda, aija kutuumibwa Yokaana.”

61 Ne bamuwakanya nga bagamba nti, “Mu kika kyo kyonna tetuwulirangayo yatuumibwa linnya eryo.”

62 Ne babuuza kitaawe w'omwana erinnya ly'ayagala atuumibwe.

63 N'abasaba eky'okuwandiikako, n'awandiikako nti, “Erinnya lye ye Yokaana!” Bonna ne beewuunya nnyo!

64 Amangwago akamwa ka Zaakaliya ne kagguka, n'olulimi lwe ne lusumulukuka, n'atandika okwogera n'okutendereza Katonda.

⁶⁵abantu bona ab'omu kitundu ekyo ne batya nnyo, era ebigambo ebyo ne bibuna mu nsi yonna ey'e Buyudaaya ey'ensozi.

⁶⁶Buli eyawulira ebigambo ebyo n'abirowoozaako nnyo mu mutima gwe, ne yeebuuza nti, "Naye omwana ono bw'alikula aliba atya?" Kubanga awatali kubuusabuusa, omukono gwa Mukama gwali wamu naye.

Oloyimba Iwa Zaakaliya

⁶⁷Awo Zaakaliya kitaawe, n'ajjula Mwoyo Mutukuvu n'awa obunnabbi nti,

⁶⁸"Atenderezebwé Mukama Katonda wa Isirayiri, kubanga akyalidde abantu be, era abanunudde.

⁶⁹Yatuyimusiriza obuyinza obw'obulokozi, mu nnyumba y'omuddu we Dawudi.

⁷⁰Nga bwe yasuubiriza mu bigambo bya bannabbi be abatukuvu ab'edda ennyo,

⁷¹Okulokolebwa mu balabe baffe, n'okuva mu mukono gw'abo bona abatukyawa,

⁷²okulaga bajajjaffe ekisa, n'ajjukira n'endagaano ye entukuvu,

⁷³ekirayiro kye yalayirira jjajjaffe Ibulayimu,

⁷⁴okukituukiriza, n'okulokolebwa okuva mu mukono gw'abalabe baffe awatali kutya, tulyoke tuweereze mu maaso ge,

⁷⁵mu butukuvu ne mu butuukirivu ennaku zonna ez'obulamu bwaffe.

⁷⁶"Naawe, mwana wange, olityibwa nnabbi w'Oyo Ali Waggulu Ennyo; kubanga gw'olikulembera Mukama okumuteekerateekera amakubo ge.

⁷⁷Okumanyisa abantu be obulokozi, obw'okusonyiyibwa ebibi byabwe.

⁷⁸Byonna birituukirira olw'ekisa kya Katonda waffe ekingi. Emmambya esala eritukyalira okuva mu ggulu,

⁷⁹okwakira abo abatudde mu kizikiza ne mu kisiikirize eky'okufa, okuluñjamya ebigere byaffe mu kkubo ery'emirembe."

⁸⁰Omwana n'akula n'ayongerwako amaanyi mu mwoyo, n'abeera mu malungu okutuusa ku lunaku lwe yayolesebwa eri Isirayiri.

Lukka 2

Okuzaalibwa kwa Yesu

¹Awo olwatuuka mu biseera ebyo, Kayisaali Agusito n'ayisa etteeka abantu bona beewandiisa.

²Okubala kuno kwe kwasooka okubaawo ku mulembe gwa Kuleniyo nga ye gavana w'Obusuuli.

³Bonna ne bagenda okwewandiisa, buli muntu mu kibuga ky'ewaabwe.

⁴Awo Yusufu n'ava e Nazaaleesi eky'e Ggaliraaya, n'agenda mu kibuga kya Dawudi ekiyitibwa Besirekemu eky'e Buyudaaya, kubanga yali wa mu kika kya Dawudi,

⁵yeewandiise ne Maliyamu eyali olubuto, oyo gwe yali ayogereza.

⁶Naye bwe baali bali eyo ekiseera kya Maliyamu eky'okuzaala ne kituuka.

⁷N'azaala omwana we omubereberye omulenzi, n'amubikka mu bugoye, n'amuzazika mu lutiba ente mwe ziriira, kubanga tebaafuna kifo mu nnyumba y'abagenyi.

⁸Mu kiro ekkyo waaliwo abasumba abaali mu kitundu ekkyo kye kimu ku ttale nga bakuumma endiga zaabwe.

⁹Awo malayika wa Mukama n'abalabikira, ne waakaayakana n'ekitiibwa kya Mukama, ne batya nnyo.

¹⁰Malayika n'abagumya nti, "Temutya, kubanga mbaleetedde amawulire amalungi ag'essanyu eringi, era nga ga bantu bonna.

¹¹Kubanga Omulokozi, ye Kristo Mukama waffe azaaliddwa leero mu kibuga kya Dawudi.

¹²Ku kino kwe munaamutegeerera: Mujja kulaba omwana omuwere, ng'abikkiddwa mu ngoye, ng'azazikiddwa mu lutiba lw'ente."

¹³Amangwago eggye lya bamalayika ab'omu ggulu ne beegatta ne malayika oyo ne batendereza Katonda nga bagamba nti,

¹⁴"Ekitiibwa kibe eri Katonda Ali Waggulu ennyo. N'emirembe gibe mu nsi eriabantu Katonda b'asiima."

¹⁵Awo bamalayika bwe baamala okuddayo mu ggulu, abasumba ne bateesa nti, "Tugende e Besirekemu tulabe kino ekibaddewo, Mukama ky'atutegeezza."

¹⁶Ne bayanguwa ne bagenda, ne balaba Maliyamu ne Yusufu, n'omwana omuwere ng'azazikiddwa mu lutiba lw'ente.

¹⁷Awo abasumba ne bategeeza bye baalabye, n'ebya bategeezeddwa ebikwata ku mwana oyo.

¹⁸Bonna abaawulira ebigambo by'abasumba ne beewuunya nnyo.

¹⁹Naye Maliyamu n'akuumanga ebigambo ebyo mu mutima gwe era ng'abirowoozaako nnyo.

²⁰Awo abasumba ne baddayo gye balundira ebisibo byabwe, nga bagulumiza era nga batendereza Katonda, olw'ebyo byonna bye baawulira era ne bye baalaba nga bwe baali bategeezeddwa.

Yesu Atwalibwa mu Yeekaalu

²¹Olunaku olw'omunaana olw'okukomolerwako bwe lwatuuka, n'atuumibwa erinnya YESU, malayika lye yayogera nga Yesu tannaba kuba mu lubuto lwa nnyina.

²²Awo ekiseera bwe kyatuuka Maliyamu okugenda mu Yeekaalu atukuzibwe, ng'amateeka ga Musa bwe galagira ne batwala Yesu e Yerusaalemi okumuwaayo eri Mukama.

²³Kubanga mu mateeka ago, Katonda yalagira nti, "Omwana omubereberye bw'anaabanga omulenzi, anaaweebwangayo eri Mukama."

²⁴Era mu kiseera kye kimu bakadde ba Yesu ne bawaayo ssaddaaka amateeka nga bwe galagira okuwaayo amayiba abiri oba enjiibwa bbiri.

²⁵Ku lunaku olwo, waaliwo omusajja erinnya lye Simyoni, eyabeeranga mu Yerusaalemi, nga mutuukirivu, ng'atyia Katonda, era ng'ajjudde Mwoyo Mutukuvu, ng'alindirira okusanyusibwa kwa Isirayiri.

²⁶Kubanga yali abikkuliddwa Mwoyo Mutukuvu nti tagenda kufa nga tannalaba ku Kristo, Omulokozi.

²⁷Mwoyo Mutukuvu n'amuluŋŋamya okujja mu Yeekaalu. Maliyamu ne Yusufu bwe baaleeta Omwana Yesu okumuwaayo eri Mukama ng'amateeka bwe galagira, ne Simyoni naye yaliwo.

²⁸Simyoni n'ajja n'asitula Omwana mu mikono gye, n'atendereza Katonda ng'agamba nti,

²⁹"Mukama wange, kaakano osiibule omuweereza wo mirembe, ng'ekigambo kyo bwe kigamba.

³⁰Kubanga amaaso gange galabye Obulokozi bwo,

³¹bwe wateekateeka mu maaso g'abantu bonne,

³²okuba Omusana ogw'okwakira amawanga. N'okuleetera abantu bo Abayisirayiri ekitiibwa!"

³³Kitaawe w'omwana ne nnyina ne beewuunya ebigambo ebyayogerwa ku Yesu.

³⁴Awo Simyoni n'abasabira omukisa. N'alyoka n'agamba Maliyamu nti, "Omwana ono bangi mu Isirayiri tebagenda kumukkiriza, era alireetera bangi okugwa n'abalala ne bayimusibwa.

³⁵Era naawe ennaku eri ng'ekitala erikufumita omutima, n'ebirowoozo by'omu mitima gy'abantu birimanyibwa."

³⁶Waaliwo nnabbi omukazi, ayitibwa Ana, muwala wa Fanweri, ow'omu kika kya Aseri, era nga mukadde nnyo, eyafumbirwa nga muwala muto n'amala ne bba emyaka musanvu gyokka, bba n'afa,

³⁷n'asigala nga nnamwandumu. Mu kiseera kino yali yaakamala emyaka kinaana mu ena, era teyavanga mu Yeekaalu ng'asiiba n'okwegayiriranga Katonda emisana n'ekiro.

³⁸Awo Ana mu kiseera ekyo yali ayimiridde okumpi ne Maliyamu ne Yusufu, naye n'atandika okutendereza Katonda ng'amwogerako eri abo bona abaali balindirira okununulibwa kwa Yerusaalemi.

³⁹Awo bakadde ba Yesu bwe baamala okutuukiriza byonna ng'amateeka ga Mukama bwe galagira, ne baddayo e Nazaaleesi eky'omu Ggaliraaya.

⁴⁰Omwana n'akula, n'aba w'amaanyi, n'ajjuzibwa amagezi n'ekisa kya Katonda kyali ku ye.

⁴¹Bakadde ba Yesu buli mwaka bagendanga mu Yerusaalemi ku Mbaga y'Okuyitako.

⁴²Awo Yesu bwe yaweza emyaka kkumi n'ebiri eg'yobukulu n'ayambuka e Yerusaalemi ne bakadde be ku mbaga, nga empisa yaabwe bwe yali.

⁴³Awo embaga ng'ewedde, ne bakyusa okuddayo ewaabwe, naye omulenzi Yesu n'asigala mu Yerusaalemi, naye bazadde be ne batakimanya.

⁴⁴Kubanga baalowooza nti ali ne bannaabwe mu kibiina ekirala, ekiro ekyo bwe bataamulaba, ne bamunoonya mu kibiina omwali baganda baabwe ne mikwano gyabwe.

⁴⁵Bwe bataamulaba kwe kuddayo e Yerusaalemi nga bamunoonya.

⁴⁶Awo nga baakamunoonyeza ennaku ssatu, ne bamusanga ng'atudde mu Yeekaalu n'abannyonnyozi b'amateeka ng'abawuliriza awamu n'okubabuuza ebibuuzo.

⁴⁷Bonna abaali bamuwuliriza ne beewuunya nnyo olw'amagezi ge n'okuddamu kwe.

⁴⁸Awo bazadde be bwe baamulaba ne beewuunya nnyo, nnyina n'amugamba nti, "Mwana waffe otukoze ki kino? Kitaawo nange tweraliikiridde nnyo nga tukunoonya!"

⁴⁹Yesu n'abaddamu nti, "Mubadde munnoonyeza ki? Temwategedde nga kijjwanidde okukola ebintu bya Kitange?"

50 Naye ne batategeera bigambo ebyo bye yabagamba.

51 N'asituka n'agenda nabo e Nazaaleesi, n'abagonderanga; kyokka nnyina ebigambo ebyo byonna n'abikuuma mu mutima gwe.

52 Awo Yesu n'akula mu mubiri, mu magezi, era n'alaba ekisa mu maaso ga Katonda ne mu maaso g'abantu.

Lukka 3

Yokaana Omubatiza alongoosa ekkubo

1 Awo mu mwaka ogw'ekkumi n'ettaano ogw'okufuga kwa Kayisaali Tiberiyo, Pontiyo Piraato bwe yali nga ye gavana wa Buyudaaya, Kerode nga y'afuga Ggaliraaya, muganda we Firipo nga y'afuga Italiya ne Tirakoniti, ne Lusaniya nga y'afuga Abireene,

2 Ana ne Kayaafa nga be Bakabona Abasinga Obukulu, Yokaana, mutabani wa Zaakaliya ng'ali mu ddungu, n'afuna obubaka obuva eri Katonda.

3 Yokaana n'atambulanga ng'agenda abuulira mu bitundu ebyetoolodde Yoludaani, ng'ategeeza abantu obubaka obw'okubatizibwa obw'okwenenya olw'okusonyiyibwa ebibi,

4 nga bwe kyawandiikibwa mu kitabo eky'ebigambo bya nnabbi Isaaya nti, "Eddoboozi ly'oyo ayogerera mu ddungu nti, Mulongoose ekkubo lya Mukama, Muluŋŋamye amakubo ge;

5 Buli kiwonvu kirijuzibwa, na buli lusozi n'akasozi birisendebwa, na buli ekyakyama kirigololwa, n'obukubo obulimu obugulumugulumu bulifuuka enguudo ez'omuseetwe.

6 Abalina omubiri bonne baliraba obulokozi bwa Katonda."

7 Kyeyava agamba abantu abajjanga gy'ali okubatizibwa nti, "Mmwe abaana b'emisota, ani eyabalabula okudduka obusungu obugenda okujja?

8 Kale mubale ebibala ebiraga nga mwenenyezza, so temwogera munda zammwe nti tulina jjajjaffe Ibulayimu. Kubanga mbagamba nti Katonda asobola, mu mayinja gano, okuggyiramu Ibulayimu abazzukulu.

9 Ne kaakano embazzi eteekeddwa ku kikolo ky'emiti. Noolwekyo buli muti ogutabala bibala birungi gujja kutemebwawo gusuulibwe mu muliro."

10 Ekibiina ne kimumubuuza nti, "Kale tukole ki?"

11 Yokaana n'abaddamu ng'agamba nti, "Alina ekkooti ebbiri, emu agigabire atalina, n'oyo alina emmere aweeko oyo atalina kyakulya."

12 Awo abasolooza b'omusolo nabo, ne bajja babatizibwe. Ne babuuza Yokaana nti, "Omuyigiriza tukole ki?"

¹³ Yokaana n'abaddamu nti, "Temusoloozanga muwendo gusukka ku ogwo ogwalagibwa."

¹⁴ Abaserikale nabo ne babuuza Yokaana nti, "Ate ffe, tukole tutya?" Yokaana n'abagamba nti, "Temuggyangako bantu nsimbi zaabwe. So temubawaayirizanga, n'empeera ebaweebwa ebamalenga."

¹⁵ Abantu baali balindirira nga basuubira, era nga buli muntu yeebuuza obanga Yokaana ye Kristo.

¹⁶ Yokaana n'addamu bona ng'agamba nti, "Nze mbabatiza na mazzi, naye waliwo ajja, alina obuyinza okunsinga, n'okusaanira sisaanira na kusumulula lukoba lwa ngatto ze. Oyo alibabatiza n'omuliro ne Mwoyo Mutukuvu;

¹⁷ n'olugali luli mu mukono gwe okulongoosa egguliro lye n'okukunjaanyiza enjaano mu tterekero lye, naye ebulusunku alibyokya n'omuliro ogutazikira."

¹⁸ Yokaana n'abuulirira abantu ebigambo bingi ebirala, nga bw'ababuulira Enjiri.

¹⁹ Naye Yokaana bwe yanensa Kerode, omufuzi, olw'okutwala Kerodiya eyali muka muganda we, n'olw'ebibi ebirala Kerode bye yali akoze,

²⁰ ate ku ebyo byonna Kerode n'ayongerako na kino: n'akwata Yokaana n'amuggalira mu kkomera.

Okubatizibwa kwa Yesu

²¹ Olunaku lumu, abantu bona abaaliwo nga babatizibwa, ne Yesu n'abatizibwa. Yesu n'asaba, eggulu ne libikkuka,

²² Mwoyo Mutukuvu n'amukkako mu kifaananyi eky'ejjiba. Eddoboozi ne liva mu ggulu ne ligamba nti, "Ggwe Mwana wange omwagalwa gwe nsanyukira ennyo."

Olulyo Iwa Yesu

²³ Yesu yali awezzesa emyaka ng'amakumi asatu bwe yatandika omulimu gwe. Yesu nga bwe kyalowoozebw, yali mwana wa Yusufu: ne Yusufu nga mwana wa Eri,

²⁴ Eri nga mwana wa Mattati, ne Mattati nga mwana wa Leevi, ne Leevi nga mwana wa Mereki, ne Mereki nga mwana wa Yanayi, ne Yanayi nga mwana wa Yusufu,

²⁵ ne Yusufu nga mwana wa Mattasiya, ne Mattasiya nga mwana wa Amosi, ne Amosi nga mwana wa Nakkumu, ne Nakkumu nga mwana wa Esuli, ne Esuli nga mwana wa Naggayi,

²⁶ne Naggayi nga mwana wa Maasi, ne Maasi nga mwana wa Mattasiya, ne Mattasiya nga mwana wa Semeyini, ne Semeyini nga mwana wa Yoseki, ne Yoseki nga mwana wa Yoda,

²⁷ne Yoda nga mwana wa Yokanaani, ne Yokanaani nga mwana wa Lesa, ne Lesa nga mwana wa Zerubbaberi, ne Zerubbaberi nga mwana wa Seyalutyeri, ne Seyalutyeri nga mwana wa Neeri,

²⁸ne Neeri nga mwana wa Merek, ne Merek nga mwana wa Addi, ne Addi nga mwana wa Kosamu, ne Kosamu nga mwana wa Erumadamu, ne Erumadamu nga mwana wa Eri,

²⁹ne Eri nga mwana wa Yoswa, ne Yoswa nga mwana wa Eryeza, ne Eryeza nga mwana wa Yolimu, ne Yolimu nga mwana wa Mattati, ne Mattati nga mwana wa Leevi,

³⁰ne Leevi nga mwana wa Simyoni, ne Simyoni nga mwana wa Yuda, ne Yuda nga mwana wa Yusufu, ne Yusufu nga mwana wa Yonamu, ne Yonamu nga mwana wa Eriyakimu,

³¹ne Eriyakimu nga mwana wa Mereya, ne Mereya nga mwana wa Menna, ne Menna nga mwana wa Mattasa, ne Mattasa nga mwana wa Nasani, ne Nasani nga mwana wa Dawudi,

³²ne Dawudi nga mwana wa Yese, ne Yese nga mwana wa Obedi, ne Obedi nga mwana wa Bowaazi, ne Bowaazi nga mwana wa Salumooni, ne Salumooni nga mwana wa Nakusoni,

³³ne Nakusoni nga mwana wa Amminadaabu, ne Aminadaabu nga mwana wa Aluni, ne Aluni nga mwana wa Kezulooni, ne Kezulooni nga mwana wa Pereezi, ne Pereezi nga mwana wa Yuda,

³⁴ne Yuda nga mwana wa Yakobo, ne Yakobo nga mwana wa Isaaka, ne Isaaka nga mwana wa Ibulayimu, ne Ibulayimu nga mwana wa Teera, ne Teera nga mwana wa Nakoli,

³⁵ne Nakoli nga mwana wa Serugi, ne Serugi nga mwana wa Lewu, ne Lewu nga mwana wa Peregi, ne Peregi nga mwana wa Eberi, ne Eberi nga mwana wa Seera,

³⁶ne Sera nga mwana wa Kayinaani, ne Kayinaani nga mwana wa Alupakusaadi, ne Alupakusaadi nga mwana wa Seemu, ne Seemu nga mwana wa Nuuwa, ne Nuuwa nga mwana wa Lameka,

³⁷ne Lameka nga mwana wa Mesuseera, ne Mesuseera nga mwana wa Enoki, ne Enoki nga mwana wa Yaledi, ne Yaledi nga mwana wa Makalaleri, ne Makalaleri nga mwana wa Kayinaani,

³⁸ne Kayinaani nga mwana wa Enosi, ne Enosi nga mwana wa Seezi, ne Seezi nga mwana wa Adamu, ne Adamu nga mwana wa Katonda.

Lukka 4

Okukemebwa kwa Yesu

¹Awo Yesu, ng'ajjudde Mwoyo Mutukuvu, n'avaayo ku mugga Yoludaani, Omwoyo n'amutwala mu ddungu,

²n'akemebwa Setaani okumala ennaku amakumi ana. Ebbanga eryo lyonna yalimala nga talidde ku mmere, bwe lyaggwaako enjala n'emuluma.

³Setaani n'agamba Yesu nti, “Obanga oli, Mwana wa Katonda, gamba ejinja lino lifuuke emmere.”

⁴Naye Yesu n'amuddamu nti, “Kyawandiikibwa nti, ‘Omuntu taabenga mulamu lwa mmere yokka.’”

⁵Awo Setaani n'amulinnyisa waggulu, mu kaseera katono n'amulaga obwakabaka bwonna obw'omu nsi.

⁶Setaani n'amugamba nti, “Nzija kukuwa obuyinza ku obwo bwonna n'ekitiibwa kyabwo, kubanga bwonna bwa mpeebwa era nnyinza okubuwa omuntu yenna gwe njagala.

⁷Bw'onoofukamira n'onsinza byonna ebyo bijja kuba bibyo.”

⁸Naye Yesu n'addamu nti, “Kyawandiikibwa nti, ‘Osinzanga Mukama Katonda wo, era gw'oweerezanga yekka.’”

⁹Ate Setaani n'amutwala mu Yerusaalemi, n'amulinnyisa waggulu ku kasolya ka Yeekaalu awasingira ddala obutumbiivu, n'amugamba nti, “Obanga oli Mwana wa Katonda, buuka weesuule wansi.

¹⁰Kubanga kyawandiikibwa nti, “‘Katonda aliragira bamalayika be bakukuume.

¹¹Era balikuwanirira mu mikono gyabwe, oleme okwerumya nga weekonye ekigere kyo ku jjinja.’”

¹²Yesu n'addamu nti, “Kyawandiikibwa nti, ‘Tokemanga Mukama Katonda wo.’”

¹³Awo Setaani bwe yamaliriza okukema Yesu mu buli ngeri yonna, n'amuviira okutuusa ekiseera ekirala.

Yesu Atandika Omulimu gwe mu Ggaliraaya

¹⁴Awo Yesu n'akomawo mu Ggaliraaya ng'ajjudde amaanyi aga Mwoyo Mutukuvu, n'ayogerwako mu bitundu byonna ebyetoolodde mu byalo.

¹⁵N'ayigirizanga mu makuŋjaaniro gaabwe, era bona ne bamutendereza.

¹⁶ Bwe yatuuka e Nazaaleesi, ekibuga mwe yakulira, n'agenda mu kkuñjaaniro ku Ssabbiiti, nga bwe yali empisa ye. N'ayimuka okusoma.

¹⁷ Ne bamuwa ekitabo kya nnabbi Isaaya, n'abikkula omuzingo gw'empapula n'alaba awagamba nti,

¹⁸ "Omwoyo wa Mukama ali ku nze. Anfuseeko amafuta okubuulira abaavu Enjiri. Antumye okubuulira abasibe okuteebwa, n'abazibe b'amaaso okuzibulwa amaaso balabe, n'abanyigirizibwa okufuna eddembe,

¹⁹ n'okulangirira ekiseera kya Mukama eky'okulagiramu ekisa kye."

²⁰ N'azingako omuzingo n'aguddiza omuweereza, n'atuula. Abantu bona mu kkuñjaaniro ne bamusimba amaaso.

²¹ N'atandika okubategeeza nti, "Olwa leero, Ebyawandiikibwa bino bye muwulidde bituukiridde!"

²² Bonna abaaliwo ne bamutenda nga beewuunya ebigambo bye ebyekisa ebyava mu kamwa ke, nga bwe beebruza nti, "Ono si ye mutabani wa Yusufu?"

²³ Yesu n'abagamba nti, "Ddala ddala muliyinza n'okuñjamba mu lugero luno nti, 'Omusawo, weewonye,' nga mugamba nti, 'Buli kye twawulira mu Kaperunawumu, kikolere na wano mu kyalokyo.'"

²⁴ Naye n'abagamba nti, "Ddala ddala mbagamba nti, Tewali nnabbi ayanirizibwa mu kyalokyo'ewaabwe!

²⁵ Naye mazima mbagamba nti, waaliwo bannamwandu bangi mu biseera bya nnabbi Eriya, mu Isirayiri enkuba bwe yamala emyaka esatu n'ekitundu nga tetonnya, n'enjala n'egwa mu nsi yonna.

²⁶ Naye nnabbi Eriya teyatumbwa eri omu ku bannamwandu abo, wabula yatumibwa eri nnamwandu ow'e Zalefaasi mu Sidoni.

²⁷ Ne mu biseera bya nnabbi Erisa waaliwo abagenge bangi mu Isirayiri, naye tewali n'omu ku bo eyalongoosebwa okuggyako Naamani Omusuuli."

²⁸ Bonna abaali mu kujñaaniro ne bakwatibwa obusungu olw'ebigambo ebyo,

²⁹ ne basituka, ne bamusindiikiriza okumutuusa ebweru w'ekibuga ku bbangabanga ly'olusozi ekibuga kyabwe kwe kyazimbibwa, bamusindike agwe eri wansi.

³⁰ Naye n'abayitamu wakati ne yeetambulira.

Yesu Agoba Dayimooni

³¹ Awo Yesu n'alaga e Kaperunawumu, ekibuga eky'e Ggaliraaya n'abayigirizanga ku nnaku eza Ssabbiiti.

³²Ne beewuunya nnyo okuyigiriza kwe. Kubanga yayogeranga nga nnannyini buyinza.

³³Mu kkuñjaaniro, mwalimu omusajja eyaliko ddayimooni n'atandika okuwowoggana nti,

³⁴“Woowe! Otulanga ki, ggwe Yesu ow'e Nazaaleesi? Ozze kutuzikiriza? Nze nkumanyi, ggwe mutukuvu wa Katonda.”

³⁵Yesu n'amuboggolera ng'agamba nti, “Sirika! Muveeko!” Awo dayimooni n'asuula eri omusajja wansi wakati mu bantu, n'amuvaako nga tamulumizza.

³⁶Buli muntu n'atya nnyo nga bwe beebuuzaganya nti, “Kigambo ki kino? Kubanga alagira n'obuyinza n'amaanyi emyoyo emibi ne giva mu muntu, ekireetera ne dayimooni okumugondera.”

³⁷Amawulire agakwata ku Yesu ne gabuna mu kitundu ekyo kyonna ekyetoolodde awo.

Yesu Awonya Abalwadde Bangi

³⁸Awo Yesu bwe yava mu kkuñjaaniro, n'alaga mu maka ga Simooni. Yasanga nnyina mukazi wa Simooni omusujja gumuluma nnyo, abantu ne bamwegayiririra ku lulwe.

³⁹Yesu n'ayimirira okumpi n'omulwadde we yali, n'alagira omusujja gumuwoneko, amangwago omulwadde n'awona, n'asituka n'abaweeereza!

⁴⁰Obudde bwe bwali buwungeera, abantu bona abaalina abalwadde ab'endwadde eza buli ngeri, ne babaleeta eri Yesu, n'abassaako emikono buli omu n'amuwonya.

⁴¹Abamu baaliko baddayimooni, Yesu n'abalagira ne bava ku balwadde nga bwe baleekaana nti, “Ggwe Mwana wa Katonda.” Naye kubanga baamumanya nga ye Kristo, n'atabaganya kukyoyerako.

⁴²Bwe bwakya Yesu n'alaga mu kifo etali bantu. Ekibiina ky'abantu ne bamunoonya, okutuusa lwe baamulaba ne balaga gy'ali ne bamwegayirira aleme kubavaako.

⁴³Naye n'abaddamu nti, “Kinsaanira okubuulira Enjiri y'obwakabaka bwa Katonda ne mu bifo ebirala kubanga eyo y'ensonga kyenava ntumibwa.”

⁴⁴Yesu ne yeeyongera okubuulira mu makuñjaaniro gaabwe mu Buyudaaya.

Lukka 5

Abayigirizwa Abaasooka

¹ Awo Yesu yali ayimiridde ku lubalama lw'ennyanja y'e Genesaleeti ng'ayigiriza, ebibiina nga bamunyigiriza nga bawuliriza ekigambo kya Katonda,

² n'alengera amaato abiri ameereere nga gali kumpi n'olukalu, nga bannannyinigo abavubi, bagalese awo, nga bayoza obutimba bwabwe.

³ Yesu n'alinnya mu lyato erimu eryali erya Simooni, n'amusaba alisembezeeko katono mu nnyanja, n'alituulamu, asinziire omwo okuyigiriza ebibiina.

⁴ Bwe yamala okuyigiriza n'agamba Simooni nti, "Kale kaakano sembeza eryato lyo ebuziba, mu mazzi amangi, musuule obutimba bwammwe mu nnyanja, mujja kukwasa ebyennyanja bingi!"

⁵ Simooni n'addamu nti, "Mukama waffe, twateganye dda ekiro kyonna, naye ne tutakwasa kantu. Naye ggwe nga bw'otugambye, nzija kusuula obutimba."

⁶ Awo bwe baakola bwe batyo, obutimba bwabwe bwajjula ebyennyanja, ne butandika n'okukutuka.

⁷ Ne bawenya ku bannaabwe abaali mu lyato liri eddala bajje babayambe, ne bajja, amaato gombi ne gajjula ebyennyanja, ne gajjula n'okusaanawo.

⁸ Awo Simooni Peetero bwe yakiraba, n'afukamira mu maaso ga Yesu n'amugamba nti, "Mukama wange, nkwegayiride ndeka, kubanga ndi mwonoonyi nnyo."

⁹ Kubanga obungi bw'ebunnyanja bye baakwasa bwa muwuniikirizza nnyo awamu ne banne bwe baavubanga,

¹⁰ Yakobo ne Yokaana abaana ba Zebbedaayo. Yesu n'amuddamu nti, "Totya! Okuva kaakano ojjanga kuvuba myoyo gya bantu."

¹¹ Amaato gaabwe olwagoba ku lubalama ne baleka awo byonna ne bagenda naye.

Yesu Awonya Omusajja Omugenge

¹² Mu kibuga Yesu mwe yali akyadde mwalimu omusajja eyali alwadde ebigenge. Bwe yalaba Yesu n'avuunama mu maaso ge, n'amwegayirira nti, "Mukama wange, bw'oba ng'oyagala, oyinza okunnongoosa."

¹³ Yesu n'agolola omukono gwe n'amukwatako, ng'agamba nti, "Njagala, longooka." Amangwago ebigenge by'omusajja ne bimuwonako.

¹⁴ Yesu n'alagira omusajja nti, "Tobaako muntu n'omu gw'ogamba, naye genda weeyanjule eri kabona oweeyo ekiweebwayo olw'okulongosebwa nga Musa bwe yalagira, kibeere obujulirwa gye bali."

¹⁵ Naye ne yeeyongera bweyongezi okubunya ettutumu ly'obuyinza bwa Yesu era ebibiina binene ne bikuññaana okumuwlira n'okuwonyezebwa endwadde zaabwe.

¹⁶ Naye bwe yasalangawo akabanga, ne yeeyawula n'alagako mu bifo eteri bantu, okusaba.

Yesu Awonya Akoozimbye

¹⁷ Lwali lumu Yesu yali ayigiriza abakulembeze b'Abayudaaya, n'abannyonnyozi b'amateeka nabo nga batudde awo, abaali bavudde mu buli kyalo eky'e Ggaliraaya ne Buyudaaya era n'e Yerusaalemi. Amaanyi ga Mukama gaali ku ye okuwonya.

¹⁸ Awo abasaja ne bajja nga basitudde omusajja ku katanda eyali akoozimbye. Ne bagezaako okumuyingiza okumuleeta Yesu we yali.

¹⁹ Naye bwe bataasobola kumuyingiza olw'ekibiina erinene ne balinnya waggulu ku kasolya, ne baggyawo ku mategula ne bayisaamu omulwadde ne bamussa ng'agalamidde ku katanda ke ne baamutereereza ddala mu maaso ga Yesu.

²⁰ Awo Yesu bwe yalaba okukkiriza kwabwe, n'agamba omusajja akoozimbye nti, "Omusajja, ebibi byo bikusonyiyiddwa."

²¹ Abafalisaayo n'abannyonnyozi b'amateeka ne beebuuzaganya nti, "Ono ye ani avvoola! Ani ayinza okusonyiwa ebibi wabula Katonda yekka?"

²² Nate Yesu bwe yamanya ebirowoozo byabwe, n'ababuuza nti, "Lwaki mulowooza bwe mutyo mu mutima gwammwe?"

²³ Ekyangu kye kiri wa? Okwogera nti ebibi byo bikusonyiyiddwa oba nti situka otambule?

²⁴ Naye mulyoke mutegeere nti, Omwana w'Omuntu alina obuyinza ku nsi okusonyiwa ebibi." N'agamba eyali akozimbye nti, "Situka, ositule akatanda ko, weddireyo ewuwo."

²⁵ Amangwago omusajja n'asituka n'asitula akatanda kwe yali agalamidde, n'addayo ewuwe ng'agulumiza Katonda.

²⁶ Abantu bona ne bajjula encukwe. Ne bagulumiza Katonda nga bajjudde entiisa nga boogera nti, "Tulabye ebyewuunyisa leero."

Yesu Ayita Leevi

²⁷ Oluvannyuma lw'ebyo Yesu n'avaayo n'alaba omusolooza w'omusolo, erinnya lye Leevi ng'atudde omusolo we gukuññaanyizibwa, n'amugamba nti, "Ngoberera."

²⁸ Leevi n'aleka awo byonna, n'asitukiramu n'amugoberera.

²⁹ Awo Leevi n'afumbira Yesu ekijjulo eky'amaanyi mu maka ge. Waaliwo abasolooza banne ab'omusolo bangi, n'abantu abalala bangi, abaali ku kijjulo ekijo.

³⁰ Naye Abafalisaayo n'abannyonnyozi b'amateeka ne beemulugunya, olw'abayigirizwa be nga bagamba nti, "Lwaki mulya era ne munywa n'abasolooza b'omusolo n'abalina ebibi?"

³¹ Yesu n'abaanukula nti, "Abalwadde be beetaaga omusawo, so si abo abatali balwadde."

³² Sajja kuyita batuukirivu wabula abalina ebibi okwenenya."

³³ Kyokka ne bamugamba nti, "Abayigirizwa ba Yokaana batera okusiiba n'okusaba. N'abayigirizwa b'Abafalisaayo nabo bwe batyo. Naye ababo balya ne banywa."

³⁴ Naye Yesu n'abagamba nti, "Abagenyi bayinza okusiiba ng'awasizza omugole akyali nabo?

³⁵ Naye ekiseera kijja, awasizza omugole ng'abaggiddwako olwo ne balyoka basiiba."

³⁶ Awo Yesu n'abagerera olugero nti, "Tewali ayuza kiwero mu lugoye oluggya alyoke azibise ekituli mu lugoye olukadde. Bw'akikola, ekiwero ekiggya kiyuza olukadde, n'ekiwero ekiggya tekijja kugendera wamu na lugoye olukadde.

³⁷ Era tewali ateeka wayini omusu mu nsawo enkadde ez'amaliba ga wayini, kubanga wayini omusu aija kuziyuza ayiike.

³⁸ Naye wayini omusu ateekebwa mu nsawo za maliba empya.

³⁹ Era tewali anywa ku wayini omukadde ate ayagala okunywa ku wayini omusu. Kubanga agamba nti, 'Omukadde ye asinga omusu.'

Lukka 6

Yesu ye Mukama wa Ssabbiiti

¹ Awo ku lunaku lumu olwa Ssabbiiti, Yesu n'abayigirizwa be bwe baali bayita mu nnimiro y'emmere ey'empeke, abayigirizwa be ne banoga ku birimba by'emmere ey'empeke ne babikunya mu ngalo zaabwe, ne balya.

² Naye Abafalisaayo abamu ne bagamba nti, "Lwaki mukola ekitakkirizibwa ku Ssabbiiti?"

³ Yesu n'abaddamu nti, "Temusomanga ku Dawudi kye yakola, enjala bwe yamuluma n'abo be yali nabo?

⁴Yayingira mu nnyumba ya Katonda, n'addira emigaati egy'okulaga, n'atoola n'alyako, n'awaako ne be yali nabo ne balya so ng'ekyo kyali tekikkirizibwa muntu yenna okuggyako bakabona."

⁵N'abagamba nti, "Omwana w'Omuntu, ye Mukama wa Ssabbiiti."

Yesu Awonya Omusajja ow'Omukono Ogukaze

⁶Ku lunaku lwa Ssabbiiti olulala Yesu yali ng'ayigiriza mu kkuññaaniro nga mulimu n'omusajja eyalina omukono ogukaze.

⁷Abannyonnyozi b'amateeka n'Abaafalisaayo ne bamusimbako amaaso okulaba obanga anaawonya ku Ssabbiiti, babeeko n'ekintu kye baneekwasa bamuvunaane omusango.

⁸Naye Yesu n'ategeera ebirowoozo byabwe. N'agamba omusajja eyalina omukono ogukaze nti, "Situka oyimirire wakati wano." N'asituka n'ayimirira.

⁹Yesu n'alyoka agamba Abafalisaayo n'abannyonnyozi b'amateeka nti, "Muleke mbabuuze; Kirungi okukola ekirungi ku Ssabbiiti oba okukola ekibi? Kirungi okuwonya obulamu oba okubuzikiriza?"

¹⁰N'abeetoolooza amaaso kinnoomu, n'alyoka agamba omusajja nti, "Golola omukono gwo." Omusajja n'agolola omukono gwe ne guwona.

¹¹Naye ne bajjula obusungu, ne boogera bokka ne bokka kye banaakola Yesu.

Abatume Ekkumi n'Ababiri

¹²Awo olwatuuka mu nnaku ezo, Yesu n'alinnya waggulu ku lusozi okusaba, n'asaba ekiro kyonna eri Katonda.

¹³Obudde bwe bwakya, n'ayita abayigirizwa be n'abalondako kkumi n'ababiri, n'abafuula abatume. Amannya gaabwe ge gano:

¹⁴Simooni, gwe yatumma Peetero, ne Andereya, muganda wa Simooni, ne Yakobo, ne Yokaana, ne Firipo, ne Battolomaayo,

¹⁵ne Matayo, ne Tomasi, ne Yakobo, omwana wa Alufaayo, ne Simooni, ow'omu kibiina ky'obufuzi eky'Abazerote,

¹⁶ne Yuda, omwana wa Yakobo, ne Yuda Isukalyoti, oluvannyuma eyamulyamu olukwe.

Yesu Ayigiriza era Awonya

¹⁷Awo Yesu bwe yava ku lusozi awamu nabo, n'ayimirira wansi w'olusozi mu lusenyi awatereevo, ekibiina kinene eky'abayigirizwa be, n'ekibiina kinene eky'abantu abaava mu Buyudaaya yonna ne Yerusaalemi n'ebitundu eby'oku lubalama lw'enyanja olwa Ttuulo ne Sidoni,

¹⁸ne bajja okumuwuliriza n'okuwonyezebwa endwadde zaabwe. Abo abaali batawaanyizibwa emyoyo emibi ne bawonyezebwa;

¹⁹era abantu bona ne bafuba okumukwatako, kubanga amaanyi agawonya gaamuvangamu nga gawonya buli muntu.

²⁰Awo Yesu n'atunuulira abayigirizwa be enkaliriza n'agamba nti, "Mulina omukisa abaavu, kubanga obwakabaka bwa Katonda bwammwe.

²¹Mulina omukisa abalumwa enjala kaakano, kubanga mulikkusibwa. Mulina omukisa abakaaba kaakano, kubanga muliseka.

²²Mulina omukisa bwe babakyawa, ne babeewala, ne babavuma, ne basiiga erinnya lyammwe enziro, olw'Omwana w'Omuntu."

²³"Musanyukanga ku lunaku olwo ne mujaguza, kubanga empeera yammwe nnene mu ggulu, kubanga ebintu ebyo bajajjammwe baabikola bannabbi abaabasooka.

²⁴"Naye zibasanze mmwe abagagga, kubanga mufunye essanyu lyammwe erijjuvu.

²⁵Zibasanze mmwe abalya ne mukkuta kaakano, kubanga mulirumwa enjala. Zibasanze mmwe abaseka kaakano, kubanga mulikungubaga, ne mukaaba.

²⁶Zibasanze mmwe abantu bona bwe babawaana, kubanga bwe batyo bajajjammwe bwe baayisa bannabbi aboobulimba."

²⁷"Naye mmwe abampuliriza mbagamba nti: Mwagalenga abalabe bammwe, n'babakyawa mubayisenga bulungi.

²⁸Ababakolimira mubasabirenga omukisa; ababayisa obubi mubasabirenga.

²⁹Omuntu bw'akukubanga oluyi ku luba olumu, omukyusizanga n'akukuba ne ku lwokubiri! Omuntu bw'akunyagangako ekkooti yo, n'essaati yo ogimulekeranga.

³⁰Omuntu yenna akusabanga omuwanga; era n'oyo akuggyangako ebintu byo tobimusabanga kubikuddizza.

³¹Kye mwagala abantu okubakoleranga, nammwe mubibakoleranga bwe mutyo."

³²"Bwe munaayagalanga abo ababaagala bokka, munaagasibwa ki? Kubanga n'abakozi b'ebibi bwe beeyisa bwe batyo.

³³Bwe munaayisanga obulungi abo bokka ababayisa obulungi, munaagasibwa ki? Kubanga n'abakozi b'ebibi bwe bakola bwe batyo.

³⁴Bwe munaawolanga abo bokka be musuubira okubasasula mmwe, munaagasibwangamu ki? Kubanga n'abakozi b'ebibi bawola bakozi ba bibi bannaabwe, basobole okusasulwa omuwendo gwe gumu.

³⁵Naye mmwe mwagalenga abalabe bammwe! Mubayisenga bulungi! Muwolenga nga temusuubira kusasulwa magoba. Bw'etyo empeera yammwe eriba nnene era muliba baana b'oyo Ali Waggulu Ennyo. Kubanga wa kisa eri abatasiima n'abakozi b'ebibi.

³⁶Mubeerenga ba kisa nga Kitammwe bw'ali ow'ekisa."

Okusalira Abalala Emisango

³⁷ "Temusalanga musango, nammwe muleme okusalirwa omusango. Temusingisanga musango, nammwe muleme okusingibwa. Musonyiwenga era nammwe mulisoniyibwa.

³⁸Mugabenga nammwe muliweebwa. Ekigera ekirungi ekikattiddwa, ekisuukundiddwa, eky'omuyiika kiribakwasibwa. Kubanga ekigera kye mugereramu nammwe mwe muligererwa."

³⁹Awo Yesu n'abagerera olugero luno nti, "Ddala ddala omuzibe w'amaaso ayinza okukulembra muzibe munne? Bombi tebajja kugwa mu kinnya?

⁴⁰Omuyizi tasaana kusinga amuyigiriza, kyokka bw'aba ng'atendekeddwa bulungi, buli muntu aliba ng'omusomesa we."

⁴¹"Lwaki otunuulira akasasiro akali ku liiso lya muganda wo, naye n'otolaba kisiki kiri ku liiso lyo?

⁴²Oyinza otya okugamba muganda wo nti, 'Muganda wange, leka nkuggyeko akasasiro akakuli ku liiso,' naye nga ekisiki ekiri ku liryo tokiraba? Munnanfuusi ggwe! Sooka oggyeko ekisiki ku liiso lyo, olyoke olabe bulungi olwo oggyeko akasasiro akali ku liiso lya muganda wo."

⁴³"Omuti omulungi tegubala bibala bibi, so n'omuti omubi tegubala bibala birungi.

⁴⁴Buli muti gutegeererwa ku bibala byagwo. Abantu tebanoga ttiini ku busaana so tebanoga mizabbibu ku mweramannyo.

⁴⁵Omuntu omulungi afulumya ebirungi okuva mu mutima gwe omulungi, n'omuntu omubi afulumya ebibi okuva mu mutima gwe omubi. Kubanga akamwa koogera ku biba bijjudde mu mutima."

Omuzimbi omugezi n'atali mugezi

⁴⁶ "Lwaki mumpita nti, 'Mukama waffe, Mukama waffe,' so nga bye mbagamba si bye mukola?

⁴⁷Buli aija gye ndi n'awulira ebigambo byange, n'abikola, ka mbalage bw'afaanana.

⁴⁸Afaanana ng'omuntu eyazimba ennyumba, eyasima omusingi wansi ennyo n'atuuka ku lwazi. Amataba bwe gajja, ne gajjuza omugga tegaasobola kunyeenya nnyumba eyo kubanga yazimbibwa bulungi.

⁴⁹Naye omuntu awuliriza ebigambo byange n'atabikola, afaanana n'omusajja eyazimba ennyumba ku ttaka nga tasimye musingi. Omugga bwe gwajjula, ne gwanjaala, ne gukuba ennyumba n'egwa, era n'okugwa kw'ennyumba eyo kwali kunene nnyo."

Lukka 7

Okukkiriza kw'Omuserikale Omuruumi

¹Awo Yesu bwe yamala okutegeeza abantu ebigambo ebyo byonna n'ayingira mu Kaperunawumu.

²Mu kiseera ekyo, omukulu w'ekitongole ky'abaserikale ekikumi, yalina omuddu we gwe yali ayagala ennyo, yali mulwadde nnyo ng'ali kumpi n'okufa.

³Omukulu w'ekitongole oyo bwe yawulira ebifa ku Yesu, n'atuma abamu ku bakulembeze b'Abayudaaya eri Yesu bamusabe ajje awonye omuddu we.

⁴Bwe baatuuka eri Yesu ne bamwegayirira nnyo nga bagamba nti, "Omusajja ono asaanira okuyambibwa nga bw'akusabye,

⁵kubanga ayagala nnyo eggwanga lyaffe, era ye yatuzimbira ne kkuñjaaniro lyaffe!"

⁶Bw'atyo Yesu n'agenda nabo. Naye Yesu bwe yali akyali mu kkubo nga tannatuuka ku nnyumba, omukulu w'ekitongole n'atuma mikwano gye eri Yesu ng'agamba nti, "Mukama wange, teweeteganya bw'otyo, kubanga nze sisaanira kukusembeza mu nju yange.

⁷Era kyenavudde nnema okujja gy'oli nze nzennyni. Naye yogera bwogezi ekigambo, omuweereza wange anaawona!

⁸Kubanga nange nnina abakulu abantwala, ate waliwo n'abali wansi wange be nninako obuyinza. Bwe ḥajamba ono nti, 'Genda,' agenda, n'omulala nti, 'Jjangu,' ajja; n'omuddu wange nti, 'Kola kino,' akikola."

⁹Yesu bwe yawulira ebigambo ebyo n'amwewuunya nnyo, n'akyukira ekibiina ky'abantu abaali bamugoberera n'agamba nti, "Mbagamba nti sirabanga kukkiriza kunene nga kuno, wadde mu Isirayiri."

¹⁰Awo omukulu w'ekitongole be yatuma eri Yesu bwe baddayo mu nnyumba ye, baasanga omuddu awonye.

Yesu Azuukiza Mutabani wa Nnamwandu

¹¹Awo ku lunaku olwaddirira, Yesu n'agenda n'abayigirizwa be n'ekibiina kinene ne kimugoberera mu kibuga ekiyitibwa Nayini.

¹²Bwe yali aseemberera omulyango gw'ekibuga, laba, abantu ne bafuluma mu kibuga nga beettisse omulambo gw'omuvubuka eyali mutabani w'omukazi nnamwandum, ate nga ye mwana we yekka. Ekibiina ky'abantu abaali bava mu kibuga baali bangi nnyo.

¹³Awo Mukama waffe bwe yalaba nnamwandum n'amusaasira, n'amugamba nti, "Tokaaba."

¹⁴N'aseemberera essanduuko, abaali bagisitudde ne bayimirira, Yesu n'ayogera nti, "Omuvubuka, nkulagira nti ggolokoka!"

¹⁵Eyali afudde n'atuula era n'atandika okwogera. Yesu n'amuddiza nnyina.

¹⁶Buli omu n'ajjula entiisa, ne batendereza Katonda nga bagamba nti, "Nnabbi ow'amaanyi atulabikidde, era Katonda akyalidde abantu be."

¹⁷Ebigambo ebyo ne bibuna Buyudaaya yonna n'okwetooloola emiriraango gyayo.

Yesu ne Yokaana Omubatiza

¹⁸Awo abayigirizwa ba Yokaana Omubatiza ne bategeeza Yokaana ebintu ebyo byonna. Yokaana n'ayita abayigirizwa be babiri,

¹⁹n'abatuma eri Mukama waffe okumubuuza nti, "Ggwe wuuyo gwe tusuubira okujja, oba tulindirireyo omulala?"

²⁰Abayigirizwa ba Yokaana bwe baatuuka eri Yesu, ne bamutegeeza nti, "Yokaana Omubatiza atutumye okukubuuza nti, Ggwe wuuyo ajja oba tulindirirayo omulala?"

²¹Mu kiseera ekkyo Yesu n'awonya endwadde nnyingi eza buli ngeri: n'abalema, n'abaaliko emyoyo emibi, n'azibula n'abazibe b'amaaso.

²²Abaatumibwa n'abaddamu nti, "Muddeeyo eri Yokaana mumutegeeze byonna bye muwulidde ne bye mulabye. Abazibe b'amaaso bazibulwa amaaso ne balaba, n'abalema batambula, n'abagenge balongoosebwa, n'abaggavu b'amatu gagguka ne bawulira, n'abafu bazuukizibwa, era n'abaavu babuulirwa Enjiri.

²³Era alina omukisa oyo atanneesittalako."

²⁴Awo ababaka ba Yokaana bwe baagenda, Yesu n'abuulira ekibiina ebikwata ku Yokaana. N'ababuuzza nti, "Bwe mwagenda mu ddungu, mwagenderera kulaba ki? Olumuli olunyeenyezebwa n'empewo?

²⁵Naye mwagenderera kulaba ki? Omusajja ayambadde engoye ezinekaaneka? Laba abambadde engoye ezinekaaneka, nga babeera mu bulamu bwa kikungu era babeera mu mbiri.

26 Naye mwagenderera kulaba ki? Nnabbi? Weewaawo ka mbabuulire, oyo asinga ne nnabbi.

27 Y'oyo ebyawandiikibwa gwe byogerako nti, “‘Laba, ntuma omubaka wange okukukulembera, y'alikuteekerateekera ekkubo lyo mu maaso go.’”

28 “Mbagamba nti, mu bantu bona abaali bazaaliddwa abakazi, tewali mukulu wa kitiiibwa kukira Yokaana, naye ate oyo asembayo mu bwakabaka bwa Katonda asinga Yokaana ekitiibwa.”

29 Abantu bona, awamu n'abasolooza b'omusolo, bwe baawulira ebigambo bya Yesu ebyo, ne batendereza Katonda, kubanga baali babatiziddwa mu kubatizibwa kwa Yokaana.

30 Naye Abafalisaayo n'abayigiriza b'amateeka ne bagaana ebyo Katonda bye yabategekera, kubanga tebaabatizibwa Yokaana.

Yesu Anenya ab'omu Biseera bye

31 Awo Yesu n'abuuza nti, “Abantu ab'omulembe guno mbageraageranye na ki? Bafaanana batya?

32 Bafaanana ng'abaana abato abazanya emizannyo gyabwe mu katale, nga bagambagana nti, “‘Bwe twabafuyira omulere, temwazina, Bwe twayimba oluyimba olw'okukungubaga, temwakungubaga.’”

33 Kubanga Yokaana Omubatiza bwe yajja teyalyanga mmere wadde okunywa omwenge, ne mugamba nti, ‘Aliko dayimooni!’

34 Omwana w'Omuntu azze ng'alya emmere era ng'anywa ne mugamba nti, ‘Laba wa mululu era mutamiivu, mukwano gw'abasolooza b'omusolo n'aboonoonyi!’

35 Naye amagezi geeragira mu butuukirivu olw'abaana baago bona.”

Omukazi Alina Ebibi Asiiga Yesu Amafuta ag'Akaloosa

36 Awo omu ku Bafalisaayo n'ayita Yesu ku kijjulo, Yesu n'ayingira mu nnyumba, n'atuula ku mmeesa.

37 Awo omukazi ow'omu kibuga ekkyo nga mwonoonyi, eyali ategedde nga Yesu ali mu nju eyo ey'Omufalisaayo, n'aleeta eccupa y'amafuta ag'akaloosa.

38 N'ayimirira awali Yesu, n'akaaba, amaziga ne gatonnya ku bigere bya Yesu ne bitoba. Omukazi n'abisimuza enviiri ze, era n'abinywegera; n'abifukako amafuta ag'akaloosa.

39 Naye Omufalisaayo eyayita Yesu, ebyo bwe yabiraba, n'agamba munda ye nti, “Singa omuntu ono abadde nnabbi, yanditegedde omukazi amukwatako kyali era nga bw'ali omwonoonyi!”

⁴⁰Awo Yesu n'amugamba nti, "Simooni, nnina kye njagala okukubuulira." Simooni n'addamu nti, "Omuyigiriza, mbuulira."

⁴¹"Waaliwo abantu babiri, omuwozi w'ensimbi be yali abanja. Omu yali amubanja ddinaali ebikumi bitaano, n'omulala ddinaali amakumi ataano.

⁴²Naye ku bombi nga tekuliiko asobola kusasula bbanja lye. Eyali ababanja kwe kubasonyiwa. Kale, ku bombi aluwa alisinga okumwagala?"

⁴³Simooni n'addamu nti, "Ndowooza oyo gwe yasonyiwa ebbanja erisingako obunene." Yesu n'amugamba nti, "Olamudde bulungi."

⁴⁴N'alyoka akyukira omukazi n'agamba Simooni nti, "Omukazi ono omulaba? Bwe nayingidde mu nnyumba yo, tewampadde mazzi ga kunaaba ku bigere byange. Nayé abinaazizza n'amaziga ge n'abisimuula n'enviiri ze.

⁴⁵Tewannyanirizza na kunnywegera, naye anywagedde ebigure byange emirundi mingi okuva lwe nayingidde.

⁴⁶Tewansiize mafuta ku mutwe gwange, naye ye asiize ebigure byange amafuta ag'akaloosa.

⁴⁷Noolwekyo nkutegeeza nti omukazi ono asonyiyiddwa ebibi bye ebingi kubanga okwagala kwe kungi, naye oyo asonyiyibwa ebitono n'okwagala kwe kuba kutono."

⁴⁸Awo Yesu n'agamba omukazi nti, "Osonyiyiddwa ebibi byo."

⁴⁹Abo abaali ne Yesu ku mmeza ne beebuuzaganya nti, "Ono ye ani asonyiwa n'ebibi?"

⁵⁰Yesu n'agamba omukazi nti, "Okukkiriza kwo kukulokodde, genda mirembe."

Lukka 8

Abakazi Abaayitanga ne Yesu

¹Oluvannyuma lw'ebyo Yesu n'agenda ng'akyalira ebibuga ebinene n'ebitono ng'abuulira Enjiri y'obwakabaka bwa Katonda, n'abayigirizwa be ekkumi n'ababiri nga bali naye.

²Waaliwo n'abakazi Yesu be yali agobyeko emyoyo emibi ne be yali awoneyzza endwadde. Mu bo mwe mwali ne Maliyamu eyayitbwanga Magudaleene gwe yagobako baddayimooni omusanvu,

³ne Jowaana muka Kuza eyali omukulu w'olubiri lwa Kerode; ne Susaana, n'abalala bangi, abaatoolanga ku byabwe ne balabirira Yesu n'abayigirizwa be.

Olugero Iw'Omuisizi

⁴Awo ekibiina kinene bwe kyali kikuŋjaana, nga n'abantu abava mu buli kibuga bajja eri Yesu, Yesu n'abagerera olugero luno nti,

⁵“Omulimi yagenda mu nnimiro ye okusiga ensigo. Bwe yatandika okusiga ensigo, ezimu ne zigwa ku mabbali g'ekkubo ne bazirinnyirira, n'ebinyonyi eby'omu bbanga ne bizirya.

⁶Ensigo endala zaagwa ku lwazi, bwe zaamera ne zikala kubanga tezaalina mazzi.

⁷Ensigo endala zaagwa mu maggwa, bwe zaamera n'amaggwa nago ne gakula ne gazizisa.

⁸Naye ensigo endala n'azisiga mu ttaka eddungi, ne zikula ne zibala ebibala emirundi kikumi.” N'amaliriza ng'agamba nti, “Alina amatu okuwulira awulire.”

⁹Abayigirizwa be ne bamubuuza amakulu g'olugero olwo.

¹⁰N'abaddamu nti, “Mmwe muweeredwa omukisa okumanya ebyama by'obwakabaka bwa Katonda, naye abalala, njogera gye bali mu ngero, “bwe batunula baleme kulaba, bwe bawulira baleme kutegeera.’

¹¹ “Kale, amakulu g'olugero olwo ge gano: Ensigo ky'ekigambo kya Katonda.

¹²Ensigo ezaagwa ku mabbali g'ekkubo, be bawulira ekigambo, naye Setaani n'ajja n'akibaggyako mu mutima gwabwe, si kulwa nga bakkiriza ne balokolebwa.

¹³Ezaagwa ku lwazi be bawulira ne basanyukira ekigambo, kyokka ne kitaba na mmizi. Be bakkiriza, naye okugezesewa bwe kujja ne bagwa.

¹⁴Ezaagwa mu maggwa, be bawulira ekigambo, naye okweraliikirira n'obugagga n'amasanyu g'omu bulamu ne bibazisa, ne bataleeta bibala bikuze bulungi.

¹⁵Naye ezaagwa ku ttaka eddungi be bantu abalungi era abeesigwa, era bakuma ekigambo ku mitima ne babala ebibala n'obugumiikiriza.

¹⁶ “Tewali muntu akoleeza ttaala ate nagisaanikirako akalobo oba n'agissa wansi w'ekitanda. Agiwanika waggulu ku kikondo, olwo lw'esobola okumulisiza abantu abayingira.

¹⁷Kubanga tewali kintu na kimu ekyakwekebwa ekitalikwekulwa, era tewali na kimu ekitalimanyibwa mu lwatu.

¹⁸Noolwekyo mwegendereze nga muwuliriza, kubanga oyo alina alyongerwako; naye oyo atalina, n'ekyo ky'alowooza nti alina kigenda kumuggyibwako.”

Nnyina ne Baganda ba Yesu

¹⁹Awo nnyina ne baganda ba Yesu ne bajja okumulaba, naye ne batasobola kumutuukako olw'ekibiina ky'abantu ekinene.

²⁰Ne wabaawo amubuulira nti, "Nnyoko ne baganda bo obwetta bayimiridde wabweru, baagala kukulabako."

²¹Yesu n'addamu nti, "Mmange ne baganda bange be bano abawulira ekigambo kya Katonda ne bakigondera."

Yesu Akkakkanya Omuyaga

²²Lwali lumu Yesu n'alinnya mu lyato n'abayigirizwa be, n'abagamba nti, "Tuwunguke tulage emitala w'enyanja." Ne basimbula okugenda.

²³Bwe baali baseeyeeya Yesu ne yeebaka. Awo omuyaga ogw'amaanyi ne gukunta ku nnyanja, n'eryato ne liyuuga nnyo, ne baba mu kabi kanene.

²⁴Abayigirizwa ne bamuzuukusa, ne bagamba nti, "Mukama waffe, Mukama waffe, tusaanawo!" N'azuukuka n'aboggolera omuyaga n'amazzi agaali geefuukudde. Ne bikkakkana, enyanja n'etteeka!

²⁵N'alyoka abagamba nti, "Okukkiriza kwammwe kuluwa?" Ne batya, ne beewuunya nnyo, ne bagambagana nti, "Omuntu ono ye ani? Alagira omuyaga n'amazzi ne bimugondera!"

Yesu Awonya Omusajja Eyaliko Baddayimooni

²⁶Awo ne bagoba emitala w'eri mu nsi y'Abageresene eyolekedde Ggaliraaya.

²⁷Awo Yesu bwe yava mu lyato omusajja eyaliko baddayimooni n'ajja okumusisinkana ng'ava mu kibuga. Omusajja oyo yali amaze ebbanga ddene nga tayambala ngoye, nga tasula na mu nju, wabula ng'asula mu ntaana.

²⁸Awo bwe yalaba Yesu n'awowoggana n'agwa wansi mu maaso ga Yesu, n'aleekaana nti, "Onjagaza ki, Yesu, Omwana wa Katonda Ali Waggulu Ennyo? Nkwegayiridde tombonyaabonya!"

²⁹Kubanga Yesu yali alagidde omwoyo omubi guve ku musajja oyo. Emirundi mingi yalumbibwanga n'amaanyi mangi, ne bwe baamusibanga n'enjegere, n'akuumibwa mu masamba, yabikutulanga, ddayimooni n'amulaza mu ddungu.

³⁰Awo Yesu n'abuuza omusajja nti, "Erinnya lyo ggwe ani?" Omusajja n'addamu nti, "Nze Ligyon," kubanga omusajja yaliko baddayimooni bangi.

³¹Baddayimooni ne beegayirira Yesu aleme okubagobera mu bunnya obutakoma.

³²Waaliwo eggana ly'embizzi, awo ku lusozi, nga liry, baddayimooni ne beegayirira Yesu abasindike mu mbizzi ezo. Yesu n'abakkiriza.

³³Baddayimooni ne bava ku musajja ne bayingira mu mbizzi, amangwago eggana lyonna ne lifubutuka nga liserengeta olusozi, ne lyewanula ku bbangabanga, ne ligwa mu nnyanja, embizzi zonna ne zisaanawo.

³⁴Abalunzi b'embizzi ezo bwe baakiraba, ne badduka embiro ne bagenda, ne bategeeza ab'omu malundiro ne mu kibuga, ebintu byonna ebibaddewo.

³⁵Ekibiina ky'abantu ne bagenda okulaba ebibaddewo ne bajja eri Yesu, ne balaba omusajja eyagobwako baddayimooni ng'atudde awo awali ebigere bya Yesu ng'ayambadde engoye era nga mulamu ddala! Ne batya nnyo.

³⁶Abo abaaliwo okusookera ddala ne bategeeza abalala ng'omusajja eyaliko ddayimooni bwe yawonyezebwa.

³⁷Awo abantu bona ab'ensi eyo ey'Abagerasene ne basaba Yesu abaviire, kubanga baali batidde nnyo. N'asaabala mu lyato n'avaayo.

³⁸Omusajja, eyagobwako baddayimooni n'amusaba agende naye, naye Yesu n'agaana.

³⁹N'agamba omusajja nti, "Ddayo ewammwe obategeeze Katonda by'akukoledde." Omusajja n'agenda ng'ategeeza buli gwe yasanganga mu kibuga, Yesu bye yali amukoledde.

Muwala wa Yayiro n'Omukazi Omulwadde

⁴⁰Yesu bwe yakomawo ekibiina ky'abantu ne bamwaniriza n'essanyu kubanga bona baali bamulindirira.

⁴¹Mu kiseera ekyo ne wajjavo omusajja erinnya lye Yayiro, eyali omukulembeze w'ekkuññaaniro, n'agwa ku bigere bya Yesu n'amwegayirira aje mu maka ge,

⁴²kubanga muwala we omu yekka gwe yalina, eyali aweza emyaka nga kkumi n'ebiri yali afa. Yesu n'agenda naye, naye ng'ekibiina kimunyigiriza.

⁴³Mu kibiina ky'abantu ekyo mwalimu omukazi eyali amaze emyaka kkumi n'ebiri ng'alwadde ekikulukuto ky'omusaayi. Yali atambudde nnyo mu basawo era nga bamumazeeko ebintu bye byonna ng'abasasula, naye ne watabaawo asobola kumuwonya.

⁴⁴Omukazi ono n'asemberera Yesu ng'amuvaako emabega, n'akoma ku lukugiro lw'ekyambalo kya Yesu, ekikulukuto ky'omusaayi ne kiwona mu kaseera ako kennyini!

⁴⁵Yesu n'abuuza nti, "Ani ankutteko?" Bonna ne beegaana, naye Peetero n'agamba nti, "Mukama waffe, ekibiina ky'abantu kinene abakwetoolodde era abantu bangi bakunyigiriza."

⁴⁶Naye Yesu n'addamu nti, "Waliwo ankutteko kubanga mpulidde ng'amaanyi ganvaamu."

⁴⁷Awo omukazi bwe yategeera ng'avumbuddwa, n'ajja ng'akankana n'agwa awo mu maaso ga Yesu, n'annyonnyola mu maaso g'abantu bona ensonga kyeyavudde amukwatako, era nti n'obulwadde bwe bwawoneddewo!

⁴⁸Yesu n'agamba omukazi nti, "Muwala wange, okukkiriza kwo kukuwonyezza. Genda mirembe."

⁴⁹Awo Yesu bwe yali ng'akyayogera omuntu n'atuuka ng'ava mu maka g'omukulu w'ekkuinjaaniro, n'agamba Yayiro nti, "Muwala wo afudde! Omuyigiriza toyongera kumuteganya."

⁵⁰Naye Yesu bwe yakiwulira n'amugamba nti, "Totya! Kkiriza bukkiriza, ajja kuba mulamu."

⁵¹Awo Yesu bwe yatuuka ku nnyumba ya Yayiro, n'atakkiriza bantu balala kuyingira naye mu nju wabula Peetero, ne Yokaana, ne Yakobo, ne kitaawe w'omwana, ne nnyina.

⁵²Mu kiseera ekyo abantu bona baali bakaaba nga bakungubagira omwana oyo. Yesu n'abagamba nti, "Mulekeraawo okukaaba! Omuwala tafudde wabula yeebase bwebasi!"

⁵³Ne bamusekerera nnyo, kubanga bona baali bamanyi ng'omuwala afudde.

⁵⁴Naye Yesu n'akwata omuwala eyali afudde ku mukono, n'akoowoola ng'agamba nti, "Mwana wange, golokoka!"

⁵⁵Amangwago n'aba mulamu, n'asituka n'ayimirira. Yesu n'abalagira bamuwe ekyokulya.

⁵⁶Bazadde b'omuwala ne beewuunya, naye Yesu n'abakuutira obutabuulirako muntu yenna ebibaddewo.

Lukka 9

Yesu Atuma Ekkumi n'Ababiri

¹Awo olunaku lwali lumu Yesu n'ayita abayigirizwa be ekkumi n'ababiri bona awamu, n'abawa obuyinza okugoba baddayimooni ku bantu n'okuwonya endwadde.

²N'abawa obuyinza n'abatuma bagende bategeeze abantu ebigambo by'obwakabaka bwa Katonda era bawonye n'abalwadde.

³N'abalagira nti, "Temwetwalira kintu kyonna nga mugenda, wadde omuggo, oba ensawo, oba emmere, wadde ffeeza wadde essaati ebbiri.

⁴Na buli nnyumba mwe muyingiranga, mubeerenga omwo, era mwe muba muvanga.

⁵Bwe muyingiranga mu kibuga, abantu baamu ne batabaaniriza, mubaviirenga, era bwe mubanga mufuluma mu kibuga ekyo mukunkumulanga enfuufu ku bigere byammwe, ebe omujulirwa eri bo.”

⁶Ne bagenda nga bava mu kibuga ekimu nga badda mu kirala, nga babuulira Enjiri buli wamu era nga bawonya.

Kerode Asoberwa

⁷Awo Kerode eyali afuga Ggaliraaya bwe yawulira ebintu ebyo byonna, n'asoberwa, kubanga abantu abamu baali bagamba nti, “Yokaana azuukidde mu bafu,”

⁸n'abalala nti, “Eriya yali alabise,” n'abalala nti, “Omu ku bannabbi ab'edda azuukidde mu bafu.”

⁹Naye Kerode ne yeebuuza nti, “Yokaana namutemako omutwe; naye ate kale ono ye ani gwe mpulirako ebigambo bino byonna?” N'ayagala okulaba Yesu.

Yesu Aliisa Abantu Enkumi Ettaano

¹⁰Awo abatume bwe baakomawo ne bategeeza Yesu bye baakola. Yesu n'abatwala mu kyama ne bagenda bokka mu kibuga ekiyitibwa Besusayida.

¹¹Naye ebibiina bwe baakitegeera ne kimugoberera. Yesu n'abaaniriza, n'abayigiriza ebigambo ebikwata ku bwakabaka bwa Katonda, n'abaali abalwadde n'abawonya.

¹²Obudde bwe bwawungeera abayigirizwa ekkumi n'babiri ne bajja gy'ali ne bamugamba nti, “Abantu bagambe bagende mu bibuga ebyetoolodde wano ne mu byalo beefunire we banaafuna ku mmere n'okusula, kubanga wano tuli mu ttale jjereere.”

¹³Yesu n'abaddamu nti, “Mmwe mubawe ekyokulya!” Abayigirizwa be ne bamuddamu nti, “Wano tulinawo emigaati etaano gyokka n'ebiyennyanja bibiri, mpozi nga tugenda tugulire abantu bano bona emmere.”

¹⁴Waaliwo abasajja ng'enkumi ttaano. Naye Yesu n'agamba abayigirizwa be nti, “Mutuuze abantu mu bibiina by'abantu ng'amakumi ataano buli kimu.”

¹⁵Abayigirizwa ne bakola bwe batyo, bona ne batuula.

¹⁶Awo Yesu n'addiria emigaati etaano n'ebiyennyanja ebibiri n'atunula eri eggulu, ne yeebaza, n'amenyaamenya emigaati n'ebiyennyanja, n'awa abayigirizwa be bagabule abantu.

¹⁷Bonna ne balya ne bakkuta, era obutundutundu obwalema bwe bwakuññaanyizibwa ne bujuza ebisero kkumi na bibiri.

Peetero Ayatula nti Yesu ye Kristo

¹⁸Lwali lumu Yesu bwe yali ng'asaba yekka kyokka nga n'abayigirizwa be bali awo, n'ababuuza nti, “Ebibiina bimpita ani?”

¹⁹Ne baddamu nti, “Abamu bagamba nti Yokaana Omubatiza, abalala nti Eriya, ate nga waliwo abagamba nti omu ku bannabbi ab’edda y’azuukidde.”

²⁰Yesu kwe kubabuuza nti, “Naye mmwe mumpita ani?” Peetero n’addamu nti, “Ggwe Kristo wa Katonda.”

²¹Awo Yesu n’abakuutira, ng’abalagira obutakitegeezaako muntu yenna,

²²n’abategeeza nti, “Kigwanidde, Omwana w’Omuntu, okubonaabona ennyo, n’okugaanibwa abakulembeze b’Abayudaaya, ne bakabona abakulu, n’abannyonyozi b’amateeka, n’okuttibwa, naye ku lunaku olwokusatu okuzuukizibwa!”

²³Era bona n’abagamba nti, “Omuntu yenna ayagala okungoberera asaana yeefiirize yekka yeetikke omusaalaba gwe buli lunaku, angoberere!

²⁴Kubanga buli ayagala okulokola obulamu bwe, alibufiirwa. Na buli alifiirwa obulamu bwe ku lwange alibulokola.

²⁵Kubanga omuntu kirimugasa ki okulya ensi yonna, naye n’afirwa obulamu bwe?

²⁶Buli alinkwatirwa ensonyi, nze n’ebigambo byange, n’Omwana w’Omuntu, alimukwatirwa ensonyi, bw’alijja mu kitibwa kye ne mu kya Kitaawe ne mu kya bamalayika abatukuvu.

²⁷“Naye ddala ddala mbagamba nti abamu ku abo abayimiridde wano waliwo abatalirega ku kufa okutuusa nga bamaze okulaba obwakabaka bwa Katonda.”

Okufuusibwa

²⁸Awo nga wayiseewo ng’ennaku munaana, Yesu n’atwala Peetero ne Yokaana ne Yakobo ne bambuka ku lusozi okusaba.

²⁹Bwe yali ng’asaba endabika y’amaaso ge n’ekyusibwa, ebyambalo bye ne byeruka ne bitukula nnyo era ne byakaayakana.

³⁰Awo abantu babiri ne balabika nga banyumya ne Yesu, omu yali Musa n’omulala Eriya,

³¹abaali bamasamasa mu kitibwa kyabwe nga boogera ku kufa kwa Yesu, kwe yali agenda okutuukiriza mu Yerusaalemi.

³²Peetero ne banne otulo twali tubakutte era nga beebase, Bwe baazuukuka ne balaba ekitibwa kya Yesu n’abantu ababiri abaali bayimiridde naye.

³³Awo Musa ne Eriya bwe baali bagenda, Peetero nga tamanyi ne kyayogera, n’agamba nti, “Mukama wange kirungi ffe okubeera wano. Ka tuzimbe wano ensiisira ssatu, emu yiyo, endala ya Musa n’endala ya Eriya!”

³⁴Naye yali akyayogera ebyo ekire ne kibabikka, abayigirizwa ne bajjula okutya nga kibasaanikidde.

³⁵Eddoboozi ne liva mu kire ne ligamba nti, “Ono ye Mwana wange, gwe nneeroboza, mumuwulirize!”

³⁶Eddoboozi bwe lyasiriikirira, Yesu n’asigalawo yekka. Abayigirizwa abo bye baalaba ne bye baawulira ne babikuuma mu mitima gyabwe, ne batabibuulirako muntu yenna mu kiseera ekyo.

Yesu Awonya Omwana Eyaliko Dayimooni

³⁷Awo enkeera bwe baakomawo nga bava ku lusozi, ekibiina ekinene ne kijja okusisinkana Yesu.

³⁸Omusajja eyali mu kibiina n’ayogerera waggulu ng’agamba nti, “Omuyigiriza, nkwegayiridde tunula ku mutabani wange ono kubanga yekka gwe nnina.

³⁹Kubanga ddayimooni buli bbanga amukwata n’amuwowogganya, era n’amukankanya n’abimba ejjovu n’amusuula eri era tayagala kumuleka, amumaliramu ddala amaanyi.

⁴⁰Neegayiridde abayigirizwa bo bamumugobeko, naye ne batasobola.”

⁴¹Awo Yesu n’addamu nti, “Mmwe omulembe ogutakkiriza era ogwakyama, ndibeera nammwe kutuusa ddi? Era ndibagumiikiriza kutuusa ddi? Leeta wano omwana wo.”

⁴²Omulenzi bwe yali ajja eri Yesu dayimooni n’amusuula wansi n’amukankanya nnyo. Yesu n’aboggolera omwoyo omubi n’awonya omwana, n’amuddiza kitaawe.

⁴³Abantu bona ne beewuunya obuyinza bwa Katonda. Awo buli muntu bwe yali akyewuunya eby’ekitalo ebyo Yesu bye yali akola, n’agamba abayigirizwa be nti,

⁴⁴“Muwulirize nnyo kye njenda okubagamba. Omwana w’Omuntu, agenda kuliibwamu olukwe.”

⁴⁵Naye abayigirizwa tebaategeera ky’agambye n’amakulu gaakyo. Kubanga kyali kibakwekebbwa, baleme okutegeera ate nga batya okukimubuuza.

⁴⁶Awo empaka ne zisituka mu bayigirizwa ba Yesu, nga bawakanira aliba omukulu mu bo.

⁴⁷Naye Yesu bwe yategeera ebirowoozo byabwe n’addiria omwana omuto n’amuyimiriza w’ali.

⁴⁸N’abagamba nti, “Buli muntu asembeza omwana ono omuto mu linnya lyange ng’asembezezza Nze, na buli ansembeza aba asembezezza oyo eyantuma. Oyo asembayo okuba owa wansi mu mmwe, ye mukulu okubasinga.”

⁴⁹ Awo Yokaana n'agamba Yesu nti, "Mukama waffe, twalaba omuntu ng'agoba baddayimooni mu linnya lyo ne tugezaako okumuziyiza kubanga tayita naffe."

⁵⁰ Naye Yesu n'amuddamu nti, "Temumuziyizanga kubanga oyo atalwana nammwe abeera ku ludda lwammwe."

⁵¹ Awo ekiseera eky'okulinnya kwe mu ggulu bwe kyali kisembedde, n'amalirira okugenda e Yerusaalemi.

⁵² N'atuma ababaka mu maaso ne balaga mu kibuga ky'Abasamaliya okumutegekera.

⁵³ Naye abantu b'eyo ne batamwaniriza, kubanga yali amaliridde okulaga mu Yerusaalemi.

⁵⁴ Abayigirizwa Yakobo ne Yokaana bwe baakiraba ne babuuza Yesu nti, "Mukama waffe, tuyite omuliro okuva mu ggulu gubazikirize?"

⁵⁵ Naye Yesu n'akyuka n'abanenya.

⁵⁶ Ne bagenda mu kabuga akalala.

⁵⁷ Awo bwe baali bali mu kkubo omu ku bo n'amugamba nti, "Nnaakugobereranga wonna w'onoogendanga."

⁵⁸ Yesu n'amugamba nti, "Ebibe birina obunnya bwabyo mwe bisula, n'ennyonyi zirina ebisu, naye Omwana w'Omuntu, talina kifo kya kuwumulizaamu mutwe gwe."

⁵⁹ N'agamba omusajja omulala nti, "Ngoberera." Omusajja n'addamu nti, "Mukama wange, nzikiriza mmale okugenda okuziika kitange."

⁶⁰ Yesu n'amugamba nti, "Leka abafu baziike abafu baabwe, naye ggwe genda olangirire obwakabaka bwa Katonda."

⁶¹ N'omulala n'agamba Yesu nti, "Nnaakugobereranga Mukama wange. Naye sooka ondeke mmale okusiibula ab'omu maka gange."

⁶² Naye Yesu n'amuddamu nti, "Omuntu yenna akwata ekyuma ekirima mu ngalo ze ate n'atunula emabega, tasaanira bwakabaka bwa Katonda."

Lukka 10

Yesu Atuma Abayigirizwa Ensantu

¹ Awo oluvannyuma lw'ebyo Yesu n'alonda abayigirizwa abalala nsantu mu babiri, n'abatuma babiri babiri bamukulembere bagende mu buli kibuga ekinene, na buli kifo mwe yali anaatera okutuuka.

² N'abagamba nti, "Eby'okukungula bingi, naye abakozi abakungula batono. Noolwekyo musabe nannyini nnimiro, aweereze abakozi mu nnimiro ye.

³Kale, mugende. Kyokka mbatuma ng'abaana b'endiga mu misege.

⁴Temugenda na nsimbi era temutwala nsawo ya kusabiriza wadde omugogo gw'engatto, ate temubaako gwe mulamusa mu kkubo.

⁵"Buli nnyumba gye muyingirangamu musookanga kugamba nti, 'Emirembe gibeere mu nnyumba eno.'

⁶Ennyumba eyo bw'eneebangamu omuntu ow'emirembe, emirembe gyammwe ginaabeeranga ku ye, bwe kitaabenga bwe kityo, emirembe gyammwe ginaabaddiranga.

⁷Mu nnyumba omwo, mwe musookedde, munaalyanga era ne munywa nabo, kubanga omukozi asaanira empeera ye. Temuvanga mu nnyumba emu ne mudda mu ndala.

⁸"Buli kibuga kye mutuukangamu ne babaaniriza, mulyenga ebyo bye babawadde okulya.

⁹Muwonyenga abalwadde abalimu, era mugambenga abantu abo nti, 'Obwakabaka bwa Katonda bubasemberedde.'

¹⁰Naye bwe muyingiranga mu kibuga kyonna ne batabaaniriza, mulaganga mu nguudo zaakyo ne mugamba nti,

¹¹'N'enfuufu ekwatidde ku bigere byaffe tugibakunkumulira. Naye mumanye kino nti obwakabaka bwa Katonda busembedde.'

¹²Mbategeeza nti ku lunaku luli, Sodomu kigenda kugumiikirizika okusinga ekibuga ekyo.

¹³"Zikusanze, ggwe Kolaziini! Naawe zikusanze, Besusayida! Kubanga ebyamagero ekyakolerwa mu mmwe, singa byakolerwa mu Ttuulo ne mu Sidoni, abantu baamu bandibadde beenenya dda, nga bambadde n'ebibukutu nga batudde mu vvu okulaga nti beenenyezza.

¹⁴Naye Ttuulo ne Sidoni birisaasirwa okusinga mmwe ku lunaku olw'okusalirako omusango.

¹⁵Ate ggwe Kaperunawumu, oligulumizibwa okutuuka mu ggulu? Nedda, ogenda kuserengesebwa wansi emagombe.

¹⁶"Buli abawuliriza mmwe aba awulirizza Nze, na buli abanyooma aba anyoomye Nze, n'oyo anyooma Nze aba anyoomye eyantuma."

¹⁷Awo abayigirizwa ensavu mu ababiri bwe baakomawo, nga basanyuka ne bategeeza Yesu nti, "Mukama waffe, ne baddayimooni baatugondera mu linnya lyo."

¹⁸ Yesu n'abagamba nti, "Nalaba Setaani ng'agwa okuva mu ggulu ng'okumyansa kw'eraddu!"

¹⁹ Laba mbawadde obuyinza okulinnya ku misota ne ku njaba ez'obusagwa n'okuwangula amaanyi gonna ag'omulabe. Era tewali kigenda kubakola kabi.

²⁰ Naye temusanyuka nnyo kubanga baddayimooni babagondera, wabula mujuze nti amanya gammwe gawandiikkidwa mu ggulu."

²¹ Mu kiseera ekyo Yesu n'ajjula essanyu ku bwa Mwoyo Mutukuvu n'agamba nti, "Nkutendereza Kitange, Mukama w'eggulu n'ensi, kubanga wakweka ebintu bino abagezi n'abayivu, naye n'obibikkulira abaana abato. Weewaawo Kitange, bw'otyo bwe wasiima.

²² "Kitange yankwasa ebintu byonna. Tewali amanyi Mwana wabula Kitange, era tewali amanyi Kitange wabula Omwana awamu n'abo Omwana b'asiima okubamubikkulira."

²³ Awo n'akyukira abayigirizwa be n'abagamba mu kyama nti, "Mulina omukisa mmwe okulaba bino bye mulaba.

²⁴ Kubanga mbagamba nti, bannabbi bangi ne bakabaka bangi abaayagala okulaba bye mulaba n'okuwlira bye muwlira naye tekyasoboka."

Omusamaliya Omulungi

²⁵ Kale laba omunyyonnyozi w'amateeka n'asituka, ng'ayagala okugezesha Yesu, n'amubuuza nti, "Omuyigiriza, nsaana nkole ki okusikira obulamu obutaggwaawo?"

²⁶ Yesu n'amuddamu nti, "Kyawandiikibwa kitya mu mateeka? Gagamba gatya?"

²⁷ Omunyyonnyozi w'amateeka n'addamu nti, "'Yagalanga Mukama Katonda wo n'omutima gwo gwonna, n'emmeeme yo yonna, n'amaanyi go gonna, n'amagezi go gonna.' Era 'yagalanga muliraanwa wo nga naawe bwe weeyagala.'

²⁸ Yesu n'amugamba nti, "Ozzeemu bulungi. Kale kolanga bw'otyo oliba mulamu."

²⁹ Naye omunyyonnyozi w'amateeka okwagala okulaga nga bw'ali omutuufu n'agamba Yesu nti, "Muliraanwa wange ye ani?"

³⁰ Yesu n'amuddamu nti, "Waaliwo omuntu eyali ava e Yerusaalemi ng'aserengeta e Yeriko, n'agwa mu banyazi, ne bamukwata ne bamwambulamu engoye ze ne bazimutwalako, ne bamukuba nnyo, ne bamuleka awo ku kkubo ng'abulako katono okufa.

³¹Awo kabona eyali tategedde n'ajjira mu kkubo eryo, naye bwe yatuuka ku musajja ng'agudde awo ku kkubo n'amwebalama bwebalami n'amuyitako.

³²Omuleevi naye yamutuukako n'amulaba, n'adda ku ludda olulala olw'oluguudo, n'amuyitako buyisi

³³Naye Omusamaliya bwe yali ng'ali ku lugendo lwe mu kkubo eryo, n'atuuka omusajja we yali; bwe yamulaba n'amukwatirwa ekisa,

³⁴n'ajja w'ali, n'amunyiga ebiwundu ng'ayiwako amafuta, ne wayini ebiwundu n'abisibako ebiwero. Awo n'ateeka omusajja ku nsolo ye n'amutwala mu nnyumba esulwamu abatambuze, n'amujjanjaba.

³⁵Enkeera Omusamaliya n'addiraa ddinaali bbiri n'aziwa nannyini nnyumba. N'amugamba nti, 'Nkusaba omujjanjabe, era ensimbi ezizo zonna z'olikozesa nga zino ze nkulekedde ziwedde, ndizikuddizaawo nga nkomyewo.' "

³⁶"Kale olowooza, ku bantu abo abasatu aluwa eyali muliraanwa w'omusajja oli eyagwa mu banyazi?"

³⁷Omunnyonnyozi w'amateeka n'addamu nti, "Oyo eyamukolera ebyekisa." Yesu n'amugamba nti, "Naawe genda okole bw'otyo."

Yesu Akyalira Maliza ne Maliyamu

³⁸Awo Yesu n'abayigirizwa be nga bali ku lugendo lwabwe, ne batuuka mu kabuga akamu, omukazi erinnya lye Maliza n'asembeza Yesu mu maka ge.

³⁹Yalina muganda we erinnya lye Maliyamu. N'atuula awo wansi ku bigere bya Yesu, ng'awuliriza ebigambo Yesu bye yali ayogera.

⁴⁰Naye Maliza yali yeetawula mu mirimu ng'ategekera abagenyi, n'ajja awali Yesu n'amugamba nti, "Mukama wange, tofaayo ng'olaba muganda wange andekedde emirimu nzekka?"

⁴¹Naye Mukama waffe n'amuddamu nti, "Maliza, Maliza, ebintu ebikutawaanya bingi,

⁴²naye waliwo ekintu kimu kyokka ekyetaagibwa, Maliyamu alonze omugabo omulungi ogutagenda kumuggyibwako."

Lukka 11

Yesu Ayigiriza Okusaba

¹Awo olwatuuka Yesu ng'ali mu kifo ekimu ng'asaba, bwe yamaliriza, omu ku bayigirizwa be n'amugamba nti, "Mukama waffe, naawe tuyigirize okusaba nga Yokaana bwe yayigiriza abayigirizwa be."

²N'abagamba nti, "Bwe mubanga musaba mugambanga nti, "Kitaffe, Erinnya lyo litukuzibwe, obwakabaka bwo bujje.

³ Otuwenga buli lunaku emmere yaffe ey'olunaku.

⁴ Era otusonyiwe ebyonoono byaffe, nga naffe bwe tusonyiwa abatukolako ebisobyo. So totutwala mu kukemebwa.'"

⁵ Ate n'abagamba nti, "Singa omu ku mmwe alina mukwano gwe, n'ajja gy'ali ekiro mu ttumbi n'amugamba nti, 'Mukwano gwange, nkusaba ompoleyo emigaati esatu,

⁶ kubanga nfunye omugenyi, mukwano gwange avudde lugendo, naye sirina kyakulya kya kumuwa.'"

⁷ "Oli ali munda mu nju bw'ayanukula nti, 'Tonteganya. Twasibyewo dda, ffenna n'abaana bange twebisse. Noolwekyo siyinza kugolokoka kaakano ne mbaako kye nkuwa.'

⁸ Naye mbategeeza nti, Newaakubadde nga tagolokoka n'amuyamba nga mukwano gwe, naye, singa akonkona n'amwetayirira, alwaddaaki agolokoka n'amuwa by'amusabye.

⁹ "Bwe ntyo mbagamba nti, musabe munaaweebwa, munoonye mulizuula, mukonkone era munaggulirwawo.

¹⁰ Kubanga buli asaba, aweebwa, n'oyo anoonya, azuula, era n'oyo akonkona aggulirwawo.

¹¹ "Ani ku mmwe kitaawe w'omwana, omwana we ng'amusabye ekyennyanja, mu kifo ky'ekyennyanja n'amuwa omusota?"

¹² Oba ng'amusabye eggı n'amuwa enjaba?

¹³ Kale obanga mmwe ababi muwa abaana bammwe ebirungi, Kitammwe ali mu ggulu talisinga nnyo okubawa Mwoyo Mutukuvu abo abamusaba?"

Yesu ne Beeruzebuli

¹⁴ Lwali lumu Yesu n'agoba dayimooni ku musajja eyali tayogera. Dayimooni bwe yamuvaako, omusajja oyo n'ayogera, ekibiina ky'abantu ne beewuunya.

¹⁵ Naye abantu abamu ne bagamba nti, "Agoba baddayimooni, kubanga amaanyi g'akozesa agaggya wa Beeruzebuli omukulu wa baddayimooni!"

¹⁶ Abalala ne bamusaba akabonero akava mu ggulu nga bamugezesha.

¹⁷ Naye Yesu bwe yamanya ebirowoozo byabwe, kwe kubagamba nti, "Obwakabaka bwe bulwanagana bwokka, buba bwolekedde kuzikirira, amaka bwe gayawukanamu gokka ne gokka gasasika.

¹⁸ Noolwekyo, singa Setaani yeerwanyisa yekka obwakabaka bwe buyinza butya okuyimirirawo? Kubanga mugamba nti ngoba baddayimooni ku lwa Beeruzebuli.

¹⁹Era obanga Nze ngoba baddayimooni ku bwa Beeruzebuli kale abaana bammwe bo babagoba ku bw'ani? Be bagenda okubasalira omusango.

²⁰Naye obanga ngoba baddayimooni mu buyinza bwa Katonda, ekyo kikakasa nti obwakabaka bwa Katonda buzze gye muli.

²¹"Kubanga omuntu ow'amaanyi bw'akuuma amaka ge, nga yenna yeesibye ebyokulwanyisa eby'amaanyi, tewaba ayinza kumutwalako bintu bye.

²²Naye omuntu omulala amusinza amaanyi bw'amulumba amuggyako ebyokulwanyisa bye, bye yali yeesiga, n'atwala ebintu bye byonna, n'abigabira abalala.

²³"Oyo atali ku ludda lwange, mulabe wange, n'oyo atakuŋjaanyiza wamu nange asaasaanya.

²⁴"Omwovo ogutali mulongoofu bwe guva mu muntu guyita mu malungu nga gunoonya aw'okuwummulira. Bwe gubulwa, gugamba nti, 'Nzija kuddayo mu nnyumba mwe nava.'

²⁵Bwe guddayo gusanga ennyumba ng'eyereddwa era nga ntegeke.

²⁶Kyeguva gugenda ne gufunayo emyoyo emirala musanvu egigusingako obwonoonefu, ne giyingirira omuntu oyo. Kale embeera y'omuntu oyo ey'oluvannyuma n'ebeera mbi nnyo okusinga eyasooka."

²⁷Awo Yesu bwe yali ng'akyayogera ebigambo ebyo, omukazi eyali mu kibiina n'ayogerera waggulu nti, "Lulina omukisa olubuto olwakuzaala, n'amabeere kwe wayonka!"

²⁸Naye Yesu n'addamu nti, "Weewaawo, naye balina omukisa abo bona abawulira ekigambo kya Katonda ne bakigondera."

Akabonero ka Yona

²⁹Awo abantu bwe beeyongera okukuŋjaana abangi, Yesu n'abayigiriza ng'agamba nti, "Omulembe guno mulembe mubi. Gunoonya akabonero, naye tegujja kukaweebwa okuggyako akabonero aka Yona.

³⁰Kubanga Yona nga bwe yali akabonero eri abantu b'e Nineeve, n'Omwana w'Omuntu, bw'ajja okuba eri ab'omulembe guno.

³¹Era ku lunaku olw'okusalirako omusango, kabaka omukazi ow'omu bukiikaddyo alisaliza abantu ab'omulembe guno omusango okubasinga, kubanga yava ku nkomerero y'ensi okujja okuwuliriza amagezi ga Sulemaani, naye oyo asinga Sulemaani ali wano.

³²Abantu b'e Nineeve baliyimirira ne basaliza abantu b'omulembe guno omusango okubasinga, kubanga beenenya bwe baawulira okubuulira kwa Yona Naye laba asinga Yona ali wano."

Ettaala y'Omubiri

³³ “Omuntu takoleeza ttaala n’agikweka, oba n’agivuunikako ekibbo! Naye agiwanika ku kikondo ky’ettaala n’emulisiza bona abayingira basobole okulaba.

³⁴ Eriiso y’ettabaaza y’omubiri gwo. Eriiso bwe liba eddamu, n’omubiri gwo gwonna guba gujjuppe omusana. Naye eriiso bwe liba eddwadde, omubiri gwo gujjula ekizikiza.

³⁵ Noolwekyo weekuume ekizikiza kireme kugoba musana oguli mu ggwe.

³⁶ Singa omubiri gwo gwonna gujjula omusana, ne gutabaamu kizikiza n’akatono gujja kwakaayakana nga gwe bamulisizzaamu ettaala.”

³⁷ Awo Yesu bwe yali ng’akyayogera, Omufalisaayo n’amuyita okulya emmere mu maka ge, bw’atyo n’agenda n’ayingira n’atuula okulya.

³⁸ Naye Omufalisaayo eyamuyita bwe yalaba nga Yesu atandise okulya nga tasoose kunaaba mu ngalo, ne yeewuunya.

³⁹ Awo Mukama waffe n’amugamba nti, “Mmwe Abafalisaayo, munaaza kungulu ku kikopo ne ku ssowaani, naye nga munda wammwe mujudde omululu n’ebitali bya butuukirivu.

⁴⁰ Basirusiru mmwe eyakola ebweru si ye yakola ne munda?

⁴¹ Naye singa munaddirira ebiri munda ne mubiwaayo ng’ekiweebwayo, olwo buli kintu kinaaba kirongoofu eri Katonda.

⁴² “Zibasanze mmwe Abafalisaayo! Kubanga muwaayo ekimu eky’ekkumi ku buli kyonna kye mufuna, ne ku buli kika kya muddo oguwunyisa obulungi era oguwoomesa enva, naye ne mutassaayo mwoyo ku bwenkanya n’okwagala Katonda. Kirungi okukola ebyo byonna, naye era n’ebirala temusaanye kubiragajjalira.

⁴³ “Zibasanze mmwe Abafalisaayo! Kubanga mwagala nnyo okutuula ku ntebe ez’ekitiibwa mu makuŋjaaniro, era n’okulamusibwa mu butale ng’abantu babawa ekitiibwa.

⁴⁴ “Zibasanze! Kubanga muli ng’amalaalo, agatalabika abantu kwe batambulira ng’ekiri munda tebakimanyi.”

⁴⁵ Omu ku bannyonnyozi b’amateeka n’amwanukula nti, “Omuyigiriza bw’oyogera bw’otyo naffe oba ng’atuvumiddemu.”

⁴⁶ Yesu n’amuddamu nti, “Nammwe zibasanze abannyonnyozi b’amateeka! Kubanga mutikka abantu emigugu emizito egy’amateeka g’eddiini, so nga mmwe temusobola na kukwata na lugalo lwammwe ku migugu egyo.

⁴⁷ “Zibasanze! Kubanga muzimbira bannabbi ebijukizo, so nga bajjajjammwe be baabatta.

⁴⁸ Noolwekyo mulaga nga bwe muwagira ebikolwa bya bajjajjammwe eby'obutemu. Bo batta ate mmwe ne muzimba ebijukizo.

⁴⁹ Noolwekyo Katonda mu magezi ge, kyeyava agamba nti, ‘Ndibawereza bannabbi n'abatume, abamu balibatta n'abalala balibayigganya.’

⁵⁰ Era ab'omulembe guno kyemuliva muvunaanibwa olw'omusaayi gwa bannabbi bona okuvira ddala ku kutondebwa kw'ensi,

⁵¹ okuva ku musaayi gwa Aberi okutuuka ku musaayi gwa Zaakaliya, eyattirwa wakati w'ekyoto ky'ebiweebwayo ne yeekaalu. Mmwe ab'omulembe guno mbategeeza nti mugenda kuvunaanibwa olw'ebyo byonna.

⁵² “Zibasanze, mmwe abannyonnyozi b'amateeka! Kubanga mwafuna ekisumuluzo eky'amagezi naye mmwe bennyini ne mutayingira, ate ne muziyiza n'abalala okuyingira.”

⁵³ Yesu bwe yava mu nnyumba eyo, Abafalisaayo n'abannyonnyozi b'amateeka ne batandika okumuteganya n'okumukambuwalira ennyo n'okumubuuza ebibuzzo bingi awatali kusalako,

⁵⁴ nga bamutega bamukwase mu bigambo kwe banaasinziira okumukwata.

Lukka 12

Ebirabula n'Ebigumya

¹ Mu kiseera ekyo ekibiina ky'abantu bangi nnyo, ne bakunjaana n'okulinnyaganako ne balinnyaganako. Awo Yesu n'akyukira abayigirizwa be, n'abalabula ng'agamba nti, “Mwekuume ekizimbulukusa bwe bannanfuusi bw'Abafalisaayo.

² Tewali ekyakisibwa ekitalimanyibwa, newaakubadde ekyakwekebwaa ekitalizuulibwa.

³ Noolwekyo bye mwogeredde mu kizikiza biriwulirwa mu musana, n'ebyo bye mwogedde mu kaama, nga muli mu kisenge n'enzigi nga nzigale, bigenda kulangirirwa ku busolya bw'ennyumba.

⁴ “Kaakano mikwano gyange, temubatyanga abo abatta omubiri, naye ne batabaako kirala kye bayinza kukola.

⁵ Naye nzia kubalaga gwe musaanidde okutya. Mutyenga oyo alina obuyinza okutta ate n'okusuala mu ggeyeena. Weewaawo mbagamba nti oyo gwe musaanye okutyanga.

⁶Enkazaluggya ettaano tezigula sente bbiri zokka? Naye Katonda tazeerabira wadde emu bw'eti.

⁷Era amanyi enviiri eziri ku mutwe gwo nga bwe zenkana obungi. Temutya kubanga mmwe muli ba muwendo nnyo okusinga enkazaluggya ennyingi.

⁸ “Era mbategeeza nti buli anjatula mu maaso g'abantu, n'Omwana w'Omuntu, alimwatula mu maaso ga bamalayika ba Katonda.

⁹Naye oyo anneegaanira mu maaso g'abantu, n'Omwana w'Omuntu alimwegaanira mu maaso ga bamalayika ba Katonda.

¹⁰Na buli muntu alyogera ekigambo ku Mwana w'Omuntu alisoniyibwa, naye oyo alivvoola Mwoyo Mutukuvu tagenda kusonyiyibwa.

¹¹ “Bwe banaabatwalanga mu makuŋjaaniro, ne mu maaso g'abafuzi ne mu b'obuyinza temweraliikiriranga kye mulyogera mu kuwoza,

¹²kubanga Mwoyo Mutukuvu agenda kubawa eky'okwogera mu kiseera ekyo kyennyini.”

¹³Awo omuntu omu mu kibiina n'avaayo n'agamba Yesu nti, “Omuyigiriza, gamba muganda wange angabanyize ku by'obusika bwaffe.”

¹⁴Naye Yesu n'amuddamu nti, “Owange, ani eyanfuula omulamuzi wammwe oba ow'okubamaliranga empaka zammwe?”

¹⁵N'abagamba nti, “Mwekuume! Temululunkananga. Kubanga obulamu bw'omuntu tebugererwa ku bugagga bw'abeera nabwo.”

¹⁶Awo n'abagerera olugero luno nti, “Waaliwo omusajja omugagga eyalina ennimiro n'abaza ebibala bingi.

¹⁷N'alowooza munda mu ye ng'agamba nti, ‘Nnaakola ntya? Kubanga sirina we nnaakuŋjaanyiza bibala byange?’

¹⁸ “Kwe kugamba nti, ‘Ntegedde kye nnaakola, nzija kumenyawo amawanika gange gano, nzimbewo agasingako obunene! Omwo mwe nnaakuŋjaanyiza ebibala byange byonna n'ebintu byange.

¹⁹Era nzija kugamba emmeeme yange nti, “Emmeeme, weeterekedde bingi mu mawanika go okukuyisa mu myaka mingi egijja. Wummula, olye, onywe era weesanyuse!”’

²⁰ “Naye Katonda n'amugamba nti, ‘Musirusiru ggwe! Ekiro kino emmeeme yo eneekuggibwako. Kale ebyo bye weetegekedde binaaba by'ani?’

²¹ “Bwe kityo bwe kiriba eri buli muntu eyeeterekera, so nga mwavu eri Katonda.”

Temweraliikiriranga

²²Awo Yesu n'agamba abayigirizwa be nti, "Noolwekyo mbagamba nti, Temweraliikiriranga bya bulamu bwammwe oba mmere gye munaalya oba engoye ez'okwambala.

²³Kubanga omwoyo gusinga wala emmere n'omubiri gusinga ebyambalo.

²⁴Mulowooze ku namujjoona, tezisiga so tezikungula, era tezirina na mawanika mwe zitereka mmere yaazo, naye Katonda aziriisa. Naye mmwe muli ba muwendo nnyo okukira ennyonyi ezo!

²⁵Ani ku mmwe bwe yeeraliikirira, ayinza okwongerayo obulamu bwe akatundu n'akamu?

²⁶Obanga temusobola kukola kantu katono ng'ako, kale kikugasa ki okweraliikirira ebintu ebirala?

²⁷ "Mutunuulire amalanga bwe gakula! Tegategana wadde okulanga ewuzi z'engoye, naye mbategeeza nti ne Sulemani mu kitibwa kye kyonna teyagenkana mu kwambala.

²⁸Kale, obanga Katonda ayambaza bw'atyo omuddo ogw'omu nsiko, ogw'ekiseera obuseera ogubaawo leero ate enkeera ne gwokebwa mu kyoto, naye ate talisingawo nnyo okwambaza mmwe ab'okukkiriza okutono!

²⁹Temunoonyanga kye munaalya oba kye munaanywa, era temweraliikiriranga n'akatono.

³⁰Kubanga ebintu ebyo byonna amawanga ge biyaayaanira, naye Kitammwe amanyi nga mubyetaaga.

³¹Naye munooonye obwakabaka bwe, n'ebintu ebyo mulibyongerwako.

³² "Temutya, mmwe ekisibo ekitono, kubanga Kitammwe asiimye okubawa obwakabaka.

³³Mutunde ebintu byammwe, ensimbi ze muggyamu muzigabire abo abeetaaga, mwetungire ensawo ezitakaddiwa era mweterekere mu ggulu mu tterekero eritaggwaamu bintu, omubbi gy'atasembera wadde ennyenje gye zitayoononera.

³⁴Kubanga obugagga bwo gye buli, n'omutima gwo gye gunaabeeranga.

³⁵ "Mube beetegefu olw'obuweereza, era mukuumi ettabaaza zammwe nga zaaka.

³⁶Mube ng'abasajja abalindirira mukama waabwe; bw'akomawo okuva mu mbaga y'obugole, n'akonkona banguwa okumuggulirawo oluggi.

³⁷Balina omukisa abaddu abo, mukama waabwe baalisanga nga batunula. Ddala ddala mbagamba nti, agenda kwambala atuuze abaddu abo ku mmeeza abagabule.

³⁸Balina omukisa abo, bw'alijja mu kisisimuka ekyokusatu, baalisanga nga batunula.

³⁹ "Naye mutegeere kino: singa ssemaka amanya essaawa omubbi w'anaayingirira okumenya ennyumba ye, teyandiganyizza mubbi kumuyingirira.

⁴⁰Noolwekyo mubeere beetegefu. Kubanga Omwana w'Omuntu, ajjira mu kiseera kye mutamulowooolezaamu."

⁴¹Awo Peetero n'amubuuza nti, "Mukama waffe, olugero luno olugeredde ffe, oba bona?"

⁴² Mukama waffe n'addamu nti, "Omuweereza oyo omwesigwa era ow'amagezi ye aluwa mukama we gw'alikwasa obuvunaanyizibwa obw'okulabirira abawereza be n'okugaba emmere mu kiseera ekituufu?

⁴³Alina omukisa mukama we bw'alikomawo gw'alisanga ng'atuukiriza bulungi emirimu gye.

⁴⁴Ddala ddala mbagamba nti mukama we alimukwasa okulabirira ebintu bye byonna.

⁴⁵Naye singa omuddu oyo alowooza mu mutima gwe nti, 'Mukama wange ajja kulwawo okudda,' n'adda ku baweereza banne, n'abakuba, n'ebiseera bye n'abimala mu kulya ne mu kunywa ne mu kutamiira,

⁴⁶mukama we agenda kudda mu kiseera ky'atamusuubira, amubonereze, era amusuule eyo abatakkiriza gye bali.

⁴⁷ "Omuweereza oyo eyamanya mukama we by'ayagala akole, kyokka ye n'atabikola agenda kuweebwa ekibonerezo kinene.

⁴⁸Naye ataamanya n'akola ebisaanidde okumukubya alikubwa kitono. Oyo aweebwa ebingi alisuubirwamu bingi, n'oyo gwe basigira ebingi, alivunaanyizibwa bingi okusingawo.

⁴⁹ "Najja kuleeta muliro ku nsi, era kyandibadde kirungi singa gukoledde!

⁵⁰Nninayo okubatizibwa kwe ndibatizibwa, naye nzija kuba mu nnaku nnyingi nga tekunnaba kutuukirizibwa!

⁵¹Mulowooza nti najja kuleeta mirembe ku nsi? Mbategeeza nti sajja kuleeta mirembe wabula okwawukana.

⁵²Okuva kaakano amaka gajjanga kwawukanamu, ag'abantu abataano, abasatu ku bo nga bawakanya ababiri, n'ababiri nga bawakanya abasatu.

⁵³Kitaawe w'omwana alyawukana ne mutabani we, n'omwana n'ayawukana ne kitaawe, ne nnyina w'omwana alyawukana ne muwala we n'omuwala n'ayawukana ne nnyina, ne nnyazaala balyawukana ne muka mwana we ne muka mwana n'ayawukana ne nnyazaala we."

Okunnyonnyola Ebiriwo

⁵⁴Awo Yesu n'akyukira ekibiina n'abagamba nti, "Bwe mulaba ebire nga byekulumulula ebugwanjuba, amangwago mugamba nti, 'Enkuba egenda kutonnya,' era n'etonnya.

⁵⁵Ate empewo bw'ekunta ng'eva ku bukiikkaddyo, mugamba nti, 'Leero akasana kajja kwaka nnyo,' era bwe kiba.

⁵⁶Bannanfuusi mmwe! Musobola bulungi okunnyonnyola obubonero obuli ku nsi ne mu bbanga, muyinza mutya obutamanya obubonero obw'omu kiseera kino?

⁵⁷"Lwaki temwesalirawo ekyo kye mulaba nga kituufu?

⁵⁸Bw'obanga ogenda n'akuwawaabira mu mbuga z'amateeka, gezaako okumusaba ensonga zammwe muzimalire mu kkubo nga tezinnatuuka wa mulamuzi, talwa kukutwala wa mulamuzi, n'omulamuzi n'akuwaayo eri omuserikale, n'omuserikale n'akusibira mu kkomera.

⁵⁹Kubanga nkutegeeza nti togenda kuvaayo okutuusa nga ne sente esembayo omaze okugisasula."

Lukka 13

Kwenenya oba Kuzikirira

¹Mu kiseera ekyo ne wabaawo abategeeza Yesu nga Piraato bwe yatta Abagaliraaya, omusaayi gwabwe n'agutabula mu biweebwayo byabwe.

²Yesu n'abagamba nti, "Mulowooza nti Abagaliraaya abo baali boonoonyi nnyo okusinga Abagaliraaya abalala bonna, balyoke baboneebone batyo?

³Nedda! Mbagamba nti bwe muteenenya nammwe mugenda kuzikirira ng'abo bwe baazikirira.

⁴Ate bali ekkumi n'omunaana omunaala gwa Sirowamu be gwagwako, ne gubatta, mulowooza be baali basinga obwonoonyi okusinga abantu abaabeeranga mu Yerusaalemi bonna?

⁵Nedda! Mbagamba nti bwe muteenenya nammwe bwe mugenda okuzikirira bwe mutyo."

Olugero Iw'Omutiini Ogutabala

⁶ Awo Yesu n'abagerera olugero luno nti, "Waaliwo omusajja eyasimba omutiini mu nnimiro ye. N'agendangayo okugulambula okulaba obanga gubazeeko ebibala, n'asanga nga tegubazeeko kibala na kimu.

⁷ Kyeyava alagira omusajja we amulimira ennimo eyo nti, 'Omuti guno gutemewo. Kubanga gino emyaka esatu nga nambula omuti guno, naye tegubalangako kibala na kimu. Gwemalira bwereere ettaka lyaffe.'

⁸ Omulimi we n'addamu nti, 'Mukama wange, tuguleke tetugutemawo. Ka tuguweeyo omwaka gumu, nzia kugutemeratemera era nguteekoko n'ebigimusa.

⁹ Bwe gulibala ebibala gye bujja, kiriba kirungi! Naye bwe gutalibala, olwo noolyoka ogutemawo.'"

Yesu Awonya Omukazi Omulema ku Ssabbiiti

¹⁰ Awo ku lunaku lwa Ssabbiiti Yesu yali ng'ayigiriza mu kkuññaaniro,

¹¹ ne wabaawo omukazi eyaliko omuzimu ogwamulwaza okumala emyaka kkumi na munaana, nga yeewese emirundi ebiri era nga tasobola kwegolola.

¹² Yesu n'amulaba, n'amuyita n'amugamba nti, "Mukazi wattu, owonyezeddwa obulwadde bwo."

¹³ N'amukwatako. Amangwago omukazi ne yeegolola n'ayimirira bulungi, n'atendereza Katonda!

¹⁴ Naye omukulembeze w'ekkuññaaniro eryo n'anyiiga nnyo, kubanga Yesu yawonya ku lunaku lwa Ssabbiiti. N'agamba ekibiina nti, "Mu wiiki mulimu ennaku mukaaga, muyinza okujjanga mu nnaku ezo ne muwonyezebwa, naye so si ku Ssabbiiti!"

¹⁵ Mukama waffe n'amuddamu nti, "Bannanfuusi mmwe! Buli omu ku mmwe tasumulula nte ye oba ndogoyi ye ku Ssabbiiti n'agitwala okunywa amazzi?

¹⁶ Naye si kituufu omukazi ono, muwala wa Ibulayimu, okusumululwa ku Ssabbiiti mu busibe bwa Setaani bw'amazeemu emyaka ekkumi n'omunaana?"

¹⁷ Bwe yayogera bw'atyo abaali bamuwakanya bona ne baswala, naye ekibiina ky'abantu bona ne bajjula essanyu olw'ebintu eby'ekitalo bye yakola.

Olugero Iw'Akaweke ka Kaladaali

¹⁸ Awo Yesu kyeyava abayigiriza ng'agamba nti, "Obwakabaka bwa Katonda bufaanana na ki? Mbugeraageranye na ki?

¹⁹ Bufaanana na kaweke ka kaladaali omusajja ke yasiga mu nnimiro ye. Kaamera ne kavaamu omuti, n'enneyonyi ez'omu bbanga ne zituula ku matabi gaagwo."

²⁰ Ate era n'agamba nti, "Obwakabaka bwa Katonda mbugeraageranye na ki?

21Bulinjanga ekizimbulukusa omukazi kye yatabulira mu bipimo by'obuwunga bisatu okutuusa obuwunga bwonna lwe bwazimbulukuka."

Omulyango Omufunda

22Awo Yesu n'ayita mu bibuga ne mu bubuga; yagendanga ayigiriza ng'ali ku lugendo lwe ng'agenda e Yerusaalemi.

23Ne wabaawo eyeewuunya nti, "Mukama waffe, abantu abalirokolebwa nga baliba batono?" Yesu n'addamu nti,

24"Mufube okuyingira mu mulyango omufunda kubanga mbagamba nti, bangi balyagala okuyingira naye tebalisobola.

25Nannyinimu bw'alisisituka n'aggalawo oluggi, mugenda kubeera bweru nga mukonkona nga bwe mwegayirira nti, 'Mukama waffe, tuggulirewo.' Agenda kubaanukula nti, 'Sibamanyi, ne gye muva simanyiiyo.'

26Nammwe muliddamu nti, 'Twalyanga naawe era twanywanga ffenna, era wayigirizanga mu nguudo z'ewaffe.'

27Naye alibaddamu nti, 'Sibamanyi, ne gye muva simanyiiyo. Munviire mwenna abakozi b'ebitali bya bituukirivu.'

28Era waliba okukuba ebiwoobe n'okuluma obujiji bwe muliraba Ibulayimu, ne Isaaka, ne Yakobo ne bannabbi bona nga bali mu bwakabaka bwa Katonda, naye nga mmwe musuulibbwaa ebweru.

29Kubanga abantu baliva ebuvanjuba n'ebugwanjuba, ne bava ne mu bukiikkono ne mu bukiikkaddyo, ne batuula ku mmeeza mu bwakabaka bwa Katonda.

30Era laba, abooluvannyuma baliba aboolubereberye, n'aboolubereberye baliba abooluvannyuma."

Yesu Anakuwalira Yerusaalemi

31Mu kiseera ekyo ne wabaawo abamu ku Bafalisaayo abajja eri Yesu ne bamugamba nti, "Tambula ove wano, kubanga Kerode ayagala kukutta."

32Yesu n'abaddamu nti, "Mugende mugambe ekibe ekyo nti laba ngoba baddayimooni, n'okuwonya abalwadde, leero, n'enkyo, era ku lunaku olwokusatu ndimaliriza.

33Naye leero, n'enkyo, ne luli nsaana mbeere ku lugendo lwange nga ntambula, kubanga tekisoboka nnabbi okufiira ebweru wa Yerusaalemi!

34 "Ggwe Yerusaalemi, ggwe Yerusaalemi, atta bannabbi, n'okuba amayinja abo ababa batumiddwa gy'oli, emirundi nga mingi nnyo gye njagadde okukunjanya abaana bo ng'enkoko bw'ekunjanya obwana bwayo mu biwaawaatiro byayo, naye n'ogaana!"

³⁵Kale laba ennyumba yammwe erekeddwa awo. Era mbagamba nti temugenda kuddayo kundaba okutuusa ekiseera lwe kirituuka ne mugamba nti, ‘Aweereddwa omukisa oyo ajja mu linnya lya Mukama.’”

Lukka 14

Yesu Awonya Omulwadde w'Entumbi ku Ssabbiiti

¹Awo olwatuuka ku lunaku lwa Ssabbiiti, Yesu bwe yali ng'agenze okulya mu nnyumba ey'omu ku bakulembeze b'Abafalisaayo, abantu bona abaaliwo ne bamwekaliriza amaaso.

²Waaliwo omusajja omulwadde w'entumbi ng'atudde okwolekera Yesu we yali.

³Awo Yesu n'abuuza Abafalisaayo n'abannyonnyozi b'amateeka nti, “Kikkirizibwa okuwonya ku lunaku lwa Ssabbiiti, oba nedda?”

⁴Yesu yalaba tebazzeemu, kwe kukwata omusajja omulwadde ku mukono, n'amuwonya, n'amugamba yeetambulire.

⁵N'alyoka abakyukira n'ababuuza nti, “Ani ku mmwe singa omwana we agwa mu kinnya oba ente ye n'egwa mu kinnya ku lunaku lwa Ssabbiiti, atamuggyayo oba atagiggyaayo mangwago?”

⁶Era ne batamuddamu.

Okwetoowaza ku Bugenyi

⁷Awo Yesu bwe yalaba abagenyi abaayitiba n'abagerera olugero ng'agamba nti,

⁸“Bwe bakuyitanga ku mbaga ey'obugole, teweetuuzanga mu kifo ekisinga okuba eky'ekitiibwa kubanga singa ejjayo omugenyi akusinga ekitiibwa,

⁹eyakuyise ku mbaga ajja kumuleeta awo w'otudde akugambe nti, ‘Viira ono atuule awo w'otudde.’ Noolyoka ositukawo ng'oswadde ogende onoonye ekifo ekirala emabega.

¹⁰Naye bwe bakuyitanga, otuulanga mu kifo eky'emabega, kale nno eyakuyise bw'ajja alyoke akugambe nti, ‘Mukwano gwange, jjangu nkutwale mu kifo eky'omu maaso.’ Noolyoka osituka nga ne bagenyi banno bakuwa ekitiibwa.

¹¹Kubanga buli muntu eyeegulumiza alitoowazibwa; n'oyo eyeetoowaza aligulumizibwa.”

¹²Awo Yesu n'akyukira eyamuyita n'amugamba nti, “Bw'otegekanga ekyemisana oba ekyeggulo, toyitanga mikwano gyo, wadde baganda bo, wadde ab'olulyo lwo, wadde baliraanwa bo abagagga; kubanga bw'okola otyo nabo bayinza okukuyita olulala ne baba ng'abakusasula.

¹³Naye bw'ofumbanga ekijjulo, oyitanga abaavu, n'abagongobavu, n'abalema ne bamuzibe.

¹⁴Oliweebwa omukisa kubanga bo tebalina kya kukusasula. Olisasulibwa mu kuzuukira kw'Abatuukirivu."

¹⁵Omúku bagenyi abaali batudde ku mmeeza bwe yawulira ebigambo ebyo n'agamba Yesu nti, "Alina omukisa oyo aliryá embaga mu bwakabaka bwa Katonda."

¹⁶Yesu n'amuddamu nti, "Waaliwo omusajja eyateekateeka okufumba embaga ennene, n'ayita abantu bangi.

¹⁷Bwe yamala okutegeka, n'atuma omuddu we agende ategeeze abaayitibwa nti, 'Mujje byonna biwedde okutegeka.'

¹⁸"Naye bona ne batandika okwewolereza; eyasooka n'agamba nti, 'Nnaakagula ennimiro noolwekyo njagala kugenda kugirambula. Nkusaba onsonyiwe, nneme kujja.'

¹⁹"Omulala n'agamba nti, 'Nnakagula emigogo gy'ente ezirima etaano njagala kuzigezaamu. Nkusaba onsonyiwe nneme kujja.'

²⁰"Omulala n'agamba nti, 'Nnawasizza omukazi noolwekyo sisobola kujja.'

²¹"Omuddu n'akomawo n'ategeeza mukama we ng'abagenyi be yayita bwe bagambye. Mukama we n'anyiiga, n'amulagira agende mangu mu nguudo ez'omu kibuga ne mu bikubo, ayite abaavu n'abagongobavu, n'abalema, ne bamuzibe.

²²"Omuddu n'agamba mukama we nti, 'Bonna mbayise nga bw'ondagidde, naye era mu kisenge ky'embaga mukyalimu ebifo.'

²³"N'agamba omuddu we nti, 'Genda mu nguudo ez'omu byalo ne mu bukubo obutono okubirize b'onoosangayo bajje, ennyumba yange ejjule.'

²⁴Era mbategeeza nti tewali n'omu ku abo be nayita aliryá ku mbaga yange.'"

²⁵Awo ebibiina by'abantu bangi nnyo bwe baali bagoberera Yesu, n'akyuka n'abagamba nti,

²⁶"Omuntu bw'anajjanga gye ndi, n'atakyawa kitaawe, oba nnyina, oba mukyalá we n'abaana be, oba baganda be oba bannyina, newaakubadde obulamu bwe ye yennyini, tayinzenga kuba muyigirizwa wange.

²⁷Era oyo ateetikka musaalaba gwe n'angoberera, tayinza kuba muyigirizwa wange.

²⁸ “Singa omu ku mmwe ayagala okuzimba omulungooti, tamala kutuula n’abalirira omuwendo omulimu ogwo gwe gunaatwala, n’alaba obanga ensimbi ezeetaagibwa azirina okugumaliriza?

²⁹ Kubanga singa tagumaliriza n’akoma ku musingi gwokka, buli agulaba atandika okumusekerera,

³⁰ nga bw’agamba nti, ‘Omuntu ono yatandika okuzimba naye n’alemwa okumaliriza!’

³¹ “Oba kabaka ki agenda okulwana ne kabaka omulala amulumba, tamala kutuula n’abalirira obanga n’abaserikale omutwalo ogumu b’alina, asobola okulwanyisa kabaka omulala ajja okumulumba n’abaserikale emitwalo ebiri?

³² Bw’afumiitiriza n’alaba nga tajja kusobola, atumira kabaka oli omubaka, ng’akyaliko wala, okuteesa emirembe.

³³ Kale, buli muntu ku mmwe ateefiiriza byonna by’alina, tayinza kuba muyigirizwa wange.

³⁴ “Omunnyo mulungi, naye singa guggwaamu ensa, guzibwamu gutya obuka bwagwo?

³⁵ Guba tegukyalina mugaso n’akamu mu ttaka wadde ne mu bigimusa, noolwekyo gusuulibwa bweru. Alina amatu agawulira awulire.”

Lukka 15

Olugero Iw’Endiga Eyabula

¹ Awo abasolooza b’omusolo n’abakozi b’ebibi ne bakuŋjaanira eri Yesu okumuwuliriza.

² Naye Abafalisaayo n’abannyonnyozi b’amateeka ne beemulugunya nga bagamba nti Yesu akolagana n’abantu abalina ebibi, n’okulya n’alya nabo.

³ Yesu n’alyoka abagerera olugero luno ng’agamba nti,

⁴ “Singa omu ku mmwe abadde alina endiga kikumi, naye emu n’emubulako, taleka ziri ekyenda mu omwenda ku ttale n’agenda anoonya eri ebuze okutuusa Lw’agiraba?

⁵ Bw’agiraba, agisitula ku bibegabega bye n’agitwala eka ng’ajaguza.

⁶ Bw’atuuka eka ayita mikwano gye ne baliraanwa be bajje ng’agamba nti, ‘Munsanyukireko kubanga endiga yange eyabadde ebuze, erabise.’

⁷ Mu ngeri y’emu, mbagamba nti mu ggulu eribaayo essanyu lingi nnyo olw’omwonoonyi omu eyeenenyenza okusinga ekyenda mu omwenda abatuukirivu abateetaaga kwenenya.”

Olugero Iw’Ennoso Eyabula

⁸ “Oba mukazi ki alina ennoso ze kkumi, emu n’emubulako, atakoleeza ttaala n’anoonya mu buli kasonda konna ak’ennyumba, n’ayera n’ebuziizi yenna okutuusa lw’agiraba?

⁹ Bw’agiraba, ayita mikwano gye ne baliraanwa be n’abagamba nti, ‘Munsanyukireko, ennoso yange eyabadde ebuze ngirabye.’

¹⁰ Mbategeeza nti mu ngeri y’emu omukozi w’ebibi omu bwe yeenenya, bamalayika ba Katonda bajjula essanyu.”

Olugero Iw’omwana eyazaawa

¹¹ Awo Yesu n’abagamba nti, “Waaliwo omusajja eyalina batabani be babiri.

¹² Omuto n’agamba kitaawe nti, ‘Kitange, nkusaba ompe omugabo gwange ku bintu byo ogunsaanidde.’ Kitaawe n’abagabanyaiza ebintu byabwe.

¹³ “Waayitawo ennaku ntono, omwana omuto n’asibako ebintu bye byonna ne yeetambulira, n’agenda mu nsi ey’ewala. Bwe yatuuka eyo n’asaasaanya ebintu bye ne yeemalira mu binyumu.

¹⁴ Mu kiseera ekkyo we yamalirawo ebintu bye byonna, n’enjala nnyingi we yagwira mu nsi omwo mwe yali, n’asiibanga era n’asulanga enjala.

¹⁵ N’agenda abeere ew’omwami omu ow’omu nsi omwo n’amusaba amuwe omulimu, n’amusindika gye yalundiranga embizzi azirabirirenga.

¹⁶ Omulenzi ne yeegombanga okulyanga ebikuta by’embizzi, naye ne watabaawo amuwa kantu konna.

¹⁷ “Naye bwe yeddamu n’agamba nti, ‘Eka ewaffe, abasajja abapakasi aba kitange bafuna emmere nnyingi ne balya ne balemwa, naye nze ndi wano nfiira wano enjala!

¹⁸ Nnaagenda eri kitange, mugambe nti, Kitange, nnyonoonye eri eggulu ne mu maaso go,

¹⁹ era sikuysaanira na kuyitibwa mwana wo. Nfunira omulimu mbeere ng’abapakasi bo.’

²⁰ Bw’atyo n’asitula n’addayo ewa kitaawe. “Naye bwe yali ng’akyaliko wala n’awaka, kitaawe n’amulengera ng’ajja, n’amusasira nnyo. Kitaawe ng’ajjudde amaziga n’amusisinkana, n’amugwa mu kifuba n’amunywegera.

²¹ Omwana n’agamba kitaawe nti, ‘Kitange, nnyonoonye eri eggulu ne mu maaso go. Sikuysaanira kuyitibwa mwana wo.’

²² “Naye kitaawe n’alagira abaddu be nti, ‘Mwanguwe mangu! Muleete ekkanzu esinga obulungi mugimwambaze. Mumunaanike empeta ku ngalo ye, mumwambaze n’engatto!

²³Era mugende mutte ennyana eya ssava. Tufumbe embaga nnene tujaguze.

²⁴Kubanga mutabani wange ono yali afudde kaakano mulamu, yali azaaye laba wuuno azaawuse.' Embaga n'etandika.

²⁵"Mu kiseera ekyo omwana omukulu yali ali mu nnimiro. Awo bwe yali akomawo eka ng'asemberedde ennyumba, n'awulira ennyimba ez'amazina.

²⁶N'ayita omu ku baweereza n'amubuuza bwe bibadde.

²⁷Omuweereza n'amutegeeza nti, 'Muganda wo akomyewo, era kitammwe amuttidde ennyana eya ssava olwokubanga muganda wo akomyewo nga mulamu bulungi.'

²⁸"Muganda we omukulu n'anyiiga, n'okuyingira n'atayingira mu nnyumba. Naye kitaawe n'ajja n'amwegayirira ayingire,

²⁹naye omwana n'amuddamu nti, 'Emyaka gino gyonna nkukoledde, era tewali mulundi na gumu Lwe wali ondagidde ne nkujemera. Naye tompangayo wadde akabuzi akato neesanyuseeko ne mikwano gyange.

³⁰Naye kale mutabani wo olukomyewo ng'ebintu byo bye wamuwa amaze okubimalira mu bamalaaya, n'omuttira ennyana ensava.'

³¹"Kitaawe n'amuddamu nti, 'Laba mwana wange, tuli ffenna bulijo, era byonna bye nnina bibyo.

³²Kaakano kituufu okusanyuka n'okujaguza. Kubanga muganda wo, yali afudde, kaakano mulamu! Yali azaaye, wuuno azaawuse!"

Lukka 16

Omuwanika Omukalabakalaba

¹Awo Yesu n'agamba abayigirizwa be nti, "Waaliwo omusajja omugagga ng'alina omuwanika we amulabiririra ebintu bye. Ne wabaawo abaamuloopera nti omuwanika oyo yali asasaanya ebintu bye, ng'abidiibuuda.

²Mukama we n'amuyita n'amubuuza nti, 'Biki ebyo bye nkuwulirako? Kale genda otegeke lipoota y'ebintu byange nga bwe biri ogindeetere. Omulimu gukufudde.'

³"Omuwanika n'alowooza mu mutima gwe, nga yeebuuza nti, 'Kale kaakano nkole ntya? Mukama wange wuuno angoba ku mulimu. Sirina maanyi galima, n'okusabiriza kunkwasa ensonyi.

⁴Ekinaasobozesa abantu okunsembeza mu maka gaabwe, nga bwe ngobeddwa ku mulimu, nkifunye.'

⁵"N'agenda ng'ayita buli eyalina ebbanja ku mukama we. Gwe yasookerako n'amubuuza nti, 'Ebbanja mukama wange ly'akubanja lyenkana wa obunene?"

⁶ “Omusajja n’addamu nti, ‘Ammanja endebe z’omuzigo kikumi mu ataano.’ Omuwanika n’amugamba nti, ‘Kwako empapula zo kw’obanjirwa ogende owandiike endebe amakumi ataano.’

⁷ “Omuwanika n’adda ku wookubiri n’amubuuza nti, ‘Ggwe obanjibwa ki?’ “N’addamu nti, ‘Ebigera by’obuwunga bw’enjaano kikumi.’” “Omuwanika n’amugamba nti, ‘Kwako empapula zo kw’obanjirwa, owandiike endala osseeko ebigera kinaana.’

⁸ “Mukama we n’atenda nnyo omuwanika we atali mwesigwa olw’obukalabakalaba bwe. Kubanga abaana b’omulembe guno bagezigezi okusinga abaana b’omusana ab’omu mulembe gwabwe.”

Enkozesza y’Obugagga Entuufu

⁹ “Era mbategeeza nti mwefunire emikwano mu bugagga obutali butuukirivu, bwe buliggwaawo balyoke babasembeze mu weema ezitaggwaawo.

¹⁰ Omuntu omwesigwa mu kintu ekitono, abeera mwesigwa ne mu kinene; n’oyo ataba mwesigwa mu kitono era ne mu kinene taba mwesigwa.

¹¹ Kale obanga temwesigibwa mu bugagga obutali butuukirivu, ani agenda okubeesiga mu bugagga obw’amazima?

¹² Obanga toli mwesigwa ku by’omulala, kale ani alikwesiga n’akukwasa ebibyo?

¹³ “Tewali muddu ayinza kuweereza bakulu babiri. Kubanga alikyawako omu n’ayagala omulala, oba aliwlirako omu n’anyooma omulala. Toyinza kuweereza Katonda na mamona.”

Amateeka ga Musa n’Obwakabaka bwa Katonda

¹⁴ Awo Abafalisaayo, abaali abaluvu b’ensimbi, bwe baawulira ebigambo ebyo ne banyooma Yesu.

¹⁵ N’abagamba nti, “Mmwe mweraga mu bantu, naye Katonda amanyi emitima gyammwe. Okwerimbalimba kwammwe kubaweesa ekitiibwa mu maaso g’abantu, naye nga kya muzizo eri Katonda.

¹⁶ “Yokaana Omubatiza bwe yali nga tannabuulira, amateeka n’obubaka bwa bannabbi byabuulirwa. Naye okuva olwo obwakabaka bwa Katonda bubuulirwa, ne buli muntu ayitibwa abuyingiremu mu bwangu ddala.

¹⁷ Naye kyangu eggulu n’ensi okuggwaawo okusinga n’akatundu k’ennukuta emu ey’amateeka okuggwaawo.

¹⁸ “Omusajja yenna agoba mukazi we n’awasa omulala aba ayenze; n’oyo awasa omukazi agobeddwa, naye aba ayenze.”

Omugagga ne Laazaalo

¹⁹ Awo Yesu n'abagamba nti, "Waaliwo omusajja omugagga ennyo, eyayambalanga engoye ez'effulungu ne linena era bulijjo ng'abeera mu masanyu era ng'alya ebyassava.

²⁰ Waaliwo n'omusajja omwatu erinnya lye nga ye Laazaalo nga mulwadde ng'ajjudde amabwa ku mubiri gwe, eyateekebwanga ku mulyango gw'omusajja omugagga.

²¹ Laazaalo ne yeegombanga okulya obukunkumuka obwagwanga wansi nga buva ku mmeeza ya nnaggagga. N'embwa zajjanga ne zikomberera amabwa ga Laazaalo.

²² "Ekiseera kyatuuka omusajja omwatu n'afa, bamalayika ne bamutwala mu kifuba kya Ibulayimu. Oluvannyuma n'omugagga naye n'afa, n'aziikibwa.

²³ Naye ng'ali eyo mu magombe mu kubonaabona, n'atunula waggulu n'alaba Laazaalo ng'ali mu kifuba kya Ibulayimu.

²⁴ N'akoowoola nti, 'Kitange Ibulayimu, nsaasira, ontumire Laazaalo oyo annyike olugalo Lwe mu mazzi, nkombeko, naye olulimi lumbabuukirira nnyo mu muliro guno ogumbonyaabonya!'

²⁵ "Naye Ibulayimu n'amuddamu nti, 'Mwana wange, jjukira nga mu biseera byo ng'okyali mulamu wafuna ebirungi bye weetaaganga, naye nga Laazaalo ye afuna bibi. Kaakano Laazaalo asanyusibwa naye gwe oli mu kubonaabona.

²⁶ Ate n'ekirala, wakati waffe nammwe waliwo olukonko luwanvu nnyo olutwawula, omuntu ali eno bw'ayagala okujja eyo akoma awo ku mugo gwalwo, n'oyo ali eyo ayagala okujja eno tasobola.'

²⁷ "Awo nnaggagga n'ayaziirana nti, 'Ayi kitange Ibulayimu, nkwegayiridde ntumira Laazaalo oyo mu maka ga kitange,

²⁸ kubanga nninayo abooluganda bataano, abandabulire, bwe balifa baleme kujja mu kifo kino ekirimu okubonaabona okwenkanidde wano.'

²⁹ Naye Ibulayimu n'amugamba nti, 'Balina Musa ne bannabbi, kale bawulire abo.'

³⁰ "Omugagga n'addamu nti, 'Nedda, kitange Ibulayimu, singa batumirwa omuntu ng'ava mu bafu, bajja kwenenya.'

³¹ "Awo Ibulayimu n'amugamba nti, 'Obanga tebagondera Musa ne bannabbi, newaakubadde alizuukira okuva mu bafu talibakkirizisa.'"

Lukka 17

Ekibi, Okukkiriza, Omulimu

¹ Awo Yesu n'agamba abayigirizwa be nti, "Ebikemo ebireetera abantu okwonoona tebiyinza butajja, naye zimusenze omuntu oyo abireeta.

² Ekyandisinze kwe kusiba olubengo mu bulago bwe n'asuulibwa mu nnyanja okusinga okwesittaza omu ku baana bano abato.

³ Mwekuume. "Muganda wo bw'ayonoonanga, omunenyanga; era singa yeenenya omusonyiwanga.

⁴ Ne bw'akusobyanga emirundi omusanvu mu lunaku olumu, naye buli mulundi n'ajja gy'oli n'akwenenyeza, musonyiwenga."

⁵ Awo abatume ne bagamba Mukama waffe nti, "Twongereko okukkiriza."

⁶ Mukama waffe n'abagamba nti, "Singa okukkiriza kwammwe kuba ng'akaweke ka kaladaali, mwandigambye omuknenene guno nti, 'Siguka ogwe mu nnyanja,' era ne gubagondera.

⁷ "Naye ani ku mmwe, ng'omuddu we yaakakomawo okuva okulima oba okulunda endiga, amugamba nti, 'Jjangu mangu otuule ku mmere?'

⁸ Tamugamba nti, 'Teekateeka emmere yange, weerongoose olabike bulungi, olyoke ompeereze nga ndya era nga nnywa, bwe nnaamala naawe n'onywa era n'olya emmere yo?'

⁹ Mulowooza nti Mukama w'omuweereza oyo amwebaza olw'okugondera bye yalagirwa okukola?

¹⁰ Nammwe bwe mutyo bwe mumalanga okutuukiriza ebyo ebyabagambibwa okukola, mugambenga nti, 'Ffe abaddu bo abatasanira tukoze omulimu gwaffe ogutugwanidde.'

Abagenge Kkumi Bawonyezebwa

¹¹ Awo Yesu bwe yali yeeyongerayo mu lugendo lwe ng'agenda e Yerusaalemi, n'akwata ekkubo eriyita wakati wa Ggaliraaya ne Samaliya.

¹² Awo bwe yayingira mu kabuga akamu, abasajja kkumi nga bona bagenge ne bajja okumusisinkana. Ne bayimirira walako

¹³ ne bakoowoola mu ddoboozi ery'omwanguka nti, "Yesu, Mukama waffe, tukwatirwe ekisa!"

¹⁴ Yesu bwe yabalaba n'abagamba nti, "Mugende mweyanjule eri bakabona." Bwe baali nga bagenda ne bawona ne baba balongoofu.

¹⁵ Omu ku bo bwe yalaba ng'awonye n'akomawo eri Yesu nga bw'aleekaanira waggulu ng'atendereza Katonda.

¹⁶ N'agwa wansi ku bigere bya Yesu ng'amwebaza. Omusajja oyo yali Musamaliya.

¹⁷Yesu n'agamba nti, "Ekkumi bona tebaawonyezebwa? Omwenda bo baluwa?

¹⁸Tebayinzizza kudda kutendereza Katonda wabula munnaggwanga ono yekka y'akomyewo?"

¹⁹Awo Yesu n'amugamba nti, "Situka weetambulire, okukkiriza kwo kukuwonyezza."

Okujja kw'Obwakabaka bwa Katonda

²⁰Awo Abafalisaayo ne babuuza Yesu nti, "Obwakabaka bwa Katonda bulija ddi?" Yesu n'abaddamu nti, "Obwakabaka bwa Katonda tebulabika nga bujja,

²¹era abantu tebagenda kugamba nti, 'Laba buubuno wano,' oba nti, 'Buubuli wali,' kubanga obwakabaka bwa Katonda buli mu mmwe."

²²Oluvannyuma n'agamba abayigirizwa be nti, "Ekiseera kijja lwe mulyegomba okulaba olumu, ku nnaku z'Omwana w'Omuntu, naye temulirulaba.

²³Balibagamba nti lwe luno era nti lwe luli temugendanga era temubagobereranga.

²⁴Kubanga ng'eggulu bwe limyansiza ku ludda olumu olw'eggulu ate ne limyansiza ku ludda olulala olw'eggulu, bw'atyo bw'aliba Omwana w'Omuntu ku lunaku lwe,

²⁵Naye okusooka kimugwanira okubonaabona mu bintu bingi, n'okugaanibwa, abantu ab'omulembe guno.

²⁶"Nga bwe kyali mu biseera bya Nuuwa, era bwe kityo bwe kiriba ne mu biseera by'Omwana w'Omuntu.

²⁷Abantu baali balya nga banywa nga bawasa era nga bafumbirwa okutuusa ku lunaku Nuuwa lwe yayingira mu lyato. Olwo amataba ne gajja ne gasaanyaawo buli kintu.

²⁸"Era kiriba nga bwe kyali mu nnaku za Lutti. Abantu baali balya nga banywa, nga bagula era nga batunda, nga balima era nga bazimba amayumba,

²⁹okutuusa ku lunaku Lutti lwe yava mu Sodomu. Olwo omuliro n'olunyata ne biyiika okuva mu ggulu ne bizikiriza buli kimu.

³⁰"Bwe bityo bwe biriba ku lunaku, Omwana w'Omuntu lw'alirabikirako.

³¹Ku lunaku olwo omuntu yenna aliba waggulu ku nju, takkanga mu nju munda kuggyamu bintu bye. N'abo abaliba mu nnimiro tebaddangayo eka okubaako ne bye banonayo.

³²Mujjukire mukazi wa Lutti!

³³Buli anoonya okuwonya obulamu bwe alibufiirwa, naye buli eyefiiriza obulamu bwe alibuwonya.

³⁴Mbagamba nti ku lunaku olwo abantu babiri baliba ku kitanda kimu, Omu alitwalibwa naye munne n'alekebwa.

³⁵Abantu babiri baliba basa ku lubengo, omu alitwalibwa naye munne alirekebwa.

³⁶Abasajja babiri baliba mu nnimiro, omu alitwalibwa naye munne alirekebwa."

³⁷Awo abayigirizwa be ne bamubuuza nti, "Mukama waffe, nga batwalibwa wa?" Yesu n'abaddamu nti, "Awaba ekifudde awo ensegwa we zirikuŋjaanira!"

Lukka 18

Olugero Iwa Nnamwandumu n'Omulamuzi

¹Awo Yesu n'agerera abayigirizwa be olugero ng'agamba nga bwe bagwanidde obutakoowanga kusaba n'obutaggwaamu mwoyo, ng'agamba nti,

²"Waaliwo omulamuzi mu kibuga ekimu, nga tatya Katonda era nga tafa ku muntu yenna.

³Mu kibuga ekyo mwalimu nnamwandumu eyajjanga ew'omulamuzi oyo buli lunaku ng'amwegayirira nti, 'Nnamula n'omulabe wange.'

⁴"Omulamuzi n'amala ebbanga ng'akyagaanyi. Naye oluvannyuma n'agamba mu mutima gwe nti, 'Newaakubadde nga sitya Katonda era nga sirina muntu gwe nzisaamu kitiibwa,

⁵naye olwokubanga nnamwandumu ono aneetayiridde nnyo, nzijja kumumalira ensonga ze, kubanga ajja kunkooya olw'okuneetayirira ng'ajja gye ndi buli lunaku!'"

⁶Awo Mukama waffe n'agamba nti, "Muwulire omulamuzi atali wa mazima bw'agamba.

⁷Kale Katonda talisingawo nnyo kulamula abantu be, be yeerondera, abamukaabirira emisana n'ekiro ate ng'abagumiikiriza?

⁸Mbagamba nti agenda kubalamula mangu. Naye Omwana w'Omuntu, bw'alijja, alisanga okukkiriza ku nsi?"

⁹Awo Yesu n'agerera olugero luno abo abeerowooza nga batuukirivu nga banyoomoola n'abantu abalala, n'agamba nti,

¹⁰"Abantu babiri baayambuka mu Yeekaalu okusaba, omu yali Mufalisaayo n'omulala nga muwooza.

¹¹Omufalisaayo n'ayimirira n'atandika okusaba nga yeeyogerako nti, 'Nkwebaza, Katonda, kubanga sifaanana ng'abantu abalala: ab'omululu, abalyazaamaanyi, abenzi, oba omuwooza ono.

¹²Nsiiba emirundi ebiri mu wiiki, era mpaayo eri Katonda, ekimu eky'ekkumi ku bintu byonna bye nfun'a.'

¹³ "Naye omuwooza n'ayimirira wala n'atasobola na kuyimusa maaso ge kutunula eri eggulu ng'asaba, wabula ne yekuba mu kifuba ng'asaba nti, 'Katonda, onsaasire, nze omwonoonyi.'

¹⁴ "Mbagamba nti omusajja ono, omuwooza ye yaddayo eka ng'asonyiyiddwa ebibi bye. Kubanga buli eyeegulumiza alitoowazibwa, n'oyo eyeetoowaza aligulumizibwa."

Yesu n'Abaana Abato

¹⁵Lumu ne wabaawo abaaleetera Yesu abaana baabwe abato abakwateko abawe omukisa. Nayé abayigirizwa bwe baakiraba ne bajunga abaabaleeta.

¹⁶Naye Yesu abaana n'abayita, n'agamba nti, "Muleke abaana abato bajje gye ndi, temubagaana, kubanga abali nga bano be b'obwakabaka bwa Katonda.

¹⁷Ddala ddala mbagamba nti atayaniriza bwakabaka bwa Katonda ng'omwana omuto, talibuyingiramu n'akatono."

Omukungu Omugagga

¹⁸Awo omu ku bakulembeze b'Abayudaaya n'abuuza Yesu nti, "Omuyigiriza omulungi, nkole ki okufuna obulamu obutaggwaawo?"

¹⁹Yesu n'amuddamu nti, "Lwaki ompita omulungi? Tewali mulungi n'omu wabula Katonda yekka.

²⁰Amateeka ogamanyi nti, 'Toyendanga, tottanga, tobbanga, tolimbanga, kitaawo ne nnyoko obassangamu ekitiibwa.'

²¹N'amuddamu nti, "Amateeka ago gonna ngagondedde ebbanga lyonna okuva mu buto bwange."

²²Yesu bwe yawulira ebyo, n'amugamba nti, "Okyabulako ekintu kimu. Genda otunde ebibyo byonna, ensimbi z'onoggyamu ozigabire abaavu, olibeera n'obugagga mu ggulu, olyoke ojje ongoberere."

²³Naye bwe yawulira ebigambo ebyo n'agenda ng'anakuwadde nnyo, kubanga yali mugagga nnyo.

²⁴Yesu bwe yamulaba ng'anakuwadde nnyo, n'ayogera nti, "Nga kizibu omugagga okuyingira mu bwakabaka bwa Katonda!

²⁵Kyangu enjamira okuyita mu nnyindo y'empiso okusinga omugagga okuyingira mu bwakabaka bwa Katonda."

²⁶Abo abaawulira ebyo kwe kubuuza nti, “Kale ani ayinza okulokolebwa?”

²⁷Yesu n'addamu nti, “Ebitayinzika eri abantu, biyinzika eri Katonda.”

²⁸Peetero n'amugamba nti, “Ffe twalekawo ebyaffe byonna ne tukugoberera!”

²⁹Yesu n'addamu nti, “Ddala ddala mbagamba nti teri muntu n'omu eyalekawo amaka ge, oba omukazi we, oba baganda be, oba abazadde be, oba abaana be, olw'obwakabaka bwa Katonda,

³⁰atalifuna mirundi mingi n'okusingawo mu mulembe guno, ate ne mu mulembe ogugenda okujja aweebwe obulamu obutaggwaawo.”

Yesu Ayongera Okwogera ku Kufa kwe

³¹Awo Yesu n'azza ku bbali ekkumi n'ababiri, n'abagamba nti, “Laba, twambuka e Yerusaalemi, era bwe tunaatuuka eyo, byonna bannabbi bye bawandiika ku Mwana w'Omuntu, bijja kutuukirizibwa.

³²Ajja kuweebwayo eri Abamawanga okukudaalirwa n'okuvumibwa. Balimuduulira, ne bamubonyaabonya, ne bamuwandira amalusu,

³³balimukuba era ne bamutta. Ne ku lunaku olwokusatu alizuukira.”

³⁴Naye abayigirizwa be tebaategeera ky'agamba, amakulu gaakyo gaali gabakwekeddwa, ne batategeera bye yayogera.

Yesu Awonya Omuzibe w'Amaaso Omusabiriza

³⁵Awo Yesu bwe yali ng'asemberera Yeriko, ne wabaawo omusajja omuzibe w'amaaso eyali atudde ku kkubo ng'asabiriza.

³⁶Awo omusajja oyo bwe yawulira ng'ekibiina ky'abantu bayitawo, n'abuuza nti, “Kiki ekkyo?”

³⁷Ne bamuddamu nti, “Yesu Omunnazaaleesi ye ayitawo.”

³⁸Omuzibe w'amaaso n'akoowoola nti, “Yesu, Omwana wa Dawudi, onsaasire!”

³⁹Abo abaali bakuleembeddemu ne bamuboggolera asirike, kyokka ye ne yeeyongera bweyongezi okuleekaana nti, “Omwana wa Dawudi, onsaasire!”

⁴⁰Awo Yesu n'ayimirira, n'alagira, omusajja bamumuleetere. Bwe yasembera, Yesu n'amubuuza nti,

⁴¹“Kiki ky'oyagala nkukolere?” Omusajja n'addamu nti, “Mukama wange, njagala nziremu okulaba!”

⁴²Yesu n'amugamba nti, “Ddamu okulaba. Okukkirizakwo kukuwonyezza.”

⁴³Amangwago n'addamu okulaba, n'agoberera Yesu ng'atendereza Katonda. Bonna abaakiraba ne batendereza Katonda.

Lukka 19

Zaakayo Omusolooza w'Omusolo

- ¹ Awo Yesu n'atuuka mu kibuga Yeriko, n'ayitamu.
- ² Mu kibuga omwo mwalimu omusajja erinnya lye Zaakayo; yali mukulu wa bawooza, era yali mugagga nnyo.
- ³ N'afuba okulaba Yesu, naye n'atasobola ng'ali mu kibiina ky'abantu kubanga yali mumpi.
- ⁴ Kyeyava adduka ne yeesooka ekibiina mu maaso, n'alinnya omuti omusukamooli asobole okulaba Yesu ng'ayitawo.
- ⁵ Yesu bwe yatuuka awo n'atunula waggulu, n'amuyita nti, "Zaakayo! Yanguwa okke wansi! Kubanga olwa leero njenda kuba mugenyi wo mu maka go."
- ⁶ Awo Zaakayo n'akka mangu okuva ku muti n'atwala Yesu mu nnyumba ye ng'ajjudde essanyu.
- ⁷ Abantu bonna abaakiraba ne batandika okwemulugunya nga bagamba nti, "Agenze okukyalira omuntu alina ebibi."
- ⁸ Awo Zaakayo n'ayimirira n'agamba Mukama waffe nti, "Mukama wange! Mpuliriza! Ebintu byange nnaabigabanyaamu wakati, ekitundu ne nkiwa abaavu; era obanga waliwo omuntu gwe nnali ndyazaamaanyizza, nnaamuliyira emirundi ena."
- ⁹ Yesu n'amugamba nti, "Olwa leero obulokozi buzzé mu nnyumba muno, kubanga omusajja ono naye muzzukulu wa Ibulayimu.
- ¹⁰ Kubanga Omwana w'Omuntu, yajjirira kunoonya n'okulokola abaabula."

Olugero Iw'Ensими

- ¹¹ Awo nga bakyawuliriza ebyo, Yesu n'abagerera olugero olulala. Mu kiseera ebyo yali aseemberedde nnyo Yerusaalemi, era abantu ne balowooza nti obwakabaka bwa Katonda bugenda kutandika mu kiseera ekyo.
- ¹² N'abagamba nti, "Waaliwo omukungu omu eyalaga mu nsi ey'ewala alye obwakabaka alyoke akomewo.
- ¹³ Bwe yali asitula n'ayita abaddu be kkumi n'abalekera mina kkumi n'abagamba nti, 'Muzisubuzise okutuusa lwe ndidda.'
- ¹⁴ "Naye abantu be baali tebamwagala ne batuma ababaka baabwe mu nsi gye yalaga, nga bagamba nti, 'Ffe tetwagala musajja ono kubeera kabaka waffe.'
- ¹⁵ "Naye n'afuulibwa kabaka, n'addayo mu kitundu ky'ewaabwe. Bwe yatuuka n'ayita abaddu be, be yali alekedde ensimbi, bamutegeeze amagoba ge baggyamu.

¹⁶ “Eyasooka n’ajja n’agamba nti, ‘Ssebo, mina gye wandeckera navisaamu mina kkumi.’

¹⁷ “Mukama we n’amwebaza, n’amugamba nti, ‘Oli muddu mulungi nnyo. Kubanga obadde mwesigwa mu kintu ekitono ennyo, nkuwadde okufuga ebibuga kkumi.’

¹⁸ “Omuddu owookubiri n’ajja, n’agamba mukama we nti, ‘Ssebo, mina gye wandeckera navisaamu mina ttaano.’

¹⁹ “Oyo naye n’amugamba nti, ‘Onoofuga ebibuga bitaano.’

²⁰ “Awo omuddu omulala n’ajja, n’agamba mukama we nti, ‘Mina gye wandeckera yiino, nagitereka bulungi.

²¹ Nakutya, kuba, nga bw’oli omuntu omukakanyavu, otwala ebitali bibyo, n’okungula n’ebibala by’otaasiga.’

²² “Mukama we n’amuddamu nti, ‘Oli musajja mubi nnyo! Nzija kukusalira omusango ng’ebigambo byo by’oyogedde bwe biri. Wamanya nga ndi muntu mukalubo, nga ntawala ebitali byange, era nga nkungula bye saasiga,

²³ kale, lwaki ensimbi zange tewazissa mu banka, bwe nandikomyewo nandizisanzeeyo nga zizadde n’amagoba?’

²⁴ “N’alyoka agamba abaali bayimiridde awo nti, ‘Mumuggyeecko mina eyo mugiwe oli alina ekkumi.’

²⁵ “Ne bamugamba nti, ‘Naye ssebo, oli alina mina kkumi!’

²⁶ “N’abaddamu nti, ‘Mbagamba nti oyo yenna alina, alyongerwako; ate oyo atalina, n’akatono k’alina kalimuggiwako.

²⁷ Kaakano njagala abo bona abalabe bange, abaajeema nga tebaagala mbeere kabaka waabwe, mubandeetere wano, mubattire mu maaso gange.’”

Yesu Ayingira mu Yerusaalemi n’Ekitiibwa

²⁸ Awo Yesu bwe yamala okwogera ebigambo ebyo, n’atambula ng’akuleembedde abayigirizwa be okwolekera Yerusaalemi.

²⁹ Bwe yali asemererera ebibuga Besufaage ne Besaniya ng’ali ku lusozi oluyitibwa olwa Zeyituuni, n’atuma abayigirizwa be babiri n’abagamba nti,

³⁰ “Mugende mu kabuga akatuli mu maaso bwe munaaba mwakakayingira, munaalaba omwana gw’endogoyi, oguteebagalwangako, nga gusibiddwa awo. Mugusumulule, muguleete wano.

³¹ Singa wabaawo ababuuza nti, ‘Lwaki mugusumulula?’ Mumuddamu nti, ‘Mukama waffe agwetaaga.’”

³² Awo abaatumibwa ne bagenda ne basanga omwana gw'endogoyi nga Yesu bwe yabagamba.

³³ Era bwe baali nga bagusumulula bannannyini gwo ne bababuuza nti, "Lwaki musumulula omwana gw'endogoyi ogwo?"

³⁴ Ne baddamu nti, "Mukama waffe agwetaaga."

³⁵ Omwana gw'endogoyi ne baguleeta eri Yesu, ne bagwaliirako eminagiro gyabwe, Yesu n'agwebagala.

³⁶ Bwe yali ng'agenda, abantu ne baaliira ebyambalo byabwe mu luguudo.

³⁷ Awo bwe yatuuka oluguudo we luserengetera olusozi olwa Zeyituuni, ekibiina kyonna eky'abayigirizwa, ne batandika okutendereza Katonda, mu ddoboozi ery'omwanguka olw'ebiyamagero bye yali akoze nga boogera nti,

³⁸ "Aweereddwa omukisa Kabaka aija mu linnya lyu Mukama!" "Emirembe gibe mu ggulu, n'ekitiibwa kibeere waggulu ennyo!"

³⁹ Naye abamu ku Bafalisaayo abaali mu kibiina ne bagamba Yesu nti, "Omuyigiriza, lagira abayigirizwa bo basirike!"

⁴⁰ Yesu n'abaddamu nti, "Mbateggeeza nti ssinga bo basirika, amayinja gano ganaaleekaana!"

Yesu Akaabira Yerusaalemi

⁴¹ Awo Yesu bwe yali ng'asemberera ekibuga Yerusaalemi, bwe yakirengera, n'akikaabira.

⁴² N'agamba nti, "Singa otegedde leero ebireeta emirembe ebyakulagirwa! Naye kaakano bikukwekeddwa, amaaso go tegayinza kubiraba.

⁴³ Ekiseera kigenda kutuuka abalabe bo lwe balikuzimbako ekigo okukwetooloola ne bakuzinda,

⁴⁴ ne bakumerengulira ku ttaka munda mu bisenge byo ggwe n'abaana bo. Abalabe bo tebalirekawo jjinja na limu nga litudde ku linnaalyo, kubanga omukisa Katonda gwe yakuwa ogw'okulokolebwa wagaana okugukozesa."

Yesu mu Yeekaalu

⁴⁵ Awo Yesu n'ayingira mu Yeekaalu n'agobamu abaali batundiramu.

⁴⁶ N'abagamba nti, "Kyawandiikibwa nti, 'Ennyumba yange eneebanga ya kusinzizangamu,' naye mmwe mugifudde 'empuku y'abanyazi.'"

⁴⁷ Okuva mu kiseera ekyo Yesu n'ayigirizanga mu Yeekaalu buli lunaku. Naye bakabona abakulu n'abannyonnyozi b'amateeka, n'abakulembeze b'Abayudaaya ne bagezaako okufuna akaagaanya we banaamuttira.

⁴⁸Naye ne balemwa kubanga abantu bona baamussaako nnyo omwoyo nga bamuwuliriza.

Lukka 20

Yesu Bamabuuza Obuyinza gy'Abuggyga

¹Awo Yesu bwe yali ng'ayigiriza era ng'abuulira Enjiri mu luggya lwa Yeekaalu, bakabona abakulu, n'abannyonnyozi b'amateeka n'abakulembeze b'Abayudaaya ne bajja gy'ali.

²Ne bamabuuza nti, "Tubuulire, buyinza ki obukukozesa bino? Era ani eyakuwa obuyinza obwo?"

³Yesu n'addamu nti, "Nange ka mbabuuze ekibuuzo kino.

⁴Okubatiza kwa Yokaana kwava eri Katonda nandiki kwava mu bantu?"

⁵Ne basooka okwogeraganyaamu bokka ne bokka nga bagamba nti, "Bwe tunaagamba nti, 'Kwava mu ggulu,' ajja kutubuuza nti, 'Kale, lwaki temwamukkiriza?'

⁶Naye ate bwe tunaddamu nti, 'Kwava mu bantu,' abantu bona bajja kutukuba amayinja, kubanga bamatizibwa nti Yokaana yali nnabbi."

⁷Kyebaava baddamu nti, "Tetumanyi gye kwava."

⁸Yesu n'abagamba nti, "Nange sijja kubabuulira gye nzigya obuyinza obunkozesa bino."

Olugero Iw'Abalimi

⁹Awo Yesu n'akyukira abantu n'abagerera olugero luno nti, "Waaliwo omusajja eyalina ennimiro ey'emizabbibu, n'agipangisa abalimi, n'agenda olugendo, n'amalayo ebbanga ddene.

¹⁰Awo ekiseera eky'amakungula bwe kyatuuka, n'atuma omu ku baddu be eri abalimi bamuwe ku bibala eby'emizabbibu gye. Naye abalimi abapangisa ne bamukuba ne bamugoba n'addayo ngalo nsa eri mukama we.

¹¹N'abatumira omuddu we omulala, n'oyo ne bamukuba ne bamuswaza nnyo, n'addayo ngalo nsa.

¹²N'abatumira omuddu owookusatu, naye ne bamukuba ne bamussaako n'ebiwundu ne bamugoba mu nnimiro.

¹³ "Nannyini nnimiro ne yeebuuza nti, 'Nkole ntua? Ka mbatumire omwana wange gwe njagala ennyo, oboolyawo banaamussaamu ekitiibwa.'

¹⁴ "Omwana oyo bwe baamulengera ne bateesa nti, 'Ono y'agenda okusikira ennimiro eno nga kitaawe afudde. Ka tumutte, ebyobusika tubyesigalize.'

¹⁵Ne bamuggyga mu nnimiro nga bamukulula ne bamutta. "Mulowooza nannyini nnimiro abalimi abo alibakola atya?

¹⁶Agenda kujja abazikirize bona, n'ennimiro agiwe abalala." Awo bwe baabiwulira ebyo ne bagamba nti, "Ekintu ng'ekyo kireme kubaawo!"

¹⁷Yesu n'abatunuulira n'abagamba nti, "Kale ekyawandiikibwa kino kitegeezaki? Ekigamba nti, "Ejjinja abazimbi lye baagaana, lye lifuuse ejinja ekkulu ery'oku nsonda.'

¹⁸Omuntu yenna agwa ku jjinja eryo alibetentebwa, na buli gwe lirigwako lirimubetenta."

¹⁹Awo abannyonyozi b'amateeka ne bakabona abakulu bwe baawulira ebiligambo ebyo, ne baagala bamukwatrewo mangwago, kubanga baamanya ng'olugero lwali lukwata ku bo. Naye ne batya abantu.

Okuwa Omusolo

²⁰Ne balinda okutuusa lwe banaafuna akaagaanya babeeko kye bakola. Ne batuma abakessi eri Yesu nga beefudde ng'abantu abalungi abaagala okumanya. Baasuubira nti mu ebyo by'anaddamu, nga bamubuuzizza ebibuuzo ebirimu emitego, munaabaamu kwe banaasinziira okumukwata ne bamuwaayo ewa gavana.

²¹Abakessi ne babuuza Yesu nti, "Omuyigiriza, tumanyi nga By'oyogera n'ebyo by'oyigiriza bya mazima, era nga tofaayo ku bigambo eby'abantu obuntu wabula oyigiriza ebyo Katonda by'ayagala.

²²Kyetuva tukubuuza nti kituufu okuwa Kayisaali omusolo oba si kituufu?"

²³Yesu n'ategeera mangu obukuusa bwabwe, n'abagamba nti,

²⁴"Mundage ensimbi eya ffeeza. Ekifaananyi kino ekiriko ky'ani? N'erinnya lino ly'ani?" Ne baddamu nti, "Bya Kayisaali."

²⁵N'abagamba nti, "Kale ebya Kayisaali mubiwenga Kayisaali, n'ebya Katonda mubiwenga Katonda."

²⁶Ne balemwa okumukwasa mu ebyo bye yaddamu ng'abantu bona bali awo. Bye yaddamu ne bibeewuunyisa nnyo, ne basirika busirisi.

Okuzuukira n'Okuwasa

²⁷Awo abamu ku Basaddukaayo abatakkiririza mu kuzuukira, ne bajja eri Yesu, ne bamubuuza nti,

²⁸"Omuyigiriza, amateeka ga Musa gagamba nti ssinga omusajja omufumbo afa nga tazadde baana, muganda we awasenga nnamwandu alyoke afunire muganda we omufu ezzadde.

²⁹Waaliwo abooluganda musanvu, asinga obukulu n'awasa, kyokka n'afa nga talese mwana.

³⁰Adda ku mufu n'awasa nnamwandum; kyokka naye n'afa nga tazadde mwana.

³¹Okutuusa abooluganda bona lwe baafa ne baggwaawo nga buli omu awasizza ku nnamwandum oyo, kyokka nga tewali alese mwana.

³²Oluvannyuma n'omukazi naye n'afa.

³³Kale mu kuzuukira omukazi oyo aliba muka ani? Kubanga abooluganda bona omusantu yabafumbirwako!"

³⁴Yesu n'addamu nti, "Obufumbo buli kuno ku nsi, abantu kwe bawasiza era ne bafumbirwa.

³⁵Naye abo abasaanyizibwa okuzuukira mu bafu bwe batuuka mu ggulu tebwasa wadde okufumbirwa,

³⁶era tebaddayo kufa nate, kubanga baba nga bamalayika. Era baba baana ba Katonda kubanga baba bazuukizibwa mu bulamu obuggyga,

³⁷Naye nti abafu bazuukizibwa, ne Musa yannyonnyola bye yalaba ku kisaka, bwe yayita Mukama Katonda wa Ibulayimu, Katonda wa Isaaka, era Katonda wa Yakobo.

³⁸Kino kitegeeza nti ssi Katonda wa bafu wabula Katonda wa balamu, kubanga bona balamu gy'ali."

³⁹Abamu ku bannyonnyozi b'amateeka ne bagamba nti, "Omuyigiriza, ozzeemu bulungi!"

⁴⁰Ne watabaawo ayanjanga kwongera kumubuuza bibuuzo birala.

Kristo Mwana w'ani?

⁴¹Awo Yesu n'ababuuza nti, "Lwaki Kristo ayitibwa Omwana wa Dawudi?

⁴²Songa Dawudi amwogerako mu Zabbuli nti, "Katonda yagamba Mukama wange nti, Tuula ku mukono gwange ogwa ddyo

⁴³okutuusa lwe ndifuula abalabe bo entebe y'ebigere byo.'

⁴⁴Noolwekyo obanga Dawudi amuyita Mukama we, kale ayinza atya okuba omwana we?"

⁴⁵Awo abantu bona nga bawulira, Yesu n'akyukira abayigirizwa be n'abagamba nti,

⁴⁶"Mwekuume abannyonnyozi b'amateeka. Baagala nnyo okutambula nga bambadde amaganduula agagenda gakweya, n'abantu okugenda nga

babalamusa mu butale, era baagala nnyo okutuula mu bifo eby'ekitiibwa mu makuñjaaniro ne ku mbaga!

⁴⁷Balimbalimba nga basaba essaala empanvu, ng'eno bwe basala enkwe okunyaga ebintu bya bannamwandu. Noolwekyo bagenda kufuna ekibonerezo ekisingira ddala obunene."

Lukka 21

Okugaba kwa Nnamwandum

¹Awo Yesu bwe yayimusa amaaso n'alaba abantu abagagga nga bateeka ebirabo byabwe mu ggwanika mu Yeekaalu.

²N'alaba nnamwandum omwavu ng'awaayo busente bubiri.

³N'agamba nti, "Ddala ddala mbagamba nti nnamwandum oyo omwavu agabye okusinga bali abagagga bonna.

⁴Kubanga bagabye kitono nga bakiggya ku bugagga bwe bafisizzaawo, naye nnamwandum mu bwavu bwe awaddeyo kyonna ky'alina."

Okuzikirizibwa kwa Yeekaalu

⁵Ne wabaawo aboogera ku bulungi bw'amayinja agaweebwayo eri Katonda okuzimba Yeekaalu.

⁶Naye Yesu n'agamba nti, "Ekiseera kijja ebirungi bino byonna bye mutunuulira lwe biribetentulwa ne watasigalawo jjinja na limu nga litudde ku linnaalyo, eritalisuulibwa wansi."

⁷Ne bamubuuza nti, "Omuyigiriza, ebyo biribaawo ddi? Ye walibaawo akabonero akaliraga nti biri kumpi okubaawo?"

⁸Yesu n'addamu nti, "Mwekuume muleme kulimbibwalimbibwa. Kubanga bangi balikozesa erinnya lyange, nga bagamba nti, 'Nze nzuuyo.' Naye temubakkirizanga.

⁹Naye bwe muwuliranga entalo n'obwegugungo, temutyanga. Kubanga entalo ziteekwa okusooka okujja, naye enkomerero terituuka mangwago."

¹⁰N'ayongera n'abagamba nti, "Amawanga galirwanagana, n'obwakabaka ne bulwanagana ne bunaabwo.

¹¹Wagenda kubeerawo musisi ow'amaanyi ennyo, n'enjala ennyingi mu bitundu eby'enjawulo, ne kawumpuli. Walibaawo n'ebiyentiisa ate n'obubonero okuva mu ggulu.

¹²"Naye bino byonna nga tebinnabaawo balibayigganya, balibakwata. Balibawaayo mu makuñjaaniro, ne mu maaso ga bakabaka ne bagavana, ku lw'erinnya lyange, ne musibibwa ne mu makomera.

¹³Kiribaviiramu okufuna omukisa okuba abajulirwa bange.

¹⁴Naye temweraliikiriranga gye muliggya ebigambo eby'okuwoza,

¹⁵Kubanga njenda kubawa ebigambo n'amagezi ebiriremesa n'abalabe bammwe okubaako n'eky'okuddamu!

¹⁶Muliweebwayo bakadde bammwe, ne baganda bammwe ne mikwano gyammwe, balibawaayo mukwatibwe, era abamu ku mmwe muttibwe.

¹⁷Abantu bona balibakyawa nga babalanga erinnya lyange.

¹⁸Naye n'oluviiiri olumu bwe luti olw'oku mitwe gyammwe terulizikirira.

¹⁹Kubanga bwe muligumiikiriza muliwonya obulamu bwammwe."

Okuzikirizibwa kwa Yerusaalemi

²⁰"Bwe mulabanga nga Yerusaalemi kyetooloddwa amaggye, nga mutegeera nga Okuzikirizibwa kw'ekibuga ekyo kutuuse.

²¹Abo abalibeera mu Buyudaaya baddukiranga ku nsozi, abaliba mu Yerusaalemi bakivangamu ne badduka, n'abo abalibeera mu nnimiro tebakomangawo mu kibuga.

²²Kubanga ebyo bye biriba ebiseera Katonda mwaliwolera eggwanga, n'ebigambo ebiri mu Byawandiikibwa birituukirizibwa.

²³Nga ziribasanga abakazi abaliba embuto n'abayonsa! Kubanga eggwanga liribonaabona, n'abantu baalyo balisunguwralirwa.

²⁴Abamu balittibwa n'ekitala ky'omulabe, abalala balikwatibwa ne bawanjangusibwa mu mawanga gonna amalala ag'oku nsi. Yerusaalemi kiriwangulwa bannaggwanga ne bakirinnyirira okutuusa ekiseera kyabwe eky'obuwanguzi lwe kirikoma mu kiseera Katonda ky'aliba ateesezza."

Okujja kw'Omwana w'Omuntu

²⁵"Walibaawo obubonero ku njuba, ne ku mwezi, ne ku mmunyeenye. Wano ku nsi amawanga galibeera mu kunyolwa, olw'ab'amawanga, ng'abantu basamaaliridde olw'enyanja eziyira n'amayengo ageesiikuula.

²⁶Abantu baliggwaamu amaanyi ne bazirika nga batidde nnyo olw'ebirijja ku nsi; kubanga amaanyi g'eggulu galinyeenyezebw.

²⁷Mu kiseera ekyo muliraba Omwana w'Omuntu ng'ajjira mu kire n'obuyinza n'ekitiibwa kingi.

²⁸Kale ebintu ebyo bwe bitandikanga muyimiriranga butereevu ne muyimusa amaaso gammwe waggulu! Kubanga okulokolebwa kwammwe nga kuseembedde."

Eky'okuyiga ku muti omutiini

²⁹Awo Yesu n'abagerera olugero luno nti, "Mutunuulire omuti omutiini n'emiti emirala gyonna.

³⁰Bwe mulaba nga gitandise okutojjera, mumanya ng'ebiseera eby'ebbugumu bituuse.

³¹Mu ngeri y'emu bwe muliraba ebintu nga bibaawo, nga mumanya nti obwakabaka bwa Katonda buli kumpi okutuuka.

³² "Ddala ddala mbagamba nti omulembe guno teguliggwaawo okutuusa ng'ebintu ebyo byonna bituukiridde.

³³Eggulu n'ensi biriggwaawo, naye ebigambo byange tebigenda kuggwaawo.

³⁴ "Mwekuume muleme okwemalira mu binyumu n'okutamiira, n'okweraliikirira eby'obulamu, okujja kwange okw'amangu kuleme kubakwasa nga temugenderedde ng'abagudde mu mutego.

³⁵Kubanga olunaku olwo lulituuka ku buli muntu mu nsi yonna.

³⁶Mutunule nga musaba Katonda buli kiseera, abawe amaanyi okubasobozesa okuwona ebintu ebyo byonna, Omwana w'Omuntu bw'alija mulyoke musobole okuyimirira mu maaso ge."

³⁷ Buli lunaku Yesu yayigirizanga mu Yeekaalu, bwe bwawungeeranga n'ava mu kibuga n'asula ku lusozi oluyitibwa olwa Zeyituuni.

³⁸Mu makya abantu bona ne bajjanga mu Yeekaalu okumuwuliriza.

Lukka 22

Yuda Alya mu Yesu Olukwe

¹ Embaga ey'Emigaati Egitazimbulukuswa eyitibwa Okuyitako yali esembedde.

²Bakabona abakulu n'abannyonyozi b'amateeka baali bakola kawefube okusala amagezi okutta Yesu, naye nga batya abantu okusasamala.

³Awo Setaani n'ayingira mu Yuda Isukalyoti eyali omu ku bayigirizwa ekkumi n'ababiri,

⁴n'agenda eri bakabona abakulu n'abakuumi ba Yeekaalu abakulu, n'ateesa nabo nga bw'anaamuwaayo gye bali.

⁵Ne basanyuka nnyo, era ne bakkiriza okumusasula.

⁶Yuda n'akkiriza okuwaayo Yesu, n'anoonya akakisa konna mw'anaamuweerayo gye bali nga tewali kibiina.

Ekyekiro eky'Enkomerero

⁷Awo olunaku olw'Emigaati Egitazimbulukuswa, okuttirwa omwana gw'endiga ogw'embaga y'Okuyitako, ne lutuuka.

⁸Yesu n'atuma Peetero ne Yokaana n'abagamba nti, "Mugende mututegekere ekyekiro kyaffe eky'okuyitako, tujje tukirye."

⁹Ne bamubuuza nti, "Oyagala tukitegekere wa?"

¹⁰Yesu n'abaddamu nti, "Munaaba mwakayingira mu kibuga, mujja kulaba omusajja eyeetisse ensuwa y'amazzi ng'atambula. Mumugoberere okutuuka mu nnyumba mw'anaayingira,

¹¹mugambe nnyinimu nti, 'Omuyigiriza atutumye gy'oli ng'agamba nti: Ekitenge ky'abagenyi kiruwa mwe nnaaliira Okuyitako n'abayigirizwa bange?'

¹²Ajja kabalaga ekisenge ekinene ekya waggulu nga kitegekeddwa bulungi. Omwo mwe muba mutegekera."

¹³Ne balaga mu kibuga, ne basanga buli kimu nga Yesu bwe yabagamba. Ne bateekateeka Okuyitako.

¹⁴Awo ekiseera ky'okulya bwe kyatuuka, Yesu n'atuula n'abayigirizwa be okulya.

¹⁵Yesu n'agamba abayigirizwa be nti, "Ebbanga eryo lyonna mbadde ndowooza nnyo ku Kyekiro kino eky'Okuyitako, nga njagala nkirye nammwe nga sinnaba kubonyaabonyezebw.

¹⁶Kubanga mbagamba nti sigenda kuddayo kulya nammwe Okuyitako okutuusa lwe kulituukirizibwa mu bwakabaka bwa Katonda."

¹⁷Awo Yesu n'addirira ekikompe ky'envinnyo, bwe yamala okwebaza Katonda, n'agamba nti, "Mukwate, munyweko mwenna.

¹⁸Kubanga mbagamba nti, Sigenda kuddayo kunywa ku kibala kya muzabbibu okutuusa ng'obwakabaka bwa Katonda buzz."

¹⁹Ate n'atoolaa omugaati, bwe yamala okwebaza Katonda, n'agumenyaamenyamu, n'abagabira ng'agamba nti, "Guno gwe mubiri gwange oguweebwayo ku lwammwe. Mukolenga bwe muti nga munzijukira."

²⁰Bwe baamala okulya ekyekiro, n'addirira nate ekikompe era mu ngeri y'emu n'akibakwasa ng'agamba nti, "Ekikompe kino ke kabonero ak'endagaano ya Katonda empya ekakasibwa mu musaayi gwange oguyiyibwa ku lwammwe.

²¹Naye muwulire kino. Omuntu agenda okundyamu olukwe atudde wano nange ku mmere.

²²Kigwanira Omwana w'Omuntu, okufa nga Katonda bwe yateekateeka. Naye zimusenze omuntu oyo amulyamu olukwe."

²³Awo abayigirizwa ne batandika okwebuuzaganya bokka na bokka nti ani ku bo ayinza okukola ekintu ng'ekyo!

Empaka ku Bukulu

- ²⁴Era ne batandika okuwakana bokka ne bokka, ani asinga ekitiibwa mu bo?
- ²⁵Naye Yesu n'abagamba nti, "Bakabaka b'abamawanga bafugaabantu baabwe, n'ab'obuyinza ne babazunza mu kino na kiri, naye abafugibwa tebalina kya kukola wabula okubayita abayambi baabwe.
- ²⁶Naye mu mmwe tekisaanira kuba bwe kityo. Oyo asinga ekitiibwa mu mmwe asaana yeeyisenga ng'asembayo, n'omukulembeze mu mmwe asaana abeere ng'omuweereza wammwe.
- ²⁷Mu nsi muno omukungu y'atula ku mmeeza abaddu be ne bamuweereza. Nayewano mu ffe nze muweereza wammwe.
- ²⁸Naye mmwe mubadde wamu nange mu biseera bino eby'okugezesebwa kwange,
- ²⁹era kubanga Kitange ampadde obwakabaka, noolwekyo mbaatulira kati nti mbawadde ekifo
- ³⁰okutuula n'okulya era n'okunywera ku mmeeza yange mu bwakabaka bwange obwo, era mulituula ku ntebe ne mulamula ebika bya Isirayiri ekkumi n'ebibiri.
- ³¹"Simooni, Simooni, Setaani asabye okukuwewa ng'enjaano,
- ³²naye ggwe nkusabidde okukkiriza kwo kuleme kukuggwaamu. Era bw'olimala okwenenya, yamba mu kuzimba n'okunyweza okukkiriza kwa baganda bo."
- ³³Awo Peetero n'addamu nti, "Mukama wange, neeteeseteese okusibirwa awamu naawe mu kkomera, era n'okufiira awamu naawe."
- ³⁴Yesu n'amuddamu nti, "Peetero, nkutegeeza nti leero ononneegaana emirundi esatu enkoko nga tennakookolima."
- ³⁵Awo Yesu n'ababuuza nti, "Bwe nabatuma okubuulira Enjiri, ne mutatwala nsimbi wadde ensawo, oba omugogo omulala ogw'engatto, mwalina okwetaaga ekintu kyonna?" Ne baddamu nti, "Nedda."
- ³⁶Yesu n'abagamba nti, "Naye kaakano alina ensawo eterekebwamu ensimbi agitwale, n'ensawo ng'ey'omusabiriza bwe mutyo. Atalina kitala, atunde ku ngoye ze akyegulire!"
- ³⁷Kubanga mbagamba nti kyetaagisa okutuukirizibwa mu nze ekyawandiikibwa nti, 'Yabalirwa wamu n'abamenyi b'amateeka,' ebinkwatako biteekwa okutuukirira."
- ³⁸Abayigirizwa ne bamugamba nti, "Mukama waffe, wano tulinawo ebitala bibiri!" N'abaddamu nti, "Bimala!"

Yesu asaba ku lusozi olwa Zeyituuni

39 Awo Yesu n'afuluma mu kibuga awamu n'abayigirizwa be n'akwata ekkubo erigenda ku lusozi olwa Zeyituuni nga bwe yali empisa ye.

40 Bwe yatuuka eyo n'agamba abayigirizwa be nti, "Musabe Katonda, muleme kuwangulwa kukemebwa."

41 Ye n'abavaako akabanga ng'awakasukwa ejinja, n'afukamira n'asaba nti,

42 "Kitange, obanga kwe kusiima kwo ekikompe kino kinzigyeko. Naye si nga Nze bwe njagala, wabula ky'oyagala kye kiba kikolebwa."

43 Awo malayika eyava mu ggulu n'ajja n'amugumya.

44 Yali mu kunyolwa kunene nnyo okw'omwoyo, ne yeeyongera okusaba ennyo n'atuuyana n'entuuyo ezamuvaamu ne ziba ng'amatondo g'omusaayi, era ne gatonna wansi.

45 Bwe yayimuka ng'amaze okusaba n'addayo eri abayigirizwa be, naye n'abasanga nga beebase, olw'ennaku eyali ebakutte.

46 N'abagamba nti, "Lwaki mwebase? Muzuukuke, musabe, muleme kuwangulwa kukemebwa."

Yesu Akwatibwa

47 Awo Yesu bwe yali ng'akyayogera, ekibiina ky'abantu ne batuuka nga Yuda, omu ku bayigirizwa be ekkumi n'ababiri, y'abakulembedde. Yuda n'ajja butereevu awali Yesu, n'amunywegera.

48 Naye Yesu n'amugamba nti, "Yuda, Omwana w'Omuntu omulyamu olukwe ng'omugwa mu kifuba?"

49 Abayigirizwa abalala bwe baalaba ekyali kigenda okubaawo ne babuuza Yesu nti, "Mukama waffe, tubateme n'ebitala byaffe?"

50 Era omu ku bo n'atemako n'ekitala okutu kw'omuweereza wa Kabona Asinga Obukulu.

51 Naye Yesu n'abagamba nti, "Temwongera kubalwanyisa." N'akwata ku kutu kw'omusajja, n'amuwonya!

52 Yesu kwe kukyukira bakabona abakulu, n'abakulu b'abakuumi ba Yeekaalu, n'abakulembeze b'Abayudaaya abaali bakulembedde ekibiina ky'abantu, n'abagamba nti, "Ndi munyazi, n'okujja ne mujja gye ndi nga mwambalidde eitala n'emiggo?"

53 Lwaki temwankwatira mu Yeekaalu? Nabeeranga omwo buli lunaku. Naye nammwe eno ye ssaawa yammwe, n'ekizikiza we kiragira obuyinza bwakyo."

Peetero Yeegaana Yesu

⁵⁴ Awo ne bakwata Yesu ne bamutwala mu nnyumba ya Kabona Asinga Obukulu. Peetero n'agoberera nga yeesuddeko akabanga.

⁵⁵ Bwe baamala okukuma omuliro wakati mu luggya ne batuula okwota; Peetero naye n'atuula wakati mu bo, n'ayota omuliro.

⁵⁶ Omuwala omuweereza n'amulengera ng'omuliro gumumulisizza, n'amutunuulira enkaliriza, okutuusa lwe yagamba nti, "Omusajja ono yali ne Yesu!"

⁵⁷ Peetero ne yeegaana nti, "Omukazi, oyo gw'oyogerako nze simumanyi."

⁵⁸ Bwe waayitawo akabanga omuntu omulala n'alaba Peetero n'amugamba nti, "Naawe oli omu ku bo." Peetero ne yeegaana nti, "Nedda, ssebo, si bwe kiri."

⁵⁹ Bwe waali wayiseewo ng'essaawa nnamba, omuntu omu n'ayogera ng'akakasa nti, "Ddala n'ono yali wamu ne Yesu kubanga naye Mugaliraaya."

⁶⁰ Peetero n'addamu nti, "Omusajja, by'oyogerako sibimanyi!" Peetero bwe yali akyayogera enkoko n'ekookolima.

⁶¹ Mu kaseera ako Mukama waffe n'akyuka n'atunuulira Peetero. Peetero n'ajjukira Yesu kye yagamba nti, "Enkoko eneeba tennakookolima ononneegaana emirundi esatu."

⁶² Awo Peetero n'afuluma okuva mu luggya n'akaaba nnyo amaziga!

Abaserikale Baduulira Yesu

⁶³ Awo abasajja abaali bakuumma Yesu ne batandika okumuduulira n'okumukuba.

⁶⁴ Ne bamusiba ekitambaala ku maaso ne bamukuba ebikonde, oluvannyuma ne bamubuuza nti, "Nnabbi! yogera ani akukubye?"

⁶⁵ Ne bamuvuma n'ebigambo ebirala bingi.

Yesu mu Maaso g'Olukiiko Olukulu

⁶⁶ Enkeera mu makya Olukiiko Olukulu olw'Abayudaaya, nga lulimu bakabona abakulu, n'abannyonnyozi b'amateeka, n'abakulembeze b'Abayudaaya, ne lutuula. Yesu n'aleetebwa mu maaso g'Olukiiko olwo.

⁶⁷ Ne bamubuuza nti, "Obanga ggwe Kristo, tubuulire." Yesu n'abaddamu nti, "Bwe nnaababuulira temujja kunzikiriza,

⁶⁸ ne bwe nnaababuza ebibuuzo temujja kunnyanukula.

⁶⁹ Naye ekiseera kituuse, Nze, Omwana w'Omuntu, okutuula ku mukono ogwa ddyo ogwa Katonda Ayinzabyonna."

⁷⁰ Bonna ne baleekaana nti, "Kwe kugamba nti ggwe Mwana wa Katonda?" Yesu n'abaddamu nti, "Nga bwe mugambye bwe nt yo bwe ndi."

⁷¹Ne bagamba nti, “Ate twetaagira ki obujulizi obulala? Kubanga ffe ffennyini twewuliridde ng’ebigambo bino biva mu kamwa ke.”

Lukka 23

Yesu mu Maaso ga Piraato

¹Awo Olukiiko lwonna ne lusituka, ne batwala Yesu ewa Piraato.

²Ne batandika okumuwawaabira nti, “Omuntu ono ajagalaza eggwanga lyaffe, ng’atuziyiza okuwa Kayisaali omusolo, nga yeeyita Kristo, kabaka.”

³Piraato kwe kubuuza Yesu nti, “Ggwe kabaka w’Abayudaaya?” Yesu n’amuddamu nti, “Ggwe okyogedde.”

⁴Awo Piraato n’akyukira bakabona abakulu n’ekibiina ky’abantu n’abagamba nti, “Siraba musango muntu ono gw’azizza.”

⁵Naye ne beeyongera okulumiriza nga bagamba nti, “Asasamazza abantu n’okuyigiriza kwe mu Buyudaaya mwonna. Yatandikira Ggaliraaya okutuukira ddala ne wano!”

⁶Piraato bwe yawulira ebyo kwe kubuuza nti, “Omuntu ono Mugaliraaya?”

⁷Bwe yategeera nga Yesu Mugaliraaya, n’amuweereza eri Kerode, kubanga Ggaliraaya kyali kifugibwa Kerode, ate nga Kerode mu kiseera ekyo yali ali mu Yerusaalemi.

⁸Awo Kerode bwe yalaba Yesu, n’asanyuka nnyo, kubanga yali atutte ekiseera kiwanvu ng’ayagala okulaba Yesu. Era okuva ku ebyo bye yali amuwuliddeko yasuubira ng’ajja kumulaba ng’akolayo ekyamagero.

⁹N’amubuuza ebibuuzo bingi, naye Yesu n’atamuddamu.

¹⁰Mu kiseera ekyo, bakabona abakulu, n’abannyonnyozi b’amateeka baali awo mu busungu obungi ne baleekaanira waggulu nga bamulumiriza.

¹¹Kerode n’abaserikale be ne batandika okuduulira Yesu, n’okumuvuma. Ne bamwambaza ekyambalo ekinekaaneka, ne bamuzzaayo ewa Piraato.

¹²Ku lunaku olwo lwennyini, Kerode ne Piraato, abaali bakyawaganye, ne bafuuka ba mukwano.

Piraato Asalira Yesu ogw’Okufa

¹³Awo Piraato n’akuinjaanya bakabona abakulu, n’abakulembeze b’Abayudaaya, n’abantu,

¹⁴n’abagamba nti, “Mwandeetedde omuntu ono nga mumuwawaabira nti asasamaza abantu bajeeme. Mubuuzizza nnyo era ne neetegereza bulungi ensonga eyo nga nammwe we muli, naye ne nsanga nga talina musango ku ebyo bye mumuwawaabidde.

¹⁵Ne Kerode naye tamulabyeko musango era kyavudde amukomyawo gye tuli. Omuntu ono talina ky'akoze kimusaanyiza kibonerezo kya kufa.

¹⁶Noolwekyo njenda mukangavvulamu, ndyoke mmusumulule."

¹⁷Ku buli mbaga ya Kuyitako, Piraato ng'ateekwa okubateera omusibe omu.

¹⁸Ekibiina kyonna ne kireekaana nnyo nti, "Oyo mutte! Otuteere Balaba."

¹⁹Balaba ono yali asibiddwa lwa kukulembera kasasamalo mu kibuga, era n'olw'obutemu.

²⁰Piraato olw'okwagala okusumulula Yesu, n'ayongera okwogera nabo.

²¹Naye ne beeyongera okuleekaana nti, "Mukomerere ku musaalaba! Mukomerere ku musaalaba!"

²²Piraato n'ayogera nabo omulundi ogwokusatu nti, "Lwaki? Azzizza musango ki? Sirabye nsongya yonna emusaanyiza kibonerezo kya kufa. Noolwekyo ka mmukangavvule, ndyoke mmusumulule."

²³Naye ne beeyongera nnyo okuleekaana, n'okuwowoggana nga baagala Yesu akomererwe ku musaalaba. Era okuleekaana kwabwe ne kuwangula.

²⁴Awo Piraato n'akola nga bwe baayagala.

²⁵N'asumulula Balaba, gwe baasaba eyali asibiddwa olw'okusasamaza abantu n'olw'obutemu. Naye n'abakwasa Yesu bagende bamukole nga bwe baagala.

Yesu Akomererwa ku Musaalaba

²⁶Awo ne bafulumya Yesu okumutwala okumukomerera. Bwe baali bamutwala ne basanga omusajja Omukuleene erinnya lye Simooni, yali ava mu kyalu nga yaakayingira mu kibuga, ne bamuwaliriza okusitula omusaalaba gwa Yesu ku kibegabega kye; n'agusitula n'agutwala ng'atambulira emabega wa Yesu.

²⁷Ekibiina kinene ne bagoberera Yesu nga mwe muli n'abakazi abaali bamukaabira nga bwe bakuba ebiwoobe.

²⁸Naye Yesu n'abakyukira n'abagamba nti, "Abawala ba Yerusaalemi, temukaabira Nze, wabula mwekaabire era mukaabire n'abaana bammwe.

²⁹Kubanga ekiseera kijja abakazi abatalina baana lwe baliytibwa ab'omukisa ddala.

³⁰ " 'Baligamba ensozi nti, "Mutugweko," n'obusozi nti, "Mutuziike." '

³¹ Kale, obanga bino babikola ku muti omubisi, naye ku mukalu kiriba kitya?"

³²Waaliwo n'abasajja abalala babiri, bombi nga bamenyi ba mateeka, abaatwalibwa ne Yesu okuttibwa.

³³Awo bwe baatuuka mu kifo ekiyitibwa Ekiwanga, ne bamukomerera awo ku musaalaba, awamu n'abamenyi b'amateeka, omu ku ludda lwa Yesu olwa ddyo n'omulala ku ludda olwa kkono.

³⁴Yesu n'agamba nti, "Kitange, basonyiwe, kubanga kye bakola tebakimanyi." Awo abaserikale ne bagabana ebyambalo bye nga babikubira akalulu.

³⁵Ekibiina ne kimutunuulira. Abakulembeze b'Abayudaaya ne bamusekerera nga bagamba nti, "Yalokolanga balala, ka tulabe naye bwe yeerokola, obanga ye Kristo wa Katonda Omulonde we."

³⁶N'abaserikale nabo ne bamuduulira ne bamuwa wayini omukaatuufu,

³⁷nga bagamba nti, "Obanga ggwe Kabaka w'Abayudaaya, weerokole!"

³⁸Waggulu w'omutwe gwa Yesu ku musaalaba kwateekebwako ekiwandiiko mu bigambo bino nti, Ono ye Kabaka w'Abayudaaya.

³⁹Om uku bamenyi b'amateeka abaakomererwa naye n'avuma Yesu ng'agamba nti, "Si ggwe Masiya? Kale weerokole era naffe otulokole."

⁴⁰Naye munne bwe baakomererwa n'amunenya, n'amugamba nti, "N'okutya totya Katonda, nga naawe oli ku kibonerezo kye kimu kya kufa?

⁴¹Ffe tuvunaaniddwa bya nsonga, kubanga ebikolwa byaffe bitusaanyiza kino. Naye ono talina kisobyo kyonna ky'akoze."

⁴²N'alyoka agamba nti, "Yesu, onzijukiranga bw'olijja mu bwakabaka bwo."

⁴³Yesu n'amuddamu nti, "Ddala ddala nkugamba nti olwa leero ojja kubeera nange mu Lusuku lwa Katonda."

Okufa kwa Yesu

⁴⁴Awo obudde bwe bwatuuka essaawa omukaaga ez'omu ttuntu, enzikiza n'ekwata ku nsi yonna, okutuusa ku ssaawa ey'omwenda,

⁴⁵kubanga enjuba yalekeraawo okwaka. Amangwago eggigi ly'omu Yeekaalu ne liyulikamu wabiri.

⁴⁶Awo Yesu n'ayogerera waggulu n'eddoboozi ery'omwanguka ng'agamba nti, "Kitange, nteeka omwoyo gwange mu mikono gyo." Bwe yamala okwogera ebigambo ebyo, n'afa.

⁴⁷Omuserikale Omuruumi omukulu w'ekitongole eyakulembera abaserikale abaakomerera Yesu, bwe yalaba ebibaddewo, n'atendereza Katonda ng'agamba nti, "Mazima omuntu ono abadde mutuukirivu."

⁴⁸Abantu bonna abaali bazze okwerolera, bwe baalaba ebibaddewo ne baddayo ewaabwe nga beekuba mu kifuba nga bajjudde ennaku nnyingi.

⁴⁹Mikwanogya Yesu, awamu n'abakazi abajja naye nga bamugoberera okuviiro ddala e Ggaliraaya, baali bayimiridde nga beesuddeko akabanga, nga batunuulira byonna ebibaddewo.

Okuziikibwa kwa Yesu

⁵⁰Laba waaliwo omusajja erinnya lye Yusufu, ng'atuula mu Lukiko Olukulu olw'Abayudaaya, yali musajja mulungi era nga mutuukirivu,

⁵¹teyakkirizaganya na banne mu ebyo bye baasalawo ku Yesu ne bye baakola. Yali wa mu kibuga Alimasaya eky'omu Buyudaaya. Yali ng'alindirira n'essuubi ddene okulaba obwakabaka bwa Katonda.

⁵²Omusajja ono n'agenda eri Piraato n'asabayo omulambo gwa Yesu.

⁵³Bwe yaguggya ku musaalaba, n'aguzinga mu lugoye lwa linena olweru ennyo, n'agugalamiza mu ntaana ey'empuku eyali etemeddwa mu lwazi, era nga teziikibwangamu muntu.

⁵⁴Bino byonna byaliwo ku Lwakutaano, olunaku olw'okweteekerateekerako ng'enkeera ye Ssabiiti.

⁵⁵Omulambo gwa Yesu bwe gwali gutwalibwa mu ntaana, abakazi abaava e Ggaliraaya ne bagoberera nga bavaako emabega, ne balaba entaana n'omulambo gwe nga bwe gwagalamizibwamu.

⁵⁶Ne balyoka baddayo eka ne bategeka ebyakaloosa n'amafuta ag'okusiiga omulambo gwa Yesu. Naye ne bawummula ku Ssabiiti ng'etteeka bwe liragira.

Lukka 24

Okuzuukira kwa Mukama Waffe

¹Awo ku lunaku Lwassande, lwe lusooka mu wiiki, mu makya ennyo, abakazi ne baddira ebyakaloosa n'amafuta, bye baali bategese, ne bagenda ku ntaana.

²Ne basanga ejinja eryali liggadde omulyango oguyingira mu ntaana, nga liyiringisibbwa okudda wabbali.

³Bwe batyo ne bayingira mu ntaana, naye omulambo gwa Mukama waffe Yesu tebaagusangamu.

⁴Ne bayimirira awo nga babuliddwa eky'okukola. Amangwago, abasajja babiri ne balabika mu maaso gaabwe nga bambadde engoye ezimasamasa ng'okumyansa kw'eraddu.

⁵Abakazi ne batya nnyo, ne bakutama ne batunula wansi, abasajja ne babagamba nti, "Lwaki omuntu omulamu mumunoonyeza mu ntaana?

⁶Taliwo wano, azuukidde! Mujukire bye yabagamba nga muli e Ggaliraaya nti,

⁷‘Omwana w’Omuntu, ateekwa okuweebwayo mu mikono gy’abantu ababi, bamukomerere ku musaalaba, naye nga ku lunaku olwokusatu alizuukira.’”

⁸Ne bajjukira ebigambo bye ebyo.

⁹Awo ne bayanguwa mangu ne bagenda, ne bategeeza abayigirizwa ekkumi n’omu n’abalala bona, ebintu ebyo byonna. Bano be bakazi abaalaga ku ntaana, era ne bategeeza abayigirizwa ebintu ebyo:

¹⁰Maliyamu Magudaleene, ne Jowaana, ne Maliyamu nnyina Yakobo, n’abalala. Ne bategeeza abatume ebintu ebyo.

¹¹Naye bye baababuulira nga biwulikika ng’ebitaliimu makulu, era tebaabikkiriza.

¹²Kyokka Peetero n’adduka n’alaga ku ntaana, n’akutama n’alingiza n’alaba ng’engoye za linena Yesu mwe yali azingiddwa ziri wabbali zokka nga njereere, n’addayo eka nga yeewuunya.

Ku Luguudo Iw’e Emawu

¹³Ku lunaku olwo lwennyini abasajja babiri, abamu ku abo abaagobereranga Yesu, baali batambula nga bagenda mu kabuga akayitibwa Emawu, akaali kilomita nga kkumi na bbiri okuva e Yerusaalemi.

¹⁴Baali bagenda boogera ku kufa kwa Yesu.

¹⁵Amangwago Yesu yennyini n’abeegattako n’atambula nabo.

¹⁶Kyokka tebaamutegeera, kubanga ekyo Katonda yali akibakisizza.

¹⁷Yesu n’abagamba nti, “Biki bye munyumyako nga bwe mutambula mu kkubo?” Ne bayimirira ng’amaaso gaabwe gajjudde ennaku.

¹⁸Omúku bo, erinnya lye Kulyoppa n’amuddamu nti, “Oli mugenyi mu Yerusaalemi atamanyi bya kitalo ebyaliwo mu wiiki eyise?”

¹⁹Yesu n’ababuuza nti, “Biki ebyo?” Ne baddamu nti, “Ebyagwa ku Yesu Omunnazaaleesi eyali omusajja Nnabbi ow’amaanyi mu bye yakolanga ne bye yayogeranga eyakola ebyamagero ebyewuunyisa, era yali Muyigiriza wa kitalo, mu maaso ga Katonda ne mu maaso g’abantu bona.

²⁰Naye bakabona abakulu n’abakulembeze baffe baamukwata ne bamuwaayo n’asalirwa omusango ogw’okufa, ne bamukomerera ku musaalaba.

²¹Twali tusuubira nti, Ye Kristo anaalokola Isirayiri.

²²Ebyo nga bikyali awo, nga wayiseewo ennaku ssatu bukyanga bino bibaawo abamu ku bakazi b’ewaffe baatwewuunyisizza. Olwa leero baakedde ku ntaana,

²³naye omulambo gwe tebaagusanzemu. Bwe baakomyewo baatugambye nti bayolesebbwa ba bamalayika abaabagambye nti mulamu!

²⁴Abamu ku bannaffe abasajja nabo ne bagendayo mangu, nabo ne basanga ng'omulambo gwa Yesu teguliimu mu ntaana, ng'abakazi bwe baagambye."

²⁵Yesu n'abagamba nti, "Nga muli bantu basirusiru! Mmwe ab'emitima eminifu egirwawo okukkiriza bannabbi bye baategeeza!"

²⁶Tekyagwanira Kristo okubonaabona mu bintu byonna n'oluvannyuma alyoke ayingire mu kitibwa kye?"

²⁷N'atandikira ku Musa n'ayitaayita mu bannabbi bona ng'agenda abannyonnyola Ebyawandiikibwa bye bimwogerako.

²⁸Bwe baasemberera akabuga we baali bagenda, Yesu n'aba nga eyeeyongerayo,

²⁹naye ne bamuwaliriza asule ewaabwe kubanga n'obudde bwali buwungedde. N'akkiriza, asigale.

³⁰Awo bwe yali ng'alya nabo n'addira omugaati, ne yeebaza n'agumenyamu, n'abawa.

³¹Amangwago amaaso gaabwe ne gazibuka ne bamutegeera! Ate n'ababulako mu kaseera ako!

³²Ne batandika okwewuunaganya nga bagamba nti, "Emitima gyaffe tegyabuguumiridde bwe yabadde ayogera naffe mu kkubo ng'atunnyonnyola Ebyawandiikibwa?"

³³Awo ne basituka mangu ne baddayo mu Yerusaalemi, ne basanga abayigirizwa ekkumi n'omu ne bannaabwe abalala nga bakuŋjaanye,

³⁴nga bagamba nti, "Ddala Mukama waffe azuukidde! Alabikidde Peetero!"

³⁵Ne bannyonnyola, nga Yesu bwe yabalabikira nga bali mu kkubo batambula, era nga bwe yategeerekeka gye bali ng'amaze okumenya omugaati.

Yesu alabikira Abayigirizwa be

³⁶Awo bwe baali bakyayogera ebyo Yesu n'ayimirira mu makkati gaabwe n'abalamusa nti, "Emirembe gibeere nammwe!"

³⁷Naye bona ne bakankana nga batidde nnyo, nga balowooza nti balaba muzimu!

³⁸Yesu n'ababuuza nti, "Lwaki mutidde bwe mutyo? Lwaki mubuusabuusa mu mitima gyammwe?

³⁹Mulaba ebibatu byange. Mutunule ne ku bigere byange! Kaakano mutengeere nga ye Nze kennyini. Munkwateko mukakasize ddala nti ssiri muzimu, kubanga omuzimu tegubeera na mubiri na magumba nga Nze bye nnina."

⁴⁰Bwe yali ng'ayogera n'abalaga ebibatu bye n'ebigere bye.

⁴¹Naye nga bakyabuuusabuusa kyokka nga balina essanyu era nga basamaaliridde n'alyoka ababuuza nti, "Mulinawo wano ekyokulya?"

⁴²Ne bamuwa ekitundu ky'ekyennyanja ekyokye,

⁴³n'akitoola n'akiriira mu maaso gaabwe nga bamutunuulira!

⁴⁴ N'abagamba nti, "Nabategeeza nga nkyali nammwe nti ebintu byonna ebyampandiikibwako mu mateeka ga Musa, ne mu bya bannabbi, ne mu Zabbuli, byali biteekwa okutuukirira."

⁴⁵ N'alyoka asumulula emitima gyabwe, ne bategeera ebyawandiikibwa.

⁴⁶ N'abagamba nti, "Kyawandiikibwa dda nnyo nti Kristo kimugwanira okubonaabona, n'okufa era ku lunaku olwokusatu azuukire mu bafu.

⁴⁷ Era mu linnya lye Enjiri ey'okwenenya n'okusonyiyibwa ebibi eribuulirwa amawanga gonna okutandikira mu Yerusaalemi.

⁴⁸Muli bajulirwa b'ebyo,

⁴⁹Laba mbawereza ekisuubizo kya Kitange. Mubeere mu kibuga okutuusa lwe mulyambazibwa amaanyi agava mu ggulu."

Okugenda mu Ggulu

⁵⁰ Awo Yesu n'abakulembera ne balaga e Besaniya. N'ayimusa emikono gye waggulu, n'abawa omukisa.

⁵¹Bwe yali ng'akyabawa omukisa, n'abavaako, n'asitulibwa, n'atwalibwa mu ggulu.

⁵²Ne bamusinza, ne baddayo mu Yerusaalemi nga bajjudde essanyu lingi.

⁵³Ne babeeranga mu Yeekaalu bulijo nga batendereza Katonda.

Yokaana

Yokaana 1

Kigambo

- ¹ Kigambo yaliwo ng'ensi tennatondebwa. Kigambo yali ne Katonda, era Kigambo yali Katonda.
- ² Oyo, okuva ku lubereberye yaliwo ne Katonda.
- ³ Ebintu byonna byatondebwa ku lulwe, era tewaliwo kintu na kimu ekyatondebwa nga taliiwo.
- ⁴ Mu ye mwe mwali obulamu; era obulamu buno ne buba ekitangaala eri abantu.
- ⁵ Omusana ne gwaka mu kizikiza, naye ekizikiza tekyaguyinza.
- ⁶ Ne walabika omuntu ng'ayitibwa Yokaana, Katonda gwe yatuma,
- ⁷ eyajja okutegeeza abantu ebifa ku musana, bona bakkirize nga bayita mu ye.
- ⁸ Yokaana si ye yali Omusana, wabula ye yatumibwa ategheeze eby'Omusana.
- ⁹ Kristo ye yali Omusana, omusana ogw'amazima, ogujja mu nsi, okwakira buli muntu.
- ¹⁰ Kyokka newaakubadde Kigambo oyo ye yatonda ensi, bwe yajja mu nsi, ensi teyamutgeera.
- ¹¹ Yajja eri abantu be, naye abantu be ne batamusembeza.
- ¹² Naye bona abaamusembeza, yabawa obuyinza okufuuka abaana ba Katonda; be bo abakkiriza erinnya lye.
- ¹³ Abataazaalibwa musaayi, oba okwagala kw'omubiri, wadde okwagala kw'omuntu, naye abaazaalibwa okwagala kwa Katonda.
- ¹⁴ Kigambo n'afuuka omubiri, n'abeera mu ffe, ne tulaba ekitiibwa kye, ng'eky'oyo omu yekka eyava eri kitaffe ng'ajjudde ekisa n'amazima.
- ¹⁵ Yokaana Omubatiza yamwogerako, ng'alangirira nti, "Ono ye oyo gwe nayogerako nti, 'Waliwo ajja emabega wange, eyansoka okubaawo, kubanga yaliwo nga sinnabaawo.'"
- ¹⁶ Ku kujjula kwe ffenna kwe twagabana ekisa ekisukiridde ekisa.
- ¹⁷ Amateeka gaatuweebwa nga gayita mu Musa, naye Yesu Kristo ye yaaleeta ekisa n'amazima.
- ¹⁸ Tewali n'omu eyali alabye ku Katonda, okuggyako Omwana we omu yekka, abeera mu kifuba kya kitaffe, oyo ye yatutegeeza byonna ebimufaako.

Yokaana Omubatiza ategheeza nga bw'atali Kristo

¹⁹ Bino bye bigambo Yokaana Omubatiza bye yategeeza abakulembeze b'Abayudaaya bwe baamutumira bakabona n'Abaleevi okuva mu Yerusaalemi ne bamubuuza nti, "Ggwe ani?"

²⁰ Teyagaana kubaddamu, wabula yayatulira ddala nti, "Si nze Kristo."

²¹ Ne bamubuuza nti, "Kale ggwe ani? Ggwe Eriya?" Yokaana Omubatiza n'addamu nti, "Nedda, si nze ye." Ne bongera okumubuuza nti, "Ggwe Nnabbi ayogerwako?" N'addamu nti, "Nedda."

²² Awo ne bamugamba nti, "Abatutumye tunaabagamba nti, Ggwe ani? Weeyita otya?"

²³ N'abaddamu nti, "Nze ndi ddoboozi ly'oyo ayogerera mu ddoboozi ery'omwanguka ng'asinziira mu ddungu nti, 'Mutereeze ekkubo lya Mukama mweteekereteekere okujja kwe, nga nnabbi Isaaya bwe yayogera.'"

²⁴ Abaatumibwa baava eri Abafalisaayo.

²⁵ Awo ne babuuza Yokaana nti, "Kale lwaki obatiza, obanga si ggwe Kristo oba Eriya oba nnabbi oli?"

²⁶ Yokaana n'addamu nti, "Nze mbatiza na mazzi, naye waliwo ayimiridde wakati mu mmwe gwe mutamanyi,

²⁷ anvaako emabega, nze sisaanira na kusumulula buguwa bwa ngatto ze."

²⁸ Ebyo byali Besaniya, emitala w'omugga Yoludaani, Yokaana Omubatiza gye yabatirizanga.

Yesu Omwana gw'Endiga owa Katonda

²⁹ Ku lunaku olwaddirira, Yokaana Omubatiza n'alaba Yesu ng'ajja, n'agamba nti, "Mulabe Omwana gw'Endiga owa Katonda aggyawo ebibi by'ensi.

³⁰ Ye wuuyo gwe nayogerako, bwe nagamba nti, 'Waliwo omuntu anvaako emabega ye ansinga obuyinza, kubanga ye yaliwo nga nze sinnabaawo.'

³¹ Nange nnali simumanyi, wabula nze najja okubatiza n'amazzi, ndyoke mulage eri abantu ba Isirayiri."

³² Awo Yokaana Omubatiza n'abategeeza nga bwe yalaba Mwoyo Mutukuvu ng'akka okuva mu ggulu ng'ali ng'ejiba n'abeera ku Yesu,

³³ n'abagamba nti, "Nze saamutegeera, kyokka Katonda bwe yantuma okubatiza yanjamba nti, 'Bw'olabanga Mwoyo Mutukuvu ng'akka n'abeera ku muntu, nga oyo, ye Kristo abatiza ne Mwoyo Mutukuvu.'

³⁴ Ekyo nkirabye era nkiweerako obujulirwa nti Ye Mwana wa Katonda."

Abayigirizwa ba Yesu Abaasooka

³⁵ Awo ku lunaku olwaddirira nate Yokaana bwe yali ayimiridde n'abayigirizwa be babiri,

³⁶ Yesu n'ayitawo ng'atambula. Yokaana n'amutunuulira enkaliriza n'agamba nti, "Mulabe Omwana gw'Endiga wa Katonda."

³⁷ Awo abayigirizwa abo ababiri bwe baawulira ekyo ne bagoberera Yesu.

³⁸ Yesu bwe yakyuka n'abalaba nga bamugoberera n'ababuuza nti, "Mwagalaki?" Ne bamuddamu nti, "Labbi" (ekitegeeza nti: "Omuyigiriza"), "obeera wa?"

³⁹ N'abaddamu nti, "Mujje mulabeyo." Awo ne bagenda naye gye yali abeera, olunaku olwo ne baluzibiza eyo nga bali naye, obudde bwali ng'essaawa kkumi ez'olweggulo okutuusa akawungeezi.

⁴⁰ Omu ku abo ababiri abaawulira Yokaana ng'ayogera ne bagoberera Yesu, yali Andereya, muganda wa Simooni Peetero.

⁴¹ Awo Andereya n'agenda anoonya muganda we Simooni n'amugamba nti, "Tulabye Masiya" (amakulu nti Kristo).

⁴² Andereya n'atwala Simooni eri Yesu. Yesu bwe yeetegereza Simooni, n'amugamba nti, "Ggwe Simooni omwana wa Yokaana, kale onooyitibwanga Keefa," amakulu nti Peetero.

Yesu Ayita Firipo ne Nassanayiri

⁴³ Ku lunaku olwaddirira, Yesu n'agenda e Ggaliraaya, bwe yasanga Firipo n'amugamba nti, "Ngoberera."

⁴⁴ Firipo yali wa mu kibuga Besusayida ewaabwe wa Andereya ne Peetero.

⁴⁵ Firipo bwe yalaba Nassanayiri, n'amugamba nti, "Tulabye Yesu mutabani wa Yusufu ow'e Nazaaleesi, Musa ne bannabbi gwe baawandiikako."

⁴⁶ Nassanayiri n'amuddamu nti, "Mu Nazaaleesi musobola okuvaamu ekintu ekirungi?" Firipo kwe kumuddamu nti, "Jjangu weerabireko."

⁴⁷ Nassanayiri bwe yali asemererera Yesu, Yesu n'agamba nti, "Laba, Omuyisirayiri wawu ataliimu bukuusa."

⁴⁸ Nassanayiri kwe kumuddamu nti, "Ontegedde otya?" Yesu n'amugamba nti, "Firipo bw'abadde tannakutuukako, nkulabye ng'oli wansi w'omutiini."

⁴⁹ Nassanayiri n'amuddamu nti, "Labbi, oli Mwana wa Katonda, gwe Kabaka wa Isirayiri!"

⁵⁰ Awo Yesu n'amugamba nti, "Okkiriza kubanga nkugambye nti nkulabye ng'oli wansi w'omutiini? Oliraba n'ebisinga awo obukulu.

⁵¹ Ddala ddala nkugamba nti oliraba eggulu nga libikkuse ne bamalayika ba Katonda nga balinnya era nga bakkira ku Mwana w'Omuntu."

Yokaana 2

¹ Awo bwe waayitawo ennaku bbiri ne wabaawo embaga ey'obugole mu Kaana eky'e Ggaliraaya ne nnyina Yesu yaliyo.

² Yesu awamu n'abayigirizwa be nabo baayitibwa.

³ Wayini bwe yaggwaawo, nnyina Yesu n'ajja gy'ali n'amugamba nti, "Tebakyalina wayini."

⁴ Yesu n'amuddamu nti, "Maama ndeka, kubanga ekiseera kyange tekinnatuuka."

⁵ Nnyina Yesu n'agamba abaweereza nti, "Kyonna ky'abagamba kye muba mukola."

⁶ Waaliwo amasuwa amanene mukaaga agaategekebwa olw'omukolo gw'Abayudaaya ogw'okwetukuza, buli limu nga lirimu lita kikumi oba kikumi mu ataano.

⁷ Yesu n'agamba abaweereza nti, "Amasuwa mugajjuze amazzi." Ne bagajuza okutuuka ku migo.

⁸ Awo n'abagamba nti, "Kale musene mutwalire omukulu w'abagabuzi." Ne basena ne bamutwalira.

⁹ Omukulu w'abagabuzi bwe yalega ku mazzi agafuuse wayini, nga tamanyi gy'avudde, so nga bo abaweereza baali bamanyi, n'ayita omugole omusajja

¹⁰ n'amugamba nti, "Bulijo omuntu asooka kugabula wayini omuka, n'oluvannyuma ng'abagenyi be banywedde nnyo, tebakyafaayo olwo n'alyoka agabula ogutali muka nnyo. Naye ggwe wayini omuka gw'osembezzaayo!"

¹¹ Ekyamagero kino, Yesu kye yasookerako okukola mu lwatu mu Kaana eky'e Ggaliraaya, ng'alaga ekitiibwa kye. Abayigirizwa be bwe baakiraba ne bamukkiriza.

¹² Embaga bwe yaggwa Yesu n'adda e Kaperunawumu n'abayigirizwa be n'amalayo ennaku ntono ng'ali eyo ne nnyina ne baganda be.

Yesu Alongoosa Yeekaalu

¹³ Embaga y'Abayudaaya ey'Okuyitako bwe yali eneetera okutuuka Yesu n'ayambuka e Yerusaalemi.

¹⁴ N'asanga mu Yeekaalu abaali batunda ente n'endiga n'amayiba era n'abali bawaanyisa ensimbi.

¹⁵ Awo Yesu n'addirira emiguwa n'agifunyaafunya ne giba ng'embooko n'agobawo endiga n'ente, n'asaasaanya n'ensimbi ez'abaali bawaanyisa, n'avuunika n'emmeeza zaabwe.

¹⁶N'akyukira abaali batunda amayiba n'abagamba nti, "Bino mubiggye wo. Temufuula Nnyumba ya Kitange katale."

¹⁷Awo abayigirizwa ne bajukira Ekyawandiikibwa ekigamba nti, "Obuggyga bw'Ennyumba yo, Ayi Mukama, bulindya."

¹⁸Awo Abayudaaya ne bamubuuza nti, "Kabonero ki k'otulaga nti olina obuyinza okukola bino?"

¹⁹Yesu kwe kuddamu nti, "Mumenyeewo Yeekaalu eno ngizzeewo mu nnaku ssatu."

²⁰Ne bamuddamu nti, "Kiki ky'otegeeza? Yeekaalu eno yatwalira ddala emyaka amakumi ana mu mukaaga okuzimba oyinza otya okugizimbira ennaku essatu?"

²¹Kyokka Yeekaalu gye yali ayogerako gwe mubiri gwe.

²²Yesu bwe yamala okuzuukira abayigirizwa ne bajukira nti kino kye yali ayogerako. Ne bakkiriza ebyawandiikibwa n'ebigambo Yesu bye yayogerako.

²³Awo Yesu bwe yali mu Yerusaalemi mu kiseera eky'Embaga ey'Okuyitako, bangi baalaba obubonero bwe yali akola ne bakkiriza erinnya lye.

²⁴Kyokka Yesu teyabeesiga, kubanga amanyiabantu bonna,

²⁵kubanga yamanya bw'afaanana, nga teyeetaaga kubuulirwa muntu kyali.

Yokaana 3

Yesu ne Nikodemo

¹Awo waaliwo omukulembeze w'Abayudaaya erinnya lye Nikodemo, Omufalisaayo,

²n'ajja eri Yesu ekiro okwogera naye. N'amugamba nti, "Labbi, tumanyi nti oli muyigiriza eyava eri Katonda kubanga eby'amagero by'okola tewali ayinza kubikola okuggyako nga Katonda ali wamu naye."

³Yesu n'amuddamu nti, "Ddala ddala nkugamba nti, Omuntu bw'atazaalibwa mulundi gwakubiri tayinza kulaba bwakabaka bwa Katonda."

⁴Nikodemo n'amuddamu nti, "Omuntu ayinza atya okuzaalibwa bw'aba nga muntu mukulu? Ayinza okuyingira mu lubuto lwa nnyina omulundi ogwokubiri, n'azaalibwa?"

⁵Yesu kwe kumuddamu nti, "Ddala ddala nkugamba nti, Okuggyako ng'omuntu azaaliddwa amazzi n'Omwoyo tasobola kuyingira mu bwakabaka bwa Katonda.

⁶Ekizaalibwa omubiri kiba mubiri, n'ekizaalibwa Omwoyo kiba mwoyo.

⁷Noolwekyo teweewuunya kubanga nkugambye nti kibagwanira okuzaalibwa omulundi ogwokubiri.

⁸Empewo ekuntira gy'eyagala, n'owulira okuwuuma kwayo, naye tomanya gy'eva newaakubadde gyegenda; bw'atyo bw'abeera omuntu yenna azaalibwa Omwoyo."

⁹ Nikodemo n'amubuuza nti, "Ebyo biyinza bitya okubaawo?"

¹⁰ Yesu n'amuddamu nti, "Ggwe omuyigiriza wa Isirayiri, n'otomanya bintu bino?

¹¹Ddala ddala nkugamba nti twogera kye tumanyi, ne tutegeeza kye twalaba, so temukkiriza bujulirwa bwaffe.

¹²Naye obanga temukkiriza bwe mbabuulira eby'ensi, kale munaasobola mutya okukkiriza bwe nnaababuulira eby'omu ggulu?

¹³Kubanga tewali muntu eyali alinnye mu ggulu, okuggyako eyava mu ggulu, ye Mwana w'Omuntu.

¹⁴Era nga Musa bwe yawanika omusota mu ddungu, bwe kityo n'Omwana w'Omuntu kimugwanira okuwanikibwa,

¹⁵buli amukkiriza alyoke afune obulamu obutaggwaawo.

¹⁶ "Kubanga Katonda bwe yayagala ensi, bw'atyo n'awaayo Omwana we omu yekka, buli muntu yenna amukkiriza aleme kuzikirira, wabula afune obulamu obutaggwaawo.

¹⁷Kubanga Katonda teyatuma Mwana we mu nsi kugisalira musango, wabula ensi erokolebwe okuyita mu ye.

¹⁸Amukkiriza tasalibwa musango, naye atakkiriza gumaze okumusinga kubanga takkiririza mu linnya ly'Omwana oyo omu yekka owa Katonda.

¹⁹Era guno gwe musango nti: Omusana guzze mu nsi, kyokka abantu ne baagala ekizikiza okusinga omusana, kubanga ebikolwa byabwe bibi.

²⁰Buli akola ebibi akyawa Omusana era tajja eri musana, ebikolwa bye bireme okumanyibwa.

²¹Naye buli ajja eri omusana akola eby'amazima, ebikolwa bye bimanyibwe nga byakolerwa mu Katonda."

Yesu ne Yokaana Omubatiza

²² Oluvannyuma lw'ebyo Yesu n'abayigirizwa be ne bajja mu nsi y'e Buyudaaya, n'abeera eyo nabo, era n'abatiza.

²³Mu kiseera ekyo ne Yokaana yali abatiriza mu Enoni okumpi ne Salimu, kubanga awo waaliwo amazzi mangi, era ng'abantu bangi bajja okubatizibwa,

²⁴olwo nga tannateekebwa mu kkomera.

²⁵Ne wabaawo empaka wakati w'abayigirizwa ba Yokaana n'Omuyudaaya ku nsongya ey'okutukuzibwa.

²⁶Ne bajja eri Yokaana ne bamugamba nti, "Labbi, omuntu oli gwe wali naye emitala w'omugga Yoludaani, gwe wayogerako, laba abatiza era abantu bona bagenda gy'ali."

²⁷Yokaana n'abaddamu nti, "Omuntu tayinza kuba na kintu okuggyako nga kimuweereddwa okuva mu ggulu.

²⁸Mmwe mwennyini mukimanyi bulungi nga bwe nabagamba nti, 'Si nze Kristo.' Nze natumibwa okumukulembra.

²⁹Nannyini mugole ye awasizza, naye mukwano nnannyini mugole ayimirira ng'amuwulidde, era asanyukira nnyo eddoboozi ly'oyo awasizza. Noolwekyo essanyu lyange lituukiride.

³⁰Kimugwanira ye okugulumizibwa naye nze okutoowazibwa.

³¹"Oyo ava mu ggulu, yafuga byonna. Ow'omu nsi, aba wa mu nsi, era ayogera bya mu nsi.

³²Ye ategéeza ebyo bye yalaba ne bye yawulira, so tewali akkiriza by'ategéeza.

³³Naye oyo akkiriza by'ategéeza akakasa nti Katonda wa mazima.

³⁴Kubanga oyo eyatumwa Katonda ategéeza ebigambo bya Katonda, n'Omwoyo gw'agaba tagerebwa.

³⁵Kitaffe ayagala Omwana we era yamukwasa byonna mu mukono gwe.

³⁶Oyo akkiriza Omwana alina obulamu obutaggwaawo, naye oyo atakkiriza Mwana, taliraba bulamu era Katonda amusunguwalira."

Yokaana 4

Yesu n'Omukazi Omusamaliya

¹Awo Yesu bwe yamanya nti Abafalisaayo bategedde nti abantu bangi bafuuse bayigirizwa be, era ng'abatiza bangi okusinga Yokaana,

²newaakubadde nga Yesu yennyini teyabatiza wabula abayigirizwa be, be baabatizanga,

³n'ava e Buyudaaya n'addayo e Ggaliraaya.

⁴Kyali kimugwanira okuyita mu Samaliya.

⁵Awo n'atuuka mu kibuga ky'e Samaliya ekiyitibwa Sukali, nga kiri kumpi n'ekibanja Yakobo kye yawa mutabani we Yusufu.

⁶Awo we waali oluzzi lwa Yakobo. Yesu yali akooye olw'olugendo lwe yatambula, n'atuula awo ku luzzi. Obudde bwali ng'essaawa mukaaga ez'omu ttuntu.

⁷Awo omukazi Omusamaliya bwe yajja okukima amazzi, Yesu n'amugamba nti, "Mpa ku mazzi nnyweko."

⁸Mu kiseera ekyo abayigirizwa be baali bagenze mu kibuga okugulayo ku mmere.

⁹Awo omukazi Omusamaliya n'amugamba nti, "Ggwe Omuyudaaya oyinza otya okusaba nze Omusamaliya amazzi okunywa?" Kubanga Abayudaaya nga tebakolagana na Basamaliya.

¹⁰Yesu n'amuddamu nti, "Singa obadde omanyi ekirabo kya Katonda, n'oyo akugamba nti mpa nnywe ku mazzi bw'ali ggwe wandimusabye, naye yandikuwadde amazzi amalamu."

¹¹Omukazi n'amugamba nti, "Ssebo, tolina kalobo, n'oluzzi luwanvu nnyo.

¹²Ate n'ekirala, ggwe oli mukulu okusinga jjajjaffe Yakobo eyatuwa oluzzi luno ate nga yanywangamu ye n'abaana be n'ensolo ze?"

¹³Yesu n'amuddamu nti, "Buli muntu yenna anywa ku mazzi gano ennyonta eriddamu okumulum."

¹⁴Naye buli anywa ku mazzi nze ge ndimuwa, talirumwa nnyonta emirembe gyonna era galifuuka mu ye ensulo etekalira, ne gakulukuta okutuuka ku bulamu obutaggwaawo."

¹⁵Omukazi n'amugamba nti, "Ssebo, mpa ku mazzi ago, ennyonta eremenga kunnuma era nneme kujjanga wano kukima mazzi."

¹⁶Yesu n'amugamba nti, "Genda oyite balo, okomewo."

¹⁷Omukazi n'amuddamu nti, "Sirina baze!" Yesu n'amugamba nti, "Oyogedde kituufu nti tolina balo.

¹⁸Kubanga walina babalo bataano, naye oyo gw'olina kaakano si balo. Ekyo oyogedde mazima."

¹⁹Omukazi n'agamba Yesu nti, "Ssebo, ndaba ng'oli nnabbi.

²⁰Ku lusozi luno bajjajjaffe kwe baasinzipanga. Naye mmwe mugamba nti, Yerusaalemi kye kifo ekigwana okusinzizangamu."

²¹Yesu n'amugamba nti, "Mukazi wattu nzikiriza, kubanga ekiseera kijja kye mutualisinzizangamu Kitaffe ku lusozi luno wadde mu Yerusaalemi.

²²Mmwe musinza kye mutamanyi; ffe tusinza kye tumanyi kubanga obulokozi buva mu Buyudaaya.

²³Naye ekiseera kijja, era kituuse, abo abasiniza mu mazima bwe banaasinzizanga Kitaffe mu mwoyo ne mu mazima. Kubanga Kitaffe anoonya abo abamusinza era n'abo abamusinza kibagwanira okumusinzanga mu mwoyo ne mu mazima.

²⁴Kubanga Katonda Mwoyo n'abo abamusinza kibagwanira okumusinza mu mwoyo ne mu mazima."

²⁵Omukazi n'amugamba nti, "Weewaawo, mmanyi nti Masiya, gwe bayita Kristo, ajja. Ye bw'alijja, alitureeza ebintu byonna."

²⁶Yesu n'amugamba nti, "Nze nzuuno ayogera naawe."

²⁷Awo mu kiseera ekyo abayigirizwa ba Yesu ne bakomawo. Ne beewuunya okulaba ng'ayogera n'omukazi. Kyokka ne watabaawo amubuuza nsonga emwogezenza naye wadde bye babadde boogerako.

²⁸Awo omukazi n'aleka awo ensuwa ye n'agenda mu kibuga n'ategeeza abantu nti,

²⁹"Mujje mulabe omuntu antegeezenza buli kye nnali nkoze. Ayinza okuba nga ye Kristo?"

³⁰Ne bava mu kibuga ne bajja eri Yesu.

³¹Mu kiseera ekyo abayigirizwa baali beegayirira Yesu alye ku mmere, nga bagamba nti, "Labbi lya ku mmere."

³²N'abaddamu nti, "Nze nnina ekyokulya mmwe kye mutamanyi."

³³Awo abayigirizwa ne beebuzaganya nti, "Waliwo omuntu amuleetedde ekyokulya?"

³⁴Yesu n'abaddamu nti, "Ekyokulya kyange kwe kukola eyantuma by'ayagala, era n'okutuukiriza omulimu gwe.

³⁵Mmwe temugamba nti, 'Ekyasigaddeo emyezi ena amakungula gatuuke?' Kale muyimuse amaaso gammwe, mutunuulire enimiro! Amakungula gatuuse.

³⁶Akungula asasulwa empeera ye era n'akuinjaanyiza ebibala mu bulamu obutaggwaawo, olwo asiga n'akungula balyoke basanyukire wamu.

³⁷Bwe kityo ekigambo nti, 'Omu asiga omulala n'akungula,' kye kiba eky'amazima.

³⁸Mbatumye mmwe okukungula kye mutaasiga. Abalala be baasiga naye mmwe mugobolodde."

Abasamaliya bangi bakkiriza

³⁹ Abasamaliya bangi ab'omu kibuga abaamukkiririzaamu olw'ebyo omukazi bye yabategeeza, ng'abagamba nti, "Antegeezenza buli kye nnali nkoze!"

⁴⁰ Awo Abasamaliya bwe bajja eri Yesu ne bamwegayirira yeeyongere okubeera nabo, n'abeera nabo ennaku bbiri.

⁴¹ Bangi ne bakkiriza olw'ebyo bye yabategeeza.

⁴² Awo ne bagamba omukazi nti, "Tumukkiriza si lwa bigambo byo byokka, naye naffe twewuliridde ebigambo bye. Ddala tutegedde nga ye Mulokozi w'ensi."

Yesu Awonya Mutabani w'Omukungu

⁴³ Ennaku ezo ebbiri bwe zaggwaako, Yesu n'ava e Samaliya n'alaga e Ggaliraaya.

⁴⁴ Ye yennyini yagamba nti, "Nnabbi taweebwa kituibwa mu nsi gy'asibuka."

⁴⁵ Awo Abagaliraaya ne bamwaniriza n'essanyu lingi nnyo, kubanga baali bamaze okulaba eby'amagero bye yakolera mu Yerusaalemi bwe baali ku Mbaga ey'Okuyitako.

⁴⁶ Yesu n'akomawo mu Kaana eky'e Ggaliraaya, gye yafuulira amazzi wayini. Waaliyo omukungu wa gavumenti ow'e Kaperunawumu eyalina mutabani we nga mulwadde.

⁴⁷ Omukungu bwe yawulira nga Yesu avudde e Buyudaaya azze e Ggaliraaya, n'agenda gy'ali n'amusaba agende amuwonyeze mutabani we eyali okumpi n'okufa.

⁴⁸ Yesu n'amugamba nti, "Temusobola kunzikiriza nga temulabye ku bubonero na byamagero?"

⁴⁹ Omukungu n'amugamba nti, "Mukama wange, nkusaba oserengete ojje ng'omwana wange tannafa!"

⁵⁰ Awo Yesu n'amugamba nti, "Ggenda mutabani wo awonye!" Omusajja n'akkiriza Yesu ky'amugambye n'agenda.

⁵¹ Naye bwe yali ng'akyali mu kkubo abaddu be ne bamusisinkana ne bamutegeeza nti mutabani we awonye.

⁵² N'ababuuza ekiseera omulenzi we yassuukidde. Ne bamuddamu nti, "Jjo olw'eggulo essaawa nga musanvu omusujja ne gumuwonako!"

⁵³ Awo Kitaawe w'omulenzi n'ajjukira nga ky'ekiseera ekyo Yesu we yamugambira nti, "Mutabani wo awonye." Awo omukungu oyo n'ab'enju ye bona ne bakkiriza.

⁵⁴ Kino kye kyamagero ekyokubiri Yesu kye yakola ng'akomyewo e Ggaliraaya ng'avudde e Buyudaaya.

Yokaana 5

Yesu Awonyeza ku Kidiba

¹Oluvannyuma Yesu n'addayo e Yerusaalemi abeewo ku emu ku mbaga z'Abayudaaya.

²Munda mu Yerusaalemi, okumpi n'Omulyango gw'Endiga waliwo ekidiba ekiyitibwa Besusayida, mu Lwebbulaniya, ekyazimbibwako ebigango bitaano okukyetooloola.

³Mu bigango ebyo mwagalimirangamu abalwadde bangi nnyo: abalema, abazibe b'amaaso, n'abakoozimbye.

⁴Kubanga bwe waayitangawo ekiseera malayika wa Mukama n'ajja n'atabula amazzi ago, era omuntu eyasookanga okukka mu kidiba ng'amazzi gaakatabulwa, ng'awonyezebwa.

⁵Waaliwo omusajja eyali yaakalwalira emyaka amakumi asatu mu munaana.

⁶Yesu bwe yamulaba n'amanya nga bw'amaze ebbanga eddene nga mulwadde, n'amubuuza nti, "Oyagala okuwonyezebwa?"

⁷Omusajja omulwadde n'amuddamu nti, "Ssebo sirina muntu ayinza kunnyamba okunsuula mu kidiba ng'amazzi gaakatabulwa. Buli lwe ngezaako okukkamu we ntukirayo ng'omulala yansoose dda."

⁸Yesu n'amugamba nti, "Situka ozingeko omukeeka gwo otambule."

⁹Amangwago omusajja n'awonyezebwa. N'azingako omukeeka gwe ne yeetambulira. Olunaku olwo lwali lwa Ssabiiti.

¹⁰Abayudaaya kyebaava bagamba omusajja awonyezebbwa nti, "Toteekwa kwetikka mukeeka gwo ku Ssabiiti, oba omenye etteeka lya Ssabiiti."

¹¹Ye n'addamu nti, "Omuntu amponyezza y'anjambye nti, 'Situlawo omukeeka gwo otambule.'"

¹²Ne bamubuuza nti, "Omuntu oyo ye ani eyakugambye okusitula omukeeka gwo otambule?"

¹³Kyokka omusajja eyawonyezebwa yali tamumanyi, kubanga Yesu yali abulidde mu bantu abangi abaali mu kifo ekyo.

¹⁴Oluvannyuma lw'ebyo Yesu n'amulaba mu Yeekalu, n'amugamba nti, "Kaakano oli mulamu, naye toddangamu okwonoona, akabi akasingawo kaleme okukutuukako."

¹⁵Omuntu oyo n'agenda n'ategeeza Abayudaaya nti Yesu ye yamuwonya.

¹⁶Okuva olwo Abayudaaya ne batandika okuyigganya Yesu, kubanga yakolanga ebintu ebifaanana ng'ekyo ku Ssabbiiti.

¹⁷Yesu n'abaddamu nti, "Kitange bulijjo akola, nange nteekwa okukola."

¹⁸Abayudaaya kyebaava beeyongera okusala amagezi okumutta, kubanga teyakoma ku kya kumenya mateeka ga Ssabbiiti kyokka, naye yeeyita Omwana wa Katonda, ne yeefuula eyenkanaankana ne Katonda.

¹⁹Awo Yesu n'abagamba nti, "Ddala ddala mbagamba nti, Omwana taliiko ky'akola ku bubwe, wabula ekyo ky'alaba Kitaawe ng'akola. Kubanga ye by'akola n'Omwana by'akola.

²⁰Kubanga Kitaawe w'Omwana ayagala Omwana we era amulaga ky'akola, era Omwana ajja kukola ebyamagero bingi ebyewuunyisa okusinga na bino.

²¹Kubanga nga Kitaawe w'Omwana bw'azuukiza abafu, bw'atyo n'Omwana awa obulamu abo baayagala.

²²Era Kitaawe w'Omwana talina n'omu gw'asalira musango, naye obuyinza obw'okusala emisango gyonna yabuwa Omwana we,

²³abantu bonna balyoke bassengamu Omwana ekitiibwa nga bwe bassa mu Kitaawe ekitiibwa. Atassaamu Mwana kitiiibwa, ne Kitaawe eyamutuma tamussaamu kitiiibwa.

²⁴ "Ddala ddala mbagamba nti, Awulira ebigambo byange, n'akkiriza eyantuma, aba n'obulamu obutaggwaawo, era talisingibwa musango, kubanga aliba avudde mu kuzikirira ng'atuuse mu bulamu.

²⁵Ddala ddala mbagamba nti, Ekiseera kijja, era kituuse, abafu lwe baliwulira eddoboozi ly'Omwana wa Katonda, era n'abaliwulira baliba balamu.

²⁶Kubanga nga Kitaawe w'Omwana bw'alina obulamu mu ye, bw'atyo bwe yawa Omwana okuba n'obulamu mu ye,

²⁷era yamuwa obuyinza okusalira abantu emisango, kubanga ye Mwana w'Omuntu.

²⁸ "Ekyo tekibeeuwunyisa, kubanga ekiseera kijja abafu abali mu ntaana lwe baliwulira eddoboozi lye

²⁹ne bavaamu kubanga be baakola ebintu ebirungi, era balifuna obulamu obutaggwaawo, naye abo abaakolanga ebibi balizuukira ne babonerezebwa.

³⁰Kyokka Nze siyinza kukola kintu kyonna ku bwange. Kitange nga bw'ajnjamba bwe nkola, era n'omusango gwe nsala gwa nsonga kubanga sinoonya bye njagala nze, wabula eyantuma by'ayagala.

³¹Singa nneeyogerako nzekka, bye nneyogerako tebiba bya mazima.

³²Waliwo ateggeza gwe ndi, era mmanyi nga bya njogerako bya mazima.

³³ “Mmwe mwatuma ababaka eri Yokaana, era ayogedde eby'amazima.

³⁴Ebigambo ebinkakasa tebiva mu muntu, naye ebyo mbyogera mulyoke mulokolebwe.

³⁵Oyo ye yali ettaala eyayaka okubaleetera ekitangaala, ne musalawo mubeere mu kitangaala ekyo akaseera katono.

³⁶ “Naye nnina ebinkakasa okukira ebyo ebya Yokaana, bye byamagero bye nkola, Kitange bye yampa, era bikakasa nti Kitange ye yantuma

³⁷ne Kitange yennyini eyantuma akakasa ebinkwatako. Temuwuliranga ku ddoboozi lye wadde okulaba ekifaananyi kye.

³⁸N'ekigambo kye tekiri mu mmwe, kubanga temukkiriza oyo gwe yatuma.

³⁹Munoonya mu Byawandiikibwa kubanga mulowooza nti muyinza okubifuniramu obulamu obutaggwaawo. Kyokka Ebyawandiikibwa ebyo bye binjulira.

⁴⁰Naye temwagala kujja gye ndi mulyoke mufune obulamu obutaggwaawo.

⁴¹ “Sinoonya kusiimibwa bantu.

⁴²Naye mmwe mbamanyi temulimu kwagala kwa Katonda.

⁴³Nzize mu linnya lya Kitange ne mutannyaniriza. Omulala bw'anajja ku bubwe oyo mujja kumwaniriza.

⁴⁴Kale muyinza mutya okukkiriza nga munoonya kusiimibwa bantu bannammwe, so nga temunoonya kusiimibwa Katonda oyo Omu yekka?

⁴⁵ “Naye temulowooza nti ndibawawaabira eri Kitange. Abawawaabira ye Musa, mmwe gwe mulinamu essuubi.

⁴⁶Singa Musa mumukkiriza, nange mwandinzikirizza, kubanga yampandiikako.

⁴⁷Kale obanga temukkiriza bye yawandiika, munakkiriza mutya ebigambo byange?”

Yokaana 6

Yesu Aliisa Abantu Enkumi Ettaano

¹Oluvannyuma lw'ebyo, Yesu n'asomoka ennyanja ey'e Ggaliraaya, era eyitibwa ey'e Tiberiya.

²Ekibiina ky'abantu kinene ne bamugoberera, kubanga baalaba ebyamagero bye yakola ng'awonya abalwadde.

³Awo Yesu n'alinnya ku lusozi n'atuula wansi n'abayigirizwa be.

⁴Embaga y'Abayudaaya eyitibwa Okuyitako yali eri kumpi okutuuka.

⁵ Yesu bwe yayimusa amaaso n'alaba ekibiina ky'abantu ekinene, nga bajja gy'ali, n'agamba Firipo nti, "Tunaagula wa emmere okuliisa abantu abo bonna?"

⁶ Yayogera atyo kugezesza Firipo, kubanga Yesu yali amanyi ky'agenda okukola.

⁷ Firipo n'amuddamu nti, "Emmere egula eddinaali ebikumi ebibiri teesobole na kubabuna, buli omu okulyako akatono."

⁸ Awo omu ku bayigirizwa be, Andereya muganda wa Simooni Peetero, n'amugamba nti,

⁹ "Wano waliwo omulenzi alina emigaati etaano egya sayiri, n'ebyenyanja bibiri. Naye bino binaagasa ki abantu abangi bwe bat?"

¹⁰ Yesu n'abagamba nti, "Mutuuze abantu." Waaliwo omuddo mungi mu kifo ekkyo. Awo abantu ne batuula, ne baba abasajja ng'enkumi ttaano.

¹¹ Awo Yesu n'atoola emigaati ne yeebaza Katonda, n'agabula abantu abatudde. N'ebyenyanja n'akola bw'atyo. Bonna ne balya ne bakkuta.

¹² Oluvannyuma Yesu n'agamba abayigirizwa be nti, "Kale mukuŋjaanye obutundutundu obusigaddewo tuleme kufirwa."

¹³ Ne babukuŋjaanya, ne bajjuza ebisero kkumi na bibiri eby'obutundutundu obwava mu migatti etaano egya sayiri, obwasigalawo nga bamaze okulya.

¹⁴ Abantu bwe baalaba ekyamagero Yesu kye yakola ne bagamba nti, "Ddala ono ye Nnabbi oli alindirirwa okujja mu nsi!"

¹⁵ Yesu bwe yategeera nti bategeka okumukwata bamufuule kabaka waabwe n'addayo yekka ku lusozi.

Yesu Atambulira ku Mazzi

¹⁶ Obudde bwe bwawungeera abayigirizwa ba Yesu ne baserengeta ku nnyanja

¹⁷ ne basaabala mu lyato ne boolekera Kaperunawumu. N'obudde bwali buzibye nga ne Yesu tannaba kutuuka gye bali.

¹⁸ Awo omuyaga ne gukunta mungi, ennyanja n'esiikuuka.

¹⁹ Bwe baavugako kilomita nga ttaano oba mukaaga, ne balaba Yesu ng'atambulira ku mazzi, ng'asemberera eryato, ne batya.

²⁰ Yesu n'abagamba nti, "Ye Nze, temutya!"

²¹ Ne baagala okumuyingiza mu lyato, amangwago eryato ne ligoba ku ttale gye baali bagenda.

Abantu Banoonya Yesu

²²Ku lunaku olwaddirira, ekibiina ky'abantu abaasigala emitala w'eri, ne balabawo eryato limu lyokka, ne bamanya ng'abayigirizwa be baawunguka bokka mu lyato.

²³Kyokka amaato ne gava e Tiberiya ne gagoba awo kumpi n'ekifo abantu we baaliira emigaati Yesu gye yabawa ng'amaze okwebaza.

²⁴Awo abantu bwe baalaba nga Yesu taliwo wadde abayigirizwa be, ne bakwata amaato ne bawunguka ne batuuka e Kaperunawumu nga banoonya Yesu.

²⁵Bwe baamulaba emitala w'enyanja ne bamubuuza nti, "Labbi, watuuse ddi wano?"

²⁶Yesu n'abaddamu nti, "Ddala ddala mbagamba nti munnoonya si lwa kubanga mwalaba obubonero, naye lwa kubanga mwalya emigaati ne mukkuta.

²⁷Temukolerera mmere eggwaawo, wabula munnoonye emmere ebeerera era etuusa mu bulamu obutaggwaawo, Omwana w'Omuntu gy'alibawa, kubanga Kitaawe w'Omwana amussizaako akabonero."

²⁸Awo ne bamubuuza nti, "Tukole ki okutuukiriza ekyo Katonda ky'ayagala?"

²⁹Yesu n'abaddamu nti, "Katonda ky'ayagala mukole kwe kukkiriza oyo gwe yatuma."

³⁰Ne bamugamba nti, "Kale kabonero ki ggwe k'okola, tulabe tukukkirize? Onookola kabonero ki?

³¹Bajjajjaffe baalya emmaanu mu ddungu nga bwe kyawandiikibwa nti, 'Yabawa emmere okuva mu ggulu balye.'

³²Awo Yesu n'abagamba nti, "Ddala ddala mbagamba nti Musa si ye yabawa emmere eva mu ggulu, wabula Kitange ye yabawa emmere ey'amazima eva mu ggulu.

³³Emmere ya Katonda ye eva mu ggulu, era ye awa ensi obulamu."

³⁴Ne bamugamba nti, "Mukama waffe, tuwenga emmere eyo buli lunaku."

³⁵Yesu n'abaddamu nti, "Nze mmere ey'obulamu. Ajja gye ndi enjala teriddayo kumuluma, era abo abanzikiriza tebaliddayo kulumwa nnyonta.

³⁶Naye nabagamba nti mundabye naye era ne mutanzikiriza.

³⁷Buli muntu Kitange gw'ampa alijja gye ndi, era buli ajja gye ndi sirimugohera bweru.

³⁸Kubanga ekyanzigya mu ggulu kwe kukola ekyo Katonda eyantuma ky'ayagala, so si Nze bye njagala ku bwange.

³⁹Eyantuma ky'ayagala kye kino: Ku abo be yampa nneme kubulwako n'omu wabula bona mbazuukize ku lunaku olw'enkomerero.

⁴⁰Kubanga Kitange ky'ayagala kye kino nti buli alaba Omwana we n'amukkiriza afuna obulamu obutaggwaawo ku lunaku olw'enkomerero."

Yesu y'Emmere ey'Obulamu

⁴¹Awo Abayudaaya ne batandika okwemulugunyiza Yesu, kubanga yabagamba nti, "Nze mmere eyava mu ggulu."

⁴²Ne bagamba nti, "Ono si ye Yesu omwana wa Yusufu? Kitaawe ne nnyina tubamanyi. Kale ayinza atya okugamba nti, 'Nava mu ggulu?'"

⁴³Yesu n'abagamba nti, "Temwemulugunya.

⁴⁴Tewali ayinza kujja gye ndi wabula nga Kitange eyantuma amuyise, era Nze ndimuzuukiza ku lunaku olw'enkomerero.

⁴⁵Kubanga kyawandiikibwa mu bannabbi nti, 'Bonna baliyigirizibwa Katonda.' Era buli gw'ayigiriza n'ategeera amazima ajja gye ndi.

⁴⁶Si kuba nti waliwo eyali alabye ku Kitange, wabula oyo eyava eri Katonda, ye yalaba Kitaawe.

⁴⁷Ddala ddala mbagamba nti, Akkiriza aba n'obulamu obutaggwaawo!

⁴⁸Nze mmere ey'obulamu.

⁴⁹Bajjajjammwe baalya emaanu mu ddungu ne bafa.

⁵⁰Eno y'emmere eyava mu ggulu, buli agiryako aleme okufa.

⁵¹Nze mmere ennamu eyava mu ggulu omuntu bw'alya ku mmere eno aliba mulamu emirembe n'emirembe. Emmere gye ndigaba okuleetera ensi obulamu, gwe mubiri gwange."

⁵²Awo Abayudaaya ne batandika okuwakana bokka na bokka nga bagamba nti, "Ono ayinza atya okutuwa omubiri gwe okugulya?"

⁵³Yesu n'abagamba nti, "Ddala ddala mbagamba nti bwe mutalya mubiri gwa Mwana wa Muntu, ne munywa n'omusaayi gwe, temuyinza kuba na bulamu mu mmwe.

⁵⁴Buli alya omubiri gwange n'anywa n'omusaayi gwange, ng'afunye obulamu obutaggwaawo era ndimuzuukiza ku lunaku olw'enkomerero.

⁵⁵Kubanga omubiri gwange kye kyokulya ddala n'omusaayi gwange kye kyokunywa ddala.

⁵⁶Oyo alya ku mubiri gwange era n'anywa omusaayi gwange abeera mu nze, era nange mbeera mu ye.

⁵⁷Nga Kitange eyantuma bw'ali omulamu, nange bwe ndi omulamu ku bwa Kitange, noolwekyo oyo alya ku nze naye aliba mulamu ku bwange.

⁵⁸Eno ye mmere eva mu ggulu. Teri ng'eyo bajajammwe gye baalya ne bafa. Alya emmere eno anaabanga mulamu emirembe n'emirembe."

⁵⁹Ebyo Yesu yabyogera ng'ayigiriza mu kkuññaaniro e Kaperunawumu.

Abayigirizwa Abamu Baleka Yesu

⁶⁰Abayigirizwa ba Yesu bangi bwe baabiwlira ne bagamba nti, "Ekigambo ekkyo kizibu okutegeera. Ani asobola okutunnyonnyola ky'agamba?"

⁶¹Awo Yesu bwe yategeera nga n'abayigirizwa be bakyemulugunyako, n'abagamba nti, "Ekyo kibeesittaza?

⁶²Kale mulirowooza ki bwe muliraba Omwana w'Omuntu ng'addayo gye yava?

⁶³Mwoyo Mutukuvu y'awa obulamu. Omubiri teguliiko kye gugasa. Ebigambo bye njogedde gye muli gwe mwoyo era bwe bulamu.

⁶⁴Naye era abamu ku mmwe temukkiriza." Kubanga okuva ku lubereberye Yesu yategeera abatamukkiriza era n'oyo agenda okumulyamu olukwe.

⁶⁵Awo n'agamba nti, "Kyennava ijambala nti tewali ayinza kujja gye ndi bw'atakiweebwa Kitange."

⁶⁶Okuva olwo bangi ku bayigirizwa be ne bamuvaako ne bataddayo kuyita naye.

⁶⁷Awo Yesu n'akyukira abayigirizwa be ekkumi n'ababiri n'ababuuza nti, "Nammwe mwagala kugenda?"

⁶⁸Simooni Peetero n'amuddamu nti, "Mukama waffe, tunaagenda eri ani? Ggwe wekka gw'olina ebigrabo by'obulamu obutaggwaawo.

⁶⁹Ffe tubikkiriza era tumanyi nti oli Mutukuvu wa Katonda."

⁷⁰Awo Yesu kwe kubagamba nti, "Mmwe ekkumi n'ababiri si nze nabalonda? Nayé omu ku mmwe Setaani!"

⁷¹Yesu yayogera ku Yuda, mutabani wa Simooni Isukalyoti, kubanga ye yali agenda okumulyamu olukwe.

Yokaana 7

Yesu ne Baganda be

¹Oluvannyuma lw'ebyo, Yesu n'alaga e Ggaliraaya, kubanga teyayagala kubaera mu Buyudaaya, kubanga Abayudaaya baali bamunoonya okumutta.

²Naye embaga y'Abayudaaya eyitibwa ey'Ensiisira yali eneetera okutuuka.

³Baganda ba Yesu ne bamugamba nti, "Vva wano, olage mu Buyudaaya, abayigirizwa bo balabe ebyamagero by'okola.

⁴Tosobola kwatiikirira nga weekwese. Kale obanga, okola ebintu ebyo, weerage eri ensi."

⁵Baganda be nabo tebaamukkiriza.

⁶Yesu n'abaddamu nti, "Ekiseera kyange eky'okugenda tekinnatuuka. Naye mmwe muyinza okugenda mu kiseera kyonna we mwagalira.

⁷Mmwe ensi teyinza kubakyawa, naye Nze enkyawa kubanga ngitegeeza ebikolwa byayo ebibi.

⁸Mmwe mwambuke ku mbaga. Nze sijja kwambuka ku mbaga eno, kubanga ekiseera kyange tekinnatuuka."

⁹Bwe yamala okubagamba ebyo n'asigala mu Ggaliraaya.

Yesu ku Mbaga ey'Ensiisira

¹⁰Baganda be bwe bamala okwambuka ku mbaga naye n'ayambuka, mu kyama so si mu lwatu.

¹¹Awo Abayudaaya ne bamunoonya ku mbaga nga beebuuza nti, "Omusajja oli, ali ludda wa?"

¹²Ne wabaawo oluvuuvuumo lungi mu bantu. Abamu ne bagamba nti, "Mulungi." Naye abalala nga bagamba nti, "Nedda, alimbaabantu."

¹³Kyokka olw'okutya Abayudaaya, tewaaliwo amwogerako mu lwatu.

Yesu Ayigiriza ku Mbaga

¹⁴Awo mu makkati g'embaga Yesu n'ayambuka mu Yeekaalu n'ayigiriza.

¹⁵Abakulembeze b'Abayudaaya ne beewuunya nga bagamba nti, "Omuntu ono ayinza atya okumanya okusoma so nga tasomangako?"

¹⁶Awo Yesu kwe kubaddamu nti, "Nze sibayigiriza byange ku bwange, wabula eby'oyo eyantuma.

¹⁷Buli ayagala okukola Katonda by'ayagala, ategeera obanga bye njigiriza byange ku bwange oba bya Katonda.

¹⁸Ayogera ku bubwe anoonya kitibwa kye, naye oyo anoonya ekitibwa ky'oyo eyantuma wa mazima so n'obutali butuukirivu tebuba mu ye. Musa teyabawa amateeka?

¹⁹Ku mmwe tekuliiko n'omu akwata mateeka. Kale lwaki musala amagezi okunzita?"

²⁰Ekibiina ky'abantu ne baddamu nti, "Oliko dayimooni! Ani asala amagezi okukutta?"

²¹Yesu n'addamu nti, "Nakola ekikolwa kimu ku Ssabbiiti buli muntu ne yeewuunya.

²²Musa kyeyava abalagira okukomolebwa, okukomolebwa tekwatandikira ku Musa wabula k watandikira ku bajjajammwe; ne ku Ssabbiiti mukomola omuntu.

²³Obanga mukomola ku Ssabbiiti etteeka lya Musa lireme okumenyebwa, kale lwaki Nze munsunguwalira olw'okuwonya omuntu ku Ssabbiiti, n'aba mulamu ddala?

²⁴Temusalanga musango okusinziira ku ndabika, naye musalenga omusango ogw'ensonga."

Yesu ye Kristo

²⁵Awo abantu abamu ab'omu Yerusaalemi ne beebuuzaganya nga bagamba nti, "Ono si ye muntu gwe banoonya okutta?

²⁶Kale wuuno ayigiriza ldatu, ate tebaliiko kye bamugambako. Osanga abakulembeze bategedde nti omuntu ono ye Kristo!

²⁷Naye tumanyi omuntu ono gy'ava; so nga Kristo bw'alijja tewaliba n'omu amanya gy'ava."

²⁸Awo Yesu bwe yali ng'akyayigiriza mu Yeekaalu n'akangula ku ddoboozi n'agamba nti, "Ddala mummanyi ne gye nva mumanyiyo. Sajja ku bwange wabula ekituufu nti oyo eyantuma gwe mutamanyi.

²⁹Nze mmumanyi, kubanga nava gy'ali, era ye yantuma."

³⁰Awo ne basala amagezi okumukwata, kyokka tewaali amukwatako, kubanga ekiseera kye kyali tekinnaba kutuuka.

³¹Naye bangi mu bibiina by'abantu ne bamukkiriza, ne bagamba nti, "Kale Kristo bw'alijja, alikola eby'amagero ebisinga eby'ono byakoze?"

³²Awo Abafalisaayo ne bawulira abantu nga boogera ku Yesu mu bwama. Awo bakabona abakulu n'Abafalisaayo ne batuma abaweereza baabwe okumukwata.

³³Awo Yesu n'agamba nti, "Nzija kumala nammwe ebbanga ttono, ndyoke nzireyo eri oyo eyantuma.

³⁴Mulinnoonya, naye temugenda kundaba, nga gye ndi, mmwe temuyinza kutuukayo."

³⁵Awo Abayudaaya ne beebuuzaganya nti, "Omuntu ono alaga wa gye tutalimulabira? Ayagala kugenda eri abo abaasaasaanira mu Buyonaani, ayigirize Abayonaani?

36Ategeeza ki bw'agamba nti, 'Mulinnoonya, naye temulindaba?' Era nti, 'Gye ndaga temuyinza kutuukayo? "

Ensulo z'Amazzi amalamu

37Awo ku lunaku olw'embaga olusembayo, olusingira ddala obukulu, Yesu n'ayimirira n'ayogera n'eddoboozi ery'omwanguka n'agamba nti, "Buli alina ennyonta, aije gye ndi anywe!"

38Ng'Ekyawandiikibwa bwe kigamba nti buli akkiriza Nze emigga egy'amazzi amalamu girikulukuta nga gifuluma mu mutima gwe!"

39Yesu yali ayogera ku Mwoyo Mutukuvu, abamukkiriza gwe baali bagenda okufuna, kubanga Mwoyo oyo yali tannagabibwa, kubanga Yesu yali tannaba kugulumizibwa.

40Abantu abamu mu kibiina bwe baawulira ng'ayogera bw'atyo, ne bagamba nti, "Ddala omuntu ono ye Nnabbi."

41Abalala ne bagamba nti, "Omuntu ono ye Kristo." Naye abalala ne bagamba nti, "Nedda, Kristo tayinza kuba ng'ava mu Ggaliraaya."

42Kubanga Ekyawandiikibwa kigamba nti: Kristo wa kuva mu zzadde lya Dawudi, era nga wa kuzaalibwa mu Besirekemu, ekibuga kya Dawudi mwe yali.

43Awo ekibiina ne kyesalamu olwa Yesu.

44Abamu ne baagala okumukwata, kyokka ne wabulawo amukwatako.

Obutakkiriza bw'Abakulembeze b'Abayudaaya

45Awo abaweereza b'abakabona abakulu n'Abafalisaayo ne baddayo eri bakabona abakulu n'Abafalisaayo. Abakulembeze Ne bababuuza nti, "Lwaki temumuleese?"

46Abaweereza ne baddamu nti, "Ebigambo by'ayogera bya kitalo, tetubiwlirangako."

47Abafalisaayo ne babagamba nti, "Era nammwe abakyamizza?

48Waliwo n'omu ku bakulembeze wadde ku Bafalisaayo eyali akkiririzza mu muntu oyo?

49Naye ekibiina ky'abantu bano abatamanyi mateeka, bakolimiddwa!"

50Awo Nikodemo, omu ku bo eddako eyagenda eri Yesu, n'abuuza nti,

51"Amateeka gaffe gakkiriza okusalira omuntu omusango nga tannaba kuwozesebwa okutegeera ky'akoze?"

52Ne bamuddamu nti, "Naawe wava Ggaliraaya? Nnoonyereza, ojja kulaba nti e Ggaliraaya teva nnabbi."

⁵³ Awo ne baabuka, buli omu n'addayo eka.

Yokaana 8

Omukazi Eyakwatibwa ng'Ayenda

¹ Awo Yesu n'alaga ku lusozi olwa Zeyituuni.

² Ku makya ennyo n'akomawo mu Yeekaalu, abantu bona ne bajja gy'ali, n'atuula n'abayigiriza.

³ Awo abannyonnyozi b'amateeka n'Abafalisaayo ne baleeta omukazi gwe baakwata ng'ayenda, ne bamuteeka wakati mu maaso g'ekibiina.

⁴ Ne bagamba Yesu nti, "Omuyigiriza, omukazi ono akwatibbwaa ng'ayenda.

⁵ Amateeka Musa ge yatulagira gagamba kubakuba mayinja abali ng'ono. Noolwekyo ggwe ogamba otya ku nsonga eyo?"

⁶ Ekyo baakyogera nga bamugezesza, bafune kye banaasinziirako okumuwawaabira.

Naye Yesu n'akutama n'awandiika ku ttaka n'olunwe.

⁷ Bwe beeyongera okumubuuza, n'akutaamulukuka, n'agamba nti, "Mu mmwe atayoonoonangako y'aba asooka okumukuba ejinja."

⁸ N'addamu okukutama, era n'awandiika ku ttaka n'olunwe.

⁹ Bwe baawulira ebyo, ne baseebulukuka kinnoomu, abasinga obukulu nga be basoose, okutuusa Yesu n'omukazi bwe baasigalawo bokka mu maaso g'ekibiina.

¹⁰ Awo Yesu n'akutaamulukuka ate, n'abuuza omukazi nti, "Abakuwawaabira baluwa?"

¹¹ Omukazi n'amuddamu nti, "Mukama wange, tewali n'omu."

Yesu n'amugamba nti, "Nange sikusalira musango kukusinga. Genda, naye toddangayo okwonoona."

Yesu gwe Musana gw'Ensi

¹² Awo Yesu n'ayongera okwogera n'ekibiina, n'agamba nti, "Nze Musana gw'ensi. Angoberera taatambulirenga mu kizikiza, wabula anaabeeranga n'omusana ogw'obulamu."

¹³ Abafalisaayo ne bamugamba nti, "Weeyogerako naye by'oyogera bya bulimba."

¹⁴ Yesu n'abaddamu nti, "Newaakubadde neeyogerako, bye njogra bituufu, kubanga mmanyi gye nava ne gye ndaga. Naye mmwe temumanyi gye nva wadde gye ndaga.

¹⁵Mmwe musala omusango ng'abantu obuntu. Nze siriiko gwe nsalira musango.

¹⁶Naye singa mbadde nsala omusango, ensala yange ya mazima, kubanga siri nzekka, naye ndi ne Kitange eyantuma.

¹⁷Amateeka gammwe gagamba nti ssinga abajulirwa babiri bakkiriziganya ku kintu, obujulirwa bwabwe buba bwa mazima.

¹⁸Kale Nze nneyogerako era n'oyo eyantuma ategéeza ebyange."

¹⁹Awo ne bamubuuza nti, "Kitaawo ali ludda wa?" Yesu n'abaddamu nti, "Nze temuntegeera ne Kitange temumutegeera. Singa muntegeera ne Kitange mwandimutegedde."

²⁰Ebigambo ebyo Yesu yabyogerera mu kifo omuteekebwa ebirabo, bwe yali ng'ayigiriza mu Yeekaalu. Naye ne wataba amukwata, kubanga ekiseera kye kyali tekinnatuuka.

²¹Awo Yesu ne yeeyongera, n'abagamba nate nti, "Nze njenda, mulinnoonya, naye mulifiira mu bibi byammwe. Gye njenda mmwe temuyinza kujjayo."

²²Awo Abayudaaya ne bagamba nti, "Agenda kwetta kyava agamba nti, 'Nze gye ndaga, mmwe temuyinza kujjayo?'"

²³Yesu n'abagamba nti, "Mmwe muli ba ku nsi, naye Nze ndi wa mu ggulu. Mmwe muli ba ku nsi kuno, Nze siri wa ku nsi kuno.

²⁴Kyenvudde mbagamba nti mulifiira mu bibi byammwe, kubanga bwe mutakkiriza nti nze wuuyo, Omwana wa Katonda, mulifiira mu bibi byammwe."

²⁵Ne bamubuuza nti, "Ggwe ani?" Yesu n'abaddamu nti, "Lwaki mbategeeza?

²⁶Nnina bingi eby'okuboogerako n'okubasalira omusango okubasinga, kyokka eyantuma wa mazima, era ebyo bye nawulira okuva gy'ali bye ntegeeza ensi."

²⁷Kyokka tebaategeera Kitaawe gw'ayogerako.

²⁸Awo Yesu n'abagamba nti, "Bwe mulimala okuwanika Omwana w'Omuntu ne mulyoka mutegeera nti nze wuuyo, era siriiko kye nkola ku bwange, naye njogera ebyo Kitange bye yanjigiriza.

²⁹Era oyo eyantuma ali nange, tandekanga bw'omu, kubanga bulijo nkola by'ayagala."

³⁰Yesu bwe yayogera ebiambo ebyo bangi ne bamukkiriza.

Abaana ba Ibulayimu

³¹Awo Yesu n'agamba Abayudaaya abaamukkiriza nti, "Bwe munywerera ku kigambo kyange muba bayigirizwa bange ddala.

³²Era mulitegeera amazima, n'amazima galibafuula ba ddembe."

³³Ne bamuddamu nti, “Ffe tuli bazzukulu ba Ibulayimu, tetubangako baddu ba muntu n’omu. Oyinza otya okugamba nti, ‘Mulifuuka ba ddembe?’ ”

³⁴Yesu n’abaddamu nti, “Ddala ddala mbagamba nti buli akola ekibi aba muddu wa kibi.

³⁵Omuddu taba wa lubeerera mu maka, naye omwana ye, aba waamu ennaku zonna.

³⁶Kale, Omwana bw’alibafuula ab’eddeme, mulibeerera ddala ba ddembe.

³⁷Weewaawo ntegeera nga muli bazzukulu ba Ibulayimu, naye ate abamu ku mmwe musala amagezi okunzita, kubanga ekigambo kyange temukikkiriza.

³⁸Nze mbategeeza ebyo Kitange bye yandaga, nammwe mukola ebyo kitammwe bye yababuulira.”

³⁹Ne bamuddamu nti, “Kitaffe ye Ibulayimu.” Yesu n’abaddamu nti, “Singa mubadde baana ba Ibulayimu mwandikoze ebyo Ibulayimu bye yakola.

⁴⁰Naye kaakano, Nze ababuulidde ebyo byennyini bye nawulira okuva eri Katonda musala amagezi okunzita. Ekifaanana ng’ekyo Ibulayimu teyakikola.

⁴¹Mukola emirimu gya kitammwe.” Ne bamuddamu nti, “Ffe tetwazaalibwa mu bwenzi, Kitaffe gwe tulina ali omu, ye Katonda.”

⁴²Yesu n’abagamba nti, “Singa Katonda ye Kitammwe mwandinjagadde, kubanga nava gy’ali okujja gye muli, sajja ku bwange wabula ye yantuma.

⁴³Lwaki temutegeera bye njogera? Kubanga temwagala kuwulira bigambo byange.

⁴⁴Kubanga Setaani ye kitammwe era nammwe mwagala okukola ebyo kitammwe by’ayagala. Okuva ku lubereberye mutemu era tanywerera mu mazima, era mu ye temuli mazima. Bw’ayogera eby’obulimba ayogera ebiva mu bibye, kubanga mulimba era kitaawe w’abalimba.

⁴⁵Naye kubanga njogera mazima kyemuva mutanzikiriza.

⁴⁶Ani mu mmwe annumiriza ekibi? Bwe njogera amazima, kiki ekibagaana okunzikiriza?

⁴⁷Buli muntu wa Katonda awulira ebigambo bya Katonda. Naye mmwe temuwulira kubanga temuli ba Katonda.”

⁴⁸Awo Abayudaaya ne baddamu Yesu nti, “Tetuli batuufu okugamba nti oli Musamaliya, era oliko dayimooni?”

⁴⁹Yesu n’abaddamu nti, “Nze siriiko dayimooni, naye nzisaamu Kitange ekitiibwa naye mmwe temunzisaamu kitiiibwa.

⁵⁰Naye Nze sinoonya kussibwamu kituibwa, waliwo omu ye akisaanira era y'alamula.

⁵¹Ddala ddala mbagamba nti, Buli anywerera ku kigambo kyange talifa emirembe n'emirembe."

⁵²Awo Abayudaaya ne bamuddamu nti, "Kaakano tutegeeredde ddala nti oliko dayimooni. Ibulayimu yafa era ne bannabbi baafa, ate ggwe ogamba nti, 'Buli anywerera ku kigambo kyange talifa emirembe n'emirembe.'

⁵³Ggwe mukulu okukira jjajjaffe Ibulayimu eyafa? Bannabbi nabo baafa. Ggwe weeyita ani?"

⁵⁴Yesu n'addamu nti, "Singa Nze neegulumiza okwegulumiza kwange tekubaamu nsa, angulumiza ye Kitange mmwe gwe muyita Katonda wammwe,

⁵⁵mmwe temumumanyi. Nze mmumanyi. Bwe ηnjamba nti simumanyi mba mulimba nga mmwe bwe muli. Nze mmumanyi era n'ekigambo kye nkikuuma.

⁵⁶Kitammwe Ibulayimu yasanyuka okulaba olunaku lwange. Yamanya nti nzija era ne kimusanyusa."

⁵⁷Abayudaaya ne bamugamba nti, "Tonnaweza na myaka amakumi ataano egy'obukulu n'ogamba nti walaba Ibulayimu?"

⁵⁸Yesu n'abaddamu nti, "Ddala ddala mbagamba nti Ibulayimu yali tannabaawo, Nze nga wendi."

⁵⁹Awo ne bakwata amayinja okumukuba, kyokka Yesu ne yeekweka n'afuluma mu Yeekaalu.

Yokaana 9

Yesu Awonya Omuzibe w'Amaaso

¹Awo Yesu bwe yali ng'atambula, n'alaba omusajja eyazaalibwa nga muzibe w'amaaso.

²Abayigirizwa be ne bamubuuza nti, "Labbi, ani eyayonoona, ono oba bazadde be alyoke azaalibwe nga muzibe w'amaaso?"

³Yesu n'addamu nti, "Ku bona omusajja ono newaakubadde bazadde be tekuliiko yayonoona, wabula kino kyabaawo emirimu gya Katonda girabikire ku ye.

⁴Kale kitugwanidde okukola emirimu gy'oyo eyantuma, obudde nga bukyali misana. Ekiro kijja omuntu mw'atasabolera kukola.

⁵Kyokka Nze bwe mbeera mu nsi mba musana gwa nsi."

⁶ Yesu bwe yamala okwogera bw'atyo, n'awanda amalusu ku ttaka n'atabula, n'alisiiga ku maaso g'omusajja oyo.

⁷ N'amugamba nti, "Genda onaabe mu kidiba kya Sirowamu," amakulu nti, "Eyatumibwa". Awo omusajja n'agenda, n'anaaba, n'adda ng'alaba.

⁸ Baliraanwa b'oyo eyawonyezebwa era n'abalala abaali bamumanyi nga muzibe w'amaaso, asabiriza, ne beebuuzaganya nti, "Ono si ye musajja oli eyatuulanga wali ng'asabiriza?"

⁹ Abamu ne bagamba nti, "Ye ye," abalala ne bagamba nti, "Nedda, anaamufaanana bufaananyi." Kyokka ye n'abagamba nti, "Ye nze ddala."

¹⁰ Bo kwe ku mubuuza nti, "Kale amaaso go gaazibuse gatya?"

¹¹ N'abategeeza nti, "Omuntu ayitibwa Yesu, yatabula ettaka n'alinsiiga ku maaso, n'andagira nti, 'Genda e Sirowamu onaabe.' Ne njenda ne naaba, ne nsobola okulaba."

¹² Ne bamubuuza nti, "Ali ludda wa?" N'addamu nti, "Simanyi."

Abafalisaayo Bakemekkereza Eyawonyezebwa

¹³ Awo ne batwala omusajja eyali omuzibe w'amaaso eri Abafalisaayo.

¹⁴ Olunaku olwo Yesu lwe yatabulirako ettaka n'azibula omusajja oyo amaaso, lwali lwa Ssabbiiti.

¹⁵ Abafalisaayo nabo ne babuuza omuntu oyo engeri gye yazibuka amaaso. Awo n'ababuulira ng'agamba nti, "Yesu yatabula ettaka n'alinsiiga ku maaso, ne naaba, kaakano ndaba."

¹⁶ Abamu ku bo ne bagamba nti, "Omusajja oyo Yesu teyava wa Katonda kubanga takwata Ssabbiiti." Kyokka abalala ne bagamba nti, "Omuntu omwonoonyi ayinza atya okukola eby'amagero ebifaanana bwe bityo?" Ne wabaawo okwawukana kunene mu bo.

¹⁷ Awo Abafalisaayo ne bakyukira omusajja eyali omuzibe w'amaaso ne bamubuuza nti, "Omuntu oyo eyakuzibula amaaso olowooza wa ngeri ki?" Omusajja n'addamu nti, "Ndowooza nnabbi."

¹⁸ Ne batakkiriza nti omusajja oyo yali muzibe, okutuusa lwe baayita abazadde be,

¹⁹ ne bababuuza nti, "Ono mutabani wammwe? Era yazaalibwa nga muzibe wa maaso? Kale obanga bwe kiri kaakano asobola atya okulaba?"

²⁰ Bakadde be ne baddamu nti, "Tumanyi ng'oyo ye mutabani waffe era nga yazaalibwa muzibe wa maaso.

²¹Naye engeri gye yazibukamu amaaso tetugimanyi, era n'eyamuzibula amaaso tetumumanyi. Wuuyo musajja mukulu mumwebuulize ajja kweyogerera."

²²Ekyaboogeza batyo lwa kutya Bayudaaya. Kubanga Abayudaaya baali bamaze okuteesa nti buli ayatula nti Yesu ye Kristo agobebwe mu kuŋjaaniro.

²³Ekyo kye kyaboogeza nti, "Wuuyo musajja mukulu mumwebuulize."

²⁴Awo ate ne bongera okuyita omusajja eyali omuzibe w'amaaso ne bamugamba nti, "Gulumiza Katonda, kubanga tumanyi omusajja oyo mwonoonyi."

²⁵Omusajja n'addamu nti, "Oba mwonoonyi oba si mwonoonyi simanyi, wabula kye mmanyi kiri kimu nti nnali muzibe w'amaaso, naye kaakano ndaba."

²⁶Kyebaava bamubuuza nti, "Kiki kye yakola? Amaaso yagazibula atya?"

²⁷Omusajja n'addamu nti, "Nabategeezessa dda ne mutawuliriza. Lwaki ate mwagala mbaddiremu? Nammwe mwagala kufuuka bayigirizwa be?"

²⁸Ne bamuvuma ne bamugamba nti, "Ggwe oli tuyigirizwa we. Naye ffe tuli bayigirizwa ba Musa.

²⁹Ffe tumanyi nga Katonda yayogera ne Musa, naye oyo tetumanyi gy'ava."

³⁰Ye n'addamu nti, "Kino kitalo, mmwe obutamanya gye yava ate nga nze eyanzaibwa amaaso.

³¹Tumanyi nti Katonda tawulira balina bibi, naye awulira abo abamutya era abakola by'ayagala.

³²Ensi kasookedde ebaawo tewalabikangawo yali azibudde maaso ga muntu eyazaalibwa nga muzibe wa maaso.

³³Kale omuntu ono eyanzaibula amaaso singa teyava wa Katonda ekoy teyandikisobodde."

³⁴Awo ne bamuboggolera nga bagamba nti, "Ggwe eyazaalirwa mu bibi, ggw'oyigiriza ffe?" Ne bamusindika ebweru.

Obuzibe bw'Amaaso ag'Omwoyo

³⁵Yesu n'ategeera nga bamusindise ebweru. Bwe yamusanga n'amugamba nti, "Ggwe okkiriza Omwana w'Omuntu?"

³⁶Omusajja n'amubuuza nti, "Ssebo, y'aluwa mmukkirize?"

³⁷Yesu n'amugamba nti, "Omulabye, ye wuuyo ayogera naawe."

³⁸Omusajja n'agamba nti, "Mukama wange, nzikiriza!" N'amusinza.

³⁹Awo Yesu n'agamba nti, "Najja mu nsi okusala omusango, abatalaba balabe, ate naabo abalaba babe bazibe ba maaso."

⁴⁰ Abamu ku Bafalisaayo abaali bayimiridde awo bwe baawulira ebigambo ebyo ne bamubuuza nti, "Ky'ogamba nti naffe tuli bazibe ba maaso?"

⁴¹ Yesu n'abaddamu nti, "Singa mubadde bazibe ba maaso, temwandibadde na kibi. Naye kubanga mugamba nti tulaba, ekibi kyammwe kyekiva kibasigalako."

Yokaana 10

Omusumba Omulungi

¹ "Ddala ddala mbagamba nti atayita mu mulyango ng'ayingira mu kisibo ky'endiga, naye n'alinniyira awalala, oyo aba mubbi era munyazi.

² Naye ayingirira mu mulyango, ye musumba w'endiga.

³ Era oyo omuggazi amuggulirawo, n'endiga ziwlira eddoboozi lye, aziyita amannya gaazo n'azifulumya ebweru.

⁴ Azikulembera ne zimugoberera, kubanga zimanyi eddoboozi lye.

⁵ Omulala gwe zitamanyi, tezimugoberera, zimudduka buddusi kubanga tezimanyi ddoboozi lye."

⁶ Yesu n'abagerera olugero olwo, kyokka bo, ebyo tebaabitegeera.

⁷ Awo Yesu kyeyava ayongera n'abagamba nti, "Ddala ddala mbagamba nti nze mulyango gw'endiga.

⁸ Abalala bona abansooka baali babbi era banyazi, n'endiga tezaabawuliriza.

⁹ Nze mulyango; buli ayingirira mu Nze alirokoka. Aliyingira, n'afuluma n'aliisibwa mu ddundiro.

¹⁰ Omubbi ky'ajjirira kwe kubba n'okutta n'okuzikiriza. Nze najja, zibe n'obulamu, era zibe nabwo mu bujuvu.

¹¹ "Nze musumba omulungi. Omusumba omulungi awaayo obulamu bwe olw'endiga.

¹² Omupakasi, atali musumba, endiga nga si zize, bw'alaba omusege nga gujja adduka n'aleka awo endiga, omusege ne guzirumba ne guzisaasaanya.

¹³ Akola atyo kubanga mupakasi, so n'endiga tazifaako.

¹⁴ "Nze ndi musumba mulungi, n'endiga zange nzimanyi era nazo zimmanyi.

¹⁵ Nga Kitange bw'ammanyi, era nga nange bwe mmumanyi, bwe nt yo bwe mpaayo obulamu bwange olw'endiga.

¹⁶ Nnina n'endiga endala ezitali za mu kisibo kino, nazo kinjwanidde okuzireeta, era nazo ziriwlira eddoboozi lyange, endiga zonna ne ziba ekisibo kimu era ne ziba n'omusumba omu.

¹⁷Kitange kyava anjagala, kubanga mpaayo obulamu bwange ndyoke mbweddize.

¹⁸Tewali n'omu abunzigyako, wabula mbuwaayo lwa kwagala kwange. Nnina obuyinza okubuwaayo, era nnina obuyinza okubwedizza. Ekyo Kitange ye yakindagira."

¹⁹Yesu bwe yayogera bw'atyo, empaka mu Bayudaaya, ne zisituka buto.

²⁰Bangi ku bo ne bagamba nti, "Aliko dayimooni oba si kyo alaluse. Lwaki mumuwuliriza?"

²¹Abalala ne bagamba nti, "Ebigambo bino si bya muntu aliko dayimooni. Dayimooni asobola okuzibula amaaso ga bamuzibe?"

Obutakkiriza bw'Abayudaaya

²²Mu Yerusaalemi mwalimu embaga ey'Okutukuza, era bwali budde bwa butiti.

²³Yesu yali mu Yeekaalu ng'atambula mu kifo ekiyitibwa Ekisasi kya Sulemaani.

²⁴Awo Abayudaaya ne bamwetooloola ne bamugamba nti, "Olituusa ddi okutubuusisabuusisa? Obanga ggwe Kristo kale tubuulirire ddala."

²⁵Yesu n'addamu nti, "Nababuulira dda naye temukkiriza. Ekikakasa ebyo gy'emirimu gye nkola mu linnya lya Kitange.

²⁶Naye mmwe temunzikiriza kubanga temuli ba mu ndiga zange.

²⁷Endiga zange zitegeera eddoboozi lyange, era nzimanyi era zingoberera.

²⁸Nziwa obulamu obutaggwaawo, era tezigenda kuzikirira. Tewali n'omu ayinza kuzisikula mu mikono gyange,

²⁹kubanga Kitange yazimpa, era ye tewali amusinga maanyi, noolwekyo tewali asobola kuzisikula kuva mu mukono gwa kitange.

³⁰Nze ne Kitange tuli omu."

³¹Awo Abayudaaya ne bakwata amayinja okumukuba.

³²Yesu n'abagamba nti, "Mwalaba ebyamagero bingi Kitange bye yankozesa, kируwa ku ebyo kye musinziirako okunkuba amayinja?"

³³Ne bamuddamu nti, "Tetukuvunaana lwa birungi by'okola wabula lwa kubanga ovvoola; ggwe oli muntu buntu naye weeyita Katonda."

³⁴Yesu n'abaddamu nti, "Tekyawandiikibwa mu mateeka gammwe nti, Katonda yagamba nti, 'Muli bakatonda'?

³⁵Obanga abo abaweebwa ekigambo kya Katonda, yabayita bakatonda, ate ng'Ebyawandiikibwa tebidiba,

³⁶ate Nze, Kitange gwe yatukuza n'antuma mu nsi, lwaki mugamba nti avvoola kubanga ɲŋambye nti, Ndi Mwana wa Katonda?

³⁷Obanga sikola ebyo Kitange by'ayagala nkole, kale temunzikiriza;

³⁸naye obanga nkola by'ayagala, newaakubadde Nze temunzikiriza waakiri mukkirize ebyo bye nkola mulyoke mutegeere nti Kitange ali mu Nze, era nange ndi mu Kitange."

³⁹Awo ne bagezaako nate okumukwata, kyokka ne yeemulula.

⁴⁰N'addayo emitala wa Yoludaani mu kifo Yokaana gye yasooka okubatiriza, n'abeera eyo.

⁴¹Abantu bangi ne bajja gy'ali nga bagamba nti, "Yokaana teyakola byamagero, naye buli kimu kye yayogera ku muntu ono kyali kya mazima."

⁴²Bangi ne bamukkiririza eyo.

Yokaana 11

Okufa kwa Laazaalo

¹Awo olwatuuka omuntu ayitibwa Laazaalo eyali e Besaniya n'alwala. Besaniya ky'ekibuga Maliyamu ne Maliza bannyina ba Laazaalo mwe baali.

²Maliyamu oyo ye yasiiga Mukama waffe amafuta ag'akaloosa ku bigere n'abisiimuza enviiri ze.

³Awo Maliyamu ne Maliza ne batumira Yesu ne bamutegeeza nti, "Mukama waffe, mukwano gwo gw'oyagala ennyo mulwadde nnyo."

⁴Naye Yesu bwe yakitegeera n'agamba nti, "Ekigendereddwa mu bulwadde buno si kufa, wabula kulaga kitiiibwa kya Katonda, era n'okuweesa Omwana wa Katonda ekitiibwa."

⁵Yesu yali mukwano gwa Maliyamu ne Maliza ne Laazaalo, naye bwe yawulira nga Laazaalo alwadde n'ayongera n'asigala we yali

⁶n'amalawo ennaku endala bbiri nga tanagenda gye bali.

⁷Awo ennaku bbiri bwe zaayitawo n'agamba abayigirizwa be nti, "Tuddeyo e Buyudaaya."

⁸Kyokka abayigirizwa be, ne bamugamba nti, "Labbi, mu nnaku ntono ezaakayita Abayudaaya baagezaako okukutta. Ate gy'odda?"

⁹Yesu n'abaddamu nti, "Essaawa ez'emisana ziwera kkumi na bbiri, era omuntu bw'atambula emisana teyeesittala kubanga aba alaba.

¹⁰Wabula atambula ekiro ye yeesittala, kubanga omusana teguli mu ye."

¹¹ Bwe yamala okwogera ebyo n'abagamba nti, "Mukwano gwaffe Laazaalo yeebase, naye ηηenda kumuzuukusa."

¹² Abayigirizwa ne bamugamba nti, "Mukama waffe oba yeebase anaazuukuka."

¹³ Naye Yesu yayogera ku kufa kwa Laazaalo, kyokka bo abayigirizwa be ne balowooza nti ayogera ku kwebaka tulo.

¹⁴ Awo n'alyoka abategeereza ddala nti, "Laazaalo afudde."

¹⁵ Naye ku lw'obulungi bwammwe, nsanyuse kubanga ssaaliyo, mulyoke mukkirize; kale mujje tugende gy'ali."

¹⁶ Awo Tomasi eyayitbwanga Didumo n'agamba banne nti, "Ka tugende tufire wamu naye."

¹⁷ Bwe baatuuka e Besaniya Yesu n'asanga nga Laazaalo yaakamala ennaku nnya mu ntaana.

¹⁸ Besaniya kyaliki kumpi ne Yerusaalemi, kilomita nga ssatu.

¹⁹ Abayudaaya bangi baali bazze okukubagiza Maliza ne Maliyamu olw'okufiirwa mwannyinaabwe.

²⁰ Maliza bwe yawulira nti Yesu ajja, n'agenda okumusisinkana, kyokka Maliyamu n'asigala mu nnyumba ng'atudde.

²¹ Awo Maliza n'agamba Yesu nti, "Mukama wange, singa wali wano mwannyinaze teyandifudde.

²² Era kaakano mmanyi nti buli ky'onoosaba Katonda, ajja kukikuwa."

²³ Yesu n'agamba Maliza nti, "Mwannyoko ajja kuzuukira."

²⁴ Maliza n'amuddamu nti, "Mmanyi nti alizuukira ku lunaku olw'enkomerero."

²⁵ Yesu n'amugamba nti, "Nze kuzuukira n'obulamu; akkiriza nze newaakubadde ng'afudde, aliba mulamu,

²⁶ na buli mutu omulamu akkiriza nze talifa emirembe n'emirembe. Ekyo okikkiriza?"

²⁷ Maliza n'amugamba nti, "Mukama wange nzikiriza nti ggwe Kristo Omwana wa Katonda, ajja mu nsi."

²⁸ Awo Maliza bwe yamala okwogera ebyo, n'ava eri Yesu n'agenda eri Maliyamu n'amuzza ku bbali mu kyama ng'agamba nti, "Omuyigiriza azze, akuyita."

²⁹ Maliyamu olwawulira ekyo n'asitukiramu n'agenda eri Yesu.

³⁰ Yesu yali akyali mu kifo Maliza we yamusisinkana nga tannatuuka mu kibuga.

³¹Abayudaaya abaali bazze okukubagiza abaali mu nnyumba ne Maliyamu bwe baamulaba ng'ayimiridde mangu ng'afuluma ne bamugoberera ne balowooza nti agenda ku ntaana akaabire eyo.

³² Maliyamu bwe yatuuka awali Yesu n'afukamira ku bigere bye, nga bw'agamba nti, "Mukama wange, singa wali wano mwannyinaze teyandifudde."

³³ Yesu bwe yamulaba ng'akaaba era n'Abayudaaya abaali naye nga bakaaba n'anyolwa mu mutima, n'ajjula obuyinike.

³⁴ N'abuuza nti, "Mwamuteeka wa?" Ne bamugamba nti, "Mukama waffe jjangu olabeyo."

³⁵ Yesu n'akaaba amaziga.

³⁶ Awo Abayudaaya ne bagamba nti, "Ng'abadde amwagala nnyo!"

³⁷ Naye abamu ku bo ne bagamba nti, "Ono eyazibula amaaso ga muzibe, lwaki teyaziyiza musajja ono kufa?"

Yesu Azuukiza Laazaalo

³⁸ Awo Yesu ne yeeyongera okujula obuyinike. N'atuuka ku ntaana. Yali mpuku ng'eggaliddwawo n'ejinja.

³⁹ Yesu n'agamba nti, "Muggyeewo ejinja." Naye Maliza, mwannyina w'omufu, n'amugamba nti, "Kaakano awunya nnyo, kubanga yaakamala ennaku nnya mu ntaana."

⁴⁰ Yesu n'amuddamu nti, "Saakugambye nti bw'onokkiriza onoolaba ekitiibwa kya Katonda?"

⁴¹ Ne baggyawo ejinja. Awo Yesu n'atunula waggulu n'agamba nti, "Kitange nkwebaza olw'okumpulira.

⁴² Mmanyi nti bulijo ompulira, naye kino nkyogedde olw'abantu bano abayimiridde wano, balyoke bakkirize nti ggwe wantuma."

⁴³ Bwe yamala okwogera bw'atyo, n'akoowoola mu ddoboozi ery'omwanguka nti, "Laazaalo fuluma."

⁴⁴ Awo Laazaalo n'ava mu ntaana, ng'amagulu ge n'emikono bizingiddwa mu ngoye eziziikibwamu abafu, nga n'ekiremba kisibiddwa ku maaso ge. Yesu n'abagamba nti, "Mumusumulule atambule."

⁴⁵ Bangi ku Bayudaaya abajja ne Maliyamu bwe baalaba Yesu ky'akoze ne bamukkiriza.

⁴⁶ Naye abalala ne bagenda eri Abafalisaayo ne babategeeza Yesu kye yakola.

⁴⁷ Awo bakabona abakulu n'Abafalisaayo ne batuuza olukiiko ne bagamba nti, "Tukole ki? Kubanga omuntu ono akola ebyamagero bingi.

⁴⁸Bwe tumuleka bw'atyo, abantu bona bajja kumukkiriza bamugoberere, n'ekirivaamu Abaruumi bagenda kujja bazikirize ekifo ekitukuvu n'eggwanga lyaffe."

⁴⁹Awo omu ku bo, Kayaafa eyali Kabona Asinga Obukulu mu mwaka ogwo, n'abagamba nti, "Mmwe temuliiko kye mumanyi.

⁵⁰Temulaba nti kirungi omuntu omu afe, eggwanga lyonna lireme kuzikirira?"

⁵¹Ekyo Kayaafa teyakyogera ku bubwe, wabula ye nga Kabona Asinga Obukulu, yayogera eby'obunnabbi nti Yesu yali anaatera okufiirira eggwanga,

⁵²ate si ggwanga lyokka naye n'okukuŋyaanya abaana ba Katonda abaasaasaana.

⁵³Okuva ku lunaku olwo abakulembeze b'Abayudaaya ne basala amagezi okutta Yesu.

⁵⁴Noolwekyo, Yesu n'alekayo okutambula mu Buyudaaya mu lwatu, wabula n'avaayo n'alaga mu kifo ekiriraanye eddungu, mu kibuga ekiyitibwa Efulayimu, n'abeera eyo n'abayigirizwa be.

⁵⁵Embaga y'Abayudaaya ejjuukirirwako Okuyitako yali eneetera okutuuka, abantu bangi ne bava mu byalo ne bambuka e Yerusaalemi okukola omukolo ogw'okwetukuza ng'embaga tennatuuka.

⁵⁶Bwe baali bakunŋaanidde mu Yeekaalu, ne banoonya Yesu, ne beebuganya nti, "Mulowooza mutya? Yesu tajje ku mbaga?"

⁵⁷Bakabona abakulu n'Abafalisaayo baali balagidde nti, Omuntu yenna bw'amanya Yesu wali abategeeze, balyoke bamukwate.

Yokaana 12

Yesu Asiigibwa Amafuta ag'Akaloosa e Besaniya

¹Bwe waali wakyabulayo ennaku mukaaga emikolo gy'Embaga ejjuukirirwako Okuyitako gitandike, Yesu n'ajja e Besaniya ewa Laazaalo gwe yazuukiza.

²Ne bamufumbira ekyeggulo, Maliza n'aweereza, Laazaalo nga ye omu ku baali batudde ne Yesu okulya.

³Awo Maliyamu n'addira eccupa erimu amafuta amalungi ag'akaloosa ag'omugavu, ag'omuwendo omungi, n'agafuka ku bigere bya Yesu n'abisiiimuza enviiri ze. Ennyumba yonna n'ejjula akaloosa k'amafuta ago.

⁴Naye Yuda Isukalyoti, omu ku bayigirizwa ba Yesu, eyali ow'okumulyamu olukwe, n'agamba nti,

⁵"Lwaki amafuta ago tegatundiddwamu eddinaali ebikumi bisatu ne zigabirwa abaavu?"

⁶Yayogera bw'atyo si lwa kuba nti yali alumirwa nnyo abaavu, wabula Lwa kubanga yali mubbi. Yatwalanga ensimbi ezaaterekebwanga mu nsawo y'ensimbi.

⁷Yesu n'alyoka abagamba nti, "Omukazi mumuleke, akoze ekoyi lwa kunteekerateekera kuziikibwa kwange.

⁸Abaavu muli nabo bulijjo, naye Nze sijja kuba nammwe bulijjo."

Olukwe olw'Okutta Laazaalo

⁹Awo ekibiina kinene eky'Abayudaaya bwe bategeera nti Yesu ali Besaniya, ne bajja, si Lwa Yesu yekka, naye n'okulaba Laazaalo, Yesu gwe yazuukiza.

¹⁰Awo bakabona abakulu ne basala amagezi okutta Laazaalo,

¹¹kubanga yaleetera Abayudaaya bangi okuva ku bakulembeze baabwe ne bakkiriza Yesu.

Yesu Ayingira mu Yerusaalemi n'Ekitiibwa

¹²Ku lunaku olwaddirira, abantu bangi abaali bazze ku mbaga ey'Okuyitako bwe baawulira nti Yesu ajja e Yerusaalemi,

¹³nebakwata amatabi g'enkindu ne bagenda okumusisinkana nga baleekaana nti, "Ozaana." "Aweeredwa omukisa ajja mu linnya lya Mukama." "Ye Kabaka wa Isirayiri."

¹⁴Awo Yesu bwe yalaba endogoyi ento n'agyebagala. Ekyawandiikibwa ne kiryoka kituukirira ekigamba nti,

¹⁵"Gwe muwala wa Sayuuni totya; laba Kabaka wo ajja, nga yeebagadde omwana gw'endogoyi."

¹⁶Ebyo abayigirizwa tebaabitegeererawo, naye Yesu bwe yamala okugulumizibwa, ne balyoka bajjukira ebintu ebyo ebyali bimuwandiikkidwako, ne bye baamukola.

¹⁷Abo abaali mu kibiina, abaalaba Yesu ng'azuukiza Laazaalo ne baategeeza ebyaliwo ne bwe yazuukiza Laazaalo.

¹⁸Abantu abangi bwe batyo kyebaava bagenda okusisinkana Yesu, kubanga baali bawulidde ekyamagero ekoyi kye yakola.

¹⁹Awo Abafalisaayo ne bagambagana nti: "Mulabye bwe tutalina kye tufunyeemu! Laba ensi yonna emugoberedde."

Abayonaani Baagala Okulaba Yesu

²⁰Naye waaliwo Abayonaani abamu abaali bazze okusinza ku mbaga ey'Okuyitako

²¹ne bajja eri Firipo eyava e Besusayida eky'omu Ggaliraaya, ne bamugamba nti, "Ssebo, twagala kulaba Yesu."

²²Firipo n'ategeeza Andereya, ne bagenda bombi okutegeeza Yesu.

²³Yesu n'abaddamu nti, "Ekiseera kituuse Omwana w'Omuntu agulumizibwe.

²⁴Ddala ddala mbagamba nti empeke y'enjaano bw'egwa mu ttaka efa, bwe tefa ebeera yokka, naye bw'efa ebala ebibala bingi.

²⁵Buli eyeemalira ku bulamu bwe alibufiirwa, naye oyo akyawa obulamu bwe mu nsi eno, alibusigaza mu bulamu obutaggwaawo.

²⁶Oyo ampeereza, angoberere. Nze w'endi n'omuweereza wange w'anaabeeranga era Kitange alimuwa ekitiibwa oyo ampeereza."

Yesu Ayogera ku Kufa kwe

²⁷"Kaakano omutima gwange gweraliikiridde. Kale njambe ntya? Nsabe nti Kitange mponya ekiseera kino? Naye ate ekyandeeta kwe kuyita mu kiseera kino.

²⁸Kitange gulumiza erinnya lyo." Awo eddoboozi ne liva mu ggulu ne ligamba nti, "Ndigulumizza era ndyongera okuligulumiza."

²⁹Ekibiina ky'abantu abaali bayimiridde awo bwe baawulira ne bagamba nti, "Laddu y'ebwatuse!" Abalala ne bagamba nti, "Malayika y'ayogedde naye."

³⁰Yesu n'abagamba nti, "Eddoboozi lino lizze ku lwammwe, so si ku lwange.

³¹Ekiseera ky'ensi okusalirwa omusango kituuse, era omufuzi w'ensi eno anaagoberwa ebweru.

³²Bwe ndiwanikibwa okuva mu nsi, ndiwalulira bona gye ndi."

³³Ekyo yakyogera ng'ategeeza enfa gye yali anaatera okufaamu.

³⁴Awo abantu mu kibiina ekyo ne bamugamba nti, "Ffe tumanyi okuva mu mateeka nti Kristo aba mulamu emirembe gyonna. Naye ggwe lwaki ogamba nti Omwana w'Omuntu kimugwanira okufa? Mwana wa Muntu ki oyo gw'oyogerako?"

³⁵Yesu n'abaddamu nti, "Omusana gujja kwongera okubaakira okumala akaseera. Kale mugutambuliremu mugende gye mwagala ng'ekizikiza tekinnatuuka. Atambulira mu kizikiza tamanya gy'alaga.

³⁶Kale Omusana nga bwe gukyayaka mugutambuliremu mulyoke mufuuke abaana b'omusana." Yesu bwe yamala okwogera ebyo n'agenda n'abeekweka.

³⁷Kyokka newaakubadde Yesu yakola ebyamagero bingi, tebaamukkiriza.

³⁸Ekigambo kya nnabbi Isaaya kituukirire ekigamba nti, "Mukama ani akkiriza bye tugamba? Ani abikkuliddwa omukono gwa Mukama?"

³⁹Kyebaava batakkiriza kubanga nnabbi Isaaya yayongera n'agamba nti,

40 “Katonda yabaziba amaaso, era n’abakakanyaza emitima, amaaso gaabwe galeme okulaba, era n’emitima gyabwe gireme okutegeera, era gireme okukyuka, mbawonye.”

41 Ebyo nnabbi Isaaya yabyogera kubanga yalaba ekitiibwa kye, era n’amwogerako.

42 Era waaliwo bangi ne mu bakulembeze b’Abayudaaya abaamukkiriza. Naye olw’okutya Abafalisaayo, tebaamwatula, baleme kugobebwa mu kkuñjaaniro.

43 Kubanga baayagala ekitiibwa ekibaweebwa abantu okusinga ekitiibwa kya Katonda.

44 Awo Yesu n’asitula ku ddoboozi n’agamba nti, “Buli anzikiriza aba takkiriza Nze nzekka, wabula aba akkirizza n’oyo eyantuma.

45 N’oyo alaba Nze aba alabye oli eyantuma.

46 Nze omusana nzize mu nsi buli anzikiriza aleme okusigala mu kizikiza.

47 “Awulira ebiligambo byange n’atabifaako, Nze simusalira musango, kubanga Nze najja kulokola nsi so si kugisalira musango.

48 Kyokka buli agaana Nze era n’agaana n’ebiligambo byange, alina amusalira omusango. Alisalirwa omusango ku lunaku olw’enkomerero okusinziira ku bigambo bye namutegheeza.

49 Kubanga Nze bye njogera si byange, ku bwange, naye mbategeezessa ebya Kitange bye yandagira okubategeezza.

50 Era mmanyi nti by’alagira bwe bulamu obutaggwaawo. Noolwekyo ky’ajnjamba kye mbategeezza.”

Yokaana 13

Yesu Anaaza Abayigirizwa be Ebigere

1 Ku lunaku olukulembira Embaga ey’Okuyitako, Yesu yamanya ng’ekiseera kye kituuse ave mu nsi muno agende eri Kitaawe. Yesu bwe yayagala ababe mu nsi, yabalagira ddala okwagala kwe kwonna okutuusiza ddala ku kiseera ekisembayo.

2 Bwe baali balya ekyekiro, Setaani yali yamaze dda okuteeka mu mutima gwa Yuda Isukalyoti, omwana wa Simooni, ekirowoozo eky’okulya mu Yesu olukwe.

3 Yesu bwe yamanya nti Kitaawe yateeka byonna mu mikono gye, era nga yava wa Katonda ate gy’adda,

4 n’asituka ku mmere, ne yeggyako omunagiro gwe, ne yeesiba ettawulo mu kiwato,

⁵n'ateeka amazzi mu bensani, n'atandika okunaaza abayigirizwa be ebigure nga bw'abasiimuza ettawulo gye yali yeesibye.

⁶Bwe yatuuka ku Simooni Peetero, Peetero n'amugamba nti, "Mukama wange, ggwe onnaaze ebigure?"

⁷Yesu n'amuddamu nti, "Ensonga enkozesza kino togimanyi kaakano, wabula ekiseera kirituuka n'ogitegeera."

⁸Peetero n'amuddamu nti, "Nedda, tolinnaaza bigere emirembe gyonna." Yesu n'amugamba nti, "Bwe siikunaaze bigere, nga tossa kimu nange."

⁹Simooni Peetero n'amugamba nti, "Mukama wange, tonnaaza bigere byokka, naye nnaaza n'emikono n'omutwe."

¹⁰Yesu n'amuddamu nti, "Anaabye omubiri, aba teyeetaaga kunaaba okuggyako ebigure byokka, alyoke abe omulongoofu. Kaakano muli balongoofu, naye si mwenna."

¹¹Kubanga Yesu yamanya anaamulyamu olukwe. Kyeyava agamba nti, "Si mwenna abalongoofu."

¹²Yesu bwe yamala okubanaaza ebigure n'ayambala omunagiro gwe, n'addayo n'atuula, n'abagamba nti, "Kye mbakoze mukitegedde?"

¹³Mmwe mumpita Muyigiriza era Mukama wammwe, mukola bulungi okumpita bwe mutyo kubanga ddala bwe ntyo bwe ndi.

¹⁴Kale Nze Mukama wammwe era Omuyigiriza, nga bwe mbanaazizza ebigure, nammwe musaana okunaazagananga ebigure.

¹⁵Mbalaze ekyokulabirako, mukolenga nga Nze bwe mbakoze.

¹⁶Ddala ddala mbagamba nti, Omuddu tasinga mukama we. Era n'oyo atumibwa tasinga oli amutumye.

¹⁷Bwe mumanya ebintu bino muba n'omukisa bwe mubikola.

¹⁸Ebintu bino byonna sibyogera nammwe mwenna, buli omu ku mmwe be nalonda mmumanyi; ekyawandiikibwa kituukirire ekigamba nti, 'Oyo bwe tulya emmere anneefuukidde!'

¹⁹Kino nkibategeeza okuva kaakano, nga tekinnabaawo, bwe kinaabaawo mulyoke munzikirize.

²⁰Ddala ddala mbagamba nti buli asembeza gwe ntuma, ng'asembezezza Nze, era asembeza Nze ng'asembezezza oyo eyantuma."

²¹Yesu bwe yamala okwogera ebyo n'alumwa nnyo mu mwoyo, n'agamba nti, "Ddala ddala mbagamba, omu ku mmwe anandyamu olukwe."

²²Abayigirizwa ne batunulaganako, nga tebamanyidde ddala gw'ayogerako.

²³Omu ku bayigirizwa, Yesu gwe yayagalanga, yali agalamidde okumpi n'ekifuba kya Yesu,

²⁴Simooni Peetero n'amutemyako ng'amugamba nti, "Mutubuulize gw'ayogerako."

²⁵Kale bwe yaddayo okugalamira ng'aliraanye ekifuba kya Yesu, n'amubuuza nti, "Mukama waffe, gw'oyogerako ye ani?"

²⁶Yesu n'addamu nti, "Gwe nnaakoleza ekitole ne nkimuwa nga ye wuuyo." Awo n'akwata ekitole, n'akikoza n'akiwa Yuda Isukalyoti omwana wa Simooni.

²⁷Yuda bwe yamala okuweebwa ekitole ekkyo, Setaani n'amuyingiramu. Awo Yesu n'amugamba nti, "Ky'okola kikole mangu!"

²⁸Ku baali balya tewaali n'omu eyategeera kyeyava amugamba bw'atyo.

²⁹Abamu baallowooza nti nga Yuda bwe yali atereka ensimbi, Yesu amugambye agende agule bye beetaaga ku mbaga, oba nti abeeko by'agabira abaavu.

³⁰Yuda olwafuna ekitole, amangwago n'afuluma ebweru; obudde bwali kiro.

³¹Yuda olwafuluma, Yesu n'agamba nti, "Kaakano Omwana w'Omuntu agulumizibbwaa ne Katonda agulumizibbwaa mu ye.

³²Era obanga Katonda agulumizibbwaa mu ye, Katonda yeegulumiza ye yennyini, era amangwago ajja kumugulumiza.

³³"Baana bange, akaseera katono ke nkyali nammwe. Mulinnoonya era nga bwe nagamba Abayudaaya nti, 'Gye ḥjenda mmwe temuyinza kujjayo,' era nammwe bwe mbagamba kaakano.

³⁴"Mbawa ekiragiro ekiggya: Mwagananenga nga nze bwe mbaagala.

³⁵Bwe munaayagalanga abantu bona kwe banaategeereranga nti muli bayigirizwa bange."

³⁶Awo Simooni Peetero n'amubuuza nti, "Mukama waffe olaga wa?" Yesu n'amuddamu nti, "Tosobola kugenda nange kaakano, wabula olingoberera oluvannyuma."

³⁷Peetero n'amubuuza nti, "Mukama wange, lwaki siyinza kukugoberera kaakano? Nnaawaayo obulamu bwange ku lulwo."

³⁸Yesu n'amuddamu nti, "Onoowaayo obulamu bwo ku lwange? Ddala ddala nkugamba nti, Enkoko eneeba tennakookolima, ononneegaana emirundi esatu."

Yokaana 14

Yesu Agumya Abayigirizwa be

¹ “Omutima gwammwe tegweralikiriranga. Mukkiriza Katonda, era nange munzikirize.

²Mu nnyumba ya Kitange mulimu ebisenge bingi, era ɳjenda okubateekerateekera ekifo. Singa tekiri bwe kityo nandibagambye.

³Bwe ndimala okubateekerateekera ekifo ndikomawo, ne mbatwala gye ndi, Nze gye ndi nammwe gye muba mubeera.

⁴Era gye ɳjenda ekkubo mulimanyi.”

Yesu ly'Ekkubo Erituusa Abantu eri Kitaawe

⁵ Tomasi n'amugamba nti, “Mukama waffe, tetumanyi gy'olaga, kale tuyinza tutya okumanya ekkubo?”

⁶ Yesu n'addamu nti, “Nze kkubo, n'amazima n'obulamu. Tewali n'omu ajja eri Kitange wabula ng'ayita mu Nze.

⁷Singa muntegedde ne Kitange mwandimutegedde. Era okuva kaakano mumulabye era mumutegedde.”

⁸Firipo n'amugamba nti, “Mukama waffe, tulage Kitaffe, kinaatumala.”

⁹ Yesu n'amugamba nti, “Firipo, kasookedde mbeera nammwe ebbanga lino lyonna era totegeeranga? Buli alaba Nze aba alabye Kitange! Kale lwaki ate oyogera nti, ‘Tulage Kitaffe?’

¹⁰Tokkiriza nga Nze ndi mu Kitange era ne Kitange ali mu Nze? Ebigambo bye mbategeeza si byange ku bwange, wabula biva eri Kitange abeera mu Nze, era akola emirimu ng'ayita mu Nze.

¹¹Kale munzikirize nti ndi mu Kitange era nga ne Kitange ali mu Nze. Oba si ekyo munzikirize olw'emirimu gyokka.

¹² “Ddala ddala mbagamba nti buli anzikiriza alikola emirimu egyo gye nkola, era alikola egisinga egyo, kubanga Nze ɳjenda eri Kitange.

¹³Era buli kye munaasabanga mu linnya Lyange nnaakibakoleranga, Kitange alyoke agulumizibwe mu Mwana.

¹⁴Bwe munaasabanga ekintu kyonna mu linnya lyange nnaakikolanga.”

Okusuubiziba Mwoyo Mutukuvu

¹⁵ “Kale obanga munjagala mugonderenga ebiragiro byange,

¹⁶nange ndisaba Kitange n'abawa Omubeezi omulala anaabeeranga nammwe emirembe n'emirembe,

¹⁷Mwoyo ow'Amazima ensi gwe teyinza kufuna, kubanga temulaba era temumanyi. Naye mmwe mumumanyi kubanga abeera nammwe, era anaabeeranga mu mmwe.

¹⁸Siribaleka nga bamulekwa, ndikomawo gye muli.

¹⁹Mu bbanga ttono, ensi eneeba tekyandaba, naye mmwe nga mundaba. Kubanga Nze ndi mulamu, era nammwe muliba balamu.

²⁰Ku lunaku olwo mulitegeera nga Nze ndi mu Kitange, era nga muli mu Nze, nga nange ndi mu mmwe.

²¹Buli anjagala anaagonderanga ebiragiro byange; era kubanga anjagala, ne Kitange anaamwagalanga. Era nange nnaamwagalanga, era nnaamulabikiranga.”

²²Yuda, atali Isukalyoti n'amugamba nti, “Mukama waffe, lwaki oyagala okweraga eri ffe so si eri ensi?”

²³Yesu n'amuddamu nti, “Omuntu yenna anjagala anaagonderanga ekigambo kyange, ne Kitange anaamwagalanga, era Nze ne Kitange tunajjanga ne tubeera mu ye era tunaatuulanga mu ye.

²⁴Oyo atanjagala tagondera bigambo byange. Ate ebigambo bye njogera si byange ku bwange wabula bya Kitange eyantuma.

²⁵Ebyo mbibabuulidde nga nkyali nammwe.

²⁶Naye Omubeezi, Mwoyo Mutukuvu, Kitange gw'alituma mu linnya lyange, bw'alijja alibayigiriza ebintu byonna era alibajjukiza byonna bye nabagamba.

²⁷Mbalekera emirembe, era mbawa emirembe gyange. Emirembe gye mbawa tegiringa egy'ensi. Noolwekyo temutyanga era temweralikiriranga.

²⁸“Mujjukire kye n'abagamba nti ḥnjenda era ndikomawo gye muli. Singa ddala mubadde munjagala mwandisanyuse kubanga ḥnjenda eri Kitange, kubanga Kitange y'ansinga ekitiibwa.

²⁹Kaakano mbabuulidde ebintu bino nga tebinnabaawo, bwe birituukirira mulyoke munzikirize.

³⁰Sikyayogera bintu bingi nammwe, kubanga omufuzi omubi ow'ensi eno ajja. Naye Nze tanninaako buyinza.

³¹Kyokka ensi eryoke emanye nti njagala Kitange, nzija kukola Kitange ky'andagidde. “Musituke tuve wano.”

Yokaana 15

Yesu gwe Muzabbibu gwennyini

- ¹ “Nze muzabbibu ogw’amazima, ate Kitange ye mulimi.
- ²Buli ttabi eriri ku Nze eritabala bibala aliggyako. Naye buli ttabi eribala ebibala, alirongoosa lyeyongerenga okubala.
- ³Mmwe kaakano muli balongoofu olw’ekigambo kye mbagambye;
- ⁴mubeere mu Nze era nange mbeere mu mmwe. Ng’ettabi bwe litayinza kubala bibala ku bwalyo nga teriri ku muzabbibu, bwe mutyo nammwe temuyinza kubala bibala bwe mutabeera mu Nze.
- ⁵ “Nze muzabbibu, mmwe matabi. Buli abeera mu Nze nange ne mbeera mu ye oyo abala ebibala bingi. Kubanga awatali Nze temuliiko kye muyinza kukola.
- ⁶Omuntu bw’atabeera mu nzeasuulibwa ebweru ng’ettabi erikaze. Amatabi ng’ago bagakuŋjaanya ne bagasuula ku muliro ne gaggya.
- ⁷Naye bwe munywerera mu Nze ne munyweza ebigambo byange, buli kye munaasabanga kinaabakolerwanga.
- ⁸Bwe mubala ebibala ebingi, muba bayigirizwa bange, ne Kitange, agulumizibwa.
- ⁹ “Mbaagadde nga Kitange bw’anjagala. Noolwekyo munywererenga mu kwagala kwange.
- ¹⁰Bwe munaagonderanga ebiragiro byange olwo munaabanga munyweredde mu kwagala kwange, nga nange bwe ɲjondera ebiragiro bya Kitange ne mbeera mu kwagala kwe.
- ¹¹Mbategeezza ebyo mulyoke mujjule essanyu lyange. Era essanyu lyammwe liryoke lituukirire.
- ¹²Kye mbalagira kye kino nti mwagananenga nga Nze bwe mbaagala.
- ¹³Tewali kwagala kusinga okw’omuntu awaayo obulamu bwe olwa mikwano gye.
- ¹⁴Muba mikwano gyange bwe mukola bye mbalagira.
- ¹⁵Olwo nga sokyabayita baddu, kubanga omuddu tamanya bifa ku mukama we. Kaakano mmwe muli mikwano gyange, kubanga mbategeezza byonna Kitange bye yaŋjamba.
- ¹⁶Si mmwe mwannonda! Wabula Nze nabalonda, mulyoke mubale ebibala ate ebibala eby’olubeerera. Olwo buli kye munaasabanga Kitange mu linnya lyange anaakibawanga.
- ¹⁷Kye mbalagira kye kino nti mwagananenga.
- ¹⁸ “Ensi bw’ebakyawanga mumanye nti yasooka kukyawa nze.

¹⁹Singa mubadde ba nsi, yandibaagadde, naye temuli ba nsi, kubanga nabalonda muve mu nsi, kyeva ebakyawa.

²⁰Mujjukire kye nabagamba nti, ‘Omuddu tasinga mukama we.’ Kale obanga Nze banjigganya era nammwe bagenda kubayigganyanga. Era obanga baagondera ebigambo byange n’ebammwe balibigondera.

²¹Ebyo byonna balibibakola ku lw'erinnya lyange, kubanga eyantuma tebamumanyi.

²²Singa sajja ne njogera nabo tebandibadde na musango. Naye kaakano tebalina kya kwewolereza olw'ekibi kyabwe.

²³Buli ankyawa aba akyawa ne Kitange.

²⁴Singa saakola mirimu egitaakolebwa muntu yenna mu bo tebandibaddeko musango. Naye kaakano balabye emirimu egyo, n’okutukyawa ne batukyawa, Nze ne Kitange.

²⁵Ekyawandiikibwa ne kiryoka kituukirira ekigamba nti, ‘Bankyayira bwereere.’

²⁶“Kyokka mmwe ndibatumira Omubeezi okuva eri Kitange, Omwoyo ow'amazima ava eri Kitange era alibategeeza buli ekinfaako.

²⁷Era nammwe mulinjulira, kubanga mubadde nange okuva ku lubereberye.”

Yokaana 16

¹ “Ebyo mbibategeezza muleme kwesittala.

²Banaabagobanga mu makuŋjaaniro, era ekiseera kijja buli anaabattanga n’alowooza nti aweereza Katonda.

³Ebyo balibibakola kubanga Kitange tebaamumanya, era nange tebammanyi.

⁴Kale bino mbibabuulidde nga tebinnabaawo, ekiseera bwe kirituuka ne bibaawo mulyoke mujjukire nti nabagamba. Ebyo saabibategeerezaawo ku lubereberye kubanga nnali nkyali nammwe.

⁵Kaakano ŋnjenda eri eyantuma. Naye tewali n’omu ku mmwe ambuuza nti, ‘Ogenda wa?’

⁶Naye kubanga mbategeezza ebyo emitima gyammwe gjijudde ennaku.

⁷Naye mbategeereza ddala nti ekisinga obulungi gye muli Nze kwe kugenda. Kubanga bwe sigenda Omubeezi tagenda kujja, kyokka bwe ŋnjenda, ndimutuma gye muli.

⁸Ye bw'alijja, alirumiriza ensi olw'ekibi, n’olw'obutuukirivu n’olw'omusango,

⁹kubanga tebanzikkiriza,

¹⁰olw'obutuukirivu kubanga ɲjenda eri Kitange era temukyandaba,

¹¹n'olw'omusango, kubanga omufuzi w'ensi eno asaliddwa omusango.

¹² "Nkyalina bingi eby'okubategeeza naye kaakano temusobola kubitegeera.

¹³Naye Omwoyo ow'amazima, bw'alijja alibalunŋamya mu mazima gonna, kubanga, taliyogera ku bubwe, wabula anaabategeeza ebyo by'awulira. Anaababuuliranga ebigena okubaawo.

¹⁴Oyo agenda kungulumiza, kubanga agenda kubategeeza bye nnaamubuuliranga.

¹⁵Byonna Kitange by'alina byange, kyenvudde ɲjamba nti Mwoyo Mutukuvu anaabategeeza ebyo nnaamubuuliranga.

¹⁶Mu bbanga ttono munaaba temukyandaba, ate wanaayitawo ebbanga ttono ne mundaba!"

¹⁷Abamu ku bayigirizwa be ne beebuzaganya nti, "Kiki ekyo ky'agamba nti, 'Mu bbanga ttono temuliddayo kundaba, ate mu bbanga ttono munandaba,' era nti, 'Kubanga ɲjenda eri Kitange?'"

¹⁸Ne beeyongera okwebuuza nti, "Kiki ekyo ky'agamba nti, 'Ebbanga ttono?' Tetutegeera ky'agamba."

¹⁹Yesu bwe yamanya nga baagala okumubuuza n'abagamba nti, "Mwebuuzaganya ku kye ɲjambye nti mu bbanga ttono munaaba temukyandaba ate wanaayitawo ebbanga ttono ne mundaba?

²⁰Ddala ddala mbagamba nti mmwe mulikaaba, mulikuba ebiwoobe, naye ensi yo erisanyuka. Mmwe mulinakuwala naye okunakuwala kwammwe kulifuuka essanyu eritagambika bwe mulindabako nate.

²¹Omukazi ng'azaala aba mu bulumi buyitirivu, kubanga ekiseera kye kituuse. Naye omwana bw'amala okuzaalibwa olwo omukazi aba takyajjukira bulumi buli olw'essanyu ery'okuzaala omuntu mu nsi.

²²Kale nammwe kaakano munakuwadde, naye ndiddamu okubalaba ne musanyuka, era essanyu lyammwe tewali n'omu aliribaggyako.

²³Mu kiseera ekyo nga temukyansaba kintu na kimu, mmwe bennyini munaasabanga Kitange mu linnya lyange.

²⁴Kino mubadde temukikola, naye kaakano mukitandike. Musabe mu linnya lyange, mujja kuweebwa ekyo kye musaba, essanyu lyammwe liryoke lituukirire.

²⁵Ebyo mbibabuulidde mu ngero. Naye ekiseera kijja kutuuka nneme kwogera nammwe mu ngero, wabula mbabuulire lwatu ebifa ku Kitange.

²⁶Mu kiseera ekyo mulisaba mu linnya lyange, so si Nze okubasabira eri Kitange.

²⁷Kitange abaagala nnyo kubanga nammwe munjagala nnyo era mukkiriza nti nava eri Katonda.

²⁸Nava eri Kitange ne nzija mu nsi era nzija kuva mu nsi nzireyo eri Kitange.”

²⁹Awo abayigirizwa be ne bamugamba nti, “Kaakano oyogera lwatu, so si mu ngero.

³⁰Kaakano tutegedde ng’omanyi byonna, era nga tewali kyetaagisa kukubuuza. Kyetuva tukkiriza nga wava eri Katonda.”

³¹Yesu n’abaddamu nti, “Kaakano mukkirizza?

³²Laba, ekiseera kijja, era kituuse mwenna lwe munaasaasaana buli omu n’addayo ku bibye, ne mundeka nzekka. Kyokka sijja kuba nzekka, kubanga Kitange ali wamu nange.

³³“Mbateggeezza ebyo byonna mulyoke mube n’emirembe mu nze. Mu nsi muno mujja kubonaabona, naye mugume, kubanga Nze mpangudde ensi.”

Yokaana 17

Yesu Yeesabira

¹Yesu bwe yamala okwogera ebyo n’ayimusa amaaso ge n’atunula eri eggulu, n’ayogera nti, “Kitange ekiseera kituuse. Gulumiza Omwana wo, n’omwana alyoke akugulumize,

²nga bwe wamuwa obuyinza ku balina omubiri bona, bona be wamuwa alyoke abawe obulamu obutaggwaawo.

³Buno bwe bulamu obutaggwaawo, okutegeera ggwe Katonda omu ow’amazima, n’oyo gwe watuma, Yesu Kristo.

⁴Nkugulumizizza ku nsi, omulimu gwe wantuma okukola, ngumalirizza.

⁵Kale kaakano, Kitange, ngulumiza wamu naawe mu kitibwa ekyo kye nnali nakyo ng’ensi tennabeerawo.”

Yesu Asabira Abayigirizwa be

⁶“Njolesezza erinnya lyo eri abantu be wampa okuva mu nsi. Baali ba nsi naye n’obampa. Baali babo n’obampa era bakkirizza ekigambo kyo.

⁷Bategedde nga buli kye nnina kiva gy’oli,

⁸kubanga buli kye wandagira nkibayigirizza ne bakitegeera era bategeeredde ddala nga nava gy'oli, era ne bakkiriza nga ggwe wantuma.

⁹Mbasabira. Sisabira nsi, naye nsabira abo be wampa kubanga babo.

¹⁰Ng'ebintu byonna bwe biri ebyange ate era nga bibyo, era ne bibyo nga byange, bampeesa ekitiibwa.

¹¹Nze sikyali mu nsi, naye bo bali mu nsi, ate nga nzija gy'oli. Kitange Omutukuvu, be wampa bakuumye mu linnya lyo, balyoke babeere bumu nga ffe bwe tuli obumu.

¹²Bwe mbadde nabo, abo be wampa mbakuumye mu linnya lyo, ne watabaawo azikirira, okuggyako omwana ow'okubula, ekyawandiikibwa kiryoke kituukirire."

¹³ "Nange kaakano nzija gy'oli, era mbabuulidde ebintu bino nabo babe n'essanyu lyange nga lituukiride mu bo.

¹⁴Mbawadde ekigambo kyo, ensi n'ebakyawa kubanga si ba nsi nga Nze bwe siri wa nsi.

¹⁵Sikusaba kubaggya mu nsi, naye nkusaba obakuumye eri omubi.

¹⁶Si ba nsi nga nange bwe siri wa nsi.

¹⁷Obatukuze mu mazima; ekigambo kyo ge mazima.

¹⁸Nga bwe wantuma mu nsi, nange bwe ntyo mbatuma mu nsi.

¹⁹Era neetukuza ku lwabwe nabo balyoke batukuzibwe mu mazima."

Yesu Asabira Abakkiriza Bonna

²⁰"Sisabira bano bokka naye nsabira n'abo abanzikiriza olw'ekigambo kyabwe,

²¹bonna babeere bumu, nga ggwe Kitange bw'oli mu Nze, nange nga ndi mu ggwe, nabo babeerenga mu ffe, ensi eryoke ekkirize nga ggwe wantuma.

²²Mbawadde ekitiibwa kye wampa, balyoke babeere bumu nga ffe bwe tuli obumu.

²³Nze nga ndi mu bo, era naawe ng'oli mu Nze balyoke bafuukire ddala omuntu omu. Ensi eryoke etegeere nga ggwe wantuma era nti obaagala nga bw'onjagala."

²⁴ "Kitange, bano be wampa njagala mbeere nabo we ndi balyoke bategeere ekitiibwa kyange kye wampa kubanga wanjagala, ng'ensi tennatondebwa.

²⁵ "Ayi Kitange Omutukuvu, ensi teyakumanya, kyokka Nze nkumanyi era n'abayigirizwa bano bamanyi nga ggwe wantuma.

26Era mbayigirizza ne bamanya erinnya lyo, era nzija kwongera okubamanyisa okwagala kwo kw'onjagala, kulyoke kubeerenga mu bo, era nange mbeere mu bo."

Yokaana 18

Yesu Akwatibwa

1Awo Yesu bwe yamala okwogera ebyo n'afuluma n'abayigirizwa be, ne balaga emitala w'akagga Kidulooni. Mu kifo ekkyo mwalimu ennimo y'emizeeyituuni, Yesu n'abayigirizwa be ne bayingira omwo.

2Yuda, eyamulyamu olukwe, ekifo ekkyo yali akimanyi, kubanga Yesu yagendangayo emirundi mingo ng'ali n'abayigirizwa be.

3Awo Yuda n'ajja mu kifo ekkyo ng'ali n'ekibinja ky'abaserikale, n'abaweeresa ba Bakabona abakulu n'ab'Abaafalaayo. Bajja nga balina ettaala n'emimuli n'ebyokulwanyisa.

4Yesu bwe yamanya byonna ebyali bigenda okumubaako, n'avaayo n'ababuuza nti, "Munoonya ani?"

5Ne baddamu nti, "Tunoonya Yesu Omunnazaaleesi." Yesu n'abaddamu nti, "Ye Nze," Yuda, eyamulyamu olukwe, yali ayimiridde nabo.

6Yesu bwe yabagamba nti, "Ye Nze" ne badda emabega ne bagwa wansi.

7Yesu n'ababuuza omulundi ogwokubiri nti, "Munoonya ani?" Ne baddamu nti, "Yesu Omunnazaaleesi."

8Yesu n'abaddamu nti, "Mbabuulidde nti, Ye Nze. Kale obanga munoonya Nze, bano mubaleke bagende."

9Yakola kino, ekyawandiikibwa kiryo ke kituukirire ekigamba nti, "Abo be wampa saabuzaako n'omu."

10Awo Simooni Peetero, eyalina ekitala, n'akisowolayo, n'atema omuddu wa Kabona Asinga Obukulu n'amusalako okutu okwa ddyo. Erinnya ly'omuddu oyo nga ye Maluko.

11Yesu n'alagira Peetero nti, "Zza ekitala mu kiraato kyakyo. Ekikompe Kitange ky'ampadde, siikinywe?"

12Awo ekibinja ky'abaserikale n'omuduumizi waabwe n'abaweeresa b'Abayudaaya, ne bakwata Yesu ne bamusiba.

13Ne bamutwala ewa Ana, eyali mukoddomi wa Kayaafa, Kabona Asinga Obukulu mu mwaka ogwo.

14Kayaafa oyo, y'oli eyawa Abayudaaya amagezi nti, "Kirungi omuntu omu afiirire bona."

Peetero Yeegaana Yesu Omulundi Oguusooka

15 Simooni Peetero n'omuyigirizwa omulala eyali amanyiddwa Kabona Asinga Obukulu, ne bagoberera Yesu. Omuyigirizwa oyo eyali amanyiddwa n'agoberera Yesu mu luggyia lwa Kabona Asinga Obukulu,

16 nga Peetero ye ayimiridde wabweru ku mulyango; omuyigirizwa oyo omulala bwe yayogera n'omuggazi w'oluggi n'ayingiza Peetero.

17 Omuwala omuggazi n'abuuza Peetero nti, "Naawe oli omu ku bayigirizwa b'omuntu oyo?" Peetero n'addamu nti, "Nedda."

18 Obudde bwali bwa mpewo, abaddu n'abawereza baali bakumye omuliro nga boota, ne Peetero naye ng'ayimiridde nabo ng'ayota omuliro.

Kabona Asinga Obukulu Abuuza Yesu Ebibuuzo

19 Awo Ana eyaliko Kabona Asinga Obukulu n'abuuza Yesu ebifa ku bayigirizwa be ne ku kuyigiriza kwe.

20 Yesu n'amuddamu nti, "Nayogeranga lwatu eri ensi, bulijo n'ayigirizanga mu makunjaaniro ne mu Yeekaalu, Abayudaaya bona mwe bakunjaanira, soogeranga kintu na kimu mu kyama.

21 Lwaki obuuza Nze? Buuza abo abaawuliranga bye njogera. Bamanyi bye nnaayogera."

22 Yesu bwe yayogera ekkyo omu ku bawereza eyali ayimiridde awo n'amukuba oluyi n'amugamba nti, "Oddamu otyo Kabona Asinga Obukulu?"

23 Yesu n'amuddamu nti, "Obanga njogedde bubi kinnumirize ekibi, naye obanga kirungi, kale onkubira ki?"

24 Awo Ana n'aweereza Yesu nga musibe eri Kayaafa Kabona Asinga Obukulu.

Peetero Yeeyongera Okwegaana Yesu

25 Mu kiseera ekkyo Simooni Peetero yali ayimiridde ng'ayota omuliro. Ne bamubuuza nti, "Naawe oli omu ku bayigirizwa ba Yesu?" N'abaddamu nti, "Nedda."

26 Awo omu ku baddu ba Kabona Asinga Obukulu, muganda w'oyo Peetero gwe yasalako okutu, n'amubuuza nti, "Saakulabye naye mu nnimiro?"

27 Peetero n'addamu okwegaana. Amangwago enkoko n'ekookolima.

Yesu mu maaso ga Piraato

28 Awo Abayudaaya ne baggya Yesu ewa Kayaafa ne bamutwala mu lubiri lwa gavana Omuruumi. Obudde bwali bwakakya, ne batayingira mu lubiri baleme okusobya omukolo ogw'okwetukuza, si kulwa nga basubwa okulya Embaga y'Okuyitako.

²⁹Awo Piraato n'afuluma ebweru gye baali n'ababuuza nti, "Musango ki gwe muvunaana omuntu ono?"

³⁰Ne bamuddamu nti, "Singa yali tazizza musango tetwandumileese gy'oli."

³¹Piraato kyeyava abagamba nti, "Kale mmwe mumutwale mumusalire omusango okusinziira mu mateeka gammwe." Ne bamuddamu nti, "Ffe tetukkiriza kutta muntu yenna."

³²Kino ne kituukiriza ebyo Yesu bye yayogera ku nfa gye yali agenda okufaamu.

³³Awo Piraato n'addayo mu lubiri n'ayita Yesu. N'amubuuza nti, "Ggwe Kabaka w'Abayudaaya?"

³⁴Yesu n'addamu nti, "Ekyo okyogedde ku bubwo oba balala be bakubuulidde ebinaako?"

³⁵Piraato n'amubuuza nti, "Nze ndi Muyudaaya? Abantu bo ne Kabona Asinga Obukulu be bakundeetedde. Okoze ki?"

³⁶Yesu n'addamu nti, "Obwakabaka bwange si bwa mu nsi muno. Singa bubadde bwa mu nsi eno abaweereza bange bandirwanye ne siweebwayo mu Bayudaaya. Naye obwakabaka bwange si bwa mu nsi muno."

³⁷Piraato n'amubuuza nti, "Kwe kugamba oli kabaka?" Yesu n'amuddamu nti, "Okyogedde nti ndi kabaka. Ekyo kye nnazaalirwa era kye kyandeeta mu nsi, ntegeeze amazima. Era abo bona abaaagala amazima bawulira eddoboozi lyange."

³⁸Piraato n'amubuuza nti, "Amazima kye ki?" Piraato bwe yamala okwogera bw'atyo n'afuluma ebweru eri Abayudaaya n'abagamba nti, "Omuntu ono talina musango.

³⁹Naye ku buli mbaga ejjuukirirwako Okuyitako mulina empisa, onkusaba mbateere omusibe omu. Kale mwagala mbateere Kabaka w'Abayudaaya?"

⁴⁰Bonna kyebaava baleekaanira waggulu nga bagamba nti, "Nedda, si oyo, wabula tuteere Balaba." Balaba oyo yali munyazi.

Yokaana 19

Yesu Asalirwa ogw'Okufa

¹Awo Piraato n'atwala Yesu n'amukuba embooko.

²Abaserikale ne bakola engule ey'amaggwa ne bagissa ku mutwe gwa Yesu, ne bamwambaza olugoye olwa kakobe,

³ne bajja w'ali ne bamugamba nti, "Mirembe, Kabaka w'Abayudaaya!" Ne bamukuba empi.

⁴ Piraato n'afuluma ebweru nate, n'agamba Abayudaaya nti, "Laba, mbaleetera Yesu ebweru, kyokka mutengeere nga nze ndaba taliiko musango."

⁵ Awo Yesu n'afuluma ng'atikkiddwa engule eyakolebwa mu maggwa, era ng'ayambaziddwa olugoye olw'effulungu, Piraato n'agamba Abayudaaya nti, "Mulabe omuntu oyo!"

⁶ Awo bakabona abakulu n'abaweeereza bwe baamulaba, ne baleekaana nti, "Mukomerere, mukomerere!" Piraato n'abagamba nti, "Mmwe mumutwale mumukomerere. Nze simulabako musango."

⁷ Abayudaaya ne bamuddamu nti, "Ffe tulina etteeka, era okusinziira ku tteeka eryo asaanidde kuttibwa, kubanga yeeyita Omwana wa Katonda."

⁸ Piraato bwe yawulira ekyo ne yeeyongera okutya.

⁹ N'azzaayo Yesu mu lubiri, n'amabuuza nti, "Oli wa wa?" Yesu n'atamuddamu kigambo.

¹⁰ Piraato n'amugamba nti, "Tonziramu? Tomanyi nga nnina obuyinza okukuta oba okukukomerera?"

¹¹ Yesu n'amuddamu nti, "Tewandibadde na buyinza ku Nze n'akatono, singa tebukuweebwa kuva waggulu. Noolwekyo abo abampaddeyo gy'oli be balina ekibi ekisinga."

¹² Okuva mu kiseera ekyo Piraato n'asala amagezi okuta Yesu. Naye Abayudaaya ne baleekaana nga bagamba nti, "Bw'ota omuntu oyo nga tokyali mukwano gwa Kayisaali. Buli eyefuula kabaka aba awakanya Kayisaali."

¹³ Bwe baayogera batyo Piraato n'azza Yesu ebweru gye bali, n'atuula ku ntebe esalirwako emisango, mu kifo ekiyitibwa Amayinja Amaaliire, mu Lwebbulaniya Gabbasa.

¹⁴ Lwali lunaku lwa kutegeka Mbaga ejjuukirirwako Okuyitako. Essaawa zaali nga mukaaga ez'omu ttuntu. Piraato n'agamba Abayudaaya nti, "Kabaka wammwe wuuno!"

¹⁵ Abayudaaya ne baleekaana nga bagamba nti, "Mukomerere, mukomerere!" Piraato n'ababuuza nti, "Kabaka wammwe gwe mba nkomerera?" Bakabona abakulu ne baddamu nti, "Tetulina kabaka mulala, wabula Kayisaali."

¹⁶ Piraato n'abawa Yesu okumukomerera. Awo ne batwala Yesu;

¹⁷ n'afuluma nga yeetisse omusaalaba gwe, n'atuuka mu kifo ekiyitibwa eky'Ekiwanga, mu Lwebbulaniya kiyitibwa Gologoosa.

¹⁸ Ne bamukomerera ku musaalaba mu kifo ekyo. Era ne bakomerera n'abalala babiri, omu eruuyi n'omulala eruuyi, Yesu n'abeera wakati waabwe.

¹⁹ Piraato n'akola ekiwandiiko n'akiteeka ku musaalaba, nga kisoma nti: "Yesu Omunnazaaleesi, Kabaka w'Abayudaaya."

²⁰ Ekifo kye baakomereramu Yesu kyali kumpi n'ekibuga, era Abayudaaya bangi abaasoma ekiwandiiko ekyo kubanga kyali mu Lwebbulaniya, ne mu Lulatini ne Luyonaani.

²¹ Awo bakabona abakulu ab'Abayudaaya ne bagamba Piraato nti, "Towandiika nti, 'Kabaka w'Abayudaaya,' naye nti, 'Oyo eyeyita Kabaka w'Abayudaaya.'"

²² Piraato n'addamu nti, "Ekyo kye mpandiise kye mpandiise."

²³ Abaserikale bwe baamala okukomerera Yesu, ne baddira engoye ze ne baziteeka emiteeko ena. Buli muserikale n'afuna omuteeko gumu. Ne baddira ekkanzu ye, eyali erukiddwa obulukibwa yonna,

²⁴ abaserikale ne bagambagana nti, "Tuleme kugiyuzaamu naye tugikubire kalulu, tulabe anaagitwala." Kino kyabaawo okutuukiriza ekyawandiikibwa ekigamba nti: "Baagabana ebyambalo byange, n'ekkanzu yange ne bagikubira akalulu." Ekyo kyennyini abaserikale kye baakolera ddala.

²⁵ Okumpi n'omusaalaba gwa Yesu waali wayimiriddewo nnyina, ne muganda wa nnyina, ne Maliyamu muka Kulooopa, ne Maliyamu Magudaleene.

²⁶ Yesu bwe yalaba nnyina, era n'omuyigirizwa Yesu gwe yayagalanga ennyo ng'ayimiridde awo, n'agamba nnyina nti, "Maama, laba omwana wo."

²⁷ Ate n'agamba omuyigirizwa nti, "Laba maama wo." Okuva olwo omuyigirizwa oyo n'atwala nnyina Yesu eka ewuwe.

Okufa kwa Yesu

²⁸ Yesu bwe yamanya nga byonna biwedde, ekyawandiikibwa kiryoke kituukirire, n'ayogera nti, "Ennyonta ennuma."

²⁹ Waali wateekeddawo ekibya ekijjudde wayini omukaatuufu, ne bannyikamu ekyangwe, ne bakiteeka ku kati ka ezobu ne bakiteeka ku mumwa gwa Yesu.

³⁰ Bwe yakombako n'agamba nti, "Kiwedde." N'akutamya omutwe gwe n'awaayo obulamu bwe.

³¹ Olunaku nga bwe lwali olw'okweteekerateekera Ssabbiiti eyo enkulu ennyo, abakulembeze b'Abayudaaya ne batayagala mirambo kusigala ku misaalaba. Kyebaava basaba Piraato abaakomererwa bamenyebwe amagulu era bawanulweyo.

³² Awo abaserikale ne bajja ne bamenya amagulu g'abasajja abaakomererwa ne Yesu.

³³Naye bwe batuuka ku Yesu ne balaba nga yafudde dda, ne batamumenya magulu.

³⁴Naye omu ku baserikale n'amufumita effumu mu mbiriizi, amangwago ne muvaamu omusaayi n'amazzi.

³⁵Oyo eyakirabira ddala nga kibaawo ye yakyogera, era kye yayogera kya mazima, era oyo amanyi ng'ayogera mazima mulyoke mukkirize.

³⁶Bino byabaawo ekyawandiikibwa kiryoke kituukirire ekigamba nti: "Talimenyebwa gumba na limu."

³⁷Era ekyawandiikibwa ekirala kigamba nti, "Balimulaba oyo gwe baafumita."

Okuziikibwa kwa Yesu

³⁸Ebyo bwe byaggwa, Yusufu ow'e Alimasaya, eyali omuyigirizwa wa Yesu mu kyama olw'okutya Abayudaaya, n'asaba Piraato olukusa okuwanulayo omulambo gwa Yesu, Piraato n'amukkiriza. Yusufu n'aguwanulayo n'agutwala.

³⁹Nikodemo, eddako eyagenda eri Yesu ekiro, naye n'ajja ng'aleese kilo ng'amakumi ataano ez'ebjakoloosa ebitabule n'envumbo.

⁴⁰Ne batwala omulambo gwa Yesu, ne baguzinga mu ngoye eza linena wamu n'ebjakaloosa ng'empisa y'Abayudaaya ey'okuziika bwe yali.

⁴¹Mu kifo Yesu we yakomererwa waaliwo ennimiro omwali entaana empya ey'empuku, eyali teziikibwangamu muntu.

⁴²Nga bwe lwali olunaku lw'Abayudaaya olw'okweteekerateekera Ssabbiiti ate ng'entaana eno eri kumpi, Yesu ne bamussa omwo.

Yokaana 20

Okuzuukira kwa Yesu

¹Mu makya g'olunaku olusooka mu wiiki, Maliyamu Magudaleene n'ajja ku ntaana, ng'obudde tebunnalaba bulungi, n'alaba ejjinja nga ligiddwa ku ntaana.

²N'adduka n'agenda eri Simooni Peetero n'eri omuyigirizwa omulala Yesu gwe yayagalanga ennyo n'abagamba nti, "Mukama waffe bamuggyeeemu mu ntaana, era simanyi gye bamutadde!"

³Awo Peetero n'omuyigirizwa oli omulala ne bafuluma ne balaga ku ntaana.

⁴Bombi ne bagenda nga badduka, omuyigirizwa oli omulala n'ayisa Peetero n'amusooka ku ntaana.

⁵N'akutama n'alaba engoye za linena nga ziteekeddwa awo, kyokka n'atayingira mu ntaana.

⁶Awo ne Simooni Peetero n'atuuka, n'ayingira mu ntaana, n'alaba engoye za linena nga ziteekeddwa awo.

⁷N'alaba n'ekitambaala ekyali ku mutwe gwa Yesu. Kyali tekiteekeddwa wamu na ngoye, wabula kyali kizingiddwa era nga kiteekebbwa ku bbali.

⁸N'omuyigirizwa oli omulala, eyasooka okutuuka ku ntaana n'ayingira. N'alaba era n'akkiriza.

⁹Kubanga okutuusiza ddala mu kiseera ekyo baali tebannategeera ekyawandiikibwa nti: Kimugwanira okuzuukira mu bafu.

¹⁰Awo abayigirizwa ne baddayo ewaabwe eka.

Yesu Alabikira Maliyamu Magudaleene

¹¹Maliyamu Magudaleene yali ayimiridde wabweru w'entaana ng'akaaba. N'akutama. N'alingiza mu ntaana nga bw'akaaba,

¹²n'alaba bamalayika babiri, nga bali mu ngoye enjeru nga batudde; omu emitwetwe n'omulala emirannamiro w'ekifo omulambo gwa Yesu we gwali guteekeddwa.

¹³Bamalayika ne bamubuuza nti, "Omukyala, okaabira ki?" N'abaddamu nti, "Kubanga baggyeemu Mukama wange, era simanyi gye bamutadde!"

¹⁴Bwe yamala okwogera ebyo, n'akyuka n'alaba Yesu ng'ayimiridde, kyokka n'atamanya nti ye Yesu.

¹⁵Yesu n'amubuuza nti, "Omukyala okaabira ki? Onoonya ani?" Maliyamu n'allowooza nti, Ye nannyini nnimiro n'amugamba nti, "Ssebo, obanga gw'omuggyeemu, mbuulira gy'omutadde ηjende mmuggyeyo."

¹⁶Yesu n'amugamba nti, "Maliyamu!" Maliyamu n'akyukira Yesu n'amugamba mu Lwebbulaniya nti, "Labooni," ekitegeeza nti, "Omuyigiriza."

¹⁷Yesu n'amugamba nti, "Tonkwatako kubanga sinnagenda eri Kitange. Naye genda eri baganda bange obagambe nti, ηjenda eri Kitange era Kitammwe, Katonda wange era Katonda wammwe."

¹⁸Maliyamu Magudaleene n'agenda n'abuulira abayigirizwa nga bw'alabye Mukama waffe, era n'abategeeza by'amugambye.

Yesu Alabikira Abayigirizwa be

¹⁹Akawungeezi ako abayigirizwa baali bakuηjaanidde mu kisenge ng'enzigi nsibe olw'okutya Abayudaaya, Yesu n'ajja n'ayimirira wakati mu bo. N'abagamba nti, "Emirembe gibe mu mmwe."

²⁰Bwe yamala okwogera ebyo n'abalaga ebibatu bye n'embiriizi ze. Abayigirizwa bwe baalaba Mukama ne basanyuka nnyo.

²¹ N'addamu nti, "Emirembe gibe mu mmwe. Nga Kitange bwe yantuma, nange bwe mbatuma mmwe."

²² Bwe yamala okwogera ebyo n'abassiza omukka, n'abagamba nti, "Mufune Mwoyo Mutukuvu.

²³ Buli muntu gwe munaasonyiwanga ebibi bye anaabanga asonyiyiddwa. Abo be munaagaananga okusonyiwa, banaabanga tebasoniyiddwa."

Yesu Alabikira Tomasi

²⁴ Naye Tomasi, omu ku bayigirizwa ekkumi n'ababiri, ayitibwa Didumo, teyali na banne Yesu bwe yajja.

²⁵ Bayigirizwa banne ne bamugamba nti, "Tulabye Mukama waffe." Ye n'abagamba nti, "Okuggyako nga ndabye enkovu ez'emisumaali mu bibatu bye, ne nteeka olunwe lwange mu nkova ezo era ne nteeka ekibatu kyange mu mbiriizi ze, sigenda kukkiriza."

²⁶ Bwe waayitawo ennaku munaana, abayigirizwa ba Yesu, era bali mu nnyumba, Tomasi yali nabo. Yesu n'ajja, enzigi nga nsibe, n'ayimirira wakati mu bo n'abagamba nti, "Emirembe gibe mu mmwe,"

²⁷ Awo n'agamba Tomasi nti, "Kale teeka engalo zo wano, laba ebibatu byange. Teeka ekibatu kyo mu mbiriizi zange. Lekeraawo okuba atakkiriza, naye kkiriza."

²⁸ Tomasi n'amuddamu nti, "Ggwe Mukama wange era Katonda wange."

²⁹ Yesu n'amugamba nti, "Okkirizza kubanga ondabye. Balina omukisa abakkiriza nga tebaliiko kye balabye."

³⁰ Yesu yakola ebyamagero ebirala bingi ng'abayigirizwa be balaba, ebitaawandiikibwa mu kitabo kino.

³¹ Naye bino byawandiikibwa mulyoke mukkirize nti Yesu ye Kristo Omwana wa Katonda era olw'okumukkiriza mulyoke mube n'obulamu mu linnya lye.

Yokaana 21

Yesu Alabikira Abayigirizwa be musanvu

¹ Ebyo bwe byaggwa, Yesu n'alabikira nate abayigirizwa be, ku nnyanja ey'e Tiberiya. Yabalabikira bw'ati:

² Simooni Peetero, ne Tomasi ayitibwa Didumo, ne Nassanayiri ow'e Kaana eky'e Ggaliraaya, ne batabani ba Zebbedaayo, n'abayigirizwa abalala babiri, bona baali wamu.

³Simooni Peetero n'abagamba nti, "ŋŋenda kuvuba." Ne bamugamba nti, "Ka tugende ffenna." Ne bagenda ne basaabala mu lyato. Naye ekiryo ekyo kyonna ne batakwasaayo kintu.

⁴ Bwe bwali bukya, Yesu n'ayimirira ku lubalama, naye abayigirizwa ne batamutegeera.

⁵ Yesu n'ababuuza nti, "Abaana, mukwasizzaayo?" Ne baddamu nti, "Nedda."

⁶ Yesu n'abagamba nti, "Kale musuule akatimba ku luuyi olwa ddyo olw'eryato, mujja ku kukwasa." Awo ne basuula, naye ne batasobola kukannyulula olw'ebennyanya ebingi bye baakwasa!

⁷ Awo omuyigirizwa oyo Yesu gwe yayagalanga ennyo n'agamba Peetero nti, "Oyo Mukama waffe!" Simooni Peetero bwe yakiwulira ne yeesiba olugoye kubanga yali mu kakutu, ne yeesuula mu mazzi.

⁸ Abayigirizwa abalala bo ne bajjira mu lyato nga basika akatimba akaalimu ebyennyanya. Tebaali wala n'olukalu, baali nga mita kyenda.

⁹ Awo bwe baatuuka ne basanga omuliro ogw'amanda nga gwaka, nga kuliko ekyennyanya n'omugaati.

¹⁰ Yesu n'abagamba nti, "Muleete ku byennyanya bye muva okukwasa kaakano."

¹¹ Awo Simooni Peetero n'agenda n'awalula akatimba n'akatuusa ku lukalu, nga kajjudde ebyennyanya ebinene kikumi mu ataano mu bisatu. Newaakubadde nga byali bingi bwe bityo naye akatimba tekaakutuka.

¹² Yesu n'abagamba nti, "Mujje mulye ekyenkyo." Naye ku bayigirizwa tewaali n'omu yategana ku mubuuza nti, "Ggwe ani?" Kubanga bona baamanya nti ye Mukama waffe.

¹³ Yesu n'atoola omugaati n'abagabira era n'ebennyanya n'akola bw'atyo.

¹⁴ Guno gwe mulundi ogwokusatu Yesu gwe yalabikira abayigirizwa be, ng'amaze okuzuukira.

Yesu Azzaamu Peetero Amaanyi

¹⁵ Bwe baamala okulya, Yesu n'agamba Peetero nti, "Simooni omwana wa Yokaana, onjagala okusinga bano?" Peetero n'addamu nti, "Ddala, omanyi nga nkwegala nnyo." Yesu n'amugamba nti, "Kale liisanga abaana b'endiga zange."

¹⁶ Yesu n'amubuuza omulundi ogwokubiri nti, "Simooni omwana wa Yokaana, ddala onjagala?" Peetero n'addamu nti, "Ddala, Mukama wange, omanyi nga nkwegala." Yesu n'amugamba nti, "Kale lundanga endiga zange."

¹⁷ Yesu n'abuuza Peetero omulundi ogwokusatu nti, "Simooni omwana wa Yokaana, onjagala?" Peetero n'anakuwala kubanga Yesu yamubuuza omulundi ogwokusatu nti, "Onjagala?" Peetero n'amuddamu nti, "Mukama wange ggwe

omanyi buli kimu, omanyi nga nkwegala." Yesu n'amugamba nti, "Kale liisanga endiga zange.

¹⁸Bwe wali ng'okyali muvubuka wasobolanga okukola buli kye wayagalanga era ng'ogenda buli gye weetaaganga naye bw'olikaddiwa oligolola emikono gyo, omuntu omulala n'akusiba n'akutwala gy'otoyagala."

¹⁹Ekyo Yesu yakyogera ng'alaga enfa Peetero gy'alifaamu okuweesa Katonda ekitiibwa. Awo n'amugamba nti, "Ngoberera."

²⁰Peetero bwe yakyuka, n'alaba omuyigirizwa oli Yesu gwe yayagalanga ennyo nga naye agoberera. Oyo ye muyigiriza eyagalamira okumpi n'ekifuba kya Yesu nga balya ekyekiro eky'enkomerero, amale abuuze Yesu nti, "Mukama waffe ani agenda okukulyamu olukwe?"

²¹Peetero bwe yamulaba kwe kubuza Yesu nti, "Mukama wange, ate ono aliba atya?"

²²Yesu n'amugamba nti, "Bwe njagala abeerawo okutuusa lwe ndikomawo, ofaayo ki? Gwe goberera Nze."

²³Awo ekigambo ekyo ne kibuna mu booluganda nti omuyigirizwa oyo talifa. Naye Yesu teyagamba nti omuyigirizwa oyo talifa, wabula yagamba bugambi nti, "Bwe njagala abeerawo okutuusa lwe ndikomawo, ofaayo ki?"

²⁴Oyo ye muyigirizwa akakasa bino era ye yabiwandiika. Era tumanyi nga by'ategeeza bya mazima.

Ebifundikira

²⁵Waliwo n'ebintu ebirala bingi Yesu bye yakola ebitaawandiikibwa. Era singa nabyo byawandiikibwa kinnakimu, ndowooza nga n'ensi zonna tezandigiddemu bitabo ebyandiwandiikkidwa.

Ebikolwa by'Abatume

Ebikolwa by'Abatume 1

Yesu Atwalibwa mu Ggulu

¹ Mu kitabo ekyasooka, munnange Teefiro, nakutegeeza ebintu byonna okuva Yesu lwe yatandika okukola emirimu gye n'okuyigiriza,

² okutuusa ku lunaku lwe yatwalibwa mu ggulu ng'amaze okuwa abatume be, be yalonda, ebiragiro ku bwa Mwoyo Mutukuvu.

³ Mu nnaku amakumi ana ezaddirira, Yesu yalabikira abatume nga mulamu era n'abakakasa mu ngeri nnyingi, era buli lwe yabalabikiranga ng'ayogera nabo ku bigambo by'obwakabaka bwa Katonda.

⁴ Awo bwe yali ng'alya nabo ekijjulo n'abalagira baleme kuva mu Yerusaalemi naye balindirire ekisuubizo kya Kitaawe. Yagamba nti, "Ekyo kye mwawulira nga mbagamba nti,

⁵ 'Yokaana yabatiza na mazzi, naye mmwe mujja kubatizibwa na Mwoyo Mutukuvu mu nnaku si nnyingi.' "

⁶ Awo bwe baali bakuññaanye ne bamubuuza nti, "Mukama waffe, mu kiseera kino mw'onooddizaawo obwakabaka bwa Isirayiri?"

⁷ Naye Yesu n'abaddamu nti, "Okumanya entuuko oba ebiro si kyammwe, kitange kye yateekateeka mu buyinza bwe.

⁸ Naye muliweebwa amaanyi, Mwoyo Mutukuvu bw'alimala okubakkako, era munaabanga bajulirwa bange mu Yerusaalemi, ne mu Buyudaaya yonna, ne mu Samaliya okutuukira ddala ku nkomerero z'ensi."

⁹ Bwe yamala okwogera ebigambo ebyo, ekire ne kimutwala waggulu nga balaba.

¹⁰ Awo bwe baali nga batunula enkaliriza mu ggulu ng'agenda, amangwago abasajja babiri nga bambadde engoye enjeru ne balabika,

¹¹ ne boogera nti, "Abasajja Abagaliraaya, lwaki muyimiridde wano nga mutunula waggulu mu ggulu? Yesu oyo abaggiddwako n'atwalibwa mu ggulu, agenda kukomawo mu ngeri y'emu nga bwe mumulabye ng'agenda mu ggulu."

¹² Ne bakomawo e Yerusaalemi okuva ku lusozi oluyitibwa olwa Zeyituuni, oluli okumpi ne Yerusaalemi, ng'olugendo olutambulwa ku Ssabiiti.

¹³ Ne balaga mu kisenge ekya waggulu mu nnyumba mwe baali basula, era be bano: Peetero, ne Yokaana ne Yakobo, ne Andereya, ne Firipo ne Tomasi, ne Battolomaayo, ne Matayo, ne Yakobo, omwana wa Alufaayo, ne Simooni eyayitbwanga "Omuzerote", ne Yuda, omwana wa Yakobo.

¹⁴ Abo bonna ne beeweerayo ddala n'omutima gumu okusaba wamu n'abakazi ne Maliyamu nnyina Yesu ne baganda ba Yesu.

Matiya Asikira Yuda

¹⁵ Awo mu nnaku ezo, Peetero n'ayimirira wakati mu booluganda abaali bakunjaanye nga bawera nga kikumi mu abiri, n'ayogera nti,

¹⁶ “Abasajja abooluganda, ebyawandiikibwa ku Yuda eyakulembera ekibiina ekyakwata Yesu byali biteekwa okutuukirira; kubanga ekyo Mwoyo Mutukuvu yali yakitegeeza dda bwe yayogerera mu Dawudi.

¹⁷ Yuda yali omu ku ffe, era n'aweebwa omugabo gw'obuweereza buno.”

¹⁸ Empeera gye yafuna mu butali butuukirivu bwe, yagigulamu ennimiro, era omwo mwe yagwa n'ayabika n'ebyenda bye ne biyiika.

¹⁹ Amawulire ago ne gatuuka ku bantu ab'omu Yerusaalemi, era ennimiro eyo ne bagituumma Akerudama mu lulimi lwabwe, amakulu nti, Ennimiro y'Omusaayi!

²⁰ “Kubanga kyawandiikibwa mu Zabbuli nti, ‘Ekibanja kye kizike, so kireme okubeerangamu omuntu.’ ‘N'obuvunaanyizibwa bwe buweebwe omulala.’

²¹ Noolwekyo kigwanye okulonda omuntu mu bantu abaayitanga naffe mu biro byonna, eyayingiranga n'afuluma wamu naffe nga tuli ne Mukama waffe Yesu,

²² okuvira ddala ku kubatiza kwa Yokaana okutuusa lwe yatwalibwa mu ggulu, alyoke abeere omujulirwa ow'okuzuukira kwe awamu naffe.”

²³ Awo ne balonda abasajja babiri, omu nga ye Yusufu (eyayitbwanga Balusaba ate era nga ye Yusito), n'owokubiri nga ye Matiya.

²⁴ Ne balyoka basaba ne bagamba nti, “Ayi Mukama, gw'omanyi emitima gy'abantu bona, tulage gw'olonze ku bantu bano ababiri,

²⁵ okubeera mu baweereza buno n'okubeera omutume mu kifo kya Yuda eyatwawukanako n'alaga mu kifo kye ekimusaanira.”

²⁶ Oluvannyuma ne bakuba akalulu, ne kagwa ku Matiya, n'agattibwa ku batume ekkumi n'omu.

Ebikolwa by'Abatume 2

Mwoyo Mutukuvu ajja ku Pentekoote

¹ Awo olunaku lwa Pentekoote bwe lwatuukabonna baali bakunjaanidde mu kisenge kimu.

² Amangwago okuwuumma, nga kuli ng'empewo ey'amaanyi ennyo ekunta, ne kuva mu ggulu, ne kujjula mu nnyumba yonna mwe baali batudde.

³Ku buli omu ne kutuulako ennimi ng'ez'omuliro.

⁴Bonna ne bajjuzibwa Mwoyo Mutukuvu, ne batandika okwogera ennimi ez'enjawulo nga Mwoyo Mutukuvu bwe yabasobozesa.

⁵Waaliwo Abayudaaya bangi abatya Katonda abaali bazze mu Yerusaalemi nga bavudde mu buli ggwanga wansi w'eggulu.

⁶Bwe baawulira okuwuma okwo, ekibiina kinene ne kikuŋjaana, ne beewuunya okuwulira nga buli muntu awulira olulimi lw'ewaabwe.

⁷Ne bawuniikirira ne beewuunya ne bagamba nti, "Bano bona aboogera si Bagaliraaya?

⁸Kale lwaki tuwulira buli muntu olulimi lw'ewaffe gye twazaalibwa?

⁹Tubawulira nga boogera eby'amagero bya Katonda mu nnimi ez'Abapaazi, n'Abameedi, n'Abeeramiti, n'ez'abalala abava e Mesopotamiya, ne Buyudaaya, ne Kapadokiya, mu Ponto ne mu Asiya,

¹⁰ne mu Fulugiya ne mu Panfuliya, n'abamu abava mu Misiri, n'ensi za Libiya okuliraana Kuleene, n'abagenyi Abaruumi,

¹¹Abayudaaya, n'abakyuka ne basoma Ekiyudaaya, n'Abakuleete n'Abawalabu."

¹²Bonna ne beewuunya nga bawuniikiridde, ne bagambagana nti, "Kino kitegeeka ki?"

¹³Naye abalala ne baseka busesi nga bagamba nti, "Banywedde mwenge musu!"

Okwogera kwa Peetero

¹⁴Awo Peetero n'asituka n'abatume ekkumi n'omu, n'asitula ku ddoboozi n'ayogera eri ekibiina, n'abagamba nti, "Abasajja Abayudaaya, nammwe mwenna ababeera mu Yerusaalemi, mutegeere bino era mumpulirize.

¹⁵abantu bano tebatamidde nga bwe mulowooza, kubanga essaawa ziri ssatu ez'enky!

¹⁶Naye kino kye kyayogerwako nnabbi Yoweeri nti,

¹⁷"Olulituuka mu nnaku ez'oluvannyuma, bw'ayogera Katonda, ndifuka Omwoyo wange ku balina omubiri bonna. Batabani bammwe ne bawala bammwe baliwa obunnabbi; n'abavubuka bammwe balyolesebwa, n'abakadde baliroota ebirooto.

¹⁸Mu biro ebyo ndifuka Omwoyo wange, ku baweereza bange abasajja n'abakazi; baliwa obunnabbi.

¹⁹Era ndikola ebyamagero mu ggulu waggulu, n'obubonero ku nsi wansi, omusaayi n'omuliro n'ekikoomi eky'omukka.

²⁰Enjuba erifuuka ekizikiza, n'omwezi gulimyuka ng'omusaayi, olunaku lwa Mukama olukulu era olw'ekitiibwa nga terunnatuuka.

²¹Na buli muntu alikoowoola erinnya lya Mukama, alirokolebwa.'

²²"Abasajja Abayisirayiri, muwulirize ebigambo bino! Yesu Omunnazaaleesi omuntu Katonda gwe yakakasa gye muli n'eb Yamagero eby'ekitalo, Katonda bye Yamukozesanga ng'ali mu mmwe, nga mwenna bwe mumanyi.

²³Naye ng'enteekateeka ya Katonda bwe yali, omuntu oyo yaweebwayo mu mikono gy'abantu abatagoberera mateeka, ne mumutta nga mumukomeredde ku musaalaba.

²⁴Kyokka Katonda yamuukiza ng'asaanyaawo obulumi bw'okufa, kubanga okufa tekwayinza kumunyweza.

²⁵Kubanga Dawudi amwogerako nti, "Nalaba nga Mukama ali nange bulijo, kubanga ali ku mukono gwange ogwa ddyo, nneme okusagaasagana.

²⁶Noolwekyo omutima gwange kyeguvudde gusanyuka, n'olulimi lwange ne lukutendereza. Era n'omubiri gwange gunaabeeranga mu ssuubi.

²⁷Kubanga tolireka mwoyo gwange kuzikirira so toliganya mutukuvu wo kuvunda.

²⁸Wandaga amakubo g'obulamu, era olinzijuza essanyu nga ndi mu maaso go.'

²⁹"Abasajja abooluganda, nnyinza okwogera n'obuvumu gye muli ku bifa ku jjajjaffe Dawudi nga yafa n'aziikibwa, era n'amalaalo ge weegali ne kaakano.

³⁰Naye Dawudi yali nnabbi, n'amanya nga Katonda yamulayirira ekirayiro, nti mu bibala eby'omu ntumbwe ze mwe muliva alituula ku ntebe ey'obwakabaka bwe,

³¹bwe yakiraba olubereberye nayogera ku kuzuukira kwa Kristo nga teyalekebwa magombe so nga n'omubiri gwe tegwavunda.

³²Yesu oyo Katonda yamuukiza, era ffe ffenna tuli bajulirwa.

³³Awo bwe yagulumizibwa n'alaga ku mukono ogwa ddyo ogwa Katonda, n'aweebwa Mwoyo Mutukuvu eyamusubizibwa Kitaffe, n'alyoka atuwa kino nammwe kye mwerabiddeko era kye mwewuliriddeko.

³⁴Kubanga Dawudi teyalinnya mu ggulu, naye agamba nti, "Mukama yagamba Mukama wange nti, "Tuula ku mukono gwange ogwa ddyo,

³⁵okutuusa lwe ndifuula abalabe bo entebe y'ebigere byo."'

³⁶ “Noolwekyo ennyumba yonna eya Isirayiri, bamanyire ddala nti oyo Yesu gwe mwakomerera ku musaalaba, Katonda yamufula Mukama era Kristo!”

³⁷ Awo bwe baawuulira ebigambo ebyo, emitima ne gibaluma, ne bagamba Peetero n’abatume abalala, nti, “Abooluganda, kiki kye tusaanidde okukola?”

³⁸ Peetero n’abagamba nti, “Mwenenye, buli omu ku mmwe abatizibwe mu linnya lya Yesu Kristo musonyiyibwe ebibi byammwe, olwo nammwe mujja kufuna ekirabo ekya Mwoyo Mutukuvu.

³⁹ Kubanga ekisuubizo kiri eri mmwe n’eri abaana bammwe, n’eri bona abali mu nsi ezeewala abalikoowoola Mukama Katonda waffe.”

⁴⁰ Awo Peetero n’abategeeza mu bigambo ebirala bingi n’ababuulira ng’agamba nti mulokolebwe okuva mu mulembe guno ogwakyama.

⁴¹ Awo abo abakkiriza ebigambo bye ne babatizibwa ku lunaku olwo ne beeyongerako ng’enkumi ssatu.

Obulamu bw’Abakkiriza

⁴² Ne banyikiranga okuyigirizibwa kw’abatume ne mu kussekimu, ne mu kumenya omugaati era ne mu kusaba.

⁴³ Buli muntu n’ajjula okutya era ebyamagero bingi n’obubonero bungi ne bikolebwanga abatume.

⁴⁴ Abakkiriza ne bakunjaananga bulijjo mu kifo kimu, ne baba nga bassa kimu mu byonna.

⁴⁵ Eby’obugagga byabwe n’ebintu bye baalina ne babitunda ne bagabira buli muntu ng’okwetaaga kwe bwe kwabanga.

⁴⁶ Ne banyikiranga okukunjaananga mu Yeekaalu buli lunaku, era ne bakunjaananga ne mu maka gaabwe nju ku nju okumenya omugaati, ne baliiranga wamu emmere yaabwe n’essanyu lingi n’omutima ogatalina bukuusa,

⁴⁷ nga batendereza Katonda, era nga basiimibwa abantu bona. Mukama n’abongerangako bulijjo abaalokolebwanga.

Ebikolwa by’Abatume 3

Peetero Awonya Omulema

¹ Awo Peetero ne Yokaana bwe baali bagenda mu Yeekaalu mu kusaba okw’essaawa omwenda,

² ne wabaawo omusajja eyazaalibwa nga mulema gwe baasitulanga ne bateekanga bulijjo ku mulyango gwa Yeekaalu oguyitibwa Omulyango Omulungi, okusabiriza.

³Awo bwe yalaba Peetero ne Yokaana nga bagenda okuyingira mu yeekaalu n'abasaba ensimbi.

⁴Ne bamwekaliriza amaaso, Peetero n'alyoka amugamba nti, "Tutunuulire!"

⁵N'abatunuulira ng'asuubira okuweebwayo akantu.

⁶Naye Peetero n'agamba nti, "Effeeza ne zaabu sibirina, naye ka nkuwe ekyo kye nnina. Mu linnya lya Yesu Omunnazaaleesi Golokoka, otambule!"

⁷Awo Peetero n'akwata omulema ku mukono ogwa ddyo n'amuyimusa, amangwago ebigere by'omusajja n'obukongovvule ne bifuna amaanyi,

⁸n'abuuka n'ayimirira n'atandika okutambula! N'ayingira nabo mu Yeekaalu ng'atambula era nga bw'abuuka ng'atendereza Katonda.

⁹Abantu bona ne baamulaba ng'atambula, era ng'atendereza Katonda,

¹⁰ne bamuteggeera nga ye wuuyo eyatuulanga ku mulyango gwa Yeekaalu oguyitibwa Omulyango Omulungi ng'asabiriza, ne bawuniikirira era ne beewuunya nnyo olw'ekyo ekimutuuseeko.

Okwogera kwa Peetero mu Yeekaalu

¹¹Awo omusajja eyali omulema bwe yali ng'akyekutte ku Peetero ne Yokaana abantu bona ne badduka okujja we baali ne bakuññaanira mu kisasi kya Sulemaani, nga basamaaliridde.

¹²Awo Peetero bwe yabalaba n'agamba abantu nti, "Abasajja Abayisirayiri, kiki ekibeewuunyisa? Era lwaki mututunuulira ng'abagamba nti obulungi bwaffe n'obuyinza bwaffe bye bitambuzza omusajja ono?

¹³Katonda wa Ibulayimu, ne Isaaka, ne Yakobo, era Katonda wa bajajjaffe ffenna yagulumiza omuweereza we Yesu, gwe mwawaayo ne mu mwegaanira mu maaso ga Piraato newaakubadde nga ye yali amaliridde okumusumulula,

¹⁴naye mmwe ne mwegaana omutuukirivu era omutukuvu, ne musaba babateere omutemu.

¹⁵Bwe mutyo ne mutta aleeta obulamu; oyo ye Katonda yamuzuukiza mu bafu, era ffe bajulirwa.

¹⁶Olw'okukkiriza mu linnya lye, omusajja ono, mwenna gwe mulaba era gwe mumanyi aweereddwa amaanyi mu linnya lye, era okukkiriza mu ye kwe kuwadde omusajja ono obulamu obutuukiridde nga mwenna bwe mulaba.

¹⁷"Kale kaakano, abooluganda, mmanyi nga kye mwakola mwakikola mu butamanya, era n'abakulembeze bammwe nabo bwe batyo.

¹⁸Kyokka Katonda yali atuukiriza ebyo bannabbi bona bye baayogera nti Kristo we ateekwa okubonaabona mu ngeri eyo.

- ¹⁹Noolwekyo mwenenye, mukyuke, mulyoke mugibweko ebibi byammwe,
- ²⁰mulyoke muwummulire mu maaso ga Mukama, naye abaweereze Yesu, ye Kristo eyalangirirwa gye muli edda,
- ²¹eyagwanyizibwa okutwalibwa mu ggulu okutuusa ekiseera nga kituuse ebintu byonna ne bizzibwa obuggya Katonda bye yayogerera edda mu bannabbi be abatukuvu.
- ²²Weewaawo Musa yagamba nti, ‘Mukama Katonda wammwe alibayimusiza nnabbi ali nga nze, gw’aliggya mu baganda bammwe. Muwulirizanga buli ky’alibagamba.
- ²³Ataliwuliriza nnabbi oyo abantu balimuzikiririza ddala.’
- ²⁴“Ne bannabbi bona okuvira ddala ku Samwiri n’abo abaamuddirira bona abaayogera nabo baalangirira olunaku luno.
- ²⁵Mmwe bazzukulu ba bannabbi abo, era ab’endagaano Katonda gye yalagaana ne bajajammwe ng’agamba Ibulayimu nti, ‘Mu zzadde lyo abantu bona ab’oku nsi mwe baliweerwa omukisa.’
- ²⁶Bw’atyo Katonda bwe yalondawo okubatumira Omuweereza we abawe omukisa, buli omu ku mmwe ng’akyuka okuva mu bibi bye.”

Ebikolwa by’Abatume 4

Peetero ne Yokaana mu Lukiiko Iw’Abayudaaya Olukulu

- ¹Awo Peetero ne Yokaana baali bakyayogera eri abantu, bakabona, n’omukulu w’abakuumi ba Yeekaalu n’Abasaddukaayo ne bajja gye bali,
- ²nga basunguwadde nnyo okuwulira nga Peetero ne Yokaana bayigiriza abantu, ku bwa Yesu, okuzuukira mu bafu.
- ³Ne bakwata Peetero ne Yokaana, naye olwokubanga obudde bwali buyise ne babaggalira mu kkomera okutuusa enkeera.
- ⁴Kyokka abantu bangi ku abo abaali bawuliriza abatume ne bakkiriza, era omuwendo gw’abasajja bokka abakkiriza ne guba ng’enkumi ttaano!
- ⁵Enkeera, abafuzi n’abakulembeze b’Abayudaaya, n’abannyonnyozi b’amateeka ne bakuñjaanira mu Yerusaalemi.
- ⁶Baali ne Ana Kabona Asinga Obukulu, ne Kayaafa, ne Yokaana, ne Alegezanda n’abalala bangi abaalina oluganda ne Kabona Asinga Obukulu.
- ⁷Awo abatume bombi ne baleetebwa ne basimbibwa mu maaso g’Olukiiko. Ne bababuuza nti, “Buyinza ki oba linnya ly’ani kwe musinzidde okukola kino?”

⁸ Awo Peetero bwe yajjuzibwa Mwoyo Mutukuvu n'agamba nti, "Abaafuzi, n'abakulembeze b'abantu,

⁹ obanga tubuuzibwa nsongha ey'omusajja eyawonyezeddwa,

¹⁰ mutegeere mmwe mwenna n'abantu bona mu Isirayiri, omusajja ono ayimiridde mu maaso gammwe mu linnya lya Yesu Kristo Omunnazaaleesi, gwe mwakomerera naye Katonda n'amuzuukiza, era kaakano mulamu.

¹¹ "Oyo ly'Ejjinja abazimbi lye baagaana, lye lifuuse ejinja ekkulu ery'oku nsonda."

¹² Tewali mu mulala yenna bulokozi, era tewali linnya ddala na limu mu manya gonna agaaweebwa abantu, wansi w'eggulu, mwetugwanira okulokolebwa."

¹³ Awo ab'Olukiiko bwe baalaba obuvumu bwa Peetero ne Yokaana, ate n'okutegeera ne bategeera nga tebasoma, era nga si batendeke, ne beewuunya nnyo, ne bategeera ng'abasajja abo baabeeranga ne Yesu.

¹⁴ Era bwe baalaba omusajja eyawonyezebwa ng'ayimiridde nabo, n'eky'okubaddamu ne kibabula.

¹⁵ Ne babalagira okugira nga babeera wabweru Olukiiko lubakubaganyeko ebirowoozo.

¹⁶ Ab'olukiiko ne beebuuzaganya nti, "Abasajja bano tubakole tutya? Kubanga tetuyinza kwegaana ekyamagero eky'amaanyi ekikoleddwa mu bo; buli muntu yenna mu Yerusaalemi akitegedde.

¹⁷ Naye engeri gye tunaaziyizaamu ebigambo byabwe okwongera okusaasaana kwe kabalabula n'amaanyi baleme kuddayo kwogera na muntu yenna ku linnya lya Yesu."

¹⁸ Ne babayita bakomewo mu Lukiiko, ne babalagira baleme kuddayo nate kwogera ku linnya lya Yesu.

¹⁹ Naye Peetero ne Yokaana ne baddamu nti, "Mmwe muba musalawo obanga kituufu mu maaso ga Katonda okuwulira mmwe okusinga okuwulira Katonda.

²⁰ Tetuyinza butayogera ku bintu bye twalaba, n'ebigambo bye twawulira."

²¹ Awo Olukiiko bwe lwamala okwongera okubatiisatiisa ne lubaleka ne bagenda, kubanga baabulwa kwe banaasinziira okubabonereza ne batasasamaza bantu. Kubanga abantu bona baali bagulumiza Katonda olw'ekyo ekyabaawo.

²² Omusajja eyawonyezebwa yali assussa mu myaka amakumi ana.

Okusaba kw'Abakkiriza

²³Awo Peetero ne Yokaana bwe baateebwa ne baddayo eri bannaabwe ne bababuulira byonna bakabona abakulu n'abakulembeze b'Abayudaaya bye baabagamba.

²⁴Bonna bwe baabiwulira ne bayimusiza wamu amaloboozi gaabwe n'omwoyo gumu eri Katonda ne basaba nti, "Ayi Mukama, Omuronzi w'eggulu n'ensi n'enyanja ne byonna ebibirimu,

²⁵ggwe Kitaffe wayogerera ku bwa Mwoyo Mutukuvu mu kamwa k'omuweereza wo, Dawudi bwe yagamba nti: "Lwaki Abaamawanga banyiigidde, n'abantu ne balowooza ebtaliiimu?

²⁶Bakabaka b'ensi n'abakulembeze, beegatta okulwanyisa Mukama n'okulwanyisa Kristo we.'

²⁷Kubanga baakuinjaanira mu kibuga. Kerode ne Pontiyo Piraato, awamu n'Abamawanga, n'Abayisirayiri, beegatta okulwanyisa Omuweereza wo Omutukuvu Yesu gwe wafukako amafuta,

²⁸ne bakola ebyo omukono gwo n'okuteesa kwo bye kwateekateeka edda okubaawo.

²⁹Ne kaakano, Ayi Mukama, wulira okutiisatiisa kwabwe; owe abaddu bo obuvumu babuulire ekigambo kyo,

³⁰golola omukono gwo owonye, n'obubonero n'ebiyamagero bikolebwenga mu linnya ly'Omumeereza wo Omutukuvu Yesu."

³¹Awo bwe baamala okusaba, ekifo mwe baali bakunjaanidde ne kinyeenyezebwa, bona ne bajuzibwa Mwoyo Mutukuvu ne babuulira ekigambo kya Katonda n'obuvumu.

Abakkiriza Okugabanira Awamu Ebyabwe

³²Abakkiriza bona baalina omwoyo gumu n'omutima gumu; nga tewali agamba nti kino kye nnina kyange ku bwange, wazira nga bona bagabanira wamu.

³³Awo abatume ne babuulira nnyo n'amaanyi mangi ku kuzuukira kwa Mukama waffe Yesu, era bona ne bajjula ekisa kingi.

³⁴Mu bo temwali baali mu kwetaaga, kubanga abo abaalina ettaka oba amayumba, baabitundanga, ensimbi ezivudde mu bye batunze

³⁵ne bazireeta ku bigere by'abatume bagabireko buli muntu ng'okwetaaga kwe bwe kwalinga.

³⁶Awo Yusufu, Omuleevi abatume gwe baatumma Balunabba (amakulu gaalyo nti atereeza emitima gy'abantu) eyazaalibwa e Kupulo,

³⁷n'atunda ennimiro ye, ensimbi ezaavaamu n'azireeta ku bigere by'abatume.

Ebikolwa by'Abatume 5

Ananiya ne Safira

¹Waaliwo omusajja erinnya lye Ananiya ne mukyala we Safira, n'atunda ebibye

²ne yeeterekerako ku muwendo, mukazi we naye ng'amanyi, n'aleetako kitundu butundu n'akiteeka ku bigere by'abatume.

³ Naye Peetero n'agamba Ananiya nti, "Ananiya, lwaki Setaani ajjudde mu mutima gwo, n'okulimba n'olimba Mwoyo Mutukuvu ne weeterekerako ku muwendo gw'ennimiro?

⁴Teyali yiyo? Era bwe yamala okutundibwa, teyali mu buyinza bwo? Lwaki ekikolwa ekyo kikujjidde mu mutima gwo? Tolimbye bantu wabula olimbye Katonda."

⁵ Ananiya olwawulira ebigambo ebyo n'agwa eri n'afiirawo! Bonna abaawulira ebyo ne bakwatibwa entiisa ya maanyi.

⁶Abavubuka ne bayimuka ne bamuzinga, ne bamutwala ne bamuziika.

⁷Bwe waali wayiseewo essaawa nga ssatu, mukyala we naye n'ayingira, kyokka nga tategedde bibaddewo.

⁸Peetero n'amubuuza nti, "Mbuulira, omuwendo guno gwe gwo gwe mwaggya mu nnimiro gye mwatunda?" Omukyala n'addamu nti, "Yee, gwe guugwo."

⁹ Awo Peetero n'amugamba nti, "Lwaki mwateesessa okukema Omwoyo wa Mukama? Laba, ebigere by'abo abaziise balo biri ku mulyango naawe bagenda kukutwala."

¹⁰ Amangwago n'agwa wansi ku bigere bya Peetero n'afiirawo. Abavubuka bwe baayingira ne bamusanga ng'afudde ne bamutwala ne bamuziika okuliraana bba.

¹¹Entiisa ey'amaanyi n'ebuna Ekkanisa yonna na buli muntu eyawulira ebigambo ebyo.

Abatume Bawonya Abantu Bangi

¹² Abatume ne baba n'omwoyo gumu ne bakunjaananga mu kisasi kya Sulemaani, ne bakola ebyamagero bingi mu bantu.

¹³So ne wataba n'omu ku balala eyayanjanga okubeegattako, newaakubadde ng'abantu bona baabasiima nnyo.

¹⁴Abakkiriza bangi abasajja n'abakazi ne beeyongeranga okwegatta ku Mukama waffe.

¹⁵abantu ne baleeta abalwadde baabwe ku nguudo z'omu kibuga, ne babagalamizanga ku butanda ne ku bikeeka, ekisiikirize kya Peetero kibatuukeko ng'azze.

¹⁶Ebibiina ne biva mu bibuga ebiriraanye Yerusaalemi, ne baleeta abalwadde n'abaaliko baddayimooni, bona ne bawonyezebwa.

Abatume Bayigganyizibwa

¹⁷Awo Kabona Asinga Obukulu, n'abo abaali naye ab'omu kibiina ky'Abasaddukaayo ne bajjula obuggyga.

¹⁸Ne bakwata abatume ne babateeka mu kkomera ly'abantu bona.

¹⁹Naye mu kiro, malayika wa Mukama n'ajja n'aggulawo enzigi z'ekkomera n'abafulumya,

²⁰n'abagamba nti, "Mugende muyimirire mu Yeekaalu mutegheeze abantu bona ebigambo eby'obulamu buno."

²¹Bwe baawulira ebyo ne bayingira mu Yeekaalu mu matulutulu, ne bayigiriza. Kabona Asinga Obukulu ne be yali nabo ne bajja ne batuuza Olukiiko Olukulu olw'abakulu b'abaana ba Isirayiri, ne balyoka batuma mu kkomera okuleeta abasibe babawozese.

²²Naye abaweereza bwe baatuuka mu kkomera tebaabasangamu. Ne bakomawo ne bategeeza Olukiiko Olukulu

²³nga bagamba nti, "Tusanze enzigi z'ekkomera nga nsibe n'abakuumi bona n'abaserikale nga bayimiridde ku nzigi; naye bwe tuziggudde, tetusanzeemu muntu n'omu."

²⁴Awo omukulu w'abaserikale ba Yeekaalu awamu ne bakabona abakulu bwe baawulira ebyo ne basamaalirira nga beewuunya ebintu ebyo gye binaakoma.

²⁵Omuntu omu n'ajja n'abategeeza nti, "Abasajja be mwasibye mu kkomera bali eri mu Yeekaalu bayigiriza bantu."

²⁶Awo omukulu w'abaserikale ba Yeekaalu, n'agenda n'abaserikale ne babaleeta, si lwa maanyi, nga batya abantu okwegugunga n'okukuba abaserikale amayinja.

²⁷Awo abatume bwe baaleetebwa, ne bayimirira mu maaso g'Olukiiko Olukulu, Kabona Asinga Obukulu n'ababuuza

²⁸ng'agamba nti, "Tetwabalagira obutayigirizanga mu linnya eryo; naye laba mujuzzizza Yerusaalemi okuyigiriza kwammwe, era mumaliridde okutuleetako omusaayi gw'omuntu oyo."

²⁹Naye Peetero n'abatume ne baddamu nti, "Kitugwanira okugondera Katonda okusinga okugondera abantu.

³⁰Katonda wa bajajjaffe yazuukiza Yesu, gwe mwatta nga mumuwanise ku muti.

³¹Oyo Katonda n'amugulumiza okubeera Omulangira era Omulokozi, abeerenga ku mukono gwe ogwa ddyo, okuwa Isirayiri omukisa ogw'okwenenya n'okusonyiyibwa ebibi.

³²Ffe ne Mwoyo Mutukuvu Katonda gw'awa abo abamugondera tuli bajulira ba bigambo ebyo."

³³Awo ab'Olukiiko bwe baawulira ebigambo ebyo ne bajjula obusungu bungi n'okwagala ne baagala okubatta.

³⁴Naye omu ku abo abaali mu Lukiiko Olukulu, Omufalisaayo erinnya lye Gamalyeri, eyali omunnyonnyozi w'amateeka era nga n'abantu bamussaamu nnyo ekitiibwa, n'alagira abatume bagira bafulumizibwa ebweru.

³⁵N'alyoka agamba banne ab'omu Lukiiko nti: "Abasajja Abayisirayiri, mwegendereze nnyo abasajja abo ne kye mugenda okubakolako.

³⁶Emabegako waaliwo omusajja erinnya lye Syuda, yasituka era n'alowoozes aabantu nti muntu mukulu, era abantu ng'ebikumi bina ne bamugoberera; naye yattibwa abaali bamugoberera ne basaasaana ne bikoma awo.

³⁷Oyo bwe yavaawo ne wasituka Yuda Omugaliraaya mu biseera eby'okubala aabantu. Abantu bangi ne bamugoberera, kyokka bwe yattibwa, abagoberezi be ne basaasaana ne bataddayo kuwlilikikako.

³⁸Noolwekyo kye njamba kye kino nti, Abasajja bano mubaleke bagende! Kubanga, obanga enteekateeka eno y'abantu ejja kukoma.

³⁹Naye obanga biva eri Katonda, temuyinza kubaziyiza, kubanga mujja kuba nga mulwanyisa Katonda." Ne bamuwulira.

⁴⁰Abatume ne bayitibwa, bwe baamala okukubibwa ne balabulwa obutaddayo kwogera mu linnya lya Yesu, ne babata.

⁴¹Abatume ne bava mu Lukiiko nga basanyuka kubanga baasaanyizibwa okukwatibwa ensonyi n'okubonaabona olw'Erinnya.

⁴²Awo ne bayigirizanga mu Yeekaalu buli lunaku ne mu maka g'abantu, nga babuulira Yesu.

Ebikolwa by'Abatume 6

¹Awo mu biseera ebyo abakkiriza bwe baagenda beeyongera obungi, ne wabaawo okwemulugunya mu Bakerenisiti ku Baebbulaniya nti bannamwandu baabwe basosolwa, ne bataweebwa kyenkanyi.

²Awo ekkumi n'ababiri ne bakuññaanya ekibiina ky'abayigirizwa, ne babagamba nti, "Kirungi ebiseera byaffe tubimalire ku kubuulira Njiri, so si mu kugabanya mmere.

³Noolwekyo, abooluganda, mwerondemu abasajja musanvu, abasiimibwaabantu, ng'abantu b'amagezi, era abajjudde Mwoyo Mutukuvu, tubakwase omulimu ogwo.

⁴Ffe tulyoke twemalire ku kusaba, n'okubuulira n'okuyigiriza."

⁵Ebigambo ebyo byonna abaakuññaana ne babisima. Ne balonda Suteefano, omusajja eyali ajjudde okukkiriza ne Mwoyo Mutukuvu, ne Firipo, ne Pulokolo, ne Nikanoli, ne Timooni, ne Pamma, ne Nikolaawo eyava mu Antiyokiya,

⁶ne babanjula eri abatume. Abatume ne babasabira, ne babasaako emikono.

⁷Awo ekigambo kya Katonda ne kyeyongera okubuna n'omuwendo gw'abayigirizwa ne gweyongera obunene mu Yerusaalemi; era ne bakabona, ekibiina kinene, ne beewaayo okukkiriza.

Okukwatibwa kwa Suteefano

⁸Suteefano, ng'ajjudde ekisa kya Katonda n'amaanyi, n'akolanga ebyamagero bingi n'obubonero mu bantu.

⁹Naye abamu ku b'omu kuññaaniro abeeyitanga Abalibettino, n'Abakuleene n'Abalegezanderiya, n'Abakirukiya n'Abasiya, ne bawakana ne Suteefano.

¹⁰Kyokka tebasobola kuwakanya magezi n'Omwoyo bye yayogeza.

¹¹Kyebaava baweerera abantu nga bagamba nti twamuwlira ng'ayogera ebigambo ebivvoola Musa ne Katonda.

¹²Abantu n'abakulembeze b'Abayudaaya n'abannyonyozi b'amateeka ne banyiiga nnyo. Ne bakwata Suteefano ne bamuleeta mu Lukiiko Olukulu.

¹³Abajulizi ab'obulimba ne boogera nti, "Omuntu ono buli kiseera avvoola ekifo kino ekitukuvu n'amateeka.

¹⁴Era twamuwlira ng'agamba nti Yesu ono Omunnazaaleesi agenda kuzikiriza ekifo kino n'obulombolombo bwonna Musa bwe yatulekera abukyuse."

¹⁵Ab'Olukiiko bwe baamwekaliriza amaaso, ne balaba amaaso ge ng'amamasama ng'aga malayika!

Ebikolwa by'Abatume 7

Okwogera kwa Suteefano mu Lukiiko

¹Awo Kabona Asinga Obukulu n'abuuza Suteefano nti, "Ebyo bwe biri bwe bityo?"

² Suteefano n'addamu nti, "Baganda bange ne bakadde bange, mumpulirize! Katonda ow'ekitiibwa yalabikira jjajjaffe Ibulayimu ng'akyali mu Mesopotamiya, nga tannaba kulaga mu Kalani.

³ N'amugamba nti, 'Vva mu nsi yannyo ne mu bantu bo, ogende mu nsi gye ndikulaga.'

⁴ "Bw'atyo n'ava mu nsi y'Abakuludaaya n'abeera mu Kalani, okutuusa kitaawe bwe yafa. Awo Katonda n'amuleeta wano mu nsi eno mwe tuli kaakano.

⁵ Naye n'atamuwaako ttaka liryे newaakubadde awalinnyibwa ekigere. Kyokka n'asuubiza okugimuwa okugirya, ye n'ezzadde lye oluvannyuma lwe, newaakubadde nga mu kiseera ekyo Ibulayimu teyalina mwana!

⁶ Katonda n'amugamba nti ezzadde lye, baliba bagenyi mu nsi y'abalala, era balibafuula abaddu, ne babayisa bubi okumala emyaka ebikumi bina.

⁷ Era Katonda n'agamba nti, 'Ndibonereza eggwanga eryo eriribafuula abaddu, n'oluvannyuma balivaayo ne bansinziza mu kifo kino.'

⁸ Era n'amuwa okukomolebwa ng'akabonero ak'endagaano. Awo Ibulayimu n'azaala Isaaka, n'amukomola ng'awezessa ennaku munaana ez'obukulu. Isaaka n'azaala Yakobo, ne Yakobo n'azaala bajjajjaffe ekkumi n'ababiri.

⁹ "Bajjajja abo ne bakwatirwa Yusufu obuggyga, ne bamutunda mu Misiri. Naye Katonda yali naye,

¹⁰ n'amuwonya mu kubonaabona kwonna era n'amuwa ekisa n'amagezi mu maaso ga Falaawo, ye kabaka w'e Misiri. Falaawo n'amuwa okufuga Misiri yonna era n'amukwasa okulabirira byonna ebifa mu lubiri lwe.

¹¹ "Awo enjala n'egwa mu Misiri yonna ne mu nsi ya Kanani, n'ereetera bajjajjaffe okubonaabona ennyo kubanga baali tebalina we baggya mmere.

¹² Yakobo bwe yawulira nga mu Misiri eriyo enjaano n'atumayo bajjajjaffe, omulundi gwabwe ogwasooka.

¹³ Ku mulundi ogwokubiri Yusufu ne yeeyanjulira baganda be era n'ayanjulira Falaawo baganda be.

¹⁴ Bw'atyo Yusufu n'atumya kitaawe, Yakobo, era n'ab'ennyumba ya kitaawe bona be bantu nsanvu mu bataano.

¹⁵ Bw'atyo Yakobo n'ajja e Misiri era n'afiira eyo ne bajjajjaffe.

¹⁶ Oluvannyuma baaleetebwa e Sekemu mu ntaana Ibulayimu gye yali aguze omuwendo gw'effeeza, ku batabani ba Kamoli mu Sekemu.

¹⁷ "Ekiseera ky'ekisuubizo bwe kyagenda kisembera, Katonda kye yasuubiza Ibulayimu, abantu ne beeyongera ne baala mu Misiri.

¹⁸Awo kabaka omulala eyali tamanyi Yusufu n'atandika okufuga Misiri.

¹⁹Kabaka oyo n'asalira eggwanga lyaffe amagezi, n'abonyaabonya bajajjaffe, ng'abasuza abaana baabwe abawere baleme okuba abalamu.

²⁰"Mu biseera ebyo ne Musa n'azaalibwa, n'ayagalwa nnyo Katonda. Bakadde be ne bamulabirira mu nnyumba yaabwe okumala emyezi esatu.

²¹Bwe yalekebwa mu mugga, muwala wa Falaawo n'amulonda n'amutwala n'amulera nga mutabani we.

²²Musa n'ayigirizibwa mu magezi gonna ag'Abamisiri, n'akula nga w'amaanyi mu bigambo ne mu bikolwa.

²³"Awo Musa bwe yali awezezza emyaka amakumi ana, n'asalawo mu mutima gwe okukyalirako baganda be, abaana ba Isirayiri.

²⁴N'alaba Omuyisirayiri ng'anyigirizibwa, n'amutaasa, n'atta Omumisiri ng'awoolera eggwanga olw'oyo eyali anyigirizibwa.

²⁵Musa n'alowooza nti baganda be banaategeera nga Katonda amutumye okubalokola, naye ne batakitegeera.

²⁶Olunaku olwaddirira n'alaba abalwana. N'agezaako okubatabaganya ng'abagamba nti, 'Abasajja lwaki mulwana nga muli baaluganda?'

²⁷"Naye oli eyali ayikiriza munne n'asindika eri Musa ng'agamba nti, 'Ani eyakufuula omufuzi waffe era omulamuzi waffe?

²⁸Oyagala kunzita nga bwe watta Omumisiri jjo?"

²⁹Musa bwe yawulira ebyo, n'adduka n'agenda abeera mugenyi mu nsi ya Midiyaani, era eyo n'azaalirayo abaana aboobulenzi babiri.

³⁰"Awo nga wayiseewo emyaka amakumi ana, Musa bwe yali ng'ali mu ddungu ly'olusozi Sinaayi, malayika n'amulabikira mu muliro ogwaka, wakati mu kisaka.

³¹Musa bwe yakiraba ne yeewuunya. N'agenda ng'asemberera ekisaka yeetegereze, eddoboozi lya Mukama ne limugamba nti,

³²'Nze Katonda wa bajajja bo, Katonda wa Ibulayimu, ne Isaaka ne Yakobo.' Musa n'akankana, era n'atasobola na kwongera kutunulayo.

³³"Awo Mukama n'agamba Musa nti, 'Gyamu engatto zo, kubanga ekifo w'oyimiridde kitukuvu.

³⁴Ndabye okubonaabona kw'abantu bange mu Misiri, ne mpulira n'okusinda kwabwe. Kyenvudde nzika okubalokola. Kaakano jjangu, nkutume e Misiri.'

³⁵"Oyo Musa gwe baagaana nga bagamba nti, 'Ani eyakufuula omufuzi era omulamuzi waffe?' Oyo Katonda gwe yatuma ng'ayita mu malayika

eyamulabikira mu kisaka eky'omuliro, abeere omufuzi waabwe era omununuzi waabwe.

³⁶Oyo n'abaggyayo ng'amaze okukola ebyamagero n'ebywewuunyisa, mu nsi y'e Misiri, n'abayisa mu Nnyanja Emyufu, n'abatambuza mu ddungu okumala emyaka amakumi ana.

³⁷"Oyo ye Musa eyategeesa abaana ba Isirayiri nti, 'Katonda agenda kubayimusiza Nnabbi ng'amuggya mu baganda bammwe nga nze.'

³⁸Era Musa oyo ye yali ne bajjajjaffe mu ddungu nga bakuŋjaanye nga malayika ayogera naye ku lusozi Sinaayi, era yaweebwa ebigambo eby'obulamu okubitutuusaako.

³⁹"Naye bajjajjaffe baagaana okumugondera, ne bamujeemera, era mu mitima gyabwe ne baddayo e Misiri.

⁴⁰Ne bagamba Aloonni nti, 'Tukolere bakatonda abanaatukulemba, kubanga ono Musa eyatuggya mu nsi y'e Misiri tetumanyi kyabadde.'

⁴¹Mu nnaku ezo, ne beekolera ennyana, ne bawaayo ssaddaaka eri ekifaananyi, ne basanyukira ekyo kye beekoledde n'emikono gyabwe.

⁴²Awo Katonda n'abavaako, n'abawaayo okusinzanga eggye ery'omu ggulu, nga bwe kyawandiikibwa mu kitabo kya bannabbi nti, "'Mwandeeteranga ssaddaaka n'ebiweebwayo mu ddungu emyaka gyonna amakumi ana, ggw'ennyumba ya Isirayiri?

⁴³Muzimbye essabo lya Moloki, ne mugulumiza emmunyeenyi ya katonda wammwe Lefani, nga be bakatonda abalala be mwekolera mubasinze. Kyendiva mbawanŋangusa' okusukka Babulooni.

⁴⁴"Bajjajjaffe baatambula mu ddungu nga beetisse Eweema ey'Endagaano, eyakolebwa nga Katonda bwe yalagirira Musa ng'efaanana nga bwe yagimulaga.

⁴⁵Bajjajjaffe bajja bagisitizza abaana baabwe, okutuusa Yoswa lwe yajja nayo okulya ensi y'abamawanga Katonda be yagobanga mu maaso ga bajjajjaffe. Eweema n'ebeerawo okutuusa ku mirembe gya Dawudi.

⁴⁶Dawudi n'asiimibwa Katonda, era n'asaba azimbire Katonda wa Yakobo ennyumba.

⁴⁷Naye Sulemaani ye yagizimba.

⁴⁸"Naye oyo Ali Waggulu Ennyo tabeera mu nnyumba zizimbiddwa bantu. Nga nnabbi bw'agamba nti,

⁴⁹ “Eggulu y'entebe yange ey'obwakabaka. N'ensi ke katebe kwe nteeka ebigure byange. Mukama n'agamba nti, Ononzimbira nnyumba ya ngeri ki? Oba kifo ki mwe ndiwummulira?

⁵⁰ Omukono gwange si gwe gwakola ebyo byonna!’

⁵¹ “Mmwe abalina ensingo enkakanyavu, abatakomolebwanga mu mutima wadde amatu, muwakanya Mwoyo Mutukuvu bulijjo; era bajajjammwe nga bwe baali, nammwe bwe mutyo bwe muli.

⁵² Nnabbi ki bajajjammwe gwe bataayigganya? Batta n'abo abaalangirira okujja kw'Omuntuukirivu, gwe mwalyamu olukwe ne mumutta.

⁵³ Mmwe mwaweebwa amateeka nga bwe gaalagirwa bamalayika naye ne mutagagondera.”

Suteefano Akubwa Amayinja

⁵⁴ Awo abakulembeze b'Abayudaaya bwe baawulira ebigambo ebyo byonna Suteefano bye yayogera, ne bajula obusungu bungi ne bamulumira obujiji.

⁵⁵ Naye Suteefano ng'ajjudde Mwoyo Mutukuvu, n'atunuulira eggulu enkaliriza, n'alaba ekitiibwa kya Katonda, ne Yesu ng'ayimiridde ku mukono gwa Katonda ogwa ddyo.

⁵⁶ N'abagamba nti, “Laba, ndaba eggulu nga libikkuse, nga n'Omwana w'Omuntu ayimiridde ku mukono ogwa ddyo ogwa Katonda.”

⁵⁷ Ne baleekaanira waggulu nga bazibikidde amatu gaabwe ne bamweiywako.

⁵⁸ Ne bamusindiikiriza ebweru w'ekibuga, ne bamukuba amayinja. Abaamukuba ne bassa eminagiro gyabwe ku bigere by'omuvubuka erinnya lye Sawulo.

⁵⁹ Awo bwe baali bakuba Suteefano amayinja, n'akoowoola Katonda ng'agamba nti, “Mukama wange Yesu, twala omwoyo gwange.”

⁶⁰ N'agwa wansi ku maviivi n'akaaba mu ddoboozi ery'omwanguka nti, “Mukama wange, tobavunaana olw'ekibi kino.” Bwe yamala okwogera ekyo, n'afa.

Ebikolwa by'Abatume 8

Ekkanisa Eyigganyizibwa

¹ Sawulo yali omu ku abo abaawagira okuttibwa kwa Suteefano. Era ku lunaku olwo okuyigganya Ekkanisa ne kutandika n'amaanyi mangi nnyo mu Yerusaalemi. Abakkiriza bona, okuggyako abatume, ne basaasaanira mu Buyudaaya ne mu Samaliya.

²Abantu ba Katonda ne baggyawo Suteefano ne bamutwala ne bamuziika mu kwaziirana okungi.

³Naye Sawulo n'akolerera okuzikiriza Ekkanisa; n'agenda buli wantu ng'akwata abasajja n'abakazi n'abatwala mu kkomera.

Firipo Abuulira mu Samaliya

⁴Naye abakkiriza abadduka mu Yerusaalemi ne bagenda mu buli kifo nga babuulira Enjiri ya Yesu.

⁵Awo Firipo, n'alaga mu kimu ku bibuga bya Samaliya n'abuulira abantu Enjiri ya Kristo.

⁶Ebibiina ne bimuwliriza nnyo kubanga abantu bona baalaba ebyamagero bye yakola.

⁷Baddayimooni bangi ne bava ku bantu nga bwe baleekaana; abaali bakoozimbye n'abalema bona ne bawonyezebwa;

⁸ekibuga ne kijjula essanyu.

Simooni Omufumu

⁹Waaliwo omusajja erinnya lye Simooni eyali omufumu omwatiikirivu mu kibuga omwo era nga yeewuunyisa nnyo abantu bona mu Samaliya. Yeeyogerangako nti muntu mukulu era wa kituibwa.

¹⁰Era abantu bangi ab'ekitiibwa n'abatali ba kituibwa baamwogerangako nti, "Omusajja oyo ge maanyi ga Katonda agayitibwa, 'Amangi.'

¹¹Ne bamussangako nnyo omwoyo olw'ebiyobufuusa bye yakolanga.

¹²Naye bwe bakkiriza obubaka bwa Firipo ng'abuulira ku bwakabaka bwa Katonda n'erinnya lya Yesu Kristo abasajja n'abakazi ne babatizibwa.

¹³Awo ne Simooni yennyini n'akkiriza era n'abatizibwa, n'agobereranga Firipo buli gye yalaganga; era ebyamagero Firipo bye yakolanga, Simooni n'abyewuunya nnyo.

¹⁴Awo abatume abaali mu Yerusaalemi bwe baawulira ng'abantu mu Samaliya bakkirizza ekigambo kya Katonda, ne babatumira Peetero ne Yokaana.

¹⁵Bwe baatuuka ne basabira abakkiriza bano abaggya bafune Mwoyo Mutukuvu,

¹⁶kubanga yali tannaba kubakkako, kubanga baali babatizibwa mu linnya lya Mukama waffe Yesu kyokka.

¹⁷Awo Peetero ne Yokaana ne bassa emikono gyabwe ku bakkiriza abo, ne bafune Mwoyo Mutukuvu.

¹⁸Simooni, Omufumu, bwe yalaba ng'abantu bafunye Mwoyo Mutukuvu olw'abatume okubassaako emikono kyokka, kyeyava atoola ensimbi aziwe abatume bamuguze obuyinza obwo.

¹⁹N'abagamba nti, "Mumpe obuyinza obwo, buli gwe nnassangako emikono gyange afune Mwoyo Mutukuvu!"

²⁰Naye Peetero n'amugamba nti, "Ensimbi zo zizikirire naawe olw'okulowooza nti ekirabo kya Katonda kiyinza okugulibwa obugulibwa n'ensimbi.

²¹Mu nsonga eno tolinaamu mugabo kubanga omutima gwo si mulongoofu mu maaso ga Katonda.

²²Noolwekyo weenenye ekikolwa ekyo ekibi weegayirire Mukama, oboolyawo Katonda ayinza okukusonyiwa ebirowoozo byo ebyo ebibi.

²³Kubanga ndaba nga mu mutima gwo mujjudde obuggyga, era oli muddu wa kibi."

²⁴Simooni n'abeegayirira nti, "Munsabire eri Mukama ebintu ebyo bye mwogedde bireme okuntuukako."

²⁵Awo Peetero ne Yokaana bwe baamala okubuulira ekigambo kya Katonda n'obuvumu, ne basitula okuddayo mu Yerusaalemi, nga bagenda babuulira Enjiri mu bibuga bingi bye baayitangamu mu Samaliya.

Firipo n'Omwesiyopa

²⁶Awo malayika wa Mukama n'agamba Firipo nti, "Kwata ekkubo eriraga mu bukiikaddyo, eriva e Yerusaalemi nga liyita mu ddungu okugenda e Ggaaza."

²⁷Firipo n'akwata ekkubo eryo. Mu kiseera ekyo waaliwo omusajja Omwesiyopa mu kkubo eryo ng'ava mu kusinza e Yerusaalemi. Yali mulaawe nga mukungu mu lubiri lwa Kandake, kabaka omukazi owa Esiyopa, era ye yali omuwanika we omukulu.

²⁸Yali atudde mu ggaali lye ng'addayo ewaabwe nga bw'asoma ekitabo kya nnabbi Isaaya.

²⁹Awo Mwoyo Mutukuvu n'agamba Firipo nti, "Semberera eggiali eryo oligenderekko."

³⁰Firipo n'adduka n'atuuka ku ggaali, n'awulira Omwesiyopa ng'asoma mu kitabo kya nnabbi Isaaya. N'amubuuza nti, "By'osoma obitegeera?"

³¹Omwesiyopa n'addamu nti, "Nnaabitegeera ntya nga sirina abinnyinnyonnyola?" N'asaba Firipo ayingire mu ggaali lye batuule bombi.

³²Ekyawandiikibwa kye yali asoma nga kigamba bwe kitu nti: "Yatwalibwa ng'endiga egenda okuttibwa. Ng'omwana gw'endiga bwe gusiriikirira nga bagusalako ebyoya, naye bw'atyo teyayasamya kamwa ke.

³³ Yajoogebwa n'atalamulwa mu bwenkanya. Ani alyogera ku bazzukulu be? Kubanga ekiseera kye eky'obulamu bwe ku nsi kyakoma!"

³⁴ Omulaawe kwe kubuuza Firipo nti, "Nnyinnyonnyola, munnange, nnabbi gw'ayogerako; yeeyogerako yekka oba ayogera ku mulala?"

³⁵ Awo Firipo n'atandika n'Ekyawandiikibwa ekyo n'amubuulira Enjiri ya Yesu Kristo.

³⁶ Bwe baali bagenda ne batuuka awali amazzi, omulaawe n'agamba nti, "Laba amazzi! Kale lwaki sibatzibwa?"

³⁷ Awo Firipo n'amugamba nti, "Oyinza okubatizibwa, bw'oba ng'okkiriza n'omutima gwo gwonna." Omulaawe n'addamu nti, "Nzikiriza nga Yesu Kristo Mwana wa Katonda."

³⁸ Awo n'alagira omugoba w'eggaali lye okuyimirira, ne bakka mu mazzi, Firipo n'amubatiza.

³⁹ Bwe baava mu mazzi amangwago Omwoyo wa Mukama n'atwala Firipo, Omulaawe n'ataddayo kumulaba nate, naye n'atambula olugendo lwe ng'ajjudde essanyu.

⁴⁰ Naye Firipo n'alabikira mu Azoto, n'agenda ng'abuulira Enjiri mu bibuga byonna eby'omu kitundu ekyo okutuukira ddala e Kayisaliya.

Ebikolwa by'Abatume 9

Okukyuka kwa Sawulo

¹ Mu kiseera ekyo Sawulo yali aswakidde ng'ayigganya abayigirizwa ba Mukama waffe ng'abatiisatiisa okwagala okubatta, n'atuukirira Kabona Asinga Obukulu,

² n'amusaba awandiikire ab'omu makuŋjaaniro ag'omu Damasiko ebbaluwa, ng'ebasaba bakolagane naye mu kuyigganya abakkiriza bona abasajja n'abakazi b'alisanga eyo, abasibe mu njegere, alyoke abaleete e Yerusaalemi.

³ Awo Sawulo bwe yali atambula ng'anaatera okutuuka e Damasiko, amangwago ekitangaala eky'amaanyi ennyo okuva mu ggulu ne kimwakako okumwetooloola.

⁴ N'agwa wansi, n'awulira eddoboozi nga limugamba nti, "Sawulo! Sawulo! Onjigganyiza ki?"

⁵ Sawulo n'abuuza nti, "Ggwe ani, Mukama wange?" Eddoboozi ne limuddamu nti, "Nze Yesu gw'oyigganya!"

⁶ Kale yimuka ogende mu kibuga onootgeeezebwa ky'osaanidde okukola."

⁷ Abasajja abaali ne Sawulo ne bayimirira nga basobeddwa n'ekyokwogera nga kibabuze kubanga baawulira eddoboozi ng'ery'omuntu naye nga tebalaba ayogera.

⁸ Sawulo bwe yayimuka wansi n'agezaako okutunula naye ng'amaaso ge tegalaba. Era baamukwata bukwasi ku mukono okumuyingiza mu Damasiko.

⁹ N'amalayo ennaku ssatu nga talaba era nga talya mmere wadde okunywa amazzi okumala ebbanga eryo lyonna.

¹⁰ Mu Damasiko mwalimu omuyigirizwa ng'ayitibwa Ananiya. Mukama n'ayogera naye mu kwolesebwa n'amuyita nti, "Ananiya!" N'addamu nti, "Nze nzuuno, Mukama wange."

¹¹ Mukama n'amugamba nti, "Genda ku luguudo oluyitibwa Olutereevu, onoonye ennyumba y'omuntu omu erinnya lye Yuda, omubuuze Sawulo ow'e Taluso. Ali eyo kaakano ng'asaba, kubanga

¹² mmulaze mu kwolesebwa omuntu ayitibwa Ananiya ng'ajja gy'ali era ng'amussaako emikono okumusabira amaaso ge galabe."

¹³ Ananiya n'agamba nti, "Naye Mukama wange, nga mpulidde ebintu ebitali birungi bingi nnyo omuntu oyo by'akoze abakkiriza abali mu Yerusaalemi.

¹⁴ Era tuwulira nti yafuna n'ebbaluwa okuva eri Kabona Asinga Obukulu, ng'emuwa obuyinza okukwata buli mukkiriza yenna ali mu Damasiko!"

¹⁵ Nayé Mukama n'amugamba nti, "Ggwe genda okole kye njambye. Kubanga Sawulo mmulonze okutwala erinnya lyange eri Abaamawanga ne bakabaka, era n'eri abaana ba Isirayiri."

¹⁶ Era nnaamulaga nga bw'ateekwa okubonaabona ku lw'erinnya lyange.

¹⁷ Bw'atyo Ananiya n'agenda n'ayingira mu nnyumba Sawulo mwe yali n'amussaako emikono n'amugamba nti, "Owooluganda Sawulo, Mukama waffe Yesu eyakulabikira mu kkubo ng'oja antumye gy'oli, oddemu okulaba era ojuzibwe Mwoyo Mutukuvu."

¹⁸ Amangwago ebintu ebyali ng'amagamba ne bigwa okuva ku maaso ga Sawulo n'asobola okulaba, n'ayimirira n'abatizibwa.

¹⁹ N'alya emmere n'afuna amaanyi. N'abeera wamu n'abakkiriza mu Damasiko okumala ennaku eziwerako.

²⁰ Amangwago Sawulo n'atandika okubuulira mu makuinjaaniro ku Yesu nti Yesu Mwana wa Katonda.

²¹ Bonna abaamuwlira ne beewuunya, ne beebuza nti, "Si y'ono eyayigganyanga ennyo abagoberezi ba Yesu mu Yerusaalemi? Ate twawulira nga yeesonga eyamuleeta abatkate eri bakabona abakulu."

²²Sawulo ne yeeyongera okubuulira n'amaanyi n'asirisa Abayudaaya abaali mu Damasiko ng'akakasa nti Yesu ye Kristo.

²³Bwe waayitawo ebbanga, abakulembeze b'Abayudaaya ne basala olukwe okumutta.

²⁴Sawulo n'abaako amubuulira ku lukwe lwabwe nga bwe baali bamuteega ku miryango gy'ekibuga emisana n'ekiro bamutemule.

²⁵Awo abayigirizwa ne bamufulumya ebweru w'ekibuga mu kiro nga bamuyisa mu bbugwe, nga bamusizza mu kisero.

²⁶Bwe yatuuka e Yerusaalemi n'agezaako okwegatta ku bayigirizwa naye bona nga bamutya, nga tebakkiriza nti mukkiriza.

²⁷Naye Balunabba n'amuleeta eri abatume n'abategeeza nga Sawulo bwe yalaba Mukama mu kkubo era n'ayogera nga bwe yabuulira n'obuvumu mu Damasiko mu linnya lya Yesu.

²⁸Ne balyoka bamukkiriza n'abeeranga nabo, n'ayitanga nabo era ng'alya nabo mu Yerusaalemi. N'abuuliranga n'obuvumu erinnya lya Mukama waffe.

²⁹Naye ne wabaawo okuwakana n'okukubaganya ebirowoozo wakati we n'Abakerenisiti, ne bagezaako okumutta.

³⁰Kyokka abooluganda bwe baawulira nga Sawulo ali mu kabi bwe katyo ne bamutwala e Kayisaliya ne bamuweereza e Taluso.

³¹Mu kiseera ekkyo Ekkanisa n'eba n'emirembe mu Buyudaaya, ne mu Ggaliraaya ne mu Samaliya; ne yeeyongera mu maanyi ne mu muwendo gw'abantu abakkiriza. Ne bayiga okutya Mukama, era Mwoyo Mutukuvu n'abasanyusanga.

Ayineya ne Doluka

³²Peetero n'atambulanga mu bifo bingi; era bwe yali ng'atambula n'asanga abakkiriza mu kibuga ekiyitibwa Luda.

³³Eyo yasangayo omuntu erinnya lye Ayineya eyali akoozimbye ng'amaze ku kitanda emyaka munaana nga mulwadde.

³⁴Peetero n'amugamba nti, "Ayineya! Yesu Kristo akuwonya. Golokoka weeyalire!" Amangwago n'awonyezebwa.

³⁵Awo abantu bona abaabeeranga mu Luda ne mu Saloni ne bakyukira Mukama, bwe baalaba nga Ayineya atambula.

³⁶Mu kibuga Yopa mwalimu omuyigirizwa ayitibwa Tabbiisa, mu Luyonaani ng'ayitibwa Doluka. Yali mukkiriza, bulijo eyakoleranga abalala ebyekisa n'okusingira ddala abaavu.

³⁷Mu kiseera ekyo n'alwala nnyo era n'afa. Ne bateekateeka omulambo gwe ne bagugalamiza mu kisenge ekya waggulu.

³⁸Naye bwe baawulira nga Peetero ali kumpi awo mu kibuga Luda ne bamutumira abasajja babiri ne bamwegayirira ajje e Yopa.

³⁹N'akkiriza. Amangu ddala nga yaakatuuka ne bamutwala mu kisenge ekya waggulu omulambo gwa Doluka gye gwali gugalamizibba. Ekisenge kyali kijjudde bannamwandu abaali bakaaba nga bwe balaganjana ebyambalo Doluka bye yali abakoledde.

⁴⁰Peetero n'abasaba bona bafulume, n'afukamira n'asaba. N'akyukira omulambo n'ayogera nti, "Tabbiisa golokoka." Tabbiisa n'azibula amaaso, era bwe yalaba Peetero n'atuula.

⁴¹Peetero n'amukwata ku mukono amuyambe okuyimuka, n'alyoka ayita abakkiriza ne bannamwandu, n'abamukwasa nga mulamu.

⁴²Amawulire ago ne gayitiijana mu kibuga Yopa kyonna era bangi ne bakkiriza Mukama.

⁴³Peetero n'abeera e Yopa okumala ebbanga ddene, ng'asula ewa Simooni omuwazi w'amaliba.

Ebikolwa by'Abatume 10

Koluneeriyo Atumya Peetero

¹Awo mu kibuga Kayisaliya mwalimu omusajja omuserikale, erinnya lye Koluneeriyo, eyakuliranga ekitongole ky'abaserikale ekikumi ekyayitbwanga Ekitaliano.

²Yali ayagala nnyo Katonda era ng'amusaamu nnyo ekitiibwa, ye n'ab'omu maka ge bona, ng'agabira nnyo abaavu, era ng'asaba Katonda bulijo.

³Lwali lumu ku ssaawa nga mwenda ez'olweggulo, n'ayolesebwa, n'alabira ddala malayika wa Katonda ng'ajja gy'ali, n'amuyita nti, "Koluneeriyo!"

⁴Koluneeriyo n'amutunuulira enkaliriza ng'atidde nnyo. N'amubuuza nti, "Mukama wange, ogamba ki?" Malayika n'amuddamu nti, "Katonda awulidde okusaba kwo era alabye nga bw'ogabira abaavu bw'atyo n'akujjukira.

⁵Kale nno, tuma basajja bo e Yopa bakimeyo omuntu erinnya lye Simooni era ayitibwa Peetero ajje akukyalire.

⁶Abeera wa Simooni omuwazi w'amaliba, era enju ye eri ku lubalama lw'ennyanya."

⁷Malayika yali yaakagenda, Koluneeriyo n'ayita abaweereza be babiri n'omuserikale atya Katonda, omu ku baweereza,

⁸n'abannyonyola byonna ebibaddewo, n'abatuma e Yopa.

Peetero Alabikirwa

⁹ Ku lunaku olwaddirira bwe baali basemberera ekibuga, essaawa zaali ziwera nga mukaaga ez'omu ttuntu, Peetero n'alinnya waggulu ku kasolya k'ennyumba akaali akatereevu, okusaba.

¹⁰Yali ali eyo enjala n'emuluma, naye bwe baali bamuteekerateekera ekyokulya embeera ye n'ewaanyisibwa n'ayolesebwa.

¹¹N'alaba eggulu nga libikkuse, ekintu ekifaanana ng'essuuka ennene ennyo, nga kinywezebbwa ku nsonda zaakyo ennyo, nga kikka wansi ku ttaka.

¹²Kyalimu ebisolo ebirina amagulu ana byonna, n'ebyawalula byonna eby'oku nsi n'ennyonyi zonna ez'omu bbanga.

¹³Awo n'awulira eddoboozi nga ligamba nti, "Peetero, situka osale, olye!"

¹⁴Peetero n'addamu nti, "Nedda, Mukama wange, kubanga siryanga ku kintu kya muzizo oba ekitali kirongoofu."

¹⁵Eddoboozi ne liddamu okwogera naye omulundi ogwokubiri nti, "Ekyo Katonda ky'amaze okulongoosa tokiyitanga ekitali kirongoofu."

¹⁶Ne kiba bwe kityo emirundi esatu, amangwago ekintu ekyo ekiri ng'essuuka ne kizzibwayo mu ggulu.

¹⁷Peetero n'abeera awo ng'asamaaliridde. Ne yeebuuza amakulu g'okwolesebwa okwo, ne yeebuuza ne ky'asaana okukola, byonna nga bimusobedde. Mu kiseera ekyo ababaka abaatumibwa Koluneeriyo, ennyumba baali baakagizuula era nga bayimiridde wabweru ku luggi

¹⁸nga babuuza obanga awo Simooni ayitibwa Peetero we yabeeranga.

¹⁹Awo Peetero bwe yali ng'akyebuuza eby'okwolesebwa okwo, Mwoyo Mutukuvu n'amugamba nti, "Laba, abasajja basatu bakunoonya.

²⁰Situka okke wansi ogende nabo awatali kulwa kubanga nze mbatumye."

²¹Bw'atyo Peetero n'akka wansi, n'agamba abasajja abaatumibwa nti, "Ye nze gwe munonya. Kiki ekibaleese?"

²²Ne bamuddamu nti, "Koluneeriyo omukulu w'ekitongole y'atutumye. Musajja mwegendereza, atya Katonda era Abayudaaya bona bamussaamu ekitiibwa. Yalabikirwa malayika wa Katonda n'amugamba akuyite ojje mu nnyumba ye omutegeze Katonda by'ayagala akole."

²³Awo Peetero n'abayingiza mu nnyumba ne basulawo ekiro ekyo. Enkeera n'agenda n'abo ng'awerekewako abooluganda abamu ab'omu Yopa.

Peetero mu maka ga Koluneeriyo

²⁴ Ku lunaku olwaddirira Peetero n'atuuka e Kayisaliya. Yasanga Koluneeriyo amulindiridde, ng'ali ne baganda be ne mikwano gye be yayita balabe Peetero.

²⁵ Peetero bwe yayingira mu nnyumba, Koluneeriyo n'agwa wansi mu maaso ge n'amusinza.

²⁶ Naye Peetero n'amuyimusa n'amugamba nti, "Golokoka! Nange ndi muntu buntu."

²⁷ N'agolokoka ne boogeramu, ne bayingira munda mu kisenge abalala bangi mwe baali bakunjaanidde.

²⁸ Awo Peetero n'abagamba nti, "Mumanyi nga mu mateeka gaffe ag'Ekiyudaaya, ffe tetuyingira mu maka g'Abamawanga. Naye Katonda yandaze mu kwolesebwa nga sisaanira kuddayo kuyisa muntu yenna ng'atali mulongoofu.

²⁹ Noolwekyo olwantumira nange ne nsitukiramu. Kale, ompitidde nsonga ki?"

³⁰ Awo Koluneeriyo n'addamu nti, "Ennaku nnya eziyise, nnali mu nnyumba yange nga nsaba mu ssaawa nga bwe ziti omwenda ez'olweggulo. Amangwago omusajja n'ayimirira mu maaso gange ng'ayambadde engoye ezitemagana.

³¹ N'anjamba nti, 'Koluneeriyo, Katonda awulidde okusaba kwo, era ajjukidde ebirabo byo by'ogabira abaavu.

³² Kale nno, tuma e Yopa, oyite Simooni ayitibwa Peetero, eyakyala mu maka ga Simooni omuwazi w'amaliba ali ku lubalama lw'enyanja.'

³³ Bwe ntyo ne nkutumira mangu, era naawe n'okola bulungi n'ojirawo. Kaakano ffenna tuli wano mu maaso ga Katonda nga tulindirira okuwulira ky'akutumye okutubuulira!"

³⁴ Awo Peetero n'agamba nti, "Kaakano ntegeeredde ddala nga Katonda tasosola mu bantu,

³⁵ wabula ayaniriza abantu bona ab'omu mawanga gonna kasita baba nga bamutya era nga bakola by'asiima.

³⁶ Kino kye kigambo kye yaweereza abaana ba Isirayiri ng'ababuulira emirembe mu Yesu Kristo, Mukama wa bona.

³⁷ Mumanyi ebyabaawo mu Buyudaaya mwonna okusookera mu Ggaliraaya oluvannyuma lw'okubatizibwa Yokaana kwe yabuulira.

³⁸ Era mumanyi bulungi Yesu Omunnazaaleesi nga Katonda bwe yamufukako amafuta ne Mwoyo Mutukuvu n'amaanyi, eyatambula ng'agenda akola ebirungi, ng'awonya abaanyigirizibwanga Setaani, kubanga Katonda yali naye.

³⁹ “Ffe bajulirwa ab’ebyo byonna bye yakola mu nsi y’Abayudaaya ne mu Yerusaalemi, gye yattirwa ku musaalaba.

⁴⁰ Oyo Katonda yamuzuukiza ku lunaku olwokusatu era n’amulaga eri abantu.

⁴¹ Teyalabibwa bantu bona, wabula abajulirwa Katonda be yali amaze okulonda, be baffe abaalya naye, ne tunywa naye ng’amaze okuzuukira mu bafu.

⁴² N’atutuma okubuulira abantu Enjiri nga tujulira nti Yesu y’oyo, Katonda gwe yalonda okubeera omulamuzi w’abantu bona, abalamu n’abafu.

⁴³ Era ne bannabbi bona bamuweera obujulirwa nti buli amukkiriza asonyiyibwa ebibi mu linnya lye.”

⁴⁴ Awo Peetero bwe yali akyayogera ebigambo ebyo, Mwoyo Mutukuvu n’akka ku abo bona abali bawuliriza ekigambo!

⁴⁵ Abakkiriza abakomole bangi abaawerekera ku Peetero ne beewuunya nnyo okulaba ng’ekirabo kya Mwoyo Mutukuvu kifukibbwa ne ku baamawanga.

⁴⁶ Kubanga baabawulira nga boogera mu nnimi endala nga batendereza Katonda. Awo Peetero n’agamba nti,

⁴⁷ “Waliwo ayinza okuziyiza abantu bano okubatizibwa n’amazzi abafunye Mwoyo Mutukuvu nga ffe bwe twamufuna?”

⁴⁸ Bw’atyo n’alagira babatizibwe mu linnya lya Yesu Kristo. Ne basaba Peetero agiraabeera nabo okumala ennaku ntonotono.

Ebikolwa by’Abatume 11

Peetero Annyonnyola

¹ Awo abatume n’abooluganda abaali mu Buyudaaya mwonna ne bawulira nti n’Abamawanga bakkiriza ekigambo kya Katonda.

² Naye Peetero bwe yakomawo mu Yerusaalemi, abakomole ne bamunenya,

³ nga bagamba nti, “Lwaki wakyalira Abaamawanga abatali bakomole n’oyingira ne mu nnyumba n’olya nabo?”

⁴ Awo Peetero n’abannyonnyola byonna ng’agamba

⁵ nti, “Bwe nnali nsaba, nga ndi mu kibuga kya Yopa, ne njolesebwa. Essuuka ennene ennyo ng’ewaniriddwa ku nsonda zaayo ennya, n’essibwa mu maaso gange ng’eva mu ggulu.

⁶ Mu ssuuka eyo ne ndabamu ebisolo byonna eby’oku nsi ebirina amagulu ana, n’ebewalula, n’ennyonyi ez’omu bbanga.

⁷ Ne mpulira eddoboozi nga liŋŋamba nti, ‘Peetero, situka osale, olye.’

⁸“Nze ne nziramu nti, ‘Nedda, Mukama wange, kubanga siryanga ku kintu kya muzizo oba ekitali kirongoofu.’

⁹“Naye eddoboozi ne liddamu nga liŋŋamba nti, ‘Ekyo Katonda ky’amaze okulongoosa tokiyitanga ekitali kirongoofu.’

¹⁰Ne kiba bwe kityo emirundi esatu. Oluvannyuma essuuka n’ezzibwayo mu ggulu ne byonna ebyagirimu.

¹¹“Amangwago laba abasajja basatu abaatumibwa okuva e Kayisaliya ne batuuka ku nnyumba we nnali nsula!

¹²Mwoyo Mutukuvu n’ajŋamba ḥŋende nabo, awatali kulwa, n’abooluganda bano omukaaga ne bamperekerako, ne tutuuka mu maka g’omusajja eyali antumidde ababaka abo.

¹³N’atutegeeza nga malayika bwe yamulabikira mu nnyumba ye, n’amugamba nti, ‘Tuma ababaka e Yopa banoonye Simooni ayitibwa Peetero,

¹⁴ajje akutegeeze ggwe n’ab’omu nnyumba yo nga bwe muyinza okulokolebwa!’

¹⁵“Awo bwe nnali nga nakatandika okubabuulira Enjiri, Mwoyo Mutukuvu n’abakkako nga naffe bwe yatukkako ku kusookera ddala!

¹⁶Awo ne nzijkira ebigambo bya Mukama waffe bwe yagamba nti, ‘Yokaana yabatiza na mazzi, naye mmwe mulibatizibwa na Mwoyo Mutukuvu.’

¹⁷Olw’okubanga Katonda ye yawa Abaamawanga bano ekirabo kye kimu, naffe kye yatuwa bwe twakkiriza Mukama waffe Yesu Kristo, nange nze ani eyandiwakanyizza Katonda?”

¹⁸Bwe baawulira ebigambo ebyo ne basirika, ne bagulumiza Katonda! Ne bagamba nti, “Ddala, n’Abamawanga Katonda abawadde omukisa okwenenya bakyuke badde gy’ali abawe obulamu obutaggwaawo.”

Ekkanisa mu Antiyokiya

¹⁹Awo abo abakkiriza abadduka okuva mu Yerusaalemi mu kuyigganyizibwa okwaddirira okuttibwa kwa Suteefano, ne basasaana ne batuuka ne mu bifo nga Foyiniiki, ne Kupulo, ne Antiyokiya, ne babunya Enjiri, naye nga babuulira Bayudaaya bokka.

²⁰Naye, abamu ku bakkiriza abaagenda mu Antiyokiya nga bava e Kupulo n’e Kuleene ne babuulira Abayonaani ku Mukama waffe Yesu.

²¹Awo omukono gwa Mukama ne gubeera wamu nabo, Abaamawanga bangi ne bakkiriza ne bakyuka okudda eri Mukama.

²²Awo ab’omu Kkanisa y’omu Yerusaalemi bwe baawulira ebyo, ne batuma Balunabba mu Antiyokiya ayambe abakkiriza.

²³Bwe yatuuka n'alaba eby'ekitalo Katonda bye yali akola mu bantu, n'ajjula essanyu, n'akubiriza abakkiriza banywerere ku Mukama n'emitima gyabwe gyonna.

²⁴Balunabba yali muntu wa kisa ng'ajjudde Mwoyo Mutukuvu n'okukkiriza, abantu bangi ne basenga Mukama.

²⁵Oluvannyuma lw'ebyo Balunabba n'alaga e Taluso okunoonya Sawulo,

²⁶bwe yamulaba n'amuleeta mu Antiyokiya. Bombi ne babeera mu Antiyokiya okumala omwaka mulamba nga bakolera wamu n'Ekkanisa yaayo, ne bayigiriza abantu bangi nnyo. Wano mu Antiyokiya abayigirizwa we baasookera okuyitibwa Abakristaayo.

Balunabba ne Sawulo Batumibwa mu Yerusaalemi

²⁷Mu kiseera ekyo ne wabaawo bannabbi abaaserengeta mu Antiyokiya nga bava mu Yerusaalemi.

²⁸Om u ku bo erinnya lye Agabo n'asituka ng'ajjudde Mwoyo Mutukuvu n'ategeeza ng'enjala ey'amaanyi bw'ejja okugwa mu nsi zonna wonna mu bufuzi bwa Kulawudiyo.

²⁹Awo abayigirizwa ne bamalirira okuweereza obuyambi eri abooluganda abaali mu Buyudaaya, buli muntu nga yeesonda nga bwe yasobola,

³⁰ne batuma Balunabba ne Sawulo batwalire abakadde.

Ebikolwa by'Abatume 12

Peetero Aggyibwa mu Kkomera

¹Awo mu biro ebyo Kabaka Kerode n'atandika okuyigganya abamu ku bakkiriza ab'omu Kkanisa.

²N'atta Yakobo muganda wa Yokaana n'ekitala.

³Bwe yalaba nga ky'akoze kisanyusizza Abayudaaya, n'akwata Peetero mu kiseera eky'Embaga ey'Emigaati Egitazimbulukuswa

⁴n'amusiba mu kkomera, ng'amutaddeko abaserikale abamukuma kkumi na mukaaga mu bibinja bina eby'abaserikale banabana. Kerode yali ategese amuleete mu bantu, ng'Embaga y'Okuyitako ewedde.

⁵Peetero n'akuumirwa mu kkomera, naye Ekkanisa n'enyiikira nnyo okumusabira eri Katonda.

⁶Ekiro ekyo, ng'enkeera Kerode ategese okuwaayo Peetero, Peetero yali yeebase wakati w'abaserikale babiri, ng'asibiddwa n'enjegere bbiri, nga ne ku mulyango gw'ekkomera kuliko abakuumi.

⁷Laba malayika wa Mukama n'ayimirira awali Peetero, ekitangaala ne kyaka mu kisenge, Malayika n'akuba ku Peetero mu mbiriizi n'amuzuukusa ng'amugamba nti, "Yanguwa. Ggolokoka." Enjegere ne ziva ku mikono gye ne zigwa wansi.

⁸Malayika n'amugamba nti, "Weesibe olukoba lwo, oyambale n'engatto zo." Peetero n'akola nga bw'agambiddwa. Malayika n'amugamba nti, "Kale, yambala omunagiro gwo ongoberere."

⁹Awo Peetero n'agoberera malayika. Naye ekiseera kino kyonna ng'alowooza nti alabye kwolesebwa, nga tayinza kukitegeera nti byonna ebyali bimutuukako mu kaseera ako byaliwo ddala.

¹⁰Ne bayita ku bakuumi abasooka n'abookubiri ne batuuka ku luggi olunene olw'ekyuma olufuluma mu kkomera nga luggukira mu kibuga. Luno ne lweggulawo lwokka, ne bayitamu. Bwe baatambulako akabanga mu luguudo mu kibuga, amangwago malayika n'amuleka.

¹¹Awo Peetero bwe yeddamu n'alyoka ategeera bwe bibadde, n'agamba nti, "Ntegeeredde ddala nga Mukama yatumye malayika we n'anziggya mu mukono gwa Kerode, era n'amponya n'eby'akabi byonna Abayudaaya bye babadde bantekedde."

¹²Bwe yamala okukakasa ebyo munda ye, n'atambula n'alaga mu maka ga Maliyamu nnyina wa Yokaana Makko, abantu bangi gye baali bakunjaanidde nga basaba.

¹³Awo Peetero n'akonkona ku luggi olunene olw'ebweru, omuwala omuweereza erinnya lye Looda n'ajja okuggulawo.

¹⁴Naye bwe yategeera nga ddoboozi lya Peetero essanyu ne limuyitirira, n'adduka buddusi nga n'oluggi talugguddeewo, n'ategeeza abaali mu nju nti, "Peetero ali wabweru ku luggi!"

¹⁵Naye abaali mu nju ne bamuddamu nti, "Oguddemu akazoole." Naye ne yeyongera okulumiriza nti ky'agamba bwe kiri. Ne bagamba nti, "Oyo malayika we."

¹⁶Naye Peetero n'ayongera okukonkona. Oluvannyuma ne bagenda ne baggulawo oluggi, ne bamulaba. Ne basamaalirira nnyo.

¹⁷N'abakomako basirike, n'alyoka abategeeza byonna ebyamubaddeko, nga Mukama bwe yamusumuludde mu kkomera. N'abagamba nti, "Mutegeeze Yakobo n'abooluganda bino byonna ebibaddewo." Awo n'afuluma n'alaga mu kifo ekirala.

¹⁸Enkeera ekkomera ne lijjula akagugumuko ng'abaserikale beebuuza nti, "Peetero abulidde wa?"

¹⁹Awo Kerode bwe yamutumya ne basanga nga taliyo, ne bamunoonya n'ababula. Abaserikale bwe baamala okuwозesebwa n'alagira babafulumye babatte.

Okufa kwa Kerode

Oluvannyuma Kerode n'ava e Buyudaaya n'agenda abeera e Kayisaliya.

²⁰Kerode yali anyiigidde abantu b'e Ttuulo n'e Sidoni. Awo ne bamuweereza ababaka baabwe okujja okumulaba, ne bakwana omuwandiisi we Bulasito, era n'abayamba okubatuusiza ensonga zaabwe ewa Kerode nga bamusaba emirembe, kubanga emmere eyali eriisa ebibuga byabwe byombi yali eva mu nsi ya kabaka.

²¹Awo olunaku olwategekebwa bwe lwatuuka, Kerode n'ayambala eminagiro gye egy'obwakabaka n'atuula ku ntebe ye ey'obwakabaka, n'ayogera eri ababaka n'abantu bonna.

²²Abantu bonna ne boogera mu ddoboozi ery'omwanguka nti, "Lino ddoboozi lya Katonda so si lya muntu!"

²³Amangwago malayika wa Mukama n'amubonereza, n'ajjula envunyu yenna, ne zimulya n'afa, kubanga yakkiriza abantu ne bamusinza, n'atawa Katonda kitibwa.

²⁴Awo ekigambo kya Katonda ne kyeyongera okubuna wonna.

Balunabba ne Sawulo Baddayo mu Antiyokiya

²⁵Balunabba ne Sawulo bwe baamala okutuukiriza ekyabaleeta mu Yerusaalemi, ne baddayo ne Yokaana ayitibwa Makko.

Ebikolwa by'Abatume 13

Balunabba ne Sawulo batumibwa

¹Mu Kkanisa y'omu Antiyokiya mwalimu bannabbi n'abayigiriza bano: Balunabba, ne Simooni, eyayitibwanga, "Omuddugavu" ne Lukiyo ow'e Kuleene, ne Manaeni, eyakulira awamu ne kabaka Kerode, ne Sawulo.

²Awo bwe baali nga basinza Mukama era nga bwe basiiba, Mwoyo Mutukuvu n'agamba nti, "Munjawulire Balunabba ne Sawulo olw'omulimu gwe mbayitidde."

³Awo bwe baamala okusaba n'okusiiba, ne bassa emikono gyabwe ku Balunabba ne Sawulo, ne babasiibula ne bagenda.

⁴Awo Balunabba ne Sawulo ne batumibwa Mwoyo Mutukuvu okugenda e Serukiya, gye baava ne bawunguka okulaga e Kupulo.

⁵Bwe baatuuka mu Salamisi ne bayingira mu makuŋŋaaniro g'Abayudaaya ne babuulira ekigambo kya Katonda. Yokaana Makko yali nabo okubaweereza.

⁶ Ne bagenda nga babuulira ku kizinga kyonna okutuuka e Pafo. Eyo ne basangayo omufumu Omuyudaaya eyali nnabbi ow'obulimba, erinnya lye Balisa.

⁷ Yayitanga ne Serugiyo Pawulo, gavana Omuruumi ow'oku kizinga ekyo. Gavana ono yali musajja w'amagezi, n'atumya Balunabba ne Sawulo ng'ayagala okuwulira ekigambo kya Katonda.

⁸ Naye Eruma omufumu (kubanga ago ge makulu g'erinnya lye mu Luyonaani), n'abeekiikamu, n'agezaako okusendasenda gavana aleme okuwuliriza ebigambo eby'okukkiriza.

⁹ Naye Sawulo, era ng'ayitibwa Pawulo, n'ajjuzibwa Mwoyo Mutukuvu, n'atunuulira Eruma enkaliriza,

¹⁰ n'amugamba nti, "Ggwe, omusajja ajudde obulimba bwonna n'obukuusa bwonna, omwana wa Setaani, era omulabe w'obutuukirivu bwonna olkomya ddi okukyusakyusa amakubo ga Katonda amatereevu?

¹¹ Kaakano omukono gwa Mukama gukwolekedde, ojja kuziba amaaso, omale ebbanga nga tolaba musana." Amangwago olufu n'ekizikiza ne bimusaanikira, n'atandika okuwammanta ng'anoonya anaamukwata ku mukono.

¹² Awo gavana bwe yalaba ebibaddewo, n'akkiriza, era n'awuniikirira nnyo olw'okuyigiriza kw'ekigambo kya Mukama.

Balunabba ne Pawulo mu Antiyokiya eky'e Pisidiya

¹³ Awo Pawulo ne be yali nabo ne basaabala ku nnyanja okuva e Pafo ne bagoba e Peruga eky'e Panfuliya. Naye Yokaana Makko n'abalekayo n'addayo e Yerusaalemi.

¹⁴ Kyokka Balunabba ne Pawulo ne beeyongerayo mu lugendo Iwabwe ne batuuka mu kibuga Antiyokiya ekiri mu Pisidiya. Awo ku lunaku lwa Ssabbiiti ne bagenda ne batuula mu kkuñjaaniro.

¹⁵ Ebitundu ebyaggyibwa mu Mateeka ne mu Bannabbi bwe byaggwa okusomebwa, abakulembeze b'ekuñjaaniro ne batumira Balunabba ne Pawulo we baali batudde nga bagamba nti, "Abasajja abooluganda, obanga ku mmwe waliwo alina ekigambo ekizimba abantu akyogere."

¹⁶ Awo Pawulo n'ayimuka, n'abawenya n'ayogera nti, "Abasajja Abayisirayiri, nammwe abatya Katonda, muwulirize!

¹⁷ Katonda w'eggwanga lino Isirayiri yalonda bajajjaffe n'abafuula eggwanga ekkulu bwe baali abagenyi mu nsi y'e Misiri n'oluvannyuma n'abaggyayo n'omukono gwe ogw'amaanyi,

¹⁸ n'abagumiikiriza okumala emyaka amakumi ana nga bali mu ddungu.

¹⁹N'azikiriza amawanga musanvu agaabeeranga mu nsi ya Kanani, era ensi eyo n'agiwa Abayisirayiri okubeera omugabo gwabwe,

²⁰okumala emyaka ng'ebikumi bina mu ataano. "Oluvannyuma n'abalondera abalamuzi okubafuganga okutuusa mu biro bya nnabbi Samwiri.

²¹Awo abantu ne basaba bafugibwe kabaka. Katonda n'abawa Sawulo mutabani wa Kiisi, ow'omu kika kya Benyamini, n'afugira emyaka amakumi ana.

²²Naye Katonda n'amuggya ku bwakabaka, n'abuwa Dawudi, oyo Katonda gwe yayogerako obulungi nti, 'Nnonze Dawudi, mutabani wa Yesu, omusajja omutima gwange gwe gwagala ajja okukola bye njagala.'

²³"Mu zzadde lye, Katonda mwe yalonda Omulokozi, ye Yesu, nga bwe yasuubiza Isirayiri.

²⁴Naye nga tannajja, Yokaana yabuulira abantu bona mu Isirayiri okubatizibwa okw'okwenenya.

²⁵Era Yokaana bwe yali ng'ali kumpi okufundikira omulimu gwe, yagamba nti, 'Mundowooza kuba ani? Nze siri ye. Laba Ye ajja oluvannyuma lwange, n'okusaanira sisaanira na kusumulula ngatto ze.'

²⁶"Abasajja abooluganda mmwe bazzukulu ba Ibulayimu, nammwe abatya Katonda, obubaka buno obw'obulokozi, bwaffe ffenna wamu.

²⁷Ababeera mu Yerusaalemi n'abakulembeze baabwe ne batamumanya oyo newaakubadde ebigambo bya bannabbi, ebyasomebwanga buli Ssabbiiti. Baamusalira omusango, ne batuukiriza ebigambo bino.

²⁸Tebaalina nsonga emussa, naye era ne basaba Piraato amutte.

²⁹Bwe baamala okutuukiriza byonna ebyamuwandiikwako, n'awanulwayo ku musaalaba n'agalamizibwa mu ntaana.

³⁰Naye Katonda n'amuzuukiza mu bafu.

³¹Era abo be yajja nabo e Yerusaalemi ng'ava e Ggaliraaya n'abalabikiranga okumala ennaku nnyingi. Era be bajulirwa be eri abantu.

³²"Ne kaakano tubategeeza nti, Katonda kye yasuubiza bajjajjaffe

³³yakituukiriza mu ffe ne mu baana baffe, bwe yazuukiza Yesu mu bafu. Nga bwe kyawandiikibwa mu Zabbuli eyookubiri nti, "Mwana wange, leero nfuuse Kitaawo.'

³⁴Kubanga Katonda yasuubiza okumuzuukiza abeere mulamu nate, era nga takyaddayo kuvunda. Ekyawandiikibwa nga bwe kyogera nti: "Ndikuwa emikisa egy'olubeerera era emitukuvu gye nasuubiza Dawudi.'

³⁵ Ne mu kyawandiikibwa ekirala agamba nti, “‘Toliganya Mutukuvu wo kuvunda.’”

³⁶ “Kino kyali tekyogera ku Dawudi, kubanga Dawudi bwe yamala okuweereza omulembe gwe nga Katonda bwe yayaga, n’afa, n’aziikibwa, era omubiri gwe ne guvunda.

³⁷ Noolwekyo, oyo Katonda gwe yazuukiza teyavunda.

³⁸ “Abooluganda, mumpulirize! Mu muntu ono Yesu okusonyiyibwa ebibi mwe kubuuliddwa. Kino nga tekiyinzika mu mateeka ga Musa.

³⁹ Buli amukkiriza n’amwesiga aggyibwako omusango gw’ekibi, n’aweewba obutuukirivu.

⁴⁰ Mwegendereze, ebigambo bya bannabbi bireme kutuukirira ku mmwe, bwe baagamba nti:

⁴¹ “‘Mulabe, mmwe abanyoomi, musamaalirire era muzikirire! Kubanga nnina omulimu gwe nkola mu kiseera, gwe mutagenda kukkiriza newaakubadde omuntu ne bw’aligubannyonyola atya temuligukkiriza.’”

⁴² Awo Pawulo ne Balunabba bwe baali bafuluma mu kkuñjaaniro, abantu ne babasaba bakomewo ku Ssabbiiti eddirira bongere okubabuulira ku bigambo ebyo.

⁴³ Abayudaaya bangi awamu n’abatya Katonda abaaliwo mu kusinza okwo mu kkuñjaaniro, ne babagoberera. Pawulo ne Balunabba ne banyumya nabo nga bwe batambula mu kkubo, nga babasendasenda banywerere mu kukkiriza ne mu kisa kya Katonda.

⁴⁴ Ku Ssabbiiti eyaddirira kumpi buli muntu eyali mu kibuga n’ajja okuwulira ekigambo kya Katonda.

⁴⁵ Naye Abayudaaya bwe baalaba ebibiina ebinene nga bizze, ne bakwatibwa obuggyga, ne batandika okuwakanya n’okujolonga byonna Pawulo bye yayogeranga.

⁴⁶ Awo Pawulo ne Balunabba ne babaanukula n’obuvumu bungi ne babagamba nti, “Kyali kituufu Ekigambo kya Katonda kino okusooka okubuulirwa mmwe Abayudaaya. Naye nga bwe mukigaanyi, ne mweraga nti obulamu obutaggwaawo temubusaanira; kale kaakano ka tukibuulire Abaamawanga.

⁴⁷ Kubanga bw’atyo Mukama bwe yatulagira bwe yagamba nti, “‘Mbafudde omusana okwakira Abaamawanga, olw’obulokozi okutuuka ku nkomerero y’ensi.’”

⁴⁸ Abaamawanga bwe baawulira ebyo ne bajjula essanyu; era bangi ne bakkiriza, abo Katonda be yalonda okuwa obulamu obutaggwaawo.

⁴⁹Awo ekigambo kya Katonda ne kibuna mu kitundu ekyo kyonna.

⁵⁰Naye Abayudaaya ne bafukuutirira abakazi abaasinzanga Katonda ab'ebitiibwa, n'abakulembeze mu kibuga, ne batandika akeegugungo mu kibiina ky'abantu nga koolekedde Pawulo ne Balunabba, okutuusa lwe baabagoba mu kitundu kyabwe.

⁵¹Abatume ne babakunkumulira enfuufu ey'omu bigere byabwe, ne babaviira ne balaga mu Ikoniya.

⁵²Abayigirizwa ne bajjula essanyu ne Mwoyo Mutukuvu.

Ebikolwa by'Abatume 14

¹Awo Pawulo ne Balunabba bwe baatuuka mu Ikoniya ne bayingira mu kkuuŋjaaniro ly'Abayudaaya. Ne babuulira n'amaanyi mangi era abantu bangi Abayudaaya n'Abayonaani ne bakkiriza.

²Naye Abayudaaya abaagaana okukkiriza ne bassa omutima omubi mu baamawanga okukyawa abooluganda.

³Ne baabeerayo ebbanga gwanvu nga babuulira n'obuvumu, era Mukama n'akakasanga ekigambo ky'ekisa kye ng'abawa okukola obubonero n'ebiyamagero.

⁴Naye ekibiina ky'abantu mu kibuga ne kyawukanamu abamu ne bagoberera Abayudaaya n'abalala ne bakkiriza abatume.

⁵Abayudaaya n'abakulembeze baabwe awamu n'Abamawanga, ne basala olukwe okubonyaabonya abatume, n'okubakuba amayinja.

⁶Naye Pawulo ne Balunabba olukwe ne baluggukamu ne baddukira mu bibuga ebya Lukawoniya ne Lusitula ne Derube, ne mu bitundu ebiriraanyewo,

⁷era n'eyo ne babuulirirayo Enjiri.

Pawulo ne Balunabba mu Lusitula ne Derube

⁸Mu Lusitula mwalimu omusajja eyazaalibwa nga mulema, ng'ebigere bye bigongobavu, nga tatambulangako.

⁹N'atuula awo ng'awuliriza Pawulo bye yali ayogera. Pawulo n'amwekaliriza amaaso n'alaba ng'alina okukkiriza okuwonyezebwa.

¹⁰Pawulo n'amugamba mu ddoboozi ery'omwanguka nti, "Yimirira ku bigere byo, weegolole!" Amangwago omusajja n'ayimirira, n'atandika okutambula!

¹¹Awo ekibiina ky'abantu bwe baalaba Pawulo ky'akoze, ne baleekaanira waggulu mu lulimi lwabwe Olulikaoniya nti, "Bakatonda basse wansi gye tuli nga bali mu kifaananyi ky'abantu!"

¹²Balunabba ne bamuyita Zewu, Pawulo ne bamuyita Kerume kubanga ye yali omwogezi omukulu.

¹³Awo kabona wa Zewu, eyali ebweru w'ekibuga, n'agenda n'aleeta ente ennume n'ebimuli ku wankaaki, ye n'ekibiina ky'abantu ne baagala okuwaayo ssaddaaka.

¹⁴Naye abatume, Balunabba ne Pawulo, bwe baabiwulira, ne bayuza engoye zaabwe, ne bafubutuka ne bayingira mu kibiina ky'abantu nga baleekaana nga bagamba nti,

¹⁵“Abasajja! Kiki ekibakozesa ebintu bino? Naffe tuli bantu buntu nga mmwe! Twazze tubabuulire mukyuke okuva ku bintu bino ebitaliimu mudde eri Katonda omulamu eyakola eggulu n'ensi, n'nyanja n'ebintu byonna ebirimu.

¹⁶Mu mirembe egayita yaleka amawanga gonna okukwata amakubo ge baayagalanga.

¹⁷Kyokka tasigalirangako awo nga talina bujulirwa ng'abakolera ebirungi okuva mu ggulu, ng'aweereza enkuba, n'okubawa ebiro eby'okubalizangamu ebibala n'okubakkusa emmere, era n'okubajjuza essanyu mu mitima gyabwe.”

¹⁸Newaakubadde baabategeeza bwe batyo, naye era katono balemwe okuziyiza ebibiina okubawa ssaddaaka.

¹⁹Awo Abayudaaya ne batuuka nga bava mu Antiyokiya ne mu Ikoniya, ne basasamaza ebibiina, ne bakuba Pawulo amayinja ne bamukulula ne bamutwala ebweru w'ekibuga nga balowooza nti afudde.

²⁰Naye abayigirizwa ne bajja ne bayimirira okumwetooloola, n'asituka n'addayo mu kibuga! Enkeera ne basitula ne Balunabba ne balaga mu Derube.

Balunabba ne Pawulo badda mu Antiyokiya eky'omu Siriya

²¹Ne babuulira Enjiri mu kibuga ekyo, era abantu bangi ne bakkiriza. Ne baddayo mu Lusitula, ne mu Ikoniya, ne mu Antiyokiya,

²²ne babuulirira abakkiriza, nga babakubiriza banywerere mu kukkiriza, era ne babagamba nti, “Kitugwanidde okuyingira mu bwakabaka bwa Katonda nga tuyita mu bibonoobono ebingi.”

²³Pawulo ne Balunabba buli kkanisa baagironderamu abakadde. Ne basaba ne basiiba, ne babakwasa Mukama, oyo gwe bakkiriza.

²⁴Awo ne batambula ne bayita mu Pisidiya ne batuuka e Panfuliya,

²⁵bwe baamala okubuulira ebigambo mu Peruga, ne beeyongerayo mu Ataliya.

²⁶Oluvannyuma ne basaabala ku nnyanja okuddayo mu Antiyokiya, gye baali baasigirwa ekisa kya Katonda olw'omulimu gwe baakola.

²⁷Bwe baatuuka, ne bakuññaanya ekkanisa ne babategeeza ebyafa mu lugendo lwabwe, ne byonna Katonda bye yabakozesa, n'Abamawanga nga bwe yabaggulirawo oluggi olw'okukkiriza.

²⁸Ne babeera eyo ne bamalayo ebbanga ggwanvu nga bali n'abayigirizwa.

Ebikolwa by'Abatume 15

Olukiiko Iw'Abakristaayo mu Yerusaalemi

¹Awo ne waja abantu abamu abaava mu Buyudaaya ne bayigiriza abooluganda nti, "Ssinga temukomolebwa ng'akalombolombo ka Musa bwe kali temuyinza kulokolebwa."

²Pawulo ne Balunabba ne bawakana nnyo nabo ku nsonge eyo ne kisalibwawo nti Pawulo ne Balunabba n'abamu ku bakkiriza ab'omu Antiyokiya, batwale ensonga eyo eri abatume n'abakadde b'Ekklesia mu Yerusaalemi.

³Ababaka ne bakwata ery'e Yerusaalemi, ne bayimirirako mu kibuga ky'e Fayiniikiya n'e Samaliya okukyalira abakkiriza mu bibuga ebyo n'okubategeeza ng'Abamawanga bangi bwe baakyuka ne bakkiriza. Ebigambo ebyo ne bisanyusa nnyo abooluganda.

⁴Bwe baatuuka mu Yerusaalemi ne baanirizibwa ekkanisa, abatume n'abakadde b'Ekklesia bona. Ne babategeeza byonna Katonda bye yabakozesa.

⁵Naye abamu ku bakkiriza, ab'omu kibiina ky'Abaafisaayo, ne basituka ne bagamba nti Abaamawanga bona abakkiriza bateekwa okukomolebwa nga bwe kiri mu mateeka ga Musa, era n'okugoberera obulombolombo bwonna ng'empisa z'Ekiyudaaya bwe ziragira.

⁶Awo abatume n'abakadde b'Ekklesia ne bakuññaana bateese ku nsonge eyo.

⁷Oluvannyuma nga bateeserezza ebbanga ggwanvu, Peetero n'asituka n'abagamba nti, "Abooluganda, mwenna mumanyi nga Katonda yannonda dda mu mmwe mu nnaku ezaasooka, mbuulire Enjiri mu baamawanga nabo bakkirize.

⁸Era Katonda amanyi emitima gy'abantu, yayaniriza Abaamawanga ng'abawa Mwoyo Mutukuvu nga naffe bwe yatumuwa.

⁹Teyabasosola kubanga bwe baamala okukkiriza, obulamu bwabwe n'abunaaza ng'obwaffe bwe yabunaaza.

¹⁰Kale kaakano, lwaki mwagala okukema Katonda nga mukakaatika ekikoligo mu bulago bw'abayigirizwa, kye mumanyi nga bajajjaffe kyabakaluubirira era naffe kitukaluubirira okwetikka?

¹¹Tukkiriza nti tulokolebwa lwa kisa kya Mukama waffe Yesu, era n'abamawanga bwe batyo bwe balokolebwa."

¹²Ekibiina kyonna ne kisiriikirira ne bawuliriza Balunabba ne Pawulo nga babategeeza eby'amagero n'obubonero Katonda bye yabakozesa nga bali ku mulimu gwe mu baamawanga.

¹³Bwe baamala okwogera, Yakobo n'agamba nti, "Abasajja abooluganda, mumpulirize.

¹⁴Simooni abategeezessa ng'okusookera ddala Katonda bwe yakyalira Abaamawanga ne yeeronderamu abo ab'okuweesa erinnya lye ekitiibwa.

¹⁵Era kino kituukiriza bannabbi bye baayogera ng'Ekyawandiikibwa bwe kigamba nti,

¹⁶"Oluvannyuma lwa bino ndikomawo, ne nziddaabiriza ennyumba ya Dawudi eyagwa. Ndiddaabiriza ebifo ebyamenyebwamenyebwa. Ndigizaawo,

¹⁷n'abantu abalala basobole okunoonya Mukama, era n'abamawanga be nayita okuba abantu bange.

¹⁸Bw'atyo bw'ayogera Mukama, alaga entegeka ye okuviira ddala ku ntandikwa y'ensi.'

¹⁹"Kyenva nsalawo nti, Tetusaana kutikka baamawanga abakkiriza Katonda mugugu munene nga tubawaliriza okukwata obulombolombo bwaffe obw'Ekiyudaaya.

²⁰Wabula tubawandiikire tubategeeze beewale okulya ennyama eya ssaddaaka eweebwayo eri bakatonda abalala, beewale obwenzi n'okulya ennyama ey'ebisolo ebitugiddwa, era beewale okulya n'omusaayi.

²¹Kubanga ebintu byonna biri mu mateeka ga Musa, era bibuulirwa mu makunjaaniro g'Abayudaaya mu buli kibuga buli lunaku lwa Ssabbiiti ebbanga lyonna."

Ebbaluwa y'Olukiiko eri Abaamawanga Abakkiriza

²²Awo abatume n'abakadde b'Ekkanisa n'abooluganda bona mu Kkanisa ne bateesa okutuma ababaka bagende ne Pawulo ne Balunabba mu Antiyokiya okubategeeza kye basazeewo. Abasajja abaalondebwaa nga bakulembeze mu Kkanisa baali: Yuda (era gwe bayita Balusaba) ne Siira.

²³Ne baweebwa ebbaluwa gye baatwala ng'esoma bw'eti: Ffe abatume, n'abakadde b'eckanisa, Eri abooluganda, mu Antiyokiya yonna ne Siriya ne Kirukiya: Abooluganda tubalamusizza.

²⁴Tuwulidde nti abamu ku booluganda baava wano ne bajja eyo nga si ffe tubatumye, ne boogera nammwe ebigambo ebyabatabulatabula mu kukkiriza kwammwe ne bibakeññentereza emitima.

²⁵Kyetuvudde tuteesa ffenna, era ne tukkiriziganya bumu, okubatumira ababaka baffe bajjire wamu n'abaagalwa baffe, Balunabba ne Pawulo,

²⁶abasajja abeewaddeyo okuweereza Mukama waffe Yesu Kristo nga tebalirira bulamu bwabwe.

²⁷Tubatumidde Yuda ne Siira bongere okubannyonyola n'akamwa ebyo ebiri mu bbaluwa eno.

²⁸Kubanga kwe kuteesa kwa Mwoyo Mutukuvu, era naffe, nga tekisaanira kubatikka migugu gyा bwereere egiteetaagibwa, wabula musaana okugoberera bino:

²⁹Mwewalenga ennyama ettiddwa olw'okuweebwayo eri bakatonda abalala, mwewalenga n'okulya omusaayi, era n'ennyama ey'ebisolo ebitugiddwa, era mwewalenga obwenzi. Bwe muneegendereza ne mwewala ebintu ebyo, munaaba mukoze bulungi. Mweraba.

³⁰Awo abaatumibwa ne basitula ne bagenda mu Antiyokiya, ne bakuññaanya ekibiina ky'abakkiriza ne babakwasa ebbaluwa eyo.

³¹Bwe baagisoma, essanyu ne liba jjitirivu mu Kkanisa yonna olw'ebyo ebyagirimu.

³²Awo Yuda ne Siira, olwokubanga baali bannabbi, ne boogerera ebbanga ggwanvu nga bakubiriza abooluganda okunyweza okukkiriza kwabwe.

³³Awo Yuda ne Siira ne bamalayo ennaku ntonotono ne basiibula okuddayo eri abaabatuma. Abooluganda ne babatuma okulamusa abali mu Yerusaalemi n'okubeebaza olw'obubaka bwe baabawereza.

³⁴Naye Siira n'asalawo okusigalayo.

³⁵Pawulo ne Balunabba ne babeera mu Antiyokiya okumala ebbanga nga bakolera wamu n'abalala nga babuuliira Enjiri era n'okuyigiriza.

Pawulo ne Balunabba Baawukana

³⁶Awo nga wayiseewo ennaku Pawulo n'agamba Balunabba baddeyo mu bibuga gye baabuulira Enjiri, bagende nga bakyalira abooluganda, balabe nga bwe bali.

³⁷Balunabba n'akkiriza, wabula n'ayagala ne Yokaana Makko agende nabo.

³⁸Naye Pawulo ekkyo n'atakyagala, kubanga Makko yabaawukanako n'abaleka e Panfuliya ng'omulimu ogwabatwala tebannagumaliriza.

³⁹Ne balemwa okukkiriziganya mu nsonga eyo, n'ekyavaamu kwe kwawukana. Balunabba n'atwala Makko ne basaabala ku nnyanja okulaga mu Kupulo.

⁴⁰Pawulo n'alonda Siira, abooluganda ne bamusabira ekisa kya Mukama mu lugendo lwe.

⁴¹Ne bayita mu Siriya ne mu Kirukiya nga bagenda bagumya ekkanisa.

Ebikolwa by'Abatume 16

Timoseewo Yeegatta ku Pawulo ne Siira

¹Awo Pawulo n'asookera e Derube n'olvannyuma n'alaga e Lusitula. Eyo waaliyo omuyigirizwa erinnya lye Timoseewo. Nnyina yali Muyudaaya omukkiriza, nga kitaawe Muyonaani,

²abooluganda mu Lusitula ne mu Ikoniya nga bamwogerako birungi byereere.

³Pawulo n'ayagala Timoseewo agende nabo mu lugendo lwabwe. Bw'atyo n'amala okumukomola, kubanga Abayudaaya bona mu kitundu ekyo baali bamanyi kitaawe wa Timoseewo nga bw'ali Omuyonaani.

⁴Awo bwe baali nga bayita mu bibuga ne babategeeza okukwatanga ebiragiro ebyasalibwawo abatume n'abakadde b'Ekkanisa mu Yerusaalemi ebikwata ku baamawanga.

⁵Ekkanisa ne yeeyongeranga amaanyi mu kukkiriza era n'abantu ne beeyongera obungi buli lunaku.

Okwolesebwa kwa Pawulo

⁶Pawulo ne banne ne batambula ne bayita mu nsi y'e Fulugya n'e Ggalatiya kubanga Mwoyo Mutukuvu yali abaziyizza okugenda mu Asiya okubuulirayo Ekigambo.

⁷Bwe baatuuka e Musiya ne bagezaako okugenda Bisuniya, naye Mwoyo wa Yesu n'atabakkiriza.

⁸Kyebaava bayita obuyisi mu kitundu kya Musiya ne baserengeta e Tulowa.

⁹Ekiro ekyo Pawulo n'afuna okwolesebwa, omusajja Omumakedoni ng'ayimiridde mu maaso ge ng'amwegayirira nti, "Jjangu ewaffe e Makedoniya otuyambe."

¹⁰Pawulo bwe yafuna okwolesebwa okwo ne yeetegeka mangu okulaga e Makedoniya, kubanga yakitegeera nga Katonda atutumye okubabuulira Enjiri.

Okukyuka kwa Ludiya mu Firipi

¹¹Awo ne tusaabala ku nnyanja e Tulowa, ne tuwunguka okutuuka e Samoserakiya, enkeera ne tulaga e Neyapoli,

¹²n'oluvannyuma ne tutuuka e Firipi, ettwale ly'Abaruumi, era nga ky'ekibuga ekikulu mu kitundu ekyo ekya Makedoniya. Ne tumalawo ennaku ntonotono.

¹³Ku Ssabbiiti ne tufuluma mu kibuga okulaga ku mugga ogwali okumpi n'ekibuga gye baali batutegeezza nti waliwo abakuṇjaanirayo okusabirayo. Ne tutuula wamu n'abakazi abaali bazze okusaba ne twogera nabo.

¹⁴Omu ku bakazi abo erinnya lye nga ye Ludiya, yali musuubuzi wa ngoye ez'effulungu ng'abeera mu kibuga Suwatira. Yali asinza Katonda bulijjo. Katonda n'amubikkulira okutegeera obulungi ebyo Pawulo bye yali ayigiriza.

¹⁵Bw'atyo n'abatizibwa n'ab'omu nnyumba ye bona. N'atuyita tumukyalire mu maka ge, ng'agamba nti, "Obanga mukakasa nti nzikirizza Mukama, mujje mubeere mu maka gange." N'atuwaliriza.

Pawulo ne Siira Basibwa mu Kkomera

¹⁶Olunaku lumu twali tuserengeta ku mugga mu kifo we twasabiranga, ne tusisinkana omuwala omuddu ng'aliko ddayimooni eyalagulanga, era n'afuniranga bakama be ensimbi nnyingi.

¹⁷N'atuvaako emabega ng'aleekaana nti, "Bano baddu ba Katonda Ali Waggulu Ennyo, era babategeeza ekkubo ly'obulokozi."

¹⁸Ekyo yakikola okumala ennaku nnyingi Pawulo n'anyiiga. Pawulo kyeyava akyuka n'agamba ddayimooni nti, "Nkulagira mu linnya lya Yesu Kristo, muveeko!" Era amangwago dayimooni n'ava ku muwala.

¹⁹Bannannyini muwala bwe baalaba nga tewakyali ssuubi lya kwongera kumufunamu nsimbi, ne bakwata Pawulo ne Siira ne babatwala mu katale eri ab'obuyinza.

²⁰Ne babaleeta mu maaso g'abalamuzi, ne bagamba nti, "Abasajja bano Bayudaaya, basasamaza ekibuga kyaffe

²¹nga bayigiriza empisa n'obulombolombo bye tutakkirizibwa kugoberera na kukozesa mu mateeka gaffe ag'Ekiruumi."

²²Ekibiina ky'abantu ne kibeeyiwako, abalamuzi ne balagira bambulwemu engoye era bakubwe emiggo.

²³Bwe baamala okukubwa emiggo mingi, ne baggalirwa mu kkomera, era omukuumi w'ekkomera n'akuutirwa abakuume butiribiri.

²⁴Omukulu w'ekkomera bwe yafuna ebiragiyo ebyo, n'abateekera ddala mu kkomera ery'omunda, n'amagulu gaabwe n'agassa mu nvuba.

²⁵Awo ekiro mu ttumbi Pawulo ne Siira bwe baali nga basaba, era nga bwe bayimba n'ennyimba ez'okutendereza Katonda, nga n'abasibe abalala bawuliriza,

²⁶amangwago ne wabaawo musisi ow'amaanyi ennyo. Emisingi gy'ekkomera ne ginyeenyezebwa, n'enzigi z'ekkomera zonna ne zibanduka ne zeggula, era n'enjegere ezaali zisibye abasibe ne zisumulukuka ne zigwa eri!

²⁷Omukuumi w'ekkomera n'azuukuka, n'alaba ng'enzigi zonna nzigule, n'allowooza nti abasibe bona badduse, n'asowolayo ekitala kye yette!

²⁸Naye Pawulo n'aleekaana nti, "Teweekola kabi!"

²⁹Omukuumi w'ekkomera n'akankana nnyo ng'ajjudde entiisa nnyingi, n'alagira ne baleeta ettaala, n'afubutuka n'ayingira munda, n'agwa wansi mu maaso ga Pawulo ne Siira ng'akankana.

³⁰Awo n'abafulumya, n'ababuuza nti, "Bassebo, nkole ki okulokolebwa?"

³¹Ne bamugamba nti, "Kkiriza Mukama waffe Yesu onoolokolebwa, ggwe n'ennyumba yo yonna."

³²Awo ne bamubuulira Ekigambo kya Mukama waffe, ye n'ab'omu maka ge bona.

³³Mu kiseera ekkyo kyennyini n'abatwala n'abanaaza ebiwundu. Era ye n'ab'omu maka ge bona ne babatizibwa.

³⁴Omukuumi w'ekkomera n'abatwala mu nnyumba ye, n'abawa emmere, era amaka gonna ne gajjula essanyu kubanga baali bakkirizza Katonda.

³⁵Awo obudde bwe bwakya, abalamuzi ne batuma abaserikale eri omukuumi w'ekkomera ne bamugamba nti, "Abasajja abo basumulule."

³⁶Omukuumi w'ekkomera n'ategeeza Pawulo nti, "Abalamuzi balagidde muteebwe. Noolwekyo kaakano mugende mirembe."

³⁷Naye Pawulo n'addamu nti, "Ekyo ffe tetukikkiriza! Baatukubidde mu lujjudde lw'abantu nga tebamaze na kutuwozesha, ne batusiba mu kkomera, ng'ate tuli Baruumi! Olwo kaakano baagala batusumulule mu kyama? Nedda! Bo bennyini be baba bajja batuggye mu kkomera!"

³⁸Abaserikale abaatumibwa ne bazzaayo ebigambo eri abalamuzi. Naye bwe baawulira nti Pawulo ne Siira Baruumi ne batya nnyo.

³⁹Ne bajja mu kkomera ne basaba Pawulo ne Siira bagende, ne babaggya mu kkomera ne babeegayirira babaviire mu kibuga kyabwe.

⁴⁰Pawulo ne Siira bwe baava mu kkomera ne bagenda mu maka ga Ludiya, ne bongera okubuulira abooluganda ekigambo kya Katonda nga babanyweza, n'oluvannyuma ne basitula ne bagenda.

Ebikolwa by'Abatume 17

Pawulo mu Sessaloniika

¹ Awo ne batambula ne bayita mu bibuga Anfipoli ne Apolooniya ne batuuka e Sessaloniika, omwali ekkuññaaniro ly'Abayudaaya.

² Pawulo, ng'empisa ye bwe yali, n'agenda n'ababuuliranga ekigambo kya Katonda okuva mu byawandiikibwa, ku buli lwa Ssabiiti okumala Ssabiiti ssatu.

³ N'abannyonyola era n'abalaga nga bwe kyali kyetaagisa Kristo okubonaabona n'okuzuukira mu bafu, era nti, "Oyo ye Kristo Yesu gwe mbabuulira."

⁴ Abamu ku Bayudaaya abaamuwliriza ne bakkiriza ne beegatta ku Pawulo ne Siira; era n'Abayonaani bangi abatya Katonda awamu n'abakazi bangi ab'ekitiibwa mu kibuga ekkyo.

⁵ Naye Abayudaaya ne bakwatibwa obuggyga, ne bagenda nga bafukuutiriraabantu ab'empisa embi ne babaggya mu nguudo z'omu kibuga ne mu katale, ne batandikawo akasasamalo mu kibuga. Ne balumbagana amaka ga Yasooni nga banoonyaamu Pawulo ne Siira babatwale mu kibiina ky'abantu.

⁶ Bwe baabbulwa, kwe kukwata Yasooni n'abooluganda abamu ne babaleeta mu maaso g'abakulu b'ekibuga, nga bwe baleekaana nti, "Pawulo ne Siira batabuddetabudde ebifo ebirala mu nsi yonna, ne kaakano bazze wano batabuletabule ekibuga kyaffe,

⁷ era Yasooni oyo y'abaaniriza mu maka ge. Bano bona bazizza omusango ogw'okuseeketerera eggwanga ne bamenya amateeka ga Kayisaali nga bayimbirira kabaka omulala Yesu."

⁸ Ekibiina n'abakulu b'ekibuga bwe baawulira ebintu ebyo ne basasamala.

⁹ Bwe baamala okusasuza Yasooni ne banne omutango, ne babaleka ne bagenda.

Pawulo mu Beroya

¹⁰ Obudde bwe bwaziba abooluganda ne bafulumya Pawulo ne Siira mu kibuga ne babaweereza e Beroya. Bwe baatuuka eyo ne bagenda mu kkuññaaniro ly'Abayudaaya okusinza n'okubuulira, nga bwe yali empisa yaabwe.

¹¹ Abayudaaya b'omu Beroya baali balungi okusinga ab'e Sessaloniika, ne bawuliriza bulungi n'essanyu Ekigambo ekyababuulirwa. Buli lunaku nga babikkula Ebyawandiikibwa okunoonyaamu ebyo Pawulo ne Siira bye baayogerangako bakakase nti bya mazima.

¹² Era Abayudaaya bangi ne bakkiriza, n'abakazi ab'ekitiibwa Abayonaani bangi n'abasajja, nabo ne bakkiriza.

¹³ Naye Abayudaaya ab'omu Sessaloniika bwe baategeera nga Pawulo abuulira ekigambo kya Katonda mu Beroya, ne bamuwondera ne batabangula ekibiina.

¹⁴Amangwago abooluganda bwe bakitegeera ne baweereza Pawulo ku nnyanja, Siira ne Timoseewo bo ne basigala e Beroya.

¹⁵Abaawerekera ku Pawulo ne bagenda naye okutuukira ddala mu Asene, eyo gye baamuleka ne bakomawo e Beroya ng'abatumye bagambe Siira ne Timoseewo bagende mangu gy'ali.

Pawulo mu Asene

¹⁶Ebbanga Pawulo lye yamala ng'alinda Siira ne Timoseewo mu Asene, n'alumwa nnyo mu mutima bwe yalaba ng'ekibuga kijjudde bakatonda abalala.

¹⁷N'abeeranga mu kkuñjaaniro buli lunaku ng'akubaganya ebirowoozo n'Abayudaaya n'Abamawanga abatya Katonda, era n'ayogeranga eri abantu bona abajjanga okumuuwuliriza mu kibuga wakati okumpi n'akatale.

¹⁸Abamu ku bayigiriza bakagezimunyyu Aba Epikuliyo ne Abasutoyiiko ne batandika okuwakana naye. Bwe yabuulira ku Yesu n'okuzuukira kw'abafu ne bagamba nti, "Aloota buloosi," n'abalala nti, "Waliwo eddiini empya etali ya wano gy'ayimbirira."

¹⁹Naye ne bamuyita aije mu kkuñjaanaa kwabwe okwa Aleyopaago nga bagamba nti, "Twagala okwongera okumanya ebikwata ku kuyigiriza kuno okuggyga,

²⁰kubanga oyogedde ebintu bingi ebyewuunyisa, noolwekyo twagala okwongera okumanya kye bitegeeza."

²¹Abaasene bona n'abagenyi abajjanga mu Asene, baayagalanga nnyo okumala ebiseera byabwe mu kukubaganya ebirowoozo ku bintu ebiggya bye baakawulira.

²²Awo Pawulo n'ayimirira mu maaso gaabwe mu Aleyopaago, n'abagamba nti, "Abasajja b'omu Asene! Ntegedde nga bwe muli abannaddiini ennyo;

²³kubanga bwe mbadde ntambulatambula ne ndaba ebyoto bya ssaddaaka bingi, ne ku kimu nga kuliko ebigambo bino nti: Kya Katonda Atamanyiddwa. Mubadde mumusinza nga temumumanyi, nange kaakano njagala mbamutegeeze.

²⁴"Katonda oyo ye yakola ensi n'ebintu byonna ebigirimu. Era olwokubanga ye Mukama w'eggulu n'ensi tabeera mu yeekaalu ezikolebwa n'emikono gy'abantu,

²⁵era abantu tebayinza kumuyamba mu byetaago bye, kubanga talina byetaago! Ye yennyini y'awa buli muntu obulamu n'omukka gw'assa n'ebintu byonna.

²⁶Ye yatonda abantu bona mu nsi, ng'abaggya mu muntu omu, n'abasaasaanya mu mawanga okubuna ensi yonna. N'ateekateeka amawanga agalisisituka n'agaligwa, era n'ebbunga lye galimala. Era n'agakolera n'ensalo zaago.

²⁷Yakola bw'atyo ng'ayagala abantu bona banoonye Katonda, nga bafuba okumuvumbula, okumuutuukako, newaakubadde nga buli omu ku ffe tamuli wala.

²⁸Kubanga mu ye mwe tubeera, era mwe tutambulira, era mwe muli obulamu bwaffe. Ng'omu ku bawandiisi bammwe bw'agamba nti, 'Tuli baana ba Katonda.'

²⁹"Obanga kino kya mazima nti tuli baana ba Katonda, tetusaana kumulowoozaako ng'ekibajje ekikoleddwa abantu oba ekintu ekyoleddwa mu zaabu oba ffeeza oba ekitemeddwa mu jjinja.

³⁰Edda mu biseera ebyayita Katonda yagumiikiriza obutamanya bw'omuntu ku bintu ng'ebyo, naye kaakano alagira abantu bona buli wantu okwenenya.

³¹Kubanga yateekawo olunaku, oyo gwe yalonda Iw'alisaalirako ensi yonna omusango mu bwenkanya. Era yamukakasa eri abantu bona kubanga yamuzuukiza mu bafu."

³²Awo bwe baawulira Pawulo ng'ayogera ku kuzuukira kw'abafu, abamu ne bamusekerera, abalala ne bamugamba nti, "Twandiyagadde okwongera okukuwuliriza ku nsonga eyo olulala."

³³Bw'atyo Pawulo n'afuluma mu lukuŋjaana Iwabwe.

³⁴Naye abamu ku bo ne bamugoberera ne bakkiriza Mukama waffe. Omwo mwe mwali Diyonusiyo Omwaleyopaago, n'omukazi erinnya lye Damali n'abalala.

Ebikolwa by'Abatume 18

Pawulo mu Kkolinso

¹Oluvannyuma lw'ebyo, Pawulo n'asitula okuva mu Asene n'alaga mu Kkolinso.

²Eyo gye yasisinkana omusajja Omuyudaaya erinnya lye Akula, eyazaalibwa mu Ponto, nga yaakava mu Italiya ne mukazi we Pulisikira, kubanga Kulawudiyo yali awadde ekiragiro okugoba Abayudaaya bona mu Ruumi.

³Olw'okuba nga baali bakola omulimu gwe gumu ogw'okukola weema, n'abeeranga nabo, era n'akolanga nabo.

⁴Buli lwa Ssabbiiti Pawulo yabeeranga mu kkuŋjaaniro ng'amatiza Abayudaaya n'Abayonaani.

⁵ Era Siira ne Timoseewo bwe baatuuka nga bava mu Makedoniya, Pawulo n'awaayo ekiseera kye kyonna mu kubuulira Ekigambo n'okukakasa Abayudaaya nti Yesu ye Kristo.

⁶ Naye Abayudaaya bwe baatandika okumuwakanya, era n'okuvvoola erinnya lya Yesu, n'akunkumula ebyambalo bye, n'abagamba nti, "Omusaayi gwammwe gubeere ku mitwe gyammwe! Nze ndi mulongoofu. Okuva kaakano nnaagendanga eri Abaamawanga."

⁷ Awo Pawulo n'ava eyo n'alaga mu nnyumba ya Tito Yusito, eyasinzanga Katonda, ng'amaka ge galiraanye n'ekkuŋŋaaniro.

⁸ Kulisupo, eyali omukulu w'ekkuŋŋaaniro, n'ennyumba ye yonna, ne bakkiriza Mukama waffe, n'abalala bangi ku Bakkolinso abaawulira ne bakkiriza era ne babatizibwa.

⁹ Awo ekiro kimu Mukama n'ayogera ne Pawulo mu kwolesebwa, n'amugamba nti, "Totya! Weeyongere okubuulira, so tosirika!

¹⁰ Kubanga ndi wamu naawe, tewali ayinza kukulumba n'akukola kabi. Era mu kibuga muno mulimu abantu bange bangi."

¹¹ Bw'atyo Pawulo n'abeerayo ebbanga lya mwaka mulamba n'ekitundu ng'ayigiriza ekigambo kya Katonda.

¹² Naye Galiyo bwe yalya obwagavana bwa Akaya, Abayudaaya ne beegatta wamu ne balumba Pawulo, ne bamukwata ne bamutwala mu mbuga z'amateeka ewa gavana okumusalira omusango.

¹³ Ne bamuwawaabira nti, "Omusajja ono asendasenda abantu okusinza Katonda mu ngeri etakkirizibwa mu mateeka."

¹⁴ Naye Pawulo bwe yali ng'atandika okuwoza, Galiyo n'akyukira Abayudaaya abaawaaba n'abagamba nti, "Muwulire, mmwe Abayudaaya. Singa omusango guno gubadde gumenya mateeka, nandibadde nteekwa okubawuliriza.

¹⁵ Naye ensonga zammwe nga bwe zifa ku nkозesa y'ebigambo n'amannya, era nga zikwata ku mateeka gammwe, kirungi mmwe muzeemalire. Nze saagala kusala musango gw'ebyo."

¹⁶ Bw'atyo n'abagoba mu mbuga z'amateeka.

¹⁷ Awo bona ne bakyukira Sossene, eyali omukulembeze omuggya ow'ekkuŋŋaaniro, ne bamukwata, ne bamukubira awo mu maaso g'embuga z'amateeka. Kyokka Galiyo teyabafaako.

Pulisikira ne Akula

¹⁸ Pawulo n'amala mu kibuga omwo ennaku eziwerako, oluvannyuma n'asiibula abooluganda n'asaabala ku nnyanja n'agenda e Siriya, ng'atutte

Pulisikira ne Akula. Naye yali tannasaabala, enviiri ze ne bazisalirako e Kenkereya olw'obweyamo bwe yali akoze.

¹⁹Bwe baatuuka mu Efeso, banne n'abaleka awo n'agenda n'akubaganya ebirowoozo n'Abayudaaya mu kkuuŋjaaniro.

²⁰Ne bamusaba abeere nabo ennaku eziwerako, naye n'atakkiriza.

²¹N'abagamba nti, "Nsaana okugenda ndyoke nsobole okubaawo ku mbaga ejja mu Yerusaalemi." Kyokka n'abasuubiza nti agenda kukomawo mu Efeso nga Katonda amukkirizza. Bw'atyo n'asaabala ku nnyanja okuva mu Efeso.

²²Pawulo bwe yagoba mu Kayisaliya, n'akyalira Ekkanisa n'oluvannyuma n'aserengeta mu Antiyokiya.

²³Eyo n'amalayo ekiseera, n'asitula n'atambula n'ayitaayita mu bibuga ebiri mu bitundu bya Ggalatiya ne Fulugya, ng'akyalira abayigirizwa bona ng'abanyweza mu kukkiriza.

Apolo mu Efeso ne mu Kkolinso

²⁴Waaliwo Omuyudaaya erinnya lye Apolo, nga yazaalibwa mu Alegezanderiya eky'omu Misiri, n'atuuka mu Efeso. Yali musajja muyigirize nnyo, era ng'amanyi nnyo Ebyawandiikibwa.

²⁵Yali ayigirizibbwaa Ekkubo lya Mukama, nga w'amaanyi mu mwoyo, era yayogeranga n'ayigiriza bulungi byonna ebifa ku Yesu, wabula ng'amanyi kubatizibwa kwa Yokaana kwokka.

²⁶N'atandika okubuulira n'obuvumu mu kkuuŋjaaniro. Awo Pulisikira ne Akula bwe baamuwlira, ne bamuyita mu maka gaabwe ne bamunyyonnyola bingi eby'Ekkubo lya Katonda.

²⁷Awo Apolo n'ayagala okuwunguka agende mu Akaya mu Buyonaani, n'abooluganda ne bamuwagira nnyo mu kirowoozo ekyo. Ne bawandiikira bannaabwe abakkiriza mu Buyonaani bamwanirize n'essanyu. Era bwe yatuuka mu Buyonaani, Katonda n'amukozesa nnyo mu kunyweza Ekkanisa,

²⁸kubanga yasambajja n'amaanyi mangi ensonga Abayudaaya ze baaleetanga nga bawakanya Enjiri mu bantu, n'asinziiranga mu Byawandiikibwa okulaga nti ddala Yesu ye Kristo.

Ebikolwa by'Abatume 19

Pawulo mu Efeso

¹Awo Apolo ng'ali mu Kkolinso, Pawulo n'atambula ng'ayita ku lukalu n'alaga mu Efeso. N'asangayo abayigirizwa bangiko,

²n'ababuuza nti, "Bwe mwakkiriza mwafuna Mwoyo Mutukuvu?" Ne bamuddamu nti, "Nedda tetuwuliranga nti waliwo Mwoyo Mutukuvu."

³N'ababuuza nti, "Kale mwabatizibwa kuyingira mu ki?" Ne bamuddamu nti, "Twakkiriza ebyo Yokaana Omubatiza bye yatuyigiriza."

⁴Awo Pawulo n'abagamba nti, "Yokaana yabatiza okubatiza okw'okwenenya eri abantu ng'agamba nti agenda okujja oluvannyuma lwe bamukkirize. Kino kitegeeza nti ye Yesu."

⁵Bwe baawulira ebyo, ne babatizibwa mu linnya lya Mukama waffe Yesu.

⁶Pawulo bwe yabassaako emikono gye, Mwoyo Mutukuvu n'abakkako, ne batandika okwogera ennimi endala era n'okuwa obunnabbi.

⁷Bonna baali abantu nga kkumi na babiri.

⁸Pawulo n'ayingiranga mu kkuuŋjaaniro buli lwa Ssabbiiti ng'abuulira n'obuvumu bungi okumala emyezi esatu, n'abategeezanga ekyo ky'akkiriza era n'ensonga kyava akkiriza, n'asendasenda bangi okukkiriza ebintu by'obwakabaka bwa Katonda.

⁹Naye abamu ne bakakanyaza emitima gyabwe ne bagaana, ne batandika n'okwogera obubi ku Kkubo mu bibiina. Pawulo n'abaviira, n'atwala abakkiriza, ne bakuŋjaaniranga mu kisenge ky'essomero lya Tulaano buli lunaku.

¹⁰Ne bamala emyaka ebiri n'okusingawo nga bakola bwe batyo, era Abayudaaya bona n'Abayonaani bona abaabeeranga mu kitundu ekyo ekya Asiya ne bawulira ekigambo kya Mukama.

Batabani ba Sukewa

¹¹Katonda n'akozesanga Pawulo eby'amagero eby'ekitalo.

¹²Obutambaala bwe n'ebiwero eby'engoye ze bwe byabikkibwanga ku balwadde nga bawona, era abaabangako baddayimooni nga babavaako.

¹³Waaliwo Abayudaaya abaagendanga nga bagoba baddayimooni ku bantu mu buli kibuga, ne bagezaako okukozesa erinnya lya Mukama waffe Yesu, nga bagamba dayimooni ali ku mulwadde nti, "Mu linnya lya Yesu, Pawulo gw'abuulira, nkulagira omuveeko."

¹⁴Waaliwo batabani ba Sukewa, eyali kabona omukulu Omuyudaaya, musanvu, nabo abaakolanga bwe batyo.

¹⁵Bwe baakigezaako ku musajja eyaliko dayimooni, dayimooni n'abagamba nti, "Yesu mmumanyi, ne Pawulo mmumanyi, naye mmwe, mmwe b'ani?"

¹⁶N'ababuukira n'abasinza amaanyi bona, n'abataagulataagula nnyo, ne bafubutuka mu nnyumba nga bali bwereere, era nga baliko ebiwundu.

¹⁷ Ebigambo ebyo ne bibuna mangu mu Bayudaaya ne mu Bayonaani abaali mu Efeso, era bona ne bakwatibwa entiisa nnene, n'erinnya lya Mukama waffe Yesu ne liweebwa ekitiibwa kingi.

¹⁸ Bangi mu abo abakkiriza ne beenenya ebibi byabwe mu lwatu ne baatula n'ebikolwa byabwe.

¹⁹ Abamu abaali abalogo ne baleeta ebitabo byabwe ne babyokya ng'abantu bona balaba. Bwe baabalirira omuwendo gw'ensimbi mu bitabo ebyayokebwa, nga guwera nga siringi emitwalo kkumi.

²⁰ Awo ekigambo kya Mukama ne kyeyongera okubuna mu maanyi n'okunywera.

Akasasamalo mu Efeso

²¹ Oluvannyuma lw'ebyo okutuukirira Pawulo n'alowooza mu mutima okugenda e Yerusaalemi ng'ayitira mu Makedoniya ne mu Akaya. N'agamba nti, "Bwe ndiva eyo kinsaanira nkyaleko ne mu Ruumi."

²² N'asindika babiri ku baamuyambanga, Timoseewo ne Erasuto e Makedoniya, ye n'asigala mu kitundu kya Asiya okumala ebbanga.

²³ Mu kiseera ekyo ne wabaawo akasasamalo ak'amaanyi ku bigambo by'ekkubo.

²⁴ Waaliwo omusajja erinnya lye Demeteriyo, yali muweesi wa bintu bya ffeeza, era nga y'akola obusabo obwa ffeeza obwa Atemi obwaleetanga amagoba mangi.

²⁵ Awo Demeteriyo n'ayita abakozi be bona wamu n'abo abakola emirimu egikwatagana n'egigye, ne bakuba olukunjaana. N'alyoka ayogera nabo nti, "Mumanyi nti mu mulimu guno mwe tuggya obugagga."

²⁶ Kale kaakano, nga mwenna bwe mulabye ne bwe muwulidde, omusajja ono Pawulo asenzesenze abantu bangi nnyo wano mu Efeso ne mu Asiya, okubakkirizisa nti bakatonda abakolebwa n'emikono si bakatonda.

²⁷ Kino kya kabi gye tuli naye si mu Efeso mwokka naye ne mu kitundu kyonna ekya Asiya ne ku yeekaalu ya Atemi ne ku mukazi Oweekitiibwa Atemi. Kubanga ettutumu ly'alina liija kumuggwaako, mu bitundu byonna ebya Asiya ne mu nsi gy'asinzbwa."

²⁸ Awo bwe baawulira ebyo, ne basunguwala, ne batandika okuleekaana nti, "Atemi ow'Abaefeeso ye Mukulu!"

²⁹ Ekibuga ne kijjula akayuugumo, abantu bona ne badduka nga balaga mu kifo omwazanyirwanga emizannya nga bwe basikaasikanya Gayo ne Alisutaluuko, abaatambulanga ne Pawulo, babatwale babawozese.

³⁰Pawulo n'ayagala naye okuyingira mu kibiina, kyokka abayigirizwa ne batamukkiriza.

³¹N'abamu ku b'omu Asiya, abaali mikwano gya Pawulo, ne bamutumira aleme kwewaayo kuyingira mu kifo omwazanyirwanga emizannyo.

³²Abantu abaali munda ne bamala galeekaana, ng'abamu boogera kino n'abalala kiri kubanga ekibiina kyali kitabusetabuse. Abasinga obungi nga n'okumanya tebamanyi nsongya yennyini ebakunjaanyisizza.

³³Abayudaaya abamu bwe baalengera Alegezanda ng'ali mu kibiina ne bamusika okumuleeta mu maaso. N'akoma ku bantu basirike abeeko ky'abagamba.

³⁴Naye ekibiina bwe kyategeera nga Muyudaaya, bona ne baddamu buto okuleekaana nti, "Atemi ow'Abaefeeso ye Mukulu!" Ne bakiddijjana emirundi n'emirundi okumala ng'essaawa bbiri nnamba.

³⁵Awo omukulu w'ekibuga n'abasirisa n'ayogera nabo nti, "Abasajja Abaefeso, buli muntu yenna amanyi nti Efeso mwe mukuumirwa essabo ekkulu ery'omukulu Atemi, gwe tumanyi ng'ekifaananyi ekyava mu ggulu.

³⁶Olw'okubanga ebyo tewali abiwakanya, temusaana kwecanga olw'ebyo ebyogerwa, era temusaana kwanguyiriza kukola kya bulabe.

³⁷Kale muleese wano abasajja bano abatabbye kintu kya Atemi n'ekimu, wadde okumunyoomoola.

³⁸Obanga Demeteriyo n'abakozi be balina ensonga ze bavunaana abasajja bano, embuga z'amateeka weeziri era abalamuzi bajja kuyingira mangu mu nsongya zaabwe. Kirungi bakwate amakubo amatongole.

³⁹Obanga waliwo abeemulugunya ku nsongya endala, ebyo biyinza okutereebwa mu Lukiko lw'Ekibuga olwa bulijo.

⁴⁰Kubanga singa tettwegendereza, tujja kuvunaanibwa olw'akasasamalo ka leero, kubanga tetujja kuba na kya kwogera."

⁴¹Awo n'abasiibula, ne basaasaana.

Ebikolwa by'Abatume 20

Okuyita mu Makedoniya ne mu Buyonaani

¹Awo akasasamalo bwe kakkakkana, Pawulo n'atumya abayigirizwa, ne bakuunjaana, n'ababuulira ekigambo kya Katonda ng'abasiibula n'okubagumya, n'alyoka asitula n'alaga mu Makedoniya.

²N'agenda ng'ayitaayita mu bitundu ebyo ng'ayogera n'abantu ebiligambo bingi eby'okubagumya n'okubanyiikiza mu kukkiriza kwabwe. Oluvannyuma n'atuuka mu Buyonaani,

³n'amalamu emyezi esatu. Bwe yali ateekateeka okusaabala ku nnyanja okulaga mu Siriya, n'avumbula olukwe Abayudaaya lwe baali basaze okumutta, kyeyava asalawo okuddayo mu Makedoniya gy'aba ayita.

⁴Abaamuwerekerako mu lugendo olwo okutuuka mu Asiya, be bano: Sopateri Omuberoya mutabani wa Puulo, ne Alisataluuko ne Sekundo Abasessalonika, ne Gaayo Omuderube, ne Timoseewo, n'Abasiya, Tukiko ne Tulofimo.

⁵Oluvannyuma bano bona ne batukulembera ne batulinda e Tulowa.

⁶Ne tusaabala ku nnyanja okuva e Firipi nga tumaze embaga ey'Emigaati Egitazimbulukuswa, ne tumala ku nnyanja ennaku ttaano, bannaffe ne tubatuukako mu Tulowa ne tumalawo ennaku musanvu.

Pawulo Azuukiza Yutuko mu Tulowa

⁷Awo olumu ku nnaku za ssabiiti, bwe twali tukuŋjaanye okumenya omugaati, Pawulo n'abaako bye yali abayigiriza. Naye olwokubanga enkeera yali asitula, n'ayogerera ebbanga ddene nnyo, n'atuusa mu ttumbi ng'akyayogera!

⁸Mu kisenge ekya waggulu mwe twali tukuŋjaanidde mwalimu ettaala nnyingi nga zaaka.

⁹Waaliwo omuvubuka erinnya lye Yutuko, eyali atudde mu ddirisa, otulo ne tumukwata. Pawulo bwe yalwawo ng'akyayogera, omuvubuka ne yeebakira ddala, okutuusa lwe yasimattuka mu ddirisa ku mwaliiro ogwokusatu n'agwa ebweru n'afiirawo.

¹⁰Pawulo n'akka wansi n'amusitula n'amuwambaatira mu mikono gye. N'agamba nti, "Temweraliikirira, mulamu!"

¹¹Awo bona ne baddayo waggulu ne bamanya omugaati ne balya. Pawulo ne yeyongera okwogera okutuusiza ddala obudde okukya, n'alyoka asitula n'agenda.

¹²Ne baddamu amaanyi, n'omuvubuka ne bamutwala eka nga mulamu.

¹³Awo Pawulo ne tumukulembera ne tusaabala ku nnyanja okulaga mu Aso, Pawulo nga bwe yali ateeseteese, kubanga ye yali ateeseteese kuyita ku lukalu.

¹⁴Bwe yatusisinkana mu Aso, ne tutuuka e Mituleene.

¹⁵Bwe twava eyo ne tuwunguka olunaku olwaddirira ne tutuuka mu kifo ekyolekedde Kiyo. Ne ku lunaku olwaddirira ne tusala ne tudda e Samo, ne ku lunaku olwaddirira ne tutuuka e Mireeto.

¹⁶Pawulo yali asazeewo obutayimirira mu Efeso nga yeewala okumala ekiseera ekinene mu Asiya, kubanga yali yeeyuna nti ssinga asobola, atuuke mu Yerusaalemi ng'olunaku lwa Pentekoote terunnatuuka.

¹⁷Bwe yatuuka e Mireeto, n'atumira abakadde b'Ekkanisa ya Efeso bajje bamulabe.

¹⁸Awo bwe baatuuka Pawulo n'agamba nti, "Mumanyi bulungi ng'okuva ku lunaku lwe natuukirako mu Asiya n'okutuusa leero,

¹⁹nkoze omulimu gwa Mukama mmuweereza n'obuwombeefu n'amaziga n'okugezesebwa ebyantukako olw'enkwe z'Abayudaaya.

²⁰Naye saalekayo kubabuulira bituufu eby'okubayamba, bwe twabanga tukuŋŋaanye oba bwe najjanga mu maka gammwe,

²¹nga ntegeeza Abayudaaya n'Abayonaani okwenenya badde eri Katonda, n'okuba n'okukkiriza mu Mukama waffe Yesu.

²²"Ne kaakano laba nsibiddwa Mwoyo Mutukuvu, ηnjenda e Yerusaalemi nga simanyi binaantukako nga ndi eyo.

²³Wabula Mwoyo Mutukuvu antegeeza nti okusibibwa n'okubonyaabonyezebwa binnindiridde mu buli kibuga.

²⁴Naye obulamu bwange sibutwala kuba nga kya muwendo gye ndi, ndyoke ntuukirize omulimu gwange, n'obuweereza bwe nnaweebwa Mukama waffe Yesu, okutegeezanga Enjiri ey'ekisa kya Katonda.

²⁵"Ne kaakano mmanyi nga temukyaddayo kundaba nate, mwenna be natambulamu nga mbuulira obwakabaka.

²⁶Noolwekyo mbategeeza leero nti sirina kyenvunaanwa olw'omusaayi gwa bona,

²⁷kubanga sirina na kimu kye nalekayo nga mbabuulira okwagala kwa Katonda.

²⁸Mwekumenga era mukuumenga n'ekisibo kyonna Mwoyo Mutukuvu mwe yabateeka okuba abalabirizi okulabiriranga Ekkanisa ya Katonda gye yeegulira n'omusaayi gwe.

²⁹Mmanyi nga bwe ndigenda, emisege emikambwe giribayingiramu, era tegirisaasira kisibo.

³⁰Ne mu mmwe bennyini mulivaamu abasajja aboogera ebintu ebikyamu, okwefunira abayigirizwa abanaabagobereranga.

³¹Noolwekyo mwekuume. Mujukire nga bwe nababuulirira nga nkaaba amaziga okumala emyaka esatu, emisana n'ekiro, ne mundeeta n'amaziga.

³² “Kaakano mbasigira Katonda n’ekigambo eky’ekisa kye ebiyinza okubazimba n’okubawa omugabo mu abo bona abaatukuzibwa.

³³ Siyaayaaniranga ffeeza newaakubadde zaabu wadde engoye eby’omuntu n’omu.

³⁴ Mmwe bennyini mumanyi nti neetuusizaako ebyetaago byange n’eby’abo bendi nabo.

³⁵ Mbalaze mu buli kintu nga mu kukola n’amaanyi, kibagwanira okuyamba abanafu, ate n’okujjukira ebigambo bya Mukama waffe Yesu bye yayogera nti, ‘Okugaba kwa mukisa okusinga okuweebwa.’”

³⁶ Awo Pawulo bwe yamala okwogera ebyo, n’afukamira n’asaba nabo bona.

³⁷ Buli omu n’akaaba nnyo amaziga, ne bamugwa mu kifuba okumusiibula,

³⁸ nga banakuwawu, naye okusinga byonna olw’ekigambo kye yayogera nti, Tebakyyaddayo kumulaba. Ne bamuwerekero ne bamutuusa ku kyombo.

Ebikolwa by’Abatume 21

Pawulo Agenda e Yerusaalemi

¹ Awo bwe twamala okusiibulagana ne tuseeyeeya butereevu okutuuka e Koosi. Olunaku olwaddirira ne tutuuka e Rodise, we twava okulaga e Patala.

² Okuva awo twagendera mu kyombo ekyali kigenda mu Foyiniikiya.

³ Ne tulengera ekizinga Kupulo, ne tukiyitako nga tukirese ku mukono gwaffe ogwa kkono, ne tuseeyeeya ne tugoba ku mwalo gw’e Ttuulo mu Siriya, kubanga ekyombo we kyali kigenda okutikkulirwa ebintu.

⁴ Bwe twava mu kyombo ne tunoonya abayigirizwa ne tubeera nabo ennaku musanvu. Mwoyo Mutukuvu n’ayogerera mu bayigirizwa abo ne balabula Pawulo aleme kugenda Yerusaalemi.

⁵ Ennaku ezo bwe zaggwaako ne tusitula. Abayigirizwa ne bakyala baabwe n’abaana baabwe ne batuwerekero okutuggya mu kibuga okututuusiza ddala ku mwalo. Awo ffenna ne tufukamira ne tusaba.

⁶ Bwe twamala okusaba ne tusiibulagana. Ffe ne tuyingira ekyombo kyaffe, ne bannaffe ne baddayo ewaabwe.

⁷ Bwe twava e Ttuulo ne tugoba e Potolemaayi, ne tulamusaganya n’abakkiriza, ne tumala nabo olunaku lumu.

⁸ Enkeera ne tweyongerayo okutuuka e Kayisaliya, ne tubeera mu maka ga Firipo Omubuulizi w’Enjiri, eyali omu ku badiikoni omusanvu abaasooka.

⁹Yalina abaana be abawala abaali batannafumbirwa bana nga balina ekirabo eky'obunnabbi.

¹⁰ Ne tumalawo ennaku eziwerako, ne wajja nnabbi erinnya lye Agabo ng'ava Buyudaaya.

¹¹Bwe yajja okutulaba, n'addira olukoba lwa Pawulo ne yeesiiba amagulu n'emikono, n'agamba nti, "Mwoyo Mutukuvu ayogera nti, 'Bw'ati nannyini lukoba luno bw'alisiibwa Abayudaaya mu Yerusaalemi ne bamuwaayo mu mikono gy'Abamawanga."

¹²Bwe twawulira ebigambo ebyo ffenna awamu n'abatuuze b'omu kitundu ekyo ne twegayirira Pawulo aleme kugenda Yerusaalemi.

¹³Naye Pawulo n'addamu nti, "Lwaki mukaaba n'okwagala okunnafuya omutima? Kubanga seeteeseteese kusibibwa kyokka, naye neetegese n'okufiira mu Yerusaalemi olw'erinnya lya Mukama waffe Yesu."

¹⁴Bwe twalaba nga tekisoboka kumukkirizisa butagenda, ne tubivaako, ne tugamba nti, "Mukama ky'ayagala kye kiba kikolebwa."

¹⁵Bwe waayitawo ennaku ntono ne tusiba ebintu byaffe, ne tusitula okulaga mu Yerusaalemi.

¹⁶Abamu ku bayigirizwa ab'e Kayisaliya ne batuwerekero, bwe twatuuka ne tubeera mu maka ga Munasoni, edda eyabeeranga e Kupulo era nga yali omu ku bantu abaasooka okukkiriza.

¹⁷Bwe twatuuka mu Yerusaalemi abooluganda ne batwaniriza n'essanyu lingi nnyo.

Pawulo Akyalira Yakobo

¹⁸Awo enkeera ffenna ne tugenda ne Pawulo ng'agenda okulaba Yakobo, n'abakadde b'Ekklesia y'omu Yerusaalemi bona baaliwo.

¹⁹Okulamusaganya bwe kwaggwa, Pawulo n'abategeeza kinnakimu byonna Katonda bye yamukoza ng'aweereza mu baamawanga.

²⁰Bwe baabiwulira byonna ne batendereza Katonda, naye ne bagamba Pawulo nti, "Owooluganda, omanyi ng'Abayudaaya nkumi na nkumi bakkiriza, era nga bona bakakatira ku kimu nti Abayudaaya bona wadde abakkiriza basaana okugoberera amateeka, n'empisa, n'obulombolombo, eby'Ekiyudaaya.

²¹Baategeezebwa nti oyigiriza Abayudaaya bona abali mu Bamawanga okuleka amateeka ga Musa baleme okukomola abaana baabwe wadde okugoberera empisa z'Ekiyudaaya.

²²Kale kaakano kiki ekinaakolebwa? Kubanga awatali kubuusabuusa bajja kutegeera nti ozze.

²³Kale waliwo wano abasajja bana abali ku kirayiro, abateekateeka okumwa emitwe gyabwe nga beerongoosa.

²⁴Genda nabo mu Yeekaalu weerongooseze wamu nabo, era obasasulire ensimbi ez'okumwa emitwe gyabwe. Kale buli omu ajja kukiraba era abantu bona bajja kutegeera nti okiriziganya n'okukuma amateeka, n'ebyo bye bakwogerako tebirii mu nsa.

²⁵Ku nsonga z'Abamawanga abakkiriza, twabawandikira nga tubagamba baleme kugoberera bulombolombo bwa Kiyudaaya n'akatono wabula ebyo bye twassa mu bbaluwa yaffe era bye bino; obutalya nnyama ya bisolo ebiweereddwayo eri bakatonda abalala, n'obutalya ebitugiddwa oba okulya omusaayi, era n'okwewala obwenzi."

²⁶Ku lunaku olwaddirira Pawulo n'atwala abasajja okwerongoosa, naye ne yeerongoosa nabo. N'ayingira mu Yeekaalu okutegeera olunaku ekiseera ky'okwerongoosa eky'ennaku omusanvu we kiriggweerako, olwo buli omu alyoke atwaleyo ekiweebwayo kye.

Pawulo Akwatibwa

²⁷Awo ekiseera eky'ennaku omusanvu bwe kyali kiri kumpi okuggwaako, ne wabaawo Abayudaaya abaava mu Asiya ne balaba Pawulo mu Yeekaalu, ne basasamaza ekibiina kyonna, ne bakwata Pawulo

²⁸nga bwe baleekaana nti, "Abasajja Abayisirayiri! Mutuyambe! Ono ye musajja agenda ayogera obubi ku ggwanga lyaffe ne ku mateeka gaffe ne ku kifo kino, ng'ayigiriza buli muntu buli wantu. Era ayonoonye Yeekaalu yaffe ng'agreetamu Abayonaani."

²⁹Kubanga baamulabako ng'atambula mu kibuga ne Tulofimo, eyava mu Efeso, ne balowooza nti Pawulo yamutwala ne mu Yeekaalu.

³⁰Ekibuga kyonna ne kijagalala olw'okuwulira ebiligambo ebyo, era abantu ne bajja nga badduka okuva mu buli nsonda y'ekibuga. Ne bakwata Pawulo ne bamufulumya ebweru wa Yeekaalu, amangwago ne baggalawo enzigi.

³¹Naye bwe baayagala okumutta, amawulire ne gatuuka ku mukulu w'ekitongole ky'abaserikale Abarumi nti Yerusaalemi kiguddemu akeegugungo.

³²Amangwago n'asindika abaserikale n'abaduumizi baabwe, ne badduka okugenda eri ekibiina ky'abantu. Awo bwe baalaba omuduumizi n'abaserikale nga bajja, ne balekeraawo okukuba Pawulo.

³³Awo omukulu w'abaserikale n'akwata Pawulo n'alagira asibibwe mu njegere bbiri, n'alyoka abuuza nti, "Y'ani, era akoze ki?"

³⁴Ne bamuddamu nga baleekaana, ng'abamu bamugamba kino n'abalala nga bagamba kiri. N'alemwa okubaako ekiramu ky'aggyamu olw'okuleekaana okungi. Kyeyava alagira batwale Pawulo mu nkambi y'abaserikale.

³⁵Bwe yamutuusa ku madaala, ekibiina ky'abantu ne bayitirira obukambwe, abaserikale ne basitula Pawulo.

³⁶Ekibiina ky'abantu abaali bagoberera ne boogera mu ddoboozi ery'omwanguka nti, "Mumutte!"

Pawulo Ayogera n'Ekibiina

³⁷Awo abaserikale bwe baali bagenda okuyingiza Pawulo mu nkambi yaabwe, n'asaba omukulu waabwe nti, "Onzikiriza mbeeko kye nkugamba?" N'amuddamu nti, "Omanyi n'Oluyonaani?

³⁸Ye si ggwe Mumisiri eyajeemesa abantu mu nnaku ezayita, n'okulembera abatemu enkumi nnya n'obalaza mu ddungu?"

³⁹Pawulo n'addamu nti, "Nedda, nze ndi Muyudaaya, ewaffe Taluso ekiri mu Kirukiya, ekibuga ekitanyoomebwa, era omutuuze. Nkwegayiridde nzikiriza njogere n'abantu bano."

⁴⁰Awo omuduumizi w'abaserikale kwe kumukkiriza, Pawulo n'ayimirira ku madaala n'akoma ku bantu basirike, amangwago ekibiina kyonna ne kisiriikirira, n'alyoka ayogera nabo mu Lwebbulaniya ng'abagamba nti:

Ebikolwa by'Abatume 22

¹"Abasajja abooluganda, ne bakadde bange, mumpulirize."

²Bwe baawulira ng'ayogera Lwebbulaniya ne beeyongera okusirikira ddala.

³Pawulo n'abagamba nti, "Ndi Muyudaaya, nazaalibwa mu kibuga Taluso eky'omu Kirukiya, naye ne nkulira wano mu Yerusaalemi. Era mu kibuga muno mwe nayigira ne nzijjumbira amateeka gonna aga bajjajaffe n'obwegendereza, nga njigirizibwa Gamalyeri. Nafubanga nnyo okuweesa Katonda ekitiibwa mu buli kye nakolanga, nga nammwe bwe mukola leero.

⁴Nayigganya abantu b'Ekkubo n'okubatuusa ku kufa, ne nkwata abasajja n'abakazi ne mbasibisa mu kkomera.

⁵Era Kabona Asinga Obukulu n'ab'Olukiiko Olukulu be bajulirwa bange. Kubanga nabasaba bawandiikire bannaabwe mu Damasiko ebbaluwa okunnyamba nkuate abaali eyo mbaleete wano mu Yerusaalemi nga mbasibye mu njegere mbaweyo babonerezebwe.

⁶"Naye mu ssaawa ez'omu ttuntu bwe nnali nga nsemerera Damasiko, amangwago ekitangaala eky'amaanyi ekyava mu ggulu ne kinjakira okunneetooloola.

⁷Ne ngwa wansi ku ttaka, ne mpulira eddoboozi nga linjambala nti, ‘Sawulo, Sawulo, onjigganyiza ki?’

⁸“Ne mbuuza nti, ‘Ani, Mukama wange?’ “N’anziramu nti, ‘Nze Yesu Omunnazaaleesi gw’oyigganya.’

⁹Be nnali nabo baalaba ekitangaala, naye eddoboozi ly’oyo eyayogera nange tebaaliwulira.

¹⁰“Ne mmubuuza nti, ‘Nkole ki, Mukama wange?’ “Mukama waffe n’anziramu nti, ‘Yimuka ogende mu Damasiko, bw’onootuuka eyo ojja kutegeezewa byonna bye nkutumye okukola.’

¹¹Bannange ne bankwata ku mukono ne bannyingiza mu Damasiko, kubanga ekitiibwa ky’ekitangaala kiri eky’amaanyi kyali kinzibye amaaso.

¹²“Omusajja omu ayitibwa Ananiya, ng’atya Katonda era ng’agondera amateeka gonna ag’Ekiyudaaya, n’Abayudaaya bona mu Damasiko nga bamussaamu ekitiibwa,

¹³n’ajja okundaba n’ayimirira we ndi n’anjambala nti, ‘Owooluganda Sawulo, zibuka amaaso!’ Mu ssaawa eyo yennyini ne nsobola okumulaba!

¹⁴“Awo n’anjambala nti, ‘Katonda wa bajajjaffe akulonze otegeere by’ayagala era olabe Omutuukirivu we, era owulire okuyitibwa okuva mu kamwa ke.

¹⁵Olituusa obubaka bwe mu bantu bona ng’obategeeza by’olabye era ne by’owulidde.

¹⁶Kaakano olinda ki? Situka obatizibwe onaazibweko ebibi byo nga bw’oyatudde erinnya lye.’

¹⁷“Ne nkomawo mu Yerusaalemi. Naye olunaku lumu bwe nnali mu Yeekaalu nga nsaba, ne mbeera ng’eyeebase,

¹⁸ne nfunu okwolesebwa ne ndaba Mukama waffe ng’ayogera nange, n’anjambala nti, ‘Yanguwa mangu ove mu Yerusaalemi, kubanga abantu ba wano tebajja kukkiriza bubaka bwo bw’onoobategeeza obufa ku nze.’

¹⁹“Ne nziramu nti, ‘Naye Mukama wange, abantu bona bamanyi nga bwe nagendanga mu buli kkuinjaaniro ne nzigamu abakukkiriza, ne mbatwala ne bakubwa emiggo n’okusibibwa ne basibibwa mu kkomera.

²⁰Era n’omujulirwa wo Suteefano bwe yali attibwa nnali nnyimiridde awo era nga mpagira okuttibwa kwe, era nga ndabirira engoye z’abo abaali bamutta.’

²¹“Naye Mukama waffe n’anjambala nti, ‘Vva mu Yerusaalemi, kubanga nzija kukutuma mu bitundu bye wala mu baamawanga!’ ”

Pawulo Omuruumi

²² Ekibiina ky'abantu ne bawuliriza Pawulo okutuusa lwe yatuuka ku bigambo ebyo, bona ne balyoka baleekaanira wamu nti, "Mumuggyeewo! Mumutte! Tasaanira kuba mulamu!"

²³ Ne bawowoggana nnyo nga bwe bakasuka n'engoye zaabwe waggulu mu bbanga, ne bayoola enfuufu nga bagiyiwa mu bbanga.

²⁴ Omukulu w'abaserikale n'ayingiza Pawulo munda mu nkambi yaabwe, n'alagira akubwemu embooko nga bwe bamubuuza ayogere omusango gwe yazzizza oguleetedde ekibiina kyonna okwecwacwana.

²⁵ Bwe baali bamugalamizza nga bagenda okumusiba bamukube, Pawulo n'abuuza omuserikale eyali amuyimiridde okumpi nti, "Amateeka gabakkiriza okukuba omuntu Muruumi nga temunnaba na kumuwozesza?"

²⁶ Omuserikale n'agenda eri omuduumizi waabwe n'amutegeeza nti, "Kiki kino ky'ogenda okukola? Omusajja ono Muruumi."

²⁷ Omuduumizi w'abaserikale n'ajja n'abuuza Pawulo nti, "Mbulira, oli Muruumi?" Pawulo n'amuddamu nti, "Yee, bwe kiri."

²⁸ Omuduumizi w'abaserikale n'amugamba nti, "Nange ndi Muruumi, naye nabussasulira ensimbi nnyingi." Pawulo n'amuddamu nti, "Nze mwe nazaalirwa!"

²⁹ Abaserikale abaali beetegese okumubuuza ne baseebulukuka ne bavaawo bwe baategeera nga Pawulo Muruumi, n'omuduumizi waabwe naye n'atya nnyo kubanga yali alagidde okumusiba n'okumukuba kibooko.

³⁰ Enkeera omuduumizi w'abaserikale bwe yay gala okumanyira ddala ensonga Abayudaaya gye bamulanze, n'asumulula Pawulo mu njegere, n'alagira bakabona abakulu bayite Olukiiko lw'Abayudaaya Olukulu lutuule. N'alagira Pawulo aleetebwe mu Lukiko ensonga Abayudaaya gye bamuvunaana eryoke etegeerebwe.

Ebikolwa by'Abatume 23

¹ Awo Pawulo n'atunuulira Olukiiko enkaliriza, n'agamba nti, "Baganda bange, obulamu bwange bwonna mbadde ntambulira mu makubo ga Katonda okutuusiza ddala ne ku lunaku lwa leero."

² Bwe yayogera atyo, Ananiya, Kabona Asinga Obukulu, n'alagira abo abayimiridde okumpi ne Pawulo bamukubemu oluyi ku mimwa.

³ Pawulo n'amugamba nti, "Naawe Katonda agenda kukukuba oluyi, oli ng'ekisenge ekiva okusiigibwa ennoni! Oli mulamuzi ki ggwe amenya amateeka ng'olagira bankube mu ngeri eyo, so ng'osuubirwa okugagoberera ng'onsalira omusango?"

⁴Abo abaali bayimiridde okumpi ne Pawulo ne bamugamba nti, “Bw’otyo bw’oyogera ne Kabona Asinga Obukulu owa Katonda?”

⁵Pawulo n’addamu nti, “Baganda bange, sitegedde nga ye Kabona Asinga Obukulu, kubanga Ebyawandiikibwa bigamba nti, ‘Toyogeranga bubi ku bafuzi bammwe.’”

⁶Awo Pawulo bwe yalaba ng’abamu abali mu Lukiko Basaddukaayo n’abalala nga Bafalisaayo, n’ayogerera mu ddoboozi ery’omwanguka eri olukiiko nti, “Baganda bange, nze ndi Mufalisaayo, ne bakadde bange Bafalisaayo! Kaakano mpozesebwa lwa kubanga nzikiriza nga waliwo okuzuukira kw’abafu!”

⁷Bwe baawulira ebyo, Olukiiko ne lwawukanamu wabiri ne wabaawo empaka za maanyi wakati w’Abaflisaayo n’Abasaddukaayo,

⁸kubanga Abasaddukaayo bagamba nti tewali kuzuukira wadde bamalayika, wadde omwoyo ogutafa, naye bo Abafalisaayo ebyo byonna babikkiriza.

⁹Awo empaka ne zikwata wansi ne waggulu, abamu ku bannyonnyozi b’amateeka, nga ba mu kibiina kya Bafalisaayo, ne beekubira ku ludda Iwa Pawulo nga bagamba nti, “Ffe tetulaba kisobyo kyonna omusajja ono ky’akoze. Obanga malayika yayogera naye, oba Mwoyo, ogwo nagwo guba musango?”

¹⁰Ne beeyongera nnyo okuwakana ng’abamu Pawulo bamusika bamulaza eno, ng’abalala bamulaza eri. Okutuusa omuduumizi w’abaserikale lwe yatandika okutya ng’alaba Pawulo baagala kumuyuzaamu wabiri, n’alagira abaserikale be bagende bamubaggyeko n’amaanyi bamuzzeeyo munda mu nkambi yaabwe.

¹¹Ekiro ekkyo Mukama waffe n’ayimirira awali Pawulo, n’amugamba nti, “Guma omwoyo, kubanga nga bw’onjulidde n’obuvumu wano mu Yerusaalemi, era bw’otyo bw’onookola ne mu Ruumi.”

Olukwe Okutta Pawulo

¹²Enkeera Abayudaaya ne bakuŋjaana ne bakola olukwe. Ne beeyama nti tebajja kulya ku kintu kyonna oba okunywa, wabula nga bamaze okutta Pawulo!

¹³Omuwendo gw’abantu abaali mu lukwe luno gwasinga ku makumi ana.

¹⁴Awo ne bagenda eri bakabona abakulu n’abakulembeze baabwe ne babategeeza nti, “Twerayiridde obutalya kintu kyonna okutuusa nga tusse Pawulo.

¹⁵Noolwekyo mugambe omuduumizi w’abaserikale akomyewo Pawulo mu Lukiko. Mumugamba nti waliwo ebibuzzo bitonotono bye mwagalala okwongera okumubuuza. Ffe tulyoke tumuttire mu kkubo nga bamuleeta.”

¹⁶Naye mutabani wa mwannyina Pawulo bwe yategeera olukwe olwo n’agenda mu nkambi y’abaserikale n’ategeeza Pawulo.

¹⁷Awo Pawulo n'ayita omuserikale atwala banne n'amugamba nti, "Twala omulenzi ono eri omuduumizi wammwe, kubanga alina ekintu ekikulu ky'ayagala okumutegeeza."

¹⁸Omuserikale n'atwala omulenzi eri omuduumizi waabwe n'amugamba nti, "Omusibe Pawulo ampise n'antuma ndeete omulenzi ono gy'oli ng'alina ky'ayagala okukuteggeeza."

¹⁹Omuduumizi w'abaserikale n'akwata omulenzi ku mukono n'amuzza wabbali n'amubuuza nti, "Kiki ky'oyagala okuntegeeza?"

²⁰Omulenzi n'amubuulira nti, "Enkya Abayudaaya bajja kukusaba ozzeeyo Pawulo mu Lukiiko lwabwe, nga beekwasiza ku kwagala abeeko ky'ayongera okwennyonnyolako.

²¹Tokkiriza! Kubanga waliwo abasajja amakumi ana abajja okwekwekerera abaserikale bo abanaaba bamutwala, bamufubutukireko bamutte. Kubanga beerayiridde obutalya n'obutanywa okutuusa nga bamaze okumutta. Kaakano bali eyo nga basuubira nti onokkiriza."

²²Omuduumizi w'abaserikale bwe yali asiibula omulenzi n'amukuutira nti, "Tobuulirako muntu yenna nti ontegeezenza ebintu bino."

Pawulo Atwalibwa e Kayisaliya

²³Awo omuduumizi w'abaserikale n'ayita abamyuka be babiri n'abalagira nti, "Mutegeke ekibinja ky'abaserikale ebikumi bibiri, n'abeebagala embalaasi abaserikale nsanvu, n'ab'amafumu ebikumi bibiri, bagende e Kayisaliya ekiro kya leero ku ssaawa ssatu.

²⁴Mutegekeewo n'embalaasi Pawulo z'ajja okweyambisa mu lugendo alyoke atwalibwe bulungi atuusibwe mirembe ewa Gavana Ferikisi."

²⁵Awo n'awandiikira gavana ebbaluwa eno nti:

²⁶Nze Kulawudiyo Lusiya, nkulamusa Oweekitiibwa Gavana Ferikisi.

²⁷Omusajja ono Abayudaaya baamukwata, naye baali bagenda okumutta, nze kwe kuweerezaayo abaserikale bange ne bamutaasa, kubanga nnali ntegedde nga Muruumi.

²⁸Awo ne mmuwala mu Lukiiko lwabwe ntegeere ekisobyo kye yali akoze.

²⁹Ne nvumbula ng'ensonga ze baali bamuvunaana zaali zifa ku bya kukkiriza kwabwe na by'amateeka gaabwe naye nga tezisaanyiza kussa muntu wadde okumusibya mu kkomera.

³⁰Naye bwe nategeezebwa nti waliwo olukwe olw'okumutta, kwe kusalawo okukumuweereza, era nzija kulagira baleete ensonga zaabwe gy'oli.

³¹Awo abaserikale ne basitula ekiro ekyo, nga bwe baalagirwa, ne batwala Pawulo ne batuuka mu Antipatuli.

³²Enkeera ekibinja eky'oku mbalaasi ne kitwala Pawulo e Kayisaliya, abaserikale abalala bo ne baddayo mu nkambi yaabwe.

³³Abaserikale ab'omu kibinja eky'oku mbalaasi bwe baatuuka e Kayisaliya ne batwala Pawulo ewa gavana n'ebbaluwa ne bagiwaayo.

³⁴Gavana bwe yamala okugisoma, n'abuuza Pawulo essaza mw'ava. Pawulo n'addamu nti, "Nva mu Kirukiya."

³⁵Awo gavana n'amugamba nti, "Abakuvunaana bwe banaatuuka ne ndyoka mpulira ensonga zo mu bujjuvu." N'lagira bagira bamukuumira mu kkomera eriri mu lubiri lwa Kerode.

Ebikolwa by'Abatume 24

Pawulo Awozesewwa mu maaso ga Ferikisi

¹Awo nga wayiseewo ennaku ttaano, Ananiya, Kabona Asinga Obukulu, n'atuuka mu Kayisaliya ng'ali n'abamu ku bakulembeze b'Abayudaaya era ng'aleese n'omwogezi omulungi erinnya lye Terutuulo, eyannyonnyola gavana emisango egiali givunaanibwa Pawulo.

²Pawulo bwe yaleetebwa, Terutuulo n'ayitibwa ategheeze ekivunaanibwa Pawulo, n'awoza bw'ati nti, "Oweekitiibwa, ffe Abayudaaya otuwadde eddembe, n'enkulaakulana olw'amagezi go.

³Tukwebaza nnyo olwa bino byonna by'otukoledde.

⁴Obutayagala kukukooya, nsaba ompulirize akaseera katono nga mpitaayita mu byangu ku nsong ze tuvunaana omusajja ono.

⁵"Omusajja ono tumulabye nga wa mutawaana nnyo, kubanga akuma omuliro mu Bayudaaya bona mu nsi yonna, basasamale era bajeemere gavumenti y'Abarumi, omukulembeze mu ttabi ly'eddiini erimanyiddwa ng'ery'Abannazaalaayo.

⁶N'okugezaako yali agezaako okwonoona Yeekaalu, ne tumukwata. Twali tugenda okumusalira omusango n'ekibonerezo ng'amateeka gaffe bwe galagira,

⁷naye Lusiya, omuduumizi w'abaserikale n'ajja n'atumuggyako n'amaanyi,

⁸n'lagira nti awozesewwe mu mateeka g'Ekirumi, era n'lagira abamuwawaabira bajje wano mu maaso go. Bw'onoogenda ng'omubuuza ebintu bino byonna, amazima g'ensonga zaffe gajja kweyoleka."

⁹ Olwo n'Abayudaaya abalala ne boogera nga bawagira ebyo Terutuulo bye yawoza nti bya mazima.

¹⁰ Oluwalo lwa Pawulo ne lutuuka, gavana n'amuwenza asituke ayogere. Pawulo n'ayanukula nti, "Mmanyi, ssebo, nga bw'osaze emisango egifa ku nsonga zaffe ez'Ekiyudaaya okumala emyaka emingi, ekyo kimpa obugumu nga mpoleza mu maaso go.

¹¹ Ggwe bw'onoobuuza, ojja kuzuula nti ennaku tezinnayita kkumi na bbiri kasookedde nyambuka mu Yerusaalemi okusinza mu Yeekaalu.

¹² Abo abampawaabira tebansisinkanangako nga nnina gwe nnyumya naye mu Yeekaalu, wadde nga nsasamaza ekibiina mu kunjaaniro oba awalala wonna mu kibuga.

¹³ Era tebayinza kukulaga bukakafu bwonna ku bintu bino bye bampawaabira nti nabikola.

¹⁴ Naye waliwo ekintu kimu kye nzikiriza. Nsinza Katonda nga nzikiririza mu Kkubo, bano kye bayita enzikiriza endala. Nsinza Katonda n'okumuweereza nga ngoberera empisa za bajjajjaffe n'obulombolombo, nga bwe baabitegeka, era nzikiririza ddala mu mateeka g'Ekiyudaaya ne mu byonna ebyawandiikibwa mu bitabo bya bannabbi.

¹⁵ Era nzikiriza, nga bano bwe bakkiriza, nti walibaawo okuzuukira kw'abatuukirivu n'ababi.

¹⁶ Olw'essuubi lino lye nnina, nfuba bulijjo okuba n'emmeeme ennongoofu eri Katonda n'eri abantu.

¹⁷ "Oluvannyuma lw'emyaka mingi, nga siriwo, nakomawo mu Yerusaalemi ng'Abayudaaya mbaleetedde n'ensimbi ez'okubayamba, nga nange neeretedde ekirabo eky'okuwaayo eri Katonda mu Yeekaalu.

¹⁸ Bano abampawaabira bansanga ndi mu kusinza kuno mu Yeekaalu, nga nneerongoosezza, mmaze n'okumwa omutwe ng'amateeka bwe galagira, nga tewaliwo kibiina kinneetoolodde, era nga tewali kasasamalo.

¹⁹ Naye waliwo Abayudaaya abava mu kitundu kye Asiya era basaanye babeewo wano boogere obanga balina kye banvunaana.

²⁰ Oba si ekyo buuza bano abali wano kaakano, bakutegeeze omusango Olukiiko lw'Abayudaaya Olukulu gwe lwandabako, bwe nayimirira mu maaso gaalwo.

²¹ Mpozzi kino ekimu kye nayogera nti, 'Ndi wano mu Lukiiko nga mpozesebwa olwokubanga nzikiriza okuzuukira kw'abafu!'"

²²Awo Ferikisi, eyali amanyi obulungi ebikwata ku Kkubo, n'agamba Abayudaaya nti, "Lusiya, omuduumizi w'abaserikale mu Yerusaalemi, bw'alituuka ne ndyoka nsala omusango gwammwe."

²³N'alamira Pawulo azzibwe mu kkomera akuumibwe, naye ng'alekerwamu ku ddembe, ne mikwano gye bakkirizibwe okujjanga okumulaba n'okumuleetera bye yeetaaga.

²⁴Awo nga wayiseewo ennaku ntonotono, Ferikisi n'ajja ne mukyala we Dulusira, eyali Omuyudaaya. N'atumya Pawulo, ne bamuwuliriza ng'abategeeza ku kukkiriza Kristo Yesu.

²⁵Awo Pawulo bwe yagenda abannyonnyola ebikwata ku butuukirivu, n'okwefuga mu bikolwa, n'okusalirwa omusango okugenda okujja, Ferikisi n'atya nnyo, n'agamba Pawulo nti, "Ebyo binaagira bimala! Kaakano genda, bwe ndifuna ekiseera ekirungi ndyongera okukuyita."

²⁶Era Ferikisi yaliasuubira nti Pawulo ajja kumuwa enguzi, kyeyava amutumya emirundi mingi n'ayogera naye.

²⁷Ne wayitawo emyaka ebiri, Polukiyo Fesuto n'adda mu bigere bya Ferikisi. Naye Ferikisi olw'okwagala Abayudaaya bamusiime, bwe yali agenda n'aleka nga Pawulo musibe mu kkomera.

Ebikolwa by'Abatume 25

Pawulo Ajulira ewa Kayisaali

¹Fesuto yamala ennaku ssatu mu Kayisaliya ng'azze okutandika emirimu gye emiggya, n'asitula okugenda e Yerusaalemi.

²Bwe yali ali eyo, bakabona abakulu n'abakulembeze b'abayudaaya ne bamutegeeza bye baali bavunaana Pawulo.

³Ne bamwegayirira abayambe atumye Pawulo aleetebwe mu Yerusaalemi, kubanga baali bategeka bamuttire mu kkubo.

⁴Naye Fesuto n'abaddamu nti, "Nga Pawulo bw'ali mu Kayisaliya, ate nga nange nzija kuddayo mu nnaku ntono,

⁵abakulembeze mu nsonga ezo tugende nabo nga nzirayo." Obanga waliwo omusango Pawulo gw'azizza baguleete mu mbuga z'amateeka awozesebwwe.

⁶Oluvannyuma lw'ennaku nga munaana oba kkumi, Fesuto n'aserengeta mu Kayisaliya, era bwe yatuuka, enkeera n'alamira Pawulo aleetebwe mu mbuga z'amateeka.

⁷Awo Pawulo bwe yaleetebwa, Abayudaaya abaava e Yerusaalemi ne baleeta emisango mingi eg'yamaanyi bamuvunaane kyokka nga tebayinza kulaga bukakafu bwagyo.

⁸Pawulo n'awoza ng'agamba nti, "Simenyanga mateeka ga Kiyudaaya n'akamu, era siyonoonanga Yeekaalu, so sijeemeranga Kayisaali."

⁹Fesuto, olw'okwagala okusanyusa Abayudaaya, n'abuuza Pawulo nti, "Oyagala okugenda e Yerusaalemi gy'oba owoleza emisango gino mu maaso gange?"

¹⁰Awo Pawulo n'addamu nti, "Kaakano nyimiridde mu maaso g'embuga ya Kayisaali era we nteekwa okuwozesebwa. Naawe omanyidde ddala bulungi nga bwe sirina musango gwonna gwe nazza ku Bayudaaya.

¹¹Naye obanga waliwo omusango gwe nazza, ne gunsaanyiza okufa, nange sigaana kufa! Nayé obanga siriiko musango, ng'emisango gyonna Abayudaaya bano gye bankakaatikako gya bulimba bwereere, ggwe tolina kw'osinziira wadde omuntu omulala yenna, okumpaayo gye bali okunzita. Njulidde eri Kayisaali."

¹²Fesuto, bwe yamala okuteesaamu n'abamuwa amagezi, n'addamu nti, "Nga bw'ojulidde ewa Kayisaali, kale, onootwalibwa ewa Kayisaali."

Fesuto Yeebuuza ku Kabaka Agulipa

¹³Awo bwe waayitawo ennaku Kabaka Agulipa ne Berenike ne batuuka mu Kayisaliya okukyalira Fesuto.

¹⁴Ku bugenyi baamalako ennaku nnyingi, era mu bbanga eryo Fesuto n'ategeeza kabaka eby'omusango gwa Pawulo. N'amugamba nti, "Waliwo omusajja wano Ferikisi gwe yaleka mu kkomera nga musibe.

¹⁵Bwe nnali mu Yerusaalemi, bakabona ne bantegeeza emisango gye baali bamuvunaana, ne bansaba musalire omusango gumusinge era abonerezebwe.

¹⁶"Ne mbannyonyola nti mu mateeka g'Ekiruumi, omuntu tasalirwa musango kumusinga nga tamaze kuwozesebwa n'aweebwa omukisa okuwoza n'abamuwawaabira.

¹⁷Bwe bajja wano okuwoza omusango ogwo, enkeera ne mpita Pawulo n'ajja mu mbuga z'amateeka.

¹⁸Naye emisango gye baamuwawaabira si gye gyo gye nnali nsuibira.

¹⁹Gyali gikwata ku bya ddiini yaabwe, ne ku muntu ayitibwa Yesu eyafa, naye Pawulo gw'ategeeza abantu nti mulamu!

²⁰Ebyo ne binnemesa. Kwe ku mubuuza obanga yandyagadde emisango egyo okugiroleza mu Yerusaalemi.

²¹Naye Pawulo n'ajulira eri Kayisaali! Bwe ntyo ne mmuzzaayo mu kkomera, nteeketeke okumuweereza eri Kayisaali."

²²Agulipa n'agamba nti, "Nange nandiyagadde okuwulira ku musajja ono by'agamba." Fesuto n'addamu nti, "Enkyo onoomuwulira."

Pawulo mu maaso ga Agulipa

²³ Awo ku lunaku olwaddirira Agulipa ne Berenike ne bayingira n'ekitiibwa kinene nnyo mu kisenge ekinene we batuukira, nga bawerekerwako abaserikale n'abantu abatutumufu mu kibuga. Fesuto n'alagira ne baleeta Pawulo.

²⁴ Fesuto n'alyoka agamba nti, "Kabaka Agulipa, nammwe mwenna abali wano ono ye musajja, Abayudaaya aba kuno n'abo ab'omu Yerusaalemi, gwe bansabye attibwe!"

²⁵ Nze nga bwe ndaba, talina ky'akoze kimusaanyiza kufa. Naye bwe yajulira eri Kayisaali, nange kwe kusalawo okumuweereza e Ruumi.

²⁶ Naye bye nnassa mu bbaluwa emutwala eri Kayisaali nange bimbuze, kubanga taliiko musango gwennyini gwe yazza! Kyenvudde muleeta mu maaso gammwe mwenna, n'okusingira ddala gy'oli, Kabaka Agulipa, nga neesiga ng'okuva mu ebyo bye munaamubuuza, naye by'anaddamu, nzija kufunamu bye nnassa mu bbaluwa ya Kayisaali.

²⁷ Kubanga sirowooza nti kirungi okuweereza omusibe eri Kayisaali ng'omusango gw'azizza tegunnyonnyose."

Ebikolwa by'Abatume 26

Empoza ya Pawulo mu maaso ga Agulipa

¹ Agulipa n'agamba Pawulo nti, "Okkirizibba okuwoza ensonga zo." Awo Pawulo n'agolola omukono gwe, n'awoza nti,

² "Kabaka Agulipa, nnina omukisa okuwoleza mu maaso go leero, nga nnyanukula byonna Abayudaaya bye banvunaana,

³ kubanga mmanyi ng'empisa z'Ekiyudaaya, zonna ozitegeera bulungi. Kyenva nkusaba ompulirize n'obugumiikiriza.

⁴ "Nayigirizibba n'obwegendereza mu mpisa z'Ekiyudaaya okuvira ddala mu buto bwange mu kibuga ky'ewaffe e Taluso ne mu Yerusaalemi, era ne ntambulira mu mpisa ezo obulamu bwange bwonna. Ebyo byonna Abayudaaya bona babimanyi bulungi.

⁵ Era bammanyidde ebbanga ddene nnyo, singa babadde baagala bandinjulidde, nga ndi munnakibiina eky'Abafalisaayo, eky'omu ddiini yaffe ekisingira ddala okunonooza mu buli nsongya ey'Ekiyudaaya.

⁶ Kaakano nnyimiridde nga nvunaanibwa, kubanga nnina essuubi mu ebyo Katonda bye yasuubiza bajjajjaffe,

⁷ebika byaffe ekkumi n'ebibiri bye basuubira okutuukako nga banyikira okusinza emisana n'ekiro; era olw'essuubi eryo, ayi kabaka, Abayudaaya kyebavudde banvunaana.

⁸Kiki ekibalowoozesha nti tekiyinzika Katonda okuzuukiza abafu?

⁹"Nze ku lwange nalowooza nti kinjwanidde okuyigganya erinnya lya Yesu Omunnazaaleesi, n'obukambwe bungi.

¹⁰Bwe nt yo ne mbikola ne mu Yerusaalemi era ne nsiba abatuukirivu bangi mu makomera, era ne mpeebwa n'obuyinza okuva eri bakabona abakulu; abatukuvu ne bwe battibwanga, nga nkiwagira.

¹¹Ne mu makuinjaaniro gonna wonna ne mbasindiikirizanga nga mbawalirizanga okuvvoola, ne mbasunguwaliranga nnyo, ne mbayigganyanga okutuuka ne mu bibuga eby'ewala.

¹²"Awo bwe nnali nga ndaga e Damasiko, nga ndagiddwa era nga mpeereddwa obuyinza okuva eri bakabona abakulu,

¹³nga ndi mu kkubo mu ttuntu, ayi Kabaka, ne ndaba ekitangaala ekyaka okusinga eky'enjuba, ne kinjakira ne bannange be nnali ntambula nabo.

¹⁴Ffenna bwe twagwa wansi, ne mpulira eddoboozi nga liŋjamba mu Lwebbulaniya nti, 'Sawulo, Sawulo, onjigganyiza ki? Weerumya wekka bw'osamba ku nkato.'

¹⁵Ne mbuuza nti, 'Ggwe ani Mukama wange?' Mukama waffe n'addamu nti, 'Nze Yesu, gw'oyigganya.

¹⁶Naye golokoka. Nkulabikidde, nkulonde obeere omuweereza wange era omujulirwa w'ebyo mw'ondabidde era ow'ebyo mwe nnaakulabikiranga.

¹⁷Era ndikuwonya mu bantu bano ne mu baamawanga gye ndikutuma

¹⁸okuzibula amaaso gaabwe bakyuke bave mu kizikiza badde eri omusana, n'okuva mu buyinza bwa Setaani, badde eri Katonda balyoke basonyiyibwe ebibi bafunire wamu omugabo gwa Katonda n'abo abatukuzibwa olw'okunzikiriza.'

¹⁹"Bwe nt yo, Ayi Kabaka Agulipa, ne sinyooma kwolesebwa okwo okwava mu ggulu,

²⁰naye ne nsookera ku b'omu Damasiko, ne nzizaako ab'omu Yerusaalemi ne mu Buyudaaya mwonna, n'eri Abaamawanga, nga mbategeeza beenenye bakyukire Katonda, era bakolenga ebikolwa eby'okwenenya ebisaanira.

²¹Eyo y'ensonga Abayudaaya kyebaava bankwata nga ndi mu Yeekaalu ne bagezaako n'okunzita.

²²Katonda kyavudde ankuuma okutuusa leero ndyoke nyimirire nga ndi mujulirwa eri ab'ekitiibwa era n'aba bulijo, nga sirina kirala kye njogera, wabula ebyo bannabbi ne Musa bye baategeeza nga bigenda okujja

²³nti Kristo kimugwanira okubonaabona, era abeere omubereberye mu kuzuukira kw'abafu, alyoke aleetera abantu bano n'Abamawanga omusana."

²⁴Awo Pawulo bwe yali akyawoza Fesuto n'aleekaana mu ddoboozi ery'omwanguka nti, "Pawulo, olaluse! Okusoma ennyo kukusudde eddalu!"

²⁵Pawulo n'addamu nti, "Siraluse, Oweekitiibwa Fesuto. Ebigambo bye njogera bya nsonga era bya mazima.

²⁶Era ebintu bino Kabaka Agulipa abitegeera, noolwekyo nnyinza okubimbuulira nga seekomoma. Era nkakasa nga tewali na kimu ku bintu bino ky'ataamanya, kubanga tebyakolerwa mu nkiso!

²⁷Kabaka Agulipa, bannabbi obakkiriza? Mmanyi ng'obakkiriza."

²⁸Agulipa n'agamba Pawulo nti, "Onsendasenda nfuuke Omukristaayo mu kaseera kano akatono bwe kati?"

²⁹Pawulo n'addamu nti, "Nsaba Katonda, mu kaseera katono oba mu kiseera kinene, ggwe ne bona abampuliriza kaakano, bafuuke nga nze, okuggyako enjegere zino ezinsibiddwa."

³⁰Awo Kabaka, ne gavana ne Berenike, n'abalala bwe baali batudde, ne basituka ne bafuluma.

³¹Bwe badda ebbali ne bakkiriziganya ne bagamba nti, "Omusajja ono talina ky'akoze kimusaanyiza kuttibwa wadde okusibwa mu njegere."

³²Agulipa kwe kugamba Fesuto nti, "Omusajja ono yanditeereddwa singa teyajulira wa Kayisaali."

Ebikolwa by'Abatume 27

Pawulo Agenda e Ruumi

¹Awo bwe kyasalbwawo tusaabale ku nnyanja tugende mu Italiya, Pawulo n'abasibe abalala ne bakwasibwa omuserikale omukulu w'ekitongole ky'abaserikale ekikumi, erinnya lye Yuliyo, eyali ow'omu kibinja kya Kayisaali Agusito.

²Ekyombo eky'e Adulamutiyo ekyali kinaatera okuseeyeya ku lubalama lwa Asiya; ne tusitula nga ne Alisutaluuko Omumakedoni ow'e Sessaloniika ali naffe.

³ Ku lunaku olwaddirira ne tugoba ku mwalo gw'e Sidoni, Yuliyo n'akolera Pawulo eky'ekisa n'amukkiriza n'agenda ku lukalu eri mikwano gye ne bamusembeza.

⁴Bwe twasitula, empewo n'etufuluma mu maaso, ne tusaabala ne tuyita ku mabbali ga Kupulo.

⁵Bwe twamala okuva mu nnyanja wakati ne tuyita ku lubalama lwa Kirukiya ne Panfuliya, ne tugoba ku mwalo Mula ogw'e Lukiya.

⁶Eyo omukulu w'ekitongole n'alabawo ekyombo ekyali kiva mu Alegezanderiya nga kiraga mu Italiya, n'atusaabaza omwo.

⁷Twamala ennaku nnyangi ng'enyanja yeefuukudde, nga tugenda mpola, ne tusemberera olubalama lw'e Kunido mu buzibu bungi naye ne tuteeyongerayo mu maaso ng'omuyaga gutuyitiridde, ne tusala ne tugenda ku luuyi olumu olwa Kuleete nga tuva ku mwalo gwa Salumone.

⁸Ne tusaabala mu buzibu bungi ne tuyita ku lubalama okumpi n'ekifo ekiyitibwa Emyalo Emirungi ekiriraanye ekibuga Laseya.

Okulabula kwa Pawulo Kulagajjalirwa

⁹Bwe waayitawo ebbanga ddene, n'obudde nga butandise okwonoonekera ddala, era nga kyakabi okwolekera olugendo, ate era nga n'ekisiibo kyayita dda, Pawulo n'abawa amagezi,

¹⁰ng'agamba nti, "Bassebo, ndaba nti olugendo lujja kubeeramu emitawaana n'okufiirwa kungi, si kwa bintu byokka n'ekyombo, naye n'obulamu bwaffe."

¹¹Naye omukulu w'ekitongole n'awalirizibwa okugondera amagezi g'omugoba w'ekyombo ne nannyini kyo okusinga Pawulo bye yayogera.

¹²Olw'okubanga omwalo tegwali mulungi okwewogomamu mu kiseera ky'obutiti, abasinga obungi kyebaava basemba eky'okweyongerayo, nga basuubira nti obanga kisoboka tutuuke e Foyiniiki, we baba bamala ekiseera eky'obutiti ku mwalo gwa Kuleete ogwali gutunuulidde obukiikkaddyo n'ebugwanjuba, n'obukiikkono n'ebugwanjuba.

Omuyaga

¹³Mu kiseera ekyo empewo n'efuluma mu bukiikkaddyo nga nzikakkamu, ne balowooza nti kye baali bagenderera bakifunye ne basikayo ennanga ne bagendera kumpi n'olukalu lwa Kuleete.

¹⁴Naye waali tewannayita bbanga ddene, omuyaga ogw'amaanyi ennyo oguyitibwa Ewulakulo, ne gukunta n'amaanyi mangi nnyo.

¹⁵Ne gufuuwa ekyombo ne kiva mu kkubo lyakyo, ne kitayinza kwolekera muyaga, ne tuguleka ne gututwala nga bwe gwayagala.

¹⁶Oluvannyuma ne tuyita ku mabbali g'akazinga akayitibwa Kawuda, mu kutegana,

¹⁷ne tukwata akaato akeeyambisibwa mu kabenje, ne bakasibira okwo n'emiguwa okwetooloola ekyombo, ne bakanyweza. Olw'okutya nti ekyombo kiyinza okuwagamira mu musenyu gwa Suluti, kyebaava bassa ettanga eddene ne baleka ekyombo ne kitwalibwa omuyaga.

¹⁸Olunaku olwaddirira omuyaga ne gweyongera amaanyi, abalunyanja ne batandika okusuula mu nnyanja ebintu ebyali mu kyombo.

¹⁹Ne ku lunaku olwokusatu nebakwata ebintu ebikola ku kyombo ne babisuula mu nnyanja.

²⁰Ne tumala ennaku nnyingi nga tetulabye ku njuba wadde emunyeeny, gwo omuyaga nga gutuzunza n'amaanyi gaagwo gonna; olwo essuubi lyaffe lyonna ery'okuwona ne lituggweeramu ddala.

Obuvumu bwa Pawulo n'okukkiriza kwe

²¹Bwe baamala ebbanga nga n'okulya tebaagala kulya, Pawulo n'alyoka ayimirira wakati mu bo, n'abagamba nti, "Abasajja kyabagwanira okumpuliriza obutava Kuleete, kubanga temwandifiiriddwa byammwe bwe muti awamu n'okulumizibwa!"

²²Naye kaakano mugume omwoyo! Kubanga tewali n'omu ajja kufa, wabula ekyombo kyokka kye kijja okuzikirira.

²³Kubanga ekiro ekyayise, malayika wa Katonda wange gwe mpeereza, yayimiridde we ndi,

²⁴n'aŋjamba nti, 'Totya, Pawulo, kubanga kikugwanira okuyimirira mu maaso ga Kayisaali owozesebwe, era laba, Katonda akuwadde obuvunaanyizibwa ku abo bona b'oli nabo mu kyombo.'

²⁵Noolwekyo mugume omwoyo! Kubanga nzikiriza Katonda nga mu ngeri yonna kijja kuba nga bwe kyaŋjambiddwa.

²⁶Naye kitugwanidde okusuulibwa ku kizinga."

Ekyombo Kisaanawo

²⁷Mu kiro eky'ekkumi n'ebina embuyaga bwe yali etuwuuba eno n'eri mu Nnyanja Aduliya, mu ttumbi abalunyanja ne bateebereza nti olukalu luli kumpi.

²⁸Ne bapima ne balaba ng'obuwantu bw'amazzi okukka wansi buli mita amakumi asatu mu musantu. Bwe waayitawo akabanga ate ne bapima ne basanga nga mita amakumi abiri mu musantu.

²⁹Bwe baatya okutomera enjazi ku lubalama ne basuula ennanga nnya emabega, ne basabirira obudde okukya.

³⁰Abamu ku balunnyanja ne bateesa okwabulira ekyombo ne bassa akaato akeyambisibwa mu kabenge, nga beefuula ng'abagenda okusuula ennanga mu maaso g'ekyombo.

³¹Naye Pawulo n'agamba omukulu w'ekitongole n'abaserikale be nti, "Mwenna temujja kuwona okuggyako ng'abasajja bano basigala ku kyombo."

³²Awo abaserikale ne basala emiguwa egiali gikutte akato, ne bakaleka ne kagwayo.

³³Awo obudde bwali bunaatera okukya, Pawulo ne yeegayirira buli muntu alye ku mmere, ng'abagamba nti, "Leero lunaku lwa kkumi na nnya nga mulindirira nga temulidde, ate era mukyeyongera obutalya.

³⁴Noolwekyo mubeeko ke mulya, kubanga ekyo kye kijja okubalokola so tewaabe n'omu ku mmwe anaavibwako luviri lwe ku mutwe gwe."

³⁵Awo Pawulo bwe yamala okwogera ebyo, n'addira omugaati, ne yeebaza Katonda mu maaso gaabwe bona, n'amenya omugaati n'alya.

³⁶Amangwago buli omu n'atandika okulya ku mmere.

³⁷Abaali ku kyombo bona awamu baali ebikumi bibiri mu nsanvu mu mukaaga.

³⁸Bonna bwe baamala okulya nga bakkuse, ne basuula ejjaano mu nnyanja okwongera okuwewula ku kyombo.

³⁹Awo obudde bwe bwakya ne batalaba lukalu naye ne balengera ekikono ky'ennyanja nga kirina ekibangirizi eky'omusenyu ku lubalama, ne baagala bagobye okwo ekyombo.

⁴⁰Ne bakutula ennanga, ne bazireka mu nnyanja, ne basumulula emiguwa egikwata enkasi ne bawanika ettanga ery'omu maaso g'ekyombo empewo eryoke ekitwale mu maaso, ne balyoka boolekera olukalu.

⁴¹Naye ekyombo ne kyeggunda mu musenyu engezi ebbiri we zaali zisisinkana, ekitundu eky'omu maaso ne kiwagamira mu musenyu nga tekinyeenya, eky'emabega ne kisigala wabweru waggulu, ng'amayengo ag'amaanyi gakikuba, era ne kitandika okumenyekamenyeka.

⁴²Abaserikale ne bateesa batte abasibe bona, si kulwa nga bawuga ne batuuka ku lukalu ne babomba.

⁴³Naye olwokubanga Yuliyo yayagala okuwonya Pawulo, amagezi ago n'agagaana. Awo n'alagira buli muntu asobola okuwuga awuge alage ku lukalu,

⁴⁴n'abo abatasobola kuwuga bagezeeko okweyambisa ebitundutundi by'embawo ebyali bimenyese ku kyombo. Awo buli muntu n'atuuka bulungi ku lukalu nga taliiko kamogo.

Ebikolwa by'Abatume 28

Pawulo mu Merita

¹Awo bwe twamala okutuuka obulungi ku lukalu ne tulyoka tutegeera nti tuli ku kizinga Merita.

²Bannansi b'oku kizinga baatulaga ekisa kingi ekitali kya bulijo, ne bakuma omuliro ne twota, kubanga obudde bwali bwa butiti nga n'enkuba etandise okutonnya.

³Pawulo yali akuŋjaanyizza akaganda k'obuku, naye yali akassa ku muliro, omusota ogw'obutwa ennyo ne guva mu buku obwo ne gweripa ku mukono gwe.

⁴Bwe baalaba ekintu ekireebeeta ku mukono gwa Pawulo ne bagambagana nti, "Ddala oyo mutemu. Newaakubadde ng'enyanja yagiwonye, naye era omusango gukyamulondoola teguumuganye kulama!"

⁵Naye Pawulo omusota n'agukunkumulira mu muliro n'atabaako kabi konna.

⁶Abantu ne balindirira balabe bw'atandika okuzimba oba okugwa eri afiirewo, naye bwe baalindiririra ebbanga eddene nga tebamulabako kamogo, ne baddamu okwerowooza, ne bagamba nti, "Oyo katonda!"

⁷Waaliwo ennimiro okuliraana n'olubalama lw'enyanja we twali, nga ya Pabuliyo eyali omukulu w'ekizinga ekyo. Awo n'atwaniriza mu maka ge n'atusembeza n'atulabirira okumala ennaku ssatu.

⁸Mu kiseera ekyo kitaawe yali mulwadde omusujja ng'alimu ekiddukano ky'omusaayi. Pawulo n'agenda gy'ali n'amusabira, n'amussaako emikono n'amuwonya!

⁹Ekyo bwe kyabaawo, n'abalwadde abalala bona ku kizinga abaalina endwadde ne bajja gy'ali ne bawonyezebwa.

¹⁰Ne batuwa ebirabo bingi, era ekiseera kyaffe eky'okusaabala ku nnyanja bwe kyatuuka, ne batuleetera ebintu bingi ku kyombo bye twali twetaaga okukozesa mu lugendo lwaffe.

Pawulo Atuuka mu Ruumi

¹¹Oluvannyuma lw'emyezi esatu ne tulyoka tusitula. Twagendera mu kyombo eky'e Alegezanderiya ekiyitibwa Abooluganda Abalongo. Kyali kyewogomye awo ku kizinga okumala obudde bwonna olw'obutiti.

¹²Ne tusooka okugoba mu Sirakusi, ne tumalawo ennaku ssatu.

¹³Bwe twava awo ne twetooloola ne tutuuka e Regio. Oluvannyuma lw'olunaku lumu ne tujirwa empewo eva obukiikaddyo bwa bugwanjuba, olunaku olwaddirira ne tutuuka e Putiyooli.

¹⁴Wano twasangawo abooluganda, ne batusaba tubeere nabo ennaku musanvu. Bwe twava awo ne tutuuka e Ruumi.

¹⁵Abooluganda abaali eyo bwe baawulira ebyatutuukako, ne bajja okutusisinkana mu Katale ka Apiya ne ku Bisulo Ebisatu. Pawulo bwe yabalaba ne yeebaza Katonda era n'aguma omwoyo.

Pawulo Abuulira mu Ruumi nga bw'akuumibwa

¹⁶Bwe twatuuka mu Ruumi Pawulo n'akkirizibwa okubeera yekka, kyokka ng'abeera n'omuserikale amukuma.

¹⁷Awo nga wayiseewo ennaku ssatu, Pawulo n'ayita abakulembeze b'Abayudaaya. Bwe baakuinjaana n'ayogera nabo nti, "Abasajja baganda bange, Abayudaaya bankwatira bwereere mu Yerusaalemi, ne bampaayo mu Baruumi, so nga sirina ky'ensobezza ku bantu, wadde ku mpisa z'abajajjaffe wadde obulombolombo.

¹⁸Abaruumi ne bampozesa, era ne baagala okunta, kubanga tebaalabawo musango gwe nzizizza gunsanyaiza kufa.

¹⁹Naye Abayudaaya bwe baagaana okukkiriza ensala eyo, ne mpalirizibwa okujulira ewa Kayisaali, newaakubadde nga saaliko kye mpawaabira bantu ba ggwanga lyange.

²⁰Noolwekyo mbayise wano tumanyagane era twogeraganye. Olw'essuubi lya Isirayiri, kyenvudde nsibibwa n'olujegere luno."

²¹Ne bamuddamu nti, "Tetufunanga ku bbaluwa ziva mu Buyudaaya nga zikwogerako, wadde baganda baffe okubaako bye batutegeeza ku ggwe nga bibi.

²²Kyokka twagala okuwulira ebirowoozo byo ku kibiina ekkyo, kubanga tumanyi nti buli wamu teriiyo gw'owulira ng'akyogerako bulungi."

²³Awo ne bategeka olunaku, era ku olwo abantu ne bajja bangi, mu kifo we yasulanga. N'abannyonnyola ng'ajulira obwakabaka bwa Katonda, n'abategeeza ku Yesu, nga byonna abyestigamya ku mateeka ga Musa ne ku bannabbi. Yatandika ku nkya n'amala akawungeezi.

²⁴Abamu ne bakkiriza bye yayogera, naye abalala ne batakkiriza.

²⁵Awo nga balemeddwa okukkiriziganya, Pawulo n'abasiibuza ebigambo bino nti, "Mwoyo Mutukuvu yali mutuufu bwe yayogera eri bajjajjammwe ng'ayita mu nnabbi Isaaya nti,

²⁶“Genda eri abantu bano obagambe nti, Okuwulira muliwulira, naye temulitegeera n'okulaba muliraba naye temulyetegereza.

²⁷ Kubanga omutima gw'abantu bano gugubye. N'amatu gaabwe gazibikidde, n'amaaso gaabwe gazibiridde. Si kulwa nga balaba n'amaaso gaabwe, ne bawulira n'amatu gaabwe, ne bategeera n'emิตima gyabwe, ne bakyuka okudda gye ndi, ne mbawonya.'

²⁸ “Noolwekyo mumanye nti obulokozi obuva eri Katonda buweereddwa Abaamawanga era bajja kubuwuliriza.”

²⁹ Pawulo bwe yamala okwogera ebyo, Abayudaaya ne bagenda nga bawakana nnyo bokka na bokka.

³⁰ Awo Pawulo n'amala emyaka ebiri miramba ng'asula mu nnyumba ye gye yee pangisiza, era n'ayanirizanga buli eyajjanga okumulaba.

³¹ N'abuuliranga obwakabaka bwa Katonda, era n'ayigirizanga ebigambo bya Mukama waffe Yesu Kristo mu lwatu nga tewali amuziyiza.

Abaruumi

Abaruumi 1

- ¹Nze Pawulo, omuddu wa Yesu Kristo, Mukama waffe Kristo, nayitibwa okuba omutume, eyayawulibwa okubuulira Enjiri ya Katonda,
- ²gye yasuubiriza mu bannabbi be mu byawandiikibwa ebitukuvu,
- ³ebyogera ku Mwana we, eyava mu zadde lya Dawudi mu mubiri,
- ⁴eyakakasibwa okuba Omwana wa Katonda mu maanyi aga Mwoyo Mutukuvu olw'okuzuukira kw'abafu, ye Yesu Kristo Mukama waffe.
- ⁵Mu Yesu Kristo Mukama waffe, mwe twaweerwa ekisa, ne mpitibwa okuba omutume, amawanga gonna galyoke gamugondere mu kukkiriza ku lw'erinnya lye.
- ⁶Nammwe muli mu abo abaayitibwa okuba abayigirizwa ba Yesu Kristo.
- ⁷Mpandikira abo bona ababeera mu Ruumi, abaagalwa ba Katonda, abaayitibwa okuba abatukuvu. Ekisa n'emirembe ebiva eri Katonda Kitaffe ne Yesu Kristo Mukama waffe, bibeerenga nammwe.

Pawulo Ayagala Okukyala mu Ruumi

- ⁸Okusooka neebaza nnyo Katonda wange ku lwammwe mwenna, ku bwa Yesu Kristo, olw'okukkiriza kwammwe okunywevu okwogerwako mu nsi yonna.
- ⁹Katonda gwe mpeereza n'omutima gwange gwonna nga mbulira Enjiri ey'Omwana we, ye mujulirwa wange, nga bwe mbasabira bulijjo,
- ¹⁰nga mbegayiririra bulijjo mu kusaba kwange, ndyoke nsobole okubatuukako nga Katonda bw'anaayagala.
- ¹¹Kubanga neesunga nnyo okubalaba, ndyoke mbawe ku kirabo eky'omwoyo, mulyoke munywezebwé okutuuka ku nkomerero,
- ¹²kwe kugamba: twezengamu amaanyi ffekka ne ffekka olw'okukkiriza kwe tulina.
- ¹³Wabula njagala mumanye kino, abooluganda nti, Emirundi mingi nateekateeka okujja gye muli naye ne nziyizibwa okutuusa kaakano, ndyoke nkungule ebibala mu mmwe, nga bwe kiri mu mawanga amalala.
- ¹⁴Kubanga nnina ebbanja eri Abayonaani n'abatali Bayonaani, n'eri ab'amagezi n'eri abasirusiru,
- ¹⁵era nammwe ab'e Ruumi kyenva njagala okubabuulira Enjiri.
- ¹⁶Enjiri tenkwasa nsonyi: kubanga ge maanyi ga Katonda agalokola buli muntu akkiriza, okusooka eri Omuyudaaya n'eri Omunnamawanga.

¹⁷Kubanga mu yo obutuukirivu bwa Katonda bubikkulibwa. Obutuukirivu obwo butuweebwa olw'okukkiriza, olw'okukkiriza kwokka, nga bwe kyawandiikibwa nti, "Abatuukirivu banaabeeranga balamu lwa kukkiriza."

Obusungu bwa Katonda eri abantu

¹⁸Kubanga obusungu bwa Katonda bubikkulibwa okuva mu ggulu ku abo abatatyatya Katonda bona n'abakaafiri bona ku bye bakola okuziyiza amazima okuvaayo.

¹⁹Kubanga ebisoboka okumanyibwa ku Katonda bibabikkuliddwa, kubanga Katonda abibalaze byonna mu bujuvu.

²⁰Kubanga okuvira ddala ku kutondebwa kw'ensi, ebintu bye ebitalabika, bwe buyinza bwe obutaggwaawo n'obwa Katonda bwe, bitegeerwa ne birabikira ddala mu by'obutonde bwe, abantu balyoke baleme kubaako na kya kwewolereza.

²¹Kubanga newaakubadde nga Katonda bamumanyi, tebaamugulumiza nga Katonda wadde okumwebazanga, naye ne bagobereranga ebitaliimu mu mpaka zaabwe, omutima gwabwe omusirusiru ne gujuzibwa ekizikiza.

²²Beeyita ab'amagezi ne bafuuka abasirusiru,

²³ne bawanyisa ekitiibwa kya Katonda ataggwaawo okukifaananyiriza ekifaananyi ky'omuntu aggwaawo, n'eky'ebinyonyi, n'eky'ebirina amagulu ana n'eky'ebewalula.

²⁴Katonda kyeyava abaleka, emitima gyabwe ne girulunkanira eby'obugwaga ne bawemula emibri gyabwe bokka na bokka.

²⁵Ne bafuula amazima ga Katonda okuba obulimba ne basinza era ne baweereza ebitonde, mu kifo ky'okusinza eyabitonda, eyeebazibwa emirembe n'emirembe. Amiina.

²⁶Katonda kyeyava abaleka ne beeyongera mu kwegomba kwabwe okw'obuwemu. Abakazi baabwe baawanyisa enkolagana yaabwe ey'obuzaaliranwa n'abasajja, ne bakola ebitali bya buzaaliranwa.

²⁷Abasajja nabo baalekayo okwegatta ne bakazi baabwe mu ngeri ey'obuzaaliranwa, ne bajjuzibwa obukaba ne beegatta ne basajja bannaabwe. N'ekyava mu bikolwa ebyo eby'obugwaga, kwe kusasulibwa empeera esaanira okwonoona kwabwe.

²⁸Bwe baagaana okumanya Katonda, Katonda kyeyava abaleka ne babeera n'omutima omwonoonefu ne bakola ebitasaana.

²⁹Bajjuzibwa obutali butuukirivu bwonna, n'ebibi, n'omululu, n'obukyayi, n'obuggya, n'obussi, n'entalo, n'obulimba, n'enkwe, n'okwogera ebitasaana, nga basala ku bannaabwe ebiambo,

³⁰era nga bageya, nga bakyawa Katonda, nga bavuma bannaabwe, nga bajjudde amalala n'okwekulumbaza, nga bagunjawo enkola y'ebikyamu, era nga bajeemera bakadde baabwe.

³¹Tebategeera so tebalina kukkiriza, tebalina kwagala, era tebalina mutima gusaasira.

³²Newaakubadde nga bamanyi nga Katonda yagamba nti abantu abakola ebintu ng'ebyo balizikirizibwa, tebakoma ku kubikola kyokka, naye basiima n'abo ababikola.

Abaruumi 2

Omusango Katonda aligusala na bwenkanya

¹Gwe anenya omuntu omulala, okola ebibi bye bimu ne by'onenyenza omuntu oyo. Kyonoova olema okubeera n'eky'okuwoza, kubanga bw'okola bw'otyo, weesalira wekka omusango.

²Naye kaakano, tumanyi nga Katonda mutuufu okunenya abo abakola ebiri ng'ebyo.

³Naye ggwe omuntu obuntu, akola ebiri ng'ebyo, kyokka n'onenya abantu abalala, olowooza nga Katonda alikuleka?

⁴Oba onyooma ekisa kya Katonda ekingi, n'okugumiikiriza kwe n'obukwatampola bwe? Tomanyi ng'ekisa kya Katonda kikuleeta mu kwenenya?

⁵Naye olw'obukakanyavu bwo n'omutima oguteenenya, weeterekera ekiruyi ku lunaku lw'ekiruyi n'okubikkulirwa, Katonda lw'alisalirako omusango ogw'obutuukirivu.

⁶Katonda aliwa buli omu empeera esaanira ebikolwa bye.

⁷Aliwa obulamu obutaggwaawo abo abaakola obulungi, nga balina essuubi ery'okuweebwa ekitiibwa, ettendo n'obulamu obw'emirembe n'emirembe.

⁸Naye abo abeenoonyenza ebyabwe, abajeemera amazima nga bagondera obutali butuukirivu, kiriba kiruyi na busungu.

⁹Walibaawo ennaku n'okubonaabona ku buli mmeeme y'omuntu akola ebibi, okusookera ku Muyudaaya n'oluvannyuma ku Munnaggwanga.

¹⁰Naye ekitiibwa n'ettendo n'emirembe biriba ku buli akola ebituufu, okusookera ku Muyudaaya n'oluvannyuma ku Munnaggwanga.

¹¹Kubanga Katonda tasosola mu bantu.

¹²Abo bona abaayonoona olw'obutamanya mateeka, balizikirira; era n'abo bona abaamanya amateeka ne boonoona, bwe batyo bwe balisalirwa omusango, okusinziira mu Mateeka.

¹³Kuba abawulira obuwulizi amateeka, si be bejjeerera eri Katonda, wabula abo abakola bye galagira, be baliweebwa obutuukirivu.

¹⁴Abaamawanga abatalina mateeka bwe bakolera mu buzaaliranwa ebintu eby'Amateeka, ebintu ebyo byennyini bifuka amateeka gye bali, newakubadde ng'Amateeka tegaabaweebwa.

¹⁵Ekyo kiraga ng'Amateeka gawandiikibwa mu mitima gyabwe, era kikakasa munda mu birowoozo byabwe, ng'emitima gyabwe giribasaliriza omusango oba okubejeeresa okusinziira ku ekyo kye bamanyi.

¹⁶Kino kiribaawo ku lunaku Katonda kw'aliramulira abantu olw'ebyo bye baakisa, ng'enjiri yange bw'eri ku bwa Yesu Kristo.

Abayudaaya n'amateeka

¹⁷Abamu ku mmwe mweyita Bayudaaya. Mwesiga amateeka ne mwewaana nga bwe mumanyi Katonda.

¹⁸Bwe musoma ebyawandiikibwa muyiga engeri Katonda gy'ayagala mweyise ne muzuula ekituufu.

¹⁹Mukakasa nga bwe muli abakulembeze b'abazibe b'amaaso, era ettabaaza eri abo bona abali mu kizikiza.

²⁰Naye olwokubanga, amateeka ga Katonda gatuwa amagezi n'amazima, mulowooza muyinza okuyigiriza abatali bagezi n'abaana abato.

²¹Kale ggwe ayigiriza abalala, lwaki toyinza kweyigiriza wekka? Ategeeza abalala obutabba, tobba?

²²Ategeeza obutayenda, toyenda? Akyawa ebifaananyi, si ggwe onyaga eby'omu masabo?

²³Mwenyumiririza mu mateeka, naye ne muswaza Katonda olw'obutagatuukiriza.

²⁴Ekyawandiikibwa kigamba nti, "Olw'ebikolwa byammwe ebyo, erinnya lya Katonda kyelivudde livvoolebwa mu mawanga."

²⁵Okukomolebwa kugasiza ddala bw'okwata amateeka, naye bw'otagatuukiriza tewaba njawulo wakati wo n'atali mukomole.

²⁶Kale obanga atali mukomole akwata amateeka, talibalibwa ng'eyakomolebwa?

²⁷Noolwekyo ataakomolebwa mu buzaaliranwa naye ng'akuuma amateeka, alikusaliza omusango gwe alina amateeka amawandiike n'otagatuukiriza ate nga wakomolebwa.

²⁸Okweyisa ng'Omuyudaaya ate nga wakomolebwa, tekikufuula Muyudaaya yennyini.

²⁹Okuba Omuyudaaya yennyini oteekwa okugondera amateeka. Okukomolebwa okutuufu kwe kukomolebwa okubaawo mu mutima, so si okw'omubiri. Omuntu ng'oyo atenderezebwa Katonda, so si abantu.

Abaruumi 3

Obwesigwa bwa Katonda

¹Kaakano olwo Omuyudaaya alina nkizo ki? Oba okukomolebwa kugasa ki?

²Kugasa nnyo mu ngeri nnyingi. Okusookera ddala, Abayudaaya be baateresebwa ebigambo bya Katonda.

³Kituufu nti abamu ku bo tebakkiriza bigambo ebyo. Obutakkiriza bwabwe buliggyawo obwesigwa bwa Katonda, olw'okuba nga bo tebaalina kukkiriza?

⁴Tekisoboka. Katonda ye wa mazima, newaakubadde nga buli muntu yenna mulimba. Ebyawandiikibwa bigamba nti, "Olyoke otuukirire mu bigambo byo, era osinge bw'osala omusango."

⁵Naye obanga obutali butuukirivu bwaffe bulagira ddala obutuukirivu bwa Katonda, tunaayogera ki? Kikyamu Katonda okutunyiigira era n'atubonerezza? Mu kino njogera ng'omuntu.

⁶Nedda, sikikyamu. Katonda alisalira atya ensi omusango?

⁷Naye obanga obulimba bwammwe bwetyongera okugulumiza Katonda, nga kiraga Katonda bw'ali ow'amazima, oyinza okwebuuza lwaki okyasalirwa omusango ng'omwonoonyi?

⁸Era okyayinza okwongerako na kino nti tukolenga ebibi mulyoke muveemu ebirungi, ng'abamu bwe batuwaayiriza nti, bwe tugamba. Kyokka Katonda mwenkanya, era alibasalira nga bwe kibagwanira.

Tewali mutuukirivu n'omu

⁹Bino byonna bitegeeza ki? Kitegeeza nti ffe Abayudaaya tuli bulungi nnyo okusinga abantu abalala bona? Nedda, n'akatono. Ffenna tufugibwa kibi, ne bwe baba Abayudaaya oba Abaamawanga.

¹⁰Ng'ebyawandiikibwa bwe bigamba nti: "Tewali mutuukirivu n'omu.

¹¹Tewali ateggeera wadde anoonya Katonda.

¹² Bonna baakyama, bona awamu baafuuka kitagasa; tewali n'omu akola obulungi, tewali n'omu.”

¹³ “Emimiro gyabwe giringa entaana ezaasaamiridde, n'emimwa gyabwe gjjudde obulimba.” “Buli kigambo ekibavaamu kiri ng'obusagwa bw'omusota.”

¹⁴ “Emimwa gyabwe gjjudde okukolima n'obukyayi.”

¹⁵ “Ebigere byabwe byanguwa okuyiwa omusaayi,

¹⁶ buli gye balaga baleka abantu baayo mu kuzikirira na mu nnaku njereere.

¹⁷ Tebamanyi kkubo lya mirembe.”

¹⁸ “N'okutya tebatya Katonda.”

¹⁹ Tumanyi nga buli kyawandiikibwa mu mateeka, kyawandiikibwa ku lw'abo abafugibwa amateeka. Amateeka malambulukufu ku nsonga ezo, omuntu yenna aleme okwekwasa ensonga yonna, ate era ne Katonda okwongera okulaga ng'ensi yonna bwe yasobya.

²⁰ Kubanga tewali n'omu aliweebwa obutuukirivu mu maaso ga Katonda olw'ebikolwa by'amateeka. Mu mateeka mwe tutegeerera ddala ekibi.

Obutuukirivu buva mu Kukkiriza

²¹ Kale kaakano tutegeere ng'obutuukirivu bwa Katonda tebutuweebwa lwa kugondera Mateeka. Ekyo kikakasibwa Amateeka ne bannabbi.

²² Obutuukirivu bwa Katonda butuweebwa olw'okukkiriza Yesu Kristo. Katonda tasosola.

²³ Ffenna twayonoona era tetusaanira kitibwa kya Katonda.

²⁴ Kyokka twaweebwa obutuukirivu bwa buwa olw'ekisa kye ekiri mu kununulibwa okuli mu Yesu Kristo;

²⁵ Katonda yaweereza Kristo okuba omutango, bwe tukkiriza Kristo olw'omusaayi gwe yayiwa. Alaga obutuukirivu bwe mu kugumiikiriza ebibi ebyakolebwa edda, be bantu abaayonoona mu biseera biri eby'edda.

²⁶ Kino kiraga Katonda bw'alaga okwaniriza kw'alina eri abantu mu biro bino, bwe baba n'okukkiriza mu Yesu.

²⁷ Kale lwaki twenyumiriza? Tewali nsonga etwenyumirizisa. Lwa kuba nga twagoberera amateeka? Nedda, lwa kukkiriza.

²⁸ Noolwekyo omuntu aweebwa obutuukirivu lwa kukkiriza so si lwa kugoberera mateeka.

²⁹ Oba Katonda wa Bayudaaya bokka? Si ye Katonda w'amawanga amalala gonna? Weewaawo nabo Katonda waabwe.

³⁰Kubanga ye Katonda omu awa obutuukirivu abaakomolebwa, n'abo abataakomolebwa olw'okukkiriza kwabwe.

³¹Kale amateeka tugaggyewo olw'okukkiriza? Kikafuuwe. Tunyweza manyweze.

Abaruumi 4

Ibulayimu Yaweebwa Obutuukirivu Iwa Kukkiriza

¹Kale kiki kye tunaayogera ku jjajjaffe Ibulayimu ku bikwata ku by'omubiri?

²Singa Ibulayimu yaweebwa obutuukirivu lwa bikolwa, yandyenyumirizza, naye si eri Katonda.

³Ebyawandiikibwa bitugamba bitya? Ibulayimu yakkiriza Katonda ne kimubalirwa okuba obutuukirivu.

⁴Omuntu bw'akola omulimu, asasulwa empeera ye. Empeera gy'aweebwa, teba kirabo.

⁵Katonda tayinza kukusembeza olw'ebikolwa byo. Katonda asembeza aboonoonyi olw'okukkiriza kwe balina mu ye.

⁶Kabaka Dawudi naye yayogera kye kimu ku muntu ono Katonda gw'awa obutuukirivu obutavudde mu bikolwa bye ng'agamba nti:

⁷"Baweedwa omukisa, abasonryiyiddwa ebyonoono byabwe, ne baggyibwako ebibi byabwe.

⁸Aweereddwaa omukisa omuntu, Mukama gw'atalibalira kibi."

⁹Kale omukisa guno, gw'abakomole bokka oba n'abatali bakomole? Ebyawandiikibwa bitugamba nti okukkiriza kwa Ibulayimu kwamubalirwa okuba obutuukirivu.

¹⁰Kale, kwamubalirwa kutya? Ng'akomolebbwa oba nga tannakomolebwa? Nedda si ng'akomolebbwa naye nga tannakomolebwa.

¹¹Akabonero ke yafuna ak'okukomolebwa, ye nvumbo ku butuukirivu olw'okukkiriza kwe, nga tannakomolebwa, alyoke abeere jjajja w'abo bona abakkiriza nga si bakomole, nabo balyoke babalirwe obutuukirivu.

¹²Ate era ye jjajja w'abantu bona, abakomole, era abatambulira mu kkubo ery'okukkiriza, jjajjaffe Ibulayimu kwe yalina nga tannakomolebwa.

¹³Ibulayimu n'ezzadde lye tebaaweebwa kisuubizo eky'okulya ensi yonna, ng'omugabo gwe, lwa kukwata mateeka. Katonda, ensi yagimusuubiza lwa butuukirivu obwamuweebwa olw'okukkiriza.

¹⁴Kale obanga baweebwa obusika lw'amateeka, okukkiriza kuba tekugasa, era nga n'ekisuubizo tekirina makulu.

¹⁵Katonda anyiiga Amateeka ge bwe gatagonderwa. Naye bwe wataba mateeka, tewaba mateeka ga kujeemera.

¹⁶Noolwekyo ekisuubizo kijja lwa kukkiriza, kiryoce kiweebwe lwa kisa, eri ezzadde lyonna, so si ezzadde erigondera amateeka lyokka naye n'eri ezzadde erya Ibulayimu olw'okukkiriza; era oyo ye jjajjaffe ffenna.

¹⁷Kyawandiikibwa nti, "Nkufudde jjajja w'amawanga amangi." Ye jjajjaffe mu maaso g'oyo gwe yakkiriza, Katonda azuukiza abafu, era alaba ebitaliwo ng'ebiriwo, era atonda ebantu ebiggya.

¹⁸Katonda yasuubiza Ibulayimu abazzukulu bangi. Ne bwe kyalabika ng'ekitasoboka, Ibulayimu yalina okukkiriza mu Katonda, n'oluvannyma n'abeera jjajja w'amawanga mangi, okusinziira ku ekyo ekyayogerwa nti, "Ezadde lyo bwe liriba."

¹⁹Teyatendewererwa mu kukkiriza, newaakubadde nga yali wa myaka nga kikumi, nga n'omubiri gwe munafu nnyo, ate nga ne Saala mugumba.

²⁰Teyabuuusabuusa kisuubizo kya Katonda mu butakkiriza, naye yaweebwa amaanyi lwa kukkiriza; n'agulumiza Katonda.

²¹Yakakasiza ddala nti Katonda kye yasuubiza asobola okukituukiriza,

²²era bwe kityo ne kimubalirwa okuba obutuukirivu.

²³Naye tekyawandiikibwa ku lulwe yekka nti, "Kyamubalirwa okuba obutuukirivu;"

²⁴naye era naffe, abakkiririza mu oyo eyazuukiza Yesu Mukama waffe mu bafu.

²⁵Kristo yaweebwayo okuttibwa olw'ebibi byaffe, n'azuukizibwa tulyoke tuweebwe obutuukirivu.

Abaruumi 5

Emirembe n'essanyu

¹Kale nga bwe twaweebwa obutuukirivu olw'okukkiriza tulina emirembe ne Katonda, mu Mukama waffe Yesu Kristo,

²era olw'okukkiriza mu Kristo tufunye ekisa kya Katonda mwe tubeera, era mwe twenyumiririza, nga tusuubira ekitiibwa kya Katonda.

³Tetukoma ku ekyo kyokka, naye twenyumiririza ne mu kubonaabona, nga tumanyi ng'okubonaabona kutuyigiriza okugumiikiriza.

⁴Era okugumiikiriza kututuusa ku mbala ennungi, n'embala ennungi ne zitutuusa ku ssuubi.

⁵Era essuubi teritukwasa nsonyi kubanga Katonda atuwadde Mwoyo Mutukuvu ajuza emitima gyaffe okwagala kwe.

⁶Bwe twali tukyali banafu wakati mu bibi, Kristo yatufiirira ffe aboonoonyi.

⁷Kizibu okufiirira omuntu omuntuukirivu. Oboolyawo omuntu ayinza okwewaayo okufa ku lw'omuntu omulungi.

⁸Kyokka Katonda alaga okwagala kwe gye tuli mu ngeri eno: bwe twali tukyali boonoonyi, Kristo n'atufiirira.

⁹Kale obanga twaweebwa obutuukirivu olw'omusaayi gwe, alitulokola okuva mu busungu bwa Katonda.

¹⁰Kale obanga bwe twali tukyali balabe ba Katonda twatabaganyizibwa naye mu kufa kw'Omwana we, bwe tutabagana naye tetulisingawo nnyo okulokolebwa olw'obulamu bwe?

¹¹So si ekijo kyokka, tweniyumiririza mu Katonda, kubanga Katonda yaweereza Mukama waffe Yesu Kristo, mwe twatabaganyizibwa.

Okufa mu Adamu n'Obulamu mu Kristo

¹²Ekibi kyajja mu nsi olw'omuntu omu, ne kireeta okufa mu nsi. Mu ngeri y'emu olw'okuba nga bona baayonoona, bona balifa.

¹³Ekibi kyaliwo mu nsi ng'amateeka tegannabaawo. Kyokka Katonda teyagamba nti be balina okuvunaanyizibwa olw'ebibi byabwe, kubanga Amateeka gaali tegannabeerawo.

¹⁴Kyokka okufa kwali kukyafuga okuva ku Adamu okutuusa ku Musa, nga kutwaliramu n'abo abataayonoona mu ngeri Adamu gye yayonoonamu. Mu ngeri endala, Adamu ali mu kifaananyi kya Kristo eyajja oluvannyuma.

¹⁵Naye Katonda wa kisa nnyo, kubanga ekirabo kye yali agenda okutuwa, kyali kya njawulo ku kibi kya Adamu. Okwonoona kw'omuntu omu, Adamu, kwaleetera bangi okufa, kyokka ekisa kya Katonda n'ekirabo ekiri mu kisa ky'omuntu omu Yesu Kristo kyasukkirira nnyo ne kibuna mu bantu bangi.

¹⁶Waliwo enjawulo nnene wakati w'ekibi kya Adamu n'ekirabo kya Katonda. Ekibi ekimu kyatuweesa ekibonerezo. Kyokka ekirabo kya Katonda kyatukkirizisa gy'ali, newaakubadde nga twonoona emirundi mingi.

¹⁷Obanga olw'okwonoona kw'omuntu omu okufa kwabuna, abaliweebwa ekisa kya Katonda n'ekirabo eky'obutuukirivu, tebalisinga nnyo okufugira mu bulamu olw'omuntu omu Yesu Kristo?

¹⁸ Kale ng'abantu bona bwe baasalirwa omusango olw'ekibi ekimu, bwe kityo n'olw'ekikolwa ekimu eky'obutuukirivu abantu bona mwe baaweerwa obutuukirivu ne bafuna obulamu.

¹⁹ Obujeemu bw'omuntu omu bwafuula abangi okuba aboonoonyi. Bwe butyo n'obuwulize bw'omuntu omu Yesu, bulifuula bangi okuba abatuukirivu.

²⁰ Amateeka gaatekebwawo, amaanyi g'ekibi galyoke galabisibwe. Kyokka ekibi bwe kyeyongera, ekisa kya Katonda kyo ne kyeyongera nnyo okusingawo.

²¹ Ng'ekibi bwe kyafugira mu kufa, n'ekisa kya Katonda kifugira mu butuukirivu ne kitutuusa mu bulamu obutaggwaawo mu Yesu Kristo Mukama waffe.

Abaruumi 6

Okuba Abalamu mu Kristo

¹ Kale tunaagamba tutya? Tweyongere okwonoona, olwo ekisa kya Katonda kiryoke kyeyongere?

² Kikafuuwe, kubanga ffe abaafa eri ekibi tuyinza tutya okweyongera okukikola?

³ Oba temumanyi nga bona bwe baabatizibwa mu Yesu Kristo, baafiira wamu naye?

⁴ Bwe twabatizibwa twaziikibwa wamu ne Kristo. Nga Kristo bwe yazuukizibwa okuva mu bafu olw'ekitiibwa kya Kitaawe, naffe twafuna obulamu obuggya, era bwe tutyo tutambulirenga mu bulamu obwo obuggya.

⁵ Obanga twegatta wamu naye mu kifaananyi eky'okufa kwe, bwe tutyo bwe tulyegattira awamu naye mu kuzuukira kwe.

⁶ Tumanyi kino nti omuntu waffe ow'edda yakomererwa wamu naye ku musaalaba, omubiri gw'ekibi guleme kuba gwa mugaso, tuleme kuddamu kuba baddu ba kibi.

⁷ Omuntu bw'afa aba takyafugibwa kibi.

⁸ Naye obanga twafiira wamu ne Kristo, tukkiriza nga tuliba balamu wamu naye

⁹ Tumanyi nti, nga Kristo bwe yazuukizibwa mu bafu, takyafa nate, okufa tekukyamufuga.

¹⁰ Okufa kwe yafa eri ekibi, yafa omulundi gumu, naye kaakano mulamu era mulamu ku bwa Katonda.

¹¹ Bwe mutyo nammwe mwerowoozenga okuba abaafiira ddala eri ekibi, naye abalamu eri Katonda mu Kristo Yesu.

¹²Noolwekyo ekibi kiremenga okufuga omubiri gwammwe ogufa, nga mugondera okwegomba kwagwo.

¹³Temuwangayo bitundu byammwe eby'omubiri okukozesebwa eitali bya butuukirivu eri ekibi, naye mweweereyo ddala eri Katonda, ng'abantu abalamu abaava mu bafu. Ebitundu byammwe eby'omubiri gwammwe bikozesebwe eby'obutuukirivu eri Katonda.

¹⁴Temukkiriza kibi kwongera kubafuga, kubanga temukyafugibwa mateeka, wabula ekisa kya Katonda.

Baddu ba butuukirivu

¹⁵Kale tukole tutya? Kale tukole ekibi kubanga tetufugibwa mateeka wabula ekisa kya Katonda? Kikafuuwe.

¹⁶Temumanyi nga muba baddu b'oyo gwe muwulira? Muyinza okuba abaddu b'ekibi ne kibaleetera okufa, oba muyinza okuba abaddu abawulira Katonda n'abawa obutuukirivu.

¹⁷Kyokka Katonda yeebazibwe kubanga mwabanga baddu ba kibi, naye bwe mwagondera okuyigiriza kwe mwayigirizibwa n'omutima gwammwe gwonna, ne mukugondera.

¹⁸Noolwekyo mwasumululwa okuva mu kibi, ne mufuuka baddu ba butuukirivu abasanya Katonda.

¹⁹Njogera nga nkokesa olulimi olwa bulijo kubanga mukyali banafu. Nga bwe mwawangayo ebitundu byammwe eby'omubiri okuba abaddu b'ebirowoozo eby'obugwaga, ne mweyongeranga okukola eitali bya butuukirivu, bwe mutyo muweeyo ebitundu byammwe eby'omubiri okuba abaddu b'obutuukirivu, nga mweweerayo ddala eri Katonda, mube batukuvu.

²⁰Bwe mwali abaddu b'ekibi, temwafugibwanga butuukirivu.

²¹Kale mwagasibwa ki mu kukola ebintu ebyo, ebibaleetera ensonyi? Enkomerero yaabyo kufa.

²²Naye kaakano obanga mwasumululwa mu kibi, ne mufuuka baddu ba Katonda, ebivaamu bibatuusa ku kutukuzibwa, n'enkomerero bwe bulamu obutaggwaawo.

²³Empeera y'ekibi kwe kufa, naye ekirabo kya Katonda, bwe bulamu obutaggwaawo mu Yesu Kristo Mukama waffe.

Abaruumi 7

Ekyokulabirako ekiva mu Bufumbo

¹Temumanyi abooluganda, kubanga njogera eri abamanyi amateeka, ng'amateeka gafuga oyo yekka akyali omulamu?

²Ka mbawe ekyokulabirako: mu mateeka omukazi omufumbo, asigala nga wa bba, bba bw'aba ng'akyali mulamu. Naye bba bw'afa, omukazi oyo ng'asumuluddwa mu tteeka eribagatta.

³Noolwekyo omukazi oyo bwe yeegatta n'omusajja omulala, bba ng'akyali mulamu, omukazi oyo anaayitibwanga mwenzi. Naye bba bw'afanga, olwo omukazi omufumbo anaabanga asumuluddwa mu tteeka, era taabenga mwenzi bw'anaafumbirwanga omusajja omulala.

⁴Nammwe baganda bange mwafa eri amateeka, muli ba mubiri gwa Kristo. Mwegatta ku Kristo eyazuukizibwa okuva mu bafu, tulyoke tubale ebibala ebisanyusa Katonda.

⁵Kubanga bwe twali tukyafugibwa omubiri, okwegomba kw'ebibi kwakoleranga mu bitundu byaffe eby'omubiri olw'amateeka, era enkomerero kwali kufa.

⁶Naye kaakano tetukyafugibwa mateeka. Tuli bafu eri ebyo ebyali bitusibye, era tebitulinaako buyinza. Noolwekyo tuyinza okuweereza Katonda mu ngeri empya eya Mwoyo Mutukuvu, so si mu nkola enkadde ey'amateeka.

Okulwanagana n'Ekibi

⁷Kale tunaayogera ki? Amateeka kye kibi? Kikafuuwe. Singa tewaali mateeka, sanditegedde kibi. N'okwegomba kw'omubiri sandikutegeeredde ddala singa amateeka tegaagamba nti, "Teweegombanga."

⁸Ekibi kyeyambisa etteeka lino, ne kindeetera okwegomba okwa buli ngeri. Noolwekyo awatali mateeka, ekibi kiba kifu.

⁹Edda nali mulamu awatali mateeka, naye etteeka bwe lyajja, ekibi ne kiramuka, n'okufa ne nfa.

¹⁰Era ne nkizuula ng'etteeka eryali liteekwa okumpa obulamu, lye lyandetera okufa.

¹¹Ekibi kyeyambisa ekiragiro ekyo ne kinnimba, era ne kinzita.

¹²Noolwekyo amateeka matukuvu, era n'ekiragiro kitukuvu, kiruṇṇamya era kirungi.

¹³Kale ekirungi gye ndi, ate kye kyafuuka okufa? Nedda. Ekibi kye kyakozesa ekiragiro ekirungi kiryoche kinzite. Noolwekyo tulaba ekibi bwe kiri, ekibi ddala.

¹⁴Tumanyi ng'amateeka mwoyo, naye nze omuntu obuntu, natundibwa ng'omuddu nfugibwe ekibi.

¹⁵Kubanga kye nkola sikitanyi. Kye njagala si kye nkola, naye kye nkyawa kye nkola.

¹⁶Newaakubadde nga nkola kye mmanyi nga kikyamu, nzikiriza ng'amateeka malungi.

¹⁷Noolwekyo si nze nkola ebintu ebyo ebibi, wabula ekibi ekiri mu nze.

¹⁸Mmanyi nga mu nze, temuli kalungi n'akamu. Ne bwe njagala okukola ekirungi, tewali kirungi kye nkola.

¹⁹Ekirungi kye njagala okukola si kye nkola, naye ekibi kye saagala kye nkola.

²⁰Naye obanga kye saagala kye nkola, si nze mba nkikola, wabula ekibi ekibeera mu nze.

²¹Noolwekyo nzudde mu mateeka nga bwe njagala okukola ebirungi, ekibi kimbeera kumpi.

²²Mu nze mu muntu ow'omunda njagala nnyo okugondera amateeka ga Katonda.

²³Naye mu mubiri gwange gwonna, ndaba amateeka ag'enjawulo nga gawakana n'etteeka lya Katonda amagezi gange ge limanyi. Ekyo kinfuula omusibe w'amateeka ag'ekibi, ekikolera mu mubiri gwange.

²⁴Nga ndi muntu munaku! Ani alindokola mu mubiri guno ogugenda okufa?

²⁵Kyokka Katonda yeebazibwe mu Yesu Kristo Mukama waffe. Nze kennyini mu birowoozo byange, ndi muddu w'amateeka ga Katonda era gwe mpeereza, newaakubadde ng'okwegomba kwange okw'omubiri, mpeereza etteeka ly'ekibi.

Abaruumi 8

Obulamu Obuva mu Mwoyo

¹Noolwekyo abo abali mu Kristo Yesu, tebaliiko musango; abo abatagoberera kwegomba okw'omubiri wabula ne bagoberera Omwoyo.

²Kubanga etteeka ery'Omwoyo aleeta obulamu mu Kristo Yesu, lyannunula okuva mu tteeka ly'ekibi n'okufa.

³Amateeka ga Musa kye gataayinza kukola, olw'okunafuyizibwa omubiri, Katonda yakikola mu Mwana we yennyini bwe yamutuma mu kifaananyi ky'omubiri ogw'ekibi, n'asalira ekibi omusango mu mubiri.

⁴Ekyo kyabaawo, eby'obutuukirivu mu mateeka biryoke bituukirire mu ffe bwe tugondera Omwoyo, ffe abatatambulira mu mubiri naye abatambulira mu Mwoyo.

⁵Abo abalowooleza mu mubiri balowooza bintu bya mubiri, naye abalowooleza mu Mwoyo balowooza bya Mwoyo.

⁶Okulowooleza mu by'omubiri kwe kufa, naye okufugibwa Omwoyo bwe bulamu n'emirembe.

⁷Kubanga okulowooza eby'omubiri kya bulabe eri Katonda. Ebirowoozo eby'omubiri tebiyinza kuwulira mateeka ga Katonda.

⁸N'abo abafugibwa omubiri tebayinza kusanyusa Katonda.

⁹Naye mmwe temufugibwa mubiri wabula mufugibwa Mwoyo, kubanga Omwoyo wa Katonda abeera mu mmwe. Era omuntu yenna bw'ataba na Mwoyo wa Kristo, oyo si wa Kristo.

¹⁰Era obanga Kristo ali mu mmwe, omubiri gwammwe mufu olw'ekibi, ate ng'omwoyo gwammwe mulamu olw'obutuukirivu.

¹¹Era obanga Omwoyo w'oyo eyazuukiza Yesu okuva mu bafu abeera mu mmwe, oyo eyazuukiza Kristo mu bafu, alifuula emibir gyammwe egifa okuba emiramu ku bw'Omwoyo we abeera mu mmwe.

¹²Noolwekyo abooluganda tulina ebbanja, so si eri omubiri okugondera bye gutulagira.

¹³Kubanga bwe munaagobereranga omubiri, mugenda kufa. Naye bwe munnatta ebikolwa eby'omubiri, muliba balamu,

¹⁴kubanga abo bona abakulemberwa Omwoyo wa Katonda be baana ba Katonda.

¹⁵Temwaweebwa mwovo gwa buddu ate mutye, wabula mwaweebwa Omwoyo eyabafuula abaana, era ku bw'oyo tumukoowoola nti, "Aba, Kitaffe."

¹⁶Omwovo yennyini akakasiza wamu n'omwoyo waffe nga bwe tuli abaana ba Katonda.

¹⁷Kale nga bwe tuli abaana, tuli basika ba Katonda, era tulisikira wamu ne Kristo, bwe tubonaabonera awamu naye, tulyoke tuweerwe wamu naye ekitiibwa.

Ekitiibwa ekijja

¹⁸Okubonaabona kwe tubonaabona kaakano kutono nnyo bwe kugeraageranyizibwa n'ekitiibwa ekiritubikulirwa.

¹⁹Ebitonde birindirira n'essuubi lingi ekiseera abaana ba Katonda lwe baliragibwa.

²⁰Kubanga ebitonde tebyafugibwa butalimu nga byeyagalidde, wabula ku bw'oyo eyabifugisa, mu kusuubira.

²¹Ebitonde birifuilibwa bya ddembe okuva mu kufugibwa okuvunda ne bigabanira wamu n'abaana ba Katonda ekitiibwa eky'okuba mu ddembe.

²²Tumanyi ng'ebitonde byonna bisinda era ne birumwa ng'omukazi alumwa okuzaala bw'abeera.

²³Naye ate si ekky kyokka, era naffe abalina ebibala ebibereberye eby'Omwoyo, naffe tusinda munda yaffe nga tulindirira okufuuka abaana, kwe kununulibwa kw'emibirgyaffe.

²⁴Twalokolebwa lwa ssuubi eryo. Naye essuubi erirabibwa si ssuubi; kubanga ani asuubira ky'alabako?

²⁵Naye bwe tusuubira kye tutalabako, tukirindirira n'okugumiikiriza.

²⁶N'Omwoyo bw'atyo atubeera mu bunafu bwaffe. Tetumanyi kusaba nga bwe kitugwanira, naye Omwoyo yennyini atwegayiririra n'okusinda okutayogerekka.

²⁷Oyo akebera emitima, amanyi Omwoyo ky'alowooza, kubanga yeegayiririra abatukuvu ng'okusiima kwa Katonda bwe kuli.

²⁸Era tumanyi nga eri abo abaagala Katonda, era abo abayitibwa ng'okuteesa kwe bwe kuli, ebintu byonna bibatuukako olw'obulungi.

²⁹Kubanga abo be yamanya olubereberye, yabalonda okufaananyizibwa mu kifaananyi ky'Omwana we, ye abeerenga omubereberye mu booluganda abangi.

³⁰Abo be yalonda, n'okubayita yabayita, n'abo be yayita, yabawa obutuukirivu, n'abo be yawa obutuukirivu yabagulumiza.

³¹Kale tunaagamba ki ku bintu bino? Katonda bw'abeera ku lwaffe, ani asobola okutulwanyisa?

³²Oyo ataasaasira Mwana we ye, naye n'amuwaayo ku lwaffe ffenna, talituwa buwi bintu byonna awamu naye?

³³Ani aliroopa abalonde ba Katonda? Katonda y'awa obutuukirivu.

³⁴Ani alibasalira omusango? Kristo Yesu yafa, kyokka okusinga byonna yazuukizibwa, era ali ku mukono ogwa ddyo ogwa Katonda, ng'atwegayiririra.

³⁵Ani alitwawukanya n'okwagala kwa Kristo? Kubonaabona, oba bulumi, oba kuyigganyizibwa, oba njala, oba kuba bwerere, oba kabi, oba kitala?

³⁶Kyawandiikibwa nti: "Ku lulwo tutiisibwatiisibwa n'okuttibwa obudde okuziba, era tubalibwa ng'endiga ez'okusalibwa."

³⁷Naye mu bino byonna tuwangudde n'okukirawo ku bw'oyo eyatwagala.

³⁸Kubanga nkakasiza ddala nga newaakubadde okufa, wadde obulamu, wadde bamalayika, wadde abafuzi, wadde ebiriwo, wadde ebigenda okujja, wadde amaanyi,

³⁹wadde obugulumivu, wadde okukka wansi, wadde ekitonde ekirala kyonna, tewali kiriyinga kutwawukanya n'okwagala kwa Katonda okuli mu Kristo Yesu Mukama waffe.

Abaruumi 9

Okulonda kwa Katonda

¹ Njogera amazima mu Kristo, sirimba, omwoyo gwange nga gunkakasa mu Mwoyo Mutukuvu,

²nga ndimunakuwavu nnyo era nga nnumwa mu mutima.

³Nnali njagala nze mwene nkolimirwe Katonda era njawukanyizibwe ku Kristo olwa baganda bange, bwe tuli ab'omu mubiri,

⁴be Bayisirayiri, abantu ba Katonda abalonde. Katonda yabalaga ekitiibwa kye, n'akola nabo endagaano, n'abawa n'amateeka ge. Yeekaalu yagibawa, n'abawa n'ebyasuubizibwa.

⁵Balina bajajjaabwe abamanyiddwa, Kristo be yasibukamu mu mubiri. Nsaba Katonda afuga byonna atenderezebwenga emirembe gyonna, Amiina.

⁶ Naye si kuba nti Katonda yalemwa okutuukiriza kye yasuubiza. Si bona ab'omu Isirayiri nti bantu ba Katonda ddala.

⁷Ate so si nti ly'ezzadde lya Ibulayimu bona balyoke babeere abaana, naye ekisuubizo kyali ku Isaaka bwe kyagambibwa nti, "Mu Isaaka mwe ndituukiririza ebyo byonna bye nakusuubiza."

⁸Kino kitegeeza nti abaana ab'omubiri si be baana ba Katonda, wabula abo ab'okusuubiza be babalibwa okuba ezzadde lya Ibulayimu.

⁹Kubanga ekigambo ky'okusuubiza kye kino nti, "Mu kiseera nga kino Saala alizaala omwana owoobulenzi."

¹⁰ Ate si ekyo kyokka, naye ne Isaaka jjajjaffe yalina Lebbeeka eyali olubuto.

¹¹Naye ng'abalongo tebannazaalibwa, era nga tebannabaako kye bakola kyonna ekirungi oba ekibi, okusiima kwa Katonda nga bwe kuli,

¹²si lwa bikolwa wabula ku bw'oyo eyabayita, kyategeeezbwa Lebbeeka nti, "Omukulu y'aliba omuweereza w'omuto."

¹³Era nga bwe kyawandiikibwa nti, "Yakobo namwagala, naye Esawu namukyawa."

¹⁴ Kale tunaagamba ki? Ddala ddala Katonda talina bwenkanya? Kikafuuwe.

¹⁵Agamba Musa nti, "Ndisaasira oyo gwe ndisaasira, era ndikwatirwa ekisa oyo gwe ndikwatirwa ekisa."

¹⁶ Noolwekyo tekiva ku ebyo omuntu by'ayagala newaakubadde by'akola, wabula ku kusaasira kwa Katonda.

¹⁷ Ebyawandiikibwa kyebyava byogera ku Falaawo nti, "Kyennava nkuyimusa, ndyoke njolesamaanyi gange mu ggwe, erinnya lyange liryoke litegeeezbwe mu nsi zonna."

¹⁸ Noolwekyo Katonda asaasira oyo gw'ayagala okusaasira, ate n'akakanyaza omutima gw'oyo gw'ayagala okukakanyaza.

¹⁹ Omu akyayinza okumbuuza nti, Lwaki Katonda atunenya, obanga y'atuleetera okukola nga bw'asiima?

²⁰ Naye ggwe omuntu obuntu, ggwe ani addamu ng'owakanya Katonda? Ekibumbe kiyinza okubuuza eyakibumba nti, "Lwaki wammumba bw'oti?"

²¹ Oba omubumbi talina buyinza ku bbumba, okubumbamu ekibya eky'omugaso, oba okubumbamu ekitali kya mugaso?

²² Katonda yayagala okulaga obusungu bwe, n'amaanyi ge eri abo bona abaali basaanira okuzikirizibwa, kyokka n'abalaga obugumiikiriza.

²³ Ekyo yakikola alyoke amanyise obugagga bw'ekitiibwa kye, eri abo bona be yeerondera okugabanira awamu ekitiibwa kye.

²⁴ Naffe yatuyita, si Bayudaaya bokka naye n'Abaamawanga.

²⁵ Ne mu Koseya agamba nti, "Abataali bantu bange ndibayita abantu bange, Ne gwe nnali ssaagala, ndimwagala."

²⁶ Mu kifo omwo mwe baayitirwa nti, "Temuli bantu bange, mwe baliyitirwa abaana ba Katonda omulamu."

²⁷ Isaaya ayogera eri Isirayiri mu ddoboozi ery'omwanguka nti, "Omuwendo gw'abaana ba Isirayiri ne bwe gulyenkana ng'omusenyu gw'enyanja, ekitundu ekirisigalawo kye kirokolebwa.

²⁸ Kubanga Mukama alisalawo era alituukiriza mangu ekyo kye yagamba okukola ku nsi."

²⁹ Era nga Isaaya bwe yayogera edda nti, "Singa Mukama ow'Eggye teyatulekerawo zzadde, twandifuuse nga Sodomu, era twandifaananye nga Ggomola."

Obutakkiriza bw'Abayudaaya

³⁰ Kale tunaagamba ki? Tugambe nti Abaamawanga abataagobereranga butuukirivu, baafuna obutuukirivu, bwe butuukirivu obuva mu kukkiriza,

³¹ naye Isirayiri mu kugobereranga amateeka ag'obutuukirivu, teyafuna butuukirivu obwo?

³²Lwaki? Ekyo baalema okukituukako kubanga tebaagoberera butuukirivu mu kukkiriza wabula mu bikolwa. Beesittala ku jjinja eryo eryesittalwako,

³³nga bwe kyawandiikibwa nti, “Laba, nteeka mu Sayuuni ejjinja eryesittalwako n’olwazi olulibasuula. Oyo amukkiriza taliswazibwa.”

Abaruumi 10

¹Abooluganda, kye njagala mu mutima gwange era kye nsabira Abayisirayiri eri Katonda, kwe kulokolebwa.

²Kubanga nkakasa nga balina obunyiikivu eri Katonda, naye si mu kutegeera.

³Mu butamanya butuukirivu bwa Katonda, bagezaako okwenoonyeza obutuukirivu, nga bagondera amateeka mu kifo ky’okugondera obutuukirivu bwa Katonda.

⁴Kristo atuwa amakulu amajjuvu, buli amukkiriza n’amuwa obutuukirivu.

⁵Musa awandiika ku butuukirivu obuva mu mateeka nti, “Omuntu alikola ebintu ebyo aliba mulamu mu byo.”

⁶Naye okukkiriza okuva mu butuukirivu, kugamba nti, “Toyogeranga mu mutima gwo nti, ‘Ani alirinnya mu ggulu?’ (kwe kuggya Kristo mu ggulu)

⁷newaakubadde okugamba nti, ‘Ani alikka emagombe?’ (kwe kuggya Kristo mu bafu.)”

⁸Abo bona abalina okukkiriza mu Kristo bagamba nti, “Ekigambo kiri kumpi naawe, kiri mu kamwa ko era kiri mu mutima gwo,” kye kigambo eky’okukkiriza kye tubuulira.

⁹Bw’oyatula n’akamwa ko nti, Yesu ye Mukama, n’okkiriza n’omutima gwo nga Katonda yamuzuukiza mu bafu, olokoka.

¹⁰Kubanga omuntu akkiriza na mutima gwe n’aweebwa obutuukirivu, era ayatula na kamwa ke n’alokoka.

¹¹Kubanga Ebyawandiikibwa bigamba nti, “Buli amukkiriza taliswazibwa.”

¹²Tewali njawulo wakati wa Muyudaaya na Muyonaani, kubanga Mukama waabwe y’omu era ayanukula abo bona abamukoowoola.

¹³Buli alikoowoola erinnya lya Mukama alirokoka.

¹⁴Kale balikoowoola batya oyo gwe batakkiririzaamu? Era balikkiriza batya oyo gwe batawulirangako? Era baliwulira batya awatali abuulira?

¹⁵Era balibuulira batya nga tebatumiddwa? Ekyawandiikibwa nga bwe kigamba nti, “Ebigere by’abo abategeeza amawulire amalungi, nga birungi.”

¹⁶Naye si bona abaagondera Enjiri. Isaaya agamba nti, “Mukama, waliwo akkirizza obubaka bwaffe?”

¹⁷Noolwekyo okukkiriza kujja olw'okuwulira ekigambo kya Kristo.

¹⁸Naye mulowooza Abayisirayiri tebaawulira? Weewaawo baawulira. Ebyawandiikibwa bigamba nti, “Eddoboozi lyabwe lyabuna mu nsi zonna, n'ebigambo byabwe byatuuka ku nkomerero z'ensi.”

¹⁹Abayisirayiri baabitegeera oba tebaabitegeera? Bw'ati Musa bw'addamu ekibuuzo ekyo: “Ndibaleetera okukwatirwa obuggyga abatali ggwanga, ne mbasunguwaza olw'eggwanga eritalina kutegeera.”

²⁰Ne Isaaya yali muvumu bwe yagamba nti, “Nazuulibwa abo abatannoonya, ne ndabika eri abo abatambuulirizaako.”

²¹Naye eri Isirayiri agamba nti, “Olunaku lwonna nalumala nga ngolodde emikono gyange eri eggwanga ekkakanyavu era abantu abeewaggula.”

Abaruumi 11

¹Kale ka mbuuze: Katonda yeegoberako ddala abantu be? Kikafuuwe. Kubanga nange ndi Muyisirayiri, era muzzukulu wa Ibulayimu, ow'omu kika kya Benyamini.

²Katonda tasuulanga bantu be, be yalonda okuva ku luberebery. Oba temumanyi ekyawandiikibwa ekyogera ku Eriya bwe yeegayirira Katonda nga yeemulugunya olwa Isirayiri?

³Yagamba nti, “Mukama, basse bannabbi bo ne bamenyaamenya n'ebyoto byo. Nze nzekka nze nsigaddewo, ate bannoonya okunzita.”

⁴Naye Katonda yamuddamu atya? Yamugamba nti: “Neesigalizzaawo abasajja kasanvu abatafukaamirira Baali.”

⁵Era bwe kityo ne mu biro bino waliwo ekitundu ekyasigalawo abaalondebwamu olw'ekisa.

⁶Naye obanga lwa kisa, si lwa bikolwa nate, kubanga ekisa kyandibadde tekikyali kisa.

⁷Kale tugambe ki? Abayisirayiri baalemwa okufuna kye baali banoonya, wabula be yalondamu be baakifuna, abalala ne bakakanyazibwa, emitima,

⁸nga bwe kyawandiikibwa nti, “Katonda yabawa omwoyo ogw'okubongoota, n'aleetera amaaso gaabwe obutalaba, n'amatu gaabwe obutawulira okutuusa leero.”

⁹Ne Dawudi yagamba nti, “Leka ekijjulo kyabwe kibafuukire omutego, era ekitimba, eky'okubatega era empeera ebasaanira.

¹⁰ Amaaso gaabwe ka gabeeko ekifu, baleme okulaba. Era batambule nga bakootakoota emirembe n'emirembe."

¹¹ Kale ka mbuuze, kyebaava beesittala balyoke bagwe? Kikafuuwe. Naye olw'okwonoona kwabwe, obulokozi kyebwava bujja eri Abaamawanga, Abayudaaya balyoke bakwatibwe obuggyga.

¹² Kale obanga okwonoona kwabwe kutegeeza bugagga eri ensi, n'okulemwa kwabwe nga kutegeeza bugagga eri Abaamawanga, okuganyulwa kwabwe tekulisingawo!

¹³ Kaakano njogera gye muli Abaamawanga, nga bwe ndi omutume eri Abaamawanga, ngulumiza obuweereza bwange,

¹⁴ singa kisoboka nk wase baganda bange obuggyga abamu ku bo basobole okulokolebwa.

¹⁵ Kubanga obanga okugobebwa kwabwe kwe kutabaganya ensi, okusembezebw a kwabwe kulitegeeza ki, bwe kutaliwa bafu bulamu?

¹⁶ Kale kaakano obanga ekitole ky'eñjano ekandiddwa ne kiweebwayo ng'ekibala ekibereberye kitukuvu, n'eñjano yonna ntukuvu; era obanga ekikolo kitukuvu, n'amatabi matukuvu.

¹⁷ Naye obanga amatabi agamu gaawogolebwa, ate nga ggwe eyali omuzeyituuni ogw'omu nsiko wasimbibwa ku kikolo kyagwo, n'ogabana ku bugimu bw'ekikolo ky'omuzeyituuni,

¹⁸ teweenyimirizanga ku matabi ago; naye bwe weenyimirizanga, jjukira nga si gwe owaniridde ekikolo, naye ekikolo kye kikuwaniridde.

¹⁹ Oyinza okwogera nti, "Amatabi gaawogolwako, ndyoke nsimbibweko."

²⁰ Ky'oyogedde kiba kituufu. Weewaawo gaawogolwako lwa butakkiriza, kyokka ggwe onywedd e lwa kukkiriza. Teweenyimirizanga, naye otyanga.

²¹ Kuba obanga Katonda teyasaasira matabi ga buzaaliranwa, nammwe ayinza obutabasaasira.

²² Kale mufumiitirize ku kisa n'obukambwe bwa Katonda. Aba mukambwe eri abo abaagwa, naye n'aba wa kisa eri ggwe, bwe weeyongera okunywerera mu kisa kye, kubanga naawe bw'otonywere oliwogolwako.

²³ Era n'abo oluvannyuma bwe balikkiriza, balizzibwako ku nduli kubanga Katonda ayinza okubazaako kuli.

²⁴ Kuba obanga ggwe mu buzaaliranwa bwo gwe eyawogolwa ku muzeyituuni, wazzibwa ku muzeyituuni ogutali gwa buzaaliranwa bo, abo ab'obuzaaliranwa tebalisinga nnyo okuzzibwa ku muzeyituuni gwabwe bo?

²⁵ Kubanga ssaagala mmwe abooluganda obutamanya kyama kino nga mwelowooza okuba ab'amagezi, ng'abamu ku Bayisirayiri bwe baakakanyaza emitima gyabwe, okutuusa mmwe Abaamawanga, lwe muliyingira.

²⁶ N'oluvannyuma Isirayiri yenna alirokolebwa, ng'Ekyawandiikibwa bwe kigamba nti, "Omulokozi aliva mu Sayuuni, era aliggyawo obutatya Katonda mu bazzukulu ba Yakobo.

²⁷ Era eyo ye ndagaano yange nabo, bwe ndibaggyako ebibi byabwe."

²⁸ Mu njiri balabe ku Iwammwe, naye mu kulondebwa baagalwa olwa bajjajaabwe.

²⁹ Kubanga Katonda bw'agabira abantu ebirabo oba bw'abayita, teyejjusa.

³⁰ Kuba nga mmwe edda bwe mwajeemera Katonda, kyokka kaakano nga musaasiddwa olw'obujeemu bw'Abayudaaya,

³¹ bwe batyo nabo kaakano bajeemu, eri ekyo ekyali okusaasira gye muli, balyoke basaasirwe.

³² Kubanga Katonda yaleka abantu bona mu bujeemu alyoke abakwatirwe ekisa.

³³ Kale nga Katonda wa kitalo, ng'amagezi ge mangi n'okutegeera kwe kungi era n'obugagga bungi; ensala ye ey'emisango nga tekeberekeka, n'amakubo ge tegekkaanyizika.

³⁴ "Kubanga ani ayinza okutegeera okulowooza kwa Mukama? Oba ani ayinza okumuluñjamya?"

³⁵ "Oba ani eyali asoose okumuwa ekintu, alyoke amuddizeewo?"

³⁶ Kubanga byonna biva gy'ali, era biyita mu ye era bidda gy'ali. Ekitiibwa kibe gy'ali emirembe gyonna. Amiina.

Abaruumi 12

Ssaddaaka Ennamu

¹ Noolwekyo abooluganda mbeegayirira olw'okusaasira kwa Katonda, muwengayo emibiri gyammwe nga ssaddaaka ennamu entukuvu esanyusa Katonda, kwe kuweereza kwammwe okw'omwoyo.

² So temwefaananyirizanga ba mirembe gino, naye mukyusibwe olw'okudda obuggyia mu birowoozo byammwe okukakasibwa okusiimibwa kwa Katonda, okusanyusa era okw'amazima.

³ Kubanga njogera olw'ekisa kye naweebwa, eri buli muntu mu mmwe, obuteerwooza okusinga ekyo ky'asaanidde okulowoozanga

nga yeegendereza, nga Katonda bwe yagabira buli muntu ekigera ky'okukkiriza.

⁴Kubanga nga bwe tulina ebitundu ebingi mu mubiri ogumu, ebitundu ebyo byonna bikola emirimu gya njawulo.

⁵Noolwekyo nga bwe tuli omubiri ogumu mu Kristo, buli muntu kitundu ku mubiri ogumu ogwo.

⁶Tulina ebirabo, ng'ekisa kye tulina bwe kyatuweebwa mu ngeri ey'enjawulo, oba bunnabbi, ng'ekigera ky'okukkiriza bwe kiri,

⁷oba buweereza, mu buweereza, oba omu okuyigiriza, mu kuyigiriza;

⁸oba omulala okugumya banne mu kubazzaamu amaanyi, oba omulala mu kugaba, oba omulala, okufuga n'obunyiikivu, n'omulala okulaga ekisa nga musanyufu.

Okwagala

⁹Mube n'okwagala okutaliimu bukuusa. Mukyawenga ekibi, munywererenga ku kirungi,

¹⁰nga mwagalana mu kwagala okw'abooluganda, nga muwaŋjana ekitiibwa,

¹¹mu kunyiikira so si mu kugayaala. Musanyukirenga mu mwoyo nga muweereza Mukama,

¹²nga musanyukira mu kusuubira, nga mugumiikiriza mu kubonaabona era nga munyiikira mu kusaba.

¹³Mufengayo ku byetaago by'abantu ba Katonda, era mwanirizenga abagenyi.

¹⁴Musabirenga ababayigganya; mubasabirenga so temubakolimiranga.

¹⁵Musanyukirenga wamu n'abo abasanyuka, era mukaabirenga wamu n'abo abakaaba.

¹⁶Buli muntu abeerenga mu mirembe muntu ne munne, nga temwegulumiza naye nga muba bakkakkamu. Temwekulumbazanga.

¹⁷Temusasulanga kibi olw'ekibi, naye mukolenga birungi byereere eribonna.

¹⁸Mukolenga kyonna ekisoboka okutabagana n'abantu bonna;

¹⁹abaagalwa, temuwalananga ggwangwa, era ekiruyi mukirekere Katonda, nga bwe kyawandiikibwa nti, "Okuwoolera eggwangwa kwange, nze ndisasula," bw'ayogera Mukama.

²⁰"Noolwekyo omulabe wo bw'alumwanga enjala, muliisenga; bw'alumwanga ennyonta muwenga ekyokunywa, bw'okola bw'otyo olimukumira amanda g'omuliro ku mutwe gwe."

²¹Towangulwanga kibi, naye wangulanga ekibi ng'okola obulungi.

Abaruumi 13

¹Buli muntu awulirenga abafuzi, kubanga tewali buyinza butava eri Katonda, era n'abafuzi abaliwo Katonda ye yabalonda.

²Noolwekyo abawakanya abafuzi, bawakanya buyinza bwa Katonda. Era baba bawakanya kiragiro kye, bwe batyo ne beereetako bokka omusango.

³Kubanga abafuzi baba tebalwanyisa bikolwa birungi naye ebibi. Oyagala obutakangibwa wa buyinza, kola bulungi osiimibwe,

⁴kubanga muweereza wa Katonda ku lw'obulungi bwo. Naye bw'onookolanga ekibi, osaanidde otye kubanga ekitala ky'alina si kya bwereere, kubanga muweereza wa Katonda awoolera eggwanga eri oyo akola ekibi.

⁵Noolwekyo kibagwanira okuba abawulize, si lwa busungu bwokka, naye n'olw'okumanya nga kye kituufu.

⁶Era kyemuva muwa omusolo kubanga abakozi abo baweereza ba Katonda nga banyiikirira emirimu gyabwe.

⁷Abantu bonna basasulenga ebibabanjiba; musasulenga emisolo eri abo be muteekwa okuwa omusolo, n'ow'empooza mumuwenga empooza; n'oyo ateekwa okutiibwa mumutyenga, n'oyo ateekwa okuweebwa ekitiibwa mumuwenga ekitiibwa.

⁸Temubeeranga na bbanja lyonna eri omuntu yenna, wabula okwaganananga; kubanga ayagala muntu munne ng'atuukiriza amateeka.

⁹Kubanga amateeka gano nti, "Toyendanga, tottanga, tobbanga, teweegombanga," n'etteeka eddala, ligattiddwa mu kino nti, "Yagalanga muliraanwa wo nga bwe weeyagala wekka."

¹⁰Ayagala muliraanwa we tamukola bubi; noolwekyo okwagala kyekuva kutuukiriza amateeka.

¹¹Mumanye nga kino kye kiseera, era essaawa etuuse mugolokoke okuva mu tulo, kubanga kaakano obulokozi bwaffe buli kumpi okusinga ne we twakkiririza.

¹²Ekiro kiyise, obudde bunaatera okukya, noolwekyo tweyambulemu ebikolwa eby'ekizikiza, twambale ebyokulwanyisa eby'omusana.

¹³Tutambulenga ng'ab'omu musana, so si mu binyumu ne mu kutamiira, ne mu bwenzi n'obukaba, ne mu kuyombagana n'obuggyga,

¹⁴naye twambale Mukama waffe Yesu Kristo so tetuwanga mubiri bbanga kukola ng'okwegomba kwagwo bwe kuli.

Abaruumi 14

Obutanenyagananga Iwa Byakulya

- ¹ Mwanirizenga omunafu mu kukkiriza, nga temumusalira musango.
- ² Wabaawo omuntu omu akkiririza mu kulya ebintu byonna, nga so ye omunafu akoma ku nva kwokka.
- ³ Omuntu asalawo okubaako ky'alya tanyoomanga atakiry, n'oyo atalya kintu alemenga kusalira musango oyo akiryu kubanga Katonda yamusembeza.
- ⁴ Ggwe ani asalira omusango omuweereza w'omuntu omulala? Mukama we y'amanya oba atuukiriza emirimu gye oba tagituukiriza. Naye aligituukiriza kubanga Mukama we alimusobozesa.
- ⁵ Omuntu omu agulumiza olunaku olumu okusinga olulala, naye omulala n'alowooza nti ennaku zonna zenkanankana. Noolwekyo buli muntu anywererenga ku ky'alowooza bwe kiba nga kye kituufu.
- ⁶ Akuza olunaku aba alukuza eri Mukama. Oyo alya aba alya ku bwa Mukama, kubanga aba agulumiza Katonda. N'oyo atalya aba talya ku bwa Mukama, era aba agulumiza Katonda.
- ⁷ Kubanga tewali n'omu ku ffe abeera omulamu ku bubwe yekka, era tewali n'omu afa ku lulwe.
- ⁸ Kubanga bwe tuba abalamu, tuba balamu ku bwa Mukama, oba bwe tufa, tufa ku bwa Mukama. Kale nno bwe tuba abalamu oba bwe tufa, tuli ba Mukama.
- ⁹ Kubanga ekkyo Kristo kye yafiira ate n'abeera omulamu, alyoke abeere Mukama w'abo abaafa era n'abalamu.
- ¹⁰ Kale ggwe lwaki osalira muganda wo omusango? Oba lwaki onyooma muganda wo? Kubanga ffenna tuliyimirira mu maaso g'entebe ya Katonda, ey'okulamula.
- ¹¹ Kubanga kyawandiikibwa nti, “‘Nga bwe ndi omulamu,’ bw'ayogera Mukama, ‘buli vviivi lirinfukaamirira era na buli lulimi lulyatula Katonda.’”
- ¹² Noolwekyo buli omu ku ffe alyennyonyolako eri Katonda.

Okwesittaza Abalala

- ¹³ Noolwekyo tetusaliragananga misango. Tumalirire obutesittaza waluganda wadde okumutega okugwa mu kibi.
- ¹⁴ Mmanyi era nkakasiza ddala mu Mukama waffe Yesu, nga tewali kya muzizo ku bwakyo, wabula kya muzizo eri oyo akirowooza nga kya muzizo.

¹⁵Kubanga obanga muganda wo anakuwala olw'ekyo ky'olya, oba tokyatambulira mu kwagala; tolyanga kintu kyonna ky'omanyi nga kinaakyamya omuntu oyo Kristo gwe yafuirira.

¹⁶Ekirungi ekiri mu mmwe kireme okuvumibwa.

¹⁷Kubanga obwakabaka bwa Katonda si kulya na kunywa, wabula butuukirivu na mirembe, na ssanyu mu Mwoyo Omutukuvu.

¹⁸Kubanga aweereza Kristo mu ebyo asanyusa nnyo Katonda era asiimibwa abantu.

¹⁹Noolwekyo tunyiikirirenga eby'emirembe, n'eb'y'okuzimbagna ffekka ne ffekka.

²⁰Toyoonoonanga mulimu gwa Katonda olw'emmere. Ebintu byonna birongoofu, naye ekibi kwe kulya ekireetera omulala okwesittala.

²¹Kirungi obutalya nnyama newaakubadde okunywa wayini newaakubadde ekintu kyonna ekyesittaza muganda wo.

²²Ky'okkiririzaamu mu kulya kikuume nga kya kyama ne Katonda. Alina omukisa ateesalira musango kumusinga mu ekkyo ky'alowooza nga kituufu.

²³Naye oyo abuusabuusa bw'alya, omusango gumaze okumusinga, kubanga talya lwa kukkiriza, era na buli ekitava mu kukkiriza kiba kibi.

Abaruumi 15

Temwesanyusa Mwekka

¹Ffe abanywevu kitugwanidde okwetikkanga obunafu bw'abo abatali banywevu, so si okwesanyusa ffekka.

²Buli omu ku ffe asanyusenga muliraanwa we mu bulungi olw'okumuzimba mu kukkiriza.

³Kubanga ne Kristo teyeesanyusa yekka, nga bwe kyawandiikibwa nti, "Ebivume by'abo abaakuvuma byagwa ku nze."

⁴Kubanga ebyawandiikibwa byonna edda, byawandiikibwa kutuyigiriza, tulyoke tugumiikirizenga era tuzzibwemu amaanyi, ate tube n'essuubi.

⁵Kaakano Katonda w'okugumiikiriza era azaamu amaanyi, abawe okulowoozanga obumu buli omu eri munne mu Kristo Yesu,

⁶mu mwoyo gumu n'eddoboozi limu mulyoke mugulumizenga Katonda, Kitaawe wa Mukama waffe Yesu Kristo.

⁷Noolwekyo mwanirizaganenga, nga Kristo bwe yabaaniriza olw'ekitiibwa kya Katonda.

⁸Kubanga njogera nti Kristo yafuuka muweereza w'abakomole olw'amazima ga Katonda alyoke anyweze ebisuubizo bya bajjajjaffe

⁹n'Abaamawanga balyoke bagulumize Katonda olw'okusaasira kwe, nga bwe kyawandiikibwa nti, "Kyendiva nkutendereza mu Baamawanga, era ne ntendereza erinnya lyo."

¹⁰Era n'ayongera n'agamba nti: "Mmwe Abaamawanga musanyukirenga wamu n'abantu be."

¹¹Era nate nti, "Abaamawanga mwenna, mutendereze Mukama, era abantu bona bamutenderezenga."

¹²Ne Nnabbi Isaaya agamba nate nti, "Walibaawo muzzukulu wa Yese alijja era alisituka okufuga Abaamawanga, era mu ye mwe muliba essuubi lyabwe."

¹³Kaakano Katonda w'okusubira, abajjuze essanyu lyonna n'emirembe mu kukkiriza, mulyoke mweyongerenga mu ssuubi ery'amaanyi aga Mwoyo Mutukuvu.

Pawulo Omuweereza w'Abaamawanga

¹⁴Era matidde baganda bange, nze kennyini, nga nammwe bennyini mujjudde obulungi, nga mujjudde okutegeera kwonna, era nga muyinza okubuuliriragana.

¹⁵Naye mu bitundu ebimu eby'ebbaluwa eno nabawandiikira n'obuvumu nga mbajjukiza olw'ekisa ekyampebwा okuva eri Katonda,

¹⁶kubanga nze ndi muweereza wa Kristo Yesu eri Abaamawanga, nga nkola obuweereza obutukuvu nga mbulira Enjiri ya Katonda, ekiweebwayo ky'Abaamawanga kiryoke kikkirizibwe, nga kitukuzibbwा Mwoyo Mutukuvu.

¹⁷Noolwekyo neenyumiririza mu Kristo olw'omulimu gwa Katonda;

¹⁸kubanga sirtyanjanga kwogera bintu Kristo by'atakolera mu nze Abaamawanga balyoke babeere abawulize mu kigambo ne mu bikolwa,

¹⁹ne mu maanyi ag'obubonero n'eb'yamagero, ne mu maanyi ag'Omwoyo wa Katonda. Bwe ntyo okuva e Yerusaalemi n'okwetooloola okutuuka mu Irluko, mbulidde Enjiri ya Kristo mu bujuvu.

²⁰Nduubirira okubuulira Enjiri mu bifo etayatulwanga linnya lya Kristo, nneme okuzimba ku musingi gw'omuntu omulala,

²¹nga bwe kyawandiikibwa nti, "Abo abatategeezebwanga bimufaako baliraba, n'abo abatawulirangako balitegeera."

Pawulo Ategeka Okukyalira Ruumi

²²Kyennava nziyizibwanga ennyo okujja gye muli;

²³naye kaakano nga bwe sikyalina kifo mu bitundu by'eno, ate nga maze emyaka mingi nga njagala okujja gye muli, nsubira okujjayo,

²⁴bwe ndiba nga ndaga mu Esupaniya. Kubanga nsuubira okubalaba nga mpitayo, n'oluvannyuma munnyambe okuva eyo ndyoke ntukirize ekitundu ekisooka.

²⁵Naye kaakano ndaga e Yerusaalemi okuweereza abatukuvu.

²⁶Ab'omu Makedoniya ne mu Akaya baasanyuka okuwaayo ku byabwe eri abatukuvu abaavu ab'omu Yerusaalemi.

²⁷Baasanyuka era balina ebbanja gye bali, kubanga ng'Abaamawanga bwe baagabana ku bintu eby'omwoyo okuva gye bali, n'Abaamawanga nabo basaanye okubaweereza mu bintu eby'omubiri.

²⁸Noolwekyo bwe ndimaliriza ekkyo ne mbakwasa ekibala ekkyo, ndiyitira ewammwe nga ijenda Esupaniya.

²⁹Era mmanyi nga bwe ndijja gye muli, ndijja n'omukisa gwa Kristo mu bujuvu.

³⁰Kaakano mbakuutira abooluganda, mu Mukama waffe Yesu Kristo ne mu kwagala kw'Omwoyo, okufubiranga awamu nange, nga munsabira eri Katonda,

³¹mpone abo abajeemu mu Buyudaaya, n'obuweereza bwange busiimibwe abatukuvu mu Yerusaalemi,

³²ndyoke nsobole okujja gye muli olw'okwagala kwa Katonda, okuwummulira awamu nammwe, nga ndi musanyufu.

³³Kale kaakano Katonda ow'emirembe, abeerenga nammwe mwenna. Amiina.

Abaruumi 16

Okulamusia

¹Kaakano mbanjulira Foyibe mwannyinaffe, era omuweereza w'ekkanisa ey'omu Kenkereya.

²Mumwanirize mu Mukama waffe, nga bwe kigwanidde abatukuvu, era muyimirire naye nga mumuyamba mu nsonga yonna gye yeetaaga, kubanga naye yennyini yayamba bangi era nange kennyini.

³Mundabire Pulisikira ne Akula, bwe tukola omulimu mu Kristo Yesu,

⁴abeewaayo wakiri okutemwako emitwe olw'obulamu bwange, era si beebaza bokka wabula n'Ekklesia z'Abamawanga zonna.

⁵Mutuuse okulamusia kwange eri abo bona abakuinjaana ng'ekkanisa mu maka gaabwe. Mundabire mukwano gwange omwagalwa Epayneeto, kye kibala ek'yolubereberye ek'yomu Asiya eri Kristo.

⁶Mundabire Maliyamu eyabakolera ennyo.

⁷ Mundabire Anduloniiko ne Yuniya ab'ekika kyange, abaasibibwa awamu nange mu kkomera, era bassibwamu nnyo ekitiibwa abatume era be bansooka okubeera mu Kristo.

⁸Mundabire Ampuliyaato omwagalwa wange mu Mukama waffe.

⁹ Mundabire Ulubano, mukozi munnaffe mu Kristo, n'omwagalwa waffe Sutaku.

¹⁰Mundabire Apere, asiimibwa mu Kristo. Mundabire n'ab'omu nnyumba ya Alisutobulo.

¹¹ Mundabire Kerodiyoni muganda wange. Mundabire ab'omu nnyumba ya Nalukiso.

¹²Mundabire Terufayina ne Terufoosa, abaakola ennyo omulimu gwa Mukama waffe. Mundabire Perusi omwagalwa eyakola ennyo omulimu mu Mukama waffe.

¹³Mundabire Luufo Mukama gwe yalonda, era ne nnyina ali nga mmange.

¹⁴Mundabire Asunkulito ne Felegoni, ne Kerume, ne Patuloba, ne Keruma era n'abooluganda abali nabo.

¹⁵ Mundabire Firologo ne Yuliya, ne Nerewu ne mwannyina, ne Olumpa n'abatukuvu bona abali awamu nabo.

¹⁶ Mulamusagane n'okunywegera okutukuvu. Ekkanisa zonna eza Kristo, zibalamusizza.

Ebisembayo

¹⁷ Noolwekyo mbakuutira abooluganda mwegenderezenga abo abaleeta enjawukana, n'eb'y'esittaza ebikontana n'okuyigiriza kwe mwayiga, era mubakubenga amabega.

¹⁸Kubanga abantu ng'abo tebawereza Mukama waffe Yesu, wabula embuto zaabwe. Bakozesa ebigambo ebirungi eby'okuwaanawaana nga balimbalimba emitima gy'abanafu.

¹⁹Kubanga amawulire ag'okuwulira kwammwe gaabuna mu bantu bona, kyenvudde mbasanyukira. Naye njagala mubenga bagezi mu kukola obulungi, era abalongoofu abeewala ekibi.

²⁰ Kaakano Katonda ow'emirembe ajja kubetentera Setaani wansi w'ebigere byammwe, mangu. Ekisa kya Mukama waffe Yesu kibeerenga nammwe.

²¹ Timoseewo mukozi munnage, ne Lukijo ne Yasooni wamu ne Sosipateri, baganda bange, babatumidde.

²²Nange Terutiyo awandiika ebbaluwa eno, mbatumidde mu Mukama waffe.

²³ Gaayo ansuza, n'ekkanisa yonna babalamusizza. Mundabire Erasuto omuwanika w'ekibuga, ne Kwaluto muganda we.

²⁴ Ekisa kya Mukama waffe Yesu Kristo kibeerenga nammwe mwenna. Amiina.

Pawulo abasiibula n'okusaba

²⁵ Kaakano eri oyo ayinza okubanyweza ng'enjiri yange n'okubuulira mu Kristo Yesu bwe biri, ng'ekyama ky'okubikkulirwa eby'ebiro eby'emirembe n'emirembe ebyasirikirwa, bwe kiri,

²⁶ kaakano nga bannabbi bwe baayogerera mu byawandiikibwa, ng'ekiragiro kya Katonda ataggwaawo bwe kiri, olw'okugonda mu kukkiriza eri Abaamawanga bona abaananyibwa,

²⁷ Katonda omu yekka ow'amagezi, agulumizibwenga ku bwa Yesu Kristo, emirembe n'emirembe. Amiina.

1 Abakkolinso

1 Abakkolinso 1

¹Nze Pawulo eyayitibwa okuba omutume wa Yesu Kristo olw'okwagala kwa Katonda, ne Sossene owooluganda,

²tuwandiikira ekkanisa ya Katonda eri mu Kkolins n'eri abo abaatukuzibwa mu Kristo Yesu, abayitibwa abatukuvu, n'abo bonna abakoowoola erinnya lya Mukama waffe Yesu Kristo mu buli kifo, owaabwe era owaffe;

³ekisa kibe ku mmwe n'emirembe egiva eri Katonda Kitaffe ne Mukama waffe Kristo.

Okwebaza

⁴Nneebaza Katonda wange bulijo ku lwammwe, olw'ekisa kya Katonda ekyabaweebwa mu Kristo Yesu,

⁵mu ye mwagaggawazibwa mu buli kintu, ne mu kwogera kwonna, era ne mu kutegeera kwonna,

⁶era ng'obujulirwa bwa Kristo bwe bwakakasibwa mu mmwe,

⁷muleme kubaako kye mwetaaga mu kirabo kyonna, nga mulindirira okubikkulirwa kwa Mukama waffe Yesu Kristo.

⁸Era oyo y'alibanyweza ku nkomerero, nga temuliiko kya kunenyezebwa ku lunaku lwa Mukama waffe Yesu Kristo.

⁹Katonda mwesigwa, oyo eyabayita mu kussekimu okw'Omwana we Yesu Kristo Mukama waffe.

¹⁰Kaakano mbeegayirira abooluganda, mu linnya lya Mukama waffe Yesu Kristo, mukkiriziganyenga mwekka na mwekka muleme okwawukananga. Naye mube n'omutima gumu n'endowooza emu.

¹¹Abooluganda, ab'ewa Kuloowe bannyinnyonnyola nti mu mmwe mulimu ennyombo.

¹²Kye njamba kye kino nti buli omu ku mmwe agamba nti nze ndi wa Pawulo, nze ndi wa Apolo, nze ndi wa Keefa, nze ndi wa Kristo.

¹³Kale Kristo ayawuliddwamu? Pawulo yakomererwa ku musaalaba ku lwammwe? Oba mwabatizibwa mu linnya lya Pawulo?

¹⁴Neebaza Katonda kubanga nze sibatizanga muntu n'omu ku mmwe okuggyako Kulisupo ne Gaayo.

¹⁵Noolwekyo si kulwa nga wabaawo agamba nti mwabatizibwa mu linnya lyange.

¹⁶Naye nzijukira nga nabatiza ab'omu nnyumba ya Suteefana, naye sirowooza nga nabatiza omuntu omulala yenna.

¹⁷Kristo teyantuma kubatiza wabula yantuma kubuulira Njiri. Era sigibuulira mu magezi ga bigambo bugambo, si kulwa ng'omusaalaba gwa Kristo gumalibwamu amaanyi gaagwo.

Kristo amagezi n'amaanyi ga Katonda

¹⁸Ekigambo ky'omusaalaba kya busirusiru eri abo abazikirira naye eri ffe abaalokolebwa ge maanyi ga Katonda.

¹⁹Kubanga kyawandiikibwa nti, "Ndizikiriza amagezi g'abagezi, ne nzigyawo okumanya kw'abayivu."

²⁰Kale omugezi aluwa? N'omuwandiisi aluwa? Omuwakanyi w'omulembe guno aluwa? Katonda teyafuula amagezi ag'ensi eno okuba obusirusiru?

²¹Kubanga Katonda, mu magezi ge, yalaba ng'ensi teyinza kumumanya ng'eyita mu kutegeera kwayo. Katonda kyeyava asiima okuyita mu busirusiru bw'okubuulira Enjiri okulokola abakkiriza.

²²Kubanga Abayudaaya banoonya bubonero, Abayonaani bo ne banoonya amagezi,

²³naye ffe tubuulira Kristo eyakomererwa. Eri Abayudaaya nkonge, eri Abaamawanga busirusiru,

²⁴naye eri abaayitibwa, Abayudaaya n'Abamawanga, Kristo ge maanyi ga Katonda, era amagezi ga Katonda.

²⁵Kubanga obusirusiru bwa Katonda businga amagezi g'abantu, n'obunafu bwa Katonda businga abantu amaanyi.

²⁶Kubanga mulabe okuyitibwa kwammwe abooluganda, bangi ku mmwe temwali bagezi mu mubiri, era nga bangi temuli b'amaanyi, era nga bangi temwazaalibwa nga muli ba kituibwa.

²⁷Naye Katonda yalonda ebisirusiru eby'ensi, akwase abagezi ensonyi; era Katonda yalonda ebinafu eby'ensi, akwase ab'amaanyi ensonyi,

²⁸era n'alonda abakopi ab'ensi n'abo abanyoomebwa; era n'ebitaliiwo alyoke aggyewo ebiriwo,

²⁹waleme kubaawo muntu n'omu eyeenymiriza mu maaso ga Katonda.

³⁰Kyokka ku bw'oyo muli mu Kristo Yesu, eyafuuka amagezi gye tuli okuva eri Katonda, bwe butuukirivu, n'okutukuzibwa, n'okununulibwa,

³¹nga bwe kyawandiikibwa nti eyeenymiriza yeenymirizenga mu Mukama waffe.

1 Abakkolinso 2

¹ Bwe najja gye muli abooluganda sajja gye muli na bumanyirivu mu kwogera wadde amagezi nga nangirira ekyama kya Katonda gye muli.

² Kubanga nasalawo obutamanya kintu kyonna mu mmwe wabula Yesu Kristo oyo eyakomererwa.

³ Bwe nnali nammwe nnali munafu, nga ntua era nga nkankana nnyo.

⁴ Era okubuulira kwange n'okuyigiriza tebyali mu bigambo bya magezi ebisendasenda, naye byali mu maanyi ne Mwoyo Mutukuvu,

⁵ okukkiriza kwammwe kuleme kuba kw'amagezi ga bantu wabula kwesigame ku maanyi ga Katonda.

Amagezi ga Katonda

⁶ Naye eri abo abakulu mu mwoyo, twogera eby'amagezi agatali ga mu mulembe guno, wadde ag'abafuzi ab'omu mulembe guno abaggwaawo.

⁷ Wabula twogera eby'amagezi ga Katonda, agatamanyiddwa era agakisibwa, Katonda bye yateekateeka edda n'edda olw'ekitiibwa kyaffe;

⁸ tewali n'omu ku bafuzi ab'omulembe guno abaagategeera, kubanga singa baamanya tebandikomeredde Mukama ow'ekitiibwa.

⁹ Naye nga bwe kyawandiikibwa nti, "Eriiso bye litalabangako, n'okutu bye kutawulirangako, n'omutima gw'omuntu kye gutalowoozangako Katonda bye yategekera abo abamwagal."

¹⁰ Naye ffe Katonda yabitubikkulira mu Mwoyo, kubanga Omwoyo anoonyereza ebintu byonna, n'ebi'omunda ennyo ebya Katonda.

¹¹ Kubanga muntu ki ategeera eby'omuntu omulala okuggyako omwoyo w'omuntu oyo ali mu ffe? Noolwekyo n'ebintu bya Katonda tewali abimanyi okuggyako Omwoyo wa Katonda.

¹² Era kaakano ffe tetwafuna mwoyo wa ku nsi, wabula Omwoyo eyava eri Katonda, tulyoke tumanye ebintu Katonda bye yatuwa obuwa,

¹³ era ne mu bigambo bye twogera so si mu kuyigirizibwa okw'amagezi g'abantu, naye mu bigambo Omwoyo by'ayigiriza, ebintu eby'Omwoyo nga bikwatagana n'ebi'Omwoyo.

¹⁴ Omuntu obuntu tasobola kufuna bintu bya Mwoyo wa Katonda, kubanga busirusiru gy'ali, era tasobola kubimanya, kubanga bikeberwa Mwoyo.

¹⁵ Naye omuntu ow'Omwoyo akebera ebintu byonna, naye tewali n'omu amukebera.

¹⁶ “Kubanga ani eyali ategedde okulowooza kwa Mukama, era ani alimulagira? Kyokka ffe tulina endowooza ya Kristo.”

1 Abakkolinso 3

Okwawukana mu Kkanisa

¹ Nange abooluganda ssaasobola kwogera nammwe ng'ab'omwoyo, naye nayogera nammwe ng'ab'omubiri era ng'abaana abawere mu Kristo.

² Nabanywesa mata so si mmere enkalubo, kubanga mwali temunnagisobola. Naye era ne kaakano temunnagisobola,

³ kubanga mukyafugibwa mubiri. Naye obanga mukyalimu obuggyga n'ennyombo, temufugibwa mubiri era temutambula ng'abalina empisa z'abantu obuntu?

⁴ Kubanga omuntu yenna bw'agamba nti, “Nze ndi wa Pawulo,” n'omulala nti, “Nze ndi wa Apolo,” olwo temuba ng'abantu obuntu?

⁵ Kale Apolo ye ani? Ne Pawulo ye ani? Baweereza buweereza ababakkirizisa, nga Mukama bwe yawa buli omu.

⁶ Nze nasiga, Apolo n'afukirira, kyokka Katonda ye yakuza.

⁷ Kale bwe kityo oyo asiga n'oyo afukirira si be bakulu wabula Katonda akuza.

⁸ Oyo asiga kaakano n'oyo afukirira bali bumu, era buli omu aliweebwa empeera ye okusinziira ku mulimu gw'aliba akoze.

⁹ Kubanga ffe tuli bakozi abakolera awamu ne Katonda, ate mmwe muli nnimiro ya Katonda, muli nnyumba ya Katonda.

¹⁰ Okusinziira ku kisa kya Katonda ekya mpeebwa, ng'omuzimbi ow'amagezi, nazimba omusingi, kaakano omulala aguzimbako. Naye buli aguzimbako yeegenderezenga bw'aguzimbako.

¹¹ Kubanga tewali n'omu ayinza kuteekawo musingi mulala okuggyako ogwo ogwateekebwawo, ye Yesu Kristo.

¹² Naye Omuntu bw'aguzimbisaako ezaabu, effeeza, n'amayinja ag'omuwendo n'emiti, n'essubi, oba ebisasiro;

¹³ omulimu gwa buli omu gulirabibwa, kubanga omuliro guligwolesa ku lunaku olwo, era omuliro ogwo gwe gulyoreka omulimu gwa buli omu nga bwe guli.

¹⁴ Omuntu kye yazimba ku musingi ogwo bwe kirisigalawo, aliweebwa empeera.

¹⁵ Naye omulimu gw'omuntu yenna bwe gulyokebwa omuliro, alifiirwa, kyokka ye yennyini alirokolebwa, naye ng'ayita mu muliro.

¹⁶ Temumanyi nti mmwe muli yeekaalu ya Katonda era nga Omwoyo wa Katonda abeera mu mmwe?

¹⁷ Omuntu yenna azikiriza Yeekaalu ya Katonda, Katonda alizikiriza omuntu oyo; kubanga Yeekaalu ya Katonda ntukuvu, ye mmwe.

¹⁸ Omuntu yenna teyeerimbalimbanga; omuntu yenna bwe yeerowoozanga okuba omugezi mu mmwe mu mirembe gino afuukenga musirusiru alyoke abeere omugezi.

¹⁹ Kubanga amagezi ag'ensi eno, bwe busirusiru eri Katonda. Kubanga kyawandiikibwa nti, "Akwatira abagezi mu nkwe zaabwe."

²⁰ Era kyawandiikibwa nti, "Mukama amanyi ng'ebirowoozo by'abagezi temuli nsa."

²¹ Noolwekyo waleme kubaawo muntu n'omu yeenyumiririza mu bantu, kubanga byonna byammwe,

²² oba Pawulo oba Apolo oba Keefa oba nsi, oba bulamu, oba kufa, oba bintu ebya kaakano, oba ebijja, byonna byammwe,

²³ nammwe muli ba Kristo, ne Kristo wa Katonda.

1 Abakkolinso 4

Abatume ba Kristo

¹ Omuntu asaanidde atulabe ng'abweereza ba Kristo era abawanika b'ebyama bya Katonda.

² Ate era omuwanika kimugwanira okuba omuntu omwesigwa.

³ Naye gye ndi ekyo kintu kitono nnyo mmwe okunsalira omusango oba omuntu yenna ku lunaku olw'okusalirako omusango; nange sseesalira musango.

⁴ Kubanga nze seemanyiko nsonga yonna, wabula ekyo tekimpeesa butuukirivu, naye ansalira omusango ye Mukama waffe.

⁵ Noolwekyo temusalanga musango ekiseera nga tekinnatuuka okutuusa Mukama waffe lw'alijja, alimulisa ebyakwekebwa eby'ekizikiza, n'ayoleta n'ebigendererwa by'omutima, buli muntu n'alyoka atendebwa Katonda.

⁶ Kaakano abooluganda ebintu ebyo mbigeredde ku nze ne ku Apolo ku lwammwe, mulyoke muyigire ku ffe obutasukkanga ku byawandiikibwa, omuntu omu alemenga okwegulumiza ng'anyooma omulala.

⁷ Kubanga ani akwawula? Era mulina kye mutaaweebwa? Kale obanga ddala mwaweebwa, kiki ate ekibenyumirizisa ng'abataakifuna?

⁸Mwakkuta dda n'okugaggawala ne mugaggawala, era ne mufuuka bakabaka awatali ffe; naye nandyagadde mufuuke bakabaka, naffe tulyoke tufuukire wamu bakabaka nammwe.

⁹Kubanga ndowooza nga ffe abatume, Katonda yatuteeka ku nkomerero ng'abasibe abalindirira okuttibwa, kubanga twafuulibwa ekyerolerwa eri ensi, eri bamalayika n'eri abantu.

¹⁰Tuli basirusiru ku bwa Kristo, naye mmwe muli bagezi mu Kristo; Ffe tuli banafu naye mmwe muli ba maanyi! Mmwe muli ba kitibwa naye ffe tunyoomebwa.

¹¹Era ne mu kiseera kino tulumwa enjala n'ennyonta nga tetulina na kyakwambala, tukubibwa era tubungeeta bubungeesi.

¹²Tutegana nga tukola emirimu n'emikono gyaffe; tusabira emikisa abo abatukolimira; bwe tuyigganyizibwa tugumiikiriza;

¹³abo abatuvuma tubaddamu ne gonjebwa. Era n'okutuusa kaakano tuli ng'ebisooto mu bigere era tuli ng'ebisaaniiko.

¹⁴Siwandiika bintu bino lwa kubaswaza naye lwa kubabuulirira ng'abaana bange abaagalwa.

¹⁵Kubanga newaakubadde mulina abalala nkumi na nkumi ababayigiriza ebya Kristo, naye mujukirenga nga mulina bakitammwe batono. Kubanga nze mbazaala mu Kristo olw'enjiri.

¹⁶Noolwekyo mbongeramu amaanyi mulabire ku nze.

¹⁷Kyennava mbatumira Timoseewo omwana wange omwesigwa era omwagalwa mu Mukama waffe, anaabajukizanga ebyo bye ngoberera mu Kristo Yesu nga bwe njigiriza wonna wonna mu buli Kkanisa.

¹⁸Naye waliwo abamu mu mmwe abeekuluntaza nga balowooza nti sigenda kujja gye muli.

¹⁹Naye nzija mangu, Mukama bw'anaasiima ndyoke mmanyi amaanyi g'abo abeekuluntaza so si mu bigambo obugambo.

²⁰Kubanga obwakabaka bwa Katonda tebuli mu kwogera bwogezi, wabula mu maanyi.

²¹Kiruwa kye mwagala? Nzije n'omuggo, oba nzije na kwagala n'omwoyo ogw'obuwombeefu?

1 Abakkolinso 5

Okugoba owooluganda ow'empisa embi

¹ Twategeezebwa nga mu mmwe mulimu obwenzi, ate obwenzi obutali na mu baamawanga, kubanga omuntu atwala muka kitaawe n'amufuula mukazi we.

² Mwekuluntazizza mu kifo ky'okwewombeeka. Oyo akola ekikolwa ng'ekyo eky'okwekuluntaza, tasaanye kuggyibwamu mu mmwe?

³ Nze newaakubadde nga siri eyo nammwe mu mubiri, naye nga bwe ndi nammwe mu mwoyo, omuntu eyakola ekyo mmaze okumusalira omusango okumusinga.

⁴ Mu linnya lya Mukama waffe Yesu, mukunjjaane nga nange ndi nammwe mu mwoyo n'amaanyi ga Mukama waffe Yesu nga gali nammwe.

⁵ Omuntu ng'oyo mumuweeyo eri Setaani omubiri gwe guzikirizibwe, omwoyo gwe gulyoke gulokolebwwe ku lunaku lwa Mukama waffe.

⁶ Okwenyumiriza kwammwe si kulungi. Temumanyi ng'ekizimbulukusa ekitono kizimbulukusa ekitole kyonna?

⁷ Muggyeemu ekizimbulukusa eky'edda, mulyoke mubeere ekitole ekiggya, nga temulii mu kizimbulukusa; kubanga Kristo ye ndiga eyaweebwayo ng'ekiweebwayo eky'Okuyitako ku lwaffe.

⁸ Noolwekyo tulye embaga si na kizimbulukusa eky'edda, newaakubadde ekizimbulukusa eky'ettima n'ekibi, naye tugiryе n'omugaati ogutaliimu kizimbulukusa nga gulimu obulongoofu n'amazima.

⁹ Mbawandiikira nga mbalabula obutegattanga na benzi,

¹⁰ so si okwewala abenzi ab'ensi eno, oba aboomululu, oba abakumpanya, oba abasinza bakatonda abalala, kubanga kyandibagwanidde mmwe okuva mu nsi.

¹¹ Naye kaakano mbawandiikira nga mbategeeza nti mwewale omuntu yenna ayitibwa owooluganda ng'ate mwenzi, owoomululu, asinza bakatonda abalala, oba omuvumi, oba omutamiivu oba omukumpanya. Ab'engeri eyo n'okulya temulyanga nabo.

¹² Kale nze nfaayo ki okusalira ab'ebweru omusango? Lwaki sisalira abo abali mu mmwe?

¹³ Naye ab'ebweru Katonda ye abasalira. Omubi oyo ali mu mmwe mumuggyeeemu.

1 Abakkolinso 6

¹ Omuntu yenna mu mmwe bw'aba n'ensonga ne munne, agitwala eri abatali batuukirivu oba eri abatukuvu?

²Oba temumanyi ng'abatukuvu be balisalira ensi omusango? Kale obanga mmwe mulisalira ensi omusango, temusobola kusala nsonga ntono eziri mu mmwe?

³Temumanyi nga ffe tulisalira bamalayika omusango, okwo nga totaddeeko bintu bya mu bulamu buno?

⁴Kale bwe muba n'ensonga lwaki muzitwala mu abo abanyoomebwa ekkanisa ne mubalonda okuba abalamuzi?

⁵Njagala kubakwasa nsongyi; ddala mu mmwe temuli muntu n'omu alina magezi asobola okusala ensonga wakati w'abooluganda?

⁶Naye owooluganda ayinza okuwoza n'owooluganda mu maaso g'abatali bakkiriza?

⁷N'okuwozanjanja mwekka na mwekka kiraga nti muli mu kabi. Lwaki obutamala gakolwanga bubi? Lwaki obutamala galyazaamaanyizibwanga?

⁸Naye musobya baganda bammwe ne mubalyazaamaanya.

⁹Oba temumanyi ng'abatali batuukirivu tebaliyingira mu bwakabaka bwa Katonda? Temulimbibwanga. Abakaba, newaakubadde abasinza bakatonda abalala, newaakubadde abenzi, newaakubadde abasajja abeeyisa ng'abakazi, newaakubadde abalya ebisiyaga,

¹⁰newaakubadde ababbi, newaakubadde aboomululu, newaakubadde abatamiivu, newaakubadde abajerega, newaakubadde abanyazi tebaliyingira mu bwakabaka bwa Katonda.

¹¹Era abamu ku mmwe mwali nga bo, naye ebibi byammwe byanaazibwa era mwatukuzibwa era mwaweebwa obutuukirivu mu linnya lya Mukama waffe Yesu Kristo n'Omwoyo wa Katonda waffe.

Ekibi eky'obwenzi

¹²Ebintu byonna nzikirizibwa okubikola, mu mateeka, naye byonna tebinsanira. Ebintu byonna nzikirizibwa okubikola naye sigenda kufugibwa kintu na kimu.

¹³Ebyokulya bya lubuto, n'olubuto lwa byakulya. Naye byombi Katonda alibizikiriza. Omubiri si gwa bwenzi, naye gwa Mukama.

¹⁴Era Katonda eyazuukiza Mukama waffe alituzuukiza olw'amaanyi ge.

¹⁵Temumanyi ng'emibirgyammwe bitundu bya Kristo? Ate nzirire ebitundu bya Kristo mbifuule eby'omwenzi? Kikafuuwe.

¹⁶Oba temumanyi nti omuntu yenna eyeegatta n'omwenzi, emibirgyammwe gifuuka gumu? Kubanga kigambibwa nti, "Bombi balifuuka omubiri gumu."

¹⁷Naye eyeegatta ne Mukama waffe bafuuka omu mu mwoyo.

¹⁸Mudduke obwenzi. Buli kibi omuntu ky'akola kiba ku mubiri, naye ayenda akola ekibi ku mubiri gwe ye yennyini.

¹⁹Oba temumanyi ng'omubiri gwammwe ye Yeekaalu ya Mwoyo Mutukuvu Katonda gwe yabawa, era n'emibiri gyammwe si gyammwe ku bwammwe?

²⁰Kubanga mwagulibwa na muwendo, noolwekyo emibiri gyammwe gigulumizenga Katonda.

1 Abakkolinso 7

Obufumbo

¹Kaakano ku bintu bye mwampandiikira, kirungi omusajja obutakwatanga ku mukazi.

²Naye olw'ebikolwa eby'obwenzi, buli musajja abeerenga ne mukazi we; era na buli mukazi abeerenga ne bba.

³Omusajja ateekwa okutuukirizanga eby'obufumbo byonna eri mukazi we era n'omukazi bw'atyo.

⁴Kubanga omukazi bw'afumbirwa aba takyafuga mubiri gwe ye wabula bba, era n'omusajja bw'atyo aba takyafuga mubiri gwe ye wabula mukazi we y'aba agulinako obuyinza.

⁵Buli omu alemenga okumma munne wabula nga mulagaanye ekiseera mulyoke mufune ebbanga ery'okusabiramu n'olvannyuma muddinjanenga, Setaani aleme okubasuula olw'obuteefuga bwammwe.

⁶Naye kino nkyogera mu ngeri ya kukkiriziganya so si mu ngeri ya kuwa kiragiro.

⁷Nandyagadde buli omu abeere nga nze; naye buli muntu alina ekirabo ekikye ku bubwe ekiva eri Katonda, omu mu ngeri emu n'omulala mu ngeri endala.

⁸Naye njogera eri abo abatannawasa ne bannamwandu; kirungi okusigala nga bwe bali, era nga nze bwe ndi.

⁹Naye bwe baba tebasobola kwefuga bafumbirwe, oba bawase, kubanga okufumbiriganwa kisinga okwakiriranga okw'okwegomba.

¹⁰Naye abafumbo mbawa etteeka eriva eri Mukama waffe: omukazi tanobanga ku bba.

¹¹Singa baawukana, omukazi ateekwa kubeerera awo, oba si ekyo addeyo ewa bba basonyiwagane; n'omusajja tagobanga mukazi we.

¹² Abalala njogera gye bali kubanga si tteeka eriva eri Mukama waffe, naye mbagamba nti owooluganda bw'abeera n'omukazi atali mukkiriza ng'ayagala okubeera naye, tamugobanga.

¹³ Era omukazi omukkiriza alina bba atali mukkiriza naye ng'amwagala, tamuvangako.

¹⁴ Kubanga omusajja atali mukkiriza ayinza okufuulibwa omukkiriza ng'ayambibwa mukyala we omukkiriza, oba omukyala atali mukkiriza ayinza okufuulibwa omukkiriza ng'ayambibwa bba omukkiriza. Kubanga bwe kitaba ekyo abaana bammwe banditwaliddwa ng'abatali balongoofu naye ku lw'ekyo abaana bammwe baba balongoofu.

¹⁵ Kyokka oyo atali mukkiriza bw'ayagala okwawukana, baawukane; mu nsonga eyo omusajja omukkiriza oba omukyala taasibwenga mu ekyo, kubanga Katonda ayagala abaana be okubeera n'eddeme.

¹⁶ Ggwe omukazi omukkiriza omanyi otya ng'olirokola balo? Oba ggwe omusajja omukkiriza omanyi otya ng'olirokola mukazi wo?

¹⁷ Buli omu abeere mu bulamu Mukama bwe yamuwa, era Katonda mwe yamuyitira mw'abatambuliranga. Ekyo ky'ekiragiro kye mpa ekkansa zonna.

¹⁸ Eyayitibwa ng'amaze okukomolebwa aleme kugamba nti ssinga teyakomolebwa, n'oyo eyakkiriza nga si mukomole aleme kufaayo ku kukomolebwa.

¹⁹ Kubanga okukomolebwa si kintu era obutakomolebwa si kintu, wabula ekikulu kwe kukwata amateeka ga Katonda.

²⁰ Buli omu abeerenga mu kuyitibwa Katonda kwe yamuyitiramu.

²¹ Oba nga wayitibwa ng'oli muddu ekyo kireme okuba ekikulu; naye bw'oba ng'ofunye omukisa okufuuka ow'eddeme, gukozese.

²² Kubanga eyayitibwa Mukama nga muddu, Mukama yamufuula wa ddembe, n'oyo eyali ow'eddeme yafuuka muddu wa Kristo.

²³ Mwagulibwa na muwendo noolwekyo temufuukanga baddu ba bantu.

²⁴ Kale abooluganda, buli kifo kyonna omuntu yenna ky'alimu, mwe yayitirwa abeere mu ekyo.

Abatali bafumbo ne bannamwandu

²⁵ Naye ku ky'abatafumbirwanga wadde okuwasa, sirina kiragiro kiva eri Mukama wabula Mukama mu kusaasira kwe yampa amagezi agayinza okwesigibwa kwe nnaasinziira okubawa ekirowoozo kyange.

²⁶ Kino nkirowooza nga kirungi, olw'embeera eya kaakano, nga kirungi omuntu okusigala nga bw'ali.

²⁷Obanga oli mufumbo tosaanye kwawukana na munno. Naye obanga wayawukana n'omukazi, tonoonya wa kuwasa.

²⁸Kyokka omusajja bw'awasa aba tayonoonye, era n'embeerera bw'afumbirwa naye aba tayonoonye. Wabula abafumbo, obufumbo bujja kubaleetera emitawaana gye nandiyagadde mwewale.

²⁹Naye kino kye mbategeeza abooluganda nti ekiseera kiyimpawadde. Noolwekyo abo abalina abakazi babe ng'abatabalina.

³⁰N'abo abakaaba babe ng'abatakaaba, n'abo abasanyuka babe ng'abatasanyuka. N'abo abagula ebintu babe ng'abatalina kintu kye bayita kyabwe.

³¹Era n'abo abakozesa eby'oku nsi kuno bireme okubamalamu ennyo, kubanga ensi eya kaakano eggwaawo.

³²Naye kye mbagaliza mmwe bwe buteraliikirira. Omusajja atali mufumbo yeemalira ku bya Mukama, engeri gy'asanyusa Mukama.

³³Naye omufumbo yeeraliikirira bya nsi, nga bw'anaasanyusa mukazi we;

³⁴aba yeesazeemu, ng'atta aga n'aga. N'omukazi atali mufumbo n'embeerera bafaayo ku bintu bya Mukama, babeerenga batukuvu mu mubiri ne mu mwoyo. Naye omukazi omufumbo yeeraliikirira bya mu nsi, engeri gy'anaasanyusaamu bba.

³⁵Bino mbyogera olw'okubagasa, so si kubaziyiza kuwasa na kufumbirwa. Kubanga njagala musobole okuweereza Mukama nga tewali birala bibaziyiza okweweरय ddala.

³⁶Omusajja bw'alowooza nti aba teyeeyisizza bulungi eri omuwala oyo gw'ayogereza bw'atamuwasa, bwe bafumbiriganwa, aba tayonoonye.

³⁷Naye oyo asobola okwefuga ng'alina omutima omunywevu, n'asalawo awatali kuwalirizibwa nti omuwala tajja kumuwasa, aba asazeewo bulungi.

³⁸Kale oyo awasa omuwala gw'ayogereza aba akoze bulungi, naye oyo atamuwasa y'aba asinze okukola obulungi.

³⁹Omukazi omufumbo abeera kitundu kya bba, bba bw'aba akyali mulamu. Naye bba bw'afa olwo ayinza okufumbirwa omusajja omulala gw'ayagala, kyokka omusajja oyo ateekwa kuba mu Mukama waffe yekka.

⁴⁰Naye nze ndowooza nti alina omukisa oyo singa taddayo kufumbirwa. Era ndowooza nga nange nnina Omwoyo wa Katonda.

1 Abakkolinso 8

Ebiweereddwayo eri bakatonda abalala

¹ Kale ku nsonga ey'okuwaayo ssaddaaka eri bakatonda abalala: tumanyi nti byonna tubitegeera. Naye okwerowooza nti tumanyi kuleeta okwekuluntaza naye okwagala kuzimba.

² Omuntu alowooza nti amanyi, aba alaga nga bw'atannamanya era nga bwe kimugwanira okumanya.

³ Naye oyo ayagala Katonda amanyibwa Katonda.

⁴ Kale ku nsonga eno ey'okulya ebiweereddwayo eri bakatonda abalala, tumanyi bakatonda abalala bwe bataliimu nsa. Era tumanyi nga waliwo Katonda omu yekka, tewali mulala.

⁵ Waliwo abayitibwa bakatonda abali mu ggulu ne ku nsi newaakubadde nga waliwo bakatonda bangi n'abaami bangi.

⁶ Kyokka ffe tumanyi nga waliwo Katonda omu yekka, ye Kitaffe, era ye yatonda ebintu byonna, era naffe tuli mu ye, era nga waliwo Mukama omu ye Yesu Kristo, ebintu byonna mwe byayita okutondebwa, era mu ye mwe tuyita okufuna obulamu.

⁷ Kyokka kino abamu tebakimanyi. Obulamu bwabwe bwonna bwamanyiira okulowooza nti bakatonda abalala balamu ddala, era nga n'ebiweebwayo ebyo biweebwayo eri bakatonda ddala. Kaakano bwe balya emmere eyo eyonoona emyoyo gyabwe, kuba minafu, beeyonoona bokka.

⁸ Naye emmere si yeetuleetera okusiimibwa Katonda. Bwe tutagirya tewaba kye tusubwa, era ne bwe tugirya terina kye twongerako.

⁹ Kyokka mwegendereze bwe muba mukozesa eddembe lyabwe eryo, si kulwa nga mwesittaza abo abanafu mu kukkiriza.

¹⁰ Kubanga ggwe amanyi, singa omunafu mu kukkiriza akulaba ng'olya mu ssabo lya bakatonda abalala, ekyo tekirimugumya okulya ebiweereddwayo eri bakatonda abalala.

¹¹ Kale owooluganda oyo omunafu, Kristo gwe yafiirira, azikirizibwe olw'okumanya kwo!

¹² Noolwekyo bwe mukola ekibi ku booluganda muba muleeta ekiwundu ku mwoyo gwabwe kubanga banafu, era muba mukola kibi eri Kristo.

¹³ Kale obanga kye ndya kyesittaza muganda wange, siryenga nnyama emirembe gyonna, nnemenga okwesittaza muganda wange.

1 Abakkolinso 9

Ebigwanira omutume ne by'ateekwa okukola

¹Ssiri wa ddembe? Ssiri mutume? Ssaalaba Yesu Mukama waffe? Si mmwe bibala by'omulimu gwange mu Mukama waffe?

²Obanga ssiri mutume eri abalala, naye ndi mutume eri mmwe, kubanga mmwe kabonero k'obutume bwange mu Mukama waffe.

³Ekyo ky'eky'okuwoza kyange eri abo abambulirizaako.

⁴Sirina buyinza kulya na kunywa?

⁵Singa nnewasiza omukazi, siyinza kutambula naye mu njendo zange ng'abatume abalala ne Keefa, ne baganda ba Mukama waffe bwe bakola?

⁶Oba Balunabba nange, ffe ffekka ffe tusaana okwekolera?

⁷Muserikale ki ali mu magye nga yeesasula empeera? Muntu ki eyalima ennimiro y'emizabbibu naye n'aziyizibwa okulya ku bibala byayo? Oba ani alunda ekisibo n'atanywa ku mata gaamu?

⁸Ebyo mbyogera ku bwange ng'omuntu, etteeka nalyo si bwe ligamba?

⁹Kubanga kyawandiikibwa mu mateeka ga Musa nti, "Tosibanga mumwa gwa nte ewuula enjaano," Mulowooza Katonda afa ku bya nte zokka,

¹⁰oba kino akyogera ku lwaffe? Kubanga kino kyawandiikibwa ku lwaffe, oyo alima mu kusuubira alime, n'oyo awuulaasuubire okufuna ku bibala.

¹¹Obanga ffe twabasigamu eby'omwoyo, tekiriba kya kitalo bwe tulikungula ebyammwe eby'omubiri?

¹²Kale obanga abalala balina obuyinza ku mmwe, ffe tetusaanidde nnyo n'okusingawo? Kyokka ffe tetwabakaka kubituwa. Naye tugumiikiriza byonna, tuleme okuziyiza Enjiri ya Kristo.

¹³Temumanyi ng'abo abakola mu Yeekaalu baliisibwa bya Yeekaalu, era nga n'abo abaweereza ku kyoto bagabana bya ku kyoto?

¹⁴Mu ngeri y'emu Mukama waffe yalonda abo ababuulira Enjiri baliisibwenga olw'Enjiri.

¹⁵Kyokka nze siriiko na kimu ku ebyo kye nkозesenzaako. Era ssawandiika bino ndyoke binkolerwe kubanga waakiri nze okufa okusinga okwenyimiriza kwange bwe kutaabeemu nsa.

¹⁶Kubanga bwe mbuulira Enjiri sisobola kwenyimiriza, kubanga mpalirizibwa okugibuulira. Era ziba zinsanze bwe sigibuulira.

¹⁷Kubanga bwe mbuulira Enjiri olw'okweyalira, mbeera n'empeera, naye ne bwe mba nga ssaagala, nkikola lwa kubanga nakwasibwa omulimu ogwo.

¹⁸Kale empeera yange y'eruwa? Empeera yange kwe kubuulira Enjiri nga sisasulwa era nga sibasaba nsasulwe olw'omulimu ogwo nga bwe nsaanidde.

¹⁹Kubanga newaakubadde nga ndi wa ddembe eri abantu bona, nfuuka omuddu wa bona olw'okweyagalira, ndyoke ndeete bangi eri Kristo.

²⁰Eri Abayudaaya nafuuka ng'Omuyudaaya ndyoke nsobole okubaleeta eri Kristo. N'eri abo abafugibwa amateeka nafuuka ng'afugibwa amateeka, newaakubadde nze nga ssifugibwa mateeka, ndyoke mbaleete eri Kristo.

²¹Eri abo abatalina mateeka ga Katonda, nafuuka ng'atafugibwa mateeka, newaakubadde nga ssaaleka mateeka ga Katanda, naye nga ndi mu mateeka ga Kristo, n'abo abatalina mateeka ndyoke mbaleete eri Kristo.

²²Mu banafu nafuuka ng'omunafu ndyoke mbaleete eri Kristo. Eri abantu bona nfuuse byonna, mu ngeri yonna ndyoke mbeeko beentusa ku kulokolebwa.

²³Byonna mbikola olw'enjiri, era nange ndyoke nfunire wamu nabo ebiva mu Njiri eyo.

²⁴Temumanyi nga mu mpaka ez'okudduka abo bona abazeetabamu badduka, naye awangula ekirabo abeera omu? Kale nammwe muddukenga bwe mutyo nga mufubirira okuwangula ekirabo.

²⁵Buli muzanyi eyeetaba mu mpaka ateekwa okufuna okutendekebwa okw'amaanyi nga yeefuga mu bintu byonna. Ekyo bakikola balyoke bawangule engule eyonooneka. Naye ffe tulifuna engule eteyonooneka.

²⁶Noolwekyo nziruka nga nnina kye ḥenderera. Sirwana ng'omukubi w'ebikonde amala gawujja n'akuba ebbanga.

²⁷Naye mbonereza omubiri gwange ne ngufuula omuddu wange, si kulwa nga mbuulira abalala Enjiri, ate nze nzennyini ne sisiimbwa.

1 Abakkolinso 10

Okulabula ku Bakatonda Abalala

¹Abooluganda, musaana mutegeere nga bajajjaffe bona baakulemberwa ekire, era bona ne bayita mu nnyanja,

²bwe batyo bona ne bakulemberwa Musa ne babatizibwa mu kire ne mu nnyanja.

³Bonna baalyanga emmere y'emu ey'omwoyo,

⁴era bona baanywanga ekyokunyuwa kye kimu eky'omwoyo, kubanga bona baanywanga mu lwazi olw'omwoyo olwabagobereranga era olwazi olwo yali Kristo.

⁵Naye era abasinga obungi Katonda teyabasiima, bwe batyo ne bazikirizibwa mu ddungu.

⁶Ebintu bino ebyabatuukako bitulabula obuteegomba bibi nga bo bwe baakola.

⁷Temusinzanga bakatonda balala, ng'abamu ku bo bwe baali, ng'Ekyawandiikibwa bwe kigamba nti, "Abantu baatuula okulya n'okunywa ne basituka ne bakola effujjo."

⁸Tetusaana kubeera benzi ng'abamu ku bo bwe baali, abantu emitwalo ebiri mu enkumi ssatu ku bo ne bafa mu lunaku lumu.

⁹Era tetusaana kukema Kristo ng'abamu ku bo bwe baakola, emisota ne gibazikiriza.

¹⁰Era temwemulugunya ng'abamu ku bo bwe baakola, ne battibwa omuzikiriza.

¹¹Ebyo byonna byabatuukako ng'ekyokulabirako gye tuli, era byawandiikibwa olw'okutulabula ffe abaliwo abatuukiddwako enkomerero.

¹²Kale alowooza ng'ayimiridde, yeekuumenga aleme okugwa.

¹³Tewali kukemebwa kubatuukako okutali kwa bantu; kyokka Katonda mwesigwa, kubanga taabalekenga kutuukibwako kukemebwa kwe mutayinza kugumira, naye anaabasobozesanga okubigumira, n'abalaga n'ekkubo ery'okubiwangula.

¹⁴Noolwekyo, mikwano gyange, muddukenga okusinza bakatonda abalala.

¹⁵Muli bantu abategeera. Kale, mulabe obanga kye njogera kye kikyo.

¹⁶Ekikompe eky'omukisa, kye tusabira omukisa, si kwe kussekimu okw'omusaayi gwa Kristo? Omugaati gwe tumenya, si kwe kussekimu okw'omubiri gwa Kristo?

¹⁷Kubanga ffe bangi, ffenna tulya ku mugaati gumu, ekiraga nga bwe tuli omubiri ogumu.

¹⁸Mulabe Isirayiri ow'omubiri, abalya ssaddaaka tebassa kimu na Kyoto?

¹⁹Kale kiki kye ngezaako okutegeeza? Mulowooza ɲjamba nti ebyokulya ebiweebwayo eri bakatonda abalala birimu amakulu? Oba nti bakatonda abalala balina omugaso?

²⁰Nedda. Kye ɲjamba kye kino nti abo abawaayo ssaddaaka eri bakatonda abalala bawa eri baddayimooni so si eri Katonda. Saagala mwegatte wamu ne baddayimooni mussekimu nabo.

²¹Temuyinza kunywa ku kikompe kya Mukama ate ne munywa ne ku kikompe kya baddayimooni. Era temuyinza kuliira ku mmeeza ya Mukama ate ne ku ya baddayimooni.

²²Oba Mukama tetumukwasa buggya? Tumusinza amaanyi?

²³Byonna bikkirizibwa, naye si byonna ebirimu omugaso. Byonna bikkirizibwa naye si byonna ebizimba.

²⁴Omuntu yenna alemenga okwefaaako yekka, naye afengayo ne ku bya munne.

²⁵Mwegulire ennyama eya buli ngeri gye batunda mu katale mulye, awatali kusooka kwebuuza olw'omwoyo gwammwe.

²⁶Kubanga ensi ya Mukama n'okujjula kwayo.

²⁷Singa omu ku batali bakkiriza abayita ku kijjulo, ne mwagala okugenda, kale mulyenga kyonna kye banaabagabulanga nga temuliiko kye mubuuzizza olw'obulungi bw'omwoyo gwammwe.

²⁸Kyokka omuntu yenna bw'abategeezanga nti, "Kino kyaweerreddwayo eri bakatonda abalala," temukiryanga olw'oyo abategeezessa n'olw'obulungi bw'omwoyo gwammwe,

²⁹bwe njogera bwe ntyo, njogera ku mwoyo gwe so si ogw'oli omulala. Kubanga lwaki eddembe lyange lisalirwa omusango omwoyo gw'omulala?

³⁰Bwe ndya nga neebazizza, lwaki nnenyezebwa olw'ekyo kye ndya nga neebazizza?

³¹Kubanga buli kye mukola, oba kulya oba kunywa, mukikole nga mugenderera kugulumiza Katonda.

³²Temukolanga ekkyo ekineesittaza Abayudaaya oba Abayonaani wadde ab'ekkanisa ya Katonda.

³³Nange bwe ntyo ngezaako okusanyusa abantu bona mu byonna bye nkola, nga sinoonya byange, wabula nga nfa ku bulungi bw'abalala balyoke balokolebwe.

1 Abakkolinso 11

¹Mundabireko nga nange bwe ndabira ku Kristo.

Okubikka ku mutwe mu kusinza

²Mbatenda nnyo Olw'okunzijjukiza mu bintu byonna era n'olw'okunyweza ebyo bye nabayigiriza.

³Kyokka njagala mutgeere nti Kristo ye mutwe gwa buli muntu, n'omusajja gwe mutwe gwa mukazi we. Era Katonda ye mutwe gwa Kristo.

⁴Noolwekyo omusaja yenna bw'asaba oba bw'ayogera eby'obunnabbi nga taggyeko kibikka ku mutwe gwe, aba aswaza omutwe gwe.

⁵N'omukazi bw'asaba oba n'ayogera eby'obunnabbi nga tabisse mutwe gwe aba tawadde bba kitibwa kubanga kyekimu n'oyo amwereddwako enviiri.

⁶Obanga omukazi tayagala kubikka ku mutwe gwe, kale enviiri ze azisalengako. Naye obanga omukazi kimuswaza enviiri ze okuzisalako oba okuzimwako, kale atekwa omutwe gwe okugubikkangako.

⁷Omusaja tasaana kubikka ku mutwe gwe, kubanga ye kye kifaananyi n'ekitiibwa kya Katonda; naye omukazi ye ky'ekitiibwa ky'omusaja.

⁸Kubanga omusaja teyatondebwa ng'aggibwa mu mukazi, wabula omukazi ow'olubereberye ye yaggyibwa mu musaja.

⁹Era omusaja teyatondebwa lwa mukazi, wabula omukazi ye yatondebwa olw'omusaja.

¹⁰Kale olw'ensonga eyo, omukazi kimusaanira okubikkanga ku mutwe gwe, okulaga nti afugibwa era ne bamalayika bakirabe.

¹¹Kyokka mu Mukama waffe, omukazi n'omusaja, buli omu yeetaaga munne.

¹²Kuba, newaakubadde ng'omukazi ava mu musaja, naye buli musaja azaalibwa mukazi; kyokka byonna biva eri Katonda.

¹³Kale nammwe bennyini mwebuuze obanga kisaana omukazi okusaba Katonda nga tabisse ku mutwe.

¹⁴Obuzaaliranwa tebubalaga ng'omusaja bw'aba n'enviiri empanvu tekimuweesa kitibwa,

¹⁵ate ng'omukazi ye zimuweesa kitibwa? Kubanga yaweebwa enviiri empanvu okumubikkako.

¹⁶Naye obanga waliwo ayagala okuwakanya bino, tetulinaayo nkola nga eyo, wadde mu Kkanisa za Katonda.

Ekyekiro kya Mukama waffe

¹⁷Mu bino bye njenda okubalagira temuli kya kubatenda, kubanga enkuunjaana zammwe zivaamu bibi okusinga ebirungi.

¹⁸Ekisooka bwe mukunjjaana ng'ekibiina, mwesalaasalamu ebitundu, era nzikiriza ng'ebimu ku ebyo bituufu.

¹⁹Naye okwesalaasalamu okwo kusaana kubeewo abatuufu balyoke bategeerekeke.

²⁰Bwe mukunjjaana ekyo kye mulya si kye kyekiro kya Mukama waffe.

²¹Kubanga bwe muba mulya buli omu alya ku lulwe, talinda banne. Abamu basigala bakyali bayala, ng'abalala bo batamidde.

²²Temulina wammwe gye muyinza okuliira n'okunywera? Oba munyooma ekkanisa ya Katonda, ne muswaza abaavu? Mbagambe ki? Mbatende olw'ekyo? Nedda na katono, sijja kubatenda.

²³Kubanga Mukama yennyini kye yampa ky'ekyo kye nabayigiriza nti, Mukama waffe Yesu, mu kiro kiri kye baamuliiramu olukwe, yaddiru omugaati,

²⁴ne yeebaza Katonda, n'agumenyaamenyamu, n'agamba nti, "Guno mubiri gwange, oguweebwayo ku lwammwe, mugutoole mulye, mukolenga bwe mutyo okunzijukiranga."

²⁵Era mu ngeri y'emu bwe baamala okulya, yaddiru ekikompe n'agamba nti, "Ekikompe kino y'endagaano empya ekoleddwa Katonda nammwe, ekakasiddwa n'omusaayi gwange, mutoole munywe, mukolenga bwe mutyo buli lwe munaakinywangako okunzijukiranga."

²⁶Kubanga buli lwe munaalyanga omugaati guno ne buli lwe munaanywanga ku kikompe, munaategeezanga abantu okufa kwa Mukama waffe okutuusa Lw'alija.

²⁷Noolwekyo buli alya omugaati guno oba anywa ku kikompe kya Mukama waffe nga tasaanidde, azza omusango ku mubiri gwa Mukama waffe, ne ku musaayi gwe.

²⁸Noolwekyo omuntu amalenga kwekebera, alyoke alye ku mugaati n'okunywa ku kikompe.

²⁹Kubanga buli alya era anywa nga tafaayo kutegeera makulu ga mubiri gwa Mukama waffe, aba yeosalidde yekka omusango okumusinga.

³⁰Mu mmwe kyemuvudde mubaamu abanafu n'abawadde, era bangi bafudde.

³¹Naye singa tusooka okwekebera, tetwandisaliddwa musango kutusinga.

³²Kyokka Mukama bw'atusalira omusango aba atukangavvula tuleme kusalirwa musango awamu n'ensi.

³³Kale baganda bange, bwe mukunjaaananga awamu okulya, buli omu alinde munne.

³⁴Era singa wabaawo alumwa enjala amale okulya eka, bwe mukunjaaana muleme kwereetako musango. N'ebirala ndibirongoosa, we ndijjira wonna.

1 Abakkolinso 12

Ebirabo bya Mwoyo Mutukuvu

¹Abooluganda, ssaagala mmwe obutategeera ebikwata ku birabo ebya Mwoyo.

²Mumanyi nti bwe mwali Abaamawanga mwabuzibwabuzibwanga ne mutwalibwa eri ebifaananyi ebitayogera.

³Noolwekyo njagala mutegeere nti tewali muntu aba ne Mwoyo wa Katonda n'ayogera nti, "Yesu akolimirwe." Era tewali n'omu asobola okwogera nti, "Yesu ye Mukama waffe," wabula ku bwa Mwoyo Mutukuvu.

⁴Waliwo ebirabo bya ngeri nnyingi, naye Mwoyo abigaba y'omu.

⁵Waliwo engeri nnyingi ez'okuweererezaamu, naye Mukama aweerezebwा y'omu.

⁶Waliwo okukola kwa ngeri nnyingi kyokka Katonda asobozesa bona mu byonna bye bakola y'omu.

⁷ Mwoyo Mutukuvu yeeragira mu buli omu olw'okugasa bona.

⁸Omú Omwoyo amuwa okwogera ekigambo eky'amagezi, omulala Omwoyo oyo omu n'amuwa okuyiga n'ategeera.

⁹Omulala Omwoyo y'omu n'amuwa okukkiriza, n'omulala n'amuwa obuyinza okuwonyanga abalwadde.

¹⁰Omú, Omwoyo amuwa okukolanga ebyamagero, n'omulala n'amuwa okwogera eby'obunnabbi, ate omulala n'amuwa okwawulanga emyoyo emirungi n'emibi. Omulala amuwa okwogera ennimi ezitali zimu, n'omulala n'amuwa okuzivvuunula.

¹¹Naye Omwoyo akola ebyo byonna y'omu, y'agabira buli muntu ng'Omwoyo oyo bw'ayagala.

Omubiri guli gumu naye ebitundu byagwo bingi

¹²Kuba omubiri nga bwe guli ogumu, ne guba n'ebitundu bingi, ate ebitundu byonna ne byegatta ne biba omubiri gumu, kale, ne Kristo bw'ali bw'atyo.

¹³Bwe tutyo ffenna twabatizibwa mu Mwoyo omu, ne tufuuka omubiri gumu, oba Bayudaaya, oba baamawanga, oba baddu, oba ba ddembe, era ne tunywa ku Mwoyo oyo omu.

¹⁴Kubanga omubiri tegulina kitundu kimu, naye gulina ebitundu bingi.

¹⁵Singa ekigere kigamba nti, "Nze siri mukono, noolwekyo siri kitundu kya mubiri," ekyo tekikifuula butaba kitundu kya mubiri.

¹⁶Era singa okutu kugamba nti, "Siri liiso, noolwekyo siri kitundu kya mubiri," ekyo kikiggyako okubeera ekitundu ky'omubiri?

¹⁷Kale singa omubiri gwonna gwali liiso, olwo okuwulira kwandibadde wa? Era singa omubiri gwonna gwali kutu, olwo okuwunyiriza kwandibadde wa?

¹⁸Naye kaakano Katonda yakola ebitundu bingi eby'enjawulo n'alyoka abifuula omubiri gwaffe nga bwe yayagala.

¹⁹Singa byonna byali ekitundu kimu olwo omubiri gwandibadde wa?

²⁰Naye kaakano ebitundu bingi naye ng'omubiri guli gumu.

²¹Eriiso terisobola kugamba mukono nti, "Ggwe sikuwetaaga," oba n'omutwe teguyinza kugamba bigere nti, "Mmwe sibeetaaga."

²²Era ebitundu ebyo eby'omubiri ebirabika ng'ebisinga obunafu bye byetaagibwa ennyo.

²³Era n'ebitundu ebyo eby'omubiri bye tulowooza obutaba bya kitiiibwa bye bisinga okwambazibwa, n'ebitundu ebitukwasa ensonyi bye tusinga okulabirira,

²⁴so ng'ebitundu byaffe ebisinga okwolekebwa mu bantu tebikyetaaga. Bw'atyo Katonda bwe yakola omubiri, ebitundu ebyandibadde biragajjalirwa n'abyongera ekitiiibwa,

²⁵olwo omubiri ne guteeyawulamu naye ebitundu byonna, ne biyambagana byokka ne byokka.

²⁶Ekitundu ekimu bwe kirumwa, ebitundu ebirala byonna birumirwa. Era ekitundu ekimu bwe kigulumizibwa, ebitundu byonna bijaguliza wamu nakyo.

²⁷Kale mwenna awamu muli mubiri gwa Kristo, era buli omu ku mmwe kitundu kyagwo.

²⁸Era abamu Katonda yabateekawo mu kkanisa: abasooka be batume, abookubiri be bannabbi, n'abookusatu be bayigiriza, ne kuddako abakola eby'amagero, ne kuddako abalina ebirabo eby'okuwonya endwadde, n'okuyamba abali mu kwetaaga, abakulembeze, era n'aboogezi b'ennimi.

²⁹Bonna batume? Bonna bannabbi? Bonna bayigiriza? Bonna bakola ebyamagero?

³⁰Bonna balina ekirabo ky'okuwonya endwadde? Bonna boogera mu nnimi? Bonna bavvuunula ennimi?

³¹Kale mwegombenga ebirabo ebisinga obukulu, naye ka mbalage ekkubo eddungi erisinga gonna.

1 Abakkolinso 13

Okwagala

¹Singa njogera ennimi z'abantu n'eza bamalayika, naye nga sirina kwagala, mba ng'ekidde, ekireekaana oba ng'ekitaasa ekisaala.

²Ne bwe mba n'ekirabo eky'okwogera eby'obunnabbi, ne ntegeera ebyama byonna, era ne mmanyia ebintu byonna, era ne bwe mba n'okukkiriza okungi ne kunsobozesa n'okusiguukulula ensozi, naye nga sirina kwagala, mba siri kintu.

³Ne bwe mpaayo ebyange byonna okuyamba abaavu, era ne bwe mpaayo omubiri gwange ne nneewaana, naye ne siba na kwagala, sibaako kye ngasibbwaa.

⁴Okwagala kugumiikiriza era kwa kisa. Okwagala tekulina buggyaa era tekwenyumiikiriza wadde okwekuluntaza.

⁵Okwagala tekukola bitasaana, tekunoonya byakwo, tekunyiiga mangu, era tekusiba kibi ku mwoyo.

⁶Okwagala tekusanyukira bitali bya butuukirivu, wabula kusanyukira mazima.

⁷Okwagala kugumira byonna, kukkiriza byonna, kusuubira byonna era kugumiikiriza byonna.

⁸Okwagala tekulemererwa; obunnabbi buliggyibwawo, n'ennimi zirikoma, n'eb'yamagezi birikoma.

⁹Kubanga tumanyiiko kitundu, ne bunnabbi nabwo bwa kitundu.

¹⁰Naye ebituukiridde bwe birijja, olwo eby'ekitundu nga biggwaawo.

¹¹Bwe nnali omuto, nayogeranga ng'omuto, nalowoozanga ng'omuto, ne byonna nga mbiraba mu ngeri ya kito. Naye bwe nakula ne ndeka eby'ekito.

¹²Kaakano tulaba kifaananyi bufaananyi, ng'abali mu ndabirwamu eteraba bulungi; naye tulirabira ddala bulungi amaaso n'amaaso. Kaakano mmanyiiko kitundu butundu, naye luli ndimanyira ddala byonna, mu bujuvu.

¹³Kaakano waliwo ebintu bisatu eby'olubeerera: okukkiriza, n'okusuubira, era n'okwagala. Naye ekisingako ku ebyo obukulu kwe kwagala.

1 Abakkolinso 14

Ebirabo eby'Omwoyo

¹Mugobererenga okwagala era muluubirirenga ebirabo eby'Omwoyo, na ddala ekirabo eky'okwogera eby'obunnabbi.

²Kubanga ayogera mu nnimi tayogera n'abantu, wabula ayogera na Katonda. Kubanga tewali n'omu ategereera by'agamba. Aba ayogera bya kyama mu Mwoyo.

³Naye oyo ategheeza abantu eby'obunnabbi ayogera ebibazimba, ebibagumya era n'okubazzaamu amaanyi.

⁴Ayogera ennimi yeezimba yekka, naye oyo ayogera eby'obunnabbi azimba ekibiina kyonna eky'abakkiriza.

⁵Nandyagadde mwenna mwogere mu nnimi, naye ekisingira ddala nandyagadde mwenna mwogere eby'obunnabbi, kubanga ayogera eby'obunnabbi akira oyo ayogera mu nnimi, okuggyako nga waliwo avvuunula, Ekkanisa eryoke egasibwe.

⁶Kale kaakano, abooluganda, bwe nzija gye muli ne njogera mu nnimi mbagasa ntya? Naye bwe mbategeeza ebyo Katonda by'ambikulidde oba bye njize mu kutegeera, oba eby'obunnabbi, oba bye njigiriza, olwo mmanyi nga mbagasa.

⁷Era n'ebivuga eittalina bulamu, ng'endere oba ennanga, bwe bitavuga mu maloboozi gategeerekeka, omuntu ayinza atya okutegeera oluyimba olufuuyibwa oba olukubibwa?

⁸Era singa omufuuyi w'eñjombe tafuuwa ddoboozi Iitegeerekeka, ani ayinza okweteekerateekera olutalo?

⁹Mu ngeri y'emu, bwe mwogera n'omuntu mu lulimi lw'atamanyi, asobola atya okutegeera kye mugamba? Muba mwogeredde bwereere.

¹⁰Weewaawo waliwo ennimi nnyingi mu nsi, era zonna zirina amakulu.

¹¹Naye omuntu bw'ayogera olulimi lwe simanyi, aba ng'omugwira gye ndi, nange mba ng'omugwira gy'ali.

¹²Bwe mutyo nga bwe mwegomba okufuna ebirabo eby'Omwoyo, mufubenga nnyo mulyoke musobole okuzimba Ekkanisa ya Kristo.

¹³Kale buli ayogera mu lulimi asabe Katonda amusobozese okuluvvuunula.

¹⁴Kubanga bwe nsaba Katonda mu lulimi lwe sitegeera, omwoyo gwange gusaba, naye sibaako kye nganyulwa.

¹⁵Kale kino ki? Nnaasinzanga Katonda n'omwoyo gwange awamu n'amagezi gange era nnaayimbanga mu mwoyo gwange awamu n'amagezi gange.

¹⁶Kubanga bw'otendereza Katonda mu mwoyo gwo, omuntu atategeera ky'ogamba ayinza atya okuddamu nti, "Amiina!" ng'omaliriza okwebaza, ng'ebigambo ebyebazizza tabitedgedde?

¹⁷Weewaawo oyinza okuba nga weebazizza Katonda, naye omulala nga tagasibbwaa.

¹⁸Neebaza Katonda kubanga njogera ennimi okubasinga mwenna.

¹⁹Naye mu lukuñjaana njagala njogere n'amagezi gange ebigambo bitaano abalala bye bategeera nga mbayigiriza, okusinga okwogera ebigambo omutwalo mu nnimi, bye bataategeere.

²⁰Abooluganda, temulowooza bya kito. Mube ng'abaana abato ku bikwata ku kukola ebibi, mube bakulu mu kulowooza kwammwe.

²¹Era kyawandiikibwa mu mateeka nti, "Ndyogera n'abantu bano mu nnimi endala, n'emimwa egy'abalala, naye era tebalimpulira, bw'ayogera Mukama."

²²Noolwekyo ennimi kyeziva ziba akabonero, si eri abo abakkiriza naye eri abo abatali bakkiriza, naye okutegeeza obunnabbi kw'abo abakkiriza so si abo abatali bakkiriza.

²³Kale singa Ekkanisa ekuñjaana bona ne boogera mu nnimi abatamanyi oba abatali bakkiriza ne bayingira, tebagamba nti mulaluse?

²⁴Naye singa bona boogera eby'obunnabbi, atali mukkiriza oba atamanyi n'ayingira, ebyo ebyogerebwa byonna, bijja kumuleetera okulumirizibwa olw'ebibi bye, yeosalire omusango,

²⁵ebyama by'omu mutima gwe bibikkulwe, alyoke afukamire asinze Katonda, nga bw'agamba nti, "Ddala Katonda ali mu mmwe."

Byonna Bikolebwe mu Bulambulukufu

²⁶Kale abooluganda tugambe tutya? Bwe mukuñjaana buli omu aba ne zabbuli, oba eky'okuyigiriza, oba ekyo Katonda ky'amubikkulidde, oba okwogera mu nnimi, oba okuvvuunula. Ebyo byonna bisaana bikolebwe olw'okuzimba Ekkanisa ya Katonda.

²⁷Singa wabaawo aboogera mu nnimi bandyogedde babiri, oba obutasussa basatu, era nga boogera mu mpalo, ate wabeewo n'avvuunula.

²⁸Naye bwe watabaawo avvuunula omwogezi w'ennimi asirike busirisi mu Kkanisa wabula ayogerere munda ye ne Katonda.

²⁹Kyokka abo aboogera eby'obunnabbi boogerenga babiri oba basatu, ng'abalala bafumiitiriza ku ebyo ebyogerwa.

³⁰Naye singa omu ku batudde abikkulirwa ekigambo kya Katonda, oyo abadde ayogera asirikenga.

³¹Kubanga mwenna musobola okwogera eby'obunnabbi nga mwogera mu mpalo, bona balyoke bayige era bongewemu amaanyi.

³²Abalina omwoyo ogw'obunnabbi bafugibwa bannabbi,

³³kubanga Katonda si wa luyoogaano, wabula wa mirembe. Kale nga bwe kiri mu Kkanisa z'abatukuvu zonna,

³⁴abakazi basirikenga busirisi mu kuñjaaniro, kubanga tebakkirizibwa kwogera, wabula okukulemberwa ng'amateeka bwe gagamba.

³⁵Bwe wabangawo kye baagala okubuuza babuuzenga ba bbaabwe eka, kubanga kya nsonyi omukazi okwogera mu Kkanisa.

³⁶Kale mulowooza nti ekigambo kya Katonda kyatandikira mu mmwe oba nti mmwe be kyatuukako mwekka?

³⁷Omuntu yenna alowooza okuba nnabbi oba omuntu ow'omwoyo, ategeere mu bujjuvu nti bino bye mbawandiikira kye kiragiro kya Mukama.

³⁸Naye omuntu yenna atabifaako naye si wa kufiibwako.

³⁹Kale baganda bange myayaayaanirenga okwogera eby'obunnabbi, kyokka okwogera mu nnimi temukuziyiza.

⁴⁰Naye byonna bikolebwenga nga bwe kisaana era mu ntegeka entuufu.

1 Abakkolinso 15

Kristo Yazuukira

¹ Abooluganda, mbajjukiza Enjiri gye nababuulira era gye mwakkiriza era gye munywereddemu.

²Mulokolebwa lwa Njiri eyo gye nababuulira, bwe muginywererako, naye bwe kitaba bwe kityo muba mwakkiririza bwereere.

³Kubanga nabategeeza ekigambo ekikulu ennyo nange kye nnaweebwa ekigamba nti Kristo yafa olw'ebibi byaffe, ng'Ebyawandiikibwa bwe bigamba,

⁴era nti yaziikibwa, n'azuukizibwa ku lunaku olwokusatu ng'Ebyawandiikibwa bwe bigamba,

⁵era nti yalabibwa Keefa n'oluvannyuma ekkumi n'ababiri.

⁶Era yalabibwa abooluganda abasukka ebikumi ebitano omulundi gumu era abamu ku abo bakyali balamu newaakubadde ng'abalala baafa.

⁷Olwo n'alyoka alabikira Yakobo, n'oluvannyuma n'alabikira n'abatume bona.

⁸Oluvannyuma lwa bona n'alyoka alabikira nange, ng'omwana azaalibbwaga musowole.

⁹Kubanga nze nsembayo mu batume, Era sisaanira na kuyitibwa mutume, kubanga nayigganya Ekkanisa ya Katonda.

¹⁰Naye olw'ekisa kya Katonda ndi nga bwe ndi kaakano, era ekisa Katonda kye yankwatirwa tekyafa bwereere. Kubanga nakola nnyo okusinga abalala bona, naye si nze nakola wabula ekisa kya Katonda ekiri nange kye kyakola.

¹¹Oba nze oba bo, be baakola ennyo ekkyo si kikulu, ekikulu kye kino nti twababuulira Enjiri era nammwe ne mugikkiriza.

Okuzuukira kw'Abafu

¹²Kale obanga abantu bategeeezebwa nti Kristo yazuukizibwa mu bafu lwaki abamu mu mmwe bagamba nti tewali kuzuukira kwa bafu?

¹³Kale obanga tewali kuzuukira kwa bafu ne Kristo teyazuukizibwa.

¹⁴Era obanga Kristo teyazuukizibwa, bye tubategeeza tebiriimu, era n'okukkiriza kwammwe tekuliiko kye kugasa.

¹⁵Ate era tuba ng'aboogera eby'obulimba ku Katonda, kubanga twakakasa nti Katonda yazuukiza Kristo. Naye teyamuzuukiza bwe kiba ng'abafu tebazuukizibwa.

¹⁶Kale obanga abafu tebazuukizibwa, ne Kristo teyazuukizibwa.

¹⁷Era obanga Kristo teyazuukizibwa okukkiriza kwammwe tekuliimu nsa, era mukyali mu bibi byammwe.

¹⁸Era n'abo abaafa nga bakkiriza Kristo baazikirira.

¹⁹Kale obanga essuubi lyaffe mu Kristo likoma mu bulamu buno bwokka, tuli bakusaasirwa nnyo okusinga abantu bona.

²⁰Kyokka ddala Kristo yazuukizibwa mu bafu, era bye bibala ebibereberye eby'abo abaafa.

²¹Kuba ng'okufa bwe kwaleetebwa omuntu, era n'okuzuukira kw'abafu kwaleetebwa muntu.

²²Kuba ng'abantu bona bwe baafa olwa Adamu, era bwe batyo bona balifuilibwa abalamu olwa Kristo.

²³Kyokka buli omu mu luwalo lwe, Kristo ye yasooka era bw'alijja ababe ne baddako,

²⁴olwo enkomerero n'eryoka etuuka, Kristo n'akwasa Katonda Kitaawe obwakabaka; Kristo ng'amaze okuzikiriza obufuzi bwonna, n'obuyinza bwonna era n'amaanyi gonna.

²⁵Kubanga Kristo agwanidde okufuga okutuusa bw'alissa abalabe be bona wansi w'ebigere bye.

²⁶Omulabe we alisembayo okuzikirizibwa kwe Kufa.

²⁷Kubanga yassa ebintu byonna wansi w'ebigere bye. Naye bw'agamba nti ebintu byonna biri wansi we, kitegeeza nti aggyeko oli ey'amusobozesa okufuga ebintu byonna.

²⁸Katonda bw'alimala okussa byonna mu buyinza bwa Kristo, olwo Kristo yennyini, Omwana we, n'alyoka afugibwa Katonda eyamuwa okufuga byonna. Era olwo Katonda n'alyoka afugira ddala byonna.

²⁹Kale obanga abafu tebazuukizibwa, abo ababatizibwa ku lw'abafu balikola batya? Era kale lwaki babatizibwa ku lwabwe?

³⁰Era ffe lwaki tuli mu kabi buli kaseera?

³¹Abooluganda, olw'okwenyumiriza kwe munninamu, era kwe nnina mu Kristo Yesu Mukama waffe, nkakasa nti nfa buli lunaku.

³²Kale obanga nze omuntu obuntu nalwana n'ensolo enkambwe mu Efeso, kingasa ki? Obanga abafu tebazuukizibwa, "Kale tulye tunywe kubanga enkyा tuli ba kufa."

³³Temulimbibwalimbibwanga, kubanga "emikwano emibi gyonoona empisa ennungi."

³⁴Mweddemu, mutambulirenga mu butuukirivu mulekeraawo okukola ebibi, kubanga abamu mu mmwe tebamanyi Katonda. Kino nkyogera kubakwasa nsongyi.

Okuzuukira kw'Omubiri

³⁵Naye omuntu ayinza okubuuza nti, "Abafu bazuukizibwa batya?" Era nti, mubiri gwa ngeri ki gwe bajja nagwo?

³⁶Musirusiru ggwe! Ensigo gy'osiga temeruka nga tennafa.

³⁷Era ensigo eyo gy'osiga eba mpeke buweke; so si ekirivaamu oba ya ɳjaano, oba ya ngeri ndala.

³⁸Naye Katonda agiwa omubiri nga bw'ayagala, era buli ngeri ya nsigo agiwa omubiri gwayo.

³⁹Kubanga emibiri gyonna tegiba gya ngeri emu. Waliwo omubiri ogw'abantu, waliwo ogw'ensolo, waliwo ogw'ennyonyi, era waliwo n'ogw'ebunnyanya.

⁴⁰Noolwekyo waliwo emibiri eg'yomu ggulu, n'emibiri eg'yomu nsi. Naye ekitiibwa ky'emibiri eg'yomu ggulu kirala, era n'eky'eg'yomu nsi kirala.

⁴¹Waliwo ekitiibwa ky'enjuba, waliwo eky'omwezi, era waliwo ekitiibwa eky'emmunyeenye. Naye era n'emmunyeenye tezenkanankana mu kwaka kubanga buli munyeenye ya njawulo mu kwaka.

⁴²Era bwe kiri mu kuzuukira. Omubiri guziikibwa nga gwa kuvunda, ne guzuukizibwa nga si gwa kuvunda.

⁴³Guziikibwa nga si gwa kitibwa, naye ne guzuukizibwa nga gujjudde ekitiibwa. Guziikibwa nga munafu, naye guzuukizibwa nga gwa maanyi.

⁴⁴Guziikibwa nga mubiri bubiri, naye guzuukizibwa nga mubiri gwa mwoyo. Kale obanga waliwo omubiri obubiri, era waliwo omubiri ogw'omwoyo,

⁴⁵kyekyava kiwandiikibwa nti, "Adamu, omuntu eyasooka, yatondebwa ng'alina obulamu." Kyokka Adamu ow'oluvannyuma ye Mwoyo aleeta obulamu.

⁴⁶Naye eky'omwoyo si kye kyasooka, wabula eky'omubiri obubiri kye kyasooka, n'oluvannyuma eky'omwoyo ne kijja.

⁴⁷Omuntu eyasooka yava mu ttaka, yakolebwa mu nfuufu. Ye omuntu owookubiri yava mu ggulu.

⁴⁸Ng'eyakolebwa mu nfuufu bw'ali, n'abo abaakolebwa mu nfuufu bwe bali.

⁴⁹Era nga bwe tufaanana oyo eyakolebwa mu nfuufu, era bwe tutyo bwe tulifaanana oyo eyava mu ggulu.

⁵⁰Abooluganda, kye ηjamba kye kino nti omubiri guno ogw'oku nsi, ogw'enyyama n'omusaayi, teguyinza kusikira bwakabaka bwa Katonda. Emibiri gyaffe egivunda tegisobola kuba gya lubeerera.

⁵¹Naye leka mbabuulire ekyama: Si ffenna abalifa, naye ejjombe ey'enkomerero bw'erivuga ffenna tulifuusibwa

⁵²mu kaseera katono ng'okutemya kikowe. Kubanga ejjombe erivuga, n'abafu balizuukizibwa, nga tebakyaddayo kufa era ffenna tulifuusibwa.

⁵³Kubanga omubiri guno oguvunda gwa kufuuka ogutavunda, era omubiri guno ogufa gwa kufuuka ogutafa.

⁵⁴Omubiri guno oguvunda bwe gulifuuka ogutavunda, ogufa ne gufuuka ogutafa, olwo Ekyawandiikibwa ne kiryoka kituukirira ekigamba nti, "Okufa kuwanguddwa."

⁵⁵"Gewe kufa, obuwanguzi bwo buluwa? Gwe kufa, amaanyi go agalumya galuwa?"

⁵⁶Obuyinza obulumya buva mu kibi, n'amaanyi g'ekibi gava mu mateeka.

⁵⁷Kyokka Katonda yeebazibwe atuwanguza ffe ku bwa Mukama waffe Yesu Kristo.

⁵⁸Noolwekyo, baganda bange abaagalwa, mubenga banywevu era abatasagaasagana nga mweyongeranga bulijo okukola omulimu gwa Mukama waffe, kubanga mumanyi nti okufuba kwammwe si kwa bwereere mu Mukama waffe.

1 Abakkolinso 16

Okuyamba Abantu ba Katonda

¹Kale ebyo ebikwata ku kuyamba abantu ba Katonda, mmwe mukole nga bwe nagamba ab'Ekkanisa z'e Ggalatiya.

²Buli omu ku mmwe ng'asinziira ku kufuna kwe mu wiiki, abengako ky'atereka, ebintu bireme kukuŋyaanyizibwa nga nzize.

³Kale bwe ndituuka ne mutuma abo be munaasiima ne mbawa ebbaluwa ne batwala ebirabo byammwe e Yerusaalemi.

⁴Naye bwe kirirabika nga nange nsaanye njende, kale balimperekero.

Enteekateeka za Pawulo

⁵Njenda kujja gye muli nga mpitira e Makedoniya, gye ndimala akabanga akatono.

⁶Osanga ewammwe gye ndimala ebbanga eriwera, oboolyawo ndiba nammwe mu biseera eby'obutiti byonna, mulyoke munnyambe buli gye nnaalaganga.

⁷Saagala kubalabako kaseera katono, nsuibira okumala nammwe ekiseera, Mukama waffe bw'alisiima.

⁸Kyokka njenda kubeera mu Efeso okutuusa ku Pentekoote.

⁹Kubanga ddala oluggi lw'Enjiri lunziguliddwawo, newaakubadde ng'eriyo bangi abampakanya.

¹⁰Timoseewo bw'ajjanga, mumuyambe atereere bulungi mu mmwe, kubanga naye akola omulimu gwa Mukama waffe nga nze.

¹¹Noolwekyo waleme kubaawo amunyooma. Mumuyambe olugendo lwe lube lwa mirembe, ajje gye ndi. Kubanga nze n'abooluganda tumulindiridde.

¹²Naye ebyo ebikwata ku wooluganda Apolo, namwegayirira nnyo ajje gye muli, ng'ali n'abooluganda abalala, kyokka ye n'atayagala kujja kaakano, wabula alija ng'afunye ebbanga.

Ebikomererayo

¹³Mutunulenga, munywerere mu kukkiriza, mubeere bazira era ab'amaanyi.

¹⁴Buli kye mukola mukikolerenga mu kwagala.

¹⁵Abooluganda, mumanyi nti mu Akaya ab'omu nnyumba ya Suteefana be baasooka okukkiriza Mukama waffe, era beewaayo okuyamba n'okuweerezaabantu ba Katonda. Kale, abooluganda, mbasaba

¹⁶Muwulirenga abantu ng'abo, era na buli omu afube okukoleranga awamu nabo.

¹⁷Suteefana ne Folutunaato ne Akayiko bwe bajja gye ndi nasanyuka, kubanga baaliwo mu kifo kyammwe.

¹⁸Era bansanyusa, era nga nammwe bwe baabasanyusa. Abantu ng'abo musaana mubalage nga bwe musiimye okuweereza kwabwe.

¹⁹ Ekkanisa ey'omu Asiya ebalamusizza. Akula ne Pulisikira awamu n'Ekkanisa ya Kristo eri mu maka gaabwe babalamusizza nnyo mu Mukama waffe.

²⁰ Era abooluganda bona babalamusizza. Mulamusagane mu n'okunywegera okutukuvu.

²¹ Nze, Pawulo, mbawereza okulamusa kwange kuno, kwe mpandiika nze nzennyini n'omukono gwange.

²² Obanga waliwo atayagala Mukama, akolimirwe. Mukama waffe Yesu, jjangu!

²³ Ekisa kya Mukama waffe Yesu Kristo kibeerenga nammwe.

²⁴ Mwenna mbalamusizza n'okwagala mu Kristo Yesu. Amiina.

2 Abakkolinso

2 Abakkolinso 1

Okulamusia n'Okwebaza

¹ Pawulo omutume wa Kristo Yesu, olw'okusiima kwa Katonda, n'owooluganda Timoseewo, tuwandiikira ekkanisa ya Katonda eri mu Kkolinso awamu n'abatukuvu bona abali mu Akaya yonna,

²ekisa n'emirembe ebiva eri Katonda Kitaffe ne Mukama waffe Yesu Kristo bibeerenga nammwe.

³ Katonda oyo Kitaawe wa Mukama waffe Yesu Kristo, Kitaffe ow'okusaasira era Katonda azaamu bona amaanyi yeebazibwe,

⁴atuzaamu amaanyi mu kubonaabona kwonna kwe tuyitamu, tulyoke tugumye abalala abayita mu kubonaabona okwa buli ngeri, olw'okugumya kwe tufuna nga Katonda atuzaamu amaanyi.

⁵Kubanga nga bwe tugabana ku kubonaabona kwa Kristo, ne Kristo bw'atyo bw'atuzzaamu amaanyi.

⁶Bwe tubonaabona, tubonaabona mulyoke muzibwemu amaanyi era mulokolebwe; oba ne bwe tuba nga tuzzibwamu endasi nammwe muzibwamu endasi, mulyoke mugumire okubonaabona kwe kumu kwe tuyitamu.

⁷Essuubi lyaffe gye muli linywevu, nga tumanyi nti nga bwe mugabanira awamu naffe mu kubonaabona, bwe mutyo bwe mugabanira awamu naffe mu kuzibwamu amaanyi.

⁸ Kubanga tetwagala mmwe abooluganda obutategeera, okubonaabona kwe twayitamu mu Asiya kwali kungi ekiyitiridde n'essuubi ery'okuba abalamu ne lituggwaamu.

⁹Naye ffe ffennyini nga tusaliddwa gwa kufa, nga tetusaanidde kwetekamu bwsige bwaffe ffe, wabula mu Katonda azuukiza abafu,

¹⁰eyatuwonya mu kufa okwo okw'entiisa, era anaatulokolanga, era gwe tulinamu essuubi ery'okutuwonyanga.

¹¹Tukolere wamu nga mutusabira, bangi balyoke batwebalizeeko olw'ekirabo kye twaweebwa.

Pawulo akyusa mu ntegeka ze

¹² Tulina okwenyimiriza ng'omwoyo gwaffe gutujulira kubanga twatambulira mu buwombeefu ne mu mazima ga Katonda, so si mu magezi ag'omubiri, naye mu kisa kya Katonda nga tuli mu nsi n'okusingira ddala gye muli.

¹³Kubanga tetubawandiikira lwa bintu birala wabula ku ebyo bye musomako era ku ebyo bye mumanyiiko; era nsuubira nga mulibimanyira ddala okutuusa ku nkomerero,

¹⁴era nga bwe mwamanyako ekitundu nti muli kya kwenyumiriza gye tuli nga naffe bwe tuli eky'okwenyumiriza gye muli ku lunaku lwa Mukama waffe Yesu.

¹⁵Olw'okwekakasa mu ekijo, nateekateeka okujja gye muli edda, mulyoke musanyuke omulundi ogwokubiri,

¹⁶nga mpita gye muli okugenda e Makedoniya, ate n'amadda nga nkomawo, mulyoke munsibirire okulaga e Buyudaaya.

¹⁷Mulowooza nga nateekateeka bwe ntyo olwokubanga nnekyusiza? Oba nti ntekateeka ebintu nga ngoberera omubiri, nga ɲjamba nti weewaawo ye weewaawo, ate nti si weewaawo, si weewaawo?

¹⁸Naye nga Katonda bw'ali omwesigwa ekigambo kyaffe gye muli tekiri weewaawo ate nti si weewaawo.

¹⁹Omwana wa Katonda Yesu Kristo gwe twababuulira, nze ne Sirwano ne Timoseewo teyali nti weewaawo ne si weewaawo, wabula mu ye mwe muli weewaawo bulijo.

²⁰Kubanga nga bwe biri ebisuubizo ebingi ebya Katonda, era mu ye kyetuva tugamba Amiina nga tuyita mu ye, Katonda atenderezebwé mu ffe.

²¹Naye atunyweza ffe awamu nammwe mu Kristo, era eyatufukako amafuta, ye Katonda,

²²era ye oyo eyatussaako akabonero, n'atuwa amazima g'omwoyo mu mitima gyaffe.

²³Katonda oyo ye mujulirwa w'emmeeme yange, nga nabasabira ne sijja Kkolinso.

²⁴Temusaanye kulowooza nti ffe tufuga okukkiriza kwammwe, naye tuli bakozi bannammwe, mulyoke musanyuke, kubanga okukkiriza kwammwe kwe kubanywezezza.

2 Abakkolinso 2

¹Kino nakimalirira munda mu nze obutakomawo nate eyo nneme okubanakuwaza.

²Kubanga bwe nnaabanakuwaza, ani anansanyusa wabula oyo gwe nnaanakuwaza?

³Kyennava mbawandiikira ebyo byennyini bwe ndija nneme kunakuwazibwa abo abandinsanyusizza, nga nnesiga nti essanyu lyange lye lyammwe mwenna.

⁴Nabawandiikira wakati mu kubonaabona okungi n'okunyolwa mu mutima, era nga nkaaba amaziga mangi, si lwa kubanakuwaza, naye mutegeere okwagala okungi ennyo kwe nnina gye muli.

⁵Bwe wabaawo eyanakuwaza munne, teyanakuwaza nze, si kulwa nga mbazitoowerera mwenna.

⁶Omuntu ng'oyo ekibonerezo ekyamuweebwa abangi kimumala;

⁷kyekiva kisaana mmwe okumusonyiwa n'okumuzzaamu amaanyi si kulwa ng'ennaku emuyitirirako n'emuyinga obungi.

⁸Noolwekyo mbakuutira okwongera okumukakasa nti mumwagala.

⁹Kyennava mbawandiikira ndyoke ntegeere obanga muli bawulize mu nsonga zonna.

¹⁰Bwe musonyiwa omuntu mu nsonga yonna, nange mmunsonyiwa, kubanga bwe mba nga nsonyiye, nsonyiye ku lwammwe mu maaso ga Kristo.

¹¹Setaani alemenga okutuwangula, kubanga tumanyi enkwe ze.

Pawulo mu Tulowa

¹²Bwe natuuka mu Tulowa olw'enjiri ya Kristo, Mukama n'anzigulirawo oluggi,

¹³saawumula mu mutima gwange, bwe ssaalaba owooluganda Tito. Bwe namala okubasiibula ne ndaga e Makedoniya.

Obuwanguzi mu Kristo

¹⁴Katonda yeebazibwe atuwanguzisa bulijjo mu Kristo Yesu, n'akawoowo ak'okumanya, ke tubunyisa wonna.

¹⁵Tuli kawoowo eri Katonda olwa Kristo mu abo abalokolebwa ne mu abo abatannalokolebwa.

¹⁶Eri abatannalokolebwa, akawoowo kaffe ka kufa akatuusa mu kufa, naye eri abalokolebwa, ke kawoowo akongera obulamu ku bulamu. Kale ebyo ani abisobola?

¹⁷Tetuli ng'abangi abakozesa ekigambo kya Katonda olw'okwenoonyeza ebyabwe, naye ffe twogera nga tetuliimu bukuusa. Naye twogera okuva eri Katonda era mu maaso ga Katonda, kubanga twogerera mu Kristo nga tetwekomoma.

2 Abakkolinso 3

¹Tutandike okwetendereza? Oba twetaaga ebbaluwa ez'okutusemba gye muli mmwe oba okuva gye muli ng'abalala?

²Mmwe muli bbaluwa yaffe, ewandiikiddwa mu mitima gyaffe, emanyiddwa era esomebwa abantu bona,

³ekiraga nti muli bbaluwa eva eri Kristo, enywezeddwa ffe, etaawandiikibwa na bwino, wabula na Mwoyo wa Katonda omulamu, si ku bipande eby'amayinja naye ku bipande by'emitima egy'omubiri.

⁴Obwo bwe bwesige bwe tulina eri Katonda nga tuyita mu Kristo.

⁵Si lwa kubanga obwesige obwo buva mu ffe ku lwaffe, naye obwesige bwaffe buva eri Katonda,

⁶oyo ye yatusaanyiza okuba abaweereza b'endagaano empya etali ya nnukuta wabula ey'omwoyo. Kubanga ennukuta etta, naye omwoyo aleeta obulamu.

Ekitiibwa ekiri mu ndagaano empya

⁷Kale obanga obuweereza bw'amateeka agaleeta okufa agaayolebwa ku mayinja bwaleetebwa n'ekitiibwa kingi, eri abaana ba Isirayiri, abantu ne batasobola na kutunula mu maaso ga Musa, olw'ekitiibwa ekyali kiva ku maaso ge, ekyali kigenda okuggwaako,

⁸kale obuweereza obw'omwoyo tebulisinga nnyo okuba obw'ekitiibwa?

⁹Kuba obanga obuweereza bw'okusalirwa omusango bwa kitiiibwa, obuweereza bw'obutuukirivu businga nnyo ekitiibwa.

¹⁰Kubanga ekyaweebwa ekitiibwa tekyakiweebwa mu kigambo kino.

¹¹Kale obanga ekyo ekiggwaawo kaakano kyajja n'ekitiibwa, ekyo ekitaggwaawo kisinga nnyo ekitiibwa kya kiri ekyasooka.

¹²Olw'okuba n'essuubi eringi bwe lityo, kyetuva tuweereza n'obuvumu bungi,

¹³so si nga Musa eyeebikkanga ku maaso ge, abaana ba Isirayiri baleme okulaba ekitiibwa bwe kiggwaako.

¹⁴Naye ebirowoozo byabwe byakkakkanyizibwa kubanga n'okutuusa leero ekibikka ku maaso ekyo kikyali kye kimu kye beebikkanga nga basoma endagaano enkadde, kye bakyebikako nga bagisoma, tekyababikkulirwa, kubanga kiggyibwawo mu Kristo.

¹⁵Naye n'okutuusa leero, Musa bye yawandiika bwe bisomebwa, emitima gyabwe giba gibikiddwako essuuka.

¹⁶Naye buli muntu akyuka n'adda eri Mukama, abikkulwako essuuka eyo.

¹⁷Kale nno Mukama ye Mwoyo, era buli Omwoyo wa Mukama w'abeera, wabaawo eddembe.

¹⁸Kaakano ffe ffenna, amaaso gaffe nga gabikuddwa, ekitiibwa kya Katonda kyakaayakana mu ffe ng'endabirwamu emulisa ekitiibwa kye ne tukyusiibwa

okumufaanana okuva mu kitibwa okutuuka mu kitibwa, ekiva eri Mukama waffe, Mwoyo.

2 Abakkolinso 4

Eby'obugagga eby'omuwendo mu bibya eby'ebbumba

¹ Noolwekyo nga bwe tulina obuweereza buno bwe twaweebwa olw'okusaasirwa, tuleme kuddirira.

² Twaleka ebikisibwa eby'ensonyi, nga tetutambulira mu bukuusa, wadde okukyamya ekigambo kya Katonda, wabula okuggyayo amazima nga bwe gali, nga tweraga eri buli ndowooza y'omuntu mu maaso ga Katonda.

³ Naye obanga ddala Enjiri yaffe ekwekedwa, ekwekedwa eri abo ababula.

⁴ Katonda w'emirembe gino yazibikira ebirowoozo by'abo abatakkiriza, obutabamulisiza njiri ey'ekitiibwa kya Kristo, ye nga kye kifaananyi kya Katonda.

⁵ Kubanga tetweyogerako wabula Kristo Yesu Mukama, naffe tuli baddu bammwe ku lwa Yesu.

⁶ Kubanga Katonda oyo ye yagamba nti, "Omusana gwake mu kizikiza," ye yayaka mu mitima gyaffe, okuleetera abantu ekitangaala eky'okumanya ekitiibwa kya Katonda ekirabikira mu Yesu Kristo.

⁷ Naye kaakano tulina ekyobugagga kino mu bibya eby'ebbumba, okulaga nti obuyinza bwonna bwa Katonda, so si bwaffe.

⁸ Tunyigirizibwa erudda n'erudda, naye ne tutabetenteka. Ne tweraliikirira, naye ne tutazirika.

⁹ Tuyigganyizibwa, naye Katonda tatuleka. Tusuulibwa wansi, naye ne tutabetentuka,

¹⁰ nga tulaga okufa kwa Yesu bulijjo mu mibiri gyaffe, okufa kwa Yesu kulyoke kulabisibwe mu mibiri gyaffe.

¹¹ Kubanga ffe abalamu tuweebwayo eri okufa olwa Yesu, obulamu bwa Yesu bulyoke bulabisibwe mu mibiri gyaffe.

¹² Kale nno okufa kukolera mu ffe, naye obulamu bukolera mu mmwe.

¹³ Bwe tuba n'omwoyo omu ow'okukkiriza, ng'ekyawandiikibwa bwe kigamba nti, "Nakkiriza noolwekyo kyennava njogera," naffe tukkiriza, noolwekyo kyetuva twogera.

¹⁴ Tumanyi ng'oyo eyazuukiza Mukama waffe Yesu, naffe agenda kutuzuukiza ne Yesu, era alitwanjulira wamu nammwe.

¹⁵Kubanga byonna biri bwe bityo ku bwammwe, okusiimibwa okwo bwe kweyongera okuyita mu bangi, n'okwebaza ne kulyoka kweyongera, Katonda n'agulumizibwa.

Okuba abalamu olw'okukkiriza

¹⁶Noolwekyo tetuterebuka, kubanga newaakubadde ng'emibir gyaffe gifa, naye omuntu waffe ow'omunda adda buggya bulijo.

¹⁷Kubanga okubonaabona kwaffe okutono okw'ekiseera ekya kaakano, kwongerayongera nnyo okututeekerateekera ekitiibwa eky'amaanyi eky'emirembe n'emirembe.

¹⁸Noolwekyo tetutunuulira bintu ebirabika naye ebintu ebtalabika, kubanga ebintu ebirabika bya kiseera buseera, naye ebyo ebtalabika bya mirembe na mirembe.

2 Abakkolinso 5

¹Kubanga tumanyi ng'ennyumba yaffe ey'ensiisira ey'oku nsi bw'erisaanyizibwawo, tulina ennyumba okuva eri Katonda, ennyumba etaakolebwa na mikono, ey'olubeerera ey'omu ggulu.

²Kubanga tusindira mu nnyumba eno, nga twegomba okwambazibwa ennyumba yaffe eriva mu ggulu.

³Kubanga bwe tulyambazibwa, tetulisangibwa nga tuli bwereere.

⁴Kubanga ffe abali mu nsiisira eno tusinda, nga tuzitoowererwa, nga tetwagala kusangibwa nga tetwambadde, wabula nga twambadde, omubiri ogufa gumiribwe obulamu.

⁵Oyo eyatuteekerateekera ekintu ekyo kyennyini ye Katonda oyo eyatuwa amazima g'Omwoyo.

⁶Noolwekyo tulina obwesige bulijo nga tumanyi nti bwe tuba mu mubiri guno, tetuba waffe, olwo nga tetuli na Mukama waffe.

⁷Kubanga tutambula lwa kukkiriza so si lw'amaaso gaffe bye galaba.

⁸Noolwekyo tuli bagumu era tuli basanyufu, wakiri okuva mu mibiri guno ne tubeera ewaffe mu ggulu ne Mukama waffe.

⁹Noolwekyo kyetuva tunoonya oba nga tuli ewaffe oba nga tetuli waffe, tumusanyuse.

¹⁰Kubanga ffe ffenna kitugwanira okulabika mu maaso g'entebe ya Kristo ey'okusalirako omusango, buli muntu asalirwe olw'ebyo bye yakola ng'akyali mulamu, okusinziira ku ebyo bye yakola oba birungi oba bibi.

Omukwano ne Katonda nga guyita mu Kristo

¹¹ Noolwekyo bwe tumanya entiisa ya Katonda, kyetuva tukola obutaweera okuleeta abantu eri Kristo, era kye tuli kimanyiddwa eri Katonda, era nsuubira nga bwe kiri ne mu mitima gyammwe.

¹² Tetugezaako kuddamu kubeenyumiririzaako, naye tubawa omukisa okwenyumiriza ku lwaffe, musobole okuba n'eky'okuddamu abo ababeewaanirako kyokka nga mu mitima gyabwe si ba mazima.

¹³ Bwe tuwulikika ng'abagudde eddalu olw'ebyo bye tweyogerako, tukikoze ku bwammwe.

¹⁴ Kubanga okwagala kwa Katonda kutuwaliriza, ng'omu bwe yafiirira bona, bona kyebaava bafa.

¹⁵ Yafiirira abantu bona; abalamu balemenga okubeera abalamu ku bwabwe bokka, wabula ku bw'oyo eyabafiirira era n'azuukira,

¹⁶ okuva kaakano, tuleme okumanya omuntu yenna mu mubiri, bwe tuba nga ddala twamanya Kristo mu mubiri. Naye kaakano tetukyamumanyi bwe tutyo.

¹⁷ Noolwekyo omuntu yenna bw'abeera mu Kristo, aba kitonde kiggya; eby'edda nga bigenze, laba ng'afuuse muggyga.

¹⁸ Ebintu byonna biva eri Katonda eyatukomyawo gy'ali nga tuyita mu Kristo, era ne tuweebwa obuweereza obw'okutabaganya.

¹⁹ Kubanga Katonda yali mu Kristo, ng'atabagana n'abantu, nga tababalira, bibi byabwe, n'atuteresa ffe obubaka obw'okutabaganya.

²⁰ Noolwekyo ku bwa Kristo tuli babaka, era Katonda atuma ffe okwogera nammwe. Kyetuva tubeegayirira, ku bwa Kristo, mutabagane ne Katonda.

²¹ Kubanga oyo ataamanya kibi, yafuuka ekibi ku lwaffe, tulyoke tufune obutuukirivu obuva eri Katonda mu Yesu.

2 Abakkolinso 6

¹ Ffe ng'abakolera awamu ne Katonda, tubeegayirira, ekisa kya Katonda kye mufunye, kireme kufa bwereere.

² Kubanga agamba nti, "Nakuwulira mu biro ebituufu, era ne nkuyamba ku lunaku olw'obulokozi." Laba kaakano kye kiseera ekituufu, era laba kaakano lwe lunaku olw'obulokozi.

Ebizibu bya Pawulo

³ Tetuleeta kintu kyonna kyesittaza, obuweereza bwaffe buleme okunenyezebwá,

⁴naye mu buli kintu tweyoleka nga tuli baweereza ba Katonda, mu kugumiikiriza okungi okw'okubonaabona, mu bizibu byonna ebya buli ngeri, ne mu kunyolwa,

⁵ne mu kukubibwa ne mu kusibibwa mu kkomera, ne mu busasamalo, ne mu kutakabana, ne mu kutunula, ne mu kusiiba,

⁶ne mu bulongoofu, ne mu kumanya, ne mu bugumiikiriza, ne mu kisa, mu Mwoyo Omutukuvu, ne mu kwagala okutaliimu bukuusa,

⁷ne mu kigambo eky'amazima, ne mu maanyi ga Katonda olw'ebiyokulwanyisa eby'obutuukirivu ebiri mu mukono ogwa ddyo n'ogwa kkono,

⁸wakati mu kitibwa n'okunyoomebwa, wakati mu kutufeebya, ne wakati mu kututenda, nga tuyitibwa abalimba ate nga tuli ba mazima.

⁹Ensi etusussa amaaso nga b'etemanyi, naye ate nga tumanyiddwa ng'abaafa, naye laba nga tuli balamu, nga tubonerezebwa naye ate nga tetuttibwa,

¹⁰nga tunakuwala naye ate nga tusanyuka bulijo, nga tuli ng'abaavu naye nga tugaggawaza bangi, nga tuli ng'abatalina kintu naye ate nga tulina byonna.

¹¹Twogedde lwatu gye muli Abakkolinso, n'omutima gwaffe gugaziye.

¹²Musiriikiridde bingi naye ffe tubategeezizza byonna.

¹³Kaakano njogera nammwe nga bwe nandyogedde n'abaana, temutwekwekerera.

¹⁴Temwegattanga wamu n'abatali bakkiriza, kubanga nkolagana ki eriwo wakati w'obutuukirivu n'obujeemu, oba kutabagana ki okuliwo wakati w'ekitangaala n'ekizikiza?

¹⁵Kristo atabagana atya ne Beriyali? Oba mugabo ki omukkiriza gw'alina n'atali mukkiriza?

¹⁶Yeekaalu ya Katonda ne bakatonda abalala bibeera bitya obumu? Kubanga ffenna tuli Yeekaalu ya Katonda omulamu. Nga Katonda bwe yagamba nti, "Nnaabeeranga mu bo era natambuliranga mu bo, nnaabeeranga Katonda waabwe, nabo banaabeeranga bantu bange."

¹⁷Noolwekyo "muve wakati mu bo, mubeeyawuleko, bw'ayogera Mukama. Temukwata ku bitali birongoofu, nange nnaabaaniriza."

¹⁸Era "nnaabeeranga Kitammwe, nammwe ne mubeeranga batabani bange ne bawala bange," bw'ayogera Mukama Ayinzabyonna.

2 Abakkolinso 7

¹ Abagalwa, nga bwe tulina ebisubizo ng'ebyo, twetukuze mu buli kintu ekyonoona omubiri n'omwoyo, nga tutuukiriza obutukuvu mu kutya Katonda.

Essanyu Iya Pawulo

² Mutuggulirewo emitima gyammwe, kubanga tewali n'omu gwe twasobya. Tewali n'omu gwe twakyamya. Tewali n'omu gwe twali tulyazaamaanyizza.

³ Bino sibyogera ng'abasalira omusango, kubanga nabateeza dda nti, Mulina ekifo mu mitima gyaffe, nga tubeera balamu ffenna era nga tufiira wamu nammwe.

⁴ Mbeesiga nnyo, era mbeenyumirizamu nnyo; muñjumizza nnyo omwoyo ne mundeetera essanyu lingi wakati mu kubonaabona kwange.

⁵ Bwe twatuuka mu Makedoniya tetwasobola kuwummulako, nga twetooloddwa ebibonoobono ebya buli ngeri, ebweru nga waliyo entalo ate munda mu ffe nga tutidde.

⁶ Naye Katonda agumya abo ababa batendewereddwa, n'atuzzaamu amaanyi olw'oktuuka kwa Tito.

⁷ Okujja kwe si kwe kwokka okwatuleetera essanyu, naye n'amawulire agafa gye muli, ge yatuleetera n'engeri ennungi gye mwamwanirizaamu, ne bwe yankeeza nga bwe mwali mwesunga okujja kwange, n'ennaku gye mwalina bwe mwategeera nga sokyazze, n'obunyiikivu bwammwe, ebyo ne binnyongera essanyu!

⁸ Kuba bwe kiba nga ddala ebbaluwa gye nnabawandiikira yabanakuwaza, sokyejusa; wabula ddala nkyejusa, kubanga ebbaluwa eyo yabanakuwazaamu ekiseera kitono.

⁹ Kaakano nnina essanyu, si lwa kubanga yabanakuwaza, naye lwa kubanga mwanakuwalira ekibi ne mwenenya, ne Katonda n'alaba okunakuwala kwammwe muleme okufiirwa ekigambo kyonna ku lwaffe.

¹⁰ Kubanga okunakuwala okw'okwenenya eri Katonda kuleeta obulokozi, era tekuleeta kwejjusa; naye okunakuwala okw'ensi kuleeta kufa.

¹¹ Kubanga laba okunakuwala okwo Katonda kw'asiima kwabaleetera okwewala bino: okufuba ennyo, n'okwennyonyolako, n'okusunguwala, n'okutya, n'okwegomba, n'okufuba ennyo okwenenya, n'okuwalana eggwanga. Mwakola kyonna kye musobola okulongoosa ekyasoba.

¹² Kale newaakubadde nga nabawandiikira ssawandiika ku lw'oyo eyakola ekibi, newaakubadde oyo gwe bakikola, wabula lwa kunyiikira kwammwe eri Katonda ku lwaffe.

¹³Noolwekyo ebyo byatuzzaamu endasi. Bwe twaddamu endasi, tweyongera nnyo okusanyuka olw'essanyu lya Tito, kubanga omwoyo gwe gwawummuzibwa mmwe mwenna.

¹⁴Obanga nnenyumiriza mu kigambo kyonna ku lwammwe, temwanswaza, naye byonna nga bwe twabibategeeza bwe biri eby'amazima, era n'okwenyumiriza kwaffe ku Tito nakwo ne kuba kwa mazima.

¹⁵N'okwagala kw'alina kweyongera nnyo gye muli ng'ajjukira okugonda kwammwe mwenna, nga bwe mwamusembeza n'okutya n'okumussaamu ekitiibwa.

¹⁶Bino byonna bindeetera essanyu lingi, era mbesigira ddala.

2 Abakkolinso 8

Okugaba kw'Abakristaayo

¹Kaakano tubategeeza abooluganda, ekisa kya Katonda ekyaweebwa ekkanisa z'e Makedoniya.

²Mu kugezesebwa okw'okubonaabona, baagattika essanyu lyabwe ery'ekitalo n'obwavu bwabwe obungi, ne bafunamu okugaba okwewuunyizibwa ennyo.

³Tebaagaba kutuuka we basobola wokka, naye nawo baasukkawo, era baagaba lwa kweyagalira.

⁴Baatwegayirira tubatwalire ebirabo byabwe, nabo basanyukire wamu ne bannaabwe abaweerezza obuyambi eri abatukuvu.

⁵Ate era kye twali tutasuubidde, baasooka kwewaayo eri Mukama, n'oluvannyuma gye tuli olw'okwagala kwa Katonda.

⁶Kyatugwanira okusaba Tito, nga bwe yasooka okubawereza, aije atuukirize n'ekikolwa ekyo eky'ekisa.

⁷Naye nga bwe musukirira mu bintu byonna, mu kukkiriza, ne mu kigambo, ne mu kutegeera, ne mu kunyiikira kwonna, twagala okulaba nga ne mu kisa kino musukirira.

⁸Sibawa kiragiro, wabula olw'okunyiikira kw'abalala n'okugezesha okwagala kwammwe nga kw'amazima.

⁹Kubanga mumanyi ekisa kya Mukama waffe Yesu Kristo nga bwe yafuka omwavu ku lwammwe, mwe mulyoke mugaggawale.

¹⁰Amagezi ge mbawa ge gano nti mumalirize ekyo kye mwatandikako mu mwaka ogwayita, kubanga si mmwe mwasooka okuleeta ekirowoozo ekyo ate era si mmwe mwali ababereberye mu kutandika okukikolerako.

¹¹Naye kaakano mu bumalirivu bwammwe mu kwagala okukikola, mumalirize omulimu ogwo, okusinziira kw'ekyo kye mulina.

¹²Kuba obanga mulina obumalirivu nga buli muntu bw'alina, buli muntu aweeyo okusinziira ku ekyo ky'alina so si ky'atalina.

¹³Abalala baleme kuyambibwa ate nga mmwe munyigirizibwa, walyoke wabeewo, okwenkanankana.

¹⁴Kaakano bye mulina ebingi biyambe abo abali mu kwetaaga, ate ebyabwe bye baliba nabyo ebingi biribayamba nga muli mu kwetaaga.

¹⁵Nga bwe kyawandiikibwa nti, "Oyo eyakuñjaanyanga ennyingi teyasigazangawo, n'eyakuñjaanyanga entono ng'emumala bumazi."

Tito atumibwa e Kkolinso ne banne

¹⁶Kyokka Katonda yeebazibwe eyassa obuniikivu bwe bumu mu mutima gwa Tito ku lwammwe.

¹⁷Olw'okuzzibwamu amaanyi kwe yafuna, n'olw'okufuba kwe, yajja gye muli.

¹⁸Era tutumye wamu naye owooluganda atenderezebwa olw'enjiri mu kkanisa zonna,

¹⁹naye si ekyo kyokka wabula yalondebwa okutambulanga naffe olw'ekisa kye tuweereza ffe olwa Mukama waffe yennyini n'olw'okugulumiza n'okulaga nga bwe twetegese okuyamba,

²⁰nga twewala omuntu yenna okutunenya olw'ekirabo kino kye tuweereza.

²¹Kubanga kye tugenderera kwe kukola ebirungi, si mu maaso ga Katonda yekka wabula ne mu maaso g'abantu.

²²Era awamu nabo twabatumira owooluganda gwe tukakasizza nga munyiikivu mu bintu bingi era nga ne kaakano munyiikivu nnyo olw'obwesige bw'abalinamu.

²³Singa wabaawo ayagala okumanya ebifa ku Tito, tukolagana, mukozi munnange; abooluganda, bo batume ba kkanisa, olw'ekitiibwa kya Kristo.

²⁴Noolwekyo okwagala kwammwe n'okwenyimiriza kwammwe byeyoleke gye bali.

2 Abakkolinso 9

Okuyamba Bakristaayo bannaabwe

¹Mmanyi bulungi nga tekinneetaagisa kubawandiikira ku nsonga y'okuweereza abatukuvu;

²kubanga mmanyi nga bwe mwagala ennyo okuyamba, ne mikwano gyaffe wano mu Makedoniya nabateezaako nga nnenyimiriza ku lwammwe nti

ab'omu Akaya babadde beetegefu okuvira ddala mu mwaka ogwayita, era obumalirivu bwammwe bwakubiriza bangi.

³Nabatumira abooluganda okwenyimiriza kwaffe ku lwammwe kuleme kuba kwa bwereere mu nsonga eyo, mube beetegefu nga bwe nagamba.

⁴Si kulwa ng'ab'e Makedoniya bajja nange ne babasanga nga temwetegese, ne tuswala, ne bwe tutaboogerako nti ye mmwe, mu kubeesiga mmwe.

⁵Kyenvudde ndowooza nga kijjwanidde okubagumya abooluganda, bano babasookeyo, bateeketeke ekirabo kye mwasuubiza, ekirabo ekyo kitegekebwe kibeere omukisa so si ekintu eky'okuwalirizibwa.

⁶Naye mujjukire nti, "Asiga ekitono alikungula kitono, naye asiga ekinene alikungula kinene."

⁷Buli omu akola nga bw'asazeewo mu mutima gwe, si lwa nnaku, newaakubadde olw'okuwalirizibwa, kubanga Katonda ayagala oyo agaba n'essanyu.

⁸Katonda ayinza okwaza ekisa kyonna gye muli, bulijo mubeerenga n'ebibamala byonna mu buli kintu nga musukkirira mu mulimu gwonna omulungi,

⁹nga bwe kyawandiikibwa nti, "Yasaasaanya, yagabira abaavu. Obutuukirivu bwe bubeerera emirembe gyonna."

¹⁰Kubanga oyo awa omulimi ensigo okusiga, ate n'amuwa n'emmere ey'okulya, anaayazanga ensigo yammwe era n'agyongerako, era anaayongeranga ebibala eby'obutuukirivu.

¹¹Anaabagaggawazanga mu buli kintu, ekyebazisa Katonda mu ffe.

¹²Kubanga omulimu gw'obuweereza buno tegukoma ku kuyamba batukuvu abali mu kwetaaga kyokka, kusukkirira mu kwebaza okungi eri Katonda.

¹³Olw'obukakafu obuvudde mu buweereza obwo, Katonda agulumizibwa olw'okugonda okw'okwatula kwammwe eri Enjiri ya Kristo, ne mu kugaba kwe mwalaga mu bye mwabawa, n'eri abantu bona,

¹⁴era n'okubasabira kwe babasabira kubanga babaagala nnyo olw'ekisa kya Katonda eky'ekitalo kye mulina;

¹⁵Katonda yeebazibwe olw'ekirabo ekitayogerekka.

2 Abakkolinso 10

Pawulo awolereza omulimu gwe

- ¹ Kaakano nze kennyini, Pawulo, mbeegayirira mu buwombeefu n'obukkakkamu bwa Kristo bwe mba nabwo nga neetoowazizza nga ndi nammwe, naye bwe mba nga siri nammwe ne mba muvumu gye muli;
- ² mbegayirira wadde ssiriwo, bwe ndijja nneme kwogeza maanyi nga bwe nkola eri abantu abamu abatulowooleza okuba nga tugoberera bya mubiri.
- ³ Newaakubadde nga tutambulira mu mubiri, tetulwana ng'ab'omubiri,
- ⁴ kubanga ebyokulwanyisa byaffe eby'olatalo, si bya mubiri wabula bya maanyi mu Katonda olw'okuwangula ebigo, n'olw'okuwangula endowooza,
- ⁵ na buli kintu ekigulumivu ekyekuluntaza okusinga amagezi ga Katonda, era nga tujeemulula buli kirowoozo, kigondere Kristo,
- ⁶ era nga tweteeseteese okuwalana eggwanga ku bujeemu bwonna, bwe munaagonderanga ddala.
- ⁷ Mutunuulira ebintu nga bwe birabika kungulu. Omuntu yenna bw'alowooza munda mu ye okuba owa Kristo, ekyo akirowooza ku ye yekka, nti nga naffe tuli ba Kristo nga ye.
- ⁸ Kubanga ne bwe ndisukkirira okwenyimiriza olw'obuyinza bwe tulina, Mukama bwe yatuwa olw'okubazimba so si lwa kubassa wansi, sirikwatibwa nsonyi,
- ⁹ nneme kufaanana ng'abatiisa mu bbaluwa zange.
- ¹⁰ Kubanga agamba nti, "Ebbaluwa ze ddala nzito era z'amaanyi, naye okubaawo kwe mu mubiri kunafu, n'okwogera kwe kunyoomebwa."
- ¹¹ Alowooza bw'atyo ategeere nga bye twogerako mu bbaluwa nga tetuli nammwe, era bye tukola nga tuli nammwe.
- ¹² Ffe tetwanjanga kwebalira wadde okwegeraageranya n'abamu ku abo abeetendereza, naye bo bwe beepimamu bokka na bokka, ne beegeraageranya bokka na bokka tebaba na kutegeera.
- ¹³ Naye ffe tetujja kwenyimiriza kusukka ku kigera kyaffe, naye tujja kwenyimiriza ng'ekigera ekyo ekyatuweebwa Katonda bwe kiri, ne tusobola n'okubatuukako mmwe.
- ¹⁴ Kubanga tetukununkiriza kusinga kigera kye tulina, kubanga nammwe twabatuusaako Enjiri ya Kristo,
- ¹⁵ nga tewenyimiriza kusinga omulimu abalala gwe baakola, naye nga tulina essuubi nti ng'okukkiriza kwammwe bwe kugenda kweyongera, n'omulimu gwaffe gugenda gweyongera,

¹⁶era nga tubuulira Enjiri ne mu bitundu ebibali ewala, naye so si mu kitundu eky'omulala omwakolebwa edda omulimu waleme okubaawo eyeenyumiriza.

¹⁷Naye eyeenyumiriza yeenyumirizenga mu Mukama waffe;

¹⁸kubanga eyeetenda yekka, oyo si ye asiimibwa, wabula oyo Mukama gw'atenda.

2 Abakkolinso 11

Pawulo n'abatume ab'obulimba

¹Mbasaba mungumiikirizeeko mu busirusiru bwange obutono, weewaawo mungumiikirize.

²Mbakwatirwa obuggyga, obuggyga bwa Katonda, kubanga naboogereza omusajja omu, nga muli mbeerera zennyini, ne mbawaayo eri Kristo;

³kyokka neeraliikirira nnyo nga ntya nti si kulwa nga mulimbibwa nga Kaawa bwe yalimbibwa omusota ne muwaba mu birowoozo byammwe okuva mu bwetoowaze n'obutukuvu obuli mu Kristo.

⁴Bwe wabaawo omuntu ajja n'ababuulira Yesu omulala gwe tutbuulira, oba ne mufuna omwoyo omulala, gwe mutafunanga, oba ne mubuulirwa Enjiri endala gye mutabuulirwanga, mubigumiikiriza.

⁵Kubanga ndowooza ng'abatume abakulu ennyo tebalina kye bansinza.

⁶Kubanga newaakubadde nga siri mumanyirivu mu kwogera, naye si mu kutegeera, wabula mu ngeri yonna twaboolesa ebintu byonna.

⁷Oba nasobya bwe netoowaza mulyoke mugulumizibwe, bwe nabuulira Enjiri ya Katonda ey'obwerefere?

⁸Nanyaga ekkanisa endala, kubanga zampeerezanga ensimbi ne nzikozesa nga ndi nammwe ndyoke mbawereze,

⁹era bwe nnali nammwe ne mbaako bye neetaaga, ssaazitoowerera muntu yenna kubanga abooluganda abaava e Makedoniya bampanga byonna bye nnali neetaaga, ne neekuumma nnyo obutabazitoowerera mu buli kintu, era nzija kwongera okwekuuma bwe ntyo.

¹⁰Ng'amazirna ga Kristo bwe gali mu nze, okwenyumiriza kuno tekujja kuziyizibwa mu nze mu bitundu bya Akaya.

¹¹Lwaki? Olw'okubanga sibaagala? Katonda amanyi nga mbaagala.

¹²Naye nzija kweyongera okukola nga bwe nkola ndyoke nziggyewo omukisa eri abo abaagala okukozesa omukisa ogwo abaagala okulabika nga ffe mu kwenyumiriza kwabwe.

¹³abantu ng'abo batume baabulimba, era bakozi baabukuusa, nga beefuula abatume ba Kristo.

¹⁴Naye ekkyo tekyewuunyisa, kubanga Setaani yeefuula nga malayika ow'omusana.

¹⁵Noolwekyo abamuweereza bwe beefuula ng'abweereza b'obutuukirivu tekitwewuunyisa. Ku nkomerero bagenda kubonerezebwा ng'ebikolwa byabwe biri.

Okubonaabona kwa Pawulo

¹⁶Nziramu okubagamba nti omuntu yenna aleme kundowooza kuba musirusiru; kyokka ne bwe mundowooza okuba omusirusiru, munsembeze, nange neenyumirizeeko katono.

¹⁷Kaakano bye njogera Mukama si yandagidde okubyogera, wabula neeyisa ng'omusirusiru mu buvumu buno obw'okwenyumiriza.

¹⁸Naye obanga bano beenyumiriza mu by'omubiri nange ka nneenyumirize.

¹⁹Mmwe muli bagezi, kyemuva mugumiikiriza abasirusiru.

²⁰Omuntu yenna bw'abafuula abaddu, oba n'abanyaga, oba n'abalyazaamanya, oba ne yeegulumiza, oba n'abakuba empi, mukigumiikiriza.

²¹Ekyo kinswaza okukyogera kubanga tubadde banafu mu ekkyo. Naye omuntu yenna kye yeewaayo okukola, nga njogera mu busirusiru, nange neewaayo okukikola.

²²Bo Baebbulaniya? Nange bwe ndi. Bagamba nti Bayisirayiri? Nange bwe ntyo. Bazzukulu ba Ibulayimu? Nange bwe ndi.

²³Bagamba nti baweereza ba Kristo? Nga njogera ng'agudde eddalu, nze mbasinga; Mbasinga okukola ennyo, era nsibiddwa mu kkomera emirundi mingi okubasinga, n'emirundi gye nkubiddwa mingi okusingawo, era emirundi mingi ne mba kumpi n'okufa.

²⁴Abayudaaya bankuba embooko amakumi asatu mu mwenda ku mirundi egy'enjawulo etaano.

²⁵Nakubwa emiggo emirundi esatu. Omulundi gumu nakubwa amayinja. Emirundi esatu ekyombo kye nalingamu kyamenyeka. Olulala ne nsula era ne nsiiba mu buziba.

²⁶Ntambudde nnyo, era emirundi mingi ne mpona akabi k'omujuzo gw'emigga, ne mpona n'akabi ak'abanyazi, n'empona ab'eggwanga lyange, era n'Abamawanga abalala. Nayolekera obubenje obw'omu kibuga, ne mpona n'okufira mu ddungu ne mu tuyaga ogw'oku nnyanja, ne mpona n'akabi ak'abantu abeeyita abooluganda;

²⁷mu kukola ennyo ne mu kufuba nga seebaka, mu kulumwa enjala ne mu kufuuyibwa empewo ne mu kubeera obwerefere.

²⁸Ebirala bye simenye nga nabyo bikyali awo, neeraliikirira buli lunaku nga ndowooza ku Kkanisa zonna nga bwe ziri.

²⁹Bwe wabaawo anafuye, nange nzigwamu amaanyi, omulala bw'agwa mu kibi, nange njaka munda yange.

³⁰Naye obanga kiñjwanidde okwenyimiriza, ka neenyimirize olw'ebyo ebiraga obunafu bwange!

³¹Katonda, era Kitaawe wa Mukama waffe Yesu, atenderezebwu emirembe n'emirembe, amanyi nga ssirimba.

³²Bwe nnali mu Damasiko, Kabaka Aleta yalagira gavana alagire abakuumi b'ekibuga, nkwatibwe,

³³naye ne mpisibwa mu ddirisa, eryali mu kisenge kya bbugwe w'ekibuga, nga ndi mu kisero kye baaleebeesa ku miguwa okuntuusa ebweru wansi, bwe ntyo abo ne mbawona.

2 Abakkolinso 12

Okwolesebwa ate n'eriggwa mu bulamu bwa Pawulo

¹Kinjwanidde okwenyimiriza, newaakubadde nga tekugasa. Naye ka njogere ku kwolesebwa n'okubikkulirwa kwa Mukama waffe.

²Waliwo omusajja wa Kristo gwe mmanyi, emyaka kkumi n'ena egiyise yatwalibwa mu ggulu eryokusatu. Naye oba yatwalibwa ng'ali mu mubiri, oba nga tali mu mubiri, nange simanyi, wabula Katonda ye amanyi.

³Era mmanyi ng'omuntu oyo, oba mu mubiri oba ng'aggiddwa mu mubiri nange simanyi, wabula Katonda ye amanyi,

⁴nga yatwalibwa mu nnimiro lwa Katonda n'awulira ebintu bingi eby'ekyewuunyo omuntu by'atakkirizibwa kwatula.

⁵Ku bw'omuntu oyo nzija kwenyimiriza naye ku bwange siryenymiriza, okuggyako mu bunafu bwange.

⁶Naye ne bwe nandiyagadde okwenyimiriza, sandibadde musirusiru kubanga nandibadde njogera mazima, naye saagala muntu yenna andowoozeeko nti ndi wa waggulu nnyo okusinga we yandintadde ng'asinziira ku ebyo by'andabamu oba by'ampulirako,

⁷okusingira ddala okubikkulirwa kwe nafuna. Noolwekyo olw'obutagulumizibwa nnyo, kyenava nfumitibwa eriggwa mu mubiri, ye mubaka wa Setaani, ankube nneme okugulumizibwa ennyo.

⁸ Emirundi esatu egy'enjawulo nga nsaba Mukama amponye eriggwa eryo.

⁹ Buli mulundi ng'anjamba nti, "Ekisa kyange kikumala, kubanga amaanyi gange gatuukirira mu bunafu." Noolwekyo kyennaavanga nneegulumiza n'essanyu lingi olw'obunafu bwange, amaanyi ga Kristo galyoke galabisibwe.

¹⁰ Kyenva nsanyukira mu bunafu, mu kuvumibwa, mu bizibu, mu kuyigganyizibwa, mu binzitoowerera, ku lwa Kristo, kubanga buli bwe mba omunafu, olwo nga ndi wa maanyi.

Pawulo alumirwa Abakkolinso

¹¹ Naye mwampaliriza okufuuka omusirusiru. Noolwekyo mmwe musaana okunjogerako kubanga abatume abakulu abawagulu tebalina na kimu kye bansinza, newaakubadde nga nze siri kintu.

¹² Eky'amazima obubonero obw'omutume bwakolerwa mu mmwe mu kugumiikiriza kwonna, mu bubonero ne mu byewuunyo, ne mu bikolwa eby'amaanyi.

¹³ Kubanga kiki ekkanisa endala kye zaabasingira, wabula nze kennyni obutabazitoowereranga. Munsonyiwe ekyonoono ekyo.

¹⁴ Laba guno mulundi gwa kusatu nga nneeteeseteese okujja gye muli, era sijja kubazitoowerera, kubanga ebyammwe si bye njagala, wabula njagala mmwe. N'ekirala, mmwe muli baana bange; abaana si be baterekera bazadde baabwe eby'obugagga, wabula abazadde be baterekera abaana baabwe.

¹⁵ Naye nzija kusanyuka nnyo okwewaayo gye muli, nze ne byonna bye nnina olw'emyoyo gyammwe, newaakubadde nga nze gye nkoma okubaagala ennyo, ate mmwe okwagala kwammwe gye ndi gye kukoma okukendeera.

¹⁶ Naye mukkirize nti ssabazitoowerera; naye ne ngerengetanya ne mbatega mu lukwe.

¹⁷ Mu abo be nabatumira, ani gwe nakozesa okubafunamu amagoba?

¹⁸ Nakuitira Tito okujja, ne ntuma n'wooluganda omulala awamu naye; Tito yeeyabafunako amagoba? Tetwatambulira mu mwoyo gumu? Tetwatambulira mu kisinde kimu?

Okutya kwa Pawulo n'okweraliikirira

¹⁹ Obw'edda mwalowooza nga mwetoowaza mu maaso ga Katonda. Naye abaagalwa ebintu byonna tubyogerera mu Kristo olw'okubazimba.

²⁰ Kubanga kye ntya oboolyawo kwe kubasanga nga mufaanana nga bwe ssaagala, nange mmwe okunsanga nga nfaanana nga bwe mutayagala; oboolyawo nga waliwo okuyomba, n'obuggy, n'obusungu, n'okwawukana, n'okugeyanjana, n'olugambo, n'okwekuluntaza, n'okutabukatabuka;

²¹bwe ndija nate, Katonda wange aleme kuntoowaza mu maaso gammwe, ne nkaabira abo bona abaayonoona edda, ne bateenenya obutali bulongoofu, n'obwenzi, n'obugwagwa bye baakola.

2 Abakkolinso 13

Okulabula Okusembayo

¹Omulundi guno gwe nzija gye muli gwe gwokusatu. Buli kigambo kirikakasibwa abajulirwa babiri oba basatu nga boogedde.

²Nabalabula era mbalabula nga bwe nabalabula bwe nnali eyo omulundi ogwokubiri, era ne kaakano nga ssiriyo, abo abaayonoona edda n'abalala bona, nti bwe ndikomawo ssirisaasira,

³nga bwe munonya okukakasa oba nga njogerera mu Kristo, atali munafu gye muli, wabula ow'amaanyi mu mmwe.

⁴Kubanga newaakubadde nga yakomererwa mu bunafu, kyokka mulamu mu maanyi ga Katonda. Naffe tuli banafu mu mibiri gyaffe nga tuli mu ye, naye tuliba balamu mu ye olw'amaanyi ga Katonda olw'omulimu gwe tukola mu mmwe.

⁵Mwekebere mulabe obanga muli mu kukkiriza; oba temumanyi nga Yesu Kristo ali mu mmwe? Mpozi nga temukakasibwa.

⁶Naye nsuubira nga mumanyi nti tetuli abataakakasibwa.

⁷Kaakano tubasabira eri Katonda obutakola kibi na kimu, si lwa kwagala kulabika nga tusiimibwa, wabula mmwe mukole ebirungi, ffe ne bwe tunaasigala nga tetusiimibbwaa.

⁸Kubanga tetuyinza kuwakanya mazima, wabula tugawagira buwagizi.

⁹Ffe kitusanyusa bwe tuba abanafu, mmwe ne muba ab'amaanyi. Tubasabira mmwe okuzzibwa obuggyaa.

¹⁰Mbawandiikira kubanga siri nammwe, bwe ndija nneme kubakambuwalira, okusinziira ku buyinza Mukama bwe yampa okubazimba, so si okubazikiriza.

Okusiibula n'omukisa

¹¹Ebisigadde abooluganda, mujaguze, muzibwemu amaanyi, mulowooze bumu, mubeere n'emirembe, Katonda ow'okwagala n'emirembe anaabeeranga nammwe.

¹²Mulamusagane n'okulamusa okutukuvu.

¹³Abatukuvu bona babalamusizza.

¹⁴Ekisa kya Mukama waffe Yesu Kristo, n'okwagala kwa Katonda, n'okussekimu okwa Mwoyo Mutukuvu, bibeerenga nammwe mwenna.

Abaggalatiya

Abaggalatiya 1

- ¹Nze Pawulo omutume, ataatumibwa bantu wadde omuntu, wabula eyatumibwa Yesu Kristo ne Katonda Kitaffe, eyamuzuukiza mu bafu,
- ²awamu n'abooluganda bona abali nange tuwandiikira ekkanisa ez'e Ggalatiya,
- ³nga tugamba nti ekisa n'emirembe ebiva eri Katonda Kitaffe n'eri Mukama waffe Yesu Kristo bibeerenga nammwe;
- ⁴Kristo oyo eyeewaayo ku lw'ebibi byaffe, alyoke atununule mu mulembe guno omubi ng'okwagala kwa Katonda, era Kitaffe bwe kuli,
- ⁵aweewbe ekitiibwa emirembe n'emirembe. Amiina.

Tewali Njiri Ndala

- ⁶Naye mbeewuunya kubanga mukyuka mangu okuva ku oyo, eyabayita olw'ekisa kya Kristo, naye ne mukyuka mangu okugoberera Enjiri endala.
- ⁷Kubanga tewali njiri ndala, wabula mwawubisibwa abaagala okunyoola n'okukyusa Enjiri ya Kristo.
- ⁸Omuntu yenna, ne bwe tuba ffe, wadde malayika ava mu ggulu, bw'abuuliranga Enjiri okuggyako gye twababuulira, akolimirwenga.
- ⁹Nga bwe twasooka okwogera, bwe nt yo nziramu okukyogera nti, omuntu yenna bw'ababuulira Enjiri eteri eyo ggye mwakkiriza akolimirwenga.
- ¹⁰Kale kaakano nkolerera kumatiza bantu oba kusiimibwa Katonda? Oba ngezaako kusanyusa bantu? Singa nnali nkyagezaako okusanyusa abantu, sandibadde muddu wa Kristo.
- ¹¹Kubanga abooluganda, mbategeeza nti, Enjiri gye nababuulira teyeesigamizibwa ku muntu,
- ¹²era nange saagiweebwa muntu wadde okusomesebwa omuntu wabula Yesu Kristo ye yagimbikkulira.
- ¹³Mumanyi nga bwe nnali nfaanana nga nkyagoberera eddiini y'Ekiyudaaya, nga bwe nayigganyanga ennyo Ekklesia ya Katonda okugizikiza,
- ¹⁴era nga nnali omu ku bannaddiini abaakulaakulana mu ggwanga lyange, ne nsukkulumu ku Bayudaaya bannange be nakula nabo, era nagezaako nnyo nga bwe nasobola okugoberera empisa zonna ez'edda ez'amateeka g'eddiini yange.

¹⁵Naye Katonda bwe yasiima, eyanjawula okuva mu lubuto lwa mmange, n'ampita olw'ekisa kye,

¹⁶n'ambikkulira Omwana we ndyoke ɳjende eri Abaamawanga mbabuulire Enjiri era sseebuuza ku muntu n'omu,

¹⁷newaakubadde okwambuka e Yerusaalemi okwebuuza ku batume, naye nagenda mu Buwalabu era oluvannyuma ne nkomawo e Damasiko.

¹⁸Awo bwe waayitawo emyaka esatu ne ɳjenda e Yerusaalemi okulaba Keefa ne mmala naye ennaku kkumi na ttaano.

¹⁹Naye ssaalaba mutume mulala wabula Yakobo muganda wa Mukama waffe.

²⁰Noolwekyo bye mbawandiikira, si bya bulimba mu maaso ga Katonda.

²¹Bwe navaayo ne ndaga mu bitundu eby'e Siriya n'eb'y'e Kirukiya.

²²Era ekkanisa za Kristo mu Buyudaaya zaali tezinnategeera bwe nfaanana.

²³Naye nga bamanyi nti, "Eyatuyigganyanga, kaakano abuulira okukkiriza kwe yagezaako okuzikiriza."

²⁴Era ne bagulumiza Katonda ku lwange.

Abaggalatiya 2

Pawulo Ayanirizibwa Abatume

¹Bwe waayitawo emyaka kkumi n'ena ne nzirayo ne Balunabba ne Tito e Yerusaalemi.

²Nagendayo olw'okubikulirwa kwe nafuna, ne mbanjulira Enjiri gye mbuulira Abaamawanga. Nayogera n'abakulembeze b'Ekklesia mu kyama balyoke bategeere bye njigiriza, si kulwa nga nteganira bwereere, ne bakkiriza nti bituufu.

³Tito gwe nnali naye ne batamuwaliriza kukomolebwa, newaakubadde nga yali munaggwanga.

⁴Naye olw'abooluganda ab'obulimba abaayingizibwa mu kyama okuketta eddembe lye tulina mu Kristo Yesu, balyoke batufuule abaddu,

⁵abo tetwabawuliriza essaawa n'emu, amazima g'enjiri galyoke geeyongerenga mu mmwe.

⁶Naye abo abaabalibwa ng'okuba ekintu eky'omuwendo, abataaliko bwe baali gye ndi kubanga Katonda tasosola mu bantu, nze gye ndi tebalina kye bannyongerako,

⁷naye mu ngeri endala bwe baalaba nga nateresebwa Enjiri ey'abatali bakomole, nga Peetero bwe yateresebwa ey'abakomole,

⁸oyo eyakolera mu Peetero olw'obutume bw'abakomole, ye yakolera ne mu nze ku lw'Abaamawanga.

⁹Yakobo ne Keefa ne Yokaana abaalabikanga ng'empagi bwe baalaba ekisa ekya mpeebwa, ne batukwata mu ngalo eza ddyo nze ne Balunabba nga bassa kimu naffe nti ffe tubeere mu Bamawanga, naye bo babeere mu b'abakomole.

¹⁰Kye baatusaba kyokka tujjukirenga abaavu, ate ng'ekyo kye nnali nesunga okukola.

Pawulo Anenya Peetero

¹¹Naye Peetero ate era nga ye Keefa, bwe yajja mu Antiyokiya ne mmunenya mu lwatu kubanga yali mukyamu.

¹²Kubanga abaava eri Yakobo bwe baali tebannajja, yalyanga n'Abamawanga, naye bwe bajja n'atandika okubeeyawulako ng'atyab'abakomole.

¹³Abayudaaya abalala bona ne bamwegattako mu bukuusa, ekyo ne kireetera ne Balunabba okusendebwasendebwa obukuusa bwabwe.

¹⁴Naye bwe nalaba nga tebatambula bulungi ng'amazima g'enjiri bwe gali, ne njamba Keefa mu maaso gaabwe bona nti, "Obanga ggwe Omuyudaaya ogoberera empisa z'Abamawanga ezitali za Kiyudaaya, owaliriza otya Abaamawanga okugobereranga empisa z'Ekiyudaaya?"

¹⁵Ffe mu buzaaliranwa tuli Bayudaaya so si Bamawanga aboonoonyi.

¹⁶Kyokka tukimanyi bulungi nti omuntu taweebwa butuukirivu lwa kugondera mateeka, wabula abufuna lwa kukkiriza Yesu Kristo, era naffe kyetwava tukkiriza Yesu Kristo tulyoke tuweebwe obutuukirivu olw'okumukkiriza so si lwa kugondera mateeka. Kubanga tewali n'omu aliweebwa obutuukirivu olw'ebikolwa eby'amateeka.

¹⁷Naye oba nga bwe twanoonya okuweebwa obutuukirivu mu Kristo twasangibwa okuba aboonoonyi, kitegeeza nti Kristo muweereza wa kibi? Kikafuuwe.

¹⁸Kubanga bwe nzimba nate bye nazikiriza, nneeraga nzekka okuba omwonoonyi.

¹⁹Kubanga olw'amateeka nnafa eri mateeka, ndyoke mbeere omulamu mu Katonda. Nakomererwa wamu ne Kristo;

²⁰kyokka ndi mulamu, si ku bwange, wabula ku bwa Kristo abeera mu nze; era obulamu bwe nnina kaakano mu mubiri, mbulina lwa kukkiriza Omwana wa Katonda, eyanjagala ne yeewaayo yekka ku lwange.

²¹Ssidibya kisa kya Katonda; naye oba nga obutuukirivu buva mu mateeka, nga Kristo yafiira bwereere.

Abaggalatiya 3

Kukkiriza Oba Kukuuma Mateeka

¹ Mmwe Abaggalatiya abatalina magezi ani eyabaloga, so nga nabannyonyola bulungi Yesu Kristo eyakomererwa ku musaalaba ne mukitegeera?

² Kino kyokka kye njagala muntegeeze; mwaweebwa Mwoyo lwa bikolwa eby'amateeka, nantiki lwa kuwulira kwa kukkiriza?

³ Muyinza mutya obutaba na magezi kutuuka awo, abaatandikira mu Mwoyo, kaakano mutuukirizibwa mu mubiri?

⁴ Okubonaabona kwonna kwe mwabonaabona kwali kwa bwereere? Bwe kuba nga ddala kwa bwereere.

⁵ Abawa Omwoyo n'abawa n'okukola eby'amaanyi mu mmwe, akola lwa bikolwa by'amateeka oba lwa kuwulira olw'okukkiriza?

⁶ Ibulayimu yakkiriza Katonda ne kimubalirwa okuba obutuukirivu.

⁷ Kale mumanye nti abo abakkiriza be baana ba Ibulayimu.

⁸ Olw'okuba nga baategeera ebiribaawo n'ekyawandiikibwa, ng'olw'okukkiriza, Katonda aliwa amawanga obutuukirivu, Enjiri kyeyava ebuulirwa Ibulayimu edda nti, "Mu ggwe amawanga gonna mwe galiweerwa omukisa."

⁹ Noolwekyo abo abakkiriza bagabanira wamu omukisa ne Ibulayimu eyakkiriza.

¹⁰ Naye abo abafugibwa ebikolwa eby'amateeka, bafugibwa kikolimo; kubanga kyawandiikibwa nti, "Buli ataagobererenga byonna ebiwandiikkidwa mu kitabo ky'amateeka, akolimiddwa."

¹¹ Kimanyiddwa bulungi nti tewali n'omu Katonda gw'awa butuukirivu olw'okukuma amateeka, kubanga abatuukirivu banaabeeranga balamu lwa kukkiriza,

¹² naye amateeka tegeesigama ku kukkiriza, naye anaagagobereranga anaabeeranga mulamu mu go.

¹³ Kristo yatununula okuva mu kikolimo ky'amateeka, bwe yafuuka ekikolimo ku lwaffe, kubanga kyawandiikibwa nti, "Akolimiddwa buli awanikiddwa ku muti."

¹⁴ Kale kaakano amawanga gaweebwe omukisa gwa Ibulayimu, mu Kristo Yesu, tulyoke tuweebwe ekyasuubizibwa eky'Omwoyo olw'okukkiriza.

Etteeka n'Ekisuubizo

¹⁵ Abooluganda njogera mu buntu; endagaano bw'eba ng'ekakasibbw, tewabaawo agiggyawo newaakubadde agyongerako.

¹⁶Katonda yasuubiza Ibulayimu n'Omwana we, naye tekigamba nti n'abaana be ng'abangi, naye yayogera ku omu, oyo ye Kristo.

¹⁷Kye ḥnjamba kye kino: endagaano eyakakasibwa Katonda nga wayiseewo emyaka ebikumi bina mu asatu n'efuuka etteeka, teyadibya ekyo ekyasuubizibwa.

¹⁸Kuba oba ng'obusika bwesigamye ku mateeka, buba tebukyali bwa kisuubizo; naye yabuwa Ibulayimu olw'okusuubiza.

¹⁹Kale lwaki amateeka gaateekebwawo? Gaagattibwa ku kisuubizo olw'aboonoonyi okutuusa ezzadde eryasuubizibwa lwe lirikomawo, nga lyawulibbwा mu bamalayika olw'omukono gw'omutabaganya.

²⁰Naye omutabaganya si w'omu, naye Katonda ali omu.

²¹Amateeka galwanagana n'ebyo Katonda bye yasuubiza? Kikafuuwe. Kubanga singa amateeka gaali galeeta obulamu, ddala ddala amateeka gandituwadde obutuukirivu.

²²Naye ebyawandiikibwa bitegeeza nti ebintu byonna bifugibwa kibi, ekyasuubizibwa kiryoche kiweebwe abakkiriza olw'okukkiriza mu Yesu Kristo.

²³Naye okukkiriza nga tekunnajja, twafugibwanga mateeka, nga tusibibwa olw'okukkiriza okugenda okubikkulwa;

²⁴ge gaali gatukuumma, amateeka galyoke gatutuuse eri Kristo, tulyoke tuweebwe obutuukirivu olw'okumukkiriza.

²⁵Naye okukkiriza bwe kwajja, ng'olwo tetukyetaaga mateeka kutukuumma.

Baana ba Katonda

²⁶Kubanga kaakano mwenna muli baana ba Katonda olw'okukkiriza Yesu Kristo,

²⁷kubanga abaabatizibwa bona mu Kristo, baayambala Kristo.

²⁸Tewakyali kusosola wakati wa Muyudaaya na Muyonaani, wakati wa muddu na wa ddembe, wakati wa musajja na mukazi, kubanga mwenna muli omu mu Kristo Yesu.

²⁹Kale kaakano nga bwe muli aba Kristo, muli zadde lya Ibulayimu, ng'ekisuubizo ky'abasika bwe kiri.

Abaggalatiya 4

¹Naye ḥnjamba nti omusika bw'aba ng'akyali mwana muto, tayawulwa na muddu, newaakubadde nga ye mukama wa byonna.

²Afugibwa abasigire n'abawanika okutuusa lw'akula n'atuuka ku kigero kitaawe, kye yategeka.

³Era naffe bwe tutyo bwe twali tukyali bato, twafugibwanga obulombolombo obw'ensi.

⁴Naye ekiseera bwe kyatuuka, Katonda n'atuma Omwana we

⁵eyazaalibwa omukazi ng'afugibwa amateeka, tulyoke tufuuke abaana.

⁶Era kubanga tuli baana, Katonda yatuma Omwoyo w'Omwana we okubeera mu mitima gyaffe, era kaakano tuyinza okwogera mu ddoboozi ery'omwanguka nti, "Aba, Kitaffe."

⁷Kale kaakano tokyali muddu, wabula oli mwana; era nga bw'oli omwana oli musika ku bwa Katonda.

Pawulo Alowooza ku Baggalatiya

⁸Mmwe bwe mwali temunnamanya Katonda mwabanga baddu ba bitali Katonda.

⁹Naye kaakano mutegedde Katonda era naye abatedgedde, kale muyinza mutya okukyuka, ne mugoberera obulombolombo obunafu obatalina maanyi ne mwagala okufuuka abaddu baabwo?

¹⁰Mukwata ennaku, n'emyezi, n'ebiro, n'emyaka;

¹¹neeraliikirira si kulwa ng'omulimu omunene gwe nakola mu mmwe gwali gwa bwereere.

¹²Abooluganda, mbeegayirira mubeere nga nze, kubanga nange ndi nga mmwe. Temulina kabi ke mwankola;

¹³era mumanyi nga mu bunafu obw'omubiri, mmwe be nasooka okubuulira Enjiri.

¹⁴Naye newaakubadde nga mwandinnyomye olw'obulwadde bwange, temwangobaganya, wabula mwansembeza nga malayika wa Katonda, nga Yesu Kristo.

¹⁵Kale essanyu lyammwe lyadda wa? Kubanga ndi mujulirwa wammwe nti, mwali musobola okuggyamu amaaso gammwe ne mugampa okunnyamba singa kyali kyetaagisa.

¹⁶Kale kaakano nfuuse omulabe wammwe olw'okubategeeza amazima?

¹⁷Abo abalabika ng'abaabassaako ennyo omwoyo tebabaagaliza birungi, okuggyako okwagala okubaggalira ebweru, mulyoke mudde ku luuyi lwabwe.

¹⁸Naye kirungi okunyiikiranga okukola ebirungi bulijjo, naye si lwe mbeera nammwe lwokka.

¹⁹Baana bange be nnumirwa nate ng'alumwa okuzaala, okutuusa Kristo lw'alibumbibwa mu mmwe,

²⁰nandyagadde okubeera nammwe kaakano, n'okukyusa eddoboozi lyange kubanga ndi mweraliikirivu ku lwammwe.

Agali ne Saala

²¹Mumbulire, mmwe abaagala okufugibwa amateeka, Iwaki temuwulira mateeka?

²²Kubanga kyawandiikibwa nti Ibulayimu yazaala abaana babiri aboobulenzi, omu yamuzaala mu mukazi omuddu, n'omulala n'amuzaala mu mukazi ow'eddeme.

²³Omwana ow'omukazi omuddu yazaalibwa nga wa mubiri, naye omwana ow'omukazi ow'eddeme yazaalibwa lwa kusuubiza.

²⁴Ebyo biri nga bya lugero; kubanga ezo ndagaano bbiri. Emu yava ku Lusozi Sinaayi, ye yazaala abaana ab'obuddu, ye yava mu Agali.

²⁵Agali lwe Lusozi Sinaayi oluli mu Buwalabu, era afaananyirizibwa ne Yerusaalemi eya kaakano kubanga ye ne bazzukulu be bali mu buddu.

²⁶Naye Yerusaalemi eky'omu ggulu ye mukazi ow'eddeme, era ye nnyaffe.

²⁷Kubanga kyawandiikibwa nti, "Sanyuka ggwe omugumba atazaala. Leekaanira waggulu mu ddoboobi ery'omwanguka newaakubadde nga tozaalanga ku mwana. Kubanga ndikuwa abaana bangi, abaana abangi okusinga omukazi alina omusajja b'alina."

²⁸Naye mmwe abooluganda muli baana abaasuubizibwa, nga Isaaka bwe yali.

²⁹Naye mu biro biri ng'eyazaalibwa omubiri bwe yayigganya oyo eyazaalibwa Omwoyo, ne kaakano bwe kiri.

³⁰Naye Ebyawandiikibwa bigamba bitya? Bigamba nti, "Goba omukazi omuddu n'omwana we, kubanga omwana w'omukazi omuddu talisikira wamu n'omwana w'omukazi ow'eddeme."

³¹Noolwekyo abooluganda tetuli baana ba mukazi omuddu naye tuli baana ab'omukazi ow'eddeme.

Abaggalatiya 5

Eddeme mu Kristo

¹Kale nga Kristo bwe yatufuula ab'eddeme, bwe mutyo munywewere mu ddembe eryo muleme kusibwa nate mu kikoligo ky'obuddu.

²Ka mbategeeze nze Pawulo: Bwe mukomolebwa, nga Kristo taliiko ky'abagasa.

³Era nziramu okutegeeza buli muntu akomolebwa nti alina ebbanja okutuukiriza amateeka gonna.

⁴Mwava mu Kristo mmwe abanoonya okufuna obutuukirivu olw'amateeka. Mwava mu kisa.

⁵Kubanga ffe, ffe ku bw'Omwoyo olw'okukkiriza tulindirira n'essuubi obutuukirivu.

⁶Kubanga mu Kristo Yesu, okukomolebwa oba obutakomolebwa, tekulina maanyi, wabula okukkiriza kukola olw'okwagala.

⁷Mwali mutambula bulungi. Ani eyabasendasenda n'abaggya ku kugondera amazima?

⁸Okusendebwasendebwa okwo, si kw'oyo eyabayita.

⁹Ekizimbulukusa ekitono kizimbulukusa ekitole kyonna.

¹⁰Mbeesiga mu Mukama waffe nga temujja kulwooza kintu kirala kyonna. Naye oyo abateganya alisalirwa omusango ne bw'aliba ani.

¹¹Naye nze abooluganda, oba nga nkyayigiriza okukomolebwa, lwaki njigganyizibwa? Kale enkonge ey'omusaalaba evuddewo.

¹²Nnandyagadde abo abaabateganya beeraawe.

Obulamu bw'Omwoyo

¹³Kubanga mmwe abooluganda mwayitibwa lwa ddembe, noolwekyo eddembe teribawa bbeetu kugoberera bya mubiri. Naye olw'okwagala buli omu abeerenga muweereza wa munne.

¹⁴Kubanga amateeka gonna gatuukirizibwa mu tteeka lino nti: "Yagalanga muntu munno nga bwe weeyagala wekka."

¹⁵Naye obanga muneneñjana mwegendereze muleme okwezikiriza.

¹⁶Mbagamba nti, mutambulirenga mu Mwoyo, mu ngeri yonna, mulemenga kutuukiriza kwegomba kwa mubiri.

¹⁷Kubanga okwegomba kw'omubiri kulwanagana n'Omwoyo, n'Omwoyo n'alwanagana n'omubiri; kubanga bino byombi bikontana, mulemenga okukola bye mwagala.

¹⁸Naye bwe muluñjamizibwa Omwoyo, olwo nga temukyafugibwa mateeka.

¹⁹Ebikolwa by'omubiri bya Iwatu, bye bino: obwenzi, obukaba, obugwenyufu,

²⁰Okusinza bakatonda abalala, obufumu, obulabe, okuyomba, obuggyga, obusungu, okwekuluntaza, okweyawula, okwesalamu,

²¹ettima, obutamiivu, ebinyumu, n'ebirala ebiri ng'ebyo. Ka mbategeeze nate nga bwe nasooka okubabuulira nti buli akola ebyo talina mugabo mu bwakabaka bwa Katonda.

²²Naye ebibala eby'Omwoyo bye bino: okwagala, essanyu, emirembe, obugumiikiriza, ekisa, obulungi, obwesigwa,

²³obuwombeefu, okwefuga; awali ebyo tewali tteeka libiwakanya.

²⁴N'abo aba Kristo Yesu baakomerera omubiri n'okwegomba kwagwo, n'omululu gwagwo.

²⁵Kale bwe tuba abalamu ku bw'Omwoyo, tugobererenga okuluŋŋamizibwa kw'Omwoyo.

²⁶Tulemenga okwemanya, n'okunyizaganya, n'okukwatiragananga obuggyga.

Abaggalatiya 6

¹ Abooluganda omuntu bw'abanga alina ekibi ky'akoze, mmwe ab'omwoyo mumuluŋŋamyenga mu buwombeefu nga mwegendereza si kulwa nga nammwe mugwa mu kukemebwa.

²Muyambaganenga, bwe mutyo bwe munaatuukirizanga etteeka lya Kristo.

³Kubanga omuntu yenna bwe yeerowooza okuba owa waggulu so nga si bw'ali, yeerimbarimba.

⁴Naye buli muntu yeekebere akakase omulimu ggwe, yenyumirize ye yekka so si mu muntu omulala.

⁵Kubanga buli muntu aneetikkanga obuvunaanyizibwa bwe.

⁶Oyo ayigirizibwa ekigambo kya Katonda, agabanirenga wamu n'amuyigiriza ku birungi byonna by'alina.

⁷Temubuzibwabuzibwanga, Katonda tasekererwa, kubanga omuntu ky'asiga era ky'alikungula.

⁸Kubanga oyo asiga eri omubiri gwe, alikungula ebiggwaawo. Naye oyo asiga eri omwoyo, alikungula obulamu obutaggwaawo.

⁹Kale tulemenga okuterebuka mu kukola obulungi, kubanga oluvannyuma tulikungula emikisa, bwe tutaggwaamu maanyi.

¹⁰Noolwekyo, buli lwe kinaabanga kisobose tukolerenga abantu bona ebirungi, na ddala ab'omu nnyumba ey'okukkiriza.

Si kukomola wabula abantu abaggya

¹¹Mulabe, bwe nnabawandiikira n'omukono gwange mu nnukuta ennene!

¹²Abo abanoonya okweraga mu mubiri be babawaliriza okukomolebwa mu mubiri, balemenga okuyigganyizibwanga olw'omusaalaba gwa Kristo, balyoke beenyimirize olw'omubiri gwammwe.

¹³Kubanga n'abo bennyini abakomolebwa tebakwata mateeka, naye baagala mukomolebwe balyoke beenyimirize olw'omubiri gwammwe.

¹⁴Naye nze sigenda kwenyimiririza mu kintu kyonna okuggyako omusaalaba gwa Mukama waffe Yesu Kristo, kubanga olw'omusaalaba ogwo, nkomereddwa eri ensi, n'ensi ekomereddwa eri nze.

¹⁵Kubanga okukomolebwa oba obutakomolebwa si kintu, wabula ekikulu kye kitonde ekiggya.

¹⁶N'abo bonna abanaatambuliranga mu tteeka eryo, emirembe gibeerenga ku bo, n'okusaasirwa, ne ku Isirayiri ya Katonda.

¹⁷Okuva kaakano tewabanga muntu n'omu anteganya, kubanga nnina enkovu za Yesu ku mubiri gwange.

¹⁸Abooluganda, ekisa kya Mukama waffe Yesu Kristo kibeerenga nammwe n'omwoyo gwammwe. Amiina.

Abaefeso

Abaefeso 1

¹ Nze Pawulo, omutume wa Kristo Yesu, olw'okwagala kwa Katonda, mpandiikira abatukuvu abali mu Efeso, era abakkiririza mu Kristo Yesu.

² Ekisa n'emirembe ebiva eri Katonda Kitaffe ne Mukama waffe Yesu Kristo bibeerenga nammwe.

Emikisa mu Kristo

³ Yeebazibwe Katonda era Kitaawe wa Mukama waffe Yesu Kristo, atuwadde mu Kristo buli mukisa gwonna ogw'omwoyo oguva mu ggulu.

⁴ Yatulonda okubeera mu Kristo ng'ensi tennatondebwa, ffe tube batukuvu, abataliiko kya kunenyezebwa mu maaso ge, olw'okwagala kwe.

⁵ Olw'okwagala kwe, yatuteekateeka tubeere abaana be mu Yesu Kristo, ng'okusiima kwe bwe kuli.

⁶ Katonda tumutendereze olw'ekisa kye yatuwa obuwa mu Mwana, gw'ayagala ennyo.

⁷ Mu oyo mwe tununulibwa olw'omusaayi gwe, ne tusonyiyibwa ebibi, ng'obugagga bw'ekisa kye bwe buli,

⁸ kye yatuwa mu bungi mu magezi gonna ne mu kutegeera kwonna.

⁹ Yatubikkulira ekyama eky'okwagala kwe, ng'okusiima kwe bwe kuli kwe yateekerateekera mu Kristo.

¹⁰ Olwo ekiseera ekituufu bwe kirituuka, Katonda alikola byonna bye yateekateeka, n'ateeka ebintu byonna awamu wansi wa Kristo, ebiri mu ggulu n'ebiri ku nsi.

¹¹ Era mu ye mwe twaweerwa obusika ne twawulibwa ng'enteekateeka bw'eri ey'oyo akola ebintu byonna okusinziira ku magezi ag'okwagala kwe;

¹² ffe Abayudaaya tulyoke tumuleetere okugulumizibwa, ffe abaasooka okuba n'essuubi mu Kristo.

¹³ Nammwe, Kristo yabaleeta eri amazima, kye kigambo eky'Enjiri ey'okulokolebwa kwammwe. Bwe mwamukkiriza, ne muteekebwako envumbo eya Mwoyo Mutukuvu eyasuubizibwa,

¹⁴ gwe musingo gw'obusika bwaffe, okutuusa bw'alinunula abantu be, ne Katonda n'agulumizibwa era n'atenderezebwa.

Okusaba kwa Pawulo

¹⁵ Noolwekyo okuva lwe nawulira okukkiriza kwe mulina mu Mukama waffe Yesu, n'okwagala kwe mulina eri abantu ba Katonda bona,

¹⁶sirekangayo kwebaza Katonda ku lwammwe. Mbajjukira

¹⁷ne mbasabira, Katonda wa Mukama waffe Yesu Kristo, Kitaffe ow'ekitiibwa, abawe Omwoyo ow'amagezi n'okubikkulirwa mweyongere okumutegeera.

¹⁸Nnyongera okubasabira, amaaso g'emitima gyammwe gamulisibwenga, mulyoke mumanye essuubi ly'okuyitibwa kwammwe, n'obugagga obungi bwe mulina mu ye, mmwe awamu n'abantu ba Katonda bona.

¹⁹Njagala mutegeere amaanyi ge agasukkiridde agakolera mu ffe abakkiriza, ng'okukola kw'obuyinza bw'amaanyi ge bwe kuli,

²⁰amaanyi ago ge yakozesa mu Kristo bwe yamuzuukiza mu bafu, n'amutuuza ku mukono gwe ogwa ddyo waggulu mu ggulu.

²¹Waggulu eyo, Kristo gy'afugira obufuzi bwonna, n'obuyinza bwonna, n'amaanyi gonna, n'obwami bwonna, na buli kitibwa kyonna ekiweebwa omuntu. Afugira mu mulembe guno, era alifugira ne mu mulembe ogugenda okujja.

²²Katonda atadde ebintu byonna wansi w'ebigere bye, n'afuula Kristo omutwe gw'ebintu byonna eby'ekkanisa,

²³era ekkanisa gwe mubiri gwe ye yennyini, mwatuukiririza ebintu byonna.

Abaefeso 2

Okuggyibwa mu kufa n'okufuulibwa abalamu

¹Edda mwali mufiiridde mu byonoono byammwe ne mu bibi byammwe.

²Ebyo bye mwatambulirangamu ng'emirembe egy'ensi bwe giri, nga mufugibwa omwoyo ogw'omukulu w'obuyinza obw'omu bbanga, omwoyo ogwa Setaani, ogufuga abajeemu bona.

³Edda naffe twatambuliranga mu kwegomba kw'emibiri gyaffe, nga tukola ebyo ebyegombewanga omubiri n'ebirowoozo. Era okufaanana ng'abantu abalala bona, naffe mu buzaaliranwa twali baakubonerezebwaa ng'abalala bona.

⁴Kyokka olw'okwagala kwe okungi, n'ekisa kye ekingi,

⁵ne bwe twali nga tufiiridde mu bibi byaffe, yatufuula abalamu awamu ne Kristo. Mwalokolebwa lwa kisa.

⁶Katonda yatusuukiriza wamu ne Kristo okuva mu kufa ne tufuna obulamu, era atutuuzizza mu bifo eby'omu ggulu, okumpi ne Kristo Yesu.

⁷Ekyo Katonda yakikola alyoke alage, mu mirembe egigenda okujja, ekisa kye ekingi kye yatukwatirwa mu Kristo Yesu.

⁸Mwalokolebwa lwa kisa olw'okukkiriza. Tekwava mu mmwe, wabula kirabo kya Katonda.

⁹Tekwatuweebwa lwa bikolwa byaffe; noolwekyo omuntu yenna aleme okwenyumirizanga.

¹⁰Tuli mulimu gwa Katonda, abaatondebwa mu Kristo Yesu, okukolanga ebikolwa ebirungi, nga Katonda bwe yatuteekerateekera.

¹¹Noolwekyo mujjukire, ng'edda mmwe abaali Abaamawanga mu mubiri, abaayitbwanga abatali bakomole aboabeeita abaakomolebwa, kyokka nga baakomolebwa mu mubiri na ngalo z'abantu,

¹²nga mu biro biri temwamanya Kristo. Temwabalirwa mu ggwanga lya Isirayiri, era ng'Abaamawanga, temwalina mugabo mu ndagaano ya Katonda ey'ekisuubizo. Mwali wala ne Katonda, nga n'essuubi temulina.

¹³Naye kaakano mu Kristo Yesu, mmwe abaali ewala mwasembezebwa olw'omusaayi gwa Kristo.

¹⁴Kristo gy'emirembe gyaffe, oyo eyatufuala ffe Abayudaaya nammwe Abaamawanga, okuba omuntu omu, ng'amenyeewo ekisenge ekya wakati eky'obulabe, ekyatwawulanga.

¹⁵Yadibya n'etteeka mu mateeka, alyoke yeetondemu omuntu omuggya ava mu babiri, ng'aleeta emirembe,

¹⁶alyoke atabaganye ababiri okufuuka omubiri gumu eri Katonda olw'omusaalaba, bwe yazikiririza obulabe ku gwo.

¹⁷Yajja okubuulira emirembe abo abaali ewala ne Katonda, n'abo abaali okumpi naye.

¹⁸Ku bw'oyo Kristo ffenna tuyita mu Mwoyo omu okutuuka eri Kitaffe.

¹⁹Noolwekyo temukyali baamawanga oba abagwira, wabula muli ba kika kimu n'abatukuvu, abantu ba Katonda, era muli ba mu nnyumba ya Katonda.

²⁰Mwazimbibwa ku musingi ogw'abatume ne bannabbi, nga Kristo Yesu ly'ejinja ekkulu ery'oku nsonda.

²¹Mu oyo ffenna tuzimbibwa wamu ne tugattibwa wamu ne tubeera essinzizo ettukuvu mu Mukama waffe.

²²Era nammwe mwazimbibwa wamu mu kizimbe ekyo Kristo ky'azimbye okubeeranga ekifo Omwoyo wa Katonda mwabeera.

Abaefeso 3

Omulimu gwa Pawulo mu Baamawanga

¹ Nze Pawulo, Kristo Yesu yanfuula omusibe we, nsobole okuyamba mmwe Abaamawanga.

² Mwawulira ekisa kya Katonda kye naweebwa okubayamba.

³ Nga bwe nasooka okubawandiikira mu bimpimpi, Katonda alina okubikkulirwa okw'ekyama kwe yandaga.

⁴ Bwe munaasoma ebbaluwa eno mujja kusobola okutegeera ebyo bye mmanyi ku kyama kya Kristo.

⁵ Mu biro eby'edda, tewali yali amanyi kyama ekyo okutuusa Omwoyo wa Katonda bw'akibikkulidde abatume be abatukuvu ne bannabbi.

⁶ Kino kye kyama kye njogerako: olw'enjiri ya Kristo, Abaamawanga balisikira wamu ne Isirayiri ekyo Katonda kye yasuubiza, era baliba omubiri gumu, era ne bagabanira wamu ekisuubizo ekyo mu Kristo Yesu.

⁷ Nafuuka omuweereza w'enjiri eyo olw'ekirabo eky'ekisa kya Katonda kye naweebwa, Katonda ng'akolera mu maanyi ge.

⁸ Newaakubadde nga nze nsembayo wansi mu batukuvu bona, naweebwa ekisa ekyo, okubuulira Abaamawanga emikisa egiri mu Kristo egitageraageraganyizika.

⁹ Katonda eyatonda ebintu byonna yayaga nnyambe buli muntu okutegeera ebyekyama ebyali bikwekedwa mu Katonda.

¹⁰ Katonda yakigenderera atyo, ng'ayita mu kkanisa, alyoke yeeyoleke eri amaanyi n'obuyinza ebiri mu nsi ey'omwoyo eya waggulu, ng'abalaga nga bw'alina amagezi amangi ag'ebika eby'enjawulo.

¹¹ Katonda yakola bw'atyo ng'enteekateeka ye ey'emirembe n'emirembe bw'eri, gye yatuukiriza mu ebyo byonna Kristo Yesu Mukama waffe bye yakola.

¹² Kristo atuwa obuvumu n'obugumu, tulyoke tusembere mu maaso ga Katonda olw'okukkiriza nga tetutya.

¹³ Kyenva mbeegayirira muleme kuterebuka olw'okubonaabona kwange ku lwammwe, kubanga ekyo kibaleetera kituibwa.

Okwagala kwa Kristo

¹⁴ Nfukaamirira Kitaffe,

¹⁵ ebika byonna eby'omu ggulu n'ebi'oku nsi mwe biggya obulamu.

¹⁶ Nsaba Katonda oyo akola eby'ekitalo era agulumizibwa, agumyenga era anywezenga omuntu wammwe ow'omunda, olw'Omwoyo we,

¹⁷ Kristo alyoke abeerenga mu mitima gyammwe olw'okukkiriza kwammwe. Mbasabira mubeerenga n'emirandira mu kwagala nga mukunywereddemu,

¹⁸mulyoke mubeerenga n'amaanyi awamu n'abatukuvu bonna, okusobola okutegeera obugazi, n'obuwanvu, n'obugulumivu n'okukka wansi ebiri mu kwagala kwa Kristo.

¹⁹Njagala mutegeere okwagala kwa Kristo okusukkiridde okutegeera kwonna, mulyoke musobole okutegeerera ddala Katonda bw'ali.

²⁰Kaakano nsaba nti oyo akola ebintu byonna okusinga byonna bye tusaba, ne bye tulowooza, ng'amaanyi ge bwe gali agakolera mu ffe,

²¹agulumizibwenga mu Kkanisa ne mu Kristo Yesu, emirembe n'emirembe. Amiina.

Abaefeso 4

Okuba ab'omubiri ogumu

¹Ng'omusibe wa Mukama waffe, mbakuutira mubeere n'empisa ezisaanira obulamu bwe mwayitirwa okutambuliramu.

²Mubeerenga bakkakkamu, abawombeefu era abagumiikiriza, nga mugumiikirizagana mu kwagala.

³Munyiikirenga okukuma obumu obw'Omwoyo mu kwegatta awamu okw'emirembe.

⁴Omubiri nga bwe guli ogumu, n'Omwoyo omu, n'essuubi liri limu ery'okuyitibwa kwammwe.

⁵Mukama waffe ali omu, n'okukkiriza kumu n'okubatizibwa kumu.

⁶Katonda ali omu, era ye Kitaawe wa bonna, afuga byonna, akolera mu byonna era abeera mu byonna.

⁷Buli omu ku ffe yaweebwa ekisa ng'okugera kwa Kristo bwe kuli.

⁸Ebyawandiikibwa kyebiva bigamba nti, "Bwe yalinnya mu ggulu, n'atwala omunyago, n'awa abantu ebirabo."

⁹Okugamba nti "yalinnya," kitegeeza ki? Kitegeeza nti yasooka kukka mu bitundu ebya wansi w'ensi.

¹⁰Oyo Kristo eyakka, ye wuuyo ddala eyalinnya ewala ennyo, n'ayisa waggulu w'eggulu lyonna, alyoke ajjule obwengula bw'ensi yonna.

¹¹Era y'omu oyo eyawa abamu okuba abatume, n'abalala okuba bannabbi, n'abalala okuba ababuulizi b'enjiri, n'abalala okuba abasumba, n'abalala okuba abayigiriza.

¹²Ekyo yakikola olw'okutendeka abantu ba Katonda olw'omulimu ogw'obuweereza, okuzimba omubiri gwa Kristo.

¹³Ekyo kijja kutwongera okugenda mu maaso, okutuusa ffenna lwe tulibeera n'okukkiriza kumu, n'okumanyira ddala Omwana wa Katonda nga tukulidde ddala mu mwoyo okutuuka ku kigera eky'okubeera nga Kristo bw'ali.

¹⁴Tuteekwa okulekeraawo okweyisa ng'abaana abato, nga tuyuuguumizibwa amayengo nga tutwalibwa buli muyaga ogw'okuyigiriza okw'abantu abakuusa, mu nkwe olw'okugoberera enteekateeka ey'obulimba.

¹⁵Tube ba mazima mu kwagala, tulyoke tukulire mu Kristo mu byonna, nga tweyongera okuba nga ye, Omutwe gw'Ekkanisa.

¹⁶Mu ye omubiri gwonna mwe gugattirwa obulungi awamu, ne guyungibwa mu buli nnyingo, nga gukola ng'ekigera kya buli kitundu bwe kuli, nga gukula era nga gwezimba mu kwagala.

Obulamu obuggyga mu Kristo

¹⁷Ng'omugoberezi wa Mukama waffe, mbalagira okulekeraawo okutambula ng'abatamanyi Katonda bwe batambulira mu birowoozo byabwe eby'obusirusiru.

¹⁸Amagezi gaabwe gajjudde ekizikiza. Tebalina mugabo mu by'obulamu bwa Katonda, kubanga bajjudde obutamanya era emitima gyabwe mikakanyavu.

¹⁹Tebakyalina nsonyi, beemalidde mu bya buwemu, na mululu gwa kukola bya bugwenyufu ebya buli ngeri.

²⁰Kyokka mmwe si bwe mwayigirizibwa ku bya Kristo.

²¹Obanga ddala mwamuwlira, era ne muyigirizibwa mu ye ng'amazima bwe gali mu Yesu,

²²kale mwambulemu obulamu obw'omuntu ow'edda, avunda olw'okwegomba okw'obulimba.

²³Mufuuke baggya olw'Omwoyo afuga ebirowoozo byammwe,

²⁴era mwambale omuntu omuggya, eyatondebwa mu kifaananyi kya Katonda mu butuukirivu ne mu kutukuzibwa okw'amazima.

²⁵Mulekeraawo okulimba, mwogerenga amazima buli muntu ne munne, kubanga tuli bitundu bya mubiri gumu.

²⁶"Bwe musunguwalanga mwekuume muleme kwonoona." Temuzibyang budde nga mukyasunguwadde.

²⁷Temuwanga Setaani bbanga.

²⁸Abadde omubbi alekeraawo okubba, wabula anyiikirenga okukola eby'omugaso ng'akola n'emikono gye, alyoke afune ky'agabirako n'abo abeetaaga.

²⁹Mwekuume mulemenga okwogera ebigambo ebitasaana, wabula mwogerenga ebyo byokka ebizimba nga buli muntu bwe yeetaaga, biryoke bigase abo ababiwulira.

³⁰Era temunakuwazanga Mwoyo Mutukuvu wa Katonda, eyabateekako akabonero akalaga nga mwanunulibwa.

³¹Okunyiiga, n'obusungu, n'obukambwe, n'okukaayana, n'okuvuma, na buli kibi kyonna, biremenga kubeera mu mmwe.

³²Mubenga ba kisa, buli omu alumirwenga munne, era musonyiwaganenga, nga Katonda bwe yabasonyiwa mu Kristo.

Abaefeso 5

Okubeera mu Musana

¹Mufubenga okufaanana Katonda kubanga muli baana ba Katonda abaagalwa.

²Mwagananenga nga Kristo bwe yatwagala ne yeewaayo ku lwaffe n'afuuka ekiweebwayo era ssaddaaka eri Katonda, eyakawoowo akalungi.

³Nga bwe muli abantu ba Katonda abatukuvu, obwenzi, n'obugwagwa bwonna, n'omululu bireme okuwulirwa mu mmwe.

⁴Mwewale okwogera eby'ensonyi, n'eby'obusirusiru, n'okubalaata ebitasaana. Mwebazenga bwebaza Katonda.

⁵Mukimanye era mukitegeerere ddala nga buli mwenzi, oba omugwagwa, oba eyeegomba, aba asinza bakatonda abalala, talina mugabo mu bwakabaka bwa Kristo ne Katonda.

⁶Omuntu yenna tabalimbalmanga n'ebigambo ebitaliimu. Katonda abonereza buli muntu yenna amujeemera.

⁷Noolwekyo temwegattanga n'abafaanana ng'abo.

⁸Edda mwali ng'abantu ab'ekizikiza, naye kaakano muli bantu ba musana mu Mukama waffe. Noolwekyo mutambulenga ng'abaana ab'omusana,

⁹ekitangaala kyammwe kirabisibwe. Mubale ebibala eby'omusana nga mweyisa bulungi, nga mubeera abeesimbu era ab'amazima,

¹⁰nga munoonya ekyo ekisanyusa Mukama waffe.

¹¹Temwenyigiranga mu bikolwa bya kizikiza kubanga tebigasa, wabula munenyenga ababikola.

¹²Kubanga kya nsonyi n'okubyogerako ebyo abajeemu bye bakolera mu kyama.

¹³Byonna bwe biryatuukirizibwa mu kitangaala, birirabikira ddala nga bwe biri.

¹⁴Ekitangaala kirabisa buli kintu. Kyekiva kigambibwa nti, “Zuukuka ggwe eyeebase, Ozuukire mu bafu, Kristo anaakwakira.”

¹⁵Mutunule nga mutambula n’obwegendereza, si ng’abatalina magezi wabula ng’abalina amagezi,

¹⁶nga temwonoona biseera kubanga ennaku zino mbi.

¹⁷Temubanga basirusiru, naye mutegeere Mukama waffe ky’ayagala.

¹⁸Ate temutamiiranga, kubanga mujja kwayeyonoona, wabula Omwoyo ajjulenga mu bulamu bwammwe.

¹⁹Bwe mukujjananga muzimbaganenga mu Zabbuli ne mu nnyimba, ne mu nnyimba ez’Omwoyo nga muyimbira Mukama era nga mumuyimusiza amaloboozi mu mutima gwammwe.

²⁰Bulijo mwebazenga Katonda Kitaffe olwa byonna, mu linnya lya Mukama waffe Yesu Kristo.

Abakazi ne ba bbaabwe

²¹Mutyenga Kristo, nga muwuliragananga.

²²Abakazi, muwulirenga babbammwe nga bwe muwulira Mukama waffe.

²³Omusajja gwe mutwe gw’omukazi, nga Kristo bw’ali omutwe gw’Ekkanisa. Ekkanisa gwe mubiri gwa Kristo, era ye yennyini ye Mulokozi waagwo.

²⁴Kale ng’Ekkanisa bw’ewulira Kristo, n’abakazi bwe batyo bwe basaana okuwuliranga ba bbaabwe mu byonna.

²⁵Nammwe abaami mwagalenga bakyala bammwe nga Kristo bwe yayagala Ekkanisa ne yeewaayo ku lwayo.

²⁶Yaginaaza n’amazzi, n’agitukuza n’ekigambo kye,

²⁷alyoke yeefunire Ekkanisa ey’ekitiibwa, eteriiko bbala wadde akamogo oba ekintu kyonna ekikyamu, wabula ebeere entukuvu, etuukiridde.

²⁸N’abasajja bwe batyo bwe basaana okwagalanga bakazi baabwe, nga bwe baagala emibirgyabwe gyennyyini. Ayagala mukazi we yeeyagala yekka.

²⁹Tewali n’omu yali akyaye omubiri gwe, wabula aguliisa era agujjanjaba nga Kristo bw’ajjanjaba Ekkanisa ye,

³⁰kubanga tuli bitundu bya mubiri gwe.

³¹“Kale omusajja kyanaavanga aleka kitaawe ne nnyina ne yeegatta ne mukazi we, ne bafuuka omuntu omu.”

³²Ekyama kino kikulu, kyokka nze ndowooza nti kyogera ku Kristo n’Ekkanisa ye.

³³Kale, nammwe buli musajja ayagalenga mukazi we nga bwe yeeyagala yennyini, era n'omukazi assengamu bba ekitiibwa.

Abaefeso 6

Abazadde n'abaana baabwe

¹Abaana, muwulirenga bazadde bammwe mu Mukama waffe, kubanga bwe mukola mutyo, mukola kituufu.

²"Kitaawo ne nnyoko obassangamu ekitiibwa," eryo lye tteeka erisooka eririmu okusuubiza nti:

³Bw'onoobanga obulungi, era n'owangaala ku nsi.

⁴Nammwe abazadde, temunyigirizanga baana bammwe, wabula mubakuze nga mubagunjula era nga mubayigiriza ebya Mukama waffe.

Abaddu ne bakama baabwe

⁵Abaddu, muwulirenga bakama bammwe ab'omu mubiri nga mubatya era nga mubawa ekitiibwa ng'omutima gwammwe mumalirivu, nga bwe mwamalirira mu Kristo.

⁶Ekyo temukikola lwa kulabibwa, abantu balyoke babasiime, wabula mukolenga ng'abaddu ba Kristo nga mukola n'omutima gwammwe gwonna, nga Katonda bw'ayagala.

⁷Muweerezenga n'omutima omulungi ng'abakolera Mukama waffe so si ng'abakolera abantu,

⁸nga mumanyi ng'ekirungi kyonna omuntu ky'akola, oba muddu oba wa ddembe, Mukama alimusasula empeera ennungi.

⁹Era nammwe bakama b'abaddu, muyisenga bulungi abaddu bammwe nga temubatiisatiisa, nga mumanyi nti Mukama waabwe, ye Mukama wammwe, ali mu ggulu era ye tasosola mu bantu.

Ebyokulwanyisa bya Katonda

¹⁰Eky'enkomerero, mubenga n'amaanyi mu Mukama waffe ne mu buyinza obw'amaanyi ge.

¹¹Mwambale ebyokulwanyisa byonna ebya Katonda, mulyoke musobole okwolekera enkwe za Setaani.

¹²Kubanga tetumeggana na mubiri wadde musaayi, wabula tulwanyisa abafuzi, n'ab'obuyinza, n'amaanyi ag'ensi ag'ekizikiza, n'emyoyo emibi egy'omu bifo ebya waggulu.

¹³Noolwekyo mwambalenga ebyokulwanyisa byonna ebya Katonda, mulyoke musobole okwaŋjanga omulabe ku lunaku olw'akabi, era bwe mulimala okukola byonna, mulyoke musigale nga muli banywevu.

¹⁴Muyimirire nga muli banywevu, ng'amazima lwe lukoba lwammwe lwe mwesibye mu kiwato kyammwe, ate ng'obutuukirivu kye ky'omu kifuba,

¹⁵nga mwambadde n'engatto mu bigere byammwe nga mugenda okubuulira Enjiri ey'emirembe.

¹⁶Era ku ebyo byonna okukkiriza kwammwe kubeerenga engabo eneebasobozesanga okuzikiza obusaale bwonna obw'omuliro obulasibwa omubi.

¹⁷Obulokozi bubafuukire enkuufiira gye mwambadde, n'ekigambo kya Katonda kibabeerere ekitala eky'Omwoyo,

¹⁸nga musabiririranga mu ssaala zonna nga mwegayiririranga mu mwoyo buli kiseera. Mwekuumenga nga mugumiikirizanga, era nga mwegayiririranga abatukuvu, be bantu bona aba Katonda.

¹⁹Era nange munsabirenga bwe nnaabanga njogera mpeebwe eby'okwogera, era mbyoyerenga n'obuvumu nga ntegeeza abantu ekyama ky'Enjiri.

²⁰Ndi mubaka wa Njiri ali mu njegere. Munsabire ndyoke ngibuulire abantu n'obuvumu nga bwe kinsaanira.

²¹Tukiko, owooluganda omwagalwa era omuweereza omwesigwa mu Mukama waffe, alibategeeza byonna mulyoke mutengeere ebinaako ne bye nkola.

²²Mmutumye gye muli, mulyoke mumanye nga bwe tuli era abagumye emitima gyammwe.

²³Emirembe n'okwagala awamu n'okukkiriza ebiva eri Katonda Kitaffe ne Mukama waffe Yesu Kristo, bibeerenga n'abooluganda.

²⁴Ekisa kya Katonda kibeerenga n'abo bona abaagala Mukama waffe Yesu Kristo n'okwagala okutaggwaawo.

Abafiripi

Abafiripi 1

Okulamusa

¹ Nze Pawulo ne Timoseewo abaddu ba Kristo Yesu tuwandiikira abatukuvu bona mu Kristo Yesu abali mu Firipi, awamu n'abalabirizi n'abadiikoni;

² ekisa n'emirembe ebiva eri Katonda Kitaffe ne Mukama waffe Yesu Kristo, bibeerenga nammwe.

Okwebaza n'okusaba Katonda

³ Nneebaza Katonda wange buli lwe mbajjukira,

⁴ era buli lwe mbasabira mwenna nsaba nga nzijudde essanyu.

⁵ Kubanga okuvira ddala ku lunaku olwasooka n'okutuusiza ddala kaakano mwetaba wamu nange mu njiri.

⁶ Nkakasiza ddala nti oyo eyatandika omulimu omulungi mu mmwe, aligutuukiriza okutuusa ku lunaku lwa Kristo Yesu.

⁷ Kino kituufu okubalowoozaako bwe ntyo mwenna, kubanga mundowoozaako mu kusibibwa kwange ne mu kulwanirira Enjiri, ne mu kuginyweza, nga mwenna mwetaba wamu nange mu kisa.

⁸ Katonda ye mujulirwa wange nga mwenna bwe mbaagala n'okwagala okuva eri Kristo Yesu.

⁹ Mbasabira nti okwagala kwammwe kweyongerenga, era mujjule amagezi n'okutegeera,

¹⁰ mulyoke mulonde ekisinga obulungi, olunaku lwa Kristo bwe lulituuka lubasange nga muli balongoofu abataliiko kamogo,

¹¹ nga mujjudde ekibala eky'obutuukirivu ku bwa Yesu Kristo, olw'okuweesa Katonda ekitiibwa n'okumutendereza.

Obusibe bwa Pawulo bubunyisa Njiri

¹² Abooluganda, njagala mmwe mutengeere kaakano nti ebimu ebyambaako byongera bwongezi kubunyisa Njiri,

¹³ n'okusibibwa kwange kulyoke kulabise Kristo eri olusiisira lwonna olw'abaserikale ba kabaka n'eri abalala bona.

¹⁴ N'abooluganda mu Mukama waffe abasinga obungi beeyongedde okuguma olw'okusibibwa kwange, era nga bamaliridde okwañjanga okubuulira nga tebatya.

¹⁵ Weewaawo abamu bategeeza abantu Kristo lwa buggyaa na kuvuganya, naye abalala bakikola mu mwoyo mulungi.

¹⁶Bano bakikola lwa kwagala, kubanga bamanyi nga nalondebwa lwa kulwanirira Njiri.

¹⁷Naye bali bategeeza Kristo lwa kuvuganya, so si mu mazima, nga balowooza nti banaayongera okunnakuwaza mu busibe bwe ndimu.

¹⁸Naye nze nfaayo ki? Kristo bw'abuulirwa, mu buli ngeri, oba za bukuusa oba za mazima, nze nsanyuka busanyusi. Era nzija kweyongera okusanyuka.

¹⁹Kubanga mmanyi nti olw'okunsabira n'olw'amaanyi g'Omwoyo wa Yesu Kristo, ndifuna okulokolebwa kwange.

²⁰Neesiga era nsubirira ddala nti sijja kuswala mu nsonga n'emu, wabula ne kaakano nzija kuguma nga bulijjo, Kristo agulumizibwe mu mubiri gwange, oba okuyita mu bulamu oba okuyita mu kufa.

²¹Nze mba mulamu lwa Kristo era ne bwe nfa mba ngobolodde.

²²Naye obanga bwe mba omulamu mu mubiri ng'ekyo kibala ky'okufuba kwange, simanyi kye nnaalondawo.

²³Nkwatiddwa buli luuyi; nneegomba okuva mu bulamu buno ḥejende mbeere ne Kristo, kubanga ekyo kisingako obulungi.

²⁴Naye okusigala mu mubiri kye kisinga okwetaagibwa ku lwammwe

²⁵Ekyo nkikakasa era nkimanyi nti nzija kuba nga nkyaliwo mbeere nammwe, mulyoke mweyongere okusanyuka n'okukula mu kukkiriza,

²⁶bwe ndikomawo gye muli mulyoke mweyongere okwenyumiririza mu Kristo ku lwange.

²⁷Naye kirungi obulamu bwammwe bubeerenga nga bwe kisaanira Enjiri ya Kristo; ne bwe ndijja oba ne bwe sirijja kubalaba, mpulire nti muli banywevu era mwegasse mu mwoyo gumu, nga mulwanirira okukkiriza okw'enjiri n'emmeeme emu.

²⁸Temutyanga abo ababawakanya kubanga ke kabonero akakakasa nti balizikirizibwa, naye mmwe mulirokolebwa, era ekyo kiva eri Katonda.

²⁹Kubanga mwaweebwa omukisa, ku lwa Kristo, si mu kumukkiriza kyokka, naye n'okubonaabona ku lulwe.

³⁰Olutalo lwe mwalaba nga nnwana, era lwe muwulira lwe ndiko kaakano, nammwe lwe muliko.

Abafiripi 2

Mulabire ku Kristo

- ¹ Kale bwe wabaawo okubazaamu endasi kwonna mu Kristo, oba okusanyusa kwonna okw'okwagala, oba okussa ekimu mu mwoyo, oba okwagala okw'engeri yonna, oba okusaasira,
- ² mutuukirize essanyu lyange, mulowoozenga bumu, nga mulina okwagala, n'omwoyo gumu, nga mulowooza bumu,
- ³ nga temukola kintu na kimu olw'okuvuganya wadde okwewaana okutaliimu, wabula mu bwetoowaze nga buli muntu agulumiza munne okusinga bwe mwegulumiza mwekka,
- ⁴ nga buli muntu tatuunuulira bibye yekka, naye ng'afaayo ne ku by'abalala.
- ⁵ Mubengamu endowooza eri eyali mu Kristo Yesu,
- ⁶ ye newakubadde nga yali mu kifaananyi kya Katonda, Teyeerowooza kwenkanankana ne Katonda,
- ⁷ wabula yeewaayo n'afuuka ng'omuddu, era n'azaalibwa ng'omuntu, era n'alabikira mu kifaananyi ky'omuntu,
- ⁸ ne yeetoowaza, n'aba muwulize n'okutuukira ddala ku kufa, ate okufa okw'okukomererwa ku musaalaba.
- ⁹ Katonda kyeyava amugulumiza, n'amuwa erinnya erisinga amannya gonna;
- ¹⁰ buli vviivi ery'abo abali mu ggulu n'abali ku nsi, era n'abali wansi w'ensi liryoke lifukaamirirenga erinnya lya Yesu,
- ¹¹ era buli lulimi lwatulenga nga Yesu Kristo ye Mukama, Katonda Kitaffe aweebwe ekitiibwa.

Okwakira Ensi

- ¹² Noolwekyo abaagalwa, nga bwe muli abawulize bulijo nga ndi nammwe, kaakano nga bwe siri nammwe mube bawulize nnyo n'okusinga bwe mwali. Munyiikirenga okukola ebiraga nti mwalokolebwa, nga mutya era nga mukankana.
- ¹³ Kubanga Katonda yakolera mu mmwe, era yabaagazisa n'abasobozesa okukola by'ayagala, olw'okumusanyusa.
- ¹⁴ Buli kye mukola mukikolenga awatali kwemulugunya wadde empaka,
- ¹⁵ mulyoke mube nga temuliiko kyakunenyezebwa nga muli balongoofu, mube abaana ba Katonda abatalina bbala, wakati mu mulembe ogwakyama era omwonoonefu, mwe mubeere ekyokulabirako eky'amaanyi mu nsi,
- ¹⁶ nga munyweza ekigambo ky'obulamu gye bali, ndyoke mbeere n'eky'okwenyumiriza ku lunaku lwa Kristo, okulaga nti ssaddukira bwereere so ssaateganira busa.

¹⁷Naye singa ddala nfukibwa ng'ekiweebwayo ekyokunywa ku ssaddaaka ne ku kuweereza okw'obwakabona okw'okukkiriza kwammwe, nsanyukira wamu nammwe mwenna.

¹⁸Era nammwe musanyukire wamu nange.

Timoseewo ne Epafuladito

¹⁹Mukama waffe Yesu bw'alisiima nsuubira okubatumira mangu Timoseewo, ndyoke ntereere omwoyo nga ntegedde ebibafaako.

²⁰Kubanga tewali mulala alina ndowooza nga yange,

²¹kubanga abalala bona beenoonyeza byabwe ku bwabwe, so si ebya Yesu Kristo.

²²Naye ye Timoseewo mumumanyi nga bw'asaanira, kubanga aweerereza wamu nange, ng'omwana bw'akolera awamu ne kitaawe nga tukola omulimu gw'okbuulira Enjiri.

²³Kale oyo gwe nsuubira okubatumira amangu ddala nga naakamanya nga bwe nnaabeera.

²⁴Naye nkakasa nti Mukama waffe bw'alisiima, nange nze kennyni sirimala bbanga ddene nga sinnajja eyo.

²⁵Era ndabye nga kisaanye okubatumira owooluganda Epafuladito mukozi munnange, era mulwanyi munnange, naye ate nga mutume wammwe, omuweereza ow'ebi'obwakabona ow'ebi'etaago byange,

²⁶ayagala ennyo okubalaba, mwenna, eyeeraliikirira ennyo olw'obutabalaba, kubanga mwawulira nga yalwala.

²⁷Ddala yalwala era yali kumpi n'okufa. Kyokka Katonda yamusasira, naye era teysaasira ye yekka, wabula nange yansasira ennaku n'eteenneyongera.

²⁸Noolwekyo nayagala nnyo okumutuma gye muli mulyoke musanyuke okumulaba nate, ekyo kikendeeze ku nnaku gye nnina.

²⁹Kale mumwanirize nnyo n'essanyu lyonna mu Mukama waffe, era abantu abali ng'oyo mubassangamu ekitiibwa,

³⁰kubanga yabulako katono okufa ng'ali ku mulimu gwa Kristo, ng'akola ebyo bye mwandinkoledde singa mwali nange.

Abafiripi 3

Obutuukirivu obwa Nnama ddala

¹Ebisigaddeyo, baganda bange, musanyukirenga mu Mukama waffe. Okuddamu ebyo bye nnabawandiikira edda tekunkooya kubanga kyongera kubanyweza.

²Mwekuumenga embwa, era mwekuumenga ab'empisa embi, era mwekuumenga abakomola omubiri.

³Kubanga ffe bakomole, abasinza Katonda ng'Omwoyo bw'atuluŋŋamya, era twenyumiririza mu Kristo Yesu so tetwesiga mubiri.

⁴Ne bwe kwandibadde okwesiga omubiri, omuntu omulala yenna bw'alowooza okuba n'obwesige mu mubiri, nze musinga.

⁵Kubanga nze nakomolebwa ku lunaku olw'omunaana. Ndi Muyisirayiri, ow'omu kika kya Benyamini, Omwebbulaniya wawu, era mu mateeka ndi Mufalisaayo,

⁶eyanyiikira okuyigganya ekkanisa, eyali omutuukirivu mu mateeka, nga siriiko kya kunenyezebwa.

⁷ Naye ebyo byonna ebyali omugabo gye ndi, nabiraba nga butalimu.

⁸Naye okusinga byonna, byonna mbiraba ng'okufirwa, kubanga okutegeera Kristo Yesu Mukama wange, kusinga ebirala byonna. Olwa Kristo nafirwa ebintu byonna, era mbiraba ng'ebisasiro, ndyoke ngobolole Kristo,

⁹ndabikire mu ye nga sirina butuukirivu bwange ku bwange obuva mu kukwata amateeka, wabula nga nnina obutuukirivu obuva mu kukkiriza Kristo, era obuva eri Katonda obwesigamye ku kukkiriza.

¹⁰Njagala okussa ekimu mu bibonoobono bye, nga mmufaanana mu kufa kwe, mmumanye era ntegeere amaanyi g'okuzuukira kwe,

¹¹nga nsuubira nga nange ndizuukira.

¹² Sigamba nti mmaze okufuna oba nti mmaze okutuukirira, wabula nfuba okufuna ekyo Kristo Yesu kye yagenderera nfune.

¹³Abooluganda, mmanyi nti sinnakifuna, naye kye nkola kwe kwerabira ebyo ebiri emabega ne nduubirira ebyo ebiri mu maaso.

¹⁴Nduubirira okutuuka awawakanirwa awali empeera ey'okuyita kwa Katonda okwa waggulu mu Kristo Yesu.

¹⁵ Noolwekyo ffe ffenna abatuukiridde ekyo kye tusaana okulowoozanga, naye obanga mulowooza bulala, na kino Katonda alikibabikkulira.

¹⁶Naye ka tunywerere ku ekyo kye tutuuseeko.

¹⁷ Kale, abooluganda, mwegatte n'abo abangoberera era mugobererenga abo abatambulira mu ebyo bye twabalaga.

¹⁸Ekyo newaakubadde nkibabuulidde emirundi emingi, nkiddamu nga nkaaba n'amaziga, nti waliwo abalabe b'omusaalaba gwa Kristo,

¹⁹era ekibalindiridde kwe kuzikirira, kubanga okulya kubafuukidde katonda waabwe, ebyo ebyandibakwasizza ensonyi kye kitiiwba kyabwe era balowooza bintu bya mu nsi.

²⁰Kyokka ffe obutaka bwaffe buli mu ggulu, era Omulokozi, Mukama waffe Yesu Kristo, gye tumulindirira okuva.

²¹Kale bw'aliija emibri gyaffe gino eminatu egifa aligifuula ng'ogugwe ogw'ekitiibwa, ng'akozesa amaanyi okussa ebintu byonna mu buyinza bwe.

Abafiripi 4

Okuyigiriza

¹Kale, baganda bange abaagalwa, era be nnumirirwa omwoyo, mmwe ssanyu lyange era mmwe ngule yange; noolwekyo abaagalwa, muyimirire mu Mukama waffe.

²Ewudiya ne Sintuke mbeegayirira mukkiriziganye mu Mukama waffe.

³Era ggwe mukozi munnange, nkusaba oyambenga abakazi abo, kubanga baakolera wamu nange omulimu gw'okubunyisa Enjiri. Abo awamu ne Kerementi, era ne bakozi bannange abalala, amannya gaabwe gawandiikkidwa mu kitabo ky'obulamu.

⁴Musanyukirenga mu Mukama waffe bulijjo. Nziramu okubagamba nti musanyukenga.

⁵Era mubeere n'okuzibiikiriza eriabantu bonna. Mukama waffe, ali kumpi.

⁶Temweraliikiriranga kintu na kimu, wabula mu buli kintu mu kusabanga ne mu kwegayiriranga awamu n'okwebazanga, mutegeezenga Katonda bye mwetaaga.

⁷N'emirembe gya Katonda, egisukkiridde okutegeera kwammwe ginaabakuumanga amagezi gammwe n'emitima gyammwe mu Kristo Yesu.

⁸Eky'enkomerero, abooluganda, mulowoozenga ku buli kya mazima, na buli ekisiimibwa na buli kya butuukirivu, na buli kirongoofu, na buli kyagalibwa, na buli kyogerwako obulungi, era bwe wabangawo ekirungi oba bwe wabangawo ettendo, ebyo mubirowoozengako.

⁹Ebyo bye mwayiga, n'ebyo bye mwafuna ne muwulira, ebyo mubirowoozengako.

Okwebaza

¹⁰Nasanyuka nnyo mu Mukama waffe, kubanga kaakano oluvannyuma lw'ebbangwa muzzeemu okundowoozaako buggya, kubanga mwali munzisaako nnyo omwoyo, naye temwalina mukisa ku kiraga.

¹¹Soogera kino olwokubanga Ndiko kye nneetaaga, kubanga mu buli mbeera gye mbaamu nayiga okumalibwanga.

¹²Mmanyi okubeera nga sirina kantu, era mmanyi okuba nga nnina buli kimu. Mu buli ngeri ne mu bintu byonna nayiga ekyama ekiri mu kukkusibwa ne mu kuba omuyala, mu kuba n'ebingi ne mu bwetaavu.

¹³Nnyinza okukola byonna mu oyo ampa amaanyi.

¹⁴Kyokka mukola bulungi okulumirirwa awamu nange mu kubonaabona kwange.

¹⁵Mmwe, Abafiripi, mumanyi nti bwe nava e Makedoniya nga nakatandika okubuulira Enjiri, tewali Kkanisa n'emu eyampaayo akantu olw'ebyo bye yafuna okuggyako mmwe mwekka.

¹⁶Kubanga ddala ddala bwe nnali mu Sessaloniika mwampeereza emirundi ebiri.

¹⁷Soogera kino lwa kubanga njagala okufuna ekirabo, wabula kye njagala kwe kulaba ng'ekibala kyeyongera ku lwammwe.

¹⁸Naye kaakano nfunye bingi okusinga bye neetaaga, kino kisinzidde mu ebyo bye mwampeereza, Epafuladito bye yandeetera. Biri ng'akaloosa akalungi ennyo aka ssaddaaka esanyusa era esiimibwa Katonda.

¹⁹Kale ne Katonda wange alibawa buli kye mwetaaga ng'obugagga bwe obungi obuli mu Kristo Yesu bwe buli.

²⁰Katonda Kitaffe aweebwenga ekitiibwa emirembe n'emirembe. Amiina.

²¹Munnamusize buli mutukuvu mu Kristo Yesu; era n'abooluganda abali wano nange babalamusizza.

²²Era n'abatukuvu bona babatumidde, naye okusingira ddala abo abali mu lubiri lwa Kayisaali.

²³Ekisa kya Mukama waffe Yesu Kristo kibeerenga nammwe. Amiina.

Abakkolosaayi

Abakkolosaayi 1

Okwebaza n'okusaba

¹ Nze Pawulo, omutume wa Kristo Yesu olw'okwagala kwa Katonda, wamu ne Timoseewo owooluganda,

² tuwandiikira abantu ba Katonda, abatukuvu era abooluganda abeesigwa mu Kristo ab'e Kkolosaayi, nti ekisa n'emirembe ebiva eri Katonda Kitaffe bibeerenga nammwe.

³ Buli bwe tubasabira, twebaza Katonda, Kitaawe wa Mukama waffe Yesu Kristo.

⁴ Twawulira okukkiriza kwe mulina mu Kristo Yesu, n'okwagala kwe mulina eri abantu ba Katonda bona, abatukuvu,

⁵ olw'essuubi eryabategekerwa mu ggulu, lye mwawulirako mu kigambo eky'amazima, ye Enjiri.

⁶ Enjiri yajja gye muli, era ebunye mu nsi yonna ng'ebala ebibala era nga yeeyongera okukula. Okuvira ddala lwe mwasooka okugiwulira, ne mutegeerera ddala amazima agali mu kisa kya Katonda, Enjiri ebadde yeeyongera okubuna mu mmwe.

⁷ Epafula muddu munaffa omwagalwa omuweereza wa Kristo omwesigwa gye muli, eyabatuusaako Enjiri eyo,

⁸ ye yatubuulira okwagala kwe mulina mu Mwoyo.

⁹ Noolwekyo, okuvira ddala ku lunaku lwe twawulira ebibafaako, tetulekangayo kubasabira na kubeegayiririra mujjuzibwe okumanya Katonda by'ayagala mu magezi gonna ne mu kutegeera okw'omwoyo.

¹⁰ Era tweyongera okubasabira, mutambulenga nga musiimibwa Mukama era nga mumusanyusa mu buli byonna bye mukola, era nga mubala ebibala mu buli mulimu omulungi, era nga mukula mu kutegeera Katonda.

¹¹ Amaanyi ag'ekitiibwa kye, galibafuula abagumiikiriza mu buli nsonga yonna, mulyoke musanyuke,

¹² nga mwebaza Kitaffe eyatusaanyiza okugabana ku birungi bye yategekera abantu be abatukuvu ab'obwakabaka obw'ekitangaala.

¹³ Katonda eyatuwonya n'atuggya mu maanyi g'ekizikiza aga Setaani, n'atutwala mu bwakabaka bw'Omwana we omwagalwa,

¹⁴ atusonyiwa ebibi byaffe, n'atufuula ba ddembe.

Obulamu bwa Kristo

¹⁵ Mu ye mwe tulabira Katonda oyo atalabika, era ye yasooka okubeerawo nga byonna tebinnabaawo.

¹⁶ Mu ye ebintu byonna mwe byatondebwa mu ggulu ne ku nsi, ebirabika n'ebitalabika oba ntebe za bwakabaka oba bwami, oba bafuzi oba ab'obuyinza; ebintu byonna byatondebwa nga biyita mu ye era ku lulwe.

¹⁷ Kristo yaliwo nga byonna tebinnabaawo, era mu ye ebintu byonna mwe binywezebwa.

¹⁸ Ye gwe mutwe gw'omubiri, n'omubiri ogwo ye Kkanisa. Ye mubereberye, era ye yasooka okuzuukira mu bafu, alyoke abeerenga omubereberye mu byonna.

¹⁹ Katonda yasiima okutuukiriza byonna mu ye,

²⁰ era mu ye ebintu byonna bitabaganyizibwa gy'ali. Yaleetawo emirembe olw'omusaayi gwe, ogwayika ku musaalaba, alyoke atabaganye eby'ensi n'ebi'omu ggulu.

²¹ Edda temwali kumpi ne Katonda, era ebirowoozo byammwe n'ebikolwa byammwe ebibi bye byabalabisa ng'abakyawa Katonda.

²² Naye kaakano mutabaganye ne Kristo olw'okufa kwe, abanjuleyo mu maaso ga Katonda nga muli batukuvu era abataliiko bbala wadde ekyokunenyezebwa.

²³ Muteekwa okubeerera ddala mu kukkiriza nga munyweddde era nga temusagaasagana okuva mu ssuubi ery'Enjiri gye mwawulira, eyabuulirwa abantu bona abali ku nsi, nze Pawulo gye nafuukira omuweereza waayo.

Okufuba kwa Pawulo ku Iw'Ekklesia

²⁴ Kaakano nsanyuka olw'okubonaabona kwe mbonaabona ku lwammwe. Era kindeetera essanyu, kubanga ntuukiriza okubonaabona kwa Kristo mu mubiri gwange, nga mbonaabona ku lw'omubiri gwe, ye Kkanisa.

²⁵ Katonda yateekateeka okunfuula omuweereza w'Ekklesia ye ku lwammwe, ndyoke mbabuulire ekigambo kya Katonda mu bujjuvu.

²⁶ Ekyama ekyakwekebwa okuva edda n'edda lyonna, n'emirembe n'emirembe, kaakano kibikkuliddwa abantu be, be batukuvu be.

²⁷ Katonda bw'atyo bwe yasiima, alyoke amanyise Abaamawanga obugagga obw'ekitiibwa ky'ekyama ekkyo. Ekyama ekkyo ye Kristo abeera mu mmwe, era ly'essuubi ery'ekitiibwa.

²⁸ Kristo oyo gwe tutegeeza nga tuyigiriza buli muntu mu magezi gonna era nga tulabula buli omu, tulyoke twanjule buli muntu eri Katonda ng'atuukiridde mu Kristo.

²⁹ Kyenva ntegana nga nfuba nga nkokesa obuyinza Katonda bw'ampa obw'amaanyi.

Abakkolosaayi 2

¹ Njagala mumanye nga bwe nfuba ennyo okubasabira mmwe n'ab'omu Lawodikiya, era n'abo abatandabangako mu mubiri.

² Ekyo nkikola mbazzeemu amaanyi era bagattibwe wamu mu kwagalana, ne mu kutegeerera ddala obugagga bwonna obuli mu kumanya ekyama kya Katonda, ye Kristo.

³ Mu Kristo mwe mukwekedwa eby'obugagga byonna eby'amagezi n'okumanya.

⁴ Ebyo mbibategeeza waleme kubaawo n'omu ababuzaabuza.

⁵ Kubanga wadde siri wamu nammwe mu mubiri, naye mu mwoyo ndi wamu nammwe, era nsanyuka okumanya nti mutambula nga bwe muteekwa okutambula mu Kristo era nti n'okukkiriza kwammwe mu Kristo kunywevu.

Obulamu obujjuvu mu Kristo

⁶ Nga bwe mwaweebwa Kristo Yesu Mukama waffe, mutambulirenga mu ye,

⁷ nga musimbibwa era nga mukuzibwa mu ye, era nga munywezebwa mu kukkiriza nga bwe mwayigirizibwa, nga mujjudde okwebazanga.

⁸ Mwekuumenga walemenga kubaawo n'omu ku mmwe abuzibwabuzibwa mu bufirosofo ne mu by'obulimba ebitaliimu, okugobereranga obulombolombo obw'abantu n'ebiyigirizibwa abantu. Munywererenga ku biyigirizibwa ku Kristo.

⁹ Kubanga mu Kristo okutuukiriza kwonna okw'Obwakabaka mwe kulabikira mu mubiri,

¹⁰ era mmwe nga muli mu ye, mwatuukirira mu ye, oyo Kristo omutwe gw'obufuzi bwonna n'obuyinza bwonna.

¹¹ Mu ye mwakomolebwa, bwe mwaggibwako okwegomba kw'omubiri, naye si okukomolebwa okw'engalo z'abantu, wabula mu kukomolebwa okwa Kristo.

¹² Bwe mwabatizibwa, mwaziikibwa wamu naye, ate ne muzuukizibwa wamu naye olw'okukkiriza kwammwe mu maanyi ga Katonda eyamuzuukiza mu bafu.

¹³ Mwali mufudde olw'ebyonoono byammwe ne mu butakomolebwa bwammwe obw'okwegomba kw'omubiri. Katonda n'abafuula balamu wamu ne Kristo, ffenna bwe yatusonyiwa ebyonoono byaffe byonna.

¹⁴ Bwe yasazaamu era n'aggyawo ebiragiro ebyawandiikibwa mu mateeka ebyatwolekeranga, n'abikomerera ku musaalaba,

¹⁵n'aggya ebyokulwanyisa ebyo ku bafuzi n'ab'obuyinza ab'omu bbanga, n'abaswaza mu lwatu, n'abawangulira ddala.

¹⁶ Noolwekyo waleme kubaawo muntu n'omu abasalira musango ku bye mulya ne bye munywa, oba okubasalira omusango olw'embaga z'Ekiyudaaya oba ez'omwezi ogubonese wadde olwa Ssabbiiti.

¹⁷ Kubanga ebyo kisikirize eky'ebyo ebyali bigenda okujja, naye ekirimu ensa ye Kristo.

¹⁸ Omuntu yenna tabalimbalmanga n'abanyagako ekirabo kye mwaweebwa, nga yeesigama ku kwewombeeka okw'obulimba n'okuwa bamalayika ekitiibwa ekingi, ng'anywerera mu bintu bye yalaba, nga yeenyumiririza mu butaliimu obw'amagezi ag'omubiri gwe.

¹⁹ Ab'engeri eyo baba tebakyalu mu Kristo, omutwe gw'omubiri gwonna. Omubiri ogwo gugattibwa mu nnyingo ne mu binywa era ne gugattibwa wamu nga gukula, Katonda nga y'agukuza.

²⁰ Obanga mwafiira wamu ne Kristo ne musumululwa okuva mu magezi ag'ebintu ebyangu eby'ensi, lwaki mufugibwa ebiragiro ng'ab'omu nsi?

²¹ Bino bye bimu ku biragiro ab'omu nsi bye bawa: Tolya kino, tokwata ku kiri oba nti tokomba ku kino.

²² Ebyo byonna ku nkomerero biriggwaawo kubanga biriba tebikyalina mugaso.

²³ Birabika ng'eb'yamagezi mu ngeri ey'okusinza, abantu gye beegunjirawo bokka mu kwewombeeka ne mu kubonyaabonya omubiri, songa tebiriiko kye bigasa n'akatono mu kufuga okwegomba kw'omubiri.

Abakkolosaayi 3

Ebiragiro ku Butukuvu

¹ Nga bwe mwazuukirira awamu ne Kristo, munoonyenga ebintu ebiri mu ggulu, Kristo gy'atudde ku mukono ogwa ddyo ogwa Katonda.

² Mulowoozenga ku ebyo ebiri mu ggulu, so si ebiri ku nsi,

³ kubanga mwafa era n'obulamu bwammwe bukwekedwa mu Kristo mu Katonda.

⁴ Kristo atuwa obulamu, bw'alirabisibwa, nammwe ne mulyoka mulabisibwa wamu naye mu kitibwa.

Obulamu obw'Edda n'Obulamu Obuggya

⁵ Noolwekyo temufugibwa bikolwa byammwe eby'omubiri, byonna mubitte. Gamba nga: obwenzi, n'obutali bulongoofu, n'obukaba, n'okwegomba okw'ensonyi, n'okuyaayaana; kye kimu n'okusinza bakatonda abalala.

⁶ Kubanga obusungu bwa Katonda bubuubuukira ku baana ab'obujeemu abakola ebintu ebyo,

⁷ ate nga nammwe edda mwe mwatambuliranga, bwe mwabikolanga.

⁸ Naye kaakano mweyambulemu ebintu ebyo byonna; obusungu, n'ekiruyi, n'ettima, n'okuvvoola, n'okunyumya emboozи ey'ensonyi.

⁹ Temulimbagananga kubanga mweyambulako omuntu ow'edda n'ebikolwa bye,

¹⁰ ne mwambazibwa omuntu omuggya, nga mufuulibwa abagga mu kifaananyi ky'oyo eyamutonda, ate ne mu kweyongera okumutegeera.

¹¹ Olwo tewaba kwawulamu, Muyonaani na Muyudaaya, eyakomolebwa n'ataakomolebwa, Omunnaggwanga, n'Omusukusi, omuddu n'ow'eddeme, wabula Kristo ye byonna, era abeera mu ffe ffenna.

¹² Ng'abalonde ba Katonda abatukuvu era abaagalwa, mwambalenga omwoyo ogusaasira, n'ekisa, n'obuwombeefu, n'obuteefu, n'obugumiikiriza.

¹³ Bwe wabangawo omuntu yenna alina ensonga ku munne, muzibiikirizaganenga, era musonyiwaganenga. Nga Mukama waffe bwe yabasonyiwa era nammwe musonyiwaganenga.

¹⁴ Okwagala kwe kusinga ebintu ebirala byonna, kubanga kwe kunyweza ebintu byonna.

¹⁵ N'emirembe gya Kristo gifugenga emitima gyammwe, kubanga emirembe egyo gye mwayitirwa mu mubiri ogumu; era mwebazenga.

Amateeka g'omu Nnyumba z'Abakristaayo

¹⁶ Ekigambo kya Kristo mu bugagga bwakyo kibeerenga mu mmwe, mu magezi gonna nga tuyigirizagananga era nga mubuuliragananga mwekka na mwekka mu Zabbuli, ne mu nnyimba, ne mu biyiiye eby'omwoyo nga tuyimbira Katonda nga mujjudde ekisa mu mitima gyammwe.

¹⁷ Na buli kye munaakolanga mu kigambo oba mu kikolwa, byonna mubikolenga mu linnya lya Mukama waffe Yesu nga tuyita mu ye okwebaza Katonda Kitaffe.

¹⁸ Abakazi, muwulirenga babbammwe kubanga ekyo kye kituufu mu Mukama waffe.

¹⁹ Nammwe abaami mwagalenga bakyala bammwe era mubakwasenga kisa so si bukambwe.

²⁰Abaana, muwulirenga bazadde bammwe mu bintu byonna kubanga ekyo ky'ekisanyusa Katonda.

²¹Nammwe bakitaabwe temunyiizanga baana bammwe baleme okuddirira mu mwoyo.

²²Abaddu, muwulirenga bakama bammwe ab'omu nsi mu bintu byonna, si kubasanyusa lwa kubanga babalaba, naye mubagonderenga n'omutima ogutaliimu bukuusa, nga mutya Mukama waffe.

²³Buli kye mukola mukikole ng'abakolera Mukama waffe so si abantu,

²⁴nga mumanyi nga mulifuna empeera yammwe ey'omugabo gwammwe okuva eri Mukama waffe. Muweerezenga Mukama Kristo;

²⁵kubanga ayonoona, alisasulwa olw'ebikolwa bye, so tewaliba kusosola mu bantu.

Abakkolosaayi 4

Ebiragiro Ebirala

¹Mmwe bakama b'abaddu, mubenga benkanya eri abaddu bammwe nga mumanyi nti nammwe mulina Mukama wammwe mu ggulu.

²Munyiikirirenga mu kusaba, nga temuddirira, wabula nga mwebazanga

³nga mwenna awamu mutusabira Katonda atuggulirewo oluggi okubuulira Enjiri, n'okutegeeza ekyama kya Kristo, kye nasibirwa.

⁴Ndyoke njolesenga ekyama ekyo nga bwe kiijwanidde okukyogerako.

⁵Abo abatannakkiriza mutambulenga nabo n'amagezi, nga mukoza bulungi ebiseera bye mulina.

⁶Enjogera yammwe ebeerenga ya kisa, era ng'enoga omunnyo, mulyoke mumanye eky'okwanukulanga buli muntu yenna.

⁷Tukiko owooluganda omwagalwa era omuweereza omwesigwa era muddu munnafe mu Mukama waffe alibategeeza ebinaako byonna.

⁸Kyenva mmutuma gye muli mulyoke mumanye ebitufaako, era abazzeemu n'amaanyi,

⁹awamu ne Onesimo owooluganda omwagalwa era omwesigwa, omu ku b'ewammwe; balibategeeza byonna ebifa eno.

¹⁰Alisutaluuko, musibe munnange, ne Makko omujjwa wa Balunabba, gwe baabagambako nti bw'aliba ng'aze gye muli mumusebezanga, babatumidde;

¹¹ne Yesu ayitibwa Yusito abalamusizza. Abo be Bayudaaya, bakozi bannange bokka mu bwakabaka bwa Katonda, abaanzizaamu amaanyi.

¹²Epafula ow'ewammwe, omuddu wa Kristo Yesu, afuba bulijjo ku lwammwe okubasabira, mulyoke muyimirenga nga munyweddde mu kukkiriza era nga mutegeereranga ddala mu byonna Katonda by'ayagala, abalamusizza.

¹³Kubanga mmuweera obujulirwa, nga bw'afuba ennyo ku lwammwe, n'ab'omu Lawodikiya, n'ab'omu Kiyerapoli.

¹⁴Lukka, omusawo omwagalwa ne Dema, babalamusizza.

¹⁵Mulamuse abooluganda ab'omu Lawodikiya, ne Nunfa, n'ekkanisa ekuñjaanira mu nnyumba ye.

¹⁶Ebbaluwa eno bw'emalanga okusomebwa mu mmwe, mulabe nti esomerwa n'ab'ekkanisa y'omu Lawodikiya, era nammwe musome ebbaluwa eriva e Lawodikiya.

¹⁷Era mugambe Alukipo nti, "Ssaayo omwoyo ku kuweereza kwe waweebwa mu Mukama waffe, okutuukirize."

¹⁸Nze Pawulo nzennyini nze mpandiise okulamusa kuno. Munzijukirenga mu busibe bwange. Ekisa kibeerenga nammwe.

1 Basessaloniika

1 Basessaloniika 1

¹ Nze Pawulo ne Sirwano ne Timoseewo, tuwandiikira Ekkanisa ey'Abasessaloniika, abantu ba Katonda Kitaffe ne Mukama waffe Yesu Kristo, ekisa n'emirembe bibeerenga gye muli.

Okwebaza olw'okukkiriza kw'Abasessaloniika

² Bulijjo twebaza Katonda ku lwammwe mwenna era tubasabira obutayosa,

³ nga tujjukira omulimu gwammwe ogw'okukkiriza, n'okufuba okw'okwagala n'okugumiikiriza okw'essuubi mu Mukama waffe Yesu Kristo mu maaso ga Katonda era Kitaffe,

⁴ era nga tumanyi, nga mmwe abooluganda muli mikwano gya Katonda, baayagala ennyo, be yalonda.

⁵ Kubanga Enjiri yaffe teyajja gye muli mu kigambo kyokka, wabula ne mu maanyi, ne mu Mwoyo Omukuku, ne mu bukakafu obungi, era nga bwe mumanyi nga twabeeranga wakati mu mmwe ku lwammwe.

⁶ Nammwe mwagoberera Mukama waffe era ne mukola nga bwe twakolanga bwe mwakkiriza ekigambo wakati mu kubonaabona okungi nga mulina essanyu eriva mu Mwoyo Omukuku,

⁷ ne mubeera ekyokulabirako eri abakkiriza bona ab'omu Makedoniya ne Akaya.

⁸ Kubanga ekigambo kya Mukama kibunye okuva mu mmwe, si mu Makedoniya ne mu Akaya mwokka, naye ne mu buli kifo n'okukkiriza kwammwe eri Katonda kwabuna ne tutabaako kye tukwogerera.

⁹ Kubanga bo bennyini batubuulira engeri gye mwatwanirizaamu, ne bwe mwakyuka okuleka bakatonda abalala ne mudda eri Katonda omulamu era ow'amazima,

¹⁰ era ne bwe mulindiridde Omwana wa Katonda, okukomawo okuva mu ggulu, gwe yazuukiza okuva mu bafu, ye Yesu oyo yekka atulokola okutuwonya mu busungu bwa Katonda obugenda okujja.

1 Basessaloniika 2

Obuweereza bwa Pawulo mu Sessaloniika

¹ Mmwe bennyini, abooluganda abaagalwa, mumanyi ng'okujja kwaffe gye muli tekwafa busa.

²Mumanyi nga bwe twabonaabonera e Firipi, n'okuyisibwa obubi kyokka ne tugumira mu Katonda waffe ne tubategeeza Enjiri ya Katonda nga tuli mu kuwakanyizibwa okungi.

³Kubanga okubuulirira kwaffe tekwali kwa bulimba so tekwali kwa bugwenyufu, wadde okw'obukuusa,

⁴naye nga bwe twasaanyizibwa Katonda n'atwesiga n'Enjiri, bwe twogera bwe tutyo, si ng'abaagala okusanyusa abantu, wabula tusiimibwe Katonda, oyo akebera ebirowoozo by'emitima gyaffe.

⁵Tetugezangako kubawangula na bigambo biwaaniriza nga nammwe bwe mumanyi, wadde okuba ab'omululu era Katonda akimanyi,

⁶newaakubadde okunoonyaamu ekitiibwa, newaakubadde okuva eri mmwe wadde abantu abalala,

⁷tulyoke tulabike ng'abatume ba Kristo ab'amaanyi. Naye twefuula ng'abaana abato mu maaso gammwe, nga nnyina w'abaana bwe yandyagadde abaana be,

⁸bwe tutyo bwe twabalumirwa omwoyo ne tusanyuka okubatuusaako si Enjiri ya Katonda yokka naye n'okuwaayo emyoyo gyaffe ffe, kubanga mwafuuka baagalwa baffe.

⁹Abooluganda mujjukire okufuba kwaffe n'okutegana kwaffe; bwe twakolanga emisana n'ekiro tuleme okubazitoowerera, nga tubabuulira Enjiri ya Katonda.

¹⁰Mmwe muli bajulirwa baffe, era ne Katonda akimanyi, nga twali bakkiriza ddala era abatuukirivu abataaliko kya kunenyezebw, abeeweerayo ddala bwe twali mu mmwe,

¹¹nga bwe mumanyi nga twali kitaawe wa buli omu ku mmwe nga kitaawe w'abaana bw'abeera eri abaana be,

¹²nga tubabuulirira era nga tubagumya mu mwoyo era nga tubaweerako obujulirwa, ne tubakuutira okutambulanga nga musaanira mu maaso ga Katonda, oyo abayita okuyingira mu bwakabaka bwe ye ne mu kitibwa kye.

¹³Naffe kyetuva twebaza Katonda obutayosa, kubanga bwe mwawulira ekigambo ekiva gye tuli, temwakiulira ng'ekiva eri abantu wabula ng'ekiva eri Katonda, nga ky'ekigambo kya Katonda kyennyini, ekikolera ne mu mmwe, abakkiriza.

¹⁴Nammwe, abooluganda abaagalwa, mwabonaabona ng'Ekklesia za Katonda eziri mu Buyudaaya mu Kristo Yesu, nga muyigganyizibwa abantu b'eggwanga lyammwe mmwe, nga nabo bwe baayigganyizibwa abantu b'eggwanga lyabwe Abayudaaya.

¹⁵Bwe baamala okutta bannabbi baabwe, ne batta ne Mukama waffe Yesu, era naffe baatuyigganya nnyo; tebaasanyusa Katonda era balabe b'abantu bona,

¹⁶era baatugaana okubuulira Abaamawanga olw'okutya nti bajja kulokoka, kale ebibi byabwe byeyongera bulijjo; ku nkomerero, obusungu bwa Katonda bubabuubukiddeko.

Pawulo okwagala okulaba Abasesaloniika

¹⁷Abooluganda bwe twabaawukanako nga wayiseewo akaseera akatono, wadde essaawa emu, so ng'emitima gyaffe gisigadde eyo, twegomba nnyo okukomawo twongere okubalabako.

¹⁸Twayagala nnyo okudda gye muli, na ddala nze, Pawulo; nagezaako emirundi n'emirundi, naye Setaani n'atuziyiza.

¹⁹Kale Mukama waffe Yesu bw'alija, si mmwe mulibeera essuubi n'essanyu lyaffe, n'engule ey'okwenyumiriza kwaffe?

²⁰Kubanga mmwe kitibwa kyaffe era essanyu lyaffe.

1 Basessaloniika 3

¹Oluvannyuma nga tetukyayinza kugumiikiriza ne tusalawo okusigala ffekka mu Asene.

²Ne tutuma Timoseewo, muganda waffe era muweereza munnafe mu mulimu gwa Katonda, mu Njiri ya Kristo, abagumye era abanyweze mu kukkiriza kwammwe,

³waleme okubaawo n'omu aterebuka olw'okuyigganyizibwa kwe mwalimu. Mmwe mwennyini mumanyi nti ekyo kye twayitirwa.

⁴Kubanga ne bwe twali tukyali nammwe twabategeeza nti tuli baakuyigganyizibwa era bwe kyali bwe kityo era mukimanyi.

⁵Ssaayinza kwongera kugumiikiriza kyennava ntuma Timoseewo ajje alabe obanga okukkiriza kwammwe kukyali kunywevu, si kulwa nga mukemebwa omukemi, ne tuba nga twateganira bwereere.

Lipoota ya Timoseewo ezzaamu amaanyi

⁶Naye kaakano Timoseewo bw'akomyewo ng'ava gye muli atuleetedde amawulire amalungi ag'okukkiriza kwammwe n'okwagala kwammwe, era nga mutujukira bulungi bulijjo, nga mwesunga okutulabako nga naffe bwe twesunga okubalabako.

⁷Noolwekyo abaagalwa, newaakubadde nga tuli mu buzibu ne mu kubonaabona, okukkiriza kwammwe kutazaamu amaanyi.

⁸Kubanga bwe muba abanywevu mu Mukama waffe, naffe tuba balamu.

⁹Kale Katonda tumwebaze tutya olw'essanyu eritujjudde ku lwammwe olw'essanyu lye tulina ku lwammwe mu maaso ga Katonda waffe?

¹⁰Katonda tumwegayirira nnyo nnyini emisana n'ekiro, atukkirize okubalabako tujjuulirize ebyo ebikyabolako mu kukkiriza kwammwe.

¹¹Katonda Kitaffe yennyini ne Mukama waffe Yesu alunjamye ekkubo lyaffe okujja gye muli.

¹²Mukama waffe aboongereko okwagala kwammwe, mwaganenga mwekka na mwekka era mwagalenga nnyo abantu bona, nga naffe bwe tubaagala,

¹³alyoke anyweze emitima gyammwe nga temuliiko kya kunenyezebwu mu butukuvu mu maaso ga Katonda Kitaffe, Mukama waffe Yesu Kristo bw'alikomawo n'abatukuvu be bona.

1 Basessaloniika 4

Obulamu obusanyusa Katonda

¹Noolwekyo abooluganda, ekisembayo, tubeegayirira nga tubazzaamu amaanyi mu Mukama waffe Yesu, nti nga bwe twababuulirira bwe kibagwanira okutambula n'okusanyusa Katonda, era nga bwe mukola bwe mutyo, mugende mu maaso okukolanga bwe mutyo n'okusingawo.

²Kubanga mumanyi ebiragiro bye twabawa mu Mukama waffe Yesu.

³Kubanga Katonda ayagala mutukuzibwe, era mwewalenga obwenzi,

⁴buli omu ku mmwe amanyenga okufuga omubiri gwe mu butukuvu n'ekitiibwa,

⁵so si mu kwegomba okw'obukaba ng'abamawanga abatamanyi Katonda bwe bakola.

⁶Mu nsonga eyo walemenga okubaawo ayingirira muganda we, newakubadde amusobyako, kubanga Mukama yawoolera eggwanga mu nsonga zino. Ebintu bino byonna twabibagamba dda era ne tubawa n'obujulirwa.

⁷Kubanga Katonda teyatuyitira bugwenyufu wabula yatuyitira kutukuzibwa.

⁸Noolwekyo anyooma bino aba tanyoomye muntu wabula Katonda, atuwa Omwoyo we Omutukuvu.

⁹Kaakano ku bikwata ku kwagalana kw'abooluganda sseetaaga kubibawandiikirako, kubanga mmwe mwennyini mwayigirizibwa Katonda okwagananga.

¹⁰Kubanga ddala bwe mutyo bwe mwagala abooluganda bona ab'omu Makedoniya, naye era abooluganda, tubakuutira mweyongere okubaagalanga.

¹¹Mubeerenga bakkakkamu, nga temweyingiza mu by'abalala, era mukolenga emirimu gyammwe nga bwe twabakutira,

¹²mutambule nga mwegendereza eri abatakkiriza, mube nga mwemalirira mu buli nsonga.

Okujja kwa Mukama waffe

¹³Kaakano, abooluganda tetwagala mmwe obutategeera eby'abo abafu, ne munakuwala ng'abalala abatalina ssuubi.

¹⁴Kubanga bwe tukkiriza nti Yesu yafa era n'azuukira mu bafu bwe tutyo tukkiriza nti Katonda alikomyawo wamu naye abo abaafira mu Yesu.

¹⁵Kubanga ekkyo kye tubategeeza mu kigambo kya Mukama waffe, nga ffe abalamu, abaasigalawo okutuusa okujja kwa Mukama waffe tetulisooka abaafa.

¹⁶Kubanga Mukama waffe yennyini alikka okuva mu ggulu n'eddoboozi ery'omwanguka, eddoboozi lya malayika omukulu nga liwulirwa, n'ekkondeere lya Katonda, n'abo abaafiira mu Kristo be balisooka okuzuukira,

¹⁷naffe abalamu abaasigalawo ne tulyoka tubeegattako, ne tusitulibwa mu bire okusisinkana Mukama waffe mu bbanga; bwe tutyo tunaabeeranga ne Mukama waffe ennaku zonna.

¹⁸Kale buli omu agumyenga munne n'ebigambo ebyo.

1 Basessalonika 5

¹Naye ku bikwata ku by'entuuko n'ebiro, abooluganda, ssetaaga kwongera kubawandiikira.

²Kubanga mmwe mwennyini mumanyi bulungi nti olunaku lwa Mukama waffe lulijja ng'omubbi bw'ajja ekiro.

³Abantu balirowooza mu mitima gyabwe nti, "Tulina emirembe era tulina obukuumi," amangwango okuzikirira ne kulyoka kubajjira, ng'okulumwa bwe kujjira omukazi agenda okuzaala omwana; ne batawona n'akatono.

⁴Naye mmwe, abooluganda abaagalwa temuli mu kizikiza ku nsonga zino, era temugenda kwekanga lunaku olwo ng'abayingiriddwa omubbi;

⁵Kubanga mmwe mwenna muli baana ba musana era baana ba butangaavu. Tetuli ba kiro yadde ab'ekizikiza.

⁶Noolwekyo tuleme kwebaka ng'abalala naye tutunulenga okwegomba kuleme okutufuga.

⁷Kubanga abeebaka beebaka kiro, n'abatamiira batamiira kiro.

⁸Naye ffe, kubanga tuli ba musana, tulemenga okutamiira. Twambale okukkiriza n'okwagala ng'ekyomu kifuba, era tube n'essuubi ery'obulokozi nga ye nkufiira yaffe.

⁹Kubanga ffe Katonda teyatulondera kufukibwako kiruyi kya busungu, wabula okutulokola ng'ayita mu Mukama waffe Yesu Kristo,

¹⁰eyatufiirira ka tube nga tuli balamu oba nga tufudde, tulyoke tubeere balamu wamu naye.

¹¹Kale mugumyaganenga era muzimbaganenga nga bwe mubadde mukola.

Ebiragiro Ebisembayo

¹²Kaakano tubeegayirira abooluganda, mumanye abafuba okukola emirimu mu mmwe era ababakulembra mu Mukama waffe era abababuulirira,

¹³mubassengamu nnyo ekitiibwa mu kwagala olw'omulimu gwabwe. Mubenga bantu ba mirembe.

¹⁴Tubakuutira abooluganda, mubuulirirenga abagayaavu, mugumyenga abo abalimu okutyta, muyambenga abatalina maanyi, mubenga bagumiikiriza eriabantu bona.

¹⁵Mulabenga nga mu mmwe temuli muntu asasula ekibi olw'ekibi, naye bulijo mukolenga obulungi buli muntu ne munne, era n'eri abantu bona.

¹⁶Musanyukenga ennaku zonna.

Musabenga

¹⁷Musabenga obutayosa.

¹⁸Mwebazenga olwa buli kintu kyonna, kubanga ekyo Katonda ky'abaagaliza mmwe abali mu Kristo Yesu.

¹⁹Temuzikizanga Mwoyo Mutukuvu,

²⁰era temunyoomanga abo aboogera eby'obunnabbi,

²¹naye mwekenneenyenga ebintu byonna, kale bwe bibanga ebirungi mubinywezenga.

²²Mewewalenga buli ngeri ya kibi.

²³Katonda ow'emirembe abatukulize ddala, era omwoyo gwammwe gwonna, n'emmeeme yammwe n'omubiri gwammwe, bikuumibwenga nga tebiriiko kya kunenyezebwba okutuusa ku lunaku olw'okujja kwa Mukama waffe Yesu Kristo.

²⁴Oyo eyabayita mwesigwa era alikitukiriza.

²⁵Abooluganda, naffe, mutusabirenga.

²⁶Mulamuse abooluganda bona mu kulamusa okutukuvu.

²⁷Mbalagira mu linnya lya Mukama waffe ebbaluwa eno mugisomere abooluganda bona.

²⁸Ekisa kya Mukama waffe Yesu Kristo kibeerenga nammwe.

2 Basessaloniika

2 Basessaloniika 1

¹Nze Pawulo ne Sirwano ne Timoseewo tuwandiikira Ekkansa ey'Abasessaloniika, abantu ba Katonda Kitaffe ne Mukama waffe Yesu Kristo,

²ekisa n'emirembe ebiva eri Katonda Kitaffe ne Mukama waffe Yesu Kristo, bibeerenga nammwe.

Okwebaza n'Okusaba

³Kitugwanidde okwebazanga Katonda bulijo ku lwammwe abooluganda, nga bwe kisaana, kubanga okukkiriza kwammwe kweyongedde nnyo okukula, awamu n'okwagalana kwammwe mwekka na mwekka,

⁴ekyo ne kituleetera ffe ffennyini okubeenyumiririzaamu mu kkanisa za Katonda olw'okugumiikiriza kwammwe n'okukkiriza kwammwe wakati mu kuyigganyizibwa kwammwe kwonna awamu n'okubonaabona bye mugumiikiriza.

⁵Ako kabonero akalaga nti Katonda mutuukirivu mu kulamula kwe, mmwe mulyoke musaanire obwakabaka bwa Katonda, bwe mubonaabonera,

⁶ate ng'abo ababanyigiriza alibalonereza nga bwe kibagwanidde.

⁷Era nammwe abanyigirizibwa muliweerwa wamu naffe ekiwummulo, mu kubikkulirwa kwa Mukama waffe Yesu bw'aliva mu ggulu, ne bamalayika be ab'amaanyi,

⁸mu muliro ogwaka, n'abonereza abo abatamanyi Katonda era abajeemera Enjiri ya Mukama waffe Yesu.

⁹Abo baliweebwa ekibonerezo kya kuzikirira emirembe n'emirembe, nga baawukanyiziddwa ne Mukama waffe, n'ekitiibwa ky'amaanyi ge.

¹⁰Bw'alija okugulumizibwa mu batukuvu be ku lunaku luli abo bona abamukkiriza balyewuunya kubanga mwakkiriza bye twabategeeza ku ye.

¹¹Kyetuva tubasabira bulijo, Katonda waffe abasaanyize okuyitibwa kwammwe. Abawe amaanyi mutuukirize ebirungi byonna bye mukola, na buli mulimu ogw'okukkiriza mu maanyi,

¹²erinnya lya Mukama waffe Yesu liryoke ligulumizibwe mu mmwe, nammwe muweebwe ekitiibwa mu ye, ng'ekisa kya Katonda waffe ne Mukama waffe Yesu Kristo bwe kiri.

2 Basessaloniika 2

Ebikolwa by'omulabe wa Kristo

¹ Kaakano abooluganda, ku by'okukomawo kwa Mukama waffe Yesu Kristo, era n'okukuŋyaanyizibwa okumusisinkana, tubasaba

²muleme okweraliikirira wadde emitima okubeewanika newaakubadde olw'omwoyo, newaakubadde olw'ekigambo wadde olw'ebbaluwa, ebirabika ng'ebivudde gye tuli, nga biranga nti olunaku lwa Mukama lutuuse.

³Omuntu yenna tabalimbanganga mu ngeri yonna; kubanga okuggyako ng'obujeemu busoose okujja, n'omuntu oli ow'obujeemu, omwana w'okuzikirira ng'amaze okulabisibwa,

⁴oyo alivvoola Katonda ne yeegulumiza okusinga ebintu byonna nga yeeyita katonda oba ekissibwamu ekitiibwa atuule mu yeekaalu ya Katonda omwo nga yeefuula okuba Katonda.

⁵Temujukira ng'ebyo nabibategeeza bwe nnali nammwe?

⁶Era ekikyamuziyizza mukimanyi kubanga tagenda kujja okutuusa ng'ekiseera kye kituuse.

⁷Kubanga ekyama ky'obujeemu kyatandika dda okukola, naye ye yennyini tagenda kujja okutuusa oyo amuziyiza lw'aliva mu kkubo.

⁸Olwo omuntu ow'obujeemu alyoke alabisibwe, Mukama waffe Yesu gw'alimalawo n'omukka ogw'omu kamwa ke n'amuzikiriza n'okulabisibwa kw'okujja kwe.

⁹Omuntu oyo alijjira mu maanyi ga Setaani gonna n'akola obubonero n'eby'amagero, eby'obulimba,

¹⁰era n'obulimba obwa buli ngeri obw'obutali butuukirivu eri abo abazikirizibwa, kubanga bagaana okukkiriza amazima okulokolebwa.

¹¹Katonda kyava abawaayo eri okubuzibwabuzibwa okw'amaanyi bakkirize eby'obulimba.

¹²Era bona balyoke basalirwe omusango olw'okukkiriza obulimba, ne bagaana amazima ne basanyukira okukola ebitali bya butuukirivu.

¹³Naye kitugwanidde okwebazanga Katonda ennaku zonna ku lwammwe, abooluganda abaagalwa mu Mukama waffe, kubanga Katonda yabalondera obulokozi okuva ku lubereberye, ng'abatuukuza olw'okukola kw'Omwoyo n'okukkiriza amazima,

¹⁴ge yabayitira ng'ayita mu Njiri yaffe mulyoke mufune ekitiibwa kya Mukama waffe Yesu Kristo.

¹⁵Noolwekyo abooluganda, munywererenga ku ebyo bye twabayigiriza mu bbaluwa zaffe oba mu bigambo byaffe.

¹⁶ Kale Mukama waffe Yesu Kristo yennyini, ne Katonda Kitaffe eyatwagala n'atuwa essanyu n'essuubi eddungi olw'ekisa kye,

¹⁷ abazzeemu amaanyi, era abanywezenga mu buli kye mukola ne mu buli kigambo ekirungi.

2 Basessaloniika 3

Okusabirwanga

¹ Abooluganda, eky'enkomerero, mutusabirenga, ekigambo kya Mukama kibune mangu era Mukama agulumizibwenga, nga bw'agulumizibwa mu mmwe,

² tulyoke tununulibwe okuva mu bakozi b'ebibi, kubanga si bona abakkiriza.

³ Naye Mukama waffe mwesigwa, alibanyweza mmwe era anaabawonyanya Setaani.

⁴ Era twesiga nga Mukama waffe, abakozesa ebyo bye twabayigiriza era nga munaabikolanga bulijo.

⁵ Mukama waffe alunjnamyenga emitima gyammwe mu kutegeera okwagala kwa Katonda, n'obugumiikiriza obuva eri Kristo.

Abalabula obutagayaalanga

⁶ Abooluganda abaagalwa, mbakuutira mu linnya lya Mukama waffe Yesu Kristo ne mu buyinza bwe, mwewalenga abagayaavu abatayagala kukola mirimu ne balemwa okugoberera ekyokulabirako kye twabateerawo.

⁷ Kubanga mmwe bennyini mumanyi bulungi bwe kibagwanira okutugobereranga ng'ekyokulabirako kyammwe, kubanga temwatulaba nga twegomba okulya ebyo bye tutakoleredde,

⁸ tettwakkiriza kulya mmere ya muntu yenna awatali kumusasula. Twafubanga nnyo ne tukoowa nga tukola emirimu emisana n'ekiro tulyoke tufunemu bye twetaaga okukozesa, era tuleme kuzitoowerera muntu n'omu ku mmwe.

⁹ Si kubanga tetwalina buyinza okubagamba mmwe okutuliisa, naye twayagala mutulabireko nga bwe kibagwanidde okukolanga.

¹⁰ Era ne bwe twali gye muli eyo, twabakuutira nti omuntu yenna bw'agaananga okukola emirimu, n'okulya talyanga.

¹¹ Kyokka tuwlira nti mu mmwe mulimu abagayaavu abatayagala kukola, aboonoona ebiseera byabwe mu kusaasaanya ejnjambo.

¹² Mu linnya lya Mukama waffe, tubeegayirira era tubakuutira abali bwe batyo, okukolanga emirimu n'obunyiikivu n'obuteefu balyoke balyenga ebyo bye bakoleredde.

¹³Naye mmwe temukoowanga kukola bulungi abooluganda abaagalwa.

¹⁴Era omuntu yenna bw'atagonderanga biragiro byaffe mu bbaluwa eno, oyo mumwetegereze, muleme kukolagananga naye, ensonyi ziryoke zimukwate.

¹⁵So temumuyisanga nga mulabe wammwe naye mumubuulirirenga ng'wooluganda eyetaaga okulabulwa.

Eky'enkomerero

¹⁶Kale Mukama nannyini mirembe abawenga emirembe mu byonna. Mukama abeerenga nammwe mwenna.

¹⁷Kuno kwe kulamusa kwange, nze Pawulo, mu mukono gwange, bwe ntyo bwe nkola ku nkomerero z'ebbaluwa zange zonna okulaga nti zivudde gye ndi. Bwe nti bwe mpandiika.

¹⁸Ekisa kya Mukama waffe Yesu Kristo kibeerenga nammwe mwenna.

1 Timoseewo

1 Timoseewo 1

Okulamusá

¹ Nze Pawulo, omutume wa Kristo Yesu, nga Katonda Omulokozi waffe ne Kristo Yesu essuubi lyaffe, bwe baalagira,

² nkuwandiikira ggwe Timoseewo, omwana wange ddala mu kukkiriza. Nkwagaliza ekisa n'okusaasira, n'emirembe, ebiva eri Katonda Kitaffe ne Yesu Kristo Mukama waffe.

Okwerinda Enjigiriza Enkyamu

³ Njagala osigale mu Efeso, nga bwe nakukuutira nga njenda e Makedoniya oziyize abantu baleme kuyigiriza njigiriza ndala.

⁴ Bagambe balekeraawo okwemalira ku nfumo, ne ku kulondoola enkalala empanvu ez'amannya g'abajajja. Ebyo byongera mpaka, mu kifo ky'okuyigiriza abantu ebya Katonda ebiri mu kukkiriza.

⁵ Kye tugenderera mu kiragiro kino, kwe kwagala okuva mu mutima omulongoofu, n'omwoyo omulungi, n'okukkiriza okutaliimu bukuusa.

⁶ Ebyo abantu abamu babivaako ne badda mu mpaka ezitaliimu mugaso.

⁷ Beefuula bayigiriza b'amateeka ga Katonda, songa tebategeera bye boogera, wadde bye bakakasa.

⁸ Tumanyi ng'amateeka malungi, omuntu bw'agakozesa mu ngeri entuufu.

⁹ Tusaanye tutegeere nga Amateeka tegaateekerwawo batuukirivu, wabula gaateekerwawo bamenyi baago na bajeemu, aboonoonyi, n'abataty Katonda, n'abatali batukuvu, n'abagwenyufu, abatta bakitaabwe ne bannyaabwe, era n'abatta abantu abalala,

¹⁰ n'abenzi, n'abalya ebisiyaga, abagula n'abatunda abaddu, abalimba n'abalayirira obwerefere, ne bona abatakkiriziganya na njigiriza ntuufu,

¹¹ ng'Enjiri ey'ekitiibwa kya Katonda atenderezebwa, gye yankwasa bw'eri.

Okwebaza Katonda olw'Ekisa kye

¹² Neebaza Kristo Yesu Mukama waffe eyampa amaanyi ag'okumuweereza. Mwebaza kubanga yalaba nga nsaanira, n'ankwasa omulimu gwe.

¹³ Newaakubadde ng'edda namwogerangako bubi, ne mmuyigganya era ne mmuvuma, kyokka yansaaasira, kubanga ebyo nabikolanga mu butamanya nga sinnaba kumukkiriza.

¹⁴ Naye Mukama waffe yankwatirwa ekisa kingi n'ampa okukkiriza kungi, era n'okwagala kwe tufunira mu Kristo Yesu.

¹⁵Ekigambo kino kituufu, kisaanye okukkiriza, ekigamba nti Kristo Yesu yajja mu nsi okulokola aboonoonyi. Mu bo nze mwonoonyi asookera ddala.

¹⁶Katonda kyeeyava ansaasira, Kristo Yesu alyoke ayoleseze mu nze, omwonoonyi asingira ddala okugumiikiriza kwe okutakoma, era mbeere ekyokulabirako eri abo abalimukkiriza ne bafuna obulamu obutaggwaawo.

¹⁷Kabaka ow'olubeerera, atafa era atalabika, Katonda omu yekka, agulumizibwenga, emirembe n'emirembe. Amiina.

¹⁸Mwana wange Timoseewo, nkukubiriza ojjukire ebigambo bya bannabbi bye baakwogerako edda, olyoke olwane olutalo n'obuzira,

¹⁹ng'okukkiriza, n'omwoyo omulungi, bye byokulwanyisa byo. Kubanga abalala abagaana okuba n'omwoyo ogwo omulungi bafiirwa okukkiriza kwabwe.

²⁰Mu abo mwe muli Kumenayo ne Alegezanda be n'awaayo eri Setaani bayige obutavumanga Katonda.

1 Timoseewo 2

Okusaba

¹Okusookera ddala, mbasaba, musabenga, mwegayirirenga, era mwebazenga Katonda ku lw'abantu bona.

²Era musabirenga bakabaka n'abafuzi abalala bona, tulyoke tube bulungi nga tuli mirembe, nga tussaamu Katonda ekitiibwa, era nga twegendereza mu buli ngeri.

³Ekyo kirungi era ekisiimibwa mu maaso ga Katonda Omulokozi waffe,

⁴ayagala abantu bona balokolebwe, era bategeere amazima.

⁵Kubanga Katonda ali omu, era omutabaganya w'abantu ne Katonda ali omu, ye mutu Kristo Yesu,

⁶eyeewaayo abe omutango olwa bona. Ekyo kyakakasibwa mu kiseera kyakyo ekituufu.

⁷Era nze kye nateekebwawo mbeere omutume era omuyigiriza w'Abamawanga, mbategeeze eby'okukkiriza n'eby'amazima; njogera bituufu sirimba.

⁸Noolwekyo njagala abantu buli wantu, basabenga Katonda nga bayimusa emikono gyabwe emirongoofu, nga tebalina busungu wadde empaka.

⁹Era kye njagala abakazi bambalenga ebyambalo ebisaanira, beegenderezenga, nga tebeemalira mu misono gya nviri, ne mu kwewoomya nga bambala ebya zaabu n'amayinja ag'omuwendo, wadde okwambala engoye ez'omuwendo ennyo.

¹⁰Wabula babe n'ebikolwa ebirungi, nga bwe kisaanira abakazi abassaamu Katonda ekitiibwa.

¹¹ Mu kuyigirizibwa, omukazi asirikenga nga yeewombeese.

¹²Sikkiriza mukazi kuyigiriza wadde okuba n'obuyinza ku musajja, wabula asaana asirikenga.

¹³Kubanga Adamu ye yasooka okutondebw, ne kuddako Kaawa.

¹⁴Era Adamu si ye yasendebwasendebwa, wabula mukazi ye yasendebwasendebwa, n'agwa mu kibi.

¹⁵Kyokka omukazi alirokolerwa mu kuzaala abaana, bw'ananywereranga mu kukkiriza ne mu kwagala ne mu butukuvu, ne mu kwegendereza.

1 Timoseewo 3

Abalabirizi b'Ekklesia

¹Ekigambo kyesigwa. Omuntu yenna bw'ayagalanga okuba Omulabirizi aba yeegombye omulimu omulungi.

²Noolwekyo Omulabirizi kimugwanira okuba nga taliiko kya kunenyezebw, nga musajja wa mukazi omu, nga muntu eyeefuga, nga mwegendereza, nga mukwata mpola, ayaniriza abagenyi, era ng'amanyi okuyigiriza.

³Tateekwa kuba mutamiivu, era nga si mukambwe, wabula omuwombeefu, nga si muyombi era nga talulunkanira nsimbi.

⁴Ateekwa kuba ng'afuga bulungi amaka ge, abaana be nga bamuwulira, era nga bamussaamu ekitiibwa.

⁵Kubanga omuntu atasobola kufuga maka ge, alisobola atya okulabirira ekklesia ya Katonda?

⁶Omulabirizi tateekwa kuba muntu eyaakkiriza Kristo, si kulwa nga yeekuluntaza, n'asalirwa omusango nga Setaani bwe yagusalarwa.

⁷Asaanira okuba ng'assibwamu ekitiibwa abo abatali ba Kkanisa, si kulwa nga yeereetako ekivume.

Abadiikoni

⁸Abadiikoni nabo kibagwanira okuba abantu abassibwamu ekitiibwa abatataaganaaga mu bigambo byabwe, abatatamiira, era abatalulunkanira bintu,

⁹nga bakuma ekyama ky'okukkiriza n'omutima omulongoofu.

¹⁰Basookanga kugezesebwa balyoke bawereze mu budiikooni nga tebaliko kya kunenyezebw.

¹¹N'abakazi Abadiikoni bwe batyo nabo kibagwanidde okubeeranga abassibwamu ekitiibwa, abatawaayiriza, abeegendereza, era abeesigwa mu buli kintu.

¹²Omudiikoni ateekwa okuba n'omukazi omu yekka, era ng'asobola okufuga obulungi abaana be, n'amaka ge.

¹³Kubanga abaweereza obulungi bafuna ekifo ekya waggulu era baba n'obuvumu bungi mu kukkiriza okuli mu Kristo.

Ekyama Ekkulu

¹⁴Nkuwandiikkide ebintu ebyo nga nsuubira okujja gy'oli mangu;

¹⁵kyokka bwe ndirwa omanye by'osaana okukola mu nnyumba ya Katonda, ye Ekkanisa ya Katonda omulamu, empagi n'omusingi eby'amazima.

¹⁶Tewali kubuusabuusa ekyama ky'okutya Katonda kikulu ddala, era kigamba nti: "Yalabisibwa mu mubiri, n'akakasibwa Omwoyo nga bw'atuukiridde, n'alabibwa bamalayika, n'langibwa mu mawanga, n'akkirizibwa mu nsi, era n'atwalibwa n'ekitiibwa mu ggulu."

1 Timoseewo 4

Abayigiriza ab'Obulimba

¹Mwoyo Mutukuvu ayogera lwatu nti mu nnaku ez'oluvannyuma walibaawo abaliva mu kukkiriza, nga bagoberera emyoyo egiwubisa, n'enjigiriza ya baddayimooni,

²nga bawubisibwa obukuusa bw'abantu abalimba, ab'emitima egiri ng'egyasiriizibwa ekyuma ekyengeredde.

³Abo be baziyyiza abantu okufumbiriganwa, era abagaana okulya ebyokulya ebimu Katonda bye yawa abakkiriza era abamanyi amazima, okubiryanga nga bamwebaza.

⁴Kubanga buli kitonde kya Katonda kyonna kirungi, era tekizira, kasita kiriirwa mu kwebaza,

⁵kubanga kitukuzibwa na kigambo kya Katonda, n'okukisabira.

Omeweereza Omulungi owa Kristo Yesu

⁶Bw'onootuusa ebigambo ebyo ku booluganda, onooba muweereza mulungi owa Kristo Yesu, ng'oliisibwa n'ebigambo eby'okukkiriza, n'enjigiriza ennungi gye wagoberera.

⁷Naye enfumo ezitaliimu, ezitasaana kunyumizibwa, zeewalenga. Weemanyiizenga okutya Katonda.

⁸Kubanga okumanyiiza omubiri kigasa katono, naye okutya Katonda kugasa mu byonna, kubanga kuleeta essuubi ery'omu bulamu buno era n'ery'obwo obugenda okujja.

⁹Ekigambo ekyo kyesigwa era kisaana okukkiririza ddala.

¹⁰Era kyetuva tutegana ne tufuba, kubanga essuubi lyaffe liri mu Katonda omulamu, Omulokozi w'abantu bona, na ddala abakkiriza.

¹¹ Lagiranga ebyo, era obiyigirizenga.

¹²Waleme kubaawo muntu n'omu akunyooma olw'obuvubuka bwo, naye mu kwogera ne mu bikolwa, ne mu kwagala, ne mu kukkiriza, ne mu bulongoofu beeranga kyakulabirako eri abakkiriza.

¹³Nyiikiranga okusomera abantu Ebyawandiikibwa mu lwatu n'okubuuliriranga, n'okuyigiriza okutuusa lwe ndijja.

¹⁴Togayaaliriranga ekirabo ekiri mu ggwe, kye waweebwa mu bunnabbi abakadde bwe baakussaako emikono gyabwe.

¹⁵Ebyo biteeke mu nkola, era bissengako omwoyo, bona balyoke balabe bwe weeyongera okukola obulungi.

¹⁶Weekuumenga mu mpisa zo, ne mu by'oyigiriza era obinywerereko. Bw'onookola bw'otyo olyerokola ggwe wennyini, era n'abo abakuwulira.

1 Timoseewo 5

Obuvunaanyizibwa bw'abakkiriza

¹Tokambuwaliranga musajja mukulu, wabula omubuuliriranga nga kitaawo. Abavubuka bayisenga nga baganda bo,

²abakazi abakadde bayisenga ng'abazadde bo, abato nga bannyoko, ng'omutima gwo mulongoofu ddala.

³Bannamwandu ddala, bassengamu ekitiibwa.

⁴Nnamwandu bw'abanga n'abaana oba abazzukulu basookenga okuyiga ebyo ebikolebwa mu maka ge waabwe, nga bassaayo omwoyo ku bazadde baabwe era n'okubalabirira. Kubanga ekyo kisanyusa Katonda.

⁵Oyo aba nnamwandu ddala, asigadde yekka, essuubi lye aba alitadde mu Katonda, era anyiikire okwegayirira n'okusaba Katonda emisana n'ekiro.

⁶Kyokka oyo nnamwandu eyeemalira mu masanyu, aba ng'afudde, newaakubadde ng'akyali mulamu.

⁷Ebyo bibalagire, baleme kubaako kya kunenyezebwa.

⁸Naye omuntu yenna bw'atalabirira bantu be, na ddala ab'omu nnyumba ye, aba yeegaanyi okukkiriza, era aba mubi okusinga atakkiriza.

⁹Nnamwandu aweezza emyaka enkaaga ye yekka anaawandiikibwanga ku lukalala lwa bannamwandu. Era atekwa kuba nga yafumbirwa omusajja omu,

¹⁰nga yakolanga ebikolwa ebirungi, oba nga yaleranga abaana, oba nga yayanirizanga abagenyi, oba nga yanaazanga abatukuvu ebigere, oba nga yayambanga abanyigirizibwa, era oba nga yeewangayo nnyo okukola obulungi mu buli ngeri.

¹¹Naye bannamwandu abakyali abato, tokkirizanga okubateeka ku lukalala lwa bannamwandu, kubanga omubiri bwe gulibalemesa okweweerayo ddala eri Kristo, balyagala okufumbirwa,

¹²bwe batyo ne bessaako omusango olw'obutatuukiriza ekyo kye baasooka okusuubiza.

¹³N'ekirala bayiga okubeera abagayaavu ne batambulatambula mu buli nnyumba, so si bugayaavu kyokka, naye era balina olugambo, era beeyingiza mu bitali byabwe ne boogera n'ebitasaana.

¹⁴Kyenva njagala bannamwandu abato bafumbirwenga, bazaale abaana, era balabirire amaka gaabwe, baleme kuwa mulabe kkubo lya kutwogerako kibi.

¹⁵Kubanga bannamwandu abamu bakyamye ne bagoberera Setaani.

¹⁶Naye bwe wabaawo omukkiriza alina bannamwandu ab'olulyo lwe abalabirenga, Ekkanisa ereme okuzitoowererwa, kiryoke kisoboke okulabirira bannamwandu abataliiko abayamba.

¹⁷Abakulembeze abafuga basaanidde okuweebwanga ekitiibwa kingi, na ddala abo abanyikira ennyo mu kubuulira n'okuyigiriza ekigambo kya Katonda.

¹⁸Kubanga Ekyawandiikibwa kigamba nti, "Ente ng'ewuula ejjaano, togisibanga mumwa." Era nti, "Omukozi asaanira okusasulwa empeera ye."

¹⁹Tokkirizanga ebyo bye bavunaana omukulembeze okuggyako nga biriko abajulirwa babiri oba basatu.

²⁰Kyokka abo aboonoona banenyezenga mu lwatu, abalala balyoke batye.

²¹Nkukuutirira mu maaso ga Katonda ne Kristo Yesu, ne bamalayika abalonde okugobereranga ebyo, nga tweekubira wadde okusaliriza.

²²Toyanguyirizanga kussaako mikono ku muntu yenna, so tossanga kimu na bibi by'abalala; weekuumenga ng'oli mulongoofu.

²³Lekeraawo okunywanga amazzi gokka, naye nywanga ne ku wayini mutono olw'olubuto lwo, n'olw'okulwalalwala kwo.

²⁴Ebibi by'abantu abamu birabika lwateru nga tebannasalirwa musango kubasinga, naye eby'abalala birabika luvannyuma.

²⁵N'ebikolwa ebirungi nabyo bwe bityo birabika lwateru; ne bwe biba tebirabise lwateru, tebiyinza kukwekebwba bbanga lyonna.

1 Timoseewo 6

Eby'abaddu ne Bakama baabwe

¹Abobonna abali mu kikoligo ky'obuddu, basaana okussaamu bakama baabwe ekitiibwa, erinnya lya Katonda, awamu n'okuyigiriza kwaffe bireme kuvvoolebwa.

²Abaddu abalina bakama baabwe abakkiriza tebabanyoomanga, okubanga baganda baabwe, wabula bona bongere bwongezi okubaweereza, kubanga bakkiriza era baagalwa, era be bayambibwa olw'okuweereza kwabwe okulungi.

Omugaso gw'okussaamu Katonda Ekitiibwa

Bino bibayigirizenga era obibakuutirenga.

³Omuntu yenna bw'ayigirizanga mu ngeri endala, nga takkiriziganya na bigambo ebya Mukama waffe Yesu Kristo ebireeta obulamu n'okugobereranga enjigiriza ey'okutya Katonda,

⁴aba ajjudde okwekuluntaza era aba taliiko ky'ategeera naye aba aguddemu akazoole ak'okubuzaabuza mu buli kintu, n'okuwakana ku buli kigambo n'ekivaamu bwe buggya, n'okuyomba, n'okuvuma, n'okuwaayira,

⁵n'okukaayana. Ebyo bikolebwa abantu abaayonooneka ebirowoozo, abatakyalina mazima, abalowooza ng'okufuna amagoba kwe kutya Katonda.

⁶Weewaawo okutya Katonda kulimu amagoba mangi, omuntu bw'amalibwa mu ekkyo ky'alina.

⁷Kubanga tetulina kye twajja nakyo mu nsi, era tetuliiko kye tuliggyamu nga tuvaamu.

⁸Naye bwe tuba n'emmere, n'ebyokwambala ebyo bitumalenga.

⁹Abo abaagala okugaggawala bagwa mu kukemebwa ne mu katego ak'okwegomba okw'obusirusiru era okw'akabi, okunnyika abantu mu kubula ne mu kuzikirira.

¹⁰Kubanga okululunkanira ensimbi y'ensibuko y'ebibi byonna, era olw'okululunkana okwo abamu bawabye, ne bava mu kukkiriza, ne beereetera obulumi bungi mu mitima gyabwe.

Okulabula

¹¹ Naye ggwe, omuntu wa Katonda, ddukanga ebintu ebyo, ogobererenga obutuukirivu, n'okutya Katonda, n'okukkiriza, n'okwagala, n'okugumiikiriza, n'obuwombeefu.

¹² Lwananga okulwana okulungi okw'okukkiriza, nywezanga obulamu obutaggwaawo bwe wayitirwa, n'oyatula okwatula okulungi mu maaso g'abajulirwa abangi.

¹³ Nkukuutira mu maaso ga Katonda, awa byonna obulamu, ne mu maaso ga Kristo Yesu eyayatula okwatula okulungi mu maaso ga Pontiyo Piraato,

¹⁴ okuumenga ekiragiro nga tekiriiko bbala, wadde eky'okunenyezebwu okutuusa ku kulabika kwa Mukama waffe Yesu Kristo,

¹⁵ kw'aliraga mu ntuuko zaakwo, aweebwa omukisa era nnannyini buyinza yekka, Kabaka wa bakabaka bona, era Mukama wa bakama,

¹⁶ ye yekka atafa era atuula mu kwakaayakana okutasemberekeka, era tewali n'omu yali amulabye, so tewali asobola kumulaba, oyo aweebwe ekitiibwa, n'obuyinza obutaggwaawo, Amiina.

Okulabula Abagagga

¹⁷ Okuutirenga abagagga ab'omu mirembe gya kaakano, obuteekuluntaza, wadde okwesiga obugagga kubanga si bwa lubeerera, wabula beesige Katonda atuwa byonna olw'okwesanyusanga,

¹⁸ bakole ebirungi, babe bagagga mu bikolwa ebirungi, nga bagabi, era abaagala okugabana n'abalala.

¹⁹ Bwe batyo beeterekere obugagga obw'engeri eyo nga gwe musingi omulungi ogw'ebiseera ebigenda okujja, balyoke banywezenga obulamu bwennyini.

²⁰ Timoseewo, kuumanga kye wateresebwu. Weewalenga ebigambo ebivvoola, era ebitaliimu nsa, n'empaka ez'ebigambo ebiyitibwa eby'amagezi naye nga bya bulimba,

²¹ abantu abamu ge balowooza okuba nago, ne basubwa ekigendererwa mu kukkiriza. Ekisa kibeerenga nammwe.

2 Timoseewo

2 Timoseewo 1

¹Nze, Pawulo, omutume wa Kristo Yesu olw'okwagala kwa Katonda, ng'okusubiza bwe kuli okw'obulamu obuli mu Kristo Yesu,

²nkuwandiikira ggwe Timoseewo omwana wange omwagalwa, nga nkwaliza ekisa n'okusaasirwa, n'emirembe ebiva eri Katonda Kitaffe, ne Kristo Yesu Mukama waffe.

Okwebaza n'Okugumya

³Neebaza Katonda gwe mpeereza mu mwoyo omulungi nga bajajjange bwe baakola, nga nkujukira obutayosa mu kusaba kwange emisana n'ekiro.

⁴Bwe nzijkira amaziga go ne neegomba okukulaba ndyoke nzijule essanyu.

⁵Nzijkira okukkiriza kwo okw'amazima olubereberye okwali mu jjajjaawo Looyi ne mukadde wo Ewuniike; era nga nkakasiza ddala nga naawe okulina.

⁶Kyenva nkujukiza okuseesanga ekirabo kya Katonda ekiri mu ggwe kye yakuwa, bwe nakussaako emikono gyange.

⁷Kubanga Mwoyo wa Katonda, gwe yatuwa tatusula bati, wabula atuwa amaanyi, n'okwagala era n'okwegendereza.

⁸Noolwekyo tokwathibwa nsonyi kwogera ku bya Mukama waffe, wadde ku nze omusibe we, wabula naawe bonaabona olw'Enjiri ng'oyambibwa amaanyi ga Katonda,

⁹eyatulokola n'atuyita tubeere babe. Ekyo yakikola nga tasinziira ku bikolwa byaffe, wabula ng'asinziira mu kuyitibwa okutukuvu, si ng'ebikolwa byaffe bwe biri, naye olw'ekigendererwa kye ye, n'ekisa kye, kye yatukwatirwa ng'ayita mu Kristo Yesu okuva edda n'edda Lyonna.

¹⁰Kaakano ekisa ekyo kyolesebbwa mu kulabika kw'Omulokozi waffe Kristo Yesu eyaggyawo okufa, n'aleeta obulamu obutazikirizibwa ng'ayita mu Njiri,

¹¹gye nalonderwa okugisaasaanya, n'okuba omutume, era omuyigiriza,

¹²era kyenva mbonaabona bwe ntyo. Kyokka sikwatibwa nsonyi, kubanga mmanyi gwe nakkiriza, era nkakasa nti ayinza okukuma ekyo kye namuteresa okutuusa olunaku luli.

¹³Gobereranga ebigambo ebireeta obulamu bye wawulira njogera, mu kukkiriza ne mu kwagala mu Kristo Yesu.

¹⁴Ekintu ekirungi eky'omuwendo kye wateresebwा kikuumenga ng'oyambibwa Mwoyo Mutukuvu abeera mu ffe.

¹⁵ Kino okimanyi, ng'ab'omu Asiya bona banjabulira, mu abo mwe muli Fugero ne Kerumogene.

¹⁶ Mukama akwatirwe ekisa ab'omu nnyumba ya Onesifolo, kubanga yambeesabeesa emirundi mingi era teyankwadirwa nsonyi kubanga ndi musibe;

¹⁷ bwe yatuuka e Ruumi, yafuba nnyo okunnoonya era n'anzuula.

¹⁸ Mukama amukwadirwe ekisa ku lunaku luli. Era gw'omanyi bulungi nnyo byonna bye yakola mu Efeso.

2 Timoseewo 2

Omuserikale Omwesigwa owa Kristo

¹ Noolwekyo mwana wange nywereranga mu kisa ekiri mu Kristo Yesu.

² Ebyo bye wawulira nga njogera mu maaso g'abajulirwa abangi biyigirizengaabantu abeesigwa, abalisobola okubiyigiriza abalala.

³ Naawe bonaabonanga ng'omuserikale omulungi owa Kristo Yesu.

⁴ Tewali muserikale ng'ali ku lutalo eyeeyingiza mu mitawaana gy'abantu abaabulijjo, alyoke asiimibwe oyo eyamuwandiika.

⁵ Omuntu yenna eyeetaba mu mizannyo gy'empaka, taweebwa buwanguzi bw'atagoberera biragiro bya mizannyo egyo.

⁶ Omulimi ategana ennyo y'asaanira okufuna ku bibala ebibereberye.

⁷ Kale lowooza ku bye ɳjamba; Mukama ajja kukuwa okutegeera byonna.

⁸ Jjukira nga Yesu Kristo ow'omu zzadde lya Dawudi yazuukira mu bafu ng'Enjiri gye ntegeeza bw'egamba.

⁹ Olw'Enjiri eyo, kyenva mbonaabona n'ensibibwa ng'omukozi w'ebibi. Naye ekigambo kya Katonda kyo tekisibiddwa.

¹⁰ Kyenva ngumira ebintu byonna olw'abalonde nabo balyoke balokolebwera bafune, n'ekitiibwa ekitaggwaawo ekiri mu Kristo Yesu.

¹¹ Ekigambo kino kyesigwa ekigamba nti: "Obanga twafiira wamu naye, era tulibeera balamu wamu naye.

¹² Obanga tugumiikiriza awamu naye, era tulifugira wamu naye. Obanga tumwegaana era naye alitwegaana.

¹³ Ffe bwe tutaba beesigwa, ye aba mwesigwa, kubanga teyeewakanya."

Omukozi Katonda gw'asiima

¹⁴ Ebyo bijjukizenga abantu ng'obakuutirira mu maaso ga Katonda, beewalenga okuwakana okutalina mugaso, nga bakyamya abo abawuliriza.

¹⁵ Fubanga okweraga ng'osiimibwa Katonda, ng'oli mukozi akola ebitakuswaza, era nga weekuumira mu kkubo ery'obubaka obw'amazima.

¹⁶ Weewalenga ebiambo ebinyooma era ebitaliimu nsa, kubanga abantu bibongera bwongezi mu butatya Katonda.

¹⁷ Era ebiambo byabwe birisaasaana nga kookolo; mu abo mwe muli Kumenayo ne Fireeto,

¹⁸ abaakyama ne bava ku mazima, nga bagamba nti okuzuukira kwabaawo dda, era waliwo abamu be bakyamizza.

¹⁹ Kyokka omusingi Katonda gwe yateekawo mugumu, era gulina akabonero kano: "Mukama amanyi ababe." Era nti: "Buli ayatula erinnya lya Mukama ave mu butali butuukirivu."

²⁰ Mu nnyumba ennene temubaamu bintu bya zaabu na ffeeza byokka, naye mubaamu n'ebye'miti, era n'ebye'ebbumba. Ebimu bikozesebwa emirimu egy'ekitiibwa, n'ebirala egitali gyा kitiibwa.

²¹ Noolwekyo buli eyeewala ebintu ebyo ebitali bya kitiibwa anaabanga ow'ekitiibwa, atukuziddwa, asaanira okukozesebwa mukama we, olw'omulimu omulungi.

²² Naye ddukanga okwegomba okubi okw'ekivubuka, ogobererenga obutuukirivu, n'okukkiriza, n'okwagalana era n'emirembe awamu n'abo abasaba Mukama n'omutima omulongoofu.

²³ Weewalenga empaka ez'obusirusiru, ezitaliimu magezi, kubanga omanyi nti zivaamu okulwana.

²⁴ Omuddu wa Mukama tasaana kulwana, wabula okuba omukkakkamu eri bona, n'okuba omuyigiriza omulungi agumiikiriza,

²⁵ era alujjanya n'obwetooowaze abo abamuwakanya, oboolyawo Katonda alibawa okwenenya, ne bamanya amazima,

²⁶ ne bava mu mutego gwa Setaani gwe baguddemu abakozese by'ayagala, ne badda engulu mu kutegeera kwabwe.

2 Timoseewo 3

Ennaku ez'Oluvannyuma

¹ Naye tegeera kino nga mu nnaku ez'oluvannyuma walibaawo ebiseera ebizibu.

²Kubanga abantu baliba nga beefaako bokka, nga balulunkanira ensimbi, nga beepanka, nga beekuluntaza, nga boogera ebibi, era nga tebawulira bazadde baabwe, nga tebeebaza, nga tebatya Katonda,

³nga tebaagalana era nga tebatabagana, nga bawaayiriza, nga tebeegendereza, nga bakambwe, nga tebaagala birungi,

⁴nga ba nkwe, nga baagala eby'amasanyu okusinga bwe baagala Katonda;

⁵nga balina ekifaananyi eky'okutya Katonda so nga tebakkiriza maanyi gaakyo. Abantu ab'engeri eyo obeewalanga.

⁶Mu abo mulimu abasensera mu mayumba ne bawamba abakazi abanafu mu mwoyo abazitoowereddwa ebibi, era abawalulwa okwegomba okubi okwa buli ngeri,

⁷abayiga bulijo, kyokka ne batatuuka ku kutegeerera ddala amazima,

⁸nga Yane ne Yambere abaawakanya Musa, ne bano bwe batyo bawakanya amazima. Be bantu abaayonooneka ebirowoozo, abatakyalina kukkiriza kutuufu.

⁹Kyokka tebaliiko gye balaga, kubanga obusirusiru bwabwe bujja kumanyibwa abantu bona, ng'obwa abasajja abo bwe bwamanyibwa.

¹⁰Naye ggwe wagoberera nnyo okuyigiriza kwange, n'empisa zange, ne kye nduubirira, n'okukkiriza kwange n'okubonaabona kwange n'okwagala kwange, n'okugumiikiriza kwange,

¹¹n'okuyigganyizibwa n'okubonyaabonyezebwa ebyantukako mu Antiyokiya, ne mu Ikoniya ne mu Lisitula, okuyigganyizibwa kwe nayigganyizibwa, kyokka Mukama n'amponya mu byonna.

¹²Era bona abaagala okuba mu bulamu obutya Katonda mu Kristo Yesu, banaayigganyizibwanga.

¹³Naye abakozi b'ebibi n'abalimba abeefuula okuba ekyo kye batali balyeyongera okuba ababi, ne babuzaabuza abalala, era nabo ne babula.

¹⁴Kyokka ggwe nywereranga mu ebyo bye wayiga era n'obikkiririza ddala, ng'omanyi abaabikuyigiriza bwe bali.

¹⁵Kubanga okuva mu buto bwo wamanya Ebyawandiikibwa Ebitukuvu ebiyinza okukufuula ow'amagezi, n'olokolebwa olw'okukkiriza Kristo Yesu.

¹⁶Ebyawandiikibwa Ebitukuvu byonna, Katonda ye yabirunjamya nga biwandiikibwa, era bigasa mu kuyigiriza, mu kunenya, mu kuluñjamya ne mu kubuuliranga omuntu abe omutuukirivu,

¹⁷omuntu wa Katonda alyoke abe ng'atuukiridde, ng'alina byonna ebyetaagibwa okukola buli mulimu omulungi.

2 Timoseewo 4

¹Nkukuutirira mu maaso ga Katonda ne Kristo Yesu, anaatera okusalira abalamu n'abafu omusango, era n'olw'okujja kwe, n'olw'obwakabaka bwe,

²buuliranga ekigambo kya Katonda, ng'oli mwetegefu mu kiseera ekituufu n'ekitali kituufu, ng'olaga ebikwekeddwa, ng'onenya, ng'ozaamu amaanyi, wakati mu kugumiikiriza, n'okubonaabona okungi, n'okuyigiriza.

³Kubanga ekiseera kijja lwe baligaana okuwulira enjigiriza entuufu, era olw'okugoberera okwegomba kwabwe balyekunjaanyiza abayigiriza, abalibayigiriza bye baagala, okuwulira.

⁴Baligaana okuwuliriza eby'amazima, ne bagoberera enfumo obufumo.

⁵Naye ggwe weefugenga mu bintu byonna, ogumirenga ebizibu, ng'okola omulimu ogw'omubuulizi w'enjiri, ng'otuukiririza ddala obuweereza bwo.

⁶Nze kaakano mpebwayo, era ekiseera kyange eky'okuva ku nsi kituuse.

⁷Nnwanye okulwana okulungi, mmalirizza olugendo lwange, nkuumye okukkiriza kwange.

⁸Kye nsigazza kwe kufuna engule ey'obutuukirivu enterekeddwa, Mukama omulamuzi omutuukirivu gy'alimpeera ku lunaku luli. Taligiwa nze nzekka, naye aligiwa n'abo bona abeegomba okuja kwe.

⁹Fuba okuja amangu gye ndi.

¹⁰Kubanga Dema yandekawo ng'ayagala omulembe gwa kaakano, n'agenda e Sessaloniika. Kulesuke yagenda Ggalatiya ne Tito n'agenda e Dalumatiya.

¹¹Lukka yekka y'ali nange. Ggyayo Makko omuleete, kubanga annyamba nnyo mu buweereza.

¹²Tukiko n'amutuma mu Efeso.

¹³Bw'obanga ojja ondeeteranga omunagiro gwange gwe naleka e Tulowa ewa Kappo. Ondeeteranga n'emizingo gy'ebitabo, na ddala egoy egyptamaliba.

¹⁴Alegezanda, omuweesi w'ebikomo yankola ebyettima bingi. Mukama alimusasula olw'ebikolwa bye.

¹⁵Naawe mwekuume, kubanga yawakanya nnyo ebigambo byaffe.

¹⁶Mu kuwoza kwange okwasooka, tewaali n'omu yajja kubeera nange, bona banjabulira. Nsaba Katonda ekijo kireme kubavunaanibwa.

¹⁷Kyokka Mukama waffe yabeera nange, n'ampa amaanyi, ne nsobola okutegeereza ddala Abaamawanga bona Enjiri ne bagiwulira, bw'atyo n'anziggya mu kamwa k'empologoma.

¹⁸Era Mukama anamponyanga mu buli kabi, era alintuusa mirembe mu bwakabaka bwe. Mukama agulumizibwenga emirembe n'emirembe. Amiina.

Okulamusia n'Omukisa

¹⁹Nnamusiza Pulisika ne Akula n'ab'omu maka ga Onesifolo.

²⁰Erasuto yasigalayo mu Kkolinso, ate Tulofimo namuleka mu Mireeto nga mulwadde.

²¹Fuba ojje ng'ebiseera by'obutiti tebinnaba kutuuka. Ewubulo akulamusizza, ne Pudente, ne Lino, ne Kulawudiya, n'abooluganda bona.

²²Mukama waffe abeerenga n'omwoyo gwo. Ekisa kibeerenga nammwe mwenna.

Tito

Tito 1

¹ Pawulo omuweereza wa Katonda, era omutume wa Yesu Kristo ng'okukkiriza kw'abalonde ba Katonda bwe kuli n'okutegeera amazima agali mu kutya Katonda,

² ebyesigamye ku kusuubira okw'obulamu obutaggwaawo, Katonda ow'amazima kwe yasuubiza ng'ebiro eby'emirembe n'emirembe tebinnabaawo,

³ naye mu ntuuko zaabyo, yayolesa ekigambo kye mu kubuulira Enjiri, kwe nateresebwa ng'ekiragiro kya Katonda Omulokozi waffe bwe kiri,

⁴ eri Tito omwana wange ddala ng'okukkiriza kwaffe ffenna okwa awamu bwe kuli, n'ekisa n'emirembe ebiva eri Katonda Kitaffe ne Kristo Yesu omulokozi waffe.

⁵ Kyennava nkuleka mu Kuleete, olyoke otereeze ebyo ebyetaaga okutereeza, era otekewo n'abakadde b'ekkanisa mu buli kibuga, nga bwe nakulagira.

⁶ Omuntu ateekwa okuba nga taliiko kya kunenyezebw, nga musajja alina omukazi omu, era nga n'abaana baabwe bakkiriza, nga tebalina kibi kiyinza kuboogerwako era nga tebeenyigira mu bikolwa bya buseegu oba mu bujeemu.

⁷ Omulabirizi kimugwanira okuba nga taliiko kya kunenyezebw ng'omuwanika wa Katonda, nga si mukakanyavu, nga si wa busungu, nga si mutamiivu, nga si mukambwe, nga teyeegomba kufuna magoba mu bukuusa

⁸ naye ayaniriza abagenyi, ayagala okukola obulungi, omutegeevu, nga mwenkanya, nga mutukuvu, era ng'amanyi okwefuga.

⁹ Ateekwa okuba omuntu anywerera ku kigambo ekyesigwa, alyoke asobole okunnyonnyola abantu enjigiriza entuufu, n'okulaga obukyamu bw'abo abagiwakanya.

¹⁰ Kubanga waliwo bangi abawakana, aboogera ebitaliimu era abalimba, n'okusingira ddala abo ab'omu bakomole.

¹¹ Basaanye okusirisibwa, kubanga boonoona buli maka, nga bayigiriza ebitabagwanidde, balyoke beefunire amagoba ag'obukuusa.

¹² Omu ku bo, nnabbi waabwe bo kyeyava agamba nti, "Abakuleete balimba bulijjo, z'ensolo enkambwe, era ba mululu ate bagayaavu."

¹³ Kye yagamba kya mazima. Noolwekyo otekwa okubanenya n'amaanyi kiryoke kibaleetere okukkiriza okutuufu,

¹⁴balekeraawo okuwuliriza enfumo ez'Ekiyudaaya, n'ebiragiro abantu abakyama okuva ku mazima bye bagunja.

¹⁵Eri abalongoofu, ebintu byonna biba birongoofu, naye eri abo abatali balongoofu n'abatakkiriza, tewaba kirongoofu na kimu. Kubanga amagezi gaabwe n'ebirowoozo byabwe byayonooneka.

¹⁶Bagamba nti bamanyi Katonda, naye mu bikolwa byabwe bamwegaana. Bagwenyufu era bajeemu, tebasaanira kuweebwa mulimu mulungi n'akatono.

Tito 2

Enjigiriza Entuufu

¹Naye ggwe yogeranga ebyo ebitayawukana na njigiriza entuufu.

²Kubirizanga abasajja abakulu babe bateefu, abassibwamu ekitiibwa, abeegendereza, abajudde okukkiriza, okwagala n'okugumiikiriza.

³Abakazi abakulu nabo bakubirize bw'otyo babe n'empisa ezisaanira abantu ba Katonda, nga tebawaayiriza, era nga tebatamiira, wabula nga bayigiriza ebirungi,

⁴balyoke basobole okugunjula abakazi abato okwagalanga ba bbaabwe awamu n'abaana baabwe.

⁵Era babenga beegendereza, era abalongoofu, era abakola obulungi emirimu mu maka gaabwe, era abawulize eri ba bbaabwe, ekigambo kya Katonda kiremenga okuvvoolebwa.

⁶N'abavubuka bakubirizenga babe beegendereza,

⁷mu bintu byonna, ng'obeera ekyokulabirako ekirungi mu byonna by'okola, ng'oli mwesimbu era assaayo omwoyo mu kuyigiriza kwo.

⁸Buli ky'oyogera kiteekwa okuba nga tekiriiko kya kunenyezebwa, oyo awakanya alyoke aswale, nga talina kibi kya kukwogerako.

⁹Era kubirizanga abaddu bawulirenga bakama baabwe era babagonderenga mu byonna, nga tebabawakanya,

¹⁰wadde okubabbangako ebyabwe. Wabula babenga beesigwa ddala mu byonna, nga beeyisa bulungi, abantu balyoke bayaayaanire okuyigiriza kwa Katonda Omulokozi waffe mu buli ngeri yonna.

¹¹Kubanga ekisa kya Katonda ekireetera abantu bona obulokozi kirabise,

¹²era kituyigiriza tuleke obutatya Katonda, n'okwegomba kw'ensi, tulyoke tube beegendereza, abatuukirivu abatya Katonda nga tuli mu mulembe gwa kaakano;

¹³nga tulindirira olunaku lwe tusuubira, n'okulabika kw'ekitiibwa kya Katonda omukulu era Omulokozi waffe Yesu Kristo;

¹⁴eyeewaayo ku lwaffe, alyoke atununule mu bujeemu bwaffe bwonna, era yeerongooseza eggwanga ery'envuma, erinyikirira ebikolwa ebirungi.

¹⁵Ebyo by'obanga oyigiriza abantu. Buuliriranga era nenyanga n'obuyinza bwonna. Omuntu yenna takunyoomanga.

Tito 3

Okuwabula abakkiriza

¹Ebintu ebyo bijukizenga abafuzi n'ab'obuyinza, babiwulirenga, era babigonderenga, era babenga beetegefu okukola buli mulimu omulungi.

²Bakuutire baleme kwogerebwako bubi, era beewalenga okuyomba, babenga bakkakkamu era babeerenga bawombeefu eri abantu bonna.

³Kubanga naffe ffennyini twali basirusiru era abajeemu, nga tuwabye, era nga tufugibwa okwegomba kwaffe okubi, n'amasanyu aga buli ngeri, nga tuli ba ttima era ab'obuggyga, nga tukyayibwa era nga tukyawagana.

⁴Naye ekisa kya Katonda Omulokozi waffe n'okwagala kwe bwe byalabika,

⁵n'atulokola, si lwa bikolwa eby'omu butuukirivu bye twakola, wabula olw'okusaasira kwe mu kunaazibwa okw'okuzaalibwa okw'omulundi ogwokubiri n'okfuulibwa abaggya olwa Mwoyo Mutukuvu,

⁶gwe yatuyiwako mu bungi ku lwa Yesu Kristo Omulokozi waffe.

⁷Bwe tulimala okutukuzibwa olw'ekisa kye, tulyoke tufune omugabo mu kusuubira obulamu obutaggwaawo.

⁸Ekigambo ekyo kyesigwa, era nkukuutira ebyo obinywezenga abakkiriza Katonda bajjukirenga okukola ebikolwa ebirungi; ebintu ebyo birungi era bigasa abantu.

⁹Naye weewalenga empaka ez'obusirusiru, n'okukaayana ku nkalala eziraga obuzaale bw'abantu, n'enyyombo, n'entalo ebikwata ku mateeka; kubanga tebiriiko kye bigasa era tebiriimu nsa.

¹⁰Omuntu ayawulayawula mu bantu bw'omalanga okumulabula omulundi ogusooka, era n'ogwokubiri, omwewalanga,

¹¹kubanga omuntu ng'oyo aba amaze okukyamizibwa mu kibi, era nga yeesalira yekka omusango.

¹²Bwe nkutumiranga Atema oba Tukiko, oyanguwanga okujja gye ndi mu Nikopoli, kubanga nsazeewo okubeera eyo mu biseera eby'obutiti.

¹³Fuba okusibirira Zeena munnamateeka ne Apolo obatume babe nga tebaliiko kye beetaaga.

¹⁴Era kubiriza abantu baffe bayige okukolanga emirimu omuva ebyetaagibwa, balemenga kubeera awo nga tebaliiko kye bagasa.

¹⁵Bonna abali nange bakulamusizza. Olamuse abo bona abatwagala mu kukkiriza. Ekisa kibeerenga nammwe mwenna.

Firemooni

Firemooni 1

- ¹ Pawulo, omusibe wa Kristo Yesu, n'wooluganda Timoseewo, tuwandiikira ggwe Firemooni, mukozi munnaffe omwagalwa,
- ² ne Apofiya mwannyinaffe, ne Alukipo mulwanyi munnaffe, n'Ekkanisa yonna ekuñjaanira mu nnyumba yo.
- ³ Ekisa n'emirembe ebiva eri Katonda Kitaffe ne Mukama waffe Yesu Kristo bibeerenga nammwe.

Okusaba n'okwebaza

- ⁴ Bulijjo bwe mba nga nkusabira neebaza Katonda,
- ⁵ kubanga buli kiseera mpulira nga bw'olina okwagala n'okukkiriza eri Mukama waffe Yesu n'eri abatukuvu bona.
- ⁶ Nsaba nti nga bw'ogenda otegeeza abantu okukkiriza kwo, nabo kubanyweze mu bulamu bwabwe, nga bategeerera ddala ebirungi byonna ebiri mu ffe ku bwa Kristo.
- ⁷ Nsanyuka nnyo era ne nziramu amaanyi olw'okwagala kwo, kubanga emitima gy'abatukuvu giziddwa buggya ku lulwo owooluganda.

Pawulo yeegayiririra Onesimo

- ⁸ Noolwekyo newaakubadde era, nga nnina obuvumu mu Kristo, nga nandisobodde okukulagira okukola ekyo ky'osaanira okukola,
- ⁹ naye okwagala kwange gy'oli kumpaliriza okukusaba obusabi, nze, Pawulo, kaakano akaddiye, era ali mu kkomera olwa Kristo Yesu;
- ¹⁰ nkwegayirira ku bikwata ku mwana wange Onesimo gwe nayamba okukkiriza Mukama waffe nga ndi mu njegere, mu busibe,
- ¹¹ Onesimo oyo, gye buvuddeko ataali wa mugaso gy'oli, naye kaakano nga wa mugaso nnyo gye tuli ffembi,
- ¹² gwe naaweereza gy'oli nga n'omutima gwange gujjirako,
- ¹³ oyo gwe nandyagadde okwesigaliza, ampeereze nga ndi mu busibe olw'enjiri, mu kifo kyo mwe wandibadde onnyambira,
- ¹⁴ naye ne saagala kukikola nga tonzikirizza. Saagala okole eky'ekisa olwokubanga oteekwa, wabula kikole lwa kweyagalira.
- ¹⁵ Kiyinzika okuba nga Onesimo yakwawukanako okumala akaseera, oluvannyuma alyoke abeere naawe ebbanga lyonna,

¹⁶nga takyali muddu buddu, naye ng'asingako awo, ng'afuuse owooluganda omwagalwa ennyo, na ddala gye ndi. Kaakano ajja kubeera wa mugaso nnyo gy'oli mu mubiri ne mu Mukama waffe.

¹⁷Obanga ddala ndi munno, mwanirize mu ngeri y'emu nga bwe wandinnyanirizza singa nze mbadde nzize.

¹⁸Obanga waliwo ekintu ekibi kye yakukola, oba ekintu ky'omubanja, kimbalarweko.

¹⁹Kino nkiwandiika mu mukono gwange nze, Pawulo, nti ndikusasula. Sijja kukugamba nti olina ebbanja lyange.

²⁰Munnange owooluganda, nkolera ekikolwa kino ekiraga okwagala, omutima gwange guddemu amaanyi mu Kristo.

²¹Nkuwandiikkide ebbaluwa eno nga neesigira ddala nga kye nkusaba oija kukikola n'okusingawo!

²²Nninayo n'ekirala kye nkusaba; nkusaba ontegekere we ndisula, kubanga nnina essuubi, nga Katonda okusaba kwammwe ajja kukuddamu anzikirize nkomewo gye muli.

Okusiibula

²³Epafula, musibe munnange olw'okubuulira Enjiri ya Kristo Yesu, abalamusizza.

²⁴Ne bakozi bannange bano: Makko, ne Alisutaluuko, ne Dema, ne Lukka nabo babalamusizza.

²⁵Ekisa kya Mukama waffe Yesu Kristo kibeerenga n'omwoyo gwammwe.

Abaebbulaniya

Abaebbulaniya 1

Omwana mukulu okusinga bamalayika

¹Edda, Katonda yayogeranga ne bajjajjaffe mu ngeri nnyingi ez'enjawulo ng'ayita mu bannabbi;

²naye mu nnaku zino ez'oluvannyuma yayogera naffe ng'ayita mu Mwana, gwe yalonda okuba omusika wa byonna, era mu oyo mwe yatondera ensi n'ebintu byonna ebirimu.

³Amasamasa n'ekitiibwa kya Katonda, era ky'ekifaananyi kye ddala bw'ali, era abeezaawo buli kintu olw'ekigambo kye eky'amaanyi. Bwe yamala okukola ekikolwa eky'okututukuza okuva mu bibi, n'atuula ku mukono ogwa ddyo ogwa Katonda mu Bwakabaka obw'omu ggulu.

⁴Bw'atyo n'asinga bamalayika, nga kyeragira ku linnya lye okuba ery'ekitiibwa okusinga amannya gaabwe.

⁵Kubanga ani ku bamalayika gwe yali ayogeddeko nti, "Ggwe oli Mwana wange, Leero nkuzadde?" Era nate nti, "Nze nnaabeeranga Kitaawe gy'ali naye anaabeeranga Mwana wange gye ndi?"

⁶Era nate bw'aleeta Omwana we omubereberye mu nsi, agamba nti, "Bamalayika ba Katonda bonna bamusinzenga."

⁷Era ayogera ku bamalayika nti, "Afuula bamalayika be ng'empewo, n'afuula n'abawereera be ng'ennimi z'omuliro."

⁸Naye ku Mwana ayogera nti, "Entebe yo ey'Obwakabaka, Ayi Katonda, ya lubeerera emirembe n'emirembe; obutuukirivu, gwe muggo ogw'obwakabaka bwo.

⁹Wayagala obutuukirivu n'okyawa obujeemu. Katonda, era Katonda wo kyeyava akufukako amafuta ag'omuzeeyituuni agaleeta essanyu okusinga banno."

¹⁰Ayongera n'agamba nti, "Mukama ku lubereberye wassaawo omusingi gw'ensi, era n'eggulu mirimu gwa mukono gwo.

¹¹Ebyo biriggwaawo, naye ggwe olibeerera emirembe gyonna, era byonna birikaddiwa ng'ekyambalo bwe kikaddiwa.

¹²Era olibizingako ng'ekooti bwe zingibwako, era birikyusibwa ng'ekyambalo bwe kikyusibwa. Naye ggwe oba bumu, so n'emyaka gyo tegirikoma."

¹³Ani ku bamalayika gwe yali agambye nti, "Tuula wano ku mukono gwange ogwa ddyo, okutuusa lwe ndifufuggaza abalabe bo, ne bafuuka entebe y'ebigere byo"?

¹⁴ Bamalayika bona, myoyo egitumibwa okuweereza abo abagenda okusikira obulokozi.

Abaebbulaniya 2

Okulabula okussaayo Omwoyo

¹Kyekivudde kitusaanira okussaayo ennyo omwoyo ku bintu bye twawulira, si kulwa nga tuwaba ne tubivaako.

²Obanga ekigambo ekyayogerwa bamalayika kyakola, na buli eyayonoona era n'ajeemera ekigambo ekyo, yaweebwa ekibonerezo ekimusaanira,

³ffe tuliwona tutya bwe tuliragajjalira obulokozi obukulu obwenkana awo? Obulokozi obwo bwasooka okwogerwa Mukama waffe, ne bulyoka bukakasibwa abo abaabuwulira.

⁴Katonda yakikakasiza mu buponero ne mu by'ekitalo ne mu byamagero abitali bimu, era ne mu birabo ebya Mwoyo Mutukuvu bye yagaba nga bwe yayagala.

⁵Ensi empya gye twogerako si yakufugibwa bamalayika.

⁶Waliwo mu byawandiikibwa, omuntu we yagambira Katonda nti, "Omuntu kye ki ggwe okumujjukira? Oba Omwana w'Omuntu ye ani ggwe okumussaako omwoyo?

⁷Wamusso obuteenkana nga bamalayika, okumala akaseera katono, wamutikkira engule ey'ekitiibwa n'ettendo,

⁸n'oteeka ebintu byonna wansi w'ebigere bye." Katonda atadde buli kintu wansi we. Kyokka kaakano tetulaba bintu byonna nga biteekeddwa wansi we.

⁹Naye tulaba Yesu eyassibwa wansi wa bamalayika okumala akaseera akatono. Olw'ekisa kya Katonda, yabonaabona n'afa, alyoke alege ku kufa ku lwa buli muntu, n'atikkirwa engule ey'ekitiibwa n'ettendo.

¹⁰Katonda oyo eyatonderwa ebintu byonna, era mu oyo Yesu Kristo ebintu byonna mwe byatonderwa, eyalondebwa okuleeta abaana abangi mu kitiiibwa. Era kyasaanira Yesu okubonyaabonyezebwa, ng'omukulembeze omutuukirivu, okubaleetera obulokozi.

¹¹Oyo atukuza era n'abo abatukuzibwa bava mu omu bona. Noolwekyo takwatibwa nsonyi kubayita baganda be.

¹²Agamba nti, "Nditegeeza baganda bange erinnya lyo, era nnaakuyimbiranga ennyimba wakati mu kkuuŋjaaniro."

¹³Era awalala agamba nti, "Nze nnaamwesiganga oyo." Ate ne yeeyongera n'agamba nti, "Laba nze n'abaana Katonda be yampa."

¹⁴ Olw'okubanga abaana balina omubiri n'omusaayi, naye yalina omubiri n'omusaayi, alyoke azikirize oyo alina amaanyi ag'okufa, ye Setaani.

¹⁵ Yakikola alyoke awe eddembe abo bonaabaali bamaze obulamu bwabwe bwonna mu buddu olw'entiisa y'okufa.

¹⁶ Kubanga eky'amazima kiri nti tayamba bamalayika, ayamba zzadde lya Ibulayimu.

¹⁷ Kyekyava kimugwanira mu byonna okufaananyizibwa baganda be, alyoke abeerenga Kabona Asinga Obukulu asaasira era omwesigwa mu kuweereza Katonda. Ekyo yakikola alyoke atangirire ebibi by'abantu.

¹⁸ Yabonaabona, ye yennyini ng'akemebwba, alyoke ayambe abo abakemebwba.

Abaebbulaniya 3

Yesu Mukulu okusinga Musa

¹ Kale abooluganda abatukuvu, Katonda b'ayise, mulowoozenga ku Yesu, Omutume Omukulu era Kabona Asinga Obukulu, gwe twatula.

² Yali mwesigwa eri oyo eyamulonda, era nga Musa bwe yali omwesigwa mu nnyumba ya Katonda yonna.

³ Kubanga ng'omuzimbi bw'aweebwa ekitiibwa okusinga ennyumba gy'azimbye, bw'atyo Yesu wa kitiiibwa okusinga Musa.

⁴ Kubanga buli nnyumba wabaawo agizimba, naye Katonda ye y'azimba buli kintu.

⁵ Musa yali muweereza mwesigwa mu nnyumba ya Katonda yonna, eyayogera eby'obunnabbi ku bintu ebyali bigenda okwogerwa mu biro eby'omu maaso.

⁶ Naye ate Kristo ye Mwana omwesigwa, akulira ennyumba ya Katonda; ate ffe tuli nnyumba y'oyo bwe tunywera ne tuba bavumu ne twenyumiririza mu ssuubi lye tunywezezza.

Ekiwummulo ky'Abaana ba Katonda

⁷ Noolwekyo nga Mwoyo Mutukuvu bw'agamba nti, "Leero bwe munaawulira eddoboozi lye,

⁸ temukakanyaza mitima gyammwe, nga bali bwe baajeema, ku lunaku lwe bagezesako Katonda mu ddungu.

⁹ Bajajammwe bangezes, ne balaba bye nakola mu myaka amakumi ana.

¹⁰ Kyennava nsunguwalira omulembe ogwo, ne njogera nti bulijo baba bakyamu mu mitima gyabwe, era tebamanyi makubo gange.

¹¹ Kyennava ndayira nga nsunguwadde nti, ‘Tebaliyingira mu kiwummulo kyange.’ ”

¹² Mwekuume abooluganda, omutima omubi ogw’obutakkiriza gulemenga kuba mu muntu yenna ku mmwe, ne gubaggya ku Katonda omulamu.

¹³ Mbuuliraganenga mwekka na mwekka bulijjo ng’ekiseera kikyaliwo, waleme okubaawo n’omu ku mmwe akakanyazibwa obulimba bw’ekibi.

¹⁴ Olw’okubanga tussa kimu mu Kristo, tunywereze ddala obwesige bwaffe bwe twatandika nabwo, era tubunywereze ddala okutuusa ku nkomerero.

¹⁵ Kyogerwako nti, “Leero bwe munaawulira eddoboozi lye temukakanyaza mitima gyammwe nga bwe mwakola bwe mwajeema.”

¹⁶ Be baani abaawulira, naye ne bajeema? Si abo bonaabaava mu Misiri ne Musa?

¹⁷ Era baani be yanyiigira okumala emyaka amakumi ana? Si abo abaayonoona ne bafiira mu ddungu?

¹⁸ Era baani abo Katonda be yalayirira obutayingira mu kiwummulo kye? Si abo abataagonda?

¹⁹ Era tulaba nga baalemwa okuyingira olw’obutakkiriza bwabwe.

Abaebbulaniya 4

Ssabiiti kiwummulo ky’Abantu ba Katonda

¹ Noolwekyo ng’ekisuubizo eky’okuyingira mu kiwummulo kye, bwe kikyaliwo, twerinde, omuntu yenna ku mmwe aleme kulabika nga takituuseemu.

² Kubanga naffe tubuuliddwa Enjiri, nga nabo bwe baagibuulirwa. Kyokka baalema okukkiriza ekigambo kye baawulira, era tebaalina kye baagasibwa.

³ Kubanga ffe abakkiriza, ffe tuyinza okuyingira mu kiwummulo kye, nga bwe yayogera nti, “Kyennava ndayira nga nsunguwadde nti, ‘Tebaliyingira mu kiwummulo kyange.’ ” Omulimu gwe gwaggwa ku kutondebwa kw’ensi.

⁴ Kubanga waliwo w’ayogerera nti, “Katonda bwe yamala okukola emirimu gye gyonna n’awummulira ku lunaku olw’omusanvu.”

⁵ Ayongera n’agamba nti, “Tebaliyingira mu kiwummulo kyange.”

⁶ Kyaterekwerwa abamu okuyingiramu, ate ng’abo abaasooka okubuulirwa Enjiri, tebaayingira olw’obujeemu.

⁷ Katonda kyeyava ateekateeka nate olunaku, n’alutuumma leero, bwe yayogerera mu Dawudi, oluvannyuma lw’ekiseera ekiwanvu nti, “Leero bwe munaawulira eddoboozi lye, Temukakanyaza mitima gyammwe.

⁸ Kubanga singa Yoswa yabatwala mu kifo eky'okuwummula, Katonda teyandiyogedde ku lunaku olulala olw'okuwummula."

⁹ Naye Katonda atusuubizza olunaku olwa Ssabiiti lwe tuliwummula, newaakubadde nga terunnatuuka.

¹⁰ Kubanga oyo ayingira mu kiwummulo kya Katonda, awummula emirimu gye nga Katonda bwe yawummula ng'amaze emirimu gye.

¹¹ Noolwekyo tufubenga okuyingira mu kiwummulo ekyo, omuntu yenna alemenga kugoberera ekyokulabirako ekibi eky'abajeemu.

¹² Ekigambo kya Katonda kiramu era kikola. Kisala okusinga ekitala eky'obwogi obubiri, era kiyitamu ne kituukira ddala ku mmeeme n'omwoyo, n'ennyingo n'obusomyo, era kyawula ebirowoozo n'okufumiitiriza kw'omutima.

¹³ Katonda amanyi ebintu byonna, so tewali kitonde na kimu ekikwekeddwaa amaaso ge. Alaba buli kintu, era tulyogera mazima nga tumutegeeza buli kimu.

Yesu Kristo Kabona Asinga Obukulu

¹⁴ Noolwekyo nga bwe tulina Kabona Asinga Obukulu, eyagenda mu ggulu, ye Yesu, Omwana wa Katonda, tunyweze okukkiriza kwe twayatula.

¹⁵ Tulina Kabona Asinga Obukulu alumirwa awamu naffe mu bunafu bwaffe, eyakemebwa mu byonna nga ffe, kyokka n'atakola kibi kyonna.

¹⁶ Kale tusembererenga entebe ya Katonda ey'obwakabaka ey'ekisa n'obuvumu, tufune okusaasirwa n'ekisa tubeerwe mu kwetaaga kwaffe.

Abaebbulaniya 5

¹ Buli Kabona Asinga Obukulu alondebwaa mu bantu n'ateekewawo okuweereza Katonda ku lwabwe, alyoke awengayo ebirabo n'essaddaaka olw'ebibi byabwe.

² Asobola okukwata empola abantu abatamanyi era n'abo abakyama, kubanga naye yennyini muntu eyeetooloddwa obunafu.

³ Olw'obunafu obwo, kimugwanira okuwangayo ssaddaaka ku lulwe yennyini ne ku lw'abantu.

⁴ Tewali muntu yenna ayinza okwefuala kabona wabula ng'ayitiddwa Katonda okukola omulimu, nga bwe yayita Alooni.

⁵ Ne Kristo bw'atyo teyeegulumiza yekka, okufuuka Kabona Asinga Obukulu. Katonda yamwogerako nti, "Ggwe oli Mwana wange, leero nkuzadde ggwe."

⁶ Era n'awalala agamba nti, "Ggwe walondebwaa okuba Kabona emirembe n'emirembe, ng'olubu lwa Merukizeddeeki bwe luli."

⁷ Mu kiseera Yesu kye yabeerera ku nsi mu mubiri ogw'obuntu, yasaba ne yeegayirira oyo ayinza okumulokola mu kufa nga bw'akaaba amaziga mu ddoboozi ery'omwanguka. Yesu yasinza Katonda mu mazima, Katonda n'awulira okusaba kwe.

⁸ Newaakubadde yali Mwana wa Katonda, yayiga okumugondera ne bwe kwamutuusanga mu kubonaabona.

⁹ Era bwe yamala okutuukirizibwa, n'afuuka obulokozi obutaggwaawo eri abo bona abagondera Katonda.

¹⁰ Katonda yamuyita okuba Kabona Asinga Obukulu ng'olubu lwa Merukizeddeeki bwe luli.

Okulabula ku kudda ennyuma

¹¹ Waliwo bingi bye twandiyagadde okumwogerako, naye ate nga kizibu okubinyonnyola, kubanga temuyiga mangu.

¹² Newaakubadde nga kaakano mwandibadde musobola okuyigiriza abalala, kyetaaga okuddamu okubayigiriza, ebintu ebya bulijo eby'amazima ebikwata ku kigambo kya Katonda. Mwetaaga mata so si mmere enkalubo ey'abakulu.

¹³ Kubanga omuntu bw'aba ng'akyanywa mata, aba akyali mwana muto. Aba tannategeera kigambo kikwata ku by'obutuukirivu.

¹⁴ Naye emmere enkalubo ya bakulu, abeeyigirizza okwawulanga ekirungi n'ekibi.

Abaebbulaniya 6

¹ Noolwekyo tulekeraawo okuyiga ebintu bya Kristo ebisookerwako, tukule mu by'omwoyo. Tulekeraawo okwogera ku bisookerwako byokka, ng'okwenenya ebikolwa ebireeta okufa, by'ebikolwa eby'obulombolombo, naye tuteekwa n'okuba n'okukkiriza mu Katonda.

² Tulekeraawo okuyigiriza obulombolombo obw'okubatizibwa, n'obw'okussibwako emikono, n'enjigiriza ey'okuzuukira kw'abafu, n'okusalirwa omusango ogw'olubeerera.

³ Katonda nga bw'asiima, tukule mu mwoyo.

⁴ Kizibu okuzza mu kwenenya abo abaamala okufuna ekitangaala ne balega ku birungi eby'omu ggulu, ne bafuuka abassa ekimu mu Mwoyo Omutukuvu,

⁵ ne bamanya obulungi bw'ekigambo kya Katonda, ne balega ku maanyi ag'emirembe egigenda okujja,

⁶ naye ne bava ku Katonda. Baba bakomerera Omwana wa Katonda omulundi ogwokubiri, ne bamuswaza mu lwatu.

⁷Ettaka ligasa omulimi, bwe lifuna obulungi enkuba, ne lisigibwamu ensigo era ne muvaamu ebibala ebirungi. Ne Katonda aliwa omukisa.

⁸Naye bwe libaza amatovu, n'amaggwa, ettaka eryo teriba lya mugaso liba kumpi n'okukolimirwa. Ku nkomerero, ebimezeeko byokebwa.

⁹Naye abaagalwa, newaakubadde twogera bwe tutyo mmwe tetubabuuusabuusa. Tumanyi nga mulina ebintu ebirungi era mukola ebintu ebiraga nti muli mu kkubo ery'obulokozi.

¹⁰Kubanga Katonda mwenkanya tayinza kwerabira mulimu gwammwe omunene bwe gutyo, n'okwagala kwe mwagala erinnya lye, era amanyi bwe mwaweeresa abantu be, era bwe mukyeyongera okubaweeresa.

¹¹Era twagala buli omu ku mmwe yeeyongere okulaganga obuniikivu obwo okutuusiza ddala ku nkomerero, lwe mulifuna ekyo kye musuubira.

¹²Tetwagala mube bagayaavu, wabula mube ng'abo abakkiriza era abagumiikiriza ne bafuna ekyasuubizibwa.

Obukakafu bw'ebisuubizo bya Katonda

¹³Katonda bwe yasuubiza Ibulayimu, nga bwe wataali mulala gw'ayinza kwerayirira amusinga, yeerayirira yekka.

¹⁴Yalayira ng'agamba nti, "Ndikuweera ddala omukisa, era n'okukwaza nnaakwazanga."

¹⁵Bw'atyo Ibulayimu bwe yalindirira n'obugumiikiriza, n'aweebwa ekyasuubizibwa.

¹⁶Abantu balayira omuntu abasinga obukulu, ku nkomerero kye balayidde kye kisalawo.

¹⁷Ne Katonda bw'atyo, kyeyava atekawo ekirayiro ng'ayagala okukakasiza ddala abasika b'ekisuubizo nti talijjulula ekyo kye yasuubiza.

¹⁸Katonda yakikola bw'atyo, okutulaga ebintu bibiri ebitajjulukuka, nti akuum aekisuubizo kye awamu n'ekirayiro kye. Talimba. Noolwekyo ffe abaddukira gy'ali okutulokola, tusaana okuba abagumu kubanga talirema kutuwa ebyo bye yasuubiza.

¹⁹Essuubi eryo lye linywereza ddala emmeeme zaffe ng'ennanga bw'enyeza eryato. Essuubi eryo lituingiza munda w'eggigi.

²⁰Yesu eyatusooka yo, eyo gye yayingira ku lwaffe, bwe yafuuka Kabona Asinga Obukulu ow'emirembe gyonna, ng'olubu lwa Merukizeddeeki bwe luli.

Abaebbulaniya 7

Kabona Merukizeddeeki

¹ Merukizeddeeki yali kabaka w'e Ssaalemi, era yali kabona wa Katonda Ali Waggulu Ennyo. Ibulayimu bwe yali ng'ava mu lutalo mwe yattira bakabaka, Merukizeddeeki n'amusisinkana, n'amusabira omukisa.

² Ne Ibulayimu n'awa Merukizeddeeki ekitundu eky'ekkumi ekya byonna bye yanyaga. Okusooka erinnya Merukizeddeeki litegeeza nti Kabaka ow'Obutuukirivu. Ate era litegeeza kabaka w'e Ssaalemi ekitegeeza nti ye kabaka ow'emirembe.

³ Merukizeddeeki taliiko kitaawe oba nnyina. Ennaku ze teziriiko ntandikwa wadde enkomerero, era n'obulamu bwe tebukoma. Asigala kabona emirembe gyonna, ng'Omwana wa Katonda.

⁴ Kale mulabe Merukizeddeeki oyo nga bwe yali omukulu! Ibulayimu jjajjaffe yamuwa ekimu eky'ekkumi ekya byonna bye yanyaga.

⁵ N'abo abazzukulu ba Leevi abaaweebwa obwakabona, balagirwa okusoloozanga ekimu eky'ekkumi ng'etteeka bwe ligamba, newaakubadde nga baava mu ntumbwe za Ibulayimu, kwe kugamba nti nabo baganda baabwe.

⁶ Naye oyo ataabalibwa mu kika kyabwe, yafuna ekimu eky'ekkumi okuva eri Ibulayimu, Merukizeddeeki n'asabira omukisa oyo eyalina ebyasuubizibwa.

⁷ Tewali kubuusabuusa omukulu y'asabira omuto omukisa.

⁸ Mu ngeri emu, ekimu eky'ekkumi kiweebwa eri abantu abafa, naye mu ngeri endala, kiweebwa eri oyo akakasibwa nga mulamu.

⁹ Noolwekyo ka tugambe nti okuyita mu Ibulayimu, ne Leevi aweebwa ekimu eky'ekkumi, naye yawaayo ekimu eky'ekkumi.

¹⁰ Yali akyali mu ntumbwe za jjajjaawe, Merukizeddeeki bwe yamusisinkana.

¹¹ Kale singa okutuukirira kwaliwo lwa bwakabona obw'Ekileevi, kubanga abantu baaweebwa amateeka nga gasinzira ku bwo, kiki ekyetaaza kabona omulala okuva mu lubu lwa Merukizeddeeki, mu kifo ky'okuva mu lubu lwa Alooni?

¹² Kubanga bwe wabaawo okukyusibwa mu bwakababona, era kiba kyetaagisa n'okukyusa mu mateeka.

¹³ Oyo ayogerwako ebigambo ebyo wa kika kirala omutaavanga muntu eyali aweerezaako ku Kyoto.

¹⁴ Kubanga kimanyiddwa nga Mukama waffe yava mu Yuda ekika Musa ky'ataayogerako bigambo bya bwakabona.

¹⁵ Era kitegeerekeka nga wazeewo Kabona omulala mu kifaananyi kya Merukizeddeeki,

¹⁶atassibwawo ng'amateeka ag'ebiragiro eby'omubiri bwe gali, wabula ng'amaanyi bwe gali ag'obulamu obutaggwaawo.

¹⁷Kubanga Kristo ayogerwako nti, "Oli kabona okutuusa emirembe gyonna ng'olubu lwa Merukizeddeeki bwe luli."

¹⁸Ekiragiro ekyasooka kijjululwa olw'obunafu n'olw'obutagasa bwakyo,

¹⁹kubanga amateeka tegaliiko kye gatuukiriza, wabula essubi erisinga obulungi, mwe tuyita okusemberera Katonda.

²⁰Era kino tekyakolebwa watali kirayiro. Waliwo abaafuulibwa bakabona awatali kirayiro,

²¹naye ye yafuulibwa kabona mu kirayiro, ng'ayita mu oyo amwogerako nti, "Mukama yalayira era tagenda kwejjusa: 'Oli kabona emirembe gyonna.'"

²²Yesu kyeyava afuuka omuyima w'endagaano esinga obulungi.

²³Bangi abaafuulibwa bakabona kubanga baafanga ne basikirwa.

²⁴Naye olwokubanga Yesu abeerera emirembe gyonna, alina obwakabona obutakyukakyuka.

²⁵Era kyava ayinza okulokolera ddala abajja eri Katonda ku bubwe, kubanga abeera mulamu ennaku zonna okubawolereza.

²⁶Noolwekyo Kabona Asinga Obukulu afaanana bw'atyo ye yatusaanira, omutukuvu, ataliiko musango, wadde ebbala, eyayawulibwa okuva ku abo abalina ebibi, era eyagulumizibwa okusinga eggulu,

²⁷ataliiko kye yeetaaga ekya buli lunaku, nga bakabona abakulu abalala, okusooka okuwangayo ssaddaaka olw'ebibi bye ye, n'oluvannyuma olw'ebyo eby'abantu abalala. Ekyo yakikola omulundi gumu, bwe yeewaayo yennyini.

²⁸Amateeka gaalondanga abantu okuba Bakabona Abasinga Obukulu n'obunafu bwabwe, naye ekigambo eky'ekirayiro, ekyaddirira amateeka, kironda Omwana eyatuukirira okutuusa emirembe gyonna.

Abaebbulaniya 8

Kabona Omukulu ow'Endagaano Empya

¹Ekigambo ekikulu ekiri mu bye twogedde kye kino nti, Tulina Kabona Asinga Obukulu, atudde ku mukono ogwa ddyo, ogw'entebe ya Katonda ey'obwakabaka mu ggulu,

²omuweereza w'ebitukuvu, era ow'eweema ey'Okukuŋŋaanirangamu ey'amazima, etaazimbibwa bantu wabula Mukama.

³ Kubanga Kabona Asinga Obukulu yenna alondebwa olw'omulimu ogw'okuwaayo ebirabo ne ssaddaaka, bwe kityo n'oyo kyamugwanira okuba n'ekintu ky'awaayo.

⁴ Singa yali ku nsi, teyandibadde kabona kubanga waliwo bakabona abawaayo ebirabo ng'amateeka bwe galagira.

⁵ Kye bakola kifaananako bufaananyi era kisiikirize ky'ebyo ebikolebwa mu ggulu. Musa kyeyava alabulwa, bwe yali ng'anaatera okumaliriza weema, Mukama n'amugamba nti, "Bw'oba ng'ozimba, goberera entegeka yonna eyakulagirwa ku lusozi."

⁶ Naye kaakano omulimu Yesu gwe yaweebwa, gusinga nnyo ogwa bali obukulu, kubanga n'endagaano gy'alimu ng'omutabaganya y'esinga obulungi, n'ebisuubizo kw'enywederedde, bye bisinga obulungi.

⁷ Singa endagaano eyasooka teyaliiko kyakunenyezebwa, tewandibaddewo kyetaagisa yaakubiri.

⁸ Kubanga bw'abanenya ayogera nti, "Laba ennaku zijja," bw'ayogera Mukama, "ndiragaana endagaano empya n'ennyumba ya Isirayiri, awamu n'ennyumba ya Yuda.

⁹ Endagaano eno empya terifaanana n'eri gye nalagaana ne bajjajaabwe lwe nabakwata ku mukono okubaggya mu nsi y'e Misiri. Olw'okubanga tebaagoberera ndagaano yange, nange ssaabassaako mwoyo," bw'ayogera Mukama.

¹⁰ "Eno y'endagaano gye ndiragaana n'ennyumba ya Isirayiri, oluvannyuma lw'ennaku ezo, bw'ayogera Mukama. Ndissa amateeka gange mu birowoozo byabwe era ndiwandiika amateeka gange ku mitima gyabwe, nange nnaabeeranga Katonda waabwe, nabo banaabeeranga bantu bange.

¹¹ Era tewaliba nate muntu ayigiriza munne oba muliraanwa we, oba muganda we ng'agamba nti, 'Manya Mukama,' Kubanga okuva ku muto okutuuka ku mukulu bona balimmany.

¹² Era ndibasaasira, n'ebibi byabwe siribijjukira nate."

¹³ Katonda bw'ayogera ku ndagaano empya, olwo ng'andibizza ey'edda; n'eyo gy'adibizza n'okukaddiwa n'ekaddiwa, eriggwaawo.

Abaebbulaniya 9

Okusinza ku nsi ne mu ggulu

¹ Endagaano ey'olubereberye, yalina amateeka agaalagirwa ag'okusinzanga Katonda, era waaliwo n'eweema entukuvu ey'oku nsi.

²Mu weema eno mwalimu ebisenge bibiri. Mu kisenge ekisooka nga mwe muli ekikondo ekya zaabu eky'ettaala, n'emmeeza okwabeeranga emigaati emyawule, ekisenge kino kyayitbwanga Ekifo Ekitukuvu.

³Era waaliwo olutimbe olwokubiri ng'emabega waalwo we wali ekifo ekiyitibwa Awatukuvu w'Awatukuvu.

⁴Mu kifo ekyo mwalimu ekyoterezo ky'obubaane ekya zaabu, n'essanduuko ey'endagaano, eyabikkibwako zaabu ku buli ludda. Mu ssanduuko nga mulimu ekibya ekya zaabu ekyalimu emmaanu, n'omuggo gwa Alooni nga gutojjedde, n'ebipande eby'amayinja eby'Amateeka Ekkumi eby'endagaano.

⁵Ku kisaanikira ky'essanduuko nga kuliko bakerubbi ab'ekitiibwa nga basiikirizza entebe ey'okusaasira; ebintu ebyo tetuyinza kubyogerako kaakano kinnakimu.

⁶Ebintu byonna nga bimaze okutegekebwa bwe bityo, bakabona baayingiranga mu kisenge ekisooka buli lunaku ne bakola emirimu gyabwe egy'okuweereza.

⁷Naye Kabona Asinga Obukulu yekka ye yayingiranga mu kisenge eky'omunda omulundi gumu buli mwaka. Yagendangayo n'omusaayi, gwe yawangayo ku lulwe n'olw'ebibi by'abantu bye baakolanga mu butanwa.

⁸Mu bino byonna, Mwoyo Mutukuvu atutegeeza bulungi nti, Ekkubo erituuka mu bifo ebitukuvu lyali terinnamanyika, ng'eweema ey'Okukuñjaanirangamu ey'olubereberye ekyaliwo, n'enkola ey'edda ng'ekyaliwo.

⁹Amakulu geekyo mu kiseera kya leero, ge gano: ebirabo ne Ssaddaaka ebyaweebwangayo tebiyinza kutukuza mutima gw'oyo asinza.

¹⁰Bikoma ku byakulya na byakunywa na ku bulombolombo obw'okunaaba, n'ebiragiro abantu bye baalina okukwata n'okugondera okutuusa ku biro eby'okuzza ebintu obuggyga.

Omusaayi gwa Kristo

¹¹Kristo yajja nga Kabona Asinga Obukulu ow'ebintu ebirungi ebyali bigenda okujja. Yayingira mu weema esinga obukulu n'okutuukirira, etaakolebwa na mikono nya bantu, etali ya mu nsi muno.

¹²Teyayingira na musaayi gwa mbuzi wadde ogw'ente ennume, naye yayingira mu Watukuvu w'Awatukuvu omulundi gumu gwokka n'omusaayi gwe; bw'atyo ye yennyini n'atufunira obulokozi obutaggwaawo.

¹³Obanga omusaayi gw'embuzi, n'ente ennume, n'evvu ly'ente enduusi, bimansirwa ku abo abalina ebibi, ne bibatukuza mu mubiri;

¹⁴omusaayi gwa Kristo ataliiko kamogo, eyeewaayo ye yennyini eri Katonda olw'Omwoyo ataggwaawo, tegulisinga nnyo okutukuza emyoyo gyaffe okuva mu bikolwa ebifu tulyoke tuweereze Katonda omulamu?

¹⁵ Noolwekyo Kristo ye mutabaganya mu ndagaano empya, okufa bwe kwabaawo olw'okununulibwa okuva mu byonoono eby'omu ndagaano eyasooka, abo abaayitibwa ab'obusika obutaggwaawo balyoke baweebwe ekisuubizo.

¹⁶ Kubanga ekiraamo kiteekebwa mu nkola ng'eyakikola amaze kufa.

¹⁷ Kubanga kikola ng'eyakikola afudde, kubanga tekiba na makulu eyakikola bw'aba ng'akyali mulamu.

¹⁸ Era n'endagaano ey'olubereberye teyakolebwa awatali musaayi.

¹⁹ Kubanga Musa bwe yamala okuwa abantu bona Amateeka, n'atwala omusaayi gwa zisseddume n'ogw'embuzi, n'amazzi, n'addiru obutabi obw'akawoowo obwa ezobu, n'ebyoya by'endiga ebiriko omusaayi, n'amansira ku kitabo kyennyini era ne ku bantu.

²⁰ N'ayogera nti, "Guno gwe musaayi gw'endagaano Katonda gye yabalagira okukwata."

²¹ Era bw'atyo n'amansira ne ku weema ey'Okukuñjaanirangamu, ne ku byonna ebyakozesewanga mu kusinza.

²² Era mu mateeka buli kintu kitukuzibwa na musaayi, era awatali kuyiwa musaayi tewabaawo kusonyiyibwa.

²³ Ebifaananyi by'ebintu eby'omu ggulu kyebiva byetaaga okutukuzibwa ne ssaddaaka, naye ebintu eby'omu ggulu byennyini biteekwa kutukuzibwa na ssaddaaka ezisinga ezo.

²⁴ Kubanga Kristo teyayingira mu kifo kya Watukuvu w'Awatukuvu ekyakolebwa n'emikono gy'abantu, naye yayingira mu ggulu mwennyini gy'ali kaakano mu maaso ga Katonda ku lwaffe.

²⁵ Kristo teyayingira mu ggulu kwewangayo mirundi mingi, nga Kabona Asinga Obukulu bw'ayingira mu Watukuvu w'Awatukuvu buli mwaka n'omusaayi ogutali gugwe,

²⁶ Kubanga kyali kimugwanira okubonaabonanga emirundi mingi okuva ku kutondebwa kw'ensi. Naye kaakano yajja omulundi gumu ku nkomerero y'omulembe, ne yeewaayo yennyini ng'ekiweebwayo.

²⁷ Ng'abantu bwe baterekwerwa okufa omulundi gumu n'oluvannyuma okulamulwa ne kutuuka,

²⁸ era ne Kristo bw'atyo yaweebwayo omulundi gumu ne yeetikka ebibi by'abantu bona. Alirabika nate omulundi ogwokubiri, si kuddamu kwetikka bibi byaffe, wabula okuleeta obulokozi eri abo abamulindirira.

Abaebbulaniya 10

Kristo yeewaayo omulundi gumu ku lwa bona

¹ Amateeka kisiikirize busiikirize eky'ebirungi ebigenda okujja, go ku bwagwo tegamala, kubanga ssaddaaka ezo ze zimu eza buli mwaka ze bawaayo obutayosa ezitayinza kutukuza abo abaziwaayo.

² Ssaddaaka ezo zandibadde tezikyaweebwayo, kubanga abaaziwaayo, omulundi ogumu gwandibamaze okubatukuza, ne bataddayo kweraliikirira olw'ebibi byabwe.

³ Naye ssaddaaka eza buli mwaka zaabajukizanga ebibi byabwe.

⁴ Kubanga omusaayi gw'ente ennume n'embuzi tegusobola kuggyawo bibi.

⁵ Noolwekyo Kristo bwe yali ng'ajja mu nsi kyeyava agamba nti, "Ssaddaaka n'ebiweebwayo tewabyagala. Naye wanteekerateekera omubiri.

⁶ Ebiweebwayo ebyokebwa n'ebiweebwayo olw'ekibi, tewabisima.

⁷ Kyennava njogera nti, 'Nzuno, nga bwe kyawandiikibwa mu mizingo gy'ebyawandiikibwa: Nzize okukola by'oyagala, ng'Ebyawandiikibwa bwe binjogerako.'

⁸ Nga bwe kyogera waggulu nti, Ssaddaaka n'ebiweebwayo, n'ebiweebwayo ebiramba ebyokebwa, n'ebiweebwayo olw'ebibi tewabyagala so tewabisima, so nga biweebwayo ng'amateeka bwe galagira,

⁹ n'alyoka agamba nti, "Nzuuno nzize okukola by'oyagala." Noolwekyo aggyawo enkola esooka alyoke anyweze enkola eyookubiri.

¹⁰ Twatukuzibwa olw'okwagala kwe, omubiri gwa Yesu Kristo bwe gwaweebwayo omulundi ogumu ku lwaffe ffenna.

¹¹ Buli kabona ayimirira buli lunaku ng'aweereza, n'awaayo ssaddaaka mu ngeri y'emu, ezitayinza kuggyawo bibi,

¹² naye Kristo bwe yamala okuwaayo ssaddaaka ey'emirembe gyonna, olw'ebibi, n'alyoka atuula ku mukono ogwa ddyo ogwa Katonda.

¹³ Okuva mu kiseera kino alindirira abalabe be bafuilibwe entebe y'ebigere bye.

¹⁴ Kubanga olw'ekiweebwayo ekyo ekimu, abaatukuzibwa yabawa obutuukirivu obw'emirembe gyonna.

¹⁵ Mwoyo Mutukuvu naye akikakassa bw'ayogera nti,

¹⁶ "Eno y'endagaano gye ndikola nabo, oluvannyuma lw'ennaku ezo, bw'ayogera Mukama. Nditeeka amateeka gange ku mitima gyabwe, era ndiwandiika amateeka gange mu myoyo gyabwe."

¹⁷ Ayongerako kino nti, "Sirijjukira nate bibi byabwe newaakubadde obujeemu bwabwe."

¹⁸ Naye kaakano awali okusonyiyibwa ebintu ebyo, waba tewakyali kyetaagisa kuwaayo kiweebwayo olw'ebibi.

Obugumiikiriza

¹⁹ Kale abooluganda nga bwe tulina obuvumu okuyingira mu Watukuvu w'Awatukuvu olw'omusaayi gwa Yesu,

²⁰ eyatuggulirawo ekkubo eriggya era eddamu eriyita mu lutimbe, gwe mubiri gwe,

²¹ kale nga bwe tulina Kabona Asinga Obukulu nga y'afuga ennyumba ya Katonda,

²² tusembere awali Katonda n'omwoyo ogw'amazima ogujjudde okukkiriza nga tulina emitima egitukuzibba okuva mu ndowooza embi, era nga n'emibir gyaffe ginaazibba n'amazzi amatukuvu.

²³ Kale tunyweze essuubi lye twatula nga tetusagaasagana, kubanga eyasuubiza mwesigwa,

²⁴ era tussengayo omwoyo buli muntu eri munne, nga twekubiriza mu kwagala ne mu kukola ebikolwa ebirungi.

²⁵ Tuleme kulekayo kukuŋjaana, ng'abamu bwe bakola, naye buli muntu agumye munne, na ddala nga bwe mulaba nti, Olunaku lw'okudda kwa Mukama waffe luseembedde.

²⁶ Singa tukola ebibi mu bugenderevu, nga tumaze okumanya amazima, waba tewakyaliwo ssaddaaka eweebwayo olw'ekibi.

²⁷ Wabula ekiba kisigadde kwe kulindirira okusalirwa omusango ogw'ekibonerez eky'omuliro ogw'amaanyi ogugenda okumalawo abalabe ba Katonda.

²⁸ Omuntu yenna eyajeemeranga amateeka ga Musa yattibwanga awatali kusaasirwa, bwe waabangawo abajulirwa babiri oba basatu abamulumiriza.

²⁹ Noolwekyo omuntu alinnyirira Omwana wa Katonda, era n'omusaayi gw'endagaano ogunaazaako ebibi n'aguyisa ng'ogwa bulijo, era n'anyoomoola Omwoyo ow'ekisa, talibonerezebwa n'obukambwe obusingawo?

³⁰ Kubanga tumumanyi oyo eyagamba nti, "Okuwoolera eggwanga kwange. Nze ndisasula." Era nti, "Mukama y'aliramula abantu be."

³¹ Kintu kya ntiisa okugwa mu mikono gya Katonda omulamu!

³²Mujukire ennaku ez'edda bwe mwategeera Kristo, ne mugumiikiriza okubonyaabonyezebwa okw'amaanyi.

³³Oluusi mwavumibwanga era ne muyigganyizibwa mu lwatu, ate olulala ne mussa kimu n'abo abaabonaabona nga mmwe.

³⁴Mwalumirwa wamu n'abasibe, era mwagumiikiriza n'essanyu bwe mwanyagibwako ebyammwe kubanga mwamanya nti mulina ebisinga obulungi era eby'olubeerera ebibalindiridde.

³⁵Kale munywererenga ku buvumu bwammwe bwe mulina, obuliko empeera ennene.

³⁶Kubanga kibasaanira okugumiikiriza nga mukola Katonda by'ayagala mulyoke mufune ebyo bye yasuubiza.

³⁷Wasigadde akaseera katono nnyo, oyo ow'okujja ajje era talirwa.

³⁸Omutuukirivu wange, anaabanga mulamu lwa kukkiriza, kyokka bw'adda emabega simusanyukira.

³⁹Naye ffe tetuli ba kudda mabega mu kuzikirira, wabula tulina okukkiriza okunywevu okutuleetera okulokoka.

Abaebbulaniya 11

Okukkiriza

¹Okukkiriza kwe kukakasa ebyo bye tusuubira, bwe butabaamu kakunkuna newaakubadde nga tebirabika.

²Okukkiriza kwe kwaleetera abantu ab'edda abakulu okusiimibwa Katonda.

³Olw'okukkiriza tumanyi ng'ensi yatondebwa na kigambo kya Katonda, ebirabika kyebyava bikolebwa nga biggibwa mu bitalabika.

⁴Olw'okukkiriza Aberi yawaayo Ssaddaaka esinga obulungi eri Katonda okusinga eya Kayini gye yawaayo, era ne kimubalirwa okuba obutuukirivu, Katonda ng'amuweerwa obujulirwa olw'ebirabo bye, era newaakubadde nga Aberi yafa, akyayogera.

⁵Olw'okukkiriza Enoka yatwalibwa nga taleze ku kufa, n'atalabika kubanga Katonda yamutwala. Bwe yali tannamutwala, yayogera nga Enoka bwe yamusanya.

⁶Naye awatali kukkiriza toyinza kusanyusa Katonda. Buli ajja eri Katonda kimugwanira okukkiriza nti Katonda waali era n'abo abamunoonya n'obwesigwa abawa empeera.

⁷ Nuuwa bwe yalabulwa ku bintu bye yali tannalaba, n'atya, era mu kukkiriza n'azimba eryato olw'okulokola ennyumba ye. Bw'atyo n'asalira ensi omusango, ate n'afuuka omusika w'obutuukirivu obuli mu kukkiriza.

⁸ Olw'okukkiriza Ibulayimu bwe yayitibwa, n'agonda, n'alaga mu kifo kye yali agenda okuweebwa ng'omugabo, bw'atyo n'agenda nga ne gy'alaga tamanyiyo.

⁹ Era ne bwe yatuuka mu nsi Katonda gye yamusubiza, mu nsi gye yali tamanyangako, olw'okukkiriza yasulanga mu weema era Isaaka ne Yakobo nabo bwe baakola, Katonda ng'abasuubizza nga bwe yasuubiza Ibulayimu.

¹⁰ Ibulayimu yali alindirira ekibuga kiri ekirina omusingi, Katonda kye yategeka era n'azimba.

¹¹ Olw'okukkiriza ne Saala yennyini, omukazi omugumba yaweebwa amaanyi okuba olubuto newaakubadde nga yali ayise ku myaka egy'okuzaalirako; yakkiriza nti oyo amusuubizza mwesigwa.

¹² Bwe kityo bangi ne bava mu muntu omu eyali omukadde ennyo ne baba bangi nnyo ng'emmunyeenye ez'oku ggulu, era ng'omusenyu oguli ku nnyanja ogutabalika.

¹³ Abo bona baafira mu kukkiriza. Baafa nga Katonda bye yabusubiza tebannabifuna, naye nga basanyufu nga bamanyi nti bibalindiridde, kubanga baategeera nti ku nsi kuno baali bagenyi bugenyi abatambuze.

¹⁴ Aboogera bwe batyo balaga nti bayolekedde obutaka bwabwe obw'omu nsi endala.

¹⁵ Abantu abo singa baalowooza ku birungi eby'ensi eno bandisobodde okudda emabega.

¹⁶ Naye kaakano beegomba ensi esingako, ye y'omu ggulu. Katonda kyava aba Katonda waabwe, nga tekimuswaza kuyitibwa bw'atyo, kubanga abateekeddetekedde ekibuga.

¹⁷ Olw'okukkiriza Ibulayimu bwe yagezesebwa, n'awaayo Isaaka omwana we omu yekka, eyaweebwa ebyasuubizibwa,

¹⁸ gwe kyayogerwako nti, "Mu Isaaka mw'olifunira abazzukulu,"

¹⁹ gwe yamanya nga Katonda ayinza okumuzuukiza mu bafu, era n'ayaniriza Isaaka, nga Isaaka ali ng'azuukidde mu bafu.

²⁰ Olw'okukkiriza ebyo ebyali bigenda okubaawo, Isaaka yasabira Yakobo ne Esawu omukisa.

²¹ Olw'okukkiriza Yakobo bwe yali anaatera okufa, yasabira bazzukulu be abaana ba Yusufu omukisa kinoomu, n'akutama ku muggo gwe n'asinza Katonda.

²² Yusufu bwe yali anaatera okufa, olw'okukkiriza yayogera ku kuva kw'abaana ba Isirayiri mu Misiri, era n'abalagira n'okutwala amagumba ge nga baddayo ewaabwe.

²³ Olw'okukkiriza bakadde ba Musa bwe yazaalibwa baamukwekera emyezi esatu, kubanga baalaba nga mwana mulungi, ne batatya kiragiro kya Falaawo.

²⁴ Olw'okukkiriza Musa ng'akuze, yagaana okuyitibwa omwana w'omumbejja wa Falaawo

²⁵ n'alondawo okubonaabonera awamu n'abantu ba Katonda n'agaana okuba mu ssanyu ery'ekibi eriggwaawo amangu.

²⁶ Musa yalaba nti okuvumibwa olwa Kristo kisingira wala obugagga bw'e Misiri, kubanga yali asuubira empeera.

²⁷ Olw'okukkiriza Musa yava mu Misiri nga tatya busungu bwa Falaawo, kubanga yanywera ng'alaba Katonda oyo atalabika na maaso buuso ag'omubiri.

²⁸ Olw'okukkiriza Musa yassaawo Embaga ejjuukirirwako Okuyitako, n'amansira omusaayi omuzikiriza aleme okutta abaana ababereberye Abayisirayiri.

²⁹ Olw'okukkiriza Abayisirayiri baasomoka Ennyanja Emyufu ng'abayita ku lukalu. Naye Abamisiri bwe baakigezaako amazzi ne gabasaanyaawo.

³⁰ Olw'okukkiriza, bbugwe wa Yeriko yagwa nga kimaze okwebungululirwa ennaku musanvu.

³¹ Olw'okukkiriza malaaya Lakabu, teyazikirizibwa n'abajeemu, kubanga yasembeza abakessi, n'emirembe.

³² Njogere ki nate? N'ekiseera kinaanzigwako bwe nnaayogera ku Gidyon, ne ku Baraki, ne Samusooni, ne Yefusa, ne Dawudi, ne Samwiri ne bannabbi abalala,

³³ abaawangula bakabaka olw'okukkiriza, be baakola eby'obutuukirivu, be baafuna ebyasuubizibwa, era be baabuniza obumwa bw'empologoma,

³⁴ be baazikiza omuliro ogw'amaanyi, be baawona obwogi bw'ekitala. Be baaweebwa amaanyi okuva mu bunafu, era be baafuuka abazira ab'amaanyi mu ntalo, ne bagoba amaggye g'amawanga.

³⁵ Abakazi baddizibwa abantu baabwe abaali bafudde ne bazuukira. Abalala baabonyaabonyezebwa okutuusa okufa, nga tebalokolebbwa, balyoke bafune obulamu obusingako nga bazuukidde.

³⁶ N'abalala ne basekererwa ne bakubibwa embooko nga bagezesebwa, n'abalala ne basibwa ne bateekebwaa ne mu makomera.

³⁷Baakubibwa amayinja, baasalibwamu n'emisumeeeno, ne battibwa n'ekitala. Baatambulanga nga bambadde amaliba g'endiga n'ag'embuzi nga kumpi tebalina kantu, nga bali mu kwetaaga, ne banyigirizibwa, ne bayisibwa bubi,

³⁸n'ensi nga tebasaanira, nga bayita mu malungu ne mu nsozi nga beekweka mu mpuku ne mu mpampagama z'enjazi.

³⁹Naye abantu bano bona abajjula okukkiriza tebaafuna kyasuubizibwa.

⁴⁰Kubanga Katonda yatuteekerateekera ekisinga obulungi, bo baleme okutuukirizibwa ffe nga tetuliiwo.

Abaebbulaniya 12

Katonda akangavvula abaana be

¹Kale nga bwe tulina ekibiina ekinene eky'abajulirwa ekyenkana awo, twambulengamu buli ekizitowa, awamu n'ekibi ekitwesibako amangu, tuddukenga n'okugumiikiriza embiro ez'empaka ezatutegekerwa,

²nga tutunuulira Yesu eyatandika okukkiriza era y'akutuukiriza, olw'essanyu lye yali alindirira bwe yagumiikiriza omusaalaba, ng'anyooma ensonyi, n'atuula ku luuyi olwa ddyo olw'entebe ya Katonda.

³Kale mulowooze oyo eyagumiikiriza okuwakanyizibwa okw'abakozi b'ebibi bwe kutyo, mulemenga okukoowa mu mmeeme zammwe nga mutendewererwa ne mu mutima.

⁴Temunnalwanaganana na kibi okutuusa ne kukuyiwa omusaayi!

⁵Mwerabidde ebigambo ebizzaamu amaanyi byayogera nammwe ng'abaana be? Agamba nti, "Mwana wange, tonyoomanga kukangavvulwa kwa Mukama, so toggwangamu maanyi ng'akunenyezza.

⁶Kubanga Mukama gw'ayagala amukangavvula, Era abonereza buli gw'ayita omwana we."

⁷Noolwekyo mugumiikirize okukangavvulwa, kubanga Katonda abakangavvula ng'abaana be. Mwana ki kitaawe gw'atakangavvula?

⁸Naye singa temukangavvulwa, nga bwe kitugwanira ffenna, muba temuli baana be ddala.

⁹Kale, nga bwe mussaamu ekitiibwa bakitaffe ab'omubiri, newaakubadde nga batukangavvula, nga batuyigiriza, kitaawe w'emyoyo talisinga nnyo okutukangavvula ne tuba abalamu?

¹⁰Bakitaffe ab'omubiri baatugunjulira ennaku si nnyingi, naye ye atugunjula tugasibwe tulyoke tusobole okugabanira awamu naye mu butukuvu bwe.

¹¹ Okukangavvulwa kwonna mu biro ebya kaakano tekufaanana nga kwa ssanyu, kuba kwa bulumi, naye oluvannyuma kuleeta ebibala eby'emirembe eri abo abayigirizibwa, era ekivaamu bwe butuukirivu.

¹² Bwe mutyo munyweze emikono gyammwe egikooye n'amaviivi gammwe agajugumira,

¹³ era ebigere byammwe mubikolere ekkubo eggolokofu, abo ababagoberera newaakubadde nga balema era banafu, baleme okuva mu kkubo eryo, wabula bawonyezebwe.

Okulabulwa obutagaana Katonda

¹⁴ Mufubenga okuba n'emirembe n'abantu bona, era mufubenga okuba abatukuvu, kubanga atali mutukuvu taliraba Mukama.

¹⁵ Buli muntu afe ku munne waleme kubeerawo n'omu ava mu kisa kya Katonda, era mwekuume ensigo ey'obukyayi ereme okuloka mu mmwe, bangi ne bagwagwawala.

¹⁶ Era mwegendereze waleme okubaawo omwenzi mu mmwe wadde atatya Katonda nga Esawu eyatunda ebyobusika bwe olw'olulya olumu.

¹⁷ Oluvannyuma ne bwe yagezaako okusikira omukisa ogwo, teyasiimibwa, era teyafuna mukisa kwenenya newaakubadde nga yagunoonya n'amaziga mangi.

¹⁸ Temuzze ku lusozi olulabika olwaka omuliro, n'okukankana n'ekizikiza ekikutte, ne kibuyaga,

¹⁹ n'eri eddoboozi ly'akagombe n'eri eddoboozi ery'ebigambo n'abo abaaliwulira ne batayinza na kweyongera kuligumira.

²⁰ Kubanga tebaayinza kugumira ekyo ekyalagirwa Katonda nti, "Ne bw'eba ensolo, bw'ekomanga ku lusozi ekubwanga amayinja n'efa."

²¹ Ne Musa n'atya nnyo olw'ekyo kye yalaba n'ayogera nti, "Ntidde nnyo era nkankana."

²² Naye muzze ku lusozi Sayuuni, ne mu kibuga kya Katonda omulamu, mu Yerusaalemi eky'omu ggulu n'eri enkumi n'enkumi ez'abamalayika abakuinjaanye,

²³ n'eri ekkanisa ey'abo abaasooka, amannya gaabwe agaawandiikibwa mu ggulu, n'eri Katonda Omulamuzi wa bona, n'eri emyoyo egy'abantu abaatukirizibwa,

²⁴ n'eri endagaano empya eya Yesu omutabaganya, ey'omusaayi ogwamansirwa ogwogera obulungi okusinga ogwa Aberi.

²⁵ Kale mugonderenga oyo ayogera nammwe. Obanga Abayisirayiri tebaayinza kulokoka, bwe baagaana okuwulira oyo eyabalabula ng'ali ku nsi, tetuliyisibwa

bubi nnyo n'okusingawo, bwe tulijeemera ekigambo ky'oyo ow'omu ggulu atulabula?

²⁶Yakankanya ensi n'eddoboozi lye kyokka n'asuubiza nti, "Omulundi omulala sirinyeenya nsi yokka, naye era n'eggulu."

²⁷Kino kitegeeza nti agenda kumalawo nate ebyo ebinyenyezebwa, kyokka ebitanyenyezebwa bisigalewo.

²⁸Kale, nga bwe twaweebwa obwakabaka obutanyenyezebwa, tusinze Katonda nga bw'asiima nga tumussaamu ekitiibwa era nga tumutya.

²⁹Kubanga ddala, "Katonda waffe, gwe muliro ogwokya."

Abaebbulaniya 13

¹Mweyongere okwagananaga ng'abooluganda.

²Temwerabiranga kusembeza bagenyi, kubanga waliwo abaasembeza bamalayika nga tebagenderedde.

³Mujjukirenga abasibe abali mu kkomera, nga muli nga abaasibirwa awamu n'abo. Munakuwaliranga wamu nabo ababonyaabonyezebwa, kubanga nammwe muli mu mubiri.

⁴Obufumbo mubussangamu ekitiibwa n'ebirayiro byabwo, kubanga abakaba n'abenzi Katonda alibasalira omusango, ne gubasinga.

⁵Mwewalenga omululu, bye mulina bibamalenga. Kubanga Katonda yagamba nti, "Sirikuleka era sirikwabulira n'akatono."

⁶Kyetuva twogera n'obuvumu nti, "Mukama ye mubeezi wange, siityenga, omuntu ayinza kunkola ki?"

⁷Mujjukirenga abakulembeze bammwe abaababuulira ekigambo kya Katonda, nga mutunuulira empisa zaabwe nga mugobereranga okukkiriza.

⁸Yesu Kristo nga bwe yali jjo, ne leero bw'ali era bw'aliba emirembe n'emirembe.

⁹Temusendebwasendebwanga kuyigiriza okw'engeri ennyingi ezitamanyiddwa. Kubanga kirungi omutima okunywezebwa ekisa, so si mu byokulya ebitagasa abo ababiryia.

¹⁰Tulina ekyoto, abaweereza mu weema ey'Okukunjaanirangamu kye batalina buyinza kuliirangako.

¹¹Kabona Asinga Obukulu yatwalanga omusaayi gw'ebisolo, olw'ebibi, mu kifo ekitukuvu era n'ennyama yaabyo n'eyokerwa ebweru w'olusiisira.

¹²Noolwekyo ne Yesu kyeyava abonaabonera era n'afiira ebweru w'ekibuga alyoke atutukuze n'omusaayi gwe ye.

¹³Kale naffe tufulume tulage gy'ali ebweru w'olusiisira nga twetisse ekivume kye.

¹⁴Kubanga wano ku nsi tetulinaawo kibuga kya lubeerera, wabula tulindirira ekijo ekija.

¹⁵Kale mu Yesu tuweerayo bulijo ssaddaaka ey'okutendereza Katonda, kye kirabo eky'emimwa, nga twatula erinnya lye.

¹⁶Temwerabiranga kukola bulungi n'okugabananga; kubanga ssaddaaka eziri ng'ezo Katonda zimusanyusa.

¹⁷Muwulirenga abakulembeze bammwe era mubagonderenga, kubanga obuweereza bwabwe kwe kulabirira emyoyo gyammwe, balyoke bakikole n'essanyu nga tebeemulugunya. Kubanga bwe babeemulugunyiza tekibagasa mmwe.

¹⁸Mutusabirenga, kubanga tumanyidde ddala nga tulina omwoyo mulungi, era twagala okukolanga obulungi mu buli kimu.

¹⁹Era okusinga ennyo mbeegayirira munsabire ndyoke nkomewo mangu gye muli.

²⁰Kale, Katonda ow'emirembe eyazuukiza Mukama waffe Yesu, Omusumba w'endiga omukulu ow'endagaano etaggwaawo gye yanyweza n'omusaayi gwe,

²¹abawe buli kirungi kyonna kye mwetaaga okubasobozesa okukola by'ayagala, era atukozese ebisiimibwa mu maaso ge ng'ayita mu Yesu Kristo. Aweebwenga ekitiibwa emirembe n'emirembe. Amiina.

²²Kaakano mbakuutira abooluganda, mugumiikirizenga ebibabuulirirwa, kubanga mbawandiikidde mu bigambo bitono.

²³Mbategeeza nti muganda waffe Timoseewo yateebwa, bw'alijja amangu, ndijja naye eyo okubalaba.

²⁴Mulamuse abakulembeze bammwe era n'abakkiriza bona. Ab'omu Italiya babalamusizza.

²⁵Ekisa kibeerenga nammwe mwenna.

Yakobo

Yakobo 1

Amagezi n'okukkiriza

¹ Nze Yakobo, omuddu wa Katonda ne Mukama waffe Yesu Kristo, mpandiikira ebika ekkumi n'ebibiri ebyasaasaana, nga mbalamusa.

² Baganda bange, mulowoozenga byonna okuba essanyu, bwe mukemebwanga mu ngeri ezitali zimu

³ nga mumanyi ng'okugezesebwa kw'okukkiriza kwammwe kuleeta okugumiikiriza.

⁴ Omulimu gw'okugumiikiriza bwe gutuukirira, ne mulyoka mufuuka abatuukiridde era abakulidde ddala mu mwoyo, nga temulina kibabulako.

⁵ Naye obanga omuntu yenna ku mmwe aweebuka mu magezi, asabenga Katonda agabira bona atakayuka, galimuweebwa.

⁶ Kyokka amusabenga mu kukkiriza, nga tabuusabuusa, kubanga oyo abuusabuusa ali ng'ejjengo ery'oku nnyanja erisundibwa empewo.

⁷ Omuntu ng'oyo bw'atasaba na kukkiriza tasuubira Mukama kumuwaayo kintu kyonna.

⁸ Kubanga omuntu ow'emyoyo ebiri, buli gy'adda tanywererayo.

Obwavu n'obugagga

⁹ Owooluganda atalina bintu bingi mu nsi muno asaana yeenyimirize, kubanga agulumizibbwaa.

¹⁰ N'omugagga tasaana anyiige ng'ebintu bye bimukendezebbwaako, kubanga naye aliggwaawo ng'ekimuli eky'omuddo bwe kiggweerera.

¹¹ Kubanga enjuba bw'evaayo n'eyaka n'ebbugumu lyayo eringi, omuddo gukala n'ekimuli kyagwo ne kiwotoka ne kigwa, n'obulungi bw'endabika yaakyo ne buggwaawo; n'omugagga bw'atyo bw'aliggwaawo, ng'ali mu mirimu gye.

¹² Alina omukisa omuntu agumira okukemebwa, kubanga bw'alimala okusiimibwa aliweebwa engule ey'obulamu Katonda gye yasuubiza abo abamwagala.

¹³ Omuntu yenna bw'akemebwanga, tagambanga nti, "Katonda ye yankemye," kubanga Katonda takemebwa, era naye yennyini takema muntu n'omu.

¹⁴ Naye buli muntu akemebwa ng'okwegomba kwe okubi, bwe kuli, n'asendebwasendebwa.

¹⁵ Okwegomba okwo bwe kumala okuba olubuto, ne kuzaala ekibi, n'ekibi bwe kikula ne kizaala okufa.

16 Noolwekyo, abooluganda abaagalwa, temulimbibwalimbibwanga.

17 Buli kirabo ekirungi ekituukiridde, kiva mu ggulu eri Kitaffe, eyatonda eby'omu bbanga ebyaka, atakyukakyuka newaakubadde okwefuula ekirala.

18 Yalondawo ku bubwe yekka okutuzaala, ng'ayita mu kigambo eky'amazima, tulyoke tubeere ng'abaana be ababereberye mu lulyo lwe oluggya.

Okuwuliriza n'okukola

19 Ekyo mukimanye abooluganda abaagalwa! Buli muntu abeerenga mwangu wa kuwulira, kyokka alemenga kubuguutana kwogera, era alemenga kwanguwa kunyiiga.

20 Kubanga obusungu bw'omuntu tebumuweesa butuukirivu bwa Katonda.

21 Kale mulekenga emize gyonna, n'ekibi ekyasigala mu mmwe, mwanirize n'obuwombeefu ekigambo ekyasigibwa ekiyinza okulokola emyoyo gyammwe.

22 Mubeerenga bakozi ba kigambo, so si abakiwulira ne batakikola, nga mwerimbarimba.

23 Kubanga omuntu awuliriza ekigambo naye n'atakigondera, afaanana ng'omuntu eyeeraba mu ndabirwamu;

24 bw'ava mu ndabirwamu, amangwago ne yeerabira nga bw'afaananye.

25 Naye oyo atunula enkaliriza mu tteeka ettuufu erituukiridde erireetera abantu eddembe, n'alinyikiririramu tajja kukoma ku kulijjukiranga kyokka, naye ajjanga kukola bye ligamba, era anaaweebwanga omukisa mu buli ky'akola.

26 Omuntu yenna bwe yeerowooza nga wa ddiini, naye n'atafuga lulimi lwe, aba yeerimba, n'eddiini ye teriiko ky'egasa.

27 Eddiini entuufu etaliiko bbala mu maaso ga Katonda Kitaffe, y'eyo ey'omuntu alabirira bamulekwa ne bannamwandu era nga yeekuma ensi gy'alimu ereme kumuletako bbala.

Yakobo 2

Obutabaamu kyekubiira

1 Abooluganda, mmwe abakkiririza mu Mukama waffe Yesu Kristo, Mukama ow'ekitiibwa, temusosolanga mu bantu.

2 Kubanga singa omuntu omu ajja mu kujjaaniro lyammwe, ng'ayambadde engoye ez'omuwendo omunene, ng'anaanise n'empeta eza zaabu ku ngalo ze, mu kiseera kye kimu ne wajjawo n'omusajja omwavu ng'ali mu ngoye ezsensusesensuse,

³ne mwaniriza omugagga, ne mumugamba nti, "Tuulira wano kyokka ne mugamba omwatu nti ggwe oyinza okuyimirira wali, oba si ekyo tuula wano wansi w'akatebe kwe nteeka ebigure byange,"

⁴kale muba temwesosoddeemu mwekka na mwekka nga mukyamizibwa ebirowoozo byammwe ebibi?

⁵ Mumpulirize, abooluganda abaagalwa, Katonda teyalonda abo ensi b'eyita abaavu, okuba abagagga mu kukkiriza, era okuba abasika ab'obwakabaka obw'omu ggulu, Katonda bwe yasuubiza abo abamwagala?

⁶Naye munyooma omwatu. Abagagga si be babanyigiriza ne babatwala ne mu mbuga z'amateeka?

⁷Era si be banyoomoola erinnya eddungi lye muyitibwa?

⁸Kiba kirungi nnyo era kya kitibwa bwe mugondera etteeka eriri mu Kyawandiikibwa erigamba nti, "Yagalanga muliraanwa wo nga bwe weeyagala wekka."

⁹Naye bwe musosola mu bantu muba mukoze kibi, n'etteeka libasingisa omusango ng'aboonoonyi.

¹⁰Era omuntu akwata amateeka gonna, naye n'asobyako erimu, omusango gumusinga mu ngeri y'emu ng'oli asobezza amateeka gonna.

¹¹Kubanga Katonda eyagamba nti, "Toyendanga," era y'omu eyagamba nti, "Tottanga." Noolwekyo singa toyenda, naye n'otta oba mumenyi wa mateeka gonna.

¹²Noolwekyo mwogere era mukole ng'amateeka ag'eddembe bwe gali naye nga mumanyi nti tunaatera okulamulwa.

¹³Kubanga abo abatalina kisa, nabo tebalikwatirwa kisa. Ekisa kiwangula omusango.

Okukkiriza n'ebikolwa ebirungi

¹⁴Abooluganda, kibagasa ki okugamba nti mulina okukkiriza kyokka ng'okukkiriza kwammwe temukwoleka mu bikolwa? Mulowooza ng'okukkiriza ng'okwo kugenda kubalokola?

¹⁵Singa muganda wo oba mwannyoko takyalina kyakwambala wadde ekyokulya,

¹⁶naye omu ku mmwe n'amugamba nti, "Genda mirembe, obugume, era olye bulungi", naye nga tamuwaddeeyo byetaago bya mubiri, olwo kimugasa ki?

¹⁷Noolwekyo n'okukkiriza bwe kutabaako bikolwa kuba kufu.

¹⁸ Naye omuntu ayinza okugamba nti, "Ggwe olina okukkiriza nange nnina ebikolwa; ndaga okukkiriza kwo okutaliiko bikolwa, nange nkulage ebikolwa byange nga bwe bikakasa okukkiriza kwange."

¹⁹ Okukkiriza obukkiriza nti waliwo Katonda omu yekka, kirungi. Naye ne baddayimooni nabo bakkiriza n'okukankana ne bakankana!

²⁰ Musirusiru ggwe! Oliyiga ddi ng'okukkiriza okutaliiko bikolwa tekuliiko kye kugasa?

²¹ Jjajjaffe Ibulayimu teyaweebwa obutuukirivu olw'ekikolwa kye yakola, bwe yawaayo omwana we lsaaka, afire ku kyoto?

²² Mulaba nga Ibulayimu bwe yalina okukkiriza, era okukkiriza kwe ne kutuukirizibwa olw'ebikolwa bye,

²³ n'ekyawandiikibwa ne kituukirizibwa ekigamba nti, "Ibulayimu yakkiriza Katonda, ne kimubalirwa okuba obutuukirivu, era n'ayitibwa mukwano gwa Katonda."

²⁴ Kaakano mutegedde ng'omuntu asiimibwa Katonda olw'ebyo by'akola, so si lwa kukkiriza kyokka.

²⁵ Ekyokulabirako ekirala kye kya Lakabu, eyali malaaya. Teyaweebwa butuukirivu lwa kikolwa eky'okusembeza ababaka, n'oluvannyuma n'abasiibulira mu kkubo eddala nga baddayo, okubawonya?

²⁶ Ng'omubiri bwe guba omufu omwoyo bwe gutagubeeramu, n'okukkiriza bwe kutyo kuba kufu bwe kuteeyolekera mu bikolwa.

Yakobo 3

Okufuga olulimi

¹ Abooluganda, abayigiriza tebasaanye kubeera bangi mu mmwe, kubanga mukimanyi nga ffe tulisalirwa omusango munene okusinga abalala.

² Ffenna tusobya mu ngeri nnyingi. Omuntu yenna atasobya mu kwogera, aba muntu eyatuukirira, asobola okufuga omubiri gwe gwonna.

³ Tuyinza okufuga embalaasi ne tugikozesa kye twagala olw'ebyuma bye tuba tutadde mu kamwa kaayo.

⁴ Era n'enksi entono esobola okukyusa ekyombo ekinene ennyo n'ekiraza omugoba waakyo gy'ayagala, newaakubadde ng'empewo ekisindika ebeera ya maanyi mangi.

⁵ N'olulimi bwe lutyo, newaakubadde nga kantu katono, lwenyumiriza nnyo. Akaliro akatono kasobola okukoleeza ekibira ekinene ne kiggya.

⁶Olulimi nalwo muliro. Lujjudde obutali butuukirivu bungi okusinga ebitundu ebirala eby'omubiri gwaffe. Lwo omuliro luguggya mu ggeyeena, ne lulyoka lukoleeza omubiri gw'omuntu gwonna ne gwaka ng'oluyiira okumutuusa mu kuzikirira.

⁷Abantu, ebisolo ebya buli ngeri n'ennyonyi, n'ebiekulula, era n'eb'y'omu nnyanja basobola okubiyigiriza ne babifuga,

⁸naye tewali muntu n'omu asobola kufuga lulimi. Terufugika era lubi nnyo, lujjudde obutwa obuttirawo.

⁹ Olulimi tulukozesa okutendereza Mukama era Kitaffe, ate era lwe tukolimiza abantu abaatondebwa mu kifaananyi kya Katonda.

¹⁰Mu kamwa ke kamu ne muvaamu okutendereza n'okukolima. Abooluganda, kino si bwe kyandibadde bwe kityo!

¹¹Ensulo y'emu eyinza okuvaamu amazzi agawoomerera n'agakaawa?

¹²Abooluganda omutiini guyinza okubala ezeyituuni, oba omuzabbibu okubala ettiini? Bw'etyo n'ensulo y'emu teyinza kuvaamu mazzi ga munnyo na gawoomerera.

Amagezi agava mu ggulu

¹³Ani alina amagezi n'okutegeera mu mmwe? Kale abiragirenga mu mpisa ze ennungi ng'akola ebikolwa eby'obwetoowaze eby'amagezi.

¹⁴Bwe muba n'omutima omukyayi ogujjudde n'obuggy, era nga mwefako mwekka, temusaanidde kwewaana na kulimba nga mukontana n'amazima.

¹⁵Kubanga amagezi ng'ago tegava eri Katonda mu ggulu wabula ga ku nsi, era si ga mwoyo wazira ga Setaani.

¹⁶Kubanga buli awabeera obuggy n'okwefako wekka, wabeerawo okutabukatabuka era n'ebikolwa ebirala ebibi byonna.

¹⁷Naye amagezi agava mu ggulu okusooka byonna malongoofu, era ga mirembe, gafaayo ku bantu abalala, mawulize, gajjudde okusaasira n'ebibala ebirungi, tegasosola mu bantu, era si gannanfuusi.

¹⁸Era ekibala eky'obutuukirivu kiva mu abo abakolerera emirembe.

Yakobo 4

Mweweeyo eri Katonda

¹Kiki ekireeta entalo n'okulwanagana mu mmwe? Si lwa kubanga mu mitima gyammwe mujjudde ebintu bingi nnyo ebibi bye mwagala?

²Mwagala ebintu ne mutabifuna ne muba n'obuggyga, ne mulyoka muttijjana so ne mutasobola kubifuna, nga mulwana era nga muyomba kubanga mulemeddwa okubisaba.

³Era ne bwe mubisaba, temubifuna kubanga ekigendererwa kyammwe kikyamu; mugenderera kubikozesa ku masanyu gokka.

⁴Mmwe abenzi temumanyi ng'okuba mikwano gy'ensi bulabe eri Katonda? Noolwekyo omuntu yenna bw'alondawo okuba mukwano gw'ensi afuuka mulabe wa Katonda.

⁵Oba mulowooza nti Ekyawandiikibwa tekiba na makulu bwe kigamba nti, "Omwoyo gwe yassa mu ffe, atulabirira n'okwagala okujjudde obuggyga"?

⁶Kyokka Omwoyo omukulu oyo era agaba ekisa kingi. Kyekiva kigamba nti, "Katonda alwana n'ab'amalala naye abawombeefu abawa ekisa."

⁷Kale, mugondere Katonda era mulwanyisenga Setaani, ajja kubaddukanga.

⁸Museemberere Katonda, ne Katonda anaabasembereranga. Mulongoose engalo zammwe, mmwe abakozi b'ebibi, mutukuze emitima gyammwe, mmwe abalina emyoyo egitaaganaaga.

⁹Mukungubage, mukube ebiwoobe era mukaabe. Okuseka kwammwe kufuuke okukungubaga, n'essanyu lifuuke okunakuwala.

¹⁰Mwetoowazenga mu maaso ga Mukama waffe, naye alibagulumiza.

¹¹Abooluganda, temugeyanjananga, era buli omu aleme kwogera bubi ku munne newaakubadde okusalira munne omusango. Bwe mukikola muba mulwanyisa etteeka era musalira etteeka omusango. Bw'osalira etteeka omusango, oba totuukiriza tteeka wabula obeera musazi wa musango.

¹²Oyo yekka eyateeka amateeka y'asala omusango. Era y'asalawo okulokola oba okuzikiriza. Kale, osinziira ku ki okusalira muliraanwa wo omusango?

Okulabula ku kwekulumbaza

¹³Muwulire mmwe abagamba nti, "Leero oba enkyo nzija kugenda egindi maleyo omwaka gumu, era ntandikeyo omulimu ogunanfunyisa ensimbi ennyingi."

¹⁴Mumanyidde ku ki ebigenda okubaawo enkyo oba obulamu bwammwe bwe bunaaba? Kubanga ebbanga lye mumala nga muli balamu liri ng'olufu olulabika ate mangwago ne lubula.

¹⁵Kino kye musaanira okwogera nti, "Katonda bw'anaaba ng'asiimye tuliba balamu ne tukola kino oba kiri."

¹⁶Bwe mutakola mutyo muba mwekuluntaza olw'entegeka zammwe, songa okwekuluntaza okw'engeri eyo tekusanyusa Katonda.

¹⁷Okumanya ekituufu ekiteekwa okukolwa, naye ne mutakikola, kuba kwonoona.

Yakobo 5

Okulabula abagagga

¹Kale, mmwe abagagga, mukaabe era mwaziirane. Mugenda kujirwa ennaku.

²Eby'obugagga byammwe bivunze, n'ebiyambalo byammwe biriiriddwa ennyenje.

³Ezaabu yammwe ne ffeeza bitalazze, era obutalagge bwabyo bwe buliba obujulirwa obulibalumiriza omusango, ne bumalawo omubiri gwammwe ng'omuliro. Mweterekera obugagga olw'ennaku ez'oluvannyuma.

⁴Laba abakozi abaakola mu nnimiro zammwe ne mulyazaamaanya empeera yaabwe, bakaaba, n'abaakungula bakungubaga, era amaloboozi g'okwaziirana kwabwe gatuuse mu matu ga Mukama ow'Eggye.

⁵Mwesanyusiza ku nsi ne mwejalabya mu bugagga bwammwe. Mwagezza emitima gyammwe nga muli ng'abeetegekera olunaku olw'okubaagirako ebyassava.

⁶Atasobyanga mwamusala omusango okumusinga ne mumutta, ng'ate ye talina bwe yeerwanirako.

Okugumiikiriza

⁷Noolwekyo abooluganda mugumiikirize, okutuusa amadda ga Mukama waffe, ng'omulimi bw'agumiikiriza ng'alindirira enkuba eya ddumbi n'eya ttoggo okukuza ebibala bye biryoke byengere.

⁸Mugumiikirize, era mugume omwoyo, kubanga amadda ga Mukama waffe gali kumpi.

⁹Temwemulugunyizagananga mwekka na mwekka, muleme okusalirwa omusango, kubanga Omulamuzi ayimiridde ku luggi.

¹⁰Ekyokulabirako eky'okugumiikiriza n'okubonaabona, be bannabbi abaayogeranga mu linnya lyu Mukama.

¹¹Laba tubayita ba mukisa abo abaagumiikiriza. Yobu yeesiga Mukama, era obulamu bwe butulaga ng'entegeka ya Mukama bwe yatuukirizibwa obulungi; kubanga Mukama wa kisa era ajjudde okusaasira.

¹²Naye okusingira ddala byonna, abooluganda, temulayiranga ggulu, oba ensi, oba ekintu kyonna ekirala. Ensonga bw'ebeeranga weewaawo, gamba weewaawo. Bw'ebeeranga si weewaawo gamba si weewaawo, mulyoke mwewale okusalirwa omusango okubasinga.

Okusaba okw'okukkiriza

¹³ Waliwo mu mmwe ali mu buzibu? Kirungi asabenga olw'obuzibu obwo. N'abo abeetaaga okwebaza, kirungi bayimbirenga Mukama bulijjo ennyimba ez'okumutendereza.

¹⁴ Waliwo omulwadde mu mmwe? Kirungi atumye abakulembeze b'Ekkanisa, bamusabire, era bamusiige amafuta, nga bwe basaba Mukama amuwonye.

¹⁵ Era okusaba kwabwe nga kuweereddwayo n'okukkiriza, kugenda kumuwonya, kubanga Mukama awonya. Singa obulwadde bwe bwava ku kibi kye yakola, Mukama agenda kumusonyiwa.

¹⁶ Noolwekyo mwatulireganenga ebibi byammwe, era buli omu asabirenga munne, mulyoke muwonyezebwe. Okusaba n'omutima omumalirivu ogw'omuntu omuntuukirivu, kubeera n'obuyinza bungi, era n'ebivaamu biba bya ttendo.

¹⁷ Eriya yali muntu ddala nga ffe, naye bwe yeewaayo n'asaba enkuba ereme okutonnya, enkuba teyatonna okumalira ddala emyaka esatu n'ekitundu!

¹⁸ Ate n'asaba enkuba n'etonna, omuddo n'ebisimbe byonna ne biddamu okumera.

¹⁹ Abooluganda, singa omu ku mmwe akyama n'ava ku mazima, ne wabaawo amukomyawo,

²⁰ omuntu oyo akomyawo munne eri Katonda, aba awonyezza omwoyo gwa munne okufa era ng'amuleetedde n'okusonyiyibwa ebibi byonna.

1 Peetero

1 Peetero 1

Okulamusá

¹ Nze Peetero omutume wa Yesu Kristo, mpandiikira abalonde ba Katonda, abaasaasaanira mu Ponto, ne mu Ggalatiya ne mu Kapadokiya, ne mu Asiya ne mu Bisuniya,

² Katonda Kitaffe be yasooka okumanya ne batukuzibwa Omwoyo olw'okugondere Yesu Kristo, era ne balongoosebwa n'omusaayi ggwe, ogwabamansirwako. Ekisa n'emirembe byeyongerenga mu mmwe.

Essuubi Eddamu

³ Katonda Kitaawe wa Mukama waffe Yesu Kristo atenderezebwe. Olw'okusaasira kwe okungi twazaalibwa mu bulamu obulina essuubi omulundi ogwokubiri, olw'okuzuukira kwa Yesu Kristo mu bafu.

⁴ Bw'atyo n'atusuubiza omugabo mu busika, ogw'olubeerera ogutakyusa langi era ogutafuma, gw'atuterekedde mu ggulu.

⁵ Era Katonda, mu buyinza bwe, alibakuma olw'okukkiriza kwammwe, n'abatuusa mu bulokozi obwateekebwateekebwa okubikkulirwa mu biro eby'enkomerero.

⁶ Ekyo, kijja kubasanyusa nnyo newaakubadde nga mujja kusanga ebizibu bya ngeri nnyingi okumala akaseera.

⁷ Kubanga okugezesebwa kw'okukkiriza kwammwe, kwa muwendo mungi nnyo okusinga zaabu egezebwa mu muliro n'ekakasibwa, kulyoke kusaanire ettendo n'ekitiibwa n'okugulumizibwa ku lunaku luli Mukama waffe Yesu Kristo lw'alirabikirako.

⁸ Newaakubadde nga Yesu oyo temumulabangako, kyokka mumwagala, era ne kaakano temumulaba naye mumukkiriza ne mujjula essanyu eritayogerekeda ne mumugulumiza,

⁹ era ekiva mu kukkiriza kwammwe kwe kulokolebwa kw'emyoyo gyammwe.

¹⁰ Bannabbi baafuba nga bwe baasobola okuvumbula era n'okutegeera okulokolebwa kuno, ne bategeeza eby'omu maaso ku kisa kya Katonda ky'agenda okubawa.

¹¹ Omwoyo wa Kristo ng'ali mu bo, yategeeza eby'omu maaso ku kubonaabona kwa Kristo era n'ekitiibwa ekiriddirira, ne bafuba okuvumbula omuntu gwe kirituukako n'ekiseera we kirituukira.

¹² Bannabbi bano Katonda yabalaga nti ebyo tebabikola ku lwabwe, wabula ku lwammwe. Era kaakano Enjiri ebuuliddwa gye tuli ffenna. Yatubuulirwa mu

maanyi ga Mwoyo Mutukuvu eyava mu ggulu. Bino by'ebintu ne bamalayika bye bayaayaanira okutegeera.

Twayitibwa kuba Batukuvu

¹³Noolwekyo mwetegeke nga muli bateefu, nga mutadde emitima gyammwe ku kisa kya Katonda ekiribaweebwa, Yesu Kristo bw'alirabika.

¹⁴Mugonderenga Katonda, kubanga muli baana be, muleme kufugibwa okwegomba kwammwe okubi okw'edda, kwe mwatambulirangamu mu butamanya.

¹⁵Kale, nga Katonda eyabayita bw'ali omutukuvu, nammwe mubeerenga batukuvu mu byonna bye mukola.

¹⁶Nga bwe kyawandiikibwa nti, "Mubenga batukuvu, kubanga nze ndi mutukuvu."

¹⁷Mujjukire nti Kitammwe gwe musaba, asalira omusango buli muntu awatali kusaliriza, musaana mumusseemu ekitiibwa, nga mwetwala ng'abagenyi ku nsi kuno.

¹⁸Kubanga mumanyi nti mwanunulibwa mu mpisa zammwe embi ezaava ku bajjajammwe. Temwanunulibwa na bintu ebiggwaawo nga ffeeza oba zaabu.

¹⁹Wabula mwanunulibwa n'omusaayi gwa Kristo ogw'omuwendo omungi ennyo, ogw'omwana gw'endiga ogutaliiko kamogo oba ebbala.

²⁰Kristo yategekebwa dda nga n'ensi tennatondebwa, kyokka mu nnaku zino ezaakayita n'alabisibwa ku lwammwe.

²¹Mu ye, mwe mwayita okukkiriza Katonda eyamuzuukiza mu bafu, n'amuwa ekitiibwa, era okukkiriza kwammwe n'okusubira kwammwe kyebivudde binywerera ku Katonda.

²²Kale kaakano nga bwe mumaze okutukuza emyoyo gyammwe olw'okukkiriza amazima, ne mwagalanira ddala mu luganda lwennyini, mweyongere okwagalana n'omutima ogutaliimu bukuusa.

²³Kubanga okusinziira mu kigambo kya Katonda ekiramu era eky'olubeerera, mwazaalibwa omulundi ogwokubiri.

²⁴Kubanga, "abantu bona bali ng'omuddo, n'ekitiibwa kyabwe kiri ng'ekimuli ky'omuddo. Omuddo gukala, ekimuli kyagwo ne kigwa.

²⁵Naye ekigambo kya Mukama Katonda kibeerera emirembe gyonna." Era ekigambo ekyo y'Enjiri eyababuulirwa.

1 Peetero 2

Ejjinja Eddamu n'Eggwanga Ettukuvu

¹ Kale mukomye buli ngeri yonna ey'ettima, n'obulimba bwonna, n'obukuusa, n'obuggyga, n'okwogera ekibi kwonna.

² Ng'abaana abaakazaalibwa bwe beegomba amata, nammwe mwegombenga amata ag'omwoyo, muganywenga mukule era mulokolebwe,

³ kubanga mwalega ku bulungi bwa Mukama.

⁴ Mujje gy'ali kubanga ye ly'ejjinja eddamu, abantu lye baasuula nga balowooza nti terigasa, kyokka eryalondebwa Katonda era ery'omugaso omunene ennyo.

⁵ Mujje gy'ali nga muli ng'amayinja amalamu, muzimbibwemu ennyumba ey'omwoyo. Mulyoke mube bakabona be abaweereza ssaddaaka ey'omwoyo, esiimibwa Katonda mu Yesu Kristo Mukama waffe.

⁶ Kubanga ekyawandiikibwa kigamba nti, "Laba, nteeka mu Sayuuni, ejinja ery'oku nsonda ery'omuwendo omungi eddonde, oyo eyeesiga Kristo, taliswazibwa."

⁷ Ejinja eryo lya muwendo mungi nnyo eri mmwe abakkiriza. Naye eri abatakkiriza, "Lye jjinja abazimbi lye baagaana, lye lifuuse ejinja ekkulu ery'oku nsonda."

⁸ Era "Lye jjinja abantu lye beekoonako, lwe lwazi kwe beesittala ne bagwa." Beesittala kubanga bajeemera ekigambo kya Katonda, nga bwe ky'atekebwateekeebwa.

⁹ Naye mwe muli kika kironde, bakabona bw'obwakabaka, eggwanga ettukuvu, abantu ba Katonda bennyini. Mwalondebwa mulyoke mutende ebirungi bya Katonda eyabaggya mu kizikiza n'abayingiza mu butangaavu bwe obutenkanika.

¹⁰ Edda temwali ggwanga, naye kaakano muli ggwanga lya Katonda, era mwali temusaasirwa, naye kaakano Katonda abasaasidde.

Abaweereza ba Katonda

¹¹ Abagalwa, mutgeerere ddala nti ku nsi kuno muli bayise. Kyenva mbeegayirira mwewale okwegomba kw'omubiri, kubanga kulwanagana n'omwoyo.

¹² Mukuumenga empisa zammwe ennungi, abo be mubeera nabo abatakkiriza, newakubadde baboogerako nti ebikolwa byammwe bibi, basobole okulaba ebirungi bye mukola, balyoke bagulumize Katonda ku lunaku lw'alirabikirako.

¹³ Ku lwa Mukama waffe, mugonderenga buli kiragiro ky'abo abali mu buyinza, oba kabaka alina obufuzi obw'oku ntikko,

¹⁴ oba abafuzi abalala b'atuma okubonerezanga abakola ebikolwa ebibi, era n'okusiiimanga abo abakola ebikolwa ebirungi.

¹⁵Kubanga Katonda asiima mukolenga ebirungi, mulyoke musirisenga abantu abasirusiru era abatalina kye bamanyi.

¹⁶Mubenga ba ddembe, kyokka nga temulyesigamya ku kukola bitasaana, wabula mulikozese ng'abaweeresa ba Katonda.

¹⁷Mussengamu abantu bona ekitiibwa, mwagalenga nnyo abooluganda. Mutyenga Katonda. Mussengamu ekitiibwa abafuzi.

Tulabire ku Kristo

¹⁸Abaddu, mugonderenga bakama bammwe, nga mubassaamu ekitiibwa ekijjuvu, si abo bokka abalungi n'abakwatampola naye n'abo abakambwe.

¹⁹Kubanga kya mukisa omuntu bw'abonyaabonyezebwa awatali nsonga, n'agumiikiriza olw'okutuukiriza ekyo Katonda ky'ayagala.

²⁰Kale kitiibwa ki kye mufuna bwe mugumiikiriza mu kubonaabona olw'okukola ekibi? Naye Katonda abasiima bwe mugumiikiriza nga mubonyaabonyezebwa olw'okukola obulungi.

²¹Ekyo kye mwayitirwa kubanga ne Kristo yabonyaabonyezebwa ku lwammwe, n'abalekera ekyokulabirako kye musaana okugoberera.

²²"Kristo teyakola kibi wadde okwogera ebyobukuusa."

²³Bwe yavumibwa, ye teyavuma. Era abaamubonyaabonya teyabeewerera, wabula yeewaayo eri Katonda alamula awatali kusaliriza.

²⁴Yesu Kristo yennyini yeetikka ebibi byaffe mu mubiri gwe bwe yatufirira ku musaalaba, naffe tulyoke tufe eri ekibi, tube abalamu eri obutuukirivu. Olw'ebiwundu bye, muwonyezebbwaa.

²⁵Kubanga mwali muwabye ng'endiga, naye kaakano mukomezebbwaawo eri Omusumba era alabirira obulamu bwammwe.

1 Peetero 3

Abakyala ne ba bbaabwe

¹Abakazi abafumbo, mu ngeri y'emu muwulirenga babbammwe, bwe waba nga waliwo abatagondera kigambo kya Katonda, balyoke baleetebwe mu kukkiriza olw'empisa zammwe ennungi ne bwe muba nga temuliiko kye mubagambye.

²Kubanga bajja kulaba empisa zammwe ennungi nga mubassaamu ekitiibwa.

³Okweyonja kwammwe kulemenga kuba kwa kungulu: nga mu misono gy'enviiri n'egy'amajjolobera ag'ebyo ebyambalwa mu bulago ne ku matu, n'egy'ebiyambalo.

⁴Naye kube kwa mu mutima munda; okweyonja okutayonooneka okw'omwoyo omuwombeefu era omuteefu, era okwo kwe kw'omuwendo ennyo mu maaso ga Katonda.

⁵Kubanga n'abakazi ab'edda abatukuvu abaasuubiriranga mu Katonda, bwe batyo bwe beeyonjanga era nga bawulize eri ba bbaabwe.

⁶Saala bw'atylo bwe yali; yawuliranga nnyo Ibulayimu, ng'amussaamu ekitiibwa ng'amuyita mukama we. Kale obanga mwagala okuba bawala ba Saala, mubenga ba mpisa nnungi, olwo tewaabengawo kibatiisa kyonna.

⁷Nammwe abasajja abafumbo, mutegeere nga bakazi bammwe banafu, noolwekyo mubakwatenga n'obwegendereza. Era mubassengamu ekitiibwa nga mumanyi nga nabo Katonda alibaweera wamu nammwe, obulamu obutaggwaawo. Bwe munaakolanga bwe mutyo okusaba kwammwe tekuziyizibwenga.

Okubonyaabonyezebwa olw'Okukola Ebituufu

⁸Eky'enkomerero, mwenna mubenga n'emmeeme emu, buli omu alumirirwenga munne, era mwagananenga ng'abooluganda ddala, mubenga ba kisa era beetoowaze.

⁹Temuwooleranga ggwanga. Abavumye, mmwe temumuvumanga. Wabula mumusabirenga mukisa, kubanga ekyo kye mwayitirwa, mulyoke muweebwe omukisa.

¹⁰Kubanga ekyawandiikiba kigamba nti, "Ayagala okufuna obulamu n'okubeera mu ddembe, aziyizenga olulimi lwe okwogera ekibi, n'emimwa gye okwogera ebyobukuusa.

¹¹Era yeewalenga okukola ebibi, akolenga ebirungi. Anoonyenga emirembe era atambulirenga mu gyo.

¹²Kubanga abatuukirivu Mukama abatunuulira n'ekisa, n'amatu ge gawuliriza bye basaba. Kyokka aboonoonyi abatunuuliza bukambwe."

¹³Bwe munaafubanga okukola ekituufu, ani anaabakolanga akabi?

¹⁴Naye era ne bwe munaabonyaabonyezebwanga olw'obutuukirivu, mulina omukisa. "Temutya bye batya; temutekemuka."

¹⁵Mutyenga Mukama waffe Kristo mu mitima gyammwe. Era bulijo mubenga beetegefu okuddamu buli ababuuza okunnyonnyola essuubi lyammwe,

¹⁶era muddengamu n'obuwombeefu, awamu n'eggonjebwa. Mubenga ba mutima mulungi, abo ababavuma era ababoogerako ekibi olw'empisa zammwe ennungi olw'okuba nga muli ba Kristo, balyoke baswale.

¹⁷Okubonyaabonyezebwanga olw'okukola obulungi, bwe kuba nga kwe kusiima kwa Katonda, kusinga okubonyaabonyezebwa olw'okukola ekibi.

¹⁸Kubanga ddala Kristo yabonyaabonyezebwa olw'ebibi omulundi gumu, Omuntu Omutuukirivu ku lw'abatali batuukirivu, alyoke abaleete eri Katonda bwe yattibwa mu mubiri, kyokka n'abeera mulamu mu mwoyo.

¹⁹Era omwoyo gwe, gwe gwagenda okubuulira Enjiri emyoyo egiali mu kkomera.

²⁰Egyo gy'emyoyo egy'abo edda abaagaana okuwulira Katonda ng'akyabagumiikiriza, mu kiseera Nuuwa kye yazimbiram eryato, abantu abatono, omunaana gwokka, mwe baawonyezebwa amazzi.

²¹Amazzi ago gaali kabonero ak'okubatizibwa mulyoke mulokolebwe kaakano. Kubanga okubatizibwa tekitegeeza kunaazibwako kko lya mubiri, wabula kitegeeza kwewaayo eri Katonda nga tumaliridde okukola by'ayagala, ng'atuwadde omutima omulongoofu olw'okuzuukira kwa Yesu Kristo,

²²eyalinnya mu ggulu era atudde ku mukono ogwa ddyo ogwa Katonda, ng'afuga bamalayika n'aboobuyinza, n'abaamaanyi ab'omu ggulu.

1 Peetero 4

Obulamu Obuggyga

¹Kale nga Kristo bwe yabonyaabonyezebwa mu mubiri, nammwe mumalirire okubonaabona nga ye. Kubanga abonaabona mu mubiri aba takyafugibwa kibi.

²Okuva kaakano nga muli mu nsi muno, mugoberere ebyo Katonda by'ayagala, so si kugoberera kwegomba kwammwe okw'omubiri.

³Mu biseera ebyayita mwemaliranga mu kukola ebyo Abaamawanga bye beegombanga. Mwali mwemalidde mu bwenzi, mu kwegomba okubi, mu butamiivu, mu binyumu, mu bubaga obw'omwenge, ne mu kusinza bakatonda abalala.

⁴Kaakano abo abatakkiriza Katonda beewuunya era babavuma bwe balaba nga temukyabeegattako mu ebyo bye bakola.

⁵Abantu abo baliwoza mu maaso ga Katonda. Kubanga yeeteseteese okulamula abalamu n'abafu ng'asinziira ku ebyo bye baakola.

⁶Enjiri kyeyava ebuulirwa, n'abafu balyoke basalirwe omusango ng'abantu abalala bona, kyokka babe balamu mu mwoyo nga Katonda bw'ali.

Okukoza Obulungi Ebirabo Katonda by'atuwa

⁷Enkomerero ya byonna eneetera okutuuka. Noolwekyo mwetegeke era mwegenderezenga, era bulijjo musabenga Katonda.

⁸N'ekisingira ddala obukulu mwagalanga ddala mu mazima, kubanga okwagalana kubikka ebibi bingi.

⁹Musembezezanenga awatali kwemulugunya.

¹⁰Buli omu asaanidde okukozesa n'obwesigwa buli kirabo Katonda kye yamuwa olw'okugasa banne nabo balyoke bafune emikisa nya Katonda emingi gy'agaba.

¹¹Ayogera, ayogerenga ng'atumiddwa Katonda; ayamba, akikolenga n'amaanyi gonna Katonda g'amuwadde; mu byonna Katonda alyoke agulumizibwenga mu Yesu Kristo, alina ekitiibwa n'obuyinza emirembe n'emirembe. Amiina.

Okubonyaabonyezebwa olw'Okuba Omukristaayo

¹²Abaagalwa, temwewuunya obulumi obw'amaanyi bwe bubatuukako ng'abatuukiddwako ekintu ekitali kya bulijjo.

¹³Kyokka musanyuke kubanga mugabanye ku kubonaabona kwa Kristo, mulyoke mujjule essanyu, ng'ekitiibwa kye kirabise.

¹⁴Mulina omukisa bwe muvumibwa olw'erinnya lya Kristo kubanga Omwoyo ow'ekitiibwa owa Katonda ali ku mmwe.

¹⁵Mu mmwe temusaana kubaamu mutemu, oba mubbi, oba omukozi w'ebibi, wadde eyeeyingiza mu by'abalala. Kubanga buli abonyaabonyezebwa olw'ebyo taliiko ky'agasibwa.

¹⁶Naye bw'abonyaabonyezebwa olw'okuba Omukristaayo aleme kukwatibwa nsonyi, wabula yeebazenga Katonda olw'okuba owa Kristo.

¹⁷Kubanga ekiseera kituuse Katonda okulamula ng'atandikira mu nnyumba ya Katonda. Obanga okulamula kutandikidde ku ffe, kale kiriba kitya ku abo abajeemera Enjiri ya Katonda?

¹⁸"Era obanga kizibu omutuukirivu okulokolebwa, kale aboonoonyi n'abataty Katonda balikolebwa batya?"

¹⁹Noolwekyo abo ababonaabona olw'okutuukiriza ekyo Katonda ky'ayagala, basaanidde okuwaayo obulamu bwabwe eri Katonda waabwe omwesigwa, bakole obulungi.

1 Peetero 5

Katonda Talemererwa

¹Noolwekyo mbulirira abakadde abali mu mmwe nze mukadde munnammw, omujulirwa w'okubonaabona kwa Kristo, era agabanira awamu ekitiibwa ekigenda okubikkulirwa.

²Mulundenga ekisibo kya Katonda ekiri mu mmwe, mukiriisenga nga mukirabirira n'okwagala so si na kwemulugunya, nga mukolerera amagoba ag'obukuusa wabula olw'okujjumbira Katonda.

³Be mukulembera temubakambuwaliranga wabula mubakulemberenga nga mubalaga ekyokulabirako ekirungi.

⁴Era Omusumba Omukulu bw'alikomawo, muliweebwa engule ey'ekitiibwa ekitaliggwaawo.

⁵Mmwe abavubuka, mugonderenga abakulu. Muweerezeganenga mwekka na mwekka n'obuwombeefu kubanga "Katonda akyawa ab'amalala naye abawombeefu abawa omukisa."

⁶Noolwekyo mwewombeeke wansi w'omukono gwa Katonda ogw'amaanyi, naye alibagulumiza ng'obudde butuuse.

⁷Mumutwalirenga byonna bye mweraliikirira kubanga abalumirwa era afaayo ku buli ekibatuukako.

⁸Mutunulenga, mwekuume omulabe wammwe Setaani, atambulatambula ng'empologoma enjala gy'eruma egenda ng'ewuluguma ng'enoonya gw'eneerya.

⁹Mumwanjange ng'abalumbye, nga mwesiga Mukama, era mujukire nti ebibonoobono ebiri ng'ebyo bituuka ne ku bakkiriza abalala mu nsi yonna.

¹⁰Bwe mulibonaabonera akaseera, Katonda waffe atukwatirwa ekisa ng'ayita mu Kristo, alibawa ekitiibwa kye ekitaliggwaawo. Alibakomyawo, alibazzaamu amaanyi, alibawanirira era alibanyweza.

¹¹Ekitiibwa n'amaanyi bibeerenga gy'ali emirembe n'emirembe. Amiina.

¹²Ebbaluwa eno nzija kugikwasa Sirwano, gwe mmanyi nga waaluganda mwesigwa ddala, agibaleetere. Nsuubira nga mbazizzaamu amaanyi mu bbaluwa eno, era nga mbalaze engeri Katonda gy'agabamu ekisa kye ekingi. Ebyo bye mbategeezza bibayambe okunywerera mu kwagala kwe.

¹³Balonde bannammwe mu kkanisa y'e Babulooni, babalamusizza. Ne mutabani wange Makko naye abalamusizza.

¹⁴Mulamusagane n'okwagala okw'Ekikristaayo. Emirembe gibeerenga mu mmwe mwenna abali mu Kristo.

2 Peetero

2 Peetero 1

¹ Nze Simooni Peetero omuddu era omutume wa Yesu Kristo mpandiikira abo abaafuna okukkiriza okw'omuwendo nga ffe, mu butuukirivu bwa Katonda waffe era Omulokozi waffe Yesu Kristo,

²ekisa n'emirembe byeyongerenga mu mmwe nga mutegeera Katonda ne Yesu Mukama waffe.

Okuyita n'okulonda kwa Katonda

³ Kubanga mu maanyi g'obwakatonda bwe, mwe twaweerwa ebintu byonna olw'obulamu buno n'okutya Katonda mu kumanya oyo eyatuyita olw'ekitiibwa kye n'obulungi bwe ye.

⁴Ebyo bye byatuweesa ebrisubizo eby'omuwendo ebikulu, mu byo mulyoke mugabanire awamu obuzaaliranwa bw'obwakatonda, muwone okuzikirira okuva mu kwegomba okubi okw'omu nsi.

⁵ Noolwekyo mufubenga nnyo, okukkiriza kwammwe mukwongerekko obulungi, ne ku bulungi mwongerekko okutegeera,

⁶ne ku kutegeera mwongerekko okwefuganga, ne ku kwefuganga mwongerekko obugumiikiriza, ne ku bugumiikiriza mwongerekko okutya Katonda,

⁷ne ku kutya Katonda mwongerekko okufaayo ku booluganda abalala bona ne ku kufaayo ku booluganda bona abalala mwongerekko okwagalanganaga.

⁸Kubanga bwe muba n'ebyo ne byeyongera obungi, bibafuula ba mugaso era ababala ebibala olw'okutegeera Mukama waffe Yesu Kristo.

⁹Oyo atalina ebyo muzibe wa maaso era awunaawuna, era yeerabidde bwe yanaazibwako ebibi bye eby'edda.

¹⁰ Kale, abooluganda mweyongerenga okunywerera mu kulondebwa kwammwe ne mu kuyitibwa kwammwe. Kubanga bwe munaakolanga bwe mutyo temulyesittala n'omulundi n'ogumu.

¹¹Era mulyanirizibwa n'essanyu lingi nnyo mu bwakabaka bwa Mukama waffe era Omulokozi waffe Yesu Kristo.

¹² Noolwekyo, ebyo nzija kubabajukizanga buli kiseera, newaakubadde nga mubimanyi, era nga ddala munyweredde mu mazima ge mwategeera.

¹³Era ndowooza nti kiñjwanira nga nkyali mu mubiri guno, okubakubirizanga nga nneeyongera okubabajukiza.

¹⁴Kubanga mmanyi nga nnaatera okuva mu mubiri guno, nga Mukama waffe Yesu Kristo bwe yankeeza.

¹⁵Kyenva nfuba ennyo okukola kyonna kye nsobola, ne bwe ndivaawo mube ng'ebyo byonna mubijjukira.

¹⁶Kubanga tetwagoberera ngero bugero ezaagunjibwa wabula twabategeeza ebyo bye twalabirako ddala, eby'amaanyi n'okukomawo kwa Mukama waffe Yesu Kristo, era n'obukulu bwe.

¹⁷Kubanga Katonda Kitaffe yamuwa ekitiibwa n'ettendo, eddoboozi bwe lyawulikika okuva mu ggulu mu kitiiwa ekingi ekimasamasa nti, "Ono ye Mwana wange omwagalwa gwe nsanyukira ennyo."

¹⁸Ffe bwe twali awamu naye ku lusozi olutukuvu, twawulirira ddala eddoboozi eryo eryava mu ggulu.

¹⁹Kyetuvudde tweyongera okukakasa ebyo bannabbi bye baategeeza, era bwe munaabigonderanga munaabanga mukoze bulungi. Kubanga biri ng'ettaala eyaka mu kizikiza okutuusa obudde lwe bukya, emunyeenyey ey'enkyo n'eryoka eyaka mu mitima gyammwe.

²⁰Okusooka mukimanye nga buli bunnabbi obuli mu byawandiikibwa, tewali ayinza kubunnyonnyola ku bubwe yekka.

²¹Kubanga bannabbi tebaayogeranga byabwe ku bwabwe, wabula baategeezanga ebyo Katonda bye yabalagiranga nga Mwoyo Mutukuvu bwe yabibawanga.

2 Peetero 2

Abayigiriza ab'Obulimba

¹Naye waaliwo ne bannabbi ab'obulimba mu bantu, era nga bwe walibaawo abayigiriza ab'obulimba mu mmwe. Baliyingiza mu nkiso enjigiriza enkyamu etwala abantu mu kuzikirira. Balyegaana ne Mukama waffe, ne beereetako okuzikirira okw'amangu.

²Abantu bangi baligoberera empisa zaabwe ez'obukaba ne bavumaganyisa ekkubo ery'amazima;

³balibafunamu amagoba mangi nga bakozesa ebigambo eby'obulimba olw'omululu gwabwe. Abo Katonda yabalalira dda omusango era n'okuzikirizibwa kwabwe tekubuusibwabuusibwa.

⁴Katonda teyasaasira bamalayika abaayonoona, wabula yabasuula mu lukonko oluwanvu olujjudde ekizikiza, gye bali, nga basibiddwa mu njegere nga balindirira olunaku olw'okusalirwako omusango.

⁵N'ensi ey'edda teyagisaasira, n'aleeta amataba ku nsi okuzikiriza abo abataamuty, n'alokolako Nuuwa eyabuulira obutuukirivu wamu n'abalala musanvu.

⁶Era yasalira omusango abaali mu bibuga by'e Sodomu n'e Ggomola bwe yabazikiriza, ne bisirikka mu muliro, bw'atyo n'alaga ebyo ebigena okutuuka ku buli atatya Katonda.

⁷Kyokka n'awonya Lutti, omuntuukirivu, eyalumwanga ennyo olw'obulamu obw'abantu abo abajeemu.

⁸Olw'okubanga yababeerangamu, buli lunaku, yalabanga era n'awuliranga ebikolwa eby'obujeemu bye baakolanga, ekyo ne kimuleetera okunyolwa mu mwoyo gwe omuntuukirivu.

⁹Mukama amanyi okuwonya n'okuggya mu kugezesewa abamutya, n'abonereza abatali bakkiriza okutuusa ku lunaku olw'okusalirako omusango,

¹⁰n'okusingira ddala abo abagoberera okwegomba kwabwe okw'omubiri ne banyooma abakulembeze baabwe. Tebaliiko kye batya, beerowoozaako bokka, era tebakwatibwa na nsonyi kuvuma baakitiibwa.

¹¹Kyokka bo bamalayika newaakubadde be basinga abayigiriza abo amaanyi n'obuyinza, bwe batwala ensonga ezo eri Mukama waffe tebakozesa lulimi luvuma.

¹²Abantu bali bavuma ne bye batategeera, bali ng'ensolo obusolo ezitaliimu magezi ezikwatibwa okuttibwa ne zizikirizibwa; era nabo okufaanana ng'ensolo ezo, bagenda kuzikirizibwa.

¹³Abantu abo bagenda kubonerezebwa olw'ebibi bye bakola. Kubanga buli lunaku bagoberera okwegomba kwabwe olw'okwesanyusa, era abantu abo bakwasa mmwe ensonyi era babaswaza bwe beegatta nammwe mu mbaga zammwe, nga bakola effujjo mu masanyu gaabwe.

¹⁴Balina amaaso agajjude obukaba, tebalekaayo kukola kibi buli kiseera boonoona era basendasenda abatali banywevu, bajjudde omululu. Baana abaakolimirwa,

¹⁵abaakyama ne bava mu kkubo okufaanana nga Balamu mutabani wa Beyoli, eyayagala empeera ey'obutali butuukirivu.

¹⁶Kyokka endogoyi etayogera, Katonda bwe yagyogeza n'emumanya olw'obujeemu bwe n'eziyiza eddalu lya nnabbi oyo.

¹⁷Abantu abo nzizi ezitaliimu mazzi. Bali ng'ebire ebitwalibwa embuyaga, era baterekeddwa ekifo eky'ekizikiza ekikutte be zigizigi.

¹⁸Boogera ebigambo eby'okwekuluntaza era ebitaliimu nsa. Mu kwegomba kw'omubiri ne mu bukaba bwabwe basendasenda abo abali okumpi n'okubadduka abakyatambulira mu kibi.

¹⁹Babasuubiza eddembe, so nga bo bennyini baddu ba bikolwa ebibi eby'okuzikirira. Kubanga omuntu afuuka muddu w'ekyo ekimufuga.

²⁰Era abantu bwe bategeera Mukama waffe era Omulokozi waffe Yesu Kristo, ne badduka okuva mu bintu ebyo eby'ensi ebyonoona era ebitwala abantu mu kuzikirira, ate ne bava awo ne babiddamu, bibasibira ddala era obulamu bwabwe bufuuka bubi nnyo okusinga bwe bwali okusooka.

²¹Ekyandisinze be bantu abo obutategeerera ddala kkubo lya Mukama waffe ery'obutuukirivu, eriggya abantu mu kuzikirira, okusinga lwe bamala okulitegeera, ate ne bava ku biragiro ebitukuvu bye baaweebwa.

²²Olugero olwagerebwa kyeluva lutuukirira ku bo olugamba nti, "Embwa eridde ebisesemye byayo," na luno nti: "Embizzi eva okunaazibwa ezzeeyo okwekulukuunya mu bitosi."

2 Peetero 3

Olunaku Iwa Mukama

¹Abaagalwa, eno y'ebbaluwa eyookubiri gye mbawandiikira. Mu bbaluwa zombi ngezezzaako okubakubiriza mutegeerere ddala ebyo ebituufu era ebisaana.

²Mujjukire ebyo ebyayogerwa bannabbi abatukuvu n'ekiragiro kya Mukama waffe era Omulokozi waffe ekyaweebwa abatume bammwe.

³Ekisooka, mutegeerere ddala nga mu nnaku ez'oluvannyuma abantu abagoberera okwegomba kw'omubiri gwabwe balija mu mmwe nga babasekerera,

⁴nga bwe bagamba nti, "Eyasuubiza nti alijja, aluwa? Kubanga kasookedde bajajjaffe bafa, ebintu byonna biri nga bwe byabanga okuva ensi lwe yatondebwa!"

⁵Beefuala abatamanyi nti edda Katonda yalagira bulagizi, era olw'ekigambo eggulu n'ensi ne bitondebwa. Olw'ekigambo kya Katonda ensi yatondebwa ng'eggyibwa mu mazzi era n'ebeera wakati w'amazzi.

⁶Era olw'ekigambo ekyo ensi eyo ey'edda, amazzi gaagisaanyaawo n'ezikirira.

⁷Era olw'ekigambo ekyo, eggulu n'ensi ebiriwo kaakano bikuumibwa nga birindiridde okwokebwa omuliro ku lunaku olw'okusalirako omusango, n'okuzikirizibwa kw'abo abataty Katonda.

⁸Naye, abooluganda, temusaana, kwerabira nti mu maaso ga Mukama emyaka olukumi giri ng'olunaku olumu, era n'olunaku olumu luli ng'emyaka olukumi.

⁹Mukama waffe taludde kutuukiriza ekyo kye yasuubiza ng'abamu bwe balowooza. Wabula ye akyabagumiikiriza, nga tayagala muntu yenna kubula, naye bona beenenye.

¹⁰Naye olunaku lwa Mukama waffe lulijja ng'omubbi bw'ajja nga tewali n'omu amanyi; eggulu lirivaawo nga liwuma nnyo, n'ebiririko birizikirizibwa n'omuliro, era ensi n'ebintu ebigrimu birisirikka.

¹¹Kale obanga ebintu byonna bya kuzikirizibwa, mugwanidde kubeeranga bantu ba mpisa ntukuvu era abatya Katonda,

¹²nga mulindirira era nga mwegomba nnyo olunaku lwa Katonda okutuuka, olunaku obwengula bwonna bwe buryokebwa ne buzikirizirwa n'ebiburimu ne bisaanuuka ne bisirikka.

¹³Naye nga Katonda bwe yatusuubiza, tulindirira obwengula obuggyga n'ensi empya omuli obutuukirivu.

¹⁴Kale, abaagalwa, nga bwe mulindirira ebintu ebyo okubaawo mufubenga nnyo okuba abalongoofu abataliiko kya kunenyezebwa nga mulina emirembe.

¹⁵Kyokka mulowoozenga ku kubonyaabonyezebwa okw'obulokozi bwa Mukama waffe, nga ne muganda waffe omwagalwa Pawulo kye yabategeeza mu bbaluwa ze yabawandiikira mu magezi Katonda ge yamuwa.

¹⁶Weewaawo ebbaluwa ze zirimu bingi ebizibu okutegeera, kyokka buli lw'awandiika aba ayogera ku nsonga ezo; wabula bo abatamanyi era abatali banywevu babinnyonnyola nga bwe bannyonnyola ebyawandiikibwa ebirala ne beereetako okuzikirira.

¹⁷Kale, mmwe abaagalwa, ebyo nga bwe mubitededde, mwekuume muleme kukyamizibwa abantu abo abajeemu, si kulwa nga babaleetera okugwa ne muva we munyweredde.

¹⁸Mweyongere okukula mu kisa ne mu kutegeera Mukama waffe era Omulokozi waffe Yesu Kristo. Oyo aweebwenga ekitiibwa kaakano n'emirembe gyonna. Amiina.

1 Yokaana

1 Yokaana 1

Kigambo Aleeta Obulamu

¹ Tubawandiikira ku Kigambo ow'obulamu, eyaliwo okuva ku lubereberye, gwe twawulira, gwe twalaba n'amaaso gaffe, era gwe twakwatako n'engalo zaffe.

² Obulamu bwalabisibwa, era tubulabye, tubuweerako obujulirwa, era tubategeeza obulamu obutaggwaawo obwali ne Kitaffe, era ne bulabisibwa gye tulি.

³ Tubategeeza ekyo kye twawulira era kye twalaba, mulyoke mutwegatteko, mubeere bumu naffe, era mussekimu ne Kitaffe awamu n'Omwana we Yesu Kristo.

⁴ Era tubawandiikira ebintu bino essanyu lyaffe liryoke lituukirire.

Okutambilira mu Musana

⁵ Buno bwe bubaka bwe twafuna okuva gy'ali: tubategeeza nti, Katonda musana; mu ye temuliimu kizikiza n'akatono.

⁶ Noolwekyo bwe twogera nti tussakimu naye, ate ne tutambilira mu kizikiza, tuba balimba era tetuba ba mazima.

⁷ Naye bwe tutambilira mu musana nga ye bw'ali omusana, olwo tussakimu buli muntu ne munne, n'omusaayi gwa Yesu Omwana we, gutunaazaako buli kibi kyonna.

⁸ Bwe twogera nti tetulina kibi, twerimba ffekka, era n'amazima tegaba mu ffe.

⁹ Naye bwe twatula ebibi byaffe, ye mwesigwa era mutuukirivu okutusonyiwa n'okutunaazaako obutali butuukirivu bwonna.

¹⁰ Bwe tugamba nti tetulina kibi, tumufuula mulimba era nga n'ekigambo kye tekiri mu ffe.

1 Yokaana 2

Kristo Omuwolereza Waffe

¹ Baana bange abaagalwa, ebintu bino mbibawandiikkidde mulemenga okukola ekibi. Naye omuntu yenna bw'akolanga ekibi tulina omuwolereza eri Kitaffe, ye Yesu Kristo Omutoukirivu.

² Ye, ye mutango olw'ebibi byaffe, naye si lwa bibi byaffe byokka, wabula ne ku lw'ebibi by'abantu bona.

³ Bwe tugondera ebiragiro bye, kye kikakasa nti tumutegeera.

⁴Kyokka oyo agamba nti amutegeera n'atakuuma biragiro bye, aba mulimba, era si wa mazima.

⁵Naye buli agondera ekigambo kye, ddala ng'okwagala kwa Katonda kutuukiridde mu muntu oyo. Era ekyo kye kitukakasisa nti tuli mu ye.

⁶Oyo agamba nti ali mu ye, asaana okutambula nga Mukama waffe yennyini bwe yatambula.

⁷Abaagalwa, sibawandiikira kiragiro kiggya, naye mbawandiikira ekiragiro ekyabaawo edda, kye kyo kye mwawuliranga okuva ku lubereberye.

⁸Kyokka nno ekiragiro kino kye mbawandiikira kiggya era kikakasirizibwa mu ye ne mu mmwe. Kubanga ekizikiza kigenda kiggwaawo era omusana ogw'amazima kaakano gwaka.

⁹Omuntu agamba nti atambulira mu musana, kyokka ate n'akyawa owooluganda, aba akyali mu kizikiza.

¹⁰Naye ayagala owooluganda aba ali mu musana, era talinaawo kimwesittaza.

¹¹Kyokka oyo akyawa owooluganda, aba akyali mu kizikiza, era mu kizikiza ekyo mw'atambulira, nga tategeera gy'alaga, kubanga ekizikiza kimuzibye amaaso.

¹²Baana bange abaagalwa, mbawandiikidde kubanga musonyiyiddwa ebibi byammwe olw'erinnya lye.

¹³Era nammwe abakulu, mbawandiikidde kubanga mwamutegeera okuva ku lubereberye. Nammwe abavubuka, mbawandiikidde kubanga muwangudde omubi. Mmwe abaana abaagalwa bawandiikidde, kubanga mutegedde Kitaffe.

¹⁴Myawandiikidde mmwe abakulu kubanga mutegedde oyo eyabaawo okuva ku lubereberye. Mbawandiikidde mmwe abavubuka kubanga muli ba maanyi era n'ekigambo kya Katonda kibeera mu mmwe, era muwangudde omubi.

Temwagalanga Nsi

¹⁵Temwagalanga nsi, wadde eby'ensi. Kubanga omuntu yenna ayagala ensi talii mu kwagala kwa Kitaffe.

¹⁶Kubanga buli eky'ensi: okwegomba kw'omubiri, n'okwegomba kw'amaaso, n'okwekuluntaza okw'obulamu, si bya Kitaffe, naye bya nsi.

¹⁷Ensi n'okwegomba kwayo byonna biggwaawo, naye buli akola Katonda by'ayagala abeerera emirembe gyonna.

Omulabe wa Kristo

¹⁸Baana bange, ekiseera ekisembayo kituuse. Mwategeezebwa ng'Omulabe wa Kristo bw'agenda okujja, era ne kaakano waliwo abalabe ba Kristo bangi, era kwe tutegeerera ng'ekiseera ekisembayo kituuse.

¹⁹abantu abo tebaali baffe ddala, era kyebaava batwawukanako, kubanga singa baali baffe ddala bandisigalidde ddala mu ffe. Naye baatuvaako kiryo ke kigeerekekere ddala nga bona si b'ewaffe.

²⁰Kyokka mmwe mwafukibwako amafuta okuva eri Omutukuvu, era mumanyi byonna.

²¹Kyenva mbawandiikira, si lwa kubanga temumanyi mazima, naye lwa kubanga mugategeera era mumanyi okwawula eby'obulimba n'eb'yamazima.

²²Omulimba y'ani, wabula oyo agamba nti Yesu si ye Kristo. Omuntu oyo yennyini ye Mulabe wa Kristo, era oyo takkiririza Kitaffe wadde Omwana.

²³Kubanga buli atakkiriza Mwana era ne Kitaffe tamukkiriza. Buli ayatula Omwana aba alina ne Kitaffe.

²⁴Ekituufu kye mwawulira okuva ku lubereberye kibeerenga mu mmwe. Bwe munaakuumanga ekyo kye mwawulira okuva ku lubereberye, Omwana awamu ne Kitaffe banaabeeranga wamu nammwe.

²⁵Na kuno kwe kusuubiza kwe yatusuubiza: obulamu obutaggwaawo.

²⁶Mbwandiikkidde bino olw'okubanga waliwo abo ababalimbalmiba.

²⁷Kyokka okufukibwako amafuta kwe mwafuna okuva gy'ali kwali mu mmwe, noolwekyo temwetaaga muntu kubayigiriza. Wabula Mwoyo Mutukuvu y'abayigiriza buli kimu, era w'amazima si wa bulimba, kale mubeerenga mu ye nga bwe yabayigiriza.

²⁸Kaakano, abaana abaagalwa, munywercere mu Kristo, bw'alirabika tulyoke tube bagumu abatalikwatibwa nsonyi ku lunaku lw'aliddirako.

²⁹Nga bwe mumanyi nti Mukama mutuukirivu, kirungi mutegeere nti oyo akola eby'obutuukirivu ye mwana we.

1 Yokaana 3

Abaana ba Katonda

¹Mulabe okwagala Katonda kw'atwagala bwe kuli okunene ennyo, n'atuyita abaana be, era ddala bwe tutyo bwe tuli. Ensi kyeva eremwa okututegeera, kubanga naye yennyini teyamutegeera.

²Abaagalwa, kaakano tuli baana ba Katonda, naye tetumanyi bwe tuliba. Kyokka tumanyi nti bw'alirabika tulifaanana nga ye, kubanga tulimulabira ddala nga bw'ali.

³Buli muntu alina essuubi eryo yeetukuza nga Katonda bw'ali omutukuvu.

⁴Buli muntu akola ebibi aba mujeemu, era ekibi bwe bujeemu.

⁵Naye mmwe mumanyi nti ye, yalabisibwa alyoke aggyewo ebibi. Era mu ye, temulii mu kibi.

⁶Era tewali n'omu abeera mu ye ate ne yeeyongera okukola ekibi. Wabula oyo eyeeyongera okukola ekibi tamutegeeranga, era tamumanyi n'akatono.

⁷Abaana abaagalwa, temulimbibwalimbibwanga muntu n'omu; Buli akola eby'obutuukirivu aba mutuukirivu, nga Katonda bw'ali omuntuukirivu,

⁸naye buli akola ekibi wa Setaani, kubanga okuva olubereberye Setaani akola bibi. Omwana wa Katonda kyeyava ajja mu nsi azikirize ebikolwa bya Setaani.

⁹Noolwekyo tewali afuuka mwana wa Katonda ate ne yeeyongera okukola ekibi, kubanga ensigo ya Katonda ebeera mu ye, so tayinza kukola kibi, kubanga yazaalibwa Katonda.

¹⁰Ku kino abaana ba Katonda n'aba Setaani kwe bategeererwa. Buli akola ebitali bya butuukirivu si wa Katonda, era na buli atayagala muganda we si wa Katonda.

Mwagananenga

¹¹Kubanga buno bwe bubaka bwe twawulira okuva ku lubereberye nti twagananenga,

¹²si nga Kayini eyali owa Setaani, n'atta muganda we. Kale yamuttira ki? Kayini yatta muganda we kubanga Kayini yakola ebibi, so nga ye muganda we yakola eby'obutuukirivu.

¹³Abooluganda, ensi bwe bakyawanga, temwewuunyanga.

¹⁴Kubanga ffe tumanyi nga twava mu kufa, ne tuyingira mu bulamu, kubanga twagala abooluganda, naye buli muntu atalina kwagala akyali mu kufa.

¹⁵Buli akyawa muntu munne, oyo aba mussi, era mukimanyi nti tewali mussi alina obulamu obutaggwaawo mu ye.

¹⁶Mu kino mwe tutegeerera okwagala, kubanga yawaayo obulamu bwe ku lwaffe, era naffe kyetuva tuteekwa okuwaayo obulamu bwaffe olw'abooluganda.

¹⁷Buli alina ebintu eby'omu nsi n'alaba muganda we nga yeetaaga, naye n'abulwako ky'amuwa, okwagala kwa Katonda, kuyinza kutya okuba mu ye?

¹⁸Abaana abaagalwa, tetusaana kwagala mu bigambo kyokka, wabula twagananenga ne mu bikolwa ne mu bulamu obulabika eri abantu.

¹⁹Mu ekyo mwe tutegeerera nga tuli ba mazima, era ne tukkakkanya omutima gwaffe mu maaso ge.

²⁰Singa omutima gwaffe tegutusalira musango, Katonda ye asinga omutima gwaffe era ye atgeera ebintu byonna.

²¹Abaagalwa, omutima gwaffe bwe gutatusalira musango, tuba bagumu mu maaso ga Katonda.

²²Era buli kye tumusaba akituwa, kubanga tugondera ebiragiro bye, era ne tukola ebimusanyusa.

²³Era kino ky'atulagira nti, tukkiririze mu linnya ly'Omwana we Yesu Kristo, era twagalanenga nga ye bwe yatulagira.

²⁴Kale oyo agondera ebiragiro bye abeera mu Ye, era naye abeera mu ye. Kino tukimanyi ng'ali mu ffe, kubanga Mwoyo Mutukuvu gwe yatuwa abeera mu ffe.

1 Yokaana 4

Mugezese Emoyo

¹Abaagalwa, temukkirizanga buli myoyo, naye musookenga okugyetegereza mulabe obanga givudde eri Katonda, kubanga kaakano waliwo bannabbi ab'obulimba bangi mu nsi.

²Eno y'engeri gye tutegeeramu Mwoyo wa Katonda: buli ayatula nti Yesu Kristo yafuuka omubiri, ng'ava eri Katonda, oyo y'alina Mwoyo wa Katonda.

³Naye buli mwoyo ogutayatula Yesu nga teguvudde eri Katonda. Ogwo gwe mwoyo ogw'Omulabe wa Kristo, gwe mwawulira nti ajja mu nsi, era amaze okutuuka.

⁴Mmwe, abaana abaagalwa, muli ba Katonda era mumaze okuwangula, kubanga oyo ali mu mmwe wa maanyi okusinga oyo ali mu nsi.

⁵Bo ba nsi era boogera bya nsi, era abantu b'ensi kyebava babawuliriza.

⁶Naye ffe tuli bantu ba Katonda, era buli amanyi Katonda atuwuliriza; atali wa Katonda tatuwuliriza. Eyo y'engeri gye tusobola okwawulamu omwoyo ogw'amazima n'omwoyo ogw'obulimba.

⁷Abaagalwa, twagalanenga, kubanga okwagala kuva eri Katonda, era buli alina okwagala mwana wa Katonda, era amanyi Katonda.

⁸Naye buli atalina kwagala tamanyi Katonda, kubanga Katonda kwagala.

⁹Katonda yatulaga okwagala kwe, bwe yatuma mu nsi Omwana we omu yekka bw'ati, tulyoke tube abalamu ku bw'oyo.

¹⁰Mu kino mwe tutegeerera ddala okwagala kwennyini, kubanga teyakikola lwa kuba nti ffe twali twagala Katonda, naye ye yennyini ye yatwagala, n'awaayo Omwana we ng'omutango olw'ebibi byaffe.

¹¹Kale abaagalwa, nga Katonda bwe yatwagala bw'atyo naffe tuteekwa okwagalananga.

¹²Tewali n'omu eyali alabye ku Katonda, naye bwe twagalana, Katonda abeera mu ffe, n'okwagala kwe ne kulabikira mu ffe.

¹³Mu ekkyo mwe tutegeerera nti Katonda ali mu ffe era naffe tuli mu Ye, olwa Mwoyo gw'atuwadde.

¹⁴Era ffe twamulaba n'amaaso gaffe, kyetuva tutegeeza nti Kitaffe yatumwa Omwana we okuba Omulokozi w'ensi.

¹⁵Kale buli ayatula nti Yesu Mwana wa Katonda, nga Katonda ali mu ye era nga naye ali mu Katonda.

¹⁶Ffe tumanyi okwagala kwa Katonda era tukkiririza mu kwagala kwe okwo kw'alina gye tuli. Katonda kwagala, era buli abeera n'okwagala abeera mu Katonda, ne Katonda abeera mu ye.

¹⁷Bwe twagala bannaffe nga Kristo bwe yakola ng'ali mu nsi muno, tetulibaako kye tweraliikirira ku lunaku olw'okusalirako omusango.

¹⁸Mu kwagala temulii mu kutya, kubanga okwagala okutuukiridde kumalawo okutya; kubanga okutya kulimu okubonerezebwa, na buli atya, aba tannatuukirira mu kwagala.

¹⁹Tulina okwagala kubanga Ye ye yasooka okutwagala.

²⁰Omuntu yenna bw'agamba nti, "Njagala Katonda," naye n'akyawa muganda we, omuntu oyo mulimba. Kubanga buli atayagala muganda we gw'alabako, tasobola kwagala Katonda gw'atalabangako.

²¹Era Katonda yennyini yatulagira nti, "Buli ayagala Katonda ayagalenga ne muganda we."

1 Yokaana 5

Obuwanguzi bwaffe

¹Buli akkiriza nti Yesu ye Kristo, oyo aba mwana wa Katonda, era buli ayagala kitaawe w'omwana ayagala n'omwana we.

²Ku ekkyo kwe tutegeerera nga twagala abaana ba Katonda, bwe twagala Katonda ne tukola by'atulagira.

³Kubanga okwagala kwa Katonda kwe kukola ebyo by'atulagira okukola. Okukola by'atulagira si kizibu,

⁴kubanga buli mwana wa Katonda awangula ekibi n'okwegomba ensi, era kuno kwe kuwangula okwawangula ensi, kwe kukkiriza kwaffe.

⁵Naye ani ayinza okuwangula ensi okuggyako oyo akkiriza nti Yesu Mwana wa Katonda?

Yesu Kristo

⁶Yesu Kristo oyo yennyini ye yajja n'amazzi n'omusaayi, si na mazzi, naye n'amazzi n'omusaayi. Era ne Mwoyo ekyo akikakasa kubanga Mwoyo ye mazima.

⁷Waliwo okukakasa kwa mirundi esatu:

⁸Mwoyo Mutukuvu, n'amazzi, n'Omusaayi, era ebisatu ebyo bikkiriziganya.

⁹Obanga tukkiriza obujulirwa bw'abantu, obujulirwa bwa Katonda tusaana okubukkiriza ennyo n'okusingawo, kubanga bwe businga obukulu ng'ategeeza ku Mwana we.

¹⁰Kale buli akkiririza mu Mwana wa Katonda akyetegeezesa ddala ye yennyini. Oyo atakkiririza mu Katonda ng'amufudde mulimba, kubanga takkiriza ekyo Katonda ky'ayogera ku Mwana we.

¹¹Era buno bwe bujulirwa nti: "Katonda yatuwa obulamu obutaggwaawo, era obulamu buno buli mu Mwana we."

¹²Buli alina Omwana alina obulamu, naye oyo atalina Mwana wa Katonda talina bulamu.

Okumaliriza

¹³Ebyo mbiwandiikidde mmwe abakkiriza erinnya ly'Omwana wa Katonda, mulyoke mumanye nti mulina obulamu obutaggwaawo.

¹⁴Noolwekyo tulina obuvumu nti bwe tugenda gy'ali ne tumusaba ekintu kyonna, ye nga bw'asiima atuwulira.

¹⁵Era bwe tutegeera nti atuwulira bwe tumusaba, buli kye tumusaba talema kukituwa.

¹⁶Omuntu yenna bw'alaba muganda we ng'agudde mu kibi ekitali kya kufa, amusabirenga, Katonda talirema kumuwa bulamu. Njogera ku abo bokka abagwa mu kibi ekitali kya kufa.

¹⁷Buli ekitali kya butuukirivu kibi, naye waliwo ekibi ekitaleetera muntu kufa.

¹⁸Tumanyi nga buli muntu yenna azaalibwa Katonda teyeyeyongera kukola kibi, kubanga Katonda amukuma, Setaani n'atamukola kabi.

¹⁹Tumanyi nga tuli ba Katonda, n'ensi yonna eri mu mikono gya Setaani.

²⁰Era tumanyi ng'Omwana wa Katonda yajja mu nsi, n'atuwa okutegeera tumanyi Katonda ow'amazima, era tuli mu oyo Katonda ow'amazima, ne mu Yesu Kristo Omwana we. Oyo ye Katonda ow'amazima n'obulamu obutaggwaawo.

²¹Abaana abaagalwa, mwewalenga bakatonda abalala.

2 Yokaana

2 Yokaana 1

¹ Nze omukadde mpandiikira omukyala omulonde awamu n'abaana be, be njagalira ddala mu mazima, si nze mbaagala nzekka, wabula n'abo bona abategeera amazima.

² Amazima ago gabeera mu ffe, era gajjanga kubeera mu ffe emirembe gyonna.

³ Ekisa, n'okusaasira n'emirembe ebiva eri Katonda Kitaffe ne Yesu Kristo Omwana wa Kitaffe bijjanga kubeera naffe mu mazima ne mu kwagala.

⁴ Nnasanyuka nnyo, bwe nnasanga abamu ku baana bo nga batambulira mu mazima nga bwe twalagirwa Kitaffe.

⁵ Naye nnyabo kaakano nkusaba nga siri ng'akuwa ekiragiro ekiggya, naye nkujjukiza ekiragiro ekyo Katonda kye yatuwa okuva ku lubereberyе nti, "Twagananenga."

⁶ Era kuno kwe kwagalana nti tugonderenga ebiragiro bya Katonda. Kubanga okuva ku lubereberyе twategeeezbwa nga bwe tuteekwa okutambula.

⁷ Mwekuume, abalimba bangi mu nsi abatakkiriza nti Yesu yayambala omubiri. Buli muntu ayogera bw'atyo mulimba era mulabe wa Kristo.

⁸ Mwekuume, muleme okufiirwa kye twakolerera, wabula mukikuume kubanga mulifuna empeera yammwe yonna.

⁹ Buli asukka ku ebyo Kristo by'ayigiriza n'atabinywereramu, talina Katonda; naye oyo anywerera mu kuyigiriza okwo alina Kitaffe n'Omwana.

¹⁰ Omuntu yenna bw'ajja gye muli, n'atayigiriza bw'atyo, temumwanirizanga mu nnyumba yammwe, n'okulamusa temumulamusanga.

¹¹ Kubanga buli amusembeza aba yeenyigidde mu bikolwa ebyo ebibi.

¹² Mbadde na bingi eby'okubawandiikira, kyokka saagala byonna kubibawandiikira buwandiikizi, wabula nsuubira okubakyalira tulyoke twogeraganye nga tulabagana amaaso n'amaaso, essanyu lyaffe liryoke lituukirire.

¹³ Abaana ba mwannyoko omulonde bakulamusizza.

3 Yokaana

3 Yokaana 1

¹Nze, Omukadde, mpandiikira ggwe Gayo omwagalwa, gwe njagala mu mazima.

²Munnange omwagalwa, nkusabira okole bulungi ebintu byonna era obeere mulamu mu mubiri, nga bw'oli mu mwoyo.

³Abooluganda bwe nabatuukako kya nsanyusa nnyo bwe bambuulira nti onyweredde mu mazima, era nti mw'otambulira.

⁴Tewali kindeetera ssanyu lisinga ng'eryo lye nfunu bwe mpulira nti abaana bange batambulira mu mazima.

⁵Omwagalwa, okola ekintu kya bwesigwa buli lw'okolera abooluganda ebirungi na ddala ababeera ku ɳjendo ne bw'oba tobamanyi.

⁶Baategeeza Ekkanisa omukwano gwe wabalaga awamu ne bye wabakolera. Kibeera kirungi singa obasiibuza ekirabo ekiba kisaanidde.

⁷Kubanga baatambulira mu linnya lya Mukama, nga tebakkiriza ebyo abatali bakkiriza bye baabawanga.

⁸Noolwekyo ffe ffennyini, ffe tusaana okubalabirira tulyoke tufuuke bakozi bannaabwe mu mazima.

Diyotuleefe ne Demeteriyo

⁹Nawandiikira Ekkanisa ku nsonga eyo, kyokka Diyotuleefe, olw'okwagala okwefuula omukulembeze tatwagala.

¹⁰Bwe ndija ndibategeeza ebimu ku bintu by'akola, n'ebintu by'atwogerako ebitali birungi, era n'olulimi oluvuma lw'akozesa. Takoma ku kugaana kwaniriza abooluganda abatambuze kyokka, naye n'okulagira alagira abantu abalala nabo, baleme okubaaniriza era abo ababaaniriza agezaako okubagoba mu Kkanisa.

¹¹Mukwano gwange, togobereranga kyakulabirako ekibi wabula eby'obutuukirivu. Gobereranga ebyo byokka by'olaba nga bya butuukirivu. Kirungi ojjukirenga nti abo abakola eby'obutuukirivu baba bakakasiza ddala nga bwe bali abaana ba Katonda; naye abakola ebitali bya butuukirivu balaga nga bwe bali ewala ne Katonda.

¹²Naye buli omu ayogera bya mazima ku Demeteriyo. Nange mwogerako bya mazima byereere. Naye omanyi nga nze njogera mazima.

¹³Mbadde na bingi eby'okukugamba, kyokka saagala kubikuwandiikira mu bbaluwa,

¹⁴kubanga nsuubira okukulaba mu bbanga ttono. Kale olwo tuliba na bingi eby'okwogerako ffembi nga tulabaganye amaaso n'amaaso.

¹⁵Emirembe gibeerenga naawe. Ab'emikwano abali wano bakulamusizza. Nange, mikwano gyange abali eyo, buli omu munnamusize.

Yuda

Yuda 1

¹ Nze, Yuda, omuddu wa Yesu Kristo, era muganda wa Yakobo, mpandiikira abaagalwa bona abayitibwa mu Katonda Kitaffe, era abakuumibwa Yesu Kristo.

² Ekisa kya Katonda, n'emirembe, n'okwagala byeyongerenga mu mmwe.

Abayigiriza ab'Obulimba

³ Abaagalwa, nnali neesunga nnyo okubawandiikira ku bulokozi bwaffe bwe ntyo nawalirizibwa okubawandiikira nga mbazzaamu amaanyi nga mbegayirira mulwanirire okukkiriza abatukuvu kwe baaweebwa omulundi ogumu.

⁴ Waliwo abantu abajja mu bubba, abaawandiikwako edda nga baasalirwa omusango, abatatyatya Katonda abajerega ekisa kya Katonda waffe, ne bakiyisaamu amaaso, ne beegaana Yesu Kristo Mukama waffe, omu yekka.

⁵ Naye njagala okubajjukiza nti newaakubadde nga byonna mubimanyi, nga olunaku lumu Mukama yalokola eggwanga n'aliggya mu nsi y'e Misiri, oluvannyuma n'azikiriza abatakkiriza,

⁶ ne bamalayika abataakuma kituibwa kyabwe ne badda mu kukola bye baayagala ne balekulira n'ebifo byabwe, abo Katonda yabisiba mu njegere n'abassa mu kkomera ery'ekizikiza ekikutte gye balindiririra okusalirwa omusango.

⁷ Temusaanye kwerabira bibuga ebya Sodomu ne Ggomola n'ebibuga ebyali bibiriraanye. Byonna byali bijjudde kwegomba okubi n'obwenzi, nga n'abasajja bakolaganako eby'ensonyi. Ebibuga ebyo byazikirizibwa n'omuliro, era byabonerezebwa n'omuliro ogutaggwaawo bibeere ekyokulabirako gye tuli.

Okukoza Olulimi Oluvvoola

⁸ Mu ngeri y'emu abo abaloota bagwagwawaza omubiri, ate oludda ne banyooma obuyinza, ne bavvoola ne bamalayika.

⁹ Kale newaakubadde nga Mikayiri, ye malayika asinga obukulu, naye bwe yali akaayana ne Setaani ku mulambo gwa Musa, teyamuvuma wabula yagamba bugambi nti, "Mukama akunenye!"

¹⁰ Naye kale abantu bano bavvoola kye batategeera, era okufaanana ng'ensolo obusolo bakola buli kye baagala, era ebyo bibaleetedde okuzikirira.

¹¹ Zibasanze abo! Kubanga bagoberera ekkubo lya Kayini, era bakola buli kye basobola okufunamu ensimbi okufaanana nga Balamu, era ne bajemera Katonda nga Koola bwe yakola, noolwekyo balizikirizibwa.

¹² Abantu bano bwe bajja ne babeegattamu nga muli ku mbaga zammwe ez'okumanyagana, baba ng'amabala amabi, nga tebatya, nga beefaako bokka, nga bali ng'ebire ebitaliimu mazzi ebitwalibwa empewo; oba ng'emiti egiwaatudde, egitaliiko bibala, egyafa emirundi ebiri, egyakuulibwa n'emirandira;

¹³ oba ng'amayengo ag'oku nnyanja agasiikuuse, ebikolwa byabwe ne bibaswaza; oba ng'emmunyeenyenye eziva mu kkubo lyazo, eziterekeddwa ekizikiza ekikutte ennyo eky'olubeerera.

¹⁴ Enoka eyaliwo nga wayiseewo emirembe musanvu okuva ku Adamu, abantu bano yaboogerako eby'obunnabbi nti, "Mulabe Mukama aaja n'abatukuvu be abangi ennyo.

¹⁵ Alireeta abantu bona mu maaso ge basalirwe omusango mu bwenkanya olw'ebikolwa byabwe bona abataty Katonda, bye baakola mu bugenderevu, n'olw'ebigambo byonna ebizibu abakozi b'ebibi bye bamwogeddeko eby'obutaty Katonda."

¹⁶ Beemulugunya, era bakola buli kye beegomba, era nga boogerera waggulu ebigambo eby'okweraga; era olaba bassizzaamu omuntu ekitiibwa ng'omanya nti balina kye bamwagalako.

Okugumiikiriza

¹⁷ Naye mmwe, abaagalwa, mujukire abatume ba Mukama waffe Yesu Kristo ebigambo bye baayogera edda

¹⁸ bwe baabagamba nti, "Mu nnaku ez'oluvannyuma walijjavo abantu abalibasekerera, nga beegomba nga bwe baagala, nga batambulira mu bitasiimibwa Katonda."

¹⁹ Abo be bo abaleeta enjawukana, ab'omubiri obubiri era abatalina Mwoyo Mutukuvu.

²⁰ Naye mmwe, abaagalwa, musaana okuzimba obulamu bwammwe nga bwetyongera okuba obw'amaanyi, nga mubuzimbira ku musingi ogw'okukkiriza kwammwe okutukuvu, era nga musaba mu Mwoyo Mutukuvu,

²¹ nga mwekuumira mu kwagala kwa Katonda, nga mwesunga okusaasira kwa Mukama waffe Yesu Kristo olw'obulamu obutaggwaawo.

²² Mubeerenga ba kisa eri abo ababuusabuusa mu kukkiriza,

²³ n'abalala mufubenga okubawonya nga mubakwakkula mu nnimi z'omuliro, n'abalala mubatuuse eri Mukama nga muyita mu kubalaga ekisa ng'aboonoonyi, wabula mukyawe ekyambalo, ekijjudde amabala agakiteekeddwako omubiri gwabwe.

Okusaba okw'Okutendereza

²⁴Katonda asobola okubawanirira muleme okuva mu kkubo lye, era n'okubatuusa mu maaso ge ag'ekitiibwa nga temuliiko kamogo era nga mujjudde essanyu;

²⁵Katonda oyo omu yekka atulokola okuyita mu Yesu Kristo Mukama waffe, agulumizibwe era atenderezebwenga olw'amaanyi ge n'obuyinza bwe, okuva ku mirembe gyonna egyptayita, ne kaakano era ne mu mirembe egitaliggwaawo! Amiina.

Okubikkulirwa

Okubikkulirwa 1

Ennyanjula

¹ Okubikkulirwa kwa Yesu Kristo, Katonda kwe yamuwa okulaga abaddu be ebyo ebiteekwa okubaawo amangu. Kristo yakimanyisa ng'atuma malayika we eri omuweereza we Yokaana

² eyategeeza ekigambo kya Katonda n'obujulirwa bwa Yesu Kristo ku byonna bye yalaba.

³ Alina omukisa oyo asoma n'abo abawulira ebigamb MAT - Mathayo o by'obunnabbi buno, ne beekuumma ebiwandiikiddwa, kubanga ekiseera kiri kiweddeyo.

Okulamusa n'Okutendereza Mukama

⁴ Nze Yokaana mpandiikira Ekkanisa omusanvu eziri mu Asiya. Mbagaliza ekisa n'emirembe ebiva eri Katonda oyo aliwo, era eyaliwo era alibaawo; n'ebiva eri emyoyo omusanvu egiri mu maaso g'entebe ye ey'obwakabaka,

⁵ era n'okuva eri Yesu Kristo omujulirwa omwesigwa. Oyo ye yasooka okuzuukira mu bafu, era y'afuga bakabaka ab'omu nsi; oyo yatwagala, era ye yatuggya mu bibi byaffe n'omusaayi gwe,

⁶ n'atufuala obwakabaka bw'obwakabona bwa Katonda, Kitaawe. Ekitiibwa n'obuyinza bibeerenga eri oyo emirembe n'emirembe. Amiina.

⁷ Laba, ajja n'ebire, na buli liiso lirimulaba, n'abaamufumita balimulaba, era n'amawanga gonna ku nsi galimukungubagira. Weewaawo. Amiina!

⁸ "Nze Alufa ne Omega," bw'ayogera Mukama Katonda, "oyo aliwo, eyabaawo era alikomawo, Ayinzabyonna."

Oyo eyali ng'Omwana w'Omuntu

⁹ Nze muganda wammwe Yokaana, abonaabonera awamu nammwe mu bwakabaka ne mu kugumiikiriza ebiri mu Yesu, nnali ku kizinga ekiyitibwa Patumo, olw'ekigambo kya Katonda era n'okujulira ebya Yesu.

¹⁰ Nnali mu mwoyo ku lunaku lwa Mukama waffe, ne mpulira eddoboozi ery'omwanguka emabega wange, eryavuga ng'ery'akagombe,

¹¹ nga ligamba nti, "By'olaba, biwandiike mu kitabo, okiweereze eri Ekkanisa omusanvu: Ekkanisa ey'omu Efeso, n'ey'omu Sumuna, n'ey'omu Perugamo, n'ey'omu Suwatira, n'ey'omu Saadi, n'ey'omu Firaderufiya n'ey'omu Lawodikiya."

¹² Ne nkyuka okulaba eyali ayogera nange, ne ndaba ebikondo by'ettaala ebya zaabu musanvu.

¹³Era wakati mu byo ne ndabamu omuntu “eyali ng’Omwana w’Omuntu” eyali ayambadde ekyambalo ekiwanvu ekikoma ku bigere, nga yeesibye mu kifuba olukoba olwa zaabu.

¹⁴Omutwe gwe n’enviiri ze byali byeru ng’ebiyoya by’endiga ebyeru, era nga bifaanana ng’omuzira, n’amaaso ge nga gali ng’ennimi z’omuliro.

¹⁵Ebigere bye byali ng’ekikomo ekizigule ekyakaayakana mu muliro n’eddoboozi lye nga liyira ng’amazzi amangi.

¹⁶Yali akutte emmunyeenyemusantu mu mukono gwe ogwa ddyo era ng’alina ekitala ekyogi eky’obwogi obubiri mu kamwa ke; n’ekyenyi kye nga kiri ng’enjuba eyakaayakana mu maanyi gaayo.

¹⁷Bwe namulaba, ne ngwa wansi ku bigere bye ne mba ng’afudde, kyokka ye n’antekako omukono gwe ogwa ddyo n’ajnjamba nti, “Totya. Nze Owoolubereberye era Owenkomerero,

¹⁸era omulamu. Nnali nfudde naye kaakano ndi mulamu emirembe gyonna, era nnina ebisumuluzo eby’okufa n’amagombe.

¹⁹“Kale wandiika ebyo by’olabye ebiriwo n’ebyo ebinaatera okubaawo oluvannyuma lw’ebyo ebiriwo.

²⁰Ka nkubuulire amakulu g’emmunyeenyemusantu z’olabye mu mukono gwange ogwa ddyo, era n’ebikondo eby’ettaala ebya zaabu omusantu. Emmunyeenyemusantu be bamalayika b’Ekkanisa omusantu, ate ebikondo by’ettaala eza zaabu omusantu ze Kkanisa omusantu.”

Okubikkulirwa 2

Ebbaluwa Eyawandiikirwa ab’omu Kkanisa ya Efeso

¹ “Eri malayika ow’Ekkanisa ey’omu Efeso wandiika nti: Bw’ati bw’ayogera oyo akwata emmunyeenyemusantu mu ngalo ze mu mukono gwe ogwa ddyo, oyo atambulira wakati w’ebikondo by’ettaala omusantu ebya zaabu.

² Nti mmanyi ebikolwa byo n’okugumiikiriza kwo, era nga tosobola kugumiikiriza bakozi ba bibi era ng’ogezesezza abo abeeyita abatume n’obavumbula nga balimba.

³Era ogumiikirizza okubonaabona n’oguma olw’erinnya lyange, n’otokoowa.

⁴ Naye nnina ensonga gye nkuvunaana: tokyanjagala nga bwe wanagalanga edda.

⁵Noolwekyo jjukira we waseeseteuka. Weenenye, onjagale nga bwe wanagalanga edda. Naye bw’otookole bw’otyo ndija gy’oli ne nzigyawo ekikondo ky’ettaala yo mu kifo kyakyo, okuggyako nga weenenye.

⁶Wabula ekirungi ekikuliko kye kino: okyawa ebikolwa by'Abanikolayiti nga nange bwe mbikyawa.

⁷ Alina amatu, awulire Omwoyo ky'agamba Ekkanisa ezo. Oyo awangula ndimuwa okulya ku muti ogw'obulamu oguli mu nnimiro ya Katonda.

Ebbaluwa Eyawandiikirwa ab'omu Kkanisa ya Sumuna

⁸ "Eri malayika ow'Ekkanisa ey'omu Sumuna wandiika nti: Bw'ati bw'ayogera Owoolubereberye era Owenkomerero eyali afudde oluvannyuma n'azuukira n'aba mulamu,

⁹nti mmanyi okubonaabona kwo n'obwavu bwo, naye ng'oli mugagga, era n'okulimirira kw'aboabee yita Abayudaaya songa ssi Bayudaaya, wabula kuinjaaniro lya Setaani.

¹⁰Temutya n'akatono ebyo bye mugenda okubonaabona. Laba Setaani anaatera okusiba abamu ku mmwe mu makomera okubagezes. Mulyigganyizibwa okumala ennaku kumi ddamba. Mubeere beesigwa okutuusa okufa, nange ndibawa engule ey'obulamu.

¹¹ Alina amatu, awulire Omwoyo ky'agamba Ekkanisa ezo. Oyo awangula talifa mulundi gwakubiri.

Ebbaluwa Eyawandiikirwa ab'omu Kkanisa ya Perugamo

¹² "Eri malayika ow'Ekkanisa ey'e Perugamo wandiika nti: Bw'ati bw'ayogera oyo alina ekitala ekyogi eky'obwogi obubiri

¹³nti, Mmanyi gy'obeera awo awali entebe y'obwakabaka bwa Setaani, kyokka ng'onywezezza erinnya lyange era wasigala n'okukkiriza kwo, ne mu biseera Antipa omujulirwa wange omwesigwa mwe yattirwa wakati mu mmwe, eyo Setaani gy'abeera.

¹⁴ Naye nkulinako ensonga ntono: eyo olinayo ab'enjigiriza eya Balamu eyayigiriza Balaki okutega abaana ba Isirayiri omutego n'abaliisa ennyama ey'omuzizo eyassaddaakirwa eri bakatonda abalala, era n'okwenda.

¹⁵Ate era olinayo n'abakkiririza mu njigiriza y'Abanikolayiti.

¹⁶Noolwekyo weenenye, bw'otookikole ndijja mangu ne nnwanyisa abantu abo n'ekitala eky'omu kamwa kange.

¹⁷ Alina amatu, awulire Omwoyo ky'agamba Ekkanisa ezo. Oyo awangula ndimuwa ku maanu eyakwekebw. Era ndimuwa ejinja eryeru eriwandiikkidwako erinnya eriggya eritamanyiddwa muntu mulala yenna wabula oyo aliweereddwa."

Ebbaluwa Eyawandiikirwa ab'omu Kkanisa ya Suwatira

¹⁸ “Eri malayika ow’Ekkanisa ey’omu Suwatira wandiika nti: Bw’ati bw’ayogera Omwana wa Katonda, oyo alina amaaso agali ng’ennimi ez’omuliro, n’ebigere ebimasamasa ng’ekikomo ekizigule

¹⁹ nti, Mmanyi ebikolwa byo, n’okwagala kwo, n’okukkiriza kwo, n’obutuukirivu bwo, n’okugumiikiriza kwo, era n’ebikolwa byo eby’oluvannyuma bisinga ebyasooka.

²⁰ Kyokka nkulinako ensonga eno. Ogumiikiriza omukazi Yezeberi eyeeyita nnabbi omukazi akyamya abaweeresa bange ng’abayigiriza obwenzi n’okulya emmere eweereddwayo eri bakatonda abalala.

²¹ Namuwa ekiseera yeenenye, kyokka tayagala kwenenya bwenzi bwe.

²² Laba, ndimulwaza obulwadde obulimusuula ku ndiri, era n’abo baayenda nabo mbatuuse ku bulumi obw’amaanyi, okuggyako nga beenenyezza ebikolwa byabwe.

²³ Era nditta abaana be. Olwo Ekkanisa zonna ziryoke zitegeere nti nkebera emitima n’ebirowoozo era ndibasasula ng’ebikolwa byabwe bwe biri.

²⁴ Kale mmwe abalala abali mu Suwatira abatagoberera kuyigiriza kuno abatamanyi bintu bya Setaani eby’obuziba ng’enjogera bw’egamba, sigenda kubassaako mugugu mulala.

²⁵ Wabula munyweze nnyo kye mulina okutuusa lwe ndija.

²⁶ Oyo aliwangula era n’oyo alisigala ng’akola emirimu gyange okutuusa ku nkomerero, ndimuwa obuyinza okufuga amawanga.

²⁷ ‘Alibafuga n’omuggo ogw’ekyuma, n’abayasaayasa ng’ayasaayasa ebibya eby’ebbumba.’

²⁸ Era ndimuwa emmunyeenyey ey’enkya nga nange bwe nagiweebwa Kitange.

²⁹ Alina amatu awulire Omwoyo ky’agamba Ekkanisa ezo.

Okubikkulirwa 3

Ebbaluwa Eyawandiikirwa ab’omu Kkanisa ya Saadi

¹ “Eri malayika ow’Ekkanisa ey’omu Saadi wandiika nti: Bw’ati bw’ayogera oyo alina emyoyo omusanvu egya Katonda n’emmunyeenyey omusanvu nti, Mmanyi ebikolwa byo, ng’olina erinnya eriraga nti oli mulamu so nga oli mufu.

² Kale weegendereze onyweze ebikyasigaddewo ebitannafa. Kubanga mu by’okola sinnalabamu by’otuukiriza mu maaso ga Katonda wange.

³ Kale jjukira bye wayigirizibwa ne bye wawulira obikwate era weenenye. Bw’otegendereze ndija mangu ng’omubbi, so tolimanya ssaawa gye ndijiramu gy’oli.

⁴ Naye waliwo abamu mu Saadi abatonotono abatayoonoonanga byambalo byabwe, balitambula nange nga bambadde engoye enjeru, kubanga basaanidde.

⁵ Na buli awangula alyambazibwa engoye enjeru nga bali, era sirisangula linnya lye mu kitabo ky'obulamu, naye ndyatula erinnya lye mu maaso ga Kitange ne bamalayika be nti oyo muntu wange.

⁶ Alina amatu awulire Omwoyo ky'agamba Ekkanisa ezo.

Ebbaluwa Eyawandiikirwa ab'omu Kkanisa ya Firaderufiya

⁷ "Eri malayika ow'Ekkanisa ey'omu Firaderufiya wandiika nti: Bw'ati bw'ayogera oyo Omutukuvu era ow'amazima era alina ekisumuluzo kya Dawudi aggulawo ne wataba aggalawo, n'okuggalawo ne wataba aggulawo.

⁸ Mmanyi ebikolwa byo. Laba nkugguliddewo oluggi, omuntu yenna lw'atayinza kuggala; kubanga olina amaanyi matono, okuumye ekigambo kyange n'oteegaana linnya lyange,

⁹ laba nnyinza okuwaayo abamu ku abo ab'omu kunjaaniro lya Setaani abeeyita Abayudaaya; laba ndibaleeta okuvuunama ku bigere byammwe bategeere nti mbaagala.

¹⁰ Olwokubanga wakwata ekigambo kyange eky'okugumiikiriza, nange ndikuwonya ekiseera eky'okugezesebwa ekinaatera okuja.

¹¹ Nzija mang! Nnyweza ky'olina waleme kubaawo akutwalako ngule yo.

¹² Awangula ndimufuula empagi mu Yeekaalu ya Katonda wange, mw'ataliva emirembe gyonna, era ndimuwandiiako erinnya lya Katonda wange, n'erinnya ly'ekibuga kya Katonda wange, Yerusaalemi ekiggya nga kikka okuva mu ggulu eri Katonda wange n'erinnya lyange eriggya.

¹³ Alina amatu awulire Omwoyo ky'agamba Ekkanisa ezo.

Ebbaluwa Eyawandiikirwa ab'omu Kkanisa ya Lawodikiya

¹⁴ "Eri malayika ow'Ekkanisa ey'omu Lawodikiya wandiika nti: Bw'ati bw'ayogera oyo Amiina, omujulirwa, omwesigwa, ow'amazima, omukulu w'abaliwo, n'abalibaawo emirembe gyonna, era ensibuko y'ebitonde bya Katonda.

¹⁵ Mmanyi ebikolwa byo: toyokya so tonnyogoga, nandiyagadde obe ng'oyokya oba ng'onnyogoga.

¹⁶ Naye olwokubanga oli wa kibuguumirize toyokya so tonnyogoga, kinaandetera okukuwandula okuva mu kamwa kange.

¹⁷Olkubanga ogamba nti, 'Ndi mugagga era nnina ebintu bingi, sso siriiko kye neetaaga. Sirina kimbulako!' Sso n'otomanya ng'oli munaku asaasirwa, omwatu, omuzibe w'amaaso era ali obwerefere.

¹⁸Nkuwa amagezi onguleko ebya zaabu, eyalongoosebwa mu muliro, olyoke ogaggawale. Era onguleko ebyambalo ebyeru, obyambale, owone ensonyi ez'okuyita obwerefere; onguleko n'omuzigo osiige ku maaso go, osobole okulaba.

¹⁹Buli gwe njagala mmunenya era mmukangavvula; kale nyikira okwenenya.

²⁰Laba nnyimiridde ku luggi era nkonkona. Buli awulira eddoboozi lyange n'aggulawo, nnaayingira omumwe ne tulira wamu ffembi.

²¹Buli awangula ndimukkiriza okutuula ng'anninaanye, ku ntebe yange ey'obwakabaka, nga nange bwe nawangula ne ntuula ne Kitange ku ntebe ye.

²²Alina amatu awulire Omwoyo ky'agamba Ekklesia ezo."

Okubikkulirwa 4

Entebe ey'Obwakabaka mu Ggulu

¹Laba, oluvannyuma lw'ebyo ne ndaba oluggi oluggule mu ggulu, era ne mpulira n'eddoboozi lye limu lye nawulira olubereberye eryali livuga ng'eryekkondere nga linjambala nti, "Yambuka wano nkulage ebyo ebiteekwa okubaawo oluvannyuma lwa biri."

²Amangwago, nga ndi mu mwoyo, laba, ne ndaba entebe ey'obwakabaka ng'etegekedwa mu ggulu, ne ku ntebe eyo nga kuliko atuddeko.

³Eyali agituddeko yali ayakaayakana ng'amayinja ag'omuwendo omungi aga yasepi ne sadio; era ng'entebe eyo yeetooloddwa musoke ng'ayakaayakana nga zumaliidi.

⁴Entebe ey'obwakabaka yali yeetooloddwa entebe endala amakumi abiri mu nnya nga zituuliddwako abakadde amakumi abiri mu bana, bona nga bambadde engoye enjeru nga balina engule eza zaabu ku mitwe gyabwe.

⁵Mu ntebe eyo ey'obwakabaka ne muvaamu okumyansa n'amaloboozi n'okubwatuka. Mu maaso g'entebe eyo waaliwo ettabaaza ezaaka musanvu, nga gy'emyoyo omusanvu egya Katonda.

⁶Ne mu maaso g'entebe eyo waaliwo ekiri ng'enyanja ey'endabirwamu, ekifaanana nga kulusitalo. Waaliwo ebiramu bina ebijjudde amaaso mu bwenyi n'emabega waabyo nga biri wakati w'entebe ey'obwakabaka n'okugyetooloola.

⁷Ekisooka ku biramu bino kyali ng'empologoma, ekyokubiri nga kifaanana ng'enyanja, n'ekyokusatu kyalina amaaso ng'ag'omuntu, n'ekyokuna kyali ng'empungu, ebuuka.

⁸Buli kimu ku biramu bino ebina kyalina ebiwaawaatiro mukaaga nga bijjudde amaaso enjuuyi zonna ne wansi. Era buli lunaku emisana n'ekiro, awatali kuwummula, nga bigamba nti, "Mutukuvu, Mutukuvu, Mutukuvu, Mukama Katonda Ayinzabyonna, Oyo eyaliwo, aliwo, era ajja okubaawo."

⁹Era ebiramu ebyo ebina, buli lwe byawanga ekitiibwa n'ettendo n'okwebaza, Oyo atudde ku ntebe ey'obwakabaka, abeera omulamu emirembe gyonna,

¹⁰abakadde amakumi abiri mu abana ne bavuunama mu maaso g'Oyo atudde ku ntebe ey'obwakabaka, omulamu emirembe n'emirembe, ne bamusinza. Ne bateeka engule zaabwe mu maaso g'entebe eyo, nga bwe bagamba nti,

¹¹"Mukama waffe era Katonda waffe, osaanidde okuweebwanga ekitiibwa n'ettendo n'obuyinza, kubanga gwe watonda ebintu byonna era byonna byatondebwa ku lulwo era gwe wasiima okubiteekawo."

Okubikkulirwa 5

Omuzingo gw'Ekitabo n'Omwana gw'Endiga

¹Awo ne ndaba omuzingo gw'ekitabo mu mukono ogwa ddyo ogw'Oyo eyali atudde ku ntebe ey'obwakabaka, nga guwandiikiddwamu munda ne kungulu era nga guteekeddwako obubonero bw'envumbo musanvu.

²Ne ndaba malayika ow'amaanyi ng'ayogera mu ddoboозi ery'omwanguka ng'abuuza nti, "Ani asaanidde okubembulula obubonero obusibiddwa ku muzingo gw'ekitabo guno alyoke aguzingulule?"

³Ne wataba n'omu mu ggulu newaakubadde ku nsi, wadde wansi w'ensi, eyayinza okugwanjuluza wadde okugutunulamu.

⁴Awo ne nkaaba amaziga mangi, kubanga tewaalabikawo n'omu eyasaanira okwanjuluza omuzingo newaakubadde okugutunulamu.

⁵Awo omu ku bakadde abiri mu abana n'aنجамба nti, "Lekeraawo okukaaba, kubanga, laba, empologoma ey'omu kika kya Yuda, ow'omu lulyo lwa Dawudi, yawangula, era y'ayinza okukutula obubonero omusanvu obw'envumbo n'okuzingulula omuzingo gw'ekitabo."

⁶Ne ndaba nga ali ng'Omwana gw'Endiga ng'attiddwa ng'ayimiridde wakati w'entebe ey'obwakabaka n'ebiramu ebina, ne wakati w'abakadde, ng'alina amayembe musanvu n'amaaso musanvu, gy'emyoyo omusanvu egya Katonda, egitumibwa mu buli kitundu eky'ensi.

⁷N'asembera n'aggya omuzingo gw'ekitabo mu mukono ogwa ddyo ogw'Oyo eyali atudde ku ntebe ey'obwakabaka.

⁸Bwe yagukwata, ebiramu ebina n'abakadde amakumi abiri mu abana, ne bagwa mu maaso g'Omwana gw'Endiga ne bavuunama, buli omu ng'alina

ennanga era ng'akutte ekibya ekya zaabu, ekyali kijjudde obubaane obwakaloosa nga butegeeza okusaba kw'abantu abatukuvu.

⁹Baali bamuyimbira oluyimba oluggya nti, “Ggw'osaanidde okutoola omuzingo gw'ekitabo, n'okusumulula ebigusibye n'okuguzingulula, kubanga wattibwa, omusaayi gwo ne gununula abantu ba Katonda okubaggya mu buli kika, na buli lulimi, na buli ggwanga, na buli nsi.”

¹⁰N'obafuula obwakabaka ne bakabona ba Katonda okumuweerezanga, era be balifuga ensi.”

¹¹Awo ne ndaba era ne mpulira eddoboozi lya bamalayika enkumi n'enkumi, n'enkuyanja nga beetoolodde entebe ey'obwakabaka awamu n'ebiramu biri n'abakadde bali.

¹²Ne boogera mu ddoboozi ery'omwanguka nti, “Omwana gw'Endiga eyattibwa, asaanidde okuweebwa obuyinza, n'obugagga, n'amagezi n'amaanyi, n'ekitiibwa, n'ettendo n'okwebazibwa!”

¹³Ne ndyoka mpulira buli kitonde kyonna mu ggulu ne ku nsi ne wansi w'ensi ne mu nnyanja ne byonna ebigirimu nga bitendereza nti, “Okutenderezebwa, n'ettendo, n'ekitiibwa, n'amaanyi by'Oyo atudde ku ntebe y'obwakabaka awamu n'Omwana gw'Endiga, Emirembe n'emirembe.”

¹⁴Ebiramu ebina ne biddamu nti, “Amiina.” N'abakadde ne bavuunama ne bamusinza.

Okubikkulirwa 6

Obubonero bw'Envumbo

¹Awo ne ndaba Omwana gw'Endiga ng'abembulula akamu ku bubonero bw'envumbo; ne mpulira ekimu ku biramu ebina nga kyogera n'eddoboozi eryawulikika ng'okubwatuka nga kigamba nti, “Jjangu!”

²Ne ndaba, era laba, embalaasi enjeru, ng'agyebagadde alina omutego oglasa akasaale; n'aweebwa engule n'agenda ng'awangula, n'awangulira ddala.

³Bwe yabembulula akabonero k'envumbo akookubiri, ne mpulira ekiramu ekyokubiri nga kyogera nti, “Jjangu!”

⁴Ne wavaayo embalaasi endala nga myufu, eyali agyebagadde n'aweebwa ekitala ekiwanvu, n'aweebwa n'obuyinza okuggyawo emirembe ku nsi, n'okuleeta entalo wakati w'abantu, battijnjane bokka na bokka.

⁵Bwe yabembulula akabonero k'envumbo akokusatu ne mpulira ekiramu ekyokusatu nga kyogera nti, “Jjangu!” Era laba, ne ndaba embalaasi enzirugavu n'eyali agyebagadde ng'akutte minzaani mu mukono gwe.

⁶Ne mpulira eddobaozi eryawulikika ng'eriva wakati w'ebiramu ebina nga ligamba nti, "Omugaati gumu gugula ddinaali, ne kilo y'obuwunga bwa sayiri nayo bw'eba egula, kyokka omuzigo n'envinnyo tobyonoona."

⁷ Bwe yabembulula akabonero k'envumbo akookuna ne mpulira ekiramu ekyokuna nga kyogera nti, "Jjangu!"

⁸ Ne ndaba, era laba, embalaasi ey'erangi ensiiwuukirivu n'eyali agyebagadde ng'ayitibwa Walumbe, ne Magombe n'agenda naye. Ne baweebwa okufuga ekitundu ekyokuna eky'ensi, okutta n'ekitala, n'enjala, n'olumbe, n'ensolo enkambwe ez'oku nsi.

⁹ Bwe yabembulula akabonero k'envumbo akookutaano ne ndaba wansi w'ekyoto emyoyo egy'abo abattibwa olw'okubuulira ekigambo kya Katonda n'olw'okuba abeesiga mu bujulizi bwabwe.

¹⁰ Ne bakaabirira Mukama n'eddobaozi ery'omwanguka nga bagamba nti, "Ayi Mukama, Omutukuvu era ow'amazima, onoosalira ddi abantu b'ensi omusango, n'owoolera eggwanga olw'omusaayi gwaffe?"

¹¹ Buli omu ku bo n'aweebwa ekyambalo ekyeru, era ne bagambibwa okugira nga bawummulako okutuusa baganda baabwe abalala era baweereza bannaabwe aba Yesu abaali bagenda okuttibwa, lwe balibeegattako.

¹² Awo ne ndaba ng'abembulula akabonero k'envumbo ak'omukaaga; ne wabaawo musisi ow'amaanyi ennyo, era enjuba n'eddugala n'efuuka nzirugavu ng'ekibukutu ekyakolebwa mu bwoya, n'omwezi gwonna ne gumyuka ng'omusaayi.

¹³ Awo emmunyeenyenye ez'omu ggulu ne zigwa ku nsi ng'omutiini bwe gukunkumula emitini egitanayengera olwa kibuyaga ow'amaanyi,

¹⁴ n'eggulu ne lyezingako ng'omuzingo gw'ekitabo bwe gwezingazinga na buli lusozi na buli kizinga ne biggibwawo mu bifo byabyo.

¹⁵ Bakabaka b'ensi, n'abafuzi ab'oku ntikko n'abantu abagagga, n'abakulu b'amaggye n'ab'amaanyi, na buli muddu n'ow'eddembe, ne beekweka mu mpuku ne mu njazi z'ensozi.

¹⁶ Ne bagamba ensozi nti, "Mutugweko mutukweke mu maaso g'Oyo atudde ku ntebe ey'obwakabaka, ne mu busungu bw'Omwana gw'Endiga.

¹⁷ Kubanga olunaku olukulu olw'obusungu bwabwe lutuuse era ani ayinza okugumira obusungu bwabwe!"

Okubikkulirwa 7

144,000 bateekewako Obubonero obw'Envumbo

¹ Oluvannyuma lw'ebyo, ne ndaba bamalayika bana nga bayimiridde ku njuyi ennya ez'ensi, nga bakutte empewo ennya ez'ensi zireme okukunta, waleme kubaawo mpewo ekunta ku nsi, wadde ku nnyanja wadde ku muti gwonna.

² Ne ndaba malayika omulala ng'ava ebuvanjuba ng'akutte akabonero k'envumbo aka Katonda omulamu, n'ayogera mu ddoboozi ery'omwanguka ng'agamba bamalayika abana abaali baweededwa obuyinza okwonoona ensi n'enyanja nti,

³ "Temukola kintu kyonna, ekinaayonoona ensi, n'enyanja oba emit, okutuusa nga tumaze okuteeka akabonero k'envumbo ka Katonda akakulu ku byenyi by'abweereza ba Katonda waffe."

⁴ Awo ne mpulira omuwendo gw'abo abaateekebwako akabonero k'envumbo nga baali emitwalo kkumi n'ena mu enkumi nnya (144,000) okuva mu bika ekkumi n'ebibiri ebya Isirayiri.

⁵ Ab'omu kika kya Yuda omutwalo gumu mu enkumi bbiri (12,000), ab'omu kika kya Lewubeeni omutwalo gumu mu enkumi bbiri (12,000), ab'omu kika kya Gaadi omutwalo gumu mu enkumi bbiri (12,000),

⁶ ab'omu kika kya Aseri omutwalo gumu mu enkumi bbiri (12,000), ab'omu kika kya Nafutaali omutwalo gumu mu enkumi bbiri (12,000), ab'omu kika kya Manaase omutwalo gumu mu enkumi bbiri (12,000),

⁷ ab'omu kika kya Simyoni omutwalo gumu mu enkumi bbiri (12,000), ab'omu kika kya Leevi omutwalo gumu mu enkumi bbiri (12,000), ab'omu kika kya Isakaali omutwalo gumu mu enkumi bbiri (12,000),

⁸ ab'omu kika kya Zebbulooni omutwalo gumu mu enkumi bbiri (12,000), ab'omu kika kya Yusufu omutwalo gumu mu enkumi bbiri (12,000), ab'omu kika kya Benyamini omutwalo gumu mu enkumi bbiri (12,000). Abo be baateekebwako akabonero k'envumbo.

Ekibiina ky'Abantu Obutabalika nga bambadde Ebyambalo Ebyeru

⁹ Oluvannyuma lw'ebyo ne ndaba, era laba, ekibiina ky'abantu ekinene ennyo nga tebasoboka na kubalika, nga bava mu buli nsi na buli kika, na buli ggwanga na buli lulimi, nga bayimiridde mu maaso g'entebe ey'obwakabaka ne mu maaso g'Omwna gw'Endiga nga bambadde ebyambalo ebyeru nga balina n'enkindu mu ngalo zaabwe.

¹⁰ Ne boogera mu ddoboozi ery'omwanguka nga bagamba nti, "Obulokozi bwa Katonda waffe atudde ku ntebe ey'obwakabaka era bwa Mwana gw'Endiga."

¹¹ Awo bamalayika bona ne bayimirira nga beetoolodde entebe ey'obwakabaka n'abakadde era n'ebiramu ebina, ne bavuunama mu maaso g'entebe ey'obwakabaka ng'ebenyi byabwe biri wansi ne basinza Katonda.

¹²Ne bayimba nti, “Amiina! Okutenderezebwa, n'ekitiibwa, n'amagezi, n'okwebazibwa, n'ettendo, n'obuyinza, n'amaanyi, bibe eri Katonda waffe emirembe n'emirembe. Amiina!”

¹³Awo omu ku bakadde n'ambuuza nti, “Bano abambadde ebyambalo ebyeru obamanyi, era omanyi gye bava?”

¹⁴Ne nziramu nti. “Mukama wange, gw'omanyi.” N'anjamba nti, “Bano be baayita mu kubonaabona okunene, ne bayoza ebyambalo byabwe ne babitkuza mu musaayi gw'Omwana gw'Endiga.

¹⁵Kyebavudde “babeera wano mu maaso g'entebe ey'obwakabaka eya Katonda nga bamusinza emisana n'ekiro mu Yeekaalu ye. Oyo atudde ku ntebe ey'obwakabaka, anaaberanga nabo ng'abalabirira.

¹⁶Tebaliddayo kulumwa njala wadde ennyonta, newaakubadde omusana okubookya wadde ekyokya ekirala kyonna;

¹⁷kubanga Omwana gw'Endiga ayimiridde mu maaso g'entebe ey'obwakabaka, y'anaabeeranga omusumba waabwe era y'anaabakulemberanga okubatwala eri ensulo ez'amazzi ag'obulamu. Era Katonda alisangula buli zziga mu maaso gaabwe.”

Okubikkulirwa 8

Akabonero k'Envumbo ak'Omusanvu n'Ekyoterezo ekya Zaabu

¹Awo Omwana gw'Endiga bwe yabembulula akabonero k'envumbo ak'omusanvu ne wabaawo akasiriikiriro mu ggulu lyonna okumala ng'ekitundu ky'essaawa.

²Ne ndaba bamalayika omusanvu abaali bayimiridde mu maaso ga Katonda ne baweebwa amakondeere musanvu.

³Awo malayika omulala eyalina ekyoterezo ekya zaabu n'ajja n'ayimirira okuliraana ekyoto, n'aweebwa obubaane bungi nnyo abuveeyo, wamu n'okusaba kw'abatukuvu bonne, ku kyoto ekya zaabu ekyali mu maaso g'entebe ey'obwakabaka.

⁴Akaloosa akalungi n'omukka ebyava mu bubaane obutabuddwamu n'okusaba kw'abatukuvu ne kambuka eri Katonda nga kava mu kyoto malayika mwe yabufuka.

⁵Malayika n'addira ekyoterezo n'akijuza omuliro gw'aggye ku kyoto n'aguyiwa wansi ku nsi, ne wabaawo okubwatuka, n'okuwuluguma, n'okwakaayakana, n'okumyansa kw'eggulu era ne wabaawo ne musisi.

Abafuuyi b'Amakondeere

⁶ Awo bamalayika omusanvu abaalina amakondeere omusanvu ne beetegeka okufuuwa amakondeere gaabwe.

⁷ Malayika ow'olubereberye n'afuuwa ekkondeere lye, omuzira n'omuliro nga byetabudde n'omusaayi ne bisuulibwa wansi ku nsi. Ekitundu ekyokusatu eky'ensi ne kiggya omuliro, bwe kityo n'ekitundu kimu kya kusatu eky'emiti ne kiggya omuliro, n'omuddo gwonna ne guggya.

⁸ Malayika owookubiri n'afuuwa ekkondeere lye, ekintu ekinene ennyo nga kifaanana ng'olusozi olunene ennyo nga lwonna lwaka omuliro ne kisuulibwa mu nnyanja. Ekitundu ekimu ekyokusatu ekyennyanja ne kifuuka omusaayi,

⁹ n'ekimu ekyokusatu eky'ebitonde eby'omu nnyanja ne kifa, n'ekitundu ekimu ekyokusatu eky'amaato ne kizikirira.

¹⁰ Malayika owookusatu n'afuuwa ekkondeere lye, emmunyeenye ennene eyakaayakana n'egwa okuva mu ggulu, n'egwa mu kitundu ekimu ekyokusatu eky'emigga n'ensulo z'amazzi.

¹¹ Emmunyeenye eyo yali eyitibwa "Kukaawa" n'etteeka obutwa mu kitundu ekimu ekyokusatu eky'amazzi gonna, abantu bangi ne bafa.

¹² Malayika owookuna n'afuuwa ekkondeere lye, ekitundu ekimu ekyokusatu eky'enjuba n'ekimu ekyokusatu eky'omwezi, n'ekimu ekyokusatu eky'emmunyeenye, ne bikubwa; era ekyavaamu, obudde obw'emisana ne buzikirako ekitundu ekimu ekyokusatu, n'ekiro ne kyeyongera okukwata ekitundu ekimu ekyokusatu, n'omusana ne gulema okwaka ekitundu ekimu ekyokusatu, n'ekizikiza ne kyeyongera bwe kityo.

¹³ Ne ndaba empungu emu ng'ebuuka mu bbanga ng'ereeakaana mu ddoboozi ery'omwanguka nti, "Zibasanze, Zibasanze, Zibasanze abantu ab'oku nsi olw'ebintu eby'entiisa ebinaatera okubatuukako kubanga bamalayika abasatu abasigaddeyo banaatera okufuuwa amakondeere gaabwe."

Okubikkulirwa 9

¹ Awo malayika owookutaano n'afuuwa ekkondeere lye, ne ndaba emmunyeenye ng'eva mu ggulu ng'egwa ku nsi era n'eweewba ekisumulizo eky'obunnya obutakoma.

² Bwe yabsumulula, omukka ne gufubutuka okuvaamu ng'oguva mu kikoomi ekinene ennyo, era enjuba ne bbanga lyonna ne bibuna ekizikiza olw'omukka ogw'omu bunnya.

³ Enzige ne ziva mu mukka ne zikka ku nsi ne ziweebwa obuyinza okulumu ng'enjaba ez'obusagwa.

⁴Zaagambibwa obutakola ku muddo kabi konna, newaakubadde ebimera, wadde emit; wabula zirumbe abantu abo abataalina kabonero ka Katonda mu byenyi byabwe.

⁵Tezaagambibwa kubatta wabula okubabonyaabonya okumala emyezi etaano nga zibaluma bulumi, ng'obulumi bwazo buli ng'obuva mu kubojjebwa enjaba ez'obusagwa.

⁶Mu biro ebyo abantu balyagala okwetta naye tekirisoboka kubanga okufa kuliba kubeesamba; balyegomba okufa naye kwo, nga kubadduka buddusi!

⁷Enzige zino zaali zifaanana ng'embalaasi ezitegekeddwa okugenda ku lutalo okulwana, ne ku mitwe gyazo nga kuli ng'okutikkiddwa engule za zaabu ate ebyenyi byazo nga biri ng'eb'yabantu.

⁸Obwoya bwazo nga buli ng'enviiri z'abakazi, ate go amannyo gaazo gaali ng'ag'empologoma.

⁹Zaali zambadde eby'omu bifuba ebiri ng'eb'yebuya, nga n'ebiwaawaatiro byazo biwuluguma ng'eddoboozi lya nnamuziga w'amagaali, ag'embalaasi ennyingi nga zifubutuka okulaga mu lutalo.

¹⁰Zaalina emikira egibojja ng'egy'enjaba ez'obusagwa. N'obuyinza bwazo obw'okubonyaabonya obwaziweebwa obw'emyezi etaano bwali mu mikira omwo.

¹¹Kabaka waazo ye malayika ow'obunnya obutakoma, erinnya lye mu Lwebbulaniya ye Abadoni ate mu Luyonaani ye Apolwoni.

¹²Eky'entiisa ekisooka ne kiyita, naye ng'ekyaliyo bya mirundi ebiri ebijja!

¹³Awo malayika ow'omukaaga n'afuuwa ekkondeere lye, ne mpulira eddoboozi nga lyogera okuva mu mayembe ana agali ku kyoto ekya zaabu ekiri mu maaso ga Katonda,

¹⁴nga ligamba malayika oyo ow'omukaaga nti, "Sumulula bamalayika abana abaasibirwa ku mugga omunene Fulaati."

¹⁵Bamalayika abana abaali basibiddwa nga balindirira omwaka n'omwezi ogwo, n'olunaku olwo, n'essaawa eyo, ne basumululwa okutta ekitundu ekimu ekyokusatu eky'abantu.

¹⁶Ne mpulira omuwendo ogw'eggye ery'abaserikale nga bali obukadde ebikumi bibiri.

¹⁷Ne ndaba mu kwolesebwa, ng'embalaasi n'abaali bazeebagadde nga bambadde eby'omu bifuba ebimyufu, era mwalimu n'abambadde ebya bbululu n'ebya kyenvu. Emitwe gy'embalaasi gyali gifaanana ng'egy'empologoma, ne mu bumwa bwazo ne muvaamu omuliro n'omukka ne salufa.

¹⁸Ebibonyoobonyo ebyo ebisatu: Omukka n'omuliro n'obuganga ebyava mu bumwa bwazo ne bitta ekitundu ekimu ekyokusatu eky'abantu.

¹⁹Amaanyi gaazo ag'okutta tegaali mu bumwa bwazo mwokka, naye gaali ne mu mikira gyazo, kubanga emikira egoy gyali ng'emitwe gy'emisota, nga gye zibojjesa.

²⁰Naye era abantu abaasigalawo nga balamu oluvannyuma lw'ebibonoobono bino ne bagaana okwenenya ebikolwa byabwe. Ne batalekaayo kusinza baddayimooni n'ebifaananyi ebyakolebwa n'emikono ebyza zaabu n'ebya ffeeza, n'eb'y'ebikomo, n'eb'y'amayinja n'omuti, ebitalaba yadde okuwulira so n'okutambula tebitambula.

²¹Era tebeenenya butemu bwabwe, wadde obulogo, wadde obwenzi, wadde obubbi bye baakolanga.

Okubikkulirwa 10

Malayika n'Omuzingo gw'Ekitabo Omutono

¹Ne ndaba malayika omulala ow'amaanyi ng'akka okuva mu ggulu nga yeetooloddwa ekire, ng'ayambadde musoke ku mutwe gwe; amaaso ge nga gaakaayakana ng'enjuba ate ebigere bye nga byaka ng'omuliro.

²Yali alina mu ngalo ze omuzingo gw'ekitabo omutono ng'agwanjuluzza, n'ateeka ekigere kye ekya ddyo ku nnyanja ate ekya kkono n'akiteeka ku lukalu.

³N'aleekaana mu ddoboozi ery'omwanguka nga liri ng'okuwuluguma kw'empologoma. Ne wabaawo n'okubwatuka kwa mirundi musanvu olw'eddoboozi eryo.

⁴Ebibwatuka omusanvu bwe byayogera, nnali n'atera okuwandiika, ne mpulira eddoboozi eryava mu ggulu nga ligamba nti, "Teeka akabonero ku ebyo ebibwatuka omusanvu bye byogedde, so tobiwandiika."

⁵Awo malayika gwe nalaba ng'ayimiridde ku nnyanja ne ku lukalu n'ayimusa omukono gwe ogwa ddyo eri eggulu,

⁶n'alayira Oyo omulamu abeerera emirembe gyonna, eyatonda eggulu n'ebintu byonna ebirimu, n'atonda n'ensi n'ebintu byonna ebigrimu, n'atonda n'ennyanja ne byonna ebigrimu, ng'agamba nti, "Tewaliba kulwa nate.

⁷Naye mu nnaku ez'eddoboozi lya malayika ow'omusanvu, bw'aliba anaatera okufuuwa ekkondeere, ekyama kya Katonda kiribikkulwa, nga bwe yabuulira abaddu be, bannabbi."

⁸Eddoboozi lye nnawulira nga liva mu ggulu, ne liddamu ne linjamba nti, "Twala omuzingo gw'ekitabo nga mubikkule okuva mu mukono gwa malayika ayimiridde ku nnyanja ne ku lukalu."

⁹ Ne njenda eri malayika ne mugamba ampe omuzingo gw'ekitabo ogwo omutono. N'aŋjamba nti, "Gutwale ogulye; mu kamwa ko guliwoomerera ng'omubisi gw'enjuki, naye guligulumbya olubuto lwo."

¹⁰ Ne nziggya omuzingo ogwo omutono mu mukono gwa malayika ne ngulya, ne gumpomera ng'omubisi gw'enjuki, naye bwe nagumira ne gugulumbya olubuto lwange.

¹¹ Ne baŋjamba nti, "Kikugwanidde okuwa obunnabbi nate ku mawanga, n'ensi, n'ennimi ne bakabaka bangi."

Okubikkulirwa 11

Abajulizi Ababiri

¹ Ne mpeebwa olumuli oluli ng'omuggo okupima ne njambibwa nti, "Golokoka opime Yeekaalu ya Katonda n'ekyoto n'abo abasiniza mu Yeekaalu.

² Naye olugya olw'ebweru lwo tolupima kubanga luweereddwayo eri amawanga, era balirinnyirira ekibuga ekitukuvu okumala emyezi amakumi ana mu ebiri (42).

³ Era ndiwa abajulirwa bange ababiri nga bambadde ebibukutu ne bawa obunnabbi okumala ennaku lukumi mu bibiri mu nkaaga (1,260)."

⁴ Abajulirwa abo ababiri gy'emiti emizeeyituuni ebiri era ebikondo by'ettaala ebibiri, abayimirira mu maaso ga Mukama ow'ensi yonna.

⁵ Omuntu yenna agezaako okubakolako akabi azikirizibwe n'omuliro oguva mu kamwa kaabwe, ne gwokya abalabe baabwe; era omuntu yenna bw'ayagala okubakolako akabi, bwe kityo kigwana ye okuttibwa.

⁶ Balina obuyinza okuggalawo eggulu enkuba n'etetonnya mu nnaku ez'obunnabbi bwabwe, era balina n'obuyinza okufuula amazzi omusaayi n'okuleeta buli kubonaabona kwonna ku nsi buli lwe banaabanga baagadde.

⁷ Bwe balimala okuwa obujulirwa bwabwe, ensolo enkambwe eva mu bunnya obutakoma erirangirira olutalo ebawanyise, era ebatte n'okubawangula ebawangule.

⁸ Emirambo gyabwe girisigala mu nguudo z'ekibuga ekinene, Mukama waabwe mwe yakomererwa ku musaalaba; ekibuga ekiyitibwa "Sodomu" mu mwoyo oba ensi eya "Misiri" mu mwoyo

⁹ Era okumala ennaku ssatu n'ekitundu emirambo gyabwe girirabibwa abantu abamu n'ebika, n'ennimi, n'amawanga mu nguudo z'ekibuga. Tewali n'omu alikkirizibwa kubaziika.

¹⁰Era walibaawo okusanyuka ku nsi, abantu bona nga bajaguza n'okuweerezagana ebirabo, n'okwekulisa bannabbi abo ababiri abaliba bafudde abaali bababonyaabonya ennyo.

¹¹Naye oluvannyuma lw'ennaku essatu n'ekitundu omwoyo gw'obulamu oguva eri Katonda ne gubayingiram ne bayimirira. Awo okutya kungi ne kujjira buli muntu yenna eyabalaba.

¹²Awo ne bawulira eddoboozi ery'omwanguka okuva mu ggulu nga ligamba nti, "Mulinnye mujje wano." Ne balinnya mu kire okugenda mu ggulu ng'abalabe baabwe babalaba.

¹³Mu ssaawa eyo y'emu ne wabaawo musisi eyasuula ekitundu ekimu eky'ekkumi eky'ekibuga, era abantu kasanvu ne bafa. Abaawona baatya nnyo era ne bagulumiza Katonda ow'eggulu.

¹⁴Eky'entiisa ekyokubiri ne kiyita, naye ekyokusatu kijja mangu.

Ekkondeere ery'Omusanvu

¹⁵Awo malayika ow'omusanvu n'afuuwa ekkondeere lye, ne wabaawo oluyoogaano olunene ennyo mu ggulu nga lugamba nti, "Obwakabaka bw'ensi eno kati bufuuse bwa Mukama waffe ne Kristo we, era anaafuganga emirembe n'emirembe."

¹⁶Awo abakadde amakumi abiri mu abana abaali batudde ku ntebe zaabwe ne bavuunama mu maaso ga Katonda ne bamusinza

¹⁷nga bagamba nti, "Tukwebaza, ayi Mukama Katonda Ayinzabyonna, ggwe aliwo kati era eyaliwo, kubanga weddizza obuyinza bwo obungi ennyo, Era ofuga.

¹⁸Amawanga gaakunyiigira, naye kaakano naawe ky'ekiseera kyo okubayiwako ekiruyi kyo era ky'ekiseera okusalira abo abaafa omusango, n'okuwa empeera abaweereza bo bannabbi, n'abatukuvu bo, n'abo abatya erinnya lyo abakulu n'abato, n'okuzikiriza abo abaaleeta okuzikirira ku nsi."

¹⁹Awo Yeekaalu ya Katonda ey'omu ggulu n'eggulwawo, n'essanduuko ey'endagaano n'erabika mu Yeekaalu ye. Ne wabaawo okumyansa n'okubwatuka kw'eggulu n'omuzira omungi ogw'amaanyi era ensi yonna n'ekankanyizibwa musisi ow'amaanyi ennyo.

Okubikkulirwa 12

Omukazi n'Ogusota

¹Ne wabaawo ekyewuunyo ekinene mu ggulu. Ne ndaba omukazi ng'ayambadde enjuba n'omwezi nga guli wansi wa bigere bye, ng'alina engule eyaliko emmunyeenye kkumi na bbiri ku mutwe gwe.

²Yali lubuto era ng'akaaba ng'alumwa okuzaala.

³Awo ne ndaba ekyewuunyo ekirala mu ggulu, era laba, ogusota ogumyufu nga gulina emitwe musanvu n'amayembe kkumi era nga ku mitwe egoy kuliko engule musanvu.

⁴Ku mukira gw'ogusota kwali kuwalulirwako ekitundu ekimu ekyokusatu eky'emmuneenye zonna eziri waggulu mu ggulu, ne guzisuala wansi ku nsi. Ne guyimirira mu maaso g'omukazi oyo, anaatera okuzaala nga gulindirira okulya omwana we nga yaakazaalibwa.

⁵Omukazi n'azaala omwana owoobulenzi eyali agenda okufuga amawanga gonna n'omuggo ogw'ekyuma, amangwago n'akwakulibwa n'atwalibwa eri Katonda ku ntebe ye ey'obwakabaka.

⁶Omukazi n'addukira mu ddungu eyali ekifo Katonda gye yategeka okumulabirira okumala ennaku Lukumi mu bibiri mu nkaaga.

⁷Ne wabaawo olutalo mu ggulu. Mikayiri ne bamalayika ab'omu kibinja kye ne balwanyisa ogusota n'eggye lya bamalayika baagwo.

⁸Ogusota ne guwangulwa era ne gusindiikirizibwa okuva mu ggulu.

⁹Ogusota ogwo ogw'amaanyi, era gwe gusota ogw'edda oguyitibwa Setaani Omulimba, alimba ensi yonna, ne gusuulibwa wansi ku nsi n'eggye lyagwo lyonna.

¹⁰Ne mpulira eddoboozi ery'omwanguka mu ggulu nga ligamba nti, "Kaakano obulokozi bwa Katonda, n'amaanyi ge n'obwakabaka bwa Katonda waffe awamu n'obuyinza bwa Kristo we bizze. Kubanga omulooopi eyaloopanga baganda baffe, eri Katonda waffe emisana n'ekiro, agobeddwa mu ggulu.

¹¹Ne bamuwangula olw'omusaayi gw'OMwana gw'Endiga, n'olw'ekigambo eky'obujulirwa bwabwe, ne bawaayo obulamu bwabwe nga tebatya na kufa.

¹²Noolwekyo ssanyuka ggwe eggulu, nammwe abalituulamu musanyuke. Naye mmwe ensi n'enyanja zibasanze, kubanga Setaani asse gye muli ng'alina obusungu bungi, ng'amanyi nti asigazza akaseera katono."

¹³Awo ogusota bwe gwalaba nga gusuuliddwa ku nsi ne guyigganya omukazi eyazaala omwana owoobulenzi.

¹⁴Naye omukazi n'aweebwa ebiwaawaatiro bibiri ebinene ng'ebi'empungu okubuuka agende mu ddungu mu kifo ekyamuteekerwateekerwa, gy'alabiririrwa era gy'akuumibwa, ogusota ne gutamukola kabi okumala ekiseera n'ekitundu ky'ekiseera.

¹⁵Ogusota ne guwandula amazzi mangi okuva mu kamwa kaagwo ne ganjaala ne gafuuka omugga nga galaga omukazi gye yali, nga gafuba okumuzikiriza.

¹⁶Naye ettaka ne liyamba omukazi bwe lyayasama ne limira omugga ogwo ogwayanjaala.

¹⁷Awo ogusota, nga gwonna gujjudde obusungu bungi, ne gugenda okulumba abaana b'omukazi abalala, abo bona abaali bakwata amateeka ga Katonda era nga bajulira Yesu.

¹⁸Ne guyimirira ku lubalama lw'enyanja.

Okubikkulirwa 13

Ekisolo Ekyava mu Nnyanja

¹Awo ne ndaba ekisolo ekikambwe nga kiva mu nnyanja, nga kirina emitwe musanvu n'amayembe kkumi era nga kirina engule kkumi ku mayembe gaakyo, era ku buli mutwe nga kuwandiikiddwako amannya agavvola Katonda.

²Ekisolo ekyo kye nalaba kyaliki faanana ng'engo naye ng'ebigere byakyo biri ng'ebi'eddubu, kyokka ng'akamwa kaakyo kali ng'ak'empologoma. Ogu sota ne guwa ekisolo ekyo amaanyi gaagwo awamu n'entebe yaakyo ey'obufuzi era n'obuyinza bungi.

³Awo ogumu ku mitwe gyagwo gwali gufumitiddwa nga gufunye ekiwundu ekyali kigenda okugutta, naye ekiwundu ekyali kigenda okugutta ne kiwona. Ensi yonna ne yeewuunya era abantu ne bagoberera ekisolo ekyo.

⁴Ne basinza ogusota olw'okuwa ekisolo ekikambwe obuyinza obwenkaniddaawo, era n'ekisolo ne bakisinza, nga bagamba nti, "Ani akisinga amaanyi era ani ayinza okulwana nakyo?"

⁵Awo ekisolo ne kikkirizibwa okwogera ebintu eby'okwegulumiza n'ebi'obuvvoozi era ne kiweebwa n'obuyinza okumala emyezi amakumi ana mu ebiri.

⁶Ekisolo ne kitandika okuvvola Katonda n'obutayogera birungi ku linnya lye, ne ku kifo kye mw'abeera, ne kivuma n'abo ababeera mu ggulu.

⁷Ne kiweebwa obuyinza okulwanyisa abatukuvu n'okubawangula era n'okufuga buli kika, na buli ggwanga, na buli lulimi, na buli nsi.

⁸Era abantu bona abaaliwo okuva ku kutondebwa kw'ensi, abatawandiikiddwa mu kitabo eky'Obulamu eky'Omwana gw'Endiga eyattibwa balisinza ekisolo ekyo.

⁹Alina amatu awulire.

¹⁰Buli ow'okutwalibwa mu busibe wa kusiba. Era buli ow'okuttibwa n'ekitala, wa kuttibwa na kitala. Kubanga awo okugumiikiriza n'okukkiriza kw'abatukuvu we kutegeererwa.

Ekisolo Ekyava mu Ttaka

¹¹Awo ne ndyoka ndaba ekisolo ekikambwe ekirala nga kiva mu ttaka, nga kirina amayembe abiri agali ng'ag'akaliga akato naye ng'eddoboozi lyakyo liri ng'ery'ogusota.

¹²Ekisolo ekyo ne kikozesa obuyinza obwa kiri ekyasooka ekyalina ekiwundu ekyawonyezebwa era ekyasinzbwa ensi yonna.

¹³Ne kikola ebyamagero ebyewuunyisa, gamba ng'okuwandula ennimi ez'omuliro ku nsi nga ziva mu bbanga nga buli omu alaba.

¹⁴Olw'okuweebwa obuyinza okukola ebyamagero ebyo mu linnya ly'ekisolo kiri ekyasooka, abantu bangi baalimbibwalimbibwa. Ekisolo ekyo ne kiragira abantu ab'oku nsi okukola ekifaananyi eky'ekisolo kiri ekyasooka ekyalina ekiwundu eky'ekitala ekyawona.

¹⁵Ekisolo ekyo ne kiweebwa okufuuwa omukka ogw'obulamu mu kifaananyi ky'ekisolo ekyo kyogere, era ekifaananyi ekyo ne kittisa abantu bangi abaagaana okukisinza.

¹⁶Awo ekisolo ne kiragira bona, abakulu n'abato, abagagga n'abaavu, ab'eddemebe n'abaddu, bateekebweko akabonero ku mukono ogwa ddyo oba mu kyenyi,

¹⁷nga tewali n'omu akkirizibwa okugula oba okutunda ekintu kyonna, nga talina kabonero ak'erinnya ly'ekisolo ekyo oba ennamba yaakyo.

¹⁸Ekyo kyetaaga amagezi: abo abasobola okutegeera amakulu g'omuwendo guno babale ennamba eri ku kisolo kubanga gwe muwendo gw'omuntu. Omuwendo ogwo guli lukaaga mu nkaaga mu mukaaga.

Okubikkulirwa 14

Oluyimba Iwa Banunule

¹Awo ne ndaba Omwana gw'Endiga ng'ayimiridde ku lusozi Sayuuni, ng'ali n'abantu emitwalo kkumi n'ena mu enkumi nnya (144,000), ng'erinnya lye n'erya Kitaawe gawandiikiddwa mu byenyi by'abantu abo.

²Ne mpulira eddoboozi eryava mu ggulu nga liyira ng'ekiyiriro eky'amazzi amangi n'okubwatuka kw'eggulu kwali kw'amaanyi nnyo. Eddoboozi eryo lyali ng'okuyimba okw'abayimbi nga bakuba n'ennanga zaabwe.

³Ne bayimba oluyimba olwali ng'oluyimba oluggyga olulungi ennyo mu maaso g'entebe ey'obwakabaka eya Katonda ne mu maaso g'ebiramu ebina n'abakadde. Ne wataba muntu n'omu eyasobola okuyiga oluyimba olwo okuggyako abo emitwalo ekkumi n'ena mu enkumi ennya, abaanunulibwa okuva mu nsi.

⁴Abo be bantu abateeyonoonesanga eri abakazi; be bagoberera Omwana gw'Endiga buli gy'alaga. Baanunulibwa mu bantu ab'omu nsi ne beewaayo ng'ebibala ebibereberye eri Katonda n'eri Omwana gw'Endiga.

⁵Si ba bulimba era tebaliiko kya kunenyezebwa.

Bamalayika Abasatu

⁶Awo ne ndaba malayika omulala ng'abuukira mu bbanga ng'alina Enjiri ey'emirembe n'emirembe ey'okubuulira abo abali mu nsi, na buli ggwanga, na buli kika, na buli lulimi n'abantu.

⁷N'ayogera mu ddoboozi ery'omwanguka nti, "Mutye Katonda era mwolese obukulu bwe, kubanga ekiseera kituuse alamule. Mumusinze oyo eyakola eggulu n'ensi, n'enyanja, n'ensulo z'amazzi zonna."

⁸Ate malayika omulala owookubiri n'amugoberera ng'agamba nti, "Babulooni kigudde! Kigudde, ekibuga ekikulu, kubanga kyasendasenda amawanga gonna okunywa ku nvinnyo y'obusungu obw'obwenzi bwakyo."

⁹Ne malayika omulala owookusatu n'abagoberera ng'ayogera mu ddoboozi ery'omwanguka nti, "Omuntu yenna anaasinza ekisolo n'ekifaananyi kyakyo, era anakkiriza okuteeka akabonero kaakyo ku kyenyi kye oba ku mukono gwe ogwa ddyo,

¹⁰Oyo alinywa ku nvinnyo y'obusungu bwa Katonda, nga muka mu kikompe eky'obusungu bwe. Era alibonyaabonyezebwa n'omuliro ne salufa ebyaka mu maaso ga bamalayika abatukuvu ne mu maaso g'Omwana gw'Endiga.

¹¹Omukka gw'okubonaabona kwabwe gunyooka emirembe n'emirembe, so tebaliiko we bawummulira emisana n'ekiro abo abaasinza ekisolo n'ekifaananyi kyakyo, ne bakkiriza n'okuteekbwako akabonero ak'erinnya lyakyo.

¹²Kino kisaanye okulaga abatukuvu abawkata ebiragiro bya Katonda ne bakkiririza mu Yesu ne bagumiikiriza okugezesebwa."

¹³Awo ne mpulira eddoboozi nga liva mu ggulu nga ligamba nti, "Wandiika kino nti okuva kaakano, balina omukisa abafu, abafiira mu Mukama waffe." "Balina omukisa ddala," bw'ayogera Omwoyo. "Banaawummula okutegana kwabwe, kubanga ebikolwa byabwe bibagoberera."

Okukungula kw'Ensi

¹⁴Ne ndaba, era laba, ekire ekyeru era nga kiriko akituddeko eyali afaanana ng'Omwana w'Omuntu eyalina engule eya zaabu ku mutwe gwe era ng'akutte ekiwabyo ekyogi mu mukono gwe.

¹⁵Awo malayika omulala n'ava mu Yeekaalu, n'amugamba mu ddoboozi ery'omwanguka nti, "Tandika okukozesa ekiwabyo kyo okukungula, kubanga ekiseera kituuse era n'ebyokukungula ku nsi byengedde."

¹⁶Bw'atyo eyali atudde ku kire n'awuuba ekiwabyo kye era n'akungula ensi.

¹⁷Awo malayika omulala n'ava mu Yeekaalu ey'omu ggulu era naye ng'alina ekiwabyo ekyogi.

¹⁸Malayika omulala eyalina obuyinza ku muliro, n'ayogera mu ddoboozi ery'omwanguka ng'agamba eyalina ekiwabyo ekyogi nti, "Kozesa ekiwabyo kyo osale ebirimba by'emizabbibu eg'yoku nsi, kubanga gyengedde."

¹⁹Bw'atyo malayika n'awuuba ekiwabyo ekyogi ku nsi, n'akuṇjaanyiza ebibala ebyo mu ssogolero ly'obusungu bwa Katonda.

²⁰Emizabbibu egyo ne gisogolerwa ebweru w'ekibuga era omugga gw'omusaayi ne gukulukuta okuva mu ssogolero, obugulumivu bwagwo ne buba ng'okutuuka ku kyuma ky'omu kamwa k'embalaasi, ate obuwantu bwagwo ne guweza nga kilomita ebikumi bisatu (300).

Okubikkulirwa 15

Bamalayika Omusanvu n'Ebibonoobono Omusanvu

¹Awo ne ndaba akabonero akalala mu ggulu ak'amaanyi era nga ka kitalo bamalayika omusanvu nga balina ebibonoobono musanvu, olwo ekiruyi kya Katonda kiryoke kituukirire.

²Awo ne ndaba ekifaanana ng'ennyanja etangalijja ng'eri ng'endabirwamu erimu omuliro, era ku nnyanja eyo kwali kuyimiriddeko abo abaali bawangudde ekisolo n'ekifaananyi kyakyo awamu n'akabonero ak'omuwendo gwakyo, nga bakutte ennanga Katonda ze yabawa.

³Baali bayimba oluyimba lwa Musa omuddu wa Katonda, n'oluyimba lw'Omwna gw'Endiga nga lugamba nti, "Ebikolwa byo bikulu era bya kyewuunyo, ayi Mukama Katonda Ayinzabyonna. Amakubo go matukuvu era ga mazima, ayi ggwe Kabaka w'amawanga.

⁴Ani ataakutye Ayi Mukama, n'atagulumiza linnya lyo? Ggwe wekka gwe Mutukuvu, amawanga gonna galijja ne gasinziza mu maaso go, Kubanga ebikolwa byo eby'obutuukirivu birabise."

⁵Oluvannyuma lw'ebyo, ne ndaba Yeekaalu ng'eggaddwawo, lye kkuṇjaaniro ly'obujulirwa mu ggulu.

⁶Awo bamalayika omusanvu abaalina ebibonoobono omusanvu ne bafuluma mu Yeekaalu nga bambadde engoye eza linena ennyonjo nga zimasamasa era nga beesibye mu bifuba byabwe enkoba eza zaabu.

⁷Ekimu ku biramu ebina ne kiwa bamalayika omusantu ebibya musantu ebya zaabu nga bijjudde ekiruyi kya Katonda omulamu era abeera omulamu emirembe n'emirembe.

⁸Awo Yeekaalu n'ejjula omukka ogwava mu kitibwa kya Katonda n'emu maanyi ge, so tewaali muntu n'omu eyayinza okuyingira mu Yeekaalu okutuusa ebibonoobono omusantu ebya bamalayika omusantu lwe byatuukirira.

Okubikkulirwa 16

Ebibya Omusantu ebirimu Obusungu bwa Katonda

¹ Awo ne mpulira eddoboozi ery'omwanguka okuva mu Yeekaalu nga ligamba bamalayika omusantu nti, "Mugende muyiwe ku nsi ebibya omusantu ebirimu ekiruyi kya Katonda."

² Malayika eyasooka n'ava mu Yeekaalu n'ayiwa ekibya kye ku nsi. Awo amabwa amazibu ne gajja ne gakwata buli muntu eyalina akabonero k'ekisolo na buli eyasinzanga ekifaananyi kyakyo.

³ Malayika owookubiri n'ayiwa ekibya kye ku nnyanja, amazzi ne gafuuka ng'omusaayi gw'omuntu amaze ekiseera ekitono ng'afudde. Ebiramu byonna ebyali mu nnyanja ne bifua.

⁴ Malayika owookusatu n'ayiwa ekibya kye ku migga ne ku nsulo z'amazzi, byonna ne bifuuka ng'omusaayi.

⁵ Ne mpulira malayika eyakola ku mazzi ng'ayogera nti, "Oli mutuukirivu, Ayi ggwe Omutukuvu, aliwo era eyaliwo, kubanga bw'otyo bwe wasala omusango.

⁶ Olw'okubanga baayiwa omusaayi gw'abatukuvu ne bannabbi, ogwo gwe musaayi gw'obawadde okunywa."

⁷ Awo ne mpulira ekyoto ng'akyogera nti, "Weewaawo Mukama Katonda Ayinzabyonna, ensala yo ya bwenkanya era ya mazima."

⁸ Awo malayika owookuna n'ayiwa ekibya kye ku njuba, n'evaamu omuliro ne gwokya abantu.

⁹ Abantu ne bookebwa omuliro ogwagivaamu ne bavvoola erinnya lya Katonda Omuyinza w'ebibonyoobonyo ebyo, ne bateenanya okukyuka okuliwa ekitibwa.

¹⁰ Awo malayika owookutaano n'ayiwa ekibya kye ku ntebe ey'obufuzi bw'ekisolo, obwakabaka bwakyo ne bujjula ekizikiza. N'abo be kifuga nabo obulumi ne bubalumya obujiji,

¹¹ ne bavvoola Katonda ow'eggulu olw'obulumi bwe baalimu, n'amabwa agaali gabaluma, naye ne bateenanya bikolwa byabwe ebibi.

¹² Awo malayika ow'omukaaga n'ayiwa ekibya kye ku mugga omunene Fulaati ne gukalira, bakabaka ab'ebuvanjuba basobole okuyisaawo amaggye gaabwe.

¹³ Ne ndaba emyoyo egitali mirongoofu esatu nga gifaanana ng'ebikere nga giva mu kamwa k'ogusota, n'ak'ekisolo, n'aka nnabbi ow'obulimba.

¹⁴ Abo be baddayimooni abakozi b'ebyamagero abateesa n'abafuzi bonne ab'oku nsi okukuŋjaana okulwana ne Katonda Ayinzabyonna ku lunaku olw'olutalo.

¹⁵ "Laba, nzija ng'omubb! Alina omukisa oyo alindirira n'akuuma ekyambalo kye nga kiyonjo, era taliyita bwereere, si kulwa ng'aswala."

¹⁶ Emayo egyo ne gibakuŋjaanyiza mu kifo ekiyitibwa Magedoni mu Lwebbulaniya.

¹⁷ Awo malayika ow'omusanvu n'ayiwa ebyali mu kibya kye mu bbanga. Eddoboozi ery'omwanguka ne liva mu Yeekaalu mu ntebe y'obwakabaka nga lyogera nti, "Kiwedde."

¹⁸ Awo ne walabika okumyansa kw'eggulu n'okubwatuka ne musisi ow'entiisa atabangawo ku nsi.

¹⁹ Ekibuga Babulooni ekikulu ne kyeyubuluzaamu ebitundu bisatu, n'ebibuga by'amawanga ne bigwa. Awo Babulooni ekikulu ne kijjukirwa mu maaso ga Katonda, era ne kiweebwa ekikompe ky'envinnyo eky'obukambwe bw'ekiruyi kya Katonda.

²⁰ Buli kizinga ne kidduka era tewaali lusozi na lumu olwalabikako.

²¹ N'omuzira ogw'amaanyi ne gugwa okuva mu ggulu, buli mpeke ng'obuzito bwayo buwera nga kilo amakumi ataano malamba ne gukuba abantu. Abantu ne bakolimira Katonda olw'ekibonyoobonyo ekyo eky'okukubibwa omuzira ogw'amaanyi era omuzito bwe gutyo.

Okubikkulirwa 17

Omukazi eyali Yeebagadde Ekisolo

¹ Awo omu ku bamalayika omusanvu abaalina ebibya omusanvu n'ajja n'ayogera nange, n'anŋjamba nti, "Jjangu nkulage ebigenda okutuuka ku mukazi malaaya omukulu atudde ku mazzi amangi.

² Bakabaka ab'oku nsi bayenda naye n'abantu ab'oku nsi banywa omwenge ogw'obwenzi bwe ne batamiira."

³ Bw'atyo malayika n'antwala mu mwoyo, mu ddungu, ne ndaba omukazi ng'atudde ku kisolo ekimyufu ekyalina emitwe omusanvu n'amayembe ekkumi, okwali kuwandiikiddwa amannya agavoola Katonda.

⁴Omukazi yali ayambadde engoye bbiri olugoye olumyufu n'olwa kakobe era ng'alina n'ebintu ebirala eby'omuwendo, nga zaabu n'amayinja ag'omuwendo, era ng'akutte mu mukono gwe ekikompe ekya zaabu nga kijjudde eby'omuzizo byonna eby'obwenzi bwe.

⁵Ebiwandiiko eby'ekyama byali biwandiikkidwa ku kyenyi kye nga bigamba nti: Babulooni Ekibuga Ekikulu Nnyina wa Bamalaaya bona, era Nnyina w'Eby'emizizo mu nsi.

⁶Ne ndaba omukazi ng'atamidde omusaayi gw'abatukuvu, awamu n'ogw'abajulirwa abattibwa olwa Yesu. Bwe namulaba ne neewuunya.

⁷Malayika n'ambuuza nti, "Lwaki weewuunya? Nzija kukunnyonnyola ebyama eby'omukazi oyo era n'ekisolo kw'atudde ekirina emitwe omusantu n'amayembe ekkumi.

⁸Ekisolo kye walabye kyaliwo, naye kaakano tekikyaliwo era mu bbanga ttono kiriggyibwa mu bunnya obutakoma kiryoke kizikirizibwe. Abantu abali ku nsi amannya gaabwe nga tegawandiikkidwa mu kitabo eky'Obulamu okuva ensi lwe yatondebwa, balyewuunya okulaba ekisolo ekyaliwo, ne kitabeerawo, ate ne kiddamu okubeerawo.

⁹"Kale kyetaaga amagezi n'okutegeera. Emitwe omusantu ze nsozi omusantu omukazi kw'atudde, era be bakabaka omusantu.

¹⁰Abataano baagwa, omu y'aliwo kaakano, naye omulala tannajja wabula bw'anajja kimugwanira okubeerawo ekiseera kitono.

¹¹Ekisolo ekyaliwo, kaakano nga tekikyaliwo, ky'eky'omunaana, kyokka kiri nga biri omusantu; era nakyo kirizikirizibwa.

¹²"Amayembe ekkumi ge walaba be bakabaka ekkumi abatannaweebwa buyinza kufuga; balirondebwa okufugira wamu n'ekisolo okumala essaawa emu.

¹³Bonna bassa kimu era baliwa ekisolo ekikambwe, amaanyi n'obuyinza bwabwe.

¹⁴Bano balyegatta wamu okulwanyisa Omwana gw'Endiga, kyokka Omwana gw'Endiga alibawangula kubanga ye Mukama wa bakama era Kabaka wa bakabaka, abali awamu naye be yayita era abalonde be abeesigwa."

¹⁵Awo malayika n'aŋjamba nti, "Amazzi ge walaba omukazi omwenzi kw'atudde, be bantu n'ebibinja by'abantu aba buli kika n'aba buli lulimi.

¹⁶Ekisolo n'amayembe ekkumi bye walaba birikyawa omukazi oyo ne bimulumba ne bimulwanyisa, era birimuleka bwereere nga talina ky'ayambadde ne birya omubiri gwe, ne bimwokya n'omuliro.

¹⁷Kubanga Katonda ye yakibiwa bituukirize ebyo bye yasiima okukola, n'okukola n'omwoyo gumu n'okuwa obwakabaka bwabwe ekisolo ekyo okutuusa ekigambo kya Katonda lwe kirituukirira.

¹⁸Ate omukazi gwe walabye, ky'ekibuga ekikulu ekifuga bakabaka bona ab'oku nsi."

Okubikkulirwa 18

Okugwa kwa Babulooni

¹Oluvannyuma lw'ebyo ne ndaba malayika omulala ng'akka okuva mu ggulu n'obuyinza obungi ennyo era ensi n'eyakaayakana olw'ekitiibwa kye yalina.

²N'ayogera mu ddoboozi ery'omwanguka nti, "Babulooni ekibuga ekikulu kigudde! kigudde! Kifuuse empuku ya baddayimooni, n'ekkomera lyu buli mwoyo ogutali mulongoofu, n'ekkomera erya buli nnyonyi etali nnongoofu, n'ekkomera erya buli kisolo ekitali kirongoofu, ebyakyayibwa.

³Kubanga amawanga gonna gaanywa ku mwenge gw'obwenzi bwe. Bakabaka ab'omu nsi bona baayenda naye. Era abasuubuzi ab'omu nsi yonna bagaggawadde olw'obulamu bwe obw'okwejalabya."

⁴Ne mpulira eddoboozi eddala nga lyogera okuva mu ggulu nga ligamba nti, "Mmwe abantu bange muve mu kibuga ekyo' muleme kwegatta mu bibi bye, muleme kubonerezebwa wamu naye.

⁵Kubanga ebibi bye bingi nnyo, era bituuse ne mu ggulu, era Katonda ajjukira obutali butuukirivu bwe.

⁶Mumuyise nga naye bwe yayisa abalala; mumubonereze emirundi ebiri olw'ebikolwa bye ebibi. Mumuyengere emirundi ebiri mu kikompe kye yagabulirangamu abalala.

⁷Nga bwe yeegulumiza ne yeejalabya, bw'otyo bw'oba omubonereza era omunakuwaze, kubanga ayogera mu mutima gwe nti, 'Ntudde nga kabaka omukazi, siri nnamwandu, era sirina nnaku.'

⁸Noolwekyo ebibonyoobonyo eby'okufa n'okukaaba n'enjala birimujira mu lunaku lumu, era alizikirizibwa n'omuliro; kubanga Mukama Katonda amusalidde omusango.

⁹"Bakabaka ab'omu nsi abeegatta naye mu bwenzi bwe ne beejalabya naye, balimukaabira nga bakuba ebiwoobe bwe baliraba omukka oguva mu kifo mw'alyokerwa.

¹⁰Baliyimirira wala nga bakankana olw'okutya era nga bogera mu ddoboozi ery'omwanguka nti, "Zikisanze, Zikisanze Babulooni ekibuga ekyo ekikulu!

Ekibuga eky'amaanyi, Kubanga mu ssaawa emu omusango gwakyo gusaliddwa.'

¹¹ "Abasuubuzi b'omu nsi balimukaabira nga bamukungubagira kubanga nga tewakyali abagulako byamagazi byabwe.

¹² Ebyamagazi ebya zaabu, n'ebya ffeeza, n'ebya amayinja ag'omuwendo, ne luulu, n'ebya engoye eza linena, n'ezza kakobe, n'ezza liiri, n'emyufu era na buli muti gwonna ogwa kaloosa, n'ebintu eby'amasanga, na buli kika eky'emiti eg'yomuwendo ennyo, n'ebikomo, n'ebiyuma awamu n'amayinja aga mabbo;

¹³ n'ebjakaloosa, n'ebinzaali, n'obubaane, n'omuzigo gw'omugavu, n'envinnyo, n'amatuta, n'obuwunga bw'eŋjaano obulungi; n'ente, n'endiga; n'embalaasi, n'amagaali; n'abaddu n'emyoyo gyabwe.

¹⁴ "Ekibala emmeeme yo kye yeegombanga, tekyakirina, byonna eby'omuwendo omungi n'eby'okwejalabya tebikyali bibyo. Bikuvuddeko byonna so toliddayo kubirabako nate emirembe gyonna."

¹⁵ Bwe batyo abasuubuzi abaaggawala olw'okubaguza ebintu bino, baliyimirira wala nga nabo batya, olw'okutya okubonaabona kwe, n'okukaaba kwe, n'okunakuwala kwe,

¹⁶ nga bagamba nti, "Zikisanze, Zikisanze, ekibuga ekikulu, ekifaanana ng'omukazi ayambadde engoye eza linena omulungi, n'ezza kakobe, n'emyufu, era ng'ataddeemu eby'omu bulago ebya zaabu n'amayinja ag'omuwendo omungi ne luulu.

¹⁷ Mu ssaawa emu obugagga obwenkanaawo bwonna buzikiridde!" "Era abo bona abalina emmeeri ez'eby'obusuubuzi awamu n'abagoba baazo, n'abo abazikolamu, baayimirira wala.

¹⁸ Bakaaba nga balaba omukka oguva mu muliro ogumwokya, nga gwambuka, nga bwe bagamba nti, 'Ekibuga ekiri nga kino kirirabika wa nate?'

¹⁹ Ne beeyiyira enfuufu ku mitwe gyabwe nga banakuwadde era nga bakaaba nga boogera nti, "Zikisanze, Zikisanze, ekibuga ekikulu! Kyabagaggawaza bona abaalina ebyombo ku lubalama lw'enyanja olw'obugagga obwakirimu, naye kaakano mu ssaawa emu byonna ebyakirimu bizikiridde.'

²⁰ "Kyokka ggwe eggulu ssanyuka olw'okubonerezebwu kwe, nammwe abatukuvu ne bannabbi n'abatume musanyuke. Kubanga Katonda amusalidde omusango ku lwammwe."

²¹ Awo malayika omu ow'amaanyi n'asitula ejjinja eddene eriri ng'olubengo n'alisuula mu nnyanja nga bw'ayogera mu ddoboозi ery'omwanguka nti, "Bwe kityo Babulooni, ekibuga ekikulu bwe kirisuulibwa wansi n'amaanyi, era tekiriddayo kulabika nate emirembe gyonna.

²² Mu ggwe temuliwulirwa nate ddoboozi lya bayimbi, n'abakubi b'ennanga n'ery'abafuuyi b'endere, n'ery'abafuuyi b'enjombe. Mu ggwe temulisangibwamu muweesi wadde okuweesa okw'engeri yonna, newaakubadde okuvuga kw'olubengo nga basa tekuliwulirwa mu ggwe.

²³ Ekitangaala ky'ettabaaza ng'eyaka tekirirabikira mu ggwe nate, kubanga abasuubuzi be wasuubulanga nabo baamanyika nnyo mu nsi yonna, era walimbalimba amawanga gonna n'eby'obulogo bwo.

²⁴ Era mu Babulooni mwasangibwamu omusaayi gw'abatukuvu n'ogwa bannabbi, n'abo bona abattibwa ku nsi."

Okubikkulirwa 19

Aleruuya

¹ Oluvannyuma lw'ebyo ne mpulira oluyoogaano lw'abantu abangi mu ggulu nga bagamba nti, "Aleruuya! Obulokozi n'ekitiibwa n'amaanyi bya Katonda waffe.

² Kubanga ensala ye ey'emisango ya mazima era ya butuukirivu. Yabonereza malaaya omukulu eyayonoona ensi n'obwenzi bwe. Era yawoolera eggwanga ku mwenzi oyo olw'omusaayi gw'abaweereza be."

³ Ate ne boogera ogwokubiri mu ddoboozi ery'omwanguka nti, "Aleruuya! Omukka ogw'okwokeswa kwe n'omuliro, gunyooka emirembe n'emirembe!"

⁴ Awo ebiramku ebina n'abakadde amakumi abiri mu abana ne basinza Katonda eyali atudde ku ntebe ey'obwakabaka, nga bagamba nti, "Amiina. Aleruuya."

⁵ Awo eddoboozi ne liva mu ntebe ey'obwakabaka nga ligamba nti: "Mumutendereze Katonda waffe, mmwe abaddu be mwenna abamutya abeekitiibwa n'abatali baakitiibwa."

⁶ Ate ne mpulira oluyoogaano lw'abantu abangi olwawulikika ng'amayengo ag'ennyanya ennene, oba ng'eddoboozi ery'okubwatuka, ne boogera nti, "Aleruuya, kubanga Mukama Katonda waffe Ayinzabyonna y'afuga.

⁷ Ka tusanyuke, tujaguze, era tumugulumize, kubanga ekiseera kituuse eky'embaga ey'obugole ey'Omwanayi gw'Endiga, era n'omugole we yeeteeseteese.

⁸ Omugole n'ayambazibwa olugoye olwa linena omulungi ennyo, olunekaaneka era olusingayo okutukula."

(Linena omulungi ennyo by'ebikolwa eby'obutuukirivu eby'abatukuvu.)

⁹ Malayika n'aŋŋamba nti, "Wandiika nti balina omukisa abo abayitiddwa ku kijjulo ky'embaga ey'obugole ey'Omwanayi gw'Endiga." N'ayongerako na kino nti, "Katonda yennyini ye yakayogera."

10 Ne ndyoka ngwa wansi ku bigere bye okumusinza naye ye n'ajjamba nti, "Tokikola! Kubanga nange ndi muddu wa Katonda nga ggwe era ng'abooluganda abalala abanywerera ku ebyo Yesu bye yatumanyisa! Ssinza Katonda. Okutegeesa kwa Yesu gwe mwoyo gw'obunnabbi."

Eyeebagadde Embalaasi Enjeru

11 Ne ndaba eggulu nga libikkuse era laba embalaasi enjeru ng'agyebagadde ayitibwa Omwesigwa era Ow'amazima, asala omusango mu butuukirivu era mulwanyi wa kitalo mu ntalo.

12 Amaaso ge gaali ng'olulimi lw'omuliro ogwaka, era nga yeetikkidde engule nnyingi ku mutwe gwe, ng'alina erinnya eriwandiikiddwa, kyokka ye yekka nga y'alimanyi.

13 Yali ayambadde ekyambalo ekyali kinnyikiddwa mu musaayi era ng'erinnya lye ye Kigambo wa Katonda.

14 Ab'eggye ery'omu ggulu abaali bambadde engoye eza linena omulungi ennyo enjeru, nabo ne bamugoberera nga beebagadde embalaasi enjeru.

15 Mu kamwa ke mwavaamu ekitala eky'obwogi eky'okutemesa amawanga. "Alibafuga n'omuggo ogw'ekyuma." Alirinnya ku ssogolero ly'omwenge ogw'obusungu bwe, kye kiruyi kya Katonda Ayinzabyonna.

16 Ku kyambalo kye ne ku kisambi kye kwali kuwandiikiddwako nti: "Kabaka wa Bakabaka era Mukama wa bakama."

17 Awo ne ndaba malayika omu ng'ayimiridde mu njuba ng'ayogera mu ddoboozi ery'omwanguka ng'agamba ebinyonyi nti, "Mujje mukunjaane ku kijulo kya Katonda omukulu,

18 mulye ennyama y'emirambo gya bakabaka, abakulu b'amaggye n'abasajja ab'amaanyi, n'egy'embalaasi n'egy'abo abazeebagala, era n'egy'abantu bona abaddu n'ab'eddembe, abeekitiibwa n'abatali baakitiibwa."

19 Awo ne ndyoka ndaba ekisolo n'abafuzi ab'omu nsi n'amaggye gaabwe nga bakuunjaanye balwanyise oyo eyali yeebagadde embalaasi, awamu n'eggye lye.

20 Ekisolo ne kiwambibwa awamu ne nnabbi ow'obulimba eyakolanga ebyamagero ng'ekisolo kiraba; bye yakola ng'alimbalimba abo abakkiriza akabonero k'ekisolo era abasinza ekifaananyi kyakyo. Awo ekisolo ne nnabbi ow'obulimba ne basuulibwa nga balamu, mu nnyanja ey'omuliro eyaka ne salufa.

21 Abaasigalawo ne battibwa n'obwogi bw'ekitala ekyava mu kamwa k'oyo eyeebagadde embalaasi. Ennyonyi zonna ez'omu bbanga ne zirya ne zekkutira emirambo gyabwe.

Okubikkulirwa 20

Emyaka Olukumi

¹ Awo ne ndaba malayika ng'akka okuva mu ggulu ng'alina ekisumuluzo eky'obunnya obutakoma era ng'alina olujegere oluzito mu mukono gwe.

² N'akwata ogusota guli ogw'edda, ye Setaani, n'agusiba mu lujege gumale emyaka lukumi,

³ n'agusuula mu bunnya obutakoma era n'agusibiramu n'ateekako n'envumbo guleme kulimbalimba mawanga nate okutuusa ng'emyaka olukumi giweddeko. Bwe giriggwaako, Setaani ng'asumululwa okumala akaseera katono.

⁴ Awo ne ndaba entebe ez'obwakabaka nga zituuliddwako abaaweebwa obuyinza okusala emisango. Ne ndaba emyoyo gy'abo abaatemebwako emitwe olw'okunywerera ku Yesu ne ku kigambo kya Katonda, era abataasinza kisolo ekikambwe wadde ekifaananyi kyakyo era abatakkiriza kabonero kaakyo mu byenyi byabwe oba ku mikono gyabwe. Abantu abo ne balamuka era ne bafugira wamu ne Kristo okumala emyaka lukumi.

⁵ Naye abafu abalala tebaazuukira okutuusa ng'emyaka olukumi giweddeko. Kuno kwe kuzuukira okusooka.

⁶ Balina omukisa era batukuvu abalizuukirira mu kuzuukira okusooka. Kubanga okufa okwokubiri tekuliba na maanyi ku bo, balibeera bakabona ba Katonda ne Kristo era balifugira wamu ne Kristo okumala emyaka ego olukumi.

Setaani Azikirizibwa

⁷ Awo emyaka olukumi bwe giriggwaako, Setaani aliteebwa okuva mu kkomera lye.

⁸ Alifuluma okulimalimba Googi ne Magoogi, ge mawanga ag'omu nsonda ennya ez'ensi, era alikunjaanya abantu ne baba egghe ery'okulwana eritasoboka na kubalika nga liri ng'omusenyu ogw'oku lubalama lw'ennyanja.

⁹ Ne bambuka basale olusenyi olunene olw'ensi balyoke bazingize abatukuvu okuva ku buli luuyi lw'ekibuga ekyagalwa. Kyokka omuliro ne guva mu ggulu ne gubookya era ne gubamalawo.

¹⁰ Awo Setaani eyabalimalimba n'asuulibwa mu nnyanja ey'omuliro eyaka ne salufa, omuli ekisolo ne nnabbi ow'obulimba era banaabonyaabonyezebwanga emisana n'ekiro emirembe n'emirembe.

Abafu Balamulwa

¹¹ Awo ne ndaba entebe ey'obwakabaka enjeru n'Oyo eyali agituddeko. Ensi n'ebbanga ne bidduka okuva mu maaso ge, naye nga tewali we biyinza kwekweka.

¹²Ne ndaba abafu abeekitiibwa n'abatali baakitiibwa nga bayimiridde mu maaso g'entebe ey'obwakabaka. Ebitabo ne bibikkulwa, n'ekitabo ekirala ky'ekitabo eky'obulamu ne kibikkulwa. Abafu ne basalirwa omusango okusinziira ku ebyo ebyali biwandiikiddwa mu bitabo ebyo, buli omu ng'ebikolwa bye bwe byali.

¹³Ennyanja zonna ne ziwaayo abafu abaali mu zo, n'okufa n'Amagombe nabyo ne biwaayo abafu abaabirimu. Buli omu n'asalirwa omusango, ng'ebikolwa bye bwe byali.

¹⁴Okufa n'Amagombe ne bisuulibwa mu nnyanja ey'omuliro, kuno kwe kufa okwokubiri.

¹⁵Era buli eyasangibwa ng'erinnya lye teriwandiikiddwa mu kitabo eky'obulamu, n'asuulibwa mu nnyanja ey'omuliro.

Okubikkulirwa 21

Yerusaalemi Ekiggya

¹Awo ne ndaba eggulu eriggya n'ensi empya. Eggulu eryasooka n'ensi eyasooka byali biwedde wo nga n'enyanja tekyaliwo.

²Ne ndaba ekibuga ekitukuvu Yerusaalemi ekiggya nga kikka okuva ewa Katonda mu ggulu, nga kiri ng'omugole bw'abeera ku mbaga ey'obugole bwe, ng'ayonjereddwa bbaawe.

³Ne mpulira eddoboozi ery'omwanguka nga lyogera okuva mu ntebe ey'obwakabaka nti, "Laba eyeekaalu ya Katonda kaakano eri mu bantu, anaabeeranga nabo era banaabeeranga bantu be, Katonda yennyini anaaberanga nabo, era anaabeeranga Katonda waabwe.

⁴Alisangula amaziga mu maaso gaabwe, olwo nga tewakyali kufa, wadde ennaku, wadde okukaaba, wadde okulumwa kubanga byonna ebyasooka nga biwedde wo."

⁵Oyo eyali atudde ku ntebe ey'obwakabaka n'agamba nti, "Laba, ebintu byonna mbizzizza buggyga." Era n'anjjamba nti, "Wandiika bino, kubanga bigambo bya bwesigwa era bya mazima!"

⁶N'anjjamba nti, "Bituukiridde, Nze Alufa era nze Omega, Entandikwa era Enkomerero. Buli alumwa ennyonta ndimuwa okunywa ku nsulo ez'amazzi amalamu, ag'obuwa.

⁷Buli awangula alifuna ebyo byonna ng'omugabo, era nze nnaaberanga Katonda we, naye anaabanga mwana wange.

⁸Naye abo ababi n'abatakkiriza n'abagwagwa, n'abassi, n'abenzi, n'abalogo n'abasinza ebifaananyi, n'abalimba bona, omugabo gwabwe kuliba

kuzikirizibwa mu nnyanja ey'omuliro ogwaka ne salufa. Okwo kwe kufa okwokubiri."

⁹ Awo omu ku bamalayika omusantu abaali bamaze okuyiwa ebibya ebyalimu ebibonoobono omusantu eby'enkomerero n'ajja n'anjamba nti, "Jjangu nkulage omugole w'Omwana gw'Endiga."

¹⁰ N'antwala ku ntikko y'olusozi olunene era oluwanvu mu kwolesebwa; n'andaga ekibuga Yerusaalemi ekitukuvu nga kikka okuva mu ggulu ewa Katonda,

¹¹ nga kyonna kijjudde ekitiibwa kya Katonda era nga kimasamasa ng'ejjinja ery'omuwendo omungi, erya yasepi, eritangalija.

¹² Bbugwe waakyo yali mugazi era nga mugulumivu, ng'aliko emiryango kkumi n'ebiri era nga gikuumibwa bamalayika kkumi na babiri, n'amannya g'ebika ekkumi n'ebibiri ebya Isirayiri nga gawandiikibba ku miryango egyo.

¹³ Ku luuyi olw'ebuvanjuba kwaliko emiryango esatu, ne ku luuyi olw'obukiakkono nga kuliko emiryango esatu, ne ku luuyi olw'obukiikkaddyo nga kuliko emiryango esatu, era ne ku luuyi olw'obugwanjuba nga kuliko emiryango esatu.

¹⁴ Bbugwe yaliko amayinja ag'omusingi kkumi n'abiri ag'abatume b'Omwana gw'Endiga.

¹⁵ Malayika eyali ayogera nange yali akutte mu mukono gwe omuggo ogwa zaabu ogupimisibwa, apime ekibuga, emiryango gyakyo era ne bbugwe waakyo.

¹⁶ Ekibuga kyali kyenganankana enjuuyi zonna, n'obuwantu nabwo nga bwenkana n'obugazi awamu n'obukiika. Byonna byali bipima kilomita enkumi bbiri mu ebikumi bina, buli kimu nga kyenganankana ne kinnaakyo.

¹⁷ Ate n'apima ne bbugwe waakyo ne kiweza mita nkaaga mu mukaaga ng'ekipimo ky'omuntu bwe kiri ng'apimye, awamu n'eky'abamalayika.

¹⁸ Bbugwe waakyo yali azimbiddwa n'amayinja agayesipi nga n'ekibuga kya zaabu omulongoose nga kitangalija ng'endabirwamu ennungi.

¹⁹ Emisingi nya bbugwe w'ekibuga nga giyooyooteddwa n'amayinja ag'omuwendo omungi ennyo aga buli ngeri. Omusingi ogusooka gwayoooyotebwa n'amayinja aga yasepi, ogwokubiri aga safiro, ogwokusatu aga kalukedoni, ogwokuna aga nnawandagala,

²⁰ ogwokutaano aga sadonukisi, ogw'omukaaga sadiyo, ogw'omusantu aga kerusoliso, ogw'omunaana aga berulo, ogw'omwenda aga topazi, ogw'ekkumi aga kerusoperaso, ogw'ekkumi n'ogumu aga kuwakinso, n'ogw'ekkumi n'ebiri aga amesusito.

²¹Ate emiryango ekkumi n'ebiri gyakolebwa n'amayinja ag'omuwendo aga luulu ennungi kkumi n'abiri, nga buli mulyango gukoleddwa n'ejinja lya luulu limu. Ate lwo oluguudo olunene olw'ekibuga lwali lwa zaabu ennungi etangalija ng'endabirwamu.

²²Mu kibuga ekkyo saalabamu yeekaalu, Mukama Katonda Ayinzabyonna awamu n'Omwana gw'Endiga, bo ye yeekaalu yaakyo.

²³Era ekibuga ekkyo tekyetaaga njuba wadde omwezi okukyakira, kubanga ekitiibwa kya Katonda kye kikimulisa, era Omwana gw'Endiga ye ttabaaza yaakyo.

²⁴Ekitangaala kyakyo kye kinaamulisanga amawanga ag'omu nsi, era abafuzi ab'omu nsi balijja ne bakireetera ekitiibwa.

²⁵Emiryango gyakyo tegiggalwenga emisana, era yo teriba kiro.

²⁶Kirifuna ekitiibwa n'ettendo eby'amawanga.

²⁷Tewali ekitali kirongoofu ekirikkirizibwa okuyingira mu kyo, wadde abo abatambulira mu mpisa ezitali nnongoofu oba abalimba, wabula abalikibeeramu, beebo bokka, amannya gaabwe agaawandiikibwa mu kitabo eky'obulamu eky'Omwana gw'Endiga.

Okubikkulirwa 22

Omugga ogw'Obulamu

¹Awo malayika n'andaga omugga ogw'amazzi ag'obulamu agamasamasa ng'endabirwamu, nga gukulukuta okuva mu ntebe ey'obwakabaka eya Katonda, n'ey'Omwana gw'Endiga,

²nga gukulukutira wakati mu luguudo olunene. Ku mbalama zombi ez'omugga kwaliko emit egypt'obulamu, gumu ku buli ludda, egibala ebibala ekkumi n'ebibiri era nga buli mwezi kubeerako ebibala eby'engeri endala; n'amakoola gaagwo nga gakozesebwa ng'eddagala okuwonya amawanga.

³Mu kibuga ekkyo tewalibaayo kikolimo nate. Entebe ey'obwakabaka eya Katonda n'ey'Omwana gw'Endiga ziribeera eyo, n'abaddu be balimuweereza,

⁴era banaalabanga amaaso ge, n'erinnya lye liriwandiikibwa mu byenyi byabwe.

⁵Teribaayo kiro, noolwekyo ettabaaza oba enjuba tebiryetaagibwa, kubanga Mukama Katonda y'anaabaakiranga era banaafuganga emirembe n'emirembe.

⁶Awo malayika n'ajnjamba nti, "Ebigambo bino bituufu, bya mazima. Era Katonda w'emyoyo gya bannabbi, atumye malayika we okulaga abaddu be ebyo ebiteekwa okubaawo amangu."

Okujja kwa Yesu

⁷ “Era laba, nzija mangu. Alina omukisa oyo akwata ebigambo by’obunnabbi ebiri mu kitabo kino.”

⁸ Nze Yokaana nalaba era ne mpulira ebintu ebyo. Era bwe nabiraba ne mbiwulira ne ngwa wansi okusinza malayika oyo eyabindaga;

⁹ kyokka ye n’ajnjamba nti, “Tokola kintu ekyo kubanga nange ndi muddu nga ggwe era nga baganda bo bannabbi bwe bali, awamu n’abo bona abakwata ebigambo ebiwandiikiddwa mu kitabo kino. Ssinza Katonda.”

¹⁰ Awo n’ajnjamba nti, “Ebyo by’owandiise eby’obunnabbi tobikuuma nga bya kyama kubanga biri kumpi okutuukirira.

¹¹ Era ekiseera ekyo bwe kirituuka, buli akola ebitali bya butuukirivu alyeyongera okukola ebitali bya butuukirivu, era n’omugwagwa alyeyongera okugwagwawala, kyokka abatuukirivu balyeyongera okuba abatuukirivu, n’abatukuvu balyeyongera okuba abatukuvu.

¹² “Laba, nzija mangu nsasule buli omu ng’ebikolwa bye bwe biri.

¹³ Nze Alufa era nze Omega, Owoolubereberye era Asembayo, Entandikwa era Enkomerero.

¹⁴ “Balina omukisa abo abayoza ebyambalo byabwe, baliweebwa obuyinza okuyingira mu miryango gy’ekibuga ne balya ne ku bibala ebiva ku muti ogw’obulamu.

¹⁵ Ebweru w’ekibuga y’ebeera embwa, n’abalogo, n’abenzi, n’abassi, n’abasinza bakatonda abalala n’abo bona abaagala era abakola eby’obulimba.

¹⁶ “Nze Yesu, ow’omu kikolo era ow’omu lulyo lwa Dawudi, ntumye malayika wange gye muli okubuulira Ekkanisa ebigambo bino. Nze Mmunyeenyeye eyaka ey’Enkya.”

¹⁷ Omwoyo n’Omugole boogera nti, “Jjangu.” Na buli awulira ayogere nti, “Jjangu.” Buli alumwa ennyonta ajje, buli ayagala ajje anywe ku mazzi ag’obulamu ag’obuwa.

¹⁸ Ntegeeza buli omu awulira ebigambo eby’obunnabbi ebiri mu kitabo: Omuntu yenna alibyongerako, Katonda alimwongerako ebibonoobono ebiwandiikiddwa mu kitabo kino.

¹⁹ Era omuntu yenna alikendeeza ku bigambo by’obunnabbi ebiri mu kitabo kino, Mukama alimuggyako omugabo gwe ku muti ogw’obulamu ne mu kibuga ekyo ekitukuvu ekiwandiikiddwako mu kitabo kino.

²⁰ Oyo ayogedde ebintu bino agamba nti, “Weewaawo nzija mangu!” Amiina! Jjangu Mukama waffe Yesu!

²¹ Ekisa kya Mukama waffe Yesu Kristo kibeerenga ne bona. Amiina.

Esclarecimento

Trata-se de iniciativa particular, com os seguintes objetivos: (i) colaborar para divulgação dos diversos textos bíblicos disponíveis, e, (ii) facilitar o acesso a esses textos, inclusive por meio de download.

Todo esforço em tornar a Palavra de Deus acessível a todos, em quaisquer localidades e falantes das mais diversas línguas, precisa ser um objetivo de todos os que são guiados pelo Espírito Santo. Ele inspirou o profeta Jeremias a dizer “não ensinará jamais cada um ao seu próximo, nem cada um ao seu irmão, dizendo: Conhece ao SENHOR, porque todos me conhecerão, desde o menor até ao maior deles, diz o SENHOR” (Jer. 31:34).

Jesus, também, falou assim: “e será pregado este evangelho do reino por todo o mundo, para testemunho a todas as nações” (Mat. 24:14).

Muitas organizações foram constituídas com o propósito de fazer a Bíblia disponível nas diversas línguas. Não é uma tarefa simples. Anos de trabalho, dedicação e entrega são necessários para esta tão extraordinária missão.

O texto deste trabalho está disponível na internet, em páginas eletrônicas de organizações que produzem ou divulgam bíblias, sem acréscimos de notas ou comentários. Assim, reconhecendo e respeitando os direitos que possuem sobre seus trabalhos, incumbe a todos os que amam a Palavra de Deus, o esforço em contribuir para amplificar sua divulgação.

Se possível, faça download do texto, para que sejamos, também, guardiões da Bíblia, e, com isso, preservando-a para as futuras gerações.

Divulga a Palavra de Deus, ela mostra o Caminho e permite a todos, que se conheça Sua vontade, em todos os lugares e épocas.

Marcel da Glória Pereira
2021, Vitória/ES - Brasil